

*image  
not  
available*









# CONCILIA GERMANIÆ,

QUORUM COLLECTIONEM

*CELSISSIMI PRINCIPIS*  
**JOANNIS MAURITII,**

GLOR.<sup>MÆ</sup> MEM. ARCHI-EPISCOPI PRAGENSIS  
SUMPTU,

**CL. JOANN. FRIDERICUS SCHANNAT**  
PRIMUM COEPIT,

**P. JOSEPHUS HARTZHEIM** Soc. JESU P.M.  
CONTINUAVIT, ET PRELO DEDIT.

## TOMUS VIII.

EJUSDEM CELSISSIMI PRINCIPIS MUNIFICENTIA  
*EX HARTZHEMIANIS COLLECTIS*  
EDITUS, AUCTUS, ET NOTIS ILLUSTRATUS

**A P. HERMANNO SCHOLL** EJUSDEM SOCIETATIS.

COMPLECTITUR CONCILIA

AB

ANNO MDLXXXIX. AD MDCX.



**COLONIÆ AUGUSTÆ AGRIPPINENSIIUM,**

TYPO VIDUÆ JOAN. WILHELMI KRAKAMP, ET HÆREDUM  
CHRISTIANI SIMONIS, Bibliopolarum.  
ANNO MDCCLXIX.

CUM PERMISSU SUPERIORUM,





PERPETUÆ. GRATISSIMÆQUE.  
MEMORIÆ.

*REVERENDISSIMI. ET. CELSISSIMI.*  
*DOMINI. DOMINI.*

**J O A N N I S.**  
**M A U R I T I I.**  
**G U S T A V I.**

**DEI. GRATIA. ARCHI-EPIS-**  
**COPI. PRAGENSIS.**

**SEDIS. APOSTOLICÆ. LEGATI. NATI.**

**S. ROMANI. IMPERII. PRINCIPIS.**

**COMITIS. DE. MANDERSCHIED-**  
**BLANCKENHEIM.**  
**ET. GEROLDSTEIN.**

**LIBERI. BARONIS. IN. JUNCKERATH.**  
**DOMINI. IN. BETTINGEN. DAUN. ET. ERP.**

**UTRIUSQUE. SACRÆ. CÆSAREÆ. NEC. NON. GERMANIÆ.**  
**HUNGARIÆ. ET. BOHEMIÆ. REGIÆ. MAJESTATIS.**

**CONSILIARII. INTIMI. ACTUALIS.**

**INCLYTI. REGNI. BOHEMIÆ. PRIMATIS.**  
**ECCLESiarUM. METROPOLITANÆ. COLONIENSIS. ET. CATHEDRALIS.**  
**ARGENTINENSIS. RESPECTIVE.**

**PRÆPOSITI. SENIORIS. ac. THESAURARII.**  
**ILLUSTRI. ECCLESIE. COLLEGIATÆ. AD. S. GEREONEM**  
**PARITER. PRÆPOSITI.**

**NEC. NON. UNIVERSITATUM. COLONIENSIS. ET. CAROLO-**  
**FERDINANDÆ. PRAGENSIS.**

**CANCELLARII. PERPETUI. ET. PROTECTORIS. &c. &c.**

**OPERIS. HUIUS. PRIMI. AUTHORIS. ET. MUNIFI-**  
**CENTISSIMI. ETIAM. POST. FATA.**  
**MÆCENATIS.**

**TOMUM. HUNC. OCTAVUM.**  
**D. D. C.**

*Hermannus Scholl S. J.*

THE UNIVERSITY OF CHICAGO

LIBRARY

1100 EAST 58TH STREET

CHICAGO, ILL. 60637

TEL. 733-4331

1950

1951

1952

1953

1954

1955

1956

1957

1958

1959

1960

1961

1962

1963

1964

1965

1966



# REVERENDI PATRIS HERMANNI SCHOLL

E SOCIETATE JESU SACERDOTIS,

*Qui Tomos Conciliorum Germaniae Vltum, Vltimum, & Vltimum*

**EX HARTZHEMIANIS COLLECTIS**

*edidit, auxit, & Notis illustravit,*

## BREVE ELOGIUM.



Ua P. *Josephus Hartzheim* sex abhinc annis occubuit, eadem extinctus fati ratione videtur P. *Hermannus Scholl*. Ille post Tomi CC. Vti; hic post Villvi hujus partem fere dimidiam typis excusam: ita etus apoplexia ille; hic defectione virium, natoque inde lethargo obrutus: tridui spatio absumptus uterque & calamus & vitam posuit. Coeperat pridie Calendas Majas habere pejusculum P. Hermannus, brevique trium duntaxat dierum intervallo nosocomium tenuit, cum, mediis frustra adhibitis, sacrisque, ingravescente malo, Sacramentis munitus, ipsa, quæ ab Inventione Ss. Crucis nuncupatur, festa luce sub horam IV. matutinam placidissime in Domino exspiravit Vir, siue solidam requiras virtutem, siue vastam scientiam, insigni conjunctam cum prudentia, solertia, diligentiaque spectes, sane egregius.

Primis illum cunis Confluentia anno MDCCVI. exceperat. A parentibus, Adamo Andrea patre, matre Anna Sophia Hirsch, ad omnem morum honestatem a teneris compositus, atque ad sanctum Dei timorem & amorem gnaviter formatus, teneram adeo conscientiam induit, ut in omni deinceps vita a levioribus etiam piaculis quam qui maxime abhorreret. His accessere pia ac solertia Moderatorum subsidia, quibus adolescentem in natalis Urbis Gymnade disciplinæ suæ commissum ita instituerunt, ut non amœnioribus solum Musis ac Philosophicis Studiis darent quam optime imbutum; verum etiam, quod rei caput est, ad majores indidem in via virtutis & solidæ pietatis progressus sedulo pro parte sua proveherent. In utroque autem genere ita excelluit, ut habitus fuerit longe dignissimus, qui nostram in Societatem, quam summis antea votis expetierat, ingenti suo solatio cooptaretur.

Tironem eum se præstitit, qui cum cæteris de pietatis, legumque nostrarum observantiæ non minus, quam de politioris ac Philosophicæ scientiæ, dum pro more literarum studia repetebat, Laurea concertavit. Juventuti Trevoricæ Præceptor datus, integro eam sexennio ad omnem humanitatem & eruditionem tam probe excoluit, ut, quod proprium docentibus nobis officium esse noverat, ad amissum explendum ratus, una cum literis pietatem, timorem Numinis, virtutisque cultum tenellis animis perquam solícite instillaret.

Sacratioribus exinde scientiis se adplicare jussus, nova indies præstantis ingenii & profectus specimina dabat: quibus commoti Superiores ad varia ipsum Societatis munia, emissa quatuor votorum professione, destinarunt. Multis Oratorem Academicum annis Trevirorum in palæstra egit; multis in Ubiorum. Ibi strenuam in promovendis ad prelum sex Tomis *Hunoldianis* operam collocavit, additis, quæ postremo in Tomo desiderabantur, varii argumenti dictionibus; in quibus tam quidem dextere stilum operi attemperavit reliquo, ut ab Hunoldio ipso alium non spirarent, operosumque esset, Schollii lucubrationes a nisu celeberrimi in Germania nostra Authoris & calamo fecer-

*Breve Elog. R. P. Herm. Scholl Tom. VIII.*

††

nere.






nere. Hic Coloniae ad sermones Academicos provinciam Ignatianae Asceseos tum triduo, quod ferias Paschales, ad Gymnasii Tricoronati Alumnos; tum, quod Pentecosten antecedit, octiduo ad Dominos utriusque fori literatos ob-  
eunda sat difficilem longa annorum serie adjunxit, Mariani etiam Sodalitatis ma-  
joris Praeses: quam avide semper ubivis, tam quoque, uti vix dubitare licet,  
auditus utiliter; quippe qui sermonis Latini, quo cultissimo, ornatissimoque  
utebatur, elegantia facile alliceret omnes, & rationum e Sacris Paginis, ac Ss.  
Patrum monumentis conquisitarum pondere superaret. Mirandum profecto  
fuit, hominem gracili corpusculo, quotidianis & illis peracutis capitis dolori-  
bus, somnum non raro impediens, cruciatum in tam diversa intendere  
animum potuisse, quin succumberet. Mirandum id ipsum magis, quod ner-  
vos adhiberet omnes, ubi vel de sua vel de proximi salute rem agi cognosceret.  
Avulsus a semetipso dixisses, cum meditationi matutinae de genibus vacabat,  
aut Christum adorabat Eucharisticum. Fuit, qui reducis aliquando ex aula  
Gymnasii, ubi de inferni cruciatibus differuerat, inflammata sacris ignibus  
faciem, genasque multa lacryma perfusas observaret.

Scientiarum genus propemodum omne in Patre Hermanno non ita resplen-  
duit, quam, volente temperantia, & exiliter de se ac parce existimandi sobrie-  
tate, latuit. Ut de Historice, Grammatica, Poësi, Rhetorica, Philosophia,  
Theologia Dogmatica aequae ac Morali nihil dicam, erat in Geographia, Chro-  
nologia, Historia Ecclesiastica & Diplomatica apprime versatus. Norunt dun-  
taxat ii, qui lucis in dubiis suis, subsidiive petendi causa ipsum adibant, vel  
promentem modeste suam de libris, quorum singularem prorsus notitiam sibi  
paraverat, crisin auscultabant. Unica illa, quam pro Digressionem ad Saeculum  
XV. sub finem Tomi Vti adnexuit, de S. R. E. Conciliis Dissertatio, quantus  
Theologus, quantus Historicus fuerit, Orbi erudito pandit.


Prudentiam, sine qua vastae licet scientiae parum aut nihil habuerunt un-  
quam apud aequos rerum aestimatores ponderis, suspiciebant in illo & Exteri  
& Domestici. Hos, Ministri fungens munere, mira pietate, suavitate, cura ac  
solicitudine sive valentes, sive aegros juvabat: illos doctissimo literarum com-  
mercio, & delatis, ubicunque erat opus, praestitisque obsequiis sibi reddebat  
addictissimos. Misit epistolas humanitatis plenissimas in Bohemiam, Poloniam,  
Saxoniam, Belgium, Trevirensis in patriam ac Leodiensem, aliasque per Or-  
bis plagas, ut, qui Collectioni Conciliorum auxiliatricem porrigerent manum,  
e DD. etiam Protestantibus viros animaret. Nil loquebatur, nisi quod tacitus  
ante secum, quam ad linguam deferretur, ad limam revocasset. Moderate age-  
bat ipse & convenienter fini omnia: si quid secus fieri in alio fors notaret; vel  
dissimulabat prudentum ex more, vel amice adeo comiterque censebat, ut asper  
aut molestus nullo modo videretur, blandus erga omnes, erga Sacerdotes re-  
verentissimus.

Porro quam fuerit laborum amans & tenax, inde conjicias, quod praeter  
editum Treviris elegantem de animae pretio libellum, relictamque hic Coloniae  
opulentam Orationum, Meditationum, & Considerationum latinarum supel-  
lectilem typo dignissimam, tribus omnino Tomis Conciliorum Collectionem  
auxit, illustravitque. Audivi eundem supremo ante mortem triduo de eodem  
Collectionis opere mecum agentem, sibi que spem, sine istud optato coronandi  
facientem: ita ut laboribus, curisque immortalis merito videatur. Rapuit  
hunc nobis virum mors V. Non. Maj. anno aetatis LXIII., Aerae Christianae  
MDCCLXVIII. sed desiderium Viri tam docti, tam prudentis, tam in-  
dustrii nobis, mihi imprimis ejus Successori  
nunquam rapiet.





# FACULTAS REV. P. PROVINCIALIS CUM PRIVILEGIO CÆSAREO.



Um Vidua JOANNIS WILHELMI KRACKAMP, & Hæredes  
CHRISTIANI SIMONIS, Bibliopolæ Colonienses, typis  
vulgare desiderant Tomum Octavum **CONCILIO-  
RUM GERMANIÆ**, ex *Hartzheimianis Collectis*  
a P. Hermanno Scholl, Soc. nostræ Sacerdote,  
*editum, auctum, & Notis illustratum*; Ego infra scriptus, ejusdem  
Societatis in Provincia Rheni Inferioris Præpositus Provincialis, potestate ad  
id mihi facta ab Adm. R. P. N. LAURENTIO RICCI, Universæ Societatis  
JESU Præposito Generali, iisdem ad primam hanc duntaxat prædicti Tomi  
editionem facultatem impertio; simulque communico Jus Privilegii Cæsarei,  
quo Bibliopolis ac Typographis interdicitur, ne quis Librum ullum a So-  
cietatis nostræ Patribus conscriptum, citra consensum Superiorum recudere,  
aut alibi recusum, intra fines S. R. Imperii inferre præsumat. In cujus rei  
fidem has iis manu propria subscriptas, ac consueto officii mei Sigillo muni-  
tas, dedi. Coloniz 22. Martii 1769.



HIERONYMUS DE WYMAR, Soc. JESU  
ad Rhenum Inferiorem p. t.  
Præpositus Provincialis m. pp.




DIGRESSIO AD SÆCULUM XVI.

CAPUT I. De Secta Hussitarum.	Pag. XV
§. I. Origo Sectæ.	
§. II. Hussi, Hussitarumque errores.	{ ibid.
§. III. Hussi; & Hieronymi Pragensis damnatio.	
CAPUT II. De Lutheranism.	XVI
§. I. Lutheri ortus, ingenium, mores.	ibid.
§. II. Initia Lutheranismi.	XVII
§. III. Lutheri dogmata.	
§. IV. Lutheri progenierantis tale systema, ac nutrientis scopus.	{ ibid.
§. V. Sectatores Lutheri præcipui.	XVIII
§. VI. Comitia, in causa Lutheri & ejus Sectatorum ab anno 1521. ad 1546. celebrata.	XXI
§. VII. Discussa & pertractata in causa Religionis post Lutheri obitum ad finem Sæculi XVI.	XXXI



van. 202. 281. 282. 283. 284. 285. 286. 287. 288. 289. 290. 291. 292. 293. 294. 295. 296. 297. 298. 299. 300. 301. 302. 303. 304. 305. 306. 307. 308. 309. 310. 311. 312. 313. 314. 315. 316. 317. 318. 319. 320. 321. 322. 323. 324. 325. 326. 327. 328. 329. 330. 331. 332. 333. 334. 335. 336. 337. 338. 339. 340. 341. 342. 343. 344. 345. 346. 347. 348. 349. 350. 351. 352. 353. 354. 355. 356. 357. 358. 359. 360. 361. 362. 363. 364. 365. 366. 367. 368. 369. 370. 371. 372. 373. 374. 375. 376. 377. 378. 379. 380. 381. 382. 383. 384. 385. 386. 387. 388. 389. 390. 391. 392. 393. 394. 395. 396. 397. 398. 399. 400. 401. 402. 403. 404. 405. 406. 407. 408. 409. 410. 411. 412. 413. 414. 415. 416. 417. 418. 419. 420. 421. 422. 423. 424. 425. 426. 427. 428. 429. 430. 431. 432. 433. 434. 435. 436. 437. 438. 439. 440. 441. 442. 443. 444. 445. 446. 447. 448. 449. 450. 451. 452. 453. 454. 455. 456. 457. 458. 459. 460. 461. 462. 463. 464. 465. 466. 467. 468. 469. 470. 471. 472. 473. 474. 475. 476. 477. 478. 479. 480. 481. 482. 483. 484. 485. 486. 487. 488. 489. 490. 491. 492. 493. 494. 495. 496. 497. 498. 499. 500. 501. 502. 503. 504. 505. 506. 507. 508. 509. 510. 511. 512. 513. 514. 515. 516. 517. 518. 519. 520. 521. 522. 523. 524. 525. 526. 527. 528. 529. 530. 531. 532. 533. 534. 535. 536. 537. 538. 539. 540. 541. 542. 543. 544. 545. 546. 547. 548. 549. 550. 551. 552. 553. 554. 555. 556. 557. 558. 559. 560. 561. 562. 563. 564. 565. 566. 567. 568. 569. 570. 571. 572. 573. 574. 575. 576. 577. 578. 579. 580. 581. 582. 583. 584. 585. 586. 587. 588. 589. 590. 591. 592. 593. 594. 595. 596. 597. 598. 599. 600. 601. 602. 603. 604. 605. 606. 607. 608. 609. 610. 611. 612. 613. 614. 615. 616. 617. 618. 619. 620. 621. 622. 623. 624. 625. 626. 627. 628. 629. 630. 631. 632. 633. 634. 635. 636. 637. 638. 639. 640. 641. 642. 643. 644. 645. 646. 647. 648. 649. 650. 651. 652. 653. 654. 655. 656. 657. 658. 659. 660. 661. 662. 663. 664. 665. 666. 667. 668. 669. 670. 671. 672. 673. 674. 675. 676. 677. 678. 679. 680. 681. 682. 683. 684. 685. 686. 687. 688. 689. 690. 691. 692. 693. 694. 695. 696. 697. 698. 699. 700. 701. 702. 703. 704. 705. 706. 707. 708. 709. 710. 711. 712. 713. 714. 715. 716. 717. 718. 719. 720. 721. 722. 723. 724. 725. 726. 727. 728. 729. 730. 731. 732. 733. 734. 735. 736. 737. 738. 739. 740. 741. 742. 743. 744. 745. 746. 747. 748. 749. 750. 751. 752. 753. 754. 755. 756. 757. 758. 759. 760. 761. 762. 763. 764. 765. 766. 767. 768. 769. 770. 771. 772. 773. 774. 775. 776. 777. 778. 779. 780. 781. 782. 783. 784. 785. 786. 787. 788. 789. 790. 791. 792. 793. 794. 795. 796. 797. 798. 799. 800. 801. 802. 803. 804. 805. 806. 807. 808. 809. 810. 811. 812. 813. 814. 815. 816. 817. 818. 819. 820. 821. 822. 823. 824. 825. 826. 827. 828. 829. 830. 831. 832. 833. 834. 835. 836. 837. 838. 839. 840. 841. 842. 843. 844. 845. 846. 847. 848. 849. 850. 851. 852. 853. 854. 855. 856. 857. 858. 859. 860. 861. 862. 863. 864. 865. 866. 867. 868. 869. 870. 871. 872. 873. 874. 875. 876. 877. 878. 879. 880. 881. 882. 883. 884. 885. 886. 887. 888. 889. 890. 891. 892. 893. 894. 895. 896. 897. 898. 899. 900. 901. 902. 903. 904. 905. 906. 907. 908. 909. 910. 911. 912. 913. 914. 915. 916. 917. 918. 919. 920. 921. 922. 923. 924. 925. 926. 927. 928. 929. 930. 931. 932. 933. 934. 935. 936. 937. 938. 939. 940. 941. 942. 943. 944. 945. 946. 947. 948. 949. 950. 951. 952. 953. 954. 955. 956. 957. 958. 959. 960. 961. 962. 963. 964. 965. 966. 967. 968. 969. 970. 971. 972. 973. 974. 975. 976. 977. 978. 979. 980. 981. 982. 983. 984. 985. 986. 987. 988. 989. 990. 991. 992. 993. 994. 995. 996. 997. 998. 999. 1000.



# INDEX CHRONOLOGICUS

## TOMI VIII.

CONCILIORUM GERMANIÆ ET EPISTOLARUM &c. AD CONCILIA PERTINENTIUM.

SÆCULO XVI.  
AB ANNO MDLXXXIX. AD ANNUM MDCX.  
SÆCULO XVII.

<i>Annus Christi</i>		<i>Pagina</i>
1570.	<b>S</b> YNODUS ATREBATENSIS, sub FRANCISCO RICHARDOTO, Episcopo Atrebatensi. Statuta Synodalia Dicecesis Atrebatensis. <i>Statuta Prædecessorum</i> Appendix variarum Synodorum Atrebatensium.	225 <i>ibid.</i> 241 307
1570.	SYNODUS LEOVARDIENSIS, sub CUNERO PETRI A BROUWERSHAVEN, Leovardiensis Dicecesis I. Episcopo. Statuta primæ Synodi Leovardiensis. Præfatio.	314 <i>ibid.</i>
1571.	BISUNTINA Synodus PROVINCIALIS, sub CLAUDIO A BAUMA, Bisuntino Archi-Episcopo. Catechismus, qui pro Indice servire poterit Statutorum Bisuntinæ Synodi. Statuta Synodalia Bisuntinæ Dicecesis. <i>Monitum Editoris, ne nimium Institutionibus, quæ Synodalibus his Statutis adjectæ sunt, tribuatur.</i>	I 6 9 95
1585.	SYNODUS COLONIENSIS, sub ERNESTO, DUCE BAVARIÆ, Archi-Episcopo Coloniensi, Episcopo Leodiensi, Frisingensi & Hildefiensi, Præsidente JOANNE FRANCISCO BONHOMIO, Episcopo & Comite Vercellensi, cum potestate Legati a latere. Literæ GREGORII XIII. Papæ ad Revmum JOANNEM FRANCISC. Episc. Vercellensem, Nuntium Apostolicum. Articuli Gravaminum. Oratio ad finem Synodi habenda.	498 <i>ibid.</i> 508 515
1591.	SYNODUS Dicecesana OLOMUCENSIS, sub STANISLAO PAWLOWSKY, Episcopo Olomucensi. Literæ Indictionis & Convocationis Synodi. Allocutio Reverendissimi ad Clerum. Oratio habita de laudibus Conc. Trid. ab A. R. Domino <i>Melchiore Pirnesio</i> (a Pirn,) Art. & Phil. Doct. Eccles. Olom. Dec. Oratio Sess. 2. die XIII. Nov. habita a P. <i>Leonardo Rubeno</i> , Soc. JESU Theologo, & Seminarii Olomuc. Regente, de officio Pastoris & dignitate Sacerdotali.	320 <i>ibid.</i> 322 324 332
<i>Index Chronol. Tom. VIII. Conc. Germ.</i>		<i>Ora.</i>



	Oratio Seff. 3. die XIV. Nov. habita de disciplina Ecclesiastica a R. D. Theodoro Engels LL. Licentiato, Archi-Diacono, & Curia Episc. Olomuc. Officiali.	346
	Peroratio Illustrissimi Principis.	359
	<i>Mentio Synodi Diœcesanæ Olomucensis, Anno Christi MDLXVIII. celebratæ sub Revmo GUILIELMO PRUSSINOUSKY de WICZKOVA, Olom. Ecclesiæ Episcopo.</i>	362
1592.	Synodus Diœcesana WRATISLAVIENSIS, Præsidente Illmo & Revmo Principe ac Domino, D. ANDREA JERINO, Episcopo Wratislaviensi, Coronæ Regni Bohemiæ Principe Ligio, Superioris & Inferioris Silesiæ Capitaneo Supremo, Wratislaviæ celebrata.	367
	Præfatio, primæ Synodi hujus editioni præmissa.	ibid.
	Epistola Illmi Cardinalis MATTHÆI ad Revmum D. Episcopum Wratislaviensem de Synodi approbatione.	368
	Ordo & processus Synodi.	369
	Ejus Constitutiones.	378
1593.	Synodus TRIDENTINA Diœcesana, sub LUDOVICO MADRUCIO, S. R. E. Cardinali Presbytero, & Episcopo Tridentino.	402
	Illmi & Revmi Cardinalis declaratio circa normam constituendi census, sive affectus.	440
	Forma constituendi Census in Episcopatu Tridentino.	442
	Gravamina proposita per Mag. D. D. Cons. Civitatis adversus novam formam constituendi Census.	447
	Decreta, sive Responsiones ad singula Capita Gravaminum propositorum per Mag. DD. Cons.	452
	Constitutio nova super dissolutione Census.	456
	Contractus ad Caput Salvum.	457
1598.	Synodus VIRDUNENSIS, celebrata per ILLUSTRISSIMUM & REVERENDISSIMUM PRINCIPEM, ERRICUM A LOTHARINGIA, Episcopum, & Comitem Virdunensem. ( <i>Digna lectu, quam Editor subjunxit, de Errico &amp; Carolo, Nepote Errici ac Successore Notatio.</i> )	458
1598.	Synodus Diœcesana COLONIENSIS, sub ERNESTO, BAVARIÆ DUCE, Archi-Episcopo.	517
	NOTATIO EDITORIS de causa intermissarum Colonia ab anno 1551. usque ad annum 1598. Synodorum.	522
1600.	Synodus TORNACENSIS, sub MICHAELE DESNE, Tornacensi Episcopo.	474
	Statuta hujus Synodi Diœcesanæ.	ibid.

\* \* \*

## SÆCULO XVII.

1603.	Synodus BRIXINENSIS, sub CHRISTOPHORO ANDREA DE SPAUR, Brixinensi Episcopo.	537
	Litteræ CLEMENTIS VIII. PP. ad CHRISTOPHORUM ANDREAM, Episcopum & Clerum Brixinensem.	ibid.
	Ejus Synodi Constitutiones.	539
1604.	Synodus Diœcesana CAMERACENSIS, per Illmum & Revmum Dominum D. GUILIELMUM DE BERGES, Archi-Episcopum & Ducem Cameracensem, S. R. I. Principem celebrata.	582
	Oratio habita ab Illmo & Revmo Domino D. ARCHI-EPISCOPO, in apertione Synodi.	ibid.
	Ejus Synodi Decreta.	588

1604.



1604. Synodus NAMURCENSIS, celebrata Præsidente Revmo in Christo Patre & Domino, D. FRANCISCO BUISSERET, Episcopo Namurcensi. 602  
 Oratio, ab eodem Reverendissimo prima die habita. 603  
 Decreta Synodi Namurcensis Diœcesanæ. 608
1605. Decreta & Constitutiones Synodales JOANNIS V. FLUGII AB ASPERMONT, Curienſis Episcopi, pro Vicariis foraneis, Decanis, Camerariis, aliisque Sacerdotibus. 635
1605. Synodus Diœcesana CULMENSIS, sub LAURENTIO GEMBICKI, Culmenſi & Pomeſaniæ Episcopo. 655  
 Literæ Indiſtionis Synodi. *ibid.*  
 Sermo Reverendissimi Domini Episcopi. 656  
 Constitutiones, in Synodo communi omnium ſententia comprobatæ. 659
1605. Synodus Archi-Diœcesana PRAGENSIS, habita ab Illmo & Rmo Domino, D. SBIGNEO BERKA, Pragenſi Archi-Episcopo, Principe, Legato Nato &c. 670  
 • Literæ CLEMENTIS VIII. Papæ ad SBIGNEUM, Archi-Episcopum Pragenſem. *ibid.*  
 Statuta hujus Synodi Archi-Diœcesanæ Pragenſis. 673
1607. Statutum Synodale ERNESTI, Archi-Episcopi Colonienſis, de Investitione & Professione utriusque ſexus Regularium, anno 1605. editum, 1607. confirmatum. 764
1607. MECHLINIENSIS Synodus PROVINCIALIS, Præsidente Revmo & Illmo in Christo Patre ac Domino, D. MATTHIA HOVIO, Archi-Episcopo Mechlinienſi, præſentibusque omnibus Episcopis Comprovincialibus habita. 767  
 Convocatio Concilii Provincialis Mechlinienſis. *ibid.*  
 Oratio exhortatoria, habita per Revmum & Illmum D. ARCHI-EPISCOPUM Mechlinienſem, ad univerſum Clerum in Concilio Provinciali jam congregatum. 769  
 Decreta & Statuta Synodi. 774  
 Testimonium Illmi & Revmi D. Cardinalis PAMPHILII ſuper facta recognitione Concilii Provincialis Mechlinienſis ab Illmis & Rmis DD. DD. Cardinalibus, Interpretibus Sacri Concilii Tridentini. 797  
 Breve Ss. D. N. PAULI Pp. V. ſuper Confirmatione Concilii Provincialis Mechlinienſis. *ibid.*  
 Aliud Testimonium examinati Concilii, ab Illmo & Rmo Domino, D. Cardinali PAMPHILIO, directum Rmo & Illmo Domino Archi-Episcopo Mechlinienſi. *ibid.*  
 Secundæ Literæ prænominati Illmi Cardinalis ad dictum Rmum Archi-Episcopum. 798
1609. Synodus Diœcesana YPRENSIS, sub CAROLO MASIO, Yprenſi Episcopo. 799  
 Constitutiones & Articuli Synodi hujus Diœcesanæ. 800
1609. Synodus CONSTANTIENSIS Diœcesana, sub JACOBO FUGGERO, Episcopo Constantienſi. 822  
 Bulla PAULI V. Papæ, in pio ac laudabili (*Synodum celebrandi*) proposito Rmum Episcopum confirmans. 823  
 Literæ Indiſtionis ſeu Convocationis Synodi. *ibid.*  
 Acta primi diei Synodi. 825  
 Oratio P. Jacobi Maier, Soc. Jeſu Theologi, ad Rmum Dominum Præſulem, totius Synodi Proceres, ac Clerum. 828


# IV INDEX CHRON. CONC. GERM. SÆC. XVII.

*Annus Christi*

*Pagina*

Acta secundi diei.	833
Acta tertii diei.	835
Acta quartæ & quintæ diei. Item sextæ.	836
Oratio Rdi & Clmi Domini <i>Leonardi Hamerer</i> , Ss. Theologiæ Doct. Parochi & Canonici Colleg. Ecclesiæ S. Stephani.	837
Catalogus Prælatorum, Collegiorum, Decanatum &c.	841
Constitutiones & Decreta ejusdem Synodi Constantiensis, anno sequente publicata.	848
Constitutionum Synodaliū Pars <u>I</u> .	850
Pars II. harum Constitutionum.	890
Pars III. illarum.	918
Earundem Pars IV.	928
Forma vulgaris & germanica Decretorum Matrimonialium, in Dice- cesana Synodo Constantiensi editorum, atque ab omnibus Pa- rochis & Curatis bis in anno ex Cancellis publicandorum.	939
1610. Synodus Dicecesana METENSIS <u>I</u> . ab ANNA DESCARS, S. R. E. Presbyt. Cardinali, & Episcopo Metensi celebrata.	947
Statuta hujus Synodi Diceces. Metensis <u>I</u> .	949
1610. Synodus ANTVERPIENSIS Dicecesana, sub JOANNE MIRÆO, Antverpiensi Episcopo.	977
Oratio ejusdem Episcopi.	978
Decreta hujus Synodi Dicecesanæ Antverpiensis.	983

FINIS INDICIS CHRONOLOGICI.



INDEX



# INDEX ALPHABETICUS CONCILIORUM GERMANIÆ

SÆCULI XVI.

AB ANNO CHRISTI MDLXXXIX. AD MDC.

ET

SÆCULI XVII.

AB ANNO CHRISTI MDC. AD MDCX.



A.

Antverpiense  
Diœc. A. MDCX. - pag. 977  
Atrebatense - - MDLXX. - - 225

B.

Bisuntinum Pro-  
vinciale - MDLXXI. - - 1  
Brixinense - - MDCHL. - - 537

C.

Cameracense Diœ-  
cesanum - MDCIV. - - 582  
Colonienſe Diœc. MDXCVIII. - - 517  
Constantienſe  
Diœc. - - MDCIX. - - 822  
Culmenſe Diœc. MDCV. - - 655  
Curienſe - - MDCV. - - 635

L.

Leodienſe - - MDLXXXV. - - 498  
Leovardienſe - - MDLXX. - - 314

M.

Mechlinienſe  
PROVINC. A. MDCVII. - - 767  
Metenſe Diœc. - MDCX. - - 947

N.

Namurcenſe - MDCIV. pag. 602

O.

Olomucenſe Diœc. MDXCL. - - 320

P.

Pragenſe Archi-  
Diœc. - - MDCV. - - 670

T.

Tornacenſe - - MDC. - - 474  
Tridentinum  
Diœc. - - MDXCHL. - - 402

V.

Virdunenſe - - MDXCVIII. - - 458

Y.

Yprenſe Diœc. - MDCIX. - - 799

W.

Wratislavienſe  
Diœc. - - MDXCII. - - 367

*Synodus Atrebatensis, de qua facta est sub initium Tomi præced. pag. VII. mentio, a Mat-  
thæo Moulartio A. 1584. celebrata, hucusque desideratur. Neque aliarum aliquot ex  
Sæculo XVII. Synodorum copia mihi fuit; quemadmodum notavi. Quod si nomine illas  
suo hic rursus nuncupem, futurum spero, ut Viri eruditi, quorum non paucos etiam  
nunc favere gratus experior, ad novum in iis mecum conquirendis studium se peramice  
invitados & sentiant & gaudeant. Sunt vero duæ ejusdem anni 1609. altera Petri  
Damantii, Gandavenſis Episcopi; altera Diœcesana Matthiæ Hovii, Archi-Episcopi Mech-  
linienſis (v. pag. 796.). Tertia est, quam Carolus a Lotburingia, S. R. E. Cardinalis  
habuisse, in penultima hujus Tomi Synodo Metensi notatur pag. 947. Dabo etis, ut  
primum ad me pervenerint.*

Index Alphab. Tom. VIII. Conc. Germ.

B

CATA-

# CATALOGUS ROMANORUM PONTIFICUM

AB ANNO CHRISTI MDLXXXIX. AD ANNUM MDCX.  
SÆCULO XVII.

Nomen & Natio.	Ordo Successio- nis a S. Petro.	Adit Pontificatum.	Sedit in Cathe- dra S. Petri.	Obiit.
Urbanus VII. <i>antea Joan. Bapt. Castaneus, Roma- nus. (*)</i>	CCXXX.	Anno Christi MDXC. XVII. Kal. Octobr.	Dies XIII.	Anno Christi MDXC. V. Kal. Octobris.

*Pontifex, a quo optima quævis, si per ætatem ac valetudinem vivere diutius licuisset, sperabant boni omnes. (a) Maximus sane, dum jamjam erat occubiturus. Diem enimvero, quem supremum sibi instare advertibat, adeo non timuit, ut insolita etiam animi vere Christiani fortitudine eundem exciperet; diemque salutis cognominaret; in quo, missis cæteris, curæ sibi omnes defigendæ essent. Legavit, quidquid bonorum possidebat (triginta aureorum millia) Sodalitati B. M. V. Annuntiatae, in calamitosarum Virginum dotes conferendum. (b)*

Gregorius XIV. <i>antea Nicolaus Sfondratus, Me- diolanensis.</i>	CCXXXI.	Anno Christi MDXC. Non. De- cemb.	Menses X, totidemque Dies.	Anno Christi MDXCI. Idib. Octob.
--	---------	--	----------------------------------	--

*Paucorum mensium intervallo non pauca statuit, fecitque memoratu digna.*

(\*) Cl. Christian. Wilh. Franc. Walchius Theol. Doct. & Prof. Ord. Götting. in libro germanice edito, sub Titulo: *Idea complete Historiæ Romanorum Pontificum*, Genuensem vocat.

(a) Spondan. *Annal. Eccles. ad b. a.*

(b) Natal. Alexand. *Hist. Eccl. Tom. VIII. pag. 69.* In defuncti Pontificis laudes sic excurrit Pompejus Ugonius: " Jam aditum ad se omnibus, etiam infima de plebe ho-  
" minibus aperuerat; jam ad subveniendum egentibus manum porrexerat; jam  
" virtuti, doctrinæ, honestisque laboribus præmia ostentabat; jam severitatem ni-  
" miam, asperitatemque imperii cedere pietati & clementiæ jusserat &c. Jam Re-  
" ligionem amplificare, Justitiam tueri, misericordiam exaltare; verbo: cunctas  
" optimi Pastoris ac Principis partes explere decreverat: cum ecce (ut abstrusa  
" sunt Divina mortalibus consilia) mors inopina, hæc omnia conantem interceptit,  
" penitusque prostravit.



# CATALOGUS ROMAN. PONTIF.

VII

Nomen & Natio.	Ordo Successio- nis a S. Petro.	Adit Pontificatum.	Sedit in Cathe- dra S. Petri.	Obiit.
----------------	------------------------------------	-----------------------	----------------------------------	--------

digna. Nobiliora ob oculos pono Constitutionem Pii V. de non alienandis Romanæ Ecclesiæ terris, aut fiducia earum accipienda renovavit; temperavit illam, quam Sixtus V. contra procurantes abortum ediderat. Societatis JESU Institutum rursus confirmavit, eique, ut, forma Sixtinæ non servata, tirones reciperet, permisit. Urbem, annonæ difficultate laborantem, profusa sublevavit benevolentia, omnesque, quæ frequentes oppido tunc erant, de vita, morte, & futura electione Pontificis aut Cardinalibus creandis, sponfiones damnavit ac prohibuit.

Quotidiana Cives Brundusinos inter & Uritanos jurgia compositurus, novum bis Episcopum sub Tarentino Metropolita, Philippo II. Hispaniarum Rege exposcente, concessit, relicto illis veteri Archi-Episcopatus titulo.

In bellum, quod contra Fidei orthodoxæ hostes suscepit, præter 40. aureorum millia ex suo ære collata, quinquies centena millia insumpsisse fertur. (c) Quæ contra Henricum IV. Gallicæ Regem diplomata misit, probata nullatenus fuere Præsulibus, ab Rege stantibus. (d)

P. Camilli de Lellis, a Benedicto XIV. P.P. fastis Sanctorum postea adscripti, religiosum cætum, difficili infirmorum ministerio consecratum in Religionem erexit, amplissimisque favoribus cumulare non destitit.

Alvi fluxu & calculi doloribus confectus piissime obiit XV. Octobris, anno MDXCI. ætatis LVII., habita paulo ante ad Purpuratos Patres insigni oratione, qua eos, ut optimum statim a morte sua dignissimumque Pontificem eligerent, in Domino obtestabatur Præsul castissimæ vitæ laude & Christiana modestia spectatissimus.

**Innocentius IX.**

antea Joan. Anton.  
Facchinettus, Bono-  
niensis.

CCXXXII.

Anno Christi

MDXCI.

IV. Kal.

Novemb.

Menses II.

vix integros.

Anno Christi

MDXCI.

Altera mox Comitiorum die summo Patrum consensu electus, summa vir erat integritate, pari in omnibus fere Facultatibus eruditione, ætate insuper & usu doctus: (e) quocum ad solium Pontificium evecto, quæ sopita ac pene emortua jacebant literarum studia

II 2

revi-

(c) Ciaconius in vit. & gest. Summ. Pontificum. Georg. Jos. ab Eggs Pontificum doctum.

(d) Fusc de his Diplomatis Nat. Alexander cit. ita narrationem suam claudens: "Hæc ad Historiam GREGORII XIV. & jactorum ab eo fulminum illustrandam ob-  
servare operæ pretium fuit.

(e) Sandinus in vitis Pontif. Roman.

Nomen & Natio.	Ordo Successio- nis a S. Petro.	Alit Pontificatum.	Sedit in Cathe- dra S. Petri.	Obit.
----------------	------------------------------------	-----------------------	----------------------------------	-------

reviviscere, uberrimosque fructus ad communem Christianæ Rei-  
publicæ utilitatem producere visa sunt. Unde factum, ut, quid-  
quid elucubrationum politiarum in lucem prodiret, nonnisi erudi-  
tissimo huic Literatorum Mæcenati inscriberetur.

Adito Pontificatu, de Ethnicis ad fidem Catholicam convertendis, de  
evellendis Sectarum erroribus, de Japonum Ecclesia ab immani  
Tyranno vindicanda, consilia agitabat; aliaque in Ecclesiæ bonum  
volutabat animo quam plurima. Byzantii fundare Collegium, &  
Turcarum conversioni & Christianorum solatio futurum decre-  
verat

Ad Ecclesiastica Beneficia probatissimos duntaxat viros, a pietate,  
prudencia, doctrinaque conspicuos promoveri voluit, probe con-  
sciis, quantum in alios inde redundaret commodi. Mors, quam  
suis in negotiis consulebat, & cujus persæpe refricabat duabus e  
tabulis, assiduis quasi Comitibus suis, memoriam, interceptit  
Principis optimi molimina, eumque permagno Urbis & Orbis lu-  
ctu in tumulum præcipitavit die Decembris XXX. anni MDXCI.

### Clemens VIII.

antea Hippolytus  
Aldobrandinus,  
Florentinus.

CCXXXIII.

Anno Christi

MDXCII.

III. Kal.  
Febr.

Anno Christi

MDCV.

Annos XIII.  
Mensem I.  
Dies III.

V. Non.  
Martii.

Supremæ inter mortales dignitati jam pene ab adolescentia, tum  
Pauli IV. P. tum Alexandri Cardinalis Farnesii præsagitione (f)  
destinatus fuerat. Haud vanam eandem fuisse, lapsis quatuor  
circiter & triginta annis, eventus docuit. Cum enim ob excel-  
lentes naturæ dotes, resque variis in Legationibus præclarissime  
gestas amorem sibi omnium atque existimationem comparasset, fa-  
cile omnium Electorum vota tulit XXX. Jan. anno 1592.

Pontifex remuniatus, sacrorum, quotquot in Urbe & quocunque  
sub nomine censentur, locorum Visitationem XLIX Cal. Julii in-  
stituit, ipsosque novem continuos dies ingenti cum fructu & mo-  
rum emendatione, ut testis est in Commentario suo, hac super Vi-  
sitatione edito, Augustinus Valerius, produxit. Rectores, Præ-  
fectos & Alumnos Seminariorum Collegiorumque, pia munificen-  
tia erectorum, officii sui gravi oratione admonuit.

Discipline inter Religiosos vel conservandæ, vel restaurandæ mirum  
in modum studiosus, varia publicavit Decreta. In tribus Ordini-  
nis

(f) Eggsius in Pontificio docto. Oldoinus in additionibus ad Ciaconium, & ex illo Palatius.

nis S. Basilii Monasteriis tria per Italiam Seminaria, unum in Sicilia, in Regno Neapolitano alterum, tertium in Crypta Ferrata agri Romani per Clementem consurrexere.

Roma præ reliquis pietatem Pontificis ac liberalitatem experta. Ibi celeberrimum Juventuti Illyricæ Collegium, quod bodieque ab auctore suo Clementinum audit; alterum Nationi Scoticæ excitavit. Ibi geminas Basilicas Urbis Principes, Lateranensem & Vaticanam superbe adeo ornavit, ut cultum suum ac nitorem, maximam Clementi partem ambæ debeant. (g)

Alia quæ bono publico confecit Clemens, paucis indicabo. Ruthe- nos fidem Catholicam professos in gratiam communionemque Romanæ Ecclesiæ admisit; Regem Gallicæ, Henricum IV. errores suos, non sine maxima prudentiæ laude ejurantem, (h) anno 1595. Orthodoxorum cætui ac felicitati reddidit; Ferrariam, ab obitu Alphonsi II. Estensis, Sedi Pontificiæ recuperavit anno 1598. (i) Hortatu illius Henricum IV. inter & Philippum III. Gallicæ Hispanicæque Reges, magna totius Europæ lætitia pax coaluit. Anno Jubilari 1600. affinem Joannis Calvinii, novæ Sectæ in Gallia parentis, ad meliora Dei beneficio reductum, Confirmationis Sacramento Ipse Romæ insignivit Pontifex.

Sub Eodem Sacrorum Bibliorum Vulgatæ Versionis Latinæ Opus quam emendatissimum prodiit: (k) Controversia etiam de Confes-  
sione

(g) Eggsius cit. non pauca id genus ornamenta recenset.

(h) Literis, officii ac reverentiæ plenis, manu exaratis propria, Rex immortales Clementi gratias pro beneficio egit. Exemplar Italice redditum a Silvio Antoniano. Pati hic, ut mitissime loquar, humani aliquid jure videatur Cl. Walchius cit., dum reconciliationem istam Henrici cum Pontifice, parum honestam Regiæ Majestati fuisse scripsit. Aliter judicavit Rex ipse; aliter Regis Procuratores Perronius & Ossatus; aliter Proceres, urbesque ad Henrici fidem certatim redeunt. Redire cum Patre in gratiam, hocce minus honestum filio? Supremo se Capiti rursus jungere, id membro non satis honorificum? Saluti suæ consultum ire, an virum? an Principem? an Regem, Cæsaremve dedecet? Illud enimvero cogitare velle, ne dicam, typis vulgare, minus profecto honestum, minus congruum sanæ rationi foret.

(i) Baronius ad Clementem: Accidit quasi miraculum a Deo, (his libenter utar Divinæ Scripturæ verbis 1. Reg. XIV. 15.) ut Ferraria, ferrea plane civitas, sine ferro fuerit expugnata. Sandin.

(k) Advertit idem Cl. Walchius, Editionem vulgatæ Latinæ Clementinam, a Sixtina admodum discrepantem, quæ Anno 1592., (non 1532., quod typi errorem lubens interpretor) Romæ prælo exiit, argumento Orbi esse luculentissimo, quod contradicere sibi, etiam in rebus Fidei, duo Pontifices queant. Verum & hic accidisse viro quidquam humanitus, si Orbi manifestem, operæ pretium erit. Ajo inique 1. probatam a Tridentina Synodo illam Editionem fuisse, quæ olim erat vetus & vulgata & longo tot sæculorum usu in ipsa Ecclesia probata. 2. Nec Pios IV. & V., nec Sixtum V., nec Clementem VIII. deprehendisse aut emendasse menda palmaria, substantiam verbi Divini vitiantia, sed leviores duntaxat præli nævos, vel descriptentium vitio, vel alia humana infirmitate textui aspersos: ut testis est auctor Præfationis in Vulgatam hodiernam. 3. Emendationem Clementinam, in substantia sensus a Spiritu S. intenti, a Sixtina non differre: quod contra Thomæ Jammesi in L. Bellum Papale ineptias invictæ & aut' aut' ostendit Henricus Bucken-topius Lucis de Luce Lib. 3. Cap. 1. 4. Plura id genus vitia transcribentium atque



Nomen & Natio.	Ordo Successio- nis a S. Petro.	Adit Pontificatum.	Sedit in Cathe- dra S. Petri.	Obiit.
<p>sione absenti Sacerdoti facta &amp; absolutione ab eodem absente im- pertita (l) ad examen vocata, atque ab illo decisa fuit.</p> <p>Disputationum de Auxiliis Divinae gratiae &amp; spectatorem agere vo- luit &amp; auditorem. Viros scientiis, virtutibusque claros singu- lari semper favore prosequabatur, sacrumque in Collegium adlege- bat. (m) E vivis excessit Princeps vere magnus &amp; Pontifex sane optimus, Anno ætatis LXIX.</p>				
Leo XI. antea Alexander Mediceus, Flo- rentinus.	CCXXXIV.	Anno Christi MDCV. Kal. Aprilis.	Dies XXVI.	Anno Christi MDCV.

Natus anno a partu Virginis 1535., parentes nobilissimos Octavia-  
num Mediceum, & Franciscam Salviatam, generis claritate ma-  
ximis Europæ Principibus affines, habuit. Non vulgari excul-  
tus doctrina, militiæ primum; tum disciplinæ Ecclesiasticæ se  
dabat. Renuntiatus postea Episcopus Pistoriensis, & mox Flo-  
rentinus Archi-Episcopus mira semper claruit Religione ac pru-  
dentia, quam sub Henrico Magno, cum Legatum Pontificium  
jam Cardinalis ageret, Gallia universa suspexit.

Sexaginta, ut memorant aliqui, & unius Purpuratorum Patrum  
suffragiis ad Apostolicæ Sedis apicem evectus, summa iisdem Pa-  
tribus humanitate, nihil, quod Deo placeret, aut conscientia  
non repugnaret, petentibus se negaturum spondit.

Obiit brevissimi temporis Pontifex anno ætatis LXX; Victor, Ba-  
ronio teste, (n) ac Triumphator amplissimus, utpote quem nec  
Romani Proceres, nec Principum Legati, nec Vaticani Senato-  
res, precibus licet ab illo contenderent quam diligentissimis, fle-  
tere potuerunt, Pronepotem suum, modestissimum adolescentem,  
quem unice diligebat, sacra ut Purpura donaret.

Successit PAULUS V., (\*) cujus annum sextum Synodus Tomi  
bujus postrema attingit. IMPE-

Librariorum in Editione per Clementem facta, remansisse non diffiteor: tum quia  
Vulgatam nunc omnibus numeris absolutam esse pro humana imbecillitate Clemens  
ipse affirmare non auder; tum quia diserte asserit, aliqua, quæ immutanda (mu-  
tanda) videbantur, immutata (non mutata) relicta ad evitandam offensionem po-  
pulorum. Vid. P. Hermann. Goldhagen S. J. *Introductio in Sacram Scripturam* P. I.  
Lect. II. Q. X. edit. Moguntiae typis Hæffnerianis anno 1765.

(l) Nat. Alexand. cit. Bullar. Rom. Tom. III. pag. 132.: cui & aliæ annexæ sunt Cle-  
mentis VIII. Constitutiones, quarum centum & viginti tres enumerat Christoph.  
Ottus S. J. in *Roma sua Gloriosa*.

(m) Illustrium Virorum, in Sacrum Collegium a Clemente adlectorum, quos inter emi-  
nent Baronius & Bellarminus, seriem bene longam videre est in eod. Nat. Alexand.

(n) Tom. XII, *Annal. Eccles.*

(\*) De Paulo V. scribam Tomo sequente.

# IMPERATORES OCCIDENTIS

AB ANNO MDLXXXIX. AD MDCX.



## RUDOLPHUS II.

**M**AXIMILIANO II. ex Maria Caroli V. filia genitus, erecti, vividique ingenii, vastæ rerum peritiæ, & acerrimi judicii Princeps XV. Cal. Augusti anno MDLII. primam lucem adspexit; Legibus deinceps ac moribus Philippi II. maximi Hispaniarum Monarchæ, cum per ætatem liceret, in Aula ejusdem ad omnem virtutis normam, optimam gubernandi rationem quam solertissime institutus. Aliis bene ut imperaret, nunquam se ad imperata difficilem præbuit, mature jam tum perspicuens, ipsam imperandi artem parendo disci.

Ex Hispaniis in Germaniam redux, anno MDLXXII. XXIX. Septembris adhuc adolescens, Regni Hungarici fasces, sibi insolita magnificentia a Pannoniis Possionii delatos vidit. Spes erat una omnium, fore, ut non frangeret modo contereretque jugum Ottomannicum, sed prorsus etiam fatalem a Regno Lunam averteret.

Anno MDLXXV. XXII. ejusd. mensis Casurgi Rex Bohemiæ, prima vero Novembris in Comitibus Ratisbonensibus Rex Romanorum salutatus fuit; & Maximiliano patri, iisdem in Comitibus mense Octobri celebratis occumbenti, Imperator anno MDLXXVI. successit, pace, ut quidem videbatur initio, optatissima fruiturus.

Quo pacis beneficio alias quoque Provincias & Urbes recreare studuit. Postquam enim anno MDLXXVII. Deputatorum Comitibus Francofurti obitis, novam Politicæ in Imperio, elegantiorisque faciem effinxisset; ad sedandos Belgii tumultus animum adjecit. Designati eum in finem e Wormatiensi Procerum Conventu anno MDLXXVIII. Viri Illustrissimi, qui Cæsaris nomine de gravissimi momenti re arbitrium facerent. Erant, qui personam Imperatoris gesturi Coloniam Agrippinensium anno MDLXXIX. venerant Jacobus Trevirensis & Gebhardus Colonienſis Septemviri, Julius Antistes Herbipolensis, Otto Henricus Comes Schwartzenburgicus, & pro Wilhelmo Juliæ Duce, qui absentiam excusarat, Wernerus Gimnichius, Archisatrapa Juliæ, Joannes Lowermannus & Hermannus Richius Icti. Actores hinc pro Rege Catholico Philippo II. ejus Legatus, Carolus Arragonius Terrænovæ Dux; inde pro Ordinibus Philippus Croyus Dux Arescoti una cum multis aliis ab Archi-  
Duce

Duce Matthia, foederatisque Provinciis missus. Post solennis supplicationis Religionem agi ceptum Nonis Maji, ipsosque septem menses consultatum: at vero effectum nihil, Orangio, pacem ne admitteret, miris rem omnem artibus involvente. (a)

Anno MDLXXXI. Aquisgrani gliscens sub cineribus flamma in apertum erupit incendium. Exules, Duce Albano jubente, Belgæ heterodoxi, Artesii præprimis & Hannonii, qui per Magistratus Aquensis, plus justo indulgentis socordiam sedes ibidem fixerant, nihil habebant antiquius, quam ut imbutis, quotquot possent, suo dogmate veteribus inquilinis, rerum potirentur. Quare in suggestum educere novi Evangelii Præcones, rudem plebeculam in partes suas trahere, sanctissimas Religionis nostræ leges palam explodere secus ac promiserant, non formidarunt. Monitus de petulantia Rudolphus, severissimis quamprimum literis urbi mandavit, opposeret sese Novatorum audaciæ, ac pestem suis e mœnibus actutum ejiceret. Quin & Ernesto Bavariæ Duci, electo nuper Leodiensi Episcopo, & Wilhelmo Clivenfi, ut civitati graviter periclitanti subvenirent, negotium dedit. Sed incassum omnia. Fabula surdis cantabatur. In novos insurrexere conatus factiosi, & quanti literas Imperatoris, quanti mandata, minasque facerent, vel ex eo conjicias, quod Consul eorum de grege, fax turbarum & auctor (*Louzenium vocat Cl. Noppius in Chron. Aq.*) dixisse feratur: " Etiam si Imperator mulum Clitellarium, literis mandatisque prægravatum mitteret; se tamen idcirco ab inceptis minime abstinturos.

Tum vero Cæsar pridie Kalendas Julias anno MDXCVIII., quo usque causam suam seditiosi protraxerant, Cives perduellionis reos ac proscriptos, urbemque prædæ expositam, pronuntiavit. Tam violento perculsi fulmine, diffugere primores; cæteri, quam supplices flagitabant, pœnæ gratiam obtinuerunt. (b)

Sub eadem fere tempora majores excitarunt motus, tum *Formula Concordiæ* ab Heterodoxis Anno MDLXXX. cusa, tum *Calendarium Gregorianum* a Protestantibus aliquot repudiatum (*Vid. Tom. præc. pag. XIII.*) tum denique Gebhardi Truchsesii Colonienfis Archi-Episcopi infelices nuptiæ, ac deploranda ab avita fide defectio, anno MDLXXXII. consecuta. Tempestatem non ab urbe solum, sed a toto etiam Archi-Episcopatu Colonienfi quantis curis, quantaque prudentia, ac felicitate Rudolphus averterit, satis loquuntur variarum Legationum, ad Truchsesium directarum capita, quæ *b. Tom. pag. 534.* addulimus.

Anno MDLXXXIV. induciæ octo annorum, quas adita Imperii possessione cum Ottomannis Rudolphus pepigerat, in novem prorogatæ annos fuere. Erexit nihilominus Cæsar Carolipolim in Illyrico, munitissimum adversus

(a) *Struv. Corp. Hist. Germ. Sect. VII. de Rudolpho.*

(b) *Kevenbüller Annal. Tom. I. pag. 192. &c. Fullon. Hist. Leod. in Ernesto. &c.*

versus Turcarum incurfiones propugnaculum; Auguftamque Comitia indixit: in quibus quid actum, quid decifum fuerit, explicant Struvius, alique. (c)

Anno MDLXXXVL ineunte, Comitia WORMATIÆ celebrata, diffidiaque inter Sigismundum Sueciæ Principem & Maximilianum Rudolphi fratrem de Corona Polonica decertantes, anno proximo compofita.

Anno MDXCII. nova belli tempeftas a Turcis in Croatiam incubuit. Vitiſcum, regionis illius caput, aliaque oppida vi expugnata. Jamque Siſacum arctiffima premebatur obſidione, cum Prætor Croatiæ paucas Hungarorum reliquias collegit, quæ tam ſecundis in barbarum auſpiciis ſefe effuderunt, ut LX. Turcarum millia a manu Hungarorum non oppido magna partim caderent, partim in fugam converterentur. Excitus inſolitæ hujus victoriæ fama Hungarus, totoque e Regno proruens, ſupremo exercitus Cæſarei ductore Maximiliano, Novigradum, Zabaticam, Filecum, Deniniam diræ XXX. annorum ſervituti Turcicæ eripuit, tantaque hoſtem adfecit clade, ut Regni totius priſtinam in libertatem vindicandi ſpes ampliſſimas Orbis Chriſtianus conciperet, ſibi que de ſelici illo armorum progreſſu gratularetur.

Verum ſpes in ſollicitudinem; gratulationem in luctum mox vertit annus MDXCIII., Sina Amurathis Prætor cum immenſo Turcarum exercitu Hungariam ingreſſo, & Javarinum non tam armis, quam auro proditum occupante. Quæ res novum Germaniæ ſimul atque Italiæ terrorem incuſſit, paucis poſt annis diſpulſum, cum e manibus hoſtium Adolphus Schwarzenbergius Comes, Dux Rudolphi clariffimus urbem denuo eriperet, tanta admiratione omnium, ut, inſanis victoriæ nuncio qui fidem haberet, vix unum repereris. Emolumentum illius feciſſe, comprecatio DEI O. M. ſolennis a Clemente VIII. Pontifice inſtituta creditur.

Varia dein fortuna pugnatum ad annum Sæculi XVII. quintum, quo cum Rudolpho in vincennales inducias Turca deſcendit.

Hæc a Turcis paſſus Imperator: cui tamen acerbius nihil, graviusque accidit, quam ingreſſencia in dies Religionis ſibi cariffimæ pericula, quæ, Sæctis heterodoxorum per Germaniam ac Bohemiam ſerpentibus, prorumpbant.

Poſt turbas a Donawerda, Boici olim juris ad Danubium civitate anno MDCVI. Idibus Aprilis excitatas (d) luctuoſiſſimæ belli tricennalis, de quo alibi differendi locus erit, hiftoriæ præluſum Anno MDCX. cum *Correſpondentium Unione*, (e) tum *Liga Catholicorum*. (f) Cauſam belli fuiſſe memorant Hiſtorici diploma (*Literas Majeſtatis* vocabant) Rudolpho a Sæctariis extortum, quo publicum profeſſionis ſuæ exercitium iis indulgebatur. Rudolphus ut

ne

(c) Struv. l. cit.

(d) Cauſam Donawerdanam exhibet *Joſephus Biner S. J. in Apparatu Eruditionis P. VIII. L. I. Cap. I. Art. I.*

(e) *Kevenbüller Tom. VII. Londerp. Tom. I. Imperat. Occident. Tom. VIII.*

(f) *Dumont Tom. V. P. II.*



ne initia quidem mali intueri cogeretur, Anno Christi MDCXII. ætatis quinquagesimo nono, Imperii sexto & trigésimo Pragæ X. Januarii e vita migravit, Bohemiæ & Hungariæ Regnis ante translatis in Matthiam fratrem, cui septemdecim florenorum Myriades in ærario reliquisse dicitur. Imperatori Religionis studiosissimo, sex linguarum peritissimo, (g) Pacisque & Literarum, Mathematicis præsertim disciplinis addictorum amantissimo successit idem germanus

## MATHIAS

Electorum omnium (Brandenburgico excepto) suffectus votis, provectiore jam ætate Princeps, cujus res gestas Tomo sequente exponemus.

**FINIS CATAL. IMPER. OCCIDENT. TOM. VII.**



DI-

(g) Corbinianus Khamm in *Hierarch. Augustana* P. I. Cap. VI. Class. IV. Sect. VIII. pag. 371. Addi possunt AA. cit. Spondanus, Brachelius, Adlzreiterus, Thuanus, Masenius, Schwarzius, Lynnaeus, Hortens. Pallavicinus & alii.



# DIGRESSIO

AD SÆCULUM XVI.

## BREVIS EPITOME RERUM,

*in causa LUTHERI, & Sæctatorum ejus toto eo Sæculo gestarum.*

**F**Idem, sub initium Tomi CC. VI. in adnotatione datam, nunc liberaturus, brevem Lectori meo rerum, toto eo Sæculo in Lutheri, ejusque Sæctatorum causa gestarum, exhibebo epitomen, quam vel ipsis DD. Protestantibus amœnam lectu, certe non molestam fore confido. Veritatem in illa reperire erit a genuino Historiæ candore, cultuque verborum simplici, quo, fucum perosa & ruras, delectari ipsa maxime solet, erudito huic nostro ac delicato Sæculo comprobendam. Ea utar moderatione scribendi, ut, ne vox quidem acerbior conscio mihi elapsura sit; ea brevitate, ut etiam ubi, quod superioribus sparsim in Tomis expressum modo fuit, inveniri possit, ne idem repetam, Lectori benevolo sim indicaturus. Nec satyram paro, nec absolutam numeris suis Historiam, sed Historiæ vastissimæ compendium; quod quidem in duo duntaxat Capita dispertio: quorum primum de Sæcta Hussitarum, tanquam infelice, unde Lutheranismus per Germaniam nostram emicare ut plurimum cœpit, ovo; alterum de Lutheranismi ipso ager. Interim censebo dictum mihi, quod monuisse Tullius Lib. 2. de Orat. videtur Scriptorum quemlibet: *ne quid falsi dicere audeat, ne quid veri dicere non audeat; ne qua suspicio gratiæ sit in scribendo, ne qua similitudinis.*

### CAPUT I.

#### *De Sæcta Hussitarum.*

##### §. I.

##### *Origo Sæctæ.*

**I**N florentissimum Bohemiæ Regnum attulerat secum ex Anglia ceu pretiosum quendam thesaurum, Joannis Wicleffi libros, Bohemus primum, Vir ex domo, quam *pueridi piscis* vocant, conspicuus; dein *Petrus Payne*, Wicleffi olim discipulus. Exempli per ipsam Regni Metropolim mox volitabant descripta non pauca: Legit ea, relegitque avidius *Joannes Huss*, ex villa ejusdem nominis, quod *anserem* lingua patriæ significat, ortus & cognomentum mu-

tuatus; atque illico latius ista divulgandi studio exarsit. Vir erat Hussus ingenio peracri, sed opinionum heteroclitarum cupidissimo: facultas dicendi gravis & copia ipsum commendabant. Vitæ etiam mundioris fama haud exiguam illi apud cives auctoritatem comparaverat. His subsidiis, non Presbyter modo, sed Pragensis etiam Academiæ Rector facile, quod animo suo propositum conceperat, in lucem edidit. Nec sane diu fuit, cum, dilapsis Praga Lipsiam Germanis, defensoribus aviræ Religionis imperterritis, doctrina Wicleffi ore simul & calamo ab Hussu propagaretur, tanta quidem cum perniciæ (verba sunt Cochlaei) "ut neque Summi Pontificis, neque Archi-Episcopi Pragensis instantissima cura... potuerit semel conceptum.. virus e cordibus hominum eradicari aut extinguui." Memorandi inter Hussi Sæctatores, primi veniunt *Hieronymus Pragensis*, *Petrus Dresdensis*, & *Jacobellus Misnienfis*.

##### §. II.

##### *Hussi, Hussitarumque errores.*

**A**B Indulgentiarum cavillatione telam suam orsus videtur Joannes Hussus, ingentemque contra Sacerdotes, ac familiarum Religiosarum viros tempestatem excitavit. Ad alios deinde errores deflexit, quos passim apud AA. Tenor illorum extat *Tom. V. CC. a pag. 86.*

##### §. III.

##### *Hussi & Hieronymi Pragensis damnatio.*

**U**trumque in erroribus suis pertinacem ac flecti nescium damnavit Constantiensis Synodus: hunc Sess. 21., illum Sess. 15. Diarium Hussiticæ damnationis & complicitum vide *Tom. V. cit. pag. 94.*

##### *Animadversio.*

Juvat hic paucis refellere tum eos, qui cum *Guilielmo Cave* in sua Historia literaria ad Sæculum XV. judicant, peccatum illa damnatione contra fidem publicam & justitiam fuisse; tum istos, qui Hussum perinde

ac Pragensem ad censendos Divis Christi Martyribus hodieque existimant.

Hallucinantur primi : nam neque Joannes XXIII. P., neque Patres Concilii Constantiensis Salvum, ut vocant, Conductum seu literas, com meatus liberi testes, Hussos dederant : id quod ex epistolis ab ipso met Hussos ad familiares Constantia datis arguitur. *Veni in Constantiam*, scribit epist. 5., *sine omni nocumento... Venimus sine salvo conductu*. Adnotarunt Hussitæ : *Intellige PAPÆ*. Ex epist. 6. : *Veni sine salvo conductu PAPÆ ad Constantiam*. In aliis, 18. præsertim & 19. et si de multis queratur capitibus sibi injuriosis, de violata a SYNODO fide Salvi conductus altum tacet. Nihil etiam de ejusmodi perfidia contra quemquam e CONCILII PATRIBUS in medium protulit, jamjam supplicio afficiendus. Ad SIGISMUNDUM Imper. quod spectat, munitum ab eo publici liberique per omne iter com meatus præsidio Hussos fatemur : sed enim a Concilii jurisdictione pissimus Cæsar, ut patet ex literis, (*apud Goldastum*) 18. Octobris anno 1414. ab eodem Spiræ datis, hominem non exemit; voluit potius, ut judicio Ecclesiæ sese submitteret, pacem non turbaret publicam, nec novis se criminibus illaquearet. Hussus e contrario vel egit vel animo saltem versavit alia prorsus omnia. Sola enim, quam modo arripuerat, fuga, licet ex eadem retractus, certo velut indicio se prodidit. Tentabat nimirum Synodi examen contra Imperatoris mandata, contra suammet sponsionem subterfugere, atque ad evertendam tota Bohemia, Moravia & Polonia fidem revolvere. " Non igitur Religiosissimo Principi, *insert* " *Cocblæus*, debet imputari, si Concilium, " exigente justitia, in pertinacem (*Hussum*) " secundum jura sententiam protulit.

Porro quisquis gravissima Hussi flagitia sinistro duntaxat oculo obiverit; sententiam Concilii ab omni injuriæ specie vindicandam censebit.

Profecto Sigismundus Imp. omnes Hussi errores, quin & singulos morte dignos, coram Concilii Patribus enunciavit. Errant itaque, qui Concilium aut læsæ tunc fidei, aut injustitiæ insimulant.

Labuntur errore & alteri, eoque gravissimo : Nam quis inter Sanctos Christi Martyres, ob edita quædam constantiæ & fucatiæ pietatis signa homines numerandos putet a vera Christi Ecclesia avulsos, suisque sceleribus quasi per triumphum immortuos? *Multi latrones*, Magni Augustini oracu-

lum est Serm. 274., *patientissime torquentur; & non cedentes, & tortorem vincentes, postea æterno igne puniuntur*. CAUSA discernit Martyrem a patientia, imo duritia sceleratorum. Et nunquid 1. Cor. 13. Apostolus: *Si tradidero corpus meum, ita ut ardeam; caritatem autem non habuero, nihil mihi prodest?* Plura hac super re congestit Cocblæus Hist. Huss. Lib. II. pag. 95, seqq.

## CAPUT II. De Lutheranism.

### §. I.

*Lutheri ortus, ingenium, mores.*

A Uthor Lutheranismi & Princeps Martinus Lutherus, primam aspexit lucem Islebii, Mansfeldensis in Saxonia Comitatus oppido Anno 1483. die 22. Octobris, aut (juxta alios) pridie D. Martini, patre Joanne Lotter, & Margaretha Linder-manna matre. Nomen familiæ, quod ex lingua vernacula *sciuram*, *scortumve* redolet, in *Luther*, quod *purum* sonat, commutavit. Literis humanioribus Magdeburgi & Ilenaci imbutus, Erfordiam petiit, ubi ob insignem in disciplinis Philosophicis profectum Lauream Magisterii, anno ætatis suæ vigesimo consequabatur. Jurisprudentiam ibi a limine vix salutaverat, cum fato socii sui, fulmine ante pedes extincti perterritus, amplectendæ Religionis votum nuncupavit, moxque Sacro Eremitatum D. Augustini Ordini nomen dedit Anno 1504.

Initiatus Sacerdotio A. 1507., Wittenbergam a Joanne Staupitio, Generali Augustinianorum per Germaniam t. t. Vicario, missus fuit, ubi & Doctoris Theologiæ prima retulit insignia & sacram aliis doctrinam publice explanavit.

Diffimulari non potest, inquit apud Flor. Ræm. *Germerus* Lutheranus, Lutherum ingenio fuisse vehementi, & qui neminem, qui cum ipso non sentiret, ferre posset. En genuinam hominis imaginem ex Pallavicino : (a) " Acuto vividoque (*Martinus* " *Lutherus*) fuit ingenio, propensus ad studia " literarum, & in iis corpore & mente indefessus. Cum inops literaturæ non esset, " longe ditissimus sibi videbatur; quippe " cui in lingua, tanquam in numerato, sua " omnia in promptu erant... Hæc dotes replebant animum mira superbia, & apud " vulgus opinionem, quæ illam aleret, pro-vocabant &c.

### §. II.

(a) Hist. Conc. Trid. L. I. C. 4. Plura Cocblæus, Flor. Ramundus, Ulenbergius, Hazartus, Defingius & alii.

## §. II.

*Initia Lutheranismi.*

**H**Æc Tom. nostro VI. CC. pag. 149. cum expressa sint, eo Lectorem nostrum remittimus. Eadem refert ad annum Christi 1517., Leonis X. PP. 5., Maximiliani I. Imp. 24., Hermanni V. Colon. Archi-Ep. 3. in Chronico suo MS. *Wilnius ex Bernardo Witio*, Scriptore coævo, testemque rei gestæ oculatum, Joannem Oldecopium, Hildesii natum, Collegii ad S. Crucem postea Decanum, Lutheri olim in Universitate Wittembergenſi discipulum producit.

## §. III.

*Lutheri dogmata.*

**P**romiserat Lutherus, qui Theſibus primum, anno 1517. toti Germaniæ luctuosissimo, contra Indulgentias editis, aliisque mox scriptis tumultuari adversus Pontificem & Ecclesiam cœpit, Hieronymo Sculteto, Brandenburgensi Episcopo, Præfui suo, saniora suadenti, se obtemperaturum; (*Tom. VI. nostro cit. pag. 136.*) sed, stimulante livido fastu, ad ingenium rediit, erroresque ex aliis alios per intervalla protruxit. Eorum aliquos reperire est in Bulla Apostolica LEONIS Papæ X. anno 1520. 17. Maji data, quam vide *Tom. 10d. pag. 171.* Analysin illorum exhibet Hist. Eccles. Sæc. XV. & XVI. pag. 101. sqq. Tom. VIII. *Natalis Alexander*, atque ad pleniorum Operum Lutheri cum Latinorum, tum Teutonicorum Indicem, ex Joanne Cochleæo perspicendum relegat. *Florim. Ræmundus* de Origine Hæreseon Lib. I. Cap. XVI. Lutheranismus ex quibus conflatus sit erroribus, pereleganter diducit. Systema suum, inquit in Prodro-mo ad Theologiam Dogm. Scholasticam Diff. II. Cap. IV. art. II. n. 310. *Josephus Gautier*, ut fabricaret Lutherus, duo primaria Fidei Catholicæ fundamenta, Scripturam & Traditionem quater & subvertere molitus est; bina item stabilire principia, ad morum subversionem haud oblique tendentia: Primum, quod extinctum diceret liberum hominis arbitrium; alterum, quod facultatem, etiam cum gratia Dei mandata ejus servandi, nobis in hac vita degentibus negatam assereret.

## §. IV.

*Lutheri progenientis tale Systema, ac nutrientis scopus.*

**I**N Ecclesia, quam Christus JESUS, Patris æterni æternus Filius in terris fundavit, sacrum quendam splendidumque Principatum seu *Hierarchiam*, eamque tam *Ordinis*, ut loquimur, quam *Jurisdictionis* agnoverunt semper, quotquot religiose ac sobrie sentiebant Viri cordati, & summis prosecuti honoribus fuerunt. Probant id satis perhonorifica antiquissimorum Patrum, non modo Ordinem Clericalem a Sæculari, verum etiam ipsos inter Clericos Ordinem ab Ordine distinguendum, testimonia vix non innumera, quæ adferre nec licet brevitatis studioso mihi, nec libet. Videri possunt bene multa apud *Thomassium Tom. I. Lib. I. Cap. LI.* Unum audiamus de Hierarchia ista Ecclesiastica scribentem S. Cyprianum: *Una*, inquit, est a CHRISTO per totum mundum in multa membra divisa Ecclesia; Episcopatus unus, Episcoporum multorum concordie numerositate diffusus. (b)

Hanc porro Hierarchiam tam ordinatam & magnificam, quæ juxta eloquium Doctores melliflui (c) *Deum habet auctorem, & de calo ducit originem*, (d) non labefactare modo voluit, sed penitus subvertere novi Systematis parens & egregius, si Superis placeat, Ecclesiæ Reformator Lutherus. Eo gesta ipsius collimabant, scriptaque propemodum omnia. Romanum Pontificem e toto Orbe Catholico proscribendum curabat. Testes Literæ ad Carolum V. Imperatorem anno 1519. datæ, (e) quibus asseruit, nihil Romanorum Pontificum tyrannide in Germaniam, ejusque Principes hætenus fuisse intolerabilius; Testis Libellus germanicus (f) ejusdem nominis Nobilitari, cujus blandiorem in se auram sentiebat, anno 1520. inscriptus; testis audacia illa & furor, quo æstuans jus Pontificium, cum ipso Leonis X. novam doctrinam condemnantis diplomate, Ecclesie & Emseri commentariis non procul Wittenbergenſi ab urbe publice Vulcano tradidit; testes denique libri varii, a Flor. Ræmundo (g) non libri, sed plaustra infamibus convitiis & injuriis onusta, quas plena inde manu Lutherus spargit, jure appellati. Certe non aliam habuisse Lutherum præfixam sibi metam, quam ut insignem illam disturbaret Ordinis Hierarchici structuram,

(b) *Epist. 52. ad Antonianum.*(c) *Lib. 3. de consider. ad Eugen. C. 4.*(d) *Vid. præter Thomass. Lc. Bellarm. de Potest. Summi Pontif. Petav. de Eccles. Hier. Melch. Camus de Rom. Eccl. Auth.*(e) *Jac. Masenius Anim. Histor. de Car. & Ferd. Lib. I. pag. 47.*(f) *Tom. I. Jen. Germ. fol. 288.*(g) *De Orig. hæres. Lib. I. C. 9. pag. 74.**Digressio ad Sæcul. XVI. Tom. VIII.*



etiam, & possessiones Episcopatum cum omni jure in Sacra, Principibus sæcularibus transcriberet, eventus docuit. Id loquuntur satis tot ditiores Ecclesiarum tum Metropoliticarum, tum Cathedralium ab Hierarchia Ecclesiastica avulsæ & profanis a Magistratibus occupatæ, tot Monasteria plane diruta, tot everstæ aræ ac templa. Id loquuntur Pax Religiosa & Weltphalica.

Noverat nimirum homo ab ingenii vafrutis instructissimus, & projectus ad audendum, opus sibi esse potentia virium, Magnatum præsidio, Principum auxilio in armis etiam, dum res postulaverit, quærendo. His sine nervis effecturum se nihil, bruta duntaxat fulmina missurum, cassas fore spes suas, molitionesque omnes, quas Procerum autoritas, favor ac suppetiæ non sustinerent, firmarentque. Sed enim illorum expugnare animos, & suas in partes trahere qua via poterat facilius, quam si præter enormem, quidquid allubescit, credendi licentiam ipsis propositam & commendatam, eorum ampliaret facultates, æraria locupletaret, integros adjiceret principatus, extenderet ultra Orbis Catholici limites jura, atque immensam jurium Episcopatum multitudinem in eos transfunderet. Hæc, aliaque id genus plurima quid tandem spectaverint, nemo non videt. Tam dulci esca, ut hamo pisces, Nobilitatem, Ecclesiasticorum bonis jamtum inhiantem, capere, suamque efficere, operosum Lutheri non erat. Rem ipsam putavit Cl. Hunius JCrus, cum ad Joannem Adolphum Fuldensis Ecclesiæ Abbatem scriberet, (b) duo esse, per quæ tantum Lutheranismus tam brevi tempore incrementum sumpserit, ut totum prope Orbem Christianum perrepperit, summosque Reges ac Principes applausores & Patronos invenerit: *vivendi nimirum libertatem & bona Ecclesiæ diripiendi immunitatem.*

## §. V.

*Señtatores Lutheri præcipui.*

**R**ecensendi hos inter, & qui, qualesque fuerint, depingendi sequentes.

I. ANDREAS BODENSTEIN, natus Carlostadii, Franciæ Orientalis oppido, unde & ipsi nomen: *Carlostadius*, Archidiaconus Wittenbergensis, primus fuit, qui Christiani Sacerdotii dignitatem nuptiis sacrilegis, non sine magno Orthodoxorum

scandalo palam anno 1525. celebratis, poluit; & tanquam si facinus patrasset memoria sempiterna dignum, carumque superis, Encomiasten Lutherum ipsum habuit, Wittenbergamque adeo sibi faventem, ut Missam propriam, cujus exemplar habet Flor. Ræmundus, (i) inauditum ante illum diem impietatis (ausimne cum Nat. Alexandro (k) loqui?) & lasciviæ impudentissimæ monumentum eam in rem cives ediderint.

Non tulit ætatem, quæ Lutherum inter & Carlostadium maxima intercedere videbatur, amicitia: vix enim hic, absente illo & inconsulto, abrogare Missam, imagines e templis ejicere, aliam de Eucharistia opinionem in vulgus spargere, ac sepultos olim excitare Sacramentarium errores; & ecce tibi! tam vehemens inter binos hostes pacis, concordiaque Apostolos exarsit dissensionis & iracundiæ ignis, ut horrendis alter alterum modis proscinderet. Triumphante nihilominus Lutheri, pulsus e Saxonia Carlostadius palari cum conjuge nobili & liberis eousque debuit, dum a Tigurinis in Helvetia primum Diaconi, post a Basileensibus Ministri, unde vitam toleraret, munus ipsi obtigerit. Diem clausit Basileæ anno 1541. De fati genere variant Authores. Sunt, qui peste consumptum putent. Lutherani a Diabolo strangulatum asseverant, testiumque nubem ex ipso Basileensium Ministrorum cætu proferunt. (l) Fuit Carlostadius homo præceps, inflatus & turbulentus, quos ille affectus scintillantibus oculis prodidit. Quod si nemo esset, quicum litigaret, secum ipse litigabat. (m) A Melanchthone male, (n) pessime a Lutheri audit.

II. HULDRICUS ZWINGLIUS, e Milite, ut vult Florim. cit., Canonicus Constantiensis, vel, ut aliis placet, e Glaronensi primum, tum Eremitano Pastore, in urbe Tigurina Parochiæ Administrator anno 1518. effectus, impia sensim per Helveticos Pagos (Cantones) Religionis mutandæ consilia sparsit. Ortus erat Wildenhufii, Doggiorum pago in Helvetia anno 1487. (o) Cal. Januarii. Studiorum suorum curriculum emensus est Basileæ & Bernæ, geminis Helvetiæ urbibus, & Viennæ in Austria. Vix ullum viri probi, Sancti & Apostolici vestigium; integra vero libidinum, aliorumque scelerum examina in illo notasses. Vivis eum coloribus adumbrant *Hazartus* & *Gretserus*, (p) legi etiam meretur *Hartmannus* in Annal. Eremiti Deiparæ ad ann. 1517.

Cum

(b) XII. Præjud. & Respons. Lutheran. & Calvinist. &c. Colon. Agripp. typis Metternichianis anno 1633.

(i) Lib. II. Cap. 7 n. 6. pag. 193.

(k) Hist. Eccles. Tom. VIII. pag. 114.

(l) Hist. Conf. Aug. fol. 41. Flor. Ræm. L. 2. c. 7.

(m) Flor. L. c. Hazart de German. Part. 4. C. 1.

(n) Epist. ad Fridr. Myconium.

(o) Dictionnaire Historique - Portatif Tom. II.

(p) Haz. in Hist. Eccl. Germ. Part. 3. C. 1. Gretf. Tom. 13. pag. 251. & aliis.

Cum Carlostadio, quo usus Magistro Zwinglius fuerat, veram negavit Corporis Christi in Eucharistia præsentiam. Sermonibus suis, quos atro passim convitiis adversus Indulgentias, invocationem Sanctorum, Sacrificium Missæ, Leges Ecclesiasticas, vota, & Rom. Pontificis Primatum, aliasque res sacras congestorum veneno imbuebat, Tiguri quadriennio habitis, & Pseudosynodis anno 1523. XXIX. Jan. ibidem & anno 1529. Bernæ celebratis eo S. P. Q. Tigurensem, Bernensemque detorsit, ut suam in sententiam abirent, & sectam amplexarentur. Quos deinde secuti Constantienses, Basileenses, Schaffhusiani, Santgallenses, Mulhusani & Bielenenses, (q) Joanne Fabro, Constantiensis Episcopi Vicario Generali frustra pro fide Catholica perorante; ipsis Rmis Episcopis Basileensi, Constantiensi & Lausannensi sese incassum opponentibus.

Occubuit Zwinglius in acie contra Catholicas Helvetiorum Tribus die XI. Octobris anno Ch. 1531, ætatis 48. Scribit de fato miselli tam vere, quam eleganter Eminentissimus Hofius in judicio & censura de adoranda Trinitate.

III. JOANNES OECOLAMPADIUS, fidus Zwinglio Achates, linguarum peritia clarus, famosus Basileensium Apostolus paritæ parem ferme etiam finem imposuit. Ex Ordine S. Brigittæ profugus, solennium votorum vinculum rupit, sibi que viduam juniorem matrimonio junxit. Eundem, quem Zwinglius, Basileæ venditavit, sub alio licet explicationis involucrio, errorem, eod. anno Christi 1531. & ætatis 49. ibi e vivis ereptus. Quo modo, non tenetur. (r)

IV. PHILIPPUS MELANCHTHON, magnum inter Protestantes nomen & vir inter eruditissimos Sæculi XVI. numerandus, Brettæ, Electoralis Palatinatus oppido, XVI. Februarii anno 1497. Georgio Schwarzerd (græce *Melanchthon* sonat) patre admodum probo ac religioso genitus, postquam in variis Germaniæ locis tum varia edidisset ingenii ac scientiæ multiplicis specimina, tum viros id ætatis præstantiores de via salutasset, anno 1518. Lutherum se adjunxit.

Inter cætera, quæ scripsit, notatur ab Historicis 1. Apologia pro Lutherum contra Theologos Parisienses. 2. Loci communes in sacras Literas, methodica ratione digesti, invictum Lutherum & incomparabile visum

opus. 3. Commentaria in Epist. ad Rom. 4. Celebris illa *Confessio Augustana*, de qua mox agetur. (s)

Variis interfuit Conventibus & Colloquiis, tandemque vivere desiit Wittenbergæ 19. Aprilis 1560. ætatis suæ 64.

V. MARTINUS BUCERUS, Argentinae ex Patre Judæo natus anno 1491., Ordinem S. Dominici postea amplexus, sed turpis ejusdem desertor Sanctimoniam sibi connubio copulavit, Lutherum scientia linguarum superior, Argentoratensis per plures annos Minister, pacis Sacramentarios inter & Lutheranos frequens interpres. Hermannum Colonensem Archi-episcopum erroribus suis fascinavit. Obiit in Anglia XXVII. Febr. anno 1551. æt. 60. homo levissimus & Proteo ipso mutabilior, dignus tamen a Seren. Landgravio Hassiæ Philippo habitus, quem ad Lutherum, aliosque Doctores Protestantes mitteret, explorandi gratia, eosque ut totidem Oracula consulendi, annon addiscere sibi alteram tori sociam, (*cur non & tertiam, quartam, pluresve?*) prima conjuge adhucdum vivente, per novi Evangelii Canones liceat? (t)

VI. GASPAR SCHWENCKFELDUS, Nobilis Silesius, non Bibliis Sacris, ut quæ Verbum Dei haud essent, verum privatis tantummodo visionibus ac revelationibus docuit esse credendum, fortissimum, quo opinionem suam tegebat, clypeum ex 1. Cor. 3. *Litera occidit, stolidissime depromens*. Alios præterea errores innovavit. Plurimos edidit contra Lutherum, cui totus vilescerat, libellos; plurimis vicissim a Lutheranis exagitatus. (u) Post viginti & octo annorum turbas obiit anno 1554.

VII. JOANNES AGRICOLA, idem cum Lutherum natale solum habuit, eosdem initio propugnavit errores, quos inter primum facile locum sibi vindicet nobile illud: *Quidquid libet, licet: modo in Christum credas*, haud certe alienum ab hac Lutheri pronuntiatione: *Pecca fortiter; sed fortius fide*. Dictus *Antinomorum* parens, quod Legi adversaretur ipse, & eandem Christianis prorsus inutilem esse affirmaret. Concessit fati anno 1566.

VIII. ANDREAS OSEANDER, (x) juxta Nat. Alexandrum Guntzenhusii in Marchionatu Brandenburgico natus, literis qua Wittenbergæ, qua Norimbergæ comprehen-

(q) Nat. Alex. Hist. Eccles. Tom. VIII. pag. 115. (r) Luther. de Miss. priv. Simon Gryneus in vita. (s) Cl. Ulenberg. Hist. de vita, moribus &c.  
(t) Bossueti Hist. variat. Eccles. Protest. gallice edit. Parisiis anno 1740. Tom. I. Lib. 6. pag. 249. sqq. (u) Leg. Conrad. Schlusfeldburg. Catalog. Hæreticorum Lib. X.  
(x) Card. Hofius Lib. I. de Hæres. nost. temp.

prehensis, Lutheri aliquamdiu probavit dogmata, de iisque verba fecit; omnium mox fabula & ludibrium, cum alterum se jactaret Henochum ac mira de hominis justificatione deliramenta, nugasque nugacissimas circumferret. Paroxifino epileptico e vivis sublatuſ est XVII. Octobris anno 1552. ætatis 52.

IX. JOANNES BRENTIUS, Patria Suevus, erroribus Lutheri inter alios hunc adjecit, quod Christi Corpus in vi unionis Hypostaticæ asſereret eſſe ubique, nuncupatus idcirco *Ubiquistarum* parens: in eandem prolapsus est Apostasiæ & Sacrilegii labem, dum e Senatu Canoniorum Wittenbergensium ac Sacerdotum ad turpes nuptias ſecunda etiam vice tranſilire non erubeſcebat. Egit Theologiæ Profefſorem Tubingæ, Ducique Wittenbergensi a conſiliis fuit, mortuus X. Septemb. anno 1570. æt. 72. Eruditus illum ſcriptis excepit, retuditque *Petrus a Soto*, vir ex Ordine S. Dominici egregius.

X. MATTHIAS FLACCUS, ab Illyrici finibus, ubi III. Martii 1520. naſcebatur, dictus *Illyricus*, ſuos primum a Luthe-ro & Melanchthone errores Wittenbergæ hauſit, quorum perofus mollitiem, ad aliud ſeceſſit inſtitutum, multosque pertraxit: unde *Flaccianorum* ſectæ ducit originem. Diſputatum ab eo vehementer cum Confeſſionistis de ritibus externis, de libero arbitrio, & aliis capitibus. Finxit peccatum Originale ipſammet eſſe hominis ſubſtantiam, penitus ſauciatam, atque inevitabili quadam neceſſitate in malum propenſam; contra Viſtorinum Strigelium, Profefſorem Jenenſem, aliter de noxa originis ſentientem, acriter pugnavit; & maxima illius in compilandis Centuriis Magdeburgenſibus pars fuit. Obiit Francofurti ad Mœnum XI. Martii 1574. ætat. 55. Stilo Wittenbergensium Scholaſticorum mordaciſſimo probroſiſſimoque confixus. (y)

XI. NICOLAUS STORKIUS, etiam pro temporum iſtorum uſu *Pelargus* ex græco nominatus, ortu Sileſius, Sectæ *Anabaptistarum*, quæ anno circiter 1522. caput extulit, autor fuiſſe tum Bullingero, tum Melanchthoni videtur. A Luthe-ro, cui primum adhærebat, poſtea defecit, jactansque inſolitas revelationes, pulſus Wittenberga fuit, & incertis diu ſedibus per Thuringiam circumforaneus, ementitæ ſanctitatis ſpecie plebem ruſticam inſigniter luſit, perſuaſitque, ut libertatem profiterentur Evangelicam, & ſe rebaptizari ſinerent. Monaſterii in Xenodochio miſer hic enthuſiaſta

occidit. Diſcipulum ſe illi adjunxerat THOMAS MÜNZERUS, Sacerdos Apoſtata, Zwickaviæ Miſnienſi in Marchionatu ortus, inſaultum terræ portentum, ut ait Flor. Ræmundus, qui, perleſtis aliquot Lutheri libris, primus Germaniæ ſolum ſeducſorum a ſe ſimpliciorum ſanguine rigavit. Turbulentiſſima enim fax belli, Cochleæ teſte, ſeditionisque fuit; cum, peragratis Evangelii ſui cauſa Bohemiæ, Marchiæ, Saxoniæque urbibus Mülhufium tandem, imperiale Thuringiæ oppidum, & circumjacentes pagos ſeditionibus impleret. Ruſtici, qui ſuaſore illo, præcipites magno numero confluerant, jamque horrendis non uno in loco adſecerant Germaniam ruinis, inito prope Franckenhuſium prælio, a Georgio Saxoniæ Duce, ſex millia & amplius fuſi, rebellionis ſuæ pœnam dedere, Antefignanis eorum Münzero & Pfeiffero (alias *Fiſtulatore*) anno 1525. capite plexis. (*Tom. noſtro CC. VI. in Serie Regum Roman. pag. XXVII.*) Oppreſſorum victricibus Principum armis, perduellium Ruſticorum numerus ad centum & triginta, imo quorundam ex calculo ad ducenta millia fertur excurrere. (z)

XII. JOANNES CALVINUS, ut Lutherus Lutheraniſmi, ſic Calvinismi autor, Novioduni Veromanduorum X. Julii anno 1509., patre Gerardo Cauvino, matre Joanna Franka, parentibus obſcuris, at Catholicis natus, abſolutis Luteriæ Pariſiorum humanioribus Philoſophicisque ſtudiis, Avarici, quo Andream Alciatum Jctum ætatis ſuæ facile principem auditurus venerat, amicitiam iniiit cum Melchiore Wolmaro, Germano, Græcarum literarum Profefſore, ab eoque doctri-nam Luthericam hauſiſſe creditur.

Cæpit anno 1534. Piſtavii in Gallia virus ſuum effundere, ubi præ reliquis Antonium Dugium, Philippum Veronium, Albertum Babinotum & Joannem Vernovium amicos ſibi & fidos in propagandis Sctæ ſuæ novitatibus adjutores habuit. (a)

Ab Joanne Morino, judice rerum capitalium æquiſſimo & inprimis Catholico male ſibi metuens, e Regno illo Baſileam ſe contulit, enixus ibidem Cal. Auguſti anno Chr. 1535., ætatis 26. partum compluribus Orbis Catholici regionibus, quo penetravit, exitialem 4. libros *Inſtitutionum Chriſtiæ Religionis*, ut vocat, primum gallice, dein latine conſcriptos, atque ex Lutheri, Oecolampadii, Melanchthonis, & aliorum Sctariorum penu maximam partem depromptos, ſed nova methodo ac purioris Latinitatis

(y) *Ulenberg in vita pag. 448. ſqq. Anabaptiſt. Fabricio Origgy. Saxon. Munzerus Stolbergæ in Herciniis.*

(z) *Cochl. Nat. Alex. & Meſbovius in Hiſtor. Lib. VII. pag. 265. apud Struvium natus fuit*  
(a) *Spondanus Annal. Eccleſ. Tom. II. pag. 424.*



tatis elegantia, ceu veste melius sedente, exornatos, eleganti Præfatione ad Franciscum I. Galliarum Regem addita.

Mox in Italiam profectus ad Renatam, Ferrariensis Ducis conjugem, Novatoribus impense faventem; ex Italia Genevam, Geneva Argentoratum, ubi, suatore Bucero, viduam Anabaptistæ, idoleam Buream (*de Bure: Catharina de Bore Lutheri fuit*) Matrimonio sibi junxit anno 1537. Comitibus Wormatiensibus, ac Ratisbonensibus interfuit. Redux anno 1541. ad Genevenses sibi conciliatos, & summo totius urbis plausu exceptus, ita insolescere, ut leges præscriberet, a quibus discedere nemini liceat, suoque ex arbitrio ageret, flecteretque omnia, dictus idcirco a quibusdam *Papa Genevensis*. Obiit hac in urbe post molestum cum variis morbis septem annorum conflictum anno 1564. ætat. 55. Maji 27.

De genio, vitiisque Calvinii scripsere Maimburg. *de Calvinismo Lib. 4. ad a. cit.* Nicolaus Romæus in *Libro*, cui titulus: *Joannis Calvinii, Noviodunensis nova effigies, centum coloribus ad vivum expressa*. Flor. Ræmundus L. 7. &c.

De Sectæ Calvinisticæ erroribus nemo diligentius, quam *Franciscus Feuardentius*, Celmum Ordinis Minorum lumen, Theologus præstantissimus in sua *Theomachia Calvinistica*, ubi excussit mille & quadringentos errores, ac strenue refutavit. (b)

En præcipuos Lutheri Sectatores, quos compendio expressi, & sine fuce, sine felle Lectatoribus hic propono, veluti per transfennam adspiciendos: partim ne manca sit, quam institui, mutilaque narratio; partim ne continuo, atque in Comitibus, aut colloquiis mentio eorundem virorum ingeritur, ad aliorum volumina, e quibus, quales fuerint novi Dogmatistæ, intelligi possit, non sine molestia recurrendum. Interim plura qui cupit, præter AA. memoratos, Staphylum, Pistorium, Forerum, Bolsecum, Vetterum, & laudatum pag. 7. *Opusc. de Sanctitate Ecclesie*, a Binerio nostro Cl. Weislingerum consulat.

#### §. VI.

*Comitia, in causa Lutheri & ejus Sectatorum ab anno 1521. ad 1546. celebrata.*

**A**Nnorum quatuor & viginti spatio quatuordecim habita sunt in causa Lutheri & ejus Sectatorum, ut mali principii obsteretur, Imperii Comitia: in quibus quid

actum sit, chronologice hic loci, propositæ mihi brevitate memor, exponam.

Anno 1521. ineunte, Carolus V. Imperator, qui flammis opera Lutheri jamtum Lovanii, Coloniae, Moguntiae, Treviris, Halberstadii, Misnæ & Musenburgii publice absumi jusserat, (c) prima Wormatiæ celebravit Comitia, ad quæ præter Electores omnes, permagno Principes, Comites, Baronesque numero confluxere. Adfuit quoque Leonis X. Pontificis Legatus *Hieronymus Aleander*, vir doctus & eloquens, qui sub ipsa Comitiorum primordia gravi Cæsarem, & Procures oratione (d) imminentis Ecclesiae simul, & Imperio a Lutheri molitionibus periculi commonefecit, ostenditque doctrinam illius a Sede Apostolica damnatam, Cæsareo pariter edicto una cum autore suo esse proscribendam. Quod Cæsari & Principibus reliquis placebat consilium, displicere Friderico præprimis, Electori Saxoniae visum, qui, ut ictum ab amplissimo cætu declinaret, multa agebat in Lutherum per invidiam congeri, assertionesque illas ab Aleandro productas, Lutheri esse pernegabat: inauditum jure damnari non posse.

Accitus igitur fide publica ad Conveniendum Lutherus, cum Schruccio, Jona, & Amsdorffio tribus sibi adjunctis sociis, in urbem venit XVI. Aprilis. Postridie ad confessum Principum introducto, Cæsaris Orator Joannes Eckius, JCrus, Archi-Episcopi Trevirensis Vicarius, duo proposuit brevi, planoque responso excipienda: primum, an libros, suo vulgatos nomine, tanquam suos agnosceret; alterum, tuerine, quam continent, doctrinam, an revocare vellet? Affirmavit primum; ad alterum, quod gravioris momenti esset, moram deliberandi sibi, gratiamque fieri petiit: quam & ex singulari Imperatoris clementia in proximum usque diem impetravit. Reversus deinde, cum longo inutilique verborum ambitu & implexa distinctione tria commemoraret librorum suorum genera, atque ipsum quaestionis caput declinare velle videretur; ab Eckio, ut *simplex daret, pressumque responsum*, urgebatur. Tum Lutherus, quoniam ita Cæsarea Majestas ac Principes velint, daturum se, inquit, responsum, quod nec cornutum sit, nec dentes habeat. Nisi manifestis Scripturae Sacrae testimoniis aut evidenti ratione convincatur erroris, non posse revocare se, quæ suis in libris docuit, nec velle. Errasse Pontificem, errasse Concilia, aut certe errandi periculo subjacere &c.

Bilem

(b) Spondanus cit. pag. 425.

(c) Nat. Alexander cit. pag. 121.

(d) Masen. *Histor. Caroli V. & Ferd. L. 1. pag. 48. § 99.*  
Digressio ad Sæcul. XVI. Tom. VIII.

Bilem Cæsari movit responsi ferocitas adeo, ut, interciso hominem colloquio e conventu dimitteret, Ordinibus ad audiendam Imperatoris sententiam altero mane redire iussis. Sententia, Carolo dignissima, lecta in Comitibus XIX. Aprilis, probataque fuit. Ejusdem argumentum ob præstantiam suam ex *Masenio cit.* adnectendum putavi.

"Cæsar, scribit ille, quod pertinaciam hominis (Lutheri) perfractæ obsistentis frangendam desperasset, ipse non est reversus; sed animum suum, scripto manu propria exarato, Ordinibus in hanc sententiam exposuit: *Genus se ducere a Christianissimis Germanicæ Nationis Imperatoribus, a Catholicis Hispaniæ Regibus, Austria Archi-Ducibus, Burgundiæ Ducibus, quorum in Ecclesiam Romanam fida & constans voluntas, Orthodoxæ Religionis, sacrorum rituum, legum, morumque indefessa propugnatio, suis monumentis Orbi etiamnum sit nota. His quidem fato functis, possessionem non minus Regnorum, quam avitæ Religionis ad se curam pervenisse. Decretum sibi esse viventi, morientique laudatis Majorum vestigiis insistere, neque degeneri consilio a recte capta Religione desistere, aut Constantiensis, aliorumque Conciliorum placitis adversari. Cum fratrem unum, suo obstinate ingenio fissum, hallucinari, multo sit evidentius, quam tot ante nos sæculorum viros religiosissimos, prudentissimosque, a quibus tanto intervallo opinionum abeat; ut necesse sit, aut omnes retro Majores nostros, a primis susceptæ Religionis nostræ incunabulis, atque universum nomen Christianum erroris condemnare, aut Lutherum non absolvere. Eam ob rem deliberatum sibi esse, omnes tam impiis conatibus vires objicere, Regna, Imperium, amicos, corpus, sanguinem, vitam demique ipsam impendere; ne capta animorum contagio longius serpat. Neque enim ferendam banc ignominia labem, quæ suo, Principumque nomini per omnem deinde posteritatem adbasura esset, si, aliqua illorum negligentia aut pravitate hæresis Germaniam occupasset. Penitere jam nunc leuitatis, qua perditissimo homini veniam hæclemus, tempusque dederit, quo perfidiæ robur adderet. Non audiendum abs se in posterum: curandumque, ut quamprimum urbe facessat, neque fidem sibi datam, prohibitis in via concionibus, primis violet. Hostis porro, ac perfidiosi hominis loco sibi illum futurum: a Principibus vero expectare, ut æquitati ac Christianæ dignitati convenientia statuatur, ne indultæ perfidiæ animum, viresque indulgendo faciant.* (e)

Varios ea res animorum motus concitare videbatur Principibus. Quare, ne malum, post adhibita incallum media aufereretur, Cæsarem rogarunt, copiam sibi faceret, privatis colloquiis num frangere Lutheri contumaciam possint, tantisper experiundi.

Triduum duntaxat, idque ægre concessum: spatio cujus bini Electores Richardus a Greiffenclaw, Archi-Episcopus Trevirensis, & Joachimus Marchio Brandeburgicus, aliique Germanis Proceribus selecti, omnem quidem lapidem moverunt, ut homini saniora persuaderent: sed frustra: omni enim lapide durior se exhibuit Lutherus, atque Imperatoris jussu XXVI. Aprilis Wormatiam deferuit, symboli sui tenacissimus: CEDO NEMINI. Promulgatum deinde contra illum iisdem in Comitibus VIII. Maji Edictum Cæsaris, quod videre est *Tomo nostro CC. VI. pag. 182. seqq.*

Præclara hæc laudatissimi Imperatoris Constitutio tam parum in nascentibus illis Germaniæ turbis compendii quod adtulerit, non mirabitur, quisquis non pauca, quæ tum temporis erant, obitacula in animum revocaverit. Natæ in Hispania seditiones & gerendum cum Francisco I. Galliæ Rege bellum requirebant Carolum; relinquenda penes duos Viri virorum, Saxonem & Palatinum, fautores Lutheri ac defensores, administratio Imperii erat. Nobilitatis etiam, ac promiscuæ multitudinis in eundem Lutherum aperta satis benevolentia & favor pessimi augebant eventus metum: sed nec ætas potestasque adhuc in Imperatore maturuerant. Quanquam non desunt, qui in Catholicos Germaniæ Proceres, nec consilio, ut par erat, nec auxilio Cæsarem juvantes, maximam admissi tunc piaculi partem conjiciendam esse arbitrentur. (f)

Damnaverant sub idem fere tempus articulos Lutheri, Lipsiæ discussos Academiae seu Facultates Theologiæ Lovaniensis, post & Colonienfis, filiam, ut habet *Wilmii Chron. MS.*, secuta mater. Ex eodem transcripta Colonienfium Theologorum verba cum Lectoribus communico:

*Universis & singulis has literas nostras visuris & auditoris Decanus & Facultas Sacrae Theologiæ universalis Studii Colonienfis cum sincera commendatione salutem.*

**T**amet si omnes, ubilibet consistentes fideles ad communis fidei defensionem nedum cum verum, verum etiam cum propria vitæ dispendio teneantur; præcipue tamen eos ad id munus arctius obstrictos constat, qui pro titulo



tulo professionis ab Ecclesia ad id præ ceteris deputati æstimantur Sacra Theologiæ Magistri, quorum [ut Scriptura ait] unicujusque ensis super femur ejus esse debet, propter timores nocturnos, errores & hæreses, quos, procurante universorum zizaniorum satore diabolo, studio pravorum, pseudoque Catholicorum in Ecclesia per tempora dormientibus hominibus contigit pullulare. Cum itaque ante aliquot hos dies Venerandi Eruditissimique Domini Decanus, & Facultas Sacratissima Theologiæ insignis Studii Lovaniensis Confratres nostri fidei zelo succensi, per proprium suum Nuntium Sacra Theologiæ Baccalaureum librum quendam sub titulo cujusdam Fratris MARTINI LUTHER impressum, ad nos transmiserint, expectierintque quatenus charitatis debito, eundem librum, quem multorum Christi Fidelium aures graviter offendisse acceperant, quod nova, insolita, & noxia quadam dogmata, in fide erronea lectoribus ingereret, perlustrare, & examinare dignaremur, atque si ita mereretur, reprobationis nostræ censuram doctrinaliter adhiberemus. Nos tam sanctis desideriis Confratrum nostrorum merito inclinati, præmemoratum librum, quadringentas, & octuaginta octo paginas in se juxta numerum illis impressum continentem videndum, revifendumque nonnullis ex gremio nostro Magistris commisimus. Et quoniam post illorum examen, talem eum palam comperimus, qui quoad tractatus & materias per Fratrem Martinum Luther editas, atque in lucem (ut fertur) datas, varios in fide & moribus errores, alienaque a Sanctis Doctoribus contineret; & speciatim sancta, vitæque æternæ meritoria humana opera infamet, & reatum eis injiciat, quasi sine culpa fieri non possint, Sacras Scripturas, Sanctorumque Patrum sententias pervertens in sensum perniciosum contorqueat; Penitentia Sacramentum dogmatibus perniciosius annullet, circa contritionem scandalosos errores inducendo, circa Confessionem contra universalis Ecclesiæ veterem doctrinam perversa consilia ingereudo, omnem satisfactionem mortali culpæ remissæ debitam cassando, cum Deus [ut ipse ait] cui mortalem culpam, semper etiam & meritam penam remittat. Thesaurum Indulgentiarum, quas ab olim non solum Patrum Decreta, sed etiam sacra approbaverunt Concilia, ex frivolis irrationabilibus fundamentis, per propositiones in Sanctos, & Sanctorum merita impias, & blasphemias pertinaciter annullet. Circa penas Purgatorii, &

statum Animarum post hanc vitam ex vanis motivis abominabiles errores disseminet; utpote quod in Purgatorio nulla Anima quippiam pro mortalibus patiat, sed duntaxat pro venialibus patiat peccatis, quod Animæ in Purgatorio Deum vitiose culpabiliterque diligant, ac sine intermissione illic peccent, & quæ sua sunt, quærentes plus, quam Divinæ voluntatis impletionem, quod (ut ipse inquit,) est contra caritatem; quod mortui fere non minus, quam vivi in statu sint merendi vitam æternam. Item contra privilegium & primatum Romanæ Ecclesiæ supra Ecclesias ceteras per orbem, erroneas assertiones ab olim pro hæreticis condemnatas auribus Christi Fidelium refricet, & ingerat. Sedem Apostolicam irreverenter palam, & scandalose taxet. Auctoritatem Summi Pontificis impudenter attenuet, utpote qui solam penam canonicam seu arbitrariam, nullam autem penam secundum Divinam Justitiam peccatis debitam, Divinitus sibi data Potestate remittere possit, cum (ut ait ipse) tales penas remittere esset Divinum jus mutare, mandatum Dei irritum facere, & in Deum impiissimum adversarium esse; innumeraque talia scandalosa his non absimilia, imo graviora & perniciosiora in se habeat. Quocirca nuper die Martis penultima mensis Augusti super hoc legitime omnes & singuli convocati, in Congregatione nostra publica, more solito, in Conventu Prædicatorum servata & habita, matura perquisitione præmissa, concorditer censuimus & doctrinaliter judicavimus, præfatum librum tantis scandalis, erroribus, hæresibusque ab olim damnatis repletum, tanquam Communitati Fidelium noxium, jure de medio tollendum, usum ejus inhibendum, supprimendum, & per eos, ad quos id spectare dignoscitur, igni publice cremandum, auctorem etiam ejus merito ad revocationem publicam compellendum. In quorum omnium robur ac fidele testimonium hanc nostram sententiam per Notarium nostrum juratum prædicto libro ascribi, & Sigilli Facultatis nostræ (quemadmodum & has nostras literas) jussimus appensione communiri. Datum & actum Colonia anno salutis Christianæ supra Millesimum, quingentesimum, decimo nono, penultima die mensis Augusti. Per me Henricum de Vorda de Colonia Notarium publicum, & supradicti generalis Studii Colonienfis Pedellum juratum. Hæc communi nomine Theologi Colonienfes.

Idem fecerant & Parisienses. Calamum quoque adversus novitii systematis fabrum generoso conatu strinxerat Henricus VIII. Angliæ Rex, titulo DEFENSORIS FIDEI a Leone Pontifice, & amplissimo Purpuratorum Præfulum Senatu eam ob rem insignitus. (g)

Sed frustra adversus obfirmatæ sententiæ hominem pugnabatur. Cibi etiam saluberrimi corrupto in stomacho morborum plerumque sunt alimentum.

Rugiebat ex castro Wartburgensi Lutherus tanquam e Pathmo & cremo sua (ut ipse vocitabar) frementis instar leonis, & Parisiensium læsus spiculo, quam Facultatem antea dixerat *primam totius Orbis & scientiarum Matrem*, inauditis post convitiis ceu *meram lepram capitalis bæreseos, matrem omnium errorum in Christianitate, Papæ veri Antichristi maximum fornicationis cubiculum* onerabat. (h)

Anno 1522. e Pathmo sua post novem menses ob Carlostadii ausus erumpens Wittenbergam, ineunte Martio, libellos edidit [*verba sunt Strunckii (i)*] omni spurcitia & scurrilitate refertissimos. 1. Contra Sedem Pontificiam. 2. Contra Statum Ecclesiasticum. 3. De vita conjugali, in quo Sacerdotes, Monachos & Sanctimoniales omnes ad incundas nuptias adhortatur. Quo factum, ut e Monasteriis suis ad sacrilega conjugia plures, nulla habita votorum ratione, petulci transilirent, querente licentiam illam atque intemperiem Hadriano VI. Papa, cum ad Fridericum Saxonem scriberet, his verbis: *Tibi debentis omnes, quod nunc passim ab unitate Matris Ecclesiæ recedatur: quod indoctum vulgus nulle præstigiis ac fascinationibus retrahatur a fide, quam suxit ab ubere materno: quod Basilicæ sint sine plebe, plebs sine Sacerdotibus, Sacerdotes sine debita reverentia, & sine Christo denique Christiani &c.* (k)

Responsum Lutheri, quod ad Angliæ Regem, doctissime scriptis ejus involucria detrahentem, dedit, fescenninum est, atque in novo Augiæ stabulo, superbia, impudentia, & rabie obstetricibus, generatum videtur. Spurcissima, quæ plenis in eo buccis crepat, referre Spondanum aliosque & piget & pudet.

In Comitibus eodem anno Norimbergæ exceptis, & in annum 1523. protractis,

Franciscus Cheregatus, Hadriani VI. Nuncius Apostolicus varia proposuit, quæ si æquis excepta auribus animisque, a partium studio immunibus fuissent, persanatura malum videri poterant. Alia ad Principes in obortæ novitatis excidium animandos spectabant; ad spem defectus quosdam emendandi, ab ipsomet Pontifice liberalius forte, quam res ferrent, Ordinibus factam alia. (l) Quibus cum sua Lutherani objicerent *centum Gravamina*, deinceps *Norimbergensia* dicta, executionem tum Bullæ Leonis X., tum Wormatiensis edicti, in novum idque haud exiguum factionis & periculi robur, impediere.

De famosis istis centum gravaminibus quid senserint Gretserus, (m) Surius (n) & Cochläus, illius temporis Scriptor, (o) quid Maimburgus, Curia Romanæ non admodum addictus, & alii; quid porro sentiendum ex æquo sit, leges apud *Josephum Binerum* S. J. (p)

Anno 1524. Imperialia rursus Norimbergæ Comitia habebantur. Misit illo Clemens VII., defuncti XXIV. Septembris Hadriani Successor, Laurentium Campegium, Cardinalem, virum pietate, prudentia, doctrinaque non vulgari præditum, ab omnibus fere Principibus; ipso etiam Cæsaris absentis fratre & Vicario Ferdinando Archiduce obviis perquam benigne exceptum, qui ad Senatum Confectumque Principum admissus, gravi mox oratione omnibus rogando institit, gliscenti Lutheranorum pesti, quæ non Religioni modo ac Sedi Apostolicæ, verum universæ etiam Reipublicæ, legibus licet optimis temperatæ, machinaretur ruinam, fortiter sese opponerent, & Papæ, Cæsarisque sententiam sincere, gnaviter, & strenue exequerentur. Secuta ingens dierum aliquot inter Principes ea super re consultatio, quam XVIII. Aprilis hoc tandem Decretum excepit: *Wormatiense edictum Cæsaris in omnibus Germaniæ terris exequendum esse, quantum pro ratione temporis & circumstantiarum fieri potest. Romanum Pontificem rogandum, ut ad examinanda Lutheri dogmata Generale Concilium in Germania convocet, quamprimum potest. Examinandos interim Lutheri libros a viris doctissimis, & nova Spirensi in urbe Comitia cogenda, in quibus, quid agendum ad usque Concilii Generalis eloquium, quid in rebus Divinis credendum sit, definiatur.*

Multa

(g) Spondan. *Annal. Eccles. Tom. II. pag. 339.*

(h) *Flor. Ramundus Lib. I. Cap. 15.*

(i) *Annal. Paderborn. Lib. XIX. ad annum Cbr. 1522.*

(k) *Hadriani epist. sub nomine Brevis extat Tom. CC. nostro VI. pag. 190. seqq.*

(l) *Mafen. cit. Lib. II. pag. 84.*

(m) *In defens. Bellarm. de translat. Imp.*

(n) *In Commentar. ad ann. 1523.*

(o) *Act. Luth. ad eund. ann.*

(p) *Apparat. Erudit. Part. VII. Art. 4. a pag. 84. ad pag. 92.*

Multa adversus Decretum illud Legatus Pontificius; sed a plerisque vix auditus. Tandem Imperator Carolus inane ipsum ac frivolum declaravit, repudiavitque, ut ex signata Burgis in Castilia die XV. Julii ann. 1524. sat longa epistola constar. (q)

Opposuerunt & aliud Decretum Principes Catholici, quo una cum Legato Pontificis (*cujus Constitutio ad removendos abusum Tom. CC. VI. cit.*) Ratisbonæ statuerunt, Imperiale edictum exacte penitus observandum & sine mora executioni dandum: ut novitia doctrina funditus eradicetur. Recententur isti Principes apud Cochläum & Khammum in *Hierarchia Augustana*.

Spirensia Comitia a Luthericis quidem omissa; Edictum Cæsaris observatum nunquam, Luthero interim Wittenbergenfes intra muros, doctrinæ suæ in Ducatum Luneburgicum & Mechlenburgicum, in Pomeraniam & Holsatiam, in Prussiam & Livoniam per adjuutores suos transferendæ quam studioliſſimo.

Horrendum postea seditionis rusticanae incendium tristis Germania conspexit, hominibus effertis vel una in Franconia ducenta & amplius Monasteria & Nobilium castra mense Majo diruentibus ac flamma absummentibus. *Vide supra §. V. n. XI.*

Anno 1526. convocati a Ferdinando, Cæsaris jussu Spiram ad Conventum Principes Imperii & Status nihil, quod postulabatur, ob animorum dissensiones perfecerunt; cum Lutherani ad mutua sese fœdera contra Catholicos pararent.

Anno 1529. Conventus Principum, aliorumque Ordinum S. R. I. & Statuum Spira: easdem, quibus ante triennium, ob causas iterum coactus. Decretum a Ferdinando & majore Procerum Civitatumque Imperialium parte in negotio Religionis conditum, sex Principibus, & quatuordecim Urbibus Imperialibus haud sapuit. Quare contra ipsum illico protestati: unde nomen *Protestantium* suam habet originem. Nec quidquam ab iis, quo Turcarum coerceretur audacia, subsidii datum: imo protestationem hanc suam Carolo Cæsari Placentiæ moranti significare, ac liberum Religionis exercitium, dum Concilii cujusdam, in Germania celebrandi autoritas rem decideret, XII. Septembris exposcere non dubitarunt. Usque petitio Cæsarem avitæ Religionis tenacissimum, & quantopere ista paucorum Statuum protestatio sibi displiceret, acuminato ipsis responso haud obscure ostendit: qui ad fœ-

derus, quo se communirent, inclinarunt animum, eamque ob causam Smalcaldæ primum, dein Norimbergæ anno 1530. Conventus egerunt.

Idem hic annus erat, quo Augustæ Vindelicorum obeunda ad VIII. Aprilis Comitia Augustus indixerat, tum sponſione libertutisque commearus, ut metus omnis ac mali suspicio abesset, tum facultate, suæ capita Religionis palam proponendi, Ordinibus facta. Frequentissimus fuit celeberrimusque Conventus, ad quem non Lutheranos modo, sed Zwinglianos etiam nota Caroli, coram præfuturi clementia & amor publicus facile adduxerat: causa, quæ non semel alias, gemina: componendum videlicet tandem aliquando Religionis dissidium, & certa in bello Turcico norma communi calculo statuminanda.

Exceptus magnifico apparatu XV. Junii Cæsar, (r) postridie, cum festum CORPUS CHRISTI incideret, solenni ipse supplicationi cum omnibus Principibus Catholicis interfuit, Lutheranis præsentiam excusantibus.

Die Junii XX. prima Conciliorum habita est conventio: in qua adventus Cæsarei causa publice ex scripto, ut mos obtinebat, recitata. (s) Quatriduo post Legatus Pontificius Campegius, vel, ut scribit Cochläus, Campegi loco Vincentius Pimpinella, Rosanus Archi-Episcopus Oratione latina & Cæsaris laudavit voluntatem & cohortatus Principes est, ut *sædum Religionis dissidium cum tanta sui nominis labe & Reipublicæ perniciæ susceptum deponerent, nec paucorum, malo ingenii, affectionisque vitio, dissentientium opinionibus, contra Europam, atque adeo antiquitatem universam adhærescerent: tutiorem viam esse, tot prudentum, Sanctorumque, tum Majorum nostrorum, tum equalium tritam vestigiis &c.*

XXV. ejusd. mensis oblata Imperatori Lutheranae doctrinæ CONFESSIO, a loco postmodum AUGUSTANA dicta, celebris ille Torgensis fœrus, quem Lutherus, ut placet Ulenbergio, (t) informem quasi & crudio-rem edidit; sed reformavit lambendo Philippus Melancthon, sibi-que vendicavit. Porrexerunt & Zwingliani suam. Utramque Theologis examinandam commisit Imperator.

Rejecta communi Principum suffragio formula Zwinglianorum, cum Lutheranis unio Religionum sancienda prima fronte videbatur. Sed concordiae spes, Luthero in

alia

(q) Ex Cochläo Strunckius cit. ad illum ann.  
(s) Masen. ex Goldast. Constit. Imp. Tom. I.  
Digressio ad Sæcul. XVI. Tom. VIII.

(r) Cochl. in act. Luth. Corbin. Khamm.  
(t) Vit. & gest. Luth. Cap. 21. n. 1.



alia prorsus consilia ruente, omnis decollaverat. " Post multas collationes, inquit Spondanus, (u) & disputationes singulis illis numeris (1. inter septemdecim. 2. inter septenos. 3. inter ternos) factas usque ad finem Augusti, cum in nonnullis conciliari posse doctrinam, visum esset (Melanchthone pro ingenio sese ad concordiam faciliorem exhibente, & maxime in restituenda Episcopis sua jurisdictione; unde & pessime tanquam fere desertor apud alios audivit) res tamen demum ad nihilum redacta est, obstante Luthero, qui literis suis vetuit, ne quid adversariis concederetur; sed missa actione domum rediretur."

Emanavit igitur pro coronide tanti Conventus ab Imperatore edictum, ut prisca Ecclesiae fides inconcussa servaretur, donec in Concilio Oecumenico (quod urgere tum quidem ac flagitare DD. Protestantes videbantur) non diu differendo definirentur lites, & Religionis dissidia abolerentur. Decreto huic 1530. die X. Novembris subscribere, sive per se ipsos, sive per Legatos suos CAROLUS V. CAESAR, QUINQUE ELECTORES, PRINCIPES ECCLESIASTICI 30., SECULARES 23., ABBATES 22., COMITES & BARONES 32., CIVITATES LIBERAE 39. (x)

Cæterum res in illo Conventu gestas narrant diligentissime Cochlaeus, qui aderat, & Ulenbergius in *Actis & Vita Lutheri*; Pontanus in *Rebus memorabilibus*; Surius in *suis Commentariis*; Goldastus in *Constit. Imperial.*, Georgius Cælestinus in *locupletissima Comitiorum Augustanorum Historia*, quatuor Tomis anno 1576. edita. (y) De Confessione Augustana examen Polemicum instituit P. Virus Pichler S. J. in *Cursu Theologiae Polemicæ*. (z)

Anno 1532. mense Martio, Cæsar, gliscentem majoribus in dies incrementis pestem sine ferro flammisque sanaturus, Conventum totius Germaniae Ratisbonam evocavit, ut collecti ibidem Principes metuenda Thracarum tentamina propinquiore loco observare possent. Aduere Orthodoxorum Proceres, & Legati bene multi, quorum seriem habet ad a. h. Cochlaeus: Protestantes vero, novi *Confessionista* ab Ordinibus tunc primum avulsi, Sweinfordiae ad Moenum, post Norimbergæ mense Junio coiere: a quibus Albertus Archi-Episcopus Moguntinus, & Ludovicus Palatinus Elector, qui quidem permissu Cæsaris eos convenerant, operam contra Turcas adjungendam ante

impetrare non potuerunt, quam, suspensis tantisper ad futurum Concilium Wormatiensi & Augustano edictis, Religionis interim suae exercitium Imperator Lutheranis permetteret. Permissum illud est, moxque suppetias adversus Solimannum omnes quam liberalissime Smalcaldici Foederis Socii detulerunt.

Anno 1540. reversus ex Hispaniis Carolus integro apud Belgas anno ob Gandavensium tumultus constitit, irretortis quasi oculis, quo rerum Germanicarum turbæ se tandem verterent, circumspectans.

Salutaverant non ignobili Legatione Smalcaldientes tæderati Augustum, & animis (fictene? an candide? non disputaverim) submissis ab eo petierant, adnotante Surius: (a) "Primum ne in eos vi & inopino aggressu rueret; deinde vero, ut omnes Judicii Imperialis actiones, quæ contra bonorum Ecclesiasticorum direptores institutæ fuerant, penitus aboleri sineret: ex his enim omnia Germanicorum Principum dissidia profluxisse, & sine earum abolitione pristinam Germaniæ quietem restitui non posse."

Reddidit post paulo per Nuenarium Comitum Imperator Clementissimus responsum, in Germaniam non venisse se animo hostili, sed Religionis concordiam modo, quo posset, æquissimo ut revocaret: propterea, quid concedere Catholicis velint, quid contra rueri, edisserant. Re diu multumque cum Melanchthone, Bucero, aliisque Theologis suis versata, responderunt Legato Comitum: "Studium concordiae sibi maxime cordi esse: cavendum vero, ne per eam intelligatur (b) ulla rejectio doctrinae, in Augustana Confessione, vel ejusdem apologia quondam exhibitæ: in hac enim sese mordicus persistere velle; solumque petere, ut illius fundamenta in Comitibus publicis per viros idoneos discutiantur."

Postulationi facturus satis amantissimus quietis Germanicæ Carolus, Spiræ Comitum in XXIII. Maji haberi voluit, mox inde, grassantis metu contagionis, Hagenoam translata: quibus a Carolo Cæsare, aliis distento negotiis, Ferdinandus frater præfuit fructu penitus nullo, cum ad Augustanam suam Professionem, tanquam ad saxum polypi, Lutheranorum Theologi adhærerent. Id quod jam ante monuit Carolum vates minime infelix Farnesius a Pontifice legatus, sic, uti fertur, Cæsarem allocutus: "Votum Pauli

(u) *Annal. Eccles. Tom. II. pag. 404.*

(y) *Spondan. ad annum 1530. n. 6.*

*Joann. Mauricii Körneri Augusta Vindel. anno 1713.*

(a) *Comment. rer. gest.*

(x) *Kbamm. loc. cit.*

(z) *Part. II. Append. a pag. 668. ad 796. Typis*

(b) *Cbytræus Lib. 15. Saxon.*

Pauli Pontificis nostri, a tam noxiis seditionibus divulsa Germaniæ membra in sanum integrumque corpus restitui; sed idoneam medicinam respuentium, suæque amantium vulnera, difficillima futura curatio est, inconstantis vitii morbus est, qui neque nomen certum, neque Medicum tam facile habere possit. Polypo omni mutabiliore hæretici, novum indies vultum induunt, quæ nuper in Comitibus Augustanis tanquam oracula Divinæ Sapientiae amplexi sunt, nunc fastidiose negligunt, novamque in formam toties humanasque leges transformant, ut sine lege, sine forma certa, sine constantia, sine fide fidem habeant, & ab his quid tandem sperare poteris, cum Orthodoxis, uni semel assertæ veritati insistentibus commune? quid? ut illi nobiscum conveniant, quibus adeo inter se non convenit; ut novis quotidie sectionibus in diversa abeant, mutuoque errores exprobrent? Ut vero illos indulgentia aliqua emolliendos speres, quos hætenus tua exacerbavit clementia, non est. Quidquid concesseris, satis esse nequit, omnia tibi tribui postulantibus. Suo illi arbitrio de fide statuere, non alieno, jam pridem decretum habent, universalis Concilii sensum, censuramque subterfugient, ac tergiversatione deludent, privatis vero conciliabulis ad fidei imperiique ruinam, bellicque, non pacis artibus utentur. Quid enim hætenus congressibus omnino impetratum? quid deinde illis etiam legibus, quibus se tibi obstrinxerunt, hucusque confectum? an quisquam tam inter rebelles parum audax repertus est, qui Legum, Decretorumque tuorum septa non transiliret? quid Schweinfurthi, quid Noribergæ pactis induciis constitutum fuerit, meministi. Receperunt, nullis se deinde locis Religionis formam mutatueros, aut quemquam suæ societati adjuncturos, pœna in prævaricatores constituta: qua fide ista præstiterint, docent tentati Legationibus Veneri, Angliæ, Galliarque Reges; docent liberæ Urbes, Dux Wittenbergicus, Daniæ Rex, in communionem fœderum adducti. Nunc porro illud agunt, ut summum Spiræ iudicium evertatur, ne quos in posterum suorum scelerum patiantur arbitros, & bonorum Ecclesiasticorum jura sine iudicis aut pœnæ timore violent. Vides, opinor, quantum his, noxiæ libertatis præconibus, concedendum sit, ut tuarum illos partium habeas. Tuæ illi voluntatis non aliter futuri sunt, nisi illorum prius voluntati te adjunxeris. Quantum vero in Religionis articulis, illis accesseris, tantum a veritate

deflectas, necesse est. Inconcussa fidei nostræ fundamenta, suæ innixa petra, steterunt hætenus, neque dimoveri, sine veritatis ruina, loco possunt. Hæc te, o Cæsar, ad levissimorum hominum arbitrium transferre, neque ratio, neque Religionis nostræ sanctitas patitur. Si quid tamen in rebus fidei controversum inciderit, non ignorabis alieni esse iudicii, neque tuo arbitratu definiri posse. Romana hoc sibi Ecclesia, inter recte sentientes, officium postulat; qua sine Concilia aut indicere, aut inire, negotium est, quod parum æquitatis, periculi multum habear; apud illos præsertim, qui Apostolicam Sedem suis everfam fundamentis obfirmate cupiant. Quocirca alio tibi consilia ad Germaniæ quietem certius possidendam vertenda sunt, ut & majori vacet Religio periculo, & firmiori opere pax instruat. Rex Galliarum ad pacis armorumque consortium tibi erit admittendus. Quo, uti pronus est, admissio, generali Orbis Christiani Concilio Religionis dissidia sunt componenda. Rebelles ad obsequium aut ratione, aut bello revocandi. Hoc nisi feceris, in re tanta, post impensas frustra cogitationes & vires, laboris fructum te denique amisisse senties, neque promovisse quidquam, nisi ad majorem Imperii labem ac ruinam. Etenim nihil est, cur placidis eos consiliis regendos speres, qui, licet imbelles hætenus, & parvis orti principiis, adeo tamen insolenter in tuum Pontificiumque nomen grassati sunt, ut illi cælo dilapsi, nos tanquam terræ filios despicerent, hos, ut levi conciliationis momento a jurata perfidia abducendos existimes, id vero erit ex pumice aquam exspectare. Denique omnis mora, tot conciliabulis impensa prorsus ad majus Religionis excidium nefariis hominibus profuerit. Quin eam rescindis, Maxime Cæsar, ne denique tot Principum viribus aucti non Germaniæ modo, sed & vicinis nationibus metuendi existant." Hæc *Farnesius. (c)*

Anno 1541. Ratisbonam iter maturavit Cæsar, novumque ibi in Aprili Conventum, a se multisque Episcopis, Principibus Catholicis ac Protestantibus, nec non utriusque partis Doctoribus insignem habuit. Spem componendi aliquando fatalis dissidii adferre visus Legatus Pontificius, *Gaspar Cardinalis Contarenius*, Vir summa literarum eruditione, morum probitate, ac rerum prudentia conspicuus. (d) Limavit is XXII. Articulos a Bucero compositos. Imperator omnes ad concordiam adhortatus, XIII. Aprilis trium utraque ex parte Theologo-

(c) *Masfen. cit. Lib. V. n. 79.*(d) *Spondan. ad b. a.*

logorum examini rem subjiciendam statuit. Delecti ex Catholicis *Julius Pflugius, Joannes Gropperus & Joannes Eckius*: ex Protestantibus *Melanchthon, Bucerus & Pistorius*. Tres quoque testes adjuncti, qui & audirent diligenter omnia, & quid actum utrumque ab Theologis, quid conventum fuerit, testari fideliter possent. Præsides constituti istius disputationis *Fridericus Princeps Palatinus & Nicolaus Granvellanus*, qui sua, dum opus foret, autoritate frænum injicerent linguis, scholasticumque furorem, in severis ejusmodi congressionibus subortu facilem, coercerent. Mensis disputatio tenuit, aut eo etiam amplius; (e) sed actum, quod optatam ad concordiam faceret, nihil, Protestantibus Lutherum suum, ceu missum e cælo oraculum, semper audientibus. Igitur rejecta & hac vice ad Concilium generale actio, his tamen, ne majora interim vulnera Religioni Catholicæ infligerentur, adstipulante Principum Collegio, die XXIX. Julii articulis ab Cæsare decretis: 1. *Ut ante Concilium proximum futurum nemo aliquid in posterum doceat contra articulos, a Theologis utriusque partis unanimiter admissos.* 2. *Ut omnes actiones & processus Camerales, qui hucusque adversus Ordinem Protestantium causa in Tribunali Cæsareo instituti vel agitati fuerant, conservandæ pacis causa usque ad idem Concilium suspendantur.* 3. *Ut inconcussa ac firmiter in posterum observetur pacificatio Norimbergensis de anno 1532.; ideoque nulli Principum ante finem Concilii prædicti liceat, alium Principem bello aggredi, infestare, premere, vel despoliare, non solum ex causa diversæ Religionis, verum etiam ex alia qualicunque. Sin vero aliter a quoquam actum vel attentatum fuerit; liceat oppressæ parti ad Camerale Tribunal se recipere, & ab eo justitiam ac pœnalia mandata contra hujusmodi invasorem petere.* (f)

Anno 1542. bini celebrati per Ferdinandum Rom. Regem, Cæsaris denuo vices gerentem Conventus, Spira in Februario alter, alter Norimbergæ mensibus Julio & Augusto. Actum in utroque cum de mittendis contra Turcam auxiliis, tum de Concilio generali tandem inchoando, quod ante Carolus, quam in Africam trajecit, Paulo III. Pontifici festinandum, summo quo potuit studio commendaverat.

De Concilii loco, quod Tridentum erat situm ad Germaniæ fines oppidum idque sat opportunum, inter Catholicos Principes,

Cæsarisque Legatos jamtum convenerat, auctore Joanne Morono, Mutinensium Episcopo, Pontificis Legato. Protestantibus, vel quod diffiderent, se posse in ea causa consistere; vel quod facti audaciores, semet & Dominos & arbitros facere vellent, nec locus illè, nec antiqua Concilium per Papam indicendi consuetudo probabatur. Paulus interim haud segnis operum, vulgato XXII. Maji ejusd. anni per Europam Diplomate (g) inchoandam decrevit Synodum festa Omnium Sanctorum luce, qua ante annos quatuor & viginti suos Wittenbergæ errores docendi initium Lutherus fecerat. Verum recrudescente Cæsarem inter & Franciscum I. Galliarum Regem bello & Turca Hungariam devastante, revocandi, quos Tridentum suos jam intra muros salutaverat, Cardinales Legati, & Synodus aliud rursus in tempus differenda. (h)

Anni 1544. Januario mense celeberrimum Spira vidit Imperii Conventum, cui præter ipsummet Cæsarem, & Ferdinandum Rom. Regem, Electores (quod raro alias) ad unum omnes; plerique etiam, unum alterumve si exceperis, Principes interfuerunt. (i) Ubi, cum plus Protestantibus Cæsar, quam per Pontificis in Ecclesia auctoritatem, fideique Catholicæ liceret integritatem, dedisset, quo suam faciles in petitionem efficeret; hos quidem sensit facillimos; Pontificem contra non leviter offendit. Decretum conciliandis sibi Protestantium reliquis, X. Junii a Carolo interpositum hujus fere argumenti erat: (k) *Augustani leges edicti usque ad æcumenici vel nationalis Concilii, aut certe, his deficientibus, usque ad autumnalem, brumalemve Principum Conventum suspensæ habeant, ubi doctorum virorum judicio de pace Religionis consultetur, quæ suo interim pede, citra litem ob bona Ecclesiasticorum occupata, & Imperialis judicii interminationem subsistat: ac promiscue ad hujus judicii subsellia utriusque Religionis viri idonei Spira recipiantur. Ludimagistri quoque & Ecclesiastæ Protestantium admittantur &c.*

Hujus porro Decreti certior Pontifex factus, prolixas ad Carolum literas XXIV. Augusti exaravit: de quibus ita Spondanus: (l) "lis benigne Pontifex Imperatorem monuit, Decreta Spirensia tam ad ipsius animæ periculum, quam ad maximam Ecclesiæ perturbationem tendere. Minime esse ab Ecclesiæ ordine & institutis discedendum; quibus præcipitur, ut, quoties de his,

(e) *Pallav. Hist. Conc. Trid. Lib. IV. Cap. 14. n. 5. & seq.*

(f) *Vid. Recept. Imperii edit. Ratisbonæ.*

(h) *Spondan. cit. pag. 477.*

*cit. Lib. XX. ad b. a.*

(i) *Annal. Eccles. Tom. II. pag. 482.*

(g) *Extat Tomo nostro CC. VI. pag. 808. seqq.*

(i) *Nomina Principum vid. in Annal. Paderb. Struckii*

(k) *Sleidanus Lib. XV. pag. 446. apud Struvium.*



his, quæ ad Religionem pertinent, disceptatur, ad Sedem Apostolicam omne iudicium semper referatur, nihilque, illa inconsulta, statuatur. Ipsum tamen Imperatorem ita rem Spiræ egisse, ut, nulla habita ratione aut mentione Pontificis, cui Divina & humana jura supremam cum cogendi Concilia, tum statuendi de his, quæ ad Ecclesiæ unitatem, utilitatemque spectant, auctoritatem dederunt, de Concilio Generali vel Nationali, seu etiam de futuro Imperiali Conventu, in quo de Religione tractaretur, statuerit: idiotis & hæreticis iudicium de illa permiserit, de bonis sacris pronunciarit, damnatos ab Ecclesia pristinis honoribus restituerit, non assentientibus iis, qui veterem & religionem observantiam præstarent. Exitima- re se, non ex ipsius hæc esse profecta sinu, sed malevolorum, cum quibus amicitiam iniit, consilio facta, ut aliquam ab alienati animi significationem daret. In Sacra Scriptura plurima extare exempla vindictæ Divinæ in eos, qui Summi Sacerdotis munera sibi vindicare ausi essent. In Ecclesia Christiana Deum Principes ac Populos Sedi Romanæ, cæterarum Ecclesiarum principi fideles, summis beneficiis amplificasse; ejusdem vero hostes gravissimis pœnis affluxisse. Ideo magis esse ipsi Imperatori verendum, quod originem duceret ab iis Imperatoribus, qui non plus honoris Ecclesiæ Romanæ derulissent, quam ab ea recepissent. Quod Ecclesiæ emendationem cuperet, & controversiarum conciliationem, id esse inprimis laudandum, petereque se, ut in eo suam operam sibi præberet, cui ministerium hoc atque curam Deus commisisset. Adjutorem ipsum posse ferre; Rectorem atque Caput non posse. Obtemperaret ergo suis monitis, & cum esset primogeniti filii loco, parentem salutaria consulentem amplecteretur; politis armis paci studeret; aut si pax coire non posset, controversiam omnem & belli causas Concilii a se jam indicti & rursus indicendi disceptationi submitteret. Postremo quæ Romanæ Ecclesiæ adversariis nimia quadam lenitudine concessisset, ea penitus rescinderet: alioqui namque futurum, ut severius agere cum ipso cogeretur, quam vel consuetudo sua, vel natura, vel etiam voluntas ferret. Hæc & alia permulta in eundem sensum Paulus." Hucusque Spondanus.

Literas has, quas Papa calamo scripsit, (cum Masenio loquor) felle juxta ac melle illito, ut sine ulla animi exulcerati testificatione

per Odatium Legatum Imperator accepit: ita tulit acerbè novus Saxonum Apostolus, contra eas ut librum Teutonice scriptum juris publici faceret, qui sine pudore nec recitari, nisi ab impudentissimo, nec legi possit.

Anno 1545. pace Carolum inter & Franciscum summa totius Orbis Catholici & præsertim Pontificis lætitia, plausuque Crespiaci in Sueffionibus jam sancita, Ferdinandus Rex & Cardinalis Otto Truchsesius, Episcopus Augustanus, Cæsare per invaletudinem nonnihil impedito, in Comitibus Wormatiensibus XXIV. Martii, quid præcipue causarum sit, cur convenerint, indicabant: nimirum ut Religio, jus, paxque per Imperium constitueretur, & pro bello Turcico iusta perurgerentur subsidia. Pacem Crespiacensem utrumque pro scopo habuisse, probatam ab Rege Gallicæ Tridentinam Synodum, & auxilia adversus Turcam promissa, remittendum ad illud Concilium modo indictum, quidquid de Religione inter se partes controversentur; morem decretis istius Concilii omnino esse gerendum. Annuentibus propositioni Catholicis, Lutherani Principes, Saxo inprimis & Landgravius per Oratores suos publice declararunt, nihil a se pro bello Turcico contributum iri, (m) nisi per edictum Cæsareum & a subjectione Cameralis iudicii & præstanda Concilio Tridentino obedientia Lutherani omnes eximerentur: pro nullo a se haberi illud Concilium, semperque habendum.

Pupugit Imperatorem, qui serius ad diem XVI. Maji Wormatiæ advenerat, ea Vilviorum suorum paucitas, ut par erat, gravior; verum multo gravius Lutheranorum Principum insolens obstinatio, qui a proposito suo nullis ejus monitis, adlatisque rationum momentis removeri se paterentur, ausi adeo Francofurti cogere Conventum, in quo de *Brunsvicensis belli sumptibus, cujus Principatus Ducem Henricum, possessionibus ejectum ob æmulationem ex Religione & bonis Ecclesiasticis natam, vinculis cum filio attinebant, de auxiliis Coloniensi Archi-Episcopo (Hermannno a Weda) contra Cæsarem sufficiendis, de prorogando fœdere Smalcaldico inter Sacramentarios, Lutheranosque inito, de repudianda denique Tridentini Concilii societate statuerunt.* (n) Perspiciens igitur sapientissimus & æquissimus Cæsar, quo ista Protestantium molimina collimarent, antequam curando ulceri applicaret ferrum, dissolutis Comitibus Wormatiensibus, alia Ratisbonæ celebranda duxit: quamvis suæ id ipsum auctoritati adversari putantes Tridentinæ Synodi Proceres, consiliorum Pontificis

(m) *Cbytræus Lib. XVI. Saxon.*

(n) *Masen. Lib. VI. pag. 281.*

ficis, Cæsarisque haud satis gnari resisterent, ac desperatum dicerent adversarios conciliandi studium.

Anno 1546. non Principes Lutherani, ut Cæsar jusserat, sed eorundem Legati Ratisbonæ convenerant de rerum summa acturi. Egerunt utriusque partis Theologi complurium intervallo mensium pro more nihil, varias in opiniones versi: Stabant a Catholicis *Petrus Malvenda*, Dominicanus, *Erardus Billichius*, Carmelita, *Joannes Hoffmeisterus*, Augustinianus, cum celeberrimo Doctore, Lutheri malleo, *Joanne Cochleæ*. Pro A Catholicis pugnabant *Martinus Bucerus*, *Joannes Brentius*, *Georgius Major*, & *Erardus Schneppius*. Tridentinam Synodum rejiciebant hi; laudabant isti ac persuadere modis omnibus connitebantur. Cæsar abruptum Ratisbonæ colloquium & desertum a Protestantibus, invenit.

" Sed quis afflictissima membra, inquit  
" *Spondanus*, (o) condemnaverit, si, capite  
" sublato, torpuerint? Unde illis respira-  
" rio post vitalia suffocata? Magis certe mi-  
" randum, quod tam diu sese regere potue-  
" rint, delapsa, qua suffulciebantur, co-  
" lumna. Mortuus enim hoc anno XVIII.  
" Februarii MARTINUS ille LUTHE-  
" RUS, qui in oppugnanda Ecclesiæ Catho-  
" licæ doctrina & ritibus, Schismaticis om-  
" nibus posteriorum horum sæculorum  
" viam aperuit, atque arma, quibus & sese  
" &, qui eis adhererent, confoderent, sub-  
" ministravit."

Porro de morbi perinde ac mortis genere non eadem est Historicorum sententia. Aliter scripsere de illo Catholici; (p) aliter Protestantes: (q) quos, cui lubet, adire poterit. Obiit Islebii in patria sua Lutherus, quo controversias aliquot componendi causa a Comitibus Mansfeldicis evocatus fuerat, anno ætatis climacterico 63. Ordinis sui religiosi & avitæ fidei desertor, errorum, ex aliarum ætatum tenebris erutorum Magister, & novi Evangelii parens, qui cum *Simone Mago* ac *Manichæis* humani arbitrii libertatem, operumque bonorum mercedem impugnare aggressus est: cum *Montanistis* rectum præmentientiæ usum, cum *Donatistis* sacrificandi ritum subvertit: jejunia cum *Eustachianis*, funebres comprecationes cum *Arianis* damnavit: cum *Eunomio* soli fidei scelerum expiationem tribuit; cum *Joviniano* religiosam proscripsit continentiam; cum *Nestorio* Patrum scripta, Conciliorumque placita errorum plena arguit; cum *Photio* castitatis me-

ritum, Presbyterii dignitatem, ac Pontificii nominis auctoritatem conculcavit; cum *Bevengario* in Eucharistia substantiam panis vinique admisit; cum *Waldensibus* indulgentias aspernatus est, Sanctorumque miraculis fidem derogavit; cum *Wicleffo* & *Husso* pleaque Ecclesiæ Sacramenta, summumque ejus Caput Pontificem execratus est. (r)

Ob eundem hunc Lutherum, sparsamque ab eo per Germaniæ terras doctrinam & hæc Ratisbonensia Comitia Imperii habita, sed suo, ut priora alia, fructu caruerunt.

Tum vero Cæsar, præcisus a Lutheranis, pro fœdere Smalcaldico quasi pro Palladio suo decertantibus, omnes pacis reducendæ vias intuitus, quo rebelles compesceret, cum Pontifice, Principibus Catholicis, nonnullis etiam Lutheranis, *Mauritio* & *Augusto* Saxonæ Ducibus, *Alberto* & *Joanne* Marchionibus Brandenburgicis, fœdus iniit, vi armisque domiturus, quos clementia hactenus & sanis rationibus & conditionibus æquissimis non potuit.

" Neque enim bellum Religionis causa,  
" ut refert *Binerus* noster, (s) paratum vi-  
" deri voluit; ut quosdam Lutheranos ad se  
" pertraheret: sed in læsæ Majestatis Divinæ  
" & humanæ reos se moturum, qui, falso  
" Religionis prætextu incisus nervis ac nexi-  
" bus, Rempublicam, totamque Imperii  
" molem conentur evertere, despecta pote-  
" state Cæsarea, omnibusque viis pacem in  
" Germania per tot Comitia stabiliendi pro-  
" terve abjectis: contra Imperatorem Con-  
" ventus cogi, & cum exteris Principibus  
" pangi fœdera: relicto judiciorum ordine,  
" privata illa atque truculenta diffidationum  
" jura suscitari denuo, in perniciem quietis  
" & tranquillitatis publicæ. Subditos Im-  
" perii impune jam toties armis invasos, at-  
" que vi injusta Principes etiam Provinciis  
" suis dejectos: Henricum Brunsvicensem  
" a Landgravio urbibus suis spoliatum, ad-  
" huc dum vinctum teneri, & in carcere  
" squalescere: ipsas Imperii bases prope-  
" diem eversum iri, ni Caput invigilet, &  
" turbulentis conatibus obviam eat.

Hæc belli, a fœdere Smalcaldico nomen mutuati, initia: quod qua fortuna gestum ab Imperatore confectumque sit, cum Tom. CC. VI. in Serie Regum Romanorum pag. XXIX. legi queat, hic supersedeo; quin tamen omittendum videatur, quod de bello isto adnotat Cl. Benedictus Schmidius

JCtus

(o) *Annal. Eccles. Tom. II. n. 11.*

(p) *Cochl. Ulenberg. Flor. Ræm. & alii.*

(q) *Sleidan. Jonas cum pluribus aliis, quos citat Struvius Period. X. Sect. IV. de Carolo V. pag. 1042.*

(r) *Mafen. Histor. Carol. V. & Ferdin. L. VI. pagg. 283. & 284.*

(s) *Apparat. Erudit. Part. III. Cap. IV. de Concil. Trid. pag. 323.*

ICTus (t) Sæc. V. §. II., nimirum vel solam ejus belli recordationem adeo. esse atrocem ac tetram, ut horrore facile quemvis percellat: quis enim non obstupescat cum *Oertelio*, per varias Europæ partes ab anno 1550. ad annum 1558., grassantibus ejusmodi Religionis dissidiis, ac violentis schismatis, 39. Principes, 148. Comites, 285. Barones, 147518. Nobiles & 700000. Plebejos, excepto etiam bello Suecico deinceps consecuto, fuisse interemptos: non detrectare se amplius, Viri CARISSIMI nomine compellare D. Doctorem Lutherum, utpote qui sanguine humano tam copioso sterit. *In hanc ferme sententiam Bambergensis Profess. jurium Ordin. & Publ.*

Vidimus, quæ acta sunt in causa Religionis Luthero vivente: nunc post ejus obitum eadem in causa quæ annis reliquis ad finem Sæculi XVI. discussa potissimum ab Imperii Magnatibus & pertractata fuerint, consideremus, a me, brevitatis rursus memori, explicanda.

## §. VII.

*Discussa & pertractata in causa Religionis post Lutberi obitum ad finem Sæculi XVI.*

PRincipem haud dubie locum inter ea, quæ post mortem Lutheri in Religionis negotio evenere, merentur famosum Interim, Forma Reformationis, Concilii Tridentini Suspendio, Transactio Passaviensis, Pax Religionis, Reservatum Ecclesiasticum, Colloquium Wormatiense, Liber Concordiæ, quibus adnectere juvat quæstionem, cur DD. Protestantes Concilio Tridentino obedire noluerint. Suo isthæc capita ordine Lectori benevolo ob oculos pono.

## I. Famosum INTERIM.

EST hoc aliud nihil, quam edita Augustanis in Comitibus anno 1548. & a Carolo V. Imp., Smalcaldicorum recens profligatorum Victore gloriosissimo proposita Imperii Ordinibus *Declaratio, quomodo in negotio Religionis per Imperium usque ad definitionem Concilii Generalis vivendum sit.* Hanc alii dixerunt *Interreligionem*; alii famoso vocabulo *INTERIM*; alii demum, Spondano teste, (u) propius ad rem & nomen *Interim* appellavere. Plures istius tituli apud Struvium, (x) cui prælusum videtur in Col-

loquiis Augustæ, Wormatiæ, & Ratisbonæ quondam habitis. Edendæ porro Declarationis *Interimisticæ* ac publicandæ hæc anfa fuit, hæc occasio:

Proposuerat in amplissimo, frequentissimoque Procerum Germaniæ ferme omnium Senatu, Augustam Vindelicorum Ulma ad Cal. Sept. translato Cæsar, bellorum, quotquot Germanorum terras miserandum in modum hætenus lacerassent, & calamitatum agmina ex solo Religionis dissidio tanquam Pandoræ pyxide prorupisse. " *Porro nullum duratura quietis superesse remedium, nisi crescentis odii, seditionisque venenum ipso in fonte exsiccetur, & infecta perfidiæ tabe membra ad sanitatem mature revocentur. Prudentium vivorum judicio illam vulgi temeritatem adstringendam esse... Huic rei Generale totius Europæ Concilium, ad quod rerum Divinarum sapientissimi quique adhibeantur, perquam videri opportunum. Procerum illud Germanorum voluntate, Tridenti nuper coactum esse, ad cuius arbitrium, non minus ex humana ratione, quam veteris Ecclesiæ instituto æquum sit accedere.* Hæc ex Masenio. (y)

Et sane oratione sua tantum effecerat Augustus, ut & Elector Palatinus & Mauritius Saxo Lutherani, & Civitatum Legati, (z) Concilii Decreta pro sacrosanctis se habituros promiserint.

Sed enim spem Imperatoris & optimos conatus unica remorabatur Concilii sedes. Tridentum volebat redire Patres, atque a Paulo III. Pontifice per Madruccium Cardinalem & Mendozam Legatum suum flagrantissime postulabat. Nec itum in sententiam Caroli a Paulo, nec a Patribus Bononiensibus. (a) Quod cum Cardinalis primum, dein Legatus ad Cæsarem scripssent, malum is longiori ex mora metuens, imponendam Theologis Provinciam censuit, ut Formulam quandam Confessionis communi opera conciperent, quæ *INTERIM*, donec a Concilio Generali dogmata Fidei definita fuerint, ab omnibus observaretur. Delecti in istum laborem *Julius Pflugius*, Episcopus Naumburgensis, *Michael Heldingus*, Episcopus Sidonius, Moguntini Archi-Episcopi Vicarius, & *Joannes Agricola*, Islebius; quibus apud Flor. Ræmundum adiunguntur *Brentius*, *Bucerus* & *Melanchton*. Hi post longam disputationem libellum conscribere, sex & viginti articulos de præcipuis Religionis Christianæ dogmatibus comple-

(t) *Tentam. & declaratio Histor. Imper. & Fundam. Legalis de Cæsar. jure Eccles. in Statum. Eccles. Protestant. Germanice edit. Francofurti & Lipsiæ 1754.*

(u) *Annal. Eccles. Tom. II. pag. 515.* (x) *Corp. Hist. Germ. Tom. II. Period. X. Sæc. IV. pag. 1056.* (y) *Lib. VII. ad ann. 1547.* (z) *Flor. Ræm. Lib. III. Cap. 17. n. 2.*

(a) *Ex Pallav. & Spondan. Maimburg. Hist. Lutheranismi. Lib. IV.*



plectentem, cumque Cæsari obtulerunt: qui convocatis Imperii Ordinibus, XV. Maji librum proposuit, & Imperiali postmodum Edicto sanxit. Hic liber, hæc Constitutio est INTERIM illud famosum, de quo varii varia.

Scriptis impugnarunt illud *Robertus Cevalis*, Episc. Abrincensis, *Franciscus Romanus*, Ord. Prædicatorum Generalis, & *Nicolaus Bobadilla*, ex primis nascentis nostræ Societatis Collegis, Hispanus.

Inter heterodoxos *Gaspar Aquila*, *Philippus Melanchthon*, sed mitius; acerrime *Joannes Calvinus*. Paucis: neutri parti ex integro probabatur INTERIM.

"Orta est, scribit *Binerus* noster, (b) occasione istius Constitutionis Cæsareæ nova Lutheranorum divisio: Alii enim, qui cum Illyrico & Amsdorfio eidem oblietabantur, nullam admittentes in doctrina Lutheri mutationem, Lutherani rigidi dicebantur; alii vero, qui cum Melanchthone tempori serviendum putabant, Lutherani molles, *Adiaphoristæ* & *Interimistæ* sunt appellati: alii rursus *Interimistæ Imperiales*, alii *Interimistæ Lipsienses*. Ut adeo Lutheranismus, qui tempore Conditoris sui in 34. Sectas jam fuerat divisus, post ejus mortem in plures, quam centenas, sit dissectus."

Notiores ex illis recenset ordine alphabetico *Godefridus Wejerus* item noster, in libello germanice edito Coloniae typis Widenfeldicis anno 1681., quem *breve Chronicon de Ortu & Occasu Evangelii Lutherani & Augustanæ Confessionis* inscripsit.

## II. FORMA REFORMATIONIS.

DE hac ita *Wilmii Chronicon* MS.: "Ut Imperator (*Carolus*) offendicula hæreticorum, quæ ex pravis Cleri moribus nata fuerant, e medio pariter tolleret, FORMULAM REFORMATIONIS, a piis & doctis viris conceptam, diuque examinatam tradidit Ecclesiastici Ordinis Statibus: qui salva Summi Pontificis auctoritate, juxta eam se suosque reformaturos promiserunt. Injunctum illis, ut Synodos Diocesanas singuli ante Martiniana celebrarent; Provinciales vero ante Quadragesimam sequentem." FORMULA hæc REFORMATIONIS tam antiquior anni 1549., quam revisa sub Ferdinando Imp. anno 1559. suis cum adjectionibus, extat *Tom. nostro CC. VI. pag. 742. & seqq.* Idem Imperator Carolus, iisdem in Comitibus & pacem publicam decrevit ser-

vandam, & Ecclesiasticos omnes Concilio Tridentino mox redintegrando, interesse voluit. (c) Vide, quod promissum est *Tom. CC. VI. cit. pag. 415.*

## III. CONCILII TRIDENTINI SUSPENSIO.

PAULO III., clarissimæ recordationis Pontifici, datus Successor fuerat *Julius III.*, antea *Joannes Maria de Monte*, Arcinus, ad diem VIII. Febr. A. 1550. electus tanto majori omnium admiratione, quod eundem Galli crederent a Cæsare aversum (utpote quo authore & Tridento abierant Patres, & Bononiæ substituerant) mox tamen hic, verso in favorem, per *Cosmum*, Ducem Florentinum Carolo, ejusdem nutu e 50. Cardinalibus, Conclave ingressis ad supremam Orbis Catholici dignitatem evocaretur. Anno jubilar, in sui primordia regiminis cadenti, more solemniter celebrando primas Pontifex curas impendit; secundas Concilio, quod pro Bononia stans, ante damnaverat, Tridenti nervis omnibus restituendo: pro rerum officiiq; mutatione suam quoque mutare sententiam & studia, viri prudentis esse arbitratus.

Adducto igitur in vota sua, idque arte non mala (d) *Henrico Galliarum Rege*, hortabatur Carolum, ut in Comitibus, quæ Augustæ Vindelicorum tunc rursus fervebant, Protestantes, ad petendum una cum aliis Imperii Ordinibus a Pontifice Concilium Tridentinum, induceret, quo quandam sibi ineri parendi necessitatem imposerent Concilio, ipsis postulantibus concessio. Ita subtilis ingenii perspicacia suo diversos Principes, tanquam horologia pondere moderabatur Julius.

Nec mora: impetratum de Concilii institutione Diploma Pontificium, anno 1551. prælegi in Conventu Augustano jussit Cæsar, ad omnesque Imperii Ordines, cum mandato Tridentina in Synodo comparendi destinavit. Cautum ad hæc omnibus fide publica de via, loco, officioque in promenda sententia libere obeundo. Miserat jam Tridentum Legatos suos Pontifex, *Marcelum Crescentium*, *Sebastianum Pigbinum*, & *Aloysium Lipomanum*. Miserant & suos Deputatos Elector Brandenburgicus *Joachimus II.*, Dux Wittenbergicus, Argentina, aliæque urbes. A Mauritio Saxonie Electore Philippus Melanchthon venerat. Habuit etiam sex sub Julio Sessiones; atque, ut refert *Sleidanus* (e) numerati sub ista tempora Tridenti præter Legatos Pontificis & Cardinalem Tridentinum, Episcopi 62. ex iis Germani 8., Hispani 25., Sardi 2., Siculi 4., Hun-

(b) *Appar. Erudit. Part. III. C. IV. §. 7. pag. 330.*

(d) *Masén. cit. Lib. VII. ad ann. 1550. n. 60.*

(c) *Spondan. cit.*

(e) *Lib. XXIII. pag. 771.*

Hungarus unus Agriensis, reliqui Itali: Theologi vero 42. Verum, surgentibus novi belli flammis, suspendendum rursus Concilium fuit: quæ quidem suspensio non sine novis decumanisque Religionis Orthodoxæ vulneribus in ipsum usque decennium ad annum fere 1562. cur tenuerit, operæ pretium erit, paucis = Binerò nostro (f) huc transcribere.

" Carolo V. Imperatori anno 1552. bellum subito gravissimum illatum est ab eo, quem inter primos amicos suos censebat, grandibus & recentibus adhuc beneficiis sibi devinctum: a Mauritio videlicet, quem post confectum bellum Smalcaldicum, capto & exauctorato Joanne Friderico, Saxoniae Electorem constituerat, translata ab Ernestina stirpe ad Albertinam dignitate, cum potissimis Saxoniae ditionibus.

" Hic Princeps, fidus in bello Smalcaldico Cæsari, quin & Socius, Protestantium odium incurrerat, non obscuro murmure perstreptentium, quod Joannem Fridericum captivum in Cæsaris manibus relinqueret, ut spoliis ejus impinguescat. Ut igitur eorum in se amorem ac studium transferret, Ducem adversus Cæsarem constituere se jam pridem tacite meditabatur, ut Lutheranos ab obedientia, Concilio Tridentino præstanda, vi illata exsolveret, Sectamque Novatorum in Romano Imperio donaret civitate; quod votis omnibus exoptabant.

" Causa altera defectionis erat Philippus Landgravius Hassiæ ipsius socer, quem libertati restitui frustra sæpius a Cæsare petierat: jam ab eo tempore ultionem tacite excoquens, quo Cæsar eundem captivum abduxit.

" Opportunum consiliis locum dedit ipsa Provincia, quam Imperator ei demandaverat, compellendi videlicet armis ad deditionem, & obsequium Magdeburgum, quod acceptandæ Constitutioni INTERIM pertinaciter repugnaret, & Sacerdotium juribus suis vi dejiceret. Validas ad hunc finem a Carolo acceperat copias; quas hoc furore rectas identidem auxit, protracta de industria in annum obsidione. Quo tempore Protestantium Principes, Brandeburgum, Palatinum, Wirtembergicum, Bipontinum, Mechlenburgos, Badensem cum Guilielmo Hassio, captivi Filio tacito fœdere in partes suas pertraxit.

" Utque illas magis adhuc firmaret, externa etiam respexit auxilia, pertracto in

" armorum societatem Henrico II. Rege Galliæ: qui ad vindicandam, ut ferebat, Germaniæ libertatem, numerofo cum exercitu vere ingruente venturum se promissit, Cameracum, Tullum, Metas, Virodunum pro se pactus. Hæcque tanta fœdera tam secreto fuerunt confata, ut Cæsar prius viderit bellum, quam crediderit. Adeo namque fidebat Mauritio, tot nominibus, ut rebatur, suo, ut Moguntini, aliorumque sincera monita tanquam vana & importuna abjiceret: Etiam tunc, cum Mauritanæ copiarum Electorum Ecclesiasticorum terras jam devastarent, ipsique Tridento ad propria defendenda recedendi facultatem a Cæsare frustra peterent. Mauritius rebus suis cum Protestantibus & Galliarum Rege clam compositis, dedito per collusionem velut in Cæsaris potestatem Magdeburgo, adjectoque copiis suis, qui urbi præsidio impositus fuerat, milite, scripto publico se vindicem obtulit libertatis conscientiarum, ac Lutheranismi in Imperio stabiliendi, atque sub finem Martii exercitum Augustæ admovet, intra quadriduum ad deditionem vel compulsæ, vel compelli se simulanti. Inde vero ad Ulmam obsidendam progreditur.

" Carolus Imperator bello Parmensi implicitus, præter eas legiones, quæ sub signis Mauritiæ militabant, vix aliquas in Germania, quam undique pacatam crediderat, habebat copias. Quare cum se proditum ab amico, & inermem Oeniponti, ubi tunc degebat, videret, per Ferdinandum Fratrem pacis condiciones iniri posse sperabat.

" Convenerunt proin Lincii Ferdinandus Rex & Mauritius, qui fœderatos suos consulendos dicebat, ut Passavii deinde pax iniri posset: Pactusque 15. dierum inducias, ad suum ad Ulmam exercitum accurrit. Atque ut Cæsarem inermem Oeniponti interciperet, cum toto suo exercitu movit Abudiacum, urbem ad Licum amnem & Alpium pedem sitam, eaque intra biduum occupata, depulsisque, qui claustrorum aditus obsidebant, Ehrenbergensem arcem, & situ & opere munitam, cepit.

" Carolus Imperator percepto tristi hoc nuntio, cum Ferdinando fratre, qui expositurus, quid cum Mauritio Lincii egisset, quidque ulterius agendum, cum Cæsare consulturus, Oenipontum advenerat, Villacum in Carinthiam profugit, comitante eum etiam Joanne Friderico Saxone, licet ab Imperatore liber esset dimissus. Mauritius

(f) Appar. Erudit. Part. III. C. IV. §. 9. pag. 339. & seqq.  
Digressio ad Sæcul. XVI. Tom. VIII.

"ritius autem Oenipontum ingressus ea,  
"quæ Cæsaris erant, militum licentiæ per-  
"misit, intactis iis, quæ ad Regem Ferdi-  
"nandum aut cives pertinebant. Cumque  
"induciæ, Lincii sancitæ pro ineunda pace  
"appropinquarent, Passavium se recepit."  
Hucusque *Binerus*. Facta ibidem, atque a  
loco nuncupata

#### IV. TRANSACTIO PASSAVIENSIS.

**H**anc II. Augusti eod. A. 1552. extorsit  
Mauritius. Convenit in ea fuit, ut  
intra semestre celebrarentur Imperii Comi-  
tia, in quibus de via componendi dissidia  
Religionis per Concilium Generale aut Na-  
tionale &c. deliberaretur: interim Augusta-  
næ Confessioni addictis nulla in Imperio  
molestia, violentia, aut contemptus propter  
Religionem inferretur, sicut vicissim nec  
illis, qui veteri Religioni adhærerent. (g)  
Conditiones illius *Transactionis* cæteræ ex-  
tant apud Chytræum, (h) Sleidanum, (i)  
Struvium (k) & alios. Gravamina, in isto  
Passaviensi Conventu a Mauritio adversus  
Imperatorem proposita, legi apud Hortle-  
derum possunt. (l) Eadem illa Pace *Mau-  
ritiana*, seu Passaviensi Constitutione inter-  
emptum fuisse illud *Interim*, cuius causa tot  
& tanti concitati fuerant motus, quodque  
nihilominus paucis locis obtinuerat, ad ni-  
hilumque recidisse, monet Spondanus. (m)

#### V. PAX RELIGIOSA, in qua RESER- VATUM ECCLESIASTICUM.

**S**aturati nondum ejusmodi bolis sat pin-  
guibus *Confessionistæ*, quo plus accipe-  
rent, nova, nescio quæ gravamina, ceu to-  
tidem Eridis poma, in medium projecere,  
Comitia iterum clamitantes cogenda. In-  
dicta hæc ab Imperatore Ulmæ primum XV.  
Aug. ann. 1553. deinde V. Febr. ann. 1555.  
Augustæ Vindelicorum. Præses pro Carolo,  
qua morbis, qua negotiis aliis impedito, Fer-  
dinandus Romanorum Rex duas, in quibus  
totius cardo negotii vertebatur, quæstiones  
Magistratibus conscriptis proposuit: alte-  
ram, quo modo componenda Religionum  
dissidia, e quibus tot tantaque mala hæcenus  
in nationem Germanicam fluxerant; alte-  
ram, qua ratione pax communis & securi-  
tas stabilienda. Prima, quod gravioris esset  
momenti & longiorem indagandi moram  
exposceret, communi statim, ut videbant  
omnes, calculo in alium rejecta est Imperii  
conventum. Ad secundam quæstionem

quod spectat, post longas multorum mem-  
brum altercationes factum, vel Caroli gravis-  
simis alibi curis impliciti senescente in res  
Germanicas & remittente studio, vel nimio  
Ferdinandi, pejora ab Adversariis sibi effor-  
mantis metu, ut descensum in duos & vi-  
ginti articulos fuerit XXV. Septembris.  
Omnes exhibet Recessus Imperii de anno  
1555. (n) En præcipuos:

1. Nullus Imperii Status propter Au-  
gustanam Confessionem vim, aut contem-  
ptum patiatur. 2. Controversiæ Religionis  
mediis Christianis & amicabilibus compo-  
nantur. 3. Ordines Augustanæ Confessioni  
addicti sinant Status Catholicos, eorumque  
Clericos avira Religione, Bonis, Juribus,  
Redditibus &c. absque ulla molestia uti ac  
frui. 4. Exclusi sint ab hac Concordia, qui  
neque Religioni veteri, neque Augustanæ  
Confessioni adhærerent. 5. *Praelati Ecclesia-  
stici, a veteri Religione discedentes, sua digni-  
tate & Beneficiis excident, bonore & existi-  
matione salva.* 6. Dispositio de Collegiis,  
Cænobiis ac Bonis Ecclesiasticis ante Trans-  
actionem Passaviensem ad alios usus per Pro-  
testantes facta, firma persistat. 7. Jurisdi-  
ctio Ecclesiastica, salvis redditibus, aliisque  
juribus, adversus Augustanam Confessionem  
suspensa esto: exerceatur tamen more re-  
cepto circa ea, quæ isti Confessioni non sunt  
contraria. 8. Nullus Status alium Consti-  
tum, ejusve subditos ad suam Religionem  
vi aut arte pertrahat, aut hos contra pro-  
prium Magistratum tucatur. 9. Conceditur  
subditis utriusque Religionis jus emigrandi.  
10. In Civitatibus liberis Imperialibus, ubi  
utraque Religio viget, incolæ vivant pacifi-  
ce, nullusque alterum in exercitio Religio-  
nis suæ turbet. 11. Integrum sit cuilibet  
Statui jus sæculare, quod ante dissidium Re-  
ligionis habuit in aliquos proventus, in ter-  
ritorio suo constitutos; ita tamen, ut ex iis  
sustententur Ministeria templorum, Paro-  
chiæ, Scholæ, Hospitalia, prout moris erat,  
absque discrimine Religionis. (o)

Atque hæc est illa PAX RELIGIOSA  
seu RELIGIONIS, Lex in Imperio funda-  
mentalis deinceps habita, pluribus etiam fir-  
mata in Comitibus, cui teste Cardinale Hosio,  
Ferdinandus non nisi lacrymantibus oculis  
subscripsisse fertur: Carolus Imperator sub-  
scripsit nunquam. Vocat eam suo in Chr.  
Ms. Wilmius *perpetuarum litium Seminarium*,  
& Magnif. P. Gregorius Zallwein, (p) *rebus  
Catholicis inimicissimam, jurisdictionis Eccle-  
siasticæ*

(g) *Vid. Præcognita Juris Canon. P. Franc. Xav. Zech S. J. Tit. XIX. §. 392.*

(h) *Saxon. Lib. XVII.*

(i) *Lib. XXIV.*

(k) *Histor. Imp. Period. X. §. 94.*

(l) *Tom. II. Lib. V. Cap. 13.*

(m) *Annal. Eccles. Tom. II. pag. 542.*

(n) *Vid. Joann. Jac. Smausii Corpus J. P. pag. 160. & seqq.*

(o) *Zech cit. eod. Tit. §. 393.*

(p) *Princip. J. E. Tom. III. Q. IV. §. VI. pag. 326.*



*fastica eversum, litium, gravaminum ac bellorum matrem facundissimam, Germania summe exitiosam, avita Religionis excidium supremum, Protestantica vero lapidem angularem, ac fundamentum primum.*

Scriptores de Pace Religiosa *Struvius* in Bibliotheca Juris selecta; *Schilterus, Limmaeus, Cortreus, Lehmannus &c.*

## VI. RESERVATUM ECCLESIASTICUM

**Q**uintus in illa Religionis Pace articulus, quo statuitur, ut, si quis Episcopus, Prælatum, aut alius quispiam Ecclesiastici Ordinis a Catholica fide deficiat, Episcopatum, Prælatum, aut Præbendam cum omnibus redditibus & proventibus Ecclesiasticis illico amittat, novusque ex Catholicis substituatur, cui omnia jura obveniant. Mirum est, quo animorum æstu de eodem in Comitibus Augustanis, atque aliis deinceps temporibus ad usque Pacem Westphalicam fuerit disceptatum. Plenæ sunt historiæ, plena Acta publica. Congesta a DD. Protestantibus adversus illud integra gravaminum plastra. Æquumne sit, an vero iniquum, examinarunt Cl. *Burckardus* Colonienſis Cancellarius in sua Autonomia, & *Scriptores* Pacis Compositionis *Dilingenses* anno 1629.: quibus se ex parte Protestantium opposuit *Lampadius*, sub nomine *Scipio Aretinus* & plures alii. *Binerus* noster (q) Reservatum illud nititur ostendere, esse æquissimum, conforme Verbo Dei, & juri naturæ, non servatum ab A Catholicis.

## VII. COLLOQUIUM WORMATIENSE.

**C**arolo V. Imperatore privatam apud Hispanos in Monasterio S. Justi, cui se maximus ille Orbis Domitor incluserat, vitam agente, Ferdinandus Rex Romanorum, nomine illius tantisper ad clavum Imperii residens, cæpta anno 1556. Calendis Septembribus Comitibus ad æquinoctium verum, sub quod finem habuere, Ratisbonæ proſequabatur. In iis *Pax Religionis* confirmata est, & repudiata illorum Protestantium opinio, qui aut Nationali quodam Concilio, aut generali Ordinum Conventu omnem in negotio Religionis nodum discordiæ solvendum esse judicabant; Catholicis cum Ferdinando Rege Proceribus in Oecumenicum Concilium, usurpatum priscis Sæculis in ejusmodi causa medium, convenientibus. Quod assiduis dolerent bellorum turbinibus interruptum, id revocandum, om-

nino se arbitrari. Integrum fore in illo, quod quique crederent, sine metu aperire. Vadum interea amico Catholicos inter & Lutheranos colloquio tentandum prius. Decretum igitur, ad XIV. Augusti anno 1557. ut ipsum Wormatiæ haberetur.

" Quia vero, inquit Cl. *Ulenbergius*, (r)  
" Lutherani scæde distracti, gravissimis inter  
" se dissidiis laborabant, ante congressum  
" publicum domesticas primum concerta-  
" tiones sopiendas censuerunt: ne, si Wor-  
" matiæ manipulatim disjuncti prodirent in  
" scenam, ludibriis & sannis ab adversariis  
" exciperentur.

" Itaque Concionatores aliquot Principum & Civitatum Lutherani professionis in Germania superiore Francofurtum conveniunt ad Mœnum; ubi duabus de rebus potissimum instituta fuit consultatio: de Colloquio nimirum, quod Wormatiæ cum Catholicis habendum erat; quomodo scilicet adversariis in eo congressu sit occurrendum: tum de generali Lutheranorum Synodo post Colloquium indicenda, in qua de controversiis domesticis, de disciplina, deque instituenda rituum Ecclesiasticorum conformitate deliberatio susciperetur. Cæterum quia non ignorabant, quam turpiter inter se dissiderent ii, qui Confessionis Augustanæ doctrinam profitebantur, duabus septimanis ante diem, inchoando Colloquio destinatum Wormatiæ conveniendum statuunt, tentandumque, an sopire possent domesticas concertationes, vel easdem instituto syncretismo tegere saltem ad tempus, priusquam cum Catholicis congredierentur. Videbant enim, nisi dissidia, quæ gliscebant, quoquo pacto vel in speciem componerentur, sese non Catholicis modo, sed & universæ Germaniæ ludibrio futuros. Quod & postmodum evenit, ubi per Flaccianos detecta fuit ipsorum turpitudine." Ita *Scriptor doctissimus*. Eventum spectaturi risum teneamus, Lectores beneyoli!

COLLOQUIUM illud WORMATIENSE ab Ordinibus delatum viginti quatuor Viris Theologis, paribus ab utraque parte numero. Præsidem Colloquii nominat Ferdinandus *Rudolphum* Episcopum Spirensensem, pro quo designatus postea *Julius Pflugius*, integerrimus fidei orthodoxæ cultor. Huic adjuncti Assessores *Joannes* Archi-Episcopus Trevirensis, *Michaël* Archi-Episcopus Salisburgensis, *Augustus* Elector Saxonæ, & *Christophorus* Dux Wirtembergicus. (s) Collocutores erant Catholici

*Mi-*

(q) *Part. III. Art. XIII. toto pag. 153. & seqq.*  
*lancetb. Cap. 23. pag. 344.*

(r) *In vit. & reb. gestis Philip. Melanctb.*

(s) *Strunck. Annal. Paderborn. Lib. XXI. pag. 343.*

*Michael* Episcopus Mersburgensis, *Delphius* Suffraganeus Argentinenfis, *Petrus Canisius* S. J., *Fridericus Staphylus*, & duo Theologi *Leuanienses*. Confessionistae *Melancthon*, *Schneppsius*, *Brentius*, *Rungius*, *Cargius*, *Pistorius* &c.

Inchoatum mense Septembri, quo incunte Theologi Electoris Saxoniae primum appulerant, Colloquium. Agebatur primo statim in confesso de norma certa ac regula, ad quam controversae res exigantur; tum de peccato originis. Facile notabant Catholici non eadem Confessionistas chorda incedere: monuerunt igitur, declararent sese adversarii, quibus faciant, ac Zwinglianos, Osian-dristas, Synergistas, aliosque Augustanae Confessioni non addictos rejicerent. Solis enim hujus Confessionis Sociis pax fuerat ab Imperio concessa, cum iisque solis praesens institutum colloquium.

Mirum visu! gravissimae inter Collocutores Protestantes subito oriebantur discordiae, aliis Augustanae Confessioni renunciantibus, aliis eandem huc, aliis illuc ferrae instar trahentibus, retrahentibusque. Dam-nandos aiebant, Sectarios alios quini; negabant septeni. Illis fuga elapsis, hisque ad Sectas, in Imperio Romano non toleratas propendentibus, negotium abruptum est cum ingenti Catholicorum gloria, quos inter ut una est veritas: ita sententia una & una vox fuit. (t) Frustra, ubi fundamenta veritatis subruere vides, sinceram recte sentiendi rationem te initurum speraveris.

#### VIII. LIBER CONCORDIAE.

**S**I quis praecipuos duntaxat Conventus, ob Religionis dissidia ab ipsismet novi Evangelii filiis actos, secum perpenderit; facile, quod olim de Gente Romana protulit epiphonema Andinus vates, mutatis vocolis huic libro tribuendum putabit, nimirum:

Tanta molis erat Concordem condere Librum.

Adeo operosi illi ac numero frequentes extiterunt. Anno 1519. erumpente e gliscen-tibus favillis tristi incendio, celebratus *Lipsiae* primus: dein *Wormutiae* a. 1521., *Norimbergae* a. 1523., *Lucernae* a. 1524. contra *Zwinglium*, *Hale* 1525., in quo *Oecolampadius*, & *Badenae* eod. a., ubi *Zwingliani* damnabantur. *Bernae* a. 1528. *Sacramentarios* inter & *Catholicos*. *Marpurgi* in *Hassia* a. 1529., cum altercationi inter *Lutherum*, *Zwinglium* & *Oecolampadium* pro aqua non

nisi oleum Landgravius adfunderet. Eod. a. *Sualbaci* inter *Evangelicos*, in quo rursus, cum tentaretur concordia, sese discordia ingellit. *Augustae Vindelicorum*, loco *Confessionis Augustanae* natali, a. 1530. *Smalcaldiae* a. 1531. ubi in mutua Protestantes foedera coierunt. *Frankfurti* eod. a. *Constantiae* a. 1534. *Bucero* concordiam inter *Lutherum* ac *Zwinglium* frustra tentante. *Tiguri* anno sequenti. *Arbonae* & *Isenaci* eod. a. Postea a. 1536. *Wittenbergae*, ubi de *Augustana Confessione* vehementer disceptatum. Eod. a. *Bernae*. *Smalcaldiae* a. 1537. *Bernae*, *Niedesburgi* in *Moravia*, iterum *Smalcaldiae* eod. a. *Tiguri* a. 1538. *Frankfurti* eod. a. hanc Duce Saxoniae sententiam proferente: *Malle se de Epistolarum S. Pauli, quam de Augustanae Confessionis veritate dubitare*. A. 1540. rursus *Smalcaldiae*. A. 1541. *Ratisbonae*. A. 1542. *Spirae* & *Norimbergae*. A. 1544. *Wormutiae*, qui animum Protestantibus addidit Concilio se opponendi. Denuo celebris ille, de quo supra, *Ratisbonae* a. 1546. *Lipsiae* a. 1548. *Bernae* a. 1554. *Frankfurti* & *Wormutiae* a. 1556. In *Saxonia* a. 1559. e quo eluctatus est liber ille, cui titulus: *Victoria veritatis & ruina Papatus Saxonici* &c. A. 1561. *Norimbergae*. A. 1562. *Halberstadii*. Eod. a. *Lunenburgi*. A. 1564. *Maulbrunnae*. (u) A. 1571. *Dreslae*, quem *Augustus* Saxoniae Dux die X. Octobris ad gravissimas de corpore doctrinae *Philippi Melancthonis* controversias sopiendas indixerat. Scripta ibidem a praestantissimis Protestantium Theologis *Consensus formula*. Quam cum improbarent, imo impugnarent plerique, habitus ejusdem Septemviri iussu alius a. 1574. Conventus *Torgae*, ubi edita quindecim Theologorum judicio *Formula Concordiae*, quotquot ab *Augustana Confessione* dissidebant, damnati rejectique fuerunt. Verum nec iste partus ex asse placuit. Quare a. 1577. die XII. Maji *Bergae* (x) convenerunt *Musculus*, *Selneccerus*, *Kemnitius*, *Cbytraeus*, *Cornerus*, & *Schmidelinus*, a quibus prior formula ad incudem revocata fuit. Prodiitque tandem ex officina maxime *Jacobi Andreae*, alias *Schmidelini* famosus ille LIBER CONCORDIAE, anno 1580. publicatus, postquam, *Struvio* teste, (y) a tribus Electoribus, *Augusto* Saxone, *Ludovico* Palatino, & *Joanne* *Georgio* *Brandenburgico*, 21. Principibus, 22. Comitibus, 4. Baronibus, 35. Urbium primariarum Magistratibus, & plusquam 8000. Ecclesiarum & Scholarum Ministris fuisset receptus & subscriptione firmatus. Complectitur porro Liber iste relatum in unum corpus *Confessionem Augustanam*, cum ejus-

(t) *Sacchin. in Hist. Soc. Jesu* P. II. Lib. I. n. 102.

Lib. 5. C. 10.

(y) *Hist. Germ. Period. X. Sect. VII. de Rudolpho II.*

(u) *Flor. Rem. de Orig. Haeres. P. II.*

(x) *Natal. Alexand. Hist. Eccles. Tom. VIII. art. X. §. 4. n. 27.*

eiusdem *Apologia, Articulos Smalcaldicos, Catechismum Majorem & Minorem Lutheri, & questionum inter ipsos Lutheranos controversarum declarationem.*

Circumfertur in illum Concordiæ librum distichon satis argutum:

R habet Aufonium liber hic, R habetque Pelasgum,

R habet Hebræum, prætereaque nihil. Lege, mi Lector, *Hospinianum*, (z) *Lindanum*, (a) *Bellarminum*, (b) & *Stanislaum Socolovium*. (c)

Ex Bellarmino sex gravissimos Libri illius errores recenset Nat. Alexand. cit. " Primus est, inquit, quod Christus non solum ut homo, sed etiam ut Deus, Patri fuerit obediens. 2. Quod Christus fuerit perfunctus munere Mediatoris & Pontificis, non solum per humanam naturam, sed etiam per Divinam. 3. Quod natura humana Christi sit ubique vere & realiter. 4. Quod Christi Humanitati sint collata vere & realiter multa attributa Divina, ut onnipotentia, omniscientia, omnipræsentia, atque adeo ipsa Divina Majestas. 5. Quod unio hypostatica consistat in communicatione Divinorum attributorum. 6. Quod totus Christus Deus & homo ad inferos descenderit."

Adnectitur

### QUÆSTIO,

#### CUR DD. PROTESTANTES CONCILIO TRIDENTINO OBEDIRE NOLUERINT.

**P**etitum olim a DD. Protestantibus Generale aliquod Concilium, atque ad ipsum, ceu idoneum rebus fidei controversis eloquio suo decidendis judicem, provocatum fuisse, nemo, nisi penitus in Lutheranismi historia rudis, & hospes in publicis illorum temporum Actis, inficiari potest. Quid enim offerentes Carolo Imperatori Confessionem suam, reliqui cum Joanne Saxonie Duce Electore Principes palam Augustæ declararunt? nonne comparituros se & in generali libero & Christiano Concilio causam dicturos? Ad cujus etiam, inquebant, Generalis Concilii conventum, simul & ad V. Cæs. Majest. in hac longe maxima & gravissima causa, jam ante etiam debito modo & in forma juris provocavimus & appellavimus, ann. præced. Spiræ in Comitibus: cui appellationi ad V. Cæs. Majest. simul & Concilium adhuc adhaeremus, neque eam... deferere intendimus aut possumus. Quid ista ejusdem Ducis Electo-

ris ac Philippi Landgravii apud Sleidanum (d) verba: *Sperare se, ut Cæsar illud (Concilium) quamprimum in Germania procuret?* Annon liberalia id genus Protestantium promissa Cæsarem, pacis cupidissimum impulere, ut ad usque Concilium Generale liberum ipsis permetteret Religionis exercitium? Et quid tandem de ipsomet Tridentino DD. Protestantes? Dolebant una cum Statibus Catholicis (quod libellus in Comitibus Augustanis a. 1548. porrectus haud obscure loquitur) diutius Concilium illud protrahendum: quandoquidem UNIVERSA Germanica Natio TRIDENTI cepto se CONCILIO submisit. Supplicabant Cæsari, modos provideret, quibus CONCILIO TRIDENTI, in quod OMNES unanimiter jam ante consenserant, quamprimum institui ac continuari possit. De hoc ipso communi Statuum consensu ita eorundem Comitiorum Recessus: *Sicut & Electores, Principes & Status, nec non absentium Legati ac Consilarii communiter se cepto huic Concilio submissuros, ejus decisiones expectaturos, ac parituros dicto modo humiliter consenserunt, & receperunt, & in hac re Nobiscum unanimes convenerunt &c.*

Igitur petatum, desideratum, probatumque a DD. Protestantibus Concilium Generale & hoc quidem Tridenti institutum. Cur porro eidem obedire tandem noluerunt? Hic Rhodus, hic Saltus. Integrum gravissimarum, si Superis placet, rationum exercitum educit Cl. Lunigius; (e) e quibus tres, me judice, primam in acie stationem obtinent. Prima contra *Romanum Pontificem*; altera contra *normam decidendi*, tertia contra *ipsummet Concilium* depræliari videtur. Non oportuit præesse Concilio Papam, hoc primum: Lites non aliunde dirimi, quam ex puro Dei verbo debuerunt, hoc secundum: Concilium non fuit liberum, hoc tertium absentiae suæ ac negatæ obedientiae caput adferunt DD. Protestantes.

Bene est. Tentemus prælium, & quid contracta in hunc locum rationum mearum momenta contra partem adversam valeant, periclitemur. I. *Non debuit præsidere Synodo Papa*; contendunt DD. Protestantes. Cur non? Ut convocandi Synodos jus Pontifici; ita & illis præsidendi competit (*Legatur Digressio ad Sæc. XV. Tom. CC. nost. V. Cap. I. §§. 3. & 4.*) Parituros se Concilio TRIDENTINO sponponderant, cujus probe noverant Præsidem jamtum esse Pontificem. Ex quid? nonne Nicænam Synodum Arius, Constantinopolitanam Macedonius, Ephesi-

(z) *Lib. Concordia discors.*

(a) *Concordia discors Protestantium.*

(b) *Judicium de libro Concordiæ Lutheranorum.*

(c) *Censura Orientalis Ecclesiæ.*

(d) *Lib. VIII. a. 1531.*

(e) *Spicil. Eccles. Contin. III. pag. 72. & seqq.*

*Digressio ad Sæcul. XVI. Tom. VIII.*



nam *Nestorius*, Chalcedonensem *Eutyches* ac *Dioscorus*, & alias alii errorum Magistri eodem jure averfari, & tanquam illegitimas rejicere potuissent? Provocant ad Conven- tum generalem e Statibus Imperii aliquot contra Rom. Cæsarem de jure quodam, cu- jus quæta is possessione mille annos & am- plius gaudet, acturi. Quid? Ergone ad- emptæ eam ob rem Cæsari potestas & con- vocandi istum Conven- tum, & eidem vel per se vel per Legatos suos præsidendi? Ergone quæ in ejusmodi Conven- tu Decreta fiunt, robore careant, aut irrita censeantur? Absit.

Profecto nulla juxta Catholicos subsi- stit, sine Pontificis viventis autoritate, in Ecclesia Catholica Synodus: uti nullus in Romano Imperio Conven- tus, cui Impera- tor cum potestate, supremo Capiti debita, non præsit.

## II. Non sunt decise lites ex puro Dei verbo.

Undenam igitur? *Ex suffragiorum plu- ralitate*, respondent DD. Protestantes: *id quod fieri non debuerat*. Quasi vero mos alius a Majoribus nostris, alia ab antiquitate universa, omnibusque Synodis consuetudo esset servata: quasi hæc ex plurium calculo decidendi ratio fini Synodorum minus res- ponderet, ad eumque faceret.

Dirimendæ erant inter partes, quarum utraque Sacram Scripturam sibi favere ac suam esse affirmabat, controversiæ: quibus dandum aliquando finem, sine votis complu- rium ac sententia, frustra sperasses. Quan- quam communi tandem consensu Patres pronunciaſſe dicendi sunt.


Adde, quod sola ex Scriptura, quæ vera & genuina sit, discerni nequeat. Multa præ- terea a primis quatuor Conciliis Oecumeni- cis, quæ DD. Protestantes pro legitimis ha- bent, statuta, præscriptaque fuerunt, quæ tum in verbo Dei ad litteram non extent,

neque arbitrari ex eodem solo Patres potue- re. Et cur amabo DD. Protestantes variis in Conven- tibus doctissimos consulebant, pe- ritissimosque Theologos, & eorum judicium requirebant? quid ni lites, quotquot erant, in dubiis fidei capitibus ex solo composue- runt *Dei verbo*? Probum denique verborum S. Scripturæ ac sententiarum sensum qui, sola Scriptura duce, reperies? Quomodo ab ob- scuro obscurum illustrabitur. Sed enim queruntur DD. Protestantes:

## III. Concilium Tridentinum non fuit libe- rum.

Superi! a quo ablata libertas? quibus ablata est? quo modo ablata est? Non ab- lata DD. Protestantibus a Pontifice aut Epi- scopis, qui ter invitatis ad ipsum Concilium omnem faciebant eloquendi & gravamina sua proponendi copiam. Non ablata a Pon- tifice ipsis Patribus: qui maxima sanc usi sunt, cum suam pro se quisque sententiam, suum suffragium tulerit. Non ablata vi, non jussu, non exhortatione minis promissive armata. Quis eandem interposuit? quis interpositam sensit. Nihil de illa co- questi unquam 8. Cardinales, nihil 3. Patri- archæ, nihil 34. Archi-Episcopi, nihil 238. Episcopi, nihil 10. Principum Legati, nihil denique 148. eruditissimi atque in scientia dogmatum Catholicorum versatissimi Do- ctiores, Viri lectissimi, qui Concilio inter- fuere. En rationum mearum momenta: quæ exponerem hic prolixius, nisi vererer, ne justos vel ob solam hanc quæstionem pro- positam limites Digressio transiliret. Satis ergo sit, armamentarium indicasse, unde, quibus exercitus ille a DD. Protestantibus in campum educ- tus, superari valeat, sint hastæ plures, telæque alia repetenda. Vid. *Pallavi- cinus*, (f) *Nat. Alexand.* (g) *Pacis Compositio Lipsiensium*, (h) *Biner.* (i) *Franc. Xav. Pfyffer.* (k) & *Franc. Neumayer.* (l)

## FINIS DIGRESSIONIS AD SÆCULUM XVI.



CON-

(f) *Hist. Conc. Trid. Lib. 24. Cap. 14.*

art. 16.

(h) *Cap. 2. Quæst. 11.*

(g) *Hist. Eccles. Tom. VIII. Dissert. XII.*


Cap. 3. Quæst. 18.

(i) *Appar. Erudit. Part. III. Cap. 4. §. 12.*

(k) *Opusculum germanice edit. typis Wolf-*

*fianis Augustæ Vindelicorum an. 1739., ubi tota illa quæstio clare graviterque agitur.*

(l) *Tom. I. Sac. Controvers. Edit. German. ibid. anno 1757. m. pag. 415. & seqq.*



# CONCILIA GERMANIÆ

A SÆCULI XVI. ANNO LXXXIX.

*Præmittuntur aliquæ Synodi, quæ in Tomo præcedente  
desiderantur.*

## SYNODUS PROVINCIALIS BISUNTINA

Anno Christi MDLXXI. Pii V. Papæ VI.  
Maximiliani II. Imp. VIII.

SUB CLAUDIO A BAUMA, (\*) ARCHI-EPISCOPO BISUNTINO.

### PROOEMIUM.

IN NOMINE DOMINI NOSTRI JESU CHRISTI, AMEN.

CLAUDIUS A BAUMA, DEI ET APOSTOLICÆ SEDIS GRATIA,  
Archi-Episcopus Bisuntinus, Sacrique Romani Imperii Princeps, universis & singulis Abbatibus, Deconis, Archi-Diaconis, Præpositis, Prioribus, Collegiorum Præfectis, Canonicis, Curatis, Capellanis, Presbyteris, Diaconis, Subdiaconis, Acoluthis, Exorcistis, Lectoribus, Ostiariis, Cantoribus, Fabviciariis, Hospitalium Rectoribus, Religiosis Conventualibus & mendicantibus Monachis & Monialibus, Ludimagistris, & Scholaribus, Doctoribus, & Graduatis, cæterisque Clericis sæcularibus & regularibus, per Civitatem & Dioecesim nostram Bisuntinam constitutis, præsentibus & posteris,  
Salutem & DEI gratiam.

*V*era est illa Prophetæ, nec inaudita, sed ut apud Ethnicos (inquit Firmianus) alii nostris in Synodis sæpe jacta vox: Labia sunt sapientiæ Professores, alii religionis Antisacerdotis custodiant scientiam: & legem requirunt de ore ejus. Neque enim apud nos, & Dei Sacerdotes. Addit vocis suæ causam idem

(\*) Claudium a Bauma, illustri apud Burgundos familia natum, cum quatuordecim duntaxat annorum esset, Petrus a Bauma, Patruus, Cardinalis & Archi-Episcopus Bisuntinus, Coadjutorem sibi, & in Metropoli regenda Successorem dixerat anno 1543. Nominatio hæc, favente, probanteque Carolo V. Cæsare, mox quidem a Rom. Pontifice Paulo III. rata habita, sed tanto simul studio celata fuit, ut Merro-

idem (ut putatur) Scriba-velox: quia Angelus Domini exercituum est: id est, Nuncius DEI Omnipotentis. Dei quidem Angelus est Sacerdos, cum internuncium agit in terris, & tanquam legatione suscepta, voluntatis ejus interpretem: & de rerum causis, legumque

æquitate homines instruit, & arcana Dei mysteria revelat. Una est enim (quod Philosophi non negant, & Theologi Divinitus edocti professi sunt) æquitatis, ac justitiæ norma: ratio summi Jovis: voluntatem dicimus nos Dei Omnipotentis: cui, nisi quæ consona lex est,

politani Collegii Bisuntini Canonici nihil de illa innotesceret prius, quam cum in locum Petri, anno 1544. defuncti, Franciscum Bonvallot, Jurium Doctorem, Canonicum Ecclesiæ Bisuntinæ ac Thesaurarium, elegissent. Ea res cum apud Pontificem, Cæsaremque in contentionem adduceretur; sic dein utrimque conventum: ut administratio Archi-episcopatus una cum 3tia parte proventuum penes Franciscum esset eo usque, dum Claudius vigesimo quinto ætatis anno completo, Ecclesiæ regimini suscipiendo aptior evasisset. Suscepit illud 3tia Aprilis anno 1556. Decennio fere Metropolim tenuerat, cum S. Pius V. Papa, ob dilatam a Claudio in alterum annum Concilii Tridentini receptionem, promulgationemque publicam, has ad eum literas dedit, quas integras ex Jacobi Laderchii Continuatione altera Annalium Ecclesiasticorum hic describimus:

*Ven. Fratri, CLAUDIO, Archi-Episcopo Bisuntino*  
*P I U S P A P A V.*

*VENER. FRATER, SALUTEM &c.*

**A**llatum jam esse ad Te non dubitamus, de Sedis Apostolicæ regimine, quod, sicut Altissimo placuit, Nobis, licet tanto loco indignis, delatum fuit. Sane a tanto onere subeundo deterrebat Nos virium nostrarum infirmitas; sed Divinæ gratiæ ope, auxilioque confisi, id suscepimus. Quia vero ad aures nostras pervenit, nondum susceptum a te fuisse Sacrum Generale Tridentinum Concilium; sane mirati sumus, cur id suscipere distuleris, quod scias Apostolicæ Sedis Auctoritate comprobatum fuisse, & ab omnibus, & ubique jussim suscipi, atque servari. Quocirca Fraternitatem tuam monemus, & districte præcipiendo mandamus, ut id sine recusatione, & mora, & devote suscipias ipse, ac fideliter observes, & a Suffraganeis tuis pari devotione ac diligentia suscipiendum, atque observandum cures. Nihil facere potes, quod ad officium tuum magis pertineat, non mediocriter Nos, & Catholicos omnes offensurus, si (quod absit) cunctatus diutius fueris; nec vero Nos id ferre, aut dissimulare possemus. Illud quoque Fraternitatem tuam hortamur & monemus, ut quoniam tantis hæresibus causam præcipuam constat Pastorum incuriam & negligentiam præbuisse, & Cleri vitia, moresque corruptos; memor officii tui, & cogitans, reddendam abs te rationem fore in judicio districto, Aeterno illi, Summoque Pastori; commissum tibi gregem debita diligentia pascas, atque custodias: hæreticorum, tanquam luporum, infidias ab eis pervigili cura arcens: Clerum, ut honeste, caste, pie vivat, & exemplo vitæ tuæ excites, & arguendo, obsecrando, increpan-

do, & si opus fuerit, severius agendo, cures. Correctis enim Cleri vitiis, sperari poterit, Laicos quoque honestius & religiosius esse victuros. Cum reliqua vero omnia Concilii Decreta tibi exequenda sunt, tum illud primo quoque tempore, de Seminario instituendo, ex quo mirifica utilitas ad unamquamque Ecclesiam perventura esse speratur. Illud quoque diligenter & sedulo curare te volumus, ut notitiam habeas Clericorum, non solum Civitatis, sed etiam Diocesis tuæ, quos constet esse Catholicos, quique vitæ, & morum honestate & doctrina ad serviendum Deo, & huic Sanctæ Sedi sint idonei: ac selectu quorum eorum cum fide, & sine personarum acceptatione habito, Nobis indicem, sigillo tuo obsignatum, & manu tua subscriptum; cum eorum nominibus, & locis, ubi habitant, mittas. Nos enim, ut communis omnium parens, proborum virorum, ubicunque sint, rationem habere decrevimus, & eorum opera uti, cum occasio oblata fuerit, adeas res, quæ ad Dei & hujus Sanctæ Sedis obsequium pertinebunt. Te ipsum vero a Nobis expectare volumus, quidquid pro loco, in quo Dominus Nos constituit, opis & auxilii tibi, ad munus tuum laudabiliter obeundum, ferre poterimus: & si vigilare te ad salutem commissarum tibi ovium, & eam, quam debes, Sanctæ huic Sedi devotionem præstare viderimus, habebis Nos propensos ad omnia, quantum cum Deo licuerit, quæ ad commodum & honorem tuum pertinebunt.

Datum Romæ apud Sanctum Petrum sub annulo Piscatoris, die XXII. Januarii MDLXVI. Pontificatus Nostri anno primo.

Literis



est, nec aqua, nec iusta, quibuscumque in oris regionibusque observetur, haberi potest. Nam sive in commutandis rebus jus dicatur: sive in distribuendis bonoribus merita pensentur: sive in sumendis panis publica tranquillitas: jus insitum nobis a natura fuit, non ab arte. Quod sane decalogus sic interpretatur, ut tergiversari nemo possit, aut lumen Divini vultus, quod super nos signatum est, obscurare: expressis verbis contestata, atque promulgata, iustitiae omnis ratione, atque aequitatis. Scientiarum autem humanarum, atque ingeniarum principia, nisi a Deo, unde repetamus? Unde vis illa rationis, qua causae rerum atque exitus cognoscuntur? Quis posuit in visceri-

bis hominum scientiam? inquit Job: Quis conclusit ostiis mare? Quis præparavit corvo escam suam, quando pulli ejus clamant ad Deum? Ergo qui legem Dei exponunt, & doctrinae sanæ scientiam tradunt, hi vere Angeli sunt, & dici debent: Nuncii, inquam, & spiritus ministri, & interpretes Dei Sabaoth. Sed quanquam premimur calumniis, non modo vulgi, sed & hominum leviter eruditorum: qui, quæ ipsi non capiunt, hæc ab omnibus rejici, & quasi explodi vellent: & qui tanquam artem ab artifice, sic officium a ministro separari non putant: licet falso nomina hæc usurpari, aut minus proprie frequentari videamus: non est hic opus multis. Tantum hoc  
sciri

Literis his Pontificiis cum non illico respondisset Bisuntinus Præsul, variaque præterea de moribus ejus, ac liberiore, quam Archi-Episcopum deceret, vita ad S. Pium Papam perlata fuissent, hic elapso nondum toto bimestri, acriores multo literas prioribus subjunxit, quas e Laderchio pariter referimus:

*Ven. Fratri, CLAUDIO, Archi-Episcopo Bisuntino*

*P I U S P A P A V.*

*VEN. FRATER, &c.*

**A**D aures nostras jam dudum, multorum fide dignorum literis, & relatione, non sine magno dolore pervenit, te multis in rebus diligentis & boni Pastoris erga commissum tibi gregem officia prætermittere, & vita & moribus tuis Clerum ac populum graviter offendere: quibus, si salutis & officii tui meminisses, pie, honesteque vivendi exempli præbere deberes: Nec suscepisse adhuc Concilium Tridentinum, tamen non ignores, ejus Decreta Apostolicæ Sedis auctoritate confirmata, & ab omnibus suscipi & observari jussa fuisse: ac plane ita te gerere, ut hæreses, quas sedulo extirpare deberes, incuria & negligentia tua, vitæque licentia potius alas, atque confirmes, quæ vehementer cuperemus, falso de te vulgata fuisse. Sed cum tuæ profectionis initia recordamur, veremur, ne nimis vera sint. Etsi autem aliis literis nostris te officii tui diligenter admonuimus; tamen Divini bonoris, & Catholicæ Religionis zelus, & sollicitudo, atque angor, qui cordi nostro infidet, propter salutis tuæ, & commissarum fidei tuæ animarum periculum, impulit Nos,

ut illo officio non contenti, mitteremus isthuc Ven. Fratrem, Julium, Archiepiscopum Surventinum, virum fidei, integritatisque spectate, Nostri & Sedis Apostolicæ Nuntium, & Commissarium, ut harum rerum veritatem diligenter inquirat, & quæ corrigenda, & emendanda in te compererit, corrigat & emendet, & præter cetera curet, ut ipsius Tridentini Concilii Decreta suscipias, exequaris & serves. Proinde Fraternalitatem tuam in virtute sanctæ obedientiæ monemus, atque præcipimus, ut ei super omnibus rebus, de quibus nostro Nomine te monuerit, pareas atque obediās: alioquin sententiam, quam in te tulerit, suspensionis, interdicti, sive etiam excommunicationis, ratam habebimus, & faciemus, Deo auctore, inviolabiliter observari.

Datum Romæ apud Sanctum Petrum, sub annulo Piscatoris die XVIII. Martii M.D. LXVI. Pontif. Nostri anno primo.

Jacob. de Laderchio in Continuat. altera Annalium Ecclesiasticor. Cardin. Cæsaris Baronii.

Verum priusquam posteriores hæc literæ Vescitionem pervenissent, Claudius Archi-Episcopus, Summi Pontificis iram forte subveritus, ut eundem sibi tanto certius coram placaret, iter Romam instituit cum Antonio Lullo, quo ante aditam dignitatem instructore, ac dein Vicario Generali utebatur: commendata interim Ecclesiæ Bisuntinæ administrandæ cura Francisco de Grandmont Majori Decano. Quinquennio tenuit ea peregrinatio, qua durante tam copiose a Claudio Antistite satisfactum Sanctissimo Pontifici fuit, ut hic eum & solennibus cæremoniis Archi-Episcopum consecravit, & Pallio donaverit.

*Tomus VIII. Concilior. German.*

*A a*

*Quan-*

sciri volumus : neque ferendum omnino Sacerdotem, qui ultro scientiam abjecerit : neque omnem in omni Sacerdote scientiam esse requirendam : sed sufficere juxta ordinum gradus, sic ordinis etiam peritiæ cujusque modum. Nam si ea, quæ de Angelis dicuntur, recipimus; nec inter eos par ponitur omnium virtus intelligentiæ : sed alii ab aliis illuminantur, & aliis subsunt, atque parent. Ac quidem ubi verum omnium naturas considerabimus, nullam reperies, quæ non habeat in suo genere res complures, dissimiles inter se, sed quæ tamen consimili laude dignentur. Sed exponamus adhuc, quænam hæc tanta similitudo, ut Sacerdos dicatur a Malachia Angelus Dei. Altior quidem natura mentium, de qua loquimur, est, quam ut a nobis, terræ immerfis, corporisque mole pressis, sensu possit aut cogitatione comprehendendi. Fure enim hic ac commolari posset ille apologus : Cum talpa aliquando juxta loquentes homines percepisset :

excita desiderio audiendi sermonis, rupto cespite, egestaque tacite gleba, caput extulit modice, ne videretur : sed captum oculis. Loquebantur autem illi de structura, & spectaculis Romani amphitheatri, & de magnificentiâ atque splendore apparatus convivii, quod Assuetus dederat in hortis Sufanæis. Retulit illa statim ad contubernales, quæ audierat. Sed quia neque ipsa se, neque alia loquentem intelligebant : ex contentione vixit, & ex vixit tumultu subitus terram excitatis, homines illos, spiritus subterraneos adesse suspicantes, in fugam egerunt. Vero quidem simillimum est, cum illa scenicum apparatus, signa theatri, pendentia aulea, vestes peregrinas personarum, & cavæ capacitatem, ordinesque spectantium, recenseret, pro colisco omnes suas cavernulas cogitasse, pro signis & alio apparatu, radículas arborum & herbarum : aut lapillos, quos fodiendo in speluncis suis offendunt. Sic re vera afficiuntur homines, maxime carnales, ubi

Quantum porro Claudius ex haustis a Pontifice Sacris Institutionibus acceperit emolumentum, ab illius in Patriam reditu compertum fuit : nam continuo Synodum Provinciale in diem Octobris 24. anni 1571. indixit, in qua una cum Revmis Episcopis Suffraganeis, Cleroque congregato Sacri Tridentini Concilii Canones ac Decreta recepit, receptaque juramenti Sacramento sancivit. Ad urgendam vero, promovendamque ejusdem Generalis Concilii Decretorum executionem illud simul eadem in Synodo Provinciali ordinatum fuit, ut prioribus Bisuntinæ Provinciæ Statutis, ad Concilii Tridentini Sanctiones reformatis, doctrina aliqua atque institutio, juxta ipsorummet Statutorum ordinem & argumenta, ex consilio, sententiaque doctissimorum virorum, qui una cum Archi-Episcopo ad id opus deputati fuere, pro Cleri totius instructione concinnaretur, & in lucem ederetur : Ex quorum dein lucubrationibus ingens illud Statutorum Synodaliū Provinciæ Bisuntinæ volumen, quod hic exhibemus, conflatum fuit, & anno 1575. typis Lugdunensibus vulgatum. In quo cum multa admodum erudite conscripta sint, varia tamen hinc inde Institutionum, Statutis adjectarum, Tractatibus inspersa reperiuntur, quæ prudenti interpretatione indigent, quod & alibi monuimus : Atque ipse Claudius Archi-Episcopus, dum Statutis in eorundem fine subscriberet, & illa Archi-Episcopali sua auctoritate firmaret, istud provide adjecit, quod Institutionibus hisce non plus ponderis tributum veller, quam ipsa contentiæ in illis doctrinæ capita mereantur. Aliis, inquit, præceptis doctrinæ, quæ ab ipsis Statutis & Ordinationibus literarum forma & charactere distincta sunt, & separantur, in suo genere, [doctrinæ scilicet loco tantum] relictis.

Cætera Claudii gesta damus ex Joannis Jacobi Chiffletii, Patritii, Consularis, & Archiatri Vesontini, Libro, cui titulus : *Vesontio Civitas Imperialis Libera, Sequanorum Metropolis.* " Anno 1575. die 21. Junii, inquit, hæretici Bisuntinam civitatem subito conatu adorti, ... magnum civibus terrorem incusserunt : in quibus propulsandis, ut totius Civici Magistratus, & Francisci de Vergeio, Comitatus Burgundiæ Gubernatoris, qui tunc Vesuntione ; sic & Claudii a Bauma egregia enituit vel prudentia, vel fortitudo. Qua de re cum accepisset Gregorius XIII., anno 1578. Pontificatus VI. die Veneris IX. Cal. Martii, cum quinto Cardinales eligeret, absentem Claudium a Bauma, Romæ creavit Presbyterum Cardinalem S. Pudentianæ, Tit. *Pastoris* : cujus tituli memor Claudius, & Pastoritii muneris, Romanam Curiam non adiit, ne in tantis Galliæ ac Germaniæ tumultibus, & hæreticæ impietatis, quæ per ea tempora quaquaversum spargebatur, periculis, suo ipse gregi deesset : in eaque cura tam diu perstitit, donec anno 1584. die Jovis, 14. Junii, Pastoris officio simul & vita cessit Arbosii, quo loco sepehri voluit in Ecclesia S. Justi, prope Claudium parentem suum, Equitem Velleris aurei, & Marechallum Burgundiæ, ac Petrum a Bauma, patrum suum, Cardinalem & Archi-Episcopum Bisuntinum. *Hæc Chiffletius, quem vide, & Jacobi Laderebii Continuat. alteram Annal. Ecclesiasticorum Card. Cæs. Baronii.*

ubi quis de Deo, rebusque cælestibus, verba facit. Sed qui Divinitus edocti sunt, talem putant naturarum omnium conditorem Angelicæ vim, facultatemque dedisse, qualem cœsuis maxime gloriæ suæ, Majestatique convenire. Fecit ergo spirituales: quia reliqua sunt corporea, quæ creavit. Fecit incorruptibilem: quia ante Omnipotentis thronum esse semper debuerant. Fecit absque corpore: ut ad omnia obeunda mysteria, quocunque mitterentur, essent paratiores. Ideo & per se intelligentem quoque: ut sensu non egerent corporeo, sicut nos miseri mortales, & tardi ad credendum. Atque hæc quidem omnia, ut theatrum suum Creator universi, spectaculorum omnis generis, & formarum varietate decoraret. Sed quid horum simile, inquires, in Sacerdotibus? Multum quidem per omnem modum. Nam sicut illi spirituales sunt & incorporei, & accensi instar flammæ ignis, & ætus puri: sic etiam nos decet, licet in terra degentes, a terrenis caducisque rebus animum subducere, & spiritu opera carnis mortificare: aliisque virtutibus præluce, caritate præcipue accensos. Quod si quando usu postulante, infirmitati nos accommodantes aliorum, humanarum aliquid agere videamur: tanquam assumpto alieno corpore id agamus, ne absorbeat a corpore spiritus Divina vis. Sic Angeli humana specie non raro apparuerunt, assumptis ex aere, vel aliunde, non propriis corporibus: ut cum hominibus possent facilius inire familiaritatem. Videbar, inquit Raphael ad Tobiam, manducare & bibere: sed ego a cibo & potu utor invisibili. Sicut illi præterea ætus puri sunt, sic otio torpere non decet Dei Ministrum, aut ignavia. Nam Sacerdos dives, & honoratus, nisi in ætlu semper sit, non differt ab idolo. Habent idola oculos, & non vident: aures, & non audiunt: pedes, & non ambulant: nihilominus auro onusta, & pretiosis rebus ornata, coluntur, atque adorantur ab stultis. Quamvis hoc in penam sepe fieri populorum consuevit: ne sibi blandiantur plebes. Ecce ego suscitabo Pastorem (dicit Dominus per Zachariam) qui derelicta non visitabit, dispersum non quæret, & contritum non sanabit, & id, quod stat, non enutriet, & carnes pinguium comedet, & ungulas eorum dissolvit. O Pastor & idolum derelinquens gregem, &c. Et contra eum, qui scientiam contemnit, per Oseam sic loquitur: Quia tu scientiam repulisti, repellam te, ne Sacerdotio fungaris mihi. Non quod oporteat omnes æque doctissimos esse. Nam intelligentiæ illæ gradus habent: & in ordine nostro, uti diximus, gradus sunt: ut ab eo plus exigatur,

cui plus creditum fuerit. Sed tamen unusquisque pro suo merito mercedem accipiet: sive qui docet in doctrina: qui exhortatur in exhortando: qui tribuit, in tribuendo: qui præest, in sollicitudine: qui misetur, in hilaritate. Superest, quod imprimis convenit nostro huic negotio: ut quemadmodum in Angelo duplex cognitio ponitur, (matutina & vespertina) eadem servata analogia quæramus hæc in Sacerdote. Augustinus quidem auctor, ut creditur, hujus sententiæ, matutinam cognitionem eam desinit, qua res omnes contemplantur Angeli in verbo æterno: quatenus autem in sua natura singule consistunt, harum cognitionem vocat vespertinam, a rebus ipsis, quæ scilicet a tenebris non procul absunt, desumptam. Non aliter in Prælato si muneri rationem habebimus, duplicem ponemus, & requiri censebimus scientiam: unam scilicet ex Verbo Dei, alteram ex rebus creatis. Illa est fidei, & mysteriorum ejus: quam vel ex literis sanctis, vel ex Patrum traditionibus, vel ex revelatione speciali acquirit. Altera quæ ex præceptis & doctrina Philosophiæ petitur: moralis, aut rationalis, aut naturalis: Per quam & cum hominibus sine querela vivamus, & hæreticos paralogizantes ex suamet ipsorum Philosophia, resellamus: & in contemplatione atque admiratione operum naturæ, Deum auctorem agnoscamus, amemus atque veneremur. Idcirco enim præceperat Dominus (quia omnia in figuris contingebant) ut Pontifex Judæorum in pectore gestaret rationale, cum duobus hisce verbis, DOCTRINA, & VERITAS: nimirum ut potens esset (quod Paulus cupit) exhortari in doctrina sana, & contradicentes coarguere. Populum meum docebunt [inquit apud Ezechielem] quid sit inter sanctum & pollutum: & cum fuerit controversia, stabunt in judiciis meis, & judicabunt. An corruptibiles judicare poterunt? nequaquam recte. Non sine causa igitur in exhortandis Pastoribus frequens usurpatur hæc sententia: labia Sacerdotis custodiunt scientiam: & legem requirunt de ore ejus: quia Angelus est Domini Sabaoth. Decet enim Dei Ministrum, eum qui populo præest, notitiam habere rerum & Divinarum, & humanarum: tam ut instituta bene vivendi docere queat, quam fidei atque spei documenta: quia Angelus Domini est. Nos autem, quos Dei benignitas, atque patientia, immeritos licet, in hac Sede collocavit, & præire multis ac præluce voluit, librum hunc compilandum bona fide, nullo ambitionis vitio curavimus: ut qui sub administratione nostra ac cura degunt, quovis illi munere in Ecclesia fungantur aut ordine, inter fideles positi sint, legem habeant &



scientiam: non utique rerum omnium, sed earum potissime, quæ solent hac nostra tempestate tractari, atque desiderari. Nam Dei gratia, accepto in urbe a bonæ memoriæ PLO V. Pontifice munere Consecrationis, & Pallio, reversi in Patriam (quod omnes feceris) Synodum Provinciale, ad diem XXIV. Octobr. anni M.D. LXXI. in Ecclesiam Metropolitanam indiximus, & convocavimus. Ubi Dioecesanis nostris, cum Reverendissimis Episcopis Comprovincialibus & Suffraganeis, in Spiritu Sancto legitime congregatis, officioque Divino cum indulgentia plenaria ejusdem Patris Sanctissimi celebrato: Synodum ritu solenni aperuimus, ac deinceps Concilii Tridentini Sacrosancti Canones ac Decreta, lecta & publicata, palam & publice cum universo Clero, recepimus ac juravimus. Sed quoniam ad eorum executionem nonnulla videbantur esse in Diocesi nostra constituenda: decretum fuit, ut reformatis ex ipso Concilio paucis aliquot Statutis ex prioribus, juxta materiam & argumenta singulorum, doctrina aliqua atque institutio Clericis omnibus pro tempore necessaria, ex consilio sententiaque Virorum doctissimorum, qui Nobiscum ad hoc opus deputati fuerunt, conciperetur, atque ederetur. Hoc opus Dei beneficio absolutum, typisque excusum, vobis jam nolo præsentamus. Accipite igitur Patres & Fratres in Christo Charissimi, ad unius DEI Omnipotentis cul-

tum, & honorem Virginis MARIÆ Matris DEI Gloriosissimæ, Beatorumque Apostolorum Petri & Pauli, Joannis Evangelistæ, & Stephani Protomartyris, Sedis nostræ Archi-Episcopalis Patronorum, ac Sanctorum Martyrum Vincentii, Ferreoli & Ferrucii, atque Irenæi, Epiphaniæ & Isidori, aliorumque ejusdem Ecclesiæ protectorum, omniumque Sanctorum, ad fidei stabilimentum: ad utilitatem Cleri, Civitatis & Dioecesis: ad defensionem libertatis, jurisdictionis & status Ecclesiastici: ut omnia suo gerantur ordine, quæ cuique in suo gradu & tempore fieri debent. Accipite, inquam, sequentes Constitutiones, sive Statuta: partim ex ipso Concilio Tridentino, Patrumque Decretis: & Ecclesiastici Juris legibus: partim ex Prædecessorum nostrorum Archi-Episcoporum Bisuntinensium Statutis Synodalibus desumpta: partim etiam a Nobis in proximis Synodis jam rogata & publicata, & denuo in dicta Provinciali recepta. Hujus autem Libri pars una commentariorum est doctrinæ, ad custodiendam aliquam scientiam in labiis Sacerdotum. Altera collectionem continet Statutorum: si quis legem requirere velit ex ore nostro, quomodo versari vos, vobisque subditos oporteat in Ecclesia Dei, quæ est columna & firmamentum veritatis. Paxit Christus Iesus, ut labor hic noster nec inanis, nec sine fructu reperatur in die judicii.

## CATECHISMUS,

*Qui pro Indice servare poterit horum Statutorum Synodaliū.*

Cum sit finis & scopus Congregationum Ecclesiasticarum atque Synodorum, ut in Clero & in populo integra retineatur Fidei doctrina & morum: operæ pretium est, ut in fronte hujus operis Capita proponamus Doctrinæ Catholicæ. Is ergo erit brevis Catechismus: qui & pro Indice etiam sumi poterit materiarum, quas continebit hæc doctrina Cleri nostri. Contineatur autem omnis doctrina Catholica in tribus virtutibus Theologicis, Fide, Spe, & Charitate: de quibus suis locis tractabimus. Nunc scire oportet Catechismum instructionem esse Catholicam, quæ per interrogationem fit & responsionem. Dictio græca est, & deducitur ab Echo, id est, resonantia, illa scilicet, quæ inter montes in profundis vallibus responderet. Et quidem merito. Nam fides ex auditu est: Echo autem ultimas tantum syllabas vocum refert, sicut a catechumeno (rudi adhuc, & lacte, non jam solido cibo indigenti) principia tantum, rudimenta que Religionis tradita voce, verbisque concepta exigimus. Sed sapientiam, inquit Apostolus, loquimur inter perfectos. Et quia perfectiores in Ecclesia habentur Clerici (quos decet non solum

verbo, sed opere etiam præire cæteris) idcirco non solum de vita, & honestate eorum, præcepta dabimus: sed & de modo conveniendi ad suscipiendam, atque tractandam disciplinam Ecclesiasticam. Vocatur hæc Congregatio Synodus.

*Quenam celebrantur Synodi in Diocesi Bisuntina?* Pag. 9

Duæ: Provincialis, seu Generalis: & Dioecesana.

*Vitam Clericorum, quæ sunt, quæ maxime faciunt honestam?* 12

Continentia, morum simplicitas, & scientia.

*Scientia quorum est?*

Virtutum, Scripturarum, & Rituum.

*Virtutes quæ sunt?*

Theologicæ, & morales.

*Quot sunt virtutes Theologicæ?* 15

Tres: Fides, spes, charitas.

*Morales quæ?* 17

Prudentia, temperantia, fortitudo, & prudentia: & quæ sub his continentur.

*Sensus exteriores?* 20

Quinque: Visus, auditus, gustus, odoratus, tactus.

Poten-

*Potentia animæ quot sunt?* Pag. 21  
Tres: Memoria, intellectus, & voluntas. Liberum arbitrium additur voluntati.  
*Fidei professio, quotuplex?* 25  
Explicita, atque articulata, Symbolum: implicita, signum crucis Christi, In nomine Patris, & Filii, & Spiritus Sancti. Amen.  
*Symbolum Apostolorum quod?* 27  
Credo in Deum Patrem omnipotentem, Creatorem cæli & terræ, &c.  
*Fides unde est?*  
Ex auditu: Auditus autem per verbum Christi.  
*Verbum Dei quomodo in nobis fit?* 33  
Per inspirationem Dei intrinsecus: & extrinsecus per os Dei, & per traditionem & per Scripturam Sanctam.  
*Libri Canonici qui sunt?* 35  
Vetus testamentum, & novum.  
*Libri prohibiti?* 36  
Hæresiarcharum omnes: aliorum quoque hæreticorum, qui de religione tractant: & præterea superstitiosi & impudici.  
*Hæreticus quis?* ibid.  
Qui fidem, quam antea professus est, in aliqua parte tenet, in alia errorem pertinaciter defendit.  
*Oratio Dominica, quæ?* 39  
Pater noster, qui es in cælis, sanctificetur &c.  
*Salutatio Angelica?* 44  
Ave Maria, gratia plena, Dominus tecum, &c.  
*Præcepta Decalogi quot sunt?* 47  
Decem. Unum crede Deum: ne jures vana per ipsum.  
Sabbata sanctifices: habeas in honore parentes.  
Ne sis occisor, mæchus, fur, testis iniquus. Alterius nuptam, nec rem cupias alienam.  
*Præcepta Ecclesiæ?* 53  
Festa cole, atque jejunia: Christum in Paschate sume.  
Crimina Paltori narra: Missamque frequentam.  
Sed decimas solves, collectis lætus aristis.  
*In Missa quænam fiunt?* 54  
Confessiones, preces, exhortationes, gratiarum actiones, oblationes, sacrificium, communio, cantus.  
*Festum quotuplex?* 57  
Duplex: Mobile, & immobile.  
*Computus Ecclesiasticus quænam docet?*  
Quantitatem anni & mensium, literam Dominicalem, aureum numerum, Pascha, & alia Festa mobilia atque immobilia.  
*Sunt ne omnia opera peccata?* 71  
Non, sed quædam bona, quædam mala, quædam indifferentia.  
*Opera satisfactoria, & meritoria quæ sunt?* 72  
Oratio, jejunium, elemosyna.  
*In Rosario Mysteria meditanda quindecim?* 77  
Læta quinque, tristia quinque, gloriosa quinque.

*Septem opera misericordiæ corporalia quæ?* Pag. 79  
Visito, cibo, potu, redimo, tego, colligo, condo.  
*Septem opera misericordiæ spiritualia?* ibid.  
Consule, suade, doce, solare, remitte, fer, ora.  
*Consilia Evangelica?* 81  
Paupertas, castitas, obedientia. Propria sunt hæc Monachorum & Monialium.  
*Votum quotuplex?* 86  
Solenne, & simplex.  
*Dispensatio quorum est?* 87  
Voti, juramenti, præcepti, & prohibitionis.  
*Indulgentia quotuplex?* 89  
Duplex: Plenaria, & determinata.  
*Peccatum quotuplex est?* 96  
Triplex: Mortale, veniale, originale.  
*Peccata mortalia, seu capitalia quot sunt?* 98  
Septem: Superbia, avaritia, luxuria, invidia, gula, ira, accidia.  
*Peccata clamantia in cælum?* 103  
Quatuor: Homicidium, sodomia, opprobrium pauperum, merces operarii detenta. Addunt etiam usuram.  
*Peccata in Spiritum Sanctum?* 107  
Sex: Præsumptio, desperatio, impugnatio veritatis agnitæ, invidia fraternæ gratiæ, obstinatio, finalis impenitentia.  
*Gratia Dei quotuplex?* 108  
Duplex: Gratia data, & gratum faciens. Gratia quoque prædestinationis, & ejus signa quæri possunt.  
*Septem dona Spiritus S. quæ sunt?* 117  
Spiritus sapientiæ, & intellectus: Spiritus consilii, & fortitudinis: Spiritus scientiæ: Spiritus pietatis & timoris Domini.  
*Fructus Spiritus?* 118  
Charitas, gaudium, pax, patientia, benignitas, bonitas, longanimitas, mansuetudo, fides, modestia, continentia, castitas.  
*Octo beatitudines quomodo explicantur.* ib.  
Beati pauperes spiritu, quoniam ipsorum est regnum cælorum. Beati mites, quoniam ipsi possidebunt terram. Beati qui lugent, quoniam ipsi consolabuntur. Beati qui esuriunt & sitiunt justitiam, quoniam ipsi saturabuntur. Beati misericordes, quoniam misericordiam consequentur. Beati mundo corde, quoniam ipsi Deum videbunt. Beati pacifici, quoniam ipsi Filii Dei vocabuntur. Beati, qui persecutionem patiuntur propter justitiam, quoniam ipsorum est regnum cælorum.  
*Quatuor novissima, quæ sunt?* 119  
Mors, dies judicii, infernus, vita æterna.  
*Morientibus necessaria officia, quæ?* 127  
Ante mortem, testamentum (vel cessio bonorum) doctrina bene moriendi, & Sacramenta: post mortem, sepultura, utriusque testimonium de bono statu.

Trus

- Tres hostes hominis assidui, qui sunt?* Pag. 134  
Caro, mundus, dæmonia.
- Jam (quod superest) ritus unde discemus Ecclesiasticos?* 139  
Ab Ecclesia.
- Quotuplex est Ecclesia?* ibid.  
Militans & triumphans.
- An est ambarum unum Caput?*  
Christus caput est tam eorum, qui in terra sunt, quam qui in cælis. Sed militantis Ecclesiæ caput in terris est Summus Pontifex.
- Ecclesia materialis, quando reconcilianda est?* 143  
Si fuerit polluta sanguinis, vel seminis effusione, vel altare ejus motum.
- Sacramenta Ecclesiæ, quot sunt?* 144  
Septem: Baptismus, Confirmatio, Eucharistia, Pœnitentia, Extrema unctio, Ordo, Matrimonium.
- In omni Sacramento necessaria quæ sunt?* ibid.  
Materia, forma, Minister, & intentio.
- Baptismo, quæ sunt necessaria?* 146  
Minister, aqua, & verbum.
- Ritus observandi in Baptismo?* 150  
Alii in casu necessitatis, alii extra hunc.
- Cognatio spiritualis inter quos?* 153  
Levantes cognati fiunt spirituales baptizati, & parentum ejus.
- Confirmationi necessaria?* 154  
Episcopus, Christma, impositio manuum.
- Eucharistiæ?* 156  
Presbyter, panis & vinum, verbum.
- An requiritur aliqua præparatio?* 157  
Debet sumpturus, se ipsum præparare, ne indigne sumat: & Presbyter admonere eum de virtute, & dignitate Sacramenti.
- Pœnitentiæ partes quæ?* 159  
Contritio, confessio, satisfactio: Minister hujus Sacramenti est Presbyter jurisdictionem habens.
- Casus reservati?* 167  
Alii Papæ tantum, alii Episcopo etiam.
- Extremæ Unctioni necessaria, quæ?* 168  
Presbyter, Oleum infirmorum, Oratio.
- Matrimonio?* 169  
Viri & mulieris consensus, & minister Parochus: cum testibus saltem duobus.
- Suntne aliqua impedimenta Matrimonii?* 171  
Sunt quidem aliqua, quæ impediunt contrahendum, sed non dirimunt contractum.
- Alia, quæ non solum impediunt contrahendum, sed eam dirimunt contractum.
- Ordines Ecclesiæ quot sunt?* Pag. 175  
Septem: Oltarius, Exorcista, Lector, Acolytus, Subdiaconus, Diaconus, Presbyter.
- Examen ordinandorum, quomodo, & quando fieri debet?* ibid.  
Ad primam Tonsuram, quocunque die: ad quatuor Minores, diebus Dominicis & Festis: ad Sacros, Sabbatis quatuor temporum promovebuntur: sed non nisi legitimi, & sufficientiæ testimonium habentes de ætate, doctrina, fide, & moribus.
- Examinis corruptela, quæ?* 178  
Simonia.
- Simonia, quibus rebus committitur?*  
Munere, prece, servitio, sanguine.
- Ministrorum Ecclesiæ differentie?* 179  
Ministri Sacramentorum, Ministri doctrinæ, Ministri pauperum & infirmorum, Ministri cantuum Divinorum, Ministri justitiæ, Ministri denique Ministrorum Ecclesiæ, & unus omnium Papa.
- Statuta Ministrorum singulorum propria quænam dabimus?* 182  
Simplicium Presbyterorum & familiarium, Pastorum seu Curatorum, Prædicatorum [& de prono] Magistrorum seu Scholasticorum, Hospitaliorum, Fabriciariorum, Monachorum & Monialium, Psallentium.
- Horæ Canonice in quibus consistunt?* 200  
In orationibus, lectionibus, & cantibus, & corporis gestu.
- Musica in quibus consistit?* 203  
In rythmo, sono, syllaba, & modo.
- Ministri justitiæ?* 208  
Ordinarii & Delegati.
- Mandatorum Curie executiones, quæ?* 210  
Monitio, citatio, districtio, notificatio, inquisitio, vel informatio.
- Censuræ Ecclesiasticæ, quæ sunt?* 213  
Excommunicatio, interdictum, suspensio, & irregularitas.
- Excommunicatio quotuplex est?* ibid.  
Major & minor: a jure, & ab homine.
- Excommunicati pena quæ est?* 214  
Privatur in vita orationibus Ecclesiæ, & Sacramentis, & convictu fidelium, omni actione in judicio: & traditur Satanæ, & post mortem caret sepultura Ecclesiastica.
- Casus excommunicationis variis temporibus publicati, multi sunt.* 218



# STATUTA SYNODALIA

## BISUNTINÆ DIOECESIS.

### DE SYNODO.

Cum multa Divinitus a Majoribus nostris, Ecclesiæ Bisuntinæ Patribus, instituta sint & tradita, per quæ nos in studio & perfectione Evangelicæ Professionis continerent, illud inter cætera maxime necessarium Reipubl. nostræ statuerunt, ut Sacerdotes frequenter in unum convenirent, & Ministrorum Ecclesiæ fieret bis in anno quædam veluti recitatio & confessus, quam Synodum Græco vocabulo appellarunt. Nam sive errores, suppel- lulent in doctrina, sive scandala ponantur in moribus, sive ritus depraventur in ministerio, sive contemptus & inobedientia notetur in delictis, & contumacia in obstinatione: hac Sancta Synodo (veluti ab equis pluribus, in area super spicas, & messem circum- actis, decussa gleba, & tritis aristis) sic omnia depurgantur & restituuntur, ut minimo flatu auræ principalis favoris, disciplina Ecclesiastica, Deique cultus, in pretio sint, & grana tritici in horreum Dominicum recondenda, pietatis operibus omnis generis niteant, & splendent. Hic conferunt Patres inter se de doctrina Fidei: nunc uno interpretante, & cæteris aliis tacentibus: nunc respondente uno, & cæteris interrogantibus: & quod Fidei Catholicæ, Patrumque præceptis consonare videtur, id unum confirmant, corroborant, & profitentur. Hic de moribus populi sui quisque refert, quod animadversione dignum putat: ut ejus rei causâ admonitiones populares, si opus sit, concipiantur in Synodo. Hic Ministri Sacramentorum sigillatim examinantur & probantur, num recte teneant & exequantur, quæ sunt sui officii: & qui deprehenduntur indigni, gradu suo moventur ab Antistite, aliis in locum eorum suffectis. Hic referuntur a suis Pastoribus quicunque ex

plebe incorrigibiles, tanquam membra putrida debent ab Ecclesiæ corpore rescindi: hæretici, usurarii, blasphemi, incantatores, & quicquid aliud correctione indiget, tum in Clero, tum in populo, refertur palam, vel paucis adhibitis ex Synodo primoribus: ut si res postulat, advocato Brachio sæculari, malum tollatur ab Ecclesia. Atque hæc quidem primum. Dehinc pro usu & necessitate, atque occasione Leges, ac Statuta rogantur: & in ultima Concione promulgantur, cum Decreto & auctoritate Antistitis. Quanquam doctrinam quidem rerum credendarum eandem semper manere necesse est: nec licet Nobis quicquam in ea novi statuere, vel deliberare. Si Nos ipsi (inquit Apostolus) vel Angelus de cælo prædicaverit vobis Evangelium, præter id, quod prædicatum est vobis, anathema sit. Verum in rebus agendis, & disciplina Ecclesiastica mutari pro ratione temporum & locorum, ac personarum multa possunt. Nam Decretum, quod cum B. Paulo (a) cæteri Apostoli propter dissidium Judæorum & Gentium condiderant, de non edendo idolothyto, idem Paulus postea scribens Corinthiis, sublata illa causa rescidit. Quicquid in macello vænit (inquit) edite, nihil interrogantes. Et contra ethnicam libertatem circumcidit Timotheum (b). Idemque ad Galatas, si circumcidimini (ait) Christus vobis nihil prodest. Neque tamen propterea licet nobis, quæ ab Ecclesia universali, & in Generalibus Conciliis (etiam circa res agendas & disciplinam Ecclesiæ, atque exercitationem corporalem) constituta sunt, nostra auctoritate abrogare, vel abolere: quamvis in multis dispensemus ex causa justa, multaue commutemus, veluti obligationem unius operis pii, in

(a) Act. 15.

(b) Act. 16.

in aliud eodem modo pium, conver-  
tentes. Nam quod a Majoribus digni-  
tate & auctoritate præceptum, sanc-  
tumque est, inferiores observare, non  
contemnere, vel abrogare decet. Sed  
quoniam non omnia Patrum Decreta  
omni tempore æque necessaria habentur:  
idecirco fit, ut variis Synodis va-  
ria etiam Statuta ferantur, non quasi  
nova quidem, sed (ut ita dicamus) re-  
novata. Cujus rei necessitatem cum  
crebro experti sint Majores nostri: hac  
certe infelici tempestate adeo Nos  
urget, ut non sine lachrymis & gemitu  
referamus. Eam igitur ob causam, ut  
omnes intelligant, quo ritu haberi Syn-  
odus debeat Ecclesiæ nostræ: Statuta  
de Synodo, quæ ab omni tempore ob-  
servata a Majoribus nostris fuere, pro-  
ponemus.

## STATUTA DE SYNODO.

### STATUTUM PRIMUM.

**S**anctorum Patrum (c) vestigiis infi-  
lentes bonæ memoriæ Prædecessores  
nostri, hujus Sanctæ Sedis Bisuntin-  
ensis Archi-Episcopi, celebrare duas  
Synodos singulis annis consueverunt.  
Primam quidem in septima & ultima  
hebdomada Paschalis solennitatis, in die  
videlicet Martis ante festum Penteco-  
stes: alteram vero in mense Octobri,  
die Mercurii post festum B. Lucæ Evan-  
gelistæ.

#### II.

Prima igitur, quæ dicitur Maji, in-  
cipit die Lunæ ante solennitatem Pen-  
tecostes, in Aula nostra Archiepiscopa-  
li, in qua fit primus sermo ad Cle-  
rum, & collatio de rebus, quæ pro  
tempore occurrunt tractandæ: semo-  
tis laicis, qui concioni tamen poterunt  
interesse. In crastino (videlicet die  
Martis) in Ecclesia nostra Cathedrali  
primo fit officium Missæ de Sancto Spi-  
ritu: deinde celebratur Synodus: & in  
ea habetur ultimus sermo ad Clerum:  
tandem, quæ statuenda visa fuerunt, pu-  
blicantur.

#### III.

Secunda Synodus dicitur Autum-  
ni, & incipit post Vesperas diei Mar-  
tis: & die Mercurii post Festum Sancti

Lucæ celebratur, & finitur sicut illa  
Maji.

#### IV.

Suadente autem necessitate, vel  
aliqua causa rationabili, potest a Ci-  
vitate transferri Synodus, & in loco  
aliquo Dioecesis congruo & commodo  
(deputando per Archi-Episcopum)  
convocari, congregari, & celebrari.  
Quam tamen translationem, congre-  
gationem & loci deputationem, tem-  
pestive facere debet Archi-Episcopus,  
ut ad eorum omnium notitiam perve-  
niat, quorum interesse possit.

#### V.

Quando causa rationabilis quidem  
existit, ut universi Ordines Ecclesiastici  
convocentur ab Archi-Episcopo ad Syn-  
odum, non solum Rectores anima-  
rum & Presbyteri, sed Abbates & Re-  
verendi Episcopi, omnes Suffraganei  
interesse debent. Verum singulis Syn-  
odis Dioecesanis, quæ bis in anno cele-  
brantur, non alii coguntur interesse,  
quam ii, quibus cura populi commissa  
est (sive Abbates fuerint, sive Prio-  
res, sive Capitula & Collegia) per se,  
vel per suos Vicarios: reliqui exempti  
sunt ab eo onere.

#### VI.

Tenantur tamen in hac Dioecesi  
Bisuntin. in omnibus Synodis compare-  
re cum Fratribus nostris Ecclesiæ Me-  
tropolitane Canonice Venerabiles Ab-  
bates, Sancti Vincentii Bisunt. Civita-  
tis, & Sancti Pauli ejusdem Civitatis:  
Abbas Montis benedicti: Abbas de  
Golia: Abbas de Corneolo, & Ab-  
bas de Bello-Campo, in habitibus qui-  
dem suis regularibus in priori collatio-  
ne, quæ fit post Vesperas, uti dictum est:  
mane vero Abbates mitrati cum cappis  
sericeis, & mitris, & crossis, alii non  
mitrati, cum similibus cappis & almu-  
tiis, prout ab antiquo observatum est,  
& præterea quatuor Archi-Diaconi no-  
stræ Dioecesis cum suis Decanis: scili-  
cet Archi-Diaconus de Salinis, Archi-  
Diac. de Faulverneyo, Archi-Diac. de  
Grayaco, & Archi-Diac. de Luxonio.

#### VII.

(c) Canon. 38. Apost. Conc. Nicen. can. 5. Antioch. c. 5.

## VII.

Decani Christianitatis (quos rurales vocamus, alii Archi-Presbyteros) aut eorum Subdecani, compareant in utraque collatione in vestibus honestis, cum superpelliciis albis, mundis & honestis: similiter & Curati, seu eorum Vicarii, cum superpelliciis (præsertim in Synodo matutina) diligenterque attendant ad verba sacræ cohortationis, & ad alia, quæ eis dicentur, ac mandabuntur: nec recedant ab ipsâ Synodo absque nostra, aut Vicarii nostri Generalis licentia.

## VIII.

Venientes ad Synodum, honestam sibi eligant societatem, honesta hospitium: ubi graviter, modeste, pacifice, se gerant: sobrie vivant: vana colloquia, & scæda, cantilenas, choreas, meretrices, & suspecta omnia devitantes: potius orationibus & jejuniis, exemplo Apostolorum, vacent, & de rebus Ecclesiasticis meditentur.

## IX.

Curati, qui nequeunt personaliter interesse propter causam legitimam, dent Decanis suis excusationem suam in scriptis, quam Decani Nobis præsentare tenebuntur in ipsâ Synodo: alias contumaces reputabuntur. Præcipimus autem Receptori Cameræ nostræ, ut diligenter exigat pœnam contumaciæ absentium omnium, qualis in quaque Synodo declarata fuerit.

## X.

Antequam vero se itineri committant, visitent gregem suum, ac dispiciant: & si quos morbo gravatos habuerint, eos hortentur ad susceptionem Sacramentorum. Similiter hortentur mulieres partui proximas, ad Confessionem, & Sacrosanctam Communionem: ne ipsis absentibus contingat eas ab hac luce decedere absque illis Sacramentis.

## XI.

Quod si commode non possint, relinquunt Presbyterum aliquem, qui eorum vices gerat: & rebus ita ordinatis, ad Sanctam Synodum properabunt.

*Tomus VIII. Concilior. German.*

*Nomina Decanatum hujus Dioecesis Bisuntin. in quos tanquam particulares Dioeceses dividitur, hæc:*

De Sexta,	De Montana,
De Faulverneyo,	De Neublanco,
De Treva,	De Varese,
De Luxonio,	De Salinis,
De Ledonesalverii,	De Dola,
De Grayaco,	De Grangiis,
De Palma,	De Rubeomonte,
De Atoya,	

## XII.

Tenantur Decani rurales in singulis Synodis referre nomina Beneficiatorum (præsertim Curatorum) non residentium in suis Ecclesiis Parochialibus, idque in scriptis.

## XIII.

Item nomina excommunicatorum, qui per annum & diem sententiam excommunicationis sustinuerint.

## XIV.

Item nomina adulterorum, concubinariorum, & usurariorum publicorum & manifestorum.

## XV.

Item nomina hæreticorum, conventicula celebrantium, seu a communi conversatione fidelium vita & moribus dissidentium.

## XVI.

Item nomina sortilegorum, divinatorum & receptorum eorundem, & blasphematorum Dei, Virginis Mariæ & Sanctorum.

## XVII.

Idcirco diligenter debent hæc inquirere tam in populo, quam in Clero, & prudenter: ut fideliter referre possint in Synodo.

## XVIII.

Item referre debent, si qui in Beneficia Ecclesiastica absque Canonica institutione se intruserint.

## XIX.

Item si qui incorrigibiles fuerint in Clero, aut minus idonei Rectores Ecclesiarum in Decanatibus ipsorum.



## XX.

Item referre debent nomina eorum, si qui sint, qui beneficia sub injusto titulo habent in confidentiam.

## XXI.

Item referre debent nomina hæredum, qui defunctorum testamenta non publicant : & exequutorum, qui pias eorundem dispositiones non exequuntur.

## XXII.

Decani rurales post nostram Synodum, cum Curatis suorum Decanatum compareant annuatim in locis & diebus consuetis ab antiquo ad celebranda sua Concilia, seu Conventus, ibique orationem per se, vel per alium habeant de moribus & honestate Clericorum, & Statuta nostra Synodalia recitent & exponant, invocato prius per Missam & Processiones devotas Spiritu Sancto: deinde conferant cum Curatis ipsis de rebus Ecclesiasticis, prout suo incumbit officio, honeste, pacifice, & modeste, sine murmure, sine contentione : & quæ invicem contentiones, expedire duxerint ad tranquillitatem, libertatem, auctoritatemque Ecclesiæ, illa in proxima Synodo referant Nobis, vel verbo, vel scripto.

## XXIII.

Recedentes Curati, vel Vicarii eorum a Synodo Maji, accipiant Sanctas Unctiones recentes, & honeste deferant, non committentes eas laicis hominibus. A Synodo vero Autumnii tabulam Calendarii & Officii sequentis anni, si quæ factæ fuerint, accipient: & utrumque gratis dabitur.

## DE VITA ET HONESTATE Clericorum

**Q**ui aliis præluere debent, si ipsi tenebræ sint: (d) aut qui sal, ipsi sint infatuati; quis ab eis vel illuminari, vel saliri velit? Ergo ut Sacerdotes exemplo sint fidelium, nec vita destruant, quod doctrina possent ædificare: De vita & honestate Clericorum præcepta jam tradamus. Nam ut conscientiam puram apud Deum nos habere oporteat: tamen & apud homines fa-

mam optimam custodire convenit, ut juxta præceptum Apostolicum, non tantum coram Deo, sed etiam coram hominibus vitæ sanctæ testimonium habeamus. Qui vitam agit doctrinæ contrariam, plus exemplo destruit, quam verbo ædificet. Quare Beatiss. Paulus Apostolus Ministrum Ecclesiæ instituturus, exemplo (inquit) esto fidelium in verbo, in conversatione, in charitate, in fide, in castitate. Et ad Titum secundo, Nemo te contemnat. Nihil vero perinde Ordinem Ecclesiasticum commendat populo, quam vitæ simplicitas & continentia. Contra vero luxus & ambitio, Deo & hominibus odiosa sunt. De vita igitur atque honestate Clericorum hæc præcepta teneant, quæ sequuntur:

### STATUTUM I.

**C**aveant sibi Sacerdotes ab omni luxu profano, (e) fastuoso, & carnali, tam in victu, quam in cultu: & ab omni specie mali abstineant: decorumque conditionis suæ atque status servant, non solum coram Deo, sed etiam coram hominibus: ne occasionem dent adversario maledicendi.

## II.

Sit habitus Clericorum (sicut jure cavetur) honestus, & simplex: non discissus, aut acupictus, aut militari more affectatus: mundus tamen. Superior vestis Presbyterorum sit calaris, nec nimia longitudine, nec nimia brevitate notabilis: Et pileus, qualem ceteri Ecclesiastici pro tempore reformati gerunt. (f) Et Professionem Sacerdotalem habitus atque incessus probent. Clerici alii simplices Beneficiati, non ferentes habitum Clericalem, privabuntur suis beneficiis post monitionem.

## III.

Sumentes cibum benedicant mensam in principio, facto signo Crucis supra epulas decenter: (g) & in fine gratias Deo agant, & eodem signo Crucis se signent.

## IV.

Non ferant arma, [b] quorum arma sunt orationes & lacrymæ: & quos vitæ sanctimonia rutos & venerabiles reddere debet.

## V.

(d) Malach. 2.

(e) Trid. Sess. 25. c. 1.

(f) Dist. 23. Non liceat. Conc. Carth. 4. c. 45.

(g) 1. Cor. 10.

Coloss. 2.

(b) De vita &amp; honest. Cler. c. Clerici.

## V.

Non barbam ferant, (i) neque molliter comam colant: sed tonsura in vertice, juxta Ordinem suum, coronam efficiat congruentem: qua se in regale Sacerdotium assumptos, nihil jam plebeum, aut humile sapere, præ se ferant.

## VI.

Non ferant annulos in digitis: nisi quibus competit ex officio dignitas. (k)

## VII.

Turpibus (l) & obscænis spectaculis, aut confabulationibus ne intersint. Quia corrumpunt bonos mores colloquia prava. Minus ergo licebit spectacula ipsa exhibere, & histrionum habitu prodire in theatrum, fabulasque recitare scenicas.

## VIII.

Nec in comessationibus & ebrietatibus, juxta Pauli (m) Apostoli præceptum: quod in vulgo etiam damnant Sacrae Literæ. Quoniam luxuriosa res est vinum, (n) & contumeliosa ebrietas. Et Propheta: Væ qui potentes estis ad potandum vinum, (o) & viri fortes ad miscendam ebrietatem. Vino & cicera lex vetus (p) interdicebat ministrantibus in templo: & Canones antiqui (q) ab officio & beneficio in longum tempus suspendebant, quem ebrium fuisse constaret.

## IX.

Nec aleæ vacent, aut ludis vel prohibitis, vel publicis: quibus simplex populus scandalizatur. (r)

## X.

Nec duellis aut certaminibus periculosis intersint, unde irregularitas incurri potest. (s)

## XI.

Neque executioni sententiæ sanguinis damnatorum hominum assistant, multo minus eam scribant, aut dicent: quia fierent irregulares. (t)

## XII.

Nulli Clerico liceat, tabernam, aut ergasterium (id est, officinam publicam) habere. Si enim hujusmodi tabernam ingredi prohibetur, quanto magis aliis ministrare in ea? Officina autem Sacerdotis, si qua esse videtur, Ecclesia sola est. Ne igitur tabernas ingrediantur cibi aut potus causa, nisi coacti necessitate. (u)

## XIII.

Nec licere sibi putent exercere Medicinam, aut Chirurgiam: nisi forte apud miseras, & sibi necessarias personas in necessitate: & ubi non est periculum mutilationis membrorum, aut mortis, nec requiratur adustio, vel incisio. (x)

## XIV.

Quibus tamen non sufficiunt reditus beneficiorum suorum, vel provenus patrimonii, possunt ex artificio honesto victum quærere: puta scribendo libros, aut notando, aut religando, aut hujusmodi. Non autem exercendo lanienam, proxeneticam, aut alias artes, ignominiosas & Sacerdote indignas: propter quas amitti solent privilegia Clericorum. (y)

## XV.

Multominus ergo usuras: quas qui accepisse Clericus detegeretur, degradari olim ab Ordine statutum est. (z)

## XVI.

Clerici non exercent (a) aut gerant officia Dominorum temporalium, propter quæ teneantur ad rationem red-

B 3

(i) Eod. c. Clerici. c. Si quis. (k) Statut. verus.  
 (l) Conc. Agath. Laodiceu. Carthag. 3. & 4. distin. 23. Clerici. (m) Rom. 13.  
 (n) Prov. 20. (o) Levit. 10. (p) Num. 6. (q) Dist. 35. Ante omnia. c. Episcopus.  
 (r) Ead. dist. (s) De vita & honest. Cleric. c. Clerici.  
 (t) C. Sententia sanguinis. Ne Clerici vel Mon. Paul. ibi. Angelus, Sylvester ver. Clericus.  
 (u) Distin. 44. c. Nulli. Conc. Laodic. c. 24. Carth. 3. c. 27. African. c. 7.  
 (x) C. Tua. de homin. Sylvester verbo Medicus. Stat. verus.  
 (y) C. Clerici. de vita & honestat. Cleric. & ca. 2. Ne Clerici vel Monachi.  
 (z) Conc. Nicæn. c. 18. Eliber. c. 20. Arelat. 2. c. 14.  
 (a) Stat. verus. Bal. in addit. ad Specu. tit. de Cleric. conjug.

reddendam ipsis Dominis temporalibus. Alioqui non juvabuntur privilegio & beneficio juris adversus dictos Dominos, si arrestentur aut detineantur ab eis in persona: aut si eorum bona occupari continget pro ratione reddenda, & solutione debiti facienda.

## XVII.

Non advocacionis, vel procuracionis officium coram Judicibus laicis: nisi pro causa sua, vel Ecclesiæ suæ, vel suorum, aut miserabilium personarum. (a)

## XVIII.

Tandem juxta dictum Apostoli, (b) qui militat Deo, ne implicet se negotiis secularibus, ut illi placeat, cui se probavit. Cujus conditionis maxime sunt Clerici omnes, tanquam in sortem & hæreditatem Domini assumpti. Et inter hos tanto magis quisque est, quanto Superior in ordine Ministrorum Ecclesiæ reperitur.

Quanto igitur indignius, Ministrum Christi, vas electum Dei, templum Spiritus Sancti: eum, qui ad sanctificandum alios destinatus est, scortationibus indulgere, & ludibrio voluptatum corpus suum tradere, quod Deo dicatum est per impositionem manuum Episcopi? Qui adhæret meretrici (inquit B. Paulus) unum corpus cum ea efficitur. Tollens ergo membra Christi, faciam membra meretricis?

Tantam indignitatem in Clero magna pœnarum severitate veteres ulsi sunt. Nam Concilium Neocæsariense (c) (quod fertur Nicæno antiquius) statuit, Presbyterum, qui uxorem duceret, ab Ordine deponendum: si fornicaretur autem, vel adulterium committeret, etiam extra Ecclesiam abjiciendum, & ad pœnitentiam inter laicos agendam redigi debere. Sequentia quoque Concilia omnia (quoniam hinc multa impendent mala) plurimam in hanc partem medicinam adhibere tentarunt.

Ut autem facilius cum Dei gratia immunes Clerici esse possint ab hac culpa, & mundos se servare in hoc sæculo: hortamur, ut præceptum Divi Hieronymi sequantur, Sacrarum Literarum lectionibus vacantes, &

orationibus: fugiant otium, postulentque a Deo (d) [qui dat omnibus affluenter, & non improperat] sapientiam, & castitatem. Vident quam maxime occasiones & consuetudinem sceminarum suspectarum. Nam qui tetigerit picem, inquinabitur ab ea. Eccles. 13. Et de vestimentis mulieris procedit tineæ. 24. Habentur (e) autem suspectæ omnes hæ: Juvenulæ formosæ, lascivæ, cultæ, procaces, imperiosæ, otiosæ, impudentes, curiosæ. Contra vero suspicionem fugient annosæ [quæ quadragesimum annum superarunt,] verecunda, sobria, pudica, inculta, laboriosa, severa: & quæ publico testimonio casta est, vidua, vel virgo senex. Sed neque cum talibus quidem familiaritas nimia est habenda: nam & consuetudinis ipsum nomen crimen habet. (f)

## XIX.

Caveant igitur sibi Ministri Altaris a contubernio & consuetudine sceminarum, maxime suspectarum. Nec domi habeant subintroductam, aut suspectam, sub pœnis a jure, & a Concilio Tridentino (g) constitutis.

Sed hæc omnia respectu hominum præcipiuntur, ut luceat lux nostra coram hominibus, ut videntes opera nostra bona, glorificent Patrem nostrum, qui in cælis est. Sed si quis peccaverit adversus Deum, quis orabit pro eo? (h) Idcirco Clericorum conscientias admonemus, ne per ignorantiam Legum Ecclesiasticarum in laqueos incidant diaboli.

## XX.

Omnes, cujuscunque Ordinis fuerint, Viri Ecclesiastici scire debent, se excommunicatos esse, si per Symoniam obtinuerint beneficia Ecclesiastica: nec jus aliquod habere ad ipsa, sed teneri ad restitutionem, tam fructuum perceptorum, quam ipsorum beneficiorum. Ad hæc qui duo incompatibilia obtinuerit sine dispensatione sufficiente (ita ut adeptus possessionem secundi, non renunciaverit priori intra tempus) utrumque amittere, inhabilemque se reddidisse, ad alia obtinenda, & ad suscipiendos Ordines Sacros. (i)

## XXI.

(a) Idem Concil. Carth. 1. c. 6. & 3. c. 15. Conc. Chalc. c. 3. act. 15. 14. & 5. c. Denique. & c. Sacerdotibus. extr. Ne Cler. vel Mon. (b) 2. Tim. 2.

(c) Distin. 28. Presbyteri. (d) Jacob. 1. (e) Form. Reform. sub Carolo V.

(f) C. Clericus. 81. dist. cum cc. seq. Ext. Monasteriis. de vita & honest. Cler.

(g) Sess. 25. c. 14.

(h) 1. Reg. 2.

(i) Paul. 2. in extr. de Sim. Concil. Constant. Sess. 43. Conc. Chalcedon. can. 10. Act. 15. Latera. part. 2. Tho. quodl. 8. & 9. gloss. in c. Dudum. 2. de Elect. & alii in c. conquirente de Cler. non resid. & in c. De multa. de probat. & dign.



## XXI.

Item qui beneficium in confidentiam tenet alterius, excommunicatum esse, & in eum sicut solet in hæreticum inquiri debere. (k)

## XXII.

Item qui natus ex illegitimo thoro. Et qui ante vigesimum quintum annum beneficium curatum obtinuerit, nullum jus habere ad beneficium: sed teneri ad restitutionem: quoniam nulla est ea collatio, sicut neque ea, quæ facta fuerit irregulari, aut excommunicato, aut interdicto. (l)

## XXIII.

Item qui habens beneficium curatum, non suscipit Ordines Sacros intra annum: & qui non relident in suis beneficiis absque iusta causa atque excusatione, beneficia amittunt. Nec illa causa videtur eos excusare a visitatione ovium suarum, quando vacat, Pastoris officium maxime diebus solemnibus impendere. (m)

## XXIV.

Qui præterea Horas Canonicas dicere neglexerit, vel in Choro, (vel extra Chorum, quando est occupatus) peccat: & post sex menses, qui ad ediscendum eas præfigitur, restituere compelletur fructus omnes ex beneficio perceptos, eosque erogare in pios usus: quin etiam testari prohibetur de iis, quæ ex fructibus beneficiorum acquisierit. (n)

## XXV.

Omnino autem interdicitur ex bonis Ecclesiæ augere suos consanguineos vel familiares. Sed si pauperes illi sint, tanquam pauperibus bene fiat: non aliter.

Quæ omnia cum sint Sacris & Canonicis sancita Constitutionibus, observari serio debent ab omnibus Ecclesiasticis: aut in quibus dispensationi locus est, dispensari secum in tempore unusquisque procuret. Atque

hæc quidem in universum omnibus Ecclesiasticis, quique militiae Clericali ascripti, beneficiis & honoribus Ecclesiæ frui, potiri que desiderant.

## DE VIRTUTIBUS THEOLOGICIS, Fide, Spe, & Charitate.

Sicut numero septem invenimus esse peccata seu vitia capitalia, sic & septem numerantur virtutes primæ & principales. Quarum tres dicuntur Theologicæ, Fides, Spes, Charitas: quatuor morales, scilicet, Prudentia, Justitia, Fortitudo, Temperantia. Hic tamen de Theologicis agemus primum.

Diætæ sunt tres Theologicæ, & aliæ morales, quia cum quatuor aliæ a Philosophis moralibus tradantur, hæc tamen per Dei verbum discuntur. Unde Jo. 6. Esa. 54. Erunt omnes docibiles Dei. Nam quod fide tenemus, spe optamus, charitate etiam inimicos diligimus, humana Philosophia nunquam docuit. Ergo in Fide, Spe, & Charitate tota Theologia (id est Divina doctrina) continetur. Nam si compendio aliquo scire desideras, quomodo colendus sit Deus: respondebit Divus Augustinus, Fide, Spe, & Charitate. Cor. 13. Nunc autem manent Fides, Spes, Charitas: Tria hæc.

Virtutes hæc Theologicæ, etiam nobis a Deo supernaturaliter conferuntur, ut per Baptismum parvulis: & dicuntur infusæ. Generantur etiam ex prædicatione Verbi Dei in adultis, & in Schola dicuntur acquisitæ: sed non sine Dei gratia præveniente & adjuvante acquiruntur. Unde & Dei donum est fides. Sed infusæ, a Deo solum supernaturaliter conferuntur.

### De Fide.

Fides, est credere, quod non vides. Sed nos de ea fide loquimur, cujus vi assentitur homo iis, quæ tralita sunt Divinitus, & sine qua impossibile est placere Deo. Hanc Apostolus definit ad Hebræos 11. Fides est substantia (Græce hypostasis) rerum sperandarum, argumentum non apparentium, id est suppositum & fundamentum, in quo spes subsistit nostra futurorum bonorum: argumentum (Græce elenchos) non apparentium, id est probatio, qua assentimur rebus iis, quæ a sensu nostro, vel experientia pro-

[k] Bulla Pii V.

(l) C. 1. & 2. de fil. Presbyter. lib. 6. c. Cum in cunctis. de Elect. c. Execrabilis. §. Interiora. ca. Cum inter. de Elect. c. Postulasti. & c. Sicelebrer. de Cler. excomm. min. C. Licet cau. de Elect. lib. 6. c. Cum ex eo. c. Extirpandæ. §. Qui vero. de Præb. Conc. Agath. c. 64. Leo Pap. Epi. 84. Conc. Arelat. 2. c. 13. Ca. Apost. 57.

(m) Vide librum Caranza de necessaria Resident.

(n) Conc. Lateran. Sess. 9.

procul sitæ sunt. Omnis enim cognitio a sensu dependet: & omnes scientiæ humanæ a sensibus quidem suas demonstrationes aspiciantur: sed Divinarum rerum doctrina a fide sumit probationem. Hinc fides pro argumento est, & pro demonstratione sufficienti earum rerum, quas non videmus. Nam sicut in scientiis humanis principia per se nota, aut aliunde demonstrata, fundamentum sunt, in quibus continentur, & quasi subsistunt conclusiones: sic in fide spes earum rerum, quas speramus. Utramque rationem fidei per varia exempla demonstrat ibidem Apostolus.

Fides est duplex. Mortua, seu historica, quæ tantum assentitur historiæ rerum credendarum: & credit, quæ credenda sunt, sed sine aliquo affectu pio in Deum, spei scilicet, vel charitatis. Hæc sola non iustificat: quod hanc etiam habent dæmones, qui credunt & contremiscunt. Et peccatores, quos licet credentes, tamen excommunicari jubet Apostolus. (o) Alia est viva & iustificans: quæ sic credit & assentitur historiæ rerum credendarum, quæ a Deo vel ab Ecclesia proponuntur, ut etiam per charitatem viveat, & operetur, dicitur aliter fides formata, alia vero informis. Et de fide formata intelligenda sunt verba Sacræ Scripturæ, quoties iustificatio ei tribuitur. Corde, inquit Apostolus, creditur ad iustitiam. Cor autem voluntatis affectum, non solum mentis assensum, significat. Ideo dicebat B. Joannes, qui non diligit, non novit Deum. Perinde enim est, ac si non nosset, qui, quem novit, non diligit, cum sit omnino diligendus & audiendus. (p) Quare falsum dicito, quod nonnulli asserunt, sola fide hominem iustificari: licet apud plures Authores phrasim hanc legas. Intelligendum enim est, fidem esse cum dilectione, & quæ per charitatem vivit.

### De Spe.

**S**pes definiri potest certa futuræ beatitudinis (vel rerum bonarum & futurarum, quas a Deo promissas, fide indubitata credimus) cum patientia expectatio ex Dei gratia & præcedentibus meritis proveniens. Docet B. Paulus: (q) Iustificati ergo (inquit) ex fide, pacem habeamus ad Deum, per Dominum nostrum Iesum Christum: per quem habemus accessum per fidem, in gratiam istam, in qua stamus & gloriamur in spe gloriæ filiorum Dei. Gloriamur etiam in tribulatione, scientes, quod tribulatio patientiam operatur, patientia probationem, probatio vero spem: spes autem non confundit.

Videtur enim Apostolus, (r) veluti finem ostendere, quo spes (anchora salutis nostræ) continetur, iacta usque ad interiora velaminis, ut ipse loquitur. Veruntamen principalis causa spei est Dei gratia, non merita nostra. Quia opera nostra nisi per Dei gratiam, vitam æternam mereri non possunt. Nam & si fecerimus omnia, quæ præcepta sunt nobis, adhuc servi inutiles (s) sumus: quod debuimus facere, fecimus. Sed cum Dei gratia, & propter promissionem ejus, certe mereri possunt nostra bona opera: quibus promissit suam gratiam. Beatus vir, qui suffert tentationem: [inquit alius Apostolus (t)] quoniam cum probatus fuerit, accipiet coronam vitæ. Et Joannes: (u) Si confiteamur peccata nostra, fidelis est Deus & iustus, ut remittat nobis peccata nostra, & emundet conscientiam nostram ab omni iniquitate. Idem in Apocalypsi (x): Ecce venio cito, & merces mea mecum est, reddere unicuique, secundum opera sua. Et Paulus, (y) Itaque fratres stabiles estote & immobiles, abundantes in omni opere Domini semper, scientes, quod labor vester non est inanis in Domino. Et David: (z) Sacrificate sacrificium iustitiæ, & sperate in Domino.

Sine meritis vero propriis omnino vitam sperare, præsumptio dicitur a quibusdam. [a] Iustus enim Deus est: & qui fecit te sine te, non salvabit, sine te, teste Aug. Nec tamen propterea desperare debent, qui nullius benedicti, sed peccatorum recordatione in mortis articulo turbantur: sed exemplo potius illius boni latronis bene sperare: modo pœniteant & conterantur de peccatis suis in Christo Iesu, qui sufficienter nobis meruit, & in quo nobis omnibus copiosa facta est redemptio. Et hæc quidem contritio pro merito reputabitur, gratia Dei ornata, & Sacramentis Ecclesiæ confirmata: Quin etiam precibus Mariæ Virginis, atque aliorum Sanctorum adjuta, spem augebit, nec confunderetur.

### De Charitate.

**C**haritas est dilectio, qua diligitur Deus propter se, & proximus propter Deum, vel in Deo. [b] Deum, inquam, propter se, quia summum bonum & finis summus, ad quem omnia bona diriguntur & tendunt: proximum autem propter

(o) Jacob. 3. Gal. 3. 1. Cor. 13.

Cypr. ad Quir. 2. 3. c. 5.

(s) Luc. 17.

(t) Jacob. 1.

(y) 1. Cor. 15.

(z) Psal. 4.

(b) Magist. lib. 3. dist. 27. Aug. lib. 1. de Doct.

(p) Aug. serm. 68. de temp. Hilar. c. 9. in Matth.

(q) Rom. 5.

(r) Heb. 6.

(u) 1. Joan. 1.

(x) Apoc. 22.

(a) Magister lib. 3. dist. 26.

ter Deum, quia charitas proximi a Dei charitate ortum habet, & ad eam tanquam ad certam regulam dilectionis dirigenda est. Nam qui amat patrem, aut matrem plus quam me, [c] non est me dignus.

Itaque in charitate duo præcepta maxima Legis Divinæ continentur, dilectio Dei, & dilectio proximi. [d] In quibus duobus tota lex pendet & Prophetæ. [e] Quare Apostolus, [f] Finis [inquit] præcepti est charitas de corde puro, & conscientia bona, & fide non ficta. (g)

Inter fidem, spem & charitatem maxima est charitas: Nam fides sine operibus mortua [i] dicitur, & spes inanis, & alia omnia quæcunque sunt charismata, prorsus, nisi adsit charitas, nihil profunt. Qui vero manet in charitate, in Deo manet, & Deus in eo. Nec charitas esse potest in hac vita, nisi adsint fides & spes: nam a fide generatur spes: charitas ab utraque.

Proprietates charitatis enarrat Apostolus, (k) ut quivis inde considerando seipsum possit judicare, an sit in charitate, nec ne: his verbis: Charitas patiens est, benigna est. Charitas non æmularur, non agit perperam, non inflatur, non est ambitiosa, non quærit quæ sua sunt, non irritatur, non cogitat malum, non gaudet super iniquitate, congratuletur autem veritati: omnia suffert, omnia credit, omnia sperat, omnia sustinet: charitas nunquam excidit. Hæc Apostolus. De signis autem hujusmodi vide infra Tit. De gratia.

Charitatis ergo duplex præceptum habemus. Unum, ut diligamus Deum ex toto corde, tota anima, tota mente: (l) hoc est, intellectu, voluntate, memoria, quantum in hac mortali vita possumus. (m) Nam ex parte nunc cognoscimus: sed quando venerit, quod perfectum est; evacuabitur, quod ex parte est: [n] & manebit charitas perfecta & dilectio Dei, aucta visione gloriæ ejus.

Alterum præceptum in charitate est dilectionis proximi: (o) quod Salvator noster simile priori dicit esse: Diliges proximum tuum sicut te ipsum, (p) id est: ad quod, & propter quod te ipsum diligere debes. Et hoc est mandatum novum, quod Christus dedit, ut diligamus invicem, sicut ipse dilexit nos. In hoc cognoscent omnes, quia discipuli mei estis, (q) si dilectionem habueritis invicem. Dilexit autem nos Christus, sicut

medicus ægrotos: salutem nostram desiderans, non morbum. Et quod vulgo proverbio jactatur: (Charitatem bene ordinatam incipere a se ipso) Ecclesiasticum non est: licet videri posset ex illo sumptum Cantic. 2. Ordinavit in me charitatem. Magis enim docet Apostolus, ne quæramus nobis placere. Sed dictum hoc ex legibus humanis, l. Præses. c. De servi. & aqua, sumptum videtur.

## STATUTUM I.

**Q**UOD cum ita sit, totis viribus debent Pastores commendare hanc dilectionem, & admonere suos, ut considerent secum & perpendant, an discipuli Christi sint, qui odiis, litibus, rixis, contumeliis & injuria proximum quotidie afficiant: & quam spem possint habere vitæ æternæ, qui contra maximum præceptum (unde vitam sperare debemus) committant. Quomodo credunt vera esse, quæ Christus dixit, qui non solum amicos, sed etiam inimicos diligendos esse docuit? Quod si quis dixerit. Quoniam diligo Deum, & fratrem odit, mendax est, inquit B. Joannes. (r)

## DE VIRTUTIBUS CARDINALIBUS & MORALIBUS.

**D**E Virtutibus Theologicis, Fide, Spe & Charitate egimus: nunc de moralibus pauca referamus. Genera hæc eo differunt, quod Theologicæ non solum Dei verbo discuntur, sed etiam Deum habent pro objecto & fine ultimo: & supernaturales cum sint, supernaturaliter etiam disponunt animum nostrum ad Deum. Sed morales & aliæ intellectivæ, secundum proportionem naturæ humanæ ad aliquid, quod ratione naturali comprehendendi potest.

Cum autem vitia virtutibus ipsis notiora sint, & observata magis, non abs re illas definiendo, ita cecinit Horatius:

*Virtus est vitium fugere, & sapientia prima,  
Stultitia caruisse.*

Et iterum:

*Virtus est medium vitiorum utrinque redactum.*

B. Au-

(c) Matth. 10. Luc. 14.

(f) Rom. 13. Gal. 5.

(k) 1. Cor. 13.

(n) 1. Cor. 13.

(q) Matth. 13. 15.

(d) Catech. Rom.

(g) 1. Tim. 5.

(l) Deut. 6.

(o) Lev. 19.

(r) Joan. 13.

(e) Matth. 2.

(i) Jacob. 3.

(m) Aug. de pe. hum.

(p) Matth. 22. Aug. de Doct. lib. c. 22.



B. Augustinus (s), virtus, ait, est bona qualitas mentis, qua recte vivitur, qua nulus male utitur: quam Deus in nobis sine nobis operatur. Et in libro de quantitate animæ: Virtus est æqualitas vitæ, rationi undique consentiens. Aristoteles tamen, interea omissis aliorum definitionibus, in 2. Ethic. veram virtutis definitionem ex omnibus, quæ de ea dicuntur, cum expressisset, habitum esse docet electivum, in mediocritate [vel medietate] rationis consistentem. Medium hoc inter vitia ponitur, quorum alterum per defectum peccat, alterum per excessum. Nam liberalis inter prodigum & avarum incedit. Ille quidem modum in largiendo excedit: avarus autem deficit. Fortis inter audacem & ignavum medius est: temperans inter luxuriosum & agrestem.

Hinc illa virtutis comparandæ tanta difficultas, quod medium attingere & scopum, tam difficile est: ab eo recedere facilissimum. Hinc quoque tanta virtutis laus: quia ut proverbio fertur, Difficilia quæ pulchra. Virtutem symbolo expressit Pythagoras, cum collatione vitii, in litera illa bicorni Y:

*Nam via virtutis rectum petit ardua callem. &c.*

Quod Hesiodus in primo Operum ac dierum exposuit: & Xenophon in luculenta illa narratione adolescentiæ Herculis, ex Prodicō Chio, sophista. Et Dominus noster Iesus Christus, Matth. 7. Intrate, inquit, per angustam portam, quia lata est porta & spatiosa via, quæ ducit ad perditionem, & multi sunt, qui intrant per eam. Quam angusta porta, & arcta via est, quæ ducit ad vitam! & pauci sunt, qui inveniunt eam.

Inter virtutes morales quatuor inveniuntur principales, quas Cardinales appellant: Prudentia, Iustitia, Temperantia & Fortitudo. His B. Ambrosius (t) quatuor Beatitudines contineri docet apud Lucam, scilicet Temperantia, cordis munditiam: Iustitia, misericordiam: Prudentia, pacem: Fortitudine, mansuetudinem.

Quod vero inter omnes ponendæ sunt istæ quatuor principales, docet S. Thomas (u) hoc modo: Principium formale virtutis humanæ est bonum rationis: hoc autem duobus modis considerari potest. Uno modo, secundum quod in ipsa consideratione rationis consistit: & sic erit una virtus principalis Prudentia. Alio modo, secundum quod rationis ordo circa aliquid adhibetur. Hoc autem vel circa operationes ponitur, vel circa passiones. Passiones duæ sunt rationi re-

pugnantes: Concupiscentia voluptatum, (hæc ad aliquid semper impellit faciendum, & sæpe numero, quod contrarium est rationi rectæ) & timor periculorum ac laborum, qui ab eo, quod ratio dicitur, retrahere solet, atque dehortari. Itaque concupiscentiam reprimit temperantia: &, ut firmetur homo in eo, quod ratio suadet, contra timores subsidio est fortitudo. Opera denique, quæ ad proximum referuntur, Iustitia certe moderatur ac dirigit.

Tota ergo boni operis structura, ut ait Greg., in quatuor hisce virtutibus consurgit. Et in libro Sapientiæ scribitur: Labores ejus magnas habent virtutes: Sobrietatem enim & prudentiam docet, & iustitiam & virtutem, quibus utilius nihil est in vita hominibus. Nota, virtutem hic pro fortitudine summi ex more Sacræ Scripturæ. Vix enim aliter in ea nomen virtutis acceptum invenias, quam pro ea, quam Græci dynamin, id est, vim & vires, potentiamque ac fortitudinem, dicunt. Pro ea vero, quam nos hic, & Philosophi morales, virtutem vocamus, nomen ponitur iustitiæ & sapientiæ. Neque id quidem ab re. Nam Prudentia rationis est virtus, quæ virtutes omnes regit. Iustitia etiam in se virtutes continet omnes, ut author est Theognis. Jam Cicero lib. 1. de Legibus: Virtus est (inquit) in se perfecta & ad summum perducta natura. & Aristot. 2. Eth. Virtus habentem perficit, & ejus opus bonum reddit: veluti bonus habitus oculi. Nos ergo de morali hic agimus, non de naturali: pro qua nomen virtutis sumitur in Sacris Literis.

Cur autem a cardine nomen habeant hæc, quanquam apud classici non reperias, ideo est, quod sunt veluti cardines quidam, & limites omnium virtutum moralium: nec extra eas dari aut inveniri ulla potest. (x) Quin etiam ipsæ inter se quatuor sic connexæ omnes sunt, convolutæ: ut si bene examinentur, singulæ in omnibus aliis, & omnes in singulis supponantur.

Porro autem Aristoteles decem quidem morales numerat cum iustitia, & prudentia. Sunt illæ: fortitudo, temperantia, liberalitas, magnificentia, magnanimitas, philotimia (id est honoris amor) mansuetudo, amicitia, veritas, eutrapelia: quæ in sermonibus & in actionibus lepidi & faceti hominis apparet. Sed nos Christiani nec eutrapeliam, (quam vertit latinus Eph. 5. scurrilitatem) nec philotimiam [etiamsi bene aliquando fieri possint] ponemus inter virtutes: quia ad rem non pertinent, & in his peccatur aliquando.

(s) Lib. 2. de lib. arb.

(t) In Lucam. c. 6.

(u) S. Th. 1. 2. q. 61.

(x) Greg. 22. moral.

quando. Atque etiam præter eas multas addemus ignotas paganis, quas Christus noster & Apostoli docuere: velut Humilitatem, virginitatem, devotionem, orandi, pœnitendi, jejunandi, & id genus alia agendi consuetudinem. Sed neque hæc, neque illæ, sine fide aliquid sunt: omnisque iustitia sine fide similis est humano corpori, caput non habenti: cui cum desit id, quod est omnium principale, & vita & sensu caret, ut loquitur Lactantius. (y)

Prudentia (quali providentia) est recta ratio agendorum: per quam scilicet recte consultamus, atque deliberamus. Hæc itaque, si aliis virtutibus non sit conjuncta, facile perturbata passionibus deficit. Idcirco seni potius tribuitur, quam juveni: quem multarum expertem rerum sæpius morum concupiscibilis, tum irascibilis facultatis sanguinis ferventis calor agitat. Agamemnon apud Homerum [ut obiter maximum Græcorum Poetam non omittamus] citius se rem Trojanam ait posse evertere, si decem Nestoras haberet in concilio, aut decem Ulysses, quam decem Ajaces, aut Achilles dimicantes fortiter. Non enim viribus corporis, aut celeritate, aut velocitate, res magnæ geruntur: sed consilio, autoritate, sententia. Prudentiæ quidem multa præcepta tradidit Aristoteles dialectice in lib. Topicorum, & Pontanus paradigmaticè in lib. de Prudentia: sed ut paucis omnia comprehendamus, capita consultationum sunt hæc: honestum, utile, jucundum, facile: & horum contraria, secundum magis & minus. Nam magis utile, quam minus, optabilius est: & quod facilius factu, quam quod difficilius.

Prudentia cum in malam partem sumitur, malitia est aut calliditas: improprie tamen sumpta prudentia.

Iustitia est, qua unicuique datur, quod suum est. Duplex reperitur. Una dicitur commutativa, qualis in emptionibus & venditionibus, aliisque contractibus exigitur. Altera distributiva, qua utitur Princeps in honorum distributione & præmiorum. Quando enim Imperator agros, vel hostium spolia distribuit in milites suos: non opus meriti simpliciter spectat, sed cum eo etiam personæ qualitates: Nam facinus idem, ab obscuro milite atque illustri perpetratum, iniquum sit, eodem præmio donari, & in infligendo supplicio mitiorem esse Judicem erga ben: meritos de virtute atque republ. leges municipiorumque statuta jubent. Judicis autem est, in litibus nec divitis, nec pauperis personam respicere. Quocirca eum decet

esse gravem, sanctum, reverendum, severum, incorruptum, inexorabilem: contra improbos, nocentesque immisericordem; rectum, arduum, & potentem: vi ac majestate æquitaris, veritatisque terribilem. Hæc non a nobis primum dicuntur. Omnia Chrysippus Philosophus apud Gellium (z) suaderi a pictoribus docet: qui iustitiam depingunt, forma virginali, aspectu vehementi & formidabili, luminibus oculorum acribus, neque humilis, neque atrocis, sed reverendæ cujusdam tristitiæ dignitate. Respicit namque Judex ad legem: arbiter ex æquo & bono sæpe judicat. Illi non licet ab scripto recedere: hic, ut litium mala amoveat, a jure summo plerumque recedit. Electores ergo Magistratuum videant hæc: nec contra conscientiam dent suffragia cuiquam. Nam iniquitatum omnium, quas iniquus Judex commiserit, rei ipsi erunt apud Deum. Sed hæc quidem Judicum & Magistratus, propria sit: cujusque autem sua iustitia partes habet differentes. Namque est erga Deum religio, erga suos charitas, in rebus creditis fides, in amore mutuo amicitia. [a]

Temperantia est virtus, modum ponens in voluptatibus corporis. Reducuntur ad temperantiam continentia, & castitas, & multæ aliæ: de quibus Primasius in Paulum, ad Gal. 5. Continentiam pro tempore esse tradit, sed castitatem perpetuam. Quamquam re vera Philosophus [b] inter intemperantem & incontinentem ita distinxerat: quod ille affectui habet astipulantem rationem, (Pravam nimirum) hic repugnantem. Ex quo fit, ut incontinens facilius resipiscat, quam intemperans. Epictetus Philosophus sanctissimus apud eundem Gellium docet, si quis duo verba cordi habeat, eaque sibi imperando atque observando curet: eum fore pleraque impeccabilem, vitamque victurum tranquillissimam. Verba illa duo sunt, PATERE ET ABSTINE. Nanque duo vitia omnium gravissima & terribissima esse dicebat intolerantiam, & incontinentiam: Sed tu tolerantiam non intemperantiæ, sed fortitudinis in limite collocabis, de qua statim. Interea memineris, quod Tertullianus tradit, gravitatem esse adjutricem, & sociam, & instrumentum pudiciæ. Impudicum ostendunt incessus mollis, manuum motus inconsideratus, unicum aliquando responsum, (Quoniam ex abundantia cordis os loquitur) relatus ad caput digitus, vel ad faciem, flexus oculorum petus.

Fortitudo animi magnitudo dicitur. (c) Proprium ejus nil extimescere: omnia humana

(y) Lib. 7. c. 9.

(z) Lib. 14. c. 4.

(a) Cic. in Par.

(b) Arist. 2. moral.

(c) Cicer. offi. 3.

mana despicere: nihil quod homini accidere possit, intolerandum putare: modum tener in aggrediendis vel fugiendis periculis & laboribus, sicut oportet. Quare si a iustitia recedat, furor fit.

*In vitium ducit vitii fuga, [inquit Flaccus]  
Si caret arte.*

Et necessaria fortitudo est iusto: necessaria temperanti: necessaria prudenti. Nam timor electionem rectam elidet: dolor, voluptatis desiderium augebit: & personarum respectus, jus omne pervertet. Cum sit ergo martyrium fortitudinis excellens opus: videant non solum imbecilles animo, & viribus destituti, sed rerum Divinarum imperiti, ne fiduciam suam temeritate regant. Nam sicut Cyprianus in multis locis tradit, Martyrium non supplicium, sed causa facit. Hæreticos videas non minori animo ad tormenta ire, quam fideles. Imbecillibus parcat lex martyrii, ne ultro ad agonem procedant: cum vero præsentibus sunt, ne subterfugiant. Ita docet Nazianzenus. Hoc enim ignavia est: illud audacia. Custos denique virtutum omnium & altrix verecundia est. Sita quidem in fugiendo dedecore, laudeque consequenda. Sed cernenda diligenter: ne fallant ea nos vitia, quæ virtutem videntur imitari. Namque & prudentiam malicia simulat, & temperantiam immanitas, & animi magnitudinem superbia, liberalitatem effusio, fortitudinem audacia, iustitiam acerbitas, lenitatem mollicia, religionem supersticio, verecundiamque timiditas: denique quæcunque cum studiis bonis similia videantur, tamen nimia sunt in eo genere, ea omnia tanquam virtutum corruptionem, & ementita officia, inquit Cicero, condemnabimus.

### DE QUINQUE SENSIBUS.

**S**ensus vocamus potentias animæ notitiam facientes. Qui in interiores & exteriores partiuntur. Exteriores quidem in corpore sunt organico: interiores in anima. De amborum natura, si placet, pauca accipe: non utique velut in pronis jactanda populo, vel in confessionibus disputanda cum pœnitere: sed ad hoc tantum, ut a laicis & idiotis aliquando de his interrogatus, ne ignorare ea deprehendaris, quæ scitu sunt non omnino injucunda. Facit quoque ad Divinæ potentia, summæque rationis gloriam ea contemplatio. Hinc Propheta: Mirabilis facta est scientia tua ex me, id est, ex membrorum mei corporis harmonia, mentisque meæ vi & sapientia.

Visio fit in pupilla oculi. Ad hanc enim terminantur pyramidis radii visuales per rectam lineam emissi [quæ dicitur catetus.] Recta quidem linea semper est catetus: nisi frangatur in superficie corporis diaphani. Tunc certe res alio in loco se ostendunt, quam re vera sint. Unde fit, ut remi videantur fracti in mari: & per conspécilia polyhedra, unum fiat plura.

Pyramidis ergo hujus basis est in re visa, lumine illustrata, ad justam distantiam posita: Conus autem in pupilla: ubi humor chrySTALLINUS speculi naturam gerit. Ipsa pyramis per corpus diaphanum protensa [qualis est aer & aqua, & vitrum, ac similia transparentia] quanto longius protenditur, tanto rem minorem esse facit: propterea quod angulus acutior fit, qui altior supra eandem basim. Niobe in monte Syphilo (d) statua est, quam si cominus aspicias, aliud non videas, quam saxum & rupem præcipitem, nullam prorsus mulieris effigiem præferentem, aut mœroris formam. Quod si procul abcedas, intueri videaris flentem, & mœsto vultu mulierem. Hæc Pausanias. Siquidem positus juxta rupem hanc vattissimam hominibus multæ bases ex utraque parte latent: quæ procul aspicientibus apparent, & in unum veluti corpus conjunctæ, in angulis minoribus gignunt, & repræsentant mulieris ideam. Ergo objectum visus proprium color est: sed sine lumine color non videtur. Ideo Paulus Apostolus (e) [sicut reddidit latinus interpres,] omne quod manifestatur, lumen est. Revera namque, nisi lumine color informetur (tanquam materia nuda) nullam de se speciem prebeat visioni. Est enim lumen actus coloris: unde fit, ut ignis (in quo certe plurimum continetur luminis) quantumvis a nobis remotus, suo tamen statim splendore ad se oculos trahat. [f]

Sicut ergo visus est in humore oculorum chrySTALLINO: sic auditus in aere incluso in auribus, ad quem nervi e cerebro manantes perveniunt, & sonum capiunt. Sonus enim aer est, vel aeris affectus. Sicut etiam visui rerum species occurrunt per pyramides: sic auditui per orbes. Nascuntur enim a re sonora orbes in omnes dimensiones extuberantes, donec deficient: ferunturque in aere sonus, & vox non aliter, quam circuli in aqua stagnante ex ictu lapidis, in omnem partem crescentes, donec ad ripam (si nihil interea obstat) deficient. Hinc discere, quomodo fit Echo. Circuli enim illi sonori & vocales, si extrema vallis alicujus sua circumferentia omni ex parte ad unguem contingant, ab aere concluso in valle & ab

(d) Euclid. lib. 1.

(e) Ephes. 5.

(f) Arist. 3. de Anima.



ab ipsis compresso, sic repelluntur, ut integri ad aurem nostram recurrant, & redire compellantur. Alii vel ab objectis obicibus dissipati, vel in via deficientes, pereunt. Disce quoque ex his, unde est, quod Concionatores melius intelligimus sub dio, quam in Ecclesiis, & in ædibus alta voce sermoninantes. Nimirum quia multis ex utraque parte objectis parietibus & fornicibus in Templo, repercussa vox, cum venientibus aliis vocibus occurrit, omnia commiscet, & conturbat. Et quanto altius clames e pulpito, tanto minus, percipiaris, quia celerius fiat vocum confusio. Itaque auditur quidem clamor, sed nulla oratio. Eam ob rem architecti plurimum olim attendebant ad partium templi proportionem, & ad collocationes aeris sonori in theatri.

Inter sensus omnes igitur honestissimi sunt visus & auditus: cum quod Spirituales omnino, tum quod prope soli faciant ad comparandam sapientiam. (g) Catone enim authore, qui velit bene sapere, multa videat, oportet, multa audiat, & multa legat. Alii omnes ad corporis commoditates tantum dati sunt, ut utilia ab inutilibus secernerent: & aliorum quidem voluptates omnes sordidae sunt, indignaeque habentur homine libero, eoque magis certe, quo magis ab Spiritualibus hisce recedunt: ut edere, bibere, sudare, scalpere. Quin hoc mirum est, quod natura in auribus & oculis animi motus prodi voluit, vel invitis nobis: Nam pudefactis aures rubent, iratis oculi. Causam dat Aristoteles in problematis sect. 31. & 32.

Medius inter gustum & auditum, est olfactus: nec ab aere puro factus, sicut auditus, nec ab humore, sicut gustus, sed ab utroque: a vapore, inquam, per nares inspiratione attracto, qui extrema priorum ventriculorum cerebri, quæ in meatu narium incumbunt, subit ac penetrat. Hic Aristoteles (h) opercula quædam posita esse dixerat, quæ inspiratione aperirentur, & odoribus viam facerent. Sed eam sententiam reprehendit Galenus multis modis: præsertim in lib. De instrumento odoratus.

Gustamus lingua potissimum, instrumento humido & spongioso. In hanc nervi tenues e cerebro missi sensum percipiunt.

Per totam denique cutem corporis dispersis nervis tenuibus & istis durioribus, sensus fit tactus: exactissimus quidem in summis digitis propter exactam temperiem, quæ in his cernitur, duri & mollis, lenis &

asper, calidi & frigidi, qualitatibus tactilium: obtusior in aliis partibus.

Ex his, quæ hætenus dicta sunt, Aristotelis & Peripateticorum sententia plurimum probari potest, qui sensum omnem patiendi fieri docent, etiam visionem: (i) Quamquam Stoici & Euclides, ex oculis missiles quasdam producant in aerem qualitates extrinsecus: & Galenus multis in locis Aristotelem hanc ob causam suggillet. Verum hic in libris De usu partium, nervos sensorios molliores factos oportuisse tradit, quod pati eos oporteret: & a coloribus aerem alterari ait usque ad oculum. Quæ si vera sunt, passionem sensuum non potest negare. Verum ut tantos auctores conciliemus, dicito, sensum non esse proprie alterationem organi sensorii, sed alterationis dignotionem. Alteratur enim manus a calore, vel pupilla a colore: sed dignotio fit ab una alia facultate communi & principe, quæ a cerebro in sensus omnes intulit, & quid in his singulis fiat, tanquam perscrutatur. Hinc fit, ut sæpe notos nobis ante oculos transeuntes non videamus, & amantes videri se non putant, cum maxime ab omnibus rideantur: quoniam vis illa cognoscens, alibi occupata se torquet, nec ad rem præsentem advertit.

Sed de his quidem Physice plus satis. Tu vero Deum time, & mandata ejus observa: hoc est omnis homo, inquit Ecclesiastes. (k) Custodi omni diligentia sensus tuos, ne mors per eos, tanquam per fenestras, ut Propheta loquitur, (l) intret. Averte oculos tuos, ne videant vanitatem. Nisi laxasset oculos suos David ad contemplandam uxorem Uriæ, nunquam in eas incidisset calamitates, quas narrat historia Sacra. Præstaret quoque sæpenumero basilicum videre, vel audire in sylvis, quam scemina impudicæ molles cantus & sermones. Hos sensus nobis a Deo datos putemus, tanquam talenta quædam, quæ non convenit, ut in terram, tanquam servi inutiles & ignari, defodiamus: id est, in affectus terrenos convertamus: sed in eas causas exponamus, unde usuris aucti regnum redimere queamus sempiternum.

## DE TRIBUS POTENTIIS animæ interioribus, & libero arbitrio.

PRætermisiss multorum opinionibus, qui de Potentiis animæ philosophati sunt, quod

C 3

(g) Vitruvius lib. 4. 5.

(h) De anima, lib. 2. & de sensu & sensato.

(i) Gellius lib. 5. Lib. 7. de placitis Hipp. & Plat.

(k) Eccl. ult.

(l) Jer. 9. Thren. 3.

quod ab omnibus receptum est, nos hoc loco constituamus, tres esse interiores animæ nostræ potentias & facultates, in quibus Divinitatis summæ atque trinæ Imago posita est a D. Augustino [m] & aliis multis Theologis: Memoriam scilicet, Intelligentiam seu Intellectum, & Voluntatem. In memoria reconduntur rerum notitiæ tam abstractæ ab aliis notitiis, quam intuitivæ præsentium objectorum. Hæc qui natura multum valent, & in dicendo quoque multum valere solent. Etenim thesaurus eloquentiæ, & scientiarum omnium, memoria. Hæc excolendo augetur: arte quoque juvatur, cum locis pluribus, pro charta comparatis, ac propolitis, imagines insignes aliquot & simulacra per ordinem, tanquam literas imaginatione factas, pro rebus ac verbis collocamus nostro arbitratu. Non contemnenda profecto ars. Nam subsidio sæpe adest præsentaneo occupatis Concionatoribus, & iis, qui parum scilicet sunt memoria. Imaginari siquidem possumus quæcunque volumus, [ut chimæram, hyppocentaurum, & absurda quævis] quanquam certe non opinari, nisi quæ vera, vel falsa videantur.

Altera potentia est Intellectus. Hic rerum ideas [n] concipit præsentium oculis & sensibus, quas intuitivas vocamus & evidentes: & absentium, quas abstractas. Ex his namque phantasmatibus, quæ in sensu communi, vel in memoria videt, vel ipsa sua vi imaginatur, varias solet producere rerum ideas, & concipere. Facultate hac homo ratiocinatur, differit, colligit, & separat, affirmat vel negat, probat vel condemnat.

Sunt ergo in intelligentia, seu mente hominis actu vel potentia hæc: Idea, vel notitia rei individuae, vel genericæ, cogitatio, opinio, fides, experientia, scientia, sapientia, ars. Notitia phantasmata speculando facit. Phantasmata alia in communi sensu, alia in memoria contemplatur, & luce sua veluti illustrat: alia vi sua fingit & imaginatur. Cogitatio ex multis notitiis fit quædam [ut Plato ait] oratio. Cui si assentiatur intellectus, opinio fit: si non assentiatur, tantum imaginatio manet. Si timide assentitur, suspicio dicitur, Græce hypolepsis. Rursus opinio alia vera, alia falsa est. Utraque opinandi habitum gignit, si frequenter habeatur. Ex vera fiunt experientia, fides, & ars. Nam si solo sensu edocta [veluti quod Eurys pluviam adducat, quod canes promissis auribus sint sagaciores:] atque id mens sapius experta, habitum sic existimandi fecerit: experientia dicitur. Sin vero hominis alicujus autoritate (quam Græci vocant eudociam) persuasi: ex hac persuasionem fides existit.

Est enim eudocia affectio erga aliquem, ut cuius magis, quam alterius verbis credamus, & fidem adhibeamus. Hinc Apostolus Paulus fidem Christianam explicans, ait, Fides ex auditu est, auditus autem per verbum Christi. Ars autem aliquando ab experientia, aliquando a fide comparatur, aliquando a fide simul & experientia. Pictura enim imitatione constat: grammatica fide: citharistica utroque. Nam qui legere atque scribere discunt, Magistro opus est fidem adhibeant, qui hanc Alpha, illam Vita nuncupandam dicit. Citharæcedus autem nisi Præceptore utatur, nunquam rite tonos examinabit, quamvis natura multum juvetur. Quare ars habitus erit perceptionum, quas ratio invenit ad agendum aliquid vel cogitandum, exercitatione comparatus. Falsa autem opinio tunc est, & animus decipitur, cum duo extrema phantasmata cogitatione ostensa, male conjungimus in problemate: & tanquam alienos calceos, figuram unius, alteri accommodamus, non satis acute rem intuentes, ideo quod figuræ attritæ sint, exolecentesque, aut inveritæ: ut in cavis fieri speculis videmus, ubi quæ sursum sunt, deorsum apparent. Quid jam vocas scientiam? Non certe cogitationem, quæ adeo varia est. An opinionem veram? Non omnem. Nam qui recte opinatur de literis, & scribit, ut oportet: (& si ratione utitur) non ideo tamen dicitur habere scientiam, sed potius artem, vel usum. Sit ergo opinio vera, non rei gerendæ, sed contemplandæ: veluti quod subtendens rectum angulum æquum producit duobus quadratis, quorum lateribus continetur angulus. Hæc quidem proprie scientia est. Quanquam cantare, & scribere, & pila ludere, & alia hujusmodi, & scire & nescire dicimur: sed improprie. Sed qui illam habet opinionem de subtendente per demonstrationem, is scientiam habet: non utique, quod opinio sit scientia. Sed quoniam scientia, id est, quod ex demonstratione generatur in intellectu: nempe promptitudo assentiendi illi conclusioni, quam ex causis primis & per se, investigando tandem assequuti sumus. Tunc enim scire nos arbitramur, cum causam cognoscimus, per quam res est, & quia ejus rei est causa. (o) Quare, si antequam demonstratio adhiberetur, tu jam putabas æqualem esse potentia subtendentem duabus: vel quia oculus ita judicabat, quæ est opinio: vel quia viro in ea re perito credebas, quæ est fides: non dum tamen te scire poteris arbitrari, cum causam ignores. Sed quid sapientia? Sapientia est Divinarum atque humanarum rerum scientia. Et capacius quidem nomen est, quam prudentiæ:

[m] De Trinitate lib. 14

[n] Arist. 3. de Anima.

[o] Arist. lib. Posterior. 1.

tia: siquidem prudentes quasi providentes, in actione magis deprehenduntur, quam in oratione. Adco ut videantur, qui sunt prudentissimi, instinctu magis naturæ tales esse, quam doctrina: sicut & muta animalia admiramur, quæ natura docuit providentiam. Prudentes ergo facit ex memoria rerum præteritarum, & collatione circumstantiarum rerum præsentium prompta electio bene agendarum. Atque hæc quidem hætenus, ut intellectivæ facultatis naturam explicemus. Si cui minus probantur, licet ei alios legere. Non moramur: quia non hic sita est salus animæ, quam optamus.

Voluntas ergo, sicut & appetitus ad bonum fertur. Sed hic quidem tantum ad delectabile, quod a sensu percipitur: voluntas & honestum, & utile, & delectabile appetit, quale fuerit ab intelligentia propositum. Malum vero statim odit ac refugit. Hinc dici solet, quod voluntas non fertur in incognitum: neque aliud appetere potest, quam quod speciem boni habeat.

Cumque diversa ei sub specie boni proponantur, libera est & sui arbitrii in eligendo: quanquam in exequendo non item, quia impeditur partim intrinsecus a passione propria & ignorantia, ne rem perficiat: partim extrinsecus, ut non semper, quod velimus, agamus bonum, sed, quod odimus, faciamus aliquando malum. (p) Lex enim homini carnali ex prohibitione cupiditatem accendit male agendi. Sed qui in gratia est, mundo mortuus est & peccato.

## DE LIBERO ARBITRIO.

**L**iberum ergo arbitrium, quasi liberum iudicium dicitur. Cum autem vis ejus in eligendo sit: electio autem, a voluntate fiat, merito Aristoteles lib. 6. Ethicorum sub dubio relinquit, utrum libertas hæc electionis principaliter sita sit in virtute appetendi, an in cogitandi. Vel est (inquit) intellectus appetitivus, vel appetitus intellectivus. Sed Sanctus Thomas in prima parte, q. 83. sequens Damascenum (qui aliud esse liberum arbitrium, quam voluntatem negavit) arbitrium non esse potentiam distinctam a voluntate docet. & Scotus in 1. d. 38. libertatem arbitrii primo quærendam in voluntate ait: quia intellectus naturaliter agit non libere. Quod contra Scotum philosophatur Cajetanus, nimis subtile est, nec ab Scoto recedet. Quare distinguendæ res sunt, quæ agunt in omni natura. Inter has quædam agunt sine iudicio: (ut arbor fructum profert, & lapis deorsum cadit)

aliæ cum iudicio, sed non libero (ut animalia bruta) quæ non electione, sed solo instinctu ad unum aliquid determinatum agunt. Ovis enim hoc modo lupum fugit, & gallina ovis incubat. Formica natura duce hyemem suspicatur, ideo laboriosa in æstate futura sibi alimenta recondit. Sed homo primum inquit nimirum collatione facta per intellectum & rationem: & consultat in particulari circa ea, quæ facienda, & non facienda videntur: non dum ad aliquid unum determinate. (q) Licet itaque voluntas semper feratur in bonum, (in bonum inquam, quod ab intelligentia vel ratione proponitur) tamen aliquando honestum præfert delectabili, & rursum delectabile honesto, & minus delectabile (si alia ratione videtur majus bonum) magis delectabili. Atque in hoc quidem libera est, & sui arbitrii. Sed cum de repugnantia sensualitatis conqueruntur Viri Sancti, quæ contra spiritum semper militat: executionis causâ conqueruntur, quæ propter vim magnam carnalis concupiscentiæ, Dei ope induget. Tanta est enim difficultas in nobis ex peccato originali: ut ratio sæpissime victa cedat appetitui. Id est, quod dicebat Apostolus in persona hominis viatoris, Velle mihi adjacet, perficere autem bonum non invenio. Et hoc quidem est internum impedimentum. Extrinsecus quoque, nisi Deus impedimenta tollat, parum homo potest. Ideo dicebat Hieremias (r), Non est in homine via ejus: nec viri est, ut ambulet & dirigat gressus suos. Quæ verba nullo modo de libertate arbitrii facta sunt, ut caput illud legenti non erit obscurum. Ob easdem causas & Paulus, (s) Non est volentis, neque currentis, sed miserentis Dei. Non enim, quod volo bonum, hoc ago, sed quod, odi malum, illud facio: quia sine Dei gratia fomes peccati vi sua ad malum propellit, ipsumque arbitrium quasi transverso collo rapit. Nam qui servit peccato, servus est peccati. Sapientiæ Divinæ verbum hoc est. Hoc sapientes Philosophi quasi per transennam viderunt: & admonuerunt sæpenumero, caveremus nobis a voluptate & passionibus cunctis. Demulceretur aliquando animus voluptatum illecebris: aliquando falsa bonorum opinione fallitur: sæpe motibus vehementioribus iræ concutitur. Unde adjunt a natura datos virtutum igniculos extinguere, pravis, inquam, moribus & falsis opinionibus. Sed idem sæpe Deus tanto gratiæ suæ lumine illustrat, ut ad bonum præter expectationem omnino converti faciat. Sic dicitur, Proverb. 21. Cor regis in manu Dei est: quocumque voluerit, inclinabit illud. Sancta vis hæc & beata in conversione Pauli facta fuit.

Ergo

(p) Rom. 7.

(q) Arist. lib. 10. Metro.

(r) Hier. c. 10.

(s) Rom. 9.



Ergo de se liberum est hominis arbitrium. Id quisquis negat, eum Catholicum non esse, pronunciat D. August. in lib. hypognost. & omnes Doctores Sacri a primo ad ultimum cum sacris literis astruxere. Hoc ut sancium relictum ex peccato primi parentis : attamen Samaritanus ille gratiæ suæ fasciis ligatum, & oleo consolationis, atque vino compunctionis delibutum, sanat quotidie & ad libertatis suæ valetudinem restituit. Sic dicebat Apostolus, Omnia possum in eo, qui me confortat. Et sane, nisi homo liberi esset arbitrii, jaceret omnis Philosophia, jaceret pietas : nulla esset laus virtutis, nullus fructus laborum, nec puniendi improbi, nec admirandi boni. Frustra essent consilia & exhortationes, & præcepta, & prohibitiones, & pænæ & præmia. Qui enim non libera voluntate, & nostra sponte susceptis laboribus, sed necessitate vel facti, vel naturæ fieri hæc dicunt, hi non solum contra fidem Catholicam loquuntur, sed principia omnia evertunt moralis Philosophiæ : non secus ac ille, qui in Philosophia naturali negaret motum. Nam præsupponit moralis doctrina, (t) hominem esse Dominum actionum suarum. Contra negantem autem principia non est disputandum. Constituit Deus hominem ab initio, & reliquit eum in manu consilii sui, id est, liberi arbitrii, ut habet Glossa Eccles. 15. Et ad Cain dicit Dominus: Si bene egeris recipies, sin autem male, statim in foribus erit peccatum tuum. Sed sub te erit appetitus tuus, & tu dominaberis illius. Deuteron. 30. Testem invoco hodie cælum & terram, quod proposuerim vobis vitam & bonum, maledictionem & benedictionem. Elige ergo vitam, ut vivas. 3. Reg. 3. Propositum fuit Salomoni, ut eligeret, &c. Esa. 1. Si volueritis & audieritis me, bona terræ comederitis. Act. 2. Nonne manens tibi manebat, & venundatum in tua erat potestate? 1. Corinth. 9. Si volens hoc ago, mercedem habeo : sin autem invitus, &c. 2. Corint. 8. Si voluntas prompta est, secundum id, quod habet, accepta est. Alia multa loca Scripturæ voluntatis libertatem docent. ut 2. Corint. 7. 1. Petr. 2. Rom. 12. Ephes. 6. Coloss. 3. Tit. 3. & similia: ex quibus nugari profecto argueretur Scripturæ author, nisi libera esset nostra voluntas. Nam si possumus bene agere, ergo & male: & si male, etiam & bene. Hæreticorum est illud, quod olim notavit Ennodius, libertatem ad alteram partem tantum datam esse : ad malum scilicet, non autem ad bonum.

Contra vanitatem vero quorundam Philosophorum, qui fieri omnia ex necessitate, persuadere volebant, vel ex fato, vel ex Dei

præscientia, vide Eusebium in lib. 6. De præparatione Evangelica. Nam de fato persuasio a Diabolo profecta est patre mendacii, qui oraculis suis homines olim dementavit : cum fatum nihil sit, sed omnia Dei voluntate fiant. Disputatio autem de rebus futuris ex Dei præscientia, eadem est, quæ de futuro contingenti, quæ capitis vertiginem Ciceroni [ut constat] & multis immisit Philosophis: a piis mentibus omnino expellenda. Sicut & illa de prædestinatione non ita dudum ab hæreticis evulgata, impia blasphemiam, & nimis perniciofam: peccatorum unicum Deum causam omnium faciens, & authorem malorum : quæ aliis spem vanam, aliis meram desperationem suaseret. Paulus Apostolus (u) serio nos dehortatur ab his cogitationibus & difficultatibus, quæ homini sunt inextricabiles. Pietatis tantum studia sectemur, & Deum timeamus. Ejus judicia abyssus multa. Sed de Prædestinatione inferius.

Gaspar Contarenus nostra ætate vir non parum celebris subtilissimo quodam tractatu de hac re disserens, tam diu liberi esse arbitrii hominem sentit, quam diu Deo adhæret : qui bonum est maxime universum & generale, omnia in se bona ineffabili modo complectens, & rerum omnium naturam: contra vero, si ab eo discesserit, & finem suum alia in re collocaverit, relictam amplitudine summa, in angustias se redigens: (quia cætera omnia angustiora sunt infinitis partibus Deo) a summa libertate se transferre in servitutem. Posse autem declinare a Deo & peccare, non facultatis est, sed impotentia: sicut lædi posse, & claudicare posse, impotentia est. Hæc ille: Quæ probare tentat hoc modo. Sicut servus est, qui sui juris non est, sed in illis actionibus, quæ servorum sunt, non sua sponte, sed Domini voluntate & imperio movetur: sic liber dicitur is, qui sui, non alieni juris est, & sua ad agendum voluntate movetur, non aliena. Hinc alius alio liberior esse potest: quanto in pluribus, vel paucioribus, parere cogitur alieno imperio. Unde si lapis sursum mittitur, minus libere, quam deorsum fertur: quia vis externa hic operatur. Bruta arbitrio videntur uti, quia cognoscunt, quæ agunt: Sed non libere: quia finem ignorant, & mediorum relationem ad finem. Et quia idem agunt semper, argumentum est, non proprio judicio, sed extrinseco principio moveri. Sibi etiam duo concedi postulat Contarenus. Unum est, quod qui vere liberum habet arbitrium, res omnes, & rerum omnium naturam, & bonitatem, & inter eas proportionem agnoscat. Alterum, ut totius boni atque uni-

(t) Arist. 3. &amp; 6. Ethi.]

(u) Rom. 11.


universi capacem habeat appetitionem: non unius boni particularis tantum. Alioqui enim in angustias, veluti carceris, redacta voluntas, libertatem amitteret. Itaque homo cum habeat late patentem intellectum: sic & voluntate præditus est, quæ ad omnia illa extendi possit: tam, inquam, ad finem, qui Deus est, quam ad media (eligendo media proportionata ad finem.) In hoc est natura liberi arb. Sed si pro fine appetit particularia: in angustias se conjiciens, libertatem amittit. Quare infertur naturam hominis liberi esse arb., quia proprio judicio amplo, nullo termino definito, voluntas & intellectus extenduntur ad finem, & ad media, id est, ad bonum ipsum universum, & omnia bona. Conservatur ergo liberum arb. quam diu homo fini ultimo & summo bono (qui Deus est) adhæret. Amittitur autem, quando relicto summo bono, ad particularia deflectit. Et licet tunc maneat illa facultas naturalis, & cognitio, & ad bonum universum propensio: quod liberum arb. vocamus) tamen ita imminuta remanet, ut in servitute quodam modo dicatur positum lib. arbitrium. Et sic quæ agit homo, cum proprio judicio agat, libere agere dicitur: licet in servitute degens. Quia qui servit peccato, servus est peccati. Hæc sententia optimi illius Cardinalis: quæ cum verbis Scripturæ Sacræ non parum convenit. Licet omnibus forte non satisfaciat, nec pro certa huc allata. Sed notanda sententia illa D. Augustini: (x) Qui creavit te sine te, non salvabit te sine te. A creandis enim, inquit, hominibus nihil exegit Deus. Quid enim exigeret ab iis, qui nondum erant? In reformandis autem & justificandis hominibus, passim in scripturis exigit, ut credant, resipiscant, pœnitentiam agant. Quare nec gratia Dei sine nobis aliquid agit, neque sine Dei gratia nos. Sed omnia possum, inquit Apollolus, in eo, qui me confortat. Malas quoque voluntates non facit: sed eis utitur (ut idem docet (y) Aug.) ex quo sequitur, neque invitum Deum mala permittere, neque negligentem: quia novit ad meliora ordinare cuncta solus. Nisi Deus adjuvet, infirmitas nostra non modo vincere, sed neque pugnare potest. Itaque velle naturæ est, bene velle Dei. Utrunque etiam a Deo. A Dei gratia excitatur voluntas ad bonum: & adjuvatur, ut recte velit, & perficiat. Philip. 2. Deus est qui operatur in nobis velle, & perficere. z) Ideo dicimur etiam nos cooperatores Dei: quia sufficientes non sumus ex nobis. 2. Cor. 7. Conatus voluntatis nostræ, & secundum Dei gratiam est, & secundum naturalem potentiam. De-

bemus gratiæ, quod vocamur: debemus etiam gratiæ, quod occultis itineribus, nisi resistamus, sapor nobis vitalis infunditur. Nostræ tamen electionis est, quod beneficia demonstrata sectamur.

## DE PROFESSIONE FIDEI.

UT qui mundanæ militiæ se dedunt, fidem ante omnia duci suo dant, & hostium ejus hostes se fore promittunt: deinde armis induuntur, quæ sibi ille præscribit: tesseram quoque in prælio accipiunt, quo inter se dignoscant: sic qui Christianæ militiæ ascribuntur per Baptisma, fidem Christo Domino dant, & renunciant Satanæ: de iis, quæ agenda sunt vel fugienda, diligenter admonentur, exorcizantur, catechizantur, unguntur tanquam athletæ, armantur donis gratiæ, & signo Crucis Christi, Principis & Domini sui, quod pro Symbolo etiam belli spiritualis habent. Rursum etiam, qui in Ecclesiastica authorandi sunt, [maxime qui futuri sunt aliorum Duces] quoniam non est nobis colluctatio adversus carnem & sanguinem, sed adversus spirituales nequitias in cœlestibus; eos ante omnia fide attingi decet suo Imperatori, Christi Vicario: hæreticis autem, atque hæresibus nuncium remittere, legesque militiæ suæ certas accipere, ne victus aliquando dicat, Non putaram.

Idcirco Sacrosancta Generalis Tridentina (a) Synodus explicitam Professionem Fidei facere jubet, cum primum ii electi fuerint: tam ut jurejurando ad rite obeundum munus suum obligentur, quam ut in confessione veræ fidei & Catholicæ, armaturam habeant: scutum scilicet fidei, & galeam spei salutis, cum gladio spiritus, quod est Verbum Dei.



Primum autem & ubique obvium Fidei, Professionisque Christianæ Symbolum, est signum Crucis Christi: quo nos signamus, & nostra omnia: In nomine Patris, & Filii, & Spiritus Sancti, Amen. Hic implicite continentur omnia fidei nostræ mysteria. Hoc spem & fiduciam, quam in Christo habemus, Redemptore nostro, & in potentia Majestatis Dei declaramus. Erga Deum & proximum chari.

(x) Ser. 15. de verb. Apost.

(y) Ad Jul. lib. 5.

(z) Aug. de corr. & grat. c. 7. & 10.

(a) Sess. 24. c. 1. & 12.

Tomus VIII. Concilior. German.

charitate accendimur, qui nos ad mortem usque dilexit, & proximum diligere præcepit.

Tres enim hic personas distinctas in Deo profiteamur: & per passionem Crucis, reliqua intelligimus, quæ in carne gessit Dominus Jesus: unde spe erecti, non confundimur; sed ad Dei Majestatem adorandam, & pro beneficiis acceptis, ad gratias agendas inducimur. Quare non immerito fidei atque professionis Christianæ Symbolum vocabimus signum Venerabile Crucis: quo semper se signare solitos, ait D. Basilus [b], eos, qui in Christum spem collocassent. Et Tertullianus verustissimus author: Ad omnem progressum (inquit) atque promotum: ad omnem exitum & aditum, ad vestitum & calceatum, ad lavachra, ad mensas, ad cubicula, ad lumina, ad sedilia: quæcunque nos conversatio exercet, frontem Crucis signaculo terimus. Tertullianum suum (c) secutus Cyprianus, asserit, per hoc signum Crucis salutem positam omnibus, qui in frontibus norantur. Quod probat ex multis locis testamenti utriusque. Signum hoc solvit terrores, tetra fugat spectra, morbos sanat, daemones expellit: in periculis præsidio est, & in rebus lætis securitati. Vide plura ejus Epith. apud Chrysostomum in Joan. August. in multis locis, ut de Civit. Dei l. 22. c. 13. De visit. infir. l. 2. c. 3. De Symbol. c. 1. De temp. ser. 130. Contra Faust. l. 12. c. 30. De Sanctis. ser. 19. &c.

Sed ut amplius intelligas Crucis mysterium, considera nos hic Trinitatem Sanctissimam invocare. Invocamus Patrem, & Filium, & Spiritum Sanctum: tres quidem Personas distinctas, sed unum Deum, unam substantiam, sive essentiam; unam potentiam, unam voluntatem: Patris, qui a nullo genitus est: Filii, qui ante omnia sæcula a Patre genitus: Spiritus Sancti, qui itidem ab æterno ex Patre & Filio procedit. Pater est prima Persona. Non utique, quod in Trinitate hæc sit aliquid prius, aut posterius: majus aut minus. Absit hæc a fidelium mentibus impietas: cum eandem gloriæ Majestatem in tribus Personis Christiana Religio prædicet. Sed Patrem propterea, quod ipse sit principium sine principio, primam Personam vere dicimus. Quæ quidem uti Patris proprietate relativa distincta est, ita in unam illam præcipue hoc convenit, quod Filium ab æterno genuit: Et in Filii Personam proprietas alia hæc congruit, ut a Patre generetur: quam Theologi filiationem vocant: & in Spiritus Sancti (quam spirationem passivam) ut ab utroque procedat.

Atque in hunc modum Divinæ Trinitatis simpliciter confiteamur unam essentiam, cum personarum perfecta distinctione: retinentes cum timore hæc essentiae & personarum vocabula: ne in rei altissimæ, atque difficillimæ perscrutatione pericitemur. Quod si forte apud aliquem Sanctum legas, plures substantias: existimato, improprie cum loqui: nam neque Divinitari, tam convenire nomen substantiæ, quam essentiae, tradit August. Immo nec personæ nomen, inquit, placuit, quod Scriptura dicat, sed quod non contradicat. (d) Quoniam igitur dictio Græca hypostases, pro qua nos aliquando suppositum, aliquando substantiam reddimus, sæpe in plurali ponitur, interdum etiam in singulari, una hypostasis & tres hypostases. Ideo unam substantiam plerique, rari plures: id est, tres res, vel tria supposita: ut hæresin Sabellianorum everterent, qui personarum Patris, & Filii, & Spiritus Sancti, nomina tantum distincta dicebant, non autem res. Sed nobis ita distinguuntur personæ sive supposita, ut alius sit Pater a Filio, alius ab Spiritu S. non autem aliud in genere neutro, quia essentiam significat substantivatum nomen in Divinis.

Amen quoque vox Hybraica Symbolum credentium est. Hanc Græci interpretati sunt *ὑμνοῦ*, id est, fiat, vel utinam fieret. Proprie idem significat, quod fides vel veritas, vel (adverbialiter) idem, quod fideliter & vere: & cum voto quodam fere assumitur. Nam cum Christus ea sit usus frequenter: non id quidem semper voluit, quod multi reddunt Gallicæ: *Ainsi soit il*. Nos interpretabimur ita: Credo, & Confiteor & affirmo, & libenter suscipio, quod dictum est: & sicut Credo, ita fieri opto. Hieronymus signaculum veritatis appellat. Est enim confirmatio dicti & consensus. Quotquot enim promissiones Dei sunt, inquit Apostolus, in illo (scilicet Filio Dei) est. Ideo & per ipsum Amen, id est, in ipso Filio Dei affirmationem consequuntur, & confirmationem cum voto fidelium. Nemini ergo liceat, sanctam vocem hanc fidei Symbolum in linguam Gallicam transferre pro suo arbitrio. Nam & D. Augustinus ad Pascendum sic loquitur. Nam sciendum est, Amen, & Alleluia (quod nec Latino, nec Barbaro licet, in linguam suam transferre) Hebræo cunctas gentes vocabulo decantare. Propter sanctiorem enim auctoritatem, quamvis interpretari potuissent, (ait idem in libro de Doctrina Christiana) servata tamen est antiquitas. Hoc sufficiet iis, qui omnia habere volunt in lingua vernacula: nec

(b) Basil. de ser. 5. c. 17.

(c) Tertul. de corona Mil. Cyp. ad Qui. lib. 2.

(d) Aug. lib. 7. de Trinit. c. 5. & 6. Greg. Naz. oron. 2. & 8. Damasc. de Fide 1. c. 10. & 11.



nec nomen Baptismi admittunt, nec Diaconi, nec Chrismatis: quod latina non sint hæc. Quod autem Amen, Symbolum fuerit semper credentium in Ecclesia, colligi potest ex 14. cap. 1. ad Corinthios. Quis supplebit locum idiotæ? quomodo dicet Amen super tuam benedictionem? quoniam quid dicas, nescit.

### J E S U S.

**A**ddimus aliquando, per invocationis modum, Jesus, nomen Domini nostri benedictum: in quo uno oportet nos salvos fieri. Vox quidem Hebraica est, quam a verbo Heb. deduci jasa (id est, salvare vel servare) Angelus docuit Matth. 1. Vocabis (inquit) nomen ejus Jesum: Ipse enim salvum faciet populum suum a peccatis eorum. Apostoli tamen Græce scripserunt *Ἰησους*: non urique Jehosua, nec Jehosue, nec Josue. Quin etiam Rabbini ipsi Hebræi in suis commentariis scribunt Jesu, vel Iſu. Unde con-jicimus, proferri semper solitum fuisse cum accentu in ultima dissyllabum; licet Græce videatur trissyllabum. Hinc discas, illud *Ἰησους*, Græcam esse scripturam veram: sed hanc Ihs corruptam ab iis, qui vocalem Græcam H putant esse aspirationem. Sicut & *χρῆς* pro *χρῆς* scribentes: pro *χ* Ch, ponunt X: & pro R, P. propter similitudinem literarum.

### DE SYMBOLO APOSTO-LORUM.

**T**Riplex celebratur in Ecclesia Catholica Symbolum. Unum est Apostolorum, *Credo in Deum Patrem Omnipotentem, &c.* Alterum dicitur Magnum & Nicenum. Licet nonnulli Constantinopolitanum appellent, propterea quod Niceno additum fuit in Concilio Const., id quod sequitur post hæc: *in Spiritum Sanctum*, Ecclesia quoque latina illud adjecit, *Filioque*. Sed vulgo nos Nicenum vocamus a prima ejus editione. Est tertium Athanasii, quod singulis diebus cantamus ad Primam. Magnum illud, live Nicænum in Missa tantum canitur. Hoc Apostolorum non canitur, sed tacite dicitur ad Primam & ad Completorium ante confessionem generalem: quia corde creditur ad justitiam, (e) ore autem fit confessio ad salutem. Dividitur in 12. Articulos, secundum numerum Apostolorum, a quibus creditur compositum. Quamquam non constar, sintne singuli a singulis, an omnes ab omnibus semel concepti. Dividitur

etiam in 14. Articulos, secundum credibilium differentias. Septem enim spectant ad Divinitatem: & alii septem ad Christi humanitatem. Possunt etiam in tria Capita separari. Nam in una parte tractatur de Creatione, in altera de Redemptione, in tertia de Sanctificatione. Et in hac divisione respiciunt tres Personas, Patrem, Filium, & Spiritum Sanctum.

### DE CREATIONE.

#### I.

**C**redo in DEUM Patrem Omnipotentem, Creatorem cœli & terræ.

### DE REDEMPTIONE.

#### II.

Et in JESUM Christum Filium ejus unicum Dominum nostrum.

#### III.

Qui Conceptus est de Spiritu Sancto, natus ex Maria Virgine.

#### IV.

Passus sub Pontio Pilato, crucifixus, mortuus & sepultus.

#### V.

Descendit ad inferna. Tertia die resurrexit a mortuis.

#### VI.

Ascendit ad cœlos, sedet ad dexteram Dei Patris omnipotentis.

#### VII.

Inde venturus est judicare vivos & mortuos.

### DE SANCTIFICATIONE.

#### VIII.

Credo in Spiritum Sanctum.

#### IX.

Sanctam Ecclesiam Catholicam, Sanctorum communionem.

#### X.

Remissionem peccatorum.

#### XI.

Carnis resurrectionem.

#### XII.

Vitam æternam, Amen.

LE

(e) Rom. 10.

Tomus VIII. Concilior. German.

## LE SYMBOLE DES APOSTRES TRES déclaré en vulgaire.

**C**redo in DEUM.) C'est à dire, Je croy en Dieu. Je mets toute ma foy, mon esperance, & mon amour en un Dieu.

**Patrem.)** Pere. Je crois en un Dieu, qui est en trois personnes (Pere, Fils, & S. Esprit) mais une seule substance, une Deité, & une puissance indivise. Je l'appelle Pere à bonne raison, pour cause de l'éternelle generation de son benoist fils JEsus Christ, selon la Divinité. Et aussi, pource qu'il nous a faict ses enfans, par adoption, & heritiers du Royaume celeste, par le merite de sondict Fils.

**Omnipotentem.)** Tout puissant. Car rien ne luy est difficile à faire: Aussi ne seroit il à deffaire & ruiner, s'il luy plaisoit. Et n'y a chose, qui puisse empêcher sa volonté. Dont je me sens bien fort: veu que j'ay un Pere tout puissant. Car comme Pere, il m'ayme: & comme tout puissant, ne scauroit faillir. Aussi le tiens je en si grande reverence, veu que plusieurs de ses œuvres excèdent ma capacité, que je n'y fais point du curieux: ains m'en rapporte du tout à sa Parole, à laquelle rien est impossible.

**Creatorem cœli & terræ.)** Createur du ciel & de la terre. Il est seul autheur de toute creature, visible & invisible. Parquoy il n'y a substance, ou nature, qui de soy soit mauvaise ou inuonde: veu qu'il est tout bon & saint. Aussi nous faut penser, qu'il ayme sa creature, & la gouverne pour sa gloire. Dont je l'ayme comme celuy, duquel je recois tout mon bien: mesmes pour l'amour de luy je prens en patience les adversitez, comme profitables pour mon salut.

**Et in JEsu Christum.)** Et je crois en JEsus Christ. Je l'appelle JEsus: qui en langue Hebraïque signifie Sauveur & salutaire. Car il nous a sauvé, & racheté par son precieux sang. Et n'y a autre nom sous le Ciel, auquel il faille avoir esperance de salut. Aussi l'appelle je Christ, qui signifie en langue Greque, Oint (lequel nom estoit des Roys, & des Prestres, & Prophetes) pour autant, qu'il est le vray Messias [qui pareillement est à dire Oint] promis en l'ancien Testament.

**Filium ejus unicum.)** Son fils unique. Dieu, filz de Dieu. Il est seul & unique filz de Dieu le Pere, trescher & bien aymé. Car si nous sommes filz de Dieu, ce

n'est pas par nature, ains par adoption & grace. Mais luy est d'une mesme substance avec son Pere: procedant d'iceluy par la generation éternelle, comme lumière d'une lumière. Il est aussi unique, je dis une seule personne, & suppos: non pas deux: combien qu'il soit Dieu & homme, & qu'il ait deux natures, Divine & humaine. Car le Verbe Divin (qui est le vray suppos & chef, en ceste disposition) a prins & a uni à soy la nature humaine, par une maniere à nous indicible: de sorte que la nature humaine ne se soustient en soy, mais au verbe Divin. A ce fils donc de Dieu naturel, le Pere communique par la generation éternelle, sa nature, sa puissance, & toute sa gloire.

**Dominum nostrum.)** Nostre Seigneur. Et combien que JEsus Christ est nostre frere, il est aussi nostre Seigneur: nous ayant racheté de la servitude du diable, non par or, ou argent: mais par son sang precieux. Et pourtant je veux obeir en tout & par tout, à ses commandemens, m'en donnant la grace.

**Qui conceptus est de Spiritu Sancto.)** Qui a esté conçu du Saint Esprit. N'a pas esté engendré de semence d'homme: mais le Saint Esprit a formé divinement & miraculeusement son corps au ventre virginal de la Vierge Marie, de pur sang & substance d'icelle. Et par ainsi il a esté engendré vray Dieu & vray homme, & selon la diversité des deux natures il a faict diverses actions en sa vie. Selon l'affection de son humanité il craignoit la mort: selon la Divinité il faisoit les miracles.

**Natus ex MARIA Virgine.)** Nay de la Vierge Marie. Vierge avant le part, au part, & apres le part. Pource qu'il convenoit qu'elle fust ainsi, pour l'honneur de si grand mystere. Dont vient à noter, que Dieu a faict naistre en quatre sortes. Adam nasquit sans pere ny mere: Eve de la coste d'Adam: nous de pere & mere: nostre Seigneur de la seule mere.

**Passus sub Pontio Pilato.)** A souffert sous Ponce Pilate. Du temps que Ponce Pilate Romain avoit le gouvernement de la Judée sous Tibere empereur des Romains, il a enduré la mort ignominieuse: lié comme un larron: battu, flagellé, souffleté, craché, moqué, & mesprisé, tant des Soldats de Pilate, que des Pontifes, leurs Ministres, & d'autres, jusques à estre crucifié: le tout pour mon salut. Ce qui m'apprent estre patient aux injures & me-

spis

*ſpris, que je reçois en ce monde: veu que mon Seigneur, & mon Dieu, la gloire eternelle, s'eſt ainſi demis, & a eſté ſi patient pour l'amour de nous, ſes pauvres creatures.*

*Crucifixus.) Crucifié. Comme un criminel & meſchant homme, a eſté attaché en un gibbet faiſt en forme de Croix & ſupplice, celui, qui ne ſeſt oncques peché: ains qui eſtoit venu pour effacer tous pechez, & nous delivrer du ſupplice eternel. Pourtant je l'ay toujours devant mes yeux, ainſi eſtandu, & cloué cruellement en la Croix. Ce qui me voinſt le cœur. Et à grand peine y penſe je ſans larmes. Et comment par ceſte grande patience il a vaincu le diable: à ceſte cauſe je ſuis ſouvent le ſigne de la Croix ſur moy, pour me fortifier, & munir contre toutes tentations & dangers: & quant & quant ſur toutes choſes (en forme de benediction) que je deſire bien venir, & ſucceder pour noſtre uſage.*

*Mortuus & ſepultus.) Mort & enſeveli. Son ame à la fin par les cruels tourmens a eſté ſeparée de ſon corps. Et le corps enveloppé de linges, à la façon des Juifs mis au ſepulchre. Par la mort il a ſuffiſamment payé noſtre rançon. Car par le peché d'Adam nous eſtions faiſts ſerfs du peché, & du diable: obligez à la mort. Par ſa mort il a eſtainſt ceſte obligation, & effacé le debt, que nous ſeſt noſtre premier pere. Cecy me faiſt l'aymer ſur toutes choſes, & prendre exemple en luy de forceſſe, & de non craindre la mort pour ſon ſervice. Et je prie d'eſtre enſeveli avec luy: à fin que le peché ne me puiſſe trouver vivant en iniquité.*

*Descendit ad inferna.) Il eſt deſcendu aux enfers. A ſavoir ſon Ame. Car il a voulu conſoler les Peres decedez, qui eſtoient detenus au limbe: & acertener de la gloire, à eux des long temps préparée, par ſa preſence: les tirant de la priſon, où ils eſtoient privés de la viſion de Dieu. Pour ceux là eſt deſcendu J'eſu Chriſt aux enfers: non pas pour les reprouver. Car la Juſtice Divine par raiſon doit donner crainte aux meſchans de la peine eternelle; & eſpoir aux bons, d'eſtre delivrez à la fin du mal.*

*Tertia die reſurrexit a mortuis.) Le tiers jour eſt reſuſcité des morts. Ceſt article de foy, le plus recommandé par les Saints Apoſtres, m'aſſeure, que je reſuſciteray une fois, pour reſembler du tout à mon Chef: lequel eſt reſuſcité. Et en ceſte vie mortelle je recon-*

*verray une autre vie, que celle, que j'ay tenu par cy devant en peché. Car j'eſpere de vivre, par ſa juſtice & grace, mortifié à toutes iniquitez. Quant au nombre des jours que mon Dieu a eſté au ſepulchre, l'Evangile monſtre, qu'il faut prendre les parties du Vendredy & du Dimenche, pour deux jours: & le Samedi entier. Auſſi eſtoit il nommé en Hebreu Sabbath, qui ſignifie tant comme repos.*

*Ascendit ad Cœlos.) Eſt monté es cieus. Ne convenoit point, que ſon corps glorifié demourast en la terre immunde & ſubjecte à corruption. Et j'apprens de ceſte Aſcenſion, que ma demeure doit eſtre au ciel avec luy: car c'eſt mon chef, qui eſt deſcendu du ciel: & faut que le corps ſoit avec luy: lequel combien que viſiblement nous ait delaiſſé ſur la terre, il ne delaiſſe pourtant d'eſtre avec nous inviſiblement par ſa grace, faveur, & preſence réelle au Sacrement de l'autel. Car il eſt tout puiſſant comme ſ'enſuit. Et ne faut doubter de ſa parole.*

*Sedet ad dexteram Dei Patris omnipotentis.) Sied à la dextre de Dieu le Pere tout puiſſant. Je croy par ce l'eternité de ſon Royaume, & la puiſſance qu'il a ſur toute creature, avec une gloire infinie, egal à Dieu ſon Pere. Ceſte pbraſe d'eſtre aſſis à la dextre, eſt déclarée par le mot y adjouſté, Omnipotent. Car autrement Dieu le Pere n'a corps aucun propre, pour avoir main dextre ou ſeſtre. Ceſt un Eſprit incomprehenſible, contenant toutes choſes: non pas contenu, ny deſiré.*

*Inde venturus eſt judicare vivos & mortuos.) Dont il doit venir juger les vivans & les morts. Quant je penſe au jour, qu'il a choiſy pour faire rendre compte devant ſon tbroſne à tous ceux, qui auront jamais eu nom d'homme, (ſans en excepter aucun, ſoit viſ ou mort) je me conſole grandement, & prens couraige à bien faire. Combien que non du tout ſans crainte: car mon imperfection m'eſt ſuſpecte, & danger eſt que ne ſoys ſurpris à l'improveu: ſoit par l'heure de la mort, [lors que ſe faiſt le premier jugement] ſoit par le jour du dernier jugement: où ſeront revelees toutes meſchancetez & fautes, à la conſuſion des pecheurs, & gloire des bons. Et iront ceux qui auront bien faiſt, au Royaume eternel: & les autres au feu d'enfer avec le diable pour jamaie.*



**Credo in Spiritum Sanctum.)** Je croy au Saint Esprit. La tierce Personne de la Trinité égal en bonté, puissance & majesté, avec le Pere & le Fils : desquels eternellement il procede : de mesme essence, & nature. Ceste confession de la Deité du Saint Esprit, que je fais, est comprinse en ces mots, **Credo in Spiritum Sanctum.** Car par iceux je confesse, que je mets en luy tout l'esperoir de mon salut. Et comme n'y a point plusieurs Dieux, je croi que le Pere, le Fils, & le Saint Esprit, n'est qu'un Dieu, procedant le Fils du Pere par generation : Et le Saint Esprit au Pere & du Fils, par inspiration & amour. Ce sont choses difficiles à comprendre : mais la foi me conduira à la vraie cognoissance, Dieu aidant. Nous appellons ceste troisieme personne, Esprit, pourtant que luy attribuons estre cause de la vie de toutes choses : & mesmes de celle de nos ames par grace : Aussi l'appellons Saint, pource que de luy procede toute sanctification.

**Sanctam Ecclesiam Catholicam.)** La Sainte Eglise Catholique. Je confesse & croy, qu'il y a une Eglise Sainte & Catholique, en laquelle j'ay esté regeneré par le Saint Baptisme. Je nomme Eglise, comme une famille de plusieurs vivants en communion, une congregation, un peuple, une republique, conduite & gouvernée par le Saint Esprit. Et pourtant elle ne peut errer en chose qui concerne nostre salut. Et combien que elle soit desia en partie avec JEsus Christ en la gloire celeste, en partie icy fluctuant aux ondes de ce monde, & combatant contre ses ennemis, si est elle une : car son chef n'est qu'un, JEsus Christ, duquel elle reçoit toutes saintes influences de vie & bonnes actions. Je l'appelle souvent ma mere : pource qu'en icelle j'ay esté regeneré par le Saint Baptisme. Elle est Sainte, comme espouse de JEsus Christ. Car combien que tandis qu'elle chemine par ce monde, les bons y soyent parmy les meschans : moyennant que ceux icy retiennent la foy, ils n'en sont dehors. Le jour du jugement en fera la separation. Et lors on verra un troupeau, & un Pasteur. Maintenant que je suis au monde, j'obeyray à mon Pasteur, & à iceluy qui est constitué sur les autres Pasteurs, qui est nostre Saint Pere le Pape. Car non seulement le commandement de nostre Seigneur le veut ainsi : mais la raison le dicte, qu'il faut un chef en toutes choses, ainsi qu'il y a un seul Dieu de tout. Elle est sainte comme

espouse de JEsus Christ, & Catholique, c'est à dire universelle : pource qu'en tous temps & en tous lieux, les bons Chrestiens ont tenu une mesme foy & doctrine des choses concernant nostre salut. Donc je renye & deteste toutes assemblées d'heretiques & schismatiques : & me tiens au giron de ceste Eglise ma bonne Mere.

**Sanctorum communionem.)** Communion des Saints, (ou, de choses Saintes.) Il n'y a difference en ceste Eglise de personnes, riche ou pauvre, gentil ou villain, tous participans des graces de JEsus Christ nostre chef, comme membres d'un mesme corps mystique (chacun en sa vocation) nous communicans mutuellement nos prieres & bienfaits, & principalement receuans un mesme Sacrement de son benoist Corps & Sang, qui nous faict estre un avec luy, & unys avec nous autres. Et pour non perdre ce bien, je me garderay soigneusement de luy estre desobeyssant, à celle fin que ne soys dejeté d'icelle, & excommunié. Car hors l'Eglise nul pourra estre sauvé non plus, que ceux qui ne se trouverent en l'arche de Noé au temps du deluge.

**Remissionem peccatorum.)** Remission des pechez. Je croy, que par la Passion de mon Redempteur JEsus Christ, le pardon de nos pechez nous a esté obtenu. Lequel m'est appliqué par le mystere & vertus des Clefs, qu'il a mis en la main des Pasteurs, & Prelats de l'Eglise. Par le Baptisme m'a esté pardonné le peché original, avec lequel j'estois né : & par le Sacrement de Penitence, tous les autres, que j'ay commis par apres. Et comme apres ledit Sacrement, ou une vraye contrition (combien que la coulpe de mon peché soit remise) toutes fois encores reste souvent une obligation à quelque peine, qu'il faudra prier en purgatoire, (car justice le commande;) J'espere, qu'elle me sera effacée par les merites de JEsus Christ & de tous les Saints, vray tresor de l'Eglise, m'estant appliqué par quelque indulgence de nostre Supreme Prelat & Pasteur.

**Carnis resurrectionem.)** La resurrection de la chair. Si j'ay travaux, peines & douleurs en ce monde, je me console, que mon corps, qui est maintenant mortel & corruptible, resuscitera, & ne sera plus sujet à corruption, mais sera glorifié à la semblance de celui de JEsus Christ, clair, resplendissant, subtil, & agile, surmontant la clarté du soleil, & des estoilles. Mais les mauvais Chre-

stiens

*stiens & infideles, combien qu'ils resusciteront, ce sera toutesfois pour aller aux tenebres, & peines perpetuelles d'enfer.*

*Vitam æternam.) Vie éternelle. C'est la fin de nos labeurs. Le comble de tout bien, préparé à ceux, qui en ce monde auront vescu selon la doctrine, que nostre Seigneur nous a donné.*

*Amen.) Amen. Je le confesse ainsi: je le croy ainsi: & prie Dieu, qu'ainsi soit il.*

## FIDEI PROFESSIO TRIDENTINA.

**P**ropter hæreticorum pertinaciam coacti fuerunt olim Patres aliquam formam confessionis fidei Catholicæ concipere : ne subdola interpretatione Scripturarum, vel traditionum, veritatem verbis corrumpere falsi fratres. Nostra pariter tempestate idem fieri oportuit, excitatis ab hæreticis, & tamquam ab inferis revocatis multis erroribus, atque blasphemis : quæ priscam Patrum illorum simplicitatem cum aliis acrius depugnantem, non ita monebant. Hanc tradidit bonæ memoriæ Pius IV. Pontifex Maximus : cujus auspiciis Tridentina Synodus finem Deo propitio felicem adepta est. Addit autem is ad magnum Symbolum articulos aliquot, ex Canonibus Concilii desumptos. Et confessionis quidem hujus forma hæc est.

Ego N. firma fide credo, & profiteor omnia & singula, quæ continentur in Symbolo fidei, quo Sancta Romana Ecclesia utitur, videlicet : Credo in unum Deum Patrem Omnipotentem, Factorem cæli & terræ, Visibilem omnium, & invisibilem : Et in unum Dominum Jesum Christum, Filium Dei unigenitum, Et ex Patre natum ante omnia sæcula : Deum de Deo, lumen de lumine, Deum verum de Deo vero : Genitum non factum, consubstantialem Patri, per quem omnia facta sunt : Qui propter nos homines & propter nostram salutem descendit de cælis : Et incarnatus est de Spiritu Sancto, ex Maria Virgine : Et homo factus est : Crucifixus etiam pro nobis sub Pontio Pilato : Passus & sepultus est : Et resurrexit tertia die secundum Scripturas : & ascendit in cælum, sedet ad dexteram Patris : Et iterum venturus est cum gloria judicare vivos & mortuos. Cujus regni non erit finis. Et in Spiritum Sanctum Dominum, & vivificantem, Qui ex Patre Filioque procedit : Qui cum Patre & Filio simul adoratur & conglorificatur : Qui locutus est per Prophetas. Et unam Sanctam, Catholicam, & Apostoli-

cam Ecclesiam. Confiteor unum Baptisma in remissionem peccatorum, & expecto resurrectionem mortuorum, Et vitam venturi sæculi, Amen. Apostolicas & Ecclesiasticas traditiones, reliquasque ejusdem Ecclesiæ observationes & constitutiones firmissime admitto, & amplector. Item Sacram Scripturam juxta eum sensum, quem tenuit & tenet Sancta Mater Ecclesia, cujus est judicare de vero sensu, & interpretatione Sacrarum Scripturarum, admitto : nec eam unquam, nisi juxta unanimum consensum Patrum accipiam, & interpretabor. Profiteor quoque septem esse vere & proprie Sacramenta novæ legis a Jesu Christo, Domino nostro instituta, atque ad salutem humani generis, licet non omnia singulis necessaria, scilicet Baptismum, Confirmationem, Eucharistiam, Pœnitentiam, Extremam Unctionem, Ordinem, & Matrimonium : illaque gratiam conferre, & ex his Baptismum, Confirmationem, & Ordinem, sine sacrilegio reiterari non posse. Receptos quoque & approbatos Ecclesiæ Catholicæ ritus, in supradictorum omnium Sacramentorum solemnè administratione recipio, & admitto : Omnia & singula, quæ de peccato originali, & de justificatione in Sacrosancta Tridentina Synodo definita & declarata fuerunt, amplector & recipio : Profiteor pariter in Missa offerri Deo, verum, proprium, & propiciatorium sacrificium, pro vivis, & defunctis, atque in Sanctissimo Eucharistiæ Sacramento esse, vere, realiter, & substantialiter Corpus, & Sanguinem, una cum anima, & divinitate Domini nostri Jesu Christi, fierique conversionem totius substantiæ panis in corpus, & totius substantiæ vini in sanguinem : quam conversionem Catholica Ecclesia transubstantiationem appellat. Fateor etiam sub altera tantum specie totum atque integrum Christum, verumque Sacramentum sumi. Constantè teneo, Purgatorium esse, animasque ibi detentas fidelium suffragiis juvari. Similiter & Sanctos una cum Christo regnantes, venerandos atque invocandos esse, eosque orationes Deo pro nobis offerre, atque eorum reliquias esse venerandas : firmissime assero, imagines Christi, ac Deiparæ semper Virginis, nec non aliorum Sanctorum habendas & retinendas esse, atque eis debitum honorem ac venerationem impertiendam. Indulgentiarum etiam potestatem, a Christo in Ecclesia relictam fuisse, illarumque usum Christiano populo maxime salutarem esse assero. Sanctam Catholicam, & Apostolicam Romanam Ecclesiam, omnium Ecclesiarum Matrem, & Magistratam agnosco : Romanoque Pontifici, Beati Petri Apostolorum Principis, Successori, ac Jesu Christi Vicario, veram obedientiam spondeo ac juro.

ro. Cætera item omnia a Sacris Canonibus, & Oecumenicis Conciliis, ac præcipue a Sacrosancta Tridentina Synodo tradita, definita, & declarata, indubitanter recipio atque profiteor, simulque contraria omnia, atque hæreses quascunque, ab Ecclesia damnatas & rejectas, & anathematizatas, ego pariter damno, rejicio & anathematizo: Hanc veram Catholicam fidem, extra quam nemo salvus esse potest, quam in præsentis sponte profiteor, & veraciter teneo, eandem integram, & inviolatam, usque ad extremum vitæ spiritum, constantissime (Deo adjuvante) retinere & confiteri, atque a meis subditis, vel illis, quorum cura ad me in munere meo spectabit, teneri, doceri, & prædicari, quantum in me erit, curaturum. Ego idem N. spondeo, voveo, ac juro, sic me Deus adjuvet, & hæc Sancta Dei Evangelia.

### STATUTUM I.

**S**Tatuitur igitur & ordinatur, ut quicumque in Episcopum, vel Archiepiscopum eligetur, in prima post suam creationem vel electionem Provinciali Synodo, cui ipse intererit, veram obedientiam Summo Romano Pontifici spondeat, fideique professionem faciat, juxta formam hanc a Pio IV. Papa traditam. Provisi etiam de beneficiis quibuscunque, curam animarum habentibus, eandem obedientiam spondere & fidei publicam confessionem facere teneantur in manibus Episcoporum suorum, vel Vicariorum Generalium: Provisi autem de Canonicatibus, vel dignitatibus in Ecclesiis Cathedralibus, non solum coram Episcopo suo, seu Vicario, sed etiam in Capitulo: Abbates coram Episcopo, a quo benedictionem accipient, & coram toto Conventu: Alii vero de Monasteriis provisi, coram Conventu, tantum. Item Universitatum & Studiorum Generalium Magistri & Doctores publice proficentes, singulis annis in prima quaque prælectione sua solemni se juramento spondeant, nihil docere, vel interpretari velle, quod huic fidei Catholicæ repugnet.

### II.

Quoniam vero impossibile est, sine fide placere Deo: idcirco Curati doceant frequenter articulos fidei, sicut in Symbolo Apostolorum continentur: distin-

cte pronunciando, & simpliciter lingua vernacula aliquando declarando. Hortentur quoque Parochianos suos, ut memoriter illos teneant, & frequenter recitent cum Oratione Dominica: quoniam qui id non agunt, non possunt reputari Catholici.

### III.

Quod si declarationem velint ampliore facere populo, (veluti in diebus solemnibus, qui articulorum aliquam interpretationem requirant) eam ex Catechismo Romano maxime desumant, & authoribus tantum Catholicis: neque ex suo sensu aliquid tradant, ne ab orthodoxæ fidei doctrina alienum quid per imperitiam afferant, vel per temeritatem affirmant.

### IV.

Doceant Curati adolescentes & mulierculas, facere signum Crucis, in nomine Patris, & Filii, & Spiritus Sancti, Amen. Idque protensa manu tota, cum decoro, a fronte ad umbilicum, & ab humero sinistro ad dextrum. Et pollice aliquando manus dextræ in fronte, & in ore, & in pectore. Quia Symbolum est, & fidei, & spei, & charitatis, in Deum & Dominum nostrum Jesum Christum: quo non solum in periculis subeundis, sed in omni actione suscipienda muniri sanctum est, & prodest.

### V.

Scribit quidem Petrus Apostolus in prima Canonica, ut simus semper parati ad satisfactionem omni poscenti nos rationem de ea, quæ in nobis est, Spe & Fide, sed cum modestia & timore. Cæterum, quia deprehendimus subornatos multos ministros Satanæ per varia loca discurrere, & sub specie pietatis quæstiones varias Curatis & Presbyteris parum in ea re exercitatis, coram populo proponere: quibus ipsi Presbyteri non sane ex B. Petri doctrina, cum modestia & timore respondentes, sed cum præsumptione loquentes, quæ non intelligunt, sæpe contingit, ut non solum auditores, sed & se ipsos etiam scandalizent: juxta Patrum Constitutiones omnibus nostræ Dioecesis



cesis prohibemus (maxime vero Presbyteris) ne cum hujusmodi hominibus disputationes de fide, vel doctrina Ecclesiastica committant, aut disputare audeant, nisi ad Theologiæ gradum aliquem assumpti sint. Sed si a peregrinis interrogentur, & respondere oporteat: Respondeant tantum de suo officio, quod facere tenentur, scilicet administrare Sacramenta secundum formam sibi præscriptam, orare & offerre, pro se & pro populo: declarare simpliciter & absque contentionibus Articulos fidei, Præcepta Decalogi, & Ecclesiæ, operæ charitatis, & similia. Quod si quam in his, & aliis similibus rebus difficultatem habuerint, consulant Superiores suos, vel Doctores Viros Catholicos, cum charitate.

### DE VERBO DEI.

**F**ides igitur duplex est: Actualis, & habitualis. Et hæc quidem etiam in duplici ratione subsistit. Nam alia infusa dicitur, uti quam puer rationis adhuc expers, Spiritus Sancti gratia assequitur per Baptismum, cum aliis virtutibus & donis. Acquisita autem ex pluribus credendi actibus generatur: sive illius hæc incrementum sit [quia ab Spiritu Sancto quoque procedit] sive quid aliud, non refert. Nam Marc. ult. prædicabant Apostoli Domino cooperante, & sermonem confirmante, sequentibus signis. Ex prædicatione Verbi Dei fit Actualis fides, quod dicimus credere. Id docet Apostolus illa eleganti gradatione Rom. 10. Quomodo invocabunt, in quem non crediderunt? aut quomodo credent ei, quem non audiverunt? Quomodo autem audient sine prædicante? Quomodo vero prædicabunt, nisi mittantur? sicut scriptum est: Quam speciosi pedes Evangelizantium pacem, Evangelizantium bona! Sed non omnes obediunt Evangelio. Etiam enim dicit: Domine, quis credidit auditui nostro? Ergo Fides ex auditu: Auditus autem per Verbum Christi. Hæc Paulus. Ex quibus patet, fidem de Christo (Actualem scilicet) non esse unquam, nisi audiat Verbum Christi. Est autem auditus quidam interior per inspirationem, vel revelationem occultam, de qua David: Audiam, quid loquatur in me Dominus: alius exterior. Ad exteriorem hunc fit Dei Verbum tribus modis. Uno per Deum ipsum loquentem homini: ut quando Verbum Domini factum fuit ad Adam, Cain, Abraham, Moysen, & alios. Alio modo per Dei Mini-

stros: ut cum Prophetæ ea referebant, quæ a Deo acceperant. Dicebant enim: Audi Israel, hæc dicit Dominus. Sed hoc Dei Verbum nobis administratur duobus etiam modis: per Scripturam Sacram: & per traditionem Ecclesiæ non scriptam, Ubi doctrina fidei, & eorum, quæ nobis necessaria sunt ad salutem, tanquam per manus tradita absque literis, inde ab Apostolis, & primis Ecclesiæ Ducibus ad nos pervenit. Itaque nisi Scripturis Sanctis credamus, & Ecclesiæ Matris nostræ traditionibus; salvi esse non possumus.

### SCRIPTURÆ SACRÆ.

**D**icitur Scriptura Sacra Verbum Dei, quoniam Spiritu Dei facta est: sicut verbum hominis dicimus, quod Spiritu hominis sit. Jerem. 1. Ecce dedi verba mea in ore tuo. Et Evangelistæ solent ita loqui: Sicut dictum est a Domino per Prophetam. 2. Petr. 1. Non enim humana voluntate allata est aliquando Prophetia, sed Spiritu Sancto inspirati, loquuti sunt Sancti Dei homines. Scripturæ ergo Sanctæ, seu Canonice sunt, quæ Spiritu Sancto dictante exceptæ sunt. Psalm. 44. Lingua mea calamus scribæ velociter scribentis. Sed earum multiplex sensus esse solet. Primo literalis: ut qui vel ex proprietate verborum, vel usitato tropo, se statim offert, alius spiritualis, vel mysticus: quem Hieronym. allegoricum nominat. Alii Doctores mysticum hunc, sive spirituales, in tres separant, & horum unum vocant Allegoricum, quando scilicet res novi Testamenti significatur in veteri, aliqua metaphora: Anagogicum, qui de futuro regno præfigurat: Tropologicum, qui mores instruit.

Dicuntur autem Scripturæ Sanctæ, sicut & sanctæ Leges, & sancti muri: quia violari non debent. Ideo Deuter. 4. Non adteris ad verbum, quod vobis loquor, nec auferetis ex eo. & c. 12. Nec addas quicquam, nec minuas. Nihil tamen prohibet, quin Scripturæ mens declarari possit per libros alios. Nam Exod. 12. 20. 23. 24. Quædam addita reperimus a Moysen, veluti de fasciculo hyssopi, & asperione: de igne non accendendo die Sabbati, de pœna mortis violanti Sabbatum: & (quod non erat in decalogo) addidit, Deum tuum timebis, & illi soli servies, & per nomen illius jurabis. Hæc enim, & alia invenias exposita, quæ non erant scripta prius: sed non erant præter illa, quæ didicerat a Deo Moyses. Sic auctum fuit volumen Bibliorum paulatim. Quia non simul & semel omnia revelata fuerant Ecclesiæ Dei. Ex multa quoque sunt in Literis Sanctis obscura, quæ non licet cuiquam pro suo arbi-

trio interpretari. 2. Petr. 3. Sicut & charissimus frater noster Paulus secundum datam sibi sapientiam scripsit vobis, sicut & in omnibus Epistolis, loquens in eis de his. In quibus sunt quædam difficilia intellectu: quæ indocti & instabiles depravant, sicut & cæteras scripturas, ad suam ipsorum perditionem. Hanc igitur ob causam dicitur, scripturas eodem Spiritu esse interpretandas, quo conditæ sint: nempe Dei, & Prophetico. Quare & in Ecclesia primitiva interpretes ejus dici consuevere, Prophetæ. 1. Corinth. 14. B. Clemens Epist. 4. ad Ecclesiam Hierosol. monet, ut Lex Dei, cum legitur, non secundum propriam ingenii virtutem, aut intelligentiam legatur, vel doceatur. Nam hæretici omnes ex Scripturis fundamentum suorum errorum petunt: Diaboli exemplo, qui Dominum autoritate Scripturarum seducere tentavit. Timotheum suum Apostolos alloquens: Qui ab infantia, inquit, Sacras Literas didicisti, quæ te possunt instruere ad salutem per fidem, quæ est in Christo Jesu. Quasi dicat, sine fide non profunt ad salutem: nec sine lumine fidei intelligi possunt. Nisi credideritis, inquit, Esa. 6. non intelligetis. Faciles ergo sunt, cum a Deo declarantur. Hinc impudentia coarguitur hæreticorum. Nam si adeo faciles sunt: quæro, cur inter se super eis dissentiant ipsi? Non sic profecto Petrus Apostolus, 2. Petr. 3. Nemo igitur proprio sensu has interpretetur. Verum ubi difficile quid acciderit, referat ad Ecclesiam. Ita jusserunt Patres. Clem. ad Jacob. c. 7. Tertull. de præscrip. Hieron. ad Damasum, Aug. contra Ep. funda. Et res patet ex Exod. 18. Deuter. 7. Matth. 10. 22. Malach. 2. 1. Timot. 3.

Dicuntur nonnunquam etiam scripta Pontificum & Doëtorum Sanëtorum, Sacræ Scripturæ: sed ad hoc, ut distinguantur a prophanis. Sic Jus Canonicum lex Divina, Imperatorium vero Civile, a Justiniano in Auth. (f)

### TRADITIONES.

**N**on semper intrinsecus illuminatione Deus inspirat, quæ nos scire vult, nec omnia in Literis Sacris reperiuntur explicita: sed per aliorum sæpe nos doctrinam instruit: ut aliis acceptam feramus nostram institutionem. Sic Moïsen a socero doceri voluit: Paulum ab Anania: Cornelium a Petro: Eunuchum Candacis a Philippo. Multos etiam per afflictiones admonet, resipiscentiæ: sed hoc non sine illis aliis. Nam ad discernendum Verbum Dei, requiritur primo lumen

fidei, quod ab Spiritu Sancto datur: Miraculorum certitudo: Ecclesiæ consensus. Nam si contra, quam tenet Ecclesia, doceat, qui miracula operetur, explodendus erit. Et qui novam doctrinam in religione adferunt, sine miraculorum certitudine, explodendi. Moses enim quantis cum miraculis legem suam tulit? Noe suam, quæ tamen lex naturæ erat, liberatis a diluvio filiis accepit. Et Abraham circumcisionis, concepto miraculose Isaac. Christus, Si opera, inquit, non fecissem, quæ alius nemo potest facere, peccatum non haberent. Christi Lex præterea legem Mosaicam perfecit, in quo erat infirma. Hæc naturæ munimen fuit: concupiscentiam enim nesciebam, nisi lex diceret, Non concupisces. Naturæ denique lex Divinæ rationis imago est: Nunc ergo si vel autoritate magna Angelus de cælo, vel miraculis editis quibuscunque alius, contra traditam ab Apostolis & a Christo doctrinam, evangelizet, Anathema esto. Miracula enim sunt a Deo in confirmationem veritatis: quia Deus mentiri non potest. Ergo falsa existimato miracula, & illusiones, fraudesque diaboli, vel malorum hominum, si contra quam accepimus ab Ecclesia, tibi quis per res stupendas persuadere aliquid molietur. Stare, inquit, & tenere traditiones, quæ didicistis, sive per sermonem, sive per epistolam. Et alibi: Laudo vos fratres, quod mei memores estis: & sicut tradidi vobis præcepta mea, teneatis. Hinc patet, inquit Chrys., non omnia per epistolam, sed multa etiam sine literis Apostolos Christi tradidisse. Eadem vero fide digna sunt tam illa, quam ista. Et subdit Ambrosii sententiam Traditio est: nihil quæras amplius. Origenes in Epist. ad Titum, Hæreticum esse, ait, qui Christo credere se proficitur, & tamen aliud credit, quam traditio Ecclesiastica habeat. Traditiones Apostolus (Tertulliano interprete de præscrip.) depositum vocat. O Timothee, depositum custodi, devitans profanas vocum novitates & oppositiones falsi nominis scientiæ. Est itaque traditio hæc, de qua loquimur, doctrina Ecclesiastica Verbi Dei: tanquam per manus viva voce, de animo in animum transfusa, & communi fidelium consensu recepta. Et quanquam Scriptura Sacra possit traditio appellari: nos tamen doctrinæ causa distinguimus, sicut & Sancti Doctores distinxere. Commendatur nobis, Hierem 31. Tradam in cordibus eorum, &c. Eccl. 8. Non te prætereant narratio seniorum: ipsi enim didicerunt a Patribus suis. Proverb. 22. Ne transeamus terminos antiquos. 2. Thessal. 2. State & tenere traditiones. 1. Corinth. 11. Ritus orandi & Eucharistiæ traditionibus contineri docetur. Cæ-

(f) Auth. 1. Ut Clerici. de Juramento calum. c. 1. c. Cum diversis. de Privil. in 6. glo. c. Ex diligenti. de Simonia.

Cæterum doctrina sic per manus tradita, & de animo in animum [ ut loquitur Dionysius ] transfusa, duplex invenitur. Una Fidei est, altera consuetudinis. De hac Tertullianus antiquissimus, in lib. De corona militis. Obijcientibus, inquit, nobis hæreticis, quoniam scripturæ loco demonstramus hæc ( scilicet Eucharistiæ Sacramentum non de aliorum manu, quam Præfidentium sumere: Oblationes pro defunctis, Pro natalitiis annua die facere: Dominico die jejunium nefas ducere, vel geniculis adorare: eadem a Paschate ad Pentecosten jejunii immunitate gaudere: ad omnem progressum atque promotum frontem signaculo Crucis terere ) & horum, & aliarum disciplinarum, si legem Scripturarum postules, invenias nullam. Traditio tibi prætenditur auctrix, consuetudo confirmatrix, & fides observatrix. Traditio est, [ ait etiam Basilus ] nihil quæras amplius. Multa enim tradi oportuit Prælati Ecclesiæ, & Successoribus, quæ literis non expediebat mandare: ne margaritas projicerent ante porcos. Proditæ quidem vulgo nimium tremenda mysteria, in contemptum jam venire. Propter ritus itaque ab Ecclesiâ huc usque servatos, legendi sunt Patres antiqui: si non ad auctoritatem, saltem ad antiquitatem, ut loquitur Hieronymus. De rebus autem credendis prior fuit traditio, quam scriptura: quia Ecclesiâ aliquando sine scriptura fuit. Ante Moysen Patriarchæ fidem Dei coluerunt, & sacrificia obtulerunt. Christus Dominus nihil scripsit. Et Apostoli ante descripta Evangelia viva voce Christum prædicarunt. Luc. i. Sicut, inquit, tradiderunt nobis, qui ab initio ipsi viderunt. Nec nunc quidem omnia sunt expressa Sacris Literis, quæ Christianam doctrinam spectant: ut de Baptismo parvulorum: de Mariæ perpetua virginitate: de processione Spiritus Sancti a Filio: de Trinitatis personarum una essentia: & aliis multis, quæ non negant nunc, nisi hæretici. Quærit D. Augustinus, (g) Si consuetudo adversatur Sacræ Scripturæ, quid agam? Respondet idem, Scripturam sequendam. Non enim dixit Dominus, Ego sum consuetudo, sed: Ego sum veritas. Sed tu Pastor Ecclesiæ, si quid tale tibi accidat, refer ad Prælatum, vel ad Synodum. De variis etiam particularium Ecclesiarum ritibus interrogatus ab eodem Augustino Ambrosius, nullam esse meliorem disciplinam, respondit, quam, ut eo modo agamus, quo agere viderimus Ecclesiam, ad quam venerimus: ne cui simus offendiculo. Sunt enim traditiones aliæ generales totius Ecclesiæ universalis: aliæ particulares singularum, aliæ quoque multarum. Author est idem Aug.

lib. 3. de Bapt. parv. & Epist. 18. cont. Donat.

## DE LIBRIS CANONICIS, & de prohibitis.

**N**ecessarium omnino duxerunt Patres ( ut tanquam a tritico separarent zizania ) librorum catalogum, solenni more Ecclesiæ, describere, tam veteris, quam novi Testamenti: idem nobis hic faciendum censemus, ut in promptu habeant Viri Ecclesiastici, & distincte, omnes & singulos, quos pro Sacra & Canonica Bibliorum scriptura Synodus Tridentina suscepit. Sunt autem infra scripti Testamenti veteris: Quinque Moysi, id est, Genesis, Exodus, Leviticus, Numeri, Deuteronomium, Josue postea, Judicum, Ruth, Quatuor Regum, Duo Paralipomenon, Esdræ primus, & secundus, qui dicitur Nee-mias, Tobias, Judith, Helter, Job, Psalterium Davidicum centum & quinquaginta Psalmorum, Parabolæ, Ecclesiastes, Canticum canticorum, Sapientia, Ecclesiasticus, Isaias, Jeremias, [ cum Baruch ] Ezechiel, Daniel: Duodecim Prophetæ minores, id est, Ozea, Joel, Amos, Abdias, Jonas, Micheas, Naum, Abacuch, Sophonias, Aggæus, Zacharias, Malachias: Duo Maccabæorum, primus & secundus.

Testamenti novi sunt: Quatuor Evangelia, secundum Matthæum, Marcum, Lucam, & Joannem: Actus Apostolorum a Luca Evangelista conscripti, Quatuordecim Epistolæ Pauli Apostoli, ad Romanos, duæ ad Corinthios, ad Galatas, ad Ephesios, ad Philippenses, ad Colossenses, duæ ad Thesalonicensis, duæ ad Timotheum, ad Titum, ad Philemonem, ad Hebræos, Petri Apostoli duæ, Joannis Apostoli tres, Jacobi Apostoli una, Judæ Apostoli una, & Apocalypsis Joannis Apostoli.

## STATUTUM I.

**H**orum Librorum Sacrorum veterem ac vulgatam editionem solum veneramus, & in Officio Ecclesiastico, publicis lectionibus, & expositionibus, pro Authentica habendam declaramus: Cæteras vero eorum voluminum integras versiones in vernaculum, vel latinum idioma, sic prohibemus, ut nisi licentia in scriptis obtenta, nemo habere audeat Biblia vernacu-

(g) Aug. lib. 3. de Bapt. parvul.



macula, vel ab aliquo alio traducta, sub pœna excommunicationis : quia omnes depravatæ sunt ab hæreticis.

## II.

Hæresiarcharum libros omnes, cuiuscunque argumenti vel tituli fuerint, prohibemus : veluti Lutheri, Stancari, Serveti, Zuinglii, Calvini, Pacimontani, Zuenfeldii, Rucceri, Davidis Georgii, Rinchii, Petrobusii, Valdoris, Brentii, & similium, qui hæreticorum duces fuere. Aliorum quoque hæreticorum libri, qui de Religione ex professo tractant, omnes damnantur. Sed qui aliis de rebus, & non de Religione : Authores autem eorum hæreticos fuisse constat, sine licentia in scriptis obtenta nemo habeat.

## III.

Prohibemus libros omnes incantationum, vel sortilegiorum, atque superstitionum. Item qui res lascivas, atque obscenas ex professo narrant, aut docent. Ab Ethnicorum autem huiusmodi prælectionibus (licet doctorum & elegantium) arceatur ætas puerilis.

## IV.

Libros de rebus sacris sine nomine Authoris, nisi examinatos prius, probatosque ab Ordinario, edere, vendere, aut apud se retinere, nemo audeat, sub pœna anathematis. Eosdem in locis suspectis imprellos prohibemus, eadem pœna.

### DE HÆRESI & HÆRETICIS.

**I**N multis rebus errare nullum, aut minimum peccatum est, ut ait Augustinus [b] : Sed hæresis gravissimum peccatum est. Melius erat illis, inquit Petrus Apollolus, (i) non cognoscere viam iustitiæ, quam post agnitionem retrorsum converti ab eo, quod illis traditum est, sancto mandato. Dicendum ergo, quid sit hæresis, quis hæreticus vel schismaticus, quæ propositio hæretica, quæ sapiens hæresis, quæ scandalosa, blasphemica, temeraria, erronea, absurda. Quin etiam quo modo vitandi hæretici, at-

que agnoscendi. Sunt namque hæc omnia Pastoribus scitu valde necessaria, non solum Prælati majoribus, sed etiam aliis Viris Ecclesiasticis.

Hæresis Græce, (id est, electio) Latine secta dicitur. Quales præcipuæ fuerunt olim quatuor Philosophorum : scilicet Stoicorum, Epicureorum, Academicorum, & Peripateticorum. Horum namque unusquisque suam eligebat opinionem & doctrinam, quam pertinaciter tuebatur. Hinc merito factum, ut inter Christianos, si quis contra communem opinionem omnium credentium obstinate sentit (hoc est contra fidem Catholicam) hunc hæreticum, id est, sectarium, & factiosum nominamus. Definiunt ergo Doctores, hæresim, dogma falsum, fidei Catholicæ contrarium. Sed ne Judæos, Mahumetanos, & Paganos (qui omnes contra fidem Catholicam sentiunt) inter hæreticos ponamus, qui potius infideles, quam hæretici dici solent : addendum aliquid est huic definitioni, nimirum, In eo, qui Christianam fidem professus est. (k) Itaque, nisi Religionem Christi professus fuerit quis, hæreticus dici non possit. Quare deductis omnibus jam proprietatibus, sic definiemus hæreticum, Qui post susceptam Religionem Christianam, Christi fidem in genere profitendo, aliquam in specie opinionem Catholicæ fidei contrariam pertinaciter tenet.

Ex his habemus, quinque requiri, ut quis proprie hæreticus dici possit. Primum, quod sit fidem Catholicam professus, non Paganus, vel omnino infidelis. Secundum, quod credat aliquid fidei nostræ Christianæ contrarium. Nam si omnia post veritatem agnitam neget, apostata vocatur. Is fuit Imperator ille nefandus Julianus. Tertium, quod errorem habeat in intellectu. Alioquin enim agens aliquid, vel proferens impium, & contra veritatem Catholicam, non ex errore opinionis, sed vel ex ira, vel libidine, vel metu, vel alia passione motus, non statim dicitur hæreticus, licet gravissime peccet. Quamquam certe posset tanquam hæreticus aliquando puniri, ob aliquas circumstantias. Ut Judæus, si post Baptisma susceptum redeat ad cæremonias Judaicas : & qui semel hæresim abjuravit, si eandem deprehendatur asserere : omnes huiusmodi, quod hæresim in opinione habere adhuc videantur (non enim passione moti videntur magis sensitivæ partis, quam opinione intellectivæ) tanquam hæretici condemnantur. Quarto requiritur, quod sit de his, quæ sunt fidei vel bonorum morum ad assequendam vitam æternam. Nam in aliis si quid aliter, quam se res habeat, sentia-

(b) Aug. encher. cap. 20.

(k) Car. de turre crem. lib. 4. de pot. Pap.

(i) 2. Petr. 2.

S. Th. 2. 2. q. 11.

sentiamus, non magnum periculum est. Quinto & ultimo, quod errorem pertinaciter defendat. Eam ob rem dicebat idem B. Augustinus (k): Errare potero, hæreticus non ero. Namque hæresis electio est: & hæreticus privatæ adhæret opinioni, peculiaremque sententiam tuetur, contempta communi. Unde & paradoxon etiam Græce vocari potest hæresis, id est, admirabile: nam & admirabile hoc, quod Paradoxum dicitur, contra communem opinionem est. Cæterum licet parum inter se differant: tamen aliis in rebus inveniri potest Paradoxum, quam in fide. Quod si in fide aliquando etiam contingat, non statim hæresis dicitur: nisi voluntaris electio sublit. Id significare voluit Cicero (l), Cato, inquit, perfectus mea sententia Stoicus, ea sentit, quæ non sane probantur in vulgus: & in ea est hæresis, quæ nullum sequitur florem orationis.

Inter schisma vero & hæresim hoc interest, quod hoc perversum dogma habet: schisma autem separationem facit ab unitate Ecclesiæ, & unius obedientia Prælati. Dictio enim Græca est, id est, scissura, sectio, divisio, diffidium, dissensio. At vero schismaticorum quidem hæc natura esse dicitur, ut hæresim illico aliquam excogitent, quo ab Ecclesia videantur jure recessisse. Ita nos docuit D. Hieronymus (m), & experientia didicimus nostra hac tempestate: & in Jeroboam (n), Rege Israel, exemplum habemus evidentissimum.

Sed ut caput hoc concludamus, apponenda est sententia D. Augustini in lib. de Baptismo contra Donatistas. Si aliquis, inquit, jam hoc sentiat de Christo, quod Photinus opinatus est, & in Ecclesia Catholica baptizatur, & hoc credit esse fidem Catholicam: nondum dico esse hæreticum, nisi manifesta doctrina Catholicæ fidei resistere maluerit, & illud, quod tenebat, elegerit. Ex his inferunt, ne peccare quidem idiotam, quem ignorantia excusat. Quod non omnes æque teneantur ad omnia intelligenda. Plebi rudi sufficit articulos Symboli explicite credidisse: non item aliis.

## DE PROPOSITIONE HÆRETICA, & ejus differentiis.

**E**st ergo veritas fidei nostræ Catholicæ revelata a Deo, in se primum, vel in suo antecedente. In se quidem, ut Sacra Biblia: in suo antecedente, ut quæ ex Bibliis Sacris necessariæ deducuntur. Quamobrem non in eodem gradu veritatis Catho-

licæ necessario credendæ est, quod ex verbis sacris deducitur, atque id, quod est in ipsis expressum. Et ideo quicquid directe & per se contradicit Sacræ Scripturæ, (novi vel veteris Testamenti) hæreticum est in primo gradu. Sunt in alio gradu traditiones a temporibus Apostolorum receptæ. Deinde Conciliorum universalium in fide definitiones: tum si quæ sunt similes Sedis Apostolicæ: ac denique Doctorem Ecclesiæ, ubi inter se conveniunt. Contra hæc omnia sentire, hæreticum est in suo gradu. Dicuntur enim Pontificum & Doctorem Sacræ Scripturæ, ut supra docuimus.

Sapere autem hæresim, dicitur illa propositio, quæ adjuncta alia propositione vera, vel quæ negari non possit, infert propositionem vere hæreticam. Ut si quis dicat Gregor. XIII. non esse Papam, saperet hæresim: quia Gregorius habetur rite electus a Collegio. Qui autem rite electus est, vere est Papa. c. In nomine Domini. 23. 4. dist. c. De evitanda. De elect. c. Ubi periculum. eo. lib. 6.

Propositio impertinens dicitur, quæ nec sequitur necessario, nec repugnat veritati Catholicæ. Exempli causa, Si quis asserat vel neget B. Joseph fuisse mortuum tempore Pathonis Domini. Hoc enim nihil refert ad fidem Catholicam. Et ea de re disputant aliquando Doctores inter se. Quamquam certe impertinens omnis illa dicitur, quæ nec infertur ex ante dictis, nec aliquid ante dictorum infert.

Propositio temeraria est, quæ nulla ratione vel autoritate subsistit. Ut si quis dicat, anno proximo futurum esse finem mundi. Erronea, quæ falsa tanquam vera asserit vel negat: ubi qui asserit vel negat se verum loqui putat. Ille enim proprie errare dicitur, qui se scire æstimat, quod tamen nescit. c. Quamvis. 38. dist. Qui error, si contra fidem esset, tunc hæresis diceretur, non solum error.

Propositio injuriosa, seu contumeliosa, quæ honori vel dignitati personæ, vel ordinis & gradus alicujus detrahit.

Scandalosa, seu piarum aurium offensiva, quæ præbet auditoribus occasionem ruinæ, & casus in hæresim, vel in peccatum mortale. Hujus generis sunt, quæ quamvis cum determinatione aliqua, vel restrictione veræ sint: tamen simpliciter & absolute sumptæ, videntur favere hæreticis, cum aliter loqui soleant Catholici. Ut si quis diceret simpliciter, Patrem majorem esse Filio

E 3

in

(k) August. de lib. arb. l. 3. &amp; Ench. c. 13.

(m) Hier. in ep. Tit. c. 3.

(n) 3. Reg. 12.

(l) Parad. c. 1.

in Divinis. Furari non esse magnum peccatum.

Schismatica, quæ ad seditionem & inobedientiam spectat.

Impia, quæ contra charitatem Deo debitam, vel Sanctis, vel patriæ, vel parentibus.

Blasphema, quæ contra honorem Dei: ut quæ directe vel indirecte contumeliam Deo infert, vel Sanctis ejus, vel Sacramentis Ecclesiæ. Et etiam omnis illa, quæ Deo tribuit, quæ non conveniunt, vel demit ei, quæ conveniunt, vel creaturæ tribuit, quod Dei proprium sit. Blasphemia enim Græce, contumelia est latine. Pœna autem blasphemi, mixti fori est, nisi hæresim habeat admixtam. Quia si contra fidem Catholicam aliquid proferatur: jam juris Ecclesiastici fit, & ad Inquisitores pertinet.

Absurda denique erit, quæ a sensu communi abhorret.

Eadem autem simul & male sonans esse potest, & sapiens hæresim, & blasphema, & schismatica, & temeraria, & scandalosa, & absurda.

### QUOD VITANDI SUNT HÆRETICI, & revelandi.

**E**X jure Civili, pertinacium hæreticorum pœna capitalis est, seu mortis. l. Arriani. C. De hæreticis. l. Ultimum supplicium. ff. De pœnis. Jure autem Canonico & Divino excommunicati sunt, & ab omnibus vitandi. Id docet Apostolus Paulus multis in locis. Ad Tit. 3. Hæreticum hominem post unam & secundam correptionem devota. Rom. 16. Rogo vos fratres, observetis eos, qui dissensiones & offendicula præter doctrinam, quam vos didicistis, faciunt: & declinate ab eis. 2. Thess. 3. Denunciamus vobis in nomine Domini, ut subtrahatis vos ab omni fratre ambulante inordinare, & non secundum traditionem, quam acceperunt a nobis. 1. Corinth. 6. Si quis non obedit verbo nostro, per Epistolam hunc notate: & ne commisceamini cum illo. 2. Corinth. 6. Nolite jugum ducere cum infidelibus. Esa. 52. Recedite, recedite, & pollutum nolite tangere. Narratur historia in lib. 3. Regum [6] notanda, de Viro Dei & Propheta, qui missus a Deo ad Jeroboam Regem Israël schismaticum, cum contra Dei præceptum, panem in terra Israel comedisset, rediens, a Leone interemptus in via est. De Beato Antonio scribit Athana-

sius, nunquam se miscuisse schismaticorum conviviiis, nec Manichæis, aut aliis hæreticis verba amice largitum, nisi quæ possent eos ab errore revocare: dicens, tales amicitias esse animæ perditionem. Leo primus, in Ecclesia celeberrimus Pontifex multa scripsit (p) de vitandis hæreticis. Cyprianus Martyr constantissimus, Nulla cum talibus commercia copulentur, inquit, convivia vel colloquia misceantur: & limus ab eis tam separati, quam de Ecclesia sunt profugi. Qui unitati & paci Christi inimicus est, nobiscum non potest cohærere. Si cum precibus & satisfactionibus veniant, audiantur: si maledicta & minas ingerant, respuantur. Apostolus Tito (q) scribit, ut tales devitet, cum sint proprio judicio condemnati. Cætera vitia (inquit Hieronymus in hunc locum) & criminoli reliqui per Sacerdotes ab Ecclesia repelluntur: hæretici sententiam ipsi in se ipsos ferunt, suo arbitrio ab Ecclesia recedentes: quæ recessio, propriæ conscientiæ videtur esse damnatio. Ideo videtur Joannes (r) dicere: Ex nobis exierunt, sed non erant ex nobis. Et Paulus, (s) Non sumus nos filii subtractionis, in perditionem: sed fidei, in acquisitionem animæ. Plura ad Constantium Lucifer Episcopus.

Ex his omnibus probatur, non ab re pro excommunicatis haberi omnes, qui cum hæreticis participant, non solum manifestis, sed etiam suspectis de hæresi: qui vocati scilicet, & ad arbitrium Episcopi purgari noluerint. Et excommunicantur illi, qui scienter tradunt Ecclesiasticæ sepulturæ fautores hæreticorum, & defensores, receptatores, credentes. Dicuntur autem credentes, qui hæreticorum doctrinam implicite laudant, aut personas. Nam si explicite doctrinam probent: jam non tantum credentes hæreticis, sed vere hæretici dicentur. Receptatores vocamus, qui hæreticos recipiunt in domibus suis, vel terris, semel vel pluries, publice vel occulte, ne videantur a populo, vel capiantur. Non autem, si causa hospitii, vel convivii publicæ. Fautores vero, qui publica autoritate fungentes, punire, vel expellere condemnatos ab Ecclesia negligunt. Privati autem, si celant eosdem hæreticos, postquam juraverint indicare, sunt excommunicati. Sed in Hispania statutum est, omnes scientes, & non revelantes, esse excommunicatos, & reos criminis. Excommunicati sunt etiam a jure, qui eos laudant, vel excusant, alunt, fovent. Defensores sunt, qui resistunt, ne in manus Judicium deveniant, puniendi ob hæresim, vel examinandi. Omnes hi excommunicati sunt ipso facto.

Non

(o) 3. Reg. 13.  
(s) Heb. 10.

(p) Lib. Epist. 3. & 4.

(q) Tit. 3.

(r) 1. Joan. 2.



Non immerito igitur Leo idem Sanctissimus, non solum vitandos esse docuit, sed etiam Presbyteris prodendos. Quia, inquit, qui tales non prodendos putant, in iudicio Dei invenientur rei de silentio, etiam si non contaminentur assensu. Et idem sermone 4. De collectis: Magna pietas est prodere latebras impiorum; & in eis debellare diabolum, cui serviunt. Contra quos omnem terrarum orbem, & totam ubique Ecclesiam decet fidei arma corripere. Cavendi sunt, ne noceant: prodendi, neque civitatis nostræ in parte subsistant, &c.

Sed hæc omnia intelligenda sunt de nominative expressis, & notoriis: quia vere hæretici difficile dignoscuntur. Veniunt [inquit Salvator] in vestimentis ovium: intus autem sunt lupi rapaces. Sed ut eos cognoscamus, subdit: Ex fructibus eorum, cognoscetis eos. Interrogare posset quis ex verbis Christi, Quid? an ex operibus secundum vitia vel virtutes? veluti continentiae, charitatis, devotionis: ut si hæc præ se ferant bonæ, sanæque esse doctrinæ arbitremur? Nequaquam. Quoniam Pelagius hæreticus nobilissimus præter cæteros, opera ostentare poterunt perfecti hominis in vita sua: Sed quid ait Christus? Nunquid colligunt de spinis uvas, aut de tribulis ficus? Ex verbis his Domini suspectos habere debemus omnes eos, qui novitates docent in fide. Siquidem hi non Christum, sed se ipsos prædicant: & gloriam propriam quaerunt. Ideo ex se ipsis loquuntur, id est, suam, non Dei doctrinam tradunt. Nota quæso: & mali cum ipsi sint, omnisque homo mendax: sequitur & arborem & fructum malos esse. Non enim producant spinæ uvas, nec humana ambitio Dei sapientiam. Dicebat Salvator Dominus: Qui a semetipso loquitur, gloriam propriam quaerit: mea doctrina non est mea: sed ejus, qui misit me [†]. Hæc Christus. Sed isti, quid? ita Chrysostomus, vel Augustinus: sed ego aliter. Hactenus ita senserunt idiotæ: sed ego tenebras excutiam. Verum Apostolus novatores istos procul abigendos censuit, & a novitate doctrinæ dehortatur Timotheum suum. (u) Depositum, inquit, custodi, devitans profanas vocum novitates. Huic quidem novo, maloque fructui junctus est alius: licentia nimia in sententiis suis. Contra hanc Jacobus Apostolus (x): Si quis putat se Religiosum esse, non refrænans linguam suam, sed seducens cor suum, hujus vana est religio. Junctus & alius est non minus malus: Impatientia reprehensionis. Neque enim se corrigi sultinet hæreticus, ut patet ad Tit. 3.

Noverint ergo Ecclesiarum Pastores, hoc differre fidei doctrinam ab humanis & sæcularibus disciplinis, quod in his rerum novarum inventores in pretio sunt: in præceptis & doctrina pietatis, omnis novitas suspecta habetur. Cæterum ne temere quemvis de hæresi accusent: regulas observant supra politas. Et quod propter solam mentalem hæresim neminem putent excommunicatum, nisi extrinsecus illa appareat. Nam occulta illa est per se. Nec de ea loquitur Concilium Trident. cum solum Episcopum posse absolvere determinat: verum de ea, quæ probari non potest. Alioqui de per se occulta quilibet Sacerdos potest.

## DE ORATIONE DOMINICA.

### *Pater noster.*

Sicut Fides Symboli frequenti meditatione confirmatur: sic Spes Orationis Dominicæ frequenti usu. Nam si nomen spectes Patris, quod in præfatione positum est: quis non in spem erigatur, omniaque & regnum (etiam ipsum Patris) tanquam filiis præparatum, non speret? Reliqua etiam, quæ Salvator nos postulare docet, magnam in ea fiduciam esse collocandam innuit. Idcirco eam semper in ore tenebimus, & in corde. Qua de causa Patres eam quotidianam appellarunt. Delet enim hæc (ut eorum verbis utamur [y]) minima & quotidiana peccata. Delet & illa, a quibus vita fidelium, etiam scelerata gesta poenitendo in melius discedit mutata. Ad ejus ergo declarationem pergamus. De oratione autem generaliter suo loco dicemus. Nomen Patris ideo Deo convenit, quia Creator noster est, & Rector & Redemptor. Hæc pro populo fideli Sacerdos in Missæ Sacrificio agnoscens, cantat alta voce: Præceptis salutaribus moniti, & Divina institutione formati, audemus dicere: Pater noster. Nam Apostolus ad Rom. 8. Non accepistis Spiritum servitutis iterum in timore, sed accepistis Spiritum adoptionis filiorum, in quo clamamus Abba Pater. Joan. 1. Dedit eis potestatem filios Dei fieri, & 1. Joan. 3. Videte qualem Charitatem dedit nobis Pater, ut filii Dei nominemus, & simus.

### *Qui es in Cælis.*

Quamquam Deus præsens adest locis omnibus & rebus, nullis terminis definitus: (dicit enim per Prophetam, Nunquid non cælum & terram ego impleo? Et in Psal.

(†) Joan. 7.

(u) 1. Timo. 6.

(x) Jacob. 1.

(y) Conc. Tolet. 4. cap. 9. ex August. in Enchir.

Psalmis, Si ascendero in cœlum, tu illic es: Si descendero in infernum, ades) tamen in Divinis Scripturis sæpe dicitur habere sedem suam in cœlo: quod cœli sint nobilissima pars mundi, in sublimi orbe positi, nullique corruptioni obnoxii, sed constantes, & inferiora hæc influxu, cursuque suo gubernantes, incorruptibiles, vi & pulchritudine, magnitudineque præstantes. In quibus elucet maxima ejus potentia, sapientia, & majestas, sicut interpretatur Salomon 2. Paralip. 6. Tu exaudies de cœlo, de sublimi scilicet, inquit, habitaculo tuo. & rursus: Exaudies de cœlo, hoc est, de firmo habitaculo tuo. Cumque omnia, quæ a Deo postulamus, cum bonis cœlestibus jungenda sint, & ad eum finem dirigenda, sicut scribit Apostolus ad Coloss. 5. Si consurrexistis cum Christo, quæ sursum sunt, querite, non quæ super terram. Nam terrena & corruptibilia contemnentes, ad Deum, qui Spiritus est incorruptibilis, aspiramus. Ideo cœlum Dei sedes dicitur: & nos orantes Deum ad cœlum oculos tollimus, quia cœli supra hæc omnia positi cernuntur, sicut & Deus super omnia est immotus in se permanens.

### *Sanctificetur nomen tuum.*

**O**bservanda diligenter est forma orandi hæc, quam Dominus noster & Advocatus Dei Filius, Verbum Patris, & Sapientia summa, quique semper exauditus est pro sua reverentia, præscripsit. Invenias hic partes omnes, & qualitates perfectæ orationis, quas viri contemplationi dediti retinuerunt. Quibus, si animum intendas, maximum accipies fructum ex oratione. Sunt autem hæc: Gratiarum actio, meditatio, oblatio, postulatio, contritio, deprecatio: cum charitate, fide, spe, & perseverantia. Et Gratiarum quidem actio hic est: *Sanctificetur nomen tuum: Meditatio, Adveniat regnum tuum.* Et quia in orando multa meditari oportet, ideo iteratur meditatio in illis verbis: *Sicut in cœlo & in terra.* Tertia est oblatio: *Fiat voluntas tua.* Quarta postulatio, *Panem nostrum quotidianum da nobis hodie.* Quinta est contritio & pœnitentia de peccatis: *Dimitte nobis debita nostra, &c.* Sexta deprecatio: *Ne nos inducas in tentationem, &c.* Charitas erga Deum in tribus illis articulis exprimitur, per quos Dei gloriam postulamus: Videlicet, sanctificationem nominis Dei, adventum regni ejus, & obedientiam exhibendam ab omnibus voluntati ejus. Fidem & fiduciam, sive spem in præfatione profitemur, Pater noster: Deprecatio denique illa, quæ in fine facta est [*Et ne nos inducas in tentationem, sed libera nos a malo*] perseverantiam docet esse ne-

cessariam, ut oratio nostra impetret, quæ postulemus. Omnia hæc sub orandi forma paraphrastice & lingua vernacula, habes in libello a nobis correcto Officii Beatæ Mariæ, vulgo: *Heures de nostre Dame à l'usage de Besançon.* Charitatis ergo ordo postulat, ut Dei gloriam primo, & ante omnia desideremus. Quoniam supra omnia Deus diligendus est. Gloriam, inquam, non qua beatus in se ille est, (hoc ei non deest) sed ut ab hominibus colatur, magnificetur, gloriosus agnoscat, & prædicetur. Hoc enim significat Verbum sanctificare in hoc loco, honorare, glorificare, pio cultu & solemniter celebrare. Ut Levit. 10. Sanctificabor in iis, qui appropinquant mihi. Cultus iste latræ dicitur & exhibetur, primo quidem fide, spe, & charitate: deinde voce, ut hymnis, canticis, & orationibus: tertio corpore, ut genu flectendo, erigendo, adorando: quarto bonis externis, ut thurificationibus, luminaribus, corollis, donariis, decimis, & similibus rebus, animi pietatem coram Deo & Angelis ejus atque hominibus, contestantibus. Considerantes igitur beneficia, quæ a Deo accepimus, gratias agendo, votis omnibus desideramus, ut pro dignitate sua laudetur & glorificetur ab hominibus: ut gentibus omnibus innotescat nomen Dei nostri: ut ad fidei Christianæ confessionem nationes omnes conveniant: ut virtute Sancti Nominis ejus, quod invocatum est super nos, mudentur peccatores ab impuris cogitationibus & operibus malis, & sancti sint sicut ipse sanctus, id est, purus & mundus est. Denique ut luceat lux nostra coram hominibus, ut videntes opera nostra bona, glorificent Patrem, qui in cœlis est. Considerantes enim conversationem nostram bonam, quam habemus inter gentes, glorificabunt Deum.

### *Adveniat regnum tuum.*

**H**ic contemplatio fieri debet ex consideratione futuræ felicitatis. Cui si calamitosam hujus vitæ conditionem opponamus: sic ut ex una parte status nostri miseria, ex altera summam illius Patriæ cœlestis & paternæ domus beatitudinem, bonorumque omnium incenarrabiles divitias, meditemur: mirum concipiemus amorem & desiderium Regni cœlestis. Ex meditatione autem hac, devotio generatur: sine qua muta est, & sine sensu oratio. Sed de oratione & devotione quidem postea. Nunc dicant simplices Clerici, verbum hoc: Regnum Dei, varia significare in Scriptura Sacra. Significat Dei potentiam & providentiam, quibus omnia ille regit & moderatur. Sic dicitur Ezech. 13. Domine Deus Rex omni-

nipo-

nipotens : in ditione enim tua cuncta sunt posita. Significat singularem illam curam & providentiam, qua Deus tuetur specialiter pios ac sanctos homines. Sic dicitur Psal. 22. Dominus regit me, & nihil mihi deerit. Et Isaia 33. Dominus Rex noster, ipse salvabit nos. Regnum hoc Christus dicit Pilato non esse de hoc mundo : quia non a mundo acceperat, sed a Deo Patre. Psal. 2. Ego autem constitutus sum Rex ab eo super Sion montem Sanctum ejus : & sequitur, Prædicans præceptum ejus. Nanique Regnum hoc Dei [ut inquit (2) Apostolus] est justitia, & pax, & gaudium in Spiritu Sancto, id est, fides, spes, charitas : per quas virtutes, regni ejus participes efficiamur, Deo subiecti in omnibus, & consecrati per sanctam religionem & gratiam. De hoc regno (quod justitia justificationum est) dixit Christus : Regnum Dei intra vos est. Itaque qui in gratia Dei sunt per justitiam & gratiam gratum facientem : illi in regno Dei sunt. Quanquam & per fidem regnat Christus in omnibus, qui in gremio Ecclesiæ Catholicæ manent. Ergo gratia Dei regnum Dei dicitur, & fides etiam regnum Dei est. Sed per excellentiam regnum Dei gloria æterna : de quo Christus, Venite benedicti Patris mei, possidete paratum vobis regnum a constitutione mundi. & Joan. 3. Nisi quis renatus fuerit ex aqua, &c. Et, Domine memento mei, quum veneris in regnum tuum. Petimus ergo uno modo, ut regnum Dei, quod est Ecclesia Christi, propagetur : conversis ad fidem Catholicam infidelibus. Petimus etiam, ut regnum Dei (id est, gratia) veniat ad eos, qui per peccata sua ab Deo distracti sunt. Petimus denique, ut solus regnet in nobis in gloria æterna & felicitate, quam nec oculus vidit, nec auris audivit, nec in cor hominis ascendit.

*Fiat voluntas tua sicut in cælo,  
& in terra.*

**H**Æc est tertia pars Orationis Dominicæ, in qua oblatio fit omnium actionum nostrarum animi, & corporis, & rerum : atque adeo nostri : ut his omnibus Deus utatur pro sua voluntate, non nostra, nisi grata sibi fuerit. [a] Non enim alii intrabunt in regnum cælorum, nisi qui fecerint voluntatem Patris cælestis. Si quid igitur in nobis boni est, cum a Deo sit, Deo offeramus, ut in eo fiat voluntas Dei. Si pauper sis, infirmus, ignobilis, abjectus, feras æquo animo : judiciumque tuum Divinæ subjiens voluntati, dicito : Fiat voluntas tua. Consilium capiens in rebus agendis, invoca Dei auxi-

lium, & dicito : Fiat voluntas tua. Orans pro te, vel alio quocunque, ut exaudiaris, dicito : Fiat voluntas tua. Meditans vel creationem, vel redemptionem nostram, vel justificationem, sic hæc omnia accepta refer Deo cum gratiorum actione, ut frustra nunquam collata tibi videantur : sed sicut ex Dei voluntate facta sunt, sic & facta esse gaudens, & in his conservari cupiens, dicito : Fiat voluntas tua. Fiat quoque voluntas tua per universum orbem terræ, sicut fieri credimus in cælo. Hoc est, optamus, ut tibi sic obediatur ab hominibus in hac vita mortali, sicut in cælesti patria coleris ab Angelis & beatis animabus. Quemadmodum illi sponte & cum gaudio tibi obtemperant, sic omnes mortales tibi pareant in hoc mundo, te colant & adorent non inviti. Particula hæc meditationis denuo materiam præbet, ut in consideratione officiorum, quæ Deo Sancti exhibent in cælo, & peccatorum, quæ committunt homines in terra commorantes, cum oramus, devotionem in nobis augeamus & spem. O quam clarus est (canit Ecclesia nostra) sydereus locus Paradisi, in quo Sanctorum animæ gaudentes, triumphant cum Angelis, & alternis vocibus concrepantes, jubulant collaudantes Deum.

*Panem nostrum quotidianum da  
nobis bodie.*

**H**Æc jam mera postulatio est. Postulandi autem ea, quæ nobis necessaria sunt, formam hinc habemus, cum dicitur : *Da nobis bodie.* Primo quidem, ut non de nobis solum sollicitos esse debere sciamus, (cum quid a Deo poscimus : ) sed etiam de aliis. Ut in cura propriæ utilitatis, unusquisque de proximo suo etiam laboret. Mandavit enim Deus unicuique de proximo suo. [b] Bona quoque temporalia, quæ a Deo accipimus, in pauperum usus partienda putemus. Esurientium namque panis est [inquit Ambrosius] quem tu detines : nudorum indumentum est, quod tu recludis. Discimus deinde memores esse nostræ infirmitatis. Quid enim magis vanum ? ut in dieculam vitam traducamus, egere cibo continuo ! Docemur etiam, non esse curandum de crastino. Sufficit enim diei malitia sua. Aviculæ, licet sollicitæ cibum quærant pro tempore necessarium : securæ tamen sunt futuri. Et formica exemplum præbet prudentiæ. Quæ colligere ac servare datur, ea bona non negligit : Pigri atque ignavi, illa eadem perire sinunt.

Per panem ergo nostrum primo intelligimus cibum, & potum, & vestitum, & domum,

(2) Rom. 14.

(a) Matth. 7.

(b) Eccl. 17.

Tomus VIII. Concilior. German.



domum, & medicinam, & alia omnia, quæcunque ad tuendam, tolerandamque vitam corporis nostri necessaria habentur. *Nostrum*, enim nobis necessarium significabit. Ut Proverb. 30. Tribue tantum victui meo necessaria. Significabit etiam non fraude, furto, vel injuria quæsitum: sed jure. Nam quæ malis artibus parata sunt, illa nostra non sunt: cum sint restitutioni obnoxia. *Labores* manuum tuarum, quia manducabis, beatus es (inquit David) & bene tibi erit. Quotidianum, id est, communem, non exquisitum, non nimis delicatum, non multiplicem: qui magis ad luxum, quam ad replendam indigentiam conducatur. *Nostri* enim corporis natura fluida cum sit, & caduca, ad substantiæ suæ reparationem alimento indiget assiduo: ciboque ac potu refici optat quotidie. Hunc sensum dictio Græca declarat *ἐπιούσιος*, quasi diceret reparandæ substantiæ (quæ assidue defluit) apponendum. Sed hætenus de pane corporali dictum sit. Est alius panis, qui de cælo descendit: Corpus Christi in Eucharistia: quo pasti ac saginati in hoc mundo, ad vitam resurgemus æternam. Dicit autem potest quotidianus, quod quotidie in Ecclesia conficitur: vel quod frequenter sumendus veniat. Idcirco D. Ambrosius parum devotos increpat his verbis: Si quotidianus est panis, cur post annum illum sumis? Aliter adhuc spiritualis cibus est Verbum Dei: proprium ac peculiare alimentum fidei & animæ: cujus sæpe fame vexantur homines propter peccata sua: ut est apud Prophetam (c) Amos. Emittam famem in terram: non famem panis, neque sitim aquæ, sed audiendi Verbum Domini.

*Et dimitte nobis debita nostra.*

**E**T si dolor de peccatis præparatio est ad orationem: non contra naturam orationis tamen est, si & in principio, & in medio, & in fine meditationum omnium piarum resumatur: cum memoria delictorum nostrorum subinde recurat, nec quisquam sit, qui ab ea eximi possit. Omnes enim peccavimus: (d) nec est homo iustus in terra, qui faciat bonum, & non peccet. Quis potest dicere, Mundum est cor meum: Purus sum a peccato? Si dixerimus, quoniam peccatum non habemus, ipsi nos seducimus, & veritas in nobis non est, inquit B. Joannes. Sed bene speremus, fideles. Nam qui peccata dimittit, ipse idem postulare veniam docet. Chirographum decreti, quod contra nos erat, sublatum est. Christus ipse peccata nostra tulit. Debita nostra ipse exolvit. Dicit enim per Prophetam:

Quæ non rapui, tunc exolvebam. Sed postulanda venia cum contritione: alioqui hæc nunquam obtineatur. Ad contritionem autem habendam hæc facient: Consideratio turpitudinis atque sceditatis peccati: indignitas conditionis humanæ. Quam, inquam, indignum facinus, quod homo (cinis, lutum, putredo, sceler, & sceditas) incomprehensibilem Dei Majestatem audeat offendere: a quo procreati & liberati sumus. Ex alia parte vero consideremus, in cujus Domini nos servitutem peccando addiximus. Diaboli, principis tenebrarum, regis superbiæ, patris mendacii. Vide, inquit apud Jeremiam (e), quia malum & amarum est, reliquisse Dominum Deum tuum, & non esse timorem mei apud te, dicit Dominus Deus exercituum. Considerabimus denique, quod cum debitores nos ipsi constituerimus per peccatum, tamen solvere per nos non possumus. Ideoque ad fontem misericordiæ confugiendum Divinæ: & per Passionem Domini nostri veniam petendam ex imo corde dicendo: Dimitte nobis debita nostra.

*Sicut & nos dimittimus debitoribus nostris.*

**V**ide hanc conditionem, Pastor, ut odia & similitudines dissuadeas plebi tuæ. Nam veniam a Deo petimus: injuriam igitur nostram proximo condonemus. Si (f) dimiseritis (ait Dominus) hominibus peccata eorum, dimittet & vobis Pater vester cælestis delicta vestra. Si autem non dimiseritis hominibus: quid aliud sequitur, nisi nec Pater vester dimittet vobis peccata vestra? Tanti officii necessitatem demonstravit Christus Salvator noster in illa, quæ est apud Lucam (g) luculentissima parabola hominis regis, & duorum servorum, quibuscum Rex ponere rationem voluit: horum enim unus, cui omnia remiserat Rex, alterum suffocabat, exigendo decem denarios sibi debitos. Ob quam inhumanitatem in carcerem missus fuit. Quin etiam proprium hoc legis est Evangelicæ mandatum, ut diligamus inimicos nostros: ut si esurierit inimicus tuus, cibus illum: si sitierit, potes. Et apud Marcum: Cum itabitis ad orandum, dimittite, si quid habetis adversus aliquem, ut & Pater vester, qui in cælis est, dimittat vobis peccata vestra. Et Matth. 5. Si offers munus tuum ad altare, & recordatus fueris, quia frater tuus habet aliquid adversum te: relinque ibi munus tuum. Observent hæc, oro, Ministri omnes altaris. Caveant, obsecro, dissidiis assueti, ne absque reconciliatione cum fratre

(c) Amos 8.

(f) Matth. 6.

(d) Eccle. 7. Prov. 20. 1. Joan. 1.

(g) Luc. 18.

(e) Jerem. 2.

fratre accedant ad altare. In Concilio siquidem Carthagenensi oblationes dissidentium fratrum neque in Sacrario, neque in Gazophylacio recipiendas esse, statutum fuit. Quanto ergo minus ferendum, quod ad Sacrificium tremendum Christi venias, vix dum effervescente rixa? In dilectione proximi, similitudo efflorescit Divinæ bonitatis. Ille enim morte Filii sui unigeniti, reconciliari sibi genus hominum elegit. Sic Matth. 5. hortatur Dominus: Orate pro persecutibus & calumniantibus vos, ut sitis Filii Patris vestri, qui in cælis est.

*Et ne nos inducas in tentationem.*

**U**ltima Orationis Dominicæ pars deprecationem continet periculorum, & malorum omnium, pænæ & culpæ, quibus vita undique nostra obsidetur. Nam qui omnibus momentis in periculo tentationis versamur, æquum est, ut assidue oremus: *Ne nos inducas in tentationem.* Si namque vel momentum unum a Dei præsidio, & Angelorum ejus deferamur, mox incidemus in manus diaboli, qui tanquam leo rugiens, circuit, quærens, quem devoret. Infirmitas nostra magna est: caro infirma: infirma memoria: infirma intelligentia: infirma voluntas: infirmi sensus: infirmæ vires omnes, quas natura dedit. Quare necesse est cadere in tentationibus multis hominem destitutum ope Divina. Exemplo nobis sunt Apostoli. Et Petrus ipse. Omnes ante tentationem animosi: sed Christi corporali præsentia destituti in illius passione, ad minimam tentationem defecere.

Non docet autem hic petere, ne tentemur (b): sed ne in tentationem inducamur. Nam tentatio sæpe utilis est. Beatus vir, inquit (i), qui suffert tentationem, quoniam cum probatus fuerit, accipiet coronam vitæ, quam repromisit Deus diligentibus se. Videndum ergo hoc loco est, quid tentatio sit, & quid induci in tentationem. Tentare (ut est in usu) est periculum facere de aliquo, ut ab eo exprimamus aliquid, quod scire cupimus. Sed hic tentandi modus non cadit in Deum: quia omnia nuda sunt & aperta oculis ejus. Est aliud tentandi genus, cum de longe progrediendo, aliud quid quæritur oblique, ut aliud obtineatur. Idque potest & in bonam & in malam partem fieri. Ut in bonam quidem, quando tentatur virtus alicujus ad hoc, ut illa cognita & præmio donata, exemplo esse possit aliis, unde laudem consequantur & virtus, & virtutis remunerator. Hoc modo Deus ten-

tat aliquando. Ut Deut. 13. Tentat vos Dominus vester, ut palam fiat, utrum diligatis eum, an non. Hoc modo tentavit Dominus (k) Abraham, quando filium immolare jussit. Sed in malam partem tentantur homines, cum ad peccatum vel exitium aliquod inde impelluntur. Quod proprium diaboli est: (l) Deus autem intentator malorum est. Tentat autem diabolus multis modis. Nunc intrinsecus animi affectus & passionibus accendens: nunc extrinsecus, res ad easdem animi commotiones idoneas subministrans, jucundas vel molestas. Uti nunc per malos homines, nunc per res alias naturales occasiones suggerens cadendi. Quales sunt hæretici, falsi doctores, inimici, lenones, meretrices, sicarii, latrones, parasiti, adulatores, delatores, cupediarii, proxenetae, & alii id genus. Induci autem dicimur in tentationem (id est, tentationi succumbere) duobus modis. Primo, cum in id ruimus malum, in quod, tentando nos, aliquis impellit. Atque hoc quidem modo Deus neminem tentat. Secundo, cum is, qui impedire potest, ne succumbas, non impedit. Hoc modo Deus tentari sinit & bonos & malos: Sed sua gratia quosdam non deserit, alios interdum iusto judicio, sceleribus ipsorum id exigentibus) sibi ipsis relictos cadere permittit: ita ut peccatum pœna peccati dicatur. Tertio, inducere nos in tentationem dicitur Deus, quando beneficiis, quæ nobis ad salutem ille dedit, nos ad perniciem nostram abutimur, illo permittente: ut dotibus ingenii, bonis corporis, & fortunæ. Sic Exod. 47. Indurabo, inquit, cor Pharaonis. Esa. 6. Excæca cor populi hujus. Rom. 1. Tradidit illos in reprobum sensum: id est, permisit indurari, excæcari, tradi. Atque hæc quidem hætenus ex Catechismo & Doctoribus Scholasticis. Alia quædam in eodem Catechismo invenies, facientia ad exhortationem & consolationem infirmorum agonizantium, & in tentationibus quibuscunque.

*Sed libera nos a malo, Amen.*

**P**roest in hoc ultimo articulo Orationis Dominicæ, tanquam in Epilogo deprecatio fieri omnium malorum, quæ nobis accidere possunt. Quam etiam cum Christus Magister noster, doceat: eam habere semper debemus in ore, atque in mente, ubicunque mali quid imminet: sive ab aqua, sive ab igne, sive a fulgure, a grandine, bello, peste, fame, ab insidiis, a criminibus, ab inimicis, & aliis quibuscunque: a quibus omnibus liberare invocantes se, solet Deus omnipotens. Et inter alia magnæ consolationi

(b) Ex Catech. Rom.

(i) Jacob. 1.

(k) Gene. 22.

(l) Jacob. 1.

Tomus VIII. Concilior. German.

tioni sunt afflicti Psalmi Davidici, ut Psalm. 33. Benedicam Dominum in omni tempore. Et Psalm. 106. Confiteantur Domino omnes misericordiae ejus. In hoc Psalmo graphice enarrat David, quomodo liberare soleat suos Deus a periculis & tribulationibus quibuscumque: veluti ab errore viae, a carcere, ab infirmitate, naufragio, exilio, sterilitate terrae, a tyrannide malorum Principum. In quibus (inquit) clamaverunt ad Dominum cum tribularentur: & de necessitatibus eorum liberavit eos. Confiteantur Domino misericordiae ejus, & mirabilia ejus filiis hominum. Cæterum, quia in principio hujus expositionis diximus commorationem fieri in hoc membro: unamque esse deprecationem in tota hac diastole, Ne nos inducas in tentationem, sed libera nos a malo: ut hujus sententiae causas intelligas, scito vocem Græcam esse ἀπὸ τοῦ πονηροῦ. Gallice: *Du mauvais & méchant*. Ideo & magnus Basilii, & Chrysostomus, & Augustinus, & alii de diabolo interpretantur & intelligunt: de malo, inquam, dæmone, qui nobis usque insidiatur & male cupit. Quare cum generaliter dixerimus, Ne inducas nos in tentationem: (quia maximæ quæque tentationes nobis fiunt a dæmone) non immerito certe in eadem sententia & oratione perseverantes addimus, Sed libera nos a malo, hoc est, a malo diabolo, malorumque authore, Amen. De voce (Amen) supra in Symbolo signi Crucis. Atque hæc quidem satis hoc loco: plura de oratione & devotione suo loco.

#### STATUTUM I.

**S**Tatuimus igitur, & ordinamus, ut Pastores doceant diligenter, & exponant frequenter Orationem hanc Dominicam: hortantes omnes (a maximo usque ad minimum) ut teneant eam memoriter. Et sciant veram esse orandi formam traditam nobis a Christo. Alioqui pro Catholicis non esse habendos, qui quotidie eam non dixerint.

#### DE SALUTATIONE ANGELICA.

**M**ARIA Virgo DEI Genitrix, Mater Christi Beatissima, compellari solet spes nostra: non sane, ut cui salutis nostræ meritum adscribamus, (hic enim solus est Christus JESUS, qui salvum facit populum suum a peccatis eorum) sed qui peccatorum

conscientia deterriti non audemus aliquando sine intercessore Deum interpellare: ejus gratia confisi, qua apud filium valet, non veremur petere veniam delictorum: sperantes nos ejus precibus & meritis juvari, & apud filium admitti: ut quam sibi Matrem electam, præ omnibus ille dilexit, & magnificavit.

Gratissima igitur Salutatione Gabrielis Archangeli frequenter veteri more Ecclesiæ Virginem Sacratissimam [gratias agentes Deo de Filii sui Incarnatione] alloquamur: *Ave Maria, gratia plena, Dominus tecum. Benedicta tu in mulieribus. Ex verbis Elizabeth adjicientes, Et benedictus fructus ventris tui. Et ex Ecclesiæ ritu, JESUS CHRISTUS, Amen.*

Et quamvis hac Salutatione sufficienter petitur, quicquid impetrare cupimus ab eo, qui vota nostra & cogitationes novit: tamen addi solet, non absque pietate, *Sancta Maria, Dei Genitrix Virgo, ora pro nobis peccatoribus, Amen.* Nec raro experti sunt Christiani Divinum auxilium contra hostes fidei per hanc orationem, quam fideles genibus flexis dicere consueverunt ad signum campanulæ sub noctem.

Hac oratione fidem profiteamur Incarnationis Filii Dei: in spem erigimur veniæ peccatorum nostrorum per Christum: & laudes Mariæ magnificantes, in amorem Divinæ Trinitatis Patris, & Filii, & Spiritus Sancti accendimur. Contra hæreticos etiam confitemur ejus virginitatem & partum, & gratiam, qua valet apud Deum Patrem: ut merito a nobis invocari soleat.

#### STATUTUM I.

**S**Tatuimus igitur, & ordinamus, atque præcipimus, ut Curati doceant & hortentur suos Parochianos dicere Salutationem hanc Angelicam singulis diebus cum aliis suis orationibus: maxime vero, quoties audierint dari signum per campanulam hora vespertina.

#### L'ORAISON DOMINICALE, exposée en vulgaire.

**P**ater noster.) *Nostre Pere. O Dieu tout puissant, je t'appelle Pere, ainsi que nostre Seigneur JESUS Christ m'a enseigné de prier: non seulement pour recognoistre vraiment, que Tu es nostre Createur, qui nous as engén-*



engendre, & fâict de rien: mais encore à celle fin, que mes prieres soyent accompagnées de foy, d'esperance, & charité. Car si Tu es nostre Pere, ne refusas ce que scis estre pour le proufit de tes enfans. Et je l'espere ainsi. Nous serions aussi meschans enfans, & desproveux de sens, si ne t'aimions de bon cœur, estant nostre Pere. Et si n'avions l'amitié à nostre prochain, que bons enfans d'un mesme Pere doivent avoir entre eux: comme oserions nous Te prier avec assurance? Tu nous rejeterois, comme enfans supposez, ne Te ressemblans en rien. Doncques puis que Tu es nostre Pere, & nous sommes Tes enfans, nous Te supplions, au nom de JEsus Cbrist ton filz naturel & nostre frere par adoption: ne refuse point nostre priere.

Qui es in coelis.) Qui es és cieux. Je leve mes yeux, & mes mains au ciel: & là je contemple Ta majesté: bien que par essence, puissance, & presence Tu sois par tout. Car je ne voy en ce monde lieu plus noble, ne creature plus admirable, que le ciel. Duquel outre sa resplendeur & mouvemens admirables, toutes choses corporelles nous voyons estre gouvernées cy bas.

Sanctificetur Nomen tuum.) Ton nom soit sanctifié. Pour les biens, que recevons de Ta grace & bonté, je Te rends grâces: desirant, que Ton nom & bonneur soyent célébrés par tous les hommes. Pour certain Tu es saint, & la fontaine de toute sainteté: mais les hommes n'entendans la verité, souvent Te blasphement & deshonorent. Ceux qui sont deputez pour le Divin service, ne font rien moins: nostre meschante vie Te fâict estre mesprisé, & Ta doctrine en est calumninée entre les infideles, superstitieux, heretiques & mescreans. Fais doncques, que Ton nom soit honoré & beny par tout, avec la cognoissance que Ton Esprit Saint donnera de Ta majesté & gloire.

Adveniat regnum tuum.) Ton royaume advienne. Quand je pense aux miseres de ce monde, & d'autre costé je considere la beatitude & royaume du ciel, que nous as préparé, & promis: je suis ravi du desir de le voir. Commence doncques par Ta grace, regir & gouverner nos cœurs en ce monde, nous delivrant de la tyrannie du peché, à celle fin que puissions bien tost parvenir au royaume de la vie éternelle: & r'amene au troupeau de Ton filz JEsus Cbrist tous ceux, que Tu as préparé à iceluy.

Fiat voluntas tua.) Ta volonté soit faicte. Je T'offre mon ame, mon corps, tous les biens, que Tu m'as donné: les remettant tous à Ta disposition & bonne volonté. Enseigne moy ce que Tu veux, que je face.

Sicut in cœlo & in terra.) Ainsi en la terre comme au Ciel. Retournant à contempler la gloire de Ton royaume celeste, & considerant l'honneur, l'obeissance, la charité, que les Anges & esprits bienheureux Te portent: & d'autre part les pechez & desobeissance, que je cognoy au monde: O que je voudrois, que Tu fusses obey par tout l'univers, comme Tu es au Ciel.

Panem nostrum quotidianum da nobis hodie.) Donne nous aujourd'huy nostre pain quotidian. Or je Te prie & demande, non pas pour moy seulement, mais pour mon prochain aussi: ny Te demande chose par curiosité, ou volupté superflue, mais ce qui nous est nécessaire au jour la journée, c'est nostre nourriture simplement, & ce qu'il faut pour nostre vie corporelle & debile: tant qu'il Te plaict, que nous arrestions en ce mortel monde. Et comme nostre ame aussi a besoin d'estre souvent repue spirituellement: donne luy souvent Ton pain mystique. Donne nous, dis je, la grace de recevoir souvent le Sacrement de ton Corps precieux, duquel nous prenons l'estre supernaturel. Oste nous aussi la faim de ta parole, par bonne & saine doctrine: qui est une autre nourriture de nostre esprit.

Et dimitte nobis debita nostra.) Et remets nous nos debtes. Avec repentences, & douleurs, je m'accuse de tant d'offenses, & pechez, que j'ay commis contre Toy & Ton bonneur. Je declare mon ingratitude. Je n'ay rendu le fruit des grâces & biens, que Tu m'as faict. Je confesse mon debt. Je suis tenu justement à reparation condigne. Mais, belas! Je n'ay moyen d'y satisfaire, ny personne de nous. Pardonne nous: use envers nous de misericorde.

Sicut & nos dimittimus debitoribus nostris.) Comme nous les remettons à nos debtors. Nous pardonnons à Tous ceux, qui pareillement nous sont obligez, & les quittons de leur offense pour l'amour de Toy: Nous le Te promettons. Nous ne serons cruels exacteurs, ny oppresseurs de pauvres: car leurs clameurs montent au ciel. Nous ne chercherons point nostre vengeance: car Ton benoit Filz JEsus, nous a dict plusieurs fois, que

si ne pardonnons à autrui, Tu ne nous pardonneras point. Et a commandé, que nous ayissions, non seulement nos amis, mais aussi nos ennemis : & qu'en ce faisant, nous monstrierions, que sommes Tes vrais enfans. Je pense bien souvent en cela : & propose me de concilier à mon frere Chrestien : mesmes avant que faire aucune offrande ou oraison, si je m'apperois, qu'il ait juste querelle contre moy.

Et ne nos inducas in tentationem.)

Et ne nous induy point en tentation. Nostre vie est environnée de tant de dangers, [je dis tant spirituels, que corporels] que si un seul moment Tu nous delaisse, incontinent trespacherons en peché, ou en quelque malheur. Le diable veille nuit & jour, pour nous surprendre : Nostre chair est foible : les vanitez du monde se presentent à tout instant : qui ne tombera doncques ? Qui se pourra garder de peché, si de Ta grace ne nous soustiens ? Ne permets donc, que les mauvaises tentations nous surmontent : ne nous laisse succomber en icelles, ou tomber aux perils d'icelles.

Sed libera nos a malo.) Mais delivre nous du mal. En somme, mon Dieu, je Te prie contregarde de tous dangers & inconveniens nostre ame & nostre corps, nostre bonne renommée, & tous les biens que de Ta liberalité nous as donné. Et pource que par la malice du diable (nostre capital ennemy) toutes sortes d'escaudales nous sont proposez : nous Te supplions, delivre nous des mains de ce meschant, cauteleux & mauvais Satan.

Amen.) Amen. Je le dis de bon cœur, & en verité : & t'en requiers, par ton benoit fils JEsus Christ, (lequel est la mesme & infailible verité) exauce ma priere : qu'il soit ainsi, comme nous en avons la confidence.

## LA SALUTATION ANGELIQUE.

**A**VE MARIA.) Salut & joye Marie. Je Te salue volentiers & honore, des mesmes parolles que l'Ange Gabriel usa, quand envoyé de la part de la Sainte Trinité, t'annonça l'incarnation du Fils de Dieu, le Verbe eternal. Car je tiens que ni'adressant à toy, je ne scaurois dire mot plus agreable, que celui, par lequel toute joye, & tout bien, est venu au monde.

Gratia plena.) Pleine de grace. Non sans cause l'Ange Te salva par un tel mot.

Car Tu es pleine de grace, & ließe : Tu es toute belle & gratieuse. Il n'y a faute en toy aucune, ne peché. Et pource Dieu justement t'a choisie pour son espouse, & a voulu que son Fils unique fust conçu en toy. Le Saint Esprit t'a sanctifié, & si remplie de ses dons de grace, que je ne pense trouver creature, qui soit plus agreable à Dieu, que toy. Et si JEsus Christ, auteur de ta grace & justice, est en ton saint ventre : qui m'empeschera de t'appeller pleine de grace ?

Dominus tecum.) Le Seigneur avec toy. Nostre Seigneur est par grace en ton ame : & il sera corporellement en ton corps sanctifié : & t'assistera en toutes choses. Pource je Te salue de rebef en ceste façon, (accoustumée aux Patriarches & Propbetes) comme desirant que Dieu soit toujours avec toy, ainsi qu'il est.

Benedicta tu in mulieribus.) Tu es benite entre les femmes. Tu es bien beureuse sur tout le genre féminin. Et bien beureuse Te diront toutes les generations.

Et benedictus fructus ventris tui.) Et beny le fruit de ton ventre. Jusques icy j'ay recité les parolles de l'Ange. Maintenant j'usuray de celles, que Te dict ta parente, Sainte Elizabeth. Tu es benite, & benit est le fruit de ton ventre, qui est JEsus Christ nostre Sauveur. Je le benys, glorifie, & adore, comme mon vray Dieu.

Sancta MARIA Mater DEI.) Sainte Marie mere de Dieu. Je t'invoque Marie mere de Dieu. Combien que ton fils selon la Divine nature n'a point de mere : (seulement son Pere celeste) toutesfois, pour l'union de la nature humaine avec la Divine [estant Dieu & homme] nay de ta personne, il t'a meritoirement honore de ce nom de mere de Dieu.

Ora pro nobis peccatoribus.) Prie pour nous pecheurs. Par ceste tant magnifique Salutation nous pouvons demander à Dieu toutes choses : [qui entend sans parolles aussi bien, que par parolles, nostre intention & desir] neanmoins selon l'ancienne coustume & loable de l'Eglise, je te requiers aussi, que Tu pries pour nous pauvres & miserables pecheurs. Car comme bonteux de nostre infamie, n'osons nous approcher de Dieu, craignans son ire : mais toy qui luy es si agreable, soys nostre advocate. Propose nostre demande devant sa majesté, Amen.

DE

## DE PRÆCEPTIS DECA- LOGI.

**S**icut diximus fidem augeri & stabiliri frequenti meditatione Symboli, & spem Oratione Dominica: sic etiam charitatem servare cupientes, assidue meditari nos oportet in Præceptis Decalogi. Finis enim legis est charitas. (m)

Hæc decem Præcepta Dei in veteri testamento data fuerunt Moyfi & populo Israelitico in monte Sinai, in duabus illis tabulis lapideis, de quibus in Exodo & Deuteron. [n] In prima tabula numerant Sancti Doctores tria præcepta, quibus docemur, quales nos præstare debemus erga Deum: in secunda vero septem, quales erga proximum. Quamquam Hebræi ultimum ex duobus faciunt, & primum separant in duo: videlicet, Ego sum Dominus, est præfatio. Diliges Dominum Deum tuum ex toto corde, &c. & Non adorabis Deum alienum, primum præceptum. Secundum, Non facies tibi sculptile, ut adores, &c. Sic numerant quatuor in prima tabula, & sex in secunda. De vi autem, & utilitate, atque necessitate hujus legis, lege Catech. Romanum. Sed tu in lege Mosaica scito, præcepta quædam fuisse moralia, quæ naturalis ratio nos docet, & naturæ leges appellamus: qualia sunt Decem hæc. Alia erant caeremonialia, de ritu colendi Dei: quæ antiquata sunt. Alia judicialia, quæ in judiciis observabant Judæi.

### PRIMÆ TABULÆ PRÆCEPTA.

#### PRIMUM.

**E**go sum Dominus DEUS tuus. Non habebis Deos alienos coram me. Non facies tibi sculptile, neque similitudinem, &c. non adorabis ea, id est, ut adores ea.

#### II.

Non assumes nomen Dei tui in vanum.

#### III.

Memento, ut diem Sabbati sanctifices.

### SECUNDÆ TABULÆ PRÆCEPTA.

#### IV.

Honora Patrem tuum & Matrem tuam, ut sis longævus super terram.

#### V.

Non occides.

#### VI.

Non mœchaberis.

#### VII.

Non furtum facies.

#### VIII.

Non loqueris contra proximum tuum falsum testimonium.

#### IX.

Non concupisces uxorem proximi tui.

#### X.

Non domum, non agrum, non servum, non ancillam, non bovem, non asinum, & universa, quæ illius sunt.

**P**rimum Præceptum declaravit Christus: Dominum Deum tuum adorabis, & illi soli servies. Et rursus, Spiritus est Deus, & eos, qui adorant eum, in spiritu & veritate oportet adorare. Apostolus quoque: Scimus, quia nihil est idolum in mundo, & quod nullus est Deus, nisi unus. Prohibetur hoc præcepto omnis idololatria, & superstitio Deorum vanorum.

Item prohibentur observationes omnes superstitiosæ, & artes magicæ, atque divinatoriæ: ut ariolorum, aruspicum, & quorundam astrologorum, qui juxta vias gentium a signis cæli metuunt. In his siquidem omnibus superstitiosi relicto Deo, (quem tota mente colere deberent per Fidem, Spem, & Charitatem,) Fidem adhibent auctori, patrique mendacii diabolo, cui in Baptismo renunciarunt.

Item exigitur a nobis hoc præcepto, ut nullam prorsus creaturam, quantumvis excellentem, pro Deo habeamus: solum autem unum, verum, æternum, immensumque Deum credamus, & confiteamur: cui summus honor, & singularis ille cultus patriæ tribuitur: hoc est, in quem credimus, in quem speramus, quem supra omnia (ut summum bonum) diligimus.

Hunc ergo supra omnia colamus, invocemus, adoremus, amemus, & reveremur: unum quidem in substantia, sed trinum in personis, Patrem, Filium, & Spiritum Sanctum. Sanctos tamen colimus veneratione dulci: & invocamus absque peccato idololatriæ: veluti amicos electos Christi, qui nostra sclicitate gaudent, & pro nobis orant: ut sunt Angeli, & Sanctorum animæ in cælo. Nam (ut tradit D. Augustinus) populus Christianus memorias Martyrum religiosæ

(m) 1. Timo. 1.

(n) Exod. 20. Deuter. 5. Exod. 32. 34. Deuter. 9. 10.



gioſa ſolemnitate concelebrat, & ad excitandam imitationem, & ut meritis eorum confocietur, atque orationibus adjuvetur. Non ergo ethnicorum more adoramus Sanctos, tamquam Deos: quamquam etiam Dii appellantur aliquando. Sed unum ſcimus Sanctum Sanctorum Deum, Omnipotentem, qui in Sanctis ſuis vult honorari: qui per Sanctos, & propter ipſos multa largitur mortalibus, & parit ſæpe immerentibus, ut patet de Abraham, Isaac, Jacob, David, Hieremia: quos etiam deſunctos profuiſſe vivis legimus. Quare non immerito Doctores Eccleſiæ, Sanctos appellant Patronos, Interceſſores, Suffragatores, & ſimilibus epithetis. Dicitur enim Apocalypſ. 8. Et aſcendit fumus incenſorum de orationibus Sanctorum. & c. 5. Habentes citharas & phialas aureas plenas odoramentorum, quæ ſunt orationes Sanctorum, quod declaravit Raphael, Tob. 12. Cum orabas, inquit, orationem tuam ego offerebam Domino. Invocavit quoque Angelos Jacob, Genef. 48. & Genef. 32.

Corpora quoque Sanctorum, quæ Tempſa fuerunt Spiritus Sancti, & Reliquias alias, deoſculamur, & veneratione proſequimur: non aliter, quam ex amoris abundantia ſolet ſponſi abſentis nova nupta veſtes, & res alias ab eo miſſas, vel relictas: quod & ſponſo gratiſſimum eſſe ſolet, quando tam multa cognoscit amoris ſigna. Sic & Deus multos exaudivit ad ſepulchra Martyrum ſe invocantes: multa edidit miracula in gratiam Sanctorum: ita ut dæmones expellantur, infirmi ſanentur, corpora Sanctorum tacta vel venerata (ut D. Nazianzenus loquitur) eadem præſent, quæ & ſanctæ animæ.

Uſum quoque imaginum Apoſtolica traditione acceptum inſtar librorum laicis & idiotis eſſe Sancti Patres tradiderunt, ubi Redemptionis noſtræ myſteria, & Sanctorum facta leguntur: ita ut quæ ſenſibus non percipimus, pia mente veneremur: non ipſos quidem lapides, aut ligna (nullo ſenſu prædita) ſed prototypum ipſum, & id, quod per imaginem repræſentatur. Si quærat aliquis, ubi invenitur adorandam eſſe imaginem Chriſti? reſponde: ubi dicitur, Adorent eum omnes Angeli ejus. Siquidem imago & prototypum, unum ſunt: non utique natura, ſed relatione & ordine, id eſt, habitu. Nam licet æquivoce dicantur nomina rerum etque imaginum: nomina tamen ſunt eadem. Et in imagine Regis, Regem quaſi intuemur. Et Deum verum in crucifixi forma adoramus. Jam enim qui Dei nullam ſimilitudinem facere poteramus, poſtquam Deus homo factus eſt Jeſus Chriſtus: nihil prohibet quo-

minus Chriſti imaginem nunc faciamus, & adoremus. Audito nomine Jeſu, omne genu ſectitur: [quia Chriſto debetur ille honos] ita viſa ejus effigie, & alio paſſionis ejus pariter certo monumento, humiliamur. Audito nomine Cæſaris, caput aperimus: cur non item conſpecta Virginis glorioſæ imagine? Si Philoſophis præcellentibus & ducebus fortiffimis, viris & mulieribus claris, tabulæ atque ſtatuz ponuntur: quid minus meruere Martyres & Virgines ſacræ, ac Confeſſores alii, quorum exemplis Eccleſia Chriſti ad hunc uſque diem decoratur?

Non proſecto ſimpliciter prohibentur hoc loco imagines: ſed imagines gentilium Deorum, ut colantur. Non tulit Deus præceptum contra præceptum, nec in eo fuit unquam, eſt, & non: quod certe feciſſet, ſi omnino atque ſimpliciter, rerum imagines prohibuiſſet. Siquidem, Num. 21. ſerpentem æneum in deſerto fieri juiſſi, quem Moyses exaltavit in figuram Chriſti, ut Joannes docet ipſius Chriſti teſtimonio. Et Exod. 25. Duo Cherubin fieri mandat, de medio eorum reſponſa daturus. Salomon Dei juiſſu bovis & aquilæ, & hominis, & Cherubin ſimulachra conſtravit: Si idololatriæ cauſa eſſent omnes imagines, putas mandaturum DEUM?

## STATUTUM I.

**S**Tatuimus, & ordinamus, ut Curati ſingulis diebus Dominicis declarant excommunicatos omnes ariolos, ſortilegos, divinos & magicos: qui artes a dæmone inventas exercent. Item omnes hæreticos & ſchismaticos, & fautores eorum. Et in crimine hæreſis occultæ, ſolis Episcopis eſſe reſervatam abſolutionem, non etiam Vicariis.

## II.

Curati doceant populum, ſolum Deum adorandum adoratione latræ: Sanctos vero dulcia colendos, qui non ſunt ipſi Deus, ſed ſervi Dei, & creaturæ ejus: quorum interceſſione & ſuffragiis juvari poſſumus, & poſtulamus.

## III.

Imagines quoque doceant Curati & Paſtores non eſſe ſuperſtitioſe colendas: luminaria, thurificationes, genuflexiones, & ſimiles honores, qui exhibentur ipſis, in prototypum referendos

dos esse : sicut Sancta Generalis septima Synodus & Patres docuerunt.

## IV.

Inventas de novo Reliquias venerari non liceat, nisi a Sede Apostolica, atque Ordinaria approbatas. (o)

SECUNDUM PRÆCEPTUM  
DECALOGI,

*Non assumes Nomen Dei tui in  
vanum.*

**H**Oc secundum Præceptum declaravit Salvator, quando præcepit non jurare omnino, neque per cælum, neque per terram, neque per Hierusalem, neque per caput nostrum: sed tantum ut sit sermo noster, est est, non non. Nam quod his abundantius est, a malo est. Quæ Christi verba faciunt Judæorum falsam opinionem fuisse, ut putarent, quocunque modo bonum esse jurare, etiam in familiari sermone, dummodo id citra mendacium fieret. Sed fallebantur. Nam præceptum Dei est: Non assumes nomen Dei in vanum: id est, temere, sine consilio, vel contra veritatem. Magna enim irrogatur injuria Deo, quem vanitatis tuæ testem profers: putans eum vel latere, quæ dicis, quæ inscitæ nota est: vel probare, quæ est improbitatis.

Itaque quatuor modis contra hoc præceptum peccatur. Primo quando nomen blasphematur per execrationes Dei, Mariæ Virginis, & Sanctorum: ut in gravi dolore, & in ludo fieri videmus, cum injuria maxima Divinitatis: cum tamen in Oratione Dominica, ut sanctificetur nomen Dei postulemus: & Sacræ Literæ adeo ab hoc scelere abhorrendum innuant, ut ne verbum blasphemare quidem aliquando ponant, sed pro eo contrarium, nempe benedicere, ut Job. 1. & 2. 3. Reg. 21.

Item quando quis jurat per diabolum, vel per Mahometem, vel per idolum, aut Deum gentium: blasphemiam committit: quia cultum patriæ Deo debitum, per juramentum impendit creaturis. [p] Secundo peccatur, quando cum juramento falsum aliquid affirmamus, vel negamus. Item peccant in hoc præceptum, qui temere absque consideratione jurant, & se devovent diabolo. De quibus Sapiens: Non assuescat os tuum jurationi. (q) Vir enim multum jurans replebi-

tur iniquitate, & a domo ejus non recedet plaga.

Peccant & in hoc præceptum, qui vota Deo facta, aut fidem proximo datam, non servant: quia nomen Dei in vanum acceperunt. Displicet Deo infidelis & stulta promissio, inquit idem Sapiens. (r)

Peccant & qui Sacram Scripturam, in qua nomen Dei celebratur, ad sensum prophanum vel hæreticum detorquent. Non pollues nomen Dei tui. Levit. 19.

Non damnatur tamen jusjurandum omnino: maxime si habeat illas condiciones, quas requirit Propheta Hieremias, nempe ut fiat in judicio, justitia, & veritate, omnis enim controversiæ finis ad confirmationem & juramentum: & Psal. 62. Laudabuntur omnes, qui jurant in eo. Est jusjurandum (teste (s) Ciccone) affirmatio religiosa. Quod autem affirmare, quasi Deo teste, promiseris, id tenendum est. De dispensatione juramenti infra.

TERTIUM PRÆCEPTUM  
DECALOGI,

*Memento, ut diem Sabbati san-  
ctifices.*

**P**ER Sabbatum intelligimus in lege Evangelica, non feriam septimam, & ultimam hebdomadis, [ut in lege Mosaica, quod fuit cærimoniale] sed diem Dominicam, in qua Christus resurrexit: quæ prima erat feria post Sabbatum, & primum Sabbatum, vel prima Sabbati appellata. In hoc debet animus noster curis hujus mundi vacuus, ad cultum Dei interiorem & exteriorem se transferre: illic quiescere: Divina meditari, & Sacra tractare: Missam audire & Concionem: Eucharistiam devote sumere, & Deum per poenitentiam & orationem demereri. Nam quomodo observari debeat hoc præceptum, & quomodo in ipsum peccetur, voces ipsæ declarant. Nam Sabbatum quietem significat Hebræis, ac cessationem: & sanctificare est sancte, religiose, devote, pieque celebrare, atque adimplere.

Peccatur ergo contra hoc præceptum duobus modis: primo per quodcunque opus servile absque necessitate factum: puta opus mechanicum, & per negotium sæculare, tam in foro judiciali, quam mercatorum. (t)

Deinde peccatur, quando in diebus Festis, & ad pietatem institutis [in quibus totum debe-

(o) Innoc. III. de Reliq. & Ven.

(q) Eccles. 23.

(r) Eccles. 5.

(p) S. Thom. 2. 2. q. 13. & q. 89.

(s) 3. Offic.

(t) Levit. 23.

debemus ad animæ salutem attendere] luxuriæ, ebrietati, ludo, maledictis, rapinis, cædibus, fraudibus & dolis, aliisque vitiis & peccatis indulgetur. Nam per hæc non sanctificatur Sabbatum, sed potius polluitur. (u)

Cum sit vero nomen Sabbati etiam generale, per ipsum nos intelligimus quoque Festa omnia, ab Ecclesia instituta & præcepta, tam ad honorem Sanctorum, quam ad memoriam nostræ Redemptionis: in quibus populus in Ecclesiam convenire debet ad audiendum Verbum Dei, psallendum & sacrificandum Deo, orandum, & opera charitatis exercendum omnis generis. Multum enim facit ad charitatem augendam in populo ipsa festi celebritas, & fidelium cætus: ubi se mutuo vident, saluant, alloquuntur, una Deum orant, & quasi communi voce compellant: Coimus [inquit Tertullianus] in cætum & aggregationem, ut ad Deum quasi manu facta præcationibus ambiamus. Sanctorum festa celebrare hortatur Apostolus Heb. 13. Mementote Præpositorum vestrorum, qui vobis loquuti sunt Verbum Dei: quorum intuentes exitum, conversationis imitemini fidem. Sed de Festis & computo Ecclesiæ, infra in 4. Præcepto Ecclesiæ.

#### QUARTUM PRÆCEPTUM DECALOGI,

*Honora Patrem tuum & Matrem tuam, ut sis longævus super terram, quam Dominus Deus tuus dabit tibi.*

**H**oc primum est præceptum secundæ tabulæ, in qua ponuntur ea, quæ ad charitatem proximi pertinent, & ad tuendam humanam societatem. Nam superiora eo spectant, ut verum Deo cultum exhibeamus, interiorem & exteriorem, privatim & publice: sequentia, quo modo nos erga homines habere debeamus.

Declarat autem Christus, quis est hic honor, quem parentibus debemus. Non sane verbo tenus honorare, revereri, & obedire jubemur: sed curam etiam habere eorum, & eos alere. Exemplo quoque suo docuit, quando subditus fuit eis: ut testatur Lucas Evangelista. (x)

Hoc præcepto commendatur nobis pietas, & observantia erga parentes nostros, & omnes eos, quibus debemus obedientiam: quales sunt Prælati Ecclesiæ, &

omnes, quos vocamus Patres Spirituales: Superiores quoque temporales, quacunque in dignitate constituti sunt: & qui privatim nostri curam gerunt, ut tutores, pedagogos, maritum uxor.

Hoc solum præceptum habet adnexam repromissionem. Nam & e contrario qui parentibus suis non obedierunt, infelices multos habemus in Sacris Literis. Ut Cham, qui patrem suum derisit, maledictus fuit in semine suo. Ruben quoque maledictus. Filii Heli, qui patris monita noluerunt audire, mox bello interfecti sunt. Absalon, qui patrem est persecutus, male periit. Filii duo Sennacherib parricidæ, non pervenerunt ad regnum Patris. Benedictiones autem, quas consequuntur, qui pietatem erga parentes colunt, lege Ecclesi. 3. cap. Et maledictiones quoque, Levit. 20. Deut. 27. & Proverb. 19. 20. 28.

Ad amandum parentes nostros inducunt hæc. Quod ab iis vita nobis data est: iis Deus usus est, uti nobis animum, mentemque impertiret: ab iis ad Sacramenta deducti sumus & ad religionem: ad humanum cultum & civilem instituti: ad morum integritatem eruditi. Item quod tanto nos ipsi amore prosequuti sint & affectu, ut nullum laborem, nullum periculum, nullam molestiam pro nobis detrectaverint. Et sicut filii debent obedire parentibus per omnia [ut B. Paulus docet] sic etiam parentes debent erga filios paternam charitatem ostendere, bona eorum procurare, spiritualia & corporalia: nec eos ad iracundiam nimium provocare, & maritus suam uxorem, ut carnem suam diligere tenetur. (y)

Patet ex his, quomodo peccetur contra hoc quartum præceptum: nimirum non subministrando necessaria, non obediendo, non honorando, non amando: & contra offendendo, exacerbando, mærore afficiendo (verbo & facto) occasionem dando peccandi.

#### QUINTUM PRÆCEPTUM DECALOGI,

*Non occides.*

**D**eclaravit hujus præcepti vim Salvator noster, quando non solum homicidium, sed convitium & iram, & odium omne, & vindictæ cupiditatem prohibuit. Qui odit fratrem suum, homicida est, inquit B. Joannes (z): & Paulus: Nulli malum pro malo reddentes. (a) Item, Non vos defendentes, charissimi: sed date locum iræ. Scriptum

(u) De Feriis. c. 1. & c. fin. S. Antonin. 2. part. tit. 9. c. 7.

(y) Coloss. 3. Ephes. 6. 1. Cor. 12.

(x) Luc. 2.

(z) Joan. 3.

(a) Rom. 13.



tum est enim : Mihi vindictam, & ego retribuam, dicit Dominus.

Ex quo facile inferuntur duo : unum, quod per hoc præceptum non adimitur gladius Principi sæculari, & Magistratui : qui non odio, vel ira, propriam injuriam ulciscitur, sed Reipublicæ studet & tranquillitati communi. Magistratus enim, vel Princeps, noxios occidendo, maxime observat præceptum hoc: Non occides; quia supplicii nocentium turior fit innocentium vita. Psalm. 110. In matutino interficiebam omnes peccatores terræ. Similiter & milites in bello, qui hostibus reipub. & pacis perturbatoribus vitam adimunt, præcepto obtemperant.

Alterum est, quod omnis læsio corporalis sibi, vel proximo illata, privata auctoritate, & ex odio vel tædio privato [sive id fiat opere, sive consilio] peccatum est contra legem Dei.

Est peccatum homicidii unum ex iis quatuor, quæ dicuntur clamare in cælum. Dicuntur autem clamantia in cælum, quia præ aliis fere semper manifeste hæc ulciscitur Deus, de cælo mittens vindictam, claudibus, bellis, vastationibus, everfionibus urbium ac regionum: & viri sanguinum ferre, non dimidiant dies suos.

Homicidam voluntarium, qui sæculi leges evasisset, circa vitæ finem tantum volebant Patres ad communionem admitti: (b) & eousque poenitentiam agere, quoad poenitentia crimen diluisset. Lex autem civilis mori jubet. I. Qui cædem. ad leg. Juliam, de sicar.

### STATUTUM I.

**C**uratus ideo non absolvat in confessione sine nostra licentia eum, qui hominem occiderit: nec etiam cum nostra licentia, nisi is omne damnum restituerit tiliis, vel hæredibus occisi, aut velit restituere. Eodem modo tenetur ad restitutionem, qui vulneravit, licet non occiderit. Damnum a Judice æstimatur, vel a bono viro.

### SEXTUM PRÆCEPTUM DECALOGI,

#### *Non mæchaberis.*

**H**oc præcepto non solum prohibentur crassæ illæ, ac sædæ libidinum species

(quas supra enumeravimus) fornicatio, adulterium, stuprum, raptus, incestus, & (quod vel dictu horrendum est) peccatum contra naturam: sed etiam omnis carnalis immunditia. Eph. 5. Et cogitationes, aspectus, tactus, sermo, habitus, incessus: & quicquid incitare potest ad libidinem. Fornicatio (inquit Apostolus) & omnis immunditia nec nominetur in vobis, sicut decet Sanctos: aut turpitudine, aut stultiloquium, aut scurrilitas. Et B. Petrus ad conjugatos: Viri similiter cohabitantes secundum scientiam, quasi infirmiori vasculo muliebri impartientes honorem.

Quam grave peccatum sit scortatio, ex eo patere potest, quod Apostolus cum fornicariis Christianis prohibet cibum sumere, aut consuetudinem habere, tanquam excommunicatis. Facit amor carnalis hominem apostatare a Deo, & instar pecudis, sensui obedire, rationis judicio obfesso a passione. Exempla habes in Davide & Salomone præter alios. Adulterium vero leges Civiles (c) capite censuerunt plectendum. Jam quid censendum de illo peccato est, quod non solum rectæ rationi & justitiæ repugnat, sed etiam ordinem naturæ pervertit? Plura quære in titulo de Peccatis.

### STATUTUM I.

**C**onfitemem de enormi peccato, & nefando, remittat Curatus ad Poenitentiarium nostrum.

### SEPTIMUM PRÆCEPTUM DECALOGI,

#### *Non furtum facies.*

**E**x definitione furti forte intelligi possit omnis hujus præcepti vis & materia. Definitor: contrectatio rei alienæ, invito Domino: addunt quidam, dolosa, vel fraudulenta, ad acquirendum Dominium, seu proprietatem, vel possessionem, vel usum. [d]

Sed uno verbo complexus est Christus, qua maxime ratione hoc præceptum adimplere queamus. Omnia quæcunque vultis, ut faciant vobis homines, & vos facite illis. Et Apostolus, Qui furabatur, jam non furetur: magis autem laboret operando manibus suis, quod bonum est: ut habeat, unde tribuat necessitatem patienti. Quantum ergo abest a lege Christi & Dei, qui non tantum non elargitur sua, sicut tenetur, sed rapit aliena? Pro-

(b) Conc. Ancyran. & Agathen. & Turon.

(c) L. Patri. ad leg. Juli. de adult.

(d) L. 1. ff. de fur. in instit. de oblig. quæ ex delict. nasc.

Prohibetur per hoc præceptum omnis rei alienæ contrectatio, & usurpatio: sicut per furtum, rapinam, usuras, lucra injusta, dolum malum: & per quosvis contractus, quibus Christiana charitas læditur, & proximus fraude circumvenitur: quocumque titulo pallietur contractus.

Et tenetur ad restitutionem quicumque rem alienam ita retinet. Quia non remittitur peccatum, nisi restituatur ablatum. (e) Propter quod periculosum est hoc peccatum, ubi semel commissum est: quia difficile potest Confessor extorquere restitutionem a pœnitente, postquam is in suos usus converterit rem alienam. Quamquam non semper oportet eandem restituere, modo satisfiat læso. Contingit enim sæpenumero, rem non esse amplius in potestate ipsius, qui cepit: sæpe etiam, ut læsus condonet, & remittat, aut acceptum ferat.

Contingit autem, ad restitutionem nos teneri, quando rem alienam injuria ceperimus, & quando debemus ex contractu, ex lege, vel statuto, ex sententia Judicis, ex testamento, vel ultima voluntate: ex delicto, vel quasi delicto. Quæ omnia prudentiæ Pastoris relinquenda sunt, ne omnia persequamur. Plura quære in titulo de Peccatis avaritiæ.

#### OCTAVUM PRÆCEPTUM DECALOGI,

*Non loqueris contra proximum  
tuum falsum testimonium.*

**P**rohibuit Deus, ne proximum offendamus in corpore, per quintum mandatum: ne in personis necessariis, per sextum: ne in bonis & opibus, per septimum: hic, ne in fama etiam, prohibet. Quamquam per præceptum hoc proprius intelligendum est prohiberi damnum omne, quod proximo inferitur, præstando falso testimonio in judicio, vel omitendo præstari: sed ex consequenti intellige omne mendacium, detractio- nem, susurrationem, derisionem, contumeliam, judicium temerarium. Lingua modicum quidem membrum est, sed magna exaltat. Ecce quantus ignis (f) quam magnam silvam incendit. Non erit criminatorem, neque susurro in populo, ait Dominus. De assentatione Psalm. 140. Oleum peccatoris non impinguet caput meum. Detrahere autem, vel detrahentem audire, utrum damnabilius sit, non facile constat. Et tenetur, qui sic nocuerit proximo, ad restitutionem: sive in bonis nocuerit, sive in fa-

ma. Et magis etiam ad restitutionem famæ, quam pecuniæ: quia melius nomen bonum, quam divitiæ multæ. Contra præceptum hoc etiam peccat, qui de seipso detrahit, cum sit sibi quisque proximus, & Ecclesiam iste lædit, cujus membra sumus omnes. Quare fugiendum est omne genus mendacii, cujus pater diabolus est. Perdes omnes, inquit, qui loquuntur mendacium. Nec se excusare quisquam putet, quod prodesse velit per mendacium: quia hæc prudentia carnis mors est. Primum, inquit Dominus, quærite Rēgnum Dei, & justitiam ejus: & hæc omnia adjicientur vobis. Ideo nunquam mentiendum: multo minus cum damno proximi.

#### STATUTUM I.

**D**ebet ergo, qui famæ alterius detraxerit per mendacium, reparare, confitendo de suo mendacio. Quin etiam si verum dixerit, debet tamen retractare aliquo modo, ne proximum infamet. Secus est in denuntiatione, vel accusatione juridicali: in qua ratio habetur utilitatis publicæ & animarum: non solum privati commodi, aut compendii alicujus.

#### NONUM PRÆCEPTUM DECALOGI,

*Non concupisces domum proximi tui.*

#### DECIMUM PRÆCEPTUM DECALOGI,

*Non desiderabis uxorem ejus.*

**D**ifferentia horum duorum præceptorum in hoc consistit: quod nonum utilitatis & commodorum desiderium reprimit: decimum voluptatis. Quare ex iis, quæ bona dicuntur a Philosophis [ut honestum, utile, delectabile,] solum honestum licet appetere semper: reliqua non item. Non utique quod mala sit omnis concupiscentia: siquidem cibum & potum appetimus naturaliter: & cum frigemus, calefieri: nec in his peccamus, nisi ea concupiscamus, quæ spiritui & rationi repugnent, vel legi Divinæ.

Duo hæc præcepta non solum manum cohibendam docent, sed etiam animum. Quod proprium legis Divinæ est. Humanæ enim leges opus tantum externum prohibent, & pœnam tantum corporalem infligunt: sed Divi-

(e) Aug. Epistol. ad Macedo. c. 14. q. 6. c. Si res. c. Sæpe. de rest. spol.

(f) Jacob. 3.

Divinæ, æternæ mortis reatum. Quia radix & semen mali operis est concupiscentia, ut Salvator inquit. De corde exeunt cogitationes malæ, homicidia, adulteria, fornicationes, furta, falsa testimonia, blasphemiae.

In sexto mandato prohibetur actus exterior carnis: hic interior concupiscentia. Qui enim viderit mulierem ad concupiscendum eam, [g] jam mæchatus est in corde suo. In septimo prohibetur rei alienæ usurpatio, & detentio; hic usurpandæ atque habendæ cupiditas: quoniam radix omnium malorum est cupiditas, & philargyria: quam quidam appetentes erraverunt a fide, [h] & inseruerunt se doloribus multis.

Quapropter omnes actiones, tendentes vel ad adulterium, vel ad furtum, his duobus præceptis damnantur, etiam si finem non fuerint consequutæ: ut sollicitatio pudicæ mulieris, [vel alteri jam desponsatæ] lenocinium, saltationes, & momi propter ea tantum facti. Possent enim recreationis honestæ causa sine peccato mortali fieri choreæ, & lusus alii. Item cibi & pharmaca ad explendam Venerem sumpta: & alia similia, quæ ex fine rationem accipiunt boni & mali. Idem esto iudicium de actionibus, a cupiditate rei alienæ procedentibus. Quare non sine iusta causa prohibita est Clericis alea. Raro enim contingit, ut expers fiat avaritiæ: præter alia mala, quæ secum defert. Prohibitæ eisdem etiam artes sordidæ omnes, ut perfectioris doctrinæ exemplum præbeant.

Omnia secundæ tabulæ præcepta uno verbo complectitur Salvator (i): Omnia quæcunque vultis, ut faciant vobis homines, hæc & vos facite illis. Quod tanquam legi naturali consonum, Tobias [k] jam antea dixerat: Quod tibi ab alio fieri non vis, alteri ne feceris.

## STATUTUM I.

**S**Tatuimus, & ordinamus, ut singulis diebus Dominicis Curati populo enarrent decem hæc Præcepta Dei, lingua vernacula, ut ab omnibus intelligi queant.

### II.

Exponant etiam, quando res postulaverit, pœnam simul & præmium, quæ Dominus proposuit, cum hæc præcepta daret. Dixit (l) enim: Ego

sum Dominus Deus tuus zelotes, visitans iniquitatem Patrum in tertiam & quartam generationem eorum, qui oderunt me: & faciens misericordiam in millia iis, qui diligunt me, & custodiunt præcepta mea. Cujus loci declarationem in eodem Catechismo Romano invenient.

## DE PRÆCEPTIS ECCLESIAE.

**I**N virtute obedientiæ, quam ex Christi præcepto (m) debemus Prælati nostris, [Nam qui vos audit, me audit, qui vos spernit, me spernit, inquit.] & ex consuetudinis Ecclesiasticæ observantia [Perambulabat enim Paulus Syriam & Ciliciam, confirmans Ecclesias, præcipiens custodire præcepta Apostolorum & Seniorum] Christiani omnes tenentur adimplere præcepta Ecclesiæ: ea, quæ ab Apostolis tradita, tanquam per manus accepimus a Majoribus nostris: & ea, quæ pro tempore videntur, iudicio Prælatorum necessaria, vel utilia populo Christiano. Sed dixerit aliquis, Apostolus contra docet: Pretio empti estis: nolite fieri servi hominum. Sunt hæc hominum traditiones contra libertatem Evangelii. Responde ad hæc & similia, libertate nos donatos a Christo: non carnali, sed a peccato. Alioqui nec præcepta Decalogi nos servare oporteret: nec servos Dominis suis obedire. Hoc est velamen malitiæ, habere libertatem, ut B. Petrus loquitur: Nolite fieri servi hominum. Non more humano servos esse, jubet Apostolus, qui metu pœnæ obediunt: sed servos spirituales Dei: iustitiæ ex charitate serviētes. Sic enim Christus dilexit nos, ut proprio sanguine redemerit. (n)

Sunt autem quinque proposita omnibus fidelibus generaliter, quæ vulgo appellantur quinque Mandata Ecclesiæ. Unum est de audienda Missa diebus Festis: Alterum de observatione Festorum: Tertium de observandis Jeuniis: Quartum de Confitendo semel saltem in anno: Quintum de sumenda Communione, saltem in Paschate. Addunt de solvendis Decimis: atque etiam de non celebrandis Nuptiis tempore prohibito. Sed illa quinque, ut magis decantata sunt, ita inculcanda magis.

*Brevis*

(g) Matth. 5.

(h) 1. Tim. 6.

(i) Matth. 7.

(k) Tob. 4.

(l) Exod. 20.

(m) Matth. 10.

Luc. 10. Joan. 13.

(n) 1. Corin. 7. 1. Petr. 3. Ephes. 6.



*Brevis expositio Myſteriorum  
Miſſæ.*

**P**Ræceptum Eccleſiæ primum ponit hic de audienda Miſſa integre omnibus diebus Dominicis, & Feſtis: nec ſine magna ratione: quoniam cum ſint iſti dies cultui Divino dedicati, in iſtis nos debemus orationi vacare, & contemplationi: pœnitentiæ quoque, operibusque pietatis exerceri. Sed ut ſimplices aliquam huius rei notitiam aſſequantur, pauca hic ex myſteriis Miſſæ recitabimus, ſecundum ritum Eccleſiæ Occidentalis, noſtræ communem. Nam Græci a nobis differunt: & a Græcis Æthiopes: & Mediolani alium ſervant ordinem atque ritum cæremoniarum a noſtro: & Toleti, in officio Muthzarabe (o), ab utroque multum diſſimilem invenias: in accidentalibus quidem, ſed non in eſſentialibus. Per nomen autem Miſſæ, quod novum non eſt in Eccleſia, [ut patet ex Concil. Carthag. 4.] intelligimus oblationem, & ſacrificium Corporis & Sanguinis Domini, in myſterium factum: ſive nomen ſit Hebraicum Miſſah, quod ſignificat munus & oblationem, & elevationem, Deut. cap. 16., ſive Latinum. Et poſſet quidem eſſe verbale, Miſſa, pro miſſio, ſive dimiſſio: ſicut olim remiſſa, & remiſſio, dicebant Patres. Nam Apuleius morem etiam fuiſſe ait idolorum cultoribus, ut peracta re divina, converſus ad plebem Sacerdos diceret: *λαῶς ἀφ᾽ ἑνός*, id eſt, populis miſſio. Sic ſentit Iſidorus. Poſſetque eſſe participium, ut recitat Magiſt. ſentent. 4. diſt. 13. vel quod ex veteri ritu Eccleſiæ facta Communionem, Diaconus alta voce pronuncians munera illa Sacra a Sacerdote miſſa eſſe jam ad Deum, vel ad eos omnes, qui erant communicaturi, dimitteret populum in pace. Nam Juſtinus in 2. Apolog. dari per Diaconos Euchariftiam dicit iis, qui aderant: ad abſentes autem per eosdem deferri. Græci vocant liturgiam: ex cap. 13. Act. Apoſt. ubi

legimus: *λειτουργούντων δὲ αὐτῶν τῷ κυρίῳ*. id eſt, Miniſtrantibus autem illis Domino & jejulantibus, dixit Spiritus Sanctus, ſegregate, &c. Itaque liturgia diceretur miniſterium publicum, Divinus cultus, rei Sacræ publica adminiſtratio, ex C. 13. & 15. ad Rom. Hebr. 8. Dionyſius vocat hierurgiam. Ignatius Thyſiam, id eſt, Sacrificium. Idem Ignatius, & Eufebius, & Juſtinianus, ſanctam Proſcomidem, id eſt, Oblationem. Malach. 1. legitur: Ab ortu Solis, &c. & Pſalmo 39. Sacrificium & oblationem, pro nomine, oblatio. Hebræa habent *miuha*: quod dicunt ſignificare oblationem factam ex farina. Irenæus autem, & Juſtinus, locum Malachiæ de Miſſa abſque dubio intelligunt. Ignatius meminit huius Sacrificii in ep. ad Eph. Dionyſius in multis locis. Cypr. lib. 1. ep. 2. & 9. Concil. Nicæn. c. 14. Iren. li. 4. Juſt. contra Appia. Auguſt. De ejus ordine multa in epittola ad Paulinum. Paulus promiſit ſe tradiendum. 1. Corint. 11. Clemens lib. 2. & plenius lib. Conſt. Apoſtol.

Quandoquidem Miſſa eſt quædam re-præſentatio, & expreſſio Paſſionis Chriſti: ideo contemplanda in primis indumenta, quibus ornatus Sacerdos prodit ad celebrandum. Amictus, velamen ſignificat, quo faciem JESU venerandam operiebant Judæi, illudentes ei in domo Caiaphæ, & dicentes: Prophetiza nobis, quis eſt, qui te percuſſit. Alba veſtis illa eſt, cum qua remiſit Herodes illum, tanquam innocentem & ſtultum: Cingulum, vincula ſignificat: Manipulus, catenas: Stola (ſeu orarium) Crucem, quam humeris ſuſtulit. Planeta, ſeu caſula, veſtem purpuream, & Mitra, ſeu thiara, coronam ſpincam. Uſos autem fuiſſe in primitiva Eccleſia Sacerdotes myſticis indumentis, docent Petalon Joannis, Infulæ Terruliani, Colobion Jacobi, & Stephani, & Euphromii, Stolæ Macharii.

Progreſſus ad gremium Altaris Sacerdos, Confeſſionem generalem facit omnium ſuo-

(o) Hoc nomine illud intelligitur officium, quod Mozarabicum, ſeu Moſarabicum paſſim appellatur. Hanc illi denominationem tunc inditam credunt, quando Mauri Hiſpanias invaſerunt. Cum enim eo tempore Chriſtiani, qui ſedes ſuas noluerunt deferere in locis, quos Mauri occupaverant, mixti Arabibus viverent, ſua illis tributa pendentes, Mixtarabes, iteinque Muzarabes & Moſarabes dici cœpere, ut quidam volunt.

Reiſſa illud officium Gothicum fuit, quo utebantur Chriſtiani, Arabum dominio ſubjecti. Unde & inſcribi ſolet *Officium Gothicum, ſive mixtum ſecundum Regulam B. Iſidori*.

Vide *Gloſſar. du Cange Tom. II. & Diſſertationem P. Emmanuelis de Azevedo e Soc. JESU, de antiquis Eccleſiarum Occidentis ritibus &c.* quam refert P. Franciſc. Anton. Zaccarias ejusd. Societ. iſ. edita a ſe Claudii Fleury *Diſciplina Populi Dei in novo Teſtamento*. Tom. I.

Cujusmodi autem fuerit Mozarabicum illud officium, docent præ cæteris *Alvarus Gomezius L. 2. de rebus geſt. Cardinal. Ximenii, & Cardin. Bona L. 1. verum Liturgicarum C. 11.*

suorum peccatorum: & eodem modo populus suorum quoque peccatorum: postulantque hi, ut Sacerdos pro se oret, & omnes Sancti, Sacerdos vero absolutionem in Christi merito impendit omnibus.

Chorus & populus cantant Introitum, significantes voces & prædictiones Prophetarum de adventu Christi. Ideo hæc fere ex Propheta aliquo sumitur cum Psalmo Davidis, & versiculo illo: *Gloria Patri, & Filio, & Spiritui Sancto.* Ex quo facile credas, olim Psalmos integros cantari solitos, dum populus conveniret ad officium hoc. Hic interea incensum adoleri, testis est Dionysius.

Deinde populus advenienti jam Christo, alta voce supplicat, Græco sermone utens: *Kyrie eleison, Christe eleison*, triplicando: *Domine miserere, Christe miserere.*

Et tanquam exauditus, gratias agens alta voce cantare incipit: *Gloria in excelsis Deo*, quod tamen non ante cantat Chorus, quam a Sacerdote excitatus, & quasi admonitus de Christi adventu: ab Angelis namque Pastores certiores facti fuerunt de nato Christo.

Hoc Hymno dicto, Sacerdos orationem unam vel plures facit ad Deum Patrem per Jesum Christum Dominum nostrum: salutato prius populo, *Dominus vobiscum.* Cui populus responder simili resalutatione: *Et cum spiritu tuo.* Et hortatur populum, *Oremus.* Finita oratione responder populus dictione Hebraica, *Amen.* Et dicuntur istæ orationes, Collectæ: propterea, quod sub istis fiebant collectæ pecuniæ, & eleemosynæ, quæ dabantur a fidelibus, diebus Dominicis in usus pauperum Ministrorum Ecclesiæ, sicut disposuit Apostolus Paulus. Nam panis & vini oblatio ad mysteria, in Offertorio fieri debet, ubi aliud offerri prohibitum est Can. 28. Sextæ Synodi.

Per lectionem Epistolæ, doctrinam accipimus disciplinæ Christianæ, & pietatis, tam ex veteri aliquando Testamento, quam ex novo, quam populus auscultare debet attente, & memoriæ mandare.

Cantatur (veluti acclamatio quædam a populo) Responsorium cum versu, & lingua Hebraica, *Alleluja*, (id est, *Laudate Dominum*) vel Tractus in diebus jejunii: quod meditationem habet Divinæ Legis: & dicitur Graduale, a cantus genere.

Post cantus istos Diaconus legit Evangelium alta & intelligibili voce: in quo continetur historia vitæ, mortis, & resurrectionis Christi.

Recitato Evangelio, incipit Sacerdos Symbolum Fidei, & populus prosequitur

Fidei confessionem, *Credo in unum Deum, &c.*

Hactenus omnia ad præparandum populum in devotione geruntur: quæ vero sequuntur, ad Sacrificium maxime spectant, quamquam certe de Sacrificio esse omnia dicuntur, quæ circa illud fiunt. Est autem Missa Sacrificium, non solum Sacramentum. Incruentum quidem: quia in commemorationem fit illius Sacrificii, quod semel factum est in ara Crucis, cum sanguinis effusione. Dominus enim cum Corpus suum daret discipulis, dixit: *Hoc est Corpus meum, quod pro vobis tradetur: hoc facite in meam commemorationem.* Itaque Corpus Domini, quod accipiebant tunc Apostoli, prius fuit pro peccatis oblatum, & deinde pro alimento Spirituali, & Sacramento manducatum. Nos ergo facientes, quod jussit Dominus, idem offerimus prius, & deinde manducamus: quod est proprium Sacrificii. In Sacrificio enim primo offertur hostia: deinde mactatur, & intingitur: postea distribuitur iis, qui participes esse debent Sacrificii. Christus semel mactatus est pro nobis, & sanguine tinctus. Nos mactationis ejus memoriam in mysterio hoc tremendo celebrantes, hostiam eandem offerimus: & in actione tanquam mactamus, incruentam tamen, sicut & incruentam manducamus ac bibimus. Qui ergo sine oblatione & sacrificio manducant panem, & bibunt vinum in suis cœnis, illi non sane faciunt, quod Dominus instituit: quia non vere sacrificant, nec offerunt corpus ejus Deo Patri. Adde, quod facere, sacrificare est, tam in Literis Sacris, quam profanis.

Rursus ergo Sacerdos salutat populum, & ad orandum hortatur, *Dominus vobiscum, Oremus.*

Et cantantibus Ministris chori Tractum ex veteri vel novo testamento (quod dicitur Offertorium) populus offert Deo, & præsentat Sacerdoti (vel ejus Ministro) oblationem suam panis & vini, vel (quod jam fieri nunc solet) pecuniæ, pro cujusque devotione.

Facta oblatione, & paratis super altare pane, & calice, Sacerdos manus abluit, ad tanti mysterii se præparans celebrationem, & offert: & deinde conversus ad populum postulat, *Orate pro me, ut meum ac vestrum Sacrificium acceptum fiat apud Dominum:* Et magno cum silentio omnium, secrete orat. Orationis secretæ sine silentium rumpit, *Per omnia sæcula sæculorum:* & respondet populus, *Amen:* ea voce vota sua cum orationibus Sacerdotis jungi desiderans. Hic tertio salutat ad excitandum populum ad attentionem: & postulat, ut animum elevent ad

ad Deum, & gratias agant. Populo igitur annuente, jam quasi Spiritu Dei plenus Sacerdos, elatior fit, & congratulando alta voce manibus & oculis in cœlum sublati incipit: *Vere dignum & justum est, æquum & salutare.*

Præfationem istam excipit statim populus, vel chorus pro populo ( Angelorum primum referens cœlestes cantus ) *Sanctus, Sanctus, Sanctus Dominus Deus Sabaoth*, id est, Deus exercituum: deinde puerorum Israelitarum, qui Salvatori ingredienti urbem Hierusalem acclamabant: *Osanna in excelsis.* Quæ vox erat ovationis & triumphi, apud Hebræos.

Hinc iterum silente populo, Sacerdos mysteria peragit Consecrationis, quæ vocatur actio: omnia agens & dicens cum timore, voce submissa, tanquam secrete: ne ab omnibus intelligatur. Sunt enim hæc mysteria tremenda: nec revelanda omnibus: non paganis infidelibus, non excommunicatis, non catechumenis, non energumenis: sed fidelibus tantum, rite in Christo initiatis: ut docuit olim magnus ille Dionysius Arcopagita. Prius tamen Sacerdos commendat Deo Prælatos, & Principes, & specialiter, quos sibi videtur: & generaliter omnes assistentes, & omnes fideles Christianos, *quorum fides Deo cognita est, & nota devotio*: pro quibus sacrificium offert, & qui offerunt communicando, & memoriam venerando Beatissimæ Virginis Mariæ, & omnium Sanctorum. Post consecrationem quoque pro Defunctis orat, qui sunt participes mortis Christi, quæ in hoc Sacramento annuntiatur. Pro se etiam orat Sacerdos, & pro omnibus peccatoribus famulis Dei, in misericordia Dei sperantibus, memoriam repetens Apostolorum quorundam, & Martyrum: omnia tamen per Christum, & cum Christo, & in Christo. Quare ut oratio a Deo exaudiatur, formam orandi a Domino præscriptam, alta voce, silentium denuo rumpens, cum fine orationis secretioris adjungit: *Pater noster*, quam populus absolvit, sequutus tacite præcuntem Sacerdotem.

Crucem super Sacramentum ante & post consecrationem, multis modis facit: in mysterio Trinitatis, Deitatis, & Humanitatis, Incarnationis, Nativitatis, Passionis, Resurrectionis, & Ascensionis Domini. Et quia in actione hac potissimum mactationis mysteria repræsentantur: ideo fiunt Cruces in memoriam plagarum quinque, & rursus quinque effusionum sanguinis. Tollit in altum Sacramentum: & ut Patri hostiam Filii sui offerat, & ut sub speciebus ipsis, tam ipse Sacerdos, quam alii omnes assistentes, Chri-

stum Deum & hominem, Salvatorem nostrum, adorent. Idcirco Sacerdos oculos in cœlum levat: & populus pectora sua tundendo, pro peccatis suis offerri hostiam profitetur, accusans culpam propriam, & veniam poscens ab eo, quem tamquam in Cruce sublatum adorat. Morem vero hunc ostendendi assistentibus Sacramenti, a primitiva Ecclesia acceptum esse, constat ex Dionysio Arcopagita.

Post hæc hostiam in duas partes dividit, quia per mortem separata est anima a corpore. Quia vero in Christo Divinitati fuit semper juncta humanitas, ideo iterum tribus partibus factis ex hostia [ quibus significantur Divinitas, anima, & corpus ] unam in calicem mittit, ut panis vino intingatur. Fuit namque mos olim, pueris & infirmis dare intinctum panem consecratum: nunc duplici videtur fieri mysterio. Nam & Corpus significare potest, quod in Cruce sanguine proprio & aqua tinctum fuit, & animam, quæ descendit ad inferos. Sergius quoque Papa aliam causam assignat. Hoc faciendo ( tanquam Patres in limbo positos ) populum salutat Sacerdos, triplici Cruce benedicens: *Pax Domini sit semper vobiscum.* Populus quoque sub persona Patrum, qui erant in limbo, Christum alloquitur: *Agnus Dei, qui tollis peccata mundi, miserere nobis.*

Hoc loco Sacerdos Communionem sumit, & alii, qui parati sunt, & volunt Sacrificii participes fieri Sacramentaliter: idque cum silentio.

Communione facta, Sacerdos tertium silentium rumpendo, excitat populum ad gratias agendum Deo, per orationem, quæ dicitur Postcommunio. Quibus actis, rursus salutat & dimittit populum.

Itaque in Missa, & Sacramentum fit, & Sacrificium. Sacrificium vocat Ignatius, uti diximus. Et Apostolus mensam, altare: Græce thytiasterium. Habemus altare, de quo, &c. Heb. 2. Et in fragmentis Nicœni Synodi poni dicitur in Sacra hac mensa Agnum Dei sine mactatione mactatum a Sacerdotibus. Immolatur ergo agnus, ut in Sacrificio: & Sacra peraguntur in mysterio, id est, Sacramento. Alterum Dominicæ cœnæ symbolum est: alterum mortis. Qui cœnæ tantum figuram faciunt, illi non faciunt, quod Dominus jussit. Quia si cœnam tantum annunciant, non tamen mortem Domini. At mortis memoriam fieri jussit. Hanc facit Ecclesia. Siquidem hostiæ illius immentæ virtutis, quam Christus in Cruce obtulit, symbola signaque fuerunt Sacrificia veteris testamenti: Novi autem, Sacrificium hoc incruentum, quod non modo Eucharisticum est, sed

&



& Propitiatorium: id est, quo Deum nobis propitium, placatumque reddimus. Idemque Sacrificium pro gratiarum actione fit, & pro peccatorum remissione. Omnis enim Sacerdos constituitur, ut offerat dona & Sacrificia pro peccatis, inquit Apost. Heb. 5. Nec tantum pro vivis (docet Chrys.) sed etiam pro defunctis. Hom. 69. ad pop. Antioch. & ex verbis Lucæ 22. patere potest. Dicit enim, quod accepto pane gratias egit, & fregit, deditque eis, dicens *Hoc est Corpus meum, quod pro vobis datur*: (id est, offertur, Eph. 5. *Qui tradidit semetipsum pro nobis oblationem & hostiam*) & sequitur: *Hoc facite in meam commemorationem*, (nempe quod ego facio: scilicet gratias agite, frangite, offerre & sumite] pro vobis. Si ergo facere iussit pro nobis, certe non tantum vivis, sed etiam defunctis fidelibus. Nam pro omnibus mortuus est Christus, & vivis & defunctis.

Hæc summatim decerpta ex aliis multis & inenarrabilibus, hujus tremendi Sacrificii mysteriis, vobis Curatis exposita volumus, ne prorsus ignari tanti muneris, nihil vos magni agere posthac arbitremini, & negligenter Sacra faciatis: cum sit nihil hic sine maxima ratione ordinatum, ad repræsentandam Passionem Christi, vel dispositionem Corporis ejus mystici, cui applicatur: vel ad reverentiam & devotionem tanti Sacramenti. Quanquam enim pauca sunt de essentia ejus a Christo tradita, & multa ante & post Consecrationem, a Patribus & Apostolis addita ad instructionem populi, & excitandam devotionem assistentium: omnia tamen cum reverentia, quam maxima possumus, & timore agenda censeo. Reliqua quære in Sacramento Eucharistiæ. Nunc hortabuntur suos Curati, ut Sacrificio huic tremendo reverenter assistant, meditantes aliquid vel de vita Christi, vel de peccatis propriis, vel de gloria cælesti, de Sanctorum victoriis, malorum pœnis, & aliis similibus rebus devotis.

### STATUTUM I.

**O**ver reverentiam tanti Mysteriorum amoris jubemus subsellia mulierum a Presbyterio & a Choro, si qua inveniantur in Ecclesiis, hoc est, juxta Altare majus, vel intra cancellos Chori.

### II.

Expectent, si fieri potest, benedictionem Presbyteri, ne Ecclesiæ ordinem perturbent: (p) non enim interfuisse Mysteriis videtur, qui antequam dimittatur, recessit. Nec spirituales Communionem recepit, qui Communionem Sacramentalem Sacerdotis non expectavit.

### SECUNDUM ET TERTIUM PRÆCEPTUM ECCLESIAE.

**S**acerdoti proprio annis saltem singulis peccata tua confiteor. Et Sacrosanctam Eucharistiam, ad minimum semel in anno, circa festum Paschæ sumito. (q)

**E**cclēsia eos, qui in Paschate, Pentecoste, & Natali Domini, non communicassent, ne inter Catholicos quidem habuit aliquando (r): sed nunc indulgentior (quando charitas refrixit) sufficere arbitrata est, modo semel in anno omnes utriusque sexus, usum rationis habentes, peccata sua Parocho, aut ex illius permissione, alii idoneo Sacerdoti, confiteantur: datam & acceptam poenitentiam adimpleant: & ad minimum in Paschate Sacramentum Eucharistiæ sumant: nisi forsan ex consilio, ob aliquam causam rationabilem, aliquantisper ab hujusmodi sumptione abstinendum putaverint.

### STATUTUM I.

**H**æc negligentem, dum vivit, ab Ecclesiæ communione, & mortuum Ecclesiastica sepultura arcendum esse, statuimus.

### QUARTUM PRÆCEPTUM ECCLESIAE,

#### De Festis, & Computo Ecclesiastico

**D**E quarto Præcepto Ecclesiæ, quo tenentur omnes fideles, etiam Divina lege, Festa colere, dictum abunde est supra in tertio Præcepto Decalogi. Sed quam necessaria sit Sacerdoti cognitio dierum Festorum, & Calendarii, vel unum verbum docet in lege: *Memento*, (inquit) *ut diem Sabbati sanctifices*. Quasi velit: Meditare, idque frequenter, & cogita diligenter, antequam feriæ, quas

(p) Ex Concil. Ancyran. c. 2. & Apostolorum c. 9.

(q) Ex Conc. Later. c. 21. & de Poenit. & Remiss. c. Omnis utriusque sexus.

(r) Concil. Agath. Conc. Eliber. Conc. Turon. De cons. distin. 2.

quas observari oportet, veniant: ne per incuriam, aut oblivionem tuam, dies Divino cultui destinati, prætermittantur. Licet enim natura ipsa doceat, Deo aliquem aliquando cultum præstandum esse: quando autem, quibusve diebus præstandus sit, non præscripsit. Qui vero positi a Majoribus sunt, excidere solent. Quotus enim quisque est, qui non hic fallatur? quis non frequenter diem Jovis, pro die Mercurii accepit? aut alium pro alio? Quod si hac in re Sacerdos aberreret: populus, qui aliud agit, a quo reduceretur? Hæc causa est, cur apud omnes gentes in more semper fuit, ut penes Sacerdotes tantum judicium relinqueretur Fastorum & nefastorum dierum: mensiumque, & annorum fines a Sacerdotibus ponerentur.

Hoc est, cur computum tradimus Ecclesiasticis. Regulas, inquam, Calendarii Ecclesiastici. (s) Nempe, ut docere populum sciant Festos, ac non Festos dies: & ad munera multa in victu quotidiano & societate hominum necessaria, admonere populum de temporum vicibus atque revolutione. Accedit ad hanc causam obligatio Horarum Canoniarum. Cujus etiam hæc vis est, atque utilitas: ut quamvis officium Ecclesiasticum tradi potuerit continuum, & uniforme: tamen ut memoriam coleremus assiduam dierum, & mensium, & temporum anni; sic ordinatum suis ubique locis est, ut & preces, & lectiones, & cantica, & cantus, & modi, pro diebus & horis distinguerentur, & varia subinde fierent: ut attentiores redderemur ad rem, quæ facile excidit, & elabitur. Si enim pensum idem, vel eodem modo, quotidie persolvere sufficeret, nulla varietate percepta: sane anni recurrentis dies sæpe oscitando prætercurreremus. Nunc varietas & obligatio, attentos reddunt.

Sed dicet forte aliquis: Paulus (t) dies prohibet observari, & menses, & tempora, & annos. Prohibet quidem superstitiose observare: ut stulti nunc multi Almanachillæ faciunt: qui atros dies, & infelices ducunt, Idibus aut Calendis proximos. Certe Ovidius ipse ab eventu dicit, non a natura, istos omen accepisse:

--- Illis nam Roma diebus

*Damna sub adverso tristia Marte tulit.*

Nos autem & dies & menses, Solisque & Lunæ motus, sic observamus, sicut a Deo creata sunt: ut essent in signa, & dies, & tempora, & annos.

Computus ergo, utcunque Latina vox, a computare usurpatum est, pro arte inve-

niendi Festa mobilia præcipue. Immobilia enim singulis anni diebus ascripta sunt in Calendario. Quamquam & horum quoque versus quidam traduntur, memoriæ causa: sed alii ab aliis. Et eorum ratio atque ars est, cum litera Dominicali investigare quoto die mensis, & qua feria hebdomadæ, veniat Festum: quoniam syllabæ numerant dies mensium, & invento die, litera dici seriam demonstrat hebdomadis. Vulgo fiunt versus, Cilio Janus Epi. &c.

In anno solari sunt 365. dies cum sex horis. Ideo quarto quoque anno addimus diem unum sexto Calendas Martii [id est, 24. Februarii] unde dictus bissextus: quia eo anno sub eadem litera F. numeramus bis, sexto Calendas Martii. Et fiunt tunc dies anni 366. Et mutatur litera Dominicalis. Datur enim eidem literæ F. feria etiam sequens.

Menses sunt duodecim: sed numerus dierum mensium non idem est. Siquidem Februarius habet dies 28. & in bissexto 29. Quatuor hi: Junius, Aprilis, September, & November 30. Reliqui, videlicet, Martius, Majus, Julius, Augustus, October, December habent 31. Quare sufficit meminisse illorum quatuor, hoc versu:

*Junius, Aprilis, Septem, Novemque trigenos.*

Diem incipiunt Astrologi a meridie: Babylonii ab ortu Solis: Hebræi ab occasu: nos in omnibus eum metimur a media nocte: sed Festivitates a primis Vesperis incipimus. Romani, & plerique Itali, horas numerant 24. ab occasu Solis ad alterum occasum.

Prima dies mensis dicitur a Latinis Calendæ, a calata (id est, vocata) plebe: Græcis est Neomenia, id est, Novilunium. Incipiebant enim pleræque nationes olim menses a prima Luna post conjunctionem. Plenilunium Græca voce appellarunt etiam Latini Idus: tanquam speciei, & formæ Lunæ perfectæ diem. Nonæ vero significant novum diem ante Plenilunium. Sed hæc nomenclatura, cum ad menses solares translata sit, a prima certe nominum ratione deflexit. Vocamusque Calendas, & Nonas, & Idus, non ad Lunæ formam vel motum, sed ad dierum numerum mensis cujusque solaris respicientes.

Primum mensem anni Romani faciunt Januarium: & vulgus hunc ordinem tenet. Sed Astrologi Martium, quia ab æquinoctio verno auspiciantur. Galli morem Ecclesiæ antiquum retinentes, a Paschate ordiuntur: & hætenus nos sequuti sumus in nostra Dioecesi.

(s) De regulis his monendus es Lector, ut observes, easdem traditas fuisse ante Gregorianam Calendarii emendationem. Synodus enim hæc celebrata est anno 1571: Calendarii vero emendatio Gregoriana secuta fuit anno 1582. Vide, quæ de anno & ejus partibus prænotata sunt in Parte Hiemali Breviarii Romani. (t) Gal. 4.

cesi. Sed ex hac differentia fit, ut non sit idem annus omnibus bissextilis: quoniam cum dies bissexti cadat inter Januarium & Februarium, idem iis, qui annum a Januario inchoant, bissextilis erit, aliis non bissextilis. Quod ignorare non oportet.

### Cyclus Literæ Dominicalis.

g	f	e	d	b	a	g	f	d	c	b	a	f	e	d
		c				e								
c	a	g	f	e	c	b	a	g	e	d	c	b		
b			d				f					a		

**L**iteræ Dominicales sunt septem A. b. c. d. e. f. g. quia septem sunt dies in hebdomada, hisce 7. literis notati. Septem Planeris dedicabant gentiles, Soli, Lunæ, Marti, Mercurio, Jovi, Veneri, & Saturno. Nos diem Dominicam appellamus primam, ab Apollolis edocti: & Romana dictione, 2. 3. 4. 5. 6. ferias: nimirum ut a peccatis, & operibus iniquis, feriemur semper. Septimam autem, Hebraice, Sabbathum. Sed singulis annis mutantur harum literarum dies. Nam quæ hoc anno notabat diem Dominicam, sequenti anno indicabit diem Lunæ. Ad inveniendum ergo, qua litera quovis anno dies Dominica signetur, circulus factus est ipsarum literarum, qui constat ex 28. partibus. In quibus literas sic collocamus, ut quarto quoque loco binæ reperiantur. Retrocedendo tamen. Nam & singulis annis retrocedunt hæ a suis feriis: propterea quod ultima Decembris eadem est, quæ prima Januarii, scilicet A. Facilitatis causa in 28. manus sinistrae articulis disposito, incipiendo in basi auricularis digiti, intrinsecus, ut in figura.

Manus interior.	13 f	14 e	15 d	16 c b	Manus exterior.			
	17 a	18 g	19 f	20 e d	12 g a	11 b	10 c	9 d
	21 c	22 b	23 a	24 g f	8 e f	7 g	6 a	5 b
	25 e	26 d	27 c	28 b a	4 c d	3 e	2 f	1 g

Ad investigandum autem quolibet anno quæ sit litera Dominicalis, ponamus finem hunc in anno Domini 1564. qui bissextilis fuit. In prima autem sede disponendo literas in manu: numero annorum Christi additis 4. aggregatum divide per 28. Quod reliquum est, ordinato per articulos manus, incipiendo nunc ab ultima sede: locum in-

Tomus VIII. Concilior. German.

ventum preme pollice ejusdem manus, donec literas disponendo (uti jussimus) ad eum articulum perveneris, quem premis pollice. Litera sic Dominicali inventa, diem alium quemlibet mensis noveris. Nam si sit ea (verbi gratia) A: cum prima mensis Januarii sit A: sequitur dati anni primam Januarii esse Dominicam: secundam Lunæ, &c. Sed expedit memoria tenere mensis cujusque primam literam. Hoc docebunt primæ literæ syllabarum harum, *Adam degebat eger cosia defert.*

### Cyclus Aurei numeri Decem-novenalis.

**A**lter Cyclus dicitur Aurei numeri, quod aureis literis, ob dignitatem, & usum investigandi Novilunia, distributus fuit in Calendario. Sic enim dispositus est, ut ubicunque anni currentis numerus est, illic Lunæ conjunctionem cum Sole fieri declarat. Quamquam certe jam, labentibus annis, antiqua ejus dispositio multum a veris conjunctionibus defecit. Ad investigandum autem hunc numerum divide numerum annorum Christi, (uno addito) per 19. quod reliquum est, numerum anni aureum notabit. Sufficietque nunc abjecisse 1500. diviso reliquo. Nam æquatum fuit cum 1500.

Quoniam igitur numerus iste sic in Calendario distributus est, ut cujuslibet anni signet Novilunia: fueritque præceptum a Domino in lege, ut 14. Luna primi mensis manducaretur Agnus Paschalis: nos Canonem Concilii Nicæni retinentes [qui æquinoctium in mense Martio jam declinante posuit] quærimus primo Aureum numerum anni currentis, in Martio: & ab eo loco numeramus 14.; sequenti quidem die Dominico Pascha nostrum esse deberet: sed ne cum Judæis impiis solennitatem hanc celebremus, si Luna 15. ceciderit in Dominica, transferimus celebritatem in proximam Dominicam sequentem.

Quamquam autem invento die Paschalis facile est reliqua mobilia Festa reperire: tamen Septuagesimam primum solemus investigare: venit enim statim in anni principio, nempe vel in Januario, vel in Febuario: unde & solennitates aliæ aperiuntur. Quæramus igitur, antequam finiatur annus Aureum numerum, qui proxime præcedit festum Epiphaniæ: (hic enim plerumque est anni præcedentis) ab eo numero dies 40. Dominica sequens hos dies 40. erit Septuagesima, nisi annus sit bissextilis. In bissexto enim oportet numerare 41. Dominicæ sequentes Septuagesimam sunt Sexagesima, Quinquagesima, Quadragesima, [quæ dicitur

H 2

Bra-



Brandonum] Dominica secunda Quadragesimæ, quæ Reminiscere: tertia, quæ Oculi: quarta, Lætare: quinta, quæ In passione: sexta, quæ In ramis Palmarum. Hinc Pascha. Et a Paschate prima Dominica Quasimodo, vel in Albis: secunda, Misericordia: tertia, Jubilate: quarta, Cantate: quinta, Vocem: & hæc quidem est ante Ascensionem. Sequitur enim Ascensio die Jovis. Postea Dominica intra octavas Ascensionis: deinde Pentecostes. Sequitur Festum Trinitatis, & intra octavas Trinitatis, feria quinta, Festum Eucharistiæ. Intra vero octavas Eucharistiæ, Dominica incidens, dicitur Dominica prima post Trinitatem: & alio etiam nomine [licet improprie] Dominica prima post octavas Eucharistiæ. Sed Dominica prima Adventus semper proxima est festo Sancti Andreæ, sive ea in Decembri veniat, sive in Novembri.

Est alius adhuc tertius Cyclus, quem vocant Indictionis: locorum 15. Incipit a Septembri: nempe ab æquinoctio Autumnali. Hunc invenies, additis 3. numero annorum Christi. Nos tam literarum Dominicalis, quam numerorum, Aurei, & Indictionis, finem ponamus in anno 1564., qui sublatis 1500. relinquit 64. Ergo anno Domini 1564. fuit annus bissexti, literarum AB: Cyclus Lunæ 7. & idem Indictionis.

Atque hæc quidem hæcenus Curatis, & Ecclesiarum Rectoribus scitu necessaria tradidimus. Verum ut aliis quoque, quantum hic opus est, & res patitur, pro more nostro satisfaciamus: licet curiosa quis ea ducat, & nimium exquisita: non tamen omnino vel inutilia, vel impertinentia, trademus, si quem juvat cælestium orbium motus nosse. Quæ signa sunt diei Festi & ævi.

### Canon Festorum mobilium.

Componitur tabula hac modo. Prima columna datur Septuagesimæ, a 18. Januarii ad 21. Febr. cum suis literis Dominicalibus Calendarii. Nam currente numero aureo xvi. & litera D: Pascha fit 22. Martii, & Septuagesima 9. hebdomadibus ante fit 18. Januarii. Altera columna datur diei Cinerum, a 4. Eebr. ad 10. Mart. Tertia Paschati, a 22. Mart. ad 25. Aprilis. Quarta Ascensioni, a 30. April. ad 3. Junii. Dispones autem semel Aureum numerum, sic ut ad primam literam, quæ est D. ponatur v. & supra hunc, xvi. Reliquos eodem ordine repones, quo dispositi inveniuntur ubique. Facta in hanc formam tabula, quære numerum aureum anni, & subtus eum literam Dominicalem ejusdem anni: non eam quidem cui numerus appositus est, sed quæ proxime sequitur. Huic respondent e regione Festa anni, nisi is bissextilis fiet: Tunc enim literam se-

cundam anni accipies, propter Festa, quæ post diem bissexti veniunt.

		Septua- gesima.	Cinc- rum.	Pascha	Ascen- sio.	Pente- coste.
xvj.	d	18. Jan.	4 Fe.	22 Ma.	30 Ap.	10 Ma.
v.	e	19	5	23	1 Maji	11
xiiij.	f	20	6	24	2	12
ij.	g	21	7	25	3	13
	A	22	8	26	4	14
x.	b	23	9	27	5	15
	c	24	10	28	6	16
xviij.	d	25	11	29	7	17
vij.	e	26	12	30	8	18
	f	27	13	31	9	19
xv.	g	28	14	1. Apr.	10	20
iiij.	A	29	15	2	11	21
	b	30	16	3	12	22
xij.	c	31	17	4	13	23
j.	d	1. Feb.	18	5	14	24
	e	2	19	6	15	25
ix.	f	3	20	7	16	26
	g	4	21	8	17	27
xviij.	A	5	22	9	18	28
vj.	b	6	23	10	19	29
	c	7	24	11	20	30
xiiij.	d	8	25	12	21	31
ij.	e	9	26	13	22	1. Jun.
	f	10	27	14	23	2
xj.	g	11	28	15	24	3
	A	12	1. Mar.	16	25	4
xix.	b	13	2	17	26	5
vij.	c	14	3	18	27	6
	d	15	4	19	28	7
	e	16	5	20	29	8
	f	17	6	21	30	9
	g	18	7	22	31	10
	A	19	8	23	1. Jun.	11
	b	20	9	24	2	12
	c	21	10	25	3	13

Cum in Calendariis ita dispositus inveniatur numerus Aureus, ut Lunæ locum non amplius monstret: (Lunationes enim quinque jam dies anticipantur.) Primum quæret aliquis, unde hæc mutatio? Deinde, unde fit, ut menses nostri non conveniant, neque cum Græcis, neque cum Arabicis, neque cum Ægyptiacis, neque cum Judaicis? ac ne cum Romanis quidem antiquis? An quia æquinoctia translata temporibus sunt? æquari namque cum altero non poterit, quocum in principio, & fine non convenit. An quia Lunæ motus non congruit omnino cum Aureo numero? Nam si lunatio-

tiones non redeunt eadem, nec anni lunares fient iidem: nec menses ipsi, quibus anni definiuntur lunares. Hic error, paulatim surrepens, magnas in Ecclesia olim excitavit difficultates: quando alii alio tempore Pascha celebrarent. Sed decretum fuit tandem in Niceno Concilio, & in Romano, sub Constantino Imp., celebrandum id fore semper a 14. Luna primi mensis usque ad 21. ut Dominica dies coruscarer. Et quia eo tempore [circa annum scilicet 325.] æquinoctium erat in 21. Martii: Ideo proximam illi diei Lunam semper postea sumpsere. Et Eusebius (vel quisquis fuit ille, cui mandatum fuerat negotium) numerum hunc in Calendario disposuit cum Ægyptiis. Sed error sub Theodosio seniore rursus apparuit. Quare Theophilus Alexand. Episcopus, circulum alium cepit Ogdoadum, incipiens a consulatu Antonii & Syagrii. Sed neque hic satisfecit [ut constat ex Leone I.] & ad Cæsareum reditum est. Anno igitur 532. sub Justiniano, cognito errore primo ex eo, quod cum Ægyptiis & Hebræis (qui annum inchoarent ab æquinoctio autumnali) disposuisset cyclum, non cum Romanis: data fuit denuo Provincia Dionysio exiguo, Abb. Rom. Is aliud nihil egit, quam quod remissit initium huiusce numeri, ab æquinoctio Autumnali, ad Vernal. Atque in hunc modum dispositus hucusque remansit. Quamquam in Breviario Pii V. reductum invenias nunc ad locum conjunctionum nostri sæculi, a Januario inchoando.

De annis ergo, & mensibus, pauca accipe: plura enim & quæsitiora apud alios invenias. Annus noster Romanus, secundum motum Solis per Zodiacum accipitur. Huius circuitus fit diebus 365. & quadrante: non tamen præcise. Nam si ad amissum finiretur, non mutarentur Æquinoctia. Atqui reperitur noster communis Alfonsino major, & Ptholemaico: [t] ut in 134. communibus annis, demendus veniat dies unus. Hinc est, quod nunc æquinoctium, quod tempore Nicæni Concilii in 22. Martii ponebatur, fiat 10. Mar. in anno bissextili, & in aliis 11. Quin etiam compertum fuit, quod cum anni medii signent æquinoctium in ingressu signi Arietis: jam tamen verum æquinoctium dies aliquot præterlabatur: nimirum quando Sol est in sectione Æquatoris & Eclipticæ. Nam nostris temporibus, ob titubationem octavi orbis, sectio hæc in 26. gradu Piscium est: & æquinoctium nunc verum inter 5. & 6. Martii accidit. Fitque ex motu octavæ Sphæræ, ut annorum quantitas etiam ipsa varietur, licet modice. Major enim aliquando est, aliquando minor, & in 3500. annis Romanis addere oportet dies 16. quia minores sunt totidem veris, ex quo cœ-

pit caput Arietis ascendere a latitudine Boreali. Sequitur ex his, quod ad retinendum perpetuo diem ingressus Solis in Arietem, oportet in anno 134. omittere bissextum. Hoc enim die majores sunt anni 134. communes, totidem veris.

Hæc de anno solari. Annus autem lunaris minor solari est, diebus undecim, quas vocant Epactas. Constat enim 12. Lunæ circuitibus, seu lunationibus, quas menses, a Mene, [id est, Luna] etiam Latini dixerunt. Cum redeat enim Luna ad Solem diebus 29. horis 12. minutis 44. & secundis 3. duodecies sumpta quantitas hæc (omissis interea minutis) dies complet 354. Atqui solaris annus, uti diximus, habet dies 365. hor. 6. ergo diebus 11. minor hic erit annus, vero. Quare, ut æquentur ambo, mos est his, qui lunares tenent, tertio plerumque anno mensem unum addere lunarem. Sic tertius annus habet 13. menses: & vocatur Embolimæus, vel embolimicus: dierum 384. & mensis additus, dicitur Græce quidem Embolimicus, Hebraice autem adjectus Adar. Nam Adar ultimus est mensis. Ergo lunarium quantitatem ut æquarent, tam Græci, quam Arabes, & Hebræi, aliis 29. dies, aliis 30. dedere, alternatim. Et hos quidem plenos, illos cavos appellarunt Latini: sicut & annos 154. dierum, Synodicos, alios Embolimæos Græci. Sed Ægyptii, qui solari anno utuntur, 12. menses anni, faciunt 30. dierum singulos: addentes ultimo dies 5. ut fiant 365. Elegerunt tamen Romani potius alternatim plenos & cavos: nempe alios 30. dierum, alios 31. Excepto Febuario [ut diximus] 28. dierum: in cuius fine quarto quoque anno addatur dies unus, propter quadrantem reliquum. Alioqui enim, si prætermitteretur intercalatio, non redirent menses iidem ante annum 1465., quem magnum antiqui vocarunt, & cynicum, id est, canicularum, ut refert Centorinus.

Scito tamen, in Scriptura Sacra annos fieri dierum 360. & menses 30., quod patet ex Genes. c. 7. & 8. & Apoc. 11. Author etiam est Philo lib. de Opif. mundi. & Origen. hom. 4. super Num. & Hippolitus lib. de Confir. mundi. Sed profecto contemplanda hic vis illa Divina Septenarii primi numeri pleni: cujus cuncta periodo tempora definiuntur. In cyclo 19. facere coguntur Hebræi 7. embolimicos, restantibus diebus 4. hor. 8. belakim 876. huiusmodi momentis constat hora 1080. Jam in tekupha 91. dies finiuntur, & 7. horæ cum dimidia, at 91. per 7. dividuntur. Rursum 4. hebdomadis in mense abjectis, restant 1. 12. 793. multiplica in menses 12. relictis hebdomadibus, restant 4. 8. 476. e cyclo 19. ablatis hebdomadibus, restant 2. 16. 595. Cyclus autem Solis major est,

H 3

(t) Habet enim Alfonsi dies 365. ho. 5. min. 49. 2. 16. Ptholomæi autem 365. 5. 55. 12.

est, quam Lunæ hora 1. 485. & ablati e cyclo Solis hebdomadibus, restant dies 19. diei  $\frac{1}{2}$  hor. 6. suntque reliqui 2. dies 18. horæ. Collectis omnibus cyclis, & diebus, & horis, & momentis, abjectisque hebdomadibus, semper reicunt lunationes & tekuphæ. Merito ergo finitur Sabbatum diebus 7., & olim Jubilæum annis 7., & magnum Jubilæum 7. hebdomadibus annorum. Nam & septimo anno dierum 360., si 7. sextas mensis, & dies 7. (qui ex quadrantibus 7. paulo minus excreverunt) addas: fient in eo menses 13. & dies 7. solennitatis. Qui adhuc quia major est 6. horis fere: omittis horis aliquot, quæ ex minutis illis colliguntur, quibus annus communis major est vero: demendo in singulis quinquagesimis diem unum, fiet, ut post annum 350. redeant iidem dies: quæ est alia hebdomas. Et forte anno 700. omnia exequantur. De anno magno variæ sunt sententiæ. Omnes fere relictu omnium Stellarum ad locum aliquem definiri voluere. Aristarchus annis finit 2484. Arretes Dirrachius 5552. Herodorus 10800. Dion 13984. Orpheus 120000. Callandrus 360000. Alii nunquam in se reverti putant.

Menses ergo ante captivitatem Babylonicam Hebræi numeris tantum notarunt, ab æquinoctio Verno. Et Romanis de patre suo Romulus Martium primum indixit anni mensem. Docet nomenclatura horum: Quintilis, Sextilis, September, November, December. Addidisse fertur Numa Pompilius Januarium & Februarium: & anni initium in bruma posuisse. Ex quo nata controversia apud Scriptores Latinos de mensium Romanorum numero. Alii enim decem a principio fuisse ajunt: ut Varro, & Suetonius. Alii duodecim, ut Fenestella & Licius Macer. Nec mirum videri debet, quod inter Authores, in componendis peregrinis mensibus cum Romanis, raro conveniat. Multæ enim causæ sunt. Tres tamen præcipuæ. Una, quod alii Solares fumerent, alii Lunares menses: & embolimicos confunderent cum synodicis. Altera, quod non ab eodem cardine omnes inchoarent annum. Tertia, est cardinum mutatio: hoc est, æquinoctiorum & solstitiorum. Adde, quod ex Sacris Scriptoribus alii Macedonicos (qui cum Hebræis multum convenirent) usurparunt: alii Alexandrinis atque Ægyptiacis usi sunt. Ex his factum est, ut bruma, quod olim ante Christum natum quingentis annis,

erat initium Januarii, nunc sit 11. Decembris: & quod Aprilis initium, sit nunc 10. Martii: Hæc ratio est, cur Epiphanius contra hæreses l. 1. Augusto apponit Thyrsi Hebræorum, & merisori Ægyptiorum, & gorpæona Macedonum, & appelleona Græcorum. Christiani nunc in civilibus negotiis initium plerique faciunt a Nativitate Domini: Alii a Resurrectione, ut Galli, & nos in Dioecesi nostra hætenus. Sed officium Ecclesiasticum omnes ordinamus ab Adventu. Et sane, si rem attentius consideremus, verisimilius est Apostolos, recenti memoria tenentes Christi passionem, mortem & resurrectionem, a passione & resurrectione tempora prædicationis suæ, & apostolatus, rerumque aliarum ordinem deduxisse, quam a nativitate. Nam & mos idem diu perseveravit: fuitque curæ multis in Ecclesiis, ut in die Epiphaniæ indiceretur Pascha. Quin & in formati diem hunc, quasi symbolum communionis, poni aliquando voluerunt. Patet dist. 13. Siquidem creatum eo die mundum: & eo in virginali utero conceptum Dei Filium arbitramur, licet aliter Judæi: & stata dies mysterio sit Incarnationis, 25. Martii. In Cancellaria Rom. ab Incarnatione numeratur. Sed undecunque incipiamus, profecto necesse est alterutros deficere: nimirum quanta fuit Domini nostri ætas in passione. De annis mundi non una est sententia. Judæi a creatione ad Christum ponunt annos 376. (u) dies 4. Sed ex Josepho aliter sentiant.

Passum autem Dominum, Patres Ecclesiæ in Nicæno Concilio tenuerunt 8. Cal. Aprilis. Idem Tertullianus, Cyrillus, Chrysostomus, Hieronymus, Augustinus, Cassiodorus. Sed Lactantius lib. 4. cap. 10. de vera Sapientia, de Tiberio loquens: Cujus anno, inquit, xv. id est, duobus Geminis const. ante diem x. Cal. Aprilium Judæi Christum cruci affixerunt. Epiphanius autem xiiij. Calen. April. crucifixum, sed natum 5. Januarii. Paulus Mittelburgensis passum colligit Prid. Calen. Aprilis. Paulus Burgenfis, iij. Nonas Aprilis. Videtur enim anno illo sumptum diem Paschatis ex aureo numero præcedentis anni, qui in principium Aprilis mittebat Plenilunium. Tradit autem idem Burgenfis Dominum fecisse Pascha eo anno, uno die antequam Judæi fecerint. Rationes adducit has. Quod Plenilunium contigerit feria 5. (x) hora 19. cum minutis aliquot: Solere

(u) Manifestus hic error est, ut consideranti patet. De vera ratione annorum, qui a creatione Mundi usque ad diluvium, indeque usque ad Christum intercessere, vide interpretes. Tirinus ab Orbe condito ad diluvium annos numerat 1656., usque ad Christum vero annos 4000. *Vide Chronicum Sacrum Tirini Cap. 7. 8. & 47. ante Tom. I. Comment. in Vet. & Nov. Testam.*

(x) Erat hæc 14. Luna: in cujus vespere præcedente, id est, Jovis, quæ in diem Veneris incidebat (a vespere enim dies inchoabant) cœnavit cum Discipulis juxta legis præceptum. Die autem 15. quievit in sepulchro: & 16. resurrexit.



Solere autem Judæos transferre tunc solennitatem in diem sequentem, quoribus superaret horas 18. Diebus quoque Veneris, & Mercurii, & Lunæ, prohiberi Festivitatis magnæ celebrationem. Quare cum venisset eo anno Pascha die Veneris, dilatum fuit in Sabbatum. Azymorum tamen solennitas incepit die Jovis, ad vespertinam: in qua licet Judæi non manducassent agnum, nihilominus diligentia magna (ut Divino parerent præcepto) & lucernis accensis, panis fermentati quicquid esset in domibus, eliminabant. Hæc haberi dicunt ex traditione Patrum: in quo certe irritam fecerunt legem Dei. Quæ si vera sunt, magna afferunt mysteria. Nam si sic est, protecto Salvator non solum Pascha fecit secundum legem Moisaicam Luna 14., sed etiam se ipsum obrulit (Agnum certe verum, in lege figuratum, pro peccatis mactandum) eo ipso die, quo Judæi in figura eundem comedebant. Sabbatho quoque quievit in sepulchro. Quies enim in Sabbatho jubebatur. Primaque Sabbathi (id est, die Dominica) resurrexit, ut legis antiquæ completa hebdomada, novam inchoaret. Cæterum Epiphanius multo aliter. Ait enim Judæos anticipasse Pascha eo anno, videlicet tertiam vespertinam, pro quinta celebrantes. De consulibus etiam, sub quibus passus est Dominus (unde & magna incertitudo de ætate ejus) aliter sentit, quam cæteri omnes. Res autem videtur sic habere. Quoniam anno decimo quinto Tiberii Cæsaris, consolatus duorum Geminorum successit (hos fuisse dicunt C. Rubellionem, vel Rutellium, & C. Rufum) & eo anno, hoc est, ætatis Christi 30. Christum passum fuisse dixerunt antiqui Tertullianus, Julius Africanus, & Lactantius: Hinc factum est, ut Augustinus, & Orosius, & alii plerique, passum sub Geminis affirmarint. Sed Epiphanius contra, post consulatum Geminorum, atque etiam Rufi & Rubellionis, sub Vinitio, scilicet, & Longino Consulibus, passum, uti diximus, natumque annos 32. & dies 74. nondum completo anno 33. Sic passus est Dominus, ex hac sententia, anno Tiberii 18. Hanc sequuntur Eusebius, Eutropius, Cassiodorus, Honorius Augustundunensis, Beda, Joannes Monachus, Jordanes, & alii. Constat enim ex Evangelica historia, tribus festivitatis Paschalibus supervixisse Dominum post Baptismum Joannis. Non ergo mortuus fuit anno 30. quo baptizatus fuerat. Hanc difficultatem attulit consularium annorum incertitudo.

Sed satis de numero, & initio annorum Christi. Redeamus ad Lunares annos. Dictum quidem est, annum Solis, qui 365. diebus cum quadrante constet, majorem esse, quam Lunarem, Epactis 11. Cumque per

Epactas æquari non possint exacte, (redit enim Luna ad Solem diebus 29. hor. 12. m. 44. sec. 3.) idcirco quamvis tertio quoque anno addito uno mense embolimico videantur coire: tamen deprehensum fuit olim longius esse procedendum: & periodi finem fieri visum est anno nono. Circulum vocarunt henneaterida, id est, novennalem. Hujus ultimo anno appellente, Pithia agebantur Delphis. Simili namque ritu in Elide, quarto quoque anno (cui noster bissextilis successit) agôn fieri solebat Jovi Olympico, [unde Olympiades] & Romæ Capitolino, ludi seculares. Hunc circulum lunarem, novennalem tenuerunt multo tempore Romani, & etiam Hebræi: sed accepto a Chaldæis, sub Julio Cæsare, decemnovennali aureo numero, valere alterum siverunt. Et Judæi cum lunaribus annis utentes, Novennali sæpius deciperentur: usurpare quoque postea coacti sunt decemnovennalem. In qua periodo annis his intercalare solent embolismos, 3. 6. 8. 11. 14. 17. 19. Ea enim videtur fuisse causa, cur celebrarent non raro Pascha ante æquinoctium, sicut & eorum error ab Ecclesiæ Prælati sæpe damnatus est. Ægyptiorum postea & Chaldæorum inventus est circulus 25. annorum, ut refert Ptholomæus, lib. 6. cap. 3. mag. Const. Quo spatio fiunt Lunationes 309. restante hora 1. m. 8. 2'. 18. Ob has minutias, ne hic quidem circulus stare potest. Arabes ergo, qui & ipsi lunaribus annis utuntur, Cyclum faciunt 30. annorum: intercalantes tertio quoque anno, mensem ex Epactis 11. Hoc circuitu fiunt Lunationes 360. diebus 10631. M. 18. 2'. 15. Quare neque hic numerus Lunæ eorum demonstrat exacte. Nos Romanum semper tenemus aureum 19. Quem licet præcedant Lunationes 235. hora una, M. 28. 2'. 3. 3'. 15. (non enim complentur horæ 18., sed 16 m. 3. 2'. 56. 3'. 45. sicut observatum fuit sæpius in meridiano Alexandrino) tamen addito alio circulo 16. aureorum circulorum, quo dies unus remittatur: item alio bissextilium, ut anno 134. omittatur intercalatio bissextilis: certe in longum tempus servari poterit henneadecateris Romana, & Ecclesiastica. Cum fiant enim Lunationes 235. diebus 6939. hor. 16. m. 31. 2'. 56. 3'. 45. anni autem 19. Romani, diebus 6939: hor. 18. sequitur necessario differentiam ex-crescere in 16. periodis, in diem unum. Quare non sine causa in annis 304. repertus est recessisse Aureus numerus die uno, a locis suis. Auferamus ergo nos in 304. annis diem unum, ob Lunæ motum, & in 134. alium, ob motum Solis medium: absque dubio Luminarium conjunctiones habebimus: & ex conjunctionibus, ætates alias Dianæ. Ergo licet Arabum cycli exactior cæ-  
teris

teris sit : nos, qui Romanis utimur ubique annis, retinere possumus Aureum numerum, nec unquam falleremur.

*Regula inveniendi ætatem Lunæ  
per Epactas, memoriter quovis  
tempore.*

**M**ultiplica anni tui currentis numerum aureum per xi. multiplicationi adde quotus est mensis tuus a Martio : ( ab hoc enim mense incipiunt Astrologi ) ab aggregato rejice xxx. quoties potes. Residuum indicabit tibi diem veræ conjunctionis. Nec unquam falleris, modo teneas memoria anni currentis numerum aureum. Si vero diem scire cupis Novilunii Ecclesiastici, sive Nicæni, ex quo deducuntur Festa mobilia : adde quinque dies inventis. Est enim hic tardior vero.

*Nomina Mensium, & ordo, apud  
Nationes aliquot.*

*Romani incipiunt a Bruma menses So-  
lares.*

1	2	3	4
Januarius,	Februarius,	Martius,	Aprilis,
5	6	7	8
Majus,	Junius,	Julius,	Augustus,
9	10	11	12
September,	October,	November,	December.

*Ægyptii Solares, ab Æquinoctio Au-  
tumnali ordiuntur.*

1	2	3	4	5
Thoth:	Phaophi:	Arthyr:	Choiac:	Tybi,
6	7	8	9	
Mechir:	Phamenoth:	Pharmuthi:	Pachon:	
10	11	12		
Payni:	Epiphi:	Meforc.		

*Hebræi Lunares ab Æquinoctio Verno.*

1	2	3	4	5	6
Nisan:	Aiar:	Civan:	Thamuz:	Ab:	Elul:
7	8	9	10		
Thifri:	Maresvan:	Cisliu:	Tebeth:		
11	12				
Sebat:	Adar.				

*Macedones Lunares, sicut Hebræi, ab Æqui-  
noctio Verno.*

1	2	3
Xanthicus:	Artemisius:	Deytius, & Dæsius:
4	5	6
Panemus:	Lous:	Gorpizæus:
7	8	9
Hyperberetæus:	Dius:	Apellæus:
10	11	12
Peritius:	Dyltrius.	

*Atbenienses, Lunares annos a Solstitio  
Æstivo inchoabant.*

1	2	3
Hecatombeon:	Metagitnion:	Bædromion:
4	5	6
Mæmaeterion:	Pyanepsion:	Anthesterion:
7	8	9
Posedeon:	Gamelion:	Elaphebolion:
10	11	
Mounychion:	Thargelion:	
12		
Scirophorion.		

**O**rdinem hunc a Theodoro Gaza sump-  
tum imprimis habe : licet is cum Ro-  
manis non satis congruat. Sed si rationem  
habet initiorum, facile erit omnes inter se  
componere. Illud quoque scire oportet:  
apud Authores antiquos alios sæpe cum alia-  
rum gentium aliis mixtos fuisse. Nam Pya-  
nepsion dictus est Beotice apud Hesiodum  
Damatrios: & Mæmaeterion, Alalcomenos:  
Metagitnion, Panemos: Hecatombeon, Cro-  
nios, & Hippodromios: Thargeleon, Phy-  
sios: Posedeon, Lenæon, & Buceros. Et  
idem Macedonibus dictus Audynæos, &  
Nechion: & Beotice, Harmæos, & Athice,  
Gameleon. Elaphebolion apud Thucydi-  
dem Gerestios, unde & Macedonibus, Ge-  
ritios.

Satis multa de Calculo : nunc de Festis  
immobilibus nostræ Dioicæsis, quæ de præ-  
cepto coluntur, hæc accipe.

*IN JANUARIO.*

A	1	Festum Circumcisionis Domini.
F	6	Epiphania.
C	17	Antonii Abbatis.
A	22	Vincentii Martyris.
D	25	Conversio S. Pauli.

*IN FEBRUARIO.*

E	2	Purificatio Beatæ Mariæ Vir- ginis.
D	22	Cathedra Sancti Petri.
F	24	Matthiæ Apostoli.

*IN MARTIO.*

G	25	Annuntiatio Dominica, quæ facta est B. Mariæ Virgini, de Incarnatione Domini.
---	----	---

Si Festum hoc venerit in die Jovis  
hebdomadæ Sanctæ, vel sequentibus,  
usque ad Quasimodo, transtertur ejus  
officium post octavas Paschæ: quia to-  
to isto tempore non fit officium de ali-  
quo Sancto, licet Festum celebretur a  
populo.

IV

## IN APRILI.

- A 23 Georgii Martyris.  
C 25 Marci Evangelistæ.

Pascha frequenter venit in hoc mense: & habet octavas, nec fit de aliquo Sancto infra octavas.

## IN MAÏO.

- B 1 Philippi & Jacobi Apostolorum.  
D 3 Inventionis S. Crucis.  
F 5 Dedicatio Ecclesiæ S. Joannis  
G 6 Joannis ante Portam Latinam.

Festum Dedicationis Ecclesiæ S. Joannis celebratur in Ecclesia Cathedrali, & in Ecclesiis nondum dedicatis, quæ sunt in Dioecesi nostra: aliæ vero dedicatæ, suas Dedicationes celebrant. Et habet octavas.

Festum Ascensionis frequenter venit in hoc mense, & habet octavas: fit tamen de Sanctis occurrentibus infra dictas octavas. Litanix (sive Rogationes) fiunt diebus Lunæ, Martis, & Mercurii ante Ascensionem, & abstinetur a carnibus: & in die Lunæ sequenti post Ascensionem, incipit Synodus, quæ dicitur Maji.

Frequenter quoque venit Festum Pentecostes, quod celebrari debet cum duobus diebus sequentibus. Habet octavas: nec fit de aliquo Festo infra octavas, sed transferuntur Festa novem lectionum.

Diebus Mercurii, Veneris & Sabbati post Festum Pentecostes, celebrantur jejunia Quatuor Temporum. Et Dominica prima post Pentecosten fit Festum Sanctæ Trinitatis.

Et die Jovis post Festum Trinitatis, fit Festum de Sacramento Corporis Christi, quod habet octavas. Et nota, quod dies Dominica post Festum Corporis Christi, tamen ipsa computata, est hætenus prima Dominica post octavas Eucharistiæ: quantum attinet ad Evangelia, & historias, usque ad Adventum.

## IN JUNIO.

- C 6 Claudii Archi-Episcopi Bisunt.  
A 11 Barnabæ Apostoli.

*Tomus VIII. Concilior. German.*

- G 24 Ferreoli & Ferrucii Martyrum Passio.  
G 24 Nativitas B. Joannis Baptistæ.  
E 29 Sanctorum Petri & Pauli Apostolorum Passio.

## IN JULIO.

- G 22 Mariæ Magdalenzæ.  
C 25 Jacobi Apostoli.

## IN AUGUSTO.

- C 1 Petri ad Vincula.  
E 3 Inventio B. Stephani Proto-Martyris.  
E 10 Laurentii Martyris.  
C 15 Assumptio B. Mariæ Virginis.  
E 24 Bartholomæi Apostoli.  
C 29 Decollatio Sancti Joannis Baptistæ.

## IN SEPTEMBRI.

- E 8 Nativitas B. Mariæ Virginis.  
E 14 Exaltatio S. Crucis.  
E 21 Matthæi Apostoli & Evangelistæ.  
F 29 Michaelis Archangeli.

In hoc mense Septembri diebus Mercurii, Veneris & Sabbati, post Exaltationem S. Crucis, celebrantur jejunia Quatuor temporum.

## IN OCTOBRI.

- D 4 Sancti Francisci.  
D 18 Lucæ Evangelistæ.  
G 28 Simonis & Judæ Apostolorum.

In hoc mense Octobri celebratur Synodus Autumni, die Mercurii post Festum S. Lucæ, & incipit die Martis.

## IN NOVEMBRI.

- D 1 Solemnitas Omnium Sanctorum.  
E 2 Commemoratio Defunctorum, celebratur usque ad meridiem.  
G 11 Martini Episcopi.  
E 30 Andreæ Apostoli.

Si Festum Omnium Sanctorum veniat in die Sabbati, tunc Commemoratio Defunctorum fit die Lunæ, juxta ritum Ecclesiæ Romanæ.

Notandum quoque, quod primam Dominicam Adventus dat nobis festum

I

S.



S. Andreæ, eam scilicet, quæ proxima reperitur, sive præcedat hæc, sive sequatur. Eandem Dominicam investigant alii a die xxvi., quæ Crastina S. Catharinæ: sequentem Dominicam accipientes, & hoc facilius est.

### IN DECEMBRI.

- D 6 Sancti Nicolai.  
 F 8 Conceptio Beatæ Mariæ Virginis.  
 C 21 Thomæ Apostoli Passio.  
 B 25 Nativitas Domini.  
 C 26 Stephani Protomartyris Passio.  
 D 27 Joannis Evangelistæ natalis.  
 E 28 Sanctorum Innocentium Passio.

In hoc mense Decembri, diebus Mercurii, Veneris & Sabbati, post festum S. Lucie (quod est xiii. mensis) celebrantur jejunia Quatuor temporum.

*Generaliter in omni mense.*

Omnes dies Dominici, festum Patroni, cujuslibet Ecclesiæ in sua Ecclesia, & Dedicationes particulares Ecclesiarum, in suis Parochiis duntaxat. Alia vero Festa, quæ consueverunt fieri ex devotione, annuntiabunt Curati, ut scire possint Parochiani, quando illa venerint, & ea celebrare, si voluerint.

### V. PRÆCEPTUM ECCLESIAE.

#### De Jejunio.

#### STATUTUM I.

**J**ejunia ex Præcepto Ecclesiæ observanda in hac Dioecesi sunt hæc. Primum in singulis hebdomadis abstinetur ab esu carnum diebus Veneris & Sabbati, in memoriam mortis & sepulturæ Christi.

#### II.

Jejunandum in feriis Quatuor temporum usque ad horam nonam, vel usque ad meridiem: abstinendumque ab esu carnum. Sunt autem ferie istæ dies Mercurii, Veneris & Sabbati sequentes Dominicam secundam Quadragesimæ, quæ dicitur Brandones, festum Pentecostes, Exaltationis S. Crucis, & S. Lucie.

#### III.

Eodem modo jejunandum in Vigiliis Nativitatis Domini, Pentecostes, Assumptionis B. Mariæ Virginis, Omnium Sanctorum, Nativitatis Beati Joannis Baptistæ, Passionis Petri & Pauli, Matthæi, Andreæ, & Laurentii Martyris, Simonis & Judæ Apostolorum. Unde versus:

*Petrus & Andreas, & cum Laurente Joannes,  
 Simon, Matthæus abstineant dapibus.  
 Omnes Sancti, Assumptio Virginis, natus  
 JESUS,  
 Et Pentecoste, temporibusque quater.  
 Tempora jume faces, Crux ebria, Lucia,  
 Pnema,  
 Inde tribus feriis, dicito jejunium.*

#### IV.

Jejunium Quadragesimale debet observari, abstinendo ab ovis & lacticiis, & carnibus: in aliis autem jejniis licet uti ovis & lacticiis. Sed generaliter in omnibus jejniis abstinendum est a carnibus.

#### V.

Jejuniorum tempore sumenda est refectio semel in die duntaxat, hora nona, quam meridianam nunc interpretamur, vel circa illam horam.

Hora nona naturalis, & juxta Sacram Scripturam, tertia est post meridiem, qua olim fideles cibum capiebant. Sed tendente mundo ad finem, cum charitas frigescat, multa remittuntur de rigore veteris observantiæ.

#### VI.

Diebus Dominicis prohibitum est jejunare: quia superstitionem saperet gentilium. Eodem modo, tam jejunia, quam Festa superstitionis Judaicæ, vel Mahometicæ, prohibentur sub excommunicationis pena.

Sed de Jejunio amplius infra.

Cum proposita fuisset quæstio in collatione quadam Synodali, quid sentiendum videretur de iis, qui per nostram Dioecesin, non sine superstitionis nota, diem Sabbati post meridiem, in honorem (ut agebant) B. Ma-

B. Mariæ in orio observarent: Sabbatum enim colere judaizare est: in honorem autem B. Virginis (si Ecclesiæ traditionem sequi vellent) non fero, sed mane officium facit Ecclesia diebus Sabbati: sed cum a Majoribus suis accepisse se ritum hunc contenderent: qui certe non ut Sabbatum in honorem Mariæ colerent, sed ut diei Dominicæ festum inchoarent, (qui est Ecclesiæ ritus sollemnis) ante vespertas ab agro redibant, ut solennitatibus Festorum interessent, quæ omnes a primis incipiunt vespers: Nos ut superstitionis causam tolleremus, quando per mulierculas fraude submissas, & fanaticos homines, populus noster seducebatur, statuendum duximus, sicut sequitur:

## VII.

Statuimus & ordinamus, custodiendam omnino esse eorum, inter quos vivimus, inoffensam societatem. Et quod B. Augustinus in Epistola ad Casulanum de jejuniis diei Dominicæ tradidit, hoc nos ad otium Sabbati transferamus. Nam sicut malum est homini, qui per scandalum manducat: (ut docet Apostolus) ita malum est homini, qui per scandalum jejunat. Et sicut malum est homini, qui per offensionem operatur: ita malum est homini, qui per offensionem vacat. Quare his diebus quando per somnia, & vanas revelationes quarundam fæminarum, superstitiosi aliqui nostræ Dioecesis sine causa dogmatizare ceperunt, quod quasi sacra solennitate statuta otium observari debeat in pomeridiana parte Sabbati: (etiam si suam hanc observationem a Judaismo alienam esse contendant) tamen, ne majus malum incurratur in scandalo, quam bonum percipi posset ex merito, Prohibemus omnibus & singulis nostræ Dioecesis, ne quis post hac vacandum esse asserat, aut studiose sic vacet in Sabbato: nisi cum Festa celebrat Ecclesia. Laudamus tamen omnes eos, qui in honorem diei Dominicæ, Vespers & Officio Ecclesiastico Sabbati, & aliorum Professorum dierum, interfunt cum Catholicis.

## DE DECIMIS ET OBLATIONIBUS.

**I**Nter præcepta Ecclesiæ ponunt plerique mandatum de solvendis Decimis. Sed  
Tomus VIII. Concilior. German.

multis Canonistis videntur Decimæ esse de jure Divino: ex verbis illis Decreti, 16. q. 1. Decimas Divinæ legis sanxit autoritas, Sacerdotibus & Levitis esse reddendas. Et ex c. Parochianos. ext. de Decimis. Scribitur enim Levit. 27. Omnes Decimæ terræ, sive de frugibus, sive de pomis arborum, Domini sunt. Et postea: Omnium Decimarum ovium, & bovis, & capræ (quæ sub Pastoris virga transeunt) quicquid Decimum venerit, sanctificabitur Domino.

Sed hujus quæstionis difficultatem solvit D. Thomas in diversis locis. Ejus verba subjiciamus ex 2. 2. q. 88. art. 1. Decimæ, inquit, in veteri lege dabantur ad sustentationem Ministrorum Dei. Unde dicitur Malach. 3. Inferte omnem decimationem in horreum meum: ut sit cibus in domo mea: unde præceptum de solutione Decimarum partim quidem erat morale, (indictum naturali ratione) partim autem judiciale, ex Divina institutione robur habens. Quod enim eis, qui Divino cultui ministrabant ad salutem populi, populus necessaria victus ministraret, ratio dictat naturalis: sicut & iis, qui communi utilitati invigilant: scilicet Principibus, & militibus, & aliis hujusmodi, stipendia victus debentur a populo. Apostolus hoc probat. 1. Corinth. 9. Per humanas consuetudines, dicens: Quis militat suis stipendiis unquam? Sed determinatio certæ partis exhibendæ Ministris Divini cultus, non est de jure naturali: sed est introducta institutione Divina, secundum conditionem illius populi, cui lex dabatur: qui cum in 12. tribus esset divisus, undecima tribus, (scilicet Levitica Ministeriis Divinis mancipata) possessiones non habebat. Quare æquum erat, ut undecim aliæ tribus decimam partem suorum proventuum Levitis darent, ut hi viverent honorabilius. Fuit quoque determinatio hæc decimæ partis, judicialis, propter transgressores præcepti: non cærimonialis. Cærimonialia namque solum ad significandum aliquid futurum instituta fuerunt, quæ jam cessarunt: judicialia autem de novo constitui possunt. Ita determinatio decimæ partis solvendæ tempore novæ legis instituta est secundum quandam humanitatem, autoritate Ecclesiæ: ut scilicet non minus populus novæ legis, Ministris novi testamenti exhiberet, quam populus veteris exhibebat: cum populus novæ legis ad majora obligetur, secundum illud Matth. 5. Nisi abundaverit justitia vestra: & cum Ministri novi testamenti sint majoris dignitatis, quam Ministri veteris: ut probat Apostolus 2. Corinth. 3. Sic ergo patet, quod homines tenentur ad solutionem Decimarum, partim quidem ex naturali, partim etiam ex institutione Ecclesiæ: quæ pensatis

opportunitatibus temporum & personarum, possit aliam partem determinare solvendam. Hæc Thomas. Addit etiam in argumentis, præceptum de solutione Decimarum, quantum ad id, quod erat morale, datum fuisse in Evangelio, Matth. 10. Dignus est operarius mercede sua. & 1. Corinth. 9. Quis militat suis stipendiis unquam? Quis pascit gregem, & de lacte gregis non manducat? Si nos vobis spiritualia seminamus, magnum est, si carnalia vestra metamus? Nescitis, quoniam qui in Sacratio operantur, quæ de Sacratio sunt, edunt: & qui altario deserviunt, cum altario participant? Ita & Dominus ordinavit iis, qui Evangelium annunciant, de Evangelio vivere. Et Galat. 6. Communicet autem is, qui catechizatur verbo, & qui se catechizat, in omnibus bonis. Nolite errare: Deus non irridetur. Addit idem: Debent autem Ecclesiæ Ministri maiorem curam habere spiritualium bonorum in populo promovendorum, quam temporalium colligendorum. Apostolus enim noluit uti potestate sibi a Domino tradita accipiendi illa stipendia sui laboris: ne daretur aliquod impedimentum Evangelio. Ait enim, Sed non usi sumus hac potestate: sed omnia sustinemus, ne quod offendiculum demus Evangelio Christi. Sic Ministri Ecclesiæ, si sine scandalo exigere Decimas non possunt, [ut propter desuetudinem, aut aliam causam interceptas] non requirunt. Nec tamen sunt in statu damnationis, qui non solvunt in locis illis, in quibus Ecclesia non petit: nisi forte propter obstinationem animi. Ut si haberent voluntatem non solvendi, etiam si ab eis peterentur. Tunc enim peccant, subtrahentes Ministris Dei necessaria, & Deo universalis Domini causa debitum tributum.

Primitias enim, atque Decimas Deo offerunt Christiani, non solum gratitudinis causa, pro iis, quæ ab eo acceperunt, (tanquam bonorum omnium datori) sed etiam in signum universalis Domini, quod supra nos ille gerit Deus Omnipotens. Ut ergo omnia ei accepta referant homines: certe alia pars dari non conveniebat, ut videtur, qua gratitudinem erga datorem ostenderent magis, quam sit Decima. Denarius enim numerus universalitatem notat: quoniam aliorum numerorum limes est, & cardo, in quem omnes alii numeri revolvuntur. Ubi si tertiam, vel quartam partem redderent, non omnia se debere profiterentur. Sed hac in re consuetudo loci approbata sequenda est ubique, ne quis infirmorum scandalizetur.

Sequitur ex his, quæ dicta sunt, solis Clericis curam animarum habentibus, per se competere jus hoc percipiendi Decimas, &

oblationes. Quoniam jus hoc spirituale est. Consequitur enim debitum illud, quo Ministris debentur sumptus de ministerio Sacramentorum, & doctrinæ, & hospitalitatis: quæ ex officio Clerici curam animarum habentes dispensare tenentur. Idcirco etiam oblationes omnes, quæ Capellis, vel Cruci, aut imagini fiunt, Curati Ecclesiæ Parochialis sunt: non Capellani: ac multo minus laicorum: nisi Episcopus ipse celebret in Parochia. Tunc enim Episcopi erunt, non Curati. Doctores in c. Pastoralis. De iis, quæ si. a præl. & glo. in l. Statuæ. ff. de usus.

Sed res ipsæ, quæ nomine Decimarum dantur, quia corporales sunt, nihil prohibet etiam Laicis, nedum Religiosis, posse deberi: debito jure manente Ecclesiæ. Hinc factum est, ut in Lateranensi Concilio sub Alexandro III. Papa, Anno 1180. Multæ Decimæ datæ fuerint per orbem Christianum generosis militibus, propter bellum, quod gerebatur tunc temporis cum infidelibus Mahometanis. Capitula quoque Ecclesiarum Cathedralium ex eo videntur esse capacia juris Decimarum: quod eorum Canonici in ministerio sint assiduo, Coadjutores Episcoporum.

Ex his sequitur, Decimas nullo modo præscribi posse a laicis. De præscrip. caus. Nec a Clericis, Parochiam non habentibus. eo. De quarta. Nec a Religiosis, Parochiam non habentibus. 16. q. 1. Placuit. Quod si præscribantur contra Parochiam unam ab alia, in aliquo prædio: non extenduntur propterea ad aliud, quod de novo colitur. ext. eod. Cum contingat. ff. de pact. l. Si unus. §. Ante omnia.

Sequitur etiam, quod qui Decimas tenent in feudum, non recipiunt Decimas novarium, quia debentur Ecclesiæ Parochiali: nisi forte sint Religiosi, ex privilegio Decimas recipientes. ext. eod. Tua nobis. ex parte. & Cum contingat.

Sequitur insuper, quod pauper laicus tenetur solvere etiam diviti Clerico habenti, unde sustentetur: quia jam debitum factum est. Ita idem S. Thomas quol. 6. art. 10. Nec propter opinionem, quam quis habere potest de vita reprehensibili Sacerdotis, ideo eas debet retrahere. ext. eod. Tua nobis. Si vero scienter solvat ei, qui violenter Ecclesiam occupat, non excusatur: nisi vel metu id agat, vel ille, qui Ecclesiam occupat, a Prælato toleretur, non contradicente.

Si igitur quæras, quinam tenentur ad solvendum Decimas, & quando, & de quibus rebus, & in qua quantitate: dicimus consuetudinem in his potissime observandam in uno quoque loco. Sed distinguendum.



dum. Siquidem aliæ sunt personales, aliæ prædiales. Et prædiales quidem de iis dantur, quæ in prædiis proveniunt: Ut ex vino, tritico, & aliis. Personales, quæ ex opera vel industria personæ: Ut ex artificio, militia, venatione, & similibus. Mixtæ sunt, quæ ex animalibus: quia partim ex pascuis, partim ex cura Pastorum existunt.

Ubi ergo non sunt prædiales, dantur personales. Sed non recipiantur de rebus restitutioni obnoxiiis: Ut quæ ex furto, vel usura partæ sint. Nam immolantis ex iniquo, (ait sapiens Ecclesiast. 34.) oblatio est immunda. Neque ex turpi quæstu, ut de meretricio, histrionatu, & similibus, (Deuteron. 23. Non offeres mercedem prollibuli.) quando ex peccato notorio quæstus provenit: ne videatur Ecclesia velle approbare peccatum. Ideo si a peccato destiterint hi, & pœnuerint: licebit accipere. Thom. 2.2. q. 88. art. 2.

Et personales quidem dari oportet Ecclesiæ Parochiali, vel baptismali, in qua Divina recipis Sacramenta. 16. q. 1. Prædiales autem, in cujus Parochiatu prædia sita sunt. De Paroch. c. ult. 16. q. 1. De Decimis.

Hilari vultu dantur. Nam Ecclesiast. 35. dicitur: In omni dato, fac hilarem vultum tuum: & in exultatione sanctifica Decimas tuas.

Mox quoque collectis frugibus. Nam si tardaveris, peccatum erit. ext. Cum homines. Et, Tua nobis. Et Aug. serm. 219. Exod. 22. Decimas, & primitias tuas non tardabis offerre Domino.

Cumque jus Decimarum sit morale, & a natura inditum, tenentur omnes laici ad eas: nisi se immunes ostendant. c. A nobis. Et quasi ex debito compelli possunt per censuras. Judex autem summarie, & de plano procedet. c. Dispendiosam. de Judiciis. in Clem.

Differunt ergo hæc nomina inter se: Decimæ, Primitiæ, & Oblatio. Namque oblationes Deo immediate fiunt, & voluntariæ sunt. Primitiæ autem, in quantum offeruntur, quoque voluntariæ sunt in quantitate: licet, ut Hieronymus refert in Ezech. & Malach. 3. Magistri Synagogæ intra Quadragesimam, & Sexagesimam, primitias redegerint. Sed & oblationes, & primitiæ, nunc, quamvis de se liberæ sint: tamen, ut Theologi docent, sub præcepto possunt aliquo modo venire aliquando. Veluti bonus denarius quem vocant, & panis benedictus per turnum, mortuaria, & similia. Verum, uti diximus, in omnibus his standum est consuetudini approbatæ. Nam consuetudo vim præcepti habet.

## STATUTUM I.

**P**Ræcipit igitur Sancta Synodus omnibus, cujuscunque gradus, & conditionis sint, ad quos Decimarum solutio spectat, ut eas, ad quas de jure tenentur, in posterum Cathedrali, aut quibuscunque aliis Ecclesiis, vel personis, quibus legitime debentur, integre persolvant. Qui vero eas aut subtrahunt, aut impediunt, excommunicentur: nec ab hoc crimine, nisi plena restitutione secuta, absolvantur.

## SERMON DE S. AUGUSTIN Des Disines.

**F**reres treschers, par la grace de JESUS Christ les jours des moissons sont venus. Pource rendant graces a Dieu, qui les nous a donnez, pensons aux dismes, qu'il nous faut offrir. Que dis je, offrir? ains qu'il nous faut rendre. Car Dieu ne desdaigne point repeter de nous un dixieme, nous ayant donne le toutage, qui n'est pas pour luy toutesfois, mais pour nous. Ainsi l'a il promis par le Prophete, disant: Pourtez en mes greniers tout le disme: a fin qu'il y aye du vivre en ma maison. Et espreuvez moy en cela, dict le Seigneur, si je ne vous ouvre les cataractes du Ciel & ne vous donne du fruit en abondance. Voylu comme nous avons preuve, que les dismes profitent plus a nous, qu'a Dieu. O hommes fols & insensez, commanda jamais Dieu choses meschantes? Vous a il dict choses pourquoy ne doive estre oy? Il dict, Tu ne tarderas de m'offrir les premiers fruits de ta grange & de ton pressoir. Donc si c'est un peche, donner tard les dismes, de combien sera il plus grand, n'en donner point? encores dict-il, Honore ton Seigneur Dieu de tes justes labours: offre luy des fruits de ta justice: a fin que tes greniers soyent remplis de froment, & tes pressoirs aussi abondent de vin. Tu n'acomplis cecy pour rien: veu que tu le recevras bien tost avec usure. Tu me demanderas paravanture, a quoy profite ce que Dieu reçoit pour rendre? Tu demanderas encores a quoy profite ce, que lon donne aux pauvres? Si tu me croys, c'est pour toy. Sy en fais doute, tu l'as perdu. Les dismes (croyez moy, freres) c'est un tribut de pauvres ames. Rendez donc le tribut aux pauvres: & offrez

aux prestres les libations. Et si tu n'as disme de fruiets terriens, comme un laboureur: Dieu attend dismes de tout ce, qui te nourrit. Car tout ce que ton esprit gagne, est à Dieu, soit en guerre, soit en negotiation, soit en artifice ou mestier. Autre chose nous payons pour la terre: autre pour recompence de l'usage de nostre vie. Rens le donc, ô homme, pource que tu le possedes: rends le pourtant qu'as merité naistre. Car il dict, Donneront chacun d'eux la rançon de leurs ames: Et n'y aura en eux ny maladie, ny desastre. Vayla comme pourras apprendre des saintes escritures les cautions de ton Seigneur, par lesquelles il te promet, que si donnes les dismes, non seulement tu recevras abondance de fruiets, mais encores tu obtiendras la santé du corps. Tes granges seront remplies, dict il, de froment, & tes pressoirs d'abondance de vin espancheront. Et n'y aura maladie, ny desastre. Si rendant les dismes tu peux meriter les choses terriennes & celestes: pourquoy te deffraudes tu par avarice de double benediction? Escoute donc homme mortel & indevoit: Tu sçais bien que tout ce, que tu reçois, vient de Dieu, & tu ne l'accommodes point des choses, qu'il a creees? Le Seigneur Dieu n'en a pas besoin. Il ne demande premination, mais l'honneur. Il ne demande rien du tien que tu luy baillies. Il ne desdaigne point demander les premices & dismes: & tu les denies, avaricieux? Qu'est ce que tu ferois, si luy prenoit les neuf parties, & te laisseit seulement la dixieme pour toy? Certes cecy est desja advenu, puyque tes maisons sont faillies, pour avoir Dieu retenu sa benediction: & la gresle a abattu ta vigne, ou elle a esté coulée du magnin. Comme comptes tu, avaricieux? Tu as perdu les neuf parties, pour n'avoir voulu donner la dixieme. On sçait bien ce que tu n'as point donné. Toutesfois Dieu le demande. C'est la coustume de Dieu nostre Seigneur tresjuste, que si tu ne luy baillies le disme, tu seras remis à la dixieme partie. Car il est escrit, le Seigneur dict, Pource que les dismes de vos champs, les premices de la terres sont avec vous: mais je le voy & vous me pensez tromper: la direption sera en vos tresors & dedans vos maisons. Tu seras contraint donner au Soldet sans pitie ce que tu refuses aux prestres. Dict encores nostre Seigneur tout puissant, Convertissez vous à moy, & je vous ouvriray les Cataractes du ciel, & espancheray ma benediction sur vous, & ne corrompray point les fruiets de vostre terre, ny la vigne sera ma-

lade en vostre champ: & serez benrys entre toutes gens. Dieu est prest tousiours pour faire du bien: mais il est empesché par la malice des hommes, qui veulent bien, que Dieu leur baille tout, & eux ne veulent rien offrir de ce qui leur semble, qu'ils doivent tenir & posseder. Que ferez vous si Dieu disoit, L'homme, que j'ay fait, est à moy: mienne est la terre, que tu laboures: la semence, que tu y mets, est à moy: les bestes, que tu fais travailler, sont mien-nes: les pluyes, les vents, la chaleur du Soleil, tout cela est à moy. Puis que toutes les elements, qui te font vivre, sont à moy: tu qui ne fais autres chose, qu'y mettre la main, ne meritois à grand peine encores la dixieme partie. Toutesfois pource que Dieu Omnipotent par sa bonté nous paist, il donne au laboureur pour recompence un present tresample. Il luy donne tout: & se reserve seulement le disme. Trompeur ingrat & desloyal, je te conviendray par la voix de Dieu. Voicy l'an desja fini: rends au Seigneur le loyer de ce, qu'il a fait plouvoir. Rachepte toy homme pendant que tu vis. Rachepte toy toy mesme pendant que tu peux. Rachepte toy (dis-je) pendant que tu as en tes mains le pris. Rachepte toy, à fin que quant la mort avaricieuse te prendra, tu ne perdes le tout ensemble, assavoir la vie & le pris. Tu n'as point de cause de laisser cecy à ta femme, qui peut estre prendre un autre mary. Et toy femme n'as cause de le laisser à ton mary: car il desire avoir une autre femme. Tu recommandes en vain tes soucis à tes parens & amis: personne d'eux ne te racheptera fidellement apres la mort, puis que tu n'as voulu te rachepter toy-mesme en ta vie. Mets en bas de sur tes espaulles le fardeau d'avarice. Mesprise ceste maistresse avarice trescruelle: laquelle te pressant d'un joug tresdur, ne permet que tu reçoives le joug de JEsus Christ. Car comme le joug d'avarice deprime la personne à l'enfer: aussi le joug de JEsus Christ l'esleve au ciel. Les dismes sont requis d'obligation: & qui ne les veut donner, il irra au lieu d'autrui: & tant de pauvres, qui meurent de faim au lieu où tu habites, pour non leur avoir fait du bien, de tant d'omicides seras coupable devant le tribunal du juge eternal, pource que tu as retenu à ton prouffit ce que Dieu a laissé pour les pauvres. Donc qui desire gagner le pris, ou pardon de ses pechez, qu'il rende le disme, & des neuf parties qu'il mette son estude à donner l'aumosne aux pauvres, de telle sorte toutesfois, que tout ce qui restera, excepté son

vivre

vivre modéré, & vestement raisonnable, ne soit réservé à dissolution, mais qu'il soit remis au trésor celeste par aumônes des pauvres. Car tout ce, que Dieu nous a donné de plus qu'il ne faut, il le nous a envoyé pour distribuer aux autres, non pas pour nous seulement. Et si ne le donnons, nous envahissons le bien d'autrui.

## DE OPERIBUS SATIS- factoriis, & Meritoriis.

**D**E Satisfactione, tertia scilicet parte Pœnitentiæ, quæ a Sacerdote imponitur confitenti, suo loco dicemus: nunc opus satisfactorium appellamus illud, quodcumque pro peccatis commissis persolvimus Deo: & quo radices peccatorum, causasque quasi excidimus. Est autem notandum, quod peccata nostra duo consequuntur: macula & pœna, id est, culpa, [qua Deus offensus manet] & reatus, id est, obligatio ad pœnam. Culpa si remittatur, remittitur & reatus, quantum ad pœnam æternam inferni: sed non statim pœna omnis, quin reparatio aliqua fieri debeat illatæ injuriæ: quia nec bonum irremuneratum, nec malum ullum a Deo impunitum esse potest, qui justus est & justitias dilexit. Non satis est, sagittam e corpore extrahi, sed plaga quoque a sagitta inflicta sananda est. Sic ab anima nostra per pœnitentiam culpa amota, necesse est ad plagam & reliquias peccati, curam adhiberi. Itaque pœnam temporalem sponte sumimus de nobis ipsis in hoc mundo, ne in æternum damnemur. Nam si nos ipsos dijudicemus, non utique judicemur a Domino. Unde & meritoria dicimus hæc opera vitæ æternæ, quatenus cum Spiritus Sancti gratia juncta sunt. Joan. 4. Aqua, quam ego dabo ei, fiet in eo fons aquæ salientis in vitam æternam.

Esse autem bona opera, meritoria, tam spiritualium, quam corporalium bonorum, sensus ipse communis docet, & ea fuit semper opinio in Ecclesia Catholica. Quamvis enim ex propriis viribus nostris sine Dei gratia nihil valeamus, sed Deus det nobis velle & perficere pro sua voluntate, & sint omnes justitiæ nostræ (si cum Dei justitia comparantur) tanquam immundiciæ: & cum fecerimus omnia, quæ præcepta sunt nobis, (a) necesse sit fateri, quod servi inutiles sumus, quod ea tantum, quæ debuimus facere, fecimus: nec condignæ (b) sint pœnæ hujus mundi ad futuram gloriam, quæ revelabitur in nobis: multaque alia adferantur contra

hanc doctrinam: tamen adeo multa extant testimonia Sacrae Scripturae in contrarium, ut necesse sit cum B. Augustino (c) sentire, quod quando Deus opera nostra remunerat, tunc sua dona coronat. Quapropter soli Deo debetur gloria. Si quid quoque nobis propter opera nostra confert boni Deus, vel temporalis, vel spiritualis, hoc ex gratia sua & mera liberalitate confert, non ex obligatione alia, quam quod ita promiserit. Quia ex doctrina fidem nostram, & spem, & charitatem, bene agendo confirmamus, & animum mirum in modum consolamur, & quietum reddimus, scientes, Deum fidelem esse in verbis suis, & justum in omnibus operibus suis. Gratia quoque Dei, qua opera nostra ornata sunt, & ex qua procedunt, vita æterna est. Hic est fons ille aquæ vivæ salientis in vitam æternam, uti diximus.

Quare non solum meritoria sunt apud Deum nostra opera in fide & charitate facta: sed cum spe mercedis & præmii fieri possunt ab homine: quanquam non prima, sed secunda intentione. Prius enim ad honorem Dei omnia agere debemus, sive manducantes, sive bibentes, ut docet Apostolus. (d) Hanc expectat fidelis, non tanquam servus: servus enim non manet in domo in æternum, sed tanquam filius & hæres, qui in timore salutem suam operatur, ne a paterna gratia effluat. Servus temporalem mercedem ex officio suo expectat, vel certe ex inobedientia plagas & verbera: gratiæ herilis non adeo cupidus. Idcirco Theologi meriti duplicem rationem ponunt. Aliud enim vocant de condigno, aliud de congruo. Et in illo quidem justitiæ intelligunt, quasi commutativæ, exactam rationem. Et hoc modo indignæ pœnæ nostræ sunt: nec quicquam hominum sic meretur apud Deum. De congruo autem mereamur: quia Deus liberalis est, & se ipsum negare non potest, qui mercedem pro bonis operibus promittit.

Loca Scripturae, quæ ad hanc rem faciunt, ut in promptu habeat Curatus, si opus fuerit, aliqua afferamus.

Abundate in omni opere bono, scientes, quod labor vester non est inanis in Domino. Non enim injustus est Deus, ut obliviscatur operis vestri. 1. Corin. 15.

Matth. 10. Quicumque potum dederit uni ex minimis istis, calicem aquæ frigida tantum in nomine discipuli, amen dico vobis, non perdet mercedem suam.

16. Filius hominis venturus est in gloria Patris sui cum Angelis: & tunc reddet unicuique secundum opera ejus.

(a) Luc. 17.

(b) 1. Cor. 3. Philip. 2.

(c) Ad Sextum Presb.

(d) 1. Cor. 10.



25. Venite Benedicti, &c. Esurivi enim; & dedistis mihi, &c.

Act. 10. De Cornelio dicitur, quod ascenderunt orationes ejus & eleemosinæ in memoriam in conspectu Dei.

Matth. 6. Docet Dominus orare non in publico, sed in abscondito, ut Pater, qui videt, reddat tibi.

7. Qui facit voluntatem Patris mei, ipse intrabit in regnum cælorum.

5. Beati misericordes, quoniam ipsi misericordiam consequentur. Gaudete & exultate, quoniam merces vestra copiosa est in cælis.

19. Sunt, qui se castraverunt propter regnum Dei. Et omnis, qui reliquerit patrem, aut matrem, &c. centuplum accipiet, & vitam æternam possidebit.

Si vis ad vitam ingredi, serva mandata.

Rom. 2. Gloria & honor omni operanti bonum, &c. Qui reddet unicuique secundum opera sua.

Phil. 2. Cum metu & tremore, vestram operamini salutem.

2. Tim. 4. Bonum certamen certavi, cursum consummavi, fidem servavi. In reliquo reposita est mihi corona justitiæ, quam reddet mihi Dominus in illa die, iustus Judex.

Heb. 6. Nolite amittere confidentiam vestram, quæ magnam habet remunerationem.

10. Ut facientes voluntatem Dei, reportetis repromissionem.

Jacob. 1. Si permanferit in lege, &c. Factor operis, &c.

Jacob. 2. Videns, quod ex operibus justificatur homo?

2. Pet. 1. Hæc si vobis adsunt, non vacuos constituent vos in Domini cognitione.

Psal. 119. Inclinaui cor meum ad faciendas justificationes tuas propter retributionem.

Psal. 7. Secundum puritatem manuum mearum retribuet mihi.

Psal. 18. Servus tuus custodit ea, & in custodiendis illis retributio multa.

Ezech. 8. Justitia iusti super eum, & impietas impii super eum. In justitia, quam operatus est, viver.

Daniel. Peccata tua eleemosynis redime. Sed hæc sufficiant.

Cum ergo omne, quod est in mundo,

sit vel concupiscentia carnis, vel concupiscentia oculorum, vel superbia vitæ: ad cuiuscunque peccati extirpandas radices tria inveniuntur opera aptissima, *Oratio, Jejunium, & Eleemosyna*. Nam bona, quæ concupiscimus, vel sunt animi, vel corporis, vel (ut loquuntur) fortunæ, id est, commodorum externorum. Contra carnis petulantiam medicina est jejunium. Contra superbiam, Oratio. Contra pleonexiam Eleemosyna. Præterea si eos etiam, qui peccatis nostris offenduntur, spectemus: Deum oratione placabimus: proximo eleemosyna satisficiemus: nos ipsos jejunio castigabimus. De his ergo paucis jam dicendum est: & primum de Jejunio.

### De JEJUNIO.

**J**ejunii nomen parum in usu fuit Scriptoribus prophanis: ideo non mirum, si aliqui falluntur, idem existimantes Jejunium, quod sobrietatem. Sed potest quidem sobrius quis esse, qui tamen non erit jejunus.

Propter multas causas, & gravissimas, Ecclesia præcipit jejunari. Primo enim peccatorum veniam per jejunia nos castigantes meremur. Si nos ipsos [inquit (e) Apostolus] judicaremus, non utique judicemur. Et apud Joëlem (f) Dominus: Convertimini ad me in toto corde vestro, in jejunio, & fletu, & planctu, &c.

Secundo prodest ad mortificationem carnis, ne peccato obediamus: sicut Paulus [g] ait, Castigo corpus meum, & in servitutem redigo, ne, cum aliis prædicavero, ipse reprobus efficiar.

Tertio, ut mens a desideriis carnalibus libera ad Deum facilius eleveatur: & obtineat, quæ petierit. Sic (h) Daniel per jejunium meruit exaudiri.

Quarto, ut nostra parcimonia pauperum necessitatibus subveniamus. Bona est oratio cum jejunio & eleemosyna, quam congregare Thesaurus. Tobia 12.

Fit etiam naturali quodam modo, ut solennitates Festorum, quas læti agere debemus, ut Paschæ, & aliorum, post ipsa jejunia agamus multo lætiores.

Itaque Apostoli nihil pene arduum, & sanctum sine hujus sanctæ virtutis exercitio auspiciari leguntur. Cum jejunio dimiserunt Paulum & Barnabam: (i) Paulus & Barnabas cum ordinassent Presbyteros Lystris, & Lycaonia: & Paulus de se loquitur [k], in fame, & siti, & jejniis multis. Centurio-

(e) 1. Cor. 8.

(i) Act. 14.

(f) Joel. 2.

(h) 2. Cor. 11.

(g) 1. Cor. 9.

(b) Dan. 12.

nis jejunia leguntur in Actis (l) Apostolorum. Petrum Apostolum frequenter jejunasse, & baptizatis a se jejunare triduo præcepisse, tradit S. Clemens. Non est ergo sola sobrietas jejunium.

Magnum & generale jejunium D. Augustinus vocat, abstinere ab iniquitatibus, & illicitis voluptatibus.

Sed Ecclesiasticum, de quo loquimur, est abstinencia ad tempus a licitis cibis: non quidem aversione creaturæ Dei, quæ bona est, si cum gratiarum actione sumatur: sed pietatis causa, ad domandam carnem, ut spiritui subjiciatur: ad fructus dignos penitentiae præstandos: ad exercendam obedientiam: ad Dei gratiam demum consequendam. Non enim dixit Apostolus, nihil rejiciendum simpliciter: sed quod cum gratiarum actione sumitur. Quod si non sumatur cum gratiarum actione, & obedientia, rejiciendum est.

Abstinencia carniū diebus Veneris & Sabbati quoddam est jejunium, quod Tertullianus vocat portionale. Abstinencia omnis cibi usque ad horam meridianam in Quadragesima, Quatuor temporibus, & Vigiliis solennitatum, majus est jejunium. Quale faciebat Daniel, etiam majus est jejunium.

Majus est illud Heliae. Et majus illud Salvatoris, quadraginta dierum spatio nec edentis, nec bibentis. Sed hoc Christi jejunium supra vires nostras imitari non quimus. Alia nihil prohibet. Et nos nimium delicatos, quos neque Joannis Baptistæ abstinencia, nec Patrum εὐσφοδῶν (id est, aridi cibi) nec Græcorum vigiliarum exempla movent. Sed disputationem de jejunio majorem, contra Centuriatores habes lib. 5. Surriani.

## DE ORATIONE ET DEVOTIONE.

**A** DEO multi hucusque de Oratione scripserunt veteres ac novi Authores; ut merito dubitare debeamus, num præster nihil de ea hic scribere, ne minus pauca narrando, expectationem piorum hominum fallamus, cum multa dici possent: an potius, pauca referre, ne nihil habeant ii, in quo se exerceant, quibus aliorum non vacat legere monumenta. Sed bene est. Nam labor, quem in compilando libro hoc suscepimus, eo respicit, ut summa capita tantum tradamus, & præcipuæ doctrinæ Ecclesiasticæ.

Quam vero necesse sit, ut Pastores tradant orandi formam atque doctrinam; & cura salutis ovium, & Christi, atque Apostolorum exempla, atque lex, suadere debent. Obsessis enim nobis undique tot periculis, quæ hostes assidui intentant, [Diabolus, Caro, & Mundus] in oratione sola salutem positam habemus. Propterea Dominus noster Jesus Christus, suos, quos diligebat, in angustia animi constitutos hortatur; Vigilate & orate, ut non intretis in tentationem (m). Inter opera autem meritoria gratiæ & vitæ æternæ: quid majus? quid præstantius, quam oratio? Est oratio Dei cultus maxime proprius, & religionis actus. Per orationem memoria tenet opera Christi. Oratione accenditur Dei amor, vitæque hujus contemptus roboratur. Orationis quasi lumine, mens humana illustratur; & ad adorandam Majestatem DEI Omnipotentis tanquam manu ducitur. Hic Fides, hic Spes, Charitas, timor Domini, penitentia peccatorum, gratiarum actio; notitia sui ipsius, voluptatum fastidium, propositum vitæ melioris, desiderium etiam patienti omnia pro Christo. Quas non in oratione invenias summas, atque heroicas virtutes: si hominem deificat, & ob consuetudinem cum Deo, Deo similem facit? Sicut ex doctorum & sapientum, atque elegantium virorum familiaritate, etiam rustici & rudes elegantes in sermone, victuque evadunt: & quod natura negavit, consuetudo docet: sic qui frequenter orat, quia cum Deo frequenter est & loquitur, Deique utitur quasi familiaritate: unus spiritus efficitur cum eo. Nam qui adheret Domino, (inquit (n) Apostolus) unus spiritus est.

Adde, quod oratio machinæ instar attractricis est, ad impetrandum omnia, quæ cupimus. Nam si Deus natura benignus est, ut credimus, & bonorum omnium largitor liberalis: accedentem ad se, paratum agere, & optantem quæcunque jussit: confitentem quoque de infirmitate sua, & Dei Majestatem suspicientem: ad fores Divinæ pietatis prostratum, cum perseverantia clamentem, & cum Chanaanæ petentem aliquid de micis, quæ cadunt de mensa largitatis ejus: nonne exaudiet? Si cum inimici essemus, pro nobis mortuus est: quid negaturus est iis, quos justificavit? Si Patres etiam mali, norunt bona dare filiis suis: quidni Pater celestis? Si Judices iniqui, victi importunitate, causam pauperis agnoscunt: quid non faciet Deus, cui grata est justitia? Oculi Domini super justos, & aures ejus ad preces eorum. Porro autem de voluptate, quæ in ora-

(l) Act. 10.

(m) Marc. 14. Luc. 21.

(n) 1. Cor. 6.

oratione est, lege D. Aug. in Solilo. c. 25. & Bernardum in cant. serm. 35. & ad Eugenium lib. 1.

Supereſt Satisfactio. Siquidem proprietates hæc causa est, ut de oratione agamus hoc loco. Sicut peccata, quæ in corpore contraximus, jejuniis vindicamus, & aliis laboribus: quæ contra charitatem proximi, restituit elemosyna: sic quod mente & animo in Deum deliquimus, oratione jubemur reparare. Estque non aliter Oratio fructus animæ Deo Domino debitus: quam corporis est jejunium, & opus elemosyna. Jubemur enim Deum, a quo omnia habemus, ex toto corde, totis viribus, ex tota substantia honorare. Jubemur Deo gratias agere; fidem apud eum testari, effundere spem coram eo, & charitatem charitate demereri. Oratio omnia hæc facit. Sed hæc sufficiant. Qui plura desiderat, legat Bonaventuram.

Teneamus ergo orationem opus esse, & meritorium, & satisfactorium, & imperatorium.

Sed dicet aliquis: Quid vocas orationem? plerique enim elevationem mentis in Deum esse tradunt. An non orationes dicuntur illæ Sacerdotum, quæ fiunt in Ecclesiis? Cum quis absque animi attentione dicit Orationem Dominicam, an non orat? Respondeo duplicem esse; & eam quidem, quæ mente fit ad obtinendum aliquid a Deo, maxime hanc esse. Quæ vero sola voce absque ulla attentione, in actu vel habitu, a Propheta reprehenditur. Populus, inquit, hic labiis me honorat, cor eorum autem longe est a me.

Ergo ut cum fructu oremus, multa requiruntur. Necessè est primum, ex corde preces prodeant: non ex labiis tantum, ut videantur ab hominibus. Hoc certe hypocritæ faciunt. Præcipiebat Dominus, Matth. 6. Tu autem cum oraveris, intra in cubiculum tuum, & clauso ostio ora Patrem tuum in abscondito. Non utique prohibet orationes publicas, quæ in templo fiebant: sed ut cum fructu oremus, excludi cogitationes vanas jubet, quæ attentionem distrahant. His fores cordis nostri occludi volebat. In conclavi soli cum solo loquamur. Si ergo in foro, vel in via, nihil aliud, quam Deum cogitemus: in cubiculo profecto orare dicemur.

Cæterum, quia imbecillitas humana non sustinet longam attentionem in actu: ne abjiciamus propterea spem. Habitualis omnia supplebit. Eam ob rem Ecclesia Catholica Horas Canonicas inchoat hoc modo: *Deus in adjutorium meum intende.* Et Ecclesiast. 18. Ante orationem præpara animam tuam: &

noli esse quasi homo, qui tentat Deum. Hujus nulla potest tam brevis esse oratio, quin de multiloquio contemnatur. Longa vel brevis non ex verborum numero, sed ex devotione & affectu judicatur. Christus prolixè oravit: imo in oratione pernoctavit. Idem tamen ait: Cum oratis, nolite multum loqui. Fratres in Ægypto, frequentes potius, quam longas faciebant orationes, ne attentio in longis deficeret. Ut enim corporalis cibus tunc maxime prodest, cum famines præcedit: sic oratio cum devotio accedit. In Ecclesia post Psalmos, Lectiones in omnibus horis adhibemus: post Lectiones, chori cantus; post hæc tandem orationes, & gratiarum actiones: neque has quidem absque præfatione ad attentionem, cum Sacerdos ait, Dominus vobiscum, Oremus.

Cum igitur hæc ita sint, dicendum aliquid etiam nobis est de Devotione.

Est devotio propensio quædam voluntatis, ad se, suæque omnia offerendum in Divino cultu. Hæc ex oratione & consideratione generatur. Docet enim experientia, ex oratione profundiore prodire hominem lætum, alacremque; paratum ad omnia agenda, vel subeunda, etiam extrema propter Deum. Unde devotionem possis etiam promptitudinem dicere, atque alacritatem ad bene agendum. Contemplationis autem (sive considerationis) duo proponuntur objecta opposita, in quæ mentis acies fixa sæpius, virtutem hanc parit, quam vocamus devotionem. Unum ex parte Dei est, alterum ex nostra. Et in illo quidem Deum intuemur per se, vel ejus beneficia collata nobis. In nobis autem mæsti consideramus imperfectiones nostras.

In Deo itaque primo se offerunt Bonitas ejus immentæ, Misericordia, Justitia, Charitas, Claritas, Pulchritudo, Potentia, Sapientia, Æternitas, Perfectio, Gloria, atque alia attributa, & notiones: quibus te gaudere pium est. Et beatus sane est, qui ex animo dicere possit: *O le grand bien, que je possède, veu que mon Dieu possède une gloire immense & tant de bien! car je le tiens pour rien: comme je l'aime plus que moy mesme.*

Deinde se offerunt beneficia, quæ nobis confert: veluti Creatio, Redemptio, Passioque Christi, Baptismus, Corporis & Sanguinis mysterium, inspirationes sanctæ, & vocationes assiduæ; Longanimitas & Patientia erga delicta nostra: quod nos a periculis aliquando imminentibus præservavit: quod ab angustiis animi, & magnis solitudinibus præter spem liberavit: quod Angelorum nos custodiæ nobilissimæ commiserunt. Atque hæc quidem & similia ex Deo considerationis objecta sunt.

Ex



Ex nobis autem unum est, Nosce teipsum, veluti considerare miseriam nostram, imperfectiones animi & corporis. Incolatum nostrum procul a Patria cœlesti: delicta tam præterita, quam præsentia: promptitudinem ac facilitatem peccandi: impotentiam animi: corporis fœdos motus. Perpendimus appetitus nostri perversitatem, qui non tam moveri solemus commodis vel incommodis spiritualibus, quam corporalibus: virtutum tantam inopiam, & vitiorum copiam; ut tanquam nullo, vel homine, vel Angelo spectante, vivamus. Adde his vulnera liberi arbitrii: quæ sunt cæcitas, debilitas, concupiscentia. Quantus in iudicio itupor & in sensu? quod perinde, ac si nihil sentiremus, nihil horrescimus fœtores peccati: non cernimus tenebras ignorantiae: non gustamus acerbiter Divinae indignationis: nec ad vocem Pastoris aures adhibemus, nos admonentis assidue, & ad ostium cordis nostri pulsantis, ut expurgiscamur.

Et quod maxime meditatione dignum est, quod Dei inimicitias gratiæ prætulerimus peccando: aliumque Deum in locum ejus collocando: ventrem scilicet, vel opes, vel honores, vel delicias hujus mundi.

Meditationes ergo hæ, cum oratione conjunctæ, devotionem pariunt, matrem virtutum maximarum. In his profecto exerceri convenit Religiosos. Non in curis sæculi, [quia se a sæculo sequestrarunt] neque in jactantia generis: qui cuculla, & habitu universo, se alios esse profitentur, quam nobiles. Neque in sapientia: quia pro stultis [imo pro abjectamentis hujus mundi] haberi velle se promittunt. Aut certe fateantur apostatiam: quia fidem & professionem, suam fefellerunt. Existiment indignum esse nomine religiosi, vel spiritualis, qui vel semel tantum in die non meditantur. Sed hæc ad Regulares. Clerici autem alii, qui quotidie tenentur ad Horas, (ne sine fructu cantent) meditentur quoque ipsi aliquid in singulis Horis. Sanctæ quoque mulieres, [quando ad Rosarium preces multiplicant] meminerint aliquid meditari sanctum oportere, quo devotio augeatur in eis. Denique quisquis ad perfectionem vitæ spiritualis pervenire desiderat, si singuli diebus horam aliquam selectam det contemplationi: & in eo consilio persistet aliquo tempore: fiet absque dubio, ut cum consolationis quadam singulari suavitate, mortificatis perturbationibus omnibus, in virum perfectum evadat, Angelorum vita cœlesti fruens jam in hoc mortali mundo. Nam consideratio clavis est cœli & inferni. Hic pœnas damnatorum patefaciendo, timorem Dei docet: illic gloriam beatorum contemplantes ad brachium

æternæ retributionis agit, atque stimulat. Meditatio ergo amorem & timorem gignit. Amorem ex bonitate Dei: timorem ex periculo damnationis. Et utrumque præstat, ut in vitæ innocentia perseveremus. Ne absit igitur orationi, nec Sacramentis, nec Sacrae Læctioni, nec Psalmodiæ devotio. Et puta, quod ob hanc rem pro foribus Ecclesiæ aqua benedicta proposita est: nimirum ut per penitentiam cogitemus illico de peccatis nostris, antequam ad orandum accedamus. Sed de partibus Orationis supra in *Sanctificetur nomen tuum.*

Devotionis internæ signa sunt & effecta, elevatio manuum, pectoris percussio: & honestus omnis, ac decorus habitus, gestusque corporis supplicantis.

Ex his, quæ dicta sunt, responde ad illas quæstiones: Quis orandus sit, & quo tempore orandum, quo loco, quo modo, qua de causa.

#### *Quis orandus.*

Cum omne bonum a Deo sit: ad Deum tanquam bonorum omnium datorem, dirigenda oratio nostra est primo. Nam licet natura sit immutabilis Dei, nec prece nostra moveri possit a natura sua: disponit tamen nos oratio: & ille præveniendo aspirat. Quia, quid oremus, nescimus: sed Spiritus Sanctus docet nos, ut Apostolus Rom. 8. Quare oratio disponit nos ad hoc, ut dona Dei recipiamus & gratiam. Psalm. 80. Dilata os tuum, & implebo illud. Quidam funi nautico compararunt. Dum namque littori alligatum funem ad se trahunt nautæ, ipsi ad litus appellunt, littoris columna stante immota.

Non ergo orandi Sancti, [dicit aliquis] ne Deo honorem detrahamus. Unde hæc conclusio? Nos gratiam & dona a Deo impetramus sæpe per Sanctos. Si quia Deus immutabilis est, ideo frustra Sanctos interpellamus: frustra etiam Deum oremus, quia semper immutabilis est. Absit blasphemia. Sancti Dei amici sunt. Multa in illorum gratiam, & honorem, facta tenet Ecclesia; & fieri etiam quotidie videmus. Gratiam & gloriam dabit Dominus. Dare quoque potuit vestibis & ossibus Sanctorum, ut tacta morbos sanarent, & dæmones expellerent applicata. Exemplis hujus rei plena est historia. Deum ergo orando dicimus, *Miserebere nobis*: sed Sanctos, *Ora pro nobis*: & aliquando, ut misericordia moti intercedant pro nobis. Ipsi quoque orationes nostras Deo repræsentant nobiscum orantes. Apocalyp. 8. Data sunt Angelo incensa multa, ut daret de orationibus Sanctorum: & ascendit fumus incensorum de orationibus Sancto-

rum de manu Angeli coram Deo. Si ergo orans coram Sancto aliquo Orationem Dominicam dixeris: puta te a Sancto petere, ut orationem tuam Deo ille offerat, & repræsentet.

#### *Quo tempore.*

Quæris adhuc, quo tempore orandum. Semper: sicut docuerunt Christus & Apostoli. Ope Divina semper indigemus: & cum sit oratio Dei cultus veræ patriæ, dicebat Psalmographus, Benedicam Dominum in omni tempore: semper laus ejus in ore meo. Et Paulus 1. Corinth. 5. Semper gaudere; sine intermissione orate, id est, beatam vitam sine intermissione desiderate. Sic interpretatur D. Augustinus Epistola 121., ubi addit: Sed ideo ab aliis curis & negotiis, quibus desiderium quodammodo tepescit, certis horis ad negotium orandi mentem revocamus: verbis orationis nos ipsos admonentes in id, quod desideramus intendere: ne quod tepescere ceperat, omnino frigescat: & ne penitus extinguatur, nisi crebrius inflammetur. Hæc ille. Sic diebus festis & jejuniorum potius ad orandum convocat suos Ecclesia; & Horas Canonicas instituit: in quibus; tanquam ad iudicium) causam dicturi accedimus, & vitæ nostræ rationem reddituri.

#### *Quo loco.*

Nec aliter quidem respondendum est de loco. Nam licet Deus in omni loco orantes audiat, qui omnia complet: distinguendum tamen est, num de privata quæris oratione, an de publica. Hanc in loco orationi dedicato fieri convenit & communi. Nam & Christus & Apostoli, in Templum ascendebant oraturi. Privata autem facta in Ecclesia ideo commendatur, quod & exemplo aliorum deprecantium augetur devotio, & aspectu Imaginum, Reliquiarum, & Corporis Domini præsentia, & Spiritus Sancti assistentis gratia, ut S. Maximus docet in lib. de Ecclesiastica Mystagogia. In Templo quoque rariora occurrunt rerum mundanarum objecta. Propterea Domus Orationis vocatur. Nullus tamen locus est tam publicus, nec forum tam frequens, nec tempus tam occupatum, nec occupatio tam insolens: in quibus nequeas, si velis, mentem elevare ad Deum, & de Deo, rebusque sacris meditari. Quod est oratio.

#### *Qua lingua.*

Idem de idiomate, vel lingua dicendum est. Novit enim Deus, quæ postulare decernimus, antequam postulemus: imo etiam antequam cogitemus. Quare intelli-

gentia verborum non sic necessaria est, quasi ad persuadendum Deo: sed intentio requiritur. Quamquam augetur hæc sæpenumero intelligentia. Et nisi satietatem sane parent idiotis, & contemptum, lingua vernacula sæpius repetita: facile pateremur utramque, & Dominicam *Pater noster*, & Salutationem, *Ave Maria*, in eandem versa tradi: quoniam a plurimis expetuntur. Sed religio est. Tanta enim debetur his reverentia atque religio, (cum propter mysteriorum copiam, tum propter authoris dignitatem) ut in ipsa eadem lingua pure, in qua primum Ecclesiæ nostræ Latine tradita sunt, nisi paraphrastice in his meditemur, usque in finem sæculi retinenda putemus: ne quid novitas verborum, afferat, quod pietas antiquæ traditionis non admittat. Nam neque a Deo vocalis tantum oratio intelligitur: quin imo Anna, 1. Reg. 1. Exaudiebatur, cum labia solum moveret. Orandum namque est in spiritu, & veritate, ut tradidit (o) Salvator noster Samaritanæ: & pauper citharædus ad fores nostras mendicans: sono sambucæ petit eleemosynam, & intelligitur.

#### *Quo gestu.*

Gestum, atque habitum corporis devotio præscribit. Genuflexio tamen maxime propria videtur ex eo, quod patriæ opus sit oratio. Scriptum est enim, [p] Vivo ego, dicit Dominus, Mihi flectetur omne genu, & omnis lingua confitebitur Deo. Philip. 2. In nomine Jesu omne genu flectatur. Sic de S. Jacobo fratre Domini legitur, ob assiduum orandi usum, genua illi in camelorum speciem occalluisse: Dominus tamen aliquando humi prostratus oravit: aliquando oculis in cælum sublati: aliquando & manibus. Publicanus apud Lucam stans a longe, nec oculos levabat ad cælum, sed percutiebat pectus, dicens: Propitius esto. Daniel (q) in jejunio, & sacco, & cinere, humiliatus, faciem vertebat ad Dominum. David (r) decumbens, lachrymis rigabat stratum suum & lectum. Helias sedens, pluviam orando (s) impetravit. Et Ecclesiæ ritu solemni post Dominicam Resurrectionem, & in omnibus diebus Dominicis, stantes oramus, traditione Patrum vetustissima: quia tempus illud est lætitiæ. Sed levamus in cælum manus, ne confundamur propter opera nostra: auxilium & misericordiam implorantes. Nam manus junctæ, & in cælum extensæ, magnæ devotionis testes atque humilitatis fiunt: separatæ palmæ fiduciæ, speciem præbent. Hoc gestu Christum in Cruce repræsentans canit antistes hym-

(o) Joan. 4.  
(s) 3. Reg. 17.

(p) Rom. 14.

(q) Dan. 9.

(r) Psalm. 6.

hymnum illum in Missa, quem dicimus præfationem. Tundere autem quid est (inquit [†] Augustinus) nisi arguere, quod latet in peccatore: & evidenti pulsū occultum castigare peccatum? [u] Ad Orientem convertimur, unde cælum surgit, ut admoneatur animus ad naturam excellentiorem se convertere, id est, ad Dominum.

#### Qualitas.

Superest qualitas maxime requisita: ut cum fiducia fiat obtinendi, quæ poscimus: (Matth. 21. Omnia quæcunque petieritis credentes in oratione, accipietis) vel certe aliquid aliud magis necessarium nobis. Quæ res facit, ut in oratione perseveretur. Nam si non statim annuit Deus: in causa aliquando est, quod injuste petamus, aliquando probare vult patientiam nostram: aliquando exercere nos contra ignaviam. Et sicut docet B. Augustin. quædam negat propitius Deus, quæ concedit iratus.

#### Causa.

Causa, si simpliciter bona est, simpliciter postuletur: ut gloria Dei, peccatorum remissio, Dei amor, fidei incrementum, & similia. Hæc enim Deo grata sunt. 1. Joan. 5. Hæc est fiducia, quam habemus ad Deum: quia quodcunque petierimus secundum voluntatem ejus, audit nos. Si vero indifferens, (ut sunt sanitas, divitiæ, scientia, aeris serenitas) cum conditione petenda est: sicut Christus oravit, Matth. 26. Pater, si possibile est, transeat a me calix iste. Cumque nihil optandum sit, quod Deo gratum non sit: ita nihil petendum, nisi quod Deus velit. Dic: Domine Deus, da mihi, quod vis.

Ut ergo exaudiamur, Oremus cum humilitate: quia oratio humiliantis se nubes penetrabit: Ecclesiast. 37. Oremus cum fide, nihil hæsitantes: quia, qui hæsitat, similis est fluctui maris. Jacob. 1. Oremus cum spe, credendo quod accipiemus. Marc. 2. Oremus cum Charitate: quia qui obturat aurem suam ad clamorem pauperis, (x) & ipse orabit, & non exaudietur. Sine operibus Charitatis arida dicitur oratio a Cypriano. Bona est oratio cum jejuniis & eleemosyna: Tob. 12. Oremus sine ira, & disceptatione: impedit enim ira charitatem. Oremus cum perseverantia, qua etiam mali vinci solent. Luc. 18. Et poeniteat nos peccatorum: quia qui ad iniquitatem respicit, non exaudietur. Psal. 63. Esa. 1. Job. 35. 1. Joan. 3.

Cæterum orandi & meditandi exercitationem non parum utilem discere poteris ex preculis, & entologiis, & aliis operibus Ludo.

Blosii, & Petri de Alcantara, & de Granata Hispanorum, quas horis Beatæ Mariæ nuper impressis nos adjecimus.

### STATUTUM I.

**J**uxta Patrum Statuta prohibemus omnibus Curatis, Presbyteris, atque aliis in Ordine Ecclesiastico constitutis, sub gravi poena arbitraria: ne in Ecclesia novis orationibus, aut collectis a se, vel ab alio excogitatis, & inventis, ullo modo utantur. (y) Sed his solum, quas Prædecessores tradiderunt, vel quæ ab illis, vel a Nobis probatæ fuerint, & admittæ: ne sub specie pietatis, contra fidem Catholicam aliquid inducatur in Ecclesiam Dei.

### DE ROSARIO, SIVE CORONA B. MARIE.

**R**osarium B. Mariæ, ejusque usum, qui ad pie meditandum inventus fuit, ignorari a Clericis non decet. Turpe enim est, eos latere, quod ex plebe multi sciunt. Maxime nunc, qui in ea tempora incidimus, quando pietatis omnia exercitia a carnalibus hominibus irridentur. Sed carnalis homo non percipit ea, quæ sunt Spiritus Dei. Rosarium ergo nostrum ex baccis constat pluribus, in modum coronæ consertis, atque ordinatis. Et harum quidem quinquaginta minores bacculæ per decades connexæ sunt, aliis quinque majusculis distinctæ. Hinc coronæ nomen apud multas gentes Galli vocant *Chapellet*. Triplex quidem fingitur hæc corona: una frondium virentium, atque lætantium: quales olim plectebantur bene meritis, ex lauro, vel hedera, vel myrto. Altera Spinarum, molestior erat: veluti civica ex pino, junipero, quercu. Tertia est rosarum, & liliorum: plena deliciarum, & gloriæ. Hinc nomen Rosarii dictum est.

Ex tribus hisce coronis (si jungantur simul) fient xv. decades bacularum, hoc est, xl. globuli. Qui numerus, cum sit idem cum numero Psalmorum in Psalterio David, formam orandi in Rosario, dicere solemus, Psalterium Beatæ Mariæ.

Ut igitur numerorum hujusmodi rationem teneas: quamquam meditationis materia generaliter, & proprie in mysteriis invenia-

K 3

venia-

(†) Aug. de ver. Domini, ser. 8. & hom. 50. c. 8.

(u) Idem de ser. Domini, c. 9.

(x) Prover. 12.

(y) Conc. Mileu. c. 12.



veniat, quæ continentur in Symbolo fidei, quæ & a piis atque spiritualibus hominibus ad usum Rosarii, sæpe applicantur: tamen Virgini Sacræ devoti, quales plerique sunt Christiani, sciant pro xv. decadibus, xv. proponi nobis cogitanda mytheria, ex quibus Dei Mater Benedicta varie affecta diversis temporibus fuit, præter alia. Quinquæ læta sunt. Hæc repræsentantur per frondium coronam. Alia quinque tristia, quæ per alteram. Alia gloriosa, quæ per rosas, & flores.

Itaque dicendo semel *Pater noster*, & decies *Ave Maria*, interea dum verba hæc, os, linguaue tua, voce submissa, formant, (sive id continenter, sive intermisce fiat) cogitato mytherium Annunciationis: quando Gabriel Angelus salutavit Virginem Mariam. Considera gaudium illud Mariæ: Et cum ea gaude etiam tu, si eam amas. Gratias quoque Deo age de beneficio nobis collato per Incarnationem Filii Dei. Atque hoc quidem est primum mytherium ex jucundis. Alterum est Visitationis. In hoc secundo recollecte sancta illa colloquia, quæ inter se miscebant Maria & Elizabeth. Dicebat hæc: Benedicta tu inter mulieres. Et Maria canebat: Magnificat anima mea Dominum, &c. Tertium est, Nativitatis Domini, ubi se offerunt contemplanda multa: ut erga infantem natum officia Angelorum, & Joseph: Pastorum colloquia, & concursus: cantus gloriæ cœlestes: paupertas tugurii: Magorum adventus, & alia. Quartum est, Præsentationis infantis in Templo: quando senex ille Sanctus Simeon, accipiens puerum in ulnas suas, cecinit ore prophetico: Nunc dimittis servum tuum, Domine, &c. Quintum, quando Maria filium suum, xii. annos natum, invenit in Templo disputantem cum legis Doctoribus. Hæc igitur quinque vocantur jucunda mytheria. In quibus comprehendes reliqua vitæ Christi.

Alia quinque Passionem Christi habent, & meroris plena sunt. Primum quidem, quando Dominus in horto Oliveti pernoctans in oratione, antequam caperetur, præ dolore tristitiaque sudorem emittebat sanguinis decurrentis usque ad terram. Secundum autem, quando flagellabatur ab impiis satellitibus & Judæis. Tertium, quando spinis coronantes caput ejus, atque arundine percutientes: faciemque colaphis ac sputis defraudantes, Ministri Sacerdotum, omnis generis probra excogitabant, ut Filium Dei Omnipotentis gloriosum, populo irridendum, contemnendumque redderent, atque exhiberent. Quartum, quando bajulans sibi Crucem ductus fuit Agnus ille mansuetus extra civitatem: cui in via occurrerunt mu-

lieres flentes ac lamentantes: inter quas creditur Mater fuisse, justo affecta dolore. Quintum, quando in monte Calvariae crucifixus est, mortuus, & sepultus. Hic meditari licet, quanta fuit peccati primi gravitas, quod tali supplicio oportuit expiari: quantaque ingratitude nostra, quos Dei charitas non movet. Atque deinceps de peccatis nostris, de inferno, de judicio, & suppliciis, quæ diabolo & peccatoribus parata sunt, licebit cogitare aliquid ad salutem.

Alia quinque Gloriosa dicimus: atque ideo tanquam ex rosis plectimus hanc coronam. Inter ea primum se offert Resurrectio Christi gloriosa. Deinde, Ascensio. Tertio, missio Spiritus Sancti, in die Pentecostes. Quarto, Virginis Beatæ Assumptio. Post omnia denique beatitudo illa suprema, tam ipsius Virginis, quam Sanctorum omnium, in vita æterna.

Formam hanc, orandi simul & meditando acceptam ferimus Beato Dominico: qui Vir Sanctissimus, quantum valeret assidua oratio cum meditatione, perpendens; primo loco Orationis Dominicæ, ac Salutationis Angelicæ vices, ordine numerisque distinxit: ut sine satietate posses orando perseverare. Sed ne ore tantum, & non ex corde etiam ista fierent: exempla adjunxit meditationum: quæ ad certum hunc numerum, ordinemque redegit, atque distribuit. Spiritualis hæc exercitatio magni momenti est ad devotionem. Sic enim subsidio sibi sunt, meditatio orationi, & rursus oratio meditationi: ut cum orando mytheria cogitamus, illa cogitando propensius oremus. Juvat vicissitudo temporum, numero hoc verborum commensurata. Orationis autem Dominicæ, atque Salutationis Angelicæ, si verba alicunde assumenda erant, quæ invenias, quam illa, pretiosiora? quæ aptiora? Memoriam natura sua confirmant ordo & numerus: Intellectum ad attentionem excitant verba: consideratio autem beneficiorum Dei, tam multorum, tum charitatem erga Deum accendit, tum etiam amorem erga Matrem ejus gloriosam alit. Qua consolatione animi quæ major esse potest?

Non immerito igitur Pontifices multi Rosarium hoc Indulgentiis donarunt. Nam si librorum multorum lectio, si Imaginum Sanctarum aspectus, si Templorum visitatio, si Reliquiarum veneratio, & aliæ multæ dari occasionem absque Rosariis possunt, quibus humana mens ad pie meditandum induci soleat: nulla tamen sic ubique, semperque in promptu esse potest, atque Rosarium.

Docerunt ergo Curati usum illius: maxime eos, qui literas non norunt: ut Christiani

stiani omnes frequenter orent, & pie meditentur. Erunt hæc veluti alæ duæ, quarum remigio facile evolabimus in cælum.

## DE ELEEMOSYNA.

**N**on diligamus verbo, neque lingua, sed opere & veritate. (2) Nam qui habuerit substantiam hujus mundi, & viderit fratrem suum necesse habere, & clauferit viscera sua ab eo: quomodo charitas Dei manet in eo? (a) Facite vobis amicos de mammona iniquitatis. Jucundus homo, (b) qui miseretur & commodat.

Signum dilectionis, exhibitio est operis. Opera ista charitatis dicuntur Eleemosyna, id est, misericordiae opera. Et alia quidem spiritualia sunt, alia corporalia: utraque septenario numero comprehensa sunt.

Septem opera misericordiae corporalia hoc versu continentur:

*Visito, potio, cibo, redimo, tego, colligo, condo.*

1. Sed D. Basilii primum opus misericordiae statuit, *Pascere esurientem*. Et certe necessitas male suadæ famis, severior est ferro, & ad multa compellit hominem, quæ alias non essent licita.

2. *Potare sitientem*. In quo etiam calix aquæ frigidae ex charitate datus, mercedem habebit.

3. *Vestire nudos*. Ad hoc etiam natura compellimur, cum ob nostræ carnis infirmitatem, nos pudet turpitudinis alienæ. Cum videris nudum, operi eum, (inquit (c) Propheta) & carnem tuam ne despexeris.

4. *Redimere captivos*, præcipue Christianos, quos infidelium sævitia captos detinet: in quo Filium Dei imitatur, nos a servitute diaboli redimentem.

5. *Colligere hospitem*, hoc est, pauperes, & peregrinos hospitio excipere: exemplo magni Patriarchæ Abraham, justi Loth, Raab meretricis. Quod intelligendum, sicut & alia pro qualitate personarum & necessitate, & facultatibus propriis.

6. *Visitare infirmos*: nempe ut eos re & verbo consolemur, & de salute moneamus: quoniam in magna infirmitate sensibus & ratione debilitatis, homo indiget consilio, & consolatione majori.

7. *Sepelire mortuos*, quam sit laudabile ostendit Raphael Archangelus Tobiae 12. & David 1. Reg. 2. & natura ad hoc nos inci-

tat, ut mortuorum corpora religiose condamus. Sed de sepultura & suffragiis pro defunctis infra, in 4. noviss.

## STATUTUM I.

**C**urati hortentur fideles, ut eleemosynis redimant peccata. Nam sicut aqua extinguit ignem, sic eleemosyna resistit peccatis. In imponendis quoque pœnitentiis, eleemosynam commendent, cum oratione & jejunio. Quia oratio cum jejunio, & eleemosyna a morte liberat: & ipsa est, quæ purgat peccata.

## OPERA MISERICORDIÆ Spiritualia.

**C**um duplicis naturæ simus (corporeæ scilicet & spiritualis) omnes illas species charitatis erga proximum bifariam, hoc est, non solum corporaliter, sed spiritualiter implere debemus; si sinceram charitatem præstare volumus, & filii Dei nuncupari. Hæc versiculo continentur:

*Consule, suade, doce, solare, remitte, fer, ora.*

1. Primum ergo, Consilio juva proximum saluari. Si tibi intellectus est, (inquit Sapiens) responde proximo.

2. Doce ignorantem. Qui ad justitiam erudiunt multos, quasi Stellæ fulgebunt in perpetuas æternitates. Daniel 12. vide Jac. 5.

3. Suade, id est, corripe delinquentem. Nam si te audierit, lucratus eris fratrem tuum. Matth. 18. Sed corripe, ut fratrem, & noli quasi inimicum existimare. 2. Thess. 4.

4. Consolare positos in angustia & tribulatione, exemplo Christi. Luc. 4. 2. Cor. 1.

5. Remitte offensam, & acceptam injuriam delinquenti. Christus ita nos admonet: Si dimiseritis hominibus peccata eorum, dimittet & vobis Pater vester cœlestis delicta vestra: Si autem non dimiseritis hominibus, nec Pater vester dimittet vobis peccata vestra. Vide Matth. 6. & Marc. 11. Ephes. 4. Colos. 3. Et Patres in Concilio Carthaginensi quarto, oblationes dissidentium fratrum neque in Sacrario, neque in gazophylacio recipi voluerunt. Qui accipit mysterium unitatis, (inquit B. Aug.) & non tenet vinculum pacis: non mysterium accipit pro se, sed testimonium contra se. Serm. de infant.

6. Fer

(2) 1. Joan. 3.

(a) Luc. 16.

(b) Psal. 111.

(c) Esa. 58.

6. Fer patienter fratris infirmitatem atque imperfectionem. Debemus nos firmiores (inquit Apostolus Rom. 15.) imbecillitates infirmorum sustinere, & non nobis placere. Et Christus Matth. 5. Ego autem dico vobis, non resistere malo: sed si quis te percusserit in maxillam tuam dexteram, præbe illi & alteram.

7. Orate pro persequentibus vos & calumniantibus. Denique benefacere iis, qui oderunt nos, Christus monet Matth. 5. ut simus filii Patris nostri, qui in cælis est. Et exemplo docuit in Cruce, orans Patrem, ut ignosceret iis, a quibus crucifigebatur. Et Stephanus plenus gratia & Spiritu Sancto, & charitate magistrum imitatus est. Act. 7.

### FORMULA CONSOLATIONIS Gallice.

**I**Nter spiritualis officia misericordiae consolatio potissima est. Cum quia sæpissime suscipienda, tum quia alia in se recipit. Idcirco formulam ejus vulgari idiomate accipe, pro negotio commutandam.

Celuy auroit le cœur bien dur, ou le sens bien stupide, qui ne sentiroit en son cœur le desastre, inconvenient au dommage, &c. Car il est grand: pour telle & telle raison, (quas deducet.) Et s'il y a personne qui s'en doive ressentir, ce sera moy, pour telle & telle raison. Mais quand je considere, qu'il n'y a en ce monde que misères & calamitez, & que nostre vie n'est qu'une fumée, ou une petite nuee transportée par les vents en l'air: il faut que je me console. Car il me semble que nous devons toujours estre résolus de n'avoir jamais rien de bien en nostre vie: ains tout mal, tribulations, troubles, agitations, malheur & misere. Par ainsi ne nous esbavrons de chose qui nous advienne.

De sorte qu'à bien considerer n'y a rien plus miserable que la vie de l'homme, si n'estoit l'esperoir qu'il a de la vie eternelle. Je voudrois sçavoir s'il y a homme au monde de bonne souvenance, qui me puisse dire, qu'il ayt passé un jour entier en toute sa vie sans regret, là où nous en passons tant & tant sans joye.

Et ne faut dire, que ceux que l'on reputé bien heureux, le soyent pour cela: be qu'ils diroyent bien autrement s'ils estoient interrogez à part. Ny que ce soit à un ou deux que les grands maux adviennent. Car il n'est homme se reputant si miserable, que s'il luy

estoit proposé de mettre tous les maux de ceux qui sont en la ville en un monceau avec les siens, pour les distribuer, puis apres également à tous: il n'aymast mieux se garder les siens, que d'en estre pourveu à sa part en portion du monceau commun. Personne n'est reputée beureuse, ou malheureuse, que par comparaison. Par comparaison, dis je, à d'autres plus ou moins beureux ou malheureux. Pourtant il nous faut prendre tout en bonne part. Mesmes que les tribulations & persecutions qui nous tourmentent, sont vrais indices de l'ire de Dieu contre nos pechez. Car pour autant que Dieu ne nous veult perdre, il nous envoie des advertissimens pour nous convertir à faire penitence en ce monde, à fin que ne soyons damnez en l'autre. Et nous punit icy temporellement, à fin qu'il ne treuve en nous qu'il doive punir eternellement, ou en purgatoire. Il est coustumier d'exercer la discipline, avant que proceder au jugement. Et par ainsi bien souvent il donne du fouet à celuy, qu'il ayme.

L'on s'abuse pensant, que Dieu punit indifferemment les justes & injustes, bons & mauvais: comme si Dieu fust injuste. Mais comme il n'y a personne, qui se puisse venter d'estre sans peché, il nous faut aussi penser, que si nous avons quelque adversité, (pour grande qu'elle soit) encores est elle moindre, que n'est l'iniquité de nos pechez: estant la Majesté Divine que nous mesprisons & offensois, digne d'honneur & crainte infinie.

Et faut aussi penser, que les adversitez & afflictions des gens de bien servent d'exercices. Et quant Dieu faict, ou permet, que nous soyons affligés, il monstre qu'il est misericordieux. Car vous trouverez toujours qu'il ne donne pas son ayde, ny nous envoie jamais tentation, que nous ne la puissions surmonter avec la confidence de sa grace. Par le contraire quant nous sommes elevez en ceste vie mondaine par les biens, faveurs, & plussirs du monde, & que nous nous enyurons de nos delices: lors oubliez de nostre bon Pere, tombons communement aux abyssmes de tous vices & pechez. Car comme aveuglez d'une fumiere de gloire, ou raviz de passion charnelle, ou regardans ailleurs, & pourchassans d'accroistre nos biens temporels, ne voyons point devant nous la fosse & la place de nostre ruine & malheur.

Il s'ensuit donc, que les miseres & tribulations de ce monde, sont les apprentissages de



de ceux, que Dieu veut sauver : & nous faut croire, qu'il n'est jamais plus pres de nous, que quant nos maux nous sont intolérables. Et quant tout sera dict & rabbatu, encores personne de nous n'a souffert pour ses pechez ce que nostre bon JEsus a pour les nostres. Contemplons, je vous prie, sa dure passion, sa croix, ses opprobres, son innocence & sa charité, & ne trouverons mal que ne doivions pour l'amour de luy porter patiemment. Nous ayme il plus, que ses Saints Martyrs ? S'il n'a pardonné à ses principaux amys, quelle impatience est la nostre pauvres pecheurs ? Et pourtant nous nous devons consoler en toutes nos tribulations, pensans que par la patience & bon espoir ne serons jamais confus, moyennant que nous prenions la patience par le bon but : c'est à sçavoir avec foy & charité cordiale : car c'est le chemin d'aller à la gloire éternelle, que nostre Pasteur JEsus Christ nous a monstré. Et si les miseres & calamitez que nous souffrons en ce monde, sont enseignemens de l'assistance de Dieu pres de nous : ceux qui n'ont adversité aucune, doivent bien craindre, qu'ils ne soyent bien loin de luy. Il nous exorte à porter nostre croix, & de le suivre. Suivons le doncque, & portons nostre croix, & prenons patiemment les tribulations venans de la main de Dieu pour nostre bien. Faisans autrement, nous serions semblables aux frenetiques, qui jettent par terre tout ce que les medecins leur portent pour leur salut. Mettons nostre espoir & confidence entierement en Dieu. C'est nostre Pere : il nous ayme plus, que nous ne sçaurions entendre, ni penser. Tout ce qu'il fait, il le fait pour le mieux. Et prions nostre bon Patron Saint N. d'estre nostre intercesseur vers luy : pour certain Dieu nous aydera. Dequoy je le supplie.

Verbis res hæc comprehensa olim est,  
cur tribulationes mittantur.

Ut probet, aut purget, vel puniat, aut me-  
reatur,

Aut Christi ut pateat gloria, pena datur.  
Job probat, inclinat Paulum, sese mani-  
festat

In cæco, purgat Mariam, sed punit He-  
rodem.

## DE CONSILIIS EVANGELICIS.

Consilium apud Theologos, est suasio  
melioris boni, ad quod alioqui non  
Tomus VIII. Concilior. German.

obligamur: eoque differt a præcepto. Nam sicut docet Hieronymus contra Jovinianum, & ad Eulochium de custodienda virginitate, ubi consilium datur, offerentis arbitrium est: ubi præceptum, necessitas est servitutis. In lege veteri data sunt præcepta: in Evangelica superadduntur consilia: quia perfectorum sunt hæc, ut a Christo didicimus. Si vis, inquit, perfectus esse, vade, vende omnia, quæ habes, &c. Nos præcepta revocant a rebus illicitis: sed consilia etiam a concessis. Nam si diligenter expendas, consilia de iis dantur, quæ neque lege præcepta sunt; neque in alteram partem determinata; sed quæ media dici consueverunt, multum conducentia ad melius quippiam: ad hoc scilicet, ut homo prorsus Deo serviat, & sine impedimento eidem obsequatur.

Sunt autem tria consilia præcipue, scilicet castitatis, paupertatis & obedientiæ. Primum adversatur concupiscentiæ carnis: alterum concupiscentiæ oculorum: tertium, superbiæ. Ac de castitate quidem primo agamus, & de cælibatu Sacerdotum.

## DE VOTO CASTITATIS.

Castitas est religiosa munditia, ac puritas a rebus veneris. Et triplex quidem invenitur: Virginalis: vidualis, & conjugalis. De hac ultima Horatius: Metuens alterius viri certo scdere castitas. Castitas a continentia etiam differre videtur apud Paulum Gal. 5. ut Primasius docet, quod continentia pro tempore sit: castitas perpetua. Pudicitia significat animi constantiam adversus aphrodisia. Qua ratione merito Tertullianus ædium & antistitem Templi Spiritus Sancti, (quod sumus nos) appellat pudicitiam. Virginalis castitas est continentia atque integritas corporis & animi: Vidualis eadem, antea experta venerem fuit. De quibus Christus: Sunt eunuchi, qui se castraverunt propter Regnum Dei, id est, sua sponte (simpliciter, vel voto,) se addixerunt ad eam vitæ rationem atque statum, qui non admittit generandi usum. Hoc vitæ genus Latini cælibatum vocant. Est enim cælebs, tam qui semper uxore caruit, quam qui nunc caret.

De servanda castitate ac cælibatu consilium habetur Matth. 19. cum dixissent Apostoli: Si ita est causa hominis cum uxore, non expedit nubere. Respondit JEsus, Non omnes capiunt verbum istud, sed quibus datum est. Sunt enim eunuchi, qui de matris utero sic nati sunt: eunuchi, qui facti sunt ab hominibus: & sunt eunuchi, qui se ipsos castraverunt propter regnum cælorum.

rum. Qui potest capere capiat. Paulus in prima ad Corinth 7. Bonum est homini, mulierem non tangere. Et certe si bonum non esset, mulierem non tangere; non exegisset Achimelech (d) a David, num mundi essent pueri ejus a mulieribus. Et Exod 19. ait Moyses ad populum: Estote parati in diem tertium, & ne appropinquetis uxoribus vestris. Ingressuro quoque Sacerdoti ad Dominum per vices suas, ab uxore sequestrabatur. Ergo bonum est homini, mulierem non tangere: nec solum Sacerdoti id bonum absolute est.

At dices, Genes. 2. habetur: Non est bonum, inquit Deus, hominem esse solum: & rursus: Crescite & multiplicamini, & replete terram. Ad hæc omnes Sancti Doctores respondent, terram tunc replendam fuisse in exordio mundi: nunc per Christi doctrinam celum. Sed adjicies, Lex 12. Tabularum habet, Cælibes esse prohibent. Ergo naturalis hoc ratio dicat. Respondeo, Tanquam reipub. pestes equidem putarem a repub. ejciendos, quos videmus multos in cælibatu turpiter atque impudice vivere. Contra istos condita illa lex, quam & Evangelica eatenus confirmat, dicens: Melius est nubere, quam uri. Addes adhuc: Quis potest capere verbum hoc? Nam Salomon ait: Continens esse non possum, nisi Deus dederit. Respondeo, Si donum Dei est, petas ab eo: quia dat omnibus affluenter, & non improperat Deus. Jacob. 2. Si pergas adhuc: Sanctum est conjugium & torus immaculatus. Respondeo, Sanctior est virginitas. Nam lucerna, quamvis lucida sit de se, tamen Soli comparata, obscura est & tenebrosa. Deus autem sicut prohibet mala, sic præcipit bona, & consulit meliora.

Et bonum absolute, quia absolute optabile propter multas utilitates, quas affert in eodem loco Apostolus. Joan. in Apoc. c. 14. Virgines extollit & agnum sequi ait: quia virgines fuerint, nunquam cum mulieribus coinquinari. Jesus Christus Agnus merito appellatur latina voce, quæ Græce significat purum & castum. Et virgo fuit, & virginis filius. Et Præcursorem virginem habere voluit. Et Clarissimos in veteri Testamento reperimus Heliam, Heliseum, Daniëlem, & quos inter virgines quoque numerat D. Ignatius (e), Melchisedech, Josue, Jeremiam. Et post Christum, ut ait Hieronymus ad Pammachium, Apostoli vel virgines fuerunt, vel saltem post nuptias continentes. Episcopi, Presbyteri, Diaconi, aut virgines eliguntur, aut vidui, aut post consecrationem pudici perseverant. Er-

go licet melius sit nubere, quam uri: melius est tamen continere, quam nubere. Consilium autem de re meliore datur ei, qui capere potest.

## DE CÆLIBATU SACERDOTUM.

Quam necessaria res sit in Divino ministerio cælibatus, duabus rationibus efficitur: Una est mundities corporis, quam ministratio requirit. Mundam, ait (f) Tertullianus, proponi oportet aram Domini. Altera animi tranquillitas & quies a curis, & a solitudine hujus mundi: vacuum sane esse decet eum, qui rerum cælestium Doctor est & Procurator. At qui uxorem habet, divisus est, ait Apostolus. Propter illam dicitur Esaia 5. Mundamini, qui fertis vasa Domini: atqui cohabitatio illa uxoria non potest fieri sine libidinis sorditate, atque immunditia. Ergo impedimento erit uxor Ministro Ecclesiæ, ne semper fungi possit ministerio. Item 1. Reg. 21. Non licuit de panibus propositionis sumere, nisi iis, qui a mulieribus mundi erant. Et Apostolus, ut orationi quis vacare possit, jubet ab uxoris consuetudine cessare ad tempus. Quanto magis ergo decet, ut qui ad mysterium Corporis & sanguinis pretiosi Domini nostri assunt & orant, (imo & conficiunt, dispensant, & sumunt) mundos esse a mulieribus: & vasa sua in sanctificatione & honore servare, non in desiderii potestate? Ideo lex Mosæ (g) jubebat Agnum Paschalem edere lumbis præcinctis: & Levitas tempore vicis suæ in templo manere seorsum ab uxoribus & familia. Ad alteram rationem tacit, quod Apostolus Petrus (b) Presbyteris & Pastoribus omnem sollicitudinem jubet deponere. Paulus autem 1. Corinth. 7. Curas & sollicitudines in conjugio esse docet: quas qui enumerare velit, nunquam profecto finem faciet: præter pericula Sacrilegii, Simoniac, & sexcentorum scelerum, quæ liberorum horum curam sequerentur, si Sacerdotibus nunc liceret liberis dare operam. Nam Levitici Sacerdotes, qui suis succedebant parentibus, nihil in partem hanc peccare poterant: ne quis veteris exemplo legis nobis obitrepit, sed exemplo potius sapiat, miserabilis Ecclesiæ Græcorum: quæ cælibatui renunciata victa sua nativa incontinentia, nunc squalida gemit sub infidelium tyrannide. Quare non immerito Ecclesia Latina hætenus cælibatum coluit. Et inde ab Apostolis, tanquam per manus tradi-

(d) 1. Reg. 21.

(e) Epistola 5. ad Philadel.

(f) Tertul. lib. 1. ad uxorem.

(g) Levit. 8.

(b) 1. Petr. 5.

traditione accepta, nullum ad Sacros Ordines admittit, qui continentiam servare non vocat, atque expresse vel tacite pudicitiam mentis & corporis DEO Opt. & Christo Domino in manibus Episcopi non consecrer. Nec unquam in Ecclesia Catholica concessum fuisse invenias, ut Sacerdotes post susceptum Ordinem Matrimonia celebrarent: licet propter penuriam Ministrorum aliquando conjugari, promoti fuerint. Qui tamen uxoribus postea utebantur, non nisi tanquam sororibus.

Et quia sunt, quibus novum & inutile videtur mandatum hoc; lege authores, quos hic citabimus. Præter alios Sixtus II. Pontifex lib. 1. de Castitate, c. 7. ait: Omnes Discipuli Domini aut continentes fuerunt, aut virgines. Sed antea Clemens, Petri Discipulus Epist. 2. ad Jacobum fratrem Domini: Si post ordinationem contigerit Ministro, proprium cubile uxoris invadere, Sacrorum non intret limina, nec Sacrificii portitor, nec altare contingat, nec ab offerentibus holocausta oblationem suscipiat: nec ad Domini Corporis portionem accedat. Epiphanius adversus Catharos: Sed omnino dices mihi: In nonnullis locis Sacerdotes, Diaconos, Hypodiaconos dare adhuc operam liberis: at hoc non ex Canone (scilicet Nicæni Conc.) sed ex vicio, atque ignavia hominum ejus temporis profectum est. Eusebius lib. 1. demonstrat. Secundum leges novi testamenti non omnino prohibitum est dare operam liberis: verum qui sunt Sacri Ordinis & Monachi, abstinere debent a concubitu uxorum. Idem docet Gregorius Nissenus in lib. de Virginitate. Origenes in 3. c. Joëlis. Illius tantummodo offerre indefinens Sacrificium, qui indefinenter & perpetuo se voverit castitati. Idem Homil. 33. in Num. Chrysost. Homil. 2. de patientia Job, & Hom. 7. in Matth. cap. 2. Cyrillus, Ephrem Syrus, Arator, Dionysius, Ambrosius, Hieronymus, Augustinus, Maximus, Leo I., Innocentius I., Historici omnes, & Concilia innumera: ut Canones Apostolorum, cap. 2. Agathense Conc., Conc. Romanum sub Sylvestro, Elibertinum, Chalcedonense, Arelatense, Chartaginense 2. & 3., Bracharen., Antisiodoren., Toleranum 4. & 9., Meldense, Africanum, Neocæsariense, &c.

Quod si aliqua ex his & aliis, quæ afferri possunt, eludant suis sophismatibus hæretici, nunquam tamen omnia. Quoniam hæc est doctrina Ecclesiæ & Spiritus Sancti. Alia, dæmonum impurorum, & Nicolaitarum hæreticorum.

Sed inquirunt, apud Græcos non servatur cælibatus iste. Respondemus, elanguisse continentiam apud eos, quam Majores rigide observarunt, ut ex Græcis Doctoribus & Historiis fit manifestum. Ab initio non fuerat sic. Et hinc est, quod in aliis a Catholica Ecclesia cum defecerint, tanquam schismatici audiendi non sunt, nec imitandi. Nam nec Basilii & Patrum temporibus fiebat.

Addunt Sapient. 8. Nemo continens esse potest, nisi Deus dederit. Qualis hæc argumentatio? Ergo nemo potest? Fides Dei quoque donum est, nec quisquam credere potest, nisi Deus dederit: ergo nemo potest fidelis esse? Excusationes sunt hæc in peccatis. Contra eos, qui dicebant esse contra naturam, acriter pugnavit olim S. Sixtus Pontifex III. Respondemus gratiam non deesse facienti, quod in se est. 1. Corinth. 1. In omnibus divites facti estis in illo, in omni verbo & omni scientia, sicut testimonium Christi confirmatum est in vobis, ut vobis nihil desit in ulla gratia. Philip. 4. Omnia possum in eo, qui me confortat. Non ego, sed gratia Dei mecum. Jacob. 1. Deus dat omnibus affluenter, & non improperat. Petite igitur sapientiam, & dabitur vobis. Ambrosius (i) contra eos, qui propter infirmitatem putabant, non esse vovendam castitatem, inquit: Ergo nemo militet, ne aliquando vincatur: nec pedis utatur beneficio, qui gradiendi periculum reformidat. Augustinus: (k) Casti non sumus, non quia non possumus, sed quia non volumus. Et in Psalm. 131. Qui te hortatur, ut voveas, ipse adjuvabit, ut reddas. Oratio illa Saræ, Tob. 3. magnæ consolationis erit, ubi dicitur: Hoc pro certo habet omnis, qui colit te, quod vita ejus, si in probatione fuerit, coronabitur; si autem in tribulatione, liberabitur: & si in corruptione fuerit, ad misericordiam tuam venire licebit.

Si omnes velint, [inquirunt] a concubitu abstinere: unde subsistet genus humanum? Respondet Aug. (l) Utinam omnes hoc velint, duntaxat in fide & charitate: quia multo citius Dei Civitas impleretur: & acceleraretur terminus sæculi.

Fortissime (ut videntur) dissuadeant legem de cælibatu libidines fœdæ, ac nefandæ Sacerdotum. Sed dic mihi: Quodnam est tantum scelus, quod non contra legem Dei committatur? Abrogentur ergo leges Dei: quia multi sunt perjuri in orbe, homicidæ, adulteri, fures. Lex bona & sancta est: malus, qui contra agit.

Urgent

(i) Lib. de Viduis.

(k) Lib. 2. c. 17. de Meritis & peccator. remiss.

(l) Lib. de bono conjug.



Urgent ex Can. 13. Sextæ Synodi, ubi damnantur, qui hæc Sacerdotum conjugia prohibebant. Responde, Canones illos non esse Sextæ Synodi, ut patet ex primo cap. sed multo post Synodum illam confectos fuisse ab hostibus Ecclesiæ Romanæ. De Triburienti autem Concilio non est curandum, quia solum est, & nullius authoritatis.

Restat Paphnutii magnum elogium, & maximi momenti [ut existimant] chria: qui cum ipse a nuptiis semper longe abhorruisset: tamen pro conjugio Sacerdotum in Concilio Nicæno peroravit, ut est in hist. Tripartita apud Socratem & Sozomenum.

Sed primo fides hujus historiæ sit penes authores, quorum hic ab Ecclesia Catholica rejicitur, ut author est (m) S. Gregorius. Socrates autem se Novatianum esse profiteatur. Deinde, si ita sensisset Paphnutius, (ut isti existimant) contra Concilii Decreta sensisset: in cujus Canon. 3. prohibetur, ut ne Episcopo, neque Presbytero, neque Diacono, neque ulli prorsus Clerico liceat, habere mulierem in domo, nisi forte matrem, aut sororem, aut materteram, aut eas solum personas, quæ ab omni suspitione alienæ essent: uxores autem nullo modo, sicut docet Basilius in Epistola ad Gregorium Presbyterum. Tertio etsi historici illi verum narrent: nihil tamen ad nos, ut docet Claud. D'espenseus Gallus. Nam Paphnutius expresse sentit, non esse permittendum, ut nuptias inirent ii, qui in Ordine Sacro jam essent constituti: aliis autem, qui uxores jam haberent, quando tempus illud de continentia antiqua multum jam remisérat, cum juberent Patres severiores separari jam maritos a suis uxoribus, ne majus malum sequeretur ex incontinentia, retineri uxores debere censuit iis, qui uxoribus uti antea solebant. Atque idem fortasse concessit Gregorius, [quando Septentrionales multæ nationes, opera Bonifacii Episcopi, & Irteilli Lulli Presbyteri ad fidem converterentur] ut indulgentia hac erga Ministros Ecclesiæ, tenellas in fidei doctrina plantas conservaret.

### STATUTUM I.

**E**Rgo si quis dixerit (n) Clericos in Sacris Ordinibus constitutos, vel Regulares, castitatem solemniter professos, posse Matrimonium contrahere, contractumque validum esse, non obstante Lege Ecclesiastica, vel voto: & oppositum nihil aliud esse, quam damnare Matrimonium: possequer om-

nes contrahere Matrimonium, qui non sentiunt se castitatis (etiamsi voverint) habere donum, Anathema sit: cum Deus id certe petentibus non denegat, nec patiatur nos supra id, quod possumus, tentari.

### DE PAUPERTATE EVANGELICA.

**D**EI Doctrina vel prohibet mala (ut in omnibus præceptis negativis,) veluti: Non mœchaberis. Non furtum facies: vel præcipit bona, (ut in affirmativis,) Honora Patrem; Memento, ut diem Sabbati sanctifices: vel consulit meliora, ut: Si vis perfectus esse, vade, vende omnia, &c. Cum enim juvenis ille [qui Dominum consulebat, quid agendo vitam æternam possideret] mandata Dei affirmativa & negativa omnia se custodisse [o] respondisset: JESUS intuitus eum, dixit ei, Unum tibi deest: (& apud Matthæum, ait illi JESUS: si vis perfectus esse) vade, vende omnia, quæ habes, & da pauperibus, & habebis thesaurum in cælo, & veni, sequere me. Cum audivisset autem adolescens verbum, abiit tristis; erat enim habens multas possessiones. JESUS autem dixit Discipulis suis: Quam difficile, qui pecunias habent, in regnum Dei intrabunt: id est, qui confidunt in pecuniis. Marcus enim interpretatur, facilius Camelum per foramen acus transire, quam divitem intrare in regnum Dei.

Ergo ut ab hac difficultate nos extricemus, consulit, ut a nobis abdicemus omne studium divitiarum. Nam, qui volunt divites fieri, incidunt in tentationes multas. Radix enim omnium malorum est avaritia, pecuniæque cupiditas. Cumque radicem hanc nemo facilius extirpare possit, quam qui nihil habere proprium decreverit; Luc. 14. dicit Dominus: Qui non renuntiaverit omnibus, quæ possidet, non potest meus esse discipulus. Hinc est, ut qui perfectionis doctrinæ Evangelicæ normam tenere volunt: ii faciant votum paupertatis. Quod multitudo credentium in Christum mox post Christi Ascensionem suscepit, Act. 4. & 5. omnia bona sua conferens in commune: nec quisquam eorum, quæ possidebat, aliquid suum esse dicebat, sed erant illis omnia communia. Divitiæ spinis comparantur a Domino, quæ suffocant bonum semen. Sed audiamus D. Hieronymum ab Demetriadem epist. 8.

Dicunt

(m) Lib. 6. Epistolarum.

(o) Matth. 19. Marc. 10. Luc. 18.

(n) Conc. Trid. Sess. 24. c. 9.

Dicunt Apostoli omnia, quæ sua fuerant, se reliquisse, & mercedem pro hac virtute audacter exposcunt. Quibus respondit Dominus: Omnis, qui relinquit domum, aut fratres, aut sorores, aut patrem, aut matrem, aut uxorem, aut filios, aut agros propter nomen meum, centuplum accipiet, & vitam æternam possidebit. O quanta beatitudo, pro parvis magna recipere, æterna pro brevibus, pro morituris semper viventia: & habere Dominum debitorem! Si qua autem vidua habet liberos, (& maxime si nobilis familiæ est) egentes filios non dimittat, sed ex æquitate eos juvet, ut & meminerit primum animæ suæ, & ipsam putet esse de filiis, & partiatur potius cum liberis, quam omnia filiis derelinquat. Imo Christum liberorum suorum faciat cohæredem. Respondebis, Difficile est: durum est, & contra naturam. Sed Dominum audias tibi respondentem. Qui potest capere capiat: & si vis esse perfecta: non tibi jugum necessitatis imponit, sed potestati tuæ liberum concedit arbitrium. Vis esse perfecta & primo stare vestigio dignitatis, fac, quod fecerunt Apostoli: vende omnia, quæ habes, & da pauperibus, & sequere Salvatorem: & nudam, solamque Crucem, nuda sequaris & sola. Non vis esse perfecta, sed secundum vis tenere gradum virtutis: dimitte omnia, quæcunque habes, da filiis, da propinquis: nemo te reprehendit, si inferiora secleris, dummodo illam scias tibi jure prælatam, quæ elegerit prima. Dices, Hoc Apostolorum est & virorum: mulierem autem nobilem non posse omnia vendere, quæ multis adjumentis hujus vitæ indigeat. Audi igitur Apostolum commonentem: Non ut aliis refrigerium, vobis autem tribulatio: sed ex æqualitate: vestra abundantia illorum sustineat inopiam, (p) ut & illorum abundantia vestræ inopiæ sit supplementum. Unde inquit Dominus, Qui habet duas tunicas, (q) det alteram non habenti. Ananias, & Saphyra, (r) Apostoli meruere sententiam, quia sua invide reservarunt. Ergone (inquires) puniendus est, qui sua non dederit? Minime. Ideo enim ii puniri sunt, quia mentiri voluerunt Spiritui Sancto: & reserantes necessaria victui suo, quasi perfecte seculo renunciantes, vanam gloriam sectabantur. Alioqui licebat libere dare, vel non dare. Quanquam ei, qui cupiat esse perfectus, præsens paupertas futuris divitiis compensanda sit. Hæc Hieronymus.

Augustinus ad Hilarium, Quibus autem non provenit corona martyrii, neque illius perfectionis de vendendis rebus suis consilium tam grande, tamque præclarum rece-

perunt, & tamen a damnabilibus immunes criminibus, esurientem Christum paverunt, sitienti potum dederunt, nudum vestierunt, peregrinantem susceperunt: non sedebunt quidem cum Christo sublimiter judicaturi, sed ad ipsius dexteram stabunt, misericorditer judicandi: (Beati enim misericordes, quoniam ipsi misericordiam consequentur: & judicium sine misericordia fiet illi, qui non fecit misericordiam) superexaltat autem misericordia judicium. Proinde isti desinant contra Scripturas loqui; & in suis exhortationibus ad majora sic excitent, ut minora non damnent. Et in 17. lib. De civitate Dei, c. 4. de terra ergo suscitatus est supra omnes divites ille pauper, & de illo stercore erectus est supra omnes opulentos ille inops, ut sedeat cum potentibus populi, quibus ait: Sedebitis super duodecim sedes: & sedem gloriæ hæreditatem dans eis. Dixerant enim potentes illi, Ecce nos dimisimus omnia, & secuti sumuste. Hoc votum potentissimum voverant. Sed unde hoc eis, nisi ab illo, de quo hic continuo dictum est: Dans votum voventi? Alioqui ex illis essent potentibus, quorum infirmatus est arcus. Dans, inquit, votum voventi. Non enim Domino quisquam, quicquam ratum voveret, nisi qui ab illo acciperet, quod voveret. Hæc Aug.

Ex duabus his authoritatibus doctrinam capere poterit Curatus, quoties consulatur super hac voluntaria paupertate suscipienda propter Christum.

## DE OBEDIENTIA & STATU Monachorum.

Obedientia est spontanea adimpletio voluntatis alienæ. Sed hujus votum abnegatio propriæ voluntatis deliberata, Deoque promissa. Duo autem sunt, quæ præter cætera votum obedientiæ suadent. Primum pietas & erga Deum amor. Nam ille, qui omnibus in rebus obedire Deo decrevit, quia non semper de voluntate ejus nobis constat, loco Dei hominem sibi proponit; ad cujus imperium, tanquam Dei oracula, arbitrii sui voluntatem attingit: adeo ut in rebus adiaphoris [id est, quæ de se, nec bonæ, nec malæ sunt] nihil agere, quod ille prohibeat, nec omittere, quod jubeat, velit. Magnum quidem perfectioris vitæ argumentum. Quid enim majus, quam nihil agere pro sua voluntate? In hac una virtute sita est humilitas, virtutum omnium fundamentum. Hoc est Christi consilium, Matth. 16. Marc. 8. Si quis vult me sequi, abne-

L 3

(p) 2. Cor. 8.

(q) Luc. 3. 6.

(r) Act. 15.

abneget semetipsum, & tollat crucem suam, & sequatur me. Hoc est seipsum denegare, ut non quæcunque volumus, illa faciamus. Ex Philosopho namque integerrimo, Epicteto, discimus, nihil esse hominis proprium, nisi mentem atque voluntatem: reliqua, quæ extra nos sunt, nostra non sunt. Quæ melior adhuc victima Deo offerri potest? In aliis caro aliena mactatur, hic nos ipsos Deo sacrificamus. Quamquam re vera voluntas nostra, nostra esse non debet, sed Dei, qui eam creavit. Quare quisquis voluntatem suam servat, ut suam, is Deo surripit, quod jure Dei est.

Sed notandum ex D. Bernardo (r), quod quædam sunt pure bona, quædam pure mala. In his nulla debetur obedientia, quoniam nec illa omittenda sunt, etiam si prohibeantur: nec ista, vel cum jubentur, committenda. Interea sunt media quædam, quæ pro tempore, vel persona, & mala possunt esse, & bona. In his lex est obedientiæ. Pure bona sunt Fides, Spes, Charitas. Pure mala furtum, sacrilegium, adulterium. Media sunt vigilare, scribere, legere, & similia. Cæterum eorum, quæ media dicimus, quædam in purorum malorum, vel bonorum conditionem aliquando transeunt. Nam conjugium, cum & fieri liceat, & non fieri: tamen factum tenet, nec solvi potest. Et propria possidere sæculari homini medium est: sed Monacho purum malum.

Altera ergo voti obedientiæ causa, est timor delinquendi. Scimus enim, quia non est in homine, [s] ut dirigat gressus suos. Idcirco diffidentes nostris viribus & judicio nostro, malumus ex ejus præscripto agere, qui Dei locum teneat, quam ex nostro arbitrio: ne cum venerit severus Judex, causam vitæ a nobis nostro arbitrio gestæ dicere districtius cogamur. Quare non immerito Hieronymus (t) primam in Monachis confederationem dicit esse, obedire Majoribus. Nam Monasteriorum omnium instituta, absque obedientia corruunt: vitam cælibem potest quivis domi suæ colere, potest & paupertatem: sed virtutem obedientiæ, non nisi qui sub antistite aliquo & communi capite degat.

Cæterum & si plura alia inveniantur consilia Evangelica, veluti de dilectione inimici, [intellige cum Theologis, quantum ad effectus amicitiae voluntarios]: de mansuetudine, & patientia: Si quis te percusserit in unam maxillam, præbe & alteram. De cessione sui juris: Qui vult tecum in judicio contendere, & tunicam tuam tollere, di-

mitte ei & pallium. Et de liberalitate, Qui petit a te, da ei: & volenti mutuare a te, ne avertas. Et de simplicitate sermonis, Sit sermo vester, est, est, non, non. Et de eruendo oculo, si scandalizet nos: de justitia facienda secreto: de vitanda solitudine in victu procurando: de correctione fraterna: & si alia sunt præterea, tamen his tribus consiliis, quæ declaravimus, facile omnia comprehendas: videlicet de Obedientia, Castitate, & Paupertate. Horum disciplina Monachorum Collegia instituit: non nunc primum quidem, sed a tempore Apostolorum. Hujus rei testis est locupletissimus Philo Judæus, quem citant Eusebius l. 2. histor. cap. 17. Hieronymus de viris illust. Nicephorus lib. 2. cap. 16. ut facile cernas in Monachorum reformatorum vita Ecclesiam eorum, qui primo crediderant in Christum, [u] ubi nihil cujusquam proprium sit; nullus inter eos dives, nullus pauper, patrimonium egentibus dividatur, orationi vacetur & psalmodiæ, doctrinæ quoque & continentiae. Sane si hujus instituti altius primordia repetamus, Filii Prophetarum appellati sunt 4. Reg. 6. qui locum sibi ad habitandum construere perierant ab Elifæo. Sed Dionysius Areopagita c. 6. Hierar. ordinem Monachorum sublimiorem initiandorum vocat: & professionis formam describit, quam faciebant jam eo tempore Religiosi. Quamquam tempore D. Augustini nomen Monachorum explodere, atque ab Ecclesia eliminare conati sint etiam hæretici. Ad quos ille respondit: [x] Sunt & Monachi falsi, & nos tales novimus: sed non periit pia fraternitas propter eos, qui profitentur, quod non sunt. Tam, inquit, sunt Monachi falsi, quam & Clerici falsi, & fideles falsi.

Tria distinguit Isidorus genera Monachorum; cui ideo fidem adhibendam censemus, quod ejus ætate plurimum vigeret hoc institutum: Unum Cœnobitarum, id est, in commune simul viventium. Secundum Heremitarum, qui procul ab hominum consuetudine, loca deserta & vattas solitudines incolebant, herbis victitantes, vel pane solo & aqua. Tertium genus vocat Anachoritarum, qui antea probati in cœnobio, postea mittebantur soli degere in locis remotis. Videtur ab his Prioratus nostros rurales habuisse originem & honorem primum. Sed o Deus bone! quam nunc aliter hæc.

### DE VOTO.

**D**Euter. 23. dicitur: Cum votum voveris Deo tuo, non tardabis reddere. Si

(r) Epist. 7. ad Oldam Monach.

(s) Prov. 20.

(t) Ad Eustoc. Epist. 22.

(u) Act. 4. & 5.

(x) In Psal. 131.



Si nolueris polliceri, sine peccato eris: Quod autem semel egressum est de labiis tuis, observabis. Liberum ita est vovere; sed reddere, postquam voveris, necessarium. Ananias & Saphyra mortem meriti sunt, quia, quod voverant, non reddiderunt. Vovere, est Deo sancte promittere: unde & votum voluntatem, & desiderium aliquando significat, quod ea maxime optamus, propter quæ Deo vota facimus. Sed definitur: promissio facta Deo, cum deliberatione, de bono aliquo, vel meliori bono. Et vocatur bonum hoc, supererogationis: quia non sub præcepto cadat, sed sub consilio. Quare votum de malo non solum non obligat, sed etiam grave peccatum est. Et requiruntur præterea tria ad hoc, ut votum teneat: deliberatio, propositum, & promissio. Factum sine deliberatione, non obligat, nisi forte ex congruo, si res bona sit: non quale illud Jepthe (y) indiscretæ promissionis: & cujusvis temulentis hominis. Quod propter merum illatum ab hominibus fit, quia propositi voluntate caret, non obligat. Secus si timor esset a casu, vel a natura: ut in infirmitate gravi, & in magna maris tempestate. In illis igitur, in quibus electio imperfecta fuerit, tutius est, dispensationem obtinere. Nam licet plena non sit deliberatio, non ideo sine electione fuerunt. Alioqui non diceretur peccare ebrius, vel alius, qui vel ex ebrietate, vel ira hominem occideret. Imperfecta enim electio, electio tamen est. Ideo adeatur superior, si adiri possit, quodcumque commutatio vel dispensatio facienda videtur. Propria enim autoritate facienda non est. Non enim liberatur debitor, solvens rem meliorem, nisi solvat, quod debet. Sed si certum sit, rem esse malam, vel inutilem, vel impediendam majus bonum, poterit. Deut. 23. dicitur: Cum votum voveris Domino Deo tuo, non tardabis reddere: quia requirit illud Dominus Deus tuus: & si moratus fueris, reputabitur tibi in peccatum.

Regula Sancti Thomæ [2] est tenenda hic: Quicquid votum faciendum impediret, si prius fuisset: voto facto, obligationem tollit. Item illi, quæ in omni voto intelligitur, conditio: Si potero.

Quare ejus, qui vovet, quod sine alterius licentia complere non potest, irritatur promissio ab eo, a quo dependet: ut si Clericus longam peregrinationem voveat sine consensu Prælati. Sic Religiosi vota omnia irritare potest Prælati ejus: filiorum impuberum pater, & tutor: uxoris maritus: servi Dominus. Quod si semel irri-

tum factum fuerit votum, nunquam de cætero obligat: propter regulam illam: Obligatio semel extincta, non reviviscit. C. De remiss. pign. l. Cum ex causa.

Impubes votum religionis suscipere non potest: ne de consensu quidem patris. Quod si fecerit, non tenetur, ne post ipsam quidem postea pubertatem.

Religiosus observare vovens regulam sui ordinis, ita eam observare tenetur, sicut illa habet: hoc est, præcepta ut præcepta, & consilia ut consilia.

Alter conjugum rato, & non consummato Matrimonio, vovere potest, atque ingredi religionem, sine consensu sponsæ: non autem consummato.

Votum insuper aliud solenne est, quod cum solennitate fit, ut professio Religionis & Ordinis Sacri. Aliud simplex, quod sine solennitate aliqua. Item aliud absolutum, aliud conditionatum, Si Deus tibi aliquid, quod optas, concesserit.

Causæ dispensandi in votis tres assignantur. Prima, si id sit malum, vel inutile, vel majoris boni impeditivum. Commutandi vero in aliud causa est, impossibilitas exequendi, vel major utilitas.

Abolvit ergo Sacerdos de transgressionem voti cujuscumque: sed non dispensat, nisi qui potestatem habet majorem in Ecclesia.

Papa dispensat in omni voto, nisi per quod sit aliquis consecratus Deo, quale est votum solenne Religionis: (a) quia quod semel Domino consecratum est, non potest in alios usus converti. Episcopi autem dispensare possunt in aliis votis omnibus, demptis quatuor, quæ Papæ reservantur: videlicet Continentiæ perpetuæ, ac Religionis, & tribus aliquando votis peregrinationum, nempe terræ sanctæ (ubi cum infidelibus bellum geritur) liminum Sancti Petri & Jacobi in Compottella. Hæc amplius videris in Summa Sylvestrina.

## DE DISPENSATIONE.

EX his, quæ dicuntur, apparebit dispensationem indulgentiam esse largo modo sumpro vocabulo: præterquam quod indulgentia propter commissa delicta dispensatur: Dispensatio autem ad hoc indulgetur, ut non imputetur ad peccatum, quod committitur. Est enim dispensatio licentia, seu permissio contra rigorem juris: juris inquam præcipientis vel prohibentis aliquid. Veluti jubet lex festum celebrari vel jejunium.

Item

(y) Jud. 12. (2) S. Tho. 4. distinct. 38.  
Monasterium.

(a) De stat. Monachorum. c. Cum ad

Item prohibet ordinari homicidam. Contra hæc fieri posse facit dispensatio. Vovit quis castitatem: dispensat Pontifex alicujus utilitatis vel necessitatis causa. Juravit alius in stipulando servare contractum: dispensatur, si lætio enormis videatur, vel contra jus facta. Prohibentur nuptiæ in gradibus nonnullis ultra legem naturæ, ut charitas Christiana necessitudinibus augeatur. Prohibentur diebus jejuniorum, & quibusdam solennibus: quod vacandum tunc sit orationi. Sed relaxatur prohibitio ob urgentem aliquam necessitatem. Caveat ergo Dispensator, ne temere legem relaxet. Namque Apostolus (b) Timotheum contestatur coram DEO & Angelis ejus, ut hæc custodiat: sine præjudicio, nihil faciens, in alteram partem declinando.

Sed ut licita sit dispensatio, duo requiruntur: (c) unum ex parte dantis, nempe potestas: alterum ex parte petentis, scilicet causa justa. Quare si impetratur ob falsam causam, vel tacita veritate, nulla est dispensatio. c. 2. De finis Presb. & c. Non potest, de Præben. libr. 6. Quæ vero sint causæ justæ, regula dari non potest generalis [inquit Sylvester] quoniam dari oporteret innumeras. Ideo standum esse dicit judicio boni viri. Sed causæ duæ generales attendi solent: necessitas & utilitas. His duabus remittuntur leges omnes. Ambrosius sane, & Cyprianus neophyti ordinati fuerunt contra legem: quia non deerat humilitas; nec metuendum erat, ne in superbiam elati in judicium inciderent, quo diabolus judicatus est. Cum Sacerdote, ut Matrimonium contrahat, dispensatum fuit ex causâ publicæ utilitatis: (ut ait Cajetanus in quodl. 12.) cum Remigio Monacho & Sacerdote. Unde nata Petronilla, hæres regni Aragoniæ, quæ nupsit Raymundo, Comiti Barchinoniæ. Celestinus quoque tertius dispensavit cum Constantia, filia Rogerii, Sanctimoniali quinquagenaria Panormi, quæ nupsit Henrico V. unde natus Fredericus II. Et Alexander VI. cum filio suo. Disputant de hac re Canonistæ. Bal. in l. rescripta. C. de præci. imp. off. glos. c. de illo. 32. dist. Inn. in c. Placet. de conver. conjug. Abb. in c. Cum olim. de Cler. conjug. &c. Quapropter si sola Principis voluntas sufficit ad dispensandum: in interiore necessaria est causæ cognitio. Alioqui enim non dispensatio, sed dissipatio fiet: & puniendus veniet dispensator: Licet dispensatio teneat, quamdiu non revocabitur a Superiore.

Quæri solet, an dispensati sine causâ legitima sit tuta conscientia quoad Deum? Respondent Doctores cum distinctione. Si di-

spensans sit inferior, conscientia dispensati tuta non est, nec quoad Deum, nec quoad Ecclesiam: quia dispensatio facta sit sine cognitione causæ. Sed Papa quidem in his, quæ sunt juris positivi, sine causa dispensare potest: non autem in illis, quæ sunt juris Divini: ut in voto, juramento, & similibus. Justa tamen causa dispensante Summo Pontifice, tenet dispensatio, etiam tuta conscientia dispensati.

Est ergo primum dispensatio relaxatio præcepti aliquid injungentis Superioris, vel prohibentis: deinde obligationis Deo factæ, ut voti: tertio obligationis cum jurejurando factæ proximo.

Cum autem dispensandi facilitate, eo ventum sit in nostra Dioecesi, ut contractum jam sit prope nulla fides: nulla pacta non irritentur, modo quis se læsum fuisse asserat, sæpe rei veritate tacita: nec simplices modo, & idiotæ huc confugiant, sed etiam, tanquam ad subterfugium cuilibet paratum (æquis & iniquis etiam omnibus) senes, potentes, Sacerdotes, Doctores juris, pacta & conventa, opportunitate dispensationum rescindant: (quod non ad decipientium, sed ad deceptorum salutem inventum est) iniquitatis dicentes vinculum esse non debere jusjurandum. Quasi iniquitas sit ei, qui vult tecum in judicio contendere, & tunicam tuam tollere, dimittere ei & pallium, ut tollatur amplius occasio agendi inique;

## STATUTUM I.

**S**Tatuimus & ordinamus, & in posterum agere decrevimus, quod dispensationes juramenti minoribus ætate, & simplicibus atque idiotis personis, de quarum simplicitate nobis fides facta fuerit, dabuntur in forma jam solita & usitata. Sed literatis & divitibus (quos non ita facile decipi posse judicaverimus) non nisi vocata parte summarie, vel communicato libello supplici: sine strepitu judicii, re considerata pie, ex æquo & bono. In juramentis quoque temerariis & iniquis, quæ fas non est servare, vel servari omnino non possunt, (ne quis in lege Evangelica Christi perplexus esse dicatur) injungatur salutaris poenitentia ante absolutionem vel dispensationem, ne jurisjurandi maneat impune violata Religio. In iis autem, quæ propter nuptias & Matrimonia celebran-

(b) 2. Tim. 3.

(c) Trid. 24. c. 18. cap. 1. de Voto.

branda, aut res alias sanctas facta fuerint (quoniam si peccaverit vir in virum, placari potest Deus: si autem in Dominum peccaverit vir, quis orabit pro eo?) satisfactio imponetur aliqua in Dei honorem, vel Ecclesiæ utilitatem.

## II.

Voti dispensationem solemnem, ad Sedem Apostolicam remittimus.

## III.

Licet Episcopi (d) possint in irregularitatibus illis & suspensionibus dispensare, quæ proveniunt ex delicto occulto: non tamen in ea, quæ ex homicidio voluntario: nec in ea, quæ ad forum jam contentiosum ducta sit.

## IV.

Si quis intra gradus prohibitos (e) scienter Matrimonium contrahere præsumpserit, separetur: & spe dispensationis consequendæ careat.

## V.

Declarat Concilium (f) Trid. dispensationes graciosas non prius sortiri debere effectum suum, quam cognitum sit ab Episcopis, eas non subiacere vitio subreptionis. (g) Idem de commutationibus ultimarum voluntatum, & de gratiis obtentis.

## DE INDULGENTIIS.

Quamvis nomen Indulgentiarum non ita dudum innotuerit; res tamen ipsa semper usitata fuit in Ecclesia, a primordio ejus: & qui eas inutiles esse dixerit, vel easdem concedendi potestatem, in Ecclesia negaverit, anathemate damnatur in Concil. Trid. Cujus rei cognitio cum sit maxime necessaria Pastoribus: præsertim hoc tempore, quando tantam inde videmus illiadem malorum prodiisse (authore Martino Lutero in Germania) & incendium, cui extinguendo solam e cælo opem sperare liceat; nos paucis & dilucide, quantum in nobis est, [Deo juvante] de nomine, vi, usuque earum dicamus: relictis in medio difficultatibus aliis, quæ parum faciunt ad ædificationem.

## Nomen Indulgentiæ unde.

Indulgentia dicta est ab indulgere, id est, blande permittere, concedere, condonare: Græce χαρίζομαι. Quo verbo usus est Apostolus multis in locis. In 2. Cor. 2. Nam ego si quid donavi (ὃς ἐχαρίσαμαι) in persona Christi propter vos. & eodem cap. Ut e contrario magis donetis, & consolemini: id est, non solum indulgeatis, & patienter feratis alios, sed & consolemini, & ad spem veniæ erigatis. Et c. 12. Donate mihi hanc injuriam: id est, ignoscite, indulge. Et Coloss. 2. Donans vobis omnia delicta, delens, quod adversum vos erat chirographum decreti. Et c. 3. Supportantes invicem, & donantes vobismetipsis, si quis adversus aliquem habet querelam, sicut & Dominus donavit vobis. Et Eph. 4. Donantes invicem, sicut Christus donavit vobis. Et Christus Luc. 7. Non habentibus illis unde solverent, donavit utrisque: ubi de remissione peccatorum loquitur Evangelista. In omnibus his locis verbum est χαρίζομαι, a gratia deductum. Ex quibus colligi potest indulgentiam merito sumi ab Ecclesia pro venia & remissione peccati, relaxationeque cujuscunque obligationis, quæ ex gratia fit, non ex merito. Nec ab ea differt, quod Quintilianus (b) ait, Mollis illa educatio, quam indulgentiam vocamus, nervos omnes & mentis, & corporis frangit. Nam in molli educatione illa, omnia condonamus, ad quæ tenerentur pueri, severius aliquanto instituendi. Nec si blanda Patrum segnes facit indulgentia natos, atque ideo injusta est: ideo & indulgentia Dei injusta. Non enim sicut videt homo, & Deus videt.

## Ubi Sacra Scriptura docet usum Indulg. &amp; virtutem.

Sed ex omnibus his locis maxime facit ad rem nostram cap. illud. 2. Cor. 2. Cum enim Apostolus jussisset incestuosum illum fornicatorem excommunicari, tradique Sathanæ, (sicut habetur ex priore Epistola ad eosdem Corinth. c. 5.) hic, ut videtur, factus certior de ejus pœnitentia, consolatur Corinthios, & gratulatur eis, quod bene acceperint suam correptionem. Quare & ipse in gratiam eorum, qui illi indulgeri voluerunt, veniam dat relapscenti. Idque non propria quidem autoritate, sed in persona Christi, tanquam Christi Minister. Sic enim in hac eadem 2. cap. 5. dicit: Quoniam quidem Deus erat in Christo mundum reconcilians

(d) Trid. Sess. 24. cap. 6.

(e) Ead. 24. c. 5.

(f) 24. c. 5.

(g) 13. cap. 5.

(b) Lib. 1.



eilians sibi, non reputans illis delicta ipsorum: & posuit in nobis verbum reconciliationis. Jam hic non reputare alicui peccatum, aliud non est, quam indulgere: & ponere in nobis verbum reconciliationis, ex phrasi Hebraica, quid, quam dare nobis potestatem reconciliandi alios? partim quidem exhortando, (sicut sequitur) Deo exhortante per nos: partim etiam puniendo, sicut in eodem Cap. Epistolæ primæ: Ego quidem absens corpore, præsens autem spiritu, jam judicavi ut præsens eum, qui sic operatus est, in nomine Domini nostri Jesu Christi, congregatis vobis, & meo spiritu, cum virtute Domini nostri Jesu tradere hujusmodi hominem Satanæ in interitum carnis, ut spiritus salvus sit in die Domini nostri Jesu Christi. Et in 2. Cor. c. 10. In promptu habentes ulcisci omnem inobedientiam, cum impleta fuerit vestra obedientia. Patet ergo, qua autoritate usus fuerit Paulus tam puniendo, quam indulgendo, erga fornicatorem Corinthium. Jam ergo hic c. 2. posterioris Epistolæ rogat, ut in bonam partem accipiant severitatem, qua in illum usus erat: quoniam justo dolore motus fecerat, non ut contristaret eos, quin potius ut partem in se susciperet mœroris ipsorum, & eos mœstitia levaret aliquo modo. Et ut recipiant ad communionem eundem illum, subdit: Sufficit illi, qui ejusmodi est, objurgatio hæc, quæ fit a pluribus. Quasi diceret: Satis pœnarum dedit: indulgere, & consolamini, ne forte abundantiori tristitia absorbeat. Nam & ego donavi (id est, indulsi) propter vos. Et confirmate eum in charitate: ne circumveniamur a Satana, cui traditus ille fuit. Ne a Satana usurpemur, qui plura semper occupare cupit: nec his contentus esse solet. Scimus enim, quid tentator ille cogitet diabolus. Atque hic quidem sensus verborum Pauli. Jam discamus ex hoc loco usum indulgentiarum. Si Corinthius ille non fuisset conversus a peccato per pœnitentiam: non dedisset profecto ei Paulus veniam: quia pœna ei debebatur ex iustitia. Cum igitur condonet ei peccatum, sequitur dimissa culpa peccati, restitisse pœnam sublatae culpæ debitam: quam condonat Apostolus in persona Christi: id est, ac si Christus ipse donasset, ut dicit gl.

*Ecclesiæ Minister remittit peccato debitam, commutando.*

**C**um sit igitur data potestas a Christo remittendi peccata, Matth. 17. & 18. per peccatum autem homo duo hæc incurrat, culpam, & reatum, seu obligationem ad pœnam aliquam: culpam vero solus dimittat Deus, qui solus dat gratiam: pœnam ali-

quando solvat peccator per satisfactionem, quæ pars est pœnitentiæ: sæpius quoque solvendo non sit, vel propter gravitatem peccati, vel quod morte intercipiatur: Potest ergo Minister Ecclesiæ culpam, Deo auctore, remittere, & pœnam condonare. Nam si homo, quamdiu pœnæ obnoxius est, a Cæli gloria excluditur: nisi impedimentum hoc tollatur, nunquam Cælum ingreditur. Sed Petro datæ sunt claves regni cælorum: ergo potest Petrus & Successores Petri impedimentum hoc auferre virtute clavium, & pœnam condonare. Jam si pergamus, culpa mortalis peccati virtute Sacramenti pœnitentiæ deletur. (Quorum remisistis, inquit, peccata, remittuntur eis) pœnam vero non omnino remitti justum est, ne peccetur impune) sed quæ æterna est, in aliam temporalem commutari convenit, persolvendam vel in hoc sæculo, vel in alio. Sic Sacerdos pœnitenti peccatori opus aliquod imponit pium, in satisfactionem delicti, & injuriæ Deo, vel proximo illatae: non utique pro merito culpæ commissæ, cui æterna debetur, (ob offensionem Divinæ Majestatis, infinitæ & inæstimabilis) sed per indulgentiam, commutando in aliam tolerabiliorem, confusus de Christi misericordia, & merito infinito: cujus legatione & vice fungitur super terram; potestatem gerens aperiendi, & claudendi regnum cælorum, juxta clavem scientiæ suæ: & dispensandi de pretio immenso passionum ejus: quas tanquam in thesauro quodam repositas ad subveniendum miseris omnibus servat Ecclesia, Sponsa Filii Dei dilectissima: additis etiam iis, quæ Sancti in vita sua passi sunt, plus quam peccata eorum commercuissent.

*De Thesauro Ecclesiæ.*

**U**Nde Doctores Theologi, & Canonistæ omnes, dicunt, quod pœnitentiæ nostræ compensantur per pœnas Christi & Sanctorum; dum ex thesauro illo conceditur alicui, quasi pretium pœnale, unde solvat Deo debitam pro suis peccatis pœnitentiam. Sunt quidem passionum Sanctorum consummatio passionum Christi, ut ex Paulo discimus Coloss. 1. Qui nunc gaudeo in passionibus pro vobis, & adimpleo ea, quæ defunt passionum Christi in carne mea pro corpore ejus, quod est Ecclesia: cujus factus sum ego Minister secundum dispensationem Dei. Ex hoc loco D. Augustinus in Psalm. 61. Thesaurum Ecclesiæ intellexit, quem vocat paratoria, dicens: Passionem Christi non in solo Christo. Si enim Christum intelligas caput & corpus; passionem Christi, non in solo Christo: imo passionem Christi, non nisi in Christo. Si autem Christum intelligas solum

lum caput: passiones Christi non in solo Christo, imo in solo capite: unde dicit quoddam membrum ejus Paulus Apostolus: ut suppleam, quæ defunt pressurarum Christi in carne mea? Si ergo in membris Christi es, &c. quicquid pateris ab eis, qui non sunt in membris Christi, deerat passionibus Christi, qui passus est in capite nostro, & patitur in membris suis, id est, in nobis ipsis ad communem hanc quasi rempublicam: nam quisque pro modulo nostro exolvimus, quod debemus: & pro posse virium nostrarum, quasi canonem passionum inferimus paratoria plenaria. Hæc S. Augustinus. Nam quod Sanctorum merita aliis prosint, patet, Genes. 26. Abraham profuit Isaac: & Jacob docuit invocare nomen suum nepotes. Gen. 48. Et Moyses, Recordare, inquit, Abraham & Isaac & Jacob. Deut. 32. & David, 3. Reg. 12. 4. Reg. 19. Esa. 37. Ezech. 14. Sed hæc merita sunt particularia: nos de illis loquimur, quæ in commune, cum Christi merito, servantur ad Ecclesiæ ædificationem. Ergo notandum, quod supra diximus, iustum non esse, ut pœna omnis peccato debita gratis omnino condonetur. Christus enim pro nobis ideo passus est, ut iustitia Dei impleteretur in nobis: factusque est pro nobis hostia, ut pro iniquitatibus nostris satisfaceret, quæ impunitæ manere non debuerunt. Nilominus tamen gratiæ suus locus relictus est. Nam non tantum passus est, ut nos Patri reconciliaret, & in gratiam ejus reduceret, cujus antea inimici eramus: [plenus ipse gratiæ & veritatis] sed etiam ut auferret chirographum decreti, quod erat contrarium nobis, id est, obligationem ad pœnam æternam. Et fuit ejus meritum infinitum: quia non pro nostris tantum passus est peccatis, sed etiam pro totius mundi. Hæc merita dicuntur thesauri spirituales Ecclesiæ per metaphoram.

In quibus etiam merita ponuntur omnium Sanctorum, qui pro Deo majores pœnas dederunt, quam pro delictis suis, ab Abel iusto, ad nos usque. Siquidem iusti plures extiterunt: qui quod nulla, vel pauca, atque ea minima deliquerint: vel nulli, vel certe minimæ, obnoxii fuisse pœnæ putandi sunt. Utinam appenderentur peccata mea, (dicebat (i) Job) quibus iram merui; & calamitas, quam patior, in statera: quasi arena maris hæc gravior appareret. Maria Virgo nihil commisit: at quantos illa dolores toleravit? Joannes ab utero matris sanctificatus, quam vixit austere? Paulus adimplet in carne sua, quæ deerant passionum Christi. Mariæ Magdalene dimissa fuerunt

peccata, ut testatus est Christus: sed postea quam austere vixit in solitudine. Ergo cum scimus omnes unum corpus in Christo, membra corporis ejus, cujus communionis ratione participes omnes sumus, alter alterius meritorum: non dubium est, posse aliorum merita aliis applicari, quæ satisfactoria fuerunt: non utique ad merendam gratiam, (hoc Christi proprium est, de cujus plenitudine omnes accepimus gratiam pro gratia) sed ad satisfactionem debiti, & noxæ solutionem.

Atque hæc est communis opinio Theologorum, & Canonistarum, in c. Indulgentiæ. de Pœnit. & rem. lib. 6. & Clem. unica de Reliq. & ven. Sanctor. & in c. Quod autem. Nec obstat, quod objiciunt Angelus in sua Sum. cum Fran. de Mairo. & Durandus, & Lutherani, Quod non sunt condignæ passiones hujus mundi ad futuram gloriam: nam Petr. de Palude jam ante dissolverat hoc argumentum. Opus enim pœnale iusti hominis considerari potest dupliciter: ut meritorium. Et sic non transit personam merentis, quia solus Christus pro aliis meruit: cæteri plus acceperunt, quam meruerunt. Aliter ut satisfactorium. Et sic sunt multi plus passi, quam meriti: plusque satisfecerunt, sive exolverunt, quam debuerunt. Horum certe passiones communicari possunt aliis: non modo propter communionem ejusdem corporis & sympathiam, sed etiam propterea, quod ita volebant Sancti: ut docent verba Pauli Coloss. 1. Et ita determinatum fuit a Clemente Sexto in Extr. Unigenitus. Et de potestate dispensandi hujus thesauri, Conc. Trid. in fine, & Later. & Vien. & Basil.

### *Nomen Jubilæi, & Cruciatæ & veniæ.*

Cum essent igitur olim in Ecclesia certæ definitæ atque constitutæ singulis criminibus, & delictis pœnæ, seu pœnitentiæ; veluti pro uno mortali septem annorum; imo & aliquibus totius vitæ; (ut videre est in antiquissimis Conciliis) videntesque aliquando Patres, eorum, qui damnati erant, & pœnitentiam agebant, obedientiam, & contritionem, soliti essent eos ad Communionem recipere ante tempus per indulgentiam, & quasi per acceptilationem a debito absolvere; remittebant obligationem injunctæ pœnitentiæ totius, vel in parte. In pœnitentia, inquit Augustinus, non tam mensura temporis, quam doloris attendenda est: &

(i) Job. 6.

& Nicænum Conc. digne pœnitentes humanius voluit tractari. Et si moderni Pontifices antiquorum rigorem Canonum super lapsos Sacerdotes remittere nequirent, Christiana Religio officio Sacerdotum destitueretur: cum nisi lapsi pene nulli Sacerdotes reperiantur, quos antiqui Canones deponebant, Hinemarus Archi-Episcopus Remensis ait. Hinc ergo cepisse videtur nomen Indulgentiæ, quo nunc utimur. Hinc usus ille Indulgentiarum annorum & dierum. Hinc nomen veniæ, [quam vulgo perdolantiam Itali] quod venia daretur de reliquo tempore. Hinc & nomen Jubilæi: quod instar liberationis a servitute, & remissionis debitorum omnium, (qualis in lege Mosaica septimo quoque anno atque Quinquagesimo fiebant.) Pontifices Romani Apostolorum limina visitantibus, omnium indulgebant veniam peccatorum: id est, omnium pœnitentiarum injunctarum pro peccatis. Quod primum fecisse tradunt Bonifacium octavum, & perpetuum constituisse in centesimum quemque annum: ut habetur Extr. c. Antiquorum. Sed postea Clemens sext. ad Quinquagesimum reduxit: Extr. Unigenitus. Denique Paulus secundus, ob hominum vitæ brevitatem, ad vigesimum quintum. Neque vero tantum pœnitentiæ injunctæ condonari ceperunt in Jubilæo, sed etiam censuræ a jure illatæ, & vota emissa, & obligationes quædam Ecclesiasticæ: ut celebrandi in loco privato, edendi lacticia diebus prohibitis, & similia. Hinc & Cruciatæ dictæ: quod ut ad ferendum subsidium Christianis in terra sancta, bellum contra infideles gerentibus, multos animarent; indulgentias hujusmodi dabant Pontifices omnibus, qui illi militiæ se ascriberent. Eratque militiæ ejus signum & tessera, Crux vestibus affuta, alicujus coloris diversi a veste. Sed postea sub Leone X. cruciatam vocari vidimus indulgentias similes, concessas omnibus, qui certam pecuniam largirentur in bellum contra Turcas. Hæc latratus horrendos excitaverunt in Germania, contra Pontificem, propter Quæstorum abusus. Et quia necdum abusus illi Quæstorum amoveri potuerunt: Conc. Trid. ne nomen quidem audiri posthac Quæstorum jussit.

### *Definitio Indulgentiarum.*

**E**X his, quæ hætenus probavimus, elici potest definitio Indulgentiæ hæc: Dispensatio thesauri Spiritualis Ecclesiæ, in remissionem pœnarum temporalium, quæ debentur vel ex peccato, vel ex voto, vel ex præcepto. Nam quod quidam definiunt, Remissionem pœnæ temporalis pro actualibus peccatis debitæ extra Sacramentum fa-

ctam ex thesauri Ecclesiæ dispensatione; non probaretur S. Thomæ: qui non tam remissionem esse vult, quam commutationem. Alii Relaxationem dicunt: sed neque id probatur: quia licet a pœna non omnino absolvar (quando opus aliquod injungit) tamen Indulgentiæ plenariæ ad omnes pœnas peccato debitas conferuntur. Sylveſter definit donationem alicujus sumpti de thesauro Spiritualis Ecclesiæ, factam peccatori, ut inde satisfiat Deo pœnarum creditori. Sed neque hæc probatur, ut omittam, quod nemo Latinus eam intelliget. Nam potius condonatio pœnæ est, facta per dispensationem, quam relaxatio, & in definitione differentiam sumit author pro genere. Quin etiam dari posse non subditis suaderet: quod est contra Alexand. III. qui non prodesse autumat, nisi de licentia Judicis. Cajetanus in opusculis definitionem non infelicitè traxit ex verbis ejusdem Alexandri & Innocentii, Extr. de Pœn. & rem. c. Cum ex eo, & c. Quod autem. In quibus videtur Indulgentiam esse absolutionem, sive remissionem judicalem, pertinentem ad forum pœnitentiæ, & de pœnitentiis injunctis. Est, inquit, absolutio ab injuncta pœnitentia in foro pœnitentiali. Sed neque per hanc definitionem omnem vim complexus est Cajetanus Indulgentiarum, quæ in usu sunt: quoniam vota sæpius commutant; & multa permittunt, quæ alioqui non licerent. Unde & proprie nomen acceperunt Indulgentiæ. Neque enim pro peccato solum & semper, pœnam debitam compensant: quamvis ad eam principio respexerint. Quare possumus & absolutionem, & compensationem, & distributionem, & dispensationem, & relaxationem, & commutationem, & communicationem, & condonationem, & veniam, & remissionem: ac pari ratione potestatem remittendi, commutandi, relaxandi, ac similem, (juxta Bullæ verba atque formam) vel peccata, vel vota, vel obligationem. Sed quia primum & principale officium earum est, remittere pœnam debitam peccatis: votorum autem commutatio, electio Confessoris, absolutio a censuris (& similia) secundario tanquam adnexa concedi solent: primusque Indulgentiarum usus fuit condonandi pœnitentias injunctas a Sacerdotibus: ideo sufficere poterit hæc definitio: Absolutio vel remissio a pœnis peccatis debitis in foro pœnitentiali: id est, quæ debentur in foro pœnitentiali: sive per Sacerdotem injunctæ fuerint, sive a jure præscriptæ, sive ex æquitate & justitia Divina præscribendæ.

*Indul-*



*Indulgentiæ plenariæ & perpetuæ.*

**H**Abes etiam ex his alias esse perpetuas, alias ad tempus: & alias plenarias, & alias determinatas in parte: omnino secundum Bullæ, qua conceduntur, verba & formam. Nam si de injunctis tantum pœnitentiis loquatur; non extends ad alias. Et si de peccatis confessis, non de non confessis purato te absolutum. Quia tantum valent, quantum sonant Indulgentiæ. Plenaria simpliciter & absolute concessa, absolvit ab omnibus, & in hoc & in futuro sæculo. Cum ergo ponitur in Bulla numerus annorum, vel dierum: & præterea etiam quarentenæ aliquot: intellige per quarentenas, numerum dierum illorum, in quibus acerbior aliqua pœnitentia imposita erat: veluti quod feria sexta, vel quarta, a vino vel sale abstineretur. Si sine restrictione loquantur, valent Indulgentiæ & quantum ad forum Ecclesiæ, & quantum ad forum Dei, ad remissionem pœnæ residuæ post contritionem & confessionem, & absolutionem: sive sit injuncta, sive non. Et ita docet Sylvester ex Thoma, & omnibus Doctoribus, præter Cajetanum.

Nec verum est, quod vulgo putant, si cui imposita sit pœnitentia x. annorum, quam non impleat in hoc mundo: torquendum eum relinqui in purgatorio eodem spatio decem annorum. Siquidem purgatorii dolores eo majores multo sunt, quam hujus sæculi: tum ex sensu, tum ex desiderii visionis Divinæ intensione majori.

*An prosint defunctis per modum suffragii.*

**S**ANCT. Thomas in 4. distinct. 45. docet Indulgentias prodesse defunctis in purgatorio, si id in Bulla ipsarum contineatur, non aliter. Sed quæri solet, quomodo prosint defunctis, extra statum positis merendi? Propter argumentum hoc dicunt Doctores, vivis dari per modum absolutionis: sed mortuis per modum suffragii. Certe Latinis suffragium (translatum a posterioribus pedibus quadrupedum) illa sententia dicitur, vel votum, quod in favorem alicujus datur: juvando, confirmandoque alterius sententiam, qui prior dixit. Sed Theologi rem similitudine declarant. Si quis propter debitum (verbigratia, centum aureorum) detineatur in carcere, vel in trireme: amicus autem ejus, sumpta pecunia ex thesauro publico, cujus administrationem habet, solvat pro eo: liberatur quidem ille a carcere: quia pro debito satisfactum est. Sed diversis ra-

tionibus, a Judice quidem per justitiam, potestate jurisdictionis: ab amico autem per suffragium, id est, per subventionem favorem. Simili modo Papa, ut Judex, liberat viventem in sæculo, absolvendo eum a reatu pœnæ: sed mortuum per modum suffragii, offerendo id pro mortuo, quo liberatur a pœnis purgatorii, tanquam dispensator publici thesauri. Vivi quoque per modum suffragii, prosunt mortuis: quia faciendo id, quod Indulgentiæ Bulla jubet, ipsi ex thesauro eodem sibi concessum præmium largiuntur liberaliter & ex charitate pro mortuis. Sic in Indulgentia agnoscimus justitiam & gratiam. Justitiam, inquam, in satisfactione: sed gratiam in acceptione. Sed controversia est, an existens in peccato mortali possit pro mortuis impetrare indulgentiam. Gabriel affirmat: alii negant. Sed ratio hujus est, quia opus id, cum sit satisfactorium, & fiat nomine Ecclesiæ, quæ semper est in gratia, licet Minister sit extra gratiam, sufficit gratia Ecclesiæ. Sicut si servus elemosynam pro Domino dederit cum peccato, non obest Domino jubenti cum charitate.

*Quæ requiruntur, ut valeant Indulgentiæ.*

**I**Deo videndum, quæ requiruntur ad hoc, ut Indulgentiæ validæ sint. Sunt hæc tria: Autoritas conferentis, charitas accipientis, & causa pia, id est, Dei honor, & Ecclesiæ ac proximi utilitas. Si unum aliquod ex his desit, frustra conceduntur, & indiscretæ vocantur ab Alexandro III.

*Quis potest conferre.*

**S**OLUS Papa potest Indulgentias dare ex plenitudine potestatis. Quoniam ei soli commissa est universalis Ecclesiæ cura. In hac enim, & non in particularibus Ecclesiis servatur indivise thesaurus meritorum Christi. Est enim Christus Caput Ecclesiæ universalis, in quo sunt omnes thesauri sapientiæ & scientiæ absconditi. Episcopi autem Indulgentias dant ex commissione tantum, & non nisi in sibi subditos: nec majores, quam 40. dierum, & in Dedicationibus Ecclesiarum, unius anni. Archi-Episcopus potest easdem in tota sua Provincia. Hæc habentur Ext. c. Cum ex eo. c. Modo. c. Nostro. 24. q. 1. quodcunque de excessib. Prælat. c. Accedentibus.

*Quale esse debet opus Indulgentiæ.*

**A**lterum, quod requiritur, est, ut causa, propter quam conceduntur Indulgentiæ,

tiæ, sit pia. Omnis enim potestas Ministrorum Ecclesiæ data est ad ædificationem. Cum ergo datur aliquid, [veluti in fabricam Ecclesiæ] ne existimes dari temporale pro spirituali: quoniam causa finalis spiritualis est, nempe honor Dei. Et quando in Hospitale, subventio proximi indigentis respicitur. Nec esse debet opus, quod imponitur alias necessarium. Nam nemo Indulgentiam mereatur ex eo, quod injuriam remittat sibi illatam: quia tenetur jam ad hoc ex præcepto Christi.

Illud quoque tradunt Doctores, quod si indeterminate aliquid injungatur ab Indulgentia, [veluti si dicant, Porrigentibus manus adjutrices fabricæ Ecclesiæ] intelligendum est, sicut congruit. Namque si pauper dando obolum, totam consequitur, non ita dives: non enim videtur dives auxilium dedisse, dando obolum tantum. Lucrabitur tamen pro tanta parte. Secus esset, si determinassent quantitatem. Ita sentiunt Thomas & Bonavent. quanquam aliter alii: quia vicini urbis cum minori difficultate veniunt ad Jubilæum, quam peregrini alii: nec minorem consequuntur Indulgentiam, licet mereantur minus.

Cum certum, quid præcipitur, [veluti visitare Ecclesiam a vespera in vesperam] semel tantum Indulgentia potiere. Sed si perpetua esset: tunc quoties eandem Ecclesiam visitabis. Ita sentit Thom. & Doctores Canonici, in c. si. de Pœn. & re. lib. 6. & Ab. & Fel. in tract. de Indulg.

### *An existens in peccato mortali possit eas obtinere.*

**T**ertium, quod requiritur, est, ut simus in charitate: nam existenti in peccato mortali non profunt. Idcirco in omni fere Bulla ponuntur verba hæc: Vere pœnitentibus. Ratio est primum, quia oportet pium esse opus, quod imponitur (ut dictum est) ergo ex charitate: alioqui non esset causa legitima Indulgentiæ. Deinde esse debet idem etiam meritorium: nam ex eo veniam speramus pœnæ debitæ pro peccatis. Atqui sine charitate nemo mereri potest. Tertio Indulgentiæ ad forum spectant pœnitentiale, sicut dictum est. Sed partes pœnitentiæ sunt contritio, confessio & satisfactio: quarum hæc [satisfactio] per dispensationem Indulgentiæ suppletur: confessio fieri ante & postea potest. Restat ergo contritio necessaria, ut culpa deleatur. Atqui deleta culpa, charitas infunditur. Itaque charitas necessaria est, tam ut finis operis, quam ut forma meriti: & ex parte causæ efficientis,

quæ contritionem exigit, requisita: Quin & ex parte subjecti præsupposita. Siquidem pœna, quæ per Indulgentiam remittitur, non æterna est, [mortali peccato debita] sed temporalis, quæ vel deleta culpa relinquebatur pro mortali: vel certe pro veniali culpa reservata erat. Ergo charitas necessario requiritur ad obtinendam Indulgentiam.

Sed disputatur a Sylvestro, an requiratur charitas actualis. Et tandem cum Archidiacono sentit, pium esse credere, quod recedente fictione, possimus consequi effectum Indulgentiæ. De confessione idem omnes sentiunt, ut cum in Bulla dicitur, Pœnitentibus & confessis, sufficiat satisfecisse nos Ecclesiastico præcepto de confitendo semel in anno, cum proposito semper satisfaciendi: nisi tamen expresse jubeatur in Bulla, ut confiteamur, vel interpretative: Ut cum sumere jubemur Eucharistiam. Et ratio quidem horum est; quia Indulgentia præsupponit, remissam esse culpam, saltem per contritionem. Neque hoc principaliter intendunt semper Indulgentiæ, scilicet, ut confiteamur, sed potius, ut opus aliquod agamus pium, propter quod datæ sunt. Atque hæc quidem est communis opinio Theologorum & Canonistarum: quamquam Cajetanus objiciat sequi ex hoc, quod eodem modo sufficeret semel pœnituisse, sicut & semel confessum esse. Utrumque enim affirmativum præceptum est, quod non obligat pro semper. Item sequeretur, quod qui aliquo ex annis elapsis confessus non fuisset, privaretur spe consequendæ Indulgentiæ: non enim confessus est secundum juris formam. Cæterum utcumque requiratur confessio, vel non: certe contritio semper necessaria, non solum de peccatis mortalibus, sed etiam de venialibus. Quoniam nunquam condonatur pœna, nisi remissa culpa, quæ sine contritione non remittitur: ne venialium quidem. Licet hæc deleri dicantur per Orationem Dominicam, per confessionem generalem, per aquam benedictam, per benedictionem Episcopi, & similia: sed non sine contritione omnino.

Ex communi opinione sequitur fieri posse confessionem laico, si aliter Bulla non loquatur. Sequitur etiam nullam esse certam formam absolutionis: quia sine forma & sine Ministro obtineri talis Indulgentia posset. Confessor tamen, si velit, potest hac forma uti:

*Authoritate Apostolica mibi  
commissa, concedo tibi Indul-  
gen-*

*gentiam omnium peccatorum  
tuorum. (†)*

cer a Principe beneficium esse mansurum,  
lib. 6. Innoc. III. c. Quod translaturum. de off.  
leg. & alii c. Cum ad hoc. de Cler. non resid.

*An durent post mortem con-  
cedentis.*

*Conclusio.*

**D**ata Indulgentia durat post mortem con-  
cedentis, etiam si particulari personæ  
data sit. Probant Canonistæ per reg. De-

**A**tque hæc quidem hætenus didacticæ:  
pro more, & stylo eorum, a quibus  
sumpta sunt. Nos autem, ne simus in eis  
nimium curiosi. Credamus nos omnes in  
peccatis esse: ideoque gratia Christi indige-  
re.

(†) Eruditus Lector facile perspiciet, varia in hac sectione referri, quæ declarationibus Pontificum, communi hodiernum Doctorum Catholicorum sensui, praxique fidelium repugnent. Similia alibi sparsim in Institutionibus, quæ Synodalibus his Statutis Bisuntinis adjectæ sunt, reperiuntur: quod semel, ne nimium illis tribuatur, monuisse sufficiat.

De instituenda, cujus supra facta est mentio, pro impetrandis Indulgentiis, confessione, subjungo Decretum duplex, a Sacra Congregatione, Indulgentiis, & Sacris Reliquiis præposita editum: primum quidem anno 1759. alterum vero anno 1763. utrumque sub SSmo Domino Nostro Papa Clemente XIII. Quæ vero de Confessione Laico facienda dicuntur sub finem, certum est apud Catholicos, quod neque de Confessione necessaria, neque de Sacramentali intelligi possint.

## DECRETUM

*Sacra Congregationis, Indulgentiis, & Sacris Reliquiis  
præpositæ.*

**U**T Christi fideles scire possint, quid sibi tenendum foret pro acquirendis Indulgentiis, in sententiarum varietate super intelligentia verborum: qui vere pœnitentes, confessi, ac Sacra Communione resecti Ecclesiam visitaverint; quæ Indulgentiarum Brevibus inferi solent: In Sacra Congregatione, Indulgentiis, Sacrisque Reliquiis præposita, discussis die 31. Martii proximi præteriti nonnullis dubiis, eadem Sacra Congregatio fuit in voto, Confessionem Sacramentalem, quando in Brevibus apponitur pro Indulgentiarum consecutione, peragi omnino debere, etiam ab iis, qui sibi letbalis peccati conscii non sunt; nec non præfatam confessionem suffragari etiam posse, si expleatur in vigilia Festivitatis. Quod autem ad Ecclesie visitationem spectat, eam impleri posse sive ante, sive post aliorum piorum operum implementum.

Factaque de iis per me infra scriptum ejusdem Sacra Congregationis Secretarium relatione SSmo Domino Nostro; Sanctitas Sua ejusdem Sacra Congregationis Votum benigne approbavit, illudque publicari mandavit, quibuscunque in contrarium facientibus non obstantibus.  
Datum die 19. Maji 1759.

Fr. J. Card. PORTOCARRERO Præfatus.

A. E. Vice-Comes Sacra Congregat. Indulgent. Secretarius.

ROMÆ M. DCCLIX.

Ex Typographia Reverendæ Camera Apostolicæ.

## DECRETUM

*Sacra Congregationis, Indulgentiis, & Sacris Reliquiis  
præpositæ.*

**Q**uum Sacra Congregatio Indulgentiis, & Sacris Reliquiis præposita, die 31. mensis Martii anno 1759. fuerit in voto, Confessionem Sacramentalem, quando in Brevibus apponitur pro Indulgentiæ consecutione, peragi omnino debere, etiam ab his, qui sibi Letbalis peccati conscii non sunt; nec non præfatam Confessionem suffragari etiam posse, si in vigilia Festivitatis expleatur, Votumque Congregationis Sanctissimus D. N. CLEMENS Papa XIII. benigne approbaverit, illudque typis publicari sub datum 19. Maji prædicti anni mandavit



re. Credamus in Ecclesia claves esse regni cœlorum; easque commissas Petro. Sectemur charitatem, quæ omnia credit, omniaque sperat. Nam si Patrem habemus Deum; si ejus dilectionem ambimus, qui bonorum omnium fons & origo est: plura ab eo sperare profecto licebit, quam mens humana cogitet.

## DE PECCATIS.

### Et primo de Originali.

**Q**uoniam Sacramenta Ecclesiæ tanquam remedia quædam contra peccata instituta sunt: scire debet Pastor Ecclesiæ, quid sit peccatum, & quæ ejus genera, ut medicinam faciat juxta morbi qualitatem. Est peccatum iniquitas: & omnis, qui peccatum facit, iniquitatem facit, teste B. Joanne (k). Desleat enim a justitia, & regula legis æternæ, quæ est Dei voluntas. Hinc D. Augustinus (l) ex lege Dei definitionem peccati dedit: Quod peccatum est, dictum, factum, vel concupitum contra legem Dei.

Peccati genus duplex est, aliud dicitur actuale, aliud originale. Peccatum actuale, in actione, vel omissione consistit: ut furtum, adulterium, negligentia, inobedientia.

Peccatum vero originale illud appellatur, quod per originem ex peccato primi Parentis omnes contraximus. Deus enim hominem ab initio rectum creavit, ad imaginem & similitudinem suam, cum gratia, & justitia originali: per quam ratio, & intellectus ejus, & voluntas, atque appetitus, omnes denique facultates, tanta inter se concordia, consensuque constabant, ut inferiores superioribus parerent; caro spiritui non repugnaret, & mens tota in Creatorem suum conjecta, obedientiam perfectam ultro libereque præstaret.

Verum primus ille noster Parens, [m] contempta lege Dei & præcepto, quod Deus sibi dederat, ne ex ligno scientiæ boni & mali vesceretur, & decepta a serpente Eva, arbitrii libertate peccavit, & Deo Creatori suo inobedientem se præstitit: quapropter justitiam illam originalem, & gratiam, qua

orna-

daverit; quam plures supplices Libelli tum Regularium Communitatum, & præsertim Monialium, tum etiam Parochorum, & nonnullorum Episcoporum pro suis Diocesis porrecti sunt, quibus maxima exponebatur difficultas, quæ interdum, imo per sæpe incidit pro Sacramentali Confessione, sive in Festo, vel ad minus in vigilia peragendo. Quamobrem, ut adeo proficius Indulgentiarum thesaurus reddatur fidelibus accommode comparandus, enixis precibus supplicabant Sanctitati Suae, ut opportuno aliquo remedio de Apostolica Benignitate providere dignaretur: Quibus precibus ad prædictam Sacram Congregationem remissis, propositum in ea fuit dubium An, & quomodo sit consulendum SSmo super præfati Decreti executione, vel declaratione in casu &c. Et responsum fuit, Consulendum Sanctissimo D. N., ut concedere dignetur Indultum omnibus Christi fidelibus, qui frequenti peccatorum Confessione, animam studentes expiare, sæpe saltem in hebdomada ad Sacramentum Penitentiae accedere, nisi legitime impediuntur, consueverunt; & nullius letalis culpæ a se post peractam ultimam Confessionem commissæ, sibi consci sunt: ut omnes, & quascunque Indulgentias consequi possint, etiam sine actuali Confessione, quæ cæteroquin juxta præfati Decreti definitionem ad eas lucrandas necessaria esset. Nihil tamen innovando circa Indulgentias Jubilæi tam ordinarii, quam extraordinarii, aliasque ad instar Jubilæi concessas, pro quibus assigquendis, sicut & alia opera juncta, ita & Sacramentalis Confessio, tempore in earum concessione præscripto peragantur.

Et facta per me infra scriptum Ejusdem Sacræ Congregationis Secretarium de præmissis omnibus Sanctissimo Dno Nostro relatione, Sanctitas Sua piis bonorum desideriis ac votis satisfacere, & Indulgentiarum gratias, iis potissimum, qui pie, sancteque vivendo, donis Divinæ Misericordiæ digniores efficiuntur, elargiri quam maxime cupiens, benigne annuit, & præfatum Indultum in forma supra scripta expediri, & publicari mandavit, quibuscunque in contrarium non obstantibus.

Datum ex Secretaria S. Congregationis Indulgentiarum die nona Decembris MDCCLXIII.

N. Cardinalis ANTONELLUS Præfectus.

J. de Comitibus Sacræ Congregationis Indulgentiarum Secretarius.

ROMÆ ex Typographia Rev. Camera Apostolicæ MDCCLXIII.

(k) 1. Joan. 3.

(l) Aug. ad Bonif. & Con. Epi.

(m) Genes. 2.

ornatus ipse erat, & filios cum eodem ornamento geniturus, misere, sedēque amisit. Itaque averſus a Deo ſummo bono, & ad creaturas converſus, Dei amorem exuens, amorem ſui induit, factus propenſus & pronus in omne malum, per naturæ ſuæ corruptionem, hoc eſt, per ignorantiam in mente, & concupiſcentiam in carne, legi Dei repugnantem, & captivantem eum in lege peccati.

Vitium ergo hoc & malum, in nos ita tranſmiſſum eſt, ut ſicut futuri eramus per nativitatem hæredes juſtitiae, & rectitudinis illius paternæ: ſic nunc privati eadem gratia, obnoxii maneamus peccato illius, amiſſa ſpe hæreditatis æternæ & gloriæ cœleſtis: cum virium naturalium magna perturbatione, ut ſuperioribus facultatibus inferiores (quæ parere debuerant) ſæpius rebellent, imo etiam imperent & dominantur in nobis, niſi gratia Dei præveniamur.

Sic præter ſitum, famem, dolores, morbos, & mortem, alia duo contraximus ex peccato primi parentis: carentiam juſtitiae originalis, quam habere debueramus: & concupiſcentiam, quæ rationi rectæ contrariatur: quam & alio nomine fomitem peccati appellamus. Hac cauſa dicimur naſci omnes filii iræ, concipi in iniquitatibus & peccatis. Nam per unum hominem peccatum in mundum intravit, & per peccatum mors.

Sed per Chriſtum Jeſum reconciliationem accepimus, (n) qui nos Deo Patri reconciliavit in Sanguine ſuo, factus nobis juſtitia, ſanctificatio, & redemptio: qui paſſione ſua delevit chirographum illud decreti, quod erat contrarium nobis. Deletur enim per Baptiſmum hoc peccatum originale, ita ut gratiam Dei conſequamur: & rebellio illa membrorum non imputetur ad peccatum, niſi conſentiamus ei. Nam concupiſcentia, ſeu fomes non alia ratione dicitur peccatum ab Apoſtolo, quam quod ex peccato eſt, & ad peccatum inclinat.

Ergo omnes (etiam unius diei infans) indigent gratia Dei, & per aquam & Spiritum renaſci: quia omnes illius primi peccati cauſa morti obnoxii, & peccatores conſtituti fuimus apud Deum. Et niſi quis renatus fuerit ex aqua & Spiritu Sancto, non poterit intrare in regnum Dei.

## DE PECCATO MORTALI & Veniali.

**P**eccatum actuale (ſeu perſonale) a nobis committitur, & noſtra culpa. Un-

de peccatum adeo voluntarium eſſe dicitur, ut ſi non eſſet voluntarium, non eſſet peccatum. (o)

Hoc duplex invenitur, Mortale ſcilicet, & veniale. Dicitur quidem mortale, quia, qui talia agunt, digni ſunt morte, nec regnum Dei poſſidebunt. Et quia etiam per peccatum mortale gratia Dei & charitas amittitur, per quam vivit anima. Veniale vero, quia venia non caret, & ſi poena dignum ſit.

Sunt ergo peccata non quidem æqualia omnia, ut quidam Stoici hæretici arbitrantur: ſed alia aliis graviora, quanto magis vel minus committuntur contra charitatem Dei, vel proximi. Docet Chriſtus Matth. 5. Qui dixerit fratri ſuo Racha, &c. Et B. Jacobus, [p] Unusquisque tentatur, a concupiſcentia ſua abſtractus & illeſtus. Deinde concupiſcentia, cum conceperit, parit peccatum: peccatum vero, cum conſummatum fuerit, generat mortem. Et B. Paulus, (q) graviora ab aliis ſejunxit, cum dixit: Fornicatio autem, & omnis immunditia, & avaritia, nec nominetur in vobis, ſicut decet Sanctos: aut turpitudine, aut ſtultiloquium, aut ſcurrilitas, quæ ad rem non pertinent: ſed magis gratiarum actio. Hoc enim ſcitote intelligentes, quod omnis fornicator, aut immundus, aut avarus (quod eſt idolorum ſervitus) non habebit hæreditatem in Regno Chriſti & Dei.

Conſiſtit quidem peccatum mortale in offenſa Divinæ amicitiae: quia dum peccator mavult ſuam voluntatem explere, quam Dei, Dei amicitiam rejicit, nec pro ultimo ſine & ſummo bono eum agnoſcit, & retinet. Qui non diligit, (inquit B. Joannes) manet in morte. Idcirco dicebat David: Tibi ſoli peccavi, & malum coram te feci. Contra vero, homo in Charitate Dei manens, Deum rebus omnibus amandis proponit, & præfert, quantum humanæ datur infirmitati: imo præ charitate Dei, omnia pericula & adverſa contemnit, in Dei charitate manere deſiderans.

Veniale autem non dirimit, aut ſolvit Divinam amicitiam: quia (ut plerique Theologi tradunt) non contra, ſed potius præter Divina præcepta & voluntatem Dei fiunt: quando ſcilicet peccamus, non deſerendo principium & finem, qui Deus eſt, nec excluſendo ejus charitatem, ſed remittendo dilectionis ejus fervorem, & prætermittendo modum rectitudinis colendi Dei. Inter hæc ponuntur motus illi appetitus ſenſitivi, qui non ſtatim reprimuntur: item riſus immodera-

(n) Rom. 5.

(p) Jacob. 1.

(o) Auguſt. de Ver. releg. lib. 14. &amp; lib. 1. retra. c. 13.

(q) Eph. 5.

deratior: joci vani & inutiles: cibus & potus supra necessitatem naturæ: dormitatio in dicendis horis, & in orando: lites non justitiæ aut pietatis causa susceptæ: & similia innumera, propter quæ non offenditur charitas Dei, nec proximi, nec sui ipsius. Unde fornicatio peccatum mortale est: nam qui fornicatur, in corpus suum peccat, teste (r) Apostolo. Peccat etiam in Christum omnis Christianus, qui contumelia afficit corpus suum: quoniam membra corporis Christi sumens, tradit ea meretrici, & ludibrio Satanæ. Non sumus nostri, inquit Tertullianus, sed pretio empti sanguine Dei. Lædentes igitur carnem istam, eam lædimus. Ad uxor. lib. 2.

Et considerandum Curato, quod eadem peccata, vel ejusdem generis, quæ natura levia sunt, & venialia, possunt mortalia fieri, propter circumstantias loci, temporis, personæ, causæ, modi: & quando contra conscientiam. Nam talis intentio est, quæ avertit a Deo. Item quando placent, & crebro iterantur, peccata venialia fieri possunt mortalia: (\*) ut docet B. Augustinus in Enchiridio: & Ecclesiasticus, Qui modica spernit, paulatim decideret.

Cum sit ergo peccatum omne iniquitas, ut ex B. Joanne didicimus: sequitur, quod nunquam licet peccare. Nam si liceret, malum non esset. Nec propter bonum quidem: Nam non sunt facienda mala, ut veniant bona. Sed dices forte, Ex duobus malis, minus est eligendum, teste Arist. in Top. & docet Gratianus distin. 13. & Chryso. homil. 27. ad pop. Antioch. Loth quoque, vir justus, filias exposuit libidini Sodomitarum, ut eos a nefando scelere reduceret. Lupanaria permittuntur in civitatibus, & jurare per falsos Deos, infideles: quia minus malum rationem habet boni. Respondetur ex communi opinione Theologorum, nunquam licere tibi male agere, neque ut majus bonum assequaris, neque ut majus malum vites. Nec tantummodo admittendum peccatum non est, ut majus in te vites peccatum: sed neque ut in alio. Huc pertinet (s) Pauli sententia, non esse facienda mala, ut veniant bona. Sed controversia est, num liceat alteri consulere minus malum, ut vitetur majus. Videretur enim malum non esse, si liceret. Ex altera parte dicitur, minus malum rationem habere boni. Dominicus Soto restrictionem adhibet: nempe, quando quis certo animo constituit peccatum gravius admittere: nec alia (\*\*) potes eum a peccato avertere, quam oblato alio minori peccato: tunc licet minus offerre. Tibi autem

nunquam licet, in gratiam cujusquam committere peccatum. Sed uri alieno peccato in bonum finem etiam Deus solet. Itaque docet idem Soto, quotiescunque tu id, quod petis, juste ab alio fieri potest, & bona causa petis; (quamquam scias alterum male esse acturum) licet tibi tuo jure uti. Si vero ille non potest illud idem bene agere ac juste: non licet tibi. Exemplum prioris esto in usura. Potest namque fenerator tibi mutuare suam pecuniam, si velit, sine scenore. Exemplum alterius: si peteres ab amico, ut fureretur, quo tibi subveniat, vel ut inimicum tuum occidat. Hæc enim bene fieri non possunt. Factum vero Loth excusare vix audent Theologi. Licet Ambrosius (t) zelum ejus excuset, & Petrus eum justum dicat. Neque enim decebat illud, quod proposuit, cum filiarum suarum charissimarum dedecore admitti. Idcirco B. Augustinus perturbationi censet, non consilio, tribuendum. 14. distin. cap. Quod.

### DE SEPTEM PECCATIS capitalibus.

SEPTem a D. Gregorio (u) enumerantur vitia, seu peccata mortalia, aliter etiam capitalia nuncupata, quod ab his (tanquam ex fontibus quibusdam) alia peccata emanent & nascantur: vel quod ad hæc alia omnia referantur, & sub ipsis contineantur, tanquam sub generibus suis. Siquidem fornicatio, adulterium, stuprum, immundus sermo, morosa cogitatio, ex uno fonte libidinis procedunt, qui dicitur luxuria: & sub uno nomine continentur luxuriæ.

Itaque potest esse hoc nomen luxuria, nomen vitii, in animo, & habitus naturalis, vel acquisiti: & potest esse nomen generale peccati libidinis, quod committatur opere, ore, vel cogitatione. Unde sequitur, quod potest peccatum luxuriæ esse aliquando veniale: licet frequentius sit mortale. Nam in conjugio (ut D. Augustinus docet) committi solent hujusmodi venialia.

Sunt peccata capitalia hæc: Superbia, Invidia, Ira, Avaritia, Luxuria, Gula & Acedia, id est, Pigritia. Quorum memoriam ordine tenebit simplex Sacerdos, si in fronte ponat superbiam, in oculis invidiam, in ore gulam, in corde iram, in renibus luxuriam, in manibus avaritiam, & in pedibus pigririam.

Hæc ordine nosse debet, & eorum differentias scire: ut sibi cavere possit Deo auxili-

(r) 1. Cor. 9.

(\*) Intellige, quod disponant ad mortalia.

(s) Rom. 3.

(\*\*) Supple: via, vel ratione.

(t) Amb. lib. de Patriarch.

(u) Greg. lib. 30. mor.



auxiliante, & alios etiam docere, quomodo cavere possint. Quare ut nihil a nobis desiderent simplices Parochi Sacerdotes, singula peccata hæc ita tractabimus, ut primo loco sententias aliquot paræneticas ex Sacris Literis proponamus, quas in ore semper habere possint. Deinde definitionem ipsius peccati ex communi Schola Theologorum. Tertio filias, quas vocant. Quarto ad detestationem vitii, similitudinem aliquam, qua peccati turpitudine exprimitur. Denique consilium familiare, quod in confessione dabunt Sacerdotes confitentibus sibi, ut vitium vitare facilius queant. Quanquam unum est & optimum consilium, Christi vitam Salvatoris nostri semper præ oculis habere, & assidue meditari. Verum propterea, quod non a Deo sumus omnes spirituales: visum est crassiori doctrina utendum.

### SUPERBIA.

**I**Nitium omnis peccati superbia est. Eccles. 10. Odibilis coram Deo & hominibus est superbia. Ibidem, Deus superbis resistit, humilibus autem dat gratiam. Jacob. 4.

Ideo Christus JESUS humilitatem merito nobis præter cætera commendavit.

#### Definitio superbiæ.

**S**uperbia est amor inordinatus propriæ excellentiæ: vel [ut clarius dicamus] Superbia est vitium inclinans ad amorem propriæ celsitudinis, & excellentiæ, perverse: veluti ad desiderium honoris, quæ est ambitio: officiorum, quæ est præsumptio: gloriæ, quæ dicitur vana gloria: atque hæc omnia perverse, hoc est, sine meritis propriis aut virtutibus, & cum contemptu legis Divinæ. [x]

#### Filiæ superbiæ.

**H**inc filiæ superbiæ nascuntur: inobedientia, contentiones, pertinacia, discordiæ, curiositas, hypocrisis, jactantia. Et quidem cætera, quæ desiderantur ab hominibus, aliquid habere videntur secum utilitatis & commodi: Superbia vero nil, nisi curas, labores, pericula, vanitatemque promittit: & in acquirendis iis, quæ cupit, atque retinendis, pari afficit molestia.

#### Similitudo.

**E**st dulce venenum gloria, & speciosus fumus: in quem cum ingrederis, obcæcaris. Est & gloria crocodilus: fugientem sequitur, & sequentem se fugit, sicut etiam umbra corpus.

### Consilium contra superbiam.

**C**onsilium contra superbiam est, considerare naturæ nostræ conditionem, & infirmitatem: quorum vita sit adeo brevis, adeoque multis obnoxia casibus & miseriis. Deinde quam multi præstent nobis ingenio, genere, forma, viribus, divitiis, & aliis rebus unde gloriamur, & insolescimus. Contra vero, quam multa habeamus mala & vitia, quæ a multis ignorantur.

### INVIDIA.

**P**utredo ossium invidia. Prov. 14.

Invidia diaboli, mors introivit in orbem terrarum. Imitantur autem illum, qui sunt ex parte ipsius. Sap. 2. Cain, qui ex maligno erat, occidit fratrem suum, scilicet, Abel. Propter quid occidit eum? quoniam opera ejus maligna erant, fratris autem ejus justa. 1. Joan. 3.

Qui ruina lætatur alterius, non erit impunitus. Prov. 17.

An oculus tuus nequam est, quia ego bonus sum? Matth. 20.

#### Definitio invidiæ.

**I**nvidia definitur: Odium felicitatis alienæ: & a Damasceno: Tristitia de bonis alienis. Habet vitium hoc odium proximi, quatenus eo se putat inferiorem esse honore, opibus, scientia, gratia, & virtute aliqua. Instigat & ad detrahendum famæ ejus, tum secreto, tum etiam publice, & coram omnibus: unde fit, ut doleat de felici successu proximi, & lætetur de infelici: peccatum sane oppositum ex diametro charitati proximi.

#### Filiæ invidiæ.

**I**taque invidia parit odium, susurrationem, detractionem, lætitiā de adversis, & afflictionem ac mœrorem de rebus prosperis suorum æqualium.

#### Similitudo.

**S**imilem nonnulli faciunt anguillæ, alii hydræ, quod utrumque horum ignavum est animal, degens in luto & cæno palustri: luto pascitur, bullasque ex profundo emittit, & vaporem atque halitum pestiferum. Sic invidus animo est abjecto, & vili, ex imo corde verba proferens cum veneno pestifero. Sepulchrum patens est guttur eorum: linguæ suis dolose agebant: Venenum aspidum sub labiis eorum. (y)

Con-

(x) S. Thom. 2. 2. q. 162. art. 1.

(y) Psal. 13.

*Consilium.*

**C**onsulet Sacerdos, ut peccator multorum hominum condiciones consideret, quos adversa fortuna indigne premit: non autem feliciores. Sic fiet ex comparatione sui (quod innumeros se infeliciores viderit, ut pauperis surgant animi jacentes. (2)

*I R A.*

**I**Ra viri iustitiam Dei non operatur. Jacob. 1.

Fatuus statim indicat iram suam. Proverb. 12.

Homo iracundus incendit litem. Eccl. 28.

Ego autem dico vobis, quia omnis, qui irascitur fratri suo, reus erit iudicio: qui dixerit racha, reus erit concilio: qui dixerit fatue, reus erit gehennæ ignis. Matth. 5.

Iraucimini, & nolite peccare: sol non occidat super iracundiam vestram. Nolite locum dare diabolo. Ephes. 4.

Sit autem omnis homo velox ad audiendum, tardus ad loquendum, & tardus ad iram. Jacob. 1.

Molle verbum frangit iram: sermo durus suscitatur furorem. Prov. 1.

*Definitio iræ.*

**I**Ra appetitus est inflammatus ad vindictam. Potest passio naturalis esse in facultate irascibili: nec erit peccatum, si legi Dei non repugnet aut rationi. (a) Sed peccatum est, quando contra rationem, vel perverse vindictam appetit. Itaque hoc vitium damnatur, quatenus inclinat ad sumendam vindictam inordinate: vel ad negandum colloquium, per quendam mentis tumorem: vel ad convivium proferendum, & vel etiam cum Dei blasphemia excandescendum.

*Filiæ.*

**I**Taque ejus filiæ sunt, clamores, blasphemiarum, contumeliarum, rixarum, indignatio, tumor mentis, ita quod loqui dedignetur iratus, & inflatus contra proximum incedat. Peccata omnia contra charitatem proximi & Dei. Quia Charitas patiens est, benigna est: Charitas non æmulatur, non agit perperam, non inflatur &c. omnia suffert, omnia credit, omnia sperat, omnia sustinet. (b)

*Similitudo.*

**I**Ra furor brevis est: animum rege. Qui nisi paret, (c)

*Imperat.* Ea mentem etiam sapientis ita perturbat, ut nisi advertas antea, nihil differas ab stulto. Nam ubi semel iracundia animum occupaverit, ratio omnis & iudicium confunduntur. Et veluti, quum magno fumo obruta est domus, portæ & exitus non apparent, qua incendium evadatur: sic obsidente ira mentem hominis, nulla patet via iudicio rationis ad reprimendum furorem.

*Consilium.*

**I**dcirco cavendum multo ante, ne ira in mentem irrumpat, & consilium videtur optimum contra iram, (præter multa, quæ Plutarchus, & alii tradiderunt) ut assuecias, quoties irasceris, cogitare tantum hoc: *Ego irascor.* Nam si istud memineris, nihil ages, vel loqueris, vel certe, si quid egeris, non erit cum magna impotentia. Sed præstat nihil agere aut loqui, quando irasceris.

*G U L A.*

**P**ropter crapulam multi obierunt: qui autem abstinens est, adjiciet vitam. Eccl. 27.

Qui diligit epulas, in egestate erit. Qui amat vinum & pingua, non ditabitur. Proverb. 21.

Attendite vobis, ne forte graventur corda vestra in crapula & ebrietate, & curis huius sæculi. Luc. 2.

Sicut in die, honeste ambulemus: non in comestationibus & ebrietatibus. Rom. 13.

*Definitio gulæ.*

**S**icut de ira dictum est, potest etiam appetitus cibi & potus non esse peccatum, si naturæ & rationi non dissentiat: sed si immoderatus sit, hoc est, si ad edendum, vel bibendum immodice inclinet; tunc multa ex se mala gignit: aut si in cibo & potu quis felicitatem constituat, [quales quidam Epicuri de grege porci, quorum Deus venter est, (d) & gloria in confusione ipsorum] certe peccatum est mortale. Tales enim Dei præcepta non verentur transgredi, & violare: modo gulæ satisfaciant & abdomini.

*Filiæ gulæ.*

**E**X crapula & ebrietate quam multa mala sequantur, nemo non novit: præter illa, quæ passim videmus, ineptam lætitiarum, stultiloquium, scurrilitatem, immunditiam, sensus hebetudinem.

*Simi-*

(2) Seneca. In Hecuba.

(a) S. Tho. 1. 2. q. 23. art. 3. &amp; 4. &amp; q. 42.

(b) 1. Cor. 13.

(c) Horatius,

(d) Phil. 3.

*Similitudo.*

**N**utriendum est corpus nostrum tanquam jumentum, ut spiritui serviat: non ut lascivia excutiat sessorem. Nam sicut in pugna, si quis alteri auxilio veniat, illi victoriam parit: sic caro carni addita, & sanguis sanguini, facile spiritum expugnant, & rationem Deo obedire præcipientem prosternunt.

*Consilium*

**U**Num consilium superest, Vitare comestiones: & in mensa recordari, quod debemus cum gratiarum actione cibum sumere, & pauperum Christi misereri.

*LUXURIA.*

**Q**ui adhæret meretrici, unum corpus efficitur. 1. Corinth. 6.

Nescitis, quia corpora vestra membra sunt Christi. Ibidem.

Fornicatio, & vinum, & ebrietas auferunt cor. Osce 4.

Nunquid potest homo abscondere ignem in sinu suo, ut vestimenta sua non ardeant? Proverb. 6.

Pretium scorti vix est unius panis, & animam viri pretiosam capit. Prov. 3.

Omnis mulier, quæ est fornicaria, quasi stercus in via ab omnibus prætereuntibus conculcabitur. Ecclesiast. 9.

Fugite fornicationem. Omne enim peccatum, quodcumque fecerit homo, extra corpus suum est: qui autem fornicatur, in corpus suum peccat.

Omnis, qui viderit mulierem ad concupiscendam eam, jam mæchatus est eam in corde suo. Matth. 5.

*Definitio luxuriæ.*

**L**uxuria, vel luxus nomen generale est apud morales Philosophos, ad omnem superfluitatem, ut venereorum, cibi, potus, vestimentorum, & rerum aliarum. Sed hic sumitur pro vitio & peccato Veneris tantum. Estque luxuria actus, vel inclinatio inordinata in rebus venereis: & potest esse inordinatio in circumstantiis, vel in ipso genere actus. Propter circumstantias quidem peccare possunt venialiter conjugati: sed in genere quædam sunt semper mortalia: ut fornicatio, adulterium, stuprum, raptus, incestus, peccatum contra naturam.

*Filiæ luxuriæ.*

**Q**ui adulter est [ inquit (e) Salomon ] propter cordis inopiam, perdet animam

suam: turpitudinem & ignominiam congregabit sibi: & opprobrium illius non delebitur. Unde hujus peccati luxuriæ filiæ appellantur cæcitas mentis, inconsideratio, inconstantia, præcipitatio, amor sui, odium Dei, amor præsentis sæculi, desperatio futuri.

*Similitudo.*

**O**Mnem voluptatem corporalem Philosophi similem esse tradiderunt monstris quibusdam, quæ Poetæ vocant Sirenes: quod hæ pulchra facie & cantu suavissimo adblandientes, posteriora corporis haberent scædissima: & homines cantu allectos misere devorarent. Sed præcipue vitium hoc luxuriæ, primum facie arridet, multa suavitate: sed posteriora ejus (id est, finis) plena sunt amaritudine; hoc est, infamia, periculis, infirmitatibus, & miseria.

*Consilium.*

**C**onsilium erit optimum, ut jejunio interficiat hanc belluam, sicut jejunii saliva dicitur extinguere serpentes. Deinde ut amoris oblivionem, quacunque ratione possit, quærat. Quod fiet, si mutato loco alio procul recedat: si consuetudinem habeat cum hominibus ab amore alienis: numquam sit solus, cum amoris est adhuc recens memoria, nec otiosus; sed lectione vel negotiis semper occupetur. Literas, & omnia monumenta, per quæ possit in memoriam revocari amor, comburat, aut aliter perdat. Quod facile factum erit, si consideret fraudes, mendacia, perfidiam, & alia, quæ in ea, quam amat, expertus est. Item si consideret imperfectiones corporis, vel animi, vel fortunæ illius, & conditionis. Denique orationibus postulet a Deo (f) sapientiam & castitatem: sine quo casti esse non possumus.

*PIGRITIA.*

**M**ulta vitia docuit otium. Ecclesiast. 7.  
Vade ad formicam, o piger, & considera vias ejus, & disce sapientiam. Proverb. 6.

Vult & non vult piger. 13.

Propter frigus piger arare noluit: mendicabit ergo æstate. 20.

Regnum cælorum vim patitur. Matth. 11.

Omnem palmitem in me non ferentem fructum tollet eum. Joan. 15.

Vigilate, quia nescitis diem, neque horam. Matth. 25.

*Definitio pigritiæ.*

**A**Cedia, ut nomen Græcum sonat, proprie incuria est & negligentia: sed si-

N 3

cut

(e) Proverb. 6.

(f) Sapient. 8.



cut huic loco convenit, est tristitia, vel tædium de mandato Dei implendo : ita ut sit quidam langor, seu fastidium & dejectio animi in exercitatione virtutum. Quapropter cum aliquis fastidit præcepta Dei, aut tristatur audiendo, quod Deus vult nos per multas tribulationes ingredi regnum cælorum, aut aliud simile, peccatum committit mortale & gravissimum, & (ut quidam dicunt) proximum odio Dei. Si negligentia sit in adimplendis mandatis Divinis, tunc peculiariter peccatum erit contrarium illi mandato, quod negligitur, sed a fonte manans hujus pigritiæ, vel acedix.

### *Filiæ.*

**H**ujus filiæ sunt desperatio, pusillanimitas, torpor, malitia, id est, voluntas machinandi malum. [f] Homo enim ignavus, dum victu indiget, expectans vanam spem, [ut ait Hesiodus] multa mala & flagitia animo concipit, unde vitam trahat. Indignatio, seu rancor, id est, inveteratum odium contra eos, qui virtutem laudant, & ad bona spiritualia hortantur. Evagatio mentis, ad res cogitandum & agendum illicitas. Quia cum necesse sit, ut animus aliquid agat semper, ne a motu vacet, in otio desidens, statim delabitur ab honestis cogitationibus ad turpes.

### *Similitudo.*

**I**gnavi homines & pigri, similes dicuntur chamæleonti, qui oscitans vescitur, & follicans ruminat de vento cibos. Alii asinis comparant, qui nisi fustibus compulsi, nihil agunt.

### *Consilium.*

**I**gnavis & desidibus, præcipiebant nasturtium: forte ut eorum dormitantem animum & frigiditate torpentem, excitarent. Sed hoc proverbium fortasse per allegoriam inventum est. Illud magis probandum, quod quidam Philosophi præcipiebant, in optimis quibusque rebus nos exerceri debere, quamvis initio videantur difficiles: quia assuefactione fiant faciles. Sed in rebus spiritualibus adimplendis, imploranda semper Divina gratia, ut det nobis velle & perficere pro sua voluntate.

## *AVARITIA.*

**A**varitia est idolorum servitus. Ephes. 5. Radix omnium malorum est cupiditas. 1. Tim. 6.

Beatus dives, qui inventus est sine macula. Ecclesiast. 31.

Ignis in domo impii, thesauri iniquitatis. Mich. 6.

Avaritia nec nominetur in vobis, sicut decet Sanctos. Corinth. 6.

Fornicatores, adulteri, & avari regnum Dei non possidebunt. Ibidem.

### *Definitio avaritiæ.*

**A**varitia est immoderatus amor habendi. Er in duos actus fertur vitiosos: Vel enim deficimus in dando, vel excedimus in accipiendo (g). Er peccatum est mortale, quoties admittitur cum injuria proximi, vel contra charitatem Dei: veluti contra præceptum charitatis erga proximum, quia non satis est nihil alienum rapere, sed opus est etiam indigentiam proximi sublevare. Esurivi [inquit (b) Christus] & non deditis mihi manducare. Concupiscentia etiam inordinata rei alienæ peccatum mortale est, & contra legem Dei: Non concupisces rem proximi tui. Tesaurizatio etiam supraquam necesse sit, aut in malum finem. Potest tamen aliquis sine peccato tesaurizare, ut parentes filiis & futuræ necessitati: quod opus est prudentiæ. Quin etiam ut in statu altiori possit Deo melius servire, juxta sibi datum talentum. Qui opes desiderat vel colligit, potest fieri, ut non peccet. Volupras nimia & gloriatio in divitiis, peccatum est mortale, & idololatria, quam vocat Apostolus. Nam qui sic affectus est, (quoniam fidem, spem & dilectionem, quam Deo debemus, in pecunia collocat) pecuniam pro Deo habet. Quod cum plerumque contingat: ideo difficile est divitem intrare (i) in regnum cælorum. Cæterum licet prodigalitas avaritiæ opponatur, nihilo tamen minus peccatum mortale est prodigalitas: ut cum quis sine ratione, & cum damno alterius, & obligatione [qua ad aliud tenetur] neglecta, pecuniam effundit: sicut quidam Beneficiati, qui bona pauperum, quorum curam habere deberent, in vanos usus prodigunt, peccant mortaliter.

### *Filiæ.*

**E**x mala hac, corruptaque radice, mali fructus producuntur, nempe obdurtio cordis, hoc est, inhumanitas & immisericordia erga egenos, inquietudo mentis, hoc est, desiderium acquirendi irrequietum, violentia, fraus, fallacia, perjurium, proditio. (k)

### *Simi-*

(f) Greg. lib. 31. mor.

(b) Matth. 6.

(g) Vide S. Tho. 2. 2. q. 118. & 119. & ejus com.

(i) Matth. 19.

(k) Greg. 31. d. S. Tho. 2. 2. q. 118. art. 17.

*Similitudo.*

**M**Orbus hic avaritiæ (qui in acquirendo insatiabilis est) comparatur hydropisi: in qua quo plus sunt potæ, plus sitiuntur aquæ. Quatenus vero in erogando deficit, nec parris uri audet: avari opes similes habentur cenæ pollincturæ, ubi cum sint omnia lauta & splendida, & abunde apposita: sola tamen deest lætitia, propter quam parari solent epulæ copiosius. Quis enim sanæ mentis rideat in funere?

*Consilium.*

**U**T ergo cura hac & lethali morbo libereris, Christus monet, Luc. 12. Videte & cavere ab avaritia, quia non est vita cujusquam in abundantia eorum, quæ possidet. Scito, quod nihil attuleris in hunc mundum: nihil etiam auferes. Considera etiam, quod te Ecclesiasticus [1] monet: Multos perdidit aurum, & in specie ipsius perditio illorum. Nam qui volunt divites fieri [inquit (m) Apostolus] incidunt in tentationem & in laqueum diaboli, & desideria multa & nociva: quæ mergunt homines in interitum. Sed conare tantum in arte tua, & professione te diligentem præstare, & justum, & sine fraude: nihil tibi deerit. Filios tuos arte aliqua instrue: disciplinam exittimans certam & solidam hæreditatem. Fuge aleam & concertationes fortis. Si mercaturam exerces; scito pondus, & pondus, hoc est, imposturam omnem, odibilem esse Deo: quin & deprehensam ab hominibus exitio magno esse auctori suo. Potest tamen mercator propter utilitatem communem, & ad finem honestum (puta ad sustentationem domus suæ, vel pauperum) suam artem exercere, & tanquam pro stipendio laboris, vilius emere, & carius vendere; dummodo vitet monopolia, nec excedat rationem, quam dare potest tempus & locus: quia res una potest pluris æstimari, & minoris propter varias causas, si non excedatur communis & solitus valor: quem habere certum est aliquam latitudinem, nec in indivisibili consistere. Nam propter penuriam rei necessariæ ad vitam humanam (ut cibi, vestimenti, habitationis & similium) pretium augetur. Res non necessarias, & ad solam voluptatem emptoris comparatas, & quas emptor non ignoret aliunde posse haberi [quia nulli fit injuria nec privatim, nec publice] vendi licet, quanti maximi possunt: alioqui enim, si aliunde haberi res possit minoris multo, (quia emptor deceptum postea se existimat) certe alteri fecisti, quod tibi factum nolles. Item propter damnum, quod

accipit ex venditione venditor, ut gratificetur amico, potest rem suam pluris facere: ne ex beneficio damnum faciat, re sua postea indigens. Turpe Lucrum etiam putato, sine necessitate, sed sola cupiditate, tempore messis aut vindemiæ vilius emas, venditurus carius. Vocatur hoc monopolium. Denique abstineas ab omnibus illis contractibus, ex quibus solent homines ex divitibus & opulentis, fieri pauperes & egeni. Tales enim omnes sunt illiciti agentibus ex se, & patientibus damnosi. Hoc consilio fugies, usuram, versuram, cambiam sicca, figuratas seu fictas venditiones, & similes omnes hircundines patrimoniorum.

## PECCATA CLAMANTIA in Cælum.

**S**unt quædam peccata, quæ ob insignem, manifestamque præ cæteris nequitiam ac perversitatem, clamare dicuntur in cælum: quasi iram, ultionemque Divinam accersentia. Ac neque unquam impune fiunt: nam clades omnes, bella, vastationes urbium, & populorum, in vindictam eorum, qui talia agunt, e cælo mittuntur. In Sacris Literis quatuor invenias. Sunt hæc: Homicidium voluntarium: peccatum Sodomiticum: oppressio pauperum: merces operarii retenta. De homicidio quidem Genes. 4. exemplum habes. Occiso a Cain fratre, dixit Dominus ad Cain, Vox sanguinis fratris tui clamat ad me de terra: de Sodomia autem Gen. 18. Clamor Sodomorum & Gomorrhæorum multiplicatus est, & peccatum eorum aggravatum, &c. De pauperum oppressione, Exod. 22. Advenam non contritabis, neque affliges, &c. Viduæ & pupillo non nocebis. Si læseritis eos, vociferabuntur ad me, & ego exaudiam clamorem eorum, & indignabitur furor meus, &c. De mercede denique retenta operarii, Deut. 24. Non negabis mercedem indigentis, & pauperis fratris tui, sed eadem die reddes ei pretium laboris sui ante Solis occasum, quia pauper est, & ex eo sustentat animam suam: ne clamet contra te ad Deum, & reputetur tibi in peccatum. Jacob. 5. Ecce merces operariorum, qui messuerunt regiones vestras, quæ fraudata est a vobis, clamat: & clamor eorum in aures Domini Sabaoth.

Homicidium nunquam relinquitur inultum. Unde scriptum est: Quicumque effuderit humanum sanguinem, fundetur sanguis illius: ad imaginem quippe Dei factus est homo. Et Christus Matth. 26. Omnes, qui acceperint gladium, gladio peribunt.

Viri

[1] Eccli. 8. & 31.

(m) 1. Tim. 1.

Viri sanguinum & dolosi non dimidiabunt dies suos. Erat olim in Ecclesia constituta pœnitentia homicidæ, ut nisi in exitu vitæ, non admitteretur ad communionem: sed in perpetua pœnitentia vitam transigeret. Sed postea relaxata fuit aliquantulum propter hominum infirmitatem ea pœna: & in Concilio Triburienti, 40. dierum pœnitentia iungitur, nempe 40. illis diebus in pane & aqua & sale vivere: nudis pedibus incedere: lineis vestibus non uti: uxorem non tangere: vehiculo non ferri: cum aliis Christianis non communicare. Peracta hac pœnitentia, adhuc annum expectare oportebat, ut ad Ecclesiam accedere posset pœnitens. Nec ideo etiam ad Communionem admittebatur statim post annum: sed expectare rursus oportebat septem annos. Tum demum, si obediens inventus fuisset, Communione Sacræ Eucharistiæ frui dabatur, facta solenni reconciliatione. (n)

Sodomia, nefandum flagitium, quod natura etiam belluarum abhorret, non modo Lex (o) Divina, sed etiam Civilis [p] morte condemnat: Qui dormierit cum masculo coitu femineo, uterque operatus est nefas: morte moriatur. Sit sanguis eorum super eos. Qui cum jumento & pecore coierit, morte moriatur. Pecus quoque occidite. Mulier, quæ succubuerit cuilibet jumento, simul interficietur cum eo. Sanguis eorum super eos. Hæc in lege Mosaica. Nunc igni traduntur, ne corpora eorum remaneant in natura, qui corporis naturam sceleris abominatione corruerunt. Mollicies & immundicia omnis, grave peccatum est. Onam filius Judæ, qui ne prolem suscitarer fratri suo, semen fudebat in terram, pœnas dedit pro scelere: Gen. 38. Nisi Philosophorum quidam Cynicus extitisset (inquit (q) B. Hieronymus) qui doceret omnem titillationem carnis, & fluxum seminis, in qualicumque attritu, tactuque venereo, in tempore non vitandum: & nonnulli sapientes sæculi in hanc turpem & erubescendam hæresim consensissent: nunquam Apostolus ad fornicationem etiam omnem immundiciam copulasset, Ephes. 5.

Pauperum oppressio Judicum perverforum crimen est maxime, & omnium eorum, qui erga pauperes se reddunt inimiciores, negando debita, vel exigendo crudelius. Contra quam inhumanitatem universa declarat Scriptura. [r]

Merces operarii retenta, effusioni sanguinis comparatur. Ecclesiast. 7. & c. 34. di-

cit: Servus sensatus sit tibi dilectus, quasi anima tua. Non defraudes eum libertate: neque inopem derelinquas. Et Tob. 4. Non morabitur opus mercenarii tui apud te usque mane.

## STATUTUM I.

**H**omicidam sine nostra, vel Pœnitentarii nostri reconciliatione, nullus Presbyter ad Communionem admittat.

## II.

Infantem qui opprimendo, vel aliter, extinxerit, mittatur in die Cinerum ad Ecclesiam Metropolitanam.

## III.

Nefando flagitio Sodomix corruptos, ne quis tentet absolvere: sed remittantur ad Ordinarium.

## DE USURA.

**Q**uintum inter peccata clamantia in oculum nonnulli ponunt usuram. Scribitur enim eodem c. 22. Exod. Si pecuniam mutuam dederis populo meo pauperi, qui habitat tecum, non urgebis eum, quasi exactor, nec usuris opprimes. Si pignus acceperis a proximo vestimentum ejus, ante Solis occasum reddes ei: ipsum est enim solum, quo operitur, indumentum carnis ejus. Si clamaverit ad me, exaudiam eum: quia misericors sum. Detestantur autem Sacræ Literæ Usuram multis (s) in locis: & gentibus omnibus invisa semper fuit. Fur apud Romanos cum dupli pœna puniretur, fœnerator quadupli fiebat reus, Catone teste, qui & apud Ciceronem, hominem occidere, esse ait fœnerari.

Dicitur usura ab usu, respectu quidem ejus, qui re mutuo accepta utitur: Fœnus autem, a fœtura, (quali fœnum) respectu fœneratoris. Namque sicut dormienti Domino fœnum in prato succrescit; sic dormienti fœneratori fœnus in usura. Græcis dicitur τὸ κέρδιον, a gignendo. Quod cum contra rei naturam sit, ut metalla pariant: non mirum videri debet, quod semina nunc terræ nihil producant, vigentibus passim in populo usuris. Hæc eadem dicitur Hebræis nesech. id est, morsus. Quam metaphorum videtur non ignorasse Græcus Aristophanes

(n) Conc. Ancy. c. 22. Epan. c. 31. Conc. Tribur. c. 54. 55. 56. 57. 68.

(o) Lev. 20. Exod. 22.

(p) L. Cum vero nubit. ca. Ad leg. Juliam de adul.

(q) Hier. in c. 5. ad Eph.

(r) Esa. 1. Zac. 7. Jer. 27. 29. Psal. 95.

(s) Exod. 22. Levit. 25. Deut. 23. 29. Nehem. 5. Psal. 14. 54. 71. Prov. 28. Ezech. 18.



phanes; quando Strepriadem, fœnore pressum, inducit subinde exclamantem in lecto, inorari se ab usuris, & excitari a somno. D. Chrysostomus pariter in Matth. c. 5. Similem esse ait morsui Aspidis. Nam qui ab aspidem percutiuntur, præ voluptate somno se dedunt, & cum suavitate soporis moriuntur, veneno serpente per membra omnia dormientis; sic qui mutuum accepit sub fœnore, beneficium quidem aliquantisper sentit, sed usura per ejus facultates interea grassando, omnes consumit, & in se convertit. Sed ut Curati miseros ab hoc ære alieno deterreant, legant Homil. Basilii, in Psal. 14.

Verum quia ignorare non decet eosdem, an liceat dare unquam sub usura, vel censu aliquo: scito aliter paulo sumi hoc nomen à Theologis (præsertim Scholasticis) quam a legum Professoribus. Hi quidem largius accipiunt, pro accessione, vel augmento successive appposito sorti principali pecuniæ (vel rei alterius) debitæ secundum proportionem sortis, & temporis, seu moræ, sub qua ratione redditus & pensiones omnes collocant. Theologi autem omne pretium constitutum pro mortuo (sive semel solvendum, sive successive, id est, sive præstituta die, sive non præstituta) usuram vocant, eamque generaliter condemnant. Dicitur enim in Conc. Agath. usuram esse, ubi amplius requiritur, quam quod datur. Et August. in Psalm. 36. Si plus quam dederis, expectes accipere, fœnerator es: quicquid illud sit, sive pecunia, sive vinum, sive triticum. Negare autem hujusmodi usuram non esse peccatum, hæresis est jam damnata in Conc. Vien. sub Clemente V. Nam ratio justitiæ vetat, ut pretium de nihilo accipias: de usu scilicet rei, quæ usu consumitur. Qui equum locat, vel domum, rei locatæ usum tradit, sed non dominium: ideo potest pro usu earum rerum aliquid exigere. Qui vero pecuniam, vel rem aliam uti absumendam; sibi nihil reservat. Perit enim res ipsa cum usu suo, & usus una cum re ipsa. Et fieri quidem necesse est, ut qui acceptis decem aureis (verbi gratia) obligatur ad reddendum ultra sortem, quinque: is obligetur ad reddendum eandem summam bis: quod iniquum est. Si dices, gratiam referendam esse pro beneficio, concedo: sed gratis referendam, non pacta mercede: alioqui certe gratia non erit, sed mercatura perversa, & rapina. Tantum hoc distat a consilio Christi, (†) ut ne idem, vel æquale ejus quidem, quod mutuo dederis, expectandum consulat. Nam & Ethnici hoc faciunt, æqualia tantum expectantes. Tu gratiam

vendis? Ubi Christiana perfectio? ubi charitas? Dices adhuc: Si malum esset ex se, non permetteretur in lege (u) Mosaica, ut extraneis fœnerarent Judæi. Hoc argumentum se ipsum evertit. Nam quod permittit lex, de se bonum non videtur. Permisit libellum repudii: permittuntur in civitate lupanaria: sed ad evitandum majora mala. Dices adhuc; Gratiam referre vult amicus. Potes accipere: sed vide, ne vel ille referat invitus; vel tu remunerationis spe mutuaveris. Nam si sic, non evades crimen usuræ: saltem mentalis. Sit regula generalis: Si contractus habet rationem mutui, propter quod promittatur aliquod pretium: dicito usurarium. Sed aureorum summam potes commodato dare amico, ad ostentationem, vel ad alium usum, constituto pretio: non tamen erit mutuum; quia non transfulisti ejus dominium. Contractus quoque societatis non transferunt dominium: quoniam societatis pecunia sociorum periculo perit. Ob hanc causam non licebit tibi pecuniam conferre in societatem, ea conditione, ut tibi salva maneat capitalis. Videlicet, ut non exponatur tuo periculo, sicut sociorum. Sic enim non societas esset, sed mutuum. Eadem causa, si oves vel armenta des in societatem, & Pastori imponas subire periculum earum, usurarius diceris.

Atque hæc quidem hætenus Theologice. Legistæ autem census etiam omnes & redditus, sub usuris ponunt. Horum alii reales sunt (ut qui supra rem certam fundati: vulgo vocant fonderias rentas) alii personales: qui personæ generali obligatione bonorum contrahuntur. Hos nostri vocant rentas viagerias, alii vagas, alii volantes. Alii sunt fœneratorii redditus omnino: qui supra pignus constituuntur. Quamquam vero legibus Civilibus non prohibeantur absolute atque simpliciter usuræ: non permittuntur tamen omnes, nec omnibus eadem. Quin infames habentur, qui usuras usurarum sumunt, vide propterea ff. de Usuris. l. Placuit. & l. Uti nullo. C. & l. Improbum. & l. Quibus causis. & l. Eos.

Genus hoc superfœtantium usurarum, lex Civilis improbum fœnus nominat: Græci ἀναισχυρον: nostri tocomoron, Græce: id est, usuræ insaniam: peccatum sane gravissimum, & in republica non ferendum omnino.

Erant autem licitæ usuræ centesimæ, quæ & dragmales dicebantur: pendentes videlicet singulis mensibus unum, pro centum mutuo acceptis. Fructificabant hæc 12. pro 100.

(†) Luc. 6.

(u) Deut. 23.

Tomus VIII. Concilior. German.

100. in annos singulos. Sed non concedebantur, nisi in negotiis trajectitiis: tanquam præmium periculi perdendæ sortis in mari. Censebantur enim gravissimæ omnium: idcirco finito negotio, cessabant. Mercatoribus autem, actu mercaturam facientibus (lucri cessantis causa) concedebatur centesimæ hujus, bes: nimirum, quæ in annos redderet 8. pro 100. Nobilibus vero, trientantum, id est 4. aliis semis, id est, 6.

Personarum distinctio optimo jure facta fuerat. Siquidem mutuandi inter cives liberalitas, atque beneficentia, optanda est in societate humana. At vero æquum non est, alterum alterius damno ditari. Quod sane fieret, nisi pro damno, & (ut vocant) interesse creditoris, aliquid debitor refundere. Pensanda igitur fuit personarum differentia: & quibus præsentis pecuniæ usus magis necessarius est, (vel damni emergentis causa, vel lucri cessantis) his plus debeatur, quam aliis. Exemplum esto damni emergentis: Paratam si habeo pecuniam ad reparandum ædes meas, quæ ruinam minantur, vel ad comparandum triticum, alendæ familiæ necessarium: tuque interea precibus a me extorques mutuam illam pecuniam: & ædes ruunt, vel annona fit carior: beneficium certe meum mihi in damno erit. Pariter lucrum mihi cessabit, nisi pecuniam reddas in tempore, quo mercaturam sum facturus. Nemo autem tenetur de proprio facere beneficium, & ex suo damno commoda facere aliena. c. Precariæ. 10. qu. 2. & 2. Cor. 8. Non ut aliis sit remissio, vobis autem tribulatio.

Ex definitione igitur Legistarum colliges, quid differat usura Theologorum a legali. Hæc siquidem successive debetur secundum proportionem sortis capitalis & temporis, uti diximus: sive annuatim, sive menstruatim. Et duplex quidem reperitur: una, quæ jam pene exolevit, licet concessa olim: altera, quæ nunc in usu est, vocatur census, & reditus, & renta vulgo. In illa obligabatur debitor ad reddendam sortem cum usuris: in censu, ad solvendas usuras tantum: non sortem, nisi velit redimere obligationem: quia pecunia sortis integre alienatur hic per emptionem census. Item usuræ illæ, cum primum æquabant sortem, cessabant: census sunt perpetui.

Hinc orta quæstio inter Doctores, an liciti essent census isti personales, & rentæ volantes. Fuerunt enim, qui damnarent: videntur enim non minus iniqui, quam contractus alii usurarii: quia non minus contraturam pecuniæ in his nummi emuntur nummis, & pecunia pro pretio pecuniæ datur, quam in illis. Imo (quod gravius est) in

his accessio procedit infinite: in illis æquata sorte finitur. Cæterum Martinus V. & Calixtus III. Pontifices Romani, licitos responderunt. Nam si obligare me possum ad solvendum pensionem aliquam: cur vendere obligationem non potero? Si cum pacto redimendi sortem obligarer, non venditio certe esset, sed mutuatio cum scenore. Cum igitur compertum fuerit expedire reipub. ut aliquid detur mutantibus ad compensationem usus alienæ pecuniæ: census hæc obligatio, (usuræ honestior ratio) inventa est: per emptionem, & venditionem reditus annui, redimibilis perpetuo a debitore. Sed cave tu lector, ne hinc pallium sumas improbæ usuræ. Deus videt omnia. Leges quoque municipales, ne licentia hæc emendi census perpetuos, alimentum daret avaritiæ, limites posuere, quos impune non transibis. Carolus V. Imperator memoriæ æternæ, ne excederet 8. pro centum, cavuit in Burgundia. Antea definiti fuerant in Francia ad duodecimam sortis.

Frumentarios autem census, qui pro pecunia constituti fuerunt; quia variante subinde caritate, varie taxari contingebat a Judicibus, ut intra limites legis determinarentur: sancitum fuit in Gallia, ut optio sit debitoris solvere in ære ad duodecimam partem sortis; vel in tritico, quantum tritici est in obligatione. Apud alios remissa est ad decimam quartam. Quod si debitor per aliquot annos cessaverit solvere: non propterea tenetur ad pœnam quanti plurimi: (fieret enim nova accessio in rebus accessoriis, quod lex verat) sed reductio fiet ad communem æstimationem totius temporis moræ.

Ex his Curati decident multos casus conscientiæ. Usurarium dicent cum, qui emendo censum 8. librarum pro centum, statim retinet octo, primæ pensionis. Nam tanto minoris emit, quam lex permittit.

Omnis quoque conditio redimendæ sortis intra tempus certum (quomodocunque coloretur) usuraria est: & in sortem numerari facit soluta jam arreragia. Pacisci tamen cum debitore, quod nisi præstito die sortem restituat, teneatur ad censum (modo id ne fiat in fraudem tegendæ usuræ) nihil prohibet. Non tenetur enim cum injuria, pecunia sua carere creditor invitus. Quare distinguere solent hic Doctores: Si lucratoria est usura, vel compensatoria, vel punitoria: Lucratoriam damnant: quia lucri tantum causa contrahitur. Compensatoria justa est, si lucri cessantis vel damni emergentis justa insit causa. Punitoria vero non ob lucrum creditoris, sed propter moram debitoris infligitur.

Si

Si rem fructiferam pignori accepisti, teneris fructus reddere, deductis tamen expensis. (x) Parum namque differt a turpissimo, Judaicoque scenore, quo pignore dato pecunia sumitur ad usuram.

Vendere carius justo, expectandæ solutionis causa: vel vilius vendere, anticipatæ: usura est: si non formalis, at certe interpretativa. (y) Sed pretia rerum scito non consistere in indivisibili: ne temere hic Judices de justitia vel injustitia pretiorum.

Uno igitur verbo dices omnes contractus usurarios quocunque pallio tegantur, qui vel censum majorem imponunt debitori, quam de jure emi concessum est: vel ad restitutionem obligant sortis, nullo damno emergente, vel lucro cessante creditori.

De monte pietatis dubitarunt nonnulli: nam a formali usura non videtur differre. Sed Pius II. Papa, & Concilium deinde Lateran. sub Leone decimo approbarunt. Et habita quidem fuit ratio tenuitatis usurarum, quæ sunt unum pro viginti: deinde, quod nihil hic lucri faciat creditor. Omnes enim fructus in hospitalis, & pauperum usum infumuntur. Sed ut intelligas hæc, Præfetti hospitalis pecuniam pauperum his duabus conditionibus locant. Prima, ut debitor pignus det sufficiens: altera, ut id vendi possit intra tempus. Et usuræ currunt mensuræ, duodecimæ partis vigesimæ.

Dicet forte aliquis: Si peccatum est in his, peccabit ergo, qui mutuum accipit. Causam namque peccandi dat: qui autem consentiunt facientibus, non modo qui agunt, digni sunt morte. Rom. 10. Ad hanc questionem distinguunt aliqui, Si alter paratus non est dare scenori, non licet eum ad hoc inducere: si vero paratus est, licet. Quia uni alieno peccato in bonum non prohibetur. Sicut Judex juramento per falsos Deos utitur hominis infidelis. Urgebis forte adhuc, Non sunt facienda mala, ut eveniant bona. Ad hoc respondimus supra, Tit. De peccato. Pœnas porro usurariorum habes apud Sylvest. usura.

## STATUTUM I.

**U**surarii ne absolvantur, nisi facta prius restitutione lucri excedentis & iniqui: vel certe serio promissa.

## DE PECCATO IN SPIRITUM SANCTUM.

**P**eccatum in Spiritum Sanctum gravissimum est, quod Salvator noster, nec in hoc sæculo, nec in alio dicit remitti: & Joannes: Est peccatum ad mortem: non pro illo [inquit] dico, ut roget quis. (z)

Sex ponuntur species peccati in Spiritum Sanctum, quæ & peccata Blasphemiae appellantur, & irremissibilia: non quod remitti non possint, aut quod omnino non unquam remittantur a Deo, si quis perfectam de his contritionem habeat: [Deus enim nemini suam misericordiam negat contrito] sed ideo dicuntur irremissibilia, quia ex se peccata hujusmodi contra causam & rationem veniæ pugnant, quæ est pœnitentia: & Spiritui Sancto, qui fons est misericordiæ, adversantur. Sunt autem hæc:

1. Præsumptio: qualis hæreticorum, qui putant se absque ullis meritis salvari: Deo justitiam detrahentes.

2. Desperatio de misericordia Dei: qualis Judæ proditoris, & Cain.

3. Impugnatio veritatis agnitæ: qualis fuit Judæorum, qui opera Christi manifestissima tribuebant principi dæmoniorum. Talis etiam fuit Jamnæ & Mambrae, qui Mosi restiterunt: talis etiam hæreticorum, qui nolunt veritatem intelligere.

4. Invidentia fraternæ gratiæ. Hac primus Cain diabolum (cujus invidia peccatum in mundum introivit) imitatus est, moleste ferens fratrem suum a Deo diligi. Saul contra Davidem: quia videret, quod esset Dominus cum David. Item omnes, qui piorum hominum sanctam conversationem criminantur, & quæ dona Spiritus sunt Sancti, perverse & malitiose interpretantur.

5. Obstinatio in peccato: ut qui perseverant in peccato, & statuunt ab eo, non desistere in futurum rejeclis omnibus admonitionibus: ut populus Israeliticus, quando ductus est in captivitatem. 4. Reg. 14.

Item Sedechias, qui non erubuit faciem Prophetæ, loquentis ex ore Domini. 2. Paral. 36.

6. Finalis impœnitentia. Hæc nunquam de peccato pœnitere statuit, ut qui gloriantur cum malefecerint, & exultant in rebus pessimis. Hos solet mors cum æterna

(x) C. 1. de Usu.

(y) S. Tho. 2. 2. q. 78.

(z) Theod. in 2. Sent. d. 43. Match. 2. Marc. 3.



na damnatione intercipere. Talis forte Herodes Agrippa, Act. 12.

Ex his patet unum esse proprie, & per se, peccatum irremissibile, finalem impœnitentiam: reliqua, non nisi in quantum ad hanc pertinent, & in hanc definiuntur, vocantur irremissibilia. Illa enim ante vitæ finem deleri possunt per pœnitentiam: quamquam difficulter, quia, uti diximus, contra causam veniæ pugnant, atque ab ea longe recedunt, quæ est pœnitentia. Siquidem peccatum ex ignorantia (quod contra Filium Dei committi dicitur) remissibile est: quia errore cognito, sequitur pœnitentia. Quod ex passione, & animi impotentia contra Patrem patratum est: extincta passione, & quasi luce Solis depulsa caligine, damnat recta ratio. At vero, ubi hæc defunt, in Spiritum Sanctum peccatur: & pœnitentiæ raro locus conceditur. Quoniam melius hic nihil videtur: & resipiscentiæ viæ omnes fere obstruuntur ei, qui ex certa scientia male agit, nec facinoris sui damna sentit.

### DE GRATIA SPIRITUS Sancti.

**G**ratia Dei, inquit D. Aug. (a) donum Dei est: donum autem maximum ipse Spiritus Sanctus est: & ideo gratia dicitur, quia gratis datur. Sed duplex gratia ponitur a Theologis. Una dicitur gratis data, alia gratum faciens. De illa dicit Apostolus, (b) Divisiones gratiarum sunt: idem autem Spiritus. Et sequitur: Alii quidem datur per Spiritum sermo sapientiæ, alii sermo scientiæ secundum eundem Spiritum, alteri fides in eodem Spiritu, alii gratia sanctorum in uno Spiritu, alii operatio virtutum, alii Prophetia, alii discretio spirituum, alii gratia linguarum, alii interpretatio sermonum: hæc omnia operatur unus atque idem Spiritus, dividens singulis prout vult.

Alia, quæ dicitur gratum faciens, Dei charitatem significat, & benevolentiam: per quam homo iustus fit, & regno cœlorum dignus. Huic peccata omnia mortalia cedunt. Hæc arrhabo Spiritus Dei dicitur ad Corinthios, (c) id est, pignus futuræ gloriæ. Et ad Rom. 5. Spes autem non confundit, quia charitas Dei diffusa est in cordibus nostris, per Spiritum Sanctum, qui datus est nobis.

Datus autem Spiritus Sanctus est in die (d) Pentecostes visibiliter. Datus nobis est deinceps singulis, in Baptismo, & Confir-

matione. Datus etiam Apostolis (e) post resurrectionem: quando insufflavit, & dixit: Accipite Spiritum Sanctum, quorum remiseritis peccata, &c. Verum cum sit Spiritus Sanctus Deus, (Credimus enim in Spiritum Sanctum, qui ex Patre Filioque procedit, qui cum Patre & Filio simul adoratur: & ita definitum in magnis illis 4. Conciliis fuit, Nicæno, Constant., Ephesino, & Chalcedonensi: quia baptizari nos Christus iussit in nomine Patris, & Filii, & Spiritus Sancti: & Ananiam mentitum Deo pronuntiavit Petrus (f): & 1. Cor. 3. corpora nostra Tempia Spiritus Sancti dicuntur) quæstio aliquando mota fuit, quomodo datus nobis est Spiritus, in substantia suæ, an in donis suis, & charismatibus?

Bessarion Cardinalis, genere Græcus, Latine doctissimus, plurimis Sanctorum Patrum autoritatibus & scriptis probare nititur, eum ipsum Spiritum Sanctum, quem certam in Trinitate personam credimus, vere & realiter habitare in nobis, non tantum per charismata, sed per substantiam. Et adfert præcipue verba Cyrilli in epistola septima ad Hermiam, qui ad gratiam Spiritus omnia referebat, quæ de hac re dicuntur. Et inter alia verba Patris Cyrilli, hæc subdit: Si gratia esset distincta a substantia Spiritus, dixisset sane Moyses: Sufflavit Creator omnium gratiam per Spiritum vitæ: & Christus dixisset, Accipite gratiam per mysterium Spiritus. Sed illic dictum est, Spiritus vitæ: hic vero per Salvatorem: Spiritus Sanctus, ipsum procul dubio Spiritum credentium animabus emittentem. Postea, Tempia vero Dei, nec non dii & vocamur & sumus: Qua de causa quæras ab adversariis: si gratia participamus nuda & non subsistente? At non ita se veritas habet. Tempia namque existentis & subsistentis Spiritus sumus. Idem in Joan. c. 1. Si Deus ex Deo secundum naturam, & Spiritus, quo & per fidem in Christo participamus, dii nos etiam efficimur, tanquam jam in nobis habentes Deum, secundum illud, Inhabitabo & inambulabo in eis. Quo namque modo Tempia Dei essemus, nisi Spiritus natura Deus esset? Hæc ex Bessarione. Videntur autem & plerique antiquorum in hac fuisse sententia: maxime Basilii, quem idem Bessarion adfert dicentem, insufflatum Spiritum a Christo discipulis, qui & cum Patre & Filio commorabatur in creatione. Et libr. 3. contra Eunomium: Principatus, & Potestates, & omnis creatura, cum ex attentione & diligentia sanctificatæ sint, non jure naturæ sanctæ dicerentur. Appetentes enim bonum secundum amoris, quem

(a) De verb. Domini. ser. 61. & de gratia & lib. arb. cap. 9.

(c) 2. Cor. 5.

(d) Act. 1.

(e) Joan. 20.

(b) 1. Cor. 12.

(f) Act. 5.

quem ad Deum habent, proportionem, sanctitatis mensuræ participant: & sicut ferrum, quod in medio ignis jacet, ferri naturam non amisit, vehementi tamen ignis actione ignitum, cum universam ignis naturam in se ipsum acceperit, & colore & actione ad ignem transit: sic sanctæ. Virtutes ex communicatione, quam cum illo habent, qui natura Sanctus est, per totam suam substantiam acceptam jam & quali innatam sanctificationem habuit: diversitas tamen ipsius a Spiritu Sancto est, quod Spiritus natura Sanctus est: illis vero participatione inest sanctificatio. Postea pergit probare Spiritum Sanctum esse Deum, ex eo, quod D. Joannes (g) scribit: Ex hoc scimus, quod in nobis est, ex Spiritu, quem dedit nobis. Nam si Deus dicitur habitare in nobis per Spiritum, non est ergo expers Divinitatis Spiritus. Similia multa reperias apud eundem: Et quidem nisi diligenter & cum judicio rem tractes, error videatur Eunomii, & eorum, quos vocarunt pneumatomachos: qui Spiritum Sanctum dicebant esse creaturam, non Deum, nisi abusive, propter energiam, id est, efficaciam. Dicebant enim hæretici illi solam esse virtutem sanctificativam. Refert Epiphanius, qui etiam locis quibusdam dari nobis Spiritum Sanctum opinatur, Deum verum adorandum, & per Spiritum ipsum dona: veluti scientiæ, sermonis, sanitatum, prophetiæ. Hæresi enim 74. lib. 3. sic loquitur de Spiritu Sancto: Non alienus sanctificationis, non distans nomenclatura, non alienus doni: Sed unus Deus, una fides, unus Dominus, &c. D. Augustinus (h) ejusdem plane videtur fuisse sententiæ: maxime in lib. de Trinitate. Cujus autoritate subnixus (i) Magister sent. eum ipsum sensit Spiritum Sanctum (qui a Patre, Filioque procedit) nostram esse charitatem, & dilectionem, qua Deum diligimus. Loca vero Scripturarum, quæ pro hac faciunt, multa sunt: maxime 2. Corint. 6. Quis autem consensus Templo Dei cum idolis? vos enim estis Templum Dei vivi, sicut dicit Deus: Quoniam inhabitabo in illis, & inambulabo inter eos, & ero illorum Deus. Id enim nisi de Spiritu Sancto nequit intelligi. 1. Joan. c. 4. In hoc cognoscimus, quia in ipso manemus, & ipse in nobis, quia de Spiritu suo dedit nobis. Item, Vos ex Deo estis filii, & vicistis eum, quoniam major est, qui in vobis est. Et rursum, Deus enim charitas est: & qui manet in charitate, in Deo manet. Joan. 7. Nondum erat Spiritus datus, quia nondum Iesus erat glorificatus. Et c. 14. ubi loquitur de Spiritu Paraceto: Vos autem cogno-

scetis eum, quia apud vos manebit, & in vobis erit. Rom. 8. Non enim accepistis Spiritum servitutis iterum in timore, sed Spiritum adoptionis Dei, in quo clamamus Abba Pater: & ipse Spiritus postulat pro nobis gemitibus, &c. Atque hæc quidem satis pro illa sententiâ.

Ambrosius (k) autem aperte docet Spiritum pro gratia spiritali poni: sicut Apostolus dicit, Spiritus postulat pro nobis, &c. Licet idem habitare dicat in nobis Deum Patrem, & Deum Filium: sicut dicitur, Ad eum veniemus, & apud eum mansionem faciemus. Chrysost. hom. de Spiritu Sancto, ait: Quando Spiritus Sanctus dicitur mitti, non de Divinitate est sermo, sed de donis ejus: non enim mittitur Divinitas, nec Filius dicitur missus a Patre secundum Deitatem. Probat ex Luc. 24. Manete in Hierusalem, donec induamini virtute ex alto. Hieronym. ad Hedibiam prorsus de gratiis Spiritus Sancti ea intelligenda putat: ut cum Apostolus dicit, Spiritum nolite extinguere, & similia. Nec alium modum agnoscit schola. Nam si dicitur nobis datus Spiritus Sanctus, aut procedere in creaturam: creatura certe non habet rationem subjecti: ut sic nobis detur, vel ponatur in nobis, sicut calor in corpore. Cum sit enim Christus Sanctus ipse suppositum, & res per se subsistens, nec in subjecto dicitur, nec datur in unitatem simplicitatemque suppositi: Quid enim id aliud esset, quam alia Spiritus Sancti incarnatio? Datur ergo nobis Spiritus, per donum aliquod spirituale: & merito est rejecta opinio Lombardi, (l) qui Deum ipsum esse senserat charitatem & dilectionem, qua Deum diligimus: cum sit Dei donum potius, & doni donum, ut Aug. loquitur 15. de Trin. c. 19. Quia Spiritus Sanctus donum dicitur. Datur autem Spiritus Sanctus, rei amatae director, & gubernator, & protector: qui custodit, dirigit, protegit, docet, tanquam tutor pupillum, quem suscipit. Sic datur nobis. Et uno quidem modo per gratiam, alio per auxilium externum, & favorem. Priori modo Beseleel (m) architectus tabernaculi, impletus fuit Spiritu Dei, sapientia, & intelligentia. Per favorem Christus nobiscum est usque ad consummationem sæculi. Utroque modo fuit cum Srephano, qui plenus gratia, & Spiritu Sancto, faciebat &c. Habitat etiam per fidem (n) in cordibus nostris: tam quia fides Dei donum est, quam quia per fidem recolimus Dei memoriam in animis nostris, sicut habere in animo dicimur, quem amamus. Ac de hac quidem

O 3

quæstio-

(g) 1. Joan. 3. &amp; 4.

(h) Lib. 7. c. 7.

(i) Magist. lib. 1. d. 17.

(k) Ambr. lib. 3. de Spir. S. cap. 12. Tom. 5.

(l) Dist. 17. l. 1. sent.

(m) Exod. 31.

(n) Ephes. 3.

quæstione hætenus. Et Sanctos illos Patres, qui aliter videntur loquuti, puta ad asserendam Spiritus Sancti Divinitatem ea attulisse. Non quod sentirent, donum Spiritus Sancti esse Deum: sic enim creatura esset, non Creator.

Est ergo gratia qualitas quædam spiritalis, a Deo creata in anima nostra, & habitus infusus a Deo in animæ potentia. Nam si ex odio in amorem, vel ex amore in odium venimus Dei: id non mutatione aliqua fit Dei, sed nostri. Ego Deus, [o] inquit, & non mutor. Vocatur hæc gratum faciens iustitia: quia per eam iustificatur homo formaliter. Dicitur pignus vitæ æternæ: quia gratia Dei vita æterna. Et quia solus Deus est, qui iustificat impium per gratiam: ideo & a solo Deo gratia confertur. Gratiam & gloriam dabit Dominus, inquit [p] David. Ex quo fit, ut opera nostra in gratia facta, meritoria sint vitæ æternæ. Dicunt non differre a charitate realiter, quia Dei amor est: & Deo charum reddit, qui eam habet. Dicitur libertas, quia liberat a servitute Diaboli, & peccati. Dicitur, sicut supra docuimus, Spiritus Sanctus, quia donum est appropriatum tertiæ personæ in Trinitate. Unde & Tempa efficiuntur Spiritus Sancti. Quare cum peccato mortali esse nunquam potest: quis enim consensus Dei cum idolis? Alia dona possunt. Quo fit, ut docet Aug. [q] ut quidam indigni vita æterna & regno celorum, aspergantur tamen quibusdam Spiritus Sancti muneribus, non habentes charitatem: sed nihil eis profunt.

Dividitur rursus Gratia Dei a D. Augustino [r] in prævenientem, & subsequenter, seu cooperantem. Nam sine Deo nihil boni possumus, inquit, neque incipere, neque perficere, ut incipiamus, enim dictum est: Misericordia ejus præveniet me: ut perficiamus, dictum est: Misericordia ejus subsequetur me. Bonum propositum hominis adjuvat subsequens gratia: sed nec ipsum esset, nisi præcederet gratia. Esa. 26. Omnia opera nostra operatus es in nobis Domine. 1. Cor. 15. Non ego, sed gratia Dei mecum. 1. Cor. 3. Dei enim Coadjutores sumus. 1. Cor. 2. Nemo potest dicere Iesus, nisi in Spiritu Sancto. 1. Cor. 3. Non quod simus sufficientes aliquid cogitare ex nobis. Joan. 6. Nemo potest venire ad me, nisi Pater meus traxerit eum. Rom. 10. Non est volentis, neque currentis, sed misereantis Dei. Sequitur ergo, ut postquam ex Dei gratia boni quippiam agere cœperimus: si-

ne ejus gratia, specialique auxilio, non possumus in bono perseverare. Idcirco idem Apostolus, Phil. 2. Deus est, qui operatur in nobis velle, & perficere pro sua voluntate. Atque hæc est Catholica doctrina.

Sed insurgunt hic male sani homines. Si sine Dei gratia bene agere non possum, frustra ergo quæritur. Nemo peccat in eo, quod vitare non potest. Quasi vero non paratus semper sit Deus ad ferendam opem. Ego ad ostium sto, & pulso, ait, Apoc. 3. & Proverb. 1. Vocavi, & renuistis: despexistis omne consilium meum. Dic sodes, si in foveam imprudens delapsus esses, ex qua non posses exire per te ipsum: alio quopiam tibi porrigente manum, per quem posses: opem respuendo, nonne esses accusandus? Si Divinæ admonitioni, vel inspirationi, vel attractioni non consentis: per te profecto stat, quo minus recte agas. Perditio tua ex te Israel, tantum auxilium tuum ex me. (s)

Nec si indurare aliquem aliquando dicitur Deus, id per se & proprie interpretemur. Deus enim intentator malorum est. Alioqui peccaret ipse, qui causa peccandi esset: & culpa careret homo, qui non libera voluntate ageret. Verum indurare corda sic dicitur, sicut indulgentia nimia parentes sæpe faciunt deteriores suos liberos. Et sol eodem calore indurat lutum, & emollit ceram. Hæc sententia est (t) Origenis, Basilii, Chrysostomi, Hieronymi, atque aliorum. Quamquam peccatorum tanta aliquando existit gravitas, ac multitudo: ut gratiæ mereatur omne auxilium amittere. Eam ob rem tradi deprehenduntur aliqui in reprobum sensum: quia sublata gratia [quasi liberi habentis] in omne flagitium ruunt præcipites. Psalm. 80. Dimisi eos secundum desideria cordis eorum: ibunt in inventionibus suis. Tertull. contra Marcio. l. 2. Greg. in Job. 30. c. 11. & Aug. passim.

## DE GRATIA PRÆDESTINATIONIS, & Reprobatione.

Disputationi de gratia iusti hominis, & obsecratione peccatoris proxima est de prædestinatione ac reprobatione. Locus sane arduus & difficilis, nec parum periculosus. Sed quia hac transeundum nobis est, cum nos cum Dei auxilio ita prætercurremus, ut quæ tuto dici possint, in illis sententiam libere ponamus: cætera ad Ecclesiæ deter-

(o) Malach. 3.

(p) Psal. 83.

(q) August. ad Simpl. lib. 2.

(r) Aug. lib. 2. contra epi. Pelag. c. 9.

(s) Hieron. 17.

(t) Orig. Periarch. lib. 3. Basil. hom. 9. Hexa. Chrys. in 9. c. Ro. Hieron. in 7. Ecclesi.



determinationem remittamus : cujus est de dubiis certos reddere credentes. Ac tota quidem hujus rei difficultas, ex duabus sententiis existit. Una est, quæ causam nullam agnoscit in homine, vel salutis, vel damnationis. Altera ex diverso, merita esse prævisa ab æterno tenet, cur a Deo alii electi fuerint, alii reprobati. Quæ autem suadent priorem, multa sunt. Probant enim nos esse in manu Dei, non secus quam lutum in manu figuli. Sed multa secum fert incommoda ea opinio. Tollit enim liberum arbitrium : acceptionem personarum in Deo probat: obscurat Dei misericordiam inducit denique Atheismum, & Epicuræorum impietatem confirmat. Ex altera resurgit Pelagiana hæresis. Namque salutis, ac damnationis cujusque causam refert ad liberum hominis arbitrium, ut ille.

Pro illa tamen stant, quæ scribit Apostolus ad Rom. 9. De Jacob & Esau: qui antequam nati fuissent, aut aliquid boni egissent, aut mali, dictum est, Jacob dilexi, Esau autem odio habui. Et Rom. 8. Diligentibus Deum omnia cooperantur in bonum, iis, qui secundum propositum vocati sunt sancti. Nam quos præscivit & prædestinavit, &c. & sequitur epiphonema: Si Deus pro nobis, quis contra nos? cap. 9. Nunquid dicit figmentum ei, qui se fingit, Cur me fecisti sic? idem Deuteron. 33. & Hierem. 8. Item Rom. 11. Reliquiæ secundum electionem gratiæ salvæ factæ sunt. Ephes. 1. Elegit nos ante mundi constitutionem. 2. Timoth. 1. Vocavit nos, &c. non secundum opera nostra, sed secundum propositum, &c. & c. 2. Firmum fundamentum Dei stat, novit Dominus, qui sunt sui. Exemplum quoque de vasis aureis & fictilibus, quam vim habet apud aliquos? quamquam similitudo illa parum juvat, si legas, quod sequitur: Si quis mundaverit se ab istis, fiet vas in honorem. Addunt c. 1. ep. 1. Petri: Benedictus Deus, qui, &c. Matth. 11. Ita Pater: quia sic placitum ante te. & 13. Ut videntes non videant. Joan. 6. & 8. Omne, quod dat mihi Pater, &c. & 15. Non vos me elegistis, sed ego, &c. & 17. Manifestavi iis, &c. nec orat, nisi pro iis, quos &c. Exod. 4. Et sequentibus narratur obduratio Pharaonis. In Psalmis multa sunt & in Esaia. [u] Ecclesiast. 7. Nemo potest corrigere, quem Deus despexerit. Proverb. 16. Omnia propter se operatus est, etiam impium. Sapien. 4. Raptus est, ne malitia, &c. Alia multa præter hæc afferri possunt, quia voluntati ejus quis resistit?

Sed ex altera parte ubique clamant Scripturæ non esse personarum acceptorem Deum. Quod si sic, cur hunc magis, quam illum

eligit? Item 1. Timoth. 2. dicitur velle omnes homines salvos fieri. Et additur ratio, quia unus Deus, unus & mediator Dei & hominum, Christus JEsus. Ergo si multi pereunt, peccatum in causa est, cum sit stultorum infinitus numerus. Matth. 23. Quoties volui congregare, sicut gallina pullos suos, & nolui. Luc. 19. Venit salvum facere, quod perierat. 2. Petr. 3. Non tardat Deus promissionem suam, sed patienter agit propter vos, nolens aliquos perire. Genes. 4. Si bene egeris, recipies: si autem male, &c. & c. 14. Propter decem justos pepercisset civitati. Exod. 33. Qui mihi peccaverit, eum delebo. Esa. 65. Expandi tota die manus, &c. Hierem. 7. Vocavi, & non audistis, & 18. Si penitentiam egerit, &c. Ezech. 18. Anima, quæ peccaverit, ipsa morietur. Justitia iusti super eum. & 33. Nolo mortem peccatoris. Osee 13. Perditio tua ex te. Jon. 4. Tu doles super hedera, & ego non parcam Ninive civitati? Proverb. 1. Vocavi, & renuistis, ego quoque in interitu vestro ridebo. Sapien. 12. Misereris omnium, dissimulans peccata: & nihil odisti eorum, quæ fecisti. Ecclesiast. 15. Non dixeris per Deum abest. Non dicas ille me explanavit: non enim necessarii ei sunt impii. Et sequitur: Deus ab initio constituit hominem, & reliquit eum in manu consilii sui.

Sequitur itaque (si Deus non est acceptor personarum) & prædestinationis, sive electionis, & reprobationis causas in hominibus fuisse prævisas a Deo, propter quas alii ad vitam, alii ad mortem destinati fuerint ab æterno. Nam parabola de semente juxta terræ, in quam ceciderat, naturam, fructum docet provenisse. Et paratum, ait Dominus, regnum iis, qui opera charitatis exhibuere: aliis in ignem mittendis. Et videtur quidem Paulus ad Rom. 8. Ideo dixisse, quos præscivit & prædestinavit: id est, illos prædestinavit, quos præscivit: id est, quorum opera bona prænovit.

In hanc sententiam inclinasse videntur antiqui. Justinus martyr Deum ait prænovisse improbos obstinato fore animo: Quin etiam Dei præscientiam non esse causam rerum futurarum, sed in diverso. Idem Origenes, ad Rom. 8. 12. 9. Chrysostomus hom. 16. in ep. ad Rom. & aliis locis aperte tradit Deum prænovisse eos, qui digni sunt corona vel supplicio. Item Damascenus & Theophylactus. D. Ambrosius per hanc rerum præscientiam vindicari vult Deum ab acceptione personarum. Hieronymus in eandem, si ejus est opus, & ad Galatas, expressissimo docet Deum hunc diligere, quem scit futurum esse justum, odisse vero, quem peccatorem.

[u] Psal. 32. 43. 46. 77. 148. Esa. 4. 6. 14. 45.

rem. Placuit hæc eadem sententia etiam nunc multis: & ideo dilectum fuisse ajunt Jacob, odioque habitum Esau, quia præno- verit Dominus, quales futuri essent. Et ad illa tam multa, quæ in Bibliis videntur, tribue- re omnia Dei præscientiæ ac prædestinatio- ni: respondent illa velle innuere, quod Deus falli non potest in iis, quæ ab æterno novit: ut neque plures, neque pauciores salventur, quam ipse vidit. Et vas, quod dicitur in manu figuli: Hierem. 18. citra figuli volun- tatem dissipatum videri. Et quamvis Apo- stolus non respondeat interrogationi illi (cur adhuc quæritur?) propterea quod reprimere volebat audaciam importuni interrogatoris: tamen ad Timoth. 1. c. 1. satisfecit, cum ait: Misericordiam consequutus sum, quia igno- rans feci. Et eodem modo respondit Deus Moyfi: Miserebor (x) cujus miserebor. Quasi dicat: Non tuum est hoc scire. Non semper expedit, ut servus sciat Domini sui consilia. Sic Sancti illi Ambrosius & Chry- sostomus.

Collidentibus itaque inter se duabus his sententiis B. Augustinus, (y) suo more me- dius incedens, rem distinxit: & salvari qui- dem prædestinatos ait Dei gratia, quam dat electis suis: reliquos autem iuste damnari: quod cum in illa peccatorum massa ex primi parentis peccato culpabiles inveniantur, que- ri non debeant, si aliis electis, alii sibi re- linquantur. Tali enim res humanas agitare Deum judicio, ut debitas pœnas aut iuste reddat, aut misericorditer donet: nec aude- re debitor potest creditorem arguere iniqui- tatis, si alteri donans, ab eo, quod debebat, exegerit. Sic Aug. multis in locis ad pecca- tum originale referens, quod multi non sint electi.

Sed subsistit adhuc eadem quæstio. Quæ- ratur enim; Cur hunc potius, quam illum ex eadem massa eligit? cur dicitur velle om- nes salvos fieri? cur addita ratio ab Aposto- lo rei hujus est, quod est unus Deus, si non idem est omnibus? Præterea Angelorum alii electi fuerunt, alii reprobati: ergo re- probationis causa non est peccatum origina- le, quia non erat hoc in Angelis. Imo etiam ex iis, qui a peccato originali per Bap- tismum mundati sunt, multi damnantur. Non ergo reprobati propter illud peccatum. Ergo acceptionem personarum non potes evadere: quoniam omnibus in eadem con- ditione peccati prævisis, hic eligitur, alter reprobat.

Sanctus Thomas in opere contra genti-

les, Deum perpetuo pulsare ad januam cor- dis nostri, ait: eosque ad salutem perducere, qui sibi aperiunt: reliquos in cæcitate relin- quere. Quare sua culpa, non tantum ori- ginali, sed etiam actuali hac (quia non ape- riunt) damnari. Nam licet omnium corda sic moveat Deus, ut duritiam mollire possit: tamen sunt, qui novam adhuc duritiam ap- ponunt. Hi dicuntur præsciti: quia suppli- cio æterno obnoxii præsciuntur. Alii ad salutem deliguntur: non propter opera sua, vel voluntatem: sed Dei gratia, quæ volun- tates eorum anteit. Et sane Patres omnes antiqui (z) sic de Dei providentia senserunt, ut auxilium & gratiam dari omnibus puta- rint, necessariam ad salutem. Nam qui præ- cepta posuit sub pœna observanda, nisi ea concedat, sine quibus observari illa neque- unt, vel condonare oportet omittenti, vel iniquum esse, si infert iram. Quo pacto volabit avis, si alas detrahis? D. Hieron. (a) vel etiam perditis ipsis ait dari gratiam. Namque & Deus proprio Filio suo non pe- percit. Sed uti diximus B. Aug. non omni- bus dari sufficientem ad salutem prædestina- torum sensit: nec teneri Deum, ut det ali- cui. Quis enim prior illi dedit, & retri- buetur ei? ad adimplenda vero præcepta sua, omnibus præsto adesse, non negat. Sed non hæc illi est gratia prædestinationis. Præ- destinatio illi est Dei voluntas & propositum dandi vitam æternam, & media omnia con- ducentia ad illam: non omnibus quidem, sed iis, quos ex illa massa corruptionis elegit. Itaque electio prior est prædestinatorum, deinde prædestinatio, post hæc prædestina- tionis illorum prævisio.

Doctrinam Sancti Thomæ de addita du- ritia Contarenus Cardinalis similitudine de- claravit. Sicut lateres ad ædificium præpa- rati, quia graves natura sunt, nunquam su- apte vi ascendant in murum, nisi ab aliquo tollantur: si vero præditos judicio fingamus & voluntate quadam, ut ascendere nolint, & ne attollantur, nova gravitate resistant: Sic licet ex nobis sine Dei ope nihil possumus, adjuti tamen Dei gratia omnia possumus: sed si resistamus Spiritui Sancto, & duritiei nostræ, duritiam addamus, culpa nostra fuerit. Rem hanc in colluctantibus experi- mur adhuc evidentius. Nam, ut uterque gravis sit: tamen ab Hercule sublati An- theus, in altum vincebatur: qui si majorem gravitatem potuisset addere, non fuisset a matre terra evulsus, neque ab Hercule vi- ctus, ut est in fabulis. Utimur re fabulosa ad argumenti evidentiam.

Sed

(x) Exod. 33.

(y) De prædestin. c. 3. & epist. 105.

(z) Chrysost. hom. 32. in 19. Matth. Ambros. in Psal. 118. & de vocat. gent. c. 9. Cypr. lib. 4. ep. 7. Origen. 1. Periarch. Basil. hom. Quod Deus.

(a) Hieron. in Ecclef. 7.

Sed neque similitudo hæc satisfacit. Ex-  
tat enim adhuc duplex difficultas. Utram-  
que docet idem Contarenus. Una est, quod  
videtur in electis, qui novam duriciam non  
apponunt, actus aliquis motionem præce-  
dere gratiæ Dei: saltem privativus. Nam  
cum possint resistere, non resistent. Hoc  
repugnat iis, quæ de gratia Dei dicta sunt,  
ut videtur. Altera, quod voluntas Di-  
vina minus efficax in juvandis reprobis,  
quam electis videretur, quod impium est:  
vel certe redit eadem personarum acceptio.

Joannes Damascenus, quem sequuntur  
multi, duas voluntates in Deo ponit: unam  
vocat antecedentem, alteram consequentem.  
Antecedens est, qua vult omnes homines sal-  
vos fieri, & ad agnitionem veritatis venire:  
quæ Divinæ gratiæ operatio est in nobis suf-  
ficiens ad consequendam salutem, si ei non  
resistatur. Per consequentem condemnat eos,  
qui gratiam hanc repudiant: servat autem  
eos, qui recipiunt, & cum ea fructum faciunt.  
Aliter eadem voluntates dicuntur, signi, &  
beneplaciti.

Sed neque hæc explere possunt animum  
hominis multa sciscitantem. Insurgit enim  
hic humana arrogantia, & urget: si præde-  
stinatus es, quid satagis? nonne quicquid  
agas, salvaberis? & si reprobaris, quid pro-  
dest virtus? vana est sollicitudo. Fruere bo-  
nis præsentibus. Nam quæ semel in illa Di-  
vina, simplici que sapientia, atque immutabili,  
definita, constitutaque sunt, non amplius  
consilio subjacent hominis, vel providen-  
tiæ. Hæc est, lector optime, hæreticorum  
ratio. Græce dicamus αἰὲς ἀίψα: qua nec  
ægrotus medicum accersit, nec agricola se-  
mentem faciet, nec ardentibus quis ædibus  
incendium extinguere curabit. Definitum  
enim in Divina præscientia dicet, an extin-  
guetur incendium: & quos fructus sit, vel  
non sit percepturus agricola: & lætione  
surget, vel non surget ægrotus. Et alia mul-  
ta, quæ afferre solita fuit apud Philosophos  
quæstio de futuro contingenti. Equidem  
nisi hac tempestate talia apud plebem scan-  
dala disseminata fuissent: ut etiam sint, quos  
non pudet affirmare prædestinatum peccare  
non posse: imo quod etiam absurdus est,  
ejus peccata Deo placere, præter alias hor-  
rendas plurimas blasphemias: abstinuisse-  
mus sine dubio ab hac de prædestinatione,  
disputatione. Nam temeritatis maximæ est,  
ea in vulgus asserere, quæ non intelligas:  
& vanitatis extremæ, ea publice tradere, quæ  
vulgus percipere non possit. Sed ut teneant  
Pastores nostri, quibus resistent vicinis qui-  
busdam importunis, pauca hæc accipiant, sub  
censura tamen Sedis Apostolicæ. Tenen-  
dum pro certo est, Deum rerum omnium

principium, simplici unaque actione omnia,  
quæ sunt, producere, atque conservare:  
ejusque actionem idcirco nullo tempore,  
nec temporis parte aliqua contineri. Nam-  
que in illa naturæ Divinæ Majestate non  
est, quod quæras, vel fuit, vel erit: tantum  
invenias esse & est nullius temporis vicissitu-  
dine comprehensa. Quam ob rem B. Au-  
gustinus, Divinitas, inquit, omnibus re-  
bus & antiquior est, & junior. Antiquior  
quidem, non quod fuerit, sed quia est ante  
res omnes: junior vero, quia est, non erit  
post res omnes, ad extremum ultimi judicii  
diem. Dei ergo effectrix rerum ratio sim-  
plicitissima est, una, immutabilis, & infini-  
ta: quæ in æternitate operatur omnia, quæ  
sunt, fuerunt, atque erunt. In illo est, Di-  
vinæ causæ, continentur omnes causæ, ne-  
cessariæ, contingentes, liberæ, coactæ, cer-  
tæ, casuales. Sed ad esse Dei hoc ineffabile,  
intellectus humanus ex se ipso non potest at-  
tollere: Quod rebus corporeis & sensibilibus  
immerfus, omnia cum tempore & materia  
& loco cogitat, & cognoscit. Ac sumus qui-  
dem in hoc mundo visibili non dissimiles fra-  
tribus illis, qui apud Platonem sibi adnexi  
sedebant in antro Troplonii. Qui cum um-  
bras rerum solum in antro viderent, reliqua  
quæ sub cælo fieri, atque esse narrabantur,  
omnia umbras esse putabant: & insanire ali-  
os dicebant, qui aliter sensissent: Sic certe  
sumus nos, cum de Divinis, supernisque dis-  
serimus, sic de illis loquimur atque cogita-  
mus, atque de his, quæ in mundo inferiori,  
ac materiali fiunt. Quare cum quis de præ-  
destinatione verba facit, illico ad res notas  
respiciamus: & de Divina virtute (licet im-  
mensa) perinde putamus, atque de ea, quæ  
ad determinatos effectus naturæ ordine pro-  
cedit. Dicimus quidem in sensu composito  
(quod verum est) unum aliquem hominem,  
quem digito ostendimus, vel salvandum,  
vel damnandum esse: sed neque salvum  
adhuc, neque damnatum audeamus affirma-  
re. Et tamen est illud Divinum, æter-  
numque, in quo salus illius hominis decreta  
est, omnia, quæ sunt, & fuerunt, & quæ erunt,  
complectitur, & excedit: nullo ipsum com-  
prehensum tempore. Et quia in verbo hoc  
prædestinationis aliquid prius cogitamus, &  
aliud posterius, [qui nos elegit, inquit Apo-  
stolus, ante mundi constitutionem, ut esse-  
mus, &c.] & in causis, quarum definitus est  
effectus, necessitatem naturæ ponere sole-  
mus, in aliis contingentiam: ideo in præ-  
destinatione necessitatem Divini decreti, cum  
libertate arbitrii conducentes, tanquam in  
præcipitium aliquod deducti, & barathri  
voraginem intuiti, tanta vertigine corripi-  
mur: ut in terram quasi prostrati, solam  
terram cogitemus. Hæc ideo voragine de-

p

terri-



territus Apostolus, exclamat: O altitudo divitiarum sapientiæ & scientiæ Dei: quam incomprehensibilia sunt iudicii ejus, & investigabiles viæ ejus! Nam si sine pœnitentia sunt dona Dei & vocatio: certe igitur, qui prædestinati sunt, finem consequuntur. Si vero liberum arbitrium: ergo peccare possunt, & a fine illo decidere: aut certe peccatum eis non imputabitur.

Tenendum igitur secundo est, primam illam, æternamque rerum omnium causam, singulis suos fines præscripsisse, & ad eos consequendos media dedisse commoda, & conducentia. Sic quos prædestinavit & vocavit, inquit Apostolus. Rebus etiam quibusdam fines & media proposuit excellentiora, & supra naturam earum, ut in animantibus quibusdam videmus mirabilia. Ut docentur equi, & canes, & elephanti quædam agere, quasi ratione utentes, quod supra naturam brutorum est. Produxit quoque Deus hominem rectum. Addidit autem (quod supra naturam hominis erat) gratiam, qua Deo charus erat: justitiam originalem, qua inferiores animæ facultates rationi parebant. Dedit scientiam rerum omnium naturalium: dedit prophetiæ Spiritum, & multa alia. Quin & capacem fecit Divinæ atque æternæ felicitatis. Ad hæc enim, nisi collata a Deo specialiter fuissent, non poterat vi sua pervenire natura primi hominis Adam. Quin etiam hic, qui cum perfectione maxima naturæ humanæ creatus fuerat, ingratus tantis beneficiis, non solum illa amisit, quæ supra naturam acceperat: sed etiam in iis, quæ naturæ propria erant, damnum fecit maximum. Nam relicto summo fine, qui Deus est, ad res caducas animum convertit: ad quas mutæ intus pecudis inhians, comparatus est jumentis insipientibus, & similis factus est eis. Licet enim libero simus a natura arbitrio, ægro tamen adeo, & tanquam saucio; ut ad bene agendum semper indigeamus gratia Dei.

Tenendum tertio, quod licet uni tantum fini addictam & infixam voluntatem quis habeat [veluti Angeli boni, summo bono: diabolus & damnati, malo] non ideo tamen libertate arbitrii, vel ii, vel illi privati sunt: quia utrique proprio impulsu, proprioque iudicio, atque electione, non alieno agunt: & ex multis & variis finem consequendi rationibus, eam tenent & consecretantur, quam maxime probant. Hæc optime persequutus est idem Contarenus.

Ex his igitur tria eliciemus fundamenta doctrinæ præsentis. Primum, quod liberum est hominis arbitrium, potest quivis sanæ mentis non solum male, sed etiam recte

agere cum Deo, si velit. Hoc enim subruto fundamento, quis vitam instituet ex Christi legibus, & doctrina? Majorem locum habeant, necesse erit dogmata Epicuri, aut Philoxeni: quam Christi, aut Apostolorum. Secundum est, quod cum libertate arbitrii non pugnat non posse peccare. Secus enim non fuisset suæ voluntatis Salvator noster Iesus Christus. Tertium est, quod perire nequeunt (id est, infallibiliter salvabuntur) omnes illi, qui secundum Dei æternum propositum electi & vocati sunt. Iis enim omnia cooperantur in bonum. Roman. 8. Fundamentum, inquit 2. Timot. 2. firmum stat: novit Dominus, qui sunt sui. Et Joan. 10. Non peribunt in æternum, & non rapiet eos quisquam de manu Domini. & 17. Pater sancte, serva eos in nomine tuo. Et alio loco: Ex nobis exierunt, quia non erant ex nobis. Nam si fuissent ex nobis, mansissent utique nobiscum. Quartum, quod sunt nonnulli electi & prædestinati: quibus ut vasis misericordiæ Deus uti voluit, ad ostendendum suæ gloriæ, & Majestatis immensæ divitias, Ideoque sine ullis operibus electi sunt, & sine meritis prædestinati. Ephes. 1. Sicut elegit nos in ipso ante mundi constitutionem, ut essemus sancti & immaculati in conspectu ejus in charitate: qui prædestinavit nos in adoptionem filiorum per Iesum Christum in ipsum, secundum propositum voluntatis suæ, in laudem gloriæ gratiæ suæ, in qua gratificavit nos in dilecto filio suo. Et Christus: Multi sunt vocati, pauci vero electi. (b) Quintum, quod qui prædestinatus est, potest peccare. Peccavit enim Paulus, persequens Ecclesiam Dei. Peccavit David, & extra Dei gratiam fuit. Nam gratia Dei donum est in homine: non in Deo passio, vel motus aliquis, qui immutabilis est. Sextum, quod neminem Deus ab spe felicitatis & gloriæ prædestinatorum, quam diu in hoc mundo sumus, abiecit. Quinimo dedit omnibus hominibus, quæ necessaria sunt & conducentia ad hunc finem. Quanquam non omnibus eadem, vel æqualia, quoniam multos reliquit tanquam in communi grege, in naturæ communi ordine & ratione: omnia tamen ad gloriam suam dirigendo. Universa, inquit Sapiens, propter semetipsum operatus est Dominus (c): impium quoque ad diem malum. Quia pœna impii in gloriam justitiæ Divinæ cedit. Neque enim justum est, nec decet, ut omnes eodem honore subditos dignetur Princeps: quia Majestas in distinctione graduum, dignitatumque cernitur. Et in magna domo multa vasa. Atque hoc nunc erit septimum postularum. Ultimum sit, quod nomen prædestinationis, ordina-

(b) Matth. 20.

(c) Proverb. 16.

dinationem notat ad aliquid, quod in intentione prædestinantis est, antequam fiat. In gratia ergo prædestinationis duo considerantur. Unum est, æternum Dei propositum, de quo jam egimus: alterum sunt media conducentia ad beatitudinem. Deus dare solet hæc electis suis; ut sunt vocatio, justificatio, perseverantia, & similia. Non omnes autem quicumque vocari sunt, sunt etiam electi: nec omnes in accepta iustitia perseverant usque in finem. Quapropter licet in proposito Dei æterno multi ad Christi gratiam & fidem (qui status electorum est) sint prædestinati: non omnes tamen ii sunt ad felicitatem æternam. Quia ex iis, qui fidem Christi receperunt, & charismatum ejus dona, quique filii Dei, secundum præsentem (ut dicitur) iustitiam, facti fuerunt: non aliter multi ad vitam æternam prædestinati sunt, quam si compatiantur Christo, & in fide permaneant, nec indignos se reddant hæreditate paterna. Huc pertinet illud Apocalyp. 3. Tene, quod habes, & nemo accipiat coronam tuam. Si namque omnia (ut quidam volunt) necessitate, ex illo Dei proposito evenirent: quis, rogo, huic quaestioni respondeat: Hic prædestinatus est, ergo timere nihil debet, ne coronam sibi quis accipiat? Quod si non est prædestinatus: quorsum hortatur, Tene, quod habes? nihil namque habet. Ergo utrumvis dicas (vel prædestinatum, vel non prædestinatum) nugatoria esset admonitio, Tene, quod habes.

Quare recens quidam author (d) non male sentiendum putat, quod Deus neminem, antequam delictis propriis pœnam commerentem viderit, supplicio præpararet æterno: vel (ut loquimur) præsciverit, aut reprobaverit. Quamquam gratis omnino multos ad gloriam suam prædestinavit: & ex non prædestinatis simpliciter, multos rursus coronabit: quos scilicet non speciali illa prærogativa, gratiaque elegit. Sic author hic particularem prædestinationem, simplicem & absolutam ponit: universaliorem, sub conditione. Doctrinam hanc, quia nondum sit (quod sciam) a Sede Apostolica approbata (cui omnia nostra subijcimus, & a cujus regula ne latum quidem unguem declinare velle protestamur) non equidem, ut ratam atque infallibilem asserimus hoc loco: sed tantum, ut Epicureis illis, & eorum Sophismatis, quod respondere possis, habeas: sicut agimus in Scholis, quando argumenti fallaciam prodimus data instantia. Qui ergo sic respondendo, prædestinationem generalem, ad adoptionem filiorum Dei, & particularem, ad gloriam æternam referant: ii non

sumunt verbum prædestinationis simpliciter & absolute, sicut sumi solet a Theologis pro proposito Divino dandi felicitatem, & media ad eam: sed determinate ad aliquid: ut certe nomen ipsum importat; & in Sacris Literis semper ad aliquid refertur. Itaque generalis illa erit; Qui prædestinavit nos, ut essemus sancti & immaculati: quamquam non omnes in sanctitate permansuri simus. Nam quemadmodum nec populus Israel simpliciter electus, nec omnes simpliciter progenies Abraham: sic nec omnes Christiani simpliciter electi sunt: sed qui compatientur Christo, & in fide ejus perseverabunt, salvabuntur. De populo Israel dicit Apostolus: Non omnes, qui sunt ex Israel, ii sunt Israelitæ: nec qui sunt semen Abraham, omnes filii. Idem tamen Paulo ante innuit omnibus factas esse promissiones. Optabam anathema esse a Christo pro fratribus meis, inquit, (e) qui sunt cognati mei secundum carnem: qui sunt Israelitæ: quorum adoptio est filiorum, & gloria, & testamentum, & legislatio, & obsequium, & promissa. Hic enim Judæorum sortem deplorat: ut quibus essent factæ promissiones, indigni tamen reperirentur promissionibus, & adoptione: quamvis non taliter fecerit omni nationi. Namque populus ille, licet habuerit hanc electionis gratiam, atque adoptionis, non omnes tamen consequuti sunt effectum adoptionis. Quia alia fuit electio, & adoptio totius populi illius in generali, [quem multis beneficiis & prærogativis gratiis prosequutus Deus est] alia singulorum ex populo. Eodem modo Corinthios (uti Christianos jam) sanctos appellat: In quibus tamen erant peccatis gravissimis obnoxii nonnulli. Particularis autem illa est, de qua dixit Dominus: Non peribunt in æternum. [f] Et: Pater sancte, serva eos, [g] & Apostolus: Omnia cooperantur in bonum iis, qui secundum propositum vocati sunt, (b) &c. Et, Fundamentum firmum stat: novit Dominus, qui sunt sui. Et de utrisque dicitur: Ex nobis exierunt, quia non erant ex nobis. Sententia quidem hæc non abhorret a sensu communi, neque a Sacra Scriptura: & pacem atque tranquillitatem aliquam afferre potest animo multa sciscitanti. Sed, amice, te etiam atque etiam monemus, ne plus sapias, quam oportet sapere. Puta Dei sapientiam ineffabilem esse, tuique ingenioli angustiis comprehendendi non posse. Quid ni? qui ne ea quidem, quæ quotidie cernimus, atque adeo manibus tractamus, assequitur? Non dicam nostram ipsam mentem, qua sapimus, qua providemus, qua hæc ipsa agimus, quæ nunc legis.

(d) Cathar. Polytus.

(e) Rom. 9.

(f) Joan. 10. 17.

(g) Rom. 8.

(b) 1. Tim. 2.

legis. Hanc enim, quis videt? aut plane qualis, aut ubi sit, quis sentire potest? Omitto illa, quæ a nobis remota, in magno cum miraculo sunt in cælo, in aere, in mari. Cujus Philosophi sententia dum probata inanet, de ratione visus? Quis demonstravit hactenus Magnetis illam tam conspicuam vim? quis animorum motus? Quis motus corporis nostri? Quis gravitatem lapidis? Quis causam ejus impetus, quo procul a projiciente defertur jaculum? Omitto disputationes de republica, de bello, de moribus, de officiis. Omitto incrementa Synapii, & differentias formarum. Omitto denique, ne aliud dicam, calcei tui attritionem. Nam neque hoc quidem satis notum est? Quid magis nosse existimamur, quam objecta ipsa sensuum? Ea, inquam, quæ ipsa per se naturalibus facultatibus percipiuntur? Hinc, velut e prima scaturigine, demonstrationes humanæ sapientiæ sua exordia sumunt, & inde auspiciantur. At vero, quid obscurius? Quid incertius, si Pyrronicas illas, & aliorum Academicorum disputationes nosti? Quid magis obnoxium contradictioni? Si album quid dixeris, ille falli oculum tuum argumentabitur. Si sphaericum, ostendet ille angulosum. Cum videberis tibi quiescere, motu agitareris. Quæ videbuntur tibi circumduci, ea maxime itabunt. Quid ergo demens? minimam naturæ lucem ferre non possumus: & miraris, si ad immensam caligant oculi? Age ergo. Missam faciamus inquirendi curiositatem. Timeamus in Esau severitatem judicii: in Jacob electionis gratiam agnoscamus. Sinamus justum Abel occidere: servari Cain parricidam: Irum in mendicitate agere: Cræsum opibus gravari. Nam & qui apibus dedit solertiam: idem muscas & fucos condidit inertes. Quorum omnium, & si causæ nobis ignotæ sunt: nihil tamen sine Dei nutu, sine æquitate summa, summaque ratione contingit. Itaque pro iis, quæ discis, gratus esto: ob ea, quæ ignoras, ne sis ægro animo: compertum habens, nihil citra rationem accidere, etiam si rationes hujusmodi te lateant. Dei mysteria [quantum ad captum nostrum attinet] duorum videntur esse generum. Unum eorum, quæ necesse est pro salute nostra, ut cognoscantur: Alterum arcanum, reconditum, & minime scitu necessarium. Quæ etiam duo ita sapientissimus dispensavit: ut quæ sciri necesse est, ea sine magno studio nostro aut labore discantur: alia autem (id est, non necessaria) a nostro conspectu remotissima sunt. Nec modus tamen in inquirendis his, nec finis ullus invenitur. Non dissimile fit in victu. Nam quæ natura corpori maxime necessaria produxit, ea in

promptu cunctis proponuntur animantibus, cælum, terra, aer, aqua, fruges: supervacua vero, & quibus sine magno detrimento carere licet, longissime a nobis posita absunt. Adeo ut nisi cum vitæ periculo ad victum nunquam perquirantur: raræ aves, feræque, & pisces admirandæ magnitudinis: purpura, geminæ, & in terræ visceribus delitescens aurum. Cogitanti aliquando Divo Antonio [ut referunt] de statu mundi: quomodo alii fideles essent, alii infideles, responsum fuit: Antoni, Antoni, cogita de salute tua: Deus satis potens est & sapiens, ut mundum regat absque te. (bb)

## STATUTUM I.

**G**ratiam Dei prædicabunt Curati, & commendabunt populis: ut ab ea in omnibus rebus semper dependant: de prædestinatione autem & præscientia Dei æterna, ne loquantur ad plebem.

## DE SIGNIS GRATIÆ DEI.

**N**emo debet de Prædestinatione sua, vel gratia præsumere: nec etiam de salute desperare. Quanquam esse possint aliqui certi de ea, ex privilegio Dei. Quantum ad primum dicitur Ecclesiastici 9. Nemo scit, odio, an amore dignus sit: sed omnia in futurum servantur incerta. Job. 9. Si venerit ad me, non videbo eum: si abierit, non intelligam. Idem: Si simplex fuero, hoc ipsum ignorabit anima mea. 1. Cor. 4. Nihil mihi conscius sum, sed non in hoc justificatus sum. Nam Luc. 17. Cum feceritis omnia, quæ præcepta sunt vobis, dicite adhuc, quia servi inutiles sumus. Quia (Rom. 8.) non sunt condignæ passionibus hujus mundi. Et Psal. 142. Quia non justificabitur in conspectu tuo omnis vivens.

Ex his sequitur, quam sint perniciosæ hæreses nostri temporis. Sunt enim quidem schismatici, qui certos de prædestinatione esse jubent omnes eos, qui secum a Fide Ecclesiæ Catholicæ Romanæ deficiant. Debuerant potius de damnatione. Nam quæ ipsi faciunt, indicia sunt reprobationis. Docemus autem nos, credendum esse verbo Dei: non utique securos esse vel gloriari, sicut ille Phariseus, (i) qui alios præ se peccatores ducebat. Beatus Petrus satagere nos potius, & solícite quærere salutem per bona opera consulit: quod faciendo, inquit, [k] non pecca-

(bb) Gerson, 1. Serm. de S. Ant.

(i) Luc. 18.

(k) 2. Pet. 1.



peccabitis aliquando. Cæterum nihil prohibet, quin possit aliquis per revelationem certus fieri. Paulo enim dictum est : Sufficit tibi gratia mea. (l) & ad Timoth. scribens, ait : Scio cui credidi : & certus sum, quia potens est depositum meum servare in illam diem. [m] & 2. Cor. 13. Nunquid experimentum quaeritis ejus, qui in me loquitur Christus ?

Verum ad confirmandos in spe animos fluctuantes meruimus etiam ad meliora semper incitandos ; Caput hoc unum lege libri De perfectione charitatis Dionysii Cartusiani, quod Gallice quidam reddiderunt.

### Signes par lesquels on conjecture si quelqu'un est en charité.

**P**AR la Loy commune personne ne peut savoir ces signes, pour en avoir une certitude. Ce neantmoins il y a quelques exercices spirituels, par lesquels on peut conjecturer, que celui qui est frequent & assidu en iceux, & y persevere jusques à la fin, est en Charité. Pour exemple : Considere soigneusement en toy, si tu as tousiours, ou au moins le plus souvent Dieu devant tes yeux, en toutes tes pensées, parolles & actions : le croyant present en tout lieu, & scrutateur, & jondeur des reins & des cœurs (n) de toutes personnes, à raison dequoy tu luy portes humblement bonneur & reverence en toute place : cela est un tresbon signe, que tu n'es sans charité.

De recbes, c'est un bon signe que tu as quelque estincelle de charité, & que tu n'es hors de la grace de Dieu, si tu parles volontiers à Dieu, par devotes prieres & meditations : si tu prens plaisir à parler de luy en toute compagnie : si tu oys volontiers parler de luy en predications & leçons. Plus si tu contemples & regardes volontiers Dieu en ses œuvres admirables, & au Venerable Sacrement de l'Autel, luy en rendant graces. Si pareillement tu visites volontiers les lieux, esquels Dieu est le plus souvent trouvé, comme es Eglises, Chapelles des Saints, & autres lieux sacrez. Outre si (selon la coustume d'amis) tu envoies souvent au Seigneur ton Dieu presens de Saints soupirs, genuissemens, & larmes de devotion & ferventes oraisons. Et si d'autre part, tu reçois gracieusement les dons, desquels il honnore coustumierement les siens, c'est à savoir, reproches, injures, moc-

queries, travaux, douleurs, maladies, & toute sorte d'adversité corporelle ou spirituelle : attendu que ce n'est grande œuvre de rendre grace par benefices & prosperitez, veu que mesmes les Gentils & Idolatres ont ceste coustume de n'estre ingrats des biens, qu'on leur a fait : ains reconnoissent & remercient leurs amis & bienfaiteurs. Ce pendant tu pourras avoir ceste confiance, que tu n'es entierement sans la grace de charité. Pareillement si tu as joye & liesse, quand tu oys louer Dieu par ses fideles : & d'ailleurs es merueilleusement desplaisant & fache, quand tu le vois deshonorer par les pecheurs : cela est un grand argument, que tu as quelque chose de charité.

Semblablement si tu te resjois de bon cœur, du bien & prosperité de ton prochain, comme de ta propre felicité : & que tu ayes dueil & compassion de la misere d'autrui, tant corporelle que spirituelle, à savoir de ses maladies, infirmités & tentations comme des tiennes propres : cela te soit en bon signe que tu n'es du tout vuide de charité. De recbes si tu es zelateur du salut des ames, attirant à Dieu tous ceux, que tu peux par oraison, parole & bon exemple, tantost les reprenant, tantost les priant & suppliant, à ce que Dieu soit loué en tous : c'est un argument de quelque charité qui est en toy. D'avantage si tu t'esvertues [selon ta puissance] de suivre JESUS Christ en vertus, mesmement en celles qu'il t'a enseigné de parole & d'exemple, savoir est, mansuetude & humilité : c'est un evident signe, que tu es son Fils, attendu que les Enfants doivent ressembler à leurs Peres : & cela ne se fait sans notable grace de charité. Et si outre les signes precedens, tu sens encores en toy celui qui s'ensuyt, c'est à savoir, que pour l'honneur de Dieu tu aymes de vray amour & non seinet ne simulé ton ennemy : ne te dueillant ny resentant des torts & injures qu'il t'a fait : mais que plustost estant passionné du danger auquel il est, (pour l'offense à toy faite) tu pries de cœur affectionné pour la remission de son peché : tu pourras avoir grande esperance, que tu n'es du tout sans charité.

### DE SEPTEM DONIS SPIRITUS SANCTI

**S**Eptiformis Dei Spiritus Sancti dona per Esaiam Prophetam enumerantur. Quæ  
P 3 con-

(l) 2. Cor. 12.

(m) 2. Tim. 1.

(n) Psal. 7.

contra septem peccata capitalia generaliter nos corroborant & munire possunt. Egredietur, inquit, (o) virga de radice Jesse, & flos de radice ejus ascendet: & requiescet super eum Spiritus Domini, Spiritus sapientiæ & intellectus: Spiritus consilii, & fortitudinis: Spiritus scientiæ, & pietatis: & replebit eum Spiritus timoris Domini. Hæc dona Dei sunt: quæ veluti septem lucernæ ab Austro ardentes, Aquilonares tenebras (inquit Hieronymus) expellunt in tabernaculo Domini. Hæc nemo utiliter accipit, nisi in Ecclesia Catholica, quæ Corpus Christi est. Nam sine charitate nihil profuit: qui Ecclesiæ unitatem non tenet, in charitate non est.

Itaque contra superbiam postulemus Spiritum timoris Domini: contra invidiam, Spiritum pietatis: contra iram, Spiritum scientiæ: contra pigritiam, Spiritum fortitudinis: contra avaritiam, Spiritum consilii: contra gulam, Spiritum intellectus: contra luxuriam, Spiritum sapientiæ.

Comparat septem hæc dona Spiritus, cum septem beatitudinibus Augustinus in sermone de Sanctis, 17. & docet, quomodo timor Domini, qui in ultimo loco positus est, (respondens tamen primæ beatitudini) sit initium sapientiæ. Sed Bernardus copiosius in tractatu de donis Spiritus Sancti. Quamquam numerus beatitudinum non respondet: nam Spiritus Sancti dona septem apud Esaiam invenit Origenes: in Hebræo nunc non invenitur nomen pietatis. Et sex tantum eo loci, conjugatione tripla numerantur.

Sapientia lumen mentis est, quo illustrati Deum cognoscimus & veneramur. Intellectus facilitas ad percipiendum omnia, quæ nobis necessaria sunt ad salutem. Fortitudo constantia animi in periculis & persecutionibus, quam consilium, id est, consulendi vis prudens a Deo data moderatur & regit. Scientia ascensus erga ea, quæ doctrina continet pietatis. Pietas autem affectus ad cultum Dei. Initium his omnibus præbet timor Dei. Sed quia nihil horum sine Christo habere possumus: (in quo fuit plenitudo Divinitatis) ideo in eo dicitur Spiritus horum donorum dator manere.

Porro autem donorum Spiritus Sancti ea vis est, ut per illa virtutes omnes facilius exerceamus Spiritui Sancto. Sunt enim habitus in anima, quibus homo perficitur ad obediendum prompte. Qui credit in me (inquit) flumina de ventre ejus fluent aquæ vivæ. (p) Hoc autem dixit de Spiritu, quem accepturi erant credentes in eum, id est, de donis gratiæ Spiritus Sancti. Ex hisce do-

nis spirituales efficimur & filii Dei. Nam qui Spiritu Dei aguntur, hi sunt filii Dei. (q)

### *Fructus Spiritus Sancti.*

**E**X his Spiritus Sancti donis fructus sequuntur Deo grati & suaves. Videlicet, charitas, gaudium, pax, patientia, benignitas, bonitas, longanimitas, mansuetudo, fides, modestia, continentia, castitas. Adversus hæc non est lex. Contra vero opera carnis sunt fornicatio, immunditia, impudicitia, luxuria, idolorum servitus, veneficia, inimicitia, contentiones, æmulationes, iræ, rixæ, dissensiones, sectæ, invidiæ, homicidia, ebrietates, comestiones, & his similia. Hæc Paulus. (r) Cum ex fructu cognoscatur arbor, jam unusquisque sodes scrutetur in se, num sequatur magis carnem, an Spiritum Dei: ut si secundum carnem se vivere deprehendat, muret mores: alioqui morietur. Si enim (inquit Apostolus) secundum carnem vixeritis (s), moriemini. Si autem spiritu facta carnis mortificaveritis, vivetis. Paulo ante dedimus signa gratiæ: eadem ex fructibus his Spiritus Sancti sumimus, & ex fructibus carnis. Ceterum aliter vivere secundum carnem definire potes, facere quicquid lubet. Ut dormire quando vis, & quantum vis: edere & bibere, quod vis, & quando vis: vestiri quomodo vis, &c. Sed Christus non venit, inquit, facere voluntatem suam.

### *De octo Beatitudinibus.*

**M**atthæi 5. scribitur Dominum in monte docuisse discipulos suos his verbis: Beati pauperes, &c.

Lucæ autem 6. quatuor tantum ponuntur; Beati pauperes, Beati, qui nunc esurit, Beati, qui nunc fletis, Beati eritis, cum vos oderint homines &c. sed in his quatuor ille octo continentur, ut docet Ambrosius.

Beatum dicimus eum, qui summo bono opinione nostra fruitur: unde divites vulgus beatos nominat, & intemperans, eos, qui corporis voluptatibus pro libidine potiuntur. Sed falluntur. Vera beatitudo in visione Dei est, & Christi ejus, quam in regno cælorum sperare possunt, non qui rebus opatis in hoc sæculo potiuntur, sed magis, quos miseros vulgus existimat in hac vita.

Sed ne quis fallatur, non omnis, qui ea, quæ hic narrantur, patitur, felix erit: sed qui pro Christo, in fide. Nam multi hære-

(o) Esa. 11.

(p) Joan. 7.

(q) Rom. 8.

(r) Gal. 5.

(s) Rom. 8.

hæretici nomine Christiano, animas decipientes, multa talia patiuntur: sed ideo excluduntur ab ista mercede, quia non dictum est tantum, Beati, qui persecutionem patiuntur; sed additum est, Propter justitiam. Ubi autem sana fides non est, non potest esse justitia: quia justus ex fide vivit. (†)

Doctrinam hanc beatitudinum ideo tradere debent Curati, ut intelligat populus primum, nobis propositam esse vitam beatam, si Christi sequamur vestigia: deinde quod corona proponitur & merces, non si credamus tantum, sed si laboremus & compatiamur Christo. [u] Quoniam, ut S. Jacobus docet, Beatus vir, qui suffert tentationem, quoniam, cum probatus fuerit, accipiet coronam vitæ.

De gloria & vita æterna plura inferius dicentur.

### DE QUATUOR NOVISSIMIS, Morte, Judicio, Inferno, & Vita æterna.

**E**ccelesiasticus cap. 7. In omnibus (inquit) operibus tuis memorare novissima tua, & in æternum non peccabis.

Ultima hæc (sive novissima) a Theologis plerisque ponuntur quatuor: Mors, Judicium, Infernus, & Gloria cælestis. Hæc sæpius repetita memoria cum teneant hominem inter spem, metumque dubium: cautiorem in vita reddunt, & sibi magis attendentem, nec prosperis efferri, vel rebus sinunt adversis frangi, sed ubique decorum servare, officiumque tueri faciunt.

Hinc enim [ut de Morte primum agamus] si valetudo, vel ætas spem promittunt vitæ longioris: illinc tamen casus innumerari, quos subiri omnino in horas videmus, mortis mille species proponunt ob oculos. Quare cogitatio de Morte digna Philosopho semper habita est: imo vera Philosophia, si credimus (x) Platoni. Quis enim adeo felix, vel contra miser, sub hoc cælo degit, qui cum vitæ annos considerat, moriendique necessitatem, non protinus utrumque, & felicitatem & miseriam perinde ducat momentaneum nescio quid, nec ulla ex parte firmum? Ubi, quæso, sunt Imperatores illi tam multi? Somnium: quanquam Imperatorum [umbrarum dico] catalogus descriptus extat apud multos. Ubi sunt illi tam multi Reges Hispaniæ, Galliæ, Angliæ,

Ungariæ, Italiæ, Africæ, Ægypti, Syriæ, Ponti? Ubi illorum opes? ubi exercitus? ubi gloriæ? Nemo illa nostrum vidit. Instar fabulæ est, quod de uno aliquo narratur. Descende paulatim ex illis ad Principes, cives, agricolas: omnes hi ad mortem, tanquam flumina ad mare, cursu præcipiti properando devenerunt. In quo & formam, & nomen non aliter amiserunt, quam in mari flumina tam magna, quam parva solent. Homo vanitati similis factus est: dies ejus sicut umbra prætereunt. Rex hodie est, & cras morietur. Et cum morietur homo, hæreditabit serpentes, & bestias, & vermes.

Cum sit autem morte nihil certius: tamen hora mortis nihil incertius. Vigilate ergo [ait Dominus] & estote parati: quia qua hora non putatis, filius hominis veniet. Et certe cæcitas illa multorum reprehendenda sæpe venit a Pastoribus: qui ad extremum vitæ spiritum differunt tam de anima sua & corpore, quam de bonis acquisitis disponere: quando nec sensus integri recte deliberare, nec assistentium inhiantium hæreditatibus importunitas libere quicquam constituere patiuntur. Quantas vero turbas relinquunt hæredibus, qui decedunt intestati? Quantas quoque lites, qui male testati? Simile quid patimur circa mortem, quod pueri circa somnum. Iis licet necessarius sit somnus, tamen nisi victi & pene prostrati somno, nunquam lectum petunt: sic licet mors necessaria nobis sit, & ad quietem malorum & ad gloriæ fruitionem, tamen nisi morbo victus extremo, & prope animam agens, ad bene moriendum nemo se comparat. Sed de meditatione mortis, in libello precum scriptum est.

Tria igitur hoc loco circa infirmum agenda, antequam vita defungatur, quæ Curatos scire oportet: videlicet formam testamenti, leges servandas in cessione bonorum, & doctrinam bene moriendi. Post hæc Statuta reponemus de Sepulturis. Nam de forma administrandi Sacramenti Pœnitentiæ infirmo, & Sacræ Eucharistiæ, atque Unctionis extremæ, omnia suis locis descripta invenies.

### DE JUDICIO EXTREMO.

**D**E Judicio extremo [quod alterum novissimorum est] ita loquitur Dominus Matth. 16. Filius hominis venturus est in gloria Patris sui cum Angelis suis. Tunc reddet unicuique secundum opera ejus. Et Apostolus 2. Cor. 5. Omnes nos manifestari oportet.

(†) August. in libr. 1. c. 9. de sermone Domini in monte.

(x) Plat. de anima.

(u) Rom. 8. Jacob. 1.



oportet ante tribunal Christi, ut referat unusquisque propria corporis prout gessit, sive bonum, sive malum. Et 14. Omnes stabimus ante tribunal Christi. Itaque unusquisque nostrum pro se rationem reddet Deo.

Sed notandum, quod in Scripturis Sacris duplex invenitur adventus Domini, & duplex etiam Judicium. Unus adventus est, cum salutis nostræ causa carnem assumpsit. Alter erit in consummatione sæculi, quando ad judicandum homines veniet. Hic adventus dicitur: Dies Domini. Qui quidem dies ut impiis & iniquis horrendus erit, sic Sanctis optabilis, expectantibus beatam spem & adventum gloriæ magni Dei, qui reformabit corpus humilitatis nostræ configuratum corpori claritatis suæ. Sed duo tempora sunt, in quibus unumquemque nostrum necesse est in conspectum Domini venire, & singularum tam cogitationum, quam operum & verborum rationem reddere, & Judicis sententiam subire. Unum est, cum unusquisque migrat e vita. Mox enim sistitur ad Dei tribunal, ubi de omnibus, quæ gessit, quæstio iustissima habetur. Hoc privatum judicium vocatur. Alterum est generale & extremum, quod in fine sæculorum de omnibus fiet hominibus, ut omnes intelligant Dei summam justitiam & æquitatem, & causas cognoscant, quarum ignoracione multi, de Dei justitia hæsitant, videntes bonis aliquando male, malis autem bene esse. Sunt multa delicta, quorum autores fuisse jam vita defunctos non debet impune esse, ut hæreses, & alia, quæ post mortem inventorum non statim adimpleri solent. De hoc extremo judicio Psal. 95. Esa. 3. Daniel. 12. Paulus Timor. 4. & Christus Matth. 25. abunde loquutus est.

### *Quis Judex.*

Christo Domino non solum ut Deo, sed etiam ut homini, hoc judicium datum esse Sacræ Literæ declarant. Quamvis enim judicandi potestas omnibus Sanctæ Trinitatis personis communis sit; præcipue tamen Filio tribuimus, cui & sapientiam convenire profiteamur. Quod autem ut homo mundum judicaturus sit, docet Joan. 5. Sicut, inquit, habet vitam in semetipso, & potestatem dedit ei, judicium facere, quia Filius hominis est. Et æquum est, ut Judicem oculis videant judicandi, & audire auribus possint, & ut, quem iniqui opprobriis attecerunt, judicantem cum Majestate agnoscant. Quia ipse est, qui constitutus est a Deo Judex vivorum & mortuorum.

Tunc erit Judex causæ tuæ, qui nunc est testis vitæ tuæ.

### *Qui judicandi.*

Duæ sunt differentiae, vel ordines hominum in hoc extremo judicio, scilicet electorum & reproborum. (y) Qui tamen in quatuor dividuntur. Nam perfectorum ordo unus cum Domino judicabit: alius judicabitur: sed uterque regnabit postea cum Christo. Ordines quoque reproborum duo erunt. Nam qui in Ecclesia nunc sunt mali, judicandi venient & damnandi: qui vero extra Ecclesiam reperti fuerint obisse, non judicandi erunt, sed solum damnandi. Ergo qui nunc nequiter opprimuntur, (inquit B. Greg.) tunc super oppressores suos Judices erunt. Judicium pauperibus tribuit Job. Et Matth. 19. Amen dico vobis, quod vos, qui reliquistis omnia, & sequuti estis me, in regeneratione, cum sederit filius hominis in Sede Majestatis suæ, sedebitis & vos super sedes duodecim, judicantes duodecim tribus Israel. Judicandi autem & damnandi ex altera parte venient illi, quibus dicitur a Domino: Esurivi, & non dedistis mihi manducare; sitivi &c. Qui peribunt non judicandi, sunt illi, de quibus Propheta ait: Non resurgunt impii in judicio: & de quibus Dominus, Qui autem non credit, jam judicatus est: & Paulus, Qui sine lege peccaverunt, sine lege peribunt. Itaque resurgent omnes infideles, sed ad tormentum, non ad judicium. Professionem vero fidei retinentes, sed professionis opera non habentes, redarguentur & peribunt. Qui denique nec fidei Sacramenta tenuerunt, increpationem Judicis in extrema examinatione non audient: quia præjudicati infidelitatis suæ tenebris, ejus, quem despexerunt, redargutionem non merentur.

### *Tempus judicii extremi.*

Quando futurum sit, omnino ignoratur. Sic enim ait (z) Dominus: De die autem illo nemo scit, neque Angeli, sed Pater solus. D. Augustinus (a) ait: Frustra annos, qui huic sæculo remanent, computare ac definire conemur, cum hoc scire non esse nostrum, ex ore veritatis audiamus: quos tamen alii quadringentos, alii quingentos, & alii etiam mille ab Ascensu Domini ad ejus ultimum adventum compleri posse dixerunt. Sed conjecturis utuntur humanis: non ab eis certum aliquid de Scripturæ Canonice veritate profertur. Hæc August. Quæ omnia vir eruditissimus non sine causa attul-

(y) Hieron. lib. 1. c. 30. de summo bono.  
(a) Civit. lib. 18.

(z) Matth. 13. 24.

attulit: nam antiqui illi Patres & Scriptores Ecclesiastici, ut Tertullianus, Lactantius, Irenæus &c. instare suo tempore omnes putabant diem judicii. Quod Irenæus libr. 5. multis probare nitebatur. Cum enim mundum sex diebus creatum sciret, & mille anni sint in conspectu Dei (b) sicut dies unus: horam pro quingentis annis sumendam existimabat. Methodius, Eusebius, Beda, & alii idem senserunt.

Fabulosi quoque Judæi ex libro suo Seder olam 6000. dant durationi mundi. Cumque anno Christi nuper elapso 1502. a fabulis suis fascinati, omnes cujuscunque ætatis & sexus jejuniis afflixissent, ludibrio omnibus gentibus fuere: quia nihil eorum accidit, quæ sperabant.

Has Judæorum fabulas Germani quidam Semijudæi pro Prophetia Eliæ acceperunt. Et ignorantes earum, non Eliam Thesbitem Prophetam, sed Thalmudicum authorem esse: durationi mundi sex millia tribuunt, sic distincta, ut legis naturæ fuerint duo millia, Mosaicæ alia duo, & Christi alia duo. Astrologi quidam septem millia ex motu parvi circuli octavæ Sphæræ conjectant: sicut alii multo majorem numerum. Alii rursus magis mystice philosophantes, a nativitate Christi ad mundi finem numerant 1700. annos, sicut a creatione ajunt ad diluvium 34. Jubilæa enumerantur ex Philone, ut sicut per aquam fuit olim iniquitas mortalium in 34. Jubilæo post primum Adam: ita delebitur per ignem trigésimo quarto Jubilæo post secundum Adam. Nam Christus, inquiunt, de die judicii loquens, remittit ad Danielem Prophetam: Daniel autem c. 12. prædicat maledictionem ultimam post dies 1335. ab egressu verbi. Ait enim: Et a tempore cum ablatum fuerit jure sacrificium, & posita fuerit abominatio in desolationem, dies mille ducenti nonaginta. Beatus, qui expectat & pervenit ad usque dies mille trecentos triginta quinque. Dies isti (ut putant) pro annis sumpti eam faciunt summam annorum.

Sed frustra torquentur omnes, qui hæc investigare hætenus conati sunt, & in errores plurimos inciderunt: quia, quod sciri nefas est, inquirere tentarunt. Deus enim in tua hæc posuit potestate: & Danieli dictum est: Vade Daniel, quia clausi sunt, signatique sermones usque ad præfinitum tempus. Ideo præstat nos semper paratos exhibere, ut semper vigilemus: quam ad tempus aliquod, tanquam certum, respicientes, cum aliis multis insanire. Hoc ignorari voluit Deus, ut semper parati essemus. Nec

si dicatur cito venturus dies judicii, ideo falsum putemus, si non cito videatur venire: quoniam si ad æternitatem respiciamus, mox erit, quodocunque erit.

Tamen ante judicium generale hæc tria inter alia præcipue veniunt notanda: prædicatio Evangelii per universum mundum: discessio (id est, apostasia) ab Ecclesia, vel ab Imperio Romano, & Antichristus. Per fidei prædicationem convertentur Israelitæ in fine sæculi. De Antichristo, & Apostasia dicit Apost. 2. Timoth. 2. Nisi venerit discessio primum, & revelatus fuerit homo peccati, filius perditionis, qui adversatur & extollitur supra id, quod dicitur Deus: cujus adventus secundum operationem Satanæ in omnibus signis, &c. Et Matth. 24. Ego veni in nomine Patris mei, & non recipistis me: Veniet alius in nomine suo, & illum recipietis. De origine autem Antichristi, & aliis rebus ejus contrariis omnino Christo, Damascenus lib. 4. c. 27.

Venient & Elias Thesbites, & Enoch: quos, ut Theologi contemplatores ajunt, occidet Antichristus. Sed ipse occidetur spiritu oris Christi. Fiet separatio bonorum a malis, tanquam agnorum ab hædis: & orbis universi conflagratio. Nam elementorum qualitates, quæ corporibus nostris corruptibilibus congruebant, ardendo penitus interibunt: atque ipsa substantia eas qualitates habebit, quæ corporibus immortalibus convenient. Ante omnia hæc, fides multorum deficiet, ut docet Christus. Luc. 18. Matth. 24. & Paul. 1. Timoth. 4. Magna erit bellorum commotio. Matth. 24. Marc. 13. Luc. 21. Tertio fames: Quarto pestis: Quinto terræ motus. Hæc oportet fieri, sed non statim finis. Erunt enim etiam signa in Sole, & Luna, & Stellis: & ignis denique conflagratio.

### Quo loco.

Joelis 3. Congregabo omnes gentes, & deducam eas in vallem Josaphat, & disceptabo cum eis, &c. Infra, Consurgant & ascendant gentes in vallem Josaphat: quia ibi sedebo, ut judicem omnes gentes in circuitu. Ex his verbis locum judicio extremo putarunt designatum in Judæa. Sed sicut tempus nemo novit, nisi Deus, sic neque locum quis temere definire debet. Nam & dictio Hæbraica Josaphat, sonat, Judicium Domini: & inferius eodem capite dicitur: Juxta est dies Domini in valle concisionis Heb.

### Quale

(b) Psal. 89.

Tomus VIII. Concilior. German.

*Quale & quomodo fiet Judicium.*

**S**ophoniæ 1. Juxta est dies Domini magnus, juxta est, & velox nimis. Vox diei Domini amara: tribulabitur ibi fortis. Dies iræ, dies illa tribulationis & angustiae, dies calamitatis & miseriae, dies tenebrarum & caliginis, dies nebulæ & turbinis, dies tubæ & clangoris. Et Dominus apud Matthæum: Cum venerit Filius hominis, &c. (c)

Notanda sunt ergo quatuor judicii generalis mysteria. Primum est trina citatio: sed bina jam præcessit. Per Prophetas enim vocavit Proverb. 11. Vocavi, & renuistis. Deinde per Apostolos Luc. 14. Misit servos suos hora cænæ. Tertia erit, in voce tubæ peremptoria: de qua B. Hieronymus dicebat: Sive comedam, sive bibam, sive quid aliud faciam, semper insonare videtur auribus meis illa terribilis tuba, & verba, Surgite mortui, venite ad judicium. Secundum mysterium est separatio, quæ fiet tanquam ovium ab hædis, bonorum a malis. Tertium, examinatio & discussio omnium actionum singulorum. Ultimum, retributio pro meritis singulorum.

In die Judicii extremi nihil, nisi opera nostra bona juvabunt: Futurum est enim, ut unusquisque nostrum & actus suos, & cogitationes ante tribunal Judicis tremendi afferat. Contremiscit cor, & renes mei resolvuntur, quoties cogito revelandas esse cogitationes meas, & sermones atque actiones meas in illo die. Sicut arbores fructiferae primo fructum concipiunt intra se, postea proferunt extrinsecus secundum propriam cujusque naturam & folia & fructus: sic in die illa terribili omnes homines quæcunque bona vel mala gesserunt in hoc sæculo occulte, ibi quasi fructus proprios ante Tribunal Domini proferent. Justi quidem bonos & jucundos: Sancti similiter suavissimos, & omnibus gratiarum floribus ornatos: Martyres vero suppliciorum & pœnarum fructus patientiæ gloriosos: Monachi autem sanctæ conversationis suæ, id est, continentiae, humilitatis, vigiliarum, orationum, & obedientiae immarcescibiles fructus. Peccatores vero impii ac prophani proferent turpissimos & execrandos, cum confusione, & ululatu, & luctu. Tremendum est judicium, in quo sine testibus omnia manifesta erunt. Ibi assistent millia millium Angelorum & Archangelorum: ibi justorum chori Patriarcharum, Prophetarum, Apostolorum, Martyrum, Virginum, & omnium omnino ag-

mina Sanctorum. Beatus homo, qui invenerit fiduciam in illa hora, & qui audierit vocem illam: Venite benedicti Patris mei, percipite regnum, quod vobis paratum est ab origine mundi. Apparebit Crux lucidissima in cælo adventum Christi significans ad judicium, quæ inimicos quidem Crucis terrore & confusione replebit, fideles autem gaudio atque lætitia. Accedent tubæ, quarum sonitu terribili, omnes, qui in monumentis sunt, excitabuntur. Cælestis jussu Regis terra mortuos suos reddet: mare itidem. Quicquid humanorum corporum vel bestia rapuit, vel piscis voravit, vel avis discerpsit, in statum suum pristinum remeabit. Omnes in ictu oculi resurgent, & ante tribunal sistentur. Qui status erit mentis miseris, [fratres] cum viderint igneum fluvium ab ortu Solis ad occasum, procumbentes montes & culmina devorantem, omniaque, quæ in terris sunt, consumentem? cum sidera de cælo cadent, cum Sol & Luna deficient & in sanguinem vertentur? cum cælum sicut liber aliquis complicabitur? cum viderint Angelos huc atque illuc cursitantes cum festinatione, & electos Dei ex quatuor angulis mundi congregantes? Cum viderint sonum sublime Judicis terribilis & severi? cum viderint aperiri libros illos, in quibus descripta sunt cujusque hominis facta, verba, atque cogitationes? O quantus erit gemitus, quam miserabiles lacrymæ, cum oculis nostris videbimus hinc cælorum regnum, illinc æterna inferni supplicia. Tunc separabuntur boni a malis, sicut oves ab hædis, Episcopi ab Episcopis, Presbyteri ab aliis Presbyteris, uxor a marito. Ingemiscunt Principes & Reges, nudi & miseri discurrent: namque opes & majestas nulla illic Principum movebit Judicem æternum. Quæ in corpore existentes gesserint bona vel mala, recipient. Dicit enim Dominus: Ego te, o homo, de limo terræ manibus meis formavi: ego animi & corporis bonis ornavi: pro te pallus sum: irradientium palmas & spura suscepi: acetum cum felle bibi: flagellis cæsus sum, spinis coronatus, cruci affixus, vulnera perfossus: ut tu eripereris morti, animam in tormentis dimissi. En clavorum vestigia, quibus affixus pependi. En perfossam vulneribus latus. Suscepi dolores tuos, ut gloriam tibi darem. Cur quod pro te per tuli, perdidisti? Cur ingrate redemptionis tuæ munera renuisti? Et quia ad medicamenta pœnitentiæ confugere noluisti, ab auditu malo non mereberis liberari: Ite maledicti in ignem æternum, &c.

Ut ergo hæc tam dura & tam terribilia ante illud tribunal æterni Judicis audire non merea-



mereamur, dum adhuc licet, & cum Dei adjutorio in potestate nostra est, consideremus conscientias nostras, & si aliqua crimina, vel peccata capitalia, nec dum elemosynis vel orationibus purgata, nobis adhuc dominari cognoscimus: portum pœnitentiæ, devictis peccatorum fluctibus, Christo juvante, intrare festinemus. An ignoras, eos, qui Judicem mitigare volunt, non ipso in examine causæ, sed priusquam judicii ingrediatur locum, benevolum sibi faciunt? Ergo præoccupemus faciem ejus, & dicamus: Ne intres in judicium cum servo tuo, Domine, quia non justificabitur in conspectu tuo omnis vivens. Si justus vix salvabitur, impius & peccator ubi apparebunt?

### STATUTUM I.

**P**rohibemus prognosticationes de die judicii extremi, quas ad demerendos homines, falsi sæpe Prophetæ ex Sacris Literis, in suum sensum detortis, vel ex motuum cœlestium calculatione, nescio, qua comminiscuntur.

### DE INFERNO, ET POENA Damnatorum.

**S**i esse Sanctorum animas in cœlo credimus, oportet omnino, credamus & iniquorum animas esse in inferno: quia ex retributione æternæ justitiæ, ex qua iusti gloriantur, necesse est, ut & iniusti crucientur. Ideo Matth. 23. Christus monet nos extremi judicii, quando dicetur iis, qui a sinistris erunt: Discedite a me maledicti in ignem æternum, qui paratus est diabolo & angelis ejus. Et ibunt hi in supplicium æternum: iusti autem in vitam æternam.

Inferorum locus creditur esse sub terra, secundum illud Esaiæ 41.: Infernus subter conturbatus est in occursum adventus ejus. Et c. 7. Pete tibi signum a Domino in profundum inferni, vel in excelsum supra. Quanquam omnis locus reprobis est pœnalis, qui semper sœcum deferunt cruciatum, & ubique contra se tormentum incurrunt. Hieronym. super illud Matth. 12. Sicut fuit Jonas in ventre ceti, &c. dicit infernum esse in medio terræ, sicut cor est in medio animalis. Quare sentiunt pii Doctores, terram

in medio sui cavam esse, ibique habere plura receptacula: præsertim vero quatuor. Unum intra alia, qui damnatorum locus sit. Alterum, puerorum limbum, qui sine Baptismo vel circumcissione decesserunt: quem ideo limbum vocarunt, quod instar limbi planisperi ambiat pœnarum locum. Tertium, Purgatorii. Quartum, Patrum veteris testamenti, quem Christus post mortem suam evacuavit.

De pœnis autem inferni ex rerum corporalium, quas videmus in hoc mundo comparatione & similitudine Sancti Doctores multa tradidere: ut horrore intolerabilis supplicii nos a peccatis & impietate revocarent. Sed putandum minora profecto esse, quæ dicuntur omnia, quam res ipsa habeat, cum & Sacra Litera supra terribilia omnia eas exaggerarint. August. (d) Hujus pœnæ & ignis illius potentiam nulla vox exponere, nullus poterit sermo explicare. Nihil est enim in rebus corruptibilibus, quod conferri possit incorruptibilibus, siue bonis, siue malis.

Idem tamen duo principalia dicit esse tormenta in inferno: frigus intolerabile, & calorem ignis inextinguibilem. Unde in Evangelio dicitur: Illic erit fletus & stridor dentium. Et Job. 24. De aquis nivium transibunt in calorem nimium. Innocentius III. in lib. De contemptu mundi: Prima pœna, inquit, est ignis: secunda frigoris. De eo dixit Dominus: Ibi erit fletus & stridor dentium, propter frigus. Tertia erit sceler. De his tribus dicitur in Psalmo, [e] Ignis, sulphur & Spiritus procellarum, pars calicis eorum. Quarta, vermes indeficientes. Unde Esaias, (f) Vermis eorum non morietur, & ignis eorum non extinguetur. Quinta, mallei percutientes. Unde (g) Salomon: Parata sunt damnationis judicia blasphematibus, & percutientes mallei stultorum corporibus. Sexta, tenebræ palpabiles exteriores & interiores. Unde (b) Job: Terra miseriæ & tenebrarum: ubi umbra mortis, &c. Vadam ad terram tenebrosam & opertam mortis caligine. Septima confusio peccatorum. Tunc enim (ut legitur in Daniele) libri aperti: id est, conscientiæ hominum erunt omnibus manifestæ. Octava, horribilis visio dæmonum. Nona, igneæ catenæ, quibus impii constringentur. Singula enim membra pro suis peccatis sustinebunt sua tormenta: ut in eo puniantur, in quo peccaverunt. Scriptum est enim: Per quæ peccat homo, per ea puniatur. Nec erit æqualis omnium pœna: sed sicut sunt pecca-

(d) Serm. de temp. 181.

(e) Psal. 10.

(f) Esai. ult.

(g) Prover. 19.

(b) Job. 10.

peccatorum differentiae, sic erunt & cruciatuum. Aliter cruciatur adulter, aliter fornicator, aliter homicida, aliter fur, aliter ebriosus, aliter mendax, aliter perjurus, aliter hæreticus, aliter apostata. Unus est gehennæ ignis, ait Gregorius, sed non uno modo cruciat peccatores. Uniuscujusque, quantum exigit culpa, tantum illic sentitur pœna. Ut ergo in summa dicamus, triplici pœna puniuntur damnati in inferno, etiam ante judicium extremum: prima dicitur pœna damni, quia privantur visione Dei beatifica. Secunda sensus, quia licet animæ illic sensus corporeos non habeant, sentiunt tamen ab igne impressionem qualitatis cujusdam afflictivæ secundum qualitatem peccati. Tertia dicitur vermis, quem remorsum conscientiae vocamus. Vexantur enim damnati assiduo illo tortore conscientiae, pœnitentes, sed frustra, quod ita se a Deo averterint in vita sua, & ad malum converterint, nec de peccato pœnitentiam, cum poterant, egerint. Post judicium autem universale, quando corpora receperint, multo majore cruciatu afficientur: quia in singulis sensibus corporeis patientur. Nec tamen deficient. Ignis enim inextinguibilis erit: quia non ipse extinguetur, nec eos, quos suscipiet, extinguet, aut perimet: talis a Deo creatus ab origine mundi, qui nec lignis alitur, nec flatu indiget, ut succendatur. Scriptum est enim: (i) Devorabit eum ignis, qui non succenditur. Ardebit autem, & non lucebit ultrix flamma illa vitiorum, inquit B. Gregorius: Concremationem habet, & lumen non habet. Hinc est enim, quod Veritas dicit: Discedite maledicti in ignem æternum. (k) Et: Ligat ejus manus, & projicite in tenebras exteriores. Quamquam, ut sentit Ilidorus, eatenus lucere poterit, ut ostendat impiis, unde doleant, non unde gaudeant.

Sed quæras adhuc, qui fieri potest, ut rem incorpoream ignis corporeus teneat? Respondet idem Gregorius: (l) Si viventis hominis teneretur in corpore incorporeus spiritus: cur non post mortem corporeo igne teneatur? Et si spiritus malus, qui incorporeus est, ab igne torquendus reservatur, cur non & anima?

De pœna autem dæmonum sic Theologi tradunt. Quod in supplicio semper sunt: nec si post judicium majori pœna essentiali punientur, accidentali tamen graviore non torquebuntur: eo quod omnes, qui modo sunt in aere caliginoso, & aliis locis, ubi hominum genus vexant, post judicium detruentur in tartarum in perpetuum, quod gravissimum erit eis, propterea quod non licebit eis nocere amplius hominibus. Hoc

enim, ut videtur ex cap. 8. Matth. maxime torquet eos. Clamabant enim: Fili David, quid tibi & nobis? Venisti ante tempus (scilicet judicii) torquere nos: cum aliud supplicium de illis non sumeret Dominus, quam quod impediabat energiam eorum. Erunt tamen executores judicii extremi, sicut interpretatur Hieronymus illud Matth. 13. Exibunt Angeli (hoc est, dæmones executores) & separabunt malos de medio justorum. Justum est enim, ut cum homines peccatores ipsi se dæmonibus subdiderint peccando, subjiciantur etiam eisdem in pœnis peccatorum.

Apud inferos ponitur limbus puerorum, qui sine Baptismate (ut diximus) decedunt. Sed pœna horum est tantum pœna damni; quod visione Dei beata privantur. Sensus nulla pœna torquentur: propterea quod actu propriæ voluntatis caruerunt. Fruentur quidem (ut quidam volunt) contemplatione rerum naturalium, sed procul a regno Dei, & hæreditate Christi.

Purgatorium quoque dicitur infernus, cum canit Ecclesia: Libera animas fidelium defunctorum a pœnis inferni, & de profundo lacu. Sicut etiam limbus Patrum, ad quem Christus descendit, dicitur infernus, vel inferi: ut articulo fidei confitemur descendisse eum ad inferos.

Probant autem Theologi purgatorium esse, primum universalis Ecclesiæ consensu, deinde hac ratione: Cum contingat aliquando existentem in gratia Dei, defungi vita, non soluta pœna temporali peccatis antea commissis debita: necesse est locum vel tempus restare, ut satisfaciatur, antequam ingrediatur civitatem sanctam Hierusalem: in qua nihil intrare potest coinquinatum. Alias enim injuria fieret Divinæ justitiæ: vel enim maneret peccatum impunitum, vel existens in gratia Dei sine novo peccato excluderetur a regno Dei. Hæc est Ecclesiæ Catholicæ doctrina multum pia & utilis populo Christiano: quam post alia Concilia, Oecumenicum Tridentinum confirmavit. Nam & Sacræ Literæ eam probant & Doctores Sancti. Malach. 3. Ecce venit, (in hora mortis scilicet) & quis stabit ad videndum eum? Ipse enim quasi ignis conflans, & quasi herba fulgonum: & sedebit conflans & mundans argentum, & purgabit filios Levi. 2. Maccab. 12. Sancta & salubris est, &c. Matth. 12. Verbum, quod quis dixerit contra Spiritum Sanctum, non remittitur nec in hoc sæculo, nec in alio. 1. Pet. 3. In quo iis, qui in carcere erant, Spiritu veniens prædicavit: qui increduli fuerant aliquando, quando expectabant Dei patientiam in diebus Noe. Non enim

(i) Job. 20.

(k) Matth. 25.

(l) Greg. lib. 4. dialo.

enim de damnatis hoc dicitur : ad eos enim non descendit Christus. Nec de sinu Abraham : quia non increduli fuerunt. Ergo de purgatorio. Apocal. 5. Joannes vidit subrus terram animas benedicentes Deum. Quod non potest de damnatis intelligi, quia superbia eorum ascendit semper : neque de Patriarchis, quia non erant amplius tunc sub terra : neque de pueris, quia non cognoscunt Christum. Ergo de iis, qui sunt in purgatorio. Paulus ad Corinth. Fundamentum aliud nemo potest ponere, quam quod positum est, quod est Christus Iesus, &c. Sequitur, Uniuscujusque opus quale sit ignis probabit, &c. Si cujus opus arserit, detrimentum patietur : ipse autem salvus erit, sic tamen quasi per ignem. Hæc verba Pauli licet principaliter de doctrina fidei intelligantur : Hieronymus tamen contra Jovinianum, (m) aurum & argentum & lapides pretiosos ad bona opera : lignum & stipulam ad mala refert. Et Theodoretus in eum locum inquit : Hunc ignem credimus esse purgatorium, in quo animæ tanquam aurum in conflatorio purgantur. August. in sermone de Sanctis loquens de peccatis venialibus : Quicquid de istis peccatis a nobis redemptionem non fuerit, illo igne purgandum est, de quo inquit Apostolus : Quia in igne purgabitur. Ambrosius in hunc locum : Ideo autem dixit, sic tamen quasi per ignem, ut salus hæc non sine pœna sit. Ostendit saluum quidem illum futurum, sed pœnas ignis passurum, ut per ignem purgatus fiat salvus : & non sicut perfidi æterno igne in perpetuum torqueantur. Locum Zachariæ, c. 9. Basilii de purgatorio interpretatur, ubi dicitur : Eduxisti eos de lacu, in quo non erat aqua. Nec prodest negantibus purgatorium, quod Apocal. 14. dicitur : Beatos esse, qui in Domino moriuntur, quod requiescant a laboribus : requiescent enim aliquando. Nec argumentum valet : Omnes nos manifestari oportet, &c. Ergo si liberarentur orationibus vivorum, locus esset merito. Nam August. eos meruisse ait, ut precibus vivorum juvarentur, quod intellige, quando a Sacerdotibus absolutionem petierunt : ut infertur ex Dionysio.

Falsum est, quod hæretici, ut suum errorem tueantur, ajunt, D. Augustinum dubitasse, an esset purgatorium : id nusquam inveniant, nisi in suis fortasse falsis indicibus. Nam Augustinus (n) passim docet in suis libris, rem serio tractans, aliam sententiam. Falsum quoque, quod ajunt, Græcos negare purgatorium. Non negant Græci purgato-

rium : sed per ignem fieri, & ignem esse, quo animæ in purgatorio affligantur : hoc contra Latinos negant aliqui ex eis, sicut elici potest ex actis Conc. Florentini. Et Ugo quidem de S. Victore nullum admittit locum determinatum esse purgationi animarum : sed esse probabilius, ait, ut in iis potissimum locis pœnas sustineant illæ animæ, in quibus culpam commiserunt : sicut multis id documentis probatum esse ait. Et Gregorius in 4. Dialogorum scribit de Paschasio Cardinali, quod in thermis pœnas purgatorii sustineret. Sed Ricardus de media Villa hanc difficultatem sic componit, quod de lege communi, animæ fidelium in gratia Dei defunctorum, pro peccatis venialibus, & etiam pro illis mortalibus, quorum sufficientem pœnitentiam non egerunt, in loco ad hoc deputato pœnas luunt : licet ex aliquibus causis specialibus, alii alibi purgentur, ut viventibus aliquid nuncient, vel ut suffragia pro se impetrent : & ut patiando, ubi peccaverunt, Dei justitiam sensibilibus manifestent. Vide Petrum de Palude, 4. d. 21. q. 1. & Bonaventuram 4. d. 20. ar. 1. q. 2.

Sed hæc forte, ut curiosa nimis sciri licet a Curato, non omnia expedit exponi populo. Illud curæ erit, quicquid ad ædificationem facit : quibus rationibus charitas augeatur erga fideles defunctos : quibus pœnarum, præmiorumque fides fiat simpliciter : quibus resurrectionis omnium spes confirmetur. Hæc sunt nostri muneris. Quæstiones autem nondum ab Ecclesia decisas, devita.

## DE INCOMPREHENSIBILI gloria beatitudinis æternæ.

PERfecta beatitudo [o] in eo sita est, ut post hoc exilium, in Dei gloriam translata & assumpta, Deum clare videamus, amemus, ac æterna fruitione possideamus. Etenim supra omnia Deus ipse essentiale præmium est : quod ubi nacti erimus ac possederimus, tunc omnia summo ac excellentissimo modo perfectæ & consummata erunt. Tunc Deum in perenni charitate cognoscemus, & intima cum delectatione amabimus, & sine ulla defatigatione laudes, gratiasque ei semper agemus. Singuli autem Sancti speciale suum habebunt præmium pro dignitate & sanctitate sua. Quilibet de aliorum beatitudine perinde, ut de propria, gaudebit ac gratulabitur. Erit autem in illa beata vita omnimoda

Q 3

lapi-

(m) Lib. 1. (n) Tom. 2. fol. 110. Tomo 4. de cura pro mor. c. 1. & q. 11. Ad dulci. Tom. 10. de verb. Apo. 34. Lib. 2. de Sacramentis. par. 15. c. 7. 4. Sent. d. 21. art. 1. q. 3. (o) Ex Joanne Rusbochio.



sapientia, omnimoda potestas: quandoquidem Reges erimus & filii Dei, & quicquid libuerit, faciemus. Erit omnigena opulentia, eaque longe ultra, quam capere possumus, abundabit. Ad hæc erit pulchritudo sempiterna & immarcescibilis: Itemque æterna & imperturbabilis pax. Denique erit ibidem omnium affluentia divitiarum, omnigenarum influxus deliciarum, omnis boni accessus, atque florida juvenus omnis expers mortalitatis. Nihil ibi erit, quod quemquam male habere, aut molestia afficere queat: abundabit autem, quicquid possit adterre lætitiæ. Atque istud gaudium, ista beatitudo, tam multiplex erit, ut nec enumerari, nec mensura comprehendere, nec cogitari, nec verbis exprimi, nec ulla demum ratione satis ostendi queat. Major est enim & cumulatio, quam vel spe, vel desiderio, vel cunctis simul viribus nostris capere queamus. Enimvero Deus ipse incomprehensibilis, & immensus nostrum vult esse præmium, nostrum gaudium. Contuebimur Divinæ sapientiæ speculum, in quo quicquid unquam factum est, quod nos exhilarare queat, relucebit. Contemplabimur corporalem, gloriosamque faciem ipsius Domini JESU, & ejus gratissimam vocem audiemus, unde cor, omnesque sensus nostri illius gloria complebuntur: atque ita præ gaudio & amore nos in eum, & ipse in nos colliquecet. Conspiciemus & beatissimam, dulcissimamque ejus Genitricem Virginem Mariam, unaque Spiritus Angelicos, & omnes Sanctos, qui nobiscum perenni Deum laude, atque amore prosequuntur. Præclarissimus Sancti Spiritus odor nos penetrabit, omni balsamo & quibuscunque aromatibus longe suavior: qui etiam nos extra nosipsum in æternam Dei trahet & rapiet charitatem. Gustabimus sempiternam bonitatem Dei omni melle dulciorem, eaque pascemur ac cibabimur, & ejus perpetua fame ac siti tenebimur: sicque fiet, ut perennem esuriem etiam perpetua cibatio comiteretur, semperque renoveretur; quæ est vita æterna. Amore comprehendemus, & ab amore comprehendemur, denique possidebimus, & vicissim a Deo possidebimur in unitate, Deoque perfruemur: & illi uniti in beatitudine quiescemus. Quæ quidem fructio & quies in superessentiali Divinitatis substantia, altissimum beatitudinis fundum est: siquidem hic supra famem in satietatem absorbebimur.

Atque hæc quidem hætenus ex pio quodam viro.

Supereft, ut pauca solita methodo tradamus: præterea, quæ supra de octo beatitudinibus, quibus loca Scripturæ Sanctæ de

hac re interpretando, populum possint in sana Ecclesiæ doctrina Pastores instituere. Beatitudo sumitur aliquando pro via & dispositione ad beatitudinem, ut: Beati pauperes spiritu, &c. Beatus vir, qui non abiit in concilio impiorum. Et fides hoc modo dicitur aliquando vita æterna. Joan. 3. Qui credit in Filium, habet vitam æternam, & (juxta interpretationem Cyrilli & Hilarii) Hæc est vita æterna, ut cognoscant te solum Deum verum, & quem misisti JESUM Christum. Alio modo proprie, ut: Beati, qui habitant in domo tua, Domine, in sæcula sæculorum laudabunt te. Beatitudinem definit Boetius, statum omnium bonorum aggregatione perfectum. Ambrosius, Claram notitiam cum laude. Augustinus lib. 1. de Trinitate dicit, contemplationem præmitti, quæ actionum omnium finis est, atque æterna perfectio gaudiorum.

Ex his dicimus, Sanctorum felicitatem claram Dei visionem esse cum laude. Unde duplex gloria infertur essentialis & accidentalis. Essentialis est visio Divinæ essentialis, qui & denarius diurnus [o] appellatur. Accidentaliter in multis aliis bonis consistit pro meritum cujusque ratione. Sic essentialis appellatur aurea corona. Accidentaliter aureola, & dores tam animæ, quam corporis, quæ ab essentiali illa efflorescunt.

Duabus autem de causis dicitur corona. Prima est dignitatis Regiæ, qua beati donantur. Et hæc est aurea. Altera victoriæ, qua nemo coronabitur, nisi qui legitime certaverit. Et laurea dici potest: quali victores in triumpho coronari incedunt. Fecerunt victores quoque in manibus suis palmas, induti veste candida. Ideo dicitur Apoc. 7. Posthæc vidi turbam magnam, &c. amicti stolis albis: & palmarum in manibus eorum. Nec solum victoriæ signum est vestis alba, sed etiam innocentia, quam in Baptismo mundati ab omni peccato accepimus. Virginum corona (aureola appellata) gloria est de incorruptione corporis, attestante mentis integritatem. Martyrum, de victoria tormentorum pro Christi nomine. Prædicatorum vero, de victoria doctrinæ Catholicæ. Sic propter tres potentias animæ [concupiscibilem scilicet, & irascibilem, & rationalem] heroice, fortiterque domitas, atque exercitas, tres coronæ propositæ sunt piis hominibus. Quod si pro meritis dari coronas putamus, non ita senties, ut meritum respondeat generi operis, sed radici charitatis: quoniam non sunt condignæ passionibus hujus mundi ad futuram gloriam, quæ revelabitur in nobis. Ideo Christus ad opera charitatis spectans, dicit: Venite benedicti Patris mei, possi-

(o) Matth. 20.

possidete regnum. Esurivi enim, & dedistis mihi manducare, &c.

Dotes ergo gloriæ aliæ erunt corporis, aliæ animæ. Et corporis quidem sunt quatuor: claritas, agilitas, subtilitas, & impassibilitas. De quibus loquitur Apostolus 1. Corinth. 15. Seminatur corpus in corruptione, surget in incorruptione: seminatur in ignobilitate, surget in gloria. Vide reliqua in illo cap. Et Sap. 3. Fulgebunt iusti, & tanquam scintillæ in arundinetis discurrent. Si quæris, cur vocentur hæc dona gloriæ, dotes; duæ causæ sunt, una, quod bona post resurrectionem ornabunt nos, sicut ornari dicimur in hac vita bonis naturæ, ut forma, viribus iudicii, ac memoriæ felicitate. Altera, quod sicut mulier nuptui data, quo maiorem affert dotem marito, eo honoratior est: ita erit fidelis anima in regno cælorum. De claritate corporum gloriosorum, præter alia loca, habes Matth. 13. Fulgebunt iusti, sicut Sol. Esa. 30. & 1. Cor. 15. Stella differt a stella in claritate: sic & resurrectio mortuorum. Hanc declaravit Dominus noster Matth. 17. in Transfiguratione. De agilitate autem exemplum dedit ambulando super mare, Marc. 6. De subtilitate, quando clauso sepulchro resurrexit, & integra virginitate matris natus est, Luc. 2. Impassibilem quoque se docuit, quando se manducandum tradidit discipulis, Matth. 26. &c.

Dotes animæ sunt tres, in quibus vera sita est beatitudo: Cognitio Dei, dilectio, & fruitio. De cognitione dicitur 2. Cor. 13. Tunc cognoscam, sicut cognitus sum. Cognoscemus enim clare Dei naturam, sapientiam, potentiam, bonitatem: & in eo omnia alia. Hæc Dei cognitio nos mirum in modum trahet in ejus amorem. Quare Joan. 17. dicebat Christus, Hæc est vita æterna, ut cognoscant te solum Deum verum. Psal. 16. Satiabor, cum apparuerit gloria tua. Videbimus autem clare & evidenter, quæ nunc in hac vita tantum credimus, & in ænigmatibus cognoscimus: veluti quomodo æternus est, unus in substantia, trinus in personis: quomodo Filius a Patre nascitur, & Spiritus Sanctus ab utroque procedit: quomodo Divinitas immensa cum humanitate Christi unita fuit. Cognoscemus omnia, quæ lumine supernaturali revelabuntur nobis opera Dei, & iudicia, & rerum naturalium causas atque effectus; de quibus anxie se torquent Philosophi in hac vita. Omnia denique, quæ nunc latent, in gloria patebunt nobis: idque cum voluptate, & lætitia inenarrabili. Et cognoscemus quidem omnia hæc in Deo, per Deum ipsum, qui lumen intellectus no-

stri erit. Psal. 35. In lumine tuo videbimus lumen, id est (ut interpretantur aliqui) Deum Patrem in Deo Filio, & Filium in Patre Deo, & Spiritum Sanctum in utroque. Dicit enim Apostolus: Tunc cognoscam, sicut cognitus sum. (p) Deus autem cognoscit nos per se: Sic ergo Deum cognoscemus per Deum ipsum. Hæc est gloria & felicitas summa. Jere. 9. Qui gloriatur, in hoc gloriatur, se scire & nosse me. Joan. 17. Hæc est vita æterna, ut cognoscam te solum Deum, id est, videam, ut communiter accipitur.

Beati ergo diligunt Deum perfectâ charitate, non qua nunc diligimus imperfecte. Quem cum habeant, eo fruuntur. Nam frui, aliud non est, quam rem amatam possidere, & in ipsa quiescere. Propterea Christus, cum de dilectione verba fecisset Joan. 15. subdit: Hæc loquutus sum vobis, ut gaudium meum in vobis sit, & gaudium vestrum impleatur. Gaudium namque filii Dei est, Patrem suum amare, & ab eo mutuo amari, in quibus & amans, & amatus, & amor ipse idem sunt, una essentia, una natura, una voluntas. Sic Deum amando anima beata ad Deum trahitur, & Deum ad se trahit. Quia qui manet in charitate, in Deo manet, & Deus in eo: (q) quoniam Deus charitas est. Ergo ex dilectione hac fit beata fruitio: id est, delectatio & voluptas suavissima ex conjunctione intellectus nostri & affectus omnis cum Deo. Complacebit sibi tenerrime anima beata contemplando charissimi sui Dei immensam gloriam, admirabilem pulchritudinem, summam bonitatem, inexhaustam sapientiam, ac denique præcipuam erga se charitatem atque amorem. Laudabit Deum, gratias agendo, cum se viderit in cœtu, atque concilio Sanctorum, liberam ab eorum, qui in inferno sunt, damnatione. Gaudebit de gloria & felicitate non solum sua, sed etiam aliorum omnium Beatorum. Ad quam nos perducere dignetur Dominus noster Iesus Christus, cum Patre & Spiritu Sancto regnans in sæcula sæculorum, Amen.

### DE OFFICIIS MORIENTI- bus necessariis.

Morti proximis omni ope subveniri decet. Tunc enim consilio, si unquam, indigent quam maxime. Hinc enim morbi doloribus, illinc solitudine eorum, quæ relinquunt in mundo, vexati, vix quæ agenda sunt, vel pro salute animæ, vel pro suis, advertunt. Ideo dum sensibus sunt integris  
ad

(p) 2. Cor. 13.

(q) 1. Joan. 4.

ad disponendum de bonis suis, inducendi sunt ad testamenti confectionem : aut certe si alieno ære onusti sint, cedant bonis, ne excommunicari decedant ex hoc mundo. Hoc enim miseris remedium unum restat, ne contumaces erga Ecclesiam habeantur & iniqui. Post hæc, sepositis curis omnibus sæculi, ad meditandum deducantur de salute animæ, & ad suscipienda Sacramenta Pœnitentiæ, Eucharistiæ, atque Unctionis extremæ. Sed primum de Testamento agamus. Et ut idiotæ etiam rem intelligant, lingua omnia trademus vernacula.

## DU TESTAMENT.

**P**our la validité d'un Testament nuncupatif, est requis le nombre de sept tesmoins masles & majeurs de quatorze ans, avec le Notaire, lesquels (Notaire & tesmoins) convient estre priez & requis par le Testateur. & le doit dire le Notaire en la fin de son instrument dudit testament, ainsi : Tesmoins à ce priez & requis.

Et si c'estoit en temps de peste, le Curé ou Vicaire du lieu (à faute de Notaire) pourroit recevoir ledit testament, y appellant trois tesmoins, si plus il n'en peut avoir : car en ce cas vaudroit le testament.

Aussi est il requis que le Testateur face institution d'heritiers : & qu'il nomme de sa bouche son heritier, ou ses heritiers.

Item que s'il y a enfans, un ou plusieurs, que à un chacun d'iceux soit donné & legué quelque chose à titre d'institution, au cas que le testateur ne les feroit (ou aucun d'eux) heritiers universel ou universels. De mesme en fera, s'il y a posthum, ou posthumes : car il en faut user comme des defia nez, pour la validité dudit testament.

### Du Testament nuncupatif peut estre la forme suivante.

**A**U nom de la Sainte & Indivisee Trinité du Pere, du Fils, & du Saint Esprit, Amen. Je N. de N. laboureur (ou marchand, ou de mestier, qu'il est) considerant que par tribut de nature, convient à un chacun mourir & rendre l'esprit à son souverain Createur, pendant que de sa grace je suis sain, de sens, & de pensee, combien que je sois constitué en griesue maladie du corps, desirant non deceder de ce monde en l'autre, sans avoir testé & disposé des biens, qu'il a pleu à mon

souverain Createur & Redempteur me presler : Je fais mon testament & ordonnance de derriere volonté, comme s'ensuit. Premièrement je rends & recommande mon ame à mon souverain Createur & Redempteur des maintenant, & quant elle sortira de mon corps, à ce que par le merite de la Sainte Passion de Jhesus Christ, & par l'intercession de la benoïste & glorieuse Vierge Marie & de tous les Saints & Sainctes de Paradis, il luy plaise la recevoir en son Royaume de Paradis. Item j'eslis la sepulture de mon corps en l'Eglise, ou cimetiere dudit N. au lieu & place où sont inbumez mes Predecesseurs. Item je donne & legue à N. Hic ponuntur legata, quæ testator fieri jubet, sive pia, sive alia : & post ipsa legata dicetur : Et au demeurant de tous & singuliers mes biens, desquels je n'ay testé ou disposé, testeray ou disposeray cy apres, je fais, nomme de ma propre bouche & institue mon heritier universel (s'il n'y a qu'un heritier) ou mes heritiers universels, chacun par egale part, & portion (s'il y en a deux ou plusieurs) moyennant qu'ils seront tenus appaiser & payer mes debts, & accomplir tout ce mien testament, duquel je nomme Executeur N. Et veux que mondict present testament s'il ne vaut par forme de & comme testament nuncupatif, vaille comme codicille, ou autrement par les meilleurs voyes, droit, forme, & maniere qu'il peut & doit mieux valoir : remettant sur ce toute rigueur du droit civil, & implorant la benignité du droit Canon. Ce fut fait & passé audict lieu de N. en la maison de moy testateur, en la chambre regardant sur N. par devant discrete personne N. Notaire de la Court dudit Seigneur Official de Besançon, & en presence de N. N. N. N. N. N. tesmoins à ce specialement priez & requis : le ... Jour du mois de N. l'an, &c.

## STATUTUM I.

**Q**Uoniam Episcopi executores sunt omnium piarum voluntatum, ideo ne pia decedentium legata per hæredum iniquitatem maneat inutilia : cum quis facto testamento obierit, Curati moneant hæredes de publicatione testamenti. Quod si neglexerint, referent Procuratori nostro, vel Decano rurali.

De



**DE CESSIONE BONORUM,**  
*aut cautione, quæ fit ab infirmis in articulo mortis.*

**STATUTUM I.**

**C**Urati, si quos habeant Parochianos infirmos excommunicatos, qui in infirmitate volunt confiteri & absolvi, mediante cessione bonorum suorum ad opus creditorum suorum, aut interveniente cautione idonea: ministrentur eis Sacramenta Pœnitentiæ, Eucharistiæ, & extremæ Unctionis.

**II.**

Infirmus igitur, qui est excommunicationis sententia innodatus a Canone, sive a jure, si petat humiliter & devote absolutionem, debet absolvi sub hac forma, ac præcepto, quod si Dominus dederit ei vitam, statim, & quam cito potuerit, post recuperatam sanitatem, ibit ad illum, a quo erat absolvendus, suscepturus mandatum ejus super illis, pro quibus erat excommunicatus. Quod si non fecerit, statim relabetur in pristinam sententiam.

**III.**

Infirmus excommunicatus a JUDGE, sive ab homine, pro delicto seu debito, si petat humiliter & devote absolutionem a prædicta sententia, debet absolvi: ita tamen, quod primo det pignora, vel cautionem idoneam, videlicet responsalem sufficientem vel juratorem, quod parebit mandatis Ecclesiæ & satisfaciet creditoribus, seu his, ad quorum instantiam excommunicatus erat.

**IV.**

Si pignora dederit infirmus, illa recipiat Sacerdos Parochialis ad manus suas, & fideliter describat, ut de eis rationem reddere possit tempore debito ad opus illorum, quorum intererit: & illum absolvat: injungendo ei (ut supra dictum est) quod si supervixerit, satisfaciet Ecclesiæ & suis creditoribus. Alioquin eo ipso, postquam evaserit mortis periculum pro illa vice, (licet

*Tomus VIII. Concilior. German.*

infirmus longius duraverit) in pristinam sententiam relapsus sit: & pro tali relapso habeatur & teneatur.

**V.**

Si infirmus cautionem (id est, responsalem) pro debito dare voluerit, Sacerdos non recipiat, nisi talis responsalis idoneus sit, & potens pro satisfaciendo: quia alias facile esset illudere creditoribus.

**VI.**

Is, qui cautionem, seu responsalem se constituerit pro debitore infirmo excommunicato, moneatur sub excommunicationis pœna, ut infra quindecim dies post decessum infirmi (si ex illa infirmitate moriatur) satisfaciat creditoribus, qui illum tenebant excommunicatum. Quod si non fecerit, elapsis dictis quindecim diebus, talis responsalis denunciatur excommunicatus pro debito dicti infirmi, ad instantiam dictorum creditorum.

**VII.**

Sive cautionem præstiterit infirmus, sive cessionem bonorum fecerit, repræsentetur illa in scriptis in forma debita per Sacerdotem Parochialem, qui illam receperit, infra quadraginta dies a die obitus dicti infirmi excommunicati, Officiali Curie nostræ Bisuntinensis, sub pœna arbitraria, si negligens fuerit.

**VIII.**

Si infirmus, post cautionem, vel cessionem præstitam in forma prædicta, humiliter & animo contrito petierit Sacram Eucharistiam sibi dari: illam recipere poterit.

**IX.**

Si vero infirmus usum loquendi perdiderit, ita ut cautionem, seu cessionem prædictam præstare non possit, tamen signa contritionis ostendit, elevando manus junctas ad cœlum, percutiendo pectus, & alia hujusmodi signa contritionis faciendo, absolvi debet a prædicta sententia excommunicationis, & Eucharistia Sacra sibi dari, atque etiam sepultura: sed hæc, dummodo parentes, liberi, aut amici ejus, ad

**R**

quos

quos bona ejus venire debent, dent pignora, fidejussores, aut idoneos responsales de satisfaciendo illis, ad quorum instantiam dictus infirmus excommunicatus erat, si pro tunc decellerit ab humanis.

## X.

Si autem dictus infirmus nihil intelligat, sed amiserit usum rationis: veruntamen si constet Sacerdoti, quod in eo signa contritionis & pœnitentiæ præcellerint, debet absolvi & communicari: recepta prius cautione per pignora, vel fidejussores, aut responsales idoneos de satisfaciendo, ut in proximo præcedenti articulo dictum est.

## XI.

Statuta Prædecessorum nostrorum Archi-Episcoporum Bisunt. contra sustinentes sententiam excommunicationis per annum & ultra, confirmando, & quatenus opus est, innovando, prohibemus districte sub gravi pœna arbitraria eleemosynæ nostræ applicanda, ne excommunicati, qui per annum continuum & ultra sententiam excommunicationis sustinuerint, si decedant, sepeliantur in Ecclesiis, aut Cœmeteriis: licet in infirmitate cessionem bonorum suorum fecerint, aut cautionem dederint, ut supra: nisi prius absolutionem meruerint, de consensu creditorum suorum, & de nostra, aut Vicarii nostro Generalis licentia speciali processerint. Ut per hoc magis timeatur Ecclesiastica censura, & creditoribus satisfiat de debito, & ipsi excommunicati in vita procurent absolvi: ne post eorum obitum creditores affici videantur injuria. Nec literæ aliæ de non obstante sufficient, quæ aliquando obtineri solent subreptitiæ: sed fiant sub sigillo Cameræ nostræ, in cera rubra.

## DOCTRINA MORIENDI IN DOMINO.

**M**agni meriti opus est, infirmos visitare: majus opus adhuc, eis opem ferre. Quod si ad vitam æternam consilio tuo perducas, quid esse potest Deo gratius? nam Dei charitas in tali opere regnat præcipua. Igitur extremum hoc officii doceamus. Jo-

annes Gerson quatuor doctrinæ moriendi capita dedit: quæ quia magnæ energiæ videntur, summatim nos Gallice reponemus. Ea sunt exhortationes, interrogationes, orationes, & observationes: quas prudens Pastor, & alius quivis consolator, habita ratione personæ & temporis, contrahet, vel dilatabit pro suo judicio. Habebit autem cautionem hanc semper, ut a caducis rebus & temporalibus laborantem avertat, & ad Deum, atque ad cœlestis patriæ desiderium convertat: ut desideret, quantum obtineri possit, Deo ac Domino suo dulcissimo gratias agere, eundemque perpetuo in cælis laudare, & perfecte amare.

### Exhortations ou mourant.

**C**onfidere, mon bon ami, la condition de nostre pauvre vie, comme tous sommes en la main de Dieu.

Quant il luy plait, il nous appelle, & quant il luy plait nous laisse, &c. Encor nous fait il plus grande grace, quand il nous oste de ce monde, auquel n'a autre chose que douleurs, soucis & larmes.

Tenez pour certain, que ne sommes, que pelerins en ce monde, & n'avons que nostre passade, pour y faire ce que Dieu nous commande, & quelque œuvre digne de louange envers Dieu, &c.

Rendez graces à Dieu, qui vous donne congnoissance de luy, & ne vous a laissé surprendre de la mort, devant que, &c.

Souvenez vous, que vous avez commis beaucoup de pechez: De quoy vous repentez, pour avoir offensé Dieu, vostre doux & gracieux Pere, &c.

Priez Dieu, qu'il prenne en remission de vos pechez ceste maladie, qui vous tient en si grande peine, à celle fin que ne soyez damné en enfer. Car tous les maux & douleurs de ce monde ne sont à comparer, &c. Et si vous les prenez en patience pour l'amour de luy, croyez qu'il vous pardonnera. Autrement si vous vous despitez, il y a danger que vous ne le fâchiez &c.

C'est maintenant l'heure, qu'il vous faut penser au salut de vostre ame, &c. Car vous n'estes certain d'avoir le loisir d'y penser apres ce peu de temps, que Dieu vous donne de bon sens, &c.

Laissez à part tous autres pensemens & tous autres soucis &c. car il vous faut à ceste heure laisser toutes choses, &c.

Re.

*Recommandez vous à Dieu, & recommandez luy tous vos affaires: car il est bon & sage pour vous y satisfaire, &c.*

*Ne voulez vous prier les assistans icy qu'ils prient Dieu pour vous?*

*Or mettons nous tretsous à genoux, & prions Dieu, &c.*

### *Interrogations au mourant.*

*V*oulez vous vivre & mourir en la confession de la foy Catholique? Ne demandez vous pas pardon à Dieu de vos pechez, &c.

*N'avez vous pas propos de changer vostre vie, si Dieu vous laisse? &c. Et ne priez Dieu qu'il vous maintienne par sa grace en tel propos & bonne volonté? &c.*

*Avez vous encores quelque remords de conscience pour quelque peché, que n'avez confessé? &c.*

*Voudriez vous bien vous souvenir de tout pour le confesser? &c.*

*Ne voulez vous rendre & restituer tout ce, que pouvez avoir de l'autrui? Et si ne pouvez, il faut ceder. Voulez vous faire cession? &c. Mais il faut crier mercy à Dieu & aux hommes, auxquels avez porté interest.*

*Ne pardonnez vous de bon cuer à tous, &c. & ce pour Dieu?*

*Ne demandez vous pardon à tous, &c.*

### *Observationes in moriente.*

**S**i infirmus nondum recepit Sacramentum Eucharistiæ: vide, an velit recipere.

Si non responderit sufficienter interrogationibus factis: instabimus admonendo.

Si sit excommunicatus, submittat se ordinationi Ecclesiæ, & absolvatur juxta Statuta.

Si non instet hora mortis, legantur coram eo historiæ piæ, vel orationes, quibus antea delectari solebat, vel interpretationes Præceptorum Dei: ut meditetur in eis, vel si quid oblitus sit, ut confiteatur factus memor.

Consulemus tandem, ut meditetur de gloria Dei & Sanctæ Trinitatis, & Angelorum, & Sanctorum, qui sunt in cælo: meditetur de vita & morte Christi cum delectatione.

Præsentetur imago Crucifixi.

Removeantur amici carnales.

Nec fiat mentio absentium amicorum, vel inimicorum.

*Tomus VIII. Concilior. German.*

*Non detur spes nimia vitæ, aut convalescentiæ.*

*Nec permittatur cum Diabolo disputare confidens in Christi passione & misericordia, quæ major est, quam sint iniquitates omnes.*

### *Orationes morientis.*

**M**on Dieu tout puissant, tout misericordieux, ayez pitié de moy.

*Pere celeste, je vous crie misericorde.*

*In manus tuas commendo spiritum meum.*

*Mon doux JEsus aïdés moy.*

*Sauveur du monde, Fils de Dieu, mon Redempteur, par le merite de vostre benoïste Passion recevez moy au nombre de vos esleuz.*

*O mon Seigneur & mon frere, je me donne à vous, ne me refusez point: je recours à vous, ne me rejetez point.*

*Donnez moy vostre paradis, vous n'en serez plus pauvre, ny vostre royaume plus estroict, ny vos amis moins honorez.*

*Roy des Roys, je vous demande paradis, non pas par mes merites, mais par le merite de vostre Passion. Vous avés racheté ce pauvre & miserable serf de péché, & esclave de malheur.*

*Vous m'avez acquis par vostre pretieux sang le Royaume: baillés le moy donc, & bien tost. In manus tuas, Domine, commendo spiritum meum.*

*O Saint Esprit, fontaine de grace Divine, vray consolateur, aïdés moy. C'est l'heure maintenant, que j'ay grand besoin de vostre grace. Secourés moy, que le malin Esprit ne me surmonte. Sanctifiés moy. Allumés mes entrailles du feu de vostre amour. Donnés moy ferme foy, & esperance avec charité parfaite.*

*Ne permettes point, que je sois puni & tourmenté, selon mes demerites: car je serois damné eternellement sans le grand abisme de vostre misericorde.*

*In manus tuas, Domine, commendo spiritum meum.*

### *Ad Mariam Virginem, & Sanctos.*

**O** Royne glorieuse, je vous salve.  
*Je vous recommande mes prieres.*

R 2

Soys



*Soyés mon Advocaté vers vostre benoist Fils  
JEsus.*

*O Anges de Dieu, Esprits bien heureux, assi-  
stés moy.*

*Defendés moy de Satban & de ses embuscées.*

*O mon bon Ange, ne m'abandonnés point.  
Et pardonnés moy, si je n'ay suivi vos bons  
admonnestemens.*

*O Saint N. mon bon Patron & Advocat, je  
vous ay souvent invoqué en ma vie, c'est  
l'heure maintenant plus que jamais, que je  
vous prie.*

Deus in adjutorium meum inten-  
de: Domine ad adjuvandum me festi-  
na. Gloria Patri, & Filio, & Spiritui  
Sancto, sicut erat in principio, &  
nunc, & semper, & in sæcula sæculo-  
rum, Amen.

## DE SEPULTURA ET EXE- quii Defunctorum. (r)

SANCTE ac religiose sepeliendi mortuos ri-  
tus solennis tam in novo, quam in ve-  
teri Testamento commendatur. Saram uxorem suam magnifico condidit sepulchro  
Abraham Genes. 23. Et de sepultura Abra-  
hæ scribitur Genes. 25. De Jacob Genes. 49.  
De Moyse Deuteron. 34. De sepultura Sau-  
lis laudat David viros Jabes 2. Reg. 2. Laudat  
Tobiam Angelus de sepultura, quam ille  
impendebat defunctis, Tob. 12. In novo  
Testamento exponitur ab Evangelistis (s)  
diligenter officium hoc Christo Domino ex-  
hibitum a Nicodemo & Josepho ab Arima-  
thia, qui corpus illius in sindone munda, &  
centum libris aromatum, in sepulchro novo  
de petra exciso sepelierunt. Et Magdale-  
nam laudat Christus Matth. 26. Quod un-  
guentum pretiosum illud servasset ad sepe-  
liendum se. Beatus Dionysius, c. ult. Eccle-  
siasticæ Hierarchiæ recitat ritum & cæremoni-  
as, quas servabant Apostoli sepeliendo  
suos. Historiæ denique Sanctorum Marty-  
rum curam hanc sepeliendorum mortuorum  
aperte docent. Quare & nos pietatis offi-  
cium hoc commendamus. Ait enim Augu-  
stinus (t): Solennitatem sepulturæ observa-  
tam fuisse propter vivos & mortuos. Prop-  
ter vivos quidem quadruplici ratione. Pri-  
ma est naturalis horror: quando ex aspectu  
corporum hominum tabescentium oculi of-  
fenduntur, & fœtore inficiuntur sani. Se-

cunda ratio est Fidei professio nostræ, qui  
resurrectionem speramus. Nam sicut, qui  
locum aliquem, aut rem, se recuperaturum  
aliquando sperat, is diligenter eam notat &  
curat: sic Sancti Patres fidem atque spem re-  
surrectionis quam habebant, hoc officio  
ostendebant, curantes diligenter & cum ho-  
nore fidelium suorum sepulturam. Unde  
idem Augustinus 1. de Civit. docet, Jacob &  
Joseph, aliosque Patres veteris Testamenti  
voluisse in terra promissionis sepeliri, ubi  
credebant Christum nasciturum, cujus & re-  
surrectio esset causa resurrectionis nostræ.  
Tertia ratio est, ut honore justo afficiamus  
instrumenta misericordiæ. Nam corpore  
Sanctorum templa fuerunt & vasa Spiritus  
Sancti. Quarta est utilitas viventium: quan-  
do occasio datur multis accedendi ad monu-  
mentum, ubi conditionis humanæ admone-  
mur, ex memoria defuncti. Alloquitur  
enim quodam modo viatorem sepultus, cum  
Ecclesiastico: (u) Mihi heri, & tibi hodie.  
Præter hæc etiam sepultura inter alia opera  
misericordiæ merito recensetur, quod in ea  
preces & suffragia sunt pro defuncto, &  
elemosynæ dantur pauperibus. Unde Da-  
mascenus in Sermone de Innocentibus verba  
Athanasii referens, ait: Licet in arca, qui in  
pietate consummatus est, positus fuerit, ne  
renuas oleum & ceras, Deum in sepulchro  
invocantes: accepta enim sunt ista Deo, &  
multam ab eo recipientia retributionem. Et  
Augustinus (x) docet, quod quodam vitæ  
genere acquiritur, dum in hoc corpore vi-  
vimus, ut aliquid juvent ista nos defunctos,  
secundum ea, quæ per corpus gessimus in  
vita.

Sed quærat aliquis, quomodo liberari  
possint animæ defunctorum a pœnis purga-  
torii? Responder Card., eas liberari duobus  
modis, vel per satisfactionem propriam (ad-  
impleta scilicet pœna pro peccatis, a iustitia  
Dei imposita) vel per suffragia vivorum.  
Sed hæc quidem quatuor modis, ut docet B.  
Gregorius in 4. Dialogorum, Oblationibus  
Sacerdotum, precibus Sanctorum, eleemo-  
synis amicorum, & jejuniis cognatorum.  
Idem tamen Cardinalis quatuor hæc ad duo  
reducit, scilicet, ad modum meriti, & ad  
modum suffragii: quæ nimirum inter se  
multum differunt. Nam meritum innititur  
iustitiæ, suffragium vero liberalitati. Per  
modum ergo meriti suffragia vivorum pro-  
sunt animabus defunctorum vel ad expiatio-  
nem pœnæ, vel ad augmentum gloriæ, seu  
præmii. Juxta illud, (y) Particeps ego sum  
omnium timentium te. Nam & Sancti gau-  
dent

(r) Ex Card. Aræ cœli de Pœnitentia.

(t) Lib. de cura pro mor. ag.

(y) Psal. 118.

(s) Matt. 27. Marc. 15. Luc. 23. Joan. 19.

(u) Eccli. 38.

(x) Eod. de cura. pro mor.

dent ob salutem nostram, Luc. 15. Ad expiationem ergo pœnæ defuncti profunt pia opera viventium facta in Dei gratia, quando qui ea faciunt, ad remedium defuncti applicari intendunt, & ita pro defuncto illa faciunt. Sic enim opera vivorum fiunt propria defunctorum, pro quibus fiunt. Hujus argumenti fundamentum sumitur ex 1. Corint. 12. ubi Paulus Ecclesiam dicit esse unum corpus in Christo. Nam sicut in corpore sunt multa membra, quorum alterum alteri suffragatur, & operam suam præstat: sic fideles omnes per gratiam & charitatem Christo conjuncti, & ab eo tanquam capite, vitam spiritualem accipientes, aliis fidelibus, eidem capiti Christo unitis, mutuam operam præstant, & suffragantur. Animæ autem in purgatorio positæ, nequaquam separatae sunt a capite Ecclesiæ, nec a corpore. Permanent enim in fide, spe, & charitate Christi, ferentes patienter pro suis delictis Divinam justitiam: quæ certe non est rigorosior, quam humana esse solet. Si ergo inter homines captus aliquis pro debito est, alius pro eo potest satisfacere: quidni igitur existens in gratia obtineat amico suo, sicut & sibi obtineret, veniam? Nec refert, viventes sint, aut mortui illi, quibus applicantur: dummodo juncti sint in charitate, quæ nunquam excidit. Nec suffragia modo facta ab iis, qui sunt in gratia, profunt defunctis, sed etiam Ecclesiæ suffragia, quæ fieri solita sunt ab iis, qui sunt in gratia, facta per Sacerdotes & Ministros in peccato mortali existentes, quæ non ut peccatores exequuntur, sed tanquam Ecclesiæ Ministri, cujus personam gerunt, veluti celebrando Missam, vel Vigiliis decantando, & exequias persolvendo: ille enim facere intelligitur, in cujus nomine faciunt, ut ait Dionysius in lib. Eccles. Hierar. Peccatum enim servi non impedit meritum Domini, cujus nomine & jussu eleemosynam ille facit. Arque hætenus quidem tractavit Cardinalis suffragii meritum. Sed per modum suffragii suffragia prodesse, & vivis & defunctis tradit: quando orationes Sanctorum, qui sunt in Patria cœlesti, atque etiam vivorum, applicantur defunctis, vel etiam vivis: atque indulgentiæ. Sed de Indulgentiis infra agemus.

Superest, ut reliqua Ecclesiæ præcepta de Sepulturis exequamur. Primum, quod quilibet, tam masculus, quam scæmina, ætatis sufficientis, non professus religionem, habens usum liberi arbitrii, potest sibi eligere sepulturam: etiam uxor sine consensu viri, & filius, vel filia sine consensu parentum. Servis autem & filiis impuberibus & uxori, Domini & parentes & maritus eligunt, etiam si post annos pubertatis morian-

tur, non electa sepultura. Electio autem sepulturæ non potest fieri extra Cæmeterium, vel Ecclesiam. Probatio quoque electionis fieri potest per testes, & per signa. Nam si Pater filio elegerit, & ipse nulla facta electione moriatur, censetur eandem sibi elegisse. [2]

Secundum est, quod si quis testamento elegit sepulturam, & ratione ejus aliquid legaverit Ecclesiæ, in qua sepeliri decreverat, veluti ornamenta, aut alia ad exequiarum cultum pertinentia, ut oblationes, & similia; si postea muret sepulturam non mutato testamento, censetur mutasse etiam legatum illud.

Tertium, quod non debet vendi, vel aliquid exigi pro ea, nec pro actu, seu officio Clericorum; propter suspicionem Simoniacæ: gratis tamen oblata recipi possunt. Licet locus sepulchri, sicut & calix consecratus materialiter vendi possunt: nihil tamen pro benedictione, aut consecratione recipere fas est. Abraham enim emit agrum speluncæ duplicis in possessionem sepulchri, Gen. 23.

Quartum est, quod jus sepulturæ competit Ecclesiis Parochialibus, licet ex privilegio concedatur domibus Mendicantium. Clem. Dudum, de Sepulturis.

Quintum, quod hæretici, & infideles, & filii Christianorum non baptizati, sepeliri non debent in loco sacro: nec mortui in torneamentis, aut desperati, vel raptores. Suspensi vero, aut aliter supplicio extremo affecti, qui non mortui fuerint impoenitentes, de licentia Judicis possunt. Leprosi Christiani de consuetudine sepeliuntur in cæmeterio separato, benedicto tamen. Excommunicati, donec obtinuerint absolutionem, in terra prophana sepeliuntur: post adeptam vero absolutionem, si videretur Prælato, transferri possunt in locum benedictum.

## STATUTUM I.

**S**I quis intestatus decesserit, vel non electa sepultura: apud Ecclesiam suam Parochialem, in qua vivens recepit Ecclesiastica Sacramenta, sepeliatur.

## II.

Defunctus, qui elegit sepeliri apud aliam Ecclesiam, quam apud Ecclesiam suam Parochialem: repræsentetur in Ecclesia Parochiali, in cujus Parochiatus defunctus est, & in qua Sacramenta Ecclesiastica suscepit, ut in ea ultimum vale faciat,

R 3

(2) C. Licet. de Sepul. in 6. C. Nullus. & c. Non æstimemus 13. q. 2.

faciat, antequam deferatur in Ecclesi-  
am, in qua elegit sepeliri : quæcunque  
fuerit illa Ecclesia, in qua elegit sepultu-  
ram, sive sit sæcularis, vel regularis  
cujuscunque ordinis, sive mendicanti-  
um, sive non mendicantium. Alioqui  
interdicta sit per præsentis Ecclesiastica  
sepultura tali defuncto, & facultas Ec-  
clesiæ, in qua elegit sepeliri, illum se-  
peliendi : sub poena interdicti Ecce-  
siastici.

## III.

Sepultura non denegetur defuncto  
per Sacerdotem Parochialem propter  
non solutionem jurium funeralium :  
sed sine mora aut contradictione de-  
vote secundum ritum Ecclesiæ impen-  
datur.

## IV.

Et si eidem Sacerdoti secundum  
piam & laudabilem consuetudinem de-  
bitum fuerit, sine strepitu & figura ju-  
dicii, nostra auctoritate, seu Vicarii  
nostri Generalis, & Officialis consequi  
poterit : si per hæredes defuncti nega-  
tum fuerit ei.

## V.

Idem statuimus & ordinamus ob-  
servandum fore in aliis Sacramentis  
Ecclesiasticis, & pro administratione eo-  
rundem.

### *Forma literarum Testimonialium de bono Statu.*

**C**onstitutum fuit in Laodicensi Conci-  
lio, ne quis laicus (ne dum Clericus)  
ad peregrinandum proficisceretur sine licen-  
tia & formatis, id est, dimissoriis literis. Ha-  
rum conceptio tradita fuit in Concilio Nice-  
no. Differunt tamen formatæ a commen-  
daritiis & pacificis, quod formatæ a solis E-  
piscopis dantur : & vocantur dimissoriæ.

[a]

Curatus Ecclesiæ Parochialis de Abbe-  
manco, in Decanatu de Rubeomonte Bisun-  
tinn. Dioicesis, Omnibus Curatis & Presby-  
teris, curam & regimen animarum habentibus,  
ad quos præsentis literæ pervenerint, Salutem & Dei gratiam. Probus at-  
que honestus vir N. protectionem susceptu-  
rus, & iter ad Sanctum Claudium reli-  
gionis ergo; a nobis postulavit testimoniu-  
m de suo statu: quod nos per præsentis da-

mus, fidemque vobis facimus, quod nullo  
est excommunicationis sententiæ vinculo in-  
nodatus, sed est bonæ famæ & conversatio-  
nis : nec scimus in eo aliquod impedimen-  
tum Canonicum, propter quod debeant ei de-  
negari Ecclesiastica Sacramenta, aut sepultu-  
ra, vel omnino detardari. Quare vobis di-  
ctum N. commendamus per Christi charita-  
tem, ut eundo vel redeundo, cum ad vos di-  
verterit, eum excipiat tanquam vere Chri-  
stianum & Catholicum: eique Sacramenta &  
& sepulturam, si petierit, impendatis, ex-  
cepto Matrimonio. Datum die . . . men-  
sis . . . Anno, &c.

### *DE TRIBUS HOSTIBUS NO- stris, Carne, Mundo & Dia- bolo.*

## C A R O.

**C**anitur in Ecclesia diebus festis Martyrum  
& Confessorum :

*Caro, Mundus, Dæmonia :*  
*Diversa movent prælia :*  
*Incursum tot phantasmatum*  
*Turbatur cordis Sabbatum.*

Cum tribus his nobis certamen est assi-  
duum: quibus cum Dei gratia superatis, pro-  
posita est nobis corona gloriæ. Conjurant  
autem hæc in perniciem animæ hominis; sic  
ut unum illorum aliquando solum ab arce  
mentis ac rationis deturbet hominem, ali-  
quando duo, aliquando tria: quamquam  
semper omnia concurrunt in consummatio-  
nem peccati. Res autem tota sic proce-  
dit. Appetitus noster depravatus jungi  
optat cum aliqua voluptate hujus mundi,  
quæ se menti nostræ offert instar meretri-  
cis prostitutæ. Diabolus autem veluti le-  
no quidam, solite procurat eorum cum  
peccato conjunctionem: non ob aliam  
mercedem, quam mortem hominis, quam  
expectat ex tali lenocinio: sive id pollicita-  
tionibus agat, sive terroribus. Per carnem  
igitur intelligimus concupiscentiam & fomi-  
tem peccati, qui ad Divinæ legis prævarica-  
tionem assidue nos stimulat, & impellit hostis  
domesticus. De hoc Apostolus Rom. 7. Ego  
autem carnalis sum, venundatus sub pecca-  
to: quod enim operor, non intelligo. Non  
enim quod volo bonum, hoc ago, sed  
quod odi malum, illud facio. Et iterum,  
Scio enim, quia non habitat in me, hoc est,  
in carne mea, bonum. Nam velle adjacet  
mihi, perficere autem bonum, non invenio.  
Et iterum, Video aliam legem in membris  
meis,

(a) De Conf. d. 5. c. Non oportet. dist. 73. 68. d. c. Ecclesiis.



meis, &c. Infelix ego homo, quis me liberabit a corpore mortis hujus. Gratia Dei per JESUM Christum Dominum nostrum.

### MUNDUS.

**P**ER mundum intelligimus, opes, honores, voluptates, prospera atque adversa, quæ mundus habet, & propter quæ homo insipiens legem Dei prævaricatur. Quibus certe nihil vanius est, si ad futurum sæculum, quod nos post hanc vitam manet, respiciamus: nihil miserius, si ad calamitates, quibus obruitur: nihil detestabilius, si ad scelera, quæ in eo committuntur. Mundi amatoribus hæc bona videntur, comessationes, concubitus, ludi, choreæ, cantus, sales, plausus, spectacula, venationes, luctæ, lavacra, deambulationes, unguenta, honores, dignitates, victoriæ, triumphi, salutationes, præminentia, lucra, divitiæ, possessiones, & similia: quæ tamen trahunt post se malorum ingentium iliadem. Sequuntur enim hæc, ebrietates, fornicationes, stupra, adulteria, incæstus, veneficia, homicidia, prodictiones, animositates, mendacia, furta, rapinæ, usuræ, fraudes, invidiæ, vindictæ, rixæ, odia, simulates, contentiones, vulnera, lites, sectæ, falsa testimonia, sacrilegia, oppressiones, detractiones, æmulationes, & alia. Inopinari jam casus ex altera parte terrent: infamia angit, infirmitas atterit, fames & frigus cruciant, frangit egestas, dolores torquent, mortis timor exanimat. Age jam, nisi omnino desipiens, quis mundum hunc amet? Quis non potius pietatis studia sectetur? Vis scire, quid spiritalis vita ferat? Audi Apostolum: fructus autem spiritus sunt, charitas, gaudium, pax, patientia, longanimitas, bonitas, benignitas, mansuetudo, fides, modestia, continentia, castitas.

Sciens ergo Dominus noster JESUS superbenedictus, mundum hunc visibilem in maligno positum esse, & laudabiliter in Deo vivere volentibus esse contrarium, ad ejus contemptum, primum exemplo suo, deinde proposita mercede hortatus est. Primo nullam ejus habere dignatus est substantiam in vita sua, non agros, non vineas, non oliveta, non possessiones, non aurum, non gemmas, non ad commorandum ædes. Mercede autem duplici, quando Matth. 19. dicit: Omnis, qui reliquerit domum, vel fratres, vel sorores, vel patrem, aut matrem, aut uxorem, aut filios, aut agros, propter nomen meum, centuplum accipiet, & vitam æternam possidebit. Nolite diligere mundum [inquit (b) B. Joannes]

neque ea, quæ in mundo sunt. Mundus transit & concupiscentia ejus. Qui autem facit voluntatem Dei, manet in æternum. Et (c) Paulus, Nolite conformari huic sæculo: sed reformamini in novitate sensus vestri, ut probetis, quæ sit voluntas Dei. Et alibi: Christus mihi crucifixus est, & ego mundo. Mundus fallax est: multa promittit, sed nihil præstat. Filii hominum [inquit Propheta David] usquequo gravi corde, ut quid diligitis vanitatem, & quæritis mendacium? Quicquid enim in mundo est, vel est concupiscentia carnis, vel concupiscentia oculorum, vel superbia vitæ. Hæc autem omnia vanitas, (d) & afflictio spiritus. Avarus non repletur pecunia: gloria fugientem sequitur: voluptas concupita anxietatis plena est; satiata, pœnitentiæ: ut omittamus malorum lernam, quam secum omnia hæc, dum petuntur, ferunt. Unde & sapientiores Philosophi plurimi, ac Poetæ, in bonis reponenda hæc non putarunt, quæ incerta essent, & quæ nec bonum habentem se facerent, nec beatum; sed miserum sæpius & infelicem. Hæc dicuntur a Philosophis bona fortunæ: quæ vitrea certe est: nam cum splendet, frangitur. Munera fortunæ insidiæ sunt. Christi consilium, quod tutius est, accipiamus: Ne solliciti sitis animæ vestræ, (e) quid manducetis; nec corpori vestro, quid induamini: scit enim Pater vester, quia his indigeris. Quærite primum regnum Dei & justitiam ejus: & hæc omnia adjicientur vobis. Videntur mundo scelices esse divites, quasi rerum omnium copia affluentes: At, inquit Ambrosius (f), tu, quantis abundent, vides; quantis egeant, non vides. Non opibus mentes hominum, curæque levantur. Quocirca vir sapiens nec extollitur, si bona hæc fortunæ adsint: nec deprimatur valde, si absint. Quoniam magis opinione, quam re vera, bona sunt, quæ bona videntur stultis.

### DIABOLUS.

**A**UCTOR, & princeps omnium peccatorum, diabolus est, teste Augustino contra duas Epistolas Petiliani. Et Sap. 2. Invidia diaboli mors intravit in orbem terrarum. Imitantur autem illum, qui sunt ex parte illius. Unde autem tanta iniquitas in diabolo, accurate Laurent. Justinianus, in fasciculo (g) amoris. Ex originalis, inquit, causa delicti tenebrarum princeps suum in mundo dilatavit imperium, solis tantummodo Divinæ legis prævaricatoribus præsidens: quia in justorum sede, coæterna Deo sapientia præsideat. Hinc livore succensus inimi-

(b) 1. Joan. 2.

(c) Rom. 12.

(d) Eccl. 1.

(e) Matth. 6.

(f) 6. Hexam. c. 8.

(g) Cap. 11.

inimicatur eidem : & cum sentit aliquem, iustitiæ semitas ingredi velle, diro certamine tentationum illum appetit. Confunditur etiam, cum in carne pallibili videt hominem inter tot mundi discrimina custodire conditoris sui obedientiam, quam in cælo positus ipse servare neglexit. Implacabili quoque odio & livore tabescit, quoties illuc homines ascendere conspicit, unde turpiter ipse superbiendo descendit.

Paret igitur se ad diaboli perferendas insidias, quisquis legi Dei parere decrevit. Fili, accedens ad servitutem Dei, sta in iustitia & timore : & præpara animam tuam ad tentationem, inquit *(b)* Sapiens. Quis ergo tam demens, qui pacem in hoc mundo sperare velit? Mundus, (hoc est, mundi amantes) membra sunt diaboli : nos ergo odio habebunt, & usque persequentur. Ipse diabolus, ut Dei laudes e mundo procul eliminet, in iustos omnes debacchatur, per quos Dei laudes celebrantur : persequitur in servis Dominum, & in fidelibus Christum. In professoribus veritatis, &c. Hactenus ex Justiniano.

Quin etiam si veterum monumenta legas, illorum præsertim Philosophorum, qui dæmonum sunt diligentius scrutati mytheria; invenies profecto eos in hac sententia, ut in perniciem hominum omnia moliri dæmones putent : nunc illecebris voluptatum, nunc mendacis oraculorum, nunc etiam vi manifesta. Unde Porphyrius *(i)* apud Eusebium : Dæmones vitiis dediti, quicquid mali excogitare, atque efficere possunt, libenter aggrediuntur : violenti enim omnino, atque simulatores cum sint, privatique luce meliore, insidiosè aggrediuntur : nunc occulte adulantes, modo manifeste cogentes. Et paulo post : Alliciunt enim multos ardore cupiditatum, divitiarum, potentia, voluptatum, inanis præterea appetitu gloriae. Unde seditiones, rixæ, bellaque nascuntur. Hæc ille.

Reges & Principes ad sibi, non solum servos, sed filios etiam charissimos sacrificandum atque jugulandum inducebant : tanta hominum cæcitate atque vecordia, ut quamvis scirent, eos in responsis suis (vel quod conjectura consequi futura non possent) mentiri, vel (quod aliud non possent) de sua ignorantia fateri : tamen ad scelerata delubra, lucos, atque speluncas, rerum cognoscendarum spe futurarum, turmatim ventitarent gentiles, superstitionibus nefandis dementati.

Atque his etiam omnibus modis, quos enarravimus, mendacissimus ille diabolus Filium Dei ipsum *(k)* tentavit. Primum sce-

lestus ille veterator veritus non fuit, Jesum Dominum, in aera sublatum, transferre in pinnaculum templi ; & rursus in montem excelsum valde : quod ei permisit Deus ad nostram instructionem. Illecebris ad voluptatem, sicut alios de vulgo solet, etiam Dei Filium illicere conatus est. Si Filius Dei es, [inquit] fac, ut lapides isti panes fiant. Quasi more meretricio diceret : Cur voluptati non indulges? cur te fame conficis? cur te maceras? Depone istam religionem. Indulge genio. Potes enim : & te decet : & res postulat. Ecquis reprehendet Dei Filium famescientem, rebus uti concessis? Hoc diaboli lenocinium fuit. Rursus inanis gloriae vento tentavit præcipitare. Sic enim etiam solet multos in pericula mittere sola inanis gloriae ostentatione. Magni Filius Dei es, inquit; age igitur, quæ te decent : magna scilicet, heroica : stupenda, horrendaque, quæ videantur cæteris. Projice te deorsum. Nihil time. Degeneres animos timor arguit. Famuli etiam patris tui, & tota familia auxilio erit. Non patientur te cadere. Pro te pectora sua objicient periculo. Manibus suis portabunt te. His, ac similibus oraculis solebant dæmones ad nefanda quæque atque horrenda incitare olim mortales : quibus plenæ sunt Poetarum tragædiæ. Restabat superstitiosa idololatria : Hæc etiam Dei Filium improbus tentator, sicut olim genus hominum fere universum induxerat, ad se adorandum (o facinus audax) tentare non erubuit. Siquidem cupiditate rerum accensos quam multos inflammavit? Quot hominum myriades ad idolorum servitutem & impietatem traxit? Quid non promisit, ut pro Deo haberetur Dei hostis? ut pro benefico maleficus?

Dicimus ergo diabolus lenonis instar ad voluptates appetendas sollicitare, sed non gratis utique. Mundi namque commoda quam maxime potest, fucata, & quasi corollis ornata, ostentat, & promittit, modo velimus ea agere, quæ ipse requirit. Si vis, inquit, illas ædes obtinere, suppose falsum testamentum : si potiri illa muliere, occide virum. Hæc merces lenocinii. Quamquam certe tanto flagrat odio in hominem diabolus : ut licet ea omnia facias, quæ ille consulit, raro tamen potiaris re concupita : quod hanc etiam tibi infensus ille hostis invideat voluptatem. Atque hic unus est nocendi modus. Aperta autem vi, instar feræ truculentæ hominem sæpe aggreditur & vexat : ut cum arreptitios, seu dæmoniacos, torquet : cum corpora morbis affligit : cum bonis omnibus spoliatur, vel fama, vel amicis, vel etiam vita : cum grandines & fulgura concitat : cum mare turbat, montes ex-

imo

*(b)* Eccli. 2.*(i)* De Præpa. l. 4. c. 11.*(k)* Matth. 4.

imo evertit: incendia & strages facit. Quamquam nihil horum sine permissione & jussu Dei. Psal. 77. Misit in eos iram indignationis suæ: indignationem & iram & tribulationem, immisiones per angelos malos. Diabolus enim, licet inemendabilis sit, & omnino malus: tamen jussu Dei, tanquam licitor & carnifex, peccatoribus pœnas infligens, occasionem dat aliis, ut recte vivant. Est ergo executor Divinæ justitiæ. Ob hanc vim tantam atque potentiam, quam habet in hoc mundo, dicitur mundi Princeps, Deus hujus sæculi, 2. Cor. 4. Fortis armatus, Luc. 11. Paulus & Sancti sæpe tanquam mancipio, utuntur diabolo. Unde mos tradendi Satanæ fuit in Ecclesia primitiva magni terroris contra inobedientes. Quos (l) tradidi, inquit Satanæ, ut discant non blasphemare. Ejusdem quoque expellendi potestas, quæ Apostolis & Discipulis data fuit a Domino, (m) magnam comparavit Christi fidelibus auctoritatem. Hæc omnia sciunt plerique vestrum, [inquit (n) Arnobius] dæmones de se fateri, quoribus a nobis, & meritis verborum, & orationis incendiis, de corporibus exiguntur, victi dolore, quod sunt, loquuntur. Et Cyprianus Demetrio, O si audire eos velles & videre, quando a nobis adjurantur: torquentur spiritualibus flagris, verborum tormentis de obsessis corporibus ejiciuntur, ejulantes & gementes voce humana: veni & cognosce vera, quæ dicimus. (o) Tertullianus: Dæmonas, id est, genios adjurare consuevimus, ut illos de hominibus exigamus. Et alibi: (p) Enimvero cur dæmonia affirmamus esse? quasi non & probemus, qui ea soli de corporibus ejicimus? Lactantius, (q) Maximis sæpe ululatus editis verberari se & ardere, jamque exire proclamant. Negantibus Arrianis (sicut & nunc nonnulli negant) dæmonum ad monumenta Sanctorum, & suffragia, clamores & confessiones vera esse tormenta, sed ficta, compositaque ludibria asserentes, S. Ambrosius (r) sic loquitur: Audi multa componi, hoc umquam nemo finxit, aut dæmoniacum esse se simulavit: quid illud, quod ita eos exagitari videmus, quibus manus imponuntur? ubi hic locus fraudi? ubi suspicio simulandi?

Confutandum igitur est, Satanam posse multa incommoda ferre hominibus: qui, ut loquitur (s) Augustinus, animam invadit extrinsecus, sensusque conturbat, & hominibus furores infert. Potest tempestates & procellas in aere movere, ut patet Job. 1. &

2. ubi impetrata licentia a Deo (postquam Sabæi 500. juga boum & 500. asinas abegissent) ignem de cælo misit, qui septem milia camelorum consumpsit: & ventum, qui ruina domus filias septem, & tres filios Job, cum famulis oppressit. Hæc narrantur in Scriptura Sacra: licet enim corporea natura non obediat ad nutum Angelis (neque bonis, neque malis) ad susceptionem formæ essentialis, sed Deo soli, qui creavit eam: tamen ad motum localem spiritali paret naturæ. Indicium sumas ex homine. Membra enim hominis ad solum imperium voluntatis moventur. Venti ergo, & grandines, ex vaporibus coeuntibus cum generentur: potest ea procurare dæmon, adductis ex variis locis terræ exhalationibus, vel vaporibus multis, in unum locum. Ex his etiam sequitur, non esse omnino pro fabulis habenda, quæ ab strigis & maleficis [quæ membra & vasa diabolica sunt] dicuntur fieri. Nam Deo propter justas causas, & sibi notas, permittente, & omnia diabolo sua opera perpetrante, lædere possunt homines in corpore, & in bonis, in usu rationis, & in vita, & in fama. Hæc enim omnia potest dæmon, ut patet Job. 1. & 2. In fama, ut cum scelera occulta manifestat malorum hominum: vel justis infamiae notam inurit fraudulenter: [t] sicut quando se Sanctum Episcopum Silanum esse mentiebatur, cum impudica muliere cubantem, ut Virum Sanctum de impudicitia traduceret apud populum.

Usus rationis perturbare docent arreptitii, seu energumeni, de quibus supra, & in historia Evangelica frequens mentio. Quod vita privent homines Deo permittente, patet Tob. 6. quando septem viros indignos conjugio Saræ malus genius suffocavit. Quod in corpore animalis loquatur, docet serpentis tentatio in Genesi: & quod sub diversorum animalium figuris appareat, tentationes Sancti Antonii.

Quæ igitur patrare dicuntur maleficæ mulieres, dæmonis opera sunt, ad mulierum illarum preces obtemperantis. Quamquam & ipsæ propriis manibus infantes necare possunt, & fascinare oculis. Nam naturalis etiam aspectus malevolæ anus noxius est: ut tradit S. Thomas 1. q. 117. art. 3. quoniam ex forti imaginatione animæ immutantur spiritus, quorum ex oculis fluxus est plurimus. Unde, rogo, sit, ut morbo oculorum laborans, aliis sæpe morbum communicet: & menstruatæ inficiant specula? Pueri autem,

(l) 1. Tim. 1.

(m) Matth. 10. Luc. 10. Marc. 3. 16.

(n) Lib. 8. contra gentes.

(o) In Apolo. 1. 32. 37.

(p) De anima c. 33.

(q) Lib. 2. ca. 6. 18. lib. 4.

(r) Serm. 91.

(s) Lib. de vita beata.

(t) In vita D. Hieronym.



tem, utpote teneri natura facile afficiuntur. Est aliud genus fascini: ludificatio sensuum: ut cum pro homine lupum, vel aliud quid oculis ostendit dæmon. Idque duplici potest modo agere: uno intrinsecus immutando phantasiam hominis, & sensus: alio extrinsecus, adaptato corpore aliquo simili, aut ex aere formato. Vide Aug. l. de Civit. 18. c. 17. 18. De hac fascinatione loquitur ad Galatas Apostolus: Quis vos fascinavit, inquit, veritati non obedire? Hoc modo visiones multæ Sanctis Viris, & sceleratis etiam factæ sunt a diabolo: qui se aliquando (u) transfiguratur in Angelum lucis. Sic maleficæ illæ Strigæ, Lamæ, & Bruxiæ, invisibiliter feruntur, quando Deus id patitur in maiorem ipsarum damnationem. Portantur aliquando per aera. Neque enim digniores sunt, quam Dominus ipse, qui se portari passus ab illo est super pinnaculum templi. Reddunt aliquando impotentes viros ad Venerem, ex pacto, quod cum diabolo fecere. In quo ille quidem promissis stare non differt, non studio veritatis ac bonæ fidei, [qui mendax est & perfidus ab initio] sed ut ad eadem fœdera nefanda alios alliciat, cum promissis stare comperiat. Et quia pactum huiusmodi cum signis quibusdam fieri solet, (veluti imagine cerea, vel acu curvata, vel simili) ideo docet Scorus curandum esse, ut tale signum quam citissime destruat. Et addit ad hæc Gabriel Biel, dæmones habere cum maleficis sic pacta sua, ut dum verba aliqua proferuntur tali modo, vel tali tempore, vel loco, acum incurvent, vel aliud quid simile agant, ad quod sequatur effectus: non vi verborum, vel rerum, quas tractant malefici, sed dæmonis, qui ut leo discurret per elementa omnia, omnesque naturas, ad rem illam facientes, per glossam in c. 7. Exodi. Non caret enim ille peritia rerum naturalium: ut plantarum, lapidum, metallorum. Nec si hæc omnia sunt a diabolo, ideo impune esse debet ipsis maleficis: Quinimo legibus Civilibus plectuntur propter perfidiam, & opus diabolicum, cui inserviunt. L. fin. C. de Maleficiis.

Præterea ut omni ex parte malas istas mulieres corrumpat hostis ille humani generis: sub assumpto virili corpore & figura, eas sibi supponit, & quasi constuprat. (x) Qua de improbitate Aug. lib. 15. de Civitate, c. 23. loquens, non negat Sylvanos & Faunos (quos vulgo Incubos vocant) improbos sæpe extitisse mulieribus: & earum appetuisse, & peregisse concubinum. Et quosdam dæmones, quos dufios Galli nuncupant, hanc assidue immunditiam, & tentare

& efficere, plures, talesque, inquit, asseverant, ut hoc negasse impudentiæ videatur.

Sed putant multi, quæ de Strigis dicuntur, omnia vana esse, imaginaria, & phantastica, nec omnino credenda: ut quod fere idiotæ sint hæ mulierculæ, mania potius, aut melancholia laborantes, quam iudicio præditæ. Tum vero præcipue, quod in c. Episcopi, 26. q. 5. hæreticum esse dicatur, fidem his adhibere mulieribus, quæ dicunt se cum Diana, & Herodiade, nocte equitare super bestias quasdam, multaque terrarum spatia intempestæ noctis silentio pertransire: eaque illusiones esse & phantasmata, a diabolo irrogata: atque ideo in spiritu, non in corpore geri. Eadem Aug. lib. de Spiritu & anima. c. 28.

Verum quando experientia harum rerum sæpe a viris sapientissimis comprobata est, potius negare oporteret & dæmones esse, & Angelos, more Saducæorum. Non desunt enim etiamnum Saducæi. Verum, ut Arnal. Alberti (y) declarat, caput illud causæ 26. q. 5. impietatem damnat, quam malæ illæ mulieres attruebant: nempe Dianam esse deam, cum idolum nihil sit: & Herodidem, scelestam illam mulierem, quæ in tartara conjecta est, ad lusus cum hisce venire: & quod creaturam dicerent a diabolo mutari in speciem aliam. Hæc enim omnia falsa sunt, & mera somnia.

Ex hoc tamen capite colligere licet, multa sæpe huiusmodi mulieres maleficas pati in phantasia, quæ re vera non fiunt in corpore: ut duplici errore plectantur impiæ illæ. Aliæ causæ ad excusationem cujuscunque maleficii tacere possent: sed magis credendum probationibus evidentissimis, quam dubitationibus incertissimis.

Supereſt quæſtiuncula una, Utrum liceat uti colloquio, vel opera dæmonum ad aliquid non malum, nec ad malum finem? Ex Cajetano in quæſtionem 90. Sancti Thomæ 2. 2. sic dicemus. Cum Apostolus scribit (z): Nolo vos fieri socios dæmoniorum: nec invocare, nec venerari dæmones, nec ullo modo cum illis nos pacisci voluit. Cum autem contingat cum arreptitiis aliquando bonos viros loqui; & idem Thomas secunda secundæ quæſtione 95. artic. 4. dicat, inquirere aliquid a dæmone sponte occurrente, quandoque licere propter utilitatem aliorum: distinguendum est: Tanquam cum hoste nostro si agamus, peccatum non erit: quia hostiliter ad eos nos semper habere oportet. Sic in exorcismis & orationibus alloquimur diabolum: Ergo maledicte diabole &c. Compellendo etiam Divina potestate alloqui possu-

(u) 2. Cor. 11.

(y) De asser. 1. ath. &amp; here. 4. 25.

(x) De incubis &amp; succubis glo. in Cle. 18.

(z) 1. Cor. 2.

possumus, aut præcipiendo, ut se prodant, ut loquantur &c. sicut discimus ex B. Cypriano, (a) & aliis Sanctis, qui vel ex revelatione, vel speciali instinctu aliquid imperarunt diabolo. Ut Beatus Jacobus per dæmonem legitur venire fecisse ad se Hermogenem. Et de S. Antidio multa hujusmodi traduntur: cui gratia data fuit supra spiritus malignos: quoniam Deus & Angeli boni dæmonibus utuntur tanquam servis & captivis suis. Aliter vero, id est, non tanquam hostibus, nulla sit conventio. Est enim hostis Dei, & patriæ cælestis, & noster: qui ab obstinata voluntate inimicitarum nunquam recedit. Potest tamen peccatum fieri veniale: veluti, si quis ex levitate, vel curiositate, non credens, se Divinam offendere Majestatem, vel charitatem, cum occurrente dæmone in assumpto corpore, vel arreptitio homine per modum transcurrentis loquatur, inquirat leve aliquid leviter: credendo eum esse semper mendacem. Unde colligitur, cur Dominus tacere iussit, Luc. 4. Mar. 13. ut ne etiam vera dicentibus credamus.

Spiritus sunt erroris 1. Joan. 8. astutia seducentes. 2. Cor. 11. Ministri mendacii. 3. Reg. 2. 3. & 2. Paral. 18. Vanum autem omnino est, putare eos cogi per superstitiones vanas & observationes: quoniam liberæ voluntatis sunt: non per lapides vel herbas, vel etiam verba: quamvis se cogi fingant per incantationes, & alia deliramenta hominum perditorum. Sed nemo cum diabolo unquam commercium habuit, qui non tandem ignominiose deceptus sit. Exemplum habes in Saule, Josia, Juliano apostata. Et contra in Sancto Antonio, antagonista diaboli invictissimo.

### DE CÆREMONIIS, SEU Ritibus Sacris.

**O**Mnis approbata consuetudo ac mos, dicitur ritus: quasi ratus, id est, certus, firmus, & constans: Sed Sacros Latini appellarunt cæremonias, sive a carendo, ut tradit (b) Gellius, sive a Cære oppido, ut Livius. Hinc D. Augustinus (c) retractavit, quod voce hac aliquando usus fuerit, quæ in Literis Sacris non inveniretur. Quamquam si a carendo deduceretur, nihil deprecatur. Sed nomen usu jam tritum est & factum familiare, undecunque deductum sit.

Quicunque autem cæremonias in Ecclesia damnant, plane desipiunt. Res est, qua religio fovetur: quaque sublata oblivioni tradatur pietas necesse sit. Figuræ etenim & similitudines rerum visibilium, ad invisibilium amorem & considerationem excitant: veluti eloquentia quædam doctrinæ salutaris, ut docet Aug. (d) Deus enim vel sacrificiis, vel Sacramentis olim non egebat, nec modo eget ullo modo: sed ea voluit, ut signa salutis celebrantes, utilia nobis officia salutis exerceremus. Sic genua flectimus: orantes manus in cælum tendimus: solo etiam prosternimur: licet Deo nota sit alioqui voluntas nostra. Sed per hæc excitatur homo ad orandum humiliter, atque ferventius. Et mirum est, cur non omnia simul Sacramenta tollant, qui cæremonias tollendas putant. Namque Sacramenta ritus sacri sunt. An confertur apud ipsos Baptisma sine ritu; an cæna? an orantes flectunt genua? anne conventus faciunt solemnes? Sed excæcantur odio: & quæ sensu percipiunt, mentis oculo non vident. Nos autem Ecclesiæ ritus observabimus. Hos nobis tanquam per manus tradidere Apostoli. Nam ut multos acceperint a Sacris Bibliis olim Patres: ad bonam eorum partem usu atque imitatione constituerunt, quæ tenere ac revereri decet, sicut diximus de traditionibus. Jubet Apostolus, puras levare manus in orationibus: ut stantes autem aliquando oremus, nusquam præcipit. Per manus impositionem Ministros constitui, in multis locis docet Scriptura: Chrisma Sanctum in Ecclesia consecrare, traditionis habetur Apostolicæ. Nec tamen Chrismatis consecratio, vel stantium oratio non magis, quam manuum impositio, vel levatio, quamdiu Christi Ecclesia in terris peregrinabitur militans, abrogabuntur.

### ECCLESIA.

**E**κκλησία Græce, Latine est evocatio, concio, convocatio, congregatio, cætus. Sumitur non raro pro templo ipso & loco, ubi fit congregatio: ut Judith. 6. Sæpe etiam pro toto Clero & Ministris Ecclesiæ, quod sit ea pars Ecclesiæ potissima: ut Deut. 23. Definitur ergo Ecclesia, congregatio fidelium: vel universitas credentium in Christum, qui sub iisdem Sacramentis, & eadem doctrina Apostolica degunt. Cyprianus (e) definit: Plebs Sacerdoti adunata & Pastori suo grex adhærens. Olim sub lege dicebatur Synagoga, id est, congregatio.

(a) Ad Demetrium Ceciliam.

(b) Gell. lib. 4. c. 9.

(c) S. Aug. retra. lib. 2. c. 37.

(d) Aug. Epist. 119. ad Janua. c. 7. Idem ad Marcell. Epist. 5. Idem de cura pro mortuis. c. 5.

(e) Cyp. libr. 4. epist. 9.

congregatio, seu coadunatio: verum per Christum ipsum in libertatem Evangelii vocata, non amplius Synagoga, sed Ecclesia, id est, evocatio dicitur. Vocati enim sumus in spem & adoptivum filiorum Dei, per Christum, per Apostolos, per Spiritus Sancti inspirationes. Paulus ideo multis in locis vocationis verbo usus reperitur. Gal. 5. Vos in libertatem vocati estis. 1. Cor. Vocatis Sanctis. Rom. 11. Sine penitentia sunt dona Dei & vocatio.

Hæc igitur Dei Ecclesia dicitur in Symbolo, Una, Sancta, Catholica, & Apostolica. Ac primum quidem una: quia unus Deus, una Fides, unum Baptisma. Una est columba mea, una est speciosa mea. Cant. 6. Hujus unum Caput Christus est: invisibile nunc nobis, sed visibile est Petri Successor Pontifex: quem Christus Dominus suæ potestatis Vicarium atque Ministrum visibilem visibili Ecclesiæ præfecit. Hic sedem suam Romæ posuit. Ex quo primatum Romanæ Ecclesiæ Patres agnoverunt in Conc. Niceño, c. 6. & antea Can. Apost. 34. & omnes Catholici a primo ad ultimum. Ad Sedem Romanam referunt Ecclesiarum omnium Prælati causas, controversiasque omnes doctrinæ. Et merito quidem. Namque dictum Petro fuit (cum fidei mirabilem illam confessionem fecisset: Tu es Christus, Filius Dei.) Tu es Petrus: & super hanc petram ædificabo Ecclesiam meam: & portæ inferi non prævalebunt adversus eam. Et tibi dabo claves regni cælorum &c. Et Luc. 22. Ego rogavi pro te, ut non deficiat fides tua: & tu aliquando conversus confirma fratres tuos. Ob hæc dicunt Doctores Catholici, Ecclesiam Christi fundatam esse supra petram hanc. Si namque Petrus confirmare debuit fratres suos: qui potestatem habet confirmandi, nonne fundamentum est? Certe in fundamento firmatur ædificium. Ad hanc similitudinem alludens Dominus Joan. 1. nomen ejus, quod fuerat ante Simon, mutavit in Cephas, id est, Petra, seu Petrus, Chaldaice. Et in loco citato Matth. 16. cur Petram vocarit, causam subdit: Et super hanc petram ædificabo Ecclesiam meam. Nec obstat, quod Paulus ait: Fundamentum aliud nemo potest ponere, quod est Christus JESUS. Alioqui enim neque lucis nomen, neque Sacerdotis alii competere posset, quam Christo, neque claves habere: quod falsum est. Donat quidem Christus dignitates suas: non quod inde maneat ipse exhaustus & vacuus: sed habens largiter: de plenitudine ejus omnes accipiunt. vide Basil. in serm. de Penitentia, & recentiores multos. Ergo sicut largitus est Petro claves regni cælorum propter confessionem illam sublimem fidei, quam nec caro, nec sanguis

ei revelaverat: sic & Ecclesiæ suæ petram & fundamentum posuit: supra quam Ecclesiæ omnes, quæ ædificatæ non fuerint, corruent omnino, nec Ecclesiæ Christi esse poterunt. Hæc hætenus. Ergo Ecclesia unum corpus in uno Spiritu dicitur Ephes. 4. Nec alia est nunc, quam quæ fuit olim, ac erit post mundi consummationem, sicut una est arbor, & una vinea, & una civitas: licet alii aliis cives succedant, & arboris rami. Sicut nec alius homo est, qui fuit antea infans, deinde puer, nunc autem vir.

Dicitur deinde Sancta, non quod Sancti & Electi solum, aut iusti in ea, non etiam peccatores inveniantur: sed quia Deo consecrata est in Sanguine Christi, & sanctificata: & quia Caput habet Christum ipsum, Sanctum Sanctorum, & thesaurum meritorum ejus: & quia extra eam non est salus, nec sanctitas. Sola enim hæc legitimum servat Sacrificii cultum, & justificationem Sacramentalem. Non ab re igitur similis facta est sagenæ missæ in mare, & ex omni genere piscium congreganti; & aræ, in qua triticum cum paleis mixtum est; & decem virginibus, quarum quinque fatuæ erant; & aræ Noe, in qua munda & immunda animalia contenta fuere; & magnæ domui, in qua sunt vasa aurea, & argentea, sicut August. & Cyprianus, & alii interpretati sunt. Quod si aliquando in sacris eloquiis vocatur munda, sine macula, sine ruga, tota pulchra: de illa ejus parte intellige, quæ cum Christo jam regnat, & quæ post mundi consummationem in æternum regnabit: cum tradiderit Dominus regnum Deo & Patri: quæ & ideo triumphans appellatur, quod superatis hostibus suis, scilicet carne, mundo, & diabolo, secunda pace, gloriaque immortalis potitur. Sed quæ in hoc mundo versatur, purgationem faciens quotidie veterum delictorum, cui semper pugnandum est, militans dicitur. In hac parte sunt, uti diximus, mixti cum bonis mali & peccatores. Et sicut in vite non omnes palmites fructum ferunt: & in corpore membrum esse potest aridum, vel sine sensu: sic nec omnium, qui intra Ecclesiam sunt, opera bona invenientur in die judicii: cum sit tamen Christus ipse vitis, & nos palmites: sed extra Ecclesiam nulla inveniantur opera, digna vita æterna. Psalm. 28. Adorate Dominum in atrio sancto ejus. Extra atrium sanctum (ait Basilus) non oportet adorare Dominum, hoc est, non excedere congregationem Ecclesiæ, & per seipsum Synagogam, aut sectam auspicari, qui vere Divinum cultum debet perficere. Sed quærat forte aliquis: Qui sunt extra Ecclesiam? Responde: Primo infideles: ii intra Ecclesiam nunquam fuerunt. Deinde hæretici: hi ab Eccle-



Ecclesia sua sponte recesserunt. Tertio excommunicati: hi ab ea eicēti sunt. Sequitur ex his, quod etiam si Pastores Ecclesiæ mali sint, & iniqui, non ideo desinunt esse membra Ecclesiæ, & vere Prælati, nisi ab Ecclesia separentur.

Dicitur tertio in utroque Symbolo: Catholica græce, id est, universalis, & perpetua, sicut vocem interpretatu Quintilianus. Notat autem universitatem & nationum, & sæculorum. Psalm. 144. Regnum meum regnum omnium sæculorum, & Dominatio mea in omni generatione & generationem. Et Psalm. 21. Apud te laus mea in Ecclesia magna. Augustinus: Ecclesia magna quid est, Fratres? nunquid exigua pars orbis terrarum Ecclesia magna est? Ecclesia magna totus orbis est. Omnes fideles, qui ab Adam fuerunt, & futuri sunt, ad hanc Ecclesiam pertinent, quæ super fundamentum Apostolorum, & Prophetarum fundata est in illo lapide angulari, qui fecit utraque unum, & pacem iis, qui prope, & iis, qui longe. Et contra Petilianum, ideo Catholicam dici, ait, quia palmites suos in omnia tempora, in omnia loca, omnemque nationem extendat.

Dicitur denique in Symbolo majori: Apostolica. Hæc ei proprietas ideo competit, quod inde ab Apostolis revelata Christi gratia ad hæc usque tempora, legitima successione Ministrorum pervenit. Primo enim post Christi ascensionem Spiritus Sanctus, qui Ecclesiam gubernat, Apostolis datus est. Deinde & credentibus per ipsos Apostolos. De eo, quod additur (Sanctorum communionem) infra agemus in titulo de Sententia excommunicationis.

Ex his quatuor Ecclesiæ proprietatibus duo licet colligere. Unum est, quod Ecclesia errare non potest, intellige in fidei doctrina & morum: regitur enim ab uno Spiritu Sancto, ubicunque fuerit. Eo duce quis erraverit? Quare obediendum Ecclesiæ est, nisi velis tanquam ethnicus reputari. Proverb. ult. Conserva, fili mi, præcepta Patris tui, & ne dimittas legem Matris tuæ. Christus ad Apostolos, tanquam Ecclesiæ Prælatos, ait: Qui vos spernit, me spernit. & qui vos audit, me audit. Et Paulus: (f) Scitis, quæ præcepta tradiderim vobis: itaque qui hæc spernit, non hominem spernit, sed Deum. Et Dominus: (g) Super cathedram Moysi sederunt Scribæ & Pharisei, quæ dicunt, facite, secundum opera illorum nolite facere: dicunt enim, & non faciunt. Idcirco scribebat Paulus (h) Timotheo: Si tardavero, ut scias, quomodo oporteat te

in domo Domini conversari, quæ est Ecclesia Dei vivi, columna & firmamentum veritatis. Dicunt Doctores Ecclesiam in iis, quæ juris sunt, pertinentia ad fidem, & bonos mores, errare non posse: sed in iis, quæ facti, nihil prohibet. Hinc fit, ut cum secundum allegata, & probata judicer, rem aliquando vel personam ei adjudicet, cui non debeat.

Alterum, quod ex illis quatuor proprietatibus discas, est, quod Ecclesia non est [ut quidam falluntur] res ficta, & imaginaria tantum; sed visibilis & cognita, [alioqui enim quomodo referrentur ad eam, quæ referri oporteret? quomodo obediretur ei, quam nemo sciret?] ut ne pro vera Ecclesia sequaris Synagogas schismaticorum. Habes enim hic signa certa veræ Ecclesiæ. Sed audi, quam disertis hoc ipsum verbis docuit Beatus Augustinus in libro contra epist. Fundamenti, cap. 9.:

Ut ergo omittam sapientiam, quam esse in Ecclesia Catholica non creditis: multa sunt alia, quæ in ejus gremio me iustissime teneant. Tenet consensus populorum, atque gentium. Tenet autoritas miraculis inchoata, spe nutrita, charitate aucta, vetustate firmata. Tenet ab ipsa Sede Petri Apostoli (cui Dominus pascendas oves suas post resurrectionem commendavit) usque ad præsentem Episcopatum, successio Sacerdotum. Tenet postremo ipsum Catholicæ nomen: quod non sine causa inter tam multas hæreses sic ista Ecclesia obtinuit: ut cum omnes hæretici se Catholicos dici velint, quærenti tamen peregrino alicui, ubi ad Catholicam conveniatur, nullus hæreticorum Basilicam suam, vel domum audeat ostendere.

Vides, quam diserte Augustinus quatuor illas proprietates (Unam, Sanctam, Catholicam, & Apostolicam) per consensum, auctoritatem, universitatem, successionem exposuit: quibus vera Ecclesia a falsis dignoscatur. Quoniam igitur hæreticis in more semper fuit, usurpare sibi nomen Ecclesiæ: dicentibus, Hic est Christus, non illic, sicut jam futurum prædixerat Dominus, Matth. 24.; ideo observanda hæc, quæ tradidit Augustinus. Quæ licet sufficere possint singula: tamen præter cætera, successio Pastorum legitima, atque Ministrorum (quam ante Augustinum, etiam [i] Irenæus, & Tertullianus objecerunt suis hæreticis) continuata ab Apostolis, & a Christo, ad nostra usque tempora, sine intermissione ordinantium & ordinatorum, obturare poterit omnium obloquentium, & contradicentium ora. Quare rejiciendus omnis homo, qui

S 3

non

(f) 1. Thess. 4.

(g) Matth. 24.

(h) 1. Tim. 3.

(i) Iren. lib. 1. c. 15. &amp; 4. &amp; 1. 4. c. 42. Tertul. de præf. Ang. col. 3. dici.

non legitime vocatus, nec a superioribus Ordinariis missus, nomen sibi Pastoris, aut Doctoris Ecclesiæ usurpaverit. Canticorum primo rogat sponsum suum Ecclesia: Indica mihi ubi pascas, ubi cubes in meridie: ne vagari incipiam post greges sodalium tuorum. Et respondet: Si ignoras te, o pulcherrima inter mulieres: egredere, & abi post vestigia gregum, & pascce hœdos tuos juxta tabernacula Pastorum. De aliis dicitur: Ego non mittebam eos, & ipsi currebant. Et Apostolus Rom. 10. Quomodo prædicabunt, nisi mittantur? Nam si qui mittunt, potestatem mittendi non habent: quomodo dignoscantur a legitime electis, intrusi?

Dantur alia signa veræ Ecclesiæ: veluti continuum Missæ Sacrificium, quod prædictum erat a Malach. cap. 1: Continua prædicatio Evangelii, sicut promiserat Dominus Joan. 17. & Matth. 28. Diffidia hæreticorum, qui, ut Jerem. 2. foderunt sibi cisternas dissipatas, quæ continere non valent aquas: Apostasia multorum. 1. Petr. 1.: Persecutio, quam patitur ab Agar, id est, Agarenis, Turcis & Arabibus Mahometistis: de qua Paulus Galat. 4.: Invidia & odium Judæorum, de quibus Deuteron. 32. & Rom. 10.: Latibula hæreticorum, cum sit Ecclesia supra montem posita, & lumen super candelabrum, Luc. 2. De miraculis meminit August. jam supra & lib. 9. cap. 7. confess. & de Civitate lib. 22. cap. 9.

Sacramentorum denique usus separat vere Catholicos ab schismaticis, & hæreticis, præsertim in iis, quæ sunt essentialia. Unde merito quidam tria esse tradit, quæ perseverare aliquem in Ecclesia Catholica docent: Confessionem rectæ fidei, Sacramentorum communionem, & consentum in ordine hierarchico juxta instituta tradita divinitus.

Ex jam ergo expositis proprietatibus nomina sortita est varia Ecclesia Christi. Dicitur enim Corpus Christi. Ephes. 1. Coloss. 1.: quia in Spiritu Christi coaluit. Dicitur regnum Dei, propter leges & politiam ejus, Matth. 5. 23. Dicitur Sponsa Christi, propter fidem mutuo datam, & prolem in ea susceptam, Ephes. 5. Dicitur amica ejus, Cantic. 1. dicitur columba, propter simplicitatem & gemitus assiduos: turtur, propter castitatem: civitas, exercitus, hortus, vinea, mons. Etiam Apocalyp. 12. Mulier amicta sole, &c. ubi militantis hujus describuntur labores: & cap. 21. Civitas Sancta Hierusalem, descendens de cælo, triumphans proponitur.

## DE TEMPLO.

**T**emplum, quod Ecclesiam vocarunt Patres, quod domus Dei est, quod domus orationis a Christo dictum est, ut locus re vera sanctus, devoto adeundum est, teste Augustino, (k) ideo magna cum religione dedicari oportet: non a quocunque, sed ab Episcopo: ædificari autem sic, ut ad altare orantes, convertantur ad orientem, ad Christum scilicet, solem in animabus nostris orientem, quique ascendit ad orientem. Formam quoque ut plurimum navis damus ex Clementis Decreto, ut admoneamur, nos tanquam navi vectos in Ecclesia assidue fluctuare. Templi Salomonis ostium ad orientem spectabat, & in æquinoctio Sol oriens mane subito illud illustrabat usque ad Sancta Sanctorum. Sed nos alio respicimus. Cæmeterium (l) non debet majus esse, quam laterum quatuor quadragenorum passuum: nec minus, quam trigonorum: nec sine altari: (procul ab Ecclesia si fuerit) ut vere religiosus esse locus possit: & in ea re Sanctorum exempla sequamur, qui ad sepulturas Martyrum Ecclesias ædificabant.

Jure ideo optimo tanta immunitate gaudet Ecclesia, & libertate: quam qui violant, excommunicantur a jure. Sed sciro immunitatem dici exemptionem loci sacri: libertatem vero personæ, in se, & in iis, quibus libere utitur, docet Benedictus XI. in extr. c. Inter cunctas. Sed Canones libertatis Ecclesiæ invenies in Summula Cajetani, de excommunicatione.

Si scire vis, quoties ædificatum fuit templum in Hierusalem: Primum a Salomone in Monte Moria: deinde post reditum a captivitate Babylonica restauratum a Zorobabel. In cujus reædificatione consumpti fuerunt 46. anni. Antiochus hoc profanavit: sed purgatum fuit a Maccabæo, reposito altari, sicut erat prius. Deinde dirutum & reædificatum ab Herode: factumque multo magnificentius, quam esset antea: ad similitudinem illius primi Salomonis, ut ipse agebat. Hujus lapides & structuram, mirabundi ostendebant Christo discipuli ejus, cujus ne lapidem quidem mansurum super lapidem respondit. (m)

## STATUTUM I.

**U**bi ob locorum distantiam, vel difficultatem populus ægre potest ad Ecclesiam Parochialem convenire,

(k) August. ad Cresc. l. 4. c. 40. & Ep. ad Bonifac. 187. De dogm. Eccles. & aliis in locis Conc. Hipp. De conf. d. 3.

(l) Part. 1. leg. Hisp.

(m) 3. Reg. Agge. 1. Eld. 1. 4. Joan. 6. Macca. 2. cap. 10. Josep. 2. 14. Matt. 24.

nire, novas Parochias etiam invitis Rectoribus erigemus. In quibus vero populus numerosior est, cogentur Rectores secum alios Presbyteros assumere, qui sufficient Sacramentis administrandis, & cultui Divino celebrando. Et ubi magna erit Ecclesiæ paupertas, plures in unam convertemus, sed sine præjudicio tamen obtinentium.

Transferemus quoque Beneficia simplicia ex Ecclesiis, quæ vetustate, vel alias collapsæ, nequeant restaurari, in alias, cum eisdem oneribus & emolumentis. Sed Parochiales recti procurentur ex fructibus ipsarum Ecclesiarum, vel Parochianorum. Quod si nimia egestate omnes laborent, ad viciniore, vel matrices transferantur.

### *SUPER ECCLESIIS POLLUTIS Anno 1569.*

**C**alamitatis recens memoria, quam a nonnullis exercitum Voltangi Gemini pontis, Ducis Palatini sequentibus in mense Martio proximo accepimus, omnes movere debet: præcipue vero nos Ecclesiæ Ministros, quorum odio flagrantēs hæretici bonam Bisuntinæ Dioecesis partem, cæde, incendio, atque ruina devastarunt. Nullum namque exemplum ab his prætermisum est sceleris in Dei Ministros. Et videntur certe in hoc tantum convenisse, ut memoriam Christi omnem extinguant. Nam JESU Christi Redemptoris, & gloriosæ Matris ejus, atque Sanctorum, imagines contumeliose fregerunt: Ecclesias, & domos Divino cultui dicatas incenderunt: Sacerdotes trucidarunt: Altaria diruerunt: Sepulchra everterunt: Sacra omnia profanarunt. Et, quod horrendum dictu est, nefariis manibus suis Sacrosanctum JESU Christi Domini nostri Corpus arripientes, perque pavimenta projectantes, pedibus insultando conculcarunt. Et ne quid etiam omitterent impietatis, Baptisteria (quæ ad ablutionem peccati & munditiam animæ in Ecclesiis præparantur) in usus illi non tantum sordidos verterunt, sed & stercore repleverunt & sordibus. Hæc illi. Sed eorum mens, & conscientia cum sordida sit, & immunda, pollueri ipsos tantum auctores tantorum scelerum potuit: Ecclesia Sancta, Christi Sanguine mundata, quanto majora ab infidelibus probra sustiner, tanto gloriosior evadit: & quanto magis conculcatur ab hostibus, tanto nitidior

solet ac fulgentior consurgere. Isti occidunt corpus, sed animam non possunt occidere. Ecclesias violant, sed Templi Dei violatoribus nunquam prospere successit. Cæterum quia super hoc tanto scandalo maxima pars Dioecesis nunc turbata est: & in multis incerti, quid agere debeant Viri Ecclesiastici remedia poscunt, & Prælati sententiam;

### STATUTUM I.

**I**dcirco Pastores omnes, & Ministros Ecclesiarum nostræ Dioecesis moneamus, & hortamur in Domino, ut plebes suas, & populos sibi subditos, tum in concionibus, tum in privatis confessionibus, hæc doceant, & similia, prout Spiritus Sanctus dabit: Hortentur omnes in fidei constantia manere: a vitiis abstinere, & peccatis: maxime vero mortalibus, propter quæ venit ira Dei. Perpendentes secum singuli, & conscientiam quisque suam examinantes, quod si pro commissis nostris nos punire Dominus decrevisset: multo graviora his commervimus. Sed speremus magis in eo, & in Christo JESU: qui lavit nos a peccatis nostris in sanguine suo, ut simus sancti & immaculati in conspectu ejus.

### II.

Prohibemus ergo imprimis, ne Missæ in altaribus fractis, nec in Ecclesiis, ruina vel incendio vastatis, aut pollutis, Divina celebrentur: nec in earum Cœmiteriis sepeliantur fideles, donec reconciliata hæc omnia sint Episcopali benedictione. Reconciliationem autem per omnia illa loca brevi facturum est R. D. Suffraganeus, visitando sicut incepit, & sine sumptu, quantum poterit.

### III.

Pollutas autem Ecclesias declaramus, & Cœmiteria denuo consecranda, in quibus hæretici, vel excommunicati (quales sunt isti hostes fidei Catholicæ) sepulti fuerint: deinde in quibus cædes factæ, vel sanguis violenter effusus, vel Veneris quæcunque opera perpetrata. Quarum quoque altare loco morum est, vel altaris reliquæ extractæ: omnes hujusmodi reconciliatione



tione indigent. Sed in quibus equi, boves, sues, aut alia animalia, stabulata fuerint: vel in quibus ipsi milites, sive propter suas necessitates, sive in contumeliam loci sacri turpe, aut fœdum quidvis commiserint: hæc poterunt pro hac vice tantum Sacerdos, Curatus, vel Decanus, & Abbas, vel Prior in Regularibus, propter populi scandalum expiare cum aqua Gregoriana, seu exorcizata.

## IV.

Ciboria & fontes Baptismi munden-  
dentur diligenter: hoc enim sufficiet, nisi  
populus nova malit facere. Quoniam  
sicut hæc ipsa non consecrantur ab Episcopo,  
sic neque polluta declarantur ab Ecclesia.  
Super altare autem fractum poterit tabula  
marmorea consecrata (altare vocant portatile)  
parari, atque in ea Missa celebrari, donec  
Ecclesiæ ipsæ restaurentur: & ubi pollutum  
sit Cœmeterium, non polluta Ecclesia;  
permittitur nunc, ut in Ecclesia sepeliantur  
fideles, qui hinc ad duos menses vita decesserint.

## V.

Atque hæc quantum ad reconciliationem  
locorum Sacrorum. Pro administratione  
autem Sacramentorum, quam cessasse hoc  
vastationis tempore in multis locis dolendum  
est: hæc, quæ sequuntur, observanto.

## VI.

Imprimis parvuli (qui baptizati non sunt)  
baptizentur statim, vel in propria Ecclesia,  
vel in alia, nisi polluta sit. Et communicabunt  
sibi mutuo Curati non solum Ecclesias, sed  
alia omnia ad hæc necessaria, benigne & sine  
spe ulla quæstus. Ubi vero vastati sunt  
Sacri Fontes, poterit nihilominus benedictio  
solemnis fieri in vase mundo, super altare,  
vel loco convenienti, intra Ecclesiam servando.

## VII.

Eucharistiæ quoque & Pœnitentiæ  
Sacramenta, qui in hoc Paschate propter  
eadem impedimenta non receperunt, confiteantur  
jam propriis Sacerdotibus: & Dominica proxima com-

municentur: nisi majoris excommunicationis  
sententia sint innodati. Alias enim expectandum  
eis erit remedium salubre absolutionis, vel suspensionis.  
Cumque dies quadragesimalis jejunii jam omnino  
transacti nunc sint, & jejunium solverit ubique  
Ecclesia: declaramus, licuisse his vesci carnibus,  
& aliis omnibus, licet adhuc confessi non fuerint.  
Quamquam decebit maxime, qui confiteri deliberant,  
ut ob reverentiam suscipiendi Corporis Domini,  
die aliquo se præparent antea cum jejunio.

## VIII.

Matrimonii denique benedictio in Ecclesia fiat non polluta, sicut res aliæ omnes  
sacræ.

## IX.

Intelligent autem Curati, quod Ecclesia polluta,  
pollutum quoque habetur cœmeterium, non contra;  
quia pollui potest cœmeterium, non polluta  
Ecclesia. Quare si qua est Capella, vel ædificium  
aliud honestum, quod hujusmodi sacrilegorum  
manus, vimque evaserit: poterunt Venerabiles  
Abbates, & Religiosi, ac Curati, & Cappellani,  
atque alii ad Divinum officium deputati (viri,  
atque fœminæ) Horas Canonicas, & preces facere  
in eo. Non autem in polluta.

## DE SACRAMENTIS IN GENERE.

Sacramentum Latine, Græce dicitur Mysterium.  
Et hoc quidem generaliter significat, quicquid sub  
figura rem continet admirabilem: ut Dan. 2. Eph. 1. & 5. Col. 1. 1. Tim. 3. Apoc. 2. Nos arctius accipimus,  
pro signo rei Sacræ. Estque Sacramentum (ut ex Divo  
Augustino, & aliis sumpserunt Theologi) invisibilis  
gratiæ visibilis forma. Dominus enim noster  
JESUS CHRISTUS novum suum populum non solum  
notis quibusdam exterius, colligari in unam societatem  
& congregationem voluit, numero paucissimis,  
observatione facillimis, significatione præstantissimis:  
sed etiam mysteriis, hoc est, cæremoniis, & signaculis  
sanctificantibus, sibi devotos initiari, atque  
dedicari sibi: Sanctificantibus, inquam, non propria  
quidem rerum externarum virtute, aut meri-

merito Ministri: sed Domini instituentis, atque secretius operantis. Itaque quamvis deceat bonum esse Sacramentorum Ministrum: tamen malus potest ea utiliter, digne suscipientibus, dispensare, faciens ea, quæ ex Christi institutione Ecclesia declaravit. Atque hoc est, quod dicunt ex opere operato gratiam conferre: non operantis Ministri vi, vel suscipientis. [n]

Sunt Sacramenta Ecclesiæ Catholicæ septem: scilicet, Baptismus, Confirmatio, Eucharistia, Pœnitentia, Extrema Unctio, Ordo, & Matrimonium. Et unum quodque horum suæ institutionis causam habet: vimque suam rebus, quibus conficitur, velut in ænigmate ostendit. Siquidem Baptismum instituit Christus, ut per illud regeneremur in novam creaturam, qui antea eramus filii iræ: & sit lavacrum nostræ regenerationis, abluendo nos a sordibus peccati originalis. Per Sacramentum Confirmationis datur Spiritus Sanctus ad robur & constantiam, & conservationem gratiæ acceptæ in Baptismo. In cujus rei signum unguuntur veluti athletæ, & in mala percutiuntur. Eucharistia nos pascit alimonia Corporis & Sanguinis Domini. Pœnitentia in remedium instituta est, si quando in crimen & peccatum incidimus: ut hac, veluti in naufragio secunda tabula apprehensa, salvemur. Per extremam Unctionem subsidium animæ, & corpori habemus in articulo mortis (tempore illo periculosissimo) contra hostis iniqui tela ignita: & si in peccatis sumus, remittuntur nobis. Ordinibus Sacris gratiam quoque accipimus, quæ ad ministeria Ecclesiæ obeunda apti efficiamur, habiles & idonei. Matrimonium honorabile, & thorus immaculatus: si in Christo fiat, gratiam confert, & efficit, ut ipsis conjugibus legitimus congressus non imputetur ad culpam. Nullum denique est, cujus virtus, vel justitia non esse incipiat in sumente absque impedimento, vel non augeatur incepta, vel non reparetur amissa. Atque hæc quidem vis est Sacramentorum. Multæ dantur præterea causæ congruentes a Theologis institutionis Sacramentorum, quæ brevitatis causâ omittimus.

Ex quo patet, non tantum duo esse ponenda Sacramenta: licet D. August. Epist. 118. & lib. 3. de doctr. chr. c. 9. aliter videatur quibusdam sentire. Nam de duobus Baptisma & Eucharistia, ita sæpe loquitur, ut duo hæc necessaria omnibus affirmet, etiam infantibus. Nec in his locis alia secluserit, dicendo: Et si quid aliud in Script. Can. commendatur, &c. Hoc uno verbo dictum fit contra adversarios Ecclesiæ.

Nec illud repetamus, quod in unoquoque Sacramento duo sunt spectanda. [o] Unum est, externum Sacramenti signum, influens oculis & auribus: alterum vero res Sacramenti, hoc est, Divina & spiritualis illa vis, quæ per Sacramentum efficitur, & significatur. In signo rursus duæ res adhibentur: una materialis, analogiam aliquam habens ad id, quod fieri per Sacramentum creditur: altera est verbum, quod id ipsum significat expresse. Ut in Baptismo [quo a peccato tanquam lavamur] aqua est materiale signum: verba sunt hæc: Ego te baptizo &c. quæ tanquam forma addita materiæ Sacramenti substantiam perficiunt. Effectus est in Baptismo mundatio a peccato, & character impressus: quanquam certe non omnia Sacramenta imprimunt characterem, ut neque omnia reiterari possunt.

Et quanquam Sacramenta salutem operantur, quam fieri significant: non ideo tamen Catholici in Sacramentis ipsis acquiescimus, sed in Christo, qui Sacramentorum author existit. Ea nos pro instrumentis habemus, & vasis quibusdam, per quæ Dei gratia & Christi meritum, applicantur. Applicantur, inquam, via ordinaria: nam & sine Sacramento res Sacramenti dari a Deo potest, per privilegium: & signum visibile fieri absque vera sanctificatione in ponente obicem peccati, vel fide accedente. Doctrina est D. Augustini in multis locis. Nec desinunt propterea esse Sacramenta, quod effectu careant: nam qui non dijudicat Corpus Domini, non tamen non manducat illud.

De differentia porro Sacramentorum novæ legis atque veteris, sic loquitur Aug. in Psal. 73. quod illa salutem dant, hæc Salvatorem promittebant, quia umbra erant, corpus autem Christi. Ideo dicimus nos Sacramenta novæ legis ex opere operato justificare: illa per fidem: quia opus erant perfectæ religionis.

Ex hoc igitur, quod actus essent ex virtute veræ religionis, meritoria censenda fuerunt. August. quoque lib. de pecc. orig. cap. 30. datam ait circumcisionem ad abluendum peccatum orig. sicut Baptismum. Idem ait Greg. lib. 4. Moral. c. 2. An vero ex vi sua peccata eluerent, hoc opus hic labor est. Justinus argumentatur: Si ex vi sua circumcisio dedisset gratiam, non fuisset data solis masculis, sed etiam fœminis. Quare in signum tantum datam fuisse ait, non in salutem. Idem Origenes, Tertul., Cypr., Chry. Nam carnalia erant, & egena, & infirma elementa, & umbra, quæ neminem ad

[n] Cypr. serm. de Cœna. Aug. lib. 3. contra Donat. c. 10. & lib. 5. c. 19.

[o] Aug. Epist. 23. & de Catech. rud. c. 26.

ad perfectum adducere potuerunt, ut Apostolus testatur. Ministri quoque eorum literæ occidentis erant, nos vero Spiritus vivificantis. Atque hæc quidem obiter. Nunc ad propositam materiam redeamus, & ad ea, quæ requiruntur in administratione Sacramentorum.

Intentionem requiri intellige non actua-lem semper, sed sufficit virtualis: quæ tunc adesse dicitur, cum actio nostra ab alia intentione præcedente procedit. Ut si quis Missam celebrare, & pro aliquo orare decrevit: omnia, quæ ab hac deliberatione postea sequuntur, & si actuali intentione ac voluntate careant, non tamen virtuali, quæ satis est.

Quantum vero ad cæremonias, & ritum attinet, quoniam Ecclesia sola est, quæ a Christo Sacramentorum thesaurum accepit, & verum ac legitimum usum eorum tenet, & novit: idcirco Minister in omnibus se Ecclesiæ conformabit, non solum in iis, quæ sunt essentialia Sacramentorum: sed etiam in accidentalibus, quæ plerumque significationis causa, aut pietatis excitandæ gratia, instituta sunt, aut ex veteri traditione Apostolorum accepta: & aliquando etiam mutata, pro ædificatione fidelium. (p)

## STATUTUM I.

**D**Ebet Minister Sacramenti intentionem habere agendi illud, quod Christus instituit, & Ecclesia facit.

### II.

In his omnibus, quæ ad ritum & cæremonias pertinent, mutare aliquid nemo privatus audeat, sub pœna suspensionis ab Ordine: si id ignavia, vel ignorantia, aut alio vitio commiserit. Nam ex pertinacia hoc faciens, tanquam schismaticus punietur: quod Ecclesiæ sensum perturbet.

### III.

Quia igitur in Sacramentis aliud videtur oculis, atque aliud agitur Divina gratia secretius; ne tanta Dei beneficia ignorentur, aut putentur otiosa esse spectacula, nec suo habeantur in honore, aut indigne tractentur: instruendus est populus in cujuslibet administratione, ubi commode fieri poterit: frequenter etiam docendus in concionibus, ubi inciderit locus: quid in

Sacramenti cujusque collatione agatur: quis sit ejus fructus: quid velint signa externa: quomodo Dei virtus præsens invisibiliter eis adsit: quomodo etiam digne vel indigne percipiantur, & similia.

## DE BAPTISMO.

**S**acramentum Baptismi, janua dici solet omnium Sacramentorum: quia nullum confertur aliud Sacramentum ante Baptismum: institutum quidem a Christo, ut ablueret nos a peccatis, sanctificaret, & justificaret. Hoc Sacramentum facit, ut consequamur remissionem peccatorum nostrorum, originalis, scilicet, & actualium, si actuale aliquod commiserit quis ante Baptismum. Per hoc nos Christum induimus: per hoc filii efficimur Dei, & fratres Christi per adoptionem, atque hæredes regni cælorum. Nec sine Baptismo quis salutem consequi potest, sive adultus sit, sive parvulus. Alios multos effectus recenset Aug. lib. contra Jul. c. 2. & Chrys. de Bapt.

Baptismus tamen triplex est: fluminis, fluminis, & sanguinis. De Baptismo autem fluminis hic intendimus tractare, & non de aliis: quia alii per analogiam ad hunc dicuntur. Unus enim Deus est, una fides, unum Baptisma. Martyrum passio, Baptismus dicitur sanguinis. Fluminis est Spiritus Sancti. Act. 1. cap. Baptismi autem fluminis, sive aquæ, nomina multa recitat Chrys. hom. 4. ad baptizandos.

In hoc Sacramento Baptismi quædam sunt de substantia: alia de solennitate solum: quæ si omittantur, nihilominus verus esse potest Baptismus: licet peccet mortaliter, qui ea omittit, ut supra dictum est. Sine substantialibus autem esse non potest Baptismus.

De substantia hujus Sacramenti sunt quinque, & necessaria omnino. Primum expressio formæ vocalis, quæ est hæc: Ego baptizo te in nomine Patris, & Filii, & Spiritus Sancti. Vel lingua vernacula ab idiosis: *Je te baptize au nom du Pere, & du Fils, & du Saint Esprit.*

Secundum est ablutio vel elementum aquæ fontis, vel fluminis, vel putei, vel pluvie, vel nivis resolutæ, vel maris, vel paludis, vel lacus, sive frigidæ, sive calidæ: quæ ablutio fiat vel in toto corpore, vel in parte corporis digniore scilicet, ut in capite.

Tertium est, quod ablutio ista fiat uno & eodem tempore, quando forma verborum

(p) Tertul. l. de Baptif. Refor. Cler. sub Carolo.



rum supradicta exprimitur: non ante, nec post, neque sic, ut unus puerum abluat, alter verba proferat: sed unus & idem teneat, altera manu puerum & abluat, & verba proferat.

Quartum est intentio faciendi id, quod facit Ecclesia: & specialiter hic in Baptismo est, ut baptizandus abluatur a peccato originali, & aliis omnibus peccatis, si adultus fuerit. In quo etiam (adulto scilicet) requiritur similis intentio: quoniam ab invitis non recipitur aliquod Sacramentum. Quapropter quæri solet, an possint invitis parentibus, in quorum potestate sunt, baptizari pueri. Communis opinio est, non debere fieri, sed factum tenere.

Quintum est fides explicita, vel implicita ipsius baptizandi: quoniam in adultis requiritur fides propria: in parvulis vero fides aliena sufficit, scilicet susceptorum, qui totius Ecclesiae nomine pro eis abrenunciant, credunt, & spondent. Quanquam videtur nonnullis non magis requiri fidem in susceptore, quam in baptizatore.

Parvuli enim in fide Ecclesiae baptizantur. Sed Christus Iesus respiciens fidem offerentium infantes, ut eos tangeret, complexatus, dixit illorum esse regnum celorum. Ex hoc videtur (q) Iustinus, qui Augustino dicuntur semper Susceptores, vocasse Offerentes: Tertull. (r) Sponsores: Nos vulgo Paternos, a Dionysio (s) sumpto vocabulo, quasi genitores secundarios appellamus.

Atque hæc quidem omnia necessaria sunt ad verum Baptisma. Sunt alia octo de solennitate, significantia res, quæ in Baptismo fiunt. Unde Versus:

*Chrisma, sal, atque oleum, cereus, chrismale, saliva,*

*Flatus, crux: virtus baptismatis inde notatur.*

Siquidem ex veteri traditione, & ritu Ecclesiae, duo præcedere debent Baptismum: Catechismus, & exorcismus. Antequam enim baptizandi sisterentur ante fontem baptismalem, [quod fieri solebat in Sabbato Sancto Paschæ, & Pentecostes] aliquo tempore antea, ante fores Ecclesiae instituebantur, ac docebantur rudimenta fidei, elementaque doctrinæ Christianæ, & vitæ melioris: quæ institutio dicitur Catechismus: & ipsi, qui edocti baptizari postulabant, competentes & catechumeni: id est, audientes: & pœnites, seu resipiscentes propter vitæ conversionem, & jejunia, & orationes, quibus vacabant. Dicebantur etiam signati, quod signo Crucis frequenter signarentur.

Dant hic baptizandi sua nomina, tanquam novæ militiæ se Sacramento obligantes: abrenunciant diabolo, & pompis, atque operibus ejus, tam verbo, quam gestu exsufflantes in illius derelictionem: & signaculo crucis sæpius impresso, armantur contra diabolum: qui virgam, qua percussus est, semper timeret. Salem dabat Minister catechumenis inter solennes Paschales dies: (non Sacramentum) quia sapientia condiri oportet deinceps actiones, & cogitationes hominis Christiani, quem Baptismus a corruptione, & fœtore peccati liberavit. Dabatur quoque panis benedictus, sive sanctificatus, qui panis dicebatur catechumenorum, & figura corporis Christi: sed non corpus ipsum.

Exorcismo, id est, adjuratione, (qui sermo increpatorius est spiritus immundi) per manus impositionem & Crucis signum, tanquam flagello, expellitur diabolus: in cuius potestate eramus propter peccatum. Et licet nunc orationes, adjurationesque simul mixtæ habeantur cum Catechismo: tamen olim fiebant per totam Quadragesimam: maxime vero quarta feria post Dominicam Quadragesimæ de Lætare: & quinta feria majoris hebdomadæ fidem reddebant verbis conceptis, sicut didicerant. Alii etiam octo diebus ante Pascha. Vocabant mysterium hoc, apertionem aurium: quia in hoc tangit Sacerdos luto ex saliva aures, & nares: ut catechumenus præparetur ad audiendum legem Domini, & orandum. Ubi rursus abrenunciant Satanæ, facta renunciatione convertuntur ab occidente in orientem, quasi a diabolo ad Christum.

Exorcismis factis, introducuntur baptizandi in Ecclesiam, & unguntur oleo catechumenorum in pectore, tanquam athletæ Christi: & inter scapulas, ut patienter ferre possint labores & ærumnas hujus vitæ pro Christo. Et rursus, antequam baptizentur, dant sua nomina: rursusque profitentur fidem, juxta interrogationem Sacerdotis. Sic fieri solet, quando recensentur milites post magnum certamen.

Paratus ergo Sacerdos abluere, interrogat semel, iterum, & tertio: Vis baptizari? quia nemo invitus baptizari debet. Quod si velit, abluatur in nomine Patris, &c. Post hæc tandem ungitur Chrismate in vertice, tanquam in Regem & Sacerdotem, & veste candida induitur: quia quicumque in Christo baptizati sunt, Christum induerunt. Et lampadem accipit offerendam mysteriis: ad significandum lumen fidei, qua illuminatus est per Baptisma. Quare Sancti Patres (præsertim Græci) Sacramentum Baptismi, præter

(q) Justin. q. 56.

(r) Tertull. de Baptism.

(s) Dion. de Bapt.

Tomus VIII. Concilior. German.

T 2

ter alia nomina, quæ recitat Chrysost., sæpe Sacramentum luminarium appellarunt; & Paulus illuminatos, baptizatos: quia Baptismus in nocte Sancti Paschæ, cereo Paschali, & multis luminibus illustrata celebrabatur, quando magna solennitate fontem baptismalem, cum sanctis precibus, & cum cereo Paschali, invocatione Sancti Spiritus, & cum Chrismate consecrabant. Quod etiam observavit semper Ecclesia, inde ab initio, ad nostra usque tempora. Chrismate enim significatur Spiritus Sancti gratia: ut intelligamus (sicut Sanctus Hieronymus ait) non aquam esse, quæ lavat animam, sed lavari eam potius a Spiritu Sancto, ut alios lavare spiritualiter possit. Et ideo Augustinus: Unde ista tanta virtus aquæ, ut corpus tangat, & cor abluat, nisi faciente verbo? Non quia dicitur, sed quia creditur. Nam & in ipso verbo aliud est sonus transiens, aliud virtus manens. Per cereum Paschalem accensum & deductum super fontem in Crucis modum, significatur hoc vere agi in Baptismo, quod præfiguratum Apostolus tradit fuisse, in transitu maris rubri, per columnam nubis, quæ interdum velamento erat contra ardorem Solis, & noctu syderei splendoris vicem gerebat peregrinis.

Fiebant adhuc plures olim cæremonia in Baptismo, ut majoribus, pluribusque actionibus devincerentur, devinctosque se esse agnoscerent baptizati. Lavabantur siquidem eorum pedes: dabatur eis lac & mel, tanquam infantibus recens natis. Ad quod respexisse videtur Apostolus Heb. 6. & 10. ubi renovari posse negat aliquem per penitentiam: id est, baptizari denuo. De trina immersione usus apud nos abolevit, non item apud Anglos. Fiebat autem in mysterium Trinitatis, ut docet Basilus. Videtur hic ritus primum cessasse in Hispania, propter Arrianos, qui tres naturas in Trinitate per trinam immersionem signari volebant.

Fontem baptismalem nos Baptisterium, a Græcis vocamus. Qui etiam aliter nominant *καλυμνήραν*: id est, lavatorium, vel natatorium. Dionysius, *μυστήριον τῆς υιοθεσίας*, matrem adoptionis. Alii *Φωτιστήριον*, ab illuminatione. Ambrosius regenerationis Sacramentum.

### *De Baptismo Joannis, & Circumcisione, & de pueris sine Baptismo decedentibus.*

**C**Æterum hic duæ existunt res examinandæ: Baptismus Joannis, & Circumcisio: habent enim affinitatem magnam cum Baptismo Christi. Ac primum quidem quaeritur, quo differat ab hoc, Joannis Baptisma:

quid quoque valebat Circumcisio: & quaestio ex his emergens, quid dicendum de pueris sine Baptismo decedentibus. Quanquam perplexæ quaestiones sunt, & quibus implicari curiosius non expedit Curatos: tamen ut sapientibus & insipientibus morem geramus, quia lectorum non idem genius unquam reperitur; Ad primam dicimus: Sicut fuit Joannes præcursor Christi: sic ejus Baptisma fuisse veluti Catechismum quendam, præparantem discipulos ejus ad Christi Baptismum: nec gratiam contulisse, nec abstulisse peccata. Ego [inquit] baptizo in aqua. Et sequitur: Qui misit me baptizare in aqua, ille dixit mihi: Super quem videris Spiritum descendantem, & manentem super eum, hic est, qui baptizat in Spiritu Sancto. Quasi dicat: Ego corpus lavo: sed ille spiritum mundabit. Et Dominus Jesus: Joannes quidem baptizavit aqua: vos autem baptizabimini Spiritu Sancto. Ergo gratiam non conferebat, sed præparabat ad gratiam: & penitentiae professionem in illo faciebant baptizati, in remissionem peccatorum, quam obtinere se sperarent per Christum. Quare & Baptismus penitentiae dictus est, sicut etiam Christi Baptismus: sed diversa ratione. Ille ad penitentiam invitabat: id est, non solum ad mutandam vitam in melius, sed ad agendum fructus dignos penitentiae. Hic autem antequam recipiatur, penitere oportet candidatos. Hic quoque in remissionem sumitur: quia in eo peccata omnia remittuntur. Ille quoque ideo in remissionem, quod hortaretur ad penitentiam, ut remissionem obtinerent. Quare nec Sacramentum existimandum volunt: licet quidam aliter senserint. Ex his multum probabile colligitur, baptizatum fuisse Joannem a Christo, postquam Christum ipse baptizasset. Dicit enim: Sine modo: quasi velit: Postea ego, quod meum erit, faciam. Siquidem Apostoli, quos in Joannis Baptismo tantum baptizatos intellexerunt, baptizarunt in nomine Domini JESU. Act. 19. Aliis tantum manus imposuerunt, qui in nomine Jesu baptizati erant. Act. 8. Ob hanc rem proprie appellatur Baptismus Christi lavacrum regenerationis: illud Baptisma penitentiae. Scripserunt multi de hac materia: Cyrillus in Joan. c. 1. August. contra Donat. lib. 5. c. 9. & seq. contra epist. Petil. l. 2. c. 37. Hieron. in Joel. c. 2. & contra Lucif. Damascenus lib. 4. Theol. c. 10. Chrys. in Matth. hom. 14. Beda in Matth. 3.

Quando ergo Apostoli baptizati fuerint a Christo (renasci enim & ipsos oportuit) variant sententiae. Vide Tertull. de Bapt. Aug. de orig. animæ. lib. 3. c. 9. lib. 5. contra Donat. c. 10. Chrys. in Act. c. 1.

Ad

Ad quæstionem igitur de pueris non baptizatis, respondet (t) D. Augustinus: Quisquis dixerit, quod in Christo vivificentur etiam pueri, qui sine Sacramenti ejus participatione de hac vita exeunt: hic contra Apostolicam prædicationem venit, Rom. 4. Judicium ex uno in omnes in condemnationem. Cæterum ne quis putet iniquiorem fuisse Augustinum erga pueros sic decedentes, videat, quæ antea Origenes lib. 6. in Epist. ad Rom. & Dionysius Hierar. c. ult. Pelagiana hæresis est dicere, quod pueri etiam sine Baptismatis decedentes gratia possint præmiis vitæ æternæ donari. Nam illud palam est, quod loquitur (u) Christus: Nisi quis renatus fuerit ex aqua & Spiritu Sancto, non potest introire in regnum Dei. Si fides parentum (ut hæretici arbitrantur) liberaret nunc a peccato & a morte liberos eorum: liberasset profecto eadem ratione & filios Abraham non circumcisos. Sed aliter docet Scriptura: Masculus cujus præputii caro circumcisa non fuerit, peribit de populo meo. At [inquiunt] si parentes sancti sunt, & filii sancti erunt, ut videtur ex 1. Cor. 7. O argutam rationem! Quasi vero unius semper modi dicatur sanctificatio. Primi Reg. 21. Vasa puerorum David sancta dicuntur: id est, munda ab ea re, qua de Sacerdos loquebatur. Sic sanctum dicimus, quod sine macula, vel nota est. Sic filios illic sanctos, id est, sine nota vel macula illegitimorum intellige: & virum infidelem a muliere fidei sanctificari, ut in honorem conjugii, non oblit fidei consuetudo infidelis: & catechumeni secundum modum quandam sanctificantur: & quod accipiunt, inquit B. August., quamvis non est corpus Christi, sanctum tamen est: & cibum sanctificari verbo Dei author est Apostolus. Quare Apostolus (x) illic non de justitiæ sanctificatione, aut gratiæ Dei loquitur: neque enim filii eo loco sancti magis dicuntur, quam vir infidelis [quem sanctificari per mulierem docet] nisi fidem habeat in Christo. Potest quidem salvare omnes Deus: quoniam virtus ejus Divina non est alligata Sacramentis. Sed quamdiu legitur Christi Evangelium [nisi aliter revelatum fuerit] perire omnes pronuntiabimus, quos sine lavacro regenerationis mors intempesta occupavit. At, inquires, quod apud nos valet aqua Baptismi, teste magno Gregorio, hoc agebat apud veteres, vel pro parvulis sola fides, vel pro majoribus virtus sacrificii, [sive oblationis] vel pro his, qui ex Abraham stirpe prodierant, mysterium circumci-

tionis: Ergo a fortiori nunc, qui sub gratia, si deest Baptismus, fides sufficiet parentum. Namque remedium nunquam defuit contra peccatum orig. In Lege naturæ Sacrificia & Oblationes erant: in Mosaica Circumcisio: in Evangelica Baptismus. Ergo in utero periclitantibus nullum ne erit solatium? Responde cum Paulo (y): Quam incomprehensibilia sunt judicia Dei! Sanctificavit certe aliquos Deus ex utero: sed privilegio paucorum. Dictum Gregorii, quod citavit Gratianus, (z) non magni fit a Durando: qui Judæorum filios opinatur ante circumcisionem salvari: non per solam fidem tamen parentum, sed per fidem, & signum aliquod exterius. (a) Sequi videtur is Alexandrum de Ales. Eum sequitur Adrianus sextus: hunc etiam (b) Cajetanus. Hanc sententiam refert S. Thom. in quodlib. 6. art. 4. Sed non subsistit: quia non invenitur præceptum aliquod signum fuisse aliud, præter circumcisionem. Idem Bonavent. & Richard. Biel. (c) Soto autem acriter hic pugnat cum Cajetano: aliis licet parcens. (d)

Idem S. Bonaventura rem hanc ingeniose distinguit. Proponit enim considerandum triplicem hominis statum. Unus est in utero matris: alter extra uterum, in infantia: tertius in ætate jam adulta. In primo, soli Deo notus est: in secundo, notus est Deo & Ecclesiæ: in tertio, & Deo, & Ecclesiæ, & sibi ipsi. Existens in primo ab uno Deo solum salvari potest, cui soli notus est: in secundo, per Ecclesiæ Sacramenta: in tertio etiam per fidem propriam, ubi copia deest Sacramenti. Sed requiritur in adulto præter Sacramentum etiam fides propria, quæ in puero sufficit aliena: nempe Ecclesiæ cum Sacramento.

De Circumcisione autem hæc scire convenit. Data fuit circumcisio Abraham in signum justitiæ fidei, & in fœdus, quod percussit Deus voluit cum eo: ut esset memoriale fidei, per quam meruerat Abraham, adhuc in præputio existens, ut sibi servarentur promissiones. Rom. 4. Signum accepit circumcisionis, signaculum justitiæ fidei, quæ fuerat in præputio. Gen. 17. Circumdetis carnem præputii vestri, ut sit in signum fœderis inter me & vos: eritque pactum in carne vestra in fœdus æternum.

Habes institutionem & originem Circumcisionis: sed cur in ea parte fieret, multæ dantur causæ. Una est, ut per occultum membrum, in quo figura quædam cordis occulta est, occulta mentis atque cordis circum-

T 3

(t) De fide ad Pet.

(u) Joan. 3.

(x) 1. Tim. 4.

(y) Rom. 11.

(z) 4. Sent. d. 1. q. 8.

(a) 4. de Sacramentis.

(b) In 3. part. S. Thom. q. 68. 4. Sent. d. 1. art. 11.

(c) Biel. 4. d. 4. q. 2.

(d) Soto. libr. 2. de natura &amp; gratia. cap. 10. 4. d. 3. q. 1.



cumcisio signaretur. Sic enim Apostolus: Non quæ in carne est circumcisio, sed circumcisio cordis in Spiritu, non litera. Altera, quod sicut per circumcisionem expiatur tunc peccatum originale: sic fieret in ea parte signum ejus, & tanquam cauterium imprimeretur, unde propagationis morbus sumit originem. Atque ob hanc causam sceminae ejus non fuerunt capaces. Quia generandi vis in viro est maxime, non sic in scemina. Quare etiam illud factum est, ut succedente Baptismo Christi, nocua sit circumcisio. Galat. 5. Si circumcidimini, Christus vobis nihil prodest. Fuit & alia causa. Dei namque populum electum symbolo aliquo distingui oportuit, cum in bello ab hostibus, tum a cæteris gentibus in pace. Quapropter in deserto, cum soli agerent Israelitæ, circumcidi cessarunt 40. annis. Nulla vero pars corporis notam poterat accipere, quam hæc, vel cum minori incommodo, vel cum minori turpitudine: quæ semper seposita servatur solícite ab hominum aspectu. Turcæ adhuc, & Mahometani omnes, se ab Abraham & Sara oriundos jactantes (unde Saraceni) circumciduntur: non octavo quidem die, sed pubertatis anno primo. Porro id ne ignorent idiotæ, nos circumcisos vocamus, a recisa pelle, recutitos: Horatius ut pelle diminutos, vocat apellas, & curtos.

**SEQUUNTUR CAPITA QUÆ-  
dam ex veteri Statuto in tit.  
de Baptismo.**

**STATUTUM I.**

**B**aptismus, Confirmatio, & Ordo nunquam iterantur, id est, non conferuntur uni personæ singulari nisi semel, seu unica vice: quia quodlibet ipsorum imprimit characterem indelebilem in anima.

Character in præsentí proposito, est quædam qualitas & facultas spiritualis: per quam suscipiens Sacramentum potest aliquid facere vel recipere, quod non poterat antea. Et ideo dicitur signum spirituale, distinguens eum, qui Sacramentum accepit ab aliis. Meminit D. Augustinus characteris in multis locis, præcipue contra Donatistas. Et videtur Ecclesia notionem accepisse hujus rei ex c. 1. Epist. 2. ad Cor. 11. & 4. ad Eph.

**II.**

Baptismi materia, qua utimur in Ecclesia, est aqua, simplex, naturalis (seu elementalis) benedicta, seu sanctificata sollemniter, secundum ritum Ecclesiæ in Sabbato Sancto Paschæ, & Sabbato Pentecostes.

**III.**

Baptismus tamen administrari potest in casu necessitatis aqua naturali, elementalí, pura & simplici, non benedicta seu sanctificata sollemniter.

**IV.**

Baptismus non debet fieri in saliva, in aqua rosacea, ardenti, vel alia artificiali, nec in cervisia aut vino: sed in lixivio fieri potest, si alia aqua non posset inveniri, quia aqua est naturalis colata per cineres: sicut in aqua naturali & pura, quæ per venas sulfureas transit.

**V.**

Baptismi forma hæc est: Ego baptizo te in nomine Patris, & Filii, & Spiritus Sancti, Amen. Quæ omnino debet observari, nihil addendo, minuendo, transferendo vel immutando de eadem: ut tollatur omnis dubietas, vel opinionum diversitas. Ea uno contextu debet proferri, ita ut non sit, aut fiat interruptio notabilis per longam pausam, & moram temporis. Quamquam verborum corruptio non viciat Sacramentum, modo sensus maneat: virtus enim verbi tanta est (Augustino teste) ut justum faciat, non quia dicitur, sed quia creditur.

**VI.**

Minister Baptismi proprius, specialis, & ordinarius, est Sacerdos, extra casum necessitatis: sed in casu necessitatis, omnis alia persona sive fuerit vir, sive mulier, sive fidelis, sive infidelis, Judæus, Paganus, hæreticus, possunt baptizare: dummodo baptizent in aqua, & verba debite proferant, cum intentione faciendi, quod facit Ecclesia.

Ecclesiastici olim Canones non nisi Episcopo & Presbytero dabant hoc ministerium: propter Ecclesiæ honorem: quo salva  
par

pax est, inquit Tertullianus. Sed in necessitate Eunuchus a Philippo Diacono baptizatus fuit, & a Laurentio multi. Ananias quoque Paulum baptizavit. Ab hæreticis baptizatos, non esse baptizandos iterum, definiuit Conc. Nicænum. Quare non refert qualem doctrinam is habeat, modo in nomine Patris, &c. August. contra Donat. li. 3. c. 14. licet dubitaverit aliquando antea de eo Ministro, qui ipse baptizatus non esset. [e]

## VII.

Pater & mater infantis in extrema necessitate possunt baptizare infantem suum: si non sit alia persona præsens, quæ baptizare sciat, aut possit, & non alias.

## VIII.

Doceant Curati obstetrices & suos Parochianos, integre, fideliter, & devote proferre verba formæ Baptismi in vulgari sermone, *Je te baptize au nom du Pere, & du Fils, & du Saint Esprit, Amen*: ut ministrare possint illud in forma Ecclesiæ, si casus necessitatis emerferit. Et doceant eas, quod simul cum prolatione verborum debent tenere infantem, & immergere illum in aquam secundum consuetudinem Ecclesiæ suæ, & quod habeant intentionem baptizandi secundum ordinationem universalis Catholicæ Ecclesiæ.

## IX.

Consuetudo Ecclesiæ est observanda in Baptismo, quo ad immersionem vel asperersionem; videlicet, quod ubi est consuetudo, quod puer immergatur in aquam, debet immergi: nisi timor esset de vita ex causa rationabili & evidenti. Et ubi est consuetudo, quod aspergatur, sive effundatur aqua super caput sine immersione, illa etiam observanda est.

## X.

Si puer dolore partus appareat vivus esse in utero matris, nec potest exire totus, sed apparet una pars corporis: Si caput apparet, debet baptizari, quia in capite vigent omnes sensus hominis exteriores & interiores. Si

autem pes & manus appareant, & non caput, ( si constet de vita, & periculum sit de expectatione totius ab utero ) debet baptizari, secundum communioem & humaniorem sententiam Doctorum.

## XI.

Si mulier præ angustia pariendi moriatur, & appareat partus in utero vivus: debet os ejus teneri apertum, ne suffocetur partus: & per probatum atque expertum chirurgum, aut incisorem, debet cum diligentia venter matris aperiri, & infans inde extrahi, ac baptizari.

Adde hinc veteri Statuto, ad majorem declarationem, quod si certum sit infantem non vivere, non scindatur mater: sed una cum infante ponatur in terra benedicta, quia corpus infantis quamdiu in utero est, censetur pars esse viscerum matris.

## XII.

Sacerdos interroget diligenter obstetrices, & alias personas, quæ defuerunt infantes ad baptizandum: si propter aliquod periculum vitæ infantis, de quo dubitaverint, illum baptizaverint, an non. Si responderint, quod non: procedat ad exorcismos, & alia per ordinem, prout in libro manuali continetur. Si vero infans baptizatus fuerit: interroget de forma verborum prolatorum. Quæ si integre & debito modo prolata fuerint, non erit infans ulterius baptizandus: quia Sacramentum est non reiterabile, ut dictum est. Debet autem catechizari & exorcizari, ut ritus Ecclesiæ servetur. Si vero re diligenter perquisita dubitet Sacerdos probabiliter, quod verba & alia necessaria non fuerint prolata & observata: baptizet sub hac forma: Si tu es baptizatus, ego non baptizo te: sed si tu non es baptizatus, ego baptizo te; In nomine Patris, & Filii, & Spiritus Sancti, Amen. Aliter vero nunquam ei fas erit.

## XIII.

(e) Clem. lib. 3. c. 10. 11. & lib. 11. & 8. Epiph. heres. 79. Tertull. de Bapti. De Conf. d. 4. c. Romanus. c. Quod est. c. Mulier. Conc. Carth. 4. c. 99. Aug. contra opin. Parm. c. 13. & lib. 2. cont. Don. c. 53. Hieron. cont. Lucif.

## XIII.

Infans , qui reperitur expositus, nec scitur a quo , nec apparent signa, vel testimonia , sitne baptizatus , nec ne: debet baptizari sub conditione, videlicet : Si tu es baptizatus, ego non intendo te baptizare: sed si tu non es baptizatus , ego baptizo te, &c. Et Gallice, si Laicus hoc faciat , dicat : *Enfant , si tu es baptisé , je n'entens pas de te baptiser : mais si tu n'es baptisé , je te baptise au nom , &c.*

## XIV.

In parvulis, qui baptizantur , sufficit fides & intentio recta illorum, qui ipsos offerunt ad Baptismum : quorum fidei professio parvulum obligat ad observantiam, quia pro salute ejus fit obligatio.

## XV.

Levantes puerum de Sacro Fonte, debent eum docere Orationem Dominicam , Pater noster : Salutationem Angelicam , Ave Maria: Symbolum Apostolorum, in quo continentur articuli fidei: scilicet , Credo in Deum Patrem omnipotentem , & Credo in Spiritum Sanctum: justitiam servare, charitatem tenere , & castitatem custodire.

## XVI.

Quia in Baptismo contrahitur cognatio spiritualis inter plures personas, propter quam multa Matrimonia impediuntur fieri: idcirco non admittantur plures, quam duæ personæ: videlicet, unus vir, & una foemina, in levatione unius infantis ad summum. Sciscitetur autem Parochus diligenter, antequam ad Baptismum accedat , quisnam electus sit ad suscipiendum infantem de Sacro Fonte: ne alius se pro Patrino gerat, licet puerum tangat, vel teneat.

## XVII.

Deinceps Sacerdotes Parochiales habeant librum, seu registrum, in cuius principio scribant annum, in quo inchoabitur, & consequenter mensem & diem Baptismi cujuslibet infantis , nomen ipsius , & nomina genitorum ip-

fius , nomina patrinorum & matrinorum; sic scribendo :

Petrus, Filius Joannis & Mariæ, natus die tertia Maji , baptizatus die vigesima ejusdem mensis. Cujus patrini fuerunt Gerardus talis & Catharina talis.

## XVIII.

Religiosi non debent pueros in Baptismo tenere, neque commatres habere, dum alii reperiri possunt.

## XIX.

In plerisque locis nostræ Dioecesis (ut accepimus) Sacerdotes quidam male docti baptizare præsumunt infantes mortuos ab utero matris : quos quædam vetulæ mulieres ebriolæ & modicæ conscientiæ, in Ecclesiis per duos, tres, vel plures dies observant, & postea testificantur signa vitæ in eis apparuisse, & post hæc in loco religioso & sacro sepeliunt: cum præmissa (si vera essent) miraculosa deberent merito dici. Ad quorum approbationem major indagatio & verificatio requiritur, quam sit testimonium vetularum. Cum igitur cum fidelibus nisi fideles sepeliuntur ; ideo, ne talia de cætero fiant, sine nostra, aut Vicarii nostri Generalis, seu Officialis, licentia , omnino prohibemus. (f)

## XX.

Baptizati inungantur in locis ordinatis Chrismate novo : id est, consecrato illo anno: & non Chrismate veteri. Sed illud comburatur in Ecclesia: & cineres in piscina aut juxta altare recondantur.

## XXI.

Baptismus celebretur in Ecclesia, & non extra : nisi in casu necessitatis. Et tunc fiat, ut supra dictum est, aut alio casu permissio a jure : & non alias.

Haftenus ex veteri Statuto Capitulum, ordine parum immutato. Quibus hoc solum addimus.

## XXII.

Si baptizatus a Sacramentariis, aut aliis hæreticis, Ecclesiæ Catholicæ reconcili-

(f) De Consec. dist. 1. c. Infideles, cum sequeari. Lappus in alleg. 83.



conciliationem postulet, & vere baptizatum esse constet, adeat Episcopum. Per eum injuncta pœnitentia reconciliabitur. Si vero facta inquisitione diligenti, dubitetur esse baptizatum, & baptizari secundum ritum Ecclesiæ Romanæ velit: eadem observabuntur illa, quæ supra diximus facienda circa illos, qui a laicis personis non certo baptizati offeruntur in Ecclesia. Quia licet hæretici plerique nostri temporis vere baptizent: a cæremoniis tamen nostris, & Ecclesiæ Romanæ dissentiunt. Quo fit, ut aliqui se baptizatos vere dubitent. Quod facere non debent, si de forma & materia adhibita certi sint. Quare interrogabuntur ipse baptizandus & Patrini, de modo & forma, quibus ab hæreticis baptizatus fuerit. Si vero dubitetur de forma: tunc utetur forma condicionali superius tradita: *Si tu es baptizé, je ne te baptize pas: Et si tu n'es baptizé, &c.* Et cæteris, ut dictum est, peractis, indutus baptizatus suis indumentis, audiet Missam tenens facem accensam in manibus, quam offeret in Ohiertorio. Patrini vero levantes offerent panem & vinum: & accepta Communionem & benedictionem Sacerdotis, dimittentur in pace.

## XXIII.

Curati scire debent, quod ex Ecclesiæ Statuto (g) cognatio spiritualis contrahitur in Baptismo, & in Confirmatione, quæ impedit Matrimonium contrahendum, & dirimit contractum: nempe baptizans & suscipiens (vel levans de fonte) cum suis uxoribus, & maritis jam cognitis dicuntur compadres parentum, id est, genitorum baptizati: & iidem patrini parentes spirituales sunt ejusdem baptizati. Filii quoque baptizantis & levantis fratres spirituales ejusdem baptizati dicebantur hætenus. Cæterum in Concilio (b) Trident. prohibitionum multitudinem contrahentes Patres, statuerunt, ut posthac inter levantes & baptizatum ipsum, & hujus patrem & matrem,

nec non inter baptizantem & baptizatum, baptizatique patrem & matrem, spiritualis cognatio contrahatur tantum, quæ impedimento sint Matrimoniis.

## XXIV.

Pro Baptismo nihil exigatur, sed si quid offeratur, illud accipiat Sacerdos secundum laudabilem consuetudinem, quæ observanda erit. (i)

## XXV.

In horum conviviiis modestia agnoscatur, luxu superfluo rejecto: maxime vero Presbyteri in his ab omni sermone abstineant impudico & vano.

## XXVI.

Fontes post solennem ipsorum benedictionem, & Chrisma, & Sanctum Oleum, sub clave & seratura custodiantur diligenter, & aqua ipsorum renovetur in Paschate & Pentecoste (k): quin etiam (quod absit) si casu aliquo corrupta fuerit, (ne quis ob corruptionem scandalizetur) renovari poterit: nec permittat Sacerdos, postquam Sacrum Chrisma admiscuerit, de aqua quenquam accipere, quia multa sortilegia & maleficia ex diabolica suggestionem fieri & procurari cum aqua hujusmodi, docuit experientia. Curatus autem circa hanc custodiam negligens, etiam si nihil nepharium inde contigerit, tamen suspensionis pœnam a jure incurret.

## XXVII.

Chrismalia infantum, & aliorum baptizandorum, munda & nova habeantur, & tam magna & lata, ut loca Sacro Chrismate & Oleo Sancto illita, regi omnino possint, ne alii panni eo pertingant.

## XXVIII.

Illi vero, qui in die Cœnæ, vel alias mittuntur ad Ecclesiam Cathedrali Sacrum Chrisma & Oleum petitori, in Sacris, vel minoribus Ordinibus sint constituti; ne indigni habeantur rem tam sacram deferre, & sciant discer-

(g) S. Thom. 4. d. 42. & alii Theologi c. Contracto. de cognat. spirit. & eodem titul. lib. 6. 30. q. 1. & 2. 3. 4.

(b) Sess. 24. c. 2.

(i) 1. q. 1. Baptizandis, c. Ad Apostolicam, de Simon.

(k) De celebr. Miss. c. Sane.

Tomus VIII. Concilior. German.

scernere vasa, ubi Christina, & ubi Oleum Sanctum contineatur, & caute in via, & in hospitiiis custodiant. (1)

Quando videbitur expedire, ut offerentes puerum, vel adultum ad Baptisma, exhortatione aliqua admoneantur, & de Sacramento ipso doceantur: (veluti quando magna est multitudo populi congregata) poterit Curatus, omnibus ante se positis, ante valvas Ecclesiæ lingua vernacula hæc recitare, vel memoriter, vel ex libro.

**M**ES Freres & Sœurs en JEsus Christ, combien que je say, que plusieurs de ceste compagnie n'ignorent la raison du mystere, pour lequel nous sommes icy: toutesfois pour satisfaire à tous, je vous dis, que nous sommes assemblez icy avec la compagnie des Anges pour administrer le premier Sacrement de l'Eglise de JEsus Christ nostre Seigneur: sans lequel nul des autres peut estre receu. Nous sommes icy, pour laver ceste creature du peché originel: pour l'oster du pouvoir du diable, & tirer de l'estat de perdition, & la rendre pure & nette par le moyen de la grace du Saint Esprit, & la faire enfant de Dieu. Car par la desobeissance de nostre premier pere Adam nous, qui sommes descendus de luy, avons esté conçeus en peché & corruption, & sortons du ventre de nos meres, enfans d'ire, de malediction, & enclins à mal faire. Mais nostre Seigneur Dieu par sa grande & excessive charité, ne nous a voulu laisser en ceste misere, & damnation: ains pour nous en tirer, nous a envoyé son benoist Fils JEsus Christ, unique & seul remede de nostre salut, qui a prins au ventre de la benoiste Vierge Marie, humanité toute semblable à la nostre, excepté qu'en luy n'y avoit point de peché: & avec sa mort nous a racheté de la mort eternelle, à laquelle nous estions condamnés, & avec l'effusion de son sang, qu'il a espendu en la croix, a nettoyé & lavé nos ames, & effacé la sentence, qui avoit esté donnée contre nous d'estre damnés eternellement: & a voulu, que nous qui desirons estre participans du fruit de sa mort, soyons baptizés au Saint Baptisme, au nom du Pere, & du Fils, & du Saint Esprit. Lequel Baptisme est comme un pacte qui se fait entre Dieu & nous. Nostre Sauveur qui ne peut mentir, accepte pour sien celui, que vous voyez baptizer: l'incorpore, le conjoint

& unit à son corps, qui est la Sainte Eglise. Et comme vous voyez, que l'eau lave la saleté & ordure, qui est au corps: aussi nostre Sauveur lave & rechange l'ame par le Baptisme en vertu de son sang: efface le peché, qu'il trouve en luy, le justifie, & le rend participant de ses graces & de tous ses biens & merites.

D'autre costé, celui que vous presentez au Saint Baptisme, se dedie, & vous pour luy le dediez entierement au service de JEsus Christ: renonce au diable, à ce monde, & à toutes les vanitez: s'oblige de non recognoistre, tant qu'il vivra, autre Dieu, autre Maistre & Sauveur, que JEsus Christ, au nom duquel il sera baptizé. S'oblige aussi, quant il sera en eage de garder les commandemens de Dieu, de mortifier sa chair: assavoir de n'obeir à ses affections desordonnées, & mettre peine de s'uyvre, tant qu'il luy sera possible, la pureté & innocence de vie, que Dieu demande de nous, pour estre ses enfans. Et en promettant pour luy, souvenne vous aussi de ce, qui a esté promis pour vous en vostre Baptisme: parquoy soyez attentifs & assistez à ceste sainte œuvre, avec reverence & honneur, & prions tous nostre Seigneur, qu'il donne grace à cest enfant, & à nous aussi, que nous ne perdions par nostre infidelité & mauvaise vie, le fruit des biens, que Dieu nous fait en ce Saint Sacrement.

Hoc facto procedet ad opus, juxta id, quod habetur in libro Manuali.

## DE SACRAMENTO CONFIRMATIONIS.

**I**N Confirmatione, sicut didicimus ab exemplo Apostolorum, & ex Christi institutione, Episcopus baptizatis imponit manum: & ex Ecclesiæ traditione, eorum frontibus cum Chrismate crucem imprimit. Quo significatur, quod Spiritum (quem accepimus in Baptismo ad purificationem, & regenerationem) in Confirmatione accipiamus ad robur & augmentum gratiæ, ad tutelam, defensionem, & ad consolationem. Idcirco dat Episcopus confirmato alapam, dicens: Pax tecum; ut meminerit se paratum esse debere, in patientia sua possidere animam suam, & percutienti maxillam præbere & alteram: denique gloriari in Cruce Domini nostri

(1) De Consec. dist. 1. c. In sancta. & c. Vestimenta.

nostri IESu Christi, qui consolatur nos in omni tribulatione.

Vocarunt Sancti Patres hoc Sacramentum, Ambrosius quidem Confirmationem: Augustinus Sacramentum Chrismatis, & Operationem Spiritus Sancti: Cyprianus, Signaculum: Clemens Rom. Sigillum promissionum, & Confessionis confirmationem: Dionys. Perfectionem. Nam sine eo perfectus esse non censebatur, nec Eucharistiam accipere poterat, nec inter perfectos sedere, nisi posteaquam regeneratus esset quis, & septiformis gratiæ Spiritu ab Episcopo confirmatus, ut patet ex Clemente, Epist. 4. & eodem Dionysio. Unde Cornelius ad Fabium scribit apud Eusebium, lib. 6. c. 44. Hilt., Novatum nunquam fuisse perfectum Christianum, quia non fuerat ab Episcopo confirmatus. Solebant olim statim a Baptismo offerri Episcopo baptizati. Dominus enim noster mox a Baptismo in desertum assumptus est, ut tentaretur a diabolo, ut doceret nos paratam illico nobis esse tentationem, postquam nati per Baptismum sumus. Ob hanc igitur causam, die Jovis in Cæna Domini consecrabatur Chrisma, ut præito esset in die Paschali: ut ex Fabiano didicimus, Ep. 2. Et Cypriano lib. de consecratione Chrismatis. Dari quoque consuevit hoc Sacramentum iis, qui ab hæreticis baptizati essent. Aug. ep. 39. & 42.

Forma hujus Sacramenti est: Signo te signo Crucis, & confirmo te Chrismate salutis, in nomine Patris, &c. Ambrosius: Consignavit te Deus Pater, confirmavit te Christus. c. 7. De iis, qui.

Minister Confirmationis, ordinarius quidem est Episcopus. Nam in Actis Apostolorum invenimus, remissos esse baptizatos ad Apostolos, ut ab eis per impositionem manuum acciperent Spiritum Sanctum. Et ne Presbyteri hoc agerent, prohibuit olim Eusebius Papa Ep. 3. & Conc. Hispal. c. 7. & Greg. lib. 3. ep. 9. Sed idem Greg. eam postea facultatem dedit Presbyteris Sardiniae, lib. 3. ep. 25. Licet enim in Baptismo Presbyteris pueros ungere Chrismate: sed non in fronte, ut solent Episcopi, verum in vertice.

### STATUTUM I.

**I**n Confirmatione contrahitur cognatio spiritualis sicut in Baptismo, impediens Matrimonium contrahendum, & dirimens contractum: & non

debet admitti, nisi una persona ad tenendum confirmandum.

#### II.

Mutus, in quo apparent signa confessionis, potest & debet confirmari.

#### III.

Suscipientes Sacramentum Confirmationis, si sint adulti, debent esse confessi, ut illud digne suscipiant: & de honestate debent esse jejuni.

#### IV.

Pueri confirmandi debent secum portare bandellos lineos, mundos, seu fasciolas albas, quibus circumligentur frontes eorum, postquam Chrismate Sancto fuerint consignati, propter reverentiam Sacramenti: ne manibus pollutis frontem detergant, & sordes contrahant.

#### V.

Sacramentum Confirmationis nec reiteratur, nec sumi debet, nisi semel in vita.

#### VI.

Laici admoneantur, ut pueros suos ad Episcopum adducant, quando eum prope esse intellexerint.

#### VII.

Decorum est, bandellos per triduum portent: & post triduum ad Ecclesiam deferant: & in fronte, ubi sunt Chrismate liniti, sale & aqua laventur: & aqua in loco mundo effundatur, ubi nequeat conculcari pedibus.

#### VIII.

Pueris non conferatur, donec memoriam habeant competentem, ne ignorantes se esse confirmatos, faciant se denuo confirmari. Ideo admoneantur de alapa, quam daturus est Episcopus, ut ex eo metu se recepisse recordentur hoc Sacramentum. (m)

DE

(m) Archid. & gloss. ma. de Conf. d. 5. c. Spiritus Sancti.

Tomus VIII. Concilior. German.



## DE SACRAMENTO EUCCHARISTIÆ.

**E**ucharistiæ Sacramentum instituit Christus sub specie visibili panis & vini: quo verum Corpus suum & Sanguinem nobis præbet, & spiritali hoc cibo nos sibi unit, veluti capiti & membris corporis sui mystici: ut in ipso nutriamur, & augeamus, in communione Sanctorum per gratiam & charitatem.

Est enim triplex hujus Sacramenti via. Primum per hoc Christo arctissimo & naturali quodam modo, non tantum spiritali conjunctione copulamur: participes effecti veræ vivificatricis carnis & sanguinis ejus pretiosi. Quæ sumpta faciunt (ut D. Hilarius (n) inquit) ut & Christus in nobis sit, & nos in Christo, non animum tantum reformante, sed & carnem nostram ad vitam, incorruptionem & immortalitatem præparantē. (o) Secundo hoc eodem Sacramento corpori mystico (quæ est Sanctorum omnium societas) arctissime jungimur; participes bonorum omnium, quæ hæc sancta societas possidet, & unum corpus, veluti unus panis ex multis granis conficitur. Tertio accendimur ad dilectionem & charitatem Christi alendam, qui nobis tantum beneficium conferat, Sacramenti virtute & efficacia. Idcirco dicitur Communio, per antonomasiam: & excommunicati, extra Ecclesiam positi, maxime hinc agnoscuntur, quod arcentur ab hac mensa cœlesti. Dicitur eadem ratione a Græcis Synaxis: quia nos Deo conciliat, & cœtui fidelium, ad participationem hujus Sacramenti congregatorum. Dicitur imprimis Eucharistia, id est, bona gratia, & gratiarum actio. Primum, quia per hanc ad amandum Deum, & proximum accendimur, & Dei amorem in nos provocamus propter memoriam passionis ejus (quæ fit in hoc Sacramento) per quam liberati sumus. Gratiarum vero actio proprie duabus de causis: Prima, quia in ejus institutione Christus Dominus gratias Deo Patri egisse legitur. Altera, quia gratias Deo agere debemus pro tanto beneficio. Et ita Sacerdos ex antiquissimo ritu Ecclesiæ, post Communionem, gratiarum actione Missam finit. Ex his omnibus sequitur merito dictum esse a Justino Martyre *εὐχαριστία ἔργον, καὶ ὄνομα*, quasi dicas, cum gratiarum actione factum. Sed de Missa nos alio loco tractavimus proprio.

Materia hujus Sacramenti est panis & vinum. Panis quidem debet esse ex farina

tritici, non fermentata: quia Christus in azimo fecit, ut ex novi & veteris Testamenti colligitur historia. Vinum autem de vite, non alio: quia & vitis meminit Christus: nec in aceto (quod omnino acetum est) nec in agresta fieri potest hoc Sacrificium: quia hæc alterius speciei sunt. In musto non decet, ut fiat, propter ejus impuritatem, & facis copiam; nisi defæcatum sit: quare in eo potest, si aliud non habetur.

Vino debet admisceri aqua, sed in parva quantitate, respectu vini. Et licet aqua non sit de substantia hujus Sacramenti: tamen graviter peccaret, qui omitteret, propter mysterium, quod in hac mixtione notatur.

Et quanquam post consecrationem non maneant substantiæ panis & vini, sed eorum species & accidentia, sicut definitum est ab Ecclesia: tamen nomine panis & vini (ex quibus fit Sacramentum) appellari solent in Sacris Literis & Sanctorum Patrum: non aliter, quam virga Aaron dicitur devorasse virgas Ægyptiorum, quæ tamen versa erat in colubrum, nec amplius erat virga. Sed nunc propter hæreticos non est usurpandus passim talis sermo.

### STATUTUM I.

**M**inister hujus Sacramenti est Presbyter, rite & Canonice ordinatus, qui potest & debet Missam celebrare.

### II.

Hæretici, schismatici, excommunicati, notorii fornicatores, Simoniaci, apostatae, & hi, quibus a suis Superioribus prohibetur ex causa, non debent celebrare.

Forma autem hujus Sacramenti sunt verba illa solennia, quæ Christus ipse dedit: Hoc est Corpus meum. Et iterum: Hic est enim Calix Sanguinis mei, novi & æterni testamenti mysterium fidei, qui pro vobis & pro multis effunderetur in remissionem peccatorum. Quibus verbis nihil debet addi, vel detrahi.

Quamvis autem ex virtute verborum Sacramentalium consecrationis Corporis Christi sub speciebus panis sit tantum Corpus Christi, est tamen etiam ibi sanguis, ex naturali quadam concomitantia. Et similiter, licet sub speciebus vini ex vi verborum consecrationis, sit tantum sanguis Christi: ex concomitantia tamen est ibi corpus: quia non

(n) Hilar. de Trinit. lib. 5.

(o) Cyrill. in Joan. c. 6. Irenæ. lib. 4. & 5.

non est corpus sine sanguine, nec sanguis sine corpore. Et sane Christum crucifigunt iterum [ut nobis videtur] hæretici, putando se in speciebus panis, corpus sine sanguine sumere: & in speciebus vini, sanguinem sine corpore: ab ejus corpore sanguinem iterum educentes falsa sua opinione.

Et ideo credendum est, hoc Sacramentum etiam sub una specie sumptum prodesse fumentis ad salutem: juxta verbum Christi: Qui manducat hunc panem, vivet in æternum. Et: Panis, quem ego dabo, caro mea est pro mundi vita. Ipse etiam Christus suum corpus porrexit duobus discipulis in Emaus, sub specie panis tantum, ut communiter tenetur.

## III.

Hoc Sacramentum sumi debet a jejunis, (p) (id est, ante cujuslibet alterius rei cibum vel potum) exceptis infirmis, & in necessitate constitutis: in quibus periculum est de vita. Quia talibus, si humiliter petant, debet ministrari, sive ante prandium, sive post, sive de die, sive de nocte, nisi sit periculum, quod statim post sumptionem illud evomant: quia tunc non esset dandum.

## IV.

Mutus, in suis negotiis discretus, potest recipere Corpus Christi, si petat, & in eo appareant signa devotionis & fidei. (q)

Accedentes (r) ad sumptionem Corporis Christi, moneantur: Primo, ut veniant cum conscientia mundata & purgata ab omni peccato mortali. Secundo, quod remittant de corde suo omnem rancorem & odium. Tertio, quod nullus excommunicatus, vel interdictus sumere præsumat. Quarto, quod ab uxoribus abstineant per aliquot dies [scilicet duos, vel tres ante & post] sicut consuluerunt Sancti Patres. Quinto, quod post sumptionem Corporis Christi, non spuant in loco immundo, neque in loco alio, qui possit pedibus conculcari: præsertim antequam alium cibum comederint, vel digestionem factam esse putaverint. Et, quod se servant, quantum poterint, a vomitu & nausea. Sexto addimus, ut antequam in os Sacramentum accipiant, supplices adorent Christum in ipso Sacramento præsentem, & se ipsis exhibentem.

Debent ergo tria habere communicaturi. Primum fidem verbis Domini dicentis: Hoc est Corpus meum, quod pro vobis datur: Hoc facite in meam commemorationem. Deinde timorem ex verbis Apostoli dicentis: Qui manducat & bibit indigne, judicium sibi manducat & bibit, non dijudicans Corpus Domini. Tertio dilectionem & charitatem erga Deum, qui Filio suo non pepercit, sed pro nobis omnibus tradidit eum: & cum gratiarum actione denique hoc Venerandum Sacramentum manducare, quod est Eucharistia.

*Quando datur Eucharistia infirmo, dici poterunt hæc, vel similia a Sacerdote, lingua vernacula, præmissa Salutatione aliqua, & alia præfatione, aut exhortatione.*

*ET avant le vous distribuer, suivant la doctrine de l'Apostre, je vous admoneste d'examiner vostre conscience, recognoistre & confesser, que vous avez tant offensé Dieu, mesprisé & oublié, que s'il avoit esgard à vostre mauvaise vie, il vous rejetteroit, comme indigne du fruit de ses Saints Sacrements, de sa misericorde, & de sa grace: mais vous esperez, que JEsus Christ vous rendra digne de le recevoir, par le merite de sa Passion & du Sacrifice, qu'il a fait de son Corps en la croix, où il a souffert mort honteuse & ignominieuse, pour vous racheter de la mort & damnation eternelle, & vous reconcilier avec Dieu son Pere.*

*Vous suppliez donc à Dieu, qu'il luy plaise, avec le Sang de JEsus Christ effacer tous vos pechez, & preparer vostre ame à dignement recevoir vostre Createur, & gouter le fruit de ce Saint Sacrement: & avec la reverence, qu'il vous est possible, adorer le précieux Corps de JEsus Christ, que je vous porte, & presenteray tantost.*

*Mais tout ainsi que de bon cœur & humblement vous suppliez Dieu, qu'il vous pardonne, & vous aussi pardonnez à tous ceux, qui vous ont offensé: & remettez toute rancune & vengeance. Vous demandez aussi pardon à tous ceux, que vous pourriez avoir offensé, soit de fait, ou de paroles. Et s'il y a quelqu'un, qui ait esté injurié par vous, dont*

V 3

vous

(p) Statut. vetus.

(q) Statut. vetus.

(r) Statut. vetus.

vous ayez souvenance, me donnez vous charge de luy demander pardon de vostre part? Et de l'amener icy devers vous, si faire se peut, pour vous en acquiter vous mesmes? Ouy.

Croyez vous pas que nostre Sauveur JESUS Christ, outre qu'il a sacrifié soy mesme pour nostre salut, il a ordonné Et institué ce Saint Sacrement, auquel il est contenu vraiment Et reallement sous les especes visibles de pain Et de vin?

Croyez vous pas cela? Ouy. Penſez aussi mon amy Et contemplez, que le recevant nous renouvelons la souvenance de sa passion Et de sa mort jusques à ce, qu'il viendra, pour nous juger. Et il nous donne son précieux Corps Et son Sang pour nourrir Et alimenter nos ames, nous unir Et conjoindre à soy, comme membre de son Corps mystique, à celle fin, qu'au jour de la Resurrection nous puissions estre vestus de l'immortalité, qu'il nous a promis, Et estre participans de son Royaume eternal. Au regard de quoy personne ne se doit decourager, s'il se sent membre infirme Et debile: car nous avons un chef tout puissant, qui est nostre Sauveur Et nostre Dieu. Or dictes vostre Confiteor.

Adorez vostre Redempteur, car c'est ce luy, que les Anges adorent: Et en joignant vos mains corporelles, humiliant vostre cœur devant luy, recongnoissez (en luy remerciant) le bien, qu'il vous fait. Dites: Mon Createur, mon Redempteur, je ne suis digne, que vous entriez chez moy, mais dictes seulement vostre sainte Parole, Et mon ame sera sauvée. In manus tuas, Domine, commendo spiritum meum.

### *Post Communionem dicet infirmo:*

Or mon frere, vous avez receu le pain des Anges Et ceste douce viande celeste, qui est JESUS CHRIST nostre Seigneur, qui donne la vie à toutes choses: Et à ceux, qui l'ayment Et qui mettent leur esperance en luy, les delivrant des miseres de ce monde, il leur donne la vie perdurable Et joye Et repos sans fin. Pour autant remerciez luy de bon cœur de ce qu'il vous a fait digne de le recevoir. L'ayant receu il est en vous, Et vous en luy. Donc vous pouvez dire avec David: Si ambulavero in medio umbræ mortis, non timebo mala: quoniam tu mecum es.

Mon amy, nostre Createur a le pensement Et soing de vostre ame, Et aussi de vostre corps: à vostre vie Et vostre mort en sa puissance. Vous estes sa creature, Et ne debuez desirer, sinon ce qu'il luy plaira ordonner. S'il luy plaît vous rendre la santé, sa volonté soit faite: s'il luy plaît vous appeler à soy, il fera beaucoup pour vous: car il vous oſtera du lieu, où vous estes toujours en peine, Et vous mettra en un perpetuel repos. Il vous oſtera du lieu, où vous offensez tous les jours, Et vous mettra avec JESUS Christ, en la compagnie des Anges Et des ames de ses saints esleuz, pour luy rendre toujours bonheur, gloire Et louange. Toutesfoiſ remettez le tout à son bon plaisir: car il ſcuit bien ce qui vous convient Et qui vous est profitable. C'est nostre Dieu, nostre Pere, Seigneur Et Maistre. Recommandez vous à luy devotement, Et mettez en sa main Et en sa garde vostre ame, vostre corps, vostre vie, Et vostre mort, Et tout, tant qui est de vous: luy suppliant, que par sa pitié Et clemence il vous pardonne vos pechès, Et vous vuille recevoir au nombre des siens.

La grace du Saint Esprit soit avec vous Et y demeure toujours, Amen.

## DE SACRAMENTO Pœnitentiæ.

Quoniam contingit, ut homines per Baptismum, & alia Sacramenta gratiam adepti, sæpenumero tamen in gravia peccata incidant: [Quis enim est, qui non peccet?] ne sublata putetur spes salutis, aut contra pericula mortis æternæ omne remedium detractum esse; (quoniam Baptismus iterari non potest) instituit Christus Redemptor noster Sacramentum Pœnitentiæ, quod post Baptismum sit nobis instar secundæ tabulæ in naufragio. In hunc enim usum tradidit Apostolis suis claves, id est, potestatem solvendi & ligandi, dicens: Accipite Spiritum Sanctum. Quorum remiseritis peccata, remittuntur eis. Et Petro: Tibi dabo claves regni cælorum: quodcunque ligaveris super terram, erit ligatum & in cælo, &c.

Est autem quædam pœnitentia ante Baptismum in adultis, ad detestationem quidem prioris vitæ, quæ non requirit Sacramentalem confessionem, nec aliam satisfactionem, quo ad Deum. Pœnitentia vero post Baptismum exigit. Nam illic omnia peccata remittuntur nobis gratis: cum per Baptismum Christo morimur, & ad vitam resurgimus spiri-



spiritualem, virtute mortis & resurrectionis ejus. Hæc vero secunda tabula non solum detestationem vitæ prioris exigit, & confessionem delictorum: sed etiam satisfactionem, & fructus dignos pœnitentiæ: ut memores, unde exciderimus, faciamus prima opera. Justus enim Dominus, & justitias dilexit; & justum est, ut qui Divinam Majestatem opere, verbo, vel cogitatione offendimus, vel populum scandalizamus: sic opere, verbo, vel cogitatione, (quantum in nobis est) offensionem vel scandalum reparemus. Si nos (inquit Apostolus) judicaremus, non utique judicemur a Domino: dum judicamur, a Domino corripimur, ne cum hoc mundo damnemur.

Fructus autem Pœnitentiæ, si nosse desideras, enarrat Apostolus in 2. Cor. 7. Qui sunt: sollicitudo atque anxietas de propria salute: indignatio contra peccatum: timor iræ Dei: desiderium veniæ: zelus provocandi alios ad salutem: vindicta de propriis delictis in corpore suo: & denique emendatio vitæ. Eadem describuntur a Luca, c. 3. in vita Joannis Baptistæ: ut cognoscas, quam Scriptura Sacra secum congruit. Interrogabat enim ille: Quis docuit vos fugere a ventura ira? illi autem anxii interrogabant, Quid faciemus, &c. Afflictionem, & vindictam, sumendam de se, exemplo suo docebat, non manducans, neque bibens: indutus pilis camelorum, deserti colens. Hæc non probantur profecto Epicureis. Sed arcta est via, quæ ducit ad vitam. Et violenti rapiunt cœlum. Ninivitæ præcedent eos: & David in sacco & cinere coarguet.

Pœnitentiarum alia est solennis, alia publica, alia privata. Pœnitentia solennis ideo dicitur, quod, cum quadam solennitate a jure introducta, imponitur pœnitenti per Episcopum: ut cum hæretico abjuranti, imponitur habitus deferendus semper: vel frenum in ore coram populo: vel, ut pedibus nudis, & flexis genibus expectet pro foribus Ecclesiæ: maxime in capite jejunii: qua die omnes, quibus talis pœnitentia imponenda est, debent comparere personaliter ante fores majoris Ecclesiæ Bisunt, & ibi expectare, donec introducantur per Episcopum, vel ejus commissum, sicut ab Ecclesia ordinatum est. In his omnibus non solum pœnitentia populo manifesta fit, sed etiam peccatum ab Ecclesiæ Ministro declaratur.

Pœnitentia solennis imponi debet pro gravi & enormi crimine, quod totam urbem vel communitatem commovit, & scandalizavit. Idcirco, ne simplex Curatus in hoc erret, cum audierit aliquod grave cri-

men a confitente commissum, remittat illum ad Ordinarium: is discernet, qualis pœnitentia imponenda fuerit. Casus referatos tam Papæ, quam Ordinario, invenies infra.

Pœnitentia publica est illa, quæ fit in facie Ecclesiæ, non cum ea solennitate, de qua in præcedenti dictum est: sicut quando iungitur peregrinatio cum baculo cubitali, vel cum aliqua veste, vel cum aliquo signo distinctivo pœnitentis ab aliis. Et tutius est, ut per Episcopum imponatur (qui debet cognoscere de gravibus criminibus) quam per simplicem Sacerdotem.

Pœnitentia privata est illa, quæ fit singulariter & secrete. Hæc frequentanda venit. Qualis, cum quis peccata sua Sacerdoti secrete confitetur: & pœnitentiam hanc simplex Curatus imponere solet.

*Pœnitentiæ sunt tres partes: videlicet cordis Contritio, oris Confessio, & operis Satisfactio.*

### CONTRITIO.

**C**ontritio, est illa tristitia secundum Deum, quæ juxta Apostoli (s) Pauli sententiam, pœnitentiam in salutem stabilem operatur. Dolor hic est vel tristitia voluntarie suscepta, qua nos pœnitet peccasse: hoc est, nollemus peccasse, & Deum (qui est summa Bonitas) offendisse: propositum habentes (saltem virtuale) & voluntatem confitendi & satisfaciendi, nec amplius posthac peccandi mortaliter. (t)

Et admonendi sæpius sunt fideles, ut cupiant potius omne malum pati, quam offendere Divinam Majestatem: quoniam illic apparet vera charitas, sine qua nemo potest dici vere contritus. Debetque vere contritus semper dolere, & displicentiam habere, quodcumque recordatur se offendisse Deum per peccatum suum: licet non semper actu defleat peccatum suum. Et admonendi sunt omnes, ut simul ac cognoverint se peccasse mortaliter, conterantur: quia possunt gratiam Dei & veniam mereri per contritionem ipsam, quæ propositum habeat confitendi, & satisfaciendi; etiam si non statim confiteantur, nec satisfaciant, ut est communis opinio Theologorum. Voluntas enim grata est secundum id, quod habet, dicit Apostolus. Nec negligere aut differre debemus pœnitentiam: quia periculosum est: & dubitat D. Augustinus de salute eorum, qui

(s) 2. Cor. 7.

(t) Ex Ambrosio, Augustino, Chrysostomo, Magistro sententiarum, Thoma, Scoto, Antonio, & aliis.

qui pœnitentiam differunt, donec positi in extrema necessitate ægritudinis, non ipsi peccata, sed peccata ipsos derelinquant.

Ad pœnitendum de peccato, veniunt hæc consideranda a peccatore: vilitas & turpitudine ipsius peccati, pudor noster. Quem fructum (inquit Paulus) habuistis, in quibus nunc erubescitis? Item timor extremi iudicii: amissio gloriæ cœlestis: offensio Divinæ Majestatis: & spes denique consequendi veniam & gratiam Dei, ac post hanc, vitam æternam. Hactenus de Contritione.

## CONFESSIO.

**S**ecunda pars Pœnitentiæ est Confessio vocalis & Sacramentalis. Estque legitima peccatorum coram Sacerdote, qui claves Ecclesiæ habet, & potestatem absolvendi, declaratio, & accusatio. (u)

Confessionem instituit Christus; non homo aliquis purus, aut Ecclesiæ consueto: debet enim accusatio præcedere, & delictorum enumeratio, super quibus Sacerdos iudicium ferat, qui a Christo potestatem accepit ea remittendi, atque etiam retinendi. Hæc ratio evidens est. Inducunt aliqui locum Jacobi 5. Confitemini alterutrum peccata vestra: ex eo, quod præcedit: Infirmatur quis: inducat Presbyteros. Et sequitur: Multum enim valet deprecatio iusti assidua. Et postea: Si quis converti fecerit ab errore viæ suæ peccatorem, salvabit animam ejus. Ex his namque apparere possit, sermonem esse de confessione, quæ fit Presbytero: in quo duæ claves requiruntur, scilicet scientiæ & potestatis. Potestas in oratione intelligitur: scientia in conversione peccatoris. Joannes in prima Can. c. 1. Si confiteamur peccata nostra, fidelis est & iustus, ut remittat nobis peccata nostra, & emundet nos ab omni iniquitate. De hac auriculari confessione intelliges, quæ Basilius in regula Monachorum, cap. 21. & Leo ad Episcopos per Campaniam & Pitcenam: & Hieron. in regula ad Eustochium. Clemens Roman. in Epistola Petri, nauseantibus in mari comparat confitentes peccata sua. [x]

Confessio fructuosa debet habere conditiones contentas in versibus sequentibus:

*Sit simplex, humilis confessio, pura, fidelis,*

*Atque frequens, nuda, discreta, lubens, verecunda,*

*Integra, secreta, lacrymabilis, accelerata,*

*Fortis & accusans, & sit parere parata.*

Quorum sensus est, **SIMPLEX**, id est, ut facile intelligi possit: non generalis, nec ambigua. **HUMILIS**, qualis illa Publicani, qui non audebat oculos levare in cœlum. **PURA**, quæ nihil habeat admittum superflui, & rerum impertinentium. **FIDELIS**, id est, verax, non ficta, nec a fide Catholica dissentiens, (qualis hæreticorum) & sub spe veniæ. **FREQUENS**, quia, qui frequenter recidunt in peccatum, frequenter etiam remedium quærere debent: **NUDA**, ore proprio, non per literas aut nuncium: nec peccatorum circumstantiæ palliari debent, aut actu aliquo regi & velari. **DISCRETA**, verbis honestis & decentibus, & neminem offendentibus. **LUBENS**, id est, voluntaria, ex contritione peccatorum magis procedens, quam ex peccato alio. **VERECUNDA**, non jocosa, veluti rem narres leviem, aut ludicram: sed cujus te pudeat, & vultu demisso. **INTEGRA**, omnia peccata (saltem mortalia,) quorum memineras, uni Confessori recites: non dividendo, nec aliquod subtrahendo. **SECRETA**, ne quem scandalizet. **LACHRYMABILIS**, ut signa præ se ferat contriti animi. **ACCELERATA**, ne differatur in longum tempus post commissum peccatum. **FORTIS**, ne timore vel pudore revoceris a confessione. **ACCUSANS**, debet confitens se ipsum accusare & suam malitiam, non alios: neque excusationes quærere in peccatis. **PARERE PARATA**. Debet paratus esse confitens ad obediendum iudicio Sacerdotis, quicquid ille sibi injunxerit pro salute animæ suæ. Nemo autem adeo rudis est, qui peccata sua, saltem mortalia, non possit nisi interrogatus, recitare. Quis enim nesciat, an sequutus ipse sit hæreticos? an concionibus vel conventiculis eorum interfuerit? Quis nesciat, an nomen Dei blasphemaverit? Quis nesciat, an Festa Ecclesiæ non servavit? an parentes injuria affecerit? an eadem fecerit, vel facere voluerit, vel aliquem percusserit injuria? an opus libidinis patravit? an furto quid cepit, vel alienum retinuerit? an falsum testimonium dixerit? an denique vanis cogitationibus mentem & animum occupaverit, & desideriis impudiciæ, vindictæ, avaritiæ, & impietatis? Dic igitur simpliciter: Ego hæc & hæc feci, & me pœnitet. Nec puta, excusando te meliorem existimari a Confessore: imo nequiores & vere hypocritas, quando te iustificas. Scimus enim, quod nemo sit sine peccato: & ad confessionem venimus, non ut iustificemus nos, sed ut accusemus, & veniam ex Christi merito atque iustitia postulemus.

STA-

(u) Stat. vetus.

(x) V. S. Tho. 3. par. q. 64. art. 2. & communis opin. in 4. dif. 17. & in Conc. Trident. & Colon.

## S T A T U T U M I.

**O**Mnes utriusque sexus homines habentes annos discretionis, tenentur semel saltem in anno in Quadagesima ( ut possint Christi Corpus in Paschate recipere ) confiteri proprio Curato, seu Pastori. In periculo quoque mortis probabili, quilibet confiteri tenetur: & quando quis accepturus est Eucharistiam vel Missam celebraturus, sicut tenet communis opinio. (y)

## II.

Mutus potest per signa confiteri, (z) & homo linguæ extraneæ potest confiteri per interpretem, qui linguam utramque calleat: ut inter utrumque sedens, referat utrique, quicquid sibi dictum fuerit: & talis interpretes secretam tenere debet confessionem, sicut Sacerdos.

## S A T I S F A C T I O.

**T**ertia pars Pœnitentiæ Satisfactio dicta est: propria autem satisfactio & vere propitiatoria pro nostris & totius mundi peccatis, Christus dicitur. Satisfactio vero hæc Sacramenti pœnitentiæ, vindicta est quædam, de nobis suscipienda propter peccatum: & recompensatio ex præscripto Sacerdotis ( veluti Medici spiritualis ) nobis injuncta & præcepta. Per hanc Deum placamus, causas & reliquias peccatorum excindimus: pœnas peccatis nostris debitas aut redimimus, aut mitigamus: & Ecclesiæ nostro malo læsæ, contrario exemplo satisfacimus. Itaque non solum proximo est satisfaciendum, quem injuria affecimus; sed etiam Deo, quem inobedientia mandatorum ejus offendimus: etiam si alteri nihil nocuissimus. Quocirca non immerito D. Augustinus, jejunium, eleemosynam, & orationem, tres istas res ( quibus pœnitentiæ satisfactio imponi solet ) justitiam hominis in hac vita esse dixit. Sed contra errorem eorum, qui partem hanc pœnitentiæ negant, lege cap. 8. Sess. 14. Conc. Triden. Et Turrianum Jesuitam lib. 4. de dogmat. charact. & lib. 4. pro Epist. Pont. ubi ex loco Pauli 2. Cor. 7. satisfactionem pœnitentiæ deducat apertissime, & nomen satisfactionis in

Act. 17. & 2. Cor. 7. reperiri contra Lutherum, *καὶ*.

Satisfactio tribus modis fieri solet: oratione, jejunio, & eleemosyna. Quæ tribus contrariis peccatis, mortalibus & capitalibus [ in quibus alia continentur ] opponi possunt: nempe oratio superbiæ: eleemosyna avaritiæ: jejunium luxuriæ. Nam quicquid est in mundo, vel est concupiscentia carnis, vel concupiscentia oculorum, vel superbia vitæ. Reliquæ omnes satisfactiones ad illas tres reducuntur: veluti ad jejunium, vigiliæ, peregrinationes, &c. ad eleemosynam omnia opera misericordiæ corporalis: ad orationem opera misericordiæ spiritualis. Sed de his supra Tit. De operibus satisf.

## MINISTER POENITENTIÆ.

**M**inister Sacramenti Pœnitentiæ est proprius Sacerdos, hoc est, Presbyter, habens jurisdictionem actualem, ordinariam vel delegatam. Licet enim Presbyteri omnes potestatem habeant remittendi peccata: non omnes tamen habent ejus potestatis executionem, nisi Pastores ordinarii: videlicet, Curatus, Episcopus, Summus Pontifex, & qui ab his delegantur vel committuntur. Nec refert, quo tempore velis, Quadagesimæ, vel alio: nisi in periculo mortis. Quo casu omnis Sacerdos potest non solum a peccatis omnibus absolvere, sed etiam ab omni excommunicatione.

Quamvis, ut perfecte officio suo possit fungi Confessarius, seu Confessor, distinguendi inter lepram & lepram, scientiam habere debeat perfectam, propter difficultates rerum, quæ in confessione possunt occurrere: tamen ut idoneus haberi possit, sufficit, ut sciat Constitutiones Synodales loci, ubi audiet confessiones, & quæ peccata sint mortalia, quæve venalia inter ea, quæ plurimum committuntur ab hominibus ejus loci, cum circumstantiis aggravantibus peccatum, quas confiteri oporteat. Item quæ peccata habeant adnexam excommunicationem aut irregularitatem, & quæ sint reservata Superiori: de quibus infra titulo De Sententia Excommunicationis, & in fine hujus tituli De Pœnit. Item quæ restitutionem postulent. Quod si dubitet super his, consulat peritiores.

## III.

Sacerdos requisitus ab aliquo ad audiendum confessionem, debet statim an-

(y) C. Omnis. de Pœn. & Remiss. Theo. in 4. distin. 18. Pan. in ca. Pastoralis. de offic. Ordin. Glos. in c. De homine. de celeb. Miss.

(z) Stat. vetus.

Tomus VIII. Concilior. German.

X



animo ad Deum converti, & devote orare: ut Deus sibi det virtutem & constantiam, ne moveatur desiderio rei turpis aut malæ, aut vanæ gloriæ: sed salutis ipsius confitentis tantum & gloriæ Divinæ, dicendo:

COR mundum crea in me Deus, & Spiritum rectum innova in visceribus meis. Ne projicias me a facie tua, & Spiritum Sanctum ne auferas a me. Redde mihi lætitiā salutaris tui, & Spiritu principali confirma me. Docebo iniquos vias tuas, & impii ad te convertentur.

## IV.

Sacerdos excipiat confitentem (a) vultu gravi, & blandis benignisque verbis, exhortans eum cum pietate, ut vulnera sua, tanquam Medico spirituali, fiducialiter & integre revelet, cum spe veniæ & salutis, quia Deus semper recipit peccatores ad se conversos quantumcunque peccaverint enormiter: ut David, Petrum, Paulum, Mariam Magdalenam, Latronem in Cruce, & alios innumeros.

## V.

Si peccator titubet, (b) aut dubitet adhuc confiteri peccatum suum, nec istis exhortationibus induci possit: declaret ei Confessor terrorem judicii extremi, pœnas inferni, perpetuitatem damnationis: totis viribus eruat animam peccatoris a faucibus inimici.

## VI.

Audiens vero confessionem Sacerdos, non aspiciat confitentem in facie (c): multo minus etiam aspiciat mulierem: nec signum aliquod faciat audiens peccatum confitentis, quo videatur detestari & abominari peccatum, quod audit: ne per hæc retrahantur, aut terreantur a confessione integra peccatorum.

## VII.

Sacerdos non audiat confessiones in domo sua, aut camera, nisi confitentes sint infirmi, sed in Ecclesia, & in loco omnibus patenti: & non in angulis, aut loco obscuro: ut tollatur

omnis occasio malignandi & obloquendi.

## VIII.

Nec audiat Sacerdos confessionem alicujus personæ, de quo peccato ipse sit agens, vel consentiens: sed talem personam remittat ad alium Confessorem, data licentia, si opus sit.

## IX.

Sacerdos discrete interroget confitentem secundum conditionem & statum ipsius. Quia alia interrogatoria facienda sunt Religioso, alia Militi, alia Sacerdoti, alia agricolæ, alia Advocato, alia mercatori, alia diviti, alia pauperi, alia seni, alia juveni, alia viro, alia mulieri: ut nihil impertinenter quærat, sed juxta cujuscunque statum, gradum, sexum, & qualitatem. Cujus conditionem & statum si ignoraverit Confessor, petet ante omnia ab eo.

## X.

Præstat, ut ipse pœnitens enarret sua peccata, quam Sacerdos. Ideo facta confessione generali, vel si nesciat confessionem, si ipse incipiat peccata sua enarrare, permittatur: sive ordine agat, sive absque ordine. Tantum admoneatur, ut nullam personam accuset in confessione, quam se ipsum: & sua tantum, non aliena peccata, revelet: alioqui peccaret sic revelando peccatum alterius. Postea poterit Sacerdos diligentius eum examinare: sed discrete, ne eum scandalizet, & se ipsum.

## XI.

Cavebit Confessor, ne inquiret (d) de omnibus, quæ potuit pœnitens commisisse: sed tantum de iis, quæ solent frequentius fieri ab hominibus illius conditionis, vel status.

## XII.

Secundo, ne de aliis peccatis inquiret, quam de iis, quæ passim & vulgo fiunt, quæque nota sunt omnibus: ut de transgressione mandatorum Dei: de septem peccatis mortalibus.

(a) De pœn. d. 6. S. Tho. 4. d. 17.  
(d) Manual. Confess.

(b) Stat. vetus.

(c) Idem Stat. vetus.

bns. Interroget de articulis fidei, de Sacramentis, quomodo hæc suscepit: de operibus misericordiae: de quinque præceptis Ecclesiae. Non autem inquirat (nisi fortasse quam prudentissime) de occultis, quæ malitia hominum excogitavit: sed illa relinquat nudæ confessioni pœnitentis: hortando tamen, ne quod prætermittat peccatorum.

## XIII.

Tertio, in peccatis luxuriæ, seu carnis non descendat nimis ad particulares circumstantias, minutim omnia & singula examinando, quando conscientia horum ipsa de se multam pœnitentiam habet, & exponendis istis adeo diligenter, nec pœnitens melior, & Pœnitentiarius deterior, fieri possunt.

## XIV.

Inquirat vero diligenter de his quinque, quibus plerique teneri solent. Primo de excommunicatione. Quia si confitens est excommunicatus majori excommunicatione, remitti debet ad Superiorem, instruendus tamen ab ipso Sacerdote, quomodo agendum ei sit, ut absolutionem consequatur. Secundo de ira, seu odio, & rancore, quem homines frequenter invicem gerunt. Ii multum hortandi sunt, ut parcant aliis offensas, sicut petunt in Oratione Dominica: Dimitte nobis debita nostra, sicut & nos dimittimus debitoribus nostris, &c. Alioqui Deus nunquam dimittet eis. Tertio interrogetur pœnitens, an aliquid retineat alieni. Si retineat, injunget, ut illud restituat, cum primum poterit. Quarto interrogetur de sortilegiis & obervationibus, divinationibus, & similibus superstitionibus. Quod si quid in eo peccaverit, admonendus erit, quomodo non est danda fides hujusmodi rebus, quas diabolus suggerit ad decipiendum homines exiguæ fidei: sicut videmus omnes tales esse miserrimos: sed Deum timendum & amandum ex toto corde & tota anima, & fidem ejus tenendam. Quinto interrogetur de votis emissis, quomodo ea adimpleve-

rit: & quomodo satisfaciat officio suo, ad quod se obligavit (sive sit onus spirituale, sive temporale) & monebitur, ut fideliter exequatur officium suum.

## XV.

Si in confessione occurrat aliquis casus reservatus, si persona est juvenis (maxime vir) non multum distans a civitate: remittat eum Sacerdos ad Vicarium Generalem, vel Pœnitentiarium nostrum reclusum. Sin vero sit mulier nupta (contra quam posset oriri suspicio & periculum a marito) vel persona debilis, vel pauper: tunc Curatus ipse veniat, vel mittat per literas & Nuntium ad civitatem, ad obtinendum pro illis personis dispensationem & licentiam absolutionis. Quam tamen postulabit in generali sic: Confessus est quidam mihi peccatum vobis reservatum, peto, ut placeat vobis licentiam mihi dare absolvendi, quia pœnitens commode non potest isthuc se transferre.

Audita confessione (e) pœnitentis, Sacerdos prudens, habita ratione qualitatis ejus, uterur levitate, vel severitate. Alii enim hortandi sunt ad majorem contritionem: alii excitandi ad spem: alii consolandi: alii commemoratione Divinæ Bonitatis laudandi: alii docendi: alii (videlicet docti & timorati, ut quidam Sacerdotes) tantum absolvendi injuncta pœnitentia.

## XVI.

Postulabit Sacerdos ante absolutionem, an pœniteat eum de peccatis, & an proponat abstinere cum Dei gratia ab iis, quæ confessus est, & ab alio omni peccato mortali. Si affirmet, absolvetur perficiendo confessionem, hoc pacto, vel simili: In quibus omnibus, & aliis multis, quorum non recordor, ego miser peccator peccavi corde, verbo, opere, & omissione, mea culpa, mea maxima culpa: ideo deprecor te (Gloriosissima Virgo MARIA) & vos omnes (Sancti Dei,) & te (Pater) orare pro me ad Dominum DEUM, ut ipse misereatur mei. Vel  
idem

(e) Manuale Confess.

Tomus VIII. Concilior. German.

idem dicat lingua vernacula, si vernacule tenuerit.

## XVII.

Si vero non pœniteat, nec velit vitam emendare: veluti relinquere aliquod impedimentum, propter quod non debeat absolvi, (ut si habet concubinam, quam nolit relinquere: si est usurarius, nec velit ab eo lucro desistere: si odium gerit capitale, & voluntatem offendendi proximum, nec velit illud deponere: si Ecclesiasticus habeat plura beneficia incompatibilia sine dispensatione, nec velit dimittere, & alia pro conditione & statu pœnitentis) in hoc casu si confitens nolit mutare vitam, & desistere ab his, quæ non potest sine peccato retinere, non absolvetur, quantumvis requirat: sed poterit ei Sacerdos dare consilium, & injungere aliquam pœnitentiam, declarando ei, quod propter hoc non est absolutus, nec satisfecit mandato Ecclesiæ: & admonebit, ut frequenter audiat sermones, vel legat pios auctores, eleemosynis, & orationibus, & aliis bonis operibus nitatur obtinere, ut Deus convertat cor ejus ad contritionem, & veram pœnitentiam.

## XVIII.

Non debent absolvi (ne a Superioribus quidem suis) excommunicati propter offensam notoriam, nisi antea satisfecerint: neque incendiarii injusti: neque mutilatores membrorum: neque violatores Ecclesiarum: neque usurarii manifesti: neque injuria notabili afficientes personas Ecclesiasticas, arma non deferentes.

## XIX.

Si confitens sit excommunicatus, & Confessor habeat potestatem absolvendi eum a tali excommunicatione: Confessor debet eum prius absolvere ab excommunicatione, quam a peccatis, si hoc faciat in principio confessionis, si in fine. Sed hic non satis est, quod promittat pœnitens, quod non amplius committet illud: sicut in absolutione a peccatis sufficit; sed requiritur, ut juret, quod obediet post-

hac præceptis Ecclesiæ, & debet prius satisfecisse parti lætæ, de principali, vel de expensis, prout erit causa excommunicationis.

Si non sit opus absolutione ab excommunicatione, Sacerdos ante absolutionem a peccatis imponet pœnitentiam. Quanquam potest etiam postea: sed necessarium est, ut absolvat antea ab excommunicatione minori, (si quam incurrit) quia potuit communicare pœnitens cum excommunicato majori excommunicatione, propter quod esset excommunicatus minori: vel ob aliam causam. Et sic est uno contextu positum in forma sequenti: ubi post *Misereatur tui, &c.* & *Indulgentiam & remissionem, &c.* imponi debet pœnitentiam, siue satisfactionem, quam judicaverit Sacerdos adimplendam a pœnitente. Et quæ sit non tantum ad novæ vitæ custodiam, & infirmitatis medicamentum, sed etiam ad præteritorum peccatorum vindictam & castigationem. Nam claves Ecclesiæ non ad solvendum tantummodo datæ sunt Sacerdotibus, sed ad ligandum etiam.

Pœnitentiam injungere debent Sacerdotes per contraria, sicut solent Medici: ut avaro eleemosynam, guloso abstinentiam cibi, luxurioso carnis macerationem & studia literarum. Sed sic, ut pœnitens illam acceptet: alioqui cavebit, ne nimis graves imponat, aut difficiles. Item neque tales, quæ sint alicui alteri personæ oneri, aut præjudicio. Velut si injungeret marito aliquid, quod esset uxori onerosum.

## XX.

Non inducat Sacerdos pœnitentem, ad dandum sibi aliquid pro Missa, vel aliis orationibus: nisi ipse ultro offerat: ad evitandam suspicionem sordium.

## XXI.

Non cogat confitentem jurare, vel vovere, quod adimplebit injunctam pœnitentiam: satis est, quod eam acceptarit.

## XXII.

Caveat Sacerdos, ne verbo aut signo, aut alio quovis modo, prodatur peccatorem. (f) Quoniam qui peccatum in pœnitentiali judicio detectum revelat, vel revelare præsumit, gravissime peccat: hunc non solum a Sacerdo-

(f) S. Tho. 2. 2. q. 33. & in 4. dist. 21. & communiter.



cerdotali officio deponendum, sed etiam in arctum Monasterium detrudendum esse Jura Canonica statuerunt ad agendum pœnitentiam perpetuam.

## FORMA ABSOLUTIONIS.

### XXIII.

Quamvis de substantia formæ absolutionis sunt verba duntaxat: Ego absolvo te a peccatis tuis: (g) tamen de congruitate præmittuntur orationes deprecativæ. Misereatur tui Omnipotens Deus. Indulgentiam &c. Et his dictis subjungitur: Passio Domini nostri Jesu Christi, & merita omnium Sanctorum, ac bona, quæ fecisti, & facturus es, & adversa, quæ sustinuiti & sustinebis, sint tibi in pœnitentiam & remissionem peccatorum tuorum, & in augmentum gratiæ Divinæ. Et ego autoritate mihi commissâ, absolvo te a vinculo minoris excommunicationis (si quam incurristi) & restituo te Sacramentis Ecclesiæ, & insuper eadem autoritate a peccatis tuis, in nomine Patris, & Filii, & Spiritus Sancti, Amen.

### XXIV.

A sententia excommunicationis majoris absolvendi forma nulla certa est: quoniam sufficit quodcumque verbum significans eam absolutionem, quod fiat cum intentione requisita, veluti: (b) Ego te absolvo ab excommunicatione: vel, Restituo te Ecclesiæ Sacramentis, & communioni fidelium: vel aliud quodcumque. Tamen ex veteri ritu absolvendi requiruntur hæc: Primo juret, quod parebit mandatis Superioris. Item requiritur, quod habeat consensum partis læsæ. Hoc est, quod appareat eum satisfecisse parti læsæ. Hoc Jureconsulti multis ex locis deducunt. (i) Item promittat, quod nunquam contraveniet illi Canoni, contra quem faciendo incurrit excommunicationem. Post hæc nudatos de-

super humeros ejus (maxime in viris) Sacerdos virga, vel fune, vel alia re percutit, dicendo Psalmum: Miserere mei Deus: Et post, Gloria Patri: (k) Kyrie eleison. Christe eleison. Kyrie eleison. Pater noster. Et ne nos &c. Salvum fac servum tuum Domine. Respon. Deus meus sperantem in te. Vers. Nihil proficiat inimicus in eo. Respon. Et filius iniquitatis non apponat nocere ei. Domine exaudi orationem meam. Dominus vobiscum. Oremus. Deus, cui proprium est, misereri semper & parcere, suscipe deprecationem nostram, & hunc famulum tuum, quem excommunicationis sententia ligatum tenet, miseratio tuæ pietatis absolvat. Per Christum Dominum nostrum, Amen. Denique adjiciet: Autoritate Omnipotentis Dei, & Beatorum Apostolorum Petri & Pauli, mihi commissâ, absolvo te a vinculo excommunicationis, quam incurristi, propter causam talem: & restituo te Sacramentis Ecclesiæ, & communioni fidelium, in nomine Patris, & Filii, & Spiritus Sancti, Amen. Hæc est forma, quam referunt Doctores: quamquam nullum jus scriptum invenitur, quod sit necesse hic nudari corpus: & ideo mos ille fere exolevit.

### XXV.

Prostrato igitur pœnitente ad pedes Sacerdotis in loco patenti, ita ut a multis videri possit (maxime si sit mulier) & facta benedictione solita, atque invocatione Sancti Spiritus, & confessione generali: exigit Sacerdos ab eo Symbolum Fidei, & Orationem Dominicam, & suffragia, si qua teneat, hoc pacto:

*Pource, mon amy, que vous vous presentez devant moy, comme bon Chrestien, pour obeyr à Dieu & à son Eglise, & obtenir de luy sa grace & la remission de vos pechez: il faut que je sache de vous, si avez la doctrine & le mot du guet, par lequel l'on connoist les Chrestiens de ceux, qui ne le sont pas.*

X 3

(g) C. Omnis. de Pœnit. & Rem. cap. Sacerdos. d. 6.

(b) Sylv. absolutio 3.

(i) C. Porro. & c. Parochianos. de sentent. Excomm. c. Cum desiderio. c. Ex parte. de verb. sig. c. Ex literis. de offic. deleg. c. Odoardus. de solv. c. Venerabilibus. C. Porro. de sent. excomm. lib. 6. c. Ex tenore. de sent. excomm.

(k) C. A nobis. de sent. excomm. S. Antoninus 3. part. tit. 24. c. 7.

*pas. Savez vous vostre creance, Ou le Credo in Deum? &c.*

Si confitens sciat, recitabit: & Sacerdos (si sit pœnitens idiota & simplex, & liceat per tempus) simpliciter lingua vernacula, singulos articulos declarabit: & idem postea de oratione, Pater noster: quam omnis Christianus scire debet, tanquam nobis a Christo traditam formam orandi. Salutationem quoque Angelicam scire debet: cujus recitatione præter alia commoda, propter memoriam beneficii Incarnationis, quod in corpore Sacratissimæ Virginis Mariæ Spiritus Sanctus operatus est, devotio multum solet augeri.

## XXVI.

Si confitens ista nescierit, docendus erit a Sacerdote, qui eum hortabitur, ut veniat in domum suam, vel Ecclesiam, & instruetur per Sacerdotem, vel per ejus Diaconum, vel Clericum.

## XXVII.

Facient quoque confessionem generalem idiotæ lingua vernacula, hac forma: *Je me confesse à Dieu, à la glorieuse Vierge Marie, & à tous les Saints & Saintes de paradis, & à vous mon Pere spirituel, de mes pechez, que j'ay commis de volonté, de bouche & d'œuvre.*

## XXVIII.

Recitatis ergo his a confitente, Sacerdos peret, an sit excommunicatus sententia aliqua Judicis, vel propter aliquod crimen putet se esse excommunicatum. Si fuerit, non absolvetur a Sacerdote, sed remitteretur suo Judici, sicut dictum est, nisi in casu extremæ necessitatis. Poterit tamen (si velit) confiteri sua peccata, ut a Sacerdote accipiat salubre consilium & consolationem. Si dicat, nescire se esse excommunicatum: tunc Sacerdos perget in hunc modum:

*Mon amy, vous avez ouy souvent au prone reciter les dix commandemens de Dieu: à l'observance desquels vous & moy & toutes personnes sommes obligez. Aussi avez ouy les commandemens de l'Eglise, lesquels tous bons Catholiques sont obligez garder. Et*

*pour les vous reciter de nouveau en nostre maniere accoustumee, ce sont,*

*Un seul Dieu tu adoreras, &c.*

*Or vous pouvez penser, mon amy, combien de fois vous avez contrevenu aux commandemens de Dieu, non pas à un seul, mais peut estre à tous, & si souvent, qu'il vous seroit impossible de sçavoir dire le nombre: & avez abusé de la patience de Dieu, qui vous a tant de fois pardonné, & longuement attendu, & donné de loysir de vous repentir & reconnoistre. Doncques bannissez vostre esprit, vostre pensée, & vostre cœur devant luy: qui se monstrera bon & misericordieux Pere, si vous estes un vray pénitent, & luy descouvrez vos fautes, & accusez vostre conscience, en luy criant mercy: assurez vous, qu'il vous pardonnera & remettra en sa grace, par le mérite de son benoist Fils JESUS CHRIST: selon que par sa parole & de son auctorité j'en prononceray tantost la sentence. Dites donc en vous mesmes tout ce, qu'avez résolu de me dire: car il n'y a personne, qui sucbe vostre conscience, que Dieu & vous mesme.*

## XXIX.

Si fuerit simplex & idiota, tunc Sacerdos discurrendo per singula præcepta, ut supra dictum est, examinabit, in aliis non amplius, quam putaverit necesse esse.

His peractis dicet Sacerdos:

*Vous congnoissez maintenant la grace, que Dieu vous a fait, quand il vous a donné le loysir de vous reconnoistre, apres que l'avez tant de fois offensé: apres luy avoir promis au Baptême & aux autres confessions, qu'avez faictes par cy devant avec sa sainte grace de luy obeir: vous avez tant souvent mesprisé les bonnes inspirations, qu'il vous a baillé pour changer de vie, & n'en avez tenu compte: & est à craindre, qu'une partie de vos fautes viennent d'une accoustumee & enracinee maniere de mal vivre. Mais si vous en demandez pardon à Dieu de bon cœur, avec volonté de non plus l'offenser, tant que vous pourrez, & par sa grace, suez vous en luy & en sa Parole, qu'il vous pardonnera. Et si par adventure vous n'avez ceste repentance pour maintenant, ou celle, qu'avez, n'est pas bien entiere & parfaite, priez le de bon cœur, qu'il la vous donne: & considerez le danger, où vous estes tous les jours de mourir soudainement*

nement & n'avoir loysir de luy crier mercy. Vous luy criez donc mercy. Et dicat confessionem generalem. Reliqua, sicut supra traditum est, exequatur Sacerdos.

### DE CASIBUS RESERVATIS.

**S**unt quædam peccata, quorum absolutio prohibita est simplici Curato, & Presbytero, jure Canonico, vel Constitutione Synodali & consuetudine. Sunt & quædam censuræ [ut excommunicationis majoris, suspensionis, interdicti, & irregularitatis] quæ reservantur Superioribus. Item dispensatio jurisjurandi, & voti: atque ejusdem commutatio, vel redemptio ad Superiores spectant.

### CASUS RESERVATI AD Papam, ex veteri Statuto.

#### XXX.

**F**alsarius literarum Apostolicarum, (1) incendiarius Ecclesiarum, & locorum Deo dedicatorum, verberans Presbyterum, aut Clericum, aut religiosam personam atrociter, videlicet cum effusione sanguinis, aut membri mutilatione, Simoniacus in Ordine, aut beneficio Ecclesiastico, excommunicatus, interdictus, vel suspensus se immiscens Divinis. Communicans in crimine scienter cum excommunicato a Papa in contemptu sententiæ.

#### XXXI.

Generaliter autem Confessor sit discretus & attentus in hoc, ut pro omni casu gravi, enormi, inaudito, inopinato, & insolito, remittat pœnitentem ad Nos, vel Vicarium nostrum Generalem, ut tali pœnitenti secure, provide, ac prudenter possit consuli, pro salute animæ suæ, secundum doctrinam ac traditionem juris: cujus peritiam ut plurimum non habet simplex Curatus, aut alius Sacerdos Confessor.

### CASUS RESERVATI Episcopis ex Statuto veteri.

#### XXXII.

**I**ncestus, stuprum, adulterium, sodomia, & sacrilegium. Sacrilegium committitur tripliciter. Scilicet, auferendo rem sacram de loco sacro, rem sacram de loco non sacro, rem non sacram de loco sacro.

Mentita fides, sive perjurium: per quod infertur damnum, vel nocumentum proximo.

Falsum testimonium; per quod Deus contemnitur, justitia decipitur, & veritas occultatur: & instrumentorum falsificatio.

Oppressio, seu suffocatio puerorum, quæ accidit propter negligentiam, seu non debitam custodiam puerorum per parentes. Tales debent remitti ad Matricem Ecclesiam in capite jejunii, id est, prima die Quadragesimæ, quæ dicitur dies Cinerum, suscipiendi pœnitentiam publicam in forma juris.

Offendens patrem aut matrem, paterne vel alias injuriose.

Incendiarii locorum non sacrorum: nisi fuerint denunciati excommunicati: quia post denunciationem absolviendi sunt a Papa.

Blasphematores Dei, Virginis Mariæ, & Sanctorum: quia tales scandalizant fideles populos.

Hæreticus omnis male credens, & male sentiens in fide, in Sacramentis, in doctrina Ecclesiæ.

Percutiens Presbyterum aut Clericum, sine membri mutilatione, aut notabili sanguinis effusione.

Matrimonium clandestine contractum, vel contra interdictum Ecclesiæ.

Homicidium in se, vel in alio, sub quo comprehenduntur procurantes extinguere partum conceptum in utero, sive dantes pocula, ne mulier concipiat.

Omnes

(1) Statut. verus.



Omnes denique excommunicati a jure, sive per Statuta Provincialia, aut Synodalia, quorum absolutio non est reservata Papæ.

Sed de Casibus reservatis plura in Tit. de Excommunicatione, infra. Ex observandæ semper Bullæ Cœnæ Domini.

## DE SACRAMENTO EXTREMÆ UNCTIONIS.

**Q**uamquam aliorum Sacramentorum vis atque utilitas patet latissime per omnem vitam : tamen ne, cum ægrotat homo, subsidium desideret eo tempore periculofissimo, quo mortis horror invadit: quando potestates tenebrarum machinas omnes admovent ad hominis salutem extinguendam : cum terroribus & visis horrendis animum frangere conantur, & in desperationem adducere : Unctio Sacra instituta est a Christo, (m) & ab Apostolo promulgata, quæ adhibitis orationibus Ecclesiæ, corpori subveniat, & animam muniat contra tela hostis ignita. Certe multis in Sacramentis & Mysteriis Ecclesiasticis unctio fit. Cujus rei causas dederunt Sancti Patres, Clemens, Dionysius, Cyrillus, Ambrosius, Augustinus, & alii. Sicut enim illa in Baptismo corporis ablutio in ænigmate vitam repurgari significat : sic unctio eum, qui baptizatur, ad certamen & sacrum pugilatum vocari sub Christo agonotheta, inferique nos in novam olivam, fierique participes pinguedinis ejus, qui est Christus. Verum ultimum Sacramentum hoc nomine designatur, quia in Literis Sacris ita dictum est : Infirmatur quis in vobis : [inquit B. Jacobus Apostolus] inducat Presbyteros Ecclesiæ, & orent super eum, ungentes eum oleo in nomine Domini : & oratio fidei salvabit infirmum, & alleviabit eum Dominus : & si in peccatis sit, remittentur ei. Atque hæc quidem efficacia est Unctionis Sanctæ.

### STATUTUM I.

**I**dcirco extremam Unctionem solis infirmis adhibemus, & majoribus quatuordecim annis: non tamen omnibus, sed tantum iis, qui periculose laborant: ubi de morte probabiliter timetur, quasi extremum Sacramentum. Minoribus autem quatuorde-

cim annis, vel furiosis (qui nihil peccarunt) non debet dari: nisi hi lucida habeant intervalla, & periculum non sit de scandalo. (n)

#### II.

Nec per alium administrari potest, quam per Sacerdotem : qui secum deferre debet crucem, & habere lumen & aquam benedictam : ut aqua benedicta aspergatur locus, ubi infirmus decumbit, ad expellendas omnes diabolicas potestates. Hanc vim habet aqua benedicta, ut Sancti Patres (o) testantur. Crucem quoque ostendat infirmo Sacerdos : ut in qua vixit Christus, & inde spem quoque ipse victoriæ concipiat.

#### III.

Mortuo dari non debet: sed si inter ungendum moriatur, cessandum est. Si vero dubitetur, an mortuus sit, hac verborum forma ubi licebit : Si mortuus es, non te ungo, sed si non es mortuus, &c. (p)

#### IV.

Minister hujus Sacramenti est proprius Sacerdos, quia is tenetur scire, qui idonei sunt ad Sacramenta Ecclesiastica, qui indigni ab eisdem repellendi : nec dari debet, nisi iis, quibus alia Sacramenta conceduntur. (q)

#### V.

Inungantur partes corporis præcipuæ: ut oculi, aures, nares, labia, pectus, renes, manus, pedes : sed in harum partium unctione mos patriæ est tenendus. Manus Sacerdotum ungi non solent, quod jam unctæ fuerunt ab Episcopo. Eodem modo laicorum frontes, qui confirmati non fuerunt, ungi debent. (r)

#### VI.

Sacerdos admoneat infirmum ante & post unctionem, si sensum nondum amiserit, ut in fide Ecclesiæ perseveret : quod pœniteat peccatorum præteritorum : & proponat, si supervixerit, vitam emendare: & spem omnem salu-

(m) Marc. 6. Jacob. 5.

(n) S. Tho. 4. d. 23. Pet. de Palud. eod.

(o) Euseb. hist. libro 7. Epiph. contra Hære. lib. 1. Greg. dial. lib. 3.

(p) Pet. de Palud. & Archi.

(q) Innoc. ad Decent.

(r) Groper. in Enchi.

salutis suæ reponat in merito Passionis Christi. Congratulari etiam ei debet, quod Sacramentum hoc sibi administrari postulaverit. Est enim signum magnæ fidei & spei, quam infirmus habet in auxilio Christi, & unctiōe Sancti Spiritus. In hac fide confirmet eum Sacerdos, & consoletur.

Administratis Sanctis Unctionibus, sicut est in Manuali, si frequentes fuerint assistentes, lingua vernacula eos alloquetur in hunc modum Sacerdos:

*Mes amis & amies, pour la Charité que devons à nostre prochain, & la crainte de Dieu, je vous prie tous avoir pitié de ce pauvre malade, & représentés à vostre esprit le jour & l'heure, que peut estre sera bien tost que vous serés en pareil estat, auquel temps vous voudriés avoir donné tout vostre bien & estre secouruz des oraisons de l'Eglise, & prieres des gens de bien. Supplions Dieu doncques tremblement, que par sa miséricorde il accompagne ceste pauvre creature de sa force & de son S. Esprit, & de sa grace, luy doient parfaite foy & esperance au merite de la Passion de JEsus Christ, & qu'il le preserve des assaux & tentations de l'ennemy: à fin qu'à l'article de la mort il die & retienne en son cœur l'oraison que nostre Seigneur nous enseigne, quand il passa de ce monde: Pater, in manus tuas commendo spiritum meum. Mon Pere, je recommande mon esprit en tes mains. Mon ame est à vous Seigneur, vous l'avez créée & mise en ce monde: JEsus Christ l'a rachetée. Je vous supplie l'accepter en vos mains. JEsus Fils de Dieu prenez par vostre pitié mon esprit, & le présentés à Dieu vostre Pere, revestus de vos merites, & lavé de vostre sang. Glorieuse Vierge Marie soyés mon Advocate envers vostre benest Fils, Michel Archange victorieux, & mon bon Ange assistés moy, & avec tous les Saints & Saintes de Paradis, aidés moy en ma priere. Atque hæc quidem poterunt sæpius repeti. Sed exhortatione facta procedet Sacerdos ad alias preces, sicut in Manuali continentur.*

Reliqua, quæ faciunt ad doctrinam bene moriendi, quæque morientibus necessa-

ria sunt, habes inter Quatuor novissima superius.

## DE SPONSALIBUS & MATRIMONIIS.

### STATUTUM I.

**S**ponsalia sunt futurarum nuptiarum promissio. (s) Et fiunt per verba de futuro: ut cum vir dicit mulieri: Accipiam te in uxorem: & mulier dicit viro: Accipiam te in maritum. Et fiunt quandoque per simplicem promissionem de futuro sine juramento, aliquando cum juramento. Et quamvis possunt sine Sacerdote contrahi, congruum tamen est & decens, ut per Sacerdotem Parochialem fiant, in præsentia honestarum personarum: ut bonum testimonium haberi possit (si opus sit) de forma, modo, & verbis contractus. Et non debent fieri ante septimum annum contrahentium.

#### II.

Matrimonium contrahitur per verba de præsentis maritali affecta: ut cum vir dicit mulieri: Accipio te in uxorem meam: & mulier dicit: Accipio te in virum meum: vel alia verba æquipollentia & denotantia consensum mutuum de præsentis. Sed non aliter posthac ratum fore declaramus, nisi præsentis Parocho, & duobus saltem testibus hæc fiant. (t)

#### III.

Matrimonium (u) per Sponsalia initium capit: per consensum animorum, expressum per verba de præsentis, uti diximus, ratificatur: per carnalem vero copulam consummatur & perficitur.

Causæ principales, propter quas contrahitur Matrimonium, sunt duæ. Prima est procreatio proles. Secunda est vitatio fornicationis & adulterii, quæ est mortale peccatum: quia omnis copula carnalis viri cum muliere, præter matrimonialem, est mortale peccatum. Aliæ sunt causæ secundariæ, sive minus principales, de quibus nihil in præsentia.

Potest

(s) Stat. vetus.

(t) Conc. Trid. Sess. 24. c. 1.

(u) Idem Stat. vetus.

Tomus VIII. Concilior. German.

Potest quis accedere ad uxorem quatuor de causis: scilicet causa prolis, causa vitandæ incontinentiæ; causa reddendi debiti, & causa explendæ libidinis. In tribus primis non est peccatum, sed in quarto esse solet aliquando mortale, aliquando veniale. unde versus:

*Quinque modis petat uxore maritus ab-  
utens,  
Tempore, mente, loco, conditione, mo-  
do.*

Tria sunt bona Matrimonii, scilicet fides, ne post vinculum conjugati cum alio, vel alia partem habeant: proles, ut suscipiatur, ametur, & religiose, id est, probe, & in bonis artibus ac moribus instituatur. Sacramentum, ut instar conjunctionis Christi & Ecclesiæ, inseparabile vinculum maneat Matrimonii usque ad mortem alterutrius ipsorum. (x)

Quos enim Deus conjunxit [inquit Dominus] homo non separet. Et si propter fornicationem separatio fiat a thoro, manet tamen vinculum Sacramenti perpetuo, viventibus ambobus. Hæc est doctrina Catholica, quam docuerunt Hilarius, Epiph. Theodoret. Basilii, & alii. *Licet Lactantius lib. 6. Divin. instit. aliter.* Sed falsus hic. Nam quomodo reconcillari poterit resipiscens uxor, si vir aliam duxerit? Reconciliari autem voluit Apostolus: in lege lapidabatur adultera.

#### IV.

Masculus major annis quatuordecim, (y) & puella major annis duodecim, potentes ad carnalem copulam, possunt Matrimonium contrahere, etiam si muti sint, dummodo signa consensus demonstrent.

Matrimonium licet possit contrahi absque consensu parentum, & amicorum contrahentium, & sine aliqua publicatione bannorum, & nihilominus habeatur ratum, nec unquam dissolvi ab hominibus possit: (ideo dicit Scriptura: Relinquet homo patrem & matrem, & adhærebit uxori suæ) tamen quia honestum, congruum & decens est, ut tanti momenti contractus non temere fiat, & inconsulto: Sancti Patres, inde a principio Ecclesiæ, omnino clandestina conjugia damnarunt, (z) nec minus quam adulteria & fornicationes tamdiu rejecerunt, donec solennitatibus adhibitis celebrarentur. Quapropter filii ex ta-

li conjugio procreati, habentur illegitimi, quamdiu in facie Ecclesiæ non celebratur.

Dicuntur autem Matrimonia clandestina, quoad præsens, & illa, quæ de facto fiunt non factis tribus bannis & proclamationibus publicis in Ecclesia Parochiali, per tres dies Dominicos aut alios Festivos, ut moris est & juris, nulla habita dispensatione bannorum prædictorum.

Uno verbo clam fieri dicuntur illa, quæ celantur timore alicujus controversiæ & impedimenti, quod jure timeri debuit. Nam qui nihil timet, non fugit lucem.

Solemnitas requisita præcipue est, ut mulier petatur ex iis, qui curam ejus habent. Deinde [ut legibus (a) docetur] a propinquis, & præsentibus Parocho, vel alio Presbytero sponsetur, [quod vocatur affidatio.] Tertio, ut publice in Ecclesiis banna pronuntientur per Curatum, præfinito termino competenti & spatio dierum inter ipsa banna aliquo, ut legitimum impedimentum opponere queat, qui volet. Quarto, ut a Sacerdote coram testibus multis, benedicatur in Ecclesia, & tempore non prohibito. Denique, ut a paranympis secundum consuetudinem patriæ custoditam, solenniter a viro accipiatur. Et biduo, vel triduo [si fieri poterit] orationi vacantes, castitatem ambo custodiant: vel ipsa nocte prima saltem, pro reverentia benedictionis.

#### V.

Mandamus etiam, (b) & districte præcipimus Curatis Nobis subditis, ut frequenter hortentur publice in Ecclesiis suis Parochianos suos, & præcipue juvenes adolescentes, ne contrahant Matrimonia, sine consensu & beneplacito parentum suorum, aut illorum, a quibus gubernantur & reguntur. Adde, quod ii melius providere possint, & cognoscere, quid expediat in tali re, quam adolescentes ipsi, passione stulta sæpenumero decepti & amoris furore.

#### VI.

Matrimonium debet in facie Ecclesiæ publice solennizari, per Sacerdotem Parochialem post tria banna publice proclamata in prono Missæ, præsentibus populo tribus Dominicis, vel Festis, non immediate se sequentibus, in Ecclesia loci,

(x) Aug. de gene. ad literam libr. 9. cap. 7.

(z) S. Evaristus 3. q. 5. aliter.

(a) 30. qu. 5.

(y) Stat. vetus.

(b) Stat. vetus.



loci, ubi morari sunt soliti contrahentes  
& parentes ipsorum. (c)

## VII.

Qui aliter, quam præsentem Parochum, vel alio Sacerdote, de ipsius Parochi vel nostra licentia, & duobus vel tribus testibus Matrimonium contrahere attentabunt: eos ad sic contrahendum Sancta Synodus Tridentina inhabiles omnino reddit, & hujusmodi contractus irritos & nullos esse decernit, ipsosque aliter contrahentes, & Parochum sine testibus, & testes sine Parocho assistentes, graviter puniendos esse declarat.

## VIII.

Si autem durante proclamatione bannorum (d) apparuerit opponens, vel contradictor proponens & allegans causam, propter quam Matrimonium hujusmodi non debeat de jure fieri: Sacerdos Parochialis citet contrahere volentes & opponentem, ad certam & competentem diem, tunc futuram coram Officiali nostro, ad prosequendum negotium, & procedendum, prout juris fuerit. Nec procedat Sacerdos ulterius ad solennizationem dicti Matrimonii, vel alicujus prædictorum, donec & quousque sibi conititerit de mandato dicti Officialis nostri.

## IX.

Et cum ad Nos, (e) vel ad nostram Sedem pertineant causæ matrimoniales: prohibemus sub excommunicationis pœna, ne quis cujuscunque gradus, conditionis vel dignitatis existat, cognoscere præsumat, aut judicare de causis matrimonialibus: Neque partes Matrimonium contrahere volentes concordent, vel transigant inter se, super ipsis causis, absque judicio Ecclesiæ.

## X.

Multa sunt impedimenta Matrimonii, impediencia contrahendum, & dirimentia contractum: super quibus antequam contrahantur, consuli Sacerdotes solent. Et a versibus his comprehenduntur:

Error, conditio, votum, cognatio, crimen,

Cultus disparitas, vis, ordo, ligamen, honestas,

Addito nunc, Parochus, binis cum testibus absens:

Si sis affinis, si forte coire nequibis.

Hæc facienda vetant connubia, facta retractant.

## XI.

Sunt alia, quæ impediunt contrahendum, sed non dirimunt jam contractum.

Ecclesiæ vetitum, nec non tempus feriarum,

Ista vetant fieri, permittunt facta teneri.

Omissis autem nunc aliis impedimentis Curatus scire debet, quod cognationis & affinitatis gradus ascendentes & descendentes, prohibiti sunt a natura: & in illis copulam omnes sanæ mentis homines abhorrent. Collaterales cognationes prohibentur partim Sacris (f) Literis, partim (g) Canonicis: sed ab his, usque ad quartum gradum inclusive. Et in cognatione quidem spirituali primus gradus prohibetur, sicut supra dictum est in titulo de Baptismo. Sed in affinitate expenduntur gradus cognationis alterius conjugum: quia toto gradu distat vir a cognatis conjugis suæ, quanto conjunx ipsa distat ab eisdem cognatione. Estque primus gradus cognationis inter patrem & filium: primus quoque inter fratres, secundus autem inter avum & nepotem, & inter filios fratrum: & sic deinceps. [h] In his gradibus cognationis, vel affinitatis, contrahentes, eo ipso facto sententiam excommunicationis à jure latam incurrunt. Et Matrimonium nullum faciunt. Lege Mosæ prohibebatur nepos ducere amitam, vel matertem. Levit. 18. Sed mittebatur avunculo & patruo, ducere neptem ex fratre vel sorore. Nam Josue 15. Othoniel duxit filiam Caleb fratris sui: & Abraham Sarai filiam Aram fratris sui. Gen. 12. Rationem hujus dispensationis dat Liranus Josue 15. quia caput uxoris est vir, & debetur viro reverentia ab uxore. Idem docet Petrus de Pal. 4. d. 41. q. 1. Licet contra doctrinam gloss. c. Litteras. de rest. spol. & cap. Gaudemus. de divort. & c. Per venerabilem. qui fil. sunt leg.

## XII.

(c) Ext. De electio. c. Postquam. Pan. c. Cum inhibitio extr. De clandest. despons. Synod. Mogun.

(d) Stat. vetus.

(e) Idem.

(f) Levit. 18.

(g) Ext. De consan. & affin.

(h) In Clem. 1. De consan. & affin.

## XII.

Tempora feriarum, quibus prohibebatur celebratio nuptiarum, sunt in toto Adventu usque ad octavam Epiphaniæ exclusive: & a Septuagesima usque ad octavam Paschæ, inclusive, & a tribus diebus ante Ascensionem, usque ad octavam Pentecostes, exclusive. Sed per Concil. Trid. sublata est prohibitio post Epiphaniam: & a Septuages. usque ad diem Cinerum. In jejuniis Quatuor temporum: & Vigiliis Sanctorum, in quibus jejunium est de præcepto, non sunt nuptiæ. Quia propter jejunia, & Communionem Sacram, etiam Matrimonio conjuncti (ut vacent orationibus) deberent a maritali thoro abstinere, tanquam uxores non habentes: multoque minus illa exempla dissolutionis exhibere, quæ solent lætitiæ causâ in nuptiis. (i)

## XIII.

Nullus Sacerdos Parochialis (k) recipiat alienum Parochianum nostræ Civitatis & Dioecesis, ad Sacramentum Matrimonii, nisi habeat literas dimissorias, & testimoniales sui Curati: seu Vicarii illius, per quas appareat, quod talis Parochianus alienus, idoneus sit, nec in eo obstat impedimentum, quominus licite Matrimonium possit contrahere: vel nisi certis de causis Nos, aut Vicarius noster Generalis mandemus fieri per patentes literas signatas & sigillatas in cera rubea: veluti fieri solet pro Magnatibus, & aliis nonnullis.

## XIV.

Si vero Parochianus alienus sit alterius Dioecesis, (l) licet habere dicatur literas testimoniales sui Curati: non tamen admittatur sine nostris, aut Vicarii nostri Generalis, vel Officialis literis de Placet, adnexis ad tales literas dimissorias: ad obviandum fraudibus & malitiis, quas experientia docet sæpe in talibus literis esse commissas.

## XV.

Pro literis, quas vocant: De relatione boni status Parochiani sui, quibus

scribitur (sicut in forma sequenti traditum est) quod ipse prior Curatus nullum scit, vel intellexit impedimentum, propter quod tali Parochiano suo debeant denegari Sacramenta Ecclesiastica: (sive antequam recedat, has petierit literas, sive postea multo tempore) Curatus tales dans literas, non exigit plus, quam quatuor albos. Si vero Parochianus, vel Parochiana absque licentia sui Curati recesserit, vel cum licentia, pro bannis, quæ fiunt in priori Parochia, & literis super hoc a Curato datis, solvet sex albos: nisi per has literas simul detur licentia recedendi a Parochia: quæ dicuntur literæ de recedo. In sua Parochia, ubi residet quis, nihil tenebitur solvere Curato suo pro bannis: nisi aliter habeat consuetudo. Pro literis vero de recedo, quibus Curatus dat licentiam Parochiano suo aliam Parochiam acquirendi, & eum ex sua dimittit & liberat, servabitur consuetudo loci absque ulla querimonia: alioqui de nimia exactione, si quis conqueustus fuerit, graviter punietur a Nobis Curatus, vel Vicarius in hoc delinquens.

## XVI.

Mulieri secundo nubenti nullus Sacerdos benedictionem impendat nuptialem: quia jam in primo Matrimonio fuit benedicta. (m)

## XVII.

Quando aliquis vir alicui mulieri fidem de Matrimonio contrahendo dedit, nullatenus debet eum Sacerdos alteri mulieri matrimonialiter conjungere, etiam, si is primam non cognoverit: nisi evidens impedimentum Canonicum interellet inter primos, propter quod non possent, seu deberent Canonice copulari. Ubi si dubitetur de impedimento, consuli Nos oportebit. (n)

Præsentatis pro foribus Ecclesiæ Sponsis, & ultimo banno proclamato, in hunc modum procedetur.

Les

(i) S. Tho. 4. dist. 32. 33. qu. 4. Non oportet. ext. De fer.

(k) Stat. verus.

(l) Stat. verus.

(m) C. Vir autem. de sec. nupt.

(n) 21. dist. De consang. & affin. c. 1. c. De exceden. de excess. Prælatorum.

*Les bans ont esté faictz & proclamez en nostre Mere Sainte Eglise par trois jours solennels, entre N. & N. encores les denonçons nous pour la quarte fois, & commandons sur peine d'excommunication, s'il y a aucuns ou aucunes, qui sachent cause pourquoy le mariage ne se doive faire, qu'ils le dient avant, qu'on procede plus avant audit mariage.*

Hoc facto si nihil opponatur, Curatus seu Pastor interrogabit eos, petito prius nomine utriusque, in hunc modum :

*Jean & toy Pernette, avez vous la volonté de vous marier ensemble? Respond. Ouy. Y a il entre vous quelque empeschement de parenté ou d'affinité, ou autres deffenduz par l'Eglise? Toy Jean, tenendo ejus manum dextram, par le serment, que tu as presté à Dieu & à son Eglise, as tu faictz promesse, &c. Quod si quis opponat, cessabit Sacerdos, & scilicetabitur: Quel empeschement y a il? Si respondeant Matrimonium esse cum alio factum: remittet eos Curatus ad Officiale nostrum, assignando diem ipsis partibus coram dicto Officiali: & dabit partibus literas hujusmodi:*

**V**ENERande Domine Officialis, noverit vestra discretio, quod cum paratus essem Matrimonium in facie Ecclesiæ meæ celebrare inter N. & N. P. se opposuit. Quare partes ad vos remisi cum his literis, assignando eis diem N. Vos oro habeatis ipsos commendatos. Datum, &c.

Si vero impedimentum obijciatur consanguinitatis vel cognationis: tunc Curatus describet arborem in charta, sicut ipse comperit rem se habere, & mittet ad dictum Officiale, si res fuerit ipsi Curato dubia: sin vero manifestum sit impedimentum, cessabit omnino a celebratione dicti Matrimonii.

Postea altiori voce, si videatur opportunum, dicet, quæ sequuntur.

*Le souverain Createur apres la creation du monde a institué le saint mariage, le premier entre Adam & Eve, eux estans encores en paradis terrestre, & en l'estat d'innocence: qui n'est pas sans grand mystere. Hic poterit Curatus, si velit dilatare sermonem,*

*exponere quo pacto Deus creavit Evam: quid dixit Adam, visa uxore, &c. Item quo pacto Filius Dei de cælo descendit, ut Ecclesiam sibi desponsaret. Quocirca Apostolus ait: Sacramentum hoc magnum est. Eph. 5. Amplificabit dignitatem Matrimonii a significatione & mysterio conjunctionis illius invisibilis Christi & Ecclesiæ, ex qua confertur gratia in hoc Sacramento. Depuis nostre Sauveur & Redempteur JEsus Christ, estant en ce monde, & conversant parmi les hommes a tant honoré ceste sainte œuvre, que luy mesme a assisté à la celebration des nopces, & au convive, où fait son premier miracle. Luy mesme a prononcé la loy de mariage, & ordonné, qu'il sera indissoluble. Nul ne separera (dit il) ceux que Dieu a conjointz. Parquoy vous A. & E. qui desirez vous assembler, & vous marier l'un avec l'autre, devez avant toutes choses prendre garde, que ceste vostre intention ne procede de mauvaise source, comme de la volupté desordonnée, de l'avarice, de l'ambition, de la contraincte des parens, ou autres: mais il faut, que ce soit selon Dieu, avec simplicité d'esprit, & de pensée, comme en l'estat que Adam & Eve noz peres estoient au paradis terrestre, & aux fins, que le mariage est ordonné: à sçavoir pour avoir des enfans, pour vous accompagner l'un de l'autre, & faire que le mal & le bien qui vous adviendra, soit commun à tous deux, & aussi pour vous préserver d'estre fornicateurs, ou adulteres. Exaggerare hic poterit crimen adulterii: primum ex dignitate Matrimonii. Quod tantum mysterium sic contemnatur, non solum perjurio, sed etiam sacrilegio: deinde ex scandalis & malis, quæ sequuntur adulteros: veluti infamia, non solum adulteri, sed totius familiæ: odia affinium & cognatorum: incertitudo prolis. Item pericula, rixæ, inimicitia, zelus, cædes, strages, urbium aliquando, & populorum everfiones. Donques vous A. prenez E. pour vostre femme & espouse & compagne, luy donnez la puissance de vostre corps, avec la promesse, que vous faictes à Dieu, à son Eglise, & à elle de luy garder loyauté & fidelité, & ne vouloir jamais autre femme qu'elle, pour elle illicite: ou pour mariage, tant qu'elle vivra. Dieu vous commande de l'aymer comme vostre propre chair, de la nourrir, de la consoler, & de l'instruire & corriger gracieusement & doucement ses imperfections, si aucunes en y a: non pas*



comme vostre esclave, mais comme vostre seur  
& compagne.

*Vous, E, en prenant, A, pour vostre  
mary & espoux luy faictes don de vostre corps,  
& luy donnez pareille puissance qu'il vous  
donne sur le sien. Vous vous obligez à Dieu,  
à son Eglise, & à luy, de luy garder loyauté,  
& fidélité, & ne vouloir jamais autre homme  
quel qu'il soit, pour acte illicite, ne pour ma-  
riage, tant qu'il vivra. Dieu vous commande  
de l'aymer, honorer, le servir, & luy obéir  
comme nous voyons, que les membres du corps  
servent à la teste de l'homme. Vous mettrez  
peine de le consoler, & contenter en tout ce  
qu'il sera possible, & patiemment supporter ses  
imperfections, si aucunes en y a. Le promet-  
tez vous ainsi? Respond. Ouy. Gardez vous  
doncques mes enfans de contrevenir à ceste  
promesse, que vous faictes icy à Dieu : car il  
se venge de ceux, que le trompent & mesprisent.*

Hic desponsabit eos juxta ritum  
Ecclesiæ, absolutos prius ab excom-  
municatione minori, vel majori, si  
possit, benedictis annulis de more, &  
prolatis verbis ab ipsis sponsis, scilicet:  
*N. Je te prens pour ma femme & mon espou-  
se, & te promets, que je te porteray foy &  
loyauté de mon corps & de mes biens, & si te  
garderay saine & malade en quelque estat  
qu'il plaise à Dieu que tu sois, ne te changeray  
jusques à la mort.*

Et rursus idem dicetur ad Spon-  
sum. Quo facto dicet: Et ego vos in  
Matrimonium conjungo in nomine Pa-  
tris, & Filii, & Spiritus Sancti,  
Amen.

*Priez Dieu tout deux, qu'il vous donne  
grace de vivre en bonne paix & en bonne union:  
& garder & tenir fidelement ce que vous  
promettez l'un à l'autre, autrement la bene-  
diction de Dieu, que vous recevrez maintenant,  
sera convertie en malediction sur vous.*

Si fuerint viri literati, exhortari eos  
poterit, ut legant historiam Tobix: ut illius  
exemplo sanctum, & in Domino conjugium  
aspiciantur.

### XVIII.

Et caveat diligenter Curatus, ne  
Sacramentum hoc Matrimonii admini-  
stret excommunicatis, vel interdictis:  
sub pœnis a jure positis.

### *Forma literarum testimonialium de bannis proclamatis pro Matri- monio contrahendo.*

**C**uratus Ecclesiæ Parochialis de Changiis  
juxta Arbosium, in Decanatu de Salinis,  
Bisunt. Dioecesis, Charissimo in Christo  
Fratri nostro Curato de Sancto Moncejo;  
Lugdinensis, vel alterius Dioecesis, salutem.  
Notum facimus vobis, quod in nostra Eccle-  
sia proclamavimus tria banna per tres dies  
Dominicos, seu Festivos solennes, ad solen-  
nizationem Matrimonii inter N. filium N. Pa-  
rochianum nostrum, & N. filiam N. quibus  
nemo se opposuit aut contradixit. Evol-  
vimus etiam registra nostra, ubi nullius ex-  
communicationis sententia inveniuntur in-  
nodati, nec scimus nos in eis aliquod impe-  
dimentum Canonicum, propter quod Eccle-  
siastica Sacramenta eis debeant denegari, aut  
differri. Hoc nos omnibus, quorum interesse  
poterit, testamur, sub nostro signo manua-  
li, die N. mensis N. Anno, &c.

Henry de Guillot Presbyt. Curatus.

### *Forma literarum de Recedo, seu missionis a Parochiatu.*

**C**uratus Ecclesiæ Parochialis de Cyrodo,  
in Decanatu de Montana, Bisuntinæ Dioi-  
cesis, Charissimo in Christo Fratri nostro Cu-  
rato de Montemartino, Lugdinensis, vel alte-  
rius Dioecesis, salutem. Petit a nobis dimissio-  
nem Joannes N. Parochianus noster: quod in  
vestra Parochia jam ab aliquo tempore mo-  
retur, vel perpetuo morari deliberet. Quam  
nos ei libenter concedimus: eumque per  
præsentes a nostra cura & regimine dimis-  
sum, vobis tradimus & commendamus in  
visceribus charitatis, nullius sententiæ ex-  
communicationis vinculo innodatum, aut  
alio impedimento, quo minus ei Sacramen-  
ta Ecclesiæ & sepulturam impartiri, tanquam  
vere Catholico, debeatis. Datum sub signo  
Manuali nostro, die . . mensis N. Anno ab  
Incarnatione Domini, &c.

Claudius Bruillon, Presb. Curatus.

Si vero excommunicatus sit, ponetur  
sic: Vobis tradimus, sed excommunicatum  
ad instantiam talis, pro summa tali, vel pro  
conrumacia, sicut in registro nostro compe-  
rimus. Datum, &c.

Formam literarum testimonialium de  
bono statu, invenies in titulo de Sepulturis.

DE

## DE SACRAMENTO ORDINIS.

**S**eptem sunt Ordines Ecclesiæ: Ostiarius, Lector, Exorcista, Acolythus, Subdiaconus, Diaconus, & Presbyter. Primi quatuor dicuntur Minores, & non sunt Sacri: tres autem ultimi dicuntur Sacri. Adde quod, qui in Sacris sunt Ordinibus, uxores habere non possunt. Et ita statim vovere coguntur, cum primum Subdiaconatus ordinem suscipiunt. Alioqui non admittuntur ad eum Ordinem, nisi qui cælibem vitam agere promittunt.

In ordinatione autem hæc requiruntur: Episcopus, qui ejus rei Minister est: vir examinatus: manus impositio, cum verbo: & in Presbytero atque Episcopo ordinando etiam unctio. [o]

Esse autem ordinem unum e septem Sacramentis Ecclesiæ, hinc patet: quod verbis & signis exterioribus ac visibilibus conficitur, & gratiam confert, sicut docet Apostolus, 2. Timoth. 1. & 4. Admoneo te, ut resuscites gratiam Dei, quæ est in te per impositionem manuum Presbyteri, id est, Episcopi. Septem vero esse, & quomodo conferri debeant, Concilium Carth. 4. jam olim definivit. Ignatius quoque ad Trall. & Antioch. aliquot recenset.

### STATUTUM I.

**A**ntequam se Episcopo offerant ordinandi, debent ei, vel Pœnitentiario, vel alii potestatem habenti confiteri: ne forte indigni accedentes ad Ordines, ex ignorantia vel simplicitate, irregulariter ordinentur.

#### II.

Qui autem a jure ordinari prohibentur, sunt ii: Primo, ætate minores, quam ad Ordinem requiratur, ut supra dictum est. Secundo, imperiti, seu illiterati. Tertio, criminosi. Existentes enim in peccato mortali non debent promoveri. Quarto, bigami, id est, qui duas uxores habuerunt, vel viduam. Quinto, solenniter pœnitentes. Sex-

to, neophyti: hoc est, recenter in fide Catholica plantati. Septimo, curiales, qui propter aliquod officium curiæ sunt obligati. Octavo, ratiociniis obligati. Nono, servi. Decimo, corpore vitiiati. Undecimo, filii illegitimi. Duodecimo, ignoti & peregrini. Decimo tertio, infames. Decimo quarto, irregulares. Decimo quinto, suspensi, & interdicti, vel excommunicati. Decimo sexto, hermaphroditi. Decimo septimo, conjugati: nisi velint ingredi religionem, & habito consensu uxorum. Decimo octavo, histriones, quia habentur infames. Denique qui per saltum, vel furtive contra voluntatem Episcopi promoti sunt, vel duos Ordines Sacros eodem die susceperunt, vel quatuor minores cum Subdiaconatu eodem die. Omnes hi prohibentur ordinari: & si ordinati fuerint, prohibentur in suscepto ordine ministrare. (p)

## DE EXAMINE ORDINANDORUM.

**J**ubet Apostolus, ut qui ad Sacros Ordines admitti debent, probentur primum, & sic ministrent, nullum crimen habentes. Quia non paucos ad hoc obtrudit minus idoneos vel ambitio, vel avaritia, vel spes otii.

### STATUTUM I.

**I**dcirco ne cui manus cito imponantur, & communicemus peccatis alienis; statuimus, & ordinamus, quod nullus Episcopus Ordines celebret in nostra Dioiceli, nec Pontificalia exerceat, absque nostra licentia, & permissione, sicut est de jure prohibitum. (q)

#### II.

Episcopus per seipsum Ordines celebret, statutis a jure temporibus, in Ecclesia Cathedrali, & publice: vocatisque & præsentibus Canonicis, nisi ægrotudo, vel alia causa impediatur.

#### III.

(o) Stat. vetus. (p) De temp. ord. lib. 6. 26. dist. 50. Ex præsentibus. 36. dist. II. literatos 40. dist. c. 1. 2. 3. 23. De legen. Exrt. de oblig. 51. dist. Ext. de servis non ord. Ext. de corpore int. de reg. jur. lib. 6. Argu. extr. de temp. ord. cap. ultim. Ext. de Cleric. excom. Extr. gloss. 4. q. 3. Hermaphroditus c. fi. de temp. ord. lib. 6. 86. dist. 4. q. 1. cap. 1. De us, qui nor. inf.

(q) Canon. Apostolorum 34. & Nicæna. 17. Trid. Sess. 15.

## III.

Literæ dimissoriæ non concedantur amplius, nec concessæ admittantur: nisi in quibus mores & sufficientia promovendi commendentur ab Ordinario. Quare forma illa, quæ olim erat usu, onerandi conscientiam Episcopi ordinantis, abrogetur: & pro illa fiat posthac commendatitia, causam continens, cur a proprio Episcopo promoveri non possit. Promovendi ad singulos Ordines Sacros examinentur prius: nec ordinetur quisquam sine diligenti examine, nec in minori ætate, quam oportet: vel etiam Regulares, & Religiosi.

## IV.

*Ad Primam Tonsuram.*

Ad primam Tonsuram Clericalem, idonei erunt adolescentes ex legitimo Matrimonio procreati: septem annos nati: Sacramentum Confirmationis adepti: legere atque scribere non prorsus ignari: & qui simpliciter Symbolum fidei tenuerint, Orationem Dominicam, Salutationem Angelicam, Confessionem generalem, & Benedictionem, non alii. Et ponantur posthac omnia hæc in literis formatis tonsuræ, alias pro nullis habeantur.

## V.

*Ad Quatuor Minores.*

Ad minores Ordines promovendi, bonum habeant testimonium a Parocho, & Magistro scholæ, in qua educantur. Sint duodecim annorum: saltem qui futuri sunt Lectores & Exorcistæ, quamvis in minori ætate liceat. Secundo, ostendant literas tonsuræ, sintque ex legitimo thoro. Tertio, sint membris integris, non careant oculis, vel naribus, vel manibus, vel pedibus: nec sint valde deformes corpore. Quarto, sciant expedite legere, ut hinc appareat eos non ignorare linguam latinam.

## VI.

Promoveantur autem ad quatuor istos Ordines per intervalla temporum, quoties fieri poterit: ut in uno quoque Ordine exercitati, de gradu in gradum ascendere merito possint.

## VII.

*Ad Tres Sacros.*

Ad singulos Ordines promovendi (scilicet Presbyteratum, Diaconatum, & Subdiaconatum) per mensem ante ordinationem Episcopum adeant, vel ejus Vicarium Generalem, qui vel Curato, vel alii committet, ut nominibus ac desiderio eorum, qui volent promoveri publice in Ecclesia promulgato, de natalibus, ætate, vita, & moribus a fide dignis inquirant, & de servitio exhibito in Ecclesia per unum annum in Ordine recepto, & literas inquisitionis transmittant: ipsi vero ordinandi se præsentabunt examini tempore aliquo ante celebrationem Ordinum, ut tempestive possint dare nomina sua Examinatoribus.

## VIII.

*Ad Subdiaconatum.*

Promovendi ad Ordinem Subdiaconatus primo exhibeant titulum Beneficii, aut pensionis, vel Patrimonii sufficientis, cujus copiam relinquent penes Sigilliferum Curia. Sub Patrimonio vero titulo vel pensionis, non alios ordinabit Episcopus, quam quos maxime necessarios, vel utiles judicaverit Ecclesiæ. Secundo, sint xxii. annorum: licet ante Concilium minores admittebantur. Tertio, ostendant literas aliorum Ordinum. Quarto, sciant grammaticam, & cantum, & parvum Catechismum, qui describitur in Statutis nostris Synodalibus. Quinto, habeant bonum testimonium.

## IX.

*Ad Diaconatum.*

Primo, sint ætatis xxiii. annorum. Secundo, ostendant literas aliorum Ordinum. Tertio, teneant grammaticam, & cantum, & Catechismum, & computum Ecclesiasticum, & Breviarii Bistuntinensis cognitionem aliquam.

## X.

*Ad Presbyteratum.*

Primo, sint ætatis xxv. annorum. Secundo, ostendant literas aliorum Ordinum. Tertio, afferant secum Breviarium



rium & Statuta Synodalia, ut rursus de officio Ecclesiastico, atque aliis Presbytero necessariis examinentur. Quarto, habeant bonum testimonium, maxime de officio exhibito in Ecclesia, & de Sacrae Communionis Eucharistiæ frequentatione.

## XI.

*Ad Curam animarum.*

Ne aliis, quam maxime idoneis, cura animarum committatur; servabitur ad unguem forma examinis, quam tradiderunt Patres in Concilio, Sess. xxiv. cap. 18. nec omnes oportet idoneos existimare, ad Ecclesiam Parochialem administrandam, quod ad Presbyteratus ordinem promoverimus. Plura enim ab illo exigentur in die iudicii, cui cura populi commissa est, quam ab eo, qui ad sacrificandum, & orandum pro defuncto Fundatore Sacelli alicujus, ordinatus sit.

Statuimus ergo & ordinamus, ut (r) nemo electus confirmetur, nemoque presentatus ad dignitatem, vel curam animarum instituatur, (vel simpliciter, vel causa permutationis) priusquam sit examinatus, & comprobatus idoneus: possitque, & velit muneri, ad quod vocatur, pro virili satisfacere. Qui si præsens instituatur, fidei professionem faciat statim in manibus nostris, vel ejus, qui ad hoc fuerit deputatus: si per Procuratorem, intra duos menses id præstare teneatur.

## XII.

Nemo ad dignitatem aliquam (s), cui cura animarum adnexa est, promoveatur, nisi saltem xxv. annum attigerit: doctrina, moribusque commendatus. Archi-Diaconi etiam, qui oculi sunt Episcopi, sint graduati.

## XIII.

Docet Sacrosancta Synodus in ordinatione Episcoporum, Sacerdotum, & cæterorum Ordinum, nec populi, nec cujusvis secularis Potestatis & Magistratus consensum, sive auctoritatem ita requiri, ut sine ea irrita sit or-

dinatio. Quin potius decernit, eos, qui tantum modo a populo, aut seculari Potestate a Magistratu vocati & instituti, ad Sacerdotum exercenda ministeria ascendunt: & qui ea propria temeritate sibi sumunt: omnes non Ecclesiæ Ministros, sed fures & latrones per ostium non ingressos habendos esse, & deponendos. (t)

## XIV.

Sacrosan. Chalcedonensis Concilii in hac saltem parte inherendo vestigiis, nullus in Presbyterum ordinabitur, qui Ecclesiæ, aut pio loco, non inscribatur: ut illic suo fungatur munere, nec incertis vagetur sedibus. Quod si locum inconsulto Episcopo deseruerit, ei sacrorum exercitium interdicatur. Nec resignare beneficium poterit, sub cuius titulo promotus fuerit: nisi habeat, unde vivat aliunde.

## XV.

Qui autem in ordine Presbyteratus constitutus est, videat, ne Sacrum Ordinem ob avaritiam, aut aliam causam non piam ambuisse judicetur. Ideo diebus saltem Dominicis & Festis Missæ Sacrificium offerat, & celebret frequenter.

## XVI.

Nemo jus præsentandi (u) occupet, nisi de novo Ecclesiam vel beneficium fundaverit, & construxerit, sive erectam, sed indotatam, de suis patrimonialibus bonis competenter dotaverit. In casu autem foundationis, soli Episcopo, non inferioribus reservatur institutio. Nec juris Patronatus titulus cuiquam proderit, nisi ex foundatione sit vel dotatione, & ex authentico documento, aliisque jure requisitis ostendatur: sive ex multiplicatis præsentationibus, per antiquissimum tempus continuatis. Quicumque etiam jus aliquod Patronatus venditionis, aut alio quocunque titulo, in alios contra Canonicas Sanctiones transferre præsumpserit, excommunicationis & interdicti pœnis subjicietur, & jure ipso privatur.

## XVII.

(r) Colon. Synod.

(s) Trid. Sess. 24. c. 12.

(t) Can. Apost. 30. Athan. Epi. ad orthodoxos.

(u) Trid. Sess. 14. c. 12. Sess. 25. c. 9.

Tomus VIII. Concilior. German.

## XVII.

In pœnas & censuras varias, veluti excommunicationis, suspensionis, irregularitatis, incidunt, qui per Simoniam propriam Sacros Ordines adipiscuntur, (x) aut per saltum: (y) aut eodem die duos: (z) & qui contra prohibitionem: (a) qui ab Episcopo simoniaci, (b) deposito, vel de hæresi, aut Simonia delato: qui homicidium voluntarium perpetraverint: qui nati ab illegitimo thoro absque dispensatione: (c) qui ante legitimam ætatem: (d) qui extra tempora: (e) qui sine licentia sui Ordinarii: (f) omnes hi si celebrarint, fiunt irregulares.

## DE SIMONIA.

**N**ulla ex re tantum detrimenti capit Hierarchia Ecclesiastica, quam ex labe Simonie. Ubi enim pretio & ambitu, Ordines Sacri, honores, & dignitates conferuntur, ac non meritis personarum, & iusto examine; necesse profecto est, ut omnis ordo, & inter homines iustitia subvertatur: Non aliter, quam si in corpore humano membrorum munia transferrentur, & manus ad ambulandum applicarentur, pedes ad audiendum, aures ad videndum. Fit enim in Ecclesia per Simoniam, ut qui parere debuerat, jubeat: & qui doceri, doceat: & qui sanctificari, sanctificet. Quam id verum sit, ortæ nostris temporibus hæreses ac seditiones declararunt. Quare non immerito in eam armatos videmus tot Canones. Ad cuius accusationem non aliter, quam in crimine læsæ Majestatis testes admittuntur, non tantum servi adversus Dominos, sed & criminati, & infames. Ex in detestationem tanti criminis, vocarunt hæresim. Flagello ex funiculis facto ejecit Dominus cum terrore spectantium vendentes in templo columbas, id est, S.S.

Dicta est a Simone illo Mago, de quo scribitur Act. 8. Cum vidisset autem Simon, quod per impositionem manus Apostolorum daretur Spiritus Sanctus, obtulit eis pecuniam, dicens: Date & mihi hanc potestatem, ut cuicumque imposuero manus, accipiat Spiritum Sanctum. Ad quem Petrus

dixit: Pecunia tua tecum sit in perditionem; quoniam donum Dei existimasti pecunia possideri.

Ex his verbis sumpta est definitio Simonie hæc: Voluntas stultiosa (seu deliberata) emendi, vel vendendi aliquid spirituale, vel spirituali adnexum. Nomine autem emptionis & venditionis omnem commutationem intelligimus rei spiritualis pro temporali: non modo videlicet pecuniam in pretio habendo, sed rem aliam quamcunque: imo preces, quæ pretio æstimari queunt, & servitia, & affinitates, quoties in compensationem sumi possunt rei spiritualis. Qui ergo munus alteri dat, ut pro se oret beneficii Collatorem, Simoniam committit: preces enim pretio redimit. Virtute (inquit Comicus) ambire oportet, non favioribus.

Res autem spiritualis intelligitur hoc loco, quæ vel gratiam Spiritus Sancti continet, ut sunt Sacramenta, & dona gratiarum: vel quæ functionibus spiritualibus destinata sunt, ut Sacerdotia, Patronatus, Altaria, Calices, & similes res sacræ. Functiones quoque, ex autoritate spirituali dependentes: ut benedictiones, dispensationes, absolutiones, reconciliationes, & similes: quas quia gratis accepimus, gratis dare debemus.

Ergo pretii ratio sola est, quæ Simoniam facit. Nam pretio æstimari nullo possunt spiritualia. Hinc sequitur pactum omne super re spirituali & conventionem, conditionemque, de Simonia argui posse. Veluti: dabo ego beneficium meum Petro, tu dabis tuum Joanni. Dare autem aliquid in elemosynam, vel in sustentationem Ministri Sacramentorum, vel ob reverentiam, vel ex obligatione legitima aut consuetudinaria, non putatur Simonia: nisi forte vel qui dat, vel qui accipit, id pro pretio habeant. Mentalis namque Simonia voluntate committitur & deliberatione, etiam si res effectum non consequatur: Quamquam censuris non subjiatur, nisi sit consummata pacto præcedente: pœnæ enim restringendæ sunt ad actus consummatos. Pater ex cap. ult. extr. de Simonia. Calices quoque, & indumenta sacra, vendi possunt pro pretio materiæ: sed non pluri, propter consecrationem. Quæ si laicis vendantur, frangi prius oportet, ne in usus convertantur profanos.

Quam-

(x) C. Illiteratos 36. distinctio. & Innoc. in c. Tantum. de exce. præd.

(y) C. Unico. de Cler. per saltum pro.

(z) C. 2. De eo, qui fur. or.

(a) C. Vel non est compos. de temp. ord. & c. Innotuit. de eo, qui furtim ord. susc.

(b) Si quis a Simoniacis. Trid. Sess. 14. cap. 7.

(c) C. 1. De fil. Presb. in antiq. & li. 6.

(d) De ætate & qualitat.

(e) De temp. ord. cap. Vel non est compos.

(f) Manual. Confess. c. 27. nu. 244.

Quamvis autem pro celebratione Missæ vel Baptismi, vel alterius rei similis accipere aliquid pretii, vel dare, simoniacum re vera sit: tamen stipendia accipere a populo & alimenta, non prohibetur. Dignus est enim operarius mercede sua, Matth. 10. id est, cibo suo, ut Luc. 10. Accipiant, inquit Augustinus, sustentationem necessitatis a populo, mercedem dispensationis a Domino.

Quæret aliquis: Si hæc vera sunt, sequitur nullo modo licitum esse pacisci pro hisce laboribus. Atqui videmus fieri quotidie, & sine reprehensione, ut Presbyteri, se obligent pro mercede ad celebrandum in Sacellis privatis, & ad vigiliis defunctorum, & ad administranda Sacramenta pro Curatis absentibus. Sane D. Thomas (g), quem sequitur Durandus, nullum pactum venditionis posse intervenire docet pro labore hoc, quin simoniacum sit. Labor enim non solet unquam vendi, sed id, quod labore quæritur: nempe opus. Quid conductoris operarum tuarum interest, multum vel parum labores, modo fiat, quod optat? Item labor in celebratione, vel administratione Sacramenti ab administratione & celebratione, non separatur: & celebratio Missæ, Missa est: sicut administratio Baptismi, Baptismus. Quod si pro Baptismo non potes pretium accipere, sequitur, quod neque pro labore. Verum Dom. Soto (h), cum quibusdam aliis, distinguit hoc loco: si tanquam laboris pretium intelligas, non licet pacisci pro labore: sed bene pro obligatione. Siquidem potest obligatio ipsa vendi per se, quæ privatio libertatis quædam est. Ipsa quoque Ministri sustentatio, si pretio æstimari potest, quid prohibet, quin in pactum duci queat? Confirmantur hæc per c. Significasti, de Præbend. Ad ampliorem quoque declarationem, considerandum, alios esse labores, qui celebrationem antecedunt: alios qui comitantur, nec separari possunt. Illi quidem locari possunt, non autem alii. Veluti, si longum iter sit, & difficile ad Ecclesiam. Sic cantorum musica & opera locari potest: quia non est essentialis Missæ. Sic sepultura, licet, quæ necessaria est, vendi non possit, at locus magnificentior, & pompa funebris ad sepulturam, possunt. Sequitur, Pastores Ecclesiarum jure exigere laborum suorum mercedem, nimirum, ut sustentationis suæ stipendium: non tamen ut pretium rerum spiritualium. Sic nos existimet homo (inquit Apostolus) sicut Ministros, &c. alioqui si talem habeant mentem, ut se spiritualia vendere censeant, Simoniaci erunt, & ad restitutionem tenebuntur. Canonici autem, qui

pro primo & principali fine officii sui pretium in mente habent, atque stipendium distributionum, Simoniam committunt. Verum si non pro fine principali, sed accessorio quodammodo, tanquam rei necessariae ad sustentationem ordinatæ, nihil peccant. Tenet quoque Scotus, spem solam mercedis licite eos ad Ecclesiam aliquando adducere: quando scilicet ex officio non obligantur alias venire.

## STATUTUM I.

**P**œnæ Simoniae est excommunicatio Papalis, privatio a Beneficio, suspensio ab Ordine, & obligatio ad restitutionem. (i) Nec solum ipsi contrahentes excommunicantur, sed etiam mediatores, qui consilium dant vel favorem.

## DE DIFFERENTIA MINISTRO- rum Ecclesiæ.

**S**icut in uno corpore [k] multa sunt membra, non omnia tamen eandem functionem habent: sic in Ecclesia Dei (quæ corpus Christi mysticum est) multi sunt gradus & diversa officia. Alii præstunt, alii parent: & alii ministrant, aliis ministratur: & inter Ministros, quosdam quidem dedit (inquit (l) B. Paulus) Apostolos, quosdam autem Prophetas, alios vero Evangelistas: alios autem Pastores & Doctores, ad consummationem Sanctorum, in opus ministerii in ædificationem Corporis Christi.

Ministrorum itaque Ecclesiæ differentiarum multæ sunt. Sunt enim quidam Ministri Sacramentorum, alii Ministri doctrinæ, alii Ministri justitiæ, alii Ministri laudum Divinarum & orationis: alii ministrant mensis, alii ministrant infirmis & pauperibus, alii ministrantibus ipsis opitulatur, & subserviunt. Omnibus his & universis unus præest velut caput, Summus Pontifex.

Ministri Sacramentorum Sacri Ordinis & Confirmationis soli sunt Episcopi, qui Apostolos repræsentant, & illorum loco successerunt: ideo illis solis reservatur potestas, confirmandi pueros, & instituendi Pastores & Ministros in Ordine Ecclesiastico: & præterea Sacramentalia quædam, ad hæc ordinata præparandi: qualis est confessio Christiani, dedicatio & consecratio Ecclesiæ, & Altaris: benedictio cæmeterii, calicis, & vestium,

(g) 2. 2. qu. 100. art. 3. ad 2.

(i) Per totam 1. causam Decr.

Tomus VIII. Concilior. German.

(h) Libr. 9. de Instit.

(k) 1. Cor. 12.

(l) Ephes. 4.



stium, seu paramentorum Sacerdotalium. Quanquam consuetudo habet, ut Abbates hoc potestum possint, & quidam Religiosi ex privilegio: excepto tamen corporali & calice, quorum benedictio Episcopis reservata est.

Sacerdotes ( quos Presbyteros Græce, id est, Seniores appellamus ) Ministri sunt Sacramenti Corporis & Sanguinis Domini: iidem etiam Ministri Sacramenti Pœnitentiæ, & extremæ Unctionis. Accipiunt enim potestatem a Deo in suo ordine, in Corpus Christi verum ( ut loquuntur Theologi ) & in Corpus Christi mysticum: id est, in Christi fideles. Sed potestas ista, quæ est in Corpus Christi mysticum ( remittendi peccata ) non potest redigi in actum, nisi adsit materia subiecta, hoc est, nisi Sacerdos habeat personam sibi subditam ex officio: ut sunt omnes Pastores, & Presbyteri, curam animarum habentes ex officio, vel ex licentia Superioris. Quare nullus momenti absolutio erit, quam Sacerdos in eum profert, in quem ordinariam aut subdelegatam non habet jurisdictionem: nisi in mortis articulo.

Ideo proprium est Pastorum Ecclesiæ, ministrare Sacramentum Pœnitentiæ suis Parochianis, casibus reservatis exceptis: eorum est etiam Sacramentum extremæ Unctionis.

Matrimonii quoque Minister est solus Pastor, qui oves suas debet cognoscere. Nam Matrimonium jure niti debet naturali, Divino, Civili, & Canonico: contra quæ jura, si quid intervenerit, in culpa erit Pastor, qui volens, sciens, illud solemnizaverit.

Sacramentum Baptismi, janua omnium Sacramentorum, quia omnino necessarium est ad salutem, idcirco in promptu esse debuerunt tum materia, tum Minister. Quare quisvis baptizare potest in nomine Patris, & Filii, & Spiritus Sancti. Sed quia in hoc agendo Ministrum se præstat Ecclesiæ ille quicumque sit: ideo præsentem Ministro ordinato in superiore gradu, inferior non debet usurpare sibi talem honorem.

Atque hæc quidem hætenus de Ministris Sacramentorum. Sequuntur doctrinæ Evangelicæ, & Verbi Divini, atque alii Ecclesiæ Ministri.

Et Evangelistæ quidem sunt Prædicatores deputati ad annunciandum fidem & Christi doctrinam, tam apud fideles, quam apud infideles: qualis erat Philippus Diaconus, unus ex septem, Act. 21. Sed licet iidem Doctores re vera sint, & dicantur: tamen Apostolus ad Pastores videtur munus docendi retulisse, cum duo conjunxit supra, Pa-

storem & Doctorem. Quare proprie munus est Pastorum docere plebem, legendo & interpretando Sacras Literas, & partim timore pœnæ, partim spe præmii, eam continere in officio. Sic idem Apostolus in examine Episcopi doctorem esse jubet. Quanquam & Diaconorum quoque fuit hoc munus docendi plebem ( uti diximus ) & declarandi Evangelium: sed jussu tamen & auctoritate Pastoris: sicut septem illi Diaconi ab Apostolis acceperunt, Act. 6. Unde illud est, quod ante Offertorium Missæ, Diaconus petita licentia & benedictione a Presbytero, alta voce legit Evangelium, & Subdiaconus Epistolam, aut Prophetiam. Sed & in aliis horis Lectores in Prophetarum locum succedentes, & in minoribus Ordinibus constituti, populo prælegant aliquid vel ex Sacris Literis, vel ex gestis Martyrum ad instructionem auditorum: qui est ordo nunc unus ex quatuor minoribus: & in officio matutino ejus functionem etiam nunc videmus. Hunc ordinem habere debent, quos in majoribus Ecclesiis vocamus Scholasticos.

Propter energumenos & oppressos a maligno spiritu, constitutus est auctore Christo ordo Exorcistarum. Hi præscriptas habent preces, & conjurationes: quibus orantes & jejunantes, sic a dæmone vexatos & illusos in Christi nomine liberare possunt. Ex horum munus erat olim, in Ecclesia baptizandos aliquanto tempore ante ingressum Ecclesiæ exorcizare: quod etiam nunc ante Baptismum fieri videmus a Presbytero. Ejus quoque munere fungitur is, qui in officio Ecclesiastico thuribulum & acerram fert, & Chorum atque Ecclesiam thurificat.

Custodes Templi, seu Aeditui, in ordine ponuntur Hostiariorum, accipientes in sua ordinatione claves Ecclesiæ: ut Ecclesiam claudant vel aperiant dignis: custodiant Ecclesiæ thesauros & Sanctuaria. Parant & ornant hi Ecclesiam juxta solennitates dierum. Quin etiam populum ad Ecclesiam convocant campanarum signo. Dicuntur ergo hi Hostiarii, & Aeditui, & Matricularii, & Sacristæ, & Custodes, & Thesaurarii, pro diversitate locorum.

Aliis Ministris Ecclesiæ ministrant specialiter Diaconi, Subdiaconi, & Acolythi. Subdiaconi quidem Diaconis subserviunt: maxime in Altaris ministerio, oblationes fidelium recipiendo, & tantum de oblationibus, quantum populo communicaturo suffecerit, Diacono suggerendo. (m) Tenentur calicem & patenam, & urceolos, ad Missæ Sacrificium deferre, & Diacono tradere, & corporales lavare.

Aco-

(m) Hieron. ad Rusticum. Anacletus Epist. 1.

Acolythorum, id est, Sæctatorum, vel comitantium, officium est, in ministerio Ecclesiastico adesse, Episcopo servientes, luminaria præferentes. Ea, quæ ad Missæ Sacrificium necessaria sunt, subministrare debent Diacono, vel Subdiacono: veluti urceolos vini & aquæ, mappas, pelves, & similia. Olim nuncii erant & tabellarii Prælatorum: ut patet ex D. Cypriano maxime. (n)

Varium ergo & difficile adeo cum sit munus Pastoris: nemo illud sibi usurpet, aut assumat, nisi vocatus, tanquam Aaron: qui oves sibi creditas pascere verbo possit, & opere; & tam sibi, quam suis cavere ab hæreticis & apostaticis hominibus, qui veniunt in pelibus ovium, cum sint intrinsecus lupi rapaces.

Jurisdictio Ecclesiæ fundatur in verbo Christi, Matth. 18. Si peccaverit in te frater tuus, &c. Et Apostoli postea nos suo exemplo docuerunt, qui fuerunt hujus rei Ministri. Itaque Ministri iustitiæ sunt Episcopi, & superiores Prælati, ut Archi-Episcopi, Primates, Summus Pontifex: quam exercent per Archi-Diaconos, Vicarios, Officiales, & similes alios ad hoc deputatos, vel delegatos.

Ministros laudum & orationis in Ecclesiis assidue psallentes, merito nunc Prophetas nuncupemus: qui die noctuque Psalmos Propheticos, & Dei gloriam in choris suis decantant, & preces pro populo faciunt, a mundanis occupationibus, curisque semoti: choros inquam Monachorum, & Virginum, & Collegiorum Canonorum. Qui illis præstant, sicut Samuel & Heliæus [tanquam Prophetarum choros ducunt] Diaconi, id est, Ministri, & Diaconissæ, Abbates & Priores, Decani & Præpositi appellantur. Licet enim Prophetiæ donum ponatur in primis (o) in interpretandis Divinis mysteriis ad ædificationem, exhortationem, & consolationem populi: tamen Cantores Ecclesiæ dicuntur Prophetæ: ut 1. Paralip. 25. Segregavit David filios Asaph, qui prophetarent in citharis, & psalteriis, & cymbalis, in confessionibus & laudibus Divinis. Idem prope, c. 15. & D. Hieronymus, filios Prophetarum Monachos fuisse sentit Epist. 4. Et Paraphrastes Chaldeus prophetare, vertit Deum laudare. 1. Reg. 19. Et Prophetæ Baal prophetabant frustra Deum suum invocando. 3. Reg. 6. Sed ne nomen Prophetæ aliter accipiatur: nos prophetandi munus hoc psallentium dicemus in hoc opere.

Crescente numero Christianorum [p], nec sufficientibus Apostolis ad omnia mini-

steria: elegerunt septem viros, quos orando, & manus eis imponendo, ordinarunt Diaconos, ut ministrarent mensis: & hi non solum in mysteriis serviebant Presbytero, sed etiam curam gerebant pauperum in hospitalibus & privatis locis. Itaque Diaconi panem & vinum, quæ ad Missæ sacrificium populus offerebat, in altari [sicut dicimus] collocabant ante Presbyterum, & post consecrationem in Communionem distribuebant fidelibus, orante Presbytero, & intendente Verbo Dei. Nunc autem cum plures sint Presbyteri: quod fieri potest per Presbyteros, non oportet, ut ab aliis tractetur Sacrosanctum Christi Corpus, nisi necessitate urgente.

Ministerium colligendæ, atque distribuendæ eleemosynæ in pauperes, non indignatur suscipere (q) Apostolus. Neque enim parvi momenti merium est in cura pauperum & infirmorum. Itaque ad hoc munus ordinantur etiam Diaconi. Hi nunc sunt Magistri hospitalium: quorum est collectas, vel redditus fundatos, recipere, & ex illis pauperes sibi concreditos alere, vel infirmos & defunctos curare, juxta intentionem eorum, qui suas opes in hos usus erogant.

Diaconorum etiam munus est, bona Ecclesiæ dispensare in Ecclesiæ Ministros, & Christi pauperes alios, jussu Episcopi: (r) Episcopum prædicantem a malis hominibus custodire, testesque Episcopo esse conversationis ipsius. Est denique Archi-Diaconus velut oculus quidam Episcopi, omnia perhistrans, de omnibus commonefaciens Episcopum. Hujus vices committi solent Procuratoribus fiscalibus, Decanis ruralibus, seu Archi-Presbyteris. Sic videmus ordinem Diaconorum (id est, Ministrorum Ecclesiæ) latius patere, & ad multa officia extendi. Erant enim in primitiva Ecclesia multi Diaconi, pauci Presbyteri. Fere omnes Presbyteri erant Pastores: nunc contra videmus multos Presbyteros, paucos vere Ministros, & ex animo. Plura de officio singulorum ordinum in Decreto Gratiani, dist. 25. leges.

Reliquit Dominus tandem in hoc mundo Vicarium suum universalem Petrum, quasi Ducem atque Pastorem Supremum, & Caput totius Ecclesiæ militantis: cui, & Successoribus ejus, dedit claves regni Cælorum. Hic primo Sedem habuit Antiochiæ, deinde Romæ: ubi & passus est, sicut omnes tradunt historiæ Ecclesiasticæ, & libri Patrum. Negare enim Petrum fuisse Romæ, hæresis est perfecta: cum ex Roma primam suam

Z 3

Epi-

(n) Cypr. lib. 3. 11. &amp; 24. epist. 3. &amp; lib. 2. epist. 8.

(p) Act. 6.

(q) 1. Cor. 1. Gal. 2. Act. 9.

(o) 1. Cor. 4. 1. Tim. 4.

(r) Conc. Carthag. 4.

Epistolam scripserit : quam vocat cap. ultimo, Babylonem, propter superstitionem & idololatriam urbis.

## STATUTA SIMPLICIUM Presbyterorum.

**P**resbyterum simplicem vocamus ( aliter Capellanium ) eum, qui licet in Ordine Sacro Presbyteratus positus sit, nulli tamen addictus est Ecclesiæ Parochialis curæ : sed tantum inscriptus Sacello alicui, vel Cæmisterio, vel Capellaniæ, ad Missas in eo celebrandum, juxta beneficii fundationem. Ab hac veteri Patrum institutione nata est alia consuetudo & mos ( præserim in Dioecesi Bisuntina ) ut ordinentur etiam Presbyteri sub solo titulo patrimoniali. Solent enim sæpenumero parentes, pietatem ac religionem viri probi ac Deo devoti amplectentes, de reditu aliquo providere ei, quo vitam procul a sordido ac servili labore tolerare possint, unque contemplationi vacare, & Missarum Sacrificio. Sed scire debent, quod sine licentia ejus, qui Ecclesiæ præest, nemo potest in Ecclesia celebrare, nec aliud quicquam officii facere. Nam neque fundationes ipsæ Missarum sine assensu Rectoris Parochiæ fieri debent : ne Divinum confundatur officium, per Ministrorum, aut minorum inordinationem.

Horum itaque simplicium Presbyterorum quamvis non tanta exigatur doctrinæ sufficientia : morum tamen probitas & religio requiruntur. Nam licet docere verbo non teneantur : multum tamen nocere exemplo possunt, si vita officio, quod sanctum est, non respondeat. Et quia in subsidium sumuntur plerique Rectorum, ut in audientis confessionibus, & Sacramentis administrandis : idcirco prorsus idiotæ non admittantur : alioquin pro lumine, tenebræ erunt.

### STATUTUM I.

**P**resbyter celebraturus Missam, provideat sibi prius de uno, vel duobus Ministris : de lumine & paramentis necessariis ac benedictis : & cum reverentia ad Altare accedat. (s)

#### II.

Nullus Presbyter præsumat celebrare super Altare non consecratum, aut in Ecclesia polluta, aut coram interdicta persona, aut excommunicata,

sub pœna suspensionis, quam tales incurrunt. Nec nisi in Ecclesia, non extra eam : nisi in casu necessitatis, licentia nostra super hoc habita, in loco decenti : & super altare lapideum consecratum, aut in quo sit tabula lapidea consecrata : non alias.

#### III.

Presbyter in celebrando Missam, totum officium in libro dicat : nihil sine libro : (r) quantumcunque sit peritus. Quia etiam in apertione & complicatione libri, sunt notata sua mysteria. (u) Nec ritus aut orationes de suo sensu faciat.

#### IV.

Quod si forte aliquis defectus in celebrando ( quod cavendum est ) acciderit, ut ei occurrere possit, habeat articulos, qui super hoc descripti sunt in magnis Missalibus nuper impressis.

#### V.

Simplex Presbyter nulli Eucharistiam administret, aut aliud Sacramentum, nisi prius, obtemperata licentia. Excepto casu necessitatis.

#### VI.

Nullus Presbyter duas Missas celebrare præsumat eodem die, nisi necessitate compulsus, (x) & in die Nativitatis Domini; & tunc non debet in prima ablutiones sumere : ut sit jejunus in alia.

#### VII.

Nullus Presbyter Missas celebrare præsumat tempore, quo Curatus, seu Prædicator Verbi Dei sermonem habet ad populum : ne per hoc impediatur, sed currat & clarificetur Verbum Dei.

#### VIII.

Presbyter volens celebrare, & super Altare plures habens hostias consecrandas, diligenter attendat, ut intentionem suam dirigat ab initio officii, & perseveret ad consecrandum omnes hostias præsentis (quotquot sunt) nec curam habeat de numero certo & speciali ipsarum.

#### IX.

(s) De Consec. dist. 1. hoc quoque.  
(x) De celebr. Miss. c. Consulisti.

(r) Stat. vetus.

(u) Rationale Divin. Offic.



## IX.

Omnia verba Canonis cum magna reverentia & devotione dici debent : maxime vero infra actionem, cum intentione actuali, quantum fieri potest.

## X.

Caveant ab avaritia, quæ est idolorum servitus : ab irreverentia, quæ ab impietate vix sejuncta est : & a superstitione, veræ pietatis falsa imitatrix. Quare pacta & mercedis conditiones pro Missis non fiant. Rejiciantur, qui non decenti cum habitu ad celebrandum accedunt. Ritus novos, vel cæremonias, vel preces ne faciant. Missarum & candelarum certum numerum, tanquam a superstitione deductum, Synodus Tridentina damnavit.

## XI.

Calix debet esse de auro, aut de argento, seu etiam urgente necessitate & paupertate, de stanno. Sed non debet esse de vitro, de lapide, de ligno, de aurichalco, de plumbo, de ære, de cupro, aut de ferro. (y)

## XII.

Corporalia de lino, non de serico : quia Christus in sepulchro fuit involutus in syndone munda. Et semper debent alba, & munda teneri. (z)

## XIII.

Celebrans post ablutiones ne tergat manus in mappis, vel lineaminibus Altaris : sed habeat manutergia munda ad hoc parata : & calicem cum patena post Missam involvat in panno munda, quem calicem nullus Minister tangat, nisi sit in Sacris : nec vendat aut impignoret. (a)

## XIV.

Ampullas quoque mundas habeat : quas ligneas aut cupreas, esse non licet.

## XV.

Inhibemus omnibus & singulis Presbyteris, qui Dioicēsi Bisunt. non sunt oriundi, nec in Dioicēsi Beneficia-

ti, ne Missas, aut aliā Divina officia celebrent in dicta Dioicēsi sine nostra, vel Vicarii nostri Generalis licentia (b) : omnibus Curatis sub gravi pœna inhibentes, ne tales Clericos transeuntes in suis Ecclesiis ad celebrandum admittant : nisi viros magnæ dignitatis esse cognoverint, & venerabiles personas.

## XVI.

Ideirco præcipitur vobis Decanis, & Curatis, seu Vicariis vestris, ne ullum patiamini celebrare, vel in ordine aliquo ministrare (c) promotum extra Dioicēsim ; quin prius habeat a Nobis permissionem, aut a Vicario nostro generali : etiam si literas nostras dimissorias obtinuerit ad Ordines suscipiendos. Quoniam nostrum est examinare, num tales rite & Canonice promoti sint. (d)

## XVII.

Curati, vel eorum Vicarii posthac, si in suis Ecclesiis aliquæ foundationes Capellaniarum, vel Collegiorum factæ fuerint, earum copiam authenticam ferant in proxima Synodo, & tradant Secretario nostro, ut repellantur in Archivis Palatii Archi-Episcopalis, ad perpetuam rei memoriam. Nec Secretarius, aut alius quisquam aliquid accipiat propter ea : quia sic fieri iussimus, & ita Nobis placet.

### DE CAPELLANIS FAMILIARIBUS.

**D**Uæ causæ sunt, propter quas Capellanos familiaritates constituuntur in Ecclesiis Parochialibus. Una est charitas, & dilectio fraternitatis : quando communio bonorum, & æqua dispensatio ministeriorum efficit, ut omnium sit cor unum, & anima una. Altera causa, seu finis est, Cultus Divinus. Quod enim solus Rector, seu Curatus Ecclesiæ non potest, per adiutores suos familiares, subsidiaria tanquam opera exequitur, & adimplet. Atque hæc quidem sanctæ & justæ causæ sunt : sed non raro aliter contingit. Nam communio discordias sæpe parit : ubi pecuniæ studium pietati dominatur, & avaritia. Et quando confamiliares Rectorem, Pastoremque suum con-

(y) Stat. vetus.

(b) Ex Concil. Chalced. c. 13.

(z) Stat. vetus.

(c) In c. 2. de Cler. excom.

(a) 23. d. Sacras.

(d) Stat. vetus.

contemnunt: omnia ministeria perturbantur.

### STATUTUM I.

**V**ltum itaque est in hac Sancta Synodo, admonere omnes hujusmodi Capellanos familiares, primum ut fines istos considerent cum timore damnationis æternæ, si contra deliquerint.

#### II.

Deinde mandatur (quia Curatus eorum Caput & Pastor est, totius Parochiæ Rector, ipsi vero in subsidium ejus assumpti, & bonorum Ecclesiæ ipsius participes effecti) ut ei honorem deferant & reverentiam in omnibus tanquam Patri. Nec verbo vel facto contumeliam ei inferant, sub pœna excommunicationis ipso facto.

#### III.

In obeundis quoque muneribus Ecclesiæ (ne in officio Pastoris impediat) ab obligationibus aliis familiaritatis excusetur: ut quando est Missa Parochialis, non cogatur ad celebrandum pro familiaritate. Et si in confessionibus, vel administrandis aliis Sacramentis occupatus fuerit, non teneatur assistere in Choro. Idque ejus conscientiæ remittatur: nisi (quod absit) tanta appareat negligentia, quæ ad Vicarium generalem deferenda veniat. Sic neque cruciferi, neque choralis pueri provincia gravetur: quæ sunt inferiorum Clericorum munera. Sic cultus Divinus rite peragetur, & fraternitatis charitas integra cum pace servabitur.

#### IV.

Damnavit Sancta Synodus, sicut & Nos damnamus, conditiones illas illicitas, quæ in promissionibus & admissionibus ad habitum Ecclesiæ, vel distributiones quotidianas, apponi solent, deducendi aliquid ex fructibus, vel solvendi, vel compensandi: easque revocandas, & abolendas censemus.

#### V.

Comestiones quoque & convivia, ad quæ recens admissus Presbyter

compelli solebat, cum ad pietatem nihil hæc faciant, nec ad utilitatem Ecclesiæ, sed potius ad manifestandum vulgo immodestiam Sacerdotum & luxum, prohibemus.

#### VI.

Ac multo minus ferendæ illæ leges sunt, quibus familiares quidam Presbyteri compellebantur, prandia vel cœnas sumptuosas dare aliis familiaribus per ordinem diebus festis quibusdam, ut Paschatis, Natalis Domini, & similibus. Quasi festa Ecclesiasticis viris in tabernis, comestationibus, & ebrietatibus (quæ damnat Apostolus) non in orationibus & elemosynis & piis operibus magis peragenda sint.

### STATUTA PASTORUM, seu Curatorum & Rectorum Ecclesiarum Parochialium.

**U**T ea omnia præstare queant Pastores, quæ in examine approbationis exiguntur, quoniam nunc Ecclesiarum Rectores (præsertim ruralium) omnia gerere debent officia, non solum Presbyterorum, sed etiam Diaconorum, & Subdiaconorum, & Aedituorum: quia his creditum est non solum ministerium Sacramentorum & Benedictionis, sed etiam prædicationis Verbi Dei, & laudum Divinarum, & curæ pauperum atque hospitalitatis, imo & custodiendæ Ecclesiæ: ideoque plura eis imponuntur, quam quæ olim erant muneris solius Presbyteri.

### STATUTUM I.

**S**tatuimus & ordinavimus (ne per ignorantiam in Divinis officiis peccetur) ut omnes & singuli Curati, seu Vicarii curam populi gerentes, habeant Missale & librum Manualem (quem Theutonice vocant, handas, a manibus) & Breviarium, secundum usum Dioecesis Bisuntinæ, & librum Statutorum Synodaliū: sub pœna suspensionis, & alia arbitraria. (e)

#### II.

Et ut rite Dei Verbum dispensare possint: doctrinamque populo salutarem

(e) Conc. Tolet. 4. c. 25.

rem depromere : Statuimus & ordinamus, ut volumen Bibliorum Sacrorum, vel partem ejus habeant, cum libris aliis Catholicis : illud Prophetæ semper in animo versantes : Si non fueris loquutus, ut impius se custodiat a via sua ; ipse in impietate sua morietur : sanguinem autem ejus de manu tua requiram. Ezech. 3.

## III.

Curati, qui Ecclesiarum Rectores esse voluerunt, & procuraverunt, ad personalem residentiam tenentur sub pœna privationis fructuum & beneficiorum.

## IV.

Curati non assumant Sacerdotem in Vicarium suæ Ecclesiæ, vel ad administrandum aliqua Sacramenta, nisi antea per Nos, vel de mandato nostro, vel Vicarii nostri Generalis talis Sacerdos fuerit examinatus, & pro idoneo ad hoc specialiter approbatus : quamvis fuerit hujus Dioecesis, & a Nobis ad Sacros Ordines promotus. Quoniam plura exiguntur ab eo, qui curam animarum suscepturus est, quam a simplici Presbytero.

Multo experimento edocti, quantum detrimenti afferat non solum Ecclesiasticæ politię, sed etiam sæculari, (f) quod peregrini & ignoti quidam, nullis suffulti præsidis virtutis vel fortunæ, Vicarii (vel ut melius dicam) conductores Ecclesiarum Parochialium, quibus Rectores ipsi & Curati, conscientię suæ & officii immemores, solius lucri, quæstusque causâ, oves sibi creditas, & pro quibus rationem in judicio Dei reddaturi sunt, crudeliter & citra omnem sollicitudinem Pastoralem, quasi rem plane quæstuosam committunt & commendant : quibus [ utpote mercenariis ] nulla cura est de ovibus, modo lac & lanam habeant, & quod pingue est, occidant : quoties vel abliguritis, & consumptis omnibus facultatibus, vel aliis causis moti & compulsi, solum vertere coguntur, & susceptam Ecclesiæ gubernationem relinquere, insalutato (ut dicitur) hospite recedentes : omnia confusa, perturbataque dimitunt : præcipue vero registra & libros dierum, in quibus baptizatorum nomina & susceptorum describi, ad perpetuam

rei memoriam debent : & præterea excommunicatorum, qui ob aliquam causam a communione fidelium separati sunt, abjiciunt, veluti res nullius momenti, vel secum asportant, cum majori aliquando malitia.

## V.

Statuimus & ordinamus, & districte prohibemus, ne Curati posthac suas Ecclesias, extraneis aut ignotis hominibus committant, sed ita notos Vicarios sibi assumant : ut pro illis respondere, & damna, quæ Ecclesiæ attulerint, præstare possint. Alioqui Curati ipsi rationem reddere tenebuntur totius damni dati.

## VI.

Idcirco etiam præcipimus & mandamus sub pœna suspensionis ad tempus (a dicto Vicario Generali, vel Officiali moderandum) ut singuli Curati, vel Vicarii, duos habeant codices paratos, & in archa honeste, secureque repositos : in quorum altero (juxta Constitutiones Synodales) nomina baptizatorum & susceptorum, ipsi Curati vel Vicarii scribant, sua manu, vel signent ab aliis descripta : cum die, mense, & anno, quibus baptizati fuerint. In altero vero excommunicatorum nomina, eodem modo tempore notato, & nominibus eorum, quorum instantia excommunicati sunt, & causa instantiæ.

## VII.

In adipiscenda possessione beneficii curati, quoties novus quis Rector institutus fuerit, Presbyter, vel Notarius ponet in instrumento, quod dicta registra receperit novus Curatus, vel quod per eum non steterit : ut in casu, quo Curatus obtinere dicta registra non possit, per Nos tunc provideatur super regimine ipsorum. Cujus instrumenti forma sequitur.

*Forma Instrumenti tradendæ  
possessionis.*

**R** Everendissimo in Christo Patri, Domino Archi-Episcopo Bisunt., vel ejus  
in

(f) Vide Conc. Lateran. part. 2. c. 2. & Damasi Epist. 4.



in Spiritualibus & temporalibus Vicario, salutem & reverentiam. Notum sit vobis, quod ego Stephanus de Liebersat, humilis Presbyter Dioicelis Bisunt., requisitus & rogatus a discreto viro, Domino Guillelmo Champion, Presbytero curato Ecclesiæ Parochialis de Cramens dictæ Dioicelis, in virtute literarum suæ institutionis, vestra auctoritate in forma solita expeditarum, eum posui in realem, actualement, & corporalem possessionem dictæ Ecclesiæ de Cramens, in Decanatu de Salinis: idque per ingressum Ecclesiæ, tactum Altaris, calicis, & libri, & pulsationem campanæ. Præterea juxta formam Statuti Synodalis, jussi Domino N. Vicario defuncti Curati, ut traderet dicto Domino Guillelmo novo Curato, registra baptizatorum & excommunicatorum. Quod fecit. Acta fuerunt hæc die 18. Septemb. 1572. præsentibus N. N. testibus vocatis & rogatis, & aliis pluribus. In cujus rei testimonium ego supradictus instrumentum hoc meo signo manuali signavi eodem die & anno.

*Steph. de Liebersat, Presbyter.*

Si per Procuratorem sumatur possessio, dicetur: Rogatus & requisitus a N. Procuratore discreti viri Domini N. Curati, &c. Si Vicarius noluerit tradere registra, dicetur: Quod se facere non posse respondit propter aliquam causam, vel noluit. Si Vicarius affuerit, dicetur: Et dixi N. assistenti, ut vestra auctoritate juberet Vicario defuncti, &c. Si per Notarium publicum fiat instrumentum: Notarius sequetur formam suæ artis.

### VIII.

Curati non admodient, seu dent ad firmam fructus beneficiorum suorum laicis, sub pœnis juris. Locationes factæ a defunctis in præjudicium Successorum nullæ sunt.

### IX.

Curati tenentur in singulis diebus Dominicis, majoribus Festivitatibus, & aliis Festivis diebus (secundum usum nostræ Dioicelis) nec non diebus Anniversariorum fundatorum, congruis horis, Missam in sua Ecclesia celebrare, & pro illa pulsare (si ab antiquo onus habeant pulsandi) aut per matricularios pulsari faciendi, per competens intervallum: ut Parochiani possint se commodè disponere & præparare ad veniendum ad Ecclesiam. Idem intelligimus de Vigiliis, seu Vesperis

pro defunctis fundatis. Quibus districte præcipimus, ut ita faciant: nisi locus, aut eorum Ecclesia interdicto Ecclesiastico subjaceat.

### X.

Quando Curatis, seu eorum Vicariis, præcipitur, ut cessent a Divinis: sic intelligendum est, ut clausis januis Ecclesiæ suæ, Missam, aut Vesperas, submissa voce (quasi legendo) dicant: nullis campanis pulsatis, sed excommunicatis & interdictis exclusis: nec sint in januis Ecclesiarum suarum, aut in parietibus fenestræ, per quas existentes foris audire possint, & videre Divina, & Officia, & Sacramenta.

Cætera, quæ Curati scire tenentur ad exequenda mandata Curiae Bisuntinæ, inferius scripta sunt, in titulo de Exequutione mandatorum, & sequentibus.

### XI.

Curati se conformantes in omnibus Ecclesiæ nostræ Bisuntin. (quæ est omnium Ecclesiarum Civitatis & Dioicelis Matrix) de nullo alio Sancto celebrent, quam de nominatis in Calendario Bisunt. & qui sunt de Ordinario: nisi tales Sancti sint Patroni Ecclesiarum suarum, aut eorum officia ex speciali devotione fundata sint in Ecclesiis ipsorum per aliquos fideles Catholicos: & in hoc casu nostra licentia speciali requisita & concessa.

### XII.

Curati præcipiant, moneant, & hortentur Parochianos suos, ut singulis diebus Dominicis, & festivitatibus præcipuis conveniant in Ecclesiam suam Parochialem: vir & uxor (aut saltem unus eorum) asperionem aquæ benedictæ recipiant, & panem benedictum: liberos suos secum ducant (si commode fieri potest) ut frequenter erudiantur in fide Catholica, & doctrina Sanctæ Matris Ecclesiæ, audiendo verba sacræ prædicationis & mandata sui Pastoris. Nec recedant ab Ecclesia, ante finem Missæ, saltem ante peractam communionem.

### XIII.

## XIII.

Singulis annis in Sabbato Sancto Paschæ, & in Sabbato ante Pentecosten, solenniter benedicant fontes suos baptismales (g), secundum ritum & traditionem Sacrosanctæ Romanæ & universalis Ecclesiæ, & renovent aquam dictorum fontium, in piscinam projiciendo veterem aquam. Similiter Chrisma, & Oleum Sanctum præcedentis anni comburant super piscinam: & Oleo atque Chrismate benedicto in die Cœnæ Domini, pro illo anno utantur, & non alio.

## XIV.

Curati singulis diebus Dominicis (b) denuntient Parochianis suis in Missa Festa Sanctorum, quæ erunt in proxima hebdomada sequenti: præcipiendo eis, ut devote illa colant, abstinendo ab omni opere servili. Similiter denuntient jejunia Quatuor temporum, & Vigiliarum Apostolorum, & aliorum, quæ cadunt sub præcepto Ecclesiæ.

## XV.

Faciant singulis diebus Dominicis aquam benedictam, cujus virtutes magnas esse scimus: & processionaliter populum circum Ecclesiam ducant cum supplicationibus & canticis. (i)

## XVI.

Singulis diebus Dominicis postquam præcepta sua denuntiaverint, dicant Orationem Dominicam: videlicet Pater noster: Salutationem Angelicam, Ave Maria: & Symbolum Apostolorum, Credo in Deum Patrem, &c. Credo in Spiritum Sanctum, &c. alta & intelligibili voce tractim, cum pausa, & per clausulas & articulos non inculcando, vel decurrando verba: ut juvenes & senes discant, quomodo perfecte & plene debeant pronunciare & recitare: & in fine doceant eos facere signum Sanctæ Crucis, dicendo: In nomine Patris, & Filii, & Spiritus Sancti, Amen.

Atque hæc quidem sufficiant hætenus ad instructionem Curatorum, quantum ad

ea, quæ agere debent in Ecclesiis suis, & intra claustra sacrae domus, vel in administratione Sacramentorum: De exequendis mandatis Curia, infra dicemus. Cæterum de Prædicatorum officio, & de Prono, quia utrumque a Curatis præstari, quoties fieri potest, oportet: his aliquid de forma habenda in Prono adjiciemus. Sed si quis scire cupit, quam sint Deo ingrati mali Pastores, legat c. 34. Ezechiel. 56. Esa. 1. Petr. 5. 2. Timot. 4.

Jam formam accipe Proni habendi.

## DE PRONO.

Vocabulum istud Proni vel Gothicum est, vel certe corruptum pro throno: nam aliæ nationes thronum vocant, & cathedram, & pulpitem. Videri posset compositum pronon, & per contractionem pronon, id est, ante templare: sed longe peteretur etymologia. Habendi vero proni singulis diebus Dominicis post Offertorium, formam hanc, quæ sequitur, poterunt servare simplices Curati & Vicarii.

## Prima Pars Proni.

Principio signando se Crucis signo: In nomine Patris, & Filii, & Spiritus Sancti, Amen, dicent:

*Les prieres & oraisons accoustumées de faire en nostre Mere Sainte Eglise, je les vous recommande. Et premierement nous rendrons graces à Dieu chacun en particulier de tant de biens, que nous recevons tous les jours de luy jusques à ceste heure sans l'avoir mérité, ains plusost l'offensé en plusieurs manieres. Et en general nous luy rendrons graces de ce, qu'il nous a donné la cognoissance de son benoist Fils JEsus Christ: par lequel avons la remission de nos pechez, l'esperoir de la vie éternelle, estans faits enfans de Dieu & freres de JEsus Christ par grace, & heritiers de son Royaume des cieux. Puis apres nous prierons pour l'estat, & union de la foy Chrestienne, & de l'Eglise Catholique, que Dieu par sa grace la vuille maintenir: & r'amener à la congnoissance de la verité, ceux qui sont en erreur, seduits par faulces opinions & detenus en tenebres par leurs pechez, ou par le mauvais conseil & suggestion des ministres du diable, ennemy du salut des hommes.*

Notus

(g) Statut. vetus.

(b) Statut. vetus.

(i) Epiph. lib. 1. contra hæret.

Alexan. 1. Euseb. li. 5. cap. 1. histor. Clemen. li. 8. contit.

Tonnus VIII. Concilior. German.

Notis prierons Dieu pour la paix : qu'il luy plaise par sa miséricorde la nous envoyer du ciel en terre, telle qu'il scait nous estre nécessaire.

Notis prierons Dieu pour la bonne disposition du temps, pour les fruits de la terre y estans, & que lon y mettra : qu'il luy plaise par sa grande liberalité & bonté les garder & multiplier, pour la nourriture & sustentation de son pauvre peuple.

Notis ferons aussi prieres & oraison à Dieu pour tous Supérieurs, Seigneurs, Prelats, & Princes, & pour tous ceux, qui sont constitués en dignité tant corporelle que spirituelle. Sçavoir est pour nostre Saint Pere le Pape, pour tous Archevesques, Evêques, Curés & Pasteurs ayans charge d'ames. Pource que d'autant qu'ils ont plus grandes charges, d'autant ils ont plus besoyn de la grace & assistance du Saint Esprit, & de vos bonnes prieres & prieres.

Et pource nous prierons Dieu pour Monsieur de Besançon nostre Pere en Dieu & Prelat : que Dieu par sa sainte grace le vuille garder & conduire en ses bonnes intentions : à celle fin qu'il nous puisse bien regir & gouverner en l'obéissance de l'Eglise, & à la foy Catholique à la louange de Dieu & salut de son ame.

De mesmes prierons Dieu pour l'estat temporel, sçavoir pour nostre souverain Prince N. pour toute sa Maison & Conseil, & pour tous autres Princes & Seigneurs temporels : spécialement pour Monsieur de ce lieu : que Dieu par sa grace leur doyent si bien regir, gouverner & garder leurs sujets de tort & d'oppressions, en administrant bonne justice, qu'ils puissent vivre en paix & tranquillité, & eux acquérir le vray royaume de Paradis.

Pareillement nous prierons Dieu pour ceux & celles, qui sont detenus en maladie. En especial je vous recommande N. nostre Parochien qui est en extrémité : que Dieu luy doyent patience & confort au mérite de nostre Seigneur JEsus Christ. Aussi pour toutes femmes grosses d'enfant, que nostre Seigneur les vuille delivrer à joye : & leur fruit conduire aux saints fons de Baptême.

Aussi devons nous faire prieres & oraisons pour tous nos bienfaiteurs de quelque estat qu'ils soyent, nobles, laboureurs, marchands, gens de mestier : & en especial pour celuy ou celle, qui a fait & offert le pain be-

nist & charité en l'Eglise de ceans, que son oblation soit agreable devant Dieu & meritoire pour son salut : & que l'oraison qu'il fera soit exaucée.

Notis prierons pour tous pelerins, qui par devotion ont entrepris le saint voyage, que Dieu les conduise en bonne santé : & vuille accepter leur devotion en satisfaction & accomplissement de leur veu au salut de leurs ames, & accomplissement de leurs saints desirs.

Finablement nous prierons Dieu pour tous nos bons parens & amis trespassés : & généralement pour tous ceux & celles, qui sont enterrés en ceste paroisse, si estans en ce mortel monde ils firent choses pourquoy leurs ames soyent detenues es peines de purgatoire : que par le mérite de la Passion de son benoist Fils, par les prieres & intercessions de nostre Mere Sainte Eglise, puissent estre abregées leur peines, & eux colloquer au royaume de Paradis.

### Secunda Pars Proni.

**E**T avant que commencer nos prieres, ny proceder au Saint Sacrifice de la Messe, je vous denonce pour excommunier, tous charmeurs, charmeuses, devineurs, devineuses, sorciers & sorcieres, & ceux qui croient en eux : tous usuriers & reneviens manifestes : tous ceux qui traitent mariages clandestins : tous ceux qui mettent les mains sur clercs ou prestres, si ce n'est en leur corps defendant : tous ceux qui mettent empeschement à la Jurisdiction Ecclesiastique de Monsieur de Besançon, & tous ceux qui malicieusement retiennent les biens & droictures de l'Eglise. Telles manieres de gens sont excommuniez & maudits s'ils ne viennent à amendement. Et de l'autorité de Monsieur l'Official de Besançon, je vous denonce pour excommunié N. (Hic publicantur, qui specialiter excommunicati sunt.) Et pour ce s'il y a en ceste Eglise aucun, ou aucunes, qui soyent en sentence d'excommunication, je leur commande, qu'ils aillent dehors, jusques à ce, que le service Divin soit fait : car s'ils y demeuroient, ce seroit à leur damnement : & quand je le scaurois, je ne procederois plus avant au Divin service. J'admoneste tous ceux, qui sont en excommunication, que s'ils ne procurent le benefice de leur absolution, ils seront enterrés aux champs (venans à mourir) comme des bestes, & non pas en l'Eglise, ny au cimetière avec les bons Chrestiens.

Tertia



*Tertia Pars Proni.*

**N**ous avons Lundy prochain la Feste de N. Elle est de commandement : & pource je vous commande la solemniser, & cesser de tous labeurs & œuvres serviles pour l'obéissance que devez à Dieu & à son Eglise. Jendy aussi l'Eglise celebrera la feste de N. mais elle n'est point de commandement : ceux qui y auront devotion, la pourront faire. Combien que tous jours nous doivent estre sanctifiés, pour nous garder de peché, & travailler de nous mettre en estat de grace. Le Lundy (qui sera de demain en huit jours) nous aurons la feste de N. laquelle porte vigille & jeune de commandement. Pour ce je vous commande, mesmes à tous ceux qui sont en aage & estat de jeuner, que Samedi prochain vous ayez à jeuner.

À la Messe du jourd'hui l'Eglise nous recite en l'Evangile que nostre Sauveur JEsus Christ, &c. Dont nous en pourrons prendre instruction & doctrine salutaire pour nos consciences : Que si nous voulons estre ses disciples & bons Chrestiens nous devons, &c.

Et applicabit Curatus huic argumento aliquem locum communem ex his, qui descripti sunt in hoc volumine: veluti de fide, vel de spe, vel de charitate, vel de operibus misericordiae, vel de peccatis, vel de præceptis Decalogi: cum exhortatione brevi ad pietatem. Simpliciter tamen non sine magno apparatu, pro populi captu. Nam quemadmodum cibo valde delicato non reficiuntur rustici: sic rustico offendi solent delicati.

*Quarta Pars Proni.*

**H**oc facto populus flexis genibus cum Curato orabit: veluti cum Psalmo: Ad te levavi oculos meos, &c. vel alio (ut videbitur Curato) cum Gloria Patri, Kyrie eleison, Christe eleison, Pater noster: Et ne nos, &c. Salvos fac servos tuos & ancillas tuas Domine. Resp. Deus meus sperantes in te. Vers. Esto nobis Domine turris fortitudinis. Resp. A facie inimici. Vers. Fiat pax in virtute tua. Resp. Et abundantia in turribus tuis. Vers. Domine exaudi orationem meam. Respon. Et clamor meus ad te veniat. Dominus vobiscum, &c. Ecclesiae tuae quæsumus

Domine, &c. Pro fidelibus defunctis. Requiem æternam dona eis Domine. Resp. Et lux perpetua luceat eis. De profundis clamavi, &c. Oremus: Deus veniæ largitor, &c. Fidelium, &c.

Eriget se Curatus postea, & dicet:

Pour satisfaire à mon devoir & au commandement de nostre Reverend Prelat, vous direz avec moy Pater noster, &c. Ave Maria, &c. Credo in Deum, &c. Les dix commandemens de Dieu, &c. Benedicite, &c. Omnia ad longum distincte & articulate.

*Quinta Pars Proni.*

**I**L reste vous notifier & faire savoir, que mariage est promis & accordé si plaît à Dieu, & nostre Mere Sainte Eglise, entre N. & N. Si il y a aucun, ou aucunes, qui sachent aucun empeschement pourquoy le mariage ne se puisse faire entr'eux, je luy fais commandement soubs peine d'excommuniement qu'il le die: & c'est pour le premier ban, ou pour le second, ou tiers, ou quart. Sed quantum bannum fieri solet pro foribus Ecclesiae hoc modo:

En l'Eglise de ceans a esté publié le mariage & faict les premier, second, & tiers bans entre N. d'une part, & N. d'autre: s'il y a personne, qui sache pourquoy le mariage ne se doive faire ou accomplir, vienne en avant. Car s'il venoit apres, il ne seroit pas creu: mais en demeureroit pour excommunié.

Bannis publicatis, & mandatis Prælati ad eum missis (si qua acceperit) Curatus faciet, ut populus dicat Confessionem generalem, ipso Curato alta & intelligibili voce præeunte, sicut fecit in Oratione Dominica, & aliis. Qua confessione facta, absolvet generaliter, & benedicet: injuncta aliqua oratione brevi.

## XVII.

Experti alias in quibusdam locis a frequentioribus civitatibus, & populis remotioribus hujus Bisuntinae Dioecesis, tantam esse doctrinæ Christianæ ignorantiam, ut non solum pueri, sed etiam adulti quidam prima rudimenta fidei Catholicae penitus ignorarent, aut perperam tenerent, quod a suis Pastoribus raro docerentur: idcirco ut insti-

tutionis Christianæ prima elementa juventus nostræ Dioicesis quam primum acciperet, & edisceret, Statuto Synodali, post longam & maturam deliberationem, præcepimus & ordinavimus, & sub gravissimis pœnis arbitrio nostro adversus inobedientes declarandis, quatenus in singulis Parochiis ruralibus (in quibus pædagogia, seu ludi literarii non aperirentur) Curatus, seu Vicarius, singulis hebdomadis, diem unum, non festum, seu feriatum eligeret, in quo hora meridiana dato signo campanæ, convocaret pueros omnes utriusque sexus, suæ Parochiæ, ætatis septem annorum, & infra: quos ipse dictus Curatus, aut Pastor expectaret sedens in prono seu in pulpito solito, suæ Ecclesiæ, apertis & patentibus omnino foribus, seu janua ipsius Ecclesiæ. Quibus pueris sic vocatis, & sedentibus in Ecclesia, per ordinem, factò primum signo Crucis, in nomine Patris, & Filii, & Spiritus Sancti, Amen, inciperet alia, distincta; & intelligibili voce recitare semel, atque iterum, vel pluries Orationem Dominicam: Pater noster, qui es cœlis, &c. cum Salutatione Angelica. Deinde Symbolum Apostolorum: Credo in Deum, &c. Et postea Confessionem generalem: Confiteor Deo, &c. Latine, vel Gallice. Denique lingua vernacula, seu Gallica recitaret decem Præcepta Decalogi: *Un seul Dieu, tu adoreras, &c.* Quo factò ex eodem loco juberet unum ex pueris (quem magis idoneum existimaret) surgere, & eodem modo recitare, quæ audivisset. Et si fieri posset, unum alium, aut duos interrogaret: ad hoc ut ceteri domi suæ, vel alibi, diligentiam & studium adhiberent ad illa ediscenda: ut si quando in Ecclesia interrogarentur, idem postea recitare possent. Hanc puerilis Catechismi formam nunc quando Patribus in Concilio placuit, quæ neque gravis profecto Curatis videri debet, (iis saltem, qui vere curam gerunt suorum populorum) denuo præcipiendam ducimus, & statuendam: sicut in hac Synodo statuimus & ordinamus. Cavebit autem diligenter idem Pastor, ne severitate, minis, vel difficultate doctrinæ, pueros deterreat ab ea Schola: sed cum mansuetudine,

& honesta gravitate, curabit ea doctrinæ Christianæ Rudimenta in animos suorum adolescentium paulatim & simpliciter instillare: habita ratione capacitatis, & ingenii ipsorum. Quo factò dimittet eos cum benedictione solita. Prohibebit autem, sicut Nos per præsens mandatum sub pœna excommunicationis prohibemus, toto illo tempore, quo Catechismus iste, seu institutio fiet, ne adultus aliquis, & major octo vel novem annis, Ecclesiam ingrediatur: ut puerilis institutio pueriliter & libere tradi possit: ne per grandiorum superbiam & insolentiam Curatus perturbetur, aut altiora tractare cogatur. Præterea ut omnes Patres familias certiores fiant hujus ordinationis & Statuti nostri, & habendæ disciplinæ in posterum, singulis diebus Dominicis Curatus ipse, seu Vicarius, declarabit in prono, diem non feriatum ejus hebdomadæ, in qua mittere debebunt suos liberos ad institutionem supradictam.

## XVIII.

In locis vero & Parochiis habentibus Magistrum & Ludum literarium, præcipimus & ordinamus omnibus Curatis & Rectoribus Ecclesiarum dictæ Dioicesis Bisunt., ut moneant Patres familias, quatenus liberos suos ad Seminaria seu Pædagogia mittant, ut discere possint, & doceri eadem rudimenta fidei Christianæ. Alioquin in negligentes juxta culpæ gravitatem per censuras Ecclesiasticas animadvertetur.

## DE PRÆDICATORIBUS.

## STATUTUM I.

**P**Ræterea ne pravis doctrinis hominum mente corruptorum simplices inficiantur, ordinamus, & districte præcipimus vobis Curatis & Rectoribus Ecclesiarum nostræ Dioicesis, aut Vicariis vestris, ne ullos Prædicatores aut Concionatores admittatis in vestris Ecclesiis ad prædicandum, nisi literas nostras, vel Vicarii nostri Generalis, in forma authentica habuerint: nec in hoc negotio cujusquam persuasionibus vel diplo-

diplomatibus (quæ nisi tacita veritate ab indignis extorqueri verisimile non sit) pareatis.

## II.

Diligenter præterea observabitis datam ipsarum literarum, an ne sint pro anno, in quo ad Ecclesias vestras accesserint: & ne sit aliqua in ipsis rasura vel falsi suspicio.

## III.

Si quos autem prævaricantesprehenderitis, illos cum suis literis & bonis capiat, arretetis, & ad Nos aducatis fideliter & secure.

Ut autem Prædicatores Verbi Dei, & Evangelistæ, ac etiam Pastores, certam habeant rationem & methodum, quam sequi possint præter ea, quæ jam in Prono diximus: pauca hic subijcimus loca & capita, ad quæ in suis concionibus respiciant.

**SEQUUNTUR CAPITA**  
*quædam argumentorum, & materialium, quæ Concionatoribus Verbi Divini commendamus, tanquam metas & fines certos, atque scopos, ad quos in suis concionibus dirigant doctrinam suam, & exhortationes, oblata occasione.*

## PRIMUM CAPUT.

**U**T populus obedientiam & reverentiam præstet Principibus, & Magistratui, & Prælati Ecclesiæ. Ipsi enim (inquit Apostolus Hebr. 13.) pervigilant, quasi rationem reddituri pro animabus vestris. Et docebunt omnem potestatem, tam sæcularem, quam Ecclesiasticam esse a Deo.

Ad quod probandum facere poterunt hæc loca, Rom. 13. Omnis anima potestatibus sublimioribus subdita sit, &c. 1. Petri 2. Subiecti estote omni humanæ creaturæ, &c. De spiritali vero potestate, illud est, quod Paulus scribit ad Corinthios: Vultis in virga veniam ad vos, an in spiritu mansuetudinis? & quod adulteros, blasphemos, & similes tradidit Satanae: & quod Christus

Jesus, cum Phariseorum & Scribarum facta reprehendisset, tamen quia super cathedram Moyse sederunt, obediendum ille esse censuit.

## SECUNDUM CAPUT.

**N**E laici Sacerdotum & Ecclesiasticorum facta temere judicent, & reprehendant: sed si quid eos pati humanum viderint, omne id in partem meliorem (quantum in ipsis est) interpretentur: considerantes, quod solus Christus Jesus fuit sine peccato, Sacerdos, & Pontifex: nos autem servos esse Christi, cui cadimus, vel stamus. Tu (k) vero quis es, qui judicas alienum servum? Unus est Legislatores (l) & Judex, qui potest perdere & liberare.

## TERTIUM ET PRÆCIPUUM.

**N**E doctrinis variis & peregrinis abducti, fidem Ecclesiæ deserant: considerantes, quod populus Israel propter infidelitatem periit totus in deserto, ut scribit Apostolus ad Hebræos. Quod extremum malorum omnium est, fidem amittere. Quia peccator, cum in profundum venerit, contemnit. Et quod sine fide (m), impossibile est placere Deo.

## QUARTUM CAPUT.

**E**T quia infidelium triplex genus esse solet: Unum eorum, qui omnia negant, ex Philosophia sæculari superbientes, & plus sapientes, quam oportet sapere, cum fides ex auditu sit, auditus autem per verbum Christi: Alterum eorum, qui tanquam Milites incerti & erronei, nullius militiæ se Sacramento addicunt, sed de omnibus perinde existimant, Epicuri de grege porci: Tertium eorum, qui pertinaciter errorem tuentur aliquem, sub specie Religionis, & zelo aliquando fidei: Idcirco Prædicatores triplici ratione fidem conservare in populo conabuntur: subinde inculcantes, quod propter peccata enormia, & malam conscientiam, homines solent in errorem incidere, & circa fidem naufragium facere, ex primæ Apostoli ad Timot. 1. capit.

Prima

(k) Rom. 14.

(l) Jacob. 4.

(m) Hebr. 11.



Prima ratio erit, ut exhortentur populum, ut diebus Dominicis & Festivis in Ecclesiam conveniant, ad Divina & concionem audiendam, vel primum: quam memoriæ mandent, ne frustra & sine fructu semen Dei jaciatur. Ecclesiæ præcepta de Festis, jejuniis, confessione, Sacramentis, & similibus, pie observent. A libris abstineant suspectis.

Deinde altera erit, ut hortentur Patres & Matres familias, ut liberos & familiam domi erudiant ad pietatem, per hæc præcepta, scilicet:

1. Deum timeant & ament: & ad eum omnia sua consilia referant.
2. Deo singulis diebus salutem suam commendent, per orationes mane & vespere.
3. Injuriam nemini inferant: quia vindex est Deus.
4. Ab omni juramento abstineant, & a mendacio.

Tertia ratione fidem stabilire & conservare licebit, ut moneant servare præcepta Christi: & præterea etiam præcepta Apostolorum, & seniorum Doctorum Ecclesiæ, sicut ab Apostolis decretum fuit, Act. 15. Neque deficere a veteri consuetudine: signaque quædam observent, quibus hæretici & novatores doctrinarum discerni deprehendique possint a quocunque, veluti:

1. Si Sanctorum Patrum antiquorum auctoritatem contemnant.
2. Si in docendo modestiam non servant, & cum contumeliis de simplicitate veterum Doctorum loquantur.
3. Si a simplicitate veteris fidei & receptæ, dissonantia probare nitantur.
4. Si in loquendo phrasas hæreticorum imitentur, veluti: *Le Seigneur Dieu: Christ: Paul: Pierre: La parole: Les Ministres de la parole:* & similes, quas hæretici hujus tempestatis tenent. Quia ex hoc apparet illos versatos esse potius inter hæreticos, quam inter Catholicos Christianos.

Et hæc hætenus.

#### STATUTUM IV.

Ipsi vero Prædicatores juxta Statuta Synodalia, neque apocrypha, neque obscura nimis, aut difficilia, & alta mysteria, simplici populo enarrare præsumant: sed tantum ea, quæ fidem confirmare possint, ut duodecim articulos fidei, & bonos mores commendare, ut præcepta Dei & Ecclesiæ, tam augendo spem vitæ æternæ in bonis, quam timorem supplicii æterni in malis.

#### V.

Argumenta & rationes hæreticorum ne referant, nisi fuerint viri doctrina & auctoritate præstantes: sed potius orthodoxorum Patrum sententias: & multo minus phrasas eorum retineant. Quales sunt, quas retulimus. Sed loco illarum dicant: *Jesus Christ, nostre Seigneur, Saint Paul, Saint Pierre, la Parole de Dieu &c.*

#### VI.

In diebus Dominicis commendent orationibus populi statum Principum & Prælatorum, & in Festis Sanctorum recitent vitas Martyrum: gesta ipsorum, cum laude, ad exemplum auditorum. Nihil tamen admittentes fabulosum.

#### VII.

Quantum fieri poterit, sæcularium fugiant consuetudinem & convictum: sed maneant cum Ecclesiasticis. Caveant etiam congressum hominum hæreticorum. Quia incorrigibiles sunt, contumaces, & contumeliosi: ex quorum contentionibus sæpe auditores pervertuntur.

#### STATUTA SCHOLASTICORUM.

Sunt in Ecclesiis Cathedralibus & Collegiatis quibusdam SCHOLASTICI, hoc est, Scholarum Præfecti, quorum officium est docere indoctos, præsertim juventutem: eique Pædagogos bonæ vitæ simul & doctrinæ Catholicæ præficere: ut sub eorum disciplina, bonis literis pietate & morum honestate, imbuatur. Nec contemnendum hoc docendi munus. Quandoquidem in Scholis Seminarium fit, non solum Prælatorum

rum & Ministrorum Ecclesiæ, verum etiam Magistratum, & eorum, qui consiliis suis Respubl. gubernant. Quæ si negligantur, aut depraventur: necesse erit & Ecclesias, & Respubl. periclitari, & confundi.

## STATUTUM I.

**P**rovideant Scholastici & solícite procurent, ut erudiendæ juvenum non tantum docti, sed imprimis Catholici & pii, nullo modo fide suspecti præficiantur.

### II.

Habento autem in Scholis suis, qui præter grammaticam, & alias artes, doceant etiam cantum & computum Ecclesiasticum: idque rudi (ut dicitur) Minerva. Duo enim hæc non solum necessaria sunt futuris Presbyteris, sed etiam omnibus utilia, & ad pietatis amorem, & ad usum vitæ humanæ. Quæ tamen, nisi in pueritia discantur, nunquam certe discantur.

## DE MAGISTRIS.

### STATUTUM I.

**A**nimadvertentes, quantum momenti habet ad veram pietatem Catholica & fidelis institutio puerorum, ut qua imbuti semel ab adolescentia rudes, simplicesque animi, ad reliquam ætatem perseverent, cum studiis eisdem vel pietatis, si bona fuerit, vel nequitie, si perversa: vos omnes Ludimagistros nostræ Dioecesis Bisuntinæ, necessarium duximus admonere, & obsecrare in Domino, ne docendi munus (quod propter ingenii gloriam cenodoxiæ vitio sæpenumero obnoxium est) propter humanam gloriam, & vanos fumos popularis commendationis, sed propter utilitatem publicam, & Deo soli probari cupientes vestram operam atque labores exerceatis. Quoniam ille solus est, qui potest laboribus vestris iusta præmia reponere: populi autem favor nihil aliud, quam curas augere, & sui Studiosos in mille difficultates conjicere, solícitos & instabiles tanquam vento circumactos.

*Tomus VIII. Concilior. German.*

### II.

Juxta igitur doctrinam Ecclesiastici, (Altiora te ne quæsieris, & fortiora te ne scrutatus fueris: sed quæ præcipit Deus, cogita semper, & in pluribus operibus ejus ne fueris curiosus) monemus & hortamur vos omnes & singulos Ludimagistros, primum, ne subtiliora aut obscuriora doceatis, quam pro captu auditorum: deinde ne falsa aut perversa, quæ animos corrumpere possint adolescentum. Sed omnem vestram doctrinam atque studia eo dirigatis, ut discant adolescentes servare præcepta Dei, & per bona opera promereri gratiam apud Deum, & homines. Hic est fructus vel præcipuus sanæ doctrinæ. Curiosæ autem disceptationes non faciunt, nisi ad subversionem audientium.

### III.

Eapropter, ut occasio primum tolleretur omnibus ex suo sensu & persuasione (quæ non raro fallitur) reipublicæ plantas tenellas effingere, atque efformare: Statuimus & ordinamus, & sub pœna præstiti juramenti prohibemus, ne libros alios vestris auditoribus interpretemini, aut interpretari patiamini, quam quos in Collegiis Universitatum Catholicarum notum fuerit publice interpretari solere: novos autem, qui recenter editi fuerint, nisi habita prius licentia a Nobis, aut a Vicario nostro, vel Officiali, ad quos exemplar ipsum mittetis videndum, & examinandum.

### IV.

Deinde ut habitus religionis & cultus Divini contrahatur a pueritia, jubemus vobis, ut omnibus diebus Festis discipulos adducatis ad Ecclesiam cum modestia & gressu composito (quantum ætas ferat puerilis) canturos scilicet cum Clero in Missa, & Vesperis: nec patiamini aliquem ex iis, qui norunt legere, carere precibus horariis, aut saltem septem Psalmis penitentialibus, in quibus legant Divinum officium, aut cantent. Singulis vero diebus sub noctem, domi, vel in Ecclesia (si populus soleat tunc

E b

con-

congregari) una cum Præceptore cantent Salve Regina, aut aliam Salutationem Mariæ Virginis pro tempore.

## V.

In quatuor quoque anni temporibus, scilicet Quadragesimæ, Pentecostes, Nativitatis Domini, & omnium Sanctorum, juxta laudabilem consuetudinem, quæ hætenus servata est, facite eos confiteri Curato, vel alii Presbytero: petita licentia & facultate prius a Curato. Hanc, si Magister, vel alius petierit, pro omnibus tenebitur Curatus sine aliqua mora concedere.

## VI.

Et ne post hac temere & sine selectu, erronee & vagi quicunque, ad munus adeo honestum admittantur: Statuimus & ordinamus, ut antequam cuiquam Magistro literarium ludum aperire liceat, Rector, seu Curatus Parochiæ (seu is, ad quem de jure vel consuetudine pertinet) ipsum instituant, recepto prius jurejurando ab ipso, quod servabit fideliter hæc, quæ in hac Sancta Synodo statuimus.

### DE HOSPITALIBUS, & locis piis.

Curatos omnes in Domino hortamur, ut exemplo magni Patriarchæ Abraham, servant hospitalitatem: Christum se recipere arbitantes, quoties pauperes & peregrinos in domum suam excipiunt. Magistri vero Hospitalium meminisse debent, quæ potissima causa fuerit erigendæ, constituendæque cujusque domus. Sunt enim aliæ ad recipiendum peregrinos: aliæ ad curandum ægros: aliæ deum ad alendum pauperes, senes, orphanos, invalidos, infantes expositos, furiosos, leprosos, contagiosisque, vel horrendis morbis affectos, & alias similiter miserabiles personas deputatæ. Ideo has, & non alias personas tenentur Magistri alere. Quas etiam ad Ecclesiasticam disciplinam pertinere, ac nostris, aliorumque piorum hominum largitionibus victitare voluerunt. Meminerint etiam hospitalium Magistri, quod Sancti Patres dixerunt, eos, qui ex bonis parentum atque suis sustentari possunt, si quod pauperum est, accipiunt, sa-

crilegium committere, seque tali muneri addictos, ut non sui, sed ut pauperum curam gerant: quos neglexisse, occidisse est. (n)

## STATUTUM I.

Sint Mendicantibus validis clausa hospitalia. Nam & publice ostiatim mendicare istis, est a jure (o) interdictum. Et Apostolus (p) denunciatur: Quoniam si quis non vult operari, nec manducet. Pietatis tamen ratio, eos, qui non possunt discernere, an vere pauper sit, qui petit eleemosynam, commendat apud Deum, quia in nomine ejus petit. Dicit enim Dominus: (q) Petenti da.

## II.

Magistri hospitalium curent ante omnia, ut in suis domibus ea, quæ ad salutem animarum pertinent, minime negligantur. Sed de Sacramentorum administratione, pauperibus debilibus & ægrotis, provideatur. Et ubi corporis infirmitas Medicum postulaverit, ibi prius animæ, deinde corporis Medicus accersatur. Nec aliquem recipiant, nisi eodem die vel postridie confiteantur.

## III.

Quod sapientissime in Colonensi Synodo constitutum fuit, ut Magistri hospitalium singulis annis, aut sæpius Magistratui ipsius loci præsentem Parcho, rationem reddant de sua administratione: Nos cum iis, quæ in Sacro Oecumenico Concilio (r) Tridentino lata sunt, & in nostra Provinciali publicata: quoniam curæ nostræ commissa sunt omnia hæc: quocunque nomine eorum Administratores censeantur, & quomodolibet exempti sint: statuimus & ordinamus, ut singulis annis rationes reddantur a Magistris, & Curatoribus hospitalium, Nobis, vel personis a Nobis deputatis cum locorum Magistratibus: aliter factæ liberationes non suffragabuntur, nisi secus in fundatione, seu erectione eorum a Nobis, vel Prædecessoribus nostris approbata, cautum expresse sit.

## IV.

(n) Hieron. & Prosper. Conc. Colon. c. 6. 7.

(p) 1. Thess. 3.

(q) Matth. 5.

(o) C. De Mend. un. l. lib. 12.

(r) Sess. 7. c. 15.



## IV.

Et ne in posterum abusus, qui fieri solent, ignoratis foundationibus, committantur: statuimus & ordinamus, ut vacante Hospitali Procuratore legitimo, antequam alius instituatur, fiat copia foundationis ejus Nobis, vel Vicario nostro.

### DE FABRICIS, & CONFRATRIIS, & aliis pietatis officiis.

Supra de iis Ministris, qui aliis Ministris Ecclesiæ subserviunt, tractantes, præter Diaconos, Hypodiaconos, Acolythos, & alios, officia Ostiarii (minimi inter alios Ordines Ecclesiasticos) diximus esse Thesaurarium, Sacristam, Aedituum, Matricularium: adde & Fabricarium & Confratriæ receptorem, seu priorem. His omnibus, utcumque nominentur, cura mandata est ædificiorum, & suppellectilis Ecclesiæ, & pecuniæ, ad hanc rem destinatæ. Quod munus quia sanctum est, debent etiam ipsi sancti esse (quantum fieri potest) & sine querela, (s) ut simplices filii Dei: unusquisque sicut accepit gratiam, (t) illam in alterutrum administrantes, sicut boni dispensatores multiformis gratiæ Dei.

### STATUTUM I.

Quando per Pastores fieri non poterit, curabunt Fabricarii, ut populus sancta tecta conservet, Ecclesiam & Cæmeterium, ornamenta etiam Altaris, & reliqua necessaria ad cultum Dei pro loci facultatibus procurabunt, & munda omnia servabunt.

## II.

Immunda animalia ab Ecclesia expellent: & excommunicatos atque infideles, tempore Sacrificii Missæ ingredi non patientur: nec fieri in ea secularia spectacula, aut actus dissolutos aliquos: quoniam domus Dei, domus orationis est.

## III.

In Presbyterio ubi Missæ celebrantur, ne ferant sedilia fieri mulierum, sed si qua posita jam fuerint, auferan-

tur: quia juxta Presbyterum celebrantem, stare non decet foeminas.

## IV.

Auferantur ab Ecclesiis (hostili cessante timore) arcæ illæ, sive granaria, quas instante aliquo periculo, plenas tritico, vel suppellectilibus, eo importarint Parochiani: quia impedimento hæc sunt & dedecori in domo Dei, ubi nonnisi spiritualia, tractare convenit.

## V.

Curati autem, seu eorum Vicarii, per Diaconos, vel Subdiaconos, vel per se (non per mulieres) abluant quater in anno ad minus, mappas altaris, amictum, albam, & corporalia. Hostias vero altero quoque mense renovent in ciborio: ne putrescant, aut situm contrahant, diutius servatæ.

## VI.

Episcopi Exequutores sunt, uti Concilium (u) docet, omnium piarum dispositionum tam ultimæ voluntatis, quam inter vivos. Et quia propterea jus illi habent visitandi Hospitalia, Collegia quæcunque, Confraternitates Laicorum, & pia loca omnia, etiam si eorum cura laicis demandata sit: idcirco jubeatur Curatis, ut de administratione locorum piorum, quæ in suis fuerint Parochiis, frequenter admoneant Decanos rurales: qui referent in Synodis, vel Episcopo, sicut se res habeant: ut provideatur eis.

## VII.

Item mandare poterunt Episcopi, quando vacaverit eis, omnibus Hospitalariis, ut deferant ad se fundationes: ut, si qui committantur abusus, corrigantur. Et juxta fundationes, vel erectiones ipsorum provideat Episcopus.

## VIII.

Et reddant Episcopo rationem singulis annis Administratores omnes Fabricarum, Hospitalium, Confraternitatum, Eleemosynarum, & piorum locorum omnium. Nec, si fundationes

(s) Phil. 2.

(t) 1. Petr. 4.

(u) Trid. Sess. 13. c. 8.

nes aliis hæc reddi constituerint, ideo sine Episcopo factæ liberationes suffragentur.

## IX.

Locationes rerum Ecclesiasticarum factæ a defunctis, nullatenus validae sunt in præjudicium Successorum: etiam si solutio anticipata sit. Et quæ ad longum tempus etiam autoritate Apostolica confirmatæ sint, Synodus Provincialis (quando in damnum Ecclesiæ factas noverit) damnabit. (x)

## X.

Quarta funeralium, quæ solita erat perfolvi ante quadraginta annos Ecclesiæ Cathedrali, vel Parochiali, redintegretur, non obstantibus quibuscunque. (y)

### STATUTA RELIGIOSORUM, & Sanctimonialium.

**V**itæ monasticæ genus ad perfectionem Evangelicam (z) ut maxime commodum, ita res est [licet possibilis] tamen ardua & difficilis. Ideo in eam nemo intrudatur invitus, vel fraude plectus: & multo minus suscipiatur a Præfectis, nisi mature, cum examine probatus: ut non alii, quam qui possunt capere, capiant hoc verbum. Nam voluntarie Domino sacrificandum: & voluntaria fieri beneplacita oris sui postulat. Ex contrario sequitur, quod Apostolus scribit de adolescentibus, quæ cum luxuriatæ fuerint in Christo, nubere volunt, habentes damnationem, quia primam fidem irritam fecerunt.

Omnis cura & diligentia adhibeatur a Prælatiis, tam in Capitulis generalibus & Provincialibus, quam visitationibus, (quas suis temporibus facere non prætermittant) ne illa, quæ ad substantiam regularis vitæ pertinent, negligantur: quæ sunt, Obedientia, Paupertas, & Castitas: & si qua sunt præterea alia vota peculiaria Ordinum: quia nulla potest ab his fieri relaxatio.

### STATUTUM I.

**N**ulli igitur liceat Regulari, bona mobilia, vel immobilia, etiam ab Episcopo acquisita, tanquam propria possidere, vel tenere; sed incor-

porentur omnia statim conventui, Superiori tradita. Nec Superioribus licet bona stabilia Religiosis concedere, etiam ad usumfructum, vel administrationem, vel commendam: sed omnia per Officiales gerantur ad nutum Superiorum amovibiles.

## II.

Nulli item Religioso liceat, sine sui Superioris licentia se subicere servitio alicujus Prælati, vel Principis, vel Universitatis. Qui sine mandato Superiorum in scriptis obrento, a Monasteriis egressi reperiantur, punientur ab Ordinariis locorum.

## III.

Sit aliquis in Monasteriis virorum (a) pius ac doctus, qui doceat Monachos ab adolescentia meditari in Lege Domini die ac nocte. Ad quod quidem munus in Monasteriis Monialium Sanctimonialis, cæteris vita & doctrina præstantior, deligatur ab Abbatisa, nisi ipsa per se hoc queat præstare.

## IV.

Et quoniam Sanctimonialium clausuram omnem restitui jubet Sancta Tridentina Synodus; decrevit Sancta Synodus nostra Provincialis, quod Episcopi, tanquam a Sede Apostolica delegati, Abbatissas omnes monerent, ut intra tempus aliquod pro ratione rerum & locorum præfigendum, Monasteria sua claudant. Quod si illæ non fecerint, Episcopi fieri procurent. Id Nos omnibus & singulis notum fieri ordinamus, & præcipimus per hoc Statutum nostrum.

## V.

Statuit eadem Synodus (b), ut Monasteria Sanctimonialium, Sedi Apostolicæ immediate subjecta, visitentur ab Episcopis, tanquam Sedis ejusdem delegatis: & bis, vel ter in anno offeratur aliquis Confessor per Ordinarium, qui earum confessiones audiet, si velint. Admonemus igitur omnes, ut singulis mensibus semel saltem confessionem peccatorum faciant, & Sacrosanctum

(x) Trid. Sess. 25. c. 11.

(a) Conc. Colon.

(y) Sess. 25. c. 13.

(b) Trid. Sess. 25. c. 10.

(z) Sess. 25. c. 1. 2. 3. 4. 5.

sanctum Eucharistiæ Sacramentum suscipiant : quo salutari præsidio se muniant ad omnes oppugnationes dæmonis fortiter superandas. Præter ordinarium autem Confessorem alium extraordinarium his aut ter in anno : qui omnium confessiones audiat , offerri procurabimus.

## VI.

Sacras Apostolicas Constitutiones executioni mandantes, hoc nostro Statuto inhibemus, ne Sanctimoniales post Professionem factam, quocunque prætextu, etiam ad breve tempus, nisi ex aliqua legitima causa a Nobis approbata, Monasterii claustra egrediantur, ut a mundanis & publicis spectaculis separatae, Deo liberius servire valeant, & immaculatas se in hac vita conservare.

## VII.

Universis etiam & singulis Ecclesiasticis & regularibus personis, nostræ Jurisdictioni subjectis, interdiciamus & prohibemus, ne absque rationabili & manifesta causa, nec sine Superioris, ad quem pertinet, licentia speciali, nec sine religione, & testimonio bono (ne aliqua sinistra oriatur suspicio) ipsa Monasteria Sanctimonialium subintrent, sub pœna excommunicationis, ipso facto incurrenda.

## VIII.

Nec Abbatisa cum aliquo loquatur sola: nec Monialem aliquo, vel etiam intra claustra Monasterii, mittat solam: sed vel ipsamet comitetur eam, vel aliam vetulam adjungat sociam.

## IX.

Statuit Sacrosancta Tridentina Synodus, ut si puella, quæ habitum regularem suscipere voluerit, major XII. annis sit: non ante eum suscipiat, nec postea professionem emittat, quam exploraverit Episcopus, vel ejus Vicarius, virginis voluntatem, an coacta, an seducta sit: an sciat, quid agat. Cujus professionis tempus ne ignoremus, jubemus, ut Præfecta Monasterio Nos ante mensē certiores faciat, sub pœna suspensionis.

## X.

Prælatos Monasteriorum per viscera misericordiæ Domini nostri JESU Christi requirimus & hortamur, ut personas regulares sibi subjectas ad observantiam regularum suarum & statutorum regularium diligentius inducant, moneant, & alliciant: Et si opus est, strictius compellant: ut de officio sibi commissio dignam Deo possint reddere rationem. Quod si ultra prævaricatores fuerint Ordinis sui, aut contemptores, seu negligentes & remissi: pro certo se noverint, non solum ab officio deponendos, sed alias secundum regulam suam castigandos. Nos etiam eorundem Prælatorum negligentiam, si opus fuerit, supplebimus juxta Canonicas sanctiones.

## XI.

Denique hortamur omnes religiosos viros & virgines sanctimoniales, ut meminerint, quod B. Petrus in Actis Apostolorum testatur, eos, qui communem vitæ societatem (qualis nunc etiam apud Religiosos conservatur ad instar illius, quæ fuit olim apud Apostolos, quando erat multitudinis credentium cor unum, & anima una, nec quisquam eorum, quæ possidebat, aliquid suum esse dicebat) qui, inquam, societatem semel receptam deserunt, tentare Spiritum Sanctum, & mentiri non hominibus, sed Deo.

## XII.

Considerare etiam ad virginitatem servandam, quod D. Cyprianus ait: Virginitas excellentior, quam non cogit necessitas, aut mandatum, sed perfectionis suadet consilium. Quod si Divinis consiliis obviaverint, tentamenta & liberas mentes ad carnales revocarint appetitus: adest Deus fortis. Nec spem ponat homo in homine, nec in brachio carnis suæ confidat: quia qui mundum vicit, & victoriam suis promittit militibus.

## XIII.

Quin etiam illud ad obedientiam servandam considerent, quod B. Basilii ait: Quod a Superioribus & Præpositis committitur & mandatur, qui recusat,



& aliud requirit; primum obedientiam corrumpit, & se declarat abnegasse: deinde etiam aliorum plurium malorum sibi ipsi, & aliis autor fit, quando januam contradictionis plerisque aperit, & se ipsum ad hanc assuefacit: & quia non potest quivis, quod utile est, probare, sæpe, quod nocivum est, eligit.

## XIV.

Et illud D. Augustini (c) timeant omnes Religiosi, (quod ille iurejurando affirmat) Difficile sum expertus meliores, quam qui in Monasteriis profecerunt: ita non sum expertus peiores, quam qui in Monasteriis ceciderunt. Quapropter & si contristamur de aliquibus purgamentis: consolamur tamen etiam de pluribus ornamentis.

### DE MINISTRIS CANTUUM Divinorum, sive de Psallentibus.

**C**Antorum, & Psallentium munus [quod Prophetarum quodammodo officium esse diximus] quam sanctum sit atque utile, non potest sane carnalis homo gustare, qui spiritualia non dijudicat, sed carnalia. Apostolus (d) cum Ephesios veller a carnalibus operibus revocare: Implemini (inquit) Spiritu Sancto; loquentes vobismet ipsis in Psalmis & hymnis, & canticis spiritualibus: cantantes & psallentes in cordibus vestris Domino. Hæc Paulus. Nam qui sine Spiritu Dei canit, [hoc est, sine fide & charitate] non intelligens, quæ sit voluntas Dei, non ut Deo placeat, profecto canit, aut ut se, vel proximum ædificet, sed ut vino (hoc est, cibo & potu) replere se queat, & carnis suæ perficere desideria. Qui autem sic agunt, errant: partem enim non habent in regno Christi & Dei. At beati, qui habitant in domo tua Domine: in sæcula sæculorum laudabunt te. Si Religiosi & Canonici, alique Clerici sæculares, huic officio deputati, perpenderent felicitatem suam, nunquam tæderet profecto Chori. Annon in Choro, quasi in Cælo sunt? Annon Angelorum munus obeunt? Annon munus Angelorum est, laudare Deum, & canere perpetuo Sanctus, Sanctus, Sanctus, Dominus Deus Sabaoth?

De cantu Ecclesiæ, Augustinus (e) librum scripserat contra quendam Hilarium. Quantum quoque commoveretur suavitate canentium in Ecclesia, scripsit lib. 9. confess. moremque ait ab Orientalibus accepisse Mediolanenses.

Sed neque ab hoc psallendi munere exempti sunt Curati. Canunt enim & ipsi, nam Symbolum, & Psalmos, & Hymnos canenti populo, ipsi (tanquam revera Choragi) præire debent, & tonum vocis in Missa dare ad Hymnum illum: Gloria in excelsis, & ad Credo: qui scolii cantus doctissimi in Ecclesia fiunt: juxta quos & respondeat populus assistens. In ministerio quoque habendi sunt cantorum & psallentium; licet ab alia psalmodia plerique eximantur. Sed Canonici proprium in primis est, unde vocatos Canonicos putatur. Quanquam antiquius Græce *κατονοίαι* dicti sunt, a communi vita: unde formatum nomen Canonici. Olim namque Collegia Ecclesiarum Cathedralium in communi vita vixisse, & adhuc nunc quadam vivere, notum est. Canonicos regulares postea dixerunt eos, qui præter communem victum etiam votum regulæ paupertatis fecerunt. Ergo canonice vivere, est in communi vivere.

## STATUTUM I.

**C**Anonici ergo, quoniam (f) ad hoc instituti sunt, ut laudes Deo singulis horis decantent, nisi legitima causa impediens, chorum sequantur: in quo modeste se habeant, & cum decenti gravitate: non garrientes aut rixantes in eo, sed Deum reverentes, in cujus conspectu siti sunt. Celebranti Episcopo, aut alia Pontificalia exercenti, assistant, & interserviant. (g)

## II.

Nulli in Sacris Ordinibus constituto, (b) vel beneficiato, in nostra Dioecesi, aliud officium dicere liceat, quam secundum usum Ecclesiæ Bisunt. nisi ad hoc dispensationem habeat a Sede Apostolica: sub pœna privationis beneficii, & suspensionis ab Ordine: sed Romanum commendamus.

## III.

Et cum psallendi gratia chorus (i) fiat, nemo labia sua muta aut clausa teneat.

(c) Epist. 137.

(d) Eph. 5.

(e) Aug. lib. 10. Retract. c. 33.

(f) Concil. Basil. &amp; Colon. &amp; Refor. Cler. sub Carolo.

(g) Sess. 24. Trid.

(b) 12. dist. c. De his. &amp; c. si. Basil. c. 15.

(i) Conc. Agath. C. Presbyter. de celebr. Miss. Conc.

nuerit; sed omnes pariter cum simili & decenti alacritate modulentur: sic tamen, ne boatus solum sine intelligentia audiat. Quod fiet, si non cursim, nec festinanter: sed tractim & cum pausa decenti (præsertim in medio cuiuslibet versiculi Psalmorum) debitam inter solenne & feriale exhibeant differentiam.

## IV.

Nemo cum publice, vel preces horariæ, vel Missæ Sacrum cantando peraguntur, legat, vel dicat privatim officium. Nam is non solum choro subtrahit illud, quo obnoxius est, & ad quod tenetur: sed alios psallentes perturbat, vel a psallendo retrahit. (k) Quare si urgetur aliqua causa, ut officium suum absolvat: egrediatur chorum, & oret in abscondito.

## V.

Organorum melodia & cantus figuratus, sic in templis adhibeatur, ne lasciviam magis, quam devotionem excitet: (l) neve præter hymnos Divinos, ac cantica spiritualia, quicquam resonet, aut repræsentet.

## VI.

Processiones Ecclesiarum aliarum ad summum templum, quæ (diebus maxime celebribus) fiunt, quia institutæ sunt causa conveniendi ad Missas Episcopales, & recipiendi communionem, vel benedictionem Episcopalem: monemus omnes, ut aliquid saltem veteris instituti retineant, ne vagandi solum causa venisse videantur. (m) Quando autem Generales extraordinariæ indicuntur, officium in Ecclesia fit solenne.

## VII.

Super his (n) debite observandis, aliisque ad Divini officii prosecutionem, ac chori disciplinam spectantibus, Decanus, vel Præpositus, aut alius, cui onus incumbit, diligenter invigilet, hinc inde, ne quid inordinate fiat, circumspiciens. Horum autem trans-

gressores, illius horæ (in qua circa prædicta excesserint) vel alia majori (prout transgressionis gravitas exegerit) plectentur pœna.

## VIII.

Qui in Matutinis (o) ante finem Psalmi Venite exultemus, in aliis horis ante finem primi Psalmi, in Missa ante ultimum Kyrie eleison, & usque in finem, Divino officio non interfuerit, (nisi forte, necessitate cogente, ac petita a Præsidente chori licentia, discedere oporteat) pro illa hora absens censetur: Salvis Ecclesiarum consuetudinibus, & privilegiis. Lex enim, teste Apostolo, iis, qui sub lege sunt, loquitur. Idem in Processionibus generalibus observetur in iis, qui a principio usque ad finem non permanserint. Pro cuius rei executione deputetur aliquis, habens hoc onus notandi, singulos statuto tempore non convenientes: qui juramento adstrictus erit agere fideliter, absque gratia vel odio.

## IX.

Quicumque in Ecclesia Beneficiatus (præsertim Divinorum tempore) per Ecclesiam, vel foris circa ipsam, sine justa causa deambulando, aut cum aliis colloquendo, vagari visus fuerit: non solum illius horæ, sed totius diei præsentiam ipso facto amittat.

## X.

Regulares, qui in Conventualibus Ecclesiis circa prædicta excesserint, graviter Superioris arbitrio castigentur.

## XI.

Cumque in Ecclesiis tam Collegiatis, quam Cathedralibus, diversi habeantur gradus & nomina Ministrorum: inter Canonicos siquidem sunt Decani, Præpositi, Archidiaconi, Cantores, Thesaurarii, Scholastici, Canonici, Vicarii, atque id genus, interpretetur quisque suum vocabulum: nec vanum dignitatis esse nomen putet, sed officii. Idcirco curet esse, quod dicitur

(k) Conc. Basil. c. 15. Hildesem. 36. Colon. de Metrop. c. 5.

(l) Conc. Basil. & Colonien. & Refor. Cler. sub Carolo.

(m) Conc. Hagath. c. 63. 64. Conc. Colon. de Metrop. c. 24.

(n) Conc. Basil. 18. (o) Conc. Basil. & Hildesem.

dicatur secundum veterem Patrum institutionem ac regulam.

## XII.

Si quos (p) Decanus vel Superior, rebelles cernat, si Divini cultus atque sui officii negligentiores: si rixosos, litigiosos, si percussores, si aleatores, si scorta foventes, aut aliis publicis criminibus irretitos: atque hi fraternam correptionem audire recusaverint: agat in Capitulo, quomodo Paulus jubet: Peccantes coram omnibus argue. Tum si nolint resipiscere, arceat a Sacris, prohibeat participare fructus, donec ad meliorem vitæ frugem revertantur. Sic tamen, ut hæc servetur regula Apostolica: Corripite inquietos, consolamini pusillanimes, patientes estote ad omnes. Neque ira, neque odium, neque rancor ullas sibi partes vendicent. Et salva ubique servantur sua cuique privilegia, legitimæque consuetudines.

## XIII.

Canonicus vocem in Capitulo non habeat, nisi in Sacro saltem Subdiacognatus ordine positus sit. In Cathedrali autem, non nisi Presbyter; propter ordinis hujus dignitatem. Nec inter Presbyteros sedeant Diaconi, vel Subdiaconi.

### DE HORIS CANONICIS, ET Cantu Ecclesiastico.

**L**audes Dei in Ecclesia decantantur, mentem ad superna erigunt, inflammant Dei charitatem, compungunt, & contemptum excitant terrenarum rerum. Scribit (q) Apostolus: Implemini Spiritu Sancto, loquentes vobismet ipsis in Psalmis, hymnis, & canticis spiritualibus, cantantes, & psallentes in cordibus vestris Domino, & gratias agentes semper pro omnibus, in nomine Domini nostri Jesu Christi, Deo & Patri. Hoc idem interpretatur ad Timotheum, ubi fieri jubet in Ecclesia obsecrationes, orationes, postulationes, gratiarum actiones pro omnibus hominibus. Hinc ritus Horarum Canonicarum. Hinc consuetudo conveniendi & pernoctandi in Psalmis, lectionibus, & orationibus, quam ab Apostolis acceptam, Ecclesia semper retinuit. Cum (r) conve-

nitis, inquit ad Corinthios, unusquisque vestrum psalmum habet, doctrinam habet, apocalypsin habet, linguam habet, interpretationem habet: omnia ad ædificationem fiant. Philo Judæus, qui temporibus vixit Apostolorum, diversis in locis meminit Psalmorum, vigiliarum, & jejuniorum, quæ primi illi Philosophi Christiani exercebant. Eadem de re scripsit Plinius secundus ad Trajanum, ut omittamus vetustissimos Justinum, Clementem Alexan. Dionysium, Tertullianum, & alios: & quod Ecclesiæ morem hunc etiam Ariani & Pagani olim aliquando imitari; sæpius & interturbare conati sunt, sicut faciunt etiam nunc hæretici. Fuit ergo divisum primo officium hoc in Diurnum & nocturnum. Nocturnum quidem nocte Sabbati, & in vigiliis magnorum Festorum pernoctantes tripliciter distinguebant: & sicut etiam nunc monumenta Ordinarii nostri Bisuntini docent, primum incipiebant circa primam vigiliam noctis: secundum in secunda: & tertium in tertia: per vices dispositis Clericis, qui alii aliis in officio nocturno & vigiliis succedebant, vocabantque ideo primam vigiliam, secundam vigiliam, tertiam vigiliam, quas nocturnos, vel nocturna nunc dicimus. Sub auroram vero in galli cantu læti ovantesque Deo laudes canebant in memoriam Dominicæ Resurrectionis. Aliis autem feriis unicum fiebat officium nocturnum: sive id a prima vigilia inciperet, sive a canticinio: frequentius tamen exemplo David media nocte surgebant ad confitendum Deo. Nunc totum officium nocturnum cum laudibus, vocamus matutinas. Quod ideo videtur factum: quod cum in Paschate major pars noctis in consecratione fontium baptismalium, & Baptismo catechumenorum, & Ordinibus Sacris, atque aliis Divinis officiis, officium illud nocturnum traduceretur: quod in aliis vigiliis noctu fieri solebat, quia mane diluculo opus erat absolvi, vocatum postea fuit matutinum. Hoc nomen adhuc perseverat. Et idem nunc matutinæ vigiliæ, quod nocturnum. Sed succedente tempore factum est, ut in Calendario, vigilia notet jejunium, (excepta apud nos Epiphania) & nocturnum, Psalmos feriales: & Matutinæ pro officio accipiantur, quod olim erat nocturnum, distinctum a Laudibus. Quanquam in veteri ordinario Laudes tantum dicantur Matutinæ, & Matutinæ Laudes. Atque hæc quidem de nocturno officio. Jam diurnum partiti sunt Patres (exemplis variis edocti) in horas septem. Primam inchoarunt orto Sole: Tertiam ab hora naturali diei tertia: Sextam a meridie: Nonam a Tertia naturali post meri-

(p) Conc. Agath. c. 2. Conc. Lateran. cap. 7. Colon. eodem.

(q) Ephe. 5.

(r) 1. Corint. 14.



meridiem: Vesperas quoque, sub vesperam: & tanquam completis omnibus, Completorium sub ipsam noctem, daturi corpora quieti.

Et notandum, quod in omnibus horis fiunt Lectiones aliquæ post Psalmodiam. In nocturnis proprie dicuntur Lectiones, sed in aliis horis Capitula: quia caput aliquod tantum legitur breve. Post Lectiones, Responsoriorum cantus, & denique Oratio. Miscentur quoque Hymni & prosæ [ quas vocant ] & Versus, & Antiphonæ puræ, aliquando cum pneumate & alleluja.

Sunt ergo partes horarii officii, præter genuflexiones, & stationes, & signum Crucis, quæ interea fieri oportet: Oratio Dominica, Symbolum fidei, peccatorum confessio, Psalmi & cantica, Hymni & prosæ, orationes, preces & litanæ, absolutiones & benedictiones, lectiones & capitula, versus & responsoria, ac rursus responsoria & versus, antiphonæ, invitatoria & pneumata. De illis, quæ supersunt, sigillatim dicemus.

Primum Psalmi CL. per ferias distributi sunt, secundum ordinem Bibliorum, vel certe proxime ad illum ordinem. Nam aliqui, asterisco notati, prætermittuntur, quod in aliis horis canantur: & centesimus decimus octavus: Beati immaculati, quotidie dicitur ad quatuor horas, cum quinquagesimo tertio, ad Primam. Differt autem Psalmus a Cantico (licet ambo canantur pæanice) quod Psalmus ex libro David: cantica ex aliis locis Bibliorum veteris & novi Testamenti sumantur.

Hymnos reliquerunt nobis Patres distinctos periodis, more lyrico. Scripti sunt aliqui stylo puro, & eleganti; modulatione quoque suavissima excepti. Alii tamen plerique numero syllabarum [ non tam quantitate ] contenti, & similitudine desinentium, ad modos elegantissimos facti sunt.

Prosa, vel prosodia (Hymno non dissimile carmen) numeris fertur lege solutis. Eoque differt ab Hymno, qui certa semper metrorum periodo recurrit. Quanquam posterioribus temporibus, quasdam hujusmodi prosas hymnice composuerunt nonnulli: numero quidem syllabarum tantum, & [ ut vocant ] rythmo, id est, cadentium similitudine: non perinde quantitate. Et cum antiquissimæ quæque in a vocalem concidant: dictas putarunt Græce *αἰσῆς* α. id est, ad a. Sed proprie *αἰσῆσις* nuncupata sunt: Librariis pro prosodia, prosa scribentibus, compendii causa. Et sive per omicron scribas, sive per omega, utrumque carmen est, in Deorum sacris adhibendum, modis lyricis, ad verba & dictiones aptato cantu. Quia

vero nec saltatoria est, nec stataria, sed inter hæc medium sortita genus: idcirco nec ab hymno separarunt grammatici prosodion. Utrumque enim poema est ad Deorum laudem compositum. Sed separavimus nos. Et scilicet putamus. Nam si solutæ orationi similis videatur Prosa, non ideo tamen soluta est: non magis, quam Pindaricæ odæ, ut chori cantus apud Græcos Poetas. Atque hinc quidem est, cur jam sordere ceperint. Sed immerito. Amulsi hominibus crimen condonamus. Detergant eas docti, si quæ vitium contraxere: & Ecclesiarum Præfecti cantari jubeant diligentius. Agnoscent profecto in his metrorum multa genera, sibi invicem respondentia: interdum singula, interdum bina, sæpius plura sub uno ambitu: nonnunquam etiam varia ultro procedentia, unde dicta etiam fuit sequentia.

Diximus itaque Prosam nec saltatoriam esse, nec statariam: propterea quod Poetarum interpretes tria tradiderunt Melorum genera. In uno ponuntur Hyporchemata: in altero Stasima. Terti generis sunt Prosodia. Sine motu quidem multa canimus, stantes in templo: veluti introitus Missarum, & Responsoria. Nullus enim hic numerus, vel pedes, vel brachia excitar ad profiliendum. Sunt alia, quæ nos audita gestire cogunt, & tanquam in chorea moveri: veluti cantus ille: Ad cænam agni providi. Sed hæc rara admodum. Magna enim vis illa commensurationis temporum ad emolliendum animum. Ecclesia autem non sine magna causa a gravitate atque perfectione rythmi deflectit.

Graduale ergo statarium carmen est. Constat solum verbo & harmonia: nullo rythmo, saltem evidenti. In singulis enim signis vel chordis, vox una subsistit: tanquam per gradus suos, cum dignitate ascendendo, atque descendendo, motu æquali. Et hæc quidem cum harmonia diatonica flexa frequenter, sine verbo. Aliquando etiam recta; solo verbo, absque harmonia.

Hujus ergo generis sunt Tractus, & Responsoria, & Alleluja, & Introitus.

Pneuma autem (perinde ac si sermo, ac ratiocinandi vis omnis nos deficiat: quia major omni humana laude Deus est) eodem modo statarie, loca consonantiæ in Antiphona designata pervestigat. Est enim Pneuma [ id est, spiritus ] vocis continuatio, quantum spiritus durare potest, sine verbo, appensa antiphonæ, juxta tropum [ sive tonum ] Psalmi decantari. Adhibetur autem in solennitatibus tantum. Et sane, qui pneumatismum contemnunt, ipsi turpiter desipi-

unt. In choro enim, cum stamus, canentes, de Deo meditamur, vel cum Deo loquimur: Loquentes vobismet ipsis (inquit Apostolus) in Psalmis, hymnis, & canticis spiritualibus. Ad tantam vero Majestatem oculos mentis attollentes, jam plane deficimus, quare gestus potius, quam verba desiderium nostrum effert: vel certe vox inarticulata, sicut olim Prophetæ clamabant, a, a, a, nescio loqui. Ac si diceres, enarrare nequeo Domine, quæ opto. Incomprehensibilis est mihi gloria tua. Reple os meum laudibus; saltem more vagiam infantium: aut, ut filii corvorum, ore aperto benedictionem cæli postulabo.

Ergo inter Chori cantus, præter Psalmos, & cantica, & hymnos, & scolia, in Ecclesia sunt Antiphonæ, & pneumata, & versus, & responsoria. Sed de Antiphonis hæc accipe: nam de spiritu satis dictum est. In libro David quidam psalmi inveniuntur, quibus præponitur titulus Alleluja. Idem etiam in fine reperitur aliquando, & aliquando resumitur in medio: ut in centesimo quadragesimo octavo. Verum psalmi Allelujatici [sic appellat D. Augustinus] omnes habent in fine vocem illam hebraicam alleluja: licet non omnes in principio. Significat laudate existentem, laudate Dominum, vel Deum. Vocem hanc Ecclesia retinuit per universum orbem. Nec nisi cum magna veneratione: sicut & alias quamvis peregrinas. In temporibus magnæ lætitiæ [inquit idem Aug.] non sine Sacramento, secundum Ecclesiæ antiquam traditionem solenniter cantare nobis moris est Alleluja. Et ad Januarium Epist. 119. (loquens de diebus 50. a Paschate ad Pentecosten) Qui celebrantur, inquit, post Domini resurrectionem, jam in figura non laboris, sed quietis & lætitiæ. Propter hoc & jejunia relaxantur, & stantes oramus: quod est signum resurrectionis. Unde etiam omnibus diebus Dominicis id ad altare observatur: & Alleluja canitur, quod significat actionem nostram futuram non esse, nisi laudare Deum, sicut scriptum est: Beati, qui habitant in domo tua, Domine, in sæcula sæculorum laudabunt te. Hactenus August.

Hunc igitur solum titulum Alleluja tempore Paschali, Psalmis præponimus in omnibus horis, diurnis, & nocturnis. Sed aliis temporibus ad ejus instar alios versiculos & sententias pro titulo Psalmis præmittimus, quos in fine integros repetimus canendo. Horum alios vocant Antiphonas, seu Antiphona: alios Invitoria. Ratio nominum est. Psalmos in Ecclesia alternatim canendos Beatus Ignatius Martyr tradidit, edoctus (sicut habent Ecclesiasticæ historiæ) revelatione Angelorum: quos Antiphona

(hoc est, responsoria) inter se canentes videbat. Psalmis itaque, quorum membra, seu versus, alternatim & vicissim cantamus, titulum præposuere Antiphona: Quod significat psalmum alternatim canendum.

Quia vero semper titulus aliquis præponitur: (scilicet Alleluja, vel alius versiculus) hinc factum est, ut ipse titulus jam vulgo dicatur Antiphona: non utique, quod sit re vera antiphonon, sed quia præponitur psalmo, qui cantari debet per antiphona. Potius enim proodion, vel proæmium, vel episodion, id est, intonatio dici debuisset, quod modum præscribat in cantu tenendum. Quanquam si naturam modorum observes, quoniam Psalmus in prima meditatione toni intrat, quam incipit antiphona: non injuria titulus iste nomen illud accepit: collateralis, scilicet, vel simili modo carmen auspicando ei, quem psalmus assumit.

Contra vero psalmo illi vigiliarum, qui ad jubilandum Deo hortatur, atque invitat: non antiphona præponitur, sed invitorium. Non enim per antiphona canitur, sed ab uno solo, vel duobus, vel pluribus simul. Et repetitur invitorium in medio & in fine.

Sunt alii quidem versus, quos Cantores modulantur duo vel unus: & ad eos continuata musicæ consonantia chorus per versum alium respondet, & ob hanc vicissitudinem & alternam responsionem dicti sunt versus responsorii, vel responsoria. Et horum quidem majores canuntur in matutinis post Lectiones: minores autem in aliis horis post Capitula. Sunt chori cantus, ut diximus, sine evidenti rythmo: sed partibus constant quatuor: nempe Strophe, Antistrophe, Ecstasis & Epodo. Quod proprie responsorium scribitur, hoc est, Strophe. Ejus repetitio Antistrophe est: Versus, Ecstasis, seu Parabasis: Gloria Patri, dicitur Epodos. Namque Epodos ante aram Deorum canebatur. Quod reliquum additur, repetitum a responsorio, reprisiæ dicunt. Est autem apocope & exodion, seu finis totius odæ. Hactenus de carminibus dictum sit: quod musicæ artis erit, docebimus iterum.

De lectionibus autem & orationibus non opus est, ut multis agamus. Hoc unum scitote, utilitates magnas in duabus hisce partibus esse officii Divini. Legendo enim nos ipsos tanquam in speculo contemplamur. Orando cum Deo loquimur: legendo, Deus loquitur nobiscum. Sed de oratione & meditatione supra dictum est suo loco. Ne quis autem a lectione sacra propter obscuritatem avocetur: vide, quod Origenes in Josue, lectionem Sacrarum Literarum Deo & Angelis pro-

probari scribit, nobisque perutilem esse, etiam si illam non plene intelligamus. Certe studium & intelligendi cupiditas, reverentiaque mysteriorum prodesse solent. Nec defuit gratia Eunuchō, Candacis Reginae, legenti Prophetam, quem non intelligebat.

Distributæ ergo sunt lectiones in ordinario per totum annum hoc pacto. Ab octavis Paschæ ad Pentecosten leguntur Acta Apostolorum, & Epistolæ Canonicae, & Apocalypsis. Ab octavis Pentecostes ad Calendas Augusti (id est, ad Dominicam proximam principio mensis) libri Regum & Paralipomenon. Hinc ad Calend. Septembris, libri Salomonis. Inde ad Cal. Octobris, Job, Hester, Judith, & Esdras. Dehinc ad Cal. Novembris, libri Maccabæorum. Et ad Cal. Decembris, Ezechiel, Daniel, & minores Prophetæ. A Calendis Decembris ad Nativitatem Domini, Esaias. Postea usque ad Septuagesimam Epistolæ Pauli. Quanquam domi hæc potius, quam in templo legi solent: quia singulis diebus hoc tempore usque ad octavas Epiphaniæ proprium sit officium. Ideo differtur lectio Epistolarum ad Dominicam post Epiphan. A Septuagesima usque ad xv. ante Pascha, legimus Pentateucum, & Josue, & Judicum, & Ruth. Et denique a die hac ad feriam quintam in Cæna Domini, Jeremiam. Hæc quidem lectiones per annum. Verum proprias quoque habent singule celebritates: de quibus illud Augustini in 1. Joan. Epistolam: Quod in solennitatibus sacrorum dierum certas Evangelii lectiones in Ecclesia oportet recitare. Quæ ita sunt annuæ, ut aliæ esse non possint. Nam & in Nativitate Domini & Epiphania, capita quædam præscribuntur ex Esaiâ, sicut & in Cæna Domini: & duabus sequentibus feriis ex Lament. Jeremiæ, cum certis quibusdam Homiliis, sive Sermionibus. Tria enim sunt Lectionum genera. Quædam sunt novi vel veteris Testamenti: aliæ historiæ Martyrum: aliæ sermonum, sive Homiliarum ad Evangelii expositionem, quod in Missa legendum venit eo die: et si historias Martyrum non nisi paucorum legimus in templis, propter incertitudinem aliquando fidei eorum, qui scripsere: & sufficere arbitramur passionis ejus, qui occurrit summariam memoriam fieri ad primam, in Martyrologio. Nota etiam, lectiones multas de Sacra Scriptura improprie vocari de historia corrente: veluti libros Salomonis, Epistolas Pauli, &c. fortasse quod bona pars Bibliorum est historica. Unde & illud notandum, quod cum in rubricis remitteris ad eas lectiones, non lectionis, sed responsorii fiat mentio. Propterea quod responsorium idem canitur per totum tempus illius historiæ: non autem legitur ex eodem libro.

*Tomus VIII. Concilior. German.*

Absolutionem hoc loco vocamus orationem illam, quæ dicitur ante lectionem Evangelii. Exaudi Domine JESU Christe: & in officio nostræ Dominicæ: Precibus & meritis, &c. Reliqua discuntur facile ex regulis Ordinarii. Quare hæc dicta sufficiant de horis Canonicis. Quæ vero pœna sit in omitendis, supra statuta est, restituendi fructus ex beneficio perceptos. Sed in Sacris positus, mortaliter peccat, si sine necessitate omitat officium hoc.

Orationes, quas Collectas vocant, a Presbytero stante dicuntur: præterquam in triduo ante Pascha. Preces prostrati facimus, præterquam diebus Dominicis & Festis: Sabbathum enim Dominicæ est Profestum. Sic & cantica novi testamenti, & Psalmum ultimum in laudibus, stantes canimus. Nec nisi mutato Choro incipitur antiphona alia, vel commemoratio, postquam Presbyter dimiserit populum per: Dominus vobiscum.

Ritum denique flectendi genua vel standi, solennem esse debere, docent omnes Sancti Doctores. Vide Justinum, Ireneum, Origenem, Epiphanium, Ambrosium, Hieronymum, Augustinum &c. Genuflexio, nostri lapsus signum est, statio resurrectionis. Et quia tempore Paschali stantes oramus, visitationes Ecclesiarum, quæ eo tempore fiunt, Romæ Stationes vocatæ sunt a posteris.

## DE MUSICA.

Nihil omnino prætermisit Ecclesia artificii in cantu. Nam, quod natura docet, id Ecclesia sola præstitit: ut voce, quam a Deo articulatam accepimus, omnis generis laudes & gratias Deo referamus. Musica enim dicta a Plutarcho est *ἡ ὑψηλὴ ἀρετὴ*. Videas sane in officio nostro prænum species omnes: odas omnis generis, & proodia, & antoda, epicheremata, & parabates, & scholia: cum strophis, antistrophis, echasibus, epodis, apocopis: & quicquid denique est, quod Græcorum diligentia invenit. Nam nisi plane asinus sis ad lyram; omnia hæc in cantibus nostræ Ecclesiæ observare queas. Novatores nostræ tempestatis ea non agnoscunt. Hinc fit, ut in Ecclesiis suis barbarum, nescio, quid, atque effæminatum, malint congemiscere: & fortadæum, carmen elumbe, mulierculis puerisque lascivientibus acceptum, obgannire, quam *εὐμενὲς* illud cantuum nostrorum, & decorum, imitari.

Sed nos de Musica jam pauca referamus. Primum quidem claves, quas Cantores

C c 2

ob.



observant semper canendo, distinguamus literis, nominibus, & syllabis per scalas. Deinde chordarum seu vocum proportionibus rudi saltem Minerva demonstrabimus. Signorum quoque quantitates & qualitates: ut sunt alia longa, alia brevia: juncta alia, alia separata: perfecta & imperfecta. Ad hæc tonorum exempla proponemus, quibus in Ecclesia Bisuntina canuntur Psalmi & cantica. Hos enim numeris duobus post antiphonas in Breviariis nostris adnotavimus. Denique si vacat, etiam symphoniarum, seu contrapuncti, pauca præcepta colligemus.

Paretur ergo instrumentum. Sit hoc quindecim chordarum, vel vocum quindecim, veluti cithara, vel tibia bisseptem distincta cicutis. Adscribantur his septem literæ, per ordinem, semel quidem repetitæ, sed prima ter accepta. Sic: A B C D E F G a b c d e f g a. Tenduntur autem chordæ hæc ad sonos monochordi (id est, unus chordæ sonore) per proportionibus musicas divisæ.

Sunt autem proportionibus musicæ omnes in primo numero perfecto, & primis duobus cubis: videlicet senario, octonario, & novenario. Ducendo igitur & reducendo ponticulo (magadam vocant Græci) per partes monochordi istis numeris divisi: nempe duas, tres 4. 5. 6. 7. 8. 9. invenies duplam proportionem, triplam, quadruplam, sesquialteram, sesquiterciam, sesquiquartam, sesquiquintam, sesquisextam, sesquiseptimam, sesquioctavam: bipartientem tertias, bipartientem quintas, tripartientem quintas: duplam sesquialteram, duplam sesquiterciam, duplam sesquiquartam, triplam sesquiterciam: Quadruplam denique sesquialteram. Verum, quia diatonico solo utitur Ecclesia, hoc est, genere cantus, quod cum dignitate & maiestate magna, per tonos atque hemitonias procedit: idcirco ex partibus, chordæ sonoræ illas tantum portiones sumimus, quæ primæ occurrunt, vel primis proximæ sunt, & sensui cæteris magis notæ. Sunt hæc, Dupla, Tripla, Quadrupla, & earum differentia. Differt autem tripla a dupla, ratione sesquialtera: & quadrupla a tripla, proportionibus sesquitercia: & rursus dupla a sesquialtera, sesquitercia. Hæc pariter minor est, quam sesquialtera sesquioctava ratione: quod intervallum appellamus tonum. Duo insuper toni minores sunt, quam una quarta, & tres, quam una quinta (id est, quam epitritia, & quam hemiola: qui concentus dicuntur Diatessaron & diapente) ea proportionibus, quæ est inter istos numeros primos, 256, & 243: quorum major minore major est partibus 13. Hæc distantia est hemitonii. Ratio, inquam,

spatii illius, quo Diatessaron superat ditonum, & diapente tritonum. Cogimur enim vocem eo etiam spatio metiri: non ratione quidem numerorum ejus, quæ obscura est, & inventu difficilis: sed quia per tonos ad perfectas consonantias progredienti [diatessaron, disdiatessaron, diapente, diatessaron, & triplam] necesse est, quod restat spatii, post duos aut tres confectos tonos; uno saltu vocis conficere. Hoc vocant semitonium minus: spatium sane non minimæ dignitatis, virtutis autem tantæ, ut unum modos omnes & mores carminum definiat pro suo situ. Toni autem alteram ab hoc partem apocopen, sive semitonium majus dixere vulgus cantorum Diesis. Sed majus hoc nusquam concinit, nec in usum usquam venit, nisi in Chromate. Si igitur singulorum spatiorum proportionibus diatonica constitutionis habere in promptu cupis: ut duarum inter se collatarum differentias elicias: multiplica denominatores, (ut ab Arithmetica docetur) per numeratores vicissim. Ut vero compositiones: numeratores per numeratores, & denominatores per denominatores. Sic invenies in systemate nostro proportionibus in his numeris: duo ad unum: tria ad unum: quatuor ad unum: 3. ad 2. & 4. ad 3. & 9. ad 8. & 256. ad 243. & 81. ad 64. & 32. ad 27. & 27. ad 16. & 112. ad 81. & 2187. ad 2048.

• • • • •

Duo hic exhibentur Schemata, quibus auctor hujus Tractatus de Musica sui Systematis paradigmata proponit: plura alia deinceps etiam in eodem hoc Tractatu aliis in locis, quos asteriscis notavimus, exhibentur: Sed hæc a nobis prætermissa sunt, cum lamellis, quibus ista insculpta sunt paradigmata, careamus; nova vero non sine magnorum impendiorum sumptu, sculpi & excudi, minime necessarium arbitrati sumus, qui a nobis consulti fuere, rei Musicæ periti, propterea, quod vel nunquam omnino, vel vix unquam eadem putaverint usui esse futura; cum principiis auctor nitatur, nunc penitus obsolescis.

Habes in Schematibus his quinque tetrachorda, scilicet gravium, mediarum, conjunctarum, disjunctarum, & acutarum. Habes & tres deductiones asperam, mollem, & naturalem. Quarum naturalis incipit a litera c, mollis a litera f, aspera a g. Et in tribus hisce literis ponuntur claves. Itaque singulis notis in linea vel in spacio positis, tot syllabas dabis, quot deductiones hexachordorum in eam concurrunt. Hinc compositio illa

illa manus, in qua pueros diu torquere solent Magistri: gamma ut, a re &c. Præstaret profecto scalam hanc ubique depingere, non indigitis.

Dominante igitur in eo genere spacio toniæo, locum nullum habere potuerunt proportionibus, sesquiquarta, sesquiquinta, ac reliquæ: quantumvis proxime accedant ad illas. Proxima namque est ditono sesquiquarta: & hemiditono, sesquiquinta: & sextæ majori bipartiens tertias. Quo primum fit, ut cantantes ascendant imprudentes. Vox enim frequenter in ascendendo collimar ad sesquiquintam, & in descendendo ad sesquiquartam. Fit deinde, ut citharædi sæpe nervos male tendant imperiti. Aurem enim particulares proportionibus potius delectant, quam ditonus & hemiditonus (differentiæ obscuriores) quando seorsum & per se solæ audiuntur. Et differentiæ in vocibus acutioribus minus percipiuntur, quam in gravioribus: quanto majores fiunt partes chordæ sonoræ in gravitate, quam acuminæ.

Hanc ob rem observanda media est inter omnes: idque præceptum sit semel non modo cantoribus, sed etiam (quod pauciorum) organorum fabris. Nam, sicut res habet, & veteres Philosophi observarunt: humana vox bene temperata spatium xv. nervorum cantando non excedit. Adeoque intra primum & ultimum definitur: ut si ab infimo velis descendere, deficiat: si supra acutissimum ascendere, tussis, vel gannitus erit. Tendemus ergo primum & ante omnes mediam. Non temere profecto: (hoc imperitorum est) sed qui sonum imitetur, ejus quæ in vocum humanarum xv. media, sine flexu, & conatu omni prodit, & efferitur. Unus hic nervus si dissonet, omnes dissonant. Hic duplo altior est, quam infimus: & item duplo gravior, quam supremus. Et ad utrumque consonantiam reddit Diapason: id est, octavam. Vocatur a Græcis  $\mu\epsilon\sigma\sigma\epsilon$  nobis est a la mi re. Reliqui sua obtinuerunt olim nomina apud Græcos, sicut proposito schemate cernes. Nam Græci totum Systema in Tetrachorda quinque dividere. Primum, quod gravissimum est, dixerunt  $\upsilon\pi\alpha\tau\omicron\nu$ , id est, principalium: secundum  $\mu\epsilon\sigma\sigma\epsilon$ , id est, mediarum: tertium  $\delta\iota\sigma\chi\omicron\rho\mu\epsilon\tau\omicron\nu$ , id est, disjunctarum: supremum  $\epsilon\pi\epsilon\chi\omicron\rho\lambda\alpha\iota\omicron\nu$ , id est, excellentium. Sed quintum supra mediam situm,  $\sigma\omega\mu\mu\epsilon\tau\omicron\nu$ , id est, conjunctarum, quia eadem MESE principium ejus est, & finis alterius, in deductione b mollis. Nostri nunc Musici pro tetrachordis hexachorda sumunt. Et syllabis sex inscribunt: ut re mi fa sol la. Author dicitur fuisse Guido quidam Monachus Are-

tinus: sumptis primis syllabis hemistichiorum hymni illius:

*Ut queant laxis Resonare fibris,  
Mira gestorum, Famuli tuorum  
Solvi polluti, Labii reatum.*

Vocant autem systema hoc sex chordarum, scalam deductionum trium. Et tria quidem ejus principia designant, quas claves vocant: C. F. G. id est, C fa ut: F fa ut: G sol re ut. Hoc præceptum si observes, in dispositione literarum cujuscunque systematis non modo Pythagorici nostri, quod humana voce conclusimus: sed in immensum poteris & ascendere & descendere: literas disponendo per suas deductiones asperas, molles & naturales: sicut idem Guido infra proslamvamenon addidit Græcam literam Gamma: & supra Neten ultimam quatuor b, c, d, e. Anselmus Georgius adhuc inferne addit octavam, & superne aliam: ut proportio fieret, 16. ad 1. Potuisset quidem in infinitum etiam descendere, si chorda dari possent infinita.

Cæterum & si literæ omnes septem dici claves possint: tamen duæ præsertim notari solent in libris. Et hæc quidem supra lineas, non inter lineas. Veluti, si infra mediam chordam canendum est, notatur linea f fa ut: si supra mediam, c sol fa ut. Reliqua ex his facile intelliguntur in suis quæque lineis, vel spatiis.

Hactenus de nominibus & quantitibus chordarum. Sed antequam de temporum dicamus, jubemus in vocibus referendis exerceri pueros sic, ut primum discant, intonare octavas: deinde quintas, postea quartas: tum tonos & semitonia, ditonos & hemiditonos. Nec tam attendant aures ad syllabas scalæ, quam ad differentias sonorum ejus, quorum tinnitus in aure relictus sit. Hac nimirum exercitatione facilius reddent verba carminum cum suis sonis, quam balatu illo ineptissimo cui assuevere, fa fa fa.

Ad temporum itaque proportionibus exprimendas in syllabis, notulas quasdam excogitarunt Musici non ita pridem, non nihil differentes a vetustioribus. Has vocant longas, breves, semibreves, minimas, semiminimas, & fusas multiplici ratione. Formæ notæ sunt, vel ipsis pueris. Continet brevis tempus unum, (quod signum vocamus, Græci  $\sigma\eta\mu\epsilon\iota\omicron\nu$ ) & tactum unum. Quanquam si recte metiri carmina opus sit, singulis pedibus sub uno tactu duas partes dabimus: arsin & thesin. Sed notularum minima dicitur prolatio: nimirum syllabæ. Quia cum sæpe metri ratio & harmoniæ plures verbi syllabas sub uno signo proferri velit, sicut & sub pluribus signis & temporibus unam: unicuique tunc syllabæ tantum

temporis damus, quantum minima prolatio ostendit. Ac deinceps per minores sæpe una syllaba decurrit: sæpe etiam diversæ: non aliter, quam per minimas, temporum ratione imminuta. Porto autem in proportionem notularum Musici rationes posuerunt perfecti, atque imperfecti: ut variari queat mensura ejusdem notulæ: & perfecti quidem rationem in ternario collocant: imperfecti in binario. Itaque si perfecto tempore canatur brevis hæc \*, tribus semibrevis æqualis erit: si imperfecto, duabus. Prolatio perfecta in semibrevis ponit tres minimas. Propter longas vero, perfectas vel imperfectas: dicunt modum. Ex quo modum perfectum initio cantilenæ notant numero ternario, imperfectum binario: tempus perfectum circulo, imperfectum semicirculo. Prolationem perfectam puncto in medio circuli vel semicirculi, imperfectam tracta linea transversa.

Ponitur etiam numerus ternarius, ut tres minimas signet dandas uni mensuræ. Hoc genus rythmi vocant triplam: sed improprie.

Ut autem e contrario uni syllabæ plures notæ accommodentur, ascendentes vel descendentes, sæpe plures notulæ quadrate connectuntur. Vetus codices Ecclesiæ has ignorabant. Signabant autem connexas easdem voces sinuosis quibusdam lineolis super verba & syllabas, non infeliciter. Fit autem ex ligatura, ut eadem notulæ mutant subinde quantitatem. Canones hujus præcepti erunt. Primus. Inter connexas, mediæ omnes sunt breves. Secundus. Prima sursum caudata semibrevis est cum sequenti: sed descendente cauda, brevis. Tertius. Prima sine cauda, cadente secunda, longa est: sed ascendente, brevis. Quartus. Ultimæ aliæ cadentes, longæ sunt: & omnes, quæ dextro latere descendunt.

• • • • •

Pausarum necessitatem natura docuit. Nam silentio definiri cantum, cogit respirandi vicissitudo. Idcirco versus omnis clauditur semipede. Quod reliquum pedis est, silentio completur. Ex hac lege, cum Divo Augustino, metiri discas hexametrum duobus hemistichiis: scilicet dactylico, & anapæstico, cum pausis semipedum duorum:

*Arma virumque cano: Trojæ, qui primus  
ab oris.*

Idem & per tria potes, silendo tribus in locis. Ut:

*Tempus erat: quo prima quies: mortali-  
bus ægris.*

Ubi autem sine silentio metra continuatur, non sane versus erunt, sed rythmus solum. Ut exemplum vides in hac lege pavanæ. Nam si locum ultimum voce repleas, rythmus est: si silentio, membrum: ex duobus membris versus erit.

• • • • •

Quia ergo necesse est, aliquando resumere spiritum ante finem: punctus ideo poni solet inter notas, quo temporis mensura sesquialtera detur præcedenti notæ. Alias enim sine puncto hoc divisionis, alteratur: & sequens minima imperfectam reddit semibrevis præcedentem. Quæ rursus si perfecta prolationis erit: terna momenta continebit. Sic ergo, quæ tribus minimis erat æqualis, fit una minor. Pariter longiores a brevioribus omnibus minuuntur, nisi separentur puncto aliquo. Indicium silentii ponitur in medio cantilenæ & in initio: brevis quidem junctis parallelis linea transversa: semibrevis ex superiore pendente perpendiculari: minima, itante. Color quoque quantitatem mutat notarum. Siquidem nigræ præcedentium tertiam partem adimunt, si perfectio signata est in cantu: sin vero imperfectio, quartam. Nisi certe brevis cum semibrevis ponatur. Namque eo loci semibrevis æqualis erit minimæ. Vocant denique syncopen (id est, concisionem) cum velut in animi deliquio, rythmus interrumpitur. Et mox redit ad quadratum numerum suum. Fit frequenter hæc in clausulis, quando penultima minima invenitur inter duas breves. Sed magis proprie dicemus syncopen suspitium. Res facilis est.

Superest, ut de ductu melopæjas loquamur. Sciant ergo Musici, quatuor esse figuras in monodia. Prima Græcis dicta est *πλοξή*: Latinis copulatio. Sed vulgus nunc cantorum fugam nominat. Est autem ploce, vocum repetitio similium aliquo modo parallela, hoc est, partium collatione æquali, vel simili, sibi inter se respondentium. Et hæc quidem triplex inventa est: in rythmo, in systemate, & in syllaba seu verbo. Sed verborum repetitione omissa, quatuor modis fieri potest fuga. Primo, secundum rythmum tantum. Secundo, secundum harmoniæ spatium tantum: quando scilicet idem tonorum atque hemitoniorum ordo recurrit. Tertio, secundum harmoniæ non idem, sed simile spatium tantum: quando, inquam, æquale vocum systema est, & ordo Syllabarum vel signorum idem, sed non idem ordo tonorum, atque semitoniorum. Quarto fit, quando rythmus idem est, & spatium harmoniæ similis, non ejusdem. Ergo in monodia



nodia repetitio juvat. Sed quoniam in re musica varietas prima est, quæ in similitudine delectat; quæ vero sine varietate & sine modo aliquo novo atque inexpectato continuantur, satietatem pariunt: repeti licebit frequenter idem prorsus vocum systema: sed utique ex uno loco transpositum in alium, ne idem omnino canamus, sed aliud: & una cum similitudine, dissimilitudo agnoscatur. Exemplum sume in hoc choriambo: SANCTIFICA.

\* \* \* \* \*

Sunt aliæ tres figuræ melopæjas: τὰν, ἀγαν, & ἰστέα. Et tunc quidem, tanquam figura plana, quadrataque, ac parallela; in diversorum locorum spatiis æqualibus, voces eandem repetit: Agoge autem consequentes se sigillatim colligit: Pettia, omittas inter alias saltim. Sed in omni opere optanda facilitas est: non peritis & exercitatis tantum, sed etiam rudibus. Nam ut in aliis rebus multa concedat natura: in concentu, vel minimum fastidit errorem. Nec satis est (inquit Horatius) docta esse poemata, dulcia, sunt.

Restat jam de tonis agere. Doctrina multum necessaria psallentibus. Græci tropos vocant: nos nunc tonos, id est, intentiones. Nominum differentia hinc facta est, quod antiqui ad vocis flexus varios respectabant: nostri vero ad principalis & dominantis in quoque modo vocis tenorem. Et primum dixerunt, in quo præcipua systematis chorda (quæ media dicitur) frequentius sonat: non ab ordine earum, quæ sunt in systemate. Antiqui autem modos ex consonantiarum spatiis differentibus definierunt. Quare si species omnes Diapason & diapente, ac diatessaron, excutias: plures invenies tonos, quam qui vulgo traduntur, octo tantum. Nec in istis quidem octo totum aliquod systema compleri videas Diapason. In Disdiapason duodecim distinxit Franquinius. Totidem numerat Glareanus. Nec plures invenit Zarlinus. Porro hi omnes in authentos & plagios distincti sunt. Illi principales habentur, hi collaterales principalium. Constatque differentia in hoc, quod authentici dividuntur chorda sua media harmonice: nimirum posita diapente in parte inferiori: plagios autem media chorda dividit arithmetice; posita inferne diatessaron. Hæc omnia in schemate ipso cernas facillime. Primus vocatur Dorius. Secundus, qui huic collateralis est, Hypodorius. Tertius, Phrygius. Quartus, Hypophrygius: sub phrygio scilicet. Quintus, Lydius. Sextus, Hypolydius. Quan-

quam non nihil hic differat Glareanus. Sed parum refert. Septimus sit, si lubet, Jastius, vel Jonius. Octavus, Hypojastius. Adde nonum, quem nos octavum irregularem dicimus: eum scilicet, qui continetur inter a, & a diapason, divisus harmonice. Ea namque ratione differt ab hypodoria constitutione: & vocetur, si lubet, Æolius. Sub hoc erit Hypoæolius, in systemate lydio diviso, tamen arithmetice. Præterea quem nos quartum irregularem nominamus, is mihi vere mixolydius est. Symbolizat enim cum lydio in retrachordo conjunctarum. Si adhuc addas hypermixolydium: complebitur numerus troporum duodenarius. Primus ergo continetur in systemate D. d. cujus media est, quæ totius Disdiapason, Mese: vulgo A la mi re. Ideo & primus omnium & laudatissimus cantus Dorius. Nam media ejus, quam frequentius cæteris percutit, vocem refert humanam illam mediam, quæ sine conatu prodit, & ubique dominatur. Secundus inter A & a continetur, media D: in quam desinunt natura sua hi duo modi. Ac merito proximus hic primo est propter a & D mediarum consonantiam inter se diapente. De reliquis pari modo judica, ascendendo gradatim per claves, seu chordas totius systematis in authentis: & dando singulis suos plagios inferne ad Quartam.

Sed regulas Cantorum accipe: Pri. re. la: Sec. re fa: Tert. mi fa: Quart. mi la: Quint. fa fa: Sext. fa la: Sept. ut sol: Octo, ut fa. Sensus est. Primi toni antiphona desinit in re (hoc est, in D sol re) & ultimum Psalmi metrum incipit ab a la mi re. Secundi toni antiphona desinit in eadem D sol re. Sed ultimum Psalmi metrum incipit in f fa ut. Ac ita de aliis interpretare. Initia autem, quamquam varia sunt: tamen in Ecclesia nostra Primus & Sextus inchoant, fa sol la. Secundus, Tertius, & Octavus, ut re fa. Quartus, la sol la. Quintus, ut mi sol. Septimus, fa mi fa sol. Quod si in versu metrum interponatur, mediationem voca. Quæ varie etiam fit. Nam in Primo, Sexto, Septimo, per hemiditonum hunc fit: fa mi re mi. In Secundo, Quinto, & Octavo, per tonum: fa sol fa. In tertio, per Quartam & tertiam minorem: sol fa re fa. In quarto tonus est: sol la sol. Fines autem maxime variant. Sed metrum omne hujusmodi ultimum sex syllabis definierunt. In hac syzygia pedum ultima exponentes Sæculorum, amen. ut paucioribus literis eas signent, solas vocales usurpare solent: Eu ou ae. Quamvis certe non omnes metrorum clausulæ sex finiantur semipedibus: & si sex syllabis his contractis, productisque in fine versus fiat semper ultima sy-

syzygia Psalmorum, pro cantus genere. Quocirca attendito in omni conjugatione ultima metri cujuscunque ad accentum acutum, qui ante ultimum occurrit. Nam ab eo inchoatur semper catalexis. Quare si breves, vel alioqui pro brevibus aliæ syllabæ interponantur plures, quam tres ab illo accentu: prolatione minuantur: & sub uno tempore proferantur plures. Exemplum accipe facile in clausula Epistolæ in Ecclesia Cathedrali: Hic integre proferentur Quatuor syllabæ eæ, Ad Romanos. Sed Quinque eæ, Ad Corinthios, penultimam brevem jungunt cum antepenultima, propter eam, quod ultima ascendit. Sed in rythmo sequenti jungitur. Nam si descenderet, quæ sequitur, tunc brevis jungeretur utroque modo sequenti. Ad Philippenses: tertia a fine dividitur. Deuteronomi: secunda & tertia. Ad Titum, & ad Galatas: primæ dabis tria tempora, seu notas breves, una separata, ut finis quadratus compleatur. Simili uteris ratione in cantu Psalmorum. Breve syllabam, quæ penultima fuerit, junges ultimæ non ascendenti: & quæ inter ultimum accentum & penultimum invenientur, uno tempore metieris. Ultima demum acuta, varitonam amittit notam finalem. ut: Qui abduxerunt nos.

• • • • •

*Sequuntur singulorum Tonorum formæ, quibus canuntur Psalmi in Ecclesia Bisuntina: appositis numeris in suis cujuscunque metris differentibus: ut qui in Breviario notati fuerint, facile inveniantur.*

• • • • •

Sed ne qua in re desideres nostram operam: de contrapuncto aliquid accipe. Vocant alii discantum. Hæc est plurium vocum differentium mixta harmonia. Præcepta erunt hæc. Primum: Initium carminis & finis poni debent in consonantia perfecta, vel unisono. In fuga tamen celeri admittuntur concinna: id est, tertiæ, sextæ, decimæ. Secundum: Duæ consonantiæ perfectæ nunquam se consequantur ascendendo vel descendendo simul. Concinnitates autem suaviter ascendunt & descendunt simul: propterea, quod spatia earum variantur ex majoribus in minora, & contra. Tertium: Sic inclinet, ut voces diversis motibus contra-

riisque (quantum fieri potest) progredientes, tandem perfectis consonantiis conjungantur: & alicujus toni finem referant. In rythmo autem continuo clausulam fugies: ut fiat, quam vocant musicam reservatam. Quartum: Mutationes generum, ut ex diatonico in chromaticum, seu ex tetrachordo disjuncto in conjunctum & contra, suaves sunt: etiam in monodia. Siquidem mutationes, quas b molle vocant, si loco suo fiant; non sinunt torpere auditorem, sed ad attendendum soni novitate excitant. Ut in hoc choriambos; tam quiescendo, quam procedendo.

• • • • •

Juvat enim audisse ditoni additionem post hemiditonum, ut ad consonantiam perveniretur: perinde ac si diviseris diapason, per hemiditonum, & ditonum (in quibus est diapente) & diatessaron. Quintum: Fugienda igitur secundæ, septimæ, nonæ & similes. Quanquam in fufis notulis celeritas dissonantiam excusat: dum modo prior semipedis pars non dissonet. Sextum: Quarta sola dissonat. Ideo vel quinta ei supponatur, vel tertia. Et sextam, si sub tenorem esse contingat, sequatur illico octava.

## DE MINISTRIS JUSTITIÆ.

**E**cclesiæ jurisdictionem & auctoritatem condendi leges, & puniendi inobedientem, hæretici tantum negant. Id autem faciunt, ut obedientiæ ejus excusso timore, vitiis omnibus laxare possint habenas. Sciunt enim sæcularem potestatem non solere, nisi in ea animadvertere, quæ palam perturbant statum Reipublicæ ac societatem: quæ Deo tantum teste fiunt, Deo vindici relinquunt. Sed invitis hæreticis, Verbum Dei manebit in æternum: & libertate conscientiarum, quam sæpe invocant scelerati homines, inimici crucis Christi, nunquam fruuntur. Potestas hæc Ecclesiæ verbo Dei niti- tur: contra quod portæ inferi non prævalent. Qui vos spernit, inquit Christus, me spernit: & qui me spernit, sperniteum, qui misit me. [a] Et alibi: Si Ecclesiam non audierit, sit tibi sicut ethnicus & publicanus. Et Paulus [b]: Itaque qui hæc spernit, non hominem spernit. Episcopi & Prælati positi sunt a Deo regere Ecclesiam suam, ut loquitur Petrus Apost. Act. 20. Si regere; ergo

(a) Joan. 13. Luc. 10. Matt. 18.

(b) 1. Thess. 4.

ergo jubere possunt, & eis obedire oportet: & qui obedire noluerit, nonne puniendus erit? Si puniendus, ergo Judex Ecclesiasticus potestatem habeat oportet puniendi. Noli quærere fieri Judex (inquit (c) Salomon) nisi potestatem habeas infringendi injuriam. Petrus Apost. annon morte multavit Ananiam (d) & Saphiram? Quae causa? Quia fraudaverant de pretio agri. Et si Ecclesiae quis debeat decimas, vel aliud quid, non puniri poterit saltem excommunicatione is, qui decimas negat? Paulus (e) fornicatorem tradidit Satanæ: Hymenemque & Alexandrum blasphemos; (f) & nobis non licebit saltem ab Ecclesia expellere sceleratos Ecclesiae hostes? An potestas aliqua, vel autoritas pœnæ erat in Apostolo, quando scribebat [g] Corinthiis: Vultis in virga veniam ad vos? Omitto, quod in lege veteri nulli fuit impune contra Sacerdotum dignitatem egisse. Exemplo sunt Dathan, Abiron, Chore, Ozias, Saul, &c. (b) Neque aliunde hæreses obortæ sunt; aut nata sunt schismata, (inquit (i) D. Cyprianus) nisi inde, quod Sacerdotibus Dei non obtemperatur, nec unus in Ecclesia ad tempus Sacerdos & Judex vice Christi judicatur. At, inquit, hæretici, Christus prohibuit judicia sæcularia. Principes gentium, inquit, dominantur eorum, &c. Et Clemens a Petro didicisse se, ait, ne Judex fieret aut cognitor de pecuniis. Sed videant, quid idem Clemens in libro magis ab eis probato dicat de Const. Apost. l. 2. c. 4. & 5. Pulchra laus, inquit, est Christiani hominis cum nemine litigare: sin autem factum fuerit, ut incidat ei lis, det operam ut dirimatur, & ne adeat ad Judicem gentium. Imo ne patiamini, ut sæculares Magistratus de causis vestris judicent. Et in eadem Epistola: Si qui ex fratribus negotia habent inter se, apud cognitores sæculi ne judicentur, sed apud Presbyteros Ecclesiae. Idem: Assistant judicio Diaconi & Presbyteri: & date operam, ut antequam Episcopus provideat, fiant amici. Idem fere Anacletus, epist. 1. sed optime extr. De foro comp. c. Novit. Ut in peccato ad mortem non maneat frater, licet Episcopo de sæcularibus causis cognoscere. Sed actor laicus, si dolo vel malicia, relicto suo foro, adeat Ecclesiasticum, rejiciatur. Finis ergo judicii Ecclesiastici est, ut litigantes reconcilientur, & ne quis maneat in peccato. Nam ex peccatis impiorum oriuntur lites. Proverb. 28.

Sciant autem omnes, qui jurisdictionem exercent, non de omnibus habere se

potestatem absolvendi, de quibus judicant. Nam & Episcopus de hæresi inquit, & de Simonia, & de irregularitate, & de criminibus multis, & reos condemnat, & obstinatos brachio tradit sæculari: non tamen absolvere eosdem potest Ordinaria autoritate. Sic Archi-Diaconi, Decani, Præpositi, & alii Judices, in criminosos inquirunt, sæpe suæ jurisdictionis contumaces excommunicant, & absolvunt: sed graviorum excessuum absolutione reservata ad Episcopum, ipsis inferioribus Judicibus interdicta.

Cum sit ergo res adeo seria, videant, quid agant Judices Ecclesiastici. Vicarii, Officiales, Procuratores, Decani, Scribæ, Advocati, cæterique Officarii nostri, se Dei Ministros esse arbitrentur, non mammonæ: electos ad animadvertendum in discholos, & Ecclesiae rebelles: favendumque simplicibus & piis. Caveant sibi a muneribus, non minus, quam a gravi peste: ne corrumpantur. Siquidem munera excæcant etiam prudentes, & subvertunt verba justorum. Exod. 23.

## STATUTUM I.

**J**udices omnes tam nostri, quam delegati observabunt diligenter Cap. XX. Sess. XXIV. & Cap. X. Sess. XXV. Sacri Concilii Tridentini, ut legitime in judicio, & breviter procedatur: & litigatorum artibus, seu in litis contestatione, seu alia parte judicii differenda, modis omnibus, aut termini præfixione, aut competenti alia ratione occurratur.

### II.

Nemini suffragentur (k) literæ conservatoræ cum quibuscunque clausulis, aut decretis, ad hoc, ut coram suo Episcopo, sive alio Superiore ordinario in criminalibus & mixtis causis accusari & conveniri, ac contra eum inquiri & procedi non possit: aut quo minus, si qua jura ei ex cessione competierint, super illis libere valeat apud Judicem ordinarium conveniri. In civilibus etiam causis, si ipse actor extiterit, neminem licet ei apud suos conservatores trahere. Nec ultra quinquennium quis similium literarum bene-

(c) Eccle. 7.

(d) Acto. 5.

(e) 1. Cor. 1.

(f) 1. Tim. 1.

(g) 1. Cor. 4.

(b) Num. 16. 2. Para. 26. 1. Reg. 13.

(i) Cypr. lib. 1. epist. 3.

(k) Conc. Trident. Sess. 4. cap. 5.

Tomus VIII. Concilior. German.



beneficio gaudeat. Prohibetur insuper ipsis conservatoribus Judicibus habere tribunal aliquod erectum: Universitas tamen & Collegia Doctorum, seu Scholarium, & regularia loca, nec non Hospitalia actu hospitalem servantia ab hoc Canone eximuntur.

## III.

Authoritate Sacrosancti Concilii Trident. excommunicantur, maledicuntur, & anathematizantur omnes cujuscunque ordinis, gradus, dignitatis, tam Ecclesiasticæ, quam secularis: qui Ecclesiasticam jurisdictionem vi vel metu, tollere vel impedire præsumunt.

## IV.

Ne remedio appellationis, quod ad innocentiam præsidium institutum est, ad iniquitatis defensionem abutantur improbi: statuit Sancta Synodus (l), ut in causis visitationis, correctionis, inhabilitatis, nec non criminalibus ab Episcopo, seu ejus Vicario, ante definitivam sententiam ab interlocutoria, vel alio quocunque gravamine non appelletur: nec appellationi deferatur, nisi gravamen ipsum per definitivam reparari, vel a definitiva appellari non possit.

## V.

Ordinarii autoritate Sedis Apostolicæ, & ab ea jus & potestatem habentes, etiam tanquam Sedis Apostolicæ delegati Ecclesias omnes, Hospitalia, pia loca, etiam Abbatis & Prioratus, in quibus non viget regularis observantia, visitent, ordinando in illis, moderando, puniendo, & exequendo, juxta Canonum Sanctiones, quæcunque duxerint salutaria. Nec in his, ubi de visitatione & morum correctione agitur, exemptio, aut ulla inhibicio, appellatio, seu querela, executionem impediat aut suspendat: salvo cuique suis juribus. (m)

### STATUTA de MANDATIS exequendis.

**A**D exercendam jurisdictionem Ecclesiasticam, & jus cuique

reddendum: Statuta Curiae Bisunt. & Officialatus, a bonæ memoriæ D. D. Antonio de Vergeyo, Francisco Buslaidio, Carolo de novo Castro, & aliis quondam Archi-Episcopis Bisunt. Prædecessoribus nostris edita, volumus observari.

Mandata Curiae nostræ Bisunt. continent vel monitionem, vel citationem, vel distractionem, vel informationem, vel solam notificationem faciendam. Et monitionem quidem plerumque habent sub pena aliqua: veluti excommunicationis, suspensionis, privationis, multæ pecuniariæ. Nec tamen incurritur omnis ea pena statim: nisi dicatur incurrenda ipso facto.

Citatio autem vocatio est juridica, rei ad iudicium. Quæ cum de jure inventa sit naturali, omitti per Principem non debet. Adam ubi es? Quicumque igitur litigare velit, ante omnia citabit adversarium suum: idque non modo in primo actu, sed & in singulis. Clem. Pastoralis. de re jud.

Fieri citatio potest viva voce Judicis pro tribunali sedentis. Jubet quoque viva voce Judex nuncio, seu viatori, ut citer, absque literis: sæpius tamen in Curia nostra per literas citamus. Quæ commissionem continent Judicis: de citando, nomen citantis, & citati: diemque & tempus, cum hoc verbo: Peremptorie comparendi. Alias non valet citatio. Sed hæc ordinarii Judicis citatio est. Nam delegati, & extraordinarii, non solum actoris nomen, & rei: sed etiam Judicis, & causæ, & loci, & temporis, & horæ: quoniam ordinariarum iudicum nota sunt omnibus tribunalia, & iudicii horæ certæ: non extraordinariarum. Per tex. cap. Cum parati. de Appell. Nec de stylo hætenus Curiae nostræ fuit, ut causa exprimeretur, vel articulus, ad quem quis citatur: propterea, quod in ordinario citante semper præsumitur causa: modo fiat ad instantiam alicujus: præterquam in casu præventionis iudicii seu tribunalis. Hic enim causa exprimenda est: quod libellare citationem dicimus vulgo.

Regulariter quoque citatio tribus editis fit: & tertium est peremptorium, etiam si non exprimat verbum peremptorie, ut not. in Sum. §. q. 2. Potest tamen ex causa unicum edictum sufficere peremptorium: sed quod contineat competentia interstitia: saltem trium temporum intervalla sufficientia, pro Judicis arbitrio: c. Cum ex literis. de in integ. rest.

Distri-

(l) Sess. 13. c. 1.

(m) Sess. 7. c. 8. & 24. c. 3. & 25. c. 8.

*Districcio*, realis citatio dicitur. Hac rapitur reus invitus ad iudicium, per capturam (ut dicitur) personæ. In causis civilibus non procedit, nisi præcedente Iudicis commissione: veluti cum reus per sententiam diffinitivam condemnatus est. Potest enim pro sententiæ executione capi: servato tamen juris ordine, & legis a D. Pio, §. In venditione, ff. De re iudicata. Alias non licet incipere a captura personæ secundum gloss. & Bart. in l. 3. §. Tutor. ff. De susp. tut. & alios. Sed si debitor sit suspectus de fuga: districcio personæ fieri potest, etiam propria autoritate per privatum sine commissione speciali Iudicis. l. Ait prætor. ff. Quæ in frau. cred. In criminalibus vero, sine correctoriis, Iudex ea uti potest: etiam edictis tribus omittis: secundum Bal. in l. Plerique. ff. De in jus vocan.

Ad hoc autem, ut quis vere citatus dici possit, tria consideranda sunt, unum ex parte Iudicis mandatum decernentis, scilicet commissio: & duo ex parte nuncii, nempe executio mandati, & relatio executionis factæ. Alias citatio non valet. Bal. in l. fin. C. De feriis. & Fel. in c. Gratum. de off. delegati.

Concurrentibus ergo prædictis tribus: si reus tribus edictis citatus, nec in primo citationis termino comparuerit: reputabitur contumax ad hoc, ut teneatur auctori comparenti ad expensas. Non tamen ut excommunicatio debeat ferri in eum, vel missio fieri. c. Querelam. de procur. sper. tit. De expens. §. Juxta. c. ult. De dolo & contu. Nisi ad primam citationem aperte declaraverit nolle comparere. Tunc enim ob notoriam contumaciam excommunicari potest.

Quod si ex causa citatio sit unica peremptoria, licet tres contineat terminos: sufficit, ut in uno termino compareat: nec reputabitur contumax, nisi post ultimum terminum non compareat: præsertim si apprehensus fuit personaliter, & citatus. Tunc enim vere contumax erit, & præsumptive. Spec. titu. De cita. §. Viso. c. Ex literis. de excess. Prælatorum.

Informationis mandatum committit aliquem fide dignum ad inquirendum de persona, vel de facto, de re, de loco, de tempore, de modo, de materia, de causa, de occasione: idque vel palam, vel secrete, productis, juratisque testibus vel secus.

Notificationem solam sæpe faciunt Curati mandatorum Superioris: quorum executioni opus non est relatione. Veluti ut denuncient populo Indulgentias, vel festum, vel processiones, &c.

## STATUTUM I.

**C**urati, seu eorum Vicarii diligenter & prompte exequantur mandata Camerae nostræ, & Curiae nostræ Bisunt. Nec notificent parti contra quam fiet executio, donec portitor, seu nuntius mandatorum longam fecerit viam: id est, donec procul jam recesserit a loco, ne is male tractetur. Si vero dicti Curati, aut eorum Vicarii præsentem ordinationem non observaverint, restituent omne damnum, & interesse partis læsæ: & Fisco nostro rationem districtam reddent pro sua inobedientia.

### II.

Curati, & Decani nullos recipiant pro Procuratoribus Camerae, aut Curiae nostræ: Nec eos permittant citare aliquos verbo aut viva voce: nisi ipsis constet per Literas nostras patentes, quod a Nobis habeant hoc officium, & hanc facultatem. Idem quoque statuimus & ordinamus de iis, qui se dicunt Substitutos & Scribas causarum Procuratorum nostrorum: & omnino eis non credatur, nisi fides fiat de commissione ipsorum, sed Nobis, aut Vicario, seu Officiali nostro volumus illico nomina talium abusorum in scriptis denunciari & intimari.

### III.

Curati, seu eorum Vicarii exequentes mandata nostra a tergo ipsorum, scribant nomen officii sui sic: Executum est præsens mandatum per me talem Curatum (vel Vicarium) talis Ecclesiae, in prono, vel ad personam ipsius: vel in domicilio ejus, ad personam uxoris, vel talis famuli: (si persona non potest apprehendi) quia illum reperire non potui: aut quia ad eum mihi tutus non patebat accessus: teste signo meo manuali, tali die, & anno tali. Et signet suo signo manuali, nomen suum & cognomen scribendo. Si vero talis Executor non sit Curatus, vel Vicarius, scribet nomen suum & cognomen, & signabit ut supra.

## IV.

Curati, seu eorum Vicarii duos habeant libros papyri albæ sibi paratos, & bene servatos sub clave: in quorum altero nomina baptizatorum scribant: in altero registrent fideliter nomina excommunicatorum, diem executionis, personam, ad cuius instantiam, & causam, propter quam facta est excommunicatio. Sic scribendo: Excommunicatus est talis pro tali summa, vel pro contumacia, vel tali re, ad instantiam talis, die tali, anno tali. Et similiter fiat de absolutione vel relaxatione.

## V.

Quas quidem absolutiones vel relaxationes cum consensibus, diligenter & studiose custodiant, nec recipiant consensus aliquorum, qui se fortes faciunt pro creditoribus absentibus: nisi sint eorum Procuratores sufficientes, vel negotiorum gestores, & quod in consensibus huiusmodi ponantur saltem duo testes. Alias tales consensus irritos decernimus & nullius roboris.

## VI.

Curati, seu Vicarii non exequantur literas citatorias (a quibuscunque Judicibus emanaverint) ad citandum extra nostram Dioicesin, vel ad excommunicandum illos, quos Judices huiusmodi contumaces reputaverint: nisi ipsis constet de literis nostris de Placet, seu Vicarii nostri Generalis, aut Officialis.

## VII.

Curati, seu eorum Vicarii, quibus semel præsentabuntur literæ excommunicatoriae pro altera parte, de eadem data, neutras illarum exequantur, sed remittant partes coram Officiali nostro, assignando eis certum diem competentem, ad recipiendum appunctamentum juridicum super dictis literis.

## VIII.

Curati, seu eorum Vicarii, cum receperint tertiam monitionem exequendam contra aliquem excommunicatum, moneant Dominos temporales dicti excommunicati, aut suos officia-

rios illius loci, in quo habitat talis excommunicatus, ut illum compellant satisfacere suo creditori, per captionem bonorum ejus, & personæ, secundum formam dictæ monitionis. Et de huiusmodi executione ad personam Dominorum, aut suorum Officiariorum, fiat expressa mentio in certificatione, seu executione, a tergo dictæ monitionis: ne ipsi habeant occasionem excusandi se, neque occasionem conquerendi, quando cessus a Divinis apponetur.

## IX.

Curati, seu Vicarii habitantes in castris, aut locis, ad quos non est accessus, exhibeant se in publicum circa horam primam circa meridiem, & circa horam vespereorum, ut mandata nostra exequantur.

## X.

Ad hæc quarundam vicinarum Dioicetium laudabilem consuetudinem commendantes, ut ab expeditionibus, quæ sunt alicujus momenti, omnis suspicio tollatur cum falsitatis, tum surreptionis: Statuimus & ordinamus, quod posthac in omnibus huiusmodi instrumentis, quæ speciale mandatum nostrum, vel Vicariorum nostrorum requirunt, nomen scribatur ipsius mandantis. Veluti, si a Nobis procedant, Claudius a Bauma, &c. Si a Vicario nostro Generali, Antonius Lullus, Vicarius Generalis, &c. Si ab Officiali, hoc modo: Nos Joannes Renard, Juris Utriusque Doctor, Officialis, &c. In literis quoque Ordinum, quos celebraverit Reverendus Pater Suffraganeus noster, sic dicetur: Noc Nicolaus Guerin, Episcopus Alexiensis, Suffraganeus, &c. Si vero alius non Suffraganeus noster fuerit, dicetur hoc modo: Claudius a Bauma, &c. vel: Vicarius Generalis, &c. Notum facimus universis, quod Reverendus Pater Franciscus Henricus, Episcopus Damasci, de licentia nostra Sacros generales Ordines celebrans, &c. Quod si in principio dictarum expeditionum nostrarum, vel Vicarii nostri, aut Officialis nomen proprium positum non fuerit, tunc volumus, ut manu propria ipsius mandantis subscribantur: alias cum suo periculo obrinebuntur.

De



## DE SENTENTIA EX- communicationis.

**O**Peræ pretium erit jam paucis cum Dei gratia, exponere, quid sit excommunicatio, & quoduplex sit: & quid differat ab anathemate, irregularitate, suspensione & interdicto.

Articulus Fidei est, quem confitemur, **C**redo unam Sanctam Ecclesiam Catholicam, Sanctorum communionem. Licet enim multæ sint Ecclesiæ particulares, ut erant septem in Asia: tamen una est Universalis, seu Catholica collectio fidelium in fidei & Sacramentorum communione. Potest quidem vox ista: Sanctorum, in genere neutro sumi, pro: rerum Sanctorum. Ut sicut Act. 1. dicitur: Omnes, qui credebant, erant pariter, & habebant omnia communia: sic in Ecclesia Christi bona omnia spiritualia omnibus communia sint, ut nemo suum quid esse solius dicat: Quæ sunt dona Dei, Passio, Redemptio, Sacramenta, Evangelium, Promissio, Tempia, Sacrificia, Ministri, & reliqua, quæ nobis Crux Christi beatissima produxit. Hi sunt fructus ligni vitæ, a quibus ingrati Christiani arcantur per excommunicationem, sicut primi parentes a paradiso voluptatis prohibiti sunt per flammeum gladium atque versatilem, Cherubin. In hanc sententiam hortatur Apostolus, Eph. 4. Solliciti servare unitatem Spiritus, in vinculo pacis: unum corpus, unus spiritus, una fides, sicut vocati estis in una spe vocationis vestræ: unum Baptisma; unus Deus & Pater omnium, qui est super omnia, & per omnia, & in omnibus nobis. Potest & Sanctorum, personarum sanctorum esse, quæ in una communione & societate degunt: qualis in corporis nostri membris reperitur, de qua idem Apostolus, 1. Cor. 12. Quia in commune omnia membra agunt, & se invicem juvant. Nam si patitur unum membrum, alia compatiuntur: unde mos est in Ecclesia, ut orationes fiant in communi. Sed utroque modo sumpta idem significat, & eodem spectat. Unio, seu unitas Ecclesiæ in tribus consideratur: ut facile est colligere ex vetustissimo Tertulliano in Apolog. C. 39. Primo in communione virtutum Fidei, spei, & charitatis: deinde in communione Sacramentorum & orationis: tertio in convictu, seu consuetudine humana. Qui in aliquo istorum non communicat in Ecclesia, re ipsa excommunicatus est, & licet nullius Prælati Ecclesiæ sententia ejiciatur; veluti hæreticus, extra communionem est Ecclesiæ, & suo ipsius judicio condemnatus, id est, excommunicatus. Qui non communicat in fide, desperans de misericordia & merito Christi, excommunica-

tus est: (hoc est, extra communionem) quia non communicat in spe cum Ecclesia Catholica, ut Judas, qui se ipsum condemnavit. Peccatores, qui Dei & proximi charitatem abjecerunt, licet in fide communicent, & propter hoc tanquam membra mortua adhuc in corpore hæreant Ecclesiæ & Christi: tamen extra communionem sunt gratiæ Spiritus Sancti, quæ influit a capite Christo in membra Ecclesiæ non mortua, nec a corpore ejus separata. Discedite a me, inquit, omnes, qui operamini iniquitatem. Alia est communio in Sacramentis Ecclesiæ, & orationibus, de qua dicitur, quod erant discipuli perseverantes in doctrina Apostolorum, & communicatione fractionis panis, & orationibus. Ab hac communione etiam separati sunt schismatici, & omnes illi, qui aliis Sacramentis utuntur, quam Ecclesia, & qui vera Sacramentorum & necessaria susceptione abstinere sine justa causa. Tertia est in consuetudine, convictu & commercio, seu negotiis humanis: a qua omnes perturbatores pacis publicæ re ipsa & a se ipsis separati sunt. Per sententiam quoque Judicis & Ecclesiæ, separantur: sicut Apostolus jubet, cum fratribus fornicariis ne cibum quidem sumere.

Ex his patet quoduplex sit excommunicatio. Verbum namque istud excommunicationis, licet apud Sanctos Doctores antiquos reperiatur: tamen frequentius invenitur cum periphrasi: velut non communicare, removeri a communione, privari communione, rejici a communione, suspendi a communione, & similibus. Et quia maxime apparebat communis Fidei professio Christianorum in Sacramenti Eucharistiæ perceptione: idcirco Patres Sacramentum hoc communionem appellarunt merito, & Græce etiam (ut supra diximus) synaxin: quasi coadunationem, seu congregationem. Separationem quoque ab hoc, & aliis Sacramentis excommunicationem dixere: quæ prima est significatio hujus vocabuli. Deinde excommunicati dicti sunt, quorum convictu & commercio interdicitur fidelibus. Tertio hi, pro quibus etiam in particulari, Ecclesia prohibet orare. Orare, inquam, publice. Nam privatim licet: & generaliter pro hæreticis & schismaticis orat Ecclesia publice in Parasceve. Nec ii, qui in Dei gratia sunt, licet per errorem, aut injuste excommunicati sint, suffragiis Ecclesiæ omnino exclusi sunt. Siquidem justii communicantes in fide & charitate, participes sunt orationum Sanctorum: ut Propheta testatur: Particeps ego sum omnium timentium te, & custodientium mandata tua: ita ut non solum vivi, sed etiam defuncti fructum capiant orationum

num nostrarum, & nos ipsorum omnium, qui in corpore Christi permanent, (tam in Ecclesia militante, quam in illa triumphante) atque etiam eorum, qui cum spe certæ beatitudinis, iusto Dei iudicio peccatorum suorum pœnas pendunt in purgatorio, quas in hac vita non persolverint: ob eamque causam in Missa (tanquam præcipuo communionis Sacramento) memoriam facit Ecclesia Sanctorum, per hæc verba: Communicantes, & memoriam venerantes in primis gloriosæ, semperque Virginis Mariæ, &c. Quod si Ecclesia iusta aliqua de causa aliquem non solum e commercio fidelium, & Sacramentorum perceptione separet, proque eo orare prohibeat: sed etiam diris devoveat, & in potestatem Satanæ tradat ad interitum carnis, ut spiritus ejus salvus fiat in die iudicii: jam hæc sane major pœna erit. Quæ vocatur hæc? anathema. Neque enim idem dicitur excommunicari (vel communione privari) atque anathematizari. Licet confundantur aliquando: ut ex uno Concilio Romano patere potest, sub Symmacho: ubi de contemptoribus Statutorum illorum sic scribitur: Si Clericus est, gradu proprio penitus careat. Si vero Monachus, aut laicus, communione privetur: & si non emendaverit vitium, anathemate feriatur. Et Basiliius ad Greg. Presbyt. Eris universo populo anathema: ut qui te receperint, omni Ecclesiastica communione priventur. Dicebatur enim Anathema id, quod diis dicatum, nemini licebat contingere: qualia in templis donaria suspensa ex voto. Sic Josue 6. dicitur: Sit civitas ipsa anathema. Erat enim igne consumenda ipsa Hierico, & omnia, quæ in ea erant: ex quibus populo fas non fuit quicquam attingere. Sic homo Sacer, ac diris & interniciei devotus: quales illi, quos olim gentiles sacrificabant idolis suis, ad expiandum aliquod crimen, aut luem publicam. Atque is quidem maxime proprie hic dicitur anathema: quamquam confundantur, ut dixi, hæc vocabula. Nam Aug. ita loquitur: Omnis Christianus, qui a Sacerdotibus excommunicatur, Satanæ traditur: quia extra Ecclesiam Diabolus est, sicut in Ecclesia Christus. Ac per hoc quasi diabolo traditur, qui ab Ecclesiastica communione removeretur, II. qu. 3. Joannes tamen Papa VIII. causa 3. q. 4. dicit: Engeltrudam uxorem Busonis, noveris non solum excommunicatione, quæ a fraterna societate separat, sed etiam anathemate, quod ab ipso Christi corpore, quod est Ecclesia, recidit, crebro percussam esse.

Habes ergo, quid sit excommunicatio, & quot modis accidat: quid anathema, quid suspensio, quid depositio, quid irregularitas, quid interdictum, omnes censuræ Ec-

clesiasticæ. Siquidem suspensio proprie & principaliter respicit administrationem ordinis vel jurisdictionis: depositio beneficium vel dignitatem: irregularitas tam ineptitudo est ad suscipiendum Ordinem, quam ad exercendum: per interdictum Sacra fieri prohibentur in aliqua Ecclesia, vel communitas aliqua privatur Sacris. Atque hæc quidem sunt omnes censuræ, id est, pœnæ Ecclesiasticæ.

Cæterum usus habet, ut dupliciter distinguatur excommunicatio. Una dicitur minor, alia major. Et major quidem non solum a perceptione Sacramentorum privat, & communione bonorum spiritualium, quorum participes sunt, qui ab unione Ecclesiæ non sunt separati, sed etiam a convictu & omni commercio fidelium: adeo ut sic excommunicatus ab omnibus vitari debeat: in iudicio agere non potest: non potest esse Procurator, non Advocatus, non testis. Et si Clericus est, & actum alicujus Ordinis Sacri exercet, aut Ordinem suscipit: efficitur irregularis, & a solo Papa dispensatur publico delicto.

Excommunicatio minor tantum separat a susceptione passiva Sacramentorum, & passiva electione Canonica: ita quod peccat suscipiens, vel administrans Sacramenta. Et incurritur ob participationem cum excommunicato majori excommunicatione. Excommunicato, inquam, publice & nominatim: vel a jure propter crimen aliquod, cujus censura a nemine ignoretur: veluti propter manum violentam in notorium Clericum.

Cum vero nitatur excommunicatio Verbo Dei, nulla potestas secularis potest eam impedire, nec infernalis: quoniam ex clava una est, quæ dicitur jurisdictionis, data Ministris Ecclesiæ, contra quam portæ inferi non prævalebunt. Quapropter Imperatores potentissimi censuram hanc excommunicationis patienter tulerunt, ut legitur de Magno Theodosio, quem S. Ambrosius Episcopus Mediolanensis ab ingressu prohibuit Ecclesiæ, propter cædem, quam fieri jusserat Thessalonica: & Philippus Imperator, cum in die Vigiliæ Paschalis ultimæ vellet orationibus cum reliqua multitudine, tanquam concors, addi, non fuit admissus a Fabiano Pontifice, nisi prius confiteretur, & pœnitentibus se conjungeret: quia in multis culpabilis esset. Et obsequutus est Imperator. Sic Sanctus Babylas Julianum prohibuit ingressu Ecclesiæ: Stanislaus Boleslaus. Et optimus atque Sanctissimus quisque Princeps Marris Ecclesiæ monitis salubribus semper paruit.

Dux præterea causæ sunt, propter quas censura fertur excommunicationis. Una est, pecca-

peccatum grave & magni scandali : Altera, contumacia seu inobedientia, quæ etiam ipsa peccatum grave est, & quasi ariolandi, ut loquitur Sapiens. Si quis non obedit verbo nostro (inquit Apostolus) per Epistolam, hunc notate, & ne commisceamini cum eo, ut confundatur : & nolite existinare inimicum, sed corripite ut fratrem. Ex verbis istis Apostoli inferunt Doctores, nos posse cum excommunicato communicare, etiam absque peccato : si causæ inlint, quæ hoc versu continentur :

*Utile, lex, humile, res ignorata, necesse.*

Sententia excommunicationis alia dicitur a jure, alia ab homine: hoc est, a Judice, causa cognita. Illius materia est peccatum, seu actio, aut omissio, de genere peccati alicujus gravissimi, ut sacrilegii, homicidii, falsitatis, & similium. Quæ vero per sententiam Judicis fertur, contumaciam habet pro causa: quia excommunicatus noluit Ecclesiam audire, ut pœnitentiam ageret. Veluti de hæresi, aut alia re: vel ut fratri restitueret pecuniam, vel famam, vel aliud, in quo eum offendit, & secundum Evangelii præceptum fuit interpellatus, & requisitus. Inter illas quoque, quæ a jure feruntur, vel per Statuta Synodalia, quædam sunt, quæ ipso facto incurruntur: & sic excommunicari vitari debent ab omnibus sub pœna excommunicationis minoris. Ut si quis Presbyterum vulneraverit. Aliæ requirunt declarationem Judicis: quod licet excommunicatus sit a jure, qui deliquit: tamen ad hoc, ut vitetur ab aliis, opus est declaratione: ut Simoniacus occultus, falsarius, &c.

Sed declamant nonnulli; Non est ferenda hæc gravis Ecclesiastica denunciatio; maxime propter debitum pecuniarium. Quasi vero, qui rem proximi detinet, eo invito (sive id sit ex contractu, sive ex judicato, sive alio modo, ut supra dictum est) non faciat injuriam fratri: quasi correctione fraterna non indigeat, qui in fratrem peccat: & processu Evangelico judicari non possit frater, si de eo frater conqueratur.

Sed notandum est, non eodem animo omnes esse, qui de censura hac obloquuntur. Alii enim male affecti in Ecclesiam, ejus auctoritatem omnem & jurisdictionem vellent penitus sublatam, & extinctam. Cum his nobis nihil est, quoniam qui non credit (dixit [n] Salvator) jam judicatus est. Alii sub prætextu serviendi Principibus & Magistratui, magis rem suam quærunt, quam Reipub. utilitatem: Quorum voces, quam audiendæ sunt, nemo sani judicii non

videt. Ipsi enim Principes Illustrissimi, & Magistratus Catholici, omni semper studio clavem hanc, & potestatem Ecclesiæ, tutati sunt, & gladio suo protexere: tantum abest, ut cupiant deterere. Alii ære alieno oppressi, quos Ecclesiæ Prælati cogunt creditoribus satisfacere, cuperent profecto, aut subito de medio rerum tolli omnem excommunicationem, aut omnino (si Deo placeret) novas tabulas fieri: omnino ne ad restitutionem tenerentur. Idem vero contra, cum licetorum & servientium multitudinem domi offendunt, supellectilem omnem domesticam describentium, & asportantium, atque distraherentium viliori pretio, quam sint: equos, asinos, boves, currus, vestes, linteamina, lectos, se denique in carcerem detrudentium. Hæc quam benigna est, inquit, Ecclesia: quam multis modis nos expectat: quam nullo sumptu! Certe illud Prophetæ dici potest: Per jurisdictionem Ecclesiasticam sublatum onus humeri, [o] virgam exactoris superatam. Nam si solvendo non sint, etiam hic remedium habetur cessionis bonorum: qua facta amplius nihil habet creditor, quam ut sibi damnum imputet, qui rem suam male collocavit. Creditores ipsi quoque multo commodius & utilius (tam sibi, quam debitori) se experiri putant processu Evangelico, quam alio. Potentes enim debitores (ad quorum personam, vel domos non audent accedere Ministri justitiæ, pignoris accipiendi causa) timore infamiæ & confusionis, (quam omnis Christianus timere debet, justa sit, sive injusta causa) cum actore coguntur convenire & decidere: ne res ulterius procedat aut promoveatur. Sufficit enim huic, qui hujusmodi est, objurgatio, quæ fit a multis, [ut loquitur [p] Apostolus.] Pauperes vero subtrahendo nunc aliquid sibi de demenso suo, nunc supellectilem suam impignorando, vel vendendo, paulatim satisfaciunt, cum multo minori damno, quam si bona ab aliis distraherentur. Et maxima pœna est in locis, ubi habitantes omnes sunt indigenæ, multis cognationibus & affinitatibus devincti, & noti, (qualis est nostra Dioecesis) quod omnibus Parochianis in Ecclesia congregatis, solus in domo, vel in platea, vel sub arbore cogaris abesse a cœtu fidelium, cognatorum tuorum & amicorum: & ab omnibus notari, tanquam indignus communione. Hoc enim fortasse parum haberet momenti in civitatibus & populis frequentioribus, ubi Parochia ni non solum Curato, sed etiam inter se parum noti sunt. Itaque sive magnum sit debitum [ita ut nequeas exolvere] sive parvum (ita ut tanta pœna indignum videatur) nihil

[n] Joan. 3.

[o] Esa. 5.

[p] 2. Corint. 2.



nihil tamen justius processu Evangelico. Nam in magno ære cessionis remedium in promptu est, quando præ paupertate non potest quis restituere. In parvo magna apparet contumacia, & argumentum animi obstinati, & inobedientis, qui malit omnem infamiam, & ab Ecclesia abjectionem expectare, quam reconciliari fratri suo: præcipiente Christo, ut percutienti unam maxillam, potius alteram præbeas: & petenti tunicam, des & pallium: & si quis te angariaverit mille passus, eas etiam duo millia.

Atque hæc sufficient his, qui malo animo de excommunicatione loquuntur. Aliis (qui zelo quodam, sed non secundum scientiam offenduntur, quando multos vident ea sententia publicari irretitos) hoc dictum sufficiat: Multos esse in Ecclesia peccatores: nec tamen de omnibus desperandum. Nec sicut omnes, qui Ecclesiam frequentant, in Dei gratia sunt: ita nec omnes, quos sententia excommunicationis ligat, extra spem vitæ futuræ esse, si patienti animo eam sustineant cum obedientia: si quando parere mandatis Ecclesiæ (quæ de occultis non judicat, sed de manifestis) non possunt. [q] Ita enim ex B. Paulo, & Sanctis Patribus Doctores tradiderunt, excommunicationem medicinalem esse: licet magna sit miseria, a communione fidelium segregari. Quoniam uri, & secari (licet malum sit) oportet tamen aliquando fieri, ad vitam redimendam. August. de correptione & gratia: Nec scimus quid contingat sequenti die: nec ante finem vitæ hujus de aliquo desperandum est: aut contradici Deo potest, ne recipiat & det poenitentiam, & a reatu, quamvis iustæ damnationis absolvat, damnatumque non damnet, accepto Sacrificio Spiritus contribulati, & cordis contriti. Ambrosius in Psal. 118. Sermo. 8. In Ecclesia, ubi decet maxime misereri, quam maxime debet iustitiæ forma servari, ne quis a communionis consortio abtentus, brevi lachrymula, ad tempus parata, aut etiam uberioribus fletibus, quod plurimis debet postulare temporibus, facilitate Sacerdotum extorqueat. Facilitas, veniæ, incentivum præbet delinquenti. Hæc Ambrosius.

Quod autem D. Chrysostomus tantis cum affectibus dehortatur, ne quem vel in vita, vel in morte anathemate feriamus, etiam hæreticum, quæ de re tractatum etiam peculiarem scripsit: nos non ita temere accipiemus, quasi quod non liceat omnino, neque viventem, neque mortuum, anathematizare quenquam. Hoc sane damnatum est in quinta Generali Synodo: & in Tridenti-

na docetur contrarium: Sess. 25. cap. 3. Serviebat Chrysostomus causæ, more suo. Ejus quoque verba magni momenti esse possunt ad dehortandum inhumanos creditores ab omni exactione parum humana. Prælati autem aliter non potest, quam vel damnare reum, vel absolvere. Damnare quidem contumacem, absolvere innocentem. Cyprianus excommunicationem custodem fidei vocat, retinaculum spei, indicem itineris salutis, fomitem virtutum, & omnis corruptelæ repurgationem: quam, qui dimiserit, instabili cursu erret necesse sit: & huc atque illuc impulsus variis dissidentium malorum tempestatibus dissipabitur: & quasi extorto de manibus Conciliorum gubernaculo, navem Ecclesiasticæ salutis illidet in scopulos. Hæc ille.

Hæc omnia Curati possunt scire, ut in confessionibus, si res postulaverit, doceant confitentes. Alioqui enim disputatio difficilior fortasse est, quam quæ in pro-  
nis populo exponatur. Iplis satis erit exequi mandata Superioris, cum omni obedientia.

## STATUTUM I.

**E**Xcommunicatus per sententiam Judicis non absolvitur, nisi ab eo, a quo excommunicatus est; vel a Superiori. Excommunicati vero a jure, alii ab Episcopis suis absolvi possunt, alii non nisi a Summo Pontifice. Ex utrisque quædam Nos referemus ad Curatorum instructionem.

### II.

Excommunicationes illæ, quæ monitionibus præmissis ad finem revelationis, aut pro deperditis, seu subtrahitis rebus, fieri solebant, non nisi a Nobis posthac decernentur: nec alias quam ex re non vulgari, causa diligenter & magna maturitate pro persona, tempore, loco, & aliis circumstantiis per Nos examinanda.

### III.

Noverint quoque omnes Curie nostræ postulantes & Clerici, quod in causis judicialibus, quandocunque executio realis vel personalis in qualibet parte judicii, nostra autoritate, a Nobis, vel Vicariis, aut Officialibus nostris, fieri poterit; tam in procedendo, quam

(q) 24. q. 4. A nobis. de sententia excom. c. Lator. c. Consanguinei. de re jud.

quam in definiendo, a censuris Ecclesiasticis abstinēbimus : sed per multas pecuniarias, quæ Hospitalibus, Fabricis, Seminariis, & similibus locis piis reorum, applicabuntur, vel per captionem pignorum, vel distractionem personarum, vel privationem beneficiorum, aliaque juris remedia procedemus. Contra contumaces autem, cum aliter non poterimus, gladio certe anathematis (licet invitj) utemur, & pœnis aliis, ac censuris, sicut censebimus, magis expedire.

**CASUS, IN QUIBUS INCURRITUR ipso facto excommunicatio reservata ad Sedem Apostolicam a jure.**

**PRIMUS CASUS.**

**H**æretici de hæresi sententialiter condemnati, delati, seu publice diffamati, & eorum fautores, receptatores, ac defensores, excommunicati sunt ipso facto : & eorum absolutio reservatur Papæ. (r)

**II.**

Et Schismatici pertinaciter ab obedientia Sedis Apostolicæ se subtrahentes. (s)

**III.**

Inquisitores hæreticæ pravitatis, qui odio, vel favore, vel spe lucri temporalis, omiserint procedere contra hæreticos, aut inculpabiles injuste vexaverint. (t)

**IV.**

Qui suadente diabolo in Clericum, vel Monachum manus violentas intulerit, vel in Sacris Ordinibus constitutum occiderit, vel mutilaverit. (u)

**V.**

Similiter qui Cardinalem percuss-

erit, vel captivaverit, vel persecutus fuerit : & sit perpetuo infamis. (x)

**VI.**

Et qui Episcopum suum. (y) Quin etiam Potestas, Consilarii, Ballivi, Scabini, Advocati, Rectores, Consules & Officiarii sæculares & Ecclesiastici, qui hoc fecerint, vel mandaverint, aut factum ab aliis ratum habuerint, vel consilium, vel favorem dederint.

**VII.**

Mutilantes, vulnerantes, interficientes seu capientes, aut depredantes eos, qui devotionis, seu peregrinationis causa Romam petunt. (z)

**VIII.**

Et qui litigantes in Curia Romana quomodolibet offendunt, causa ipsius litis. (a)

**IX.**

Piratae, hoc est, latrones maritimi. (b)

**X.**

Qui equos, ferrum & arma deferunt Turcis, & hostibus Christi.

**XI.**

Falsarii Literarum Apostolicarum, & eorum fautores. (c)

**XII.**

Sedis Apostolicæ auctoritatem offendentes, tam in suis, suorumque literis, processibus & executionibus impediendis, quam in jurisdictionum, fructuum, reddituum & proventuum non vacantium occupatione. (d)

**XIII.**

Qui compellunt Presbyteros celebrare in locis interdictis : quique excommunicatos vel interdictos ad Divina evocant audienda : vel excommunicatos publice, & a Celebrantibus monitos, egredi prohibent : ipsique excommu-

(r) Sixtus IV. in ext. Et si Dominici. Honor. III. de sent. excom. c. Noverit.

(s) In processu Cænæ Domini.

(u) 17. q. 4. Si quis. & Sixtus IV. in ext. Et si.

(y) Ext. de Pœnitent. c. Si quis. in Cle.

(a) Ibidem.

(c) Innoc. III. de crimin. fal. c. Falsariorum.

Tomus VIII. Concilior. German.

(t) In Clem. de hæret. c. Multorum.

(x) Bonifac. VIII. ext. De pœnis. c. Fœlicis. li. 6.

(z) In processu Cænæ Domini.

(b) Ibidem & in Conc. Later. de Judæis. c. Ad liberandam.

(d) In process. Cænæ Domini.

communicati publice, vel interdicti, qui nominatim a Celebrante moniti, ut exeant, tempore Missarum remanere præsumperint. (e)

## XIV.

Religiosi, vel Clerici sæculares, qui temere aliquos inducunt ad vovendum, jurandum, vel promittendum, quod sepulturam in suis Ecclesiis eligant, vel electam non mutant. (f)

## XV.

Religiosi, qui Clericis aut laicis Sacramentum Unctionis extremæ, vel Eucharistiæ ministrare, vel Matrimonium solennizare, non habita super his Parochialis Presbyteri licentia: aut quenquam excommunicatum a Canone (præterquam in casibus a jure expressis, & per privilegia Sedis Apostolicæ concessis) vel a sententiis per Statuta Provincialia, aut Synodalia promulgatis, seu si a pœna & a culpa absolvere quenquam præsumperint. (g)

## XVI.

Clerici, qui scienter & sponte participant cum excommunicatis a Summo Pontifice, eos recipiendo ad Divina officia. (h)

## XVII.

Qui in locis Christianorum defunctorum corpora inhumaniter tractando exenterant, concidunt in frusta, elixant, exossant, ut alio transferre possint. (i)

## XVIII.

Qui in terris suis nova pedagia imponunt, vel prohibita exigunt. (k)

## XIX.

Qui nova onera imponunt realia vel perionalia Ecclesiis, vel Ecclesiasticis personis. (l)

## XX.

Per Simoniam dantes, vel recipientes Ordines vel beneficia. (m)

## XXI.

Ex pacto dantes vel accipientes aliquid pro ingressu religionis, nisi aliter nequeant in Monasterio nutriri. (n)

## XXII.

Religiosi mendicantes, sine licentia Sedis Apostolicæ transeuntes ad alium Ordinem (excepto Carthusiensium) tam ipsi recipientes, quam transeuntes. (o)

## XXIII.

Intrantes Monasteria Sanctæ Claræ in casibus non concessis in regula ipsarum, vel sine licentia eorum, qui dare possunt. (p)

## XXIV.

Quicumque libellos famosos, nec non cantilenas, rithmos, edere vel publicare præsumunt in infamiam status Ordinis Prædicatorum, vel Minorum. (q)

## XXV.

Confessores (r) denique absolventes ab his casibus supradictis, Sedi Apostolicæ reservatis, nisi in articulo mortis: & nisi quod excommunicatus promittat se præsentare, & satisfaciat, vel promittat satisfacere data cautione idonea, pignoratitia, vel fidejussoria, vel juratoria, quam poterit.

*CASUS, IN QUIBUS IN-  
curritur excommunicatio a  
jure, & absolutio refer-  
vatur Episcopo.*

## ARTICULUS I.

**H**æretici omnes & fautores eorum ipso facto excommunicati sunt, & a solo Episcopo absolvi possunt occultis, non a Vicario. Qui vero per sententiam fuerint jam condemnati, ad Papam remittuntur. (s)

II.

(e) De senten. excom. c. Gravis. in Cle.

(g) Ext. de Privil. c. Religiosi. in Cle.

(i) Bonifac. viii. ext. de sep. c. Detestandæ.

(l) Sixtus in extr. Et si Dominici.

(n) Urban. V. in extr. Sane, ne in vinea.

(p) Refert S. Anto. in 3. parte summæ.

(r) Sixtus IV. in extr. Et si Dominici.

(f) Ext. de Pœniten. c. Cupientes. in Clem.

(b) Clemen. iii. de sent. exc. c. Significavit.

(k) In process. Cœnæ Domini.

(m) Matth. 5. In Concil. Constan.

(o) Martin. V. in extr. Viam ambitiose.

(q) Alexand. in priv. ex alto & non sine multa.

(s) De sent. exc. c. Noverit. Conc. Trid. Sess. 24. c. 6.



## II.

Inquisitores pecuniam modis illicitis extorquentes, si plene satisfecerint, absolvuntur ab Episcopo: alioquin ad Papam remittuntur. (t)

## III.

Qui Christianos naufragantes in rebus suis spoliant. (u)

## IV.

Qui autoritate propria incendunt villam, domum, mansionem, segetem. (x)

## V.

Statuta condentes contra libertatem Ecclesiasticam, & secundum illa judicantes. (y)

## VI.

Qui repressalias concedunt contra personas Ecclesiasticas, vel bona Ecclesiarum. (z)

## VII.

Qui compellunt Prælatos, vel personas Ecclesiasticas ad submittendum Ecclesias, vel earum bona laicis. (a)

## VIII.

Qui modis illicitis impediunt litigantes in foro Ecclesiastico in causis, quæ de jure vel consuetudine ad dictum forum pertinent. (b)

## IX.

Qui lædunt, occidunt, vulnerant, capiunt eos, per quos, vel propter quos excommunicati sunt: nisi intra duos menses satisfaciant, ad Papam remittuntur. (c)

## X.

Qui temporale Dominium obtinentes, prohibent suis subditis, ne Prælati aut Clerici quicquam vendant,

aut emant, ne bladum molant, aut panem coquant. (d)

## XI.

Qui impediunt sequestrationem beneficiorum contra mandata Apostolica, vel fructus occupant. (e)

## XII.

Qui regalia, custodiam (sive guardiam) advocacionis, seu defensionis titulum in Ecclesiis vel Monasteriis vacantibus de novo præsumunt occupare. (f)

## XIII.

Qui pedagia ab Ecclesiasticis exigunt de rebus, quas non negotiandi causa important, vel exportant. (g)

## XIV.

Qui jurisdictionem Ecclesiasticam evacuant, & qui Ecclesias vel personas Ecclesiasticas oneribus & angariis gravant, nisi moniti intra mensem desistant. (h)

## XV.

Qui vi vel metu absolutionem excommunicationis, vel revocationem interdicti extorquent. (i)

## XVI.

Qui Visitatores Monialium, aut mulierum (quæ vulgo Canonice seculares appellantur) impediunt, nisi moniti resipiscant. (k)

## XVII.

Qui hæreticos, vel eorum fautores, in loco sacro scienter præsumpserint sepelire. (l)

## XVIII.

Qui scienter, quoque sepelire præsumunt in Cœmeteriis tempore interdicti, vel excommunicatos publice, vel nomi-

(t) De hæreticis. c. Nolentes. in Cle.

(u) Conc. Lateran. de raptorib.

(x) 2. quæst. 8. Si quis. & c. Pessimam.

(y) Honor. III. de sentent. excom.

(z) Greg. IX. de injuriis. lib. 6. c. Et si pignorationes.

(a) Idem de reb. Eccles. non alien. ca. Hoc consultissimo.

(b) Bonifac. VIII. ext. De immuni. Eccles. c. Quoniam. lib. 6.

(c) Greg. IX. de sent. exc. c. Quicumque. li. 6.

(d) Bonif. VIII. de imm. Eccl. c. Libertates. li. 6.

(e) Ext. de Sequest. c. 1. in Clem. & in veteri Statuto.

(f) Idem de Elec. c. General. lib. 6.

(g) Ext. de Cens. c. Quanquam. li. 6.

(h) Ext. de Imm. Eccl. c. Non minus. & c. Adversus.

(i) Gregor. X. ext. De iis, quæ vi vel met. lib. 6.

(k) Ext. De stat. Monach. c. Attendentes. in Clemen.

(l) De hæret. lib. 6.

nominatim interdictos, vel manifestos usurarios. (m)

## XIX.

Qui scienter in gradibus consanguinitatis, vel affinitatis interdictis, aut in Monialibus contrahere Matrimonium non verentur: nec non Religiosi, Moniales & Clerici, in Sacris Ordinibus constituti, Matrimonium contrahentes, & inter eos, qui scienter ea celebrant. (n)

## XX.

Religiosi, qui decimas, & alia, quæ Ecclesiis debentur, sibi usurpant dolo & injuste: nisi desistant intra mensem. (o)

## XXI.

Religiosi mendicantes, qui domos vel loca ad habitandum de novo suscipiunt, vel olim suscepta dimittunt. (p)

## XXII.

Qui scienter cum nominatim excommunicato communicat in crimine criminoso, ei consilium, auxilium vel favorem impendendo. (q)

## XXIII.

Qui fraude & fictione Judicem adducunt ad aliquam mulierem ejus pudicitie insidiantes. (r)

## XXIV.

Religiosi, in scholis vel alibi habitum suæ religionis dimittentes, vel sine licentia suorum Superiorum studia frequentantes; & Doctores, qui eos scienter docent, vel retinent. (s)

## XXV.

Religiosi in suis sermonibus aliqua proferentes, ut auditores detrahant a solutione decimarum. (t)

## XXVI.

Religiosi tam exempti, quam non exempti, qui interdictum, quod Ecclesiam Cathedralem servare, vel Pa-

rochiale loci intellexerint, non servant. (u)

## XXVII.

Sacerdos officium gerens Vice-Comitis, vel Præpositi sæcularis, nisi monitus desistat. (x)

## XXVIII.

Qui vocati ad dirigendas in electionibus suis Moniales, discordias nutriverint. (y)

## XXIX.

Monachi, qui sine licentia Prælatorum suorum intra septa Monasterii tenent arma. (z)

*CASUS ALIQUOT, IN QUIBUS ferebatur excommunicationis sententia per Statuta Synodalia diversis temporibus edita, quorum pars bona antiquata est.*

**Q**ui non permittunt solvi decimas, nec solvunt de animalibus juxta consuetudinem loci: sed in fraudem tradunt aliis tenenda, nisi moniti desistant, excommunicantur.

Incendiarii non solum sacrorum locorum, sed etiam aliorum.

Archidiaconi & Decani, qui causas de cætero audire præsumunt, excepto Officiali Archidiaconi Bisuntini.

Abbas, Prior, Decanus, Archidiaconus, Canonicus, vel alius Ecclesiæ Prælatus sæcularis, vel Religiosus, aut laicus, qui aliquem citari faciet, & per literas Apostolicas, vel Legatorum Sedis Apostolicæ, contra quem non habeat causam, propter quam faciat ipsum citari tempore impetrationis literarum.

Nullus Presbyter utatur literis, quibus non fuit usus contra illum, quem

(m) Ext. De sepulturis. c. 1. in Clem.

(n) De decim. c. Religiosi. in Clem.

(o) Innoc. III. de sent. exc. c. Nuper.

(p) Ne Cleric. vel Monac. c. Ut periculosi. lib. 6.

(q) De sent. excom. c. Ex frequen. in Clemen.

(r) De elec. c. Indemnitatibus. lib. 6.

(s) De consang. & affin. c. 1. in Clem.

(t) c. Cum ex eo. de excess. Præl. lib. 6.

(u) De Judic. c. Mulieres. lib. 6.

(x) Ext. De pœnis. c. Cupientes. lib. 6.

(y) Ext. Ne Cler. vel Mon. c. Clericis.

(z) Ext. De stat. Monac. c. Ne in agro. in Clem.

quem vult per dictas literas ante mortem mandatoris, seu etiam antequam legatus exiret Provinciam, suæ legationis officio deputatam: & hoc intelligimus de literis ad causas, & ad lites impetratis. Alioqui excommunicationi subjaceat.

Nullus utatur literis Apostolicis citatoriis, in quibus continetur hæc clausula generalis: Quotiescunque fueritis requisiti: sub excommunicationis pœna, prohibentes illis, quibus præsentabuntur ad exequendum, quod illas nullatenus exequantur.

Excommunicamus Archidiaconos, qui contra inhibitionem nostram alias in Synodo recitatam, imposuerunt tallias Presbyteris in suis Archidiaconatibus constitutis, & receperunt ab eisdem.

Oppressores orphanorum, pupillorum, viduarum, & aliarum miserabilium personarum: & qui, seu quæ eorum jura surripiunt scienter & injuste, donec de prædictis destiterint, & ad satisfactionem venerint.

Religiosi suspensi sunt, si officiant Parochiales Ecclesias, aut Parochianis ministrant Ecclesiastica Sacramenta: nisi a Nobis cura Parochialis commissa sit eisdem.

Qui frangunt vel violant Ecclesias, & Cœmeteria, capiendo & extrahendo ab eisdem res depositas sine voluntate illorum, quorum sunt illæ res: nec ad communionem admittantur, donec a Nobis, vel mandato nostro Spirituali fuerint absoluti.

Excommunicati etiam denunciuntur singulis diebus Dominicis & Festivis usurarii manifesti.

Excommunicati sunt omnes illi, qui portitores literarum nostrarum, seu Curie nostræ Bisuntinensis, verberant, & alias quovismodo impediunt & damificant: & illos, qui procurant, consulunt, aut adjuvant hæc fieri directe vel indirecte: & qui literas ipsas rapiunt, dilacerant, vel alias apud se retinent spoliando portitores earum.

Excommunicamus omnes illos, qui falsient seu bona illorum, qui ad-

versarios suos trahunt coram Nobis ad judicium, vel propter hæc trahent coram Judice sæculari: vel qui occasione hujus capient personas, vel bona amicorum suorum.

Excommunicamus & a gremio Sanctæ Matris Ecclesiæ segregamus, Ballivos, Majores, Præpositos, & alios ministros sæculares, qui impediunt, perturbant, prohibent & contradicunt, ne aliqui veniant ad Curiam nostram Bisuntin. pro justitia super his, de quibus cognoscere possumus & debemus.

Excommunicamus sacrilegos, & fortilegos, & eos, qui fovent eos, & eis credunt.

Excommunicamus omnes Clericos & Religiosos, qui contra Clericum vel Religiosum, seu aliam quamcunque personam Ecclesiasticam coram Judice sæculari litigaverint in personalibus actionibus: & eos præcipimus excommunicatos publice nunciari singulis diebus Dominicis & Festivis.

Excommunicamus, & excommunicatos publice nunciari præcipimus omnes hæreticos cujuscunque sortis existant, & quocunque nomine censeantur, fautores & receptatores eorum, & credentes ipsis hæreticis.

Excommunicamus omnes falsarios quarumcunque literarum in litera & sigillo: & specialiter falsarios Curie nostræ Bisunt. & monitione quindecim dierum præmissa, omnes illos, qui scienter utuntur literis sic falsificatis, & qui sciunt, vel sciverunt aliquos falsarios, nisi Nobis, vel Officiali nostro manifestaverint sine mora.

Excommunicamus authores libellorum famosorum, & publicatores eorum.

Excommunicamus omnes illos, qui celebrant Matrimonia clandestina, & qui Matrimoniis clandestinis scienter ex proposito interfunt, & intererunt. Matrimonia clandestina intelligimus, quæ fiunt per verba de presenti in occulto: vel quæ fiunt bannis non legitime præmissis in facie Ecclesiæ: vel extra tempora, non obtenta dispensatione: seu quæ celebrata fuerint de personis nondum in ætate legitima constitu-



stitutis. Et postquam vobis Curatis, vel Vicariis de talium personis constitit, eas nominatim excommunicatas publice nuntietis, & nomina talium infra quindecim dies, postquam vobis constitit, Officiali nostro fideliter rescribatis. Alioquin dictam pœnam incurrat eo ipso.

### *CASUS, IN QUIBUS PETITUR ab Officiali nostro forma Concilii Bisuntini.*

**S**ed primum, ut intelligatis, quid sibi volunt hæc verba: Forma Concilii Bisuntini, sciendum est, quod anno Domini M. CC. LXXXII. sub bonæ memoriæ Odone de Rubeomonte, Archi-Episcopo Bisuntino, congregatum fuit Concilium Provinciale: in quo præter cætera tractatus fuit Canon ille Innocentii Secundi: Si quis suadente diabolo: qui scribitur in Decreto Gratiani, causa 17. qu. 4. contra sacrilegos omnes, & manus violentas inferentes in viros Ecclesiasticos. Et ut magis pœna illa excommunicationis Papalis (quam tales incurrunt) timeretur: decretum fuit eo Concilio Provinciali, quod non solum ipsi verberatores ac interfectores Presbyterorum ac personarum Ecclesiasticarum, excommunicati sunt, sed etiam omnes, consilium, auxilium, vel favorem dantes ad cædem, vel verbera. Quin etiam præterea in eo Concilio, quod si locorum Domini rei comperirentur ejus facinoris, loca ipsa, seu terræ, interdicto Ecclesiastico supponenda essent.

Item constituerunt, quod Domini temporales, in quorum potestate essent, tenerentur compellere verberatores ipsos ad satisfaciendum læsis, & injuriam passis reparandam: sin minus, si moniti & requisiti ab Ordinario id negligerent, ipsi Domini excommunicationi, & eorum terræ interdicto, subjicerentur. Atque hæc quidem decreta tunc primo fuerunt.

Postea vero, cum videretur ratione dignitatis personæ graviolem aliquando censeretur injuriam, vel minus gravem, declarationem addiderunt Statutis Concilii: nempe, quod si caperetur Decanus, vel Canonicus Cathedralis Ecclesiæ, vel Abbas aliquis, illico interdicerentur omnes Ecclesiæ. Si Canonici alii, Ecclesiæ Archidiaconatum, in quibus essent Canonici, eodem modo interdicerentur. Si alii Presbyteri, Ecclesiæ Decanatus: & ubi capti essent. Si alii Clerici, tantum in ipsis locis fieret interdictum. Sed si Cle-

rici non dimitterentur intra quindecim dies, tunc interdictum extenderetur per totum Decanatum. Atque hæc fuit declaratio Concilii.

Clericus ergo injuria affectus, petebat ab Archi-Episcopo, vel Officiali formam Processus Concilii: ut juxta eam moneretur Dominus loci, aut poneretur interdictum, nisi sibi satisfaceret. Eratque forma intentionis ejus hæc: *Ego N. humilis Presbyter Diæcesis vestræ Bisunt. vulneratus sui cum injuria a N. Idcirco peto a vobis, ut mittatis Curato N. vel Decano formam Concilii Bisunt. &c.* Officialis vero ad hoc committabat aliquem, ad inquirendum de veritate rei. Facta inquisitione & visa, mittebat Officialis ipsam formam ad Curatum loci, vel ad Decanum, ut juxta ea procederet. Sed hæc consuetudo bona ex parte exolevit: cum quia Principes nostri non minus, quam nos ipsi, cupiunt libertatem Ecclesiasticam sanctam rectam servare: tum etiam, quia parum expedit nunc (propter quotidie suppullulantes errores in grege Domini, & schismata, & hæreses) adeo frequenter interdicti Ecclesias aut populos: sed facinorosi ipsi & sacrilegi, puniendi relinquuntur Curiae nostræ Bisunt. Et in illos feruntur aliæ censuræ excommunicationis, nisi satisfaciant: videlicet anathematis, & maledictionis, & interdictæ familiæ, & requisitionis brachii secularis, ut a loco & communitate expellantur.

### *SEQUUNTUR ARTICULI formæ supradicti Concilii, cum declarationibus ex veteri Statuto: tantum ad hoc descripti, ut omnes intelligant, quanta fuerit olim Ecclesiasticæ libertatis atque immunitatis cura.*

**E**xcommunicati sunt verberatores ac interfectores Presbyterorum, Clericorum, & personarum Ecclesiasticarum: nec non dantes auxilium, consilium, vel favorem interfectioni, seu verberationi.

Si Dominus aliquis temporalis verberaverit aut interfecerit, seu verberari aut interfici mandaverit, aut in præmissis consilium, favorem vel auxilium dederit: terra ei subiecta ipso facto supposita est Ecclesiastico interdicto.

Domini temporales, sub quorum dominio & potestate sunt verberatores aut interfectores

Stores prædictarum personarum, si moniti aut requisiti nostra auctoritate, vel Officialis nostri, quod compellant hujusmodi delinquentes sacrilegos satisfacere injuriam passis, per captionem bonorum ac personarum, si necesse fuerit, non obedierint: ipsi Domini ipso facto post viginti dies excommunicationis, & terræ, hominesque interdicti Ecclesiastici sententiæ & censuræ subjaceant.

Cæterum circa captivitates, seu detentiones personarum Ecclesiasticarum laudabilis & antiquæ consuetudinis circa hoc editæ memoriam recolentes, sic duximus statuendum: ut si Decanus, aut alius Canonicus Ecclesiæ Cathedralis Bisunt. captus fuerit a quocunque in Civitate & Dioicēsi Bisunt. seu Provincia, aut etiam extra dictam Provinciam, ab aliquo nostræ Civitatis & Dioicēsis Bisunt. nulla Ecclesiastica Sacramenta celebrentur, exceptis Pœnit. & Baptismo: quousque dictus Decanus, seu Canonicus captus, una cum omnibus rebus & bonis sibi ablati occasione captionis, amissis, datis, vel promissis restitutus fuerit plenariæ libertati, & de injuria læso & Ecclesiæ Bisunt. fuerit satisfactum. Hoc idem extendimus ad Abbates.

Pro captione vero cæterorum Canoncorum, Priorum, Decanorum, & Curatorum Civitatis & Dioicēsis Bisunt. cessetur, ut supra, in locis & Archidiaconatibus, in quibus Ecclesiæ, quarum sunt Canonici, Priores, Decani & Curati, constitutæ fuerint: in Archidiaconatu, in quibus etiam capti detinebuntur.

Pro captione autem aliorum Presbyterorum & Clericorum in Sacris Ordinibus constitutorum, cessetur, ut supra, tam in Decanatibus, ubi degunt, quam in locis, ubi capti detinebuntur.

De Clericis vero inferiorum Ordinum, & aliis simplicibus captivatis statuimus, ut cessent, prout supra, in locis, in quibus ipsos capi contigerit, seu etiam detineri.

Postquam vero capti & detenti fuerint per quindecim dies, in Decanatibus, ubi degunt, & in quo capti detinebuntur: ex tunc cessetur penitus a Divinis.

Quia per impunitatis audaciam fiunt, qui nequam fuerant, nequiores: attendentes, quod in nostra Dioicēsi quamplures, imo quasi omnes communiter majoris excommunicationis sententiam in ipsos latam adeo vilipendunt, quod excommunicatio, quæ ab initio medicinalis fuerat, per diuturnam inobedientiam & contemptum fit mortalis: volentes super hoc salubrem adhibere medelam, statuimus, ut postquam aliquis per annum (*iii*) excommunicatione perstiterit,

Dominus ejus temporalis, vel Superior, Bailivus, vel Præpositus, Castellanus, vel alius in eum jurisdictionem habens, moneatur & requiratur auctoritate ordinaria, ut ipsum excommunicatum, cujuscunque conditionis existat, infra mensem a tempore monitionis ejusdem compellat per bonorum captionem & personæ (si necesse fuerit) redire ad Sanctæ Matris Ecclesiæ unitatem. Alioquin ipse Dominus, vel Superior monitus, ex tunc excommunicationis sententiæ se noverit subjacere: & per singulas Ecclesias excommunicatus publice nuncietur.

Additum etiam fuit præsentī Statuto, quod si aliquis Sacerdos sacris vestibus indutus, volens Missam celebrare, viderit vel sciverit, aliquem excommunicatum esse in Ecclesia, in qua vult Missam celebrare, ipso excommunicato præsentē Missam nulloatenus celebrare præsumat: & quamvis sacris vestibus indutus Missam inceperit, & dictus excommunicatus contumaciter exire noluerit: Missam (nisi sit in Canone) dimittat, & sacris se exuat vestimentis. Cæteri vero fideles in Ecclesia præsentēs, si talem excommunicatum, vel tales excommunicatos in Ecclesia viderint, vel sciverint, hoc Sacerdoti celebranti, vel celebrare volenti manifestent: & nisi dictus excommunicatus exierit, omnes alii fideles exeant, & nullus cum ipso excommunicato Missam, vel alia Divina audire præsumat, si similem sententiam voluerint evitare.

Præsentēs autem Constitutiones ad Religiosos etiam exemptos, qui eas, & præsentēs sententias ac præmissa servare voluerint, extendi volumus & mandamus.

Sane de Canonicis & Abbatibus, Prioribus, Decanis nocte, vel in itinere extra villas, a laicis verberatis, seu captis, vel rebus aliquibus spoliatis: Statuimus, ut eis super verberatione, captione, seu spoliatione de verberatoribus, captoribus & spoliatoribus sine aliqua probatione credatur suo simplici juramento.

Abusores, & qui de cætero abutentur dicto Concilio, & qui super hoc falsum perhibuerint testimonium, & perhibent, excommunicamus.

Illis sub pœna prædicta præcipimus, & expresse inhibemus, ne quis impetrare præsumat dictum Concilium, præterquam persona læsa, vel spoliata, vel habens super hoc procuratorium, vel speciale mandatum ab eadem: vel nisi fuerit læsus in tali statu, quod non possit impetrare: quod si secus factum fuerit, illud irritum decernimus & inane, & tales impetratores, consilium & auxi-

auxilium super hoc præbentes, excommunicamus.

Item præcipimus & mandamus vobis & singulis Ecclesiarum Parochialium nostræ Civitatis & Dioicesis Bisuntinen. Rectoribus, Vicariisque, & aliis eorum loca tenentibus sub pœna suspensionis & excommunicationis (quam monitione trium dierum præmissa peremptoria & monitione Canonica vobis præfigimus, in vos ferimus in his scriptis, nisi feceritis, quod mandamus) ut quamprimum sciveritis, aliquos Decanos, Archidiaconos, seu Canonicos, nostræ Cathedralis Ecclesiæ Bisunt. Abbates, Curatos, vel Presbyteros, aut alios Clericos cujuscunque status, aliamve personam Ecclesiasticam nostræ Civitatis seu Dioicesis, a quocunque capi, seu captivari, vel captivam detineri: sine expresso mandato nostro, vel Officialis nostri, per quamcunque personam sæcularem seu Ecclesiasticam, absque expectatione alicujus literæ Concilii Bisuntinensis, vel alterius mandati: tales sacrilegos captivatores, detentores, & in his operem, auxilium, consilium, favorem, & juvamen (de quibus vobis constiterit, secundum formam Concilii Bisuntinensis, inspecto solo textu ipsius Concilii) nominatim & alios in generali excommunicatos de Canone publice nuntietis. Et nihilominus secundum illius Concilii textum, tenorem ad unguem firmiter observantes, & quæ inde fueritis executi, contra quem, & causam seu veritatem facti ipsius cessationis, quanto otius poteritis, Nobis, vel Officiali nostro, fideliter rescribatis.

Hactenus ex veteri Statuto de forma processus Concilii Bisuntinensis, sicut dictum est. Unde apparere potest, quantum nostra tempestate decesserit ex veteri honore Sacerdotum, bona parte horum Statutorum, quæ dignitatis Ecclesiasticæ causa condita fuerant, antiquata.

**N**OS IGITUR CLODIUS ARCHIEPiscopus supradictus Statuta hæc at-

que ordinationes, quemadmodum jam alias pro maxima parte descripta erant & distincta, nunc denuo examinata & communicata cum Reverendis & Venerabilibus Dominis Deputatis a Provinciali Synodo, & aliis, tam ex fratribus nostris, Ecclesiæ nostræ Metropolitanæ Canonicis, quam aliis Consiliariis nostris, Sacræ Theologiæ, & utriusque Juris Professoribus, stabilienda decrevimus, & tanquam salutaria Clero & Ecclesiæ nostræ, auctoritate nostra corroboranda, prout ea in præsentia corroboramus & stabilimus, statuimus & ordinamus: aliis præceptis doctrinæ, quæ ab ipsis Statutis & ordinationibus, literarum forma & charactere distincta sunt, & separantur, in suo genere (doctrinæ scilicet loco tantum) relictis. Quare ad Dei gloriam, & Sanctæ Ecclesiæ ejus Sponsæ honorem, fidei Catholicæ exaltationem, subditorumque nostrorum instructionem, & salutem, ea omnia, tam vetera Statuta Prædecessorum nostrorum confirmantes, quam nova (quæ nuper lata fuerunt) decernentes, legi & publicari in singulis Synodis posthac justinus & mandavimus, volumusque & mandamus, & ubi & quando, quoriesque Nobis, aut Vicario nostro expedire videbitur, denunciari decernimus: Ut per subditos nostros, perpetuo inviolabiliterque observentur. In hujus vero rei testimonium & robur, Nos manu nostra propria ipsis subscripsimus, & Sigillum Cameræ nostræ huic paginæ impressimus: Bisuntii in Palatio nostro Archiepiscopali, Calendis Julii, Anno Domini M.D.LXXIII.

C. ARCHIEP. BISUNTINUS.

*Recognitum post impressionem  
ANT. FOLLIUS mpp.*



SYN-



# SYNODUS ATREBATENSIS

Anno Christi MDLXX. Pii V. Papæ VI.  
Maximiliani II. Imp. VI.

## STATUTA SYNODALIA DIOECESIS ATREBATENSIS,

*Per Reverendissimum in Christo Patrem FRANCISCUM RICHARDOTUM, (\*) ejusdem Diœcesis Episcopum ordinata, cum veteribus Prædecessorum suorum piæ memoriæ Statutis adjectis.*

*FRANCISCUS RICHARDOTUS, DEI ET APOSTOLICÆ SEDIS GRATIA,  
Episcopus Atrebatensis, universo Clero sibi commisso & credito,  
Salutem in Domino.*

**N**on temere factum esse credimus, quod Legislator Moses, majore studio, ac numero, gerendi Sacerdotii leges, quam Magistratus administrandi sanxerit, quanquam hæc omnium ministeriorum culmina ejusmodi sunt, ut neutrum sine altero stare possit. Ille quidem qua lege Regibus, ac Reipublicæ Principi, vivendum sit, & imperandum, diserte præscripsit, ne sibi scilicet, uxorum magnum numerum aggreget, ne superbe & petulante effera-

tur, neve a via recta declinet: sed in legis volumine versetur, totamque servet. In Sacerdotio autem constituendo, id ipse tradidit, non modo Sacerdoti quid esset agendum; sed quo cultu, quoque ornatu in templum prodire, quo vitu ac tempore Sacris operari, quibus hostiis aras imbucere, quaque mundicia ministerium obire suum deberet, Divino monitus oraculo mandavit: idque non una, aut altera, sed innumera propemodum legibus. Illud ve-

70

(\*) Franciscus Richardotus, Burgundus natione, omni genere disciplinarum egregie excoltus, partaque hinc sibi fama scientiarum, virtutumque celeberrimus fuit. Adolescens Eremitarum S. Augustini Institutum complexus in Patria: inde Tornacum, ac dein Parisios missus, ibidem Epistolas S. Pauli explicuit. Reversus suis apud Philippum II. consiliis plurimum contulit, ut nova apud Duacenses Universitas excitaretur, primusque in eadem Sacræ Theologiæ Doctoris personam & munus gessit. Circa annum 1554. Antonio Perennotto, Cardinali Granvellano, cui suæ merito virtutis, doctrinæque charissimus erat, adnitante, Episcopus Nicopolitanus consecratus, Bisuntina in Metropoli Suffraganeum egit: Anno vero 1561. quo idem Granvellanus Cardinalis & Episcopus Atrebatensis ad Archi-Episcopatum Mechliniensem evectus fuit, eidem in Cathedrali Atrebatensi regenda successit. Difficillimo bellici in Belgio tumultus tempore, cum maxima prudentiæ laude per annos tredecim suæ Diœcesi sic præfuit, ut omnes boni Pastoris partes impleverit. Mirifica in eo fuit sermonis facundia, qua optimis inculpatæ vitæ exemplis animata, id evicit, ut commissum sibi populum non solum ab hæresi vindicaverit, sed in servanda etiam Principibus fide continerit. Tridentinam ad Synodum cum aliis Belgii Episcopis ac Doctoribus missus, luculentissimam ibidem ad Patres, quæ etiamnum exstat, Orationem habuit. Dixit & aliam in Concilio Provinciali Cameracensi, relatam a nobis Tomo præcedente, eximiiis laudibus a Paulo Manutio in Epistola ad Richardotum scripta commendatam, ut videre est in Manutii Epistolar. L. VI. Epist. 11. Plura alia reliquit publicis edita typis Ingenii sui, zeli quoque monumenta, quorum catalogum vide in Bibliotheca Belgica Clar. Francisci Foppens Tomo I.

Obiit die 26. Julii anno 1574. Sepultus in Cathedralis suæ Odeo, sub eleganti Mausolæo, quod ex marmore & alabastrite, Joannes Richardotus, Sororis ejus  
Tomus VIII. Concilior. German. F f filius,

ro eam potissimum ob rem ita factum, constitutumque esse judicari recte potest; quod cum in omni vitæ genere, servari integritas debeat, tum ea in ordine Sacerdotii maxime servanda sit, virtusque per omnes sui partes colenda: vix enim ulla ex re major ad hominum mores pernicies redire potest, quam ex Sacerdotii corruptela. Nam siue id quaeritur, ut doctrinam cælestis traditam, & ore Sacerdotio depromptam, populus approbet; siue id spectatur, ut & auctoritas ministerii nostri, & rerum sacrarum dignitas, in populo valent; nihil bonum consequi possumus, nisi & doctrinam Sanctitatis commendet, & ministerium nostrum integritas illustret. Heli Sacerdotis seculo in Laicos Israelis tadium colendæ religionis irrepserat, sed id improbitate filiorum ejus accidebat: quorum sordes, luxus & quæstus, ambitio, procaciterque petitus, rerum Divinarum contemptum intulerat in populum. Malicias quoque dure, & acerbe, sui temporis Sacerdotes increpat, quod amplissimis ac sanctissimis Ceremoniis instituti Sacerdotii dignitas, eorum sceleribus viluisset, quorum virtute illustrior esse debuerat. Gemmas fulgor, varitas, venustas, commendat; at hæc tamen in luto & stercore provolutæ, sordent: sic cum nihil sit Sacerdotii dignitate clarior & augustior, ea tamen nihil est inter homines abjectius, nisi sanctitate & moribus nostris excolatur. Hujus autem incommodi periculum, hac æta-

te, magno nostro malo facimus; nec spes est ulla, id abigi posse, quicquid afferri rebus nostris præfidii queat, dum ipsi ordini nostro nequitia nostra, labem aspergimus. Quoniam vero, ex deterrimis sæpe moribus, optimæ nascuntur leges; hæc improbitas multorum, tandem effecit; ut bonas, piasque mentes studium veteris disciplina revocandæ concitaret, & ad salutaria consilia captanda semel adduceret. Servavit sibi enim semper Deus, rebus ad exitum propemodum adductis, viros justo numero, pietatis & salutis publicæ studiosos, ut Elia seculo factum legimus; segetem scilicet ubertatis futuræ, per quos sua tempore, majorum virtus restoret in posteris, & veterum excuti ille possit, quo misere hominum pars bona laborabat. Quid igitur actum? quæve antidota quæsitæ, quibus hic morbus publicus depelli posset? Sancta Sedes Apostolica, & amplissimus ille Ecclesiæ Romanæ Senatus Concilium Oecumenicum collegit, quo de doctrina & moribus eorum, qui nomen Christo dedissent, de veteri disciplina revocanda, de Sacramentorum usu, cultuque diceretur; in quo Patres ex orbe toto Christiano, Tridenti congregati, id inter cætera censuerunt oportere, singularum Provinciarum ac demum Diocesum Synodos & Conventus, negligentia diutius intermissos, haberi; ut quicquid, vel temporum injuria collapsum, vel impostura præpostere receptum, vel improborum licentia neglectum esset

filius, qui Richardoti adoptavit nomen, Artesiæ primo, post intimi Præses Concilii poni curavit, hoc addito Epiraphio:

D. O. M. S.  
FRANCISCO RICHARDOTO BURGUNDO,  
ATREBATIUM EPISCOPO,

VIRO IN OMNI DISCIPLINARUM GENERE  
VERSATISS. ET CONCIONATORI ELOQUENTISS.

QUI OB SINGULAREM DOCTRINAM,  
ET PRÆCLARAS ANIMI DOTES

OMNIBUS ORDINIBUS UNICE CHARUS,  
POSTQUAM HANC ECCLESIAM PERICULOSIS  
TEMPORIBUS INGENTI DEXTERITATE, ET  
ASSIDUIS CONCIONIBUS

ANNOS IPSOS XIII. FELICITER REXISSET,  
MAGNO SUI RELICTO DESIDERIO  
ANNUM ÆTATIS AGENS LXVIII.

■ VIVIS EXCESSIT:

JOANNES RICHARDOTUS

PHILIPPO II. HISPANIARUM REGI  
A REBRUM STATUS SECRETISQUE CONSILII  
AC LIBELLIS, ET ARTESIÆ PRÆSES,  
AVUNCULO OPT. NEPOS MOESTISS. POS.  
OBIIT VII. KAL. AUG. MDLXXIV.

Vide Moreri Dict. Histor. Foppens Bibliothec. Belgic. & Joann. Bapt. de Castillon  
Sacram Belgii Chronolog. P. II.

esset in Ecclesijs, id posset communibus votis & auctoritate publica restitui, corrigi, reduci. Neque sane hæc fuit penitus supervacanea, & inanis opera. Nam singulari DEI Optimi, Maximi beneficio, jam videtur sydus aliquod propitium nobis affulgere, quod hanc deformatæ vitæ prioris caliginem, ex Christiana Re publica sensum abigat; & priscae sanctimonie, saltem vestigia reponat. Jam ardere multos gloriæ Divinæ propagandæ desiderio majore, quam prius, cernimus. Jam Pastores, multis locis cum doctrina sana, tum moribus integris, præluere conspiciamus. Jam pleraque Monasteria, Cænobia, Collegia, specimen præbere lucis ceperunt, virtutis, ac pietatis excolendæ. Jam timor Numinis animos in Clero multorum afficit. Se Episcopi non ad ocium, sed negotium vocatos intelligunt, & Provinciam suam labore, ac diligentia fideliter obeunt. Nos itaque, quia in eadem sorte ministerii, Christus Pastorum Princeps censeretur voluit, induximus jam pridem in animum, si qua ratione illorum conatus effectuari; vel imitatione quadam possemus, ac semel perficere, ut Clerus, populusque noster ad eas res, studium intendat: quibus & Christiani nominis bonos & salutis Christi merito parva, comparari queat. Synodum itaque nostram, frequenti consensu, per DEI gratiam celebravimus, quod DEUS bene vertat; & veteribus Majorum ac Prædecessorum nostrorum Statutis quædam, ut res & occasio postulare visa est, adjecimus; quæ eo maxime spectant, ut fides, Verbo DEI & Apostolica doctrina stabilita, pias mentes, adversus omnes hæreticorum technas & machinas, muniat: ut Ecclesiæ Sacramenta recte & erudite tradantur, cultus Divinus, pie ac religiose procuretur: vita & mores instituto, & ordini nostro respondeant. In quo tamen si progressus sit languidior, quam v. llemus, tamen nos fructum aliquem nostræ hujus propensionis, DEI incrementum dante, ad horrea Domini redditurum speramus. Ea est quidem humanarum virium imbecillitas, ut ultero præcipites ruamus ad deteriora, anxie autem & ægre, ad potiora consecramus. Sed omnia tamen in eo possumus, qui nos confirmat. Quare emendandum nobis est nervis omnibus, ut stadium semel ingressi, propositum nobis bravium constantia, & perseverantia, fortiter apprehendamus. Animum vero nobis, & spiritus augere facile possunt, ne ordinem, stationemque deseramus, neve gradum revocemus, Sanctorum exempla, merces sempiternæ felicitatis piis proposita, periculum, quod cervici-

Tomus VIII. Concilior. German.

bus officii desertorum, imminet. Sacerdos, in iis quæ sunt ad DEUM, constitutus est; non tantum autem in iis, quæ sunt ad homines: quanta igitur munditia, quanta innocentia præditus, quam defæcatus, & excoctus, ac ob omni macula repurgatus, in Divinum conspectum prodire debet sacrificaturus, oblaturus, interpellaturus? Demus esse aliqua ex parte tolerabile, si Pastor, Doctor, Parochus, ad plebem concionetur vicio aliquo notatus, at si in aditum ac penetrabile Divini colloquii se conferat illotus, si scelere & flagitio contaminatus, quibus panis hæc temeritas satis expiari potest? Voce Domini territus generis humani parens ab eo profugit: pudebat enim hominem nuditatis suæ. An nos non pudeat, vultui Divinitatis astare, sordidos & impuros? Exhorruit Esaias, quod Majestatem Divinitatis aspectasset, cum pollutus esset labiis. Quid si polluta conscientia, prodeas in Domini Sanctuarium? Perspiciate Fratres, quanta sedulitate, quantisque jejuniis, vigiliis, meditationum exercitiis, Moses, Daniel, Hesdras, se ipsos ad Angelorum congressus, & oracula componebant: quorum nos exemplo summam tota vita degenda, innocentiam colere, & si quid maculæ, per infirmitatem, aut infirmitatem, contractum est; penitentia illud eluere, mentemque ad cælestes delicias, precibus erigere, res sacras aggressuri, & in arcam Sanctuarii subituri debemus: id est, Mysteria Corporis & Sanguinis Christi celebraturi. Considerate, quantum referat Ecclesiæ ac salutis publicæ, nostri ordinis homines, quocumque gradu sint constituti, servare fidem in religione, pietatem in cæremoniis, gravitatem in moribus, diligentiam in ministeriis, charitatem in officiis: quæ omnia quo facilius & melius exequi possimus, Scriptura præceptis, Ecclesiæ traditionibus, Patres Canonibus, Decretis, ac Statutis, nos erudiunt & instituunt. Quare vos in Domino monemus, obsecramus, & obtestamur, uti per omnia, decorum personæ servetis, quam agendam in hac scena suscepistis. Mandamus autem omnibus, in Clero nostro jurisdictioni nostræ, subditis, ac maxime Decanis & Pastoribus, ut diligenter hæc nostra Statuta teneant, observent, & observari curent. Cæterum, cum Illustrissimus ac Reverendissimus Dominus Antonius Perenotus, Cardinalis Gramvellanus, quo tempore hujus Ecclesiæ gerebat Episcopatum, pro sua pietate ac diligentia, antiqua Majorum nostrorum Statuta recognosci per homines pios & doctos curaverit, ea ipsa Statuta nostris adjungi vo-

F f 2

luimus



luimus, quæ servari mandamus, ut nostra: ita tamen, ut si quid contineatur in illis, quod Tridentino atque Cameracensi Conciliis mutatum, aliterve constitutum fuerit, locum non habeat, sed auctoritati cedat Sanctæ Matris

Ecclesiæ Catholicæ & Apostolicæ. Faxit autem Christus, idem Rex, idem Pontifex noster, ut post tantas tenebras, optata luce & tranquillitate frui ac gaudere possimus.

## INDEX TITULORUM.

- I. De Fide Summæ Trinitatis, & doctrina Religionis Catholicæ.
- II. De Sacramentis in genere.
- III. De Baptismo.
- IV. De Sacramento Confirmationis.
- V. De Sacramento Penitentiae.
- VI. De Eucharistia.
- VII. De Sacramento Ordinis.
- VIII. De Matrimonio.
- IX. De Sacramento Extremæ Unctionis.
- X. De Vita & honestate Clericorum.
- XI. De Decanis Christianitatis, seu Archipresbyteris.
- XII. De Pastoribus.
- XIII. De Visitationibus.
- XIV. De Cultu & Officio Divino.
- XV. De Lectionibus.
- XVI. De Fundationibus & Exequiis.
- XVII. De Monasteriis.
- XVIII. De Hæreticis, & eorum libris.
- XIX. De Excommunicatione, Censuris & monitione.

## INDEX STATUTORUM ANTIQUORUM.

- I. De modo veniendi ad Synodum.
- II. De Sacramentis in genere.
- III. De Baptismo, & ejus effectu.
- IV. De Confirmatione.
- V. De Sacramento Confessionis.
- VI. De Casibus reservatis Episcopo.
- VII. De Eucharistia.
- VIII. De Celebratione Missarum.
- IX. De Oblationibus in Missa faciendis.
- X. De Celebratione Horarum Canoniarum.
- XI. De Processionibus.
- XII. De Prædicatione Verbi Dei.
- XIII. De Matrimonio.
- XIV. De Sacramento Ordinis.
- XV. De Sacramento Extremæ Unctionis.
- XVI. De Penitentis & Remissionibus.
- XVII. De non residentibus in suis beneficiis.
- XVIII. De Receptione Clericorum, & eorum Præsentatione.

- XIX. De pluralitate Beneficiorum.
- XX. De rebus Ecclesiæ non alienandis.
- XXI. De Vita & honestate Clericorum.
- XXII. De Scholis & Magistris.
- XXIII. De cessione bonorum facienda.
- XXIV. De Usuris & usurariis contractibus.
- XXV. De Testamentis.
- XXVI. De inhumatione Corporum.
- XXVII. De Privilegiis & Privilegiatis.
- XXVIII. De Veneratione Ecclesiarum vel Cæmeteriorum.
- XXIX. De Immunitate Ecclesiarum vel Cæmeteriorum &c.
- XXX. De Refectione Ecclesiarum.
- XXXI. De Domibus Beneficiorum.
- XXXII. De Festis colendis.
- XXXIII. De Observatione Jejuniorum.
- XXXIV. De Purificatione post partum.
- XXXV. De Domibus Religiosorum.
- XXXVI. De Mandatis Curiae observandis & exequendis.
- XXXVII. De Executione Mandatorum Judicum delegatorum.
- XXXVIII. De Abusoribus.
- XXXIX. De Portitoribus Literarum.
- XL. Qualiter venientes ad Curiam debent plena libertate gaudere.
- XLI. De Clericis captis, & eorum bonis.
- XLII. De Sententia Excommunicationis, & ex quibus causis &c.
- XLIII. De Interdicto non violando, & qualiter interdicto durante sit celebrandum.
- XLIV. De tribus Conciliis Provincialibus, & primo de Concilio Compendiensi &c.
- XLV. Concilium Sylvanectense.
- XLVI. Concilium Novionense.
- XLVII. De Promotoribus.
- XLVIII. De Procuratoribus.
- XLIX. De Revocatione Gratiarum.
- L. De Quæstoribus & Abusoribus.
- LI. Constitutiones Synodales MARTINI Episcopi.
- LII. Statuta Concilii Remensis.

I. De

*I. De Fide Summæ Trinitatis,  
& Doctrina Religionis Ca-  
tholicæ.*

C A P U T I.

**F**ides initium est ædificationis Ecclesiasticæ, sine qua in oculis Domini nulla virtus, nullumque meritum potest subsistere: est enim rerum sperandarum Hypostasis, ita, ut spes futuræ vitæ nulla certa esse queat, nisi fide vera, non ficta: integra, non mutila sustentetur. Quare mandamus in primis omnibus personis Ecclesiasticis, curam animarum & regimen Ecclesiarum habentibus: uti per omnia doctrinam fidei, juxta Verbum Dei, & Sanctæ Matris Apostolicæ & Catholicæ Ecclesiæ traditionem, solide teneant, Symbola tum Apostolorum, tum Nicenæ Synodi, & Athanasii sciant, & pro suo quisque captu intelligere contendat, sequanturque per omnia, quæ de Sancta Trinitate & Fide Catholica, Innocentius Tertius in Concilio Generali, Gregorius Decimus in Lugdunensi, Clemens Quintus in Viennensi Conciliis, tradiderunt.

II.

Volumus insuper; ut quotquot regundis Ecclesiis præfecti sunt, & Pastoris in Ecclesia nomen sustinent, hi doctrinam Articulorum fidei, Præceptorum Decalogi, Sacramentorum Ecclesiæ, vim & rationem Orationis Dominicæ probe perdiscant & teneant: quam doctrinam frequentius populis suis explicent, simulque Præcepta Sanctæ Matris Ecclesiæ doceant, benignitatisque Divinæ largitatem erga pios, misericordiæ promptitudinem erga pœnitentes, furorisque sui pondus adversus impios, sceleratos & contumaces exponant, & in suis concionibus ad officia virtutum alliciant, a vitiis autem serio deterreant.

*II. De Sacramentis in genere.*

C A P U T I.

**Q**uoniam Pastorum interest, non tantum plebem docere, sed fidelibus rite pieque Sacramenta &

Mysteria Ecclesiæ ministrare, nec spes est, posse ex illis tam uberem fructum percipi; nisi accedat doctrina, qua rudiores aliqua ex parte vim, efficaciam & usum legitimum intelligere queant; hinc fit, ut serio præcipiamus omnibus Pastoribus, ut in Sacramentorum administratione, semper aliquid adferant ad explicandam institutionem & utilitatem Sacramenti; ex quo præsentis ædificationem aliquam capiant: uti jam a nobis alias constitutum est, traditis ad compendium hujus rei formulis.

II.

Cæterum mandamus, ut hæc Sacramenta reverenter, cordate & diligenter ministrent; ne temere & negligenter tam Sanctum Ministerium ob-eant: omnes autem avaritiæ sordes, & quæstus inhonesti & reprobatæ suspiciones evitent; ne mercedem (quasi in rebus Sanctis & Spiritualibus commutatio ulla justa esse queat) vel capient procaciter, vel exigant sordide.

III.

Sed tamen, ubi solidi fructus nulli sunt, aut exigui beneficiorum curatorum, & minores, quam ut sufficiant alimoniam Pastorum: si populus se durum & avarum præbeat, nec liberaliter pro suo quisque modulo aliquid conferat Pastoribus, Sacramenta ministrantibus; agi debet cum Majest. Regia, ut iisdem Pastoribus, greges necessaria commode provideant, si per decimas personales, quas certum est cessisse consuetudini laudatæ, qua populus pro ministratione Sacramentorum liberaliter honorarium aliquod impendere solebat: si alia quavis ratione: alioqui valde esset inhumanum, laborem Pastoralis officii requirere sine justa mercede, & sublata omni ratione parandi victus & vestitus.

*III. De Baptismo.*

C A P U T I.

**B**aptisaturus Presbyter se præparet oratione, sit sobrius, ac, si fieri potest, jejunos: cæremonias honeste, ac reverenter expleat: Catechismum non perfunctorie, sed distincte pronun-

nunciet. Verba autem Sacramentalia attente & distincte proferat: nec ferat Pastor Baptismum quavis de causa differri, sed propter periculum moneat Parentes infantum, ut primo quoque tempore eos baptisari curent. Baptismus autem in Ecclesia conferatur, nisi gravis aliqua causa & necessitas postulet. Plures susceptores, aut susceptrices, quam ex Concilio Tridentino conceditur, non admittant. Qui hoc mandatum contempserit, castigabitur Canonica poena.

## II.

Præcipimus item, ut antequam accingatur Presbyter ad Baptismum conferendum, si dubitatur de Parentibus; ut auctoritate nostra Ordinaria sub poena excommunicationis, obstetricibus mandet & susceptoribus, declarare nominatim Parentes infantum, locum ubi habitent; ut possit inscribi, quo die baptisari, quibus Parentibus orti, quibus Susceptoribus in Ecclesiam adducti & ad Baptismum oblatis fuerint.

## III.

Pastor, aut quivis Presbyter baptifans, susceptores, ac susceptrices admoneant officii sui: publiceque usum, efficaciam, institutionem & fructum Baptismi (ut locus, tempusque ferre poterunt) breviter explicet.

## IV.

Servet Pastor registrum (quod vocant) in quo nomina Baptisatorum, Parentum & Susceptorum inscribantur: quod registrum teneatur exhibere cum opus fuerit, & integrum successori relinquere. Explicet præterea, cum quibus personis susceptores cognitionem spirituales contrahant ex præscripto Decreti Tridentini. Scilicet quod cum baptisato, & ejus parentibus & baptisante tantum, ineant ejusmodi cognitionem & propinquitatem spirituales.

## V.

Reliqua autem, quæ pertinent ad hujusmodi Sacramenti ministrationem, servare præcipimus, juxta Prædecessorum nostrorum piæ memoriæ Statuta Synodalia. Sed illud inprimis serio

mandamus, ne pueros, aut prorsus ignaros susceptores admittant: aut qui Symbolum fidei, & Præcepta Decalogi, & Orationem Dominicam probe non teneant.

## IV. De Sacramento Confirmationis.

## CAPUT I.

Confirmationis mysterium & Sacramentum magnas utilitates rite suscipientibus adfert, propter donum roborantis & Confirmationis Spiritus Sancti, qui haud dubie piorum animis jam in Christo renatis, ad uberiores gratiam per impositionem manuum & hujus Sacramenti ministrationem, & Ecclesiæ orationem illabitur. Propterea præcipimus omnibus Pastoribus, & Ecclesiarum Rectoribus, ut sæpe moneant populares in Parochiis suis; ne hujus Sacramenti susceptionem negligant, aut in extremam senectam differant. Hortentur quoque, ut ad hoc suscipiendum, oratione & affectu pio, atque peccatorum confessione, si adsit opportunitas, se præparent: atque ante omnia curent, ut quotquot se huic Sacramento offerunt; teneant latina, & vernacula lingua Orationem Dominicam, Symbolum Apostolorum, Præcepta Dei & Ecclesiæ: sciantque confessionem dici solitam initio Missæ.

## V. De Sacramento Pœnitentiæ.

## CAPUT I.

Sacramentum Pœnitentiæ, ejusque partes, Pastores sæpius ovibus suis explicent: maxime vero circa ea tempora, quibus aut ex præcepto, aut ex laudabili & religiosa consuetudine, solent populares confiteri peccata sua; ut intelligant, quæ sit vera contritio, quamque sit efficax seria præteriti peccati detestatio. Doceant omnes veræ integræque confessionis circumstantias, quanta humilitate scilicet, quanto animi dolore, quanta spe misericordiæ; quantaque integritate & veritate, in explicandis latebris conscientiarum suarum ad hoc Sacramentum accedere debeant. Doceant insuper, quam religiose satisfactionem explere, & quam

armo



firmiter proposito statuere debeant, ne rursus in peccatorum sentinam recidant. Sed ante omnia doceant, remissionem peccatorum & expiationem, merito Sanguinis Christi Domini nostri præcipue niti, & ab eo pendere, etiam si necessaria sit satisfactio, quæ auctoritate clavium imponitur.

## II.

Pastores diligenter considerent ovilia sua & inscribant singulos, qui (semel in anno saltem) confessi fuerint peccata propria, idque proprio Sacerdoti, aut alteri idoneo, qui hujus rei potestatem habeat ab ipso Pastore; ut intelligat, & plane cognoscat in suis gregibus, an sint aliqui, qui hoc Sanctum Ecclesiæ Præceptum negligant; quos tenebitur notare ac deferre. Quod si quis contumaciter contempserit, Ecclesiæ mandato parere; prohibeatur aditu & ingressu ipsius Ecclesiæ, dum vivit, & non resipit; mortuus Ecclesiastica sepultura privetur.

## III.

Mandamus præterea Pastoribus, ne suo loco ullos Sacerdotes ad confessiones audiendas admittant, nisi probatos & admissos; si secus fecerint, puniantur graviter: quia valde dedecet, nec sine gravi periculo permittitur, ut rudes & indocti hoc ministerium subeant: quando quidem ea in re opus est magna diligentia, cautione & peritia ad consulendum, increpandum, consolandum & leniendum, ut res & occasio postulaverit.

## IV.

Nemo præterea, sive Regularis, sive Laicus circa festum Resurrectionis Domini (id est, tempore Quadragesimæ) confessiones pœnitentium audiat, sive absolvat; sine scitu & licentia Pastoris: cujus unius interest, saltem semel in anno, suas oves recognoscere.

## V.

Et quia Nobis relatum est nonnullos Sacerdotes tam Religiosos, quam laicos; officium Pastoris in purificandis puerperis usurpare (quamvis id sub sententia excommunicationis sit prohibi-

tum) Nos propterea denunciavimus eandem sententiam a jure latam, contra quoslibet, cujuscunque sint conditionis, qui id attentaverint, qui hanc Constitutionem contempserint, statim Officiali nostro renunciarent, ut declarentur excommunicati.

## VI.

Præcipimus præterea omnibus Pastoribus, ut diligenter pœnitentes admoneant, ne per incuriam ea peccata putent esse nulla, quæ tamen gravia sunt in oculis Domini: cujusmodi sunt illa omnia, ex quibus incurritur in excommunicationis sententiam. Cujusmodi etiam sunt fraudes, imposturæ, & rerum alienarum, sive sacrarum, aut prophanarum, sive sint publicæ, sive privatæ, detentiones injustæ, nec eos temere absolvant, nisi firmiter proposito restituendi, quod injuste detinetur.

## VII.

A sententia autem majoris excommunicationis non absolvant, sive sit a jure, sive sit ab homine lata; quod idem prohibemus districte tam Religiosis, quam sæcularibus Sacerdotibus, ne quid hujusmodi audeant.

## VIII.

Permittimus autem tantisper, dum ita videbitur fieri convenire, ut Pastores, & alii hujus rei potestatem habentes, a casibus Nobis alias reservatis, pœnitentes absolvant; præterquam ab excommunicationis sententia, hæresis crimine, homicidio voluntario, & nephanda libidine.

## IX.

In Ecclesiis Cathedralibus, & aliis Collegiis Canonorum, qui curam animarum gerunt, sive Præpositi, sive Decani, habito Capituli consilio, quosdam viros bonos, probos Presbyteros eligant, qui, de licentia tamen nostra, prius accepta, possint confessiones audire suorum, & eosdem absolvere ab iisdem casibus, ut prædictum est.

## X.

Nemo, nisi obtenta Pastoris, propriæque Sacerdotis facultate ad munus absol-

absolvendi pœnitentes, confessionesque audiendi, se conferat: nisi eam potestatem a Nobis acceperit. Quam potestatem si cui concedemus, ita tamen concedemus, ut proprio Sacerdoti semel in anno confiteri debeant.

## VI. De Eucharistia.

### CAPUT I.

**S**acrosanctam Eucharistiam, qua Corpus & Sanguis Christi continetur, summa religione, pietate, & reverentia consecrandam, offerendam, sumendam, ac distribuendam esse, certissimum est. Qua in re si quid vel per incuriam, vel per contemptum, aut quavis alia indignitate peccetur, tum gravissime & perniciosissime peccatur. Quare districte mandamus & præcipimus, ut Sanctissimum hoc, ac Divinissimum Sacramentum Sacerdotes celebraturi, se præparent & probent. Et idcirco mandamus, ne cui liceat in Diocesi nostra, Missas & Sacrificia celebrare, de cuius vita, moribus & fide, etiam per literas a Nobis concessas & fidem facientes, non constiterit.

#### II.

Teneant Presbyteri, & diligenter advertant omnia Sacrificii Missæ mysteria, quo majore reverentia & cultu, majoreque fructu hanc salutarem Hostiam, Deo pro salute fidelium offerre queant, in memoriam ejus cruenti Sacrificii, quod Christus pro salute generis humani in Crucem sublatus obtulit.

#### III.

Frequenter hujus tanti Sacramenti sublimitatem, institutionem, usum legitimum & fructum pie sumentibus exponant; ac præcipue, quando fidelibus sumendum distribuitur. Cere monias autem in Missa servari solitas (ne propter hæreticorum probra & contumelias in contemptum veniant) Pastores subinde suis popularibus, pro captu & ratione loci ac temporis exponant.

#### IV.

Præterea idem Sacramentum servetur loco mundo, & vase honesto ac puro, renoveturque bis, ut minimum,

singulis mensibus: feratur ægrotis, sed reverenter, ut decet, & a Majoribus Nobis traditum est: caveaturque, ut vel plures, vel saltem duæ Hostiæ ferantur, ne in redeuntis Ministri manibus inane & vacuum vasculum populus adoret, deturque laborantibus & ægris, modo nullo vomitus periculo, liceat; sed ita tamen detur, ut intelligant esse viaticum salutis, tesseram remissionis peccatorum, symbolum & signaculum testamenti Christi, ad firmandum animum ægotantium & de vita periclitantium, & fidem, spemque illorum fulciendam adversus insultus Satanz. Propterea dent operam Pastores, ut viva & pathetica oratione, ægrotos excitent, quo firmissime credant, hoc Sacramento piis mentibus Christum cum suis donis exhiberi.

#### V.

Pastores etiam moneant Patresfamilias, ut liberos, ubi ætatem idoneam nacti fuerint, ad hujus Sacrosancti Mysterii perceptionem inducant, & offerant Ecclesiæ, ut hoc sanctissimo pabulo pasci & educati, in omne opus bonum crementa suscipiant.

## VII. De Sacramento Ordinis.

### CAPUT I.

**Q**uotquot ad Sacros Ordines promovendi ad Nos, vel Vicarios, Archidiaconosve nostros se conferent examinandos; volumus literas testimoniales exhibere, quibus certum fiat de vita & moribus, qua in re ne qua fraus committi queat, servari præcipimus Decretum Concilii Cameracensis Provincialis, ut uno mense, priusquam sint ordinandi, in Ecclesia publice significetur, quod ad Sacros Ordines proxime futuros cupiant admitti, ut, si quod impedimentum produci queat, ne promoveri debeant, Nos, nostrique Vicarii certiores facti, vel differamus, vel omnino remittamus.

#### II.

Tonsura non detur, nisi ætate idonea, quam exprimi volumus in literis, nec admittantur, nisi qui legere expedite norint, quique fidem faciant, se

eo

eo animo hunc gradum optare, ut Deo & Ecclesiæ serviant.

## III.

Præcipimus item, ut pridie ejus diei, quo Ordines celebrari debent, adsint hora octava ante meridiem in æde Episcopali nostra, non tantum examinandi, sed instituendi, si facultas dabitur.

## IV.

Titulos Patrimoniales a Decanis, seu Archi-Presbyteris Christianitatis approbandos offerri Officiali nostro volumus & diligenter examinari, ut sit in Metropolitana Ecclesia Cameracensi, & reliquis Episcopatibus hujus Provinciæ: nec non jusjurandum interponi ab his, qui eos titulos habebunt: quod eos servabunt, nec ejurabunt, aut in alios conferent, nisi obtento beneficio ad alimoniam sufficienti.

## VIII. De Matrimonio.

## CAPUT I.

**Q**uod attinet ad Sacramentum Matrimonii, præcipimus ea omnia servari, quæ Decretis Conciliorum Tridentini & Cameracensis constituta sunt. Caterum Pastores doceant, vinculum esse Divinitus firmatum, & in Matrimonio Christiano imaginem extare Sacrosancti Conjugii, quod inter Christum & Ecclesiam intercellit.

## II.

Doceant, præterea Ecclesiæ benedictionem in Sacramento contrahendo nullo modo contemni debere: quia ea plurimum conferre potest ad incolumitatem & felicitatem rei familiaris, ad pacem & concordiam fovendam inter partes, ad prolem suscipiendam, & cætera omnia Matrimonii bona.

## III.

Doceant insuper, Matrimonium rem esse sacram, ac præterea loco sacro celebrari debere, quoad fieri possit.

## IV.

De impedimentis autem Matrimonii, quoniam iisdem Conciliis Tridentino & Cameracensi abunde definitum

*Tomus VIII. Concilior. German.*

est, ea omnia ita observanda declaramus, ut rectissime constituta sunt.

## IX. De Sacramento Extremæ Unctionis.

## CAPUT I.

**H**oc Sacramentum religiose ferant Pastores laborantibus in extremis, qui eundo, Psalmos, precesque consuetas devote & attente recitent. Ægrotis omnia ex Sacris Scripturis & traditionibus adferant, quibus fides spesque in Deum stabiliri possit: moneantur ægroti suam fidem, quam in Baptismo susceperunt, aperte & libere profiteri, Christi & Sanctorum Patrocinium interpellare, promissiones Divinas pœnitentibus factas, & in Christum credentibus oblatas & consignatas, revocent in memoriam: ostendant, non esse in potestate cujusquam, oves Christi rapere de manu ejus, nec posse perire animam, quæ toto corde per Christum (qui est ostium) feratur in Deum Patrem.

## II.

Quoniam vero & charitas, & ratio Pastoralis officii requirunt, ut sæpius ægrotantes invisamus, ac eos maxime, qui versantur in mortis periculo: eosdem Pastores in nomine Domini nostri JESU CHRISTI monemus & hortamur, ut ægrotos suos frequenter visitent; & initio ad pœnitentiam & confessionem hortentur: quibus ostendant, quam lubrica sit & incerta hujus vitæ statio: ut pie disponant res suas; ut, si quid est injuriarum, aut malevolentia, quibus in propinquos suos peccaverint; in tempore rationem ineant, qua parta benevolentia & reintegrata concordia omnem simultatem deponant, & pro injuria satisfaciant: sed ante omnia beneficium Christi proponant, & Dei erga pœnitentes misericordiam.

## X. De Vita &amp; Honestate Clericorum.

## CAPUT I.

**C**lerum oportet non tantum doctrina, sed vitæ integritate cæteris prælucere, & iis dotibus animi orna-

G g

tum



tum esse, quas Apostolus in Episcopis, Presbyteris, Diaconis ostendit. Quare omnes & singulos Ordines Ecclesiasticos, quemcunque locum teneant, monemus in Domino, ut vitam omnibus virtutibus informatam, nullis autem sceleribus contaminatam ducant: ne qui reliquis exemplo esse debent, sint scandalum. Ante omnia, ut Deum religiose colant: gravitatem in gestu & moribus externis, ordini suo convenientem, retineant: castitatem ac sobrietatem præseferant, officia charitatis præbeant, nec verbo, nec facto ullam injuriam inferant.

## II.

Si quis autem vel Pastor, vel Presbyter, vel in Sacris Ordinibus constitutus, in tabernis potioris versetur extra necessitatem, & præter ordinis honestatem; præcipimus nulla dissimulatione a Pastoribus & Decanis, huic Officiali nostro deferri, & pro ratione peccati severe puniri. Quicumque autem temulentus fuerit, contumelia ordinis Ecclesiastici, carcere & jejuniis puniri mandamus: ebriosos autem, id est, quibus consuetudo est, ebrietatem sectari, nisi castigati ac moniti resipiscant, volumus omnino Sacrorum ministeriis arceri. Quod si hujusmodi aliquos vel Decani, vel Pastores per dissimulationem tolerant, eosdem ut sceleris fautores per Officiale nostrum castigari & puniri mandamus: atque eo severius, quod nullum peccati genus sit, quo solutius & laxius se polluant Ecclesiastici, quam ebrietatis vicium, cum gravissima & intolerabili contumelia Ordinis Ecclesiastici.

## III.

Si quis Sacerdos, aut in Sacris constitutus, aut laicus, mulieres quocunque prætextu apud se retineat, quarum fama maculam turpitudinis inter populares habeat, aut quæ vehementi suspitione incontinentiæ laborent, moneantur illas a se remove: ipsæ vero mulieres ita suspectæ, ter monitæ, nisi decesserint, agi cum Magistratu debebit, ut exire loco compellantur, ut auctoritate ejusdem ejiciantur.

## IV.

Quicumque autem in crimine incontinentiæ deprehensus fuerit, carcere & jejuniis ad sceleris castigationem, juxta Concilii Tridentini Sanctiones nulla remissione punietur: nec ipse tantum, sed si qui peccatum dissimulent, cum prodere deberent, arbitrio nostro, vel Officialis nostri castigantur.

## V.

Prohibemus præterea, ne Sacerdotibus liceat secularia ministeria, aut exercitia minus honesta, aut quæ statui Presbyterii derogent, subire, aut exercere commercia contra decorum Ordinis Ecclesiastici.

## VI.

Pastores, seu Sacerdotes Notarii munus non exercent, nisi in casibus a jure permissis & concessis.

# *XI. De Decanis Christianitatis, seu Archi-Presbyteris.*

## CAPUT I.

**D**ecani omnes Christianitatis nostræ Diocesis serio moneant Rectores Parochialium Ecclesiarum suorum Decanatum; ut solcite considerent & observent, sintne aliqui in suis Parochiis, qui sinistre & male de Fide Catholica sentiant; sine ulla dissimulatione quotquot hujusmodi homines reppererint hoc vicio laborare, renuntient nominatim eisdem Decanis, qui tenebuntur singulis mensibus semel dictos Curatos monere, & ab eis sciscitari super hoc, & ubi informatione facta compererint aliquos, teneantur statim Officiale nostrum certiores facere, ut præcludatur via omnibus scandalis & hæresibus.

## II.

Decani diligenter advigilent, ne in cultu Divino, caeremoniis, aut hujusmodi rebus, quæ ad religionem pertinent, ullus abusus aut superstitio possint irrepere, aut si qua irreperit, statim nos moneant, ne hoc malum per incuriam radices agat.

## III.

## III.

Curent ipsi quoque, ut cultus Divinus pie & religiose in Ecclesiis Parochialibus perficiatur, ac idoneo tempore, ut in Cameracensi Provinciali Synodo præcipitur.

IV.<sup>o</sup>

Dicti Decani & Curati advertant super ratione instituendi juvenes in literis, & maxime de religione, moribus & doctrina Ludimagistrorum, certiores fieri curent. Inprimis autem sciant, qui libri legantur, neque patiantur legi aut doceri, ex quibus ingenia pueritiæ corrumpi possint: moneantque eosdem Ludimagistros, ut discipulos doceant Præcepta Dei, Symbolum Apostolorum, Orationem Dominicam Latine & Gallice, & alia, quæ pertinent ad pietatem, & ne ab eisdem Decanis contemnatur hic Articulus:

Præcipimus quoque, ut ipsi Decani renunciarent per literas, aut alio modo, quomodo procedatur in institutione dictæ juventutis.

## V.

Iidem Decani considerent diligenter, an Pastores exequantur, quæ prius a Nobis mandata fuerunt, scilicet, ut singulis saltem mensibus die Dominico jubeant congregari minores Parochiarum suarum; ut cognoscant, an iidem juvenes teneant memoria Symbolum Apostolorum, Orationem Dominicam, Præcepta Dei & Ecclesiæ, ut jam dictum est. Qua in re si qua negligentia committatur ab eisdem Pastoribus, iidem Decani certiores nos faciant. Ut autem pueritia & minor ætas commodius possit institui, hortamur Patresfamilias, Præceptores & Ludimagistros, ut libellum, cui titulus est: *L'Enfance du Chrestien*, Duaci ad hanc rem judicio nostro editum, tradant pueris, filiis, discipulis, cum literarum rudimentis ediscendum; ut ab ineunte ætate sementem veræ pietatis & religionis capiant.

## VI.

In Capitulis Decanatum ruralium sumptus fiant moderati ac tenues: servetur frugalitas & honestas: caveant

*Tomus VIII. Concilior. German.*

que Decani, ne quid exigant a Pastoribus præter ea, quæ jure & legitime recipi debent. Cujus rei Officialis noster curam suscipiat, Nobisque renunciet, an iidem Decani, aut Promotores, præterquam, quod æquum est, & constitutum fuerit in formulis Curie nostræ, a Pastoribus extorqueant, ut huic malo tempestive provideatur.

XII. *De Pastoribus.*

## CAPUT I.

**R**ectores Ecclesiarum non permittant concionari, nisi eos, qui mandatum & concessionem nostram, aut Vicariatus nostri habuerint, & eos, qui concionabuntur, diligenter audient: quos si deprehenderint aliquid dixisse, quod videatur parere offenculum, alienare Laicos ab Ecclesiastica obedientia, & verisimiliter induere aliquam falsam opinionem de fide; tunc sine strepitu Nobis, aut Officiali nostro renunciare mandamus, cum nomine & ordine personæ, quæ hæc concionando protulerit.

## II.

Ipsi Pastores, ut rite Provinciam suam sustineant & expleant, non tantum ministrando Sacramenta, sed docendo populum sibi commissum, idque diebus Festis & Dominicis, maxime si desint Concionatores, utantur Catholicorum Catechismis, homeliis Patrum & piis tractatibus Sanctorum: quod si dederit occasio, ut Sectariorum opiniones refutent, id ita faciant, ut explicate & solide Sanctæ Matris Ecclesiæ sententiam tueantur, ad quod perficiendum, utantur libris ad hanc rem editis & evulgatis.

## III.

Si Pastorum penuria laboretur, placeatque Capellanos Ecclesiarum, sive Cathedralium, sive Collegiarum ad hoc ministerium advocare, illi tantisper dum Pastoris officium sustinebunt, fructus beneficiorum suorum integros accipiant.

## IV.

Mandamus item omnibus Curatis, seu Ecclesiarum Rectoribus, ut libellos

G g 2

habeant

habeant, quibus continetur summa doctrinæ Christianæ, sive Latinos, sive Gallicos, quorum magna est copia ubique; ut assiduitate lectionis illorum libellorum possint religiose ministrare Sacramenta, maxime autem Sacramentum Pœnitentiæ, Matrimonii, Eucharistiæ & Extremæ Unctionis: in quorum ministerio & collatione debent dicti Rectores, seu Curati, docere, monere, consolari, & terrere, pro casus & rei exigentia. Quod tamen præstare minime poterunt, nisi assuescant lectionibus, & discant ea, quæ conveniunt eorum officio.

## V.

Ne Rectores Ecclesiarum adhibeant sibi Sacerdotes Coadjutores in administratione Sacramentorum, nisi quos sciverint esse probos viros & idoneos, & nulla causa excommunicationis sententia innodatos, nec transfugas, aut Religiosos, literis suorum Majorum minime munitos.

## VI.

Pastores si quos habent Sacerdotes, aut Sacellanos immorigeros, moneant illos: quod si non resipiscant moniti, non patiantur eos in choro esse & Divinum servitium peragere, priusquam Officiali nostro fuerint denunciati, & ab eo correcti & restituti.

## VII.

Mandamus itaque, ne iidem Rectores, aut per se, aut per alios Coadjutores faciant Sponsalia in tabernis potioris & publicis diversoriis, maxime post computationem & comellationes, ne fraus ulla intendi possit partibus contrahentibus, & ut honor habeatur Matrimonio.

## VIII.

Nemo ad Pastoratus officium admittatur, quin inter cætera sancte quoque promittat, ter, quaterve in anno Statuta Synodalia diligenter lecturum, ut & ea studiosius observet, & nihil prætermittat, quod ex frequenti dictorum Statutorum lectione, cognoverit ad officium suum pertinere. Qua in re quoque præcipimus, ut eadem Statuta in Capitulis omnibus per Pasto-

rem aliquem, a Decano nominandum, præsentibus aliis omnibus legantur.

## IX.

Ne Sacerdoti, aut ordinato in Sacris, liceat incedere aut peregre proficisci, præcipimus, nisi in tonsura Ecclesiastica & habitu decenti, scilicet pro ratione temporis & locorum; alioqui si hanc ordinationem contempserint, per Decanos, aut Curatos deferantur puniendi.

## X.

Moneant dicti Decani eosdem Curatos & Rectores, ne permittant celebrari Missas in Ecclesiis suis tempore concionis, seu sermonis publici; ut ministerium prædicationis non interturbetur: sed possint laici audire, & erudiri absque impedimento.

## XI.

Omnes, qui ratione ordinis, aut beneficii tenentur horas Canonicas legere, eas legant secundum ritum & usum Atrebatensis Ecclesiæ, aut ex præscripto Romani Breviarii, nuper in lucem emissi, & auctoritate Sanctæ Sedis Apostolicæ confirmati & approbati.

## XII.

Ut Decani moneant dictos Curatos & Rectores, ne patiantur Sacerdotes & Clericos, maxime in Sacris constitutos, libere versari & colloquia secreta inire cum mulieribus, unde sinistra aliqua suspicio nasci possit: & ut non a malo ipso, sed a specie mali se abstineant, alioqui deferantur, qui admoniti non destiterint.

## XIII.

Præcipimus etiam iisdem Decanis & Rectoribus, ut admoneant Patres familias Parochiarum suarum, ne quoquo pacto ferant suos liberos assuere contumeliis probrosis & nefandi sceleris, quibus passim abutuntur etiam pueri, cum magno dedecore nominis Christiani; & ubi intellexerint, eosdem liberos, aut famulos licentiose uti hujusmodi contumeliis, neque tamen castigari a parentibus, Nobis, aut Officiali renuntient. Quod idem mandamus



damus de blasphemia & execrandis juramentis.

## XIV.

Mandamus itaque, ut iidem diligenter considerent, sintne aliqui inter laicos, maxime focum & larem habentes, qui negligent diebus Dominicis & Festis Millæ Parochianæ adesse; & quos noverint hujusmodi contemptores, moneant familiariter & amice primum, deinde si pergant Ecclesiam contemnere, deferantur Officiali nostro.

## XV.

Item, ut diligenter inquirent de delictis commissis, tam laicorum, quam Clericorum, ac maxime de his, quæ iram Dei confestim provocant, cujusmodi sunt: Adulteria, incestus, blasphemiæ & abominandæ libidines, usuræ, & reliqua hujusmodi.

## XVI.

Relatum Nobis est, quosdam Pastores agros & prædia suorum beneficiorum clam elocare, & minoris multo, quam deberent; quo fit, ut proventus sit minor, quam ut sufficiat eorum alimoniam. Quare præcipimus, ut dictæ locationes semper posthac publica auctione fiant, vocato etiam Decano rurali.

## XVII.

Patroni, & qui decimas recipiunt, portionem Canonicam pro rata Pastoribus sufficienter provideant, æstimatione tamen facta frumenti pro ratione annonæ anni cujuslibet, deductis etiam oblationibus, ne dicti Pastores, coacti penuria, sordes querere, & suum officium negligere cogantur.

## XVIII.

Cæterum quia Laici magna ex parte contemnunt contra juris Divini sententiam decimas Ecclesiasticas reddere, idque propterea, quod non tangantur conscientia hujus peccati; Mandamus, ut omnes Decani & Curati moneant diligenter populares suos, & doceant, jus decimarum esse institutum a Deo, quod si negligatur, grave peccatum committunt. Propter quod sæpe Dominus infert calamitates publicas in agros, & dat cælum ferreum, &

terram æream. Super quo debebunt dicti Rectores Ecclesiarum monere Concionatores, ut sic doceant præstita occasione, reddere, quæ sunt Cæsaris, Cæsari, & quæ sunt Dei, Deo.

## XIII. De Visitationibus.

## CAPUT I.

CUM in hac Dicecesi nostra Parochialium Ecclesiarum visitatio ex antiqua consuetudine sit penes Archidiaconos Ecclesiæ nostræ, quibus ex Decreto Tridentini Concilii mandatur, ut hanc visitationem adjuncto Notario nostro personaliter obeant, volumus, & præcipimus, hanc visitationem diligenter fieri, non autem perfunctorie, neque tantum, ut cognoscatur de bonis Ecclesiasticis, quomodo insumantur, aut de Ecclesiarum rebus, cujusmodi sunt ornamenta, libri, altaria, aut de Sacrosanctæ Eucharistiæ honesta conservatione, aut Baptisteriis, & hujusmodi aliis; sed de Sacerdotum, Clericorum & Laicorum fide, vita, & moribus. Sed quia tamen accidit sæpe, ut per ætatem, aut alia vitæ incommoda, non liceat iisdem Archidiaconis personaliter eandem visitationem perficere, tenebuntur hoc casu aliquem probum virum a Nobis approbatum & acceptum, constituere, qui hujusmodi visitationem obeat, & eorum loco rite & legitime suppleat, adjuncto Notario nostro, qui, ne sumptu gravent dictos Archidiaconos, poterunt uno die plures visitationes perficere. Tenebuntur autem eadem Parochiales ecclesiæ dictis Archidiaconis jus visitationis suæ omnino persolvere.

## II.

Cæterum mandamus iisdem Archidiaconis, ut in hac visitatione sua, aut ejus, quem ad hoc negotium commiserunt, solcite cognoscant & inquirent, quam recte ac diligenter Decani, seu Archi-Presbyteri, officium præstent, & juramento suo satisfaciant, & an vita statui respondeat. Quod si quid in eis deprehenderint, quod corrigi, castigarique debeat, illud teneantur sine ulla dissimulatione Nobis, aut Officiali nostro significare. Quia fieri non potest,

G g 3

ut

ut disciplina Ecclesiastica in Clero nostro vigeat, nisi iidem Decani probe & fideliter officium suum obeant, qui sunt speculatores & oculi, & quasi cor Episcopi nostri.

## III.

Visitent etiam Ecclesiarum facta recta, Capellas, quas vocant, ædes tam Pastorum, quam Capellanorum.

## IV.

Cæterum cum multi beneficia simplicia, veluti Capellanas obtinentes in Diocesi nostra, in suis beneficiis non resideant, aliosque subrogent quoslibet, sine electu, qui Missas foundationis celebrent, scilicet, ut minoris possint hoc onus Missarum celebrandarum redimere, minime curantes, sintne probi, aut improbi ii, quibus id negotii committunt. Cumque fructus beneficiorum suorum laicis elocent, ex quo Sacella & ædes sæpe per avaritiam aut negligentiam corruunt, quæ omnia magnum detrimentum adferunt, & scandalum sæpe gravissimum pariunt; hinc fit, ut districte præcipiamus & mandemus, ne hæc sua beneficia, quantumlibet exigua, relinquant, aut aliis ad deservendum committant, sine expressa licentia nostra, & literis super hac re confectis. Quod quia recte & iuste observatur in Ecclesiis Metropolitana & Suffraganeis hujus Provinciæ, idem quoque hic volumus observari.

*XIV. De Cultu & Officio Divino.*

## CAPUT I.

**Q**uæcunque ad Cultum & Officium Divinum pertinent, ea integre servari & fieri præcipimus, quæ Conciliis Generali Tridentino & Provinciali Cameracensi statuta sunt; scilicet, ut in Collegiis & Capitulis, Canonici, qui choro adesse debent, non absint diutius ab Ecclesiis, quibus sunt designati, quam ab eisdem Conciliis concessum est; ut iidem Canonici suo quisque ordine & loco, quoad fieri per valetudinem, vel alias liceat, propria Ecclesiastica munia per se devote & religiose obeant: ut distributiones constituentur, & in Choro honestas &

reverentia semper servetur; & ut potius Religionis pius motus & affectus in Officio Divino perficiendo, ad ædificationem Ecclesiæ eluceat; quam affectatio supervacanea, aut aliud quicquam, quod rem non pertineat.

## II.

Quod vero ad Officium Parochialium Ecclesiarum pertinet, quoniam maxime dedecet, id ex cujusque arbitrio ac voluntate fieri; Nos ut suus honos Pastoribus, eorumque ministerio tribuatur; volumus statim horis Missas, Vesperasque celebrari, Missas quidem æstate, scilicet a die Paschæ usque ad festum Remigii, hora octava: hyeme a festo Remigii usque ad diem Paschæ hora nona, Vesperas autem perpetuo hora secunda, neque cuiquam licere eum ordinem intervertere.

## III.

Quia vero magna est diversitas in Festorum & Jejuniorum observatione, putamusque valde convenire, ut hac in re Provincia Cameracensis conformitatem servet ad vitandam popularem invidiam, placuit, hac de re ut referatur ad proximam Synodum Provinciale.

*XV. De Lectionibus.*

## CAPUT I.

**I**N Ecclesiis Cathedralibus, Collegiatis, & Monasticis Lectiones Theologicæ, & sancta Studiorum exercitia, ut iisdem Conciliis præscriptum est, fiant: id enim plurimum refert, cum ad mores instituendos, tum vero ad veram religionem & pietatem fovendam; hoc autem qui negligunt, cum hujus rei causa præbendas obtineant, certum est, eos id officii bona conscientia contemnere non posse. Eadem Ecclesiæ veteres Bibliothecas suas restituant, componant & ordinent; quibus omnibus viam muniant junioribus ad sacra studia capescenda.

## II.

Cum Patres in Sacrosancto Concilio Tridentino diserte mandarint, ut in Monasteriis literarum Professores ad juventutem instituendam habeantur, quod

quod tamen negligi videmus in nonnullis hujus Diocesis Monasteriis; propterea mandamus, ac districte præcipimus, sub pœnis in eisdem Decretis contentis, ut Abbates curent rite & diligenter doceri suos Monachos, maxime eos, quibus ex usu & consuetudine cura animarum committitur.

## *XVI. De Foundationibus & Exequiis.*

### CAPUT I.

**S**uffragia piorum fidelium, quorum nomine aliquid impartiti sunt Ecclesiis & Ministris earum, omnino servari & fieri præcipimus. Mandamusque, ne Missarum, suffragiorumque foundationes, præter Fundatorum mentem in aliud quodcunque opus convertantur, nisi cognoscente & ita decernente Ordinario.

#### II.

Si quis fidelium testamento, aut alio quovis pacto Ecclesiæ & pauperibus erogandum mandaverit, idque hæredes perficere negligant, aut per fraudem differant, cogantur satisfacere piæ voluntati Majorum suorum, ac præcipue exequias celebrandas non differant. Quod si fecerint, denuncientur, ut cogi & redigi ad officium debitum possint.

#### III.

Sacerdotes ne comeant ad Ecclesias vicinas, ut quæstum faciant ex Missis pro defunctis; nisi vocati fuerint vel a Pastore, vel ab his, qui exequiis præsumunt; sive hæredes, sive testamentorum Executores fuerint.

## *XVII. De Monasteriis.*

### CAPUT I.

**I**N Monasteriis tam virorum, quam mulierum, sublatis comessationibus, mensisque privatis, nisi de licentia Prælati ex causa multum rationabili, proprietatis, seu incontinentiæ suspicione, omni denique dissoluta libertate recisa, regulæ observationem, victus communionem, vitæ integritatem, & omnia exercitia spiritualia, quibus ad perfectionem tenditur, ex præ-

scripto Conciliorum Tridentini & Cameracensis servari, aut si desierint, restitui mandamus.

#### II.

Rationes, seu computa bonorum temporalium in Monasteriis ipsis, non autem in domibus laicorum, reddi singulis annis præcipimus.

#### III.

Et quoniam in nonnullis Monasteriis Abbates nullos libros computorum, seu rationum suarum faciunt, sed per semetipsos, non adhibita receptoris diligentia fructus Monasteriorum suorum recipiunt; ex quo verisimile est, ea bona tandem deperitura esse; propterea quod mortuis eisdem Abbatibus nulla supererunt monumenta, quibus Successores plane cognoscant, qui, quantique sunt redditus; hinc fit, ut districte præcipiamus omnibus hujusmodi Prælati, Abbatibus, & Abbatissis, ut intra trimestre ab exitu hujus Synodi confici curent libros rationum, sive computorum, qui singulis annis renovari debeant & reddi, idque præsentibus aliquibus senioribus Religiosis, maxime si Monasteria sint onerata debitis.

#### IV.

Prioratus Abbatarum, quoniam ad liberam Abbatum dispositionem pertinent, visitent ipsi Abbates quotannis vel per se, vel per alios, audiantque rationes omnes computorum, atque Priores ad eas rationes exhibendas, singulis annis compellant: ut remotis Administratoribus negligentibus, prudentiores statim præstent, nec quicquam eis liceat ex Prioratum bonis assumere, priusquam æs alienum, si quod justum contractum sit, exsolverint, & ædificiorum sarta tecta conservarint.

#### V.

Quoniam vero magno Ecclesiarum detrimento audimus accidere aliquando, ut nonnulli Abbates propria sua auctoritate ac literis, solo suo sigillo & Conventus munitis, temere Monasteriorum res alienent, Nos præsentis hoc Decreto in usum revocamus solemnitates, Canonibus in rerum Ecclesiasticarum alio-



alienatione expressas, easque tam Sancte observari præcipimus, ut iis non adhibitis, quæcunque gesta erunt, irrita & inania fore declaremus.

*XVIII. De Hæreticis, & eorum Libris.*

C A P U T I.

**D**E scriptis & libris hæreticorum, ne venum exponantur, aut in publicum, sive patenter, sive occulte spargantur, volumus ea omnia, quæ super hac re decreta sunt in eisdem Conciliis Tridentino & Cameracensi, valere, & imprimis, ut agatur cum Magistratibus, ne Bibliopolæ libros ullos importent, quorum Catalogus vilis non sit & approbatus.

*XIX. De Excommunicatione, censuris & monitione.*

C A P U T I.

**M**andamus, ut frequenter Pastores suis populis ostendant, quantum opere ea peccata vitari debeant, quorum causa peccantes extra consortium fidelium per excommunicationem ejici debeant: sive sit a jure, sive sit ab homine lata: & ea peccata nonnunquam exponant publice, quo magis ab illis abhorre discant.

II.

Doceantque, quam terribilis & execranda sit excommunicationis sententia, qua quicumque julte feriuntur, exclusi Christi merito, Sanctorumque & Ecclesiæ communione, ut membra putrida resecti, traduntur Satanæ potestati, ut tandem resipiscant.

III.

Mandamus præterea, ac sub pena arbitraria præcipimus, ne ulla sententia excommunicationis quoquo modo feratur, nisi cognoscante, sciente, & expresse mandante Officiali nostro, Nobis, aut Vicario nostro Generali.

IV.

In omni hujusmodi sententia ferenda, declaretur factum cujus causa

fit, contumacia & monitiones præcedentes, neque leviter, aut præcipitanter, aut in fraudem cujusquam ferantur, sed omnino agatur ex scripto Concilii Tridentini.

V.

Pastor, antequam publice moneat eum, qui sit excommunicandus, nisi resipiscat, eundem benigne & paterne prius adeat, & secreto colloquio moneat, horteturque, ne in hoc excommunicationis baratrum per contumaciam incidat, ut sic Pastor bonus lucretur ovem suam, si fieri possit.

VI.

Prohibemus, ne quis excommunicatus absolvatur, nisi præsentem se constituat Nobis, aut Officiali nostro, a sententia contra ipsum lata non perfuntorie, sed legitime, ubi resipuerit, absolvendus, de cujus penitentia & resipiscencia prius constare debebit, quam in gremium Ecclesiæ per absolutionem assumatur.

VII.

De ordine autem, modo, & jure, Curiae nostræ Atrebatensis volumus servari, quæ a Majoribus nostris piæ memoriæ constituta sunt, quantum scilicet licebit. Ex quoniam conventum est inter Ecclesias Metropolitanam Cameracensem & Suffraganeas; ut aliqua forma constituatur communis in hac Provincia de modo, de ratione hujusmodi Curiae exercendæ; volumus eam formam integre conservari, ubi constituta & evulgata fuerit, ac maxime, ut omnes ejusdem Curiae Procuratores promittant, se Statuta nostra lecturos & servaturos, ut Constitutione PETRI Prædecessoris nostri piæ memoriæ cautum est.

VIII.

Cæterum omnia eorundem Prædecessorum nostrorum Statuta, ea scilicet, quæ nulla ex parte dissident a Decretis Conciliorum Tridentini & Cameracensis, confirmamus & approbamus, quorum Compendium probe & diligenter recognitum, præsentibus nostris Statutis adjecimus, præcipientes omnibus Decanis, Pastoribusque Eccle-

Ecclesiarum Nobis subiectis, ut ubi impressa fuerint, habeant sibi, & sedulo legant, curentque servari in hac

Dieceſi noſtra ab omnibus, pro ratione cujusque ſtatus & ordinis.

*FINIS STATUTORUM SYNODALIU Rmi IN CHRISTO PATRIS  
FRANCISCI RICHARDOTI.*

SEQUUNTUR AUTEM

*STATUTA PRÆDECESSORUM. (\*)*

*I. De modo veniendi ad Synodum.*

**S**Tatuimus & diſtriſte præcipimus, ut (a) omnes, qui tenentur (b) Sanctæ Synodo intereſſe, compare- ant coram Nobis, vel a Nobis deputan- dis (c), quando per Nos, vel Vica- rios noſtros evocabuntur in Eccleſia Attre-

(\*) Eadem Statuta antiqua, quæ, prout ſub Granvellano Cardinali & Epifcopo Attrebatenſi, Richardoti Prædeceſſore, collecta ſunt, hoc loco referimus, edita jam antea fuerunt Sæculo XV. cum ſequenti Titulo & Præſatione, non addito Epifcopi nomine, cujus cura collectio illa perfectæ, nec loco designato, in quo impreſſa fuit. Quæ, facta utriusque editionis collatione, notabiliores repertæ fuerint mutationes, ſuis locis indicabimus. Illud univerſim notandum, quod editionis recentioris Statuta prolixiora ut plurimum ſint, quam antiquæ: in hac vero & diverſo non pauca exhibeantur Conſtitutiones Synodales Eccleſiæ Attrebatenſis, quæ poſteriori in editione fuerunt prætermiſſæ. Quas ſuo ſingulas loco & ordine dabimus, ſervata ubique & ſcribendi, & interpuagendi methodo, quam anteriore in exemplari invenimus. Hoc illarum initium:

*INCIPIUNT CONSTITUTIONES SYNODALES  
EPISCOPATUS ATTREBATENSIS.*

**P**astoralis cura ſollicitudinis, Dei, & Apoſtolice Sedis gratia nobis injuncta: continua & aſſidua meditatione nos urget, & hortatur: ut juxta nobis credite diſpenſationis officium: ſubditorum noſtrorum commodis: jugi ſtudio intendamus. Sane cum a prædeceſſoribus noſtris epifcopis Attrebatenſibus: & eorum Vicariis in ſpiritualibus & temporalibus, tam provide quam utiles nonnullæ Conſtitutiones Synodales diverſis temporibus emanaverint: quarum aliquæ propter ſimilitudinem nimiam: & quedam propter contrarietatem indiſſolubilem. Nonnullæ etiam propter ſui prolixitatem conſuſionem inducunt: & laqueum poſſunt animabus parare. Nos ſuper hoc a multis noſtris ſubditis cum instantia requiſiti: conſuſionem & ambiguitatem tollere cupientes: per dilectum nobis in Chriſto Dominum Joannem de Graveria priorem de oratorio Horbonienſi in jure canonico Licentiatum: & Vicarium noſtrum in ſpiritualibus & tempo-

valibus generalem: conſtitutiones bujuſmodi diligentius fecimus recenſeri. Et tandem quibusdam ex ipſis (cum vel temporales, aut ſibi ipſis vel aliis contrarie ſeu omnino ſuperflue viderentur) penitus reſecatis: reliquis quibusdam ex ipſis abbreviatis, multisque detractio- nibus interpretationibus & additionibus, prout expedire vidimus factis in ipſis: in unum libellum una cum tenore trium conciliorum provincialium: in quibus ad correctionem ſubdito- rum noſtrorum & quietem: multa ſtatuuntur ſalubria: fructus uberes Deo propicio in domo domini allatura: redigi mandavimus: & ſub debitis titulis collocari. Statuentes & mandantes, quod conſtitutiones contentæ in bujuſmodi libello: diligenter a noſtris ſubditis obſerventur. Nullas alias conſtitutiones præter insertas in eo a noſtris prædeceſſoribus ante editionem bujuſmodi libelli promulgatas, recepturi ulterius: aut pro conſtitutionibus Synodalibus, ſub pena canonica habituri.

Sequuntur deinde Tituli ipſorumque Statutorum, quos nos ſub initium bujus Synodi præmiſimus.

(a) In exemplari antiquo: quod, pro: ut.

(b) in Sancta Synodo

(c) Feria 3. poſt feſtum B. Dionyſii

Tomus VIII. Concilior. German.

H h

Attrebatensi ad Sanctam Synodum peragendam, justo impedimento cessante, de quo sufficiens (d) fiat fides, quo casu excusator tenetur (e) facere, quæ mittens teneretur, si præsens in Sancta Synodo adesset. (f) Item Prælati, Patroni, Curati, & cæteri Beneficiati, licet sint in inferioribus ordinibus constituti, ad dictam Sanctam Synodum honeste veniant. Prælati videlicet regulares in eorum vestimentis regularibus: seculares (g) in honesto & decenti habitu, prout conditioni propriæ & qualitati decens arbitrabuntur, & in suis beneficiis dimittant Vicarios idoneos, qui in dicta die Sanctæ Synodi & sequentibus, valeant suis beneficiis loco ipsorum deservire. Item Sanctam Synodum omnes intrent jejuni, Præpositus, Decanus & Canonici Ecclesiæ nostræ Cathedralis Attrebatensis cum cappis pretiosis, Abbates (h) autem cum insignibus Abbatialis dignitatis, sive mitris: Decani & Canonici Collegiarum Ecclesiarum extranearum, cum superpelliciis, & amussis: Decani rurales cum albis manipulis & stolis, absque casulis: Priores & Monachi in suo habitu consueto regulari; Curati cum superpelliciis, & stolis pendentibus. (i) Omnes diligenter Statuta Synodalia & attente audiant, & ad ea, quæ dicuntur, advertant, nec ante finem dictum locum exeant, & postmodum honeste ad sua hospitia revertantur, (k) locaque aliquatenus suspecta ne ingrediantur, & a Synodo sine nostra licentia ne recedant. Interim tamen expresse & solenniter protestamur, intentionis nostræ non esse, ad hanc Synodum admittere quenquam, per se, vel Procuratorem comparere debentem, aut habere pro excusato, qui sit a jure &

ab homine aliquo vinculo excommunicationis innodatus. Omnes quoque & singulos, qui de jure vel consuetudine ad hanc præsentem nostram Synodum venire, & eidem interesse tenentur, & non comparuerint tamen in eadem, nisi fuerint per Procuratorem idoneum, & sufficiens mandatum habentem, legitime excusati, contumaces reputamus. Prohibemus etiam, ne quis præsumat aliquid proponere, quod præsentī Synodo sit impertinens. Declaramus insuper & volumus, ut Decani sive Archi-Presbyteri procurent, ut habeant Synodi prædictæ Constitutiones ante elapsos octo dies, postquam impressæ ad nostram Civitatem Attrebatensem fuerint illatæ, ut eas suarum regiuncularum Pastoribus ad hoc specialiter convocandis, publicent & non intellectas exponant. Si autem ipsimet Decani, vel Archi-Presbyteri quid dubitent, ad Nos, vel ad nostrum Vicarium, aut Officialem recurrent, pro vera intelligentia.

### *Qualiter Synodus teneatur.*

Primo Dominus Episcopus, vel ejus, quoad hoc Commissarius de Revelatorio venire debet, (l) Diacono, Subdiacono, duobus Clericis portantibus duos cereos, & tertio crucem deportante ipsum præcedentibus, & decantabitur responsorium, incipiente Cantore.

#### *Responsorium.*

*Honor virtus & potestas, & imperium sit Trinitati in Unitate, Unitati in Trinitate, in perenni seculorum tempore. Versus, Trinitati lux perennis, Unitati sit decus perpetua. In perenni. Gloria Patri, & Filio, & Spiritui Sancto. In perenni.*

Postea

(d) In exemplari antiquo: sufficienter.

(e) teneatur facere ea.

(f) In antiquo exemplari inferuntur sequentia: Quod verum, nisi per nos, seu nostros Commissarios dies supradicta fuerit transmutata: ad quam diem omnes comparere debent, ut superius est expressum.

(g) supertunica libus & Wardecoris induti, clausis vestimentis, puta honciis vel cappis.

(h) in stolis albis & cappis sericeis: Decani christianitatis albis & stolis.

(i) Cæteri in superpelliceis almucis, vel birretis, sive capuciis sub amissione capuciorum prædictorum.

(k) tabernas & lupanaria non intrent: sed ea prorsus evitent. *Cætera, quæ in recentiori editione supra sequuntur, non leguntur in antiqua.*

(l) diaconus subdiaconus. Duo clerici portantes duos cereos: & tertius crucem deportans: ipsum debet præcedere: & cantatur responsorium. & incipit Cantor scilicet Responsorium: *Honor Virtus &c.*



Postea incipit Dominus Episcopus  
Hymnum:

*Veni Creator Spiritus, mentes tuorum visita &c.*

Sulcepta Benedictione ab Episcopo, legat  
Diaconus Evangelium secundum Joan-  
nem. Evang. *Ego sum Pastor bonus.*  
quo lecto fiet Concio. (m)

### *De Summa Trinitate & Fide Catholica.*

**I**N primis præcipimus, & districte  
omnibus Prælati, Abbatibus & Ec-  
clesiarum Parochialium Rectoribus in-  
jungimus, quatenus istud Generale  
Concilium, quod incipit: *Firmiter cre-  
dimus*, quod est in antiqua compilatio-  
ne decretalis sub hoc titulo collocatum:  
ac Constitutionem fælicis recordationis  
Bonifacii, quæ incipit: *Fideli ac devota.*  
in sexto libro. Nec non Concilium  
Viennense, quod incipit: *Fidei Catholi-  
cæ fundamento*, sub eodem titulo reposita,  
quorum tenores (n) fini Capitis præ-  
sentis adjunguntur, penes se habeant,  
attente legant, & frequenter juxta ca-  
pacitatem sui ingenii, quæ capere po-  
terunt, capiant, & sæpius commen-  
dent memoriæ. Si quæ vero dubia  
habuerint, consulant peritiores. Sym-  
bolum Apostolorum, Credo in Deum  
Patrem. & Credo in unum Deum. Et  
illud Athanasii: Quicumque vult sal-  
vus fieri, cordetenus sciant, frequen-  
terque in corde revolvant, & contenta  
in eisdem firmiter & districte credant.  
Debent etiam firmiter credere, quod  
in Sacramento Altaris conficitur, & est  
verum Corpus Christi & verus Sanguis.  
Et suadere, & inducere debent perso-  
nas sibi subditas, ut circa præmissa &  
singula districte credenda studeant, &  
instruant, secundum sui ingenii capaci-  
tatem & eorum facultates; nam alias af-  
fectatores ignorantiae viderentur. Præ-  
cipimus insuper omnibus curam anima-  
rum habentibus, quatenus sciant & me-  
moriter teneant decem Præcepta Deca-  
logi, eaque frequenter populo sibi  
commisso exponant, maxime, quod

illis contraveniens damnabitur in per-  
petuum, nisi fuerit vere pœnitens &  
confessus. Et idem præcipimus fieri  
de septem peccatis mortalibus: item  
supra dictis præcipimus, quatenus sæ-  
pius exponant populo, qualiter pec-  
catur contra quinque sensus corpora-  
les.

### *INNOCENTIUS TERTIUS in Concilio Generali.*

**F**irmiter credimus & simpliciter confitemur,  
quod unus solus est verus Deus, æternus,  
immensus, & incommutabilis, incomprehen-  
sibilis, omnipotens & ineffabilis, Pater, & Fi-  
lius, & Spiritus Sanctus, tres quidem perso-  
næ, sed una essentia, substantia, seu natura,  
simplex omnino, Pater a nullo, Filius a Pa-  
tre solo, ac Spiritus Sanctus pariter ab utro-  
que, absque initio, semper, ac sine fine: Pa-  
ter generans & Filius nascens, & Spiritus  
Sanctus procedens; consubstantiales & coæqua-  
les & coomnipotentes & coæterni, unum uni-  
versorum principium, Creator omnium visibi-  
lium & invisibilium, Spiritualium & corpora-  
lium, qui sua omnipotentis virtute simul ab ini-  
tio temporis utramque de nihilo condidit crea-  
turam spiritualem & corporalem, Angelorum  
videlicet & mundanam, ac deinde humanam,  
quasi communem ex spiritu & corpore constitu-  
tam. Diabolus enim & alii dæmones, a Deo  
quidem creati sunt boni, sed ipsi per se  
facti sunt mali, homo vero diaboli suggestionem  
peccavit. Hæc Sancta Trinitas secundum com-  
munem essentiam individua & secundum perso-  
nales proprietates discreta, primo per Moysen  
& Sanctos Prophetas, aliosque famulos suos  
juxta ordinatissimam dispositionem temporum,  
doctrinam humano generi tribuit salutarem. Et  
tandem Unigenitus Dei Filius, Iesus Chri-  
stus a tota Trinitate communiter incarnatus,  
ex Maria semper Virgine, Spiritus Sancti co-  
operatione conceptus, verus homo factus, ex  
anima rationali & humana carne compositus,  
una in duabus naturis persona viam vitæ ma-  
nifestius demonstravit. Qui cum secundum  
Divinitatem sit immortalis & impassibilis:  
idem ipse secundum humanitatem factus est  
mortalis & passibilis, qui etiam pro salute hu-  
mani

(m) Sequuntur Abbates, Abbatissæ, Capitula & alii, qui interesse tenentur in Synodo Atre-  
batenfi. Horum Catalogum vide sub finem horum Statutorum.

(n) Antiqua: causa brevitatis non inserimus: quia dictas tres constitutiones in suis anti-  
quis Synodalibus poterunt reperire.

mani generis in ligno crucis passus & mortuus, descendit ad inferos, resurrexit a mortuis, & ascendit in cælum, sed descendit in animam & resurrexit in carne, ascenditque pariter in utroque, venturus in fine seculi iudicaturus vivos & mortuos, & redditurus singulis secundum opera sua, tam reprobis, quam quam electis, qui omnes resurgent cum suis propriis corporibus, quæ nunc gestant, ut recipiant secundum opera sua, siue bona fuerint, siue mala, illi cum diabolo pœnam perpetuam, & isti cum Christo gloriam sempiternam.

Una vere est fidelium universalis Ecclesia, extra quam nullus omnino salvatur, in qua idem ipse Sacerdos est Sacrificium Iesus Christus, cuius Corpus & Sanguis in Sacramento Altaris, sub speciebus panis & vini veraciter continetur, transubstantiatis, pane in Corpus, & vino in Sanguinem, potestate Divina, ut ad perficiendum mysterium unitatis, accipiamus ipsi de suo, quod accepit ipse de nostro, & hoc utique Sacramentum nemo potest conficere, nisi Sacerdos, qui rite fuerit ordinatus, secundum Claves Ecclesiæ, quas ipse concessit Apostolis, eorumque Successoribus Iesus Christus. Sacramentum vero Baptismi, quod ad Dei invocationem & Individuæ Trinitatis, videlicet Patris, & Filii, & Spiritus Sancti, consecratur in aqua, tam parvulis, quam adultis in forma Ecclesiæ, a quocumque rite collatum, proficit ad salutem. Et si post suspensionem Baptismi, quisquam prolapsus fuerit in peccatum, per veram potest semper penitentiam reparari. Non solum autem virgines & continentis, verum etiam conjugati, per rectam fidem & operationem bonam, placentes Deo ad æternam merentur Beatitudinem pervenire.

### GREGORIUS DECIMUS in Generali Concilio Lugdunensi.

Fideli ac devota professione fatemur, quod Spiritus Sanctus, æternaliter ex Patre & Filio, non tanquam ex duobus principiis, sed tanquam ex uno principio, non duobus spirationibus, sed unica spiratione procedit, hoc professu est hæcenus, prædicavit & docuit: hoc firmiter tenet & prædicat, proficetur & docet, Sacrosancta Romana Ecclesia, Mater omnium fidelium, & Magistra: hoc habet orthodoxorum Patrum, atque Doctorum, Latinorum pariter & Græcorum, incommutabilis & vera

sententia. Sed quia nonnulli, propter irrefragabilis præmissæ veritatis ignorantiam, in errores varios sunt prolapsi; Nos, huiusmodi erroribus viam præcludere cupientes, hoc Sacro approbante Concilio, damnamus & reprobamus omnes, qui negare præsumpserint, æternaliter Spiritum Sanctum ex Patre & Filio procedere, siue etiam temerario ausu asserere, quod Spiritus Sanctus ex Patre & Filio, tanquam ex duobus principiis, & non tanquam ex uno procedat.

### CLÉMENTS V. in Concilio Viennensi.

Fidei Catholica Fundamento, præter quod (teste Apostolo) nemo potest aliud ponere, firmiter inhaerentes, aperte cum Sancta Matre Ecclesia, confitemur, unigenitum Dei Filium in his omnibus, in quibus Deus Pater existit, una cum Patre æternaliter subsistentem, partes nostræ naturæ simul unitas, ex quibus in se verus Deus existens, fieret verus homo, humanum videlicet corpus passibile, & animam intellectualem, seu rationalem, ipsum Corpus vere per se & essentialiter informantem, assumpsisse ex tempore in virginali thalamo ad unitatem suæ hypostasis & personæ, & quod in hac assumpta natura ipsum Dei Verbum, pro operanda salute non solum affigi cruci, & in ca-mori voluit, sed etiam emissio jam spiritu perforari lancea sustinuit latus suum, ut exinde profluentibus undis aquæ & sanguinis, formaretur unica, & immaculata, ac Virgo Sancta Mater Ecclesia conjunx Christi. Sic de latere primi hominis supurati, Eva sibi in conjugium est formata, ut sic certæ figuræ primi & veteris Adæ, qui (secundum Apostolum) est forma futuri, in nostro novissimo Adam: id est, Christo veritas responderet. Hæc est, inquam, veritas illius prægrandis aquilæ vallata testimonio, quam Prophetæ vidit Ezechiel, animalibus cæteris Evangelicis transvolantem, Beati Joannis videlicet Apostoli & Evangelistæ, qui Sacramenti huius rem gestam narrans & ordinem, in Evangelio suo dixit: Ad Iesum autem cum venissent, ut viderunt eum jam mortuum, non fregerunt ejus crura, sed unus militum lancea latus ejus aperuit, & continuo exiit sanguis & aqua, & qui vidit, testimonium perhibuit, & verum est testimonium ejus, & ille scit, quia vera dicit, ut & vos credatis. Nos igitur ad tam præclarum testimonium, ac Sanctorum & Doctorum communem sententiam, Apostolica considerationis (ad

(ad quam duntaxat hæc declarare pertinet) aciem convertentes, Sacro approbante Concilio declaramus, prædictum Apostolum & Evangelistam Joannem, rectum in præmissis factæ rei ordinem tenuisse, narrando, quod Christo jam mortuo, unus militum lanceæ latus ejus aperuit. Porro doctrinam omnem, seu positionem temere asserentem, aut vertentem in dubium, quod substantia animæ rationalis, seu intellectivæ, vere ac per se, humani corporis non sit forma, velut erroneam, ac Fidei Catholicæ inimicam, prædicto approbante Concilio, reprobamus. Diffinientes, ut cunctis nota sit fidei sincera veritas, ac præcludatur universis erroribus aditus, ne subintrent: quod quisquis deinceps asserere, defendere, seu tenere pertinaciter præsumpserit, quod anima rationalis, seu intellectiva, non sit forma corporis humani per se & essentialiter, tanquam hæreticus sit censendus. Ad hoc Baptisma unicum, Baptizatos omnes in Christo regenerans, est, sicut unus Deus, ac fides unica, ab omnibus fideliter confitendum. Quod celebratum in aqua in nomine Patris, & Filii, & Spiritus Sancti, credimus esse tam adultis, quam parvulis, communiter perfectum remedium ad salutem. Verum quia quantum ad effectum Baptismi in parvulis, reperiuntur Doctores quidam Theologi, opiniones contrarias habuisse, quibusdam ex ipsis dicentibus, per virtutem Baptismi parvulis quidam culpam remitti, sed gratiam non conferri; aliis contra asserentibus, quod & culpa eisdem in Baptismo remittitur, & virtutes ac informans gratia infunduntur quoad habitum, etsi non pro illo tempore quoad usum. Nos attendentes Generalem efficaciam mortis Christi, quæ per Baptisma applicatur pariter omnibus baptizatis, opinionem secundam, quæ dicit, tam parvulis, quam adultis, conferri in Baptismo informantem gratiam & virtutes, tanquam probabilior, & dictis Sanctorum & Doctorum modernorum Theologiæ, magis consonam & concordem, Sacro approbante Concilio duximus eligendam.

## II. De Sacramentis (o) in genere.

**S**acramenta, quæ sunt signa rei factæ homines sanctificantes, gratis exhibeantur, id est, sine pecunia, vel

muneris recepti, seu recipiendi exactione, promissione, seu peritione eorundem, nisi ultro hujusmodi aliquid offeratur, aut pia consuetudine debeatur. Quo casu ante omnia sunt Sacramenta administranda: & ipsis exhibitis, quod introduxit consuetudo, potest peti, & si denegatum fuerit, ad Nos, vel Officialem nostrum super hoc habeatur recursus: alias autem pecuniam, vel munera exigentes pro Sacramentis ministrandis, Symoniacos reputamus, & ab officio suspendimus, & tam diu volumus manere suspensos, quousque sic receptam pecuniam, a quibus receperint, plenarie restituerint, promissaque quittaverint, & ad arbitrium nostrum, vel Commissariorum nostrorum, fecerint propter hoc emendam, & cum ipsis fuerit canonice dispensatum. Quod si ante restitutionem, quittance, emendam & dispensationem prædictas, Divinis se immiscuerint, in suo agentes officio, sicut prius, irregularitatis laqueum non evadent. (p) Denunciamus quoque gravissimam ultionem capiendam de Sacerdotibus, qui indigne auferint Sacramenta administrare. Mandamus item Parochis, ut instituunt plebem suam, cum ipsa Sacramenta administrant, vel in concionibus, si argumentum præiens patitur, quid in cujusque collatione agatur, quis inde fructus manat, quid sibi velint, quæ sic visibiliter exhibentur, ad quæ invisibiliter Dei virtus efficacius operatur, deinde quando digne, aut indigne percipiuntur.

## III. De Baptismo, & ejus effectu.

**B**aptismus, cum sit janua omnium Sacramentorum, cum reverentia & honore celebrari debet, (q) mane potius, quam tempore pomeridiano, nisi aliud postulet necessitas, ut a jejunis & sobriis ad res tantas veniatur. Sacerdotem oportet esse attentum, præsertim in prolatione verborum & distinctione, in quibus virtus Sacramenti

H h 3

con-

(o) Antiqua editio: De Sacramento in genere. Tum sic orditur: Sacramenta gratis exhibeantur: id est, sine pecunia &c.

(p) Quæ dein apponuntur in editione recentiore, hoc capite, non habentur in antiqua.

(q) Antiq. præsertim in prolatione verborum & distinctione, cæteris, quæ hic inferuntur, prætermisiss.



consistit, videlicet in his verbis: (\*) In nomine Patris, & Filii, & Spiritus Sancti. Serios quoque & animadvertentes, esse decet susceptores, qui in quiete, & silentio, omnibus, per ipsos agendis, intendant. Quare prohibemus sub pœna Canonica, ne quis ad levandum masculinum de Sacro Fonte, ultra duos viros & unam mulierem, & ad levandum mulierem, ultra duas mulieres, & unum virum, admittat, nisi de nostra, vel Officialis nostri licentia speciali. (r) Admonebit autem Curatus susceptores, ut meminerint, filiolos, postquam ad eam pervenerint ætatem, quæ institutionem admittit, docendos esse per ipsos, si opportunum esse potest, vel saltem eorum cura per alios, Precationem Dominicam, Salutationem Angelicam, cum Articulis Fidei, sedulo quoque & frequenter exhortandos, ut vitam Christiano homine dignam, a teneris studeant meditari. Ad hæc, quia novimus Sacris Canonibus, Abbatibus, Prioribus, ac aliis Religiosis, interdictum, in Baptismo parvulos suscipere, aut nuptialibus convivii interesse; ideo monemus, & præcipimus, ne in hujusmodi Canonum, hæcenus a multis neglectorum, præscripta & Sanctiones peccare, quanta vis necessitudine desponsatis, vel parvulis jungantur, præsumant. Nam pro transgressione & scandalo dato, severiores pœnitentiæ pœnas sumus per Nos, aut nostros Vicarios posthac exacturi. Item si dubitetur, an aliqui fuerint baptizati, sub his verbis debebunt baptizari, dicendo: Si non es baptizatus, ego te baptizo in Nomine Patris, & Filii, & Spiritus Sancti, amen. Item præcipimus singulis curam animarum habentibus, quatenus instruant matronas obstetrices, qualiter tantum impellente necessitate, pueros habeant baptizare, videlicet sub hac forma, & non alia, sive lingua laicali, sive latina: Ego baptizo te in Nomine Patris, & Filii, & Spiritus Sancti. Amen. Et

faciant (s) cum immersione & asper- sione in aqua, neque dubitent Paren- tes in absentia obstetricum, & aliorum, extrema hujusmodi necessitate occur- rente, proprio puero Baptismum im- pendere & mutuis conjugii officiis, ut ante fecerunt, nihilominus postea in- dulgere. Et si contigerit, puerum bap- tizatum per personas prædictas ad fon- tes deferri, ante omnia querat Sacerdos, sub qua forma fuerit baptizatus: quod si invenerit formam debitam observa- tam fuisse, ipsum non baptizet, (t) baptizatum. Sin autem, baptizet ip- sum, ut superius est expressum. (u) Si infantis nascentis caput appareat ex- tra, vel aliud membrum principale, & timeatur de morte infantis, antequam perfecte nascatur, infundat, qui adfue- rit, aquam super caput nascentis, vel membrum principale, dicens: Infans ego te baptizo in Nomine Patris, & Filii, & Spiritus Sancti. Si autem perve- nerit vivus ad ortum legitimum, de no- vo baptizetur sub his verbis: Si es bap- tizatus, ego te non baptizo; sed si non es baptizatus, ego te baptizo in No- mine Patris, & Filii, & Spiritus Sancti. Amen. Item si mulier prægnans decef- ferit & partus credatur vivere, aperia- tur mulier & partus baptizetur. Item linitus saliva, in quacunque parte cor- poris, licet in hujusmodi linitione ver- ba fuerint prolata, quæ requiruntur in Baptismo; non est baptizatus, sed bap- tizandus. Cum ad esse Baptismi requi- rantur verbum & elementum, quod est aqua, quod quidem elementum in hoc casu deficit. Item juxta tenorem Concilii Viennensis prohibemus, ne quis alibi, quam in Ecclesiis, in quibus ad hoc fontes sunt specialiter deputati, aliquem baptizare præsumat, vel suam præsentiam exhibeat personalem, nisi Regum, vel Principum liberi extite- rint, aut talis emerferit necessitas, propter quam nequeat ad Ecclesiam absque periculo accessus haberi. (x) Proinde sollicitudinem volumus adhibe- re

(\*) Scriptoris incuria, aut errore Typographi prætermittæ videntur hæ voces: *Ego te baptizo*, quarum legitima pronuntiatio non minus, quam aliarum supra relatarum, ad constituendam Baptismi essentiam requiritur.

(r) *Sequitur*: Item si dubiteretur &c. *omissis aliis, quæ interposita sunt in edit. recent.*

(s) *Antiqua*: cum trina immersione in aqua. *Dein subjungitur*: Et si contigerit.

(t) *Antiqua*: sed approbet baptizatum.

(u) *In antiq. edit. omissis, quæ hic sequuntur, subditur*: Item si mulier prægnans decefferit &c.

(x) *Sequitur in ant. edit.* Item præcipimus, quod curati de novo Chrismate &c.

re Parochum, seu Curatum, ut fontes firmiter clausi teneantur, ne sordidentur, aut sortilegis pateant. Renoventur autem aquæ fontium, ut minimum bis in anno pridie Festorum Paschæ, & Pentecostes, ac tum mundentur, antequam recens aqua infundatur. Item præcipimus, ut Curati de novo Chrismate, quod in die Cœnæ singulis annis conficitur, citius quam poterunt, anno quolibet post diem dictæ Cœnæ a deputato nostro (y) inungant, quoniam de antiquo Chrismate non debent inungere, sed ipsum in suis Ecclesiis concremare: (z) Mandamus insuper Presbyteris curatis, ut quando vascula mundant pro novo Chrismate, vel oleo, habeant aliqua alia vascula, in quibus antiquum Chrisma & oleum reponant, donec novum Chrisma sit allatum in Ecclesiam: tunc enim primum, cum novum fuerit allatum, concremabitur antiquum, & hoc propter frequentem necessitatem infirmorum & baptizandorum, ne, videlicet infirmi sine Sacra Unctione decedant, & ne pueri sine Chrismate baptizentur. Et quando prædicti veniunt ad habendum dictum Chrisma, honestas ampullas, mundas & bene clausas, apportent; quod si personaliter non veniant, mittant suo loco honestas personas, in Sacris Ordinibus constitutas, & non alias, scientes, quod si secus egerint, aut in hoc negligentes fuerint, vel remissi, sic eos puniemus, quod cedit aliis in exemplum.

#### IV. De Confirmatione.

**Q**Uoniam Confirmationis Sacramentum est Sacramentum (a) magnæ utilitatis, & ideo omnibus Christi fidelibus exhibendum, nunquam autem contemnendum: præcipimus omnibus Curatis, ut suos Parochianos sæpe moneant, ne hoc Sacramentum a Nobis recipere negligant, sed ad Nos, qui soli hoc Sacramentum

hic conferimus per Nos ipsos, aut nostrum Suffraganeum, veniant, nec non pueros, ut minimum septennes, aut alios majoris ætatis, adducant Sacro Chrismate ungendos: qui memoriter teneant Articulos Fidei, Præcepta Decalogi cum Precatione Dominica, & Salutatione Angelica. Adducti autem si sint doli capaces, ad Confirmationem accedere ne præsumant, nisi jejuni & confessi, ut mundi sint, ne conferendæ gratiæ præstent impedimentum: doceantur etiam populi, hoc Sacramentum, in quo Episcopus nomina confirmandorum mutare potest, non posse iterari. Unus confirmandum teneat, ac Episcopo præsentet, qui ex tali susceptione contrahere se sciat spirituales compaternitatem: ideoque ab hoc susceptionis officio arcendi sunt eorum parentes. Nemo præter Sacerdotem, vel in Sacris Ordinibus constitutum, tollat, vel solvat fasciolas confirmati, idque post triduum: ac tunc frontem confirmati sale defricatam lavabit, ipsam ligaturam, sive fasciolum comburendo, ipsosque cineres cum aqua lotionis frontium, in piscinam reponendo; nisi cineres in aliquem usum oporteat reservare. Et ne Curati possint justam ignorantiam prætexere, quibus modis cognatio spiritualis contrahatur, & sic Matrimonio jungant eos, qui jungi non possunt; ideo subjecimus Decretalem: *Nedum inter. Tit. De cognatione Spirituali, L. VI.* Nedum inter baptizatum, & illum, qui eum suscepit de Baptismo, ac inter eundem baptizatum & susipientis filios, & uxorem, ante susceptionem carnaliter cognitam ab eodem, imo etiam inter susipientem, patremque baptizati & matrem, cognationem spirituales in Baptismo contrahi, jure constat, quæ cognatio & contrahendum Matrimonium impedit & dirimit post contractum, & eadem, quæ de suscipiente sunt dicta, sunt etiam de baptizante censenda. Ex Con-

(y) *In antiqua*: a deputato nostro super hoc recipiant, & habeant: & de dicto novo inungant.

(z) *Ant.* & quando prædicti venient ad habendum dictum crisma, honestas ampullas & bene clausas apportent &c.

(a) *In antiquo exemplari initium hujus capituli sic habet*: Quoniam Confirmationis Sacramentum est Sacramentum necessitatis, presertim si contemnatur. Quod in posteriore editione merito, recteque eo, quo hic legitur, modo emendatum.

Confirmatione quoque, seu frontis Chrismatione, spiritualis cognatio iisdem modis contrahitur: Matrimonia similiter impediens contrahenda, & dirimens post contracta. Caveant autem, qui ad primam Tonsuram aspirant, aut ad Ordines Sacros cupiunt admitti, ut non nisi confirmati audeant accedere.

### V. De Sacramento Confessionis.

**C**UM Sacramentum confessionis sit secunda tabula, per quam nobis in hujus mundi pelago navigantibus, & quandoque fluctuantibus, nec non per peccatum mortale naufragium passis, paratur reconciliationis remedium apud DEUM per JESUM Christum; ideoque omnibus districte præcipimus, quatenus quilibet, prout ad ipsum pertinet, diligenter attendat, & faciat a suis subditis observari ea, quæ in Decretali continentur, cujus tenor sequitur in hæc verba: Omnis utriusque sexus fidelis, postquam ad annos discretionis pervenerit, omnia peccata sua (saltem semel in anno) solus fideliter confiteatur proprio Sacerdoti, & injunctam sibi pœnitentiam propriis viribus studeat adimplere, suscipientes reverenter, ad minus in Pascha Eucharistiæ Sacramentum, nisi forte de proprii Sacerdotis consilio, ob aliquam rationabilem causam ad tempus ab ejus perceptione duxerit abstinendum. Alioqui & vivens ab ingressu Ecclesiæ arceatur, & moriens Christiana careat sepultura. Unde hoc Statutum salutare frequenter in Ecclesiis publicetur, ne quis ignorantix cæcitate velamen exultationis assumat. Si quis alieno Sacerdoti voluerit justa de causa confiteri peccata, licentiam prius postulet & obtineat a proprio Sacerdote, cum aliter ipse illum non possit absolvere, vel ligare. Sacerdos autem sit discretus & cautus, ut more periti medici super infundat vinum & oleum vulneribus fauciat, diligenter inquirens & peccatoris circumstantias & peccati, quibus prudenter intelligat, quale debeat ei præbere consilium, & cujusmodi re-

medium adhibere, diversis experimentis utendo ad salvandum ægrotum. Caveat autem omnino, ne verbo, aut signo, aut alio quovis modo aliquatenus prodatur peccatorem: sed si prudentiori consilio indiguerit, illud absque expressione ulla personæ, caute requiratur. Quoniam eum, qui peccatum in pœnitentiali judicio sibi detectum præsumpserit revelare, non solum a Sacerdotali officio deponendum decernimus, verum etiam ad agendam pœnitentiam perpetuam (b) in arctum Monasterii detrudendum. Sacerdos audiens confessionem, personarum qualitates & exercitia prudenter explorans, secrete & sigillatim audiat peccata, & sedeat in Ecclesia in loco publico, ut ab omnibus videri possit, nisi contrarium suadeat necessitas, aut infirmitas, vel alia justa causa. Insuper in confessione audienda, Sacerdos habeat vultum humilem, oculos ad terram demissos, nec frequenter aspiciat vultum confitentis, & præsertim mulieris. Præterea competenter audiat, quæ confitens dixerit, in spiritu lenitatis, & eum moneat pro viribus, ut integre sua peccata confiteatur, alioqui confessionem fore nullam: peccata usitata diligenter inquireat, & inusitata, non nisi a longe: unde caveat, ne det occasionem in novis adinventionibus peccatorum. In confessione quoque & extra eam, suos Parochianos moneat & inducat, ut confiteantur de transgressionem fidei & juramenti, si aliquoties ipsos contigerit, non adimplevisse promissum, nisi continua inopia ipsos excusasset; nam si cessante inopia continua terminum labi permiserint, etiam si postea pacificaverint, vel conventiones adimpleverint cum effectu, & in foro contentioso absolutionem ab excommunicatione, si quam incurrerant hac de causa auctoritate cujusvis Judicis impetraverint: in foro tamen pœnitentiali a peccato, quod ratione transgressionis commiserint, non sunt immunes. Districte etiam præcipimus omnibus Presbyteris, curam animarum gerentibus, & eorum loca tenentibus, ut a constitutionibus, tam Provincialibus, quam Synodalibus, extrahant omnes casus, in

(b) *Antiq.* in carcere perpetuo detrudendum.



in quibus sui subditi possunt excommunicationis sententia innodari, quos sic extractos in uno rotulo habeant, ut dum confessiones audierint, super illis in ipsorum quolibet interrogent confidentes. (c) Prohibemus insuper prædictis, ne absolvant eum, qui a peccato abstinendi propositum non habet: nihilominus diligenter moneant, ut quicquid boni poterit, faciat, ut Deus ad veram pœnitentiam cor illius illustret: eum tamen sine injunctiōe pœnitentiæ non dimittant. (d) Curati docere debent Parochianos suos, ne rem furtivam, vel suspectam, quod furtiva sit, emere audeant; ut non audiant illud Psalmistæ: *Videbas furcm & currebas cum eo*, quia ipsi ad restitutionem tenentur. Præcipimus etiam & statuimus, ut Sacerdotes in procuranda ablatorum restitutione hunc modum servant: primum injungant pœnitentibus, ut damnum passis, vel eorum hæredibus faciant restitutionem, cum non dimittatur peccatum, nisi restituatur ablatum. Quod si non inveniantur hæredes, jubebunt, ut restituenda applicent in usum fabricæ Ecclesiæ nostræ Cathedralis: & si non habent faculta-

tem impræsentiarum restituendi, curent, ut promittant, se restitutos prædictis modis, ubi & quando facultatem habuerint: & tunc licite poterit absolvere Sacerdos a peccatis. Porro quia repertum est aliquando inconveniens aliquod evenisse propter casus reservatos, vel juris dispositione, vel per Statuta Synodalia: cum enim essent vel minoris ætatis aliqui, vel mulieres, qui Sacerdotem in hisce casibus in promptu non haberent, cui confiterentur: ideoque, aut omnino non confiteri mallent, aut sane longius differrent, quam ex animarum salute esset: non enim videri poterat parva suspitionis macula hinc oriri, si homines (maximeque mulierum genus) ad Nos, seu Vicarios nostros, relictis propriis Curatis, proficiscerentur. Hac de causa volentes verecundiæ consulere & famæ, Curatis & Parochis, nec non eorundem vicem gerentibus, cum quatuor ordinum mendicantium Prioribus ac Guardianis, ita ut etiam liceat iisdem, unum aut alterum adhuc Nobis nominare, quibus similem absolvendi facultatem tuto impartiri possimus, cum ad id per Nos fuerint omnes prævia exa-

(c) *Antiq.* Si quos sententiam incurrisse cognoverint, nobis absolvendos remittant.

(d) *Reliqua hic apposita non inveniuntur in editione antiqua. Subnectuntur autem casus reservati hęc modo:*

Primus casus. In solenni penitentia imponenda. Secundus. In absolutione a symonia canonis impendenda. Tercius. In irregularitate contracta dispensando. Quartus. In incendiario absolvendo. Quintus. In blasphematoribus Dei & Sanctorum. Sextus. In voti transgressione & commutatione. Septimus. Si episcopus de consuetudine vel statuto aut superior certa debeat audire peccata. Octavus. Si episcopus vel superior confessionem audivit de aliquo peccato. Nonus. De parentibus qui filios oppresserunt. Decimus. In homicidiis. Undecimus. De sacrilegiis. Duodecimus. De falsariis. Tercius decimus. De violatoribus ecclesiarum & immunitatum, ac ecclesiasticæ libertatis. Quartus decimus. De sortilegiis. Quintus decimus. De vicio contra naturam: & præsertim cum brutis. Sextus decimus. De corruptione Sanctimonialium. Septimus decimus. De incestu. Octavus decimus. De perjurio. Nonus decimus. De clandestina matrimonia contrahentibus. Vicesimus. De expositione filiorum. Vicesimus primus. De dicentibus falsum testimonium. Vicesimus secundus. De deflorantibus mulieres. Vicesimus tertius. De percussoribus parentum. Vicesimus quartus. De venientibus contra fidem prestitam. Vicesimus quintus. De hereticis. Vicesimus sextus. De committentibus adulterium. Vicesimus septimus. Ablatorum, sive subtractorum vel alias illicite acquisite restitutionibus: quando sunt incerta vel non extant hi, quibus restitutio est fienda. Alias si certa fuerint: & extant hi, quibus debent restitui: ante omnia sacerdos injungat: quod fiat restitutio. Quia non dimittitur peccatum nisi restituatur ablatum. Et tunc licite poterit absolvere a peccato. Vicesimus octavus. De contrahentibus matrimonium contra ecclesiæ vel judicis interdictum. In his omnibus casibus: & ipsorum quolibet curati, & capellani nullam habent potestatem: nisi fuerit eis specialiter a superiore concessa.

examinatione admissi in nostra Diocesi: istud ex nostra potestate munus delegamus: ut ab omnibus peccatis, Nobis ex jure, vel Statutis Synodalibus reservatis, possint absolutionis beneficium impendere, manumque imponere poenitentibus. Quod si quippiam sit, quod scrupulum injiciat, poterunt Curati & Religiosi præfati consilium Vicariorum nostrorum, ad hoc delegatorum, requirere. Cæterum, ut omnes intelligant, quantum Curatis, aut eorum vicem gerentibus, Guardianis, nec non Prioribus mendicantium, ad utilitatem populi, auctoritatis indulgeatur, caluum Nobis reservatorum indicem, seu titulos, hic subnotandos duximus.

#### *VI. Casus reservati Episcopo.*

**I**ncendium, homicidium, sacrilegium, peccatum contra naturam, incæstus, blasphemia in Deum & Sanctos, violatio voti, perjurium solenne, adulterium, defloratio virginis, sortilegium, hæresis, apostasia, divinatio, usura, injectio manuum in parentes, oppressio, seu suffocatio parvulorum, etiam per negligentiam, injectio manuum violentarum in Clericos, crimen falsi, procuratio sterilitatis, vel abortus, violatio Ecclesiarum & Ecclesiasticæ libertatis, corruptio Monialium, clandestini Matrimonii contractio, expositio filiorum, falsum testimonium, matrimonium contractum contra Judicis vel Ecclesiæ interdictum. In his omnibus casibus & ipsorum quolibet Curati & Capellani nullam habent potestatem, nisi fuerit eis specialiter a Superiore concessa. Districte quoque præcipimus Curatis, & eorum vicem gerentibus, ac mendicantibus, ut, cum audierint confessiones suorum subditorum, eos moneant & inducant, ut decimas solvant Ecclesiis Parochialibus de omnibus & singulis, (e) quæ secundum jura, aut secundum loci consuetudinem decimantur: & alias ipsos non absolvant a peccato detentionis decimarum, nisi ut minimum restituere promittant. Item solcite Sacerdotes Parochianos

suos, quicumque fuerint doli capaces, moneant, ut sæpe confiteantur peccata: &, præsertim in principio Quadragesimæ, ipsos instruant, qualiter, & de quibus debeant confiteri, puta de septem peccatis mortalibus, & eorum circumstantiis, de quinque sensibus corporis, de decem Præceptis legis: & de aliis peccatis, simpliciter & pure fatendo veritatem, non autem peccatum palliando. Item statuimus & ordinamus, quod Curati Parochiales, Presbyteri, Capellani in eorum Parochiis moram facientes, & in eisdem Capellas habentes confiteantur suis Decanis, & non aliis, nisi de nostra processerit, vel dictorum Decanorum licentia speciali. Monachi vero & Canonici Regulares, suis Superioribus, vel ab eis deputandis, secundum consuetudinem laudabilem in eorum Ecclesiis observatam: Abbates vero, & Decani Nobis, aut in nostra absentia, nostro Vicario Generali. Per hoc tamen præjudicare non intendimus illis, quibus a Sede Apostolica est indultum, quod confessiones audiant, vel audire valeant sibi confiteri volentium, quominus ea potestate uti valeant, non obstante hujusmodi prohibitione, sicuti antea de jure poterant & valebant. Quia vero, saltem semel in anno, debite non accedens, potest non immerito de hæresi suspectus esse; Statuimus & districte præcipimus Curatis, & cuilibet eorum, quod negligentiam in hac parte suorum subditorum, Nobis infra mensem, postquam eis legitime constiterit, studeant revelare, ut delinquentes puniamus in exemplum aliorum, & ipsorum salutem. Præcipimus etiam Medicis corporum, ut ante omnia, cum venerint ad infirmos, ipsis suadeant confiteri, nec eis aliquid pro sanitate recuperanda suadeant, quod vergat in animæ detrimentum, juxta Decretum Innoc. Tertii in Concilio Generali latum sub hujusmodi tenore: " Cum infirmitas corporalis nonnunquam proveniat a peccato, dicente Domino languido, quem sanaverat: *Vade, & amplius noli peccare, ne deterius aliquid tibi con-*

(e) *In antiq.* Seminibus & fructibus quos terra, aer, aqua, animalia, arbores producunt, alias ipsos non absolvant a peccato detentionis decimarum.

" *contingat*; præsentī Decreto statuimus,  
 " & districtē præcipimus Medicis cor-  
 " porum, ut cum eos ad infirmos vo-  
 " cari contigerit, ipsos ante omnia mo-  
 " neant & inducant, ut Medicos advo-  
 " cent animarum: ut postquam fuerit  
 " infirmo de spiritali salute provisum,  
 " ad corporalis medicinæ consilium sa-  
 " lubrius procedatur, cum causa ces-  
 " sante cesseret effectus. " Huic quæ-  
 dam inter alias causam dedit edicto,  
 quod quidam in ægritudinis lecto ja-  
 centes, cum eis a Medicis suadet, ut  
 de animarum salute disponant, in de-  
 sperationis incidunt periculum, unde  
 facilius formidinem mortis incurrunt.  
 Si quis autem Medicorum hujus trans-  
 gressor extiterit, tam diu ab ingressu  
 Ecclesiæ arceatur, donec pro transgres-  
 sione hujusmodi facti fecerit emendam  
 competentem. Cæterum cum anima  
 sit multo pretiosior corpore, sub pœna  
 anathematis prohibemus, ne quis Me-  
 dicus pro corporis salute aliquid ægro-  
 to suadeat, quod in periculum animæ  
 convertatur. Inhibemus quoque om-  
 nibus Religiosis, cujuscunque religio-  
 nis existant, ne aliquos auctoritate no-  
 stri mandati generalis, vel Officialis  
 nostri excommunicatos, absolvere præ-  
 sumant: excepto mortis articulo, &  
 tunc præstita ab eis cautione, quod si  
 a periculo, vel infirmitate illa valeant  
 liberari, impensæ absolutionis appro-  
 bationem a Nobis, vel Officiali no-  
 stro, quam citissime poterunt, impetra-  
 bunt. Inhibemus etiam omnibus Pres-  
 byteris, subditis nostris, ne quis ex-  
 communicatos pro recognito, vel con-  
 temptu præsumat absolvere, nisi super  
 hoc a Nobis, vel Officiali nostro re-  
 cepto mandato; sed tales ad Nos, vel  
 Officialem nostrum remittant absolven-  
 dos; nisi sit periculum in mora. Quo  
 casu recepta cautione idonea, de im-  
 petranda approbatione absolutionis, &  
 de mandatis nostris juxta formam Ec-  
 clesiæ sibi factis parendo, per se, vel  
 hæredes suos, licitum erit, ipsos ab-  
 olvere, sed non Ecclesiasticæ tradere

sepulturæ, nisi Nobis, vel nostro Of-  
 ficiali consultis, & Curia literis im-  
 petratis. (f) Volentes, quantum in no-  
 bis est, omnium conscientis bene con-  
 sultere: districtē præcipimus omnibus  
 quorumcunque Monasteriorum nostræ  
 Diocesis Visitatoribus, seu Superiori-  
 bus, Patribus Confessariis Moniali-  
 um, clausuram Professarum, ut ex no-  
 stra indulgentia sub suspensionis a Di-  
 vinis Officiis pœna, concedant, ut bis  
 vel ter in anno alicui alteri honesto ab  
 illis (g) & discretio Confessario, suas  
 conscientias revelare possint. Et quia  
 multi per negligentiam, vel imperi-  
 tiam, sæpe & periculose valde peccant,  
 circa formam absolutionis impendendæ  
 iis, quorum confessiones audiunt;  
 ideo volumus & ordinamus, ut omnes  
 Confessarii post salutes monitiones,  
 ac injunctam pœnitentiam utantur for-  
 ma absolutionis sequentis: " Indulgen-  
 " tiam, absolutionem & remissionem  
 " omnium peccatorum tuorum, spa-  
 " tium veræ pœnitentiæ, & emendatio-  
 " nem vitæ, gratiam & consolationem  
 " Sancti Spiritus Paracleti, & perseve-  
 " rantiam in bonis operibus, largiatur  
 " tibi Omnipotens Pater, pius, & mi-  
 " sericors Dominus. Dominus noster  
 " Jesus Christus, qui est verus Abso-  
 " lutor omnium criminum, per suam  
 " sanctam misericordiam te absolvat:  
 " Et ego auctoritate mihi commissa,  
 " absolvo te a vinculo excommunica-  
 " tionis, si incidisti; (b) In Nomine  
 " Patris, & Filii, & Spiritus Sancti.  
 " Amen.

### VII. De Eucharistia.

CUM inter omnia Sacramenta, Eu-  
 charistiæ Sacramentum omnium  
 longe sit dignissimum: existens ve-  
 rum, vivum, & efficacissimum animæ  
 alimentum, sub visibilibus speciebus  
 totum Jesum Christum, Propitiatorem  
 & Redemptorem nostrum, Deum ac  
 hominem occultans: ideo maxime ve-  
 nerandum erit. Quod ut fiat propensius,  
 semper

(f) *Sequentia non leguntur in editione antiqua.*

(g) *forte omissum: electo*

(b) *Recte hic antiqua manu adscriptum a margine: Et ab omnibus peccatis tuis. quod Li-  
 brariorum, seu Typographorum errore prætermisum fuisse, evincunt aliæ formæ, quæ  
 sub finem harum Constitutionum sequuntur.*



semper illud in Ecclesia, loco honesto servari, propendente lumine, volumus: in eo hostiarum numero, qui ad aliquam necessitatem occurrentem bene putatur posse sufficere, ne hostiæ debeant aliquando frangi. Statuimus enim, & ordinamus; quod, quacunque hora infirmus Communionem petierit, omnibus aliis omissis, Sacerdos ad eum accedere sit paratus, hostiam deferens in vase honesto, mundo, & bene clauso: dicendo septem Psalmos pœnitentiales, aut alias orationes salutare, in vultu humili & demisso, cum alicujus campanulæ pulsatione. Item frequenter Sacerdos doceat plebem, ut in elevatione Corporis Christi, flexis genibus adorando, reverenter se inclinet. Similiter quando in solennitate publica circumfertur, & etiam dum portatur ad infirmum, post signum sonitu campanæ datum, ad Ecclesiam (si quo modo commodum est) veniant, comitaturi cum lumine reverenter, & pro infirmo; eundo ac redeundo deprecaturi. Antequam autem Sacerdos Eucharistiam communicet infirmo, consideret, si frequentem vomitum levi occasione patiatur: & tunc non conferat: sed jubeat infirmum credere, & sic spiritualiter illud manducare. Verum si quo casu contingat, ut communicatus evomat partes Corporis Domini, religiose & diligenter colligendæ erunt, & quæ reperiri possunt, cum vino a Sacerdote, vel ab aliquo alio fidei sumentur, ac residuum vomitus comburendum, ponendumque in terra juxta altare, vel alibi in sacro loco, ubi fieri id commode poterit. Videat autem, ut tot hostias consecratas in vase prædicto deferat, ut saltem una remaneat in eodem: ne homines in reditu decipiantur, adorando creaturam, & non Creatorem. Et si propter multitudinem infirmorum, aut aliam causam totum expenderit, cesset in revertendo sonitus campanulæ, & lumen extinguatur, aut aliud signum fiat, per quod certificentur Parochiani, ne se inaniter, sicut idololatræ, inclinent. Omnibus autem vere pœniten-

tibus, & confessis, seu proponentibus confiteri, quam primum opportunitatem habebunt, qui Corpus Christi (quando per Presbyteros ad infirmos portatur) reverenter comitati fuerint, viginti dies, de injunctis sibi pœnitentiis misericorditer relaxamus. (i) Quisque Sacerdos, sive Curatus, suos Christi fideles summa veneratione & modestia communicet; idque sub una tantum specie, postquam illi ad annos discretionis pervenerint; si modo excommunicati, interdicti, vel ob aliquod notorium crimen notati non sint. Velut publice fornicantes, meretrices, ganeones, mimi, histriones, usurarii, Divini, sortilegi, aut de quibus alias constat, quod publica malitia sunt infames. Item, mandamus Sacerdotibus Parochialibus, ut regulariter de octavo in octavum diem Eucharistiam renoveant, ne propter nimiam vetustatem horror recipientibus ingeneretur, & proinde affectui devotionis aliquid decedat.

### VIII. De celebratione Missarum.

**S**Cire debent Sacerdotes, quod non licet, nec permittitur alicui de jure, celebrare in die plures Missas: imo debet sufficere unicuique semel celebrare; quia valde felix est, qui celebrat digne unam. Excepto die Nativitatis Domini, in qua quilibet Sacerdos potest ter celebrare: in die vero Paschæ & in magna necessitate, potest celebrare bis Sacerdos, nisi vinum perfusionis in prima Missa receperit: quo recepto, nullo modo eodem die permittitur ulterius celebrare. Sacerdotes Sacerdotalibus integris & mundis induti ornamentis, ad Missæ Sacrificium peragendum, mundi quoque & confessi accedant: Altare tectum sit, ut minimum duabus pallis, cortinæ utrimque dependeant, ne Sacrificantis visus distrahi possit. Calicem & patenam aurea, argentea, vel stannea esse volumus: bene ac honeste (cum illorum usus non est) lineis involuta sacculis,

aut

(i) *Sequentia non leguntur in antiqua editione. Caput de celebratione Missarum, quod proxime sequitur, invenitur in antiqua editione post Caput de Penit. & Remiss.*

aut sudariolis. Ampullas vini & aquæ perpetuo mundas decet conservari. Vinum (si fieri potest) volumus esse rubrum, ne sit acidum, aut adeo insuave, ut vomitionem, aut nauseam provocet. Hostia integra, solida & rotunda sit, nullum vetustate situm ducens. Universæ Missæ officium legatur distincte, attente, & intelligibiliter; excepto Canone, quem oportet, ut semper in Ecclesia factum est, submisso recitari, nihil in eo mutando, aut omitendo. Totus habitus, vultus, gestus Sacerdotis, devotionem, religionem, reverentiamque in tam tremendorum Mysteriorum tractatione præ se ferant: ut populus, qui Sacris interest, inflammetur ad orandum, & una saltem in spiritu communicandum, cum desiderio fructus Sacramenti & unionis cum Christo. Imago Crucifixi & Pacificatoris nostri ab ore Sacerdotis ad præsentes Officio Missæ circumferatur. Magna quoque cum cautione Sacerdos ante Missæ initium ea præparet, quæ circa Sacrificium sunt necessaria: si autem evenerit per negligentiam Sacerdotis, aut illi ministrantium, quod perlecto Canone, consecrationeque peracta, nec vinum, nec aqua reperiantur in calice, utrumque statim debet apponi & infundi, & reiterabit Sacerdos verba consecrationis, ab illa parte Canonis: *Simili modo*, usque in finem; ita quod illas duas cruces omittat, quæ singulariter sunt super hostiam. Sciendum, quod si de tenui vino fiat consecratio, reputatur pro Sacramento: quod si sola aqua apponeretur, non reputaretur Sacramentum: unde nunquam in majori quantitate debet apponi aqua, quam vinum. Quod si magis apponeretur de aqua, adeo quod ipsa dominaretur, totamque vini substantiam consumeret; non conficeret Sacerdos Sanguinis Sacramentum. Et sciendum est, quod si aqua tantummodo in calice ponatur, & post susceptionem Eucharistiæ reperiatur aqua tantummodo in calice: aqua debet amoveri, & poni in loco mundo, vel reservari usque

in finem, & postea sumi, ob reverentiam particulæ, quæ posita fuit in calice: & amota aqua de calice ponantur vinum & aqua, & incipiantur verba a capite Consecrationis Sanguinis cum orationibus sequentibus. Si autem Sacerdos sumpserit aquam, & adhuc in ore habeat, non expuat, quia si expueret aquam, quam in ore retinuit, illa aqua viliter tractaretur, quod fieri non debet, ob reverentiam Corporis Christi, quod fuit positum in calice cum aqua: & tunc ponatur vinum & aqua in calice, & incipiantur verba de illa parte Canonis. *Simili modo*: Si autem Sacerdos biberit de illa aqua sine vino, ita quod descenderit ad stomachum (k); ponantur vinum & aqua in calice, & incipiantur verba ab illa parte Canonis. *Simili modo*, usque in finem, ut perficiatur Sacramentum sub utraque specie, sicut Christus instituit. Sciant etiam Sacerdotes, quod Corpus Christi elevare non debent, nisi consecratione completa, & verbis, quæ ad eam faciunt, formaliter & integraliter prolatis. Similiter, nec calicem, antequam finierint verba substantialia consecrationis Sanguinis, ne populum idolatrare faciant; cujus contrarium multi faciunt ignorantes: quibus præcipimus, ut a talibus studeant propensius abstinere: alias propter Divinam offensam, quam exinde incurrunt, se noverint graviter puniendos. Item, si de Sangune Christi super Corporale stillaverit, scindenda est pars illa, & in loco reliquiarum reponenda. Si palla altaris intincta fuerit, fiat consimiliter. Si vero super casulam, seu aliquod vestimentum, comburatur illa pars, & cinis in Sacrario reponatur. Si autem ad terram ceciderit, lingendus, tergendus, & radendus est locus ille, & pulvis in Sacrario ponendus. Cæterum si musca, vel aranea, aut aliquid tale ceciderit in calicem, quod vix sine vomitu vel periculo corporis sumi potest, igne comburendum est illud, & Sanguis debet sumi: Rei vero talium negligentiarum subiaceant ultioni. Adjicimus

I i 3

cimus

(k) In antiquo exemplari sic legitur: Si autem sacerdos biberit de illa aqua sine vino: ita, quod descenderit ad stomachum, melius est abstinere a consecratione. Recte hæc corriguntur in editione recentiore, in qua nova consecratio præscribitur, ob causam subjunctam.

cimus etiam, quod nullus Missam celebrare audeat, nisi jejunos, & nisi prius dixerit saltem Matutinas, & Primam. Si autem Sacerdos sit in tanta necessitate constitutus, quod Missam non possit perficere, suppleat alius, si præsens fuerit, diligenter attendens locum, ubi alius dimisit. Item quia exigit perverforum audacia, ut non simus sola delictorum prohibitione contenti, sed & pœnam delinquentibus imponamus: Omnibus & singulis Presbyteris & Capellanis Civitatis & Dioecesis Attrebatensis sub excommunicationis pœna, & quadraginta librarum, piis usibus applicandarum præcipimus, ne bis in die celebrare præsumant, nisi in casibus supradictis, & a jure permissis: & nisi etiam a Nobis, vel Vicariis nostris, super hoc obtinuerint gratiam specialem. Quibus sub prædictis pœnis inhibemus, ne Missas celebrent in præsentia mulierum, quæ post partum ad Ecclesiam accedere solent: nisi postquam eisdem constiterit, easdem purificatas debite fuisse a proprio Curato, seu proprio Sacerdote. Similiter & sub iisdem pœnis inhibemus, ne Missas celebrent in præsentia eorum conjugatorum, qui in sua Parochiali Ecclesia non receperunt benedictionem nuptialem, nisi super hoc a Nobis, vel Officiali nostro licentiam habuerint specialem. Præterea caveant Sacerdotes, ne scientes celebrent unquam, præsentibus excommunicatis: quorum nomina Pastores, singulis Dominicis, in Sacra Concione, aut Missæ officio debent publice denunciare. Nemini liceat domi suæ, sine nostra, aut Vicariorum nostrorum licentia Capellam extruere: qui contra fecerit, gravi pœna ferietur. Item sub pœna excommunicationis, & decem librarum, omnibus & singulis Presbyteris mercenariis inhibemus, ne præsumant in quavis Ecclesia, Oratorio, seu Capella nostræ Dioecesis celebrare Divina, seu ministrare Ecclesiastica Sacramenta, nisi in casibus a jure licitis, & permissis, nisi prius a Nobis, & nihilominus postea a Curatis, seu loca tenentibus eorum petita licentia & obtenta. Et sub eisdem pœnis inhibemus dictis Curatis, &

omnibus aliis Ecclesiasticis personis, regentibus Capellas vel Tempia; ne talia fieri patiantur in suis Ecclesiis, nisi prius eisdem Curatis constiterit evidenter, eosdem mercenarios a Nobis (ut præmittitur) obtinuisse gratiam specialem. Hortamur etiam omnes & singulos Decanos, Curatos, & eorum loca tenentes, ut quotiescunque commode poterunt, intra Ecclesiam, quæ Domus orationis dicitur, sacro attestante eloquio, dicant Horas Canonicas, & Divinum Officium: quod sub præcepto eis damus, saltem quoad dies Dominicos & Festivos. Inhibemus insuper dictis Curatis, sub pœnis suspensionis ab officio, & centum solidorum Parisiensium, ne sine literis nostris, admittant ad Divina aliquam personam, de qua ad eorum notitiam pervenerit probabiliter, etiam per famam publicam solum, quod excommunicationis sententiam a Canone incurrerit propter injectionem manuum violentarum, factam in Clericum, vel Ecclesiasticam personam. Hortamur quoque omnes & singulos puberes & adultos, tam Clericos, quam Laicos Civitatis & Dioecesis Attrebatensis, ut singulis diebus Dominicis & Festis, a Clero & populo coli, & etiam celebrari debitis, ad Ecclesiam suam Parochialem conveniant, Divinum Officium, Missamque integraliter audituri, cum præceptis Festorum, & jejuniorum, ac aliorum, quæ in Ecclesiis denunciari solent. Cæterum sicut in majoribus & insignioribus Ecclesiis Divinum Officium & solennius, & cum majori reverentia celebrari convenit (idque certis, statutisque diei horis, ut plebs Christiana se se ad Missarum solennia, & debitas Deo offerendas preces, præparare possit) ita & in subalternis Parochialibus Ecclesiis nostræ Dioecesis, hoc omnino observari volumus: tunc etenim populus fidelis debito modo & ordine, quæ agenda sunt, persolver. (1) Quod ut facilius fieri possit, statuimus & ordinamus; ut in Ecclesiis Parochialibus (in quibus ex antiqua & non recta consuetudine, statutis horis, Festis diebus, aut Dominicis Missa Parochialis non celebratur, sed nunc serlus, nunc tempestivius; pro

(1) *Sequentia hujus Capituli non habentur in editione antiqua.*



pro libito & arbitrio quorundam: quod quidem tendit in negligentiam, & vilipendium Divini Cultus; statuimus, inquam, ut in æstate in dictis Ecclesiis Parochialibus, Missa Parochialis non ante octavam celebretur, in Hyeme autem non ante nonam: ita enim fiet, ne rei domesticæ negotiis quid depereat populo ipsi, nec quod de Divino cultu neglecto quæri possit, relinquatur. Sed quia subinde neglecta Ecclesia Parochiali, hi qui de propria salute non multum solliciti sunt, diebus Festis & Dominicis, dum Sacro Parochialis Ecclesiæ interesse deberent, discurrunt per Capellas quasdam, ibidemque sese Divina audire jactitant; volumus deinceps, ne neglectis Parochialibus Ecclesiis populus per Capellas, aut alia privata Oratoria, discurrat, eo præsertim tempore, dum Verbi Divini prædicationi in Ecclesia Parochiali interesse deberent: sed nec in præfatis Oratoriis, aut Capellis, aut in ipsis Ecclesiis Parochialibus, etiam ex fundatione, deinceps solennia Sacra celebrentur, diebus præsertim Dominicis & Festis, nisi post Missam Parochialem, vel ante eandem, ubi populus de his, quæ salutis sunt, admoneri per Curatos & instrui debet: ita enim fiet, ut Pastor oves sibi creditas, facile cognoscat, ut possit, quod infirmum est, consolidare: & quod ægrotum, sanare: & quod contractum, alligare.

De Parochialibus Missis etiam hoc amplius præcipimus, ut in Missis solennibus, quæ cantantur, Sacerdos nullo modo Symbolum Apostolorum, Præfationem aut Precationem Dominicam prætermittat, nisi forte deficiente voce tacere cogatur: ubi organa sunt, efficiatur, ut nihil seculare sonent, seu aliud, quam Cantum Ecclesiasticum: omnino autem ne pulsantur ab elevatione Eucharistiæ usque ad Agnus Dei: quo interea ab omnibus, sub alto silentio, religiosa ac devota Dominicæ Passionis, & nostræ Redemptionis memoria recolatur. Ut autem populus solito religiosius & libentius quæcunque Sacerdotes in Missa agunt, obser-

vet, mandamus omnibus Curatis, ut frequenter & admodum prudenter doceant, de adorandis Mysteriis Missæ, juxta Sanctorum Patrum doctrinam, & ea, quæ in formula Cæsareæ Majestatis (cujus præscriptum sæpe multumque in toto hoc Synodali Statutorum libello sequimur) de Missa traduntur. Quo tempore Missa Parochialis celebratur, aut Evangelii prædicationi durat, neque tabernæ, cauponæ aut cenopolia foris pateant, neque in Templo aut in Cœmeterio populus ambulare permittatur; ne qua occasione Officia Divina alicui vilescant, & hæc inhibeant Parochi sub pœnis negandæ absolutio- nis, aut Communionis. Quare nec conventus Capitulares in Ecclesiis tempore Divinorum tolerare ullo pacto volumus, ut conjunctæ omnium Christi fidelium preces in Ecclesia ardentiores sint, ac efficaciores apud Deum.

#### IX. De Oblationibus in Missa faciendis. (m)

**Q**uia didicimus ex Sacris Bibliorum voluminibus, fuisse in lego veteri, præter varia Sacrificia, plurimas Primitiarum, Decimarum & aliarum rerum liberales Oblationes, ex quarum consideratione fluxit consuetudo in nova lege, ut in primitiva Ecclesia, in usum Ministrorum magnis studiis populus in Missa multa offerret, ratione quorum, & Orationes, quæ vocantur Secretæ, quibus oblationes populi Deo commendantur, sub Offertorio legendæ, a Sanctis & antiquis Patribus Missæ adjunctæ sunt: ideo volumus, & mandamus, ut Concionatores, qui de populi oblationibus non participant, hortentur omnes, ad revocandam oblationum consuetudinem, & doceant, ut & pro vivis & pro mortuis offerant: quo preces & orationes illæ, quas Sacerdos post Offertorium legit, in illos quadrent, & suffragiis orationum, & oblationis Christi non fraudentur. Doceant quoque populum, ut ad Altare offerant suis Pastoribus, in quatuor Festis principalibus anni, & alia Parochialia jura persolvant, secundum laudabilem morem

(m) In antiqua editione non invenitur hoc Caput, nec sequens de celebratione Horarum Canonicarum, nec tertium de Processionibus, nec quartum de prædicatione Verbi Dei.

morem in Ecclesiis hætenus observatum.

*X. De celebratione Horarum Canonicarum.*

**C**UM Divini Verbi testimonio doceamur, etiam maledictum esse hominem, qui fecerit opus Dei negligenter, & experientia quotidiana tantum neglectum in celebrandis Divinis Officiis committi comperimus, non sine provocatione iræ Dei, & summo totius populi Christiani scandalo; præsentibus malis volentes remedio opportuno occurrere: Statuimus, ut non solum Missæ Officium omni reverentia celebretur horis & temporibus, ut prius constitutum est, congruis, sed ut reliquum Divinum Officium, preces scilicet Canonice, aliæque Divinæ laudes, modo debito & honesto in templis celebrentur, in cantu debito, tractim & integre, si non per Canonicos, aut Curatos, prout Ecclesiæ curatæ tamen, aut Collegiatæ fuerint, saltem per diligentes & bonos Vicarios: qui omnino curare debent, ut nomini suo respondeant; præsentibus, & ipsi Divino Officio continuo interessentibus omnibus, qui horæ illius, qua illud officium celebratur, distributione gaudere volunt: nisi quem forte excuset infirmitas, seu iusta & rationabilis corporalis necessitas, aut evidens Ecclesiæ utilitas. Interesse Divinis illos putamus, qui continuo tempore, quo fit Officium Divinum, aut canuntur horæ Canonice, in choro manent, aut non nisi ad modicum ab eo absunt; ubi, aut cum aliis psallendo, aut privatim meditando sese occupant. Quare ne quis de Clero, vagationibus & obambulationibus in templo, aut intra immunitates ejus vacet: districte præcipimus, ut taliter facientes priventur distributione illius horæ, in qua peccasse invenientur, aut animadvertatur in eos, juxta Concilii Basiliensis, cujus verba hic sequuntur, Decretum: Quicumque in Ecclesia Beneficiatus, præsertim de Majoribus, Divinorum tempore per Ecclesiam, vel foris circa ipsam deambulando, aut cum aliis colloquendo, vagari vilis fuerit; non solum illius

horæ, sed totius diei præsentiam ipso facto amittat: qui si semel correctus non destiterit, per mensem distributionibus careat: vel graviori, si pertinacia exegerit, pœnæ subiaceat; ita ut tandem desistere cogatur. Prohibeatur etiam, ne Divina Officia, tumultuosi quorumcunque per Ecclesiam discursus, impediant, aut perturbent. Regulares, qui in conventualibus Ecclesiis circa prædicta excesserint, gravi pœna Superiorum arbitrio castigentur.

*XI. De Processionibus.*

**P**ROCESSIONES, & supplicationes, quæ ad excitandam multitudinis devotionem, olim recte institutæ, & hominum vanitate nunc in varios abusus tractæ sunt, religiosius posthac volumus observari: prohibentes, ut nihil petulans, scurrile, aut prophanum in illis admittatur: cessent otiosa spectacula, ut seriæ, graves, compositæ, & quod dicuntur, supplicationes sint. Quare jubemus, ut Curati diligenter doceant, cur institutæ, & quid significant solennes Processiones: Clerus quoque in his studeat se religiosum præstare, cum gravitate ambulans, & sicut res ipsa postulabit, aliquid pium legens, cantans, aut meditans, optimis exemplis modestiæ, sanctitatis, præsentibus ædificando: nullo autem modo, aut prophanis colloquiis vacet, aut curiosè, huc, illuc circumspiciens, obambulet, nec ad jentacula delabatur; sed finita supplicatione, unde processerunt, revertantur Clerici pariter & Laici.

*XII. De Prædicatione Verbi Dei.*

**C**UM Verbi Dei Concionatorem meminisse oporteat, quanta fungatur pro Christo apud populum legatione: ad quam non debet temerario ausu profligare, sed expectare, donec ad munus, tantæ in Ecclesia difficultatis, utilitatis, necessitatis & dignitatis, vocetur; idcirco inhibemus, ut si sive sæculares Sacerdotes sint, si Religiosi, cujuscunque ordinis, status, aut conditionis, ne præsumant prædi-

prædicationis officium obire in Ecclesiis Parochialibus, Capellis, aut Cœmeteriis, antequam exacto ac diligenti per Nos facto examine, ad prædicationem Verbi Dei, specialiter nostrarum literarum testimonio, fuerint admissi: qui præscriptum instructionis, in Formula Reformationis Cæsareæ Majestatis sub Tit. *Dispens. Verbi Dei.* (n) positæ, in omnibus suis articulis servare tenebuntur, in exhortando, monendo, objurgando, Scripturas Sacras interpretando. Caveant incerta, fabulosa, vel suspecta proferre, difficiles quæstiones, & quæ non ædificant rudem populum, sed prolixas contentiones potius provocant, in concionem ne adducant. Omnem servant in gestu, vultu modestiam, docentes sanam doctrinam Ecclesiæ Catholicæ, Scripturis Sanctis, & Ecclesiasticis Doctoribus conformem.

### XIII. De Matrimonio.

**M**atrimonii vinculum ab ipso Ecclesiæ capite, rerum omnium conditore, ipsum in paradiso, & in statu innocentie instituyente, unionem, & indissolubilitatem accepit. Et ideo statuimus & ordinamus, quod cum reverentia & honore, tempore ab Ecclesia non interdicto, palam & publice, & interdiu, in facie Ecclesiæ, coram alterius contrahentium Pastore, aut Vice-Pastore ante Missam, quam audire tenebuntur, aut ut ad minimum post Missam, in Ecclesia auditam, celebretur, ne contractum vinculum negari valeat; Et antequam fiat, tribus diebus Dominicis, aut Festivis, a se distantibus, Presbyter denunciât Matrimonium contrahendum, inter Missarum solennia ante summum Altare, seu ante chorum, post decantatum Evangelium, vel post Dominicam matutina concionem & suggestu; prout fuerit loci laudabilis consuetudo: Nominando personas, & sub pœna excommunicationis omnibus injungendo, quod impedimentum sciens, quare initiatum Matrimonium perfici non debe-

at, revelet, antequam dicta tria banna, seu edicta fuerint in Ecclesia publicata: (o) Nam etiam cum tantum apparuerit Sacerdoti impedimentum ex probabili conjectura; non licebit illi conjungere, aut illis conjungi, sub pœna excommunicationis: donec per Nos, aut nostrum Officialem (quos occurrente tali casu adire debebunt) de agendis fuerint instructi. Cæterum, quia multos rudiores Curatos esse in hac nostra Diocesi timemus, qui nesciunt populo aliquando publicanda impedimenta Matrimonii; non gravabimur hic paucis ea commemorare. Impossibilitas carnaliter cognoscendi, cum propter defectum naturalis caloris, tum propter passum maleficium: cuius procuratorem excommunicamus, & excommunicatum denunciamus: suscepta, ac professâ Religio: susceptio Ordinis sacri Subdiaconatus, & supra: cognatio spiritualis, consanguinitas intra quartum gradum, cognatio carnalis, affinitas: votum solenne factum in manu Episcopi, vel alicujus, ex parte ejus destinati: dispar cultus paganismi, vel Judaismi: vis, coactio, violentia: error personæ, inhonestas, seu contra publicæ honestatis instituta. Qui scienter contraxerint contra hæc Canonica interdicta, a Canone se non ignorent excommunicatos. Sacerdos itaque si noverit aliquos illicite conjunctos, sub pœna excommunicationis ne differat nobis indicare: & ante hujusmodi trium bannorum publicationem, seu proclamationem, etiam se nemine opponente, nullus audeat celebrare Matrimonium, seu solennizare, nisi super hoc a Nobis, vel Officiali nostro, petita licentia, & obtenta. Et quia in horum trium bannorum remissione subinde hætenus peccatum est; & sic per indirectum Concilii Generalis Constitutioni neutiquam satisfactum, quod ante Matrimonii solennizationem, congruum vult terminum publice constitui per locorum Sacerdotes, ut infra illum, qui voluerit, aut valuerit, legitimum impedimentum opponat; ordina-

(n) Vide Tom. VI. Conciliorum German. pag. 752.

(o) Pleraque ex sequentibus non leguntur in antiqua edit.

Tomus VIII. Concilior. German.



dinamus, & deinceps volumus, ne super his tribus bannis amplius dispensari possit per Officialem, aut Vicarios nostros, quin saltem unum supersit, quod publice fiat, in die Festo; sitque spatium sufficiens, ut infra illud commodè possit impedimentum, si quod sit, annunciari, puta trium dierum. Illudque salutare Statutum, quod sæpe in Sacris Canonibus reperitur, omnino servari volentes, præcipimus, & districte statuimus, ut deinceps Matrimonia, nisi in facie Ecclesiæ contrahantur: ne deinceps in domibus privatis, prout sæpe contigisse repertum est, celebrari Matrimonia permittantur: sed qui nubere vult, benedictione accepta a Sacerdote publice & clara luce, nubat in Domino. Hoc autem Statutum adeo districte observari volumus, ut Decani, aut Archipresbyteri, super eo dispensare non valeant. Serio vetamus, ne pro proclamatione, aut registratione bannorum, & concessione testimonialium, si contrahentes diversarum Parochiarum, aut Diocesium fuerint, Decani rurales, aut Pastores pro sigillo aut cera accipiant plusquam..... Ex alia quoque Parochia, vel Diocesi venientem non jungant, nisi conjungendus, conjungendave habuerit literas sui Parochi, testantis, proclamationibus bannorum per se factis, nullum se scire, aut intellexisse Canonicum intervenisse, aut interventurum impedimentum. Quare excommunicatos a Canone, per Sedem Apostolicam tamen absolvendos, nunciamus, Religiosos, seu alios quoscunque, qui auserint solennizare Matrimonia alienorum Parochianorum, non habita super hoc Presbyteri Parochialis Ecclesiæ licentia. Item, quia Matrimonia clandestina adeo sunt in jure reprobata, quod proles exinde secuta & suscepta, eo durante, si postmodum impedimentum appareat, quare Matrimonium non possit stare inter eos, prorsus censetur illegitima, nec succedet parentibus, de parentum ignorantia nullum subsidium habitura: & Parochialis Sacerdos etiam, aut quilibet regularis, qui talibus Matrimoniis præsumpserit interesse, sit per triennium ab officio suspendendus: idcirco districte præci-

pimus & prohibemus sub excommunicationis pœna, quam in contrarium facientes, propter culpas præcedentes, ferimus in his scriptis, ne quis, vel qua clandestinum Matrimonium contrahat, aut tali Matrimonio, dum contrahitur, intersit. Quod si Parochialis Sacerdos, Capellanus, aut Regularis fuerit, qui in talibus interesse præsumpserit, ipsum ab officio suspendimus, & si suspensione durante, Divinis se immiscuerit, irregularitatem ipsum incurrisse ipso facto declaramus, a qua non poterit liberari, nisi per Sedem Apostolicam. Matrimonia vero clandestina appellamus, quæ per verba de præsentì, sine proclamatione bannorum contrahuntur, & sine solennitate Ecclesiæ: vel quæ per verba de futuro, per carnalem copulam, ante lapsum proclamationis bannorum, & benedictionem, subsequuta præsumptione juris, & de jure contracta consummantur. Quia vero subinde varix & frequentes contentiones coram Officiali nostro Attrebatensi oriuntur, idque ex sponsalibus, quæ vulgo affidationes vocantur, dum in locis privatis, non præsentibus fide dignis testibus, aut post ebrietates celebrantur; dignum duximus, hujusmodi promissis temere subinde emissis, omnino obviare; statuentes, ne tales promissiones aut affidationes exinde fiant, nisi aut in loco sacro, aut alio honesto prophano, tuncque præsentibus parentibus contrahentium. Et prorsus in re tam seria & magni momenti, cessent ludi aut joci parum honesti, & inutiles illæ computationes, quæ cum sæpe (\*) dederint, ut ab hujusmodi affidationibus subinde altera pars reticere tentarit, quod videlicet in probatione clam emissæ, testante Sacro Concilio Arelatensi, aut nulla prorsus existente, aut dubia, variaque, oriretur altercatio: necessarium visum fuit, commodum ad hanc rem hujusmodi adferre remedium. Si autem fidem dederint per verba de futuro, & ante copulam carnalem, fidem datam mutuo, velint remittere, non fiat hæc remissio, nisi conscio Episcopo, ejus Officiali, aut loci Archidiacono. Item caveant sibi Sacerdotes sub pœna suspensionis, ne in Sponsalibus, quæ solent con-

(\*) *Supple: ansam.*

contrahi ante proclamationem bannorum, utantur verbis de præfenti, sed verbis de futuro duntaxat, his aut similibus: N. vis promittere, quod accipies N. quæ hic est, in uxorem, si Canonicum impedimentum non obstat: & e converso. Quibus dictis, accipiet manus contrahere volentium, & dicet: N. tu promittis, quod accipies N. in uxorem, si Canonicum impedimentum non obstat? & e converso: ac prohibebit, sub pœna excommunicationis, ne ante Matrimonium legitime in Ecclesia celebratum, se carnaliter cognoscant. Mandamus quoque Presbyteris, Curatis aut Vice-Curatis, ut patriam, parentes, nomina & cognomina athdatorum diligenter inquirant, & sic libro suo, ad hoc particulariter destinato, inscribant, quem in necessarium usum nostrorum Promotoris aut Decanorum, legendum, inspiciendumque conservare debemus. Item Curatis Nobis subditis, vel eorum loca tenentibus, præcipimus, quatenus publicando hujusmodi, de non contrahendo clandestine, Statutum, suis Parochianis prohibeant sub excommunicationis pœna, ne fidem sibi ad invicem tribuant de Matrimonio contrahendo, nisi coram Sacerdote, & testibus, vel amicis utriusque partis. Quod si contra fecerint; sub eadem præcipimus, hoc infra duos menses, coram Sacerdote curato, vel ejus Vicario, si prædicti Curati copia haberi non possit, publice recognosci: alioquin contra partem, per quam stabit, ad pœnas graviores procedemus. Item quia causæ matrimoniales, non per quoslibet sunt tractandæ, sed per Judices discretos, qui potestatem habent judicandi, & Statuta Canonica non ignorant: & quia etiam in causis prædictis arbiter nequit assumi; sub pœna excommunicationis & suspensionis, quas in contrarium facientes ipso facto incurrant, districte prohibemus, ne quis alius de causis matrimonialibus, dependentiis, accessoriis, vel concomitantibus eas cognoscat, sive tractet, tanquam amicus compositor, seu etiam arbitrator, vel amicus compositor compromittat: sed si aliquod dubium in hujusmodi causis interven-

rit, ad Nos, ad quem spectat, vel Officiale nostrum, habeatur recursus: & Nos, vel dictus Officialis noster, simpliciter & de plano, sine strepitu & figura judicii, procedemus in iisdem. Item nullus Curatus aut Capellanus, secundo nubentem, vel eum, aut eam, qui cum tali contrahit, audeat benedicere: alioqui ab officio noverit se suspensum. Item moneant sæpe Curati subditos suos sub pœna excommunicationis, ut sua Matrimonia legitima custodiant, & cum aliis stuprum, adulterium, sive incestum, non committant. Ne aliquis aliam, quam uxorem, & econtra uxor, quam maritum superinducat: alioqui ipsos & ipsas super inducentes, quos in his scriptis excommunicamus, a Nobis palam & publice excommunicatos nuncient, nec ipsos facile absolvant, sed prædictos publicos & manifestos adulteros, ad Nos, vel Vicarios nostros remittant absolvendos, nisi essent in mortis articulo constituti. Quo casu etiam ordinamus, quod injungatur eis, quod si de illa infirmitate convaluerint, ad Nos, vel dictos nostros Vicarios accedant, quam cito commode poterunt, absolutionis impensæ approbationem petaturi. Alioquin in eandem sententiam excommunicationis se incidisse noverint ipso jure. Ac quia in eandem fere sententiam extat Constitutio Synodalis, Reverendi Patris Domini Petri Mansuerii, utriusque Juris Doctoris Excellentissimi, & Prædecessoris nostri, quam publicavit Anno Domini 1375. ideo, ut antiquitati suæ quoque honor tribuatur, subjiciendam duximus. "Ad audientiam nostram fide digna relatione pervenit, quod nonnulli uxorati, relictis de facto, & licentiatis suis legitimis uxoribus, aliis subinductis, in suis domibus, sive lectis palam & publice (ac si essent eorum uxores desponsatæ) tenent: & econtra mulieres conjugatæ, maritis suis legitimis abjectis de facto, & alios viros assumere, & cum eis residere, ac si essent earum mariti, non verentur in grave scandalum plurimorum; Ea propter, cum tales manifesti adulteri sunt perjuri, & per dictum statutum excommunicati, præcipimus, in his scriptis, omnibus Ecclesiarum

Reſtoribus , ſub obedientiæ debito, quatenus in ſuis Eccleſiis diebus Dominicis, tales denuncient excommunicatos adulteros & perjuros, palam & publice nominatim, ex quo delictum eorum eſt notorium, publicum & manifeſtum, & per evidentiam facti conſtat, & ab omnibus tanquam excommunicatos faciant arctius evitari, donec ſuper his, Nobis, ſeu Curiae noſtræ, ad emendam venientes, a præmiſſis adulteriis penitus deſiſtendo, & ceſſando fuerint literatorie abſoluti: de qua abſolutione Curatis ſuis fidem facere teneantur, priusquam ipſi, vel eorum liberi ad aliqua jura Eccleſiaſtica, vel Sacramenta per eosdem Curatos admittantur, taliumque adulterorum nomina per Decanos, ſeu Curatos, infra menſem a die notiæ volumus Curiae noſtræ referri, ut contra eos ad alias pœnas graviores procedatur."

#### XIV. De Sacramento Ordinis. (p)

**N**on mirum, aut novum facturi Nobis videmur, ſi in impertinendo Sacramento Ordinis, quod in Eccleſiaſtica Hierarchia merito magnæ dignitatis habetur, quodque a Chriſto in nova lege inſtitutum legimus, plus non ſolicitudo tantum, ſed & ſeveritatis, juxta veteres & Canonicas Sanctiones, uſurpemus; cum ex ejus neglectu male hætenus audire Eccleſiam ſciamus. Inhibemus itaque, habentes imprimis rationem perſonarum, ut nullus irregularis, vel filius Sacerdotis, aut alias illegitime natus, niſi prius habita diſpenſatione, ad Sacros Ordines præſumat accedere. Ad avertendam quoque morum & doctrinæ corruptelam, quam nunc dolentes experimur in Eccleſiam irrepiſſe, inſequentes ordinationem Formulæ Reformationis Cæſareæ Majeſtatis, diſtricte mandamus: ne quis ad Sacrorum Ordinum perceptionem admittatur, niſi diligentiffime per Nos, aut Vicarios noſtros, bonos & doctos, quibus hoc onus impoſemus, examinatus de ætate, fide, moribus ac eruditione, nec non animo, ſeu affectu, quoad petendos & ſuſcipien-

dos Ordines venit. Maximam quoque curam haberi volumus, conditionis, ſtatus, aut dignitatis examinandorum: Nam quo quiſque major, aut dignior eſt, eo rigidiori examini, ſine aliqua conniventia ſubjicietur. Quia autem experientia compertum eſt, nonnullos fide data contraxiſſe ſponſalia, aut matrimonium, qui poſtea ad Sacros Ordines promoveri præſumunt; congruum eſt, ſtatuerè, ut publice in Eccleſia Parochiali, per Curatum loci, tribus diverſis edictis, ſuper quibus non intendimus diſpenſare, per ſingulos dies Dominicos, aut Feſtos, ordinandi ad Sacrum Subdiaconatus ordinem, proclamantur: prout in bannorum matrimonialium proclamatione fieri præcipimus. Nullo autem reperto impedimento, aut vinculi alterius alicujus, aut defectus notorii, ætatis, morum, aut ſcientiæ, promovendus, de dicta proclamatione ſic rite facta, a loci Paſtore teſtimonium de fide factarum proclamationum modo prædicto, ad examen ſecum adferat: quod quidem, quantum ad ætatem, & mores attinet, continere etiam debet duorum aut trium teſtium probatorum teſtimonium, deponentium ſolenni juramento, de ſufficiencia ætatis promovendi, & de probata & inculpata illius vita. Pro quo quidem ſuo reſcripto dictus Curatus habeat duos ſtupheros. Inſuper præcipimus, ut ordinandi ad Subdiaconatus, aut Diaconatus ordinem, nomina ſua dent Examinatoribus, feria quarta antecedente diem ordinationis ſuæ futuræ, & eodem, & ſequenti die examinentur: illi vero, qui ordinandi ſunt ad Sacerdotium, dabunt nomina ſua feria quinta ante diem ordinationis, quibus commoda hora examinationis ſtatuetur. Et antequam quis recipiat Sacrum Ordinem, confiteatur ſua cum devotione peccata: nam, cum Sacri Ordines conſolationem cœleſtis gratiæ tribuant, ſuſcipientem eſſe convenit ſine macula mortalis peccati, quia ſimul eſſe non poteſt gratia cœleſtis, & macula peccati. Nullus Sacros Ordines ſuſcipiat, ſeu etiam minores, ab Epifcopo alieno, niſi literas dimiſſorias a No-

(p) Caput hoc multis partibus auſtius eſt, quam in editione antiqua.



a Nobis, vel Vicariis nostris meruerit obtinere, nec etiam Clericalem tonsuram: & qui contra fecerit, executione sui ordinis careat: monemusque talem, ne executioni se immisceat, aut tonsuram taliter receptam radi faciat; donec a Nobis, post debitum examen boni testimonii, de vita, moribus, ætate, ac doctrina, cum ipso fuerit misericorditer dispensatum. Verum ne dimissorialium concessio, alicujus malitiæ, aut inidoneitati prodesse possit; declaramus, Nos post hac nemini dimissoriales indulturos, nisi postquam Nobis, aut Vicariis nostris sufficienter constiterit, per justum ordinandorum Examen: vel, si absint a Patria, per alias legitimum testimonium fide dignorum, bona ac rationabili causa eas postulari. Præterea cum Ecclesiæ non parva irrogetur ignominia, si ipsius Ministri, velut pannosi & mendicantes, eleemosynis victum quaritare cogantur, aut sane ei intendere quæstui, qui Sacerdotalem dignitatem non deceat; fuit ab Ecclesia antiquitus statutum, ne Episcopi Clericos ad Sacros Ordines promoveant, nisi sub titulo, eoque sufficienti, beneficii aut patrimonii. Quæ de causa ne in nostra Diocesi hujusmodi scandala in Ecclesiæ dedecus & vituperium amplius contingant; prohibemus, ne deinceps promovendi, ad Sacrum Subdiaconatus Ordinem ullo modo admittantur, nisi sufficientem titulum, quem usque ad viginti librarum Turonensium valorem idoneum esse judicamus, aut beneficalem, aut patrimoniam exhibeant, super quo per Vicarios nostros, vel Officiales, diligens fiat inquisitio. Quod si ergo beneficalem promovendus produxerit; præstet coram Examinatoribus Sacramentum, quod hunc titulum canonice sit adeptus. Quod si patrimoniam ostendat, diligenter inquiratur, an legitimo titulo, cessionis forte, aut donationis, aut alio loco eum sit adeptus, & super hac re legitimum etiam exigatur Sacramentum, nullam in tali cessione, aut donatione, aut alio titulo intervenisse fraudem, dolum, aut simulationem: deponatque similiter,

quod illum titulum non alienabit, antequam alium legitimum & sufficientem præacti valoris fuerit assecutus. Quare etiam præcipimus, quod nulli ad Ordines admittantur per titulum Vicariæ, nisi sit perpetua, & a qua submoveri non possit. Præpositi, Decani, & quicunque curam habent animarum, ad Ordines Sacros suscipiendos se præsentare debent, & in Ecclesiis suis facere residentiam, nisi per Nos, aut alium potestatem habentem, desuper ex rationabili causa cum eisdem legitime fuerit dispensatum. Item prohibemus, sub pœna excommunicationis & decem librarum Parisiensium, piis usibus applicandarum, ne aliquis ad Clericalem tonsuram per aliquem præsentetur, aut eandem recipiat, nisi major infante fuerit, & etiam literatus. Nullus conjugatus ad Clericalem tonsuram recipiendam in nostra Diocesi, Nobis aut alteri, seu aliis loco nostri præsentetur quovis modo, aut eandem recipiat. Quod si secus a quoquam attentatum fuerit; præsentans, & recipiens, excommunicationis sententiam ipso facto incurrant: talesque privilegio Clericali in nullo gaudere volumus; imo sic de facto tonsuratos, a foro seculari nullatenus exemptos, nec Clericali militiæ sociatos, sententialiter decernimus in his scriptis; seu, quod verius est, declaramus, & idem censemus de illo, qui sponsalia per verba de futuro contraxerit. Item volumus omnes & singulos, privilegio Clericali insignitos, singulis diebus, Psalmum (q) pœnitentialem quinquagesimum: *Miserere mei Deus* &c. dicere. Acolythi Horas Virginis Gloriosæ, Subdiaconi, & alii in superioribus Ordinibus constituti Horas Canonicas legent, ad quas etiam dicendas, omnes & singuli beneficia obtinentes sunt propentius obligati, licet non sint in Sacris Ordinibus constituti: (r) & cum propter officium detur beneficium, merito tales Divinum Officium negligentes, & pensum servitutis Deo debitæ non solventes, possent suis beneficiis spoliari: insuper adjicimus & consulimus, quod propter inadvertentias, quas circa Ho-

K k 3

ras

(q) In antiquo exempl. Septem Psalmos penitenciales.

(r) Additur in antiquo: quod nisi fecerint, peccant mortaliter.

ras Canonicas faciunt, post Vesperas qualibet die dicant Antiph. *Salve Regina &c.*

Custodes Ecclesiarum & Sacristæ, sint Clericali habitu incedentes decenti & honesto. Cum enim ipsi sint, qui operam suam etiam Divinis rebus præstant, & Curatis Ecclesiarum Parochialium in re sacra peragenda auxiliuntur: indecorum esse arbitramur, si Laicorum more converſentur. Volumus ergo, ut huiusmodi ædiles aut Ecclesiarum Sacristæ, sint ad minimum, Clericali tonsura insigniti, dumque Sacris peragendis interfunt omnino habitu Clericali ornati, ministeria sua in superpelliceis exhibeant, lintheaque Sacrarii, Ecclesiæ pallas ac mappas, vestes quoque sacras satagant mundas asservare: de quorum lotione, quando sordida erunt, debebunt admonere illos, quibus hæc cura incumbit, & quibus per Canones licet, sub pœna suspensionis ab officio, & emolumentis, donec pareant.

#### *XV. De Sacramento Extremæ Unctionis.*

**I**Nſistentes huic Sanctissimi Apostoli Jacobi sententiæ: *Infirmatur quis in vobis? inducat Presbyteros Ecclesiæ, & orent super eum, ungentes eum oleo in nomine Domini: & oratio fidei salvabit infirmum, & allevabit eum Dominus, & si in peccatis sit, remittentur ei*; Ordinamus, ut juxta Catholicæ Ecclesiæ vetustissimam consuetudinem, cum reverentia & honore, Oleum Sacrum ad infirmos deferatur per Sacerdotem, dicentem inter eundem septem Psalmos, cum aliis orationibus consuetis: idque fieri volumus præſenti aliqua multitudine fidelium, quæ Sacerdoti inungenti adſit, & cum infirmo, aut etiam nomine infirmi, possit religioſe, & devote, flexis genibus, alternos Psalmorum, aut Litaniarum versus recitare, aut ſaltem una orare. Studeant Presbyteri infirmos sæpe visitare, & eis prædicent Verbum Dei, & eos ad meditandum de animarum ſuarum ſalute gratioſis, benevolis, ac piis exhortationibus ſolicitent; eos ad fidem, devotionem, contritionem, & integram peccatorum confessionem incitando, & propenſius erigendo jam

contritos & confessos, ad ſpem veniæ per Christum obtinendæ. Doceant Parochi, iſtud Sacramentum, a puberibus in gravissimis ægritudinibus ſuſcipiendum eſſe, ac etiam iterari poſſe in diverſis, ac periculosis morbis; præmiſſa tamen ſemper confessione, niſi forte illam excludat ægri ex nimia mortis iſtancia procedens imbecillitas. Inuncti extergantur ſtuppis, quarum exuſtarum cinis in ſacrum locum reſicietur. Librum etiam habeant, qui dicitur Manuale, ubi continetur ordo Extremæ Unctionis, Cathechismi, exorcismi, & Baptiſmi, & huiusmodi. Qui hoc Sacramentum contemptibili neglectu ſuſcipere prætermiſerit, Eccleſiastica carebit ſepultura.

#### *XVI. De Pœnitentiis & Remiſſionibus.*

**D**ocere debent Sacerdotes ſuos Parochianos, quod vera Pœnitentia regulariter conſiſtit in tribus, & habet tres partes: ſcilicet Confessionem, Contritionem, & operis Satisfactionem. Et dico regulariter: Quia ubi neceſſitas, non contemptus, excluderet confessionem & ſatisfactionem, ſufficeret ſola contritio ad expiationem peccati: unde verum eſt, quod ſola contritio, in tali caſu, cum propoſito contritendi, & ſatisfaciendi, tollit peccatum & reddit hominem vivum, qui per peccatum fuerat mortuus. Alias vero contritio non ſufficeret, ex quo poſt contritionem, haberetur tempus opportunum contritendi & ſatisfaciendi, quo tamen non confiteretur, vel ſatisfaceret. Itaque quamvis melius ſit, quod ſtatim quilibet, dum poteſt, poſt lapſum confiteatur: ſi tamen ſtatim quis non confiteatur: caveat, ne aliquod opus interim exerceat, in quo reverentia requiratur, videlicet ne Corpus Chriſti conſecret, aut aliquod Sacramentum in tali ſtatu adminiſtret. Et ideo Sacerdotes curati, quibus incumbit quotidiana Sacramentorum collatio, ſtatim, quando poſſunt, neceſſario tenentur confiteri. Item ſciendum eſt, quod quamquam ſatisfactio pœnitentiæ pars dicatur, non tamen ſemper pœnitentibus & confelliſ eſt ſatis-

satisfactio injungenda, sicut est videre in infirmis in mortis articulo constitutis, a quibus licet vera confessio peccatorum sit requirenda, quantitas tamen pœnitentiæ, vel satisfactionis non est eis imponenda; sed duntaxat dicendum: *Pro istis peccatis, talem satisfactionem, seu pœnitentiam debes peragere, quam tibi propter infirmitatis periculum de præsentibus non injungo, sed si divinitus ereptus convalesceris, dictam pœnitentiam & satisfactionem fideliter adimpleas & observes.*

Quod si infirmus a seculo migraverit, pondus pœnitentiæ est amicorum orationibus, jejniis, eleemosynis, Sacrificiis in altari offerendis sublevandum. Quod onus pœnitentiæ etiam sublevatur Sacra Unctione Olei & Sancta Communionem viatici, quam percipit moriturus. Sciendum præterea est, quod ex tribus rebus debet fieri satisfactio, scilicet aut de bonis fortunæ, quæ nobis subtrahimus, dando scilicet eleemosynam: aut de bonis naturæ seu corporis, scilicet per jejunium: ut subtrahamus necessaria corpori, & ut carnem castigemus & affligamus per jejunia, vigiliis, & alios labores: aut de bonis animæ, ut vacemus orationi & devotioni. Et ex his omnibus, & eorum singulis debet discretus Sacerdos injungere pœnitentiam, & satisfactionem pro peccatis commissis; consideratis diligenter persona peccantis, & circumstantiis peccatorum. Item scire debent Sacerdotes curati, quod pœnitentiæ & satisfactiones sunt regulariter arbitrarie, juxta Canonicas Sanctiones, & ad arbitrium Sacerdotis regulariter imponendæ. Debet tamen arbitrans discrete respicere quantitatem & qualitatem peccati, seu delicti, & ætatem, scientiam, sexum, & conditionem delinquentis, nec non locum & tempus, quo delictum commissum est. Et secundum ista, arbitretur pœnitentiam & satisfactionem imponendam; quoniam quandoque pensatis præmissis, unus & idem excessus, magis est in uno, quam in alio puniendus. Unde consideratis præmissis, discretus Sacerdos potest dispensative satisfactionem & pœnitentiam moderari; dum

tamen multum non erret, nec Divina justitia infringatur. (s)

### *XVII. De non residentibus in suis beneficiis.*

**S**Ciant Curati, beneficia Ecclesiastica obtinentes, quod omne beneficium quantumcunque modicum, etiam viginti solidorum, requirit residentiam: nisi per ordinationem in fundatione appositam, privilegium seu specialem consuetudinem, ad residentiam minime sit adstrictum. Et idcirco omnibus & singulis in Civitate & Diocesi Attrebatensi beneficia Ecclesiastica obtinentibus, quæ residentiam requirunt ex consuetudine, vel de jure, præcipimus & mandamus: quod in suis beneficiis residentiam faciant personalem, & continuam, deserviendo laudabiliter eisdem in Divinis, & aliis prout decet, & onus beneficii requirit. Non residentes, maxime Curati, & alii, qui in eorum ingressu jurant residere continue, ultra pœnas juris, privationem beneficii debent merito formidare, nisi cum eis, super non residentia, per Nos, vel Vicarios nostros fuerit dispensatum, & quia residentiam facere nihil aliud est, nisi Ecclesiæ deservire, & curam Ecclesiæ personaliter gerere, ita quod quilibet per se & in propria persona, Ecclesiæ suæ debet deservire, cum ad hoc ejus industria sit electa; idcirco inhibemus, sub excommunicationis pœna & quadraginta librarum, universis & singulis Decanis, Curatis & Capellanis, ac aliis beneficia Ecclesiastica obtinentibus, requirentia continuam residentiam de consuetudine vel de jure, ne alicui exercitium curæ suæ, Capellanæ, seu beneficii committant, etiam ad modicum tempus, nisi a Nobis, vel Vicariis nostris licentiam obtinuerint specialem. Et quia dubium esse potest, quod tempus dici modicum debeat: declaramus, modicum tempus id esse, quod est ultra spatium quindecim dierum: nec etiam illud modicum tempus volumus indulgere sæpius, quam bis in anno, nisi accedente nostra licentia speciali;

ne

(s) Additur in editione antiqua Decretum Innocentii III. editum in Conc. Gen. de Medicis; quod vide supra Cap. de Sacramento Confessionis post Casus reservados.



ne aperiatur via volentibus evagari, & scandalosas invenire cautelas, per quas se possint a personali officio & residentia diutius excusare. Item licet beneficia obtinentes, quæ ex aliqua rationabili causa residentiam non requirunt, excusentur a personali residentia; propter hoc tamen non excusantur, quominus teneantur per alium, seu alios, eisdem facere deservire, & onera eisdem incumbentia debite supportare. Item si ex aliqua justa causa oporteat, Curatos, & alios Beneficiatos, extra sua beneficia proficisci, honesta quærant hospitia, & quam citius poterunt, ad suas redeant Ecclesias. Vicariis ibidem dimissis, de licentia nostra, seu Vicariorum nostrorum.

*XVIII. (t) De Receptione Clericorum, & eorum præsentatione.*

**P**resbyteri curati, & Capellani, seu Clerici, qui a Nobis institutionem seu collationem Ecclesiarum, seu Capellaniarum debent recipere: Nobis rite, canonice & infra tempus juris, per eos, ad quos, ratione juris patronatus, seu ex alia causa justa & rationabili, spectat præsentatio, legitime præsententur, vel in nostra absentia Vicariis nostris, seu Vicario Generali, firmiter statuentes, ut hi, ad quos dictorum spectat præsentatio, ut præfertur, pro qualitate beneficii, seu beneficiorum nobis præsentent idoneas personas, scientia moribus, & ætate. Quod si personas nobis indignas repræsentaverint, si personæ Ecclesiasticæ fuerint, ea vice potestate præsentandi, per has nostras Synodales Constitutiones, declaramus privatas. Caveant etiam hujusmodi personæ præsentandæ, ne ante receptionem suam, vel post, obligationem, promissionemque, sive juramentum personæ faciant, vel patrono, quia illud continet speciem Symoniæ. Quod si contrarium fecerint, ultra pœnas juris, privationem beneficii possunt non immerito formidare: Curati

vero, cum ad curam recipiuntur, examinatione præmissa, jurare debent obedientiam Nobis, & Successoribus, ac Vicariis nostris, Nobis absentibus, nec non Officiali Curiae nostræ, & quod mandata Curiae cum reverentia & promptitudine exequentur. Jurabunt etiam in suis Ecclesiis personaliter residere & ad Synodum venire, nisi cum eisdem fuerit per Nos misericorditer dispensatum: Jurabunt etiam, quod jura, possessiones seu redditus, & bona suæ Ecclesiæ bona fide & diligenter observabunt: nec alienabunt, seu alienari permittent, vel procurabunt; sed alienata pro viribus ad jus & proprietatem Ecclesiæ revocabunt. Cæteri vero ad Capellanas præsentandi, seu præsentati jurabunt obedire, ut præfertur, & residentiam facere, si ad hoc de jure vel consuetudine Capellania astringatur, & jura Capellaniæ servare illæsa & non alienare, sed alienata revocare, ut superius enarratur. Et si Clerici non constituti in Sacris, fuerint præsentati ad Capellanas, jurent cum prædictis, quod promotionem suam de ordine in ordinem prosequantur, nisi alias eisdem de non promovendo, ex justa & rationabili causa, specialis licentia sit concessa. Nullus alienos Capellanos recipiat in sua Ecclesia seu Capella, nisi de assensu nostro: alioqui tam recipientes, quam recepti pœnas incurrant, contra tales promulgatas supra in eisdem Constitutionibus, in titulo: *De celebratione Missarum*. Illi vero, qui ad curam animarum admissi fuerint, nisi infra annum, a tempore sibi commissi regiminis & possessionis adeptæ, ad Sacerdotium sint promoti, suis Ecclesiis sint privati ipso jure: nisi Canonicum impedimentum habeat eos excusatos, prout in Constitutione Gregorii Decimi, edita in Concilio Lugdunensi, quæ incipit: *Licet Canon*; juxta Bonifacianam Constitutionem, quæ incipit: *Commisæ*; situatam in titulo de Electione libro sexto plenius continetur: & nisi causa studiorum, juxta Decretalem: *Cum ex eo*. situatam eodem titu-

(t) Mutatus hic est, uti & alibi antea, ordo Capitulorum. Nam in antiqua editione ponitur hoc loco Titulus: De rebus Ecclesiæ non alienandis, quem vide inferius post Caput: De pluralitate beneficiorum.

titulo, & eodem libro, per Nos fuerit cum eisdem Curatis misericorditer dispensatum.

Non est æquum, ut quæ Spiritua-  
lia existunt, pro his turpis cujusdam  
quæstus gratia, plus æquo quid exi-  
gatur. Quare, quamvis jus Patronatus  
non omnino spirituale existimandum  
sit; quod nempe & Laicis competit,  
est tamen rei spirituali multum assimile:  
testantibus id variis Sacris Canonibus.  
Nihil ergo Patronus ex dotatione, quasi  
præstiti muneris mercede, sibi com-  
petere agnoscat, nisi processionis adi-  
um, qui Christianis omnibus in com-  
mune debetur. Ex licentia tamen &  
authoritate Episcopi, aut ipsius Eccle-  
siæ fundamine, aut ex pia consuetudi-  
ne (si quid pro præsentatione gratis  
dari consuevit) grati muneris oblatio-  
nem non damnamus, modo non ex-  
cedat id, quod Episcopus pro collatio-  
ne habere consuevit. Haud præter-  
eunda est hoc loco vetustissima quæ-  
dam Constitutio, ante annos plus mi-  
nus ducentos quinquaginta, in Synodo  
quadam Atrebatensi decreta: qua ca-  
vetur; ne absque Episcopi licentia  
quispiam curam animarum, aut Sacra-  
menta administrare præsumat. Cujus,  
ob venerandam antiquitatem, repeti-  
tionem, de verbo ad verbum facien-  
dam duximus.

" Cum non sit Pastoris excusatio,  
si oves, ipso nescio, lupinis moribus  
devorentur. Pro eo, quod ex debito  
Pastoralis officii, de gregis custodia  
teneamur, Nobisque licet immeritis  
animarum regimen & Pastoralis cura  
solicitudinis totius Atrebatensis Dio-  
cesis, generaliter & universaliter, sit Di-  
vina permissione commissa: adeo quod  
nullus alius præter Nos, & illi, qui per  
Nos ad singularem animarum custodi-  
am, committuntur, Deo respondere  
teneantur: non est mirum, si de dicta  
cura solliciti, curiose scire volumus,  
qui sunt illi, qui singularem Ecclesia-  
rum nostræ prædictæ generalis sollicitu-  
dinis gerunt custodiam, sive curam,  
ne forte sub Pastoris specie lupi rapaces,  
dolosè custodiam usurpantes, lupina  
rabie devorent totum gregem. Cujus

ad nos periculum dinoscitur pertinere.  
Audivimus enim nuper, quod ceden-  
tibus, seu decedentibus, Rectoribus  
Ecclesiarum prædictæ nostræ Diocesis  
Atrebatensis, vacantibus dictis Eccle-  
siis Rectoribus seu Ministris, quidam  
curam animarum, auctoritatē, seu ve-  
rius, temeritate propria, gerere, seu  
Rectoris officium assumere non veren-  
tur. Et licet a nobis in mellem nostram  
generalem non fuerint speciales opera-  
rii instituti, falcem suam tamen in ean-  
dem damnabiliter ponere non formi-  
dant, & sub specie Pastoris, dolosi  
mercenarii lævitiam exercentes, ani-  
mas nobis commissas decipiunt fraudu-  
lose, cum eas prætextu cujusvis con-  
suetudinis, absque nostra Autoritate  
speciali, solvere non valeant, vel liga-  
re; neque non suis subditis, excluso ta-  
men necessitatis articulo, ministrare  
Sacramenta Ecclesiastica, supposito et-  
iam, quod fuerint in Sacris Ordinibus  
constituti, & in ordine Sacerdotii; Sa-  
cerdotalis tamen ordinis executionem,  
quoad præmissa, in nostra Diocesi ha-  
bere non possunt, nisi eisdem a Nobis  
specialiter committatur. Ne igitur  
prætermisso caritatis ordine nostris ne-  
gligamus obviare periculis, universis  
Presbyteris nostræ Diocesis cujuscun-  
que status & conditionis existant, di-  
strictius inhibemus, ne talia de cætero  
præsumant recipere, seu alias attenta-  
re. Contrarium vero facientes, ultra  
alias pœnas juris, nec non & Constitu-  
tionum Provincialium, & Synodali-  
um Statutorum, excommunicationis  
sententiam eo ipso incurrant." Cum ho-  
die res Ecclesiastica in eum statum per-  
venerit, ut omnia rapiente avaritia me-  
rito dici possit, omnes quærunt mu-  
nera & sequuntur retributiones: Soli-  
citudinis Pastoralis esse arbitramur, ea,  
quæ dignam requirunt correctionem,  
omnino in melius reformare. Consi-  
derantes itaque esse per Diocesin no-  
stram permultos Pastores, seu Vicarios  
perpetuos, qui gregem Dominicum  
sibi commissum (pro suscepti muneris  
debito) pascere cupientes, quasi ma-  
num ad aratrum ponentes, retro respi-  
cere coguntur; quod nempe a Mona-  
steriis,

steriis, Capitulis, aut Collegiis, quibus decimæ olim aut in totum, vel in parte incorporatæ esse dignoscuntur, quod videlicet ad eos antiquitus cura animarum spectabat; ipsis ita parva assignetur portio, ut contra Clericalem dignitatem, & debitum Pastorale pascendis ovibus non commode invigilare queant: injungimus omnibus Abbatibus, Monasteriis, Capitulis, Collegiis, ad quos decimæ ex incorporatione olim facta, spectant sub pœna inobedienciæ: ut deinceps hujusmodi Parochis seu Vicariis perpetuis, eam assignent portionem Canonicam, super proventibus dictorum Collegiorum, aut Monasteriorum, quatenus possint gregi Domini recte vacare. Idem etiam statuere volentes in aliis Pastoribus & Curatis proprietariis, ut Vicariis temporalibus, quos in curam Pastoralem delegarunt, congruam dent portionem & stipendium, ne turpibus exactionibus & questu parum honesto cogantur oves sibi committas gravare. Ut autem hæc salutaria præcepta melius servari possint, injungimus Vicariis nostris in hoc constitutis, ne de cætero curam animarum committant Vicariis perpetuis, aut Vice-Pastoribus, in absentia verorum Pastorum, nisi Canonica portione assignata, eaque sufficienti judicio nostro, aut Vicariorum nostrorum.

Præterea cum vel dicente Domino, os bovi trituranti non sit alligandum, rationi sane dissonum, & contra Canonicas Sanctiones videtur, ut qui altari inserviat, ipse de altari non participet. Quapropter volentes extirpare perversam & iniquam quorundam Capitulorum consuetudinem, statuimus deinceps, ut omnes Canonici, qui personaliter residentes, Ecclesiis ut cæteri Canonici, inserviunt, quamvis sint noviter recepti, grossos fructus suorum beneficiorum & alios quoscunque lucrentur: damnabilem illam consuetudinem judicantes, qua prædicti fructus in lucrum & augmentum jam receptorum cedunt, vel quod jam de novo recepti sint ad tempus expectantes. Sane si ex fundatione quorundam locorum speciali & legitima, quæ tamen sufficienter probari debet, aliis Ecclesiis, aut piis

usibus prædicti grossi fructus reservari soleant, hanc piam fundatorum intentionem omnino impleri desideramus.

### *XIX. De pluralitate Beneficiorum.*

**E**X animo quoque cupientes refrœnare insaniam quorundam in congerenda, detestanda & scandalosa multitudine Beneficiorum, maxime eorum, quibus animarum cura annexa est, nostra & Synodi præsentis auctoritate statuimus, ut nemo post hac in aliquo beneficio, in nostra Diocesi instituat, nisi præstito juramento de numero beneficiorum a se possessorum. Et si quis plura beneficia possidere inventus fuerit; exhibere & præsentare tenebitur Nobis, aut Vicariis nostris dispensatorias literas sibi per Sedem Apostolicam, aut alias super tali pluralitate indulgas: ut, vel induci possit, si ad impetrandum inveniat non fuisse qualificatus, uno, quod maluerit, retento, alia libere resignare, aut dimittere viris idoneis, personaliter residere volentibus: absque præjudicio tamen præsentantium, eligentium, aut collatorum: vel, si sic honeste talis induci recuset, ut Summo Pontifici deferri per nostrum Promotorem possit, tanquam surreptitæ impetrans, ut alicui digniori de beneficiis reliquis provideatur per alios, quibus alias competit jus eligendi, conferendi, vel præsentandi.

### *XX. De rebus Ecclesiæ non alienandis.*

**N**on debet latere omnes & singulas personas Ecclesiasticas, quod Gregorius X. prohibuit, ne Abbates, Prælati, ceterique Monachi, Clerici & Presbyteri Ecclesiarum & Monasteriorum, Ecclesias & Monasteria, vel quæcunque alia loca pia sibi commissa, jura, redditus, seu possessiones, ac alia bona mobilia & immobilia eorundem, Laicis supponerent & submitterent, de novo recognoscerent, seu profiterentur, se tenere a prædictis Laicis, tanquam a Superioribus, seu aduocarent, (prouc vul-



vulgariter in aliquibus partibus dicitur) aduœer e tenir a Seigneur) seu quomodolibet procurarent, sub quocunque colore custodiæ, guardiæ, regalæ, advocacionis, seu defensionis titulo. Et Nos etiam, addendo dicto Statuto Gregorii, præmissa sine consensu nostro, & nihilominus Capituli, vel Conventus, in illis locis, ubi sunt Capitula, vel Conventus, fieri prohibemus: si pœnam statutam in Decretali dicti Gregorii, quæ incipit: *Generali Constitutione* &c. & hæc est, situata in titulo *de Electione*, sexto libro, voluerint evitare. Et quoniam omnes ad istam Decretalem forte nescirent, aut non possent habere recursum, ne prætextu ignorantia incidant in laqueum: sciant omnes & singuli; quod præmissa facientes, aut fieri procurantes, excommunicationis sententiam incurrunt ipso facto. Eandem quoque sententiam excommunicationis per hanc nostram Constitutionem se noverint incurrisse ipso facto, Abbates, Prælati, Presbyteri, cæteræque personæ Ecclesiasticæ Nobis subditæ, quæ de novo dabunt in feudum Laicis, jura, redditus, seu possessiones, aut bona Ecclesiarum, vel suorum Monasteriorum. Capitula, seu Conventus præmissa facientes, seu consentientes, interdicto Ecclesiastico subponentur. Cæterum quoniam per reddituum, jurium & possessionum, bonorum Ecclesiasticorum venditiones, seu concessionem ad vitam, vel ad aliud longum tempus factas per Administratores, seu Rectores Ecclesiarum, Monasteriorum, seu Collegiorum, & præcipue per Regulares sub prætextu & colore utilitatis, vel necessitatis eorundem, magna dispendia & detrimenta quam plurima eisdem Monasteriis, & Ecclesiis cognovimus provenisse: adeo quod plures Ecclesiæ, & maxime Regulares, in nostra Diocesi constitutæ, propter præmissa depauperatæ sunt, & tanta paupertate depressæ, quod jam quasi ad ultimum desolationis opprobrium sunt deductæ: idcirco cupientes indemnitatibus dictarum Ecclesiarum & Monasteriorum ex debito Pastoralis officii (quantum cum Deo possumus) providere, & contra talium venditionum incommoda, utilis provisionis

adhibere remedia; imprimis illud, quod in *Concilio Viennensi*, quoad Religiosos statuitur, super præmissis, cum quibusdam additionibus, his nostris Synodalibus Constitutionibus duximus inferendum. Unde sciant cuncti Religiosi, nostrarum Civitatis, & Diocesis, quod statutum est in dicto Concilio, ne quis Religiosus, Monasterio, Prioratu, Ecclesiæ, seu administrationi præsidens, jura, proventus, aut redditus, sive possessiones ejusdem, alicui ad vitam ejus, seu ad aliud certum tempus, pecunia exinde recepta, quovismodo concedat; nisi necessitas locorum, aut utilitas hoc exposcat; quo casu etiam non fiat, nisi de consensu Conventus, si Præsidens Conventum habet: & si non habet Conventum, de consensu Prælati proprii. Contrarium vero facientes pœnam suspensionis eo ipso incurrunt, per prædicti Concilii Statutum: nec recipienti jus aliquod acquiritur, ex concessione prædicta. Nos autem nostra auctoritate ordinaria, dicto Statuto per has nostras Constitutiones Synodales annectimus: Quod præmissa, in Civitate, seu Dioceci Atrebatensi, non possunt fieri quomodolibet: etiam intervenientibus dictis solennitatibus & conditionibus, appositis in Concilio supra dicto, etiam si esset utilitas, vel necessitas, ut præfertur, absque nostris licentia & assensu. Contrarium vero facientes, ex nunc ab officio suspendimus, & recipientibus absque nostra auctoritate, decernimus jus aliquod non acquiri. Prohibemus insuper, ne quis dictas concessionem aliter, quam dictum est, recipiat, sub pœna excommunicationis: quam in contrarium facientes ferimus in his scriptis; ne impune transeant nonnulli, qui ad faciendum tales concessionem, quam plures personas Ecclesiasticas fraudulenter & malitiose frequentius inducunt. Cæterum quia, quod supra statutum & ordinatum est, quoad Ecclesias regulares, ad sæculares quoque Ecclesias Collegiatas & non Collegiatas nostrarum Civitatis & Diocesis duximus extendendum. Inhibemus insuper, ne quis Ecclesiæ sæculari Collegiatæ, seu non Collegiatæ præsidens, venditiones, seu concessionem ad ali-

quod certum tempus, seu ad vitam faciat, omiſſis ſolennitatibus ſupradictis. Contrarium vero facientes, ſeu tales conſeſſiones, aliter, quam dictum eſt, factas, recipientes, pœnas ſupradictas eo ipſo incurrant. Collegia vero, ſeu Capitula, formam non ſervantia prædictam in talibus venditionibus, ſeu conſeſſionibus, eo ipſo ſint ſuppoſita Eccleſiaſtico interdicto. Statuentes etiam, cum neceſſitas & utilitas exegerit, tales conſeſſiones, ſeu venditiones fieri ad vitam, vel aliud certum tempus, ſolennitates, quæ ſequuntur, ut præcludatur via fraudibus, obſervari. Et primo: quod in ipſis Eccleſiis Collegiatis, tam ſecularibus, quam regularibus, aliquid de bonis, juribus, vel redditibus, ad tempus, vel ad vitam vendere volentibus, ut præfertur, ſolennis & diligens capitulariter habeatur tractatus: ſcilicet, utrum neceſſitas huius Eccleſiæ vendere volentis, vel utilitas exigat, aut ſuadeat, quod talis venditio, ſeu conſeſſio celebretur: declareturque per eundem tractatum, certa ſumma vendenda. Secundo: quod ſi per huiusmodi tractatum, ſic capitulariter factum, viſum fuerit expedire, talem conſeſſionem vel venditionem debere fieri, & concordatum etiam de ſumma; tunc vendere volentes ad Nos, vel Nobis abſentibus, ad noſtrum, ſeu noſtros Vicarios Generales accedere habeant, ad declarandum cauſas & rationes inſpectas in capitulari tractatu, quæ neceſſitatem, vel utilitatem inducant, vendendi dictam certam ſummam, de qua vendenda deliberatum eſt: quæ etiam nobis debeat declarari, & dictis declarationibus, Nobis, vel Vicariis noſtris factis, ut præmittitur, petita licentia & obtenta vendendi taliter & talem ſummam. Tertio: quod dicta licentia petita & obtenta, & non ante, habeatur cum emptoribus, ſeu emere volentibus, venditionis tractatus, prout diligentius & utilius poterit: omnis ſingularis avaritiæ, commodique, vel utilitatis affectione ceſſante, Eccleſiarum vendere volentium utilitate penſata duntaxat: ſuper quibus eorum conſcientias oneramus. Dictoque tractatu inter vendentes & ementes concor-

dato, ſcribantur in ſchedula dicti tractatus, & declarentur in ſcriptis redditus venditi, cum certis circumlocutionibus: deſignentur præcia conventa, obligationes, conventiones, ſubmiſſiones, contractum vallantes, ac omnia & ſingula, quæ inter huiusmodi contrahentes fuerint ſuper his venditionibus concordata. Quarto: quod ad Nos, vel Vicarios noſtros dicta ſchedula, ſeu ſcriptura minuta, antequam groſſetur, deferatur vel mittatur, per Procuratorem vendere volentem, habentem ſpeciale mandatum ſuper hoc, nec non potestatem jurandi in animas Domino-  
rum ſuorum, quod præmiſſa ſolennitas fuerit obſervata, pravitatem & fraude ceſſantibus, abſque privatis commodis & ſingularibus affectionibus, ad utilitatem Eccleſiæ fideliter & diligentius, quam fieri poterit, cum matura deliberatione, adhibita ſolennitate præfacta, venditio prædicta tractata fuerit, & etiam concordata: ut tam per ſchedulæ inſpectionem, quam per Procuratoris juratam aſſertionem, comprehendere poſſimus, an dictus tractatus, ſine fraude & deceptione, fideliter & utiliter fuerit adhibitus: & utrum in dictis conventionibus, ſubmiſſionibus, ſeu obligationibus ſit aliquid illicitum, quod Canoniciſ obviet inſtitutis, Eccleſiæ oneroſum, diſpendioſum, vel alias reprobandum. Quinto: quod tunc demum, viſis & inſpectis præmiſſis, ad libram juſtitiæ ponderatis, literæ dictæ venditionis groſſentur, & per eaſdem Nobis, ut moris eſt, ſupplicetur, quatenus venditionem, ſeu conſeſſionem, ſic rite, utiliter & ſolenniter celebratam, dignemur noſtra auctoritate ordinaria confirmare, ſigilloque vendentium, una cum noſtro, ſigillentur, & etiam in veritatis teſtimonium roborentur. Et tunc demum, ſubſequuta confirmatione, & non ante, literæ tradantur emptoribus ſupradictis. Conſeſſiones vero, ſeu venditiones aliter factæ ad vitam, vel ad certum tempus longum, quod nunc interpretamur ultra triennium, careant robore firmitatis, ne per eas emptoribus juſ aliquod poſſit acquiri: dictosque venditores, ſeu emptores, ultra pœnas juris & Conſtitutio-

tionum Synodaliū, decernimus arbitrarie puniendos. Statuimus præterea & ordinamus : quod nulli ex aliqua causa libros, calices, aut alia ornamenta Ecclesiastica audeant obligare. Quod si fecerint, cum non sint Domini Ecclesiarum, sed Procuratores tantum, furtum videntur committere, rem alienam, invito Domino quodammodo contrectando. Etiam caveant Prælati, Sacerdotes, Capellani, cæterique Ministri Ecclesiæ, quod officia, seu beneficia sibi commissa, seu res Ecclesiasticas, pro alienis debitis non obligent : quod si fecerint, sententiam excommunicationis, & suspensionis ab administratione Spiritualium, se ipso jure noverint incurrisse. Et si, durante tali suspensione, se Divinis immiscuerint, irregularitatis laqueum non evadent. Et nihilominus Ecclesiæ & beneficia pro alienis debitis obligata, ad solutionem nullatenus obligentur. Creditores etiam, res Ecclesiæ si titulo obligationis scienter recipiant, sciant se excommunicationis laqueo innodari. Beneficiati insuper immoderata debita non contrahant, ne propter defectum solutionis exinde scandalum oriatur. Inhibemus quoque sub pœna excommunicationis & privationis beneficiorum, ne quis in vita, vel in morte, bona Ecclesiastica, in fraudem, vel læsionem Ecclesiæ det fratribus, vel amicis carnalibus, aut liberis, seu etiam extraneis, aut de hoc aliquid acquirat eisdem : at per hoc, moderatam curialitatem faciendam prædictis personis, causa indigentiae sublevandæ, vel servitii adhibiti, seu eleemosynæ, dum non sit in gravamen, seu læsionem Ecclesiæ, eisdem non intendimus prohibere. (x)

### XXI. De Vita & Honestate Clericorum.

**N**ULLUS Sacerdos, aut alius Clericus beneficiatus, in domo sua teneat concubinam, fornicariam, aut mulierem suspectam, sub pœna excommunicationis, quam pœnam incurrunt ipso facto, tenentes notorie concubi-

nam, aut continue mulierem in domo suspectam. Et non obstante, quod a Nobis, vel Vicariis nostris fuerint moniti, quod mulieres hujusmodi abjiciant, si post hujusmodi monitiones easdem mulieres duxerint retinendas, non propter hoc pœnas juris contra concubenarios latas tollere intendimus. Neminemque lateat, quod publici concubinarij, ipso jure a Divinis sunt suspensi : & si durante suspensione Divinis se immiscuerint, irregulares sunt, & etiam deponendi. Presbyteri quoque & Clerici, officia seu commercia sæcularia non exerceant, maxime inhonesta. Scribitur enim tam in Canone, quam in Sacra Scriptura, quod nemo Deo militans, debet se ipsum sæcularibus negotiis implicare. Tabernas prorsus evitent, nisi forte necessitatis causa, vel sint in itinere constituti. Inhibemus Curatis, Decanis, & aliis Beneficiatis nostræ Diocesis, ne in domibus Ecclesiarum tabernas, vel vinum venale teneant, & hoc sub pœna excommunicationis & decem librarum Parisiensium. Evitent perjuria, scientes, quod perjurus est infamis, nec potest ferre testimonium, etiam si fuerit de perjurio emendatus, & inhabilis ad obtinendum beneficium Ecclesiasticum, & privandus obtento : quia perjuri & infamibus portæ dignitatis patere non debent. Ad aleas, seu taxillos non ludant, nec eisdem intersint. Clerici conjugati gaudere non possunt Privilegio Clericali, nisi tonsuram & vestes deferant Clericales : & tunc trahi non possunt criminaliter vel civiliter ad judicium sæculare, pro commissis ab ipsis excessibus, vel delictis, nec pro eisdem etiam pecunialiter ab eis quovis modo condemnari. Et quicumque tales percusserit, seu in eos manus violentas injecerit, ipso facto sententiam excommunicationis incurrat, prout in Bonifaciana Constitutione, situata in titulo : *De Clericis conjugatis, Libro sexto*, continetur. Quare Decanis & Curatis districte præcipimus, & mandamus, quatenus hoc Statutum, saltem semel in mense, in Ecclesiis suis publice & intelligibiliter exponant, ad finem,

L I 3

quod

(x) In antiq. sequitur : De observatione Jejuniorum, quod Caput vide hic post Tit. De Festis colendis.



quod dicti conjugati Clerici sint magis cauti, per delationem habitus & tonsuræ sibi providere contra malitiam justitiæ secularis : quia Clericis Laicos oppido infestos testatur antiquitas, cui merito est fides & reverentia adhibenda. In Bonifaciana Constitutione situata: *De vita & honestate Clericorum*, *Libro sexto*, cavetur expresse: quod Clerici, qui abjecta Clericali dignitate, se goliardos exhibent, aut buffones : si per annum artem illam exercuerint; eo ipso perdunt privilegium Clericale: & si tempore breviori, & tertio moniti, non resipuerint, similiter ipso jure amittunt dictum privilegium. Et quia per inhonestatem indecentem, & minus curiosam formam vestium, Ecclesiasticæ quam plurimum detrahitur honestati, statusque personarum Ecclesiasticarum vilipenditur in immensum, non sufficimus admirari, quod Presbyteri, Curati, & Capellani, & alii Beneficiati, vestes adeo indecentes & inhoneste ac curiose formatas deferunt. Ita ut magis ex forma habitus milites, scutiferi, meri laici, seu seculares apparent, quam Clerici & Ecclesiasticæ personæ. Unde inspecto eorum elato & superbo habitu, seculares scandalizantur, & assumunt exempli perniciem, & inhonestatis signum ab illis, a quibus merito deberent accipere normam totius humilitatis, ac devotionis exemplum: ita quod pereunti populo viam perditionis ostendunt, qui debuerunt esse ductores ad vitam. Hinc est, quod nos (quantum ex alto conceditur) perniciosam curiositatem talium refrænare volentes, omnibus & singulis personis prædictis sub pœna Canonica præcipimus & mandamus: quatenus in colore, & forma honesta de cætero deferant indumenta non lon-

gitudine nimia aut brevitate notanda. Pannis viridibus aut rubeis excessive non utantur: sint vestes superiores prædictarum personarum talaris, clausæ, & si non clausæ, saltem non strictæ, sed largæ & honestæ, secundum quod decet statum Clericalem. (y) Sciant autem Clerici quicunque, quod in Concilio Viennensi statuitur, sub certis pœnis, hic inferius contentis: & nos illud Statutum sub eisdem pœnis præcipimus, exacta diligentia observari; ne Clerici, quicunque sint, virgata, radiata, seu partita veste utantur, nisi rationabilis causa subsit, puta timoris, vel alia, quæ juste posset rationabilis arbitrari. Alioqui tales vestes deferentes, si fuerint Beneficiati, per sex menses a perceptione fructuum beneficiorum, quæ obtinent, sint ipso facto suspensi. Si vero non Beneficiati fuerint, tamen in Sacris Ordinibus circa Sacerdotium constituti, per idem tempus redduntur eo ipso inhabiles ad Ecclesiasticum beneficium obtinendum. Si simplex Clericus est, non Beneficiatus, nec in Sacris constitutus, qui tales vestes insimul & tonsuram portaverit publice Clericalem, & non alias, per sex menses pœnas prædictas inhabilitatis incurrit. Obtinentes vero dignitates, personatus, seu beneficium, cui cura animarum imminet, nec non cæteri Sacerdotes & Religiosi, quilibet Beneficiati, qui per exteriorem habitum morum intrinsecam debent prætere honestatem, si tales vestes (nisi ex rationabili causa) publice portaverint, ut præfertur, per annum a perceptione fructuum suorum beneficiorum suspensi sunt eo ipso. Sacerdotes vero Religiosi, non Beneficiati, per annum similiter pœnam inhabilitatis incurrant. (z) Prohibemus insuper, quod Clerici, præ-

(y) *Additur in antiq.* Vestes strictas a parte anteriori boutonatas, longas manicas in supertunicalibus: cornetas longas capuciorum: sub pena excommunicationis, & decem librarum Parisiensium penitus prohibentes, nisi equitando: vel si causa timoris contigerit, habitum transformari.

(z) *Additur in antiq.* Sed & tales, & quicunque Clerici, utentes epitogio, seu tabardo fuderato: usque ad oram: & ita brevi, quod vestis inferior notabiliter videatur! ipsum epitogium Clerici seculares & Religiosi, administrationem habentes: teneantur infra mensem pauperibus erogare. Ceteri vero Religiosi administrationem non habentes: teneantur illud Superioribus suis infra idem tempus assignare, in pios usus convertendum. Alioquin beneficiati pœnas prædictas suspensionis: non beneficiati inhabilitatis per idem tempus se noverint incurrisse.

præsertim Beneficiati, caligis sericeatis, rubeis, aut viridibus publice non utantur. Et sciendum est, quod Innocentius III. statuit in Concilio Generali, quod Clerici, maxime in Ordinibus constituti, & Ecclesiastica beneficia obtinentes, coronam & tonsuram deferant congruentem, se Divinis officiis, & aliis bonis studiis exerceant diligenter, & quod pannis rubeis aut viridibus, seu sericeis, frenis, sellis, pectoralibus, calcaribus deauratis, aut aliam superfluitatem habentibus, non utantur, nisi eis de dignitate Ecclesiæ, vel nobilitate scientiæ competere valeant. In his vero & aliis ornatibus, & curiositatibus excessivis, præcipimus & mandamus prædictis personis Ecclesiasticis, tantam tenere moderantiam, & honestatis mensuram; quod non solum ab intus, sed ab illis, qui foris sunt, possunt habere testimonium totius honestatis. Ita quod incessus, status, & habitus eorum, nullius ostendat aspectum: sed afferat sanctitatis & sanctæ conversationis exemplum. Præterea inhibemus districte, & sub pœna excommunicationis, & centum Solidorum Parisiensium, ne quis Sacerdos propriæ fornicationis filios, aut filias in domo sua, vel Parochia tenere præsumat: quoniam ex hoc scandalizatur populus, & eorum peccatum in Cleri opprobrium divulgatur. Sub pœna quoque excommunicationis, & viginti librarum, omnibus Clericis & Presbyteris, nec non & Religiosis firmiter inhibemus, ne arma ullâ deferant: (a) nisi casibus a jure permittis. Presbyteri curati, seu Religiosi honeste in suis domibus & hospitibus conversentur, nec teneant in eisdem turpia officia, per quæ Clericis & eorum ordini scandalum generetur. Suspecta hospitia non habeant, nec lufores, aleatores, meretrices, & hujusmodi viles personas, recipiant, nec cum eis conversentur. Contrarium vero facientes, pœnam privationis a beneficio (si Beneficiati fuerint) poterunt formidare. Non Be-

neficiati vero sint inhabiles per quatuor menses, ad beneficium Ecclesiasticum obtinendum: conjugati autem Clerici, in decem libris monetæ currentis mulctentur: & quia ex præmissis solent evenire pericula quamplurima; idcirco Decanis, Curatis, & eorum loca tenentibus, sub pœna excommunicationis præcipimus & mandamus: quod moneant etiam Laicos Parochianos publice in Ecclesia, auctoritate nostra, quod nullus, etiam Laicus, teneat in domo sua ludum taxillorum, nec recipiat in domum suam meretrices, cum ex talibus plura scandala sæpe, nec non pericula soleant evenire. Alioqui trina monitione sic publice facta, dictos Laicos, talem domum tenentes, & præmissas viles personas tenentes, & frequenter recipientes, diebus Dominicis & Festivis excommunicatos denuncient: quia eos in his scriptis excommunicamus; absolutionem talium, Nobis, aut Officiali nostro penitus servantes. Clerici, Presbyteri, Beneficiati, vel in Sacris Ordinibus constituti, non debent esse mercatores, vel mercimoniis intendere, nec vilius emere, ut carius vendant: ista enim sunt negotia sæcularia, quibus militans Deo non debet se implicare. Non sint errabundi, nocte incedentes, rixosi, vel ebriosi, laudabiles & honestas consuetudines locorum, & Ecclesiæ, in quibus habitant, servant, si Divinam & nostram volunt effugere ultionem. Circa vero Regulares, quantum ad formam, & honestatem vestium & habitus, decretalem: *Ne in agro*, una cum Constitutionibus Benedicti, nec non & consuetudines laudabiles suæ religionis præcipimus diligentius observari.

## XXII. De Scholis & Magistris.

Cum intelligamus, quantum ad vitam, morumque honestatem promovendam momentum adferat teneræ ætatis prima educatio: Quantum quoque

(a) *In antiq.* Videlicet cultellum magnum, cuspidatum, misericordiam, ensen, gladium, bouquellarium aut alias armaturas: nec vadant armati, seu armis prædictis: aut aliis non utantur, nisi proficiscendo pedes vel eques de villa ad villam. Et tunc liceat eis solum portare ensen cum bouquellario: seu cultellum, vel misericordiam, & non alias armaturas absque nostra, vel Officialis nostri licentia speciali.

que interfit Reipublicæ Christianæ, quomodo & a quibus, & quos auctores doceatur rudis adhuc, tenacissima semel conceptarum opinionum juvenus: e qua quidam vel ad Ecclesiarum regimen, vel administrationem Reipublicæ, aliquando assumendi erunt, statuimus & ordinamus, ut nemo posthac in nostra Diocesi, ad trivialem Scholam regendam admittatur, quolibet etiam prætextu, nisi qui de eruditione, moribus, vita, fide, ac religione sua, probe fuerit examinatus ab illo, vel illis, cui vel quibus in singulis urbibus, aut celebrioribus pagis nostræ Diocesis, nostra auctoritate hoc examinationis munus delegabimus, qui soli idoneos admittere, & inidoneos rejicere debebunt, & eos tantum libros juventuti prælegendos dictabunt, quos Catholicarum Academiarum ac Universitatum judicio probatos esse cognoverint, secundum Catalogos, cum Lutetiæ, tum Coloniz, & Lovanii evulgatos, atque excusos; si qui autem Ecclesiarum Scholastici, Magistratus civiles, ædiles, aut Provisores, etiam qui suis propriis impensis Scholas erexerunt, præsumperint Scholis præficere Præceptores aut Rectores, qui non fuerint, ut præscriptum est, per nostrum Commissarium, aut Commissarios prævia legitima præsentatione sic examinati & admissi, sciant se pro illa vice præsentationis aut institutionis jure privandos, ipsosque Magistros a sua præfectura dejiciendos.

### XXIII. De cessione bonorum facienda.

**Q**uia plerique Curati, Capellani, & alii Beneficiati nostræ Diocesis famæ suæ prodigi, indifferenter facultatum suarum faciunt cessiones, (quas vocant distributiones) cum talia facere nequeant, quin apud bonos & graves saltem facti infames sint, & eorum opinio gravata remaneat. Idcirco circa hunc abusum (prout possumus) providere volentes: statuimus & ordinamus, ut nullus Curatus, seu Capellanus, se debitis onerare valeat absque nostra, vel Officialis nostri licentia speciali, ultra medietatem valo-

ris sui beneficii. Quam quidem æstimationem, secundum taxationem decimæ haberi volumus: scilicet, ut summa debiti, medietatem taxationis decimalis nequaquam excedat. Species namque dilapidationis est, majora contrahere debita, quam requirat potentia facultatis: & quisque juxta eas facultates debet expensas suas omnibus modis mensurare. Contrarium vero facientes, tanquam dilapidatores, decernimus pœna Canonica feriendos. Cæterum ut circa miserabiles cessiones, quas frequenter debitores faciunt contra suos Creditores, in Curia nostra Atrebatensi: viam malitiis & fraudibus, prout est nobis possibile, præcludamus; Statuimus, ut nullus debitor ad bonorum cessionem per Officiale nostrum de cætero admittatur, nisi prius proclamatione facta publice, plebe astante, aliqua die Dominica in Ecclesia, ubi dictus debitor Parochianus existit, per Rectorem Ecclesiæ, vel ejus Vicarium, dum Missarum solennia celebrantur, statim post Offertorium, dicendo: quod talis in Curia nostra vult facere cessionem contra talem. Et de hoc Officiali constet legitime per rescriptionem Curati: quas proclamationem & rescriptionem, per dictum Curatum decernimus faciendas, sub excommunicationis pœna. Die vero ad cessionem faciendam assignata, coram Officiali nostro, antequam recipiatur cessio hujusmodi, cedere volens, scalam ascendere habebit in ingressu portæ claustræ ad hoc deputatæ: & ibi stabit a prima pulsatione tertiæ, usque ad finem magnæ Missæ, & his peractis ad cessionem admittatur, & non ante, aliis solennitatibus, hætenus circa talem cessionem in nostra Curia observatis, nihilominus in suo robore duraturis.

### XXIV. De Usuris & usurariis contractibus.

**U**surarum vorago, quæ animas devorat, & exhaurit damnablem facit facultates, est in partibus istis tanto studiosius inhibenda, & tanto curiosius compescenda, quanto in eisdem partibus magis, quam alibi pullulat, & for-



fortius invalescit. Quapropter omnibus & singulis tam Clericis, quam Laicis subditis nostris inhibemus, ne usuras, aut contractus usurarios exercent quoquo modo. Et ne quis hujusmodi nostram prohibitionem infringere valeat: mandamus Decanis, Curatis, aut eorum loca tenentibus sub excommunicationis pœna; quatenus hujusmodi prohibitionem nostram, singulis diebus Dominicis & Festivis, in Ecclesiis suis studeant publicare. Qui vero contra prohibitionem prædictam usuras aut contractus usurarios exercent, (ut præfertur) excommunicationis sententiam eo ipso incurrant: uxorque ejus, & familia, sint etiam suppositæ Ecclesiastico interdicto: & tales denuncientur per Decanos & Presbyteros curatos, interdicti & excommunicati publice, talibusque, Decani & Curati prædicti, ingressum Ecclesiæ interdicant: quousque ad emendam competentem devenerint, & absolutionis beneficium meruerint obtinere: restitutionis prius usuris, vel cautione idonea, secundum juris dispositionem præstita Nobis, vel Officiali nostro de restituendo easdem. Cæterum illi, quos fama publica attestatur usurarios, nec eorum familia, quoquo modo ad Communionem altaris, seu Ecclesiasticam sepulturam admittantur, nec oblationes talium recipiantur in Ecclesia. Recipientes vero talium oblationes, restituere compellantur. Et qui eos Ecclesiasticæ tradiderit sepulturæ, donec ad arbitrium nostrum, vel Officialis nostri satisfecerit, juxta Lateranense Concilium ab officii sui maneat executione suspensus. Et nihilominus hodie, per Decretalem Clementis quinti, eo ipso sententiam excommunicationis incurrunt. Et sciendum est, quod usurarii publici & manifesti, quamquam in ultima voluntate mandaverint, de receptis usuris satisfieri, indistincte vel expressa certa quantitate: Nihilominus tamen debet eis Ecclesiastica sepultura denegari, donec de usuris, prout suppetunt facultates eorum, plenarie fuerit satisfactum illis, a quibus extortæ fuerint, vel cautio sufficiens Nobis, vel Officiali nostro sit præstita, vel Curato loci de mandato nostro, vel nostri Officialis,

*Totius VIII. Concilior. German.*

juxta dispositionem Decretalis Gregorii decimi, quæ incipit: *Quamquam*; & situata est in titulo: *de Usuris, Libro sexto*. Ubi etiam prohibetur, quod nullus testamentis manifestorum usurariorum interlit, aut ad confessionem admittat eosdem, sive eos absolvat, nisi de usuris satisfecerint, vel de satisfaciendo pro suarum viribus facultatum idoneam præstiterint cautionem. Cujus contrarium faciunt multi Curati, qui tales, nobis inconsultis, absolvunt, & ad Ecclesiastica Sacramenta recipiunt, licet eis denegent sepulturam. Quod fieri sub pœna gravissima, pro nostro arbitrio moderanda, firmiter prohibemus. Et cavetur ibidem etiam, quod testamenta usurariorum prædictorum facta aliter, quam sit dictum, sunt irrita ipso jure: Et quia posset esse dubium apud multos, qui dicantur usurarii manifesti; usurarios manifestos volumus intelligi, de quibus constat per confessionem eorum, extra Confessionem Sacramentalem factam, vel per sententiam Judicis, quod sunt usurarii, & illos etiam, qui super usuris sunt publice diffamati, vel qui ita publice se exhibent usuris, quod omnibus appareat ipsos esse usurarios manifestos. Sciendum, quod illi tenent fenestras publicas, vel mensam numulariam ad exercendas usuras, vel aliud quodcunque signum, per quod usurarii cognoscuntur. Sunt vero quidam, qui in contemptum Dei & Ecclesiasticæ disciplinæ de Ecclesiis, vel Cœmeteriis propriis Parochialibus, excommunicatos & usurarios prædictos, eorum uxores aut familiam defunctos, in fraudem volentes circumvenire vindictam, & usuram damnabiliter retinere, antequam restituant usuras, vel idoneam præstiterint cautionem, ut præfertur, deportant, vehunt, quadrigant, vehi, portare, seu quadrigari faciunt, ad aliquas Ecclesias vel cœmeteria, exemptas & non exemptas in nostra Diocesi, & extra, ut ibidem Ecclesiasticam recipiant sepulturam: tales & dantes auxilium, vel favorem, eo ipso sententiam excommunicationis incurrunt: eandemque pœnam incurrunt, si prædictos, modis præmissis, transferant, vel transferri faciant, ut præfertur, vel ad hoc

*M m*

*dent*

dent auxilium, consilium, vel favorem, etiam si non fuerint mortui, sed infirmi, in mortis articulo constituti: & quos super præmissis culpabiles sciveritis, nominatim excommunicatos nuncietis publice, donec ad emendam venerint competentem. Insuper sciendum est, quod communitas locorum, aut quicumque Judices seculares, quovis nomine nuncupentur, vel eorum Vicarii, dictantes, vel scribentes statuta super usuris, cum juramento, vel sine juramento solvendis, vel solutis non repetendis, vel judicantes secundum prædicta statuta, vel non delentes ea de suis libris infra tres menses, vel illa servantes, excommunicati sunt ipso jure. Usurarii quoque edere debent, & tenentur contra se, in causis usurarum, codices suarum rationum: & sustinentes pertinaciter, quod exercere usuras non sit peccatum, sunt velut hæretici puniendi; prout hæc omnia in Decretali unica, situata in titulo: *de Usuris*, in *Clemen.* plenius & serius continentur. Et quia nonnulli iniquitatem suam palliare sub dissimulatione volentes, cum ad usuras exercendas intendunt, & usurarios contractus exercent, licet revera hujusmodi faciant, contractus, puta, emptionis, vel depositi, aut similes confingunt: aut si instrumentis, aut literis, sive chartis, tales contractus simulatos inscribi faciunt: idcirco cum magis attendi debeat: quod agitur, quam quod quadam dissimulatione concipitur, tales non obstantibus dictis simulationibus, usurarios reputamus, & poenis ligatos decernimus, supra contra usurarios inflictis, fulminatis, & etiam promulgatis. Notarios vero, tales contractus simulatos scienter recipientes, & etiam conscribentes, tanquam falsarios, decernimus puniendos. Decernimus etiam, ne Usurarii publici, vel supra hoc diffamati, ut supra, ad levandum prolem de Sacro Fonte, nullatenus admittantur.

Ut vero (b) minor fœeneratoribus fœnerandi tribuatur facultas, & in odium usurarum in hac præsentī Synodo statuimus, & etiam prohibemus sub pœna interdicti, suspensionis, & excom-

municationis, nec non quadraginta librarum Parisiensium piis usibus applicandarum, ut nec Collegium, nec alia Universias, nec singularis persona, personas alienigenas, vel alias, ab ipsorum terris non oriundas, pecuniam fœnebrem publice exercentes, recipiant ad morandum in terris suis, domos conductas, vel alias nullo modo habere permittant, sed hujusmodi usurarios expellant a suis terris, & domibus. Nemo talibus de cætero domos locet, vel sub alio titulo concedat. Qui vero contra hujusmodi nostram Constitutionem & inhibitionem attentare præsumperit, si Collegium sit, vel Universitas, in ipsos interdicti: si vero personæ Ecclesiasticæ, suspensionis: & si personæ singulares laicæ fuerint, in ipsas excommunicationis sententiam promulgamus, & declaramus, eas dictam pœnam quadraginta librarum Parisiensium incurrisse, nisi tamen infra mensem a die notitiæ hujusmodi usurarios expulerint, eorum loca, & terras Ecclesiastico interdicto supponentes. Mandamus præterea omnibus Ecclesiarum Rectoribus, quatenus tales, si eorum notitiam habuerint, nec non omnes & singulos usurarios palam & publice excommunicatos, in suis Ecclesiis diebus Dominicis publicent & nuntient, eorum liberis, & uxoribus, & familia interdicto Ecclesiastico suppositis nostra auctoritate, sine alterius expectatione mandati. Quibus dicti Curati Sacramenta Eucharistica præbere, aut sepulturam ministrare nequaquam præsumant, absque nostra, seu Curiae nostræ licentia speciali, de qua per literas suis Curatis fidem facere teneantur.

### XXV. De Testamentis.

**L**ibera sit voluntas decedentibus ordinandi de rebus suis, & Executores eligendi fideles, qui bona testatoris post mortem recipiant, & describant ac distribuunt secundum rectam dispositionem ipsius. Electi vero Executores onus executionis in se suscipientes, de bonis testatoris, præsertim mobilibus, & ad executionem spectantibus, infra mensem a die obitus defuncti,

(b) Paragraphus hic deceptus est ex Constitutionibus Synodalibus Petri Mansueti, Episcopi Atrebatensis, editis anno 1375.

functi, numerandum, sub manu publica, vel saltem in præsentia Curati loci, & sub sigillo Parochialis Ecclesiæ, vel, ubi fieri præmissa non possent commodè, sub fide dignorum testimonio, inventarium facere teneantur, in quo omnia bona prædicta & nomina debitorum, executores scribant, & eorum valores seu precia, juxta æstimationem, per æstimatores locorum super hoc juratos, plenarie declarentur. Factoque inventario, executores hujusmodi per se, vel per alium, cum testamento & inventario prædictis, ad Officialem Curiae nostrae Atrebatensis se transferant, & coram eo se præsentent infra alium mensem. Et de hujusmodi testamento, & inventario copiam faciant, & eidem Officiali tradant, quam penes Curiam nostram prædictam volumus remanere, ut per hujusmodi copiam possit Officialis prædictus plenius informari de fidelitate, diligentiaque dictorum Executorum, & ut negligentiam, seu defectus eorum melius deprehendere valeat, & etiam corrigere & supplere, nec non & dictos Executores, si necesse fuerit, utilius possit instruere, qualiter se habere debeant in executione prædicta. Statuimus etiam & ordinamus, quod hujusmodi executores, voluntatem testatoris infra annum a die mortis adimpleant, & teneantur juxta provisionem Canonica & civilem, executioni debitæ demandare; alioqui ad Nos, seu Officialem nostrum, ex tunc hujusmodi executio totalis, si in nullo fuerit adimpleta, vel in parte restante adimpleri (ubi in parte fuerit executà) devolvatur. Statuimus præterea & præcipimus, quod executores hujusmodi de suscepto, vel suscipiendo in posterum executionis officio, infra annum a die executionis susceptæ, vel saltem post lapsum anni, (quam cito commodè poterunt) Nobis, vel Officiali nostro prædicto teneantur reddere rationem: quod si non fecerint, una monitione pro omnibus peremptorie præmissa, si Prælati sunt, vel Presbyteri, eo ipso suspensus sit a Divinis: alia vero persona quæcunque sententiam excommunicationis incurrat. Et est sciendum, quod Religiosus in sua ultima voluntate ab

aliquo executor deputatus, non potest, cum nec velle, nec nolle habeat, hujusmodi onus executionis in se suscipere, vel exequi hujusmodi voluntatem: nisi primo a Superiore suo petita licentia, & obtenta: sed si prædicti Religiosi, etiam exempti de voluntate & licentia suorum Superiorum, onus alicujus executionis in se susceperint, tenentur absque dolo & fraude, etiam si Prælationis fungantur officio, non obstante exemptione quacunque, de suscepto executionis officio, locorum Ordinariis reddere rationem: Et si contra id reperti fuerint deliquisse; per eosdem Ordinarios, quocunque non obstante privilegio, pœna debita castigari. Prout hæc, & alia plura statuuntur in Concilio Viennensi: & Nos juxta idem Concilium statuimus; quod dicti Religiosi quicunque nostræ Diocesis executores, ut præmittitur, deputati, vel deputandi, inventarium facere, copiam dare, & rationem reddere infra annum, ut præmittitur, teneantur, non obstante privilegio, seu exemptione quacunque: alioqui pœnis subjaceant prædictis. Insuper sciendum est, quod si plures executores fuerint a testatore simpliciter deputati, uno eorum mortuo, aut in remoris agente, vel alias legitime impedito, vel exequi nōlente, alius potest voluntatem prædictam exequi & libere adimplere, nisi aliud fuerit a testatore ordinatum, prout in Bonifaciana Constitutione continetur plenius.

Præcipimus quoque Curatis nostræ Diocesis, & eorum loca tenentibus, ut Testamenta, quæ scient non esse infra annum executioni demandata, vel de quibus non est ratio reddita, Decanis denuncient infra mensem a tempore notitiæ, ut iidem Decani infra alium mensem Nobis, vel Officiali nostro non differant nunciare; quo id, quod statutum est, de inventario, & copia ipsius faciendâ, diligentius observetur. Præcipimus omnibus & singulis Presbyteris, Curatis, Civitatis & Diocesis Atrebatensis, & eorum loca tenentibus, sub pœna inobedientiæ & sexaginta solidorum, quatenus Executores testamentorum suæ Parochiæ moneant diligenter, & præ-



cise super dicto inventario (ut præmittitur) faciendo, & copia ipsius, nec non & testamenti, ut supra tangitur, Nobis, vel Officiali nostro facienda : & Nobis rescribant de huiusmodi monitione & nomina dictorum executorum insinuent, & certificent, an monitioni suæ parere velint, an non, & responsionem plene conscribant. Quoniam si lapsis temporibus, quo ad præmissa, ordinationem dicti executores non adimpleverint, quod de inventario & copia superius extitit ordinatum, diligenter ut præfertur, moniti per Curatos, ex tunc sententiam excommunicationis ipso facto incurrunt. Insuper ordinamus, & præcipimus sub pœna quadraginta solidorum, Curatis, Decanis, & eorum loca tenentibus, quod copiam testamentorum factorum, vel auctorizatorum, Nobis infra mensem a tempore mortis testatoris, tradant & faciant. Et hoc idem sub pœna privationis officii Notariis Curiae nostræ, nec non Tabellionibus publicis duximus injungendum.

#### XXVI. De inhumatione corporum.

**B**onifaciana Constitutione cavetur, & etiam inhibetur universis Religiosis & Sæcularibus, Presbyteris & Clericis, cujuscunque status & conditionis existant, ne aliqui ad vovendum, jurandum, seu fide interposita promittendum, aliquem, seu aliquos inducant, quod apud eorum Ecclesias eligat, seu eligant sepeliri, vel jam electam sepulturam non immutent : & si secus fuerit attentatum, electio nulla est ipso jure. Et hi, qui sepulturam sic eligunt, apud Ecclesias electas sepeliri non possunt : nec alibi eligere possunt sepulturam, sed debent sine quocunque obstaculo, sepeliri apud illas Ecclesias, apud quas essent sepeliendi, si sepultura non electa decessissent. Et si dicti Religiosi vel seculares, prædictos, sic eligentes sepulturam, sepeliant : tenentur & sunt obligati, tam ad restitutionem corporum, si petantur, quam aliorum omnium, quæ huiusmodi occasione sepulturæ provenierint quomodolibet, infra decendi-

um integraliter faciendam : quam nisi fecerint, elapso dicto decendio ; Ecclesie ipsæ, apud quas sepulti fuerint, nec non & Cæmeteria eorundem, ipso facto & tam diu maneat Ecclesiastico suppositæ interdicto, donec ab eis facta fuerit plenaria restitutio omnium prædictorum. Et nihilominus ultra istam pœnam, violatores primæ partis hujus constitutionis : nempe inducentes aliquos ad vovendum, jurandum &c. per Decretalem Clementis V., quæ incipit : *Cupientes*, excommunicationis sententiam ipso facto incurrant, a qua per alium, quam per Sedem Apostolicam (præterquam in mortis articulo) absolvi non possunt. Sub pœna quoque excommunicationis prohibemus, ne quis infra Ecclesiam, vel Capellam tradatur, seu tradi permittatur Ecclesiasticæ sepulturæ, sine nostra, vel Officialis nostri licentia speciali, & nisi dotaverit Ecclesiam, ad minus de tribus solidis redditualibus bonæ monetæ; nisi tamen fuerit Dominus loci, villæ, seu primogenitus ejus, Patronus, aut Sacerdos, sive Capellanus Ecclesiæ, seu Capellaniæ. Item sub pœna excommunicationis prohibemus, ne quis excommunicatos, suspensos, vel suppositos Ecclesiastico interdicto, aut non Christianos, nec eos, qui subitanee discesserint, sine nostra licentia cum illa clausula, *si Catholice vixerint*, &c. aut suspensos in patibulis, tradat, vel tradi faciat quomodolibet, aut procuret tradi Ecclesiasticæ sepulturæ, seu in hoc faciendo det auxilium, consilium, vel inventionem, quousque fuerint a præmissis Canonice absoluti, seu a Nobis de ipsis inhumandis obtenta fuerit licentia specialis. Caveant omnes Sæculares, & Religiosi quicunque, ne quem sepeliant extra Parochialem Ecclesiam, sine Curati licentia, aut nostra, aut Officialis nostri. Et Sæculares, aut Religiosi quicunque, etiam exempti, qui sine proprii Curati licentia, seu nostra, vel Officialis nostri, Matrimonii solennizationem, benedictionem nuptialem, sepulturam, administrationem Sacramenti Extremæ Unctionis, & Eucharistiæ, aut aliqua alia Sacramenta Eucharistica alibi, quam in Parochiali Ecclesia, cujus recipiens

Paro-

Parochianus extiterit, conferunt, faciunt, vel impendunt, aut aliquos ad præmissa admittunt, & quicumque alibi, & alias, quam dictum est, præmissa recipi, conferri, aut impendi sibi facit, vel ad ea recipienda quovis modo procurat, dantes & recipientes huiusmodi, aut etiam procurantes, & dantes in præmissis opem, consilium, aut favorem; per has nostras Synodales Constitutiones, sententiam excommunicationis ex eo ipso incurrant, illis duntaxat exceptis, quibus præmissa ex speciali licentia a Sede Apostolica sunt concessa. Et idcirco districte præcipimus Curatis, ut in Ecclesiis suis tales excommunicatos publice denuncient diebus Dominicis & Festivis, nec illos, quos tales sciverint, ad Divina officia, seu Ecclesiastica Sacramenta admittant, & eisdem ingressum Ecclesiæ nominatim interdiciant, & moneant omnes Parochianos suos: ut quicumque de prædictis transgressionibus habebit, vel habet notitiam, quidquid sciverint, Nobis, vel Officiali, seu Promotori Curiae nostræ infra septem dies significant, ubi requisiti fuerint; alioquin excommunicationis sententiam eo ipso incurrunt. Per hoc autem Statutum non intendimus, quin Prædicatores, & Minores, Nobis debite præsentati, & a Nobis licentiam obtinentes, possint audire confessiones, & ad Ecclesiasticam sepulturam (sine præiudicio Parochialis Ecclesiæ) recipere eos, qui apud ipsos eligunt, seu eligunt sepeliri. Insuper inhibemus districte, & sub pœna suspensionis (quoad personas in Sacris Ordinibus constitutas) & excommunicationis (quoad alias) ne de cætero fiant pacta, aut conventiones inter Prælatos, & Rectores Ecclesiarum, & hæredes, seu executores defunctorum, videlicet, super funeralibus, pannis sericeis, cereis candelis, quæ circa funera in Ecclesiis debent apponi; sed cum gratiarum actione, recipiant personæ Ecclesiasticæ illa, quæ circa funeralia apponentur, nec prædicti hæredes compellantur apponere, nisi quod eis placuerit, & quod est in talibus fieri consuetum. Tales enim conventiones non carent specie Symoniæ, & multoties

sunt in Ecclesiarum dispendium, & gravamen. Statuimus, quod dicti Curati Civitatis, Villæ & Diocesis Atrebatensis, vel eorum saltem Capellani, cum corporibus, seu cadaveribus Parochianorum suorum (dum ad sepulturam deferentur) personaliter incedant, eadem conducendo in habitu decenti capæ, vel superpellicei cum stola, aqua benedicta, & cruce antecedentibus, dicentes orationes, ad hoc dici consuetas, & ordinatas, propter animarum utilitatem, Ecclesiæ honestatem & populi devotionem.

### XXVII. De Privilegiis & Privilegiatis.

**Q**Uoniam Religiosi, maxime privilegiati & exempti, prætextu suæ exemptionis & privilegiorum, multa committunt, quæ ipsis infamiam pariunt, & aliis inferunt læsionem, sciant Curati, quod Religiosi, etiam exempti, aut privilegiati, qui Clericis, aut Laicis Sacramentum Unctionis extremæ, vel Eucharistiæ ministrare, Matrimonia solennizare (sine Parochialis Presbyteri licentia speciali) præsumpserint, eo ipso, per Constitutionem Clementis V., editam in Concilio Vienne, sententiam excommunicationis incurrunt, a qua nisi per Sedem Apostolicam absolvi non possunt. Religiosi quoque prædicti, qui excommunicatos a Canone, præterquam in mortis articulo, & in casibus a jure permissis, vel per privilegia concessis eisdem, vel a sententiis per Statuta Synodalia promulgatis, seu a pœna & culpa (ut verbis eorum utamur) absolvere præsumpserint, eandem sententiam excommunicationis incurrant ipso facto, per Sedem Apostolicam absolvendi. Quare omnibus Decanis & Presbyteris curatis, & eorum loca tenentibus, districte præcipiendo mandamus; quatenus eos (quos constiterit esse tales) nominatim, & nihilominus in generali omnes in præmissis excedentes, in eorum Ecclesiis diebus Dominicis & Festivis excommunicatos palam & publice studeant nunciare, nullo eis super hoc exemptionis, vel alio privilegio suffragante. Exempti & Privilegiati,

giati, & quicumque alii, qui sepeliunt in cœmeteriis corpora defunctorum, tempore interdicti (nisi in casibus permissis a jure) vel excommunicatos publice, aut manifestos usurarios scienter, excommunicati sunt ipso facto, nec possunt absolvi, donec satisfecerint (ad arbitrium Diocesani) eis, quibus præmissa injuria fuerit irrogata, ut in Decretali prima, *de Sepulturis*, in Clementinis plenius continetur. Præterea quantumcunque exempti gaudeant libertate, nihilominus tamen ratione delicti, siue contractus initi, aut rei, de qua agitur contra ipsos, possunt coram Episcopis, & eorum Officialibus, seu locorum Ordinariis conveniri, & illi quoad hoc in eos, suam jurisdictionem exercere, prout fieri rationis, ut cavetur expresse in Constitutione Innocentii IV., edita in Concilio Lugdunensi, quæ incipit: *Volentes*. Quod debet intelligi, nisi contra illam Decretalem, privilegium obtineant speciale, quod, per hæc privilegia ostendenda, juxta Bonifacianam Constitutionem, quæ incipit: *Cum persone*, poterit apparere.

### XXVIII. De veneratione Ecclesiarum, vel Cœmeteriorum.

**S**ignum indevotionis est in sacris locis sordes negligere, quæ non decent in prophanis: Et idcirco statuimus, & præcipimus, quod Cœmeteria honeste claudantur, ne bestię, sicut porci, anseres, & animalia bruta, ibidem faciant suam immunditiam, & ea sordident. Et quia Ecclesia Domus orationis, quæ non negotiationis esse debet, moneant sæpe Presbyteri suos Parochianos, ne in Ecclesiis, & Cœmeteriis commercia sæcularia faciant, seu exercent, seu causæ, vel sæcularia placita ibidem tractentur, & ne etiam rixæ, contentiones, seditiones, choreæ, seu proclamationes, vel banna, parlamenta proclamantur, aut aliqui contractus sæculares, per quoscunque Ballivos sæculares, Majores Præpositos, Scabinos, & alios quoscunque Judices sæculares, vel eorum servientes, vel per alios fiant in eisdem locis, sub pœna

excommunicationis, & quadraginta librarum: ne prædicti, seu quivis alii per tumultum suum, vel alias perturbent Divinum Officium, sub pœnis prædictis. Ecclesiæ, seu Cœmeteria sanguinis, seu seminis effusione pollutæ, reconcilientur per Nos, vel Deputatos nostros, siue fuerint consecratæ, siue non: Et interim Divina officia (nisi in casibus a jure permissis) non celebrentur ibidem, nec aliquis ibi sepeliatur, donec reconciliatæ fuerint, ut præfertur. Et sciendum est, quod Ecclesia polluta, Cœmeterium contiguum est pollutum: secus si fuerit remotum ab eadem: sed non convertitur, quia polluto Cœmeterio, etiam contiguo, polluta propter hoc Ecclesia non existit: quia sequeretur absurdum; scilicet, quod accessorium ad se traheret principale.

### XXIX. De Immunitate Ecclesiarum, vel Cœmeteriorum.

**C**onfugientes ad Ecclesiam Decreta Sanctorum Patrum sanxerunt, plenissima libertate gaudere. Et idcirco statuimus, & præcipimus, ac etiam ordinamus, quod quicumque fugientes ad Ecclesiam, vel Cœmeterium pro tutela refugii, a dicto Cœmeterio, vel Ecclesia extraxerit, aut ad extrahendum dederit opem, consilium, vel favorem, vel manus violentas in tales confugientes intulerit, mutilaverit, seu occiderit, vel impedierit, quo minus confugientibus prædictis, in dicto Cœmeterio, aut Ecclesia, victualia ministrantur; cum sic indirecte libertas Ecclesiæ infringatur, excommunicationis sententiam incurrant ipso facto, & per Decanos, Presbyterosque, & Curatos, tales, sic facientes, excommunicati publice nuncientur, & cessetur a Divinis, quousque dicti abstracti, prædictæ libertati fuerint restituti, a qua abstracti fuerunt: vel donec cessent ab impedimento, quando impediunt dicta victualia ministrari: & donec venerint ad emendam competentem.

XXX.



## XXX. De refectione Ecclesiarum.

**P**atroni, personæ, cæterique, qui participant in oblationibus & decimis Parochialium Ecclesiarum; juxta quantitatem suæ portionis conferant ad refectionem Cancellorum, sive Chori Ecclesiarum prædictarum: Parochiani, de Calice, Missali, Breviario, casulis, albis, & aliis necessariis, ad cultum Divinum, provideant competenter de bonis Ecclesiæ, quæ colligunt vel de elemosynis, seu de communi contributione. Provisores Ecclesiæ de perceptis & administratis ipsius Ecclesiæ bonis coram Presbytero curato loci annis singulis teneantur computare, & legitimam rationem reddere: Presbyter autem summam computi Decano tradat, qui Nobis, vel Officiali nostro respondere possit, cum ab eo requiremus. Ecclesiæ campestræ, de die & de nocte sub bonis serraturis claudantur, saltem de nocte, ne malefactores ibidem faciant sua conventicula. Doceant insuper, & moneant Curati & Presbyteri populum sibi subditum, ut quotiescunque in Ecclesia audierint, nominare nomen illud, quod est super omne nomen, scilicet nomen Domini nostri JESU Christi, per quem salvati sumus & liberati, aliquod signum reverentiæ faciant, genua flectendo, vel capita inclinando, seu pectus percutiendo: scriptum est enim: *In nomine Domini omne genu flectatur.* Idem præcipimus, quoties nominari audient nomen Virginis Gloriosæ. Et quia sunt quidam Ecclesiarum Parochialium Rectores, qui Ecclesias suas replent eorum bonis propriis, aut repleti permittunt alienis: blada, fasena, (c) vasa, stramina, aut alias res prophanas ibidem ponendo, aut poni permittendo: ita quod domus laicæ potius, quam DEI Ecclesiæ videantur. Quod fieri sub pœna excommunicationis de cætero prohibemus: monentes ex nunc dictos Curatos, ut talia, si qua sunt in suis

Ecclesiis reposita, extrahant, nec de cætero talia infra dictas Ecclesias reponant, & reposita ibidem per alios, extrahi faciant, atque mandent. Et si quos in præmissis rebelles invenerint, qui in hac parte noluerint suis monitionibus aut mandato obedire, Nobis, aut Officiali nostro denunciare procurent.

## XXXI. De Domibus Beneficiatorum.

**D**E Domibus Beneficiatorum statuendum Nobis videtur; ut Presbyteri, Capellani, Curati, vel alii Beneficiati, domos beneficiis adjunctas possidentes, sive resideant in suis beneficiis, sive de nostra licentia & speciali permissione, ex rationabili causa absint, factas, rectas, & integras eas semper studeant conservare: quod si facere prætermiserint; volumus, quod Decani locorum, de fructibus dictarum Ecclesiarum, vel Capellaniarum, domos reparari (si ruinam minantur) & reedificari, (si corruerint) faciant: si, & prout (ultra salarium deservientium eisdem Ecclesiis) Ecclesiarum & Capellaniarum ipsarum suppetant facultates: quod, nisi fecerint, & ex lata eorundem Decanorum, qui eas visitare tenentur, culpa contigerit, deteriores factas, pro nunc volumus ejusmodi Decanos, propriis sumptibus & impensis dictas domos instaurari curare.

## XXXII. De Festis colendis.

**F**esta vero, quæ nunciare debetis Parochianis vestris, absque omnibus operibus forensibus excolenda, & cum debita veneratione celebranda, sunt hæc: Nativitas Domini, cum tribus sequentibus diebus. Circumcisio. Epiphania. Conversio Pauli. Purificatio Beatæ Mariæ. Mathias. (d) Annuntiatio ejusdem Mariæ. Resurrectio Domini, (e) cum tribus sequentibus. Apostolorum Philippi & Jacobi. Ascensio Domini. Dies Pentecostes, (f) cum tribus

(c) Salena, nuspiam reperi hanc vocem. In antiqua editione sic legitur: blada, vasafena, forsan: vasa, fena, stramina &c.

(d) Festum S. Mathiæ in antiqua editione non ponitur.

(e) In antiqua editione: Resurrectio Domini. Quarta feria sequens.

(f) In antiq. Dies Pentecostes. Quarta feria sequens.

tribus sequentibus. Festum Sanctissimi Sacramenti. Festum Beati Barnabæ Apostoli. Nativitas Beati Joannis Baptistæ. Apostolorum Petri & Pauli. Mariæ Magdalenzæ. Jacobi & Christophori. Laurentii Martyris. Assumptio Beatæ Mariæ. Nativitas ejusdem. Bartholomæi (g) Apostoli. Matthæi, Lucæ, Marci Evangelistarum. Inventio (h) Sanctæ Crucis. Simonis & Judæ. Omnium Sanctorum. Commemoratio omnium fidelium defunctorum. Martini Episcopi. Nicolai Episcopi. Andreæ Apostoli. (i) Thomæ. Omnes dies Dominicales. Dies principales Sanctæ Ecclesiæ. & Dedicatio Sanctæ Ecclesiæ, cum festo Sanctæ Catharinæ Virginis. Et sciendum est, quod Festa Apostolorum, nec non & quatuor Doctorum Ecclesiæ, scilicet Gregorii, Ambrosii, Augustini & Iheronymi debent solenniter, sub officio duplici, per universas Ecclesias celebrari: prout in Bonifaciana Constitutione (quæ incipit: *Gloriosus*) plenius continetur. (k) Sed quia in Ecclesiarum Dedicationibus, quæ variis, diversisque diebus, per nostram Diocesim celebrari solent, magis conventicula malefactorum haberi soleant, quam quod dictæ solennitates debita reverentia & honore celebrentur: ideoque quod recta, piaque consuetudine noscitur institutum, ludis quibusdam prophanis, choreis, comotationibus, unde subinde cædes, rixæ, & homicidia perpetrantur, impendantur: dum in uniuscujusque Ecclesiæ celebranda Dedicatione, per omnes Civitates & pagos nostræ Diocesis, sub specie quadam devotionis, quasi per circulum malefactores conveniunt; Statuimus, ne deinceps ita circulatim, & quasi per orbem hujusmodi Dedicationes Ecclesiarum fiant: sed omnes uno, eodemque die, septima videlicet Julii, quæ est ipsius matricis Ecclesiæ Atrebatensis Dedicatio, exinde celebrentur.

### XXXIII. De observatione Jejuniorum.

**P**Ræcipimus & mandamus omnibus & singulis Decanis & Curatis Nobis subditis, sub obedientiæ debito, ut jejunia ab Ecclesia indicta mandent a Parochianis suis adultis, seu puberibus utriusque sexus (cessante impedimento legitimo & Canonico) fieri & cum debita devotione celebrari, ac etiam observari. Et intimare debent dictis Parochianis, quod talia jejunia sunt necessaria, & sub præcepto: adeo quod qui non observant, peccant mortaliter, nisi senectus, debilitas, infirmitas, paupertas, ac alia iusta causa & rationabilis, vel necessitas excusaret, nec possunt talia redimi pecunia, vel aliquo modo, nisi causa valde rationabilis, seu necessitas in jejunante subsit: licet aliud sit in jejniis voluntariis, quæ auctoritate Superioris, etiam sine tali casu, redimi possunt, ac etiam commutari, dum tamen illud sit majus, aut æquale, aut quantum præstare possunt, in quod talia commutantur. Jejunia indicta ab Ecclesia sunt ista: Quatuor temporum, Vigiliæ Apostolorum (præter Vigiliæ Philippi & Jacobi, Beati Joannis Evangelistæ, & Beati Bartholomæi, circa quæ nos remittit decretalis ad consuetudinem regionis) Vigilia Nativitatis Domini, & Beati Joannis Baptistæ: Vigilia Omnium Sanctorum, Ascensionis Domini, Pentecostes, Beati Laurentii, Assumptionis Beatæ Mariæ, & tota Quadragesima. Ista sunt jejunia indicta ab Ecclesia, & sub præcepto.

### XXXIV. De Purificatione post partum.

**N**ULLUS Presbyter, Curatus, aut alius quicumque, mulierem jacentem in puerperio purificet, nisi tum demum cum per mensem jacuerit: & hoc

(g) Post S. Bartholomæi Apost. additur in antiq. Ludovici.

(h) Festum hoc in antiqua non legitur.

(i) In antiq. post S. Andreæ Apostoli, scribitur: S. Eligii. S. Nicasii. de S. Nicolao, & S. Thoma nulla mentio.

(k) Sequentia non habentur in editione antiqua: nec sequens Caput de observatione Jejuniorum.

hoc etiam fiat de die, & in Ecclesia propria Parochiali, & non alibi, nisi in mortis articulo: & tunc petita a Nobis vel Officiali nostro licentia & obtenta. Nullus Presbyter, Curatus, Capellanus, Religiosus, etiam exemptus, aut alius quicumque, mulierem jacentem de partu ex damnato coitu, & nefario, vel fornicario, seu alias quovis modo damnato, excommunicatam, aut interdictam purificet, seu alienam Parochianam, sine nostra, vel nostri Officialis licentia speciali. Contrarium vero facientes, etiam si exempti fuerint, cum etiam exemptos non liceat Statuta nostra Synodalia violare, excommunicationis sententiam incurrant ipso facto: Absolutionem vero talium, Nobis, vel Officiali nostro, modis omnibus reservamus. Videant etiam Curati, quid de hoc caveatur super iisdem Constitutionibus, in titulo: *De inhumatione corporum & sepulturis*. Deinde sciant Curati, quod absolutis excommunicatis, vel usurariis manifestis, vel alio impedimento diu detentis, propter quæ uxores eorum fuerunt non purificatæ de uno partu, vel pluribus, supposito, quod præmissi absolutionem a Nobis, vel Officiali nostro obtinuerint, mulieres tamen non sunt purificatæ: imo debent purificari, quia absolutio non dat purificationem in hoc casu. Non tamen est necesse, quod pro unoquoque partu purificentur. Caveant tamen Presbyteri curati, ne dictas mulieres, aut alias quascunque sine purificatione recipiant ad Ecclesiastica Sacramenta.

### XXXV. De Domibus Religiosorum.

**I**N Domibus Religiosorum, aut Religiosarum, teneatur & observetur numerus Religiosorum taxatus, & tentus, aut certus, sive etiam consuetus. Et si diminutus fuerit, redintegretur, & etiam restauretur, ne propter paucitatem servitorum cultus Divinus minuatur. Debent enim poni Regulares in Monasteriis, etiam si non sit ibi numerus certus institutus, quot consueverunt esse: dum tamen ad hoc suppetant facultates: alias debet fieri juxta

*Tomus VIII. Concilior. German.*

Concilium Generale, scilicet, quod non amplius ponantur in Monasteriis prædictis, quam quot de bonis Ecclesiæ sine penuria se regere possunt. Volumus tamen & præcipimus, quod absque nostra speciali auctoritate, numerus consuetus non diminuatur, seu etiam augeatur, aut augmentetur. Contrarium vero facientes graviori subjaceant disciplinæ.

### XXXVI. De Mandatis Curiae observandis & exequendis.

**D**istricte in virtute sanctæ obedienciæ, & sub pœnâ transgressionis Nobis præstiti juramenti, nec non & excommunicationis præcipimus, ut Abbates, Decani, Sacerdotes, Capellani, & Clerici Nobis subjecti, ad quem, vel ad quos mandata Curiae nostræ pervenerint exequenda, ea fideliter & diligenter, secundum formam & tenorem eorundem, cum promptitudine reverentiæ exequantur. Et quod diebus Dominicis & Festivis, secundum tenorem dictorum mandatorum, nomina excommunicatorum, alta & intelligibili voce nominentur, ita quod ab omni populo in Ecclesia existente possint audiri. Et si timeant verisimiliter aliquod malum per adversarium, vel Judicem secularem, Portitori literarum debere, aut posse inferri; ipsum caute expediant, & rescriptionem faciant, aut sigillent. Et cum nuntius recesserit: adimpleant mandatum. Quod si per eorum incuriam, negligentiam, aut incautam executionem, dicto portitori quicquam mali acciderit; noverint, quod eos graviter puniemus, in aliorum exemplum. Nihil recipiant executores prædicti nostrarum literarum, sive a portitore, sive a litigante, nisi duos denarios, scilicet pro qualibet citatione sigillanda, & Clericus pro qualibet persona citanda unum denarium. Decani Christianitatis pro suis sigillis, quibuscunque literis apponendis, ultra tres denarios non recipiant, nisi pro suis literis testimonialibus & matrimonialibus faciendis. quo casu, pro eisdem literis possunt recipere duos solidos, & non ultra. Et

N n

quia



quia nonnulli, citationes aut monitiones auctoritate Judicum delegatorum, Executorum, Conservatorum, Ordinariorum, seu etiam aliorum quorumcunque, in locis publicis, vel in Ecclesiis, ad infamiam personæ citandæ vel monendæ, seu contra quas processus intenditur; malitiose exequuntur, seu exequi faciunt, aut procurant; licet personæ citandæ, vel monendæ faciliter copia haberi valeat: Nos hujusmodi malitiis, quæ frequenter in nostris civitate & Diocesi, ut audivimus, committuntur, obviare volentes, præmissa districtius fieri, aut procurari de cætero prohibemus, sub pœna excommunicationis, quam in contrarium facientes, seu fieri procurantes, ferimus in his scriptis. (1)

Cum vero fides literis ex appensione sigilli habeatur, & jurgia quamplurima atque lites, coram Nobis, & Officiali nostro, quotidie, pro Sigillorum incognitorum, quibus Presbyteri nostri subditi utuntur, diversa ac varia mutatione oriantur & emergant, & ad Nos gravis querela nonnullorum subditorum nostrorum sit propter hoc perlata; ea propter volentes super his remedium apponi opportunum, provida deliberatione statuimus & ordinamus, quod singuli Curati Nobis subditi, infra unius mensis spatium a die nostræ Synodi computandum, sub pœna excommunicationis, & viginti solidorum Nobis (si secus fecerint) applicandorum, habeant artum & proprium sigillum, quo utantur communiter, & non alio: cujus impressio penes Curiam nostram in cera remaneat, propter falsitates sigillorum incognitorum evitandas. Proinde, sicut intelleximus, nonnulli Presbyteri, moniti, quod recognitiones, contumacias, & taxationes Curie nostræ exequi differunt, & prætermittunt, multotiens ob favorem, & aliquotiens ex negligentia, metu, aut periculo excommunicationis, in creditorum subditorum nostrorum & Curie nostræ contemptum, damnum, præjudicium, & gravamen, expedit, ut talibus malitiis & periculis via præcludatur. Ea propter volentes

super his remedium apponi opportunum, provida deliberatione statuimus & etiam ordinamus: quod, super quibuscunque recognitoriis, contumacialibus, & taxatorialibus, antequam monitus valeat excommunicari, impetrentur & obtineantur ab Officiali nostro, & a Curia nostra literæ, quæ in eisdem literis infigantur (termino monitionis elapso) sub hac forma:

*Officialis Atrebatensis omnibus Presbyteris &c. Cum nobis constet per rescriptionem vestram, vel talis Presbyteri, talem monitum fuisse & esse, ad instantiam talis pro contentis in literis his præsentibus annexis: & tempus hujusmodi monitionis sit elapsum, dicto tali de præmissis minime satisfacto, vobis mandamus, quatenus dictum talem, qualem in his scriptis excommunicamus, excommunicatum publice in facie Ecclesiæ nunciatis; quod inde feceritis &c.*

Tenentes tamen illos monitos, fore excommunicatos, qui infra triduum sibi assignatum, de his, pro quibus moniti fuerunt, minime satisfecerunt. Prohibemus vero, ne quis Presbyterorum nobis subditorum, aliquem monitum, virtute & prætextu literarum quarumcunque monitorialium, excommunicatum denunciet, sine literis prædictis: quæ in eisdem monitoriis infigantur, ac signis audientarii, & apparitoris nostrorum signentur evidenter, ac sigillo Curie nostræ sigillentur: exceptis tamen literis monitoriis pro Clericis, & bonis eorundem; ac literis, ad instantiam Curie & monitoris nostri, quarum formam & tenorem præcipimus inviolabiliter observari, secundum quod est hætenus consuetum, & prout in eisdem continebitur, quod sic fieri volumus, decernentes irritum & inane, si secus contigerit, quomodo libet indebite attentari. (2)

Multorum ad Nos gravis querela perduxit, quod nonnulli Curati, & Capellani, Executores mandatorum Curie nostræ, aliquotiens prece, vel favore, & aliquando munere, vel contemptu, seu etiam vano metu, mandata & literas Curie nostræ exequi differant, & negligant: & si aliquo modo exequantur

(1) *Sequentia ex additionibus Synodalibus anni 1364. deprompta sunt.*

(2) *Paragraphus, qui sequitur, excerptus est ex Constitutionibus Synodalibus D. Petri Mansuerii, Episcopi Atrebatensis, editis anno 1375.*

quantur, hoc fit ita generaliter, & confuse & obscure, præsertim in denuncia-  
tione excommunicatorum, dicendo  
sic: *Illos denunciamus excommunicatos &  
aggravatos, de quibus mandata recepimus.*  
Vel alias nequaquam intelligibiliter,  
adeo, quod frequenter patiuntur, &  
permittunt scienter, excommunicatos  
cum fidelibus in Ecclesiis suis esse, quan-  
do celebrant juxta & prope eos in Cho-  
ro, & circa Altare, cum eisdem ex-  
communicatis participantes, & in sua  
malitia, & errore ipsos damnabiliter  
sustinentes, in grave præjudicium ani-  
marum suarum, & scandalum pluri-  
morum: unde censura Ecclesiasticæ dis-  
ciplinæ vilescit, & autoritas Mandato-  
ris ducitur in contemptum, Curiaque  
nostræ (quæ ex hoc culpabilis non ex-  
istit) detrahitur per culpam, seu ne-  
gligentiam dictorum Curatorum; prop-  
terea volentes super his providere, in  
virtute sanctæ obedientiæ, & sub pœna  
transgressionis nobis præstiti juramen-  
ti, nec non suspensionis & excommu-  
nicationis, ac sub pœnis privationis &  
amissionis beneficiorum suorum, ac de-  
cem librarum Parisiensium, piis usi-  
bus applicandarum, præcipimus &  
injungimus omnibus & singulis Pres-  
byteris subditis nostris, quatenus hu-  
jusmodi mandata nostra, & literas, quæ  
sibi exequenda deferuntur, diligenter  
& fideliter exequantur, secundum te-  
norem ipsorum mandatorum, adeo-  
que per eorum incautam seu negligen-  
tem executionem, Portitoribus, seu  
Procuratoribus literarum hujusmodi,  
nulla injuria inferatur, eosdem Por-  
titores & Procuratores celeriter expedi-  
endo, juxta formam dicti Statuti, quod  
excommunicatos, aggravatos, nomi-  
natim, & specificè denuncient & publi-  
cent, in suis Ecclesiis diebus Dominicis,  
omni favore postposito, & a participa-  
tione excommunicatorum se abstineant,  
nec celebrent scienter in eorum præ-  
sentia; alioqui ipsos curatos Presbyte-  
ros, & Executores, præsentis nostræ  
intentionis, injunctionis & præcepti  
transgressores, & contemptores pro-  
nunciamus & declaramus in his scrip-  
tis, ex nunc, prout ex tunc dictas  
sententias & pœnas, perjuriique rea-  
rum damnabiliter ipso facto incurrisse,  
& in casu, quo ad personas partium,

per eorum ferocitatem, seu temerari-  
am præsumptionem, vel ob inhibicio-  
nem Domini, seu Dominorum tempo-  
ralium loci, vel alia de causa non aude-  
rent mandata hujusmodi exequi: sta-  
tuimus & ordinamus, quod talium ex-  
ecutiones fiant in Parochiali Ecclesia,  
vel in propinquiori, ubi tute fieri pos-  
sunt, & ad valvas Ecclesiæ copia hujus-  
modi mandatorum per Curatos affiga-  
tur, de hisque rescribant Officiali Cu-  
riæ nostræ. Talium vero executiones,  
literas, & processus super his factos,  
decernimus validos ac valere, ac si &  
prout dictæ executiones factæ forent,  
& existerent ad personas, contra quas  
mandata hujusmodi impetrantur.

In executione mandatorum Curia gra-  
viter peccari nonnunquam constat, dum  
Curati locorum Clerici, Notarii, vel di-  
ctorum mandatorum Executores, sese  
dicta mandata executos esse, vel pro-  
priis signis testantur, antequam ramen  
citationem ipsam personæ citatæ indica-  
verint; cum enim ad eos hujusmodi  
executio, per Statuta Synodalia pro-  
priumque juramentum pertineat, ut  
apparitores vel portitores dictorum  
mandatorum, quasi probe functo mu-  
nere, citius possint domum remeare,  
sæpius falso chirographo de facta dicta  
executione testantur, quapropter, quum  
hac de causa rei (qui in judicium vo-  
cati sunt) sæpius, nunc velut contu-  
maces mulcentur, nunc sententia ex-  
communicationis innodentur, quasi le-  
gitime citatione facta; notorium illum  
abusum ex Curia nostra auferre volen-  
tes, Statuimus & ordinamus, ne dein-  
ceps ex solius exequentis chirographo  
ad hujusmodi gravamina procedatur:  
Sed in executione quorumcunque man-  
datorum, literarum & processus, a No-  
bis, seu Officiali nostro emissorum, dies,  
mensis, annus, nomen exequentis, locus  
& modus executionis: an ad personam,  
vel ad domicilium facta fuerit, adpo-  
nantur; ut sic videlicet executor a ter-  
go mandati scribat: *Executum est præsens  
mandatum, per me N. Plebanum Ecclesiæ N.  
Clericum, aut Notarium ad personam, aut  
ad domicilium talis: nomen suum, & Ec-  
clesiæ ad cognomen proprium expri-  
mendo anno infra scripto, die tali,  
mensis talis: ut videlicet de hujusmo-  
di executione legitima fiat fides.* Cum

autem jura etiam decernant, ut qui alium in jus vocat, ipse actionis suæ speciem edat, quo reo possit esse clarum, utrum liti cedere, an actione experiri malit, & jura (præsertim Canonica) manifeste, ex facti ratione speciem Judicii demonstrari velint; injungimus omnibus actoribus, & Procuratoribus Curiae nostræ Atrebatensis, ne citationes aliquas decernant, nisi legitima expressa causa, ut citato facile constare possit, qua de re in judicio futura sit controversia: turpe enim est & calumniam sapere videtur, comparente reo in judicio, deliberare velle, quid, aut qua de causa petatur.

*XXXVII. De executione Mandatorum Judicum delegatorum.*

**M**andatum alicujus, qui se executorem, conservatorem, aut delegatum a Sede Apostolica asserit, aut affirmat: firmiter & districte exequi prohibemus, nisi prius de authentico fiat ostensio exequenti: prohibemus etiam, ne ad mandatum prædictorum citetur aliquis, donec primitus facta fide de jurisdictione, & potestate mandantis, citandus vel citatus (si eam habere voluerit) de eisdem suis expensis copiam integram habeat: nec alias Curati, vel alii Executores, eum citasse referant, seu rescribant, seu ipsum habeant pro citato, nisi forte aliquem absentem, vel contumacem, seu impedientem, ne posset ad eum citatio pervenire, citarent publice ad domicilium, vel in propria Ecclesia, reperto Procuratore ejusdem, seu aliquo de familia, vel quavis alia persona petente, vel recipiente dictam copiam de hujusmodi literis vel mandato. Per præmissa enim jurisdictionem Apostolicam (qua tales fungi se asserunt) non intendimus impedire, seu perturbare, sed potius abusibus fraudulosis, & malitiosis vexationibus (quæ frequenter circa præmissa fiunt) pro viribus obviare.

*XXXVIII. De Abusoribus.*

**I**tem abusores literarum Apostolicarum quarumcunque, seu legatorum,

vel subdelegatorum (si dictus abusus in gravamen, injuriam, seu detrimentum juris alicujus fiat) nec non & dantes ad dictum abusum consilium, & favorem, excommunicationis sententiam ipso facto incurrunt, a qua (nisi in mortis articulo) per Nos, vel Officialem nostrum absolvi non possunt; & tunc, & primitus refusus expensis & damnis læso. Et si in mortis articulo ab aliis absolvantur, si recuperata sanitate non satisfecerint infra mensem, in pristinam sententiam eosdem reducimus ex tunc in his scriptis: Mandantes nihilominus Decanis, & Curatis locorum, ut saltem semel in quindecim diebus die Dominico, seu Festivo tales abusores in Ecclesiis suis excommunicatos publice studeant nunciare.

*XXXIX. De Portitoribus literarum.*

**P**ræcipimus etiam prædictis Curatis & Decanis, quod si alicui portitori nostrarum literarum, seu Curiae nostræ injuria inferri contigerit; utpote ipsum verberando, capiendo, seu detinendo, aut literas ipsas lacerando, moneant malefactores, seu injuriatores hujusmodi, ut infra triduum post monitionem suam, Nobis, vel Officiali nostro præmissa competenter emendant, & nihilominus injuriato portitori satisfaciant. Quod si non fecerint, moniti prius, elapso triduo, ipsos (quos in his scriptis excommunicamus) excommunicatos, palam & publice non differant nunciare. Præterea nomina talium, Promotori Curiae nostræ (quam cito commode poterunt) adferant, vel transmittant. Quod si detenti fuerint dictarum literarum monitores; moneant detentores, ut ipsos indilate expediant, alioqui ipsos statim dicti Curati excommunicent, & cessent a Divinis, quousque restituti fuerint, & Nobis, vel Officiali nostro fuerit emendatum.

*XL. Qualiter venientes ad Curiam debent plena libertate gaudere.*

**I**tem si quis veniendo ad suam diem coram Nobis, vel ad Curiam nostram,



stram, existens in conductu nostro, vel Curiae nostrae praedictae captus fuerit, arrestatus, aut detentus, aut infidiose, qua veniebat ad Curiam, vel ibidem litigabat, verberatus, moneantur per Decanos, seu Curatos, arrestatores, seu detentores, & omnes, quorum ope, consilio, vel favore praemissa fuerint facta, ut indilate post monitionem eis factam, detentores dictum citatum, seu venientem ad suam diem, dearestent, & deliberent, ac infra triiduum tam Nobis, quam injuriato emendam faciant competentem. Alioqui ipsos omnes & singulos excommunicent sine alterius expectatione mandati, & cessent a Divinis, quousque ad emendam venerint humiliter & devote.

### *XXI. De Clericis captis, & eorum bonis.*

**I**tem si quis Clericus, vel persona Ecclesiastica, aut eorum bona mobilia, seu catella, per laicalem justitiam capti, & arrestati fuerint, ipsos moneant indilate, ut post monitionem hujusmodi dictos Clericos, vel personas Ecclesiasticas & eorum bona deliberent, & dearestarent; alioqui exer-

centes dictam justitiam, praedicti Decani, & Curati excommunicent, & excommunicatos a Canone nuncient, & cessent a Divinis, quousque deliberati, & dearestati fuerint: servantes in hac parte Constitutiones Conciliorum Provincialium, quae sunt Compendiensis, Silvanectensis, & Noviomensis. Nobis tamen, & Officiali nostro primitus consultis, quoad terram Comitum Atrebatensis. (m)

### *XLII. De Sententia Excommunicationis, & ex quibus causis, tam per Synodales Constitutiones, quam Provinciales, quis incurrit sententiam excommunicationis ipso facto.*

**S**cire debent Sacerdotes, & personae Ecclesiasticae, maxime Curati, quod duplex est excommunicatio, scilicet major & minor: & licet etiam tertia species possit assignari, quae est anathema, in hoc tamen non est vis facienda: quia anathema major est excommunicatio, & non differt a majori quoad effectum, sed solum in eo, quod cum majori solennitate fulminatur. Et est notandum, quod major excommunica-

(m) In editione antiqua inseritur hoc loco sequens Caput:

*De contumacia non venientium ad Synodum, vel minus debite recedentium ab eadem.*

**O**mnes, qui ad nostram Sanctam Synodum venire tenentur de consuetudine, vel de jure, personaliter compareant, & inter sint in eadem: nisi corporalis infirmitas vel alias urgens necessitas, seu evidentissima causa eos habeat excusatos. Quo casu per procuratorem legitimum cum mandato, continente specificis & expressis causam & impedimentum, quare personaliter non venerint: & cum potestate audiendi, referendi, & consentiendi mittere teneantur. Alioquin contumaces reputamus eosdem. Statuentes ex nunc, quod dicti contumaces sub pena decem librarum parisiensium, infra mensem a die Synodi numerandum: compareant personaliter coram nobis facturi emendam congruam de contumacia seu contemptu. Item precipimus Prelatis, abbatibus, decanis, & curatis: quatinus synodales constitutiones secum afferant: & antequam recedant: nobis, vel illi, seu illis, quem seu quos ad hoc deputavimus, eas exhibeant, & hoc sub pena excommunicationis, & quadraginta solidorum piis usibus applicandorum. Nullusque dum venerit ad synodum, presumat sub eadem pena recedere, sine nostra licentia speciali. Item monemus omnes & singulos, qui ad sanctam synodum venire tenentur: ut haec nostra statuta synodalia in hac presenti compilatione contenta habeant: & sub penis in eisdem contentis teneant inviolabiliter, & observent: & quantum poterunt, procurent inviolabiliter observari. Item ordinamus & precipimus praedictis personis, quae constitutiones synodales habere & observare tenentur: ut in eisdem frequenter studeant, ne per ignorantiam contentorum in eisdem ipsos errare contingat: seu aliquid eorundem omittere: vel pretextu ignorantie committere, quod sibi vel suis subditis pariat periculum animarum. Et quod saltem semel in mense eas integraliter videant & perfecte legant.

nicatio separat hominem a Corpore Christi, quod est Ecclesia, hoc est, a communione fidelium, & administratione & perceptione Sacramentorum, nec non a quolibet alio actu legitimo. Unde excommunicatio diffinitur: excommunicatio est a communione quolibet licita, & quolibet legitimo actu separatio. Doceant ergo Curati Parochianos suos, quod nihil tantum debet timere Christianus, quam excommunicationem majorem, cum per eam Christianus separatur a corpore Christi. Si enim est Christianus separatus a corpore Christi, jam non est membrum Christi, & si non est membrum Christi, non vegetatur, non vivificatur Spiritu Dei: & quisquis (secundum Apostolum) non vivificatur Spiritu Dei: & quisquis (secundum Apostolum) Spiritum Dei non habet, is non est ejus membrum, nec filius. Prædicent ergo intelligibiliter & sensibiliter suis Parochianis, quod, ut membrum separatur a corpore humano, efficitur putridum, nec vitam, nec humorem habet; sic nec alicujus boni operis, aut gratiæ spiritualis communionem anima, quæ est separata per excommunicationem a corpore Christi, scilicet ab Ecclesia: & nisi per reconciliationem & satisfactionem dicto corpori confederata fuerit, & introducta intra Ecclesiam; in fine janua Regni cœlestis eidem claudetur. Ista ergo pœna multum debet timeri, scilicet excommunicatio, qua (juxta Canonicas Sanctiones) in tota Dei Ecclesia, non est dare majorem & periculosiorem, si sustineatur animo indurato. Minor autem excommunicatio separat tantum a perceptione Sacramentorum, & infligitur quandoque ab homine, quandoque a jure, sicut major excommunicatio. Quandoque ab homine, scilicet, quando Sacerdos confitentem & pœnitentem ex certa causa suspendit a perceptione Sacramentorum, & quandoque loco pœnæ, scilicet quando confitens non vult pœnitere. Quandoque infligitur a jure per sententiam Canonis, ut cum quis participat scienter cum excommunicato majore excommunicatione a Judice, vel a jure. Et ideo docere debent Parochiales Sacerdotes populum suum, quod non

participent cum excommunicatis, quia sic faciendo privati sunt ab omni perceptione Sacramentorum, nec possunt ea recipere, nisi fuerint prius absoluti. Sacerdos tamen curatus, ab illa minore excommunicatione potest eos absolvere. Sciendum est etiam, quod nullus debet participare cum excommunicatis, orando in Ecclesia cum eis: imo statim debet exire, si viderit eos: salutando, quia non debet eos salutare: communicando, quia non debet cum eis communicare, nec loqui eum eis, nec habitare in domo, in qua ipsi habitant, nec comedere in mensa, nec exercere in eorum societate aliquem actum, quem ipsi exerceant, nec in aliquo alio casu, nisi loquendo de salute animarum eorum, & de illis, quæ profunt ad salutem, & absolutionem obtinendam.

Hanc minorem excommunicationem debent multum timere Presbyteri, qui frequenter celebrant: quia talis excommunicatio est multum vicina irregularitati, unde non debent celebrare in præsentia excommunicatorum, quod si faciant, prima vice est eis ingressus Ecclesiæ interdictus, secundum unam opinionem, per *Capitulum. Episcoporum. de Privilegiis. Libro sexto.* Et quicumque postea celebrant, nisi ab illo interdicto fuerint absoluti, sunt irregulares: quia is, cui ingressus Ecclesiæ est interdictus, si celebrat in Ecclesia, irregularis est per *Capitulum: Is, cui. de sententia excommunicationis. Eodem Libro.* Quare in his summe debent cavere, tum propter periculum prædictum, tum etiam, quia per se ipsos docere debent, qualiter alii debeant excommunicatos evitare: quia quod agitur a Superioribus, de facili trahitur a subditis in exemplum. Statuimus etiam, & districte præcipimus omnibus & singulis Decanis, & Parochialium Ecclesiarum Rectoribus nostræ Civitatis & Diocesis sub pœna excommunicationis, & viginti librarum, quod quilibet eorum registrum habeat, supposito etiam, quod in sua Parochia excommunicatos non haberet, in quo registro nomina excommunicatorum Parochiæ suæ (si qui sunt) nomen Judicis excommunicantis, & personæ, ad

ad cuius instantiam, quis excommunicari mandatur, ponant & inscribant, nec non diem, mensem, & annum: & utrum pro re cognita, iudicata, & confessata, vel manifesta ostensa: an pro contumacia, vel contemptu: & in principio huius tituli, seu registri ponatur, de grossa litera titulus: *Hoc est Registrum Excommunicatorum.* Et illud registrum ponatur in certo loco & publico, seu sæpius frequentato, utpote, consuante in principio Breviarii, seu Missalis, si necesse fuerit, ad finem, quod si aliquis dictorum Curatorum decesserit, dictum registrum a successore valeat reperiri, ut etiam faciliter possit informari, si in sua Parochia sint aliqui excommunicati, nec non: quia alias possint exinde multa pericula & inconvenientia provenire. Successor vero nomina excommunicatorum ignorans, & eadem inregistrata minime reperiens, possit (non sine magno periculo & scandalo) plurimos excommunicatos, cum non excommunicatis admittere, ad Ecclesiastica Sacramenta, & eosdem tanquam absolutos, in morte recipere ad Ecclesiasticam sepulturam. Sub penis quoque prædictis eisdem Decanis & Curatis præcipimus, ut postquam aliquis per annum in excommunicatione steterit, hoc Curati denuncient Decano loci, infra octo dies a lapsu anni numerandos: & Decani ex tunc infra alios octo dies, Officiali nostro, vel Promotori Curie nostræ significare studeant diligenter: & cum hoc etiam, an dictus excommunicatus potens sit ad satisfaciendum creditoribus, & facere se absolvi: nec non ut ex hoc, contra dictum excommunicatum, de majori, vel minori contemptu, vel vilipensione censuræ Ecclesiasticæ præsumatur. Prima enim facie talis videtur sapere hæresim, saltem contemptum non modicum Dei, & Sanctæ Matris Ecclesiæ. Nam quisquis ab Ecclesia Dei, & communione fidelium, tam diu voluntarie remansit separatus, hæresim sapere videtur. Districte etiam præcipimus, scire casus, in quibus ipso facto incurritur sententia excommunicationis tam per Synodales Constitutiones, quam Provinciales. Et quia cavetur supra in titulo, de *Confessionibus*,

& districte præcipitur omnibus curam animarum habentibus, quod extrahant ab omnibus Constitutionibus Synodalibus & Provincialibus, omnes & singulos casus, occasione quorum subditi possunt sententia excommunicationis, per easdem Constitutiones ipso facto ligari, & ad finem debitum (in dicto verticulo) qui incipit: *Districte etiam præcipimus*, comprehensum: idcirco ut facilius possint eosdem casus extrahere, quoddam repertorium eisdem in isto titulo duximus consultius ordinandum. Primus enim casus habetur in titulo: de *Matrimonio*, circa finem. Secundus casus in titulo: de *Sacramento Ordinis*, circa medium. Quatuor casus habentur in titulo: de *rebus Ecclesiæ non alienandis*: videlicet duo circa principium, unus prope medium, & quartus in fine. Duo casus habentur in titulo: de *vita & honestate Clericorum*, scilicet unus circa principium, & alius circa finem. Quinque casus habentur in titulo: de *Usuris*. Duo in titulo: de *Testamentis*. Et alii tres in titulo: de *inburnatione corporum & sepulturis*. Tres casus habentur in titulo: de *Privilegiis*. Unus in titulo: de *immunitate Ecclesiarum*. Quatuor in titulo: de *Mandatis Curie observandis*. Tres in titulo: de *Interdicto*. In Concilio Compendiensi septem, in Concilio Novionensi novem: quorum primus casus continet in se septemdecim articulos. Et licet in pluribus aliis locis per dictas Constitutiones infligatur dicta excommunicatio comminatorie, nec non & aliæ pænæ tam suspensionis ab officio, & a fructibus beneficii, & a perceptione eorundem, quam aliæ pænæ pecuniariæ, secundum quod videre poterit diligens inspector Constitutionum prædictarum; credo tamen, quod non in pluribus aliis locis reperietur excommunicationis sententia, ipso facto lata. Si tamen per oblivionem, in isto repertorio non fuerit, nihilominus alibi reperta timeatur, & etiam evitetur. Districte præterea præcipimus, quod (saltem semel in mense) in Ecclesiis nominent & publicent dictos casus, & eos intelligibiliter Parochianis suis exponant, dicendo per hunc modum: *Quicumque fecerit sic, & sic, per Synodales Constitutiones & Provinciales,*



les, *sententiam excommunicationis eo ipso incurrit. Et nos omnes & singulos tales excommunicatos publice nunciamus, specificando singulariter singulos.* Deinde omnibus Curatis districte præcipimus, & mandamus sub obedientiæ debito, & sub pœna transgressionis juramenti, qua nobis astringuntur: quatenus omnibus & singulis diebus Dominicis & festivis, publice, infra Missarum Solennia, excommunicatos denuncient in Ecclesia sua, verbis Gallicis illos, qui sequuntur, sic: *De l'auctorité de Monsieur l'Archevesque de Reims, & du Concille Provincial, & de nostre Reverend Pere en Dieu, Monsieur l'Evesque d'Arras, nous denoncions pour excommunier tous ceulx, qui empeschent la jurisdiction de l'Eglise en ce, que lui appartient de droit, ou de coustume. Item tous ceulx, qui empeschent, ou font empeschier, que on ne face point sermoner l'ung, l'autre en la court de l'Eglise, & qui font cesser les proces encommenciez, au cas dessusdictz. Item tous juges seculiers, qui font paier au Clercs amendes, en les constrainant a composer a eulx, & les font purger devant eulx de cas: dont la cognoissance ne appartient a eulx. Item & tous Clergs, qui paient amendes ausdictz juges, & qui a eulx se composent, ou purgent devant eulx.* Et præmissa verba ponantur in una scedula, quæ publice & intelligibiliter prædictis diebus Dominicis legantur.

**XLIII. De Interdicto non violando,  
& qualiter Interdicto durante  
sit celebrandum.**

**T**Empore interdicti, non tantum morientes, sed etiam viventes, tam sani, quam infirmi, ad pœnitentiam & confessionem per consequens admittantur, excommunicatis exceptis, qui non nisi in mortis articulo admittuntur. Illis etiam exceptis, quorum culpa, dolo, fraude, occasione, seu causa, ope, favore, vel consilio latum est interdictum: quia tales ad pœnitentiam nullatenus admittuntur, nisi prius satisfecerint, si sint tales, quod satisfacere valeant de edicto hujusmodi, vel de satisfaciendo dederint idoneam cautionem, aut si satisfacere nequeant, vel hujusmodi cautionem præstare, ju-

raverint, quod, cum poterunt, satisfaciant, & ad satisfaciendum, quam cito poterunt, dabunt auxilium, consilium, vel favorem. Et instabunt apud eos, qui satisfacere possunt, quam cito poterunt, quod satisfaciant de delicto prædicto. Nec tunc etiam quoad aliquem prædictorum, ubi Civitas, vel locus alius, seu Universitas extiterit interdicta, facienda est relaxatio interdicti, sed solum recipiatur ad pœnitentiam salutarem, nisi is (propter cujus culpam latum est interdictum) satisfaciat: tunc enim tollitur interdictum. Glo. in C. *Alma Mater.* de Sententia excommunic. in VI. Eodem tempore interdicti in Ecclesiis Collegiatis, & Monasteriis, singulis diebus Missa, & alia Ecclesiastica officia debent dici submissa voce: Interdictis tamen & excommunicatis exclusis, januis clausis, & sine sonitu campanarum, & tam Canonici, quam Clerici, eisdem debent interesse: alioqui distributiones perdunt, sicut perderent, si eisdem officiis non interessent, interdicto non existente. Sed in quatuor Solennitatibus, scilicet Nativitatis Domini, Paschæ, Pentecostes, & Assumptionis B. M., apertis januis, alta voce Divina officia celebrari possunt, excommunicatis prorsus exclusis, sed interdictis admittis; quibus ob reverentiam dictarum solemnitatum (ut ipsi ad humilitatis gratiam, & reconciliationis affectum facilius inclinentur) præfatis diebus participationem permittimus Divinorum: sic tamen, quod illi (propter quorum culpam, interdictum est latum) altari nullatenus appropinquent. In cæteris vero servandum est ab omnibus interdictum, non obstantibus quibuscunque privilegiis concessis, quibuscunque personis, seu locis exemptis, & non exemptis, prout in Decretali Bonifaciana, quæ incipit: *Alma Mater.* situata in titulo, de Sententia excommunicationis, Libro sexto, serius continetur. Quæ quidem Decretalis, & ejus moderatio, locum sibi vindicat in generali interdicto. Et est generale interdictum, cum interdicitur Regnum, Provincia, villa, seu castrum. Non autem in particulari interdicto, puta, cum interdicitur, particulariter una

una Ecclesia: ut, quia Rector non solvit portionem, vel decimam: vel Collegium, vel Capitulum. Tunc ipse Rector, nec ullus alius, (quia de Rectore non est dubium, cum sit in culpa) posset celebrare submissa voce singulis diebus, vel in Festivitatibus quatuor, ut supra dictum est: cum præmissa de generali intelligantur interdicto, & non de particulari. Et nota, quod tempore interdicti, possunt administrari Ecclesiastica Sacramenta, quæ sequuntur: Baptismus, Pœnitentia, una cum Viatico morientibus, sanis autem sine Viatico: Confirmatio, confectio Chris-matis, & Matrimonium, de quo est altercatio inter Doctores, utrum possit fieri tempore interdicti: De hoc non dubito, sed credo, quod non debet solemnizari juxta opinionem Hostiensis. Et sciendum est, quod Religiosi quicumque exempti & non exempti, quibuscunque privilegiis & exemptionibus gaudeant, & cujuscunque ordinis, aut conditionis existant, violantes vel non observantes interdictum positum per Sedem Apostolicam, vel per Ordinarium loci, vel per cessationem generalem Divinorum, factam per Provinciale Concilium, vel per Judicem ordinarium, & Capitula, Collegia, vel Conventus, qui hanc possunt facere, vel indicare, de consuetudine, vel de jure, & qui fraudulenter violare procurant, vel non servare, januis suarum Ecclesiarum perforatis, aut in eis fenestris fractis, seu modis aliis exquisitis, dum vident Cathedralē, seu Ecclesiam maternam loci servare interdictum, vel cessationes prædictas, excommunicationis sententiam incurrunt ipso facto. Non obstantibus quibuscunque appellationibus, antea ad Sedem Apostolicam, vel alibi (\*) interdictis, prout hæc omnia in Concilii Vienneſis Constitutione, quæ incipit: *Ex frequentibus*. plenius continentur. Insuper Nobiles, & Domini temporales, qui in terris eorum Ecclesiastico interdicto suppositis, nedum in Capellis suis, sed etiam in Collegiatis, & aliis locis insignibus Missas, & alia Officia publice, & cum solennitate faciunt celebrari, ad eadem Officia celebranda, nunc hos; nunc illos vocantes, & in-

terdum (quod deterius est) compellentes, & ad ea per campanarum pulsationem, seu voce præcon s evocantes, vel facientes evocari; nec non & illi, qui prohibent subditis suis excommunicatis & interdictis, dum Missarum solennia celebrantur, ne exeant, licet fuerint cum instantia moniti, quatenus exirent: omnes tales prædicti, nec non etiam excommunicati, seu interdicti, qui post monitionem, ut exirent, in eisdem Ecclesiis præsumpserint remanere, excommunicationis sententiam meruerunt ipso facto: a qua non nisi per Sedem Apostolicam absolvi possunt, ut in Constitutione Concilii prædicti, quæ incipit (*Gravis*) plenius continetur. Fratres quoque Minores recipientes in suis Ecclesiis, tempore interdicti ad Divina officia Fratres & Sorores de tertio Ordine, quem Sanctus Franciscus instituit, qui pœnitentes, seu de pœnitentia nuncupantur, vel aliquem eorundem, etiam si super hoc ille, vel illi privilegiati essent, eo ipso sententiam excommunicationis incurrunt: a qua non nisi per Sedem Apostolicam absolvi possunt; aut nisi satisfactione præmissa per locorum Episcopos (qui in hac parte Apostolica auctoritate funguntur) possunt beneficium absolutionis obtinere. Præmissa autem de interdicto & cessationibus diligenter attendant Curati, vel alii Nobis subditi, ut sciant, qualiter celebrare debeant, & quando, tempore interdicti, seu cessus. Et etiam caveant, & advertant, quod, quando celebrabunt januis clausis tempore cessus, vel interdicti, quod nullos admittant ad Divina, etiam non excommunicatos, vel interdictos, nisi super hoc privilegiati extiterint. Sciendum est autem, quod si sententia interdicti, proferatur in Clerum, propter hoc non interdictur populus, nec econtra. Cæterum cum propter delictum Domini, vel Rectoris, civitas, vel terra est interdicta, Cives, vel incolæ possunt alibi audire Divina, nisi propter delictum Domini puniendum, in eis fuerint interdicti. Sed cum populus alicujus terræ est interdictus, singulares personæ de populo non possunt (etiam extra illam ter-

*Tomus VIII. Concilior. German.*

(\*) forte: interpositis.

O o

terram) audire Divina, nisi in casibus a jure permittis.

*XLIV. De tribus Conciliis Provincialibus: & primo de Concilio Compendiensi per Archiepiscopum Remensem.*

**S**Tatuimus & decernimus, auctoritate Concilii: quod si in aliqua Civitate, vel Diocesi, seu loco nostræ Provinciæ Remensis, contingat aliquem Clericum detineri per laicalem justitiam, postquam dictus Clericus fuerit a Presbytero illius loci, vel Officiali, seu Decano rurali, ex parte alicujus eorum legitime requisitus, cessetur a Divinis in loco captionis, seu detentionis, quousque fuerit competenter restitutus: & si dictus Clericus capiatur in una Diocesi, & extrahatur ab ea, ut ad aliam ducatur, cessetur a Divinis in loco, ubi captus fuerit, & in locis, ubi fuerit translatus: quousque ad locum captionis fuerit reductus, & competenter restitutus. Deinde, cum per laicalem justitiam non debeant puniri Clericorum excessus, nec ab eis emenda levare per Judices sæculares; monemus auctoritate, qua supra, omnes & singulos Judices sæculares nostræ Provinciæ (quovis nomine nuncupentur) ne pro præmissis, seu occasione præmissorum, ab eisdem aliquid exigant, levent, vel recipiant quoquo modo. Contrarium facientes excommunicationis sententia innodamus auctoritate prædicta.

*Additio Synodalis:*

Et Nos huic articulo addimus, quod Clerici nostrarum Civitatis & Diocesis Atrebatensis, qui pro delictis, criminibus, maleficiis, excessibus & forfactis, ab eisdem commissis, jurisdictioni Judicum sæcularium quorumcunque voluntarie se submitunt, subijciunt, submiserint, seu subjecerint, super præmissis coram eis se purgantes, emendas gagiantes, & solventes compositionem per se, vel alios cum eis facientes, aut factam, vel factas ratificantes, & solventes (cum talia cedant quam plurimum in detrimentum Ec-

clesiæ & libertatis Ecclesiasticæ) eo ipso sententiam excommunicationis incurrunt: & super præmissis excessibus, pro quibus præmissa fecerint, habeantur eo ipso convicti. Mandantes districte omnibus & singulis nostræ Diocesis, quatenus prædictam Constitutionem, cum præsentis nostræ additione, sæpe in suis Ecclesiis solenniter publicent: ne quis posset se ab eisdem (prætextu ignorantia) excusare: & quia nonnulli Scabini, Gubernatores, Rectores, Judicatores aut Communitates locorum & Civitatum, seu Territoriorum & Villarum nostræ Provinciæ (prout intelleximus) conspirationem fecerunt, aut facere nituntur: quod si aliquis de Civitate communitate, territorio, seu loco a suis, seu de suis subditis conveniatur in foro Ecclesiastico, aut contra eum procedatur in dicto foro in causa, in qua potest ibidem de jure, vel de consuetudine conveniri, quod eum ad sumptus communes defendant: propter quod non est dubium, quod jurisdictionem Ecclesiasticam volunt impedire. Et idcirco monemus in his scriptis omnes & singulos Judices sæculares prædictos nostræ Provinciæ, qui talia fecerint, ea revocent infra mensem, de cætero a talibus abstinere, taliaque, vel consimilia facere non præsumant, nec præmissis utantur: alioquin excommunicationi subjaceant ipso facto. Item cum nonnulli Domini temporales suis inhibeant subditis, ne quis eorum alium trahat in foro Ecclesiastico, in casu a jure, vel consuetudine concessio: quinimo contra sic trahentes procedatur frequenter ad captionem personæ trahentis, & bonorum ejusdem, seu amicorum; Nos, ne talia fiant, districte prohibemus, & contrarium facientes excommunicationis vinculo innodamus, & a Cænone excommunicatos nunciamus.

*Additio Synodalis.*

Et Nos huic Statuto adjicimus: Quod ubicunque per Dominos temporales, seu quoscunque Judices sæculares, quovis modo nuncupatos, Civitatis & Diocesis nostræ Atrebatensis fiant, & proclamantur banna, præcepta,



ta, proclamationes, ordinationes, seu inhibitiones contra jurisdictionem Curiae nostrae, vel quasi possessionem ejusdem, seu contra Ecclesiasticam libertatem & praedictam jurisdictionem fiunt statuta, seu ordinationes fidei interpositae, seu quacunque alia firmitate vallatae. In primo Casu: in loco, ubi praemissa banna, proclamationes, praecpta, seu inhibitiones publicae fiunt, cessetur a Divinis, donec praemissa revocent, & donec a Nobis, vel Officiali nostro, aliud receperint in mandatis. In secundo Casu: facientes statuta & ordinationes praedictas ( nisi destruant hoc intra mentem ) & ea servantes, seu secundum ea judicantes, eo ipso sententiam excommunicationis incurrun. Item nonnulli Abbates hujus Provinciae juraverunt & ordinaverunt, seu conspirationem fecerunt ( ut praefertur ) quod si contingat aliquem Episcopum, contra aliquem Abbatem sibi subditum, velle procedere pro suis excessibus, vel ad puniendum eum, quod ad defensionem ejus contribuent, & ad sumptus communes ipsum defendent. Quod non est dubium fore in praedictum sui Episcopi, & contra suae professionis Juramentum, per quod suo Episcopo est astrictus, nec non contra suae Ecclesiae libertatem. Monemus ergo tales, quod hoc revocent infra mensem, alioqui excommunicationi subjaceant ipso facto. Item, si excommunicati publici per biennium sententiam excommunicationis, & amplius animo sustinuerint indurato; vocentur ad primum Concilium, tanquam de haeresi suspecti: Et in eodem Concilio contra tales, prout fuerit rationis, & prout justum videbitur, procedatur. Quae omnia & singula praemissa volumus in scriptis redigi, & in primo Concilio solenniter publicari: Praecipientes, & districtius mandantes, auctoritate praesentis Concilii, universis & singulis nostrae Remensis Provinciae, quatenus haec, quae pro defensione Ecclesiasticae libertatis, & ipsarum Ecclesiarum statu pacifico duximus ordinanda, ( prout decet ) servant, teneantque illaesa. In quorum testimonium &c. Datum apud Compendium,

*Tomus VIII. Concilior. German.*

Anno Domini millesimo, ducentesimo primo. Die Mercurii ante Clementis.

#### *XLV. Concilium Sylvanectense.*

**Q**Uoniam primus articulus hujus Concilii de Generali, quasi de eadem materia, loquitur cum primo articulo Novionensi: idcirco volentes superflua refecare, dictum primum articulum hic non duximus inferendum, & ibidem in suo loco ponemus, quod plus hic continebatur, quam ibi, secundum & ultimum Articulum Sylvanectensis Concilii, qui talis est, solummodo scribendo hic, & etiam recitando. Ad haec autem Statuta addimus, statuentes & praecipientes, ut omnes & singuli Rectores Ecclesiarum Parochialium nostrae Provinciae, singulis diebus Dominicis & festivis, palam & publice in suis Ecclesiis denuntient excommunicatos, auctoritate Apostolica, & nostri praesentis Concilii omnes, jurisdictionem Ecclesiasticam de jure, vel de consuetudine eisdem Ecclesiis competentem, impediunt, directe, tacite, vel expresse, aut alias quovismodo. Ipsos enim impediunt eandem jurisdictionem, auctoritate praesentis Concilii, sententiam excommunicationis, & anathematis incurrere volumus ipso facto. Hanc autem nostram sententiam in virtute sanctae obedientiae praecipimus publicari. In cujus rei testimonium &c. Datum in Concilio nostro Generali apud Sylvanectum, Anno Domini Millesimo trecentesimo, decimo septimo, die 22. mensis Martii.

#### *XLVI. Concilium Novionense.*

**C**UM ad nostram pluries pervenerit audientiam, ex querimonia & relatione plurimorum, quod nonnulli tam Domini temporales, quam eorum Judices & Ministri saeculares, pluresque pacis turbatores, non solum contra jura, sed & Sedis Apostolicae Legatorum, Conciliorum Provincialium ordinationes, & Statuta, nec non contra prohibitiones praedictorum, damnabiliter, in suarum animarum periculum, timore Dei postposito multipliciter delinquentes, poenas in eisdem juribus, & statu-

O O 2

tis

tis appositas, sæpius incurrentes, easque animo indurato non verentes diutius sustinere, quam plures pressuras, injurias, oppressiones, gravamina, transgressiones & offensas viris Ecclesiasticis non solum in eorum bonis, sed in propriis personis, nec non & turbationes & impedimenta multiplicia, & diversa, contra libertatem Ecclesiasticam inferre, vel inferri facere per suos Satellites & Ministros non formidant. *Additionem Synodalem habes in Concilio Compendiensi quoad bannum, & proclamationes. Vide licet:*

Quidam faciendo per eorum Villas, & Castra publice proclamari, ne aliquis de eorum subditis, aut Burgensibus sub certis pœnis obligent se coram Judicibus Ecclesiasticis, seu deputatis ab ipsis, vel sub literis suarum Curiarum, aut citari faciant unus alterum coram ipsis: nec non inhibendo, seu inhiberi faciendo Curatis, in eorum terris vel Dominiis temporalibus constitutis: ac etiam Tabellionibus, Notariis & Commissariis dictarum Curiarum, ne recipiant, aut sigillent, aut quoquomodo exequantur: quodque Tabelliones, Notarii, aut alii Commissarii in terris, Dominio, seu districtu dictorum Dominorum temporalium, seu Judicium sæcularium, non faciant informationes, auditiones enquestas, & ne officium suum exercent in locis supradietis. Pluresque de supradietis Tabellionibus, Notariis, Commissariis, exercentes ibidem sua officia, vel negotia sibi commissa (prout licebat, & licet) carceribus, propter hoc, mancipando, gravesque injurias, & minas tales eisdem faciendo, & inferendo, quod eos justo metu ductos recedere oportuit, & oportet. Dietis suis auditionibus, vel enquestis, officiis, & negotiis, sibi commissis non inceptis, vel saltem imperfectis: ac etiam plures dictorum Curatorum & Notariorum, & Tabellionum, nec non Portitorum literarum, seu Commissariorum interdum carceri mancipando, mutilando, graviter verberando, viliterque tractando, & quod horribilius est, aliquos morti tradendo, bonaque prædictorum saisiando, capiendo, devastando, capientium vel co-

rum Dominorum usibus applicando, occasione præmissorum. Nonnullosque prædictorum Curatorum, Tabellionum, Notariorum, Portitorum, seu Commissariorum, ex causis prædictis compellendo ad emendam eis faciendam: Literas plures & registra dictarum Curiarum, a Curatis, Portitoribus, & aliis personis, seu Commissariis violenter extorquendo, dilacerando, ac etiam in locis publicis, seu coram pluribus comburendo: Nonnullosque Presbyteros, Clericos, seu Viros Ecclesiasticos pro delictis & excessibus, eis per ipsos impositis coram se trahendo, & carceri mancipando, & eos in præmissis calibus, nec non in contractibus & actionibus personalibus respondere compellendo, ac ipsos ad emendas pecuniarum condemnando, peregrinationes, aut alias pœnas eisdem injungendo, aut de facto eos bannendo, nec non & eosdem coram se purgari faciendo: bonaque mobilia de domibus eorundem, vel in quibus moram trahunt, ejiciendo, & quandoque de dictis domibus eos expellendo, ac dictas emendas ab ipsis personis Ecclesiasticis, tam per captionem corporum & detentionem bonorum, quam per alias vias obliquas extorquendo, nec non & prædictos Clericos & personas Ecclesiasticas pro excessibus & delictis sibi impositis, pro quibus fuerunt a suis Judicibus Canonice puniti, seu etiam absoluti, pro libito temerariæ voluntatis, capiendo, incarcerando, & de facto ad emendas supra dictas, aut earum aliquam compellendo: dictosque Clericos, & personas Ecclesiasticas extra legem ponendo more suo, qui potius dicendus est abusus, & sic prætextu suæ prævæ consuetudinis, quæ potius potest dici & debet corruptela, talibus personis Ecclesiasticis, sic extra legem positis injuriantes, aut eos occidentes, verberantes, seu etiam mutilantes, per eos nullatenus, aut modicum puniuntur: pluresque personas, debita sua in dictis Curiis petentes, vel jus suum in eisdem Curiis debite prosequentes, & interdum contra suos adversarios, rationabiliter excommunicationis sententiam impetrantes, per captionem corporum, & bonorum eorundem, compellendo,

lendo, ut desistant a suis processibus antedictis: &, quod nequius est, ut prædictos suos adversarios, ad eorum instantiam excommunicatos, ut præfertur, absolvi faciant, aut procurent suis sumptibus & expensis; quæ omnia & singula, non solum in detrimentum jurium Ecclesiasticæ libertatis, sed in opprobrium, vituperium, gravamen & damnum ejusdem cedere dignoscuntur. Hinc est, quod nos damnis, & indemnitatibus Ecclesiasticis succurrere volentes, malignantiumque perversitates, temerarios abusus, & nefarios sub loris justitiæ, prout possumus, refrenare: & sub prædictis oppressiionibus, pressuris & injuriis, & cuilibet earundem (prout ex debito tenemur officii) providere volentes: deliberatione super hoc in præsentis Concilio habita pleniori, de totius Concilii providentia unanimi & concordi Statuimus, decernimus & ordinamus: quod quodocunque prædicta gravamina, vel aliquod eorumdem, per aliquem Dominum temporalem, vel Judicem sæcularem, aut eorum servitores, & ministros, aut ab ipsis Dominis, seu Judicibus deputatos perpetrari contigerit, vel committi, & hoc Judici ordinario loci, vel Decano rurali, seu Curato Parochiali manifestum, per evidentiam facti, fuerit, seu de hoc eisdem, aut eorum alteri, per juramentum partis, si fuerit fide digna, cum unius testis adminiculo, vel favore, publice aut alias constiterit competenter; quod tunc juxta formam, & tenorem Concilii Provincialis, tempore bonæ memoriæ *Roberti*, quondam *Remensis Archiepiscopi*, celebrati apud *Sylvanectum*, Anno Domini Millesimo, trecentesimo decimo septimo, quod Statutum fuit editum contra bonorum Clericorum & locorum Ecclesiasticorum occupatores, cessetur a Divinis. Et nihilominus, nisi prædicta gravamina, vel gravamen, sic commissa, vel commissum, infra octo dies, dicti, reus sive rei, revocaverint cum effectu, & emendam condignam fecerint realiter & de facto, ipsos vel ipsum, qui illud, vel illa perpetraverint, seu perpetraverit, & eisdem dantes auxilium, consilium, vel favorem, auctoritate præsentis Concilii

decernimus & volumus incurrere sententiam excommunicationis ipso facto. Ad cujus sententiæ publicationem juxta dictam Constitutionem Concilii Sylvanectensis procedatur, altero mandato nullatenus expectato. Tenor vero hujusmodi partis Concilii Sylvanectensis, contra dictos occupatores editæ, noscitur esse talis:

STATUIMUS, ut si Dominos temporales, eorum Servitores, aut aliam personam, pia bona Ecclesiarum, Monasteriorum, locorum Religiosorum, Hospitalium, aut aliorum locorum, aut personarum Ecclesiasticarum invadere, rapere, vel occupare contigerit, & hoc Judici ordinario locorum eorundem, vel Decano rurali, seu Curato Parochiali manifestum fuerit per evidentiam facti, & de hoc eisdem constiterit evidenter; si quidem persona invadens, occupans, vel rapiens, quæ per se, vel per alium, ipsa mandante, præmissa perpetraverit, vel perpetrata nomine ipsius rata habuerit, vel Dominium, vel jurisdictionem temporalem habeat in loco invasionis, occupationis vel rapinæ, donec spoliato restituerit, vel eidem satisfecerit competenter, ibidem & in domo raptoris, invasoris, vel occupatoris (dum tamen sit Dominus temporalis loci, vel jurisdictionem habeat ipsius) cessetur a Divinis penitus: nec non & in loco, ubi res invasa, vel occupata detinebitur: & etiam in locis, in quibus invadens, vel occupans extiterit, licet ibi domicilium, vel jurisdictionem non habeat temporalem. Sed in his ultimis duobus casibus, quando res occupata, seu occupator, vel raptor, ibidem erunt, & detinebuntur, tam diu cessetur a Divinis. Si vero persona invadens, rapiens, vel occupans privata fuerit, vel jurisdictionem non habuerit, licet eam exerceat nomine alieno, in quo vel invasa, vel occupata extiterit, in loco, ubi persona invadens vel occupans extiterit, & in loco, ubi invasa detinebuntur: solum quamdiu ibi erunt res prædictæ, vel prædones, & non ultra, similiter cessetur a Divinis: nec non & in loco domicilii ipsius (dum tamen dominium loci, vel jurisdictionem habeat temporalem) donec (ut prædictum



Etum est) spoliata res, quibus spoliata fuerant, integre fuerint restituta, vel ipsis de eisdem fuerit satisfactum. Salva tamen in omnibus moderatione Decretalis: *Alma mater*. Porro ne delictum raptoris in propria persona remaneat impunitum, volumus, ut si infra octo dies a tempore cessationis indictæ contra eum, res per ipsum invadas non restituerit, cui tenetur, ex tunc incurrat sententiam excommunicationis ipso facto: ad cujus sententiæ proclamationem contra ipsum procedatur, altero mandato nullatenus expectato: a qua non absolvatur, nisi prius Ecclesiæ Parochiali, dicti loci, de suo interesse satisfecerit competenter. Et ne aliqui, obtentu hujus Constitutionis, calumniose occupationem, vel invasionem prætendant, statuimus, ut si aliqui reperti fuerint, cessationem a Divinis, contra aliquem indebite procurasse, per Ordinarios locorum, ad expensas legitimas, nec non ad interesse partis, sine juris dispendio condemnentur, & alias graviter puniantur.

### *Concilium Novionense.*

**C**eterum, quia tanta personarum prædictarum delicta remanere non debent impunita; volumus, & ordinamus, reos prædictos personaliter fore citandos, ad certam diem, quam Ordinarius loci, juxta personarum qualitatem, & locorum distantiam duxerit arbitrandam pro tantis & talibus excessibus, correctionem debitam secundum eorum demerita recepturos, & quod justum fuerit, responsuros: verum quia propter austeritatem & immoderatam potentiam aliquorum Dominorum temporalium, & Judicum secularium antedictorum, Nuntii dictarum Curiarum, de factis præteritis perterriti, verisimiliter dubitantes de futuris, terras, vel districtus eorundem pro personis aliquibus, & præsertim pro dictis Dominis, & eorum Judicibus, aut servientibus citandis, adire non sunt ausi, propter metum corporis, vel membrorum. Nos volentes contratales morbos pestiferos, prout est nobis possibile, de salubri remedio providere: Statuimus auctoritate nostri Con-

cilii, & etiam ordinamus; dictas citationes, ad personas dictorum reorum citandorum, si commode valeant apprehendi, alioquin ad eorum domicilia, vel publice in Ecclesia Parochiali dicti loci, dum tamen secure & absque periculo possit haberi accessus, fore faciendas, alioquin videlicet, ut Nuntii dictarum Curiarum, tute vel secure, ad dictos reos, vel eorum domicilia, sive loca, vel ad Ecclesias prædictas non possent accedere, vel auderent, auctoritate, qua supra, decernimus, dictas citationes, monitiones, & processus, cum debito temporis intervallo publice fieri in Consistorio, vel Curia Ordinarii dicti loci, & publice in Ecclesiis Cathedralibus fiant citationes supra dictæ, vel ad valvas Ecclesiarum Cathedralium, aut alio loco eminenti & patenti, scedula, vel literæ citationum publice affigantur, ut verisimiliter possint citationes, & processus inde sequuti, ad citatorum, vel citandorum notitiam pervenire: volentes, citationes & processus hujusmodi tantam efficaciam obtinere, sicut si personæ propriæ dictorum reorum forent apprehensæ.

### *Nota de aggravatione cessus:*

Statuentes ulterius, quod si dicti rei prædicta gravamina cum effectu non revocaverint: si per quindecim dies a tempore cessationis, contra sic interdictæ personæ dictum cessum sustinuerint, absque eo, quod dicta gravamina fuerint per ipsum inferentem totaliter revocata, ac etiam damnorum restitutio & emenda propter hoc realiter facta Judici Ecclesiæ, & etiam parti læsæ, quod prædictus cessus totaliter aggravetur; quod in loco, sive locis, ubi sic cessabitur, corpora quorumcunque defunctorum, nec corpora totaliter delinquentium decedentium, etiam si fuerint absoluti, in locis prædictis, vel aliis nostræ Remensis Provinciæ (nisi de licentia & assensu Diocesani loci, ubi gravamina supradicta fuerint perpetrata) non tradantur Ecclesiasticæ sepulturæ. Corpora vero Clericorum, qui causam, vel occasionem in præmissis non dederint, sine pulsatione campanarum tumultentur,

tur, etiam in locis prædictis, in quibus dictus cessus observabitur: Matrimonia non solennizentur, nec mulieres post partum ad purificationem admittantur. Quod si Domini temporales, in quorum dominio, vel districtu dicta gravamina, vel aliquod eorundem illata extiterint, vel illatum, ad reparationem dictorum gravaminum per eos, aut eorum Judices, seu ministros, ut præfertur, damnorum restitutionem & emendam competentem, propter hoc realiter faciendam, infra quindecim dies a tempore cessationis prædictæ, taliter, ut præfertur, aggravatæ non fecerint; sed dictam cessationem, per dictos quindecim dies animo sustinuerint indurato: hoc Sacro approbante Concilio, concorditer ordinamus, quod eorum terra, quam in Diocesi (qua gravamen fuerit perpetratum) obtinebunt, Ecclesiastico subiaceat interdicto: donec eos ad prædicti gravaminis reparationem realem, damnorum restitutionem, & emendam condignam Judici ordinario dicti loci, Ecclesiæ, seu parti læsæ constiterit pervenisse: salva tamen in omnibus Constitutione, quæ incipit: *Alma mater*. Prædictis omnibus sic delinquentibus pœnas alias, tam a jure, quam a Sedis Apostolicæ, Legatorum, & Conciliorum Provincialium Constitutionibus contra tales appositas & promulgatas, nihilominus incursum. Eos autem, qui prædictas sententias incurrerint, faciant Ordinarii per suas Civitates & Dioceses publice nunciari. Item ordinamus, quod personæ Ecclesiasticæ diffidationes non faciant, prava consuetudine, quam quidam allegant in contrarium, non obstante. Contrarium vero facientes, sententiam excommunicationis incurrere decernimus ipso facto. Ecclesiasticæ personæ diffidare non debent. Diffidentes autem ipsas personas Ecclesiasticas, & diffidationes jam factas prosequentes, etiam si laici fuerint, eandem sententiam incurrere volumus ipso facto. Item hoc Sacro approbante Concilio ordinamus, & volumus per singulas Ecclesias cujuslibet Civitatis & Diocesis, tam Collegiatas, quam Ordinarias, quod usus Divini Servitii, in modo officiandi, & qui in Ecclesiis

Cathedralibus observari consuevit, & teneri, inviolabiliter observetur: quia conformare se debent officio Cathedralis Ecclesiæ. Item aliqui Domini temporales, multotiens occasione quæsitæ, suis subditis inhibent, & defendunt, ne ipsi quicquam vendant Clericis, vel Ecclesiasticis personis, seu aliquid emanant ab ipsis, & ne aliqui eorum terras colant, aut alias cum eis communicent: propter quod, sententiam excommunicationis incurrunt ipso facto. Præcipimus tales excommunicatos publice nunciari. Item Judices sæculares, qui pro detentione Clericorum ab ipsorum Ordinariis pro dictorum Clericorum restitutione eis faciendam, Canonicè fuerint requisiti, seu moniti; si dictos Clericos recepta pecunia, vel alias malitiose abire permiserint, dictis Ordinariis restitutione non facta, excommunicationi subjaceant ipso facto. Item, sicut audivimus, in multis Villis nostræ Provinciæ Joculatores, sive Histriones, de novo candelas cereas tanquam res sacras deferunt, & nituntur processionaliter portare, & dictas candelas, tanquam res sacras, adorare, populum ad idololatriam inducendo: Quod nos de cætero prohibemus, injungentes districtè Ordinariis locorum, quatenus dictos Histriones, seu Joculatores, & eorum fautores taliter puniant, & compellant cessare a dictis idololatriis, & ab eisdem consimilibus, quod cedat aliis in exemplum. Excommunicati sunt tales Concilio Compendiensi. Item volumus & ordinamus, quod Clerici, qui injunctas peregrinationes, vel pœnas a laicis Judicibus latis sponte peregerunt, vel qui emendas pecuniarias pro excessibus eisdem impositis sponte persolverunt, gravissime puniantur. Item Mendicantes, Curati, & alii Verbum Dei proponentes, populum moneant, & hortentur, informant, & inducant ad decimas persolvendas, intimantes eisdem, quod nisi decimas persolverint, interdicetur eis ingressus Ecclesiæ, & carebunt Ecclesiastica sepultura. Et licet prædicti Mendicantes hoc facere teneantur, volumus tamen, quod, quotiescunque prædicabunt, hoc faciant sine fraude, alias non habeant potestatem absolven-  
di

di de Casibus Episcopis reservatis. Et maxime in dictas decimas retinentes, dictam potestatem Dioecesanis specialiter reservamus. Item cum facultas probationum non debet angustiari, decernentes ordinamus, quod Capicula compositiones inter Prælatos & Episcopos, ac etiam privilegia, vel alia instrumenta (cum necessitas id exegerit) dictis Prælati, pro causis eorum exhibeant sine fraude, & econtra Prælati faciant Capitulis pari forma. Item statuimus injungentes omnibus Decanis, Capitulis, & Judicibus Ecclesiasticis, in virtute sanctæ obedientiæ, quatenus Clericos & Canonicos sibi subditos moneant, ut incedant in tonsura & habitu congruis & decentibus, eosdem ad hoc per subtractionem distributionum, & alias Canonice compellentes. Item inhibemus omnibus Presbyteris & personis Ecclesiasticis, ne miracula, quæ de novo dicuntur evenire, in suis locis vel Ecclesiis solennizent, Ordinario super hoc inconsulto.

*Nota excommunicatos Judices laicos, qui auferunt Tonsuram Clericis per eos detentis.*

Item quod nonnulli Domini temporales, & Judices sæculares, seu eorum ministri, cum Clericos quandoque pro excessibus aliquibus de facto sibi impositis capiunt, & detinent, vestes Clericales & tonsuram auferunt, aut utrumque, crines eorum radendo, aut radi faciendo, vestesque radicatas dictos Clericos induendo: ipsos omnes & singulos, cum eorum fautoribus, præstantibus auxilium, consilium, & favorem in præmissis, volumus sententiam excommunicationis ipso facto incurrere. Item Laici se fingentes Clericos fraudulenter, tonsuram Clericalem propria auctoritate, immo verius temeritate, assumptes, excommunicationis sententiam cum suis participantibus incurrunt ipso facto. Item, cum (sicut intelleximus) quidam Domini temporales, eorum Judices, & laicalem justitiam exercentes, Constitutioni Sylvanectensi fraudem facientes, quandoque Clericos, vel eorum bona detinent, pro sua temeraria voluntate, & ante octavam diem illos reddunt,

ut sic Ecclesiarum Curati, absque Ordinarii mandato, organa Divinæ laudis resumant, ut excommunicationis sententiam dicantur evitasse, quam post illos octo dies ipso facto incurrentes, resumptis Divinæ laudis organis, iterum dictos Clericos capiunt, seu eorum bona saisiunt pro causis eisdem, pro quibus ipsos ipsi primi tenuerant: quod est in illusionem dictæ Constitutionis, atque fraudem. Statuentes igitur decernimus, quod qui perpetraverint talem fraudem, excommunicationis sententiam incurrant ipso facto.

#### XLVII. De Promotoribus.

Cæterum, quam plurimorum Dominorum & Judicum quorumcunque sæcularium, gravem querimoniam accepimus, continentem, quod nonnulli Promotores Curiarum Ecclesiasticarum, & etiam Procuratores, ad excessus eorum, homines & subditos, ac burgenes, varia & diversa crimina & excessus, exquisitis coloribus fictis eisdem imponendo, non solum corporibus propriis, & cum gravi scandalo, eos damificant, & fatigant, sed etiam cum magnis, & gravissimis sumptibus, & expensis; Nobis supplicantes, ut vellemus circa hæc de remedio opportuno providere. Nos vero attendentes fore rationi contrarium, ut exinde nascantur injuriæ, unde deberet justitia provenire, statuimus: quod de cætero nullus Promotor, aut Procurator ad excessus aliquem citari faciat, aut procuret contra eum super aliquo crimine, vel excessu, & præsertim tali, ratione cujus persona ipsius citari posset in posterum denegari, seu scandalum contra ipsum oriri, nisi verisimiliter videatur eisdem, quod justam causam habeant procedendi contra tales: super quo eorum conscientias oneramus. Et ad hoc cum ad dictum officium assumuntur, per juramentum astringantur, nec tunc etiam ultra primam citationem, procedatur per eosdem, Officiali loci super hoc inconsulto.

XLVIII.



## XLVIII. De Procuratoribus.

**I**tem quia Procuratorum cæcitas, & vorago, adeo pullulavit, quod nullis injustis, vilibus, seu minimis causis immoderatam multitudinem sumptuum, & expensarum lupina crudelitate cumulare cessat: Nos dictorum Procuratorum calliditatibus (prout est nobis possibile) obviare volentes: iungimus omnibus & singulis Iudicibus ordinariis, quatenus ipsi provideant diligenter, præcavendo, ne dicti Procuratores Curiarum, ac literarum Portitores, sumptus & expensas immoderatas faciant, ut est dictum, sed ipsi Ordinarii taliter provideant, more Patrum, quod ipsorum subditi malitiosis cupiditatibus talium indebite non vexentur: injungentes, & districte præcipientes Officialibus, & aliis Ecclesiasticam jurisdictionem exercentibus, nec non Decanis ruralibus, & Curatis Provinciæ Remensis, quatenus nostram Constitutionem, seu Constitutiones diligenter, prout ad quemlibet pertinuerit, exequantur, & observent, ac easdem Constitutiones per loca Ecclesiarum suarum & jurisdictionum publicari faciant, & exequi, ac inviolabiliter observari. Datum apud Novionium anno Domini MCCC. quadregesimo quarto, 26. Junii. Et Nos omnibus & singulis Abbatibus, Decanis, Curatis, & aliis personis Ecclesiasticis quibuscunque, Civitatis & Diocesis Atrebatensis præcipimus, & mandamus, quatenus has Constitutiones Conciliorum prædictorum habeant, ac omnia & singula in eis contenta quilibet eorum, prout ad suum spectat officium, legat, publicet in sermonibus & Ecclesiis suis sæpe & sæpius, dum populus convenerit ad Divina, ad finem, quod nullus ignorantia causam valeat allegare, exequantur inviolabiliter, & observent, & Synodalibus Constitutionibus adjungere non postponant, alioquin Nos etiam præter pœnas in eisdem Constitutionibus contentas, eos graviter puniemus, prout cujuslibet negligentia, seu contemptus suadebit.

## XLIX. De Revocatione Gratiarum.

**C**um reducimus ad exactæ considerationis examen, propter importunitatem potentium, nonnulla frequentius concedi, quæ forent rationabiliter deneganda. Monemus (nec immerito) ut gratiæ maximæ, quæ quandoque, propter importunitatem prædictam, nec non & quandoque surreptitæ, veritate tacita, & falsitate nonnunquam expressa, tam a Nobis, quam a nostris Vicariis & Prædecessoribus, seu Vicariis eorundem, in læsionem & præjudicium Ecclesiarum, & dispendium salutis subditorum hætenus concessæ sunt, & in posterum concedentur, tempore brevi finiantur: quo dicta importunitas impetrantium, seu petentium (cum viderint easdem modico tempore duraturas) ab impetratione earundem propensius compescatur. Et ideo hac nostra Synodali Constitutione, provide ac salubriter ordinamus: quod omnes gratiæ, de & super non residentia concessæ, & in posterum concedendæ quibuscunque personis Ecclesiasticis in Diocesi nostra beneficiatis: celebrandi in Oratoriis, seu Capellis, celebrandique bis in die: audiendi confessiones, indulgentias pro quæstis exponendi: aut quæcunque gratiæ, sub quacunque forma verborum, quibuscunque personis sæcularibus & Regularibus, mendicantibus, & non mendicantibus, exemptis, privilegiatis, seu aliis non exemptis, ad tempus concessæ, seu in posterum, ut dictum est, concedendæ durent, & durare intelligantur solum a tempore concessionis usque ad Synodum immediate sequentem: advenienteque Synodo, careant omni robore & firmitate, etiam si ad prolixius tempus dictæ gratiæ fuerint ordinatæ: etiam si caveretur in eisdem, quod per revocationem generalem, in Synodo faciendam, forent minime revocatæ, familiaribus nostris, nec non & Dominorum Cardinalium duntaxat exceptis. Quorum gratias per modum concessionis, & ad tempus eisdem limitatum valere volumus, hac Constitutione edita in contrarium non obstante. Nullus ergo subditorum, no-

strorum has Constitutiones nostras Synodales audeat temere violare, nec alias Constitutiones, præter istas, pro Constitutionibus Synodalibus recipere, sub pœna inobedientiæ, nec non & gravissimæ ultionis.

Cæterum nostræ intentionis existit, quod omnes pœnæ contentæ seu positæ in Statutis Prædecessorum nostrorum, & nostris, correctis tamen prout sunt, & sicut in præsentibus plenius continetur, sive sint sub pœnis ab ingressu Ecclesiæ interdicti, excommunicationis, vel pecuniarum, aut alterius cujuscunque conditionis latæ comminatoriæ, vel ferendæ, vel quovis modo comprehensæ, eo modo quo statutz sunt, stent, & habeant roboris firmitatem, & ligent rebelles, & contemptores Statutorum eorundem: quibuscunque revocationibus per Nos, vel nostros Vicarios, aut Officiale nostrum in contrarium factis, vel editis non obstantibus: præcipientes vobis omnibus & singulis, Archidiaconis, Abbatibus, Decanis, Curatis, & aliis, sub pœna quadraginta librarum Parisiensium in pios usus convertendarum, quatenus infra tres menses, a die datæ præsentium computandos, de ista nostra revocatione & aliis Statutis conditis, nisi alias habuerint, copiam habeant de eisdem, ne prætextu ignorantiz quis se valeat excusare.

*Anno Quinquagesimo quinto in Sancta Synodo.*

Cæterum, quia in quadam nostra Constitutione Synodali, titulo: *de Vita & honestate Clericorum*, continetur, quod Clerici conjugati, gaudere non possunt privilegio Clericali, nisi vestes, & tonsuram deferant Clericalem: occasione cujus nonnulli curiosi de his, quæ non multum impediunt, disputantes, & contra doctrinam Apostoli plus sapere, quam oporteat, affectantes, astruere satagunt, & nituntur, consuetudinem contrariam continentem dictos Clericos conjugatos, foro Ecclesiastico, pro excessibus commissis ab ipsis criminaliter, subiacere, ac privilegio Clericali gaudere, licet vestes non deferant Clericales, dum tamen de titulo doceant Clericatus, per dictam nostram Consti-

tutionem Synodalem fore penitus abrogatam, aut saltem per hanc eidem consuetudini derogatum. Nos considerantes consuetudines esse facti & in factis consistere persæpe, Constitutiones non tolli, nisi de ipsis, & per eum, qui eas tollere potest, in ipsis Constitutionibus fiat mentio specialis, ut unde jus prodiit, interpretatio quoque procedat, declaramus nostræ intentionis non fuisse, neque esse, dictæ consuetudini, persæpe factam Constitutionem in aliquo derogare, neque volumus per istam Constitutionem, seu Statutum Synodale, dictam consuetudinem laudabilem, & Ecclesiis utilem, per quam res, quæ de facili ad sui naturam revertitur, in statum pristinum noscitur rediisse, sicut nec possumus, ullatenus abolere.

### *L. De Quæstoribus & Abusoribus.*

**Q**uia ex relatione fide dignorum intelleximus, & Nos ipsi experientia certa probavimus in minoribus constituti, quod quam plures quæstores (immo potius mercatores, vel censarii) per Ecclesias nostrarum Civitatis & Diocesis, pro petendis elemosynis accedentes, multotiens eligunt præcipuas & majores Dei, vel Sanctorum Solennitates, & Festa, vel dies, in quibus Religiosi Verbum Dei populo prædicare, & exponere pro salute fidelium hætenus consueverunt; quando fideles debent Divinis laudibus insistere devotius, & spiritualia meditari; nituntur Prædicatoribus hujusmodi se præferre, & eos, a prædicatione Verbi Dei pluries desistere coegerunt, etiam inter Missarum solennia, unde fidelium quies, propter scandali materiam, quæ inde consurgit, per eosdem quæstores nimium perturbatur: hisque non contenti in suarum expositione quæstarum, pro majori parte mendacia & abusiones, ut decipiant simplices, & pecunias a fidelibus subtili & fallaci ingenio extorquere valeant, proferunt, errores seminant, & inducunt: quorum aliqui in Decretali, quæ incipit: *Abusionibus*, de Pœnitent. & Remiss. in Clementin. serius continentur, falsaque miracula

racula narrant & exponunt : ac Verbum Dei, quamvis nesciant hoc, & si sci-  
rent, tamen interdicitur eis a jure  
& vetatur, populo prædicant, sæpe-  
que Sacram Scripturam pervertunt, &  
multa alia detestanda, non sine magnæ  
temeritatis audacia, & deceptione mul-  
tiplici animarum dicunt, & faciunt in  
offensam Divinæ Majestatis, & scanda-  
lum plurimorum: idcirco tales abusio-  
nes, per quas Clavium Ecclesiæ au-  
thoritas ducitur in contemptum, & præ-  
judicium animabus fidelium generatur,  
omnino aboleri, & tam nefarios con-  
temptores, Ecclesiasticæ animadversio-  
nis mucrone ferire, ut metus pænæ  
metu hujus præsumptionis existat, pro-  
vida deliberatione præhabita, in hac  
Sancta Synodo, per hanc præsentem  
Synodalem Constitutionem, quam va-  
lere perpetuis temporibus volumus, &  
servari, omnibus & singulis quæstori-  
bus, ne unquam deinceps talia facere,  
vel attentare audeant, aut Verbi Dei  
prædicationes facere solitos, seu Divi-  
num Officium impedire, vel perturba-  
re, vel quæstas suas, in quavis Eccle-  
sia, nisi prius nostras, seu Vicariorum  
nostrorum literas, super hujusmodi quæ-  
stas eis concessas, de data ejusdem anni  
post Synodum habuerint, antequam  
quicquam aliud, quam in nostris, seu  
Vicariorum nostrorum literis concessis  
eisdem continebitur, facere, vel expo-  
nere, aut asserere, omni Verbo prædi-  
cationis excluso, vel aliquem de no-  
stris subditis citari, seu vexari facere,  
alibi quam coram Nobis, seu Officiali  
nostro præsumant: districtius inhiben-  
tes. Ex hæc omnia & singula statuimus,  
inhibentes & præcipientes sub pœnis  
suspensionis & excommunicationis la-  
tæ sententiæ in his scriptis, & sub pœna  
quadraginta librarum Parisiensium, si  
fecus egerint, Nobis applicandarum:  
quas quidem sententias & pœnas, trans-  
gressores hujusmodi Constitutionis no-  
stræ, & inhibitionis, declaramus &  
pronunciamus incurrisse ipso facto. Et  
nihilominus talium literas sibi concessas  
in dicto casu revocamus. Curatos,  
qui quæstores ipsos sine nostris literis,  
datis post Synodum nostram ejusdem  
anni, recipere præsumperint, pari  
pœna decernimus puniendos. Præte-

*Tomus VIII. Concilior. German.*

rea nostræ intentionis existit, quod  
dicti Quæstores, seu aliqui quicunque  
pro suis quæstis faciendis inter Missa-  
rum solennia minime recipiantur, &  
per Curatos minime in hac parte ad-  
mittantur, exceptis duntaxat Nuntiis  
Ecclesiæ Atrebatensis, Sponsæ nostræ,  
quibus ob reverentiam Virginis Glo-  
riose volumus deferri, & eos inter  
Missarum Solennia recipi de gratia spe-  
ciali: non alios, cujuscunque status,  
vel dignitatis existant, etiam si contra-  
rium in concessis sibi literis concessum  
appareret, & caveretur in eisdem, quod  
admitterentur, non obstante Constitu-  
tione Synodali: quia non volumus no-  
stræ hujusmodi Constitutioni derogari.  
Quam quidem Constitutionem nostram  
præcipimus diebus Dominicis sæpe &  
frequenter publicari, una cum supra-  
dictis Constitutionibus nostris: ne quis  
ignorantiæ prætextu, velamen excusa-  
tionis assumat. Ulterius præcipientes  
omnibus & singulis, qui ad nostram  
Synodum venire tenentur, sub pœna  
suspensionis & excommunicationis, nec  
non 40. librarum Parisiensium, piis  
usibus applicandarum, quatenus has  
nostras præsentis Constitutiones Syno-  
dales, per Nos editas, sub debitis titu-  
lis infra mensem, penes se cum aliis  
Constitutionibus Prædecessorum no-  
strorum in uno libro, seu volumine  
habeant, & in eis libris sæpe & frequen-  
ter legant, studeant, & advertant dili-  
genter: alioqui dictas pœnas non eva-  
dent. Nos enim omnia Statuta & Con-  
stitutiones Synodales, a bonæ Memo-  
riæ Reverendo Patre & Domino, Do-  
mino Aginerico, & aliis Prædecessori-  
bus nostris Episcopis Atrebatensibus, re-  
cte & salubriter editas, ratificamus,  
approbamus, & etiam confirmamus.

*LI. Sequentes Constitutiones Syn-  
odales per bonæ memoriæ Do-  
minum MARTINUM, Epi-  
scopum Atrebatensem, Ordinis  
Prædicatorum, Sacræ Theolo-  
giæ Professore, fuerunt editæ  
& publicatæ in Sancta Synodo  
Atrebatensi, feria 3. post festum*

*P p. 2*

*Beati*



*Beati Dionysii, Anno MCCCC.  
decimo.*

**Q**uia negligentia noverca virtutum, & cunctorum genitrix vitiorum, nonnullos in nostra Diocesi, (prout facti evidentia demonstrat, & ad nostram pervenit proli dolor, notitiam) sic invasit Parochiales Sacerdotes, ut jam suæ salutis immemores eos fecerit Decretorum Sanctorum Patrum, & Statutorum Synodaliū temerarios transgressores, perversiores Religionis, Christianæ fidei & devotionis orthodoxæ contemptores, sectatores quodammodo hæreticæ pravitate, male sentiendo de Sacramentis novæ legis. Dum Sacrosanctum Corpus Christi, pro communione fidelium in suis Ecclesiis, sub speciebus Sacramentalibus reservatum, adeo negligenter, incaute, immunde, & irreverenter tractant, & conservant illud, non debite visitantes, neque renovantes, prout tenentur juxta Concilii Aurelianensis, & Synodaliū Statutorum tenorem, quod præfatæ species Sacramentales corrumpuntur, pulvis fiunt, aut totaliter alterantur, in aliam speciem transeunt: quo casu desinit esse Corpus Christi sub eisdem, ex quibus abominabilia frequenter generantur: quod cedit in grave Fidei Catholicæ opprobrium, scandalum Ecclesiæ, contemptum Sacramentorum, derisionemque cultus Divini, & ad idolatriam inducit populum Christianum. Nos igitur, quem suscepti regiminis, imo verius Dei amor, fidei & Sacramentorum reverentia & devotio sollicitat, & compellit, ut illa excludamus (pro viribus) a populis Nobis commissis, per quæ detrahitur venerationi Dei, fidei, honori, & reverentiæ Ecclesiasticorum Sacramentorum; sana conscientia præmissam negligentiam tolerare non volentes, sed illi (quantum cum Deo possumus) obviare cupientes: Mandamus, in virtute sanctæ obedientiæ & sub pœna suspensionis, Parochialibus Sacerdotibus nostræ Dioecesis universis, quatenus inviolabiliter observent Statutum de renovatione Eucharistiæ, de octavo in octavum diem mentionem faciens, in Capitulo: de Celebratione Missarum, expres-

sum. Adjicientes, quod quilibet Sacerdos, per cujus negligentiam, & incautelam contingeret pulvis fieri species Sacramentales, alterari, aut corrumpi (ut præfertur) triginta diebus continuis in pane & aqua jejunans, tribus mensibus manebit ab officio suspensus, cum eadem pœna plecti debeat, etiam si nihil horroris exinde contingeret, aut nefandi; nisi per Nos, aut Vicarios nostros cum eo fuerit misericorditer dispensatum.

*Constitutio facta in Sancta Synodo,  
a Reverendo in Christo Patre ac  
Domino, Domino MARTINO,  
Atrebatensi Episcopo, Anno  
Domini M. LCCC.  
decimo.*

**F**ide dignorum relatu multiplici audivimus, quod quidam, titulo alieno, per nostram Diocesim pro libito suæ voluntatis discurrunt, assumptis secum quibusdam nostrorum Officiorum, ut prætextu nostræ auctoritatis, per hujusmodi assumptionem rite agere ea, quæ perperam faciunt, videantur: cum sine statu, & licentia nostra sibi adjungunt, ut eis a nostris subditis melius pareatur, quos in opus nostri ministerii per Nos agnoscunt deputatos, visitationis, aut alius executionis titulo (ut dicitur) quamvis nulla sit eis attributa facultas, occasione suæ commissionis generalis (si quam habent) visitandi, nec non procuratores recipiendi, seu alia exercendi: & quia non omni spiritui credendum est, & cum teneamur probare, qui, & cur aliqui intrant in nostrum ovile, an tales sufficienti auctoritate fulciantur per nostras literas, aut alio evidenti testimonio, nostris debet subditis apparere; præcipimus in virtute sanctæ obedientiæ sub pœna suspensionis, ac decem librarum piis usibus applicandarum, Abbatibus, Prioribus, Decanis Christianitaris, nostræ Dioecesis, ac Sacerdotibus Parochialibus universis, ne tales sine nostro speciali mandato recipiant, aut eis obediant quovis modo: quod si secus factum fuerit, per quemcunque Nobis, aut Vicariis nostris

nostris significant indilate, ut providere possimus præmissis, prout fuerit juris & rationis.

*LII. Statuta Concilii Remensis  
Provinciae, apud Sueffionem, die  
Veneris, undecima mensis Julii,  
anno Domini M. quadringente-  
simo quinquagesimo sexto  
celebrati.*

**U**niversis præsentis literas inspecturis, JOANNES miseratione Divina Archi-Episcopus Remensis, Joannes Sueffionensis, Antonius Laudonensis, Joannes Ambianensis, & Joannes Sylvanectensis, Episcopi Suffraganei Remensis Provinciae, una cum aliorum Suffraganeorum ejusdem Provinciae absentium, & Cathedralium Ecclesiarum Procuratoribus, in Concilio Provinciali apud Sueffionem congregati, aliis omnibus, qui potuerunt, & debuerunt interesse, debite convocatis in Domino salutem. Cum per longam celebrationis Conciliorum Provincialium intermissionem in hac Remensi Provincia, Status Ecclesiasticus gravem ruinam, & multiplicia incommoda, ac innumera detrimenta patiatur: vepribus & spinis vitiatorum per defectum culturae agri Dominici undique pullulantibus, ac variis oppressionibus, & gravaminibus ultra modum adversus jura, libertates, & auctoritatem Ecclesiae excrecentibus, ex quibus Divinus Cultus minuitur, atque in diversis partibus prophanatur, & ipsius Christi Sponsae splendor atque dignitas plurimum denigratur in offensam Omnipotentis Dei, ad perditionem animarum: Nos in hac Synodo, favente Altissimi gratia, congregati, ad restorationem Domus Dei, & salutem gregis Dominici, quantum in Nobis est, intendere cupientes: Primo statuimus, ut in singulis Ecclesiis Cathedralibus, ac Collegiatis, atque Monasteriis hujus Provinciae Remensis, Divinum servitium in cantus prolatione, habituum honestate, & aliis ad debitam venerationem Divini cultus pertinentibus, decenter & reverenter, celebretur: cui omnes de Ecclesia debite intersint, Domino servientes

conformiter ad intentionem Decreti, quod incipit: *Si quis Principem saeculi* &c. deliberationem in congregatione Bituricensi dudum super acceptionem ejusdem Decreti, & aliorum celebrata, ad consuetudines laudabiles singularum Ecclesiarum, monentes Decanos, Cantores, & alios, ad quos pertinet, corrigere defectus Chori, sub obtestatione Divini Judicii, ac poenis, per eorum Superiores arbitrandis, perturbantes Divinum Officium, cum fabulationibus, risibus, aut alias in eo delinquentes & deficientes, diligenter puniant & corrigant. Præcipimus insuper, & mandamus, hoc inviolabiliter observari, ut vagantes per Ecclesiam deambulando, seu etiam sedentes extra Chorum otiosi, ad invicem confabulando tempore Divinorum Officiorum, præsertim dum Matutinorum, Missæ majoris, & Vesperarum Officia celebrari contigerit, totius diei immolumentum, tam in pane, quam in distributione amittant: & hoc per illos, ad quos pertinet omnino, executione demandetur. Advertantque in singulis Ecclesiis Canonici privati, ut tali hora, sua Capitula tenere incipiant, quod non impediatur ab interessendo majori Missæ, conformiter ad ea, quæ in prædicto Decreto sunt ordinata. Tenor vero Decreti (de quo supra) sequitur sub his verbis: Si quis Principem saeculi rogaturus, habitu honesto, gestu decenti, prolatione non præcipiti, sed distincta, attenta quoque mente, se ipsum ad verba studet componere: quanto diligentius, in hoc Sacro loco, Omnipotentem oraturus DEUM, hæc omnia facere curabit? Statuit igitur hæc Sancta Synodus, ut in cunctis Cathedralibus, ac Collegiatis Ecclesiis, horis debitis, non cursim, ac festinanter, sed abstractim, & tractim, cum pausa decenti, præsertim in medio cujuslibet versiculi Psalmorum, debitam faciendo inter solemne & feriale Officium differentiam, reverenter ab omnibus persolvatur: Horas Canonicas dicturi, cum tunica talari, ac superpelliceis mundis, ultra medias tibi as longis, vel cappis juxta temporum, vel Regionum diversitatem, Ecclesias ingrediantur, non capucia, sed

almucias, vel bireta tenentes in capite: qui, cum in choro fuerint, gravitatem servant, quam & locus & officium exigunt: non insimul cum aliis fabulantes, seu colloquentes, aut literas, seu scripturas alias legentes, & cum psallendi gratia ibidem conveniant, mura & clausa labia tenere non debent; sed omnes (præsertim, qui majori funguntur honore) in Psalmis, Hymnis, & Canticis Deo alacriter modulentur. Cum dicitur: *Gloria Patri, & Filio, & Spiritui Sancto*; omnes consurgant: cum nominatur illud Gloriosissimum Nomen, JESUS, in quo omne genu flectitur celestium, terrestrium, & infernorum, omnes caput inclinent. Nemo ibidem, dum horæ in communi publice cantantur, legat & dicat privatum Officium: nam non solum obsequium (quo obnoxius est) Choro subtrahit, sed alios psallentes perturbat. Super his debite observandis, aliisque ad Divini Officii prosecutionem, ac Chori disciplinam spectantibus, Decanus, vel cui onus incumbit, diligenter invigilet, hinc inde, ne quid inordinate fiat, circumspiciens. Horum autem transgressores, illius Horæ, in qua circa prædicta excesserint, vel alia majori (prout transgressionis gravitas exigit) plectantur pœna, salvo tamen laudabilibus consuetudinibus, & statutis, ac observantiis spectabilibus Ecclesiarum singularum Regni & Delphinatus. Insuper mandat & præcipit hoc Sacrum Concilium, ut turpis ille abusus in alio Decreto, per dictam Congregationem acceptato prohibitus, omnino a singulis Ecclesiis, a Monasteriis quorumque Religiosorum, & Religiosarum hujus Provinciæ extirpetur: quo larvales & theatrales joci, choreæ, mercimonia, negotiationes, & alia, Ecclesiam, Divinum Officium, vel ejus honestatem perturbantia, fieri prohibentur. Quodque pœna contra Ordinarios, Decanos, & Rectores, qui talia fieri permittunt, in eodem Decreto contenta, de suspensione a perceptione omnium proventuum Ecclesiasticorum per trium mensium spatium, etiam in realem executionem demandetur; adjicientes, quod etiam mercimonia & negotiationes intra Ecclesiam fieri nullatenus de cæte-

ro permittantur: quodque infra septa, seu clausuram Monasteriorum, tam virorum, quam mulierum, choreæ & tripudia nullo tempore exerceantur per quoscunque; nec enim extra ipsa Monasteria liceat Religiosis personis in quibuscunque locis, præfatas choreas, & tripudia agere. In contrarium facientes, per Superiores eorum debite puniantur. Item Ordinarii & alii Judices, diligenter puniant Clericos, aleæ & ebrietati servientes, ac tabernas etiam frequentantes, & acrius eos, qui tempore jejunii hoc faciunt. Et quoniam Domini Episcopi, qui cæteris exemplum honestatis esse debent, & ea, quæ in Divinis Scripturis, & Sacris Canonibus, ac Juribus statuuntur, in se ipsis maxime observare, ipsi habitus honestos superlunaribus amictos, prout jura volunt, tam in suis Diocesis, quam extra deferant, non nimis breves aut viles, sed nec nimis curiosos: modestiam in incessu & verbis habeant: sintque tales in omni conversatione, quales eos Apostolica regula esse jubet, & Canonice Sanctiones. Hortamur etiam Dominos Episcopos prædictos, quatenus in Ordinibus, etiam prima tonsura, conferendis, ad servitium Dei & honorem Ecclesiæ vigilantiter & discrete intendant: talesque ad ipsos Sacros promoveant Ordines, quos & vitæ honestas, & idoneitas personæ, tam in literarum scientia, quam ætate commendent: juxta juris dispositionem, abusus omnes circa præmissa vitantes. Insuper mandamus, & districte præcipimus, Decretum, per Ecclesiam Gallicanam, Bituris acceptatum, intitulatum: *De Concubinariis*, per totam Remensem Provinciam, ab omnibus quibuscunque, etiam si Episcopalis dignitatis, aut alterius præminentie existant, inconcusse, & inviolabiliter observari: cujus quidem Decreti tenor sequitur: Quicumque Clericus cujuscunque conditionis, status, religionis, dignitatis (etiam si Pontificalis, vel alterius præminentie existat) qui post hujus Constitutionis notitiam (quam habere præsumatur) per duos menses post publicationem ejusdem, in Ecclesiis Cathedralibus, quam ipsi Diocesani omnino facere teneantur, post-



postquam eadem Constitutio ad eorum noticiam pervenerit, fuerit publicus concubinarium, a perceptione fructuum omnium beneficiorum suorum, trium mensium spatio, sit ipso facto suspensus, quos suus Superior in fabricam, vel aliam evidentem Ecclesiarum utilitatem, ex quibus hi fructus percipiuntur, convertat. Nec non & huiusmodi publicum concubinarium, ut primum esse innotuerit, mox suus Superior monere teneatur, ut infra brevissimum terminum concubinam dimittat. Quod si non dimiserit, vel dimissam, ut aliam publice resumpserit: jubet hæc Sancta Synodus, ut ipsum suis beneficiis privet omnino. Et nihilominus hi publici concubinarij (usquequo cum eis per suos Superiores, post ipsarum concubinarum dimissionem, manifestamque vitæ emendationem fuerit dispensatum) ad susceptionem quorumcunque bonorum, dignitatum, beneficiorum, vel officiorum sint inhabiles. Qui si post dispensationem, reciduo vomitu, ad huiusmodi publicum concubinatum redierint, sine spe alicujus dispensationis ad prædicta prorsus inhabiles existant. Quod si hi, ad quos talium correctio pertinet, eos, ut prædictum est, punire neglexerint: eorum Superiores, tam in ipsos de neglectu, tam in illos pro concubinato, modis omnibus digna punitione animadvertant. In Conciliis etiam Provincialibus, Synodalibus, adversus tales punire negligentes, vel de hoc crimine diffamatos, etiam per suspensionem a collatione beneficiorum, vel alia condigna pœna severiter procedatur. Et si hi, quorum destitutio ad Summum Pontificem spectat, per Concilia Provincialia, aut suos Superiores propter publicum concubinatum reperiantur privatione digni, statim cum processu inquisitionis ipsi Summo Pontifici deferantur. Eadem diligentia, & inquisitio in quibuscunque Capitulis Generalibus & Provincialibus, quo ad suos, fervetur, pœnis aliis contra prædictos, & alios, non publicos concubenarios, statutis in suo robore permanfuris. Publici autem intelligendi sunt non solum hi, quorum concubinitus, per sententiam, aut confessio-

nem in jure factam, seu per rei evidentiam, quæ nulla posset tergiversatione celari, notorius est; Sed qui mulierem de incontinentia suspectam, & infamatam tenet, & per suum Superiorem admonitus, ipsam cum effectu non dimittit. Quia vero in quibusdam regionibus, nonnulli jurisdictionem Ecclesiasticam habentes, pecuniarios quæstus a concubinariis percipere non erubescunt, patiendos eos in tali sceditate sordescere; sub pœna maledictionis æternæ præcipit, ne sub pacto, compositione, aut spe alicujus quæstus, deinceps talia quovis modo tolerent, aut dissimulent: alioqui ultra præmissam negligentiae pœnam, duplum ejus, quod propterea acceperint, restituere ad pios usus omnino teneantur. Ipsas autem concubinas, seu mulieres suspectas, Prælati modis omnibus curent a suis subditis, etiam per brachii sæcularis auxilium, si opus fuerit, penitus arcere. Quod etiam, a tali concubinato procreatos filios, apud Patres suos cohabitare non permittant. Jubet insuper hæc Sancta Synodus, ut etiam in prædictis Synodis & Capitulis hæc Constitutio publicetur: & quilibet suos subditos, ad ipsarum concubinarum dimissionem moneat diligenter. Injungit præterea omnibus sæcularibus Viris, etiam si Regali præfulgeant dignitate, ne ullum qualecunque inferant impedimentum, quocunque quæsito colore, Prælati, qui ratione officii sui adversus subditos suos, pro huiusmodi concubinato procedunt. Et cum omne fornicationis crimen lege Divina prohibitum sit, & sub pœna peccati mortalis necessario evitandum, monet omnes laicos, tam uxuratos, quam solutos, ut similiter a concubinato abstineant: Nimis enim reprehensibilis est, qui uxorem habet, & ad alienam uxorem accedit: Qui vero solutus est, si continere nolit, juxta Apostoli doctrinam, ducat uxorem. Pro huiusmodi autem observatione præcepti, hi, ad quos pertinet, tam salutaribus monitis, quam aliis Canonicis remediis omni studio laborent. Et ut nullus, quantumque præfati Decreti prætereundum ignorantiæ, jubemus hoc Decretum per Dominos Episcopos, & tam Cathedra-

thedralium, quam Collegiatarum Ecclesiarum Capitula, nec non Abbates, & cæteros jurisdictionem Ecclesiasticam habentes, infra duos menses a fine præsentis Concilii numerandos, suis subditis intimari: Et deinde in singulis Synodis Dioecesanorum, nec non generalibus quarumcunque Ecclesiarum Capitulis, etiam evocatis ad hoc singulis suppositis earundem, alta & intelligibili voce publicari. Moneant insuper dicti Domini Episcopi, Capitula, Abbates, nec non jurisdictionem habentes, omnes & singulos suos subditos concubinarios notorios generaliter, quatenus infra trium mensium spatium concubinas suas, seu mulieres suspectas, & diffamatas abjiciant & dimittant. Et quoniam nonnulla Capitula Ecclesiarum ad subditorum suorum, de hoc crimine diffamatorum, correctionem minus diligenter hactenus compimus processisse; unde peccata indies magis foventur, & deterioribus adaugentur incrementis, in grave scandalum Ecclesiastici Status, & perditionem animarum: præcipimus & mandamus omnibus & singulis Ecclesiarum Cathedralium & Collegiatarum Capitulis, ac Præfidentibus in eisdem, sub pœnis ipsorum suspensionis a Divinis, & aliis per suos Superiores arbitrandis, quatenus post supradictorum trium mensium, a tempore præmissæ monitionis generalis spatium elapsum, infra quindecim dies proxime sequentes, contra singulos subditos suos de hoc crimine diffamatos (qui prædictas concubinas suas realiter & cum effectu non dimiserint) procedant via juris, specialiter & nominatim, ad declarandum eos prædictam suspensionem fructuum spatii trium mensium incurrisse, nec non consequenter, ad ulteriores pœnas, juxta tenorem Decreti superscripti, eisdem infligendas. Et si hoc facere neglexerint, Superiores eorum, ad executionem pœnarum prædictarum contra ipsos negligentes sine dissimulatione procedant, ac etiam Episcopos, & alios quoscunque Ecclesiasticam jurisdictionem habentes, qui in ejusdem criminis punitione negligentes invenirentur, Superiores eorum puniant: de neglectu & in defectu ipsorum, pœ-

nas contra concubinarios supra dicto Decreto positas, cum omni diligentia realiter exequantur. Injungimus universis Episcopis, & aliis jurisdictionem Ecclesiasticam exercentibus, quatenus ad correctionem fornicatorum, & maxime adulterorum publicorum intendant, & invigilent, prout animarum saluti viderint expedire. Monemus omnes & singulos Dominos Episcopos, Capitula, Abbates, & alios jurisdictionem Ecclesiasticam exercentes, quatenus suos subditos Ecclesiasticos, ad honeste & cum habitu condecienti incedendum compellant, tunicas nimium breves, aut in spatulis elevatas, vel capellos, sive pilea in capitibus, seu sutores, rostratos, vel rubei, cælestis, purpurei, viridisve, aut crocei colorum caligas eos deferre, aut ad pilam maxime, usque ad camisiā exutos in theatris, vel locis publicis ludere non permittant: sed potius ea omnia sic indecentia prohibeant: Sacerdotesque, & alios quoscunque Ecclesiasticos, a mercantiis publicis & negotiationibus secularibus exercendis præcipiant abstinere. Contra facientes, prout eorum transgressio exegerit, debite puniendo. Item cum in multis partibus Rectores Ecclesiarum Parochialium, adeo modicam provisionem habeant, quod non reperiuntur, qui ipsis Ecclesiis deservire velint, quod cedit in grave præjudicium animarum: provideant omnes Prælati, & Patroni, quatenus secundum dispositionem jurium in Capitulo: *De Monachis, de Præbendis in antiquis, & Capitulo, suscepti Regininis*, eodem titulo, & in Sexto, & in Clement. id est, de jure patronatus, congrua portio præfatis Rectoribus assignetur, ne pro defectu administrationis ipsarum animarum, prædicti Prælati & Patroni, apud Deum & homines veniant reprehendi. Item ad obviandum exquisitis & abusivis modis, quibus nonnulli quæstores, pecunias a pauperibus extrahere conantur, contra dispositionem jurium, utentes, seu uri facientes prædicatione Verbi Dei, finem quæstus eorum, ipsam principaliter applicando; Prohibemus quibuscunque Quæstoribus, ne in hac Provincia Remensi prætextu Indulgentiarum, vel alio-

aliorum quorumcunque, faciendo suas quæstas prædicent Verbum Dei. Sed solum negotium suum verbis planius exponant, vel etiam literas, si quas habeant, legant, seu legi faciant: & si forsan aliqui Doctores, vel alias, qui ad prædicandum idonei cum ipsis venerint, & prædicare velint, nihil in suo sermone quæstuosum exponant, & contra eos servetur Cap. *Cum ex eo.* & Clement. *Abusionibus. de Peniten. & Remissione.* Nostramque præsentem prohibitionem Ordinarii locorum faciant diligenter observari. Item quia ex inordinata multitudine Religiosorum, qui ad confessiones audiendas deputantur, plurimum utriusque sexus nimia libertate utentes, pro libitu suo, quibus volunt, confitendi & absolutionem obtinendi, præsertim in casibus reservatis, audaciores sunt ad graviora peccata perpetranda; admonemus omnes Episcopos hujus Provinciæ, quatenus juxta formam Clementinæ: *Dudum.* & Decretal. *Supra Catbedram.* in eadem insertæ, personis taliter qualificatis, & in tali numero ex Conventibus Religiosorum mendicantium, licentiam audiendi confessiones concedant, sicut in prædicta Decretali continetur. Et illis non ita indifferenter Casus Episcopales concedant, sicuti hætenus in multis Diocesis fieri consuevit. Sed ubi necessitatem viderint, aliquos Casus particulariter concedendi, cum tanta discretionem hoc faciant, ut per hoc non detur subditis occasio liberius ad peccata & crimina graviora prorumpendi. Item licet in antiquis juribus salubriter instituta fuerint tempora, in quibus non debent Matrimonia celebrari, tamen nonnulli per abusum, in hujusmodi temporibus prohibitis, contra ipsorum jurium intensionem, festa & convivias, choreas & tripudia, tanquam pro solennizatione ipsorum Matrimoniorum exercent. Inhibemus, ne de cætero in prædictis temporibus, neque etiam die Trinitatis talia fiant, & interessentes talibus conviviis, & festis per Ordinarios debite corrigantur, & gravius Ecclesiastici, si talibus interfuerint. Insuper præcipimus, quod aliis temporibus Matrimonia non fiant in domibus, sed tantum in Ecclesiis,

*Tomus VIII. Concilior. German.*

ac hora competenti, & die clara celebrentur, advertantque Domini Episcopi, ne super bannis, ante Matrimonium fiendis, sine causa rationabili dispensent. Præterea Constitutiones Conciliorum Provincialium, tempore bonæ memoriæ Dominorum Roberti de Catherenayo apud Sylvanectum, Anno Domini Millesimo trecentesimo quadragesimo quarto, tam super libertate, jurisdictione, & immunitate Ecclesiarum, & Ecclesiasticarum personarum, ac pœnis contra perturbatores earum, quam super reformatione morum editas laudamus, approbamus & ratificamus, & quantum opus est, hujus præsentis Concilii Decreto renovamus: Mandantes, ut deinceps in nostra Provincia, servantur & executioni demandentur. Cæterum, & si contra Dominos sæculares, Ecclesiasticam jurisdictionem impediunt, excommunicationis & aliæ pœnæ per dicta Statuta Provincialia sint adjectæ, tanto magis in Ecclesiasticos, qui eandem jurisdictionem Ecclesiasticam non solum non impedire, sed & promovere, & exaltare tenentur, locum habere debent: idcirco sub excommunicationis pœna, & aliis, in prædictis Conciliis Provincialibus, declaratis pœnis, universis & singulis Prælati, & Ecclesiasticis personis, totius Provinciæ Remensis, cujuscunque dignitatis, sive præminentie existant, prohibemus, ne in terris, quibus ad eos & eorum Ecclesias, Monasteria, & dignitates jurisdictio temporalis pertinet, directe vel indirecte, quovis quæsito colore, tacite vel expresse, per se, vel alios, prohibitiones fiant, aut per alios quoscunque Judices, vel Officiarios temporales fieri procurent; subditis suis Judicibus Ecclesiasticis, vel aliis quibuscunque aut pœnas, minas, vel terrores adjiciant, quominus in terris hujusmodi, in suo dominio temporali subiectis, citationes, monitiones, & mandata Curiarum Ecclesiasticarum, etiam in personalibus actionibus, & alias libere possint executioni demandari. Et si hætenus tales prohibitiones fecerint, aut minas, aut terrores incuriant, infra unum mensem a die publicationis præsentis Statuti, in singulis Diocesis, quam Ordinarii diligenter facere teneantur,

Q q



antur, sub eadem pœna, publice revocent, aut faciant revocari. Item, quia nonnulli, tam Clerici, quam Laici, sentientes, se super suis excessibus, delictis seu debitis, coram Judice Ecclesiastico esse citatos, de suæ causæ iustitia diffidentes, ad Dominorum temporalium, seu Officiariorum, aut servitorum eorundem potentiam recurrunt, literasque comminatorias, aut minas verbales impetrant, & armatos adducunt, & alias faciunt, quia timor tam Judicibus, quam Officiariis suis, ac partibus incutitur, unde non modicum Ecclesiastica jurisdictio perturbatur & læditur: Prohibemus sub pœna excommunicationis: ne Clerici, vel Laici, coram Ecclesiastico Judice tracti, armatos adducant: literas comminatorias, seu minas verbales hujusmodi, aut alia quæcunque impetrent, vel procurent, unde directe vel indirecte Ecclesiastica jurisdictio aliquatenus valeat impediri. Item statuimus, quod in causis, summam duorum Francorum monetæ loci non transcendentibus, libellus inscriptus non admittatur, & in talibus tanquam minimis, ad discretionem Judicium summarie de plano procedatur: qui tam in his, quam aliis, omnes frivolas dilationes studeant refecare. Et ut Religiosæ personæ Deo dicatæ, sicut præ cæteris districtius Domino votis solennibus manciantur, sic earum vita, & conversatio honeste refulgeat, & aliis bene vivendi propitium indicent exemplum; statuimus & ordinamus: quod omnes & singuli Abbates, Abbatissæ, Priores, & Præpositi quorumcunque Monasteriorum, Ordinum Sanctorum Benedicti, & Augustini, Provinciæ Remensis, tam in se, quam in suis Religiosis, & subditis, omnem evagandi, levitatisque materiam evitent, & faciant evitari. Jejunia ab Adventu usque ad Festum Nativitatis Domini, & a Septuagesima usque ad Festum Sancti Paschæ, abstinentiamque ab esu carniū, singulis quartis feriis, totius anni, tam in publico, quam in privato diligenter observent. Computa & rationes præsentibus Religiosis reddant, in vestibus & habitibus, juxta suorum ordinum observationem, ac in gestibus & verbis honestatem & gravi-

tatem gerant. Zonas argenteas, sotulares laqueatos, breves tunicas, & alia, quæ vanitatis pompæ indicia sunt, evitent. Religiosos, sine quæstu pro ingressu Religionis recipiant secundum Canonicas Sanctiones: Novicios, & alios in cultu Divino & Sacrarum lectione Scripturarum instrui faciant. Regulas suorum Ordinum, juxta limitationem Constitutionis, felicitis recollectionis Domini Benedicti Papæ XII. circa Reformationem Religiosorum eorundem Ordinum editas, & appositas teneant. Quas Constitutiones singuli Abbates, Abbatissæ, Priores, & Præpositi, prout sunt editæ, in vulgari expostas juxta sui Ordinis qualitatem, saltem ter in anno legere teneantur, habitusque suarum Religionum non deserant: apostasiam (cui excommunicationis sententia ipso facto annectitur) prorsus evitent. Maxime vero Religiosi mulierum, & Religiosæ virorum frequentationem & consortia effugiant, ac alias juxta suorum Ordinum laudabilia constituta, ac Sanctorum Patrum Decreta, nec non Canonicas Sanctiones vivere studeant. Ita ut servitium exhibeant Deo gratum, ac ex eorum bona conversatione, cæteri valeant ad honestatis & munditiæ zelum ferventius incitari. Mandantes universis eorundem Abbatum, Abbatissarum, Priorum, & Præpositorum Superioribus, quatenus ipsos, ad præmissorum observationem (si aliquatenus defecerint) via juris vigilanter coerceant: Et nihilominus dicti Religiosi, Capitula suorum Ordinum observent, dictis aliis Statutis Provincialibus, circa præmissa omnia & singula in suo robore permanentis. In quorum omnium & singulorum testimonium & munimen, Nos Archi-Episcopus, & Episcopi præfati, literis præsentibus sigilla nostra duximus apponenda. Datum Sueffione Anno Domini M.CCCC.LV. Indictione tertia, mensis vero Julii die Veneris undecima: Pontificatus Sanctissimi in Christo Patris & Domini nostri, Dni Calixti, Divina Providentia Papæ tertii, anno primo.

F I N I S.

*Sequitur.*

*Sequuntur Abbates, Abbatissæ, Capitula, & alii, qui interesse tenentur in Synodo Atrebatensi.*

Abbas Aquiscinctensis.  
 Abbas montis S. Eligii.  
 Abbas Ayulcurtenfis.  
 Abbas de Hyniaco.  
 Abbas de Viconia.  
 Abbatissa de Strumis.  
 Abbatissa de Avennis.  
 Abbas de Femy.  
 Abbas de Nongento.  
 Abbas S. Amandi in Pabula.  
 Abbas in Blangiaco in Ternesio.  
 Abbas S. Andreæ de Castello in Cameracesio.  
 Abbas de Chifomo.  
 Abbas S. Auberti Cameracensis.  
 Abbatissa de Melbodio.  
 Capitulum Cameracense.  
 Capitulum S. Amati Duacen.  
 Capitulum Lensense.  
 Prepositus Arietum.  
 Prepositus de Eversen.

Abbas de Arovasia.  
 Abbas de Marchienis.  
 Abbas de Marolio.  
 Abbas de Hanonio.  
 Abbas de Castro juxta Moritaniam.  
 Abbatissa de Donomo.  
 Abbatissa de Syn.  
 Abbas de Hamo in Viromandia.  
 Abbas S. Vincentii Sylvanectensis.  
 Abbas S. Nicolai in Bosco.  
 Abbas de Hem juxta Villers.  
 Abbas S. Petri de Gandavo.  
 Abbas Sancti Sepulchri Cameracensis.  
 Abbas montis S. Quintini juxta Peronnam.  
 Prior S. Vedasti Atrebatensis.  
 Capitulum S. Crucis Cameracensis.  
 Capitulum S. Petri Duacen.  
 Capitulum S. Bartholomæi Bethuniens.  
 Prepositus Yprensis.  
 Decanus Lensensis.

## APPENDIX VARIARUM SYNODORUM ATREBATENSIIUM.

*Referuntur hæc in citata sæpe a nobis editione antiqua fere sub finem Constitutionum præcedentium: In posteriore vero, quam secuti hic sumus, pleraque earundem Decreta ad suos redacta Titulos, locis opportunis inserta sunt, ut mox indicabimus.*

*Anno Domini M. CCC. quinquagesimo quarto in SANCTA SYNODO.*

**S**USCEPTI regiminis nos cura sollicitat, & inducit, ut utilitatibus subditorum in illis precipue, per quæ animarum saluti consulitur: nunc statutorum antiquorum & penarum contentarum in iisdem recitatione: nunc penarum aliarum appositione & comminatione sollicitè providere curemus. Sed quod dolentes referimus: ad aures nostras pervenit: quod nonnulli statuta nostra a juribus Divinis & canonicis sanctionibus per predecessores nostros & per nos cum maximis penis & laboribus abstracta habere contemnunt & de novo: & nihilominus qui habent: legere nolunt, & forte nesciunt, & qui sciunt, non curant alios informare ut debent: in grave dam-

*Tomus VIII. Concilior. German.*

num & periculum animarum suarum & scandalum universalis Ecclesie ac etiam plurimorum.

Nos volentes saluti eorum consuli meliori modo quo possumus & debemus; precipimus & mandamus omnibus, qui tenentur de jure vel consuetudine in nostra Sancta Synodo interesse: licet sæpe & pluries sit preceptum ab antiquis nostris predecessoribus, & etiam a nobis: quatinus Statuta portent Synodalia: & ea diligenter legant: tam Archidiaconi: Abbates, Priores, Decani, Curati & ceteri universi. Scientes, quod anno futuro, & aliis sequentibus: annuente Domino tam per Abbates, quam per alios singulariter prout nobis visum fuerit, palam & publice in Synodo legi faciemus. Et contra non habentes ea, aut

Qq 2

lege-

legere nescientes, aut nolentes, juxta penas in eis contentas, & alias prout fuerit rationis graviter procedemus, & ut ad presens pauca de multis, in quibus forte magis delinquitur in nostra Diocesi eliciamus. Idcirco aliqua legemus ad que attendatis, & diligenter advertatis.

*Sequitur deinde Confirmatio penarum, a Prædecessoribus, Episcopis Atrebatensibus latarum. Cæterum nostræ intentionis existit &c. quod Statutum vide supra sub Titulo XLIX. De revocatione Gratiarum, pag. 298. Huic subjungitur:*

• • •

*Anno Domini M. CCC. Quinquagesimo quinto in SANCTA SYNODO.*

Cæterum, quia in quadam nostra Constitutione Synodali, Titulo de Vita & honestate Clericorum, continetur, quod Clerici &c. Vide supra ead. pag. jam cit.

• • •

*Additiones factæ Anno M. CCC. Sexagesimo quarto.*

**A**D nostrum pervenit auditum quod quamplures nostri subditi Sacerdotes: magnam negligentiam, & periculosum defectum committunt circa formam absolutionis eorum: quorum audiunt confessiones. Nam aliqui solum utuntur verbis deprecativis, dicendo absolutionem & remissionem omnium peccatorum tuorum tribuat tibi Omnipotens & Misericors Dominus Amen. Alii dicendo solum: Misereatur &c. & absolvat te Omnipotens Deus. & non addunt Absolvo te de omnibus peccatis tuis. Nec utuntur aliquibus verbis indicativis. Absolvo te a peccatis tuis de quibus contritus es & confessus. Et hoc modo non absolvent non contritum, & tamen tenent Doctores, quod virtute Sacramenti de attrito cito fit contritus: etiamsi aliquis omittat aliqua confiteri non per negligentiam: sed ea sit paratus confiteri: si occurrerent sue memorie: si absolvatur in debita forma: remanet absolutus. licet ea non confiteatur de presenti proponens ea confiteri, quan-

do ad suam memoriam reducentur. Item licet excommunicatus minori excommunicatione pro participatione cum excommunicatis non sit susceptivus Sacramentorum: immo separatus est a perceptione Sacramentorum ut in Capitulo. *Si quem*, de sententia excommunicationis. Nihilominus ligatum excommunicatione minori dicti Sacerdotes absolvent a peccatis, antequam abolverint ab eadem excommunicatione, cujus absolutionis peccator non est capax. Ideo ut talibus defectibus & periculis obviemus, volumus & ordinamus, quod omnes subditi nostri Sacerdotes: forma absolutionis (que sequitur) de cetero utantur: & nullatenus obmittant: & ponant eam per modum additionis in suis Constitutionibus Synodalibus sub titulo de Sacramento Confessionis. Ita quod postquam audita confessione dixerint verba, que consueverunt dicere, videlicet Absolutionem & remissionem. Aut illa verba. Misereatur tui Omnipotens Deus, aut consimilia: nullatenus in fine obmittant dicere sic: Auctoritate qua fungor ego absolvo te a sententia minoris excommunicationis, si quam incurristi, pro participatione cum excommunicatis, & a peccatis tuis in Nomine Patris, & Filii, & Spiritus Sancti Amen. Et sciant illam formam corde tenens. Et Decani sint diligentes in diebus in quibus tenebunt sua capitula particularia de Sacerdotibus instruendis & examinandis super dicta forma: & maxime quos constiterit, seu contigerit de novo ordinari.

*Addatur in Titulo de Mandatis Curie.*

Item cum fides Literis ex appensione sigilli habeatur &c. *Additionem hanc vide supra pag. 282.*

*Subnectitur Statutum de Sepulturis: Statuimus, quod dicti Curati Civitatis &c. quod vide supra sub Tit. XXVI. de inhumatione Corporum. pag. 277.*

*Sub finem additur:*

Item quod singuli Decani in Synodo legant nomina Curatorum in suo Decanatu defunctorum, & quod dicant ibidem: *De profundis*, cum oratione: *Fidelium*, pro hujusmodi defunctis.

Con-



*Constitutiones Synodales per Reverendum Patrem D. PETRUM MANSUE-  
RII, (\*) Utriusque Juris Doctorem excellentissi-  
mum Episcopum Atrebatensem. Anno Do-  
mini Millesimo trecentesimo septuagesimo quin-  
to, edite & publicate in Synodo Atreba-  
tensi: per eundem Reverendum Patrem  
in Ecclesia Atrebatensi  
celebrata.*

*Primo de Sacramento Confessionis.*

**P**roborum relatione didicimus, quod in pluribus villis & locis nostrarum civitatis & Dyocesis sunt quamplures Clerici & seculares, qui immemores salutis eterne: nedum per annum sine confessione: immo per duos vel tres: alii per septem annos & amplius in gravem contemptum hujusmodi Sacramenti: & etiam a perceptione Eucaristie sine consilio proprii Sacerdotis abstinerunt. Idcirco cum per tales: Ecclesiastica Sacramenta & præcepta vilipendantur. Nos pene exaggeratione adjecte volentes eos compelli ad viam salutis eterne redire: tales præter alias penas que in dicto Statuto exprimuntur: excommunicatos pronunciamus: districte precipientes omnibus ecclesiarum rectoribus: quatinus hujusmodi contemptores in suis ecclesiis denuncient in generali & publicent excommunicatos auctoritate nostra: singulis diebus dominicis & festivis: nec in talium excommunicatorum presentia, scienter celebrent: eosque non absolvant: nec recipiant ad ecclesiasticam sepulturam. Hocque & idem precipimus de omnibus & singulis, qui nostram jurisdictionem turbaverint, seu impediverint, aut ad impediendum dederint consilium, seu juvamen. Prohibentes omnibus Presbyteris: ne tales absque nostre Curie licentia speciali absolvant: quia talium absolutionem penes nos re-

servamus. Et nihilominus nomina talium referant seu mittant per Decanos infra mensem a die noticie sine fraude promotori curie nostre: ut contra tales excommunicatos: ad alias penas graviores procedi valeat: prout justitia suadebit.

*De Sacramento Matrimonii.*

Ad audientiam nostram fide digna relatione pervenit, quod nonnulli uxorati &c. *Vide supra pag. 259.*

*De Usuris.*

Ut minor fœeneratoribus fœenerandi tribuatur facultas &c. *Vide supra pag. 274. sub eod. Titulo.*

*De Mandatis Curiae exequendis.*

Multorum ad nos gravis querela perduxit, quod nonnulli Curati &c. *Vide pag. 282.*

*De Questoribus & Abusoribus.*

Quia sicut ex relatione fide dignorum intelleximus &c. *Vide pag. 298.*

• • •

*Constitutiones Synodales per Bonæ  
Memoriæ Dominum MARTINUM (\*\*) Epi-  
scopum Atrebatensem, Ordinis Prædicatorum,  
Sacrae Theologie Professore, edita & pub-  
licata in Sancta Synodo Atrebatensi feria  
tertia post festum Beati Dionysii Anno  
Domini Millesimo quadringente-  
simo decimo.*

Quia negligentia noverca virtutum &c. *Vide supra pag. 299. & 300.*

• • •

*Constitutio facta in Sancta Synodo  
a Rever. in Christo Patre ac Domino D.  
MARTINO, Atrebatensi Episcopo,  
Anno MCCCC. decimo.*

Fide dignorum relatu multiplici audivimus &c. *Vide ead. pag. 300.*

• • •

Qq 3

Alie

(\*) Petrus Mansuerius (Joanni Bapt. Castillionao Masoësius) Patria Arvernensis, Legum Doctor, & olim Gregorii XI. Pontificis Max. institutor, ex Archidiacono Cameracensi Atrebatensis Ecclesiæ, quæ Gerardo Dainvillio ad Morinorum Cathedram promotus vacaverat, Antistes renunciatus est anno 1370. Obiit A. 1391.

(\*\*) Martinus Poræus, Ordinis S. Dominici in oppido Senensi Religiosus, S. Theol. Doctor, in Joannis Canardi Episcopi Atrebatensis locum successus fuit anno 1408. Interfuit Concilio Pisano, quod anno 1409., ac dein etiam Constantiensi, quod anno 1416. congregatum fuit. Obiit anno 1426. die 6. Septembris, in Templi sui Odeo honorifice tumulatus. *Joann. Bapt. Castillon in Sacra Belgii Chronologia P. II.*

*Aliæ Constitutiones Synodales per  
eundem Rever. Patrem Dominum MARTI-  
NUM Episcopum Atrebatensem factæ & pub-  
licate in Synodo Atrebatensi: celebrata feria  
tercia post Dionysii mensis Octobris decima  
sexta Anno Domini millesimo qua-  
dringentesimo vigesimo  
quinto.*

**G**aves atque crebras querelas do-  
lenter suscepimus: quod quidam  
mercennarii Sacerdotes tam de Diocesi  
nostra quam de alienis: prætextu no-  
strarum literarum gratiose eis concessa-  
rum: ut valeant in nostra Diocesi (infra  
tamen juris dispositionem) missas cele-  
brare: fallaciter subditos nostros & cu-  
ratorum nostrorum sibi alliciunt: in  
Dei opere, sue salutis immemores,  
fraudem faciendo: dum temerarie se  
ingerunt ad officium alienum exercen-  
dum: ministerium dictorum nostro-  
rum curatorum damnabiliter usurpan-  
do: confessiones suorum Parochiano-  
rum utriusque sexus audiendo: vel au-  
diendi modum mendaciter contingen-  
do: penitencias eisdem injungendo, mu-  
lieres post partum purificando, aquam  
cum solennitate consueta in capellis aut  
oratoriis, seu etiam in domibus priva-  
tis (si detur eis quandoque facultas  
propter aliquas justas causas Missas ce-  
lebrandi) in eisdem benedicendo &  
spargendo, ac multa alia faciendo: in  
quibus maxime consistit jurisdictio &  
potestas predictorum nostrorum cura-  
torum, pertinens ad regimen anima-  
rum eisdem commissarum. Unde non-  
nulli boni Parochiani & fideles, a fre-  
quentatione suarum ecclesiarum & mis-  
sarum parochialium periculose retra-  
huntur. Et quasi uniuscujusque pro-  
pria jurisdictio, ordo atque gradus pre-  
lationis sue non servantur, nil aliud agi-  
tur, nisi ut per eos penitus confundan-  
tur: per quos deberent inviolabiliter  
tueri & conservari. Nos itaque, qui  
unicuique jus suum intendimus illibate  
conservare: & presertim illorum qui  
partem sollicitudinis gerunt nobiscum:  
in regimine nobis commissi populi chri-  
stiani: pretextu aut colore nostrarum  
literarum gratiose quibuscunque pres-  
byteris concessarum, atque conceden-  
darum: talia aut similia per quoscun-

que Sacerdotes mercenarios, aut fora-  
neos, cum ad eos de nostris ovibus non  
pertineat: sub pena suspensionis (quam  
in contra facientes ferimus in his scrip-  
tis: ) de cetero fieri prohibemus: nisi  
certis de causis, de præactis aut aliquo  
eorum: in nostris literis impetrandis  
specialem fecerimus mentionem. Item  
quia nonnulli predictorum Sacerdotum  
specialiter foraneorum: hoc est aliarum  
Dyocesum aut provinciarum: frequen-  
ter reperti fuerunt apostate: aut fugi-  
tivi a sua religione. Alii fuerunt in-  
venti excommunicati: suspensi: aut  
propriis beneficiis privati: suis exigen-  
tibus demeritis: quorum aliqui literas  
promotionis ad sacros ordines & (etiam  
usque ad presbyteratum inclusive) alio-  
rum verorum Sacerdotum surripuerunt  
furtim, aut alias illicite: & se faciunt  
fallaciter appellari nominibus & cogno-  
minibus in dictis litteris descriptis.  
Alii post decessum quorundam sic pro-  
motorum litteras ceperunt, detinue-  
runt, & detinent. Et quamvis tales  
detentores sint quandoque laici, aut in  
Sacerdotium non promoti, assumptis  
tamen nominibus talium Sacerdotum  
defunctorum: mendaciter fingunt se  
esse Sacerdotes illos, de quibus in tali-  
bus litteris fit mentio: in damnatio-  
nem suarum & populi nostri grave pe-  
riculum animarum. Quapropter: ut  
de cetero talibus fallaciis, fraudibus,  
& mendaciis atque perniciosis obvieu-  
mus: omnes gratias factas cuicunque  
Sacerdotum predictorum verorum, aut  
pretenso- rum: celebrandi missas in no-  
stra Dyocesi: aut aliqua alia spiritualia  
officia in ea exercendi penitus revo-  
camus & cassamus. Significantes qui-  
buslibet: quod de cetero non inten-  
dimus quemcunque admittere ad pre-  
missa: nisi cum litteris suorum sacro-  
rum ordinum: litteras approbatorias  
suorum ordinari-orum de eorum statu  
& personis secum detulerint: & nobis  
aut vicariis nostris in nostra absentia  
de eisdem fecerint plenam fidem.

• • •

*Statu-*

*Statutum Synodale de novo editum*

*Anno Domini Millesimo quadringentesimo  
quadragesimo secundo per Dominum FOR-  
TIGARIUM(\*) Episcopum At-  
trebatensem.*

**Q**uia valde decens & honestum cen-  
setur: quod dum & quando cu-  
rati, seu vicegerentes ecclesiarum  
parochialium, in Dyocesi nostra Attre-  
batenſi existentes & residentes: nec  
non clerici provinciales earundem Di-  
vinum officium celebrant: sint vestiti  
superpelliceis: habentes super capita  
sua almucium & biretum. Et intel-  
leximus (quod dolenter referimus)  
quod quamplures curati: eorumque  
vicegerentes, ac clerici ipsarum eccle-  
siarum: dum divinum officium faciunt:  
cantando matutinas, vesp̄as, & alias  
horas diei: incedunt cum magnis ca-  
pellis nigris, quorum usus est ad pre-  
sens in cursu: nec non cum capuciis,  
quorum cornettas circa colla seu eo-  
rum facies habent tortas: adeo quod  
melius videntur & apparent seculares,  
seu galandi, quam presbyteri seu viri  
ecclesiastici: quod cedit in vituperium  
& dedecus totius ordinis, seu status  
ecclesiastici. Propterea nos episcopus  
volentes & cupientes (prout nostro  
incumbit officio pastoralis) circa hunc  
abusum providere. Mandamus & pre-  
cipimus omnibus & singulis curatis,  
eorumque vicegerentibus, ac clericis  
ecclesiarum parochialium: etiam sub  
pena suspensionis a Divinis (quoad  
presbyteros) & excommunicationis  
(quoad clericos): quatinus deinceps  
dum Divinum servitium in suis eccle-  
siis facient, & celebrabunt: sint vestiti  
superpelliceis: habentes super capita  
sua ipsorum almucium vel biretum.  
Contra facientes vero preceptis penis  
subjacere volumus, a quibus (nisi per  
nos vel officialem nostrum) absolutio-

nis beneficium minime valeant obti-  
nere.

Nos vero constitutiones provin-  
ciales & synodales: a reverendis in  
Christo patribus & dominis remensis  
archiepiscopis, & eorum suffraganeis,  
editaque in conciliis generalibus re-  
mentis provincie: & in synodis bone  
& recolende memorie predecessorum  
nostrorum, dudum episcoporum attre-  
batenſium, & a nobis rite & salubri-  
ter edita ratificamus, approbamus, &  
etiam confirmamus. Precipientes vo-  
bis & singulis abbatibus, archidiaconis,  
decanis & curatis, ac aliis sub  
pena viginti librarum parisiensium, in  
pios usus convertendarum: quatinus  
infra tres menses a die sancte synodi  
computandos copiam de eisdem con-  
stitutionibus, statutis, & edictis ha-  
beant: nisi alias habuerint: ne pretextu  
ignorantie: valeant se excusare ea-  
rundem transgressores.

Nos non intendimus aliquem per  
se vel procuratorem in hac sancta syn-  
odo attrebatensi comparere debentem:  
admittere: aut habere pro excusato:  
qui sit a jure vel ab homine aliquo ex-  
communicationis vinculo innodatus,  
& de hoc expresse protestamur.

Omnes & singulas gratias per nos  
seu vicarios nostros quibuscunque per-  
sonis religiosis & secularibus in ge-  
nerali vel speciali concessas & factas,  
cujuscunque tenoris existant: in hac  
sancta nostra synodo revocamus: &  
penitus annullamus.

Omnes & singulos, qui de jure  
vel consuetudine ad hanc presentem  
nostram synodum attrebatensem inter-  
esse & venire tenentur: qui non com-  
paruerint in eadem, nisi fuerint per  
procuratorem idoneum: sufficiens man-  
datum habentem: legitime excusati:  
contumaces reputamus in his scriptis.

*Sequun-*

(\*) Fortigarius de Placentia, Flander, Philippi Burgundiae Ducis Sacellanus, eidemque  
primus ab Eleemosynis fuit, Archidiaconus item Attrebatensis & Præpositus Insu-  
lensis. Anno 1438. Episcopi Attrebatensis dignitatem ex Canonicorum omnium  
suffragiis obtinuit. Præfuit annis circiter tredecim: cujus intervallo temporis præ-  
ter Episcopalem domum, Mareolensem etiam, Becrianensem, atque Bronnensem  
reparavit. Vivere desiit 21. Februarii Anno 1452. & in Cathedralis Ecclesiae suae  
Sacello S. Vedasti, quod suis pariter sumptibus restauraverat, marmoreo sub tu-  
mulo sepultus fuit. *Joann. Bapt. Castillon. in Sacra Belgii Chronologia P. II.*



*Sequuntur STATUTA CONCILII REMENSIS PROVINCIÆ APUD SUESSIONEM. quæ supra retulimus.*

*Subnectuntur pro instructione Curatorum, seu curam animarum habentium Formula Testamenti, Literarum testimonialium Ban- norum proclamatorum pro Matrimonio contrahendo: boni status: Rescriptum de ponendo aliquem in possessionem: pro citatione: aliud item Rescriptum commune aliud per Notarium Apostolicum &c.*

*In fine additur, quam integram exhibemus,*

## DE PENITENTIA

### *Generalis instructio pro Sacerdotibus.*

**P**Lebanus in primis diebus Dominicis presertim ante magnas solennitates populum sibi commissum habet admonere, ut sepius peniteant: precepta Dei & ecclesie custodiant. Et in generali peccatores arguere, minari penas male agentibus, & premia recte viventibus polliceri.

Veniens autem quis ad penitentiam seu confessionem dicat presbitero, Benedicite, Et presbiter inquit. Dominus sit vobiscum & maneat in eternum, Amen. In nomine Patris. Sciat seu inquirat propriam conditionem artem vel industriam & modum vivendi ut facilius peccatis confitendis possit mederi: diligenterque presbyter inquirat a confitente secundum persone varietatem peccata usitata sigillatim, inusitata autem cum discretionem. & non nisi a longe per aliquam circumstantiam: ut expertius detur modus & materia confitendi, & eliciendi peccata, que habentur & latent in corde cuilibet generi confitentium. Discat prudenter consulere, & instruere, primo senibus qui pro consuetudine habent sensus exercitatos ad discretionem boni & mali: ut sobrii sint & pudici, atque prudentes & fani in fide: quia maledicitur puer centum annorum. perseveranter in dilectione & patientia. Robustioribus autem ut timeant Deum, de crastino non confidant, paveant projici in jehennam. Juvenibus simplicitatem servare, ocium fugere, juvenilia desideria temperare,

a turpiloquio abstinere, sobrios esse, tabernas abhorrere, pacem diligere, mores ad bonum convertere. Junioribus disciplinam diligere, parentes amare, ac eis obedire & honorem deferre, verecundos fore, ludos contemnere. Mulieribus doceant viros suos diligere, revereri, & timere, verecundiam & sobrietatem semper observare, preciosas vestes & inhonestas non appetere, domus curam gerere, non incarminatrices fore, castas & modestas existere. Servis autem suadeant Deum timere, obsequiis diligenter insistere, Magistros honorare, diligere & timere, fideles & sobrios esse, non rebelles sed patientes, humiles & obediens fore. Divitibus non superbire, sensu vel verbo nunquam superbe sapere. bonis operibus insistere: facile tribuere & communicare. Ne que pollident bona, perdant & eterna. Pauperibus aliena non concupiscere. sufficientiam & patientiam habere. laborare, operari. & ut pueri non sint. Curam gerere, fideles esse. & cum pauperes in terra, desiderant esse divites in celo. Summopere omnibus, peccata mortalia timere: causas & occasiones peccatorum fugere. virtutibus adherere. penas internales horrescere. fraternitatem diligere. unicuique jus suum reddere. forefacta restituere. neminem ledere. nec verbo nec opere. Prelatum suum revereri. Jura ecclesiastica conservare, decimas solvere. dominis obedire. Deum timere. ecclesiam diligere. Dei & ecclesie mandata custodire. & gloriam sempiternam concupiscere. Audiatque presbiter in ecclesia in loco eminenti confessiones. vultum mulieris non respiciens. omnes patienter audiens. veniam petentibus promittens. penas portabiles infligens. verbi gratia pro superbia humiliare. pro rixa & odio peregrinari. pro invidia egenis & ministris subvenire. pro avaricia pauperibus & locis piis elemosynas facere. pro gula jejuna. pro luxuria carnem domare. pro accidia bonis operibus diligenter insistere. Observetque tamen quisque Sacerdos, ne de majoribus peccatis sacrosancte Sedi apostolice, vel episcopo tantummodo reservatis quemquam absolvere, cum ejus potestas quoad hoc sit

sit ligata, videlicet de fractione voti, de perjurio solemni, de blasphemia in Deum & Sanctos, de homicidio, de peccato contra naturam, de adulterio, de defloratione virginum, de sortilegio, de heresi, de divinatione, de incestu, de injectione manuum in parentes. de oppressione & suffocatione parvulorum, de injectione manuum in Clericos: & aliis pluribus criminibus que inferuntur juri prohibito. Et in his versibus aliqua continentur. Unde versus:

Per Papam Clerum feriens, falsarius,  
urens

Solvitur. & quisquis audet celebra-  
re ligatus.

Symon si fueris. Sed fallit regula  
talis.

Impubes, monachus, mulier, vetu-  
lus, quoque pauper.

Janitor, hostilis tu revelabis eos.  
(Episcopo.)

Qui facit incestum, deflorans aut ho-  
micida,

Transgressor voti, perjurus, forti-  
legusque.

Sacrilegus, patrum percussor, vel  
sodomita

Et mentita fides, faciens incendia,  
prolis

Oppressor, blasphemus, hereticus  
omnis adulter.

Pontificem super his adcas, Clerum  
feriensque.

In mortis tamen articulo quorum-  
cunque peccatorum & excommunica-  
tionum a quocumque presbitero non  
deneganda est absolutio. Ab infirmitate  
vero convalescentes absoluti de quo-  
cumque criminum predictorum a non  
habente potestatem sciant episcopum,  
vel sanctam sedem apostolicam post-  
modum fore consulendum. Sed si quis  
fuerit excommunicatus ab homine:  
non potest corpus Christi, nec unctio-  
nem sanctam, aut sepulturam recipere  
tanquam catholicus, donec fuerit a  
suo excommunicatore absolutus. Et

dicat penitens, confiteor Deo. Presbi-  
ter, Frater vel Soror Misereatur tui  
omnipotens Deus & dimittis omnibus  
peccatis tuis perducatur te Jhesus Chri-  
stus Filius Dei vivi ad vitam eternam.  
Amen.

#### *Absolutio.*

Indulgentiam absolutionem & re-  
missionem omnium peccatorum tuo-  
rum, spatium vere penitentiae & emen-  
dationem vite, gratiam & consolatio-  
nem Sancti Spiritus paracliti & perseve-  
rantiam in cunctis bonis operibus lar-  
giatur tibi Pater pius & misericors Do-  
minus Amen.

#### *Oratio.*

Dominus noster Jhesus Christus,  
qui est verus absolutor omnium crimi-  
num, per suam sanctam misericordiam  
te absolvat: Et ego auctoritate michi  
commissa ab omnibus peccatis tuis mi-  
chi dictis, ore confessis, corde contritis.  
& negligenter oblitis: te absolvo, &  
restituo te ad Sacrosancta Sacramenta  
nostre sancte matris ecclesie. In nomi-  
ne † Patris & Filii & Spiritus Sancti  
Amen. Tunc dicat. Amice, vel do-  
mine & magister. . . vel aliter. . . In  
multis Deum offendisti: & tuam salu-  
tem impedisti. Caveas de cetero a pec-  
catis, & a laqueis dyaboli, & bonum  
facere studeas. Deus tibi concedat ut  
bona que fecisti & que facies in poste-  
rum, per Dei misericordiam conver-  
tantur in penitentiam & remissionem  
peccatorum tuorum Amen.

Tunc pro speciali penitentia quam  
levem secundum peccata tua tibi impo-  
nam. Tu dices sic & sic: & facies sic  
vel sic. Et injuncta penitentia, & a  
penitente suscepta dicat presbiter: Va-  
de in pace: & noli amplius peccare. ne  
deterius tibi contingat: Deus det tibi  
gratiam suam Amen.

*Tempus feriarum continetur in isto  
metro:*

Aspiciens. veterem. circum quasi quis  
benedicta.

*Ita editio antiqua Sæculi XV., cujus varissimo exemplari ex Bibliotheca Clarissimi Dni Pon-  
chel usi sumus, retenta, quam in eadem invenimus & scribendi & interpungendi forma.  
Ceteras vero Constitutiones deprompsimus ex recentiore Sæculi XVI. editione, asservata in  
Bibliotheca Ecclesiæ Cathedralis Tornacensis, singulari benevolentia Rmi Capituli nobis  
commodata.*

*Tomus VIII. Concilior. German.*

R r

SYN-

# SYNODUS LEOVARDIENSIS

Eodem Anno Christi MDLXX.

*STATUTA PRIMÆ SYNODI LEOVARDIENSIS  
sub Reverend. D. CUNERO PETRI a BROUWERSHAVEN, (\*)  
primo ejusdem Diœcesis Episcopo, assistentibus illi vigilantissimo Do-  
mino Dominico Bendixio, Pastore in Oldenbove & Canonico, ad suæ  
R. petitionem, atque Clarissimis Viris Doctore Petro a Fritema,  
M. Foccone Rommarts, Reg. Majest. Curiae Frisicæ Consilia-  
riis ad hoc deputatis, die mensis Aprilis vige-  
sima quinta. 1570.*

## P R Æ F A T I O.

CUNERUS PETRI, DEI ET APOSTOLICÆ SEDIS GRATIA EPISCO-  
PUS LEOVARDIENSIS, UNIVERSIS ET SINGULIS DOMINIS PRÆLATIS, PRÆPOSITIS,  
ARCHI-DIACONIS, DECANIS, PRIORIBUS, ET PASTORIBUS QUIBUSCUNQUE  
PER JURISDICTIONEM NOSTRAM OCCIDENTALIS FRISIÆ, SALU-  
TEM IN DOMINO SEMPITERNAM.

**T**Ametsi quæ Sacro Concilio Tri-  
dantino decreta sunt, generatim  
sufficiant, ut in recta fide vitam omnes  
honestam transigamus; pro antiquo ta-  
men aliarum Diœcesium more necessa-  
rium erat, ut etiam quæ pro nostræ  
Diœcesis statu, particulatim viderentur  
expedire, quibusdam Statutis decer-  
neremus: partim ea, quæ in magno  
illo & celeberrimo Concilio statuta sunt,  
me-

(\*) Ad Leovardiensem Episcopalem Sedem, a Paulo IV. Papa institutam, nominatus qui-  
dem Episcopus fuerat Remigius Driutius, ab adeunda tamen ejusdem possessione  
cum temporum iniquitate fuisset impeditus, Brugenſium Præſul consecratus fuit.  
Vide, quæ de illo diximus *Tomo præcedente pag. 802.* ad primam Synodum *Brugen-*  
*sem*, anno 1571. sub ipso celebratam.

Non diu post autem, cum sopito factionum æstu, serenior aliquantulum rerum facies  
apud Leovardienses appareret, eadem in Sede primus Episcopus collocatus fuit  
Cunerus Petri a Brouwershaven, Zelandus, Ss. Theol. Doctor, ac Lovanii antea  
Decanus ad S. Petrum. Pontificale munus suscepit anno 1570. 1. Februarii, ac  
mox insequenti mense Aprili ejusdem anni hanc Synodum celebravit: cujus Statuta,  
Lovanii eodem ipso anno Hieronymi Wellæi typis excusa, hic damus. Multa dein  
alia ad Cleri sui populique salutem pertinentia salubriter instituit, nullam, quoad  
præfuit, veri Episcopi, sedulique Pastoris partem prætermittens. Verum non  
diu illi pacato, Pastoralibus his insistere officiis licuit: Nam post octo annorum  
decursum, invalescente rursus factionum vi, occupataque a Fidei Catholicæ ho-  
stibus Leovardia, captus, Harlinganæ arci inclusus, dein post biennii captivitatem  
sua Sede spoliatus, totaque Diœcesi ejectus fuit. Ita exul ac profugus Monasterii  
Westphaliæ aliquamdiu substitit, Suffraganei munere functus. Quod reliquum  
fuit vitæ, Coloniae apud Ubios exegit, ubi Sacras Literas publice interpretatus est.  
Multa pie, doctæque conscripsit, ac typis tum Lovaniensibus, tum Coloniensibus  
vulgavit. Novitatum omnium præsertim in doctrina & dogmatibus fidei osor  
acerrimus fuit, earumque Authoribus tum verbis tum scriptis egregie se se oppo-  
suit. Operum ejus elenchum vide apud *Franc. Foppens Bibliotheca Belgicæ Tomo I.*  
Ærumnis confectus obiit Coloniae anno Christi 1580. die 15. Februar. Ætatis anno  
quadragesimo nono, in Templo Metropolitano ad aram SS. trium Regum humili  
sarcophago conditus. Vir & vita longiore & fortuna meliore dignus.

*Joann. Bapt. Castillon. in Sac. Belgii Chronolog. P. II. Franc. Foppens L. cit.*



memoriæ causâ inferendo, partim quæ pro loci & temporis ratione judicata sunt, convenire, juxta ejusdem Concilii Tridentini sententiam addendo. Neque enim quisquam eo consilio hæc edicta existimare debet, quasi ex iis, quæ augustissima illa Synodo statuta sunt, hæc sola observari velimus: ea enim velut bases & fundamenta, quæ nullius autoritate convelli possunt, hic præsupponimus, eoque inviolata ab omnibus juxta publicationem nuper factam servari cupimus. Itaque pro munere Divinitus Nobis incumbente, & cura, quam pro totius Diocesis salute mandato Apostolico gerere tenemur, tum hæc, tum illa omnia, vobis omnibus & singulis servanda in Domino præcipimus. Hortantes, ut Divini

præcepti memores, sincera conscientia, sine præjudicio in alteram partem declinando ea custodiat; scientes, quæ a Præpositis Ecclesiæ constituuntur, Dei autoritate a Vicariis suis constitui, ideoque non humana, sed Divina præcepta censi debere. Quibus non propter iram, aut ex necessitate, sed propter conscientiam parendum est. Sive enim Deus, ait præclarus ille (\*) Ecclesiæ Doctor, sive homo Vicarius Dei mandatum quodcunque tradiderit, pari profecto obsequendum est cura, pari reverentia deferendum. Datum Leovardiæ, 25. Aprilis 1570.

CUNERUS PETRI, de BROU-  
WERSHAVEN, Episcopus  
Leovardienfis.

## INDEX TITULORUM.

- I. De Synodo.
- II. De Sacramentis in genere.
- III. De Baptismo.
- IV. De Confirmatione.
- V. De Eucharistia.
- VI. De Pœnitentia & Confessione.
- VII. De Extrema Unctione.
- VIII. De Ordine.
- IX. De Matrimonio.
- X. De Purificatione Puervarum.
- XI. De Vita & honestate Clericorum.
- XII. De Beneficiis.

- XIII. De Exequiis.
- XIV. De Religiosis.
- XV. De Templis & Cemiteriis.
- XVI. De Hæreticis & Apostatis.
- XVII. De Ludimagistris.
- XVIII. De Aedituis.
- XIX. De Testamentis.
- XX. De Decanis.
- XXI. De Libris.
- XXII. Mandatum de Apostatis.
- XXIII. Mandatum de Presbyteris.
- XXIV. De Monialibus.

## STATUTUM I.

### De Synodo.

**S**tatuimus & ordinamus, ut singulis annis, feria tertia post Dominicam *Cantate* Synodus celebretur: ad quam omnes Prælati, & qui curam animarum habent, in habitu Ecclesiastico comparebunt.

### II. De Sacramentis in genere.

Cum Sacramentorum administratio res sancta sit, ideoque sancte tractanda, meminerint, quibus ea commissa est, ut magna cum reverentia, gravitate, in statu gratiæ, sobrii & pru-

dentes, ea administrent: cumque in omnibus rebus pro pace & tranquillitate debeat esse legitimus ordo, Statuimus & ordinamus, ut nemo curam animarum habens, cessante periculo extralimites suæ Parochiæ Ecclesiastica Sacramenta administrare præsumat, absque Pastoris loci licentia speciali. Ubi tamen Ecclesiam vacare contigerit, poterit implorari ministerium proximi Pastoris.

Item mandatur, ut Pastores nullum usurarium ad Sacramenta admittant, nisi usuras restituere voluerit & promiserit. Similiter nullum hæreticum, aut alium publice facinorosum, sine legitima pœni-

(\*) Bernardus de præcepto & præcepti dispensatione.

pœnitentia & confessione, ad Sacramenta, vel sepulturam Ecclesiasticam admittant, sub pœna suspensionis ipso facto incurrendæ.

### III. De Baptismo.

Quia maxima est Sacramenti Baptismi necessitas, injungitur sub pœna arbitraria omnibus curam animarum habentibus, ut subditis suis præcipiant, ut ipsi diligenter curent, ut iustantes quam citissime a die partus ad Ecclesiam baptizandi deferantur, serioque suos adhortentur, ut quos sciunt parvulos suos ad Ecclesiam non mittere, sine dissimulatione Pastori suo, vel Decano, vel Episcopo denuncient, scientes se gravissime reos futuros in Judicio Dei, qui hac ratione proximum suum perire sinunt. Porro quibus administratio hujus Sacramenti committitur, curent, ut illud cum omnibus Ecclesiæ solitis cæremoniis administrent, ac verba illa, sine quibus Sacramentum non perficitur, videlicet: Ego baptizo te in nomine Patris, & Filii, & Spiritus Sancti, tractim & perfecte pronuncient, quæ in casu necessitatis cum ablutione aquæ sola sufficiunt.

Proinde fontem ipsum consuetis temporibus consecrent, & mundum servant. Chrisma quoque & Oleum Sacrum semper honesto loco custodiant.

Item præcipitur, ut secundum Decretum Sacri Concilii Tridentini, unus tantum, sive vir, sive mulier, vel ad summum unus & una, baptizatum de Baptismo suscipiant, inter quos ac baptizatum, & illius patrem & matrem spiritualis cognatio, Matrimonium impediens, & initum dirimens, contrahitur.

Volumus etiam, ut diligenter in usu retineatur, quod nomina baptizatorum cum nominibus susceptorum & parentum, fideliter describantur.

### IV. De Confirmatione.

Doceant Pastores frequenter suos subditos, & instruant de fructu & utilitate Sacramenti Confirmationis, quod sicut Baptismus iterari non potest: monentque, ut adulti non nisi jejuni ac confessi a suo Episcopo id petant, ad-

juncto sibi aliquo, qui confirmandum sustineat: inter quem & confirmatum, confirmatique patrem & matrem, sciant contrahi cognationem spirituales, quæ Matrimonium contrahendum impedit, & dirimit contractum.

Item, quando ferendum est Chrisma, volumus, ut non nisi a Sacerdotibus, sine convivio & sumptibus adferatur. Feretur autem deinceps feria sexta post Pascha ex Leovardia, & feria septima sequenti ex Bolsuardia.

### V. De Eucharistia.

Præcipitur omnibus Sacerdotibus sub pœna excommunicationis ipso facto incurrendæ, ut Sanctam Eucharistiam non nisi ex legitima materia, id est, pane azymo, & vino naturali, de vite expresso consecrent. Et si quis in Missa non serio consecrare, aut Sacram Communionem non recipereprehenditur, præter suspensionem ab officio, arbitraria pœna gravissime punietur.

Item Decani diligenter advigilabunt, ut Pastores sancte & reverenter mysteria hæc pertractent, mundo & honesto loco asservent, præsentem semper lumine. Et quando ad ægrotos deferunt, ea gravitate & honorificentia id fiat, quæ tantæ Majestatis præsentia digna sit.

Singulis mensibus hostiæ pro infirmis servatæ renoventur.

Nemo in mortale peccatum lapsus, sine Sacramentali confessione hæc sancta contingere audiat.

Nullus Sacerdos, nisi horis suis Canonicis ad Primam usque prælectis, celebrare præsumat. Et in toto officio devote, humiliter & graviter se gerant, nec fabulas ullas cum quoquam admisceant, donec Missa sit persoluta.

Observent Decani, & corrigant eos, qui in Festo Paschæ a Dominica Palmarum usque ad octavas Paschæ non communicant, vel etiam diebus Festis Missam non audiunt.

### VI. De Pœnitentia & Confessione.

Doceant Pastores, ut subditi, contrito corde, integre confiteantur omnia pecca-

peccata mortalia, quorum post diligentem sui discussionem memoriam habent, una cum circumstantiis, quæ speciem peccati mutant, vel multum aggravant, specificando quantum fieri poterit, quoties in illa inciderint, ut pro qualitate delictorum salutaris pœnitentia imponatur.

Observent etiam, ut non nisi in Ecclesia palam & publice, præterquam in articulo necessitatis, confessiones excipiant.

Provideant etiam, ne quæ salutem subditorum, aut confessionem haud concernunt, admisceantur, & maxime ne a confitentibus, aliorum nomen & fama lædantur.

Inprimis vero caveat Confessarius, ne confitentem, aut ejus peccata, quovis signo aut nutu quoquo modo prodatur, sub pœnis a Sacris Canonibus constitutis, & ne ullo modo in absolutione principalia verba omittat: Ego te absolvo a peccatis tuis in nomine Patris, & Filii, & Spiritus Sancti.

Item statuimus & ordinamus, ut omnes semel in anno suo proprio Sacerdoti confiteantur, vel, si alicui alteri cupiant confiteri, ab eo licentiam petant, vel saltem testimonium ad eum deferant, quo de legitima confessione constet: quod qui non observant Decani corrigant.

### VII. De Extrema Unctione.

Pastores sæpius, & maxime apud infirmos ex Apostolo Jacobo declarent, quam salutare infirmis sit Sacramentum Extremæ Unctionis. Et omnibus suis subditis, qui annum decimum quartum attigerunt, præcipiant, ut quoties in gravem aliquam infirmitatem, unde timetur mortis periculum, inciderint, statim curent se hoc Sacramento, præmissa confessione, muniri.

Qui vero notabili tempore infirmus fuerit, &, vel confiteri, vel hoc Sacramento inungi non periverit, loco sacro non sepeliatur.

### VIII. De Ordine.

Nemo ad Tonsuram Clericalem & Ordinis Sacramentum, nisi secundum

præscriptum Concilii Tridentini, & ad Sacros Ordines, nisi debite confessus, accedat.

### IX. De Matrimonio.

Statuimus & ordinamus, ut ad Matrimonium, præcedentibus secundum Decretum Concilii Tridentini proclamationibus, procedatur, idque non nisi sub Missæ Sacrificio, palam in Ecclesia, præmissa confessione celebretur.

Item, ne quis per ignorantiam decipiat, bis in anno populus illius Decreti admoneatur, quod nullum Matrimonium ratum est, quod aliter, quam præsentente Parocho & duobus testibus contrahitur.

Noverint etiam Pastores, & diligenter observent Matrimonii impedimenta, quæ subiectis versibus solent comprehendere:

*Error, conditio, votum, cognatio, crimen,*

*Cultus disparitas, vis, ordo, ligamen, honestas,*

*Affinis, si jura pari nequeat persolvere sueta.*

Deinde magna habeatur ratio extraneorum, ne, qui alibi forte conjugati sunt, nostros adulterio commaculent. Quapropter ad conjugium non admittantur, nisi proclamationibus in iis Parochiis factis, ubi quatuor postremis annis habitaverunt.

### X. De purificatione puerperarum.

Volumus antiquam Ecclesiæ consuetudinem in usu retineri, ut mulieres post consuetum tempus, aut saltem triginta dierum spatium a partu, solenniter in Ecclesia compareant, acturæ gratias Omnipotenti Deo, & prolem suæ Bonitati per merita Gloriosæ Mariæ Virginis commendaturæ.

### XI. De Vita & honestate Clericorum.

Meminerint Clerici, ut secundum doctrinam Apostoli, in omnibus se præbeant exemplum bonorum operum, in pietate, in doctrina, in integritate,



in castitate, & sobrietate, nequaquam laicorum more conditionis suæ oblici incedant, sed sine barba cum tonsura & habitu Clericali, ab omni levitate, choreis, aleis, lusibus illicitis, ac negotiis sæcularibus, mercatura & servilibus abstineant: potationes & comestationes vitent: tabernas non nisi necessitatis causa ingrediantur.

Curent etiam summa diligentia, ut templa, altaria, locus Sacræ Eucharistiæ, Chrismaris, fontes, ornamenta, & alia, quibus in Divino Officio utuntur, munda & integra sint.

Præcipitur etiam omnibus Clericis, sub obtestatione Divini Judicii & pœna maledictionis æternæ, ne concubinas aut suspectas mulieres in domo vel extra detineant, aut cum eis consuetudinem habeant: & contra eos secundum formam Concilii Tridentini sine dissimulatione procedatur.

Item, ne aliter de Sacramentis, aut aliis Ecclesiæ dogmatibus doceant, quam Sancta, Catholica, & Romana Ecclesia, ac Sacrum Concilium Tridentinum tradit, sub pœnis arbitrariis, & a Sacris Canonibus constitutis.

Item, si quis in Sacris constitutus, aut Beneficiatus Horas Canonicas non legerit, per privationem fructuum, & ipsius beneficii, adversus eum procedatur, & multo magis contra eos, qui Sacra, Conciones, aliaque debita officia non persolvunt.

Rursus, si quis in turpe ebrietatis vitium inciderit, prohibemus sub pœnis arbitrariis, ne ipse prostridie celebrare audeat, & Decanis injungimus, ut super hoc diligenter invigilent.

Quum vero accidit, quod deplorandum est, Clericos suæ vocationis oblitos, postposito timore Dei, non aliter vixisse, quam si Matrimonio juncti fuissent: Præcipimus sub gravissimis pœnis, ne prolibus in Baptismo, aut nuptiis solennitas aliqua per ipsos adhibeatur.

Item, volumus, & juxta Decretum Sacri Concilii ordinamus, ut ante decimum quartum annum nemo Ecclesiasticum beneficium obtinere possit: qui etiam Horas suas Canonicas legere, ton-

suram & habitum Clericalem deferre teneatur, sub pœnis in Sacris Canonibus constitutis.

## *XII. De Beneficiis.*

Item statuimus & ordinamus, nominationes ad Pastorum, vel alia beneficia, fieri debere sine pacto aut pollicitatione dandi, vel accipiendi: neque nominati ad aliquos sumptus obligentur, Symposia, quæ in iis fieri consueverunt, sub gravibus pœnis arbitrariis penitus abrogantes. Quod etiam in electionibus Decanorum volumus observari. Statuentes, ut nominationes & electiones per unum & alterum deferantur nominato.

## *XIII. De Exequiis.*

Item volumus exequias, septenarium, trienarium, & anniversarium juxta antiquam Ecclesiæ consuetudinem & patriæ morem, sicubi exoleverint, in usum revocari, & diligenter observari. Jura quoque, Ecclesiæ vel Presbyteris antiquitus post tricesimum diem debita ex consuetudine, sicuti & alia universa jura, integre persolvi.

## *XIV. De Religiosis.*

Inhærentes iis, quæ a Sancto Concilio Tridentino de Religiosis sunt constituta, volumus inviolabiliter observari: Ut nemo aliquid sine sui Superioris consensu habeat, aut retineat, sed quicquid vel dono, vel quacunque alia ratione receperit, Superiori exhibeat, ejusque discretionis & distributioni committat. Et ut Sacræ Virgines, quarum pudicitiam Christus nimium æmulatur, nunquam mixtim cum viris, sed separatim comedant & bibant.

Perversum quendam abusum, quo Monasteria Divino cultui dedicata, aliquando tabernarum more ad symposia & comotationes eliguntur, detestantes, prohibemus, ne extra horam prandii & sine naturali necessitate, alimentorum aliquid sumatur.

Item irreligiosum quendam abusum abolentes, Præcipimus, ne qui Sacerdotum demortuorum domos (ut fieri solet) potaturi aut comestaturi irruant,

irruant, aut quicquam faciant, quod Christiano luctui adversetur, sub gravi pœna arbitraria, invocato, si opus sit, brachio sæculari.

Hortamur in Domino Prælatos, ut dispensationis suæ memores, utiliter bona Conventus ad communem utilitatem expendant. Et præcipimus, ut computum singulis annis legitime factum Episcopo exhibeant.

Caveant etiam, ne bona Conventus, repræsentata pecunia, in notabile Successorum præjudicium elocentur.

### *XV. De Templis & Cœmiteriis.*

Statuimus & ordinamus, ut Tempia ac Cœmiteria ad nullos prophanos usus applicentur. In Templis juridica exercitia non habeantur, Cœmiteria non elocentur, nec a bestiis depascantur. Quod si quis in Templis sub Divino Officio, aut in Cœmiteriis sub concione, aut summa Missa deprehenditur ambulare, duobus stuferis singulis vicibus, invocato ad hoc brachio sæculari, mulctetur.

Festa & Vigiliæ volumus juxta antiquam Ecclesiæ consuetudinem observari, in quibus Pastores populo serio præcipiant, ut integram Missam audiant, neve ante benedictionem Sacerdotalem exeant. Ab operibus servilibus, negotiatione & mercatura abstinuant, officinas claudant, & non nisi usui humano necessaria sobrie vendant.

### *XVI. De Hæreticis & Apostatis.*

Decani & Pastores diligenter advigilabunt, & a fide dignis læpius investigabunt: An inter subditos aliqui sint Hæretici vel Apostatæ, quos summo studio, quanta possunt cum modestia & charitate studebunt ad Ecclesiam & ordinem suum reducere, eosque ordine Evangelico denunciabunt Episcopo.

### *XVII. De Ludimagistris.*

Mandamus & præcipimus, ut Pastores, locorum Præfecti, & Aeditui diligenter curent, quo Scholam, & ho-

nestum Ludimagistrum in suo loco habeant, qui fidem in manu Episcopi sit professus. Et juventutem in timore Domini & rudimentis Catholicæ fidei instituat. Quod ut expeditius fiat, & firmitus observetur, ordinamus, ut singuli immobilium possessores unum aureum viginti stuferorum in singulis pagis ad tam pium ac necessarium opus erogent. Et electio (salva examinatione & admissione Episcopi) & destitutio (cum consensu & requisitione Episcopi præcedente) sit penes Pastorem, loci Præfectum, Nobiles & Aedituos.

### *XVIII. De Aedituis.*

Aeditui singulis annis legitimum computum illis exhibeant, ad quos de consuetudine pertinet, & nequaquam suum Pastorem excludant.

### *XIX. De Testamentis.*

Præcipimus, ut intra anni spacium a morte testatoris pro ejus voluntate satisfiat, alioqui anno finito ad Nos executio deducatur.

### *XX. De Decanis.*

Decani advigilabunt, ut omnes suo officio legitime perfungantur: omnes excessus & defectus, transgressiones præceptorum Ecclesiæ, Statutorum Concilii Tridentini, & hujus nostræ Synodi, sine dissimulatione corrigantur: ita tamen ut causas criminales & matrimoniales ad Episcopum referant. Et, si in aliis negligentiam eorum Advocatus Fiscalis prævenerit, studium ejus locum habeat.

### *XXI. De Libris.*

Quod ad libros attinet, volumus inviolabiliter sub gravissimis pœnis observari Indicem, a Patribus Concilii Tridentini auctoritate Sanctissimi, & mandato Catholicæ Majestatis, cum appendice jam proxime editum & publicatum.

### *XXII. Mandatum de Apostatis.*

Decani nostro nomine requirent & hortabuntur omnes, qui ab Ordine Sacer-

Sacerdotali, vel Professione monastica defecerunt, ut intra sex septimanas ad suum quisque ordinem & statum revertatur; alioqui, limites nostræ Diocesis, invocato ad hoc brachio sæculari, egredi compellantur. Idem etiam hærensis denunciari volumus, ut ad Ecclesiam Catholicam, accepto a Pastoribus consilio, quam citissime revertantur.

### XXIII. Mandatum de Presbyteris.

Mandatur omnibus, qui se Presbyteros asserunt, ut legitimo docu-

mento de ordine suo & consecratione Decanis fidem faciant, qui ad Episcopum una etiam cum suis transmittant.

### XXIV. De Monialibus.

Porro Sanctimonialis, juxta Sacrum Concilium, a Monasterio non exeant, nisi ex legitima causa ab Episcopo approbata. Neminem etiam intra septa Monasterii sui admittant, sine ipsius Episcopi, vel Superioris licentia in scriptis obtenta.

FINIS.

Ex editione Lovaniensi apud Hieron. Wellæum. A. 1570.



## SYNODUS DIOECESANA OLOMUCENSIS

Anno Christi MDXCI. Innocentii IX. Papæ I.  
Rudolphi II. Imp. XVI.

### *Acta & Constitutiones Synodales Diocesis Olomucensis.*

#### LITERÆ INDICATIONIS & CONVOCATIONIS SYNODI.

STANISLAUS PAWLOWSKY, DEI, ET APOSTOLICÆ SEDIS GRATIA Episcopus Olomucensis, Princeps, Regalis Capellæ Bohemiæ Comes, Sacræ Cæsareæ Majestatis Consiliarius. Universis, & singulis Reverendis, Venerabilibus, Honorabilibus, Religiosis, Devotis, Discretis, in Christo Nobis Charissimis, & sincere Dilectis, Dominis Decano, & aliis Cathedralis Ecclesiæ nostræ Olomucensis Prælati, & Canonicis, Abbatibus, Præpositis, Prioribus, nec non Collegiatarum Ecclesiarum Prælati, & Canonicis, atque tam ejusdem Cathedralis nostræ, quam Collegiatarum Vicariis, Altaristis, Choralistis, Præbendis, Parochiis, & aliarum quarumvis Ecclesiarum Rectoribus, Sacellanis, Concionatoribus, Ludimoderatoribus, & aliis quibusvis Ministeria Ecclesiastica in Diocesi nostra quomodocunque obeuntibus, Salutem in Domino sempiternam.

**P**astoralis officii, in quo nos Dominus posuit regere Ecclesiam suam, simul & ipsa temporum nostrorum ratio, a debita gregis fidei nostræ commissi cura & solitudine, minime nos quiescere fuit: quin potius urget ac admonet, ut ea, quæ ex re & utilitate ovium nostrarum futura cognoscimus, vigili studio prosequamur. Et quia ad fidelis populi in orthodoxa Religione, Christianaque

pietate eruditionem, vix magis opportunum, & efficax dari posse videtur medium, quam si illi, quos ad docendum alios Divina Bonitas e populo sublato, in altiori dignitatis, Sacerdotii nempe gradu collocare est dignata, non solum verbo, & doctrina, sed etiam inculpta & a terrenarum rerum contagione vacua vitæ salutari exemplo, subjectis sibi populis præire, & splendida virtutum omnium face



face praelucere summo animorum conatu intendant: equidem disciplinae Ecclesiasticae in Clero nostro reformandae, Sanctaeque Religionis Catholicae in Diocesi hac nostra propagandae causa, Synodum Diocesanam, cujus habendae summa necessitas etsi mentem nostram graviter hucusque semper sollicitam reddidit, temporum tamen calamitas, & communis boni promovendi non exigua, omnibusque perspecta moles, conatibus ea in parte nostris obstitit: tandem aliquando, auxiliante Domino, studiumque nostrum ad Divini sui Nominis gloriam, cultusque sui instaurationem, missi e Calis auxilio, in viam salutis populi nostri, & futurae prosperitatis dirigente, celebrandam constituimus. Quemadmodum per praesentes nostras Literas, eandem Synodum, hoc anno, die duodecima Novembris, Divo Christiano, & Fratribus Patribus nostris Sacra, festum Divi Martini immediate sequutura, in Cathedrali nostra Olomucensi Ecclesia, feliciter auspice Deo incibandam, & duobus sequentibus diebus continuandam atque absolvendam, indicimus, intimamus, convocamus, & decernimus: paterne monitos, & per viscera misericordiae Dei nostri fraterne oratos volentes, omnes & singulos exemptos, nostrae vero jurisdictioni immediate subiectis, auctoritate ordinaria in virtute sanctae obedientiae mandantes, ut Olomucii, pro Divi Martini Festo, omnes & singuli congregentur, ac demum die sequenti ad sonum campanae, in Cathedrali nostra conveniant, & personaliter compareant, iis, quae in utilitatem Ecclesiarum Diocesis nostrae per Nos in praedicta Synodo salubriter proponantur & statuantur, interfuturi, nostrosque pro orthodoxae Fidei augmento, in disciplinae Ecclesiasticae instauratione, ex munere Pastoralis officio, susceptos conatus, consiliis suis pro parte sollicitudinis adjuturi. In quo etsi omnes supra scriptos faciles, obediens, & meritos sese exhibituros, atque pro die praefixa ad Synodum conventuros non ambigimus: si qui tamen ordinariae auctoritatis contemptores, bonique publici atque officii sui minus memores, legitimis non obstantibus impedimentis, ex mera negligentia, aut contumacia (quod absit) dictae Synodo personaliter interesse, vel per Procuratores suos legitimos, impedimentorum causas sufficienter probare neglexerint; sane pro eo ac Sacrorum Canonum jubent Decreta, contra tales, tanquam contumaces, & inobedientes, per censuras Ecclesiasticas, aliasque penas Canonicas debite processuri sumus. In quorum fidem haec Literas manu propria

Tomus VIII. Concilior. German.

subscriptas, sigillique nostri appensione roboratas, in vulvis Cathedralis nostrae Olomucensis affigi, & per districtus Diocesis nostrae, ad omnes Praelatos, & alios quosque Clericos per Archidiaconos eorundem districtuum mitti mandavimus. Datae in arce nostra Cremfiriensi die XIII. Octobris, anno Domini M. D. LXXXXI.

Quibus quidem Literis Indictionis, & Convocationis Synodi in Cathedralis Ecclesiae Olomucensis, nec non aliarum ejusdem Civitatis praecipuarum Ecclesiarum, demum & Brunae in Collegiatae Sancti Petri vulvis, alibique affixis, atque ad Praelatos tam saeculares, quam Regulares Marchionatus Moraviae, simul etiam ad Decanos rurales ac Parochos, aliosque, quorum intererat, opera Archidiaconorum districtuum transmissis, legitimeque intimatis: tandem Anno supra dicto M. D. LXXXXI. die XII. mensis Novembris, Indictione quarta, Pontificatus Sanctissimi in Christo Patris & Domini nostri, Domini Innocentii, Divina providentia Papae noni, anno primo, cum jam plurimi juxta Indictionis Synodi Literas ex Praelatis regularibus & saecularibus, Parochis, aliisque Clericis Diocesis Olomucen. pro Synodo habenda in Cathedrali Olomucensem S. Wenceslai Martyris Ecclesiam, ad sonum campanae convenissent, hora decima quinta praefatus Illustrissimus, & reverendissimus Princeps, Pontificalibus indutus, ad celebrandum solenni ritu Sacrosanctum Missae Sacrificium, ex Sacrario ad altare majus ejusdem Ecclesiae prodit, praecedentibus & ministrantibus in apparatu Levitarum, Reverendis Dominis, Magistro Mathaeo Strikovio, & Joanne Martini, Canonicis praedictae Cathedralis Ecclesiae, nec non aliis quatuor Clericis, Levitarum quoque habitu indutis, Venerabilibus Dominis, Joanne Schidlovino, & Michaeli Regulino, ejusdem Ecclesiae Honoris Vicariis, atque Joanne Schemelka, Canonico Cremfiriensi, praedicti Illustrissimi Domini Sacellano, ad insulam, pedum, & gremiale ministrantibus: Missa itaque solennis, operante Sacris ipsomet Illustrissimo Principe, de Spiritu Sancto, cum commemoratione Festi Sanctorum Christini, Benedicti, Mathaei, Joannis, atque Isaac Patronorum Moraviae; cantata fuit. Qua debite peracta, post Benedictionem Episcopalem populo datam, praefatus Illustrissimus Dominus ad Sacrarium rediens, casula deposita, pluviali ex materia aureis filis, & serico rubro contexta indutus, rursus ex Sacrario ad altare majus Ecclesiae progressus est, & in faldistorio ante idem altare praeparato, sub infula confedit. Populo deinde per Promotores Synodi admonito, ut ad partem secedens, Ec-

S s

clesia-

clesiasticis viris locum daret, seque Sacerdotibus non immisceret, loca convenientia Admodum Reverendis Dominis, Decano, totique Capitulo Olomucensis Ecclesiæ, nec non Reverendo Patri Bartholomæo Villerio Societatis Iesû, Provinciali, aliisque ejusdem Societatis Patribus, ad cornu Evangelii; Admodum vero Reverendis Dominis Abbatibus, Præpositis, Prioribus, Provincialibus, & Monasteriorum Præfectis, aliisque Regularibus, quorum nonnulli, qui nimirum benedictionis munus jam receperunt, infulati, alii in solo duntaxat Religionum, Ordinumque habitu comparuerunt, ad cornu Epistolæ: in inferioribus vero scabellis in medio, Decanis ruralibus: extra Chorum autem minorem, Parochis, & aliis Clericis, per eosdem Promotores assignata fuerunt. Quo factò Illustrissimus Princeps assurgens, flexoque poplite exorsus est Antiphonam: *Exaudi nos Domine.* Choro ad finem usque prosequente; demum cantati sunt Psalmi, Litanie, & Orationes, juxta præscriptum libri Pontificalis Romani. Quibus finitis, Reverendus D. Mathæus Strikovius, Evangelium ex præscripto Pontificalis Romani cantavit, & tandem Illustrissimus Princeps incepit canere Hymnum: *Veni Creator.* Prosequente Choro, & Clero universo. Absolutis tandem cæremoniis solitis, Illustrissimus Princeps in Faldistorio confedit, una & omnes Prælati loca sibi assignata occuparunt. Cæterum antequam ad Synodaliū ulteriorem progressum procederetur, Admodum Reverendus Dominus Eggerdus a Schwoben, Abbas Welegradensis, Ordinis Cisterciensis assurgens, facta Illustrissimo Principi debita reverentia, protestationem solennem interposuit, nimirum *se in Statutis Ordinis sui Cisterciensis habere, ut si quando Abbates ejusdem Ordinis ad Synodos Diocesanas veniunt, solemniter protestentur, se id non ex debito, (cum exempti sint ab Ordinariorum jurisdictione, & soli Sedi Apostolicæ immediate subiecti) sed ad paternam invitationem Ordinariorum facere, proindeque præjudiciū aliquod privilegiis exemptionis suæ, tali facto fieri, aut renuntiare iisdem privilegiis non intendere, ideoque se etiam sollemniter de tali exemptione protestari, atque ut protestatio Actis Synodalibus inferatur, petere instanter.*

Tunc Illustrissimus Dominus adhibitis ad consiliū super dicta protestatione, Admodum Reverendis Dominis Decano, & aliis Prælati, atque Canonicis Ecclesiæ Olomucensis, nec non aliis Abbatibus, Præpositis, Prioribus, Provincialibusque Ordinum, ac per Reverendum D. Joannem Jergerum, J.

U. Doctorem, Scholasticum Olomucensem, & Canonicum Brunensem, Cancellarium suum, Synodique præsentis primum Promotorem, responderi fecit prædicto Domino Abbati Welegradensi, nempe:

*Celsitudinem ipsius Illustrissimam protestationem ipsius, una cum Dominis assidentibus, diligenter expendisse, eamque supervacaneam visam, vel eo nomine, quod ipsimet Domino Abbati probe constaret, se per Literas Indictionis Synodi, una cum aliis exemptis, ab Illustrissimo Domino non citatum, sed amanter & paterne invitatum, ac monitum saltem fuisse, ut pro die statuta ad Synodum veniret. Illustrissimum porro Dominum, non ignorantem, quid exemptio Ordinis Cisterciensis secum ferat, quid etiam Sacrorum Canonum, & Sacri Concilii Tridentini Decreta, in hoc puncto statuant: non cogitare quidem Privilegiis Sacri Ordinis Cisterciensis præjudiciū aliquod facere, quin potius eundem Ordinem, pro pietate sua, sortum tectum conservare malle, suæ tamen jurisdictioni, & auctoritati Ordinariæ legitime exercendæ, nulla ratione deesse posse, proinde hanc protestationem Domini Abbatis insinuari Actis Synodalibus permittere, valituram in tantum, quantum de jure valere potest.*

Hoc responso accepto, Dominus Abbas Welegradensis, Illustrissimo Principi, & Sacræ Synodo prolixis verbis gratias egit. Ac demum Illustrissimus Princeps ad omnes, qui Synodo intererant, conversus in hæc præfatus est verba:

### *Allocutio Reverendissimi ad Clerum.*

**F**Oeliciter sane mihi & vobis omnibus [Fratres in Christo Charissimi, vosque cæteri Confacerdotes Nobis sincere dilecti] hodiernus illuxit dies. Quod enim antætorum temporum injuria, pro communi Sanctæ Catholicæ Religionis in Diocesi hac nostra propagandæ & conservandæ bono, ex voto nostrum omnium hucusque ad optatum finem & exitum minime deduci potuit: id utique Divino aspirante Numine hodie faustis inchoari auspiciis videmus, subindeque pie in Domino exhilarati, bonam in spem erigimur, conventum hunc nostrum communem, orthodoxæ Religionis promovendæ, nec non disciplinæ Ecclesiasticæ revocandæ, tam profuturum esse, quam ardentibus votis hætenus bonis omnibus, eum jam pridem experitum fuisse non ignoramus. Ut enim quælibet bene instituta Respublica tam diu in floren-

florenti statu perseverare solet, quam diu sanis civium suorum regitur consiliis, communibusque omnium indigenarum studiis juvatur: ita quoque Ecclesiastica hæc nostra, propter regale, quod gerit, Sacerdotium, aliis quibusvis dignior, & officii amplitudine augustinior, nisi eorum, penes quos rerum omnium summa versatur, frequentibus juvetur consiliis, dubium non est fore, ut neglecto & penitus everso bono, debitoque ordine turbetur, eaque turbata inde tandem incommoda proveniant, unde maxima sperari commoda debuissent: inde orientur scandala, unde salutis plurimorum medelam depromi: inde lapidem offendiculi evolvi contingat, unde certam honestatis Christianæ normam profluere, atque ad omnes derivari par fuisset. Consiliorum porro Ecclesiasticorum rationem universam, ut olim a primis nascentis Ecclesiæ exordiis, ex celebratissimis illis Sanctorum Patrum conventibus, quos Concilia hucusque vocamus, depromi solitam fuisse, nemini non constat: ita quoque calamitosissimo hoc nostro ævo nusquam saniora pro rebus Ecclesiæ Dei juvandis consilia peti posse quisque intelligit, quam ex Synodis: quas vel ea potissimum de causa Sedis Apostolicæ & Sacrorum Conciliorum Generalium autoritas, singulis annis per Dioceses quasque haberi decrevit, ut in iis, conventu Patrum facto, id quod tam crescentibus in domo Dei bonis promovendis, quam orientibus scandalis radicibus extirpandis & evellendis, aptum est, communicatis consiliis indagari, & reperiri queat. Atque utinam in Diocesi hac nostra tanta non fuisset temporum iniquitas, ut non minus aliquot Prædecessoribus nostris, quam nobismet ipsis, Pastoralem, quam indigni gerimus curam, ea quoque in parte, quæ annuas Synodos de jure celebrandas spectat, sine gravioribus impedimentis, distractionibus variis, & publicarum occupationum mole non obstante, exercere integrum fuisset. Aliam enim nunc forte rerum faciem in patria hac, ratione augmenti Sanctæ Catholicæ Religionis videremus, neque tanto dolore ob dissolutionem Cleri nostri vitam, moresque incompósitos Sacerdotum afficeremur. Nam quonus quisque veltrum est, quæso, qui vel conscientia propria teste, palam fateri non ausit, defectibus, scandalis, & excessibus hisce, quos partim circa negligentem cultus Divini, Sacrorumque administrationem: partim circa vitam ipsam & mores in Clero Diocesis hujus nostræ videre est, sicut ansam præbuisse tam diu intermissam visitationum & Synodorum celebrationem, ita etiam emendationem & correctionem, nihil aliud, quam Sacra ejusmodi Concilia afferre posse? Magnis proinde, alacribusque ani-

mis nos ad primam hanc Synodum, duce & auspice Deo, pro sælici aliarum, Christo Domino adjuvante, celebrandarum ingressu, ferri, & properare operæ precium est, & pro sublevando calamitoso isto Religionis orthodoxæ statu, maxime necessarium, ut quod totus Christianus orbis admirabili animorum consensione, devitandorum errorum causa, & veritatis retinendæ studio, est complexus, nos quoque communem Ecclesiæ sensum secuti, pro eo, ac fideles Christi, Sanctæque Matris obedientes filios decet, amplectamur. Jam vero communia Patrum nostri ævi consilia ad normam exactissimam veterum Conciliorum, quæ Catholicæ Ecclesiæ censura, & autoritas approbavit, gravissime in rem totius Ecclesiæ Dei, in Sacro Oecumenico Concilio Tridentino expressa, isthucque tam ad veram fidem, quam ad mores Cleri, & vitæ honestatem, adeoque ad omnia munia Ecclesiastica rite obcunda pertinentia, optimo ordine per Canones & Decreta comprehensa esse, quis non videt? O sælix Tridentum, cui vel id calamitosissima hac tempestate solatii obrigit, ut tot doctissimorum pene ac piissimorum totius Orbis Christiani Virorum, de rebus gravissimis, nimirum de Summa Christianæ Fidei, deque aliis fidem ipsam, non secus, ac corpus quodque umbra sequi solet, concomitantibus, consultantium, deliberantium, ac tandem salutaria Decreta, Legesque saluberrimas figentium capax fieres, adeo ut in te Augustinissimus ille Conventus sæliciter, sancteque inchoatus, sælicissime quoque concluderetur. Sælicem Summum Romanæ Ecclesiæ Pontificem Paulum III. cujus auspiciis hic Conventus inceptus, non mediocre sub eodem & Julio III. sumpsit progressum, multo vero sæliciore Pium IV. quo Sanctæ Ecclesiæ clavum tenente, ad optatum finem, id Sacrum Concilium deductum fuit. Sælices quoque nos ipsos, qui alias inter errores variarum sæculi hæresum, in ipsorum hæresiarcharum ceu meditullio creditam nobis a Domino spartani, pro virili defendentes, non levia arma & tela retundendis adversariorum Dei, & Ecclesiæ ejus, impiis conatibus opportuna, ex Sacri hujus Oecumenici Tridentini Concilii salutiferis Decretis hausimus, & deprompsimus, ita, quod jam omni propemodum potentia hostium protrita, nihil aliud nobis curandum superesse videatur, quam ut salutari huic doctrinæ, quæ in dicto Tridentino Concilio sancte traditur, constanter inhærentes, id in usum (quod etsi pridem jam fieri debuisset, temporum tamen minime permisit calamitas) inducamus, inductum sanctissime servemus, ab omnibusque nostris tam in judiciis, quam in Sacramentorum administratione,



myfteriorumque Dei dispensatione accurate, & diligenter observari faciamus. Prima itaque hæc sit nostræ hujus Synodi in Dei præpotentis nomine in unum collecta, & coadunata voluntas, primariumque & immutabile consilium, ut Sacrosancta hæc Oecumenica & Generalis Tridentina Synodus, quam merito veræ fidei, & debitæ honestatis Magistram non injuria quisque dixerit, nobis posthac & credendi, & vivendi, certissimam præbeat normam & regulam, ita ut nisi fides cujusque ad examen ipsius subsistat, ædificium id, quod per eum struitur, in gehennam strui certo omnes existiment & sciant. De cujus quidem Sacrosanctæ Synodi & Concilii laudibus, etsi multa nobis dicenda forent, quia tamen fratrum nostrorum tanta est erga nos charitas, & observantia, ut ipsi quoque inter se labores, in hac Synodo obeundos, nobiscum partiendos, nosque sublevandos censuerint, eapropter hanc in sententiam Reverendum Decanum Ecclesiæ nostræ, non minus graviter, quam diserte, ad vos verba facturum, attentis benevolisque animis audiat, paternæ cupimus, atque hortamur: inque hac Synodo nullis præcedentiæ, aliarumve rerum ambitionem redolentium quæstionibus motis, ea una nobiscum statuere conemini, quæ nobis omnibus, ordinique nostro, inprimis vero cultui Divino instaurando, & Catholicæ Religionis promovendæ, nec non disciplinæ Ecclesiasticæ reformandæ, necessaria, & opportuna fore agnoscimus, quotidianaque experientia deprehendimus.

Fine dicendi per Illustrissimum Principem imposito, Admodum Reverendus Dominus *Melchior Pirnesius a Pirn, Artium, & Philosophiæ Doctor, Ecclesiæ Olomucensis Decanus, & Wratislaviensis Canonicus*, consensu Cathedra ex opposito Cyborii collocata, de Sacrosancto Concilio Tridentini laudibus, Orationem habuit, cujus tenor est, ut sequitur:

### ORATIO.

**E**St quod tibi gratuler, Illustrissime Princeps, & Reverendissime Antistes, STANISLAE, de hujus ornatissimæ coronæ, atque confessus, quem præsentem adesse cernis, summa erga te observantia, ac integerrima fide. Quanti enim te ille faciat, quanti Decreta & Mandata æstimet tua, hoc suo adventu non obscure testatur. Anne vides, quam ad primum edictum, ne dicam unicum nutum tuum, facilem, promptum, obedientem se exhibuerit, & privatis emolumentis, commodis, sacris juxta atque profanis negociis relictis, huc advolaverit,

de Ecclesiæ S. progressu, de sua ac commissarum ovium salute, de Dei Opt. Max. honore, ac gloria promovenda, atque propaganda, tua auditurus consilia, omnemque sollicitudinem, curam & cogitationem, ad Sanctissimæ Religionis nostræ dignitatem tuendam, tecum traducturus? An ego, Præsul Amplissime, Solem te alterum dicam? ad quem unum, tot Religiosissimi Domini, Abbates, & Monasteriorum Præpositi, & ex cætera Sacerdotum, atque Parochorum turba, tot egregii viri, tanquam sydera quædam circumfusa, oculos, & ora converterint, a quo clarissimam salutaris doctrinæ hauriant lucem? An te eum esse palam faciam omnibus, in quem natura parens, suas effuderit opes, ut esses huic Dicecesi admirationi, & ornamento, quemque Deus hoc calamitoso sæculo, & tibi gloriæ, & Ecclesiæ suæ præsidio, & huic universo gregi voluerit esse exemplo. Verba tibi dare merito possum videri, nisi Cærus hic lectissimus, hanc suam erga te propensionem, hanc cum tua voluntate conspirationem, hoc instaurandæ ecclesiasticæ disciplinæ commune studium, hac sua alacritate, & ad satisfaciendum tibi promptitudine testaretur. Gratulor & vobis Charissimi Confratres, de tanta Venerabilium Patrum, Religiosorum Virorum, ac piorum Sacerdotum frequentia, quibuscum de Marcomannæ Dicecesis instauracione, communibus suffragiis, ac votis, præsto esse possitis, easque calamitates, atque pericula, quibus tantum non est obruta, cum communi Pastore, ac parente Illustrissimo Principe nostro, propulsetis. Atque utinam multo plures amantiissimi Parentis literis invitati, huc una convenissent, sperassemusque, telephia hæc vulnera, ad intima usque præcordia, S. Religionis inflicta, tot tantorumque virorum prudentissimo consilio, & præsentissimo auxilio, brevi persananda. Sed neque animum despondeo prorsus: tamen enim hostes nostri, omnia Divina pariter, ac humana jura miscere, & tantum non terram cum cælo committere moliantur, aderit tamen, uti optamus, afflictiis, & pene jam desperatis Religionis S. rebus, præpotens Deus, qui in medio se affuturum spondit, ubi duo, aut tres, in ejus nomine fuerint congregati. Aderunt & hujus Augustissimi Templi, Clementissimi Parroni, & Tutelares, tuque inprimis Sancte Christine cum Fratribus tuis, quorum hodierna die annuam memoriam solenni ritu celebramus, qui Sanctissimis suis precibus, apud Deum, strenue, conatus nostros promovebunt. Alacri igitur animo, spe pleni, in eam omnes curam, pro virili nostra incumbamus, ut quæ in hac Sancta Synodo, ab Illustrissimo & Reverendissimo Præsule nostro,

ex

ex ipsissimo Concilii Tridentini fonte, proponitur, maturo, ac prudenti consilio, expendamus, expensa acceptemus, acceptata exequamur, atque perficiamus. Et ut ad certum quasi scopum, studia vestra, & cogitationes collimare possitis, illud vobis, hoc loco in memoriam revocandum videtur, quod Ss. Concilium Tridentinum Sessione XXIV. de Reformatione, Capite secundo, præscribit, de tribus potissimum Capitibus, in Provincialibus, ac Diocesanis Synodis tractandum esse: de moderandis Cleri moribus, de corrigendis excessibus, & de controversiis componendis. Vos igitur ad hæc tria, vestra omnia revocate consilia & ordinate, certo certius persuasi, his tribus recte constitutis, tres præcipuas malorum omnium lernas, quæ Dei Ecclesiam, & Sanctæ Religionis nostræ puritatem contaminant, pessundant, evertunt, vos confecturos. Facisset enim illico omnis morum turpitude: corrigentur, aut etiam penitus tollentur, gravissimi plerique in Divino cultu excessus, ac corruptelæ: discordiæ, ac lites omnes, adhibita æquitatis trutina, sopientur, ac conquiescent. Denique scandala omnia, ex Dei Ecclesia profligata, exulabunt: Est, fateor, id quod dico, si miseram horum temporum conditionem, & calamitosum istius Diocesis statum spectemus, difficile, laboriosum, arduum, & ceu humanas excedens vires; nisi sublimior Dei sapientia, ac bonitas, quæ jam ante piis conatibus Majorum nostrorum, nunquam defuit, promptum, & expeditum remedium demonstrasset. Solebant autem Religiosissimi Prædecessores nostri, in omnibus fluctuantis Religionis periculis, calamitatibus, impressionibus, ac procellis, ad cœlestem imprimis confugere præsidium, & æstuantem DEI Opt. Max. iram, piis restinguere lachrymis. Deinde vero, antea vitæ nuncio remisso, severiorem illam, unanimi consensu morum revocare disciplinam, ad placandam Divinam indignationem, hanc vel solam sufficere existimantes. Hac sane, gravissimi Patres, & nobis via est progrediendum, his vestigiis insistendum, hoc Thesei filo, ex tanto abusu, corruptelarum, & periculorum labyrintho evadendum, hoc vel hostium nostrorum, quotidie nobis occidunt, & inculcant voces. Quam sæpe illos audimus, illud usurpare, & repetere: Fides antiqua, mores antiqui; quorum ut primum illud est nobis gloriosum, ita & illud posterius, infame est, & probrosum. Significant enim his illi verbis, se non propter aliud, ab antiqua fide descivisse, quam ob nostram a veteri disciplina, ac sanctissimis moribus, & institutis, quæ nobis Majores nostri, quasi certam, & firmam hære-

ditatem reliquerunt, defectionem. Quod etsi diffiteri nequeamus, inique tamen tanti sui sceleris culpam, in aliorum depravatos mores transferunt. An quia me vident militem ignavum, illis transtugas, & proditores esse licet? Quia ambitiosus ego, illi paricidæ esse volunt? Quia veterano laboro ego, in Deum blasphemi illi esse pergent? Quia gubernator dormit aliquando, & qui in navi feruntur, profligatis sunt moribus; illi ideo totam navim perforabunt? Quia cives plerique improbi; civitatem totam hostibus diripiendam tradent? Miseros & infelices, ne dicam stupidos illos, qui hæc intelligentes, ob aliquorum in Clero depravatos mores, ab Ecclesia Dei se præciderunt, & ex sancto ejus gremio profugerunt! Sed quamvis horum stupiditas, & hebetudo, helleboro potius, quam argumentis est corrigenda, nec eorum hoc probum, apud Deum momenti quicquam habet. Nos tamen expostulationem eorum, tacitas quasdam Dei voces, per adversarios nos monentis, & excitantis, existimare debemus: cum his illi machinis, in perniciem aliorum utantur, & præsertim imperitæ multitudinis aures, & animos percellant, atque in ruinam, & præcipitium, impellant: ut si quid in sacratis personis deforme, sordidum, corruptum in moribus, ac a conditione, ac sui status dignitate abhorrens videant, illud curiosissime notatum in angulis, in circulis, in templo, in foro, rudi plebeculæ obtrudant, & inculcent: maledictis, & probris incessant, & insultabundi invehantur, multisque verborum phaleris, ac mendaciorum plaustis amplificent, & modo tuti suos errores tueantur, quacunque tandem arte omnes simul Catholicos in odium inducant.

Hæc itaque, ut illis arma, & quasi Herculi clavam, extorqueamus, addiscenda est rursus vetus illa, & severior disciplina, vitæ integritas, & sanctimonia procuranda. Memoria repetite per Deum jam illud vitiis hominum invalescentibus, lectissimis Ecclesiæ membris usu venisse, quod in speciosa, & scite quidem depicta tabula, quæ nitorem suum, & pulchritudinem primam, sensim amiserit, quæ si non denuo repingenda, ad minus certe situ, & squalore deterso, est instauranda, & quod fuit fœdatum, & obscuratum, rursus est innovandum, & collustrandum. Renovemus ergo & nos vitam nostram, ut ubi hostes in eam oculos conjecerint, se deceptos misere intelligant, & erubescant. Vincemus mihi credite, vinceamus eos, hac bona vitæ demonstratione, nec arma illis solum, sed & captivos, & spolia, adimemus. Ne autem quenquam vestrum illa perturber, aut deterreat molestia, quæ in rebus arduis aggrediendis, magis quam

prosequendis, ac superandis, multorum animos languidos, & desides, efficere solet, ut nimirum non desit ad perficiendum, certa ratio, ac norma; eam ego vobis in præsentia offero lubens, non ex cerebro, aut ingenio meo, quod tantæ supellectili construendæ impar est, depromptam, sed in Sanctissimorum, simul ac Doctissimorum Patrum, ditissimo Archivo, admirabili Sancti Spiritus opificio elaboratam. Offero, inquam, vobis, celeberrimi illius Sacrosancti Oecumenici Generalis Concilii Tridentini, Sanctissimas Leges, Statuta & Decreta, ad quæ vos, tanquam certissimam amullim, & lesbiam regulam rectissimam, omnes functiones vestras, & mores, exigere valeatis. Ad illud Concilium amplectendum, ego vos provoco, & mecum invito, Patres gravissimi, quo vix ullum aliud Majorum nostrorum, & nostra memoria fuit, vel Authoribus, vel Promotoribus, vel Assessoribus augustius, gloriosius, illustrius.

O bone DEUS, quæ in illo adfuit gentium, populorum, nationum multitudo, & varietas? qui Episcoporum ex toto orbe delectus? quæ Pontificum, & purpuratorum Patrum Majestas? quæ Theologorum medulla? qui flores Academiarum? quis Christianorum Principum, & rerum publicarum splendor? Celebratum est autoritate, & auspiciis trium Pontificum Sanctissimorum, Pauli III. Julii III. Pii IV. & quidem studio & opera duorum Augustissimorum, & Inviictissimorum Imperatorum Caroli V. & Ferdinandi, qui tanquam Ecclesiæ Romanæ Primogeniti, & præcipui Advocati, illud omnibus modis tutati sunt, & promovenerunt.

Actum autem ab Illustrissimis Cardinalibus sex, quatuor Pontificiis Legatis, tribus Patriarchis, Archi-Episcopis triginta duobus, Episcopis ducentis viginti octo, Abbatibus quinque, Ordinum Ministris septem, Sacrosanctæ Theologiæ Doctoribus, Episcoporum Procuratoribus, Principum, & Rerum publicarum Legatis pene innumeris. Inter quos tanta fuit unitas, ac consensus judiciorum, ac voluntatum, ut merito fateri debeamus, isthic adfuisse multitudinis credentium cor unum, & animam unam, populum & civitatem labii unius, & eorundem sermonum, Deum ipsum pacis, & dilectionis, qui arctissimo vinculo, flagrantissimi sui amoris, per diversitatem linguarum cunctarum gentes in unitate fidei, congregavit. In hujusmodi igitur loco a tot, & tantis, ac talibus viris, frustrane conventum agitatum, dissertatum, & per viginti fere annos defudatum putaris? Nunquid eis defuit ad suum munus peragendum, vel facultas, vel fides, vel voluntas?

Facultas certe deesse non potuit Viris doctissimis, prudentissimis, ac multo rerum usu, ac experientia cumulatis. Sed nec fides, propter quam illi præstandam, domos, patriam, amicos, seipsos, suæque omnia Ecclesiæ Dei consecrarunt, & devoverunt. Multo vero minus defuit illis voluntas salutis animarum, & Dei gloriæ amantissimis, cupidissimis, sitientissimis, quorum propterea non pauci ut hanc suam erga Ecclesiam fidem, observantiam, & obedientiam testarentur, morte eam oppetita consignarunt. Nosne adhuc dubitabimus, eos omnes vires, ac nervos intendisse; ut Ecclesiasticam disciplinam, pædore, squalore, & pulvere obsitam, pristinae integritati, flori, ac splendori, restituerent; id quod infirmum erat, consolidarent, quod ægrotum, sanarent, quod contractum, alligerent, quod abjectum, reducerent, quod perditum, quærerent; Præterea, vacillantium fratrum animos confirmarent, probitatem complectentes impellerent, sub onere fluctuantes sublevarent, omnes vero Spiritu lenitatis, & mansuetudinis, patientia, alacritate & constantia, tanquam fortissimi Antesignani, & Duces præirent. Fecerunt sane, & quidem diligenter id omne, quod ex suscepti oneris officio illis incumberebat: & revera, se nulla alia de re magis, quam de commodis nostris laborasse, & sollicitos fuisse, declararunt: cum se Patres esse intelligerent, de hoc solum cogitabant, ut liberorum saluti esset prospectum: cum infirmitates nostras animadverterent, se vere Evangelicos Medicos esse agnoverunt, & ideo oleum, & vinum, corporis nostri vulneribus, & scissuris infuderunt: cum Pastores, ovium curam susceperunt, ad pascua pingua deduxerunt, a luporum, & aprum insultibus, & incursionibus nos liberarunt. Cum viderent cadentem, & labentem Rempublicam, officii sui esse existimarunt, ut tanquam Arce Noe, & Templi Dei Architecti, eam erigerent, fulcirent, sustentarent. Sunt plurimi fateor, insignes Authores, qui spartam sibi commissam, ut ornarent, de corrigendis Ministrorum Ecclesiæ moribus, & languore, docte, acute, enucleate, satis disseruerunt; verum hoc apud me certissimo est persuasum, nullum unquam privatum Doctorem, atque Scriptorem, aut tot in Ecclesiæ corpore nævos, aut tam dissidentium populorum, quot sunt in Ecclesia mores, ac instituta, aut tam convenientia grassantibus in membris Ecclesiæ morbis remedia observare, intelligere, providere potuisse, atque Sacrosancti Concilii Tridentini Sanctissimorum Virorum oculos lynceos, experientiam, judicium, sapientiamque pene Divinam. Ubi, quæso, enim alias unquam quid officii



officii Pastor, quid ovis, quid Prælati, quid subditus, quid Sacerdos, quid populus, quid cælebs, quid conjugii vinculis astrictus, quid Clericus, quid Laicus agat: quas functiones legitime obire, quas curas suscipere, quas consuetudines admittere, quas leges exsequi, quos duces in via sibi spirituali proponere, sequi & assequi liceat, clarius, luculentius, locupletius fuerit demonstratum. Tantum non digito Concilii Tridentini Patres monstrant. Nec id sane mirum, nam Concilium fuit Generale, Universale, & Oecumenicum: fuit mandato Summi Pontificis convocatum, & inceptum, & ejusdem Sedis Apostolicæ, prout fieri debet, & solet, autoritate confirmatum: in eo, ex totius Orbis Christiani Regnis & Provinciis, tantus Prælatorum, & Præsidium Ecclesiæ numerus, quantum ad hoc satis erat, extitit, ut hoc etiam nomine, primis illis laudatissimis superioribus temporibus celebratis Conciliis, merito queat comparari, & annumerari. Non in eo, ut in aliis sæpe, unius, aut alterius hæresiarchæ saltem, sed varii variorum pertinaces errores, opiniones impiæ, & monstriosi partus: neque duntaxat in una, sed in diversis, iisdemque difficillimis, & abstrusis subjectis per innumerabiles Canones sunt notati, in lucem producti, damnati, & anathematizati. Hinc datus campus latissimus, & horrea refertissima aperta Ss. Theologiæ Doctores, & Juris Canonici Professoribus, in quibus jucundissime exspaciari, & quantum perplaceret, de humidissimo cæli rore, & de tritico purissimo, sibi sumere possunt. Nonne huic rei Institutiones, & compendia, ipsum denique integrum juris, ut vocant, Canonici Corpus, a Gregorio XIII. Pontifice Max. maximo cum commodo bonorum omnium, nuper editum, nobis testimonio esse possunt, dum videmus, in hac, ad regimen Ecclesiæ apprimè necessaria disciplina, horum temporum, personarum, etiam locorum aliquorum habita ratione, quasdam Constitutiones sublatas, & antiquatas, quasdam enucleatas, quam ante, traditas, & explicatas, plurimas vero, de novo in hoc Concilio edidas, in jus illud Canonicum ex Capitulis de Reformatione, translatis, & insertas, ad quarum præscriptum, nostra hæc præsens debet regi, atque, qui in sortem Domini vocati sumus, merito instrui vici. Sed ad contemplanda altiora ascendamus, nec solum Concilio Tridentino nobis, ut hæretici falso fabulantur, de dignitate nostra speciose tuenda, non etiam, & multo quidem magis, de animæ salute, perpetuæque felicitate adipiscenda provisum esse putetis. Vos ego Sacratissimos, Sacratissimi Verbi, & eloquiorum Dei interpretes interrogo: utrum non vestra

dogmata, & Christianæ doctrinæ capita, post examina Sacrarum Scripturarum, hoc magis, & frequentius, quam ullo alio adstruitis, & approbatis Concilio. Vos, inquam, Theologos alloquar, nonne disputationes vestra acutissimæ, conciones eloquio superiori ferventissimæ, & eruditissimæ Lectiones vestra, quas in Universitatibus profitemini, & scriptis etiam libris publicatis, magna ex parte hujus Sacratissimi Concilii fundamentis, atque locis innituntur: ex quibus validissimis sumptis argumentis, fraudes, atque dolos adversariorum detegitis, ipsamque perspicuam, & illustrem veritatem, aperte, & vere, in hoc Concilio applicatam atque definitam, docetis? Nonne hinc etiam liquido apparet, quod hoc Concilium, & ipsismet hæreticis, si modo voluissent, aut vellent, fructum magnum allaturum esset? Nam cum variis inter se ipsos opinionibus digladiantur, nec omnino in omnibus adhuc conveniant, facile, si æquissimum hujus Concilii judicium agnoscere vellent, dissidiis, & controversiis illorum, debitus finis imponeretur. Quod si enim purum Dei Verbum, quis Scripturæ Sacrae germanus sensus, atque consensus, quis controversiarum nodus, atque status, ab hac collocata in eminenti loco cathedra, verissima sententia, a qua quidem appellare non licet, pro consolatione conscientiarum suarum, impartirentur? quam reverenter suscipere, & ei stare in omnibus, nonne satius foret, & magis ex re illorum, quam semper in incertum currere, umbras affectari, & dubio eventu de propriæ animæ salute periclitari? Novistis enim, quomodo exterminium, ejectionem, & sublationem de medio Israël, denique mortem ipsam Deus graviter denuntiet, & minetur istis, qui eorum, qui supra Cathedram Moysis sedent, & Domino Deo suo pro tempore deserviunt, mandatis & dictis, superbiæ vitio elati, obedire recusant. Quod ut propitius procul a nobis Deus avertat, hoc nobis curarum, & sollicitudinis pondus incumbit, ut hoc Concilium, quæ decet, pietate veneremur, illi nos permittamus, illi credamus, illud audiamus, illud secundum Deum ipsum vereamur: quæ de rebus Divinis illud sentit, sentienda, quæ de humanis præscribit, facienda, quæ prohibet, fugienda, sine ulla dubitatione statuamus. Statuamus & hoc, quod quæ semel sunt de consensu omnium constituta, ea non modo convellere, aut labefactare, sed ne in dubium quidem, amplius cuiquam revocare permissum esse. Quis enim non videt, quæ sit ex eo rerum & humanarum, & Divinarum confusio sequutura, si cuilibet arbitrio suo, secus aliquid de his, quæ in Conciliis constituta sunt, decernere fas esset?

quid

Quid fide nostra incertius? quid institutis mutabilius? quid futurum esset Ecclesiae statu perturbatus? quis dubitandi? quis inveniendi? quis quaerendi finis esset expectandus? Animadvertit id Sanctissimus Papa Gelasius, & propterea inquit: Patres nostri Catholici, Docti videlicet Pontifices, in unaquaque haeresi, quolibet tempore suscitata, quicquid pro fide, quicquid pro veritate, pro communione Catholica, atque Apostolica, secundum Scripturarum tramitem, praedicationemque Majorum, facta semel congregatione sanxerunt, id inconvulsam deinceps voluerunt, firmumque constare, nec in eadem hac causa denuo, quae praefixa fuerunt, retractare qualibet recenti praesumptione permiserunt, sapientissime providentes, quoniam si Decreta salubriter cuilibet liceret retractare, nullum contra singulos quosque errores stabile persisteret Ecclesiae constitutum, ac semper iisdem furoribus recidivis, omnis integra definitio turbaretur. Nolite ergo, inquit D. Augustinus, nolite esse ingrati tantae misericordiae Dei, quae per illam diligentiam nobis ministrata est: nulla exculatio jam remansit: nimium dura, nimium diabolica sunt hominum corda, quae adhuc tantae manifestationi veritatis obfistunt. Animadvertit hoc humanissimus omnium, & prudentissimus Imperator SIGISMUNDUS noster (domesticis enim libentius utor exemplis) ad quem ex Concilio Constantiensi reversum, cum Brunam Ordines, & Proceres Regni Bohemici, ad Regni gubernacula capessenda cum invitaturi venissent, atque inter alia Communionem utriusque speciei, iniquo animo Hussii & Hieronymi supplicium ferentes vehementer urssissent; Superfedete istis, inquit Imperator, chari Bohemi, nihil ad rem in praesens pertinentibus, quae non hic Brunae, sed potius Constantiae, dicenda erant, ubi ad ista omnia, vobis Concilium respondere potuisset: cujus si exemplum hoc tempore Reges, & Principes, qui ad gubernacula evocantur, aut rerum jam potiuntur, studiose imitarentur, minus certe haberent animi subditi, ut ab eis tanta cum instantia, & importunitate petere auderent, Augustanae, Vittembergensis, & nescio non quarum confessionum, ac confusionum, permissionem, praecidereturque hac ratione, perniciosissima illa, quod valde impium est, quidlibet impune credendi, aequa concessa potestas; Animadvertit hoc prudentissimus, & acerrimus in rebus dijudicandis arbiter, & Judex Sacratissimus Imperator FERDINANDUS, qui suis Legatis, a Tridento reversis, illis potissimum verbis, est gratulatus: Aluimus vos, inquit, in Schola optima, optima sane Schola, in qua Doctor ille summus, non aliis

discipulis, quam Apostolorum Successoribus suggerit, & communicat omnia, qui eo Spiritu edocti, nil nobis de proprio adferunt, nihil proponunt, nihil enarrant, nihil edocent, quam quod ab ipso audiverunt, intellexerunt, & a Patre largitore bonorum omnium, desuper est illis revelatum. Animadvertisti hoc ipsum, Antistes, & Princeps Illustrissime, cum tu quoque singulari ingenii tui bonitate, acumine, dexteritate, quod dixi, probe allequereris, intelligeres, agitares, & probares: Nunquam tamen haec tenus id, quod animo conceperas, fuit tibi facere licitum (injuria haec fuit temporis, & perversitas status praeteriti) nunquam pro tuo deliderio, & arbitrato concessum, ut tam locuples Spiritus Sancti Sacrarium, in hac tua Marcomannica Diocesi erigeres, tam necessariam, & utilem officinam, tuis subditis aperires, tantas Sanctissimorum, & Sapientissimorum Virorum merces ovibus tuis distrahendas proponeres. Non tua id, fateor, accidit culpa. Sed vicit tamen labor improbus, vicit tua patientia, vicit tuus constantissimus zelus, & id effecit, ut haec Moravica Provincia, quae circumjacentibus Regionibus, & Provinciis, a septingentis, & ultra annis, Authoribus, & Apostolis DD. Cyrillo, & Methodio, Fidei, & Religionis extitit Magistra, & Informatrix, hoc Sacrosanctum Concilium Tridentinum, si non primo, attamen non ultimo loco reciperet, & approbaret. Illud enim tu hodierna hac die in tuam Diocesim plenis velis, ac remis invehitum nemine penitus resistente, nobis universis, quos tua pastoralis regit cura, suscipiendum, & deinceps in omnibus (exceptis iis, quae speciali Sedis Apostolicae indulgentia innuerentur) serio praecipis, & demandas, observandum. Sit Nomen Domini in omnes aeternitates benedictum! Felicitas haec est tua, STANISLAE, ut quod tuis aliquot Praedecessoribus laudatissimis facere non licuit, id tibi, benigne spirante Dei aura, sit concessum. Favores enim Divorum, & hominum, ipsaque temporum momenta, deservire tibi videntur. Dicam breviter: *Ad res magnas natus es.* Quamobrem sicut mihi de te, Princeps Illustrissime, hoc persuasissimum est, quod haec ipsa a DEO Opt. Max. in te profecta cognoscas, atque propterea illi gratias immortales referas semper: sic etiam de vobis gravissimi Patres, & Fratres Observandi & Charissimi, nihil addubito, vos Sanctae Romanae, & Orthodoxae Ecclesiae, cujus Alumni, & Filii esse, & nominari vultis, vocem, monita, jussa, & decreta, quae nobis per Illustrissimum, & Reverendissimum Principem STANISLAUM, Filium suum charissimum, exhibet, & porrigit, summa alacritate, promptitudine, fide, obe-

obedientia, & observantia, quæ filios decet charissimos, obviis, ut ajunt, ulnis, complexuros esse, in quibus Ecclesiæ ipsius Matris vestræ, incolumitas, vestra perfectio ac dignitas, innumerabilium hominum salus, tanquam radius a Sole dependet, dubio procul, eam apud universam posteritatem vobis laudem, & nomen, comparaturi, ut præter vos, nullos alios in hac Diocesi, Ecclesiæ Dei, & salutis animarum amantiores, neque præteritis temporibus, neque præsentibus, fateantur extitisse omnes. Precor ergo CHRISTUM JESUM, Instauratorem vitæ, & salutis nostræ Vindicem Optimum Maximum, ut eam vobis omnibus mentem inspiret, eam suggerat alacritatem, eas vires suppediet, quibus tantopere exulceratis, & pene jam perditis rebus, dissensionibus nimirum in Religione, & in vita communi malis moribus, salutare auxilium & solatium, ex hoc præsentis in Christi nomine congregato conventu afferatis, Dixi.

Finita Oratione, Reverendus Dominus *Joannes Jerger*, Promotor Synodi, jussu Illustrissimi Principis ex eodem suggestu legit *Præfationem Synodi, publicationem Concilii Tridentini complectentem*, ut sequitur:

### P R Æ F A T I O.

IN NOMINE SANCTISSIMÆ ET INDIVIDUÆ TRINITATIS, PATRIS, ET FILII, ET SPIRITUS SANCTI, AMEN.

CUM Doctrina Christiana, ea parte, qua sua præcepta certa quadam methodo, modo, ac ratione tradit, humanis quibusque disciplinis non sit assimilis, necesse est, ut quemadmodum istæ, ita & illa, certa quoque ac propria principia habeat, a quibus & ortum suum, atque incrementa agnoscat, & simul arma oppugnandis, proterendisque hostibus necessaria, deprobat. Ista porro principia sunt, primo quidem ac maxime proprie, res omnes Symbolo Fidei Sanctorum Apostolorum traditæ, deinde ea universa, quæ Divinitus inspirati loquuti sunt Sancti Dei omnes. Quæ etsi primævæ originis, ab ipsis Apostolis deductæ, demum & firma Sacrorum Conciliorum, & Sanctorum Patrum autoritas, indubitata, atque certissima efficit: Non desunt tamen corruptissimo hoc ævo plurimi,

*Tomus VIII. Concilior. German.*

qui certas fidei doctrinæque Christianæ bases humanæ sapientiæ viribus evertere moliantur, quamque exquirere velle videntur doctrinam, ejus principia non minus impie & pertinaciter, quam imprudenter, & malitiose impugnant.

Quorum omnium principiorum (ut & ipsius legis) fundamentum ac Caput unum est *Christus Jesus*, Mediator Dei, & hominum, qui in sinu Patris existens plenitudine temporis adveniente, hæc omnia non quibusvis promiscue hominibus clarius revelavit, & uberius impertivit, sed præelectis tantum a se Apostolis, per quos etiam traditam cœlestem doctrinam in omnem terram sub Petro Principe disseminavit, iisdem docentium verbis, quos orbi universo assignavit, finibus constitutis. Licet autem per doctrinam hujusmodi eadem illa Ecclesia, quæ prius ab ipso met Christo Domino, super petram fundata erat, tantæ semper fuerit firmitatis, ut illi per milites suos certanti, fortiterque agenti, ipsæ portæ inferi non prævalerent, & infernus ipse victas manus daret; nunquam tamen inquietus humani generis osor, & capitalis hostis Satan ab illa oppugnanda destitit, excitatis etiam hac nostra ætate hominibus Philistæis, quorum armis unica hæc columba impeteretur. Sed qui sponsam suam ad exercitium tentari permisit Dominus, idem ille tentationem supra vires procedere haud passus, ut olim, ita quoque nostro hoc ævo, eidem cymbæ suæ, inter tot procellas & fluctus protervi maris graviter fluctuanti, ac periclitanti, jamque propemodum fessæ, præsens auxilium & remedium benigne attulit, est dignatus. In viris namque Apostolicis velut dormitans expergefactus, per Sacrum illum totius orbis Christiani Conventum, Tridenti nuper habitum, doctrinam a se olim Divinitus traditam, ita confirmavit, & stabilivit, ut non cæcutientium duntaxat Hæreticorum oculos ejus clarissima luce mirre perstrinxerit, verum etiam in densissima infidelitatis caligine, apud Antipodas viventes homines longe lateque illuminaverit, illamque ipsam credentium unitatem in una fide Petri restitue-

T t

rit,



rit, in qua olim prima Ecclesiæ suæ jecerat fundamenta. Quam fidem Nos STANISLAUS, Episcopus Olomucensis, sincero corde amplectentes, ac unicupientes, ut oves curæ nostræ creditæ, quarum plerasque non sine magno dolore nostro per errorum avia, furacium luporum multitudo ferri coegit, ad hanc Christi Domini & Dei nostri beneficio restitutam unitatem reducantur, in præsentia Reverendorum, & Venerabilium Fratrum nostrorum, Dominorum Decani, & Capituli Cathedralis nostræ Olomucensis, Abbatum, Præpositorum, Priorum, Collegiatarum Ecclesiarum Deputatorum, Archidiaconorum districtuum, Decanorum Ruralium, Paræciarum Rectorum, ac aliorum Sacerdotum, totiusque Cleri cujuscunque gradus, ordinis, & conditionis, in hac Synodo nostra Olomucensi congregatorum, de communi eorundem consilio, assensu, & astipulatione, exemplo Christi Jesu Dei, & Servatoris nostri, a quo fermento cavendum, quæve doctrina non sincera, & falsa vitanda esset, monentis, atque ut D. Mathæus scribit, confessionem veræ fidei ab Apostolis exigentis, tum etiam Sacris Legibus edocti, ac instituti, ut Summi Pontificis Pii IV. fel. rec. mandato, tanquam Filii Ecclesiæ obedientissimi, pareamus, in hac nostra prima Synodo, ad Majorem Dei Gloriam, nostrum omnium salutem, Sanctæque Orthodoxæ Religionis propagationem, felicitibus (quod Deus gloriosus benevertat & faxit) auspiciis inchoata, prompto & alacri animo, Sacrosanctum Oecumenicum, & Generale Concilium Tridentinum Sancte & reverenter palam recipimus, atque amplectimur, a Nobis, Successoribusque nostris, nec non universo Diocesis nostræ Clero, in judicio, & extra judicium sancte & inviolabiliter in posterum sine ulla exceptione vel tergiversatione servandum: Rati ex eo tanto certiores rite credendi, ac bene, honesteque vivendi normam nos deprompturos esse, quanto majori totius Christiani orbis consensu, Spiritus Sancti nutu, universa ejus Decreta novimus emanasse. Hujus itaque Sacrosancti Oecumenici Con-

cilii Tridentini Canones, & Decreta vobis omnibus præsentibus, qui Sancte, & religiose moniti, una nobiscum in ejusdem receptionem consensistis, sicut & aliis quibusque absentibus in præsentiarum proponimus, promulgamus, in usum inducimus, publicamusque, omnes & singulos paterne in Domino monentes, atque etiam in virtute sanctæ obedientiæ præcipientes, ut in posterum secundum eadem vos gere, inque munerum vestrorum ministeriis & officiis quam maxime iisdem conformare apprime studeatis: sicut & nos, ut ab omnibus Diocesis nostræ subiectis observentur, pro virili nostra, & quoad fieri poterit, curaturi sumus. Et si quæ difficultates super eorum executione subortæ fuerint, Reverendissimum, & Illustrissimum Dominum, ad Sacram Majestatem Cæsaream, Dominum nostrum Clementissimum, Nuncium Apostolicum, vel etiam ipsum Sanctissimum Dominum nostrum, Sedemque Apostolicam, si necesse fuerit, consulturi, atque earum declarationem, moderationem, & limitationem, quemadmodum id ipsum idem Sacrum Concilium Tridentinum indulget, (a) demisse petitori. In præsentibus vero nostra Synodo, in omnibus iis, quæ orthodoxam, Catholicam, Romanam Fidem concernunt Decreta, & placita ejusdem Sacrosancti Concilii Tridentini sine ulla hæsitacione amplexi, ea, quæ ad Cultum Divinum rite, & decenter peragendum, disciplinæ Ecclesiasticæ reformationem, & vitæ, morumque Cleri nostri correctionem, ex moderni status, & necessitatis Diocesis nostræ ratione pertinere visa sunt, inhærendo Sacrorum Canonum, & præfati Sacri Concilii Tridentini Decretis, nonnullas salutare Constitutiones sancientdas & edendas duximus.

Leſta Præfatione, & publicatione Concilii Tridentini facta, Illustrissimus Princeps, primam Constitutionem Synodalem per prædictum Promotorem Synodi clara voce ex loco eminentiore legi mandavit, Promotorque eam legit, ut sequitur:

CA-

(a) Concil. Trid. Sess. 22. de recipiend. & observand. Decret. Concilii.

## CAPUT I.

*De Professione Fidei ab omnibus  
facienda.*

**Q**uia corde creditur ad justitiam, ore autem confessio fit ad salutem, idcirco in hac nostra Synodo in primis statuimus, & decernimus, ut ad testificandam unitatem fidei, quæ in unica Christi Ecclesia statim ab ipso sui exordio invariabilis semper fuit, & ad finem usque sæculi post Beatum Petrum Apostolorum Principem continua Romanorum Pontificum successionem, secundum Servatoris nostri repositionem, eidem Petro factam, est duratura; universi, & singuli Prælati, alique Presbyteri, nec non reliqui Clerici, tam sæculares, quam Regulares ad unum omnes, qui Synodo huic interfuerunt, ex formula per Pium, felicitis recordationis Papam quartum præscripta, & edita, ante ulteriorem Synodali tractationem Fidei Professionem emittant, idque in locis coram personis per Promotorem Synodi demonstrandis, & assignandis.

Ejusdem quoque Sacri Concilii Tridentini innixi Decreto (b) statuimus, ut omnes & singuli Prælati, Canonici, Parochi, Presbyteri, Clerici tam sæculares, quam Regulares, nec non omnes, qui beneficia Ecclesiastica cum & sine cura animarum habent, vel habituri sunt: item Magistri, Licentii, Doctores, in quacunque Facultate promovendi, vel jam promoti, Scholarum Rectores, Baccalarii, Pædagogi, nec non ii, qui artem scribendi in lingua Bohemica, & Germanica, & Arithmericam in oppidis ac civitatibus profitentur: similiter & alii quicunque, qui munus alios verbo, aut scripto docendi, instituendi, & prædicandi habent, dictam Fidei Professionem, antequam ad exercitium suorum officiorum, dignitatum, & beneficiorum Ecclesiasticorum possessionem admittantur, emittere, omnesque ii, qui in Synodo Diocesana posthac convenire debent, idem facere teneantur.

Qua Constitutione perlecta, Illustrissimus Dominus, nec non Domini Prælati sæculares, & Regulares, alique omnes Clerici, qui Synodo interfuerunt, flexis genibus fecerunt Professionem Fidei, secundum formulam Bullæ PII Papæ Quarti, una omnes clara voce, præeunte in verba ejusdem Professionis Reverendo *Domino Georgio Sekera*, Sacræ Theologiæ Baccalario, Canonico Olomucen. dictæque Synodi altero Promotore, ac demum tactis Scripturis, singuli jurarunt in omnia contenta, in dicta formula Professionis Fidei, dicendo: *Sic me Deus adjuvet, & hæc Sancta Evangelia.*

Forma autem Professionis Fidei hæc est: *Ego N. firma fide credo, & profiteor omnia, & singula, quæ &c.*

Facta per omnes, & singulos Fidei Professione, jussu Illustrissimi Principis lecta fuit secunda Constitutio Synodalis per primum Promotorem, una cum Bulla PII Papæ Quarti, ut sequitur:

## CAPUT II.

*De Libris hæreticis & prohibitis  
non legendis, neque reti-  
nendis.*

**S**icut turpe, indecorum, & periculosissimum est, eum, qui militari obstrictus Sacramento, in bellum sine armis, tam proprii corporis defensivis, quam adversarii viribus retundendis nonnullis prodire: ita sane & Sacerdotem, ex cujus labiis Divinæ Legis requiritur scientia, opprobriosum & periculosum est, sine libris, qui contra spiritualia nequitia adversariorum humani generis tela, defensiones ac arma subministrant, in officio suo versari. Proinde statuimus, ut quilibet nostræ Diocesis Sacerdotum, & Clericorum sæcularium, & regularium libros Catholicos, & approbatos duntaxat, pro sui quisque captu ingenii, & officii ratione legat, omnes vero eos, quorum authores Sancta Mater anathematizat, & rejicit Ecclesia, & Sedes Apostolica, uti hæreticos, & erroneos, quemadmodum & Magicos, ac supersticiosos, nec non obscenos quosque fugiat, neque eos legere, aut retinere, sine expressa

(b) Sess. 23. Cap. 12. de Reform.

Tomus VIII. Concilior. German.

pressa Sedis Apostolicæ, aut nostra ejusdem Sedis autoritate, licentia in scriptis obtenta, sub pena excommunicationis ipso facto incurrenda præsumat.

Archidiaconi proinde districtum, visitationes facturi, diligenter Bibliothecas Sacerdotum perlustrabunt, & si quos prohibitos tam in indice librorum vetitorum, ex Decreto Sacri Concilii Tridentini edito, contentos, quam eos, qui postea emanarunt, & hucusque in lucem prodeunt, libros invenerint, auferent, atque contra eos, qui Decreto huic in abjiciendis talibus libris non paruerint, tanquam contumaces, & de hæresi suspectos, diligenter juxta tenorem Bullæ Pii IV. Pontificis Maximi, inquirent, procedant, & in eos animadvertant. Et ne forte ignorantia, etiam hac in parte, exultationem aliquibus, facile ad effugia quæcunque pronis pariat, mandamus, ut exempla Concilii Tridentini quisque Sacerdotum, & aliorum quorumvis Clericorum sibi emat, quo & salutaria ipsius Decreta ediscere, & librorum prohibitorum Catalogum, qui ad calcem ejusdem Concilii, una cum prædicta Bulla Pii IV. extat, ad manum semper habere possit, cujus Bullæ tenorem hic pro majori omnium cautela, & ejus rei evidentia subjici mandavimus.

*PIUS Papa IV. ad futuram rei memoriam. Dominici gregis custodia, Domino disponente, Præpositi, &c. Vide Tomo nostro VI. pag. 945.*

Absoluta lectione secundæ Constitutionis, & Bullæ prædictæ, Illustrissimus Princeps, peractis cæremoniis, admodum Reverendos Dominos Prælatos, tam sæculares, quam Regulares clara voce interrogavit, an illis placeat, ut primæ Sessioni finis imponatur: quibus respondentibus: *Placet*, alteram Sessionem, pro die crastina, nempe XIII. Novembris indixit, utque hora solita ad sonum campanæ omnes & singuli convenirent, injunxit: & antequam congregatio soluta esset, Judices Synodales, qui causas & controversias Cleri audirent, examina- rent, & sine Canonico terminarent, per Cancellarium suum publice nominari mandavit, nimirum admodum Reverendos Dominos, *Melchiorum Pirnesium*, Decanum:

*Joannem Styrenski a Styra*, Præpositum: *Theodorum Engels*, LL. Licentiatum, Archidiaconum & Officalem: *Ulricum Rittmannum*, J. U. Doctorem, Canonicum præfatæ Ecclesiæ Olomucensis. Qua publicatione facta, omnes discesserunt in pace.

## SESSIO SECUNDA.

**D**ie XIII. Mensis Novembris Admodum Reverendi Domini Prælati sæculares, & Regulares, Parochi, Presbyteri, alique Clerici, qui die præcedenti Synodo intererant, ad pulsum campanæ in præfata Cathedrali Ecclesia Olomucensi congregati fuere. Tunc Sacro Missæ Sacrificio ad summum Altare, per Admodum Reverendum Dominum Decanum Olomucensem, de Sancto Spiritu cantato, ac decenter solenni ritu peracto, Illustrissimus Princeps pluviali albo amictus, sub Pontificali infula, cumque pedo ex Sacratio egressus, altare majus accessit, sequentibus se Dominis Prælatiis sæcularibus & regularibus, singulisque loca sibi per Promotores assignata occupantibus. Tunc Illustrissimus Dominus incepit Antiphonam: *Propitius esto*, ut in Pontificali habetur, Choro prosequente: demum Hymnus, *Veni Creator*, cantatus fuit a Choro, & toto Clero, aliæque cæremoniæ, & orationes, juxta Pontificalis tenorem decenter sunt peractæ. Reverendus itaque Pater *Leonardus Rubemus*, *Societatis Jesu Theologus*, & *Seminarii Olomucen. Regens*, ex suggestu orationem habuit de officio Pastoris & dignitate Sacerdotali, in hæc verba.

## O R A T I O.

**E**T si verear, Reverendissime, & Illustrissime rerum Divinarum Antistes, Venerabiles, Reverendi, & Ecclesiastici Viri, cæterique Auditores, ne turpe sit, de officio Pastorum Ecclesiæ dicere incipientem, pertimescere; multa tamen sunt, quæ præter rei ipsius, de qua dicturus sum, excellentiam, mihi timorem hoc loco hodierna luce afferunt. Etenim video me corona confusus vestri cinctum amplissima, conspicio me antehac vix usitata Religiosorum Ordinum & Prælatorum frequentia stipatum, cerno complures pietate, vitæ & morum integritate, doctrina ipsa & dicendi facundia, me longe superiores adesse, ut me, si non perorantem, attamen balbutientem, vel lingua hæsitantem audiant. Ante oculos mihi versatur is, qui rem Ecclesiasticam universam per omnes Moraviæ fines, quasi in specula constitutus, cum spectata virtute, singulari doctrina, rara pietate, tum & ipsa specie corporis tuerur. Adest, qui ut agnoscat vultum

peco-



pecoris sui, & oves omnes suæ fidei concreditas, in suum ovile congreget, hanc Sanctam Synodum constituit, ut penitus introspiciat, vel quibus insidiis grex sibi commissus antehac petitus, vel certe quibus præfidiis a luporum rabie sepius in posterum esse queat. Dignæ Pastore, Præsule, Episcopo, Principe, partes. Quæ quidem omnia, nescio, quid dicenti horroris afferant, nescio, quam novi hujus judicii nova forma oratoris terreat oculos. Sed me recreat, & reficit, quod non mea, sed Illustrissimi Principis voluntate & arbitrio, hunc locum ad dicendum ornatissimum conscenderim, quæ res non periculum mihi, sed prælidium denunciat, neque solum, ut quieto, sed etiam ut magno sim animo, hortatur, neque auxilium modo orationi meæ, sed & benevolentiam, & silentium pollicetur. Fretus etiam vestro, cæteri Auditores, in me studio, omnem mihi attentionem pollicor, cum aliis de causis, tum vel maxime, quod de Sacerdotum & Pastorum munere sim verba facturus hic, ubi locus huic orationi datus ab amplissimorum Ordinum lætissimis Viris.

Ut vero rem hanc scitu dignissimam aggrediamur, id velim intelligant, si qui auditorum adsunt, vel qui minus huic Sanctissimæ Præsulum, & Sacerdotum coronæ faveant, vel omnino cum hæreticis sentiant, Ordines Sacros omnes in eo tantum consistere, ut sint Ministri, uti vocant, verbi, nos id, qua ii temeritate astruunt, eadem fidei constantia inficiari. Novimus nos in Ecclesia Pastores, Prælatos, Præpositos, Episcopos: novimus D. Paulum non tantum dicentem, *qui docet in doctrina*, [c] sed etiam subjungentem, *qui præest in solitudine*: novimus eundem hortatum Hebræos: *Obedite Præpositis vestris*, (d) *& subjacete illis, ipsi enim pervigilant, quasi rationem reddituri pro animabus vestris, ut cum gaudio hoc faciant, & non gementes*. Idem non tantum Ministros, sed & dispensatores Mysteriorum Dei requirit. Idem Mileri coacto Episcoporum Concilio, eos vel hoc nomine ad rem Ecclesiasticam digne administrandam cohortatus est, quod a Spiritu Sancto positi fuerint, regere Ecclesiam Dei. Age vero, unde initium administrationis hujus sument? Utrique a domo propria, & familia suæ fidei concredita. Hinc totam domum evertere oportet, cum muliere non carnali, sed Evangelica scopas adhibere, admoveere facies, illustrare focos, triclinia, cubicula, demum ædium angulos omnes, si quid latitare conspexerint, quod salutis tum propriæ,

tum aliorum obicem constituat, id scopis etiam adhibitis evertere, quo drachma perditum inveniat: videre, quos alant, qua fide, qua in Deum pietate & conscientiæ integritate, demum quibus moribus conspicuos. Itane vero? ita profecto. Si enim D. Paulus a vidua singularem domus gubernationem requirit, dum inquit: *Si quis [e] suorum, & maxime domesticorum, curam non habet, fidem negavit, & est infideli deterior*; quid a Sacerdote, quid ab animarum Præsule exiget, cum eum vult suæ domui bene præpositum, quod usque adeo necessarium ostendit, ut sine eo Pastor minime esse possit. *Si enim quis suæ domui præesse nescit*, (f) *quomodo Ecclesiæ Dei diligentiam habebit?* Erit is quidem Pastor, sed adumbratus, sed adulterinus, sed, ut cum Zacharia loquar, Pastor & idolum, non dissimilis moribus Sobnæ Præposito templi, quem Isaïas, jubente Domino, gravissimis verbis coarguit. Ut vero magna cum domesticorum, tum aliorum cura teneantur, quis ambiget necesse fore, ut Divino inprimis amore sint incitati, atque adeo inflammati? Etenim quid aliud, dum Filius Dei optimi Pastoris partes Petro detulit, tertio repetito sermone in eo expevit, nisi amorem Christi? Quo tertia quoque responsione confirmato, audit: *Pasce oves meas*. (g) Dignum te mearum ovium Pastorem, Apostolorum Collegio, imo universo terrarum orbi, renuncio, a quo non vereor, oves ad sanguinem emulgendas, non timco lanam una cum pelle tondendam, nedum viscera ipsa eruenda; verum, quem arbitror, anima & sanguine proprio, a luporum nefaria rabie oves meas vindicaturum, ac proinde te, uti prudentem, & fidelem mihi servum, supra familiam meam, Vicarium, Rectorem, & Pastorem constituo. Hinc illæ voces D. Pauli, omnibus Præsulibus dignissimæ, posita prius infinitorum pro Christi Evangelio susceptorum periculorum serie, *Quis, inquit, infirmatur*, (h) *& ego non infirmor? Quis scandalizatur, & ego non uror?* Nec hic amoris suo terminum, metamque figendam putat, nisi etiam alibi asserat, *se anathema futurum a Christo*, (i) *pro fratribus suis, qui sunt secundum carnem*. O quanta tibi D. Paule amoris, & exactorum certaminum gloria manet? Nobis vero, ut eandem cum D. Paulo assequamur, pari studio contendendum erit. Ac proinde e re nostra fuerit, ut omnibus iis negotiis, quæ vel specie ipsa nos ab animarum cura avocant, nuncium mittamus.

Jam enim, ■ querimoniam, assiduo  
T ■ 3 fletu

(c) Rom. 12.

(d) Hebr. 13.

(e) 1. Timoth. 5.

(f) 1. Timoth. 3.

(g) Joan. 21.

(h) 2. Cor. 11.

(i) Rom. 9.

fletu, lachrymisque dignissimam ! videre est plurimos, qui ordinis, dignitatis, & Magistratus sui obliti, iis negotiis, quæ olim, nec ipsis quidem, qui in Ecclesia erant contemptui, concedebantur, ultro citoque se ingerunt, & summo laicorum scandalo sese implicant. Nobis certe aliud acclamat D. Paulus: *Nemo militans Deo* [k] *implicat se negotiis secularibus, ut ei placeat, cui se probavit.* Sed ubi nunc illa tua, D. Paule, Timotheo tradita doctrina? Adhibe, quas potes faces, circumspice omnes angulos, vide, si est, qui ex his negotiis sese expediat. Non quidem negaverim, esse; at paucissimos. Ad vivos revertatur oratio. His expediri, negotia agent Dei, & imbuunt se scientia Sacerdote digna. Quid enim Ezechiel a Sacerdote requirit, ut inter pollutum & immundum dijudicet? Scientiam. Quid Malachias ab eodem, cum Angelus Domini exercituum sit? Scientiam. Id vero verius esse, ex eo constabit, si Deo, Divisque omnibus invisam Sacerdotum ignorantiam æqua iudicii trutina examinaverimus. Erenim quam graviter eorum inscientiam ferat Dominus, testis est Isaias: *Speculatores, inquit, ejus omnes cæci, (l) nescierunt universi: canes muti, non valentes latrare: videntes vana, dormientes, & amantes somnia. Et canes impudentissimi, nescierunt saturitatem. Ipsi Pastores ignoraverunt intelligentiam, omnes in viam suam declinaverunt, unusquisque ad avaritiam, a summo usque ad novissimum. Venite, sumamus vinum, & impleamur ebrietate, & erit sicut bodie, sic & cras, & multo amplius.* Quid vero Jeremias? *Sacerdotes (m) non dixerunt, ubi est Dominus? Et tenentes legem, nescierunt me, & Pastores prævaricati sunt in me.... Propterea adhuc iudicio contendam vobiscum, ait Dominus, & cum filiis vestris disceptabo.* Quid Ezechiel: *Sacerdotes (n) ejus contempserunt legem meam, & polluerunt Sanctuaria mea: inter sanctum, & profanum, non habuerunt distantiam, & inter pollutum & immundum non intellexerunt.* Quid ergo? *Et effudi super eos indignationem meam, (o) in igne iræ meæ consumpsi eos: viam eorum in caput eorum reddidi, ait Dominus Deus.* Has minas justitiæ (p) Sacerdotum intentatas, quis non stupefactus exhorrescat, quæ ipsorum dæmonum nos filios constituit? *Filii liquidem Heli, (q) filii Relial, nescientes Dominum, neque officium Sacerdotum ad populum.* Sumite itaque optimi Pastores, Sacrorum Bibliorum volumina: vol-

vite Ecclesiasticos & Sacrorum Conciliorum, inprimis Concilii Tridentini Sacros Canones: sumptus præcipuos in colligendis & conservandis Bibliothecis, ut sempiterna studii, & doctrinæ vestræ vigeat memoria, impendite: date operam, ut nihil vos lateat eorum, quæ ad tuendam cum propriam, tum proximi (r) Sancti Patres tradiderunt. Figite animis vestris, Apostolorum facile Principe Petro dignam sententiam: *Domini autem Christum sanctificate in cordibus vestris, (s) parati semper ad satisfactionem, omni poscenti vos rationem de ea, quæ in vobis est spe, & fide.* Pertimescite dictum [t] Prophetæ: *Quia tu scientiam repulisti, repellam te, ne Sacerdotio fungaris mihi.*

Hac vero scientia acquisita, necesse est, ut quivis in hanc cogitationem veniat, se speculatorem gregis Christi constitutum, & sibi id, quod Ezechiel, dictum existimet: *Fili hominis: (u) Speculatorem dedi te domui Israel.* Quid ita? Ut enim speculatoris est, de editiori loco plus omnibus contemplari; ita necesse est, ut Pastor proposita dignitatis sublimitate & altitudine, majori scientia instructus sit, quo aliorum miseriis & necessitatibus valeat prospicere, & clamet cum Isaiaco Leone: *Super speculam Domini ego sum, (x) stans jugiter per diem: & super custodiam meam ego sum, stans totis noctibus.* Qua in specula constitutus, videat, quam parum tutus grex Domini sit a fraude nequissimorum Dæmonum: videat, ex quo occultis insidiis in apertum latrocinium conjiciatur. Quo viso acclamet, ut is apud Isaiam in specula constitutus: *Surgite Principes, arripite clypeum.* Quid est hoc? Defigite oculorum aciem in terribiles adversariorum copias, intueamini phalanges asperas, non ex senibus desperatis, non ex agresti luxuria, non ex helluonibus, decoctoribus, vadimonii desertoribus collectas, non ferro, scuto, telisque hisce vilioribus circumseptas, sed exercitus omni armorum genere, quibus non provocati nos laceessant, instructos, quibus ad intentanda omnia nobis adversa, ingenium ipsis suum abunde satis est. *Non enim est nobis colluctatio (y) adversus carnem & sanguinem; sed adversus Principes & Potestates, adversus mundi Rectores tenebrarum harum, contra spiritualia nequitiae in caelestibus.*

Vis alium exercitum spectare, immanem ac crudelem, gregi isti insidiantem? Hunc ipsum tibi de eadem specula spectare licebit. *Caro, inquit, concupiscit adversus spiri-*

(k) 2. Tim. 2.

(o) Ibid.

(r) Supple: salutem, vel quid simile.

(u) Ezech. 3.

(l) Isa. 56.

(p) Legendum arbitror: inscitia.

(x) Isa. 21.

(m) Jerem. 2.

(s) 1. Petr. 3.

(y) Ephes. 6.

(n) Ezech. 22.

(q) 1. Reg. 2.

(t) Osee 4.

*spiritum, (z) & spiritus adversus carnem: hæc enim sibi invicem adversantur.* Quod quam grave sit duellum, vis, & eventus ipsi enunciant. *Manifesta enim sunt opera carnis, [a] quæ sunt fornicatio, inmunditia, & quæ sequuntur.* Hinc oritur vigilantia cum cura, quanta potest esse maxima, cum sciat sibi rationem de singulis animabus reddendam exactissimam. Etenim qui oves perdidit, vel lupis rapientibus, vel latronibus adorientibus, vel lue aliqua, aut alio id genus casu sæviente, is forte aliquam a Domino gregis veniam impetret: si vero penas exigit, damnum non nisi pecunia contat; At vero, si cui Christi grex commendatus, is animam pro anima reddat, necesse est. Nam si is, qui scandalum dederit uni ex minimis agniculis gregis hujus, id consequitur pœnæ; ut Divino judicio dignus censeatur mola alinaria, qua collo ejus alligata, in profundum maris præceps agatur; quid de co statuendum, cujus supina negligentia anima minima ex altissimo dignitatis gradu ad tartara præcipitatur? Neque enim sine causa gravissimi periculi denuntiatione terret Ezechielem, dicens: *Si me dicente ad impium: (b) Impie, morte morieris; non fueris locutus, ut se custodiat impius a via sua; ipse impius in impietate sua morietur, sanguinem autem ejus de manu tua requiram.*

Videor mihi videre, aliquos magno animi mei sensu, harum rerum commemoratione excitari, ad functionem hanc, quam ante hac, majori diligentia obcundam: alios vero munus hoc susceptum, ob rei cum dignitatem, tum gravitatem reformidare. Ex his primos perbeatos, postremos infelicissimos merito dixerim: quod ex iis, qui etiam inviti ad dignitates evecti sunt, facili conjectura assequemur. Nam si ii hoc nomine excusari non potuerunt, nos qua ratione crimen hoc a nobis removebimus, aut a gravissima culpa eximemus? Reclamavit vocationi suæ Ezechiel, at compulsus ire ad gentes Apostatrices, ad filios dura cervice & indomabili corde, ad domum exasperatricem, & exasperantem, ad subversores & scorpiones, ad domum Israel attrita fronte, ac ita quidem compellitur, ut ni eat, ni dicat, ni arguat, se in perpetuum animæ discrimen adductum iri sentiat. Moyses unus, & facile primas e sacrorum virorum numero, tantum absuit a Judæorum præfectura, quod eam etiam detrectarit, ita ut Deum pene iratum in se concitavit; nihilominus cum ad aquas contradictionis deliquisset, nihil illi assidue principatus sui recusationes profuerunt. Neque etiam Heli, studio aut cupidi-

tate honorum & ambitione ductus dignitatem Judicis & Sacerdotis sibi paravit; hic tamen ob male in filios administratam functionem, cervice contracta, periit. Quid Saulem commemorem, qui omnium Regum Judæorum primus, tantum abest, ut Regni Israelitici gubernacula ambierit, ut errantes potius Patris asinas quæsierit, quemque cum a Samuele Rex renunciaretur, domi latitantem Dominus manifestaverit. At nuncquid hæc cunctatio, hæc declinatio Regni suscipiendi, post ejus patrata in regno administrando crimina, obicem objecit Divinæ vindictæ? Nunquid repressit, a Domino in Saulem latam severam, gravemque sententiam? Quare nullus se extra omnem causam, culpamque positum arbitretur, si coactus ad hanc functionem suscipiendam, eam postmodum non ea vigilantia & singulari virtute, qua debuit, administraverit. Hac itaque quisque vigilantia, ubi aliquid viderit deesse gregi, quam celerrime advolet, & sibi id Sapientis dictum arbitretur: *Discurre, (c) festina, suscita amicum tuum: ne dederis somnum oculis tuis, nec dormitent palpebræ tuæ. Erue quasi damula de manu, & quasi avis de manu aucupis.* Tum aggredienda ovis, summa inprimis lenitate animi. Aliter enim cum ovibus, & iis perditis, aliter cum lupis rapacibus agendum esse censeant. Videant, quam leniter aggressus sit Corinthios D. Paulus: *Spero, inquit (d), quod usque in finem cognoscetis, sicut & cognovistis nos ex parte, quod gloria vestra sumus, sicut & vos nostra, in die Domini nostri JESU CHRISTI.* Et infra: *Adjutores (e) sumus gaudii vestri.* Cujus animus ad hæc similia Pastoris colloquia non exardeat, & studio emendationis inflammetur? His succedant admonitiones, exhortationes, conciones, summa cum doctrina conjunctæ, *Arma liquidem militiæ nostræ non carnalia sunt, sed potentia Deo ad destructionem munitionum, consilia destruentes, & omnem altitudinem, extollentem se adversus scientiam Dei, & in captivitatem redigentes omnem intellectum in obsequium Christi.* Oportet enim Pastorem continentem esse, *amplectentem eum, (f) qui secundum doctrinam est, fidelem sermonem: ut potens sit, exhortari in doctrina sana, & eos, qui contradicunt, arguere: oportet, ut sermo Christi habitet in nobis cum omni sapientia.* Quantum vero intersit, hoc medio esse instructum: idem testis est. *Attende tibi, (g) & doctrinæ: insta in illis: Hoc enim faciens, te ipsum salvum facies, & eos, qui te audiunt: liquidem, qui bene [b] præsumt Presbyteri, duplici honore digni sunt,*

(z) Gal. 5.  
(d) 2. Cor. 1.  
(b) 1. Tim. 5.)

(a) Ibid.  
(e) Ibid.

(b) Ezech. 33.  
(f) Tit. 1.

(c) Prov. 6.  
(g) 1. Tim. 4.



sunt, *maxime qui laborant in verbo, & doctrina*. Rem hanc, vita & factis illustrasse D. Paulum, D. Lucastestis est. Hic enim teste conscientia, Episcopis omnibus, Mileri congregatis, ausus fuit dicere: *Vigilate, memores, quod per (i) triennium nocte ac die non cessaverim, cum lacrymis monens unumquemque vestrum*: Ita vult, ut accedat in primis vitæ & morum nostrorum integritas, & clarissimis monumentis testata, consignataque vitæ Sanctitas. *Qui enim alios docet, [k] te ipsum non docet*. In omnibus, inquit (l), *te ipsum præbe exemplum bonorum operum, in doctrina, in integritate, in gravitate, verbum sanum, irreprehensibile; ut is, qui ex adverso est, vereatur, nihil habens malum dicere de nobis*. Ac talis, cum & faciat, & dicat, magnus, ut Christi (m) fert sententia, in regno celorum censebitur. Huic si accedat singularis animi sensus, qui ob res adversas, & peccata populi suscipitur, similes erunt Davidi, qui luxit interitum Absolonis: Moyse, qui populi scelus in idololatria patrum, deflevit, & rerum novarum & exitialium studiosum, multis lachrymis prosequutus est: similes Patriarchæ Jacob, qui visa tunica Joseph, sanguine conspersa, querebatur. Erit ex eorum numero, de quibus (n) Malachias: *Inter vestibulum & altare plorabunt Sacerdotes, Ministri Domini, & dicent: Parce populo tuo: & ne des hereditatem tuam in opprobrium, ut dominantur ejus nationes*.

Accedat postremo Sacramentorum quam fidissima dispensatio. In quorum administratione linceos oculos adhibeat ad summam animi munditiam, & vitæ Sanctitatem, & corporis puritatem: *Sacerdotes*, inquit ille, *qui accedunt ad Dominum, sanctificentur, ne forte percutiam eos*. Et: *Qui habuerit maculam, panes non offerat Deo suo, nec accedat ad ministerium ejus: memores simul illius Poetæ*:

*Vos quoque abesse procul iubeo: discedite ab aris*

*Quis dedit besterna gaudia nocte Venus.*

*Casti placent superis. Para cum mente venite,*

*E manibus puris sumite fontis aquam.*

Quid ita? Etenim si Moyses legem Domini accepturus, omnibus triduo interdixit usum Matrimonii: *Esote, (o) inquit, parati in diem tertium, & ne appropinquetis uxoribus vestris*; quid Sacerdotibus nostris fugiendum statueris, qui non legem, sed Legislatorem suscepturi sunt? Unde & D. Paulus vult, ut nos Ministros Christi in castitate exhibeamus. Advertant deinde, ne exterior-

res in templo, rebusque Divinis, interiorum in corde sordium sint indices. Quare si suppellectilem suam nitidam, comptam, & sordibus omnibus deterfam volunt; agent Dei negotia, adsit templis ornatus, qui aulam, qui mensam Dei deceat. Laventur pallæ sacræ altarium, mappæ, strophiole: purgentur calices, patenæ, ciboria: Tum vero ornatus Sacerdotalis munditiam singularem præferat, cum multorum Angelorum frequentia stipatus, Sacris operaturus, templum, chorum, ipsas sacras aras accedit. Mirum enim dictu est, quantum conferat, his quasi armis septum, ad legationem istam procedere, & impetum Divinæ contra nos sævientis iræ a cervicibus hominum, ipsis Angelis obstupescens, arcere. Etenim jam Chore, Dathan, & Abiron nefandæ conjurationis Principibus æternis suppliciis, vivis mortisque mactatis, cum plurimi acervatum ex populo concidissent mortui; Aaron interstitit, & vim ignis cohibuit. At qua ratione? *In veste*, inquit Sapiens (p), *poderis, quam habebat, totus erat orbis terrarum* (ut in Sacerdotum veste tota Christi passio) *& parentum magnalia in quatuor ordinibus lapidum erant sculpta, & magnificentia tua in diademate capitis ejus scripta*. *His autem cessit, qui exterminabat, & hæc extimuit*. O Sacerdotii incredibilem vim, cujus sanctitas non modo in anima, sed corpore, & vestimentis ipsis elucescit! Etenim si in veteri hæc acta sunt; quid in nova lege tempore nostro fiet, ubi Principis Sacerdotum sanctitas, & animi splendor, non Ovidiana quadam, sed Divina metamorphosi in corpus, & vestimenta Christi, transmissa est? Quid ergo mirum, si sacris Sacerdotum vestibus, tanta sanctitatis Deus edat insignia, quibus non orbis terrarum, non parentum magnalia, sed Christi Servatoris de mundo, carne, peccato, Diabolo parva victoria, non alienis stipendiis, sed proprio sanguine comparata trophæa conscripta sunt? Videor mihi jam videre, Illustrissime Princeps, & penitus intueri, animos Pastorum omnium mirifice incitatos, nihil moliri amplius, quam ut in eo curam, cogitationemque omnem defigant, ut considerata dignitatis excellentia, quivis eorum ad gloriam Divinæ Majestatis, ad Ecclesiæ Catholicæ splendorem & amplitudinem, ad salutis cum propriæ, tum alienæ defensionem, indies contendat. Video vos singulari, rerum domesticarum studio, ovium amore, contemptu rerum sæcularium, scientia, vigilantia, zelo Divino, vitæ exemplo, administratione rerum Divinarum, cum omni munditia instructos, obviam

(i) Act. 20.

(n) Joel. 2.

(k) Rom. 1.

(o) Exod. 19.

(l) Tir. 2.

(p) Sap. 18.

(m) Matth. 5.

viam ire sponso, & sponsæ. Videor audire D. Paulum vobis acclamantem: *Qui bene [q] ministraverint, bonum gradum acquirunt, & multam fiduciam in fide, quæ est in Christo JESU, Domino nostro.* Videor videre Principem Pastorum omnium accurrentem, vos obvis ulnis excipientem, & super omnia bona constituentem. Quare agite, agite, inquam, & injuria horum temporum considerata, Ecclesiæ tot hæresum tempestatibus expositæ, tot schismaticorum injuriis, procellisque agitæ, vestra diligentia, vigilantia, doctrina, integritate vitæ, solatio, præsidioque sitis: & Christi Domini, & Antistitum vestrorum expectationi, satis superque fide & amore in oves vestras incitati, satisfaciatis. Tum tu, Chritte, quem propter beneficia Optimum, propter vim vero Maximum semper nominavimus, hos omnes insignes animarum præsidēs, a nefariorum luporum scelerata societate sequestratos, æternis trophæis, tuo studio, merito, & Sacrosancto Sanguine partis, auctos, cælestibus domiciliis excipies, & ubertate domus tuæ repletos, corona, & aureola Doctoribus & Pastoribus digna, redimitos, ad dextram tuam constitues, ut qui speculatores ovium suarum in militanti, iidem speculatores æternæ tuæ Majestatis, in triumphanti Ecclesia, iterum sine fine sempiterna & lætitia exultent, & gaudio triumphent. Dixi.

Oratione finita, Reverendus Dominus Cancellarius ad mandatum Illustrissimi legit, & promulgavit *Caput III. IV. V. VI. VII. Statutorum Synodaliū,* ut sequitur:

### C A P U T III.

#### *De Sacrosancto Missæ Sacrificio debite, ac reverenter celebrando.*

**D**ivinissimum Sacræ Eucharistiæ Sacramentum, quanto reliquis novæ legis Sacramentis a Christo Domino institutis, nobilitate & dignitate, propter realem ipsiusmet Domini in eo præsentiam, antecellere non ambigitur; tanto majori quoque veneratione & cultu exquisitiori est prosequendum ab iis, quorum salutis causa institutum fuit. Ac proinde (r) & actus ipse mysticus, quem Missam vocant, in quo per consecrationem, oblationem, &

communionem, Passionis Dominicæ jugis in Ecclesia Dei, juxta præceptum ejusdem Domini sit memoria, eo majori cum dignitate ac decencia est peragendus: quo solenniores caeremonias olim circa illa, quæ hujus incrementæ Hostiæ umbræ & significationes erant, Dei ipsius jussu adhibitas fuisse, luculenter sacra Pagina testatur. Sacerdos itaque, rem Divinam factururus, non ignarus, se pro conditionis humanæ fragilitate tam mundum esse non posse, ut de meritis suis præsumens, haud præmissa debita Exomologesi, ad altare summi Dei accedere queat; primo conscientiam suam diligenter examinet, atque ea, in quibus a Divinæ legis mandatis se declinasse adverterit, per Sacramentum confessionis expiare non prætermittat: ac demum puro corde, ac animo ad superos erecto, ad Mysteria tractanda accedat. Et quamvis tanta Sacratissimæ hujus actionis sit Majestas & dignitas, ut merito summam in animis Sacerdotum, per quos celebratur, devotionem excitare, neve immundis ad eam obeundam conscientis prope rare audeant, Apostoli Pauli minacibus verbis in memoriam reductis, eosdem detertere debeat; ut tamen legis rigor ad bene agendum eos poenæ metu inducat, quos Divinus amor & ipsa rei tractandæ dignitas in officio non continet: Statuimus, & decernimus, ut singuli tam Cathedralis Ecclesiæ nostræ Prælati, Canonici, Presbyteri, quam alii, quibus animarum cura ex Parochiali, vel alio quolibet munere incumbit, peccata sua semel ad minimum quolibet mense (nisi delicti cujuscumque commissi conscientia maturiorem poenitentia sacra medelam exposceret) confiteantur, ac Sacrosanctum Missæ holocaustum frequenter, pro suis & commissorum sibi populorum peccatis offerant. Cujus quidem Sacrificii uniformiter, quo ad externas attinet caeremonias, peragendi ritum & normam, ex nostro, quem edituri sumus propediem, Missam celebrandi modo, deproment, eumque & non alium quempiam peregrinum, & inusitatum, diligentissime, atque exactissime servabunt: &

(q) 1. Tim. 3.

(r) Concil. Trid. Sess. 22. in doctrina de Sacrificio Missæ.

& id quidem sub pœnis, Canonibus Sacris contra Presbyteros, irreverenter ad Missam accedentes, latis, sub aliisque gravioribus arbitrio nostro pro irreverentiæ qualitate imponendis.

#### CAPUT IV.

##### *Quomodo & qualiter Sacerdos ad Altare accedens circa Divina se gerere debeat.*

**S**iquidem externorum corporis humani gestuum compositio, non vulgare ad cognoscendam internam animi dispositionem indicium facit, ea propter Sacerdos Divina peracturus, absolutis primum iis, quæ ex præscripto a Nobis Missam celebrandi modo, ante accessum altaris sunt dicenda, curet diligenter, ut in Sacrario vestis sacræ apparatus omnem, nitida ex cultum munditie, ita per artus suos disponat, sicque induatur; quo Sacer hic cultus & ornatus, Dominicæ Passionis mysteria repræsentans, pietatis (s) Christianæ religiosam inspectantis populi animis excitare queat meditationem. Prodi- bit igitur Sacerdotalis officii amictus insignibus, cavens accurate, ne vel humerali per scapulas fluctuante, vel aliqua Albæ non bene succinctæ parte, ad unum latus longius æquo prominente, syrma trahere, aut attracta anteriori ex parte eadem Alba, tibias pavonum more spectandas proponere videatur. Ex Sacrario ad Altare prodeundo, oculos, modestæ Sacerdotalis indices, in circumstantes non jactitet, nec caput hanc vel in illam partem, puerorum instar, circumvertat; sed demisso ante pectus obtutu, gravitate incessus, muneris quoque sui excellentiam & sublimitatem testetur. Dehinc iis, quæ in genuflexionibus, aliisque reverentis erga Deum animi signis consistunt, non prætermittis, ubi jam Divinum Officium aggressus fuerit, quæ clara voce juxta Missalium rubricas legenda sunt, clare, distincte, intelligibiliter, & devote legat, nec festinando nimium, nec etiam verba languidius & exquisitius, quam convenit,

protrahendo, in illis etiam proferendis, quæ majoris reverentiæ causa præfiori voce dici solent, talem vocis moderationem adhibeat, ne, quod submis- se legendum venit, mentaliter duntaxat percurrat. In conversionibus de- mum ad populum faciendis, manibus extendendis, complicandis, aliisque circa Missæ Sacrificium exterioribus cæ- remoniis caveat, ne vel ludicra capi- tis in diversum jactatione, vel impudica fluctuantium huc & illuc oculorum con- torsione, aut gesticulationum indecen- tium scurrilitate, hominem minime præsentem sibi, vel histrionem quempi- am, agere videatur: sed per omnia gravitatis memor existat, decenterque non solum manus complice, vel ex- tendat, sed etiam Cruces, inconcinna digitorum divaricatorum velocitate, quasi præruptas, & consequenter semi- perfectas non faciat; at digitorum ho- neste extensorum, atque in perfectam Crucis formam ductorum ministerio, ad efformanda hæc sacra signacula utatur, aliaque omnia circa hoc tremen- dum Sacrificium (t) ita devote, decen- ter, reverenterque peragere studeat, ne a quopiam ministerium ipsius re- prehendi, sed potius tam internæ de- votionis, quam externi cultus stu- dium, digne laudari & commendari possit.

#### CAPUT V.

##### *De Altari, Ciborio, atque omni Ecclesiastica suppellectili mun- de conservanda.*

**E**tsi munditiem, quam Dominus per Prophetam ab iis, qui vasa ipsius ferunt, requirere dignatur, in cordis & animi ab omni criminum labe purgari candore & puritate, inprimis consistere, dubium non est; nec illud tamen omittendum erit a fido quoque Ecclesiaste, quod & Salomon ille sapi- entissimus pro augustiori Dei Optimi Maximi cultu, diligens decorem Do- mus Domini, ex ejusdem Dei præcep- to olim abunde legitur præstitisse, & ipsa novæ legis mysteriorum amplitudo ex-

(s) Concil. Trid. Sess. 21. de Sacrific. Missæ Can. 7.

(t) Concil. Trid. Sess. 22. in Decreto de observand. in celebr. Missæ.



exposcit. Altare itaque, in quo incrementum illud Sacrificium tradito a Majoribus ritu peragitur, Pontificalis benedictionis autoritate consecratum esse debet: alias in eo rem Divinam fieri Sacrorum Canonum præscripta, nisi superimposito portatili, vetant. Unde non nisi in Altari consecrato, cuius nec lapis fractus, nec suo loco motus, nec sigillum sepulchri violatum esse debet, vel certe altare viaticum, seu portatile habenti, quisque nostrorum celebrabit Sacerdotum: qui secus fecerit, per Sacros Canones constitutis pœnis omnino mulcendus. Mappis porro ad minus binis, altare conteget, easque puras & nitidas conservabit, similiter & ornamenta Altaris, quæ vulgo Antependia vocant, decenter insterni, & utroque ex latere æqualiter a facie mensæ altaris ita, ne distortum aliquid isthuc appareat, appendi curabit. Candelabra, seu ceroteraria, nitide (si ex metallo quopiam conflata fuerint) expoliet, quemadmodum etiam urceolos, vel ampullas, aquæ & vino pro Sacrificii Missæ usibus sacris excipiendo necessarias, munde ita, ne vel pulverum asperginem contrahant deforis, vel intus mucorem ex longo situ redoleant, asservabit: Calices, & patinas sacras, adeoque omnem pallarum, corporalium supellectilem, absterget frequenter, & abluet, nitidissimeq; conservabit: atque aquam ablutionis eorum, in secretiorem Sacrii partem (prout fieri solet) effundet, ne foras projecta, transeuntium pedibus, non sine injuria & irreverentia tanti Sacramenti, conculcetur. Purificatoria quoque, id est, strophiola, ex tenuiori tela, Crucibus ex omni latere in extremitatibus insignita, confici faciet, quibus non solum in extergendo & siccando ante & post Communionem, atque ablutionem calice, sed etiam in ore abstergendo, circa Divinorum operationem utetur, aliudque mantile, seu linteolum oblongum, ad sinistrum latus altaris dependens, pro manibus abstergendis habebit, depravatumque aliquorum, mappas majores Altarium commaculantium, & sacculis, qui recondendis facti sunt calicibus, ipsos calices ante & post ablutionem munda- re indecenter consueverunt, morem

unice vitabit. Casulas, pluvialia, & alias vestes sacras, a tinearum injuriis & situ, frequentiori excussione & ventilatione defendet, ac tuebitur. Cymelia, seu Clenodia, præsertim vero ea, quibus Sanctorum inclusæ sunt reliquiae, non in obscuro aliquo (uti multi consueverunt) angulo, sed in armario decenter, mappa linea, vel serica intus circumquaque suffulto asservabit. Locum vero ipsum, in quo Divinissimum reponi solet Eucharistiæ Sacramentum, ab aranearum telis, pulveribus, aliisque id genus sordibus, diligenter custodiet, isthucque tabernaculum, seu vasculum, cui Eucharistia includitur, corporali suffultum, & tunicella, atque velo, ex pretiosa, quoad ejus fieri poterit, materia deforis ornatum, non nisi super corporali substrato collocabit: quo loci, etiam sacros liquores, suis distinctos vasculis, reverenter servare poterit, unice curaturus, ne unquam clavam Ciborii cuiquam homini laico concedat, cum valde sit indignum, profanorum hominum contrectari manibus ea, quorum ministerium præter solos Sacerdotes, etiam Angelicæ non est concessum sublimitati. Tantum abest, quod digne sit ferendum, si forte facta laicis Sacrorum contrectandorum, vel pro libitu adeundorum potestate, in supersticiosos abusus quidpiam horum (ut sæpe evenit) suffurari ab aliquo scelesto homine contingeret. Sacramentum porro Eucharistiæ, quod pro quotidianis infirmorum usibus, in templis religiosissime consuevit asservari, singulis quatuordecim diebus hostias recentes consecrando, & verustiores, earumque fragmenta reverenter ante ablutionem sumendo, renovabit Sacerdos; ne, si forte diutius hostiæ consecratæ asserventur, ex humiditate loci mucorem contrahant, vel omnino corrumpantur. Lampadem quoque ante Ciborium apensam sedulo curabit, & lumine Sacrum Corporis Domini pignus nunquam carere patietur. Fontem quoque Baptismalem, in Parochialibus Ecclesiis haberi solitum, operam dabunt Parochi, ut una cum lustralibus undis clausum, honesteque coopertum, munde conservent. Tandem eos se in con-

servandis pure ac nitide rebus, ad Sacros Ecclesiæ usus destinatis, exhibebunt, quos debita reverentia, merito Creatori impendenda & præstanda, illos esse, sui ipsius ampla Majestate ob oculos posita exposcit, ne opus Domini negligentius, quam par est, tractantes, maledictionem filiorum Heli, gravi salutis propriæ cum dispendio, incurrant.

## CAPUT VI.

*De Horis Canonicis.*

**H**Orarum Canonicarum, sive Officii nocturni, diurnique quotidianum pensum, Clericis cum ratione Ordinum Sacrorum, tum etiam propter Beneficia Ecclesiastica, Sacrorum Canonum, & Conciliorum auctoritas adeo necessarium facit, ut quicumque id mera ex negligentia & vâcordia, & quotiescunque prætermittit, toties peccato mortali obnoxius reddatur, atque ad restitutionem partis fructuum beneficii, pro rata omisæ recitationis earundem Horarum computandæ, teneatur. Quocirca statuimus, atque ultra gravem Dei indignationem, quam qui in obsequiis Divinis oscitantes, & desides sunt, incurrunt, sub pœna amissionis fructuum, & suspensionis a beneficio, aliisque pœnis, arbitrato nostro infligendis, omnes & singulos Prælatos, Canonicos, Presbyteros, tam curatos, quam eos, quibus nulla animarum cura ex officio incumbit, reliquosque omnes, Clericali adscriptos militiæ, in Sacris actu existentes, ac beneficia Ecclesiastica possidentes, paternè in Domino hortamur; ut conscientiarum suarum, & debiti officii habitatione, Horas Canonicas itatis, quoad ejus fieri potest, temporibus, debita cum attentione ac devotione quotidie recitent, neve labiis in laudes Divinas resolutis, mentem per ludicra evagari pariantur: sed animo recollecto, atque ad Deum, cui decora, jucundaque præstari debet laudatio, erecto, distincte orationes, preces, ac Psalmos, aliæque omnia juxta rubricarum Breviarii tenorem, per totius anni Festos, profestosque dies disposita legant: ita ut nec verba nimia linguæ præcipatione

ac volubilitate obtruncet, & absorbeant, nec nimium mussitando ita mentaliter duntaxat, verbis non expressis, orare videantur, quo nec seipsos audire, nec prolata intelligere queant. Quæ ratione enim a Deo audiri postulabunt, cum se ipsi non audiant? Aut quomodo Horas Canonicas fructuose recitasse dici poterunt, qui mimica labiorum velocitate plus, quam linguæ officio, in alloquendo Creatore suo uti, eidemque ceu illudere non verentur? Quemadmodum etiam illi præfatis pœnis se se obnoxios reddunt, qui Horas Canonicas, detestabilem illam, & depravatam consuetudinem sequuti, non nisi tunc, dum celebraturi sunt, putant recitandas: sicut & ii, qui dum peregre proficiscuntur, ab earum recitatione, Officio de Beata Virgine, vel septem Psalmis, aliisve precationibus recitatis, se immunes & exemptos arbitrantur; cum tamen Deum offendant, & conscientias suas non levi reatu gravent, fructusque beneficiorum, si quæ habent, non faciant suos, sed eos tanquam injuste perceptos ad fabricam Ecclesiæ, in qua beneficium obtinent, vel in pauperes erogare teneantur. Ut itaque huic salutari Constitutioni, debite ab omnibus satisfiat, monemus tam Cathedralis nostræ Decanum, quam Collegiatarum Præpositos, Archidiaconos districtum, & Decanos rurales, ut bono suo exemplo alios in id excitantes, vigilanter attendant, & quos ea in parte negligentes repererint, præmissis pœnis in eos animadvertant.

## CAPUT VII.

*De Agendis & Breviario Romano recipiendo.*

**C**Um in Sacramentis administrandis, ceremoniisque Ecclesiasticis peragendis, uniformitas merito requiratur, quo ii, qui unius moris in domo Dei sunt, diversitatis cujuscumque internæ, per externorum variam functionem minime notentur, eapropter libros Agendorum, tam Sacramentalium, quam Ceremonialium, recens impensa nostra typis edendos curavimus: & quemadmodum propositis iisdem tunc tempo-

temporis, ex eorum præscripto, tam Sacramenta administrari, quam ceremonias omnes peragi, a Diœcesis nostræ Clero expetiimus; ita nunc statuimus, & decernimus, ut nullo alio Agendorum Sacramentalium & ceremonialium libro, quisquam Sacerdotum, & aliorum quorumvis Diœcesis nostræ Clericorum, quam eo, qui autoritate nostra in lucem prodiit, uti præsumat, utque ab omnibus curam animarum gerentibus, in Ecclesiis fidei ipsorum commissis, & extra, pro quotidianis usibus habeantur, & infra mensem a publicatione Constitutionum hujus Synodi, ab unoquoque emanetur, vel a vitricis Ecclesiarum comparari curentur, sub pœna duarum marcarum, in usus Seminarii Cleri nostri convertenda, & per Archidiaconos & Visitatores exigenda, serio injungimus. Breviarii vero, quod ante plures annos, Prædecessorum nostrorum labore, ad Diœcesis hujus usum accommodatum & excusum fuerat, atque etiamnum aliquorum manibus teritur, cum tam pauca jam extent exemplaria, ut vix decimus quisque reperiat in Diœcesi nostræ Sacerdos, qui id habeat, multique subinde visi hæctenus fuerint, libellos qualescunque precatorios Breviariorum loco circumferre, & negligentiam ea in parte intolerabilem, solo exemplarium Breviarii defectu excusare: nonnulli aliarum Diœceseon Breviariis uti, adeo quod non solum summam Divini cultus, una eademque in Diœcesi perturbationem inde sequi, sed etiam periculosissimum discrimen animarum Sacerdotes omissione officii incurrere, non sine gravi dolore adverteremus; idcirco hujusmodi defectui debite occurrere volentes, in eam quantocius curam Nobis incumbendum, operæ pretium duximus; quo & uniformitas in persolvendo hoc Sacerdotali penso servari, & tam supinæ, crassæque negligentiae aliquorum posthac allegandæ, omnis præsciendi occasio posset.

Considerantes proinde Breviarii veteris ad ritum Diœcesis nostræ, olim sub Antecessore nostro Stanislao Turſone, bonæ & sanctæ memoriæ editi, non minus inconcinnam quibusdam in

locis compositionem, quam etiam Lectionum & Historiarum, non satis probatarum simplicitatem, demum & indecoram partim brevitatis, partim prolixitatis officiorum dispositionem: cupientes præterea sine longiori dilatione, periculo animarum, quod negligentes ex parte Horarum Canoniarum omissionis incurrunt Sacerdotes, pro Pastoralis nostri officii providere; siquidem dicti veteris Breviarii emendandi, corrigendi, atque decentiorem in ordinem redigendi, tam laboriosa foret cura, ut vix annorum plurimum spatio corrigi, ac typis mandari posset: aliarum Diœcesum præclarum exemplum, nobis quoque tanta in necessitate sequendum, atque Breviarium Romanum, ex Decreto Sacrosancti Concilii Tridentini restitutum, jussuque PII Quinti Pontificis felicitis recordationis editum, abolito, & abrogato veteri Diœcesis nostræ Breviario, recipiendum: idque in usus officii privatum recitandi, apud Clerum Diœcesis nostræ inducendum, constituimus: nihil tamen in Ecclesiis nostris, ratione officiorum Divinorum, juxta veteres rubricas decantandorum innovantes, vel eo quod id temporis minus possibile futurum videatur, propter librorum Ecclesiasticorum, uti Gradualium, Antiphonariorum, atque aliorum ad persolvenda solenniter Divina officia destinatorum defectum, & non minus maximos, qui insumendi in iis recitandis forent, sumptus, quam longam annorum, operi tam laborioso necessarium seriem. Cæterum ne Patronorum Moraviæ, Divorumque Ecclesiæ nostræ Tutelarium particularia officia, quæ alias in Breviario Romano non habentur, omitti contingat, debitæ erga Patronos devotioni, & venerationi pro eo, ac par est, deesse nolentes, officia de illis optimo, prout fieri poterat, ordini restituta, novis eorundem Sanctorum historiis, ex fide dignis annualium regionum harum nostrarum codicibus depromptis, atque in Lectiones Matutinarum precum distributis, ornavimus & auximus, specialemque rubricellam officiorum de Patronis, una cum indice Festorum, simul & vigiliarum, seu



jejuniorum, in Dicecesi nostra observari solitorum, sub prælum primo quoque tempore daturi sumus, quo ad calcem Breviarii Romani adjuncto, uniformi modo in celebratione Sacrificii Missæ observando, qui prope diem quoque jussu nostro ad usum Cleri nostri in lucem edetur, compacta, vel seorsim in forma libelli colligata, pro temporum opportunitate a Sacerdotibus, aliisque Clericis, qui ad Horas Canonicas recitandas obstringuntur, officia de Patronis Provinciæ, non jam sub communi Sanctorum, sed particulariter recitari queant. Ne itaque in posterum exemplarium Breviarii penuria & defectus, negligentia, vel potius impietati Clericorum, in Dicecesi hac nostra suffragari & patrocinari posse videatur; Statuimus, ut universi & singuli ejusdem Dicecesis nostræ Clerici, quos Horarum Canonicarum quotidie dicendarum constringit necessitas, non alio posthac Breviario in recitatione officii extra Chorum, & Ecclesiam utantur, quam Romano, officia majora publice in Ecclesiis more antiquo nihilominus decantaturi. Qua in parte sicut ab omnibus voluntati ac Decreto nostro obedienter satisfieri, sub pœnis arbitrato nostro per Archidiaconos districtum, in visitationibus infligendis, præcipimus, & mandamus; ita nobis de universo Clero nostro pie in Domino pollicemur, neminem, favente Deo, repertum iri, qui consilio, ac ordinationi huic nostræ non obsequatur: præsertim cum facile quisque videat, quam bono ordine prædictum Breviarium Romanum sit dispositum, quantusve fructus, Horas Canonicas ex eo quotidie recitaturis obvenire possit: cum nimirum Scripturæ pro tempore occurrentis sacras Lectiones, demum Sanctorum Patrum authenticas explanationes, atque insuper Sanctorum vitas, ex fide dignis depromptas authoribus, in eo sint habituri: adeo quod vel sola intendendo quotidie stans horis Breviario diligentia, iis, qui fertiliori, faciliorque sunt ingenio, non difficile recte, honesteque vivendi monitionem gravissimam, quotidie instillare, & materiam, doctrinæ salutis populo proferendæ, uberrime sine multorum libro-

rum laboriosiori revolutione suppeditare queat. Ut itaque salutare hoc, & necessarium Romani Breviarii in usum apud nos inducendi consilium ac decretum eo faciliorem progressum sortiatur, certo Bibliopolæ id negotii dedimus, ut primo quoque tempore plura exemplaria ejusdem Breviarii Olomucium advehat, eaque venum exponat: ita ut singuli de exemplari, quod edendis per nos officiis de Patronis conveniat, infra spatium unius mensis a tempore eorundem exemplarium copiarum factæ, sub pœna trium marcarum, in usum Seminarii Cleri nostri convertendarum, & per Archidiaconos districtum, talium inobedientia & negligentia deprehensa, exigendarum, sibi providere teneantur.

Absoluto per Dominum Cancellarium septimo Capite Constitutionum Synodali, Admodum Reverendus Dominus Abbas Welegradensis Illustrissimo Domino, & Sacræ Synodo luculentis verbis defectum Breviarii sui Ordinis Cisterciensis exponens, instantissime petit, ut juxta tenorem Bullæ PII Papæ Quinti, quæ incipit: *PIUS Episcopus, Servus Servorum Dei. Ad perpetuam rei memoriam. Quod a nobis postulat ratio Pastoralis officii, in eam curam incumbimus, &c.* Permissu Illustrissimi Domini, uti loci Ordinarii, & Venerabilis Capituli Olomucensis, Breviario Romano ipse & alii Monasterii ipsius Fratres libere uti possint, donec illis de propriis sui Ordinis Breviariis fuerit provisum. Quam petitionem dicti Domini Abbatis Illustrissimus Princeps ex consilio Admodum Reverendorum Dominorum Decani & Capituli Ecclesiæ Olomucensis, atque Virorum Religiosorum, eidem consilio adhibitorum, justam & rationi consentaneam, licitamque judicans, eidem Reverendo Domino Abbati, & Fratribus Monasterii ipsius, usum Breviarii Romani concessit, donec de Breviariis Ordinis Cisterciensis iisdem fuerit provisum. Quo facto Cancellarius prosequutus est, & continuavit lectionem Statutorum Synodali, & legit, ut sequitur:

#### C A P U T VIII.

##### *De prædicatione Verbi Dei.*

**Q**Uemadmodum humani corporis vires imminui & labefactari est necesse, nisi naturæ humanæ convenientibus sustententur alimentis: non ali-

aliter sane animas Christi fidelium lenta quasi tæbe extenuari, & deformari credibile est, si diuturniori fame Verbi Dei torqueantur. Ovium itaque fidei nostræ concreditarum saluti ac emolumento spirituali hac in parte prodesse ac providere cupientes, decernimus, ut nemo in posterum per Dioecesim nostram, tam ex Regularibus, quam ex secularibus ad prædicandum prodire præsumat prius, quam se coram Nobis, uti Ordinario, vel licentiam, vel benedictionem (prout id per Sacrum Concilium Tridentinum *Sess. V. Cap. II. de Reformat.* statuitur) petiturus præsentet, & post examen debitum a Nobis approbetur; idque sub carceris pœna, & aliis durioribus animadversionibus, quibus Ordinariæ authoritatis contemptores Sacrorum Canonum Decreta perstringi volunt. Illis porro, qui uti ad Parochialia munia obeunda, animarumque curam gerendam, ita consequenter ad prædicandum Dei Verbum per Nos approbati fuerint, hoc primario curæ esse debet, ut lectioni Sacræ Scripturæ & Sanctorum Patrum diligenter incumbant, & non nisi bene præparati in publicum prodeant: firmiterque sibi proponant, & diligenter elaborent, ne contra communem sensum & consensum Ecclesiæ Catholicæ, quæ columna & firmamentum est veritatis, aliquid in medium proferant, neve in explanandis Scripturis proprii capitis conceptus, sed Sanctorum Patrum & Doctorum Ecclesiæ mentem sequantur: ne si contrariam (quod Deus avertat) Apostolicæ Ecclesiæ doctrinam astruere conentur, tanquam non acquiescentes sanis sermonibus Domini nostri Jesu Christi, & ei, quæ secundum pietatem est, doctrinæ, superbi, nihil scientes, lanquentes circa quæstiones & pugnas verborum, ex quibus oriuntur insidiæ, contentiones, blasphemix, suspensiones malæ, conflictationes hominum mente corruptorum, & qui veritate privati sunt, reputentur, & a cætu fidelium explodantur. Quid vero pro concione sit loquendum ad ædificationem proximorum, facile charitas, quam Spiritus Dei puris pectoribus infundere solet, edocebit.

Evangelium enim ex ipsius Christi Domini præcepto omni creaturæ annunciandum & prædicandum esse per orbem universum, nemo Christianus est, qui non norit. In quo prædicando hanc periculosissimo istorum temporum nostrorum ævo methodum ab Ecclesiasticis servari expedit & decet, ut primo fundamentum fidei recte stabilietur: deinde charitas per exhortationes pias in mentibus hominum exciteretur. Conciones itaque singulæ eo dirigendæ erunt, ut ex iis salutaris doctrinæ ad fidei stabilimentum pertinentis copiosus hauriatur fructus simul, & charitatis Christianæ præceptorum necessaria compendia resultent. Quod utique fiet, si Concionatores Evangelia pro tempore occurrentia, aliasve Scripturas Canonicas populo explanaturi, verum & genuinum Scripturarum sensum, menti Sanctorum Patrum congruentem, fideliter reservaverint, ac demum moralia, vitæ ad Christianæ Religionis normam componendæ, præcepta ex ipsis Sacræ Scripturæ verbis & explicationibus elicere, populoque proponere haud prætermiserint. Curare propterea debent, ut diebus Dominicis <sup>(u)</sup> & in Quadragesima una ad minimum pars concionis ea, quæ ad doctrinam Christianam pertinent, in se contineat, ad quod Catechismo Romano, ad Parochos ex Decreto Sacri Concilii Tridentini edito, commodissime utentur. Demum Catechismum Catholicum Canisii minorem, cujus exemplaria, tam Bohemica, quam Germanica venalia facile haberi possunt in locis, in quibus Scholæ sunt, a pueris memoriæ mandari, ac demum in Templis per interrogationes ac responsiones mutuas in lingua vernacula recitari curabunt, diligenterque ipsimet explicabunt, adeoque unice incumbunt, ut anno quolibet, delecto ad id quadragesimali tempore, circa Salve, vel etiam alias, prout illis commodius visum fuerit, universam doctrinam Christianam percurrant: quo ea non solum in puerorum, sed etiam eorum, qui maturiori sunt ætate, mentibus plantata, ad reddendam rationem suæ fidei instructi reddantur.

CA.

(u) Conc. Trid. Sess. 24. Cap. 4. de Reformat.

## CAPUT IX.

*De Sacramentorum administratione.*

**C**UM in Sacrosancta Tridentina Synodo, quam communi consensu, Domino inspirante, in omnibus & per omnia sanctissime servandam suscepimus, doctrina vera de Sacramentis Ecclesiæ, aliisque ad fidem Catholicam pertinentibus, plenissime sit tradita, Nos circa ea, quæ tam doctrinam de iisdem Sacramentis, quam de articulis fidei spectant, nihil plane hic statuere volumus, nisi ut in Sacramentis dispensandis non aliam normam Sacerdotes nostræ Diœcesis sectentur, præter eam, quæ in eodem Sacrosancto Concilio Tridentino sancte traditur, idque sub anathematis pœna. Statuimus quoque, ut pro administratione Sacramentorum Ministri eorum nihil prorsus exigant, neque verbis, neque signis, directe vel indirecte aliquid eo nomine petentes; ne videlicet ex turpi litatione, & Sacrorum mercatu perniciosam Simoniam labem incurrant, pœnisque contra nefarios ejusmodi homines in Canonibus Sacris contentis se se obnoxios reddant. Ritus quoque & formulas Sacramentorum administrationis non vulgari aliquo, & a sectariis usurpato, sed approbato Cathedralis Ecclesiæ nostræ more, a Romano in essentialibus minime dissentiente, nec discrepante, ex præscripto Agendorum libri, usu & sumptu nostro editi, observent: atque ceremoniarum circa id adhiberi solitarum significationem ac vim (x) rudi plebeculæ pro Concionibus opportune explicare non prætermittant, & ad debitam earum observantiam ac venerationem frequentibus monitionibus inducere conentur. Circa Baptismi vero & Matrimonii Sacramenta hoc exactissime observent ii, qui curam gerunt animarum, ut libros conficiant, (y) in quibus baptisatorum, eosque ex Fonte Sacro levantium, nec non eorum, qui Matrimonium contrahunt, nomina (prout id ipsum Sacrosanctum Concilium fieri districte præ-

cipit; & mandat) annotent, quo de parentela & cognatione cujusque facile constare possit. Quod autem ad confessionem Sacramentalem attinet, nullos plane turmatim, sed seorsim singulos audiant, diligenterque peccata, & eorum circumstantias, habita semper ratione ætatis & conditionis personarum, examinent ac inquirent: formam solitam absolutionis, quam memoriæ fideliter mandare debent, observent, idque nullatenus committant, ut retro Altare, vel in Sacrario, aliove abstruso Templi angulo, confessiones pœnitentium, præsertim fœminarum excipiant; verum in loco patenti, & omnibus conspicuo, ad Exomologesin accedentes audiant. Parochiam quoque unius alter invadere, vel Parochianos alienos ad Baptismi, Pœnitentiæ, Eucharistiæ, atque Matrimonii (z) Sacramenta, sine licentia proprii eorum Parochi, admittere non præsumat. Si culpabilem se ea in parte aliquis exhibuerit, præter id, quod suspensionem ipso jure incurreret, & tam diu ea innodatus ex ejusdem Sacri Concilii Tridentini Decreto remanebit, donec a Nobis absolvatur: etiam ad restitutionem eorum, quæ nonnullis in locis ex antiqua & laudabili consuetudine Parochis, Sacramenta administrantibus, pie offerri solent, injuriam passo tenebitur, & trium marcarum multa, in usus Seminarii Cleri nostri convertenda, punietur.

## CAPUT X.

*De sacris liquoribus quolibet anno renovandis.*

**S**iquidem aliquorum Sacramentorum debita administratio sine sacris liquoribus expediri Catholico more non potest, eapropter decernimus, ut singuli Parochi, aliarumque Ecclesiarum Rectores, omnesque illi, ad quos Sacramentorum administratio ex officio curæ animarum spectat, quotannis tempore debito, & solito, nimirum intra octavam Paschæ, liquores sacros ab Archidiaconis districtum suorum petant, & accipiant: prohiben-

(x) Conc. Trid. Sess. 24. C. 7. de Reformatione.

(y) Conc. Trid. Sess. 24. C. 1. de Reformatione Matrimonii.

(z) Conc. Trid. Sess. 24. Cap. 1. de Reformatione Matrimonii.



bentes serio, ne, quemadmodum hactenus indigne factitatum novimus, homunciones prophanos, pro ejusmodi liquoribus expediant, sed si Clericorum copia haberi non possit, ad minus Ædituorum, vel Vitricorum Ecclesiæ, qui eos dedita cum reverentia in pixidibus, sigillo Archidiaconi districtus obsignatis, perferant, opera utantur: qui secus fecerint, pœnis pro arbitrio nostro Canonicis mulctandi.

## CAPUT XI.

*Ne Prælati Sacerdotes peregrinos, sine commendatitiis priorum Ordinariorum suscipiant.*

**Q**UOS vaga mens honesti bonique propositi minus tenaces factos, certis sedibus consistere non sinit, atque ad mutandum crebro domicilium inordinata animi levitas impellit, experientia quotidiana didicimus, non exiguum scandalorum fomitem ex his, facile ad Sacra exercenda receptis, ac admissis, in vulgus prodiisse: quin potius id aliquando evenisse, comperit, quod nonnulli deplorati homines, nullis insigniti Ordinibus, ut collapsis vitæ scelestæ rationibus qualicumque modo consulerent, Sacerdotalis officii dignitatem mentiti, ab incautionibus quibusdam Ecclesiarum Præsidibus sine testimonii legitimi productione recepti, Sacramenta illicite & sacrilege administrarint, & Presbyterorum munus, ad quod legitime vocati minime fuerunt, obierint. Nonnulli præterea, aliis ex Diocesium, ob scelerum admissorum enormitatem, in exilium acti, vel etiam religionum votis impie violatis, ex Monasteriis elapsi, vita in hac quoque Diocesi nostra non minus, quam in Patria sua licentiose traducta, variisque scandalis datis, summum Clero nostro apud seculares odium confluxerunt, magnamque infamiae notam suis moribus toti Ordini nostro inusserunt. Quorum malitiis ut debite obvietur, & occasiones prædictorum inconvenientium præcidantur, statuimus, ne quisquam Prælatorum tam secularium, quam Regularium

*Tomus VIII. Concilior. German.*

Diocesis nostræ in posterum Sacerdotem, vel Clericum alterius Diocesis ad Parochialem, Sacellanalem, vel aliam quampiam functionem Ecclesiasticam obeundam, sine formatis, suspitione omni prorsus carentibus, & proprii ipsius Sacerdotis, vel Clerici Ordinarii commendatitiis literis, non solum liberam ipsius dimissionem, verum etiam vitæ honestatem & bonam conversationem attestantibus, suscipiat, aut ad Sacra exercenda, Divinaque celebranda admittat. Sic enim futurum pie in Domino confidimus, ut commissa hactenus per externos errores scandala tollantur, dum vel Domestici fidei duntaxat, vel ii, quorum vitæ innocentia & sanæ doctrinæ studium, fide dignorum commendabitur testimoniis, in partem sollicitudinis Pastoralis adsciti fuerint & vocati.

Lectis Constitutionibus & promulgatis, Illustrissimus Princeps ex sede sua confurgens, solitas ceremonias continuavit, iisque peractis, Sessioni secundæ ex placito Patrum finis est impositus, tertiæque Sessio pro die sequenti ad horam decimam quintam indicta fuit.

## SESSIO TERTIA.

**D**IE XIV. Novembris hora præfixa ad pulsam campanæ majoris vicissim omnes Prælati sæculares & regulares, Canonici, Parochi, alique sæculares & regulares Clerici, qui primis duabus Sessionibus Synodi interfuerunt, in dictam Ecclesiam Cathedralē convenere, tunc a Sacro solenniter per Reverendum Dominum *Joannem Rosenbluth, Præpositum Sternbergensem*, Ordinis Canonorum Regularium Sancti Augustini, sub Infula ad summum Altare decantato, Illustrissimus Princeps, albo pluviali auro contexto indutus, atque Pontificalem gestans infulam, solitas, juxta Pontificale Romanum, ceremonias exorsus est: iisque peractis, Reverendus Dominus *Petrus Grodecius, Præpositus Brunensis, & Canonicus Olomucensis* accepta ab Illustrissimo Benedictione, cecinit Evangelium, ut in Pontificali præscribitur. Finito Evangelio, Illustrissimus Dominus incipit Hymnum: *Veni Creator!* Choro & Clero occinente usque ad finem. Tunc in suo quisque sedili se collocavit, ac illico Reverendus Dominus *Theodorus Engls. LL. Licentiatus, Archi-Diaconus & Curia Episcopalis Olomucensis Officialis*, consensu

X x

ambo.

ambone, Orationem de Disciplina Ecclesiastica ad Clerum habuit in hæc verba:

### ORATIO.

**C**um turbulenta Arriani furoris tempestate Dei Ecclesia jactaretur, Reverendissime Antistes, Reverendi Patres, cæterique Sacerdotes, & Auditores Ornatissimi, Aphraatem, unum ex primi Ægypti Monachis, a Valente Imperatore interrogatum, cur e solitudine Antiochiam divertisset, respondisse ferunt: nulli e domesticis, si quod fulgur in ædes paternas incidisset, esse cessandum: verum his, ut aquam hauriant, festinandum: illis, ut ignem proserpentem suffocent, accurrendum: omnibus, ut domum, in qua sint & nati & educati, sartam rectam habeant, eritendum. Atqui nunc tam acerbis errorum incendio Ecclesiæ culmen conflagratum concidit, tam funesto flagitiorum igne, Domus Dei fulcra inflammata corrunt, tam pestifero calore fundamenta correpta concutuntur, ut si ullo sæculo, hoc certe maxime tristem illam Prophetæ [a] orationem, usurpare liceat: *Quanta malignatus est inimicus in Sancto! Et gloriati sunt, qui oderunt te, ... Incenderunt igni Sanctuarium tuum, polluerunt tabernaculum nominis tui, quasi in sylva lignorum... exciderunt jamnas ejus, in securi, & ascia dejecerunt eam.* Nemo itaque opinor, erit, Patres, quem vel cum Valente isto capiet admiratio, vos hodierno conventu, in publicum prodiisse ad ea capienda consilia, quibus, si non incendium restingui, saltem ne flammæ imperus longius pervadat, impediri possit. Multa sunt, quorum sollicitudo ad Ecclesiæ salutem saltem est utilis: & nihil tam necessarium, quam ut gregis Dominici Pastores, frequenter, libenterque conventus celebrent, quibus & pia, & sana, de ovium pastu inter se consilia agitent, & quod e re sit Ecclesiæ, non modo votis consentientibus decernant, sed & viribus conjunctis, exequantur. Hoc vobis præcipuum nostris præsidium relictum, ad hortum Dominicum, a noxiis vitiorum, errorumque herbis purgandum, quod & legibus non Apostolicis & Ecclesiasticis tantum, sed & Imperatoriis Decretum, & exemplis vetustissimis usurpatum, quanti Majores nostri fecerint, & opinio declamat, qua summam, si libere ad Concilia convenire liceret, Ecclesiæ felicitatem prædicabant: & desiderium indicat, quo in summis periculis Synodos frequentabant: & studium indefessum, in Decretis Patrum exequendis, ostendit. Atque istorum vestigiis vos hodierno die insistere probatis, adeoque istam negligentiam culpam, a vobis depellitis. Etenim cum duo

sint, quæ Patres Toletani jam olim ad Ecclesiam conservandam, & restituendam necessaria, judicabant, Conciliorum coactio, & ad disciplinam Ecclesiæ retinendam, executio; Vos, Patres, ad Dominici ovilis inspectionem convenisse videmus, consilia de lupis abigendis, morbidis ovibus ejiciendis, cepisse, haud obscure intelligimus, leges, ad diruta septa reficienda sancitas, advertimus. Verum in re tanta, cum Orator adhibendus sit, qui tum ornate ac prudenter, tum pie ac graviter verba faciat; ac illud mihi dicendi imperitia, judicii inopia, ac infantia neget: hoc vero neque mea ferat ætas, neque oratio sine Dei metu esse possit; erit, Auditores, vestri candoris, ac pietatis, me dicentem in altero benigne sublevare, in altero religiose adjuvare. Statuite ergo, vos non meam, sed eorum orationem audire, quorum authoritati, & vos plurimum deferitis, & ego in hoc dicendi onere, etsi arduo, viribusque impari, suscipiendo, cedere debui, aut potius Sanctorum Patrum sententias vobis annunciari & recitari, rectæ rationis judicium explicari existimate, neque a quo proficiscatur, sed quid ferat, attendite. Cogitate Divinitimum Moysen, prophani hominis Jethro admonitionem admisisse, & quod Cicero ait, summos Gubernatores, in magnis tempestatibus, a vectoribus nonnunquam utiliter admonitos fuisse. Itaque diu mihi cogitanti, qua in re, aut materia, exilem & jejunum hunc meum sermonem consummare velim, ratio in eam sententiam deduxit, neque hoc loco indignam, neque a studiis vestris alienam fore orationem, si cum & Patres Calcedonenses conventus habere sanxerunt, ut, quæ correctione opus habent, ex Patrum regulis, Sacrisque Canonibus & Constitutionibus emendentur, & in hanc curam, celeberrima quæque Concilia hujus generis incubuerint, ut mores fidelium integri conserventur, de disciplina Ecclesiastica verba faciam.

Primum itaque ostendam, Ecclesiæ disciplinam a Deo institutam, Præsulumque curæ mandatam: deinde explicabo, quanto pere ea, quorundam negligentia, & conniventia, summo & suo & Ecclesiæ malo collapsa sit: denique, quid ad eam instaurandam opus sit, breviter monebo.

Magna est rerum humanarum varietas, nihil in iis tam bene constitutum, nihil tam valide munitum, quod non in deterius prolabatur, quod non concidat; nisi & assidua cura sustentetur, & subinde renovata solitudine erigatur. Malum hoc, tam est pervagatum; ut non modo florentissimis Imperiis, ornatissimis Rebus, ac Illustribus Familiis

[a] Psal. 73.

miliis sit & infestum, & exitiosum; sed in Christi Regnum, in Dei Domum, quæ cœlesti Panoplia ab ipso Deo firmata, tam truculenter grassetur, ut non solum misere perturbata, sed prope etiam eversa videatur. Itaque quemadmodum Viri prudentes, ut Regna & familias, ob improbas hominum machinationes nutantes, ab interitu vindicarent, sive a Deo impulsæ, sive a natura edocti legum vincula, ac suppliciorum metum, invenerunt; sic Divino beneficio, ne acerbior aliquis casus Ecclesiam involveret, disciplina Canonica in eam inducta est: res, si D. Augustino credimus, tam ad omnem administrationem necessaria, ut, non dico, sine ea, Episcopus plebi, non Rex genti, non Judex provinciae, recte præesse possit; sed neque maritus conjugem, neque Pater filium, neque Dominus servum, cum laude regat. Atque istius tam præclari ac Divini inventi curam, vos Patres, & Pastores sustinetis: vobis apud Prophetam (b) Dominus locutus est: *Ecce ego dedi verba mea in ore tuo: ecce, ego constitui te super gentes, & regna, ut evellas, & destruas, & disperdas, & dissipes, & aedifices, & plantes.*

Nolite ergo hanc curam abjicere, si non & Divinum mandatum negligere, sanctissima exempla Ecclesiae contemnere, & cum certissima ratione pugnare velitis. A vobis Deus exigit, ut incessanter clametis, quasi tuba vocem eleveris, populo sua scelera annuncietis: vobis mandavit, ut vulpeculas vineæ suæ infestas capiat, gregem suum solícite visitetis. Prædicare igitur, Pastores, verbum, instate opportune, importune: cum omni imperio arguite, peccantes corripite, apprehendite disciplinam, ne irascatur Dominus, & pereatis de via justa: utimini potestate, quam vobis Deus, non in destructionem, sed ædificationem tribuit: injicite contumacibus frenum Ecclesiasticarum censurarum, quo tanta audacia reprimatur, & ferocia mitigetur. Hoc agite in animarum curatione, quod in corporum medicis videmus, qui morbi ratione, non dulces modo, sed & acerbæ potiones agrotis propinant, & vulnera nunc leniunt, nunc exasperant. Scio, Auditores, gravissimis Pontificibus videri, plus in corrigendis improbis interdum agere benevolentiam, quam severitatem: plus exhortationem, quam comminationem: plus charitatem, quam potestatem. At mansuetudo Medici, si morbi vim confirmet, carnificina est: Regis clementia in regni hostes, tyrannia est: Pastoris bonitas in lupos sævientes, in oves contagiosas, est crudelitas. Ergo cum mulci oratione neque blanda, neque acerba floctan-

tur, viam disciplinæ ingrediemini, non certam modo, quæ a Deo monstrata, sed & planam & expeditam, quæ omnium vestigiis trita est. Usque enim adeo, ipsa etiam natura faciem vobis præfert, ut in ea sequenda ab hominibus a fide & pietate dimotissimis, tum præcepta, tum exempla petere liceat. Memoria aliquis secum, obsecro, repetat, quæ Plato, quæ Aristoteles, quæ alii in effringenda Reip. absolutæ forma, friteris mandarunt: eogitet, quæ a barbaris legum-latoribus de religione & justitia sunt sancita: perpendat, quam severi impietatis extiterint vindices, & videbit in eorum decretis & studiis, non claram modo civilis administrationis effigiem, sed ne minime obscura Ecclesiasticæ disciplinæ vestigia reperiet. Quid enim aliud volebat Templi Epidaurici inscriptio, quæ sceleratis aditum intercludebat? Quid illa XII. Tabul. lex, quæ impios donis iras Deorum placare verbat? Quid censoria Romanorum potestas, quæ populi mores regebat, in Magistratu probum non ferebat. Utinam vero cujus umbram tanto studio prophani isti homines, ad ementitas religiones propagandas, ad fucatam probitatem mortalibus instillandam consecrati sunt; ejus veram rationem mediocri diligentia ad Christianæ pietatis ac justitiæ fructum aliqui tenerent! Utinam pudorem in his excitet disciplinæ studium, ab illis naturæ ductu susceptum, vobis vero Divinis decretis, & exemplis propositum. Intuemini, Auditores, veterem Synagogæ gubernationem: inspicite primam Ecclesiæ & institutionem & administrationem; semper apud Dei populum Divinum hoc institutum viguisse animadvertetis. Moyses Deo authore mandavit, ut, qui in Legem graviter peccasset, instar immundi, & abominandi haberetur, a tabernaculi aditu ad tempus arceretur: qui gravius deliquisset, a Synagoga ejiceretur, e Dei populo excisus, cum Israeliticis non censeretur: qui morum flagitio minime destitisset, diro anathemate percussus, æternis suppliciis adjudicaretur. Et hæc sanctissima Christi instituta, in ipsis Ecclesiæ cubulis quanta cura excoluerint primi a Deo relictæ Pastores, Apostoli, Episcopi: quanta sollicitudine Pontifices ad disciplinam augendam, firmandamque incubuerint, Canones Apostolici, Conciliorum Decreta, Pontificiæ Sanctiones, non obscure id declarant, tot in errata populi censuris refertæ, ut undique improbis suspensiones, undique irregularitates, & interdicta infligant. Agite igitur ista tuendæ fidei, servandæ pietatis arma, Divinitus nobis tradita, semper a piis Pastoribus exerta, nolite depo-

(b) Jerem. i.

Tomus VIII. Concilior. German.



deponere; sed quod Deus apud Prophetam jubet, accingite lumbos vestros, agite & loquimini omnia, quæ Deus nobis præcepit. Imitamini in coercendis excessibus Divini Moyſis fervorem: Joſuæ induitiam vobis proponite: Phinces induite zelum, opitulamini pietatis cultui, jam pene defloresceni: quod illi ferro, quod igne in vitiis vindicandis cum laude egerunt, vos nequaquam armis disciplinae, delictis puniendis intermittite. Sequimini Ducem vestrum Jesum, flagello in sacrilegos Domus Dei prophanos sævientem, templo, everſis mensis, effuso ære, impuros mercatores ejicientem. Veniant vobis in mentem sanctissima Majorum exempla, Cypriani, Ambrosii in Theodosium, Augustini in Bonifacium Comitem. Istorum vobis in disciplina, magnis etiam periculis custodienda, imitandus est zelus: istorum vobis revocandum studium, si eum vestrae administrationis fructum Ecclesiae ferre cupitis, quem veterum sollicitudo & constantia reliquit. Inspicite, quaeso, mores, & vitam Sacerdotum antiquorum: integritatem & innocentiam plebis animo volute: reducite in memoriam florentem priscae Ecclesiae faciem; & quid diligentia, solertique opera animadversionis effectum sit, colligite. Quamdiu illa pudoris & modestiae magistra viguit, vere Pastores formarent, exemplum facti: in omni pietate, morum integritate, & honestate vivebant: quod nomine, quod ore, quod habitu profitebantur, in eorum vita lucebat: vere de Sacerdotibus affirmabatur, quod ligneis utens calicibus, ipsi essent aurei: tanta & mysteriorum eruditione, & Majorum pietate fulgebant. Et quod istis studiis & Cleri & populi, magnus Christiano nomini splendor allatus, magna Ecclesiae tranquillitas accesserit, & parata sit, nemo tam est ignarus, quin probe calleat. Testis est ipsa rerum natura, disciplinae beneficio ista vel maxime comparata. Quid enim non magis constrixis improborum ausibus bonorum florebat pietas, cum evulsis zizaniis, suspenso lolio, ager cultior, seges lætior videbatur? Testis est nefarius apostata Julianus, non solum Christianis Legibus, Sacerdotum innocentiam, plebis pietatem, Ecclesiae fines proferri querens, sed & similem disciplinae formam Ethnicis instituendam, Arsatio Galliae Pontifici mandans. Testes sunt denique ipsi hæretici, qui ut perditionis sectas introducant, ut infestam sobolem propagent, annon sacrilegas errorum suorum officinas, velut subdole Christianorum simiae, confectis disciplinae umbris obducunt? Quantum ea in re, veterum quorundam hæreticorum fuerit studium, ex Novatianis apud Cyprianum, ex Donatistis apud Augustinum, ex

aliis apud Epiphanium discere licebit. Nostorum vero, quis non perspexit fraudem? Intuemini immanes istos cyclopas, an non diligentissime speluncis suis prospiciant, ne quis avitæ pietati deditus, pedem in iis figat? An non advigilent, ut coercendis publicis flagitiis, larva honestatis se obtegant? Proinde si unquam solícite attendere, diligentem curam adhibere oportuit, jam vero potissimum, quando tot hostes, ut diximus, & inimici Crucis Christi, variis, pestiferisque doctrinis, fideles inficere, atque in suam massam pertrahere moliuntur. Ad canem ut cædas, baculus requiritur: Ecce vobis baculus ille Pastoralis, censurae salutare Ecclesiae, quibus tanquam struma civitatis & pestis Christianae Reipub. sunt excutendi. Iis tanquam arundineis bacillis, si non fugentur, quid enim tartarei illi Cerberi non spernunt? Accingite vos gladio spiritus, penetrabiliore omni ense ancipiti, gregem vobis commissum a lupina direptione illa sum conservare: Agnellos ex immanium ferarum trisulcibus eripite, stygios Leones ope & gratia Divina, ejusque sanctissimi sermonis virtute confodite, jugulate, ac demum, ut obmutescant, cogite. Qua in re quanta discretio, prudentia quanta requiratur, multis persequi, neque res, neque tempus postulat: quod omnes tanquam expertissimi Medici, diversis morborum generibus, diversa antidota noveritis præparare, & severitatis rigorem æquitate, & lenitatem quadam severitate moderari. Audistis, Patres, cæterique Auditores, disciplinae severitatem a Domino Pastoribus mandatam, audistis, quibus ea Sanctionibus contineatur.

Audite nunc, quomodo ea, quorundam negligentia & conniventia collapsa sit. Nolim hic meum sermonem ita accipi, ac si omnes officii minus debite administrari arguam: quam plurimos enim muneri commissi gnaviter & strenue incumbere, apparet. Porro per omnia, Apostolus inquit, temetipsum præbeas formam bonorum operum. Nihil [vult dicere] est virtutis præconium foris, nisi vitæ innocentia domi. Destinati estis in Republ. Christiana censores morum, accusatores scelerum, & omnis iniquitatis extirpatores; cavere igitur omni studio, ne, quod in aliis cupitis ademptum, in vobis tenacius hæreat: prospicite, ne quod verbis recte & sancte plantetur, prava & dissoluta vita eradicetur. Sal terræ & lux mundi cum sitis; quid vitæ indecenti, puro sermoni tenebras offunditis? ac non magis gregi univervo faciem præfertis ad justitiæ opera? Cur non salem sapientiæ super fideles infunditis, ut omnes vitæ vestrae exemplo etiam tacite moveantur, nihil efferre, quod sanctitatem non sapiat: nihil agere, quod cœlestem ju-

sticiam

stiriam non redoleat? Populus enim ob ingenii stuporem, ex vita Doëtorum, omnem doctrinæ veritatem metitur: nullum tenet inter Doëctorem & doctrinam discrimen: pie admonitus jussa Sacerdotum ridet, jure castigatus eorum vitia regerit. Quis enim aures benignas præbebit homini ambitioso, de contemnendis honoribus disputanti? Quis avarum, quis superbum, quis perfidum, & id genus sceleribus coopertos homines, de liberalitate, humilitate, dictorum ac factorum constantia, de honestate, ac reliquis virtutibus differentes ac perorantes attente audiet? Audire, quid non humana, sed Divina vox apud Malachiam edicat: Sacerdotes esse a Deo repudiatos, Sacerdotio excidisse, cunctis honoribus exutos, & vice versa affectos ignominia, quod scientiam a se abjecerint, Legem Dei ventis tradiderint. Testis est futurorum præcius Daniel, Sacerdotes ob scelera contempnissimos fore, ac mundi fabulam, quod pactum Domini irritum fecerint. Testis Hieremias in Threnis, Sacerdotes ob flagitia sua, tanquam lapides platearum dispersos iri. Testis tota antiquitas, testes omnes Orthodoxi Patres, Sanctimoniam Clericorum, Religionem stabilivisse; eorundem peccata hanc ipsam evertisse. Omitto exempla, ne sit infinitum. Tantum hoc a vobis peto, ut taciti de omnibus, quos quondam in Clero fuisse cognitum est, cogitetis; intelligeris unumquemque illorum prius a sua vita, quam vulgi opinione esse laudatum. Attendite ergo vobis, attendite gregi vestro, super quem vos Christus posuit, regere Ecclesiam Dei, quam acquisivit sanguine suo. Diligenter agnoscite vultum pectoris vestri, greges vestros considerate: *Omne (c) caput languidum, & omne cor mærens. A planta pedis usque ad verticem, non est sanitas in eo: vulnus & livor, & plaga tumens, non est circumligata, nec curata medicamine, nec fota oleo.* Considerate, quanta, dum non vigent leges, Sacerdotalem ordinem, in quo sanctitatis exempla lucere oportebat, improbitas invaserit: quanta populum Christianum occuparint flagitia, quantis Dilecta Dei Sponsa involuta miseriis? Quos Deus lucem mundi esse voluit, ignorantia tenebris immerfi sunt; quos oportebat esse lucernam, toti domui lucentem, imperitia cæcutiunt: quos sal terræ esse decebat, parum Christo dignum sapiunt. Stare quidem adhuc ex parte videmur, dum veteris status vestigium servatur. Verendum tamen, ne consummatum Ecclesiæ naufragium eveniat. Id jam instat nobis præsens: instat, inquam, o Pastores, porrigite manus, in genua inclinate, paternæ vestra viscera commoveantur, lacrymas profundatis. Quid

enim aliud agitis, dum in domo Dei scelera cernitis, & flagellum, quod Christus vobis tradidit, continetis? dum pestem, qua oves corruptæ sunt, sentitis, & contagionem fovetis? Audite ergo Sacerdotes, quoniam vobis est judicium: quia laqueus facti estis speculationi, & rete expansum super Thabor. *Vae Pastoribus Israel, qui pascunt semetipsos & solos, a duobus Sanctissimis Vatis Ezechiele & Jeremia infertur: Nonne greges a Pastoribus pascuntur (d)? Lac comedebatis & lamis operiebamini, & quod crassum erat, occidebatis, gregem autem meum non pascebatis. Quod infirmum fuit, non consolidastis: quod egrotum, non sanastis: quod confractum, non alligastis: quod abjectum, non reduxistis.... Et dispersæ sunt oves meæ, factæ sunt in devorationem omnium bestiarum agri... Erraverunt greges mei in cunctis montibus.. & super omnem faciem terræ dispersi sunt, eo quod non erat, qui requireret. Cogitate igitur, quæ sit muneris vestri amplitudo, quæ dignitas & honor, atque ingratum animum exhorrescite: percellat illum horrenda illa Dei vox: Audite Reges, (e) & præbete aures, qui continetis multitudinem:... quoniam vobis data est potestas a Domino, & virtus ab Altissimo, qui interrogabit opera vestra, & cogitationes scrutabitur, quia cum essetis ministri ejus, non recte judicastis, neque custodistis legem justitiæ, neque secundum Dei voluntatem ambulastis. Agnoscite itaque, quid fieri debeat: expavescite, qui salutem animarum incuria impeditis. Parcite, obsecro, parcite sanguini, qui pro vobis effusus est: cavete periculum, terreat vos horrendum illud Divinæ comminationis fulgur. O Pastor, (f) o idolum derelinquens gregem! gladius super brachium tuum, & super oculum dextrum: brachium tuum ariditate ficcabitur, & oculus tuus dexter tenebrescens obscurabitur.*

Restat nunc postremum, in quo disciplinæ reparandæ spes omnis sita est. Qua in re cum & si vos salvos cupitis, jam tutos vos esse oporteat; id vobis providendum est, ut quibus disciplina profligata est, hæc a vobis quam longissime dimoveatis, vigent vero, quibus ipsa jam olim constituta, & longo tempore conservata est. Atque tribus istis omnem non modo disciplinæ interitum, sed honestatis everfionem debere, & ratio & experientia convincit, quorundam dico inscitia, vitæ scandalosæ, & desidia. Quod si ergo eam Ecclesiæ restitutam cupitis, id unice curandum erit, in Clero sint homines ornati doctrina, pietate fulgeant, zelo Dei inflammentur, vitæ innocentia, in qua omnis doctrinæ instaurandæ spes collocata est, præ omnibus polleant; ut quod

X x 3

verbo

(c) Il. 1.

(d) Ezechiel 34.

(e) Sap. 6.

(f) Zachar. 11.

verbo fieri jubent, factis ipsis, vitæ innocentia, & sanctimonia contentatum reddant. Istis septi præliis, nulla eos difficultas, in suscepto onere remorabitur: quibus destituti, non dico disciplinæ fructum, sed ne formam quidem sperare licebit. Vultis Ecclesias bene verbo veritatis instrui, vultis enutrirī filios in correptione, non vultis figulinam (ut ait ille) in dolio discere, hoc est, cum animarum periculo pietatem meditari; animarum Curatores, quantum fieri potest, exhibete, qui sacras literas didicerint: sciant, quomodo oporteat conversari in Domo Dei: sciant decenter gregem Dominicum pascere, ut possint præesse in solitudine. Illud tamen etiam statuere, literarum scientiam, solum pietatis studium ad mores hominum corrigendos, non sufficere; nisi sopitus in animis Sacerdotum fervor rursus exsuscitetur, nisi extinctus religionis, & innocentiae zelus mentes eorum inflammer, nisi ab isto negligentiae somno excitati, diligentius posthac evigiletis. Apostoli igitur consilium secuti, operam date solitudini, exhortationi, doctrinæ. Hoc unum meditemini, in hoc uno estote, ut profectus vester notus fiat omnibus. Operarios vos præbere, non erubescere: stete in fide, viriliter agite, & confortamini, omnia vestra in caritate fiant. Excute istum ab animis vestris languorem, æmulamini vos Dei æmulatione: Divino zelo armati, non collaborate modo Evangelio; sed bonam in eo militiam militate. Erratis, erratis inquam, si vos in tam periculoso Christiani orbis bello, spectatores exhibere satis esse ducitis. Intuemini, intuemini, ad vos igitur hujus rei consideratio pertinet. Conventum hodierna die agitis, auditis, quanta Ecclesiam mala occuparint, quanta nos pericula infestent, & dum non datis operam, ut fibras flagitiorum exscindatis, ut omnem furoris materiam, illud miseriarum Seminarium extirpetis, Catholicæ fidei & integritatis plantaria semineris; tam horrendis erroribus implicamini, ut non jam ab Ecclesia, sed Deo ipso, a Christo Salvatore, manifestam defectionem nonnulli moliri videantur. Quod si ergo neque Dei mandatum, quo vobis cura commissa est, neque Majorum exempla, quæ vos ad diligentiam cohortantur, ut tandem manus auxiliatrices adhibeatis, vos excitant; obsecro, inconfutilis Christi tunica tam misere dilacerata, grex Dominicus, qui instructione cumprimis indiget, denique salus propria, quæ cuilibet quam maxime cordi esse debet, vos moveant & inflamment. Date, date, inquam, operam, quantum vires & facultates sinunt, ut ista Sathanæ mœnia convellatis, arcem ipsius vestro conatu diruatis, Dei

domicilium in animis hominum exciteris, pietatis fundamenta in moribus jaciatis. Nihil majus, aut Divinius excogitari potest, ad coercendas hominum cupiditates, ut ea vitia, quæ legibus humanis, & judiciis emendari nullo modo possunt, istis vestris censuris expedite: primum latenter ac amice, tum paulo acerbius, demum graviori animadversione ex potestate Divinitus vobis tradita utimini. Habetis Præsulem, absit hic omnis assentationis nota, si fervor religionis, si pietas, si eruditio, si eloquentia, si ceteræ dotes Episcopo dignæ spectentur, nulli secundum. Habetis ducem memorem vestri, vestras libertates summa cum laude tutantem, quæ non semper facultas datur. Omnes boni, quorum nec contemnenda pars in Clero, ad reformationem mente, voluntate, studio, virtute, voce consentiunt. Vineam Christi a pessimis feris depasta, oppressa noxiis humoribus Ecclesia, vobis supplex manus tendit mater communis: vobis se, vobis salutem filiorum, vobis ipsam Ecclesiam, vobis & vigilanti vestra custodiæ, muros atque urbis tecta commendat. Tot igitur piis Ecclesiæ lachrymis, tam paterno Præsulis animo, tantæ veri Antistitis vigilantia, tot fidelium suspiriis ut digne respondeatur, vobis hodierna die providendum est. Retinenda est vobis constantia, gravitas, perseverantia: repetenda, & quasi postliminio reducenda est verus illa severitas. Tum tu, Sancte Deus, nobis illa Saturnia regna, & tuis Vicariis authoritatem debitam restitues: Cunctos perfidiæ socios, a tuis aris, & templis, a tectis urbis, ac mœnibus, a vita, fortunisque fidelium omnium arcebis, & omnes inimicos Catholicorum, hostes religionis, scelerum fœdere inter se nefaria societate conjunctos, mactabis. Vos, Auditores, capietis denarium, pro fidei navata opera in vinea Domini, æternam atque immarcescibilem cœlestis gloriæ coronam: audietisque gratissimam illam Christi æterni Judicis vocem: *Euge serve bone (g) & fideles, quia super pauca fuisti fidelis, supra multa te constituam, intra in gaudium Domini tui, ad quod nos omnes deducat, qui est benedictus in sæcula.*

Ubi perorasset Archidiaconus, Illustrissimus Princeps ex consilio & placito Patrum Cancellario injunxit, ut suggestu consensu Statutorum Synodaliū residuam partem legeret, & publicaret, quæ quidem per illum lecta & promulgata fuere, ut sequitur.

CAPUT



## CAPUT XII.

*De Vita & honestate Sacerdotum,  
& aliorum Clericorum.*

**Q**Uæ de orthodoxæ fidei mysteriis, nec non de Christianæ charitatis officiis per Sacerdotes populo proponi solent, longa experientia compertum est, vix debitam persuasionis vim ac efficaciam sortiri, nisi illorum tradendorum ratio universa vitæ inculpatæ exemplo salutari, ab iis, per quos traduntur, comprobetur. Unde qui in sortem Domini vocati sunt, Divinorumque ministerio addicti, si morum gravitate atque honestatis studio dignitatem ipsimet suam tueantur, non parum authoritatis ad pie honesteque vivendum aliis præstat; si vero a vocationis suæ religioso instituto deflecentes, vel in minima re delinquant, adeo ordinis sui diminuunt authoritatem, ut illum dignitatis decorem & splendorem retinere nequeant, qui ad seculares in officio continendos, maxime utilis, imo plane necessarius esse videtur. Sic enim natura comparatum videmus, ut quisque etiam ex infima plebe, facilius fidem accomodet iis, quæ sequenda proponuntur, ubi cum dictis Magistri facta quoque ipsius convenire, & non aliud verbis doceri, aliud vero vita exprimi advertit. Doctrinam itaque suam efficacior fore intelligens Sacerdos, eam, quæ ex vitæ laudabilis uberrimo fonte deprompta, atque ad alios derivata fuerit, diligenter in eam incumbet curam, ut omnes vitæ suæ actiones ad exactam pietatis, & honestatis componat normam, sicque in luce & celebritate hominum versetur, ne Christianam aliis suadens modestiam, eosque in lege Domini erudiens, incompolitorum morum offendiculo, animos populi a doctrina sua tanto reddat magis aversos, quanto minus verba ipsius factis respondere fuerint visa. Cogitet, turpe esse Doctori, quem culpa redarguit ipsum: consideret, quanta sit officii sui dignitas & majestas, cumque non ignoret, se mediatorem inter Deum & homines constitutum esse, ita dignitatem suam tueatur, ne se

tanto honore indignum præbeat. Dies & noctes in lege Domini meditetur, quidque ipsum facere conveniat, sedulo attendat: ita ut lucem & facem quandam ad vitam beatam tendentibus præferre videatur. Ille siquidem unus ex illis est, quos Dominus sal terræ in Evangelio, & lucem mundi appellat. Ille pro universo terrarum orbe legatione ad Deum fungitur, deprecatorque est apud Dominum, ut peccatis mortalium propitius fiat. Ille, quod purissimis ac beatissimis denegatum est Spiritibus, Sacrosanctum Corporis & Sanguinis Jesu Christi Sacramentum Divini verbi virtute conficit. Ille peccati labe oppressos homines, concessa sibi cœlitus ligandi & solvendi potestate, in spem Regni cœlestis erigit, & cum Deo Optimo Maximo, qui se a peccatoribus avertere solet, in gratiam eosdem redire facit, eosque ad tartara ruentes, e medio cursu revocatos, vitæ æternæ restituit. Officii itaque Sacerdotalis sublimitatem sanctitate morum eo magis ornandam convenit, quo severiore vindicta negligentia & contemptus Sacrorum, qui ex Ministri impuritate resultat, a Deo justissimo punietur.

## CAPUT XIII.

*De castitate Clericorum, & ne  
cum suspectis mulieribus  
conversentur.*

**C**ontinentiæ studium quemadmodum etiam in iis, qui nullo ejus servandæ voto, aut necessitate adstringuntur, maxime laudabile est, & commendabile; ita eos imprimis decet, quorum pars hæreditatis ipse Dominus est, in cujus sortem vocati, vasa corporum suorum in sanctitate possidere, seque ab omni carnalium desideriorum impuritate & immunditie diligenter custodire debent. Ut igitur Diœcesis nostræ Clericorum mores & actus in melius reformatur, neve eorum inhonestæ conversationis suspicio, offendiculi ansam præbeat secularibus, statui-  
(b) mus, ut nullus Sacerdos aut Clericus  
nem

(b) Conc. Trid. Sess. 25. Cap. 14. de Reform.

nem habere, easque nec domi retinere, nec earum domos frequentare præsumat: & si forte aliqui ex naturalis pietatis officio matrem, amitam, sororem, aut alias consanguineas, Canonibus Sacris concessas, in domibus retinendas atque alendas duxerint, meminisse debent, & in his aliquando instigante diabolo, aut in pedissequis earum scelus perpetratum fuisse, atque proinde præstare, periculi evitandi causa, tales personas extra domos Clericorum, degere, ne vel consanguinitatem ignorantibus sinistra suspicio ingeratur, vel turpe aliquid contra conscientiam, & Dei mandatum committendi occasio relinquatur. Atque infelici hoc quidem ævo adeo Clericorum Ditecesis nostræ mores depravatos esse non sine justo animi dolore advertimus; ut in carnalium concupiscentiarum ceno sepulti, plus libidinibus nefandis vacare, quam Divinorum, ad quæ tractanda vocati sunt, pia exercitatione occupari videantur. Hinc nonnulli ad Matrimonia prætenso post Ordines Sacros susceptos convolare, atque eas, quibus illicite copulati sunt, legitimarum uxorum loco habere, nec minus cum illis, quam cum liberis incontinentiæ nefandæ testibus, publice circumvehi non verentur. Nonnulli etiam, si talia Matrimonia de facto non contrahunt, muliercularum tamen inhonestarum pravam & impudicam non evitant cohabitationem, ac sub matrum-familias, vel coëtricum prætextu, eas in domibus suis magno cum scandalo plebis, & totius Ordinis Ecclesiastici dehonestamento retinent.

Quorum perversitati ut tandem opportunis remediis obvietur; moneamus serio Archidiaconos, aliosque omnes Prælatos, ad quos jus visitandi, aut etiam corrigendi aliqua ratione pertinere dignoscitur, ut quoscunque indistrictibus suis repererint Clericos cujuscunque gradus, dignitatis, & eminentiæ, qui inhonestas mulieres in domibus suis retinent, aut etiam in alienis specioso quovis prætextu fovent, vel earum commercia, atque consortia quovismodo affectant, memores officii sui, eosdem ad Nos deferant, quo secundum Sacrorum Canonum Decreta

contra tales diffidentiæ filios legitime procedere, & impudicitiam ejusmodi pœnis pro delictorum enormitate infligendis compescere, ac exterminare possimus. Dignum est enim, ut quos ad vitæ decora domesticæ laudis exempla non revocant correctionis, saltem medicina compellat, utque ferro abscindantur vulnera, quæ fomentum non senserint medicinam.

## CAPUT XIV.

*Ne Clerici noctu per plateas vagentur, sed in domibus suis pernoctent.*

**Q**uia tenebræ ad malum fabricandum, atque honestati adversas actiones obeundas sunt accommodatissimæ; Satuimus & districte præcipimus, ne posthac Clerici nocte intempesta, & hora suspecta, per vicos & plateas locorum, in quibus commorantur, noctuarum, aut vespertilionum more, oberrent: imo nec in domibus secularium sine gravi causa, & summa necessitate, pernoctare audeant; sed domi suæ quisque præsertim eorum, quibus animarum cura incumbit, se contineat: ut si forte aliqua vel confessionis infirmorum excipiendæ, vel alterius Sacramenti administrandi ex inopinato ingrueret necessitas, non per alienas domos quæri, sed propriis in ædibus illico reperiri, officiumque suum exequi possit. Qui contra fecerit, seque culpabilem ea in parte exhibuerit, sciat, se pœna inobedientiæ debita, ad primam Archidiaconi sui denunciationem a Nobis correptum & coercitum iri.

## CAPUT XV.

*De sobrietate a Clericis servanda, tabernis non frequentandis, & conviviis ac comessationibus fugiendis.*

**C**um D. Hieronymo teste, luxuriosa res sit vinum & tumultuosa ebrietas, cumque venter mero æstuans cito despumat in libidines, idemque Apostolus

stolus moneat dicens: *Nolite* (i) *inebriari vino, in quo est luxuria*; ea propter Clerici, quorum sensus ad obeunda ministeria sacra vigere, & mentes ad Deum erectas esse convenit, sobrietatis studio omnibus antecellere, & ebrietatis, quæ mentis inducit exilium, libidinisque provocat incendium, cane pejus & angue fugere debent. Animadverso itaque, remulentix vitium adeo Cleri nostri mentes, ad enormia quævis perpetranda pronas & faciles jam reddidisse; ut verecundiæ Sacerdotalis immemores, talia committere palam non vereantur, qualia in hominibus secularibus quivis Magistratus, impunita nullo modo relinquere solet: laudabile temperantiæ studium restituere, multisque ex ebrietate provenientibus malis occurrere cupientes, mandamus, & statuimus, ut Clerici sanctam, & Ministris Dei dignam sobrietatem, tanquam honestatis magistratam colant, ejusque, sive in domibus privatis, sive apud alios observentur, apprimè (k) existant.

Tabernas itaque publicas, bibendi vel edendi causâ, nisi peregrinationis necessitate compellantur, ingredi, atque ibidem cum hominibus prophanis, ad patinas variis nidoribus fumantes, meroque aut cerevisia spumantes pateras, turpiter hæere sibi nefas putabunt: convivia, & comestiones, choreas, aleas, aliosque infames lusus, omnino vitabunt (l), & si forte honesti cujusdam viri mensæ adhibiti fuerint, modestiæ ac gravitatis Clericalis memores, caveant diligenter, ne tantopere vel epularum illecebris, vel fœcundiorum calicum ubertate, atque vini potentia obruantur, ut distento ventre, & mente poculorum calore perturbata, in plausus & risus inconditos solvantur, & fabellas inanes ibidem referendo, aut in cantus lascivos prorumpendo, scurras & histriones potius, quam Sacerdotes se exhibeant.

Si vero plures Sacerdotes, aliosve Clericos ad anniversarium alicujus defuncti, vel Dedicationis Ecclesiæ diem,

vel ad primum novelli Sacerdotis Sacrum, aut alia quavis honesta de causâ congregari, & refectionem necessariam, abiolutis primum iis, quæ munus eorum concernunt, sumere contigerit; sine benedictione mensæ non accumbent, neque etiam sine gratiarum actione isthinc recedent. In convivio autem id omnibus curæ erit, ne se invicem indecora ad potus æquales invitatione & obligatione gravent: neve pro salute aliorum (ut inter seculares fieri solet) immania pocula exhaustiant: id enim sicut indecens est & onerosum, ita a servis Dei remotissimum esse debet. Barbaricum namque ingurgitandi se se morem, cum ii omnes, qui excellentiorum quorumvis officiorum functionibus exercendis destinantur, studiose fugere soleant; equidem Sacerdotes, quorum muneris amplitudinem humanis verbis explicare difficile est, fœtidam ingluviem sectari, & nocturno (ut ille) fœtere mero, certare diurno, non solum minime decet, sed abominabile inprimis est ac horrendum. Expendant accurate Sacerdotes, quam multa olim mala pepererit ebrietas, quantave clade sequaces sui quotidie afficiat. Noe, quem universo genere humano naturæ summus opifex Deus pro ejusdem generis conservatione, cataclysmo vel diluvio subduxerat, vino pressus nudavit fœmora. Loth, quem Sodomorum iniquitas, a recto bene vivendi proposito abducere non potuit, vicit ebrietas. Holofernem bellicosissimum, imbellis fœminæ manu obtruncari fecit ebrietas, nuncque tantam in genere humano stragem facit, ut plures vino obruti pereant, quam hostili perimantur ferro. Et quamvis de Cleri nostri pietate nil, Domino juvante, diffidimus, adeo ut unumquemque vocationis suæ debitam habiturum rationem, & sicut alia fœda vitia, ita crapulam & ebrietatem, quæ ad turpitudinem omnem fores patefaciunt, vitaturum esse non ambigamus; si qui tamen (quod absit) conditionis suæ immemores hac in parte se se exhibuerint, sciant, severiores pœnas inobedi-

(i) Ephes. 5.

(k) *Supple*: Studiosi, vel quid simile.

(l) Conc. Trid. Sess. 22. Cap. 1. de Reformat.

Tomus VIII. Concilior. German.



dientiz, temeritatisque eorum coer-  
cendæ per nos adhibitum, belluinam-  
que hanc carnalium sensuum exorbita-  
tionem, ultra distributionum quoti-  
dianarum & aliorum proventuum sub-  
tractionem, atque ab officio & benefi-  
cio (ut Canones Sacri decernunt) su-  
spensionem, commensuratis delicto ani-  
madversionibus, ultum iri.

## CAPUT XVI.

*Ne Clerici in ædibus suis vina  
aut cerevisiam propi-  
nent.*

**H**umanæ leges cauponum suspe-  
ctam habentes fidem, non pau-  
ca contra eosdem edidere Statuta:  
adeo, ut jam tam vilis negociationis  
genus etiam apud inconditum vulgus  
male audiat, subindeque ergasteria ex  
necessitate adeuntes, non minus con-  
tra lucri avidos tabernarum exercito-  
res, armare se se consueverint, quam  
si sub Jove frigido, inter spælaæ fera-  
rum pernoctandum foret. Et de tali  
proinde illicito quæstu, suspicionis, &  
scandalorum, facile inde provenientium  
vitandorum, causa statuimus; ne  
quispiam ex Prælatiis tam secularibus,  
quam regularibus *Canonicis*, Parochis,  
aliisve Diœcesis nostræ Clericis, publi-  
cam tabernam, in qua vinum aut cere-  
visia venum exponatur, domi suæ,  
quam incolit, habere præsumat: neve  
privilegiis, quæ olim Majorum nostro-  
rum fundis Ecclesiæ concessit pietas, in  
grave animæ suæ periculum, totius-  
que Ordinis Ecclesiastici dedecus maxi-  
mum abutatur. Si enim Clerico, ex-  
tra peregrinationis necessitatem, taber-  
nas edendi, bibendive causa ingredi Sa-  
cra Canones prohibent; quanto minus  
tabernas exercere, & vile cauponis  
ministerium obire, eidem ex dictorum  
Canonum præscripto licebit. Id tamen  
non prohibetur, ut si forte Prælati re-  
gulares vina, ex propriarum cultu vi-  
nearum, ex decimis, vel etiam alia  
quæcunque habuerint, ea in locis op-  
portunioribus, extra clausuram Con-  
ventus, sine scandalo, sæcularium  
opera requisita propinari curari possint.  
Si qui reperti posthac fuerint, Statuti

hujus immemores, vino ipso, quod  
sic venum exponere ausi fuerint, per  
Fiscalem nostrum privandos, ac pœna  
Canonica, pro arbitrato nostro insuper  
se irremissibiliter mulctandos, certo sci-  
re debent.

## CAPUT XVII.

*Ne Clerici comam nutriant aut  
barbam.*

**A**ntiquis Statutum novimus Ca-  
nonibus, ne Clerici barbam, co-  
mamve nutriant: quod cum eo dun-  
taxat intelligendum sit modo, ut non  
plane derasis capitibus, mentoque gla-  
bro, & quasi psilotro levigato, Cleri-  
cos incedere oporteat, sed ne comam  
ita relaxent, ut concinnati & calami-  
strati appareant, vel barbas, præsertim  
labro superiori insitas, adeo produ-  
cant, quo irreverentiam Sacris Myste-  
riis altaris Domini irrogent; idcirco  
decernimus, ut tam in coma, quam in  
barba, Diœcesis nostræ Clerus, præ-  
sertim vero Sacerdotes, debitum non  
transcendant modum, ac modestiam:  
ne hirsutioribus barbis silvestres homi-  
nes, comave laxiori scæminas referant,  
ac non minus Sacramentis, quæ tra-  
ctant quotidie, injurii fiant, quam lai-  
cis scandalosi. Quod si qui nihilomi-  
nus post Decretum hoc nostrum im-  
modestiam hac in parte suam corrige-  
re, debiteque ac congruenter tonderi  
noluerint, post primam Archidiaconi,  
aliorumque Visitatorum monitionem,  
inviti ab iis tonderi poterunt, pro ar-  
bitrio insuper nostro inobedientiæ no-  
mine mulctandi.

## CAPUT XVIII.

*Ne Clerici armis offensivis  
utantur.*

**A**rmorum usum præternaturalis  
hominum, in genus proprium  
sævientium, induxit crudelitas: eo lap-  
su temporis progressa, ut non solum  
illatas sibi injurias, parvi vi repellere:  
sed etiam non lacescita aliorum bonis,  
& salutis insidiari præsumeret. Cum  
itaque Sacerdotis sit, obesse nemini,  
prodesse vere velle omnibus, serio pro-  
hibe-

hibemus Clericis Dicecesis nostræ, ne extra peregrinationis & viarum longiorum periculi necessitatem, in locis, quæ inhabitant, arma offensiva, uti bombardas, frameas, machæras, ficas, aliaque id genus necis inferendæ instrumenta deferant, sed quemadmodum Evangelium pacis concredito sibi populo, tanquam fideles ipsius summi pacis Authoris ministri, annunciant; ita quoque, beatæ pacis studio sibi nihil antiquius esse, re ipsa declarent, ac testentur: memores ejus, quod B. Ambrosius in oratione contra Auxentium dicit, nempe suas sibi lachrymas arma, hæcque duntaxat Sacerdotis munimenta esse, aliter autem, se nec posse, nec debere resistere. Quod si quis vocationis ea in parte suæ debitam habere nolens rationem, talia arma deferre, seque tumultibus hominum seditiosorum data opera immiscere præsumpserit, penas Canonicas se nullatenus effugiturum, atque ad aliorum exemplum castigandum fore sciat. Nec enim decet eos, qui in Spiritu lenitatis errores populi corripiendo, mansuetudinis cultores se se exhibere debent, secularis Magistratus instar gladiis, atque aliis id genus telis, non secus, quam fascibus, securibusque, eidem populo formidabiles reddi, cujus Pastores, non percussores, a Deo sunt constituti.

## CAPUT XIX.

*De habitu & tonsura Clericorum.*

**E**X habitu corporis, diversas humanorum officiorum functiones, etiam ab iis, apud quos ignotus sit quisque, agnosci solere, tam verum est; ut jam vix aliter, quam ex vestium differentia, nobilis ab ignobili, doctus ab indocto, pauper a divite, primo intuitu discerni queat, imo & diversarum nationum populi, non secus ac certo quodam discrimine, a se invicem separentur. Ne itaque Clericalis vocationis dignitatem indecentis habitus dehonestet ratio, neve in eos, qui in

sortem Domini vocati sunt, quidpiam tanto indignum munere, per homines prophanos committi contingat, si Clerici neglecto professionis suæ indice vestitu, secularium more induantur; districte præcipiendo statuimus, ut quilibet Dicecesis nostræ Clerici, immunitate libertatum & privilegiorum Clericalium gaudere cupientes, vestes (m) ordini, statuique suo competentes, nimirum tales deferant, nimia brevitate, vel longitudine non notandas. Pannis rubeis, aut viridibus non vestiantur, atque omnia, quæ secularem redolent pompam, prorsus abjiciant & devitent. Cæterum cum Hierarchicus Ecclesiæ ordo etiam in minimis merito servari debeat, ut pro eo, ac in domo Dei distincta cernuntur officia, vestitus quoque disparis, minoris vel majoris cujusvis Personæ Ecclesiasticæ dignitatem demonstrantis, certa ratio ineatur, quove facilius Magister a Discipulo, Prælati a subdito, Sacerdos ab eo, qui in aliis inferioribus est ordinibus, dignoscatur; decernimus, ut sericeas vestes, nullus Sacerdos deferre posthac audeat, nisi sit Cathedralis Ecclesiæ Canonicus, aut in Cathedrali, vel Collegiata Prælati, aut Doctor, vel alias in aliqua Facultate promotus: quibus quidem cum ejusmodi habitus in signum Prælaturæ vel dignitatis duntaxat concedatur, unice curæ esse debet, ne vanæ gloriæ & elationis animi vitio tentati, debitæ immemores reddantur demissionis. Nullus præterea Clericorum, exceptis privilegiatis, ut paulo ante dictum fuit, personis, deferat orificia & fimbrias de pellibus sebellinis vel marturinis, sive circa collum, sive in anteriori suffultura, aut in manicis. Indusiis quoque acu elaboratis, & coloribus crispatis lactucarum instar, sibi interdictum omnino putabunt Clerici nostri omnes: talia enim vanitatis & levitatis cum non obscura sint argumenta, a Clero gravitatis debitæ studioso & modestiæ sectatore aliena esse debent. Anulos plures nemo eorum gettet, nisi cui id tanquam Prælato, vel Doctori, aut

(m) Concil. Trident. Sess. 14. Cap. 6. de Reformat.

Tomus VIII. Concilior. German.

aut Magistro in aliqua facultate convenit: imo & hos quoque unico saltem annulo contentos esse decet, ne dignitatis signo ad fastum inanem abuti videantur. Quod si forte aliquando longioris itineris suscipiendi ingruerit necessitas, ii, qui in Sacris sunt, recutitis, & medias coxas vix contegentibus vesticulis, inflatis femoralibus, & palliolis brevibus non utentur, ne milites potius, aut quosvis laicos, quam sacris initiatos Ordinibus referant. Calcaria inaurata & fibulas aureas, vel alio precioso ex metallo factas non gestabunt. Clericalem tonsuram, quæ coronæ Servatoris nostri spinæ gloriosam repræsentat memoriam, singuli pro susceptorum Ordinum ratione deferent. Secus qui fecerint, & neque tonsuram, neque habitum Clericalem deferentes, secularium hominum commerciis ac consortiis se se implicaverint, aut etiam vestes preciosiores, quam dignitatis eorum postulat ratio, gestaverint, post primam admonitionem ab Archidiaconis talibus vestibus in usum pauperum arbitrio nostro convertendis privari poterunt, & tanquam indigni privilegiis Clericalibus, sibi imputabunt, si forte per ignorantiam a laicis verbo, vel facto eos contigerit offendi: frustra enim legis implorat auxilium, qui in legem committit: & indecens est, eum protectionis Ecclesiasticæ gaudere beneficio, qui Clericalis militiæ nota suppressa, inconvenienti vocationi suæ corporis cultu dignitatem, in qua positus est, dehonestare non veretur.

## CAPUT XX.

*Ut Clerici mutuo se se honorarent.*

**H**onor, qui Majoribus per minores exhiberi solet, a natura ipsa hominibus etiam iis, qui alias barbariem innatam spirant, insitus esse videtur. Unde valde inconveniens est; illos debita non affici a minoribus reverentia, quos ad Sacerdotalis fastigium dignitatis Divina providentia evehere est dignata. Quocirca monemus omnes & singulos Diocesis nostræ Prælatos, Presbyteros, aliosque cujusvis

ordinis Clericos, ut subditi quidem & inferiores id, quod officii eorum exposcit ratio, in honorandis Prælati, Superioribusque suis non prætermittant, sed eis debitam reverentiam domi & foris exhibeant: hi vero vicissim mansuetudinis & charitatis, qua merito Ecclesiastici Dynastæ subjectum sibi Clerum paterne complecti, ac fovere tenentur, immemores haud exsistant. Si enim a laicis debite honorari volunt, ut se se mutuo honore invicem complectantur, bonumque iisdem laicis ea in parte præbeant exemplum, necesse est. Cogitent Prælati, idem plane esse infimorum quorumvis Sacerdotum officium, quod & ipsi gerunt, ac ea propter honorem, qui ipsis per inferiores impenditur, servata debite dignitate sua, pari officio compensare non verecundentur. Considerent itidem & inferioris conditionis Sacerdotes, alii-que Clerici, Hierarchicum Ecclesiæ militantis ordinem id exposcere, ut togatis hæc satellitibus, sui non desint Præsides atque Duces, quorum cura & solitudine universa Ecclesiastica Respublica gubernetur: ideoque illis tanquam Magistratui a Deo constituto, obediant in rebus justis ac honestis, & honorem, quem dignitas atque auctoritas eorum meretur, filiali ex amore deferre non reculent; ne si vel immergeri Majoribus suis fuerint, vel eos despexerint, dignas inobedientiæ & sprete Numinis Divini, quod in Magistratu legitimo honoratur, & despiciatur, penas incurrant.

## CAPUT XXI.

*De Clericis ad Judicium seculare provocantibus, & Institutiones aut Beneficia Ecclesiastica a Secularibus petentibus.*

**A**mpla Clericalis militiæ dignitas quemadmodum ex multis aliis prærogativis aperte colligitur, ita vel inde manifeste apparet, quod nec Legis humanæ, nec alicujus consuetudinis tanta possit esse auctoritas, quæ efficiat, ut Clerici coram seculari Judice tam de crimine, quam in civili causa conveniri queant. Qua in re non solum



lum Canoniarum Sanctionum, verum etiam Legum Civilium Clericali ordini suffragatur munimen, utpote cum antiquorum Ecclesiæ Patrum Decretis & Imperatorum perpetuis Edictis abunde sit cautum, ne Clerici alibi, quam coram Ecclesiasticis Judicibus conveniantur, ipsique Clerici nullam habeant Judicem laicum sibi constituendi facultatem. Unde magno animi dolore nonnullorum ex Diœcesis nostræ Clero pusillanimitatem, animique dejectionem vel potius temeritatem hætenus advertimus, dum ii vocationis, dignitatisque propriæ immemores, jurisdictionem implorare haud vererentur secularem, seque mutuo in causis sine Canonico terminandis, ad iudicium pertraherent laicorum, & a laicis se se eodem trahi paterentur. Quæ res cum non exiguum toti Ordini Ecclesiastico, gignat præjudicium; Nos talium exorbitationi obviare cupientes, nihil aliud hic decernendum putamus, quam quod olim in Milevitano & Cartaginensi Concilio eo in genere constitutum fuisse, Sacri Canones testantur: nempe ne Clerici Clericos, relicto suo Pontifice, ad iudicia publica pertrahant, alioquin causam perdant, & a communione habeantur extranei, sique in criminali, seu in civili negotio, derelicto Ecclesiastico iudicio publicis iudiciis se purgare voluerint, quanquam pro eis lata sit sententia, locum suum amittant, & hoc quidem in criminali; in civili vero perdant quod evicerint, si locum suum maluerint obtinere. Cauti ergo sint in posterum Diœcesis nostræ Clerici, ne brachii secularis inopportune implorantes auctoritatem, non solum causarum, sed, quod majus est, ordinis proprii patiantur jacturam, nec putet quisquam, privilegio in favorem suum inducto, se hac in parte renunciare posse, cum privilegium, quo Ecclesiasticus ordo a laicali eximitur iudicio, personale minime sit censendum, sed toti Ecclesiastico ordini concessum, adeo ut illi, tanquam juri publico, privatorum pactis nequeat derogari. Quod vero ad eos attinet, qui cum non ignorent, nullam circa spiritualia disponendi laicis concedi potestatem, sed

potius eos, non imperandi auctoritatem, & obsequendi necessitatem manere, animarum tamen curam, & Ecclesiarum regimen ab illis suscipere, sique sine institutione Canonica, quæ ad Ordinarios, (n) vel eorum jure hac in parte fruenter, spectat, dicta beneficia retinere, in iisque Sacramenta administrare non reformidant: cum tam temerarii Ecclesiasticæ disciplinæ & Canoniarum Sanctionum contemptus, pœnis ab iisdem Canonibus Sacris constitutis merito puniri debeat, tantaque Clericorum, Magistratus suos vilipendentium, præsumptio sit refrenanda; statuimus & decernimus, ut nullus in posterum beneficium Ecclesiasticum ex manu laici, siue is Patronus sit, siue simplex territorii, in quo id beneficium situm est, tenutarius, suscipere audeat, cum Patronis laicis non nisi jus præsentandi competat, institutio vero ad Ordinarium spectet, quemadmodum etiam ad illum personæ præsentatæ de jure pertinet examen & approbatio, seu improbatio. Quocirca monemus Archidiaconos districtum, ut inter alia visitationum suarum capita illud inprimis diligenter perquirant, an Parochus, aliusve quispiam Sacerdos, Ecclesiastico gaudens beneficio, Canonice sit institutus, quoque titulo sui possessionem obtineat beneficii: quoscunque a laicis, sine Ordinarii voluntate ac investitura, beneficia obtinere repererint, contra illos Canonice, tanquam intrusos, processuri.

## C A P U T XXII.

*Ut Clerici secularibus negotiis se non immisceant. & illicitas venationes devitent.*

CUM secundum Apostolum nemo militans Deo negotiis secularibus se immiscere debeat, sane Clerici, quos togatæ militiæ Summo rerum omnium Opifici obstrinxit Sacramentum, ab iis, quæ vocationi ipsorum minime conveniunt, quæve eos a tractandis Divinis distrahunt, plane abstinere debent.

Primum igitur Clericus dignitatis suæ memor, siue in minoribus, siue

Y y 3

in

(n) Conc. Trid. Sess. 25. cap. 9. de Reform. cap. 18. de Reform.

& Sess. 14. cap. 13. de Reform. & Sess. 24.

in majoribus sit Ordinibus, nulli laico operam suam eo modo addicendam putabit, ut negotia ipsius administrans, in famulatu & ministerio laici esse videatur. Quam enim sit indignum, Summi Dei Ministros vel ad ratiocinia obligari, vel objurgationes herorum duriorum sustinere, aliaque vilia obire officia, facile quisque conjicit. Unde & Sacrorum Canonum cautum est Decretis, ne iis, qui aliena negotia aliquando tractarunt, & ad rationes ex administratione sua dandas obligantur, Sacrorum Ordinum suscipiendorum detur facultas prius, quam rationes reddant, & secularibus negotiis omnino nuncium remittant. Ad hæc cum, Imperatore teste, opprobriosum sit Clericis, si peritos se monstrare velint rerum forensium, ea propter officia Procuratorum, Syndicorum, Causidicorum, Tabellionum, aliaque id genus non sustinebunt, neque etiam justam alicujus defensionem in judicio publico suscipere præsumunt, nisi Ecclesiæ, & personæ miserabilis, uti sunt orphani & viduæ: idque servata semper ordinis Clericalis dignitate, quo illos non spe lucri cujuspiam temporalis, sed amore duntaxat Dei & proximi, patrocinium impendisse facile appareat. A negotiationibus quoque illicitis, quæ etsi nonnunquam ex licitæ sint, diversis tamen ex causis inhonestæ & injustæ efficiuntur, abstinébunt. Circa rem familiarem curandam ea moderatione utentur, ut non ex radice cupiditatis & avaritiæ, sed partim orii fugiendi, partim vitæ honeste sustentandæ causâ, ad exercitia œconomica descendere nonnunquam videantur. Quocirca illi merito sunt reprehendendi, qui ad domesticarum rerum curam omnes animi & corporis conatus conferunt, neglectisque spiritualibus, ad quæ vocati sunt, primariam de agris, vineis & pecoribus sollicitudinem gerunt, plusque temporis stivæ premendæ, & sulcis ducendis, quam Sacerdotalis officii exercitio impendunt. Quemadmodum & illi sua digni sunt reprehensione, qui clamoris & oppressivis venationibus indulgere non verecundantur, officique

Sacerdotalis gravitatem indigna circa feras insequendas & canes urgendos levitate dehonestant. Quæ quidem omnia supradicta, pro eo ac servis Dei minime conveniunt, atque vocationi eorum plane repugnant, diligenter a Diœcesis nostræ Clericis caveri debent. Quod si quispiam eorum, salutis, vocationisque propriæ immemor, a proposito ea in parte suo desistere noluerit, seque nihilominus sæcularibus implicaverit negotiis, sciat se Canonice ultioni ad exemplum aliorum subjiendum, ad officiumque debitum pœnæ severitate revocandum.

## CAPUT XXIII.

*Ne Clerici Sanctimonialium claustra intrent.*

**Q**uia in fœmineo sexu tanta est naturæ imbecillitas, ut plerumque ex judicii fragilitate, etiam contra propria laborare soleant commoda, idcirco tam humanis, quam Divinis legibus multa eidem sexui concessa fuerunt, quæ viris negantur, quemadmodum quoque vice versa nonnulla interdiciuntur, quæ viris solis obeunda relinquuntur. Quas itaque ad virginitatem perpetuo colendam, Summoque Deo consecrandam singularis induxit devotio, adeo ut mundi contemptis illecebris, castissimarum mentium acie, in Sponsum cælestem Christum Jesum defixa, cultui Divino ultro sese mancipandas duxerint; earum pium institutum juvandum, obicesque omnes & obstacula, nec non impedimenta universa, casto adversantia proposito, tanto majori cura sunt amovenda, quanto facilius ipsas ab incepta sancte vivendi norma declinare posse, vel ipsa naturæ earum fragilitas sat superque insinuare videtur. Sacrorum ergo Canonum, & Sacrosancti Concilii Tridentini (o) inhærentes Decretis & dispositioni, omnia, quæ de clausura Sanctimonialium ibidem statuuntur, pro majori domus Dei decore, & suspitionum malarum vitandarum gratia, diligentissime in Diœcesi nostra observari statuimus, serio sub excommunicationis

(o) Conc. Trid. Sess. 25. cap. 5. de Reformat.

nis latæ sententiæ pœna, omnibus tam Secularibus, quam Regularibus cujuscunque status & conditionis Clericis (præter eos, qui ex ordinum suorum privilegiis jus visitandi claustra ejusmodi obtinent, quos tamen officii sui diligenter, & sine offensione præstandi, commonitos esse velimus) prohibentes, ne sine expressâ nostrâ, aut Ordinarii, aut Visitatoris ab ordine deputati, licentia, in scriptis concessâ, claustra Monialium, aliquo negotiorum vel etiam consanguinitatis prætextu, intrare præsumant, multoque minus Deo dicatas virgines, literarum missionibus, vel per internuncios inquietare attentent. Quod si forte aliquis temerario ausu hanc Sacrorum Canonum, dictique Concilii, demum & nostram violare præsumperit Constitutionem, noverit se pœna carceris, aliisque durioribus animadversionum generibus corporis afflictivis coerciturum iri: dignum siquidem, ut quos ipsa Ecclesiasticæ honestatis ratio non permoveret, pœnarum saltem acerbitas ad meliorem vitæ frugem reducat.

## CAPUT XXIV.

*De Constitutionibus præsentis Synodi observandis, & Archidiaconorum circa visitationes peragendas diligentia.*

**Q**Uæ ad majorem præpotentis DEI gloriam, ex Diocesis nostræ præsentis necessitate, pro cultus Divini instauratione, disciplinaque Ecclesiastica revocanda, in Synodo hac nostra, Domino inspirante, statuimus, ea omnia una cum Actis Synodalibus per suas distinctas Sessiones & Capitula, post absolutam prædictam Synodum, primo quoque tempore Typis mandari, utque omnes & singuli Diocesis nostræ Clerici exemplaria dictorum Statutorum Synodaliū (quæ Officialis noster venum exponi curabit) emant, penes se habeant, & exactissime universa in iis contenta observent, decernimus, paternæque ad id omnes in Domino hortamur, & monemus. Quia vero frustra essent in Rebus publicis Leges,

nisi forent ii, qui eas exequerentur, & contra eorundem transgressores debitam exercerent authoritatem; capropter serio monemus Archidiaconos districtum, ad quos munus visitationum obeundarum de jure & antiqua Diocesis hujus consuetudine pertinet, ut officii sui, quod sane non exiguum est, utpote eorum, qui ob partem sollicitudinis Pastoralis, oculi Episcoporum non immerito vocantur, apprime memores, temporibus commodis, visitationes Ecclesiarum & Parochiarum faciant: per quam diligenter, in iisque omnia, quæ ad cultus Divini incrementum, instaurationemque, nec non ad animarum curam debite a Parochis administrandam, demum & vitæ, morumque Cleri honestatem reducendam, & manutenendam spectant, accuratissime provideant, ac demum peractarum annis singulis visitationum processus Nobis præsentent, quo defectibus occurrere, morbisque animarum mederi in tempore pro muneris nostri ratione possimus. Qua in parte etsi de sedulitate ac diligentia prædictorum Archidiaconorum pie in Domino meliora quæque nobis pollicemur, si tamen (prout hucusque accidit) aliquem eorum in officio, munereque proprio debite obeundo remissiorem & oscitantiorē in posterum fore contigerit, contra talem uti ignavum, vocationique suæ minime satisficientem ad fructum sui Archidiaconatus, imo etiam crescente (quod absit) negligentia, ipsius officii Archidiaconalis privationem Canonice processuri sumus.

Lectis per Cancellarium Constitutionibus superscriptis, & per omnes Prælatos, Clericosque tam seculares, quam Regulares, qui Synodo intererant, approbatis, Illustrissimus Princeps ex auditorio suo ad omnes Prælatos & totum Clerum præsentem conversus, sequenti usus est Peroratione.

**P E R O R A T I O**  
*Illustrissimi Principis.*

**Q**Ui navium gubernandarum Præfecturam suscipiunt (Fratres in Christo Charissimi) etsi navigandi



di rationem universam eorum duntaxat arbitrio institui adeo est necessarium, ut eos, qui sese navigiis commiserunt, non nisi de portu assequendo cogitare sit opus; quia tamen communis est tam nauclero ipsi, quam navigantibus salutis & periculi ratio, si forte insperata mari tempestas ingruat, si compactæ vi sævientium ventorum nubes, offusis tenebris, cælum diemque ex oculis navigantium eripiant: si antenarum gemitus, rudentum stridor, malique nutantis horribilis aspectus, dissecti artemonis fissuræ, ipsaque totius navalis machinæ, inter æstuantis pelagi fluctus & procellas jactatio, præsentissimum naufragii periculum denunciant, ac improvise mortis incutiant metum, quis, obsecro, navigantium tam prodigus salutis propriæ fuerit, qui periclitanti mari, & pro communi bono laboranti nauclero, auxiliatrices ultro non afferat manus? Communis equidem periculi timor, communisque spes anxia salutis, etiam inertis & pigerrimi cujusque manus ad durissimos labores obeundos, celeriter expedit, atque non assuetum remis & conto, ad transtra & puppim cito ferri cogit. Hæc certe navis Ecclesia Dei est: cujus in hac Provincia gubernandæ clavum, nobis immeritis, præpotens tradidit Deus, quæ vos una cum concredito fidei nostræ populo, non jam pro vellere aureo, ad Colchos, ut olim de Jasone, Æsonis filio, prodiderunt fabulæ, sed pro immarcessibili vitæ æternæ corona, ad cœlestem illam Hierusalem navigantes, per æstuosæ maris procellas, perque mundi istius fyrtes & charibdes periculosissimas defert, atque optatum, superatis, juvante Domino, fluctibus, portum indubie pollicetur. Quam vero hæc navigatio, nobis qui naucleri vices agimus, simul & vobis omnibus sit periculosa, videte. En vix a continente in altum progressi, velis & remis instamus, cum illico immanes sævientium ventorum fluctus, variarum nempe hæresum infernalium monstra, nutantem huc & illuc cymbam exagitare, & in commotos fluctus impellere incipiunt, adeo ut non levi naufragii metu etiam animosissimus quisque corripere facile posset;

nisi summi illius Navarchi Christi Domini, hanc navem D. Petro Apostolorum Principi, legitimisque ipsius Successoribus commissam: fluctuum quidem impetu concutiendam, non tamen unquam mergendam fore, certissima promissione solaretur. Nobis itaque pro salute vestra gnaviter laborantibus, navigiumque hoc pro virium tenuitate dirigentibus, etsi consurgentium tempestatum discrimina magnam ingerunt animi perturbationem; vestram tamen ad conatus nostros promovendos, & juvandos fidem atque alacritatem intuiti, præ gaudio vix molestiarum tanti laboris non obliviscimur. Si enim id, quod nobis justæ lætitiæ materiam subministrat, aliquantulum commemorare libet, vestrum omnium, singulare ad ferendas prædictæ navi fluctuanti suppetias, studium in hac nostra Synodo, quam, Domino auxiliante, non infausse jam peregimus, abunde, factique luculenter contestatum, qua laude, quibus encomiis effereendum erit? Et quia calamitosus Orthodoxæ Religionis, in Patria hac nostra tot hæresibus infectæ, status, pro extirpandis novorum dogmatum letalibus plantis, seriatim tandem consilia a nobis suscipi; & contra violentos hæresum turbines, navigio istius, quod nos omnes alueo suo continet, provideri exposcebat; vos una nobiscum in hoc tam necessario, quamdiu exoptato, nostro communi Conventu, Catholicæ fidei professionem, tanquam communis militiæ referam, unanimiter fecistis, ipsumque Sacrosanctum Concilium Tridentinum, quod rite credendi, ac recte vivendi, non secus, quam pixis nautica transfretandi certissimas proponit normas, lætis mentibus, pro eo, ac obediens Sanctæ Matris Ecclesiæ filios decet, acceptastis, & firmissime amplexi estis. Insurgant itaque jam venti, commoveatur mare, ebulliant vesani fluctus, ipseque infernalis Æolus obscuros ex carcere Austros, Africos, Notos, Aquilonesque omnes relaxet, nec non densam turbati aeris caliginem furientium nimborum fragore commisceat: nobis enim salutari fidei scuto munitis, naveque nostra certissimis provisæ fidei velis, rudentibus & anchoris, nulla pror-

prorsus naufragii faciendi incumbet sollicitudo: quin potius ipsissima salutis spes perpetuo affulgebit. Sed ad sedulitatem diligentiamque vestram in defendenda hac nave revertemur. Et quia in navigantibus Divini Numinis placandi studium elucere debere, sapienter animadvertistis; in hac nostra Synodo non pauca Divini cultus, rite & uniformiter peragendi statuta, a nobis pro domus Dei decore proposita, pie approbastis: utque in posterum eorum præscripto Divinorum peragendorum ratio, in Diœcesi nostra dirigatur, unanimiter consensistis. Et quemadmodum navigantes, submersionis vitandæ causâ, sæpenumero mercium pondere navem exonerare, salutique propriæ, facultatum jactura consulere solent; haud aliter vos quoque detestanda vitia, quæ in Clerum nostrum irrepserunt, non exiguo sui pondere, navem hanc sanctam premere, cursumque ipsius præperem remorari cernentes, Decreta, vitam, & honestatem Cleri concernentia, per nos oblata, ultro acceptastis, vestræque vitæ rationem ad eorum normam vos composituos esse, unanimi consensu professi ac polliciti estis: quantumque in vobis fuit, nos dirigendæ huic navi intentos, unice consiliis, operaque vestra juvistis.

Quo nomine licet vos a nobis aliquam exspectare gratiam non existimamus, quin potius eam ab illo recipere malle putamus, cujus causam egistis: cujus gloriam potissimum spectastis: cujus denique honorem promovistis; vel ob id tamen vobis, quantas maximas valemus, non agere haud possumus gratias; quod tanta animorum promptitudine ea, quæ per nos pro communi bono in consilium deducta fuere, promoveritis, vosque salutariibus hujus Synodi Statutis & Decretis obedienter submiseritis. Agite ergo jam, Fratres Dilectissimi, agite, & pro ut sacram hanc Cymbam variis agitatum procellis vestra ope juvare cepistis, ita eidem certissimam spem salutis æternæ post tot discrimina vobis afferenti, de velis & remis bonorum operum vestrorum, vitæque honestæ & inculpatae, nec non de veræ doctrinæ ancho-

*Tomus VII. Concilior. German.*

ris providete. Luceat sic lux vestra, ut hisce variarum sectarum tempestatibus obortis, atque ingruente errorum tetra caligine, sacra hæc navis, extra quam nulla est salus, infestos scopulos evitare, & luce probitatis, pietatis, honestatisque vestræ inter densas tenebras adjuncta, gloriosum de procellis, & tot lernæis irati maris monstribus, triumphum agere valeat. Nihil equidem vocationi vestræ magis convenit, quam ut ea, quæ populo vobis commissio quotidie sectanda proponitis, honestæ vitæ exemplis, in vobis ipsis contestemini & probetis. Munia enim, officiaque vestra, etsi per se sint excellentissima; non parum tamen dignitatis accedet iisdem, ubi vos morum honestas & vitæ Sacerdotalis integritas, illis sustinendis idoneos esse comprobaverit. Præcingite igitur lumbos vestros, & exorbitantibus sensibus carnalium desideriorum, arctos lupatos, & fræna injicite: futurum est enim, ut doctrina vestra tanto acceptior evadet populo, quanto vos studiis virtutum sese eminentiores advertet. Ad hæc conatus vestros, pro salute ovium fidei vestræ concreditarum susceptos, puritatis amator Deus eo facilius promovere dignabitur; quo clementius & benignius vos per tot Sacrarum Scripturarum oracula ad innocentiam vitæ & munditiam cordis invitare non cessat. Si enim sobrie, iuste & pie, ut Apostolus monet, vixeritis, fideliterque & diligenter gregibus vobis commissis invigilaveritis, iisque morum integritate, & vitæ innocentia, nec non salutari doctrina præfulseritis; dubium non est, quin tandem ex hoc mortalium corporum ergastulo evocati, a summo illo ovium nostrarum Pastore Christo Domino, vocem illam jucundissimam audituri sitis: Euge serve bone, quia in pauca fuisti fidelis, supra multa te constituam, intra in gaudium Domini tui. Quod ut mihi & vobis omnibus contingat, præstare dignetur is, qui omnis perfectionis est Author. Cui honor sit & gloria in ævum, amen.

Absoluta Peroratione, ad laudem & gloriam DEI Omnipotentis, totiusque celestis Curie, finis Synoda est impositus,

Z z

omni-

omnibusque Parochis ex mandato Illustrissimi Principis per Cancellarium significatum & injunctum fuit, ut antequam ex Civitate Olomucensi excederent, singuli ad Archidiaconos districtuum, vel Decanos suos rurales venirent, iisque nomina, cognominaque sua, atque etiam nomina Parochiarum, quibus præsunt, vel locorum, in quibus operam suam Ecclesiæ Dei locant, inscribenda darent: tandemque Indulgentiæ quadraginta dierum toti Clero autoritate ordinaria per Illustrissimum Principem sunt concessæ, & per dictum Cancellarium publicatæ. Quibus omnibus peractis, Domini Prælati & totus Clerus, congregatione soluta, ad Curiam Episcopalem, invitari jussu Illustrissimi Principis, refectionis sumendæ gratia convenerunt, iisque lautum epulum exhibitum fuit.

Acta & gesta sunt hæc Olomucii in Cathedrali Ecclesia, præsentibus ibidem Admodum Reverendis Dominis Melchior Pirnesio a Pirn, Decano. Joanne Styrsky a Stirn, Præposito & Archidiacono Brunense. Theodoro Engels a Gymnich, Jurium Licentiato, Archidiacono & Officiario. Joanne Jerger J. U. Doctore, Scholastico & Canonico Brunense. Wenceslao Chyba a Kouaczow, Seniore. Ulrico Ritmano J. U. Doctore. Luca Leto. Christophoro Stredetto, Sac. Theologia Baccalaureo & Archidiacono Znoymense. Mathæo Strikovio, Artium & Philosophiæ Magistro. Joanne Tarnawsky, J. U. Doctore.

Georgio Sekera, Sac. Theologia Baccalaureo. Petro Grodecio de Brod, J. U. Baccalaureo. Joanne Martino & Alberto Cossubio, Præposito Cremfiriensi, Canonicis: Item admodum Reverendis, Venerabilibus & Religiosis Dominis, Eggerdo a Schwoben, Protonotario Welegradense. Paulo Grunwaldt a Grunwaldt, Gradicense. Sebastiano, Badense, Lucense, Abbatibus. Joanne Rosenbluth a Schuartzembach, Sternpergense, & Joanne Fulnecense Præpositis. Bartholomæo Villerio. Joanne Wernero. Leonbardo Rubeno. Hurtado Perez, Societatis Jesu, Provinciale, Rectore, Regente, & Theologis. Ludovico Romano, Hieronymo Jacobello. Joanne Comrado Han. Dionysio. Dominico. Joanne Baptista, Ordinum DD. Dominici, Francisci, & Carthusiæ Provincialibus, Prioribus & Guardiano. Christino Neuferte. Joanne Fischero, Ecclesiæ Collegiæ Brunensis Canonicis. Joanne Schidlovino. Michæle Regulino honoris Vicariis. Paulo Brosowio. Thoma Krentzio. Nicolao Judice. Joanne Stirnitzko. Egidio Fabro. Leopoldo Cesare. Georgio Kofeleitz. Olomucensis, Brunensis, Znoymensis, & Oppaviensis districtuum Decanis ruralibus. Et aliis Parochis, Presbyteris & Clericis, ad minus trecentis, quorum nomina brevitatis studio hic omittere visum fuit.

Lunig Spicilegii Ecclesiastici Continuat.  
III. in appendice pag. 150.

## Mentio Synodi Diæcesanæ Olomucensis

Anno Christi M.D.LXVIII. celebrata

Sub Revmo **GUILIELMO PRUSSINOUSKY de WICZKOVA,**  
**Olomucensis Ecclesiæ Episcopo.**

*Meminit hujus Synodi P. Joannes Schmidl in sua Historia Provinciæ Bohemiæ Societatis JESU, Parte I. Lib. III. a N. 121. Ex cujus narratione sequentia, quæ ad Synodi notitiam faciunt, excerptanda, & hæc loco inferenda duxi: Acta authentica una cum Constitutionibus Synodalibus daturus, ubi eadem amicorum opera accepero.*

**G**uilielmus Episcopus, ut erat commo-  
dorum Ecclesiæ suæ studiosissimus,  
Synodum universi Cleri Diæcesani, ab annis  
fere quinquaginta intermissam, convocare  
jam pridem decreverat. Sed quod eo usque  
non potuit aliarum mole rerum impeditus,  
id anno tandem Millesimo quingentesimo  
sexagesimo octavo perfecit. Diem Conven-  
tui fixerat decimam Maji, qua & Synodo ini-  
tium datum.

Tria præcipue fuere, de quibus coram  
se agitari Præsul voluit: de obedientia nimi-  
rum Ecclesiæ, ejusque Prælati exhibenda: de

servanda Fidei unitate: ac demum de honesta-  
te vitæ, rectaque Cleri disciplina restauranda:  
atque ad hæc eadem Capita Constitutiones  
plerasque omnes referri placuit, quas Joannes  
Grodecius, Vir eruditus, Brunensis tunc  
Præpositus, futurus non diu post Guilielmi  
in Olomucensi Cathedra Successor, scripto  
consignandas, & Synodo, ut probarentur,  
offerendas susceperat.

Dictam igitur ad diem convenere in Ca-  
thedrale S. Wenceslai Templum Olomucen-  
se ducenti & quinquaginta de Clero. Hos  
inter Doctores quinque, alique plures e So-  
cie-



cietate Jesu numerabantur, quos Episcopus non ex Diœcesi tantum sua, sed Praga etiam, Viennaeque ad suam hanc Synodum invitandos censuit. Ante omnia Episcopus pro impetranda *Spiritus Sancti gratia* Missam decantavit: tum compositis omnibus, & subfelliis, quæ in medio Templi gradibus aliquot assurgebant, occupatis, Archidiaconus Capituli, *Martinus Smalcerus* Orationem de obedientia Ecclesie, ejusque *Præsulibus præstanda* recitavit. Cantatæ dein *Sanctis* in auxilium advocandis *Litanie*, atque aliæ solennes *Synodorum cæremoniæ* peractæ. Post hæc *M. Sigismundus Dominatus*, Soc. Jesu, Professor Rhetoricæ, de instituto & utilitate *Synodorum* dixit. Demum ex Seminarii Alumnis quispiam, idemque *Canonicus Olomucensis*, cui demandatum id munus fuit, *primam Statutorum partem*, quæ de *Fide* agebat, legere aggressus est, eamque lectionem ad continuas aliquot horas perduxit. Rogatis ad extremum Cleri sententiis, omnia placere sibi, una omnes voce professi sunt. Solus fuit *Proslanensis Curio*, qui cum pauculis suis contra nitebatur; sed hunc, quia manifestum esse hæreticum pridem constabat, non ceu partem Synodi, sed ut auditorem, si forte resipisceret, Episcopus adesse permiserat. Ita *Conventus* illo die dimissus est.

Alter Synodi dies eundem *Maturini* temporis ordinem, eandemque fere actionum seriem habuit. *Sacra Præmonstratensis Familiae Abbas Gradicensis*, Episcopali ritu solenne Sacrificium obtulit, cæteræque securæ cæremoniæ. *P. Wolffgangus Piringer*, Soc. Jesu, *Convictus Olomucensis Regens*, de calamitatibus, Ecclesie & Regioni ab hæresi inflatis, deque *Summi Pontificis Auctoritate* peroravit. Altera etiam pars *Statutorum de Sacramentis* lecta: quam communi acclamatione: *Placet*, omnes probavere. Ipse dein Episcopus, postquam de *Sacramentorum dignitate* multa fuisset præfatus, ad *Disputationem*, pomeridianis horis instituendam a *P. Adalberto Bausseck*, Soc. Jesu, *Theologiæ apud Viennenses Professore*, quem cum in finem, ut Synodo adesset, *Præsul* expetierat, universos invitavit.

Venere post prandium omnes. Cum assedissent, *M. Bartschomæus Weissagius*, Soc. Jesu, sermone prævio de utilitate *Disputationum* differuit. Tum *P. Adalbertus* destinatum sibi locum conscendit, omnesque prælectos hucusque ac promulgatos *Synodi articulos* defendendos ac propugnandos suscipiens, postquam eosdem *Sacrorum Bibliorum testimoniis*, *Sanctorum Patrum sententiis*, *Conciliorum œcumenicorum au-*

thoritibus, variisque argumentis aliis stabilivisset, *Thesesque Theologicas* inter præcæntes distribui curasset, provocavit ex cætu universo, ut si forte adessent, qui secus opinarentur; suam quisque mentem coram expromerat. Cum nemo omnium, nec illorum etiam, qui die præcedenti adversabantur, obloqui quidpiam vellet; *P. Henricus Blyssenius*, Patria Colonienlis, tunc *Collegii Soc. Jesu Pragensis Rector*, dilucidandæ potius, quam impugnandæ veritatis gratia nonnulla opposuit. Similis disputatio sequenti etiam biduo instituta: pluresque fuere, qui exercitationis pariter causa adversariorum vices agerent: Inter cæteros *Præpositus Sternbergensis*, & *Canonici quidam*, tum & e *Societate Jesu P. Laurentius Magius Provincialis*, *P. Baltasar Hostovinus*, *Ss. Theol. Doctor*, ejusdemque apud *Olomucenses Professor*, atque alii duo.

Ultima Synodi die turbatum quidpiam fuit. Post Missam ex more decantatam, auditus iterum est *M. Sigismundus Dominatus*, qui de *Sacerdotii dignitate*, orationem, publicis deinde typis vulgatam, ad congregatos habuit. Secuta *Lectio partis ultimæ Statutorum*, qua de *Reformatione*, *Clerique restauranda disciplina* agebatur. In hac cum præter cætera *habitus modestior*, & qui *Clericis magis congrueret*, præscriberetur, *vano ac superfluo multorum luxu damnato*; tam odiosum istud plerisque est visum, ut vix clamoribus abstinere. At Episcopus gravi oratione interlocutus, cum, quid *Ordo Clericalis*, quid ejusdem dignitas & Professio postularer, insigni eloquentia declarasset, cunctos in sententiam adduxit. Sic concordî, communique omnium lætitiâ *Synodus soluta* est, & *Cantico Ambrosiano* terminata.

Unum notari hic velim, quod & *Laudatus supra Author* observat, *Concilium Tridentinum*, quod ante quadriennium finitum modo fuerat, in hac tamen *Olomucensi Synodo* anni 1568. communi solennique *Decreto* publicatum non fuisse. Quanquam enim *Guilielmus* Episcopus nihil optaret vehementius, quam ut œcumenici ejusdem Concilii *Canones*, cæteraque *Statuta* unanimi Cleri sui, totiusque Diœcesis conspiratione reciperentur; quia tamen ad illum usque diem nihil ab *Imperatore Maximiliano*, nihil a *Proceribus aliis*, ad quos id negotium pertinebat, vel actum hanc in rem, vel constitutum fuerat, (\*) habita ante Synodum cum primoribus Cleri, aliisque viris, sapientia ac doctrina claris consultatione, illud optimum factu visum, ut, ne qua daretur *Cæsari* offensionis occasio, ab expressa *Tridentini* & solenni receptione absti-

(\*) Quam multis aliis in Provinciis Germaniæ Concilium Tridentinum receptum fuerit ante annum 1568., vide in Synodis prioribus Tomi præcedentis.

abstineretur quidem, tam crebra tamen illius, ac singulis reperita pagellis fieret mentio, ipsæque Constitutiones ad normam Tridentinarum ita aptarentur, ut publicam receptionem, quanquam solenniter facta fuisse in hac Synodo dici non posset, placere tamen *Olomucensibus*, imo & optari ab eisdem, desiderarique, non obscure appareret. Unde & illud demum evenit, ut *receptio ista solennis, & Generalis Concilii promulgatio publica* apud *Olomucenses* ante Synodum anni 1591. quam supra retulimus sub Episcopo Stanislao Paulowsky, peracta non fuerit.

Cujus tamen dilationis causa nec Guilielmi, nec aliorum, qui cum secuti sunt, Episcoporum socordia, sed deproperatis potius eorundem funeribus tribuenda est: cum intra unius sexennii non integri spatium Ecclesia *Olomucensis*, quatuor præstantissimis Episcopis, continuo ordine, inopinato prorsus ac repentino fati genere se viduatam luxerit. Veneni eisdem propinati suspicio vel ea de causa vehementior fuit, quod *inter Sacerrimos viros* (verba recito Patris Schmidl) *perditissimus quidam parricida, Johannes* (cognomen & conditionem hominis, etsi sciam, meum non est referre) *versaretur: homo ingenio quidem præstans, ob quod Philoponi agnomen adsciverat; at fastosus inprimis, & in venenis miscendis artifex habitus, qua scelerata scientia quatuor continenter Olomucenses Episcopos se sustulisse, postea in tormentis fassus esse dicitur: ob quod a Wenceslao Brzezan, Historiæ Rosensis Scriptore, Episcopida vocitatur.*

Primum hæc inter funera fuit ipsiusmet, quem sæpe jam commemoravimus, *Guilielmi Prussinowski de Wiczkowa*. Hic quarto post celebratam *Olomucii Synodum*, anno, nimirum 1572. die Sabbathi post Ss. Corporis Christi Octavam, quam supplicatione publica *Olomucii* honoraverat, *Cremfirium*, Episcoporum Sedem, reversus, gravissima subito ægritudine corripiebatur, pluribus simul malis, podagra, colica, continuo insuper vomitu, stomachique, mirum in modum intumescens, doloribus dire adeo exagitatus; ut cum Sabbatho ægrorare cœpisset, die Lunæ, quæ in 16tam Junii incidebat, grassanti per viscera veneno succumbens, maximo bonorum omnium luctu vivere desierit. Circa annum 1534. ex vetustissima, notissimaque in Historiis *Equitum Prussinoviorum* gente apud Moravos natus, splendorem sui generis, ingenii præstantia, prudentiæque ac doctrinæ laudibus egregie illustravit, sæpe ob eas dotes Cæsareas ad Legationes adhibitus. Maxime tamen pietate in Deum, avitæ Religionis, Catholicæque Fidei, & Ecclesiæ propugnandæ stu-

diò, ac cæteris, quæ Præsulem ornant, virtutibus enituit. Anno Christi 1565. quem ætatis suæ primum ac trigessimum numerabat, ex *Brunensi* ac *Litomericensi Præposito, Olomucensem* ad *Cathedram* evectus, curandis Diocesis suæ commodis, subditorumque salutis promovendæ, ita se se impendit; ut nec suscipiendis cum in finem laboribus, nec sumptibus liberalissime expendendis percerit. Tertio ab adito Episcopatu anno *Synodum*, cujus acta paulo ante enarravimus, celebravit. Ad hæreses, quæ in variis Moraviæ locis jam invaluerant, aut inde profligandas, aut ne ad ulteriora subjectarum sibi animarum damna se se extenderent, prohibendas, *Societatis Jesu Patres, Olomucium, Collegio* ibidem, quod incolerent, *Academia*, quam administrarent, Scholisque magnifice constitutis, ac dein etiam *Brunam* advocavit. Rectam juventutis, ut una cum literis etiam sanis veræ fidei principiis, probaque morum ac virtutum disciplina imbueretur, institutionem primis in curis habuit: atque ut ista ad studia tenellos animos vehementius incitaret, ipse traditas Patribus discentium Scholas invisere, positæque in medio sella disputantes audire, segniores animare, proficientes ulteriorem ad progressum impellere, bene meritis præmia largiri non dubitavit. Porro ne aliquando Moravis suis probatorum deesset copia Magistrorum, quorum tunc penuria maxime laborabatur; plura ejusdem Societatis Religiosis ædificia moliri, aut eorum curæ gubernanda tradere, tum *Olomucii*, tum *Brunæ* ingentis animi excelsitate meditabatur. Sed his ejus consiliis, aliisque magnis, quæ pro Deo & Ecclesia, ac Diocesi præsertim sua exequi decreverat operibus, ne ab ipso perficerentur, præmatura, quam dixi, mors intervenit. Defuncti corpus *Cremfirio Olomucium* deportatum, ibidemque, ut jussit, in erecti a se, fundatque *Collegii Templo* depositum fuit, ut eos inter Patres, quibuscum ejusdem Religionis & Instituti consors vivere sæpe ante, sed incassum opraverat, saltem post mortem requiesceret. Sepulchro ab *Helena Sorore* appositum hoc fuit Epitaphium, æri incisum:

REVERENDISSIMO ET ILLUSTRISSIMO  
PRINCIPI AC DOMINO,  
D. GUILIELMO PRUSSINOWSKY  
A WICZKOWA,  
EPISCOPO OLOMUCENSI,

DIVORUM CYRILLI ET METHUDII  
PRESULUM MARCOMANNORUM IN RECTA LINEA  
SUCCESSORI DIGNISSIMO, HUIUS COLLEGII, ET  
SCHOLARUM SOCIETATIS JESU FUNDATORI,  
TEMPLIQUE INSTAURATORI LIBERALISSIMO: FI-  
DEI

DEI CATHOLICÆ ACERRIMO PROPUGNATORI, NEC  
NON STUDIORUM ATQUE PAUPERUM OMNIUM  
MECÆNATI, AC PATRONO BENIGNISSIMO.

HELENA SOROR UNICA, UNICO FRATRI  
PIENTISSIMO, GEMEBUNDA POSUIT.

OBIIT ANNO DOMINI MDLXXII. DECIMO  
SEXTO CAL. JULII, ÆTATIS SUE XXXVIII.  
EPISCOPATUS VERO SEPTIMO.

Hæc de Prussinovio ex occasione Synodi ab ipso celebratæ paulo prolixius: cætera brevius prosequemur.

Secutus *Prussinovium* fuit in Cathedra Olomucensi, qui eidem jam antea in dignitate & Officio Præpositi Brunensis successe- rat, *Joannes Grodecius de Grody*, gente *Silesius*, eruditissimis merito Præsulibus an- numerandus. Par illi cum Antecessore no- bilitas, par virtus, & animi magnitudo, nec minus etiam Religionis ac Fidei turandæ stu- dium: quo jam diu antea cum illo ad procu- randas Moravicæ Ecclesiæ e Societate JESU suppetias, pia quadam æmulatione munifi- centiæ convertaverat, meritis propterea, ut sicuti Prussinovius Collegii Olomu- censis, ita ipse Brunensis Domus Funda- tor agnosceretur & honoraretur. Multa, quæ Antecessoris præcipitata mors aut abrup- pit, aut imperfecta reliquit, ipse perfecit, consummavitque: plura facturum, si vita illi diutius superstes fuisset. Tenuit Cathedram anno unico & mensibus fere quatuor. Eun- dem, cujus antea funesta facta est mentio, Philoponum adversarium habuit, qui cum Episcopum suum lite vincere non potuisset, parricidalis ipsum veneno creditur consopi- visse. Episcopatum adiit anno 1572. 15. Septembris. Deseruit anno 1574. die octa- va Januarii.

Non diu post rursus alia duorum secuta sunt Præsulum Olomucensium funera. Pri- or horum fuit *Thomas Albinus*, natione Bohemus, J.U. Doctör, Archiepiscopi Pra- gensis antea Vicarius, & Regius Decanus in Carlslein: magnæ vir eruditionis, & egre- giæ in rebus Ecclesiasticis tractandis dexteri- tatis. Anno 1574. mense Martio in Gro- decii locum susceptus, anno mox inse- quente, cum idem Martius recurreret men- sis, simili fere, qua bini Antecessores, mor- te sublatus fuit, anni unius, non proflus in- tegri, Episcopus.

Alter *Joannes Mezon*, Telecensis ap- pellatus, eo quod Telecium Moraviæ oppi- dum natale illi fuerit solum. Romæ in Col- legio Germanico, nuper a Gregorio XIII. Papa erecto, studiis, sacrisque disciplinis ex- cultus, cum adhuc ibidem versaretur, *Gro- decio* Episcopo suggerente, Decanus Colle- gii Canoniorum ipsomet a Pontifice nomi-

natus fuit: paucosque dein post annos Olo- mucensis Capituli votis ad vacantem ab *Al- bini* morte Cathedram evectus. Perjucunda fuit eidem Gregorio Papæ ista eligentium suffragatio propterea, quod Mezonius pri- mus fuerit, qui ex fundati a se Germanici Collegii Alumnis Episcopalem ad dignitatem emerlerit. Cum dotibus omnibus ad Anti- stitis munus digne obeundum insigniter ef- set exornatus, Diocesim universam in mag- nas magnarum rerum spes crexerat; Verum has, cum vix biennium in Cathedra exegis- set, ipsius quoque deproperata mors abitu- lit. *Nimirum*, inquit P. Schmidl, *inter vene- na sedebant Optimi Præsules, ejus ante para- ta, ut constans suspicio fuit, qui ita dolorem su- um ulcisci, ut inimicitias finire gaudebat.*

Post hæc tamen quatuor, quæ recensui, Episcoporum intra annos non omnino sex sublatorum funera, Divino tandem benefi- cio, sua restituta fuit Olomucensi Sedi secu- ritas, & ab ulteriori maleficio immunitas.

Obierat *Mezonius* Anno 1578. die 6. Februarii: ejusdem anni die 25. Martii novi Antistitis suscepta electio. Diviso in par- tes Capitulo, concertatum aliquamdiu: tan- dem tamen cordatiorum Electorum præva- lente suffragio, Episcopale munus STA- NISLAO PAULOWSKY delatum fuit, viro magnis, multisque meritis eo. honore dignissimo, quique viginti, quibus Dicc- esim Olomucensem gloriosissime rexit, annorum spatio feliciter supplevit ea, quæ tot aliis a Prædecessoribus ob subitanea eorundem fata præstari non potuerat. Cum celebratam sub ipso Synodum supra a pag. 320. exhibuerimus, pro more nostro, pauca quædam adhuc de rebus ab eo præclare gestis hic nobis commemoranda sunt, quod, non immemor tamen præscriptæ mihi bre- vitaris, perlubenter faciam hoc loco, tum ut magni illius viri gloriosior vigeat apud posteros memoria ob ingentia ejusdem in Christi Ecclesiam merita; tum vero simul, ut in opere hoc nostro tenue saltem aliquod exstet grati animi monumentum, ob pluri- ma, maximaque, quæ ab eodem in mini- mam Societatem nostram profecta sunt be- neficia.

Ortus erat STANISLAUS ex Equestri, & an- tiquissima apud Polonos, Silesiosque *Paulo- viorum* familia, indeque indolem hausit ge- nerolis natalibus parem. Confecto cursu studiorum, juris utriusque Laurea insignitus, ac Ecclesiasticæ Militiæ adscriptus, Præpositi Brunensis munus per decennium, Scholasti- ci Olomucensis per biennium, atque insuper sub quatuor Episcopis, qui eum præcesse- rant, arduum Cancellarii officium ita gessit, ut per harum functionum veluti gradus, vi- am sibi straverit, qua ad Cathedram fuit elu-



status. Eximium semper in eo, uti virtutum omnium, ita fidei Catholicæ adversus hæreses propugnandæ, provehendæque studium eluxit: quod Episcopali dein in Cathedra constitutus, quanto sublimiori loco confederat, tanto luculentius fecit effulgere, latiusque diffudit: nullis A catholicorum minis, aut machinationibus contrariis deterrius. Vix ullum suorum in numero Aulicorum tolerare diu potuit, qui ejurata hæresi, cum Catholica reconciliari Ecclesia non vellet. Imo hoc unum habuit in Votis, ut ad illam, tanquam unicum verumque Christi ovile, gregem suum universum reduceret. Illud certe feliciter effectum vidit, ut in omnia Dicecelis suæ oppida, pagosque Catholicus Sanctissimam Eucharistiam sumendi ritus denuo inveheretur: Patrum Societatis JESU, ad id evincendum usus opera, quos eum in finem amplissima instructos potestate, functiones sacras pro Societatis more ubilibet obeundi, publicoque ad Curiones comiteatu munitos, per Moraviam omnem misit. Iisdem Patribus (multum enim ipsorum laboribus indefessis, docendique methodo delectabatur) Catechesis Christianæ Olomucii quotidie explicandæ munus demandavit, cui quidem explicationi ipse, cum vacabat, interesse voluit, pulchro non minus, quam potenti ad rudiores plebem excitandam, convocandamque exemplo. Mupia Episcopalia tanta animi promptitudine, imo & voluptate peragenda suscepit; ut ab iisdem, si quo modo posset, obeundis, nulla difficultate, nulla corporis ægitudine, impediri se sineret. Tridentini Concilii Canones & decreta, quod eo usque Olomucii factum non fuerat, Anno 1591, in congregata a se Synodo promulgari, perque Dicecelin universam recipi fecit. Eadem in Synodo quam multa alia tum ad abusus tollendos, tum ad restaurandam Cleri disciplinam, præclare constituerit, facile intelligent, qui ejusdem Acta, Statutaque voluerint perlustrare.

Jurium, possessionumque Ecclesiæ suæ tutandorum, vindicandorumque studiosissimus, pro ea, qua apud Rudolphum Cæsarem valebat, gratia, impetravit, ut quæcunque Antecessoribus suis concessa olim fuerant privilegia ac prærogativæ, novo Diplomate, autoritate Imperatoria stabilirentur. Titulos *Principis Imperii, & Regiæ Capellæ Bohemiæ Comititis*, injuria temporum fere oblitteratos, ab oblivione vindictos, in usum revocavit, & Successoribus restituit. Arces & oppida suæ Cathedralis vetustigia, sed jam pridem alienata, aliisque oppignorata, præstito Lytro redemit, plurima suo studio, curisque acquisita veteribus adjecit: omnia denique, quæ vitium contraxe-

rant, aut ruinam minabantur, refecit, instauravit: Merito propterea Olomucensis Episcopatus Restaurator appellatus.

Nec illud silentio prætereundum, quod eloquentiæ suæ vi, gravissimarumque causarum momentis, Catholicos Moraviæ Proceres eo adduxerit, permoveritque, ut si quod illis competeret Ecclesiarum Pastores nominandi jus; istud integrum in Olomucensem Episcopum ultro volentesque transferrent. Quod ejus consilium in maximum Rei Catholiciæ emolumentum, & in æternam plurimarum animarum salutem cessit. Hac enim ratione cautum sapientissime fuit, ne, si forte, qui Patronorum in jus essent successuri, ad hæreticos deficerent; ab his pro Pastoribus lupi Catholicis obtruderentur communitatibus, sed ut e diverso Episcoporum providentia, probatæ fidei, vitæque Parochi Ecclesiis præficerentur.

Atque ex hac ejus vita publica facilis conjectura est, qualis fuerit privata. Integritatis, puritatisque morum, uti amator eximius, ita custos sollicitus, castimoniæ intaminatæ nitorem non conservare solum, sed etiam perpolire studuit: Hunc in finem veterum Patrum de ea virtute sententias, propria manu descriptas circumferebat in Breviarii sui libro, quo mentem & oculos per intervalla reflexit, tanquam ad speculum, ut se lustraret. Ob sincerum, qui insigni prudentiæ jungebatur, animi candorem hæreticis pariter, atque Catholicis charissimus erat: fecitque harum connexio virtutum, ut non solum versutorum technas eluderet, sed & ut omnes sibi devinciret. Multus erat in legendis illis, quæ tum ad eruditionem, tum ad pietatem augendam facerent, semperque inter prandendum, cœnandumque anagnosten adhibebat, quem legentem auscultaret. Inter Sanctos Cælites Divam Annam, Deiparæ Virginis Matrem, & Christi Aviam, præcipue venerabatur, ejusque cultum in subditis etiam suis promovere plurimum adnitebatur. Famulitium Aulicum, quod numerosum habuit, non verbis tantum, sed, quæ multo plus movent, exemplis ipse suis omnem ad virtutem incitavit: fuitque illud plane singulare, quod indies eosdem, antequam illos ad somnum a se dimitteret, in destinato ad id loco congregaverit, ubi ipse tantæ Authoritatis Præsul, omnibus ad recitandas secum Litanias, aliasque preces, in verba præivit. Quæ una res quantum & propriæ pietatis fovendæ, & ejusdem apud alios extimulandæ desiderium indicet, nemo non videt.

Demum ut de ipsius in Societatem JESU amore, quidpiam dicam; hanc ille sicuti ad sua studia Fidei, pietatisque percommendam

censuit, ita ardentissime dilexit, eiquo beneficiendi occasiones non tantum oblatas arripiebat, sed etiam quærebat. Collegiis *Pra-genfi*, *Brunensi*, & *Olomucensi* plurima beneficentiae suae reliquit argumenta: & postremum hoc quidem annuo perpetuoque quingentorum florenorum censu donavit. ConviCTORIBUS nostris domum propriam & Templum attribuit: Alumnorum Episcopaliū, jam antea inibi constitutorum numerum auxit. His, aliisque pluribus cum sibi Socie-

tatem obstinxisset meritis: Ipsum vicissim, P. Claudius Aquaviva Generalis meritorum universae Societatis consortem ac participem renuntiavit. Post vitam tot piis operibus, totque rebus præclarissime gestis illustratam, quartana novem fere mensium febris exhaustus, pietissime obiit, perenni apud posteros memoria dignissimus.

*Plura de illo vide apud P. Schmidl, Hist. Soc. Jesu Prov. Bobemiae Parte I. & II.*

## SYNODUS DIOECESANA WRATISLAVIENSIS

Anno Christi M.D.XCII. Clementis VIII. Papæ I.  
Rudolphi II. Imp. XVI.

### ACTA ET CONSTITUTIONES SYNODI DIOECESANÆ,

*Quæ fuit celebrata Wratislaviæ in Insula S. Joannis,  
Anno M.D.XCII. Mense Octobri.*

*Præsidente Illustrissimo & Reverendissimo Principe ac Domino, Domino  
ANDREA (\*), Episcopo Wratislaviense, Coronæ Regni Bobemiæ  
Principe Ligio, Superioris & Inferioris Silesiæ  
Capitano Supremo.*

### P R Æ F A T I O,

PRIMÆ SYNODI HUIUS EDITIONI PRÆMISSA.

**NOS ANDREAS, DEI GRATIA EPISCOPUS WRATISLAVIENSIS, CORONÆ  
Regni Bobemiæ Princeps Ligius, superioris & inferioris Silesiæ Capitaneus, toti  
Clero Diœcesis nostræ, cujuscunque dignitatis & gradus, Salutem in Domino.**

**Q**UO Instituto & consilio Synodum Diœcesanam celebraverimus, prolixiori aliqua & supervacanea repetitione opus esse, non existimamus. Præter id enim, quod a nobis evidentissima & gravissima rationes & causæ in ipso Synodi celebrandæ initio expositiæ fuerunt; neminem ex vobis reperiri arbitramur, qui non vel ipse summam, urgentemque utilitatem hujus instituti, nullo etiam monente agnoscat, vel ex Sacrosancti Concilii Tridentini Decretis & Sanctionibus: exemplo item Ecclesiæ Catholicæ Antistitem, & laudabili, utilique consuetudine intelligat. Nos sane hoc respeximus maxime, ut Majorum insistentes

vestigiis, communicato consilio & accurata deliberatione, in Synodo nostra ea constituere-mus, quæ huic Diœcesi publice, privatimve prodesse viderentur: quo nomine easdem deliberationes de Synodi voluntate scripto comprehendendi curavimus, ut ad multorum pervenirent notitiam, & perpetuitati inservirent. Quia vero docuit, monuitque nos ea fides & obedientia, qua Sanctæ Sedi Apostolicæ devincti sumus, & quam hactenus integram & illibatam conservavimus, ut quid in Synodo Diœcesana actum esset, quidve conclusum, justissimo ejusdem Sedis Apostolicæ judicio & censuræ subiceretur: omnia ea, sicut gesta & conscripta fue-

(\*) De Andrea Jerino, Episcopo Vratislaviensi, vide sub finem hujus Synodi.

fuere, Sanctissimo & Beatissimo in Christo Patri ac Domino, Domino CLEMENTI, Divina Providentia hujus nominis Papæ octavo, Sacrosanctæ Romanæ ac Universalis Ecclesiæ Pontifici Maximo, Domino nostro Clementissimo, Romam transmisimus. Sua autem Sanctitas, licet aliis gravissimis totius Christianæ Reipublicæ oneribus & difficillimis negotiis, si unquam alias, nunc maxime implicata esset; tamen sicut fidelissimus Christi ovium Pastor, nostræ Diœcesi deesse noluit; quin ex Paterna benignitate Processum & Decreta Synodi nostræ Sacræ Congregationi Illustrissimorum Patrum, Tridentini Concilii Interpretum, judicio expendenda dedit. Quo facto Illustrissimus & Reverendissimus Dominus, Dominus Hieronymus, Tituli Sancti Pancratii S. R. E. Presbyter Cardinalis Matthæius, tandem ad nos ex Urbe remisit, cujus Illustrissimæ D. Literas, quod iis Synodi nostræ Decreta auctoritate S. Sedis Apostolicæ approbentur & confirmantur, una sub initium

imprimi curavimus: sicut etiam ad finem adjecta sunt, quæ idem Illustrissimus Dominus Cardinalis, Constitutionibus Synodalibus appresso Sigillo Romæ subjecit.

Eadem Decreta igitur nunc typis Nissenfis in publicum damus, ac benevole hortamur, monemus, ac mandamus serio omnibus Diœcesi subjectis nostræ, præsertim vero, qui Deo & Sacris suam consecraverunt vitam, ut non solum has Constitutiones diligenter manibus volvant & revolvant; verum etiam reipsa specimen edant ejusmodi, unde appareat, facta & opera optime nostræ, & Synodi voluntati & Sanctionum præscripto, consona esse & respondere. Quod eo magis futurum arbitramur, cum Sanctissimi D. N. & Sanctæ Sedis Apostolicæ auctoritas & approbatio accesserit. Optamus vos omnes in Domino recte vivere & valere. Datum ex Civitate nostra Nissenfi die 28. Septembris, Anno Millesimo quingentesimo nonagesimo quinto.

## EPISTOLA

*Illustrissimi Cardinalis MATTHÆI ad Reverendissimum D. Episcopum Wratislaviensem de Synodi approbatione.*

*PERILLUSTRI ET REVERENDISSIMO DOMINO, UTI FRATRI, DOMINO EPISCOPO WRATISLAVIENSI, &c.*

*Perillustri & Reverendissime Domine, uti Frater.*

**S**ynodum Diœcesanam Wratislaviensem, ab Amplitudine T. istic nuper habitam, & ad Sanctissimum Dominum nostrum missam, Illustrissimi Patres Tridentini Concilii Interpretes, quibus id munus a Sanctitate Sua mandatum fuit, accurate perlegerunt, & mature examinarunt: in eaque Summam Amplitudinis T. pietatem, devotumque in Catholicam Religionem, & in hanc Sanctam Sedem studium agnoverunt. Itaque non admodum multa necesse fuit immutare, vel corrigere.

Eam ipsam Synodum nunc ad Amplitudinem T. mittimus, paucis in locis aptatam & emendatam, sicut in ejus margine descriptum videre licebit. Nihil autem opus esse existimamus illam cohortari, ut curet tam salutaria ipsius Synodi sic aptatæ Decreta a suis subditis diligenter custodiri, atque executioni mandari; quandoquidem eam ad suum Pastorale munus, grave quidem & laboriosum,

in istis præsertim locis sibi impositum, sedulo ac solícite explendum, satis per se ipsam incitatum scimus.

Tantum Divinam Clementiam rogamus, Amplitudini T. concedat, ut ex pio hoc labore, & egregia opera, quam in suorum subditorum salute procuranda suscepit, uberrimum fructum percipere queat. Quæ in re Illustrissimi Patres, ubi opus erit, sua officia & studia Amplitudini T. libenti animo pollicentur, & omnia prospera & salutaria a Domino precantur.

*Romæ die XXV. Augusti M.D. XCIV.*

*Amplitud. T. Perillustri  
& Reverendissimæ*

*Uti Frater Studiosiss.  
HIER. Card. MATTHÆIUS.*

ORDO



## ORDO ET PROCESSUS

## Synodi Diœcesanæ.

IN NOMINE SANCTÆ, ET INDIVIDUÆ TRINITATIS, DEI PATRIS,  
ET FILII, ET SPIRITUS SANCTI. AMEN.

**I**N tam dubia, & ancipiti res humanæ omnes posite sunt conditione, ut nihil in iis tam perfecti reperiatur, nihil vel Legum vel Sanctionum repagulis, solerti, ac prudenti Legislatorum industria tam munitum; quin lubrica, ac præcipiti, malorumque plurimorum instigatrice, & effœtrice cupiditate, novisque artibus, aut callide multa eludantur, aut malitiose pervertantur.

Quocirca omnibus iis, qui ad aliquod primariæ Dignitatis fastigium evecti sunt, perpetua quædam incumbit necessitas, ne unquam securitati, aut Legum confisi constantiæ, somnolentos, parumque perspicaces gubernationi atterant oculos; sed eorum aciem hinc inde magna cum vigilantia circumferant, ut exigente usu, & succrescente malitia, quovis tempore novis legibus condendis, antiquis vero restaurandis, atque ad usum revocandis, si communi consulendum saluti sit, perpetuo excubias agant. Quod cujuscunque ordinis excellentissimos semper Magistratus feliciter cepisse, & magno cum successu Imperia, Regna, Ditionesque stabilisse, & in exoptata tranquillitate, & harmonia conservasse, Historiarum tam Sacrarum, quam profanarum Codices illustribus exemplis passim referunt, & testantur.

Hunc præclarum imitatus morem Reverendissimus, & Illustrissimus in Christo Pater, ac Dominus, Dominus ANDREAS, Dei, & Apostolicæ Sedis gratia Episcopus Wratislaviensis, Coronæ Bohemiæ Princeps Ligius, Saceræ Cæsareæ Majestatis Consiliarius, & Supremus superioris, & inferioris Silesiæ Capitaneus, cum magno animi dolore videret, & re ipsa experiretur, labascente prisca pietate, & Catholicæ Religionis disciplina corruente, hisce temporibus Ecclesiæ membra suæ Diœcesis utili aliqua correctione & reformatione omnino indigere; nihil quidquam ab ipso statim initio accepti Episcopatus, sibi præclarior, aut optabilius judicavit, quam ut, sicuti in politica gubernatione, ita in Ecclesiastico munere, quoad ejus fieri possit, omnia pristinae integritati restitueret, & agrum Domini a sentibus, & zizaniis emundaret. Itaque accurata, & diligenti cum Venerabili Capitulo Cathedralis Ecclesiæ Wratislaviensis deliberatione suscepta, publica citatione ad valvas Ecclesiæ Cathedralis Sancti Joannis Wratislaviæ, & alibi etiam in Collegiatis, & primariis Ecclesiis

Parochialibus affixa, vocatis omnibus, & singulis legitime, qui de jure, vel consuetudine fuerant vocandi, Synodum Diœcesanam Wratislaviæ celebrandam indixit: ut, Deo annuente, communi consilio propositum suum exequi inciperet, & quæ ab antiquo sancte, & salutariter constituta quidem; fragilitate tamen, & perversitate humana neglecta, & corrupta fuerunt, opportunis remediis, novisque, si opus esset, Constitutionibus in pristinum statum, & integritatem revocaret.

Die Synodi adveniente, Reverendissima Celsitudo Sua in Profesto Sancti Michaelis, mature Wratislaviam venit, & sepolita omnium Politicorum, negotiorum cura, quæ ad Synodi celebrationem secundum Prædecessorum Episcoporum Wratislaviensium morem usus, & commodo essent, in ordinem redegit.

Promotorem Synodi Dominum Paulum Albertum S. Theologiæ Doctorem, Scholasticum: Bonaventuram Han J. U. Doctorem, Decanum Sanctæ Crucis, Secretarium: Lectorem vero Dominum Conradum Waibelium, S. Theologiæ Doctorem, Vicarium in Spiritualibus, ac Officialem Generalem, omnes Cathedralis Ecclesiæ Wratislaviensis Prælatos, & Canonicos instituit. Duo præterea Notarii publici, qui Synodi acta diligenter annotarent, fuerunt requisiti, Dominus Adamus Kesselius, Ecclesiæ Collegiatae Sanctæ Crucis Canonicus, & Daniel Zwick, utriusque Capituli Wratislaviensis Notarius juratus.

Priusquam de Articulis, Religionem, Cultum Divinum, mores Clericorum, & temporalia concernentibus consultatio institueretur, Reverendissimus Dominus Episcopus singulari in Religionem Catholicam zelo & cura, vero animarum Pastore digna, a precibus initium fieri debere censuit: ob id supplicationes, seu Litanias tribus diebus ante Synodum decantari, & jejunia pro fausta, & felici continuatione Synodi devote peragi jussit, ipseque Episcopus, audito prius magna devotione Ss. Missæ officio, institutæ ex Cathedrali S. Joannis Ecclesia in Collegiatam S. Crucis Processioni, subsequentibus Prælati, & Canonicis, ac Aulica suæ Reverendissimæ Celsitudinis Familia interfuit. Collegiata Ecclesia S. Crucis similiter Processionem pari cum devotione in Cathedralem Ecclesiam absolvit.

*Ipsa indictionis Synodi die, mane hora quinta, & sexta, campana majori ad Synodum duabus vicibus signum datum est: ultimo vero & tertio impulsu circa horam septimam dato, Reverendissimus Dominus Episcopus, comitantibus cum Reverendissimo Domino Adamo Episcopo Nicopolienſe, Abbate in Arena, & Suffraganeo Wratislaviensi, DD. Prælatiſ, & Canonicis Eccleſiæ Wratislaviensis, atque ſeptem Abbatibus, alioque Clero ſubſequentē, Eccleſiam Cathedralē Wratislaviensem Divi Joannis ingreſſus eſt, & cum preces Domino Deo, flexis genibus, peculiari ſcabello, ad inferiorem gradum ad hoc diſpoſito, obtuliſſet, Chorus incepit Hymnum: *Veni Sancte Spiritus*. Quo finito Reverendissimus D. Episcopus Verſum: *Emitte Spiritum tuum, &c.* una cum oratione: *Deus, qui corda fidelium &c. &c.* Choro debite correfpondente, devore decantavit. Poſtmodum recedente Reverendissimo Domino Episcopo in Sacriſtiam, Promotor Synodi per Venerabilis Capituli Notarium omnes ad Synodum ſpectantes ex ſcheda ordine conſcripta evocavit, atque cuilibet locum ſuum allignavit, in ſtallo videlicet dextro verſus Altare prope ſtallum, aut Sedem Reverendiſſimi Domini Episcopi, primo loco Reverendiſſimum Dominum Suffraganeum Inſula, & Stola ornatum, ad latus demilliore tamen loco cum Pede Episcopali Sacellano aſſiſtente.*

Deinde Dominos: Joannem Sitsch Præpoſitum, Adamum Landeck Decanum, Chriſtophorum Gerſmannum Cuſtodem, Andream Bogursky J. U. Doctorem, Vincentium Salinum, Magiſtrum Baltbaſarem Habicht, Bonaventuram Han J. U. Doctorem, Georgium Scholtz S. T. Doctorem, & Magiſtrum Caſparum Hiltprandum Prælatos, & Canonicos Eccleſiæ Cathedralis Wratislaviensis: Adamum Keſſelium Eccleſiæ Collegiatæ S. Crucis Canonicum, præterea Concionatorem, & Penitentiarium Eccleſiæ Cathedralis. Item Magiſtri Hospitalis S. Matthei ablegatum, & Andream Roſnecium Præpoſitum Falckenbergensem collocavit. Sinistri vero lateris Sedes Domini Abbates, ſine Inſulis tamen, occuparunt: videlicet D. Hieronymus, Lubenſis, D. Joannes, S. Vincentii Wratislaviae, Jacobus, Saganenſis, Dominus Nicolaus, Heinrichoviensis, D. Antonius, Camenienſis, D. Caſparus, Griſſoviensis, D. Georgius, Femelnienſis, & Laurentius Girlicius, ablegatus Abbatis Raudenſis.

Nomine Capituli Eccleſiæ Glogoviae majoris Georgius Schulteti Præpoſitus, Martinus Lembuſius Decanus, & Caſparus Sellius Archidiaconus.

Nomine Capituli Niſſenſis Nicolaus Tincmann Medicinae Doctör.

Nomine Capituli Opolienſis Jacobus Zuretius, Decanus, Joannes Kuna, Archidiaconus, Joannes Zwick, Cuſtos.

Nomine Capituli Ratiborienſis Petrus Sebiſch, Decanus, & Sebastianus Tieſſowsky, Cuſtos.

Nomine Capituli Glogoviae ſuperioris Albertus Petricius, Decanus, Matthæus Adam, Præpoſitus Cruciferorum Niſſæ valetudine adverſa impeditus abſuit. Intra Abbates ipſorum Sacellani ordine ſtabant, baculos manibus ſuſtinentes.

Commendatores Lignicenſis, Scwidnicenſis, & Creutzbergenſis excuſatione abſentiae uſi ſunt.

Ex Præcentoribus adſuerunt Chori minoris Cathedralis Eccleſiæ, & minoris Chori Collegiatæ Eccleſiæ S. Crucis, & in Crypta: Poſtea Archi-Preſbyteri, Parochi, & alii Sacerdotes ab utraque parte fuerunt locati.

Cum ſuo jam quiſque loco conſediſſet, Reverendiſſimus Dominus Episcopus Pallio, Myrra, aliſque Pontificalibus amiſtus, ſolita cum ceremonia, & Sacrorum Miniſtris Eccleſiaſticis Viris ſtipatus, ex Sacriſtia ad Altare proceſſit, ubi ſacdiſtorio inclinatus incepit Antiphonam: *Exaudi nos*. Reſpondentibus duobus Canonicis Wratislaviensibus Dominis Doctore Nicolao Tincmanno, & Magiſtro Caſparo Hiltprando, Regentibus: *Domine &c.* reliquum Chorus: *Quoniam, & Salvum*, cum Clero abſolvit. Poſt: *Exaudi*, Reverendiſſimus Dominus Episcopus Orationem: *Omnipotens ſempiternus Deus &c.* ex Pontificali Romano recitavit. Qua oratione finita, Reverendiſſimo miniſtrantes Vicarii duo flexis genibus Litaniam *Kyrie eleiſon* inceperunt, toto Choro correfpondente uſque ad Verſum: *Ut hanc præſentem Synodum viſitare, diſponere, & benedicere digneris*, quem Verſum ter Dominus Episcopus ſacta cruce repetiit, Choro correfpondente: *Te rogamus audire nos*. Deinde Vicarii proſequebantur Litaniam uſque ad finem. Tandem Reverendiſſimo incipiente: *Oremus*, duo Vicarii ſimul reſpondebant: *Flectamus genua: & Levate*. Abſolvit Reverendiſſimus orationem ex Pontificali Romano, depoſitoque pluviæ, accipiebat Caſulam a duobus Canonicis, & incipiebat Miſſam ſolemni de Spiritu Sancto, more Romano. Ad Agnus Dei Domini Canonici miniſtrantes Reverendiſſimo pacem dederunt, unus Suffraganeo, alter Lubenſi Abbati. Abſoluto Ss. Miſſæ Sacrificio, Reverendiſſimus dedit Benedictionem, quam circa *Pax Domini* juxta Pontificale Wratislaviense omiſit. Porro in Sacriſtia Pontificalem ornatum exiit Reverendiſſimus Episcopus, & ſedem præparatam

tam accessit, ibique confidens Dominum Doctorem Georgium Schultetum Canonicum, de Synodo prudenter, & docte perorantem, & integre absolventem audivit. De Cathedra autem, aut suggestu descendente Schulteto, Reverendissimus per Promotorem proposuit, Suam Reverendissimam, & Illusterrimam Celsitudinem desiderare, quo omnes ad Synodum spectantes cum sua Reverendissima Celsitudine in Curiam Episcopalem se conferrent, ut Synodus justo ordine, & legitimo modo inciperetur. Omnes itaque, & singuli Clerici, cujuscunque status, ac dignitatis, Aulicis Reverendissimi D. Episcopi præcedentibus, & tandem solo Promotore Cappa, & Almutio induto, præeunte Reverendissimum D. Episcopum in Hypocaustum Curiae suae subsequebantur. Prælati, & Canonicis solis habitum rubeum deferentibus, alii enim cappas, & superpellicea sua deposuerant. In eodem Hypocausto Reverendissimus D. Episcopus solus ad mensam decenter ornatam, illique imagine Crucifixi apposita confedit, rocketo, & cappa rubea, & mucerto rubro indutus. Et latus quidem unum Prælati, & Canonici Ecclesiae Cathedralis, alterum vero Domini Abbates occupabant, reliquis suo ordine, ut in Ecclesia confederant, medium diligentibus Hypocausti locum. Cumque omnes intentos oculos, & mentem haberent; a Regii vatis dicto initium sumens Reverendissimus Dominus Episcopus: *Ecce quam bonum, & quam jucundum sit, habitare fratres in unum: piam, & gravem exorsus est ad Clerum orationem:*

*Janique ab initio statim accepti Episcopatus totam ingenii vim, & mentis aciem eo intendisse, optabat, ejusmodi ut reperiret medicinam, quæ Cleri disciplinae exsuscitandæ, & restaurandæ conducere videretur. Quam ob rem cum Clerum convocari necesse esset omnino: se quidem diutius id in animo habuisse, ut Synodus celebraretur Diocesana, verum multa longe necessarium, & honestum propositum impedivisse.*

*Principio quidem pestem hinc inde miserabili multorum strage grassantem; quam paulo post gemina Regum Poloniae electio, tumultusque Bellici in hac Provincia, & Regno Poloniae subsecuti essent. Pace tandem cum eodem Regno Poloniae conclusa, difficile Legationis munus a Sacra Casarea Majestate Domino nostro Clementissimo ad Serenissimum Poloniae Regem, & Regni Ordines sibi fuisse demandatum, ad certo confirmandas juramento pacis condiciones: non multo post iterum ad Regni Poloniae fines se missum ad Serenissi-*

*Tomus VIII. Concilior. German.*

*um Sacra Casarea Majestatis Fratrem Maximilianum reducendum. A publicis itaque negotiis ubi paulum nancisci otii, & veluti respirare licuerit, nihil se reliqui fecisse, ut aliquando tandem inductione Synodi, & conventu tam præstantium Ecclesiastici Ordinis Virorum, voti sui, & expectationis operata compos redderetur. Quem felicem, & diu desideratum diem cum bodie intueatur, Venerandum etiam laudabili numero aspiciat Clerum, plurimum se letari, & sibi ex animo gratulari dicebat, atque pluribus demonstrabat, non tantum bonum, & jucundum esse fratres habitare, sed in unum etiam convenire: Exemplo id Apostolorum fieri, qui suborta difficultate aliqua, & exigente nascentis Ecclesiae usu convenerint; quemadmodum Historia de Circumcisione Judæorum tollenda, & apud Christi sectatores abroganda luculenter contestetur, ubi re examinata, Apostoli bis concluderunt verbis: VISUM EST SPIRITUI SANCTO, ET NOBIS. Hinc a Successoribus Apostolorum Generalia Concilia, ab inferioribus vero Provinciales, & Diocesanas Synodos fuisse celebratas: sicut etiam in politica gubernatione, & in Imperiis, Regnis, ac Ditionibus, rite ad normam, & justæ Legis æquitatem constituendis, regere loque dignis Legum repagulis populo, ab Imperatore Comitibus, a Regibus & Principibus Dieta, & Conventus, poscente usu, indicantur. Ob similes causas, & Ecclesiae utilitatem se omnes, qui Synodo interesse tenentur, convocasse, ut salutaria omnium consilia coram audiret de iis præcipue rebus, de quibus in hac Synodo agere constituisset, quæ potissimum quatuor Capitibus essent comprehensa.*

*Primo: quomodo Religio Catholica Adversariorum variis artibus, & machinationibus collapsa restaurari, & Ss. Concilii Tridentini Decretis constans auctoritas, ita quidem ut ibidem a Patribus sancte constituta in posterum in hac Diocesi observentur, conciliari, & stabiliri possit.*

*Secundo: Cultus Divinus, qua ratione recte, ac decenter peragi debeat.*

*Tertio: Corrupti Clericorum mores quomodo reformandi.*

*Quarto: In Temporalibus quid commodum Ecclesiarum statui debeat, tum Clericorum certi redditus quibus modis conservandi, incerti vero, ac dubii ad certitudinem, quantum fieri liceret, reducendi, & stabilendi.*



Atque ita si communicatis prudenti circumspeditione, & exaucte accurato tot Sapientum consiliis, ac habito inde justo delectu de hisce Sanctiones conscriberentur, & ab earum observatione in posterum non discederetur; censuit Reverendissimus D. Episcopus, nihil aliud, quam optimum successum certo exspectandum esse, ilque præter alias in Sacris Bibliis Historias, Josue testari exemplum, cum Divinae memor Legis Judaicum populum, ne Deos colerent alienos, hortaretur &c.

Quibus sic propositis, Reverendissimus per Lectorem Decretum de modo vivendi, & aliis in Concilio servandis, Sessione secunda Concilii Tridentini legi curavit; idque præcipue propter Sessionem Clericorum, quod nulli propterea præjudicium generetur, nullique novum jus acquiratur; quod tota Synodus per verbum Placet approbavit. Quasiivit dehinc Synodi Promotor, utrum omnes, qui de jure, vel consuetudine Synodo interesse deberent, præsentibus essent; monuitque, ut absentium Procuratores, aut Ablegati absentiae certam redderent rationem. Omnibus ex scheda per Notarium evocatis, præsentibus vocati honorifice assurgebant.

Postmodum oblatae fuerunt literæ Michaelis Waltheri, Abbatis Raudensis, qui infirmitatis excusatione usus, loco suo Laurentium Girlicium Sacellarium ablegaverat. A Magistro Hospitalis S. Matthei Wratislaviae per Fratrem Joannem Prussium idem factum. Similiter & a Zarenfis Districtus Archi-Presbytero, qui nomine suo, ut Synodo interesset, Antonium Parochum Tostensem Wratislavianum misit. Pauci (incertum, qua de causa) sine ulla excusatione emanerunt: ii si ex inobedientia, & contumaci neglectu, aut sine iusta causa alia, id fecisse deprehenderetur, in eos animadvertere Episcopus constituit, & Clero per Promotorem mandavit, ne aliquis ante finitam Synodum, nisi speciali Suae Reverendissimae Celsitudinis licentia Wratislavia discedat.

Et cum fides sit fundamentum salutis æternæ, Reverendissimus D. Episcopus, Ss. Oecumenici Concilii Tridentini pium institutum, tum etiam Provincialis Petricovienfis, & a Prædecessore suo Episcopo MARTINO piæ mem. celebratae Synodi Diocesanae consuetudinem observare volens, flexis genibus, tactis Ss. Dei Evangeliiis, Professionem fidei prius solus, & consequenter totus Clerus simul, prælegente Synodi Lectore, eandem Professionem juxta PII QUARTI fel. record. præscriptum fecit.

Exhibebant deinde, requirente hoc Reverendissimo Domino Episcopo, DD. Archidiaconi suas visitationes: D. Julius Landus,

Archidiaconus Wratislaviensis, propter morbum, quo domi detinebatur, per D. Doctorem Georgium Sebultetum, Canonicum Wratislaviensem, visitationem suam obtulit: subsequutus est D. Adam Landeck Legnicensis, hinc Casparus Sella Glogoviensis, & Joannes Kuna Oppolienfis Archidiaconi, suas quisque Reverendissimo Domino Episcopo obtulit visitationes. Iis Reverendissimus Dominus Episcopus ob hanc diligentiam gratias egit, hortatusque est eosdem, ut parem in posterum pro ipsorum munere adhibere non prætermittant.

Exhibitæ quoque fuerunt variae Parochorum querelæ, quæ cum in magnum exerescerent numerum, Reverendissimus D. Episcopus tribus ex DD. Canonicis Cathedralis Ecclesiæ Wratislaviensis, Nicolao Tincmanno, D. Bonaventura Han, & D. Conrado Waibelio id dedit negotii, ut supplices libellos, & querelas reviderent, & Suae Reverendissimae Celsitudinis referrent, quo Cleri querelis tempestive, & cum fructu succurreretur.

Conscripserat Reverendissimus D. Episcopus ante Synodi congregationem Constitutiones, vel Articulos quosdam, qui ad institutum Ecclesiasticum, & ad conservandam, & augendam Catholicam Religionem necessarij erant visi. Ex iis, quæ fidem, & Religionem Catholicam concernerent, legi curavit: post omnium consilia audire cupiens, primo Prælatorum, & Canonicorum Ecclesiæ Cathedralis, quid de his videretur, sententiam rogavit: qui omnes Constitutiones utiliter promulgari posse, unanimi consensu judicabant.

DD. Abbates vero semel atque iterum seorsim deliberandi, & consultandi quoddam spatium sibi petebant concedi. Quam rem novam, nec ante prioribus in Synodis usitatam cum Reverendissimus D. Episcopus arbitraretur; eosque moneret, ut quilibet in libero dicendi, & consultandi loco libere suam sententiam proferret: tunc DD. Abbates, Reverendissimi Domini Episcopi se submittentes voluntati, per D. Abbatem Vincentinum, virum doctrina, & rerum usu amplissimum, egerunt gratias Episcopo pro Paterna ista cura, quam in conscribendis, & proponendis illis Articulis, & Constitutionibus de Religione, Suae Celsitudo habuisset. Videre ipsos in lectis Articulis præter reliqua, Reverendissimum Dominum Episcopum ex præscripto Concilii Tridentini urgere, ut D. D. Abbates juxta ejusdem Concilii Decreta Magistrum in suis quisque Monasteriis alerent, qui noviter receptos Ordinis Fratres pietatis, & bonarum artium fundamenta fideliter doceret.

ceret. Id DD. Abbatibus bucusque summae curae fuisse, quemadmodum qui *Wratislaviae* sua haberent Monasteria, nunquam utile hoc institutum pratermississent. Et licet etiamnum domi Praeceptoribus non destituerentur, se tamen uberius disciplinae gratia aliquos in Seminarium Episcopale *Nissam* mittere velle. Omnia itaque Decreta, maturo consilio a Reverendissimo Domino Episcopo conscripta, & jam lecta, ipsos Dominos Abbates approbare: unicum solummodo Caput, quo jus instituendi, seu investiendi Parochos, Reverendissimo Domino Episcopo reservaretur, in ipsorum Abbatum praesudicium positum videri: Eos bucusque a longo tempore viros pios, & doctos Parochiis praefecisse sine aliqua Domini Episcopi institutione, & quandoquidem in tanto Clericorum defectu seculares Sacerdotes habere non potuerint, se fratribus interdum Monasteriorum Parochias regendas commisisse, eamque possessionem ipsos ex longa consuetudine obtinuisse, rogare itaque DD. Abbates, ut Reverendissimus D. Episcopus jus illud instituendi Parochos, sicut bucusque ab ipsis observatum esset, integrum Abbatibus relinquere velit. Deinde quando visitationes Parochorum in Monasteriorum fundis per Dominos Archidiaconos in posterum instituerentur, ut DD. Abbatibus visitationibus huiusmodi interesse liceret.

Ad ea Reverendissimus D. Episcopus respondit: Se nihil novi constituere, sed ex Concilii Tridentini Decretis (sicut ex eodem Concilio Sess. 14. cap. 10. & Sess. 23. cap. 9. de Reformatione fuerunt lecta) nihil aliud optare, quam ut sit Hierarchia bene ordinata: nihil quicquam in praesudicium DD. Abbatum fieri, neque eos juris alicujus facere hac in parte jacturam: quin imo liberum permanere DD. Abbatibus Praesentationis jus, si quod haberent: non iniquum vicissim esse, ut Episcopo loci ordinaria auctoritas salva conservetur, eique investiendi jus integrum permaneat, & relinquatur. (Videndae sunt hac de re Sacrae Congregationis Notae infra Tit. de Parochis.) Pontifices enim Maximos suas Bullas Collationum & Provisionum, Sacratissimos Caesares, Serenissimos Poloniae Reges (ut de aliis nihil dicatur) Praesentationes Episcopo mittere, ac misisse; multo magis ergo Abbates id decere, ut Episcopo investandos praesentent, ne ordo Hierarchicus quovis modo turbetur.

Et quamvis DD. Abbates affirmarent, non semper expedire, ut Praesentationes essent

perpetuae propter Religiosos Fratres, quibus interdum Parochiae conferuntur, & ad Monasteria revocantur, ut existiment majus etiam commodum Monasteriis hac ratione accedere, atque ideo demum illos rogare, si ut ratio habeatur, & Privilegia confirmantur ipsorum, quibus a tam longo tempore integrum fuisse jus investiendi.

Tamen Reverendissimus Dominus Episcopus, a Ss. Concilio Tridentini Decretis recedere se nec velle, nec posse respondit.

Quandoquidem praeterea in Constitutionibus praelectis, secularibus Clericis liberam testandi facultatem concessam esse intellexerant DD. Abbates, si Religiosi in Parochiis e vivis excederent, ad quem relicta pertinerent, rogabant; Reverendissimus Dominus Episcopus ad haec: Monasterio, inquit, Fratrum res derelictas accrescere, cum testamenti ob paupertatis votum non habeant factionem: Si vero seculares Clerici in Parochiis, non condito Testamento decederent; Statuta Provincialia & Synodalia juxta praxin quotidianam observanda esse, ut scilicet post sumptus funebres debita exsolvantur: deinde Coniungentis al qua hereditatis pars; Fabricae item & Ecclesiae, in quo intestatus obiit, vel vel Parochiae portio quaedam relinquatur.

Post acclamationem Placet Reverendissimus Dominus Episcopus proponebat: Magnam esse penuriam Catholicorum Servitorum, quorum opera Domini Abbates, & Abbatissae in Praefecturis, & aliis officiis uterentur; cogitasse itaque se, non convenientius huic malo remedium reperiri, nisi ut certus nobilium puerorum numerus, scilicet viginti quatuor, honeste alerentur, qui in fide, moribus, & disciplinis Catholice instructi suo tempore tum aliis, tum ejusmodi officiis praeficerentur: in quem finem ades *Nissae* jam emisset: saltem a Clero consilium se requirere, utrum magis conferat, sumptus facere in Nobiles vel plebeos. Venerabili Capitulo Cathedralis Ecclesiae placuit Reverendissimi Domini institutum, ut Nobiles praecipue, si haberi possint, in eum finem alantur: cum in Episcopale Seminarium nonnisi juvenes, qui in Ecclesiastico statu Deo, & Ecclesiis suo tempore inserviant, recipiantur.

Domini Abbates, hoc unum se dolere, dicebant, quod non habere possent Catholicos: esse in Aulis Principum magis gratos homines Nobiles, quam plebeos. Rogabant itaque Dominum Episcopum, ut Nobiles convenientis aetatis reciperet, ipsos suam operam offerre.

Abba-

*Abbatem enim Sancti Vincentii in eum finem quatuor bucusque aluisse, ut ipsorum opera aliquando uteretur.*

Reverendissimus Dominus Episcopus respondit: *Non minores XVIII. annis recipi in Seminarium Clericorum: in receptuque Nobilium se observaturum, ut XIV. sint annorum, qui si aliquot annis pietati, ac studiis operam dent, futurum, ut vel circa XX. ætatis annum commode servitiis Principum, & Abbatum adhiberi queant.*

Porro Clericorum Seminarii Episcopalis sumptum annuum Reverendissimus Dominus Episcopus tribus millibus florenorum æstimabat, imo eundem etiam superari numerum, & quatuor millia non raro excedere, Expositorum consignationes, & regesta testari. *Quandoquidem vero difficile fieri esset, in utroque Seminario Clericorum scilicet & Nobilium sæcularium facta tecta omnia conservare, tot Scholares Clericos, & Laicos cum ipsorum Doctoribus, Magistris, Præceptoribus, & Servitoribus alere: petere se vigore Constitutionis Concilii Tridentini Sess. XXIII. Cap. XVIII. de Reformatione, ut Prælati, & Canonici præcipue, ac totus Clerus ad Seminarium Clericorum contribuere velint.*

Capitulum Cathedralis Ecclesiæ Wrislaviensis Prælatorum, & Canonicorum decumbentium absentiam inprimis allegabat; rogans, ut Reverendissimus tantum concederet spatii, donec cum aliis Confratribus hac de re consilium capere possit: tamen cum Reverendissimus responsum a Venerabili Capitulo urgeret, Capitulum asseverabat: *Reverendissimi Domini Episcopi Proventus, Capitulares redditus longe superare, decimis ubique collapsis, & infertones Episcopales commutatis; rogare se, quandoquidem Venerabili Capitulo Proventus tertiæ partis Episcopatus competant, ut Reverendissimus retentis duabus partibus, tertiam Venerabili Capitulo juxta Conc. Trid. assignet, inde ad Seminarii conservationem partem adjici posse.*

Reverendissimus Episcopus Venerabilis Capituli Responsum non satis æquo animo ferre visus est, æstimavitque merito, se aliud Responsum expectare debuisse. *Nam quod de tertia parte Proventuum Episcopatus, seu mensæ Episcopalis Capitulo assignanda dictum sit, illud sine ullo fundamento prolatum esse. Capitulum enim proprias habere villas sylvas, & alia bona divisa, & distincta a bonis, quæ ad mensam Episcopalem pertinerent: de proventibus & bonis mensæ Episcopalis ne Te-*

*runcium quidem competere Capitulo, neque Concilium Tridentinum quidquam de hac re constituisse. Quod vero de collapsis Decimis dictum sit, illud quidem non negari, sed Episcopi quoque Decimas, quæ amplissimæ fuerint, ad eundem modum sicuti Capituli collapsas esse. Recordari se inter alia Statuta Ecclesiæ Cathedralis unum extare, quo Episcopus ad certa quædam onera sit obligatus, ad simplum Capituli contribuere duplum: æquum igitur, ut ad Seminarium etiam ad duplum Episcopi, Capitulum contribuat simplum. Quod si illis grave hoc videretur, ac existimarent, æquam non servari proportionem, petiit Reverendissimus, ut quilibet Prælati, & Canonicus Cathedralis Ecclesiæ de suis proventibus contribuat decimam, vigesimam, trigessimam, vel quinquagesimam partem, se ad eundem modum paratum esse de proventibus mensæ Episcopalis decimam, vigesimam &c. contribuere, & hunc modum esse longe justissimum, ut quo plures quis habeat redditus, eo plus etiam conferat.*

Venerabile Capitulum tempus deliberandi in alterum diem petiit, & impetravit.

DDnis Abbatibus placuit institutum Reverendissimi, operamque suam non denegarunt, sperantes, si quid contribuerint, Reverendissimum Dominum Episcopum contentum fore, ut in Clericorum Seminario Nissensi suos alumnos alant, quorum opera uti possint.

Capitulum Glogoviæ majoris de collapsa Religione, & Censuum imminutione conquestum est, atque hinc fieri, ut, unde commode vivant, vix suppetat: Scholæ Rectores, & Professores stipendio commodo destitui, Ecclesiam etiam ipsam mutam quodammodo manere: excusari itaque sese petierunt in iis, quæ de contributione proposita essent.

Capitulum Nissenfense, & Oppoliense certum responsum ad ulteriorem cum fratribus absentibus consultationem rejecit.

Capitulum Ratiboriense, & Glogoviæ superioris summam allegarunt paupertatem, quam excusationem, ut certam, Reverendissimus Dominus Episcopus non gravatim admisit.

Præpositus Rosenbergensis se ex Prælati sui Domini Abbatis in Arena voluntate dependere, ait.

Vidit Reverendissimus Dominus Episcopus, pro Seminario Clericorum inanem contributionis spem esse; nihilominus se a pio proposito suo in alendis Clericis, & pueris Nobilibus desistere nolle asseveravit.

Ex



Et quia major diei pars rerum tractatione consumpta esset, dimisit Clerum Reverendissimus Dominus Episcopus, Abbates vero apud se in prandio retinuit. Commisit autem Reverendissimus DD. Archidiaconis, ut suis Archipresbyteris demandarent, quo absentes Sacerdotes, qui Synodo huic non interfuissent, suo tempore convocarent, atque ab eis professionem fidei exigèrent. Synodi etiam Promotor, innuente Reverendissimo Domino Episcopo, jussit, ut sequenti die, hora septima ad sonum campanæ majoris torus Clerus ad Sacrum Missæ officium, & tandem in Curiam ad Synodum vicissim reverterentur.

**SECUNDA DIE SYNODI** mane vicissim campanæ impulsu signum dabatur; sub tertium pulsus, eodem ordine, quo præcedente die, eodemque Prælatorum, Canonorum, & Abbatum, totiusque Cleri comitatu, in Cathedralē Ecclesiam ingressus Episcopus Sacrum Missæ officium de Beata Maria Virgine, quod a Reverendissimo Domino Adamo Episcopo Nicopolien- se, & Suffraganeo Wratislaviense celebrabatur, devote audivit, ac in Curiam reversus, ut cceptam Synodi tractationem continuaret, per *Promotorem* diversa Capita de Cultu Divino rite peragendo, ut de illis deliberaretur, proponi jussit: & cum ad *Caput de Cantilenis*, in Ecclesia ante Concionem decantandis, perventum esset, placuit Synodo, idque devotioni plebis plurimum conferre quidem censuit, ut omnibus universim Ecclesiis Cantiones ejusmodi concederentur: evitandæ autem confusionis, & disparitatis causa, opportunum esse, ad unam certitudinem redigi cantilenas, in quibus, ut certitudini, & conformitati devotio conjungeretur, Reverendissimus Dominus Episcopus curam eandem Dominis Doctōri Andrea Bogursky, præterea Concionatori, & Penitentiario majoris Ecclesiæ commisit, qui utroque & Germanico, & Polonico idiomate cantiones probatas, & pietati inservientes colligerent, & Episcopo afferrent, illi tum curæ fore, ut in usum multorum typis Nissensibus excusæ in publicum prodirent.

Baptizandi ritum quod attineret, DD. Abbates gravibus, & urgentibus de causis, ac rationibus consultum existimabant, in Sacramento Baptismi Joannis Jeusentritii, Episcopatus Misnensis Administratoris, Viri in Religione juvanda probatissimi, Germanica baptizandi forma magis, quam Latina hætenus consueta, utendum esse. Quam difficultatem Dominus Reverendissimus exemit, cum diceret: *Formam baptizandi potius secundum Agendam Metropolitana Eccle-*

*sia Gnesnensis ubique servandam, quam novi aliquid statuendum esse: non displicere tamen, quin inchoari, ac monere, ut paulatim & adhibita in consilium prudentia, a Parochis Germanico, aut etiam, ubi ejus lingue usus sit, Polonico sermone, populo Cereemoniæ opportunis verbis explicentur: ita enim futurum, ut modus Germanice baptizandi in iis locis, ubi partim a Parochianis desideraretur, partim in quibusdam locis nunc in usu esset, pedetentim diligentia Parochorum tolli posset.*

De Breviario Wratislaviensi, cujus exempla desiderarunt, Reverendissimo Domino Episcopo, approbante, Synodo placuit, usum Romani Breviarii esse introducendum, non ut Wratislaviense tollatur, sed ut propter defectum Wratislaviensis Breviarii, recens ordinandi ad recitationem Breviarii Romani assuefiant.

Placuerunt etiam Synodo *Articuli de Cultu Divino* omnes. Ad Reformationem Clericorum condescendendum erat: ejus a Capite initium sumendum, judicabat æquum Reverendissimus D. Episcopus, ac horrabatur, ut libere, ac confidenter omnes, & singuli publice indicarent, si quid in Sua Reverendissima Celsitudine emendatione dignum animadverteretur. Cum autem tota Synodus uno ore profiteretur, omnia, quæ hætenus gesta essent, Episcopali officio, ac muneri convenientissima, & cum pietate conjuncta fuisse: preces adjiciebant, ut quemadmodum sancte cœpisset, progrediretur, mercedemque a Deo Optimo Maximo expectaret.

Capita deinde de moribus Clericorum approbarunt, præcipue vero ea Constitutio, ne Clerici pro aliis in causis pecuniariis fide juberent, DD. Abbatibus plurimum placuit, se unicum hoc optare, ut a fidejussionibus liberentur.

Cum autem ex Abbatibus quidam subsequenti die certis de causis abitum pararent, rogabant Reverendissimum Dominum Episcopum, ut quibus in rebus a secularibus gravarentur, benigne audire, consilium impartiri, & auxiliatrices porrigere manus dignaretur. Aquisimo desiderio Abbatum benigne annuit Reverendissimus, & ad omnia, & singula partim a vestigio in Synodo publice, partim etiam altera die privatim sufficienter respondit: ac in omnem eventum nec consilio, nec auxilio DD. Abbatibus quovis tempore, & occasione sese defuturum, humanissime est pollicitus, monuitque paterne, ut sequenti die omnes mane campanæ signo dato ad rem Divinam faciendam redirent, & residuis Synodi negotiis incumberent. Cæterum

tum insumpta jam majori parte diei, humaniter Clerum, ut cibo, & potu reficeretur, Episcopus invitavit.

Pulsu campanæ tertio, die etiam Synodi tertia, præcedente, in præsentia Reverendissimi Domini Episcopi, & Cleri totius, D. Abbas Vincentinus officium de S. Joanne Baptista, Patrono Ecclesiæ Wratislaviensis, celebravit. Post hæc in Curia Episcopali de temporalibus quædam proposita, eaque post diligens examen approbata fuerunt.

Tum Ecclesiæ Cathedralis Capitulum Seminarii faciens mentionem; si idem Clericorum augeretur numerus, consultum arbitratur, atque ob id, cum Concilium Tridentinum Sess. XXIII. cap. XVIII. de Reformatione, certum præscribat, ad Seminarii jumpus contributionis modum, rogabat, ut Reverendissimus ex Prælati, vel Canonicis Ecclesiæ Cathedralis unum, alium etiam Capitulum nominaret, qui postmodum ea de re consultarent, suæque Reverendissimæ Celsitudini, quid fieri expediat, referrent. Quod Venerabilis Capituli Responsum Reverendissimo D. Episcopo non displicuit, adjecitque, Dominos Archidiaconos nudius tertius Visitationes suas obtulisse; quæ propter occupationes, sicuti oportebat, accurate revideri nondum potuerint, sed adhibiturum se Viros doctos, qui diligentius hæc expendant, & in medium consulant, qua ratione petitionibus Clericorum satisfiat.

Et cum Reverendissimus D. Episcopus tum a Prælati, tum ab aliis Clericis aliquoties intellexisset, quædam in Concilio contineri Tridentino, quæ non modo difficilia, sed quasi impossibilia in hac Provincia observari essent: Episcopus, utrum ea scriptis consignata in promptu haberent, interrogabat; quæ aliqua moderatione indigerent, & quorum præcedente etiam Synodo mentio facta esset; ea enim de re ad Ss. Sedem Apostolicam tempertive ut referretur, se non prætermitturum. Cathedralis Ecclesiæ Capitulum aliquot Capita in scriptis Reverendis-

simo obtulit, rogavitque, ut dispensationem, si ita S. Reverendissimæ Celsitudini visum esset, apud Ss. Sedem Apostolicam urgeret. DD. Abbates, & Collegiarum Ecclesiarum Capitula difficultates quasdam ex Concilii Tridentini Decretis allegabant, eas ut similiter in scriptis exhiberent, Episcopus commodissimum judicavit. Ad extremum; ubi gravamina Clerus exhibuisset, Reverendissimus Dominus Episcopus sese una cum aliquot Prælati & Canonicis ex Ven. Capitulo legere, ad amussim expendere, & necessitatibus eorum consulere velle, clementer promisit.

Quibus ita peractis, cum Reverendissimo Domino Episcopo interrogante, utrum Decreta his diebus lecta approbarent, ita, ut emendata imprimi possint, reliqui annuissent DD. Abbates conditionem adjiciebant, sibi Decreta placere, in omnibus, in quibus non sint contra jura, immunitates, & Privilegia Monasteriorum, de quo solenniter protestabantur. Reverendissimus D. Episcopus protestationem eatenus admisit, quatenus non præjudicaret juri, & libertati Reverendissimi, tanquam loci Ordinarii: item Ss. Canonum, & Concilii Trid. Decretis, de quo se in contrarium solenniter protestationem interponere, aiebat.

Et hisce Reverendissimus Dominus Episcopus omnibus benignissimis verbis gratias egit, quod ad citationem, & requisitionem ipsius, Synodi Diocesanæ negotiis, quæ ex Sacris Canonibus, Provincialibus, & Synodali-  
bus Constitutionibus, & Concilio Tridentino sua habuerint fundamenta, interfuerint. Nihil amplius nunc superesse, quam ut ea, quæ pie, & sancte a Diocesana Synodo unanimiter constituta sint, firmiter, & inviolabiliter ab omnibus observentur, Deusque pro augmento Religionis, & Fidei Catholica sedulo implore-  
retur.

Dataque Benedictione, omnibus licentiam abundi concessit, præterquam iis, quibus ad querelas, vel consilium impertendum, vel auxilium afferendum erat.

### NOMINA PRÆCIPUORUM, QUI AD SYNODUM hanc Diocesanam Wratislaviæ convenerunt.

**R**everendissimus, & Illustrissimus in Christo Pater, ac Dominus D. ANDREAS, Dei gratia Episcopus Wratislaviensis, Coronæ Bohemiæ Princeps Ligijs, Sacræ Cæsareæ Majestatis Consiliarius, atque Supremus superioris, & inferioris Silesiæ Capitaneus, Præsidens in Synodo.

Reverendissimus D. Adamus, Episcopus Nicopolien-  
sis, & Suffraganeus Wratislaviensis.

EX CAPITULO CATHEDRALIS  
Ecclesiæ Wratislaviensis.

Reverendi Domini  
Joannes Sitsch, Præpositus.  
Adam Landeck, Decanus.

*Paulus Albertus*, S. Th. Doctor; Scholasticus.

*Christophorus Gerstman*, Custos.

*Andreas Bogursky*, J. U. Doctor.

*Vincentius Salnius*.

*Balthasar Habicht*, Artium liberalium Magister.

*Bonaventura Han*, J. U. Doctor.

*Georgius Schultetus*, S. T. Doctor.

*Conradus Waibelius*, S. T. Doctor, Vicarius in Spirituelibus, & Officialis generalis.

*Casparus Hiltprandus*, Art. liber. Magister.

*Georgius Andreales*, S. T. Doctor, Can.

#### EX DOMINIS ABBATIBUS.

DD.

*Hieronymus*, Lubensis.

*Joannes*, S. Vincentii Wratislaviae.

*Jacobus*, Saganensis.

*Nicolaus*, Heinrichoviensis.

*Antonius*, Camenicensis.

*Casparus*, Grissoviensis.

*Gregorius Stojanus*, Zemelnicensis.

*Laurentius Girlicius*, Ablegatus Michaelis Waleberi, Abbatis Raudensis.

Prior in Pratis ad Glogoviam Superiorem, Ordinis Sancti Pauli, primi Eremitæ.

#### COLLEGIATARUM ECCLESiarUM ABLEGATI.

Glogoviae Majoris.

*Georgius Schultetus*, Præpositus.

*Martinus Lembusius*, Decanus.

*Casparus Sella*, Archidiaconus.

Sanctæ Crucis Wratislaviae.

*Adamus Kessel*, Artium liberal. Magister. Nissenfis.

*Sebastianus Hartman*, S. T. Doctor, Præpositus.

*Nicolaus Tinczman*, Medicinæ Doctor. Oppoliensis.

*Jacobus Zuretius*, Decanus.

*Joannes Kuna*, Archidiaconus.

*Joannes Zwick*, Custos.

Ratiboriensis.

*Petrus Sebisch*, Decanus.

*Georgius Stephetius*, Custos.

Glogoviae minoris.

*Albertus Petricz*, Decanus.

Magistri Hospitalis S. Mattheæ, Ablegatus

Fr. Joannes Prussius.

Tomus VIII. Concilior. German.

Cathedralis Ecclesiæ Wratislaviensis Concionator, & ejusdem Ecclesiæ Pœnitentiarius.

Falckenbergensis.

*Andreas Rosnecky*, Præpositus.

#### PRÆPOSITI MONASTERIORUM.

Fr. *Wenceslaus*, Præpositus Rosenbergensis.

Fr. *Joannes Fuchs*, Præpositus Zottensis.

Fr. *Franciscus Welle*, Præpositus in Seitsch.

Fr. *Georgius Faber*, Præpositus in Novo Castro.

#### PRIORES, & FRATRES.

Fr. *Martinus Opicz*, Prior ex Conventu S. Vincentii Wratislaviae.

Fr. *Albertus*, Concionator Rosenbergens.

Fr. *Matthias Bittner*, Senior Conventus Saganensis.

Fr. *Balthasar Rotbentorn*, Prior ad Divam Virginem in Arena Wratislaviae.

Fr. *Paulus Soraviensis*, Prior Conventus Sancti Adalberti Wratislaviae, Ordinis Prædicatorum.

Fr. *Dominicus Wansovita*, Prior Conventus Suidnicensis S. Crucis, Ordinis Prædicatorum.

Fr. *Blasius Gedanensis*, Prior Ordinis Prædicatorum ad St. Petrum & Paulum Glogoviae majoris.

#### PRÆCENTORES.

*Zacharias Felckel*, Sanctæ Crucis Superioris Wratislaviae.

*Albertus Molitorius*, Sanctæ Crucis in Crypta Wratislaviae.

#### ARCHI PRESBYTERI, SEU DECANI RURALES.

Ex Wratislaviensi Archi-Diaconatu.

*Melchior Jentsch*, Parochus ad S. Mauritium.

*Casparus Schoresius*, Parochus Grotkoviensis.

*M. Christophorus Lachnit*, Parochus Cantensis.

*Jacobus Arienus*, Parochus in Czirkowicz.

*Albertus Tricesius*, Richtalensis.

*Stanislaus Podolsky*, Ostrossoviensis.

Ex Archi-Diaconatu Glogoviae majoris.

*Matthias Heinicus*, loco Parochi in Holnkirch.

*Georgius Weigel*, Parochus in Preichaw.

B b b

Ex



*Ex Archi-Diaconatu Legnicensi.*

*M. Laurentius Joniseber, Virginum in Lubenthal Pœnitentiarius.*

*Matbias Renner, Parochus in Olbersdorff.*

*Ex Archi-Diaconatu Oppoliensi.*

*Ex Sede Rosenbergensi Vitus Budeſto, Parochus in Dobruſczin.*

*Ex Sede Strelcenſi Clemens a Stock, Parochus in Groſſowicz.*

*Ex Sede Tboſtenſi Joannes Prziffowſky, Parochus in Tboſt.*

*Ex Sede Gleywicenſi Joannes Servacius, Parochus ibidem.*

*Matbias Mazureck, Parochus in Petri Villa, Senior.*

*Ex Sede Zarenſi, & Wladislavienſi Joannes a Ploſta, Parochus in Jadlownick.*

*Ex Sede Ratiborienſi Georgius Richtineck, Parochus in Lyſcky.*

*Valentinus Sartoris, Senior.*

*Ex Sede Ugeſdenſi Petrus Cervus, Parochus Leſnicenſis.*

*Ex Sede Coſlenſi Caſparus Leſſius, Parochus ibidem.*

*Stanislaus Wartman, Parochus in Koſtenthaal, Senior.*

*Ex Sede Glogoviae minoris Sebaſtianus Rudolphi, Parochus Sebonovienſis.*

*Ex Sede Cilicenſi loco Jacobi Rudolphi Vincentius Matthei, Canonicus Ratiborienſis.*

*Adamus Cbarinus, Parochus Cilicenſis Senior.*

*Ex Sede Falckenbergenſi Petrus Zmarcky, Vicarius Falckenbergenſis.*

*Præter ſupraſcriptos Prælatos, & Sacerdotes, in dignitatibus, & officiis conſtitutos, ex Religioſis Fratribus, Eccleſiarum Vicariis, Altariſtis, & Parochis Villarum, magnus adfuit numerus, quorum Nomina recensere ſupervacaneum videretur.*

## CONSTITUTIONES SYNODI DIOECESANÆ

### DE FIDE, ET RELIGIONE CATHOLICA.

#### De Professione Fidei.

#### CAPUT I.

**Q**ui Sacras ædes, Theatra, privatasque domos magnifici alicujus operis erigere, & ſtructurarum, ſuique Nominis perpetuitati, ac memoriæ inſervire volunt, in fundamentum primo cogitationes, & labores convertunt: idque ut omni ſtudio firmant, & ſtabiliant; circulos, aliasque ex Geometrica diſciplina convenientes figuras mutuati, ad earum normam, & artificis certam delineationem, ſolum aut ante firmum occupare, aut fragile faxis, aliaque materia accommodata firmare conſueverunt. Fruſtra enim duraturæ molis, & ædificiorum conſtanciam ſibi pollicerentur; niſi fundamenti immobilis certitudo omnes reliquas ſtructuræ partes ad operis uſque abſolutionem, humeris velut in ſeſe reciperet, & ſuſtulciret. Cum igitur omnes, qui Chriſti Eccleſiæ in-

ferti, ejus profeſſioni nomen ſuum vere dederunt, magnam animo moliantur felicitatis perpetuæ ſtructuram, quæ in omnem æternitatem duratura ſit; a fundamento, quod eſt FIDES CHRISTIANA, & CATHOLICA, ſine qua impoſſibile eſt placere Deo, ad imitationem Sanctorum Patrum, in hac Synodo noſtra exordium ſumendum erit: ut hoc idoneo, & inſallibili fundamento poſito, reliqua omnia facilius ſuperſtrui, & ſine ullo ruinæ metu firmius, certiusque ſtabiliri poſſint. Eſſi autem in ea Synodo, quæ Anno M.D.LXXX.(\*) ab Illuſtriſſimo Principe, ac Reverendiſſimo Domino MARTINO, Epifcopo Wratiſlavienſe, proximo Anteceſſore noſtro, piæ, & felicitis memoriæ celebrata eſt, omnes, qui interfuerunt Synodo, Fidei Catholicæ Profeſſionem ſecundum Bullam, ſive Præſcriptum

P II

(\*) Vide Synodum hanc Tomo VII. præcedente, a pag. 873.

PII QUARTI Pontificis Maximi, solenniter præstiterunt; quia tamen ab eo tempore non pauci Prælati, Canonici, & alii Beneficiati in Domini sortem vocati accesserunt, eos fidei Professionem facere, & quæ corde credunt, tum aliis gravibus de causis, tum ut omnes intelligant, perpetuam esse debere in Ecclesia Dei concordiam, unanimitem, & consensum, Nobis præeuntibus, ore idem profiteri, & alios etiam repetere, in hac Synodo, sicut paulo ante dictum est, æquum censuimus. Quoniam autem non sufficit, ut Ecclesiastici, quorum exiguus numerus est, soli credant, aut soli officii ac muneris sui admoneantur; sed ad Dei Optimi Maximi gloriam, ad Catholicæ Religionis propagationem, & ad Christianæ Reipublicæ utilitatem pertinet; ut in hac fide Catholica omnes, qui Christi Ecclesiæ inserti sunt, illique nomen dederunt, instruantur; sequentes *Articulos*, seu *Constitutiones*, in *Synodo* conscriptas, salvis tamen prioribus Decretis, tam Diocesanae, quam Provincialium Synodorum, ac reliquis Ss. Ecclesiæ Catholicæ, inprimis vero Oecumenici, & Ss. *Concilii Tridentini* Præceptis, Sanctionibus, & Ordinationibus, ubi a Ss. Sede Apostolica iustissimæ censuræ trutina examinatae, & approbatae fuerint, imprimi, & publicari curabimus, ut ad omnium æque noticiam perducantur. Omnes igitur Christianos, & præcipue Ordinis Ecclesiastici Viros, sicuti Catholicam Religionem profiteri, & pro illa etiam laudabili Sanctorum Martyrum exemplo vitam, & sanguinem profunderere paratos esse decet; ita Salvatoris nostri Præceptis, qui pollicitus est, coram Patre suo eos sese agniturum, qui in hoc mundo ipsum confessi essent, & Sacrosancto Concilio Tridentino Sess. XXIV. Cap. XII. de Reformatione, adducti statuimus, ut in posterum nemo ad quancunque Prælaturam, Canonicatum tam in Cathedrali, quam Collegiatis Ecclesiis, ad Parochiam Mansionariam, vel Vicariam, vel ad munus concionandi, priusquam solennem Fidei Professionem fecerit, ullo modo admittatur. Et quoniam experientia constat, tenella puerorum ingenia, quidquid in puerili

ætate imbibunt, tenacissime retinere, & ad Præceptorum nutum atque exemplum sese conformare; statuimus, ut Scholarum Rectores, Magistri, Baccalaurei, & alii, qui pueros literis Germanice legendis, & scribendis, atque in Arithmericis rationibus instituunt, ab Archi-Diaconis, & Visitatoribus compellantur, quo hanc Fidei Professionem faciant, ut securius, & tutius pueri illorum institutioni concedi possint. In posterum etiam ad hujusmodi officia exercenda in Civitatibus non admittantur, nisi fidei Professionem faciant, atque etiam, si Ordinario visum fuerit, stipulata manu promittant, se nec libros lascivos, aut suspectos, illis prælecturos, aut quidquam contra Catholicam Fidem unquam docturos. Idem observari volumus de Fidei Professione in iis, qui Religionem aliquam ingredi volunt, idque, ut ante annum probationis fiat: cum indignum censeamus, ut, qui ad perfectiorem statum aspirant, de Fide, & Religione veluti dubios suos Superiores relinquunt. Ex hæc quidem Fidei Professio coram Nobis, vel nostro in Spiritualibus Vicario Generali, flexis genibus, & debito cum reverentiæ honore præstanda erit.

### *De forma Professionis Fidei.*

#### C A P U T II.

**F**orma autem hujus Professionis nulla alia sit, quam quæ Bulla, live Rescripto PII QUARTI Pontificis Maximi hæc, quæ sequuntur, verbis est comprehensa:

Ego N. firma fide credo, & profiteor omnia, & singula, quæ continentur in Symbolo Fidei, quo Sancta Romana Ecclesia utitur, videlicet:

Credo in unum Deum Patrem omnipotentem, &c.

Nomina eorum, qui Fidei Professionem quovis in loco fecerint, Tituli item Beneficii, seu Parochiæ, sive Ecclesiæ, ad quam quisque promovendus, vel jam promotus sit, Episcopalis Cancellariæ registis peculiaribus inserantur, nemoque sine Authentico Professionis Fidei Testimonio ad pos-

sessionem Prælaturæ, Canonicatus, vel Parochiæ mansionariæ, Vicariæ admittatur.

### *De Concionatoribus.*

#### CAPUT III.

**Q**ui agris conferendis occupantur, in semine deligendo non postremam, imo præcipuam ferme curam habent, quod alias feracissimum, & bene excultum solum, ob seminis imperfectionem spem ferentis frustratur. Seminis autem perfecte vivacis tantam norunt esse vim, & efficaciam, ut terræ etiam qualitate non nihil resistente, ipsa cultura lætis culmis, ac aristis proveniat, & enascatur, fructu copioso abundet, & messe locupletet. Ut igitur in agro fidei apud populum nostræ Diœcesis similis fructus expectari possit: præter Symbolum Fidei, quo Sacrosancta Romana Ecclesia utitur, & præter Articulos omnes in eo contentos, quos populus firmiter credet, vivo & vivifico Verbi Divini semine opus erit. Statuimus itaque, ut omnes Prælati, Parochi, & alii, ad quos munus docendi spectat, diligenter omnia dogmata Catholicæ Religionis populo summo studio, & cura, cum in publicis Concionibus, tum privatim etiam quavis commoda occasione proponant, & ut quam plurimos Christo lucrificent, perennem, & salutarem operam navent. Fieri enim non potest, quin ex assidua cultura in cordibus humanis læges læta proventura sit; cui pullulanti, & nascenti Misericors Deus rorem Benedictionis asperget, & fructum æterna beatitudine fecundabit. Ad hanc rem & cumprimis ad prædicandi officium seligantur Viri Catholici, pii, graves, & maxime idonei, qui tam vita, quam doctrina populo præeant, & qui morum integritate, & cognitione Scripturarum Utriusque Testamenti, quam maximam in Vineâ Domini facere conentur messem.

### *Quid docere debeant Concionatores.*

#### CAPUT IV.

**A**rticulos de hominis justificatione; de Missæ Sacrificio: de Sa-

cramentis: de invocatione Sanctorum: de veneratione Reliquiarum, & Imaginum: de Purgatorio: de Indulgentiis, & Votis: & si qui sunt alii, qui a sceleratis Neotericis in dubium impie vocantur, Parochi fideliter explicent; quid credendum sit, doceant, prudenter etiam calumnias diluant Hæreticorum, qui Sacramenta, & Articulos Fidei, & Ceremonias Ecclesiasticas, & totum denique Cultum Divinum, ac Religionem Catholicam cum alias passim, tum præcipue ad imperitam, & nimis credulam multitudinem plebis indefinenter calumniari non verentur. Dum diebus Dominicis, & aliis diebus Festis Evangelica Historia populo legitur, Parochi, & Concionatores circumspicte quippiam ex controversiis pro Auditorum capto explicabunt. Quodsi Parochus ejus eruditionis non sit, ut dilucide, ac solide ejusmodi quæstiones tractare possit: satius erit ab ipso simpliciter veritatem, omittâ disputatione proponi. Hortetur autem populum ad timorem Domini, ad Religionem Catholicam constanter retinendam: vel si Catholicus non sit, ad amplectendam eandem, ad bona opera exercenda, & ad pie vivendum: dehortetur contra ab omni scelere, flagitio, atque ab his maxime vitiis, ad quæ peculiariter homines suæ Parochiæ senserit propendere.

### *Ordo quis a Concionatoribus sit observandus?*

#### CAPUT V.

**P**rædicationis in Ecclesia Dei munus præcipuum, ac pernecessarium cum magno administretur fructu, ac utilitate, si modo recte, & ex sincera charitate erga Deum, & proximum, & secundum præcepta, & exempla Sanctorum Patrum, qui hæc profitentes, fidei Catholicæ propagatione plurimum Ecclesiæ contulerunt, exerceatur; necessarium esse duximus, Curatis omnibus, iis præsertim, qui parum moratæ plebis Rectores sunt, certum modum præscribere, quo ad utilitatem eorum, quos instruunt, ipsorum officium potissimum dirigatur. Idcirco statuimus, & ordinamus: ut Paro-



Parochi auditoribus suis præter Evangeliorum explicationem partes Catechismi Romani certis anni temporibus, & hoc quidem ordine, explicandas sibi sumant: A die Epiphaniæ ad Quadragesimam usque, decem Præcepta Dei: In Quadragesima de Pœnitentia, & Eucharistiæ Sacramento: Tempore Paschæ de Baptismo, & Confirmatione: Circa Festum Pentecostes de Oratione Dominica: Post Festum Trinitatis Symbolum Apostolorum. Et sic unius anni circulo reliquas Catechismi partes absolvant. Expedit etiam, ut doceant plebem Apostolicarum Traditionum, & Sacrarum Ceremoniarum ordinem, vim & institutionem: quo religiosius, & majori cum reverentia, omnes pietatis capaces illam excellentem harmoniam penitus cognoscant, & amplectantur. Indulgentiarum literas in omnibus passim Ecclesiis revideri ab ordinariis Visitatoribus, & ad consolationem animarum a Parochis, & aliis Concionatoribus certo tempore, quod ex circumspccto Visitatorum arbitrio constituetur, ex Cathedra publicari, & promulgari jubemus. In genere autem ex Sacrosancti Concilii Tridentini Decretis statuimus, ut nemo, Nobis contradicentibus, prædicare præsumat.

### *De Concionatoribus Regularium.*

#### C A P U T VI.

**I**dem quoque observandum est quoad Regulares ex Decreto Concilii Tridentini, quo etiam cautum est, ut nullus Regularis Canonicus, aut Monachus, cujuscunque ordinis, prædicare præsumat, ne in suis quidem Ecclesiis, nisi Superiorum suorum licentia, & morum, vitæ, & scientiæ examen, & approbatio præcedat. Quæ in re longe utilis adhibenda erit cautio, ut eorum quilibet ejusmodi consensus apud Nos fidem faciat, & benedictionem petat. In aliis autem Ecclesiis, quæ Ordinum non sunt, præter concessionem suorum Superiorum, eamque recentem, & legitimam, sine licentia nostra nullo modo possunt prædicare. Monachi autem erronei, qui,

nomine solum Regulares, extra claustra, & obedientiam Religionum suarum hinc inde oberrant, & divagantur: Presbyteri item ejus conditionis sæculares (nisi sint Nobis noti) ne in Civitate, vel Diœcesi conciones faciant, sunt prohibendi. Ne Parochi, aut Concionatores sedulitatis, & laboris jacturam faciant, suoque munere sine fructu fungantur, quod fit, si plebs a Sacris, & concionibus absit: Præfatis, & Magistratui in omnibus Ditioribus nostris serio injungimus, ut tempore Concionum & Divinorum Officiorum, otiosam, & bibulam turbam a tabernis, a foro, & plateis abigant, & ut concionibus, & Divinis Officiis intersint, nisi legitimis causis impediuntur, diligentissime hortentur, vel potius auctoritate sua omnino curent.

Hortamur autem omnes alios, cujuscunque ordinis, vel status fuerint, ut in locis, & Dominiis sibi subiectis idem fieri curent. Id cum Christianæ pietati convenientissimum sit, omnino futurum, Nobis plane persuasum habemus.

### *A quibus Concionatores abstinere debeant.*

#### C A P U T VII.

**C**um homo omnis ad humanitatem, & bene dicendum natus sit potius, quam ad infigendum mordacis linguæ aculeum, aut ad inspergendam factis alienis labem; id præ cæteris Concionatores Religiosi, & sæculares meminisse debent: quos serio monemus, ut in suggestu a scommatibus, maledictis, & convitiis omnino abstineant. In confesso est enim, si semel, atque iterum ejusmodi dictis asperiores infixerint morsum; vulnus aut difficillime per sanari, aut, si sanetur, cicatricosum nihilominus relinqui locum, quod in publico convitia passi exacerbatiores magis ac magis reddantur, eosque odio habeant, quos veluti Patres, & salutis assertores, alias venerati fuissent. In quæstionibus controversis si mentio pro concione fiat, moderata linguæ temperies adhibenda, & cavendum est, ne temere convitia jactent, sed salva Catholicæ

unitatis veritate charitatem, & benevolentiam erga omnes præ se ferant. In reprehendis criminibus gravitatem adhibeant, & prudentem aliquam vehementiam, iracundiæ omnis expertem, & vitia quidem redarguant solum, neminem autem unquam nominatim perstringant, nec ullo signorum genere detegant: nullum ordinem, statum, aut tribum asperius appellent, multo minus aperte & nominatim vel Ecclesiasticum, vel Civilem Magistratum reprehendant. Nocturno tempore nemini liceat concionari, nec, dum die habetur Concio, in eadem Ecclesia clara, vel submissa voce Missæ legentur, vel Horæ Canonicæ decantentur, nec Baptisimi Sacramentum eadem hora, nisi necessitate aliud exigente, administretur, vel quidquam aliud agatur, quod Concionatorem ipsum, vel Auditores turbare possit.

Si Concionator errores aut scandala in populum disseminare deprehendatur, aut alius Sæcularis, vel Regularis, contradicentibus Nobis, prædicare præsumat, iis sine mora conciones interdici mandamus.

### *Quales Libros Parochi habere debeant?*

#### CAPUT VIII.

**U**T Rectores Ecclesiarum secundum sanam Scripturæ intelligentiam Verbum Dei annuntient, librorum vere Catholicorum honesta suppellectili instructos esse eos oportet: Statuimus igitur, & mandamus, ut omnes Parochi præter *Sacra Biblia* unam, & alteram *Postillam* Catholici Scriptoris, qualis est *Thomæ Stapletonii*, *Ludovici Granatensis*, *Jacobi Feuchtii* &c. &c. *Catechismum* item *Concilii Tridentini*, *Summam Sylvestrianam Francisci de Victoria*: *Doctores Navarrae Rationale Divinorum Officiorum*. *Directorium audiendi confessiones Polanci*; & Authorem præterea approbatum, qui fidei tractet controversias, sibi comparent: neque alicui Parochiam credi volumus, qui aliquos saltem prædictorum librorum non habeat. Curæ autem erit Nobis, ut apud Bibliopolas Nisenses tales libri venales reperiantur: ne apud

Parochos ob penuriam exemplorum excusationi ulli supersit locus. Parochi villarum, qui legitimo impedimento tempore pomeridiano Christianam doctrinam, & Catechismum juventutem docere non possunt, ante concionem Orationem Dominicam, & Salutationem Angelicam: post concionem Symbolum Apostolorum, alio vero tempore Præcepta Decalogi, quinque Præcepta Ecclesiæ articulata voce recitent, & juvenus præeuntem imitetur, & paulatim addiscat.

### *De Proclamationibus post Concionem.*

#### CAPUT IX.

**I**Ndecorum, quinimo ineptum est, Sacra profanis misceri. Huic, ut salubri occurratur remedio, Statuto nostro expresse, & serio cavemus, ne proclamationes fiant in templis quarumvis rerum, quæ ad sæcularem magis negotiationem quandam, quam ad Ecclesiam pertineant: ut sunt: venditiones domorum, agrorum, & ejus generis etiam leviorum.

### *De Læctionibus Sacris.*

#### CAPUT X.

**C**onsueverunt Medici peritiores in periculosis, & acutis morbis omni cura variarum medicinarum compositiones, ex artis suæ penetralibus desumptas, in promptu habere, ut contumacium morborum lethalem vim frangant, usu medicinæ præstantis arceant, aut corpus jam ægrum restituant sanitati. Id in hæresum quoque morbis, ubi cum corpore anima in periculo versatur, faciendum esse, Ss. Concilium Tridentinum censuit: cujus Decretis insistentes statuimus, ut a Parochis quidem ubique pro concione Evangelium explicetur, Fides Catholica doceatur; apud Ecclesiam vero Cathedralē, tanquam in loco ob majorem frequentiam Prælatorum, Canonicorum, aliorumque Sacerdotum magis celebri & honorato, singulis septimanis bis, vel semel ad minus legatur Læctio Theologica, qua contro-

versi

versi articuli hujus temporis explicentur, & Adversariorum argumenta, Catholicorum dogmata impugnantia refutentur, & velut antidotus præsentissima veneno sectariorum opponatur. Hora lectionis ea præfigatur, quæ Vicariis Mansionariis, & reliquis Sacerdotibus, & Clericis in psallendis Horis Canonicis, & Cultui Divino in Ecclesia, nullum afferat impedimentum.

In Schola Civitatis nostræ Nissenfis, ubi propter Seminarium Clericorum, & Pædagogium Nobilium sæcularium major est Scholasticorum numerus, & frequentia: præter Lectiones controversiarum, casuum etiam conscientiæ Lectio bis vel ter in septimana secundum caput auditorum adjiciatur.

Abbates Wratislaviæ commorantes, Fratres suos, qui nec in Seminario nostro Nissæ, nec in aliqua Academia student, ad Lectiones in Insula Wratislaviensi audiendas mittant. De reliquo omnes Abbates juxta antiquas consuetudines, & Statuta Provincialia, & *Concilii Tridentini Decretum*, in suis Monasteriis, & Conventibus Magistrum Theologiæ, qui Sacram Scripturam interpretetur, alant, ut suo tempore ex ipsorum gremio idonei ad Monasteria gubernanda, aut Ecclesias Parochiales regendas inveniantur.

Sed & Catechismum Parochi, maxime in populosis oppidis, & locis, vel mane, vel a prandio doceant: vel certe advigilent, ut Ludimagistri, & Pædagogi in Scholis pueris fidei Rudimenta sedulo inculcent.

### De Libris.

#### C A P U T X.

**C**elebrium Rerumpublicarum Historici præter cætera laudabiliter constituta, hoc non in postrema posuerunt laude, quod scurriles libros ob dicacitatem & ingenii virulentiam urbe sua interdixerint; ne illorum lectione castis, & honestis civium moribus aliquid venenatæ mordacitatis instillaretur. Eandem enim cautionem adhibendam in moribus, & vita cen-

sebant, quam pestis contagiosa lue faviente, alii naturæ ductu ad conservationem sui adhibere consueverunt: cuius ut sævitiam effugiant, antidotis ex variis terra nascentibus utuntur, & fructus, odores, liquores, pesti specifica vi adversantes, ab extremis Indis petunt; inprimis vero cavent, ne in loco infecto commorentur, cum ex aëris contagiosi attractu nihil nisi certum veneni periculum, & mors ob oculos versetur. Hanc industriam Nos quoque imitari æquum est, ut & morum honestatem, vitæque integritatem, populo Christiano dignam, in Dicecesi nostra conservemus: arceamus autem potissimum ea hæreticorum librorum venena, ex maledici, & blasphemæ profecta spiritus suggestionem, quæ peste eo nocentiora sunt, quo magis præcipuam humanæ essentiae partem, animam videlicet, invadunt, ac æternæ damnationi, & cruciatibus obnoxiam reddunt. Remedium autem vix ullum efficacius reperitur, nisi ut infelicitissimæ hujus infectionis occasio evitetur: quod fiet, si Concionatores, & Parochi sedulo invigilaverint, ut hæreticorum libri improbatæ lectionis extirpentur: sicut Nos vigore hujus Constitutionis serio omnibus mandamus, inprimis vero Clericis, qui populum docent, ne libros ejusmodi apud se retineant, aut alios suæ commissos fidei habere patiantur: neque illos libros interno-scere difficile erit, cum jam pridem incertum catalogum relati, & a Patribus *Ss. Concilii Tridentini*, ac a Pontificibus Maximis damnati fuerint; quod *Ss. Sedes Apostolica* videret, omnes lucubrationes, ex Hæreticorum prodeuntes officina, perennes esse fontes, qui perpetuum scaturiunt virus, & instar aconiti succum proferunt lethalem. Hujus præcavendi causa iterum mandamus, ne Prælati, & Curati ullo modo in locis eorum jurisdictioni subiectis, eos importari, aut publice vendi, aut quovis modo in fidelium manus devenire patiantur. Qui monitis obsecundare noluerint, ii Commissariis, & Officialibus denuntientur, ut contumaci licentiæ huic opportunum frænnum injiciatur. Et ne ignorantia sit excusatio, operæ pretium erit, catalogum



logum librorum prohibitorum singulis annis Nissæ in convocatione Parochorum post Ss. Paschæ festivitatem; per Archidiaconos vero Archipresbyteris, & per hos reliquis subjectis Parochis in suis congregationibus, quas certis anni temporibus habere tenentur, publicari. Nemo etiam Curatorum propria autoritate ad ejusmodi librorum lectionem accedat, sitque memor gravissimarum Constitutionum, quæ a JULIO TERTIO, & a PAULO QUARTO, aliisque Romanis Pontificibus, fel. rec. hac de re editæ sunt. Quod si quis damnatæ illius lectionis libros aliquos scienter apud se retinuerit: intra octodecim dies a fine hujus Synodi, sub pœna & mulcta arbitraria Visitatoribus ordinariis tradi volumus.

### *De Parochis.*

#### CAPUT XII.

**Q**ui in civilibus vitæ humanæ actionibus, muniisque gubernandis prudentiam consultricem adhibent, eo respiciunt maxime, ut rebus gerendis dignos, & idoneos præficiant; rati hoc valde opportunum felicitis successus medium esse, & imperitos, parvique judicii homines plus sapius detrimenti, quam commodi publicæ rei afferre.

Id in Ecclesiæ negotiis similiter ut observetur, cum magna æquitate, ac usu maximo conjunctum censemus. Sicuti igitur in tota passim Diœcesi exactissimum habere delectum volumus, dum annuarum cura sæcularibus Sacerdotibus credenda est, ut præstantiorum, potiorumque habeatur ratio; ita similiter in Monasteriorum Parochiis hanc desiderari circumspeditionem novimus; ideoque ex Ss. Concilii Tridentini præscripto sancimus, ut occurrente vacatione Parochialium, quæ juris Patronatus Abbatiarum, aut alias Ecclesiastici fuerint, servetur ad unguem, quod salubriter constituit idem Concilium Tridentinum C. XVIII. Sess. XXIV. Vers. Si vero juris Patronatus: In Beneficiis autem curatis, unitis Abbatibus, aut aliis Regularium Monasteriis, servetur Decretum ipsius Concilii C. VII. Sess. VII.

atque *Constitutio PII V. fel. rec. de Vicariis perpetuis.* Si vero ipsismet Monasteriis, aut domibus Regularium cura animarum immineat, observandum utique esse, quod habetur Decreto Cap. XI. Sess. XXV. de Regularibus. Nulli autem Parocho, vel Rectori Ecclesiæ admissio, & approbato, suam Parochiam, Beneficium, Ecclesiam sine licentia nostra expressa deferere, & alio migrare liceat. Monachi vero, vel Regulares, cujuscunque sint ordinis, aut status, rejecti a suis Abbatibus, Superioribus, vel Prælatibus, Parochias sub aliis non obtineant, nisi causam dimissionis in scriptis legitimam probent. Meminerint autem Abbates, ne Fratres suos jam Professos, licet inobedientes, aut etiam rebelles, ex Monasteriis ita dimittant, ut neglectis votis, sæcularium vivendi morem sibi assumere audent: sed juxta Ordinis sui Regulam digna animadversione in viam revocent, vel contumaces, addito vitæ, ac morum vero testimonio, ad aliud Monasterium Ordinis ejusdem dimittant.

Eam si habet negotiorum multitudo peculiarem veluti vim in plerisque humanis rebus; ut varietas, & copia accuratam, quæ alias adhiberi poterat, diligentiam excludat, aut torpidiorem reddat; multo magis in Ecclesiasticis muniis id usu venire certo constat. Bene igitur cum Ecclesiis agi arbitramur, si unica ab unico Rectore, curam animarum habente, pie, fideliter, & sufficienter gubernetur. Occasio alicujus incommodi ut evitetur; volumus, ut nemo plures Ecclesias Parochiales etiam juris Patronatus obtinere possit, quamvis earum fructus valde tenues existant, nisi a Sede Apostolica dispensationem obtinuerit: cum multitudo segniora efficiat officia, & necessum sit, quosdam subditos aliquot Dominicis diebus prædicatione Verbi Dei, & Ss. Missæ Sacrificio, & Sacramentorum administratione negligi, & defraudari.

*De*

*De Archi-Diaconis, & quod præcipuum eorum in Visitatione officium esse debeat?*

C A P U T XIII.

**B**oni Pastores præter eam, quam adhibent curam, ne oviculæ pascuis commodis, ac pabulo sufficienti destituantur, sylvarum quoque latebras indagare, & perscrutari soliti sunt, an lupo aliquis in insidiis ibidem lateat, qui prædæ causa gregem invadere, & oves rabido dentium morfu dilaniare possit; cognita enim luporum vicinitate Pastores diligentius excubias agunt, canum custodias adhibent, & malum a grege arcent, & averunt. Parem sedulitatem, imo accuratorem ab animarum Pastoribus requiri, & Salvatoris nostri admonitio, & ipsa ratio docet. Idcirco statuimus, ut Archidiaconi in suo quisque Archidiaconatu, Parochos Catholicos & obediens non solum visitet, lepram a non lepra dijudicet, & Christi, ejusque Ecclesiæ Catholicæ insertas oves a sectariis secernat, & tueatur; verum etiam lupis illis pro viribus omnem in gregem Dominicum irruendi præcludat vigilantem oculo commoditatem. Opportunum erit hac de causa, Archidiaconatum Ecclesias, & Paræcias annotare, quæ & quo tempore a Fidei Catholicæ unitate desciverint, cujus jurisdictioni in temporalibus subjecti sint, quam sectam Lutherine, Calvinianæ, aut Schwenckfeldii &c. &c. amplectantur. Ad hæc an Parochiani omnes ea sectariorum lue, & luporum moribus infecti sint: an aliquibus pestiferum vulnus persanari, & ex famelicis faucibus bestiarum eripi possint. Ita enim jacula prævisa minus ferient, & notæ Sectariorum latebræ minus extirpandæ erunt: quin contra, circumstantiæ certa consignatione exhibitz, ad defendendum, tuendum, & augendum ovile, magnum adjumentum præbebunt.

*De Scholis.*

C A P U T XIV.

**J**ulianus Imperator, magnus ille apostata, & acerrimus Christianorum persecutor, omnem Christi

*Tomus VIII. Concilior. German.*

doctrinam radicitus evellere, & extirpare volens, callidissimum reperit inventum; & in toto Romano Imperio Christianis Scholas interdixit. Animadvertit astutus veterator, frustra adultiores, & constantis ætatis homines dogmate imbutos esse, si juventutis institutio tolleretur. Quo enim fundamento niti debebat Religio, si illud dirueret, brevi temporis spatio, maximam doctrinæ Christianæ jacturam in Christiano populo futuram, argutis oculis prospiciebat. Neque res humanæ rationis calculo, successu fuisset destituta; nisi idem apostata Julianus, qui ex Persico rediturus bello, funera crudeliter voverat Christianis, & excidium minatus erat; in conflictu sagitta lethaliter vulneratus, cælos aspiciens, & impiis his verbis: *Vicisti Galilæe*, sermonem ad Christum convertens, crudelem animam efflasset. Evidentissima igitur Scholarum necessitas, vel Nobis tacentibus suadet: idque etiam hac Constitutione sancimus, ut tanti ædificii tam in Ecclesiastica, quam Politica Republica fundamentum primum ubi vis conservetur, & opportunus ad id in civitatibus, oppidis, & pagis etiam majoribus, ubi prius non sit, eligatur locus, & hæc prior adhibeatur cura; secundaria, ut in Scholis habeantur Præceptores Catholici, probatæ vitæ, ætatis juxta, eruditionis, ut locus & officium exiget, sufficientis. Hique cum ad id muneris eliguntur, fidei Professionem juxta Constitutionem Sanctæ mem. PII Vti, & Decretum a Nobis superius editum, emittant: his mandamus serio, ut unum, eundemque Catechismum Petri Canisii prælegant, cum variis Authorum Catechismis ingenia puerorum confundantur. Universim Scriptoribus Catholicis solummodo locum in Scholis concedimus, suspectos autem omnes plane proscribimus, & perpetuo exilio mulctamus. Nam ut Theologica omittantur, plerumque etiam Grammatici, Dialectici, & Rhetorici libri, a Sectariis vario errorum cumulo contaminati in lucem prodeunt, unde infectionis periculum imminet juventuti: Superiorum inspectio, a quorum voluntate in assignandis prælectionibus, & Authoribus probatis,

C c c

Præ.

Præceptores nunquam recedent; huic malo occurret, & salutarem manum adhibebit. In Germanicis Scholis idem Catechismus germanice proponendus, & explicandus est.

Porro Præceptores diebus Festis, & maxime Dominicis, hora aliqua conveniente Symbolum Apostolorum, Orationem Dominicam, Salutationem Angelicam, Decalogum, Præcepta Ecclesiæ, & alia, quæ in Catechismo continentur, pro captu, & ingenio puerorum pueris, qui literas non didicerunt, explicant. Atque huic negotio in opipidis, & pagis Pastores, ac Sacellani, aut Clerici, Scribæ, aut alii ad hoc idonei incumbant. Prælati Ecclesiarum tam Cathedralis, quam Collegiatarum, & Monasteriorum, subditorum suorum filios ad Scholas Hæreticorum mitti serio prohibeant, eosque potius Catholicis Præceptoribus intruendos mandent tradi. Plurimi inopes, cum numerosa prole abundant, quorum indoles magnum in literis progressum pollicetur, ac paupertas parentum, quominus ad frugem perveniant, & emergant, filiis obstaculo sit: hortamur omnes Ecclesiastici ordinis Viros, aliosque ex bonis Ecclesiasticis viventes, ut ipsi in tanta necessitate Ecclesiæ, & Religionis Catholicæ juvandæ commoditate, promptos, hilares, ac liberales se præbeant, & pauperum, & vilioris conditionis hominum filios in studiis liberaliter juvent. In primis ferme Rudimentis literarum indoles quemque commonstrabit, an ad graviores disciplinas idoneus videatur. Si ad altiora aspirantes in mediis subsistent, vel id non infrugiterum erit. Visitatores cum alias visitant, Scholas non prætergrediantur: idem faciant sæpius, quibus ex officio id peculiari-ter incumbit.

### *De Librariis.*

#### CAPUT XV.

**N**on liceat cuivis, de rebus Fidei & morum, ad ædificationem doctrinæ pertinentium, quidlibet ulla ratione scribere, vel imprimere, vel impressos libros divendere, aut apud se retinere, aut scripta etiam commu-

nicare, sine Superiorum Ecclesiasticorum licentia, & examine, ac nostra approbatione (quæ in fronte, vel fine libri scripti, vel impressi apponenda est) sub pena anathematis, ac arbitraria pecuniæ, & amissionis librorum. Similiter nec Librariis, Bibliopolis, & Typographis concessum sit, in nostras Ditiones ullos Sectariorum libros importare, advehere, & ibidem exponere venales. Quocirca vetustiorum Provincialium Synodorum exemplo statuimus, ut singulis annis ab iis, quibus munus visitandi incumbit, vel quibus Nos hoc committimus, Bibliopolarum libri venum expositi visitentur. Quilibet autem Parochus apud suæ Parochiæ Patresfamilias caute inquirat, an libros hæreticos in suis domibus habeant, & si quos deprehenderit, Visitatoribus, vel Nobis significet.

Ne in locis, jurisdictioni Ecclesiasticorum subjectis, dissensionis, & perfidiæ spiritus disseminetur, injungent omnes suis Præfectis, ut quoad ejus fieri potest, neminem jus Civitatis acquirere, aut in Senatum cooptrare sinant, aut ad officia honoratiora admittant, qui non prius, se Ecclesiæ obtemperatum, receperit.

## *DE CULTU DIVINO, ET ECCLESIIIS.*

### CAPUT I.

**C**um omne illud, quod in Templis manufactis agitur, totum in nobis spiritali reædificatione compleatur: ipsaque Domus Dei in terris constitutatur, ut in ea fidelium suorum exaudiat preces, visitec animum, excitec affectum, suæ gratiæ surroget auxilium, & Nominis conservec cultum; merito sane ejusmodi locorum dignitatem, & reverentiam pro viribus tuemur. Et quoniam compertum est, non raro Ecclesias sine Antecessorum nostrorum licentia, ac sine ulla dote ædificatas esse, quæ factæ tectæ conservari, & pro decore Domus Dei exornari nequeunt; Statuimus, ut nulla Ecclesia de novo in posterum a quocunque, quan-



quantumvis pio ducatur zelo, absque permissione nostra, exstruatur. Cum vero ex nostra licentia constituenda fuerit, fidelium in hac Diœcesi auctior numerus, & insignis, ac manifesta utilitas novam erigi Ecclesiam veluti cogeret; ad hanc litus decens, honestus, & populi capax deligendus erit, ab aliis ædibus tantum distans, ut commodò circumiri spatio possit: Altare vero majus Orientem versus in ea constitutur. Ante dotis vero assignationem sufficientem, ullum construi Templum prohibemus: quia enim ad rem Divinam faciendam, & cultum peragendum, conservandam etiam ipsam Ecclesiæ structuram, redditibus opus est; ne, si his careat Ecclesia, posteaquam ædificata, & consecrata fuerit, in profanum usum vicissim converteretur. Domicilia nostra maximis sæpe sumptibus exornare, & aeris intemperiem, ac injuriam arcere consuevimus: majorem adhibemus solertiam ad corporis deperditas, aut labascentes vires recuperandas: quanto æquius est, in ædibus Deo constructis, & dedicatis fieri, in quibus pretiosissima salutis nostra pharmaca conficiuntur, ipsa nimirum Sacramenta administrantur, animæ Dei Verbo pascuntur; ut nimirum integræ ab omni detrimento, & injuria conserventur. Et Collegiatis, vel alicujus Monasterii, vel Prælati ruinosas, vel collapsas Ecclesias, Capitula, vel Prælati earum; Parochiales autem instaurentur ex fructibus & proventibus, ad easdem Ecclesias quomodocunque pertinentibus: qui (\*) non fuerint sufficientes, omnes Patroni, & alii, qui fructus aliquos ex dictis Ecclesiis provenientes percipiunt, aut in eorum defectum Parochiani opportunis mediis reficere, & restaurare cogantur, quacunque appellatione, exemptione, vel contradictione remota, quemadmodum opportune sancitum est Decreto *Tridentini Concilii Cap. VII. Sess. XXI.* Ab iisdem nundinationes, & mercatus Laicorum arceantur: accessus, in villis præsertim, muniatur, ne brutis animalibus ullus pateat ingressus: & eo tempore, quo Divina celebrantur offi-

cia, aut conciones ad populum habentur, deambulationes, nugæ, & risus minime tolerantur, ut Domus DEI domus orationis & videri, & dici vere possit.

Non sine dolore intelleximus, quasdam Ecclesias, & Oratoria publica in profanos usus converti, ita ut in iis deponantur, quæ ejusmodi locum minime decent, utpote ligna, asseres, cementum, grana, arma bellica, &c. Hæc ut deformitas tollatur, ex omnibus Ecclesiis omnino hujusmodi amoveri, aut alias opportune accommodari mandamus, ne Domus Dei suo decore destituatur. Quod si in villis, præter Ecclesiam, nullus reperiat ad arma bellica asservanda locus, in secretiorem aliquam Ecclesiæ partem, ne in conspectu sint, poterunt reponi. Nemo etiam absque dote idonea, & licentia nostra, Oratorium aliquod publicum constituat.

Ciborium picturis Sacris ejusmodi exornetur, quæ populum doceant, in eo Venerabile Sacramentum Corporis Christi asservari, & quæ ad adorandum incitent. Lychnus olei in lampade, vel candela accendatur, ad minus tempore Divinorum officiorum, si tenuitas proventuum non fert, ut perpetuo ad honorem tanti Sacramenti ardeat.

Curati omnes certum aliquem locum ad confessiones excipiendas in Ecclesiis suis constituent, neque is retro Altare, aut in obscuro aliquo Ecclesiæ angulo existat.

Suggestus pariter, ex quo Conciones ad populum habentur, opportune, & decenter per Vitricos Ecclesiæ, Parocho monente, erigatur.

### *De Altaribus.*

#### C A P U T II.

Cum plerique Beneficiatorum, piarum oblici foundationum, Altaria sua, ornamenta, sacramque suppellectilem vel negligent omnino, vel minus æque curent, minusque instructam, aut

(\*) *Supple: si.*

*Tomus VIII. Concilior. German.*

aut ornatam habeant; mandamus, ut intra tres menses post hujus Synodi publicationem, ornamenta sacra Beneficiati reficiant, & Altaria exornent, prout honestas, & loci pietas postula-verit: alioquin per alios, Beneficiatorum tamen impensis, cavebitur ne quid indignum patiatur Domus Domini: in quem usum & fructus arrestare licebit. Idem faciendum de domibus Beneficiatorum, ut tempestive instaurentur, perpetuoque, usufructuarius sumptibus, conserventur in debito suo statu; sic tamen, ut habeatur ratio proven-tuum, ne, plusquam par est, sese gra-vari Beneficiati conquerantur.

### *De suppellectili Ecclesiarum.*

#### C A P U T III.

**P**atresfamilias, civilitatis, & mун-ditiei in re domestica studiosi, suppellectilem etiam mundam amant; nec satis censent, reliquam domum cœnaculis, & cubiculis exornatam esse, nisi mundities in utensilibus appareat. Non absimili modo Nos quo-que æquum censemus, ut in re sacra administranda, præter templi structu-ram, arasque altare, Sculptoris, & Pictoris, aliorumve Artificum manu præparatas, & devotioni accommoda-tas, supellex quoque Ecclesiæ mун-da, & nitida servetur. Quare in Ec-clesia Cathedrali, Collegiatis, & Mo-nasteriis Sacristanis, in Parochialibus vero Parochis curæ erit, ut corporalia, & purificatoria, quæ ubi aliquando ob frequentem communionis usum im-munda fuerint, a Clerico, saltem Dia-cono, laventur, in vase ad hoc pecu-liariter destinato; postea vero Monia-libus dentur, ut purius lavent. Ubi Moniales non sunt, dentur alicui ho-nestæ matronæ; quod si vetustate attri-ta fuerint, in cineres concrementur, qui in Sacrario, in locum peculiarem projiciendi erunt. Quæ nova substi-tuantur, ea ex purissimo, & mundissi-mo linteo fiant, & in medio acu non pingantur.

Monemus omnes, quibus Eccle-siæ commissæ sunt, ut paramenta, & ornamenta omnia, ad Ecclesias spectan-tia, ut sunt: Cruces, vexilla, thuri-

bula, vasa aspersoria, imagines, sive sculptiles sint, vel depictæ, pulvina-ria, mappas, seu vela, calices, & pa-tenas, manutergia, capsulas, ampul-las, corporalia, superpellicea, albas cum stolis, manipulis, casulis, fim-briis amictis, Monstrantiis, & quibus-cunque aliis, ad cultum Divinum, & ministerium pro Sacerdotibus necessa-riis, recte, munde, & tute conservent, eademque reficere, & augere studeant. Vestes Sacerdotales, & ad cultum Di-vinum benedictæ, in profanos usus non convertantur; sed ex antiquis ca-sulis, dalmaticis, & pluvialibus, pul-vinaria, burse corporaliū, cooper-toria librorum, reliquiarum, antipen-dia, & alia hujusmodi fiant. Et quæ non sunt consecrata, consecrentur ad-huc, reparentur vastata, & destructa, atque diligenter prospiciatur, ne ro-dantur per mures, vel per vermes. In Sacristiis habeantur cistæ, & almaria ad hæc sufficientia, & munda, & recte disposita. Si aliquid paretur novi, non prius sacris adhibeatur usibus, quam ab Episcopo, vel ejus Suffraganeo be-nedictum fuerit. Nullæ imagines, quæ imperitæ plebi ad obscœna magis, quam ad devotionem, & pietatem in-citamentum præbent, in Ecclesiis sta-tuantur. Quæ vero antiquitate viden-tur esse consumptæ, renoventur; mu-tilæ autem, & truncatæ, aut reparentur, aut tollantur, neque in Processionibus publicis hujusmodi deformes imagines circumferantur.

Sancta antiquitas organorum con-centum, & instrumenta musica in Ec-clesiis ad meræ devotionis, & pietatis usum haberi jussit; nihil igitur sæcu-lare, vanum, aut amatorium, organistæ atque musici unquam sonent, aut can-ent.

Cœmiteria; fidelium dormitoria, ne in vanos, & seculares convertantur usus, tuto claudentur; ne quadrupe-dibus pateat ingressus: atque in eorum medio, ubi loci commoditas tulerit, Crux erigatur.

Baptisteria serventur munda, caute clausa, ac ita parata, ne aqua effluat, habeantque opercula non spurca, sed honesta, ornata, & aliquo colore de-picta.

pieta. Rector etiam Ecclesiæ claves ad Baptisterium solus custodiat, & nemini concedat.

Aquam benedictam, quæ singulis annis, adhibitis Oleis Sacris renovanda est, ex Baptisterio nemini dent, vel concedant, postquam Sacrum Chrisma est admixtum; cum notorium sit, homines sæpissime iis ad superstitiones, fascinationes, & maleficia horrenda abuti.

### *De Sacramento Baptismi.*

#### C A P U T IV.

**C**UM Ceremoniæ, quæ in Sacramenti Baptismatis administratione adhiberi solent, ab hæreticis rideantur, eamque ob causam nonnulli in baptizandis infantibus easdem prætermittant, aut ad libitum mutant; mandamus omnibus Curatis, & Rectoribus Ecclesiarum Parochialium, ut quando antiquissimos Ecclesiæ ritus in Baptismo parvulorum exhibent, sicuti eos sancte observari volumus, nonnunquam brevem aliquam catechesin de eorum origine, institutione, seu fine, ad susceptores, & astantes faciant, maxime eo loco & tempore, ubi & quando aliquem contemptum & horum rituum, & Latinæ linguæ, in qua peraguntur, oriri posse probabiliter subvererentur. Parochus cum honore & reverentia Baptismum conferat, diligenterque advertat, ut unus tantum Patrinus, vel ad summum unus & una admittatur, qui infantem de fonte levent, inter quos spiritualis cognatio contrahitur, ut *Concilium Tridentinum in Cap. II. Sess. XXIV.* habet. Et quia in hac tota Provincia a multis jam annis usitatum est tam apud Nobiles, quam apud plebeios, ut ad infantum suorum Baptisma quamplurimos invitare soleant: diligenter Parochi sciscitabuntur, quos ex illis pro veris Patrinis habere velint, eosque in librum, quem peculiarem ad hoc habere tenentur, una cum nomine infantis, Patris item & Matris, & certa anni ac diei consignatione annotabunt. Advertent autem, ne Baptismi formam immutent, aliquid addendo, minuendove; eandemque obstetrices, quæ aliquando,

dum Sacerdos tanta celeritate adesse non potest, & mora periculo non vacat, infantes baptizant, doceri curent. Quod si infans in necessitatis articulo ante baptizatus, ad Ecclesiam deportaretur, & dubium esset, an obstetrix rectam Baptismi formam observasset, eum nonnisi adjecta conditione baptizent: nimirum: *Si non es baptizatus, ego te baptizo In Nomine Patris, & Filii, & Spiritus Sancti. Amen.* Adhortentur Curati suos Parochianos, ne infantes ad Sacrum Baptismi fontem, & lavacrum deferendos diu detineant; sed quanto citius baptizare curent, nec ullo modo ultra octavam diem Sacramentum, tam ad salutem necessarium, differri patiantur. Præterea Susceptores, seu Patrinos infantis erudiant de ipsorum officio: quod baptizato, tanquam filio spirituali, impendere, & Christianæ Religionis rudimentis fideliter imbuereteneantur. Nec permittant illis ridicula, vel gentilium, & impiorum hominum nomina imponi; sed eorum potius, quorum fidem, & virtutem Christianam in cælis jam dudum novimus esse remuneratam.

### *De Confirmatione.*

#### C A P U T V.

**Q**UANDOQUIDEM illis, qui a Christo Rege in militiam conscripti, & adversus spirituales nequitias, & tenebrarum potestates, dum vivunt, continuo pugnare coguntur, salutariter provisum est per Confirmationis Sacramentum; quo fortiores, & confirmationes ad profitendum Nomen Domini JESU CHRISTI efficiantur: illud sane cum devotione amplectendum est. Singulis itaque annis opportunis temporibus, & maxime, si fieri potest, circa Festum Paschæ, & Pentecostes Dominus Suffraganeus ad celebriores, & magis populosas Civitates se conferat, & id Sacramentum administret: per Parochos autem populus de dignitate & præstantia hujus Sacramenti prius erudiat, quem & ad eam Civitatem certa præscripta die evocare Parochi debent. Quo vero majori cum fructu, & utilitate hoc Sacramentum a fidelibus percipiatur, omnes



Curati adultos admoneant, ut nonnisi post peccatorum suorum confessionem, & si placuerit, Eucharistiæ summptionem, ad Confirmationis Sacramentum accedant. Infantes rationis impotes, & qui ad septimum ætatis annum nondum pervenerunt, non confirmantur; nisi rationabilis aliqua causa contrarium suadet; quod confirmantis prudenti arbitrio relinquitur. Observabunt etiam, ne confirmandi absque Susceptore, vel Patrino compareant, qui dextra suscipiat, confirmandum teneat, offeratque Episcopo administranti hoc Sacramentum. Admonendi etiam sunt, ex Confirmationis Sacramento inter confirmantem, & confirmatum, illiusque patrem, & matrem, ac tenentem, cognationem spirituales contrahi, & Sacramentum hoc, sicut Baptisimum, reiterandum non esse.

### *De Eucharistia.*

#### CAPUT VI.

**C**um Divinum illud, & admirabile Sacra Eucharistiæ Sacramentum, panis Angelorum, animarum nostrarum salutare medicamentum, Viaticum salutis æternæ, & pretiosum futuræ gloriæ pignus, summa cum religione, & cultu administrari debeat: & a fidelibus participari tanto frequentius, quo majori cum dispendio animæ illius usus intermittitur; Idcirco Parochi, omnes laicos homines utriusque sexus adhortabuntur, ut Sacrosanctam Eucharistiam, nisi legitimum adsit impedimentum, ad minimum quater in anno, in Pascha quidem ex præcepto; in Festis vero Pentecostes, Assumptionis Beatissimæ semper Virginis Dei Genitricis **MARIÆ**, & Nativitatis Domini nostri **JESU CHRISTI**, ex pia devotione sumant. Licet autem ab initio Christianæ Religionis aliquando unius, aliquando utriusque speciei usus fuerit; progressu tamen temporis Sancta Mater Ecclesia, gravibus & iustis causis adducta, consuetudinem sub altera specie communicandi approbavit, & pro lege habendam decrevit. Quoniam vero ex indulto quodam a felicis record. **PIO PAPA QUARTO** concessio Regno Bohemiæ, cui Pro-

vincia hæc & Dicecesis Wratislaviensis incorporata est, laicis Calicis usus sub certis forma & conditionibus permissus fuit; quæ tamen in ejus exhibitione, quantum experimento comperimus, non servantur, seu a communicantibus implentur: nec plerumque usus hujusmodi recte aut decenter, ut deberet, a Sacerdotibus administratur; idcirco Nos Sanctæ Catholicæ, & Apostolicæ Ecclesiæ veterem generalem, atque approbatam consuetudinem, quoad, Domino suffragante, poterimus, servare, & restituere cupientes, Dilectis Nobis in Christo Scholarum Rectoribus & Magistris, præsentis Decreti tenore præcipimus, & mandamus, ut, quos instituunt, vel erudiunt Scholares in Scholis parochialium Ecclesiarum, ad unius speciei usum sedulo adhortentur, & suo, aliorumque exemplo assuesciant, & fideliter de ejus veritate pro captu eorundem informant: & quia parentes, & propinqui Scholarum a Communionem unius speciei filios subinde retrahere solent, Parochus, & Scholæ Magister, communicatis consiliis, cum parentibus, & propinquis agant, eosque diligenter, & benigne admoneant, ne huic ordinationi, quæ inter cetera ad ipsius scholasticæ disciplinæ conformitatem retinendam plurimum facit, contradicant. Quod cum obtinebunt facilius, ubi illos accurate docuerint, ex fide Catholica esse, tantum sub una, quantum sub utraque specie contineri, ac ita Sanctam Ecclesiam semper credidisse. Parochi etiam & Confessarii in audiendis confessionibus, confitentes, ubi opus erit, de veritate hujus Sacramenti, & legitimo ejus usu instruant, eisque sedulo inculcent, magis necessarium, & tutius esse, ut se religiose, & antiquissimæ consuetudini Sanctæ Matris Ecclesiæ accommodent, quam ut paucorum Neotericorum, non recte utentium, exemplum perperam imitentur. Omnes jejuni, parati, ac ab omni prius peccati leiferi sordibus per confessionem expiati, ad hoc Sacramentum accedant, admoneanturque universi a suo quisque Parocho, ut in Sacramenti Eucharistiæ dispensatione astantes, genua flectant, atque pio cordis affectu Sanctissimum

simum hoc Sacramentum adorent. Ad infirmos Venerabile Sacramentum, una ad minimum Hostia in Ciborio relicta, deportetur debita cum reverentia, luminaribus videlicet accensis, & signo campanulæ adhibito: Sacerdos vero stola, & superpelliceo decenter ornatus, inter eundem Psalmos recitet, moneatque Parochianos suos, ut illud devote comitari non intermittant; neque properanter, sed moderato & gravi incellu progrediatur. Et cum Summos Principes advenientes, summo honore excipere, & comitatu nos adjungere soleamus; summum quoque honorem huic Sanctissimo Sacramento, in quo Rex Regum præsens est, ut exhibeamus, recta ratio, & Sacri Canonis nos docent. Quocirca diligentem operam dabunt omnes ii, ad quos hujus Sacramenti administratio pertinet, ut in iis Ecclesiis, ubi fieri potest, sub baldachino, seu umbella, tam ad ægrotos, quam in Processionibus publicis deferatur. Cubiculum quoque infirmi ab omnibus sordibus, & inquinamentis purgetur, atque sacris exornetur imaginibus. Mensa etiam, in qua hoc Sacramentum reponi possit, munda, mappa tecta, & luminaribus accensis sit parata. In Ecclesiis habeantur vascula argentea, in quibus utraque species tuto, absque effusione, & corruptione conservari, & ad infirmos deferri possit, maxime in iis locis, ubi utriusque speciei usus adhuc retinetur. Sacra Hostiæ bis, vel semel in mense renoventur. In eorum vero gratiam, qui sub utraque specie hoc Sacramentum sumere contendunt, in frequentioribus communitatibus, utpote Civitatum, & oppidorum, utraque species asservari poterit, & sæpius renovari. In locis vero ruralibus nonnullorum infirmorum consuetudini, qui utramque speciem petunt, annuendum est, si prius Missæ Sacrificium Parochus celebraverit: ubi infirmi, ne ad extrema vitæ momenta hujus Sacramenti usum semper differant, a Parochis sunt admonendi.

### De Sacrificio Missæ.

#### C A P U T VII.

UT eorum rationem haberemus, ad quos animæ cura in communatibus duntaxat agricolarum pertinet, hunc certum ordinem circa Missarum Solemnia, diebus Dominicis & Festis peragenda, inter ipsos observari volumus, eumque maxime ad eorum, quibus præsumt, devotionem accommodatum, quæ multis adminiculis, ut infirmitati & simplicitati eorum consulari, suffulcienda est. Post tertium campanæ pulsus, & aquæ lustralis benedictionem, peracto circuitu, in quo publice preces ab Ecclesia de more instituuntur; Sacerdos pluviale, quo indutus erat, ante altare deponat, casulam assumat, & Missam continuo exordiat, Schola, vel Ministro Ecclesiæ Introitum Missæ, *Kyrie eleyson*, & *Gloria* concinente: quibus finitis, & Epistola jam lecta, Præcentor cum tota communitate aliquem Sacrum Hymnum in vernacula lingua ipsis familiarem, loco Gradualis decantet: Post Evangelium, & Symbolum decantatum, Sacerdos casulam ante altare deponat, suggestum ascendat, & plebem Verbi Dei prædicatione reficiat. Absoluta concione, & precibus de more dictis, ad altare iterum accedat, & assumpta casula Sacrum continuet. Post elevationem Ss. Eucharistiæ, quam populus flexis genibus adorare debet, alius hymnus in lingua vulgari decanetur, & Sacro finito, populum data benedictione in pace dimittat. In illis vero Ecclesiis ruralibus, in quibus hymnos vulgari lingua decantari consuetum non fuit, sed ubi totum Officium latine canitur, nihil immutandum est: quin imo Parochos hortamur, ut in Ecclesiis ruralibus, ubi Scribæ, & Scholares sunt, omissis germanicis Hymnis, dum celebrant, consuetudinem latine cantandi totum officium Missæ introducant. Curabimus autem eorum, qui maxime huic Mysterio, & Fidei Catholicæ integritati congruunt, delectum fieri, & quemadmodum ordine secundum Missæ partes, & Festi solennitates decantari debeant, typis excudi.

Sanci-

Sancimus præterea, & præcipimus, ne quis Sacerdos solus ad celebrandam Missam accedat; sed ad minimum unum adhibeat Ministrum, qui cum modeste una cum libro, dum & Sacristia ad Altare progreditur, antecedit, & ad publicas orationes Ecclesiæ nomine det responsum. In Altari, quod decenter ornatum, & duabus mappis, seu robaleis tectum esse debet, duæ candelæ ardeant. Præter corporale mundum sit etiam substratorium: palla, qua calix tegitur, non ex membrana, sed puro sit linteo, & cum purificatorio, non cum sacculo, calix mundetur. Sacris vestibus iidem, nec laceris, nec sordidis, nec male compositis se induant: sic induti nemini loquantur, aut per Ecclesiam discurrant, vel inter celebrandum inquiete circumspiciant.

Cum de Sacrario egrediuntur, id faciant demissis oculis, non festinanti, & in composito incellu: genuflexiones in actione Sacri Canonis circa consecrationem hostiæ, & calicis: item quotiescunque post consecrationem hostiæ, & calix est tractandus, decenti motu corporis fiant, manibus altari innixis, & scabellum subpedaneum flexo genu dextro attingant.

### De Pœnitentia.

#### CAPUT VIII.

CUM regeneratos, postquam ad rationis usum pervenerunt, ex Dæmonis suggestionem, erga Deum infestet ingratitude, ut justiciam ipsius beneficio, & gratiam in Baptismo susceptam ægre conservent, & tueantur, sæpe etiam prorsus amittant eandem; noluit sane omnipotens, & in misericordia mitissimus Deus, opus manuum suarum omnino perire, qui ob peccati servitutem in Dæmonis potestatem devenissent: sed Pœnitentiæ Sacramentum, quo lapsis post Baptismum beneficium mortis Christi applicatur, in remedium vitæ instituit. Ab illius igitur salutari usu & fructu, ne aliquis ignorantia vel errore, quod hoc sæculo frequenter evenire solet, desistat, sed ad eum quærendum utiliter excite-  
tur; idcirco statuimus, ut posthac in

iis locis, ubi major necessitas, vel evidens utilitas propter populi frequentiam id postulaverit, de confessione peccatorum instituenda in initio Quadragesimæ Catechismus hunc in modum doceatur. In Ecclesia inter pueros duos prius ad hanc rem instructos, & idoneos, dialogus fiat, de requisitis, & ad confessionis integritatem, & pœnitentiæ veritatem pertinentibus: idque in præsentia Parochi, cui curæ erit, aliquid explicatius, si astantium utilitas id requireret, adjicere. Parochis ad hoc utile erit, ut diligenter se exercent in lectione alicujus Summæ casuum conscientiæ, & librorum superiorum a Nobis nominatorum.

In administratione hujus Sacramenti eandem omnes & formam verborum, & absolvendi observent modum. Forma talis sit: *Ego te absolvo ab omnibus peccatis tuis in Nomine Patris, & Filii, & Spiritus Sancti, Amen.*

Modus autem hic est: *Misereatur tui omnipotens Deus, & dimissis omnibus peccatis tuis perducatur te in vitam æternam. Amen. Dominus noster JESUS CHRISTUS, qui est Summus Pontifex, te absolvat, & ego auctoritate illius, licet mihi indignissimo, concessa, absolvo te imprimis a vinculo excommunicationis, suspensionis, interdicti, & quantum possum, & tu indiges, deinde te absolvo ab omnibus peccatis tuis in Nomine Patris, & Filii, & Spiritus Sancti, Amen. Passio Domini nostri JESU CHRISTI, & merita Beatissimæ, semperque Virginis MARIÆ, & merita Sanctorum omnium, & quidquid boni feceris, & mali sustinueris, sit tibi in remissionem peccatorum, in augmentum gratiæ, & præmium vitæ æternæ. Amen.*

Ante festum Paschæ, aut in Quadragesima singuli Parochi singulas ob-eant domos, inquirantque diligenter, & inscribant numerum eorum, qui & confiteri, & Sacram Eucharistiam sumere teneantur. Animadvertant deinde, an confessi fuerint, & communicaverint: hoc enim modo agnoscent oves suas, & eos, qui ad Eucharistiam non accedunt. Non prætermittant etiam parochianos suos exhortari, ut ad hoc Pœnitentiæ Sacramentum (cujus administratio laboriosissima est) non demum in Vigilia S. Paschæ accurrant, sed



sed potius, si fieri possit, in oppidis certis tribubus: in villis vero, ubi ad unam Ecclesiam plures villæ pertinent, communitatibus villarum certos nominent dies, quibus ad conscientias exonerandas Ecclesias accedant: præter id integrum erit cuivis, animi sui puritatem frequenti peccatorum confessione conservare.

Medici advertant, ne facile ægroti suscipiant curam, antequam ipsi de spirituali salute fuerit provisum, a qua ad corporalem medicinam salubrius proceditur; & salubrem PII V. sanctæ mem. observent Constitutionem de ægrotis post triduum non confessis, per Medicos non invisendis.

Quotiescunque evenerit, ut Confessarius pœnitentem, qui in casum reservatum incidisset, absolvere non possit, eum ad Nos, vel ad alium, habentem facultatem absolvendi, mittat; sin pœnitens id facere recuset, suscipiat id curæ Confessarius, ut tacito nomine illius, & caute, ne sigillum confessionis violetur, casum referat ad eum, qui ejusmodi facultatem habet, & absolutionem impetret.

### *De Extrema Unctione.*

#### CAPUT IX.

**Q**uemadmodum Clementissimus Salvator noster servis suis quovis tempore voluit de salutaribus remediis adversus omnia omnium hostium tela esse prospectum; ita Extremæ Unctionis Sacramento finem vitæ, tanquam firmissimo quodam præsidio munivit, maxime cum vehementissimos adversarii nostri insultus sub finem vitæ experiamur. Non igitur intermittant Parochi hoc Sacramentum fidelibus administrare periculose infirmantibus; idque decenter peragant, stola, & superpelliceo induti, capite detecto, lumine accenso, adhibita unctione Sacri Olei sub consueta forma: Per istam unctionem indulgeat tibi Deus, quidquid oculis, auribus, & similibus deliquisti: neque omnes corporis partes inungant, sed eas duntaxat, quibus natura hominis tanquam organis sensuum prædita est: videlicet oculos, pedes &c. sicuti in Agenda habe-

tur: partes inunctas bombyce, aut stuppa abstergant, ejusque combusti cines in Sacrarium mittantur.

### *De Sacramento Ordinis.*

#### CAPUT X.

**D**um Sacri conferuntur Ordines, character invisibilis animæ imprimitur, magnæque ad Sacra Mysteria peragenda, & dispensanda tribuitur potestas; ideo tanto magis ordinandorum qualitas attendenda est, quanto ex illis, dum minus caute discernuntur, majora in mentibus fidelium scandala, & Divini cultus contemptus deinceps generantur. Quia igitur a minoribus Ordinibus ad altiores gradus, & Sacra Mysteria ingressus obtinetur; neminem iis initiari volumus, quem non scientiæ spes majoribus Ordinibus dignum ostendat, quemadmodum *Tridentinum Concilium* constituit. Hi vero ad Sacros Ordines Presbyteratus posthac non admittantur, nisi absque mora Diaconi facti, & nisi aliter Nobis visum fuerit, ad nostrum Seminarium Clericorum se recipiant, atque in eam diu, donec totum illud tempus, quod pro majoribus Ordinibus consequendis a jure statutum est, ibidem commorentur. Quo fiet, ut accuratius, quantum sit hujus disciplinæ pondus, edoceantur, ac in unoquoque munere juxta præscriptum Superiorum istius loci exerceantur: & Sacramentorum præterea tradendorum, maxime quæ ad confessiones audiendas, videbuntur opportuna, & rituum, & ceremoniarum formas ediscere queant. Regularibus duntaxat exceptis, qui tamen, nisi institutionis suæ, morum, & doctrinæ coram Examinatoribus nostris sufficientem rationem dederint, nequaquam in Ordinandorum numerum adscribantur. Convenit autem ad majorem reverentiam, & majestatem huic Sacramento conciliandam, ut cum cantu solemni Sacri Ordines in Ecclesia Cathedrali, nisi Nobis, vel Suffraganeo nostro aliud visum fuerit, conterantur præsentibus & assistentibus Ecclesiæ Canonicis, & Prælati. Cum ab Archidiacono ordinandi examinantur, Suffraganeus una cum Domino

Scholastico, Officiali, & Cathedralis Ecclesiæ Concionatore, & Notario Capituli ab ipso Archidiacono vocentur, simulque in Curia nostra, vel alio loco commodo convenient: ii interrogent ordinandos de omnibus, quæ ipsos scire oportet. Quod si quis prædictorum Dominorum iusta de causa examini interesse non potest, alius, ut substituat, licebit.

### *De Matrimonio.*

#### C A P U T XI.

**I**Ortamur contrahentes Matrimonium, ut in Ecclesiâ, non alibi contrahant; eosdemque monemus, quod, nisi ex *Tridentini Concilii* præscripto Parocham, & testes adhibuerint, Matrimonium irritum erit, & contrahentes, ad sic contrahendum erunt inhabiles. Ut impudentium hominum vitetur temeritas, qui frequenter per fraudem ac nefas, multas diversis locis uxores ducere audent: mandamus, ut *Concilii Trid.* ea de re servetur Decretum, ne temere Pastores homines ignotos cum Sacramenti contumelia jungant: & ne quis alterius Parochianos, sine expressâ Parochi, aut nostra licentia ac facultate, audeat copulare.

Proclamationes ante Matrimonium veteri more consuetas, & Decreto *Concilii Trid.* demandatas, non omittant Pastores; examinenturque contracturi, num aliquo impedimento prohibeantur, ut conjuges inter se esse non possint. Si conjecturam habeat Pastor impedimenti, Nos, seu Archidiaconos, & Commissarios nostros consulat, antequam Matrimonio jungat, de quibus dubitat. Qui legitimum impedimentum sciens reticuerit, & nihilominus conjunxerit, arbitrariam, certam tamen poenam, incurret.

### *De Ceremoniis, & Officiis Divinis.*

#### C A P U T XII.

**C**eremoniæ Catholicæ in multis Ecclesiis nostræ Diocesis negligenter peraguntur. Cum autem his pietatis, & Religionis Christianæ signaculis simplicium mentes in Dei cogni-

tione eleventur, aliorumque Christianorum corda in commemorationem beneficiorum, a Divina Bonitate collatorum evehantur, & ubi fides, & devotio accrescat, Spiritus Sanctus operetur, ac præsentium animos moveat efficaciter; convenit sane, ut illæ sic in Ecclesiis religiose conserventur. Nullæ vero ceremoniæ noviter inventæ, & non approbatæ in Ecclesiis peragantur, aut recipiantur sine nostro iudicio, & approbatione. Et cum non raro contingat, ex aliena Diocesi Parochos in hac Diocesi Parochiis præfici, & eosdem ritus in celebratione Missarum, ac aliarum Ceremoniarum, ac Sacramentorum administratione diversos adferre, diversis etiam Agendis uti; operam dabunt Archipresbyteri, ut ab omnibus uniformis modis, & ratio observetur, quæ in Agenda Ecclesiæ Metropolitanæ Gnesnensis de Ceremoniis Ecclesiasticis fuit promulgata.

### *De Processionibus.*

#### C A P U T XIII.

**I**N publicis supplicationibus, ac stationibus obeundis, quarum Scriptura attestante, magna est, & utilis necessitas, adhortamur omnes in Domino, ut in iisdem supplicationibus modestiæ, & pietatis memores, a quacunque levitate, risu, colloquio, & confabulatione abstineant, eaque devitent, quibus Divina Majestas magis ad iram provocatur, quam ad miserationem inducitur. Quilibet propterea Clericorum habitu decenti, & Ordini suo convenienti induatur, locum suum competentem occupet, Rosaria, vel Breviaria in manibus gesser.

### *De Cantilenis Germanicis.*

#### C A P U T XIV.

**C**um etiam ex antiquo more juxta diversitatem temporum diversæ cantilenæ in lingua vernacula in Ecclesiis hujus Diocesis a fidei populo vel ante, vel post concionem soleant decantari; eam sane consuetudinem, ut laudabilem, & devotioni plebis inservientem approbamus, & perseverare cupi-

cupimus : ita tamen , ut nulla cantio canteretur , quæ non in libello , quem in hunc usum singulariter imprimi curabimus , contineatur. Porro illi cantionum libri , qui ab hæreticis sunt compositi , vel qui hæresin sapere videntur , quibus Ministri Ecclesiarum in quibusdam locis uti consueverunt , omnino tollantur.

Ministri Parochiarum , quos Scribas vocant , absque vestitu , & habitu corporis decenti , quo se Ministros esse Dei & Ecclesiæ demonstrent , in Choro psallere , aut cantare non audent.

### *De Reliquiis.*

#### C A P U T XV.

**U**T Reliquiis veris Sanctorum , in quibus Spiritus Sanctus aliquando habitavit , & quæ de futura corporis glorificatione nos commonefaciunt , debitus honor exhibeatur ; eas in honestis loculis asservari , in loco conspicue ornato collocari , nec non in publicis fidelis populi deprecationibus & supplicationibus cum omni veneratione circumferri mandamus. Prohibemus etiam , ne a Laicis , cujuscunque sint ordinis , vel dignitatis , Reliquiæ parum reverenter attingantur , tum ne quisquam ex capsulis , vel reliquiariis , absque nostra licentia aliquid eximere præsumat : secus facientes dignis pœnis coerceantur.

### *De Horis Canonicis.*

#### C A P U T XVI.

**A**B eo tempore , quo divinitus , primum e medio plebis selecti sunt , qui essent Sacerdotes Dei Altissimi , Sacerdotum semper fuit officium , orare pro populo : quamvis enim Christus vere Summus Sacerdos tempore novæ Legis uno Sacrificio sui Corporis in Cruce mundi peccata tulit ; orationis tamen necessitas neganda non est , cujus certe præcipua cura Ecclesiæ Ministris incumbit.

Meminerint igitur omnes , & singuli in Sacris Ordinibus constituti , Sanctionis illius , in *Lateranensi Concilio* promulgatæ , & a PIO V. Pontifice felicis recordationis amplius declaratæ ,

*Tomus VIII. Concilior. German.*

quomodo illi , qui in precibus Canonicis absolvendis negligentiores reperiuntur , pœnas amissionis fructuum Beneficii incurrant , noverintque , tales cum condigna satisfactione ad restitutionem esse compellendos.

### *De Breviario Romano.*

#### C A P U T XVII.

**I**Nter multa , quæ Religionis Catholicæ commendant unionem , plurimum etiam facit uniformis precandi , & orandi ratio , & modus. Cum Romana igitur Ecclesia in dicendis , psallendisque Horis Canonicis conformitatem inducendam laudabile censemus , cum quod Breviarium Diocesanicum a nonnullis minus castigatæ lectionis infimuletur ; tum quod Romani Officii accuratior perfectio , & integritas usum ejus omnibus Ecclesiis commendet , facile in promptu sit , jamque a multis Diocesanicis , & imprimis *Nissæ in Seminario Clericorum* recitetur. Idcirco statuimus , & ordinamus , ut ab omnibus Clericis secularibus , quocunque nomine censeantur , hujus officii usus posthac recipiatur. Ad officia vero quod attinet , quæ in Choro Ecclesiæ sub Notis Gregorianis decantantur , dabimus operam , ut primo quoque tempore ad Romani Breviarii formam , quoad fieri potest , accommodentur. Quemadmodum & ea , quæ de Patronis hujus Provinciæ peculiaria habentur , seorsim imprimi curabimus , ut Breviariis Romanis apte inferi queant.

### *DE MORIBUS.*

#### C A P U T I.

**S**I diligenter ea expendimus vitia , quæ passim his deploratis Sæculis selectissimum Christi ovile infestant , vix gravius , aut perniciosius sese offert , quam quod in ipsis Dominici gregis Ductoribus reperitur , a quibus præclara bonorum operum exempla , & vitæ merita expectanda erant. Quare diligentiori opus esse censemus admonitione , ut si totum ovile sanum , & integrum cupimus , omnia ea a Pastoribus reseceamus , unde infectionis in

D d d a

grege



grege periculum metuatur. Si enim unica ovis morbida a toto gregis corpore fecernitur, & removetur, ne contagio in reliquas serpat, cum unius, quam multorum jactura levior sit; quis non videt, in ovili Christi multo majorem sollicitudinem requiri, ut non solum morbidæ oves excludantur, verum etiam opera detur, ut cujus manu, & ore pascendæ & nutriendæ sunt oves, a cujus dispensatione & cura, gregis vel salus, vel perniciēs dependet, is integra sit valetudine, incorruptis moribus, planeque vitiis vacuum, & infontem afferat mentem. Quod facile eveniet, si & officii sui, & se Pastores, & Sacerdotes Dei esse, sanguinemque ovium ab eorum manibus requirendum meminerint: si Sanctorum Patrum exempla in memoriam revocaverint, qui corpus, & animam Deo consecrantes, exteriores etiam sensus & affectus ita refrænarunt, ut luculentissimo sui exemplo cum intima humilitate, & conspicua integritate omnia ad gloriam Dei, & proximi ædificationem conferrent.

Neque vero sufficit Sacerdotem a vitiis immunem esse; quinimo decet, ut virtutum gemmis exornatus in populi conspectum prodeat, & munere suo fungatur: certoque sibi persuadeat, nullum rei Ecclesiasticæ bene feliciterque administrandæ, & populi procurandæ salutis efficacius præsidium esse, quam si de virtutibus differentem, velut speculum virtutum coram inspiciant, & admirentur.

Admiratio enim ad imitandum incitat, & allicit, mirabilem amoris nexum conciliat, acciditque, ut ad monitoris, vel ducis exemplum suos quoque mores componere, & accommodare conentur, & in emendationis progressu inter sese certent.

### *De Castitate.*

#### C A P U T II.

**O**Mnes, & singulos Clericos, inprimis vero Prælatos, & Canonicos serio monemus, & adhortamur, ut se ipsos omni tempore & moribus conspicuos, & pietati, castitatiq; deditos

exhibeant. Contra eos autem, qui in conspectu populi decus Sacerdotale per sceleratam concubinatus foeditatem turpiter prostituere non verentur, & in maximum animarum suarum detrimentum in eo perseverant, cum scandalo suspectas personas in domo, vel extra detinentes; Constitutionem Sacri Concilii Tridentini, tanquam salubre remedium opponimus: ut, nisi infra mensem unum post hujus Synodi publicationem, quam vim habere volumus peremptoriæ monitionis, ab hujusmodi excessu reipsa, ac serio destiterint, atque personas hujusmodi penitus dimiserint, pœnas in Concilio Tridentino, & in priori Synodo Diocesana constitutas, ipso facto incurrant.

### *De Sobrietate.*

#### C A P U T III.

**Q**ui ebrietatem voluntariam dixerunt insaniam, eamque si in pauciores producat dies, sapius in manifestum evadere furorem; plurium historiarum tam sacrarum, quam profanarum exemplis edocti retulerunt. Quotquot enim ex summis Monarchis, & terrarum Principibus turpi huic ingurgitationis vitio obnoxii fuerunt, ii cum alias nec numeroso hostium exercitu, nec imbrium æstu, aut frigoris inclementia & horrore vincerentur, hoc unico bibendi insatiabili ardore & scypho fatali victi, Majestatem suam vario vitiis genere labefactatam prostituerunt; ut de plebis fece mentionem faciamus nullam, apud quam eo turpiora flagitia ex hoc vinoso ebrietatis fonte scaturiunt, quo plus affectuum imperio regitur: ut in omni genere detestandus sit ingurgitationis luxus, quod tam corporis, quam animæ infirmitatis causam, & materiam tribuat. Tum vel maxime in Ecclesiastici Ordinis hominibus, quorum sensus in perpetua Divini Ministerii actione vigere debet.

Ad evitandum vero ingens, & periculosum malum occasiones primo abrumpendas esse censemus. Itaque si aliqui ex Clericis, dignitatis suæ immemores, in publicis tabernis ex amore luxus, non necessitatis alicujus even-

eventu, versari, & scandalosius vivere præsumant, in eos per Officiales, seu Commissarios nostros, diligentius animadverti, & deprehensum, pro qualitate delicti, arbitraria pœna volumus mulctari. Multo major pœna illos maneat, qui pridie inebriati ad tremenda Mysteria peragenda accurrerint, non expiati legitima pœnitentia, & ab aliquo designatorum Confessariorum absoluti. Est enim valde absurdum, præposterum, & indignum, quod Sacerdotes velint omnem reverentiam huic Sacramento a laicis exhiberi, quam tamen ipsi moribus, ac religione sua non declarent, & impudentissimo audeant ore, quod crapulam pridianam non decoxit, ad tantum Sacrificium accedere.

### De Confessione.

#### CAPUT IV.

**A**D animi puritatem conservandam cum maxime valeat peccatorum confessio, præcipimus omnibus, & singulis Sacerdotibus, ut quater ad minimum intra anni circulum peccata sua vere confiteantur suis Archi-Presbyteris, vel alteri Sacerdoti licentiam habenti: & de hoc requisiti a Visitatoribus per Schedam fidem facere teneantur subsequentis tenoris: *Anno tali &c. die tali &c. Sacramentalem peccatorum confessionem mihi N. fecit N., quod ego propria manus subscriptione testor.* Quod si quis salutis suæ deprehendatur æquo negligentior, nec huic ordinationi nostræ locum dederit, ut impietatis suæ pœnam aliquam luat, illi partem fructuum suorum ipsi defalcandam statuiamus, quæ fabricæ Ecclesiæ, aut alteri pio loco, arbitrio nostro, applicetur.

### De Habitu.

#### CAPUT V.

**E**T si habitus non facit Monachum, oportet tamen Clericos tam sæculares, magis autem Regulares, & Monachos, vestes, proprio congruentes Ordini semper deferre, ut per decentiam habitus extrinseci morum honestas intrinseca ostendatur: & cum inoleverit tanta non solum Clericorum

sæcularium, sed & Regularium, & Monachorum temeritas, Religionisque contemptus, ut vestes etiam deferant publice, statui suo non convenientes, pedes in diversis ponentes, unum in Divinis, alterum in carnalibus; monemus omnes, qui nostræ jurisdictioni subsunt, ut habitum honestum Clericalem, illorum Ordini, ac dignitati congruentem deferant sub pœna a Nobis, seu nostro Vicario, vel Commissariis infligenda. Quia vero Regularibus, ac Monachis ex Regula cujusque Ordinis determinatus est habitus in colore, materia, & forma: de sæcularibus vero Clericis multa tum antiquiora Concilia, tum Provinciales, & Diocesana Synodi decreverunt; iis adhuc insistendum censemus, & quicumque contrafecisse deprehensus fuerit, siue Sæcularis, siue Regularis, puniatur.

Sacerdote Primitias celebrante, æquum est, auspiciis tanti Ministerii gratulatione publica hilariter excipi: sed ita tamen concedendum, ut eam gratulationem, ac lætitiā nulla turpitudine vitiet. Absit igitur in convivio temulentia, ludicra omnia, cujusmodi sunt saltationes, choreæ, & hujusmodi alia, prorsus tollantur. Servetur autem decorum per omnia, ac Sacerdotalis ratio habeatur dignitatis.

Qui detractores, & diffamatores aliorum existunt, & publice, vel secrete rixas disseminant, acerbè puniantur.

Cavebunt etiam, ne ad sæculare tribunal mutuo sese Clerici vocent: ne pecuniam ad usuram præstent, aut contractus illicitos constituent sub pœna amissionis pecuniarum, similiter & fidejussiones pro sæcularibus evitent.

In iis causis, quæ vinculum, aut fœdus Matrimoniale concernunt, aut ab ea dependent, nemo cognoscere, concordare, transigere, aut definire præsumat, qui non ad hoc a Nobis, vel a Sede Apostolica facultatem obtinuerit: alias processus, sententias, concordias, & transactiones ejusmodi judicamus, & decernimus nullas & frivolas, & quæ merito nullum debent sortiri effectum.

D d d 3

Judi-

Judices ordinarii causarum Matrimonialium ante omnia curent, ne ignorent ea, quæ ad Sponsaliorum justitiam requiruntur: sententiam latino vel germanico sermone publicent, eamque omissis in ea decidendi rationibus, claram, & absque omni verborum ambiguitate concipiant.

Nemo in tantæ avaritiæ prorumpat cupiditatem, ut lucri gratia aliena prædia conducat, vel alia re illicita, & a Sacris Canonibus prohibita, cupiditati suæ satisfacere studeat.

Cumque omnes Religiosi, qui se Divino cultui, spretis mundi illecebris, devoverunt, in altiore sublati locum conspiciantur, & in eos, tanquam perfectionis speculum, reliqui oculos conjiciant, & ex iis sumant, quod laudabiliter imitentur; decet omnino, ut ipsi status, & obligationis suæ sint memores, eaque devitent, quæ ab illius dignitate aliena sunt; quæque ad eandem tum augendam, tum retinendam faciant, sedulo exequantur.

Inprimis igitur *Decretis Tridentini Concilii* inhærentes, ordinamus, ut Monasteria, in quibus viget Regularis observantia, si eorundem Superiores admoniti, infra sex menses non visitaverint, ut ad Nos visitatio, & correctio illorum devolvatur.

Quod si prætenderint se a jurisdictione nostra esse exemptos, neque eam admittere vellent, aliud Nos facere non poterimus, nisi ut secundum *Concilii Tridentini* præscriptum contra ipsos procedamus.

Qui extra Monasteria viventes, ita notorie deliquerint, & populo scandalum exhibeant, a suis Superioribus dignis pœnis coerceantur: quod si a Nobis moniti illud facere Superiores intermiserint, ne peccata impunita maneant, Nos ipsi in illos animadvertemus, autoritate Nobis a *Tridentino Concilio* tributa.

Ea autem loca, quæ a devoto femineo sexu religiose inhabitantur sub Monastica disciplina, aut Regulari observantia; nemo ingrediatur, sed ex PII V. felicitis rec. Constitutione Mona-

stica clausura perseveret, nec sibi liberius extra divagandi licentiam assumant, neque aliquo modo Monasterio egredi permittantur.

## DE TEMPORALIBUS.

**C**ollatores Beneficiorum Ecclesiasticorum, aut qui jus præsentandi habuerint, caveant, ne lucri alicujus gratia aliquem ad ea promoveant, nec quidquam, vel ultro oblatum, accipiant, dignis tantum & habilibus personis ea conferant.

Quicumque jus habent præsentandi Nobis, aut aliis, quibus jus investiendi legitime competit, præsentent, non autem de facto conferant.

Illud etiam in communi præcipimus, & serio mandamus quibuscunque Sacerdotibus, ne Parochias ullas sine Canonica institutione, servata forma concursus, a *Concilio* præscripta accipiant.

Ubi etiam habenda est ratio eorum, qui continuis, & perpetuis obsequiis deserviunt Ecclesiis, ne ipsis, cum pondus diei, ac æstus ferunt, in Beneficiorum, ac Altarium collatione præferantur alii, qui propter otium, & pigritiam non merentur, aut quos jura etiam, quo minus capaces sint, excludunt.

Neque ulla electio in quibuscunque Monasteriis, siue exemptis, siue non exemptis per absentiam Commissariorum nostrorum administrata, Canonica & legitima censeatur; sique Constitutioni huic alicubi non obtemperatum, sed secus aliquid factum fuerit, solenni præmissa protestatione, de nullitate actus procedatur.

Cum ferme omnes Parochi, aut de tenuitate suorum proventuum, aut de alienatione quorundam censuum, fructuum, agrorum, & similium: aut de tarda, ac molesta decimarum solutione conquerantur; volumus, ut omnes Parochi sua vera gravamina conscribant, eaque quot annis in convocationibus suis Archi-Presbyteris tradant, hi autem cum suis Archi-Diaconis, & Commissariis nostris eam rationem ineant, qua



qua his incommodis succurri possit, demum Nobis rem omnem integre indicent, & exponant.

Et cum post obitum Altaristarum, & Sacerdotum, multorum beneficiorum, & Altarium regesta supprimantur, & beneficia Ecclesiastica sic paulatim intereant, aut in laicorum, seu etiam hæreticorum veniant manus: omnibus sub pœna amissionis, ac privationis injungimus, ut Regesta, vel literas censuum suorum, reddituum, ac proventuum in originali Nobis intra trimestre spatium exhibeant, quæ in nostra Cancellaria, aut in Ecclesiæ Cathedralis Archivis asserventur: copia autem, seu transumptum authenticum Regestorum, & literarum, ex nostra Cancellaria Beneficiatis petentibus concedatur.

Ne etiam propter imperitos, ac illiteratos Ecclesia detrimentum aliquod patiatur, aut animarum negligatur cura; Archidiaconis, & Visitatoribus nostris injunctum volumus, & cum scitu, & voluntate nostra iis, qui Parochiis præsent, & vel ob ingenii exiguitatem, ac doctrinæ tenuitatem, vel populi numerosam multitudinem tanto oneri non sufficiunt, cogant Rectores adjungendos sibi Coadjutores, & Vicarios idoneos, & his congruam fructuum portionem assignent, & alias juxta *Tridentini Concilii Decretum*, quod diligenter exequi curent.

Sapius Parochorum negligentia, & incuria ædificia facta tecta non conservantur. Unde fit, ut Parochiani aliquando nimium graventur, si domus, horrea, stabula a fundamentis veluti ædificanda sint: Archidiaconi itaque, & Visitatores Parochos admonent, ut facta tecta conservent, aut Patronos Ecclesiæ mature, & in tempore certiores reddant, qui efficient, ut ea mature, & opportune instaurentur.

In omnibus universim Parochiis observari volumus, aliquot ut Regestorum libri perpetuo extent, & a Parochiis asserventur.

In *priori* omnia, Ecclesiæ ejus Parochialis pretiosiores res, vasa aurea, argentea, & clinodia, vestes sacras,

aliaque cujuscunque generis fideliter annotatas habebunt.

In *secundum*, baptizatorum, patrinorum, ac parentum nomina diligenter inscribent, cum anni, mensis ac diei certa consignatione.

*Tertius* liber nomina Matrimoniorum contrahentium (ubi temporis etiam exacta mentio adjicienda est) sibi vendicabit.

*Quartus* nominibus eorum, qui ex hac vita decedunt, cum simili temporis annotatione inserviet.

*Quintum* solers Parochorum Oeconomica disciplina adjiciet, in quem redditus, census, fructus, proventus omnes accurate & integre conscribent, & singulis annis repetent.

In *prioribus quatuor* Libris conficiendis si perspicax Archidiaconorum oculus calamum parochorum oscitantiorum, aut negligentiorum repererit; non impune quidem evadent Parochi; gravis tamen, & quidem defalcatione quartæ partis fructuum eos puniri mandamus, qui in *quinto* libro conficiendo voluntati nostræ, & Constitutioni huic non satisfecerint; sed tam in Ecclesiæ, quam propriis commodis socordes, & dormitantes fuerint reperti.

Ea bona, quæ ad Ecclesias, Monasteria, vel Beneficia spectant, non tanquam propria, & sua, sed ut Christi Patrimonium tractare, usurpare quivis meminerit: inque eum convertat usum, in quem Fundatores olim humili in Deum observantia converti voluerunt; omnino autem non alienet, nisi in casibus a jure permissis: qui secus fecerint, pœnam privationis, administrationis, & suspensionis officiorum suorum incurrant.

Statuimus præterea, & ordinamus, ut eo tempore, quo Beneficiatis suorum beneficiorum possessio datur, præter antiqua, quæ extare volumus, nova iterum Inventaria, & inscriptiones omnium bonorum tam immobilium, quam mobilium ad ipsa Beneficia spectantium conficiantur, vel per Notarium publicum, si haberi poterit, aut alium ex illa communitate hominem fide dignum, aut per Vitricos etiam

etiam Ecclesiæ, qui omnia vasa sacra, vestes, fundos, agros, domos cum qualitatibus & continiis suis accurate annotabunt.

Omnes etiam Clerici Beneficiati studiose inquirent, ut detentores injustos, seu occupatores bonorum Ecclesiasticorum, seu Decimarum, allodiorum, domorum, & censuum ad Nos deferant, re prius cum Officialibus, & Commissariis nostris communicata: Idem fiet in eo casu, in quo impedimentum, seu diminutio aliqua in rebus ad Ecclesiam, vel Beneficium spectantibus, infertur.

Ne Ecclesiarum, atque Ecclesiasticarum personarum immunitates, & privilegia violentur, Præfæctis nostris serio mandamus sub gravissima indignatione, reliquos vero Magistratus seculares una cum *Ss. Concilio Trid.* obnixè rogatos esse volumus, ut ea, quæ non solum a Summis Pontificibus, sed etiam Supremis Principibus concessa sunt, secundum Juris Civilis, & Canonici dispositionem integra permanere patiantur.

Nemo Beneficiatorum debita enormia, & quæ facultatibus, & fructibus sui beneficii non respondent, contrahere præsumat: Quod si quis modum excessisse comperietur; Officialibus, Commissariis, & Archi-Presbyteris injungimus, ut absque ulteriori dilatio-

ne rationem administrationis ab illo exigant, & terminum solutionis certum constituent. Quo elapso, si creditoribus non fuerit satisfactum, certa fructuum suorum portio per Curatores a Nobis constituendos in hunc usum defalcabitur.

Si qui etiam ex Clericis, pupillorum, personarum miserabilium sunt Tutores, vel in posterum fient; serio prohibemus, ne absque facultate nostra, vel nostrorum Officialium, vel Commissariorum bona mobilia, vel immobilia, multo minus pecuniam, quovis modo, ratione tutelæ, ad se recipere præsumant.

Cum munera excæcent oculos Sapientum, & mutent verba justorum, ultima hac Constitutione monemus, caveant Judices in foro Ecclesiastico, ne a partibus coram se litigantibus munera quæcunque, & quovis etiam prætextu accipiant; si enim delinqui hac in parte aliquid animadverterimus, ne impune ferant, Nobis curæ erit.

**H**As Constitutiones huic Provinciæ, hisque hominum moribus accommodatas, Illustrissimus, & Reverendissimus in Christo Pater ac Dominus, Dominus ANDREAS, (\*) Dei, & Apostolicæ Sedis gratia Episcopus Wratislaviensis, Coronæ Bohemiæ Princeps Ligius, Sacræ Cæsareæ Majestatis

(\*) ANDREAS JERINUS, Episcopus *Wratislaviensis XL.*, industriæ suæ, doctrinæque, ac virtutum meritis ad culmen istud Cathedræ Episcopalis ascendit. *Reudlingæ*, Sueviæ oppido, Patre Senatore natus, cum acri perspicacique polleret ingenio, post navatam felici successu literis operam, aliquamdiu apud Nepotes *Ottonis Truchsesii*, Cardinalis Augustani, dum Studiis Lovaniensi in Academia vacarent, præceptorem egerat. Inde Romam profectus, Septennium posuit in Collegio Germanico, quod olim ex S. Ignatii, Soc. JESU Fundatoris, consilio sub annum 1552. a *Julio III.* Papa, maximo totius Germanicæ Nationis emolumento erectum, dein vero, deficiente censu annuo, prope collapsum, recentissime tunc, anno nimirum 1573. a *Gregorio XIII.* ex integro restauratum, censuque & perpetuo, & amplissimo donatum fuit. Ex eo Collegio eductus, Prætorianam Pontificis Maximi Helvetiorum cohortem sacris concionibus excolendam accepit. Tum *Ss. Theologiæ Doctor Bononiæ* renunciatus, rediit in Germaniam, ac *Dilingæ* Parochi munus gessit, donec ejusdem, quem supra diximus, *Gregorii XIII.* favore *Canonicorum Wratislaviensium* Collegio adscriptus fuit: ex quo tempore altiora continuo ad subsellia eluctari cæpit, ac veluti saltu quodam Episcopalem ad gradum sese extulit: Nam non diu post Præpositi dignitate auctus, ac demum ad ipsam Cathedram *Wratislaviensem*, quæ a *Martini Gerstmanni* morte vacaverat, communi atque unanimi Electorum suffragio promotus est anno 1585. Ad has, intervallo non longo congestas in eum dignitates cumulus dein accessit ex benevolentia *Rudolphi Cæsaris*, qui viri merita civili etiam honore coronaturus, Utriusque

ris Confiliarius, & Supremus superioris, & inferioris Silesiæ Capitaneus, in Diœcesana Synodo unanimi omnium approbatione publicari curavit, reservata, humili obsequendi studio, & singulari observantia Sanctissimo Domino nostro, & Sanctæ Sedi Apostolicæ liberrima censura, & iudicio. Sicuti enim seipsum Reverendissimus, & Illustrissimus Dominus Episcopus Sanctitatis Sux voluntati permittit: ita expressa, & semel, atque iterum solenniter repetita protestatione, testatum publice fecit Reverendissimus Dominus Episcopus, si quidquam S. D. N. Sanctæque Sedes Apostolica reperiat, quod Fidei Catholicæ articulis, Sacro-

rum Canonum Sanctionibus, unitati & consensui Ecclesiæ; inprimis *Ss. Oecumenico Concilio Tridentino* quovis modo repugnare, aut hæresis contraxisse saporem videatur, se id omne pro non dicto, non scripto habere, censuræ subicere, & S. Sanctitatis clementem, & benignam voluntatem, cui omnino obsecundare velit, expectare.

**NOS HIERONYMUS**, Tituli Sancti Pancratii S. R. E. Presbyter Cardinalis MATTHÆIUS, fidem facimus, & attestamus, Decreta facta in *Synodo Diœcesana Wratislaviensi* a Perillustri, & Reverendissimo Domino Episcopo Wratislaviensi, & ad S. D. N. missa:

que Silesiæ Præfectum constituit: ac multis dein sæpe laudibus ob res domi, foris-  
que, in Legationibus præsertim quintum obitis, præclare ætas, condecoravit?  
Statim a suscepto Episcopatu pro insigni suo in Religionem studio, duo hæc sibi, quanto citius posset, curanda proposuerat: Primum erat, ut ad stabiliendam in subditorum animis Fidem Catholicam, ac simul ad restaurandos in Clero, populo-  
que mores Diœcesanam Synodum cogeret. Sed hanc ante annum 1592, qui ab ob-  
tenta Cathedra septimus erat, congregare non potuit, tum grassante per Sile-  
siam peste, tum tumultibus belli Polonici, ex duplici Regis electione nati: tum  
denique variis, quas pro Cæsare, ad pacem componendam, confirmandamque, in  
Poloniam suscipere debuit, Legationibus impeditus: prout hæc ipse testatur in  
Præfatione sua ad Synodum habita. *Vide supra pag. 371.*

Alterum erat, ut strenuos Societate JESU operarios, qui gregem suum diligenter  
excolerent, atque adversus Neotericorum, & fidei hostium errores sana & ortho-  
doxa doctrina communirent, Vratislaviam accerseret, stabili ibidem in sede, con-  
stituto pro eisdem Collegio, collocandos. Verum huic ejus consilio A catholici  
Silesiæ Status omni contentione, viribusque sese opposuere, pauculosque illi dun-  
taxat, qui Vratislaviæ, tanquam in temporanea statione sublitterent, habere per-  
missum fuit, qui non diu post ejus obitum, cum necessario præsidio, tutelaque  
adversus insectantium persecutiones destituti essent, loco cesserunt.

Anno 1596. nova in Poloniam Legatione perfunctus, cum contracto jam morbo æger  
in Silesiam rediisset, obiit 15ta die Novembris, postquam Ecclesiam suam annis  
undecim administrasset magno pacis studio, nec minore cum commendatione pie-  
tatis, ac sapientiæ.

JERINO mortuo, tribus annis vacavit Sedes ob graves altercationes, tricasque in  
novi Præfulis electione exortas. Tandem ex Pontificia, Cæsareaque autoritate  
PAULO ALBERTO Suevo collata est dignitas Episcopalis, qua tamen gavisus  
diu non fuit, cito ex Cathedra ad æternitatem avocatus: cui demum successit JO-  
ANNES A SITSCH.

Hæc de JERINI Successoribus adnectere placuit, ut manifestum fiat, quam parum  
fidendum sit Episcoporum Vratislaviensium Catalogo, quem Author *Hist. Eccle-  
siasticæ Germaniæ*, idiomate Gallico *Typis Bruxellensibus Francisci Foppens* anno  
1724. editæ, vulgavit: in quo substitutis variorum Episcoporum nominibus, quos  
alii Scriptores ignorant, non tantum nulla *Joannis Sitschii*, & *Pauli Alberti*, sed  
neque *Andreae Jerini* & *Martini Gerstmanni* fit mentio, quos tamen circiter ab  
anno 1574. ordine continuo Vratislaviensi Ecclesiæ præfuisse, partim publica fides  
celebratarum ab ipsis Synodorum, quarum alteram sub *Jerino* jam dedimus, alte-  
ram sub *Gerstmanno*, Tomo præcedente retulimus: partim etiam domestica So-  
cietatis nostræ monumenta, grataque & frequens in Annalibus nostris beneficio-  
rum ab eisdem acceptorum memoria, ut nihil de Scriptoribus aliis dicam, evi-  
denter evincit. *Vide Hubnerum Question. Politico-Historicarum Lib. IV. P. Schmidl Hist. Soc. JESU Provinc. Bobem. P. I. & II.*



missa: a Sacra Congregatione Illustrissimorum Patrum *Tridentini Concilii* interpretum, emendata, atque aptata fuisse, nec non eorundem Decretorum originale apud ipsam Congregationem remansisse: cum quo hujusmodi Decreta hoc libello Chartarum XXXVI. quarum prima incipit: *Ordo, & Processus Synodi Diocesanae &c. &c.* postrema vero: *Has Constitutiones &c.* & definit: *Velit expectare.* descripta, & collata in omnibus

& per omnia concordant. In quorum fidem his propria manu subscripsimus, & ab infra scripto Secretario item scribi, Sigillique nostri impressione communiri mandavimus. Datum Romæ die XXV. Augusti M.D. XCIV.

HIER. Card. MATTHÆIUS.

*Bernardinus Rossius pro Secretario.*

## SYNODUS TRIDENTINA DIOECESANA

Anno Christi MDXCIII. Clementis VIII. Papæ II.  
Rudolphi II. Imp. XVIII.

LUDOVICUS, (\*) MISERATIONE DIVINA S. R. E. Tit. S. LAURENTII IN LUCINA, PRESBYTER CARD. MADRUTIUS, EPISCOPUS TRIDENTINUS, &c. UNIVERSIS ET SINGULIS SÆCULARIUM ET REGULARIUM ECCLESiarUM PRÆLATIS, DECANIS, PRÆPOSITIS, CANONICIS, PRIORIBUS, PLEBANIS, PAROCHIALIUMQUE ECCLESiarUM RECTORIBUS, CAPELLANIS, CÆTERISQUE BENEFICIATIS, CURATIS ET NON CURATIS QUIBUSCUNQUE, PER CIVITATEM, ET DIOECESIN NOSTRAM UBILIBET CONSTITUTIS, SALUTEM, ET SIN-  
CERAM IN DOMINO CHARITATEM.

Cum primum, sic DEO disponente, ad hujus Ecclesiæ Episcopale munus admoti fuimus, illud præcipue studuimus, ut illius regiminis rationem ad Divini Nominis gloriam, & populi Nobis commissi salutarem dire-

ctionem, juxta Sacri Trid. Concilii præscriptum, institueremus. Quum enim immensa DEI clementia ad totius orbis Christiani salutem illud in hac nostra Civitate inchoatum, & perfectum vidissemus, facile intelligere potui-

(\*) LUDOVICUS MADRUCIUS, Cardinalis CHRISTOPHORI MADRUCII, civis & Episcopi Tridentini, cujus in Historia Sacri Oecumenici Concilii, eadem in urbe celebrati, per frequens est mentio, ex fratre nepos erat, & æmulator egregius, iisdemque, quibus ille, viis, virtutum scilicet, scientiarumque, & rerum magnarum bene gerendarum studiis, ad maximas dignitates eluctatus est.

Anno 1561. 26ta Februarii a PIO IV. Papa Cardinalis Diaconus Tit. S. Callisti, postea Tit. S. Onuphrii: dein Cardinalis Presbyter S. Anastasiæ, mox S. Laurentii in Lucina: demum Episcopus Cardinalis Sabinus, & supremus hæreticæ perfidiæ Inquisitor constitutus: Christophoro Patrio suo, anno 1578. defuncto, in Episcopatu Tridentino regendo successit, ibidemque anno 1593. Cleri sui Diocesani Synodum habuit, in qua sequentia edidit Statuta.

Floruit in eo Viro cum doctrinæ, prudentiæque laude conjuncta, ut *Ciaconus* ait, plena antiquitatis auctoritas, gravitasque Senatoria, sententiarum ac verborum librata ponderibus, unde factum, ut ejus judicio & effatis plurimum ab omnibus tribueretur. Variis per Germaniam Legationibus, arduis pro Ecclesia DEI laboribus, amplissimisque Magistratibus egregie perfunctus, obiit Romæ anno sæculari 1600, tam rebus, quam honoribus gestis clarissimus. Successorem habuit in Sede Tridentina Carolum Gaudentium Madrucium, qui & ipse dein Cardinalis Episcopus Sabinus creatus fuit. Hunc quartus ex eadem familia Antistes excepit Carolus Emanuel Madrucius.

*Alphonfus Ciaconus de Vita & rebus gestis Summorum Pontific. & S. R. Eccles. Cardinalium. Histoire Ecclesiastique d'Allemagne Typ. Bruxellensib. Franc. Foppens a. 1724.*

tuimus, ultra obedientiæ debitæ rationem (quæ nobis cum omnibus Episcopis, in gratia, & communione Sedis Apostolicæ constitutis, communis est) ipsum hujus Sacri Concilii nomen nos quasi specialiter admonere, ut promptiori studio saluberrimas illius Constitutiones, & Decreta, tanquam falcem quandam assumeremus, qua sentes, & vepres, qui temporum injuria in hac vinea, quæ Divina voluntate nobis excolenda obtigit, excinderentur. Ubi itaque per difficultates, & impedimenta, quæ regiminis nostri initia exceperunt, lieuit, per plures visitationes, quas partim per Nos ipsos, partim per deputatos idoneos viros obivimus, per diversa etiam Decreta, ac serias admonitiones id, quantum in Nobis fuit, egimus, ut ipsius Episcopalis officii functiones ita dirigerentur, ut quoad fieri posset, tam Clerus, quam populus nostræ Dicecesis, traditæ a Sacro Concilio Tridentino disciplinæ, vita & moribus responderet. Unde etiam sæpius Prædecessorum Synodales Constitutiones, quibus hujus Episcopatus regimen maxime niti videbatur, ad prædicti Concilii præscriptum reformare cupivimus. Verum cum publicis, iisque gravissimis de causis, sæpius hinc advocati fuerimus, diutius, quam volebamus, id disterre coacti fuimus: tandem vero Dei benignitate opportunitatem toties desideratam nacti, una cum Ven. Capitulo Cathedralis Ecclesiæ nostræ, & totius Cleri Synodali præsentia Constitutiones a bonæ mem. CARDINALE(\*) BERNARDO, & pluribus alijs Prædecessoribus nostris longa serie ad hujus Dicecesis usum, & necessitatem accommodatas, Divino implorato auxilio, matura deliberatione præhabita, prout horum temporum ratio exigere videbatur, juxta Sacri Concilii regulas, & dispositiones innovavimus, ampliavimus, ac reformavimus, prout etiam præsentem earum publicatione & editione innovamus, ampliamus, & reformamus, auctoritate nostra ordinaria. In virtute sanctæ obedientiæ, ac sub pœnis & censuris in il-

lis contentis, vos districtius requirentes, quatenus hujusmodi Constitutiones, & Statuta prompto affectu suscipiatis, & pro Statutis Synodalibus observetis. Omnia tamen, ut debemus, Sanctæ Sedis Apostolicæ judicio submittendo, ac salvis etiam Patriarchalibus ordinationibus, dispositionibus, nec non aliorum Prædecessorum nostrorum constitutionibus, quatenus in usu sunt, & per præsentem has nostras non sunt aliter declaratæ, seu correctæ, quibus derogare non intendimus.

### De Professione Fidei.

#### C A P U T I.

Cum eorum, qui JESU CHRISTI Salvatoris nostri gregi pascendo, præpositi sunt, præcipua cura esse debeat, ut Fidem, sine qua impossibile est placere Deo, unam, illibatamque conservent, ac fideli populo proponant & prædicent: Nos hanc Fidei unitatem, in Dicecesi nostra, quoad, favente Deo, possumus, integram & ab omni labe sinceram servare volentes, duximus Constitutionibus nostris Synodalibus præmittendam esse ejusdem Fidei Professionem, ex forma, quam sanctæ mem. PIUS IV. Pontif. Max. ex Generalis Concilii Tridentini sententia præscripsit, videlicet:

Credimus, & profitemur omnia, & singula, quæ continentur in Symbolo Fidei, quo Sancta Romana Ecclesia utitur: Credo in unum Deum, Patrem omnipotentem, factorem cæli & terræ, visibilium omnium & invisibilium, &c.

Volumus autem, ut qui in hac nostra Dicecesi ad Canonatus, & dignitates quascunque, etiam Regulares, ac beneficia curata promoti fuerint, hanc Fidei Professionem emittant, secundum præscriptum Conc. Trid. Sess. XXIV. Cap. 24. incip. Cum dignitates in Ecclesiis &c.

Et quia in hac nostra Dicecesi multis locis contingit, Parochos ob populi frequentiam, & Parochiarum amplitu-

(\*) Fuit is Bernardus de Glöfs, Christophori Madrucii Antecessor: Cardinalis creatus anno 1530. Obiit 1539. Constitutiones ejus Synodales, quarum hic, & postea sæpius fit mentio, hucusque non reperi.

plitudinem, plures habere cooperatores, quibus confessiones audiendi, & Divini Verbi prædicandi munus communicatur; statuimus, ne quis in cooperatorem assumatur, nisi prius in nostra, aut Vicarii nostri mandato, in alterius manu, Fidei Professionem emisserit.

Monemus vero omnes, qui ex præcepto Sacri *Concilii Tridentini* Fidei Professionem emittere tenentur, præcipue autem illos, quibus animarum cura quoquomodo incumbit; ut attente & diligenter emissæ Professionis fidei formam, & quæ in illa continentur, considerent, curentque ore prolata, opere adimplere, docendo subditos suos, & plebem sibi commissam, ut in suscepta a Majoribus fide constanter perseverent: Constitutiones, Traditiones, Statuta, & Cæremonias Sanctæ Matris Ecclesiæ observent: Summo Pontifici, tanquam vero Christi in terris Vicario, debitam obedientiam præstent.

### *De Hæreticis.*

#### C A P U T II.

**E**T cum hæresis Fidei Catholicæ, ut certissima pestis, adversetur, omni studio est elaborandum, ne illius contagione grex fidei nostræ commissus iniciatur. Statuimus itaque, ne quis in hac nostra Diœcesi, ea docere, tenere, credere, aut asserere, quovis modo præsumat, quæ Sancta Catholica Romana Ecclesia damnat, & anathematizat. Libros item, Scripta, & Tractatus, ea continentes, nullus importare, vendere, emere, recipere, legere, aut quomodolibet penes se tenere audeat, sub pœnis, quæ tam in Summorum Pontificum, & Sacri *Concilii Trid.*, quam orthodoxorum Imperatorum, & Catholicorum Principum Constitutionibus, nec non nostrorum Antecessorum Decretis continentur. Quare universis & singulis, tam Ecclesiasticis, quam sæcularibus personis districtè in virtute sanctæ obedientiæ, & sub censuris Ecclesiasticis præcipimus, ut exclusâ omni malitia, si quos sciunt hæreticos, vel de hæresi qualitercunque suspectos, eos Nobis, aut Vicario nostro, sine mora revelare procurent.

Prælati insuper, & Ecclesiarum Parochialium Rectoribus committimus sub eisdem pœnis, & aliis, arbitrio nostro infligendis, ut si quos intellexerint disseminare errores, aut hæreses, conventicula facere, de Fide & Religione obloqui, prohibita & damnata lectionis libros, tractatus, aut scripta palam, vel occulte tenere, aut legere, tales Nobis quamprimum denuncient: tum vero diligenter vultum sui gregis observent, & si quos inordinate ambulare, neque per omnia ad fidelium usum juxta Statuta, Ordinationes, & laudabilem antiquam Catholicæ Romanæ Ecclesiæ consuetudinem se se conformare cognoverint; eos in Christi visceribus moneant, & corrigant: quos si contumaces, ac depravato affectu perspexerint, de eo Nos, vel Vicarium nostrum quanto citius edoceant.

Moneant etiam confitentes, ut si quos noverint de hæresi suspectos, Ecclesiastico judicio denuncient, ostendantque, ex charitate, & obedientia erga Sanctam Matrem Ecclesiam, eos ad hoc teneri, cum & errantium ipsorum correctio, & reliquorum salus ex eo pendeat, ut latens virus detegatur: intimando pœnitentibus, illos beneficium absolutionis obtinere non posse, si hæreticos, & ab Ecclesia desciscientes scienter occultaverint.

Et quia publici commercii ratio in his locis, secum trahit promiscuum quandoque hominum concursus, etiam ex locis, ubi hæresis impune grassatur; Curati diligentiores sint, præcipue nundinarum tempore, in investigando, an per diversoria, de Religione sermones habeantur, & a quibus, & quales: an libri prohibiti adferantur, disseminenturque: an diebus, quibus ab Ecclesia interdictum est, vesci carnibus, illæ mensis apponantur: & similia. Et si quid tale repserint, Nos, aut Vicarium nostrum certiores reddant, suos subditos frequenter, ac diligenter admonentes, ut stabiles in fide, aures nullis novitatibus accommodent.

Quod si Parochi compererint, opiniones damnatas disseminari, vel alias perversorum hominum dictis, aut factis tentari, ac labefactari fidem pusillorum;



lorum; tales redarguere, & Catholicæ veritatis rationibus confutare studeant, impiisque eorum conatibus se se opponant, etiam invocato (si opus fuerit) brachii sæcularis auxilio, Nosque, aut Vicarium nostrum Generalem de eo quanto citius admoneant.

Cum etiam aliquibus hujus nostræ Diœcesis partibus mercimoniorum, vel aliis de causis, contingat, pueros, & adolescentes ad civitates, & loca hæresi infecta, a suis ablegari; Parochi solcite parentes, vel majores, aut in quorum sunt potestate, dehortentur, ne juvenes, vel pueros ad hujusmodi loca mittant, vel certe eos probatis, & Catholicis viris diligenter commendent; ipsos vero juvenes efficaciter obtestentur, ut in Religione Catholica constanter persistant, ne, dum momentaneum commodum sectantur, æternæ salutis jacturam faciant, seque semper, dum in locis suspectis commorantur, virorum Catholicorum, & proborum consortio adjungant, hæreticorum familiaritatem, & consuetudinem, quantum possunt, devitantes.

Deinde domum reversos Parochi diligenter examinent, an monitioni ipsis factæ satisfecerint, hoc est, an Catholice vixerint: an statutis ab Ecclesia temporibus peccata sint confessi, & Sacram Eucharisticam sumpserint. Et si quos a via recta deflexisse, hæreticisque imbutos esse opinionibus cognoverint; eos Nobis, vel Vicario nostro quamprimum denuncient.

Tunc vero Parochi gravibus verbis dehortentur parentes, vel majores, seu in quorum potestate sunt juvenes, ne omnino ad illas partes eos mittant, in quibus nullum Catholicæ Religionis exercitium est relictum. Si vero Parochi viderint parentes, vel majores, tanquam salutis suorum impie prodigos, hanc dehortationem contemnere, suumque mittendi propositum exequi, tales, ut de hæresi vehementer suspectos, non tantum diligenter observent, sed etiam Nobis, vel Vicario nostro denuncient.

Et quia non solent deesse, qui ipsam teneram juventutem erroneis opinionibus inficere conantur; ordinamus, ne quis posthac ullo prætextu

ad docendi munus admittatur, ne ad ipsa quidem prima literarum elementa tradenda, nisi prius Professionem Fidei in manibus Parochi, in cujus Parochia munus exercere volet, emisserit; quam si eorum quis facere detreterit, illico Nobis, vel Vicario nostro denunciatur.

Mandamus proinde, ut Parochi diligenter pernoocere studeant Institutores puerorum suæ Parochiæ, videantque, ut se se huic Constitutioni per omnia conforment. Et qui ab Ecclesiis, vel Parochis stipendium accipiunt, præsertim per districtum Athesinum, nisi quæ ad Latinam linguam pertinent, diligenter docuerint, Parochi eos propria autoritate ab officio removeant. Super omnia autem curent Parochi, ne quid a Magistris Catholicæ fidei, & bonis moribus contrarium prælegatur, aut in discipulorum manibus versetur: Scholam etiam cum oratione: *Veni Sancte Spiritus*, inchoent, & cum *Oratione Domunica*, *Salutatione Angelica*, *Symbolo Apostolorum*, & *Decem Præceptis*, ac aliqua gratiarum actione terminent.

### *De Libris prohibitis, & Typographis.*

#### C A P U T III.

Cum etiam ex nimia Librariorum, & Typographorum licentia magna immineant pericula; Nos, ut illis, juxta Decretum Sacri Concilii Trid. opportune occurramus, statuimus, & prohibemus, ne quis, sive incola fuerit, sive peregrinus, libros damnatorum, aut suspectorum secundum Indicem Romanum, & ejus regulas, in hanc nostram Diœcesim, & Ditiones inferre, aut venales tenere audeat, sub pœnis confiscationis librorum, & aliis, nostro, seu Vicarii nostri Generalis arbitrio infligendis.

Statuimus item, & ordinamus, ne Parochi locorum, in quibus, statis anni temporibus, nundinæ celebrantur, ullos libros venales proponi patiantur, nisi Bibliopolæ ipsis eorum indicem, seu catalogum prius exhibuerint examinan-

minandum; ut perniciosi a bonis, & probatis discerni queant.

Quod ut accuratius observetur, districte præcipimus omnibus cujuscunque status Præfectis, & Judicibus terrarum, jurisdictionum, & locorum temporalis Domini hujus Ecclesiæ Tridentinæ, ceteros vero serio in Domino requirimus, ut Parochis in hujus nostri Decreti executione, sua auctoritate, & auxilio adsint, ut si contigerit, damnatæ lectionis libros penes aliquem reperiri, curent juxta præmissa, contra importantes, & tenentes severe procedi.

Si item reperti fuerint libri, aut scripta, sive tractatus, cantilenæ, aut similia, vernacula, & vulgari lingua composita, in quibus contineantur hæreses, seu errores, aut scandalosa; ea, licet Indice Romano non contineantur, Parochi diligenter colligant, neque patiantur evulgari: curentque, ut contra similia importantes, ut supra dictum est, pro modo culpæ severe procedatur.

Idem facient de picturis, quibus vel Religio Catholica traducitur, aut hæresis simplici populo obtruditur.

Admonemus etiam Decanos rurales, ut pro viribus & ipsi non tantum in propriis Parochiis, sed etiam in totis suis Decanatibus in hoc advigilent, ipsos Parochos sui officii admonendo, & si necessitas postulabit, brachium sæculare contra inobedientes invocando. Quod si in hoc remissius viderint procedi, de eo quamprimum Nos, seu Vicarium nostrum certiores faciant.

Impressores vero, juxta modum eis a *Sancta Tridentina Synodo* præscriptum, nullum librum, vel quodcunque scriptum, tam antea ubivis locorum impressum, quam non impressum, excudere possint sine nostra, vel Vicarii nostri licentia: ipsa vero originalia cum exemplis concordantia, in Archivio nostro reponi volumus, ne cui fraudi locus relinquatur. Contra facientes, præter exemplorum amissionem, alias pœnas nostro arbitrio luent.

### *De Blasphemis.*

#### C A P U T IV.

**U**T populus a blasphemix abominabili peccato se se contineat, Parochi & Verbi Dei Concionatores ejus enormitatem sæpe exponent; pœnas a Lege Divina, a Sacris Canonibus, a Summis Pontificibus, ac nostris etiam Antecessoribus in blasphemos promulgatas, ipsis ob oculos ponendo.

Interim etiam in Domino moneamus, & districte mandamus quibusvis Judicibus tam Ecclesiasticis, quam sæcularibus, ut contra hujusmodi Majestatis Divinæ contemptores debitis pœnis procedant.

Et quoniam reprimenda est etiam eorum temeritas, qui Sacræ Scripturæ verbis, & sententiis abutuntur, ad profana, fabulosa, scurrilia, vanitates, ac scommata, contumeliasque eas convertentes; si quisquam id facere deprehensus fuerit, pœnis debitis severe contra eum, juxta supra dictorum Legum rigorem, procedemus.

### *De Superstitionibus.*

#### C A P U T V.

**L**icet Divina Lex maxime detestetur magos, striges, ariolos, incantatores, divinos, sortilegos, & id genus superstitiosos, ac maleficos homines: ac contra tales, & illis credentes, illos consulentes, eorum opera utentes, non tantum extent severæ Dei comminationes, sed etiam Legibus tam Ecclesiasticis, quam Sæcularibus gravissimæ illis pœnæ infligantur; nihilominus intelligimus, hujuscemodi diabolicas impietates & abominaciones nondum a nostro Episcopatu plane exulare. Proinde districte mandamus, ut contra quoscunque maleficos, striges, incantatores, necromantas, divinos, & id genus sacrilegos impostores, ligaturis, characteribus, incognitis figuris, imaginibus, verbis ignotis, demonum invocationibus, adorationibus, Sacramentorum, aut Sacramentalium abusu, & profanatione, aut quolibet alio modo superstitioso, de futuris contingentibus investigantes, thesauros,

& res perditas simili modo inquirentes, pluvias, siccitates, tempestates procurantes, maleficia inducentes, aut etiam maleficio solventes, aut quomodolibet superstitiosa, vana, pernicioſa, ut præfertur, attentantes, nec non illos de his, & similibus consulentes, illis faventes, & cooperantes, severe secundum Sacrorum Canonum præscripta, & Summorum Pontificum Constitutiones, pro modo culpæ, etiam tanquam contra suspectos de hæresi, aut apostasia a fide, procedatur.

Moneantque Parochi fideles omnes, sub pœna excommunicationis, ut si tales noverint, illos Nobis, aut Vicario nostro denuncient.

Et quia plerumque contingit, aliquos animi simplicitate in hæc delabi, non attendentes delicti gravitatem; injungimus Parochis & Curatis, nec non Verbi Dei Concionatoribus, ac Confessoribus, ut fideli populo, etiam in casu amissionis rerum suarum, accessum ad divinatores prohibeant, sæpeque in mentem reducant, quam Deo abominabile sit hoc delictum, quod cum manifesta, aut certe occulta demonum societate conjunctum, illaqueatas animas tenebrarum potestati mancipat. Ac propterea moneant eos, ut non solum graviores, & atrociores species superstitiosarum impietatum, sed etiam illas evitent, quæ leviores & vanae videntur: cum ubique se se his inimicus demon sua operatione, ad fallendas, & in præceps trahendas animas, immisceat. Si vero moniti non resipuerint, tunc Nobis, aut Vicario nostro sine mora eos indicare teneantur.

Si cui Parocho, aut Curato, vel Confessario instrumenta, scripta, aut alia, ad hujusmodi artium diabolicarum exercitium facta, a poenitentibus, aut aliis exhibita fuerint, ea quamprimum Vicario nostro Generali tradant.

### De Prædicatione Verbi Dei.

#### C A P U T VI.

**Q**uoniam ad culturam agri Domini, ipsi Verbo Dei inest vis incomparabilis; admonemus cu-

ram animarum exercentes, ut præcipuam officii sui, ac sollicitudinis partem positam esse meminerint in ejusdem Verbi prædicatione. Ex qua, ut populus ipsis commissus majorem fructum capiat, eos in Domino hortamur, ut sermonem suum captui ejusdem populi accommodent, præcipue huc respicientes, ut fidei Christianæ rudimenta, & salutis monita tradentes, pietatis, & Religionis documenta fidelium animis, Deo cooperante, imprimant: ac proinde in Dei Verbo meditentur die, ac nocte, scientes, omnem Scripturam, Divinitus inspiratam, utilem esse ad docendum; & Verbum Dei esse malleum, conterentem petras; & sæpe in simplicitate suscipi a pusillis & parvulis, tremantibus sermones ejus.

In exponendo vero Sacro Evangelio, & Verbo Dei annunciando, nulli ab intelligentia Sanctæ Matris Ecclesiæ deflectant, unanimem Sanctorum Patrum, ejusdem Ecclesiæ Doctorum interpretationem, & sententiam, sine hæsitazione sequentes: atque hac salutari doctrina innixi, Dominicis, & Festivis diebus, quando populus majore frequentia ad Ecclesiam confluit, ea præcipue explicabunt, quæ omnes scire necessarium est ad salutem.

Tum vero diligenter meditentur, quæ Sacrum *Concilium Tridentinum* fidelibus a Parochis, diversis occasionibus potissimum exponi, & doceri mandat. Quare Catechismum Romanum, & ex modernis illos auctores, qui omittis superfluis quæstionibus, ea tractant, quæ fideli populo his temporibus pro recta fidei, & pietatis instructione sunt proponenda, assidue perlegant.

Maxime vero curabunt, ut populus intelligat gravitatem delictorum, eorum præcipue, quæ frequentius in ipsorum Parochiis committuntur: ea denique sæpius inculcabunt, quæ ad vitam pie, & Christiane instituendam requiruntur. In fine autem sermonis semper vulgari lingua Orationem Dominicam, Salutationem Angelicam, Symbolum Apostolorum, & Decem Præcepta subjungant.

Obscuras, ac indeterminatas quæstiones, audientium captum excedentes,



tes, quæ ad pietatem parum, vel nihil faciunt, omittant.

Apocrypha, vana, fabulosa, & Evangelicæ prædicationis gravitate indigna, evitent.

Hæreticorum opiniones, & argumenta e suggestu non referant, nisi quando id necessitas postulat: atque tunc ita sint instructi, ut dilucidis, & clavis responsionibus ea diluere valeant; ne ullus in mentibus audientium scrupulus hæreat.

Amarulentias, aut inconcinnum rigorem, quo auditores non ædificantur, fugiant: ubi vero verborum acrimoniam res ipsa postulat, sit sermo sale conditus, & spirans charitatem: severitas pungat, & dirigat: percutiat, & sanet.

In summa, hoc tantum munus ea charitate, prudentia, & assiduitate exequantur, quam fidelis populi instructio, & ad salutem per mandatorum Dei observantiam, directio postulabunt: sciantque, ad id efficiendum, magnum pondus accessurum esse, si vitæ innocentia, integritateque ministerium Verbi commendetur. Quod si Parochi huic ipsorum Divini Verbi prædicandi officio non satisfecerint, contra eos severe procedemus, & ad illa remedia deveniemus, quibus ipsorum negligentia, ac defectus suppleantur, juxta *Tridentini Concilii præscriptum Sess. V. Cap. II. de Reform. & Sess. XXIV. C. IV.*

### *De Doctrina Christiana.*

#### C A P U T VII.

**U**T teneræ ætatis animis Fidei, & Religionis, unde universæ vitæ pie instituendæ ratio pender, rudimenta instillantur; omnes Rectores, Capellanos, & alias personas Ecclesiasticas hortamur, & in Domino iis injungimus, ut huic tam necessario operi diligenter invigilent: parvulos, & quoscunque alios, rudimentorum fidei ignaros, Dominicis & Festivis diebus in Ecclesiis congregent, ac contenta in libello sub nostro nomine, ea de re edito, studiose iisdem prælegant, & interpretentur.

Quod ut majori fructu præstare

possint; parentibus, tutoribus, ac patribus familias serio mandamus, ut filios suos, & alios sibi subiectos, ad saluberrimum hoc exercitium mittere non prætermittant.

### *De Prædicatoribus extraordinariis examinandis.*

#### C A P U T VIII.

**Q**uia sæpe usuvenit, ut diversorum Ordinum Prædicates, Quadragesimali tempore ad villas, & Parochias per Diocesim nostram destinentur, admodum exiguo populorum fructu: dum vel nimium juvenes mittuntur, vel in iis, quæ ad veram pietatem tradendam spectant, parum instructi;

Ideo præcipimus, & ordinamus, ut Vicarius noster, & qui ad hoc deputati sunt, juxta locorum necessitatem, & qualitatem personarum, illos dirigant, & si quos noverint alias scandalose se gessisse, vel non illa esse eruditione, & prudentia, ut prædicandi munus decenter exequi possint; tales non admittant, neque eis literas, aut parentes concedant, sine quibus a nullo Parocho nostræ Diocesis quemque Religiosum volumus ad munus prædicandi extra Regulares Ecclesias admitti.

Qui vero ad prædicandi munus per Diocesim destinabuntur, serio a Vicario nostro admoneantur, ut tam Parochos, quam populos, ad quos mittuntur, paterna benevolentia, & pietate prosequentes, munus suum cum charitate, & prudentia exequantur. Illa missa faciant, quæ rudis populi intelligentiam excedunt. Verum cognito ex Parochis, & probis viris statu, & conditione populi, ad ejus se caput accommodent: de Christianis virtutibus, & oppositis vitiis, prout necessitas exiger, ita tractent, ut ad salutaria auditores dirigant, & ab illis peccatis, & vitiis, ad quæ procliviores noverint, avocent.

Et quia admissi ad concionandi munus, etiam ad confessiones audiendas approbantur, volumus, ut illis districtè inhibeatur, ne se se in casibus, Episcopo, nedum Summo Pontifici Roma-

Romano, reservatis, ingerant. Et si quem ex rationabili causa a proprio Parocho absolutionem non impetrare cognoverint, talem neque ipsi absolvant. Venientes ab aliis Parochiis sine ipsorum Parochorum licentia, omnino non absolvant, sub pœna suspensionis ab officio prædicandi, & confessiones audiendi in nostra Diœcesi, & aliis ad arbitrium nostrum, vel Vicarii nostri.

Moneantur, ut tam in Concionibus, quam in Confessionibus salutari cum rigore tractent casus usurarios, & illicitos: & quæ in præsentī Synodo statuta sunt, atque in admonitionibus ad Parochos, & Curatos editis continentur, diligenter observentur; tum etiam edicta, quibus damnatorum contractuum species proponi curabimus, attente meditentur.

Si quis autem ex istis Concionatoribus (quod absit) in concionibus, vel alias se scandalose gesserit, id Nobis a Parochis indicari volumus, ut contra eos juxta dispositionem *Concilii Tridentini Sess. V. Cap. II. de Reform.* procedi possit.

### De Sacramentis in genere.

#### C A P U T IX.

**Q**uia fidelis populi sanctificationem, & justitiam Sacramenta Ecclesiæ regulariter operantur, augent, & amissam reparant; Parochi docebunt juxta Sacri *Concilii Tridentini* præscriptum, hæc ipsa Sacramenta a Christo Domino nostro ad lapsæ per peccatum naturæ reparationem instituta, Divinæ gratiæ esse instrumenta, quibus inexhausta virtus Passionis & Mortis ejus digne suscipientibus applicatur.

In administrandis vero Sacramentis, volumus per Parochos, & animarum curam gerentes, exacte eum modum, & cæremonias observari, quæ tum e Sacris Canonibus per Oecumenicum *Concilium Tridentinum*, tum in *Rituale* nostro præscribuntur: in primis diligenter observando, ut ante cujuscunque Sacramenti administrationem, breviter lingua vernacula ad captum ipsorum suscipientium, explicetur vis, & usus ipsius Sacramenti.

*Tomus VIII. Concilior. German.*

Fugiant vero in administratione Sacramentorum, omnem speciem avaritiæ, neque quicquam ex pacto, vel conventionem exigant: sed Sacramenta ipsa bene dispositis, absque dilatione, pro loco, tempore, & necessitatis exigentia, pie, prompteque administrent juxta Ecclesiæ institutum.

Post ipsa vero Sacramenta administrata non prohibentur recognitionem ex consuetudine debitam exigere, juxta *Cap. Ad Apostolicam. de Simon.* In quo tamen caveant, ne offendiculum, aut scandalum præbeant.

### De Sacramento Baptismi.

#### C A P U T X.

**D**oceatur populus, natura filios iræ per Baptismum regenerari in filios & hæredes vitæ æternæ: qui cum propterea differri minime debeat, statuimus, natum infantem quamprimum, vel ad summum intra octiduum, ad Ecclesiam esse deferendum & baptizandum. Parochus autem, antequam ad baptizandi actum deveniat, diligenter inquirat, an infans ob aliquod periculum fuerit baptizatus, & si repertus fuerit rite esse baptizatus, eo casu, ne sub conditione quidem amplius baptizet, sed tantum imposito nomine infanti, consueta præces, Sacram Unctionem, atque alia adhiberi solita, juxta ipsum *Rituale* adjungat.

Et quia experientia docet, aliquando constare vix posse, an a laicis baptizatus, Baptismum vere susceperit; ideo ad medendum in hoc Sacramento tam periculosa incertitudini, Parochus quomodolibet baptizatum, ubi probabiliter de Baptismi validitate dubitat, baptizet juxta modum præscriptum in *Rituale*.

Doceant etiam Parochi diligenter formam & materiam hujus Sacramenti, admoneantque omnes viros juxta ac mulieres, ne facile moveantur ad baptizandum infantem: sed tunc tantum, quando probabiliter periculum mortis timeretur, nec copia est præsentis Sacerdotis, aut alterius Sacris initiati: & tunc adhibita aqua naturali, & simplice, accurate utantur integra forma:

F f f

Ego

*Ego te baptizo in Nomine Patris, & Filii, & Spiritus Sancti* : verba ipsa formalia semel tantum proferendo.

Moneant præterea Parochi infantum parentes, ut baptizandis Sanctorum potissimum nomina imponi curent, in quorum tunc sortem vocantur.

Ad levandos de Sacro Fonte infantes sit tantum unus Compater, aut una Commater, vel ad summum unus & una : Neque admittantur publice criminosi, hæretici, aut excommunicati : imo neque illi, qui absque legitimo impedimento omiserint semel saltem in anno, tempore ab Ecclesia constituto, peccata sua confiteri, & Sacram Eucharistiam sumere.

Item moneri volumus compatres, & commatres de spiritali cognatione, quæ in susceptione contrahitur, ac illius impedimento, juxta *Concilii Tridentini declarationem Sess. XXIV. Cap. II.*

Statuimus etiam, ut compatres, & commatres, non impuberes deligantur; ne videatur infans infantem offerre, ac sponso rem se Deo pro alio constituere, qui quod promittit, non intelligat.

Insuper improbamus illorum factum, qui citra casum necessitatis ambitiose curant, suos infantes in domibus privatim baptizari, post habito Templo Domini.

Et cum baptizandi renuncient diabolo, & pompis ejus, fideles admonentur, ut filios regenerandos offerant cum devotionis affectu, eas pompas devitantes, quæ jactantiam & ostentationem præ se ferunt.

Habeant insuper Parochi librum bene ligatum, & qui possit conservari, & cum necessitas postulat, ad manus etiam post longum tempus haberi, in quo annotent nomen baptizati, patris, matris, & susceptorum, diem quoque, mensem, & annum: tum etiam, si infans illegitimus, aut ex incerto patre natus est.

Reliqua ad Sacramentum hoc rite administrandum pertinentia, ex *Catechismo Romano*, & *Rituale* nostro petantur.

## De Sacramento Confirmationis.

### CAPUT XI.

**P**ER Baptismum renati, Sacramento Confirmationis augmentur in gratia, & perfectum animi robur accipiunt, ac ad luctam contra diabolum, mundum, & carnem armantur, quo stabiles in fidei susceptæ confessione, perfectos se Christi milites exhibeant: quod a Parochis populo Dei diligenter inculcari volumus.

Moneant pariter, Sacramentum hoc summa reverentia, devotione, humilitate, ac omni puritate, prævia in adultis confessione, suscipiendum esse. Nulli minori septennio præbeatur.

Parochi, priusquam Sacrum Chrisma sit administrandum, doceant confirmandos de hujus Sacramenti institutione, materia, effectu, & ministro, juxta illa, quæ in Catechismo ad Parochos traduntur. Quod etiam Episcopus, hujus Sacramenti Minister ordinarius, de more præstare solet.

Teneant Parochi librum, in quo nomina confirmatorum, & compatrum describantur, uti de baptizatis injungitur.

Admoneantur præterea susceptores, & suscepti, de spiritali cognatione, quam contrahunt; & de onere, ac obligatione, doctrinam Christianam confirmatos docendi.

Decet etiam, ne mulieres adultos, neque viri adultas, teneant, sed in utrisque servetur sexus conformitas: & ne junior seniore offerat: atque in universum, qui non fuerit confirmatus, & eo anno non fuerit sua peccata confessus, & Eucharistiam non sumpserit: qui Orationem Dominicam, Salutationem Angelicam, Symbolum Apostolorum, & Decem Præcepta non calleat: item publice criminosus, hæreticus, aut alias excommunicatus. Hi, inquam, nullo pacto confirmandum offerre præsumant. Pater, & mater filium, aut filiam non offerant. Denique offerentes quicumque, nullis armis instructi accedant.

De



*De Sacerdotibus, ad Sacrum Chrismi conficiendum mittendis.*

C A P U T XII.

**N**E propter defectum Clericorum, qui in die Coenæ Domini ad Sancti Chrismatis confectiōem necessario requiruntur, aliquod scandalum oriatur; Prædecessorum nostrorum Decreto inhærentes, mandamus, ut in illam diem per Rectores Ecclesiarum Parochialium, & alios ex infra scriptis sex Decanatibus, & aliis Ecclesiis nostræ Diœcesis mittantur Sacerdotes viginti quatuor: videlicet ex *Præpositura Sancti Michaelis ad Atbesim*, mittatur Sacerdos unus: ex *Decanatu ad longum Atbesim* quinque: ex *Decanatu Bulzani* duo: ex *Decanatu Vallium Annaniae & Solis*, quinque: ex *Decanatu Judicariarum*, quinque: ex *Clero Archiepi*, unus: ex *Decanatu Ripano*, unus: ex *Decanatu Vallis Lagarina*, quatuor. (Cura autem, & munus deputandi eos, qui quotannis mittendi sunt, Decanis Ruralibus incumbat.) Qui quidem Sacerdotes hora congrua, sub pulsu campanæ magnæ, ut moris est, præsto adsint in Ecclesia Cathedrali, cum aliis officium peracturi. Et eo finito, ac Chrismate consecrato, teneantur pro omnibus illis, a quibus missi sunt, secum Chrisma deferre: districte prohibentes, ne ab illis, aut aliis nostræ Diœcesis Sacerdotibus, & Curatis, ad Chrisma recipiendum laicus ullus mittatur, neque Sacrista ulli laico illud deferendum dare præsumat. Contrafacientes poena decem librarum mulctentur, applicanda eorum Parochiali Ecclesiæ.

Quod si forte contingat, Tridenti Chrisma non confici; tunc ipsi Decani foranei pro tempore providebunt, ut Tridento deferatur, & classes singulæ prædictorum Decanatum mittant Sacerdotem ad suum Decanum, a quo Chrisma accipiat pro sua classe: contribuendo ipsi Decano libras singulas in singulos suæ classis Plebanos, pro sumptibus in deferendo factis.

*De Sacramento Eucharistiæ.*

C A P U T XIII.

**D**E Sacro hoc, admirabili, & tremendo Mysterio, vix paucis dici possunt, quæ populo fideli a Parochis sunt inculcanda, ut condecorer se se præparet ad fruendum mystico hoc Angelorum cibo, quo mens omnium spiritualium charismatum abundantia impinguatur. Hortentur ergo ante omnia plebem Parochi, ut prævia diligenti discussione propriæ conscientiæ, & per integram, & fructuosam poenitentiam, cum timore, & tremore accedant ad tanti Regis mensam.

Quadragesimali vero tempore, diebus Dominicis, & ante hebdomadam sanctam, sæpius omnes moneant utriusque sexus fideles, in legitima ætate constitutos, ut se se præparent per Sacramentalem Confessionem ad sumendum tempore Paschali Sacram Eucharistiam. Quod si quis Sanctæ Matris Ecclesiæ præcepto in hoc non paruerit, semel, aut iterum infra octavam Paschæ admoneatur: si ne tum quidem evigilaverit, Parochus, vel Curatus ejus nomen ad Nos, vel Vicarium nostrum Generalem quamprimum deferat.

In illis Ecclesiis, in quibus animarum cura exercetur, tam in Civitate, quam extra per Diœcesim, asservetur Eucharistia in vase argenteo intrinsecus deaurato, super Altari majore, in Tabernaculo, quoad fieri potest, ornatisimo, lampasque coram eo perpetuo luceat: & quum ad ægrotos deferretur Sacramentum hoc, evocetur populus campanæ sono, & præsertim societates, si quæ sunt: Sacerdos devote & reverenter psallendo illud deferat, cota, stola, & pluviali indutus: adsint item cerei, & umbella. Pluviale tamen, & umbella alicubi per Diœcesim, ex causa omitti possunt.

Processio, quæ singulis annis in festivitate Corporis Christi fit, celebretur devote, & reverenter: adsint per vias, & congruis locis ornatus, quam fieri potest, decentissimus. Nil exponatur, agatur, vel repræsentetur, quod risum, seu irreverentiam moveat, aut profanam sapiat vanitatem: nec tor-

menta, aut bombardæ in ipsa Processione displodantur.

### De Sacrificio Missæ.

#### C A P U T XIV.

**Q**Uoniam vero his temporibus exulceratissimis hostes Ecclesiæ nihil acrius impugnant, quam Sacrificium Missæ; Parochi, & alii curam animarum gerentes, diligenter meditentur, quæ de Sanctissimo hoc Sacrificio Oecumenicum Concilium Tridentinum statuit, quidque doceri de eodem postulet. Circa quod etiam Catechismus Romanum consulant, fideles populos crebro admonendo, ut tremenda hæc Mysteria pie venerentur, illorum vim, fructumque ineffabilem, quantum quidem fieri potest, & intelligere studeant, & ardenti animi desiderio ad illum anhelent.

Tum vero diligenter attendatur Decretum de observandis, & evitandis in celebratione Missæ. Sess. XXII. quibus adiungenda est diligens lectio, & cognitio Rubricæ ipsius Missalis reformatæ.

Sacerdos celebraturus, si conscius sibi fuerit peccati mortalis, Sacramentaliter confiteatur, juxta Decretum Conc. Trid. Sess. XIII. Cap. VII. incip. Si non decet.

Noverint etiam Sacerdotes maxime decere, ut qui frequentius, vel ex devotione, vel officio celebrant, singulis hebdomadibus Sacramentaliter confiteantur.

Nullus Sacerdos, ut aliam Ecclesiam honoret, propriam deferat sine Sacrificio Missæ diebus Dominicis, aut aliis Festivitatibus, quibus ex præcepto Ecclesiæ populus Missæ Sacrificio interesse debet, nisi Ecclesia, quam honorare intendit, sit vicina, & ad illam populus suæ Ecclesiæ tunc confluere soleat.

Nullus Sacerdos sæcularis audeat primam Missam celebrare sine nostro, aut Vicarii nostri consensu: quo obtento, juxta Decretum de observ. & evitand. in celebrat. Miss. omnino abstinere ab omni illiberali eleemosynarum exactio: quæ cum a sordido quæstu non absit, pari modo fugienda est in omni celebratione Missarum.

Musici & Organistæ a cantu lascivo, a profanis carminibus ad choreas accommodatis, in Ecclesia abstineant.

Statuimus præterea, & ordinamus, ut Missas debitas quilibet Sacerdos, aut Beneficiatus per se, vel per alium idoneum, persolvat suis Altaribus, & Cappellis, juxta eorum foundationes.

Idemque in Ecclesiis, ubi diebus Dominicis, & aliis solennitatibus Missæ Sacrum, & Vesperæ decantari solent, in posterum diligenter servetur.

Volumus etiam, ut juxta Tridentini Concilii Decretum, fidelium vivorum suffragia, Missarum scilicet Sacrificia, orationes, eleemosynæ, aliaque pietatis opera, quæ pro defunctis fieri consueverunt, secundum Ecclesiæ institutum pie, & devote fiant, ipsique Rectores, Parochi, & Beneficiati fideliter & diligenter juxta Testatorum foundationes, ea præstent & persolvant.

Præterea populus moneatur, ut diebus saltem Dominicis, & majoribus Festis, ad proprias Parochias accedat ad audiendum Verbum Dei. Ipsi autem Parochi, & Curati infra Missarum Solennia ex iis, quæ in Missa leguntur, aliquid exponant, atque inter cætera ipsius Missæ mysterium aliquod declarent.

Damnanda vero est illorum irreverentia, qui Dominicis, aliisque Festis diebus, quibus ex Sanctæ Matri Ecclesiæ præcepto in suis Ecclesiis Missam integram audire cum teneantur; nihilominus temere de Templo ante Missam finitam, & Sacerdotis benedictionem recedunt: & pariter illorum, qui dum Missa celebratur, & Divinum Verbum prædicatur, fabulis & nugis in cœmiterio tempus extrahunt, plerumque sæcularia tractantes, malo fidelium exemplo, & contra Sacrorum Canonum Sanctiones. Cui malo Nos opportune providere cupientes, statuimus, ut Parochi, & Curati omnes aliquando per annum in Ecclesiis publicent Canonem antiquum Cap. Missas, Distinct. I. de Consecrat. cujus tenor est:

" Missas die Dominica sæcularibus totas audire, speciali ordine præcipimus: ita ut ante benedictionem Sacerdotis egredi populus non præsumat:

"mat: quod si fecerint, ab Episcopo  
" publice confundantur."

Qui igitur admoniti in prædictis contraxerint, subjaceant, præfatorum Canonum pœnis, atque insuper multam incurrant librarum duarum per Syndicos exigendarum, & Parochiali Ecclesiæ, vel alii pio usui, ad arbitrium Parochi, applicandarum, quibus etiam pro ipso labore exigendi, dentur quaterni cruciferi ex hujusmodi multa.

Moneant Parochi, & Rectores ingredientes Ecclesias, ut omnino bombardas, hastas, & alia arma insueta deponant; qui si non obedierint, tanquam contumaces, Nobis, vel Vicario nostro deferantur.

Si vero scandala, vel pericula ab hujusmodi contumacibus verisimiliter oritura timeantur, Sacerdotes etiam a celebrando abstineant.

### *De Ara portatili.*

#### C A P U T XV.

**I**Nsuper omnibus & singulis Sacerdotibus sub pœna excommunicationis, & marcharum quinque prohibemus, ne in nostra Dicecesi super Ara portatili, ad requisitionem cujusquam celebrare præsumant, sine speciali nostra licentia, in scriptis habita; & non nisi in dedicato ad hoc oratorio, a Nobis, vel Vicario nostro, visitando.

In visitationibus etiam Altaria portatilia perquirantur: & quæ non ampla, & commoda reperta fuerint, tollantur.

De cætero vero lapis consecrandus pro Altari portatili sit longitudinis unius saltem palmi cum dimidio, & latitudinis unius palmi, ita ut commode calicem cum hostia capiat.

### *De Altarium ornatu, Imaginibus, & cultu Reliquiarum Sanctorum.*

#### C A P U T XVI.

**A**ltaria decenti ornatu, quantum fieri potest, exculca & nitida sint,

& ante omnia salutiferæ Crucis signo condecorata, ac pari studio Ecclesiæ ipsæ, sicut decet domum Dei, ab omni situ, & squalore vindicentur, puræque, ac mundæ conserventur.

Si quæ fuerint in Ecclesiis imagines vetustate, aut alias indecoræ, & offensionem præbentes, eæ debito modo tollantur.

Ne (\*) vero in cultu Reliquiarum Sanctorum, quæ in aliquibus Dicecesis nostræ Ecclesiis reconditæ reperiuntur, abusus ullus oriatur, vel minus decenter custodiantur; mandamus, illas per Sacerdotes, quorum curæ sub inventario authentico committantur, diligenter & honorifice in loco sacro, & sub diligenti clavium custodia in capitulis, vel pyxidibus, se a manu laica contrectentur, conservari, & non nisi cum reverentia ostendi, in visitationibus vero ordinariis eas diligenter recenseri volumus.

### *De Sacramento Pœnitentiæ.*

#### C A P U T XVII.

**C**um Sacramento Pœnitentiæ, lapsis post Baptismum, beneficium Mortis Christi applicetur, alia tamen ratione, quam in Baptismo: Parochi, & alii, curam animarum exercentes, sæpius per annum, præcipue vero tempore Quadragesimæ diligenter populo explicabunt saluberrimi hujus, & maxime necessarij Sacramenti virtutem & efficaciam.

In primis vero docebunt, quid ab illis, qui a suscepta semel gratia excidentes, peccatorum sordibus Spiritum Sanctum contristaverunt, requiratur. Quod ut efficacius præstare possint Parochi, habeant in promptu Sacri Concilii Tridentini de Sacramento Pœnitentiæ & justificatione impii doctrinam, meditentur etiam diligenter, quæ in Catechismo ad Parochos de his traduntur. Quibus omnibus adhibeant probiores Summas, illos Auctores, qui dilucide, pie & erudite de Sacramento Pœnitentiæ, ejusque partibus tractant: illud præcipue intendentes; ut cum timore, & tremore discant fideles recogitare

F f f 3

(\*) Cap. 2. de Reliq. & vener. Sanct. C. Corpora. de Consecr. Dist. 1.



gitare dies suos in amaritudine animæ suæ: quo excitati, Dei miserantis auxilio, per veram contritionem, integram confessionem (qua distincte & sigillatim peccata sua enumerent, & in specie recenseant) & operis satisfactionem, possint pervenire ad eam gratiam, quæ ex Dei institutione, Sancto hoc Sacramento, administratur.

Quapropter primis statim diebus Quadragesimæ publicabunt Capitulum: *Omnis utriusque sexus, &c.* (\*), populumque monebunt, ut tempestive se præparet ad confessionem.

Habeant casus Episcopo reservatos: item Bullam in Cæna Domini, ut si qui eos adeunt, hujusmodi casibus irretiti, sciant eos cum charitate, & opportunis monitionibus, consilio etiam, & auxilio, ad illos dirigere, qui facultatem habent tales absolvendi, in quo magna circumspèctione curabunt, ne aliis innotescat, tales reservatis casibus esse illaqueatos.

Si qui rationabili causa petunt a propriis Parochis licentiam alteri Sacerdoti confitendi, ea non gravate concedatur; ita tamen, ut probato Sacerdoti confiteatur, ab eoque fidem habeant in scriptis de confessione facta.

Et quia nonnunquam contingit, aliquos a proprio Parocho absolutionem Sacramentalem non obtinere, si causæ negatæ absolutionis sunt manifestæ, puta contractuum damnatorum, vel concubinatorum, vel quævis alia Canonica; tunc nullus alius Sacerdos secularis, aut Regularis, tales absolvat, ne sub prætextu quidem Jubilæi quantumvis ampli, cum nullæ facultates illi suffragentur, qui absque debita satisfactione prætendunt informi confessione effugere pœnas Cap. *Omnis utriusque sexus*.

Et quia difficillimum est, delicta intelligere, & pœnitentium animos, tot & tam diversis peccatorum involucribus involutos, fructuose tractare; Confessarii ad audiendas confessiones approbati, diligenter & attente considerabunt casus difficiliiores, ut sunt, qui ab usurariis, & aliis illicitis, & injustis

contractibus: item a materia restitutionum, censurarum Ecclesiasticarum, & similibus pendent: quos si de sua peritia, & scientia diffidentes, evolvere non poterunt, alios peritiores, & magis expertos consulant.

Quapropter injungimus etiam Decanis foraneis, ut aliquando per annum Sacerdotes congregent, & si quid obscurum aut difficile occurreret circa casus conscientiarum, inter se conferant, & si necessarium videbitur, ad Nos, vel Vicarium nostrum Generalem referant.

Et quia Sacerdotes vice Dei Salvatoris nostri, hoc fori conscientiarum judicium exercent; meminerint, sibi inevitabilem impositam esse necessitatem, ut vitæ, & morum integritate muneri tam sublimi respondeant; proinde in primis Dei auxilio se se exhibeant ut Ministros Christi, in patientia, & charitate.

In audiendis confessionibus eam adhibeant gravitatem, quæ Divinum hoc Tribunal decet.

Non nisi in Ecclesia confessiones audiant, exceptis casibus necessitatis. Sint induiti cotta & stola, sedentesque audiant confitentes.

Mulieres tantummodo clara luce (nisi gravis causa excuset) audiant, idque in loco patente, & in sedibus confessionalibus, ad hoc deputatis.

Et quia experientia docet, multos salubrius confiteri, si animi eorum apposite, & cum charitate tractentur; ideo secundum necessitatem locorum, temporum, & personarum, Confessarii advertant ad ea peccata, quibus confitentes magis obnoxios conspiciunt, ac quanta possunt diligentia, prudentia, & charitate, nunc mansuetudine, & commiseratione, nunc etiam (si id necessitas postulabit) salutare cum rigore, quærant animarum lucrum, & pœnitentium salutem.

Proinde curabunt, ut ipsi pœnitentes sinceram eorum erga se charitatem agnoscentes, vulnera animarum, & angustias conscientiarum liberius, & fidelius detegant.

Et

(\*) Cap. de Pœn. & Remiss. peccat.

Et quia non desunt, qui arbitrentur se satisfacere præcepto & necessitati Sacramentalis confessionis, per quandam generalem confessionem; Parochi & Concionatores, ubi id maxime necessitas postulat, monebunt de integræ confessionis partibus, tum præcipue, de ipsa peccatorum, & circumstantiarum eorundem necessaria enumeratione: ac propterea Parochi non admittant pœnitentes catervatim, videantque, ut tanta distantia a confitente cæteri absint, ut quæ dicuntur tam a pœnitente, quam Sacerdote, a circumstantibus audiri non possint. Et populum suum moneant, ut tempestive ad confitendum accedant, nec ad ultimos Quadragesimæ dies differant.

Non raro etiam contingit, ut adversa valetudine laborantes, majorem curam gerant corporis, atque exteriorum bonorum, quam ipsius animæ. Ut igitur eorundem imbecillitati consulatur, serio monendos esse duximus Medicinæ Professores, ut cum primum ad ægrotos vocati fuerint, omni studio eos inducere nitantur, ne animæ minus, quam corporis salutem quaerant: quod futurum est peccatorum sincera confessione, & Eucharistiæ sumptione: Nam & hæc ad sanitatem corporalem recuperandam, via est valde expedita. Quod quidem si infirmi facere negligant; Nos inhærentes *Constitutioni fel. rec. PII V.* quæ incipit: *Supra gregem Dominicum*, &c. Omnibus & singulis Medicis nostræ Diœcesis mandamus, ut post secundum diem (nisi Confessarius ægrotto ex rationabili causa, longius ad confitendum spatium concesserit) infirmum amplius non visitent, donec peccata sua sit confessus, & Sacram Eucharistiam sumpserit. Alioquin pœnas in supra dicta Bulla contentas, ipso facto Medici ipsi incurrant.

Vetamus autem sub interminatione Divini Judicii, ne ullus Sacerdos tam regularis, quam sæcularis, terminos Parochiarum, qui a Majoribus nostris, aut a Nobis sunt constituti, transgredi (sola necessitatis causa excepta) & alienæ curæ subiectos, ad

confessionem admittere, aut alia Sacramenta administrare præsumat, nisi desuper proprii Parochi petita licentia. (\*)

*De Examine eorum, qui ad audiendas Confessiones deputantur.*

C A P U T XVIII.

**C**oncilium *Tridentinum Sess. XXIII. Cap. XV.* prohibet, ne ullus Sacerdos, etiam Regularis, possit sæcularium, nec Sacerdotum quidem confessionem audire, nec ad id idoneus reputari, nisi aut Parochialem Ecclesiam regat, aut ab Episcopo per examen (si illi videbitur esse necessarium) aut alias idoneus judicetur, & approbationem, quæ gratis danda est, obtinuerit. Extat præterea *Constitutio PII Quinti Anno M.D.LXXI.* edita, quæ incipit: *Romani Pontificis Providentia* &c. qua declarat loco citato Concilii, comprehendere etiam Regulares mendicantes, & consequenter jubet, omnes hoc Episcoporum examen subire.

Quocirca Nos etiam gravibus scandalis, quæ ex illorum aut ignorantia, aut negligentia oriuntur, qui se se audiendis confessionibus ingerunt, occurrere volentes: Statuimus, & vetamus sub pœna excommunicationis, ne ullus Sacerdos tam sæcularis, quam Regularis, beneficium curatum non obtinens, audiendis confessionibus se se immisceat, nisi primo a Nobis, vel Vicario nostro fuerit approbatus.

Et ut fructuose hæc audiendarum confessionum facultas iis tantum impertiatur, qui possint debito modo animarum languoribus, salutaris pœnitentiæ medicamentis succurrere, admonemus omnes, ad audiendas confessiones approbatos, nec non illos, qui ad hoc munus destinantur, aut aspirant, ut diligenter Catechismum Romanum, & approbatas Summas perlegant, multiplices conscientiæ casus attente considerent, se seque ita, Domino juvante, præparent, ac disponant, ut possint cum spiritali animarum lucro hoc Dei Tribunal exercere.

Volu-

(\*) Trid. Sess. XIV. Cap. VII.

Volumus etiam, ut qui audientium Confessionum facultatem requirunt (nisi sint ejus doctrinæ, & experientię, ut examini subjiciendi non videantur) diligenter interrogentur de forma absolutionis; de peccatorum differentiis, & circumstantiis; de excommunicationibus, irregularitatibus, de casibus, reservatis, de satisfactionibus, pœnitentiis, & aliis, quæ necessario hoc conscientię judicium exercentes, scire debent.

Quod si ex responsionibus apparuerit, aliquem Catechismum Romanum, vel non legisse, vel non percepisse, nec studium adhibuisse, ut ex lectione, & meditatione probatarum Summarum, aliorumque piorum Tractatum potuerit instrui, ad hoc munus non indigne tractandum; is omni respectu postposito, repellatur, neque prius admittatur, quam constiterit, eum tantum profecisse, quantum muneris hujus recte exequendi ratio ex postulat.

### *De Sacramento Extremæ Unionis.*

#### C A P U T XIX.

**P**arochi congruo tempore fidelibus hujus Sacramenti virtutem & efficaciam explicabunt, illosque monebunt, ut procurent, illud infirmis in tempore adhiberi, quo percipientes, quæ circa ipsos hoc extremo pietatis officio aguntur, intelligant, se hujus Sacramenti gratia munitos, ex hac mortali vita expeditiorem viam ad Cœlum habere.

Ipsos infirmos verbis placidis, & piis erigent in spem exuberantis Misericordiæ Dei; illos exhortantes, ut hoc Sacramentum ea devotione suscipiant, ut & corporis & animæ salutem Benignissimæ Dei voluntati resignent. Hæc autem, & alia his accommodata, Parochis abunde suppeditabit diligens lectio Catechismi Romani.

Quod si Regularis ad alicujus infirmi Confessionem audiendam vocatus fuerit, is, si periculum mortis infirmi imminere cognoverit; moneat adstantes, ut tempestive Parochum de lan-

guentis periculo certificent. Si vero probabiliter possit præsumere, ipsos id in tempore fortitan non facturos; ipsemet Parochum adeat, ne ex ignorantia periculi contingat, infirmum absque Extremæ Unionis solatio decedere.

Atque ut hoc Sacramentum in debita reverentia habeatur, statuimus, ut Sacrum Oleum in tuto & honesto loco, & vasculo argenteo, vel stanneo, mundo & decenti, ab aliis Sacrorum Oleorum vasculis distincto, honorifice servetur, & qua decet reverentia, deferatur.

In cæteris ad Ritualis nostri præscriptum, & cæremonias Ministri recurrant.

### *De Sacramento Ordinis.*

#### C A P U T XX.

**P**arochi, & alii omnes, quibus Verbi Dei populo annunciandi cura commissa est, doceant juxta *Sacri Concilii Tridentini* præceptum, JESUM CHRISTUM salutis nostræ Auctorem, ut dilectæ Sponsæ suæ Ecclesiæ visibile reliquit Sacrificium, sic etiam visibile instituisse Sacerdotium.

Ac propterea populum diligenter monebunt, ut spirituales hanc potestatem non hominum meritis, aut conditione metiantur, sed potius in ipsis Ministris, Dei ministerium venerantes, omnibus tam Sacerdotibus, quam iis, qui in aliis Ordinibus Ecclesiæ (quibus quasi gradibus ad Sacerdotium ascenditur) constituti sunt, debitam reverentiam exhibeant. Et quia non omnes Sacerdotes pari sunt potestate, ratione jurisdictionis tam fori interioris, quam exterioris; Ideo moneantur populi, ut suis propriis Parochis, quibus cura salutis animarum ipsorum est commissa, non solum reverentiam, sed & obedientiam exhibeant, ipsorumque monita libenter suscipiant. Quod multo idem magis locum habet in consideratione Episcopalis dignitatis, cui ultra proprias functiones Pontificales, ratione plenariæ potestatis jurisdictionis in utroque foro; competit alios graviores casus, prout regiminis ratio exigit.



exigit, reservare, aliaque ordinare, & statuere, ad quæ fideles omnes Diocesani obligantur, & in quibus inferiores Sacerdotes, etiam Curati, se se ingerere non possunt. Unde monendi sunt populi, ut Episcopi sui constitutiones, ordinationes, reservationes, edicta, interdicta, & excommunicationes venerentur, solciteque ad illum recurrant in iis, quæ ipsius auctoritati reservata cognoverint.

Quod item longe magis in his observandum, quæ Summo Pontifici Romano noverint reservata.

In summa docebunt, in Dei Ecclesia (quæ est ut castrorum acies ordinata) Divina institutione differentibus functionibus, & potestatibus, sub uno in terris Christi Vicario, omnia esse ordinate disposita, in opus ministerii, ad consummationem Sanctorum.

Præcipimus autem Parochis, ut quotiescunque intelligent, ordinationes esse habendas (quod per edictum illis innotescet) id populo, ubi aliqui fuerint ordinandi, annuntient, atque hortentur, ut Deum orent, quo in tanti ministerii partem ii tantum assumantur, qui & vitæ exemplo, & doctrina saluari populo præluere possint.

Edictum, in quo ordinandorum nomina continebuntur, ita promulgabunt, ut de Sacramenti dignitate, & utilitate, aliqua præmittant: moneant etiam omnes, ut si quid habent adversus aliquem ex ordinandis, ob quod tanquam indignus repelli possit, aut alias noverint, aliquo impedimento irretitum, id secreto, omni odio, ac passione sepositis, ipsi Parocho denuncient: quod si causa subsit, cur Parocho id forte aperire nolint, Vicario nostro Generali, vel Decano rurali significant.

Parochi autem ipsi sub Divini iudicii interminatione, si quid intellexerint, aut noverint de promovendis, quo indigni possint judicari, id tempestive denuncient, omni personarum postposito respectu.

Observent etiam suæ Parochiæ pueros, & alios, qui ad Clericalem statum, & ordinem aspirant; illosque ex charitate salutaribus monitis diri-

gant, & quantum possunt, juvent, ac parentes moneant, ut si filios suos cupiunt Clericali statui adscribi, eorum exactiorem tam in literarum, quam morum disciplina curam habeant.

### *De observandis in collatione Ordinum.*

#### C A P U T XXI.

Cum disciplina Ecclesiastica nulla re magis labefactetur, quam cum indigni promoventur ad Clericalem statum, & Doctor gentium moneat, manus nemini cito imponendas esse; Nos, ut ea adhibeatur diligentia in Ordinum collatione, quam rei ipsius gravitas postulat, monemus omnes, & quoscunque Diocesis nostræ Clericos in minoribus Ordinibus constitutos, qui ad majores aspirant, ut juxta Sacri Concilii Tridentini determinationem *Seff. XXIII. Cap. V.* se se per mensem ante ordinationem, Nobis, aut Vicario nostro, nec non Archidiacono præsentent; quo Parocho, aut cui magis expedire videbitur, possit committi inquisitio de natalibus, ætate, moribus, & vita: neque ullus præsentetur, aut admittatur ad ordinationem, qui literas testimoniales, inquisitionem, juxta nostram, vel Vicarii nostri commissionem factam continentes, non exhibuerit, ad quod Archidiaconus pro muneris sui ratione, diligenter advertat.

Parochi (si inquisitione diligenter facta, nullus quicquam opponet) inquisitionem ipsam obsignatam Nobis, vel Vicario fideliter mittant, vel ipsi ordinandi deferant.

Præsentatis autem omnibus, qui ordinari intendunt, præfigetur certus dies, quo ad examinationem faciendam, tempestive compareant.

Curet autem Archidiaconus, ut in ipsa examinatione ea omnia diligenter observentur, quæ Sacrum Conc. *Trid.* statuit *Seff. XXIII. Cap. XI. XII. XIII. & XIV.*

Et quia in Ecclesiæ Ministrorum ordinatione, nihil aliud attendi debet, quam ipsius Ecclesiæ utilitas, ante collationem Ordinum magna est adhibenda cautio in examine, maxime eorum,

G g g

qui

qui ad Sacros Ordines assumuntur; an videlicet illa intelligant, & sciant, quæ ad Ordinem illum exercendum requiruntur. Et in primis, an Breviarii, & Missalis ipsius Rubricas reformatas norint, & quæ ulterius hac de re Cærimoniale continet, & docet.

### *De Sacramento Matrimonii.*

#### C A P U T XXII.

**P**arochi opportunis occasionibus de Sacramento Matrimonii ea docebunt juxta Sacri (\*) *Concilii Trid.* Decreta, quæ fideles scire tenentur. Utque Sacramentum hoc in nostra hac Dicecesi in debita veneratione habeatur, præcipimus Parochis, ut quoties necessarium duxerint, Decretum ipsius Concilii *de Matrim. Sess. XXIV. C. I.* publicent & explicent: Tum vero exunte interdicti tempore, videlicet, Dominica præcedenti Epiphaniam Domini, & secundo vel tertio Festo Paschatis populum diligenter moneant, ut accurate observent, quæ de Sacramento Matrimonii sunt constituta, & uti Sancti hujus Sacramenti dignitas postulat, cum omni honestate, in timore Domini Matrimonia rite & legitime contrahant. Non solum a clandestinis, & invalidis Matrimoniis, sed etiam a clanculariis, & furtivis promissionibus & pactis de contrahendo abstineant.

Quod si Parochi, fama, aut aliis argumentis cognoverint, istis viis rudem, & simplicem juventutem circumveniri; parentes, & eos, in quorum potestate sunt, admoneant, ut caute perichitantium pudori & famæ consulant.

Ut vero hac in re audacia quorundam debite coerceatur: si qui occultis, & dolosis promissionibus suæ cupiditati viam aperire tentaverint, & a Parochis moniti, eas promissiones legitimis solemnitatibus Matrimonio rite contracto stabilire detrectaverint; hos Nobis, vel Vicario nostro Parochi ipsi denuntient ad hoc, ut contra ipsos, tanquam pudoris, & honoris circumventores, & qui impie, & impudenter venerando Matrimonii nomine abutun-

tur (reservata parti actione) juxta Canonum dispositionem, pœnis tam pecuniariis, quam etiam carceris, & banni, prout rei, & personarum qualitas postulabit, procedatur.

Denunciationes super contrahendo Matrimonio non fiant, nisi prius certus sit Parochus de consensu contrahentium.

Si contrahentes fuerint diversarum Parochiarum, non deveniatur ad ipsum Matrimonium, nisi Parochus, ubi solemnizandum erit, certior sit factus ab alio Parocho de publicationibus etiam ab illo jam factis, & quod nullum sciatur legitimum impedimentum.

Interdicti tempore nullus Parochus Matrimonium absque speciali nostra, vel Vicarii nostri licentia, sub pœna viginti florenorum, ad opus pium arbitrio nostro applicandorum, audeat solemnizare.

Qui aliquod sciverint impedimentum legitimum, illud Parocho tempestive denuntient, sub pœna mortalis peccati, aliisque pro personarum, & facti qualitate nostro arbitrio, vel Vicarii nostri infligendis.

Impedimentum inter se extare scientes, nullo modo sub spe dispensationis obtinendæ contrahant, sed prius dispensationem obtinere curent.

Si scientes impedimentum, de facto contraxerint, pœnam decem; quod si etiam ausi fuerint consummare, viginti florenorum ad opus pium nostro arbitrio applicandam incurrant, ultra alias pœnas, & pœnitentias, juxta scandali, & personarum qualitatem infligendas.

Si Sacerdos sciens impedimentum, solemnizare Matrimonium ausus fuerit; præter pœnam suspensionis a Sacris Canonibus constitutam, multam quinquaginta florenorum, nostro arbitrio applicandam, incurrat.

In Sponsalibus, Parochi moneant contrahentes, mulieres præsertim, per ipsa verba de futuro non contrahi tunc Matrimonium, sed obligari tantum ipsas partes ad contrahendum (si nullum extiterit impedimentum) forma *Concilii Tri-*

*Tri-*

(\*) Sess. XXIV. Cap. I. de Reform. Matrim.

*Tridentini* servata; ubi Parochi, quando interveniunt sponsaliorum contractui, diligenter caveant, ne verba adhibeant, quibus per consensum contrahentium ipsum Matrimonium contrahitur.

Serio etiam, ac frequenter Parochi inculcabunt, ut qui tantum per verba de futuro contraxerunt, quatenus salutem animæ suæ charam habeant, in eadem domo minime cohabitent, atque a copula carnali, donec Matrimonium legitime contractum sit, abstineant.

Parochi sedulam operam præstent, ut sponsi antequam contrahant, vel saltem triduo ante Matrimonii consummationem confiteantur, & Sanctam Communionem accipiant, juxta piam *Concilii Trid.* exhortationem.

Prohibeatur per Parochos damnable ille abusus, quo vulgus alicubi in nuptiis ad secunda vota transeuntium, vel alias polygamorum, tintinnabulis, & id genus aliis rebus importune perstreperere consuevit ad domum ipsorum sponsorum, contra Sancti hujus Sacramenti dignitatem. Et in summa ea omnia Parochi prohibeant, quæ in contrahendis matrimoniis Sacramenti reverentiam videntur imminuere, nihilque, in Ecclesiis præsertim, fieri permittant, quod indecentiam, aut petulantiam præ se ferat.

Parochus in celebrando Matrimonio, si tempus id patitur, brevi sermone aliquo, ipsius Sacramenti Sanctitatem commendet: de bonis Matrimonii, fide, prole, & Sacramento, juxta id, quod abunde Catechismus Romanus suppeditabit, sermone instituto.

Præterea Prædecessorum nostrorum Constitutionibus inhærentes, etiam sub excommunicationis pœna interdiciamus omnibus tam Clericis, quam laicis per Diœcesin nostram ubilibet constitutis, ne ullus eorum de causis matrimonialibus cognoscere, concordare, seu diffinire judicialiter præsumat, absque nostra licentia & mandato speciali.

Contra conjugatos utriusque sexus, qui nulla legitima causa, sed pro-

pria temeritate, sibi mutuo cohabitare nolunt (etiamsi a fornicatione alias abstineant) nisi infra terminum a Parcho præscriptum, ad cohabitationem redierint, arbitrariis pœnis procedi volumus. Quibus etiam obnoxios esse declaramus, qui eos fovere in domibus suis ausi fuerint.

Parochi denique sæpius per opportunitatem moneant fideles in statu matrimoniali degentes, ut maritali castitate & charitate honorabile suum conjugium comprobent. In primis vero eos diligenter monebunt, ut filios in timore Domini instituunt, ut videantur intelligere, illos ad Matrimonii bonum demum pertinere, si per rectam educationem Christianæ pietati & religioni inferantur.

### *De Festis, & diebus jejuniorum.*

#### C A P U T XXIII.

**P**RÆTER Festa, quæ ex præcepto Ecclesiæ celebranda sunt, & in quorum vigiliis (legitimo impedimento cessante) jejunandum, a cibis ex usu Ecclesiæ Catholicæ vetitis, abstinendo, ac semel tantum in die, circa meridiem cibum sumendo; in Episcopatu nostro Tridenti, solemniter ab omnibus celebrandum est Festum Divi Vigili Episcopi & Martyris gloriosi, Patroni ipsius Civitatis, ac totius Diœcesis.

Qui vero in diebus præfatis, ex præcepto Ecclesiæ celebrandis, nec non Sancti Vigili, opus servile, sine urgenti necessitate fecisse, deprehensus fuerit, præter Divinam ultionem, & amissionem animalium ac instrumentorum, quibus usus fuerit, Ecclesiæ locorum, vel alias arbitrio nostro, vel Vicarii nostri applicandorum, pœnam etiam duorum florenorum incurrat; quorum quarta cedat denuncianti, reliquæ vero tres partes fabricæ Ecclesiæ loci applicentur. Ad quam mulctam exigendam teneantur Syndici, seu Massarii Ecclesiarum, quibus fuerit applicata: habeantque exactores pro suo labore, quaternos cruciferos: & summarie, ac de plano, sine figura judicii in his procedatur.



Si qua vero inciderit ingens necessitas operis alicujus faciendi; Parochi, alique Curati, habita ratione loci, rei, temporis, & personarum, poterunt (dummodo id caute & citra scandalum fiat) dispensare; in quo ipsorum conscientiam oneramus.

Festa autem Sanctorum Sisinii, Martirii, & Alexandri Martyrum: Item Sanctæ Maxentiæ Matris Sancti Vigili, Sancti Romedii Confessoris, & Sancti Simonis innocentis Martyris, ejusdem Tridentinæ Civitatis & Diocesis Advocatorum, in Ecclesiarum Dedicationibus, & juxta piam cujusque loci consuetudinem, observanda sunt; quemadmodum Festa Sancti Martini, Catharinæ, Antonii, Mariæ Magdalænæ, Rochi, Agnetis, Gregorii, & similia.

### *De Ecclesia Cathedrali.*

#### C A P U T XXIV.

**C**UM Venerabile Cathedralis Ecclesiæ Capitulum Nobis, uti capiti, arctissime sit conjunctum, meritoque illius exemplo, & auctoritate fideles totius Diocesis plurimum moveantur: Nos Decanum, & Canonicos in Domino monemus, ut ea, qua decet eorum ordinem, gravitate, habitu, incessu, & conversatione se vere Ecclesiæ Senatum exhibeant, curentque non tantum aliis præluere observatione eorum, quibus Ecclesiasticæ dignitatis status continetur, augetur, & observatur; sed in illud etiam incumbant, ut inferior Clerus Cathedralis Ecclesiæ statuta, & ordinata circa vitam, mores, honestam cohabitationem, habitum & tonsuram, diligenter observet.

Nos quoque, quotiescunque id justitiæ ratio postulabit, officio nostro, secundum Sacrorum Canonum & *Concilii Tridentini* dispositionem, pro debita salubriter ordinatorum observantia & executione non deerimus.

Et quia assidua Canonici Residentia cum ipsius Ecclesiæ dignitate, & decore maxime est conjuncta, ac Divinus cultus ab ea plurimum pendet; Ideo eam juxta antiquam hujus Ecclesiæ consuetudinem, & *Concilii Tri-*

*dentini* præscriptum diligenter præstabunt.

Sciant autem, *Concilii* dispositione Canonicos teneri ita suam præsentiam Ecclesiæ debitis temporibus exhibere, ut quæ hebdomadatim, ex præbendarum onere incumbunt, Missas, & officia accurate præstent. Ac proinde in ordinariis sextarum feriarum Capitulis, sapius diligenter providebunt, ut propriis functionibus, & officiis omnes tam de gremio Capituli, quam Capellani, & inferiores Sacerdotes Cathedralis Ecclesiæ satisfaciant.

Videant, ut in Choro diligenter secundum Romanæ Ecclesiæ ritum, Divinæ laudes persolvantur: tum Cærimoniarum concinne, & cum dignitate observentur: & si quid temporum injuria irrepsit, quod Romanæ Ecclesiæ consuetudini non correspondeat, id emendetur.

Circa animarum curam, quæ Cathedrali Ecclesiæ conjuncta est, aut Ecclesiis ipsi Capitulo incorporatis competit, ea observentur, quæ in visitationibus, juxta Sacri *Concilii Trid.* dispositionem diffuse præscripta fuerunt: quæque in proxima futura præscribentur: idemque de Mansionariorum, & Capellanorum officio dicimus.

Et quia distributiones diebus feriatis valde sunt exiles, ordinamus, ut congruæ portionis accessione augeantur.

In collationibus, & provisionibus Canonicatum ea serventur, quæ Sacrum *Concilium Trid.* statuit, tam circa ætatem, quam alias qualitates. Serventur etiam diligenter, particularia Summorum Pontificum indulta, huic Ecclesiæ circa Canonici assumptionem concessa, in quo si se aliquæ difficultates objicient, ad S. D. N. erit pro congruo remedio, aut dispensatione recurrendum.

Et quia gravitas Collegii Canonici maxime pendet ex dignitate personarum, quæ assumuntur; decori illius maxime videtur convenire, ut in Capitulo adsit Theologus præbendatus. Ideo juxta Decretum *Concilii Tridentini Sess. V. Cap. I. de Reformatione*, ordina-

dinamus, ut prima vacatura præbenda promotio in Sacra Theologia in universali Academia conferatur. Qui tamen secundum indultorum præscriptum, illius capax sit, & cui lectionis Theologicæ munus incumbat.

Item etiam de secundo loco vacatura præbenda statuimus de Pœnitentiaro, qui qualitates habeat a Sacro Concilio requisitas, quique præbendæ secundum indulta sit capax.

Demum quando Statuta Ven. Capituli sunt maxima ex parte constata ex Synodalibus Antecessorum nostrorum Constitutionibus; Capitulum curabit, ut illa, juxta *Sacri Concilii Tridentini* dispositionem, & præsentis Constitutiones, reformentur, & ampliuntur, prout præsentium temporum ratio postulat.

Laudabilem, longævam, & præscriptam consuetudinem circa primarios fructus, a nostris Prædecessoribus Episcopis Tridentinis confirmatam: Nos etiam confirmamus, videlicet: ut omnes Beneficiati cum cura, vel sine cura, exempti, vel non exempti, primarios fructus beneficiorum, & Ecclesiarum quarumcunque, per mortem, aut permutationem, vel qualitercunque vacantium, ac toties quoties ea vacare contigerit, in collatione, seu investitura eorundem beneficiorum teneantur, ac debeant, & quilibet eorum teneatur, & debeat Massariis Ecclesiæ nostræ Cathedralis Sancti Vigili, secundum eorum taxam dare, & respondere; seu super hoc cum eis concordare. Quam consuetudinem, a nostris Antecessoribus acceptam, volumus inviolabiliter observari; omnibus exceptionibus juris & facti remotis.

Et cum Ecclesia hæc nostra Cathedralis ita nobis sit cordi, ut eam quam ornatissimam, & omnibus necessariis instructissimam esse desideremus: hortamur, & requirimus Vener. Decanum, & Canonicos ejusdem, ut officia omnia, præsertim Massariatus, personis integritate, fide, & industria præstantibus committant, quæ non per substitutos, sed per (\*) ipsos ea administrant.

## De Visitatione Ecclesiæ Sancti Vigili.

### CAPUT XXV.

**A**Ntecessorum nostrorum Decretum sequentes, mandamus omnibus & singulis Plebanis, & Rectoribus Ecclesiarum, qui annuatim Ecclesiam matricem Sancti Vigili cum plebibus sibi commissis, visitare consueverunt, ut singulis annis, in Festivitatibus Sancti Vigili, seu in Anniversario Dedicationis, vel in Festivitatibus Paschatis Resurrectionis, aut Pentecostes, juxta morem & consuetudinem eorundem, una cum laicis utriusque sexus ad hoc aptis, uno nimirum pro qualibet domo, se Tridentum conferant, ac præsentent ad tumulum, & Altare Sancti Vigili, in signum subjectionis, & reverentiæ, sub poena decem librarum fabricæ Sancti Vigili applicanda, quam quemlibet Presbyterorum, ac etiam laicorum, huic nostro Decreto contravenientium incurrere volumus. Alii vero Plebani de mandato nostro, Parochianos suos adhortentur, ut & ipsi Ecclesiam Sancti Vigili supra dictis diebus visitent.

## De vita & honestate Clericorum.

### CAPUT XXVI.

**C**UM ad Divini cultus observationem & augmentum in primis pertineat, adscriptos Ecclesiastico Ordini cæteris vita & moribus prælucere, ac quodammodo præire: Nos CARDINALIS BERNARDI Constitutionem novantes, omnibus Clericis per Diocesim nostram ubilibet constitutis, cujuscunque gradus, vel conditionis existant, præcipimus, & mandamus, ut, qua decet in sortem Domini vocatos, gravitate, modestia, & inculpabili conversatione (quemadmodum etiam Sacrum *Tridentinum Concilium* pie requirit) irreprehensibiles se se exhibeant.

Abstinencia a comestationibus, computationibus, & intempestivis conviviis, choreis, lusibus, spectaculis,

G g g 3

taber-

(\*) forte: se ipsos.

tabernis, illicitis venationibus, usura, mercatura, & aliis negotiis, & exercitiis sæcularibus, quibus Sanctitas Clericali statui debita contaminatur: Armorum etiam deportatione, rixis, & aliis, de quibus Sacri Canones, præsertim *Trid. Concilium* salubriter & copiose statuit.

Et quia per decentiam exterioris habitus, compositi animi affectus potissimum declarantur; ordinamus, ut omnes Clerici coronam gerant decentem & conspicuam juxta cujusque Ordinis gradum. Barbas vero tales gerant, ne videantur partium quarundam rasura, militares homines imitari; vel plane abrasas, vel circumtonsas gerant, præcipue vero pilorum præcisione superiora labra appareant.

A sericis præsertim pretiosioribus abstineant: in Ecclesiis & in publico vestes gerant talares nigras, juxta hujus Episcopatus consuetudinem: subtaneas habeant ad talos usque demissas, vel quæ genua ad minus contegant; vel saltem superiores vestes talares portent clausas, ita ne inhoneste pectus, ventrem, & femora ostendant.

In villis & pagis tamen pro necessitate aliquando brevioribus uti poterunt. Nunquam incedant thorace & caligis solis induti. Birreta habeant quadra, nec in Ecclesia, aut coram Episcopo utantur galero: Camisiarum collaria deferant non crispata, neque admodum elaborata, quæ lasciviam præse ferant.

Parochi, Cooperatores, & Beneficiati, quum ex obligatione fundationis Divino Officio interfunt, cottis sint induti. Quod si qui huic Constitutioni non paruerint, contra eos procedatur, juxta Sacri *Concilii Tridentini* Decretum *Sess. XIV. Cap. VI.* cujus circa hæc tenor talis est:

"Propterea omnes Ecclesiasticæ personæ quantumcumque exemptæ, quæ aut in Sacris fuerint, aut dignitates, personatus, officia, aut beneficia quæ liacumque Ecclesiastica obrinuerint, si postquam ab Episcopo suo etiam per edictum publicum moniti fuerint, honestum habitum Clericalem, illorum ordini, & dignitati congruen-

tem, & juxta ipsius Episcopi ordinationem, & mandatum non detulerint, per suspensionem ab Ordinibus, ac officio, & beneficio, ac fructibus, redditibus & proventibus ipsorum beneficiorum: nec non (si semel correpti denuo in hoc deliquerint) etiam per privationem officiorum, & beneficiorum hujusmodi coerceri possint, & debeant, secundum Constitutionem CLEMENTIS V. in Concilio Viennensi editam, quæ incipit: *Quoniam* innovando, & ampliando."

In minoribus Ordinibus constituti, sciant maxime decere, ut ad minus omnibus Solennitatibus, & Festis præcipuis Beatæ Virginis, Sacram sumant Eucharistiam, quod si non faciant, tales ad altiores Ordines non facile admittantur.

### *De Clericorum & mulierum suspecta, & probibita cohabitatione.*

#### C A P U T XXVII.

Cum deceat Clericos non solum malo, & culpa, sed etiam omni culpæ suspicionem vacare, prohibemus eisdem, omnem suspectam mulierum cohabitationem: statuentes, ut nullus Sacerdos, sive Clericus de cætero mulieres apud se habere, & tenere audeat, præter matrem, sororem, amitam, aut aviam; vel extraneam, quæ excedat annum quadragesimum quintum, eamque bonæ famæ, sub pœna florenorum decem, quotiescunque contra factum fuerit, in pios usus applicandorum.

Declarantes etiam illarum cohabitationem esse pro suspecta habendam, quæ alias in eorundem, aut aliorum concubinato fuerint, licet ob senium, de præsentem videantur carere suspicionem; Item & illas suspectas dicimus, quæ de lenocinio diffamata existant.

Quantopere vero detestandus sit concubinatus in his, qui Divinis officiis, ac ministeriis sunt adscripti, nullis nos verbis aptius explicare posse arbitramur, quam quibus utitur Sacrum *Concilium Tridentinum*, cujus hac de re Decretum ideo de verbo ad verbum his



his nostris Constitutionibus inferi volumus, ut omnes intelligant, Nos juxta illius præscriptum, contra quoscunque, nullo personarum habito respectu, ut officii nostri ratio exigit, processuros: cujus tenor est:

Quam turpe, ac Clericorum nomine, qui se Divino cultui addixerunt, sit indignum, in impudicitie sordibus, & concubinato versari, &c. *Vide Tomo nostro VI. pag. 930.*

*De ebrietate Clericis vitanda.*

C A P U T XXVIII.

**Q**uia etiam in Clericali ordine inveniuntur aliqui ita vino dediti, ut limites temperantiae, & honestatis transgredientes, ipsos seculares, alioquin erga religionem bene affectos, sua temulentia ita offendant, ut debitum Ordini Ecclesiastico reverentiae affectum exuant; Nos huic malo occurrere volentes, Clericos cujuscunque ordinis serio monemus, ut ab hujusmodi vitio sibi caveant: Statuentes, & ordinantes, quod si quis Sacerdos, aut Clericus in Sacris constitutus, post debitam admonitionem (quæ etiam auctoritate præsentis Decreti facta censeatur) ab ebrietate, nec non tabernis, & diversoriis (excepta causa necessitatis) aliisque intempestivis conviviis, & computationibus non abstinuerit; prima vice, qua in aliquo præmissorum deliquerit, ultra alias poenas delicti, si quod ibi per eum committi contigerit, poena decem librarum mulctetur, fabricæ Ecclesiæ, cui inservit, pro duabus tertiis, & alia tertia parte denunciatori etiam secreto, applicanda. Si secundo deliquerit, mulcta duplicetur, ac jejunet semel in pane, & aqua sub reatu peccati mortalis. Si tertio, mulcta & jejunium triplicentur. Si vero ulterius in hoc vitio infortuerit, tanquam incorrigibilis, graviore poena, etiam privationis officii, vel beneficii, nostro, vel Vicarii arbitrio puniatur. Verum si Clericus, Sacro Ordine non initiatus, vel beneficium non obtinens, in præmissis, vel aliquo præmissorum deliquerit; poenas vel mulctas per Nos, vel Vicarium nostrum arbitrandas, se noverit incursum:

Quod si his modis correpti tales se se non correxerint, vel ob solum hoc ebrietatis crimen rejiciantur, quotiescunque se examinandos, vel suscipiendorum Ordinum, vel concursus ad beneficium obtinendum occasione, præsentaverint.

Volentes insuper, & serio mandantes, quod in quolibet casuum præmissorum, tam ex mero officio, quam alio quocumque modo, Vicario nostro benevise, contra transgressores summarie & de plano procedatur.

*De Horis Canonicis dicendis.*

C A P U T XXIX.

**A**necessorum nostrorum vestigiis inhærentes, statuimus, & ordinamus, ut Rectores tam Collegiarum, quam Parochialium Ecclesiarum, procurent in Ecclesiis suis haberi libros Horarum, secundum usum Ecclesiæ Romanæ, juxta cujus stylum, officium rite peragi possit; idque integre, distincte, intelligibiliter, atque attente, tanquam cum Deo colloquentes, persolvant.

Qui vero Horas Canonicas, aut domi, aut foris, seu in itinere, absque legitimo impedimento omiserint, ultra peccatum, quod incurrunt, poenis Constitutionis PII V. quam hic jungendam duximus, subjaceant, quæ sic habet:

" Ex proximo Lateranensi Concilio pia, & salubris Sanctio emanavit,  
" ut quicumque habens Beneficium Ecclesiasticum cum cura, vel sine cura,  
" si post sex menses, quam illud obtinuerit, Divinum Officium, legitimo cessante impedimento, non dixerit, beneficiorum suorum fructus pro rata omissionis, & temporis, suos non faciat; sed eos, tanquam injuste perceptos, in fabricas ipsorum beneficiorum, vel pauperum eleemosynas erogare teneatur. Verumtamen ne multorum animi suspensi teneantur, cujusmodi ratæ prædictæ ratio sit habenda, Nos huic rei evidentius, atque expressius providere volentes, statuimus, ut qui Horas omnes Canonicas uno, vel pluribus diebus intermi-

" termiserit, omnes beneficii, seu be-  
 " neficiorum suorum fructus, qui illi,  
 " vel illis diebus responderent, si quo-  
 " tidie dividerentur : Qui vero Matu-  
 " tinum tantum, dimidiam : qui cæte-  
 " ras omnes Horas, aliam dimidiam :  
 " qui harum singulas, sextam partem  
 " fructuum illius diei amittat.

" Item, si aliquis Choro addictus,  
 " omnibus Horis Canonicis, cum aliis  
 " præsens adsit, non tamen recitans;  
 " fructusque & distributiones sola præ-  
 " sentia, juxta Statuta, consuetudinem,  
 " fundationem, vel forte aliter assig-  
 " natas, sibi lucrificasse prætendant :  
 " is etiam præter fructuum, & distri-  
 " butionum amissionem (sicut ille, qui  
 " primis sex mensibus officium non  
 " dixerit) nisi legitimum impedimen-  
 " tum ipsum excusaverit; grave pec-  
 " catum se intelligat admisisse.

" Declarantes præstimonias, præ-  
 " stimoniales portiones, ac qualiacun-  
 " que alia beneficia, etiam nullum om-  
 " nino servitium habentia obtinentes,  
 " cum prædictis pariter contineri.

" At quicumque pensionem, fru-  
 " ctus, aut alias res Ecclesiasticas, ut  
 " Clericus percipit, eum modo prædi-  
 " cto ad dicendum Officium parvum  
 " Beatæ Mariæ Virginis, decernimus  
 " obligatum, & pensionum, fructuum,  
 " rerumque ipsarum amissioni obno-  
 " xium."

### De Seminario.

#### C A P U T XXX.

**S**eminarium ex sententia Sacri Con-  
 cili (\*) Tridentini stabilire cupien-  
 tes, ultra Prioratum Sanctæ Crucis extra  
 muros Tridenti, & alia, jam ante ad  
 ipsum Seminarium destinata; eidem in  
 præsentem Synodo, infra scripta beneficia,  
 una cum oneribus suis, in perpetuum  
 applicamus, & incorporamus, sine præ-  
 judicio tamen in præsentia possiden-  
 tium.

Videlicet:

Hospitale, seu Prioratum Campellii,  
 cum suis annexis.

Prioratum S. Thomæ, Ripæ, & Archi.

Hospitale, seu Prioratum Sancti Hila-  
 rii Roboreti.

Prioratum Sanctæ Margaritæ, vallis  
 Lagarina.

Hospitale, seu Prioratum Sancti Mar-  
 tini Tridentini.

Prioratum Sancti Thomæ, in plebe Ro-  
 mani, vallis Annania.

Prioratum, seu Capellam Sanctæ Bri-  
 gidæ, in plebe Maleti, vallis Solis.

Prioratum in Tonalo.

Beneficium Sancti Danielis, plebis Fla-  
 vomi.

Beneficium Sancti Galli, in plebe Revodi.

Beneficium Sancti Lazari, ibidem.

Beneficium, seu Clericatum in Eccle-  
 sia Parochiali Leudri.

Beneficium Sancti Jacobi de Airono,  
 plebis Thioni.

Ut autem interea temporis (videlicet  
 donec præfata beneficia cum effectu  
 Seminario per vacationem applicabun-  
 tur) illud sustentari queat; Nos tem-  
 porarie providentes, juxta ejusdem  
 Concilii præscriptum, deputamus Ven.  
 & Nob. Hieronymum a Roccabruna,  
 Canonicum & Archidiaconum, nec  
 non Hon. Presbyterum Pompeum Ar-  
 noldum, Beneficiatum Ecclesiæ Sancti  
 Vigili, Oeconomum nostrum, qui pro  
 parte nostra, pensatis necessariis sump-  
 tibus, una cum Ven. Nob. Sylvio de  
 Prato, Canonico & Vicario nostro Ge-  
 nerali, ac Hon. Presbytero Bartholo-  
 mæo Bonetto, Deputatis pro parte Ca-  
 pituli, & Cleri Civitatis, definiant por-  
 tionem ex mensa Episcopali, & Capi-  
 tuli, ac fructibus quorumcunque be-  
 neficiorum nostræ Diocesis detrahen-  
 dam, & eidem Seminario (ut præmit-  
 titur) medio hujusmodi tempore præ-  
 standam.

### De Collatione Beneficiorum, exa- mine, & Examinatoribus.

#### C A P U T XXXI.

**U**T animarum cura, quæ merito  
 ars artium a Sacris Canonibus  
 appellatur, a dignis & idoneis perso-  
 nis administretur, in collationibus, seu  
 provisionibus quorumcunque Benefi-  
 ciorum curatorum, etiam juris Patro-  
 natus,

(\*) Sess. XXIII. C. de Reform.

natus, formam Sacri Concilii Tridentini servari volumus, quæ præscribitur in Cap. XVIII. Sess. XXIV. incip. *Expedi*.

Examinatores autem, qui concurrentium sufficientiam explorent, in futurum quoque, sicut jam observatum fuit, in Synodo, aut alias, prout expediet, etiam extra Synodum subrogari volumus, servatis omnibus in eorum electione, quæ in eodem Decreto Concilii statuuntur.

Qui per Examinatorum approbationem, Beneficium Ecclesiasticum obtinuerit, si ad aliud postmodum, vel per concursum, vel aliter promoveri volet, teneatur rursus se examini subijcere, in quo tam ejus sufficientia, quam antea actæ vitæ series exploretur, maxime si a beneficio simplici ad curatum aspirabit.

Nullus illegitime natus, in Ecclesia, in qua pater beneficium obtinet, beneficium possideat; aut patri in illa serviat in Altaris ministerio: & districte servetur Constitutio Concilii Tridentini Sess. XXV. Cap. XV. de Reform. incipiens: *Ut paterna*.

*Ut obtinentes Beneficia incompatibilia de dispensationibus doceant.*

C A P U T XXXII.

**A**ntecessorum nostrorum Decreto circa Beneficia incompatibilia inhærentes, & Sacri Concilii Tridentini ordinationi satisfacere volentes; statui-  
mus, & ordinamus; ut quicumque Clerici in nostra Diœcesi plura beneficia obtinent, infra quatuor menses a publicatione præsentium in Synodo præsentia facta, immediate sequentes, de legitimis suis titulis, & compatibilitate; & si incompatibilia, de dispensationibus doceant: alioquin ex sententia Decreti Tridentini (\*) Concilii, juxta Constitutionem Gregorii X. in Conc. generali Lugdun. editam, quæ incipit: *Ordinari*, contra ipsos procedemus.

*De Residentia Curatorum.*

C A P U T XXXIII.

**Q**uicumque in hac Civitate ac Diœcesi nostra, beneficia obtinent,

quibus animarum cura incumbit, in iis personaliter resideant: quod qui non præstiterint, præter mortale peccatum, quod committunt, novent beneficium etiam fructus pro absentia ratione, suos se non facere, nec tuta conscientia, alia etiam declaratione non secuta, illos sibi retinere posse; tum etiam contra absentes procedendum esse juxta Tridentini Concilii determinationem Sess. XXIII. Cap. I. incip. *Cum præcepto Divino &c.* ad finem §. *Eadem omnino*.

Proinde habentes curam Ecclesiæ Parochialis, vel alterius, ab ea non discedant absque nostra, vel Vicarii nostri licentia in scriptis obtenta.

Si vero ex causa Nobis, vel Vicario nostro cognita, & approbata, alicui licentia discedendi a Parochiali fuerit concessa (quæ bimestre tempus, nisi ex gravi causa non excedat) Substitutum idoneum a Nobis, vel Vicario nostro approbandum, cum debita, & certa mercedis assignatione relinquant, ut ab eodem Concilio ordinatum est; teneanturque, qui discedendi tales obtinuerunt licentias, de redditu suo Nos, vel Vicarium nostrum quamprimum certiores facere.

Quod si ob gravem causam contigerit discessio repentina, infra sex dies curent id Nobis, vel Vicario nostro significari, nec ultra terminum a Nobis, vel Vicario nostro, aut Decano foraneo præscriptum absint.

Sed ne tum quidem Ecclesiam suam absque Sacerdote, ad Sacramenta administranda approbato, relinquant. Quod si approbatus a Nobis, vel Vicario nostro haberi non poterit, ad breve illud tempus, quo abesse contigerit, aliquem substituant Decani ruralis judicio & consensu.

Illis temporibus, quibus Sacrae Confessiones frequentantur, nullus facile, nisi statim eodem, vel ad summum sequenti die rediturus, a propria Parochia discedat.

Qui Beneficium curatum obtinuerit, si intra annum a die commissæ sibi administrationis, Sacerdotii ordinem non

(\*) Sess. VII. C. V. de Reform.

Tomus VIII. Concilior. German.



non susceperit, nulla etiam prævia monitione, beneficio se privatum intelligat, juxta *Cap. Licet Canon. & Cap. Cum in cunctis.*

*Curatis Vicarii, & Coadjutores  
quando deputandi.*

C A P U T XXXIV.

**Q**Uoniam vix provideri potest, ut non aliquando etiam ad curata Beneficia imperiti, & parum idonei irreparent, & indigni, quibus animarum cura relinquatur; Volumus, ut si qui tales in hac nostra Diocesi reperi fuerint, contra eos procedatur juxta *Decretum Concilii Tridentini Sess. XXI. Cap. VI. de Reformatione*, tenoris infra scripti, videlicet: " Quia illiterati & " imperiti Parochialium Ecclesiarum " Rectores Sacris minus apti sunt Officiis, & alii propter eorum vitæ " turpitudinem, potius destruunt, quam " ædificant; Episcopi etiam, tanquam " Apostolicæ Sedis delegati, eisdem " illiteratis, & imperitis, si alias honestæ vitæ sint, Coadjutores, aut Vicarios pro tempore deputare, parremque fructuum iisdem pro sufficienti victu assignare, vel aliter providere possint, quacunque appellatione & exceptione remota.

" Eos vero, qui turpiter & scandalose vivunt, postquam præmoniti fuerint, coerceant & castigent, & si adhuc incorrigibiles in sua nequitia perseverent, eos Beneficiis juxta Sacrorum Canonum Constitutiones, exceptione & appellatione quacunque remota, privandi facultatem habeant.

Et quia contingit aliquibus in locis, ob itinerum difficultatem & longinquitatem, ut fidelis populus ægre ad Parochiales Ecclesias pro Baptismi, & aliorum Sacramentorum susceptione, cultusque Divini frequentatione possit convenire: ob id in diversis locis, ac villis extent controversiæ & lites inter ipsos populos, ac inter populos & Parochos; ordinamus, ut in futura proxima visitatione, inspecta locorum distantia, itinerum difficultate,

plebis frequentia, & aliis circumstantiis, juxta Sacri Concilii(\*) *Tridentini* dispositionem provideatur.

*Curati subditos suos ne gravent  
in exactione Jurium Parochialium.*

C A P U T XXXV.

**U**T Parochi, & omnes curam animarum exercentes, sive in ea cooperantes, non tantum ab avaritia, ac labe Simoniaca, sed etiam ab omni hujusmodi vitiorum detestabilium suspicione, se plane illibatos servant; attente *Concilii Tridentini Decretum, de observand. & evitand. in celebrat. Miss.* meditentur. Nos autem, ut saluberrimam hanc doctrinam factis comprobent, volumus, ut suæ curæ commissos nullatenus gravent in Juribus Parochialibus, de sepulturis, & aliis spiritualibus quibuscunque, ullo modo etiam paciscendo. Sed & in specie Confessarii caveant, ne pœnitentias pecuniarias contentibus imponant, quæ in suam utilitatem quomodocunque vergere possint; sed pro qualitate contentium forsitan impositas, eorundem conscientiarum, vel in eleemosynas miserabilium personarum, vel piorum locorum erogandas, penitus relinquant.

*De Foro Ecclesiastico.*

C A P U T XXXVI.

**C**Upientes, ut in foro nostro Ecclesiastico omnia quam minimis sumptibus, brevissimoque tempore peragantur; Statuimus, ut tam in causis summariis, quam ordinariis, probatoriæ dilationes per dies continuos utrique parti communes constituantur, servando tamen, ut dilationes in ordinariis, dies viginti non excedant; & in summariis duodecim, nisi ex aliqua legitima, & rationabili causa Judici videantur longiores concedendæ: idem etiam servetur in reprobatoriis dilationibus.

In causis summam florenorum decem non excedentibus, si Clericus Clericum, vel Laicus Laicum conveniet, sum-

(\*) Sess. XXI. Cap. IV.

summarie, simpliciter, & de plano sine figura judicii, sed sola veritate rei inspecta, dirimendi, & decidendi facultatem etiam Decanis foraneis in suo Decanatu concedimus.

Advocati, Procuratores, & Notarii publice criminosi ad forum Episcopale non admittantur: admissi vero, si tales sint, etiam ex officio rejiciantur: & admittendi jurent in manibus nostris, vel Vicarii nostri, omnia se servaturos, quæ in ipsa Juramenti formula, eisdem proponenda, continebuntur.

Iidem Notarii pro mercedibus suis non recedant a *Sacri (\*) Concilii Tridentini* præscripto. Et cum ab officio decedunt, omnia instrumenta, aliasque scripturas in dicto foro a se confectas, aut in acta relatas, Vicario nostro consignent, qui diligenter curet & instet, ut mortuo aliquo eorum Notariorum, statim omnes scripturæ sub inventario consignentur, ac penes ejus officium conserventur, donec de loco idoneo Archivii provideatur.

### *De Ecclesiastica Libertate & Immunitate.*

#### C A P U T XXXVII.

**Q**Uæ Sacrum Concilium Tridentinum statuit de Ecclesiastica libertate, ea nostris etiam Constitutionibus de verbo ad verbum inferenda duximus: ut omnes gravissimum dicti Sacri Concilii judicium intelligentes, sciant, qualiter se circa personas Ecclesiasticas, earumque libertatem, & immunitatem gerere debeant.

" Cupiens Sancta Synodus Eccle-  
" siasticam disciplinam in Christiano  
" populo non solum restitui, sed etiam  
" perpetuo sanctam, rectam a quibus-  
" cunque impedimentis conservari,  
" præter ea, quæ de Ecclesiasticis per-  
" sonis constituit, sæculares quoque  
" Principes officii sui admonendos esse  
" censuit, confidens eos, ut Catholicos,  
" quos Deus Sanctæ Fidei, Ecclesiæ-  
" que protectores esse voluit, jus suum  
" Ecclesiæ restitui non tantum esse  
" concessuros; sed etiam subditos suos

" omnes ad debitam erga Clerum, Pa-  
" rochos, & superiores Ordines reve-  
" rentiam revocatuos; nec permissu-  
" ros, ut Officiales, aut inferiores Ma-  
" gistratus, Ecclesiæ, & personarum  
" Ecclesiasticarum immunitatem, Dei  
" ordinatione, & Canonicis sanctioni-  
" bus constitutam, aliquo cupiditatis  
" studio, seu inconsideratione aliqua  
" violent; sed una cum ipsis Principi-  
" bus debitam Sacris Summorum Pon-  
" tificum, & Conciliorum Constitutio-  
" nibus observantiam præstent.

" Decernit itaque, & præcipit, Sa-  
" cros Canones, & Concilia generalia  
" omnia, nec non alias Apostolicas  
" Sanctiones in favorem Ecclesiastica-  
" rum personarum, libertatis Ecclesia-  
" sticæ, & contra ejus violatores edi-  
" tas, quæ omnia præsentis etiam De-  
" creto innovat, exacte ab omnibus  
" observari debere. Proptereaque ad-  
" monet Imperatores, Reges, Respubli-  
" cas, Principes, & omnes, & singu-  
" los cujuscunque status, & dignitatis  
" extiterint, ut, quo largius bonis tem-  
" poralibus, atque in alios potestate  
" sunt ornati, eo sanctius, quæ Eccle-  
" siastici juris sunt, tanquam Dei præ-  
" cipua, ejusque patrocinio recta, ve-  
" nerentur, nec ab ullis Baronibus,  
" Domicellis, Rectoribus, aliisque Do-  
" minis temporalibus, seu Magistrati-  
" bus, maximeque Ministris ipsorum  
" Principum lædi patiantur; sed severe  
" in eos, qui illius libertatem, immu-  
" nitatem, atque jurisdictionem impe-  
" diunt, animadvertant; quibus etiam  
" ipsimet exemplo ad pietatem, Re-  
" ligionem, Ecclesiarumque protectio-  
" nem existant, imitantes anteriores  
" optimos, religiosissimosque Principes,  
" qui res Ecclesiæ suæ imprimis aucto-  
" ritate, ac munificentia auxerunt, ne-  
" dum ab aliorum injuria vindicarunt:  
" Adeoque ea in re quisque officium  
" suum sedulo præstet, quo cultus Di-  
" vinus devote exerceri, & Prælati,  
" cæterique Clerici in residentiis, &  
" officiis suis quiete, & sine impedi-  
" mentis, cum fructu, & ædificatione  
" populi permanere valeant." Hactenus Concilium Tridentinum. (\*\*)

Et

(\*) Sess. XXI. Cap. I. de Reform.

Tomus VIII. Concilior. German.

(\*\*) Sess. XXV. Cap. XX.

H h h 2

Et quoniam non raro contingit, aliquos ex diversis causis, manum Judicis sæcularis pertimescentes, ad Ecclesias, Sacraque loca confugere; ut Ecclesiastica immunitas juxta Sacros Cánones illæsa, inviolataque conserveatur, mandamus Presbyteris, atque Clericis quarumcunque Ecclesiarum, ut Nos, seu Vicarium nostrum in Spiritualibus quamprimum de confugientibus ad Ecclesias suas, certiores faciant, quo considerata personarum, locorum, factique qualitate, decerni possit, quod Sacrorum Canonum dispositioni consentaneum est. Non possit autem sæcularis potestas citra Ecclesiasticæ Superioritatis licentiam (quæ non detur, nisi in casibus a jure permissis) fugientes ad Ecclesiam inde extrahere.

*Ne Clerici ad Judicia sæcularia trabantur.*

C A P U T XXXVIII.

**Q**uia ad Ecclesiasticam libertatem imprimis pertinet, ut Clerici Ecclesiasticis, tanquam propriis Judicibus, subjiciantur: præsentī Decreto statuimus, ne quis Clericum, cujuscunque gradus sit, ad tribunal Judicis sæcularis trahere præsumat, neque Judex sæcularis suæ cognitionis officium contra eum ullatenus interponat. Si secus factum fuerit, tam actor, quam Judex sententiam excommunicationis ipso facto incurrant, nunquam ad absolutionis beneficium admittendi, donec parti læsæ de injuriis, & expensis satisfecerint, vel caverint, æstimatione, & declaratione coram Nobis, vel Judicibus nostris legitime facienda; salvis Constitutionibus aliis super hoc promulgatis.

*De Officio Decanorum Ruralium.*

C A P U T XXXIX.

**Q**uoniam Decani Rurales ideo potissimum constituuntur, ut Clericorum honestatem, & confraternitatis suæ utilitatem procurent, mandata nostra, & Vicarii nostri debite exequantur, & singula, quæ a Superioribus injunguntur, ad notitiam

confratrum suorum deducant, ipsos serio admonitos volumus, ut meminerint se in partem sollicitudinis nostræ esse vocatos. Quare eis districte præcipimus, & in vim juramenti Nobis præstiti, mandamus, ut si quos excessus sciverint, quibus Ecclesia scandalizetur, quales sunt, si quid (quod Deus avertat) circa Sacramenta, & eorum administrationem sacrilege, vel irreverenter committatur, hæresis suspicio, furtum manifestum, homicidium, incestus, concubinatus, notoria fornicatio, manifesta usura, aut alia delicta tam Clericorum, quam aliorum: præterea si Clericus excommunicatus se publice Sacris administrandis ingereret: si usuram qualitercunque exerceret: si post monitionem Decani, tabernis, aut aliis locis inhonestis, ludis publicis, comestationibus, potationibus, & aliis actibus illicitis palam se immisceret: si in habitu laicali, aut inhonesto incederet, & id genus alia, diligenter ea omnia Nos, aut Vicarium nostrum edoceant.

*De Ecclesiis, quæ sunt obnoxie Juri Patronatus, earumque Patronis, & bonis.*

C A P U T XL.

**J**uris Patronatus Ecclesia, seu Beneficio aliquo vacante, volumus, Patronum tam laicum, quam Ecclesiasticum, infra tempora a jure præscripta, præsentare; alioquin Nos juxta Sacrorum Canonum dispositionem, ea conferemus.

Prohibemus insuper, ne ullus Patronus sub prætextu juris Patronatus, vel quovis quæsito colore, quicquam occupet, seu usurpet eorum, quæ ad ipsa beneficia spectant, sed Sacerdotibus, seu Clericis, ad beneficia admittis, atque institutis, omnes proventus, res, & bona quæcunque integra relinquat: neque ausu sacrilego ex eisdem pensionem, partemve ullam reservare, vel aliam quamcunque portionem similem apponere præsumat: alioquin tam recipiens, quam dans, uti Simoniacæ labis rei, eo ipso excommunicationis pœnam incurrisse censeantur, & insu-



insuper Patronus omni suo, quod superinde habebat, jure : instituendus vero, nominationis, seu præsentationis commodo, ipso facto sit privatus.

Præterea Patroni in iis, quæ ad Sacramentorum administrationem, & Divinum Officium peragendum spectant, nullatenus se præsumantingere; neque visitationi ornamentorum Ecclesiæ, aut bonorum stabilium, seu proventuum fabricarum se se immisceant. Si quid tamen aliqua reformatione dignum animadverterint; id Nobis, aut Vicario nostro quam primum significant.

Insuper vacante quacunque hujusmodi Ecclesia, de nostro, vel Vicarii nostri, & nullatenus Patroni ordine, Vicarius constituatur idoneus, & fidelis, qui regat Ecclesiam, necessitatibus provideat, fructusque percipiat, & usque ad nostram, vel Vicarii nostri deliberationem, fideliter reservet, rationem debitam de iis redditurus.

Denique omnino prohibemus, ne quis, prætextu juris Patronatus, præsentatos Clericos, & per Nos admissos, ac institutos audeat amovere, aut in exercitio officii sui quovis modo impedire, vel alios auctoritate propria assumere, sine nostro consensu, sub pœna amissionis juris Patronatus: contra intrusum vero pœnis suspensionis a Divinis, & aliis arbitrio nostro, vel Vicarii nostri, procedi volumus.

Propterea Visitatoribus nostris mandamus, ut si quid fraudis, vel suspicionis in Bullarum recognitione, aut alias repererint, opportune juxta Sacrorum Canonum regulas providere non omittant.

*De Ecclesiis sartis tectis conservandis, & reparandis, si quæ vetustate sint collapsæ.*

#### C A P U T XLI.

**U**T Ecclesiæ sartæ tectæ custodiantur, Constitutionem *Cardinalis BERNARDI* sequentes, tectæ, ex quorum neglectu & vicio plerumque ruinarum initium contingit, per commu-

nitates sub excommunicationis, & interdicti pœnis arbitrio nostro infligendis, refici mandamus: si quæ vero de præsentis sint in nostro Episcopatu, aut futuris temporibus erunt Ecclesiæ ruinosæ, & quæ reparatione indigeant, volumus in iis restaurandis, servari Decretum *Concilii Tridentini Sess. XXI. Cap. VII. de Reform.* incip. *Cum illud quoque.* Ac proinde præcipimus, ut in proxima futura visitatione hujusmodi Ecclesiarum status, ac necessitas diligenter consideretur, eaque omnia remedia adhibeantur, quæ dicti *Concilii* Constitutione proponuntur.

*De novis Ecclesiis erigendis.*

#### C A P U T XLII.

**P**ræsentis Constitutione declaramus, ut juxta Canonicas Sanctiones nullus intra fines Parochiæ erigat, vel erigi patiatur novas Ecclesias, vel in campis icones, vel capitellos sine licentia nostra. Cum populus novitate gaudeat, & matrices Ecclesiæ talibus occasionibus fraudentur debitis honoribus, & sæpenumero hominum temeritate, falsa pro veris in his locis publicari compertum sit; volumus, & mandamus, ut Rectores Parochialium Ecclesiarum, ubi similia attentantur, ad Nos, vel Vicarium nostrum recurrant: ut cum causæ cognitione, quod cum pietatis, & servitii Divini commodo conjunctum erit, decernere possimus.

*De occupationibus Decimarum, & aliorum bonorum Ecclesiasticorum.*

#### C A P U T XLIII.

**U**sque adeo inexplebilis & cœca temporalium rerum cupido quorundam hominum animos occupat, ut nec ab iis, quæ Dei sunt, ejusque præcepto Ecclesiis, illarumque Ministris debentur, non secus ac si profana, & in nullius Dominio essent, invadendis, se contineant.

Quod cum alicubi in hac nostra Diecepsi circa Decimas, & nonnulla alia bona Ecclesiarum evenire deprehenda-

mus Constitutionem bonæ mem. *Cardinalis BERNARDI* innovando, eos, qui occupant, aut detinent bona Ecclesiæ Sancti Vigili, aut aliarum Ecclesiarum Civitatis, vel Diocesis nostræ, nisi infra spatium trium mensium a publicatione præsentis Decreti (quem terminum eis, & eorum cuilibet pro peremptorio, ac monitione Canonica assignamus) ea restituerint, in his scriptis excommunicamus, Decreto Sacri Concilii Tridentini (cujus normam in exequendo sequi volumus) inhærentes; quod propterea hic de verbo ad verbum inferendum duximus. Videlicet:

" Si quem Clericorum, vel Laico-  
 " rum, quacunque is dignitate, etiam  
 " Imperiali, aut Regali præfulgeat, in  
 " tantum malorum omnium radix, cu-  
 " piditas occupaverit, ut alicujus Ec-  
 " clesiæ, seu cujusvis Sæcularis, vel  
 " Regularis beneficii, montium piera-  
 " tis, aliorumque piorum locorum ju-  
 " risdictiones, bona, census, ac jura,  
 " etiam feudalìa, & emphyteutica, fru-  
 " ctus, emolumenta, seu quascunque  
 " obventiones, quæ in Ministrorum,  
 " & pauperum necessitates converti de-  
 " bent, per se, vel alios, vel timore  
 " incusso, seu etiam per suppositas per-  
 " sonas Clericorum, aut Laicorum, seu  
 " quacunque arte, aut quocunque quæ-  
 " sito colore, in proprios usus conver-  
 " tere, illosque usurpare præsumpse-  
 " rit, seu impedire, ne ab iis, ad quos  
 " jure pertinent, percipiantur; is ana-  
 " themati tamdiu subjaceat, quamdiu  
 " jurisdictiones, bona, res, jura, fru-  
 " ctus, & redditus, quos occupaverit,  
 " vel qui ad eum quomodocunque,  
 " etiam ex donatione suppositæ perso-  
 " næ pervenerint, Ecclesiæ, ejusque  
 " Administratori, sive Beneficiato inte-  
 " gre restituerit, ac deinde a Romano  
 " Pontifice absolutionem obtinuerit.  
 " Quod si ejusdem Ecclesiæ Patronus  
 " fuerit, etiam jure Patronatus, ultra  
 " prædictas pœnas, eo ipso privatus  
 " existat. Clericus vero, qui nefandæ  
 " fraudis & usurpationis hujusmodi fa-  
 " bricator, seu consentiens fuerit, eis-  
 " dem pœnis subjaceat, nec non qui-  
 " buscunque beneficiis privatus sit, &  
 " ad quæcunque alia beneficia inhabi-  
 " lis efficiatur, & a suorum Ordinum

" executione, etiam post integram sa-  
 " tisfactionem, & absolutionem, sui  
 " Ordinarii arbitrio suspendatur." *Ha-*  
*tenus Concilium Tridentinum.*

Pari etiam pœnæ subjicimus eos, qui sciunt tales detentores, & occupatores bonorum hujusmodi, sive feudorum, nisi infra præfatum tempus illos manifestaverint. Et si occupatores & detentores hujusmodi bona restituere neglexerint, ultra præfatas pœnas, omnibus aliis juribus, quæ ab Ecclesiis tenent, hoc nostro Decreto eos perpetuo privamus, & privatos esse decernimus. Volentes, ut hæc Constitutio ter in anno publicetur, quum major verisimiliter populi multitudo in Ecclesiis reperitur: Denunciatores autem, etiam secretos, talium occupatorum, ultra mercedem Divinam suis præmiis non frustraturi.

Statuimus item, & ordinamus, ut Beneficiati, & alii Clerici studeant indagare, si qui sint detentores bonorum Ecclesiarum, aut Decimarum, oppressores piorum locorum, & miserabilium personarum, viduarum, pupillorum, & orphanorum; & si quos repererint, illos Nobis, aut Vicario nostro in Spiritualibus notificent, ut contra eos, prout justitia postulat, procedi possit, in quo si negligentes fuerint, eorum conscientias oneramus; reservata etiam Nobis, vel Vicario nostro arbitraria punitione.

Et quia Sæcularium nonnulli interdum temeritate propria Decimas, quas omnium Dominus solvi præcepit, in totum, vel pro parte subtrahere, vel per fraudem diminutas, & vitiatas præstare non verentur, in animarum suarum grave periculum; Præcipimus cunctis Prædicatoribus & Confessoribus, tam Religiosis, quam Sæcularibus in virtute sanctæ obedientiæ, quatenus in Prædicationibus, & Confessionibus, fidelem populum studiosius moneant, & inducant, ut memores salutis animarum suarum, Decimas omnium terra nascentium, sine ulla diminutione, & fraude: personales vero secundum laudabilem consuetudinem persolvant, si pœnas damnationis æternæ voluerint evitare.

Et

Et quoniam magni momenti esse putamus, quod ultra jam superius dicta saluberrimum etiam *Concilii Trident. Decretum de Decimis*, ad fidelis populi notitiam deducatur, illud hic de verbo ad verbum subjungi volumus. Videlicet:

" Non sunt ferendi, qui variis  
" artibus Decimas Ecclesiis obvenien-  
" tes, subtrahere moliuntur, aut qui  
" ab aliis solvendas, temere occupant,  
" & in rem suam vertunt; cum Deci-  
" marum solutio debita sit Deo: & qui  
" eas dare noluerint, aut dantes im-  
" pediunt, res alienas invadunt. Præ-  
" cipit igitur Sancta Synodus omni-  
" bus cujuscunque gradus, & condi-  
" tionis sint, ad quos Decimarum so-  
" lutio spectat, ut eas, ad quas de jure  
" tenentur, in posterum Cathedrali,  
" aut quibuscunque aliis Ecclesiis, vel  
" personis, quibus legitime debentur,  
" integre persolvant. Qui vero eas  
" aut subtrahunt, aut impediunt, ex-  
" communicentur, nec ab hoc crimine,  
" nisi plena restitutione secuta, absol-  
" vantur."

Omnibus igitur tam Ecclesiasticis, quam sæcularibus Judicibus, Officialibus, & Ministris nostris serio præcipimus, quatenus gratiam nostram caram habent, ut Ecclesiasticis personis, & earum Ministris, pro ipsarum Decimarum consecutione, omnino præsto sint, auxilium eis præbendo adversus pertinaces, & quovis modo in solvendis Decimis fraudem committere attentantes.

### *De Novalibus.*

#### C A P U T XLIV.

**P**Lacuit, bon. mem. *Cardinalis BERNARDI* Decretum super Novalibus, per Nos innovatum, hic subjungere. Videlicet:

Licet Laici in Ecclesiarum Parochiis Decimas possideant ab antiquo, Novalium tamen Decimas, quæ in Parochiis ipsis insurgunt, nullo modo, seu titulo valent possidere. Præsentī itaque Constitutione decernimus, Novalia hujusmodi non ad Laicos, prætextu Decimarum, sed ad Ecclesias, sub quarum districtu crescunt, pertinere,

juri communi, ac Constitutionibus quondam bon. mem. Episcopi ALEXANDRI, ac aliorum Prædecessorum nostrorum, inhærendo, mandamus Laicis, & Novalium ipsorum detentoribus, ut ea libere Ecclesiis dimittant, sub pœnis in eisdem Constitutionibus contentis; in quibus præcipitur omnibus & singulis Plebanis nostræ Diocesis, sub excommunicationis pœna, ut postquam tales detentores legitime declarati fuerint, excommunicationis sententiam incidisse, publice diebus Dominicis, & Festivis, candelis accensis pariter & extinctis, & campanis pulsatis, excommunicati denuncientur. Quibus pœnis successores & hæredes Novalia ipsa usurpantium, pari judicio volumus subjacere.

Insuper mandamus universis & singulis colonis, & affictaliniis, qui agros convertunt in prata in fraudem, ne Decimas solvant, sub excommunicationis pœna, ut ab ejusmodi fraude desistant; sed de fructibus, etiam secundariis, quotiescunque etiam in anno nascuntur, & quibus de jure tenentur, Decimas dent, & sine aliqua diminutione persolvant.

### *De bonis Ecclesiæ non alienandis.*

#### C A P U T XLV.

**U**T bona, quæ pia fidelium devotio Ecclesiis contulit, illæsa & integra custodiantur, bon. mem. Antecessoris nostri *Cardinalis BERNARDI* Decreto inhærentes, veramus omnibus Præpositis, Prælatiis, Decanis, Prioribus, Beneficiatis, & aliis quibuscunque tam sæcularium, quam Regularium Ecclesiarum Rectoribus, ne Beneficiorum suorum bona tam immobilia (qualiacunque ea sint) quam mobilia; præsertim ad Canonice, vel Ecclesiæ ipsius usum pertinentia, citra nostrum consensum in scriptis habitum, alienare audeant; sed contra, omni studio advigilent, ne ipsorum incuria, aut culpa dissipentur, aut ab aliis usurpentur.

Prohibemus præterea omnibus antedictis, ne caducitates, & devolutiones

nes



nes bonorum Ecclesiarum, & Beneficiorum remittere, aut super his transigere, vel novas locationes perpetuas sine nostra licentia, ipsis contractuum instrumentis inferenda, concedere possint: Decernentes, hujusmodi citra nostram licentiam celebratos contractus quoscunque, licet aliis solennitatibus aliqui sint vallati, nullius esse roboris & efficaciz. Notarios autem, tales contractus scribentes, suspensionis ab officio per annum, & insuper quinque marcarum poena mulctari volumus. Mandantes, ter in anno, tempore congruenti, hanc Constitutionem per Parochos publicari.

*De bonis Ecclesiarum administrandis.*

C A P U T XLVI.

**C**Um Ecclesiarum bona in Dominio Dei sint posita, possessio eorum apud Ecclesiam, administratio vero apud Rectores; omnes Clericos, & Sacerdotes beneficiatos admonemus, & serio eis præcipimus, ut bonorum hujusmodi diligentem curam habeant, studeantque & invigilent, ne a quocquam usurpentur. Quod si vero in hoc ab aliquo impediatur, Nobis id denuncient. Et si per eorum negligentiam, Ecclesiæ passæ fuerint damnum, poenis juris, & aliis, nostro arbitrio afficiantur.

Districte prohibentes Laicis, ne de sepulturis dandis se intromittant: nec campanas, aut alia ad cultum Divinum deputata, contra voluntatem Presbyterorum, quocunque modo contrectent, sed eorum usum integrum Parochis permittant: nec in Ecclesiis, & rebus earundem quicquam propria auctoritate ipsi statuere, aut ordinare præsumant. Quod Decretum sæpius per annum in Ecclesiis publicari mandamus.

*De conficiendis Inventariis reddituum Ecclesiarum.*

C A P U T XLVII.

**N**E bona Ecclesiarum injuste occupentur, Antecessorum nostro-

rum menti inherentes, statuimus sub poena quinque florenorum, ut quilibet Beneficiarius infra annum a publicatione præsentis Constitutionis, bonorum, tam mobilium, quam immobilium Ecclesiæ, & beneficiorum suorum per Notarium publicum, Inventarium authenticum curet faciendum: in quo bonorum mobilium quantitates, & confinia accurate describantur. Quod quidem Inventarium, seu copia ejus authentica, Nobis in dicto termino præsententur, originali apud Ecclesiam, seu Beneficiarium remanente; contra negligentes autem Vicarius noster ad poenas prædictas, aliasque graves pro qualitate contumaciæ, procedat.

*De Locationibus bonorum Ecclesiarum.*

C A P U T XLVIII.

**E**adem ratione prohibemus, ne quis Clericus, cujuscunque ordinis existat, redditus, aut bona ad Beneficium, vel Ecclesiam suam pertinentia, ad longius tempus, quam ad triennium locare possit, neque factam jam locationem renovare, aut prolongare ad longius spatium, quam de triennio in triennium: decernentes, ut contractus hujusmodi locationum factus ad longius tempus, validus non sit, nisi consensus & beneplacitum a Nobis obtentum sit, & instrumento insertum.

Similiter prohibemus Beneficiariis quorumcunque Beneficiorum, & Ecclesiarum, anticipate aliquid recipere a conductoribus suis, ne qua successoribus fraus, aut præjudicium fiat, juxta *Decretum Concilii Trident. Sess. XXV. Cap. XI. incip. Magnam Ecclesiis.*

*Ne vacantes Ecclesiæ spoli-  
entur.*

C A P U T XLIX.

**S**tatuiamus, ne ullus Ecclesiasticus, vel sæcularis, quocunque officio in Parochia fungatur, sive dignitate præmineat, Ecclesiarum vacantium, aut Clericorum decedentium, maxime Paro-

Parochorum, bona rapiat, dissipet, aut invadat, juris Patronatus, aut alio quocunque prætextu. Contrafacientes, si jus Patronatus habeant, illud eo ipso amittant, & ut alii quicunque anathemati, & aliis pœnis subjaceant, juxta *Decretum Concilii Trident. Sess. XXII. de Reform. Cap. XI. incip. Si quem Clericorum.* Quod Decretum aliquoties per annum publicari volumus.

Curet autem Decanus Ruralis, vel ipso absente, Commissarius, aut proximior Parochus, quem ædituus Ecclesiæ ægrotantis, de periculosa ejus infirmitate, & obitu (si sequatur) quamprimum certiore faciat: omnia bona mobilia, & scripturas ipsius defuncti in tuto loco reponi, & obsignari, quousque Nos, vel Vicarius noster certiores facti simus. Interim ipse Decanus provideat de idoneo Sacerdote pro populi, & beneficii exigentia, usque ad ulteriorem nostram, vel Vicarii nostri deliberationem.

### *De Syndicis, & Juratis Ecclesiarum.*

#### C A P U T L.

**E**ccliesiarum indemnitati providere cupientes, præsentis Constitutione ordinamus, ut præter Rectorem, sive Plebanum, tanquam principalem, quotannis duo laici bonæ famæ & conversationis, & qui solvendo sint, vel tot, quot fuerint necessarii, & opportuni Syndici, seu Jurati fabricæ cujusque nostræ Diocesis Ecclesiæ constituentur. Qui quidem laici hujusmodi Syndicatus, seu procurationis officia, citra eorum privata commoda, fideliter, cum scitu, & consensu Plebani, exerceant; rationem de singulis per eos collectis, levatis, distributis, & factis, in præsentia ipsius Rectoris, sive Plebani, tanquam principalis Procuratoris, & aliorum, juxta laudabilem cujusunque loci consuetudinem, singulis annis, temporibus consuetis, una cum residuis reddendo. Quæ residua, & in universum, omnia fabricæ credita, sub ipsorum Syndicatu facta, intra trimestre Successoribus exacta consignent; sin minus, de suo ea præstare teneantur.

*Tomus VIII. Concilior. German.*

Successores vero mutius hujusmodi suscipientes, jurent in manibus Parochi, se fideliter officium suum facturos. Parochis vero præsentis Decreti auctoritate, hujusmodi juramentum recipiendi, etiam mulcta retinentibus Syndicis indicta, facultatem impertimur. Quod nostrum Decretum qui transgredi ausi fuerint, ii per Rectorem, seu Plebanum Canonice moniti, si in præmissis non satisfecerint, eo ipso Sacrorum Canonum pœnas incurrant: Plebani vero de his ad Nos, vel Vicarium nostrum referant.

Quia in re serio monemus ipsos Rectores, ut diligenter officio suo satisfaciant, alioquin & Deo, & Nobis negligentiae rationem reddituri, condignamque punitionem recepturi.

Et ut Ecclesiarum necessitatibus opportune subveniatur: ordinamus, ut pecuniæ ad eas pertinentes, scripturæ item, & quæcunque literarum monumenta asserventur in capsis firmiter ad hoc constructis, & loco tutiore positis, quæ, uti & gazophylacia, duabus, vel tribus clavibus, pro locorum consuetudine, obserentur: quarum unam Parochus, alteram sæcularis Potestas (ubi ita consuetum est), tertiam Syndici habeant: ita ut neque dicti Syndici, neque alii possint iis pecuniis uti, aut aliis utendas dare.

Et qui hætenus pecunias hujusmodi penes se habuerunt, cogantur sub pœna duplici, fabricæ applicanda (quam etiam duplicem pœnam, novo Syndico, intra dictum bimestre exactorem negligenti, applicandam eidem fabricæ, imponi mandamus) infra idem spatium omnino eas reddere novis Syndicis, ad necessarios Ecclesiarum usus reponendas, & ubi occasio tulerit, impendendas.

Prohibemus etiam, ne oblationes, quæ in gazophylaciis, & capsis in Ecclesiis constitutis fiunt, a laicis, etiam jus Patronatus habentibus, occupentur; neve propria auctoritate in illis se ipsi ingerant, quacunque arte, vel quæsito colore, in proprios usus illas convertendo, seu impediendo, ne ab iis, ad quos de jure pertinent, percipiantur, sub pœna excommunicationis, & aliis

I i i

juxta

juxta *Decretum Concilii Trident. Sess. XXII. Cap. XI. §. incip. Si quem Clericorum.*

Et quia sæpe magnæ quibusdam in locis fieri consueverunt impensæ, in adhibendis Notariis, & conficiendis instrumentis & scripturis: item in aliis rebus, quæ in libris Ecclesiarum scribuntur: Cupientes ipsarum Ecclesiarum indemnitati consulere; statuimus, quod scripturis & libris ipsarum Ecclesiarum, nec non locationibus temporalibus, & afflictibus (quos vocant) perpetualibus, secundum Constitutiones nostras faciendis, usque ad summam viginti quinque Rhenensium, Plebani manu coram Syndicis ipsius Ecclesiæ, aut Regularis, seu Juratis villarum, vel duobus saltem idoneis testibus, notatis, plena adhibeatur fides, non secus ac si Notarii publici manu scriptæ essent. Id quod etiam ad scripturas, eadem solennitate antehac factas, extendi volumus. Mandantes etiam, ut impensæ, quæ in rationibus Syndicorum recipiendis, fieri consueverunt, quantum fieri potest, moderentur, ac superflue tollantur: præsertim illæ, quæ in commensationibus & computationibus, in Ecclesiarum detrimentum fieri solent.

*De Legatis ad pias causas, & ad quæ teneantur Notarii.*

#### C A P U T L I.

**V**olumus & mandamus, inhærendo Constitutioni bon. mem. *Cardinalis BERNARDI*, ut nullus Notarius per totam Diocesim nostram præsumat conficere ullum testamentum, nisi aliquid fabricæ Ecclesiæ Cathedralis Sancti Vigili Tridenti sit legatum, sub pœna decem florenorum.

Mandamus etiam districte eisdem Notariis, sub pœna rescindi Ecclesiæ de suo, quanti illius intererit, nec non peccati mortalis (cujus absolutionem Nobis, vel Vicario nostro expresse reservamus) ne animos testantium avertant, quominus legata ad dictam fabricam, ac alias Ecclesias, & pias causas, faciant.

Præterea dolenter audivimus, quod fidelium, tam Clericorum, quam Laicorum testamenta, atque ultimæ vo-

luntates, & maxime pro animarum salute, ad pios usus legata, & relicta, suis debitis executionibus perverse, & negligenter multis in locis multipliciter frustrentur, & retardentur.

Cum itaque ultima voluntas testantium, & præsertim ad pias causas, debita executione nullo modo sit fraudanda, & nostro incumbat officio Pastoralis, talibus providere, testamentaque defendere, & exequi; universis nostræ Diocesis & jurisdictionis Ecclesiasticis, & Sæcularibus sub interminatione Divini Judicii & aliis pœnis, quæ Nobis, vel Vicario nostro, pro qualitate facti, & personarum, infligendæ videbuntur, inhibemus, ne testamenta & ultimas voluntates Ecclesiasticarum, vel sæcularium personarum, maxime ad usus pios, earumque executionem negligant, retardent, vel impediant: Nec testamentorum & legatorum, quæ ad Divinum cultum pro animarum salute sunt facta, & causarum occasione ipsorum, pro tempore motarum, & movendarum cognitioni se intromittant; sed eam ad Nos, vel Vicarium nostrum remittant.

Mandantes etiam sub eadem pœna omnibus Notariis, ut hujusmodi legata pia, quæcunque in suis instrumentis habent, intra duos menses, a publicatione præsentis Decreti computandos, omnino in scriptis exhibeant (etiam si antehac aliquando ea exhibuerint) Parochis, seu Curatis locorum, ubi degunt hæredes ad ipsa legata obligati; & in posterum etiam successive, quæcunque legata pia habebunt, intra duos menses computandos a die mortis ipsorum Testatorum, seu Codicillantium, exhibeant dictis Parochis, seu Curatis: Qui pariter, tanquam de animabus sibi commissis, districte rationem reddituri, seriis adhortationibus efficere studeant, ut legata hujusmodi infra idoneum tempus, juxta Testatorum dispositionem, executionem habeant. In quibus exequendis si Notarii, & hæredes ad legata obligati, culpabiles fuerint; ultra præfatas pœnas, incurrant mulctam unius floreni, fabricæ Ecclesiæ Parochialis applicandam: & nihilominus per ipsos Parochos, vel Cura-



Curatos Nobis, vel Vicario nostro quamprimum denuncientur, ad hoc, ut officio nostro satisfacere valeamus.

Ipsi quoque Parochi, & Curati, in prædictis negligentes, eandem penam incurrant.

Insuper Decretum hoc integrum saltem bis per annum publicetur in Ecclesiis.

### *De Legatorum piorum commutatione.*

#### CAPUT LII.

**Q**Uoniam omnium piarum dispositionum in casibus a jure concessis executores sunt Episcopi; propterea si quæ commutationes Legatorum ad pias causas faciendæ videbuntur, mandamus, eas ad Nos referri, ut possimus juxta *Decretum Concilii Trid. Sess. XXII. Cap. VI.* circa eas providere.

Sicubi vero vel propter magnum numerum Missarum ex legatis, vel propter tenuitatem elemosynarum aliqua opus fuerit nova provisione, ut piis testantium mentibus satis fiat; mandamus pari modo, de iis ad Nos referri, ut possimus in Synodo, prout expedire videbitur, providere.

### *De Testamentis Clericorum.*

#### CAPUT LIII.

**N**E circa Clericorum testamenta, & eorum executiones ullæ fraudes committantur, & bona per eos relicta ad alios usus, quam sunt destinata, dispensentur; statuimus, ut quicumque in nostra Diocesi extra Civitatem Executor, seu Commissarius bonorum relictorum per Clericos decedentes, se intromittere velit, in executione faciendâ, antequam manum ad aliqua bona detrahenda apponat, omnino conficiendum curet Inventarium authenticum bonorum in hæreditate defuncti Sacerdotis repertorum (si quidem ad valorem Rhenensium quinquaginta ascendant) illudque ad Nos mittat, & de obitu Nos, vel Vicarium nostrum, quamprimum certiore faciat, & ubi legitime requisitus fuerit, Nobis, aut dicto Vicario integram de inventis, vel distributis, reddat rationem.

*Tomus VIII. Concilior. German.*

Si vero probabiliter ad valorem quinquaginta Rhenensium non ascendant, Executor ipse, præsentibus Syndicis, vel duobus testibus fide dignis, Inventarium conficere possit: quo casu etiam supra scripta servare obligatus sit.

Si quis vero præmissis non servatis, bona cujuscunque Clerici, Nobis immediate subiecti, dispensare præsumpserit, ultra refectionem de suo proprio, arbitrio nostro puniatur.

Mandamus insuper omnibus Parochis, per Diocesim nostram ubilibet constitutis, ut si quem Regularem cujusvis Ordinis extra claustra, & suorum obedientiam in hac nostra Diocesi mori contingat, ejus bona quæcunque quamprimum annotent, & Nobis Inventarium transmittant, eaque diligenter custodiant; donec a Nobis aliud desuper statuatur, sub penis arbitrio nostro exigendis.

### *De portione fructuum, post mortem Clerici restantium, Successori assignanda.*

#### CAPUT LIV.

**Q**uia vero frequenter controversiæ inter Clericos noviter promotos ad Beneficia, & Executores defunctorum, super fructibus restantibus occurrunt, cuinam debeant applicari: proinde Nos Canonum Sanctiones imitando, ordinamus, hujusmodi inter præmissos nostræ Diocesis, extra Civitatem nostram, faciendam esse divisionem: Videlicet, ut de superexistentibus fructibus, talis Successoribus assignetur portio, unde judicio Vicarii nostri, vel Decani Ruralis, honeste sustentari valeant, usque ad integrorum, & novorum fructuum perceptionem, quocunque anni tempore decedere contingat Antecessorem, ne plebs occasione tali debito fraudetur obsequio.

### *De Sepulturis.*

#### CAPUT LV.

**S**tatuimus & ordinamus de occisis, seu præventis mortuis in enormibus & manifestis peccatis, cujusmodi sunt interdicti, excommunicati, seipso

l i i 2

ex

ex desperatione interimentes, Hæretici (quorum sepultura in Ecclesia, (\*) ipso facto, Ecclesiastico interdicto subijcitur) publici concubinarij, & usurarii manifesti; quod in Cœmeterio non sepeliantur, si sine confessione, vel saltem signis contritionis decesserint: Et qui scienter tales sepelierint absque speciali licentia nostra, vel Vicarii nostri, sententiam excommunicationis, hac nostra monitione præmissa, ipso facto, & ulteriore pœnam, etiam arbitrio nostro infligendam incurrant. Adjicientes, ut cadavera contra hanc nostram Constitutionem sepulcorum exhumentur, & sepultura careant Ecclesiastica.

Ut insuper occurramus nimiae quorundam ambitioni, qui non contenti fidelium Cœmeterio, loco ad hoc destinato, in ipsis Ecclesiis, atque adeo juxta altaria volunt sua, suorumque cadavera tumulari; serio prohibemus, ne ullus posthac cujuscunque conditionis, vel gradus existat, sepulchra nova in Ecclesiis condere præsumat, sine nostra, vel Vicarii nostri licentia speciali. Qua obtenta teneantur nihilominus sepulchra ipsa, solo æquata, lapide ita plano tegere, ut vel annorum, vel aliarum imaginum sculptura desuper transeuntium pedes non offendant, nec Divinum Officium impendant.

Parochi non permittant ulla in Ecclesiis, aut Capellis depingi arma, nisi ab iis, qui eas fundaverint, aut in toto, vel majore parte dotaverint, restauraverint, aut alias notabiliter de iis sint benemeriti.

### De Regularibus.

#### C A P U T LVI.

**U**T, qui Regularem vivendi normam elegerunt, secundum Regulas suas, & Decreta Sanctæ *Oecumenicæ Synodi Trid.* vivant, decernimus, atque mandamus omnibus Præpositis, Prioribus, Guardianis Civitatis nostræ, ut ultra professionis suæ Regulas, omnia ea & singula, quæ in eodem *Concilio Tridentino de Reformatione Regularium* sancita, quæque per Summos Pontifices decreta sunt, tum in admissione ante Religionis Professionem, tum etiam in electionibus ad regimen Monasterio-

rum, & reliqua vitæ norma instituenda, plene & exacte observent. Qua in re, ne quis negligentia, aut inobedientia suæ impunitatem speret, præsentis Decreto scire volumus Regulares omnes, Nos in casibus, quos Nobis dictum *Concilium Trident.*, tum fel. record. Pont. Maxim. PIUS V, & GREG. XIII. suis Constitutionibus hac in parte delegant, contra transgredientes severe esse processuros. Ante omnia vero caveant, ne ullas mulieres, cujuscunque conditionis sint, intra Monasteriorum suorum septa admittant; alioqui pœnis in dictis Bullis contentis severe puniendi.

Ut autem Novitii in Monasteriis, præsertim Sancti Michaelis, & Sanctæ MARIÆ in *Gries* admissi, utiles evadant Religioni; Præcipimus Præpositis, ut provideant de Ludimagistris sufficienter eruditis, & bonæ tamæ, qui eos tam bonis literis, quam moribus instruant, & doceant; qui in manibus ipsorum Præpositorum Professionem fidei ante omnia emittant. Habeant etiam Theologum, qui Religiosos in iis, quæ regulam, Conciones, conscientia casus, & id genus alia respiciunt, omni, qua potest, diligentia instruat, juxta *Sacri Concilii Trid. Decretum, Sess. V. Cap. I. de Reform.*

### De Monialibus.

#### C A P U T LVII.

**M**oniales etiam ad Regulæ, quam professæ sunt, præscriptum, vitam suam componant, Ordinumque suorum vota custodiant: ante omnia vero clausura, sicubi neglecta fuit, restituantur, & inviolate observetur, juxta præscriptum supra dictarum Constitutionum PII V. & GREG. XIII.

Serio etiam mandamus, sub eisdem censuris, & pœnis, omnibus & singulis personis, cujuscunque status & conditionis sint, tam Ecclesiasticis, quam laicis, ne ullo quæsito colore, audeant ingredi Sanctimonialium septa, sine nostra, vel Vicarii nostri licentia in scriptis obtenta, sub excommunicationis pœna ipso facto incurrenda, juxta *Trid. Conc. Sess. XXV. Cap. V. de Regul. & Monial.*

In

(\*) *Supple: hæc.*

In aliis, quæ ad Sanctimonialium disciplinam spectant, ea servantur, quæ Sacrum *Trid. Concilium*, & supradicti Pontifices in allegatis Constitutionibus præcipiunt, quorum omnium observationem, & executionem Nos exacte prosequemur.

Is tantum numerus Monialium constituatur, & in posterum conserveatur, qui vel ex redditibus propriis Monasteriorum, vel ex consuetis eleemosynis commode sustentari possit, juxta *Decret. Conc. Trid. Sess. XXV. Cap. III.* incipiens: *Concedit Sancta Synodus.*

*De Clericis ignotis, & peregrinis, ac Regularibus extra Claustra degentibus.*

## CAPUT LVIII.

**N**E quis Clericus, aut Religiosus profugus, aut alias criminofus in Episcopatu nostro posthac refugium, aut latibulum quærat; Statuimus & ordinamus, ut de cætero nullus Religiosus extra claustra degens, aut ignotus, sive peregrinus Sacerdos, nedum ad ullam partem curæ animarum exercendam, sed nec ad Sacrum celebrandum (itinerantibus, qui suorum Ordinariorum, aut alio, qui fide dignas literas exhibeant, exceptis) sine nostra, aut Vicarii nostri licentia, in scriptis habita, admittatur. Si secus factum fuerit, qui id permittit, si quidem Beneficiatus fuerit, quoties contraverit, pœnam decem floren. incurrat: si non fuerit Beneficiatus, arbitrio nostro, una cum ab ipso admissio, puniatur.

Licentiam autem hujusmodi nulli, neque sæculari, neque Regulari Sacerdoti peregrino concedi volumus, nisi & formatas, & sui Ordinarii testimoniales ac commendatitias exhibeat.

Si qui vero Religiosi extra claustra ad præsens in Diocesi nostra moram trahunt, etiamsi alias a Nobis, vel Vicario nostro commorandi licentiam impetraverint, volumus, ut infra duos menses a præsentium publicatione, se coram dicto Vicario sistant, licentiamque obtentam exhibeant. Quod nisi fecerint, contra eos, juxta Sacros

Canones procedemus, procedique mandamus; nulla eis licentia, aut tolerantia, elapso dicto termino, suffragatura.

Porro si quis hujusmodi Religiosos contra hanc nostram prohibitionem fovere præsumpserit, contra eum per Vicarium nostrum debitis pœnis, etiam excommunicationis (si opus fuerit) procedatur.

*De Quæstuariis Ordinum mendicantium.*

## CAPUT LIX.

**T**Ametsi Quæstuariorum nomen, atque usum *Concilium Trid.* penitus abolevit, nihilominus Bullæ PII V. inherentes admittimus, ut Fratres Ordinum mendicantium nostræ Diocesis, possint eleemosynas solitas per Episcopatum nostrum petere, & qui Sacerdotes fuerint, Divina Officia inter petendum celebrare, ad quod tamen licentiam (quæ ultra annum se non extendat) in scriptis a Nobis, vel Vicario nostro obtinere, & Parochis, ac aliis quibuscunque, animarum curam gerentibus, ad quos divertent eleemosynas petitori, ostendere, eleemosynasque per se ipsos, non autem per personas substitutas, colligere teneantur.

Quibus per licentiam hujusmodi, Missas tantum celebrandi, non autem concionandi, aut confessiones audiendi facultas data intelligatur, aliis quibuscunque, præter antedictos Religiosos mendicantes, penitus interdictis, & exclusis. Indulgentias autem publicare, aut icones, cruces, vel similia, occasione illa vendere, nulli supradictorum liceat.

*De Confraternitatibus.*

## CAPUT LX.

**C**Um per Diocesim nostram Confraternitates multæ institutæ reperiantur ad pia opera exercenda; easdem per Rectores vitæ, & morum integritate probatos, pie ac recte gubernari cupimus: Mandantes, quod cum earum privilegiis diligenter examinen-



tur, ac visitentur: & quæ negligent, vel indecenter haberi compertæ fuerint, si nulla alia ratione ad observantiam condecens reduci poterunt, tollantur: de cætero vero nullæ absque auctoritate nostra institui, vel erigi possint.

Perochi vero ac Decani, intra quorum fines Confraternitates constitutæ reperiuntur, eandem adhibeant diligentiam, ut omnia in eis decenter, & pie peragantur.

Et si quos redditus, aut alia bona possident, ea omni studio conservari, & singulis annis per Massarios administrationis exactam rationem reddi volumus.

### *De Hospitalium, & aliorum piorum locorum administratione.*

#### C A P U T LXI.

**Q**uia Sacrum *Trident. Concilium* Nobis imponit curam providendi, ut Hospitalia, & alia loca pia fideliter administrantur; statuimus, ut qui ad Hospitalium, Montis pietatis, & piarum Confraternitatum quarumcunque regimen assumentur, jurent, in manibus Vicarii nostri, vel ab eo deputati, se fideliter officium suum facturos, bona ipsorum locorum ad deputatos usus dispensaturos, & si quæ indebite alienata fuerint, recuperaturos.

Ne vero bona hujusmodi locorum piorum, & eleemosynas ad privata sua commoda convertant, omnia mobilia & immobilia bona in inventarium diligenter redacta, durante eorum administratione (quæ ultra triennium non extendatur) nullatenus conducere, vel suis usibus accommodare possint; ac singulis annis Nobis, vel Subdelegatis nostris administrationis rationem reddere teneantur: recusantes Ecclesiasticis censuris compellantur.

Qui vero Hospitalia, ad pauperum usum instituta, in Prioratum, administrationem, vel quemcumque alium titulum obtinuerint, fabricas ruinosas restaurent, & sartas tectas custodiant, debitaque onera præstent. In quo si

negligentes fuerint, secundum Sacrorum Canonum, & *Concilii Trident.* dispositionem contra eos procedemus.

Mons pietatis Civitatis nostræ (unde mutuas pecunias gratis pauperes accipiunt) & si quæ sunt alia hujusmodi, in Dicecesi nostra, a Præfectis, quorum fides, innocentia, & charitas graviorum virorum testimonio commendata fuerit, studiose ac fideliter administrantur. Et omnia juxta *Concilium Trident.* a Vicario nostro visitentur, & recognoscantur.

### *De Adulteris & Concubinariis.*

#### C A P U T LXII.

**F**œdum adulterii, & concubinatus peccatum a nostro Episcopatu eliminatum cupientes, Sacri *Trident. (\*) Concilii* præscriptum inviolabiliter observandum duximus: Cujus Decretum ob id hoc loco inferi volumus, ut sciant omnes, Nos contra eos processuros secundum dicti *Concilii* regulas, cujus Decreti tenor est:

" Grave peccatum est, homines solutos concubinas habere: gravissimum vero & in hujus magni Sacramenti singularem contemptum admissum, uxoratos quoque in hoc damnationis statu vivere, ac audere eas quandoque domi etiam cum uxoribus alere, & retinere. Quare ut huic tanto malo Sancta Synodus opportunis remediis provideat; statuit hujusmodi concubinarios tam solutos, quam uxoratos, cujuscunque status, & dignitatis, & conditionis existant, si postquam ab Ordinario; etiam ex officio, admoniti ea de re fuerint, concubinas non ejecerint, seque ab earum consuetudine non sejunxerint, excommunicatione feriendos esse, a qua non absolvantur, donec reipsa admonitioni factæ paruerint. Quod si in adulterio, vel concubinato per annum, censuris neglectis, permanserint, contra eos ab Ordinario severe pro qualitate criminis procedatur. Mulieres, sive conjugatæ, sive solutæ, quæ cum adulteris, seu concubinariis publice vivunt, si ter admonitæ non paruerint, ab Ordinariis locorum, nullo etiam requirente;

cx

(\*) Sess. XXIV. Cap. VIII. de Reform. Matrim.

" ex officio graviter pro modo culpæ  
 " puniantur, & extra oppidum, vel  
 " Dicecesim, si id eisdem Ordinariis  
 " videbitur, invocato ( si opus fuerit )  
 " brachio sæculari ejiciantur: aliis pœ-  
 " nis, contra adulteros, & concubina-  
 " rios infligendis, in suo robore perma-  
 " nentibus."

*Ne Parentes cum filiis, aut filia-  
 bus, aut fratres cum sororibus  
 in uno lecto dormiant.*

#### C A P U T LXIII.

**Q**uandoquidem intelligimus, in hac nostra Dicecesi parentes cum filiis, vel filiabus, fratres cum sororibus, & aliis consanguineis suis proximis, adultis præsertim, in uno lecto interdum dormire, cum evidenti incestus, & animarum suarum periculo; ne id in posterum fiat, vel paupertatis, vel alterius cujuslibet necessitatis prætextu, monemus Parochos, ut suos Parochianos, posito ipsis ob oculos periculo peccati horrendi imminenti, minis, & pœnis ab hujusmodi condormitione deterreant, & si necessitatem ita exigere videant, Nobis, vel Vicario nostro denuncient, pro qualitate facti coercendos, & puniendos. Pariter matres, & nutrices hortentur, ne infantulos noctu in lecto secum habeant, propter periculum suffocationis: vel saltem ita eos accommodent, ut non periclitentur: quemadmodum etiam in nostro Rituali monentur, & poterunt Parochi opportune Dominicis diebus per annum aliquoties hoc Decretum insinuare.

*De Usuris, & illicitis con-  
 tractibus.*

#### C A P U T LXIV.

**Q**uamvis usuraria pravitas, quanto pluribus Constitutionibus reprimatur, tanto acrius per novas fraudes erumpit; solerter nihilominus cupidorum hominum avaritiæ & iniquitati obviam eundum esse, & Divinæ, & humanæ leges admonent. Ac proinde Nos, *Cardinalis* BERNARDI, & aliorum Prædecessorum nostrorum

Constitutiones renovantes, statuimus, ut juxta Canonicas Sanctiones contra quoscunque manifestos usurarios severe procedatur.

Et quia cupiditatis stimulis acti avari, & omnis Christianæ pietatis obliti, lucris per fas, & nefas inhiantes, variis technis, & fraudibus usurariam pravitatem contegunt, & obvolvunt;

Quandocunque contractus aliquis, sub titulo & nomine venditionis, emptionis, locationis, societatis, permutationis, aut quovis alio celebratus fuerit, si ex circumstantiis personarum, rerum, temporis, pretii, lucri, aut aliis verisimilibus conjecturis constiterit, secundum latentem contrahentium mentem, contractum diversum esse a substantia realis, puri & legitimi contractus, sub cujus nomine celebratus fuit; Declaramus usurarium esse, & pro tali haberi debere, ac contra ita contrahentes, ut contra usurarios, esse procedendum ( etiam si tales contractus, ut injusti, & illegitimi, fuerint in judicio rescissi ) ob lucrum certum, vel probabile, habitum, aut expectatum, ex pecunia, re exhibita, vel non exhibita, vel ejus pretio.

Quod si Notarii scienter celebraverint contractus tales, aut ubi etiam res, de quibus contrahitur, non extant, vel ubi pecunia, de qua fit mentio in instrumento, realiter non exhibetur, aut non integre exhibetur, vel pro pecunia diversæ merces, res mobiles, aut se moventes justo pretio etiam non æstimatæ repræsentantur, aut pro repræsentatis habentur; declaramus illos teneri in conscientia ad damna parti lætæ reficienda: Et tales Notarios ipso jure, & facto censeri privatos, tamquam indignos officio tabellionatus, eosque a matricula Notariorum deleri volumus. Decernentes etiam, quod testes, qui scienter intervenerint talibus fraudulentis, & simulatis contractibus, item proxenetæ, qui tales contractus tractaverint, tanquam participes pravitatis usurariæ, velut usurarii puniantur.

Quia vero multiplices istæ simulatorum contractuum fraudes, vulgo notæ non sunt, Parochi, Concionatores,

res, & Confessarii per occasiones eos ardenti stylo infectentur, detestabilem eorum iniquitatem, & pœnas gravissimas exaggerando.

Quod ut facilius præstare queant, Nos per speciale edictum Visitatoribus in hoc Episcopatu damnatorum hujusmodi contractuum speciebus propositis, ipsis normam, quam sequantur, suggeremus.

*De Judæis.*

CAPUT LXV.

**Q**Uoniam honestas exigit, & universalis Ecclesiæ consuetudo servat, ut Judæi a Christianis aliquo notabili signo discernantur: Volumus, & ordinamus, signum illud esse debere circulum de filis croceis in veste extrinseca ante pectus quoad masculos, & duas rigas flavi coloris in peplis mulierum. Volumus etiam Cap. *Post miserabilem, De usuris*, huic Statuto esse annexendum, & inferendum; & cum eo publicandum: cujus tenor subsequitur:

Post miserabilem, & infra. Judæos ad remittendas Christianis usuras per Principes & Potestates compelli præcipimus sæculares, & donec eis remiserint, ab universis Christi-fidelibus tam in mercimoniis, quam in aliis, per excommunicationis sententiam, eis

jubemus communionem omnimodam denegari.

Famulatum autem Christianorum, præter quam in casibus a Sacris Canonibus permissis, penitus eis interdicimus, sub pœnis ipsorum Canonum, arbitrio nostro aggravandis.

Capitulum: *Omnis utriusque.*

*De pœnit. & remiss.*

CAPUT LXVI.

**O**Mnis utriusque sexus fidelis, postquam ad annos discretionis pervenerit, &c.

*De Constitutionibus.*

CAPUT LXVII.

**N**E quis autem harum Constitutionum Synodaliū ignorantiam prætere valedat, præcipimus omnibus tam Religiosis, quam sæcularibus Presbyteris, nostræ jurisdictioni subiectis, cujuscunque status & dignitatis existunt, sub pœna duorum florenorum, fabricæ S. Vigili applicandorum, (ut earum) exemplum infra spatium duorum mensium, postquam impressæ fuerunt, habere procurent, vitamque suam ac mores juxta earum ductum & normam ita instruant, ac reforment, ut quibus præsent, iisdem & præluceant ad laudem & gloriam Dei, qui sit benedictus in sæcula. Amen.

*ILLUSTRISSIMI ET REVERENDISSIMI CARDINALIS  
CHRISTOPHORI MADRUTII &c.*

*Declaratio circa normam constituendi census, sive affectus.*

CHRISTOPHORUS, DEI GRATIA EPISCOPUS TRIDENTI,  
ADMINISTRATOR BRIKINENS. AD PERPETUAM REI MEMORIAM.

**E**T si ex Pastoralis officio teneamur omnia promovere, & toto mentis conatu intendere, quo subditorum nostrorum utilitati, & commodo generaliter consulatur; tamen specialiter humeris nostris incumbit, diligenti custodia invigilare, ne in sæcularibus negotiis, quæ singulis diebus homines pro augmento bonorum temporalium inter se tractant, & celebrant, aliquid

committatur, quod animos in gehennam præcipites trahat. Cujus quidem solitudinis Prædecessores nostros fuisse diligentissimos animadvertimus, dum pro temporum qualitate ipsos varias, & diversas Constitutiones promulgasse videmus, quibus omnes usurariæ pravitates penitus e mentibus hominum evellerentur: sed usu venit (ut a natura omnis ætas ad malum proclivis est)



est) quod quanto plures ederentur inhibitiones, tanto majores excogitentur fraudes, colores, quibus non solum animæ a præcipitio non sunt retractæ, sed etiam pauperum subditorum nostrorum irreparabilis jactura est subsequuta. Quum vero necesse sit, ut aliquis modus contrahendi existat, & novissima Constitutio per immediatum Prædecessorem nostrum felicis recordationis promulgata, etsi in se sanctissima fuerit, tamen male interpretantium technis, & cautelis adeo periculosa, & damnosa effecta sit; ut nisi efficacia remedia adhibeantur, totalem ruinam ipsis pauperibus sit allatura.

Nos vero Prædecessorum nostrorum vestigia laudabilia imitando, negotium hujusmodi maturo consilio sæpius disculimus, & tandem omnibus circumstantiis, quæ pro temporum qualitate erant considerandæ, diligenter consideratis: statuimus, ordinamus, & decernimus, ut infra.

Quia cassamus, abrogamus, & tollimus omnes, & singulas Constitutiones, per Prædecessores nostros qualitercunque emanatas, & editas circa contractus afflictuum bladum, & vini generis cujuscunque celebrandos, & maxime Constitutionem novissimam, & volumus, disponimus, & ordinamus, ut in antea afflictu generis cujuscunque impune fieri, & celebrari possint, dummodo fiant in ratione Rhenensium sex pro stario frumenti, siliginis quin-

que, milii quatuor: Bladi vero alterius generis cujuscunque Rhenensium trium; vini Theroldici Rhenensium septuaginta quinque, bulliti septuaginta, dulcis sexaginta. Pecuniæ vero in ratione quinque pro centenatio, cum pacto tamen perpetuo redimendi, non obstante præscriptione aliqua juris municipalis, vel communis.

Item, quod in casu devolutionis propter Canonem non solum, Dominus agere possit ad devolutionem cum defalcatione tertii, respectu duntaxat capitalis, in quo tertio etiam intelligantur inclusi afflictus retenti, quos Dominus aliter consequi non possit, nisi præcedente de anno in annum mandato de solvendo afflictum afflictalini facto, de quo appareat legitime, quibus mandatis non præcedentibus ut supra, devolutio locum non habeat.

Item quod ab afflictibus celebratis ab anno Millesimo, quingentesimo citra, afflictalini omnes possint, & valeant se affranchare, & Domini ad id teneantur.

Item quod prædicta omnia & singula intelligantur locum habere, & habitura solum, & duntaxat in afflictibus habentibus præambulam venditionem, ab eodem afflictalino, & non in iis, qui propria bona ab aliis, quam a conductore acquisita, locant.

*Publ. die 19. Januarii 1545. ut in actis d. Francisci Zelli Not. Malef.*

## *Moderatio afflictuum, sive censuum*

*Illustrissimi & Reverendissimi Cardinalis*

**LUDOVICI MADRUTII.**

**LUDOVICUS, MISERATIONE DIVINA S. R. E. TITULI S. HONUPHRII PRESBYTER CARDINALIS MADRUTIUS, EPISCOPUS TRIDENTINUS &c.**

**C**Um a nonnullis annis citra non parvæ querelæ exortæ fuerint inter debitores & creditores annuorum afflictuum, qui in hoc nostro Episcopatu Trident. celebrari consueverunt, super qua controversia alias coram tunc temporis Commissario Cæs. fuerunt

ab utraque parte plures supplicationes, & scripturæ allegationum productæ, ac processus formatus, qui postea ab eodem Commissario fuit transmissus ad Suam Cæsaream Majestatem, quæ deinde causam ad Nos remisit, Nobis mandando, ut super ea provi-

sionem opportunam faceremus, ne subditi contra honestatem, & æquitatem gravati remanerent. Proinde Nos considerata ipsa commissione, consideratoque diligenter tenore Constitutionis, per proximum Prædecessorem nostrum super afflictibus promulgatæ, ac partibus in contradictorio, & seorsum sæpe auditis, & causa maturo consilio ad longum discussa: volentes assiduis querelis, & indemnitati pauperum subditorum, juxta prædictam commissionem Cæs. prospicere: hoc præsentis Decreto afflictus omnes redimibiles, & secundum formam dictæ Constitutionis celebratos de cætero reducendos, & moderandos esse duximus, prout eos scilicet ex nunc & pro anno præsentis, & pro aliis annis futuris moderamus in hunc modum.

Videlicet:

Frumenti ad rationem grossorum	- 26	
Siliginis ad rationem grossorum	- 21	} pro stario.
Milii ad rationem grossorum	- 17	
Vini bulliti pro plastro ad rationem Rhenensium quinque pro plastro.		
Vini dulcis ad rationem Rhenensium	4. Librarum 1. pro plastro.	
Olei pro Galea ad rationem Librarum	4. gross. 3.	
Butyri ad rationem Librarum	4. gross. 3. pro pondere.	

Possint tamen creditores recipere solutiones in speciebus, si maluerint, sed ad ratam precii prædicti, & non in majore quantitate. Et hanc nostram mo-

derationem tam diu servari volumus, donec generali Constitutione super creandis novis afflictibus per Nos provisio fiat.

Quo vero ad afflictus factos per nonnullos præter, & contra formam Constitutionis prædictæ, & qui a debitoribus allegantur illiciti, & usurarii, committimus omnibus Judicibus ordinariis nostri Episcopatus, ut super eis justiciam summariam administrent, tam in irritando contractus irritandos, quam in puniendo, prout juris erit.

In quorum fidem & testimonium præsentis fieri, Sigillique nostri appensione jussimus muniri.

*Datum Tridenti in arce nostra boni consilii XI. Septembris 1579.*

*Ad Mandatum Illustrissimi & Romani Dni Cardin. pr. &c.*

CAROLUS GROTTA, &c.

*Declaratio prædictæ clausulæ:*

Possint tamen &c.

Supra dicta clausula declaratur, & intelligitur, quod creditores possint recipere solutionem in speciebus, si maluerint, sed ad ratam pretii prædicti, hoc est, quod possint recipere tantum vini, & frumenti, seu aliarum specierum ad pretium commune currens tempore solutionis, quantum importat pretium in pecunia taxatum, in ipso Decreto; Non autem quod possint recipere species in majori quantitate.

*Decretum in Cancellaria boni consilii, die 23. Septembris 1579.*

## *Forma constituendi Census in Episcopatu Tridentino, & declaratio nonnullorum casuum, & contractuum illicitorum.*

*Juxta intensionem datam in Synodo Diocesana sub Cap. LXIV. de Usuris, & illicitis contractibus habita de anno 1593.*

CAROLUS, MISERATIONE DIVINA S. R. E. TITULI S. THOMÆ IN PARIONE PRESBYT. CARD. MADRUTIUS, EPISCOP. TRIDENT. &c.  
AD PERPETUAM REI MEMORIAM.

**E**T si Prædecessores nostri animarum salutem, ac commodis subdi-

torum summa cum diligentia invigilantes, diversas pro temporum qualitate San-

Sanctiones, & Constitutiones in publicum edere non neglexerint, quibus avaritiæ libidinem extinguerent, & usurarum pravitatem e subditorum mentibus funditus evellerent; tamen cum ex fide-dignorum relatione didicerimus, & ex usurariis criminationibus diebus superioribus jussu nostro peractis, compertum habeamus, avaritiæ fomitem animos subditorum nostrorum adeo incitasse, ut postpositis omnibus piissime editis Sanctionibus, & Constitutionibus, non vereantur, variis, occultis, & palliatis modis pauperes in censum, sive afflictum creationibus defraudare, & circumvenire: maxime dum mercibus & rebus ad eorum rem non facientibus, injusto, excessivoque valore ad libitum taxatis, & pretiis confessionatis loco numeratæ pecuniæ decipiuntur. Nos pro debito muneris nostri, Prædecessorum nostrorum laudabilia vestigia sequendo, ut hujusmodi circumventiones eliminentur, & animarum saluti pro posse nostro salubriter prospectum, ac indemnitati pauperum, ne inexplebili usurarum voragine miserabiliter absumantur, consultum sit; statuendum esse duximus, ut statuimus, ordinamus, & decernimus, quatenus deinceps census, sive afflictus constitui debeant super re immobili, certis limitibus designata.

I. Fructifera de sui natura, & apta ad reddendum afflictum.

II. Quæ solum maneat obligata solutioni census, non autem alia ipsius venditoris bona, nisi ratione evictionis, & ad securitatem rei, nimirum quod ea sit vendentis, & fructifera, & capax ad illius census solutionem.

III. Valeatque tantum, quantum capitale afflictus, & tertium de pluri, ob casum repetitionis sortis, ut infra dicetur.

IV. Deinde vero integrali pretio in pecunia numerata, coram testibus, & Notario tempore Instrumenti, & non confessionato, aut quod dicitur anticipato interveniente: quod quidem pretium revera, quacunque fraude, simulatione, & fictione remota venditor accipiat. Præterea sub pacto de re

trovendo quodocunque, nulla obstante præscriptione, non coacto venditore ad redimendum.

V. Ad hæc si res periret in parte, vel in totum, pro parte, vel in totum respective periisse intelligatur periculo emptoris: aut si pro parte, vel in totum, casu tamen fortuito, efficeretur infructuosa, ad ratam emptoris quoque periculo Canon cesset.

VI. Quod si dolo, vel culpa venditoris id contigisse probatum fuerit; is teneatur præcipuum census reddere, aut illum super alia re immobili, ad superius traditam normam, constituere.

VII. Si autem Dominus rei censuariz illam vendere voluerit, Dominus census præferendus erit cuicunque alteri emptori, eique denunciato pretio & conditionibus, quibus res est vendenda, dies quindecim expectentur, num ipse velit eam emere. Reliqua vero circa taxam, & devolutionem, seu verius sortis repetitionem, ob Canonem non solum, tribus successivis annis factis mandatis, & alia præsentibus non contraria, expressa in Constitutionibus Prædecessorum nostrorum, firma volumus, usque ad aliam nostram deliberationem permanere.

VIII. Declarantes bona ob Canonem non solum devoluta, seu loco sortis propter moram, ut supra, extracta, posse redimi, & recuperari per censuarium quodocunque soluta sorte, afflictibus incurtis, ac omnibus expensis. Decernentes proinde, quod afflictus, sive census, sub alio modo, & forma, aut pactis in futurum celebrandi, nulli sint, ac fæneratitii esse intelligantur, ita ut pœnis quoque debitis subiaceant.

IX. Nempe ut principales contra præscriptam formam afflictus constituentes, pro singulo afflictu mulctam decem, viginti quinque, quinquaginta, & centum marcarum, & plus & minus, juxta casum, & personarum qualitatem, Fisco applicandarum, incurrant, &c.

Notarii eos scribentes, præter alias pœnas, pro arbitrio infligendas,



ipso jure; & facto censeantur privati officio rebellionatus.

Testes quoque & Proxenetæ, tanquam participes pravitatis usurariæ, veluti usurarii puniantur. Census vero, præter juris dispositionem, & Constitutionem Prædecessorum nostrorum, præteritis temporibus celebratos, subjacere volumus debitis juris censuris.

Ut autem magis cognoscatur, quibusnam modis sub palliata emptione, & venditione censuarius contractus, contra, & præter supra expositam normam in fraudem usurarum celebrari consueverit, diversisque aliis figmentis, & simulationibus usura in his Regionibus committatur; nonnullos, magisque frequentes casus subjicere operæ pretium duximus, ut etiam causa supradiçtæ nostræ Constitutionis de censibus constituendis magis cognoscatur, ab ejusmodique illicitis, & foeneratiis contractibus absteineatur, & ignorantia crassæ objectio neminem excuset.

X. Quidam enim ab indigentibus pecunia emunt fundum, vel aliud stabile, & eodem contextu illud locant venditoribus sub annuo affectu, & cum pacto redimendi. In quo quidem genere fraus, vel saltem injustitia multifariam committitur. Primo, quia pretium non solvitur secundum qualitatem, & quantitatem fundi, nec emptor habet intentionem emendi, quia in se non retinet fundum, sed locat venditori: nec venditor pariter habet intentionem vendendi, quia non vult a se abdicare, sed in se retinere, sub ficto nomine conductionis: Item quia pensio, seu affectus non constituitur habito respectu ad fructus fundi, prout haberi debet, sed habito respectu ad pecuniam: Item quia onera, & pericula rejiciuntur in conductorem, cum tamen pertinerent ad locatorem, quando vere esset Dominus rei locatæ: Item, quia per pactum oneratur venditor ad expensas instrumenti emptoris, ad quas tamen tenetur emptor, qui libere, & absque ullo onere lucratur fructus. Ex quibus, præsertim ex depravata voluntate contrahentium, eorumque intentione contractus eviden-

ter redditur illicitus. Nec illum excusant Constitutiones anni 1545. quia illæ præsupponunt rectam intentionem in contrahentibus semper adesse.

XI. Nonnulli consueverunt emere annuos redditus, seu census pro pretio quidem a Constitutionibus præscripto; sed obstringunt venditorem ad retro emendum, & ad pretium restituendum infra tot menses, post monitionem sibi factam, & interim emptor percipit redditus: Quod pactum a jure improbat, quia ex eo detegitur depravata intentio contrahentium, non quidem emendi vendendi, sed mutuum exercendi. Contractus enim hujusmodi recedit ab emptione annui census, cujus natura est, ut fors perpetuo alienetur, & redemptio pendeat a libera voluntate, & facultate venditoris; sed quando repetitio sortis pendet a voluntate emptoris, contractus resolvitur in mutuum usurarium, licet effigiem emptoris præ se ferat.

Alii ob affectus per triennium non solutos, agunt ad devolutionem omnium bonorum obligatorum, putantes ea indistincte in commissum incidisse, cum tamen devolutio non debeat admitti, nisi in contractibus emphyteuticis, & in affectibus celebratis cum præambula, & vera emptione, ex qua dominium directum vere fuerit translatum in emptorem.

In affectibus autem constitutis super rebus alienis, qui mos est frequens in hac regione, scilicet, ubi quis emit affectus, seu jus percipiendi affectus, pro quibus venditor supponit, & pro pig-nore obligat fundos; tunc cum emptor non emat fundos, nec dominium directum acquirat, sed solum emat affectus, non potest habere locum pœna commissi, saltem ex æquitate, nec consolidatio utilis cum directo. Et quamvis ex stylo quorundam Notariorum, ea pœna in contractibus aliquando inferatur, non est tamen observanda, cum naturæ, & substantiæ contractus adversetur, ac repugnet pacto redimendi, quod per devolutionem extinctum remaneret. Emptori autem absque devolutione competunt alia remedia, ad consequendum affectus non solutos.

Ali-

Aliqui autem vendunt animalia, vina, grana, & alias merces, pro gravi & excessivo pretio, & quia emptores non habent tunc pecuniam paratam, eos constringunt ad solvendum, & constituendum annuos afflictus. In qua re venditor duplicem quæstum facit: primo in sorte, quam integram, & solidam non solvit: deinde in redditu annuo, qui in hac angusta, & sterili regione ascendit ad rationem septem pro centum ad minus: & post aliquod tempus sortem augent ex his excessivis afflictibus decurtis, & non solutis, simul cum augmento novorum afflictuum.

Quidam etiam anticipata solutione emunt vili pretio fruges tradendas a venditore eo tempore, quo verisimile est, eas majori pretio esse valituras, & quas venditores plerumque venales non habent: quæ anticipatio solutionis habet mutui rationem, quia ementes, antequam res possint eis tradi, censentur mutuare pecunias venditoribus, ut recipiant lucrum, quod est ultra veram æstimationem.

XII. Alii e converso vendunt vina, grana, & alias merces carius, quam omnino valeant tempore contractus, ob datam emptoribus dilationem ad solvendum: qui contractus etiam mutui rationem implicat, quia perinde est, ac si emptor statim numerasset pretium venditori, & venditor illud mutuasset emptori, usque ad terminum, cum lucro, quod pariter erat ultra verum pretium.

Aliqui habentes granum venale, illud vendunt tempore hyemis, nulla tunc facta æstimatione, sed postea pretium taxant quanti plurimi eo anno, usque ad novas fruges venierit.

Plerique vero pecunias mutuunt, cum pacto, ut mutuatarius emat ab eis vinum, bladum, pannum, & animalia, vel nomina debitorum suscipiat, & quo melius fraudem cooperiant, imprimis conficiunt instrumentum sub figura & nomine venditionis, pro majori pretio, quam res tunc vendi possent, & quibus emens non indigebat, deinde certam pecuniæ quantitatem mutuo persolvunt. Et licet videantur duo

contractus, tamen cum sint facti eodem contextu, & in eodem instrumento, censetur unus factus contemplatione alterius, quia emptor eas res non emisset, nisi venditor ei pecunias mutuasset, nec ipse quoque mutuasset, nisi alter quoque emisset pro eo pretio, & ita vendens lucrum acquirit ex mutuo, & usuram committit.

XIII. Quidam alio genere fraudis utuntur, præsertim contra rusticos, quia emunt ab eis oves, vel boves, aut alia animalia, quæ sciunt, aut credunt eos non habere, eademque fide eisdem locant, sub annua pensione, vel si emunt animalia revera extantia, aut propria habent, ea locant cum pacto, ut sors sit salva, seu illius valor, & pretium, & animalia sint periculo conductoris, quod tamen ad locatorem uti Dominum pertinere deberet, & in his casibus latet usura.

Et idem censendum est de locantibus propria animalia revera extantia, ac æstimata: quæ etiam si pereant citra culpam, & fraudem conductoris, volunt tamen, præter annuam pensionem antea perceptam, dictorum animalium æstimationem a conductore sibi persolveri: quod, ut patet omnino iniquissimum est.

Alii tradunt alteri frumentum, seu siliginem sub nomine mutui; sed pretio summæ taxato, cum pacto, ut tempore messis restituatur frumentum novum: usque ad quantitatem dicti pretii. Qui contractus claudicare videtur: quia si est venditio, emptor tenetur ad pretium, non autem ad frumentum: si est mutuum, debitor tenetur restituere frumentum in eadem mensura, & qualitate, & non pretium.

Quidam autem credunt alteri pecunias, & conficiunt instrumentum sub nomine gratuiti mutui; sed post discessum Notarii & testium recipiunt ex pecunia numerata septem, aut decem ex centum, pro interesse anticipato, & tamen mutuatarius remanet debitor de tota summa contenta in instrumento.

Aliqui apertas exercentes usuras mutuunt pecunias ad tempus, modo sub fide, modo sub pignore rei mobi-

lis, vel stabilis, ad rationem septem pro centum, & pro excusatione obijciunt consuetudinem regionis, & Constitutiones Trid. & quia beneficienti naturaliter liceat beneficium rependi. Quæ tamen consuetudo ab eis introducta, cum sit irrationabilis, & Divino juri contraria, non excusat, præsertim in foro poli; nec similiter Constitutiones, quia non loquuntur de mutuo rependibili, sed de redemptione annui census pecuniarii, ad rationem quinque pro centum. Et cum mutuatio sit opus charitatis, debet gratis fieri, & conferens beneficium, non debet plus accipere, quam dedit; nec quæstum facere ex necessitate alterius. Imo quod gravius est, plerumque ex decurso hujusmodi interesse augment sortem, & ex usuris in capitale redactis alias renovant, & exigunt usuras sub nomine interesse.

Propterea his calliditatibus occurrere, & subditorum commodis, ac animarum saluti prospicere volentes, ut pro debito Pastoralis nostri officii tenemur,

Admonemus imprimis omnes Christi-fideles, ut ab ejusmodi contractibus omnino abstineant, & inertii otio relicto, honestis exercitiis incumbant, ne dum reprobis artibus lucrum temporale acquirere procurant, proprias animas in æternum amittant.

Et ulterius considerantes Nos, usurarum crimen in hac regione eo usque invaluisse, ut neminem fere jam id committere pudeat; prohibemus omnes & singulos prædictos contractus, tanquam illicitos, fœneratios, & simulatos: Mandantes, ne quis usurarium manifestum, sive sic manifestus de jure, sive de facto, vel quovis alio modo convictus, ad Ecclesiasticam recipiat sepulturam, nisi idonea præstita cautione de usuris restituendis.

Insuper declaramus, omnes & singulos usurarios subjacere debere quibuscunque pœnis, & censuris Ecclesiasticis, infra describendis, contentis in *Constitutione Lugdunensis Concilii*, quam singulis annis in prima Dominica Quadragesimæ, per Rectores animarum publicari mandamus, & inviolabiliter ob-

servari, ultra multam pecuniariam marcarum decem, viginti quinque, quinquaginta, & centum, in præmissa Constitutione afflictuum impositam, quæ etiam in præmissis casibus locum habeat.

Similiter observari mandamus contra omnes Usurarios Statutum sub *Cap. 68. Lib. primo Civilium*.

XIV. Idcirco omnibus, & quibuscunque Judicibus, potissimum vero Vicario nostro in Spiritualibus Generali districtè injungimus, ut contra usurarios; Notarios instrumenta scribentes, proxeneras, mediatores, consultores, & alios quoscunque, qui ejusmodi contractibus illicitis, quoquo modo interfuerint, auxilium, & opem præstiterint, diligenter inquirant, & procedant, ac ultra debitam restitutionem, censuris Ecclesiasticis, & aliis pœnis, tam juris Canonici, quam Civilis, & Statutariis, ac præsentis Constitutionis omnino coerceant: Alioqui si in hoc tam detestabili vitio compeſcendo desides erunt, indignationis nostræ pœnam sciant se incurſuros.

Cujus nostræ Constitutionis, & dispositionis, & declarationis tenorem in omnibus locis, qui sub nostra ditione continentur, publice manifestari mandamus.

### *Constitutio Concilii Lugdunensis.*

Quamquam usurarii manifesti, de usuris, quas receperant, satisfieri expressa quantitate, vel indistincte in ultima voluntate mandaverint, nihilominus tamen eis Ecclesiastica denegetur sepultura, donec de usuris ipsis fuerit, prout patiuntur facultates eorum, plenarie satisfactum: vel illis, quibus est facienda restitutio, si præsto sint ipsi, aut aliis, qui possint eis acquirere, vel eis absentibus, loci Ordinario, aut ejus vices gerenti, sive Rectori Parochiæ, in qua testator habitat, coram aliquibus fide dignis de ipsa Parochia. Quibus quidem Ordinario, Vicario, aut Rectori, prædic-



Et modo, cautionem hujusmodi eorum nomine liceat præsentis Constitut. auctor. recipere: ita quod illis perinde actio acquiratur, ac si servo publico de ipsius Ordinarii mandato idonee de restitutione facienda sit cautum. Cæterum si receptarum usurarum sit quantitas manifesta, illam semper in cautione prædicta exprimi volumus, alioquin aliam recipiens cautionem hujusmodi arbitrio moderandam, ipse tamen scienter non minorem, quam verissimiliter creditur, moderetur: & si secus fecerit, ad satisfactionem residui teneatur. Omnes autem Religiosos, & alios, qui manifestos usurarios, contra præsentis Sanctionis formam ad Ecclesiasticam ausi fuerint admittere sepulturam, pænæ Lateranen. Concilii, contra usura-

rios promulgatæ, statuimus subjacere. Nullus manifestorum usurariorum testamentis interfit, aut eos ad confessionem admittat, sive ipsos absolvat, nisi de usuris satisfecerint, vel de satisfaciendo pro suarum viribus facultatum præstent (ut præmittitur) idoneam cautionem. Testamenta quoque manifestorum usurariorum aliter facta, non valeant, sed sint irrita ipso jure.

*Dat. Trid. ex Arcenostri boni consilii, die XIII. Januarii 1609.*

*Ad Mand. Illustr. & Rev. D. D. Card. Episc. Princip. Trid. &c. pr.*

PETRUS ALEXANDRINUS DE NEUSTAIN, Cancell.

## GRAVAMINA

*Proposita per Mag. D. D. Cons. Civitatis, adversus novam formam constituendi Censuræ, sive Affictus in Episcopatu Tridentino.*

**§. I. Fructifera de sui natura, & apta ad reddendum affictum.** Et paulo inferius: *Fructifera, & capax ad illius census solutionem.*

**Primo.** Pare aggravio, che per detta Costituzione sia esclusa l'antica consuetudine, & usanza approvata di poter constituir censi sopra le case, il che però da molti summissi viene admeso, & tollerato; & anco in se è ragionevole; poiche occorrerà, che molti poveri Cittadini, & Artigiani ritrovandosi quella sol casa, con la commodità di poter constituir sopra censo, cavaranno danari da porsi a traffico tale, che sarà causa in buona parte di sustentare la famiglia loro. Et non dimeno non faranno privi d'habitarla; cosa, che non haverebbero, quando altretti à venderla, dovessero privarsi di quella, & del solito, che lor causa la commodità del traffico, & consequentemente l'utile, & guadagno.

**§. II. Quæ solum manean obligata solutioni census, non autem alia ipsius venditoris bona, nisi ratione evictionis, & ad securitatem rei.**

**Secundo.** Se considera, che, stante queste Constitutioni, il Padrone del censo volendo conseguire l'annual suo fitto, sarebbe sforzato con grave suo scommodo, & disturbo (non potendo proceder contra altri beni per non esser sottoposti ad obligo, se non per l'evictione) far pignorar l'affittalino ogn'anno sopra le fructe del luogo obligato, il che, manco potrebbe fare, essendo notorio, che nel tempo solito dello scosside de censi, sono no solo di già raccolte tutte l'entrate, mà etiandio in buona parte consumate. Donque per valersi del suo, doverebbe necessariamente procedere alla subhastatione di parte del luogo obligato. Onde oltre li gravi litigii, spese, e travagli auverrebbe, che in puoco tempo la proprietade, & fondamento del censo resterebbono estinte à evidente, & enormi.

missimo danno d'incatti compratori; confidando perciò, che sarà provisto, permettendo, che resti sì l'hypotheca speciale nel luogo, ove sarà fondato l'affitto, sì anco la generale sopra li altri beni del venditore, non solo per l'evittione, mantenimento, & validezza totale del contratto, mà anco per l'annual interesse, & frutti correnti, spese, & danni; che per conseguir quelli vengono patiti dai Patroni.

**§. III. Valeat tantum, quantum capitale affictus, & tertium de pluri.**

*Tertio.* Vedendo, che oggidì li stabili, & possessioni sono in prezzo tale, che à voler constituir l'affitto sopra'l valor del capitale col terzo di più, senza dubbio il fondo non sarà atto, ne capace, à render il 7 pro cento, detratte le spese, e parte colonica; onde si deve conchiudere, che per esse Constitutioni più tosto sono costituiti li censi sopra le fatiche del povero contadino, che sopra'l fondo; non essendo quello atto per se alla rendita di tre, ovvero quattro per cento, contra l'espressa mente, & parola della Bolla; onde si desidera, che fosse lecito costituirli sopra tal quantità, che sia atta à render frutto equivalente all'interesse del capitale sborsato: tanto più ch'in esse Constit. vien statuito, che se in parte si facesse infruttuoso'l fondo, ciò s'ii anco in pregiudicio del Patrone del censo, havendo in ciò riguardo alli frutti, & non al capitale, & valor del fondo.

**§. IV. Deinde vero integrali pretio in pecunia numerata, non confessionata, aut, quod dicitur, anticipata.**

*Quarto.* Par non leggiero aggravio, attesa la strettezza del denaro, & del paese, non poter almeno con legitimo, & liquido credito, & con il valor vero, & real di robba constituir il censo; il che non solo per il passato è stato sempre osservato; mà anco da Dottori in materia de censi in termine della Bolla adMESSo, & tollerato, massime potendosi (per oviare alle fraudi) ritrovare strada, & mezzo, che in caso de far Constit. de censi in questa guisa,

si debba dal giudice interponere il Decr. causa cognita.

**§. V. Ad haec si res periret in parte, vel in totum efficeretur infructuosa, casu tamen fortuito.**

*Quinto.* Ne questa Constitutione par esser senza aggravio considerabile, per le chiare regole in jure, & opinione de Scriventi, che vogliono, che possi liberarsi l'emphiteuta, ò livellario in tutto, e non in parte; altrimenti s'il fondo non perisse in tutto, e non in parte, non essendo convenevole, che'l livellario giochi al sicuro. Et in ciò il livellario & censuario conven-gono insieme probabilmente. Et meno può star l'altra, che se la cosa in tutto, ovvero in parte fortuitamente, si facesse infruttuosa, parimente debba cessar il censo pro rata al compratore. Conciosiache quindi si causerebbe senza dubbio introductione nuova di liti infinite, & immortali; Poiche la maggior parte de censuari per porre intrico, & sotterfuggere i pagamenti de censi usand'ogni cautela, & astucia s'opporrebbero à i Patroni, con dire di non haver cavato dal fondo obligato frutto bastevole alla reintegratione dell'affitto per siccità, freddi, geli, copia sopra-bondante d'acque, tempeste, & altri simili accidenti, ascrivendo il tutto (ancorche fosse più presto per difetto, & colpa sua, ch'altrimente) benchè indebitamente, in tutti li accidenti accennati per scudo di quella general parola: infruttuosa, senza farne la ragionevole distinctione, pretendendone perciò ristoro, ò remissione. Nelche quali litigii auverrebbero? quai spese? quai travagli? ciascun può giudicare, se non volesse il Padron del censo del continuo far custodire le frue, & assister al raccolto di quelle, come se del loco, ne fosse egli assolutamente Padron; il che gli farebbe di troppo grave scommodo, e danno; Et quando in tempo d'infruttuosità si dovesse permetter ristoro all'affittalini, porterebbe l'honesto, che li Padroni parimente in tempo di fertilità sentissero ristoro, e reintegratione de danni patiti; acciò concorresse trà di loro parità nel bene, & nel male, per le ritte regole in jure; meglio

meglio sia dunque per ischivar questi, & altri disturbi, & travagli, che resti presso gl'Affittalini incommodo, & comodo. Che s'il fondo gli apportarà frutti in quantità, e di gran prezzo il tutto cede à beneficio suo, & se per contrario, n'habbi pazienza, & nell'uno, & nell'altro caso ringracii il signore.

**§. VI. Quod si dolo, vel culpa venditoris id contigisse probatum fuerit, is teneatur pretium census restituere.**

*Sesto.* Si duolo che considerandosi la malicia dell'Affittalino nel peggiorar il fondo, & luogo soggetto all'affitto, se gli lasci in libertà, le per esse parole come per raggion commune sopra quelle fondata di potere, ovvero restituire il danaro, ovvero fondar l'affitto sopra altri beni, dovendo per ogni raggion in pena de fraude commessa solo esser in libertà del Patron del censo, over di repeter il danaro, over far quello costituire sopra altri beni; poiche altrimenti facendo il Contadino, che nelli tempi presenti è molto sagace, & accorto potrà trovar mille occasioni (danneggiando il luogo) di rimover l'affitto d'un luogo, & riporlo nell'altro.

**§. VII. Si autem Dominus rei censuarie illam vendere voluerit.**

*Settimo.* Che venendo 'l caso che l'Affittalino in fatto, avanti li quindici giorni statuti à deliberare al Padrone del censo, ovvero avanti la denontia alienasse il fondo soggiogato, non sia per qualche clausula annullativa, ovvero legale impediente la translatione del dominio provisto, a fine, che volendo il Padrone rihaver il fondo non s'ia astretto à porsi in lite, & intencar un giuditio ordinario, potendogli esser soccorso con un summario possessorio esecutivo.

**§. VIII. Declarantes bona ob canonem non solutum devoluta. Alii ob affus per triennium non solventes agunt ad devolutionem.**

*Ottavo.* Pajano notabilmente gravatorie le sudette Constitutioni, perche  
*Tomus VIII. Concilior. German.*

in esse non solo si concede patto alli censuali di redimer il fondo devoluto dopò li trè mandati, alterandosi in ciò gl'ordini, & constitutioni già da passati Statuenti in questa materia introdotti; quali è da credere, che habbino molto ben pesato, & considerato questo negotio, & perciò, per raggione probabile meno, habbino concesso patto alcuno da redimere, dovendosi vedere, che li Censuarii puoco si curarebbono di pagar il censo, mà il tutto con varie cavillationi, & ostacoli ingiusti, & illeciti sotterfugendo i pagamenti, lasciarebbono scorrer alla peggio, giovando loro, in caso de devolutione haver il patto di redimer; mà anco si concede perpetuo, e non à tempo limitato, che se pure si voleva conceder questo patto (ancorche gravatorio) poteva scorrere, quando s'havellè concesso conforme lo stile, & Constitutione delle subhastationi; ne' quali da Ragnesi cento in giù, li debitori hanno patto da redimer la cosa subhastata di mez'anno, & da detta summa in sù, sia quanto si voglia, d'un'anno intiero, & non oltra. Venendo in ciò parimente alterati li Statuti di questa Città in materia de prescrittioni, & anco le leggi communi, da cui vien admissa la prescrizione, anco contra la Chiesa Romana, ne' suoi casi: oltra che restando il dominio del fondo in dubio, & incerto, si causerà, che 'l più delle volte faranno, ovvero dal Padrone, ovvero d'altri lasciati deserti li Luoghi, & Possessioni devolute; & di più per non lasciar venir questo caso, si causeranno asperità contro poveri Fittalini, che pure nel termine di trè anni, over nel fine potriano ritrovar danari per pagare gl'affitti incorsi, & sollevarsi dalla devolutione. Aggiungendosi, che gli Affittalini, in cui pregiudicio occorrerà la devolutione, habbino non solo il patto suddetto perpetuo de rescottere la cosa devoluta; mà anco agiovolezza di far ciò con il sborsar solo la sorte con l'incorsi & spese, nel che vien ad'essere levato al creditore anco quel poco beneficio del terzo di più, che si dava dalle passate Constitutioni, nel qual però venivano computati gli affitti in-



corsi triennali. Quindi resullarà che all'Affittalini molte volte tornerà a conto di non curarsi delle devolutioni, potendo riaver il fondo devoluto, & à beneplacito suo, & in tempo forli di maggior rendita, prezzo, & stima, senza sottogiaccere à pena alcuna, mà solo pagando (come s'è detto) la sorte incorfa, & spese à evidente danno solo de creditor. Restando oltra di ciò notabil aggravio, che nell'affitti ordinarii, non s'admette la devolutione, mà solo nelli contratti Emphiteotici, & quelli ch'hanno preambula, & vera venditione, contra l'ordine di Statuenti passati, quali in questa materia non fanno distintione, ò differenza alcuna trà quelli, & questi, mà tutti indistintamente comprendon sotto'l capitolo. Item quod in casu devolutionis; & si deve conchiudere certamente, ch'anco ne i censi ordinarii si faccia translatione del dominio diretto per l'antico stile, & approvata osservanza di questo Paese praticata universalmente ne i contratti, Instrumenti pubblici di constitutioni, & cessioni d'affitti ordinarii, ove specificatamente quella si scopre in quelle parole, dedit, vendidit, cessit, transtulit unum affictum una cum proprietate, & directo dominio, unde solvitur; & anco in altre clausule solite di tali Instrumenti, che non si transferisse il dominio diretto, si dourebbe dire più tosto obligo personale, & reale insieme, secondo l'opinion de Dottori; E perciò ne i censi ordinarii ancora deve havere luogo la pena del commesso, & consolidatione del dominio utile col diretto; la quale tanto più viene à esser ammissibile, quando, che già dalle passate Constitutioni ragionevolmente fù introdotta à terrore delli Affittalini, acciò che più facilmente pagassero li censi, & successivamente à beneficio loro, & de creditor insieme, & doppo, che sono state fatte esse Constitutioni passate, quando devolutioni sono mai occorse? Certo puoche, perciocche ciascun Affittalino, benchè debole, volendo però pur nel termine d'anni tre (come s'è detto di sopra) haver tempo, & comodità de far danari per pagar li restanti, senza cascar nella devolutione

sodetta; quale se non fosse, in vero li Padroni di censi farebbono à guisa delli Affittalini strusciati ne i pagamenti, che di raro, ò non mai restarebbono da quelli compitamente sodisfatti. Et perciò niuno, ò puochi si ritrovarebbono, che sotto questa constitutione (ritrovandosi puochi parimente hoggi ch'ancor sorte le passate vogliono comprar fitti, così difficili sono di scuoterli, & mantenerli, come è notorio) vogliono far simili acquisti de censi, & affitti: Ilche redondarà finalmente tutto à danno, & rovina de poveri Contadini, che nei lor bisogni gli sovenghi, se non alienando totalmente le proprie sostanze; tanto più sentendosi gravata questa Città, che per essa dichiarazione viene non solo dato legge alli censi futuri; mà anco alli passati; quali essendo itati fondati da Padroni, mentre v'era una forma di constitutioni diversa dalla presente, nondimeno esser sottoposti (altrimente sarebbe notabilissimo danno, & universal pregiudicio di questo Paese) a queste novamente publicate, mà restar solo sotto le passate, in quei stessi termini, modo, via, & forma, ne' quali fin qui sono state prattitate & osservate senz'alteratione alcuna, ch'attion seguita nanzi à chiara prova sottogiaccere non deve a legge nuova. Dovendosi, e potendosi restringere essa dichiarazione solo a censi futuri, & non à passati.

*§. IX. Nempe ut principales contra predictam formam affictus constituentes, pro singulo affictu,*

*Et Notarii eos scribentes,*

*Testes quoque, & Proxenetæ tanquam participes.*

*Nono.* Ci preme non solo la gravità delle pene, dovendo bastar le statutarie & legali, mà anco che indifferentemente li Notari, Testimoni, & Sensali à quelle soggiaciono; potendo occorrer (come occorrono) casi, che non solo li Testimoni, e Sensari, che per il più sono persone idiote, mà anco li Notari, Dottori, & persone capaci non sappino cognoscer la qualità delli casi, & varietà de contratti, & passate usu-

ture, solo con grande consideratione & studio, & fatica. Oltra che essendo per li Statuti de questa Città al cap. 68. in civilibus, & legal intelligenza de Dottori, & in vero con ragione applicata la pena che ad Uturari si leva alla parte, in sollevatione del danno patito, quella venghi hora levata, sperando ch'in ciò meno verrà pregiudicato in conto alcuno a essi Statuti.

**§. X. Quidam enim ab indigentibus emunt fundum.**

*Decimo.* Che per la generalità delle parole habbia ad esser prohibito (cessando le fraudi narrate in detto Capit.) il comprar il fondo, & poscia incontenente il relocarlo al venditore per temporale, over perpetual affitto, & livello. Ilche come usitato da tempo, che non vi è memoria in contrario, & admeso dalle passate Constitutioni in questo distretto, non conviene ch' hora sia indifferentemente prohibito; massime potendo, & dovendo li contrafacenti esser penitentiati in foro poli; & quelli anco potendosi in caso di fraude, e di malitia castigare senza simili prohibitioni in foro fori di pene statutarie; & legali comminate in altre Constitutioni.

**§. XI. Nonnulli consueverunt emere annuos redditus, seu census pro pretio.**

*Undecimo.* Che dovendo esser la legge chiara, sii nella generalità delle sodette, & sequenti parole prohibito il comprar il censo già costituito d'altri, con il patto, del quale si fa mentione; non potendosi considerar fraude, inganno, ò malitia; ne meno ritrovandosi ciò esser vietato per qual si voglia legge Canonica, overo Civile; perciò sarà necessario, nel presente soprascritto capo dichiararsi talmente, che contra la mente non sii restretto il commercio, & contrattar trà le persone.

**§. XII. Alii e converso vendunt vinum, grana, & alias merces carius, quam omnino valeant tempore contractus, ob datum emptoribus dilationem ad solvendum.**

*Duodecimo.* Si pone per reverente ricordo, che si resta con grandissimo dubbio, che per non esser prescritto modo, & meta à quelli, che danno in credenza, di qualche lecito, & honesto guadagno, qual anco in foro conscientiae si suol admettere, considerata la qualità delle pers. in caso di penurie, & carestie, li poveri Contadini non troveranno robbe in credenza; Ilche causerà loro, che dovendo alienare li stabili, viveranno in continua miseria con le famiglie loro: onde gli Gentil' huomini, & Cittadini non ritrovaranno sicurezza ne' Contadini di poter locar li suoi masi.

**§. XIII. Quidam alio genere fraudis utuntur, &c. quod tamen ad locatorem.**

*Terzodecimo.* Che sii giudicata usura, s'il Padrone nel locar, ò affittar un suo maso, overo possessione, con essi parimente consegnasse al conduttore alcuni animali stimati, de quali valendosi egli ne suoi bisogni per la vecchiaja, overo difetto naturale morissero, solo il Padrone habbia da sentir il danno, volendo ogni honesta ragione, che ponendovi il Padrone il capitale, & il conduttore la fatica, à quello resti il capitale sicuro, & à questo la metà de nodrumi; overo almeno, che si come il conduttore ne cava la metà del frutto, & non del suo, mà di metà concorresse nella perdita fatta dell'animali. Et però si giudica, che farebbe meglio, postposta simil prohibitione, fargli ordine, e prescriversi modo di fare foccide d'animali, quale si somministrerà d'approvarsi, à fine che, per la sodetta inhibitione generale, non sia causato danno à poveri Contadini, che altrimenti non ritrovaranno soccorso così facilmente in simili bisogni.

§. XIV. Idcirco omnibus, & quibuscunque Judicibus, potissimum vero Vicario nostro in Spiritualibus.

*Finalmente.* Si reputa notabil, & praticabil aggravio, che l'officio spirituale, preta quindi occasione, vogli non solo conoscere le cause mere spirituali; mà anco le laicali in termine di lesione, errore di calcoli, conti di partite, & simili, & quelle avocare da Giudici secolari; il che vien à causar gravame notabile, non solo per particolari, per le spese eccessive, ch'occorrono; mà anco generale, sì alla Città, & Podestaria, sì anco alla temporal giurisdittione di questo Vescovado; levandosi in questa maniera l'appellationi, & ricorsi; & quelle introducendosi avanti il Metropolitano.

Alche si spera, che sarà provisto, & oviato.

**DECRETA, sive RESPON-  
SIONES ad singula Capita  
Gravaminum propositorum  
per Mag. DD.  
Confs.**

*Ad Primum.*

**N**on prohibet Constit. census super domibus, quia inter res fructiferas censetur: dummodo in illius æstimatione habeatur ratio ad id, quod locari potest, juxta infra declarata ad tertium Caput.

*Ad Secundum.*

Non est restricta facultas consequendi census non solutos super aliis bonis stabilibus, quam mobilibus ipsius constituentis censum; sed hypotheca restringitur, ut in Constitutione, super re certis finibus designata ratione capitalis, & si alia bona per censuarium possiderentur, consulere sibi Dominus poterit, absque diminutione fundi obligati, per dimissionem ex Salviano interdicto in rem hypothecatam, tamdiu retinendam, donec de fructibus fuerit ei integre satisfactum, & ideo vana est proposita speculatio.

*Ad Tertium.*

Quia fundus vere non emitur, sed jus percipiendi annum censum, æstimatio facienda erit, non habita ratione pretii fundi, sed juris exigendi illum annum censum, qui vere emitur, & proinde justum pretium erit, designando, & obligando tantam quantitatem fundi, de qua percipi possit census, qui solvi promittitur, ex quibus cessat dubium propositum.

*Ad Quartum.*

Licet in foro conscientie in casibus sinceris compensatio fieri possit; tamen in foro fori indistincte ad tollendas palliatis fraudes, quæ ut plurimum fieri solent, non admittitur: & si secus determinaretur, contrariaretur Bullæ Summi Pontificis, quæ ubique terrarum servari debet.

*Ad Quintum.*

Male conqueritur: quia fundus non dicitur fieri infructuosus ratione grandinis, pruine, vel siccitatis; sed ex aliis casibus, quibus fundus ipse perit in totum, vel in partem: nec bene inferitur de emphyteusi ad censum; quia, ut notorium est, differunt.

*Ad Sextum.*

Per illa verba non gravantur Domini census: & fraudibus, si opus erit, aliis etiam opportunis remediis, & modis occurratur.

*Ad Septimum.*

Non est prohibitum contrahentibus adjicere in instrumento opportunas clausulas ad corroborationem eorum, quæ in Constitutione conceduntur.

*Ad Octavum.*

Pactum redimendi est de substantialibus census, adeo quod, illa pactione sublata, contractus haberet vim mutui, & esset usurarius, contra quem nulla cadit præscriptio legis communis, nec municipalis, aut pacto vel consuetudine induci potest, nec potuit, quæ, uti corruptela nil in esse posuit, uti etiam dictum est in Constitutione sub §. Alii ob affectus per triennium. Propterea non admissibilia petuntur: prout male con-



conqueruntur, Constitutionem extendi ad præteritos census; quia aliter ex ejusdem lectura constat.

*Ad Nonum.*

Nihil derogatur Statuto Capit. 68. quod firmum manet respectu pænæ parti applicandæ, sed disponitur de pænâ Fisco debita, in qua arbitrandâ Judices discrete, & moderate, habita ratione qualitatibus, casuum, & personarum procedant.

*Ad Decimum.*

Non prohibetur sincera fundi emptio, & ejusdem non simulata locatio sub pensione, correspondente fructibus de jure permessa.

*Ad Decimum primum.*

Superflua & minus necessaria declaratio petitur, cum satis recte intuen-

tibus Constitutionem pateat, in ipsa fieri dispositionem de creandis censibus, & non de emendis jam creatis.

*Ad Decimum secundum.*

Notetur verbum: *omnino*, quo excluditur nimius excessus, & non honestus, & licitus, & cessabit dubium.

*Ad Decimum tertium.*

Caveant a prohibitis in præsentî Constitutione; cæterum modus constituendi societas licitas a legibus satis præscribitur.

*Ad Ultimum.*

Causæ non spectantes ad forum spirituale, remittantur ad Judicem sæcularem, prout ita mens fuit, & est Illustrissimi & Reverendissimi Domini.

**QUÆSITA facta per Notarios Judicariarum: super forma novissime edita constituendi Census, super primo Capite incipiente:**

Quatenus deinceps census. §. Præsupponendo, quod constitutur affectus, sive census capitalis Rhenen. centum.

*Primo.* **Q**uæritur, an tertium de pluri, de quo fit mentio in dicta forma, debeat esse Rhenen. 33. & car. 20. An quinquaginta & sic petia terræ, super qua dictus census fuerit constitutus, debeat esse valoris dictorum Rhenen. 133. gr. 20., an 150. an aliter?

*Secundo.* An dicta petia terræ debeat æstimari per probos viros? & quatenus debeat ita æstimari; An dicti probi viri possint eligi a partibus, vel a Judice, & a quo Judice? Et an dicta res possit æstimari per contrahentes?

*Tertio.* Præsupposito, quod dicta res fuerit æstimata juxta dictam formam; videlicet æquo & justo pretio, & quod tamen ex ea non perciperentur tot fructus, ex quibus dictus affectus, sive census juxta tenorem Constitutionum, ac earum moderationem posset solvi integre, & sic non esset capax ad illius solutionem; poteritne accipi ex alia petia terræ in majore quantitate pretii supradicti, limitati in prædicta forma, seu ex prædicta, si esset majoris pretii? Et pro

quanta quantitate ad hoc, ut sit capax ad solutionem dicti census juxta dictam formam?

*Quarto.* Ulterius quæritur, si pretium liquidatum, seu limitatum petiæ terræ, super qua fuerit constitutus census, decreverit pro medietate, sive plus, vel minus, & censuarius vellet ipsam Domino dicti census renunciare, & amplius dicto censui non subjacere; an Dominus dicti census tenebitur eam acceptare minoris valoris, & pretii capitalis, & affectuum retentorum, & sic de dicto capitali census, & affectibus occurrentibus amittere? Stante, quod si pretium dictæ rei creverit, Dominus census a censuario invito eam habere non poterit; & ita in hoc casu, Dominus census esset pejoris conditionis, quam ipse censuarius, quod non videtur juri consentaneum.

*Quinto.* Item, an in Instrumento constitutionis affectus tritici, & vini graspati, licet celebretur in quolibet mense anni, debeat poni & scribi, quod dictus affectus debeat dari & solvi per censuarium Domino singulis annis in-

tra octavam S. Michaëlis respectu tritici : respectu vero vini graspati in vin-  
demia proxima, prout ante hac fuit  
observatum : & si ita fieri non debeat ;  
quid in hoc fieri, & observari debeat ?

*Sexto.* Item, an censuarius pro  
majori cautione, & securitate Domini,  
debeat jurare, rem, super qua consti-  
tuit censum, esse suam liberam, & ex-  
peditam, & nulli alii obligatam, saltem  
pro quanto ipse sciat.

*Super secundo,* incipiente : Deinde  
vero integrali pretio.

*Septimo.* Præsupponendo, quod  
emptor affectus, sive census, contrahe-  
ret cum suo debitore liquido, & claro,  
ex causa legitima, & solveret eidem  
venditori, sive censuario in præsentia  
Notarii, & testium, pretium capitalis  
affectus, constituti juxta dictam formam ;  
an creditor possit expedito negotio in  
præsentia dicti Notarii, & testium, re-  
cipere ex dictis pecuniis a dicto cen-  
suario, & debitore, volente satisfacere  
dicto suo debito : & quatenus non pos-  
set recipere eo momento, id est, expe-  
dito dicto negotio a dicto debitore,  
quando possit, & si nunquam ex dictis  
pecuniis posset recipere in solutum, ex  
qua causa hoc a jure reprobatur ? Et  
quid in dicto casu agendum sit, ut di-  
ctus creditor consequatur a dicto affec-  
tualino, & debitore creditum suum li-  
quidum, ut supra dictum fuit, & de  
quo non est aliqua inter contrahentes  
controversia ?

*Octavo.* Item si Titius velit cedere  
Sejo affectum, quem ipse a Sempronio  
emit ; an ipse Sejus in solutum pro di-  
cto affectu mobilia, & se moventia da-  
re poterit ? Et si poterit, cur non po-  
terit etiam dare in emendo similem af-  
fectum, ut in prædicta cessione : & ca-  
su, quo mobilia, ac se moventia in ces-  
sione dicti affectus, dari non possent,  
& quod Dominus dicti affectus (ut quo-  
tidie occurrit) ob necessitatem propri-  
am, talem affectum vendere, aut cede-  
re cogatur, & non inveniat promptam  
pecuniam, quid agere debeat ?

*Nono.* Item an per prædictam formam  
censuarius tenebitur (prout antehac  
observatum fuit) solvere mercedes in-  
strumenti constitut. dicti affectus ? Et

an in dicto instrumento id licite Nota-  
rius scribere poterit de voluntate con-  
trahentium, prout pariter antehac ob-  
servatum fuit ? Cum id in dicta forma  
non videatur prohibitum in contra-  
ctibus censuum.

*Decimo.* Item an Notarius, qui est  
confecturus instrumentum super dicto  
affectu, & testes debeant continue in-  
teresse ad videndum fieri, & observa-  
ri contenta in aliquibus ex supra scrip-  
tis Capitulis, &, quatenus debeant  
interesse, ad quæ debeant : an vero  
sufficiat, quod sint præsentibus publica-  
tioni instrumenti, prout antehac ob-  
servatum fuit ?

Super quibus omnibus & singulis

*Quæsitis*

*Quæritur,* quid agendum sit ; ne  
contrahentes, Notarius, & testes inci-  
dant in pœnas contentas in dicta for-  
ma ?

### *RESCRIPTA ad dicta QUÆ- SITA, facta per Notarios Judicariarum.*

*Ad Primum.*

**T**ertium capitalis Rhen. centum,  
in præsentibus propositum sunt Rhen.  
33. car. 30. & non quinquaginta, qui  
efficiunt dimidium capitalis prædicti :  
& petia terræ, super qua constituen-  
dus erit talis census, debet ad mini-  
mum valere 133. car. 20. & reddere  
fructus sufficientes ad solutionem cen-  
sus, ut in tertio Capitulo infra declara-  
bitur, licet possit etiam valere de pluri  
in modico excessu.

*Ad Secundum.*

Non est necessaria æstimatio, quo-  
tiescunque sciunt contrahentes verum  
pretium : & illius in creatione census  
habeatur debita ratio : & in casu, quo  
partibus non liqueat de valore, æsti-  
matio poterit fieri omni meliori modo  
contrahentibus bene viso ; dummodo  
sincere fiat, & absque fraude, &  
dolo.

*Ad Tertium.*

In æstimando valore bonorum, su-  
per quibus constituendus est census,  
attendendum est potissimum ad preti-  
um, quo ipsa bona venundari, & com-  
muni-

muniter æstimari possent, & quos redditus, & fructus quotannis afferant. Nam si fundus valuerit quingentis florenis, & redderet solummodo fruges valoris Rhen. 14.; non debet in ætimatione facienda ad hunc effectum appretiari ultra Rhenen. 200. & ita intelligitur illa clausula in Constitutionibus, quod res censualis sit apta ad reddendum affictum.

*Ad Quartum.*

Valor rei censuariæ attenditur, & æstimatur tempore, quo constituitur census: & si postea auctus, vel diminutus fuerit, exinde nullum Domino oritur præjudicium; reliqua declarata sunt a jure communi.

*Ad Quintum.*

Quamvis pacisci liceat inter contrahentes, ut solutio affictus fiat tempore eis bene viso, dummodo annus integre expleatur; tamen magis congruum, & veniens est, ut affictus tritici, & vini graspati, cum possint a Dominis prætendi in specie, solvantur tempore, quo prædictæ fruges solvendæ extant.

*Ad Sextum.*

Non est necessarium jusjurandum.

*Ad Septimum.*

Non prohibetur censuarius distrahere pecuniam receptam pro venditione census in exolutionem æris alieni, & in alios ejus usus; dummodo sponte id faciat, nulla præcedente, aut subsequente, ad id coactus conventionem, aut obligationem, idque fiat post perfectum contractum.

*Ad Octavum.*

In constitutione census debet intervenire realis numeratio, & solutio pecuniæ: secus in cessione, aut venditione census jam constituti, in qua dari poterunt aliæ res, quam pecuniæ, juxta conventa.

*Ad Nonum.*

Censuarius de jure non potest gravari ad solutionem mercedis instrumenti.

*Ad Decimum.*

Facta publicatione, & stipulatione instrumenti partibus præsentibus, non est ulterius necessaria Notarii præsentia, & testium.

### *Alia QUÆSITA facta per Notarios Judicariarum.*

*Primo.* **Q**uæritur, an verba illa, *tempore solutionis*, posita in declaratione clausulæ (*possint tamen creditores*) intelligantur, & intelligi debeant tempore S. Michaelis, quo tempore censuarii tenentur solvere affictum, seu interesse: vel tempore, quo effectualiter fit solutio?

*Secundo.* Quæritur, an censuarii tempore affrancationis, & liberationis affictus, sive census, teneantur, & debeant solvere mercedes instrumentorum constitutionis dicti affictus, ad formam hanc novissimam celebratorum, prout & an. hoc fuit observatum, cum sint ex conventionem, & pacto expresso obligati.

*Tertio.* An dicti censuarii teneantur, & debeant tempore affrancationis affictus constituti post novissimas Constitutiones, solvere saltem pactum retrovendendi, cum sint propria jura sua.

### *RESRIPTA ad dicta QUÆSITA facta per dictos Notarios.*

*Ad Primum.* **I**ta intelliguntur verba, ut attendatur tempus, quo fit per mandatum a creditore census specialis interpellatio, & declaratio, ipsum velle solutionem in specie, non autem in pecunia.

*Ad Secundum, & Tertium.* Mercedes Notariorum sunt solvendæ per emptorem census, cujus gratia fit instrumentum, prout jura disponunt, quibus per novissimam Constitutionem nihil additum fuit: sed quod fieri debuit, ac debet, ad tollendos abusus, declaratum; & idem intelligatur de exigua mercede pacti, cum pactum ipsum sit accessorium, & de summa essentia contractus; prout e converso venditor census tenebitur integras solvere mercedes instrumenti liberationis, quia fit in ipsius favorem.

*Sign. 17. Aprilis 1612.*

CON.



## CONSTITUTIO NOVA SUPER DISSOLUTIONE CENSUS.

*Quomodo scilicet, & quando in alia specie, quam in pecunia numerata, invito Domino census, illius redemptio fieri debeat, & possit.*

CAROLUS EMANUEL MADRUTIUS, DEI GRATIA, EPISCOPUS,  
PRINCEPSQUE TRIDENTINUS &c.

**L**icet in census redemptione pretium Domino censuali contradicenti, in alia specie, quam in pecunia numerata alioquin restitui nequeat; sæpius tamen contingere rerum magister usus testatur, quod iusta necessitatis causa impellente, potissimum vero, ubi debitoris inopia, vel hæreditatis aditio cum benef. l. & invent. facta, iudiciali separationi, seu bonorum discussioni inter concurrentes creditores locum aperit, ille volens, nolens, adversus censuales contractus naturam, cogatur vel prædia censita, vel alia debitoris bona, etiam in sortis censuales extinctionem, in solum accipere pro æstimatione a peritis facta: Qua in re plures indebite se gravari conqueruntur, dum illa non ex fructuum quantitate (quos in hac regione censuales conventiones ex Antecessor. nostror. Constitut. in ratione septem pro centum producere solent) sed ex quodam commercior. abusu desumitur, ita ut qui redditum annuum florenorum septem pro centum ab initio adepti fuerant, vix tres, vel quatuor ex bonis postmodum in solum acceptis in fructibus percipiant. Idcirco subditorum nostrorum commodo & cuiusque indemnitati prospicere volentes, Antecessor. nostror. placito inhærentes, qui in constitutione census ineunda illud iustum pretium esse decreverunt, cui fructuum ex fundo censito percipiendorum modus respondeat, jubemus, & statuimus, eandem æstimationis normam in census quoque dissolutione observari; proindeque deinceps ubicunque supervenientis necessitatis causa censuales creditores compulerit ad restitutionem sortis in alia specie, quam in pecunia numerata, recipiendam,

pretium bonorum in solum illis assignandorum, ex fructibus, quos annuatim proferre solent, vero valore ita liquidari, ut cui addicuntur, ex illis proventum annuum consequatur æquipollentem emolumento, quod ex censu constituto ante resolutionem annuatim percepisset. Ad fraudes porro propellendas, quæ in debitorum perniciem facile construi possent, volumus, & mandamus, antequam bona, juxta normam hic præscriptam æstimanda, censualibus creditoribus in solum addicantur, eadem per dies novem publicæ hæstæ subjacere, trinoque edicto voce præconis ter in diversis diebus intra proximos sex dies publice, & palam in locis solitis venalia proclamari, illique venditionis jure assignari, qui in una, vel alterna ex publicis auctionibus plurimum licitando obtulerit: dummodo licitationis pretium æstimationis ex ratione fructuum desumptæ modum excedat: neque cuiquam præsentem Constitutionem suffragari decernimus, nisi ordinem, & formam præfatarum subhastationum ad amissim observaverit. Declarantes, eandem ad sortem duntaxat censualem pertinere, neuiquam vero ad fructus, siue affectus censuales decursos pro tendi; salvo semper, & in quocunque casu, jure offerendi posterioribus creditoribus, ex juris vel Statutorum providentia competente, cui derogatum nolumus.

*Dec. in Conf. die Merc. XI. Feb. 1637.*

*Ad Mand. Illustriss. & Rev. D. D.  
Episc. & Princ. in consilio.*

FELIX ALBERTI,  
Cancell.

CON-

## CONTRACTUS AD CAPUT SALVUM.

Præter Summistas, in verbo *Usura*, sciendum est, *Sixtum V.* edidisse *Constit.* super Contractibus, societatum *ad Caput Salvum*, vel alia pacta illicita continentibus, & quomodo imposterum iniri debeant, ut patet ex ejus *Constitut.* publicata Romæ die 25. Octobris 1586. fol. 154. in Bullar. incip. *Detestabilis avaritiæ ingluvies*, & infra.

**H**Ac nostra perpetuo valitura Constitutione damnamus, & reprobamus omnes, & quoscunque contractus, conventiones, & pactiones, posthac ineundos, seu ineundas, per quos, seu quas, cavebitur personis, pecunias, animalia, aut quaslibet alias res, societatis nomine tradentibus, ut etiam si fortuito casu quamlibet jacturam, damnum, aut amissionem sequi contingat, fors ipsa, seu capitale semper *salvum* sit, & integrum a socio recipiente restituatur: sive ut de certa quantitate, vel summa in singulos annos, aut menses, durante societate, respondeatur. Statuimusque, hujusmodi conventiones, & pactiones, usurarios & illicitos posthac censerī debere, atque imposterum non licere iis, qui pecunias, vel animalia, aut alias res in societatem tradent, de certo lucro, ut præfertur, percipiendo, inter se pacisci, & concordare: neque etiam sive ad certum, sive ad incertum lucrum convenerint, socios, qui ea recipient, ad sortem seu capitale *salvum*, & integrum, ubi illud casu fortuito perierit, vel amissum erit, reddendum, quovis pacto, aut promissione sibi obligare. Ac ne de cætero societates ineantur sub hujusmodi pactis, & conditionibus, quæ usurariam pravitatem sapiunt, districte interdiciamus, & prohibemus. Sed potius cuncti noverint, societates hujusmodi, cum imposterum unus pecuniam, animalia, aut alias res, & bona, alter vero operam, vel industriam confert, pure, sincere, & bona fide, sicut decet, justis, & æquis conditionibus, & pactis, secundum juris dispositionem, ac sine ulla prorsus fraude, palliatione, aut usurariæ pravitatis labe, aut suspitione, ineundas, seu contrahendas esse: ita, ut non ad certam summam, aut quantitatem, ab omni periculo, & damno, ut præfertur, immunem, lucri nomine perfol-

vendam, neque ad capitale, si casu fortuito perit, restituendum, socius accipiens teneatur. Si vero finita societate ipsum capitale exstat, ei, qui illud in societatem contulerit, restituatur, nisi socio recipienti fuerit communicatum, aut aliter inter ipsos contrahentes super eo legitime conventum sit. Ac præterea iidem contrahentes fructus, expensas, & damna in commune conferant, & prout æquum, & justum fuerit, sibi communicent, atque dividant. Decernentes, si qui contractus, conventiones, & pactiones in futurum contra nostram hujusmodi prohibitionem de facto initi fuerint, nullam ex eis, tanquam per hanc eandem Constitutionem nostram damnatis, & reprobatis, etiam si juramento, aut in forma Camere Apostolicæ, vel alias quomodolibet roborati fuerint, obligationem civilem, aut naturalem ori-ri, nullamque actionem realem, aut personalem, nec Judicis officium, neque aliud quodcunque jus cuiquam competere, neque quoad sortem, seu capitale integrum recuperandum, quod casu fortuito perierit, aut amissum erit, neque quoad certas summas, & quantitates in singulos annos, aut menses lucri socialis nomine promissas. Si quis vero imposterum sub prædictis conditionibus, & pactis contrahere præsumpserit, aut prætextu similium contractuum, conventionum, & pactio-num, societatis nomine initorum, qui hucusque durant ad exactionem dictæ sortis, seu capitalis, sive illius pretii, & valoris, postquam illud in toto, vel in parte casu fortuito perierit, aut amissum sit, aut certa summa, vel quantitatis annuæ, aut menstruæ sibi promissæ, in futurum procedere ausi fuerint, eos universos, & singulos in pœnas, contra manifestos usurarios, & fœneratores a Sacris Canonibus, & Con-

ciliis Generalibus latas & promulgatas,  
eo ipso incurrere, & contra illos, uti  
manifestos usurarios, & fœneratores,  
via juris, aliisque opportunis reme-

diis procedi posse, & debere; sicque  
omnibus &c.

*Lünig Continuat. III. Spicileg. Eccle-  
siast.*



## SYNODUS VIRDUNENSIS

Anno Christi MDXCVIII. Clementis VIII. PP. VII.  
Rudolphi II. Imp. XXIII.

SUB ERRICO (\*) A LOTHARINGIA, EPISCOPO.

## CONSTITUTIONES

*Editæ & promulgatæ in Synodo Virdunensi, celebrata per ILLUS-  
TRISSIMUM & REVERENDISSIMUM PRINCIPEM,  
ERRICUM a LOTHARINGIA, Episcopum, & Comi-  
tem Virdunensem anno Domini 1598. die 15. Julii.*

ERRICUS A LOTHARINGIA, DEI ET APOSTOLICÆ SEDIS  
GRATIA EPISCOPUS, ET COMES VIRDUNENSIS, AC SACRI IMPERII PRINCEPS,  
UNIVERSIS AC SINGULIS DOMINIS ABBATIBUS, PRIORIBUS, DECANIS, ARCHI-  
DIACONIS, ARCHI-PRESBYTERIS, SEU DECANIS RURALIBUS, RECTORIBUS  
ECCLESiarUM PAROCHIALIUM, SEU EORUM VICARIIS, CAPELLANIS,  
PRESBYTERIS ET CLERICIS NOSTRARUM CIVITATIS ET  
DIOECESIS, SALUTEM IN DOMINO.

**Q**uamvis onus Nobis imponat Epi-  
scopalis officii ratio cogendæ  
Synodi Dioecesanæ, satis declarat  
Sacrosanctum *Tridentinum Concilium*, cum  
eam plerisque in locis ab Episcopis  
celebrari quotannis præcipit. Quare  
cum primum ad hanc Civitatem no-  
stram accessimus, impositam humeris  
nostris, licet tanto oneri ferendo im-  
paribus, officii Pastoralis curam obituri,  
in

(\*) Nicolao Bocherio, Episcopo Virdunensi, anno 1593. e vivis erepto, ex nominatione Clementis VIII. Papæ, successit ERRICUS, Dux Lotharingiæ, filius Principis Nicolai, Comitis Vaudemontii, frater Caroli Cardinalis ac Tullensis Episcopi, & Aloysiæ Reginæ Galliarum. Is adolescentiam egit sub institutione præstantissimi viri Christophori de la Valle, Tullentium postea Antistitis, quo Præceptore ad omnem disciplinam ac virtutem, quæ Ecclesiæ Præsulem ornaret, egregie forma- tus fuit. Verum vix tertius ab oblata illi Episcopali dignitate transierat annus; cum oneris Pastoralis & curæ, quæ huic dignitati annexa est, expensa gravitate territus, ut onus tam arduum excuteret, ipsi renuntiare honori, & alicubi Keli- giola in domo abdere se se meditabatur. Præ cæteris Ordinibus Societatem JESU amplectendam sibi statuit, in qua nimirum interposita voti Religione præclusum Sacris dignitatibus aditum noverat. Romam igitur cum in finem iter suscipere instituit, ut veniam a Romano Pontifice peteret, Pastorale deponendi pedum, au- lamque Episcopalem cum Societatis domicilio commutandi. Quod quidem con- silium etli dissimulare omni studio niteretur; celare tamen omnino non potuit. Nam Mussipontani Collegii Rector illud subodoratus, ad Claudium Aquavivam Societatis Generalem scripserat, quanti interesset publicæ rei, ut vir tantus Eccle- siæ sibi commissæ gubernacula non abjiceret. Illud plus admirationis habuit, quod viginti adolescentes nobiles, qui de isto Errici, Societatem amplectendi desiderio inaudierant, ipsius incitati exemplo, comites illi se se, & non itineris tantum, sed ejus-



in id maxime animum intendimus, ut hanc vel præcipuam officii nostri partem expleremus: quam licet multis implicatam difficultatibus cerneremus propter intermissam a 13. vel circiter annis ob bellicos tumultus cogendæ Synodi consuetudinem, ob idque fieri non posse videremus, ut tot incom-

moda, quæ tam longa secum intermissio afferre solet, abusumque multiplicem, qui tum in Clerum, tum in populum irrepsit, tam cito tolleremus: Ne tamen in dies omnia in pejus ruerent, in longius tempus differendum non duximus. Quapropter ab iis, quæ vel majoris sunt momenti, vel prom-

eiusdem etiam propositi socios adjunxerint, una cum ipso a Generali Claudio flagitaturi, ut inter Societatis Tirones adlegerentur. Tam pulchro comitatu stipatus Romam pervenit anno 1596. Sed neque Pontificem, jam antea a Claudio de re tota edoctum, neque ipsum Claudium in vota flectere, immo nec ab Aulæ Romanæ Proceribus impetrare potuit, suas ut preces intercedendo fulcirent. Una erat omnium vox, multo plus cum ad DEI gloriam collaturum boni, si in suscepta jam dignitate Ecclesiastica persisteret, quam si abditus viveret in statu religioso. Longe faciliorem ad concedendum petita, experti sunt Claudium Generalem aliqui ex Errici, quos dixi, comitibus: Nam eorum quinos Romanis Tironibus addidit: alios Virdunense ad tirocinium probandos destinavit: cæteros vero, quod insciis plerique parentibus ac invitis, Romam abiissent, partim ad suos remisit, partim aliud in tempus distulit.

Erricus interim Princeps ab ista in Societatem JESU ingrediendi spe dejectus, anno 1597. Virdunum rediit, atque altero mox anno (1598) Dicecesano Clero congregato, Synodales, quas infra referemus, Constitutiones promulgavit.

Eodem anno arduum aggressus est negotium introducendæ Reformationis in Monasteria Ordinis Sancti Benedicti, restaurandæque Disciplinæ Regularis in iis præcipue Abbatibus, quarum illi, *Commendæ*, ut vulgo dicitur, nomine, demandata fuerat administratio. Quam rem, maximis licet implexam difficultatibus, quantis ille animis urgendam suscepit: quam strenue fortiterque promoverit, ac demum confecerit, vide apud *Augustinum Calmet, Ord. S. Bened. Abbatem Nanceji ad S. Leopoldum, Historiæ Lotharing. Eccles. & Civil. Tomo III.*

Verum hos ipsos inter sacros labores & curas, identidem adhuc pii Principis animum antiqua stimulant desideria, quibus mundanarum rerum ac tumultuum pertæsus, Religiosam solitudinem anhelabat. Quare anno 1601. Literas ad Cardinalem Bellarminum dedit, sperans, eo sequestro ac deprecatore impetraturum se, quod suis ipse precibus ante quadriennium a Clemente Papa obtinere non potuit. Sed irritorursum conatu, ut datæ ad ipsum a Ven. Bellarmino Responsorie docent, quas ex *P. Jos. Favencio, Histor. Soc. JESU Part. V. Lib. XXV.* integras exhibeo:

## HENRICO a LOTHARINGIA, EPISCOPO VIRDUNENSI.

### ILLUSTRISIME, & REVERENDISIME DOMINE.

**B**inas uno tempore ab Illustrissima D. V.stra literas accepi, quibus mihi duo negotia commendabantur, & præterea desiderium Sanctæ animæ Vestræ aperiēbatur, veniendi ad Urbem, dimittendæ curæ Pastorali, & collocandi in tuto salutem sempiternam. Quod ad negotia attinet, faciam omnino, quod potero. Sed non multum potero; quia pendet ab aliis permultis, qui non facile iuribus suis cedunt. Cum de re pecuniaria agitur, mirum est, quam multis difficultatibus negotia impediuntur.

Quod vero ad pium desiderium pertinet adipiscendi pennas columbarum, & volandi ad locum dulcissimæ quietis; dicam Illustrissimæ D. V. quod mihi occurrit. Non existimo solidiorem quietem, & veriore salutis securitatem in ulla re posse reperiri, quam in Dei voluntate, tota animi devotione perficienda. Illam Domini vocem præter ceteras semper amari: Pater, transfer calicem hunc a me: Veruntamen non mea, sed tua voluntas fiat. Empti sumus pretio magno: proinde ut servi emptitii simplicem obedientiam Domino nostro debemus. Dum nobis conscientia nostra vere renuntiet, nos non quaesivisse, non optasse, non elegisse locum altiore: nunc etiam bonorem temporalem nobis cordi

promptiori egent remedio, initium sumentes, hæc, quæ sequuntur, his nostris Constitutionibus, pro ea, quam hætenus de statu nostræ Diœceseos cognitione habere potuimus, statuenda judicavimus, cæteris incommodis, quæ in dies Nobis clarius innotescunt, diligentius provisiuri tum in sequentibus Synodis, tum etiam universam Diœ-

cesim nostram generali & solemnî visitatione lustraturi: quod propediem, Deo favente, Nos facturos speramus.

### De Fidei Professione.

I.

Considerantes, quanti sit momenti, ut hæc nostra Diœcesana Synodus (in

non esse, hunc libentissime deposituris, si liceret; non video, cur in Dei voluntate, per imperium Vicarii sui nobis expresse proposita, acquiescere non debeamus. Pastorale onus grave est: solitudine & periculo plenum: Nec minus fortasse gravis, & periculosa est dignitas Cardinalitia. Si Opifici atque Emptori nostro placuit, nos in has angustias & pericula vocare; qui sumus nos, qui dicamus illi: Cur ita fecisti? Qui nos dilexit, & animam suam pro nobis posuit, dicere dignatus est Petro, & in eo Pastoribus omnibus: Si amas me, pascere oves meas. Quis igitur erit, qui audeat Domino respondere: Nolo pascere oves tuas, ne perdam salutem meam; nisi qui non Deum, sed se ipse amat? Verus Dei amator cum Apostolo dicet: Malo anathema esse a Christo pro fratribus meis, quam non subire sarcinam, quam mihi Dei amor imposuit.

Sed neque periculum salutis ullum esse potest, ubi regnat Caritas. Nam etsi ex ignorantia, vel infirmitate humana in multis labamur; tamen Caritas operit multitudinem peccatorum.

Illustrissime & amantissime Domine, si ulla spes esset, ut cum DEI beneplacito, & Vicarii ipsius benedictione ad quietem Religionis D. V. venire, & ego redire possemus, id certe omnino eligendum esset: Sed quia spes ejusmodi nulla affulget; propterea scripsi, quod scripsi: & quod mihi frequenter dico, Sanctæ animæ Vestræ, quam propter onus Pastorale angi video, dicere volui. Si per negotia licuisset, D. V. Romam venire, rem gratissimam non solum mihi, sed & Cardinali Baronio, & aliis permultis fecisset. Sed quando præsentia Vestra frui nobis non licet; saltem orationum Vestrarum suffragio non destituamur. Romæ die 6. Novemb. 1601.

His Bellarmini literis levati aliquantisper fuerunt Errici Episcopi angores, sed non ante, quam post Clementis VIII. obitum penitus sublatis. Nam Anno 1609. denovo Romam profectus, a Paulo V., Clementis Successore, impetravit, ut translato in Carolum a Lotharingia, Comitem de Chaligny, nepotem suum, Episcopatu, Pastoralî onere, quod eum tandem excruciaverat, tandem solveretur. Datæ ea de re Literæ Pontificiæ anno 1610. DEO igitur soli deinceps, ac sibi vixit usque ad annum 1623., quo obiit die Aprilis 27. Nanceji.

Author *Hist. Ecclesiast. Germaniæ*, editæ Bruxellis idiomate Gallico apud Franciscum Foppens anno 1724. ait, Erricum, Episcopatu deserto, ingressum fuisse Ordinem Capucinorum; Augustinus autem Calmetus *Hist. Ecclesiast. & Civil. Lotharingicæ Tomo III.* factam illi quidem a Paulo V. potestatem, scribit, Religiosum istud Institutum amplectendi; id vero quominus exequeretur, debilitatem valetudinis, ac virum obituisse. Post mortem tamen Capucinorum indutum habitu, & ad S. Nicolaum in ejusdem Sacri Ordinis Cœnobio, quod magna ex parte fundaverat, fuisse sepultum.

Pauca nunc etiam commemoranda veniunt de CAROLO, Errici Nepote & Successore, tum, quod cum iis, quæ modo narravimus, quodammodo connexa sint rerum similitudine, tum, quod singularia, quibus eminuit, ornamenta virtutum dignissima sint, ut imitanda aliis proponantur. Educatus hic Princeps renensis ab annis fuerat ad consecrandam laudem bellicam, gloriosissimæ illi familiæ hæreditariam, ad quam illustrandam omnibus etiam naturæ præsiidiis comparatus videbatur. Sed maturiorem ad ætatem provecto Erricus Patruus, qui ipsum sibi Successorem optaverat, suavit, ut sacram in Ecclesia militiam sequi mallet, quam profanam in castris. Nec multis opus erat ad id persuadendum Principi, suapte indole ad omnem virtutem propenso. Anno igitur 1617. cum ad Sacras functiones

(in qua ad DEI Omnipotentis gloriam, tam de moribus reformandis, Christianeque instituendis, quam de avita Religione, Fideque orthodoxa, in commisso Nobis grege, conservanda, & corroboranda, acturi sumus) rite instituatur: antequam ad singulas res pertractandas accedamus, Sanctorum Patrum vestigiis inhærentes, qui in

sacratioribus consiliis in principio suarum actionum, Confessione Fidei, tamquam scuto quodam tutissimo munire se consueverunt, statuimus, ut ab omnibus Professio Fidei (sine qua placere Deo impossibile est) juxta formam traditam a Sanctissimo D. N. bonæ memoriæ PIO QUARTO, & receptam in hac nostra Diœcesi a Prædecessoribus nostris,

nes jam esset idoneus, ab eodem Errico Viridunensis Episcopus consecratus fuit. Atque ex eo tempore hoc unum egit, ut verum se Ministrum Dei Altissimi, dignumque Ecclesiæ Præsulem exhiberet. Eum in finem viros pietate non minus, quam doctrina claros sibi adjunxit, quibuscum consultaret assidue, eorumque ex institutione disceret, quæ scire Episcopum, quæ facere oporteret. Præter hos Sapientem delegit sibi conscientiæ arbitrum, quem veluti Angelum tutelarem, ac Divinæ voluntatis interpretem venerabatur, cujusque sine consilio agebat nihil. Unde factum, ut tota ejus vivendi ratio ad prudentiæ, virtutisque regulas composita, exemplum esset omnibus & norma, quam imitarentur. Nihil illi jucundius erat, quam ea, quæ Pastoralis sunt muneris, per se ipsum exercere. Ipse pro concione dixit ad populum: Ipse SSma Sacramenta petentibus administravit: Ipse parvulos, rudemque plebem Sacra Catechesi imbuit: Ipse hæreticos reconciliavit cum Ecclesiâ: Ipse Diœcesim suam visitando lustravit: quod, dum faceret, oviculas suas non tantum doctrina & Verbo Dei pavit, sed largas etiam elemosynas in pauperum sinus effudit. Vitam aulicam adeo non amavit, ut etiam perhorresceret. Quod si vel occurrentis aliquando negotii magnitudo exposceret, vel officii ratio postularet, ut ad Aulam Lotharingiæ Ducis inviseret; invito id penitus, ac refugiente animo fecit. Heus! inquebat sibi, quo imus? Aëri miscbimur, qui quanto suavior, tanto insalubrior est: quem vix quisquam sibi familiarem fecerit, quin contagionem inde & noxam contrahat. O quam timendum istud est mihi, ne Princeps Episcopum damnet. Consimilia his sensa ut aliis quoque inspiraret, quos ad aulicam vitam ipsa adstringit prosapia & nascendi conditio; egregiam pro eorundem institutione lucubratiunculam composuit, in qua hunc unicum sibi præfixit scopum, ut ostenderet Principibus, eosque doceret, qua ratione possint, debeantque cum nobilitate virtutem, cum aularum illecebris pietatem, cum Principali supra subjectum sibi populum jurisdictione & auctoritate debitam Summo DEO, ejusque mandatis obedientiam conjungere. Illustria sunt, inquit Calmetus, quæ in eo opusculo proponuntur principia, nobili etiam stilo, & qui dignus sit authore suo, pertractata.

Quinquennio circiter eo fervore Diœcesim administraverat Carolus, cum paribus stimulis, ac olim Erricus, Patruus, ad Religiosam solitudinem, sectandamque in Societate JESU vitæ sanctioris perfectionem impellebatur: qua quidem in re consequenda multo, quam ille, felicior extitit: quod enim Errico a Clemente VIII. semper negatum, supra vidimus; mox Carolus, ac petiit, a Gregorio XV. impetravit.

Non abs re erit, si quæ ejus consilii suscipiendi occasio illi fuerit, qua simul promptitudine & constantia id fuerit executus, breviter commemorem. Solenne Carolo erat, Spiritualibus, ut loquimur, exercitiis vacare quotannis, octo vel decem diebus in recessu pio. Anno tamen 1622. hujus consuetudinis quodam quasi horrore perfulsus, imperare sibi non poterat, ut abruptis suo more negotiis reliquis, notam peteret solitudinem, licet ad eam interne se vocari & impelli adverteret. Ter, quaterve Nancejum hac mente venerat, ut Sacrarum exercitationum moderatorem exquireret e Collegio Societatis; semper re infecta redierat. Id cum animo suo reputans vir prudens, facile intellexit, istam inconstantiam non aliunde oriri posse, quam a malo dæmone. Quare obnitendum contra existimans, sepositis tantisper aliarum rerum curis, adhibitisque præter usitatum modum precibus, tanto majore fervore & contentione pietatis, sacris istis commentationibus excolere animum cœpit, quanto potentius inde retrahere malignus hostis conabatur. Vix primos in eo recessu dies exegerat, cum afflari se sensit rerum Divinarum sensu prorsus insolito, eoque tam suavi, ut cohibere se non posset, quin in lachrymas



nostris, clare & distincte emittatur, juramentumque juxta formam ibi traditam a singulis præstetur, de retinenda inviolabiliter Fide Catholica. Est vero hujusmodi: Ego N. firmissima fide credo & confiteor omnia & singula, quæ continentur in Symbolo Fidei, quo Sancta Romana Ecclesia utitur, videlicet: Credo in unum DEUM Patrem Omnipotentem, factorem cæli & terræ, visibilium omnium & invisibilium; &c.

## I I.

Statuimus autem convenienter Decretis Sanctorum Conciliorum & Summorum Pontificum; ut provisi de Beneficiis quibuscunque, curam animarum habentibus, dignitatibus, Canonicatibus, Monasteriis, Conventibus, Domibus, & aliis quibuscunque locis Regularium quorumcunque Ordinum, teneantur a die adeptæ possessionis, intra duos menses coram Nobis, vel Vicario nostro Professionem Fidei juxta for-

præ mentis dulcedine erumperet. Istam animi suavitatem excepit desiderium vehemens vitæ sanctioris, cum certa deliberatione obsequendi in rebus omnibus Divinæ voluntati, quoties hæc sibi innotesceret. Absolutis Exercitiis cum Virdunum rediisset, accidit paulo post, ut ibidem in Collegio Societatis scenæ committeretur Alexius ex domo Paterna profugus. Pio huic & jucundo spectaculo cum interesset Episcopus, novo repente pietatis ardore succenditur. Pervolutat animo excellens illud Christianæ virtutis exemplum, quod aspectui subiciebatur: exardescit imitandi studio: demum voto se obstringit, in Religiosa Societatis septa transiit, si modo votum probaret P. Fagotius, quo arbitro conscientia utebatur; si Pontifex Maximus pateretur. Ubi ratum haberi votum audit, nihil cunctatus, misit illico Nancejum, qui Lotharingiæ Ducem arrepti consilii certiorum faceret, datisque per Tabellarium Literis ad Ludovicum Galliarum Regem, sibi ut liceret cum bona ejus venia Virdunenses Insulas transmittere Francisco, fratri suo nati minori; hominem sibi fidum legavit Romam, ut rei exequendæ veniam a Rom. Pontifice exoraret. Dux difficilem se præbuit initio, multaque per aliquot dies molitus est, ut eum a proposito dimoveret. Magis obstitit Caroli Mater vidua, quæ tamen & ipsa demum non solum oblectari desiit, sed generosum filii exemplum imitata etiam fuit: dum mundo pariter valedixit, Deoque se in Monasterio Sancti Sepulchri, quod Carolo-villæ condiderat, Religiosam complexa vitam, devovit. Illud mirum permultis est visum, quod ipse Pontifex Gregorius intellectis Caroli Episcopi votis precibusque, confestim annuerit, ne audito quidem, ut moris est, Purpuratorum consilio: prolixè etiam eidem per literas gratulatus, quod aulæ splendorem cum paupertate Christi permutare, ipsiusque nominatim in Societate militare Deo decrevisset. *Agnosce se, (scribit inter cætera) felicitatem illius, gratiasque DEO agere, qui per illum velit augere Sanctarum artium, Christianorumque triumphorum exempla &c.* Demum, *Prosciscere*, inquit, *ad eam Sacræ militiæ Societatem, Catholici nominis defensionem, & hæreticorum excidiis clarissimam. &c.* His acceptis SSmi Literis Carolus dimisit illico opima, quibus instructus erat, Sacerdotia, & Testamentum condidit, cui subscribens exclamasse fertur: *Utinam hoc puncto temporis amplissimas Ecclesiæ dignitates, atque adeo regnum opulentissimum possiderem: quam libenter omnia dimitterem Christi gratia!*

Tandem compositis Nanceji, Virdynique rebus, omnibusque obstaculis, quibus ejus constantia tentata diu fuit, feliciter superatis, maximo sui apud Diocesanos relicto desiderio, magnis itineribus Romam perrexit, ut ibidem remotior a suis vitæ religiosæ tirocinium poneret. Oblatam Societatis tunicam tam cupide arripuit, toties ac tam suaviter exosculatus est; ut Patribus, qui circumfusi aderant, multum lachrymarum excusserit. Nec vero de hoc animi ardore unquam remisit: quin potius ex continuo cum Deo commercio, tam suavis consolationibus, animique deliciis perfusus fuit; ut dicere soleret, vel unci momenti in spiritualibus istis suavitatibus transacti præmio, quam abundantissime sibi retributum esse promissum a Christo centuplum pro omnibus, quæ deseruisset in mundo bonis. Annis aliquot præterlapsis, cum amici cujusdam sui literis ad se Romam perscriptis accepisset, rumorem increbuisse in Aula Lotharingica, se minus tranquille vivere in Societate, ac suppliciter jam consilii sui: Rescripsit ad eundem libere, *non modo falsa esse, quæ jactarentur: sed præterea se, si nondum esset in Societatem receptus, nec recipi*

formam positam emittere, sub pœnis in jure contentis, privationis nimirum fructuum, & aliis, arbitrio nostro imponendis. Nulli vero ad prædicandum Verbum Dei, vel Confessiones audiendas, ante emissam eandem Fidei Professionem admittantur. Nisi alia de causa eam prius coram Nobis emisserint.

## III.

Quia vero multum refert, ut puerilis ætas a teneris annis Christianis moribus & præceptis rite instituatur, multumque ad hoc conducit, ut qui eos instituunt, in fide stabiles sint; Statuimus, ut quicumque juventuti erudiendæ quoque modo præficientur in hac Civitate, coram Nobis, vel Vicario nostro: in aliis vero locis coram Decano, vel Parocho loci cum duobus testibus teneantur eandem fidem profiteri.

## IV.

Nullus vero in posterum ad ea munera admittatur, qui testimonio sui Parochi, & duorum, triumve virorum fide dignorum non manifestet, se in Ecclesia Catholica semper perseverasse, quique secum non habeat testimonium ab iisdem vitæ honeste & Catholice actæ. Mandamusque omnibus Presbyteris Parochialibus, & aliis, curam animarum gerentibus, ut hæc nostra Constitutio diligenter observetur, Nosque quamprimum certiores faciant, si ab his, quorum est Ludimagistrorum

institutio, vel approbatio, aliter, quod absit, attentari contingat: fratresque nostros Archidiaconos, aliosque Visitatores in Domino rogamus, ut inter visitandum sollicitos se præbeant, ne Parochi hac in parte suo officio desint, eosque, qui contra fecerint, ad Nos deferant puniendos.

## De Hæreticis manifestandis &amp; vitandis.

## V.

AD eandem fidei firmitatem inviolabiliter conservandam, mandamus omnibus Decanis, Parochis, & eorum Vicariis, ut diligenter inquireant, an in plebe sibi commissa, ullus vel hæreticus, vel suspectus de hæresi resideat, Nosque quamprimum, Synodo absoluta, certiores faciant: Statuimusque in posterum, ut bis in anno circa Festum Paschatis, & Sanctorum omnium, vel etiam sæpius, si opus sit, teneantur singuli Parochi suo Decano deferre, an in suis locis quispiam hæreticus, vel suspectus hæreticæ pravitatis reperiatur; ut Nos ab eodem Decano sine mora certiores facti, remedium promptum adhibeamus. Et quamvis nulli tales (quod esset optandum) reperirentur; volumus nihilominus, ut dictis temporibus Parochi Decanos, Nos vero Decani etiam ea de re certiores faciant: ut illa cura levati, Domino Deo pro tam singulari beneficio gratias pro virili parte agamus.

## VI.

*recipi aliter posset, quam usque ad Japones peregrinando; nihil dubitaturum, sortem hanc optatissimam usque in Japoniam per sexcenta vitæ pericula quesitum ire. Ad-didit, nec recusaturum se remigum ministerio addici, ut Societatis veste donaretur. Adeo de statu suo judicium non mutaverat.*

Anno 1628. die 8. Decembris, anticipato ex singulari privilegio tempore, cum quatuor Societatis vota emitteret, quintum adjecit, & scripto complexus fuit, *se semper quasitum majorem DEI gloriam in rebus gravibus, & semper defensurum Immaculatam Beatissimæ, & dulcissimæ Virginis, Matris suæ, Conceptionem &c.* Ex voluntate Superiorum, quorum ab arbitrio totus pendebat, Roma reversus in Galliam, Burdigalensi primum, dein & Tolosanæ Societatis JESU Professorum domui præfuit, illustribus ubique nobilissimarum virtutum præluens exemplis. Postquam annis non plus undecim in Societate cum insigni sanctimonie laude vixisset, Tolosæ morbo correptus, ex quo se morituum prædixit, cum annum ætatis quadragesimum nondum penitus complexisset, felici & pretiosa in conspectu Domini morte obiit anno Christi 1631. 28. Aprilis: quo die ejusdem etiam apud nos memoria quotannis ex Menologio Societatis recolitur.

*P. Jos. Juvencius Histor. Soc. JESU Parte V. P. Julius Cordara ejusd. Hist. Parte VI. Augustin. Calmet. Hist. Ecclesiast. & Civil. Lotharing. Tom. III.*

*P. Nadasi anno dierum Memorabil. Soc. JESU.*

*Plura de P. Caroli a Lotharingia virtutibus vide in ejus vita, a P. Condé conscripta.*

## V I.

Ad hæreticorum conventicula, & conciones, multo minus ad profanam eorum cœnam, nemo accedat: qui se-  
cus fecerit, ipso facto ab officio & be-  
neficio per sex menses suspensus mane-  
at, si Sacris sit initiatus, vel Benefi-  
ciarius: si laicus, triginta Francorum  
mulctam, & aliam corporalem, si No-  
bis videbitur, subeat.

## V I I.

Hæretici, qui ad Ecclesiam Catho-  
licam redeunt, publice vel privatim,  
prout Nobis in Domino videbitur, co-  
ram Nobis, vel Vicario nostro, præ-  
sentibus Notario, & duobus saltem te-  
stibus, errores omnes & hæreses abju-  
rabunt juxta formam in Pontificali  
præscriptam, Fidemque Catholicam  
profitebuntur secundum tenorem Bul-  
læ PII QUARTI, de Fidei Professione,  
quam in eum finem in linguam vulga-  
rem converti curabimus, eamque ma-  
nu propria subsignabunt.

*De Fidei Articulis, a Parochis  
populo tradendis.*

## V I I I.

**Q**Uoniam quorundam Fidei Arti-  
culorum cognitio ita est ad salu-  
tem necessaria, ut sine illa nemo,  
si adultus sit, salutem consequi possit,  
ideo in id diligentius incumbunt Paro-  
chi, ut eorum facilem explicationem  
populo rudi & imperito tradant. Ii ve-  
ro præcipue continentur in Symbolo  
Apostolorum, quod singulis diebus  
Dominicis, vel decimo quinto quoque  
saltem die, tam latine, quam lingua  
vernacula volumus palam recitari. Im-  
primis vero sequentium Articulorum,  
maxime ad salutem necessariorum, me-  
moriam populo sæpe erit refrendenda, ut  
eorum cognitionem sibi frequenti illa  
repetitione acquirat.

1. Deum esse unum, eumque re-  
muneratores juxta Apostoli senten-  
tiam.

2. Myſterium Sanctæ Trinitatis, id  
est, in Deo unam esse Essentiam & tres  
Personas distinctas, scilicet Patrem,  
Filium, & Spiritum Sanctum.

3. Has tres Personas, unum tan-

tum esse Deum, ejusdemque essentia &  
potentia. Non autem esse plures Deos.

4. Patrem esse Creatorem rerum  
omnium, primamque Trinitatis Per-  
sonam.

5. Filium, nempe secundam Tri-  
nitatis Personam, suscepisse carnem hu-  
manam, ut nos liberaret e potestate  
diaboli (cui propter originale pecca-  
tum, in quo omnes nascimur, propter  
prævaricationem primorum parentum,  
subjiciebamur) incarnatumque esse de  
Spiritu Sancto, natum ex MARIA  
Virgine, hominem factum, passum  
sub Pontio Pilato pro universi generis  
humani liberatione: descendisse ad in-  
feros, ut Patres, qui in lympo detine-  
bantur, redimeret: tertia die resur-  
rexisse, in Cœlos ascendisse, ubi sedet  
ad dexteram Patris, interpellans pro  
nobis apud Patrem gemitibus inenar-  
rabilibus: unde venturus est ad judi-  
candos vivos & mortuos (qui omnes  
resumptis corporibus ad vitam revocan-  
di sunt: reddendumque unicuique jux-  
ta opera sua, nempe vitam æternam  
iis, qui recte: & supplicium sempiter-  
num iis, qui male vixerint.

6. Spiritum Sanctum tertiam esse  
Trinitatis Personam, ex Patre, Filio-  
que procedentem, sanctificantem tum  
singulos Christianos, qui se a peccati  
mortalis reatu puros & integros ser-  
varint, tum universam Ecclesiam, Chri-  
sti Sponsam.

7. Hanc Ecclesiam unam esse, &  
Catholicam, nec errare posse: extra  
quam non magis salus esse possit, quam  
extra Arcam Noe tempore diluvii: &  
e contrario in ea omnium peccatorum  
quorumcumque gravium veniam & re-  
missionem obtineri posse.

## I X.

Quæ omnia fidelis populus modo  
simul, modo per partes a suis Parochis,  
vel aliis idoneis clare edoceatur in lin-  
gua vulgari, & eodem fere modo, quo  
hic explicata sunt, cum vix rudis po-  
pulus altioris explicationis capax esse  
possit.

## X.

Quia vero parum conducit scire,  
quæ credenda sunt, nisi etiam probe  
intel-



intelligantur, quæ ab unoquoque fidelium fieri & vitari convenit; præcipimus iisdem Parochis, eorumque Vicariis, ut in omnibus Ecclesiis Parochialibus, & illis annexis, Oratio Dominica, qua quid sperare debeamus a Domino Deo discimus, Dei mandata, & Ecclesiæ septem Sacramenta, quæ præsertim ad quemlibet pertinent: septem opera misericordiæ, tam spiritualia, quam corporalia, cæteraque præcipua Capita doctrinæ Christianæ Festis, Dominicisque diebus tam latine, quam in lingua vernacula recitentur.

## X I.

Quæ omnia, si propter populi tardum quolibet die Dominico recitari non possint, ita saltem distribuantur, ut omnia decimo quinto quoque die, vel saltem semel in mense percurrantur.

## XII.

Moneant vero Parochi sibi commissos, ut diligenter supra dicta memoriarum commendent, tum ut ea opere exequantur, tum etiam, ut liberos, famulos, ancillas, & alios suæ curæ commissos, edoceant. Sic vero in omnibus suprascriptis subditos instruant Parochi, ut non tantum ipsa verba prædictorum more exterius percipiant, sed etiam verborum vim & sententiam.

## XIII.

Parochi neminem ex suis subditis ad Matrimonium contrahendum admittant, aut cuiquam literas testimoniales ad Ordines præbeant, qui in suprascriptis non fuerit sufficienter instructus.

*De Prædicatione & expositione Verbi Dei.*

## XIV.

**P**rovideant Parochi, ut singulis Dominicis & Festis diebus, aut saltem semel in mense, extra Quadragesimam, in Quadragesima vero sæpius Verbum Dei populo prædicetur: quod si hoc ipsi facere non possint, curent, ut per idoneos id præstetur; Ne populus spirituali alimento destitutus, justam habeat occasionem de ipsis conquerendi.

*Tomus VIII. Concilior. German.*

## X V.

Nullus, sive Regularis sit, sive secularis quantumcumque exemptus, audeat prædicationis munus sibi usurpare, nisi a Nobis approbatus sit & examinatus, si ita videbitur, approbationemque in scriptis habeat, a Nobis, vel a Vicario nostro gratis obtinendam. Et ut abusus, qui hætenus irreperere potuerunt, prorsus aboleantur; revocamus hac nostra Constitutione omnes facultates hætenus vel a Nobis, vel a Prædecessoribus nostris concessas quibusvis personis, cujuscunque conditionis existant, prædicandi Verbi Dei: ita ut si deinceps voluerint concionandi munus exercere, a Nobis, vel Vicario nostro de novo approbationem petere (quam sane nemini, qui idoneus repertus fuerit, intendimus denegandam) teneantur. Quare monemus omnes Superiores Religiosorum, & alios quosvis, qui vel concionari, vel alio quovis modo Verbum Dei publice, vel per se, vel per sibi subditos disseminare solent, ne vel ipsi concionentur, neve suos ad id dimittant, antequam de novo a Nobis, vel dicto Vicario nostro, ut dictum est, approbentur. Singulis vero Presbyteris Parochialibus, & eorum Vicariis, sub pœnis arbitrio nostro imponendis, mandamus, ut neminem ad prædicandum Verbum Dei, vel publice populum docendum admittant, nisi prius scripto illis constet de approbatione a Nobis, vel a Vicario nostro, a publicatione præsentium facta.

*De Libris prohibitis.*

## XVI.

**N**on liceat in hac nostra Diocesi ullos libros venales proponere, sub pœna confiscationis librorum, & aliis, nisi prius juxta Indicem, jussu Tridentini Concilii factum examinati fuerint. Cujus rei curam Vicario nostro committimus, ejusque conscientiam oneramus.

## XVII.

Volumus autem, ut statim, absoluta Synodo, is aliquos deputet, qui visitent officinas Bibliopolarum, ut si quos libros prohibitos ibi repererint,

N II II

eos

eos statim postposita omni mora amoveant, curentque, ut in singulis officinis habeatur supradictus Index, ut juxta ejus tenorem, & non aliter, libri deinceps venales proponi possint. Cum primum vero extraneus Bibliopola in hanc Civitatem, ad libros vendendos appulerit, statim antequam libros venales proponat, Vicarium nostrum adeat, ut ab eo facultatem, post examinatos libros accipiat: in aliis vero locis Parochum loci, sub pœna confiscationis librorum, & incarcerationis ad nostrum arbitrium.

*De Beneficiariis.*

XVIII.

**N**ullus ad Parochiale beneficium obtinendum in hac Ditecesi admittatur, qui minimum annum studio casuum conscientiarum, vel Juris Canonici non vacaverit, aut sui Præceptoris testimonio munitus non fuerit, quod in dictis scientiis satis profecerit ad alios docendos.

XIX.

Qui vero Vicarii munus obire voluerint, tantumdem dictis studiis tribuisse debebunt: nec ullis precibus admittantur ad ea munera obeunda, nisi constet per examen, scientia sufficienti præditos esse. Super quo conscientiam Examinatorum oneramus.

XX.

Omnes Parochi in Ecclesiis sibi commissis resideant, officiumque suum per se, quantum fieri potest, exercent: pœnas vero statutas a *Tridentino Concilio* contra non residentes, incurere se sciant, qui sine facultate abfuerint ultra tempus in jure permissum. Quascunque vero facultates, hætenus a Nobis, vel Prædecessoribus nostris de non residendo concessas, hac nostra Constitutione revocamus, volumusque, ut intra quindecim dies post Synodum finitam Decani Nos certiores faciant, nisi jam fecerint, quinam in suo districtu, & quas ob causas non resideant, eosque (ipsorum tamen expensis) monendos curent, ut quam primum ad Ecclesias suas revertantur, vel certe Nobis suæ absentiarum rationem reddant.

XXI.

Quicumque beneficium, qualecunque sit, in nostra Ditecesi deinceps consequetur, jurabit ad Sancta Dei Evangelia, se per Simoniarum labem beneficium non obtinuisse, neque possit facere suos fructus, nisi coram Nobis, Vicario nostro, vel alio Deputato, juramentum tale præstiterit.

XXII.

Nemini Beneficium Ecclesiasticum, quodcunque illud sit, conferatur, qui decimum quartum ætatis annum non attigerit. Curatum vero ante vigesimum quintum obtinere nemo possit, juxta Summorum Pontificum Decreta.

*De Dominicis, Festisve diebus rite observandis.*

XXIII.

**D**olendum est, Dominicis, Festisve diebus Divinis Officiis, præsertim vero Augustissimo Missæ Sacrificio, & Sacrae Concioni plerosque vel omnino non interesse, vel eo imperfecto abscedere. Quod malum ne longius serpat in dies, Mandamus, ut Parochi diligenter observent, quinam a Divinis sine justa causa aberunt, sibi que subditos moneant, ut in suis Paræciis, quantum fieri poterit, Officia Divina, maxime vero Sacrum Missæ Officium audiant: abscedentes autem, eo imperfecto, Parochi severe increpent. Qui ter moniti si se non corrigant, ad Vicarium nostrum, ab eo graviter puniendi, deferantur.

XXIV.

Moneant vero Parochi Patres-familias, ut filios & famulos, quos in animalibus pascendis occupant, Dominicis, Festisve diebus Missæ jubeant interesse, cum illis salutis suorum major cura, quam lucris cujuscunque temporalis esse debeat.

XXV.

Mandamus autem sub pœnis arbitrio nostro imponendis, ne quid Festis diebus vendatur, aut ematur, quod ad victum, aut agrotorum curationem necessarium non sit.

XXVI.

## XXVI.

Nundinæ autem & mercatus, si qui in Festum diem inciderint, in antecedentem, vel sequentem, qui Festivus non sit, transferantur.

## XXVII.

Choreæ & saltationes, vel alii ludi, quantumlibet honesti tempore Divini Officii, vel Concionis non fiant. Qui secus fecisse deprehensus fuerit, gravi pœnæ subiaceat.

*De blasphemia & juramento vitando.*

## XXVIII.

**A**GRE & dolenter audivimus, Sanctissimum DEI & Sanctorum nomen palam sine ulla reverentia usurpari: imo vero plerisque ad singula pene verba (non sine perjurii periculo) in ore esse: quodque dolendum magis est, sæpe etiam blasphemari. Quapropter volentes ex commissa Nobis plebe pessimam jurandi consuetudinem penitus eliminari, cum juxta Ecclesiastem, Vir multum jurans repleatur iniquitate, juxta Concilii Lateranensis Decreta, & bonæ memoriæ NICOLAI PSALMÆI Prædecessoris nostri Constitutionem, statuimus & mandamus, ut quicumque Deo maledixerit, contumeliosisque aut obscenis verbis Dominum Nostrum JESUM CHRISTUM, vel Gloriosam Virginem ejus Matrem, ullumve Sanctorum, aut Sanctarum Dei blasphemaverit: prima vice fructibus unius anni beneficiorum Ecclesiasticorum, quæcunque obtinuerit, si Clericus sit, mulctetur, & secunda dignitates & beneficia omnia ipso facto amittat, ad eaque retinenda sit deinceps inhabilis. Si vero Laicus sit, secundum Canonicas & Civiles Constitutiones severe puniatur.

## XXIX.

Parochi Patres-familias moneant, ne patiantur ullum genus juramenti, vel maledictionis a filiis, famulis, ullove ex familia usurpari: & ne ipsi parentes malum exemplum supra dictis præbeant, ab omni juramento prorsus abstineant.

*Tomus VIII. Concilior. German.*

## XXX.

Doceant vero populum, quot mala ex frequenti juramento proveniant, quod tam variis locis Scripturæ (quæ plagam a domo sæpe jurantis nunquam discessuram asseverat) quam variis exemplis ex Patrum historiis decerptis illustrabunt: varias autem jurandi formulas, a populo usurpari solitas, Parochus data occasione aperiet, damna-bitque.

*De Sacramentis.*

## XXXI.

**C**UM Sacerdotum, præsertim vero Parochorum præcipua functio sit Sacramentorum administratio, toti in id incumbunt, ut, qua par est, reverentia & cultu ea pertractent. Et, quoniam, cum Dei Ministri sint, Domino, qui sanctus est, conformare se debent; caveant diligenter, ne ullo lethali crimine irretiti, ullius Sacramenti, quodcunque illud sit, functiones obeant: Id enim sine alio peccato mortifero, gravissimoque sacrilegio, facere non possunt. Quare primum confiteantur, vel, si copia Confessarii desit, saltem animo, cum proposito confitendi conterantur.

## XXXII.

Cum Sacramenta Ecclesiæ non solum sine Simonia labe, verum etiam sine avaritiæ suspitione ministrari debeant, caveant iidem Parochi, cæterique, qui quoquo modo Sacramenta ministrandi facultatem habent, ne populum, præsertim vero pauperes, importunis exactionibus gravent: quamvis ab iis, qui solvendo sunt, non prohibeamus eos debitum stipendium exigere.

## XXXIII.

Ægrotos, etiam non vocati, sæpius invisant, & ad Sacramentorum susceptionem hortentur, eorumque animabus impense provideant, scientes, se pro eis rationem, juxta sententiam Apostoli, Domino Deo reddituros.

*De*



*De Sacramento Baptismi.*

## XXXIV.

**Q**uamvis Sacramentum Baptismi, quantum fieri potest, sine sacris ritibus & cæremoniis, vel extra Ecclesiam ministrari non debeat: quia tamen interdum id non patitur baptizandi necessitas; permixta est eo casu baptizandi facultas in privatis ædibus, Sacerdoti primum, vel, si is absit, alteri Sacris initiato: qui si item abfuerit, Laicis, primum mari, deinde fœminæ, non tamen patri vel matri baptizandi, si alii reperiantur, qui rite tenuerint veram baptizandi formam, quam fusa in caput pueri aqua sic proferant: *Ego te baptizo in Nomine Patris, & Filii, & Spiritus Sancti. Amen.* Cui nihil vel addant, vel detrahant. Sint vero solliciti Parochi, ut præsertim obstetrices doceant dictam baptizandi formulam, idque tam latina, quam vernacula lingua, eamque, aquam effundendo, simul pronuntient.

## XXXV.

Quod si baptizatus postea vixerit, cum primum per valetudinem licuerit, eum parentes in Ecclesia Parochiali sistant: ubi si rectam baptizandi formam servatam esse, post diligentem inquisitionem constiterit, ei tantum omnes cæremoniæ Baptismi adhibeantur, & ne quidem sub conditione (quod fieri a quibusdam ignavis Parochis intelligimus) verborum forma repetatur.

## XXXVI.

Parochi nullius precibus, vel auctoritate induci se patiantur, ut plures, quam unum, vel ad summum unum & unam, compatrem, & commatrem admittant, juxta *Tridentinam Synodum*. Sint vero hi susceptores, seu susceptrices, adulti bonæ æstimationis, nec ullo modo de hæresi suspecti: eosque sui officii moneant, quamve affinitatem contrahant, edoceant: Monachos vero, Monialesve ad id nullatenus recipiant.

*De Eucharistiæ Sacramento.*

## XXXVII.

**P**arochi neminem publice a Communionem repellant, qui publi-

cus, vel notorius peccator non sit: peccatores autem manifestos & notorios nullo modo ad eam admittant, nisi publice constet, quod pœnitentiam egerint, vitæque melioris propositum fecerint.

## XXXVIII.

Curent, ut tabernaculum, in quo Sacra Eucharistia servatur, ornatum & bene septum, ac munitum, vasque, in quo asservatur, mundum sit: & ante illud, quantum per Ecclesiæ facultates licebit, lampas accensâ coluceat.

*De Celebratione Missarum.*

## XXXIX.

Sacerdotibus alienæ Diœcesis rei Divinæ faciendæ facultatem non faciant Parochi in suis Ecclesiis, nisi ostensis literis testimonialibus & dimissoriis Ordinarii, ultra sex menses a data non valituris.

## XL.

Nullus Sacerdos in privatis ædibus, vel extra Ecclesiam & Oratoria, Divino tantum cultui dicata, quæ vel a Nobis, vel Prædecessoribus nostris designata, aut visitata non sint, Missam celebret.

## XLI.

Nemo bis eodem die sacrificare præsumat, nisi in casibus a jure permittis, vel quibus id ex officio incumbit, quorum non est, aliis potestatem facere, suo loco iterum celebrandi. Qui secus fecerit, pœnis arbitrio nostro taxandis, subjacebit.

## XLII.

Ornamenta, & instrumenta altarium pro celebratione Missæ pura & munda servantur, sed maxime corporalia, & purificatoria: quæ in posterum non ex serico, sed ex linteo fieri mandamus. Dabuntque operam Curati, ut semel, vel sæpius in hebdomada, ubi plures Missæ celebrari solent: ubi vero pauciores, decimo quinto quoque die diligenter abluantur, neque in usum profanum ulla ratione convertantur.

## XLIII.

## XLIII.

Volumus, Vicarium nostrum Generalem in singulis Decanatibus Magistrum caeremoniarum idoneum constituere, idque intra tres menses: qui omnes novos Sacerdotes, antequam primum Sacrum celebrent, cæterosque, qui minus decenter id præstant, Missæ ritibus ac caeremoniis instituat. Nullusque sub gravi pœna præsumat primum Sacrum facere in hac Diœcesi, nisi syngrapha præfati Magistri caeremoniarum manifestet, se in prædictis ritibus & caeremoniis satis instructum esse.

## XLIV.

Irrepsit error in Missale nostrum (Librariorum, ut credimus, inscitia) cum in officio diei Parasceves ante illa verba (Pax Domini) dicitur consecrari vinum per mixtionem Corporis Christi cum vino. Id enim falsum est, cum vinum non consecratur nisi per formam. Quare omnes ex suis Missalibus hæc verba: *Quia hic consecratur vinum per Corpus Domini*, deleant intra quindecim dies.

## XLV.

Qui vero bis dicto die Parasceves Officium facere tenentur, secundum Sacrum statim post adorationem Sanctissimi Sacramenti factam terminabunt, diligenterque cavebunt, ne secundo communicent cum (ut ex prædictis patet) non sint amplius jejuni. Sed adoratione facta Sanctissimum Sacramentum cum omni devotione in Ciborio, seu capſula reponent.

## XLVI.

Sacerdotes celebraturi, quo puriores ad rem Divinam faciendam accedant, saltem semel in hebdomada peccata sua confiteantur, nisi eos propter lethalem culpam frequentius id facere oportuerit.

Nemo vero præsumat ad tremendum hoc Myſterium cum peccati mortiferi conscientia accedere, quantumcumque sibi contritus videatur, si quidem habeat Confessarii copiam, quæ si desit, abstinendum omnino erit, nisi ratione officii ad vitandam populi offensionem ad id cogantur, & nullus sit, qui id muneris obire velit.

## XLVII.

Curent Sacerdotes, ut hostiæ, quibus uti debent ad sacrificandum, nimis vetustæ non sint: ex puro tritico fiant, & singulis mensibus novas fieri curent, vinum vero purum sit & recens haustum. Urceoli denique, quibus vinum & aqua conservantur, semper sint mundi.

*De Sacramento Pœnitentiæ.*

## XLVIII.

Nemo sub pœna suspensionis ab officio per sex menses, ipso facto incurrendæ, & aliis pœnis arbitrio nostro imponendis, in hac nostra Diœcesi præsumat ullas confessiones nostrorum subditorum audire, nisi vel beneficium Parochiale obtineat, vel a Nobis approbatus sit per examen juxta *Tridentinum*: Declarantes absolutiones nullas aliter factas. Facultates autem hæcenus concessas revocamus, Ecclesiarumque Rectoribus mandamus, ne ullum ad audiendas confessiones admittant, qui novam approbationem a data præsentium non habeat.

## XLIX.

Parochus unius loci (quod sibi nonnulli falso persuadent) non possit audire confessiones alienorum Parochianorum, etiam extra tempus Paschatis sine licentia proprii Parochi: cum juxta *Tridentinum* nullius sit momenti absolutio, quam Sacerdos in eum profert, in quem jurisdictionem Ordinariam, vel delegatam non habet.

## L.

Non sint vero difficiles Parochi in concedenda suis subditis facultate, alteri Sacerdoti a Nobis approbato confitendi, siue in Paschate, siue extra illud tempus. Quando tamen in Paschate alteri confitebuntur, debebunt Parocho manifestare, quod confessi sint: alioqui contra eos, tamquam non confessos, procedent juxta *Lateranensis Concilii Decretum*.

## LI.

Irrepsit quidam error & abusus intolerabilis in hanc nostram Diœcesim, audiendi in Paschate multos pueros,

N n n 3

etiam

etiam doli capaces, simul confitentes. Quare propter gravissima incommoda, quæ ex talibus confessionibus promanare posse intelligimus, sub pœna excommunicationis ipso facto incurrendæ, prohibemus, ne ullus Sacerdos plures pueros simul, postquam octavum ætatis suæ annum attigerint, audiat: minores vero ætate ita Parochus simul audiat, ut nullam Confessionis Sacramentalis formam præ se ferat, sed omnibus simul jussis Orationem Dominicam recitare benedictionem largiatur.

## LII.

Penitus vero eliminetur is, qui ex diaboli officina processit, interrogandi modus, quo ignari quidam Sacerdotes pœnitentes sub conditione interrogant: si hoc vel illud feceris, confiteris? Ea enim interrogandi ratio, nisi in dubiis, præterquam quod confessionem irritam, & nullius valoris faciat, tam Confessarium, quam pœnitentem, gravissimo sacrilegio obstringit.

## LIII.

Quoniam magnopere confert ad populi Christiani disciplinam, ut *Tridentinum Concilium* monuit, graviora quædam scelera non a quibusvis: sed a summis tantum Sacerdotibus, Episcopis nempe, remitti: ideo mandamus in virtute obedientiæ omnibus Sacerdotibus, nulla ratione casibus in *processu Bullæ Cane*, vel quomodolibet Apostolicæ Sedi reservatis, nisi in mortis articulo, se immisceant. Quorum casuum catalogum, cum semper Confessarii præ oculis habere debeant, ad levandam eorum memoriam his Constitutionibus addi, Deo dante, curabimus. Ut porro munus hoc audiendarum Confessionum Sacerdotes suscipiant alacrius, præter eos casus, quos jus commune, ratione alicujus censure annexæ, reservat Episcopis, circa quos nihil intendimus innovare, hos dumtaxat Nobis censuimus reservandos.

1. Homicidium voluntarium.
2. Raptus Virginum & Monialium, violentaque earum oppressio, vel defloratio.
3. Incestus cum matre propria, vel cum matre conjugis.

4. Percussio Patris & Matris, si sit formalis: non autem, si casu, se defendendo, vel fugiendo, quis Patrem aut Matrem læserit.

5. Usura manifesta & notoria, sive notoreitate juris, sive facti.

6. Publice perjuri in judicio, & ea de re convicti in judicio publico, & non aliter.

7. Percussio & violenta detentio Clericorum.

8. Ecclesiasticæ libertatis oppressio, seu violatio.

9. Ecclesiam polluentes per sanguinis vel seminis effusionem manifestam & notoriam.

10. Qui ad magicas artes, veneficia, & superstitiones, Eucharistia & Chrysimate abutuntur.

11. Peccatum Sodomiticum cum qualibet persona, & bestialitas.

12. Adulterium publicum, manifestum, & notorium.

Præter supra dictos autem, respectu Sacerdotum tantum, & aliorum, qui sunt constituti in Sacris Ordinibus, sequentes casus Nobis duximus reservandos.

1. Concubinarium publicum, id est, qui concubinam secum domi habet, vel eam alibi palam frequentare dignoscitur.

2. Qui mulierem quamcumque gravidam reddidit, postquam factum in populi notitiam venit. Antequam autem id populo innotescat, non reservatur.

3. Qui explevit fornicationem cum filia spiritali, id est, cum ea, quam vel baptizavit, vel cujus confessionem audivit, vel quæ in fornicatoris Parœcia quomodocunque domicilium habet.

4. Ebrietas usque ad crapulam & vomitum, si id in populi notitiam venerit.

5. Clerici per saltum scienter promoti, vel ab alieno Episcopo, sine nostra licentia, quomodolibet ordinati.

6. Qui aliqua censura excommunicationis, suspensionis, interdicti, vel aliqua irregularitate irreciti, Missam celebrarunt, vel aliam Ordinis Sacri functionem scienter exercuerunt.

## LIV.



## LIV.

Hos omnes casus tantum hac præfenti Constitutione Nobis, & Successoribus nostris reservamus, priores quidem respectu omnium tam Laicorum, quam Clericorum: posteriores respectu Sacerdotum, & aliorum Sacris Ordinibus initiatorum, a quibus nemo, sine speciali facultate nostra, vel Vicarii nostri poterit absolvere, nisi in articulo mortis: irritum declarantes, quod secus a quocunque fuerit attentatum.

## LV.

Parochi, aliive Sacerdotes, semel in anno, idque circa festum Paschæ, Decanis vel confiteantur, vel ab iis facultatem petant, alium Confessarium, a Nobis approbatum, adeundi: reliquo vero tempore anni permittimus, ut aliis approbatis a Nobis, ad confessiones audiendas, confiteri possint. Extraneis autem, nisi in itinere, vagabundis, vel non approbatis, nulla ratione confiteantur.

## LVI.

Hortetur Parochus populum suæ curæ commissum, ut cum primum quis in aliquem morbum inciderit, Confessarium accersere curet, ostendatque se non minus sollicitum de animæ, quam de corporis salute. Evellat vero Parochus e suorum mentibus pravam illam opinionem, quod Sacramentorum suscipiendorum memoria mortem acceleret.

*De Extrema Unctione.*

## LVII.

**E**Xtremæ Unctionis Sacramentum curet Parochus, ut ægroto, dum integris est sensibus, quantum fieri potest, exhibeatur.

## LVIII.

Parochus ministraturus Extremam Unctionem non destillet in posterum Sacrum Oleum in palmam suam sinistram, ut habetur in Rituali: tum ne Sacrum Oleum in terram effundatur, tum ad evitandam populi offensionem, qui ea occasione minoris, quam par est, hoc Sacramentum facit; sed juxta Pastorale Romanum virgulam stan-

neam, vel argenteam intingat in Oleum Sacrum, ejusque extremitate ægrotum in partibus debitis ungat.

## LIX.

Curatus, antequam hoc Sacramentum conferat, interroget decumbentem, an recordetur alicujus peccati, habeatque aliquid, quod conscientiam gravet: qui si affirmat, abscedant assistentes, ejusque confessionem excipiat. Si neget, eum consoletur, ad agendumque Deo gratias hortetur, recitataque a Ministro generali confessione super ægrotum hanc absolutionem generalem recitet: *Miserentur tui &c. Indulgentiam & remissionem &c.* per modum orationis, non autem per formam Sacramentalem Sacramenti Pœnitentiæ, quod quidam sacrilege faciunt. Multo vero minus Sacerdos ægrotis indulgentiam plenariam (quod male nonnulli faciunt,) largiatur, nisi eam indulgentiam æger a Summo Pontifice obtinuisse.

## LX.

Parochi ante Extremam Unctionem ægrotos moneant, ut testamenta conficiant, domuique suæ ita disponant, ut meminerint, se in die judicii Deo reddituros rationem, de oblata sibi & neglecta bene merendi occasione.

*De Sacramento Ordinis.*

## LXI.

**A**D Sacros Ordines non admittantur, qui beneficium Ecclesiasticum, quo honeste sustentari possint, non obtinent. Si qui vero alii iudicio nostro admittendi videantur; id non fiat, nisi vel Patrimonium, vel pensionem sexaginta aureorum annuatim liquide obtineant: quod patrimonium, seu pensionem alienare nequeant, nisi Nobis manifestarint, quod aliunde honeste vivere possint: Aliter facta alienatio irrita sit ipso facto, juxta *Tridentinum*.

*De vita & honestate Clericorum.*

## LXII.

**R**enovantes, quæ in Sacris Canonibus de vita & honestate Clerico-

ricorum habentur, mandamus omnibus Archidiaconis & Decanis, ut diligenter invigilent; ne Clericorum vita aliis offensionem, scandalumque pariat, cumprimusque Nos certiores faciant, si quæ offensio ex Clericorum depravatis, corruptisque moribus in populo exorta fuerit: super quo ipsorum conscientias oneramus.

Quæ vero specialiter duximus hoc loco constituenda, hæc sunt.

## LXIII.

Sacerdotum & aliorum Clericorum vestitus sit honestus, & statui conveniens.

Omnes talarem vestem, & pileum quadratum ordinarie gestent. Si vero rus proficiscantur, tunicella ad poplitum saltem producta, utantur.

## LXIV.

Ferant omnes Tonfuram Clericalem, eamque satis latam: crines vero & barbam non nutriant saltem in superiori parte labiorum.

## LXV.

Mulierum consortium, multo magis contubernium, fugiant, nisi quarum ætas & mores suspecti non sunt.

## LXVI.

Si quem vero contra hanc nostram Constitutionem deliquisse constiterit, eo ipso pœnis in *Tridentino*, contra fornicarios statutis, sine alia monitione, quam tenore præsentium suppleri volumus, subjaceat, aliisque pœnis arbitrio nostro imponendis.

## LXVII.

Choreas nec privatim, nec publice agant Sacerdotes, vel Sacris initiati, gravissimas alioquin pœnas subituri.

## LXVIII.

Alearum ludum, & venationem, præsertim clamorâ, sibi prohibitam noverint Clerici: qui secus fecerint, graviter se sciant a Nobis castigandos.

## LXIX.

Sacerdotes, aliosve in Sacris constitutos, cauponarum aditu & usu, quibus, non sine gravi laicorum scandalo, nonnullos nimis addictos audimus,

præter itinerantes interdiciamus: ab omni vero crapula & ebrietate de cætero abstineant.

*De Sacramento Matrimonii.*

## LXX.

**M**Eminerint Parochi, juxta *Tridentini* mandatum, sæpe in memoriam revocare commissio sibi populo, Matrimonium contractum sine Parochi præsentia cum duobus, tribusve testibus, invalidum esse.

## LXXI.

Moneant iidem futuros conjuges, ut antequam Matrimonium contrahant, peccata sua confiteantur, Sacramque sumant Synaxim, quo abundantiorum ad Matrimonii onera gratiam consequantur.

## LXXII.

Sacramentum Matrimonii nullo modo in Monasteriis, aliisque locis, quam in Ecclesiis Parochialibus, sine licentia nostra celebretur.

*De Ludimagistris.*

## LXXIII.

**S**int in singulis Parochiis, quantum fieri poterit, Ludimagistri, qui pueros scribere & legere, primaque fidei rudimenta & principia docere possint.

## LXXIV.

Expediret puellarum institutioni præfici probatam viduam, aut puellam grandiorum, maturam tamen, quæ eas honeste vivendi formam, & legendi rationem studiose doceat. Quare videant Parochi, an id commode fieri possit, in magnis præsertim Paræciis & urbibus.

*De Rebus ad Ecclesiam pertinentibus.*

## LXXV.

**P**arochi, præsentibus tribus honestis viris, quos ipsi seligent quotannis, dati & accepti a Scabinis computum exquirant. Id autem quam primum faciant, ut in proxima visitatione ejus rei Nobis ipsi rationem reddant.

## LXXVI.

## LXXVI.

Parochi ad proximam Synodum secum deferent Catalogum, tum baptizatorum, tum etiam conjunctorum Matrimonio: præter quem Catalogum Decani alium secum deferent Sacerdotum, qui in suo districtu mortui sunt, a quo tempore id non est factum. Si quis vero id non egerit, decem Francorum mulctam subibit, applicandam operibus piis, ad nostrum arbitrium. Inventarium item bonorum mobilium Ecclesiæ singulis annis renovabunt, & cum Inventario superioris anni conferent; ut intelligant, an aliquid deperierit.

Si quid vero refectione egeat, curent, id ab iis, quorum interest, fieri.

## LXXVII.

Curent ex Ecclesia & Cœmeterio exportari, seu extrahi supellectilia, aliasque res prophanas, si quæ adhuc illis locis reconditæ sint; neque in posterum in Ecclesia hujusmodi res afferrentur, nisi propter hostiles incursus, vel gravem necessitatem.

## LXXVIII.

Registrum præterea censuum suarum Ecclesiarum diligenter servent, & unum exemplar manu Notarii publici signatum, ad visitationem proxime futuram fieri curent. Si quæ vero bona a Scabinis bellorum prætextu, aut alienata, aut obligationibus supposita sint, ea de re Nos etiam Curati moneant, ut damna Ecclesiarum reparari provideamus.

Non intendimus autem his nostris Constitutionibus quicquam vel innovare, vel immutare circa Decreta, Statuta, & Constitutiones, a Prædecessoribus nostris in præcedentibus Synodis latas & promulgatas, præterquam in casibus reservatis; ad quos reformandos & moderandos permultorum Nos preces & rationes permoverunt. Cæteris omnibus, quorum in his Constitutionibus mentio facta non est, in suo robore permanentibus, maxime vero, quæ respiciunt Fidem Catholicam, Sacramentorum administrationem, examen promovendorum, Decanorum & Curatorum officium, Sacri Concilii Tridentini observationem, cujus singulos articulos, Prædecessorum

*Tomus VIII. Concilior. German.*

nostrorum vestigiis inhærentes, tam ad Fidei integritatem, quam morum correctionem pertinentes, cæteraque Sacrorum Canonum Decreta & Statuta recipi, & inviolabiliter custodiri præcipimus. Iis, inquam, omnibus in suo robore permanentibus, omnia & singula, his nostris Constitutionibus contenta, tamquam juri & æquitati consentanea, vobis supradictis, & cuilibet vestrum intimamus, insinuamus, & ad vestram notitiam deducimus: eaque, qua debemus obedientia & reverentia, auctoritati & judicio S. Romanæ Ecclesiæ, omnium Ecclesiarum Matris & Magistræ, emendanda & corrigenda submittimus.

Acta, lecta, & publicata in Synodo Diocesana Virdunensi, die 15. Julii Anno 1598.

REVERENDISSIME PATER, & Venerabiles Domini: PLACENTNE HÆC VOBIS?

Quibus respondentibus, (PLACENT) vel annuentibus.

*Lector subjungit:*

DEO GRATIAS.

*De Mandato Reverendissimi & Illustrissimi Principis, Domini mei, ERICII a LOTHARINGIA, Episcopi & Comitis Virdunensis.*

EXAMINATORES PAROCHORUM  
& promovendorum ad Ordines & Beneficia.

D. Nicolaus Henart, Archidiaconus de Vo-  
sago in Ecclesia Tullen.

D. Petrus Chenetius, Archidiaconus de Ve-  
pria.

F. Nicolaus Malteste, Doctor Theologus,  
Religiosus Ordinis S. Augustini.

F. Servatius la Rue, Doctor Theologus, Re-  
ligiosus Ordinis Præmonstratensis.

Magister Jacobus Boucherius, Sacræ Theo-  
logiæ Baccalaureus.

P. Carolus Benedictus, Rector Collegii So-  
cietatis JESU, qui & Pœnitentiarius.

P. Herveus Torontius, Presbyter ejusdem  
Societatis, vel eorum loco alii duo ex ea-  
dem Societate.

*Ex editione antiqua Virdunensi ejusdem  
anni 1598., curata per Joannem Wap-  
p Typographum Episcopali., commodata  
nobis ex Bibliotheca Collegii Trevirensis  
Societatis JESU.*

O o o

SYNO.





# SYNODUS TORNACENSIS

Anno Christi MDC. Clementis VIII. PP. VII.  
Rudolphi II. Imp. XXIV.

SUB MICHAELE DESNE, (\*) EPISCOPO TORNACENSI.

## S T A T U T A

SYNODI DIOECESANÆ TORNACENSIS,

*Incboatæ Anno Domini Millesimo sexcentesimo, Feria tertia post  
Dominicam secundam post Pascha, & finitæ die sequenti.*

MICHAEL DESNE, DEI ET APOSTOLICÆ SEDIS GRATIA  
EPISCOPUS TORNACENSIS, UNIVERSO CLERO CIVITATIS ET DIOECESIS  
TORNACENSIS, SALUTEM IN DOMINO.

**I**Nter alia, quæ a frequentissimo Patrum S. Concilii Trident. conventu ad restituendam Ecclesiasticæ disciplinæ integritatem præclare instituta fuerunt, apposite ad DEI gloriam, & lucrum animarum, ut Synodi Provinciales, singulis trienniis, Diœcesanæ vero quotannis celebrentur, decretum fuit, cujus instituti haud dubie, Auctor est CHRISTUS Dominus, qui Patribus in salutaris hujusmodi tractatione congregatis (cum dixit: Ubi sunt duo, vel tres congregati in Nomine meo, ibi Ego sum in medio eorum,) sese adfuturum promisit. Et Apostoli, licet uberrime Spiritus Sancti gratiam singuli accepissent, tamen in rebus gravioribus hanc consultandi rationem non omiserunt, ac ne eorum Successores eam omitterent, ut bis in annos

singulos Concilia ab Episcopis haberentur, sanxerunt: plurimæ consecutæ deinde sunt Constitutiones SS. Pontificum, & Conciliorum Generalium, & Provincialium de frequenti Synodorum usu constanter retinendo.

Quibus Sanctissimis Decretis ut satisfaceremus, de consilio Venerabilium Virorum, Confratrum nostrorum Decani & Capituli Ecclesiæ nostræ Tornacensis, feria tertia & quarta post Dominicam secundam post Pascha (ut scitis) Synodum Diœcesanam habuimus. Verum quum parum profint etiam optimæ Leges, nisi diligenter observentur, & executioni mandentur, immo vero noceant tam illis, quibus positæ sunt, quam illis, ad quos pertinet curare, ut executioni mandentur; cura Nobis fuit ad communem utilitatem, De-

(\*) Michael (vulgo *Grand Michel* dictus) Esnea, nobili admodum apud Belgas gente natus, Benthencuriæ & Serenvillersii in Cameracensi Toparcha, profana aliquamdiu caltra secutus fuerat: sed bellicos brevi pertæsus tumultus, vitæ sanctioris, veræque virtutis sectandæ studio ad sacram Christi militiam se transtulit, unique DEO, Regi Regum, Ecclesiastico in Statu se se devovit. Postquam Sacerdotio fuisset initiatus, ex nominatione Philippi II. Hispaniarum Regis, cui jam pridem, dum ejusdem in Aula inter honorarios Ephebos versaretur, ob inculpata vitæ laudem percharus fuerat, Tornacensis Ecclesiæ Episcopus circa annum 1597. ab Illustrissimo D. Octavio, Nuntio Apostolico, consecratus fuit. Anno 1600. secunda post Paschalem solennitatem hebdomada, hanc Synodum habuit, in qua Antecessorum suorum Statuta non innovavit solum, suæque auctoritate firmavit; sed novis etiam additis auxit. Multis rebus præclare gestis, præfuit Episcopatu usque ad annum 1614, quo obiit 1. Octobr. plenus dierum ac meritorum: ab eximia in Deum pietate & liberalitate in pauperes præcipue commendatus.

*Jacob. Le Groux in Synopsi Vit. Episcoporum Tornacensium. Raissi Belg. Christi.*

Decreta in eadem Synodo promulgata (quam primum per occupationes licuit) prælo committere, ut a vobis legi, & executioni demandari possint. Quocirca omnes Prælatos, Archi-Presbyteros, Pastores, & quosvis alios Ecclesiæ Ministros, aliosque omnes & singulos, quos dicta Decreta concernunt, in Domino cohortamur, ut memores vocationis suæ sæpe ad animum revocent (juxta excellens Decretum Sacrosancti Concilii Trid. Cap. I. Sess. XXII.) nihil esse, quod magis alios ad pietatem & Dei cultum assidue instruat, quam eorum vita & exemplum, qui se Divino ministerio dicarunt; cum enim a rebus sæculi in altiore evecti

locum conspiciantur, in eos, tanquam speculum, oculos reliqui conjiciunt, ex iisque sumunt, quod imitentur; quapropter sic decet vos in sortem Domini vocatos, vitam, moresque vestros omnes componere, ut in habitu, gestu, incessu, sermone, aliisque omnibus rebus, nihil, nisi grave, moderatum, ac Religione plenum præ vobis feratis. Levia etiam delicta, quæ in vobis maxima essent, fugite, ut vestra actiones cunctis adferant venerationem: ad quæ (Domino adjuvante) copiose præstanda non parvo vobis erit auxilio diligens lectio atque observatio Statutorum hujus Synodi.

## INDEX TITULORUM HUIUS SYNODI.

### TITULUS PRIMUS.

*De Professione Fidei, & de his, quæ ad ejusdem Fidei integritatem tuendam & conservandam pertinent.*

*II. De Doctrina & prædicatione Verbi Dei.*

*III. De Divinis Officiis.*

*IV. De observatione Festorum & Jejuniorum.*

*V. De Sacramentis in genere.*

*VI. De Sacramento Baptismi.*

*VII. De Sacramento Confirmationis.*

*VIII. De Sacramento Penitentia.*

*IX. De Sacramento Eucharistia.*

*X. De Sacramento Ordinis.*

*XI. De Sacramento Matrimonii.*

*XII. De Sacramento Extreme Unctionis,*

*XIII. De Sepulturis.*

*XIV. De Oblationibus.*

*XV. De recta bonorum Ecclesiasticorum administratione.*

*XVI. De Clericis in genere.*

*XVII. De Episcopis.*

*XVIII. De Capitulis & Canonicis.*

*XIX. De Pastoribus, Decanis, & Custodibus.*

*XX. De Regularibus.*

*XXI. De Scholis.*

*XXII. De Foro, jurisdictione, & immunitate Ecclesiastica.*

*XXIII. De Usuris.*

*XXIV. De Synodali Congregatione.*

### TITULUS I.

*De Professione Fidei, & de his, quæ ad ejusdem Fidei integritatem tuendam & conservandam pertinent.*

#### CAPUT I.

**U**T quæ de Fidei Professione II. Camerac. Synodo Tit. I. Cap. I. decreta sunt, facilius executioni mandentur, deputandos censuimus aliquos, qui Fidei Professionem (juxta formam contentam in Bulla PII IV.) ab illis, qui ad eam tenentur, accipere possint & debeant. Atque imprimis ab ordinandis omnibus finito examine eam accipiemus Nos ipsi, vel noster Vicarius Generalis. Similiter a Pastoribus in eorum institutione, etiam a Concionatoribus, Confessariis & Professoribus,

*Tomus VIII. Concilior. German.*

is videlicet, qui eos admittet, eam accipiet. Bibliopolæ autem in Civitate Tornacensi istam Professionem singulis annis semel (in Vigilia nempe S. Joannis Baptistæ) in manibus nostris, vel Nobis impeditis, vel absentibus, in manibus Vicarii nostri Generalis, secundum formam brevioris per Edictum Regium præscriptam, renovabunt. Insulis vero & Contraci eadem Professio Fidei fiat in manibus Decani Christianitatis: Scholarum vero Magistri & Magistræ istam Professionem facient in

O o o 2

mani-

manibus Scholastici, ubi Scholasticus est, alias in manibus Decani Christianitatis, aut Pastoris loci.

#### CAPUT II.

Omnes, qui ad Fidei Professionem faciendam tenentur, ejus exemplar, seu copiam descriptam habeant, & interdum relegant, ut videant, & ad memoriam revocent, quid professi sint, quidve sancte juraverint.

#### CAPUT III.

Ut *Caput II. secundæ Synodi Provinc. Cameracensis* (cui accessit *Artic. I. Editi Regii*, facti ad commodiorem executionem Decretorum dictæ Synodi) debite mandetur executioni, Tornaci Episcopus, aut eo absente, vel impedito, Vicarius Generalis; Insulis autem & Cortraci Decanus Christianitatis quotannis, sub tempus renovandi Magistratum, moneant Committarios Principum, ut illam Fidei Professionem a novo Magistratu exigant. In oppidulis autem & pagis, ubi non est Decanus Christianitatis, idem officium præstet Pastor loci apud eos, qui habent jus renovandi Magistratum, & si quis de novo Magistratu absit, cum sit Professio Fidei, hujusmodi Professionem faciat in manibus novi Magistratus, antequam se rei judicariæ immisceat.

#### CAPUT IV.

Et ut ad effectum deducatur *Art. III. ejusdem Editi Regii*, instent iidem quotannis apud novum Magistratum, ut præcipui officarii perpetui, nempe Baillivi, Consilarii, Scribe, seu Grapharii, & Syndici, seu Procuratores Communiatum, illam Fidei Professionem in ipsius novi Magistratus manibus renovent.

#### CAPUT V.

De libris prohibitis diligenter observentur, quæ constituta sunt in utraque Synodo Cameracensi, & Indice librorum prohibitorum a Pio IV. comprobato, una cum appendice adjuncta, quod ut melius obtineatur, quando Bibliopolæ librorum sarcinas accipient, antequam illæ aperiantur, præsententur, ut minimum duo Deputati, qui

omnes libros diligenter inspiciant, nec ullos vendi permittant, qui suspecti sunt, sed eos secum auferant.

#### CAPUT VI.

Ne habeant, & multo minus communicent Bibliopolæ Indicem librorum prohibitorum, qui singulis annis in nundinis Francofordientibus, & alibi apud Protestantes venales prodeunt, quia talis Catalogi inspectio infirmis infide facile scandalum parit, & nonnullis curiosis parum doctis præbet occasionem ruinæ, & si mittatur Bibliopolis, eum tradant statim in manibus Visitatorum, etiam ipsis non petentibus.

#### CAPUT VII.

Hortentur Pastores suos Parochianos, ut si quos habeant libros prohibitos aut suspectos, eos ipsos exhibeant, exposito animæ periculo, quod incurrun non illi tantum, qui libros tales legunt, sed & qui eos habent, propter censuras, in quas ipso facto incidunt.

#### CAPUT VIII.

In domibus mortuariis, si qui sint libri, caveant Executores & Pastores loci, ne distrahantur, nisi ab illis, qui deputati sunt ad visitationem librorum, visitati & vendi permitti fuerint, quæ visitatio fiet gratis.

#### CAPUT IX.

Cum multi etiam Catholici contra prohibitionem Summi Pontificis, & *II. Synodi Provinc. Tit. I. Cap. IV.* non sine magno animæ suæ periculo legant libros Sacræ Scripturæ lingua vernacula, non obtenta in scriptis hoc faciendi potestate, de eo moneant Pastores suos Parochianos, eosque serio & frequenter exhortentur, ne deinceps id faciant, & ut qui fecerunt, de eo poenitentiam agant; Et in venia concedenda observabitur forma præscripta a Summo Pontifice in *IV. Regula Indicis librorum prohibitorum*, & non permittant eis, alia versione uti, quam approbata: idem fiat de libris, qui tractant de controversiis, juxta Regulam VI. Indicis librorum prohibitorum, & Caput illud populo Pastores publicent singulis annis circa Festa Paschalia & Nativitatis Domini.

CA.



## CAPUT X.

Diligenter observetur *Caput VII. II. Synodi Provincialis*, & hortentur Pastores suos Parochianos, ne homines vel animalia sua tuta reddere tentent a quolibet morbo, vel periculo per verba quædam magica, aut quascunque superstitiosas obervationes. Et generaliter, ne aliquo medio extraordinario utantur hujusmodi in rebus, nisi consultis Superioribus. Ne consultant etiam ariolos (quos vocant Divinos) ad cognoscendum, quis rem furripuerit, cum detestabile sit, & homine Christiano indignissimum, ad utilitatem aliquam consequendam uti mediate vel immediate diaboli auxilio & opera.

## CAPUT XI.

Et quia experientia quotidiana docet, nihil esse, in quo etiam prudentissimi, ac valde probi viri facilius fallantur, quam in ea cura, quam in exorcizandis spiritibus impendunt; nulli liceat exorcizare in nostra Diocesi, nisi licentia in scriptis obtenta, solis Pastoribus exceptis, quibus licebit in sua Parochia, & non aliis Parochianis. Demone infestatis succurrere, non aliis tamen exorcismis, quam iis, qui continentur in Manuali, a Dno Rmo VEDULLIO Prædecessore nostro piæ mem. edito. Si quis aliis exorcismis uti desideret, eos nostro examini prius offerat. Exorcismi autem personarum non alio in loco fiant, quam in Ecclesiis, vel Oratoriis ab Ordinario approbatis.

## CAPUT XII.

Decretum ultimum *Tituli I. II. Synodi Provinc.* factum contra blasphemos, diligenter observetur; moneant etiam Pastores & Concionatores populum, graviter eos peccare, qui sine justa causa jurant, & Nomen Dei sumunt in vanum, foreque, ut promotor contra eos procedat, nisi deinceps abstineant.

## TITULUS II.

## De Doctrina &amp; Prædicatione Verbi Dei.

## CAPUT I.

Sufficere videntur, quæ in *Synodo II. Cameracensi* ordinata fuerunt: ea diligenter observentur.

## TITULUS III.

## De Divinis Officiis.

## CAPUT I.

Similiter hic diligenter observentur, quæ in *II. Synodo Cameracensi* statuta sunt.

## CAPUT II.

Certam horam in pagis & Parochiis Missam celebrandi constituimus a Festo S. Remigii usque ad Pascha, novam, a Paschate vero usque ad Sancti Remigii Festum, octavam & pro Vesperis, secundam, a qua Constitutione, quacunque in contrarium allegatione non obstante, non recedant.

## CAPUT III.

In illis locis, ubi Dominicis & Festis diebus tantum una Missa celebratur, moneant Pastores Patres- & Matres-familias, ut tempore Missæ Parochialis unum tantum (si necessitas aliquem manere requirat) domi relinquant, neque semper eundem, sed vicissim nunc hunc, nunc illum, qui per Pastores admoneantur, ut domi manentes animo Divinis Officiis intersint, & cum Sacerdote, & iis, qui in Templo sunt, sua vota conjungant, & orent. Quod si loco aliquo vicino duæ Missæ diversis horis eo die celebrentur, ad eam, quæ ante Missam Parochialem absolvitur, mittatur is, qui tempore Missæ Parochialis domi mansurus est. Quod ubi non contingeret, mittatur ille idem ad Vesperas suæ Parochiæ.

## CAPUT IV.

Instruatur populus, quomodo tempore tremendi Sacrificii Missæ se gerere debeat, & quam reverenter, quamque perseveranter in spiritu humilitatis, & in animo contrito a principio usque ad finem adesse: eosque non satisfacere præcepto Ecclesiæ, qui ad Orationem Dominicam, sicuti plerisque moris est, ac si esset absolutum Sacrificium, templo egrediuntur.

## CAPUT V.

Deambulationes in Templis non tantum tempore Divini Officii, sed & etiam extra illud prohibemus, item-

O o o 3

que.

que confabulationes: cum enim domus Dei domus orationis sit, & fideles Dominum & Deum suum illic in Eucharistiæ Sacramento vere præsentem esse firmiter credant; indignissimum est, ea illic agi, quibus tanta Majestas offendatur.

## CAPUT VI.

Et cum intellexerimus, in nonnullis Parochiis hujus Diocesis raro decantari Vesperas diebus Dominicis & Festis, enixe præcipimus, ut deinceps decantentur, idque hora secunda pomeridiana, uti dictum est. Eodemq; tempore Parochus, ubi non est Schola Dominicalis, a prandio, commodiore ante & post Vesperas hora, pueros campanæ pulsu convocatos, prima Fidei rudimenta doceat; si quis autem Parochus, non legitime impeditus, hoc tam necessarium officium, quod etiam ex *Concilii Trident.* Decreto præstare debet, prætermiserit, is toties unius floreni mulctam fabricæ suæ Ecclesiæ applicandam incurrat.

## CAPUT VII.

Ac ne ulla ratione unquam sese excusare possint Pastores a salutari Catechisationis officio, id usque adeo præstari volumus, ut etiam si unus tantum, aut duo ad Catechismum veniant, illis doctrinæ Christianæ initia tradere ne negligant, qua diligentia Pastoris continuante, & Deo (haud dubie) incrementum dante, paulatim auditorum numerus accrescet. Quod si aliquis Pastor donum linguæ non habeat, eos saltem nuda Catechismi lectione instruat, ita fiet, ut cum legem Dei cognoverint, non facile in eam impingant.

## CAPUT VIII.

Baillivos & Magistratus omnes per viscera JESU Christi obsecramus, atque adeo obtestamur, ut magno pietatis studio tam salutare, tamque necessarium Reipublicæ officium promoveant, ac juxta Edictum Regium parentes, heros & heras, pueros, ministros & ancillas, quæ institutione indigent, ad doctrinam Christianam mittere cogant.

## CAPUT IX.

In Ecclesiis, ubi celebratur Divinum Officium, Canonici, Pastores, &

Capellani Divino cultui pariter intenti reverenter concinant, & singulos Versus parvula pausa claudant, ne præcipitatio inchoantis Versum finire volentis mutilet.

## CAPUT X.

Et quo vigilantius id observetur in quavis Ecclesia Nobis subdita, tam Canonicis, quam Capellanis singulis horis majoribus distributiones fiant, Constitutione *Concilii Tridentini* diligenter in hoc observata.

## CAPUT XI.

Incepta Canoniarum Horarum æliqua, ante eam completam nemini (salva necessitate) Choro egredi liceat, nisi distributionibus illi horæ assignatis frustrari velit.

## CAPUT XII.

Quas eorum percipiet nemo, nisi si qui ante primi Psalmi hñem, & in Missa ante Epistolam absolutam in Chorum se receperit, & totius ejus Officii finem expectarit.

## CAPUT XIII.

Supplicationes solennes, quæ in honorem Venerabilis Sacramenti, seu B. MARIE Virginis, aliorumque Sanctorum fieri solent, in quibus Divorum imagines & feretra circumferuntur, priusquam fiant, denuntiatione præmissa, illarum causæ populo aperiantur, ut majori cum fervore populus assistat.

## CAPUT XIV.

Celebrare nemo præsumat, nisi in calice aureo, vel argenteo, & nisi Canonicas Horas saltem usque ad primam exclusive perlegerit; calicum autem stanneorum usum, ob tanti Sacramenti reverentiam optaremus abolitum; sed quia plurium Ecclesiarum paupertas, nec non pericula direptionum hoc adhuc ferre non videntur: hortamur omnes, ut paulatim alios, quorum cuppa saltem sit argentea, substituant, & interea, qui dictis stanneis utuntur, ut singulis mensibus eos quam diligentissime mudent.

CA.

## CAPUT XV.

Preces autem, quas Canonicas vocamus, secundum ritum & usum Romanum, jussu PII V. Pontificis S. receptum, de cætero persolvantur, eo quovis suppresso, quem dicti Pontificis abrogavit autoritas. Qua in re si qui negligentes comperiantur, nostro, vel Officialis arbitrio castigentur.

## CAPUT XVI.

In solemnī Missæ Sacrificio præfatio, Dominicaque Oratio a Celebrante, Gloria in excelsis, & Symbolum Apostolorum a Clero integre decantentur, nec organis supprimantur, nec aliis cæremoniis, quam in Missali Romano præscriptis, utantur.

## CAPUT XVII.

Quia in quibusdam Ecclesiis contingit, vel tam magnum Missarum celebrandarum numerum ex variis defunctorum relictis impositum esse, ut illis pro singulis diebus a testatoribus præscriptis nequeat satisfieri: vel eleemosynam hujusmodi pro illis celebrandis adeo tenuem esse, ut non facile inveniat, qui velit se huic oneri subicere: unde depereunt piæ testantium voluntates, & datur occasio onerandi conscientias eorum, ad quos prædicta spectant; Monemus omnes & singulos, in quorum Ecclesiis hujusmodi foundationes sunt, ut earum declarationem Nobis exhibeant, ut autoritate, quam Nobis Sacrosancta Synodus Sess. XXV. Cap. IV. tribuit, circa præmissa statuamus, quidquid magis ad Dei honorem & cultum, atque Ecclesiarum utilitatem expedire videbitur. Neque ante nostrum Decretum quemquam beneficio reductionis gaudere posse declaramus.

## TITULUS IV.

*De observatione Festorum & Jejuniorum.*

## CAPUT I.

**P**rohibemus, ne aurigæ, nautæ & similes Dominicis & Festis diebus mercium sarcinas navibus, aut curribus imponant, vel vecturam incipiant: & ne cum ad locum destinatum pervene-

rint, iisdem diebus onera deponant. Item prohibemus agrorum culturam, messem, molitorum, coctorumque cerevisiæ, lanionum & pistorum operas (nisi ob notabilem necessitatem) cujus cognitio ad Ordinarium, vel Decanum Christianitatis, aut, eo absente, ad Pastorem loci spectabit.

## CAPUT II.

Prohibemus etiam, ne die Dominico aut Festo vendantur carnes in macello, vel etiam in domibus privatis, nisi superveniente necessitate, & obtenta venia in scriptis, ut supra.

## CAPUT III.

Item vetamus subhastationes, vel auctiones publicas fieri diebus Dominicis & Festis; & nundinas annuas ac forum rerum venalium hebdomadarium, cum in idem Festum incidet, in alium diem transferri volumus.

## CAPUT IV.

Cum duo sint Ecclesiæ præcepta præcipua, omniumque vetustissima, & incredibilis plane momenti ad promovendam salutem animarum, quæ in Ecclesia primitiva & media a nostris Majoribus ad hæresim usque Lutheri, & aliquot annis post, diligentissime fuerunt observata: unum de Sanctificatione dierum Dominicorum & Festorum, alterum de observatione Jejunii Quadragesimalis, & aliorum jejuniorum ab Ecclesia indictorum: eorumque diligens observatio sit efficacissimum remedium ad bene observanda Dei mandata, & utrumque hodie perniciosissime, frequentissimeque violetur, atque adeo (proh dolor) diebus Dominicis & Festis, & Jejuniorum ab Ecclesia indictorum, ad nostram Sanctificationem institutis, Deus præcipue offendatur; diebus quidem Dominicis & Festis per ebrietatem, comestiones, & alia plurima peccata gravissima, quæ ex his fontibus oriuntur: diebus autem jejuniorum violatione jejunii ab Ecclesia indicti; Nos nolentes in hac Diocesi diutius tolerari tantas, tamque frequentes Dei offensiones, tantumque abusum, & ea tolerando communicare peccatis alienis, qui, quantum possumus, debemus saluti animarum Nobis com-

missa-



missarum consulere ; imprimis præcipimus omnibus Pastoribus, Concionatoribus, & Confessariis nostræ Diœcesis, ut frequenter & acriter hortentur populum & Clerum ad diligentem illorum Sanctissimorum, maximique momenti præceptorum observationem, eos etiam admonentes, fore, ut contra illos procedatur, qui ea violarint : idque præcipue faciant in quinque præcipuis Solemnitatibus anni, quo tempore Clerus & populus solent esse animo melius præparato ad amplectenda salutaria consilia.

## CAPUT V.

Et præcipimus omnibus curæ nostræ commissis, ut deinceps dies Dominicos & Festos diligenter sanctificent, & tota Quadragesima, præter dies Dominicos, aliisque diebus jejuniorum indictorum ab Ecclesia jejunent, illis exceptis, qui propter ætatem, morbum, vel aliam causam legitimam a jejunando excusantur, qui tamen ita sumant, quod postulat eorum necessitas, ut alios non scandalizent, & ut paulo minus sumant, quam facerent, si jejunium non esset, hortamur. Qui dies Dominicos & Festos non sanctificaverint, quin imo opere prohibito violaverint, vel jejunium ab Ecclesia indictum non observaverint, pro modo delicti pœna Ecclesiastica puniantur.

## CAPUT VI.

Contra Ecclesiæ Constitutionem omnino graviter peccant, qui celebratis in Quadragesima, vel die jejunii ab Ecclesia indicto exequiis, præter convivium prandii etiam cœnam parant, Dominum Deum, quem defuncto propitium in Ecclesia reddere conati sunt, offendendo, & proximum scandalizando, de quo intolerabili abusu Pastores Parochianos suos frequenter, & serio moneant, & Promotor contra hujusmodi delinquentes procedere non omitat.

## CAPUT VII.

Prohibemus, ne quis Dominicis & Festis diebus tempore Summi Sacri, Concionis, aut Vesperarum ludat, vel ambulet in foro, vel alio loco publico, vel prope Ecclesias, vel in taberna ali-

qua, vel popina, aliove loco potitet, qui contra fecerint, puniantur, & similiter tabernarii & caupones, qui hoc in ædibus suis passi fuerint.

## CAPUT VIII.

Et cum frequentissima sit ebrietas, idque præcipue diebus Festis & Dominicis, & per ebrietatem plurima gravissima peccata committantur, ut rixæ, pugnæ, & multa etiam homicidia; summopere hortamur, & rogamus omnes in Domino Christi-fideles, curæ nostræ commissos, ut per (\*) ebrietatem, quæ (ut non semel mōnet B. Paulus) excludit a Regno cœlorum, & proinde peccatum mortale est, & plurimorum, aliorumve causa & scaturigo, studiose caveant quovis tempore.

## CAPUT IX.

Et cum intelligamus, in quibusdam Parochiis, præsertim diebus Dominicis & Festis, puellas & viduas, vel etiam conjugatas, sine suis maritis, deduci ad tabernas, vel popinas, vel publica diversoria, & illic cum juvenibus, aut viris potitare magno cum pudicitie suæ periculo; præcipimus Pastoribus, & Concionatoribus illorum locorum, ut acriter hortentur parochianos suos, & parochianas, ne deinceps tale quid faciant, aut fieri permittant: ostendentes, quam sit turpe & periculosum pudicitie puellarum, & mulierum, & tristissimos eventus inde provenire. Adhortantes omnes & singulos, ne tale quid fiat, itemque ne tabernarii, vel caupones illud domi suæ fieri patiantur.

## CAPUT X.

Interdicimus etiam, ne confraternitates sclopetariorum, vel arcubalistarum diebus Festis aut Dominicis sua certamina, vel recreationes exerceant ante absolutam Missam parochialem.

## CAPUT XI.

Quoniam Festorum multitudine populum plus æquo gravari animadvertimus, justis de causis eam duximus coarctandam, nec alios dies solemnes per Pastores populo denuntiandos, quam hos: Circumcisionis Domini, Epiphaniæ, Purificationis B. MARIE, Mat-

(\*) Ita quidem habetur in editione Synodorum Tornacensium Insulensi, anni 1726. Legendum tamen arbitror: ab ebrietate.

Matthiæ Apostoli, Annuntiationis B. MARIE, Paschæ cum duobus sequentibus diebus, Apostolorum Philippi & Jacobi, Ascensionis Domini, Pentecostes cum duobus sequentibus diebus, Sanctissimæ Trinitatis, Venerabilis Sacramenti, Nativitatis B. Joannis Baptistæ, Ss. Apostolorum Petri & Pauli, B. Magdalenz, S. Jacobi Apostoli, S. Laurentii, Assumptionis B. MARIE, S. Bartholomæi Apostoli, Nativitatis B. MARIE, Exaltationis S. Crucis, B. Matthæi Apostoli, S. Michaelis Archangeli, Apostolorum Simonis & Judæ, Omnium Sanctorum, S. Martini, S. Catharinæ, S. Andreæ Apostoli, S. Nicolai, Conceptionis B. MARIE, S. Thomæ Apostoli, Nativitatis Domini, S. Stephani, S. Joannis Evangelistæ, & Ss. Innocentium, omnesque dies Dominicales, Translationis S. Eleutherii 25. Augusti, & S. Pii 1. Octobris, & Dedicationis Ecclesiæ Cathedralis in Civitate Tornacensi 9. Maji, & Patromi cujusque Ecclesiæ in sua parochia.

## CAPUT XII.

Festis autem sequentibus Marci scilicet, quo fit a carnibus abstinencia cum processione, Barnabæ Apostoli, Lucæ Evangelistæ, Commemorationis fidelium Defunctorum, & Parasceves, absoluta Missa parochiali ad suæ vocationis operas redire cuilibet liberum sit.

## CAPUT XIII.

Et si forte contingat, Festos dies Purificationis, Conceptionis, & Annuntiationis B. MARIE Virginis ab Ecclesia transferri, eo die servantur a populo, quo celebrantur ab Ecclesia, cum benedictione cereorum ipso die Purificationis, reliqui vero eo die, in quem cadunt.

## CAPUT XIV.

Festa etiam Ss. Episcoporum Tornacensium, Medardi videlicet die 8. Junii, & Eligii 1. Decembris duplici officio, Sanctorum vero Mommolani 16. Octobris, & Acharii 27. Novembris simplici Festo per totam Diocesim celebrabuntur.

## CAPUT XV.

Cum ex multorum gravium & fide dignissimorum virorum relatu & querimoniis intellexerimus, quod ex ludis theatralibus, qui diversis in locis hujus Diocesis exhibentur, alii sint hujusmodi, vel sic agantur, ut in eis doceantur quædam, quæ hæresim sapiant: vel res Sanctas, quasque Sancta Religio Catholica merito veneratur, in contemptum adducant: alii vero lasciviam doceant, vel alioquin bonos & Christianos mores corrumpant; ne deinceps ulli ludi theatrales exhibeantur, nisi visitati & approbati per Nos, vel aliquos ad hoc a Nobis specialiter deputandos, & nisi actiones omnes sint extra suspicionem hæresis, & de eo Nobis, vel a Nobis deputandis sufficienter constet.

## CAPUT XVI.

Dies observandi Jejunii sunt Quadragesima tota, Quatuor tempora, Vigilia Pentecostes, Vigilia Nativitatis S. Joannis Baptistæ, Ss. Apostolorum Petri & Pauli, S. Laurentii, Assumptionis B. MARIE Virginis, Matthæi Apostoli & Evangelistæ, Ss. Apostolorum Simonis & Judæ, Omnium Sanctorum, S. Andreæ Apostoli, Nativitatis Domini: Quæ si diebus Dominicis, vel Lunæ evenerint, Sabbatis præcedentibus jejunentur. Diebus vero S. Marci, & Rogationum, quibus fit a carnibus abstinencia cum processionibus consuetis, usque ad prandium jejunetur. Si vero Festum S. Marci incidat infra Octavam Paschæ, transferatur ipsum Festum cum jejuniis & processione in primum diem post *Quasimodo* non impeditum, si vero in aliam Dominicam incidat post *Quasimodo*, Festum ipsa Dominica celebretur, abstinencia vero cum processione in feriam secundam transferatur.

## CAPUT XVII.

Inhærendo ordinationibus Prædecessorum nostrorum, monemus Pastores omnes, ut juxta consuetudinem generalem hujus Diocesis, iis diebus, quibus a carnibus abstinendum est, etiam a pinguedine, & jure carniū abstinendum esse, sedulo doceant.

## TITULUS V.

*De Sacramentis in genere.*

## CAPUT I.

**D**iligenter hic observentur, quæ *Synodus Cameracensis secunda* ordinavit.

## CAPUT II.

Quamdiu in illis Parochialibus Ecclesiis, quæ magnam partem populi extra mœnia, seu portas oppidorum habent, Sacellanus constitutus non erit, qui nocturno tempore ejus loci incolis Sacramenta administret; occurrente noctu necessitate, recurratur ad Pastorem viciniorem, quem etiam requirat Pastor oppidanus: ut occurrente tali necessitate, Parochianis suis paratus esse velit ad Sacramenta administranda.

## CAPUT III.

Sacramenta administraturi sint in veste decenti, neque unquam Baptismum, Eucharistiam, aut extremam Unctionem ulli administrent, vel aliquos Matrimonio conjungant, nisi induti superpelliceo, vel saroto & stola.

## CAPUT IV.

Ut Ecclesiarum Rectoribus non desint necessarii adjuvatores, decernimus, ut omnes possidentes Capellaniam aliquam fundatam in Ecclesia Parochiali, cujus fundatio non invenitur, si tam sit opima, ut ex ejus fructibus Sacellanus honeste sustentari possit, personaliter resideant, vel alius aliquis eorum nomine & expensis, qui Pastorem in Divinis Officiis, Sacramentorum administratione, & Catechisatione juventutis adjuvet: si vero fructus Capellanix tam tenues sint, ut ex illis quis ali non possit, permittimus, ut per Pastorem, vel alium quemvis, eo loco non residentem Missæ exonerentur, de quarum exoneratione fidem facient, cum pro gratia non residentix supplicabunt. Si tamen ex fundatione non appareat, quibus diebus Missæ sint celebrandæ, & per alium, quam per Pastorem loci, valde tenuiter dotatum celebrentur; volumus, eas diebus Dominicis & Festis mane celebrari, pro famulis & famulabus, cæterisque,

qui Missæ Parochiali interesse non possunt. Hactenus dicta intelligi volumus eo casu, quo unica Sacellania est fundata in Ecclesia Parochiali. At si in ea fundatæ sint plures, poterunt Sacellani omnes contributione facta illic constituere unum Sacellanum, qui Pastorem adjuvet.

## CAPUT V.

Quando Sacrorum Oleorum vascula evacuanda erint, ut eis novum oleum imponatur, alia honesta vascula sint parata, in quibus pro ea, quæ occurrere posset, populi necessitate, vetera tantisper conserventur, donec nova olea allata sint: quibus allatis, vetera in Ecclesiæ lampadibus comburantur. Curent autem Pastores omnes a suis Decanis olea nova accipere feria quarta paschali, ad quem finem omnes unius districtus convenient in Ecclesia parochiæ, ubi Decanus residet, ut Sacra Olea ab eo cum reverentia accipiant: & ante celebretur Sacrum, cui omnes in habitu honesto cum stola sub pœna 30. stufferorum inter sint. Infusio autem oleorum in fontem benedictum differatur, donec nova olea accepta fuerint, & tantisper pro necessitate superveniente in vase honesto aqua veteris fontis conservetur, qua pastor uti possit, donec nova olea acceperit.

## TITULUS VI.

*De Sacramento Baptismi.*

## CAPUT I.

**H**ic diligenter observentur, quæ in *II. Synodo Cameracensi* statuta sunt.

## CAPUT II.

Ut Baptismus, qua debet, reverentia administretur, caveant diligenter pastores, ne ad proles suscipiendas admittant eos, qui ebrii, vel semi-ebrii sunt.

## CAPUT III.

Cum autem Susceptores & Susceptrices sint tanquam parentes spirituales eorum, quos suscipiunt, ac fidei eorum sponsores: & curare debeant, ut cum per ætatem poterunt, addiscant & teneant prima elementa Christianæ Religionis.



ligionis, Christianeque vivant, ut etiam pulchre monet Catechismus Romanus *Tit. de Sacram. Baptismi*; ad hoc munus non admittantur, nisi adulti & adultæ, qui probe norint Christianæ Religionis rudimenta, & sint Sacro Chrismate confirmati, ut de Susceptoribus confirmandorum statuitur *Tit. 7. II. Synod. Provinc. Camerac.* Si qui pastores alios deinceps admiserint, puniantur.

## CAPUT IV.

Dehinc ut incommoda, quæ ex suscipientium multitudine provenire solent, vitentur, duo tantum, vir scilicet unus, & mulier una (Catholici tamen) ad suscipiendum de Sacro Fonte parvulum admittantur, nominaque paganorum nulla ratione parvulis indantur, imo ne veteris testamenti: non quod per se improbandum sit; sed quia id hæreticis peculiare est, etiam ab eis abstinendum edicimus.

## TITULUS VII.

*De Sacramento Confirmationis.*

## CAPUT I.

**C**UM summa sit utilitas Sacramenti Confirmationis, Pastores & Concionatores eam interdum populo declarent, & præsertim sub tempus visitationis Episcopalis vehementer adhortentur adultos nondum confirmatos, ut prima quaque opportunitate Sacramentum hoc suscipiant: & patres- & matresfamilias, ut curent suos liberos: & Curatores & Tutores fidei suæ commissos, prima quaque occasione confirmari. Ad quod ut facilius inducantur, admoneant, nullos posse deinceps admitti in Patrinos & Matrinas, vel tonsura Clericali insigniri, vel ad professionem vitæ regularis, seu religiosæ admitti, nisi in Fide Christiana per Sacramentum Confirmationis roboratos & roboratas, ut partim *II. Synodo Provinc. Tit. 7. Cap. 1. & Tit. 20. Cap. ult.*, partim hac Synodo decretum est.

## TITULUS VIII.

*De Sacramento Pœnitentiæ.*

## CAPUT I.

**Q**UAMVIS non sit confitendi necessitas iis, qui non sunt contaminati

*Tomus VIII. Concilior. Germaniæ*

peccato aliquo mortali, vel de quo dubitent, sitne mortale; tamen quia etiam venialia peccata, quando negliguntur, multum diminuunt charitatis fervorem; serio monemus & hortamur pastores, & alios Sacerdotes omnes, qui frequentius celebrant, ut saltem octavo quoque die peccatorum suorum confessionem facere non omittant: & ut bonum, probumque Confessarium sibi deligant, cum bonus Confessarius magno sit auxilio ad obtinendam veram contritionem, & seriam vitæ emendationem.

## CAPUT II.

Cum autem multi veniant ad Confessionem Sacramentalem nimium imparati, nempe non contriti, & etiam non præmisso debito examine conscientie; Confessarii ne tales facile absolvant, sed in aliud tempus rejiciant, ut alio die redeant melius præparati: ne si aliter fecerint, communicent illorum peccatis, & eos, quos absolvunt, decipiant, pacem dantes, accipientibus non profuturam, & dantibus periculosam, ut dicit *Cyprian. Serm. 5. de Lapsis.*

## CAPUT III.

Et quia tales magno numero solent venire Vigilia Paschæ & Nativitatis sub Vesperam, ne talium multitudine nimium graventur pastores, & ad officium posttridie bene faciendum minus apti reddantur; optamus, ne diebus illis serius confessionem audiant, quam in horam septimam, vel octavam vespertinam. Confessarii autem, cum Judicis officium præstent, nonnisi sedentes confessiones excipiant.

## CAPUT IV.

Pro meliori observatione ejus, quod ordinatum est hoc *Tit. Cap. 9. in I. Synodo Camerac.*, insistentes antiquis Decretis nostrorum prædecessorum, mandamus omnibus pastoribus, quatenus registrum conficiant omnium, quorum tempore Quadragesimæ confessiones excipiunt, & eos, qui aliis, ad confessiones audiendas admissis, confessi fuerint, serio moneant, ut allato testimonio Confessarii, cui confessi sunt, se in dicto registro describi curent, nec alios, quam hic descriptos, ad Sacra-

P p p 2

menta,

menta, aut Matrimonium, aut Sepulcrum admittant.

#### CAPUT V.

Ministri, ancillæ, studiosi, & similes, qui aliquo in loco morantur, non animo ibi residendi, sed ad propria redeundi, debent confiteri & communicare in illo loco, ubi morantur. Quod si voluerint in loco originis, vel alio, præcepto Ecclesiæ de confitendo & communicando tempore paschali satisfacere, petant licentiam a pastore loci, ubi morantur, eique referant testimonium illius pastoris, ubi præceptum adimpleverint.

#### CAPUT VI.

Sacerdotibus etiam indifferenter, cuicunque velint, confiteri liberum non fit, sed illis tantum, qui per Nos, vel nostros Deputatos ad audiendas pœnitentium confessiones fuerint admissi, demptis tamen pastoribus, quos Sacramenta administrare sapius compellit necessitas, quibus, cum non facile Confessoris per Nos approbati copiam habere possint, alium quemvis idoneum, qui eos absolvat, deligere sibi permitimus.

#### CAPUT VII.

Cæterum, ne quis solita casuum reservatione a salutari confessionis remedio retrahatur, vel quia Sacerdotem, qui eum absolvat, in promptu non habet, vel quod propter sumptus ad Nos, vel Delegatos nostros proficisci differat, huic rei consulere volentes, potestatem absolvendi a casibus Nobis reservatis omnibus parochis, usque ad nostram revocationem committimus, exceptis tamen hæreticis, qui a Nobis absolvendi veniant: homicidis, quos ad pœnitentiarium: excommunicatis, suspensis, ac nostra autoritate interdictis, vel quibus sollemnis pœnitentia foret imponenda, quos ad Officiale nostrum remittimus.

#### CAPUT VIII.

Casus autem Nobis reservati, a quibus pastoribus damus licentiam absolvendi, sunt hi: Apostasia, fortilegium factum cum Eucharistia, aut Chrismate, perjurium solemne, viola-

tio voti solennis, injectio violenta manuum deliberato proposito cum læsione in parentes: veneficium, procuratio sterilitatis, vel abortus, sacrilegium excedens 40. solidos, usura notoria, incendium voluntate deliberata procuratum, adulterium notorium, incestus cum Sanctimonialibus, & consanguineis intra tertium gradum: Sodomia, raptus virginum, falsum testimonium in iudicio datum, crimen falsi, Simonia realis, & prædictis graviora in eodem genere peccati: Apostolicæ tamen Sedis suis semper salvis.

#### CAPUT IX.

Prædecessorum nostrorum Decretis inherendo ordinamus, ne Sacerdotes mulierum, cum quibus prævalente tentatione carnaliter vixerunt, vel quas ad peccatum forte induxerunt, confessiones audiant, sed ad honestos Confessores transmittant: & qui contravenire præsumpserint, pœnis contra spirituales incestum decretis, vel his gravioribus plectentur.

### TITULUS IX.

#### *De Sacramento Eucharistiæ.*

##### CAPUT I.

**D**iligenter observentur, quæ hoc Tit. habentur in *Concilio II. Cameracensi.*

##### CAPUT II.

Cum ad infirmos deferretur Eucharistia, moneantur vicini ejus, ad quem deferretur, ut accensis tedis, si quas habent, Venerabile Sacramentum comitentur: ut autem magis incitentur fideles ad comitandum hoc Venerabile Sacramentum, dum ad infirmos deferretur, de potestate Nobis concessa elargimur 40. dies Indulgentiarum singulis, qui illud comitantur.

##### CAPUT III.

In die Nativitatis Christi, palmarum, & paschatis, illis in parochiis, ubi major est populi frequentia, quo majori cum devotione ac reverentia, ac sine pressura ad Sacram Communionem veniatur; volumus, ut saltem unus Sacerdos constituatur, qui continue a mane usque ad meridiem petentibus Eucharisti-

charistiam administret, etiam extra Missarum solemniam.

## CAPUT IV.

Dum primum adolescentes, vel puellæ ad hujus Augustissimi Sacramenti susceptionem admittendi sunt, curent pastores, & Confessarii, ut antequam eos admittant ad Communionem, sint mediocriter instructi de hujus Sacramenti Mysterio, sciantque Religionis Christianæ rudimenta, nimirum Symbolum Apostolorum, Orationem Dominicam, Salutationem Angelicam, decem præcepta Dei, & quinque præcepta Ecclesiæ.

## CAPUT V.

Pastores hortentur fideles ad frequentem Confessionem & Communionem, & ut saltem quinque præcipuis anni Festivitatibus communicent, videlicet paschatis, pentecostes, Assumptionis B. Mariæ Virginis, Omnium Sanctorum, & Nativitatis Christi. Sacerdotes autem, ut minimum singulis diebus Dominicis, & Festis solemnioribus celebrent, Diaconi vero & Subdiaconi frequenter communicent.

## CAPUT VI.

Sacræ Hostiæ, quæ pro infirmorum Viatico præparatæ sunt, fidei custodia conserventur, & per Parochos mensibus singulis renoventur.

## TITULUS X.

*De Sacramento Ordinis.*

## CAPUT I.

**D**iligenter serventur, quæ in *II. Concilio Cameracensi* hic ordinata sunt.

## CAPUT II.

Ad primitiarum Solemnia infra 40. dies a susceptis Ordinibus presbyteros teneri palam sit & manifestum, a quibus comestiones, crapula & luxus procul exulent.

## TITULUS XI.

*De Sacramento Matrimonii.*

## CAPUT I.

**S**ponsalia contracturi jurent in manibus pastoris, se plane existima-

re, non subesse aliquod impedimentum, quo minus Matrimonio jungi possint: quod si pastor audierit, inter eos aliquam esse cognationem, vel affinitatem, sed dicatur, eam esse remotiorem, quam ut conjungi non possint; diligenter inquirat, sitne illa cognatio, vel affinitas intra gradus prohibitos: & si de hoc aliquo modo dubitet, eo quod non satis cognitam habeat rationem computandorum graduum cognationis, vel affinitatis, consulat suum Decanum: Decanus, si & ipse dubitet, D. Officalem. Idemque faciant pastores, si dicatur subesse aliud aliquod impedimentum, de quo dubitent, sit verum impedimentum, nec ne. Sed qui non obstante qualicunque oppositione (etiam si levissima conjectura contra Matrimonium fuerit) antequam hujusmodi oppositio vel conjectura in Curia nostra diluta extiterit, ulterius procedat, excommunicationis poenæ subiacet.

## CAPUT II.

Moneant pastores eos, qui Sponsalibus junguntur, ut antequam Sacramentum Matrimonii suscipiant, confiteantur peccata sua, præmissis diligenti examine conscientiæ, ut ea repurgata, uberiores gratiam accipiant ad bene & Christiane vivendum in conjugio.

## CAPUT III.

Sed & Sponsalia de futuro, quas affidationes vocant, non aliter fiant, quam in loco Sacro, & in manibus parochi, vel alterius Sacerdotis ex nostra, vel parochi licentia, duobus presentibus. Et si quis contraveniat, & clandestine in privatis ædibus, vel tabernis contrahat, tam contrahentes, quam Sacerdos, cæterique præsentis, & consentientes, nostri Officialis arbitrio graviter plectantur.

## CAPUT IV.

Quod si contrahentes diversarum Parochiarum, ejusdem tamen Decanatus existant, alterius Parochus eos affidare poterit, modo alterius Parocho super bannis utrobique proclamandis rescribat. Si vero diversorum Decanatus fuerint, nonnisi receptis prius sui Decani literis ad affidationem

P p p 3

pro-



procedat, & si alienæ Diœcesis persona cum alia nostræ Diœcesis contrahere velit, absque nostra, aut Sigilliteri nostri licentia, easdem affidare Parochus non attenter.

## CAPUT V.

Parochus autem sub arbitraria pœna neminem ante Matrimonio conjungere auit, quam tribus proclamationibus, tribus diebus festivis a nostra Synodo per Diœcesim nostram observari præceptis, die semper intermedio, infra Missarum solemnia factis, & editis, atque die post tertiam publicationem interposita, nisi causâ cognita aliter fuerit dispensatum.

## CAPUT VI.

Favore tamen prolis superstitis, nulla proclamatione facta, in duorum testium præsentia concubinam cum viro, non sine periculo mortis ægrotante, parochus Matrimonio conjungere poterit: ea etiam cautela, ut si postea convaluerit, proclamationes rite fiant.

## CAPUT VII.

Et quod attinet ad bannorum proclamationes, eas fieri volumus tam in parochia, ubi personæ annos nobiles, vel viduitatis transegerint, quam in loco, ubi contraxerint Sponsalia, ut fraudibus omnibus & imposturis obviatur.

## CAPUT VIII.

Nomina Matrimonio junctorum, nec non testium præsentium, dies & locus contracti Matrimonii, in registro ad id specialiter ordinato per parochos describantur.

## CAPUT IX.

Interim ut Matrimonii vim indissolubilem quivis intelligat, rite semel conjuncti propria auctoritate separari non possunt. Quare si subditorum nostrorum quispiam absque Ecclesiæ judicio seorsum habitare attenter, excommunicetur.

## CAPUT X.

Pari modo non solum is, qui in gradu prohibito contrahere volentes, conjunget, sed & parochus, qui horum rite junctorum separationem ad

Nos confestim non deferet, imò qui fidei datæ privatas remissiones super Matrimonio contrahendo aliququaliter recipiet, excommunicetur.

## CAPUT XI.

Nullus præterea subditorum Matrimonium contrahere, vel Matrimoniorum solemnisationes facere, nuptiarum convivia celebrare, tripudia admittere: nec Sacerdos ullus Matrimonio aliquos conjungere, vel prædictis solemnisationibus consentire tempore prohibito, a prima scilicet Dominica Adventus in Epiphaniam, & a die Cinerum in octavas paschæ inclusive, sub pœna Canonica præsumat.

## CAPUT XII.

Denique (ne) Sponsus ante solemnisationes Matrimonii & Benedictionem Sacerdotalem, a parocho in Templo solemniter susceptam, cum Sponsa carnaliter conversetur, aut invicem cohabitent, sub eadem excommunicationis pœna veramus.

## CAPUT XIII.

Quas solemnisationes omnes intra dies 40. a die contractæ affidationis executioni demandandas censemus, alioquin tam contra defectuosos, quam contra Parochos, qui statim hos defectus ad Nos non detulerint, rigoroſe procedatur.

## TITULUS XII.

*De Sacramento Extremæ Unctionis.*

## CAPUT I.

**H**ortentur pastores infirmos, ut ad susceptionem hujus Sacramenti non expectent tempus extremum, sed tempestive illud suscipiant, vigente adhuc usu rationis, quo majorem ex eo fructum percipiant. Et ut Christi fideles licentius Sacerdoti se jungant, qui Extremam Unctionem ægrotis detert, & cum eo pro salute ægri deprecantur, omnibus, qui hoc charitatis officium præstiterint, singulis vicibus 40. dierum Indulgentias in Domino largimur.

## CAPUT II.

Cum hoc Sacramentum infirmos tantum concernat, furiosis & mente captis

captis ( qui tamen sanæ mentis nunquam fuere, nec ad Confessionis & Eucharistiæ Sacramenta admissi sunt ) gladio feriendis, suspendendis, vel aqua submergendis, & similibus, cum non reputentur infirmi, non debet administrari.

## CAPUT III.

Nullus agrotus in eadem infirmitate sæpius inungatur. Si tamen post Unctionem, semel in periculo mortis factam, infirmitas ita se remittat, ut censeatur infirmus periculum mortis evasisse, & postea contingat, ut in idem periculum mortis incidat, iterum poterit inungi, quia secundum D. Thomam, est alius infirmitatis status..

## TITULUS XIII.

*De Sepulturis.*

## CAPUT I.

**C**orpora fidelium defunctorum ex domibus mortuariis per plateas aut locum sepulturæ non deferantur sine Sacerdote, & Custode ad minimum assistentibus.

## CAPUT II.

Taxa Exequiarum, quæ in oppidis constituta est, observetur, in pagis autem ea, quæ a Domino Rmo VENDULLIO pia mem. prædecessore nostro constituta fuit, & est talis: pro pauperibus non amplius pastores, quam 15. stuferos exigant, pro mediocribus 30: pro divitibus 3. florenos: pro opulentis autem & nobilibus 6. florenos. Custodes autem dimidium obrineant, Saccellani vero pro intimo gradu duos stuferos: pro reliquis vero proportionabiliter. Et ad evitandas in supradicta personarum qualitate omnes difficultates, declaramus censerī pauperes, qui nihil, aut domunculam possident: mediocres, qui domum, & ultra eam tria aut quatuor jugera: in hoc gradu comprehendimus fabros lignarios, ferrarios, molitores, & similes: divites, qui domum, equorum juga, octo, duodecim, aut quindecim terræ jugera possident, vel sunt notabiles coloni: opulentos, sive nobiles, qui fructus ex propriis agris distrahunt, & qui plura, quam quæ supra dicta sunt, pos-

sident, quique in redditibus annuis 200. florenos, & supra percipiunt.

## CAPUT III.

Et quia intelleximus, in diversis pagis Ecclesias parochiales mirum in modum gravari sumptibus campanarum, visum fuit expediens ordinare, prout ordinamus, ut deinceps juxta qualitatem personarum etiam pulsantur campanæ, observatis quatuor gradibus jam nominatis: hoc adjecto, ut pro qualitate mortui pro inferiori 15. grossi, pro secundo 30., pro tertio 60., & pro quarto gradu Ecclesiæ pro pulsu campanarum solvantur sex libellæ parisienses, remanente nihilominus in suo robore, consuetudine, si quæ sit, ut amplius Ecclesiæ pro hujusmodi onere a defunctis solvatur.

## CAPUT IV.

Inhibemus etiam, ne deinceps redditus Ecclesiæ pro novis campanis absque nostro Decreto onerentur, declarantes, irritum & inane, quidquid in contrarium cum præjudicio Ecclesiæ attentatum fuerit.

## TITULUS XIV.

*De Oblationibus.*

## CAPUT I.

**S**erventur, quæ de his in I. & II. *Cameracensibus Synodis* ordinata sunt.

## CAPUT II.

Quoad gazophylazia, sive truncos, ut vocant, oblationum, clavis una sit penes pastorem, alia penes ædituos, ut administratio eorum fiat communi manu, & non per solos laicos.

## TITULUS XV.

*De recta bonorum Ecclesiasticorum administratione.*

## CAPUT I.

**Q**uo citius revocari possint alienationes bonorum Ecclesiasticorum, antehac indebite factæ, Decani Christianitatis & Episcopus ipse in suis visitationibus de illis etiam diligenter inquirat.

## CAPUT II.

Ut saluberrimum Decretum *Synodi II. Provinc. Cap. 7.* hujus Tit. primo quoque tempore executioni manderetur, conficiant pastores & Sacellani, qui necdum fecerunt, & suo Decano Christianitatis tradant intra 4. menses a die hujus Synodi, inventarium omnium bonorum, pertinentium ad suum beneficium, sub pœna 20. florenorum: & Decani idem inventarium intra quintum mensem tradant Nobis, aut Vicario nostro Generali, ut cum aliis in registro describantur.

## CAPUT III.

Ne computus fabricarum, piorumque locorum, qui quotannis reddi debent, omittantur, vel in longum tempus differantur, Pastores Nobis denuntient, si Ecclesiarum æditui redditionem rationum distulerint ultra duos menses, ab eo die, quo reddi consueverunt, idem fiat de bonis pauperum.

## CAPUT IV.

Curent Pastores & Decani Christianitatis, ne æditui Ecclesiarum bibendo & comessando cum venditoribus candelarum cerearum, aliarumque rerum Divino cultui necessariarum, & cum conductoribus bonorum Ecclesiæ ad onus ejus sumptus faciant, neque in auditione computuum ullo rum sumptuum ratio habeatur, nisi fuerint valde moderati, & facti ex justa causa: & hac de re ædituos serio admoneant pastores & Decani Christianitatis.

## CAPUT V.

Ut autem piæ testatorum voluntates plene executioni mandentur, diligenter observentur, quæ hac de re in *II. Camerac. Synodo hoc Tit. Cap. 16.* ordinata sunt.

## CAPUT VI.

Parochi quoque nostri legatorum ad pias causas factorum diligentem curam habeant, sic ut ante finem anni piis testatorum voluntatibus hac in re fiat satis.

## CAPUT VII.

Verum ne hæc nostra Constitutio illusoria permaneat, si forsitan & præ-

dicti provisores, & piorum legatorum executores ante revolutum annum munus sibi injunctum non compleverint, Parochi suis respectivè Decanis rescribant, de quo Nobis suo tempore rationem reddere teneantur; alioquin tanquam nostri Statuti transgressores pœna arbitraria corrigantur.

## CAPUT VIII.

Et cum de legatis ad pias causas factis de jure cognoscere debeamus, multosque hoc tempore turbulento Ecclesiæ Dei minus favere intelligamus, ne hac ratione morientium bona defraudetur intentio, Parochi ad tam pium opus morituros adhortentur, & post mortem diligenter inquirant, si defunctus testamentum condiderit, piave legata reliquerit: quo casu hæc omnia Officiali nostro quotannis ante Festum Nativitatis Christi per dictos Parochos intimentur.

## CAPUT IX.

Receptores piarum foundationum advigilent, antequam, quæ fundatores ordinaverunt solvenda, persolvant, an completa fuerint tam in Missis, quam in eleemosynis, quæ defuncti ordinaverunt, quod si in illis defectus deprehendant, ad Nos, aut Vicarium nostrum Generalem, seu Officialem deferant.

## TITULUS XVI.

*De Clericis in genere.*

## CAPUT I.

**A**D declarationem *I. Cap. Synodi Provinc.* adjicimus, ne Clerici Sacris initiati, & maxime Sacerdotes decimas conducant, Pastoribus tamen permittentes, ut ipsi per se suam quotam, & Patroni colligere possint.

## CAPUT II.

Iisdem inhibemus, ne tabellionum munus exercent in negotiis profanis extra casus a Canonibus permittos, neque se se occupent procurandis negotiis profanis hominum laicorum, sive nobilium, sive aliorum; cum Clerici non debeant se negotiis secularibus immiscere, sed intendere lectioni, orationi & meditationi rerum Divinarum & Sanctis precibus.

CA-



## CAPUT III.

Clerici omnes in acquisitionibus & resignationibus beneficiorum magnam sinceritatem adhibeant; ne cum magno animæ suæ detrimento per Simoniam labem, vel aliquid Simoniae vicium, beneficium, vel aliud quid acquirant.

## CAPUT IV.

Lapsus carnis, notamque libidinis maxime scandalosam esse in iis, qui Sacris initiati sunt, cum certo certius sit, eoque magis, quod incestum spirituale, sacrilegiumque committant; idcirco omnibus Nobis subditis in virtute sanctæ obedientiæ mandamus, ne in domibus suis concubinas, aut alias mulieres suspectas ætate, aut moribus, retineant, alioquin contra delinquentes per irrogationem pœnæ a Concilio Trid. statuti sine ulla dissimulatione procedamus.

## CAPUT V.

Horum vero concubinæ, si semel monitæ, ab eorum conversatione non abstineant, præter excommunicationis sententiam, quam incurrunt, nostro territorio, brachio sæculari (si opus sit) invocato, expellantur.

## CAPUT VI.

Decanos, Promotoresque nostros, ut sedulo circa hæc advigilent, admonemus: alioquin, qui sic delinquentes Curia nostræ non detulerint, tanquam consentientes, vel saltem negligentes, arbitraria pœna punientur.

## CAPUT VII.

Quod supra de concubinariis statutum fuit, ad Clericos ebriosos, & crapulæ deditos extendimus: & Officiali nostro injungimus, ut contra eosdem pœnis, a Sacrosancto Concilio Trident. contra concubenarios constitutis, successive procedat. Et meminerint omnes, juxta antiquos Canones (quos II. Synod. Prov. innovavit) nullo prætextu Clericis licere, tabernas potitandi gratia ingredi, nisi peregre profiscantur.

## CAPUT VIII.

Cum Clerici, qui ad lectionem Canoniarum Horarum tenentur, earum lectionem sæpius omittendo gra-

*Tonius VIII. Concilior. German.*

vissime peccent, & pro rata temporis fructus suos non faciant, ideoque ad eorum restitutionem teneantur, sine qua non dimittitur peccatum: & tamen sint, qui cum summo animæ suæ periculo earum lectionem frequenter omittant in totum, vel ex parte; decernimus, ut Clerici beneficium Ecclesiasticum habentes, si sint suspecti, quod Horas Canonicas non legant, vel eorum lectionem frequenter omittant, citentur, ut fidem faciant, se legisse, vel saltem jurejurando se se expurgent: alioquin cogantur pro rata temporis restituere fructus perceptos secundum Constitutionem PII V.

## CAPUT IX.

Clerici, præsertim Sacris initiati, & maxime Sacerdotes, diligenter observent, quæ pulcherrime, utilissimeque de vita & honestate Clericorum constituta sunt in I. Synodo Provinciali Tit. de vita & honest. Clericorum, & quæ habet eadem Synodus Tit. de Cæremoniis & Officio Divino, quæ magna ex parte eo spectant.

## CAPUT X.

Decet Clericos vestium gravitate & honestate ab aliis semper distingui, quocirca Decretum Sacri Concil. Trid. Sess. XIV. Cap. 6. hic de verbo ad verbum inseruimus, & diligenter observari volumus: Et est tale:

" Quia vero, etsi habitus non fa-  
" cit Monachum, oportet tamen Cleri-  
" cos vestes proprio congruentes ordi-  
" ni semper deterre, ut per decentiam  
" habitus extrinseci morum honestatem  
" intrinsecam ostendant: tanta autem  
" hodie aliquorum inolevit temeritas,  
" Religionisque contemptus, ut pro-  
" priam dignitatem & honorem Cleri-  
" calem parvipendentes, vestes etiam  
" deferant publice laicales, pedes in  
" diversis ponentes, unum in Divinis,  
" alterum in carnalibus; propterea  
" omnes Ecclesiasticæ personæ, quan-  
" tumcunque exemptæ, quæ aut in  
" Sacris fuerint, aut dignitates, per-  
" sonatus, officia, aut beneficia qualia-  
" cunque Ecclesiastica obtinuerint, si  
" postquam ab Episcopo suo etiam per  
" edictum publicum moniti fuerint,  
" honestum habitum Clericalem, illo-

Q q q

rum

” rum ordini & dignitati congruentem,  
 ” & juxta ipsius Episcopi ordinationem  
 ” & mandatum non detulerint, per  
 ” suspensionem ab ordinibus, ac officio,  
 ” & beneficio, ac fructibus, redditibus,  
 ” & proventibus piorum beneficio-  
 ” rum, nec non si semel correpti de-  
 ” nuo in hoc deliquerint, etiam per pri-  
 ” vationem officiorum & beneficiorum  
 ” hujusmodi coercere possint & debé-  
 ” ant secundum *Constitutionem CLEMEN-*  
 ” *TIS V. in Concilio Viennensi editam, quæ*  
 ” incipit : *Quoniam innovando & ampli-*  
 ” *ando.*

## CAPUT XI.

Juxta dictam *Constitutionem* ordina-  
 mus, ut vestes ejus sint longitudinis,  
 ut ad talos usque diffundantur, quan-  
 quam interior poterit esse ad tibiæ me-  
 dium. Itineris vero causa licet sint bre-  
 viiores, omnino tamen sint infra ge-  
 nua.

## CAPUT XII.

Quoniam Ecclesiastica beneficia  
 magis instituta sunt, ut Ecclesiis de  
 idoneis Ministris, quam ut Ministris  
 de beneficiis provideatur; vehementer  
 Ecclesiasticum Ordinem pervertunt,  
 Divino honori plurimum detrahunt,  
 intercessoribus Ecclesiam minuunt, &  
 maximo scandalo vivis & defunctis fa-  
 ciunt injuriam, sibi que turpissimam  
 avaritiæ inurunt notam, quotquot me-  
 diocri bonorum Ecclesiasticorum por-  
 tione non contenti, officia vel benefi-  
 cia, pluribus personis destinata, soli  
 occupant.

## CAPUT XIII.

Quod malum ut ex hac Dicecesi au-  
 feratur, imprimis persuasum esse omni-  
 bus cupimus, hoc, quod multitudine  
 beneficiorum Ecclesiasticorum conse-  
 qui laborant, per eam obtineri non  
 posse: cupiditas enim habendi hac ra-  
 tione non satiatur, & impletur illa pro-  
 phetæ vox: *Respexistis ad amplius, & ecce*  
*factum est minus.*

## CAPUT XIV.

Cæterum, ut infirmas quorun-  
 dam voluntates Ecclesiæ autoritate  
 confirmemus, ordinamus (juxta *Sacri*  
*Concil. Trident. Constitutionem*) ne deinceps  
 aliquis, habens beneficium, quod ei

ad honestam sustentationem sufficiat,  
 ad aliud beneficium, etiam si simplex  
 sit, promoveatur, vel instituatur; nisi  
 jurejurando promiserit, se beneficium,  
 quod habet (antequam fructum ex  
 posteriori beneficio recipere possit)  
 resignaturum esse, & sine legitima  
 ac necessaria dispensatione a Nobis visa  
 (prout a *Concilio Trid. Sess. 7. Cap. 5. con-*  
*stitutum fuit*) nemo conscribatur.

## CAPUT XV.

Quando ob proventuum tenuita-  
 tem unum alicui beneficium sufficere  
 non potest ad honeste vivendum, lice-  
 bit aliud simplex eidem conferri; dum-  
 modo utrumque personalem residenti-  
 am non requirat, vel alterum alterius  
 ministerium aut officium non impediat,  
 nec sub eodem tecto fuerint.

## CAPUT XVI.

Non tamen in his quidquam agen-  
 dum est sine legitima declaratione ejus,  
 cui incumbit, de hujusmodi judicare:  
 manifestum enim est, si proprio uni-  
 uscujusque judicio standum sit, quod  
 frugali cujusque sustentationi satis est;  
 hoc parum videri cupiditati, & sub præ-  
 textu honestæ sustentationis, vel pru-  
 dentia, regi negotium timiditatis aut  
 cupiditatis. Et cum idem *Sacrum Con-*  
*cil. Trid. Cap. 12. Sess. 24.* Ordinem Eccle-  
 siasticum perverti confirmet, quando  
 unus plurium Clericorum officia occu-  
 pat, quisque sine legitima autoritate  
 aliter faceret, magnæ improbitatis, at-  
 que adeo impietatis notam contrahe-  
 ret, aliisque liberius peccandi causam  
 daret.

## TITULUS XVII.

*De Episcopis.*

## CAPUT I.

Quæ de Episcopis Oecumenica *Syno-*  
*odus Trid.* pro Ecclesiæ collapsæ re-  
 formatione salubriter statuit & or-  
 dinavit, similiter quæ hoc *Tit. in Synod.*  
*Cambrac.* decreta sunt, hic repetenda &  
 renovanda non duximus.

TITU.

## TITULUS XVIII.

## De Capitulis &amp; Canonicis.

## CAPUT I.

**Q**uæ hic per *Concil. Cameracense* ordinata sunt, diligenter observentur.

## CAPUT II.

Quia autem in beneficiorum provisione seu collatione, nisi diligens cautio adhibeatur, Simoniaca labes contrahi facile solet in maximum animarum periculum, & Divini Cultus detrimentum, ideo adhibendum est studium, ut omnia rite ex Sacrorum Canonum præscripto, & Summorum Pontificum Constitutionibus fiant, expédianturque. Cum igitur de aliquo simplici, etiam de Jure Patronatus Ecclesiastico beneficio quomodolibet facienda erit provisio, vel præsentatio, collatio aut nominatio admittenda: ordinamus patronis (inhærendo *Sacro Concil. Trident. Sess. 24. Cap. 14.*) ne quisquam, quicumque ille sit, ab eo, qui præsentationem concedit, vel ab alio, ejus nomine quidquam accipiat. Pro literis autem & sigillis, ac registratione, cæterisque eodem spectantibus, qui id oneris habent, & instrumenta examinare, registra conficere & conservare debent, ratione illius sumptus, & pro qualitate laboris, quem subeunt, stipendium moderatum pro consuetudine accipere possint, sed quod in communibus & mediocribus negotiis non excedat summam 20. vel 30. Itulerorum, nunquam vero ne in maximis quidem accipere possint ultra coronatum. Quod si ab aliquo præsentationem petente plus exigatur, ad Nos recursum habeat, nec prius amplius solvat.

## CAPUT III.

Quæ de residentia Canonorum & aliorum Beneficiatorum in *Concil. Trident.* salubriter statuta fuerunt *Sess. 24. Cap. 12.*, ad executionem deducantur.

## TITULUS XIX.

## De Pastoribus, Decanis &amp; Custodibus.

## CAPUT I.

**S**i qui Pastores nondum habent Sacra Biblia, primo quoque tempore

*Tomus VIII. Concilior. German.*

illa sibi comparent, neque enim Sacerdos, & præsertim pastor, illo cœlesti thesauro carere potest. Habeant & Catechismum Romanum, & Summam doctrinæ Christianæ *Petri Canisii*, & ejusdem parvum Catechismum, vel Catechismum Ecclesiæ Parmensis, ad institutionem & examen puerorum & adolescentum.

## CAPUT II.

Juramentum, quod quisque Parochus post institutionem vel collationem sibi factam præstare tenebitur, in manibus nostris, vel Vicarii nostri Generalis, vel a Nobis deputandi, formula hac observetur:

" Ego N. accepturus institutionem & possessionem Parochialis Ecclesiæ N., juro & promitto obedientiam, reverentiam & honorem Sedi Apostolicæ Romanæ, ac Episcopo Tornacenti, & ejus Successoribus. Juro & promitto fideliter dictæ Ecclesiæ deservire secundum oneris illi annexi exigentiam: non alienabo, aut distraham, vel in Emphyteusim concedam Ecclesiæ meæ bona, & quæ alienata aut distracta cognovero, quantum in me erit, fideliter recuperare studebo: fructus anni, in quo me mori, aut meam Ecclesiam dimittere contingeret, subjicio & obligo ad laudabilem deservituram usque ad festum Nativitatis S. Joannis, mortem meam, aut dimissionem proximæ securum. Sic me Deus adjuvet, & omnes Sancti ejus.

## CAPUT III.

Interim dictos Parochos studiose monemus, ne magis temporalium bonorum aucupium, quam salutis animarum sibi commissarum studium amplecti videantur, ut de fide suorum, si omnes articulos Fidei, Dominicam & Angelicam orationes, Dei & Ecclesiæ mandata probe teneant, sedulo inquirent. In quibus si aliquos ignorantes repererint, vel eos instruant, vel instrui saltem curent.

## CAPUT IV.

Moneant Pastores populum diligenter, ut frequenter ad suas Parochias, saltem diebus Dominicis & majoribus

Q q q 2

Festis



Festis accedant; & unumquemque teneri Parochiæ suæ interesse, ubi id commodè fieri potest, ad audiendum Verbum Dei juxta *Concil. Trid. Sess. 22. de observandis & evitandis in Sacrif. Missæ, & Sess. 24. Cap. 4.*

## CAPUT V.

Observent quoque diligenter, qui ad suas Parochias habitationis causa, aut alias commigrent, & ab iis literas testimoniales ultimi ipsorum Pastoris super vita & moribus illorum requirant, quas si exhibere aut negligant, aut contemnant, Curia nostræ insinuent, ut eas exhibere compellantur.

## CAPUT VI.

Cæterum, ut Prædicatoribus peregrinis & ignotis, ac quibusvis mendicantibus, qui singulis annis ad prædicandum per Nos admitti solent, omnis divagandi tollatur occasio; non liceat cuiquam etiam quomodolibet exempto, in Ecclesiis Nobis subditis Verbum Dei annuntiare, nisi per literas de consensu nostro Parochis ipsis fidem faciant: & si id non præstiterint, per Parochos rejiciantur.

## CAPUT VII.

Quæstores autem ad prædicationis officium per Parochos non admittantur: quia tamen Indulgentiarum usus fidelibus est maxime salutaris, & Sacrorum Conciliorum autoritate probatus, in nostra Dicecesi cum *Concilii Trid. moderatione* per Ecclesiarum Rectores retineatur, sed nullæ indulgentiæ, nisi visis literis nostris, publicentur.

## CAPUT VIII.

Presbyteri autem extranei, per quos (proh dolor) diversa hætenus in Ecclesia Dei orta sunt scandala, ad Missæ Sacrificium peragendum, aut ullius Sacramenti administrationem subeundam, nisi literas nostras Decanis primo præsentandas obtinuerint, sub poena duarum librarum grossorum per Parochos solvendarum non admittantur.

## CAPUT IX.

Transeuntes vero per viam Sacerdotes celebrare petentes, servata super hoc Sacri *Concil. Trid.* Sanctione per Parochos nostros admitti possunt.

## CAPUT X.

Ad satisfaciendum Decreto *S. Concilii Trid. Sess. 24. Cap. 18.* pro examine Pastorum nominamus infra scriptos: Dnum ac Magistrum *Laurentium Malcot, S. Theol. Licent.*, Ecclesiæ nostræ Cathedralis Decanum, Vicarium nostrum Generalem: *D. Magistrum Michaelem Navum, J. U. Licent.*, *Archid. Torn.*: *D. ac Magistrum Joannem Lescaillet, S. Theol. Licent.*, *Archidiat. Flandriæ*: *D. ac Magistrum Petrum Courouble, J. U. Licentiatum*: *D. ac Magistrum Dionysium de Villers, Decretorum Doctorem & Ecclesiæ nostræ Tornac. Cancellarium*: *D. ac Magistrum Nicolaum Joes, J. U. Licent.*, *Officiale nostrum*: *D. ac Mag. Petrum Coretum, S. Theol. Licentiatum*, & *D. ac Mag. Joannem Boucher, S. Theol. Doctorem*, respective *Canonicos Ecclesiæ nostræ Tornac.*

## CAPUT XI.

Quemadmodum Examinatores ab Episcopo nominati & deputati, tenentur sub juramento quacunque humana affectione postposita, fideliter munus suum exercere, ita in beneficiis Juris Patronatus Ecclesiastici, ubi institutio ad Nos pertinet, Patronus, quem digniorem inter probatos ab Examinatoribus judicabit, Nobis præsentare tenetur, ut instituatur.

## CAPUT XII.

Quoad Custodes diligenter observentur, quæ *Cap. 8. II. Synodi Camerac.* super eo ordinata sunt.

## CAPUT XIII.

Et cum ad bene promovendum honorem Dei in aliqua Parochia, utque cultus Divinus bene & reverenter peragatur, & juvenus bene instituatur, necessarium sit, ut inter Pastorem & Custodem Ecclesiæ bene conveniat, statuimus, ut deinceps illius, ad quos pertinet electio Custodum, eam faciant de Pastoris consilio.

## CAPUT XIV.

Cum de jure communi nemo debeat admitti ad officium Custodis, qui bigamus sit, nulli deinceps admittantur tales: quod si bigami fuerunt admissi, aut electi a tempore postremi *Concilii Provinc. Camer. anno 1586.* publicati, eorum

rum

rum admissionem & electionem nullam & irritam declaramus, Custodem etiam institui tabernam, hospitiumque renentem, aut officium aliquod laicale vel mechanicum exercentem ab eis, qui jus institutionis habent, inhibemus, sed is demum instituatur, qui Clericus sit, & actu habitum Clericalem gerat.

## CAPUT XV.

Et cum Custodibus, præsertim in pagis Scholarum regimen committi solet, nullus instituatur, qui sufficientis non sit ætatis, & ad minimum annorum octodecim, quo Fidei articulos, & Dominicam orationem, septem Psalmos, & hujusmodi docere valeat.

## CAPUT XVI.

Sed & eundem debite institutum, hujusmodi officium exercere non volumus, priusquam in nostris, vel Vicariorum, aut saltem Decanorum nostrorum manibus ad illud fideliter exercendum, & de sua administratione Officiali nostro respondendum, quoties opus fuerit, juramentum præstiterit.

## CAPUT XVII.

Cæterum, quia totius Ecclesiæ ornamenta ejus fidei & custodiæ committuntur, & se totum quodammodo in Parochianorum gratiam negotiis Ecclesiæ mancipare debet, rationis est, ut & condignis salariis muneretur. Quare Ecclesiarum Æditui, cæterique Parochiani de honesto stipendio eidem quotannis provideant.

## CAPUT XVIII.

Hortamur eos, ad quos spectat electio Custodis, ut eligant (etiam aucto stipendio Custodis) Sacerdotes, ubi fieri potest: qua ratione fiet, ut habeatur commoditas habendi Sacrum diebus Dominicis & Festis pro ancillis & famulis, eruntque ii magis idonei ad instituendam juventutem.

## CAPUT XIX.

Quæ de officio Decanorum Christianitatis Cap. 12. *hujus Tit. & sequentibus*, salubriter ordinata sunt in *Conc. Cameracensi*, bene observentur.

## CAPUT XX.

Capitula Pastorum celebrentur bis quotannis in omnibus Decanatibus hujus Diocesis, primum quidem paulo ante Quinquagesimam, alterum vero paulo post Festum S. Remigii.

## CAPUT XXI.

In his autem convocationibus ante omnia palam & intelligibili voce per unum ex Parochis, quem Decanus nominaverit, nostra Statuta, Synodalesque Constitutiones legantur: & si quos abusus contra has commissos deprehenderit Decanus, suos Parochos, recepto a singulis juramento, dictos abusus scripto fideliter tradere compellet, quos postmodum cum sufficienti instructione ad Curiam nostram corrigendos referat.

## CAPUT XXII.

Ad Decanorum etiam officium pertinet, omnium beneficiorum sui Decanatus bona & onera cognoscere, & si hujusmodi beneficia debitis non defraudentur obsequiis, perquirere; ne videlicet bona hujusmodi per alienationes, locationes, similesque contractus, aut Rectorum negligentiam depereant.

## CAPUT XXIII.

Decani domos & ædificia ad Ecclesiam pertinentia diligenter visitent, & per arrestum etiam bonorum reparari procurent, alioquin ob admissam negligentiam, nisi tempestive ad officarios nostros in hujusmodi reparationibus defectuosos detulerint, ædificia per Decanos eorum expensis reparentur.

## TITULUS XX.

*De Regularibus.*

## CAPUT I.

**Q**uod in *II. Cap. Synodi Prov.* Prælati concessum legitur, ut suis subditis Confessarios deputare possint, ad Abbatissas, & alias Sanctimonialium præfectas trahendum non esse, declaramus.

## CAPUT II.

Omnes Religiosi & Religiosæ votum paupertatis, tanquam ineffabilis

Q q q 3

&amp;

& dulcissimæ quietis causam custodiant, neque proprietatis vitio violent. Caveant igitur, ne quid pecuniæ, si-  
ve labore, si-ve industria, si-ve amico-  
rum liberalitate, seu quavis alia occa-  
sione acquisita fuerit, penes se detine-  
ant; sed statim Superiori tradant, ita  
ut ad nutum ejus tanquam res commu-  
nis expendatur. Sciant autem Supe-  
riores juxta *Decretum S. Conc. Trid. Sess. 25. Cap. 2. de Regularibus*, sibi non licere, alicui  
Religioso, aut, Religiosæ, peculium  
permittere, & administrationem bono-  
rum Monasteriorum ad solos officiari-  
os ad nutum ipsorum amovibiles per-  
tinere. Vestes, libros, & similia, scien-  
te & consentiente Superiore, retinere  
poterunt, non tanquam sua, sed tan-  
quam res communis, ac proinde iis  
non utantur ad res peculiares, sine Su-  
perioris consensu & eorum usus ita per-  
mittatur, ut statui paupertatis, quam  
professi sunt, conveniat, nihilque su-  
perflui in iis sit.

## CAPUT III.

Prohibemus Abbatibus, ne pati-  
antur alicui portionem vini anticipari,  
aut eam, quæ in Refectorio propinari so-  
let, pecunia redimi, vel extra Refecto-  
rium bibendam servari.

## CAPUT IV.

Cum plurimum momenti positum  
sit in recta institutione & reformatio-  
ne Novitiorum, præcipimus, ut Su-  
periores Monasteriorum magnum de-  
lectum agant in præficiendo bono Ma-  
gistro Novitiorum, eumque præficient,  
qui sit pius, gravis & maturus, qui-  
que exemplo & verbo eos bene insti-  
tutus videatur in mortificatione, sui-  
que abnegatione, humilitate & chari-  
tate Dei & proximi, quod etiam obser-  
vent in suo genere Præfectæ Sancti-  
monialium.

## CAPUT V.

Et quia homines discoli, vani, &  
non timentes Deum, suis sermonibus  
& colloquiis multum nocent Religio-  
sis, mandamus Abbatibus & Prioribus,  
ne sine delectu patiantur quoslibet in-  
visere Religiosos: multo magis idem  
servent Præfectæ Religiosarum, in re-  
liquis servantur, quæ in *I. & II. Camerae. Synodo* de his ordinata sunt.

## TITULUS XXI.

## De Scholis.

## CAPUT I.

Sufficiunt, quæ de his in *Concil. Came-  
rac. II.* ordinata sunt.

## TITULUS XXII.

De Foro, Jurisdictione & Immu-  
nitate Ecclesiastica.

## CAPUT I.

**A**D Ecclesiasticam libertatem in to-  
tum vindicandam, spectat pro-  
videre, ne in Ecclesiis, Cæmeteriis,  
aut locis sacris merces venales exponan-  
tur, & ne Domini temporales suis  
Edictis subditos iisdem locis congregent.

## CAPUT II.

Nefas etiam est, confugientes ad  
ædem Sacram, tanquam asylum, a Ju-  
dice laico violenter extrahi.

## CAPUT III.

Quod si quadam animi impotentia  
hujus gratiæ beneficio indignos se red-  
diderint; Officialis noster de causa  
prius certior fiat, quam a quoquam  
avellantur.

## CAPUT IV.

Personas quoque Ecclesiasticas apud  
alium, quam Judicem suum Ecclesia-  
sticum, pro quacunque causa & Edicto  
conveniri non posse, explorati juris est:  
Quo fit, ut sub pœnis & censuris legi-  
timis omnibus inhibeamus, ne Clericos  
nostros alibi, quam coram Nobis con-  
veniant, neque se conveniri permit-  
tant: Judicesque sæculares monemus,  
ne in hoc ulla ratione consentiant; alio-  
quin, tanquam libertatis Ecclesiasticæ  
effractores, sciant se excommunicatio-  
nis sententiam incursumos.

## CAPUT V.

Cæterum cum bona, præsertim  
mobilia, personam sequantur, eodem-  
que jure ac privilegio merito gaude-  
ant; præfatos Judices (nisi nostra au-  
thoritate) Ecclesiæ, vel Nobis subdi-  
torum bona, quemadmodum nec per-  
sonas ipsas capere, arrestare, detine-  
re, vel deponeri facere non posse, certi  
juris est.

CA-



## CAPUT VI.

Quod si aliquos nostræ Diœcesis Clericos, vel etiam extraneos in flagranti delicto apprehensos detineri contigerit, per Parochum Decano intinuetur, ut cum de captivi Clericatu sufficienter constiterit, eundem pro meritis puniendum, ad Curiam nostram remitti, Judicem ipsum nostra auctoritate requirat.

## CAPUT VII.

Verum, ne quis hoc privilegio abutatur, *S. Synodus Tridentina* recte statuit, ne deinceps quis eo gaudeat, nisi beneficiatus is fuerit, aut in Scholis, aut alias de Ordinarii licentia, quasi in via ad majores Ordines suscipiendos versetur, vel saltem Ecclesiæ ministerio deputatus, habitu & tonsura utatur Clericali.

## CAPUT VIII.

Quæ *Cap. 16. hujus Tit. in II. Synodo Camerac.* ordinata sunt, exacte observentur.

## CAPUT IX.

Ut juris est, illegitimos, absque dispensatione, ad Sacros Ordines pertingere non posse, sic Sacris initiati, de bonis suis, præsertim mobilibus, sine speciali nostra licentia in scriptis obtenta, testamento disponere non possunt.

## CAPUT X.

Legitimos vero Clericos, in Sacris Ordinibus constitutos, de bonis suis testari posse, eorumque testamenta valere, si modo in Notarii, aut alterius personæ publicæ, duorumque testium præsentia confecta reperiantur, hac nostra Constitutione declaramus: quamvis ea quoque testamenta, quæ propria testatoris signatura legitime notantur, ultimæ voluntatis favore non improbemus.

## CAPUT XI.

Nullæ tamen horum voluntates ultimæ vim & robur testamenti obtineant, nisi quæ per patentes Officialis nostri literas approbatæ sint & roboratæ.

## CAPUT XII.

Nec Executorum testamentariorum fidei, vel aliorum per Officialem

nostrum eorum loco surrogandorum, testatoris bona prius committantur, quam ipsi in Decani præsentia de prædictis bonis inventarium fecerint, atque de debita eorum administratione secundum testatoris voluntatem, & infra annum a die obitus de rationibus reddendis, vocatis pro suo interesse vocandis requisitum juramentum præstiterint.

## CAPUT XIII.

Quæ sane corroboratio, si non intervernerit, bona defuncti, tanquam si intestatus decesserit ab ipso Decano, sub pœnis juris, & 30. librarum Paris. in inventarium redigantur & arrestentur, donec Officialis noster, vel Decanum, vel alios hujusmodi ad voluntatem ultimam executioni demandandam nominaverit: qui debite suæ administrationis in fine anni rationem reddere teneantur.

## CAPUT XIV.

Præterea si quis Sacerdotum Nobis subditorum testamentum non condiderit, vel alias de suis bonis non disposuerit; secundum antiquam nostræ Diœcesis consuetudinem, ære alieno deducto, omnia mobilia tanquam ab intestato Nobis competant.

## CAPUT XV.

Quod si parentes, vel quosvis propinquos in suum convictum receperint, inventario factò, bona per ipsos illata in præsentia testium describantur; ne forte cum Ecclesiasticis bonis eorum bona commisceantur, & pars alterutra rerum suarum jacturam faciat: alioquin omnia bona, in domo mortuaria reperta, defuncti esse non immerito præsumuntur.

## CAPUT XVI.

Prudenter Sacrosanctum Concilium *Trid. Sess. 24. Cap. 4.* statuit, sobrie & magna circumspectione exercendum esse excommunicationis gladium, nervum alioquin disciplinæ Ecclesiasticæ, & ad continendos in officio populos valde salutarem: cum experientia doceat, si temere, aut levibus ex rebus incutiat, magis contemni, quam formidari, & perniciem potius parere, quam

quam salutem. Quocirca, quia multorum querimoniis didicimus, multos ex subditis nostris facile, & inscio Officiali nostro, Promotore, vel Procuratoribus reportantibus suis literis, & petentibus in contumaciam non comparentium ulteriores, excommunicationis vinculo astringi, & postea contra eos ulterius non procedi, non sine magno periculo tam eorum, qui excommunicatione feriuntur, quam qui cum eis conversantur, indeque nasci censurarum contemptum, præsertim cum fere excommunicationes ferantur in contumaces, quia vocati in iudicium non veniunt: Re mature deliberata, ordinamus, ut *eiusdem Sacri Concilii forma servata*, quandocunque executio realis, vel personalis in qualibet parte iudicii propria auctoritate fieri poterit, abstinetur, tam in procedendo, quam in definiendo a censuris Ecclesiasticis. Quodsi executio realis, vel personalis adversus reos hac ratione fieri non potuerit, & de contumacia constiterit; tunc præviis monitionibus, hætenus fieri consuetis, earum executione reportata, Officialis noster in scriptis, & pro tribunali sedens, pro arbitrio suo præter alias penas sententiam excommunicationis ferat: quæ sententia sic lata, non tantum per affixionem copię ad valvas Ecclesiæ, sed & a Pastoribus octo diebus post, secundum formam & tenorem literarum publicabitur.

## CAPUT XVII.

Cupientes autem saluti animarum, Nobis committarum, more pii Patris, & boni Pastoris providere, omnes & singulos utriusque sexus personas nostræ Diocesis, sententiis interdicti & excommunicationis quoquo modo, nostra, vel Curię nostræ auctoritate innotatas, hortamur, ut se Nobis, vel Officiali nostro, infra quadrimestre a die publicationis Synodi, pro absolutione præsentent, de gratia speciali indulgentes, ut sine præiudicio illorum, quorum interest, sine punitione, & ulterioribus expensis pro hac vice absolutionem obtineant. Mandamus autem omnibus & singulis Pastoribus nostræ Diocesis, ut huiusmodi gratiam in Ecclesiis Parochialibus, & aliis, ubi

opus fuerit, quamprimum, & repetitis vicibus, publice notificent.

## CAPUT XVIII.

Et quia post sententiam suspensionis a Divinis, debite licet executam, suspensi non curant a Sigillifero obtinere absolutionem: sed duntaxat se ex registro deleri; declaramus, eos posthac non absolutos, nisi debitam a Sigillifero absolutionem obtineant.

## CAPUT XIX.

Quoniam ob maliciosam petentium suggestionem, & quandoque ob locorum longinquitatem noticia personarum, quibus causæ auctoritate Apostolica mandantur, haberi non potest: hincque interdum Iudicibus non undequaque idoneis, causæ in partibus delegantur, statuit *S. Trid. Synodus Sess. 25. Cap. 10.*, aliquot personas aptas & idoneas nominari, quibus causæ Ecclesiæ, & ad forum Ecclesiasticum pertinentes in partibus delegandæ committantur, in quem finem nominamus Venerabilem Virum ac Dominum *Magistrum Laurentium Malcot, S. Theol. Licentiatum*, Ecclesiæ nostræ Cathedralis Decanum, Vicar. nostrum Generalem: *D. Michaelem Naveum, J. U. Licent.*, Canonicum & Archidiaconum Tornacensem: *D. Carolum Lademre, J. U. Licent.*, Canonicum & Thesaurarium Tornac.: *D. Petrum Courouble, J. U. Licent.*, Canonic. Torn.: *D. Nicolaum Joes, J. U. Licent.*, Canonic. & Officialem Tornac.: *RR. DD. Jacobum de Marquis*, Abbatem S. Martini: & *Simonem Chevalier*, Abbatem S. Nicolai in Civitate Tornacensi.

## TITULUS XXIII.

*De Usuris.*

## CAPUT I.

**Q**uoniam non obstante excommunicatione contra manifestos usurarios lata, illi a populo non vitantur, atque adeo non tantum a plebeis, verum etiam a ditioribus & honoratioribus ad convivia invitantur, & ad familiaritatem admittuntur, tanquam nulla labe aspersi, non sine magna Dei offensione, & censurarum Ecclesiasticarum

rum contemptu; Præcipimus omnibus Pastoribus, & illis præsertim, in quorum Parochiis hujusmodi homines tolerantur, ut privatim & publice Dominicis diebus ante 4. præcipuas anni festivitates, nempe Paschæ, Nativitatis Domini, Pentecostes, & omnium Sanctorum, suos Parochianos moneant, ne extra necessitatis causam cum publicis usurariis (quos lombardos vocant) colloquantur, aut converſentur: eisque declarent, illos, qui aliter faciunt, Deum graviter offendere, & in excommunicationem minorem incidere, ideoque a Sacramentorum participatione arcendos esse.

## CAPUT II.

Et cum intelligamus, dictos usurarios manifestos, & alios etiam excommunicatos, sese interdum ingerere Divinis Officiis, districte veramus ipsis, & omnibus excommunicatis, ne deinceps Divinis Officiis intersint, antequam impetraverint absolutionem. Qui contra fecerint, graviter puniantur poena pecuniaria, arbitrio nostro, vel Officialis nostri taxanda.

## TITULUS XXIV.

*De Synodali Congregatione.*

## CAPUT I.

**C**UM *Concilium Trident. Sess. 24. Cap. 2. & 3.* insequendo Canones Apostolorum, & varia scripta œcumenica, quotannis Synodos Diœcesanas celebrari mandaverit; DEO juvante, Synodum nostram quotannis celebrare decrevimus. Quo circa feria III. post Dominicam, qua in Ecclesia in initio Missæ *Misericordia Domini* cantari solet, quæ est II. post Pascha (quo die ex antiqua hujus Diœcesis consuetudine Synodi fieri consueverunt) singulis annis Synodum Diœcesanam celebrandam esse ordinamus, indicimus, & publicamus. Et RR. ac Venerabiles Viros Dominos, Decanum, & Capitulum Ecclesiæ nostræ Cathedralis Tornacensis, Abbates, Abbatillas, Præpositos, Priores, Collegiatarum Ecclesiarum Capitula,

Decanos Christianitatis, Ecclesiarum Parochialium Rectores, atque in universum omnes & singulos, tam exemptos, quam non exemptos, qui ad Synodum Diœcesanam Tornacensem de jure, consuetudine, aut ex Sacri *Concil. Trident.* dispositione venire tenentur, ex nunc, prout ex tunc requirimus & monemus: ut absque alia convocatione, aut monitione, personaliter pridie illius diei adsint, non obstantibus quibuscunque gratiis, hætenus concessis, quas revocamus.

## CAPUT II.

Quod si aliqui legitimo impedimento detenti, comparere non valeant, Procuratorem id ipsum præstare permittimus, ut quidquid S. Synodus statuerit, suscipere possint, & de Canonico impedimento in eorum animam (si opus sit) jurent.

## CAPUT III.

Præterea comparentes ad Synodum, ad honesta se recipiant hospitia, sumptus moderatos faciant, honeste incedant, nec eis absque nostris licentia & consensu recedere liberum sit.

## CAPUT IV.

Decanis autem nostris injungimus, ut cum alba & stola, Parochis vero cum superpellicio jejuni & rasi Synodum intrent, usque ad finem permansuri atque audituri, quidquid in ea stabilietur & constituetur.

*Lecta & publicata fuerunt hæc Decreta de mandato Reverendissimi Domini in Ecclesia Cathedrali per me Adrianum Canis J. U. Licentiatum, Reverendissimi Domini præfati Secretarium & Notarium publicum. Anno Domini Millesimo sexcentesimo, Mensis Maji die decimo nono.*

Scriptum erat

A. CANIS Secret.

*Prædictæ Publicationi Ego Joannes de Male. Juratus Scriba Curie Tornacensis, & Notarius publicus similiter interfui.*





**A P P E N D I X**  
**SYNODORUM PRÆTERMISSARUM**  
**SÆCULI XVI.**

**SYNODUS LEODIENSIS (\*)**  
**Anno Christi MDLXXXV. Sixti V. PP. I.**  
**Rudolphi II. Imp. IX.**

SUB ERNESTO (\*\*) DUCE BAV. ARCHIEPISCOPO COLONIENSI,  
 EPISCOPO LEODIENSI, FRISINGENSI ET HILDESIENSI.

**PRÆSIDENTE**

JOANNE FRANCISCO BONHOMIO, (\*\*\*) EPISCOPO ET COMITE  
 VERCCELLENSI, NUNTIOQUE APOSTOLICO, CUM POTESTATE  
 LEGATI DE LATERE.

**SYNODUS LEODIENSIS,**  
*Servata Anno MDLXXXV. III. Octobris, & subsequentibus tribus*  
*continuis diebus, in Capitulo Majori.*

**LITERÆ GREGORII XIII. PAPÆ**  
*ad Revmum JOANN. FRANCISC. Episc. Vercellensem,*  
*Nuntium Apostolicum.*

**FACULTATES NUNCII**

GREGORIUS EPISCOPUS, SERVUS SERVORUM DEI, VENERABILI FRA-  
 TRI JOANNI FRANCISCO, Episcopo Vercellensi, ad Germaniæ partes, quæ  
 presentibus exprimuntur, Nostro & Apostolicæ Sedis Nuncio, Salutem  
 & Apostolicam Benedictionem.

**R**omanum decet Pontificem suos ad remota  
 procul Nuncios Privilegiis Apostolicis,  
 quantum fert temporis & locorum ratio, cu-  
 mulate prosequi, ut & ipsi illis suffulti possint  
 in functione muneris sui benignitatem hujus  
 Sanctæ Sedis erga ejus fideles & devotos, cum  
 venerit usus, liberaliter impertiri. cum igitur  
 Te ob fidem, doctrinam, industriam, &  
 alias præclaras animi tui dotes, nostrum, &  
 Apostolicæ Sedis Nuntium, ad Coloniensem,  
 Moguntinensem, Trevirensensem, Basileensem,  
 Argentinensem, Spirensem, Vormatiensem,  
 Mona-

(\*) Synodi hujus mentio facta Tomo VII. præcedente pag. 996. Nunc ejusdem acta, nunquam hætenus edita, exhibeo, prout illa descripta ex autographo Archæi Reverendissimi & Illmi Capituli Ecclesiæ Cathedralis Leodiensis, ex singulari ejusdem Revmi Capituli gratia ac benevolentia accepi. In dicto autem autographo varia hinc inde longo situ, atque ipsa antiquitate adeo corrupta & exesa fuere reperta; ut quacunq; virorum eruditorum diligentia adhibita legi non potuerint: quæ suis locis per interpunctiones notata, Lectorum judicio supplenda relinquo.

(\*\*) De Serenissimo Ernesto, Duce Bavariæ, vide, quæ paulo infra in præmonitione ante Synodum Coloniensem anni 1598. habimus.

(\*\*\*) De Illmo Joan. Franc. Bonhomio vide Tomo præcedente pag. 995.

*Monasteriensem, Osnaburgensem, Paderbor-  
nensem, Leodiensem, Luxemburgensem, cæ-  
terasque inferioris Germaniæ ac Belgarum, &  
Duci Clivienfi & Juliacensi, subjectas Pro-  
vincias, Ducatus, Civitates, & loca omnia,  
cum potestate Legati de Latere, destinaveri-  
mus, qui mandatis, consiliisque nostris instru-  
ctus, Sanctæ Romanæ Ecclesiæ, & nostra, or-  
thodoxæque Fidei negotia, ad totius Rei-  
publicæ Christianæ salutem pro viribus exequare.  
Sed ut harum quoque Provinciarum, ac per-  
sonarum, & locorum eorundem saluti & sta-  
tui opera tua consulatur, hoc tuum munus  
specialibus facultatibus prosequendum censui-  
mus, ut Tu illis suffultus juxta datam Tibi  
a Domino sapientiam, . . . . . utaris mo-  
derate & prudenter cum ad DEI gloriam,  
populorum solamen & ædificationem, ipsiusque  
Sedis . . . . . videris expedire, itaque ut  
Tu personis Provinciarum, terrarum, & lo-  
corum prædictorum opportune consulere, Teque  
. . . . . utilem & benignum exhibere pos-  
sis, non . . . . . Concilii Tridentini De-  
cretis Fraternitati tuæ Legatione tua hujus-  
modi durante, & intra illius fines, atque  
erga ejus personas & loca ibi existentia dum-  
taxat, per Te ipsum, vel alium, seu alios viros  
probos & idoneos Patriarchales, Primitiales,  
Metropolitanas, & alias Cathedralis ac Col-  
legiatas & Parochiales Ecclesias, nec non Mo-  
nasteria tam virorum, quam mulierum, Pri-  
oratus, Præposituras, Præpositatus, & loca  
secularia, & quorumvis Ordinum & mendi-  
cantium Regularia, nec non Hospitalia & ex-  
empta, dièæque Sedi immediate subiecta, vel  
quocunque alio privilegio suffulta, eorumque  
Capitula, Conventus, Universitates, Collegia  
& personas, tam seculares, quam Regulares,  
etiam, ut præfertur, exemptas & subiectas,  
quoties Tibi videbitur, auctoritate Apostolica  
visitandi, ac in illorum statum, formam, re-  
gulas, instituta, regimen, Statuta, consue-  
tudines, vitam, ritus, mores & disciplinam  
tam conjunctim, quam divisim, ac tam in Ca-  
pite, quam in membris diligenter inquirendi,  
nec non Evangelicæ & Apostolicæ doctrinæ,  
Sacrorumque Canonum & Generalium Conci-  
liorum Decretis, ac Sanctorum Patrum tra-  
ditionibus atque institutis inhaerendo, & pro-  
ut occasio, rerumque qualitas exegerit, qua-  
cumque, mutatione, correctione, emendatione,  
revocatione, renovatione, ac etiam ex integro  
editione indigere cognoveris, reformandi, mu-  
tandi, corrigendi, ac etiam de novo condendi,  
condita Sacris Canonibus non repugnantia,*

*Tonius VIII. Concilior. German.*

*confirmandi, abusus quoscunque tollendi, Re-  
gulas, institutiones, observationes, & Eccle-  
siasticam disciplinam, ubicunque illa excide-  
rint, modis congruis restituendi & reintegran-  
di, præfati Concilii Tridentini Decreta, ubi  
nondum introducta sunt, proponendi & custo-  
diri præcipiendi, ipsasque personas, tam sæ-  
culares, quam Regulares, & exemptas ad de-  
bitum, honestumque vitæ modum revocandi,  
& quicquid inde statueris & ordinaveris, per-  
petuo observari faciendi, contra inobedientes,  
& etiam contra falsarios, usurarios, raptores,  
incendarios, & alios criminosos & delinquentes  
quoscunque, & exemptos, eorumque fautores  
& receptatores, cujuscunque dignitatis, or-  
dinis vel conditionis fuerint, per viam accu-  
sationis vel denunciationis, aut ex officio sim-  
pliciter, & de plano, ac sine strepitu & figura  
judicii inquirendi, & procedendi; reusque,  
prout Canonice requirunt Sanctiones, & alias  
Tibi videbitur expedire, puniendi, nec non  
horum criminum & matrimoniales, & quas-  
cunque alias Ecclesiasticas propbanas, non ta-  
men Beneficiales causas, Civiles, Criminales,  
& mixtas, ad forum Ecclesiasticum quomodo-  
libet pertinentes, sine præjudicio Ordinari-  
um, quoad causas hujusmodi in prima in-  
stantia coram eis, juxta præfati Concilii Tri-  
dentini Decretum, cognoscendas, tam per viam  
simplicis querelæ, quam etiam quarumcum-  
que appellationum, a quibuscunque Judicibus  
ordinariis, & etiam a Sede præfata delega-  
tis, interpositarum, & dicta Legatione du-  
rante, interponendarum, motas, & inchoa-  
tas, ac interim movendas cum earum inci-  
dentibus, dependentibus, emergentibus, an-  
nexis & connexis, etiam summarie, simplici-  
ter, & de plano, ac sine strepitu & figura ju-  
dicii, sola veritate inspecta, ac terminis sub-  
stantialibus unico contextu vel etiam non ser-  
vatis, sed illorum loco præfixo termino, ar-  
bitrio tuo procedendi, audiendi, & sine debito  
terminandi. Et ad hunc cæterorumque con-  
tingentium effectum quoscunque etiam per  
Edictum publicum, constituto prius etiam sum-  
marie & extrajudicialiter de non tuto accessu  
citandi & monendi, eisque, ac etiam quibusvis  
Judicibus, cæterisque personis, quibus & quo-  
ties opus fuerit, etiam per simile Edictum,  
ac etiam sub censuris & penis Ecclesiasticis,  
nec non pecuniariis, Tuo, vel delegatorum tuo-  
rum arbitrio, moderandis & applicandis inhi-  
bendi, ac contra inobedientes & rebelles quos-  
libet censuras & penas ipsas, etiam iteratis,  
vicibus, aggravandi, interdictum Ecclesiasti-*

*R r r 2*

*cum*

cum apponendi & relaxandi, auxiliumque bra-  
ebii secularis invocandi, seu causas ipsas alii,  
vel aliis idoneis, modo & forma præmissis,  
ac cum defimili vel limitata potestate pariter  
audiendas, & terminandi, delegandi. Quas-  
cumque personas adversus sententias, res judi-  
catas, & contractus quoscunque, prout juris  
fuerit, in integrum restituendi, Juramenta  
quæcumque ad effectum agendi dumtaxat qui-  
buslibet relaxandi, quoscunque a quibusvis  
censuris & pænis simpliciter vel ad cautelam,  
prout juris fuerit, absolvendi, præterea quos-  
cumque ad Te recurrentes, qui homicidium  
etiam voluntarium, sacrilegium, Symoniam,  
& perjurii reatum, quomodocumque commi-  
serint, aut in apostasiam incurverint, si tamen  
apostasie ad ovile redierint, qui bellis inter-  
fuerint, qui manus violentas in Clericos &  
Presbyteros, non tamen Episcopos injecerint,  
qui ad Ordines etiam Sacros per saltum, aut  
furtive, vel alias minus rite promoti fuerint,  
& qui ratione Beneficiorum Ecclesiasticorum,  
etiam Curatorum, per eos obtentorum, Horas  
non dixerint, & intra tempus a jure statutum,  
vel foundationum, aut alias requisitum, se ad  
Sacerdotium promoveri non fecerint, etiamsi  
post ipsum lapsum tempus Beneficia hujusmodi  
retinuerint, fructus tamen Ecclesiasticos inde-  
bite non perceperint, & præterea eos, qui  
adulterium, incestum, fornicationem, aut aliud  
quodcumque flagitium carnis perpetraverint,  
nec non usurarius, raptores, incendiarios, &  
aliorum quorumcumque criminum, ad forum  
Ecclesiasticum quomodolibet pertinentium, reos,  
si hoc a Te humiliter petiverint, ab Excom-  
municationis, aliisque sententiis, censuris &  
pænis Ecclesiasticis & temporalibus, quas  
propterea quomodolibet incurverint, injuncta  
inde pro culpæ modo penitentia salutari, &  
aliis, quæ de jure fuerint indulgenda, & vo-  
luntariis hujusmodi homicidis, si Presbyteri,  
aut alias in Sacris Ordinibus constituti sint,  
ab Altaris ministerio & Sacrorum Ordinum  
fuerint executione perpetuo suspensi, ita ut  
promoti in susceptis non ministrent, nec ad  
superiores Ordines hujusmodi ascendant, etiam  
in utroque foro absolventes, ac cum supradictis  
& prorsus cum quibusvis aliis Clericis &  
personis Ecclesiasticis secularibus & Regulari-  
bus, super quacumque irregularitate per eos,  
non tamen occasione homicidii voluntarii, hæ-  
resis, læsæ Majestatis, vel Bigamie contracta,  
etiamsi ipsi, censuris hujusmodi ligati, Missas,  
& alia Divina Officia, non tamen in contemp-  
tum clavium, celebraverint, vel alias Divinis

se se immiscuerint, ita quod nondam promoti  
omnes etiam Sacros & Presbyteratus Ordines  
suscipere, & tam ipsi, quam alii in susceptis,  
etiam in Altaris ministerio ministrare, ac  
quæcumque Beneficia Ecclesiastica cum cura,  
& sine cura recipere, & illa ac etiam ab eis  
alias Canonice obtenta, ex quibus tamen fru-  
ctus indebite non perceperint, & dummodo  
plura simul non sint, quam quæ a dicto Con-  
cilio permittuntur, retinere, libere & licite  
valeant dispensandi, ac quibusvis in ætate le-  
gitima constitutis, & alias idoneis Sacerdotali  
militiæ adscribi volentibus, qui competenter  
Beneficiati & arctati fuerint, ut ad omnes  
etiam Sacros & Presbyteratus Ordines a suo  
in unitate Fidei, & dictæ Sedis obedientia per-  
sistente; Alioquin, a quocumque alio malue-  
rint, Catholico Antistite gratiam & communio-  
nem dictæ Sedis habente, extra Romanam Cu-  
riam & in propria Diœcesi residente, tribus  
Dominicis, vel aliis Festis diebus, etiam conti-  
nuis, extra tempora a jure statuta, ac etiam  
quibusvis aliis, juxta Canonicas Sanctiones  
qualificatis, earum Civitatum & Diœcesis, in  
quibus similes Antistites non fuerint, ut pariter  
a quocumque alio voluerint Catholico Antistite  
Clericali charactere insigniri, & ad omnes  
etiam Sacros & Presbyteratus Ordines promo-  
tos promoveri, & in illis sic promoti etiam in  
Altaris ministerio ministrare possint, licentiam  
tribuendi, Et cum patientibus defectum na-  
taliū, si consideratis diligenter circumstan-  
tiis universis, quæ circa idoneitatem personarum  
fuerint attendenda, si paternæ non fuerint  
incontinentiæ imitatores, sed bona conversatio-  
nis & vitæ, & alias eis merita suffragentur,  
ad dispensationis gratiam obtinendam, ac  
cum corpore vitiatis, dummodo in his tanta  
non sit deformitas, quæ scandalum generet in  
populo, vel vitium tale non sit, quod in Sacris  
agendi præstet impedimentum, ut pariter ad  
omnes etiam Sacros & Presbyteratus Ordines  
promoveri, ac cum graduatis, quorum cen-  
tum, cum aliis vero, quorum quinquaginta  
Ducatorum auri de Ca. Se. Com. extra valo-  
rem annuum fructus, redditus & proventus  
non excedant, quæcumque Beneficia Ecclesia-  
stica cum cura, & sine cura, etiam si Parochia-  
les Ecclesiæ, vel earum perpetuæ Vicariæ, aut  
Canonicatus & Præbendæ, dignitates, Per-  
sonatus, administrationes vel officia in Cathe-  
dralibus & Metropolitanis, & dignitates ipsæ  
non tamen quoad defectum natalium patientes  
post Pontificales majores, vel Collegiatis Eccle-  
siis hujusmodi principales fuerint, si sibi alias

Cano-



Canonice conferantur aut eligantur, præsententur vel assumantur ad illa, & instituantur in eis recipere, & dummodo plura simul non sint, retinere. Et super impedimento publicæ honestatis iustitia, ubi solum Sponsalia intercesserint, ut Matrimonium inter se contrahere, & in facie Ecclesiæ solemnizare, ac postquam contractum, in eo remanere, ac pariter cum illis, qui huiusmodi impedimento non obstante, illud alias tamen rite jam contraxerint, & carnali copula consummaverint, & prolem exinde susceperint, ipsos ab incestus reatu & excommunicationis sententia, aliisque censuris Ecclesiasticis absolvendo, ut Matrimonium de novo inter se contrahere, & ut perfertur, solemnizare, ac pariter in eo remanere, libere & licite valeant, dispensandi, prolemque exinde Inceptam & suscipiendam legitimam decernendi atque nunciandi, ad hæc quæcumque Beneficia Ecclesiastica cum cura, & sine cura, secularia, ac quorumvis Ordinum Regularia intra limites Tuæ Legationis consistant, etiam si secularia Vicaria, aut Capellania perpetua, vel Officia in Cathedralibus & Metropolitanis, vel Collegiatis Ecclesiis, aut Parochialibus Ecclesiæ, vel earum perpetua Vicaria, regularia vero Beneficia huiusmodi, Prioratus, Præpositura, Præpositus, Dignitates, Personatus, administrationes vel officia, etiam claustralia fuerint, & ad Dignitates, Prioratus, Personatus, Præposituras, administrationes & officia huiusmodi consueverint, qui per Electionem assumi, eisque cura imminet animarum; dummodo secularia Canonici & Præbende, seu Dignitates aut Personatus in Metropolitanis, aut aliis Cathedralibus seu Collegiatis Ecclesiis, Regularia vero Beneficia huiusmodi Monasteria aut dignitates Conventuales non sint, ac nulla Beneficia præfata dispositioni Apostolicæ aliter, quam ratione vacationis illorum in mensibus, in quibus vacantium Beneficiorum Ecclesiasticorum dispositio Nobis, & Apostolicæ Sedi reservata existit, vel pro tempore erit reservata aut affecta existant, per obitum illorum possessorum, aut aliis quibuscumque modis, & ex quoruncumque personis, & extra Romanam Curiam, & intra limites Tuæ Legationis vacantia & vacatura, personis idoneis juxta dicti Concilii, & alias Canonicas Sanctiones qualificatis, ac servata in Parochialibus Ecclesiis dicti Concilii Tridentini forma conferendi, & de illis etiam providendi, ac quibusvis personis Ecclesiasticis Beneficia Ecclesiastica, secularia, vel Regularia in titulum, vel commendam obtinentibus, ac conditionem illorum meliorem efficere volentibus, ut Bona

immobilia Beneficiorum suorum in Emphyteusim, non tamen perpetuam, nec ultra tres generationes sub annuo canone sive censu, non tamen quinque Ducatos excedente, in evidentem ipsorum Beneficiorum utilitatem, alienare vel permutare possint, licentiam concedendi, vel alienationes & permutationes usque ad dictam summam dumtaxat jam factas confirmandi, etiam cum juris & facti defectuum suppletionem, ita tamen, quod concessio, seu confirmatio, ac totius negotii huiusmodi cognitio non minus, quam duobus delegatis conjunctim processuris, & forma Constitutionis fel. record. PAULI PP. II. super rebus Ecclesiæ alienandis, in quinterno Cancellariæ Apostolicæ designatæ, servata committatur, præterea quascumque monitorias, penalesque literas in forma significavit consueta, contra occultos & ignotos malefactores detenta, restituere, & scientes revelare differentes, servata forma præfati Concilii Tridentini, nec non Constitutionis piæ mem. PII PP. VI. Prædecessoris nostri, super hoc editæ, & in Cancellaria præfata publicatæ concedendi, nec non officium Tabellionatus & Notariatus quibuscumque personis idoneis, receptis prius ab eis Professione fidei, juxta formam a Sede prædicta propositam, & juramento in forma solita concedendi, eosque Notarios & Tabelliones constituendi, Item omnibus utriusque sexus Christi Fidelibus ad pia & salutaria opera exercenda, centum aut plures dies citra annum, nec non vere penitentibus & confessis, qui quascumque Regulares & seculares Ecclesias seu Capellas, in una, vel duabus anni Festivitatibus, dumtaxat a primis Vesperis usque ad secundas Vesperas & occasum Solis cujusque diei Festi visitaverint, & pro unione Principum, ac Fidei Catholice propagatione preces Altissimo effuderint, quo die Festo id fecerint, septem annos & septem quadragenas, aut infra de injunctis eis penitentibus, seu quæ merito injungi deberent, misericorditer in Domino relaxandi, ita ut relaxatio huiusmodi semel tantum pro una Ecclesia vel Capella fiat, & si pro duobus Festis diebus concedatur triennium, pro uno vero Festo concessa quinquennium tantummodo debeat perdurare, nec non vota quæcumque ultra marina visitationis liminum BB. Petri & Pauli Apostolorum de urbe, S. Jacobi in Compostella, castitatis & Religionis votis dumtaxat exceptis, in alia pietatis opera commutandi, ac quibuscumque utriusque sexus personis Ecclesiasticis & secularibus, quas ad loca Ecclesiastico interdicto auctoritate Apostolica supposita declinare contigerit, ut in eis januis clausis

non pulsatis campanis, excommunicatis & interdictis personis exclusis, in sua, domestico-rumque & familiarum suorum presentia, dummodo ipsi causam non deferant interdicto, nec contingat eis specialiter interdicti, celebrare & celebrari facere licite possint, facultatem concedendi, ac quibuscumque utriusque sexus personis, non tamen Regularibus, Sepulchrum Dominicum visitare volentibus, ut ad illud, & alia loca pia ultramarina absque alicujus censuræ aut pænæ incurso accedere possint, dummodo aliqua prohibita non deferant, ac senibus & aliis valetudinariis, ut quadragesimalibus, & aliis prohibitis temporibus & diebus ovis, butyro, caseo, & aliis lacticiis, ac etiam carnibus de utriusque Medici consilio, ac secreto & sine scandalolo, uti & vesci libere & licite vellant, concedendi: denique omnibus & quibuscumque personis Ecclesiasticis & Presbyteris, ut de bonis & rebus Ecclesiasticis, juxta formam in quincerno Cancellariæ Apostolicæ annotatam testari, & disponere libere & licite possint, facultatem concedendi, & ut concessionibus gratiæ, & literæ per Te vigore presentium concedendæ, sublati obstaculis suum sortiantur effectum, quascumque personas ad effectum duntaxat omnium & singulorum præmissorum consequendum ab omnibus, & quibuscumque excommunicationis, suspensionis & interdicti, aliisque Ecclesiasticis sententiis, censuris & pænis, in jure, vel ab homine quavis occasione, vel causa latis, si quibus quomodolibet inmodati fuerint, dummodo in eis per annum non infurderint, absolvendi, & absolutos fore censendi, vicesque tuas in præmissis in toto, vel in parte committendi, Judices, Assistentes, Commissarios, & Exequutores pro prædictorum & literarum tuarum executione & observatione delegandi, mandata, prohibitiones & monitoria, etiam sub censuris, & aliis pænis prædictis, cæterisque benevisis remediis, & etiam appellatione postposita, decernendi, & omnia quaecumque alia in præmissis, & circa ea necessaria, & quomodolibet opportuna faciendi, decernendi & exequendi, & per alium, seu alios, auctoritate Apostolica, tenore presentium plenam & liberam licentiam, facultatem, & auctoritatem concedimus: decernentes, Te omnibus facultatibus & concessionibus prædictis, etiam cum derogationibus, suspensionibus, indultis, irritantibus, aliisque Decretis & clausulis necessariis & opportunis, ac in Literis Apostolicis concedi, & extendi solitis in quibuscumque partibus Tuæ Legationis præfata libere & li-

cite, non autem aliis etiam prætextu tituli Legati de Latere uti posse, ac in concessionibus, gratiis, dispositionibus per Te auctoritate præsentium tuarumque Legationis faciendis soli narrativæ tuæ, ac etiam solis concessionibus & Literis tuis absque alia presentium insertionem, seu exhibitionem aut Notarii, testiumve adhibitionem stare, nec ad id alterius probationis adminiculum requiri, sique per quoscumque Judices ordinarios & delegatos, etiam Causarum Pallatii Apostolici Auditores, ac Sanctæ Romanæ Ecclesiæ Cardinales, in quavis causa & instantia, sublata eis & eorum cuilibet quavis aliter judicandi & interpretandi facultate & auctoritate ubique judicari & definiri debere, irritumque & inane, si secus super his a quocumque, quavis auctoritate, scienter vel ignoranter contigerit attentari, non obstantibus Literis recolendæ memoriæ SIXTI PP. IV.: quibus inter alia cavetur expresse, quod Nuncii dictæ Sedis, etiam cum potestate Legati de Latere, tam quoad Beneficia conferenda, quam dispositiones, & alias gratias concedendas, facultatibus uti non possint, nec quavis clausula in Literis facultatum hujusmodi appositæ adversus dictas Literas cuiquam suffragentur, nec non defectibus, & aliis præfatis, & quorumcumque Conciliorum Universalium, Provincialium, & Synodaliū, nec non præ mem. BONIFACII PP. VIII., etiam Prædecessoris nostri, de una, & in Concilio Generali edita de duabus dietis, aliisque Apostolicis Constitutionibus, nec non Cancellariæ prædictæ regulis nullis prorsus exceptis, & quæ sigillatim in quaque re extendendi & exprimi possint, Statutis quoque & consuetudinibus Ecclesiarum, Monasteriorum, Universitatum, Collegiorum, Civitatum & locorum hujusmodi, nec non Ordinum quorumcumque Juramento, Confirmatione Apostolica, vel quavis firmitate alia roboratis, etiam si de illis servandis & non impetrandis Literis Apostolicis contra ea, & illis etiam ab alio vel aliis impetratis, seu alias quovis modo concessis, non utendo personæ persistierint eadentes vel imposterum perflare contigerit Juramentum, & alius Privilegiis & Indultis Apostolicis generalibus vel specialibus quorumcumque, etiam Cisterciensium & Cluniacensium Ordinum, quæ præmissis quovis modo obviare videantur, per quæ presentibus non expressa, vel omnino non inserta effectus impediri valeant quomodolibet vel differri, & de quibus quorumque totis tenoribus ad verbum habenda sit in nostris, Tuisque Literis mentio specialis, quæ quoad hoc nullatenus cuique vo-

leniam.

lunus suffragari quibusque omnibus, cæterisque contrariis quibuscumque, ubi & quando expediet secundum rei & casus exigentiam in genere vel in specie, ac tam conjunctim, quam divisim, prout Tibi placuerit, valde derogare, ac super iis indulgere, atque aliqui super provisionibus sibi faciendis de hujusmodi, vel aliis Beneficiis Ecclesiasticis in illis partibus generales vel speciales dictæ Sedis, vel Legatorum ejus Literas impetrarint, etiam si per eas ad inhibitionem, reservationem & decretum, vel alias quomodolibet sit processum, quibus omnibus personas, in quarum favorem per Te de Beneficiis præfatis providebitur, aut alias disponitur, in eorum assentione volumus anteferri, sed nullum per hoc eis quoad assentionem Beneficiorum aliud præjudicium generari, seu si eorum Ordinarius & Collatoribus, vel quibusvis aliis communiter vel divisim ab eadem sit Sede indultum, quod ad receptionem vel provisionem alicujus minime teneantur, & ad id compelli, aut quid interdici, suspendi vel excommunicari non possint, quodque de hujusmodi vel aliis Beneficiis Ecclesiasticis ad eorum collationem, provisionem, præsentationem, electionem, seu quamvis aliam dispositionem, conjunctim vel separatim spectantibus, nulli valeat provideri per Literas Apostolicas, non facientes plenam & expressam & ad verbum de indulto hujusmodi mentionem. Volumus autem, ut præsentium transumptis, etiam impressis, manu Tua, aut Regentis Cancellariæ tuæ, ac Sigillo tuo obsignatis, eadem illa prorsus fides in Judicio, & extra illud ubique locorum adhibeatur, quæ adhiberetur eisdem præsentibus, si essent exhibitæ vel ostensæ. Datæ Romæ apud Sanctum Petrum, Anno Incarnationis Dominicæ Millesimo, quingentesimo, octingentesimo quarto, quarto decimo Kal. Februarii, Pontificatus nostri anno Tertio decimo, signatum ut sequitur M. Prodat, deinde sic Jo. Baptista Canobius, & A. de Alexes, evanque præsentis Literæ more Romanæ Curie sub plumbo expedita. In dorso erat signat. Rta apud Jo. Baptistam Secretarium. Signatum Lamb. Doupey, publicus Sacris Apostolica & Imperiali auctoritatibus, nec non Insignis Capituli Cathedralis Ecclesiæ, ac Curie Spirituales Leodiensis Notarius juratus, per Copiam concordantem cum originalibus Literis, sub plumbo more Rom. Cur. expeditis.

## SIXTUS PAPA V.

VENERABILIS FRATER, SALUTEM  
& Apostolicam Benedictionem.

UT animarum salutem & populorum, qui sub Tua sunt Legatione, commodo consulere uberius valeas, Fraternitati Tuæ, ut in istis partibus, in quibus Nuncii nostri munus geris, quibuscumque personis Ecclesiasticis, quæ fructus Ecclesiasticos quomodolibet indebite perceperint, eosdem fructus omnes, sive eorum partem, arbitrio tuo remittere & condonare, seu alicui fabricæ, vel Hospitali, aut pio operi applicare: ac etiam, quia redditus Ecclesiastici, ob diuturnum in istis Regionibus bellum, valde fuerunt imminuti, plura Beneficia incompatibilia obtinentibus, ut illa insimul pro eorum congrua sustentatione, ad tempus Tibi benevisum, & alias, prout temporum, locorum, & personarum qualitate pensata noveris expedire: & pariter illegitimis, cum quibus Tibi facultas jam est tradita ad Beneficia Ecclesiastica, quæ plura non sunt, dispensandi etiam plura, quæ habuerunt, non tamen incompatibilia, ad eorum sustentationem retinendi licentiam concedere, nec non super impedimentis quarti & tertii ac quarti consanguinitatis, seu affinitatis graduum cum personis, quæ scienter, vel ignoranter Matrimonium contraxerint, & etiam carnali copula consummaverint, iis prius ab excommunicationis sententia, & incestus reatu salutari penitentia injuncta, absolutis, ut in Matrimonio sic contracto renuancere libere & licite valeant, dummodo mulieres propterea captæ non fuerint, dispensare, prolemque susceptam & suscipiendam exinde legitimam decernere, ac quascumque uniones de Beneficiis Ecclesiasticis juxta jus commune & Concilii Tridentini Decreta facere, præterea quosvis hæreticos & schismaticos, si ad eorum reversionem, errores suos recognoverint, & ad Ecclesiæ gremium admitti humiliter petierint, per Te, seu quoscumque Sacerdotes idoneos, seculares, vel cujusvis Ordinis Regulares, arbitrio tuo deputandos, in foro conscientie dumtaxat, injuncta eis penitentia salutari, absolvere libere & licite valeas, auctoritate Apostolica tenore præsentium facultatem tribuimus, non obstantibus præmissis, ac Constitutionibus & Ordinationibus Apostolicis, Statutisque & consuetudinibus, cæterisque contrariis quibuscumque. Datum Romæ apud Sanctum Petrum sub annulo Piscatoris, die XII. Octobris M. D. LXXXV., Pontificatus nostri anno



anno *Primo*. Sic subscriptum : *Joannes Baptista Canobius*. A tergo : *Venerabili Fratri Joanni Francisco, Episcopo Vercellensi, nostro & Apostolica Sedis ad partes Germaniæ Nuncio.*

VENERABILI FRATRI ERNESTO,  
EPISCOPO LEODIENSI,  
GREGORIUS PP. XIII.

VENERABILIS FRATER, SALUTEM  
& Apostolicam Benedictionem.

**T**amet si nemini dubium esse potest, quin Sacri Concilii Tridentini Decreta omnem vim habeant, etiam in iis Diocesibus, in quibus non fuerunt hactenus publicata, neque probabilis sit ulla omnino cujusque ignorationis excusatio; tamen volumus his literis monere Fraternitatem Tuam, & mandare, ut ex Concilio ipsius præcepto, cui multo ante satisfactum esse oportuit, quamprimum licebit, habeas Synodum Diocesanam, inque ea tum ipse, tum ceteri, quos convenire oportuerit, omnia & singula, quæ in Sancto illo Concilio sunt decreta & constituta, palam recipiatis, veramque obedientiam Romano Pontifici spondeatis, præstaturosque Vos profiteamini, hæreses omnes, Sacrorum Canonum, Tridentinique Concilii, cæterorumque Oecumenicorum Conciliorum Decretis damnatas, publice detestemini, anathematizetisque: neque ulla dissimulatione patiatur Fraternitas Tua, hæc ipsa Decreta a quoquam violari aut depravari, operamque des, ut ab omnibus quam diligentissime fidelissimeque servantur, impedimenta quoque omnia amoveas, recusantesque omnes & contumaces, Tua, ut debes, auctoritate comprimas. Non dubitamus Fraternitatem Tuam nostris monitis a summa nostri muneris necessitate, & Dei gloriæ zelo profectis, quam libentissime obtemperaturam esse. Datum Romæ apud Sanctum Petrum sub annulo Piscatoris, die secunda Junii M. D. LXXXII., Pontificatus nostri anno Vicesimo. Sic signatum: Ant. Buccapadulius, eratque expeditum sub annulo Piscatoris more Romanæ Curia. Signatum Doupey, Notarius per Cop.

ERNESTUS, ELECTUS ET  
CONFIRMATUS ARCHIEPISCOPUS  
Coloniensis, S. R. I. per Italiam Archiepiscopi  
Cellarius & Princeps Elector, Electus & Con-  
firmatus Episcopus Leodiensis, Postulatus Mo-  
nasteriensis, Administrator Hildesheimensis,  
Frisingensis & Stabulensis, Comes Palatinus  
Rheni, Dux utriusque Baviaræ, West-  
phaliæ, Angariæ & Bullonii, Mar-  
chion Franchimontis, Comes  
Loffensis &c.

**R**everendi, Generosi, Spectabiles, sincere  
Dilecti, significavit Nobis Illmus & Rmus  
D. Episcopus Vercellensis, Nuncius Apostoli-  
cus, se a Serenissimo Principe Parmensi in Ci-  
vitatem nostram Leodicensem reversum aliquam-  
diu ibi moraturum, ut pro muneris sui fun-  
ctione reformationem Ecclesiasticam ibi insti-  
tuit, atque imprimis ut ad sancientiam & pro-  
mulgandam in Diocesi nostra Leodiensi Sacri  
Oecumenici Concilii Tridentini observationem,  
Synodum Diocesanam sub beneplacito nostro  
ibidem promoveat, de quo ei respondimus,  
Nos ad ipsius simul & vestram deliberationem  
atque resolutionem Nos referre, id quod vobis  
etiam his nostris Literis indicare volumus,  
vos hortantes & requirentes, ut cum ipso Do-  
mino Nuncio in hanc deliberationem venientes,  
ea per Dei gratiam fundere & concludere stu-  
dentis, quibus Divinae ipsius Majestatis gloria,  
& Ecclesiæ salus atque honestas in Diocesi nostra  
Leodiensi augeantur. Cum qua fiducia omnia  
vobis Reverendi, Generosi, Spectabiles, sincere  
Dilecti, salutaria & prospera a DEO Omni-  
potente toto animo precamur. Datum in Op-  
pido nostro Bonnensi, XXIX. Junii 1585:  
Signatum ERNESTUS.

IV. Julii anno 1585.

**R**everendissimus & Illustrissimus D. Epi-  
scopus Vercellensis, Sanctissimi Do-  
mini nostri Nuncius, ad has partes & alias  
Provincias missus, vocato per cum Clero  
primario ac secundario, intraneo & extra-  
neo, ad Monasterium Sancti Jacobi Leodii  
hora nona de mane, atque ejusdem Cleri  
Deputatis, Decanis, Abbatibus & Prælatibus  
inibi comparentibus in aula superiori ex-  
posuit magna oratione primo, benevolen-  
tiam & promptum animum, quem Sua San-  
ctitas erga hanc Ecclesiam Leodicensem, quæ  
semper Romanæ Ecclesiæ unica Filia fuit,  
gerit, deinde causas suæ Missionis & Lega-  
tionis, & hanc præcipuam, quod Sua Sancti-  
tas desideret & velit, ut Decreta Sacri Con-  
cilii

in Tridentini, in multis Provinciis, eas repetendo, publicata & recepta, ita quoque ea hic in Diocesi Leodiensi publicentur & recipiantur, & ob id, juxta Suae Sanctitatis mandatum, constituisse in fine mensis Septembris proxime futuri, vel principio Octobris sequentis Synodum servare pro publicatione hujusmodi facienda, & Reformatione aliqua pro DEI cultus & Status Ecclesiastici honore statuenda, addiditque, se audivisse, Clerum præfatum conqueri super eo, quod fructus & proventus unius tantum Beneficii, ut sustinendo decenti Canonorum gradui non sufficiant, habita ratione qualitatum earundem personarum, ac attentis præsentibus tumultuosis temporibus, rerumque, quo ad hoc dixit, se firmiter credere, Suam Sanctitatem desuper informari, ita tum provisuram de aliquo remedio, ita quod de eo non erit locus querelæ. Ulterius declaravit, dictam Suam Sanctitatem Jubilæum concessisse ad implorandum sibi a Deo lumen & auxilium pro bono Catholicæ Ecclesiæ regimine, Bullam desuper expeditam exhibens. Et his dictis, atque finita oratione, impertitaque per dictum Nuncium Benedictione, R. d. D. Sigitt, Suae Celsitudinis Vicarius, in pedes surgens, summas totius Cleri nomine Suae Sanctitati, & deinde ipsi Dno Nuncio egit gratias de labore impenso, & quantum ad ea, quæ placuisset ipsi Dno Nuncio exponere, Dnos Prælatos ea omnia ad sua Capitula relatuuros, & sperare ipsum Dnum Nuncium benignum & favorabilem rursus accepturum, & sic idem Dnus Nuncius prædictos Dnos Prælatos apud se in prandio manere iussit.

#### V. Julii anno 1585.

**L**ECTIS coram RR. DD. meis Literis, per Suam Celsitudinem ad Capitulum datis, quibus significat, R. m. & Illmum D. Episcopum Vercellensem, Nuncium Apostolicum cupere pro muneris sui functione Reformationem Ecclesiasticam in Civitate Leodiensi instituere, atque in primis ad faciendam & promulgandam in Diocesi Leodiensi Sacri Oecumenici Concilii Tridentini observationem; *Synodum Diocesanam* sub beneplacito Suae Celsitudinis in Civitate promoveri, eandemque Suam Celsitudinem respondisse, ad illius simulque & Dominorum deliberationem atque resolutionem se referre, auditaque relatione Domini Scholastici super iis, quæ per Nuncium præfatum hesterno die apud Sanctum Jacobum Clero primario atque secundario, intraneo & extraneo, seu eorundem Deputatis, atque Abbatibus & Prælatibus, inibi præsentibus, exposita fuere, primo affectum & benevolentiam, quam Sua Sanctitas, simulque & ipse

*Tomus VIII. Concilior. German.*

Nuncius erga hanc Ecclesiam gerit, deinde Suam Sanctitatem cupere & velle, Canones & Decreta Sacrosancti Oecumenici & Generalis Concilii Tridentini in Civitate & Diocesi Leodiensi publicari, & ob hoc circa mensem Septembris proxime futuri Synodum pro publicatione fienda servari, deinde eundem Nuncium Jubilæum Ssmi Dni nostri Papæ moderni ad implorandum eidem Ssmo, a Deo lumen & auxilium, pro bono Catholicæ Ecclesiæ Regimine exhibuisse, rogans Dominos, ut hujusmodi Jubilæum sequi vellent; R. d. D. omnes auditis, deputaverunt Dnos Sigilliterum, Cancellarium, Præpositum S. Martini Gaverum, Officialem Leodiensem Goem, Scholasticum Carondelet, & D. Vice-Decanum D. Anthonium Ghennart, ad super præmissis cum Deputatis Cleri secundarii intranei & extranei communicandum & dispiciendum, quid conveniat & referendum.

Ad hæc decreverunt significandum secundariarum Ecclesiarum Decanis & Capitulis, atque Conventuum & Monasteriorum Civitatis Leodiensis Abbatibus & Prælatibus, Capitulum primarium decrevisse, proxima die Dominica Jubilæum publicare, atque hebdomada sequenti, diebus videlicet feria quarta post Missæ celebrationem, Processionem ad Sanctos Dionysium, Paulum & Joannem, atque secunda feria sexta deposit. Vener. ad Ecclesias Ss. Crucis & Martini, & demum die Sabbati ad S. Petrum & Bartholomæum devote celebrare, eosdem propterea monere, & ad Ecclesiam Leodiensem comparere, & Processionibus interesse dignentur, & velint ad implorandum sibi Summo ac moderno Pontifici a DEO lumen & auxilium pro bono Catholicæ Ecclesiæ regimine.

Significatum ut supra emissis Schedulis per Claustrarium Vandermissen.

#### VI. Julii anno 1585.

**I**N Congregatione Dominorum Deputatorum Capituli quo ad propositionem Rmi & Illmi Domini Joannis Francisci, Episcopi Vercellensis, Legati Apostolici novissime factam, post multas ac diversas adductas rationes super publicatione Concilii Tridentini hic in Civitate Leodiensi & Diocesi fienda vel non fienda, simulque de die, qua esset observanda Synodus, visum est, quod ad ipsam Synodum servandam posse dies constitui in initio Octobris proxime futuri, ac in medio ejusdem.

Et interim quoad publicationem Concilii Tridentini cum Deputatis Cleri secundarii communicandum, singulaque Capita, quæ viderentur publicationem præstare

S s s

posse

posse præjudicium adferre Jurisdictioni spiritali Leodiensi, & etiam toti Clero, colligenda, ut singulis bono ordine redactis possit desuper cum Domino Legato conferri.

Rdus Dnus Decanus Leodiensis insequendo ordinationem Rmi Domini nostri Episcopi Leodiensis de approbatis Confessoribus, ad tres hebdomadarios nostros Vicarios, adjungit, D. & M. *Joannem Huveners, Petrum Vandermissen, Petrum Levitskyk, Antonium Tilon, & P. Oems*, quibus concedit facultatem excipiendarum Confessionum Rdorum Dominorum Canonicorum suorum Confratrum, Beneficiatorum & Officiatorum Ecclesiæ omnes & singulos adhortans, ut studeant se tanti doni plenariæ nimirum omnium suorum peccatorum Indulgentiæ facere participes, ea sedulo præstando, quæ pro ipsis consequendis S. Sanctitas in suis Literis requirit: si quis forte cujuscumque alterius Ecclesiæ Sacerdotis operam hac in re uti maluerit, illi petita licentia non gravatim concedetur, dummodo probum & minime scandalosum deligat. *Datum anno Domini XV. octuagesimo quinto, mensis Julii die duodecima.*

*NOTA.* Servatæ fuerunt Processiones per Clerum primarium & secundarium, atque Abbates & Conventuales Monasteriorum intraneorum & extraneorum: videlicet *Laurentii, Egidii & Sancti Leonardi*, & hoc successivis vicibus, videlicet *Feria quarta ad S. Dionysium, Joannem & Paulum, Feria sexta ad S. Crucem & Martinum, Sabbato ad S. Petrum & Bartholomæum*, adfuitque in omnibus Processionibus & quibuscumque Ecclesiis supradictus Legatus, & Collectas decantavit, præsentem populo in magna congregatione, & magna cum devotione. Quibus factis, die *Dominico* sequenti idem Nuncius, Missam in Ecclesia Leodiensi in Pontificalibus celebravit, & finito Evangelio, Concionem latino sermone, sedens in Pontificalibus ante Altare majus, Clero primario & multis Civibus in magna copia ibi congregatis, fecit, & in ea declaravit, quam vim & efficaciam Jubilæum concessum habeat, & demum finita Missa, multis Officiariis Ecclesiæ, & aliis Civibus, Sacrosanctam Eucharistiam ministravit, valde devote.

*Die vigesima quarta mensis Julii anno 1585.* Rmus Dnus Nuncius procuravit affigi valvis Mandatum, per quod significat, se servaturum Synodum tertia die mensis Octobris proxime futuri, citando ob hoc omnes Prælatos, Diocesis Leod., ut ad hanc diem adsint.

*Die decima quinta Julii anno XV. octuagesimo quinto,* Rdus D. Sigillifer exposuit

Dominis meis, statim a Matutinis decantatis Capitulariter congregatis, Rmum Dominum Episcopum Vercellensem, Nuncium Apostolicum, hoc mane suum Datarium ad eum misisse cum facultatibus per Summum Pontificem in sua ad has & alias Provincias Legatione sibi datis, eas in Capitulo Leodiensi legendas, maxime quod intelligeret a nonnullis de eis dubitari, super qua expositione habita deliberatione, acceptis dictis facultatibus ordinaverunt per me Notarium copiam inde fiendam, crastinoque in Capitulo legendam & publicandam.

*Die decima septima Julii anno 1585.* lectæ & publicatæ in Capitulo dictæ Facultates Nuncii, quæ manserunt in manibus Domini Levini Torrentii, Vicarii S. Celsi, in modum munimenti scriptæ.

*Die ultima Julii anno 1585.* quoad deambulationes in insigni Ecclesia Leod., quas Rmus & Illmus D. Nuncius Apostolicus, Episcopus Vercellensis, summopere cupit tolli & amoveri, Reverendi Domini mei, postquam Reverendus Dominus Præpositus brevi in civitatem expectatur, censuerunt illius adventum expectandum, & in illius præsentia de omnibus mediis, quibus hujusmodi deambulationes tolli poterunt, dispiciendum, ut, quanto fieri poterit, petitioni dicti Domini Nuncii in hac parte satisfiat.

Ad hæc cum jam diu ex parte Capituli deputati sint ad communicandum cum Clero secundario, vel illius Deputatis super publicatione Concilii Tridentini, & iis, quæ ex ea dependere videbuntur, ordinaverunt intimandum D. Decano Sancti Petri, & Decanis Ecclesiarum secundariarum, significet dictam deputationem factam, utque iidem in effectum præmissum suos velint dare Deputatos.

*NOTA intimatum D. Decano S. Petri per Schedulam sequentem.*

*EX parte Insignis Capituli Leodiensis significatur Reverendo D. Decano Divi Petri Leodiensis, dictum Capitulum suos dedisse Deputatos, ad communicandum cum Dominis Ecclesiarum secundariarum Decanis, aut earundem Deputatis super publicatione Concilii Tridentini, & iis, quæ ex ea dependebunt; itaque placeat præfato D. Decano intimare prædictis Dominis secundariarum Decanis, ut suos quæque Deputatos, in finem & effectum prædictum, dare velint. Actum in Capitulo, die ultima Julii 1585.*

Intimavit Walterus.

Penul.



*Penultima Julii anno 1585.*

*NOTA.* D. Officialis Leodiensis exposuit Dominis meis, Capitulariter congregatis, Rmum D. Episcopum Vercellensem, Nuncium Apostolicum, sibi declarasse; ut cum intelligeret nonnullos conqueri publicationem Concilii Tridentini posse magnum adferre præjudicium Jurisdictioni Ecclesiasticæ Rmi Episcopi Leodiensis quoad Clericos, & etiam Privilegiis Ecclesiæ & Patriæ Leod. per Summos Pontifices & Imperatores concessis, itaque se cupere omnia hæc scripto sibi tradi, ut illa apud Summum Pontificem mittere posset, addens se sperare, eundem Dnum Pontificem pro sua, quam erga Ecclesiam Leodiensem gerit, fiducia, & intellectis rationibus, futurum benevolum: sic videbatur Dominis meis, non fore abs re, si Vicarius Rmi cogitaret Prælatos totius Cleri ad se vocare, ut mutua communicatione singula colligerentur, & capitularim scripto redigerentur, atque Nuncio ante diem futuræ Synodi communicarentur.

**EXEMPLAR LITERARUM**  
*Patentium Reverendiss. in Christo*  
*Patris & Illustriss. Domini JO-*  
*ANNIS FRANCISCI, Episcopi*  
*Vercellensis, Sanctissimi Domini*  
*nostri Papæ, & Sanctæ Sedis Apo-*  
*stolicæ Nuncii cum potestate Le-*  
*gati de Latere, Indictionis Synodi*  
*Diæcesanæ Leodiens. ad tertium*  
*diem proximi mensis Octobris*  
*M. D. LXXXV. in Civitate*  
*Leodiensi habendæ &*  
*celebrandæ.*

**IN NOMINE SANCTÆ ET INDIVI-**  
 DUE TRINITATIS, PATRIS, ET FILII, ET  
 SPIRITUS SANCTI. AMEN.

**J. FRANCISCUS, DEI ET APOSTO-**  
*lica Sedis gratia Episcopus Vercellensis & Co-*  
*mes: in tractu Rhenano, inferiorisque Germa-*  
*næ, ac Belgarum & præcipue Leodiens., &*  
*Provinciis, Civitatibus &c. locus omnibus*  
*Nuncius Apostolicus cum potestate*  
*Legati de Latere.*

**C**Um in præcipuis curis Nobis a Sede Apo-  
 stolica una cum hac Legatione impositis,  
 illa non postremum locum teneat, ut Diæcesanas,  
 Provincialesque Synodos, ad Sacrorum  
 antiquorum Canonum & Tridentini Concilii  
 Tomus VIII. Concil. German.

præscriptum in usum revocemus, quæ una  
 prope est ac necessaria quidem hac exulceratissi-  
 ma tempestate Dei gloriæ, Ecclesiasticæ dis-  
 ciplina, Catholicaque etiam Religionis pro-  
 movendæ, instaurandæque ratio, committere  
 non possumus pro singulari nostro erga Nobilissimum hunc Clerum, inclytamque hanc Leodiensem Patriam affectu, quin hoc tam salutare, tamque necessarium cbaritatis, sollicitudinisque Pastoralis officium Ecclesiæ huic Leodiens. primum præstaremus, ea præsertim spe ducti, ut in hac vinea longe uberiores fructus, quam aliunde percipiannus, & aliæ finitimæ Ecclesiæ, quæ cum a tumultibus bellicis nondum sint immunes (quod tamen Dei gratia, brevi futurum speramus) non ita facile hos Clericorum Convventus admittere nunc possent, pio Leodiensis exemplo excitatæ, paulo post ipsæ, & hanc eandem, omnemque aliam rectius conformandæ Cleri disciplina, cultusque Divini restituendi rationem studiosius atque adeo ardentius amplectantur, Synodum igitur Diæcesanam ita sane Sanctissimo D. N. SIXTO Papa Quinto jubente, Serenissimoque ac Reverendiss. Domino ERNESTO Episc. Leodiens., Archi-Episcopoque Coloniens. & Principe Electore &c. non modo consentiente, verum etiam fortassis adjuturo (si tamen Coloniensis belli, aliæque gravissimæ curæ id illi permittent) habere statuimus hic Leodii in Ecclesiâ Cathedrali Sancti Lamberti, ad primam feriam quintam Octobris proxime futuri, quæ quidem erit tertia ejusdem mensis dies, quamobrem ipsam Synodum ad illum tertium Octobris diem celebrandam auctoritate Apostolica indicentes, universos & singulos, qui in hac Civitate, ac Diæcesi Leodiensi dignitates, vel Beneficia quævis Ecclesiastica, & sine ulla cura animarum obtinent, omnesque tam Regulares, quam sæculares, qui quovis jure, vel consuetudine Diæcesanæ Synodo interesse debent, moneamus in Domino, eisdemque in virtute sanctæ obedientiæ, ac sub penis Sacrorum Canonum jure constitutis, injungimus, & mandamus, ut ipsi decenti habitu, nempe talari veste, ac superpelliceis mundis induti, præstituta illa die, summo mane in Cathedrali Ecclesiâ Sancti Lamberti conveniant, non ante Synodi finem, ac sine permissu nostro ex hac Civitate abituri, si qui vero Prælati sunt sæculares aut Regulares, Abbates, Præpositi, Priores, aut alio quovis nomine nuncupati, qui Diæcesanis Synodis eam ob causam, quod ab omni ordinario jure exempti sint, tantumque Sedi Apostolicæ subiecti, minime interesse soleant, eos nihilominus, eosdemque propositis penis, ut adsint, moneamus, volumusque omnino, ut cum auctoritate Apostolica a Nobis evocentur, interesse etiam ipsi una cum aliis, ne ulla ratione prætermittant. Declarantes tamen nullum, inde inferri, oririive unquam posse eorum juri-

bus, privilegiis, vel exemptionibus præjudicium, ne vero si omnes ad unum Parochi conveniant, tempore Synodi interdum contingat aliquos Christi fideles absque necessario Sanctissimorum Sacramentorum subsidio ex hac vita decedere, ideo Decanorum prudentia & arbitrio illud permittimus, ut aliquibus Parochis, qui ejusmodi necessitatibus incidentibus subvenire non inconmode queant, id curæ mandare, atque committere, eisque ne Leodium ad Synodum accedant, veniam possint concedere, ut autem feliciter Synodalis hujus translationis eventum impetremus a Domino, illud edicimus atque expresse mandamus, ut tam in Cathedrali, quam Collegiatis quibusque & Parochialibus, nec non & Regularium quorumcumque Civitatis ac Diœcesis universæ Leodiens. post indictam Synodum, quinta quaque feria, triplici officio non impedita, Missa de Spiritu Sancto celebretur, ut ubi ob Festum aliquem incidentem diem solennius Sacrum erit faciendum, Commemoratio saltem de eodem Sancto Spiritu ne prætermittatur, quarum in rerum omnium fidem, ac testimonium, has Literas nostras, nostrique Secretarii manu signatas, confici, Sigilloque nostro muniti & promulgari jussimus, Cathedralisque Ecclesiæ, & Officialis Curie, nec non Sancti Jacobi valvis affixas, eandem vim habere volumus & declaramus, ac si ipsis omnibus & singulis supradictis, aliisque omnibus, quorum interest, vel interesse potest, reddita essent, ac denunciata. Datum Leodii in ædibus Sancti Jacobi, V. Cal. Sextil. M. D. LXXXV. Habebatur J. FR. Ep. Vercellen. Nunciusque Apostolicus, J. Antonius Carefana Secretarius. Leodii typis Gualteri Morberii.

#### MEMORIALE.

Nulla modo prætermittes, quin ad hanc Epistola hac nostra, cui hæc Scheda inclusa est, memoratam Synodum personaliter venias; nisi detinearis infirmitate gravi, vel inevitabili necessitate, quod si venire non poteris, mites ad Synodum cum Literis tuis patentibus causam infirmitatis tuæ, vel necessitatis expresse continentibus tuo sigillo, vel alio authentico sigillatis, per quas te obligabis ad Statuta ipsa Synodalia observanda, Capellanum, vel Clericum, vel alium idoneum habentem, per ipsas Literas potestatem te absentem excusandi & Canonicum impedimentum in animam tuam jurandi, & Mandata Synodi ad te referendi, porro quod ad Decanatus tui Pastores attinet, bene erit, si ob causas Literis paten-

tibus dicti Domini Nuncii Apostolici hic per Copiam excusam, similiter adjunctis expressas potiores tantum, ac principales aliquot ipsius tui Decanatus Pastores pro arbitrio tuo tecum adduces.

#### Ad comparendum ad Synodum.

**ERNESTUS, DEI & APOSTOLICÆ SEDIS GRATIA, ELECTUS**  
& Confirmatus Archi-Episcopus Colonienfis & Princeps Elector, Confirmatus Episcopus Leodiens., Hildesheimens. & Frisingens., Postulatus Monasteriensis, Administrator Stabulensis, Comes Palatinus Rheni, Dux utriusque Bavariæ, Westphaliæ, Angariæ & Bulonii, Marchio Franciomontanus, Comes Loffensis, Longiens. Hornens. &c.

#### REVERENDE NOBIS IN CHRISTO, sincere Dilecte:

**M**ittimus Devotioni Tuae Exemplar typis excusum, ac de speciali nostro Mandato per Sigilli nostri ad causas Notarium signatum Literarum patentium Rmi & Illmi Domini, D. JO. FRANCISCI, Episcopi Vercellenfis, ac Sanctissimi D.N. Papæ, & Sedis Apostolicæ Nuncium cum potestate Legati a Latere, Synodi nostræ Diœcesanæ Leodiens. in tertium diem proximi mensis Octobris indictæ, habendæ & celebrandæ, ad finem & effectum eisdem Literis expressos, quarum Literarum tenore considerato, Tibi auctoritate nostra Episcopali & ordinaria de consilio & assensu Reverendorum, Nobilium & Spectabilium Confratrum nostrorum Decani & Capituli Ecclesiæ nostræ Cathedralis Leodiens. tenore præsentium, præcipimus & mandamus, ut juxta eundem tenorem in dicta nostra Synodo Diœcesana ad diem superscriptum compareas, aliasque & alia facias, quæ & prout in dictis Literis ad Devotionem Tuam & officium Tuum pertinentia videbis, plenius contineri, quod a Devotione T. nullo modo & sub pena inobedientiæ in eventum Tui hac in parte defectus prætermitti, prout prætermittere non potes, nec debes, volumus: Devotionem T. in Domino recte valere optamus. Datum in Civitate nostra Leodiens. sub Signatura Vicarii nostri in Spiritualibus Generalis. XV. Septemb. 1585.

Signatum L. TORRENTIUS Vicarius.

### ARTICULI GRAVAMINUM

Quorum supra facta est mentio.

**I.**  
**T**Am Cathedralis, quam aliarum Ecclesiarum personæ eximuntur ab omni Juris-

**I.**  
**E**cclésiæ Cathedralis Leod. & tot aliarum Insignium Collegiarum Ecclesiarum in

Jurisdictione Episcopi. Sed Conc. Trident. Sess. VI. C. 4. & Sess. XIV. C. 4. idem Sess. XXV. C. 6. abrogat omnia hujusmodi Privilegia, imo secundum præfatum Capitulum sextum Capitulis sive Decanis non subessent Capellani.

## II.

Archidiaconus de matrimonialibus & criminalibus causis, præsertim ex incontinentia provenientibus, cognoscendi potestas adimitur, Sess. XXV. C. 14. & Sess. XIV. C. 20.

## III.

Pluralitas Beneficiorum cum perceptione fructuum grossorum per PP. SIXTUM IV. & NICOLAUM V. conceditur Canonicis Cathedralis Ecclesiæ, sed Decreto Concil. Sess. XXIV. C. 17. tollitur.

## IV.

Omnes Canonici sunt hætenus ab Ordinibus liberi, & in aliquibus Ecclesiis, etsi non sint in Sacris constituti, tamen habent vocem in Capitulo. At Sess. XXIV. C. 12. decernitur omnes in Cathedralibus cogens dos esse Presbyteros Præbendarum Leodiensium, ubi minor est numerus, nisi ex Statutis provisum sit, in Synodo provideri poterit.

## V.

Ex antiqua observatione vere Nobiles quanquam alioqui idonei non suscipiunt gradum: ne ergo per indirectum priventur, dignitati Archidiaconali sufficere debet, probari eos ab Episcopo, quemadmodum & cum Episcopus dispensatur, in Germania modo congruentem doctrinam habeant, etiam sine gradu, ut vero Diaconatus Ordinem suscipiant intra annum, nemo poterit prohibere.

## VI.

Ad distributiones quod attinet, difficulter fieri posset distinctio, seu divisio tertiarum partis, sufficiat notabilem aliquam portionem statui pro abscentibus in majoribus officiis Matutinis, Missa, Vesperis, præsertim in tam frequenti numero.

in hac Diocesi tam Canonici, quam alii subditi, præsertim actu servientes, plurimorum Pontificum Privilegiis ab omni pene tempore exempti fuerunt a Jurisdictione Episcopi, nec sine gravi perturbatione eidem nec subjici possent, neque Episcopus, qui & ibidem Princeps est, hanc curam sibi committi postulat, quin & Rmus & Illmus D. Nuncius expresse declaravit, se hujusmodi Privilegiis nolle contravenire, quare satius est Decanis hanc curam committi, qui si forte per se sufficere non possint, aut si negligentes notabiliter insignis aliqua persona, vel etiam plures, qui tanquam Delegati Apostolici jurisdictionem exercent Privilegiis salvis.

## II.

Archidiaconi Ecclesiæ Leodiens. a primæva foundatione concurrunt cum Episcopo, non tamen gravioribus delictis & carcerem merentibus se immiscant, leviora autem tuto cognoscunt, præsertim in tam lata Diocesi.

## III.

Istud Privilegium peculiariter competit Canonicis Cathedralibus, nec est in usu ideoque de novo, si ita videatur, petendum esset.

## IV.

In Cathedrali Ecclesia, qui majorem Ordinem non habent, nec integros fructus faciunt, nec Capitulares sunt. Idem in reliquis servari posset, & ad Presbyterales Præbendas, quod attinet, nullus notabilis defectus est, ob multitudinem vel Subdiaconos fieri, ita ut media pars sint Presbyteri, maxime in illis Ecclesiis, ubi Beneficia habent hujusmodi onera, ut alii Missas, alii Evangelium, alii Epistolam cantent, alioquin Conc. permittit Canonicos manere in minoribus Ordinibus, modo vocem in Capitulo non habeant, juxta C. 4. Sess. XXII.

## V.

Archidiaconi debent esse Magistri in Theologia, vel Doctores aut Licentiat in Jure Canonico, & debent promoveri intra annum. C. 12. Sess. XXIV.

## VI.

Ex antiqua consuetudine certa quædam portio præsentibus Canonicis in Ecclesia distribuitur. At Conc. vult tertiam partem distributionibus impendi, Sess. XXI. C. 3. & Sess. XXII. C. 111. & Sess. XXIV. C. 12.



## VII.

Jura Receptionis in Canonicum in Ecclesia Cathedrali, & plerisque aliis applicantur ad pios usus, atque Ecclesiæ necessitatem idem statuatur in omnibus.

## VIII.

Sacerdotes passim audiunt confessionem Sacerdotum, licet Beneficium Parochiale non habeant, & approbati vel admissi non sint, contra C. 15. Sess. XXIII.

## IX.

Hactenus Archidiaconi & alii instituendi provisos aut præsentatos habuerunt potestatem, quæ videtur sublata per C. 13. Sess. XIV. Existimo tamen dictam potestatem remanere penes Archidiaconos; cum Conc. permittat inferioribus, ad quos spectat institutio, eandem potestatem reservato examine instituendorum Episcopo.

## X.

Conservatores suos quæque Ecclesia habuit. Verum Sess. XIV. C. 5. eorum potestas restringitur maxime in criminalibus & mixtis causis, quas cognoscere debet Episcopus, vel ordinarius Superior.

## XI.

Clerici conjugati ex longo usu Ecclesiasticæ jurisdictioni subjiuntur, licet habitum & tonsuram non deterant, aut alicui Ecclesiæ vel Episcopo non deserviant, quod est contra C. 6. Sess. XXIII.

## XII.

De Seminariis suo tempore agi poterit.

## XIII.

Ufus obreptum est, ut Ordines in Ecclesia Cathedrali non conferantur, nec multum interest, cum tot aliæ Ecclesiæ sint ac Monasteria valde insignia, statuatur tamen, ut Suffraganeo Ordines conferenti assistant, præcipuè quinquè Ecclesiæ, in qua id fieri contingit.

## XIV.

Non potest hic Articulus alicui displicere.

## XV.

De-Scholastici officio sufficere videtur, ut dignis & sine gradu conferatur, præsertim

## VII.

Hactenus aliquid pro Receptione Canonicorum aut Capellanorum solvi consuevit, id per Conc. Sess. XXIV. C. 14. abrogatur, nisi in pios usus convertatur.

## VIII.

Hic defectus corrigi poterit in Constitutionibus Synodalibus brevi, ut speratur, publicandis.

## IX.

Institutiones Beneficiorum consueti more merito penes Archidiaconos remanere debent, attento quod concurrunt ab origine cum Episcopo, qui idem etiam Princeps cum sit, pluribus negotiis distrahitur, accedit Collegium ad hoc ordinatum, ut sine maturo consilio nemo instituat, sed & jura consueti merito solvenda sunt, quia valde moderata & alioquin Archidiaconi nihil fixi emolumenti habent.

## X.

Ad Conservatores Ecclesiarum quod attinet, Clerus secundarius simul omnis habet, Abbatem S. Laurentii, Episcopus & Clerus primarius Abbatem S. Jacobi, nec sane convenit ut Regulares, cum sint causis criminalibus vel mixtis, se immisceant.

## XI.

Per reformationem Curie spiritualis Leod. providetur, ne in criminalibus pro Clericis habeantur alii, quam qualificati juxta Conc. Trid., quod vere ad conjugatos & alios similes attinet Episcopos, qui etiam ut Princeps utramque jurisdictionem habet statuere, merito potest, ut coram Officiali suo in civilibus conveniatur, & non alibi, nisi velint.

## XII.

Onera Seminarii omnes communiter coguntur sustinere tam Episcopi, quam Capitula, Abbates regulares, & quicumque Beneficiarii officia habentes & exempti, C. 18. Sess. XXIII.

## XIII.

Suffraganeus in quacumque Ecclesia confert Ordines, at Conc. Sess. XXIII. C. 8. vult Ordines in Ecclesia Cathedrali præsentibus Ecclesiæ Canonicis, extra vero Civitatem in Ecclesia digniori celebrari.

## XIV.

Una Præbenda Doctori Theologo, & alia Pœnitentiario erit conferenda, C. 1. Sess. V. de Reform. C. 8. Sess. XXIV. de Reform.

## XV.

Scholasticæ debent conferri Magistris in Theologia, aut Doctoribus vel Licentiat

si in Ecclesiis singulis sit Præbenda Theologalis.

## XVI.

Episcopus omnium piarum dispositionum est Executor, C. 8. Sess. XXII. sicque hic non observatur.

## XVII.

Clausura Sanctimonialium non est in observantia, & quicumque septa Monasterii ingreditur, quod est contra C. 5. Sess. XXV.

## XVIII.

Passim Monachi & Moniales proprium habent. Conc. C. 2. Sess. XXV. de Reg. & Mo.

## XXIX.

Unus Susceptor & una Susceprix in Baptismo permittitur. C. 2. Sess. XXIV.

in Jure Canonico, vel aliis idoneis, qui per se ipsos docere queant, C. 18. Sess. XXIII.

## XVI.

Optandum sane esset, ut hic Articulus (quod hic Leodii erit difficile) observaretur.

## XVII.

Utilissime erit hunc Articulum observari per discretionem Rmi & Illmi Nuncii.

## XVIII.

Hoc quoque remittitur discretioni & prudentiæ Rmi Nuncii.

## XIX.

Pars Concilii Tridentini, quæ Matrimonia & Baptismus concernit, publicata fuit Leodii, manderetur serio, ut observetur.

**C**um exemptio Cathedrali & Collegiatis Ecclesiis Civitatis & totius Patriæ Leod. ex iustis & rationabilibus causis concessa, & correctio delinquentium partim per Summos Pontifices, partim per Statuta nonnullis Prælati & Capitalis ipsis demandata fuerit; habeantque singulæ Ecclesiæ sua Statuta, quibus delicta & excessus corrigi mandantur, vitæque & morum probitas commendatur, similes & jam generales unius ditionis exemptiones per Concilium Tridentinum abrogatæ, non credantur exemptiones hujusmodi & correctiones firmæ & illæse persistant, quod si forte (quod non creditur) aliqui eorum, ad quos correctio spectat, officio suo deessent, illud ipsum per Ss. Petri & Martini Collegiatarum Leod. Decanos, illud auctoritate Apostolica per fel. rec. JULIUM Secundum, & utrimque postea per totum Clerum secundarium Leod. deputatos suppleatur, & ne ullomodo delicta impunita maneant, ipsi provideant.

Pluralitas Beneficiorum simplicium & compatibilium ex æquo omnibus propter fructuum eorundem ut plurimum tenuitatem, annonæque in Belgio caritatem, promittatur.

Nellus Canonicus Civitatis Leod. in aliquo ex Sacris Ordinibus non constitutus, sit Capitularis, nullusve Sacris ante vigesimum tertium suæ ætatis annum initiatur, initiati vero in vigesimo tertio anno constituti sint omnium fructuum Canonicatum & Præbendarum suarum capaces, non initiati autem ante trigessimum quartum annos completos fructus non habeant, & Statuta ecclesiarum hic ferventur.

Quicumque residentes Canonici tribus Horis majoribus seu Officiis intererunt loco, distributionum quotidianorum condignam portionem, per Capitula ordinandam & ita-

tuendam, habeant jura receptionum, ubique simplicia sint, & fabricæ aut piis usibus applicentur.

Anni gratiæ & fabricæ a Majoribus non sine iusta causa instituti, ac etiam auctoritate Apostolica indulti, immobiles & continui juxta institutionem & indultum persistant, sed a die vacationis, & non aliter, currere incipiant.

Archidiaconi, & alii inferiores, qui in possessione, seu quasi juris sibi præsentatos, instituendi, & jura eapropter elolvi solita recipiendi, necnon causas desuper motas & movendas cognoscendi & decidendi existunt, in eadem suâ possessione & consuetudine in præmissis dumtaxat permanent, sic tamen quod ista per se ipsos, vel alios de jure habiles & qualificados exercere, & cognoscere, & in reliquis omnibus officia sua observare debeant & teneantur.

Quicumque Conservatores hætenus auctoritate Apostolica dati munus suum obire continent & perseverent.

Piarum dispositionum executio, in Collegiatis penes Capitula esto, in aliis vero jura commune servetur.

Super his omnibus ante publicationem Concilii per Summum Pontificem provideatur.

## XXVII. Septembris anno 1585.

**C**omparuit personaliter ad Capitulum Reverendissimus & Illmus Dominus Episcopus Vercellensis, Nuncius Apostolicus coram reverendis Dominis meis Capitulariter congregatis, atque omnium initio Literas Suæ Celsitudinis, ad Capitulum scriptas, infractas reddidit, quibus eadem Suæ Celsitudo præfatos Dominos meos hortatur, ut pro reverentia & obedientia Sanctæ Sedi Aposto-

postolicæ debitis ipsius Nuncii voluntati obtemperare studerent, atque ulterius brevi oratione eosdem Dominos meos admonuit, ut cum brevi instaret dies celebrandæ Synodi, atque hætenus inter ipsum, & præfatos Dominos meos propemodum conveniret super eis, quæ in eadem Synodo proponenda forent salvo articulo frequentationis Horarum dignarentur, quantum fieri posset, se accommodare maxime, quod omnia in honorem Dei & conscientiarum Dominorum exoneratione tenderent, subjungens ulterius, ut si qui ex Dominis essent, qui se gravatos aut oppressos prætenderent, ad illum comparere vellent illos libenter audidit, unde Reverendus Dominus Scholasticus eidem Domino Nuncio totius Capituli nomine summas egit gratias de benevolentia & promptitudine Dominis præsentibus offerendi quæcumque obsequia, & eodem Domino Capitulari loco egresso, & habita super præmissis deliberatione, Domini mei ordinaverunt omnes ad crastinam diem hora nona de mane ad Capitulum in vim juramenti, & sub pœna trium stuforum vocandos, ad super negotio prænotato mature & penitus deliberandum & concludendum, & interim Deputatos dicta crastina die statim a Matutinis, ad Capitulum convenire debere, & singula adamussim & penitus examinare, ut maturo consilio omnia fiant.

**ERNESTUS, ELECTUS ET CONFIRMATUS ARCHI-EPISCOPUS**  
*Coloniensis, S. R. I. per Italiam Archi-Cancellarius & Princeps Elector, Electus & Confirmatus Episcopus Leodiensis, Administrator Hildesheimensis, Frisingensis & Stabulensis, Comes Palatinus Rheni, Dux utriusque Bavaria, Westphalia, Angaria & Bullonii, Marchio Franchimontis, Comes Lothensis &c.*

**REVERENDI, GENEROSI, SPECTABILES, sincere Dilecti,**

**Q**uoniam Rmus & Illmus Dnus Episcopus Vercellensis, Nuncius Apostolicus, istuc proficiscitur, ut juxta commissum sibi a Sanctissimo Domino nostro Papa, & Sanctæ Sede Apostolica munus institutum a se, & propositam ibi nuper Ordinationem Ecclesiasticam in Diocesi nostra Leodiens. Divina favente gratia perficiat, omittere nolumus, quin has ad Vos Literas daremus, quibus Vos hortamur, ut pro reverentia & obedientia Sanctæ Sedi Apostolicæ a Vobis nobiscum debitis, de quibus

ipse D. Nuncius Clerum & populum nostrum Leodiensem vehementer laudat, ipsius, ut patet, voluntati obtemperantes, ejusque, ut Nostri, rationem habentes, reliquum Clerum & populum nostrum in Vos respicientem, hoc exemplo nostro in eodem officio confirmetis. Quod superest, omnia Vobis Reverendi, Generosi, Spectabiles, sincere Dilecti salutaria & prospera a Domino DEO precamur. Datum in oppido nostro Bonnenfi, secunda Septembris 1585.

*Signatum ERNESTUS mpp.*

Vigesima octava Septembris anno 1585., statim a Matutinis decantatis, convenerunt in Capitulo in parte Deputati, & nonnulli & colloquio habito ad invicem super multis, quæ concernebant Synodum Anno quadragesimo octavo servatam, videlicet de compositione Prælatorum, & super articulis, quos correxit D. Vicarius, super scriptis abinde recesserunt nulla capta conclusione.

**XXVIII. Septembris anno 1585.**

**L**ectis coram Reverendis Dominis meis articulis superscriptis ex Decretis Concilii per Deputatos extractis, cum annotatione Gravaminum ad quemlibet articulum hujusmodi placuit sententia Deputatorum, salvo articulo de pluralitate Beneficiorum cum perceptione fructuum grossorum Præbendæ, in quo censuerunt privilegiis per Summos Pontifices concessis, omnino inhærendum, & illis insistentum nec recedendum, & ob id publicationem hujusmodi articuli suspendendum, salvis tamen de Beneficiis incompatilibus, item articulo frequentationis Horarum, ad quam nullo modo astringere intenduntur, nisi ad unius Horæ dumtaxat frequentationem, per eos, qui in civitate erunt, salvis tamen quatuor mensibus, quibus ex Statuto abesse licet, & præsentibus aliquam honestam portionem constituendi, extra tamen massam Præbendarum, quam intactam ea ratione intelligunt.

**II. Octobris anno 1585.**

*in Capitulo.*

**L**ectis coram Reverendis Dominis meis articulis infra scriptis ex multis & crebris Deputatorum habitis congregationibus, conceptis, cum Scheda per Reverendissimum & Illmum Dnum Nuncium pro securitate Cleri signanda, videlicet, delationis, executionis Concilii Tridentini, quoad hujusmodi articulos, placuerunt Dominis hujusmodi articuli salvo articulo finali de iudicibus delegatis, quem Domini attentis suis & Ecclesiæ privilegiis expunctum volunt, & suis privilegiis inhærendum.

**ARTI-**



**ARTICULI CONCERNEN-  
tes Gravamina, & quorum mo-  
deratio petitur, signati  
per Nuncium.**

**C**Um Illustrissimus & Reverendissimus Dominus Nuncius Apostolicus in futura Synodo non putet expedire, ut de iis Articulis & Gravaminibus, quorum moderatio & declaratio ex parte Cleri primarii & secundarii Leod. petitur, fiat aliqua vel protestatio, vel exceptio in publico, ne in plebe & alibi aliqua scandala oriantur, & Cels. S. Illma & Rma cupiat nihilominus petitionibus Cleri, quantum in ipsa est, satisfacere, & paratus sit articulos, de quibus est difficultas, sua manu signare, ne scilicet Clerum ad eorum observationem adigat, donec & de iis a Sede Apostolica aliter statuatur; placuit Dominis Capitularibus primariis & secundariis, sequentes hos articulos Suae Rmæ & Illmæ Celsitudini offerre, eandem humillime, & qua decet, reverentia rogantes, ut eos in bonam & benignam partem accipere, & signatam promissionem dare non dedignentur.

*Primus* itaque *Articulus* est de Exemptionibus, quas uterque Clerus sibi a pluribus Rom. Pontificibus concessas, & ab omni ævo, atque hominum memoria observatas, cupit conservari, nec privilegiis quibuscumque derogari: præsertim cum Clerus non credat, mentem Patrum Concilii Tridentini fuisse, ut iis derogaretur, vel ut illæ tollerentur. Ne tamen sub prætextu Exemptionum delicta maneant impunita, concipietur quædam formula, ac Cels. Suae Illmæ exhibebitur, juxta quam in delinquentes animadverti poterit, quam sperat Clerus C. S. non displicituram.

*Secundus Articulus* Archidiaconos concernit, in quo cupiunt DD. prædicti omnia jura & qualiacumque Archidiaconis competentia, & quæ ab omni tempore, ac ab origine foundationis Ecclesiæ Leodiensis habuerunt, illæsa & integra retineri, exceptis tamen gravioribus delictis. Item, quod in posterum Archidiaconorum Collectores, *Vicarii & Officiales, Ecclesiastici erunt.* Viderur etiam Dominis sufficere, si Archidiaconi idonei sint doctrina & eruditione, licet gradum non susceperint. Et quod ad fructus Beneficiorum litigiosorum attinet, cupiunt Domini, ut omnia in eo statu, quo inde sunt, permaneant; donec Sanctæ Sedis Apostolicæ decisio & determinatio habeatur.

*Tertius* est de pluralitate Beneficiorum. Cupiunt Domini, & non diffidunt, se obtenturos, ut hic articulus suspendatur; cum impossibile sit, aliquem ex unico Beneficio

*Tomus VIII. Concilior. German.*

ob fructuum tenuitatem vivere: nisi tamen sint duo Beneficia, curam animarum habentia, quæ sine dispensatione obtinere non licet.

*Quartus* est de Canonicis, extra Sacros Ordines constitutis. Viderur utrique Clero æquum, ut tales non sint Capitulares: Item, ut non nisi dimidiatos fructus habeant.

*Quintus* ad quotidianas distributiones pertinet, de quibus in singulis Capitulis prospicietur & statuatur, ut eæ fiant pro modo facultatum, quæ tamen tales sint, ut verifimiliter non contemnuntur.

*Sexto Articulo* agitur de juribus Receptionum, quæ cupiunt Domini manere, & ea quidem simplicia, ut applicentur ad necessarios fabricæ & Sacristiæ usus. Intelligunt autem simplicia jura, ut si quis habuerit aliquod Beneficium, & postea resignaverit, & is Resignatarius etiam resignaverit, nihilominus ultimus veniens ad possessionem, non nisi semel jura persolvat, manentibus tamen duobus annis gratiæ & fabricæ ex antiqua observatione, ita ut a die vacationis Beneficii per obitum, incipiant currere.

*Septimo* agitur de Clericis conjugatis. Rogetur S. C. Rma, ut sit contenta veteribus Statutis, quæ in hoc mandentur observari, ut & nova Reformatio, quæ etiam promulgetur.

*Octavus Articulus* concernit Seminarium, cujus cura singulis Capitulis per primam occasionem erit.

*Nonus & ultimus* est de Scholaribus studentibus, ut censeantur debere gaudere plenius fructibus. Rogetur, ut sint contenti consuetis absentis & portionibus.

*Hic articulus obelo notatur in originali.*

Judices delegati Apostolici nominentur Suae Cel. Illmæ Decanus Leod., Vicarius, Officialis Leod. & Capituli, & Scholasticus: præterea seprem Decani Cleri secundarii, omnes numero duodecim.

**NOS JOANNES FRANCISCUS, Episcopus Vercellensis, ac Nuncius Apostolicus &c. super Articulis præscriptis Concilii Tridentini Executionem differimus, neque eandem urgebimus, donec a Sanctissimo D. Nostro certius de eis habeatur responsum, sive rescriptum. Quod quidem ut ad vota Inchyti hujus tam primarii, quam secundarii Cleri, atque ad totius Ecclesiæ Leodiens. tranquillitatem impetretur, quemadmodum fore speramus, apud illius Sanctitatem sedulo ipsi inter-**

**T t t**

**cedemus,**

cedemus, omnemque operam dabimus. Signatum: J. FRAN. Episcopus Vercellensis, Nuncius Apostolicus.

### II. Octobris anno 1585.

**L**ectis coram Reverendis Dominis meis, Capitulariter congregatis, superscriptis Articulis, ex multis hactenus habitis congregationibus, tandem conceptis, cum Scheda Rmi & Illmi Domini Nuncii dilationis videlicet executionis Concilii Tridentini, quo ad præscriptos Articulos, placuerunt hujusmodi Articuli, salvo finali Articulo, de Judicibus delegatis, quem Domini mei præfati, suis Privilegiis attentis expungendum,

& dictis suis Privilegiis inhærendum putarunt.

### III. Octobris anno 1585.

*Celebrata Synodus per modum, ut sequitur. (\*)*

### XVI. Octobris anno 1585.

**A**d sollicitandum Responsum, sive Rescriptum super moderatione Articulorum superscriptorum per Dominum Nuncium signatorum, ante publicationem Decreti Concilii Tridentini, primario & secundo Clero sub signatura ipsius Nuncii traditorum, visum est scribendum ad Dominum Stravium, & sollicitationem hanc eidem committendam.

*Ex*

(\*) Præter paucula hæc verba, quæ hic retulimus, nihil amplius de ipsa Synodo, ejusque celebratæ modo memoratur in transmissio ad nos apographo: sed a 3. Octobris mox transiit ad 16tam Octobris, qua die quid actum sit, modo vidimus.

Interim Synodum 3. Octobris cæptam, ac subsequenter tribus diebus continuatam, præfixus Actorum relationi titulus probat: In eadem vero Concilium Tridentinum fuisse promulgatum, constat ex Joannis Chapeavilli narratione de gestis Episcoporum Leodiensium in Ernesto. Cui Scriptori tanto magis adhibenda est fides; eo quod eorum, quæ refert, testis oculatus fuerit, & eadem in Synodo a Bonhomio Episcopo Vercellensi, Nuntioque Apostolico, Pœnitentiarii munere in Ecclesia Cathedrali Leodiensi donatus. Quare ejus verba, additamenti loco, ad supplendum ea, quæ prætermissa hic sunt, Lectorum in gratiam subjungo:

" Iisdem diebus, inquit, Joannes Franciscus Episcopus Vercellensis, Nuntius Apostolicus, Leodium appulsus, Indulgentias plenarias ad instar Jubilei a Sixto V. ex Ecclesiæ thesauris depromptas promulgat, magno ab omnibus cum honore, præstigio & æstimatione habitas.

" Deinde Diœcesanam Synodum, nomine Præfulis, rebus bellicis distenti, celebrat, & in eadem ante omnia Concilium Tridentinum promulgat, lectis illius Capitulis præcipuis, quæ Fidei doctrinam, morumque reformationem concernebant. Cumque nonnulla Capita Privilegiis & Libertatibus Ecclesiæ Leodiensis adversari, & Jurisdictionem ordinariam minuere viderentur; nonnulli Ecclesiarum Prælati, ut in eis dispensaret, aut ut eorum publicationem vel executionem suspenderet, magna contentione postularunt. Ad quæ ille, nudum se executorem esse, nullam in Concilio dispensandi facultatem habere, respondit. Protestari sunt interim, rogaruntque, ut ad Pontificem in eam rem allatas rationes perscriberet, & pro gratia, ac dispensatione supplicaret; quod se facturum recepit, scripto in eam rem Officiali Leodiensi, Henrico Dorneo, ad D. Lamberti Canonico, tradito, quod est tale:

" Credimus, per Concilii Tridentini Decretum, quod est in Cap. Nullus Sess. XXIII., non posse esse derogatum juri Episcopi Leodiensis, cum præsertim ipse etiam Princeps sit Imperii, & utrumque gladium in Clericos & Laicos gerat. Si quid tamen difficultatis hac de re suboriri potest, id totum ad Summi Pontificis arbitrium referimus. Interim declaramus, nostræ intentionis non fuisse, nec esse, Concilium Tridentinum promulgando, circa Clericos conjugatos, maxime in habitu & tonsura, juxta Sacrorum Canonum Sanctionem incedentes, Episcopalem jurisdictionem aliqua ex parte imminuere; sed eam in eodem statu, in quo hactenus fuit, integram, illasque relinquimus, donec aliter ab illius Sanctitate decernatur. Sic signatum: Joannes Franciscus Episc. Vercellensis, Nuncius Apostolicus.

" Porro cum nihil ex Urbe hac de re mandaretur, nec Pontifex, quamvis per Nuncium, Cleri instantis nomine interpellatus, quicquam rescriberet, illis exposulantibus, respondit:

" Quod

*Ex Literis Richardi Stravii ex Urbe ad Dominum Præpositum die XXII. Martii anno 1586. scriptis.*

*se habiturum rationem præfatorum Privilegiorum, uti etiam ad eundem Nuncium scribi institi.*

**E**Gi hic & institi pro Confirmatione Apostolica super Articulis nuper in executione Conc. Tridentini Nuncio Apostolico concedente suspensis. & per eundem scriptis. St. D. N. respondit, non posse, hoc est, non velle ipsum confirmare Privilegia, Statuta, Articulos, aut consuetudines contrarias Sacro Conc. Tridentino. Satis esse, si relinquamini in possessione, in qua estis, & si occurrente casu necessaria sit Sedis Apostolicæ auctoritas, Suam Sanctitatem Ecclesiæ & Clero Leodiensi non defuturam, atque de his Illms & Rmns Cardinalis Alldimus prolixè jussu Sanctissimi ad Reverendissimum Vercellensem scripsit.

*Ex Literis Domini Stravii ad Præpositum datis & scriptis ex Urbe die XXIX. Martii 1586.*

**E**Gi hic pro Confirmatione Privilegiorum & Articulorum, nuper per Nuncium subscriptorum. Respondit Papa se nolle rescribere adversus Conc. Trident., sed occurrente casu

## ORATIO ad finem Synodi habenda

*Leodii apud Gualtherum Morberrum M. D. LXXXV.*

**F**RATRES CHARISSIMI, toto mentis affectu orate, ut hæc Sacra Synodus, auctoritate Apostolica congregata, cum in hac Civitate, ac Dicecesi Leodiensi uberrimos spirituales fructus afferat, cum finitimas Provincias sancto imitationis desiderio accendat.

FRATRES CHARISSIMI, toto mentis affectu orate pro SANCTISSIMO D. N. D. SIXTO PAPA QUINTO, ut cum diuturna & felicissima Pontificatus administratione omnium meliorum charitatum plenitudinem a Domino consequatur, atque ad vitam una cum grege sibi credito perveniat sempiternam.

FRA-

" Quod a me petiistis, quodque in me fuit, præstiti. Nihil equidem impetraturum me non ignoravi, neque enim solet adversus Concilii Oecumenici Decreta dispensare Pontifex, sed quandoquidem Concilium aliter recipere refragabamini, cum astutus essem, (?) dolo cepi vos. Atque hæc subridens sæpius ex Apostolo distabat.

" Examinatores quinque jam ante per bon. mem. Cardinalem Groesbekanum deputatos renovavit, eisque duos adjecit, exacto ab omnibus jurejurando de forma examinis, per Sacrum Concilium præscripta (quam per concursum vocant) inviolate observanda: quod & ego tunc cum aliis, uti illorum unus præstiti: Canonicum Theologalem & Pœnitentiarium in Cathedrali juxta Concilium esse voluit, pro quibus duos primo vacaturos Canonicatus ab Ernesto Præsule impetravit: quorum primum D. Georgius Thurinus, uti Theologalis, & perexcellens Concionator, Verbique Dei Minister; ego alterum, uti Pœnitentiarius obtinui.

" Voluit quoque speciatim relegi Decretum circumductionis, seu annulationis Matrimoniorum clandestinorum, quod jam ante, juxta ejusdem Concilii præscriptum, per singulas Diœcesis Parochias, Groesbekani Præsulis jussu, fuerat promulgatum.

" Conclusa Synodo, cœpit in quosdam, concubinatus suspectos, juxta formam a S. Concilio præscriptam, procedere: tantumque brevi tempore protexit; ut pauci concubinas habere convicti, eas a se etiam extra urbem, ad omnem evitandam suspicionem dimitterent: Ut etiam quod Clerici, Canonici, & alii de habitu Clericali gerendo admoniti, habitum Clericalem, & verticis initiati tesseram Clericalem, modo & forma in Canonibus præscripta gererent.

" Inquisivit & in Simoniacos, quos satis severe ad restitutionem fructuum male perceptorum multavit. Habebat civem, virum probum, plerisque omnibus notum, qui multas Simoniacorum, concubinariorum, & aliorum colligebat, & fideliter asservabat: e quibus montem pietatis, more Italico, Leodii erigere, & usurarios, qui pauperum fortunas exedunt, civitate excludere meditabatur. Sed morte præventus, quod pio animo destinarat, perficere non potuit." Hucusque Chapeavillus de Gest. Episcoporum Leodiens. Tom. III. in Ernesto Bavaro. Cap. IX.

(f) 2. Cor. 12.

*Tomus VIII. Concilior. German.*

T t t 2



FRATRES CHARISSIMI, toto mentis affectu orate pro Reverendissimo & Illustrissimo D. JOAN. FRANCISCO EPISCOPO VERCELLENSI, APOSTOLICO NUNCIO, Sanctæque hujus Synodi PRÆSIDE; ut opus, ac præsens ministerium sibi commissum digne impleat, ac pares tanto oneri vires a Domino impetrare mereatur.

FRATRES CHARISSIMI, toto mentis affectu orate pro SERENISSIMO PRINCIPE ET EPISCOPO VESTRO; ut victoriam contra suos Christianique hostes tandem obtineat, atque in pace & tranquillitate degens, spiritualibus in dies crescat augmentis, & iis, quibus præfectus est a Domino, non modo præsit, verum etiam proficiat ad perpetuam Catholicæ Religionis propagationem.

FRATRES CHARISSIMI, toto mentis affectu orate pro Ministris Ecclesiasticis, ejusdem Episcopi & Principis, quatenus in rectam veritatis & justitiæ viam, duce Domino, dirigantur, dumque manus in bonis operibus elevant, laborum suorum benedictionem a Domino largissimam consequantur.

FRATRES CHARISSIMI, toto mentis affectu orate, ut qui huic Civitati, vel ditioni præficiuntur, sapientia, justitia, omnique virtute præfulgeant; ac bonorum operum exemplum toti populo indefinenter præbeant.

FRATRES CHARISSIMI, toto mentis affectu orate Deum Patrem misericordiarum, ejusque Filium unigenitum, Salvatorem nostrum, Sanctumque Spiritum, qui nos huc ad Sanctissimæ Trinitatis laudem convenire voluit, ut in hac Synodo Apostolica ad Spiritum Sacerdotalem excitati, latam spatiosamque viam, quæ ad perditionem ducit, omnino relinquamus; tandemque ingredi plane statuamus per illam angustam, quæ ad vitam ducit, eamque usque ad obitum pergere non desinamus, quousque ad Cœlestem Patriam, quo tendimus, & in qua cives conscripti sumus, auxiliante Divina gratia, perveniamus.

## ACCLAMATIONES

*in Synodo.*

**S**anctissimæ & Individuæ TRINITATI sempiterna laus & gloria.

*Respons.* Magna est misericordia tua, Domine, super nos; quemadmodum speravimus in te: qui ad optatum finem hanc Sacram Synodum perducere dignatus es, tibi gratiarum actio in sæculorum sæcula.

Smo D. N. D. SIXTO PAPÆ QUINTO, Christi in terris Vicario, & Petri Clavigeri Successori, Summo universalis Ecclesiæ Pontifici, cunctarum gentium obedientia.

*Respons.* Domine Deus! supremum tui gregis Pastorem gratia tua custodi ac dirige; ut eo gubernante universæ gentes sancto veræ fidei lumine illustratæ, in unum Ecclesiæ tuæ ovile colligantur.

Clementissimo & Serenissimo IMPERATORI summa felicitas, & contra infideles perpetua victoria!

*Respons.* Rex Regum & Dominantium Domine, Augustissimum Imperatorem tua cœlesti gratia & felici Regnorum propagine semper auge!

Reverendissimo & Illustrissimo Domino, D. JO. FRANCIS. *Episc. Vercellen.* Nuncio Apostolico, & Sacræ hujus Synodi Præfecto, sancta in ferendis laboribus tolerantia, & perpetuum Pastoralis sollicitudinis incrementum!

*Respons.* Deus misericordiarum Pater, humiles servi tui preces propitius exaudi, piaque illius vota ac desideria ad Nominis tui gloriam, & Ecclesiarum, illius curæ creditarum, instaurationem benignus adimple!

Serenissimo ac Reverendissimo Domino, D. ERNESTO EPISCOPO & Principi *Leodiens.* salutaris vigilantia, vita longæva & prospera gubernatio!

*Respons.* Omnipotens Deus, super eo benedictionis tuæ dona perpetuo multiplica, ut greges tuos sibi commissos secundum beneplacitum tuum hic diu pascat, ac demum ad cœlestia pascua secum feliciter perducatur.

LEO.

LEODIENSI POPULO pax Christi æterna, & perpetuum Catholicæ Religionis studium!

*Respons.* Memento Domine in beneplacito populi tui, ac perpetuum tuæ benedictionis rorem, tuumque amorem simul ac timorem illi infunde.

Nos Dei voluntatem pie, sancteque implentes, Sancta hujus SYNODI Decreta ad DEI gloriam, & salutem animarum sedulo exequentes, digni reddamur misericordia & gratia magni & Supremi Sacerdotis JESU Christi, intercedente simul ejus Genitrice Beatissima Virgine, ac Beato Lamberto Episcopo & Martyre, omnibusque aliis

hujus Ecclesiæ Patronis, una cum omnibus Sanctis!

*Respons.* Amen. Amen. Amen.

(L. S.)

*Per Copiam, quantum fieri potuit, conformem manuscripto, in Secretaria Perillustri Capituli Cathedralis Ecclesiæ Leodensis asservato, quod testor H. Mouillard, præfati Perillustri Capituli Notarius & Secretarius.*

*Hoc Exemplar quadraginta quinque foliis constans, accurate a me cum originali manuscripto collatum, testor cum eodem concordare. Leodii die 23. Martii 1767. Carolus Wastelain S. J.*

## SYNODUS DIOECESANA COLONIENSIS

SUB ERNESTO, BAVARIÆ DUCE, (\*) ARCHI-EPISCOPO,  
Anno Christi MDXCVIII. Clementis VIII. PP. VII.  
Rudolphi II. Imp. XIII.

### *Statuta Synodi Diœcesanæ Colonienfis* Anni 1598. 2da Octobris.

#### DE CANONICIS.

##### TITULUS I.

I. **P**recipimus observari Canones & Statuta Provincialia, quæ de vita & honestate Clericorum edita sunt, ac imprimis innovamus ea, quæ contra Simoniacos, concubinos, fornicarios, ebriosos, coronam, tonsuram, & habitum Clericalem non gestantes, vagantes, non residentes, Horas Canonicas non recitantes, Monasteria Virginum absque licentia & rationabili causa frequentantes, secularibus negotiis sese immiscuentes, olim salubriter decreta & promulgata fuerunt.

II. Quo vero strictius ista omnia observentur, mandamus Decanis, &

aliis Ecclesiarum Prælati, ut in suorum Canonicorum & Vicariorum vitam & mores sedulo animadvertant, & quos in prædictis culpabiles offenderint, debitis pœnis coërceant, memores Heli Sacerdotem (a) pro filiorum iniquitate damnatum: alioqui Nos illorum negligentiam supplentes, ad censuras & pœnas Canonicas serio procedi faciemus.

*De Pastoribus, Decanis ruralibus, Concionatoribus & Confessariis.*

##### TITULUS II.

I. **I**mprimis volumus, ut omnes Pastores per Diœcesim Colonien-

T t t 3

fem

(\*) Vide notata sub finem Statutorum.

(a) 1. Reg. 2.

sem de sua jurisdictione & Canonica institutione, sive investitura, coram suo quisque Archi-Presbytero, sive, ut vocant, Decano rurali, per legitima instrumenta fidem faciant. Deinde ad manus eorundem Professionem Fidei edant, secundum formam a Sacra Tridentina Synodo præscriptam. Qui sine Canonica institutione curam animarum administrare præsumperint, aut Fidei Professionem edere detrectaverint, eos dicti Archi-Presbyteri ad proximam Synodum Nobis scripto denuntiabunt.

II. Qui ad curam animarum (b) legitime vocati sunt & admissi, apud Ecclesias suas, sicut jure Divino tenentur, residere, atque oves suæ fidei commissas per se ipsos pascere compellantur.

III. Mandamus (c) & præcipimus universis Parochis & Presbyteris, ut non nisi publice in Ecclesia infantes baptizare, aut Sponsos Matrimonio jungere præsumant, casu necessitatis excepto, ut sic reprimatur quorundam Laicorum fastus & superbia, qui ista Sacramenta sibi, suisque, in privatis domibus ministrari postulant, quos in Corinthiis graviter perstringit Apostolus: (d) An Ecclesiam Dei contemnitis? Nec volumus per Officiales nostros cum quovis, nisi ex causis gravissimis & urgente magna necessitate dispensari.

IV. Meminerint (e) quoque Pastores, sui muneris esse, ad promovendam Juventutis rectam institutionem solcite providere, ut Ludimagistri non tantum literis sufficienter instructi, sed Fide Catholica imprimis, vitæque integritate commendati, Scholis Parochialibus præficiantur. Itaque non admittentur posthac, nisi examinati ab ipsis Pastoribus, vel extra Coloniam a Decanis Ruralibus, atque ad eorundem manus Fidem Catholicam secundum præscriptum Concilii Tridentini professi fuerint. Si quis inveniatur de hæresi suspectus, aut qui recuset Fidei

Professionem edere, ab officio depellatur, alio Catholico & idoneo in ejus locum substituto.

V. Nullus in posterum Sacerdos sive secularis, sive Regularis, etiam exemptus, administrationem Sacramentorum, & præcipue Confessionum audiendarum munus, aut prædicationem Verbi Dei publice in Ecclesia sibi sumere audeat, nisi doctrina, moribus & vita probatus, & ad id muneris idoneus visus fuerit Examinatoribus, quos ex Colonientium Pastorum & Theologorum ordine duximus deputandos, ac Vicarii approbationem, quæ gratis dabitur, in scriptis obtinuerit, privilegiis contrariis quibuscumque, & consuetudine etiam immemorabili non obstantibus.

VI. In Casibus Episcopalibus, qui Nobis de jure, vel consuetudine, vel per Statuta Synodalia reservati sunt, in foro conscientiae absolvendi potestas jam olim pluribus aliis benigne admodum, salubriterque communicata fuit; Suffraganeo scilicet, Metropolitanæ Ecclesiæ Presbyteris Canonicis, Theologis, intraneis & extraneis tam Collegiorum, quam ruralium Pastorum Decanis, quatuor primarum Parochiarum urbis Colonienfis Pastoribus, quatuor Ordinum Mendicantium Prioribus, & ædis Metropolitanæ Pœnitentiarii. Nos tamen attendentes horum temporum iniquitatem & itinerum pericula, quod durante isto exitiali bello, non semper, neque ex omnibus locis pœnitentes ad dictos Commissarios in casibus reservatis accedere valeant; ex multis aliis gravibus causis animum nostrum moventibus, potestatem absolvendi in gravioribus delictis Nobis reservatis, occultis tamen, idque in foro conscientiae duntaxat, ulterius extendere, omnibusque Nobis subjectis Parochis legitime vocatis impertiri volumus, quo facilius omnibus vere pœnitentibus ad gratiam & remissionem peccatorum aditus concedatur, inhærentes Placitis & Decretis Concilii Provincia-

(b) Concil. Trid. Sess. III. de Reform. cap. 2.

(c) Conc. Prov. Colon. A. 1536. Part. 7. c. 7. & An. 1549. in Censur. & Decr. sub Num. XV.

(d) 1. Cor. 2.

(e) In Statutis Provinc. sub Adolpho anno 1550.



vincialis anno 1536. celebrati, quod sic habet:

In occultis delictis ex reservatione casuum compertum habemus, nonnihil mali interdum accidere, vel quoddam peccator non habens in promptu Sacerdotem, qui illum absolvat, confiteri vel differt, vel contemnit; vel quod minores ætate sunt, vel mulieres, difficile adducantur, ut ex suis Parochiis non sine levi suspitione ad Nos, seu Commissarios nostros proficiantur. Quare ut consulamus & verecundiæ & famæ, visum Nobis est hanc potestatem nostram absolvendi a peccatis & casibus nostræ absolutioni reservatis, occultis tamen, omnibus Parochis per Diocesim nostram constitutis, rite vocatis, delegare: modo tamen Vicariorum nostrorum in Pontificalibus consilium requirant ac adhibeant.

VII. Archi-Presbyteri, sive Decani Rurales, Statuta suarum Decaniarum revidenda Nobis tradant, Capitula sua bis in anno convocent, in quibus Canones & Statuta Synodalia publicabunt, & contra ea delinquentes, quæ dignum est severitate, corripient & punient. Omnes item & singulas causas Beneficiales, Matrimoniales, & reliquas Ecclesiasticas ad tribunal Archi-Episcopi, vel Archidiaconi pro ea, quæ illis etiam juramento obstricti sunt obedientia, remittent.

VIII. Decretum denique Concilii Tridentini de reformatione Matrimonii, sæpius & suggestu a Pastoribus & Concionatoribus publicetur, ne simpliciores e populo ignorantiam prætere possint. Quod ob id visum est in fine, Latina & Germanica lingua, Statutis his Synodalibus subicere.

### *De Regularibus Monachis, & Sanctimonialibus.*

#### TITULUS III.

I. **Q**UAMVIS Superiores Ordinum, pro suorum subditorum confessionibus audiendis, Confessarios designare possint, eos tamen sive

per se, sive per alium idoneum examinare tenentur.

II. Ne Monialium ordinarii Confessarii seu Rectores, jurisdictionis potestate careant, legitima auctoritate instituantur, & ab Ordinario, aut ejus Vicario approbentur.

III. Ac quoniam (g) de Sanctimonialibus, dum ad unum aliquem Confessarium perpetuo adstringuntur, verendum, ne subinde aut metu, aut pudore in confessione peccata aliqua reticere, & conscientiam non plene exonerare inducantur, & tamen postea ad Sacrosanctam Communionem statutis temporibus cum aliis accedere non peritescant: ideo præter ordinarium Confessarium, bis aut ter in anno, offeratur alius extraordinarius, ab Ordinario loci deputatus, aut saltem approbatus, qui omnium confessiones audiat.

IV. Regulares (b) cujuscunque Ordinis, nisi a suis Superioribus de vita, moribus & scientia examinati, & approbati fuerint, ac de eorum licentia, etiam in Ecclesiis suorum Ordinum prædicare non possint: sed cum ea licentia personaliter se coram Episcopo, aut ejus in Spiritualibus Vicario præsentare, & ab eis benedictionem petere teneantur, antequam prædicare incipiant; In Ecclesiis vero, (i) quæ suorum Ordinum non sunt, ultra licentiam suorum Superiorum, etiam Episcopi licentiam habere teneantur, sine qua in ipsis Ecclesiis non suorum Ordinum nullo modo prædicare possunt. Episcopo autem contradicente nullus sive secularis, sive Regularis, etiam in Ecclesiis suorum Ordinum, prædicare præsumat.

V. Clausuram Sanctimonialium, (k) ubi violata fuerit, diligenter restitui, & ubi inviolata est, conservari maxime desiderantes, statuimus & ordinamus, quod ingredi intra septa Monasterii nemini liceat, cujuscunque generis aut conditionis, sexus vel ætatis fuerit, sine Episcopi vel Superioris licentia in scriptis obtenta, sub excom-  
muni-

(g) Conc. Prov. sub Adolpho III. an. 1549.

(b) Conc. Trid. Sess. V. de Reformatione, c. 2.

(k) Conc. Trid. Sess. XXV. c. 5.

Conc. Trid. Sess. XXV. cap. 10.

(i) Conc. Trid. Sess. XXV. c. 4. de Reformatione.

municationis pœna ipso facto incurrenda. Dare autem tantum Episcopus, vel Superior licentiam debet in casibus necessariis. Pari ratione & pœna mulieres virorum Monasteria ingredi prohibeantur.

VI. Nemini quoque Regularium (1) tam virorum, quam mulierum liceat bona immobilia, vel mobilia, cuiuscunque qualitatibus fuerint, etiam quovis modo ab eis acquisita, tanquam propria, aut etiam nomine Conventus possidere vel tenere: Sed statim ea Superioribus tradantur, Conventuique incorporentur. Nec deinceps liceat Superioribus bona stabilia alicui Regulari concedere, etiam ad usum fructum, vel usum, administrationem, aut commendam. Administratio autem bonorum, Monasteriorum aut Conventuum ad solos Officiales eorundem ad nutum Superiorum amovibiles, pertineat.

*De vagis & peregrinis Sacerdotibus.*

TITULUS IV.

I. **N**ulli vago, (m) ignoto & peregrino Sacerdoti, sive seculari, sive regulari sit, in ulla Ecclesia celebrare, aut alios Sacros actus exercere liceat, priusquam de ordinatione sua rite adepta, deque vita, moribus, eruditione ac titulo fidem fecerit, per sui Ordinarii literas, aut publica instrumenta: docueritque nullo Ecclesiastico impedimento se ab executione ordinis arceri. Quibus quidem literis atque instrumentis exhibitis a nostro in Spiritualibus Vicario, vel si extra Coloniam versetur, a Decano Rurali, ad quem istius loci cura spectabit, licentiam in scriptis petere debebit.

*De his, quæ ad populum pertinent.*

TITULUS V.

I. **M**onendus (n) populus diligenter, teneri unumquemque

Parochiæ suæ interesse, ubi commode id fieri potest, ad audiendum Verbum Dei.

II. Monendus (o) idem populus (quod Sacrosancta Synodus Tridentina Decreto de observandis & evitandis in celebratione Missæ constituit) ut frequenter ad suas Parochias, saltem diebus Dominicis & Festis accedant.

III. Quæ sint Festa celebria Ecclesiæ Colonienfis, præscriptum & definitum est in Statutis Provincialibus sub HENRICO anno 1397. & ADOLPHO Archi-Episcopis anno 1549., ac tametsi ea omnia, ut a Majoribus præscripta sunt, non tantum a Clero nostro, sed ab omni populo etiam in foro debite observari cuperemus: tamen & Festorum hujus Patriæ mediocrem multitudinem, supra morem aliarum Ecclesiarum excrecentem, & populi in eorum observantia flaccescentem devotionem attendentes, peccati periculum ab infra scriptis duximus removendum: Videlicet, Agnetis, Cathedræ & Vinculorum Petri, Georgii, Pantaleonis, Exaltationis S. Crucis, Gereonis, undecim millium Virginum, Severini, Cuniberti, Cæcilie, & Innocentium. Itaque propter varias hujus vitæ & temporum necessitates, in prædictis Festis obligationem feriandi relaxamus, ut culpa vacent, qui iisdem diebus laboraverint: sed maneat tamen per omnia eorundem in Ecclesiis consueta observantia. Ad excitandam autem fidelium pietatem, omnibus, qui Sacrificio Missæ, cæterisque Officiis Divinis prædictis Festis interfuerint, suas preces cum Ecclesia ad Deum pie attenteque fundentes, 40. dies Indulgentiarum pro qualibet vice de Omnipotentis Dei misericordia confisi, auctoritate nostra ordinaria clementer concedimus.

IV. Mandamus quoque & præcipimus, ne in Civitatibus & vicis nostræ Diocesis Dominicis & Festis diebus sub Concione & Missa ænopolia & cervisariorum officinæ, nisi viatoribus & peregre advenientibus aperiantur, ne popu-

(1) Conc. Trid. Sess. XXV. cap. 2.

(m) Conc. Provinc. Colon. an. 1536. Parte 1. cap. 31. & Trid. Sess. XXII. in Decreto de observandis & evitandis in celebratione Missæ.

(n) Conc. Trid. Sess. XXIV. cap. 4. de Reformat.

(o) Ibid. Sess. XXII.

populus a cultu Divino ad compotationes cum insigni profanatione Festorum, & Dei offensâ pertrahatur. Contra delinquentes pœnis arbitrariis procedi faciemus.

V. Pastores item frequenter (p) & diligenter subditos suos utriusque sexus admoneant; quotquot ad annos discretionis pervenerunt, teneri, ut omnia sua peccata, humiliter, integre, aperte, & distincte minimum semel in anno confiteantur proprio Sacerdoti, aut de ejus, vel Superioris licentia, alteri sæculari, vel regulari Presbytero, per Ordinarium loci admissio & approbato, utque ad minus in Paschate Sacrosanctam Eucharistiæ Communionem, non nisi de manibus proprii Sacerdotis reverenter accipiant; alioqui viventes ab ingressu Ecclesiæ arceantur, & morientes Christiana careant sepultura.

VI. Alioqui nemo Christianus, (q) qui in communionem decessit Ecclesiæ, ab Ecclesiastica sepultura arceatur, etiamsi casu & repentina morte extinctus fuerit. Soli vero hæretici, excommunicati, publici latrones, & hi, qui sibi mortem criminis conscientia adacti consciverunt, & quos in peccato lethali, nullis pœnitentiæ signis præcedentibus, decessisse constiterit, prohibeantur.

*Sequitur Decretum Concilii Tridentini de Reformatione Matrimonii.*

**T**Ametsi dubitandum non est, (r) clandestina Matrimonia, libero contrahentium consensu facta, rata & vera esse Matrimonia, quamdiu Ecclesia ea irrita non fecit, & proinde jure damnandi sint illi, ut eos Sancta Synodus anathemate damnat, qui ea vera ac rata esse negant, quique falso affirmant, Matrimonia a filiis-familias sine consensu parentum contracta, irrita esse, & parentes ea rata vel irrita facere posse; nihilominus Sancta Dei Ecclesia ex justissimis causis illa semper detestata est, atque prohibuit. Verum cum Sancta Synodus animadvertat, pro-

hibitiones illas propter hominum inobedientiam jam non prodesse, & gravia peccata perpendat, quæ ex eisdem clandestinis conjugis ortum habent; præsertim vero eorum, qui in statu damnationis permanent, dum priore uxore, cum qua clam contraxerant, relicta, cum alia palam contrahunt, & cum ea in perpetuo adulterio vivunt. Cui malo cum ab Ecclesia, quæ de occultis non judicat, succurri non possit, nisi efficacius aliquod remedium adhibeatur: idcirco Sacri Lateranensis Concilii sub Innocentio III. celebrati, vestigiis inhærendo præcipit, ut in posterum, antequam Matrimonium contrahatur, ter a proprio contrahentium Parocho tribus continuis diebus festivis in Ecclesia, inter Missarum solemnias publice denuntietur, inter quos Matrimonium sit contrahendum: Quibus denuntiationibus factis, si nullo legitimum opponatur impedimentum, ad celebrationem Matrimonii in facie Ecclesiæ procedatur; ubi parochus viro & muliere interrogatis, & eorum mutuo consensu intellecto, vel dicat: Ego vos in Matrimonium conjungo, in nomine Patris, & Filii, & Spiritus Sancti: vel aliis utatur verbis, juxta receptum uniuscujusque provincie ritum. Quod si aliquando probabilis fuerit suspicio, Matrimonium malitiose impediri posse, si tot præcesserint denuntiationes, tunc vel una tantum denuntiatio fiat, vel saltem parochus, & duobus vel tribus testibus præsentibus Matrimonium celebretur: Deinde ante illius consummationem denuntiationes in Ecclesia fiant, ut, si aliqua subsint impedimenta, facilius detegantur; nisi Ordinarius ipse expedire judicaverit, ut prædictæ denuntiationes remittantur, quod illius prudentiæ & judicio Sancta Synodus relinquit. Qui aliter, quam præsentem parochum, vel alio Sacerdote de ipsius parochi, seu Ordinarii licentia, & duobus vel tribus testibus Matrimonium contrahere attentabunt, eos Sancta Synodus ad sic contrahendum omnino inhabiles reddit, & hujusmodi contractus irritos & nullos esse decer-

(p) In Statutis Sifridi cap. 8. de Pœnitentia, & Henrici anno 1310. Statuto 20.

(q) Conc. Provinc. an. 1536. Part. 7. c. 15.

(r) Trid. Sess. XXIV. c. 1. de Refor. Mat.



decernit, prout eos præfenti decreto irritos facit & annullat. Insuper parochum, vel alium Sacerdotem, qui cum minore testium numero; & testes, qui sine Parocho vel Sacerdote hujusmodi contractui interfuerint, nec non ipsos contrahentes graviter arbitrio Ordinarii puniri præcipit. Præterea eadem Sancta Synodus hortatur, ut conjuges ante benedictionem Sacerdotalem in Templo suscipiendam, in eadem domo non cohabitent; Statuitque, benedictionem a proprio Parocho fieri; neque a quoquam, nisi ab ipso Parocho, vel ab Ordinario licentiam ad prædictam benedictionem faciendam, alii Sacerdoti concedi posse; quacunque consuetudine, etiam immemorabili, quæ potius corruptela dicenda est, vel privilegio, non obstante. Quod si quis Parochus, vel alius Sacerdos, sive regularis, sive secularis sit, etiamsi id sibi ex privilegio vel immemorabili consuetudine licere contendat, alterius Parochiæ sponso, sine illorum Parochi licentia, Matrimonio conjungere, aut benedicere ausus fuerit, ipso jure tamdiu suspensus maneat, quamdiu ab Ordinario ejus Parochi, qui Matrimonio interesse debe-

bat, seu a quo benedictio suscipienda erat, absolvatur. Habeat Parochus librum, in quo conjugum & testium nomina, diemque & locum contracti Matrimonii describat, quem diligenter apud se custodiat. Postremo Sancta Synodus conjuges hortatur, ut antequam contrahant, vel saltem triduo ante Matrimonii consummationem sua peccata diligenter confiteantur, & ad Sanctissimum Eucharistiæ Sacramentum pie accedant. Si quæ Provinciæ aliis, ultra prædictas, laudabilibus consuetudinibus & cæremoniis hac in re utuntur, eas omnino retineri Sancta Synodus vehementer optat. Ne vero hæc tam salubria præcepta quemquam lateant, Ordinariis omnibus præcipit, ut cum primum poterunt, curent hoc Decretum populo publicari ac explicari in singulis suarum Diocesium Parochialibus Ecclesiis, idque in primo anno quam sæpiissime fiat; Deinde vero quoties expediri viderint. Decernit insuper, ut hujusmodi Decretum in unaquaque Parochia suum robur post triginta dies habere incipiat, a die primæ publicationis in eadem Parochia factæ numerandos.

#### NOTATIO EDITORIS

#### *De causa intermissarum Coloniae ab anno 1551. usque ad annum 1598. Synodorum.*

**O**Mnes inter Germaniæ Ecclesias nulla est, quæ per priores quinque Sæculi XVI. Decades Synodos tam multas a se celebratas exhibeat, quam Coloniensis. In hac enim ab anno 1513. usque ad annum 1551. Diocesanas decem, ac duas insuper Provinciales habitas fuisse, Tomo nostro VI. ostendimus, allatis, quæ in eisdem editæ & promulgatæ fuerunt, Constitutionibus. Harum Provincialium primam anno 1536. convocavit Hermannus a Weda, funestissimi fatis Præsul, qui vix elapso post eam Synodum quadriennio, Buceris fraude circumventus, gravissimo Provinciæ Metropolitanæ detrimento, maximoque fidelium omnium scandalo a Catholica fide defecit, factus apostata: ac propterea ex Rom. Pontificis, Cæsarisque sententia damnatus, Ecclesiastica simul & Principali, Electoralique dignitate ac Jurisdictione privatus est. *Vide, quæ de illo diximus eod. Tom. VI. pag. 236.*

Altera Provincialis habitæ fuit ab Hermanni Successore, Adolpho e Comitibus de Schawenburg. In hac cum Clero Provinciali deliberatum de mediis, quibus restaurari possent, quæ ab Antecessore depravata per hæresin fuerant. Saluberrimæ cum in finem editæ Constitutiones, quæ ut inducerentur in usum, Clerum suum bis duobus annis subsequentibus Diocesanam ad Synodum congregavit Vigilantissimus Archi-Episcopus, & ut Turckius in MSS. inquit, inter maxime eximios Ecclesiæ Coloniensis Antistites jure numerandus. Ad cujus cæteras laudes illud etiam pertinet, quod ultimus ipse Colonienses inter Archi-Episcopos extiterit eo sæculo, qui solenni consecrationis ritu Episcopalis Ordinis charactere fuerit insignitus, quo honore, ut Gelenius, ac Turckius asserunt, integro centum prope annorum spatio caruerunt, quotquot post Adolphum ad Sacra apud Ubios moderanda electi sunt, donec

donec Maximilianus Henricus Bavarus, Ferdinandi Successor, anno 1651. istam Episcopalis consecrationis gloriam, quam a Fabio Chisio, Apostolico tunc Nuntio, accepit, Sedi Colonienſi denuo vindicavit.

Eodem Adolpho, anno 1556. mortuo, interrupta etiam fuit apud Ubios, utilissima, & nunquam satis prædicanda Synodorum celebrandarum consuetudo. Nam ab anno 1551. quo ultima, ut opinor, Diœcesani Cleri Comitia sub Adolpho Coloniae coacta fuere, nullum amplius longo, circiter quadraginta ac septem annorum intervallo, Synodalem Cleri conventum ibidem congregatum inveni usque ad annum 1598. sub Ernelſto Bavaro Archi-Episcopo, cujus Synodi Constitutiones mox dabimus.

Interruptionis hujus tam diuturnæ multiplices recenſeri cauſæ poſſunt: quarum aliæ omnibus Germaniæ Eccleſiis fuere communes, publicæ nimirum Germanorum, poſt inſectum a Luthero ſchiſma, a ſe invicem circa fidei dogmata diſſidentium diſcordiæ, & internecina, quæ inde nata ſunt, bella: aliæ particulatim ad Eccleſiam Colonienſem pertinere, quæ eo tempore Episcopos habuit aut valetudinarios & brevissimi regiminis, aut communis belli curis impeditos: unum etiam de fidei ſinceritate non leviter ſuſpectum: alium manifeſtum apoſtatam, ac lupum potius, quam Pastorem, qui Diœceſin univerſam ſædiſſime laceravit, ac tantum non penitus peſſumdedit.

Non aberraverim a ſcopo hujus operis, ſi, quo manifeſtior Lectoribus fiat Colonienſis Eccleſiæ ſtatus, Episcoporum horum nomina ac ſeriem, rerumque ab ipſis geſtarum ideam quandam breviter exhibuero.

Quinque fuerunt, qui poſt Adolphum Schawenburgicum, ad regendam hanc Metropolim deſecti fuerunt, Archi-Episcopi. Primus hos inter fuit Adolphi frater, Antonius Schawenburgicus. In hunc Cleri Primates tanto propenſius ſua vota contulerunt, quanto recentius adhuc apud eosdem vigeſat deſiderium Adolphi, quem nuper amiſerant, quemque in fratre ſuperſtite ſpiraturum, recturumque opinabantur, cum illi par fere ineſſe cernerent ingenium, indolemque. Nec fortalſe ſpes ipſos ſua ſefelliſſet; ſi Antonio ſupperiſſet aut ætas vegetior, aut vita diuturnior. Verum non diu gaudere eo Præſule Colonienſibus conceſſum fuit: Nam cum anno 1558. Francofurtensibus e Comitibus, in quibus una cum aliis VII.-viris Majeſtatem Imperii in Ferdinandum Regem tranſtulit, ad ſuos rediſſet, ſolennemque pro more in Urbem Colonienſem ingreſſum pararet: in gravillimum morbum incidit, quo Medicorum artem atque induſtriam omnem ſuperante, die 18. Junii in arce Godesbergenſi, præpropere fato diem extremum clauſit: (P. Mich. Mörckens Carthuſian. apoplexia extinetum ſcribit) cum Eccleſiæ præſuiſſet anno uno, & menſibus circiter novem.

Huic eodem anno 1558. VII. Kal. Auguſti ſubrogatus eſt Joannes Gebhardus e Comitibus de Mansfeldt, Trajecti ad S. Servatium, & Coloniae ad S. Georgium Præpoſitus, idemque binis Antecelloribus affinitate conjunctus. Præter claritudinem generis egregios mores atque indolem ad oblatum ſibi Principatum attulit, naturam naſtus, modeltiæ, pacis ac tranquillitatis, inſitæque clementiæ doribus egregie exornatam. Et quanquam Gentilitiæ domui labes non modica ab hæreſi Lutherana adhæreret, ipſe tamen in fide Orthodoxa, quoad vixit, conſtantiffime perſiſtit: Vir, ut a Cleinſorgio, Merſæo, aliisque prædicatur, ſplendidus, magnificus & liberalis. Brevitas imperii, uti Antecellorem, ita & ipſum a rebus magnis gerendis impedit: nam annis tantum quatuor, ac tribus menſibus tenuit Episcopatum, incommoda diu valetudine uſus, inclinante in hydropiſin corpore, quo ex morbo demum Brulæ occubuit anno 1562. IV. Nonas Novembris, eidem ſepulchro illatus, quod non ita pridem Antecelloribus ſuis & Affinibus Schawenburgicis Metropolitano in Templo erigi, magnificeque exornari curaverat.

Extat gravillimum ejus ediſtum, adverſus Sectam Anabaptiſtarum, anno 1560. promulgatum Kempenæ, in *Wilmii Chron. MS.*

Decimo poſt Joannis Gebhardi ſepulturam die, maturatis Cleri Comitibus, Successor illi datus eſt Fridericus, e Wedanorum Comitum ſtirpe ortus. Parentes habuerat Joannem Wedæ Comitem, Runckelii Dynaſtam, & Eliſabetham, Joannis Naſſovici, Vianæ & Diezii Comitum filiam. Nepos erat infelicis Hermannii Wedani, Colonienſium pariter Archi-Episcopi, cujus in Sede ſua propter hæreſim deſecti ſupra meminimus. Unde mirum videri merito poteſt, quod Eccleſiæ Colonienſis Primates, Apoſtatiæ tam recentis immemores, ex eadem familia, Lutheri dogmati-

bus addicta, Antistitem sibi deligere non dubitaverint. Sed fuerint forte superstites in Clero, qui ejusdem Hermanni partibus olim adherentes, iisdemque cum illo opinionibus imbuti, novum in Friderico Hermannum optaverint. Utut sit, non ipsimet Friderico ista sui electio magnopere placuit, invitique ad oblatam sibi Provinciam administrandam accessit. Erat enim jamrum senecta invalidus, languido corpore, animoque, & auditu prope destitutus. Quare ejus etiam regimen nulla pene a rebus præclare gestis laude nobilitatum, & nec utile subjectis, nec ipsi gloriosum fuit.

Ad fidem ejus quod attinet, sunt, qui in Catholica constanter perstitisse contendunt: sunt alii, qui in suspensionem illum adducant, tanquam si propenso nimium erga Protestantes fuerit animo, iisdemque faverit. Illud certum, quod eo permoveri potuerit nunquam, ut præceptam a Tridentino Concilio, & a Pio IV. Papa præscriptam Catholicæ Fidei Professionem emitteret: malueritque demum amplissimæ Archi-Episcopali, Electoralique dignitati renuntiare; quam Catholicum se ex ea, quam dixi, formula, juramenti religione interposita, profiteri. Multum in eo, ab ista animi fluctuatione avocando S. Pius V. Pontifex Max. laboravit. Literas ad eum dedit plenas amoris & benevolentiae: Rationes, quibus illo juratæ Professionis edendæ præcepto, non teneri se existimaverat, evertit: Cardinali Commendone, Apostolico Augustana ad Comitata Legato, istud singulari cura in mandatis dedit, ut omni meliore, quo posset, modo Friderici animum expugnaret, atque ad præstandam Rom. Pontifici ea in re obedientiam inflecteret: Immo & ipsius Imperatoris imploravit operam, ut Suae Majestatis autoritate eundem ad saniora sequenda consilia adducere non gravaretur: ut ipsa, quæ mox afferemus, literarum monumenta ostendent. Sed irriti fuere conatus. Nihil precibus, nihil monitis, nihil minis profectum. Tandem cum Fridericus Romanum Pontificem ab exigenda ea Fidei Professione nunquam destitutum: nec alia via se, factæ in sui favorem electionis confirmationem ab eodem impetraturum, jamque de altero sibi in Sede Coloniensi substituendo agi adverteret; ut istam a se amoliretur infamiam, seu sponte sua motus, seu inductus ab aliis, anno 1567. VIII. Kal. Januarii oblato sibi Pontificatu ultro se abdicavit, facta Metropolitanæ Ecclesiæ Canonicis potestate, alium, quem vellent, eligendi. Abdicationem hanc Patres, volentes, lubentesque accepere, privatoque deinceps victuro, trium millium aureorum florenorum pensionem annuam adstipulati sunt: cui tamen summæ intercessit Successor. Litem mors diremit. Nam antio postero exeunte, X. Kal. Januarii, cum totus sacris voluminibus lectitandis vacaret, tenuique cum familia frugalem prorsus vitam instituisset, subito extinctus est. Administrevit Ecclesiam Coloniensem Annis IV. Menses XI. dies duodeviginti.

Literas nunc subjiciam, quarum antea memini.

**EPISTOLA FRIDERICI a WEDA, COLONIENSIS ARCHIEpiscopi electi, ad S. PIUM V. Pontificem Maximum, quæ causas exponit, cur Fidei Professione supersedendum censeat.**

**BEATISSIME PATER, AC DOMINE CLEMENTISSIME!**

**P**ost beatorum pedum oscula, & debitam promptissimamque erga Sanctam Sedem Apostolicam reverentiam, & observantiam. Quandoquidem Omnipotens, & misericors Deus post obitum felicitis recordationis PII IV. Pontificis Maximi, Sanctitatem Vestram, ut excellenti doctrina præditam, & vitæ innocentia insigniter ornatam, ita Summo Pontificatu maxime dignam, ad regimen Ecclesiæ suæ vocavit, non possum nisi & Divinæ ejus Majestati, ac bonitati ex animo gratias agere, & Sanctitati Vestræ eo nomine reverenter & humiliter

gratulari, faustaque & felicia omnia illi precari. Quamvis autem maturius aliquanto hoc ipsum facere, & pro impetranda confirmatione devote, humiliter & diligenter instare constitueram; cum tamen intelligerem, Sanctitatis Vestræ, Sanctæque Sedis Apostolicæ Legatum bisce Augustanis Comitibus interfuturum, non inconveniens existimaui, hanc rem in hac Comitata rejici, humiliterque hinc petere, ut Sanctitas Vestra illud, quidquid est moræ, atque dilationis, patienter ferat, mibique pie ignoscat.

Porro



Porro Sanctitatis Vestrae clementissimas literas, per ejusdem Legatum Reverendissimum, & Illustrissimum Dominum Joannem Franciscum Cardinalem Commendonum, in hisce Comitibus mihi presentatas, ea, qua decet, reverentia & humilitate accepi. Ex quibus Sanctitatis Vestrae Summo Pontifice dignam curam, sollicitudinem, & vere paternum affectum erga gregem sibi commissum, & me (cui & filii nomen clementer tribuit, & paternis adhortationibus ad præstandum id, quod officii suscepti ratio exigit, non leve calcar addidit, & promptissimum animum suum gratiosissime significavit) facile intellexi. Quonomine Sanctitati Vestrae summas merito gratias ago, humiliterque, ac reverenter polliceor, me & hisce tam salutaribus, piis ac paternis adhortationibus, quantum in me erit, ea, qua decet, obedientia pariturum, & Deo volente, usque ad extremum vitæ spiritum in obedientia Sanctæ Romanæ, & Catholicæ Ecclesiæ, Sedisque Apostolicæ constanter permansurum, & nihil, quod ad ejus auctoritatem, ac dignitatem conservandum, & gregis mihi concrediti salutem, Ecclesiæque commissæ utilitatem pertinebit, & in mea potestate erit, intermissurum.

Ceterum cum ad has tantas res, quas officium meum postulat, rite peragendas, Electionis meæ confirmatione summo opere opus habeam, non potui non cum præfato Reverendissimo Domino Legato de hujusmodi confirmationis negotio diligenter conferre, illique omnes difficultates, quæ hactenus circa idem negotium interciderunt, & causas, propter quas nihil insoliti, & inusitati a me exigendum existimem, plene & confidenter recensere. Quamvis autem idem Reverendissimus Dominus Legatus, Vir integerrimus, ad hanc rem promovendam sese perquam benigne, amanter, ac fraterne obtulerit; ne tamen mandati sui fines excedere videretur, ad Sanctitatem Vestram me remisit, promissitque, se in hac re facturum, quæ posset, omnia. Cum igitur, Sanctissime Pater, omnibus aliis difficultatibus superatis, hæc sola supersit, quod non tantum vetus juramentum, ad quod præstandum me semper obtuli, nec ea tantum obedientia, quam Prædecessores mei hactenus præstare consueverunt (cujus in Brevis Sanctitatis Vestrae fit mentio) sed præterea insolita quidem, atque jurata Fidei Professio a me exigitur; ea autem vel hanc ob causam, quod electio de me facta, & negotii confirmationis

plena instructio, ab ejusdem impetratione (quam nihil, quod in mea potestate fuit, impedivit) benigna juris interpretatione non differens, & existimationis, ac fidei meæ sufficiens defensio, & professio, Summi etiam Pontificis calculo approbata, dudum ipsius Concilii Tridentini conclusionem, & confirmationem præcesserit, in hoc casu nec necessaria sit, nec infelici ac turbulento hoc tempore sine summo Catholicæ Religionis & Ecclesiæ afflictissimæ, mihi commissæ detrimento a me præstari possit: ut hæc omnia prædictus Dominus Legatus ex me, meisque plenius intellexit, & Sanctitati Vestrae procul dubio fideliter relaturus est. Idcirco, quanta possum, & debeo, humilitate, & reverentia peto, ut tandem Sanctitas Vestra solito juramento a Procuratore meo, Romæ excolente, (\*) recepto, omnique difficultate, & mora submota, confirmationem tantopere desideratam, & periculosissimis hisce temporibus Ecclesiæ Colonienfi adeo necessariam, gratiose mihi concedere, & benigna legis sequentis interpretatione, totque relevantium causarum ratione habita, hac vice insoliti, & inusitati juramenti præstationem clementer remittere dignetur. Quod si, ut spero, fiat, non poterunt illi, qui post hæc eligendi, & confirmandi sunt, quorum par similisque causa non erit, hoc ipsum in exemplum trahere. Ego certe non eo minus Catholicæ Fidei, & Religionis, quam toties & verbis & scriptis, & re ipsa professus sum, sectator, & propugnator ero, & ab eo, Deo me favore suo prosequente, nunquam recedam. Spiritus Domini nostri JESU CHRISTI animam, & omnes conatus Sanctitatis Vestrae ad DEI gloriam, & salutem Christiani Orbis dirigere, & Sanctitatem Vestram diu nobis incolumem servare dignetur.

Datum Augusta Vindelicorum VI. April.  
MDLXVI.

Sanctitatis Vestrae

Devotissimus Filius  
FRIDERICUS, Electus  
Colonienfis.

RESPON-

(\*) forte: Romam incolente.

**RESPONSORIA S PII V. PAPÆ**  
ad FRIDERICUM a WEDA, electum Coloniensis Ecclesiæ  
Archi-Episcopum.

DILECTO FILIO FRIDERICO, ELECTO COLONIENSI, SACRI ROMANI  
IMPERII PRINCIPI, ELECTORI.

P I U S P A P A V .

**D**ecte Fili! &c. Cuperemus admodum, Te Fratris nomine posse honorare, sicut mos est Romanorum Pontificum, eos, qui consecrationis munus jam susceperunt, Archi-Episcopos, & Episcopos appellare. Sed Te, donec id suscipias, filium ad Paternæ nostræ erga Te benevolentiae indicium appellamus, confisi, fore, ut utriusque erga Te & Patris, & Fratris affectum conservantes usitatio Te nomine appellemus. Accepimus Literas tuas, quibus primum nobis gratularis, quod ad Apostolatus officium assumpti fuerimus. Gratum fuit nobis, perinde ac debuit, illud tuæ erga nos pietatis indicium. Hoc autem Dei de nobis iudicio ita demum nos quoque letabimur, si quid dignum hoc loco, in quo sine meritis nostris constituti fuimus, ad Divinæ Majestatis honorem, & Ecclesiæ Catholice utilitatem egere, Divina gratia fervente, ac Te, ac cæteris, qui nobis adesse debent, iuvantibus, poterimus, omnes labores, ac molestias, quas tecum (\*) tantæ servitutis officium offert (\*\*), patientissimo, ac libentissimo animo excepturi. Cum Dilectionem Tuam de assumptione nostra certiores per literas fecissemus, grato quoque animo acceptam abs Te fuisse hortationem nostram libenter cognovimus. Cui cohortationi nostræ quod ea, qua decet, obedientia obtemperaturum Te esse polliceris, laudamus admodum in Domino istud pium propositum tuum, & magnam in spem venimus, ut nostris salutaribus monitis acquiescas. De Professione Fidei, secundum Tridentini Concilii Decretum faciendam, intelleximus, quæ Tu excusandi Tui causa attulisti: sed in ea exigenda perseverare compellit nos commissum nobis officium. Etenim curare debemus, ut, cum omnia, quæ

tam salubriter, & sapienter, non sine Spiritus Sancti instinctu, in eo fuerunt Concilio statuta, atque decreta, ab omnibus, & ubique suscipiantur, tum ea maxime, quæ ad fidem pertinent, inviolata servantur, nec quicquam in eis gratiæ concedatur. Nec ullam Tibi in eo injuriam facimus. Etsi enim electio Tua istud Concilii Decretum præcessit, tamen, cum non fueris adhuc confirmatus, non tempus, quo electus fuisti, sed quo confirmandus es, spectari debet. Neque est, quod verearis, ne fides tua ob eam causam in dubium vocari videatur. Non enim lædetur fama tua, non æstimatio violabitur. Laderes eam Tu ipse potius, & quadam nomen tuum labe commutares, si, quod omnibus electis in universum prescriptum est, ipse exsiqui pertinacius recusares. A nobis quidem si quis nostræ Fidei Professionem exigeret, eam, juxta Apostoli præceptum, reddere sine mora, & cunctatione ulla parati essemus. Quocirca Te etiam atque etiam hortamur, & admonemus, ut hac in re nos audias, qui Te sincere in Domino diligimus, & id tibi suademus, quod si feceris, ut speramus, omnes recte, pie, sapienterque abs Te factum judicaturi sunt. Consules honori tuo, consules conscientiæ, consules Ecclesiæ tam nobili, cui officium Pontificale præstare non potes, sicut a Prædecessore nostro monitus fueras, nisi confirmationem obtinueris, ut consecrationis munus postea suscipere, atque ita Ecclesiam, sicut decet, administrare possis. Sed de hac re Tecum pluribus aget Legatus noster, cujus orationi fidem habebis. Datum Romæ apud S. Petrum sub annulo Piscatoris die XIII. Junii 1566. Pontificatus nostri anno primo.

**EPISTOLA Ejusdem PII V. P. M. ad MAXIMILIANUM II.**  
Imper., qua rogat, ut conetur Confessionem Fidei ex Fridero Wedano exprimere.

CHARISSIME IN CHRISTO FILI NOSTER SALUTEM!

**Q**uanti momenti sit negotium, de quo ad Majestatem Tuam scribendum esse duximus, & quantæ curæ Nobis esse debeat,

Majestas Tua pro sua sapientia facile intelliget. Coloniensis Electus abhinc triennium, & eo amplius, cum ad eam Ecclesiam electus fuit, et si initio

(\*) forte: secum.

(\*\*) forte: assert.

initio confirmationem suam ab Apostolica Sede, Prædecessorum suorum, & aliorum Catholicorum more, petiit; tamen quo minus eam obtineret duo impedimenta, ac difficultates ipsemet objecit: quarum altera, quæ ad jura Cardinalium, & aliorum Curie Romanæ Officialium pertinet (quæ levior fuit) fel. record. PII Papæ IV. Prædecessoris nostri hortatu, & ipsorum Cardinalium æquitate ac benignitate minui facile potuisset; sicut ipsi significatum fuit. Altera ejusmodi fuit, ut eam nemo Catholicus, nedum Prælati obicere debuerit. Cum enim deberet juxta S. Tridentini Concilii Decretum Sanctissimum, & his temporibus maxime necessarium Fidei suæ Confessionem facere, priusquam confirmaretur, & de ea facienda non semel admonitus fuisset, eam facere recusavit; tametsi ea suscepta, & usu recepta fuerit juxta formam ab ipso Prædecessore nostro approbatam, non in Italiae solum, & Franciæ, Hispaniæ, ac Poloniæ Regnis, sed in ipsa etiam Germania. Qua in re ejus recusatio, & tam diuturna contumacia silem ejus non parvam in suspicionem adduxit, & maximum Coloniensibus, & omnibus Catholicis scandalum peperit: quod Nos scandalum pro Pastoralis officii munere removere compellimur. Sed, quia invitati ad acriora remedia essemus descensuri, testandum prius duximus, sicut hujus S. Sedis, ac nostra mansuetudo, ac moderatio postulat, si ipsum lenibus remediis adducere possumus, ut errorem suum agnoscat. ac Catholici viri ac Prælati officio fungatur. Quocirca Majestatem Tuam,

cujus auctoritate magnopere eum commotum iri speramus, hortandam in Domino duximus, & rogandam, ut eum benevole officii sui ad moneat, & ad hujusmodi confessionem faciendam, ac parendum Apostolicæ Sedis tam æquis. & salutaribus monitis adhortetur, & illis eum rationibus, quas Majestati Tuæ sua sapientia suggererit, inducat: ac, si de hac re in Comitibus agere tentarit alicujus Principis favore nixus, sicuti eum in animo habere certiores facti sumus, ab hac eum temeritate deterreat. Erit hoc pietatis Majestatis Tuæ dignum officium, & illi gratissimum esse debet, nobis certe erit, qui nolumus ullam necessitatem nobis imponi, cum eo severius agendi, ac parati sumus, si ille officio, quo debet, functus fuerit, & debitam huic S. Sedi obedientiam præstiterit, paterna illum charitate complecti. Sed, si in contumacia perseveraverit, nec Apostolica monita, nec Cæsareæ Tuæ Majestatis auctoritas satis apud eum valuerit, non poterimus officium ejus prætermittere, & juxta Canonicas Sanctiones necessitati tam nobilis Ecclesiæ, quæ tamdiu Pastore caret (tametsi is se pro Archi Episcopo gerere minime vereatur) providere, & ne id malum propter exemplum latius serpat, occurrere, Deo juvante, curabimus: Majestatis Tuæ, & omnium Catholicorum favorem Nobis juste, quod justum fuerit, facientibus, ipsiusque imprimis Omnipotentis auxilium non defuturum esse confisi. Datum Romæ apud S. Petrum sub annulo Piscatoris die 23. Mart. MDLXVI. Pontificatus nostri anno Primo.

Porro, ut elucescat magis, quanta fuerit hujus Pontificis pro Ecclesia Coloniensi sollicitudo; binas adhuc alias Literas adjiciam, quibus idem Ssmus, postquam illi de ultronea Friderici Wedani abdicatione renuntiatum fuit, tum Cleri primores, tum ipsum quoque Imperatorem Maximilianum II. adhortatur ad omnem operam adhibendam, ut proxima in electione de digno idoneoque Præsule, in Friderici locum substituendo, Ecclesiæ illi Metropolitanæ provideatur.

## DILECTIS FILIIS DECANO, ET CAPITULO ECCLESIAE COLONIENSIS.

### DILECTI FILII, SALUTEM ET APOSTOLICAM BENEDICTIONEM.

**N**on parva animi molestia, ac solitudine liberati fuimus, postquam ex literis Nuncii nostri, apud Cæsaream Majestatem residentis, cognoverimus, eum, qui a vobis electus Archi Episcopus fuerat, suo tandem jure cessisse. Gaudemus admodum, & Deo gratias agimus, quod jam de integro potestas ad vos delata sit, novum Archi Episcopum eligendi. Hortamur autem in Domino, & omni

studio vos admonemus, ut officii vestri memores, matura deliberatione adhibita, & eo, quo decet, consensu, ejusmodi personam eligatis, ut electionis Vestrae & Deo & hominibus rationem reddere possitis. Agitur, ut videtis, honor Dei, agitur animarum salus; agitur officium & exultatio vestra. Cogitate, quam hæc turbulenta sint tempora: Mementote, quanto in periculo alias ista Ecclesia versata sit: quanti-



quanta damna & detrimenta acceperit quorundam Præfulum culpa. Si unquam Capitulum istud in eligendo Archi Episcopo curam & diligentiam adhibuit; nunc multo maiorem, quam antea, adhibeat, necesse est. Proinde Dei tantum obsequium, & animarum salutem, atque utilitatem Ecclesiæ, propositam ante oculos habete, & eligite, seu postulate virum, cuius exploratum & plane compertum habeatis Catholica fidei zelum: qui præterea vita, & moribus, & rerum usu, atque prudentia, ad tantæ Ecclesiæ regimen, non solum in Spiritualibus,

sed etiam in temporalibus, quam maxime aptus, atque idoneus sit. Talem si, ut speramus, vestra fide, probitate, prudentiaque confisi, elegeritis; Electio vestra Deo grata, Ecclesiæ salutaris erit. Vos autem Iudicii Vestri non solum a Nobis, & ab omnibus aliis, magnam laudem, sed a Deo etiam premium consequemini.

Datum Romæ apud S. Petrum, sub annulo Piscatoris, die 29, Novembr. 1567. Pontificatus nostri anno secundo.

### AD MAXIMILIANUM IMP.

CHARISSIMO IN CHRISTO FILIO NOSTRO, MAXIMILIANO, UNGARIÆ ET BOHEMIÆ REGI ILLUSTRÍ, IN ROMANORUM IMPERATOREM ELECTO.

PIUS PAPA V.

CHARISSIME &c.

**G**ravi admodum cura levati fuimus, postquam certiores facti sumus, Electum a Capitulo Colonienſi, electionis suæ juri cefſiſſe. Qua in re, ſicut M.ij. Tuam perſuaſum habemus ſunclam eſſe officio, quod ipſius ſapientia ac pietate dignum erat; ita conſidimus, curæ ei quoque futurum eſſe, ut ad Eccleſiæ tantæ regimen ejusmodi perſona a Capitulo eligatur, cujus integritas Fidei, ac Religionis orthodoxæ zelus, cum vitæ & morum honeſtate conjunctus ſit, quæque præterea ætate, ac rerum uſu apta ſit ad tantum onus ſubeundum. Etenim ſi unquam adhibita in eligendo cura fuit, hoc maxime tempore curandum & providen-

dum eſt, ut quam optimo Præfuli, ac Paſtori ea Eccleſia committatur: ad quod Nos quidem pro eo ac debuimus, ipſum Capitulum hortati ſumus: ſed ſperamus, ut diximus, Majeſtatem Tuam quoque ſtudioſe curaturam, ut hac in re DEI Omnipotentis bonori, & animarum ſaluti, quam optime conſulatur. Quod cum faciet, gratiſſimum DEI obſequium præbebit, & maximam ab hominibus laudem merebitur.

Datum Romæ apud S. Petrum, ſub annulo Piſcatoris die VI. Decembris 1567. Pontificatus noſtri anno ſecundo.

Eodem die, quo ſe imperio exuerat Fridericus, vel, ut alii volunt, tertio poſt, concordibus primarii Cleri votis, Archi-Epiſcopus renuntiatus eſt Salentinus, Comes Henburgicus, Metropolitanæ Eccleſiæ Colonienſis, ac ſimul Moguntinæ Canonici, idemque ad S. Gereonem Coloniz Decanus, & in Argentinenſi Cathedrali Eccleſiaſtici theſauri Cuſtos. Magna omnium gratulatione ejus excepta fuit electio: Nam præter nobiliſſimæ ſtirpis claritatem & formam Imperio dignam, multis fuerat egregius virtutibus Divinitus ornatus, cujus heroica decora & res, tum apud Colonienſes intra decennium, tum etiam aliquamdiu apud Paderbornenſes egregie geſtas, coram ſpectaſſe ſe gloriatur celebris ejus temporis Scriptor, Gerardus Cleinſorgius, qui illi a conſiliis fuit.

A reformatione Cleri regimen exorſus, viros probos, ſapientesque & eruditos conſtituit, qui Ordinem Eccleſiaſticum ad præſcriptam a Tridentino Concilio normam revocarent. Selecta etiam ex eodem Sacro Concilio Decreta anno 1569. promulgavit, eademque in ordinem digeſta ad Eccleſiarum Præſides tranſmiſit, ut inducenda in uſum, conſtanterque obſervanda curarent. Idem Eccleſiam Kempenſem ſuæ Diœceſis, a Bucero, qui novi Evangelii præconem ibidem egerat, prava doctrina infectam ac depravatam, opera Joannis Geyer Coloniz ad Ss. Apoſtolorum Decani, & ad S. Albanum Paſtoris, ad Catholicæ Fidei integritatem revocavit. Teſte Wilmio, Patria Kempenſi, ac dein in Cæſaris Inſula Decano in MS. Chronico rerum Colonienſium L. II.

Nec

Nec minor illi de jurisdictione temporali, possessionibusque suæ Ecclesiæ vel tuendis, vel recuperandis cura fuit. Acceperat Archi-Diœcesin, multis prædiis, villis, oppidis, ditionibusque accisam & mutilam: quæ ille paucorum spatio annorum, prudenti, minime tamen sordida, æconomia usus, reddita creditoribus pecunia redemit, suæque Ecclesiæ iterum adjunxit. Commemorandum hæc inter præcipue venit Horneburgum arx cum tota Vesta Recklinghusana. Hanc ab annis fere centum & quinquaginta possidebant Comites Schawenburgici, quibus ea ditio quondam sub Theodorico de Mœrsa Archi-Episcopo Coloniensi pignori tradita fuerat pro septendecim florenorum aureorum millibus, ac præterea quingentis & quinquaginta: neque ullus Theodorici Successorum fuit, qui debitum istud conaretur expungere: indignum illud, imo & probrosum Salentino visum. Quare magnis animis rem aggressus, anno 1576. totam eam Summam Comitibus Schawenburgicis, multum quidem reluctantibus, Cæsaris tandem auctoritate ad eam recipiendam coactis, reddidit, sicque nobilem hanc Archi-Episcopalis jurisdictionis portionem Ecclesiæ suæ possidendam restituit. Pari ratione Urdingam oppidum una cum Castro, Præfecturam & arcem Erpradiensem haud procul Novesio, Wichternichium in Præfectura Legionacensi, aliaque, ære alieno liberata Coloniensi Cathedræ rursus vindicavit.

Septennio circiter Ecclesiæ Coloniensi jam præfuerat Salentinus tanta laude sui nominis, ut inter optimos ejus temporis Præsules censeri mereretur. Qua fama excitati Paderbornensis Ecclesiæ Primates, quibus avitæ vigor Religionis cordi erat, Joanni ab Hoja, Osnabrugensi Episcopo, Paderbornensi simul ac Monasteriensi Administratori, anno 1574. vita functo Successorem, qui votis suis responderet, daturi, Salentinum una omnes voce postulavere. Non displicuit Rom. Pontifici Gregorio XIII. ista postulatio: etsi enim is Salentinum sciret ab Ordinibus sacris eo usque abstinuisset, ut Familiam Isenburgicam, quæ in ipso, ceu ultimo, unicoque nobilissimo Stemmatis furculo nitebatur, ab interitu vindicaret; facile tamen & postulantium subscripsit sententiæ, & Salentino pro auctoritate sua Apostolica, curaret Ordinis Episcopalis munia per Episcopum Suffraganeum exerceri, potestatem fecit, datis, quas hic subnectimus, ad eundem literis.

*Venerabili Fratri SALENTINO, Archi-Episcopo Coloniensi,*

*G R E G O R I U S P A P A X I I I .*

*VENERABILIS FRATER, SALUTEM ET APOSTOLICAM  
BENEDICTIONEM.*

**C**Um, sicut accepimus, nuper Dilecti Filii Decanus & Capitulum Ecclesiæ Paderbornensis, Ecclesia ipsa tunc per obitum b. m. Joannis olim Episcopi Monasteriensis, qui, dum viveret, ex concessione Apostolica eandem Ecclesiam Paderbornensem in administrationem obtinebat, extra Romanam Curiam defuncti, Pastoris solatio destituta, Te, qui Ecclesiæ Coloniensi ex simili concessione Apostolica præes, etiam in Episcopum Paderbornensem postulaverint: Nos, qui nostri universalis Pastoris officii sollicitudine utilitati Ecclesiarum omnium, præsertim Cathedralium, quantum cum Deo possumus, bis potissimum turbulentis & periculosis temporibus, ne illæ longæ vacationis exponantur incommodis, neve propterea in spiritualibus aut temporalibus detrimenta patiantur, diligenter providere studemus, sperantes, quod, dirigente Domino actus tuos, præfata Ecclesia Paderbornensis sub tuo felici

*Tomus VIII. Concil. German.*

regimine utiliter vegetetur, & prospere dirigatur: Te dictæ Ecclesiæ Paderbornensis in eisdem spiritualibus & temporalibus Administrationem auctoritate Apostolica tenore præsentium ad nostrum & Sedis Apostolicæ beneplacitum facimus, constituimus, & deputamus: Tibique possessionem ipsius Ecclesiæ Paderbornensis & illius bonorum, seu quasi, vigore præsentium per Te vel alium, quem ad hoc duxeris deputandum, capiendi & retinendi, nec non illius mensæ Episcopalis fructus, redditus & proventus petendi, exigendi, & percipiendi, ac debitis consuetis ipsius Ecclesiæ Paderbornensis supportatis oneribus, quod supererit, in tuos licitos & honestos usus convertendi, ac Pontificalia officia, quo ad ea, quæ sunt Ordinis, durante tua administratione hujusmodi, per Suffraganeum a Te deputatum in Civitate & Diœcesi Paderbornensi exerceri faciendi, cæteraque in præmissis & circa ea

*X x x*

*necessa-*

*necessaria seu quomodolibet opportuna gerendi, mandandi & exequendi, plenam & liberam facultatem & potestatem concedimus.*

*Mandantes Dilectis Filiis Capitulo & Vasallis dictæ Ecclesiæ Paderbornensis, ac Clero & Populo Civitatis & Diocesis Paderborn., ut juxta presentium tenorem Tibi, tanquam Ecclesiæ hujusmodi Administratori, ac Patri & Pastori animarum suarum, humiliter intendentes, exhibeant Tibi obedientiam ac reverentiam debitas ac devotas: Vasalli vero & subditi consueta servitia & jura Tibi ab eis debita integre exhibere procurent. Non obstantibus Apostolicis, in Provincialibusque & Synodalibus ac Generalibus Conciliis, editis specialibus vel generalibus Constitutionibus & Ordinationibus, & Ecclesiæ Paderbornensis prædictæ etiam juramento, confirmatione Apo-*

*stolica vel quavis firmitate alia roboratis statutis & consuetudinibus, privilegiis quoque, indultis & literis Apostolicis illi concessis & confirmatis, . . . cæterisque contrariis quibuscunque. Hortamur igitur Te plurimum in Domino, ut hoc munus regendæ & administrandæ Ecclesiæ Paderbornensis, tuis per Nos impositum bumeris, sic exercere studeas sollicite, fideliter ac prudenter, quod illa, sicut speramus, provido & fructuoso Administratori gaudeat se commissam; Tuque in nostro & ejusdem Sedis conspectu Te semper meritorum præmiis digniorem constituas, Nosque proinde ad uberiores gratias Tibi faciendas per amplius invitetur.*

*Datum Romæ apud S. Marcum sub annulo Piscatoris die IV. Septembris 1574. Pontificatus nostri anno Tertio.*

Literæ hæc ex Urbe vix advenerant, cum Salentinus, egregio mille equitum comitante agmine, non Episcopali in habitu (nullis enimvero adhuc erat Ordinibus Sacris insignitus) sed in sago, loricam indutus ferream, Paderbornam ingreditur, vel suo hoc declarans apparatu, quam strenue sit, & constanter pro Diocesis sibi commissæ & Fidei Orthodoxæ juribus atque incolumitate pugnaturus. Hærebant insolito perstricti lumine A catholici, effusis in lætitiâ Catholicis, & in spem erectis amplissimam, fore, ut sua propediem veræ Religionis integritas sub tanto Principe rediret, ac Patria universa omni felicitate cumlaretur. Nec falsi spe sua fuissent Paderani, si diutius sedere ad clavum imperii Salentino libuisset. Profecto inter cætera, quæ in Reipublicæ emolumentum, & Religionis utilitatem gessit, præstantissimum illud, grataque & intermoritura nunquam apud posteros memoria celebrandum, quod novum Paderbornæ Gymnasium, nuncupatum Illustri deinceps ab Auctore *Salentinianum*, invalescenti quot diebus ac late grassanti hæresi objiciendum erexit pro meliori juventutis instructione, opulentaque etiam, datis ea de re A. 1577. sexta Febr. literis, quas videre est apud *Strunck Annal. Paderb. P. 3. Lib. XXII. pag. 438.*, dote ac proventibus sapientissimus Princeps intruxerit, primo ejusdem Rectore designato Hermannō Kerschenbrochio, viro inter Westphalos eximio, de totaque fere Westphalia cum ob Anabaptistarum confectam a se historiam, tum ob editum Episcoporum Monasteriensium, Paderbornensiumque Catalogum Scriptore merito, cui & alios Scholarum Magistros, laborum periculosissimis istis temporibus necessariorum socios adjunxit. Anno tandem 1577. die 5. Sept. remisso Paderbornensi Ecclesiæ, cui annos tres, menses quatuor, dies quindecim summa laude præfuerat Episcopus ordine secundus & quadragesimus, nuncio, convocatisque Coloniam totius Archi-Diocesis Ordinibus, in splendidissimo Procerum consessu Vllvirarum, quem maxima sui commendatione ac Patriæ totius utilitate annos decem, mensibus tribus & diebus duodecim demptis, gesserat, Brulæ abdicavit, ducta Bonnæ, ut emorienti familiæ succurreret, Antonia Wilhelmina, Joannis Arembergæ Comitissæ filia.

Dolere boni omnes, scribit in *Cbron. MS. Colon. Wilmius*, tanti Viri abscessum usque adeo, ut vel uxurato obtulerint (Paderbornenses) Provinciæ administrationem: id cum obtinere non possent, quem ante triennium venientem maximo applausu exceperant, recedentem ingenti luctu ac mœnore sunt prosecuti. Non modo sibi, sed & utrique Episcopatu a se dimisso, odiosa hac renuntiatione Salentinum vehementer nocuisse, testatur *Strunck cit.* " Sibi quidem, quia in tanta dignitate ad  
" exigui Comitatus angustias devenit; & Familia Isenburgica, quam ab interitu  
" vindicare voluit, postea tamen in Ernesto ipsius filio prorsus intercudit: suis  
" vero Episcopatibus, quia tam Colonæ, quam Paderbornæ, infelicissima Capi-  
" tularium electione tales (pro dolor!) Successores habuit, qui suis Diocesium  
" extremam fere perniciem adtulere." *Ita ille.*

Quam



Quam gravis porro Diœcesim Paderbornensem, subrogato in Salentini locum Henrico Ducibus Saxoniae Lauenburgicis orto, Bremensi Archi-Episcopo, fortuna concusserit, quisquis inspicere propius & explorare voluerit, eundem ad cit. *Strunckii Annales Paderbornenses*, variis ex Scriptoribus, ac monumentis MS. confectos remitto, Lectoribus interim meis, quis rerum sub illa tempora Colonienſi in Ecclesia status fuerit, ob oculos, quantum hic loci opus est, positurus.

Successit Isenburgico Gebhardus Truchsesius ex Illustrissima Waldburgensium Equitum familia in Suevia natus, & Ottonis Truchsesii, Magni illius Principis (*de quo vid. Tom. VII præc. pag. 213.*) ex fratre nepos, Augustani tum Collegii Præpositus, Argentinentis Decanus, Metropolitanæ Colonienſis Ecclesiæ Canonicus; qui nonnisi uno Serenissimum Ernestum, Bavariæ Ducem, cujus postea dotes, meritaque recensebo, suffragio antecesserat: quod quidem tum opera Hermannii Nuenarii Comitis, & sibi & Protestantibus suis a Bavaro, Religionis Catholicæ studiosissimo male metuentis, tum facundia ejusdem, subdolisque machinationibus facile effectum.

Novi Præsulis optima sese prodebant initia. Certe Gregorius XIII. P. M. perinde ac Rudolphus II. Rom. Imp. eam de prudentia ipsius, de morum integritate, de pietate & religione existimationem conceperant; ut quidem Gregorius anno 1578. suis in literis testaretur, aut *Religionis Orthodoxæ studiosiorem*, aut *Ecclesiasticæ disciplinæ observantiorem*, Gebhardo, fore neminem: Rudolphus vero illum, cui gravissimam Belgicos tumultus componendi Provinciam, vicesque suas gerendi, anno insequente committeret, inter Imperii Proceres dignissimum arbitraretur.

Locus, revocandæ Philippum inter Hispaniarum Regem & Belgicos Ordines paci, designatus Augusta Agrippinensium erat. Convenere illuc viri ex utraque Germania illustrissimi, qui ut tanti momenti negotium, Cælo favente, auspicarentur, felicique coronarent exitu, supplicationem, Gebhardo authore ac socio, pridie Cal. Majas adornarunt & ab hominum multitudine frequentissimam, & a delectu Virorum splendidissimam. Processum ab hac ad consultationem labore maximo, fructu nullo. Mirum est, quod, dum ista agitabantur, præ se Gebhardus tulit Fidei Orthodoxæ Belgas inter stabiliendæ desiderium ac studium. Palam asseverasse fertur: *Malle se in furcam ac crucem agi, quam a Fide Catholica vel latum unguem desciscere, aut libertatem Religionis, pro qua tam acriter Belgæ pugnarent, ullo pacto permittere.*

Susceptis jamtum antea Sacris Ordinibus, ipsoque etiam Sacerdotio initiatus, Rudæ, Ducatus Westphalici oppido, ne quis, nisi probe Catholicus, Senatorum adscriberetur Ordini, edicto cavit; author fuit Werlensibus, ut, quo demum studio possent, fidem orthodoxam colerent ac propugnarent; Susatensibus, ut Novatorum amicitiam, doctrinamque fugerent. Ad hæc Visitationem, per Westphaliæ Paræcias instituendam, (*Mich. ab Isselt de bello Colon. L. IV. pag. 490.*) sanam adeo conceperat & integram, ut, quod ab Ecclesiæ Romanæ sensus alienum esset, penitus nihil contineret. Plura sunt, quæ edidit propensi in Religionem animi specimina. Quid igitur hisce initiis, ni dolos Gebhardus dolis consuerit, præclarius? quid oprabilius?

Verum didicit mox ipse infelix Princeps, & luctuosissimo suo alios exemplo docuit, quo male cautum, suiue negligentem familiaritas cum A catholicis nimia, atque epularum assidua luxuries, tum vel maxime amoris impuri vis abripere tandem aliquando valeant. Summa Truchsesio cum Solmensi, Nuenario, Saynio, Wittgensteinio, & aliis Novatorum Patronis intercedebat consuetudo, cum iisque immanibus non raro poculis certabatur. Baccho se facile dat comitem Venus. Conjecerat inter illa Gebhardus oculos in Agnetem Mansfeldiam, Joannis Georgii Comitis filiam, Gerresheimiano prope Dusseldorpium Monasterio adscriptam sub id temporis virginem, quæ visendæ sororis causa Coloniam venerat. Obtutus ei, ut quondam pluribus, fatalis fuit: ita enimvero illam deperire puellam cæpit, ita inescari elegantis formæ amoribus, ut, superante rationem libidine, contractas clam anno 1582. nuptias, altero statim anno celebrarit, ab avita defecerit Religione, & hujus destitutus luce, ex alio aliud in scelus proruerit, nec Pontificiis expugnatus literis, nec Legationibus Cæsareis ad saniora reductus. Crescebat cum fama horrendum ubivis scandalum; cui ut iretur obviam, Apostolico fulmine utendum erat. Uritur illo Romæ Cal. April. A. 1583. Gregorius, & Archi-Episcopali Gebhardum Sede movet, absolutam ab ejus fide & obedientia patriam declarat, deni-

que Collegio Canonorum, alium, præcisâ mora, Antistitem ejus in locum designent, imperat. Sententiam hanc Supremi Pontificis, quam Rudolphus Imp., uti decuit religiosissimum Ecclesiæ Catholicæ Advocatum, querulo licet Novatore contra fremente, ratam habuit, ad Ubios pertulit Joannes Franciscus Bonhomius, Vercellensis Episcopus, (cujus elogium extat *T. CC. Germ. VII. pag. 995.*) Metropolitanique mox Collegii Clerum primum admonuit, ut Comitibus pro novo eligendo Archi-Episcopo maturaret; Hanc esse Pontificis voluntatem, hoc Imperium. Obtemperat Capitularium Senatus eo promptius, quo diutius Pastorem alium optaverat, & quo jam ante generosius causam Gebhardo abjudicaret, nobili hac Antonii Comitis Schawenburgici, Decani, oratione animatus:

- " *Nemini vestrum, ut opinor, ambiguum esse potest, quin modernæ machinationes*  
 " *Archi-Episcopi nostri directe pugnent cum antiquis Provinciarum nostrarum statibus*  
 " *& conventionibus, quas vulgo STATUUM UNIONEM (vid. *Erklarte Land-**  
 " *vereinigung* de anno 1550. apud Cleinsorg, cit.) vocant. Ab hac autem unione  
 " *ut recedatur, & pro antiqua, Sanctissimæque Religione Catholica jam nobis perperam*  
 " *obtrudatur novitia quædam fides Confessionis Augustanæ: id enimvero nec ego,*  
 " *quantum in me est, permitti patiar; neque vos pariter, si viri esse vultis, per sa-*  
 " *lutem animæ vestræ concedere poteritis aut consentire. State igitur in hac Unione*  
 " *tam sancta & antiqua! Id enim Comites, id viros Nobiles & Generosos, id fidelem*  
 " *Reipublicæ Magistratum decet.*"

Obtemperat, inquam, Capitularium Senatus, & mirabili consensu, omniumque suffragiis Ernestum Bavarie Ducem, Eburonum ac Frisingensium Episcopum, Hildesheimensium Administratorem, Principem optimum Truchsesio, inter Urbis totius atque Ordinum gratulantium voces ac plausus, sufficit X. Kal. Junii.

Nova hæc Cleri Metropolitanæ electio, auctoritate Pontificis, consensu Imperatoris, Patriæque Ordinum adstipulatione fulta, certi etiam manifestique juris confirmata adminiculo, tantum absuit, ut Gebhardo & ejus fautoribus probaretur; ut belli etiam non diuturni quidem, sed peracris tamen ac funesti, postmodum ab ipsis excitati, esset origo. Quod cum ab ovo integrum ex Iseltio, scriptore Synchrono, repetere quivis possit, explanare hic loci superfedeo.

Adspirante interim Ernestinis armis Divino Numine, coactus Provinciam deferere Truchsesius, ne cum Principatu vitam amitteret, Delphos ad Arausicanum se recepit; qui victum exuli ac hospitium tantisper præbuit; causam tueri armis nunquam voluit. Spem deinde, vota in Angliam transmisit infelix, ab Elisabetha Regina ut susciperetur. Verum & istic repulsam passus, nihilque præter duo Imperialium millia ac plenas aculeorum literas, in quibus misero objiciebatur, fieri haud posse, ut, quæ cæca animi perturbatione & impetu nituntur, feliciter eveniant, adeptus, Argentinam suam ad Decanatum secessit: ubi (\*) mœrore primum, post calculi & cholicæ doloribus confectus, vitam in squalida 17. annorum quasi caigine actam, inglorius posuit XII. Kal. Junii anno 1601., Ecclesiæ Colonienfis per septennium Archi-Episcopus: cum Carolum octennio ante & Ferdinandum anno 1585. Germanos, & Joannem Casimirum, Palatinum Comitem, unicum pene in causa sua fulcrum, 1592. acerbis fatibus amisisset, expertus damno suo gravissimo & alios erudiens, in quale, quamque truculentum possit monstrum libido adolescere, nisi in ipso statim ortu suffocetur. *Maimb. Hist. Lutheran. T. II. L. VI. pag. 356.* Adde cit. AA. *Wilmii Chron. MS. Turckii Hist. MS. Eyzingeri Hist. Truchses. Kobleri Dissert. de fatibus Gebh. Tbuân. Struv. Flor. Ram. & alios.*

Pontificias jam pro more meo adjungam literas.

EPIS-

(\*) Cum Maimburgio errat *Hist. Eccles. Germania, 1724. Bruxellis gallice edita apud Franc. Foppens, dum scripsit Truchsesium in Hollandia extinctum.*

EPISTOLA GREGORII XIII. P. M.  
ad GEBHARDUM TRUCHSESIUM, Coloniensem Archi-Episcop.  
qua eundem a Schismate debortatur.

GREGORIUS PAPA XIII.

VENERABILIS FRATER, SALUTEM ET APOSTOLICAM  
BENEDICTIONEM.

**T**Ruchsesiorum domum, non minus generis nobilitate, quam fidei Catholica studio & constantia antebac floruisse, testis est insignium Virorum, qui ex ea prodierunt, tum antiqua, tum recens memoria, præcipue vero Cardinalis Augustani, qui Principem in ea locum obtinuit, apud quem Tu pie & religiose, & quasi in conspectu ac gremio Sanctæ Romanæ Ecclesiæ educatus, non parvam olim præbuisisti spem, fore, ut dignus tali genere, ac disciplina evaderes: Hinc nostra erga Te propensio, nosterque Paternus amor initium habuit, qui postea, ex gravium virorum testimonio, non solum confirmatus, sed etiam auctus fuit, ut de Te Nobis vicissim optima & rectissima quæque polliceremur.

Successit tempus illud, cum electus fuisti a Capitulo Colonienſi in Archi-Episcopum illius Ecclesiæ, quæ electio, cum maximis implicaretur difficultatibus, & vehementissime oppugnaretur; tamen ea erga Te usi sumus benignitate, ut, sublati omnibus impedimentis, Capituli iudicium, & electionem de Te factam, approbaremus, confirmationisque Apostolicæ robur adjiceremus. Ex his putabamus neminem Te aut Religionis orthodoxæ, aut S. beatus Sedis, aut etiam disciplinæ Ecclesiasticæ studiosiorem, vel observantioſiorem fore.

Sed dolemus, & quidem graviter dolemus, nostram sane expectationem ex his, quæ de Te multorum literis, sermonibus, & fama ipsa quotidie ad Nos perferuntur, non solum labefactam & imminutam, sed pene deletam, ac illa, quæ circumferuntur, talia esse, & loco munereque tuo adeo indigna, ut sine magno pudore exprimi non possint.

Sustinuimus Nos certe, quoad potuimus, ne quicquam, quod de Te indignum esset, crederemus. Sed cum rumor quotidie magis ingravesceret, coacti sumus suspensio ac sollicito de Te animo esse, nec diutius dissimulare volumus.

Monemus igitur Te, ut fama ac salutis tuæ, in tempore consulas, & si fortasse longius, quam oportuit, progressus es, Te revoces:

ſin vero falsa sunt, quæ obijciuntur, quod potius vellemus, animum ac sensum tuum aperias & declares, nec patiaris ex malevolorum sermonibus perpetuam notam ac ignominiam Tibi, tuæque agnationi, & Ordini Ecclesiastico iniuri. Cogitesque, quid Deo, qui Te ad istum sublimem gradum evexit, quid Sedis Apostolicæ, quæ Te singulari quodam amore, & gratia complexa est, quid Patriæ, quid generi, quid Christiano nomini, quid publicæ utilitati, quid denique Tibi ipsi debeas. Qui, cum honorificentissimum locum teneas, non alii magis, quam Tibi ipsi inimicus fueris, si ita Te gesseris, ut merito inde exturbandus sis: cum tamen nullo negotio cum Tibi conservare & magnus in Ecclesia Dei, & summa cum auctoritate inter Imperii Principes esse possis.

Memineris, quam difficiles & periculosi sint novarum rerum exitus, & quantopere cavendum sit prudenti & pio viro, ne temere famam, rem, statum, dignitatem, animamque denique ipsam, in extremum discrimen adducat, cujus rei non desunt nostra ætate exempla, quibus doceri possis.

At si longius fortassis progressi sumus; amoris nostro, dignitatisque ac salutis tuæ desiderio id assignabis. Non enim dubitamus, quin Paterna hæc monita nostra, id apud Te pondus habitura sint, quod omnibus nominibus & iustissimis de causis debent, atque reipsa, eam pietatem & reverentiam erga Sacram hanc Sedem sis ostensurus, qua Nos recreari, Te in dilectissimi filii loco, sicut antea, ita & post hæc habere; & ea re letari magnopere possumus.

Sed hoc literarum officio non contenti, mandavimus Venerabili Fratri nostro Archi-Episcopo Trevirensi, ut ad Te proficiscatur, Tecum fusius, eadem de re, quam diligentissime agat, ac consilium, deliberationemque nostram clarius patefaciat. Cui plenam fidem Te habiturum non dubitamus.

Data Romæ apud S. Petrum sub annulo Piscatoris die 17. Dec. MDLXXXII. Pontificatus nostri anno undecimo.

JOH. BAPT. CANONIUS.

X x x 3

Pro



Pro Responsorio Gebhardi ad Pontificem data, quæ valde prolixa & indignis scripta modis, extare T. I. operis, inscripti: *Litteræ Procerum Europæ*. Lipsi. ed. 1712. pag. 27. a Reiffenbergio *Hist. Soc. JESU ad Rhenum Infer. T. I.* in Mant. Diplom. dicitur, si præcipua Legationum Cæsarearum capita Lectoribus meis attulero; rem ipsis gratam facturus mihi videor.

Rudolphus II. Imp. postquam intellexerat, quo cruda spectarent & impia Truchsesii molimina, Legatum ad eundem misit Andream Gailium, Agrippinatem, Virum Clarissimum, per eumque moneri serio voluit, perpenderet gnaviter, quam turpe, quam omni juri, consuetudinibus, Sacris Canonibus, Imperii Constitutionibus, & communis Patriæ pacis conditionibus esset contrarium, quod tam constanti de ipso fama divulgabatur: quæ pericula & damna, quod probrum, quas calamitates non ipse tantum, sed antiquissima etiam nobilissimaque ejus familia, sed totus pariter Archi-Episcopatus Colonienfis incurrerent, si ab illo, quod animoolvebat, proposito non recederet. Quantis denique & corpus & animam oblectaret periculis.

Alter, quem Cæsar ablegavit, erat Jacobus Curtius, vir integerrimus; cui hæc perferenda ad Archi-Episcopum mandata: Non tantum confirmari novis rumoribus prima, quæ de Electore ad se venerant; sed alia multo graviora adjici: ipsum videlicet, excusso turpiter statu Ecclesiastico, ad profanum rediisse; versare nunc secum dies noctesque, & omnem movere lapidem, ut idem penes se Imperium, eadem autoritas maneat: quosdam eo fine Capitulares suam in sententiam pellere; cogere ad hæc, ubicunque posset, militem, quo voti sui compos ex integro fiat. Res veteri Truchsesiorum nomine tam indignas, ut credat Sua Majestas, induci vix posse. At vero, pro officii sui ratione vigilandum sibi, ne, si ita se habeant, ingens ex iis periculosi belli tempestas oboriatur. Quare se totum aperiat Elector, & quæ vera sint, quæ falsa, planissime explicet.

Legationis tertiæ ad eundem, jussu Imperatoris, ab Joanne Preinero, viro nobili, Hubingæ, Fladnizii, & Rabensteinii Domino susceptæ, hæc summa erat: De Religionis mutandæ, & ineundi Matrimonii proposito nihil ad se. Revocare interim in memoriam non posse pervetustam, celeberrimamque illam utroque in foro Truchsesiorum, Comitum Waldburgensium Familiam, non animo repetere, quid in ipso aditi Regiminis vestibulo primum Capitulo, inde Dicecesi, post Electoratus Collegio, præprimis vero Pontifici, jurejurando solenni interposito, spoponderit, atque a se indultum administrationis politicæ obtinuerit, non, inquam, ista animo repetere posse, quin præcipitem illam atque in domo Truchsesia inauditam voluntatis mutationem summopere admiretur. Cæterum non disputare ea de re Cæsarem. Sed enim quod, ejurata Fide Catholica, retinere Archi-Episcopatus, Virginitatisque dignitatem velit, & decernat qua opibus, qua sanguine propugnare, id Cæsari non ferendum. Reclamat approbata, totiesque repetita, & confirmata toties concordia Religionis; ipsiusmet repugnant Archi-Episcopi promissiones & juramenta, Statuta Ecclesiæ, Aurea Bulla, Electorum unio; Jura denique tam politica, quam Ecclesiastica reluctantur. Ad hæc nonne causam Gebhardi decidit vel solus ille, in quem juravit, pacis articulus Religionis: " Si quis Archi-Episcopus, Episcopus, Antistes, aut alius Ordinis Ecclesiastici a Religione veteri deficiat, is continuo discedat ab Episcopatu suo, Præfectura, beneficio. . . Et Collegio, sive iis, ad quos ea res jure vel consuetudine pertinet, liceat in ejus locum eligere seu constituere alium, qui sit veteris Religionis? "

Cedat igitur Dicecesis administrationi, Patriam Sacramento liberet, S.R.I. feuda atque Regalia deferat, armaque deponat.

Monita hæc Imperatoris, sana quantumvis & amorem potius, quam severitatem spirantia, quod in Truchsesii animo ne tantillum quidem evicerint, res est Orbi notissima, quam ignorare nemo potest.

Ex iis porro, quæ de Adolphi Schawenburgici Successoribus obiter tantum attigimus, pronum Lectoribus erit, causam, cur optimo cum Principe mos ille Synodos celebrandi, Ecclesiæ Colonienfis tam honorificus, tam utilis Reipublicæ ac pene necessarius, tantum non prorsus occubuerit; ab anno certe 1551. ad 1598. interciderit, genuinam perspicere.

Ad Ernestum nunc redeo. Erat is Monachii Anno 1554. XVI. Cal. Januar. Clarissimis in Imperio ortus e Boica Domo natalibus. Patrem habuit Albertum V. Bavaricæ Ducem, Matrem Annam Austriacam, Ferdinandi I. Imp. filiam. A teneriori jam

jam ætate ad Insulas, resque pro Ecclesiæ bono gravissimas aliquando conficiendas Divina Ipsum providentia delignasse videtur. Annos enim duodecim natus, Frisingensis creabatur Episcopus; octennio post, anno videlicet 1573. Hildesheimensis; tum Leodiensis pridie Cal. Februar. A. 1581.; & pridie Idus Febr. ejusd. anni Administrator Stabulensis. Denique A. 1583. Gebhardi, ut supra meminimus, substitutus in locum, Provinciam suscepit, non una ex parte difficilem. Arma opponenda armis erant; revocandæ ab erroribus oviculæ; expellenda variis ex locis hæresis, Fides orthodoxa velut ab exilio reducenda. Vicit, quidquid difficultatem sese objiciebat, Religiosus Princeps, DEI O. M., cujus res agebatur, auxilio confusus. Eundem sibi, publicis per Diocesim supplicationibus, orationibus, jejuniis, aliisque piis exercitationibus conciliare ac facilem in vota sua efficere adlaboraverat. Nec incassum: Urbes enim & oppida vel a Friderico Saxone, Coloniensi Chorepiscopo Truchsesianis erepta, ad obsequium redigebantur, vel a Salentino Isenburgico, olim Archi-Episcopo, in fide novi Principis conservabantur. Totus Westphaliæ Ducatus sine ullo armorum itrepitu in illius potestatem venit: revocati Myltæ Catholici, a Truchsesio proscripti; redditus suis officiis Proceres; reducti variarum urbium Consules ac Judices, ob antiquam fidem exulare jussi; renovatum Catholicæ Religionis exercitium, diu pulsus; subditi ad veræ Religionis cultum, ad pristinam pietatem, eliminata, quam novella quorundam annorum fides permiserat, noxia libertate, ductu præstantium, quos inter Joannes Nopelius, Lippia, non ignobili Westphaliæ Civitate ortus, Coloniæ Trajanæ, seu in Cæsaris Insula Decanus, eminebat, virorum & opera redierunt.

Rebus jam feliciter compositis, Leodium repetiit Ernestus, dictoque ex Canonum Sanctionibus juramento, a Joanne Schœnenbergio, Trevirensi Electore, Vilviratum obtinuit anno 1584. IX. Cal. Sept. Ad Monasteriensem quoque Insulam altero mox anno XV. Cal. Jun. evocatus, fidumque expertus in frangenda Martini Schenkii, hominis levissimi, acerrimi tamen Truchsesianarum partium defensoris arrogantia, Farnesium Parmensem, Novesium anno 1586.; deinde Bonnam a Carolo Croyo, Chimacensi Principe, quem & ipsi sui loco Parmensis submiserat, ad deditionem X. Cal. Oct. 1587. compulsum recuperavit.

Accusarant interea, nescio, qui, Ernestum apud Sixtum V. Pontificem tum ambitionis nimix, tum cupiditatis. Vocatus idcirco in Urbem, comparere tum quidem haud potuit, gravissimis ipsum curis alio avocantibus. Anno nihilominus 1593. ineunte, per Hartgerum Henothum J. U. D. ac Metropolitanæ Coloniensis Canonicum, Romam a se ablegatum, Clementi VIII. de utroque accusationis capite se totum purgavit, tamque cumulate satis fecit, ut non modo is collatas tor uni Præfuli dignitates non improbarer, sed suum etiam ipse calculum adjiceret.

Ejusdem Pontificis literas, quibus singularem Ernesti tum in Imperii juribus, tum in Fidei Catholicæ integritate defendenda prudentiam ac fortitudinem sub Comitibus Ratisbonensibus Orbi manifestatam, egregie commendabat, ex *Wilmii Chronico MS.* huc transcribimus.

### LITERÆ CLEMENTIS VIII. P. M.

ad ERNESTUM, Archi-Episcopum Coloniensem, S. R. I. Electorem,  
quibus res ab ipso in Comitibus Ratisbonensibus contra Protestantes & prudenter & fortiter gestas, mirifice illustrat.

### VENERABILIS FRATER, SALUTEM ET APOSTOLICAM BENEDICTIONEM.

**D**Ecebat sane animi tui magnitudinem, & quam præ Te semper tulisti in Catholica Religione constantiam, ut talem Te præberes in Ratisbonensi Conventu, qualem Te multa tua cum laude præstitisti. Accepimus enim crebris literis & honorifica admodum de Te te-

stificatione, non solum a dilecto filio nostro Ludovico Cardinale Madrutio, nostræ Apostolicæ Sedis de latere Legato, sed etiam a Venerabili fratre Cæsare, Episcopo Cremonensi, cæterisque Apostolicis Nunciis, qui in eodem Conventu interfuerunt, quanto studio, quanto animi

animi ardore & zelo Catholica Religionis causam defendendam susceperis, Tuæque auctoritate & gratia procuraveris, ut Catholicorum Principum salutaris concordia & consensus conservaretur: qua nimirum, Deo juvante, factum est, ut impii Sathanae conatus eluderentur, & iniustitia contra justitiam non prævaleret, & Ecclesiastici Ordinis jus & dignitas retineretur. Sed & in gravissimo negotio, quod cordi nostro penitus infixum est, de bello nimirum contra teterribus Turcas gerendo, quam præclaram operam navaveris, non ignoramus. Utinam vere Germani Principes intelligant, quanta occasio Divinitus oblata immortalis gloriæ cum summa utilitate consequenda! quod nos omni loco contestari non cessamus. De Te vero, Frater, plane Nobis per-

suademus, quod causæ Dei, Patriæ, & totius Christianæ Reipublicæ nullo loco decris, curabisque omni diligentia pro tua virili parte, ut Catholicorum Germaniæ Principum consensus atque unio & conservetur & augeatur.

Tibi interea pro nostra perpetua erga Fraternitatem tuam, totamque inclitam Domum vestram paternæ charitate gratulamur, quod merita tua erga Catholicam Ecclesiam quotidie adaugeas; quibus etiam majora ad publicum bonum & ad peculiarem insignis Ecclesiæ tuæ Coloniensis utilitatem, quæ Nobis merito charissima est, a tua virtute & pietate expectamus.

Datum Romæ apud S. Marcum sub anno Piscatoris, die secunda Septembris M. D. XCIV. Pontificatus nostri anno tertio.

Alias ejusdem argumenti literas, amoris, observantiæ ac gaudii plenissimas ad Ernestum exaravit Alanus Cardinalis Anglus. Vide *Chapeavill. Hist. Leod. Pontif. Tom. III. in Ernest. C. 22. pag. 588.* Meminit earundem etiam *Mörckens in Indic. Chronol. apodict.*


Plura de Ernesto Bavaro, Principe sapientissimo ac religiosissimo, apud *Adlzreiterum P. II. Annal. Boic. Lib. 12., Stradam de bello Belg., Haræum in Annal. Brab., Fullonium Hist. Leod. Tom. II. in Ernest. Lib. 8.*

Pro coronide juvat hic in rem nostram adjicere, immortalis Ernesti laude & gloriosa apud posteros memoria esse dignissimum, propterea quod auctoritate illius, & solertia studioque factum, ut jacentem tot annis ac pene emortuam, Synodos cogendi consuetudinem erigere sese & ad Patriæ universæ felicitatem revirescere Coloniensis Ecclesia viderit.



CON-





# CONCILIA GERMANIÆ SÆCULI XVII.

## SYNODUS BRIXINENSIS

Anno Christi MDCIII. Clementis VIII. Papæ XII.  
Rudolphi II. Imp. XXVII.

SUB CHRISTOPHORO (⁂) ANDREA, BRIXINENSI EPISCOPO,  
MENSE SEPTEMBRI CELEBRATA.

*LITERÆ CLEMENTIS VIII. PAPÆ AD CHRISTOPHO-  
RUM ANDREAM, Episcopum, & Clerum Brixinensem.*

CLEMENS PAPA VIII.

*VENERABILIS FRATER, ET DILECTI FILII, SALUTEM ET APOS-  
TOLICAM BENEDICTIONEM.*

**N**ihil ardentius pro nostra omnium Eccle-  
siarum cura, & solitudine expetimus,  
& optamus, quam ut Fratres nostri Episcopi,  
& Filii nostri Canonici, tum Prælati, &  
Clerici omnes in sortem Domini vocati, ex suo  
quisque loco & munere, pro DEI bonore,  
& animarum salute, strenue atque unanimiter  
collaborent. Bonum est enim, & jucundum  
habitare fratres in unum, & in domo Dei am-  
bulare cum consensu, & frater, qui adjuva-  
tur a fratre, quasi civitas fortis, quæ diaboli  
machinis, & oppugnationibus facile resistit.  
Propterea ex antiquissima Ecclesiæ consuetudi-  
ne, & Sacrorum Conciliorum & Canonum  
Decretis instituta sunt Provinciales, & Diace-  
sanæ Synodi, ut multi in nomine Domini con-  
gregati, Spiritus Sancti gratia invocata, tan-  
to facilius, tantoque fructuosius Dei glo-

riam, & fidelis populi utilitatem procurent.  
Cum igitur, Frater Episcopo, allatum ad  
Nos esset, velle Te ex tuo Pastoralis officio, &  
ad Sacri Tridentini Concilii præscriptum, Syno-  
dum Diacesanam celebrare, non mediocrem  
cepimus voluptatem: Nam cum Fraternitatis  
Tuae prudentiam, pietatem, zelumque perspe-  
ctum habeamus, plane in Domino confidimus  
fore, ut, Deo juvante, uberes fructus ex ea  
salutari actione existant: Tuis nimirum etiam  
Canonicis, Prælati, Parochis, cæterisque  
omnibus Tecum pariter, ut Nobis certo per-  
suademus, ad eundem Divini honoris & Reli-  
gionis scopum collineantibus. Quare ex no-  
stra paterna erga Te, atque illos charitate,  
has Literas voluntatis nostræ testes placuit jam-  
nunc dare, quæ tunc, cum omnes simul in  
loco benedictionis, & pacis confidebitis, atten-  
tius

(⁂) Vide sub finem Synodi.

Tomus VIII. Concilior. German.

tius perlegantur. Te igitur, Venerabilis Frater Episcopo, Vosque ceteri Dilecti Filii, etiam, atque etiam hortamur, ut ad animum vestrum revocetis, Vos in hoc loco insigni in Ecclesia positos esse, tanquam signum ad sagittam, ac Vos sal, et lucem esse, qui omni vitæ integritate, et honorum operum luce fidelem populum quasi condire, eique præluere debetis. Attendite igitur diligenter vobis, et gregi, atque ovibus Christi, quæ fidei vestræ sunt creditæ, pascite illas exemplo, pascite verbo, et doctrina, pascite pabulo, et alimonia cælesti Divinorum Sacramentorum. Ea vero cura sit Vobis antiquissima, quæ est de Catholica Fide conservanda, et propaganda: Nescitis enim astutias Satanae, et quibus assidue machinationibus conetur eam in Provinciis istis oppugnare, et animas Christi Sanguine redemptas devorare. Cui pro virili vestra resistite fortes in fide, præclaram Majorum vestrorum hereditatem, unitatem, et obedientiam erga Sanctam, Catholicam, Romanam Ecclesiam, Matrem vestram omni constantia conservantes. DEI autem cultus ut augeatur, et ubique emicat, Divinorumque officiorum frequentia et dignitate, præsertim in Sacrosancto et Augusto Missæ Sacrificio, ut Ecclesia DEI colluceat, diligenter curate; denique diligite decorem Domus DEI: Quod si Templum manufacta DEO dicata mundi, et ornata esse decet, quanto magis Vos; qui viva DEI templa estis, qui peculiari Clericalis vitæ professione DEO Altissimo mancipati, et consecrati estis? Ecclesiastica igitur disciplina restituenda, mores conformandi, cæteraque ad Sacri Tridentini Concilii normam dirigenda, ut vere luceatis, sicut lucernæ ardentes in Domo Dei, et sitis bonus Christi odor, qui ad salutarem virtutis, et pietatis imitationem, fidelem populum mirabiliter excitetis, ut glorificetur DEUS et Pater Domini nostri JESU CHRISTI. Hæc, et alia complura a Tua, Frater Episcopo, Pastoralis vigilantia, a vestra, Filii, opera, et diligentia, a vestra omnium concordia, et charitate, Divina adiutrice gratia, expectamus. Estote igitur concordēs, et pacem, et charitatem habete, quæ est vinculum perfectionis, et Deus pacis erit Vobiscum, ut omnia vite, pie et fructuose a Vobis fiant, ut maxime optamus, et speramus. Et Nos, qui Vos omnes paternæ animæ in visceribus Christi, corpore quidem absentes, sed spiritu Vobiscum præsentēs, Vos nostra Apostolica benedictione in nomine Sacrosanctæ et Individuæ Trinitatis benigne benedi-

cimus. Datum Romæ apud Sanctum Petrum sub annulo Piscatoris, die 22. Maji MDCIII. Pontificatus nostri anno duodecimo.

SILVIUS ANTONIANUS  
Card.

Venerabili Fratri CHRISTOPHORO,  
Episcopo Brixinensi, et Dilectis Filiis  
Canonicis, et Capitulo ejusdem Eccle-  
siæ, nec non Prælati exemptis, et  
non exemptis, cæterisque omnibus in  
Diocesana Synodo ibidem congregatis.

Perillustri ac Reverendissime Do-  
mine, Vosque Venerabiles, ac Reverendi  
Domini.

ET si Sanctissimus D. N. confidit, Vos ad celebrandam Diocesanam Synodum sic animatos convenisse, ut suas quisque partes, quæ decet, fide præstiturus sit; tamen pie sedulitati vestræ stimulos paternæ cohortationis suæ ad-movendos existimavit; ut videlicet, quæ auspice Christo a vobis instituta sunt, cohortatore ejusdem Christi in terris Vicario, feliciter procedant et perficiantur. Mitto igitur Sanctitatis suæ ad Vos ea de re Literas vere Apostolicas, et ardentis in Vos charitatis refertissimas. His, quid ego addiderim, præter vota Sanctitatis suæ menti, vestræque pietati consentanea? Ego hæc lubens addo, DEUM Opt. Max. precatus, ut omnia consilia, omnesque actiones vestras ad eum exitum perducat, qui sibi acceptissimus sit, vobisque maxime salutaris. Romæ, die 21. Maji an. 1603.

Perillustri ac Rmæ Dtionis

Vestræ, Vestrarumque Venera-  
bilibus ac Rdissimarum DDmm

Uti Frater studiosissimus

CINTHIUS Cardinalis Sancti  
Georgii.

Perillustri ac Reverendissimo Domino Epi-  
scopo Brixinensi, et Reverendis Do-  
minis Canonicis, et Capitulo ejusdem  
Ecclesiæ, nec non Prælati exemptis,  
et non exemptis, cæterisque omnibus  
in Diocesana Synodo ibidem congrega-  
tis, &c.

CHRIS.

## CHRISTOPHORUS ANDREAS, DEI ET SEDIS APOS-

tolice gratia Episcopus Brixinensis, & S. D. N. CLEMENTIS, Providentia  
Divina Papæ VIII. Assistent.

## Ad Religiosos, &amp; Clerum Diœcesanum.

**Q**uandoquidem nulla Respublica sine Legibus bene subsistit; idcirco Nos in Synodo Diœcesana, mense Septembri proxime elapso, Brixinæ juxta Sacros Canones legitime & solenniter celebrata, Leges aliquas certas, quibus Diœcesis nostra in posterum gubernaretur: quasque Clerus universus in docendo populo, in Sacramentis ministrandis, in officiis Divinis peragendis, in regendis Ecclesiis, in piis locis administrandis, in Monasteriis dirigendis, in contractibus hominum adjudicandis, in salute animarum procuranda, demique in suis, ac subditorum suorum moribus conformandis, uniformiter ubique sequeretur; de unanimi omnium Patrum ibidem congregatorum, ac plane Synodali consensu sancimus, promulgavimus, ac Ordinaria quoque auctori-

tate nostra confirmavimus. Has nunc typis expressus ad vos mittimus, qui eas in Synodo præsentis, non semel, sed sæpius Synodaliter approbastis, collaudastis, ac pro viribus observare sancte promissistis, ut ad eas, absentes vestram, omniumque aliorum, quos curæ vestræ commisimus, vitam instituentes, Ecclesiasticam disciplinam exemplo & zelo vestro adversus Ecclesiæ hostes & alios obtrudatores, si minus in integrum, aliquando tandem in statum meliorem vindicetis. Accipite, legite, facite.

Datum Brixinæ ex arce nostra Episcopali  
die V. Octobris, anno reparatæ salutis  
M.DC.III. Pontificatus vero S. D. N.  
Clementis VIII. anno duodecimo.

## CONSTITUTIONES SYNODI

BRIXINENSIS, Anno Domini M.DC.III. Die 23. 24. 25.

& 26. Septembris celebratæ.

IN NOMINE SANCTÆ ET INDIVIDUÆ TRINITATIS, PATRIS, ET FILII,  
ET SPIRITUS SANCTI, AMEN.

## De Religione Catholica.

**F**ides & vera DEI Religio mandatum illud est & depositum Apostolicum, de quo ad Timotheum Apostolus: Præcipio tibi, inquit, coram DEO & CHRISTO JESU, ut serves mandatum sine macula, irreprehensibile usque in adventum Domini nostri JESU CHRISTI. O Timothee depositum custodi. Ut, igitur Religio Catholica, quam ab Apostolis accepimus, illibata & incorrupta in Ecclesiis nostris conservetur; ut nihil irrepât, quod ejus Sanctitatem & Majestatem quoque modo deformare queat; & si quid vel culpa hominum, vel negligentia invexisset, id salutari remedio citius emendetur: sed ut ad posteros quoque nostros, qualis a Majoribus Nobis commendata & tradita fuit, facta cuncta propagetur: Nos in hac Synodo Diœcesana legitime congregati, ita decernimus, statuimus, & definimus.

Tomus VIII. Concilior. German.

I. Fidei Catholicæ Professionem, antequam officiis suis fungi cœperint, ex formula PII IV. jurati faciant omnes Parochi, Curati, Sacerdotes, Concionatores, Confessarii, Magistri Scholarum quarumcunque, Typographi, Bibliopole, Medici, & Chirurghi. Clerici quidem seculares in manibus nostris, aut Vicarii nostri Generalis: Regulares in manibus suorum Superiorum: Laici coram suo Parocho, aut Decano rurali. De omnibus autem semper ad Nos referri volumus, ut sciamus, quibus neglecti officii pœna sit infligenda.

II. Libros hæreticos nullis legere, aut retinere apud se, vel alios liceat, nisi facultatem ad id, a Sede Apostolica impetratam in scripto Nobis exhibuerint. Qui vero ejusmodi libros de facto habent, nisi eos Decano, vel Sacerdoti Parochiæ suæ, aut Vicario nostro

Y y y 2

(qui



(qui Nos deinde certiores facient) intra menses duos ab hujus Synodi publicatione tradiderint, illos pro excommunicationis præsentis Decreto nominamus, ac publicamus. Apud quem vero post mortem reperti fuerint, (nisi vel animo simplici, vel ignorantia, quæ peccatum excuset, retinuisse probari possit) ejus cadaver more Christiano in loco sacro ne sepeliatur, sed asini sepultura condatur. In conscios autem omnes, nisi detexerint; præsertim vero in illos, qui in defunctorum inventaria ejusmodi libros scienter inscribentes, vel in supellectili reperientes, rem ad Parochum loci, aut Decanum non retulerint, tanquam in suspectos de fide, agatur.

III. Qui libros, impuros, amatorios, inhonestos, famolos, superstitionem, artem magicam, divinationem, & his similia docentes, vel quavis de causa alia prohibitos, legerint, vel habuerint: Item qui petulantes, & obscenas imagines, vel ad ludibrium Religionis, aut ad Ecclesiasticorum hominum infamiam effigatas, vendiderint, emerint, vel apud se retinuerint, in eos severissime animadvertatur. Sed Parochi & Decani, qui ista nesciverint, vel scientes dissimulaverint, Nos multo severiores experientur.

IV. Nulli libri uspiam venales exponantur, quos Parochi, Decani, vel alii Censores a Nobis designandi, non approbaverint. Qui secus fecerit, librorum omnium amissione, & pœnis aliis pro arbitrio nostro plectetur. Censores vero, si vel scienter approbaverint, quos non oportebat; vel in expositos libros non inquisiverint; neglecti officii Nobis rationem reddent.

V. Nemo temere de fide, præsertim inter pocula disputet, aliosve sermones misceat. Nemo Sacræ Scripturæ sententiis, aut verbis Sacris ad jocos, profana atque aliena proverbialia abutatur.

VI. Peregrini, artifices, mercatores, & id genus alii, qui ex suspectis locis adveniunt, vel in Dicecesi nostra morantur, si quid adversus Religionem Catholicam moliri, vel palam agere compertum fuerit, pœnis gra-

vissimis coërceantur. Qui tales in domum receperit, foverit, defenderit, contra eum, tanquam in hæreticum, aut de hæresi suspectum procedatur.

VII. Ne parentes filios suos ad Hæreticorum scholas, vel alia quavis de causa ad hæreticos habitatum ablegent. Quod si missionem ejusmodi necessitas exegerit, id non fiat, nisi de consilio Parochi proprii ac Confessarii: a quibus deinde domum reversos diligentissime rursus examinari volumus; ac si qua opinione hæretica, aliove errore imbutos compererint, eos, ut Nobis, aut Vicario nostro quamprimum denuntient, districte mandamus.

VIII. Hospites, tabernarios, cautionas in Domino obligamus, & pro autoritate nostra quoque mandamus, ne peregrinis, qui quavis de causa ad eos diverterint, aut de fide disputare, aut libros de hæresi, vel alias suspectos aliis vendere, donare, legere patiantur: Neve eis cibos vetitos coquant, vel aliud quidpiam superstitione faciant, ne alieni sceleris participes fiant. Quare principio tales amice monebunt, in Ecclesia Dei non esse talem consuetudinem. Si quos vero pertinaciores nacti fuerint, eos si hospitibus suis excludere commode non poterunt, ut etiam opera secularis Magistratus reprimantur, ad Parochos suos recta deferant. Parochorum autem & Magistratuum aliorum fidem imploramus, præstent se viros, & fidem, quam DEO & Ecclesiæ suæ obligarunt, Divini judicii memores, nefarie ne prodant, obtestamur.

IX. Populus sæpe pro concione moneatur, magni sceleris reos esse, qui aliena crimina, in certam Reipublicæ perniciem vergentia, ut sunt hæreses, superstitiones, maleficia, & his similia, non patefaciunt. Parochi autem ipsi sub pœna privationis, & aliis arbitrariis, de hujusmodi criminibus, aut malis artibus constanter diffamatos, quamprimum per Vicarium, aut Decanos suos Ordinario denuncient, ut quod ipsi a suis ovibus malum arceere non possunt, nostra autoritate efficacius removeatur.

X. Ec-

X. Ecclesia DEI usque ab origine sua ciborum delectum instituit, & sancte semper observavit; Festos dies magna religione coluit. Quibus duabus in rebus, quantum a Majoribus nostris plerique recesserint, magno cum dolore nostro videmus. Diebus jejuniorum, præsertim autem Sabbathinis, esus carniū apud quosdam æquo licentior est: diebus festis cultus Divinus passim negligitur: ad sacras Conciones, ad Divina Officia, ad Missas rari concurrunt: qui Ecclesias frequentant, vel ad initium rei Divinæ non adfunt, vel ante finem excurrunt: Catecheses Christianæ nihil penduntur: Nundinationes impune celebrantur; sub Officiis Divinis officinæ mercatorum aperiuntur: hilariter vivitur in hospitiiis publicis, choreæ & saltationes agitantur, & alia plurima, quæ referenda non sunt, & ad Divinam offensionem, & ad certam animarum perniciem, in quibusdam locis publice fiunt. Quocirca omnibus & singulis animarum pastoribus, & Ecclesiarum Rectoribus, sub interminatione Divini judicii præcipimus, ut se se pro gloria & Ecclesia Dei fortiter opponant: non sint canes muti, sed latrantes: Ciborum vitiorum usum, Festorum irreverentiam, contaminationem, abusum, opportune, importune redarguant; populum docentes, debere unumquemque eo tempore in Divinis Officiis & Concionibus audiendis frequentem esse, ac in precibus, recolendisque Dei beneficiis assidue versari. Contumaces & refractarios debitis poenis coerceant, ac demum incorrigibiles denuncient, ut pro officii nostri ratione, quid de illis statuendum sit, mature dispiciamus. Magistratus autem civiles, ac Principes enixe in Domino rogamus, ut si quid illorum autoritate, vel ad Fidem Catholicam tuendam, vel ad disciplinam Ecclesiasticam conservandam, aut restituendam opus fuerit, pie, prompte & alacriter opem ferant, ut communibus studiis & laboribus, honor Dei & animarum salus, quas Deus sanguine suo redemit, efficacius ac certius procuretur; cogitantes, se hac in re Deo rem gratissimam, & subditis suis utilissimam facturos, ac navaræ tam piæ operæ

mercedem uberrimam aliquando se a Domino Deo, qui nihil omnino irremuneratum relinquit, accepturos.

### *De Sacramentis Ecclesiæ.*

**D**Ecebat quidem Sanctissime tractare, quæ Deus ad hominum sanctificationem & salutem in Ecclesia sua Sanctissima Sacramenta reliquerat, vel eo nomine, quod ea tanto uberiores & efficaciores fructus in hominibus producant, quanto purius & religiosius administrantur & usurpantur. Sed vel hominum culpa, vel negligentia, secus hoc tempore evenisse palam est; quando maximas rerum Divinissimarum profanationes intueri necesse est. Quare ut rebus Sacris sua reverentia constet, & rectus earum usus, sublatiis abusibus, sicubi irrepsierunt, in Ecclesiis nostris confirmetur & stabiliatur; omnibus & singulis, qui ea tractare vel usurpare debent, certas quasdam regulas præscribere placuit.

I. Sacramenta Divina omnibus Christi fidelibus ex æquo, juxta Ecclesiæ Catholicæ institutum bene dispositis sine dilatione, pro loco, tempore, necessitate, pie & prompte ministrentur. Nullis quavis de causa negentur; qui ad ea suscipienda digni fuerint.

II. Ante cujusque vero Sacramenti administrationem, ubi rudes sunt, lingua vernacula ad captum suscipientium, breviter & dilucide vis ac usus exponatur, ut norint, quid suscipiant, aut quantum fructum inde referant, & quomodo ad ejus usum sese digne præparent.

III. Inferiores Ecclesiæ, quæcumque illæ sint, ritus & caeremonias Ecclesiæ Cathedralis sequantur, nec unguem latum ab ejus præscripto ullatenus discedant: Ecclesia autem Cathedralis ritus Sacramentorum ex more Romanæ Ecclesiæ adhibeat, prout in libro Agendorum, seu Sacerdotali Brixinensi recuso, traduntur.

IV. Omnia Sacramenta, stola & superpellicio induti, Sacerdotes reverenter, summaque cum honestate ministrent, mortali peccato, quoad ejus fieri possit, vacui. Sint mundi, qui

portant vasa Domini, vasa gratiæ, vasa benignitatis cœlestis, ex quibus hauritur peccatorum venia, & confertur vita æterna.

V. Cum exorcizant, vel catechizant infantes: cum liniunt, cum abluunt, cum Sacris operantur, vel alias sacras functiones obeunt; curent, ut omnia & singula, quæ ad rem præsentem pertinent, non obiter, non præcipitanter, sed graviter & reverenter faciant: ab omnibus gesticulationibus, seu gestibus Clericos dedecentibus abstineant, ut populus eos religiose agere videns, tangatur & ipse Religione, magisque in Sacramentorum amorem rapiatur.

VI. Sanctissimum Domini nostri JESU CHRISTI Corpus, aqua Baptismi, Sanctum Chrisma, Olea Sacra, cæteraque ad res Sacras pertinentia, sub diligenti, fortique custodia semper habeantur. Claves sint penes Pastorem, magnæque fide custodiantur, ut ne ulla vel injuria, vel profanatio tremendis Christi mysteriis, rebusque Sacris irrogetur.

VII. Chrisma Sanctum, Oleaque Sacra, quorum in Sacramentis usus est, quotannis renoventur; ac alia nova, (veteribus exustis) ab Ecclesia matrice repetantur. Caveant vero omnes, ne alibi, quam in Ecclesia, & (si alius locus honestus non fuerit) in tabernaculo una cum Venerabili Sacramento, in mundis, ac distinctis tamen vasculis, & loco etiam inferiore, quo decet honore, reserventur.

VIII. Vasa, loca, vestes, totaque supellex sacra, semper munda, ac nitida sit. Quod domi tuæ non terres, in domo Dei tolerabis? Nec ullis prophanis, sed Sacris solum usibus accommodentur. Immemores officii sui, puniantur.

IX. Mappæ, pallæ, & aliæ vestes lineæ laventur quater ad minimum in anno: Corporalia & purificatoria sæpius. Calices, patenæ bis terve: urceoli, quoties in eis vinum, vel aqua ad Sacramentum apponetur, accurate eluantur. Candelabra, cruces, tapetia, & alia, sive vasa, sive ornamenta, tam sæpe laventur, purgantur, excutiantur, &

mundentur, ut nunquam sordida, imundave in domo Dei appareant. Corporalia, Purificatoria, Calices, Patenæ, &c. primum per Sacerdotem, vel Subdiaconum abluantur; deinde per alias honestas personas ablutio absolvetur: alia lavent, seu purgent alii.

X. Ut autem vasa ministerii sacri non una materia constant, ita non eadem est omnium lavandi ratio. Nam quæ ex ære, cupro, vel simili metallo fiunt, fere creta, latere, lixivio, vel similibus rebus purgantur: quæ vero aurum, vel argentum habent, ne detrimentum res tam pretiosæ patiantur, alio modo sunt tractanda. Calices igitur 1. bis, terve in tepidam aquam immergantur. 2. Sapone cum lixivio peracti in pulvis decocto, obliui, & bene inuncti per noctem integram, vel saltem, horas aliquot extra aquam relinquantur. 3. Ter, quaterve, aut sæpius aqua calida abluantur. Quo aqua & manus pertingere non poterunt, scopulæ setaceæ, quales aurifabris in usu, serviant. 4. Sic loti in aquam rursus frigidissimam, quæ haberi possit, reponantur. 5. Denique ex frigida extracti, sole, cum aer ferens est; alias in loco calido siccantur. Eodem modo patenæ, & alia aurea, vel argentea, cum immunda fuerint, repurganda sunt.

XI. Sed hoc loco illud quam diligentissime observari volumus, ut semper lotio prima vestium, & vasorum, quæ Corpus & Sanguinem Christi Domini, vel alia Sacramenta contingunt, aut continent, in Sacrarium, vel piscinam sacram (quæ, ut in quavis Ecclesia sit, serio mandamus) effundatur. Piscina autem locus sit sub terra fornice reclusus, in quem juxta Sacros Canones, aquæ, cineres, & id genus Sacra, ut terra hauriantur, demitti debent: qui fere in Sacristia, vel pone Altare, vel in alio Ecclesiæ angulo, vel etiam in Cœmiterio, pro loci cujusque conditione, constitui solet. Clavem, qua referatur, semper habeat Parochus.

XII. Materiæ, formæ, cæremoniæ Sacramentorum, quales in Rituali nostro, aut Missali Romano describuntur,



buntur, ab omnibus & singulis quam diligentissime adhibeantur. Nulloque modo ferendi sunt, qui vel alterius Dicecescos, unde in nostram venerunt, ritibus utuntur; vel novas & peregrinas caeremonias sibi pro arbitrio suo fingunt; sed quotquot in Ecclesiis nostris serviunt, juxta earum duntaxat ritus, Sacramenta ministrare, & Divina Officia peragere, omnes uniformiter volumus: ut sicut omnium est una professio, ita quoque apud omnes una eademque sit cultus Divini ratio.

XIII. Sacramenta Divina ante meridiem potius, quam post epulas, & prandia (nisi aliud postulet necessitas, vel approbata loci consuetudo) & a valde sobriis administrentur. Pertinet hoc imprimis ad reverentiam rerum Divinarum: tum ad securitatem conscientiarum: denique etiam ad communem hominum ædificationem. Quod si quis plus æquò potus (quod Deus clementissime avertat) vel Baptismum, vel aliud Sacramentum ministrasse, vel confessiones excepisse deprehensus fuerit, is carcere in pane & aqua per decem dies puniatur.

XIV. Consuetudo pervulgata est, pro Sacramentis, & aliis Ecclesiæ ministeriis pecuniam dare, & accipere; quæ ex pietate primam suam originem traxit; postea vero in varios abusus degeneravit. Ut Nos pias, & laudabiles consuetudines neutiquam improbamus, ita pravas, & iniquas minime laudare possumus. Statuimus ergo, & ordinamus: sponte oblata semper accipere liceat; de re nulla pacisci. Quæ jura usus jam recepit, & debentur ei, qui altari servit, non abrogamus, sed nimias duntaxat exactiones vetamus: & ut post administrationem primum exigantur, declaramus. Inter divites quoque & pauperes, sive Sacerdotes ii sint, sive laici, discrimen statui volumus. Nam divites facilius, quæ dant, donare præsumuntur: Et Sacerdotes egentiores majus jus ad exigendum habent, quam locupletiores; cum stolæ (ut vocant) jura Sacerdotibus haud alio, quam gratitudinis, vel necessarii victus nomine debeantur. Ubi enim de re agitur, quæ pretio non

æstimatur, nisi hisce duobus nominibus subnixa fuerit, consuetudo non magis pia, quam impia censeri solet. Quod si quis operas suas, ad quas ex officio suo alioquin non obligatur, extraordinarie alteri velit locare, quin ita faciat, non prohibemus, modo iuste, & citra scandalum id fiat, & quidquid accipitur, non pro re spirituali, sed vere pro labore temporali recipiatur. Qui huic nostræ ordinationi contraverint, gravissimis pœnis se punitum iri minime ambigant.

### *De Baptismo.*

I. **S**ingulæ Parochiales Ecclesiæ, vel alias Curatæ, singulos fontes habeant lapideos, in quibus aqua Baptismatis toto anno, & non in aliis vasis aut locis, summa diligentia, & munditia servetur. Abusus contrarii, si qui irrepererunt, penitus tollantur.

II. Fontes bene clausi & muniti sint, ne ad illos aditus profanis pateat; ne qua ex eis ad profanum, vel superstitiosum usum atteratur; ne quæ fordes aquam immundent; vel aliquid sit, quod altantium oculos offendant. Quod si quid casu in fontes inciderit, ut ii solo Sacerdote quantocius expurgentur, jubemus.

III. Aqua vero bis in anno, Paschæ videlicet, & Pentecostes Sabbatis (veteri in piscinam effusa, & fontibus bene purgatis) renovetur, ac solemniter benedictione & Sacri Chrismatis unctione, a Parochis ex Canonum præscripto consecratur. Nec in alia aqua extra casum extremæ necessitatis baptizare quemquam liceat.

IV. Infantes recens nati, quam citissime fieri potest, baptizentur; nec cujusquam Baptismus, nisi de expressa licentia Parochi, ultra octiduum differatur: quæ tamen licentia brevis esse debet, & non nisi ob rationabilem causam, & ubi periculum nullum timeatur, concessa. Dum autem baptizatur, infantem manu sua Patrinus, non Sacerdos sustineat.

V. Extra Ecclesiam baptismalem baptizare non liceat. Excipimus casum necessitatis; ut cum hyems riger, vel

vel mortis periculum urget: & Principum ac Illustrium personarum liberos, quos in privatis Oratoriis; a proprio tamen Parocho, vel ejus Vicario baptizari permittimus.

VI. Quocunque tempore infans ad Baptismum defertur, sine mora, & tergiversatione ulla baptizetur. Si per negligentiam cujusquam, vel avaritiam, sine Baptismo quispiam mortuus fuerit, is a Divinis perpetuo suspendatur, & beneficio suo priveretur. Idem de aliis quoque Sacramentis intelligatur.

VII. Quando periculum urget, ubivis, & cuivis baptizare liberum sit, ita tamen, ut præsentem Sacerdote, ne mo alius id præsumat: si vero absit omnis Sacerdos, primum Clericus, deinde mas, demum femina, qui, vel quæ veram Baptismi formam recte noverit, baptizare possit. Quod si ita baptizatus, postea supervixerit, is quamprimum in Ecclesia sistatur, ut in eo ceremoniæ ob necessitatem omisæ, rite suppleantur. Nunquam autem, ne quidem sub conditione, ullus iterato baptizetur, quem semel rite baptizatum fuisse constiterit: Examinentur proinde ii, qui in necessitate Sacramentum ministrarunt, an, & quomodo id fecerint, & si dubium probabile subsit, sub recepta conditione Baptismus repetatur.

VIII. Qui parentes infantem infra primum ætatis annum, sine cunis lecto suo noctu exceperint, ii pro rei gravitate puniantur.

IX. Obstetrices a Magistratu sæculari delectæ, ad obstetricandum non admittantur, nisi a Curione loci de fide, & moribus examinatæ, formam Baptismi veram didicerint: & præterea juraverint, se mensibus singulis cujusque loci Pastori puerperas, quibus adfuerint, cum numero prolium susceptarum denunciaturas.

X. Puerperæ vero certo post partum die ad Missæ Sacrificium, & benedictionem a Sacerdote in Ecclesia suscipiendam pro more veniant. Ut autem mos antiquissimus, & Ecclesiæ Catholicæ probatissimus conformiter ab omnibus ubique servetur, Parochi invigilent. Nihil vero pro hujusmodi

benedictione accipere liceat, nisi quod sponte, & mere liberaliter oblatum fuerit.

XI. Unus tantum sive vir, sive femina, vel ad summum duo, vir scilicet & mulier, in Baptismo, aut Confirmatione susceptores sint. Neque ab eodem plures vel ex Baptismo levare, vel Episcopo ad Confirmationem offerri convenit; ne spiritualis cognatio forte subsequenti Matrimonio impedimentum afferat.

XII. Patrini autem sint homines pii, & Catholici, ætatis provectæ, bonæ vitæ & famæ, in fide bene instructi, & ab Ecclesia non abstenti, nec Monachi, vel Monachæ, vel alii ab officii hujus functione, jure prohibiti; demum tales, qui non solum ore, sed & mente, ac serio ad interrogata respondere, suum munus intelligere, & magis filios suos spirituales fide, & moribus bonis imbuere, quam donis cumulare queant, ac velint. Cujus officii eos a Parochis sæpius etiam admoneri serio cupimus.

### *De Sacra Confessione, & Communione.*

I. **P**aschalis Communio quotannis in Curata, seu Parochiali Ecclesia fiat: Nec confessio fiat alibi, sine expressa licentia Parochi proprii. Quo tamen Canone nihil omnino iis, qui peculiararia privilegia, sive ab Episcopo, sive a Sede Apostolica habent, adimere intendimus. Hoc solum requirimus, ut Parochi & Curati de suorum obedientia certi esse queant.

II. Nemo Paschalem Communionem, & Confessionem intermitrat, aut differat, sine proprii Parochi approbatione.

III. Tempus autem Paschale, intra quod ex præcepto Ecclesiæ communicare, & confiteri fideles omnes oporteat, septem hebdomadis integris definimus, a Dominica *Invocavit* videlicet usque ad Dominicam *in Albis*. Qui intra hoc tempus sine justa causa, a Parocho, vel a Nobis comprobanda, ad Communionem non accesserit, & vel generatim solum monitus ad officium non

non redierit, is ad nullum Sacramentum, etiam Matrimonii, donec relipiscat, admittatur, & vivus ab ingressu Ecclesiæ arceatur, post mortem autem sepultura sacra careat.

IV. Ut autem certe constet, qui eo tempore communicaverint, statuiamus, & ordinamus, ut si quis Confessionem, & Communionem extra Parochiam suam obierit, Parochio suo de eis fidem faciat. Qui vero intra Parochiam id fecerint, certum aliquod signum afferant, vel accipiant, quod Parochus præscripserit, ac pro concione promulgaverit. Parochi autem sexto die post octavam Paschæ, eos, qui officium hominis Christiani tunc neglexerint, ad Decanos suos in scripto deferant, qui deinde Nos certiores faciant; alioquin pœnas dabunt unius floreni toties, quoties neglexerint.

V. Hortamur autem in Christo Domino omnes fideles, ut qui per ætatem possunt (nisi eodem anno sæpius id facere malint) per Quadragesimam bis confiteantur; semel in illius principio, & iterum in fine, cum ad Sacram Synaxin accedent. Interjectum tempus expiandis per pœnitentiam vitiis deputeretur, ut ita demum puriores facti, Sacra Eucharistia majori cum fructu potiantur.

VI. Ægroti, Puerperæ, & alii in probabile vitæ periculum deducti, adversus ingravescentia mala sese tam salutaribus remediis muniant, nec in ultimum diem differant, ne iis præoccupati, una cum corpore, animæ quoque jacturam faciant. Hoc Parochi imprimis urgeant, & morem tam antiquum, imo & necessarium, revocent, aut, ne penitus aboleatur, attendant; ipsi alioquin eorum, qui negligenter perierint, rationem Deo reddituri.

VII. Magnus abusus & grande piaculum est, peccata sua Sacerdoti solum in genere exponere, & nihil in specie velle fateri. Quem Nos eliminare cupientes, eos, qui aliter non confitentur, a Sacra Communionem tanquam indignos rejiciendos decernimus. Parochis autem, & Concionatoribus, ut hoc nostrum Decretum populo sæpius inculcent, & de modo

specialis confessionis eundem magnam diligentiam instituant, præcipimus. Confessariis denique injungimus, ut rudes in re tam necessaria pro viribus suis adjuvent, peccatorum species, numerum, & circumstantias necessarias ab eis diligenter, & solícite exquirentes. Negligentes moniti ab officio removeantur.

VIII. Pueri, cum primum accedere voluerint ad Sacram Communionem, nisi bene prius examinati, & de vi, ac ratione Sacramenti diligenter instructi, ne admittantur. Infames, concubinari, fenerator, & similes, peccatores notorii, antequam publice de eorum pœnitentia constet, publice etiam rejiciantur. Qui raro sumunt, si diligenter ex suggestu, vel in confessione moneantur, quanta reverentia, & humilitate ad tremendum illud Sacramentum venire debeant, quantaque supplicia, juxta Apostoli sententiam, illos maneat, qui indigne suscipiunt.

IX. Piam Sacramentorum frequentiam in Ecclesias nostras introduci cupientes, omnibus, & singulis Curatis, & Concionatoribus mandamus, ut suos quisque verbo, & exemplo ad crebrum eorum usum, præsertim vero in solennioribus anni Festis privatim, & publice invitet, ac incitet.

X. Nemo est, qui cibum, aut medicinam, ad corporis salutem aut conservandam, aut recuperandam non cupidissime, & sæpissime usurpet. Animas fidelium pascit Corpus & Sanguis Domini nostri Jesu Christi, ac in vitam æternam custodit: Salutaris pœnitentia omnium morborum animi præsentissima est medicina. Hæc, & alia commoda, quæ Eucharistiæ, & Pœnitentiæ dignus usus secum affert, sæpe proponant Parochi, ut populus ad frequentiores eorum usum accendatur.

XI. Cæterum, quando fideles ad Sacram Communionem accedunt, ut omnia summa cum reverentia, & honestate peragantur, curandum est: Candelæ ab Elevatione ad finem Communionis ardeant: Communio laicorum Sacerdotis Communionem sequatur:



tur: Communicantes ad cancellos ligneos (qui, ut in omnibus Ecclesiis nant, serio mandamus) genibus nites, Venerabile Sacramentum ex manu Sacerdotis reverenter accipiant: Cancellis mappæ mundæ supersternantur, vel donec cancelli parentur, ab innocentibus pueris utrinque inter Sacerdotem & communicantes, expansæ sustineantur, ut si quæ hostia casu exideret, eam mappæ exciperent. Postquam Venerabile Sacramentum ex ore summentis descenderit, ordine singuli ad locum ablutionis accedant, ubi stantes (non est enim Sacramentum, quod tunc sumunt) quod porrigetur, bibant. Post Communionem vero non solum in Ecclesia, sed etiam toto die piis precibus & operibus vacare, itaque deinceps vivere studeant, ut ne Christum Dominum, quem pie susceperunt, ex suo hospitio impie rejiciant.

XII. Et hæc quidem communicantes. Sacerdos autem principio populum, maxime aggreſſum & rudem jam ante aram procumbentem, brevi aliqua exhortatione, ad dignam Communionem præparabit: Deinde generali confessione germanice, pie & clare pronuntiata, dataque generali absolutione, & ter verbis Centurionis pro more pie repetitis, in ora singulorum cum summa reverentia, & modestia Sacram Eucharistiam immittat. Caveat autem, ne iis digitis, quibus Venerabile Sacramentum attigit, antequam vino, more jam recepto, abluantur, quicquam aliud contingat. Quare ciborium, ex quo Venerabile Sacramentum dispensat, vel indice, & pollice sinistræ manus non disjunctis sustineat; vel iis in calicem ablutis, toto pugno, quamdiu communicat, apprehendat: Sed & ciborium ita circumferre studeat, ne communicantium halitu, vel suspirio, aliqua ex Sacris Hostiis ejiciatur. Finita denique Communione, micis etiam minutissimis, quas summa cura colliget, reverenter absumptis, primum ablutionem (nisi enim aliud necessitas, vel paucitas, vel multitudo communicantium requireret, non nisi hoc modo Communio erit peragenda) suam bibat, ac Sacrificium Missæ absolvat.

XIII. Vinum post Communionem Sacram vulgo non in calice, nec a Sacerdote, sed ab alio honesto viro ex alterius formæ poculo porrigatur, ne se Christi Domini sanguinem bibere putet. Poculum autem illud sit argenteum, vel saltem deargentatum: vinum album, non rubeum, ne forte vulgus imperitum colore decipiat.

XIV. Tot Hostiæ Sacræ pro morientium viatico, vel alios in usus semper reserventur, quot præſenti necessitati sufficere videbuntur: sed non aserventur ultra diem decimum quintum, quin prioribus reverenter consumptis, recentes substituantur, ut nunquam defit, quod vel ex hac vita abituris præbeatur, vel communicaturis porrigatur, vel adoraturis proponatur.

XV. Ut recentium Hostiarum consecratio, ita quoque veterum consumptio fit a solo Sacerdote celebrante. Consecratio quidem hoc modo: Hostiæ laicæ, & Sacerdotales unica, eademque oblatione, & consecratione offeruntur, & consecrantur, extensa nimirum intentione ad totam materiam propositam. Solæ Sacerdotales elevantur, & simul a Sacerdote celebrante absumuntur, nisi vel una, vel plures quandoque in alios usus consecrantur; ut sit in festo Corporis Christi, & in Cæna Domini. Laicæ, quando plurimæ sunt consecrandæ (nam quando una consecratur, vel paucæ, semper ponuntur juxta Sacerdotalem) in vase peculiari Sacerdoti celebranti apponuntur; Vas extra corporale in altari consistit, usque ad tempus consecrationis; postea semper in corporali: In Consecratione juxta calicem: postea vero pone, ne Sacerdotem celebrantem impediatur. Ubi vas peculiare non est, Calix vel Patena adhibeatur. Consumptio vero hoc modo: Post Communionem suam Sacerdos, omnes Hostias in pyxide reliquas, quantumvis recentes videantur, reverenter sumit una cum micis sacris: Deinde pyxidi purgatæ recentibus impositis, primum manus suas abluit, ablutionem quoque suam bibit; demum Sacro absoluto, pyxidem in suum locum reverenter reponit.

XVI.

XVI. Quod si ex negligentia crassa Sacerdotis Hostiæ omnes, vel saltem aliquæ (quod ne fiat, severissime prohibemus, & cum factum fuerit, gravissimis penis vindicabimus) computruissent, vermes, si qui nati fuissent, comburantur, cineribus in piscinam abjectis: Hostiæ vero integræ, vel earum partes reverenter a Sacerdote absumantur, nisi sine horrore, & stomacho sumi nequeant. Tunc enim in vase aliquo peculiari, donec omnino corrumpantur, in tabernaculo Venerabilis Sacramenti cum reverentia reponi volumus.

XVII. Quæ Hostiæ per angariam unam, vel alteram in Sacristia remanserunt, ad consecrationem a Sacerdotibus adhiberi nullo modo volumus; quæ unius, vel alterius mensis fuerint, eas solum consecrandas esse statuentes. Ut autem recentes semper in promptu habeantur, ordinavimus; ut in Diocesi nostræ sex ad minimum deligantur, qui eas coquere norint; duo in valle Oeni inferiori: duo in superiori: & duo in Pustrissa. Qui si ex Religiosis non fuerint, ii sint saltem Pistores, vel tandem Æditui jurati, de quorum fide dubitare non liceat: a quibus omnes, & singuli Sacerdotes secundo quoque mense competenti pretio, tot Hostias emere teneantur, quot communibus duorum mensium necessitatibus sufficere posse judicabuntur.

XVIII. Quoties viaticum ad ægrotos deferitur, comiteretur populus Sacerdotem, campanæ alicujus sonitu præmonitus. Candelæ, vel lampas accensa præferatur; alius æris pulsu det signum præsentia Sacramenti Venerabilis, ut omnes ei honorem exhibeant. Cum Sacro ferculo Sacerdos stola & superpellicio indutus sequatur. Idem servetur in reditu. Quare duæ semper ad minimum Hostiæ ferendæ erunt, aut sine solemni apparatu revertendum. Quod tamen fieri non debet, nisi loci distantia, itineris, temporisque difficultas aliud postulet.

XIX. Lumen ante Sacramentum semper ardeat; ubi id fieri non potest, fiat, quod Ecclesiæ facultates ferunt. Id vero Archi-Decanus, Decanus, & Parochus arbitrentur.

*Tomus VIII. Concilior. German.*

### *De Missæ Sacrificio.*

I. **M**issa Deo Sacrificium est gratissimum, in quo Filius Deo Patri incruente immolatur; ad quod, quoties accedunt Sacerdotes, pro hominibus apud Deum legatione funguntur. Quare summa, qua possunt mentis puritate, & externa quoque reverentia Sacrosanctum hoc munus absolvant, ut &, quæ volunt, a cœlesti Patre obtineant, & populum amore tanti Sacrificii inflamment.

II. Missæ in solis Ecclesiis, vel Oratoriis dedicatis fiant: & hora statâ, præsertim die festo, quæ toti communitati ad conveniendum sit commoda; nec ad instantiam ullius, unquam suo Sacro totus populus defraudetur.

III. Ab Altaribus procul arceantur feminae. Qui ministrat, Celebranti simul respondeat; locum enim idiotæ supplet: quod in Civitatibus, oppidis, Collegiis, Monasteriis, & aliis locis celebrioribus, ut fiat, omnino præcipimus. Neque id sane difficile erit, si vel nullus ad Sacristiæ munus in posterum admittatur, qui latine legere nescit: vel Scholæ Parochiales quantocyus restaurentur. Ubi vero minister respondens haberi nullo modo potest, singuli Parochi, & Curati suos Ædituos ita instituant, ut saltem apte, opportune, ac devote Celebranti inserviant. Curent Decani, ut Canon iste in usum veniat, contumaces etiam debitis pœnis coercentes.

IV. Duæ ad minimum candelæ ex pura cera, neque nimium exiles ad singulas Missas accensæ sint, quæ ab initio ad finem usque Evangelii S. Joannis, ardeant.

V. Quoties genu in Missa flectendum est (quod circa Consecrationem Hostiæ & Calicis: item quotiescunque Sacra Hostia tractanda est, ante & post fieri debet) Sacerdos genu dextro, cum decoro corporis motu, manibus altari innixus, quasi terram attingat.

VI. Symbolum Fidei & Oratio Dominica semper integre pronuncientur. Qui inter legendum, aut cantandum aliquid scienter omiserit, vel abruperit, severe castigetur.

Z z z 2

VII.

VII. Circa Elevationem Sacrae Hostiæ, antiphonæ, vel alia carmina intempestiva ne intercinantur. Altum silentium, quod præsentibus mysteriis tunc deberetur, paulisper ab omnibus servetur; Sed elevato Calice, si musice cantandum fuerit, id devote & submissa voce fiat.

VIII. Canon uterque tacite recitetur, reliqua voce clariore: Omnia vero tractim, integre, distincte, graviter, religiose, atque ex instituto Cathedralis Ecclesiæ, juxta rubricas Missalis Romani, peragantur.

IX. Ut uniformes ubique Cæremoniæ sint, in Ecclesia Cathedrali, & Collegiis semper deligatur unus, qui sit Cæremoniarum Magister: cujus officium erit, instruere eos, qui de novo ad Sacerdotium accedunt; alios minus perite Celebrantes monere; ut omnia recte, decenter, ordinarie fiant, attendere: quando sedere, stare, genu flectere in Choro oporteat, docere; Cui omnes alii obedire teneantur. In aliis Ecclesiis idem officium gerant Decani rurales, vel alii ab eis delecti.

X. Nemo Missam primam inconsulto, vel non approbante Vicario nostro Generali per totam Dioecesin nostram faciat. In Missis autem novis, sive (ut vocant) Primitiis, omnes comestationes, ebrietates, saltationes, omnem denique luxum interdiciamus. Nefas enim est eo die, quo primum tremendi Sacrificii auspiciam faciunt, Sacerdotes rebus prophanis seque indignis operam dare. Qui contravenerit, decem aureis, & aliis pœnis arbitrariis mulctetur.

XI. Nemo celebret in ara portatili, vel in ædibus privatis, sine libro Missali, mundo & sacro vestitu, lumine ceræ, cæremoniis in Missali Romano, aut Brixinensi novo Sacerdotali expressis.

XII. Hostiæ sint azymæ, hoc est, fermenti expertes, ex sola aqua naturali, & farina triticea coagulata: non atræ, non mucidæ, non putres, non maculis aspersæ, non rimis fissæ, quæ vel aspectum astantium offendant, vel fumentis stomachum moveant. Si quid

peccatum a quoquam fuerit, carcere vindicetur.

XIII. Vinum autem sit de vite, clarum, album, vel aliud; optimum tamen, quod haberi possit. Optimum namq; ad optimum Sacrificium adhiberi convenit. Quandoquidem autem non expedit vinum ex publicis cauponis afferri, statuimus & ordinamus, ut unaquæque Ecclesiæ suum proprium vinum habeat: Aut si hoc fieri non possit, ex hospitio non accipiatur, nisi quod Ædituus ipse in cellam vinariam descendens, ex dolio quotidie haustum esse oculis suis viderit.

XIV. In posterum nemo plures Missas suscipiat, quam commode celebrare possit. Qui secus fecerit, a Divinis suspendatur.

XV. Sicubi numerus Missarum ita magnus est, ut dici juxta fundatoris dispositionem non possint; aut elemosynæ ita tenues, ut oneri ferendo non sufficiant, ad Nos clare in specie & numero referri volumus, ut, quid ad gloriam Dei fieri deceat, mature statuamus. Interim vero a Fundatorum pia voluntate ne latum unguem discedatur.

### *De Extrema Unctione.*

I. **P**ER Sacramentum exeuntium (ita veteres appellant) gratia Dei confertur, quæ peccata præsertim leviora remittit, & animam a languore ex peccatis innato liberat, & in supremo mortis agone certantem animat: nec solum animæ, sed sæpenumero etiam corpori salutem affert. Hæc fidelibus diligenter explicanda sunt, ut quod hætenus, vel ex falsa persuasionem, vel ignorantia neglexerunt, edocti ardentius expectant.

II. Curent Pastores, ne quis sine Viatico, vel Extrema unctione ex hac vita abeat. Si quis dare petenti neglexerit, is beneficio suo: si vero quis monitus suscipere contempserit, is sepultura sacra privetur.

III. Cæterum Sacro unctionis Oleo ne ungantur pueri, amentes, furiosi impœnitentes, & desperati homines, qui nullum pœnitentiæ signum dederint; sed



sed ii solum, qui illud petiverint, & in præsentis mortis periculo versantur, dum integris adhuc sunt sensibus, & postquam jam Pœnitentiæ, & Eucharistiæ Sacramenta præceperunt, inungantur.

IV. Inter ungendum ægrotum nihil præpostere, nihilve inordinate fiat, sed uti Agenda præscribunt, ritus omnes religiose & decenter, ac in locis corporis debitis adhibeantur. Post unctionem absolutam, ægrotus ad extremum illud certamen paucis animetur, & instruatur; astantes vero infirmitatis humanæ admoneantur, & ut pro laborante in extremis ferventius orare studeant, rogentur.

V. Vasculum olei Extremæ unctionis sit argenteum. Si cum Eucharistia simul effertur, servetur, quod supra de Viatico efferendo statuimus. Sin autem separatim deportatur, omitatur campanulæ sonus, & minister linteat sine lumine, cum sola aqua benedicta Sacerdotem sequatur, ne populus genibus flexis adoret. Ut enim alia quædam Sacramenta, ita & hoc, sola capitis apertione honorare sufficit. Semper autem efferatur vel in bursa serica, funiculo serico ad collum appensa, vel in pyxide grandiore, pro loci cujusque consuetudine, magna cum reverentia.

### *De Sponsalibus & Matrimonio.*

I. **N**Overint fideles, Sponsalia non esse Matrimonium, sed Matrimonii futuri duntaxat mutuam promissionem: Ideo Sponsorum cohabitatio in Ecclesia Dei minime toleratur. Qui enim revera conjuges non sunt, jure Matrimonii nullo modo gaudere possunt. Hoc vero ad Parochos, Decanos, & Magistratus civiles pertinet, ut hujus generis scandala quovis modo e medio tollere curent. Nos certe præsentium tenore omnibus Pastoribus sub pœna suspensionis injungimus, ut quos ante nuptiarum solennitatem cohabitare cognoverint, si vel semel moniti se non disjunxerint, eos a Matrimonii conjunctione etiam publice repellant.

II. Si Sponsos liberos procreasse, aut turpem aliquam consuetudinem ha-

buisse, publicum fuerit, ii sine publica pœnitentia nec ad Matrimonium, nec ad Ecclesiam recipiantur: & præterea pro gravitate criminis ad arbitrium Judicum Curiae nostræ mulctentur. Quod Decretum nostrum in singulis Parochiis, quoties nuptiæ denuo aperiuntur, pro concione proponi, ac exponi populo volumus.

III. Si sponsalibus Sacerdos proprius interit, eum non ut Parochum, sed veluti testem (quo nomine etiam alii quidam accersuntur) duntaxat adesse præcipimus. Quare nec stola, nec superpelliceo tunc utetur, nec sponfos ullo modo per verba de præsentis conjunget, diserte protestatus, illum actum Sponsalia, non Matrimonium esse, neque conjunctione, neque benedictione Sacerdotali indigere.

IV. Futuri conjuges semper de libero consensu, aliisque impedimentis a proprio Parocho privatim examinentur, antequam ad proclamationes procedatur. Nulli autem in Ecclesia proclamantur, quos verisimile est, aliquo legitimo impedimento a nuptiis prohiberi. Alii quidem proclamantur, sed si postea impedimentum aliquod deprehensum fuerit, tales inconsulto Ordinario, aut Vicario ejus, non copulentur. Sed neque facile credatur cuiquam dispensationem jactanti, nisi literas Judicis fide dignas exhibuerit.

V. Trinæ autem proclamationes fiant ante nuptias, tribus festis continuis, a Parocho, vel Concionatore in publica Ecclesia, & concione frequentissima; nulla ipso die nuptiarum. Ab hac lege nulli omnino excipiantur sine speciali mandato nostro, sub pœna suspensionis ab officio. Qui vere Christiani sunt, legi tam necessariæ, ac utili facile parituros speramus, scientes tales magis Dei, quam hominum gloriam amare, & Christianam obedientiam etiam Sacrificio præferre.

VI. Si contrahentes diversarum Parochiarum fuerint, in utraque publicationes fiant, nec ulterius procedatur, nisi ex mutuis Parochorum illorum literis, & publicationes rite factas, & nullum subesse Matrimonii impedimentum, certo constiterit.

VII. Matrimonium clandestinum, quod sine proprii Parochi, vel alterius Sacerdotis de ejus, vel Ordinarii licentia, ac duorum, vel trium testium præsentia contrahitur, non solum est peccatum mortale, sed etiam coram Deo, & Ecclesia Dei irritum, ac in utroque foro nullum.

VIII. Hortamur Sponsos, ne ipso nuptiarum die, sed triduo ad minimum ante expiatis per Sacramentalem Confessionem rite peccatis, ad Sacramentum Corporis Domini nostri JESU CHRISTI reverenter accedant, ut rem tanti momenti cum Deo incipiant; & per gratiam Dei, quæ illis dabitur, grave jugum Matrimonii suavius efficiatur. Et nisi certam fidem Confessionis, & Communionis, saltem ante nuptiarum solemnia factarum, fecerint Parocho, non admittantur ad Matrimonii solennitatem.

IX. Nuptiæ a proprio Parocho, vel ab alio Sacerdote, de ejus, vel Ordinarii consensu, benedicantur. Benedictio autem fiat in Missa, cui convehientes ab initio ad finem usque interesse oportebit.

X. Cum per Diocesin universam, maxime inter locupletiores, Matrimonia in facie Ecclesiæ fere fiant vesperi præcedenti, & benedictiones nuptiales primum mane sequenti in Ecclesia suscipiuntur, quod tamen ægre, & sine licentia speciali Ordinarii, vel ejus Vicarii Generalis, omnino non permittendum est, hortatur, ac serio monet Synodus Diocesana, authoritatem Concilii Tridentini secuta, ut conjuges ante Benedictionem, mane in templo suscipiendam, non consumment Matrimonium; speratque, fideles tam sacra monita facile admissuros.

XI. Nuptiæ die festo, vel non celebrentur, vel ea hora ad Ecclesiam ducantur, quando etiam totus populus Sacrum, & concionem audire commode potest. Volumus insuper, & ordinamus, ne unquam nuptiæ die festo ultra horam nonam: die vero profesto ultra decimam, a Sacerdotibus expectentur. Quæ serius venerint, non copulentur sub pœna suspensionis; nisi alius Sacerdos, qui nuptiale Sacrum

faciat, in promptu sit, ad id ab ipsis conjugibus antea specialiter rogatus, atque a Parocho proprio, vel Ordinario deputatus.

XII. Qui coactas nuptias conjungere præsumpserit, pœnam suspensionis ab officio, & beneficio incurrat: qui autem liberos suos, aut alios subditos, nuptias, ubi & quomodo volebant, contrahere coegerint, sive privati, sive Magistratus fuerint, anathematis pœna coërceantur.

XIII. Caveant Parochi omnes, ne ullos, cujuscunque etiam dignitatis existant, in privatis ædibus per verba de præsentem matrimonialiter conjungant, sed neque in Ecclesia, quæ propria non sit, vel tempore interdicti sine expresso nostro consensu. Qui secus fecerit, per Diocesin nostram ad omne officium, vel beneficium ad arbitrium nostrum sit inhabilis.

XIV. Ignotos, vel ex alia Parochia, aut regione venientes, Matrimonio nemo facile jungat: multo minus vagos, & eos, qui nullam certam habent sedem, nisi post diligentem inquisitionem, & re ad Ordinarium delata, ab eo licentiam id faciendi impetraverit.

XV. Nemo conjungat eos, inter quos impedimentum esse, certo noverit, sub pœna privationis beneficii: qui autem eos ad rem tam nefariam coegerint, cujuscunque status, dignitatis, & conditionis sint, ii anathemate irretiti, donec Ecclesiæ reconcilientur, ab omnium Sacramentorum usu excludantur.

XVI. Ut ii, quos semel legitime conjunctos publice fuisse constat, separationem vivere non debent, nisi a Magistratu Ecclesiastico legitime, & iustam ob causam separati fuerint: cujus facere fidem indubitata debebunt literis authenticis, in quibus & causæ justæ, & separationis concessæ expressa mentio fiat: Ita, qui prohibitas nuptias contraxerint, simul cohabitare nullatenus sunt permittendi. Tales ergo Parochi, si quos noverint, nobis recta denunciabunt, ut contra eos, quæ juris sunt, persequamur.

XVII.

XVII. Conjunx unus non potest cum altero contrahere, nisi certus de morte prioris conjugis fuerit. Non igitur quinquennium, aut septennium absentem expectare sufficit, sed certitudo juxta leges Civiles æque, ac Canonicas requiritur, ut ad alias nuptias convolare possit: quam Judex æquus arbitrabitur.

XVIII. Causæ matrimoniales, & ab eis dependentes, ad solius Episcopi cognitionem pertinere dignoscuntur. Idcirco nullus sive Ecclesiasticus, sive sæcularis, sine peculiari commissione ipsis facta, de impedimentis, divortis, & aliis ejus generis, quæ jus, & vinculum Matrimonii contingunt, sub pena excommunicationis, cognoscere, aut judicare præsumat.

XIX. Matrimonia non alibi, quam in Curatis Ecclesiis, nisi quid impedierit, celebrentur. Impedimenti autem cognitionem Nobis, & Vicario nostro reservamus.

XX. Probare nullo modo possumus tam varias, & perniciosas corruptelas, quæ passim in nuptiis licenter, & improbe committuntur, sed eas detestamur, & corrigi vehementer optamus. Non decet enim filios Sanctorum Matrimonia sua auspiciari, sicut gentes, quæ ignorant Deum. Quare aut penitus tollantur, aut saltem temperentur illa levitatis, vanitatis, prodigalitatis, & lascivix studia, quæ tam in Ecclesia, quam domi, sub prætextu nuptialis hilaritatis fiunt, dum plerique abjecto Dei timore, voluptatibus, & aliis carnis operibus indulgentissime, & stultissime vacant.

### *De Ministris Ecclesiæ, eorumque officiis.*

**E**cclesiæ incolumitatem, totamque salutem Christiani populi a Ministrorum qualitate, maxima ex parte pendere, quis inficietur? Ut si boni, & idonei præsent, Religio incolumis persistat, & Christiani populi salus in tuto permaneat: Si mali, & negligentes, mox universa morum corruptela populos occupet, & malis agminatim irruentibus, Ecclesiæ salvæ esse ne-

queant. Quapropter Nos pro Pastoralis cura Ecclesiis nostris recte consulere volentes, de iis, qui Ecclesias gubernaturi, Divinaque mysteria dispensaturi sunt, ut sequitur, statuimus & ordinamus.

I. Nullus ad Ordines deinceps admittatur sine testimonio legitimæ ætatis, probitatis, & literaturæ a proprio Parocho, & Magistro Scholæ, in qua studuit. Huic legi satisfaciunt Religiosi, ubi legitima Superiorum suorum testimonia Nobis exhibuerint.

II. Nullus ordinetur posthac sine Beneficio, aut Patrimonio, aut pensione, unde annuatim ad minimum triginta Coronati ad ipsum redeant: aut denique sine titulo mensæ, eoque perpetuo. Abusus enim perniciosus irrepsit, titulos temporales, & mere fictitios offerendi, quem Nos, Sacerdotali dignitati consulere cupientes, ex tota nostra Diœcesi penitus exterminatum esse volumus.

III. Ad ministeria Ecclesiæ soli digni, & idonei recipiantur, tantoque major delectus habeatur, quanto digniora officia eis injunguntur. Nihil hic examinatores carni, & sanguini, nihil amicitix, odio, vel gratiæ tribuant: In quo eorum conscientias quam maxime obstrictas esse volumus.

IV. Nullus ad curam animarum, vel Confessiones audiendas, vel prædicandum Verbum Dei (quantum fieri potest) assumatur, qui unum annum integrum in Theologia, saltem morali, perdiscenda non expleverit.

V. Apostatas, fugitivos, & vagabundos Monachos in nostra Diœcesi nullatenus esse ferendos, decernimus. Deprehensi severissime castigentur, & ad sua loca relegentur.

VI. Nullus in Diœcesi nostra Ecclesiis, Beneficiis, vel officiis ullis Ecclesiasticis deservire ultra octiduum permittatur, qui admissionem a Vicario nostro Generali, vel ejus Delegato, in scripto obtentam non ostenderit. De repentinis necessitatibus, & quando Vicarius, vel Delegatus ejus, adiri commode non poterit, statuant Decani.

VII.



VII. Qui ad certam Ecclesiam, Beneficium, aut officium a Vicario nostro semel admissus fuerit, is ad aliam Ecclesiam, officium, vel beneficium, sine nova ejusdem admissione, commissione, aut investitura, & præterea testimonio, ex quo liquido constet, quomodo priorem Ecclesiam administraverit, & reliquerit, per totam Diocesim nostram non recipiatur.

VIII. Nullus Parochorum ex nostra Diocesi, cui semel adscriptus fuerit, in aliam sine nostro, sive Vicarii nostri Generalis consensu expresso, migrare præsumat. Quod si fecerit, ipso facto suspensus sit. Idem de Curatis, & Cooperatoribus, qui vel in nostra Diocesi nati, vel alias eidem obligati existunt, decernimus.

IX. Qui Beneficia habent, in quibus vel de jure, vel consuetudine residere debent, ut in Ecclesiis eorum personaliter munera obeant, necessarium est. Nam qui otiose resident, abesse potius, quam adesse censemus.

X. Nullus Clericorum Magistratui civili, Patronis, aut Dominis temporalibus plus æquo se subjiciat, aduleatur, vel ne Nos in illum auctoritatem nostram exerceamus, adhæreat, aut ab iis contra Nos patrocinium quærat. Qui secus fecerint, ut & ii, qui tales receperint, foverint, defenderint, se in excommunicationem latæ sententiæ incurrisse noverint.

XI. Nullus Ecclesiam suam sine facultate nostra relinquat: nullus beneficium, aut officium Ecclesiasticum resignet, nisi in manus ejus, ad quem institutio de jure pertinet. Alias ipso facto ad omnia officia, & beneficia per totam Diocesim nostram omnino inhabilis censeatur.

XII. Horas Canonicas attente, & devote quotidie recitent, nec sine justa causa ullus intermittat. Qui post monitionem negligentes, aut contumaces reperti fuerint, præter juris poenas, beneficio priventur.

XIII. Beneficia inter se nulli permutent sine consensu legitimi Superioris.

XIV. Qui plura beneficia in posterum habebunt, præsertim incompati-

bilia, sive in eadem Diocesi, sive in diversis, iis, ut dispensationes suas Nobis examinandas intra semestre exhibeant, sub poena in Constitutione Gregorii Decimi expressa, præcipimus.

XV. Bona Ecclesiæ immobilia, vel mobilia: item fundationes, jura, aut privilegia ne pignori dentur, vel accipiantur, neve ea commutentur, donentur, vendantur, aut quocunque modo obligentur.

XVI. Beneficia sua ære alieno non gravent, aut majori debito onerent, quam ex perceptione fructuum, vel ex lege, vel consuetudine ad ipsos spectet.

### *De Sacerdotibus.*

I. Sacerdotes simplices diebus Dominicis, & Festis anni sollemnioribus Missas celebrent: qui curam animarum, beneficium, vel officium habent, toties, ut satisfaciant: Cæteri autem Clerici, quater ad minimum in anno publice communicent.

II. Omnes, & singuli ordinarie singulis mentibus Sacramentaliter confiteantur: extraordinarie quoties in peccato mortali celebraturi essent. Ordinariæ Confessionis testimonium scriptum semper exhibeant in Capitulis, vel quoties ab ipsis requiretur, sub poena quatuor librarum ad pias causas: Si qui semel in anno, aut nunquam confitentur, non sunt ferendi.

III. Cooperatores suis Parochis ad nutum obediant: Nihil certi sibi vendicent; sed quidquid a Parochis injungatur, id prompte faciant. Si quis propterea discesserit, quod pro arbitrio suo omnia agere non permittitur, is a Vicario nostro severe puniatur.

IV. Diebus Festis nullus Ecclesiam suam deserat, ut alienam honoret, nisi populus tunc ad vicinam venire soleat.

### *De Parochis & Curatis.*

I. Nullum Cooperatorem, Capellanum, vel Sacerdotem alium, quocumque nomine censeatur, recipiant, foveant, retineant, inscio, aut invito nostro Vicario Generali; sed eos tantum, quos ei corporaliter stiterint; ab

ab eisque, ut illis in cura animarum, vel aliis Ecclesiasticis officiis adiutores essent, expresse, & in scripto approbati fuerint.

II. Tot Sacerdotes quilibet alar, quot & ad Sacramenta Parochianis propriis administrandis, & ad curam animarum exercendam satis esse possunt. Victus autem eis honestus, & necessarius præbeatur, & præterea stipendium liberale, (juxta taxam videlicet, a Vicario nostro præscribendam) ne, dum sordide eos habent, Sacerdotes idoneos, & quos oporteret, habere minime queant. Attendant Decani, & peculiare examen in quovis Capitulo instituunt; in quo, qui rei inventi fuerint, vacantis officii pecunia non illis, sed vel domus Canonice, vel Ecclesie fabricæ accrescat.

III. Omnia, & singula officia, quæ vel ex fundatione, vel laudabili consuetudine obire debent, statis diebus & horis studiose exequantur, ut tam Deo, quam Decanis, & Vicario nostro, quoties opus fuerit, justam sui rationem reddere possint.

IV. Scholæ in singulis Parochiis sint: ubi collapsæ sunt, restituantur: ubi conservatæ, colantur, & augeantur. Ab institutione enim inchoanda est disciplina, ut juvenus a teneris annis assuescat Religionis initiis, ac ignorantia, omnium malorum origo, exterminetur.

V. In pagis, vallibus, & montibus, ut Scholæ ejusmodi, saltem per hyemem habeantur a Parochis, & Curatis, vehementer optamus: ut habeant ipsi, unde commodius vivant; & quomodo otium, & quæ ipsum comitantur, prudenter caveant. Sed & juvenus agrestis, dum legere, & scribere discet, etiam in Fidei articulis, orandi modis, & aliis pietatis Christianæ exercitiis, ac hominis Christiani officiis instituetur; & ad cultum civiliorum, & vitam Christiano homine dignam, multo facilius assuescet. Quos amore agere omnia decet, ii timore non sunt trahendi.

VI. Quoniam vero in Dioecesi nostra plures Ecclesie unicum habent Sacerdotem, qui in omnibus simul ad-

esse non possit: & subditi sæpenumero nolunt ad vicinas Ecclesias diebus Festis se conferre: unde fit, ut Sacerdos unus binas conciones habere cogatur, unam in una Ecclesia cum Missa, alteram in alia sine Missa; vel in altera Missam; in altera Benedictionem aquæ cum processione: & plurimus populus sine cultu Divino dies Festos transigat. Quam consuetudinem, vel rectius corruptelam, Nos abolere cupientes, statuimus, & ordinamus: ubi plures Ecclesie sunt, quæ singulæ singulos Sacerdotes alere vel non possunt, vel nolunt, diebus Festis in earum singulis cultus Divinus per vices agatur: & populus semper ad eam convenire cogatur, in qua Missam & concionem simul audire possit; non obstante quacumque consuetudine. Non est enim æquum, Sacerdotem discurrendo, & concionando in pluribus locis eadem die plus æquo defatigari: & populus præceptum Ecclesie Dei prævaricando, Deum tam graviter offendere desinet. Ubi vero plures Ecclesie sunt, quæ singulos Sacerdotes commode alere possunt, ut quæque suum Sacerdotem proprium habeat, volumus. Neque dubitamus, quin apud fidelem populum tam paterna ordinatio locum habitura sit, ne, quos ut filios amare debemus, in eos tanquam in servos animadvertere cogamur.

VII. Ægrotos Parochiæ suæ quisque solcite inquirat, & non vocatus etiam sæpius invisat. Neque putent se Parochi satis officio suo functos fuisse, si infirmis Confessionis, Communionis, & Extreme Unctionis Sacramenta impertiverint; sed adsint præterea morientibus, ea omnia præstantes, quæ ad animæ salutem tali tempore requiruntur.

VIII. Caveant vero Parochi, ne oves suas periculo morbi alicujus, aut mortis metu unquam deserant. Bonus Pastor animam suam ponit pro ovibus suis, mercenarius autem fugit. Unde etiam ex officii sui obligatione peste laborantibus opem ferre tenentur. Quod nisi fecerint, Deo, & Nobis deserti officii pœnas gravissimas dabunt.

IX. Dies Dominicos, & alios Festos in solis defunctorum exequiis, ne

in pagis quidem impendi volumus. In parentaliis vero, & aliarum exequiarum conviviiis comellationes, ebrietares, & alias nugas, quibus aliqui stultissime indulgent, omnino interdiciamus. Illud enim ad Festorum: ista etiam ad mortuorum injuriam pertinent. Curent ergo Parochi, ut mortuis iuxta sua aliquo die profesto, etiam in pagis solvantur: & ut funebria convivia, vel omnino tollantur, vel, si illud fieri non possit, saltem ea sobrietate, & modestia, quæ Christianos decet, habeantur.

X. Sacramenta Baptismi, Pœnitentiæ, Eucharistiæ, Extremæ Unctionis, & Matrimonii per se, & Cooperatores suos propriis duntaxat subditis administrent, non alienis: neminem iis quavis de causâ defraudent, vel ex negligentia, vel culpa sua privari patiantur: ne & Nos pro tanti sceleris gravitate in eos animadvertamus.

XI. Ex Cancellis, aut pro Concone, vel in Cœmeteriis, vel aliis locis sacris, forensia, & profana nec ipsi promulgent, nec alios publicare permittant; sed ea tantum, quæ sacra & pia sunt, ac ad cultum Dei, & pietatis opera pertinent. Ubi vis infertur, ad Ordinarium confugiant.

XII. Bona, & jura Ecclesiæ suæ quisque pro viribus propugnet, potius vitam suam amitti, quam CHRISTI JESU patrimonium patiantur. Deperdita inquirere, & recuperare satagant. Quam ad rem Nos illis fidam operam pollicemur.

XIII. Ut pœnitentiæ publicæ in usum, ad malorum terrorem revocentur, omnibus modis studeant. Nec peccata, ac scandala ulla dissimulent, sed Magistratus etiam civilis opera severissime vindicent. Verum pœnitentiam publicam nulli injungent inconsulto Vicario Generali, hoc ad solius Episcopi officium pertinere humiliter recognoscentes.

XIV. Pauperum, Viduarum, & aliarum miserabilium personarum curam peculiarem suscipiant, scientes se pauperum parentes a piis Fundatoribus esse relictos.

XV. Decimas, census, atque proventus alterius nemo intercipiat. Et

quia non desunt, qui fructus Ecclesiarum filialium (ut vocant) totos sibi vendicent, onere toto in alios derivato, ordinamus, & mandamus, ut infra semestre a Synodi hujus publicatione, sua cuique Ecclesiæ citra moram restituantur. Quid autem in recognitionem Pastoribus, ab ejusmodi Ecclesiis reddendum sit, nostræ cognitioni reservamus.

XVI. Ab Ecclesia sua nemo discedat sine licentia Canonice obtenta. Si necessitas abesse ad unam hebdomadam cogat licentiam in scripto dabit Decanus: sin ad longius tempus, Vicarius Generalis. Absentia vero nulli permittatur diebus solennioribus anni, nec sine cognitione causæ, nec sine Vicarii idonei, & a Nobis approbati, vel approbandi deputatione. Si quis contra facere attentaverit, sacrorum Canonum pœnas experietur.

XVII. Ecclesias sibi subjectas ad minimum bis in anno quisque visitet: quæ emendatione indigere perspexerint, ad Visitationis, & Synodi hujus Statuta quantocyus reforment; quæ recte se habere viderint, conservare studeant. Idem de beneficiis, ædibus, bonis, ac juribus eorum statuimus.

XVIII. Domus Parochiales ordine, ac disciplina sint reliquis exemplum. Non asciscantur in eas quavis de causâ infantes, suspecti, blasphemæ, scelerosi. Fœminæ omnes penitus excludantur, quas Decani non probaverint.

XIX. Urbarium authenticum quisque confici curet, in quo Prædia, decimæ, census, agri, eorumque fines, ac termini, jura, privilegia, obligationes perspicue inscripta legantur, unde distincte cognosci queat, quos proventus & onera quælibet Ecclesia habeat. Cujus exemplum alterum apud Ecclesiam maneat; alterum ad Archivium Diœcesis mittatur.

XX. Illiteratos ineptos, ac inutiles, si qui forte superioribus temporibus irrepsérunt, modo bonæ vitæ sint, & Vicarios idoneos, aut Coadjutores a Nobis approbandos, sibi asciscant, toleramus: Alios in damnum Ecclesiarum, & animarum perniciem ferre non possumus.

XXI.



XXI. Cum primum possessionem adierint, in præsentia testium rerum omnium Ecclesiæ Inventarium conficiatur.

XXII. Familiæ suæ mercedem annuam semper integre solvant, nec eam in tempus longius protrahant.

XXIII. Ecclesias, aut earum bona pignori non supponant: nec debitis onerent: nec decimas, aliosque proventus in damnum successorum vendant. Hæc enim omnia irrita decernimus: ne autem fiant, Decani in Capitulis diligentissime dispiciant.

XXIV. Nemo ad curam animarum posthac admittatur, nisi post accuratum examen idoneus repertus, fidem suam Ecclesiæ Catholicæ & Nobis probaverit; ac in iis, quæ ad officium suum, & jura Ecclesiastica pertinent, se fidelem fore, ac vitam Sacerdote & Pastore dignam se acturum, solenniter juraverit.

### *De Prædicatione Verbi Dei.*

I. **A**D Prædicationis Divinæ Officium nemo absque diligenti probatione, benedictione nostra, & testimonio literis consignato, in posterum recipiatur. Et tales sint, quos & pietas, & vitæ honestas, & doctrinæ puritas commendat: & qui populum tam lingua, quam exemplo ædificent. Pulchrum enim est, cum de Concionatore illud dicitur, quod olim de quodam ex veteribus dictum legimus: Hic est, qui quale habet verbum, talem habet & vitam.

II. Conciones singulis diebus Dominicis, & Festis, in omnibus Parochialibus, & Curatis Ecclesiis (quæ Sacerdotem proprium habent) habeantur. In urbibus, & oppidis etiam in Adventu Domini, & Quadragesimæ, aut binæ per hebdomadam, ubi in usu fuere, retineantur; ubi fieri non consueverunt, juxta Tridentinum Concilium, si ullo modo fieri possit, instituantur.

III. Parochi, & Curati munus concionandi per se obeant: absque nostra facultate, ne Cooperatoribus quidem ordinarie committant. De re-

*Tonius VIII. Concilior. German.*

pentinis necessitatibus præcipimus, ne quisquam infra Sacerdotem; vel cujus vita, & doctrina non sit explorata, in suggestum admittatur.

IV. Ubi Parochi, & Concionatoris officia diversis committi solent, Parocho Concionatorem subicimus: neve plures (in) partes scindatur Ecclesia, ejus judicio, in rebus controversis hunc omnino acquiescere volumus.

V. A prædicandi munere neminem omnino idoneum, & alias approbatum excludi volumus; Statuta omnia, & privilegia in contrarium abrogantes, & irrita declarantes.

VI. Fideles pro Concione de fide, & moribus diligenter instituantur; & semper aliquid ex Catechismo Romano, præsertim extra civitates, agresti populo proponatur, ac ad rudium caput explicetur, ut, quæ scire omnium interest ad salutem, omnes addiscant.

VII. In reprehendendis vitiis ita se gerant, ut pietatis, & charitatis studio adducti, non hominum, sed peccatorum odio, id facere videantur. Ea vero vitia præ cæteris exagitent, quæ populus frequentat, aut in quæ procliviores esse vident; ut populus eorum gravitatem intelligens, ab iis avocetur. Neminem nominatim perstringant, aut quasi digito demonstrent; ab Episcopis & Magistratibus abstineant. Quin tamen omnes sui officii commonefaciant, ejusque obligationem, suo loco & tempore, omnibus & singulis graviter, & serio inculcent, non interdicimus.

VIII. Nemo causam suam, sed solius Dei, & animarum ex suggestu tractet: ad caput auditorum se quisque accommodet: omnibus omnia, exemplo Pauli, facti, omnes Christo lucrificent: ab omni furo, & orationis pigmentis abstineant, sed potenter, & prudenter officio suo fungantur, nihil aliud quærentes, quam auditorum suorum utilitatem, & animarum salutem.

IX. Fabulæ aniles, sales, commata procul a concionibus absint; immodestas invektivas, historias suspectas,

A a a a 2

incer-

incertas, orationem nimis aculeatam omnino prohibemus. Omnis concio ut charitate, & prudentia condita, ac doctrina referta sit, præcipimus. Qui secus fecerint, in eos, juxta Concilii Tridentini Sanctionem, animadvertemus.

X. Fideles autem omnes, & singulos, qui per ætatem, & negotia necessaria possunt, non solum diebus Dominicis, sed omnibus etiam Festis, ad rem Divinam, & conciones frequentes concurrere, & ab initio ad finem usque cum summa modestia, attentione, ac devotione adesse volumus.

XI. Quoniam autem intelleximus, populum rude, & simplicem (ut supra quoque monuimus) præter dies Dominicos alia festa nihili pendere; nec iis ad Ecclesias suas venire, aut si veniant, pro libitu excurrere, in cœmeteriis circumambulare, fabulari, prophana tractare; in Ecclesia dormire; altaribus instar trunci incumbere; nihil orare, nullas prope actiones in Missæ Sacrificio observare; conciones oscitanter auscultare: e salute fore populi fidelis existimavimus, si hoc vitium gladio spiritus excinderetur. Idcirco Pastoribus ac Concionatoribus omnibus injungimus, ut ubi iste tam irreligiosus abusus irrepsit, frequenter eundem pro concione redarguant, populum de tremendis Missæ mysteriis, de modo orandi, Festa colendi, Sacrum & conciones audiendi instituentes: & quod Christianorum sit, quolibet die Festo, integro Sacro interesse, quo participes fiant ejus oblationis, quam Sacerdos pro tota plebe facit, & omnium orationum, ac benedictionis, qua eos dimittit, accurate docentes, ac identidem inculcantes. Et si quidem ea in re tota communis rustica peccat, censemus Magistratum, sive Præfectum loci requirendum, ut abusum tantum prohibeat, ac coerceat: qui si forte recusaverit, ne quis eum absolvat, donec se regulis istis paritum, certa fide polliceatur, præcipimus. Quod si vero paucorum istud vitium est, nisi moniti emendentur, cera, vel rebus aliis in usum Ecclesiæ, aut pauperum, pro arbitrio Parochorum, & Decano-

rum mulctentur: incorrigibiles ad Nos deferantur.

### *De Catechismo.*

I. **U**T tenera ætas, pene cum lacte materno, Religionem Christianam imbibat; Catechismum & in Scholis privatim, & publice in Ecclesia omnibus diebus Dominicis, in singulis Parochiis si non totius anni, saltem Adventus, & Quadragesimæ ordine, quo decet, exerceri, & doceri mandamus; neque in oppidis, & civitatibus solum, sed etiam in villis & pagis.

II. A prandio igitur signo campanæ Curati pueros in Ecclesiâ convocent; ubi convenerint, Catechista 1. Clara voce & lenta prolatione recitet Orationem Dominicam, Salutationem Angelicam, Symbolum Apostolorum, pueri præeuntem sequantur. 2. Recitationes, & pia æmulandi studia disponat. 3. Facilem, & qualem illa ætas admittit, explicationem subjungat, ad gustum aliquem intelligentiæ, ut omnes rebus sacris debitam reverentiam ab initiis primæ ætatis tribuere condiscant. 4. Lectionem juventuti præscribat, ab ea sequenti conventu memoriter exigendam. 5. Denique Orationem Dominicam cum decem Præceptis, vel alia quadam Catechismi particula, ipso præeunte, pueri ubi clare & pie pronunciaverint, Scholæ dimittantur.

III. Curet autem Catechista, ut parvum Petri Canisii Catechismum juvenis ab initio ad calcem usque memoriter discat, ac quantum capere potest, intelligat. Non vagetur ad alia, nisi admodum raro, cum adultiores intervenerint; sed intra fines suos sese contineat.

IV. Ut autem Scholæ hujusmodi non frustra institutæ videantur, sed cum fructu frequententur; 1. Pastores tam in concione, quam privatim, parentes admoneant frequenter, ut ad Catecheses proles suas, & familiam ipsi adducant, vel saltem mittant. 2. Publicent frequenter, nec ad Eucharistiæ, nec ad Matrimonii Sacramenta admitte-  
tendos, qui in primis fidei rudimentis sufficienter instructi non fuerint. 3. O-

co-

eorum, ut deprehendi possint, qui negligentiores fuerint. 4. Diligentia summa, qua poterunt, officium suum hac in re præstent, ut exemplo suo alios ad imitationem invitent. Munusculis, aliisque variis modis, pro temporum ratione, juventutis studia excitare nitantur.

V. Has easdem exercitationes juventutis, pluribus quoque modis Magistratus sæcularis excitare, & provehere poterit. 1. Si mandet parentibus, ut liberos suos ad has Scholas diligenter venire curent, idque sub certa mulcta, si moniti, officium suum negligant, ab eis exigenda. 2. Si in omnibus Ecclesiis, eo tempore, quo juvenus instituitur, sub pœnis eorum arbitrio imponendis, a tripudiis, & aliis insolentis abstinere præcipiant. 3. Si sumptus, qui necessarii erunt, ut honorariis donentur, qui labores subeunt (si forte non inventiantur, qui pietatis intuitu, gratis facere velint) ex publico ærario, (ut in aliis quibusdam locis fit) subministrent: cum nihil in meliores usus collocari possit, quam quod ad recte instituendam juventutem, & a teneris annis ad pietatem imbuedam, impenditur. Neque dubitare possumus, quin Magistratus Catholicus, in re tanti momenti, quod ab eo requiretur, pie ac prompte sit exhibiturus.

VI. Denique Pastores hoc munus per se exercent, vel alios substituant ad juventutem instituendam aptos: qui more parentum, blande, & humaniter pueros tractent, ad discendum alliciant. Qui negligentes erunt, pro singulis lectionibus singulis libris mulcentur: Quam pecuniam Syndici Ecclesiarum ab iis, quorum negligentia per Decanos damnata fuerit, exigant, ac in munuscula, quibus juvenus allicitur, vel ad alia, ad hanc rem necessaria, expendatur.

### *De Confessariis.*

I. **Q**ui audiendis confessionibus præficiuntur, sint viri integri, eruditi, prudentes, zelum Dei, & animarum habentes, amore flagrantes, silentii tenaces, non ad quæstum inten-

ti, sed ad profectum animarum: In explorando non plus æquo curiosi, non leves, non ebriosi, vel quovis alio vitio notabiles.

II. Confessarius Patris, Judicis, & Medici personam sustinet: quare gravitatem benignitate temperatam habeat; nec eorum rudis sit, quæ ad iudicium faciendum, & ad morbos curandos pertinent; ut inter lepram, & non lepram; inter veniale & mortale, inter omisum, & commissum discrimen faciat: ut sic ægro condoleat, quod possit magis indulgens Pater, quam severus Judex videri.

III. Nemo, siue Regularis, siue Sæcularis sit, ad confessiones audiendas accedat, nisi Sacerdos rite ordinatus, & Canonice non impeditus, ac beneficium Parochiale habeat; vel alias Canonice approbatus sit.

IV. Ordinarii igitur Confessarii sunt Parochi; delegati, alii, qui vel a Parochis, vel ab Episcopis, vel ab Apostolico, privilegium habent: Qui eos solum, in quos potestatem acceperint, audire poterunt, non alios. Cæterum Parochi suam potestatem non possunt amplius delegare, nisi ab Episcopo suo approbatis, & ad id per examen admittis.

V. Nemo in mortali peccato constitutus confessiones audiat, ne & ipso peccet mortaliter.

VI. Confessiones in sola Ecclesia (exceptis casibus necessitatis) & in aperto loco, & conspectu fidelium audiantur; non in Sacristia, vel obscuris Ecclesiæ angulis. Quod si alius commodus locus haberi nequeat, confessionale saltem idoneum, in quo pro Confessario sedile, pro pœnitente vero scabellum, ubi genua flectat, & tabula intermedia rite accommodata sint, in Sacristia ita collocetur, ut aperta Sacristiæ janua Confessarius, & pœnitens ab aliis in Ecclesia expectantibus, commodè videri possint. Si quis aliter mulierum confessiones audire præsumpserit, ipso jure, & de facto ab audiendis confessionibus, & ab omnibus Divinis sit suspensus.

VII. In audiendis confessionibus eam adhibeant gravitatem, quæ Divi-



num hoc tribunal decet: Vultum humilem, & oculos in terram defixos gerant, nec faciem confitentis indiscrete inspiciant: omnes patienter, & in spiritu lenitatis audiant.

VIII. In casibus gravioribus, vel ipsi peritiores consulant, vel pœnitentes ad eos dirigant; quorum sententia, qui se staturos promittunt, absolvi poterunt; nisi quid aliunde impediatur: alii absolvi non debent.

IX. Animas quærant, non pecunias: unum, duos, quinque cruciferos, imo vel unicum teruntium pro confessione audienda exigere, turpe lucrum est, & Simoniacum, nec ulla ratione ferendum. Quod sponte, & liberaliter datur, nec signo, aut verbo petitur, quin accipiat, non prohibemus; cum hoc a consuetudine, & pia fidelium devotione non abhorreat.

X. Semper prius excommunicatio tollenda, quam absolutio a peccatis impenditur.

XI. Semper confitenti potius, quam aliis credatur.

XII. Non omnes sunt examinandi, sed illi soli, quos vel ex ipsorum confessione, vel aliunde constat non integre confiteri, vel omnia habere, quæ oporteret. Absit curiositas; modus debitus servetur; ne pœnitentem doceat, & se ipsum Confessarius in periculum conjiciat: sequi debet pœnitentem, non præire: a communissimis, & notissimis ad minus obvia prudenter descendat.

XIII. Verbis semper honestissimis utatur, quantum fieri potest, & uti decet.

XIV. Nullo signo, aut verbo, vel ulla alia ratione, quæ vel ad peccatum, vel infamiam pœnitentis faciunt, sine expresso ejus consensu, manifestare licet. Pœna manifestantis, præter peccatum mortale, est depositio, & pœnitentia perpetua in Monasterio.

XV. Qui casus Sedi Apostolicæ reservatos attulerunt, ad Apostolicum, vel qui ab eo habent absolvendi potestatem, remittendi sunt. Habet etiam Episcopus quilibet, quos ipse in Dicecesi sua absolvit. Ne errent igitur Con-

fessarii, & casus Summo Pontifici, & Episcopo suo reservatos, apud se scriptos habeant.

XVI. Casus autem Episcopo in nostra Dicecesi reservati, sunt numero decem. 1. Hæresis. 2. Librorum hæreticorum lectio, aut retentio voluntaria. 3. Homicidium, factum, præcepto, consilio, consensu, vel quovis alio illicito modo commissum, etiam casuale voluntarium, sive in actu, sive in causa tantum. 4. Incestus primi, & secundi gradus. 5. Procuratio abortivi, aut sterilitatis, quovis tandem medio ad alterutram instituto, sive effectus subsequatur, sive non. 6. Falsum testimonium, aut perjurium in judicio. 7. Decimarum, aliorumque jurium Ecclesiæ notabilis defraudatio. 8. Adulterium notorium, eoque majora delicta, ut concubinatus, Simonia, usura, Sodomia, cum similiter publica, & notoria fuerint. 9. Omnis excommunicatio major, quæ nimirum S. Pontifici non reservata, nec a Judice lata est. 10. Contractus mutui, in quo sine legitimo titulo supra sortem aliquid exigitur.

XVII. Noverint autem Confessarii, 1. In extremo mortis periculo nullam esse casuum reservationem. 2. Casum primum, secundum, quintum, nonum, & decimum soli Episcopo Brixinensi reservari, & quorum absolutioni ipse eos specialiter commiserit. 3. Absolutionem aliorum omnium, qui hic reservantur, relinquit Decanis ruralibus, & Confessariis Capitularibus, iis nimirum, qui Capituli sui Clerum de peccatis confitentem, præsertim tempore Congregationis audient. 4. Omnes alios casus, qui alias de jure, vel consuetudine ad Ordinarium (\*) Episcopi absolutionem pertinent, omnibus omnino Confessariis usque ad nostram revocationem, vel aliam dispositionem plenarie committimus. 5. Si quis sine infamia, vel ob aliud legitimum impedimentum, ad Nos, vel alios, propter dictos casus mitti non possit, si se Ordinarium suum, sublato impedimento, auditurum promittit, a suo Confessario absolvi posse decernimus; sed si prima vice, aut tertia fefellerit, ei non facile amplius fides habeatur. 6. Quod si quis

ad

(\*) *Legendum arbitror: ad Ordinarium, vel Episcopi absolutionem pertinent.*

ad Superiorem suum ire recusaverit, rem ad Nos, vel ad eum, qui facultatem absolvendi habet, absque notificatione personæ, Confessarii perscribant, ut illis eo etiam casu, vel vices nostras committere, vel id statuere possimus, quod magis expedire videbitur. 7. Mulieres quoque ad Nos, vel alium mitti non debent, nisi casus earum fuerit peccatum publicum. 8. Qui absolverit scienter a casu, Episcopo Brixinensi, vel Summo Pontifici reservato, incidet in excommunicationem latæ sententiæ; a qua solus Episcopus, vel Papa possit absolvere; ejusque absolutio nulla erit.

XVIII. Nullus, qui in statu sit peccati mortalis, absolvi potest, nisi & peccatum, & statum peccati relinquat. Tales sunt meretrices publicæ, concubinarij & concubinæ, apostatæ, usurarii, aleatores, ebriosi: breviter, quicumque in peccato mortali publice ita vivunt, ut consuetudo peccandi, & peccantium impudentia statum videantur facere peccati.

XIX. Qui sunt gravati ære alieno, vel aliis debitis, & possunt restituere, ne absolvantur, donec restitutionem, quam primum fuerit possibile, faciendam serio promiserint: deinceps non absolvendi, si hujusmodi promissione culpabiliter non steterint: Si restituere non possunt (hoc est, non habent, nisi unde vivant ipsi, & quos tenentur alere) promittant se daturos operam seriam, ut possint restituere, aut solvere: qua promissione habita, poterunt absolvi.

XX. Clerici in Sacris, vel Beneficiati, qui Horas Canonicas non recitant, aut recitare nolunt, non sunt absolvendi, donec facere velint, quod debent. Idem intelligatur de iis, qui obtinent plura beneficia absque legitima dispensatione, vel non debite serviunt beneficio, quod legitime habent.

XXI. Qui habet aliquod beneficium, vel officium, & tamen nescit facere, ad quæ ex illo obligatur, non potest absolvi, nisi polliceatur, se cessaturum ab officii, vel beneficii sui exercitio, donec didicerit, quæ necessaria sunt, ut rite ministret; ac interim pro-

videat, per quem suppleatur, quod ipse non facit.

XXII. Clerici habitum Clericalem non ferentes, vel tonsuram congruentem Ordini, ne absolvantur, donec honestatem Clericorum præ se ferant.

XXIII. Qui proximam peccandi occasionem relinquere nolunt, absolutione sunt indigni, amantes periculum, in quo peribunt.

XXIV. Pœnitentiæ, quæ injunguntur, pœnæ sunt, & medicinæ: Puniunt enim peccatum; sanant infirmitatem animæ; & a recidivo præservant: Ideo contrariæ esse debent, & æquales peccato, ac convenientes peccatori. Quod si hoc ignoretur, ut plerumque, fiat, quod peccator possit, aut facere velit.

XXV. Non una, eademque satisfactio est omnibus injungenda, sed diversis diversæ pro qualitate peccatorum, & pœnitentium: Gravia gravem pœnitentiam, publica publicam requirunt, (quanquam publica injungi cuiquam non debet, nisi ab Episcopo; vel sine ejus consensu) semper tamen videatur, quid, & quantum peccator exequi possit.

XXVI. Confitentes non admittantur catervatim, tantumque a confitente absistant cæteri, ut, quæ dicuntur utrinque, non audiantur. Moneatur quoque populus sæpius, ut tempestive ad confessionem se conferat, nec ad ultimum diem, vel horam differat.

XXVII. Denique omnibus, & singulis Medicis, & Chirurgis nostræ Diœcesis mandamus, ut ægrotos suos de Confessione facienda juxta Sacros Canones tempestive admoneant, nec amplius visitent, qui moniti, ultra quartum diem Confessionem & Communionem distulerint.

### *De Gubernatione Diœceseos.*

UT Clerus, qui rure degit, commodius regi, & in officio contineri possit, universum in plura Capitula descripsimus, unicuique tot Parochias cum omnibus annexis Ecclesiis, officiis, & beneficiis attribuentes, quot commodè regi poterunt; Capitulorum autem

autem nomina hæc sunt: Clusinese, Livinalis longi, Toblacense, Brunegianum, Sterzingense, Matranense, Oenipontanum, Schwazense, Telfense, & Imbstense. Singulis Capitulis singulos Decanos præfecimus: Decanis singulis singulos Assistentes, Camera-rios, & Confessarios adjunximus. Decani vitam, mores, & singulorum officia curabunt: Camerarii multas, debita, collectas, fabricam, bona, & jura Ecclesiarum: Assistentes consilio, & auxilio Decanos juvabunt: Confessarius Capituli sui Clerum de peccatis confitentem, præsertim tempore congregationis audiet. His omnibus, sicut & toti Clero Vicarius noster Generalis nostro loco, & nomine præsidebit: Hic mandata nostra ad Decanos deferret: Decani ad Clerum: & viceversa, quæ Clerus Nobiscum, aut Vicario nostro tractare volet, id per Decanos suos faciet: ita tamen, ut si cum Decanis suis ille convenire non possit, vel alias suum illi officium non fecerint, unicuique liberum sit, ad nostrum tribunal appellare. Præter hos reservamus Nobis etiam Archidiaconos, etiam pro locorum, & temporum ratione creari Archidecanos, qui pluribus regionibus cum potestate pleniore præsent. Et Decani quidem, Archidecani, ac Confessarii Capitulorum pro nostro arbitrio constituentur, ac destituentur: Reliqui Officiales communibus suffragiis in pleno Capitulo delecti, a Nobis solum confirmationem accipient. Porro quam potestatem Capitula, eorumque Præfecti habeant, & quid ab unoquoque requiratur, id ex legibus, quas subjungimus, planum erit.

### *De Capitulis Ruralibus.*

I. **A**D Capitula universus Clerus conveniat; iis solum exceptis, quos impedimentum Canonicum, aut præsens Ecclesiæ necessitas (de quibus cognoscet Capitulum) venire non permittet: quare tales loco suo excusatores, aut literas mittere oportebit. Pœna negligentium pro prima vice erit una libra, pro secunda tres, & sic crescente negligentia, & contumacia, semper crescet & multa.

II. Capitula ruralia singulis semestribus celebrentur, die aliquo profesto, qui ad conveniendum sine detrimento Ecclesiarum, omnibus commodus judicabitur; nempe feria quarta post Dominicam in Albis; Et iterum, quando alias ad Sacra anniversaria Serenissimæ Domus Austriacæ, omnes convenire oportet; vel alio denique tempore magis opportuno, quod Decanus tempestive nominabit.

III. Non fiant in hospitiiis, aut cauponis publicis congregationes, sed vel in Ecclesiâ Parochiali, vel in domo Canonica: Nec semper in uno, eodemque in loco, sed in diversis, nempe apud singulas Parochias per orbem; vel ubi magis commodum videbitur. Sumptus convivii faciet Parochus, apud quem conventus ageretur; aut pro se quisque solvet. Moderatum vero, & honestum prandium esse oportebit, a quo omnis ebrietas, levitas, rixa, immodestia procul exulet. Qui contra fecerint, pro arbitrio nostro punientur; maxime vero Decani, & Parochi, apud quos alii deliquerint.

IV. Pridie Capituli omnes Confessario Capitulari, vel alteri, Sacramentalem Confessionem faciant: & sequenti die pro fratribus defunctis, & simul benefactoribus, Sacrum Missæ Officium offerant. Unus, vel alter deligatur, qui Celebrantium ritus observet, ac postea de defectibus singulos moneat, ac instruat.

V. Missa quoque conventualis pro mortuis, vel de Spiritu Sancto solenniter cantetur: qua finita circa horam octavam, omnes & singuli superpelliciiis induti, ex Templo processionaliter locum Capituli ingressi, in suo quisque loco (quem singulis in primo post hanc Synodum conventu, secundum antiquitatem officii sui, ita tamen, ut Parochi Curatos; hi semper alios Sacerdotes, & Sacerdotes alios, qui tales non sunt, antecedant, Capitulum assignabit) confideat: tum ad omnes Decanus, vel alius ab eo mature constitutus, brevem sermonem habeat, de officiis, & virtutibus Sacerdotum, de cura, & zelo animarum, vel aliis, quæ tempori magis convenire videbuntur.

VI.



VI. His peractis. 1. Legentur Statuta nostra Synodalia, vel omnia, vel media eorum pars. 2. An, & quomodo illa, vel alia Visitatorum, & nostra mandata servantur, omnes & singulos Præsidentes Decani per ordinem interrogabunt. 3. De Horis Canonicis, an, & quomodo recitentur, quas ob causas omittantur. 4. De Sacramentorum administratione. 5. An Fundatorum voluntatibus singuli satisfaciant. 6. An Parochi tot, ac tales Sacerdotes alant, quot, & quales debent. 7. An singuli confiteantur Sacramentaliter, quoties deberent, ejusque testimonia petantur. 8. An Carechismum doceant, & quomodo. 9. Quam familiam quisque habeat, & præsertim de fœminis. 10. De vita, habitu, & honestate Cleri, ac populi, de litibus, gravaminibus, injuriis, scandalis, & his similibus tractandum erit. 11. Negligentes denique, & defectuosi pro qualitate criminis multentur.

VII. Ante omnia vero hoc diligentissime observetur, ut ab oratione quæque congregatio inchoetur, & simul terminetur. Omne namque bonum a Patre luminum descendit. Quare ubi ad locum convenerint, omnes alternatim & flexis genibus Hymnum: Veni Creator Spiritus, recitabunt. Collectam de Spiritu Sancto subjunget Decanus. Omnibus finitis, similiter quisque semel Pater, & Ave, secum devote dicet: Decanus denique clara voce orationem de tempore subjiciat.

VIII. Decani interdum uno mense ante congregationem, Clero suo exhibeant duos vel tres casus conscientiae, in congregatione excutiendos & decidendos.

IX. Capitula ruralia potestatem definiendi non habent, sed tantum inquirendi, referendi, exequendi, quæ illis mandata fuerint, ac puniendi. Nihilque omnino facient, quod eis, vel eorum Decanis, in his Synodalibus Decretis, vel alias expresse permissum non fuerit.

X. Sigillum proprium singula habeant, & carcerem: sed carcere non utantur ipsi, vel ipsorum Decani, nisi

*Tonus VIII. Concilior. German.*

in quatuor casibus. 1. Cum scandalum ebrietate, fornicatione, blasphemia, vel aliis peccatis publicis, a Clero populo dabitur. 2. Quando officium suum non faciunt Clerici, & quæ his statutis cuique præscripta fuere, publice negliguntur; & alia poena non fuit opposita. 3. In causis rixarum, pugnarum, æris alieni, debitorum. 4. Cum eis a Generali Vicario nostro injunctum fuerit.

XI. Matricula habeatur, in qua omnium Sacerdotum nomina inscribantur, officia, Patria, Diœcesis, mors & tempus ingressus in Capitulum, vel in hanc Diœcesin. Ex hac mortui vivis commendentur tempore congregationis.

XII. Acta Capitulorum singulorum præsertim majoris momenti in librum peculiarem referantur, cum querelis & difficultatibus propositis, ut Vicario nostro facile, quid actum fuerit, constet.

XIII. Præter ruralia Capitula & particularia, generale semel quoque in anno in Urbe nostra Brixinensi, vel ubi Nobis commodius videbitur, cogatur; semper a Dominica post octavam Corporis Christi feria tertia: ad quod soli Archidecani, & Decani cum singulis fœciis (si quos eis Capitula adjungere voluerint) convenient. Omnibus præsidebit Vicarius Generalis. Si tamen casus incideret, qui præsentiam tantæ congregationis exposceret, non ægre ferent, si a Vicario nostro sæpius convocati fuerint.

XIV. In his congregationibus generalibus singuli referent statum suæ regionis, necessitates, difficultates, lites. Deinde plurium suffragiis (quæ decisiva esse volumus, non solum consultiva) quæ ad bonum Diœcesis statum pertinent, definiantur: Quorum definitionibus, modo ab Ordinario approbatæ fuerint, reliqui omnes parere tenebuntur.

#### *De Decanis ruralibus.*

I. **H**Os viros prudentes, magnæ doctrinæ, & vitæ probatæ, ac multæ experientiae esse oportet: sunt enim Pastores Pastorum quodammodo

B b b b

&

& ipsi: & alios exemplo, consilio, verbo, ope juvare debent.

II. Ut alii Pastores in suis Ecclesiis, ita Decani in sua regione, ad personalem residentiam compellantur.

III. Chrisma Sacrum, aliaque Olea Sacra, quibus utitur Ecclesia, quotannis ex Ecclesia Cathedrali accipiant: ex eo tradat deinceps quisque suis Curatis, quantum satis erit: pro traditione nihil omnino accipiant, præter sumptus ejus causa necessario factos.

IV. Semel ad minimum quotannis omnes Ecclesias suæ regionis obeant, una cum Camerariis: non omnes quidem simul, sed modo hanc, modo illam, prout occasio se obtulerit. Victum frugalem præbebunt Parochi. Idem fiat, cum alias, officii tamen sui causa, per regiones suas excurrent. Tum enim præter victum a Parochis vel Ecclesiis, ne sponte quidem oblatum, quicquam accipere licebit.

V. Ecclesias, Sacristias, Vasa, Vestes, Ornamenta, Cœmeteria, Sepulturas, Prædia, totamque familiam Parochi, & aliorum Clericorum, cum omni diligentia inspiciant; quid in eis desit vel desideretur, accurate considerent. Dispiciant etiam Decani in visitatione sua, an Clerus officium suum faciat; an vera sint, quæ quisque in Capitulo de observatione Decretorum nostrorum, & aliis, de se ipso deposuit, oculis inspiciant: in singulis Parochiis, a viris ætate, usu, & probitate commendatis de omnibus subtiliter inquirent, quæ eos pro officii sui munere scire oportebit: videant, an in populo sint hæretici, concubinarij, alij flagitiosi, qui Quadragesimam, aliaque jejunia, Festos dies non servant, & his similia. Quæ ipsi poterunt, statim corrigant: cætera ad Nos referant.

VI. Mandata nostra, & Vicarii nostri Generalis cum debita reverentia excipiant: ad eorum notitiam, quorum intererit, deducant. Quæ ipsis Superiores mandaverint, debite exequantur: Quæ vero ipsi suo, vel Superiorum nomine jusserint, an & quomodo executioni mandentur, sæpe videant.

VII. Vitam, mores, habitum, conversationem, suspensiones rationabiles de Clericis intra fines suos inspiciant; extrajudicialiter cognoscant, emendare contendant: Majora ad nostram cognitionem referant. Quæ autem in hoc genere fecerint, & curarint, ea scripto comprehendant, ut suo tempore rationem reddere administrationis suæ valeant.

VIII. Cum aliquis ex Curatis suæ regionis ægrotare cœperit, eum invitant: si gravius habuerit, curent diligentius, ut necessaria tam spiritualia, quam temporalia illi suppeditentur. Si obierit, rerum relictarum Inventarium conficiant, & omnium quæcunque in vita possederat, curam diligentem habeant. Ne autem cura animarum detrimentum patiatur, Vicarium idoneum interea substituunt, qui etiam post mortem vices defuncti gerat, donec de alio provisum fuerit. Semper autem de Substituto, ejusque qualitatibus informetur Vicarius Generalis. Idem de aliis Sacerdotibus suo modo intelligatur.

IX. Nullos Sacerdotes in suo districtu ministrare permittant, qui ipsis a Parochis præsentati non fuerint, & literas admissionis a Vicario nostro; & simul dimissionis a Parocho, aut Episcopo, ex cujus Diocesi discesserunt, non ostenderint. A Religiosis, quas a Superioribus suis attulerint, literæ requirantur.

X. Singulis annis Nobis, aut Vicario nostro de illis, quæ in cujusque Decanatu gesta sunt, rationem reddant, cum videlicet ad generale Capitulum convenerint.

XI. Sacerdotes omnes, reliquique ex Clero, Decanis suis morem gerant: ad Capitulum vocati, conveniant: si legitime impediuntur, excusatores mittant: visitantibus Decanis operam suam præstent: ad interrogata bona fide respondeant; alias poenam arbitrariam subibunt: correptiones, admonitiones, & mandata eorum reverenter excipiant: ab iisdem, vel a Camerariis moniti æs alienum dissolvant. Inobedientes, si qui fuerint, graviter a Nobis puniuntur.

XII.

XII. Decanus quilibet, antequam officio suo fungi ceperit, Professionem Fidei coram Notario & testibus, juxta formulam PII Quarti, in manibus Vicarii nostri Generalis faciat. Et deinde fidelitatem stipulata manu, aut juramento promittat.

### *De Camerariis.*

I. **C**amerarii ærario Capitulari Præfecti, & jurium Ecclesiasticorum præcipui Custodes, ac Patroni, suæ administrationis singulis semestribus toti Capitulo rationem reddant.

II. Muletas, quæ quavis ratione debentur, suis temporibus exigant. Idem de collectis ordinariis, vel extraordinariis statuimus.

III. Ut res & jura Ecclesiastica servantur, vel amissa recuperentur, sollicite Parochos, aliosve Beneficiarios urgeant, ne quid vel negligentia pereat, vel aliorum vi usurpetur. Si quid insolentius alicubi fiat, id statim Episcopo significant.

IV. Cum Parochi, elocationi prædiorum & pecuniarum Ecclesiæ ejusque ad sint: curent etiam ea tolli, quæ vel impedimentum afferunt, vel damnum interunt.

V. Confinia terrarum & bonorum Ecclesiæ præcipient Beneficiarios diligentia perfici, negligentes excitent.

VI. Aedes Canonice sæpius inspiciant, & si qua reparatione indigent, eas refici opportune procurent.

VII. Quid quisque in ædium suarum reparationem, aut conservationem quotannis impenderit, attendant.

VIII. Ne Ecclesiæ, vel beneficia debitis onerentur, neve fructus in damnum Successoris ab Antecessore vendantur, aut prædia eloquantur, aut male tractentur, invigilent.

IX. Eos potissimum fructus, per Camerarios exigere volumus, quos Sacerdotes & Beneficarii, propter iniquam Horarum Canonicarum, vel aliorum officiorum omissionem in conscientia retinere non possunt; Item quas pecunias Parochi, cum sua culpa Collaboratores non habent, restituere debent. In quos etiam singulis Ca-

pitulis summa cum diligentia inquire, nec nulli penam Canonis remitti præcipimus.

X. Inconsulto Decano nihil statuant, faciantve.

XI. Idem, quod Decani, juramentum fidelitatis, aut promissionem faciant, fidem prius solenniter professi.

### *De Archi-Decanis, si aliquos aliquando constituerimus.*

I. **U**T Parochis, & Clero inferiori, Decani; ita Archidecani, Decanis præerunt. Nihil ergo cum inferiori Clero ex officio agent, nisi aliter a Vicario Generali specialiter fuerit mandatum; aut in mora fuerit periculum; aut Decani moniti, nihilominus officium suum non fecerint.

II. Horum officium erit, Capitulis generalibus interesse, referre, & exponere illic suæ regionis statum: Capitula particularia dirigere, modo huic, modo illi præsidendo: Synodalia, vel Capitularia Decreta, placita quoque Episcoporum, Vilitatorum, Vicariorum, suæ curæ commissis publicare & exequi; Decanos visitare, admonere, corrigere, reformare: contra publicos peccatores, hæreticos, usurarios, supersticiosos, & omnium criminum reos in causis ad forum nostrum pertinentibus, processus conficere, confectosque ad Nos mittere: expedire quæcumque eis specialiter ab Episcopo, aut ejus Vicario commissæ fuerint. Denique omnia & singula, quæ ad Ecclesiæ gubernationem in sua regione pertinent, inspicere, considerare ac deferre.

III. Penes eosdem liber quoque erit, in quo privilegia Cleri Dicecesani descripta sint. Item Statuta & Leges Capitulorum singulorum, ad suam jurisdictionem pertinentium.

IV. Tres autem Archidiaconi esse poterunt. 1. Oeno inferiori. 2. Oeno superiori. 3. Pustrißæ, & locis adjacentibus, cum potestate præsidebit.



*De Ecclesiis & aliis piis locis.*

**U**T re ipsa appareat, quod jam per doctrinam omnes norunt, Ecclesiam Domum Dei, & orationis esse, non negotiationis; & ut loca alia pia abusus, si qui irrepererunt, e medio sublatis, ad legitimum & pristinum suum usum reformatur, de illis statuimus, & ordinamus, ut sequitur.

I. Ecclesiæ novæ sine nostro consensu & dote sufficienti nullæ fiant: vetustate, vel alias collapsæ restaurentur, vel juxta Sacros Canones alio transferantur.

II. Omnia loca pia summa munditia semper excellant. Sæpe igitur scopis mudentur, pulveres a sedibus, parietibus, fenestris, altaribus, imaginibus, picturis, vulpium caudis, aut panno aliquo, vel scopis accommodatis abstergantur, araneorum telæ undique studiose tollantur. Hæc cura ad Oeconomos & ædituos potissimum pertinet; qui, si negligentes fuerint, ut octavo quoque die ad minimum verri expurgarique non curaverint, iis ex salario pro rata, sine remissione detrahatur.

III. Deambulationes, prophana colloquia, acta judicialia, tractatus sæculares, repositiones mercium, vel aliarum rerum nundinationes, pauperum concursationes, mendicationes civiles, & id genus alia in Ecclesiis ne fiant.

IV. Solum semper bene stratum sit: fornix & parietes purgati; & vel dealbati niteant: vel sacris historiis depicti, oculos hominum simul & animos pascant.

V. Fenestræ reticulis ferreis muniuntur, ne cujusvis injuriæ vitra pateant; neve aviculæ in Ecclesias involare queant. Altius a terra tollantur, quam ut quis per eas introspiciat: & ita constitutæ, ut semper aliquæ commode claudantur, vel aperiantur: quarum beneficio humiditates, vapores, fumi, pulveres, & his similia exhalent facilius: nec ita apertæ, vel Sacerdoti sacrificanti, vel rebus Divinis ventus, vel vis quævis alia injuriam faciat.

VI. Januæ Ecclesiarum clausæ sint, quamdiu in iis cultus Divinus non agitur. Non procul a januis sit aqua benedicta, qua se, qui ingrediuntur, vel egrediuntur, pie conspergant: vel ea etiam ad usum aliquem pium domum secum auferant. Vas singulis hebdomadis expurget diligenter Ædituus, & aqua recenti, quæ die Dominico semper consecrabitur, repleat.

VII. Tectum reliquarum partium Ecclesiæ præcipuum munimentum, sæpe a Syndicis inspiciatur, ne ex ejus neglectu in totum ædificium vitium promanet. Si negligentes fuerint, præhas luant promeritas.

VIII. Inter Chorum & Ædem sacram ubique Crucifixi imago locetur, quæ prima in oculos ingredientium incurrat, & præcantem populum continua intuens, ejus quam Christus nobis in Cruce salutem peperit, commonefaciat; & quis Ecclesiæ Dominus, cum quo illic agendum & tractandum sit, rudiores etiam sine voce doceat.

IX. Altaria mappis lineis iisque ternis (quarum intimam semper ceratam esse volumus) strata sint: nec tempore celebrationis asseribus cooperta, sed nuda ad linea usque, Cancelli lignei non nimis alti, nec nimium altaribus vicini, ut Sacerdotem celebrantem impediunt. Quibusdam in Ecclesiis ab altero latere sistenda candelabra ferrea, ne matronæ candelulas suas ipsi altari, sed dictis candelabris sine periculo incendii, affigant.

X. Crux ex ligno, lapide, vel alia materia affabre facta in omni omnino altari collocata perpetuo cernatur, eoduntaxat excepto, in quo alias efficta, vel picta fuit.

XI. Tabernaculum Venerabilis Sacramenti clavis ferreis, iisque valde angustis constet, ne mures, vel alia sese ad injuriam inferant; intus panno serico rubei coloris vestiatur: vel saltem colore cæruleo ac stellis aureis ornatur; ac valde mundum sit extrinsecus velis adversus pulveres muniatur: locus sit amplus & altus, ut in eo, (ubi alius commodior non est) infra octa-

octavam Corporis Christi, Venerabilis Sacramenti Monstrantia, post Divina officia recondi queat: solum tabula quadrata populea (nucea enim & querna contra humiditates vim nullam habent) serico panno vestita sternatur, tabulae corporale mundum (sine quo nunquam & nusquam Venerabile Sacramentum, aut vasculum illud continens, deponi vel collocari debet) supponatur: in supposito corporali pyxis locetur, in pyxide Sacramenti Hostiae resideant. Hoc vero vel ad cornu Evangelii in pariete more Germanico; vel (quod mallemus) semper in summo Altari, more Romano constitutum erit.

XII. Sacrae Campanae sacris, & non prophanis (quoad id fieri potest) significationibus deserviant. Nec ullae ad Divina officia pulsantur, quam ab Episcopo benedictae fuerint.

XIII. Ter in die, mane, meridie, & vespere signo campanae populus ad orationem moneatur, ut meminerit, si non saepius, saltem his tribus temporibus esse orandum.

XIV. Reliquiae novae sine nostro consensu ne proponantur, veteres in loco sacro decenter & cum honore convenienti retineantur, & populo devoto ad minimum semel in anno, praescripto aliquo die solenniori ex ordine & nomine demonstrantur, facibus accensis, vel candelis; Saepius autem, in solennioribus nempe Festivitatibus omnes, vel aliquae earum ad venerationem in altaribus exponantur.

XV. Imagines lacerae, indecorae, procaces, obscenae, ignotae, novae, superstitiosae, aliaeque omnia, quae fidelium mentes distrahunt aut offendant, ex omnibus locis sacris ejiciantur.

XVI. Albae, & caeterae vestes sacrae, non lacerae, non sordidae, non indecentes sint, sed pro facultate cujusque loci honestissimae. Ex albis & humeralibus scutula auferuntur: crux acu picta, amictui, stolae, manipulo inferatur.

XVII. Colores Ecclesiastici sunt, albus, niger, rubeus, viridis & violaceus. Hi in casulis, stolis, manipulis, velis, ornamentisque aliis apparere

debent, & pro temporum ac solennitatum varietate adhiberi. Quot autem colores sunt, tot genera vestium, aliorumque paramentorum in singulis Ecclesiis esse praecipimus.

XVIII. Tot, & tam pretiosos calices quaque Ecclesia habeat, quot, & quales cultus illius Divinus, Missarum frequentia, & redituum amplitudo requirit. Unusquisque calix habeat ad minus tria corporalia: totidem pallas, & octo purificatoria. Reliqua suppellex pro facultate cujusque loci paretur.

XIX. Corporalia fiant ex tela candida & tenuissima; longa duabus spithamis & semisse: paulo latiora: simplicia omnia, nulla duplicata; amylo post lotionem leniter roborata, ne intractabilia evadant. Aurum, sericum, vel ullum aliud ornamenti genus, non nisi in eorum fimbriis toleretur. Quae rimas habent aut foramina, maxime circa medium, ab altaris ministerio penitus removeantur. Alternis semper mensibus mutantur: summa semper mundities niteat. Et quoniam quorundam crassa & pudenda hac in re est negligentia, districte & sub poenis arbitrio nostro infligendis praecipimus, ut, quae de his statuimus, in continenti executioni mandentur, ac inviolate servantur. Quod si qui segniores reperti fuerint, pecuniarias & corporales poenas, omni excusatione seclusa, irremissibiliter experientur.

XX. Pallae sint ea magnitudine, ut calicem ubique contegant: ex eadem tela constent, qua corporalia, seu duplicata, & amylo uberius fortificentur, ut firmiter extensa permaneant: formae quadratae.

XXI. Purificatoria, quibus calix extergitur, ex pura & candida tela, ut non nimis crassa, ita nec omnino tenui confici volumus longa duabus spithamis, una & semisse lata: in cujusque medio, & simul in quatuor initiis, sive angulis crux serica, vel ex simplici filo acu pingatur, ut ab aliis panniculis discerni queant. Ubi plures eadem die, ex eodem calice sacrificant, purificatoria singulis septimanis mutantur, alias alternis hebdomadis, vel singulis mensibus

sibus, prout usus eorum frequentior aut rarior fuerit, renovari satis erit. Denique quæ de corporalium mundicie paulo superius ordinavimus, eadem de purificatoriis, & aliis vestibus, ac sacri ministerii vasis omnino intelligi volumus. Turpissimum nempe est, mensas prophanas elegantius ac nitidius instructas videre, quam Divinam, in qua sacrum illud convivium, in quo Christus sumitur, mens impletur gratia, & pignus futuræ gloriæ datur, spectante Deo ac Angelis, peragitur.

XXII. Urceoli tot sint in quaque Ecclesia, quot Missarum & Sacerdotum frequentia requiret; literis A & V in summo operculo inscripti, ut qui vino, quive aquæ fundendæ serviant, primo aspectu discerni possit. Ex stanno fiant vel argento: aqua vinumve per noctem, vel etiam magnam diei partem in iis ne relinquatur, sed illico post Missarum finem quotidie magna cura ablui, abstergi, ac in locis suis reponi debent, ut in suo semper nitore, quantum fieri poterit, perseverent.

XXIII. Ampullæ Chrismates sint tres digitos transversos alte, tam vero amplæ, ut pollicem Sacerdos inferre & referre commode possit. His Olea Sacra bombyci, ne affluant, superinfusa, conserventur. Tres autem esse debent; in quarum prima S. C. in secunda O. C. in tertia O. I. majusculis literis incisa legantur; ut quæ Sacrum Chrisma; quæ oleum Catechumenorum; denique quæ oleum Infirmorum contineat, statim dignosci queat. Quas ampullas bene mundatas mittent Parochi & Curati ad Decanos suos quotannis in hebdomada sancta, ad olea recens consecrata ab eis auferenda: mittent autem in capsella lignea inclusas: capsella in tres partes distincta sit, quarum quælibet ampullam unam capiat: & intus quidem serico rubeo circumamicta, foris autem corio decenter contexta, seraque ac clave munita sit. Ne autem fraudis, alteriusve injuriæ suspicioni locus aperiatur, capsulae apertæ (clavi domi retenta) a Parochis mittantur; clausæ vero remittantur a Decanis.

XXIV. Quæ vasa, vel vestes benedici vel consecrari, juxta Ecclesiæ

præscriptum debent, prius ne ad usum sacrum adhibeantur. Calices, patenæ, & alia, quæ Chrismate liniuntur, a solo Episcopo consecrantur: nullis aliis consuetudo etiam longissimi temporis suffragetur. Alia ab iis benedici poterunt, quibus hanc facultatem ex antiquissima & immemorabili consuetudine facultatem dederimus, vel qui privilegia habent, de quibus Nobis fidem fecerint.

XXV. Cœmeteria septa sint & semper clausa, ne pecudes illic pascantur: omnibus sordibus & arboribus prorsus vacua: nihilque in eis prophanum fieri permittatur.

XXVI. Intra Cœmeteria sit 1. locus aliquis, in quo mortuorum ossa Majorum more, tum ad expurganda sepulchra: tum ad fidelium mentes movendas apto ordine componantur. 2. Locus alius, ubi feretrum & alia instrumenta funerealiter recondantur. 3. Vas unum (vel plura majuscula) pro aqua benedicta cum aspersorio, quod auferri nequeat. 4. Si non Capella, vel Ecclesia, certe Christi Salvatoris crucifixi imago ex lapide lignove pro loci magnitudine erigatur. 5. Sepulchris singulis singulæ Cruces, Catholicæ fidei, ipsi & charitatis monumenta, impositæ conspiciantur.

XXVII. In Cœmeteriis, aliisque locis sacris, infideles, hæretici, schismatici, publice excommunicati, nominatim interdicti, blasphemæ, omnesque alii absque ullo penitentiae signo vita perfuncti, humari nullo modo debent: sed Catholici duntaxat, quos probabile est ex hac vita ad beatam illam abiisse. Quod si quis scienter contrarium fecerit, is hoc ipso ab officio & beneficio suspensus sit.

XXVIII. Infantes Christianorum ante Baptismum decedentes non in communi fidelium Cœmeterio, sed in loco separato, neque tamen consecrato sepeliantur. Hunc autem locum muris septum, extra vel etiam intra consecrata Cœmeteria, ubi nondum est, primo quoque tempore ubique parari, nec interea ea in sacrum locum ullum talem infantem inferri sub pœna privationis, & aliis arbitrio nostro rependis, serio mandamus.

XXIX.



XXIX. Denique, si quæ Cœmeteria sunt ab Episcopis nondum consecrata, vel post consecrationem quovis modo prophanata, de iis ad Nos, Pastores quamprimum referre volumus: Interim vero dum consecrentur, aut reconcilientur, in iis fidelium nullus sepeliatur.

### *De Festis Ecclesiæ.*

I. **Q**uia dies Festi in qualibet Dicecesi, juxta Sacros Canones, uniformiter observandi sunt, ne confusio accidat, Nos præter Dominicos dies, ab omnibus per Dicecesin nostram observandas decernimus, septem Solennitates Christi: videlicet Nativitatis, Circumcisionis, Epiphaniæ, Ascensionis, Sacramenti Corporis ac Sanguinis ejusdem: Resurrectionis, & Pentecostes cum duabus diebus immediate sequentibus. Quatuor Festivitates B. Mariæ Virginis, nempe Annunciationis, Purificationis, Nativitatis & Assumptionis: omnia Natalitia Apostolorum: Conversionem S. Pauli: Nativitatem S. Joannis Baptistæ: Festum S. Stephani Protomartyris: Sanctorum Innocentium, S. Georgii, S. Viti, S. Mariæ Magdalenæ, S. Laurentii, S. Michaëlis, S. Martini, S. Catharinæ, S. Nicolai, & Festum Omnium Sanctorum.

II. Præter hos sunt quidam alii dies, qui locorum particularium devotione aut voto coluntur, hos iis in locis, ubi ab antiquo recepti fuerunt, totos ad instar aliorum celebrari ab omnibus uniformiter tam in Choro, quam in foro præcipimus.

III. Quoniam autem Sanctus Cassianus, Ingenuinus, & Albuinus Patroni sunt præcipui Ecclesiæ Brixinensis, per quos Evangelium ad nos præcipue pervenit: ideoque eos merito veneramur, ordinamus & statuimus, ut per totam Dicecesin nostram, Festum S. Cassiani 13. SS. Augusti, Ingenuini & Albuini 5. Februarii tanquam duplex in Choro, & simul in foro, solenniter celebretur.

IV. In prædictis vero Festis interdiciamus omnibus & singulis omnia opera servilia; aliaque omnia illicita,

ut comessationes, ebrietates: Contra vero ut quisque rei Divinæ, orationi, & pietati vacet, Concionem, Missæque Sacrificium integrum audiat, edicimus.

V. Prohibemus etiam omnibus Magistratibus, & Judicibus sæcularibus, ne cuiquam ex prædictis Festis violandi, seu prophanandi licentiam concedant, sed eos, qui ab ipsis licentiam, hujusmodi requirunt, ad Episcopum, ejusve Vicarium, vel Pastorem loci, ad quorum cognitionem Festa pertinere dignoscuntur, remittant.

VI. Festum Annunciationis B. Mariæ Virginis, si quando in hebdomadam Sanctam ante Pascha inciderit, Sabbato, aut feria sexta (si Sabbato illo Festum novem Lectionum occurrat) ante Dominicam Palmarum, tam a populo, quam a Clerico in utroque foro celebretur.

VII. Festum S. Gregorii more jam recepto, 24. Aprilis die, ab omnibus conformiter celebretur. In Festorum concursu & translatione Rubricæ Romanæ servantur.

### *De Jejniis Ecclesiæ.*

I. **O**mni feria sexta & Sabbato (excipe festum Nativitatis Domini, quando in eos dies incurrit) cujusvis septimanæ; & diebus Dominicis Quadragesimæ per totum diem solum est abstinencia a carnibus. Supra quam omnia reliqua jejunia (delectus enim ciborum istis in locis servari commode non potest) unicam præterea refocillationem corporis circa meridiem duntaxat admittunt. Quæ ab universis ætatem habentibus, nec legitime excusatis sub periculo peccati mortalis observanda sunt.

II. Jejunia vero ex præcepto Ecclesiæ servanda, (præter Quadragesimam & quatuor anni tempora) sunt Vigiliæ Pentecostes, Nativitatis Domini, Nativitatis Joannis Baptistæ, Apostolorum omnium (exceptis Philippi & Jacobi, ac Joannis Evangelistæ) Assumptionis B. Mariæ Virginis, S. Laurentii Martyris, & omnium Sanctorum. Hæc mature pro concione denuntiabunt Parochi & Concionatores, ne quis forte cum non jejunat, ullum ignorantie

rantia & inobedientia suæ prætextum obtendere possit.

III. Si feria secunda Festum occurrerit celebrandum, quod habet Vigiliam, Sabbato præcedenti jejunetur, nec ulterius trahatur vigilia, quamvis in Sabbatum aliud jejunium incidat.

IV. Caveant fideles, ne dum a cibis sese abinent, aliarum rerum delicias confectentur, genioque suo indulgentes in ebrietates & alia peccata prolabantur, sed in jejunio id præcipue studeant, ut dum corpus ab alimentis abstinet, mens pariter a culpa jejundet. Parum enim prodest homini corporis abstinence, si animus peccatis indulgeat: & hoc est jejunium, quod Dominus apud Esaiam delegit; bonis operibus studere.

V. Si qui (quod Deus avertat) ita se immorigeros exhiberent, ut non solum jejunia ab Ecclesia præscripta susque deque haberent, sed etiam diebus prohibitis carnis usum sibi nefarie permitterent, eos si publice deprehensi, aut diffamati sunt, sine publica pœnitentia in Ecclesiam non esse recipiendos; & quamdiu eam non obierint, neque post mortem ad sacram sepulturam admittendos esse decernimus.

#### *De Jure Patronatus.*

I. **P**atroni Ecclesiarum, aut beneficiorum quorumlibet Ecclesiasticorum, siue Ecclesiastici, siue sæculares, solum jus habent nominandi & præsentandi Beneficiarium Episcopo loci: alia omnia jura beneficiorum de jure ad Episcopum pertinent.

II. Literæ, seu jura Patronatuum, juxta Concilium Tridentinum recognosci volumus; quare omnes & singuli eas Visitatoribus nostris in visitatione proxima exhibeant, vel ipso facto jus suum amittant.

III. Mandamus etiam omnibus Ecclesiasticis Patronis, ut intra sex menses; Lais vero, ut intra quatuor menses a die vacationis cujuslibet beneficii idoneam personam Nobis præsentent, quam Canonice examinatam vel admittamus, vel repellamus: quod si ipsi neglexerint, Nos eorum negligentiam auctoritate nostra supplebimus.

IV. Semel præsentatos, & per Nos legitime admissos, vel investitos, nemo audeat amovere, vel in officio suo impedire, vel ullo modo, siue publice, siue occulte, per se, vel alios divexare, vel ad resignationem cogere; vel alios auctoritate propria assumere sine nostro consensu, sub pœna excommunicationis & amissionis Patronatus. Contra intrusos vero, pœnis suspensionis & aliis arbitrariis procedi volumus.

V. Neque Clerici beneficia sua Patronis resignare, neque Patroni ejusmodi resignationes acceptare præsumant: sed nec post resignationes Ordinario loci factas, prius alium offerant, quam Nos eas, earum causis examinatis, approbaverimus.

VI. Nemo juramenta aut promissiones Simoniacas, vel alias illicitas a Præsentandis extorqueat, vel etiam sponte oblatas acceptet: Nemo pensionem præsentatis imponat sine nostra, aut Sedis Apostolicæ auctoritate: nemo de bonis Ecclesiæ quidquam quovis prætextu sibi usurpet, sed omnia Sacerdoti legitime instituto integre relinquuntur. Si qui secus fecerint, contra eos debitis pœnis progrediemur.

#### *De Vicariis & incorporatis Ecclesiis.*

**V**icarii perpetui vel temporales sine nostro, aut Vicarii nostri, vel Archidiaconorum, si qui fuerint, quibus id specialiter concederetur, expresso consensu, nec assumantur, nec amoveantur. Tantam autem illis proventuum portionem assignare convenit, quanta ad jura Episcopalia solvenda, & vitæ sustentationem commodam sufficiat. Quod nisi fiat, Nos ex officio nostro, ut Ecclesiæ debitis officiis non fraudentur, juxta S. Concilium Tridentinum primo quoque tempore ei rei modum statuemus.

#### *De Immunitate Ecclesiæ.*

**U**T Ecclesiæ ipsæ, ita & bona ac personæ ejus, juxta Leges Canonicas & Civiles, ad solum forum Ecclesiasticum pertinent; pœnæque gravissimæ in eos decretæ sunt, qui alio trahunt: quas Nos hic omnes expresse reno-

renovamus, & statuimus, quæ sequuntur.

I. Ne Clerici se mutuo ad sæcularia judicia trahant : aut si ab aliquo isthuc citentur, ne compareant, neve respondeant, sed ad Nos id deferant.

II. Ne quis Clericum ad sæculare tribunal trahere præsumat ; neve Clericus ad Judicem civilem confugiat, vel appellet : si quis attentaverit, eo ipso causa cadat.

III. Ne quis Clericum in vincula, contra nostram voluntatem, & Canonicas Sanctiones, conjiciat, aut injuriose percutiat, tractetve : nemo Clericos ad munera vel officia civilia, præsertim sordida, aut prophana, ludicra, eoque statu indigna cogat ; nec ad ea Clerici se demittant.

IV. Si quem delinquere contingat, is ad Nos, aut Vicarium nostrum deferatur, ut eum vel simpliciter citari, vel personaliter apprehendi curemus. Quod si in mora periculum sit, etiam Magistratui civili fas sit, talem vinctum ad Nos transmittere.

V. De iis, qui ad Ecclesias, vel alia loca sacra confugerint, Vicarium nostrum quam primum certiorum fieri volumus ; ut, quid fieri debeat, decernamus. Non possit autem civilis Magistratus (extra casus a jure permisos) citra nostram expressam licentiam, quemquam inde extrahere.

VI. Decimæ integre & sine fraude solvantur. Hoc Confessarii & Prædicatores urgeant. Speramus etiam Judices civiles in causa tam pia & justa Ecclesiæ non defuturos. Defraudatores a Nobis excommunicabuntur, eorumque absolutio ad Nos, vel quibus Nos eandem commiserimus, pertineat.

VII. Qui bona Ecclesiarum scienter occupant, aut injuste detinent, nisi infra annum a Synodi hujus publicatione restituerint, eos excommunicationis poenam eo ipso incurrisse declaramus. Eidem poenæ subicimus, qui scienter ejusmodi bonorum occupatores, vel detentores non manifestaverint. Hoc vero Decretum, semel ad minimum in anno in singulis Parochiis publicetur.

*Tomus VIII. Concilior. German.*

VIII. Quod Magistratus civilis in ædibus Canonicis ex officio disponat, agatve, nihil omnino est : cum hujusmodi domus non minus, quam Ecclesiæ ipsæ immunitatis jure gaudeant. Si quis prophanus in Sacra involare præsumpserit, gladio spirituali arceatur.

### *De bonis & juribus Ecclesiæ.*

I. **N**E jura Ecclesiarum minuantur, pereantve, sed integra conserventur, summopere cavendum est. Quod Nos omnibus & singulis Prælati, Decanis, Capitulis, Beneficiariis in virtute obedientiæ injungimus.

II. In singulis Ecclesiis, Monasteriis, aliisque locis piis liber sit, in quo bona, redditus, census, domus, terræ, prædia, decimæ, aliaque jura quæcunque clare, & distincte conscribantur, ne quid cedente, vel decedente Beneficiario, ad Ecclesiam damni redundet.

III. Bona Ecclesiæ hypothecæ ne subiciantur, nisi gravissima necessitas, eaque Nobis proposita & approbata urgeat ; & utilitas evidens Ecclesiæ suadeat. Obligationes, quæ alio quocunque modo sunt, irritamus, & nullas esse declaramus.

IV. Literæ originales, Registra, & alia quæcunque munimenta, quæ vetustate facile consumuntur, & quæ jam quasi consumpta sunt, infra semestrem, post Synodi hujus publicationem in authenticam formam transumpta, ac Prælati signo obsignata, in qualibet Ecclesia, vel loco, cujus propria sunt, sub tuta & fideli custodia trium clavium, (quarum unam Prælati vel Parochus, alteram Oeconomus, tertiam Decanus habeat) cum aliis munimentis conserventur.

V. Literæ beneficiorum non apud Beneficiarios, sed in Ecclesiæ cujusque Archivio asserventur : ad quam custodiam, ut intra sex menses omnes & singuli suas literas authenticas deferant, sub poena arbitrio nostro eis infligenda mandamus. Quas Decani in domibus mortuorum forte invenerint, in eandem recludi curent : & neque illas, neque alias inde sine speciali Vicarii Go-

C c c c

nera-



neralis, aut Archidecani sui mandato, unquam efferrī patiantur. Negligentes, si quid interim perierit, omne damnum reſarciant, & graviter puniantur.

VI. Oeconomi, Syndici, Adminiſtratores officio ſuo ne deſint, bona Eccleſiarum juſtis modis augeant: non in uſum ſuum, vel alterius, ſed in Eccleſiæ & cultus Divini convertant: ſingulis annis accepti, & expenſi rationem coram deputatis faciant.

VII. Abuſum autem illum grandem, quo poſt rationes abuſus ratiociniorum, &c. etiam profuſa convivium, aut computationes, Eccleſiæ ſumptibus ſunt, omnino ſublato volumus. Indigniſſimum quippe eſt, eleemoſynas piorum toto anno congeſtas, uno die tam indigne, quam in quibusdam locis fieri accepiſimus, abliguriri. Quod ſi Chriſtiana charitas ita reſcripſit, ut Eccleſiæ ſuæ nemo ſine mercede, ac ſuperfluis ſumptibus ſervire velit, ſerveſtur, quod hac de re etiam lege municipalī ſtatutum eſt.

VIII. Ultra triennium uni eidemque homini adminiſtratio citra noſtrum conſenſum ne committatur, aut relinquantur. Qui debita non ſolidarunt in ſingulos annos: vel reliqua non integre perſolverunt; tam ipſos, quam hæredes ipſorum ad illius Eccleſiæ adminiſtrationem, cui aliquid debent, donec integre debitum perſolverint, omnino inhabiles eſſe declaramus.

IX. In Villis, & Pagis, ubi, qui legere, & ſcribere norint, pauci ſunt, Oeconomi electis Curatus loci ſemper adjunctus eſſe intelligatur; qui unam ex clavibus gazophylacii, ſeu trunci, & capſæ pecuniarum habeat, accepta, & impenſa omnia, & ſingula clare, diſtincte conſcribat, ut rationum tempore omnia inſpici queant.

### *De Monaſteriis.*

**Q**uod arces bene munitæ ſunt in Regno, id faciunt Monaſteria bene inſtituta in Eccleſia Dei; ac proinde totius etiam populi Chriſtiani intereſt, de Monachorum, aliorumque Religioſorum reformatione, ſerio cogitare; ac quæ ea de re jam ſancte con-

ſtituta ſunt, executioni mandare. Quod, ut citra dilationem fiat, diſtincte præcipimus, quæ ſequuntur.

I. Vota ſubſtantialia in omnibus Cœnobiis tam virorum, quam mulierum, veraciter obſerventur.

II. Regularis vitæ peſtis pernicioſiſſima, eſt proprietas: huius nomen quidem ferendum cenſemus: & quæ ei occaſionem, & fomenta ſubminiſtrant, ex omnibus Monaſteriis penitus auferenda decernimus.

III. Viſtus, veſtitus, cæteraque vitæ ſubſidia ſingulis ex communi pro neceſſitate indigentia, & Monaſterii facultatibus, prompte, hilariter, non fordide, nec in pecuniis, ſed in ſpecie rerum præbeantur.

IV. Penſiones vitales, aut redditus perpetuos nullus quovis prætextu recipere, neque ratione officiorum, vel miniſteriorum pecuniam corradere, aut conſervare permittatur, ſed omnia in communem uſum convertantur.

V. Nemo pecuniam, vel aliud quidpiam proprium apud ſe, vel alium habeat: imo ne quidem apud Priorem ſuum, vel alterius nominis Superiorem, ut vere dicere poſſit: hoc eſt meum, & non commune, ac pro ſua voluntate uti queat: nec bona immobilia ad uſumfructum, vel adminiſtrationem poſſideant.

VI. Ut viri a mulierum, ita mulieres a virorum Cœnobiis penitus excludantur, nec intra clauſtrum eis ullus pateat aditus, niſi de Superioris, vel Epilcopi licentia in ſcripto obtenta, & in cauſis plane neceſſariis.

VII. Hoſpites in virorum Monaſteriis, juxta Regulam excipiantur in menſa Superioris, vel alio honeſto loco: ſit tamen menſa frugalis; abſit ebrietas, & potatio ad æquales hauſtus, & alia omnia Religioſis indigna: ſed nec nimium protrahatur reſectio; nec deſit ſacra lectio. In Monaſteriis vero Monialium nulli omnino recipiantur hoſpites, per noctem illic manſuri.

VIII. Ad Divinum Officium omnes ſimul in Eccleſia conveniant: in eodem reſectorio omnes comedant: & in eodem dormitorio cubent: niſi quos

ætas, aut infirmitas, vel aliud legitimum impedimentum excuset. Ad dormitorium autem se recipiant mox post Completorium, & sic claudatur, ut nemo inde exire possit, sine Superioris consensu. Omnia juxta Regulam cujusque Ordinis, & Monasterii fundationes, & laudabiles consuetudines intelligendo.

IX. Bibliothecæ ubique bonis libris instruantur; a prohibitis repurgentur.

X. Officia Monasterii pro cujusque dignitate: non ex gratia, vel alia quavis de causâ distribuantur.

XI. Qui bona temporalia curant, ut Cellerarii, Bursarii, alique quotannis coram Superiore, & Senioribus accepti, & expensi rationem reddant. Prælatus autem eandem quotannis Conventioni suo faciat: & deinde a Conventioni subscriptam ad Episcopum mittat; vel quando Episcopus requisiverit, eisdem reddere paratus sit.

XII. Monachi, alique Religiosi non in Ecclesiis incorporatis, sed omnes in Monasteriis vitam communem agant, nisi aliud Regula permiserit, & Superior cum Capitulo suo expresse consenserit, ac Nos eorum sententiam approbaverimus. Quin tamen curam animarum in iis exerceant, non prohibemus, modo alias apti sint, & a Nobis approbati. Qui vero alia de causâ extra Monasteria sua degunt in nostra Diocesi, ut intra tres menses se Superiorum suorum obedientiæ subdiciant, sub pœna carceris, & relegationis imperamus.

XIII. Vagabundi Monachi in habitu Sacerdotum inquirantur, & ad Monasteria sua omnibus modis revocentur, ac mittantur. Apostatæ, & fugitivi juxta cujusque Ordinis disciplinam, Regulam, & probatum morem, pœnitentes benigne recipiantur, nec pro excessibus graviores eis pœnæ, quam in Canonibus Sacris, & Regulis expressæ sunt, imponantur.

XIV. Quæ Monasteria Parochias incorporatas habent, ut idoneos Parochos habere queant, duos ad minimum juvenes in celebri aliquo Gymnasio alere teneantur: alioqui Nos illis Ec-

clesiis pro autoritate nostra providebimus.

XV. Virtus, & doctrina præcipua sunt Monasteriorum ornamenta: virtutem docent Regulæ cujusque Ordinis, quas Nos ab omnibus exactissime servari volumus. Ut docti autem viri parentur, semper duo ex junioribus Professis, vel si id nulla ratione fieri possit, saltem unus ex omnibus & singulis Cœnobiis in Studiis usque ad secundum Theologiæ annum alantur. Quod ut faciant Prælati, id omnibus & singulis in virtute obedientiæ injungimus, ac sub pœnis arbitrariis etiam districte præcipimus.

XVI. Capitulares congregationes ad disciplinæ monasticæ conservationem singulis septimanis ad minimum bis, vel juxta cujusvis Ordinis Regulas etiam sæpius habeantur; in quibus, quæ contra honestatem, vel Ordinis Regulam admissa fuere, puniantur. His etiam ipsos Prælatos interesse, volumus.

XVII. Nullos Prælatorum mutuum sumere, vel æs alienum contrahere supra centum Rhenenses, sine nostro speciali consensu præsumat.

XVIII. Intelligant Religiosi, se nihil possidere proprium, usum habere in vita, post mortem nullum testandi, aut disponendi actum habere, aut habere posse, etiam consentiente Superiore. Quin nec inter vivos sine licentia Superioris suis quidquam donare valent, omni rerum proprietate per professionem exui.

XIX. In mensa communi (cui etiam Superior intererit, quoties per alia licebit) ne desit spiritualis lectio, qua corporales cibi suaviter condiantur. Liber autem nullus legatur, quem Superior, & Confessarius ordinarius non approbaverit.

XX. Silentium, Obedientia, Charitas, Humilitas, ac reliquæ Christianæ virtutes Religionum gemmæ sunt: quibus Religiosos imprimis exornatos esse desideramus.

XXI. Regula Ordinis omnibus, & singulis intra mensem prælegatur, ita ut singuli singulis mensibus eam vel legendo, vel audiendo absolvant: id,

C c c c a

quod

quod in Triclinio, vel Capitulo, ubi omnes convenire solent, fieri commode poterit.

XXII. Qui Sacerdotes non sunt (nisi sæpius ex Regula sua obligentur) saltem semel quot mensibus Sacramentalem peccatorum suorum confessionem faciant, & Sacrosanctam Eucharistiam suscipiant. Sacerdotes autem ter ad minimum per hebdomadam celebrent; & Sacramentaliter confiteantur, quoties peccati mortalis conscientia eos urgebit, sed ita tamen, ut confessionem ejusmodi ultra decimum quartum diem nunquam differant. His attribuaturs Confessarius prudentia maturus, vita, & doctrina probatus. Ut sæcularibus Sacerdotibus, vel quilibet cuilibet confiteatur, non est ferendum. Si domi aptus non sit, asciscatur communi consensu aliunde, præsertim vero ex Religione aliqua, cui omnes simul confiteantur.

XXIII. In singulis Monasteriis sit locus aliquis separatus, in quo Novitii instituantur; in quo omnes quamdiu in probatione erunt; hoc est, per annum integrum morentur. Quin ad publicos tamen Conventus, ut & alii omnes, qualis est Capitulum, Chorus, Refectorium, exeant, non impedimus.

XXIV. Novitiis assignetur vir pius, prudens, ac doctus, qui eis Regulam explicet; ad vitam Regularem verbo, & exemplo instituat; ad pietatem informet; ad virtutis amorem inflammet; & in iis, quæ Ordinis sunt, & Regularum, exerceat; ut quid professuri sunt, non tantum sciant, sed etiam usu & experientia didicerint.

XXV. Novitiatum singulis mensibus Abbas, vel Superior cum uno ex Senioribus visite; & statum illius, & Novitiorum disciplinam, & Magistri eorundem diligentiam ad minimum bis in anno Episcopo significet.

XXVI. Curent Abbates, Præpositi, alique Regularium Superiores habere Ludimagistrum aliquem eruditum, & bonæ famæ, qui juniores statim a Professione, imo, & Novitios (si expedire videbitur) saltem in Grammaticis instituat, atque ad Scholas, ad quas mitti debebunt, altiores disponat.

Habeant præterea Theologum, qui Sacerdotes, aliosque in iis, quæ Regulam, conciones, casus conscientiarum, & id genus alia respiciunt, omni, quæ potest, diligentia, juxta S. Tridentini Concilii dispositionem instruat.

XXVII. Nemo Professionem Religionis faciat ante decimum sextum annum ætatis expletum, & qui per annum integrum post habitus susceptionem in probatione non steterit. Professio autem antea facta sit nulla. Ita Sacra Tridentina Synodus sanxit, & multa alia eodem pertinentia, quæ omnia Nos inviolabiliter servari præcipimus.

XXVIII. Nemo, cujuscunque dignitatis, vi, metuve aliquem cogat, vel dolo malo ad Religionis professionem inducat; maxime vero id in virginibus, viduis, & quibuscunque mulieribus caveri volumus; cum Tridentinum Concilium eos, qui id fecerint, excommunicationis vinculo constringat.

XXIX. Nihil a Regularibus in ingressu Monasterii præter honorem Dei, & salutem animarum quæratur: sed nec ipsa Monasteria, vel eorum Præfecti, aut Præfectæ, vel aliquis eorum nomine, ab illis, qui professionem faciunt, professionis nomine pecuniam aliquam, aut quævis bona Novitii, aut Novitiæ, neque convivia cujusque consuetudinis prætextu exigant. Nihil etiam ex Novitii, Novitiæve bonis ante illorum professionem, etiam si sponte offeratur (excepto victu, & amictu illius temporis, quo in probatione sunt) accipiant.

XXX. Caveant Prælati, ne ex bonis, aut fructibus Monasterii sui, distent suos amicos, vel propinquos, neve quidquam ut proprium ipsi possideant, vel aliis possidendum, aut donandum relinquunt.

XXXI. Regulares, ad quos cura animarum quovis jure pertinet, ut munera Parochiæ, sicut & sæculares Curiones, cum omni diligentia exerceant, autoritate Concilii Tridentini præcipimus: Ad congregationes Capitulares cum aliis Parochis conveniant, & in Ecclesiis suis dictos Conventus habeant; prandium etiam, cum opus fuerit, præbeant.

XXXII.



XXXII. Si qui vero (quod absit) audiendarum confessionum, aut concionandi officium non ita sincere, & cum ædificatione gererent, aut imperiores essent, eos quamprimum ab officio suspendi, vel omnino removeri volumus.

XXXIII. Habitu & vestitu utantur omnes decenti juxta Regulæ præscriptum & consuetudinem laudabilem; neque tam vestibus, & corporis cultu ac munditie, quam vitæ innocentia, ac morum integritate & simplicitate hominibus placere studeant. Unius autem, & ejusdem Ordinis ac Regulæ uniformis sit habitus; quem Sacri Canones sine legitima causa absque periculo censurarum, ne ad breve quidem tempus deponi permittunt. Idcirco ordinamus, & mandamus, ut habitus domi, & foris ab omnibus, & singulis, tam Superioribus, quam inferioribus conformiter gestetur, nec ita deponatur, vel deformetur, vel transformetur, vel occultetur unquam, ut certum, & notorium indicium Ordinis non sit.

XXXIV. Magna cura habeatur ægrotantium, & debiliū: iis Religionis præscripta relaxentur, potus, victus, locus, & omnia alia, quæ sanitas exigere videbitur, prompte, hilariter, & magna cum charitate subministrentur: atque id fiat de Medici consilio, ne morbus incrudescat, & radices agat. Ordinentur quoque ad eorum curam personæ idoneæ, ex eodem Ordine, vel aliunde (non tamen scemina viris, aut sceminis viri) quæ non sint morosæ, nec difficiles, sed in omni mansuetudine & lenitate iis inserviant, ac necessaria ministrent.

XXXV. Religiosi singuli singulas suas cellas, & lectos habeant: duo in eadem cella simul, multo minus in eodem lecto ne dormiant: Examen conscientie ad minimum semel in die faciant: colloquia vana, inutilia, turpia, petulantes sermones, jocos obscenos, &c. abominentur, sanctum silentium juxta Regulam sancte colentes: a chartarum, aliisve inhonestis, vel illicitis ludis penitus abstineant: otium tanquam pestem fugiant, honestis exer-

citiis (exceptis horis, quæ cultui Divino, studio literarum, lectioni librorum, præsertim spiritualium, honestæ post cibum recreationi, ac propriorum officiorum functionibus dantur) sese occupantes. Nihil in Templo, Choro, vel Monasterio agant, quod illic expedire non conveniat, vel indecorum, aut turpe sit: sint omnes unanimēs, ita ut plures cor unum, & animam in Domino habeant: absint procul lites, jurgia, odia, invidiæ, & similes Religionum pestes, sed omnes se mutua charitate & dilectione in Domino complectantur.

XXXVI. Abbates, Præpositi, alique Religionum Præfecti nusquam a suis Monasteriis abeant, nisi prius causa per Episcopum cognita & probata discedendi licentiam Canonice obtinuerint: quæ Nos superius de Ministrorum Ecclesiæ residentia ex Sacris Canonibus sancivimus, ad se imprimis pertinere intelligentes.

### *De Monialibus.*

**Q**Uæ de viris ordinavimus, eadem & de mulierum Cœnobiis suo modo intelligi volumus. Et quæ in S. Tridentina Synodo de utrisque sancte statuta sunt, eadem ab utrisque sancte servari cupimus. Propria autem Sanctimonialium sunt, quæ sequuntur.

I. Præter ordinarium Confessarium, cui singulis mensibus omnes simul confiteantur, ut eis ter, aut quater in anno Extraordinarius offeratur, qui similiter omnium confessiones excipiat, Vicarius noster Generalis diligentissime curet.

II. Clausuram Conventus mulieres æque, ac viri strictissime servant, nullum virum, puerum, nuncios, literas, munera, sceminas sine expressa Abbatis, Matris, aut Præfectæ licentia, & in causis extreme necessariis admittentes: nunquam exeant (quæ alioquin omnino clausæ non sunt) nisi vel omnes simul, vel major earum pars cum legitima facultate, vel Religionis, vel sanitatis causa ad hortum, vel Ecclesiam aliquam ire voluerint.

III. Ubi perfecta clausura in usu est, ea integre juxta Tridentini Concilii dispositionem servetur; ubi vero non est, quandoquidem Sacri Canonum omnia mulierum Monasteria claudere strictissime jubent, Nos presentium tenore omnibus & singulis denunciamus; si sponte non suscipitur, cum primum gravius quid contra disciplinam Regularem hac in parte (quod Deus avertat) admissum fuerit, omnimoda clausura, etiam invitis (nulla alia monitione præmissa) imponetur.

IV. Nulla Monialis puellam ullam, sive ex consanguineis, sive ex alienis apud se educare, & usque ad professionem in Monastica disciplina in propria cella exercere præsumat, sed omnes ad Novitiatum, uti de viris præcepimus, remittantur.

V. In Novitiatum autem nulla recipiatur sine habitu Regulari; ad habitum nulla, nisi duodecim annis major admittatur; ad Professionem vero duntaxat post annum probationis absolutum, & decimum sextum ætatis expletum, quæ Episcopo, vel ejus Vicario de libero suo consensu, & voluntate pia certam fidem fecerint, recipiantur. Professio autem fiat solenniter, & verbo expresso.

VI. Puellæ, quæ educationis, pro ut moris, & disciplinæ causa in Cœnobiis degunt (quod non improbamus) in aliqua Monasterii parte a Monialium habitatione, separate degant, & ibidem erudiantur. Magistra omnium sit una, quæ doctrinam Christianam, modos orandi Ecclesiæ probatos, Litanias, Rosarium, Officium B. Mariæ Virginis, Psalmos penitenciales, &c. recitare doceat: Item acu pingere, & alia, quæ locum, & sexum illum deceant. Salarium pro qualibet assignatum totum Abbatissæ solvatur, unde victus puellis; & Magistræ præterea laboris stipendium congruum suppeditetur. Alium educandarum puellarum omnem modum abrogamus, ac tollimus.

VII. Moniales solæ foras ne egrediantur: ad convivia, & nuptias sæculares ne exeant. Extra Monasterium ne pernoctent. Pecunias mutuo sumere, æs conflare, proprias pecunias ha-

bere, nugigerulas alere, per inter-nuncios sæcularia tractare, & id genus alia, non Religionis, sed mundi sunt opera: Quæ Nos omnia, & singula sub pœna excommunicationis prohibemus.

VIII. In ministerio Abbatissæ, vel alterius Præfectæ viri, puerive ne ulli sint.

### *De Hospitalibus.*

I. **P**rima cura piis in locis sit de animarum salute. Habeant ergo singula proprios Sacerdotes, vel si habere non possunt, a Parochis, in quorum jurisdictione sunt, qualibet hebdomada semel saltem, & frequentius etiam, si opus fuerit, invisantur, qui infirmos verbo Dei, Divinorum Sacramentorum administratione, aliisque modis consolentur.

II. Omnes, qui locorum piorum sumptibus aluntur, Festis anni solennioribus confessi, Sacram Eucharistiam reverenter sumant; statâ vero hora quotidie in Ecclesia congregati, pro Benefactoribus pias ad Deum preces effundant.

III. Bona ad alium usum, quam instituta sunt, ne avertantur; ad primam institutionem omnia citra moram revocentur; quæ viduis designata, iis viduæ solum alantur; quæ aliis deputata fuere, ex iis illi, non alii vivant. Neque in posterum ulla mutatio circa res pias ejusmodi fiat, nisi Nos ex causa legitima eam faciendam decreverimus.

IV. Hospitalarius, seu Paterfamilias vir sit, cujus fides, pietas, innocentia, sedulitas, charitas, gravium virorum testimonio commendata sit: Matres vere sint, quod appellantur, id est, pietate, & charitate flagrantes.

V. Mendicantes robusti, indiscussa causa ne recipiantur: personæ suspectæ, vel inhonestæ penitus excludantur; miserabiles solum admittantur. Nihil ab advenientibus, vel adeuntibus peregrinis accipiat, nec ullæ turpes pactiones cum mendicis ineantur.

VI. Curent Hospitalarii, ne quid peregrini, advenæ, pauperes hospitio ex-

excepti contra Christianam pietatem, bonosque mores admittant. Quos possunt, corrigant, alios Nobis, aut locorum Curionibus denuncient, ut sæcularis brachii opera coerceantur.

### *De disciplina Cleri.*

**C**Lerici lux mundi, sal terræ, exemplum fidelium, & alia passim summa cum laude audiunt: quæ nomina ut re ipsa tueantur, vehementer optamus; & ut facere velint, in Domino rogamus: neque impune ferent, qui tam paternâ monita non audierint.

I. Nemo mysticem alat; nemo barbam indecoram, vel quovis modo Ordine suo indignam nutriat: labra præcis pilis paululum aperiantur, ne qua inter sacrificandum Sacramento injuria fiat.

II. Collaria plana sint, quæ comode, & apte super veste reflecti possint: crispata, lactucata, nimiumque elaborata, quæ militem, vel aulicum ornent, in Clericis omnino detestamur.

III. Colorem nigrum solum permittimus, alios quoscunque prohibemus.

IV. Habitus sit honestus, & simplex, non limbis, aut scissuris compertus; mundus tamen. In oppidis, & locis celebrioribus vestem talarem requirimus; in nullis paulo brevior: sine qua nec domi se conspici, ab aliis patiantur. In itinere vestis genua stantis saltem operiat: & brevem ensen, qui pallio tegatur; non alia arma permittimus: domi omnia, quæ gestent ipsi, omnibus prohibemus. Arma namque Clericorum lachrymæ sunt, & orationes.

V. Omnes coronam in vertice conspicuam, & Sacerdotes quidem Hostia magna, qua sacrificantes utuntur, majorem; reliqui sensim minorem; quisque videlicet pro gradu Ordinis sui, perpetuo gerant: quam alternis semper hebdomadis renovari curent.

VI. Mensa sit frugalis. Exquisite delicias, longiores accubitus, comestiones, ebrietates, comotationes

ad æquales haustus provocationes, in omni Christiano, quanto magis in Clerico damnamus, atque detestamur.

VII. Qui choreas duxerit, aut larvatus per plateas, vel domos nocte, vel interdiu inceserit, fructibus beneficii, vel officii sui per unum mensem privetur, & crescente contumacia, crescant similiter & poenæ.

VIII. Si ad nuptias invitati fuerint, vel alia convivia publica, quæ propinquitatis, vel alia honesta de causa declinare non poterunt, possint quidem accedere; memores tamen Ecclesiastici decoris, a choreis, & rixis abstineant; nec ullos alios, nisi Clericali honestate dignos gestus præferant; verbo, & exemplo se ipsos exhibeant, sicut Dei Ministros, nemini dantes ullam offensionem, sed modestia & sobrietate omnes in Domino ædificent.

IX. Extra causam itineris necessariam, vel casus alios extreme necessarios in Tabernis, seu Cauponis publicis potitantes, seu comestantes, pro prima vice, qua fuerint deprehensi, damnamus in uno floreno ab eis irremissibiliter auferendo: pro secunda vice ad carcerem per quinque dies: pro tertia vice ad carcerem per decem dies: quarto denique, tanquam incorrigibiles, omni officio & beneficio privamus. In eos vero, qui publice ebrii fuerint, vel post ebrietatem sine prævia confessione, & poenitentia Sacramentali tremendum Missæ Sacrificium offerre non verentur, easdem omnino poenas decernimus, volentes ut 1. Poena pecuniaria. 2. & 3. Carcere puniantur. 4. Denique omni officio, & beneficio priventur, uti & de iis, qui in tabernis publicis comestantur, statuimus.

X. Præterea paci, & tranquillitati publicæ consulere cupientes, ordinamus, ac decernimus: si Clericus Clericum, vel Laicum probris, vel maledictis, aut convitiis inceserit, sub duorum aut trium testimonio, ab omni proventuum Ecclesiasticorum perceptione per unum mensem suspendatur: si manus violentas, citra vulnus tamen, intulerit, jam dictam poenam sustineat duplicatam: si vulnus inflixerit, ultra poenam excommunicationis, quam ipso



so facto incurrit, ad quatuor menses fructuum privatione mulctetur: si membrum mutilaverit, vel inutile reddiderit, omni beneficio Ecclesiastico sit ipso facto privatus. Et nihilominus in omnibus illis casibus, juxta Consistorii nostri arbitrium læso satisfacere, pro injuria illata semper cogatur; & pro delicti qualitate a Vicario nostro, si videbitur, etiam gravius puniatur. Quod si linguam petulantem, aut manus violentas in Prælatum aliquem intorserit, in omnibus casibus proxime memoratis pœnæ geminentur. Denique rixarum, pugnarum, tumultuum authores, carceris pœnam subeant. Qui contra alios jurgiis, vel armis contenderint, per Prælatos suos pro excessuum gravitate plectantur. Salvo semper jure, quod vim vi repellere permittit: salvis item Religionum privilegiis, Regiis, ac Statutis, quibus hac in re nihil omnino derogatum volumus.

XI. Negotiationes, mercaturas, alienæ rei procuraciones, tutelas, advocaciones, actiones causarum apud Judicem sæcularem, Notariatus, & Tabellionatus officia prophana, artem mœdendi, & cauponandi, & his similia, a Clericorum professione declaramus esse aliena, minimeque ferenda.

XII. Simonia, ambitio, turpiloquium, scurrilitas, inter Clericos ne quidem nominentur.

XIII. Clerici Ordinis sui memores, homines leves, viles, in quibus nihil singularis pietatis, Christianæ virtutis elucet, quo possunt studio fugere debent: Ad eorum convivias, compotationes, ludos, ne accedant: a nimia familiaritate omnino abstineant. Haud enim aliunde Clericalis Ordinis gravitas magis offensa fuit. Cum piis, & honestis, & cum sui Ordinis hominibus eorum conversationem præcipuam esse volumus.

XIV. Erga populum gravitatem, mansuetudine temperatam servent, & conservent: se ipsos propter temporalia odiosos ne reddant. Si quid fieri debeat in hoc genere, per tertium potius faciant. Scandala evitent, morum integritate, & vitæ exemplo omnibus

præluceant, ita ut eos populus amare, vereri, & revereri merito possit. Quomodo enim ei conscientiam meam aperuero, cui propter avaritiam, aut morum corruptelam ostium domus merito clausero?

XV. Adversus concubinos juxta Canonem S. Tridentini Concilii citra remissionem procedemus, ut iam scdum scandalum e medio tollamus. Itaque prima vice, qua deprehensi fuerint, ejecta concubina, tertiam partem omnium fructuum suorum amittent: si facinus reperiverint, suspensionem ab officio, & beneficio incurrant: ubi vero apparuerint incorrigibiles, nec pœnis abarceri a scelere, tertio denique omnibus beneficiis suis privatos ad omnes omnino honores, officia, & beneficia Ecclesiastica perpetuo inhabiles esse decernimus. Pari modo in eos, qui fornicationis, aut suspectæ familiaritatis convicti fuerint, procedetur.

XVI. Si Decani, vel Archidecani unum, vel plures Clericos in suis regionibus concubinos, aut fornicarios degere noverint, neque Nobis eum, vel eos manifestaverint, ii ad Nos delati, ac convicti, si non eandem pœnam, quam concubinarij, quos celarunt, experientur, saltem ad arbitrium nostrum gravissime, & irremissibiliter plectentur. Quod ipsum etiam de quocumque alio Sacerdote, sui vicini amicam, vel concubinam Nobis, vel saltem Decano, vel Archidecano non revelante, intelligi omnino volumus.

XVII. Sed & concubinas, quæ posthac cum Clericis cohabitaverint, per excommunicationem ab Ecclesia expellimus. Si vero nihil istis proficiamus, ut ejusmodi mulieres denique pœnis temporalibus subjiciantur, decernimus. Quam ad rem, uti speramus, Nobis Magistratus civiles sedulam operam præstabunt. Quod ut facere velint, cum id ab eis requiretur, etiam atque etiam in Domino omnes exhortamur, & obsecramus.

XVIII. Ludum aleæ, talorum, taxillorum, tesserarum Diocesis nostræ Clero penitus inhibemus. Honestis tamen recreationibus, quas jura permittunt, quo minus utantur, non impedimus.

XIX. Denique quæ a Summis Pontificibus, & Sacris Synodis, maxime vero a Synodo Tridentina de Clericorum honestate, ac modestia retinenda, & simul de luxu, & quibuscumque criminibus vitandis copiose, & salubriter sancita sunt, eadem sub iisdem, aut etiam maioribus pœnis, tanquam hic verbatim repetita & inserta, integre servari præcipimus.

XX. Quod si qui in Clero, vel etiam populo sint, qui (quod non expectamus) reformari detrectent, Principes, & Magistratus civiles monemus, & obsecramus, ne eis patrocinentur, sed Episcopo, Vicario ejus, Decanis, ac aliis Prælati sint auxilio, eorumque Decreta fideliter exequi mandent, & ordinem præscriptum cogant servare. Neque dubitare possumus, quin Magistratus Catholici, a quibus omne genus officii erga Matrem Ecclesiam merito expectatur, pro sua pietate, & zelo, quod Nos enixe hortamur, ac petimus, prompte & alacriter efficiendum suscepturi sint.

### *De Testamentis Clericorum.*

I. Clerici, uti hætenus per Diœcesin nostram liberam testandi facultatem habeant; Volumus tamen, & ordinamus, ne de bonis Ecclesiæ nomine acquisitis testentur, nisi quatenus Sacri Canones, & legitima ipsorum privilegia id permittunt.

II. Quicumque Sacerdos, vel Clericus prius de morbo, aut morte Clerici alterius cognoverit, de eo Archidecanum, Decanum, vel Cameraarium suum quamprimum certiores faciat. Quod si casus tam cito ad eos deferri nequeat, præsertim si nullum testamentum sit factum, aut testamentarii non sint præsentibus, vel ignorentur, ipsi Sacerdotes proximi, & primi ejus obitus scientiam habentes, nomine Ordinarii universa obsignent, remque statim ad Consistorium nostrum referant.

III. Concubinarum, vel aliarum turpium personarum in testamentis Clericorum ne mentio quidem fiat. Quod si quis quacumque de causa, vel modo concubinæ suæ, sive ancillæ, sive

*Tomus VIII. Concilior. German.*

alio quovis ficto nomine quid legaverit, id non concubinæ reddatur, sed in pios usus convertatur.

IV. Executores testamentorum hujusmodi, intra annum de omnibus, & singulis, quæ invenerint (quorum omnium Inventarium authenticum extare volumus) an, quibus, & quomodo ea distribuerint, testamentumque executioni mandarint, Nobis, aut Vicario nostro, rationem reddant. Negligentiæ pœna quinque Marcæ.

V. Quocumque anni tempore Clericus quispiam mortuus fuerit, ex fructibus defuncti semper congrua portio relinquatur Successori usque ad novi anni initium. Si inter Successorem, & Executores non conveniret, litem dirimat Vicarius Generalis. Annus autem quoad fructuum perceptionem in Civitate nostra Brixinensi a die S. Helenæ; sed per vallem Isaci, & Pustriellæ a S. Georgii; per valles Oeni a die Purificationis B. Virginis principium habere censeatur. Quantum vero Successori relinquendum sit, id ex loco, tempore, & oneribus colligatur. Qui huic nostræ ordinationi contravenerint, triginta libras pœnæ nomine solvent.

VI. Ne quis bona Clerici vivi, vel defuncti invadat, aut quoquo modo subtrahat: si quis attentaverit, eum in pœnas Canonis incidisse, præsentis Canonis declaramus.

### *De Libris Clericorum.*

UT Parochi, & alii Clerici has nostras Constitutiones, & ea, quæ officii sui sunt, rectius obire, & exequi possint, ac simul literarum studio incumbere assuescant, ordinamus, ac volumus, ut inter alios libros, quos quisque sibi arbitrato suo comparare voluerint, etiam istos, quos subjungimus, habeant, ac sedulo legant:

Biblia Sacra.

Breviarium Romanum, vel ex quo Horas recitare debent.

Catechismus Romanum auctoritate Concilii Tridentini editum, latine & germanice, cum indice, & distributione omnium materialium pro omnibus Dominicis, & præcipuis Festis

D d d d

per

per Concionem explicandarum : vel cum dilucidatione ejusdem, authore Joanne Chapeaville : vel cum explicatione Sebastiani Catanei.

Catechismus Trevirensis Archiepiscopi cum praxi Catechistica.

Catechismus Petri Canisii saltem minorem.

Epistolam Antonii Possevinii de Catechismo docendo.

Concilium Tridentinum.

Constitutiones Metropoliticas Salisburgenses.

Constitutiones nostras Diocesanas, quæ deinceps apud Ecclesiam maneant, cujus sumptibus coëmptæ sunt.

Manuale Parochorum Feliciani Episcopi Scalensis.

Agenda Brixinensia a Nobis recusa.

Directorium Joannis Polanci, & librum ejusdem de juvandis moribus.

Methodum Confessionis.

Rationale Officiorum Divinorum.

Institutiones Sacerdotum Francisci Toleri Cardinalis : vel Petri de Soto.

Theologiam Pastoralem Petri Binsfeldii.

Manuale Navarri, vel aliquem alium ex iis, qui de casibus conscientiæ scripserunt ; quo in genere plures excellunt.

Scutulum Fidei Laurentii Hermanutii germanice.

Controversias Francisci Costeri germanice, vel latine.

Pro Concionibus unum, vel plures probatos Authores, ut Homilias Joannis Ecki de Tempore, & Sanctis, ac Sacramentis.

Postillam Petri Canisii germanicam, Friburgi Brisgoviz impress. 1602.

Post illam Georgii Schereri germanicam.

Epitomen Friderici Nauseæ, & id genus alios.

Item pro excitanda mente in Dei amorem, opuscula Granatæ, latine vel germanice. Institutiones, Meditationes Francisci Costeri. Libellum Thomæ de Kempis de Imitatione Christi, & alia ejusdem opuscula ; & his similes libellos spirituales sedulo lectitari a Clericis cupimus.

Omnes præterea Parochi, & Curati sub pœnis gravibus pro arbitrio nostro infligendis, intra duos menses post hujus Decreti publicationem, duos sequentes libros sumptibus Ecclesiæ compingi, vel emi curabunt, qui deinde penes illam Ecclesiam semper maneant. Primus est, in quo Baptizatorum nomina in hunc, qui sequitur modum, describantur. Die 24. Augusti anni 1603. Ego N. Parochus, Curatus, vel Cooperator Parochialis Ecclesiæ Sancti N. in Velthurns, baptizavi filium N. & N. conjugum ; natum die 23. Augusti ejusdem anni : eique fuit Pauli nomen impositum. Patrini autem fuere Joan. N. filius N., & Anna uxor N. & filia N. Quod si filius non fuerit legitimus, nomen solius matris, si quidem de ea constiterit, inscribatur. Quod si expositus, & ideo, vel alia quavis de causa sub conditione iterato baptizatus ; vel in quo ceremoniæ ob necessitatem omissæ, supplendæ erunt ; hæc omnia erunt in eodem libro exprimenda : nempe ; Inventus fuit de sexto Julii, & quia nesciebatur esse baptizatus, sub conditione eum baptizavi ; vel baptizatus fuit ab obstetrice N. N. die nono Januarii, & postea omissa supplevi, die quarto Augusti anni 1603. In alterum librum deferenda sunt nomina, qui Matrimonia legitime contraxerint : modus autem iste servari poterit. Die nono Septembris anni 1603. Jacobus filius N. contraxit Matrimonium de præsentibus cum Anna filia N. in Ecclesia Parochiali Sancti N. (vel in ædibus privatis, vel in alia Ecclesia de licentia Ordinarii) in Albis præsentibus me N. Rectore (vel Sacerdote N. de mea, vel Ordinaria licentia) prædictæ Parochiæ, & N. atque N. testibus præsentibus, & aliis multis de populo, qui ad Ecclesiam conveniant : præmissis jam tribus (aut duobus, aut una, concessu Ordinarii) solitis inter Missarum solennia denunciationibus, quarum prior facta est die Dominico 23. Augusti proxime præterito : altera die festo N. & nullo prorsus inter eos detecto impedimento, quo minus libere contrahere possent.

De



*De usuris, & aliis contractibus  
illicitis, & licitis.*

**U**suræ vitium in utroque Ordine, Ecclesiasticorum & Laicorum latissime patet; estque adeo pervulgatum, ut jam prope omnem viri naturam, eorum judicio exuisse videatur. Contra vero non desunt, qui usuram esse, sentiant, quidquid præter sortem provenit: utrique in errore, tamen non pari cum periculo, versantur. Quocirca Nos pro Pastoralis cura nostra ad subditorum nostrorum mentes tranquillandas, matura ac diuturna deliberatione cum viris eruditis habita, de hac re Canones sequentes edidimus; & singulis nostræ Dicecesis fidelibus, fideliter & integre servari præcipimus.

I. Nullus contractus, in quo sex, vel septem, vel amplius pro centum quot annis exiguntur, in posterum in eundus, toleretur. De præteritis judicent conscientiarum Judices.

II. Qui pecunias suas sine ullo delectu personarum, solius lucri intentione, cuilibet mutuo dant, qui pro centum quot annis quinque salvo semper capitali & lucro quinario stipulentur, ac solvere paratus sit, eos proprie usurarios esse, & in æternæ damnationis periculo versari declaramus.

III. Ne frumentum, vinum, vel aliud quippiam mutuum detur, ut eo, quod datum est, ex obligatione solius mutui aliquid amplius reddatur, si ejusdem, si diversi generis, etiam si sint operæ, vel onera, quæ pretio æstimentur. Usura enim est (inquit Agathense Concilium) ubi amplius (vi mutui) requiritur, quam datur.

IV. Ne cui cum altero ita contrahere liceat: do tibi mutuo centum vel mille, ut justa mercede mihi servias; in meo prædio labores; ut justo pretio tuum frumentum mihi vendas, vel meum emas; ut mihi cum indigero, vicissim mutues; ut mihi beneficium, vel officium, si sæculare, si Ecclesiasticum conferas, vel impetres: hæc enim & similia pacta in mutuo sunt usuraria.

V. Qui frumentum, vinum, ligna, vel alia quævis ob solam expectationem

solutionis, justo pretio carius vendunt, usurarii sint.

VI. Qui præcise ob anticipatam solutionem minoris justo pretio emerint, vel minus solverint, quam debebant, usurarii censeantur.

VII. Pecuniam præsentem quærenti, ne quid carius credito vendatur, ut statim præsentem pecunia a venditore per se, vel per interpositam personam vilius ematur.

VIII. Non liceat vendere dilata in tempus solutione, ita ut precium, quod interim merci accreverit, solvatur venditori: nisi precii diminutio, quæ æque timeatur, ejusdem quoque periculo fiat.

IX. Omnia monopolia, quæ auctoritate privata sunt, aut in manifestum damnum Reipublicæ conceduntur, rejicimus & damnamus.

X. Ne mercatores inter se conspirent de non vendenda merce aliqua infra certum precium, aut non emenda ultra precium certum.

XI. Ne artifices inter se conveniant, opus ab uno eorum inceptum, ab alio non continuari vel absolvi; aut non laborare infra certam mercedem: & ne similia pacta fiant, quæ constare esse iniqua.

XII. Qui vina, frumenta, vel alia præsertim vitæ humanæ necessaria, cum eorum magna copia est, coemunt, ut penuriæ tempore pro sua voluntate & avaritia divendant, in Republ. nullo modo sunt ferendi.

XIII. Nullus post hac contractus in nostra Dicecesi feratur, qui non possit ad eas formulas revocari, ad quas omnes contractus, ut justus sint, reduci debent: quas apud omnes & singulos Decanos, Archidecanos, Parochos, & Ecclesias Curatas perpetuo extare volumus, ut sciant, quos contractus probare, vel improbare debeant. Quod si, qui aliter contraxisse deprehensi fuerint, eos absolvi prohibemus; volentes non solum contrahentes ipsos, sed etiam testes, subscribentes, obfignantes literas, & quomodolibet coadjuvantes, vel approbantes, ad Nos, vel eos, quibus absolutionem eorum

expresse commiserimus, remitti. Ad Regulas autem prædictas revocentur contractus, quos subjungimus, vel iniusti erunt.

XIV. Census ex agris, pratis, prædiis, aliisque rebus fructiferis emere & vendere per se non est illicitum: sed horum plures sunt differentiae.

XV. Census perpetui, vel a venditore solum redimibiles, citra controversiam iustis lucrandi modis accensentur.

XVI. Census utrimque redimibilis, non est contra jus naturæ, vel Divinum: & ideo, ubi leges humanæ, quibus prohibetur, non sunt in viridi observantia: ac requisitæ conditiones adhibentur, præsertim in Regionibus istis; satius est isto, quam aliis aperte usurariis modis, rem suam facere.

XVII. Emere certa pecuniæ summa censum ad vitam suam aut venditoris, ex se quidem non est illicitum.

XVIII. Porro censuum fundamentum, cui eorum iustitia præcipue ininitur, est res fructifera, sive certa, sive incerta, ut domus, aut omnia generatim bona alicujus: quam vere habet, qui censum vendit; & quæ vere fructus illos reddat, in quos jus ab altero emitur. Nam si venditor vel rem vere non habeat; vel annuus census, ad cujus solutionem res obligatur, superet æstimationem fructuum, quos ex ipsa re Dominus solet aut potest percipere, fictus ille contractus erit, & minime iustus.

XIX. Non improbamus contractum societatis cum duplici assécuracione, sortis nempe & lucri certi, quando cum mercatoribus, vel artificibus, vel agricolis, vel aliis id genus notabilem industriam ad lucrandum habentibus celebratur: nec altera pars præter æquum gravatur.

XX. Contractus damni emergentis, & lucri cessantis, quando prior contractus est vere causa damni sequentis, neque id contrahentes tempore contractus ignoraverunt; adeo non sunt improbandi, ut etiam eorum ratione ex mutuo liceat lucrum quærere.

XXI. Si pecunia mutuo accepta tempore præfixo non redditur, teneatur

debitor ad omnia damna, quæ ex tali mora in creditorem sequuta fuerunt; si quis vero oblatas re ipsa, loco & tempore, etiam dotales pecunias sibi debitas accipere recusaverit, præter sortem nihil accipere iuste possit, etiam si revera illi ex eo, quod pecunia sua careat, aliquod lucrum cesseret, damnumve emergat.

XXII. Si quis de damno tempore contractus expresse pactus sit (ut sane tutæ conscientia potest,) qui mutuum recepit, ad æstimationem damni tenebitur, etiam quod creditor ante moram incurrit; alias non tenebitur.

XXIII. Neque damnandi sunt, qui hoc modo inter se contrahunt: do tibi centum, ut quotannis des mihi quinque, meliori modo, quod id fieri iuste poterit; quando rerum quidem & personarum circumstantiæ omnes fuerint ejusmodi, ut saltem a doctioribus contractus eorum ad aliquem lucrandi modum iustum revocari possit, tamen si ipsi contrahentes id bona fide ignorent. Nam talis contractus re minime est diversus ab iis, ad quos revocabitur.

XXIV. Quantum autem istis, vel aliis similibus modis lucrari quotannis liceat, id certo non constat. Nos omnibus consideratis, quæ hic attendi necessario debent, salvo semper capitali & lucro, amplius quinque ex centum tuto quæriri non posse, per Dicecesin nostram definimus: Imo nec semper quinque, nisi rerum & personarum circumstantiæ aliud permittant.

XXV. Tenentur quidem Tutores & Curatores pupillorum, locorum piorum, aut Ecclesiarum bona augere, sed honestis, & iustis modis, quos jura permittunt: ad usuram modo pervulgato exponere, quia nullo jure licet, sub interminatione æternæ damnationis & pœnis aliis districtissime prohibemus.

XXVI. Omnes Ecclesiasticos, sive pauperes, sive divites, ab omni lucro sordido inprimis abstinere convenit; ut eorum exemplo Laici provocari, hoc malum tanto libentius fugiant, & detestentur. Ne igitur pecunias suas ad usuram, vel aliquo alio contractu illicito,

cito, mutuo dare præsumant, sub pœna amissionis pecuniarum, & privationis omnium dignitatum & beneficiorum prohibemus.

XXVII. Denique Principes & Magistratus in Domino hortamur, & obtestamur, ut & ipsi huic pesti, quæ non minus conscientias hominum, quam bona depopulatur, quibus tandem poterunt modis, sese opponere velint.

### *De Constitutionibus Synodalibus.*

**H**As Constitutiones in Synodo Diocesana sancitas, & publicatas, ab omnibus & singulis, cujuscunque Ordinis sint, Religiosis & Clericis exactissime observari mandamus, ac juxta eas totam Diocesin nostram administrari & gubernari volumus. Obligandi autem vim habebunt, statim post secundum a die promulgationis mensem, ita ut post illud tempus omnes & singuli pœnis in eis expressis, vel aliis arbitrariis teneantur; ac contra quemlibet illorum, tanquam inobedientem, inquiri & procedi possit. Quæ his Decretis comprehensa non sunt, juris communis dispositio-

ni subjacere declaramus. Si quæ vero declaratione, moderatione, interpretatione, dispensatione indigebunt, ea omnia Nobis solis, & Successoribus nostris reservamus. Quod si quid his nostris legibus defuerit (neque enim simul omnia statui possunt) de iis postea deliberatione suscepta viderimus. Denique omnibus & singulis Regularibus & sæcularibus Clericis, cujuscunque gradus & dignitatis sint, ut hunc Synodalem libellum omnes habeant sub pœna duorum florenorum in pios usus, injungimus: illum legant, ad illum vitam suam, studia docendi populi, Sacramentorumque ministrandorum rationem instituant, nec ab ejus præscripto uspiam discedant.

Datum in Synodo nostra Diocesana Brixinæ, die 26. Septembris, anno 1603. Pontificatus S. D. N. Clementis VIII. anno duodecimo.

*NOTA. Recusa & emendata sunt hæc Decreta Brixinæ, ex mandato Celsissimi & Reverendissimi Domini, Domini PAULINI, Episcopi & Principis Brixinensis, die 29. Junii anno 1679.*

**CHRISTOPHORUS ANDREAS**, ex Illustri Familia Baronum de Spaur & ( *Valör* ), Gurcensis antea Episcopus, indeque anno 1601. ad Brixinensem postularus, utramque Ecclesiam ea laude administravit; ut in Serie Episcoporum Brixinensium, quæ anno 1721. in Cancellaria Episcopali Brixinensi digesta, ac dein Typis publicis missa fuit, breve hoc illi, maximum tamen adscribi potuerit elogium, quod fuerit Pater pauperum, & viva virtutum imago. Anno 1603. Synodum hanc Clemente VIII. Papa probante, celebravit, in eaque multa admodum, saluberrima Decreta, & ad corrigendos Diocesis suæ mores utilissima edidit & promulgavit. Præter Monasterium RR. PP. Capucinorum, quod Brixinæ fundavit, Seminarium etiam Clericale ibidem crexit, dotavitque, in quo adolescentes, ad Ecclesiasticæ vitæ statum aspirantes, enutrientur, atque omni genere Sacrarum disciplinarum ad Sacerdotalia munia digne, sancteque obeunda formarentur. Vitam laudatissime transactam, felici beataque morte finivit anno 1613.





## SYNODUS DIOECESANA CAMERACENSIS.

*Per Illustrissimum & Reverendissimum Dominum D. GUILIELMUM  
DE BERGES, DEI & Apostolicæ Sedis gratia Archi-Episco-  
pum & Ducem Cameracensem, Sacri Imperii Principem,  
Comitem Cameracensium &c. celebrata mense  
Octobri.*

Anno Christi MDCIV. Clementis VIII. Papæ XII.  
Rudolphi II. Imp. XXIX.

### O R A T I O

*Habita ab Illustrissimo & Reverendissimo Domino D. ARCHI-  
EPISCOPO, in apertione Synodi.*

**C**UM Clarissimus ille architectus Dinocrates Macedo polliceretur Alexandro Magno, se montem Athon in statuum virilem formaturum, cujus læva amplissimæ Urbis mœnia sustineret, dextera autem pateram, quæ montis flumina exciperet, ac in mare profunderet; delectatus Alexander ratione formæ, quæsit, essentne agri, qui re frumentaria Civitatem illam alerent? Cumque respondisset Dinocrates subventionibus transmarinis opus esse; Rex ait, Judicium illud non esse probum. Nam ut natus puer nec vivere, nec crescere sine nutricis lacte potest, ita nec Civitas sine agrorum fructibus. Digna tanto Principe sententia. Sciebat profecto Alexander, parva esse Urbis præsidia, parum admodum Leges, Sanctionesque & bonum ordinem Civitatis prodesse, si populus esuriret; nil esse populo famelico periculosius, quem non arma, non Magistratus, non Jura Divina vel humana, non leges vel pudor aliquis coercere possunt. Nescit enim (ut quidam Poeta <sup>(a)</sup>) plebs jejuna timere. Cui Alexandri sententiæ non est absimile consilium magni illius Patriarchæ Joseph, <sup>(b)</sup> qui cum prævidisset post septem fertilitatis annos, Ægyptum toridem annis gravissima fame affligendam; constitutus a Pharaone de consilio ministrorum suorum, totius Ægypti Præfectus, per cunctas Regiones præpositos ordinavit: qui quintam partem fructuum, per septem fertilitatis annos in horrea congregarent: ita ut omne frumentum sub Pharaonis potestate conderetur & servaretur in urbibus, ad obviandum & succurrendum futuræ fami & sterilitati. Hoc Alexandri dictum & me-

morabile illius Patriarchæ factum (quo Ægypti Salvator esse, & appellari meruit) imitari omnino nos convenit, ut quam illi pro bono publico rei frumentariæ curam gesserunt, eandem & nos in procuranda animabus nobis commissis spiritali annona, omni conata & studio, adhibeamus. Quem ob finem maxime hanc Synodum de consilio Venerabilium Confratrum nostrorum, Præpositi, Decani, & Capituli Ecclesiæ nostræ Metropolitanæ, jussimus convocari, ut in ea tractemus non de nova aliqua Civitate ædificanda, cujus mœnia statua aliqua sustineat, sed ut huic Dicecesi & Ecclesiæ ante tot sæcula fundatæ, ac meritis Patronorum tutelarium, & inprimis potentissima Gloriosissimæ Virginis protectione, hætenus in Fide Catholica, Apostolica, Romana conservatæ, sufficiens ad nutriendas & reficiendas animas procuretur & subministretur annona; flumina etiam Babylonis ab hac eadem Dicecesi avertantur, & in ea erigatur fons aquæ salientis in vitam æternam. Ad hunc scopum vos omnes, qui huc in Spiritu Sancto tanquam præpositi spiritalis annonæ convenistis, collimare, & actiones vestras dirigere debetis; reddentes nunc de cura vobis imposta rationem; & si quid ad procurandam aut conservandam annonam, ejusque utilitatem judicaveritis pertinere, idipsum nobis libere in hac Synodo significare, pro ut in foro fori & conscientiæ obligati estis. Si enim inter Servum & Dominum constituitur Legis Juliæ de annona judicium, servo asserentem Dominum annonam publicam fraudasse, imo & mulieres, quæ alias accusare non possunt, ad hoc genus denun-

tatio-

(a) Lucanus.

(b) Gen. 41.

riationis admittantur, uti Impp. Verus & Antonius rescripserunt, qua nos actione non conveniendi, aut a quibus non accusandi, quorum plerique aut curam animarum habemus, aut peccata populi comedimus, si annonam spirituales defraudasse, aut subditis curæ nostræ commissis non tempestive eandem procurasse, convicti fuerimus? Periculosior siquidem in Ecclesia defectus annonæ quam in Civitate. Nec enim novit plebs Christiana jejuna Deum timere, Leges Evangelicas, & Ecclesiasticas Constitutiones observare, & Superioribus debitam reverentiam exhibere.

Quæ cum ita sint, nos qui (licet immeriti) locum Patriarchæ Joseph in hac Dicecesi obtinemus, aliquot selectiores cibos, quibus Christi fideles nutrirî & refici oporteat, in medium proferemus. Cum enim vel ipsa experientia sit manifestum, cibis valde juvari, vel corrumpi spiritus animales, & interiorum sensuum organa, quorum bona constitutio ad bonitatem actuum mentis mirifice confert; sintque cibi, qui valde profint, sintque, qui ingenio & memoriæ valde noceant, ac ut brevibus dicam, aperte constet, pro varietate alimentorum variari ingenia hominum & mores; & quod id ipsum cibi spirituales in anima præstent, & operentur. Certe in hac Synodo, in qua de reformatione morum præcipue ageretur, omnis opera adhibenda in cibis spiritualibus apparandis, condiendis, & apponendis; ut nobis ipsis primum, deinde ovibus curæ nostræ commissis, veri cibi spiritualis desiderium & gustum procuremus.

Dicemus igitur primum de qualitate & varietate annonæ spiritualis, qua Pastores suum gregem nutrire & pascere tenentur. Secundo, causas in medium proferemus, ob quas hanc spirituales escam tot Christi fideles tam parum appetant, aut illa animas suas non reficiant; sequæ in tanta rerum spiritualium abundantia, fame ac siti perire sinant.

Idque, ut cum fructu & utilitate fiat, imploremus supplices opem Gloriosissimæ semper Virginis, Matris magni illius Salvatoris, quem Patriarcha Joseph præfiguravit, dicentes: Ave MARIA &c.

Quem primum in Ecclesia Dei cibum spirituales invenio, is est, de quo Ecclesiasticus: Cibabit illum (c) pane vitæ & intellectus: de quo & Salvator noster (d): Non in solo pane vivit homo, sed in omni verbo, quod procedit de ore Dei. Merito cibus Verbi Divini primum locum obtinet. Fides siquidem est spiritualis vitæ principium; Justus enim ex fide vivit, illamque aliter consequi non possumus, quam per internam Dei revelationem, vel Angelorum ministe-

rium hominibus Divina revelantium, aut per externam Verbi Dei prædicationem, quæ fidem dispositive inducit: Fides enim ex auditu, (e) auditus autem per Verbum Dei. Neque vero ob id tantummodo cibus animarum nostrarum est Verbum Dei, sed etiam quia animas per fidem vivificatas reficit, nutrit, fovet, impinguat & delectat. Hoc cibo jubet Petrus (f) Apostolus pasci gregem Dei. Hoc cibo erat enutritus Timotheus, ad quem scribit Paulus: Enutritus verbis fidei & doctrinæ, quam assequutus es. Hunc cibum vocat idem Paulus, Verbum vitæ. De hoc & Psalmista (g): Quam dulcia faucibus meis eloquia tua super mel ori meo: dulciora super mel & favum. Hujus cibi defectum querulis vocibus lamentatur Hieremias (h): Parvuli petierunt panem, & non erat, qui frangeret eis. Hoc cibo populum privare maximam esse pœnam, asserit Amos Propheta: Immittam famem in terram, non famem panis aut sitim aquæ, sed famem audiendi Verbum Dei. Hunc cibum omnibus ita distribuerunt Apostoli: & eorum Successores, quod totius Orbis nationes, cum aliquando gustasse, & jam gustare videamus: dum nostro Sæculo in maxime dissitas Regionibus, & veteribus prorsus incognitas, per Viros Apostolicos esse illatus, & subministratur (Laus Deo) hisce in partibus satis copiose, sed, prohi dolor! a paucis gustatur, masticatur, ruminatur, & digeritur. Gustaretur autem, si cum suavitate spiritus exciperetur: masticaretur, si quid faciendum, aut quid fugiendum sit, ex eo disceretur: ruminaretur, si mente versaretur, & teneretur: digeretur autem & concoqueretur, si per fervorem charitatis conceptum boni desiderium executioni mandaretur. Nec enim docuisse, excepisse, mente retinuisse sat est, nisi opere ipso impleatur.

Hinc elicitur alius Christi fidelium cibus in Ecclesia relictus, a curam animarum habentibus sæpe proponendus, cibus nempe meritoriarum operationis, de quo Psal. 12. Beati omnes, qui timent Dominum, qui ambulant in viis ejus, labores manuum tuarum quia manducabis. Sane cibus in stomachum trajectus, hominem operationi aptum non efficit, si superfluis humoribus cibi efficacia impediatur: idem evenit, si quis stomachum mentis pravis humoribus, hoc est, vitiis & peccatis habeat gravatum; is ad bene operandum est ineptus, ideoque hujusmodi humores quantocius per veram compunctionem & confessionem purgandi, quo sic Deo reconciliati per gratiam ipsius ambulemus in viis ejus, & exemplum simus fidelium, non in verbo solum, sed & in pia conversatione, in charitate, in fide & castitate, in omnibus præbentes nosmetipsos exemplum bono.

(c) Eccli. 15. (d) Matth. 4. (e) Rom. 10. (f) 1. Petr. 5. (g) Psal. 118. (h) Thren. 4.

bonorum operum, in doctrina, in integritate, in gravitate. Ita enim labores manuum nostrarum manducabimus, beati erimus, & bene nobis erit: Ad hunc cibum meritorie operationis invitatur nos Salvator: Operamini, inquit, non cibum qui perit, sed qui permanet in vitam æternam. Similiter & Ecclesiasticus: Operare iustitiam ante obitum, quia non est apud inferos invenire cibum, id est, opera iustitiæ, quibus anima mereri aut refici possit.

Ut præfati cibi facilius in animabus nostris operentur, humectandi sunt. Quid enim prodesset cibus siccus in stomacho, nisi aliquando humectaretur? Accipite igitur cibum lachrymarum, non threnæ solum, sed extrinsecus erumpentis conturbationis, de quo David: Fuerunt mihi lachrymæ panes die ac nocte; quando, nimirum, a Nathan Propheta ob adulterium & homicidium reprehensus, dixit: Peccavi Domine. & alibi: Cibabis nos panem lachrymarum, potum nobis dabis in lachrymis in mensura. Hunc cibum mirifice gustavit post trinam illam negationem D. Petrus Apostolus. Quin & eundem Judæis statim apposuit, quando exposita gravitate delicti in Christum Crucifixum admissi, ipsos eo adduxit, ut dicerent: Quid faciemus Viri Fratres? Et in hoc incumbere debent omnes Pastores, & Verbi Dei Prædicatores, ut in suis subditis & auditoribus lachrymas excitent; ac imprimis semetipsos cibo lachrymarum pascant; exemplo Christi, qui videns Hierusalem, flevit super eam. Hoc ipsum frequenter Hieremias præstitit: Quis dabit, inquit, capiti meo aquam, & oculis meis fontem lachrymarum? Neque hoc ei satis, sed ad id alios incitat, dicens eodem capite: Deducant oculi nostri lachrymas & palpebræ nostræ defluant aquis. Nonne Sacerdotes plorabant, dicentes: Parce, Domine, parce populo tuo, & ne des hæreditatem tuam in perditionem. Per trisennium non cessavit D. Paulus nocte ac die cum lachrymis, monens unumquemque; & alibi: Flens commemorat inimicos Crucis Christi. Cum multis etiam lachrymis scribit Corinthiis, ob fornicationem illam admissam. Plenæ sunt Sacra Scripturæ ejusmodi exemplis.

Dicite mihi, Fratres Charissimi, annon regnant hoc tempore peccata gravissima, quæ lugeamus? Annon Ecclesiæ eadem, & major calamitas imminet, quam olim Hierosolymis? An populus noster non est flagellis & peccatis attritus, uti Judæi tempore Hieremiæ? Nonne filii & fratres nostri in perditionem ruunt præcipientes? Nulline inimici Crucis Christi, nulli fornicarii, adulteri, incestuosi, blasphemæ, Simoniaci, qui aliunde, quam per ostium, ovile Christi in-

gressi, miseras oves excoriant, deglubunt & occidunt? Quid dicam? nunquid plures de Clero, qui piis vitæ exemplis, doctrina, orationibus Ecclesiam, tamquam firmæ columnæ sustinere, & itam Divinam ab ea avertere deberent, conjurasse videntur in ipsius Ecclesiæ ruinam? Et ubi lacrymæ? ubi tristitia? ubi dolor? ubi gemitus, lamentatio & planctus? Non secus nos gerimus, ac si contritio populi Dei ad nos non pertineret, aut nos minime tangeret. Sentiemus tamen (uti metuo) citius, quam existimamus. Res enim nostra tunc agitur, paries cum proximus ardet. Hæc itaque flammæ fonte lachrymarum est extinguenda, si velimus periculum imminenti ignis evadere, & illum a nobis arcere. Pascamur igitur, & alios pascamus isto pane lachrymarum, ut sic causæ, quæ Deum ad iracundiam provocant, tollantur, & disponamur cum subditis nostris ad gustandum panem adhuc longe præstantiorem.

Est autem cibus ille præstantior, quem Ecclesia vocat cibum viatorum; Panis, inquam, qui de cælo descendit, qui datus est pro mundi vita, & dat vitam mundo, quem Christus in ultima cæna pinsuit & igne ardentissimæ charitatis excoxit, & nobis pro viatico reliquit; ut illo refecti (sicut Helias cibo ab Angelo allato corroboratus, ad montem Oreb pervenit) ita possimus & nos ad montem Sion, ad cælestem illam Hierusalem pervenire. Dedit se ipsum nobis Christus in pabulum, ut qui per cibum vetitum homo in mortem corruerat, per panem, qui de cælo descendit, relevaretur ad vitam. Cecidit enim homo per cibum ligni mortiferum, relevatus est per cibum ligni vitalem. In illo pependit esca mortis, in isto pependit vitæ alimentum: illius esus meruit læsionem, istius gustus intulit sanitatem: gustus fauciat, gustus sanavit. De illo gustu dicitur: In quacumque die comederis ex eo, morte morieris. De isto legitur: Si quis manducaverit ex hoc pane, vivet in æternum. Hic est cibus, qui plene reficit, vere nutrit, summeque impinguat, non corpus, sed cor, non carnem, sed animam, non ventrem, sed mentem.

Si quis hoc Viatico Sacramentaliter, vel spiritaliter sumpto, ex hac vita decesserit, pane Beatorum & regnantium in cælis, in æternum reficietur, & sic ab uno pane ad alium perveniet. Cibus, cibum quodammodo pariet: Cibus nempe viatorum pariet cibum Angelorum, quo nunc in æterna illa beatitudine Sancti fruuntur; qui præstantissimus est inter omnes jam dictos cibos. Licet enim in hac vita nihil beatius nobis contingere queat, quam Sacrosancti Corporis Christi perceptio, per quam spiri-

tualis



malis dulcedo in suo fonte gustatur; longe tamen beatior, beatæ illius gloriæ fruitio, ac Supremæ Majestatis contemplatio, quæ beatas illas animas & spiritus coelestes dulcissime reficit, & in continuo vigore ac indeficiente vita conservat. Hunc cibum nobis præparat, qui dicit: (i) Ego dispono vobis, sicut disposuit mihi Pater regnum, ut edatis & bibatis super mensam meam in regno meo. Beatus autem, Fratres, qui manducabit panem in Regno Dei. Non enim erimus ibi, ut ait Augustinus (k), sine esca & potu. Ipse erit cibus noster Deus & potus noster, solus ille cibus reficit, nec deficit.

Ex hæc quidem de qualitate & varietate ciborum spiritualium sufficiant. Nunc investigemus, cur tam pauci illos appetant & gustent, aut nullum fructum spiritualem sive gratiæ augmentum, ex hujusmodi alimentis consequantur. Id evenire puto aut culpa sumentium; aut apparatus cibos spirituales, Pastorum videlicet, & aliorum Ministrorum Ecclesiæ, ad quos cura pascendi pertinet.

Et culpam quidem sumentium, quis melius describat, quam Salvator noster, Lucæ 8. ubi ait de semine, quod cecidit secus viam, supra petram & inter spinas; ideoque huic parabolæ non immorabor, tantum referam, quod desuper scribit Gregorius Magnus (l): Sunt, inquit, nonnulli, qui præcepta Dei nec aure corporis percipere dignantur, quos egregie suis coloribus depingit Apostolus (m): Erit tempus, cum sanam doctrinam non sustinebunt, sed ad sua desideria concervabunt sibi Magistros (ipsi) prurientes auribus, & a veritate quidem auditum avertent, ad fabulas autem convertentur. Et sunt nonnulli, qui hæc quidem aure corporis percipiunt, sed ea nullo mentis desiderio complectuntur; illi semini similes, quod secus viam cum cecidisset, terra non excepit, nec sinu fovit, sed conculcatum est, & volucres oculi comederunt illud: Non enim audiunt Verbum Dei, ut vicia deponant, aut aliquam vitæ legem accipiant, ad quam mores suos componant, aut animas suas reficiant, sed propter aliquem humanum respectum, aut ut oblectamento aurium perfruantur. Sunt etiam nonnulli, qui libenter Verbum Dei suscipiunt, ita, ut etiam floribus compungantur, sed post tempus lacrymarum ad iniquitatem redeunt. Hi nimirum cum gaudio suscipiunt Verbum, sed quia radices non habent, ad tempus credunt, & in temptationis recedunt. Et quamvis fructus aliquis exiguus subsequatur, a solitudinibus, divitiis & voluptatibus vitæ præsentis suffocatur; quia interna mentis cogitatio, externorum solitudine interpellatur; ut

pulchre Gregorius Nazianzenus ait: Recte proinde quidam monebat mel summo digito, non cava manu gustandum; ne nimia voluptatis illecebra rerum magis utilium sensum auferat.

Sed ad Pastorum culpam, uti magis huic loco propriam, veniamus, qua sæpe contingere solet, ut cibi spirituales Christi fidelibus non sapiant. Id ex tribus causis potissimum oritur; vel quia Pastores sunt ignorantes; vel quia gregem lucri causa pascunt; vel quia cibos præbent & apponunt, quos ipsimet non prægustant aut præmandunt. Ignorantia autem Pastorum in eo maxime consistit, quod naturam, vim & qualitates ciborum spiritualium ignorent. Tales sunt, qui cum Deo militare deberent, ita se implicant negotiis sæcularibus, ut legis Dei obliviscantur, & sic propter ignorantiam, tanquam canes muti, non valeant latrare, & tanquam idola, nec linguam moveant, neque os aperiant, multo minus manus, nisi ad malum. Qui si aliquando moneantur, ut subditos suos Catechesi aut verbo doceant, metuendum, ne ex ignorantia pro lacte venenum propinent, uti puer ille Elisei, qui iussus pulmentum filius Prophetarum coquere, collegit in agris ex vine Silvestri Colocynthidas, quas confissas misit in ollam: nesciens (ut refert Sacra Scriptura (n)) quid esset, cumque gustassent filii Prophetarum de pulmenti coctione, & sensissent illius amaritudinem, clamaverunt: Mors in olla: quæ quidem amaritudo per invectionem farinæ in ollam, statim fuit sublata. Metuendum, prohi dolor, ne Pastores, qui alioquin dum ad Sacerdotium & curam animarum admittebantur, fuerunt idonei reperti, postea lege Dei derelicti, idolis servientes, maxime impuditiæ, gulæ, mammonæ, & ob id ignavi, ignari, desides, & mancipia tabernarum facti; Metuendum, inquam, ne tales Pastores pro pabulo salutari, herbas mortiferas propinant suis subditis gustandas, ideoque consultum erit, si Parochi & Concionatores scripto annotent, quibus cibis oves suas pascant; quo tempore & loco constare possit, de ipsorum diligenti cura & doctrina; ut si quid hæc amarum aut mortiferum contineat, id ipsum juxta verum Sacra Scripturæ sensum (quæ per farinam ollæ injectam designatur) tempestive sanet, corrigat, & emendet is, qui in suo districtu Elisei officio fungitur.

Quantum ad illos, qui boni Pastoris nomine gaudere volunt, interea re ipsa contrarium præstat: non est mirum, si oves talibus commissa sæpe pereant: licet enim plurimi ex ipsis naturam & vim ciborum spiritualium norint, & latrare valeant, mune-

ris

(i) Luc. 22. (k) Super Psal. 50. (l) Lib. 1. Homil. 18. in Evang. (m) 2. Tim. 4.

(n) 4. Reg. 4.

Tomus VIII. Concil. German.

ris tamen sui oblitum, gregem Domini non pascunt, quia Mercenarii sunt, & non pertinet ad eos de ovibus, lac comedunt, lanis operiuntur; & sufficit ipsis, si ita Præpositi sint, & dignitate gaudeant, aurem popularem capient, honorem suum & consanguineorum quærant, lucrum & comoda sua solum respiciant, se pascant, & non oves; quia ut ait D. Gregorius, Plus terrenam substantiam, quam oves diligunt. Audite, quid D. Augustinus (e) de his scribat ad Valerium Episcopum: Ante omnia peto, cogitet religiosa prudentia tua, nihil esse in hac vita, & maxime hoc tempore facilius, lætius, & hominibus acceptabilius Episcopi, aut Presbyteri, aut Diaconi officio, si perfunctorie & adulatorie agatur, sed apud Deum nihil miserius, tritius & damnabilius: econtra autem, nihil esse in hac vita, & maxime hoc tempore difficilius, laboriosius & periculosius, Episcopi, aut Presbyteri, aut Diaconi officio, sed apud Deum nihil beatius; si eo modo militetur, quo noster Imperator jubet. Hunc Imperatorem imitatur D. Paulus, & ut eundem imitemur, nos invitat, dicens (p): Imitatores mei estote, sicut & ego Christi. Quod an præstemus, an bonum certamen cum eodem certemus; an fortiter Deo militemus, & non potius transfugæ simus, unusquisque secretum conscientie sue ingrediatur, reperiet, prohi dolor! plurima nimis perfunctorie & adulatorie agi, maxime dissimulando cum reis criminum; inveniet plerosque nostrum non belligerantes, sed cauponantes prælia Domini, hoc lucri causa, & ad oculum tantum militantes, & Deo servientes: sed is falli non potest: ipsi enim cognita sunt opera nostra, & verendum, ne nos evomere incipiat, eo quod nec calidi, nec frigidi, sed tepidi simus.

Tertio culpa Pastorum inde oritur, quod licet pascant gregem salutaribus verbis, & Christianæ doctrinæ rudimenta recte doceant; cibum tamen, quem ad reficiendum animas apponunt, pauci præmandunt, aut prægustant: hoc est, quod non omnes, qui alios docent, se ipsos prius doceant: quod qui prædicant non furandum, furentur; qui dicunt non mœchandum, mœchantur; qui abominantur idola, sacrilegium faciant, & qui in lege gloriantur, per prævaricationem legis Deum inhonorent; id est, quod aliter vivant, quam doceant.

Eheu! quam magnum ejusmodi Prædicatorum & Pastorum numerum esse dolens audio, de quo hominum genere quam graviter conqueratur Deus per Ezechielem (q) audite: Nonne, inquit, satis vobis erat, pascua bona depasci? Insuper & reliquias pascuarum vestrarum pedibus conculcastis, & cum purissimam aquam biberitis, reliquam

pedibus vestris turbabatis. Et miramur, si tam pauci in pietate proficiant, cum optimum pabulum animarum condimento, seu potius toxico malorum morum, & scandalose vitæ corrumpant ii, qui subditos suos tenentur pascere & nutrire? Quanto rectius faciunt matres & nutrices, quæ puerulis suis adhuc tenellis cibum præmandunt, & præmansum in os ingerunt, imo & tanto amore proles suas prosequuntur, ut si quando videant eas morbo laborare, qui sine medicinæ sumptione curari nequeat, ipsæmet matres, sive nutrices illam sumant, quo sic curentur proles infirmæ, sugentes cum lacte medicinam salubrem. Utinam nos id ipsum præstaremus! utinam nihil unquam verbo doceremus, quod prius vita & moribus non expressissemus! utinam dignos fructus penitentiae (quæ animæ est medicina) pro peccatis populi nobis commissi, sæpius faceremus! Longe aliam Ecclesiæ faciem cerneremus; longe alios in Christiano populo mores. Prius igitur Pastores debent comedere, & postea alios pascere, prius saturari, & postea eructare. Hunc ordinem D. Paulus præscribit Timotheo (r): Attende tibi & doctrinæ: hoc est, attende tibi, ut comedas, & doctrinæ, ut postea alios erudias.

Nostro ergo vitio evenit, quod greges nobis commissi non melius pascantur; aut quod tam multi, in tanta annonæ spiritualis abundantia, siti & fame (adinftar Tantali) misere pereant; verendum, verendum certe, ne sceleris arguamur. Quarti Regum septimo legimus, Rege Syriæ, qui Samariam obsidebat, in fugam converso, leprosos illos transfugas, expleta qua premebantur fame, sublati auro & argento, & aliis spoliis in castris repertis, existimasse se sceleris arguendos; nisi Regem Samariæ obsessum, & populum extrema fame laborantem, de hostium fuga, & abundantia in castris reperta, redderent certiores. Certe cum mecum perpendo deplorandum hujus Diocesis & Civitatis statum, non ita dudum ab extraneis occupatum, nunc autem Gloriosissimæ Virginis MARIE, & Patronorum Tutelarium patrocínio, nec non Regis Hispaniarum Philippi II. potenti manu liberatum, non possum non animo exultare. Verum cum ex altera parte diligentius oculis meis intueor hinc maximam animarum famem, & ab hostibus invisibilibus obsessionem, quam plerique subditorum nostrorum patiuntur: inde magnam omnium rerum, quæ ad refocillandas, nutriendas & liberandas animas sunt necessariae, abundantiam in Ecclesia relictam, est; quod maxime doleam nostram negligentiam, & me gravissimæ culpæ reum existimem, si vobis non annuntiavero hujusmodi obsessionis solutionem, nec non a fame-

(e) *Epist.* 148.(p) *1. Cor.* 11.(q) *Ezech.* 34.(r) *1. Tim.* 4.

fame spirituali liberationem, jam in nostra esse potestate: dummodo obsessi cupiant liberari, spiritualiter refici; & qui curam animarum habent, Pastoralis strenue fungantur officio. Mihi itaque hanc annonæ abundantiam publicanti credite, eamque opportune distribuite, ne cum Duce illo, qui Eliseo copiam hordei & similæ in crastinum prædicenti, credere nolebat, mala morte puniamini. Vestrum igitur erit, qui per regiones vobis commissas, spiritualis annonæ Præpositi constituti, & cooperatores assumpti estis, si quos subditorum vestrorum obsessos, hoc est, vinculis peccatorum ligatos esse cognoveritis, eosdem quam citissime fieri poterit, liberare, & cibis spiritualibus reficere: interim colligentes etiam in horrea, quæ ad pascendum gregem vobis commissum erunt necessaria, & opportuna, ut tanquam fideles servi possitis dare in tempore tritici mensuram.

Curate, ne cibis Verbi Dei unquam desit, & quod ore docetis, exemplo vitæ integræ exprimitis; cibum a vobis præmansum, subditis, & maxime adhuc infantibus, gustandum præbere; & panem lacrymarum frequenter sumite, animas vestras & subditorum, Divini Corporis Christi viatico sapius reficite, & ad illum cibum supernum, ad beatificam illam visionem totis animi conatibus & viribus aspirate; & alios, ut ad eandem aspirent, docete & exhortamini. Quod si præstiteritis, non deerunt in hac Diœcesi, qui parvulis panem frangant: non erit plebs Christiana famelica; timebit Deum & mandata ejus, non timore servili, sed filiali; hoc est, sponte & non coacte observabit; Pastores & Superiores suos tanto subsequetur honore & amore, quod nullo modo ab ipsis volet avelli, aut alium, quam ab eisdem præparatum spirituales cibum accipere. Quemadmodum enim nihil Reges aut Principes populo magis amabiles reddit, & gratos efficit, quam si procurent abundantiam annonæ; uti & turbæ testantur, quæ, post multiplicationem panum, Christum secutæ; voluerunt illum Regem constituere; sic etiam nihil Episcopos ac Ministros Ecclesiæ gratiores reddit suis subditis, quam si eis copiam spiritualis annonæ sedulo subministrent. Credite mihi, oculos suos eruerent Christi fideles, & suis Pastoribus darent etiam nunc, si tales haberent, qui verbo & exemplo ipsos pascere, prout olim habuerunt, & adhuc Dei beneficio habentur, sed pauci.

Scribit D. Augustinus(s): Si Poetæ dicere licuit, trahit sua quemque voluptas, non necessitas, non obligatio, sed delectatio, quanto magis nos dicere debemus, trahi ho-

mines ad Christum, qui delectantur virtute, delectantur justitiâ, delectantur beatitudine, delectantur æterna vita; quod totum Christus est, & cibus spiritualis. Et post pauca adjicit: Ramum ostendis ovi, & trahit illam, nuces puero demonstrantur, & trahitur. Hanc trahendi rationem ad Christum panem vivum, qui dat vitam mundo, hanc rationem insecandi Christi fideles, si, qui curam habent, diligenter & exacte observarent, felicissima foret Christiana Respublica, & multo felicitior, quam si Legibus aut Statutis in suo continerentur homines officio; quorum quidem Statutorum & Legum multitudinem dicebat Plato: Signum esse mali status Reipublicæ: ideoque ad officium prudentis Magistratus pertinere, non porricus implere Legibus aut Statutis; sed ad hoc adniti; ut subiti insitum justitiæ studium habeant, eo quod homines male instituti Leges etiam exquisitissimas audeant contemnere. Hoc igitur sedulo agamus, ut primum in nobis ipsis, dein in subditis curæ nostræ commissis, sanctitatis & justitiæ, nec non æternæ beatitudinis studium inseratur, ut ipsi eandem esuriant & sitiant, & nos illam abundanter subditorum animis inseramus & instillemus.

Ad hoc cum pia juventutis institutio & educatio maxime Catechismi doctrina plurimum profit, eandem vobis, quantum in me est, commendo, & ut sedulam ad id operam impendatis, mando & præcipio. Quod si hanc pascendi populum nobis commissum rationem servaverimus, certe is voluptate & delectatione trahetur ad Christum, illum tanquam Imperatorem sequetur, & imitabitur: Pastoris sui vocem audiet, in pascuis ejus manebit, & se felicissimo illius Regimini (sub quo nihil deesse potest) sponte subijcet.

Licet autem hæc via facillima sit ad nutriendas animas, & illas in suo spirituali vigore conservandas, nec non ad vitam & mores hominum reformatos, quia tamen pauci, prohi dolor! hoc tempore inveniuntur, qui sua sponte cibos spirituales & salutem animarum appetunt, aut reformationem vitæ & morum desiderant, periculum autem sit, ne tales honorum Pastorum conatus evertant, & disciplinam Ecclesiasticam pessumdent; idcirco quædam statuenda duximus, quibus ii, qui voluptate & ciborum spiritualium suavitatem ad pascua Domini non trahuntur, eadem ingredi, ac inibi salubri animarum pabulo se se reficere cogantur & compellantur; aut tanquam cadavera foetida (ne sua contagione gregem inficiant) ab ejusdem communione arceantur, & separentur: ut sic juxta Psalmistæ votum & desiderium

(s) Ad cap. Joann. 6.

Tomus VIII. Concilior. German.



rium (utinam & omnium nostrum, quorum est Jurisdictionem Ecclesiasticam promoveri) in chamo & freno maxillæ eorum constringantur, qui sponte appropinquare nolunt ad Dominum, aut Divinæ voluntati & Ecclesiæ mandatis obedire recusant. In quo unusquisque nostrum officio suo satisfaciatur, ne si contingat oves nobis commissas, culpa nostra perire, sanguis earum de manibus nostris requiratur, & pars nostra sit cum hypocritis in stagno ardenti, igne & sulphure, quæ est mors eterna, a qua Deus per suam infinitam misericordiam nos liberet. Sed spero jam nos omnes firmum concepisse propositum emendandi culpam, vel negligentiam in officio nostro Pastoralis,

aut ministerio Ecclesiastico, hætenus commissam, Nosque Ordinationes & Statuta per Prædecessores nostros edita, & alia per Nos in hac Synodo promulganda, exacte observaturos: Pascendo maxime juxta doctrinam D. Petri [t] gregem Dei, providentes non coacte, sed spontanee secundum Deum, neque turpis lucri gratia, sed voluntarie; neque ut dominantes in Cleris, sed forma facti gregis ex animo.

Sic pœnam horrendam Pastoribus negligentibus statutam evitabimus, & cum apparuerit Princeps Pastorum, percipiemus immarcescibilem gloriæ coronam, quam nobis tribuere dignetur Pater, & Filius, & Spiritus Sanctus. Amen.

(t) 1. Petr. 5.

## D E C R E T A SYNODI DIOECESANÆ CAMERACENSIS ANNI MDCIV.

### I N D E X T I T U L O R U M.

- |  |  |
|--|--|
| <p><i>TIT. I. De Fide &amp; ejus integritate conservanda.</i></p> <p><i>II. De Doctrina &amp; prædicatione Verbi Dei.</i></p> <p><i>III. De Officio Divino.</i></p> <p><i>IV. De dierum Festorum cultu, &amp; jeuniis.</i></p> <p><i>V. De Sacramentorum administratione.</i></p> <p><i>VI. De Baptismo.</i></p> <p><i>VII. De Sacramento Confirmationis.</i></p> <p><i>VIII. De Sacramento Pœnitentiæ.</i></p> <p><i>IX. De SSmo Eucharistiæ Sacramento.</i></p> <p><i>X. De Sacramento Ordinis.</i></p> <p><i>XI. De Sponsalibus, &amp; Sacramento Matrimonii.</i></p> <p><i>XII. De Sacramento Extremæ Unctionis.</i></p> <p><i>XIII. De Inucribus, Sepulturis, &amp; Exequiis.</i></p> | <p><i>XIV. De Oblationibus, Decimis, &amp; Portione Canonica.</i></p> <p><i>XV. De recta Honorum Ecclesiasticorum administratione.</i></p> <p><i>XVI. De Clericis in genere.</i></p> <p><i>XVII. De Episcopis.</i></p> <p><i>XVIII. De Capitulis &amp; Canonicis.</i></p> <p><i>XIX. De Pastoribus.</i></p> <p><i>XX. De Regularibus &amp; Monialibus.</i></p> <p><i>XXI. De Scholis.</i></p> <p><i>XXII. De Foro, Jurisdictione &amp; Immunitate Ecclesiastica.</i></p> <p><i>XXIII. De Usuris.</i></p> <p><i>XXIV. De Synodo.</i></p> <p><i>Lectio &amp; Publicatio Decretorum hujus Synodi</i><br/><i>6ta Octobr. 1604.</i></p> |
|--|--|

### T I T U L U S P R I M U S.

#### *De Fide & ejus integritate conservanda.*

##### CAPUT PRIMUM.

**Q**Uæ posteriori Synodo Provinciali (a) Cameracensi constituta, & ad Fidei integritatem tuendam & conservandam ordinata sunt; ea ab omnibus inviolabiliter observari volumus & mandamus, sub pœnis inibi decretis. Et quia plures ejusdem & præcedentium Synodorum Decreta, licet salubriter condita, hominum &

temporum injuria & malitia, vel nondum suum sortita sunt effectum, vel observari desierunt: idcirco hæc, quæ sequuntur, statuenda & renovanda duximus, prout præsentī Synodo statumus & renovamus.

##### CAPUT II.

Cum non minus nocuementi adferant damnatorum Authorum Libri, quam vox viva; observetur quam exactissi-

(a) Habita Montibus anno 1586. sub Ludovico de Berlaymont, Archi-Episcopo & Duce Cameracensi. Vide illam Tomo VII. præcedente pag. 991.

aetissime Decretum dictæ posterioris Synodi Cameracensis Tit. I. Cap. 3. quo Decreto etiam teneantur circumforanei & vagi librorum venditores. Habeantque præterea penes se omnes Typographi, Bibliopolæ & Librarii Catalogum librorum prohibitorum, aliumque omnium omnino, quos in sua officina venales habent: neque de cætero Catalogos librorum noviter impressorum absque licentia nostra, aut Censorum nostrorum exponant.

## CAPUT III.

Eisdem prohibemus, ne deinceps Biblia vernacula, aut eorum partem aliquam vendant, nisi emptores ea legendi potestatem sibi a Nobis, aut Vicariis nostris datam in scriptis exhibeant.

## CAPUT IV.

Moneant autem sæpe Parochi, Concionatores suos Parochianos, auditores & pœnitentes, maxime circa initium Adventus & Quadragesimæ, ne qui apud se libros prohibitos, aut pravis opinionibus resperfos habeant, vel legant; propter periculum excommunicationis, ut si quos habent vernaculos de Sacra Scriptura & vitæ Christianæ institutis tractantes, de quibus certo non constat, an sint approbati, eos Parocho suo, aut Censoribus a Nobis deputatis ostendant examinandos.

## CAPUT V.

Executores testamentorum libros defunctorum non distribuunt, aut venales exponant, nisi Censoribus a Nobis deputatis eorundem Catalogum, ac etiam, si opus sit, ipsos libros ostenderint. Neque deinceps sine Censorum licentia, ulla scripta, documenta, tabulæ, regulæ, exhortationes, & alia ejusmodi, quocumque nomine censeantur, non in forma libri tantum, sed nec in extenso chartæ folio impressa vendantur. Imagines autem, quæ falsitatem aliquam, adversus sanam fidem & probatas Sanctorum historias, continent, nullo modo exponantur, aut vendantur.

## CAPUT VI.

Figuræ lascivæ, & quæ intuentium mentibus, obsceni aliquid inge-

rere possent, sive ob pudendam nuditatem, seu alias, in processionibus & supplicationibus publicis, non exponantur. Si quæ vero tales in templis reperiantur, Nobis denuntient Parochi, ut eæ aut omnino tollantur, vel saltem reformentur: neque novæ ullæ in loca sacra figuræ inferantur, nisi approbatæ.

## CAPUT VII.

Diffimulari non debet a Nobis insignis illorum temeritas, qui magno sui nominis, maximo vero salutis filiorum suorum periculo, ipsos ad loca hæresi infecta, qualibet occasione transmittant: proinde parentes omnes hortamur, ut filios suos mercaturæ, aut opificii exercendi, aliave causa ad loca hujusmodi proficisci non patiantur omnino, & certe, nisi de eorum fidei soliditate constet.

## CAPUT VIII.

Excommunicatos a Canone pro suggestu denunciari volumus (ita tamen, ut nominatim id non fiat absque speciali nostro mandato) omnes & singulos, qui Magos, Divinatores, Sages, Aegyptios (ut vulgus vocat) aliosve similes, super futuris eventibus, qui a libera pendent hominum voluntate, super furto ablati, absconditis thesauris, rebus deperditis, aliisque occultis consulunt, aut consuli mandant: quique rerum occultarum cognitionem, per cribri, annuli, vel alterius rei agitationem explorant, & illos, qui ligaturis, signis, maleficiis, aliisve modis Matrimonii actum impediunt, etiamsi animo illa dissolvendi, aut cito tollendi id fecerint.

## CAPUT IX.

Ea omnia, quæ certas personarum, temporum, numerorum, locorum, & similibus rerum observationes, corporisque compositionem, ac certorum esculentorum & poculentorum sumptionem ita requirunt, ut qui ea prætermiserit, expectato fraudetur effectu; tanquam vana & superstitiosa, vel de superstitione admodum suspecta, de medio tollantur, nisi arte medica, Ecclesiæ constitutione, aut consuetudine

dine per eandem approbata, præscribuntur.

### CAPUT X.

Cum autem adversus mala per maleficos & sortilegos hujusmodi illata, remediis Ecclesiasticis uti oporteat: caveant ii, quibus exorcizandi licentia concessa est, seu deinceps a Nobis concedetur, ne superstitiosis precationibus, aut exorcismis non approbatis, utantur.

## TITULUS II.

### *De Doctrina & prædicatione Verbi Dei.*

#### CAPUT I.

**A**D prædicationem Verbi DEI, & Christi fidelium confessiones excipiendas, non admittantur per Parochos Terminarii, aut alii Concionatores & Confessarii, nisi de admissione fidem fecerint: Sæculares quidem per literas nostras, Regulares vero per similes, aut earum copiam sigillo Conventus sui munitam, & Superiorum suorum manu subscriptam.

#### CAPUT II.

Quod si ex admissis hujusmodi plures simul ad prædicandum concurrant: ut omnis dissensio & scandalum tollatur, Terminarius, qui ordinariam ex consuetudine stationem tunc obtinet, præferatur, sive pro illo, sive pro sequentibus ejusdem stationis diebus; alioquin is, qui a Parocho fuerit requisitus: & extra hos casus, qui primus in Ecclesiam venerit.

## TITULUS III.

### *De Officio Divino.*

#### CAPUT I.

**I**Nstruatur diligenter populus a Parochis & Concionatoribus, quomodo, quam reverenter & devote Missam audire debeat: & severe pro concione reprehendantur omnes, qui vix consumpta a Celebrante specie panis, ante calicis sumptionem surgunt, vel disce-

dunt, nec usque ad finem Missæ permanent.

#### CAPUT II.

Doceant iidem Parochi & Concionatores populum, maxime decere, ut Missæ privatæ genibus flexis audiantur ab omnibus.

#### CAPUT III.

Doceant præterea, quantæ sit utilitatis Ecclesiam Parochialem frequentare; tum ut populus monitioni Concilii Tridentini <sup>(b)</sup> satisfaciat, & inter Missarum solemnia Evangelicam doctrinam hauriat, tum etiam ut quisque intelligat, quomodo tota septimana in sua familia se se gerere debeat, ex iis, quæ Parochus in sua concione annuntiaverit; videlicet, quæ jejunia, quæ festa, quæ publicæ supplicationes, quæ Missæ votivæ, & quæ alia pietatis & charitatis Christianæ officia sint agenda: ut audiant publicationes bannorum, tam eorum, qui Sacris Ordinibus sunt initiandi, quam qui Matrimonio sunt conjungendi, ut impedimenta, si quæ sint, denuntientur: denique ut Christi fideles de pluribus aliis instruantur, quæ ad suam & proximorum salutem, & bonum publicum pertinent.

#### CAPUT IV.

Deambulationes in templis, etiam extra Divinum Officium sub pœna excommunicationis prohibemus: curent proinde Ecclesiarum Superiores, etiam pœnis pecuniariis appositis, ejusmodi abusum penitus aboleri.

#### CAPUT V.

Saluberrimam Catechismi doctrinam nunquam intermittant Parochi, etiam si paucissimi forent auditores: sed singulis diebus Dominicis ante & post Vesperas diligenter eo munere fungantur, magnam a Domino mercedem tam pii operis recepturi.

#### CAPUT VI.

Ballivos, & alios locorum Magistratus rogamus & hortamur, ut juxta Regium Edictum, in re tam pia operam suam Parochis impendant, puniantque graviter illos parentes, heros & heras, qui

(b) Sess. XXII. in Decreto, de observ. & evitandis in celebrat. Missæ.



qui filios, famulos, famulas, ad Catechismum non miserint.

## CAPUT VII.

Omnes obituum Anniversariorum, Missarum & Capellaniarum, aliasque fundationes ad Nos quamprimum referri fideliter volumus, ut auctoritate Nobis per Concil. Trid. (c) concessa statuamus, quod magis ad Dei honorem & cultum, atque Ecclesiarum utilitatem viderimus expedire: nemini suffragari declarantes quamlibet reductionem sine nostra, aut Prædecessorum nostrorum, vel Vicariorum auctoritate factam.

## CAPUT VIII.

Dum Missæ Sacrificium celebratur, non minus, quam duo cerei sint accensi: sintque cætera altarium ornamenta munda & decentia, juxta præcedentium Synodorum Constitutiones.

## CAPUT IX.

Curent Parochi, ut in locis, in quibus unica Missa diebus Dominicis & Festis celebratur, famuli, famulæ, & alii legitime impediti, alternis saltem vicibus Missam audiant, alternisque diebus Dominicis, vel Festis, etiam Catechismi lectioni interfint.

## CAPUT X.

Statuta Synodalia, tam Provincialia, quam Diocesana, de Horis in hieme & æstate servandis in Missarum Parochialium celebratione, & Vesperarum decantatione, sub pœna suspensionis, & alia, arbitrio nostro imponenda, observari mandamus.

## CAPUT XI.

Raro, & non nisi gravibus de causis extra Ecclesias processionaliter efferratur Venerabile Sacramentum, currentque Parochi, & Ecclesiarum Editui, ut cum sufficienti tædarum aut cereorum lumine id fiat.

## CAPUT XII.

In supplicationibus laici suum ordinem servant, Clerumque & Magistratum sequantur, nec ulli inter Ecclesiasticos se se ingerant.

## CAPUT XIII.

In iisdem supplicationibus nulla exhibeantur spectacula, quæ a cultu Venerabili Sacramento, Sanctorumque Reliquiis debito, Christi fidelium animos avertant.

## TITULUS IV.

*De dierum Festorum cultu, & jejniis.*

## CAPUT I.

UT abusus ille, Divino & Ecclesiastico præcepto contrarius, semel tandem penitus aboleatur, quo se plerique existimant probe suo functos officio; si Missa, etiam privata tantummodo, diebus Dominicis & Festis audita, reliquum diem profectio, negotiationi, lusibus, choreis, potationibus, & aliis sæcularibus, vel etiam illicitis actionibus impendant: Parochi suis subditis frequenter inculcent ea, quæ in Catechismo Romano ad tertium præceptum Decalogi, & aliis authoribus, de recta dierum Festorum observatione traduntur.

## CAPUT II.

Si quando ob cœli inconstantiam & imminentes tempestates, maturas fruges ex agris asportari diebus Sacris fuerit necessarium, id non sine expressa Parochorum licentia fiat.

## CAPUT III.

Ebrietatis vitium adeo enorme, ut S. Paulo teste, a Regno sæculorum homines excludat, multo majori reprehensione dignum est, si diebus cultui Divino, & animarum salutis deputatis, committatur: propterea Parochis & Concionatoribus mandamus, ut tam grave peccatum diligenter pro concione exaggerent, & illius deformitatem, pericula, ac incommoda ostendant.

## CAPUT IV.

Festa tam majora, quam minora in Dicecesi Cameracensi hætenus celebrari consueta, ea, qua decet, reverentia coli, & indicta jejunia observari volumus & mandamus.

## CAPUT

(c) Conc. Trid. Sess. XXV. C. 4. de Reform.

## CAPUT V.

Festa autem Majora, præter Dominicas, sunt hæc: Festum Circumcisionis Domini, Epiphaniæ, Purificationis B. Mariæ, Annunciationis ejusdem, Paschæ cum feria secunda sequente, Ascensionis Domini, Pentecostes cum feria secunda sequente, Ss. Trinitatis, Sanctorum Philippi & Jacobi Apostolorum, Inventionis Sanctæ Crucis, Venerabilis Sacramenti, Nativitatis Sancti Joannis Baptistæ, Petri & Pauli Apostolorum, Visitationis B. Mariæ Virginis, B. Mariæ Magdalenzæ, Jacobi Apostoli, Laurentii, Assumptionis B. Mariæ, Bartholomæi Apostoli, Nativitatis B. Mariæ, Exaltationis Sanctæ Crucis, Matthæi Apostoli, Michaelis Archangeli, Simonis & Judæ, Omnium Sanctorum, Martini Hyemalis, Catharinæ, Andreæ Apostoli, Nicolai Hyemalis, Conceptionis B. Mariæ, Thomæ Apostoli, Nativitatis Domini, Stephani Protomartyris, Joannis Evangelistæ, Patroni & Dedicationis cujusque Ecclesiæ semel in anno. In Civitate autem nostra Cameracensi, inter majora etiam observari præcipimus, Festum Processionis postridie Ss. Trinitatis, Sancti Gaugerici undecima Augusti, & Sancti Auberti decima tertia Decembris.

## CAPUT VI.

Minora vero Festa sunt, Conversionis Sancti Pauli, Cathedræ Petri die vigesima secunda Februarii, Matthiæ Apostoli, Marci Evangelistæ, feria tertia & quarta Paschæ & Pentecostes, Petri ad Vincula, Decollationis Sancti Joannis Baptistæ, Lucæ Evangelistæ, & Sanctorum Innocentium: quibus diebus Christi fideles Missam audire tenentur.

## CAPUT VII.

Si Festum Purificationis B. Mariæ Virginis inciderit in Dominicam Septuagesimæ, Sexagesimæ, & Quinquagesimæ, non transferatur, sed celebretur cum commemoratione Dominicæ. Si autem Festum Annunciationis ejusdem B. Virginis inciderit in aliquam Dominicam Quadragesimæ, transferatur in feriam secundam proxime sequentem, & a populo ferietur. Si ve-

ro inter Dominicam Palmarum & Dominicam *Quasimodo* inclusive evenierit, feria secunda post *Quasimodo* celebretur, & a populo ferietur.

## CAPUT VIII.

Si Festum S. Marci in die Paschæ, vel ejus octavis evenierit, celebretur cum jejuniis, Litanis & Processione in proxima feria post *Quasimodo* non impedita Festo Ss. Philippi & Jacobi, vel Exaltationis S. Crucis. Si autem in aliquam Dominicam post Pascha incidat, eadem die celebretur: sed jejunium, ac Processio & Litanie in proximam sequentem feriam alterutro dictorum festorum non impeditam transferantur. Sed si alterutrum ex dictis Festis Ss. Philippi & Jacobi, & Exaltationis S. Crucis inciderit in diem Ascensionis Domini, eorundem officium fiat feria sexta sequente, sed a populo non ferietur. Dedicatio vero nostræ Ecclesiæ Metropolitanae Cameracensis, & omnium simul totius Dioceseos Ecclesiarum, celebretur Dominica proxime sequente diem tertium mensis Julii.

## CAPUT IX.

Grave nimis & intolerabile scandalum præbent plerique Catholici, qui diebus Quadragesimæ & Jejuniorum, etiam publice comessari, inebriari, vel saltem jejunia ab Ecclesia præscripta violare non verentur, in animarum suarum manifestum periculum, aliorum offensionem, & Ecclesiastici præcepti contemptum maximum. Idcirco omnibus Parochis & Concionatoribus serio præcipimus, ut populo frequenter exponant & doceant, eos, qui morbo, ætate, aliave legitima a Parochis vel Confessariis probata causa non impediti, dictum jejunandi præceptum scienter transgrediuntur, toties graviter peccare: volentes insuper, ut publici hujusmodi jejunii violatores, per Parochos & Decanos ad Nos, aut Officiale nostrum, sine ulla dissimulatione deferantur, pro modo culpæ puniendi: hortantes locorum Magistratus, ut in tam pia causa suam etiam civilem auctoritatem interponant, & contemptores puniant.

CA.

## CAPUT X.

Indicta autem jejunia præter Quadagesimam & quatuor tempora, hæc sunt: Vigiliæ Pentecostes, Nativitatis B. Joannis Baptistæ, Petri & Pauli Apostolorum, Laurentii Martyris, Assumptionis B. Mariæ Virginis, Matthæi Apostoli, Simonis & Judæ Apostolorum, Omnium Sanctorum, Andreæ Apostoli, & Nativitatis Domini. Si quæ ex his Vigiliæ in Dominicam inciderint, Sabbato præcedenti jejunetur. In Festo autem S. Marci, & tribus diebus Rogationum abstinetur ab esu carnium per totam diem, & jejunetur usque ad prandium.

## TITULUS V.

*De Sacramentorum administratione.*

## CAPUT I.

**N**ullus Parochus, aut Presbyter extra casum necessitatis alienis Parochianis Sacramenta administret, sine Parochi ipsorum, aut nostra licentia; si quis autem in extrema necessitate constitutis, etiam non subditis, hanc operam Christianam negaverit, præter peccatum gravissimum quod committit, ab iis, qui consensu fuerint, ad Decanos & Promotores deferri jubemus.

## CAPUT II.

Parochi, eorumque Vicarii ad Sacramentorum administrationem a subditis in eorum necessitate vocati, illam nullo prætextu differant: alioqui pro modo culpæ graviter puniantur.

## CAPUT III.

Publicæ meretrices, usurarii, & alii quilibet peccatores notorii, etiam sanctissime confessi, ad publicam Sacramentorum perceptionem non admittantur, nisi publice pœnitentiam egerint, aut ex ipsorum bona conversatione, aliove legitimo modo, de vitæ ipsorum emendatione publice constet. Occulti autem peccatores ne publicè a Sacramentis arceantur.

*Tonus P.H. Concilior. German.*

## TITULUS VI.

*De Baptismo.*

## CAPUT I.

**A**d proles de fonte baptismatis suscipiendas non recipiant Parochi eos in paternos & maternos, quos Orationem Dominicam, Salutationem Angelicam, Symbolum Apostolorum, & Præcepta Decalogi & Ecclesiæ ignorare, aut in postremo Paschate ex præcepto Ecclesiæ peccata sua confessos non fuisse, & Sacram Eucharistiam (si in ætate competenti existant) non sumpsisse, aut excommunicatos, publice denuntiandos, esse constiterit.

## CAPUT II.

Ad obstetricis officium nulla in posterum admittatur, quæ etiam coram Parocho suæ residentie, juramentum secundum formam, a Nobis in Manuali nostro præscriptam, non præstiterit.

## CAPUT III.

Nulla deinceps obstetrix, aliave mulier, puerperam ullam, ad Templum purificandam, inconsulto Parocho audeat adducere: alioqui taliter adducta ad purificationem non admittatur.

## CAPUT IV.

Non liceat ullis Sacerdotibus præter Parochos, aut eorum Vicarios Saccellanos (nisi de ipsorum consensu) mulieres a puerperio purificare.

## TITULUS VII.

*De Sacramento Confirmationis.*

## CAPUT UNICUM.

**Q**uæ ad dispositionem hoc Sacramentum suscipientium, & alia huc spectantia pertinent, petantur ex Synodis præcedentibus, & nostro Manuali.

## TITULUS VIII.

*De Sacramento Pœnitentiæ.*

## CAPUT I.

**N**e multitudine Casuum reservatorum infirmi, & nimis verecundi, a salutari Pœnitentiæ Sacramento retrahantur, reservamus Nobis, Vicariis nostris,

F f f f

nostris,



nostris, & Pœnitentiariorum, ea tantummodo peccata, quæ sequuntur. (d)

1. Hæresim. 2. Apostasiam. 3. Publicam & enormem in Deum & Sanctos blasphemiam. 4. Homicidium voluntarium. 5. Incendium etiam voluntarium. 6. Incestum cum patre, matre, filio, filia, fratre, sorore, & cum mulieribus religiosis professis. 7. Maleficia. 8. Voluntarias parvulorum oppressiones. 9. Simoniam realem. 10. Sodomiam, & ejusdem generis graviora.

Similiter reservamus peccata mandantium, consulentium, auxilium & favorem præstantium in hæresi, homicidio, incendio, maleficiis, & oppressione parvulorum supradictis.

#### CAPUT II.

Permittimus nihilominus, ut in unoquoque Decanorum Christianitatis districtu quatuor Parochi prudentiores, locis opportunis residentes, in eorum congregatione Capitulari eligantur, & electorum nomina ad Nos referantur, qui accepta a Nobis licentia, sicut & ipsi Decani a supradictis casibus, suorum respectivè districtuum Christi fideles, in foro conscientiarum tantum, absolvere possint ac valeant.

#### CAPUT III.

Nemo tamen prædictorum Confessariorum, virtute ejusmodi concessionis, permissionis ac facultatis nostræ, quemquam præsumat ab hæresi absolvere, nisi specialem licentiam id faciendi in scriptis obtinuerit.

#### CAPUT IV.

Quamquam Prædecessores nostri excommunicationes omnes, suspensiones, & interdicta Synodalia sibi & Successoribus suis reservaverint: Nos tamen humanæ fragilitati consulere cupientes, ea tantummodo reservamus in posterum, quæ in antiquis eorundem Prædecessorum nostrorum Decretis propediem recudendis, reservata declarantur: a cæteris absolvere poterunt omnes Sacerdotes a Nobis ad confessiones audiendas admissi, & deinceps admittendi, idque in foro conscientiarum tantum. (e)

#### CAPUT V.

Parochianos suos ad frequentem confessionem sæpe hortentur Parochi, modumque & necessitatem confitendi eos publice doceant, imminente potissimum Adventu Domini & Quadragesima.

#### CAPUT VI.

Confiteri volentes in aliud tempus non rejiciant, nisi ministerium publicum in Ecclesia exercendum, aut aliquod Sacramentum necessario administrandum, sed faciles & benignos omnibus se præbeant, sciantque, se medicos esse animarum Christi Sanguine redemptarum.

#### CAPUT VII.

Confessarii sedulo pœnitentes interrogent (nisi aliunde constet) num Orationem Dominicam, Salutationem Angelicam, Symbolum Apostolorum, Præcepta Dei & Ecclesiæ exacte norint; & ignorantibus præcipiant, ut quamprimum omnia supradicta diligenter addiscant: se alioqui negligentibus beneficium absolutionis denegaturos.

#### CAPUT VIII.

Prohibemus omnibus Confessariis, etiam Regularibus, ne unquam de peccatis in confessione exauditis, inter se conferant. Si tamen interdum necessitas id postulaverit, tam discrete faciant, ut in personarum cognitionem, ne per suspicionem quidem, veniri possit.

#### CAPUT IX.

Nulli Confessario liceat eorum, quibus ipse in delicto præsertim graviore socius fuit, confessiones audire.

#### CAPUT X.

Prætextu confessionum excipiendarum nullo modo prætereant Parochi horam celebrandi Missam parochialem diebus Dominicis & Festis.

#### CAPUT XI.

Mulierum confessiones nemo audiat, nisi in loco omnibus conspicuo, & adhibito lumine, si tenebræ fuerint, uti nec in ædibus privatis extra casum infirmitatis.

CA.

(d) Vid. Rituale Cameracense novissimum.

(e) Vide ibid.

## CAPUT XII.

Dum pœnitentium etiam Sacerdotum confessiones audiunt Confessarii, tanquam Judices sedent.

## CAPUT XIII.

Hortamur Sacerdotes omnes, ut saltem semel in hebdomada confiteantur.

## CAPUT XIV.

Studiosi, famuli & famulæ in Paschate confiteantur, & communicent in loco residentiae suæ. Quod si in loco Nativitatis, vel alio, quo fortassis tunc diverterint, confessi fuerint, ac communicaverint, testimonium Parocho dictæ suæ residentiae referant.

## CAPUT XV.

In Ecclesiis, in quibus magnus est Sacerdotum numerus, si Collegiatæ fuerint, Decani & Capitula; si Parochiales, ipsi Parochi præsentent Nobis doctiores & prudentiores aliquot ex iis, quibus (si idonei reperti fuerint) confessiones audiendi facultatem committamus.

## CAPUT XVI.

Initio cujusque Quadragesimæ publice moneantur omnes, qui a postremo Paschate non sunt confessi, ut in hebdomadam majorem, illiusque ultimos dies confessionem non differant: alioqui in dies sequentes expectare cogantur, quo eorum salutem melius consulere, & eorum conscientiam discutere valeant Confessarii.

## CAPUT XVII.

Optamus omnes Religiosos, etiam exemptos, observare Antecessorum nostrorum Decreta, de describendis in Quadragesima continentium nominibus.

## CAPUT XVIII.

Confessarii, etiam Regulares, non utantur alia forma absolutionis, quam ea, quæ in Manuali nostro præscripta est.

## TITULUS IX.

## De Sanctissimo Eucharistia Sacramento.

## CAPUT I.

**P**arochi omnes, alique locorum Superiores, semel saltem in men-

Tomus VIII. Concilior. German.

se Hostias consecratas, quæ ad usum infirmorum asservantur, consumant, & novas consecrent: ubi vero loca sunt humidiora, sæpius id fiat.

## CAPUT II.

Ad frequentem & ferventem Communionem populum sæpe hortentur Parochi & Concionatores.

## CAPUT III.

Qui, vel quæ ex consuetudine potius, & ad aliorum imitationem, quam ex devotione frequenter, aut quotidie communicare advertuntur, ad tam frequentem Communionem non facile admittantur.

## CAPUT IV.

Doceant Parochi populum in ablu-tione, quæ datur post Sacram Communionem, non esse nisi purum vinum: & proinde, quantum fieri poterit, non ex calice sacro, sed alio vasculo porrigatur.

## CAPUT V.

In patenis calicum nullæ deinceps fiant sculpturæ, vel cœlaturæ: ipsæ autem patenæ, quantum fieri potest, sint inauratæ.

## CAPUT VI.

Ubi magnus esse solet in Paschate, Natali Domini, & alias communicantium numerus, constituantur in loco ad hoc commodo Sacerdos aliquis, qui qualibet hora, etiam extra tempus Missæ, omnibus advenientibus Sacram Eucharistiam administret.

## CAPUT VII.

Prædecessorum nostrorum vestigiis inhærentes, comitantibus Venerabile Corpus Christi, quando ad infirmos deferretur, eundo decem, & redeundo etiam decem dies; iis vero, qui de nocte comitati fuerint, vel de die cum cædis aut candelis accensis, viginti dies Indulgentiarum eundo, & totidem redeundo, concedimus.

## CAPUT VIII.

Adolescentes, qui prima vice Eucharistiam sumere voluerint, ad eam non admittantur, nisi eos Parochus, Confessarius, vel Catechista, aliquot ante die-

F f f f 2

bus

bns examinaverit, & de vi & ratione Sacramenti diligenter instruxerit. Ut autem hoc observent fideles, Statutum illud frequenter pro suggestu inculcent Parochi.

#### CAPUT IX.

Confraternitates Corporis Christi in omnibus locis, saltem celebrioribus, erigi optamus.

### TITULUS X.

#### *De Sacramento Ordinis.*

##### CAPUT I.

**O**rdines suscepturi accedant cum tonsura & habitu decenti, Ordini- que suscipiendo convenienti.

##### CAPUT II.

Parochi, & alii, ad quos spectat, nomina & desiderium eorum, qui ad singulos majores Ordines volent promoveri, publice in Ecclesia intra Missarum solennia proponant: & de ipsorum ordinandorum natalibus, ætate, moribus & vita a fide dignis diligenter inquirent: ac literas testimoniales ipsam inquisitionem factam continentes, Parochi quidem ad Decanum Christianitatis clausas & subsignatas, ipsius Decani testimonio roborandas, alii ad Nos etiam subsignatas; Decani vero easdem suo testimonio roboratas & clausas, per ordinandos ad Nos transmittant. Quod si ordinandi extra locum Nativitatis habitent, a parocho, vel alio Superiore loci residentie suæ, morum & vite testimonium similiter clausum adferre teneantur.

##### CAPUT III.

Qui ad Subdiaconatus Ordinem erunt promovendi, præter testimonia jam dicta habeant etiam Titulum Beneficii Ecclesiastici, vel Patrimonii: & si quidem titulus Beneficium fuerit, ejus valorem examinabunt Decani, suæque subscriptione illius veritatem testabuntur, aut literis clausis defectum, quem adverterint, Officiali nostro significabunt; omnino autem insufficientem rejicient. Si vero Patrimonium fuerit, literas authenticas adferent in pergamento a Scriba Magistratus subsignatas, vel alias, pro consuetudine loci vali-

das, quæ contineant hypothecam Tituli, ejusque valorem, ac patris, matris, vel alterius donatoris ex præscripto legum municipalium realem cessionem, vel successionem, cum simili subscriptione Decani.

##### CAPUT IV.

Qui autem ad Diaconatus, vel Presbyteratus Ordines erunt assumendi, etiam ministrationis in Ordine suscepto, testimonium a Parocho, vel alio fide digno subscriptum adferre teneantur.

##### CAPUT V.

Sacro Presbyteratus Ordine initiati, primam suam Missam intra quadraginta dies ab ordinatione celebrent: neque diutius sine nostra licentia differant: ac in hujusmodi celebritate ab omni insolentia, excessu & choreis abstineatur.

### TITULUS XI.

#### *De Sponsalibus, & Sacramento Matrimonii.*

##### CAPUT I.

**A**D Sponsalia contrahenda nulli in posterum admittantur, nisi in manibus parochorum affirmant, se vere existimare nullum inter ipsos Canonicum impedimentum intercedere, ratione cujus Matrimonium contrahere non possent.

##### CAPUT II.

Si quis in extrema ægitudine constitutus, in favorem legitimandæ prolis Matrimonium contrahere cupiat, & non possit ad Nos ejus desiderium commode referri; permittimus, ut omnis tribus proclamationibus, præsentem parocho, & duobus vel tribus testibus, etiam in privatis ædibus (nisi Canonicum illud obstat impedimentum) Matrimonio conjungi possit.

##### CAPUT III.

Quod alias constitutum est, & quibusdam in locis minus exacte observatum, innovantes, omnibus parochis prohibemus, ne quos ad Matrimonium contrahendum admittant, nisi Orationem Dominicam, Salutationem Angelicam, & Symbolum Apostolorum,

PRÆ-



præcepta Decalogi & Ecclesiæ sciant, & pro suo capto intelligant.

## CAPUT IV.

Si contrahentes diversarum Parochiarum, Decanatum, & Episcopatum existant, sine literis alterius parochi, Decani vel Episcopi, eorum sigillo munitis, ad Matrimonium non admittantur; ita quod parochus parochus, Decanus Decano, & Episcopus Episcopo literas suas dirigant. Parochus vero, qui sine huiusmodi literis eos Matrimonio conjungere, aut benedicere præsumpserit, a Divinis uno mense suspendatur, aut alias arbitrio nostro, seu Officialis nostri puniatur. Continebunt porro dictæ literæ præter testimonium vitæ, etiam quamdiu personæ desponsæ, aut earum altera, in parochia, Decanatu, Episcopatu habitaverint.

## CAPUT V.

Omnibus parochis præcipimus, ut bis saltem in anno pro suggestu populo impedimenta, quæ Matrimonium impediunt, vel dirimunt (ut in Manuali nostro recensentur) diligenter expendant: in quo, si negligentes deprehensi fuerint, severe ab Officiali nostro eos puniri mandamus.

## CAPUT VI.

Antequam ad Matrimonium admittant affidatos, diligenter etiam secreto ab iis (& præsertim puellis) inquirant parochi, an libere, an vero coacte, contrahant: & si quomodolibet coactos deprehenderint, aut minus liberos, vel Matrimonium differant, vel omnino illud non celebrent. Et si ipsi parochi (quod absit) illius coactionis complices, socii aut conscii fuerint, & nihilominus ad Matrimonii contractum processerint; præter excommunicationem, quam ipsi de jure ipso facto incurrunt, volumus, ut ab Officiali nostro graviter puniantur. Excommunicationem etiam incurrunt omnes illi, qui quovis modo, directe vel indirecte subditos suos, vel quoscunque alios cogunt, quominus libere Matrimonia contrahant. (f)

## CAPUT VII.

Parochi sæpe hortentur patres & matres, ne ullo modo liberos ad Matrimonium cum certis personis cogant, sed obtemperare nolentes rationibus ad consensum inducant. Filios autem & filias vicissim admoneant, doceantque non esse contemnenda in re tanti momenti & parentum & seniorum sana consilia.

## CAPUT VIII.

Matrimonium, libertati consulere volentes, poenas pecuniarias in contractu antenuptiali, quarum metu contrahentes ad Matrimonium inviti, aut minus liberi compellantur, improbamus: ideoque tam contrahentes, quam huiusmodi contractibus assistentes, & Notarios monemus, ut a tali poenarum appositione & stipulatione penitus abstineant.

## CAPUT IX.

Sponsalia contracta non dirimant Parochi, sed rei cognitionem ad Officiale nostrum remittant.

## CAPUT X.

Eos, qui foeminam quamcunque uxoris loco publice fovent, si liberi sunt, ad Matrimonium contrahendum hortentur parochi: parere nolentes, ad promotores, aut Officiale deferant.

## TITULUS XII.

*De Sacramento Extremæ Unionis.*

## CAPUT I.

**S**acramentum istud quamquam non sit de necessitate salutis absoluta, diligenter administrent Parochi: & quatenus fieri potest, per se, raro autem per Substitutos morientibus adsint: cum in extremo huiusmodi conflictu, pastorum opera maxime indegeant fideles.

## CAPUT II.

Frequenter moneant subditos suos, & ostendant non esse differendum tam salutare Sacramentum ad extremam ægritudinem, fallamque illorum opinionem convellant, qui arbitrantur iis

F f f f 3

ex

(f) Conc. Trid. Sess. XXIV. C. 9. de Reform. Matr.

ex hac vita necessario migrandum esse, qui hoc Sacramento sunt muniti: cum nimis impium sit existimare, Sacramenta ad animarum salutem instituta, corporibus mortem adferre, aut accelerare.

## CAPUT III.

Doceantur autem omnes, hujus Sacramenti susceptione neminem impediri a condendo testamento, seu alia bonorum temporalium dispositione.

## CAPUT IV.

Omniſibus noſtræ Diœceſis Chriſti fidelibus, qui Sacrum infirmorum Oleum, quando ad ægrotos inungendos deferitur, comitati fuerint, eundo decem, & redeundo etiam decem dies Indulgentiarum in Domino conferimus: iis vero, qui id de nocte præſtiterint, viginti dierum Indulgentiarum eundo, & totidem redeundo, impartimur.

## CAPUT V.

Piam & olim uſitatam conſuetudinem aliquid ex testamento legandi Eccleſiæ Cameracenſi ut matri, in uſum revocari curent Parochi, & Notarii testamentorum Scriptores; idque ad conſervandam Eccleſiæ matri debitam reverentiam.

## TITULUS XIII.

*De Funeribus, Sepulturis & Exequiis.*

## CAPUT I.

**I**N ſepeliendis corporibus defunctorum, etiam infantium, ſerventur formulæ in noſtro Manuali præſcriptæ.

## CAPUT II.

Brevem ſemper exhortationem habeant Parochi in ſepultura & exequiis defunctorum, antequam populum a loco ſepulturæ dimittant; in eaque ad ſeriam mortis cogitationem, & præparationem, atque ad orandum pro defunctis omnes hortentur.

## CAPUT III.

In orationibus funebribus ita diſcrete ſe gerant Concionatores, ut aſſentationem omnem fugiant, & non niſi ob veras & compertas virtutes defunctos laudent.

## TITULUS XIV.

*De Oblationibus, Decimis, & portione Canonica.*

## CAPUT I.

**N**Ova gazophylacia, ſeu truncos (ut vocant) in Eccleſiis ſine noſtra licentia poni veramus.

## CAPUT II.

Antiquo Diœceſis noſtræ Decreto & dudum receptæ conſuetudini inhzrentes, excommunicatos a Canone declaramus, & excommunicatos generaliter denunciari mandamus, quotquot fraudem & dolum in decimis lanarum, vellerum, agnorum, & aliarum rerum committunt.

## CAPUT III.

Quæ de portione Canonica ſalubriter ſunt conſtituta, ea obſerventur, & debitæ executioni mandentur.

## TITULUS XV.

*De recta Bonorum Eccleſiaſticorum adminiſtratione.*

## CAPUT UNICUM.

**E**Ccleſiarum bona a fidelibus in animarum ſuarum refrigerium, atque ad Catholicæ Religionis, Diviniſque cultus perpetuationem relicta, & a Prædeceſſoribus diligenter conſervata & aucta, qua par eſt diligentia etiam Nos conſervari cupientes; mandamus, ut quæcumque ab iisdem ſunt conſtituta, exacte obſerventur: & inſuper Decanis Chriſtianitatis præcipimus, ut eos, qui hac in re negligentes deprehenſi fuerint, ad Nos deferant, pro modo culpæ arbitrio noſtro puniendos.

## TITULUS XVI.

*De Clericis in genere.*

## CAPUT I.

**Q**ui in Sacris ſunt conſtituti, habitu Ordini ſuo conveniente utantur, ac non niſi cum pileo, ſeu bireto Clericali in populum prodeant, & ad Eccleſias accedant.

## CAPUT II.

Cum indecorum ſit Eccleſiaſticos ſe ſe negotiis ſæcularibus immiſcere, multo

multo minus decet eos alienas decimas colligendas, terras aut prædia excolenda accipere: a qua negotiatione & rebus secularium tractandis ut in posterum abstineant, districte mandamus.

## CAPUT III.

Ad officium Clericaturæ, Matricularii, seu Custodis, non admittantur, nisi prima tonsura insigniti: neque vilem aliquam artem exercent.

## TITULUS XVII.

*De Episcopis.*

## CAPUT UNICUM.

**Q**Uæ de officio Episcopali in Generali Tridentina Synodo, & Provincialibus Cameracensibus, sancte fuerunt constituta, quantum cum Divinæ gratiæ adiutorio in Nobis erit, operam dabimus, ut ea exacte observentur: in Domino confidentes, Clerum nostrum, & maxime Prælatos, ac alios in Ecclesiastica dignitate constitutos, ad eorum executionem Nobis futuros fideles & voluntarios Cooperatores.

## TITULUS XVIII.

*De Capitulis & Canonicis.*

## CAPUT I.

**O**Mnes Divina per se, & non per Substitutos compellantur obire officia.

## CAPUT II.

Curent Ecclesiarum Superiores exacte observari Decreta postremæ Synodi provincialis, cum alia hujus Tituli, (g) tum ea, quæ sunt C. 15. & 17.

## CAPUT III.

Fidei professionem ab omnibus Canonicis in prima eorum receptione, juxta formam a PIO. IV. præscriptam, integre fieri mandamus.

## CAPUT IV.

Distributiones, quæ in Ecclesiis fieri solent, vel debent, in posterum non fiant; in Matutino quidem Officio, ante *Benedictus*, & in Vespertino, ante *Magnificat*; in Missa vero ante Communionem Sacerdotis: nec earum participes esse censeantur, qui ab initio

cujusque Officii, ad finem usque (legitimo cessante impedimento) Choro non interfuerint.

## CAPUT V.

Singulæ Ecclesiæ Collegiatæ habeant Synodalia Decreta, compacta, & in Capitulo asservata.

## TITULUS XIX.

*De Pastoribus.*

## CAPUT I.

**A**Necessorum nostrorum Decreta tam antiqua, quam nova, ac etiam Concilii Tridentini, quæ nostræ Diocesis parochos concernunt, in singulis Decanorum Capitulis, successive per partes saltem legantur: sintque congregationes seriæ; relectio autem brevis & sobria.

## CAPUT II.

Habeant omnes Parochi ut minimum Biblia Sacra, Catechismus Romanum ad parochos, & parvum Catechismus vernaculum, Concilium Tridentinum, Directorium Polanci, & alium Summistam, ac Homiliasten aliquem probatum in totius anni Evangelia.

## CAPUT III.

Nunquam intermittant Parochi, quin per se, vel per alios idoneos, si legitime impediti fuerint, saltem Dominicis & Festis solemnioribus plebes sibi commissas pro sua & earum capacitate pascant salutaribus verbis.

## CAPUT IV.

Conciones autem eorum sint breves, nervosæ, & horæ unius spatium non excedant, etiam inclusis monitionibus Dominicalibus, seu mandatis, quæ juxta instructionem in Manuali nostro præscriptam, & laudabilem ac antiquissimam Ecclesiæ consuetudinem, fieri præcipimus.

## CAPUT V.

Doceant, quæ scire omnibus necessarium est, annuntiando eis cum brevitate & facilitate sermonis salutarem fidei doctrinam, vitia, quæ declinare, & virtutes, quas sectari oporteat, ut poenam æternam evadere, & cœlestem gloriam consequi valeant.

## CAPUT

(g) Syn. Prov. 1586. Tit. 18.



## CAPUT VI.

Populum cohortationibus & admonitionibus ad religionem & pacem, innocentiamque accendant, dissidentes ad concordiam revocare studeant: sint proinde ipsi vel maxime religionis, vel veræ pietatis insignes cultores, pacis studiosi, innocentiae & puritatis nomine commendabiles: a dissidiis vero & odiis ita prorsus abhorreant, ut se se veros animarum Curatores, non autem in Clero dominantes exhibeant: Qui in his deliquerint, sine ulla dissimulatione aut privata affectione a Decanis ad Nos deferantur.

## CAPUT VII.

Nemo de cætero virtute solius admissionis, vel etiam collationis alicujus beneficii curam animarum annexam habentis, in Ecclesia ipsius beneficii administrare præsumat, nisi prius institutionem Canonicam, possessionem, & curam animarum acceperit: alioqui fructibus illius anni privatus existat eo ipso.

## CAPUT VIII.

Decani Christianitatis singulis annis suos Districtus visitent, & suarum visitationum articulos in scriptis (eorum copia sibi retenta) ad Nos ante Kalendar. Septemb. transmittant.

## CAPUT IX.

Prohibemus Parochis, ne pastoralibus domibus, quæ exstant, relictis, alias inhabitent: & ubi est fundus pastoralis, in alio non ædificent. Si secus fecerint, arbitrio nostro multa indicta puniantur.

## CAPUT X.

Si quando Presbyteri curam animarum habentes, ex causa legitima a suis Ecclesiis ad breve tempus abesse debebunt, alium Sacerdotem idoneum, & a Nobis ad Sacras Confessiones audiendas, & Sacramentorum administrationem admissum, substituant: vel vicino Presbytero curato suas vices committant.

## TITULUS XX.

*De Regularibus & Monialibus.*

## CAPUT I.

**N**on patiantur Sanctimonialium Præfecti & Præfectæ quemquam,

etiam ejusdem sexus, ad loca regularia admitti, quovis prætextu vel colore etiam vestitionis aut professionis, sub poena excommunicationis, tam in admittentes, quam in ingredientiæ: currentque dicti Superiores Decretum istud publicari, quotiescunque ejusmodi solemnitates occurrunt, & ejus copiam valvis clausuræ affigi.

## CAPUT II.

Religiosorum Superiores nonnisi graves, pios, maturos, & observationum Regularium studiosos viros, Novitiis formandis præficient, qui eos in mortificatione, humilitate, charitate, cæterisque virtutibus, probe instituant, tales quoque Magistras suis Novitiis præbeant Sanctimonialium Præfectæ.

## TITULUS XXI.

*De Scholis.*

## CAPUT I.

**S**cholis etiam, in quibus prima literarum rudimenta docentur, nonnisi matura ætate viri præficientur, si possint haberi.

## CAPUT II.

Easdem Scholas in oppidis præferim, & aliis locis celebrioribus simul non frequentent pueri & puellæ: sed viri masculis, sceminae puellis, quantum fieri potest, instruendis præsent.

## CAPUT III.

Curent ejusmodi Scholarum Præfecti & Præfectæ singulis diebus Profectis ex Catechismo vernaculo aliquid a singulis recitari; diligentemque navent operam, ut quamprimum sciant omnes memoriter Orationem Dominicam, Salutationem Angelicam, Symbolum Apostolorum, & Præcepta Dei & Ecclesiæ: diebus vero Dominicis, & aliis, quando lectio Catechistica habetur, discipulos suos ad eam deducant.

## TITULUS XXII.

*De Foro, Jurisdictione, & Immunitate Ecclesiastica.*

## CAPUT UNICUM.

**D**ecreto S. Concilii Tridentini inherentes, quo statuimus, ut in singulis

singulis Conciliis Provincialibus aut Diocesanis, aliquot personæ, quæ qualitates habeant, juxta Constitutionem BONIFACII VIII. quæ incipit: *Statutum*, & alioquin ad id aptæ designentur, ut præter Ordinarios locorum, iis etiam causæ Ecclesiasticæ & spirituales, atque ad forum Ecclesiasticum pertinentes, in partibus delegandæ committantur: nominamus infra scriptos, videlicet Venerabiles Viros & Dominos, *Robertum de la Hamaide*, Præpositum: *Carolus du Cornet*, Archi-Diaconum Cameracensii, J. U. Licentiatos: *Valerianum du Flos*, Archi-Diaconum Brabantiae, Decretorum & Legum Doctorem: *Valentinum Collart*, Archi-Diaconum Hannoniae: *Nicolaum Goubille*, Decanum: *Petrum Preud' Homme*, *Amandum Marlart*, *Adolphum Blyleven*, & *Gabrielem Broude*, etiam J. U. Licentiatos, & Ecclesiæ nostræ Metropolitanæ Canonicos.

## TITULUS XXIII.

## De Usuris.

## CAPUT UNICUM.

**U**T, qua possumus ratione, occurramus usuris, quæ hoc calamitoso tempore in mutuo, venditione, & aliis contractibus palliatis & simulatis invaluerunt: omnes illos & singulos, qui hujusmodi contractus inierint, ac Notarios & testes, qui doli ac fraudis conscii interfuerint, excommunicationem ipso facto incurrere declaramus.

## TITULUS XXIV.

## De Synodo.

## CAPUT I.

**C**UM ex antiqua & laudabili consuetudine Synodus, & Congregatio Decanorum Christianitatis nostræ Diocesis ad diem S. Remigii in capite

Octobris quotannis haberi soleat: declaramus eam Synodum fore apertam non solum ipsis Decanis, sed etiam aliis omnibus, quos ad præsentem Synodum convocavimus, eosque ex nunc, prout ex tunc convocamus, ut personaliter, vel per Procuratores legitimos, singulis annis compareant, aut si quid exponendum habeant, id tempestive rescribant, ut desuper in ea Congregatione, quod æquum fuerit, statuere valeamus.

## CAPUT II.

Et quia frustra conduntur Leges, nisi etiam observentur: omnibus Prælati, Decanis, Parochis, Concionatoribus, aut aliis Presbyteris & Beneficiariis Nobis subditis, mandamus, & exemptos in Domino hortamur; ut præter duas Provinciales Synodos, etiam hujus Decreta intra duos menses a tempore editionis eorundem, sibi comparent, & quæ populum concernunt, in suis concionibus exponant; eaque omnia (sicut & antiqua quatenus eis derogatum non sit) ipsi diligenter perlegant & observent, & a suis subditis observari curent, sub pœnis in iisdem contentis.

**L**ECTA & publicata fuere hæc Decreta, de mandato Illustrissimi & Reverendissimi Domini, Domini GUILIELMI DE BERGES, (\*) Dei & Apostolicæ Sedis gratia Archi-Episcopi & Ducis Cameracen. &c. in Aula Synodali Palatii Archi-Episcopalis, per Nos *Adolphum de Blyleven*, & *Jacobum Franco*, Ecclesiæ Metropolitanæ B. MARIE Cameracen. Canonicos, dictæ Synodi Secretarios, anno Domini M. DC. IV. mensis Octobris die sexta.

ADOLPH. DE BLYLEVEN.  
JAC. FRANCO.

(\*) GUILIELMUS DE BERGES, quem avito Baronum Grimbergenstium atque Illustri ortum Stemmata, Brabantia vidit, Generis sui splendorem miris, quæis & amovectus Belgii loco fuit, dignitatibus haud parum auxit. Leodii in Cathedrali S. Lamberti Decanum agens, Antverpiam evocatur, Pædo ibidem Episcopali ac Mitra exornandus. Inde Archi-Episcopali huic præfectus Sedi, dignissimum se se tanto officio Virum, Pastorem, Patremque exhibuit. Pietatem in eo singularem, & assiduum Sanctimoniarum studium non Domestici solum, sed & exteri mirabantur. Gregem curæ suæ creditum dum piis pascebat, recreabaturque monitis (quod quidem pro muneris sui conditione agebat frequentissime) eadem, quo saperent melius,

lius, ac felicius prodesse, orationis suavitate, comitate morum & modestia, pulcherrimo demum infantis vitæ exemplo, ceu totidem lectissimis condire aromatis prius ipse adlaborabat. Sensere Præsulis optimi munificentiam Ecclesiæ Leodientis, Antverpiensis, & Cameracensis, quas pretiosis, & excitandæ Christiani Gregis religioni aptis ornamentis instruxit. Palatio Episcopali non ita sibi, quam Successoribus suis ampliato, obiit quinto post Synodum hanc Provinciale, cujus ipse Autor Caputque fuit, anno, 25. Aprilis 1609., ætatis supra quinquagesimum octavo, Antistes vita longiore dignus.

*Vide Moveri Dict. Castil. Sac. Belgii Chronol. Foppens Biblioth. Belgicam.*



## SYNODUS NAMURCENSIS

Eodem anno MDCIV. 17. Octobris

IN ECCLESIA CATHEDRALI CELEBRATA,

*Præsidente Reverendissimo in Christo Patre & Domino, D. FRANCISCO BUISSERET, Episcopo Namurcensi.*

FRANCISCUS BUISSERET, DEI ET APOSTOLICÆ SEDIS GRATIA  
EPISCOPUS NAMURCENSIS, UNIVERSO CLERO AC POPULO SUÆ  
DIOECESIS.

**Q**uemadmodum sapientes olim viri dixerunt, Leges esse animam Civitatis, & fœlicem aut infœlicem esse ejus statum, prout bonis aut malis Legibus gubernatur: ita non minus vere dici potest, ipsarum Legum animam esse promptam ac voluntariam earundem observationem. Nam & Civitas muris cincta, sed omni Legum ac civilis politiæ præsidio destituta, in qua proinde suo quisque vivit arbitrio, Civitatis quidem nomen retinet, sed re ipsa Civitas non est, & Leges etiam pulcherrimis verbis conceptæ, & gratissimo ordine dispositæ, quamdiu chartis aut libris clauduntur, nec ipsa praxi in publicum prodeunt, ultimam suam formam seu perfectionem non habent, ideoque Sapientum judicio, honorificam illam Legum appellationem non merentur. Quæ causa fuit, cur omnis sapientiæ fons & auctor Deus, tanto studio olim Legum suarum ac cœlestium præceptorum observationem, etiam amplissima mercede proposita, & populo suo promissa, passim in Scripturis Sanctis, & maxime per os sapientissimi Salomonis commendavit. Sic enim ille suavissimis verbis, & miro certe affectu: (a) *Fili mi, ne obliviscaris legis meæ, & præcepta*

*mea cor tuum custodiat; longitudinem enim dierum, & annos vitæ, & pacem apponent tibi; misericordia & veritas te non deserant, circumda eas gutturi tuo, & rescribe in tabulis cordis tui, & invenies gratiam & disciplinam bonam coram Deo & hominibus. Et iterum: (b) Conserva, fili mi, præcepta Patris tui, & ne dimittas legem Matris tuæ, liga ea in corde tuo jugiter, & circumda gutturi tuo. Cum ambuleris, gradientur tecum, cum dormieris, custodiant te, & evigilans, loquere cum eis: quia mandatum lucerna est, & Lex lux, & via vitæ increpatio discipline. Quo admirabili loquendi genere non aliud insinuat, quam summa cura ac diligentia, & assiduo studio, mandata Dei, qui primus ac præcipuus nobis Pater, & præcepta Ecclesiæ, quæ charissima Mater nostra est, servanda esse, sicut pretiosissimæ gemmæ & aurea monilia, quæ collo appendi & circumdari, ac die ac nocte diligentissime asservari solent. Causam autem elegantem subdit Rex prudentissimus, ob quam hoc tanto studio urgeat & commendet, quia mandata Divina sunt nobis loco lucernæ, & cœlestes illæ Leges loco lucis, quæ depulsis ignorantiae tenebris viam nobis ostendunt, qua incedendum, ut secure aliquando perveniamus ad vitam æter-*

(a) Prov. 3.

(b) Prov. 6.



æternam ; quod thesauri omnes , ac gemmæ etiam pretiosissimæ , in quibus custodiendis tantopere laboratur , præstare non valent. Inter cætera autem Sanctæ Matris Ecclesiæ præcepta semper habita fuerunt , quæ Summi Pontifices , atque inferiores Episcopi , alique Prælati Ecclesiam regentes & repræsentantes , in suis Conciliis Generalibus aut particularibus legitime congregatis suis subditis tradiderunt , de quorum numero hæc sunt , quæ nuper in prima nostra Synodo Diocesana de consilio atque unanimi consensu Patrum , qui eidem interfuerunt , ad maiorem Dei gloriam , & Sanctæ Ecclesiæ decus atque ornamentum , nec non communem vestram omnium salutem decrevimus , atque edidimus. Sed quis erit fructus laborum nostrorum , si Leges tantum mortuas , ac prorsus inanimas condiderimus , si Statuta , quæ fecimus , nullum spirent virtutis odorem , nullum edant motum seu mutationem vitæ in melius , nec ullo alio signo testentur sibi infusum spiraculum vitæ ? Non alius certe , quam fructus abortivus , quem non sine dolore pro-

pria intuetur Mater , nec nos intueri unquam poterimus. Superest ergo , ut quod nos ( materiam his Legibus aut Statutis subministrasse contenti ) vobis reliquimus , illis infundatis animam : hic vester honos , hæc vestra gloria , quam non tantum non invidemus vobis , sed etiam ardentibus vobis optamus , speramusque aliquando fore , ut & nos votorum compotes , & vos tanti honoris participes effecti Sanctissimæ Trinitati , in cuius nomine fuimus congregati , gratias simul omnes referamus , quod his Legibus pœna constituta , sed secuta non fuerit , quod iis magis virtutis amore , quam formidine pœnæ obtemperaveritis , quod antequam plenum ac consummatum Ecclesiam DEI opprimat naufragium , prout tam diuturna tempestas huic afflictissimo Belgio incumbens jam dudum minatur , vos una mecum hanc exiguam ratem mihi commissam velis ac remis in portum tranquillum ac securum deduxeritis , gaudium meum & corona mea , valete in Domino , & eundem pro me orate , Amen.

## O R A T I O

*Habita a Reverendissimo Domino EPISCOPO NAMURCENSI  
prima die Synodi , quæ fuit 17. Octob. anno 1604.*

**O** Prærem , Reverendi Patres , & in Christo carissimi Fratres ac Filii mei , talem esse totius hujus meæ Diocesis statum , quod nulla penitus reformatione , nulla ad reformandum consultatione , nullo denique ad consultandum labore indigeret : sed quando in hæc tam infœlicia Sæcula incidimus , ut , si unquam alias , certe nunc passim bono semini , quod optimus Pater familias in agro Ecclesiæ seminavit , inimicus homo superfeminavit zizania ; vos in hunc finem huc alacres convenisse gaudeo , ut conjunctis animis atque consiliis , qua meliore ratione ista extirpari , & fructus optimus ex bono illo semine expectari , & aliquando a nobis omnibus & subditis nostris cum exultatione plenius manipulis colligi possit , serio dispiciamus. Hæc enim semper fuit via , a Majoribus nostris sapientia & sanctitate admirabili præditis viris , probata & electa , ut in summis Ecclesiæ periculis , modo ad Generalia ex toto orbe Christiano a Summis Pontificibus , modo ad Provincialia ab Archiepiscopis convocata Concilia , modo etiam

*Tomus VIII. Concilior. German.*

ad particulares ab Episcopis in suis Diocesibus coactas Synodos libenter & frequenter convenirent : multis quidem , sed tribus potissimum de causis. Primum ad condemnandas , & extinguendas nascentes hæreses : deinde ad sopiendas Catholicorum inter se dissensiones & controversias : postremo ad extirpandas spinas vitiorum , inferendaque animis mortalium nova semina cælestium , Divinarumque virtutum. Non quod Summus Pontifex non possit solus aut hæreses condemnare , aut controversias componere , aut toti Ecclesiæ utiles Leges præscribere , & quivis Episcopus Clero & populo suo , salutaria Decreta condere & promulgare , sed quod , ut in morbis & vulneribus corporalibus , ita & in spiritualibus frequenter eveniat , ut qui illis sanandis adhibetur , non sibi soli fidere auit , sed cum aliis peritis communicato consilio , sibi persuadeat , majori securitate ægrotis suis etiam alias sibi cognita applicare se posse remedia. Unde Sancta Dei Ecclesia tanti semper fecit periculum novarum hæresum , ut non putaverit eis

G g g g a

aliter

aliter posse resisti, quam si omnes, aut certe permulti Principes Ecclesiæ, conjunctis viribus & quasi agmine facto irruerent in hostes fidei. Hinc legimus septem prima Concilia Generalia congregata fuisse, ut ejusmodi hæreses novas condemnarent. Nec minus cordi habuerunt prisca illi Patres sanctam morum reformationem, de qua omnia fere Concilia pulcherrimos & maxime salutare Canones ediderunt, adversus corruptelas & abusus suorum temporum. Quod si Summus ille Christi in terris Vicarius, cui soli in persona Petri dictum est: (c) *Pasce oves meas*, cui ipse Christus suum nempe solidæ & immobilis Petræ nomen imposuit, adversus quam *Portæ inferi non prævalebunt*, (d) qui solus Judex est omnium controversiarum, & cui (ut D. Cyprianus loquitur [e]) obtemperare debet fraternitas universa, in rebus tamen magni momenti soli suo judicio non fedit, sed adhibet in consilium Sacrum Cardinalium Senarum, convocat Episcopos, & alios Ecclesiæ Prælatos, & ex eorum suffragiis suas leges condit, & judicia decernit; quid nos facere par est, qui quanto inferiores & infirmiores sumus, tanto pluribus auxiliis indigemus? Hoc certe olim etiam Sanctissimi & Sapientissimi Episcopi non solum ingenue fassi sunt; sed etiam re ipsa comprobarunt. Nam idem Clarissimus Martyr Cyprianus [f] ad Stephanum de se ipso & contemporaneis Episcopis scribit: *Necesse habuimus, convenientibus in unum pluribus Sacerdotibus, cogere & celebrare Concilium.* Sed quid opus est aut Episcopos, aut Summos Pontifices proferre in medium, cum salutaris hujus institutionis Christum ipsum Dominum nostrum authorem habeamus? Ut apertissime colligitur ex ejus doctrina, qua correptionis fraternæ & modum & ordinem præscribit: (g) *Si peccaverit in te frater tuus, vade & corripe eum inter te & ipsum solum, si te non audierit, adhibe tecum adhuc unum vel duos, ut in ore duorum vel trium stet omne verbum, quod si non audierit eos, dic Ecclesiæ.* Quod idem est, ac si ipse, ut futurorum omnium præscius, nos instruens aperte diceret: cum posthac, aucto discipulorum meorum numero, multa contingant, quæ singuli per vos haud facile poteritis componere aut definire, recurrendum vobis erit ad communem Prælatorum conventum. Sic enim intelligenda esse verba illa: *dic Ecclesiæ*, ipsemet paulo post insinuat, cum subjungit: Ubi sunt duo vel tres congregati in nomine meo, ibi sum in medio eorum. Ex Apostoli sic interpretandum esse locum, suo exemplo docuerunt: quia

cum possent etiam seorsim definire controversias, quæ in ipsis nascentis Ecclesiæ initiis oriebantur; tamen ne viderentur negligere medium ordinarium ipsis a Christo demonstratum, controversiam de Legalibus Antiochiæ exortam, non sine Concilio definire voluerunt, sed eam ad congregationem Apostolorum & Seniorum, quæ Hierosolymis erat, retulerunt, quo & Paulus & Barnabas cum quibusdam aliis profecti sunt: ut patet ex Actis Apostolorum Cap. 15. ubi etiam & pluribus aliis locis ejusmodi congregationes, ab Apostolis factæ, Ecclesiæ appellantur.

Quamdiu autem laudabilis illa consuetudo ab Apostolorum Successoribus observata est, tamdiu Ecclesiastica disciplina in suo vigore permansit: at cum dormire, hoc est, ut Augustinus interpretatur, negligentius agere ceperunt Præfecti Ecclesiæ, suo forsitan judicio plus æquo fidentes, nec magnopere solliciti de aliis viris sapientibus & prudentibus in consilium adhibendis, facile fuit inimico homini bono semini superseminare zizania pravarum opinionum, ac spinas & tribulos omnis generis vitiorum. Non alium producam hujus rei testem, quam Augustissimum Imperatorem Justinianum, testem sane irrefragabilem, & ut dici solet, omni exceptione majorem: is enim novella sua constitutione 123. peccata, in quæ multi inciderant, in hanc unam causam rejicit, quod Synodi Religiosissimorum Sacerdotum, secundum ea, quæ a Sanctis Apostolis & Sanctis Patribus dicta sunt, non celebrarentur. Unde non mirum, si Sacrosancta Synodus Tridentina Metropolitanos moneat, ut pro moderandis moribus, corrigendis excessibus, controversiis componendis, aliisque a Sacris Canonibus permisis, quolibet triennio Synodum in sua Provincia cogere non prætermittant, quo Episcopi omnes, & alii, qui de jure vel consuetudine interesse debent, convenire omnino teneantur: Synodos vero Diocesanas quotannis celebrari jubeat, & tam Metropolitanos, quam Episcopos, & alios hac in parte negligentes, pœnas Sacris Canonibus sancitas incurrere declararet. Quod si ullis unquam sæculis necessarium fuit, ut Archi-Episcopi, & Episcopi, aliique Prælati in hanc curam moderandi mores & corrigendi excessus suorum subditorum incumberent, hoc certe tempore, quo orbem Christianum ante oculos nostros ruentem quotidie videmus, hoc onus omnibus incumbit, nisi velint perire cum per-euntibus, & tanto majora aliis sustinere tormenta, quanto ipsi eos honore ac dignitate ante-

(c) Joan. 21.  
(g) Matth. 18.

(d) Marc. 16.

(e) Epist. 3. Lib. 1.

(f) Epist. 1. Lib. 2.

antecellunt. Sed & Canonicis, Decanis ac Pastoribus, & Clericis omnibus hæc reformationis materia non minus cordi esse debet, si proprio suo honori ac salutis probe consultum esse velint, & Christi Sponsam Matrem suam Sanctam Ecclesiam aliquando videre optent suo honori & pristinae tranquillitati restitutam. Quod certe nunquam sperare debent, quamdiu ipsi Episcopis, aliisque suis Prælati, quantum in eis est, non cooperantur, nec prælucent populo sanæ doctrinae radio, & sanctæ conversationis exemplo; ad quod etiam ipso jure naturæ obligantur: una enim est omnibus filiis obligatio communem Matrem fovendi, ejus honorem tuendi, ejus salutem procurandi. Certe Sancta Ecclesia nos omnes in utero suo tum labore portavit, & quamvis sine dolore peperit, ut quæ non tenetur sententia ob inobedientiam primæ Matris in alias omnes prolata, tamen non absque magnis impensis & sollicitudinibus nos hætenus educavit, & in hanc usque ætatem provexit, ab omnibus etiam jure suo reposcit in senectute suam ipsam antipelargiam, qua vicissim portetur, & quotidie generetur, nutriatur & protegatur a nobis: quod cum noverit a singulis præstari non posse, hoc expectat ab omnibus. Quis enim est, qui tanto oneri ferendo se parem agnoscat? Quis montem magnum, qualis Ecclesia Mater nostra est, suis humeris solus gestare possit? Certe sicut non simplex Clericus, non Sacerdos, non Religiosus, ita nec Pastor, nec Abbas, nec Episcopus. Quemadmodum enim generosus & fortis equus, quamvis omnes sui corporis nervos intendat, ut currum irahat per vias rectas, parum promovet, si alii plures etiam minores equi in contrariam partem nitantur: ita parum proficiet Episcopus, Abbas, aut Pastor, etiamsi toti in hoc incumbant, ut salutaribus monitis & aliis curæ Pastoralis officiis dirigant pedes subditorum suorum in viam pacis ac salutis, ni & alii inferioris ordinis Sacerdotes, eundem cursum teneant, & ad eandem metam ardentibus & continuis votis aspirent. Quod ne cui mirum fortasse videatur, rationem subjungam ex magno illo Gregorio, qui ab insigni rerum Divinarum scientia Theologi nomen accepit: is enim oratione funebri in Divum Basilium, & in suo Apologetico notat malitiam sæcunditate excellere probitatem. Ideoque facilius esse exemplis malorum bonos inquinari, quam bonorum stimulis malos ad virtutem impelli. Ergo necesse est, ut quotquot ab Ecclesia nomen habemus, simul eundem Ecclesiæ cursum irahamus, idem Christi jugum portemus, eandem viam, quam ipse nobis & verbo & exemplo monstrare dignatus est, simul omnes

sequamur, ut aliquando ad eandem, quæ nobis omnibus communis est, cœlestem Patriam simul omnes pervenire valeamus. Quod si impedimenta nonnunquam occurrant in via, non ideo desperemus, non Principes, non Pastores nostros, tanquam malos viæ duces, aut culpemus, aut calumniemur, quin potius unusquisque nostrum sibi attribuere & imputare debet, quod in via Domini non progrediatur, quod adverso plerumque flumine naviget, quod etiam publica negotia felices non fortiantur successus, quod Ecclesia ipsa diuturniorem persecutionem patitur, quod hostes ejusdem frequentibus victoriis instantur, quod Tempia Deo ac Divis ejus dicata ab illis profanantur, vastantur, concremantur, quod imagines Sanctorum confringuntur, quod etiam in ipsum Christum impie sævitur, quod Divina & humana jura violantur, denique quod populus fidelis misere affligitur, & quodammodo opprimitur. Hæc omnia, & si quæ sunt graviora mala, sibi merito attribuent etiam viri Ecclesiastici, quoties omni proprio affectu deposito, attente meminisse volent officii sui. Quod enim est Ecclesiasticorum omnium proprium munus, etiam illorum, quibus animarum cura commissa non est? Nonne pro populo orare? pro ejus salute Deo Sacrificia offerre, ipsius iram placare, & pro avertendis a Republica Christiana ejus flagellis, eum assidue deprecari? Et quare preces eorum non exaudiuntur? quare tot Sacrificia, summæ alioquin virtutis & efficaciae, suos, ut olim, hac in parte effectus non operantur? quare post tot supplicationes publicas & privatas, Dei flagella, quæ cessare debuerant, potius in dies augentur & multiplicantur? & adhuc manus ejus extensa, gladiusque evaginatus ex utraque parte acutus, & arcus ejus continue tensus, ac in eo apratae sagittæ non communes, sed quas ipse carbonibus ardentibus effecit, quæ proinde totæ ignitæ sunt, & vera vasa, seu jacula, aut instrumenta mortis? Nonne ideo quia victimæ impiorum abominabiles Deo sunt, & cum is, qui displicet, ad intercedendum mittitur, irati animus ad deteriora provocatur? Nemo ergo jam mihi dicat: ego his malis principium non dedi, nullius hæreseos auctor fui, sed nec hæreticos aut alios impios homines ad sacrilegia illa, cæterosque excessus incitavi. Nam tu qui Prælatus, aut Pastor es, agrum Domini colendum suscepisti, nascentes proinde in animis subditorum tuorum vepres & spinas pravarum opinionum, perversarum affectionum, & quorumcunque vitiorum salutariibus tuis monitionibus, ac bonæ vitæ exemplis, illico extirpare debuisti: excute ergo primo te ipsum, antequam excuses, inter-



roga conscientiam tuam, quomodo in illo agro Domini excolendo, quomodo in illis vepribus, & spinis extirpandis, quomodo in seminandis bonis seminibus, te gesseris. Invenies fortassis te malis illis herbis non minus principium dedisse, quam si illas seminasses, aut plantasses, & tunc colligere poteris, an non aliqua grassantium jam passim hæresum culpa ad te pertineat. Tu vero, qui Sacerdos es, nullam animarum curam gerens, vel etiam simplex Clericus, bonis tamen Ecclesiasticis gaudens, ut minimum Ingruente, aut jam præsentē persecutione, iram Dei adversus populum suum conceptam, tuis orationibus & Sacrificiis, jejniis, ac aliis operibus bonis placare debuisti. Attende igitur, an in eum finem cum Daniele Propheta (b) posueris unquam faciem tuam ad Dominum Deum tuum, ut eum rogares & deprecareris, in jejniis, sacco & cinere: Peccavimus, iniquitatem fecimus, Domine, in omnem justitiam tuam, avertatur, obsecro, ira tua & furor tuus a civitate tua Hierusalem, & a monte sancto tuo: propter peccata enim nostra, & iniquitates Patrum nostrorum, Hierusalem & populus tuus in opprobrium sunt omnibus per circuitum nostrum: nunc ergo exaudi Deus noster orationem servi tui, & preces ejus, & ostende faciem tuam super Sanctuarium tuum, quod desertum est, propter temetipsum inclina Deus aurem tuam, & audi, aperi oculos tuos, & vide desolationem nostram. Attende etiam diligenter, an priusquam orares, aut Sacrificia tua offerres, audieris Dominum per Isaiam tibi, cæterisque Ecclesiæ suæ Ministris dicentem: (i) *Lavamini, mundi estote, auferte malum cogitationum vestrarum ab oculis meis, quiescite agere perverse, discite benefacere, alioqui cum extenderitis manus vestras, avertam oculos meos a vobis, & cum multiplicaveritis orationem, non exaudiam.* Recogita, an Beatissimi Apostoli consilium secutus adieris cum fiducia ad thronum gratiæ Dei, ut misericordiam consequeris, & gratiam invenires in auxilio opportuno: & an juxta Beati Jacobi doctrinam postulaveris in fide nihil hæsitans, alioqui non mirum, si nihil acceperis a Deo, quia, ut D. Bernardus ait, *indignus celesti benedictione esse convincitur, qui Deum dubio querit affectu.* Postremo expende, an ipsius Christi exemplum secutus fueris, qui pernoctabat in oratione Dei, & an viduam severum Judicem interpellantem, & hominem ad amicum suum media nocte venientem, ac commodato tres panes petentem & obinentem; denique an Chananæam mulierem post duram Apostolorum repulsam ad ipsum Christum pro filiae sanitate clamantem, imitatus

fueris, hoc est, an cum perseverantia oraveris, quæ sola impetrat, & sola virtutum coronatur. Quod si aliter ad orandum, & Sacrificia tua Domino offerendum accesseris, non est, quod tibi blandiaris, quasi tu in culpa non sis, quod bellum, & pestis, & caritas rerum omnium, cæteraque Dei flagella tamdiu perseverent, & populus gemat sub pondere miserationum omnium: tuum enim erat, non Episcoporum aut Pastorum tantum, his malis occurrere, ac Dei iram prævenire, aut saltem eundem jam iratum placare. Si vero non tantum hæc neglexeris, sed etiam tuis propriis peccatis eundem ad majorem iracundiam provocaveris, vel sero tandem te tantorum malorum causam agnosce, & oblata tibi a summo Medico efficacissima adversus hos morbos remedia, obviis ulnis amplectere. Sic sane olim Sanctissimus & Clarissimus Martyr & Episcopus Cyprianus Africæ calamitatem & devastationem Presbyteris & Diaconibus suis adscribebat, & imputabat, ut eos ad remedia opportuna quærenda compelleret. Eos enim sic alloquitur: (k) *Intelligendum est & confitendum pressuræ ipsius tam turbidam vastitatem, quæ gregem nostrum maxima ex parte populata est, & adhuc usque populatur, secundum peccata nostra venisse, dum viam Domini non tenemus, nec data nobis ad salutem celestia mandata servamus: fecit Dominus noster voluntatem Patris, & nos non facimus Domini voluntatem, patrimonio & lucro studentes, superbiam sectantes, æmulationi ac dissensionem vacantes, simplicitatis & fidei negligentes, sæculo verbis solis & non factis renuntiantes, unusquisque sibi placentes, & omnibus displicentes. Vapulamus itaque. ut mereamur, cum scriptum sit: Servus qui cognoscit voluntatem Domini sui, & non paruerit voluntati ejus, vapulabit multis. Quas autem plagas, quæ verbera non meremur, quando nec Confessores, qui exemplo cæteris ad bonos mores esse debuerant, teneant disciplinam? Itaque dum quosdam insolenter extollit confessionis suæ tumida & inverecunda jactatio, tormenta venerunt, & tormenta sine fine tormentis, sine exitu damnationis, sine solatio mortis, tormenta quæ ad coronam non facile dimittant, sed tamdiu torqueant, quamdiu dejiciant, nisi si aliquis Divina dignatione substractus, inter ipsa cruciamenta profecerit, adeptus gloriam non termino supplicii, sed celeritate moriendi. Hæc patimur delicto & merito nostro, sicut præmonuit Divina censura dicens: Si dereliquerint legem meam, & in judiciis meis non ambulaverint, si justificationes meas profanerint, & præcepta mea non observaverint, visitabo in virga facinora eorum, & in flagellis delicta eorum. Virgas igitur & flagella senti-*

(b) Dan. 9.

(i) Isaiæ 1.

(k) Epist. 4. Lib. 4.

*Sentimus, qui Deo nec bonis factis placemus, nec pro peccatis satisfacimus.* Hæc S. ille Episcopus de sui temporis persecutione, in qua multi vi ac diuturnitate tormentorum deficiebant a fide, & ideo suis privabantur coronis. Nos vero in hunc usque diem per Dei gratiam, tormenta non superant, sed a nostris vitiis omni tortore crudelioribus turpiter superamur; tormenta quidem vicinorum nostrorum frequenter audimus, & eadem nostris cervicibus impendere non ignoramus, & tamen nec aliorum exemplis erudimur, nec nostris periculis emendamur, sed tales nos exhibemus, quales D. Gregorius (1) Sacerdotes sui temporis describit his verbis: *Nullum puto, Fratres charissimi, ab aliis majus præjudicium, quam a Sacerdotibus tolerat Deus, quando eos, quos ad aliorum correctionem posuit, dare de se exempla pravitatis cernit, quando ipsi peccamus, qui compescere peccata debuimus, nulla animarum lucra quærimus, ad nostra quotidie studia vacamus, terrena concupiscimus, humanam gloriam intenta mente captamus, & quia eo ipso, quo cæteris prælati sumus, ad agenda quælibet, majorem licentiam habemus, susceptæ benedictionis ministerium vertimus ad ambitionis argumentum; Dei causas relinquimus, ad terrena negotia vacamus, locum sanctitatis accipimus, & terrenis actibus implicamur.* Si Sanctissimus ille Pontifex ante annos mille hæc dixit, & vere dixit de Sacerdotibus sui temporis, quid dicturus esset de nobis, qui plura fortassis & pejora committimus, quæ hujusmodi acrem reprehensionem justius mereantur? Quis ergo jam miretur diuturnam Ecclesiæ persecutionem? quis obmurmuret de felici hæreticorum contra Catholicos successu? quis non potius cum B. Hieronymo omnem rei veritatem ingenuè fateatur, & dicat: *Nostris peccatis Barbari & Hæretici fortes sunt, nostris vitiis Catholicus superatur exercitus; infelices nos, qui tantum displicemus Deo, ut per rabiem barbarorum & hæreticorum illius in nos ira deserviat.* Alioqui nunquid abbreviata est manus Domini, ut salvere nequeat, aut aggravata est auris ejus, ut non exaudiat? Sed iniquitates nostræ diviserunt inter nos & Deum nostrum, & peccata nostra absconderunt faciem ejus a nobis. Illud unum nobis reliquum est, ut si Deum metuere in tranquillitate noluimus, cum saltem vel percussionibus attriti timeamus. Quod si & hoc facere renuimus, procul dubio erunt novissima nostra pejora prioribus: plus nempe exacerbatur Deus, ut idem Cyprianus ait: quando nihil talia & tanta proficiunt: nam de eo graviter apud Jeremiam conqueritur: *Sine causa percussi filios vestros, disci-*

*plinam non receperunt.* At nos Reverendi Patres, Charissimi Fratres & Filii, si pœnas illas tam acriter ab ipso comminatas evadere volumus, disciplinam de paterna ejus manu libenter & alacriter recipiamus, agnoscantes nos mereri, quod patimur, & plura mereri, quam patimur; humiliemus ei, non tam corpora, quam animas nostras, hoc signo significantes, nos ab eo expectare remedium, qui intulit damnum. Denique tanquam veræ obedientiæ filii, obviis ulnis amplectamur omnium supralictorum malorum nostrorum remedia, quæ ipsemet per Spiritum suum Sanctum nobis exhibere dignatus est; pulcherrima videlicet & maxime salutaria Generalis Concilii Tridentini Decreta, eadem non tam memoriæ nostræ imprimamus, quam moribus nostris exprimamus, ad eorum normam totius vitæ nostræ cursum componamus, & alios, ut hoc ipsum præstent, serio & frequenter exhortemur: habemus in illis optima & sufficientia ad bene beateque vivendum Divinitus nobis tradita præcepta; non enim sine singulari Dei providentia factum est, ut celeberrimum illud Concilium tanto zelo a Paulo III. Summo Pontifice inchoatum, & injuria temporum toties intermissum, tandem aliquando, & quidem in diebus nostris a Pio IV. felicissime fuerit absolutum & confirmatum, ac ejus jussu per totum orbem Christianum publicatum. Quod summi beneficii loco omnes accipere, & pro eo summas quoque Deo Opt. Max. gratias agere debemus. Hic ergo sit præcipuus noster scopus in hac solemni Congregatione, ut Decreta illius, quæ hætenus in hac Dicecesi per Dei gratiam observata fuerunt, imposterum adhuc exactius ab omnibus observentur; quæ vero variis ex causis in hunc usque diem executioni demandata non sunt, conjunctis animis & viribus procuremus, ut quanto citius fieri poterit, debitæ executioni demandentur. Si quæ etiam alia sint, quæ pro felici directione hujus Dicecesis digna sunt hoc confesso, convenienti ordine proponentur, & super omnibus ac singulis omnium vota ac suffragia exquirentur. Vestrum erit, Reverendi Patres, & Filii Charissimi, qui pro salute universæ Ecclesiæ, & maxime particularis istius, quæ mihi commissa, & vobis tanquam in partem sollicitudinis meæ vocatis, commendata est, huc convenistis, toto hoc tempore, quo in hanc curam maximè sane momenti, simul incumbemus, purgatis primum ab omni sorde peccati vestris mentibus, modestiæ, sobrietatis, castitatis, & pacis, seu mutuae concordiae exemplis, omnibus prælucere, nec non assiduis, & ab humili ac contrito corde profectis precibus Spiri-

(1) Homil. 17. in Luc.

Spiritum Sanctum invocare, ut huic congregationi præsideat, ut nos in omnibus propositionibus, consiliis ac resolutionibus nostris ad maiorem Sanctissimæ Trinitatis gloriam, & veram Ecclesiæ utilitatem dirigat; denique ut lucem suam cordibus no-

stris infundat, qua ea, quæ agenda sunt, sine ullo errore videamus, & ad implenda, quæ viderimus, fortes & alacres, ejus quoque dono efficiamur. Quod nobis concedat, & vos benedicat, qui est benedictus in sæcula sæculorum. Amen.

## INDEX TITULORUM SUBSEQUENTIS SYNODI.

- |   |   |
|---|---|
| <p><i>TIT. I. De Professione Fidei, &amp; eam conservandi studio.</i></p> <p><i>II. De Scholis Parochialibus &amp; Dominicilibus.</i></p> <p><i>III. De Seminario Clericorum.</i></p> <p><i>IV. De Officio Divino.</i></p> <p><i>V. De diebus Festis &amp; Jeuniis.</i></p> <p><i>VI. De Sacramentorum administratione.</i></p> | <p><i>VII. De prima Tonsura, Minoribus &amp; Sacris Ordinibus.</i></p> <p><i>VIII. De vita &amp; honestate Clericorum.</i></p> <p><i>IX. De Canonicis, Decanis ruralibus, Pastoribus &amp; Matriculariis.</i></p> <p><i>X. De Regularibus &amp; Monialibus.</i></p> <p><i>XI. De Bonorum Ecclesiasticorum conservatione.</i></p> <p><i>XII. De Visitatione.</i></p> |
|---|---|

## DECRETA SYNODI DIOECESANÆ NAMURCENSIS, ANNO DOMINI M.DC.IV. IN ECCLESIA CATHEDRALI CELEBRATÆ,

*Præsidente Reverendissimo in Christo Patre ac Domino, D. FRANCISCO BUISSET, Episcopo Namurcensi.*

### TITULUS PRIMUS.

*De Professione Fidei, & eam conservandi studio.*

#### CAPUT PRIMUM.

**P**Ræmissa per Nos & universam hanc Synodum in nomine Sanctæ & Individuæ Trinitatis congregatam, publica Fidei Catholicæ & Apostolicæ Professione, juxta formam Constitutionis felicitis recordationis PII Papæ Quarti, ut eadem fides, quæ hætenus per Dei gratiam in hac nostra Diocesi pura & illibata permansit, nostris etiam & futuris temporibus ab omni hæresum infectione præservetur: insequendo saluberrimum Generalis Concilii Tridentini Decretum, statuimus & ordinamus, ut similis Fidei professio fiat ab omnibus, quibus deinceps in hac nostra Diocesi de Dignitatibus, sive Regularibus, sive Sæcularibus, Canonicatibus, & aliis quibuscunque Beneficiis Ecclesiasticis curam animarum habentibus providebitur, idque in manibus nostris, vel coram Generali nostro Vicario, seu

Officiali, alioquin fructus non faciant suos, nec illis possessio suffragetur.

#### CAPUT II.

Eandem Fidei professionem facient, quicunque ad Sacros Ordines promovebuntur, & omnes, qui posthac ad Synodum Diocesanam convenient, & præcedenti non interfuerint, & qui in hæresim lapsi ad Ecclesiæ gremium revertentur.

#### CAPUT III.

Concionatores vero & Confessarii, cum ad prædicandum Verbum Dei, vel confessiones audiendas admittentur, Ludimagistri, Typographi & Bibliopolæ, fidem suam proferri poterunt sub hac breviori forma. Ego N. omnia & singula, quæ continentur in Symbolo fidei, quo Sancta Romana Ecclesia utitur, & quæ a Sacris Canonibus, & Generalibus Conciliis, & præcipue a Sa-

cro-



crofancta Tridentina Synodo tradita, definita & declarata fuerunt, indubitanter recipio atque profiteor, nec non Romano Pontifici Summo in terris JESU Christi Vicario veram obedientiam spondeo ac juro, simulque hæreses omnes ab Ecclesia damnatas & rejectas ego pariter damno & rejicio. Sic me Deus adjuvet, & hæc Sancta Dei Evangelia.

## CAPUT IV.

Scabini autem, seu Senatores tam pagorum, quam urbium, aliæque publicæ personæ in Ediçto piæ memoriæ PHILIPPI Secundi, Hispaniarum Regis, specificatæ, profiteantur fidem suam juxta similem formulam ibidem ad instantiam novissimi Concilii Provincialis Cameracensis insertam.

## CAPUT V.

Quia vero parum prodesset Superiores ac Præfectos fidem Catholicam profiteri, ni & populus universus a teneris annis eam imbibat, & ipsorum Superiorum vigilantia in eadem sincere & sedulo perseveret, monemus Prælatos omnes ac pastores, ut per se ipsos, aut alios viros doctos, Articulos fidei, Orationem Dominicam, Salutationem Angelicam, præcepta Decalogi, & Sanctæ Matris Ecclesiæ, & omnium Sacramentorum doctrinam populis sibi commissis frequenter explicant, & diligenter advigilent, ne ullus lusus inter oves versetur aut latitet, quod nulla meliori ratione deprehendent, quam si studeant cognoscere vultum pecoris sui, frequentiusque visitent domos & familias suorum subditorum, nec non singulis annis universos suæ curæ commissos doli capaces describant, & in Paschate Eucharistiæ Sacramentum non aliis, quam sibi confessis, aut alicui ex Confessoribus approbatis, administrent, & de ipsa confessione aliis facta fidem scriptam exigant, quam ipsi Confessores dare tenentur. Quod si qui tempore paschatis abfuerint, quousque in propria Parochia Eucharistiam sumant, nisi fidem authenticam adferant, quod alibi eam sumpserint, cum iis, qui non sumpserunt, ab Ecclesia arceantur vivi, & morientes careant Ecclesiastica sepultura, juxta Cap. *Omnis utriusque sexus. De Penit. & Remiss.*

*Tomus VIII. Concilior. German.*

## CAPUT VI.

Cum autem periculosius sit venenum, quod auribus, quam quod ore hauritur, non sufficit, quod populus sana doctrina instruatur, nisi etiam librorum, quorum lectio ei conceditur, diligens ratio habeatur: quocirca præcipimus Decanis & Pastoribus, ut sedulo intendant Librariis & Bibliopolis, ne ullos libros in suos districtus inferant, aut venales exponant, antequam eorum Catalogus sit a Nobis, aut nostris Vicariis approbatus. Ipsi vero Librarii & Bibliopolæ, præter supradictam Fidei professionem, juramentum præstent de non invehendis, nec secreto distribuendis libris prohibitis.

## CAPUT VII.

Et quoniam pestiferi quoque sunt libri, qui continent magicas præstigias, diabolicas artes, & varias superstitiones, prohibemus etiam eos versari in manibus nostrorum Diœcesanorum, eosque frequenter doceri volumus a Prædicatoribus & Pastoribus, quam grave peccatum sit lectione ejusmodi librorum, ac multo magis praxi eorum, quæ continent, Christianum hominem occupari. Quod si nihilominus aliquos deprehenderint, qui hoc parvi pendentes, ejusmodi libros penes se habeant; & semel moniti eos dimittere nolint, Nobis significant, prout & eos, qui Sacra Biblia vulgari lingua penes se habent, absque nostra, aut Deputatorum a Nobis in scriptis obtenta facultate.

## CAPUT VIII.

Eos vero, qui morbos aut vulnera tam hominum, quam brutorum animalium superstitionis remediis, quæ expressum vel implicitum pactum cum dæmonibus continent, curare præsumunt, vel ut in rerum deperditarum notitiam deveniant, divinatores consulunt, seu alias superstitionibus utuntur, juxta Sacros Canones & Decretum prædicti Concilii provincialis Cameracensis excommunicatos in suis concionibus, publice denuntient, & gravitatem hujus delicti, quia hodie frequens est, frequenter suis subditis & auditoribus exponant, & si quos hoc vitio notatos norint, eosdem privatim mon-

H h h h

neant,

neant, in quam periculoso salutis suæ statu versentur, & ad confitendum peccata sua, petendumque beneficium absolutionis a dicta excommunicatione eos hortentur. Quod si hujusmodi salutarem monitionem contemnant, Nobis deferantur.

## TITULUS II.

### *De Scholis Parochialibus & Dominicalibus.*

#### CAPUT I.

**P**Lurimum interest ad Catholicam Fidem conservandam & propagandam, ut recte instituaturs juvenus, quæ, ut eleganter dixerunt Patres Generalis Concilii Tridentini, nisi a teneris annis ad pietatem & religionem informetur, antequam vitiorum habitus totos homines possideat, nunquam perfecte ac sine maximo & singulari propemodum Dei Omnipotentis auxilio, in disciplina Ecclesiastica perseverat: proinde optamus in omnibus Diocesis nostræ urbibus ac pagis, Scholas Parochiales, quæ injuria temporum collapsæ sunt, quantocyus fieri poterit, restitui. Quod ut fiat, Pastores, Magistratus, & notabiliores singularum parochiarum personæ moneantur a Decanis, in proxima sua visitatione, ut conjunctis animis & viribus serio inter se agant, de inveniendis & præceptoribus assignando justo stipendio, quo mediante si fieri potest, doceantur gratis, sic enim fiet, ut a parentibus pueri lubentius ad Scholas mittantur, eos etiam hortentur, ut in eum finem confraternitates erigant, quas Nos libenter & approbavimus, & Sacris Indulgentiis donabimus.

#### CAPUT II.

Præceptores autem non alii assumantur, quam qui probatæ sint fidei, vitæ & doctrinæ, qui prævio sui Pastoris testimonio a Nobis, aut Decano Concilii sui ad hoc munus admittantur, ac juxta formam præscriptam ipsius, fidei sui professionem præstent, nec aliter, quam servatis præmissis omnibus, in Diocesi nostra quisquam docere permittatur.

#### CAPUT III.

Hunc servabunt ordinem in docendo. Primum assuefacient pueros discere & perfecte recitare Orationem Dominicam, Salutationem Angelicam, Symbolum fidei, decem præcepta Dei, & quinque Ecclesiæ, septem Sacramenta, & septem peccata mortalia: & si eos capaces invenerint, ulterius pergent ad reliqua capita doctrinæ Christianæ.

#### CAPUT IV.

Deinde docebunt eos formulam peccata sua confitendi, ac mane ac vespere orandi, nec non modum respondendi Sacerdoti, & eidem inserviendi Sacrosanctum Missæ Sacrificium peragenti. Quæ dum pueri exacte norint, poterunt eosdem docere artem legendi & scribendi. Quod si aliqui dictorum præceptorum aliter fecisse, vel vitæ scandalosæ esse deprehendantur, si primum a pastore moniti non resipuerint, docendi facultate priventur.

#### CAPUT V.

Dictæ Scholæ sæpius visitentur in urbibus a Scholasticis Ecclesiæ nostræ Cathedralis, & Collegiatarum Ecclesiarum, & in pagis a Decanis Conciliorum ruralium, qui de præmissis omnibus, an observentur, diligenter inquirent, libros, qui docentur, visitent, pueros examinent, & si quos defectus aut excessus deprehendant, ad Nos referant. Curent iidem cum Pastoribus locorum, ut, quantum fieri poterit, separatim a pueris puellæ instituantur per honestas matronas, quæ teneantur etiam fidem suam profiteri, & reliqua observare, quæ Ludimagistri.

#### CAPUT VI.

Porro cum habenda sit non minor ratio salutis pauperum, quam divitum, in illorum gratiam juxta Decretum dicti Concilii provincialis erigi volumus & mandamus Scholas Dominicales; ut minimum in hac Civitate, & omnibus oppidis ac celebrioribus pagis, ad quas venire compellantur omnes pueri, qui diebus ferialibus parochiales illas Scholas non frequentant, doceanturque prædicta omnia doctrinæ Christianæ

næ capita, ad salutem unicuique necessaria. Quæ Scholæ Dominicales ut magis frequententur, non solum ab ipsa juventute, sed etiam a præcipuis viris & matronis, qui eas sua auctoritate sustentare, ac suis divitiis dotare possint, erigantur Sodalitates doctrinæ Christianæ, quibus adscripti Sacris Indulgentiis a variis Pontificibus concessis, & a Nobis quoque auctoritate nostra ordinaria concedendis, frui & gaudere possint.

## CAPUT VII.

Ne qui vero sint, five parentum, five puerorum, qui tam salutare opus negligant aut contemnant, visitentur familiæ singulorum a Præfectis ejusmodi Sodalitatum, ubi illæ erectæ fuerint, alias a Pastore, aut Ludimagistro cujusque loci, adjuncto uno ex Magistratu: & Catalogus conficiatur puerorum & puellarum cujusque familiæ, quo absentes facile cognosci & puniri possint, etiam subtractione elemosynarum, quæ in singulis locis pauperibus assignari & distribui solent.

## CAPUT VIII.

Ubi commoditas non erit erigendi ejusmodi Sodalitates, Pastor loci, una cum Capellanis suis & vicinorum locorum, ac Ludimagistris, hanc provinciam subeat, & si quis (quod absit) Pastor legitime non impeditus, tam præclarum pietatis & veræ charitatis opus facere neglexerit, unius floreni mulctam ad opus fabricæ Ecclesiæ suæ, toties, quoties a Decano in sua visitatione irremissibiliter exigendam, incurrat. Capellani vero, quibus hoc ipsum in virtute sanctæ obedientiæ, quam Nobis in sua ordinatione præstiterunt, injungimus, si hac in parte fuerint refractarii aut negligentes, arbitrio nostri Officialis puniantur.

## CAPUT IX.

Quo tempore fiet hæc puerorum institutio, abstineatur in plateis a tripudiis, & a lusus, quibus avocari possent pueri ab hac utilissima lectione doctrinæ Christianæ, & impleretur ad hoc auxilium brachii secularis.

## TITULUS III.

## De Seminario Clericorum.

## CAPUT I.

**M**aximum quoque præsidium conservandæ Catholicæ Religionis, & restituendæ Ecclesiasticæ disciplinæ dicti Patres Concilii Tridentini in Clericorum Seminario collocarunt, quod tanto studio omnibus Episcopis, Archiepiscopis, & his Majoribus commendarunt, ut si negligentes hac in parte fuerint, Episcopos ab Archiepiscopis, Archiepiscopos ac Superiores a Synodo Provinciali acriter corripere, & ad omnia, quæ ea de re præscribunt adimplenda cogi velint. Ne Nos itaque in re tanti momenti, & quæ usque adeo cordi fuit sanctæ illi congregationi, quæque Ditecesi nostræ est pernecessaria, officio nostro defuisse videamur, de consensu hujus Synodi declaramus, hujusmodi Seminarium in loco convenienti a Nobis eligendo, quanto citius fieri poterit, erigendum, nec non ad ejusdem fabricam instituendam, & ad mercedem Præceptoribus & Ministris solvendam, & ad alendam juventutem, & ad alios sumptus juxta præscriptum ejusdem Concilii ex fructibus mensæ nostræ Episcopalis, & Capituli Ecclesiæ nostræ Cathedralis, & quarumcumque dignitatum, personatum, officiorum, præbendarum, portionum, Abbatiarum & Prioratum, & Hospitalium, quæ dantur in titulum vel administrationem, & quorumcumque Beneficiorum, nostræ aut nullius Ditecesis, cum consilio duorum de Capitulo Ecclesiæ nostræ Cathedralis, & duorum de Clero, sexagesimam partem vel portionem detrahendam, & huic Seminario applicandam & incorporandam: quæ tamen in totum vel in parte remitteretur aut diminueretur, cum Seminarium ipsum per viam unionis simplicium beneficiorum, vel aliter in totum vel in parte dotatum fuerit.

## CAPUT II.

Dicto Seminario non alius præficietur, quam qui sit Sacerdos, & si commode reperiri possit, Sacræ Theologiæ, aut Juris Canonici Doctor aut Licentiatus, qui Catechismum aut casus



conscientiæ juventutem docere possit, promittatque in sua receptione se singulis annis coram Nobis, aut Vicario nostro, & Cleri & Capituli deputatis, totius suæ administrationis rationes fideliter redditurum. Cui ultra victum suum cum bursariis communem, in singulos annos competens honorarium assignabimus: Professoribus quoque certum stipendium annum concedetur, ut juvenus gratis & absque ullo parentum sumptu docere possit.

### CAPUT III.

Bursariorum, qui ibidem alentur, numerus constituetur, pro modo facultatum ipsius Seminarii, nonnullis aliis in diminutionem suarum expensarum erogabuntur triginta aut quadraginta floreni communi suffragio omnium deputatorum; ita tamen, ut pauperum filii juxta ordinationem dicti Concilii Tridentini, cæteris paribus, aliis præferantur.

### CAPUT IV.

Dicti Bursarii sint sexdecim ad minus annorum, & de legitimo Matrimonio procreati, ex nostra Diocæsi oriundi, Clericali tonsura insigniti, & ut Sacrorum Ordinum capaces esse possint, nullum in manibus, aut alia corporis parte notabilem defectum habentes, qui præter studia literarum, doceantur cantum Gregorianum, computum Ecclesiasticum, homilias Sanctorum, ritum & formam tradendorum Sacramentorum, cæterasque cæremónicas Ecclesiasticas, habita tamen diligenti ratione capacitatis eorundem, ne ingenia lectionum multitudine obruantur; singulis diebus intersint Missæ Sacrificio, & singulis, ut minimum, mensibus peccata sua confiteantur, & juxta Confessoris judicium Corpus Domini nostri JESU CHRISTI sumant, & Sacerdotibus Missæ Sacrificium celebrantibus cum superpelliceo diebus festis inserviant.

### CAPUT V.

In dicto autem Seminario remanebunt, donec studia bonarum literarum abolverint, postea ad Universitatem Studii generalis sumptibus ejusdem Se-

minarii mittentur illi, de quibus spes sit, quod in Philosophiæ ac Sacræ Theologiæ studiis insignem fructum facient, quo Ecclesiæ Dei utiliores esse possint: reliqui simul atque ætatem a Sacro Concilio Tridentino præscriptam attingerint, ad Sacros Ordines suscipiendos mittentur, & ea munia Ecclesiastica sine ulla contradictione amplectentur, ad quæ obeunda nostræ, aut Successorum nostrorum judicio idonei judicabuntur, quod se facturos sub pœna refusionis expensarum, quas in ipso Seminario fecerint, in sua ad bursam admissionem promittent.

## TITULUS IV.

### De Officio Divino.

#### CAPUT I.

Cum jamdiu Ecclesia nostra Cathedralis Romani Officii usum receperit, & secutæ fuerint plures Collegiæ: mandamus, ut juxta Decretum Concilii provincialis Cameracensis reliquæ Collegiæ, & omnes Ecclesiæ parochiales eundem usum suscipiant, & sequantur. Quod ut minore sumptu fieri possit, de consensu totius hujus Synodi, typis excudatur Summarium Antiphonarii, & Gradualis Romani cum suis notis, quod omnia, quæ Pastoribus necessaria sunt, pro utrisque Vesperis & summa Missa Dominicorum & Festorum dierum complectatur, quod simulatque excusum fuerit, interdiciamus omnibus Rectoribus Ecclesiarum parochialium Diocæsis nostræ, tam Regularibus, quam secularibus, ne alio Officio utantur, sub pœna unius scuti aurei, in manus Decanorum, quoties suas visitationes facient, consignandi, & arbitrio nostro piis usibus applicandi. Dicta vero Summaria sumptibus eorum, qui ad libros præstandos ex consuetudine locorum tenentur, pro singulis Ecclesiis comparentur.

#### CAPUT II.

Quo pacto autem sit persolvendum Divinum Officium, ipsum nomen satis indicat, significans, quod eo tempore negotium nobis sit cum Deo ipso, quem in cœlis laudant Angeli, adorant Dominationes, tremunt Potestates. Unde

Unde cum procul abesse debeant a Christianis hominibus, dum in Dei laudibus occupantur, omnes irreverentiarum, confabulationes, deambulationes, cæteraque ejus generis, non solum ordine Ecclesiastico, sed etiam Christiano nomine indigna, præcipimus, ut in parochialibus Pastor severe prohibeat ejusmodi abusus, etiam sub pœna pecuniaria fabricæ Ecclesiæ applicanda, cujus executionem, si Pastor ipse eam exequi non possit, Officiali nostro committimus. In Cathedrali vero & Collegiatis Ecclesiis, præter Decanum, aut eum, qui de jure aut consuetudine oculus Chori esse solet, duo Canonici vicissim designentur, qui omnibus diei Horis intersint, defectus observent, insolentias compescant, & delinquentes signo aliquo officii sui admoneant, & monitionem contemnentes ad Capitulum deferant, qui statim ad capitularem congregationem evocentur, & arbitraria pœna castigentur. Quod si Canonici ad hoc deputati a Choro simul abesse cogantur, aliis idoneis vices suas mandent, alioquin & ipsi moneantur, & si monitionem quoque contemnant, tota hebdomada suis distributionibus priventur.

## CAPUT III.

Potissimum autem, dum Sacrosanctum Missæ Sacrificium peragitur, tam a Clericis, quam a Laicis summam reverentiam, silentium, devotionem, & humilitatem requirimus; optaremusque omnes eidem assistere genibus flexis a principio usque ad finem, saltem in Missis privatis, excepto dum ad Evangelium assurgitur; sed si hoc populo persuaderi non potest, moneatur tamen sæpius a pastoribus & prædicatoribus non probari a nobis eam consuetudinem, qua plerique ante consecrationem in genua procumbentes paulo post assurgunt, & reliqua Sacrificii parte etiam sedere præsumunt, quod admodum indecorum est, præsertim quamdiu immaculata illa Hostia permanet in altari, seque ipsam offert Deo Patri in remissionem peccatorum nostrorum. Quapropter ut dicta corruptela penitus aboleatur, jubemus statim post præfationem, dum Sacerdos dicit:

*Sanctus, Sanctus &c.* sono campanulæ admoneri populum, procumbendum esse in genua, nec assurgendum, donec Christi Sanguinem sumpserit, nec etiam prius extinguantur cædæ, quæ in plerisque locis ex laudabili consuetudine ad elevationem Sacræ Hostiæ accenduntur. Quod ut facilius usu recipiatur, concedimus omnibus toto illo tempore genibus flexis orantibus, decem dies Indulgentiarum.

## CAPUT IV.

Non est ferendus abusus, quo pauperes per Ecclesias mendicare permittuntur, quod dum faciunt, & ipsi in locis sacris irreverentia peccant, & aliorum devotionem frequenter interturbant: quapropter omnibus Ecclesiarum Superioribus præcipimus, ut aliquem constituent, qui particularem curam suscipiat dictos pauperes ab Ecclesia repellendi; etiam ipsi assignato, si opus fuerit, certo stipendio ex mensis pauperum, aut bonis fabricæ. Quod ut eo promptius exequantur, quo intelligent rem Deo gratam se facturos, hic adjiciendum duximus extractum Bullæ Summi in terris Christi Vicarii, & Sanctissimi Pontificis PII V. datæ Romæ Kalendis Aprilis anno 1566. qua idem districte præcipit hujusmodi sub tenore: *Mandamus præterea omnibus & singulis Cathedralium, Collegiarum & Parochialium Ecclesiarum Capitulis, Rectoribus, Vicariis, Sacristis, Ostiariis, & aliis ipsarum Custodibus, quatenus præfatos omnes in Ecclesiis delinquentes admoneant, & ut in eis vetita fieri non permittant, vel saltem ipsis Ordinariis, vel Officialibus nostris puniendos deferant, quod si facere neglexerint, penam duorum aureorum vice qualibet incurrant. Pauperes quunque mendicantes, seu elemosynas petentes, per Ecclesias tempore Missarum, prædicationum, aliorumque Divinorum Officiorum ire non sinant, sed eos ad valvas Ecclesiarum stare faciant, sub pœna duorum aureorum Capitulis infligenda pro qualibet vice, nisi eos ejici curaverint, & Parochis dimidii aurei. Religiosis vero claustralibus, sive Regularibus præcipimus in virtute sanctæ obedientiæ, ut in Ecclesiis suis deputent aliquem, qui tales ejiciat, & si negligentes fuerint, gravissime ab Ordinario corripiantur, quod si illi parere recusaverint, gravissimas pœnas incurrant, &*

*pro qualitate personarum etiam corporaliter punientur arbitrio vestro, siue Superiorum suorum.*

#### CAPUT V.

Sacerdos vero dum ad illud Augustissimum Missæ Sacrificium Deo offerendum accedit, neque in sua præparatione ac vestitione, & calicis, corporalis ac Missalis dispositione, neque in verborum pronuntiatione, ulla unquam præcipitatione utatur, sed eam semper præ se ferat in vultu maturitatem, in gestibus reverentiam & gravitatem, in loquela aut cantu modestiam & attentionem, quæ illum decet, qui Christi personam non solum coram hominibus, sed maxime coram Deo & Angelis ejus repræsentat.

#### CAPUT VI.

Nullus Sacerdos Missam celebrare præsumat, nisi eam ante præviderit, sintque hæc omnia ante præparata, candelæ, si facultates Ecclesiæ ferant, ad minimum duæ accensæ super altare, corporale mundum cum simili purificatorio, calix si non aureus semper aut argenteus, propter quotidiana variis in locis hostium aut latronum pericula, certe stanneus, sed mundus integer & rectus, mantile aut linteolum pariter mundum ad detergendas manus, panis integer & incorruptus, vinum recens, & aqua pura disposita in urceolis. Quod si quis his non præparatis Missam inchoare præsumpserit, aut eandem cum calice seu patena aliqua ex parte ruptis, vel corporali aut purificatorio immundis celebraverit, denique ad mappam altaris manus suas deterferit, aut mantili sordido usus fuerit (cum etiam minimi defectus graves sint in re maximi momenti) ab Officiali nostro graviter puniatur. Et quia res est plena periculi, si quis vino, quod facile accescit, ad multos dies extra vas servato utatur, expedit, ut Pastores pagorum, quibus non est vinum recens ad manum, convenient cum decimatoribus, qui ad illud ministrandum tenentur, in singulos menses, aut pro integro vel medio anno, & sibi ipsi comparent vinum optimum, si fieri potest, Hispanicum, quod recondant & asservent in vasculis convenientibus, aut

lagenulis bene obseratis, seu alio convenienti modo provideant, ne vino acetoso uti unquam cogantur. Quod si faciant, graviter eos peccare declaramus, & si resciri possit, condignis poenis puniri ordinamus.

#### CAPUT VII.

Duas vero in die Missas celebrare nemo audeat, nisi licentia in scriptis obtenta, ne quidem prætextu supplendi defectum Parochi vicini, absentis, aut ægroti, ejusdem, vel alterius Diocesis: sed hoc casu parochiani ad vicinam Ecclesiam Missæ audiendæ gratia accedant, aut Pastor ægrotus vel absens tempestive provideat de alio Sacerdote, vel si nullo modo reperiatur, dictam licentiam a Nobis, aut Vicario nostro impetret cum causæ cognitione.

#### CAPUT VIII.

Non sine causa Episcopus Sacerdotes omnes recenter a se ordinatos diligenter admonet, ut honeste totius Missæ ordinem, & Hostiæ consecrationem & fractionem ab aliis jam doctis Sacerdotibus discant, priusquam ad celebrandam Missam accedant. Quia tamen experientia cognovimus, sæpe eos deligi Sacerdotes, qui magis egerent doceri, quam docere, cum ipsimet in cæremoniis ac ritibus, præsertim Romanæ Ecclesiæ, parum sint exercitati, scimusque difficillimum esse ab iis, quibus primum quis assuevit, se se revocare; decernimus omnes, qui deinceps in hac Diocesi ordinabuntur Sacerdotes sæculares, assumere debere unum ex Deputatis a Nobis in unoquoque Decanatu, a quo instructionem & perfectam intelligentiam hauriant omnium cæremoniarum, & aliarum observationum, quæ a nullo Sacerdote ignorari debent. Cæteris Sacerdotibus interdiciamus, ne huic muneri se immisceant, ut aliquando omnes iisdem plane ritibus & cæremoniis in re tanti momenti utantur, quod hac ratione, & non alias brevi futurum speramus.

#### CAPUT IX.

Quemadmodum indecorum est, Sacerdotem usque adeo alta voce Missam legere, ut alios in eadem Ecclesia celebran-



lebrantes conturbet: ita indecens est, ipsum tam submissa voce loqui, ut a nemine circumstantium intelligatur. Servanda ergo in his mediocritas, & quidem vox ita temperanda, ut cum Sacerdos ad ea, quæ secreto dici debent, pervenerit, ea sic pronuntiet, ut distinctum quidem verborum sonum ipse percipiat, at nulla ratione ab aliis intelligatur: Canonem vero maxima cum modestia, & attentione pronuntiet, ac præsertim Sacrosancta illa verba, quibus Corpus & Sanguis Christi conficitur, quæ nullus unquam memoriter recitare præsumat, sed vel ex ipso Missali, vel ex tabella, quæ in multis altaribus non inutiliter oculis Sacerdotis opponi solet, quod ex gravibus causis animum nostrum moventibus, omnibus tam Regularibus, quam sæcularibus Sacerdotibus, in virtute sanctæ obedientiæ, quam Nobis in sua ordinatione promiserunt, & sub pœna arbitria præciendum duximus.

## CAPUT X.

Insequentes ordinationem Concilii Tridentini interdiciamus, ne quis vagus & ignotus Sacerdos in hac nostra Dicecesi ullo modo Missam celebrare permittatur, nisi exhibitis sui Ordinarii dimissoriis literis, & si a propria Dicecesi diu absens, & in alia commoratus fuerit, etiam Ordinarii illius literas testimonium suæ honestæ conversationis continentes, exhibere teneatur. Qui ejusmodi vagum & ignotum Sacerdotem, non visis prædictis, aut nostris literis, admiserit, unius floreni mulctam fabricæ Ecclesiæ applicandam incurrat.

## CAPUT XI.

Si quis Sacerdotum (quod absit) impuro concubinato infamis, aut cum pridie remulentus notabile scandalum dederit, Sacrosanctum Missæ Sacrificium celebrare præsumperit, ad integrum mensem ab ejusdem Sacrificii celebratione suspendatur. Qui enim Sacra illa Mysteria sic tractat, Deum, quem tanto Sacrificio debuerat sibi & populo reddere placatum, ad iram magis provocat, & ipse reus efficitur Corporis & Sanguinis Domini.

## CAPUT XII.

Verum quia plerumque accidit, ut ejusmodi scandala ac crimina, neque ad nostram, neque Vicariorum nostrorum notitiam deveniant, districte præcipimus talium Sacerdotum Confessariis, ut pro meritis eos graviter increpent, & satisfactionem illis tanta irreverentia dignam injungant. Quod si in tali præsumptione perseverent, denegent eis tanquam impœnitentibus benedictionem absolutionis, donec ex animo resipuerint.

## CAPUT XIII.

Missæ Parochiales a Festo Paschæ usque ad Festum Sancti Remigii circa horam octavam ubique celebrentur: a Festo vero Sancti Remigii usque ad Pascha circa horam nonam, sub pœna suspensionis a Divinis, Pastoribus contravenientibus, juxta Decretum prædicti Concilii Provincialis Cameracensis, infligenda. Vesperas quoque, ob causas animum nostrum moventes, in omnibus Ecclesiis parochialibus quovis tempore eadem hora, nempe secunda pomeridiana decantari ordinamus. Nec ullum Pastorem ab illis decantandis excusari hoc prætextu, quod medias, ut vocant, Ecclesias, aut quartas Capellas duntaxat possideant. Diebus enim Dominicis & Festivis omnes ad hoc obligari declaramus, & sic a nostris Officialibus judicari præcipimus.

## CAPUT XIV.

Qui contra laudabilem hujus Dicecesis consuetudinem, in præcipuis anni Festivitatibus Ecclesiam suam Parochialem non frequentant, aut tribus continuis Dominicis diebus a Missa Parochiali absunt, admoneantur primum a suis Pastoribus, & si monitionem contemnant, citentur coram Officialibus nostris, & in aliquam emendam, fabricæ Ecclesiæ ejusdem applicandam, eorundem arbitrio condemnentur, nisi ob causam rationabilem excusentur.

## CAPUT XV.

De his omnibus, an exacte per totam Dicecesim observentur, Reverendus Dominus Archi-Diaconus, & Decani Conciliorum in suis visitationibus

bus se diligenter informant, & ad Nos deferant, quos invenerint defectus aut excessus, ut coram Nobis, aut Vicario nostro delinquentes evocati, rationem reddant suæ negligentiae aut contemptus.

## TITULUS V.

### *De diebus Festis & Jejniis.*

#### CAPUT I.

**S**ummopere dolendum est, iis diebus, qui ad Divinas laudes decantandas, & ad peccatorum veniam impetrandam instituti sunt, fideles Christi ad graviora scelera committenda, Divinamque iram magis incitandam nefarie abuti: ideoque sæpe & graviter reprehendant Pastores & Prædicatores abusum illum, quo plerique a servili quidem opere Festis diebus abstinere, sed majorem illorum partem deambulationibus, lusibus, comestationibus, & choreis impendunt, cum econtra ideo cessandum sit ab omni opere servili, ut universus populus absque ulla distractione orationi vacet, & Missæ Sacrificio, ac cæteris Divinis Officiis, nec non Sacris Concionibus diligenter interfit.

#### CAPUT II.

Quare ut supradicta impediuntur, & avaritia quoque eorum mercatorum, qui iis diebus merces suas vendere præsumunt, nec non agricolarum, aurigarum, nautarum, molitorum, pistorum, piscatorum, & aliorum ejus generis hominum, qui absque notabili necessitate & licentia suas operas exercent, coerceatur; præcipimus Promotoribus nostris, ut diligenter advigilent, quo in prædictorum abusu notitiam devenire possint, authores coram Officialibus nostris citari curent, qui eos pecuniariis pœnis, piis usibus applicandis, puniant. Magistratus autem urbium, & Ballivos, Majores, aliosque in pagis justitiæ Præfectos, paterno affectu rogamus, ut juxta Edictum Regium his etiam malis sua autoritate mederi omnibus modis annituntur: ac præsertim tempore summæ Missæ & Vesperarum, deambulationes in foro, aut aliis locis pu-

blicis, potationes in tabernis, lusus in sphæristeriis, venditiones carniū in macellis, non permittant, majores urbium portas clausas teneant, nec currus oneratos mercibus ullo pacto diebus Dominicis ac Festis egredi, multo minus iis diebus a rusticis grana ad publicum forum adduci, & ea vendendi patiantur: sed si in consuetum ac ejusmodi publicæ venditioni præfixum diem, Festum aliquod inciderit, uti & nundinæ similiter incidentes, in sequentes dies, juxta præfatum Edictum Regium transferantur. Gratuitæ vero operæ Dominis a colonis suis præstari solitæ, quas vulgo *Cornées* vocant, iis quoque diebus, nisi in casu necessitatis, & habita Superiorum licentia, non præstentur.

#### CAPUT III.

Festi autem dies ultra Dominicos per universam hanc Diocesim nostram solemniter observandi hi sunt: Dies Nativitatis Domini nostri Jesu Christi. S. Stephani Protomartyris. S. Joannis Evangelistæ. Sanctorum Innocentium. Circumcisionis Domini. Epiphaniæ. Purificationis Beatæ MARIE Virginis. Sancti Matthiæ Apostoli. Annuntiationis ejusdem Beatæ MARIE. Paschæ, & Pentecostes cum feria secunda & tertia sequentibus. Ascensionis Domini. Sanctissimæ Trinitatis, & Venerabilis Sacramenti. Sanctorum Apostolorum Philippi & Jacobi. Inventionis Sanctæ Crucis. S. Albani Martyris, Patroni Ecclesiæ nostræ Cathedralis, cujus festum celebratur vigesima prima Junii. Nativitatis S. Joannis Baptistæ. Sanctorum Apostolorum Petri & Pauli. Visitationis B. MARIE Virginis. S. Mariæ Magdalenz. S. Jacobi Apostoli. S. Laurentii Martyris. Assumptionis B. MARIE Virginis. S. Bartholomæi Apostoli. Nativitatis B. MARIE Virginis. S. Lamberti Episcopi & Martyris. S. Matthæi Apostoli & Evangelistæ. S. Michaelis Archangeli. Sanctorum Apostolorum Simonis & Judæ. Omnium Sanctorum. S. Martini. S. Catharinæ. S. Andreæ Apostoli. S. Nicolai. Conceptionis B. MARIE Virginis, & S. Thomæ Apostoli. Quos dies Festos juxta Concilii Tridentini Decretum ab omnibus etiam emptis

emptis & Regularibus servari mandamus.

## CAPUT IV.

Si prædictum Festum Annuntiationis B. MARIE Virginis inter Dominicam *Palmarum* & *Quasimodo* inciderit, juxta Decretum Concilii Provincialis Cameracensis, feria secunda post dictam Dominicam *Quasimodo*, etiam a populo celebretur.

## CAPUT V.

Jejunia in hac Dicecesi servanda, præter Sacrum Quadragesimæ & quatuor anni temporum jejunium, sunt: Vigiliæ Nativitatis Domini. Sancti Joannis Baptistæ. Sanctorum Apostolorum Petri & Pauli. S. Laurentii Martyris. Assumptionis B. MARIE Virginis. Sancti Matthæi Apostoli & Evangelistæ. Sanctorum Apostolorum Simonis & Judæ. Omnium Sanctorum, & Sancti Andreæ Apostoli. In festo Beati Marci Evangelistæ, & tribus diebus Rogationum, juxta laudabilem Ecclesiæ consuetudinem usque ad meridianum tempus jejunetur, & tota die ab esu carniū abstinenceatur. Quod si dictum festum S. Marci in hebdomada Paschæ evenierit, ad feriam secundam post Dominicam *Quasimodo* transferatur, & ea die supplicationes fiant; & dicta a carnibus abstinence observetur.

## CAPUT VI.

Cum autem multum hodie se remiserit antiquus Christianorum in jejniis exacte servandis fervor & devotio, præcipimus Pastoribus & Prædicatoribus Verbi Dei, ut sæpius populo inculcent teneri omnes sub pœna peccati mortalis jejunare prædictis diebus, nisi ob impotentiam, necessitatem aut majus bonum excusentur, & graviter peccare caupones & hospites, qui aliis, quam peregrinis, iis diebus cibos ministrant, nulla consideratione habita, an habeant justam causam non jejunandi: multo vero magis, si cibos veritos (quod absit) etiam petentibus in diebus jejuniorum ministrent, non visa legitima dispensatione. Quod si hoc quocunque Dicecesis nostræ loco fieri contingeret, pastorum erit Nos illico ejus rei reddere certiores.

*Tomus VIII. Concilior. German.*

## CAPUT VII.

Ut aliquod vestigium antiquæ pietatis in hac Dicecesi observari solitæ imposterum remaneat, laudabilem consuetudinem feria quarta Cinerum, & feria sexta Parasceves ab omnibus lacticiis abstinendi, retineri, & ubique servari, & de illa per Pastores aut Prædicatores tempestive populum moneri volumus, nisi per Nos fuerit super hoc dispensatum. Aliis Quadragesimæ diebus lacticiniorum usum toleramus, dummodo ii, qui illis utentur, alia pietatis opera faciant, in quæ jamdiu obligatio juris communis strictius jejunandi noscitur esse commutata, doceanturque non aliter satisfacere præcepto Ecclesiæ de Jejunio Quadragesimæ.

## TITULUS VI.

*De Sacramentorum administratione.*

## CAPUT I.

**Q**Uæ ad Sacramentorum administrationem pertinent, tam exacte & dilucide in Sacrosancta Tridentina Synodo, Catechismo ad Parochos, & Concilio provinciali Cameracensi explicantur, ut Parochos nostros, & alios, quibus hæc cura commissæ est, ad illa remittere, quam eadem inculcare satius existimemus: pauca tamen variis de causis utiliter ipsis præscribi posse censemus.

## CAPUT II.

Imprimis, ut nullus eorum, neque aliorum Sacerdotum ullum Sacramentum unquam administret, nisi alba, aut mundo superpelliceo & stola indutus, ut meminerit se intus candida innocentia stola exornatum esse debere.

## CAPUT III.

Deinde ut, quamdiu hæc Dicecesis proprium Manuale non habet, in administratione Sacramentorum, Manuali Ecclesiæ Metropolitanæ Cameracensis juxta Decretum dicti Concilii provincialis omnes utantur.

## CAPUT IV.

Ut diligentissime præcaveant, ne alienis parochianis absque proprii illo-



rum Parochi, aut nostra licentia Sacramenta administrent, præsertim Pœnitentiæ & Matrimonii; scire enim debent invalidas, imo de jure nullas esse alienorum parochianorum extra casum necessitatis absolutiones, & quod ii Sacerdotes, qui ipsos Matrimonio sic conjungunt, ipso jure sint suspensi, quamdiu ab Ordinario ejus parochi, qui Matrimonio interesse debebat, absolvantur.

## CAPUT V.

Summo quoque studio invigilent, ne quisquam parochianorum suorum, per ipsorum negligentiam absque Sacramentorum perceptione decedat a vita, & si alicujus Parochi culpa aliquis infans sine Baptismo, aut adultus sine confessione, aut Extrema unctione decesserit, ab administratione Sacramentorum ad mensem suspendatur, aut alias arbitrio Judicis puniatur.

## CAPUT VI.

Hæreticos, quamdiu non abjura-verint hæresim, usurarios manifestos, quamdiu pro usuris non satisfecerint, aut de restituendis bonis per usuras injuste acquisitis, sufficientem non dederint cautionem, & excommunicatos a Judice, quamdiu de absolutione, ab eodem, aut ejus Superiore obtenta non docuerint, ad Sacramentorum perceptionem & Ecclesiasticam sepulturam non admittant, excepto mortis articulo, quo casu usurarii, quibus facultas non suppetit prædictam cautionem dandi, admitti possunt, mediante promissione, quod si convaluerint, ab usuris prorsus abstinebunt, & lucra ex eis acquisita restituent, quamprimum hoc eorum facultates ferent; excommunicati vero præstita prius per ipsos obligatione, & quatenus possint, etiam cautione, quod si periculum mortis evadant, statim se a censuris absolvi curabunt.

## CAPUT VII.

Eosdem usurarios, manifestos hæreticos & excommunicatos, a susceptione Baptizandorum, & a præsentatione Confirmandorum prorsus repellant.

## CAPUT VIII.

Diligenter instruant mulieres, quæ obstetricis officio funguntur, quibus casibus illis baptizare liceat, & qua verborum forma, ac materia uti oporteat, nec ulla admittant, imo ab ingressu Ecclesiæ, cum infantem baptizandum deferunt, prohibeant, nisi prius sic fuerint instructæ, & exhibuerint testimonium suæ fidei, ac juxta Edictum Regium in manibus Magistratus juraverint, se ante diem tertium fideliter denuntiaturas Pastoribus infantes, quos in eorum parochiis scient esse baptizandos.

## CAPUT IX.

Sedulo admoneant parentes ac nutrices, ne infantes anno juniores secum in cubili excipiant, ne forte, quod nimis frequenter accidere compertum habemus, incaute illos suffocantes, gravissimum peccatum admittant, cujus absolutionem, si in hac nostra Diœcesi contingat, Nobis reservamus.

## CAPUT X.

Antequam pueros parochiarum suarum ad Nos mittant pro Sacramento Confirmationis suscipiendo, diligenter præmoneant populum suum de iis, quæ dictum Concilium provinciale sigillatim præscripsit, addantque ob defectum illorum, quæ ex parte parentum aut puerorum requiruntur, ipsos pueros pro ea vice a tanti Sacramenti susceptione repellendos.

## CAPUT XI.

In privatis ædibus, nisi ob ægritudinem, confessiones nunquam audiant; cum Ecclesia sit proprius Sacramenta administrandi locus, nec in quolibet Ecclesiæ loco, sed in aperto & claro, & quidem in sedilibus ad hoc specialiter destinatis, quæ in omnibus Ecclesiis, quarum facultates hoc ferre possunt, fieri optamus.

## CAPUT XII.

Omnes eadem forma absolutionis utantur, quam idcirco hic inferendam duximus, scilicet his verbis: *Dominus noster JESUS CHRISTUS, qui est Summus Pontifex, te absolvat, & ego auctoritate ipsius te absolvo imprimis ab omni vinculo ex-*  
com-

*communicationis, in quantum possum, & indiges, deinde eadem auctoritate absolvo te ab omnibus peccatis tuis in nomine Patris, & Filii, & Spiritus Sancti, Amen. Quod si quis sit etiam absolvendus ab aliis censuris, dicat hoc modo: Dominus noster &c. ab omni vinculo excommunicationis, suspensionis & interdicti &c.*

## CAPUT XIII.

Non præsumant absolvere a casibus Summo Pontifici, aut Nobis reservatis. Hos autem casus Nobis reservamus. Imprimis omnem casum, cui annexa est excommunicatio major, Nobis de jure aut ex Decreto Concilii Tridentini reservata, hæresim, apostasiam, homicidium, incendium voluntate deliberata procuratum, concubitus contra naturam, raptum virginum, incestum cum Sanctimonialibus, vel consanguineis, aut affinibus in primo aut secundo gradu, adulterium manifestum, injectionem manuum violentam in parentes, veneficium, ligaturam & omne maleficium, quo impeditur actus matrimonialis in conjugibus, & oppressionem prolis etiam ignoranter a parentibus factam.

## CAPUT XIV.

Quoties deferunt ægrotis Sanctissimum Eucharistiæ Sacramentum, aut Extremæ Unctionis, eorundem vicinos ad comitandum exhortentur, sed & hoc populo pulsu campanæ paulo ante significant, ut ex pio charitatis affectu plures comitentur, aut certe in domibus suis pro salute corporali & spirituali ipsius ægroti Dominum deprecantur, & ipsi Indulgentias hoc facientibus a Summis Pontificibus concessas, lucrari mereantur. Nos quoque iis, qui comitabuntur, quadraginta, iis vero, qui suis præpediti negotiis, ut supra, orabunt, viginti dies Indulgentiarum impartimur.

## CAPUT XV.

In Paschate a matutino tempore usque ad meridiem dictum Eucharistiæ Sacramentum per se, aut suos Capellanos administrent, nec ullo modo expectent finem concionis aut Missæ solemnis, quod sine gravi Parochianorum, adeoque ipsius Parochi incommo-

do fieri non potest, & Nos sub poena unius scuti aurei fabricæ ejusdem Ecclesiæ applicandi, fieri prohibemus.

## CAPUT XVI.

Dictum Eucharistiæ Sacramentum non deferant in iis processionibus, quæ per agros ad magnum spatium se extendunt, nisi hoc cum omni modestia ac reverentia fiat; præcedente semper lumine ac campanula sonante, & populo sequente, sicut in civitatibus fieri solet & debet.

## CAPUT XVII.

Eos, qui necdum sunt confirmati, vel adeo rudes sunt, ut ignorent Orationem Dominicam, Salutationem Angelicam, Symbolum Apostolorum, præcepta Dei & Ecclesiæ, latina aut vulgari lingua, nec ad Eucharistiæ, nec ad Matrimonii Sacramentum admittant, sed eos prius de prædictis omnibus instruant, vel per aliquem alium instrui curent, & instructos pro Sacramento Confirmationis ad Nos remittant, extraneos autem in eorum Parochiis commorantes, non nisi visis Ordinariorum, aut Parochorum suorum literis, quod soluti & liberi sint, fidem facientibus, Matrimonio jungant. Quod si eas ob nimiam distantiam habere non possint, ab eis solemne juramentum exigent, quod nullum norint impedimentum, quominus inter se Matrimonium contrahere possint.

## CAPUT XVIII.

Proclamationes bannorum matrimonialium nunquam omittant, nisi visis literis dispensationis, quas, qui obtinere voluerint, adferent testimonium a suis Parochis, quod nullum sciant Canonicum impedimentum.

## CAPUT XIX.

Omnes Parochi exacte sciant impedimenta Matrimonii, saltem quæ usitatus eveniunt, qualia sunt, consanguinitas usque ad quartum gradum inclusive; affinitas orta ex legitimo Matrimonio usque ad similem gradum etiam inclusive: si vero orta sit ex fornicatione duntaxat, usque ad secundum inclusive, cognatio spiritualis, sive per Baptismi, sive per Confirmationis Sacra-

mentum contracta, Ordo Sacer, omne votum castitatis, impotentia, validæ promissiones priores matrimoniales, iustitia publicæ honestatis ex validis Sponsalibus proveniens quo ad primum gradum tantum. Quod si aliqui Parochorum hæc impedimenta discernere non norint, peritiores consulant, alioquin si scienter aliquos sic impeditos conjunxerint, juxta Decretum Concilii Provincialis Cameracensis, ad annum ab officio pastoralis suspendantur, aut alia arbitraria pœna puniantur.

## CAPUT XX.

Si vero contingat impedimentorum istorum aliquod denunciari, aut Matrimonio desponsorum oppositionem aliquam fieri, vel rumor sit publicus impedimentum aliquod subesse, etiamsi nulla sit oppositio, non prius a Parochis ad ultiores proclamationes aut Matrimonii solemnizationem procedatur, quam re ad Nos, aut Officiale nostrum delata, ut, quid sit agendum, decernatur: non enim permittimus, ut de causis ejusmodi parochi cognoscant, sed omnem decisionem nostro, aut dicti Officialis judicio reservamus.

## CAPUT XXI.

Ad exterminandum gravissimum abusum, qui temporibus nostris passim irrepsit, singulis diebus Dominicis denuntient, excommunicatos esse eos, qui ligaturis aut quibuscunque maleficiis actum Matrimonii inter conjuges impedire conantur, quos etiam Nos ex nunc, prout ex tunc excommunicamus, & tam peccati ipsorum, quam excommunicationis nostræ absolutionem Nobis reservamus.

## CAPUT XXII.

Sed & alium abusum dissimulare non possumus, quo nova nupta postridie suarum nuptiarum e templo (ubi Sacrosanctum Missæ Sacrificium audit) egrediens, excipitur a mimis & larvatis, seu aliis petulantibus hominibus, & cum multis irreverentiis & insolentiis abducitur, donec a suo conjuge redimatur; quæ omnia tanquam Matrimonii Sacramento, imo Christiano nomine indigna, deinceps sub eadem

pœna excommunicationis fieri prohibemus, & ne eam in authores fulminare cogamur, Judicum sæcularium, ut aliis convenientibus modis has insolentias reprimant, auxilium imploramus.

## CAPUT XXIII.

Postremo statuimus, ut dicti parochi quatuor libellos conficiant, in quorum primo, nomina omnium ab eis baptizatorum & parentum & patrino- rum eorundem describant, diemque Baptismi & nativitatis annotent. In secundo, nomina omnium tempore sus- regiminis confirmatorum, cum nomi- nibus parentum & patrino- rum, ac E- piscopi confirmantis, & loci, ubi hoc Sacramentum ipsis contulit. In tertio, nomina omnium, qui Matrimonium co- ram ipsis contraxerunt, & testium, qui contractui interfuerunt, diemque & lo- cum contractus Matrimonii. In quar- to, nomina omnium, quorum ipsi corpora sepelierunt in suis Ecclesiis aut Cæmeteriis, cum die mortis seu obi- tus eorundem: quæ descriptio exigui erit laboris, & minoris impensæ, mag- ni autem fructus, & maxime interdum iis, quorum interest consolationis. Quos libros dicti parochi Nobis, aut Deputatis nostris cum occasio se offe- ret, nec non Decanis in suis visitationi- bus, exhibere tenebuntur.

## TITULUS VII.

*De prima Tonsura, minoribus ac  
Sacris Ordinibus.*

## CAPUT I.

**A**D primam Tonsuram nemo se præsentet, qui non sit confirma- tus, & linguæ latinæ jactis fundamen- tis; coram Nobis testari sit paratus, se non judicii sæcularis fugiendi causa, sed Deo liberius serviendi, hoc primo Clericorum charactere insignire velle, & testimonium habeat a proprio Paro- cho, quod sit de legitimo matrimonio natus, & ratione originis aut domicilii noster Diocesanus: alioquin sciat se a tonsuræ susceptione arcendum, quem- admodum & eos, qui ad illam susci- piendam sine superpelliceo & cereo comparebunt.

CA-



## CAPUT II.

Promovendi ad minores Ordines compareant ad minus summo mane illius diei, qui sacras ordinationes præcedit, & quidem cum literis suæ tonsuræ, ac bonæ & honestæ conversationis; nec ullus se præsentet ad plures Ordines minores simul suscipiendos, nisi Ecclesiæ necessitas aut utilitas hoc postulaverit, cum extra hunc casum, Sacrum Concilium Tridentinum in minoribus non minus, quam in majoribus Ordinibus interstitia servari voluerit.

## CAPUT III.

Quod si quis illegitimus a bona indole & vitæ honestate commendetur, ut primam Tonsuram ac minores Ordines suscipere, & simplex beneficium possidere possit, dispensationem super defectu natalium in scriptis habeat, priusquam ad Tonsuram se præsentet, alioquin ab illa repellendus.

## CAPUT IV.

Qui vero ad Sacros Ordines se præsentare voluerint, multo magis intelligant in re tanti momenti non esse festinandum, ideoque interstitia inter singulos Ordines exactissime a Nobis esse servanda. Adferant ergo ultra literas susceptionis Ordinum, competens testimonium, quod a novissimo Ordine suscepto, sæpius Sacram Eucharistiam sumpserint, & novas proclamationes fieri curaverint, & interim honeste & laudabiliter vixerint, denique testimoniales literas habeant ætatis suæ, per suos Superiores, Decanos aut Parochos, auditis parentum vel susceptorum, vel iis deficientibus, aliorum fide dignorum testium depositionibus, aut inspecto libro baptismali, fideliter expeditas.

## CAPUT V.

Qui ad Ordinem Subdiaconatus se præsentare voluerint, mature prius examinata illius muneris, ad quod aspirant, dignitate, & si onus, quod ultro appetunt (nempe perpetuam castitatem servandi, & Dei servitio, atque Ecclesiæ ministerio se totos mancipandi) vires eorum non excedat, compareant aliquot diebus ante ipsam ordinationem

coram Officiali nostro, cum attestationibus valoris sui beneficii aut patrimonii, ad cuius titulum promoveri intendunt: quas si sufficientes judicaverit, hoc suo Decreto testabitur, ne cum ad examen vitæ & doctrinæ venietur, hæc inquisitio, Nos, seu Examinatores ad hoc deputatos, diutius remoretur.

## CAPUT VI.

Sufficientiam autem Tituli æstima- bit dictus Officialis, juxta Decretum dicti Concilii provincialis, prout & juramentum exiget ab iis, qui promoveri intendunt sub titulo patrimonii, juxta formam ibidem præscriptam, & de illo præstito, fidem faciet.

## CAPUT VII.

Ad Ordinem Diaconatus promovendi, diligenter secum perpendant, ad quantum gradum Ecclesiæ ascendant; nam ut olim Levitæ arcam fœderis, ita nunc ipsi Ecclesiam Dei portare & munire debent, ornatu sancto, prædicatu Divino, exemplo perfecto, ut vere testentur se esse Levitas, hoc est, assumptos a carnalibus desideriis, & a terrenis concupiscentiis, quæ militant adversus animam, ut hæreditas & tribus amabilis Domini esse mereantur, & tanquam Ministri & Cooperatores Corporis & Sanguinis Domini, sint ab omni illecebra carnis alieni, & quibus Evangelium ore annuntiant, vivis operibus exponant, habeantque pedes suos calceatos Sanctorum exemplis, in præparationem Evangelii pacis.

## CAPUT VIII.

Qui vero ad Sacrum Presbyteratus Ordinem se præsentare intendunt, meminerint, quod cum magno timore ad tantum gradum ascendendum est, atque providendum, ut cœlestis sapientia, probi mores, & diuturna justitiæ observatio ad id electos commendent, & advocati in adjutorum Episcoporum cognoscant quod agunt, imitentur quod tractant, quatenus mortis Domini- cæ mysterium celebrantes, mortificare membra sua a vitiis & concupiscentiis suis omnibus procurent, sitque doctrina eorum spiritualis medicina populo Dei, sit odor vitæ eorum dele-

Etamentum Ecclesiæ Christi, ut prædicatione atque exemplo ædificent domum, id est, familiam Dei, eluceat in eis totius forma iustitiæ, ut bonam rationem dispensationis sibi creditæ reddaturi, æternæ beatitudinis præmia consequantur.

## CAPUT IX.

Nullus autem speret se ordinandum a Nobis, nisi alicui Ecclesiæ ascribatur, hoc est, ni Ecclesiam deligat, in qua se ministraturum spondeat Ordine suscepto, doceatque se hoc fecisse, priusquam ad altiorem gradum promoveatur, ne dictam Ecclesiam deserere possit nobis inconsultis sub pœna interdictionis exercitii Sacrorum Ordinum, a Sacrosancta Tridentina Synodo præscripta.

## TITULUS VIII.

*De vita & honestate Clericorum.*

## CAPUT I.

**Q**uamvis habitus non facit Monachum, oportet tamen Clericos, vestes proprio convenientes Ordini, semper deferre, ut per decentiam habitus extrinseci, morum honestatem intrinsecam ostendant. Quapropter ad praxim pulcherrimi Decreti Generalis Concilii Tridentini, & CLEMENTIS V. in Concilio Viennensi procedentes, monemus eos, qui Sacris insigniti sunt, vel Beneficium Ecclesiasticum possident, & in Civitate aut oppidis degunt, ut vestibus talaribus cum bireto Clericali ad crucis similitudinem confecto, quod est Ecclesiasticorum hominum proprium, vel chlamydibus usque ad talos, aut circiter, & veste interiori, ut minimum ultra genua propendente, semper utantur, sub pœna suspensionis a suis Ordinibus, officiis, beneficiis, fructibus, redditibus, & proventibus ipsorum beneficiorum, nec non, si semel correpti denuo in hoc deliquerint, sub pœna privationis officiorum & beneficiorum huiusmodi ab eodem Concilio Tridentino præscriptis. Cum autem extra Civitatem, aut oppida proficiscuntur, prout & ii, qui ruri vitam agunt, brevioribus chlamydibus uti poterunt, ita tamen, ut interiorem semper ha-

beant vestem, quæ thoracem & caligas contegat.

## CAPUT II.

Prædictas pœnas multo magis incurrant, qui disiectas vestes, aut variis coloribus distinctas (quod absit) deferre ausi fuerint.

## CAPUT III.

Tonsuram quoque Clericalem pro uniuscujusque Ordinis ratione latam & patentem, omnes semper gerant, & ut minimum, in singulos menses, & omnibus præcipuis anni festivitibus renoveant, ut hoc antiquissimo Ecclesiæ ritu significant, se superflua omnia, curasque omnes sæculares ac terrenas sollicitudines abieciisse, & ea, quæ sursum sunt, querere & sapere. Barbam etiam non aliam nutriant, quam suo Ordini congruentem, eamque singulis etiam mensibus, si non radere, saltem concinnare & honeste præscindere teneantur.

## CAPUT IV.

Clericorum arma esse debent orationes & jejunia, quibus recte communiti securiores erunt adversus omnes hostes, quam clypeis, gladiis aut sclopetis armati; quare omnibus usum armorum interdiciamus, nisi ob itinerum pericula expressam ad illa gerenda, a Nobis, aut Vicario nostro in scriptis obtinuerint licentiam, cujus tamen prætextu, nullus Clericus templum ipsum cum armis ingrediatur. Huic Decreto contravenientes pro prima vice pœnis pecuniariis mulcentur.

## CAPUT V.

Tabernas vero, tanquam malorum omnium fontes, non solum prohibemus, sed etiam serio injungimus Promotoribus nostris, ut si quos resciverint Clericos nostræ Diocesis, qui eas frequentent, excepta sola itineris necessarii causa, eos statim hoc nomine coram Officialibus nostris evocari curent, quibus præcipimus, ut eos pœnis primum pecuniariis, deinde etiam, si abstinere noluerint, carceribus ad meliora compellant.

CA.

## CAPUT VI.

Quia vero incontinentiæ crimen maximum dedecus parit Ordini Ecclesiastico, ita ut sola illius suspicio Laicos homines graviter offendat; prohibemus, ne quis Clericorum cujuscunque ordinis fuerit aut dignitatis, mulierem in suam familiam quocunque servitii prætextu assumere audeat, quæ antea fuerit vel convicta, vel etiam de incontinentia suspecta, sub pœna suspensionis ab exercitio suorum Ordinum, aut a suis officiis & beneficiis, si primum amicabiliter monitus, eam non dimiserit, & ne deinceps eo nomine vituperetur ministerium nostrum, præcipimus, ut nullus habeat ancillam quadraginta aut circiter annis juniorem, etiam ab omni incontinentiæ suspitione alienam, nisi sit ipsi consanguinea in primo aut secundo gradu consanguinitatis: qui secus fecerit, primum moneatur, ut ejusmodi ancillam juniorem dimittat, deinde, si non paruerit, arbitrio sui Superioris graviter puniatur; contra concubinarios vero secundum formam a Sacrosancta Tridentina Synodo præscriptam (a), sine ulla dissimulatione procedatur.

## CAPUT VII.

Non solum contra Apostolicum præceptum faciunt Clerici, qui negotiationibus operam dant, & quæstum captant, sed etiam qui alienos agros, aut decimas conducunt, & illis colendis, his vero colligendis maximam sui temporis partem, quam orationi & sacris studiis impendere deberent, inutiliter impendunt; nec non ii, qui Dominorum temporalium obsequiis se tradunt, & in eorum negotiis curandis toti occupantur. Proinde omnes Clericos monemus, ut deinceps ab iis abstineant. Parochis tamen ruralibus, qui partem decimarum suæ parochiæ, ratione sui pastoratus possident, permitimus, ut reliquam partem ab iis, ad quos pertinet, conducere possint, quo minori impensa suas decimas colligant, & ipsi commodius sustententur.

## TITULUS IX.

*De Canonicis, Decanis ruralibus, Pastoribus, & Matriculariis.*

## CAPUT I.

**O**Mnia, quæ dictum Concilium Provinciale præscripsit Capitulis & Canonicis, observari volumus & mandamus in nostra Ecclesia Cathedrali, & omnibus Ecclesiis Collegiatis nostræ Diocesis, quibus hoc solum adjicimus, Canonicos semper meminisse debere beneficium dari propter officium, nec sufficere, si per Vicarios Horas Canonicas decantari, & Missas celebrari curent, sed omnes teneri ad Divina per se, & non per substitutos officia obeunda, atque in Choro ad psallendum instituto, hymnis & canticis Dei nomen reverenter, distincte, devoteque laudandum. Quod etsi semper rationi & juri, atque antiquorum observationi consentaneum fuit, non frustra tamen a Patribus Sacrosancti Concilii Tridentini expresse & in particulari Canonicis est præscriptum (b); ut omnes intelligant, sed ad prædicta præcise obligari, nullusque eorum, quocunque prætextu se a Divinis Officiis per se obeundis, excusare possit.

## CAPUT II.

Sed & in reliquis suis actionibus ita se habere debent, ut respondeant suæ dignitati & institutioni, de qua pulchre olim & graviter Patres Concilii Aquisgranensis sub Ludovico Pio sic scriptum reliquerunt. (c) "Quia evidenti auctoritate liquet, Canonicam institutionem præstare cæteris institutionibus debere, necesse est, qui hujus professionis censentur nomine, procurare, qualiter in semetipsis eandem institutionem vitam & moribus exornent potius, quam dehonestent." Quod quamvis ad omnes Canonicos pertineat, præcipue tamen ad eos, qui prærogativis Ecclesiæ Cathedralis honorantur, qui cum unum corpus cum Episcopo conficiant, ipseque Episcopus in statu perfectionis sit positus, præ cæteris ad ejusdem perfectionis gradum aspirare, & quantum in eis est, continue ascendere tenentur, ut non

(a) Sess. 25. C. 14.

(b) Sess. 24. de Reform. C. 12.

(c) Cap. 115.



non tantum populo, sed etiam Collegiatarum, & totius Civitatis ac Dicecesis Clero, vitæ sanctitate & zelo Divini honoris præluceant, sui que nominis dignitatem, virtutum splendore tueantur, ne si ab Antecessorum suorum magnanimitate degenerarint, aliquando contingat eos, qui in Ecclesia militante post Episcopos primum obtinent, in triumphante cum rubore novissimum locum tenere, aut etiam (quod absit) in æternum omni honoris gradu & Sanctorum societate privari.

## CAPUT III.

Quæcunque in prædicto Concilio Provinciali Cameracensi de Decanis ruralibus & Pastoribus habentur, Decani & Pastores nostræ Dicecesis diligenter observent; quibus adjicienda duximus, quæ sequuntur. Imprimis, ut ipsi Decani in prima congregatione Capitulari Pastorum sui districtus, curent omnes, qui huic Synodo non interfuerunt, publicam fidei suæ facere professionem, juxta formam a felicis recordationis Pio Papa Quarto præscriptam: deinde legi & publicari hujus Synodi Decreta, & serio tractari de eorundem executione, quatenus eos & populum eis commissum tangunt, aut concernunt.

## CAPUT IV.

Et cum dicti Decani constituti sint Nobis tanquam Pastores dictorum Pastorum, sollicitos se exhibeant de eorum salute & spirituali profectu. Ideo singulis annis, dum suas visitationes faciunt, non solum ad præcavendum & fugiendum crimina omnia, & occasionem eorundem, sed etiam ad fortiter pugnandum prælia Domini, & viriliter in ejus vinea laborandum, paterno eos affectu cohortentur. Ut tanquam boni milites victoriam reportare, ac triumphum agere, & tanquam boni agricolæ suavissimum aliquando laborum suorum fructum percipere mereantur. Econtra mandamus Pastoribus, ut Decanos suos pro suis Pastoribus agnoscant, eos ut tales honorent & ament, ipsisque aliquoties in anno, ut minimum semel, peccata sua confiteantur.

## CAPUT V.

At præter supradicta, etiam ad officium Decani pertinent, quæ sequuntur: campanas novas benedicere, beneficiorum omnium sui Decanatus curam habere, eadem singulis annis visitare, & de eorum statu, an videlicet satisfiat foundationibus & oneribus, & an Sanctissimum Eucharistiæ Sacramentum, & Sacrum Chrisma, atque Oleum catechumenorum, & infirmorum honorifice asserventur, & quidem hæc tria separatim ab ipso Sanctissimo Sacramento: An Ecclesiæ ipsæ debite reparentur, altaria decenter ornentur, cœmeteria sufficienter claudantur, aliaque ejusmodi, quæ ad decorem Domus Domini pertinent, nec non de ipsorum Pastorum, Capellanorum, Matriculariorum, imo & Parochianorum vita & moribus diligenter inquirere, defectusque omnes, quos deprehenderint, ad Nos referre, eos, quibus de Ecclesia Parochiali, aut alio Beneficio sui Decanatus recenter provisum est, visis literis institutionis debite expeditis, in possessionem mittere; hoc enim ad evitandas multas fraudes, ipsis Decanis reservamus, aliisque Presbyteris, etiam si literæ expediantur in forma *Universis*, ne se huic missioni in possessionem, nisi de ipsorum Decanorum consensu immisceant, expresse prohibemus.

## CAPUT VI.

Decani quoque est, Pastorum sibi subditorum, nec non aliorum Sacerdotum, vel in aliis Sacris Ordinibus constitutorum, Nobilium & leproforum exequias celebrare, & munita bonorum ad Pastoratus ipsos spectantium, nec non & registra Baptizatorum, Confirmatorum, Matrimonio conjunctorum, & sepultorum, ne ab ipsorum pastorum hæredibus, aut aliter distrahantur, & si quæ alia sint, quæ Ecclesias ipsas concernunt, sub inventario, Successori, cum institutus fuerit, tradenda, aut in Archivum nostrum referenda, conservare. Insuper omnia defuncti mobilia describere & sequestrare, ac sequestrum statim Promotori nostro denuntiare, ut jura nostra, si quæ sint, tueatur, &

& Pastorales domos debite reparari curet, donec omne æs alienum persolutum fuerit, aut pro his omnibus ab hæredibus præstita fuerit sufficiens cautio. Nos autem labores eorundem Decanorum, prout juris & rationis fuerit, taxabimus, & eisdem persolvi curabimus.

## CAPUT VII.

Acceptum a Nobis in die Cænæ Domini Sacrum Chrisma, & alia Sacra Olea, non alibi, quam in templo loci Decanalis distribuant, & quidem in capsulis, quantum fieri potest, mundissimis, nec aliis ea deferenda tradant, quam personis Ecclesiasticis, quas monebunt, ut statim ea reverenter deferant ad propriam Ecclesiam, nec cum illis in via, maxime in tabernis hære, & computationibus se se dare audeant, sub gravi pœna, arbitrio nostro infligenda. Pastores autem iis acceptis, nullo pacto utantur veteribus, sed quidquid ex iis superfuerit, lampadi, quæ lucet ante Venerabile Sacramentum, infundant, aut super piscinam comburant.

## CAPUT VIII.

Quoad portionem Canonicam Pastoribus nostræ Diœcesis assignandam exacte servari jubemus Decreta dicti Concilii Provincialis Cameracensis, & Officialibus nostris præcipimus, ut quanto citius fieri poterit, ejusmodi causas terminari curent, nec Procuratorum, aut aliorum quorumcunque artificii eas protrahi patiantur.

## CAPUT IX.

Magnam præbuerunt occasionem hæreticis suos errores disseminandi, & rudem populum pervertendi, qui olim Ecclesiis Parochialibus viros ignaros, & ad Pastoralis muneris functionem ineptas præfecerunt, ideoque prudentissime Concilium Tridentinum statuit, ut vacatione alicujus Ecclesiæ parochialis occurrente, etiam per edictum publicum vocentur omnes, qui ad illam obtinendam volent examinari, & peracto examine renuntientur, quotquot ab Examinatoribus idonei judicati fuerint, ætate, moribus, doctrina, prudentia, & aliis rebus ad vacantem Ec-

clesiam gubernandam opportunis, ex hisque Episcopus cum eligat, quem cæteris magis idoneum judicaverit, aut Patronus digniorem inter illos Episcopo præsentare teneatur, ut ab eo instituatur. Cum autem hoc saluberrimum Decretum, magno cum fructu, juxta ejus tenorem jamdiu in hac nostra Diœcesi usu receptum sit, hæc Synodus, cujus judicio dictum Concilium ipsorum Examinatorum nominationem reliquit, ad hanc functionem exercendam communi nomine omnium Prælatorum, & aliorum, quibus Ecclesiarum provisio incumbit, nominavit Reverendos & discretos Viros ac Magistros, *Nicolaum Caussin* Decanum, *Joannem Daurin* Archi-Diaconum, Sacræ Theologiæ, *Lambertum Paradisum* Juris utriusque, *Ægidium Bosman* Archi-presbyterum, Sacræ Theologiæ, & *Jacobum Cassot* Scholasticum, Juris respective Licentiatos, & Ecclesiæ nostræ Cathedralis Canonicos, qui omnes juraverunt ad Sancta Dei Evangelia, se, quacunque humana affectione postposita, fideliter hoc munus executuros.

## CAPUT X.

Matricularii autem, qui cum Parochis Divinum Officium decantant aut peragunt, de numero sint Ministrorum Ecclesiæ: proinde necessarium est, ut antequam admittantur, testimoniales exhibeant literas suæ vitæ, & honestæ conversationis, subsignatas a Pastore & Magistratu suæ ultimæ residentiae, & quod sint consurati, nec non semper conspicuam tonsuram gerant cum habitu decenti: expediret etiam eos minores Ordines suscipere: unde apparet, quam indecens sit caupones, aut alterius vilis professionis ad id muneris admitti, quod deinceps omnino prohibemus; sed nec Ballivos, Scabinos, aut Scribas Curiae sæcularis eos esse convenit, quia tamen multis in locis, virorum ad hoc officium in Ecclesia peragendum penuria est, poterunt ejusmodi admitti, sed non sine nostra, aut Vicarii nostri licentia, quam ut obtineant, promittere debebunt se in omnibus, quæ hoc ministerium Ecclesiasticum concernent, Pastori suo fore obediens, & ad ipsi inserviendum paratos.

## CAPUT XI.

Iis in locis, ubi Matriculariis committitur cura & custodia ornamentorum, & aliorum mobilium bonorum Ecclesiæ, non admittantur ad hoc munus, nisi sufficientem, iudicio Pastoris, & præcipuorum Parochianorum, de iis fideliter conservandis & restituendis, præstiterint cautionem.

## CAPUT XII.

Moneantur autem diligenter & frequenter a Pastoribus, ut ornamenta ipsa, quantum fieri potest, integra & munda conservent, & quæ lacera deprehenderit, statim resarciri aut reparari, quæ sordida, protinus mutari, lavari aut mundari curent; denique ut nullas in altaribus aut parietibus, nec in ipso Templi pavimento, imo nec in cœmiteriis notabiles sordes patiantur, sed re ipsa omnibus testentur se diligere decorem domus Dei, cuius ministerio haud contemnendo sunt mancipati.

## TITULUS X.

*De Regularibus & Monialibus.*

## CAPUT I.

**A**bbates, cæterique Monasteriorum Superiores omnem curam & diligentiam adhibeant, ut in Monasteriis sibi subiectis, ea, quæ ad regularis vitæ substantiam pertinent, qualia sunt obedientiæ, paupertatis, & castitatis, & si quæ alia sunt alicujus Regulæ & Ordinis peculiaria vota & præcepta, nullo unquam tempore relaxentur, sed exacte & fideliter observentur: si enim illa, quæ bases sunt & fundamenta totius regularis disciplinæ, non fuerint conservata, totum corruat ædificium necesse est.

## CAPUT II.

Hoc autem a suis subditis nulla alia meliori ratione ne unquam impetrabunt, quam si ipsi ex animo forma sui gregis fiant, & in se ipsis, tanquam in lucidissimo speculo, omnes illas virtutes ac perfectiones repræsentent, quas in aliorum animis imprimere conabuntur: non ergo præcipua illis sit rerum temporalium cura, sed potius

hoc mente & cogitatione revolvant, hoc assidue meditentur, in hoc die ac nocte versentur, ut præsent verbo & exemplo, & ad eum finem officium Divinum frequentent, Missæ Sacrificium sæpius Deo offerant, & non minus humilitate, quam autoritate superent omnes, charitatis vero officiis a nemine superentur, castitate etiam aliis præemineant, & in mediis divitiis, si per Dei gratiam, ac propriam, & Prædecessorum industriam & parsimoniam, Monasterio suo forsitan abundant, se vero pauperes esse ac mundi, & terrenorum omnium bonorum contemptores re ipsa testentur, ideoque a pretiosa suppellectile omnino abstineant. Subditis quoque suis mobilium bonorum usum ita permittant, ut eorum supellex statui paupertatis, quam professi sunt, conveniat, nihilque superflui in ea sit, nihil etiam, quod sit necessarium, eis denegetur. Quod si quem aliter quippiam tenere deprehendant, eundem biennio activa & passiva voce privent, atque etiam juxta suæ Regulæ & ordinationis Constitutiones, puniant, prout voluerunt, & expresse statuerunt S. Patres prædicti Concilii Tridentini. (\*) Nec existimet Abbas, seu quivis alius Superior, quod super habenda proprietate cum aliquo Monacho dispensare possit, quia abdicatio proprietatis, sicut & custodia castitatis, adeo est annexa regulæ Monasticæ, ut INNOCENTIUS III. asserat, nec Summum Pontificem contra eam posse licentiam indulgere, & CLEMENS III. jubeat Religiosum, qui proprium, quod contra Regulam latenter habuerat, noluit resignare, & sic diem clausit extremum: non tantum Christiana sepultura privari, verum etiam, si sine maximo scandalo fieri posset, de ipsa Ecclesia projici. Unde non immerito damnanda est illa consuetudo, qua in nonnullis Monasteriis certa pecunia singulis Religiosis pro vestimentis assignatur, cum non minus vestiri, quam nutriri debeant in communi, & nequidem permitti possit, ut ullam penes se pecuniam habeant, sed si quam habent, vel a parentibus aut amicis sibi donatam, vel propria industria acquisitam, eam in manus Superioris, aut ab

co

(\*) Sess. 25. Cap. 2. de Reg. & Monial.



eo deputati, consignare, aut certe ab eo licentiam impetrare teneantur, cum in usus sibi necessarios convertendi, sub pœna violationis voti paupertatis, in quo non minima pars perfectionis regularis vitæ consistit.

## CAPUT III.

Expedit etiam, ut Religiosi omnes reipsa testentur se esse, quod dicuntur, nempe Monachos, seu Solitarios, hoc est solitudinis amatores, & mundi ac rerum mundanarum contemptores: ideoque, quam rarissime fieri potest, septa Monasterii egrediantur, cum non sit necesse ea videre crebrius, quorum contemptu Monachi esse cœperunt, quin potius semper contemnere debeant, quod semel contempserunt.

## CAPUT IV.

Sicut pro receptione Monachi, aut Monialis, etiam paupertatis Monasterii prætextu, nihil exigere potest, ita indecorum est in die vestitionis aut professionis eorum adeo magnos sumptus fieri, ut hoc & parentibus onerosum, & apud alios sit mali exempli, quasi hac via pauperibus ad Monasteria aditus præcludatur: itaque Abbates & Abbatissæ, alique Monasteriorum Superiores, & domibus suis hanc consuetudinem, seu potius corruptelam prorsus eliminant, parentesque etiam volentes ejusmodi facere sumptus, prohibeant, maxime in vestitionibus, ne dimissis postea, aut sponte recedentibus Novitiis, aliqua inde exprobatæ aut oblocutionis materia oriatur, aut certe in præjudicium honoris eorundem Superiorum & Monasteriorum arripiatur.

## CAPUT V.

In omnibus virorum Monasteriis, lectionem Sacræ Theologiæ haberi non frustra statuit Tridentina Synodus, quam cum non solum utilem, sed etiam necessariam esse huic nostræ Diœcesi compertum habeamus, omnes Abbates monemus, ut infra tres menses a die publicationis horum Decretorum, de Lectori regulari, aut sæculari sibi provideant, alioquin a Nobis, tanquam Sedis Apostolicæ delegatis, ad id opportunis remediis compellendi.

*Tomus VIII. Concilior. German.*

## CAPUT VI.

Extra horam refectionis non sit liberum cuicumque Religiosorum, etiam prætextu adventus parentum, aut amicorum suorum, comellationibus aut computationibus indulgere, sed ipsi parentes aut amici a Superiore aut ab Oeconomo excipiantur, Religiosis ad prandium aut cœnam duntaxat evocatis: qui nihilominus, quacunque occasione extra commune refectory cœnati fuerint, ante horam nonam dormitorium repetere compellantur, quod semper clavibus obseretur, ita quod nullus Religiosus, nisi conscio & consentiente Superiore, unquam egredi possit.

## CAPUT VII.

Res est plena periculi & mali exempli, quod in Monasteriis tam virorum, quam Sanctimonialium, hospitibus advenientibus vina vendantur, ideo hæc Synodus omnibus eorum Superioribus interdicit, ne hæc deinceps fieri ulla ratione patiantur, alioquin contra ipsos, tanquam principales causas abusum, qui ex hoc consequuntur, sine ulla dissimulatione procedatur.

## CAPUT VIII.

Mulieres ad loca regularia Monasteriorum virorum extra tempus supplicationum aut processionum sub pœna excommunicationis contra easdem mulieres, & suspensionis a Divinis contra Superiores eorundem Monasteriorum, quocumque prætextu ne admittantur.

## CAPUT IX.

Cum autem idem Concilium Tridentinum sub obtestatione Divini iudicii, & interminatione maledictionis æternæ, omnibus Episcopis præcipiat, ut in omnibus Monasteriis sibi subiectis ordinaria, in aliis vero Sedis Apostolicæ autoritate clausuram Sanctimonialium, ubi violata fuerit, restituant, & ubi inviolata est, observari maxime procurent, inobedientes atque contradictores per censuras Ecclesiasticas, aliasque pœnas quacunque appellatione proposita compescendo, invocato etiam ad hæc, si opus fuerit, auxilio brachii sæcularis: Nos ne nostro officio hac in

K k k k a

parte

parte defuisse inveniamur, dictamque maledictionem æternam (quod absit) incurramus, cum omnia Monasteria Sanctimonialium nostræ Diœcesis a nostra subjectione sint exempta, omnes eorundum Superiores ex intimo charitatis affectu requirimus, & sub eadem obtestatione & interminatione moneamus, ut tam salutare Decretum statim post publicationem hujus Synodi summo studio exequantur, ne Nos ipsi, tanquam ejus Sanctæ Sedis delegati, ad dictas censuras, aliasque pœnas, aut ad prædicti brachii sæcularis invocationem procedere compellamur, prout tenemur, ex ordinatione dicti Concilii Tridentini, ne nostram hac in parte, & omnibus aliis, quæ dictos Regulares concernunt, negligentiam, Concilium Provinciale supplere & coercere cogatur, quod de dictorum Superiorum pietate ac religionis zelo confidimus.

## CAPUT X.

Ut autem dicti Monasteriorum Superiores, tanto se promptiores & ferventiores ad dictam executionem exhibeant, quanto majus periculum ipsis & aliis ex ejus neglectu imminere cognoscent, ultra prædicti Concilii Tridentini præceptum, adjiciendam hic duximus Bullam fœlicis recordationis GREGORII Papæ XIII. continentem revocationem omnium licentiarum ingrediendi Monasteria Monialium & Virorum, & prohibitionem, ne habentes licentias ab Episcopis vel Superioribus in casibus necessariis, ingrediantur Monasteria Monialium, pro libito, nec necessitatibus urgentibus duntaxat, hujusmodi sub tenore:

**GREGORIUS EPISCOPUS, SERVUS**  
servorum Dei, ad perpetuam rei memoriam.

**U**bi gratia & indulta ab hac Sede concessa successu temporis incommodum adferre noscuntur, expedit illa salubri præsentis consilio submoveri. Proinde Sanctimonialium quieti & tranquillitati consulere, ac omnia, quæ illas a spiritualium rerum cogitatione, & exercitio avocant, impedimenta tollere, periculaque & scandala ab eis remove cupientes, auctoritate præsentium revocamus & abolemus omnes & quascunque licentias ac facultates

ingrediendi Monasteria, domos, & loca Monialium, ac etiam virorum quorumvis Ordinum, quibusvis etiam Comitissis, Marchionissis, Ducissis, & aliis cujuscunque status & conditionis mulieribus, ac etiam omnes & quascunque licentias ingrediendi Monasteria, domos, & loca ipsarum Sanctimonialium, quibuscunque viris, etiam ejusdem status & dignitatis, tam a Prædecessoribus nostris, quam etiam a Nobis & Sedis Apostolicæ Legatis, aut aliis, ex quibusvis, quantumcunque urgentibus causis, sub quibuscunque tenoribus, & etiam derogatoriis derogatoriis, revocatoriis restitutoriis, aliisque efficacioribus clausulis, irritantibusque & aliis Decretis, etiam motu proprio, & ex certa scientia, deque Apostolicæ potestatis plenitudine, atque ad Imperatoris, Regum, Reginarum, aliorumque Principum contemplationem vel supplicationem concessas, confirmatas, ac etiam iteratis vicibus renovatas, cassamusque & annullamus literas desuper confectas, & processus habitos per easdem. Inhibemus eisdem, qui illas obtinuerunt, sub excommunicationis pœna, ipso facto incurrenda, super qua, a nemine, nisi a Romano Pontifice, præterquam in mortis articulo absolutionis beneficium possit impertiri, ne ipsarum licentiarum prætextu, Monasteria hujusmodi quovis modo ingredi audeant: Abbatissis vero, nec non Abbatibus, Conventibus, ac aliis Monasteriorum utriusque sexus Superioribus, & personis, quocunque nomine vocentur, districte præcipimus, sub eadem excommunicationis pœna, nec non privationis dignitatum, beneficiorum & officiorum suorum, ac inhabilitatis ad illa & alia impostero obtinenda, ne in Monasteria, domos, & loca sua, quemquam, prætextu hujusmodi licentiarum & facultatum ingredi faciant, vel permittant, quin etiam sub eisdem pœnis ipso facto incurrendis, prohibemus atque interdiciamus omnibus, & quibuscunque personis Ecclesiasticis, & secularibus, ac etiam Ordinum quorumcunque, etiam mendicantium Regularibus, ne prætextu licentiarum ab Episcopis vel Superioribus (quibus illas concedendi in casibus necessariis tantum ex Decreto Concilii Tridentini tribuitur) Monasteria ipsa Monialium, pro libito, sed necessitatibus urgentibus duntaxat ingredi, neve Moniales sub eisdem pœnis illos aliter admittere præsumant: non obstantibus præmissis, ac Constitutionibus ac Ordinationibus Apostolicis, Monasteriorumque & Ordinum prædictorum, juramento, confirmatione Apostolica, & quavis firmitate alia roboratis,

boratis, statutis & consuetudinibus, privilegiis quoque, exemptionibus, & indultis Apostolicis, illis, eorumque Superioribus prædictis, ac aliis quibuscunque, per quoscunque Romanos Pontifices, Prædecessores nostros, ac Nos, & dictam Sedem, sub quibuscunque tenoribus & formis, ac cum quibusvis clausulis & Decretis concessis, confirmatis, ac etiam iteratis vicibus innovatis; quibus omnibus, eorum tenores, perinde ac si ad verbum infererentur præsentibus, pro sufficienter expressis habentes, illis alias in suo robore permansuris, hac vice duntaxat specialiter & expresse derogamus, cæterisque contrariis quibuscunque. Quoniam autem difficile esset præsentibus ad omnia loca perferri, volumus earum exemplis, etiam impressis, manu Notarii publici, & sigillo personæ in dignitate Ecclesiastica constitutæ munitis, eandem fidem in iudicio, & extra illud ubique locorum adhiberi, quæ præsentibus adhiberetur, si essent exhibitæ vel ostensæ. Nulli ergo hominum liceat hanc paginam nostræ revocationis, abolitionis, cassationis, annulationis, inhibitionis, præcepti, prohibitionis, interdicti, derogationis & voluntatis infringere, vel ei ausu temerario contraire. Si quis autem hoc attentare præsumpserit, indignationem Omnipotentis Dei, ac Beatorum Petri & Pauli Apostolorum ejus, se noverit incursurum. Datum Romæ apud S. Petrum Anno Incarnationis Dominicæ 1575. Idibus Junii, Pontificatus nostri anno IV.

## CAPUT XI.

Superiores dictarum Sanctimonialium, moneant Præfectas earundem, ut non permittant puellas habitum regularem suscipere, vel professionem emittere, quin exploraverit Episcopus, vel eo absente aut impedito, ejus Vicarius, aut aliquis ab eis deputatus, virginis voluntatem, cæteraque examina-verit, quæ præscribit dictum Concilium Tridentinum, ex quo evidenter apparet, Episcopum tam de vestitione, quam de professione reddi debere certiore, & quidem uno ante ipsam professionem mense, sub pœna suspensionis ipsius Præfectæ ab officio suo, quamdiu ipsi Episcopo videbitur.

## CAPUT XII.

Illud postremo adjiciendum duximus, non convenire Regularibus, ut iis, quæ propria sunt muneris Pastoralis, se immisceant, proinde ipsis absti-

nendum ab administrando secularibus, tempore Paschatis Eucharistiæ Sacramento, & a purificatione mulierum post partum, quod relinquere debent proprio eorum Pastori, seu ejus vices gerenti, juxta Decretum dicti Concilii provincialis Tit. de Bapt. Cap. 13. Sed nec audiant ægrotorum confessiones in domibus privatis, nisi hoc prius significaverint proprio eorum pastori, & multo minus præsumant eis deferre secreto & sine lumine Sacrosanctam Eucharistiam, quod nequidem ipsis pastoribus permittitur, nec sollicitent ipsos ægrotos ad eligendum in ipsorum Ecclesiis sepulturam, & si sponte eam elegerint, serventur nihilominus Ecclesiæ Parochiali sua jura.

## TITULUS XI.

*De Bonorum Ecclesiasticorum  
conservatione.*

## CAPUT I.

**I**Nanis futura est personarum Ecclesiasticarum, de quibus hætenus, reformatio, ni bonorum, quibus honeste sustententur, diligens ratio habeatur: itaque non minima cura Prælatorum, & aliorum quorumcunque Ecclesiastici Ordinis, circa hoc versari debet, ut quæ illis, vel antiquorum pietas donavit, vel Antecessorum industria acquisivit, summo studio ab iis conserventur: cum in finem Decani in hoc incumbant, non tantum ut Beneficiorum omnium sui districtus notitiam habeant, sed etiam eorundem qualitates, valorem videlicet & onera norint, an hæc persolvantur, & an ipsa bona, juxta verum valorem elocentur, num etiam alienationes perpetuæ, aut ad longum tempus de iis fiant: quæ omnia redigant in scriptis cum nominibus & cognominibus eorum, qui dicta Beneficia curata aut simplicia possident, & infra sex menses a die publicationis hujus Synodi, eorundem terras, redditus, proventus, cæteraque bona omnia, per modum inventariorum aut registri, exacte & sigillatim describant, & ipsa inventaria a Majori Ballivo aut Scabinis, seu aliis publicis personis, quæ ejusmodi bonorum notitiam habent, subsignari curent,



rent, eaque suis Decanis tradant, sub pœna suspensionis a perceptione dictorum proventuum.

#### CAPUT II.

Decani vero ejusmodi registra in Archivum nostrum reponenda Nobis transmittant, & si qui Possessores Beneficiorum hujusmodi huic Statuto non obtemperaverint, fructus eorumdem a Decanis arrestentur & sequestrantur.

#### CAPUT III.

Et quia experientia cognovimus, in curia Pastorum, & aliorum, qui Beneficia simplicia obtinent, aut malitia hæredum eorumdem, qui literas originales, registra, & alia munimenta in domibus mortuariis inventa, non restitunt eorum successoribus, denique injuria bellorum dum ad varia loca transferuntur, magnam partem bonorum ad dictas Ecclesias Parochiales, aut simplicia Beneficia spectantium, perire, aut certe ignorari, & pro derelictis haberi, in grave præjudicium Collatorum, seu Decimatorum, qui postmodum pro portione Canonica Pastorum, aut reparatione Ecclesiarum seu Capellarum variis modis molestantur & vexantur, ut huic malo aliqua ratione succurramus; volumus, ut literæ originales, registra & alia munimenta eorumdem bonorum, in formam authenticam transsumantur, & originales quidem in Archivum nostrum reponantur, inde retrahendæ, quoties opus fuerit, relictis eorum loco dictis transumptis, quæ alias in manibus dictorum Pastorum & aliorum Beneficiatorum, ad quotidianos usus remanebunt, quibus tamen dicta originalia non consignabuntur, nisi scripto se illa recepisse testentur, & de illis restituendis seu referendis fidem suam præstent.

#### CAPUT IV.

Prælati vero & Capitula simili aliqua ratione provideant, ut omnia munimenta Ecclesiarum suarum ab hac diuturna bellorum tempestate vendicentur, & in tuto conserventur, & si quæ ob nimiam vetustatem consumptioni proxima sunt, transsumi, & in formam authenticam redigi curent,

etiam implorata Principum autoritate, ut ipsis transumptis, in judicio & extra, plena & indubitata fides adhibeatur, quod & Nos (si opus fuerit) pro prætactis bonorum ad Ecclesias Parochiales & simplicia Beneficia pertinentium transumptis, fieri omnino curabimus.

#### CAPUT V.

Si quæ bona ad dictas Parochiales Ecclesias, aut simplicia beneficia pertinentia, non ob solutionem censuum ab ipsis Pastoribus aut Beneficiatis evincantur, aut eviçtione ab aliis facta, ab ipsis recuperentur, non ideo liberum sit ipsis Pastoribus, aut Beneficiatis, pignora sic eviçta sibi retinere, aut ea transferre in suos hæredes, sed suis Ecclesiis reacquisita esse censeantur: si quis aliter fecisse deprehendatur, condignis pœnis afficiatur, & contra hæredes, tanquam detentores bonorum Ecclesiasticorum, procedatur.

#### CAPUT VI.

Porro cum non sufficiat præcavisse, ne bona Ecclesiastica deperdantur, sed æque nostrum sit providere, ne a possessoribus, in præjudicium successorum notabiliter imminuantur; declaramus exacte observanda per universam Dicecesim nostram, quæ Concilium Provinciale Cameracense, Tit. *De reſta Bonorum Ecclesiasticorum administratione*, prudenter sanxit de alienationibus & locationibus bonorum Ecclesiasticorum, quæ etiam piissimæ memoriæ PHILIPPUS II. Hispaniarum Rex suo edicto stabilivit, sub pœna nullitatis contractuum aliter factorum absque Superiorum Decreto, cum causæ cognitione interposito. Quæ omnia hæc etiam Synodus probat, & tam a Prælatibus & Capitulis, quam ab aliis inferioribus & singularibus personis Ecclesiasticis, imo & Administratoribus bonorum, quæ fabricæ Ecclesiarum, vel pauperibus relicta sunt, terminos locationi domorum & terrarum arabilium, pratorum & decimarum ibidem præscriptos, deinceps inviolate observanda fore declarat.

#### CAPUT VII.

Dicti vero Prælati & Capitula, current in singulos annos reddi computus suo.

suorum bonorum, in quibus de novennio in novennium specificentur quantitas & limites terrarum arabilium, & pratorum, nec non limites decimarum & fundi, super quibus hypothecati sunt census & redditus eorum Ecclesiis debiti.

## CAPUT VIII.

Hoc ipsum facere teneantur omnes Administratores bonorum fabricis Ecclesiarum, mensis pauperum, aut piis locis relictorum, & computibus eorum intersint Decani aut Pastores, cujusvis Ecclesiæ, & si bona ipsa secundum verum valorem, & factis proclamationibus, non elocari, aut in alios, quam debent usus converti, vel expensas inutiles in præjudicium piarum foundationum fieri, aut pecunias ex redemptione censuum seu reddituum provenientes, in emptionem aliorum reddituum aut bonorum immobilium non converti animadverterint, Nos de prædictis diligenter informant, ut quantum in Nobis est, his abusibus prospiciamus, prout de jure tenemur, & ex Decreto Concilii Tridentini.

## CAPUT IX.

Ut autem dicta bona rectius administrarentur, eorum administratio viris bonis & timoratis de consilio Pastorum & præcipuorum parochianorum semper committatur, qui jurent in sua admissione, se eandem diligentiam adhibituras in dictis bonis curandis, recuperandis & conservandis, quam in propriis adhiberent, seque de illis in singulos annos integrum & fidelem computum reddituros.

## CAPUT X.

Domorum quoque pastoralium, quarum ruinæ non solum Pastoribus, sed & Parochianis omnibus præjudicium adferunt, diligentissima cura habenda est, proinde dictis Pastoribus serio præcipimus, ut eas integras conservent: Decanis vero, ut dum Ecclesias visitant, dictas quoque domos visitare non omittant, & si quid collapsum aut ruinosumprehenderint, statim per Pastores reparari curent, alio-

quin hoc in relationibus suarum visitationum sigillatim annotent, ut Pastores ad eas reparandas, prout juris fuerit & rationis, compelli, & ob præteritam negligentiam, arbitraria pœna puniri possint. Quod si aliqui sint, qui pastorales domos non habeant, vel temporum injuria funditus everse sint, provideant cum suis Parochianis, & aliis, qui de jure aut consuetudine in hoc pium opus contribuere tenentur, ut quanto citius fieri potest, in fundo pastoralis aut alio commodiori loco Ecclesiis ipsis proximo ædificentur. Quæ vero ante obitum Pastoris debite non fuerint reparata, sumptibus domus mortuariæ eorundem reparentur. Arrestatis & sequestratis per Promotores nostros ad eum finem fructibus & emolumentis, ad ipsam spectantibus, implorato etiam, si opus fuerit, ob commune & publicum bonum, brachio sæculari.

## CAPUT XI.

Si qui vero Ecclesiarum & quorumcunque Beneficiorum, aut piorum locorum jurisdictiones, bona, census, ac jura in proprios usus convertere, illaque usurpare præsumpserint, seu impedire, ne ab iis, ad quos jure pertinent, percipiantur, sciant se anathemati tamdiu subiacere, quamdiu jurisdictiones, bona, res, jura, fructus & redditus, quos occuparunt, Ecclesiæ ejusdem Administratoribus, sive Beneficiato integre non restituerint, ac deinde a Romano Pontifice absolutionem obtinuerint, & si Clericus sit, ultra dictas pœnas, etiam quibuscunque Beneficiis se privatum, & ad quæcunque alia Beneficia inhabilem effectum esse cognoscat, per expressam ordinationem Concilii Tridentini (\*), & ita a Prædicatoribus Verbi Dei doceri, & sæpius inculcari, nec non a Confessoribus sic pœnitentes moneri cupimus & mandamus.

## CAPUT XII.

Porro si tanta diligentia bona Ecclesiarum temporalia conservanda sunt, quanto magis advigilandum est, ut Ecclesiæ ipsæ, & alia loca Deo sacra ab omni

(\*) Sess. 22. Cap. 11.

omni periculo profanationis, exustionis, aut direptionis, & quacunque ruina & damno præserventur: ideo tam Rectoribus earundem & aliis Clericis, quam locorum incolis prohibemus, ne in illa cum suis pecoribus & aliis bestiis ac domesticis utensilibus se recipiant, sed nec in illis dormire, comedere aut bibere præsumant. Quod si absoluta necessitas ob vim aut incursus hostium, aliquos ipsorum ad hoc compellat, statim illa cessante, non solum pecora, sed & dicta utensilia, quæ magnum præstant Divinis officiis impedimentum, amoveant, Templaque ipsa diligenter mudentur, priusquam in illis Sacrosanctum Missæ Sacrificium celebretur, sub pœna suspensionis a Divinis in Clericos, & excommunicationis in Laicos decernendæ.

## CAPUT XIII.

Non parum quoque damni accedit Sacris Templis, quod multis in locis per totam diem aperta relinquantur, & non solum furum direptionibus, sed etiam variis profanationum periculis exponantur. Quod ne deinceps contingat, omnibus Ecclesiarum Præfectis nostræ Diœcesis, & Pastoribus & Matriculariis Parochialium Ecclesiarum præcipimus, ut extra tempus Divini officii, easdem clausas semper teneant, seu claudi curent, sub pœna unius floreni toties quoties a negligentibus exigendi, & fabricæ ipsius Ecclesiæ applicandi.

## CAPUT XIV.

Cœmeteria vero, muris, fossis aut sepibus, ac de nocte etiam portis ita muniantur, ut nec contentiosis ac dissolutis hominibus, qui eadem sæpius profanant, nec feris aut fœdis animalibus ad illa pateat ingressus, sed nec in hortos redigantur, nec bestię in illis pasci ulla ratione permittantur, & si ibidem repertæ fuerint, comprehendantur, nec suis possessoribus restituantur, donec quinque stuferos pro singulis animalibus eidem fabricæ applicandos persolverint, in hanc enim emendam seu mulctam pecuniariam ex nunc, prout ex tunc eos condemnamus, ut hæc irreverentia erga loca ab Epi-

scopis solemniter in sepulturam Christianorum dedicata, aliquando refrænetur: multo magis prohibemus, ne in eisdem cœmeteriis ante aut post Divinum Officium, seu alio quovis tempore, insolentiæ fiant, sed in illis prout & in ipsis Ecclesiis, cum omni reverentia ac modestia incolæ omnes sub eisdem pœnis converfentur. Ad quarum executionem, Matricularium cuiusque Ecclesiæ deputamus, & pro suo salario ei quartam partem earundem assignamus. Quod si ipsemet Matricularius, aut etiam Pastor, suas in cœmeterio bestias depasci permittat, in duplum condemnatur.

## CAPUT XV.

Diligenter etiam advigilandum est, ne in dictis cœmeteriis vendantur merces cujusque generis, sed nec in vicinis locis expedit venale exponi vinum, aut cerevisiam, iis diebus, quibus Dedicatio Templi, aut sollemnis processio celebratur, propter insolentias & enormia peccata, quæ ex ea re plerumque accidunt. Quare hæc Pastores fieri prohibeant, & quatenus opus sit, invocent auxilium brachii sæcularis.

## CAPUT XVI.

Cum autem immunitatis Ecclesiasticæ non minor habenda sit ratio, hæc Synodus diligenter servari optat & præcipit, quæ de eadem, & de jurisdictione Ecclesiastica, Sacri Canones & utrumque Concilium provinciale decernunt & statuunt.

## CAPUT XVII.

Porro ut satisfiat Decreto Concilii Tridentini, *Sessione 25. Cap. 10.* quo jubet in singulis Conciliis provincialibus aut Diœcesanis, aliquot personas, quæ qualitates habeant, juxta Constitutionem Bonifacii Octavi, quæ incipit: *Statutum*: & alioquin ad id aptas designari, quibus causæ Ecclesiasticæ in partibus delegandæ committantur, præsens Synodus designavit & nominavit in Comitatu Namurcensi Reverendos & Venerabiles Viros, Magistrum *Nicolaum Causin*, Sacræ Theologiæ Licentiatum, Ecclesiæ Cathedralis Decanum, Magistrum *Jacobum Cassot*, Juris utriusque Licentiatum, ejusdem Ecclesiæ Canonicum



nicum & Scholasticum, Floreffienssem & Boneffienssem Abbates: & Magistrum Joannem Somet, Ecclesiæ Collegiatæ Beatæ Mariæ Virginis Decanum & Canonicum. In Gallica vero Brabantia Reverendos Dominos, Gemblacensem & Villariensem Abbates, ac Magistrum Nicolaum j' Ardeur, Juris utriusque Licentiatum, & Ecclesiæ Collegiatæ Beatæ Gertrudis oppidi Nivellensis Decanum: quorum nomina ad Summum Pontificem, & ejus ac Sanctæ Sedis Apostolicæ in his partibus Nuntium, transmittimus, ut juxta prædictum Decretum delegationes quæcunque, aliis, quam his factæ, subreptitiæ censeantur. Interim admonemus eosdem, uti & ordinarios Judices nostræ Diocesis, ut terminandis causis, quanta fieri potest brevitate studeant, ac litigatorum artibus, competenti aliqua ratione, ut eadem Synodus Tridentina præscripsit, occurrant.

## TITULUS XII.

*De Visitatione.*

## CAPUT I.

**C**UM frustra condantur Leges ac Statuta, nisi postmodum debitæ executioni demandentur, reliquum est, ut, qua via Sacrosancti Concilii Tridentini, Provincialis Cameracensis, & hujus Synodi nostræ, ac Prædecessorum nostrorum Decreta in praxim deduci possint, provide ordinetur: nec alia melior & faciliior visa est, quam ut ultra visitationes, quas Nos ipsi per DEI gratiam personaliter facere intendimus, Decani, singulis annis, Archidiaconus vero singulis trienniis, suos districtus visitent, juxta formulam illis a Nobis præscribendam, Pastores, aliosque Sacerdotes, nec non Matricularios sui officii diligenter admo-  
neant, excessus ac defectus eorum annotent, & ad Nos referant, quibus sua salaria per eos, qui tenentur, solvi mandamus.

## CAPUT II.

Promotoribus etiam nostris injungimus, ut diligenter & assidue se informant, num prædicta Decreta per universam nostram Diocesis, observentur, & si quam resciverint in Prælati aut Capitulis negligentiam, de illa Nos reddant certiores, alios citari curent coram Officialibus nostris, quibus mandamus, ut pœnas ipsis Decretis appositæ, prout jacet, exequantur, reliquis casibus punitionem excessuum aut defectuum eorumdem arbitrio relinquentes.

## CAPUT III.

Ne quis autem ignorantia prætextu, a prædictorum Decretorum observatione se excuset, dictorum Conciliorum, quatenus opus sit, & hujus Synodi Decreta publicamus & promulgamus, & pro legitime publicatis, ab omnibus haberi, & ita per quoscunque Judices judicari volumus, ac omnibus Prælati, Canonicis, Pastoribus, ac aliis Sacerdotibus nostræ Diocesis præcipimus, ut eadem penes se habeant, legant & observent, nec non a suis subditis observari faciant. Nos uti prævaricatores & contemptores earum condignis pœnis coerceri mandamus, ita omnibus eadem observantibus nostram benedictionem impartimur, quam vobis concedet fons omnis benedictionis, qui est benedictus in sæcula. Amen.

**L**ECTA & publicata fuerunt hæc Decreta in Ecclesia Cathedrali Sancti Albani Martyris, Civitatis Namurcensis, præsidentibus Synodi Patribus, de mandato Reverendissimi Domini Episcopi (\*) eidem præsidentis, anno Domini Millesimo sexcentesimo quarto, die vigesima mensis Octobris.

JACOBUS FABRI, Synodi Secretarius.

LEO DE HACCURIA, dictæ Synodi Scriba.

(\*) Fuit is FRANCISCUS BUSSERETUS (*de Buissere*), quem Nobilis, eaque Patricia familia Montibus Hannoniæ Orbi dedit. Prima domesticos intra parietes hausit Latini sermonis elementa, quin & omnem humaniorum Litterarum, quibus imbui adolescentia formarique solet, cursum non sine magna ingenii sui commendatione præclarissime confecit. Annum ætatis agebat vicesimum, cum Lovanii

Tonus VIII. Concil. German.

sub Liliensis Gymnasii Præceptoribus eos faceret in Philosophia progressus, ut locum inter artium Magistros bene multos vix non principem assecutus, scientiæ istius arcana palam explicandi facultatem, ex arbitrio eruditorum Verborum & calculo, facile sibi comparavit. Post arduum quinquennii laborem tum Utriusque Juris Licentia, ut vocant, eadem in Urbe, tum Canonico in Metropolitana beneficio Cameraci A. 1574. potiebatur. Romam dein petiit, Bononiæque in J. U. Doctorum Ordinem solenni est ritu collocatus. Cameracum e Latio redux, a virtute magis, quam ab illa doctrinæ Laurea (cum *Morero* loquor) commendatus, ad amplissimos Senatus Ecclesiastici honores, veluti per gradus ascendit. Officialis enim primum, tum Archidiaconi A. 1583., post Decani & Vicarii Generalis A. 1586. splendida administravit munia, in iisque partes suas tam egregie sustinuit, ut, quod suspicerent in eo omnes, atque imitarentur, desiderari nihil posset. Namurcenses certe, ad quos præcellentis fama Viri pervenerat, aptiorem illo ac digniorem, cui Episcopalem imponerent Insulam A. 1602. seque regendos darent, reperere neminem. Quo quidem in officio ad annum 1614, *Morero* teste, peritit. S. Concilii Tridentini sapientissima Decreta quanti cum faceret Ipse, tum ab aliis fieri percuperet, testatur satis præfixa Synodalibus hisce Statutis atque ab Eodem habita Oratio elegans, accommodata tempori, idoneis Sanctorum Patrum sententiis exornata. Fulgere vix in Archi-Episcoporum ac Ducum Cameracensium Sede virtus FRANCISCI cœperat A. 1615., & ecce, sub ipsa Pontificatus auspiciis VI. Nonas Majas ejusdem anni, acerbissimo summorum imorumque luctu Valencenis occubuit, mirum apud omnes sui desiderium relinquens. In æde Metropolitana Cameracensi, ubi Præsulis optimi exuviae quiescunt, hanc videre est tumuli inscriptionem:

**EPITAPHIUM**

ILLUSTRISSIMI ET REVERENDISSIMI DOMINI  
**FRANCISCI BUISSET,**  
 QUI METROPOLITANÆ HUIUS ECCLESIAE  
 MUNIIS FUNCTUS PRÆCIPUIS,  
 AB ANNO M. D. LXXIV. CANONICUS,  
 OFFICIALIS, ARCHIDIACONUS MAJOR,  
 DECANUS, ET SEDIS VICARIUS GENERALIS,  
 INDE ANNIS QUINDECIM  
 EPISCOPUS NAMURCENSIS;  
 TANDEM  
 ARCHIEPISCOPUS ET DUX CAMERACENSIS  
 ASSUMPTUS,  
 PRIMO PONTIFICATUS SUI ANNO OBIT,  
 ÆTATIS LXVI. SALUTIS HUMANÆ  
 M. D. C. XV. MAJI II.  
 TU ANIMÆ LECTOR  
 BENE APPRECIARE.

*Cl. Foppens Biblioth. Belg. P. I. pag. 288. Sac. Belgii Chronolog. de Castillon Part. ult. pag. 358. Præ cæteris Nicol. de Guise in suo, quem A. 1616. publici juris fecit, libello: ubi vitam, virtutes, resque præclare gestas Illustrissimi hujus Archi-Episcopi compendio quidem, sed tanto tamen expressit haud dubie verius ac felicius, quanto easdem licuit propius, cum Ipsi ab secretis, imo a latere quasi alliduisime esset, intueri. Opusculum mihi hæc adnotanti deerat.*

*Ex Decretis & Statutis omnium Synodorum Diœcesanarum Namurcensium &c:  
 de jussu & mandato Illmi & Rdmi Domini FERDINANDI COMITIS  
 DE BERLO Episcopi Namurcensis &c. A. 1720. Namurci recufis.*



# DECRETA & CONSTITUTIONES SYNODALES

JOANNIS V. CURIENSIS EPISCOPI,  
Pro Vicariis foraneis, Decanis, Camerariis, aliisque Sacerdotibus  
Anno Christi MDCV. Pauli V. PP. I.  
Rudolphi II. Imp. XXIX. editæ.

JOANNES, DEI & APOSTOLICÆ SEDIS GRATIA EPISCOPUS CURIENSIS,  
Dilectis Nobis in Christo Vicariis foraneis, Decanis, Camerariis, cæterisque Sacerdotibus, Curatis, & non Curatis per Diocesim nostram Curiensem ubique constitutis, Salutem in Domino sempiternam.

Sapientis illud verbum: *judicium durissimum* in his, qui præsumunt, fiet, quod frequentius ruminare usu venit, Nobis & timoris & sollicitudinis plurimum parit: Timoris quidem, nam ad hoc onus, munusque nostrum minus sufficientes Nos agnoscimus: Sollicitudinis vero, quia de vobis strictissimam sumus reddituri rationem. Hinc fit, ut ex quo tempore placuit S. P. N. CLEMENTI VIII. Pont. Max. electionem per Reverend., Nobiles, Doctissimosque Viros bujus Almæ & antiquissimæ Ecclesiæ Canonicos, ad quos ea spectat, in Nos factam confirmare, atque adeo Episcopalem nobis Cathedram & vestrum omnium curam committere, nullam fecerimus moram, quin ad Ecclesiæ nostræ & Pastoralis curæ functiones obeundas festinarem. Verum ea in re, multum Nos terruit, & nostra ad tantum onus imparitas, & zizania super seminata, præ quorum multitudine triticum vix cernitur. Qui vero Spiritum bonum dat petentibus se, qui confert robur infirmis, qui semen administrat seminanti Deus, ille mirum in modum Nos consolatus est, cujus quippe ope freti animum sumpsimus ad ea, quæ Nobis concredita sunt, alacri studio & animi ardore amplectenda, sperantes per ejus gratiam declaratos Nos, quantum de vobis simus solliciti.

Cum vero Pastoralis officii ratio dicet, ut, qui præsumunt aliis, quæ per semetipsos expe-

dire nequeunt, per alios substitutos & idoneos ea curent, volumus pro munere nostro, ac tranquilliori conscientie statu, nec non Cleri, populiue commodo aliquas Constitutiones ac Decreta præscribere, & per Substitutos nostros strictè exequenda mandare, cum præsertim videamus multa in nostro Episcopatu reformatione ac correctione indigere, multosque Sacerdotes, quæ ad mores tum suos, tum aliorum reformandos, pietatem inducendam, Ecclesiæque libertatem tuendam pertinent, vel ob ignorantiam negligere, vel ob malitiam despicere. Quæ Decreta latius post totius Episcopatus visitationem, & Synodi Diocesanae, quam, Deo dante, brevi intendimus, celebrationem, extendere statuimus, ut omnes Sacerdotes gregem sibi concreditum custodiant, saluari pabulo, fidelique Sacramentorum administratione, ad vitam æternam alant, & nutrant: Se ipsos vero tales illis exemplo præbeant, ut qui a foris sunt, de iis conqueri non habeant.

Quapropter optima spe nitimur, hæc nostra Decreta, Deo probata, vobis, populoque nostro salutaria fore, Divinam nobis desuper, gratiam celestemque benedictionem deprecantes: Curia 7. die Junii, Anno 1605.

JOANNES, Episcopus Curiensis &c. &c.

## DECRETA ET CONSTITUTIONES de Sacerdotibus generatim.

Quicumque ad curam animarum, vel ad alia Beneficia Ecclesiastica deinceps promovebuntur, examinati, & approbati prius coram Nobis, vel Vicariis nostris, quibus hoc

munus specialiter demandabitur, faciant Professionem Fidei, juxta Bullam PII IV. Pont. Maximi: Ac Nobis, & Successoribus nostris debitam obedientiam spondeant, ac jurent.



Horas Canonicas quotidie integre, ac devote dicant, quas nec in itinere ullo modo omittent, cum iter a recitandis Horis non excuset. Iter itaque facturi Breviarium semper secum deferre meminerint: cum vero iustis, & rationalibus causis intendamus Breviarium Missaleque Romanum in omnibus Diœcesis nostræ locis introducere, mandamus omnibus Sacerdotibus & Ecclesiarum Syndicis, ut illi pro se, & isti pro Ecclesiarum indigentibus Breviaria, & Missalia Romana, cæteraque ad Divinum cultum spectantia sibi cœmant, & tam in Choro, quam extra illum, illis solis utantur, contravenientes volumus debitis subiacere pœnis.

Noverint etiam febri, vel alia infirmitate leviter laborantes a dicendis Horis non excusari: suas itaque conscientias adeant, videantque, quid præstare possint, ne omittendo graviter peccent.

In Sacrosanctæ Missæ Sacrificio peragendo sint imprimis attenti, & devoti, neque faciem jam in hanc, jam in illam partem leviter convertant. Cæremonias ab Ecclesia præscriptas, & approbatas ex Romani Missalis Rubricis discant, atque diligenter observent, quibus nihil nec addant, nec demant.

Semper celebrent adjuncto sibi Clerico, vel alio ministrante, ac ad Missam respondente, quantum ullo modo fieri potest.

Accessum altaris pro opportunitate devote dicant, recessum vero nunquam intermittant, & plusculum finita Missa in gratiarum actione persistant; nihil enim magis intuentium offendit oculos, magisque tremendo hoc Sacrificio est indignum, quam Sacrificantem necdum forte consumptis Sacramentalibus speciebus vel statim sedere, vel etiam (quod longe pejus) in prophana cum obviis quibusque colloquia effundi, quod jejunæ & incompositæ mentis non leve est argumentum.

Calices, patenæ, corporalia, purificatoria, albæ, humeralia, mappæ altarium, cæteraque ad Divinum cultum spectantia, munda sint & decora. Quapropter sæpius mudentur, ac laventur.

Ut autem puriores ad hæc tremenda Myſteria accedant, singulis mensibus deputandis a Nobis Confessariis accurate confitebuntur. Quod si vero quis se intra hoc menstruum tempus lethalis peccati stimulo urgeri senserit, ac celebrare necesse sit, is ne celebret prius, quam saluari confessione peccata expiaverit, nisi occurrens necessitas tantum ipsi temporis neget: quod si eveniat intensum saltem contritionis actum eliciat, & antequam denuo sacrificet, priores noxas confessione eluat, statimque non expectato mense eidem suo Confessario, aut si ejus copia commode haberi non possit, alii Sacerdoti (docto tamen, pio ac approbato) confiteatur, ne iudicium sibi sumat, factus reus Corporis & Sanguinis Domini.

Testimonium peractæ confessionis mensstruæ annuatim quisque suo Decano, vel Vicario nostro ostendat.

Toties celebrent in hebdomada, quoties suorum beneficiorum fundatio, & approbata consuetudo præscribit: Neque enim in conscientia securi esse possunt, aut suorum beneficiorum redditus, tuto & iuste percipere, *de iis disponere*, nisi foundationibus satisfecerint. Prout enim volumus & præcipimus, ut secundum mentem Fundatorum omnes fructus & proventus suorum beneficiorum, nemine impediante, inquirere teneantur, eos percipere, de iis disponere, & iisdem gaudere possint, ita vicissim etiam serio mandamus, ut in executione officiorum eandem adimpleant.

In domibus, seu locis privatis extra Ecclesiam absque speciali nostra facultate ne celebrent.

Magni certe interest, qualiter ille vivat, qui pastorale Magisterium suscipit, ita ut, cum Pastor per abrupta graditur, ad præcipitium grex sequatur, & cuius vita despicitur, necesse sit, quod etiam prædicatio ejus contemnetur; inter alias autem dotes, quibus Clericus ornatus esse debet, maxima reputatur castitas animæ & corporis: quam vero turpe sit Sacerdotem Dei Altissimi toties immaculatum Agnum in altari tractantem, cæteraque Sacramenta a JESU CHRISTO Salvatore nostro

stro instituta administrantem immunditiae sordibus coinquinari, res ipsa satis, tanto populi scandalo, loquitur. Quocirca si quem turpi concubinatus crimine irretitum deprehenderimus, contra eum juxta Sacrorum Canonum, & maxime Concilii Tridentini Decreta severe procedemus, utque Vicarii, & Decani nostri contra tales de facto, citra ullum personarum respectum procedant, eis in virtute sanctae obedientiae mandamus atque praecipimus.

Luxuriosa res, vinum, & tumultuosa ebrietas, quicumque his delectatur, non erit sapiens. Prov. 2. Et Augustinus ad Sacras Virgines: Ebrietas est flagitiorum omnium mater, culpae materia, radix criminum, origo vitiorum, turbatio capitis, subversio sensus, tempestas linguae, procella corporis, naufragium castitatis, amissio temporis, insania voluntaria, ignominiosus languor, turpitudine morum, dedecus vitae, honestatis infamia, animae corruptela, quibus nos addimus Sacerdotes propter eam destruere opus Dei, seipsos perdere, & salutem hominum negligere.

Quare cum in plerisque execrabilis is vivendi modus sit, ut publicas tabernas, aliaque loca insueta ingrediantur, vino indulgeant, & post comestiones, & frequentata pocula, rixari, canere, inepta effutire, scurras agere, populo gravissima scandala parere, ac ea, quae eorum officium concernunt, vel omnino negligere, vel ineptissime exercere soleant; his opportunis remediis obviare cupientes, volumus & stricte mandamus, ut universus noster Clerus hospitia publica, tabernas & omnia conventicula (necessitatis & honestatis causis exceptis) ebrietatemque ac comestiones fugiant. Si qui vero reprehensibiles in hoc genere fuerint reperti, gravem nostram animadversionem experientur.

Convenientes vero Exequiarum, Capitularium, Congregationum, Confraternitatum, aut aliorum negotiorum tractandorum causa, volumus, ut nulli, quam in Presbyteri domo prandium sumant, mensam sacra lectione condiant, & sumpta refectioe, quae hone-

sta & sobria esse debet, quisque ad suum locum se recipiat.

Prohibemus etiam serio, ne Clerici nostri in contemptum suae sortis, exercitiis & negotiis saecularibus & illiberalibus dent operam. Audimus enim aliquos chirurgos, medicos, tabernarios, mercatores, laniones, venatores, conjuratores, divinatores, veridicos, pro pudor! agere. Alios autem aliena praedia conducere, pro aliis fidejubere, coram Judice saeculari advocare, procurare &c. Quae omnia uti a Clericali statu aliena, ut omnino vitentur, sub gravissimis poenis, mandato praecipimus. In sua tamen vel Ecclesiae suae pauperum aut propinquorum causa, nostra licentia prius obtenta, quin opem & patrocinium praestent, non impedimus. Sicut etiam artes honestas, & ut aliquid manibus lucrentur suis, quo ad victum necessaria facilius sibi conquirant, permittimus.

Multo minus, ut choreis, saltationibus, lusibus, praesertim tesserae & talorum, larvis, jocisque ineptis & inanibus spectaculis, levitatibus, & scurrilitatibus vacent Clerici, ferendum est.

Quin potius lectioni, meditationi, orationi, scriptioni, aliisque piis & honestis studiis, & exercitiis se totos tradant. Hinc doctorum pariter, & piorum librorum bonam suppellectilem sibi comparent, & supra omnia otium socordiamque, omnium malorum scaturiginem, devitent.

Inter alios vero libros sibi parabunt Biblia Sacra, Catechismus Romanum, Concilium Tridentinum, Armillam, Directorium Polanci e Societate Jesu, Rationale Divinorum Officiorum, Sacerdotale Romanum, Enchiridion controversiarum Patris Francisci Costeri, Institutiones Sacerdotum Francisci Toleti S. R. E. Cardinalis, expositores aliquos super Scripturam, aliosque libros pios, quos suasu, & consilio doctorum Virorum, praesertim Patrum Societatis Jesu, emant.

Clericorum arma, sunt orationes, & lachrymae. Idcirco edicimus, ne Clerici cujusvis generis arma nec offensiva, nec defensiva (exceptis cultellis ad

usum quotidianum necessariis) secum ferant, nisi forte extra locum, quem inhabitant, longius abeundum esset. Bombardis vero, balistis, hastis, relis, & similibus ipsis omnino interdiciamus.

Habitus, eorum statui, & dignitati congruentem, semper domi forisque deferant, qui sit oblongus ad talos usque defluens. Niger autem tantum color in vestitu adhibeatur, in quo ut sordes respuimus, ita exquisitam nimis sæcularem elegantiam improbamus. Indusia ad collum & ad manus crispata & rugosa aut nimium elaborata abjiciant. Collare sit simplex, modice latum, & honeste super veste reflexum. Armillis ac monilibus ne se ornent. Annulum digitis ne inferant, nisi quibus ob officii dignitatem aut honoris gradu sit jure concessus, quem solum digito dextræ manus quarto gerant, & dum Missæ Sacrificium faciunt, deponant.

Tonsuram, & coronam convenientem gestent, curentque, ut barba a superiori labro ita rescindatur, ut pili in Sacrificio Missæ Corpus Christi, & Sanguinem sumentem non impedi-  
ant.

Quisque beneficium sive curatum, sive simplex possidens, ut in ædibus beneficii sui resideat, volumus. Et cum nobis constet hujusmodi ædes Parochorum, Primissariorum, seu qualiumcunque beneficiorum multis in locis ruinam minari, ac Sacerdotes magis sibi, & suis, quam Ecclesiæ providere, ordinamus, ut omnes Parochi & Beneficiati, qui per biennium Parochiam, vel beneficium possederunt, eas ædes propriis expensis pro sua & successorum habitatione decenti restaurent, ad nostrum & Visitatorum judicium.

Promovendi vero ad beneficia, ut easdem ædes ita bene ædificatas suis expensis fartas tectas semper conservent, & necessaria ædificent: negligentiam autem Sacerdotum, vel inde discedentium, vel morientium, ex bonis eorum, aut propriis, aut relictis compensari, præcipimus.

Nullus se ullo beneficio aut Curato, seu non Curato intrudat, sed ab

iis, ad quos spectat, legitime præsentetur, ac a Nobis, vel Vicario nostro, investiat.

Quocirca omnes titulum possessionis sui beneficii, seu literas investituræ Nobis, Vicariis, seu Visitatoribus nostris quamprimum exhibeant. Si quis autem has nondum haberet, eas a Nobis dari curabunt. Si quis vero obtento beneficio statuto tempore se Nobis, seu Vicario nostro non præsentaverit, beneficio se carere, & debitæ pœnis subjacere sciat. Beneficium autem suum quisque retineat, nec sine auctoritate nostra permutet aut deferat.

Patronis seu Collatoribus nullus se pro præsentatione seu collatione beneficii obliget ad quicquam dandum, aut de juribus & redditibus beneficii remittendum, neque spondeat se detracta beneficio non reperiturum, aut ad Collatoris arbitrium cessurum, nec ullam obligationem (quam vocant Reversales) nisi a Nobis jussam & approbatam tradat. Sed jura Ecclesiæ, ipsamque libertatem Ecclesiasticam, & bona sibi commissa pro viribus defendat. Reditus tamen sibi beneficii non male & scandalose, sed pie ac utiliter dispense.

Coram Judice laico ab eo ad causam dicendam vocati, non compareant, neque sæculari ulli multas unquam solvant, neque pœnam infligere sibi sinant. Quodsi vis cuipiam inferetur, Ordinario significabit.

Sed si quis forte Clericorum (quod Deus avertat) in contemptum libertatis Ecclesiæ spretis debitæ clavibus ad laicos confugeret, illorumque patrocinium procuraret, ipso facto a Divinis sit suspensus.

Omnes Clerici per Diocesim Curientem jussis & mandatis nostris obtemperant, memoria teneant juramentum per eos Ordinario præstitum, & nullo prætenso fuco ab Ordinarii obedientia se subtrahant.

### *Monitiones ad totum Clerum nostrum.*

**S**emper memores estote vocationis vestræ, qua vos dignatus est Dominus



minus noster. Cœlestem in terris vitam, tamquam Angeli Dei, moribus vestris exprimere studete. Divino cultui, cœlestium rerum meditationibus, orationi, & litterarum studiis vacate. Charitatem tanquam seminarium omnium virtutum omni studio amplectimini.

Humilitatem, patientiam, justitiam, temperantiam, & reliqua officia Christianæ pietatis colite: quæcunque sunt vera, pudica, sancta & religiosa, ea cogitate, & agite.

Ut Deus misereatur populi sui, ut fidelium animos ad concordiam sectandam, ad vitia fugienda, ad virtutes amplectendas; ut e Regum, & Principum animis evellatur, si quæ sunt, discordiæ semina; pro dilatazione fidei Catholicæ, hæresum extirpatione, pro Romani Imperii victoria contra Turcarum feritatem Deum semper & devote orate.

Otium vitare semper studete, singulis diebus Dominicis, Festis Beatæ Virginis, Apostolorum, & Sanctorum, quæ feriantur, etiam tempore Adventus & Quadragesimæ litis populo a concionibus.

In incessu, statu, gestu, victu, doctrina, & exemplo, ita vos præbete, ut ab ordinis nomine, & ratione nullo modo discrepetis.

Nihil scurriliter, nihil jocosè, nihil indecore, nihil turpiter loquamini.

Maledicta, obtrectiones, curiositas, levitas, nugæ absint a vobis.

In excipiendis hospitibus intra parimoniam fines vos continete.

Mutuum dantes nolite nec petere, nec accipere aliquod interesse, sub pœna amissionis & summæ & census.

Sub prætextu tenuis beneficii nihil, quod speciem avaritiæ habeat, tentate.

Erga pauperes misericordes estote, eorumque indigentis pro posse subvenite.

Instruite subditos vestros religiose non solum in Missæ Sacrificio, verum etiam in Divinis aliis Officiis, quando versandum, quando standum genua flectenda, & assurgendum. Quod in

Templis sint fugiendæ confabulationes, deambulationes, strepitus, &c.

Quam sancte & religiose in concomitatu Eucharistiæ, supplicationibus, litanis versandum sit.

Parentes monete, ut filios, totamque familiam ad statâ doctrinæ Christianæ loca ipsi conducant, & domi semper pie ac religiose instruant.

Quando dies festi colendi & sanctificandi sint, docete & monete.

Libros prohibitos de eorum manibus omnino tollite.

Ut suis creditoribus (quod & vos facite) juste satisfaciant, præcipite.

Quicquid facitis ad laudem Dei, & salutem animarum facite, non vero studio aucupandi hominum gratiam. Servus Dei enim non essem, si hominibus placerem, ait S. Apostolus.

### *De Parochis.*

**N**ULLUS ad regimen animarum admittatur, nisi prius per Nos, vel Vicarium nostrum examinatus & approbatus fuerit. Qui vero curam gerunt, denuo stricte pro ea examinentur; minus idonei a cura amoveantur. Et si qui Parochi Coadjutores habere teneantur, eos sine mora Nobis, vel Vicariis nostris pro cura examinandos, & approbandos omnino & sub pœna arbitraria præsentent. Nullus item Sacerdotem vagantem in Ecclesia sua celebrare permittat, nisi visis prius ejus formatis, & nostra in scriptis obrenta licentia. Apostatæ, etiam Monachi nudam eorum Prælatorum demonstrantes licentiam; item Sacerdotes aliarum Diœcesium ab eorum Ordinariis non dimissi, Nobis inconsultis ad nullum admittantur beneficium.

### *Admonitio ad Parochos.*

**P**ARochi toti in eo erunt, ut populum sibi commissum, (\*) & potissimum comestiones & ebrietates, rixas, blasphemias, perjurias, imprecationes, obscena verba, detractiones, inimitias, & similia, quæ Deum offendunt, animam perdunt, & proximum lædunt, fugiant.

Per plures ex ignorantia, ex malitia

(\*) Subintelligendum, quod forte omissum: *sedulo curent.*

litiæ aliqui, & quidam ex levitate Sacrae Scripturae verbis & sententiis ad jocum & prophanos sensus pessime abutuntur. Quæ detestabilis licentia ut prorsus tollatur, studebunt Parochi tam in concionibus, quam in confessionibus. Omnes tam Sacerdotes, quam laici ab omni usu benedictionum, quæ ab Ecclesia approbatæ non sunt, abstineant; conjurationibus ullis, siue verbo, siue scripto ne utantur: magos & maleficos, vulgo *die Beschwörer und Segner*, ligaturis, nodis, characteribus, verbis occultis, nominibus ignotis, superstitionibus & observationibus tam temporis, quam loci, mentes hominum perturbantes, morbos, & cætera adversa accidentia amovere promittentes, a societate fidelium, nisi resipiscant, ex nostro mandato amovebunt Parochi.

Nulla modo patiantur sub altarium mappis herbas, cereos, aut alia hujusmodi supponi.

In hoc desudent Parochi, ut plebem suam Legem Dei & præcepta Ecclesiæ observare, justitiam & pietatem colere doceant.

Moncant patresfamilias, (\*) suos liberos, servos & ancillas diebus festis Sacrificio Missæ & concioni interesse. Si aliquos vero vel pro domus custodia, vel pro pascendis bestiis domi remanere necesse sit, ut saltem mutatis vicibus Sacrum non negligant.

Curabit Parochus, ut populus in Ecclesia pie versetur, Divinis Officiis diligenter & devote ad finem usque intersit, processiones ab Ecclesia institutas; etiam devotionis ergo susceptas non negligat, ut strepitus & confabulationes in Ecclesia vitet, eumque, quando standum, genua flectenda, & assurgendum sit, accurate doceat. Quæ omnia facile Dei ope consequentur Parochi, si prædicandi muneri diligenter invigilaverint, moresque suos ita composuerint, ut subditi eorum ab eis modestiæ, temperantiæ, castitatis, concordie, humilitatis, charitatis, devotionis, cæterarumque virtutum exempla petere possint.

Denique sine intermissione confiderent Parochi, & universi Sacerdotes se non ad propria commoda, non ad

divitias & luxum, sed ad labores & sollicitudines pro Dei gloria vocatos, si-bique muneris sui strictissimam coram Deo rationem aliquando reddendam, & animas sibi commissas, ac pretioso Christi Domini Sanguine redemptas, ex manibus eorum requirendas esse.

### *Doctrina Christiana.*

**S**trictè mandamus, ut in Parochiis vestris doctrinam Christianam, vulgo *die Kinderlehr* introducatis, ac introductam conservetis: dici enim vix potest, ac ipsi probe experimini, quantum ea res plebi vestrae spiritualis emolumentum sit allatura, præcipue autem vobis sit in manibus Catechismus Romanus, ac D. Petri Canisii, quem sedulo populo vestro proponetis, ac declarabitis.

Ubi Horæ Canonicae sine cantu dicuntur, volumus, ut Parochi primas & secundas Dominicas & Festorum Vesperas in Ecclesia decantent, ad quas omnes ejusdem loci Beneficiati accedere & in cantando juvare teneantur. Sicubi vero Parochi soli essent, & magnam in cantando difficultatem paterentur, eas saltem alta voce tractim legant.

Diebus Dominicis & Festis competenti hora dato signo ad Ecclesiam se conferant, Divinum Officium decantent, vel si soli sint, legant, ac ut omnia ordine ac rite peragantur & decantentur, curabunt. Credo vel Symbolum in Sacro-Sanctæ Missæ officio ut integrum & non medium, ut in multis Ecclesiis factum deprehendimus, cantetur, strictè & sub pœna arbitraria fabricæ applicanda mandamus.

Conciones suas (quas singulis diebus Dominicis ac Festis solennibus habere debent) & rebus & verbis aptis instruent, populumque vehementi cohortatione, ac fervore ad pietatem ac religionem, vitæ puritatem, ac innocentiam, pacem & concordiam adhortabuntur, eique bonæ vitæ exempla (quod perpetuum prædicandi genus dicitur) prælucebunt, & inflammabunt.

Ut autem tanto rectius commissum sibi populum salutari doctrinae pabulo pascant, Catholicos & præstantes

Autho-

(\*) Addendum: *debere eorum liberos &c. vel: quo curent, suos liberos &c.*

Authores tam vernacula, quam latina lingua conscriptos coemant, ex quibus & potissimum ex Catechismo Romano, quod maxime captui auditorum accommodatum, ac eis utile esse perspexerint, decerpent, ac proponent.

Evangelia Dominicalia & suggestu secundum præscriptum Missalis Romani in lingua vernacula populo prælegent, & explicabunt.

Parochus ultra diem a sua Parochia non absit: Si autem eum necessitate exigente diutius abesse, vel morbo corripitur contigerit, alium sufficientem, qui interim Parochiæ præsit, substituatur.

Dum Parochus vel alius concionatur, nulli Sacerdoti liceat Missæ Sacrificium facere, aut Baptismi Sacramentum extra mortis periculum administrare.

Invigilent Parochi, an in populo sint hæretici, vel in fide suspecti, libris prohibitis utentes, usurarii, concubinarij, blasphemj, adulteri, matrimonio juncti non cohabitantes: item inimicitias gerentes, Festa, Quadragesimam, & alia ab Ecclesia instituta jejunia non servantes, maxime abstinentiam ab esu carniū diebus Veneris & Sabbati, ac similes; quos si incorrigibiles extiterint, Nobis, vel Vicario nostro quamprimum denuncient.

Inprimis vero accurate animadvertant Curati, an aliqui in eorum Parochiis inveniantur, qui annuatim non confiteantur, nec communicent, ac eos (præterquam quod tales etiam ad Magistratum sæcularem deferre oporteat) Nobis omnino significari volumus.

Munera & officia parochialis curæ, non per alios (nisi infirmitas, vel summa necessitas aliter exiget) sed ipsimet Parochi obeant ac præstent.

### Capitulum rurale.

**A**nnum Capitulum ad hunc finem institutum est, ut ad laudem Dei talis actio perficiatur, & omni studio ac diligentia fidelium animarum auxilia, Ecclesiarum necessitates, & totius Cleri status in iis facilius exquiri & proponi possint. Quare volumus, ut omnes Sacerdotes per Vicarium, seu Decanum, ad Capitulum vocati, co-

dem loco, die & hora, sub pœna arbitraria pijs locis applicanda, compareant, una secum decorem externum & mundiciam internam deferentes. Peracto Missæ Sacrificio de Spiritu Sancto, & finita brevi concione, omnes superpelliceis induti processioni interfint. Finitis Litanis cantabitur Hymnus: *Veni Creator Spiritus*, cum oratione: *Deus, qui corda fidelium*. Tunc Vicarius, seu Decanus, in loco eminentiori sedens, lectis Capitulo, si quæ sunt perlegenda, instituet primo examen vitæ, & morum tam Sacerdotum, quam populi (\*) debitis medijs tollere studebunt. Deinde habebit Decanus, per se, vel alios idoneos juratos, absque omni humano respectu, examen doctrinæ juxta Sacrum Tridentinum Concilium, & Catechismum Romanum. Examen vero erit præsertim circa Sacramentum Pœnitentiæ. Ad quem finem instituta sint Sacramenta novæ Legis? An illa tria, materia scilicet, forma, & Minister requirantur in Sacramento Pœnitentiæ?

An per Sacramentum Pœnitentiæ deleatur omnis culpa & pœna integre, aut quo modo?

### De Confessario.

**Q**uæ conditiones requirantur in Confessario?

In quo differat potestas Ordinis a potestate jurisdictionis?

Quæ scientia in Ministris pœnitentiæ requiratur?

Quæ regulæ sint ad discernendum peccatum mortale a veniali?

Quæ bonitas in Confessore necessario requiratur?

An excommunicatus possit esse minister Sacramenti?

An debeant interrogari pœnitentes de peccatis, quando, quomodo, & quo ordine?

### De Contritione.

**Q**uæ dispositio requiratur necessario in pœnitente?

In quo differant contritio & attritio?

Quomodo cognoscat quis probabiliter se habere contritionem vel attritionem.

(\*) Sensus ille mancus & mutilus. Addendum videtur: *Quos irrepsisse abusus deprehenderint, debitis &c.*



tritionem, vel quibus mediis obviari possit?

An contritio sit aliquando in præcepto, & quando?

An debeat quis conteri distincte de singulis peccatis, vel satis sit de omnibus conteri in communi, & quo tempore hoc sit faciendum?

An formale propositum cavendi a peccato in futurum sit de necessitate contritionis?

Quæ peccandi occasio a pœnitente sit necessario relinquenda?

### *De Confessione.*

**A**N Confessio generalis totius vitæ sit necessaria ante mortem?

An in ea possit quis omittere aliquod peccatum alias confessum?

Quæ peccata sint confitenda de necessitate, quæ de congruitate, & cum quibus circumstantiis?

Quomodo differant circumstantiæ mutantæ speciem ab his, quæ aggravant?

Quibus casibus teneatur quis statim confiteri, quibus iterare confessionem, & quæ perfecta confessio dicatur?

### *De Satisfactione.*

**Q**ualis & quanta pœnitentia debeat a Confessore injungi pœnitenti, & an ab ejus arbitrio pendeat, aut aliter?

Ad implendam Satisfactionem Sacramentalem quæ requirantur, & quot modis satisfacere possimus, & quid operetur hæc satisfactio?

An Confessor possit commutare, vel tollere pœnitentiam injunctam ab alio Confessore? in quo differat restitutio a Satisfactione Sacramentali?

An per opera alias debita possit fieri satisfactio?

Quid efficiant indulgentiæ ad hanc Sacramentalem Satisfactionem?

### *De Absolutione.*

**Q**uæ verborum forma in absolutione requiratur de essentia, & quæ de congruitate, & quis ordo servandus tam in absolutione a peccatis,

quam ab excommunicatione aut irregularitate?

Qui casus reservati Papæ, qui Episcopo?

Quomodo sint absolvendi in articulo mortis, qui confiteri nequeunt, sed signa contritionis solum ostendunt?

An absolvendi, qui in idem peccatum sæpius confessum incidunt?

An aliqua cautio sit petenda a pœnitente ante absolutionem, & in quibus casibus?

### *De Sigillo.*

**Q**uomodo differat sigillum secreti a sigillo confessionis?

An hujusmodi sigillum sit de necessitate confessionis?

An illa, quæ sciuntur in confessione præter peccata, cadant sub sigillo confessionis?

An liceat detegere peccata in confessione audita, quæ publica sunt, aut saltem non nominando personam, sed in communi?

An peccet mortaliter revelans ea, quæ sibi dicta sunt extra confessionem sub conditione, ut teneret ea sub sigillo confessionis?

An in aliquo casu possit confessum peccatum revelari?

Quas pœnas incurrat hujusmodi sigilli fractor?

Quæ cadant sub sigillum secreti, & an omnis secreti detectio sit mortalis?

An, quod occultum est, vel secrete scitur, revelari debeat ad præceptum Judicis?

### *De Restitutione.*

**A**N peccans contra charitatem debitam proximo, ut qui ei in necessitate posito non subvenit, vel ad peccatum illum inducit, teneatur ad aliquam restitutionem?

An consentiens in damno dato teneatur ex æquo restituere, an teneatur is solus, qui damnum dat?

Qui sint illi novem modi, quibus quis dicitur consentire delinquenti?

An Confessor, qui per ignorantiam, vel per negligentiam absolvit aliquem ante restitutionem, maneat obligatus ad restituendum?

An

An qui furatus est rem aliquam, & illam non habet, satis ei sit, quod restituat æquivalens?

An locans rem furatam debeat restituere pretium locationis vero Domino?

Qui pro committendo aliquo peccato pretium suscepit, an illud restituere teneatur?

Quæ causæ non restituentem a peccato excusent?

Bonorum incertorum restitutio quomodo facienda?

Infamans proximum de delicto vero, an restituere teneatur, & quomodo?

### De Usura.

**Q**uid sit Usura, & in quibus rebus consistat?

Pro re accommodata aliquid ultra sortem accipere, an sit usura?

Quod dicatur justum pretium rei venditæ?

An donare aliquid, ut reddatur duplum, si moratur ante tale tempus, sit licitum?

Quomodo in pacto retrovendendo committatur usura?

Quid sit cambium, & quæ cambia sint licita?

Societatis Contractus quid, & quis licitus, & ut talis ineundus?

Quis Usurarius dicatur manifestus, & a quo absolvendus?

Vendere rem carius credito, quam numerata pecunia, an sit usura?

In quo differant lucrum cessans, & damnum emergens?

An pro pecunia dotali liceat aliquos fructus accipere?

### De Simonia.

**S**imonia quid, & quoruplex?

An conferens beneficium indigno ob consanguinitatem, amicitiam, vel preces, sit Simoniacus?

Quomodo dignoscetur, qui inservit alicui Prælati pro beneficio obtinendo, an sit Simoniacus? & quomodo per manus a manu, a lingua, & ab obsequio committatur Simonia?

Quis Simoniacus sit ipso jure suspensus vel excommunicatus?

*Tomus VIII. Concilior. German.*

### De Censuris.

**Q**uot sint censuræ Ecclesiasticæ?

Quid sit excommunicatio major; quid minor?

Quot sint irregularitatis species?

An Confessarius tempore Jubilæi possit cum irregulari dispensare?

Cætera committuntur discretioni Examinatorum, qui pro temporum, locorumque varietate, & casuum necessitate Curatos strikte examinabunt.

Quibus omnibus expletis, Vicarius & Decanus genu flexus, *Te Deum laudamus* incipiet, cujus primo Vers. dicto, surgent omnes, & Hymnum prosequantur. Quo finito, dicat Vers. *Ostende nobis Domine misericordiam tuam.* Resp. *Et salutare tuum da nobis.* Oremus: *Exaudi, quæsumus Domine, supplicum preces &c.* Vers. *Recedamus cum pace.* Resp. *In nomine Christi.*

### De Congregatione Casuum conscientie.

**C**um ratio bene, riteque administrandi Sacramentum Pœnitentiæ pendeat præcipue ex casuum conscientie cognitione, & frequenti eorundem examine, statuimus & volumus, ut omnes Parochi & Sacerdotes singulis mensibus semel dictæ congregationi intersint, tempore & loco, ubi congregationis Præsidi placuerit.

Volumus item, ut aliquot ante congregationem diebus ab unoquoque Præsidi ad minus tres casus in praxi occurrentes proponantur, & ad omnes Parochos & Sacerdotes suæ congregationis mittantur, ut ab iisdem possint legi & examinari. Præsides vero tales casus singulis angariis ad Cap. Vicarium, vel Decanum una cum notula, cujuscunque Sacerdotis profectu & scientia mittent.

Stata die & hora omnes compareant sub certa pœna ad pia loca applicanda.

Mandamus item, ut omnis Sacerdos congregationis librum habeat, in eoque propositos casus, & eorundem resolutionem a Præsidi approbatam diligenter scribat.

M m m m 2

In

In initio, dicto Sacro de Spiritu S., de B. Virgine, vel ad libitum Præfidis preces præmittantur, & iis finitis, casus proponantur.

Interrogatus scientiam suam latine proferat.

Congregationes oratione finiantur, & refectio omnino sobria in ædibus Parochi loci, vel alterius Sacerdotis, cum sacra lectione, sumatur: qua sumpta, se quisque honeste ad propria recipiat; quod de fine Capituli, & omnium Congregationum & Confraternitatum dictum volumus.

Ubi apparuerit aliqua difficultas conveniendi, Decembri & Januario mensibus ob dierum brevitatem, & itineris difficultatem, prætermitti concedimus.

### *De Sacramentis in genere.*

**S**ancta Sacramenta a Christo Domino instituta, & ad communem omnium salutem proposita, cum celestia munera sint, & instrumenta Divinæ gratiæ, ut administratio sancta sit, & perceptio religionis plena, omnino oportebit. Sacerdos igitur, cuius est Sacramenta administrare, meminisse debet sancta se tractare, omnique fere temporis momento paratum esse oportere ad tam sanctæ administrationis munus.

Quare cum alios per Sacramenta purget, studebit ipse, adjutrice Dei gratia, animum ab omni peccati labe purum semper habere. Qui si reum se noverit, prius Sacramentali confessione se expiare studeat. Nam etsi Sacramenta Divinam virtutem, quæ illis inest, nunquam amittunt, impure tamen ea ministrantibus æternam mortem afferunt. Parochus igitur domi, vel in Ecclesia, ut vigilantem Pastorem decet, semper sobrius expectabit, & petentibus hilari vultu occurret, ac Sancta Sacramenta, prout necessitas vel devotio exiget, prævia semper oratione pie administrabit. In omni Sacramentorum administratione semper superpelliceum, & stolam adhibebit.

Sacramenti, quod ministrabit, vim, rationem, usum, salutaresque fructus

diligenter explicabit, & ut sancte suscipiantur, populum admonebit. Ritibus, cæremoniis utetur, prout in Sacerdotali.

In via nihil loquatur, verum meditetur, & attentus sit ad rem, quam sancte acturus est. Caveat, ne aliquid exigat, sed quæ gratis accepit, gratis ministret. Curet, ut viri armis depositis, & mulieres velato capite, devote & modeste accedant.

Sacerdos cum administrat aliquod Sacramentum, ut id cum magna religione præstet, singula verba, quæ ad illius formam rationemque pertinent, omni animi attentione & pietate distincte pronunciabit, & clara voce, ut ab illis audiri possit, quibus ministratur. Sacras item prædicationes sancte, graviter, & distincte dicat.

Studebit præterea assiduis orationibus, doctrina & omni Sacerdotali industria fideles sibi commissos tales efficere, quibus digne utiliterque Sacramenta ministrari possint. Ad quæ ne debitus externus cultus omittatur, suscipientes non patietur accedere, nisi exteriori habitu, vestiumque modestia debitam illis venerationem præ se ferant.

### *De Sacramentis in specie, & primo quidem de Baptismo.*

**P**arochi pro concione admoneant parentes, ut in baptizandis filiis eos potius eligant compadres, qui eorum animæ consulere, quam inopiæ subvenire possint. Quod vero patrino officium sit, sæpius admoneant. Levantes seu compadres non sint, qui confirmati non sunt, nec minores natu 14. annis, & qui non intelligunt a se suscepti muneris partes.

Clericis infantem de Sacro Baptismatis fonte suscipere vetitum sit, & in Confirmationis Sacramento sine licentia compadres ne sint.

Nullus Sacerdos sciens infantem vere riteque a mari, vel a foemina baptizatum, eum baptizare præsumat, nec etiam sub conditione: *Si es baptizatus, ego te iterum non baptizo*, &c. Alias præter irregularitatem, quam incurrit, gravi



gravi etiam pœnæ subjacebit. Si vero dubium esset, sub conditione baptizetur infans, ut infra dicetur.

Sacerdos baptizare paratus (quod etiam in administratione omnium Sacramentorum requiritur) sciat suas partes esse, non solum hoc Sacramentum juxta formam Ecclesiæ, & præscriptos ritus administrare; sed ne januam cœli, quam aliis aperit, sibi ob sordes peccatorum obstruat. Quare in tam sancto, & necessario actu mentem erigat, spiritumque colligat, & quid sibi agendum sit, devote cogitet: Sacerdotes enim accedentes ad Dominum sanctificentur, ne forte percutiat eos.

Vocatus Parochus, superindutus superpelliceo & stola, ad januam Ecclesiæ quærat de nomine infantis, qui sint patrini, & an domi ob aliquem casum fuerit baptizatus.

Quantum ad nomen, ne imponatur infanti nomen incognitum seu gentiliū, qui Christum Salvatorem non cognoverunt.

Numerus patrinorum amoveatur. Unus vero patrinus & una matrina ad summum admittuntur.

Admoneat levantes affinitatem seu cognationem spiritualem in illa sacra regeneratione contrahi inter patrilos, & baptizatum, ejusque Patrem & Matrem, atque idcirco Matrimonium inter ipsos omnino prohiberi.

Frequenter obstetrices circa materiam & formam hujus Sacramenti examinent, & instruant, doceantque obstetrices, & alias personas graviter peccare, si domi quempiam baptizant, nisi urgente necessitatis casu.

Obstetrices officium non præstabit, nisi per Parochum instructæ, & idoneæ probatæ ad Sacramentum Baptismi, cum necesse erit, ministrandum.

Si instat periculum, permittitur facultas baptizandi in domibus privatis, 1. Sacerdoti, in absentia ejus sacris initiato; si is non adsit, laicis, & quidem primo mari, deinde fœminæ, qui rite noverint formam Baptismi, quæ est: *Ego te baptizo in nomine Patris, & Filii, & Spiritus Sancti.*

Materia autem est, aqua naturalis, pura, munda, & sincera, absque mixtione alicujus materiæ, quæ solvat speciem.

Quod si baptizatus domi, postea vixerit, eum in Ecclesiam deferant, ubi si rectam formam Baptismi servatam esse constiterit, reliqua adhibeantur.

In repentino casu, & mortis periculo, si nemo alius adest, non prohibetur parentibus baptizare eorum filios, qui parentes debent, quamprimum eis licuerit, Confessario detegere.

Casus periculi mortis sunt varii, quos quilibet Sacerdos ex probatis authoribus discet tam pro se, quam pro obstetricum necessaria informatione.

Moneant Parochi puerperas, ut, cumprimum post partum exierint, mox ad Ecclesiam Deo acturæ gratias accedant, & benedictionem suscipiant. Puerperæ domo ne egrediantur, etsi mulier ob infirmitatem Ecclesiam adire nequeat.

Moneat sub pœna excommunicationis ipso facto subeunda, ne ante annum exactum puerpera, nutrix, quævis mulier, aut vir infantem in lecto teneat.

Expositi infantes, quorum certa scientia non habetur, an sint baptizati, licet habeant scriptum collo appensum, quo baptizati significantur, si post diligentem inquisitionem adhuc dubium reperiatur, ea conditionis formula baptizentur: *Si es baptizatus, ego te iterum non baptizo, & si nondum baptizatus es, ego te baptizo in nomine Patris, & Filii, & Spiritus Sancti.*

Quam formam etiam Sacerdotes coram Ecclesia servare debent, ubi Baptismi rectam formam servatam esse non constiterit.

Claves tabernaculi, fontis baptismalis, & sacrorum oleorum a solo Parocho custodiantur, & eorum januæ aperiantur.

### *De Baptismo Adultorum.*

**P**arochus in iis omnibus diligens erit, ut baptizandis adultis præter doctrinæ Christianæ rudimenta, quæ necessario scire debent, admissio-

rum scelerum, & malæ actæ vitæ pœniteant, & ut in posterum a peccatis omnibus abstinere statuant.

Cum adultus Baptismum petit, primo quærantur testimonia certa ejus conditionis actæ vitæ & status, ejusque voluntas diligenter exploretur, utrum ex animo & vera pietate Baptismum petat, qui si recte pieque sit paratus, cum idoneo religiosoque viro committatur; (Si fœmina fœminæ) a quo per aliquot menses (nisi tempus aliud postulaverit) fidei doctrina & institutionibus accurate erudiatur, & congrua abstinencia exerceatur. Tum ad Ecclesiam ducatur communi vestitu, post Baptismum mox alba veste induendus.

Statæ cæremoniæ adhibeantur ex ordine Baptismi parvulorum. Ad majorem Sacramenti cultum, nisi necessitas aliud exegerit, unum ex statis temporibus Paschatis, & Pentecostes expectari poterit.

Interroganti respondeat ipse & non patrinus, assistat tamen semper patrinus, tanquam qui pro baptizando spondeat.

Qui baptizandus est, debet genuflexus fidem profiteri, & Baptismum petere. Baptizatus curæ alicujus viri probi, saltem per annum committatur, qui vitam illius piis rationibus regat, & moderetur.

Habeant Parochi librum, in quem baptizatos, & eorum parentes & patrilinos scribant, cum annotatione diei, mensis, & anni, tali forma:

Ego N. Parochus, Coadjutor, Beneficiatus Ecclesiæ N., Anno, Mense, Die baptizavi N., filium N. & N. conjugum, secundum ritum & præscriptum S. Romanæ Ecclesiæ. Patrinus & Matrinx fuerunt N. & N.

Ritus administrandi Sacramentum Baptismi, reperiuntur in Sacerdotali, seu Obsequiali.

### *De Sacramento Confirmationis.*

**Q**uisque Parochus postquam de constituto die Chrismatis administrandi ex Reverendissimi Ordinarii indiçione admonitus fuerit, iis

diebus, qui hujus Sacramenti administrationem præcedunt, debet populum suæ curæ commissum inter Missarum solennia diligenter edocere ea omnia, quæ ad Sacramentum hoc rite administrandum & recipiendum pertinere intelliget.

Primo, ut fideles paratiores ad hoc Sacramentum se conferre possint, illiusque sanctitatem, & necessitatem recte expendere, ex Romano Catechismo, aliisque Catholicis Authoribus eos instruat, doceatque opportune, quam necessaria sit hujus Sacramenti doctrina, declaret nomen ipsum Confirmationis, ipsiusque vim. Aperiat quid inter Baptismum & Confirmationem intersit; quæ sit ejus materia, quæ forma, quis Minister, quosque effectus pariat, ut fideles intelligentes se Christi Milites fieri ardentiori animo, totisque viribus ad dimicandum contra humani generis hostem, & contra peccata semper sint parati.

Cum per hoc Sacramentum Spiritus Sancti gratia in corda fidelium infundatur, hortatur Parochus confirmandos, ut, si idonea sint ætate, per sanctam confessionem corda purificent, ut apta Sancti Spiritus vasa, templaque efficiantur.

Ut jejuni accedant, aut saltem sobriam corporis refectiorem adhibeant; moneat, ut confirmandi & patrini ad Ecclesiam devote, & ubi fieri poterit, processionis ritu, veniant; & prius matres, deinde fœminæ ad Confirmationem recipiendam accedant.

Confirmandos moneat, cum hoc Sacramentum characterem imprimat, ipsum iterari esse nefas.

Quod si autem quis confirmatum esse ignoret, de hoc certior fieri studeat, quod si nequiverit a parentibus, amicis, vel aliis, sequatur consilium Ordinarii.

Nullus ad Confirmationem adducatur, qui annis septem minor sit natu, ut aliqua ex parte illius Sacramenti vim intelligere possit, & se illud percepisse reminiscatur.

Nullus, qui ex Episcopatu oriundus non est, accedat, nisi resciat Reverendissimus, ut possit admitti, vel dimitti.

Cura.

Curabunt Parochi, ut confirmandi secum schedam ferant, sub hac formula: N. filius N. Parochiæ N. Patrinus N. filius N. Parochiæ N.

Accedant primo mares, deinde feminae, quorum frontes lana gossipina seu bambacio primo, deinde mantili madido, ultimo sicco abstergantur.

Viri pueros, feminae puellas in hoc Sacramento suscipere debent, ad puerum unus patrinus, ad puellam unica matrina requiritur, qui confirmatos non solum in spiritualibus instruere, verum, ubi necessum fuerit, etiam temporali ope juvare tenetur.

Confirmandus coram Episcopo flectat genua, quem patrinus dextera supra humeros ejus posita teneat.

Patrinæ & Matrinx maiores natu esse debent ipsis confirmandis, ut officio suo erga eos, quos suscipiunt, melius satisfacere possint. Sint ad minus ætatis sedecim annorum, nisi necessitas aliud postulaverit.

Iisdem eodem die, duos aut tres pueros, puellasve suscipere licebit, non plures, nisi ex licentia Ordinarii.

Patrinus, seu Matrina esse non possunt, nisi sint ipsi prius confirmati. Patrini docendi sunt, eandem inter ipsos & confirmatum, & parentes confirmati, quam in Baptismo spirituales cognationem intercedere.

Omnes Parochi habeant libros, in quibus nomina confirmatorum noceant, tali forma:

Die-- Mense-- Anno-- ætatis annorum, filius N. & N. ex Parochia N. Chrismatis Sacramento fuit confirmatus a Reverendissimo Domino, Domino JOHANNE, Episcopo Curiensi. Patrinus fuit N. ex Parochia N. Administratum fuit hoc Sacramentum in Ecclesia Parochiali S. N.

Post Confirmationem acceptam, ut nemo ab Ecclesia recedat, curet Parochus, nisi urgente aliquo casu, antequam a Reverendissimi Ordinatio benedictio de more sit data.

### *De Sacramento Pœnitentiæ.*

**C**um Christianus homo confiteri teneatur, & postea Eucharistiam

sumere, prius de Pœnitentia pauca dicere placuit.

Confessarius, qui & Judicis & Medici personam gerit, ex variis peccatorum generibus, ut Judex, quæ gravia, quæ levia sunt, quomodo ea corrigere, & pro cujusvis hominis ordine & genere judicare. Ut Medicus autem ea remedia, quæ ad illius animam sanandam, & contra vim morbi muniendam aptiora videantur, adhibere possit, opus est, ut is scientia & prudentia præditus sit, quam primo assidua ad Deum oratione, tum authorum probatorum continua lectione sibi comparare poterit.

Quare pro majori securitate volumus & serio mandamus omnibus Vicariis, & Decanis cujuscunque Capituli, ut annuatim tempore Quadragesimali loco menstruæ congregationis, omnes Confessarios ipsi, vel per ordinarios Examinatores stricte examinent, & prout Confessarii idonei reperti fuerint, dent vel auferant facultatem audiendi confessiones.

Curati bis, tertiove ad summum, examinati, & minus idonei reperti, ut ad Nos mittantur, omnino volumus.

Parochi maxime circa Pœnitentiæ Sacramentum elaborare debent, utpote adultis imprimis necessarium ac salutare, & populum instruere, quid sit pœnitentia, quot & quæ ejus partes, & quæ ad eam recte peragendam requirantur: potissimum vero, in quo magni apparent defectus, eum ad veram & Sacramentalem, quæ in peccatorum connumeratione in specie & sigillatim coram Sacerdote facienda consistit, confessionem inducere omnino studeant: quod sæpenumero & maxime Quadragesimæ tempore, & quando hoc Sacramentum frequentandum erit, pro concione & alias faciendum est.

Nullus præsumat intra domesticos parietes (infirmis exceptis) confitentem audire, nec etiam feminas præsertim, surdastris item demptis, in Sacristia, sed quemlibet publice in Ecclesia seorsim audiat, eumque paterne & graviter moneat, ut integre & debitum cum circumstantiis sua peccata confiteatur. Rudes autem, & in specie confi-



confiteri nescientes instruant, & per singula præcepta Decalogi (ad quæ etiam præcepta Ecclesiæ revocanda erunt) itemque circa peccata capitalia caute & prudenter examinent & interrogent, prout Catechismus Romanus, Directorium P. Joannis Polanci, Institutiones Francisci Costeri, & aliorum bonorum authorum libelli de confessionum audiendarum ratione conscripti edocent.

Confessarius superpelliceo & stola violacei coloris indutus, prius genuflexus orabit, ut tanto ministerio satisfacere possit. Regulares vero vestitum adhibeant, quem ex regulæ præscripto in choro adhibent.

In pœnitentiis imponendis adhibebit prudentiam, pietatem, & industriam, habebit rationem status, conditionis, sexus, & ætatis: talem vero confitenti pœnitentiam imponet, qualem ab eo posse præstari judicabit, & utrum possit, interrogabit.

Considerabit item animum pœnitentis, fletum, gemitum & lachrymas, intimi doloris indices. Videat, ne pro peccatis gravibus pœnitentias levissimas imponat, & e converso.

Confessarius facultatem habens in votorum commutatione, ea non commutet, nisi in alia majora pietatis opera, vel Deo gratiora, vel saltem, quæ tantidem valeant: qua in re judicanda rationem habeat sumptuum, laborum, molestiarum, & omnium incommodorum, quæ pœnitentes in persolvendo voto passuri erant.

Noverint Parochi casus Summo Pontifici, aut Nobis reservatos, & si quempiam in eos incidisse perspexerint, ne absolvant, sed eum ad Nos, vel Vicarium nostrum Generalem remittant.

Nullus, cui animarum cura non incumbit, confessionem ullius (nisi in articulo mortis) excipere audeat.

Nullus item in ulla Sacramento administratione in alterius Parochi agrum falcem (proprio Parocho inconsulto) sub gravi pœna imponat.

Nullus item Parochus audiendarum confessionum munus suis Coopera-

toribus, Primissariis, aut Sacellanis, aut quibusvis Presbyteris imponat, nisi si prius a Nobis, vel Vicariis nostris fuerint ad id idonei reperti & approbati.

Ut autem una eademque in hoc Sacramento absolvendi forma ab omnibus observetur, eam hic subicere placuit.

Sedens & recto capite, posteaquam dixerit Sacerdos: *Misereatur tui Omnipotens Deus, & dimissis peccatis tuis perducatur te ad vitam æternam, Amen*: extendat manum supra caput confitentis, & dicat: *Dominus noster Iesus Christus te absolvat, & ego auctoritate ipsius te absolvo primum a sententia excommunicationis, in quantum possum & indiges; deinde te absolvo a peccatis tuis in nomine Patris, & Filii, & Spiritus Sancti, Amen.*

Postea sublata manu dicat: *Passio Domini nostri Iesu Christi, & merita Beatæ Virginis & omnium Sanctorum, & quicquid boni feceris, & mali sustinueris, sit tibi in remissionem peccatorum, augmentum gratiæ, & præmium vitæ æternæ. Amen.*

### De Sacramento Eucharistiæ.

**E**Luceat pietas pariter, & industria Parochi in explananda hujusce Sanctissimi Eucharistiæ Sacramenti dignitate, veritate, adoratione, fructu & effectu, ac populum devote & digne ejus sumptionis modum edoceat, eumque, ut non solum semel in anno, quod præcepti est, sed, quantum fieri potest, sæpius, quod pietatis est, inducere studeat.

Communicaturus ergo populus in loco debito genua flectat, ac Minister Altaris, vel ipse Sacerdos loco populi Confessionem generalem dicat: *Confiteor Deo Omnipotenti &c.* Qua finita, Sacerdos ad populum conversus, eum Generali Absolutione absolvat, dicendo: *Misereatur vestri, &c. Indulgentiam & absolutionem, &c.* ac omnes sub una duntaxat specie communicent, dicatque ostendendo: *Corpus Domini nostri Iesu Christi, &c. Domine non sum dignus, & præbendo Communionem, dicat: Corpus Domini nostri Iesu Christi custodiat animam tuam in vitam æternam, Amen.*

Cum

Cum Venerabilis Eucharistia ad ægrotos defertur, honorifice ac pie id fiat fidelium prosequente comitatu, pro facultate regionis, lumine ac campanella præcedentibus, ac Sacerdote graviter incedente.

Hoc salutare viaticum in vasculo argenteo abintus deaurato, decenti & nitido asservetur, coram quo lumen diu noctuque ardeat semper.

Singulis etiam sex septimanis, & quoties necessitas postulaverit, renovetur.

Vascula item Oleorum & Chrismatum sint argentea, munda & decentia, quæ quidem Olea & Chrisma singulis annis tempore Paschatis, secundum Decretum FABIANI Papæ, mutantur.

Adolescentes, qui primo Eucharistiam sumere desideraverint, aliquot diebus ante modum & rationem recte confitendi, ac Sacram Eucharistiam digne percipiendi doceant, eosque super his examinent, & non nisi bene instructos admittant.

Reus capitis eo die, quo Eucharistiam sumpsit, supplicio non afficiatur, ob honorem tanti Sacramenti.

### *De Extrema Unctione.*

**E**X pastoralis cura vobis incumbente statim atque sciveritis aliquam personam ex vestris Parochianis ægrotare, cujuscunque conditionis illa sit, eam visitabitis rarius aut sæpius, prout recta dictabit conscientia. Ideoque frequenter e suggestu populum vestrum admonebitis, ne suos ægrotos subtriceant, verum in tempore vobis significant, ut munus vestrum erga eos explere possitis. Cum autem hujusce visitationis finis potissimus ille sit, ut animæ ægroti consulat Parochus, eamque ad salutis portum dirigat, ante omnia cum ægrotis agat de Sanctorum Sacramentorum perceptione, illumque in ea infirmitate piis colloquiis, præpositis exemplis, & aliis spiritualibus documentis juvare & solari, atque ad patientiam, firmam spem in Deum, atque sui resignationem inducere satagat, & morientium animas, secundum præscriptum Breviarii, Deo commendare studeat.

*Tomus VIII. Concilior. German.*

Non prætermittat etiam monere ægrotum, ut disponat domui suæ, testamentum condant, pauperesque (si alicujus facultatis sit) Ecclesias, Xenodochia, & pia loca commendata habeat.

Volumus autem, & in virtute sanctæ obedientiæ præcipimus, ne quis ex vobis in iis, quæ munus vestrum concernunt, aliquid sub quovis prætextu, consuetudine, via, modo, & colore, quod avaritiæ speciem habeat, exerceat.

Cum intelligamus hoc Extremæ Unctionis Sacramentum in aliquibus locis in exiguo usu esse, volumus & præcipimus, ut id omnino ad usum revocetur: quod facile fiet, si populo ejus virtutem & efficaciam frequenter exposueritis.

Ministratur hoc Sacramentum adultis periculose ægrotantibus, senio confectis, in diem morituris, peste laborantibus, licet ita infirmi non videantur.

Non ministratur iis, qui non habent usum rationis, neque peccata admittunt, nec furiosis & amentibus toto vitæ tempore, nec excommunicatis, interdictis, & impœnitentibus, neque mulieribus in partu laborantibus, nec ultimo supplicio afficiendis.

Cæcis, mutis, surdis, paralyticis, claudis, quamvis eo sensu caruerint, præbetur; peccare enim potuerunt per internas potentias, quibus ea membra respondent.

Durante eadem infirmitate semel tantum inunguntur. Si vero infirmus convalescit, & iterum in eundem, vel alium morbum inciderit, rursus ungi debet.

Æger, si dum Sacro Oleo ungitur, moritur, Parochus ungere desistat: si vero ob vim morbi dubitetur, vivusne sit, an mortuus, ea ungatur conditione: *Si es vivus, per istam Sanctam Unctionem &c. &c.*

Curet tamen Parochus, ut hoc Sacramentum ægrotis, dum integris est sensibus, administretur.

Si infirmus Catholicus præ infirmitate id petere non possit, nihilominus, amicis & vicinis pro eo petentibus,

N n n n

Sacra

Sacra Unctio administranda erit, dummodo pie vixerit & pœnitentiæ signa in eo apparuerint.

Hujus, & cæterorum Sanctorum Sacramentorum administrandi rationem Sacerdotale edocet.

### *De Sacramento Ordinis.*

**C**um administratio Confirmationis & Ordinis solius Episcopi sit, de illis pauca dicere volumus, ut cum ea Episcopus solenniter administrabit, Parochi sciant suscipientes recte instruere.

Ubi primo Parochus aliquem norit sponte ad Clericalem statum adspirantem, eundem instituat, ut paulatim in Clericalis vitæ officiis, & laboribus obeundis assuefiat, & ad pietatem, vitæ innocentiam cum literarum doctrina conjunctam edoceatur.

Impediuntur autem ab Ordinum susceptione, minores natu, non confirmati, ignari, criminosi, solenniter pœnitentes, neophyti, ebrietati & gulæ dediti, impudici, lapsi post susceptum Ordinem, perjuri, ulurarii, manifesti, infames, servi, corpore vitiati insigniter deformes, illegitime nati, ignoti, bigami, irregulares, suspensi, interdicti, excommunicati, amentes, morbo caduco laborantes, energumini, non examinati, & probati.

Subdiaconatum suscepturus admo-  
neatur a Parocho, ut purior ad tantum onus accedat, priusquam eo Sacro Ordine initietur, exercitia spiritualia consilio & auxilio alicujus viri religiosi, cui ad nutum obtemperabit, subeat. Horas Canonicas orare sciat, alias ad gradum Subdiaconatus minime promovendus.

Ordinandus, ut de vitæ suæ disciplina, moribusque testatum fiat, ferat secum literas tam a Parocho, quam a Ludimagistro; Literas item legitimæ ætatis, & tituli mensæ, seu patrimonii.

Ex præscripto Sacrosancti Concilii Tridentini nullus, nisi post annum a susceptione postremi gradus minorum Ordinum, ad Sacros Ordines promoveatur, nisi necessitas, aut Ecclesiæ utilitas judicio Episcopi aliud exposcat.

Ætatis annos, viginti duos, si Subdiaconatum: viginti tres, si Diaconatum: viginti quinque attigisse, si Sacerdotium quis suscepturus est, oportebit: qui omnes habita ratione, & officii & beneficii curati, seu non curati, examinandi erunt.

Omnes item in habitu Clericali accedent, alias repulsam passuri.

### *De Sacramento Matrimonii.*

**A**dvertent non segniter Sacerdotes, ne in gradibus prohibitis, aut aliis impedimentis Matrimonia contrahantur.

In dubiis ad nuptias non progrediantur, nisi inquisitione diligenter facta, impedimentum nullum subesse.

Quamvis Matrimonia a filiis familias absque parentum consensu ea rata vel irrita facere non possint, dummodo libero contrahentium consensu facta sint; suadendum tamen iis omnino est, ne insciis parentibus ullo modo contrahant, sed eorum voluntati ac consiliis in re tam gravi subjaceant & pareant.

Vagantium, & eorum, qui certas sedes non habent, Matrimoniis Parochus ne intersit, nisi prius diligentem de personis conjungi volentibus inquisitionem fecerit, ac a Nobis desuper licentiam id faciendi obtinuerit.

Certum & firmum esse debet, propter absentiam quantumvis diuturnam non licere alterutri conjugi cum ullo alio Matrimonio conjungi, ac proinde, nisi de morte alterius conjugis moraliter certa constiterit, ad alia vota transire nullo modo poterit.

Contrahentes in doctrina Christiana sint instructi, alias Matrimonio non jungendi.

Posteaquam Parochus cognoverit Matrimonium denunciari posse, id fiat tribus Dominicis diebus, vel Festis, quæ ab Ecclesia feriantur, inter Missarum solennia: quæ denunciationes non fiant, nisi ex petitione contrahentium. Ultima autem denunciationis die, nisi ex nostra licentia, nuptiæ non celebrentur.

Si in diversis Parochiis contrahentes



tes habitant, utriusque item Parochus hoc observet.

Denunciationibus factis, si nullum opponatur impedimentum, ad celebrationem Matrimonii in faciem Ecclesiæ procedatur.

Sacerdos post brevem sermonem de sanctitate hujus Sacramenti primo sponsum, deinde sponsam vulgaribus verbis interrogabit: *N. vis accipere, & jam nunc accipis: N. hic præsentem in tuam legitimam uxorem, sicut præcipit S. Mater Ecclesia?* ubi sponus clare respondebit: *Volo*, ut ita iisdem verbis interrogabit sponsam.

Quibus consentientibus Parochus dicat: *Quod Deus conjunxit, homo non separet*, Et aperte dicat: *Ego auctoritate S. Matris Ecclesiæ, qua fungor, conjungo vos in Matrimonium in nomine Patris † & Filii † & Spiritus Sancti † Amen.*

Cætera ut in Sacerdotali.

Habeat Parochus librum, in quo contrahentium & testium nomina, & cognomina, denique & locum contracti Matrimonii describat, & diligenter asservet.

Qui falsum impedimentum malitiose attulerit, ut Matrimonium impediat, præter alias juris pœnas, excommunicationis etiam pœna afficiatur.

Serio mandamus, ne sponus & sponsa, antequam Matrimonium inter eos celebratum sit, una cohabitent, secus si fecerint, gravis illis a Nobis pœnitentia injungenda erit.

Volumus item, ut sponus & sponsa ante celebrationem Matrimonii confiteantur, & nisi prævia confessione, minime intronizentur. Ut etiam communificent, illis suadeat Parochus biduo vel triduo ante nuptiarum diem.

Contra simul cohabitantes ante solennizationem Matrimonii, superiori anno edidimus mandatum, quod ut a Parochis sæpius publicetur, & stricte observetur, præcipimus.

Si qui laici, quod Deus avertat, sive soluti, sive uxorati reperirentur, contra hujusmodi juxta præscriptum Sacrosancti Concilii Tridentini *Sess. 24. C. 8.* procedendum statuimus. Quare præcipimus, ut prædictum *C. de Refor.*

*Tomus VIII. Concilior. German.*

*matione Matrimonii*, in Ecclesiis Parochialibus inter Missarum solennia sæpius publicetur.

Causæ matrimoniales ut ad forum Ecclesiasticum pertinent, ita eas ad Nos, vel Vicarios nostros (& nullo modo ad Judicem sæcularem) deferri, & per eos decidi volumus.

Præcipimus itaque omnibus Laicis, ut intra limites jurisdictionis ipsis delatæ consistentes, a rerum Ecclesiasticarum tractatione ac diffinitione, se abstineant, ne illis, quod Ozæ & Oziæ accidit, eveniat. Memoria etiam repetentes illud Sancti Concilii Tridentini *Sess. 24. Can. 12.* Si quis dixerit causas matrimoniales non spectare ad Judices Ecclesiasticos, anathema sit.

Ad Sponsalia, seu promissionem de futuro Matrimonio, si Parochus tanquam testis vocatus fuerit, quin pro consuetudine regionis accedat, non prohibemus.

Nuptiæ juxta Decreta Concilii Tridentini a Dominica prima Adventus usque in diem Epiphaniæ, & a feria quarta Cinerum usque in octavam Paschatis inclusive, a Sancta Synodo prohibentur. In aliis vero temporibus nuptias solenniter celebrare permittit.

### *De bonis Sacerdotum defunctorum.*

CUM aliqui homines, inter cætera, quæ sibi contra libertatem Ecclesiasticam usurpant, etiam ad id temeritatis sæpe veniunt, ut Clerici defuncti bona relicta invadant, de iis disponant, & ad libitum sacrilege subripiant. Nos huic malo prævenire & mederi volentes, sub pœna excommunicationis latæ sententiæ vetamus omnibus tam spiritualibus, quam sæcularibus personis, ne Clerici mortui, qui, dum viveret, Ecclesiasticum beneficium obtinebat, bona sua relicta quisquam temere invadat, auferat, vel dividat, sed Vicariis, Decanis, seu Substitutis nostris talem dispositionem relinquant: qui visa prius Clerici defuncti licentia testandi a Nobis obtenta, & testamento coram Nobis, seu Vicario nostro erecto de illis bonis, etiam cum interventu brachii sæcularis, si opus fuerit, bene & se-

N a n n 2

cundum

cundum piam testatoris mentem disponent, & ut sumptibus, in quantum fieri poterit, parcatur, serio mandamus.

### *Bona Fabricarum.*

**C**UM Nobis certo constet, multis in locis bona fabricæ pessime dilapidari, ad varios usus, & comestiones, præsertim circa festum Purificationis Beatæ Mariæ, tempore rogationum, & processionum inutiliter consumi: hujusmodi abusus tollere volentes serio mandamus, ne bona, census, proventus, oblationes piorum, aliaque ejus generis, quæ ad Ecclesiarum fabricas quavis ratione pertinent, ab earum Præfectis, seu Ministris secundum præscriptum Sancti Concilii Tridentini, ad alios usus, nisi Ecclesiæ necessarios & utiles, avertantur.

Volumus item, ut rationes fabricæ a Præfectis, seu Syndicis Ecclesiarum coram nostro Vicario, seu Decano, vel ex nostra licentia Parocho loci, etiam cum interventu Magistratus sæcularis, si id necessitas postulaverit, annuatim dentur, qui de fideli administratione Nos quamprimum admoneant. Mandamus insuper rationem hujusmodi petentibus & dantibus, ut parcant sumptibus, ne per eos sub hoc prætextu Ecclesiæ aggraventur.

Ad eleemosynas, oblationes, & paratam pecuniam Ecclesiarum habeat Parochus loci unam clavim, quam nemini committat, sed personaliter cum cæteris clavigeris archivum ingrediat, illudque aperiat & claudat.

Nova Ecclesia ulterius non ædificetur inconsulto Ordinario, & licentia ab eo in scriptis data.

### *Ordo servandus circa funeralia.*

**P**letas illorum, qui defunctos rite sepelire consueverunt, Deo Creatori nostro accepta semper fuit.

Invigilabunt tamen Parochi, ne sub specie pietatis superstitiones, abusus & inutiles observationes a quovis homine, nec in obitu, nec post obitum defuncti introducantur.

Rationem servandam in deferendo defuncti corpore ad sepulturam in di-

spositionibus, vigiliis, septimis, tricesimis, & anniversariis habetis in Sacerdotali seu Exequiali, ad quod vos remittentes, volumus, ut omnia, quæ ibidem notantur, pie ac devote, tanquam Deo rationem daturi, expediatis.

Exactiones pro funeribus omnino prohibemus. Quare mandamus universo nostro Clero, ne ab hæredibus defuncti, non obstante quacunque consuetudine Nobis, vel Vicario nostro inconsultis ad libitum nihil exigant, sed stent ordinationi per Nos declarandæ.

Volumus autem, ut Vicarii nostri, Decani & Camerarii cujusvis Capituli ruralis habentes rationem & loci, & beneficiorum, & cum interventu Magistratus sæcularis, si opus fuerit, certam eleemosynam pro funeralibus dandam, & per Nos ratificandam statuunt, ne populus hujusmodi exactionibus gravetur, & Parochus suis viribus defraudetur.

In locis vero, ubi de consuetudine pro funeralibus cera seu fixa eleemosyna datur, eam interrompere.

### *Tempore Pestis quid observandum.*

**S**I unquam Parochi, Sacerdotes & Magistratus sæculares indigent fortiter, magno & paratissimo animo ad omnia ministeria, charitatis officia exercenda, indigent præsertim pestis tempore, ubi deficiente eorum fortitudine, constantia, sollicitudine, & erga omnes diligente cura, in utriusque hominis sustentatione ut omnia ruant, oportet.

Quare Parochis & universo Clero mandamus, ubi infirmitas illa grassatur, ut publicas processiones indicant, quas, ut poenitentes decet, profusis lachrymis, precum studio, & interno pietatis affectu, celebrare, & sæpe frequentare studeant. Universum autem populum ad confessionem, Sanctam Communionem, & salutarem poenitentiam admoneant.

Magistratum Parochi sollicitabunt, ut publica peccata, quibus Deus offenditur, funditus evellere studeat, pauperes & infirmos alar, & omni pietatis studio eis subvenire curet.

Paro.

Parochus animabus sibi in curam a Christo Domino traditis pœnitentiæ, Eucharistiæ, & Extremæ Unctionis Sacramentis taliter subveniat, ne quis eorum omnibus iis non munitus, moriatur: eisque afflictis ac pene prostratis consolationes, remedia, subsidia, & alia dilectionis officia præstet, eorumque inopiam Magistratui & ditioribus significet.

Pestis periculo DEI benignitate sublato, populum excitabit ad orationem, obsecrationem, & gratiarum actionem: inter alia vero bonorum operum exercitia, ut omnes confiteantur, & certa die Sacram Communionem sumant, & ne amplius peccent, ne quid gravius eis contingat, pie & frequenter admonebit.

Experientia didicimus, populum ob imminuentem calamitatem, vel aliam causam emittere vota, eaque postmodum non observare. Quare Parochis mandamus, ut Nos consulant pro voti formula rite concipienda. Si vero temporis angustia non patitur, pestis præsertim tempore, votum sententiæ & iudicio Ordinarii relinquatur, ut illud Deo factum pie servetur.

Voti instrumentum Notarii manu confectum, Vicario vel Decano custodiendum, a Parocho loci tradatur.

*Placuit hisce Constitutionibus addere Tabulam dierum, Festorum, & Vigiliarum, quæ ex præcepto S. Matris Ecclesiæ, & ex consuetudine hujus almæ Ecclesiæ Curiensis feriantur & servantur.*

#### Januarius.

Circumcisio Domini. Epiphania. Sancti Sebastiani in multis locis ex voto.

#### Februarius.

Purificatio Gloriosissimæ Virginis Mariæ. Sancti Matthiæ Apostoli.

#### Martius.

Annunciatio Beatissimæ Virginis Mariæ.

#### Aprilis.

Sancti Marci Evangelistæ, & Sancti Georgii Martyris simul.

#### Majus.

Sanctorum Jacobi & Philippi Apostolorum. Inventio Sanctæ Crucis.

#### Junius.

Nativitas Sancti Joannis Baptistæ. Sanctorum Apostolorum Petri & Pauli.

#### Julius.

Sanctæ Mariæ Magdalenzæ. Sancti Jacobi Apostoli.

#### Augustus.

Sancti Laurentii Martyris. Assumptio Beatæ Virginis Mariæ. Sancti Bartholomæi Apostoli.

#### September.

Nativitas Beatissimæ Virginis Mariæ. Sancti Matthæi Apostoli & Evangelistæ. S. Michaelis Archangeli.

#### October.

Sanctorum Simonis & Judæ Apostolorum.

#### November.

Omnium Sanctorum. S. Martini Episcopi. S. Florini Patroni. S. Catharinæ Virginis. S. Andreæ Apostoli.

#### December.

Sancti Lucii Regis, Confessoris, Apostoli Rhetiz, & Sanctissimi Patroni nostri. Conceptio Beatissimæ Virginis Mariæ. Sancti Thomæ Apostoli. Nativitas Domini. S. Stephani protomartyris. Sancti Joannis Apostoli & Evangelistæ. Ss. Innocentum.

#### Festa mobilia.

Pascha Resurrectionis Domini, cum duobus diebus proxime sequentibus.

Ascensio Domini nostri JESU Christi.

Pentecostes, cum duobus diebus proxime sequentibus.

Solennitas Sanctissimi Corporis Christi.

Omnes dies Dominici.

In unaquaque Parochia feriat proprius Patronus.

Item Festa solenni voto ferianda suscepta.

De laudabili consuetudine feria sexta Parasceves, & Commemoratio omnium Fidelium Defunctorum

N n n n 3

ferian-



feriantur usque post peractionem Divinorum Officiorum, ut Christi Fideles omnes eo commodius Divinis Officiis interesse possint.

In plerisque locis usurparunt superiores Laici, quod sub excommunicationis pœna inhibemus, potestatem dandi licentiam opera servilia in diebus Festis exercendi. Hanc potestatem facimus Parochis, quibus serio mandamus, ne sint faciles in danda hujusmodi licentia, nisi necessitate, aut publica utilitate id exigente, quam etiam non dabunt, nisi a prandio, & peractis in Ecclesia omnibus Divinis Officiis.

*Tabula Vigiliarum, seu Jejuniorum, quæ ex præcepto S. Matris Ecclesiæ servantur, & etiam de consuetudine Ecclesiæ Curienfis.*

**V**igilia Nativitatis Domini: Pentecostes: Assumptionis Beatissimæ Virginis Mariæ: Omnium Apostolorum, præter Ss. Joannis Evangelistæ, Philippi & Jacobi: Vigilia Omnium Sanctorum: Nativitatis Sancti Joannis Baptistæ: S. Laurentii: Jejunium singulis diebus Quadragesimæ, exceptis Dominicis.

*De Quadragesima additio.*

Jejunium quadragesimale est institutum ad Christum imitandum, & ad hoc, quod fideles disponantur ad Redemptionis nostræ mysteria devote recolenda, & ad reprimendas concupiscentias, ad serenitatem, & elevationem animi, nec non ad placandum Deum & reatum pœnæ delendum. Ad quod tria requiruntur. 1.) Unica comestio. 2.) Abstinencia carniū, ovorum, & lacticiniorum. Butyrum vero & lactinia in locis, quibus consuetudo propter defectum olei est introducta, non inhibemus. 3.) Competens hora, quæ in toto Episcopatu nostro est in meridie in undecima hora.

Jejunia item quatuor Temporum, & jejunia solenni voto suscepta.

Quatuor Tempora celebrantur IV. & VI. feria, atque Sabbato post tertiam Dominicam Adventus: post primam Dominicam Quadragesimæ: post

Pentecosten: post festum Exaltationis Sanctæ Crucis.

*Sequentes Vigiliæ non sunt de præcepto, quæ tamen pie possunt observari.*

Vigilia Epiphaniæ, Ascensionis, Corporis Christi, Nativitatis Sanctissimæ Virginis Mariæ, Sancti Martini, Sanctorum Lucii & Florini Patronorum.

In diebus jejuniorum a Quadragesima possunt jejunantes & non jejunantes uti ovis & lactiniis, in Quadragesima autem non, ut dictum est.

Omnes sub pœna peccati mortalis obligantur ad jejunium de præcepto, a quo tamen nonnulli excusantur. 1.) Infirmi & debiles. 2.) Ostiatim mendicantes, nisi sufficienter inveniant ad sustentationem naturæ, & alias robusti sint. 3.) Prægnantes & lactantes. 4.) Pueri usque ad 21. annum: si tamen proclives sint ad luxuriam, tenentur jejunare & præcepto juris naturæ & Divini ad domandam carnem. 5.) Senes, aliquibus videtur ab anno 70. tutius tamen standum erit judicio conscientie: quidam enim in 50. anno sunt debiliores, quam alii in 80. 6.) Laborantes seu operarii labores graves perficientes. 7.) Itinerantes. 8.) Omnes, qui propter jejunium impediuntur a majori bono, ut Cantores, Prædicatores, & natura debiles, Doctores in Scholis.

Singulis feriis sextis & Sabbatis (nisi festum Natalis Domini inciderit in eis) ab esu carniū abstinendum erit, per totum annum.

Cum Ecclesia sit Mater & non noverca, facimus facultatem omnibus Parochis per totam Diocesim nostram, dandi licentiam infirmis, debilibusque personis, vescendi cibis prohibitis, ubi judicium periti & jurati Medici accesserit.

Admoneant Parochi subditos, ut omni tempore, præsertim autem Quadragesimæ, se in vestitu, cibo, potu, eleemosynæ largitione, cæterisque Christianis exercitiis vere pœnitentes ostendant, singulis diebus Sacrificio Missæ intersint, frequenter confiteantur, orationi, & meditationi vacent, a con-

conviviis, spectaculis, & mundanis vanitatibus, & ab omni peccandi occasione, taliter abstineant, quatenus actus eorum in pœnitentiæ regulis nunquam discrepent.

Quæ hisce nostris Constitutionibus & Decretis comprehensa non sunt, juri communi subjacere declaramus, ad quod vos remittimus.

Interpretationem vero eorundem, si quæ in his difficultas orta erit, prout etiam moderationem, & dispensationem, si aliquando necessitas id postulaverit,

Nobis reservamus, salvo semper Sanctæ Sedis judicio, & auctoritate.

Ut autem hæc nostra Decreta eam, quam optamus, habeant executionem, vobis Vicariis, Decanis, & Officialibus nostris, tanquam eorundem a Nobis deputatis Executoribus serio mandamus, ut ea annuatim in vestro Capitulo perlegi, ac stricte observari faciatis: eorum enim transgressores nostram indignationem, ac severam animadversionem nequaquam effugient.

*Ex Lunig Contin. II. Spicil. Eccles. P. I. pag. 441.*

JOANNES, (hujus nominis V.) Flugiorum ab Aspermont de Familia, electus MDCL. Cal. Febr. Sedis Curienfis Episcopus, qualis, quantusque fuerit, paucis ostendit *Bucelinus* Germaniæ Sacræ Part. I. pag. 4, ubi meritissimi illum religiosissimique appellatione Pontificis exornatum, fatis concessisse scribit 30. Aug. MDCXXVII.

De hoc porro Episcopo & ipsa Rhetorum Metropoli Curia videri possunt *Stumpf Hist. German. Helv. L. XIX. Bucel. cit. Diction. univers. Gall. & Lat. vulgo Dictionar. Trevolt. Tom. II. Adrian. Daude S. J. Majestas Hierarchiæ Eccles. pag. 305.*

## SYNODUS DIOECESANA CULMENSIS

Eodem Anno Christi MDCV.

SUB LAURENTIO GEMBICKI, CULMENSIS ET POMESANLÆ  
EPISCOPO.

### LITERÆ INDICATIONIS SYNODI.

LAURENTIUS GEMBICKI, DEI GRATIA EPISCOPUS CULMENSIS ET Pomesaniensis, universis & singulis Prælatiis, Canonicis, Præpositis, Archi-Presbyteris, Presbyteris, Parochis, Commendariis, Vicariis, Altaristis, cæterisque, qui de jure vel consuetudine, nostræ Diœcesanæ Synodo interesse debent vel tenentur, per utramque Diœcesim nostram, tam Culmensem, quam Pomesaniensem Nobis in Christo Dilectis Salutem in Domino.

Cum in curam, gubernationemque nostram, Divina ita disponente providentia, Ecclesiæ Culmensis & Pomesaniensis, a Christi Domini in terris Vicario collatæ essent: omni studio in id incumbendum esse putavimus; ut eas virtute Cleri florentes, tanquam Sponsam immaculatam, sine ruga, pristinaque dignitate, ac Sanctæ Religionis integritate, Christianisque officiis conspicuas, adjuvante Domino, redderemus. Itaque quadriennio isto, quo illis non nostris meritis, sed dignatione Divina præsumus, non prætermisimus iis, qui Duces dati sunt, vitæque Magistri populo No-

bis commissio, inculcare eorum officia, eosque ad vitæ morumque innocentiam, ac sanctæ doctrinæ propagandæ studium hortari: cum intelligeremus a Sacerdotum vita & moribus, sive vitia, sive virtutes Christianas in plebem, quæ ab eorum ore pendet, eorumque facta intuetur, dimanare. Attamen per difficultatem superiorum temporum, maxime autem pestilentiam, singulis pene annis grassantem, quod unum vel maxime opportunum a Sanctis Patribus, Matreque ipsa Ecclesia, Spiritu Sancto auctore, ad reformationem morum, ad fidei propagationem atque pietatis, ad res Ecclesiarum

clesiarum stabiliendas est institutum, generalem Cleri hujus utriusque Conventum habere minime potuimus: jam autem, Deo bene juvante, indicimus, & instituimus ad diem XXI. Junii Culmsæ, quem locum & tempus, communi Venerabilis Capituli, & Archiepiscoporum nostrorum consilio adhibito delegimus. In qua quidem Synodo ea, quæ partim quorundam Sacerdotum negligentia, partim hominum aut temporum iniquitate, sive perturbata & confusa sunt, sive ab Ecclesiis nostris alienata, collatis in commune sententiis componi, & restitui curabimus, & quæ salubriter a nostris Prædecessoribus statuta in desuetudinem, aut oblivionem abiisse videntur, in usum revocabimus, Deo bene juvante, & vobis suadentibus.

Quapropter vobis omnibus & singulis supradictis, in virtute sanctæ obedientiæ mandamus, ut ad hanc futuram Synodum Culmsam, tempore præstituto mature veniatis, Sanctas Constitutiones inde, quibus unusquisque ad officium suum recte obeundum, ac ad reformationem morum, extirpationemque vitiorum, Sanctissimæque Religionis doctrinam, ad animarum salutem utiliter proponendam, & prava dogmata convellenda instruat, accepturi. Ut autem nostri conatus, nostraque consilia feliciter ad DEI gloriam, stabilendumque statum Ecclesiarum, prospere eveniant, ad illum ipsum, a quo omno donum perfectum, & omne datum optimum, Patrem luminum, confugiendum nobis est, ejusque imploranda per supplices preces, cælestis gratiæ auxilia. Idcirco in celebrioribus Civitatibus utpote Culmsæ, Torunii, Culmæ, Lubaviæ, Mariæburgi, ac aliis item oppidis, ubi ob frequentiam Cleri id commodè peragi potest, quadraginta horarum orationes institui ante Synodum commodis temporibus cupimus, in quibus toto corde ad DEUM Optimum Maximum conversi, summam ac infinitam ejus Bonitatem suppliciter rogabitis, ut respiciat nos indignos servulos suos, quos in opus ministerii sui vocavit, irrigationique nostræ, quam, officio exigente, commissæ nobis vineæ adbibemus, ipse benignus & misericors præstet incrementa; ac Pontificatum recens electi Pontificis Maximi fortunet; Christianos populos ab inhumanitate barbarorum tueatur; Principibus donet concordie spiritum; Regnum hoc magnis undequaque periculis circumvallatum, tutum inviolatumque conservet. Cæterum hunc nostrum processum juxta morem antiquitus receptum, volumus, ut alter alteri vici-

niori Parocho transmittat; ultimus vero eundem ad Cancellariam nostram, vel ad Synodum, Culmsæ proxime celebrandam, deferat. Volumus item, & auctoritate nostra ordinaria decernimus & mandamus, ut præsentis ejus processus nostri literæ ad valvas Ecclesiæ Cathedralis nostræ publice affigantur, quo omnibus prædictis istic accedentibus, indictio nostræ Synodi patere possit, ne videlicet quisquam illorum ignorantiam de præmissis quomodo prætere, aut se contra præmissa excusare valeat. In quorum omnium fidem præsentibus, manu Notarii nostri subscriptis, sigillum nostrum apprimi jussimus.

Datum in arce nostra Lubaviensi, die XIV. Maji Anno Domini MDCV.

Die itaque XXI. Junii, quæ fuit feria tertia post octavas Corporis Christi, Synodus feliciter inchoata fuit. Ubi celebrata Missa per Reverendissimum Dominum Episcopum, Pontificio habitu, ritumque solenni, imploratoque auxilio Spiritus Sancti, habita fuit ad Clerum Concio, a R. P. MARTINO LASCIO, Societatis JESU Presbytero. Qua peracta, progressum fuit ad Supplicationes & Litanias, ac alia in Pontificali Romano in Synodo servari præscripta. Tum ipse Reverendissimus ad Clerum in hæc verba sermonem suum exorsus.

### SERMO REVERENDISSIMI DOMINI EPISCOPI.

**M**Agnum & difficile munus, Fratres in Domino Charissimi, mihi infirmo, peccatisque cooperto impositum est, voluntate providentiæque Divina. Posuit enim me Spiritus Sanctus Episcopum & Pastorem regere Ecclesiam, quam acquisivit Redemptor noster Sanguine suo. In quo munere attendere me oportet, non modo mihi ipsi, sed & universo gregi, qui hisce binis Diocesisbus continetur, atque adeo vobis etiam, qui Rectores ejus estis & Magistri. Quod si propriam animam custodire operosum est: quantum & quale esse putatis custodire vestras, custodire totius populi, ac non modo propria, verum etiam aliena peccata portare? Grave profecto id onus, Angelicis etiam humeris, ut pius Doctor censuit, formidandum. Ingemisco igitur sub tanto pondere, exhorresco ad illas Domini per Prophetam voces: *Speculatorem in Israel posui te, & sanguinem ipsius de manu tua requiram.* Vigilandum igitur mihi est, exploranda diligenter omnia, Fratres; providendum, ut

vos,



vos, per quos populum mihi commissum condire debeo fidei, puræque doctrinæ & justitiæ Christianæ, ne putrefatis & scateatis sordibus vitiorum: nam a vestra pietate & virtute salus eorum, quibus præestis, dependet. Quapropter ut primum in hanc meam Diocesim veni, non cessavi vos in charitate & mansuetudine officii admonere, adii ipse Ecclesias plerasque, omnes quotannis per Archi-Presbyteros lustravi. Cognovi autem esse in hoc cœtu vestro Viros eruditione probitateque insignes, qui pie ac solícite in ministerio suo, animarumque cura versantur. Sed & hoc quoque dissimulare minime possum, quod angit & cruciat, esse aliquos ignaros officii, immemores dignitatis, torpentes otio, luxu diffuentes, ventri gulæque deditos; sua lucra, non animarum salutem procurantes; ut minime mirum sit, talibus Pastoribus aberrare oves a via Domini recta, dari in devorationem lupis, languescentes hæreses iterum reviviscere, vectigalia, decimas, & redditus Ecclesiarum parcius jam a fidelibus præstari. Hæc ego cum partim ipse animadvertissem, partim a Visitatoribus accepissem, jam pridem de cogenda Synodo cogitavi. Quod unum remedium, tum ad integritatem sanctæ doctrinæ Catholicæ retinendam, tum ad disciplinam Ecclesiasticam sanciendam, tum ad instauranda Christiana officia, pietatemque in populo excitandam, Spiritu Sancto auctore, est jam inde ab Apostolicis temporibus salutariter institutum. Sed variae præteritorum temporum difficultates, maxime autem pestilentia, late annis hisce quatuor per has regiones diffusa, consilium voluntatemque meam remorata fuerunt. Nunc gratias ago Domino DEO JESU CHRISTO, qui nos huc incolumes congregavit, & vos laudo, qui prompte mihi evocanti parvultis. Et precor te, Supreme Pastor & Magister noster, qui promisisti, si duo vel tres in tuo nomine congregati fuerunt, in medio eorum te futurum, ut nobis indignis servulis clemens & benignus adesse digneris, nostraque consilia Divino Spiritu ad laudem & gloriam tuam, nostramque & eorum, quorum curam gerimus, salutem dirigas & modereris. Vos autem, Fratres Charissimi, adeste animis, & supplicibus votis Divinam opem implorate, ut & videatis, quæ recta, illique placita sunt, & ad ea peragenda robur & gratiam divinitus, Christianæ Republicæ tranquillitatem, Regno huic salutem & pacem, Ecclesiæ Sanctæ Summum Pastorem secundum cor Domini, in hac iniquitate temporum, tantisque tempestatibus impetretis.

Tria autem nobis in hac nostra Synodo tractanda existimo. Primo ea, quæ ad cu-

*Tomus VIII. Concilior. German.*

ram de vobis ipsis referuntur. Secundo de cura gregis, cui præestis. Tertio de Ecclesiarum statu, rebusque temporariis ad eas pertinentibus. Ac principio quidem de nostra cura, authore Apostolo. Quid enim prodest, si universum mundum lucremur, animarum autem nostrarum detrimentum patiamur? Et quæ spes de felici successu curæ gregis, si non illi ad virtutem & honestatem nostris exemplis præibimus? Necessesse sane est, ut cujus vita despicitur, ejusdem prædicatio contemnatur. Porro ita ex sententia Sanctorum Patrum ego quoque statuo, ipsam dignitatem Sacerdotalem, si eam cognoscamus & diligenter expendamus, ad nostræ salutis curam, nobis summo incitamento esse futuram. Angelum Domini exercituum Sacerdotem Malachias appellat, cujus labia custodiunt scientiam, & de cujus ore legem populi requirunt, Angelum igitur purum & immaculatum ab omni peccati contagione esse par est, nuntium Altissimi, præditum ipsius gratia, non inimico ipsius Satanæ, aut corpori, mundove servientem. Ne, dum legatione ad Deum fungitur pro populo, quod ipsius munus est, proque peccatis ipsius deprecatur, repulsam ferat, tanquam ingratus & hostis, & sibi quoque graviores iram in die iræ Omnipotentis thesauriset. Addo, eam dignitatem esse Sacerdotum, ut eam Angeli ipsi superiores esse sua censeant, nempe, qui eam, quæ illis data est in terris, potestatem non habeant, ipse quoque Dominus eo honore prosequatur, ut eorum contemptum suum ducat, seque sperni dicat ab iis, qui eos spernant. Tu igitur, o Sacerdos, quem Angeli, quem ipse Deus Angelorum honorat, honorem tuum prostitues? Tu Sacerdotalem dignitatem in crimen vertes? Tu impura flagitiosaque vita contaminabis? Non sic, obsecro, non sic; audi potius Doctorem gentium, & sequere: *Quamdiu sum, inquit ille, gentium Apostolus, honorificabo ministerium meum.* Tu quoque ita te compone, ut idem dicas animo constanti; quamdiu sum Prælati, quamdiu Canonicus, quamdiu Parochus, quamdiu Sacerdos, honorificabo ministerium meum, id est, nunquam prætermittam; non me ab exercendo vis aut metus, non voluptatum illecebræ, non cupiditas, aut studium immoderatum rerum mundanarum, avocabunt. Hæc utinam fidenter dicere possimus, o Sacerdotes. Puritatem quidem tantam a nobis requirit D. Bernardus, ut nugas appellet in ore nostro blasphemias. Quid vero ebrietates, jurgia, multaque fœda, quæ commemorare etiam turpe & indecorum? Talem profecto oportet esse Sacerdotem, ut ad solum ipsius memoriam, fideles ad pietatem inflammentur, ut

O o o o

in

in benedictione sit perpetua, & nomen ejus celebretur a generatione in generationem, ut inquit idem Apostolus: *Mementote Præpositorum vestrorum, qui verbum Domini vobis locuti sunt, & quorum exitum intuemini, imitamini fidem.* Atque hæc, ne plura commemorem ad vestræ salutis curam diligentem excitare posse vos videntur, nisi prorsus obtorpuistis. Jam ad ea, quæ ad curam pertinent gregis, quem pascendum accepistis.

Grex fidelium, Ecclesia Salvatoris est, Sponsa ipsius dilecta, pro qua ille non septem, ut Jacob olim Patriarcha, aut XIV. annis, sed XXXIII. summos labores in medio terræ Dominus Dominantium servilem formam indutus summa patientia & humilitate pertulit, quam denique sanguine suo mercatus est, quam a sempiterna morte, sua morte, ad sempiternam vitam revocavit, quam corpore, sanguineque pretiosissimo, per ministerium vestrum, quos dispensatores Sacramentorum suorum delegit, pascit & nutrit. Hanc discedens vestræ fidei commendavit o Sacerdotes! vobis dixit: *Curam illius habe*; vobis talenta ad eam curandam, nutriendamque reliquit, vobis promisit se cumulate redditurum, si quid supererogaveritis. Deferetis igitur Sponsam Domini vestri? Non operam dabit, ut castam & immaculatam ab omni labe teterrimorum peccatorum, pestiferarumque opinionum exhibeatis Christo, cum ad rationes a nobis omnibus exposcendas tremendus Judex apparebit? Absit hoc a vobis, Fratres Charissimi, coronam potius & præmia sempiterna sectemini, quam tenebras illas & supplicia, in quas conjectus est servus, qui talentum Domini defodit. Et is quidem ob solam inertiam addictus est æternis pœnis. Quid illis putamus futurum, qui patrimonio Ecclesiæ ad luxum libidinesque suas abutuntur? Fovete, obsecro Charissimi! per viscera misericordiæ Dei nostri sponsam hanc Domini salutaribus Sacramentis: nutrite cibo doctrinæ cœlestis, exornate virtutum omnium monilibus, per exempla vestræ conversationis. Neque enim ulla ad docendum efficacior est via. Hoc facitis aliqui, Fratres, adjuvante Domino; sed sunt aliqui pigri, sunt flagitiis dediti, sunt, quod nollem, qui Sponsæ huic, ordinique vestro sunt dedecori, qui Sacerdotalem stolam imbuunt scelere, & dignitatem vertunt in deformitatem. Recensendi igitur estis; laudandi boni, puniendi mali. Quapropter initium harum Synodaliū actionum, a cognitione, & examine visitationum peractarum sumendum existimavi, ita quidem, ut prolixis relationibus tempus extrahi nolim, sed Archipresbyteri notatos brevioribus scriptis excessus, quos corrigi autoritate nostra judicaverint oportere, nobis offerant. Ad-

jungant etiam de injuriis, si quas Sacerdotes nostri, aut Ecclesiæ ipsorum, a quopiam patiantur. Dabitur etiam locus querelis, si quas Sacerdotes ipsi, vel contra Officiales meos, aut etiam me ipsum, qui homo sum infirmitate circumdatus, habebunt. Neque cuiquam fraudi erit, libera voce exposuisse, in quo se læsum existimabit. Vos igitur, Archi-Presbyteri! moneo, ut nihil occulteris: dissimulare enim peccata, quæ arguere debeas, est illis consentire, quod scelus esse non ignoratis. Expedit autem Christi Ecclesiæ, quæ sancta & immaculata est, ne scelera maneat impunita. Væ igitur vobis, si tacueritis. Porro etsi & ex Divinis Literis, & ex Sacris Sanctionibus, atque adeo ex Constitutionibus Synodalibus, ab Antecessore nostro, felicitis recordationis Reverendissimo Petro Kostka Episcopo olim editis, suppetunt præcepta vitæ instituendæ, officiorumque peragendorum: visum tamen est mihi partim in ordinem ea sub certis titulis redigere, partim addere nonnulla ex Sacris Canonibus, quæ accommodata visa sunt stabiliendæ Ecclesiasticæ disciplinæ, quæ quidem omnia crastina die peragentur, ut vestro quoque judicio, qui in Lege Divina, Canonibusque versari estis, examinentur.

Proponentur jam etiam vobis puncta nonnulla ad res Ecclesiarum, aut firmandas aut vindicandas spectantia, de quibus per noctem hanc deliberabitis, & nobis deinde per Archi-Presbyteros vestros explicabitis, quid sentiat.

Quoniam autem non habitat in corpore subdito peccati Spiritus sapientiæ, & consilii, expiate conscientias vestras, parate puras mentes Domino, ut crastina die intra vestra viscera Dominum salutis vestræ authorem, de manibus meis recipiatis, illique concorporei, ut Apostolus ait, effecti, in ipsius amorem inflammini, & Spiritus Sancti & cœlestis gratiæ lumen accipiaris. Porro ita demum recte ac salubriter consilia vestra procedent, si quod jubet Divus Paulus, mutuam charitatem habebitis, unanimes id ipsum sentientes, nihil per contentionem, aut inanem gloriam, sed in humilitate, Superiores sibi invicem arbitantes, non, quæ vestra sunt, quærentes, sed quæ aliena; supportantes alter alterum in charitate, solliciti servare unionem fidei vinculo pacis. Ego quidem libentissime omnia impendam, & superimpendar ipse pro animabus vestris, licet fortasse, ut ait idem Apostolus, plus vos diligens minus ipse diligar. Vos quidem estis spes mea & gaudium meum, si Sacerdotalem dignitatem non modo bene docendo, sed & bene vivendo, integram inviolatamque conservabitis, sique in eam curam sedulo incumbetis, ut plebem vobis commissam reddatis Domino populum

lum acceptabilem, sectatorem bonorum operum, scientiamque salutis illi præsteris.

Quod Dominus vobis ipse concedat, qui est DEUS in sæcula benedictus.

## SEQUUNTUR

## CONSTITUTIONES

IN SYNODO COMMUNI OMNIUM SENTENTIA  
COMPROBATÆ.*De Fidei Professione.*

**Q**Uoniam Fides fundamentum est humanæ salutis, recte ab ejus Professione, juxta præscriptum Sacrorum Canonum, omnia Sacerdotalia munia, functionesque curam animarum sustinentium & dispensantium Divina Mysteria, debent inchoari. Quocirca tametsi bene omnes utriusque Dicecesis nostræ Sacerdotes, præsertim curam animarum obtinentes, eam esse jam profectos, existimemus: attamen ab omnibus jam hic congregatis iterandam etiam & voce unanimi declarandam, & pium & consentaneum esse indicamus. Inposterum autem nullus ad Sacerdotium sive curatum, sive sine cura admittatur, nisi prius in manibus nostris, Successorumque nostrorum, vel Vicarii in Spiritualibus sive Officialis, eam præstiterit, ac ad obedientiam Sanctæ Romanæ Ecclesiæ, ejusque Pontificis & Ordinarii se se obstrinxerit.

Hoc ipsum de Vicariis Ecclesiæ Cathedralis, aliisque omnibus Sacerdotibus & Ministris Ecclesiarum, ac etiam Scholarum Rectoribus statutum esse volumus, ut nimirum omnes a Professione Sanctæ Fidei Catholicæ sua munia auspicentur.

*De Canonicis Ecclesiæ Cathedralis.*

**Q**Uoniam autem Ecclesia Cathedralis caput est aliarum, & Canonici nostri, ordine dignitateque primi cooperarii in hac Domini Sabaoth vinea, æquum & conveniens est, ut omnium etiam virtutum splendore cæteris præluceant, & quam fidem, dum in Ecclesiam cooptantur, juxta Statuta sua, Canonesque Sacros, profiteri solent, eam etiam factis expriment, integritate vitæ, pietatis studiis,

*Tomus VIII. Concilior. German.*

zelo Divinæ gloriæ propagandæ, diligentia defendendi patrimonii Ecclesiarum, alios inferioris Ordinis Ecclesiasticos viros ad idem studium excitent.

Ideo curent, ut non modo nomine, sed re ipsa sint Canonici, id est, regula & canon vitæ aliorum, secundum Sacros Canones, mores & vitam suam instituant, ac Constitutiones ex Sanctorum Patrum doctrina, ac Summorum Pontificum Decretis in Sacra Synodo sancitas, quæ ad ipsos pertinebunt, pariterque Statuta Capitularia ab Ordinariis approbata sancte observent.

Cum autem munus sit Canonico- rum, Episcopis suis in arduis & gravibus Ecclesiæ negotiis consilium præbere; monemus illos in Domino, ne bonas horas inaniter & sine fructu abire patiantur, sed eas in Sacræ Scripturæ, ac Sacrorum Canonum, jurisque communis lectione collocent, ut eum scientiæ thesaurum sibi comparent, ex quo ad omnia, quæ occurrunt, negotia, expedita consilia depromant. Non enim sibi persuadeant eo quod præstent dignitate cæteris Sacerdotibus, otiosis illis esse licere, sed potius secum reputent, se in editiore quodam loco esse, ex quo & lucere totius virtutis forma, & universæ Ecclesiæ prudentia auctoritateque prodesse possint.

Statuta sua, tum omnia, tum præcipue ea, quæ de residentia ex Concilii Tridentini Decretis pie utiliterque sancita sunt, nequaquam labefactari permittant, curentque, ut in tam exiguo eorum numero, omnes apud Ecclesiam præsentis permaneant, quo Divinus cultus & officia omnia Ecclesiastica sine intermissione majori cum dignitate ob- eantur, utque possessiones Ecclesiæ, hac injuria temporum & hominum rectius administrari, fortiusque defendi possint. Quodsi aliquando aliquem

O o o o 2

necef-



necessaria aut publica aut privata negotia ab Ecclesia avocabunt, volumus, ne ultra spatium trium mensium, juxta dispositionem Statutorum Capitularium, quolibet anno ab Ecclesia absint, alias cum diutius abesse voluerint, id illis nequaquam licebit, nisi prius a Nobis, nostrisque Successoribus licentiam obtinuerint, sub pœnis per Concilium Tridentinum de ea re statutis. Itaque qui jam absunt, peracta Synodo admonendi erunt, ut & Statutis & præsentì Constitutioni obtemperent, si pœnas ab eadem sancitas, atque etiam Capitularibus Statutis jam pridem decretas, velint evitare.

Bona Ecclesiæ suæ, tam ea, quæ in communi possident, quam quæ specialiter a singulis Canonicis loco præstimoniorum tenentur, certis temporibus, per Statuta Capitularia designatis revideant, aut etiam, si fieri possit, frequentius: quibus si damnum aliquod per aliquem Canonicum illatum fuerit compertum, contra eum Capitularia Statuta sine ullo respectu extendantur.

Fundationes veteres in Ecclesia Cathedrali, ne prorsus obsolescant, aut intereant, diligenter provideant Canonici, caveantque, ne quid in eo genere contra Decretum Concilii Tridentini in *Sessione XXII.* quod incipit: *Si quem Clericorum* &c. ab ipsis peccetur.

Capitularem conventum bis ad minimum in mense, si singulis septimanis commode non poterunt, habeant, in quo de negotiis Capituli & Ecclesiæ quam diligentissime agant, juxta præscripta Statutorum suorum: jura omnia & privilegia Ecclesiæ Cathedralis primo quoque tempore revideant, & cognoscant; indicem eorum conficiant: actiones Capitulares, & deliberationes, in monumenta librumque per Notarium fidelem referant, ut habeant eorum posteri, unde depromant consilia, ac rerum gerendarum exempla.

Ad extremum aliud quoque Capitulum, præter superius jam dictum semel quolibet trimestri Canonicus senior convocabit. Qualibet feria quarta incidentium quatuor temporum post Missam matutinam, cui omnes Canonici, ac reliquus item Cathedralis

Ecclesiæ Clerus cum aliis Ministris interesse omnino tenebuntur, idque pro executione nostrarum Constitutionum Synodaliū, & conservatione disciplinæ Ecclesiasticæ: in quo quidem Capitulo spiritualia tantum tractabuntur; an videlicet Decreta Constitutionum Synodaliū circa Divina Officia executioni demandentur: an omnes tum Sacerdotes, tum Clerici, tum Ministri alii Ecclesiæ adstricti, rite & ordine sua munia, ac ea, qua debent, diligentia exerceant. Si autem quempiam sive per negligentiam, sive aliam culpam aliquid deliquisse fuerit compertum, si is Vicarius sit, aut inferior aliquis Ecclesiæ Minister per Officiale nostrum, cui animadversionis potestas a Nobis delegatur, juxta Canonum aut Statutorum ipsorum præscriptum, vel rei exigentiam, puniatur: sin vero Canonicus fuerit, & præter Diocesanas Constitutiones Capituli quoque Statuta adimplere neglexerit, ad Nos quoque primo tempore deferatur. Quodsi forte aliqui reperti fuerint, qui hæc a Nobis pro conservanda in Ecclesia circa Divina Officia diligentia, decreta, in usum deducere noluerint, illi omnes tanquam Canoniarum Sanctionum, disciplinæque Ecclesiasticæ violatores, Dei Omnipotentis indignationem, & nostram severam animadversionem, sentient.

### *De Vicario in Spiritualibus, seu Officiali Generali.*

**V**icarius noster in Spiritualibus, seu Officialis Generalis, qui loco nostro jus dicit, hoc maxime curabit, ut causas ad judicium nostrum spirituale spectantes audiat, & decadat, consilio & deliberatione matura adhibita, erroresque & excessus, si qui ad eum, ejusque judicium delati fuerint, juxta juris præscriptum puniat, etiam, si opus fuerit, carceris pœna, ut disciplina Ecclesiastica a Sacerdotibus nostris, ac aliis Ecclesiasticis Ministris observetur. Sicut autem nostrum Magistratum gerit, nostramque in suis judiciis personam refert, ita eum decet in summa haberi ab omnibus veneratione. Si enim quidpiam in ipsum fuerit

fuerit commissum, quo autoritas ejus lædi possit, in Nos ipsos commissum, ac nostra autoritas læsa videbitur.

Et quamvis ipsi ex injuncto officio multiplex potestas competat, cum eandem Nobiscum habere dicatur jurisdictionem, ad ea tamen, quæ specialia mandata requirunt, nisi ea a Nobis habuerit, manum non mittet. In iis namque non ordinariam jurisdictionem, sed delegatam habebit, quam a Nobis ipsum expectare convenit.

Commendas ne ultra tempus in Concilio Trident. præfixum, neve amplius, quam semel concedat. Ac instituendi quidem jus illi erit, cæterum resignationes recipiendi absque speciali nostro mandato, minime.

Vicario porro Pomesaniensi, cum illius Dicecesis ratio diversa habenda sit, specialem instructionem ad ipsius officium spectantem in scriptis dabimus.

### *De Archi-Presbyteris.*

**A**Rchi-Presbyteri, qui alibi Decani rurales vocantur, delecti sunt ex Sacerdotum cœtu, quasi oculi nostri & cæterorum Inspectores, ut non modo Ecclesias, quas ipsi obtinent, pia solitudine gubernent: verum etiam in Presbyteros, præcipue in Parochos, qui per minores titulos habitant intra terminos cujusvis Archipresbyteratus, assidue oculos habeant intentos, eorum vitam & mores inspiciant, & tanquam solliciti Rectorum Inspectores & Magistri, sine intermissione vigilant, ut nec in plebe, nec in Sacerdotibus sibi commissis aliquid aut indecorum aut flagitiosum appareat, utque Parochi rite & legitime officio suo perfungantur, curamque animarum recte administrent.

Ac imprimis ipsis in Dei nomine injungimus & mandamus, ut ad minimum semel in anno Ecclesias earumque Rectores visitent, & de omnibus tam ad rem Ecclesiasticam, nimirum dotationem, redditus, suppellectilem, quam ad Parochorum vitam pertinentibus diligentissime inquirant, provideantque & satagant, ne qua in re Ecclesiæ illæ vel in temporalibus, vel in spiritualibus, detrimentum patiantur.

Porro perlustrata regione sibi commissa, bis in anno convocent Clerum, præmissoque Sacro de Spiritu Sancto, oratione gravi admonebunt de iis, quæ a quoquam aut negligi, aut contra officium fieri cognoverint, tum Constitutionum Synodaliū, Divinæque Legis, ac Sacrorum Canonum præscripta, ipsis diligenter inculcabunt, ac hortabuntur, ut si qui in ea peccaverint, delicta corrigant, ac in viam redeant. Et idcirco confessiones eorum vel ipsi excipient Archipresbyteri, vel cuique suum assignabunt Confessarium, quem ita assignatum, non vero alium, adire tenebuntur, ipsique peccata religiose confiteri. Graviora autem delicta, & scandala, quibus ipsi sua admonitione, vel correctione & impositione pœnitentiæ pro qualitate culpæ, mederi non poterunt, ad Nos, sive Officialem nostrum, sive scripto, sive oretenus, sine mora deferent, ut in contumaces Sacerdotes juxta Canonum præscripta, gravioribus pœnis animadvertatur.

Diligenter quoque invigilabunt, ne quid in illorum districtu adversus fidem aut pietatem emergat, quin non statim Nos certiores reddant, ut si quis sub eorum cura Parochus, vel alii Sacerdotes, aut Scholæ Rector, in articulis Catholicæ Fidei aliquid peregrinum sapiat, & alienum ab Ecclesiæ Romanæ doctrina, si quis curiosius de fide disputet, & simplicibus injiciat scrupulos, ne id latius serpat, & animos simplicium in errorem inducat, mature autoritate nostra provideatur. Itaque ea diligentia, qua debent, & tenentur, Nobis ejusmodi personas manifestabunt. Moneant itidem Sacerdotes, ut si quando in disputationem aliquam cum hæreticis, aut eorum ministris ipsis descendendum sit, id caute & sobrie, locis idoneis, non in comestationibus, faciant; a jurgiis & contentionibus prorsus abstineant, sed veram doctrinam Catholicam Scripturarum, Sanctorum Patrum, Conciliorum Oecumenicorum, & venerandæ antiquitatis autoritate confirment.

Provideant etiam, ne vagi Sacerdotes sive Regulares, sive sæculares, in

Ecclesias nostras se se obtrudant, ne quis Parochorum aut Commendatorum etiam, aut quorumvis Sacerdotum ad curam animarum, administrationem Sacramentorum, prædicationis officium, ministerium altaris, admittatur, sine prævio examine, & nisi sufficienter probaverit, se legitime ordinatum esse, probatæque fidei Sacerdotem, neque ulli pro Capellanis aut Vicariis recipiantur, nisi prius Nobis, aut Officiali nostro fuerint præsentati.

Inquirent etiam diligenter, quomodo Hospitalia & Capellæ, ex quibus aliquæ eleemosynæ colliguntur, administrentur, & quam honeste vitam pauperes in ipsis ducant, dabuntque operam, ut rationes ex administratione eorum, in præsentia Parochi quotannis, ab iis, quibus commissæ sunt, etiam ipsi Visitatori reddantur. De indulgentiis etiam diligenter inquirent, & si forte abusus aliquos in illis repererint, vel ipsi tollent, vel Nos de ipsis informabunt. Maxime autem vetabunt coitiones & comestiones Sacerdotum, quas in Patrociniis & Dedicationibus Ecclesiarum fieri intelligimus.

Providebunt etiam, ut Parochi nunquam ab ovibus suis recedant, sed perpetuo apud ipsas resideant, & in Pastoralia munia diligenter incumbant; quapropter in omnibus suis tam visitationibus, quam congregationibus nostro nomine id ipsis denuntiabunt, ne per totum annum ultra mensem quicumque ab Ecclesia sua se absentet, sine nostra, vel Officialis nostri licentia, quæ ex justis causis non gravatim concedetur, & in scriptis extradi mandabitur.

Ad Archi-Presbyterorum quoque curam ac sollicitudinem pertinet, ut in Scholis Parochialibus juventus in omni pietate, ac morum integritate recte informetur & instituatur. Qualis enim illius a primis annis institutio fuerit, tales Ecclesiis Dei suppeditabuntur Ministri. Quapropter dum Parochorum curæ suæ commissorum, visitationem obibunt, simul etiam de Rectorum Scholæ vita, moribus, doctrina, ac quid juventuti, cujus erudiendæ curam gerunt, proponere soleant, dili-

genter inquirent. Commonefacient autem eos serio, ut ipsis Catechisticam lectionem quam sæpius proponant, fidei articulos eosdem edoceant, & explicant.

Porro quæ de officio Archi-Presbyterorum nostrorum hic scripsimus, ita esse scripta volumus, ut ea, quæ ex Sacris Canonibus, quæque ex præscriptis informationibus visitandi, & muneris sui obeundi, tam ab Antecessoribus nostris, quam a Nobis ipsis jam ante data sunt, non excludamus.

### *De Parochorum officio.*

**O**Mnes Parochi nostri id curabunt, ut oves suas cibo cœlestis doctrinæ pascant, utque salutaribus reticiant Sacramentis, ac rite ordineque juxta præscriptum in libro Agendorum, ministrent: idque faciant semper prompte, dum ab aliquo requisiti fuerint, & gratis. Summo autem studio, ac omni sollicitudine providebunt, ne qui in eorum Parochiis infantes sine Baptismo moriantur: quin potius Parochianis suis illud inculcabunt, ut postquam infans aliquis natus fuerit, illum statim uno vel duobus patrinis rogatis, parentes ipsius Sacerdoti præsentari curent, ac illum baptisari postulent. De iis vero, qui jam sunt adulti, & usum rationis habent, satagant, ne sine perceptione Corporis Domini & Extremæ Unctionis Sacramento ex hac vita decedant. Domos suorum Parochianorum sæpe visitabunt, attendentque, ne habeantur apud ipsos libri hæreticorum, quos, si invenerint, eos auferri curent, & illis persuadeant, ut in locum eorum Catholicos, maxime vero vitas Sanctorum Patrum, & libros aliquos piarum orationum, & exercitiorum spiritualium domi suæ teneant, & legant.

**Ss. MISSÆ SACRIFICIUM** ut singulis diebus Dominicis & Festis solennibus, ac præter Festa bis in septimana, præcipue vero feria quarta & sexta in Ecclesiis suis per se, vel per alium faciant, serio præcipimus. In illo autem faciendo ita versabuntur, ut Sacri Canones, & Missalis Romani ritus, ac ista istius Divini Sacrificii Majestas



jestas exposcunt: nemo peccato mortali contaminatus, nisi prius confessione integra per eum, qui ei designatus est, Sacerdotem expietur, nemo non jejunos; nemo nisi ad minus Matutinis precibus & Laudibus recitatis accedat, ac meminerit, se inspectantibus Angelis stare in conspectu Altissimi, & immaculatam Hostiam Corporis & Sanguinis Domini nostri tremendo mysterio, pro suis, populi que peccatis, modo incruento offerre. Quocirca fervet ea omnia in celebratione, quæ quoad ritus & cæremonias, dignitatemque actionis & venerationis, ac consecrationis, oblationisque in rubrica Missalis (quam diligenter frequenterque evolvat) sunt præscripta. Avaritiæ omnem speciem, aut illiberales exactiones elemosynarum ejus Sacrificii nomine, & aliorum Sacramentorum administrationis, severe prohibemus. Tempora itidem nempe pomeridiana, vespertina, nocturna, præterquam in nocte Natalis Domini, cavenda esse fiant.

Porro singulis diebus Dominicis & Festis celebribus, ac per Quadragesimam etiam feria quarta & sexta, præsertim in oppidis habendæ sunt conciones ad populum, quibus is & ad ea credenda, quæ Catholica docet veritas, & ad ea agenda, quæ Christiana requirunt officia, informetur. Materia autem & argumentum concionum petenda erunt ex Evangelio occurrenti, cujus explicationem Parochi, vel ex approbatis ab Ecclesia Sanctis Scriptoribus, vel ex Postillis Polonico idiomate, a Theologis Societatis Jesu Jacobo Wieco, & Petro Skarga editis, vel aliis idoneis tam Germanicis, quam Polonicis (suspectis omnibus rejectis) petent, sermoneque patrio & ad captum audientium tota materia ac serie, orationeque maxime accommodata, populo proponent: ita ut meminerint, se verbi Dei fideles esse debere relatores: scommata, convicia, fabulas, jocos ineptos, inanes quæstiones, verborumque contentiones, omnemque levitatem fugiant. Unum id habeant propositum, ut rudes edoceant, doctos confirmant, errantes in viam reducant, ac omnibus ad por-

tum salutis viam commonstrent. Quam ad rem accommodatum est, ut per certa anni tempora doctrinam dispertiantur: ita ut a die Epiphaniarum ad Quadragesimam Decalogum explicent, moresque populi instruant, & quæ cavenda sint, quibusque offendatur Divina Majestas, ita doceant, ut ea rudes quoque percipiant, Divinaque præcepta ac vitæ officia prorsus ex hujusmodi doctrina hauriant & imbibant. Per Quadragesimam de Pœnitentia, Sanctissimæque Eucharistia diligentissime tractent, tempore Paschatis de Baptismo, Confirmatione, & Extrema Unctione instruant, verbaque faciant, a Pentecostes autem diebus Orationis Domini cæ sensum interpretabuntur, post Trinitatis festum, in duodecim Symboli Apostolici articulorum expositione versentur, hæc autem semper, Evangelio perite convenienterque explicato, in secunda Concionis parte adjungant. Cæterum vel post maturas Missas, vel pomeridiano tempore, pro hominum & temporum commoditate e Catechismo Ledesmi, vel Cardinalis Bellarmini in Polonicum idioma jam translato, rudimenta Christianæ Fidei a Scholaribus recitari curabunt, eaque ipsi, vel eorum Vicarii, junioribus aut simplicioribus fidelibus accurate explicabunt.

Quoties item se occasio dederit, doceant populum, quid Missa sit, ad quam oves suas cum devotione audientiam excitabunt, docentes eas, quæ, & quanta mysteria contineat, quam ob rem in Ecclesia quotidie celebretur, quid fideles, dum peragitur, meditari oporteat, qui fructus ad eos redeant, qui devote assunt, & audiunt.

CONFESSIONES accurate excipiant: animarum hanc esse medelam, se Medicos agnoscant, & artem omnium vel maximam tractandarum conscientiarum. Modum igitur recte confitendi plebem suam accurate doceant. In exquirendis peccatis cauti sint & solertes, in pœnitentiis imponendis prudentes, neque a casibus reservatis absolvendi potestatem sibi, nisi concessa a Nobis, vel Officiali nostro (excepto mortis articulo) fuerit, usurpent.

Porro

Porro utantur Directorio Polanci, ad examinandas conscientias, & ordinem eum teneant, ut si qui imperiti ad confitendum accesserint, per Decalogi seriem, vel per peccatorum capitalium ordinem, qua parte quisque doleat, quoque morbo laboret, & caute & sine offensa aut scandalo explorent, aptamque ad sanandam accommodent, pœnæ consiliique medicinam.

Caveant, ne gregatim confiteantur, sed singulatim, neve communem omnibus, quod aliquando evenisse intelligimus, absolutionem impertiant.

Curent, ut omnes eorum Parochiani ex consilio & devotione frequenter, ex præcepto, sub peccati mortalis reatu, ac excommunicationis pœna circa festum Paschatis (quod tempus habita Provinciæ istius Sacerdotumque paucitatis ratione, a Dominica Passionis incipi posse, & pro Dominica conductus Paschæ terminari declaramus) confiteantur & communicent. Quocirca eos vim execrationis Ecclesiasticæ doceant, & semel minimum in anno circa festum Paschæ, præcipua Bullæ Cœnæ Domini Capita diligentissime explicant, verbisque planis omnes, qui jurisdictionem Ecclesiasticam violant, qui decimas, & alia debita Christi Ministris stipendia; aut agros Parochorum sibi quomodolibet usurpant, qui res morte Parochorum relictas diripiunt: omnes item usurarios, incestuosos, incantatores, maleficos, sortilegos, homicidas, viduarum & virginum raptores, Sacramenta singulis annis non sumentes, excommunicationi subjacere edoceant.

FESTI DIES, quos semper in hac Diœcesi nostra pius populus summa cum reverentia celebravit, ut inviolati sint, attendant; monebuntque plebem, ut eos non in ebrietatibus, sed in pietatis officiis, Divinoque cultu traducat. Sunt autem, ut sequuntur: Circumcisio Domini. Epiphania. Purificatio B. Mariæ Virginis, cujus vigilia jejunetur. Divi Matthiæ Apostoli cum jejuniis. Annuntiatio B. Mariæ Virginis. Festum Paschæ cum sequentibus duobus diebus, cujus vigilia jejunetur. D. Alberti. (Marci Evangelistæ ad me-

ridiem) Philippi & Jacobi. Stanislai. Inventio S. Crucis. Ascensio Domini. Pentecostes, cum duobus sequentibus diebus, cujus vigilia jejunetur, jejuniis Paschali in lacticiis. Trinitatis. Corporis Christi. S. Joannis Baptistæ, cujus vigilia jejunetur. Petri & Pauli, quorum vigilia jejunetur. Visitationis Beatissimæ Virginis cum jejuniis consueto. Mariæ Magdalenæ. S. Jacobi, cujus vigilia jejunetur. S. Laurentii Martyris, cujus vigilia jejunetur. Assumptio B. M. V. cujus vigilia jejunetur. S. Hyacinthi, cujus festum celebratur Dominica infra octavas Assumptionis B. M. Virginis juxta Breve Apostolicum. S. Bartholomæi Apostoli, cujus vigilia jejunetur. Nativitatis Beatæ M. V. cujus vigilia jejunetur. Exaltatio S. Crucis, in Culmenti Diœcesi ex consuetudine. Matthæi Apostoli & Evangelistæ, cujus vigilia jejunetur. Dedicatio S. Michaelis. Simonis & Judæ, quorum vigilia jejunetur. Omnium Sanctorum, quorum vigilia jejunetur. S. Martini Episcopi. S. Catharinæ. S. Andreæ, cujus vigilia jejunetur. S. Nicolai. Conceptio B. M. V. cujus vigilia jejunetur, propria consuetudine veteri. Thomæ Apostoli, cujus vigilia jejunetur. Nativitas Domini nostri Jesu Christi, cujus vigilia jejunetur. S. Stephani Protomartyris. S. Joannis Evangelistæ. Præterea Festa Patronorum in Ecclesiis ad memoriam eorum consecratis.

De Festo Annuntiationis B. M. V. celebrando, quando illud transferri contingit, serventur Rubricæ Breviarii Romani.

Habeant autem in suis Ecclesiis opportuno loco appensam tabellam, quæ hæc omnia Festa superius descripta contineat, ut in promptu Festa populo denuntianda ex ambone habeant: adnotatis ibidem Casibus Papalibus & Episcopalibus, ut sciant Sacerdotes, a quibus peccatis suos confitentes absolvere possint.

Tum etiam, ut jejunia Quatuor temporum, & feriarum sextarum religiose, secundum Provinciæ consuetudinem, observentur, Sacerdotes pro concionibus populo inculcabunt, & ipsi ea sancte observabunt.

Immi-

Imminentibus quatuor anni temporibus, quibus in Ecclesia, ex instituto Ss. Canonum, Ordinum collatio fieri solet, ex ambona denuntiabunt illis, qui animum suscipiendi Ss. Ordines habuerint, ut tempestive feria quarta ad Ecclesiam nostram Cathedralē, vel ad locum ordinationis, per literas intimationis a Nobis designandum se fistant. Admonebunt autem similiter eosdem, ut quisque a Rectore Scholæ, ac a Parocho suo testimonium conversationis, morum; a Magistratu autem civili natalium; alia itidem requisita adferat. Cætera item, quæ de ea materia in Concilio Tridentino Sess. XXIII. traduntur, ordinandos edocebunt.

DE DOMIBUS PAROCHIALIBUS reparandis, ne collabantur, servent Statutum Reverendissimi Domini PETRI KOSTKA nostri Prædecessoris. Inventaria autem habeant omnium rerum non modo Ecclesiæ, sed etiam Parochiæ. Quæ Ecclesiis vel antiquitus adscriptæ sunt, vel legantur, ea sibi nullatenus usurpent, quin imo omnium Legatorum rationem Archi-Presbyteris reddant, salva portione Canonica Parocho.

Canonicam porro portionem istis definimus finibus, atque ita de ea statuimus, ut, si quis ratione sepulturæ alicui Ecclesiæ res aliquas reliquerit: earum rerum conjunctione, & computatione facta, pars quarta detrahi debeat, & Curato vel Rectori Ecclesiæ Parochialis concedi: si quis vero sanus & nulla ægritudine correptus, alicui Ecclesiæ quid reliquerit, cum bona sint sua, & quibuslibet etiam privatis ea conferre possit, nulla ex hoc detrahetur Canonica portio. Similiter si pro fabrica Ecclesiæ cujuscumque anniversario vel aliis piis operibus, aut ad perpetuum cultum Divinum, in infirmitate constitutus aliquid reliquerit, nihil inde percipit Parochus, nisi in fraudem Parochialis Ecclesiæ hoc factum probetur.

Et quoniam solent interdum aliunde Religiosi quidam confluere ad Diocesis nostræ oppida & civitates, ad mercatus, & alias solennitates, ibi sti-

pem colligere, potitare, & victum etiam Religiosis, qui in nostra Diocesi versantur, præripere. Igitur ubi tales Parochi nostri animadverterint, exquirant ab illis testimonium Superiorum: quod si scandalose se gesserint, eos prorsus vel carceribus coerceant, vel ex oppidis extrudi curent, quemadmodum Nos quoque, autoritate nostra ordinaria, tales erroneos & scandalosos, ex nostræ Diocesis locis hoc Decreto nostro proscribimus.

Volumus ad extremum, ut Sacerdotes pro concione, ex aliqua occasione, moneant graviter populum, ut se a cursitationibus, dum Sacra peraguntur, & Divina Officia celebrantur, penitus abstineant, utque pueros & canes, quos clamoribus, strepitu, latratu, continere non valent, in domibus suis relinquunt, memores verborum Domini, domum suam orationi addictam esse asserentis.

### *De Vicariis & Choralistis Ecclesiæ Cathedralis Culmensis.*

IN Ecclesia nostra Cathedrali Culmensi, quæ primaria est, & officiorum Ecclesiasticorum Magistra, omnia tanto magis ad normam Ss. Canonum fieri, Divinaque Officia cum majori diligentia & attentione peragi debent, quanto magis in eam omnes Sacerdotes, qui per minores titulos habitant, oculos intendunt, exemplumque pietatis ab ea requirunt. Quemadmodum igitur primaria ipsius membra, Canonicos, officiorum commo- nuimus, ita Vicarios & Choralistas hortamur, ut in ministeriis, quibus se se addixerunt, diligentes, vigilantesque sint, Horas Divinarum laudum designatas observent, & in peragendis Officiis Divinis, ac Hymnis, Psalmisque decantandis ita versentur, ut ipso etiam exteriore cultu corporis & habitu, præ se ferant, se intus animo Deum venerari, ac promptissimam mentem habere ad Divinas ipsius laudes celebrandas.

Quare adveniente hora cantandi Divini Officii, ad initium statim campanæ pulsus, quisque illorum domo

P p p p

sua



sua tempestive egrediatur, ne pulsu finito, certatim ad Ecclesiam primo currant, & ex celeri illo cursu, anhelant ad Chorum ad cantandum veniant. Porro in ipso Ecclesiæ aditu superpellicia sumant; a fabellis & colloquutionibus abstinentes, in Chorum recta eant, atque istic cõtam Sanctissimo Eucharistiæ Sacramento aliquantisper orent, se se ad devotionem disponentes, tamdiu, donec ab Hebdomadario officium fuerit inchoatum. Qui secus fecerint, in Capitulo, quod propter retinenda officia in Cathedrali Ecclesia statis temporibus superius institutum est, arbitrio Dominorum Canonici diurna portione salarii sui multabuntur.

De cætero autem, posteaquam Divinas Horas absolverint, otiosi ne sint, neque ebrietati dediti, nec per oppidum discursent, sed eam modestiam & honestatem servant, quam in cæteris Clericis nostris exigimus, & lectioni, & aliis honestis occupationibus se dedant. Qui secus fecerint, in eos Officialis noster congruis pœnis animadvertat.

### *De vita & honestate Clericorum in communi.*

**C**UM ab honestate pietateque Clericorum & Sacerdotum, vita Christiani populi vel maxime ad virtutem informetur, dent operam Clerici & Sacerdotes nostri, ut luceant omnibus exemplo modestiæ & castimoniæ; crapulam & ebrietatem, vitiorum omnium vel maxime fomitem, devitent, poculis ne certent, nec æqualibus haustibus indulgeant; choreas ne ducere, aut quid insolens aut scandalosum agere, in comestationibus audeant; cantilenas turpes, jocos scurriles, verba procacia, omnesque nugas, quæ in ore Sacerdotis sunt blasphemiæ, cane pejus & angue fugiant; meminerint se esse gentem sanctam, regale Sacerdotium, lucem mundi, salem populorum. Habeant animum castum, os purum, & ad solas Divinas laudes promptum, linguam continentem & modestam, gravitatem, modestiam, innocentiam, mundiciem, adjuvante Domino, in omnibus actionibus, totaque vita,

summo studio colendam sibi esse censeant. Aleam, & omnes indignas Presbyteris (qui Senes populi sunt & Doctores) occupationes prorsus ne attrectent. Si quando nuptiis aut conviviis sæcularium, aut affinitatis, aut necessitudinis aliquo respectu, interesse eos contigerit, ubique præ oculis habeant dignitatem, qua ornati sunt, Sacerdotalem.

Qui novas Missas recenter ordinati celebrant, ne stipem pro eo colligant, neve convivia in ipsis peragant, sub pœna suspensionis ad arbitrium nostrum.

Nominatim districte vetamus, ne qui aliquo modo suspectas mulieres in domibus suis foveant, nec cum iis multum conversentur, nec ad publicos mercatus, vel quoquam alio una proficiscantur, quod quidem puniendi Archipresbyteris potestas esto.

Incorrigibiles etiam privationibus beneficiorum ex Concilii Tridentini præscriptis, vel ex Synodalibus Constitutionibus, tum sequestrationibus fructuum, tum carceris, ac aliis gravioribus Canoniciis pœnis, a Nobis, vel Officiali nostro, plectentur.

Horas Canonicas, quas tum ob Ordines susceptos, tum ratione beneficiorum Clerici recitare tenentur, caveant, ne ullo modo omitant, aut negligant.

Nullus Sacerdotum autoritate propria Nobis, vel Officiali nostro inconsultis, ab Ecclesiæ ingressu quenquam prohibeat, aut excretur, neque denegat Sacramenta, nisi in casibus a jure permissis. Nullus intersit sententiæ sanguinis, neque pro exequenda literas scribat: reorum suppliciis non aliter intersit, nisi pro consolatione, aut exhortatione moriturosum.

Vestitu insuper statui suo Sacerdotali convenienti utantur, & ejusmodi quidem, qui sit coloris duntaxat nigri, & ad talos usque pertingat; binas vestes in publico portent, tunicam nimirum talarem, & pallium, vel Sacerdotalem togam; neque solis domesticis vestibus, quæ Czamaræ vocantur, toraces contexti, per oppida currant.

fitent. Pileorum hyemalium pelles non nimium exponant; barbas contra Canonum Decreta ne nutrant: turpe enim est Sacerdoti, ab istis potius dignitatem aut decorem quærere, quam a virtute actionumque pulchritudine; & exterior habitus cultusque corporis indicat, quomodo intus animus sit effectus. Igitur hanc quoque modestiæ partem pœna Synodali sancimus.

### *De Provisionibus & Institutionibus.*

**I**Nolevit a multo tempore in hac nostra Diœcesi consuetudo, Canonibus, ac Ss. Patrum institutis inimica, quod multi Sacerdotes, magno cum animi nostri dolore, reperiantur, qui Ecclesias nullo jure, nulla prævia institutione, possident. Quæ cum sit janua quædam ad obtinenda Ecclesiastica beneficia, & citra quam plebanalis jurisdictio, & animarum cura, legitime haberi non possit; ideo statuimus, ut quilibet Archi-Presbyter, infra sex septimanas a publicatione præsentis Synodi, omnes Parochos curæ suæ Archi-Presbyterali commissos, de quorum titulis, institutione, aut legitimis provisionibus sibi non constat, ad exhibendum infra XI. dies titulos, institutiones, sive provisiones legitimas beneficiorum autoritate nostra sub pœna suspensionis, per eundem Archi-Presbyterum ferenda, compellat. In posterum autem provideant, ne quis ad Ecclesias a quoquam intrudatur, vel sponte invadat, nisi prius aut Nobis, aut Officiali nostro, fuerit præsentatus, & institutionem legitimam vel Commendam obtinuerit.

Quia autem aliquarum Parochiarum & Ecclesiarum bona certi sæculares homines audent occupare, panemque ex domo Domini Ministris tollere, & præripere; tales quidem in pœnas Canonic. Sacri Concilii Trident. *Sess. XXII.* incipien. *Si quem Clericorum* &c. incidisse declaramus; quem Canonem jubemus etiam pro concione, semel a Nobis in mense, idiome vernaculo populo explicari; Nos quæque Patronos beneficiorum monebimus per literas nostras, ut, quantum id peccatum

sit, recogitent, ablataque restituant. Quodsi contempserint, juridicæ eis actiones eo nomine intentandæ erunt, in quibus auctoritatem, patrocinium, opem, consiliumque nostrum, sive Parochis, sive Sacerdotibus aliis, qui eas prosequuntur, præstabimus.

### *De Scholis.*

**S**cholæ Catholicæ, non modo doctrinæ, verum & pietatis debent esse officinæ. Curent igitur Parochi diligenter, ut pro ratione locorum idonei Rectores ab illis, quorum interest, illis præficiantur. Professionem fidei ab illis exigant, apposita ibidem clausula, de reverentia & obedientia Reverendissimo loci Ordinario, & Parochi proprio pro tempore existenti exhibenda. Volumus autem omnino, ut jurisdictioni Parochorum, non autem Magistratus, licet ab eo salarium percipiat, quivis Rector una cum Collega, sicubi eum habet, Cantoreque & juvenibus, qui eum in cantu juvant, subjaceat. Modum instituendæ & erudiendæ juventutis Parochi ipsis præscribant, ita ut is ad Concilii Trident. Decreta conformetur. Curent etiam, ut non modo Grammaticam, humanioraque studia proponant, verum etiam rudimenta Christianæ doctrinæ. Prohibeant etiam, ne, quod fieri in quibusdam oppidis parum honeste intelligimus, puellæ cum pueris, in eodem contubernio legere doceantur, unaque versentur.

Providendum etiam esset, ut in Scholis honesti, modestique adolescentes, præsertim in oppidis, Cantori & Rectori Scholæ adsint, tot, quot commode, vel ex facultatibus Ecclesiæ illius, vel ex liberalitate Parochi, vel ex benignitate, munificentiaque piorum sustentari possint. Qui quidem Divinas laudes decantent, Ministeriis Ecclesiasticis & ritibus ac cæremoniis assuescant. Ac deinde, posteaquam mores suos probaverint, tyrociniumque istud exegerint, inter alumnos nostros recipi, ad Gymnasia ampliora pro Sacrarum Literarum studio mitti, & deinceps Ecclesiasticæ militiæ adscribi possint. Hortabuntur autem Archi-Pres-

byteri eo nomine Magistratus oppidorum, & hujusmodi Constitutionibus nostris obtemperent.

### *De Seminario.*

**P**ropositum fuit ad deliberandum Sacerdotibus in Synodo congregatis, ut pium de erigendo Seminario, aut saltem reformandis Scholis in civitatibus amplioribus institutum, jam ante a Reverendissimo olim piæ memoriæ PETRO KOSTKA inchoatum; tum etiam de Domo Hospitali pro Sacerdotibus senio confectis, & ad Ministeria Ecclesiastica inhabilibus, pro qua jam, Authore Reverendissimo PETRO TILICKI (\*) Antecessore nostro, aliquantum pecuniæ collatum fuit, ad effectum deduceretur: & ut contributio aliqua certa pecuniaria, a Sacerdotibus utriusque Diœcesis annuatim eo nomine pendenda, communibus suffragiis sanciretur. Quam contributionem cum Sacerdotes Diœcesis Culmensis, utpote hac injuria hominum & temporum iniquitate, graviter oppressi, maximo sibi oneri fore quererentur, peterentque deliberationem istam cum toto suo effectu, in aliud commodius tempus differri: supplicationi hujusmodi illorum datus est locus & deliberatio ea de re ad futuram, Deo volente, Synodum dilata. Non derogantes quicquam Constitutioni superius factæ, nimirum, in qua modum reformandarum Scholarum omnibus Archipresbyteris apud majores Ecclesias manentibus præscripsimus. Cum autem reliqui Diœcesis Pomesaniensis, tum paucitate Cleri laborantes, tum mole magna jurium & negotiorum Ecclesiasticorum prosequendorum pressi, ultro se se ad hujusmodi contributionem submiserint; idcirco ex majori quidem & minori Insula, ubi pinguior gleba, & fertiliores agri, ex singulis mansis, singulos florenos Polonicos; in montibus autem, ubi res Parochorum angustiores sunt, itidem ex singulis mansis unam Marcam Prutenicam annue, sive id in unam ratam pro Festo Sancti Martini summatim, sive in singula quartalia per partes pendere malint, ad manus eorum, qui hujusmodi census Quæstores eligentur, re-

præsentare tenebuntur. Ex cujus contributionis summa, & ad negotia, sive juridicas causas Cleri illius, & ad alimenta Sacerdotum senio confectorum, aut etiam inhabilium ad Officia Divina peragenda, præsertim, qui operam suam Ecclesiæ fideliter præstiterunt: tum etiam in alios communes Ecclesiarum illarum usus, ac illius Diœcesis commodum, pecunia illa, ex arbitrio Reverendissimi Domini Episcopi, præstabitur. Idque tamdiu, quoad res communes illorum Sacerdotum eam contributionem postulare videbuntur, & quoad aliquid aliud de ea a Nobis, vel nostris Successoribus, non fuerit constitutum.

### *De Matrimonio.*

**D**E Matrimonio servant diligenter Parochi Decretum Sacri Concilii Tridentini, *Sessione XXIV.* Idque nemo eorum ignoret, ac ne temere quosquam, nisi præmissis ternis bannis, separatis festivis diebus, testimoniis exquisitis, viliores præsertim, & vagas personas, Matrimonio jungant, sub pœna arbitraria. Tempora nuptiarum ab Ecclesia prohibita diligenter observent.

### *De Testamentis.*

**D**E ordinandis Testamentis, tum etiam de bonis eorum conscribendis, qui intestati decedunt, volumus ab omnibus Statutum nostri Prædecessoris Reverendissimi PETRI KOSTKA servari.

Quoniam autem in inventariis Parochiarum tam a decedentibus, quam a resignantibus, & a novis Parochis multa peccantur, non sine injuria & detrimento Ecclesiarum; statuimus, ut novus parochus cum Archipresbytero, vel alio quovis Sacerdote, qui ipsum introducit, præsentibus vitricis & primoribus Ecclesiæ, vel Parochiæ illius, vel ultimæ voluntatis Exequutoribus Antecessoris ejus, in primo ingressu suo, inventarium omnium pecorum, jumentorum, frumentorum, supellectilis, & aliarum quarumvis rerum ad parochiam pertinentium, conficiat, easque res in potestatem suam reci-

(\*) Tilickius Episcopatum Warmiensem anno 1599., Vladislaviensem 1604., Cracoviensem 1606. adeptus.



recipiat, & omnia in tres codicillos describat, ac a se, & ab introducente Sacerdote subscriptos. Unum quidem vitricis Ecclesiæ statim tradat; alterum vero intra XV. dies Nobis, vel in absentia nostra, Officiali nostro Generali offerat, vel transmittat; tertium vero sibi seruet, ac deinceps secundum ejusmodi inventarium decedens, in parochia illa, si non meliora, non deteriora tamen Successori suo relinquat: si autem ultra tres annos eam parochiam obtinuerit, additamentum aliquod pro parochiæ redditibus ipse, vel exequutores ejus, faciant: si ultra sex annos parochus fuerit, majus aliquanto additamentum, idque non tantum introducens, verum Officialis ipsius, vel Archi-presbyteri illius, sub quo Sacerdos quispiam decesserit, arbitrio relinquat; quæ omnia ea & singula, quæcunque relinquuntur, iustis pretiis æstimari debebunt, pretiaque in supradictos codicillos sive inventaria inscribent.

Si autem in aliquo supra memoratorum negligens compertus fuerit, dimidia parte anni gratiæ mulctabitur, quæ eidem Parochiæ cederet, & in inventarium Successori redigeretur.

Hoc autem pro locupletiori Statuti, de ordinandis Testamentis infirmorum, Decessoris nostri declaratione


annotamus, quod, etiam si Sacerdotes viciniore infirmus non advocaverit, ultro etiam non vocati debent, & ea, quæ in dicto Statuto præscribuntur, peragere.

*Forma absolutionis, qua Sacerdos  
uti debet apud infirmum in articulo  
mortis.*

*Misereatur nostri &c. Indulgentiam &c. ut supra. Dominus noster JESUS Christus, qui est Summus Pontifex, te absolvat; & Ego auctoritate Omnipotentis DEI, & ejusdem Domini nostri JESU Christi, qua fungor hac in parte, absolvo te ab omnibus excommunicationis majoris, suspensionis, & interdicti sententiis, & censuris Ecclesiasticis, a jure vel ab homine, contra scienter vel ignoranter latis, & ab omnibus peccatis tuis, DEO per te coram me confessis & oblitis, ut sis absolutus hic, & in futuro sæculo ante tribunal ejusdem Domini nostri JESU Christi. In nomine Patris, & Filii, & Spiritus Sancti. Amen.*

*Commodavit Synodi hujus exemplar Illmus, Excellens ac Rdms Dnus Kioviensium Episcopus, Comes de Zaluski, Abbas grati animi memoria dignissimus, & vel sub ipsa hac, quæ labuntur, turbida Regni Polonici tempora, ab singulari Religionis orthodoxæ tuendæ studio percelebris.*

Facta LAURENTII GEMBICKII, harum Constitutionum & auctoris & editoris, mentio fuit Tomo præcedente pag. 990. Culmen sem ascendit Cathedram A. 1599. Haud multo post egregium ipsi Pro-Cancellarii munus delatum. Tum evectus ad Sedem Vladislaviensem est anno 1610. Tandem, lapso quinquennio, virtus illum cara omnibus dignum reddidit, qui Gnesnensium Archi-Episcoporum in numerum adscriberetur. Quibus tamen, licet amplis honoribus, diu uti non licuit. Suorum enim laborum, vitæque cursum anno 1624. Antistes piissimus confecit. Vid. Hartknockii Dissert. XIV.





# SYNODUS ARCHI-DIOECESANA PRAGENSIS,

HABITA

AB ILLUSTRISSIMO ET REVERENDISSIMO DOMINO,

D. SBIGNEO BERKA,

DEI ET APOSTOLICÆ SEDIS GRATIA ARCHI-EPISCOPO PRAGENSI,  
PRINCIPE, LEGATO NATO &C.

Anno Christi eodem MDCV.

In Festo

S. WENCESLAI PRINCIPIS, MARTYRIS ac PATRONI. (\*)

LITERÆ CLEMENTIS VIII. PAPÆ ad SBIGNEUM,  
Archi-Episcopum Pragensem.

CLEMENS PAPA VIII.

VENERABILIS FRATER, SALUTEM ET APOSTOLICAM  
BENEDICTIONEM.

**Q**uo loco sint Ecclesiasticæ res hoc tempore in Regno Boëmia, ea præsertim, quæ tum ad Catholicæ Fidei ibi variis modis collapsæ restitutionem, tum ad morum correctionem, & moderationem excessuum pertinent, Fraternitas Tua omnium optime novit, & ipsi nuper ex multorum relatione cognovimus. Cum autem Nos, pro Pastoralis nostro officio, eam curam, & cogitationem jam diu suscepimus, ut in universis Provinciis, ac Regnis, quæ Christiano nomine censentur, quantum cum Domino possumus, hæreticæ pravitatis errores extirpemus, & corruptos mores emendemus; cumque ex Sacrorum Canonum præscripto, intelligamus, ad hæc mala sananda, illud inter cætera aptissimum esse remedium, quod plerique Ecclesiarum Prasules non sine magno emolumento adhibuerunt, Provincialis nimirum Concilii; ejus in Provincia Tua, cogendi, & Deo, ut confidimus juvante, celebrandi Concilium (\*\*) non modo utile, verum etiam necessarium esse arbitramur. Pestis enim hæresum tam longe lateque progressa est, & Ecclesiasticarum personarum corrupti, & depravati mores adeo ibi excreverunt, ut (quod sine magno animi marore, nec meminisse possumus, nec referre) nulla fere Ecclesiastica disciplina vestigia supersint, nec (quod sciatur)

aliquod unquam Provinciale Concilium ibi indictum & celebratum fuerit. Quantopere autem hæc Concilia referant ad tanta & tam perniciose mala tollenda, ipsa Decreta Generalium Conciliorum declarant, quæ ubi adhuc recepta non sunt, eadem institui, ubi vero omissa fuerunt, renovari jubent; & varia morborum hujusmodi in plerisque Provinciis curationes per hoc salutare remedium adhibitæ, & Ecclesiarum reformationes consecutæ testantur. Atque hæc nos ratione ducti, maximam in spem venimus, ipsius misericordia freti, qui etiam cum hæc mala permittit, & irascitur, misericors est; fore, ut tantis hujusce Provincie malis eadem Concilii Provincialis ratione imitata, medela salutaris adhibeatur. Nos itaque indictionem ejus duximus non esse diutius differendam. Te igitur in Domino hortamur, ut postpositis cæteris curis, nulla propria valetudinis, laboris, aut incommodorum ratione habita, Synodum Episcopis Comprovincialibus tuis omnibus, qui de jure, vel consuetudine illi interesse debent, in Tua Provincia primo quoque tempore indicas, & statuto tempore, praecommodo Provincie, in summa extirpandis hæresibus, moderandis moribus, corrigendis excessibus, controversiis componendis, aliis denique ex Sacrorum Canonum dispositione muni-

neri-

(\*) Die 28. Septembris, nunc 23.

(\*\*) Error typi. Lege: consilium.

Adnotanda in hanc Synodum vide sub finem.

neribus præstandis, diligenter incumbas. Neque vero est quod corporis, & virium imbecillitate, & rei novitate, aut difficultate deterrearis, bonorum siquidem omnium parens, & auctor Deus, ut speramus, vires corporis augebit, difficultates omnes de medio tollet, cæptis hisce tuis favebit sublatis omnibus impedimentis, & pro subditorum tuorum salute, pias cogitationes tandem ad optatum exitum perducet. Qua in re dedimus in Mandatis Venerabili Fratri JOANNI STEPHANO Episcopo Vercellen. nostro & Apostolicæ Sedis apud Cæsaream Majestatem Nuntio, ut qua pollet,

prudentia, consilio & dexteritate, susceptam hanc deliberationem juvet; & quæ ad eam rem perficiendam necessaria fuerint officia, ea nostro nomine præstet, & diligentissime exequatur.

Datum Tusculi sub Annulo Piscatoris, die XIV. Octobris, M.DCIV. Pontificatus Nostri Anno tertio decimo.

M. VESTRIUS BARBLANUS.

A tergo.

Venerabili Fratri SBIGNEO,  
Archi-Episcopo Pragensi.

**SBIGNEUS, DEI ET S. SEDIS APOSTOLICÆ GRATIA  
ARCHI-EPISCOPUS PRAGENSIS, ET PRINCEPS,  
LEGATUS NATUS, &c.**

Universo Clero nostro, in visceribus misericordiæ DEI Dilectissimo, Salutem in Domino, & omnis felicitatis incrementum.

**Q**Uam religiosum, quam Divino cultui adiectum, quam denique Catholicæ Fidei propagandæ studiosum antiquitus fuerit Bohemiarum Regnum, cum multa alia ostendunt, tum illud imprimis perspicuo docet, quod nulla fere in toto terrarum orbe Civitas, natio, vel gens reperitur, quæ Templis Divino cultui dicata tam assidue, tam artificiose, tam magnifice, tam denique regie extruxerit, ornarit, & locupletarit. Neque vero in hoc demonstrando multum immorari necesse est; res enim ipsa loquitur, & omnium, qui varias terrarum orbis Regiones peragraverunt, testimonio comprobatur. Extant etiam luculentissimi historiæ Scriptores, qui hoc ipsum æternis literarum monumentis commendaverunt, omnibusque & posteris & exteris nationibus notum esse voluerunt. Jam qui & quales fuerint eisdem temporibus ejusdem Regni Clericorum mores, vita ac disciplina, si nulla alia ex re cognosci posset, facile ostenderent, quæ apud Nos conservantur, ERNESTI primi Archi-Episcopi Constitutiones: illæ enim ita plene, atque ita cumulate omnes Clericorum muneris partes compleruntur, & sanciant, ut necesse sit, & qui tam egregias Constitutiones composuerit, Antistitem valde egregium, & quibus ad observandum propositæ fuerint, Clericos plusquam mediocri virtute præditos fuisse. Unde autem sit, ut populus Religione, pietate, ac Divino cultu florentissimus, ab illa sua pristina consuetudine, & candore describeret, moresque antiquissimis ejus moribus longe contrarios imbiberit, & Clerus, a quo antea

sanctitatis, justitiæ, charitatis, atque omnium virtutum exempla exteræ nationes petere consueverant, tantam repente morum, ac vitæ mutationem passus sit, ut nullam ferme antiquæ religionis, & pietatis imaginem retinuerit. Id adeo clarum, & notum est, ut nulla prorsus explicatione indigeat, Nosque tantam hujusce Metropolitana Ecclesiæ nostræ calamitatem tacitos potius præterire, quam eam commemorando acerbiores reddere oporteat. Illud tamen tacere nullo modo possumus, vel debemus, inter cætera, quæ tantam morum, & disciplinæ mutationem in populum, & Clerum invexerunt, illud non in postremis collocandum esse, quod cum Ecclesiæ hæc suis veris & legitimis Pastoribus per centum quadraginta circiter annos privata fuerit, nullus interim in hac urbe Antistes fuit, qui nascenti morbo occurreret, eique sensim irrepenti, antequam penitus invalesceret, remedium aliquod afferre curaret. Vidit hoc Sacratissimæ memoriæ FERDINANDUS I. Romanorum Imperator, Hungariæ & Bohemiarum Rex: is enim cum singulari quodam Religionis, & Fidei Catholicæ propagandæ studio arderet, omnesque sibi rationes incundas duceret, quibus Divinus cultus in pristinum splendorem suum restitui posset videretur; eam ad id consequendum longe præcipuam, & quasi compendiarium viam judicavit, si Ecclesiæ Pastorem suum restitueret, & quæ antea Pastore carebat, eam paternæ Antistitis proprii curæ, & sollicitudini concredere. Neque vero tantum vidit, sed etiam pro ea, qua in primis florebat, pietate-



pietate, ac Religione, summo studio, ac singulari diligentia praestitit; statim enim cum Summo Pontifice egit, ab eoque, ut certum huic Archi-Episcopali Sedi Antistitem daret, qui scilicet oves suas agnosceret, easque in aeternae vitae pascua recta conducirer, impetravit. Creatus igitur fuit **ANTONIUS** Archi-Episcopus, qui cum primum Tridento rediit, quo ejusdem **FERDINANDI** Imperatoris Orator ad Sacrum Tridentinum Concilium accesserat, confestim in eam curam incubuit, ut Clerum, quam optimis moribus imbueret, eumque quantum humanis viribus consequi posset, ad pristinum illum pietatis, Religionis, & sanctitatis nitorem traduceret; illico enim universum Clerum per singulos Archi-Decanatus visitavit, deinde ad Diocesanam Synodum cogendam animum applicuit. Verum tamen inexpectata illius mors effecit, ne tam pius, tam religiosus, & tam salutare consilium ad optatum exitum perducere potuerit. Eodem prorsus desiderio, ac studio affectus fuit **MARTINUS** Praedecessor noster; verum ea tempora consecuta sunt, ut ne ipse quidem, quod omnibus votis optaverat, assequi ullo modo valuerit. Nos quoque cum ad hoc Archi-Episcopale munus, Dei & Apostolicae Sedis gratia, assumpti sumus, nihil antiquius habuimus, quam ut omnes eas difficultates, quibus tantum, tam excellens, ac tam Divinum bonum impediatur, superaremus. Et quamvis fel. rec. **CLEMENS** Papa VIII. tum per suas literas, quorum exemplum superius videre potestis, tum per Illustrissimum ac Reverendissimum D.D. **JOANNEM STEPHANUM FERRERIUM**, Vercellen. Episcopum, & Comitem, ac suum, & Sedis Apostolicae ad S. C. M. cum potestate Legati, de Latere Nuncium, Nobis significasset, idemque Nobis pariter in optatis fuisset, ut Provinciale Concilium primo quoque tempore celebraremus; quia tamen multa fere quotidie emergebant, quae desiderium nostrum longe diutius, quam volueramus, retardare videbantur; animum ad Diocesanam Synodum congregandam convertimus, in eoque nos Summo Pontifici, si non penitus, at maxima saltem ex parte obedivisse existimamus. Porro maxime animati fuimus, quod cum primum hac de re cum **RUDOLPHO II.** Romanorum Imperatore semper Augusto, Hungariae & Bohemiae Rege gloriosissimo egimus, eum sicuti pro certo Nobis polliciti fueramus, ad Synodi celebrationem adjuvandam, pro ejus eximia pietate, & Religione paratissimum invenimus. Accessit etiam, quod Sanctiss. D.N.D. **PAU-**

**LUS** Divina providentia Papa V. statim ut Summus Pontifex creatus fuit, Nosque Synodi celebrationem instituisse intellexit, Nobis per eundem Illustrissimum, ac Reverendissimum Dominum Nuncium suum Apostolicum, significandum curavit, sibi gratissimum fore, si susceptum & inchoatum opus quam primum ad optatum exitum perduceremus. Maturavimus igitur, ac tandem, quo totis animi nostri viribus contendebamus, Divina adjuvante misericordia, pervenimus; Synodum Diocesanam, videlicet, quae per annos ferme trecentos nunquam celebrata fuit, congregavimus, in eaque breviter ac dilucide illa omnia complexi sumus, ac constituimus, quae ad pietatem in hominum animis excitandam, Clericorum mores emendandos, ac Divinum cultum promovendum magis necessaria judicavimus. Reliquum est, ut quae Nos non exiguo labore collegisse animadvertitis, ea vos assidue & attente cogitetis, in iisque vos ita diligenter exerceatis, ut neque industriae, ac vigilantiae nostrae Nos peniteat, & ad vos ex laboribus nostris quam uberrimus fructus perveniat. Et quoniam Divino numine, factum est, ut omnia & singula, quae a Sacrosancta Tridentina Synodo definita & statuta sunt, ea vos omnes, nullo penitus excepto, ac summa vestra voluntate, receperitis, vos omnes in Domino hortamur, ut ejus quoque Concilii librum assidue in manibus habeatis, ejus Decreta & Constitutiones singulatim, ac diligenter examinetis, eaque ut vestrarum omnium actionum norma, & regula sint, procuretis: nunquam enim errabitis, si vitam vestram ad Sanctissimas illius Concilii Leges, & praescriptiones direxeritis. Agite igitur, Fratres Charissimi, Majorum nostrorum disciplinam, pietatem, & Religionem imitemur. Si quid in Nobis est, quod emendatione indigeat, id quamprimum emendemus: fieri enim non potest, ut reliquos ad pietatem, Religionem & Divinum cultum amplectendum traducamus, nisi Nos ipsos prius pietatis, Religionis, ac Divini cultus amatores comprobemus. Nostra nos caritas, humilitas, patientia, & benignitas omnibus commendent: Tales denique Nos in omnibus praebeamus, ut solus aspectus noster Nos veros Christi Ministros esse convincat: ita semper animo affecti sumus, ut omnibus in Domino inserviamus. Haec videlicet arma illa sunt, quibus Nos testos esse oportet, & quibus si pie, prudenter, ac studiose usi fuerimus, quamplurimos profecto populos Christo Salvatore nostro lucrificemus. Gratia DEI cum omnibus vobis, Amen.

# STATUTA SYNODI ARCHIDIOECESANÆ PRAGENSIS.

## INDEX TITULORUM.

- |   |   |
|---|---|
| <p><i>TIT. I. De Professione Fidei, &amp; ejus tuendæ cura.</i></p> <p><i>II. De Doctrinæ Christianæ initiis.</i></p> <p><i>III. De Prædicatione Verbi Dei.</i></p> <p><i>IV. De Sanctorum Reliquiis.</i></p> <p><i>V. De Sacris Imaginibus.</i></p> <p><i>VI. De Blasphemia.</i></p> <p><i>VII. De Superstitionibus.</i></p> <p><i>VIII. De Indulgentiis.</i></p> <p><i>IX. De diebus Festis.</i></p> <p><i>X. De Sacris Ecclesiæ Jejuniiis, ciborumque delectu.</i></p> <p><i>XI. De Ecclesiarum cultu, pique in eis versandi ratione.</i></p> <p><i>XII. De Altaribus.</i></p> <p><i>XIII. De Sacristia.</i></p> <p><i>XIV. De Sacramentalibus.</i></p> <p><i>XV. De Sacramentis generatim.</i></p> <p><i>XVI. De Baptismo.</i></p> <p><i>XVII. De Confirmatione.</i></p> <p><i>XVIII. De Sacra Eucharistia.</i></p> | <p><i>XIX. De Sacrosancto Missæ Sacrificio.</i></p> <p><i>XX. De Penitentia.</i></p> <p><i>XXI. De Extrema Unctione.</i></p> <p><i>XXII. De Ordine.</i></p> <p><i>XXIII. De Matrimonio.</i></p> <p><i>XXIV. De Divinis officiis.</i></p> <p><i>XXV. De Vita &amp; honestate Clericorum.</i></p> <p><i>XXVI. De Parochis.</i></p> <p><i>XXVII. De Beneficiorum collatione, &amp; Jure Patronatus.</i></p> <p><i>XXVIII. De Monasteriis Virorum.</i></p> <p><i>XXIX. De Monialibus.</i></p> <p><i>XXX. De Archi-Diaconis Diœcesanis.</i></p> <p><i>XXXI. De Decanis ruralibus.</i></p> <p><i>XXXII. De Testamentis Clericorum.</i></p> <p><i>XXXIII. De Clericorum Seminario.</i></p> <p><i>XXXIV. De Penis, &amp; aliis, quæ generatim ad has Constitutiones pertinent.</i></p> <p><i>XXXV. De Sacri Concilii Tridentini acceptatione.</i></p> |
|---|---|

IN NOMINE SANCTÆ ET INDIVIDUÆ TRINITATIS, PATRIS,  
ET FILII, ET SPIRITUS SANCTI. AMEN.

**N**OS SBIGNEUS, DEI & Apostolicæ Sedis gratia Archi-Episcopus Pragensis, & Princeps, Legatus natus, Sacræ Cæsareæ Majestatis Consiliarius, & Supremus ac Generalis Magister Ordinis Crucigerorum, cum rubea Stella per Bohemiam, Moraviam, Silesiam, Poloniam &c. ad DEI Omnipotentis, Beatæque MARIÆ semper Virginis, ac Beatorum Martyrum Patronorum nostrorum Viti, Wenceslai, Adalberti, Sigismundi, Procopii, Benedicti cum fratribus, ac Ludmillæ, & omnium Sanctorum laudem, hæc pro Christianæ morum disciplinæ conformatione, qua Clerum, populumque Fidei nostræ concreditum præluce totis in Christo visceribus expetimus, in nostra Synodo Diœcesana decernimus, statuimus, ac sancimus.

### I. De Professione Fidei, & ejus tuendæ cura.

**U**Nam, Sanctam, Fidem Catholicam, quam unigenitus Dei Filius in terris docuit, quamque Sacrosancta, Apostolica, Romana Ecclesia, omnium Ecclesiarum Mater, & Magistra, unice colit, ac tuetur, omnes, qui Christiano nomine censentur, uno ore profiteri debent. Quare ut ab illa, sine qua, ut ait Apostolus, impossibile est placere Deo, initium sumamus, hæc ad ejus Professionem, & conservationem pertinentia edicimus, & jubemus.

#### De Professione Fidei.

**I** omnes, qui Abbacias, Præposituras, Canonicatus, Dignitates, Ecclesias Parochiales, aliave Beneficia Ecclesiastica cujusvis generis obtinent, in hac Synodo Diœcesana, quive hujusmodi beneficia in posterum obtinebunt,

Q q q

in

in ea Synodo, quæ eorum provisionem proxime sequetur, illam Fidei Catholicæ præstent Professionem, iisque verbis conceptam, quæ a fel. record. PIO Quarto Pontifice Maximo literis, eo nomine editis, præscripta sunt, cujus quidem Professionis formula hæc est:

Ego N. firma fide credo, & profiteor omnia & singula, quæ continentur in Symbolo Fidei, quo Sancta Romana Ecclesia utitur, videlicet: Credo in unum Deum, Patrem, Omnipotentem factorem cæli & terræ, visibilium omnium & invisibilium. Et in unum Dominum JESUM CHRISTUM, &c. *Vide supra.*

Ecclesiastici omnes hujus Civitatis & Archidiecefis, qui huic Sanctæ Synodo non interfunt, cum supradictam Fidei Professionem in ea non præstiterint, non solum eam in nostris, nostrive Officialis, seu alicujus ex Visitatoribus nostris manibus, infra sex menses proximos emittant, sed etiam in proxime sequenti Synodo Diocesana nostra eandem profiteantur.

Qui de Beneficiis curatis, aut Canonicatibus, seu dignitatibus providebuntur; præter eam, quam in Synodo Diocesana obire debent, Fidei Professionem, eandem etiam profiteantur in nostris, nostrive Officialis manibus, intra duorum mensium spatium a die aditæ possessionis beneficii obtenti, alioquin fructus non faciant suos. Provisi autem de Canonicatibus vel dignitatibus, ipsammet Fidei Professionem intra eundem terminum in Capitulo jurent.

Sacerdotes item sæculares, ac cujusvis Ordinis & Instituti Regulares, qui ad confessiones audiendas, seu ad Verbum Dei prædicandum admittentur, hujusmodi Fidei Professionem in manibus nostris emittant, priusquam id muneris aggrediantur.

Idem præstent ii, qui absque Titulo, aut aliorum vice, certo, aut incerto tempore ad animarum curam gerendam assumuntur.

Nemo præterea ad aliquem Ordinem majorem, vel minorem promoveatur, nisi prius, si decimum quar-

tum suæ ætatis annum expleverit, eandem fidem, modo quo supra, professus fuerit.

Regulares autem ad Sacras Confessiones audiendas, Verbive Dei prædicandi munus suscipiendum, seu ad Ordines assumendi, huic Decreto satisficient, si testimonium Nobis exhibuerint, se in sui Superioris manibus id obivisse, alioquin coram Nobis eam præstent.

Qui Doctoratus, vel Baccalaureatus, aut alios gradus suscipere, seu ad Notariatus officium assumi voluerint, nullo modo admittantur, priusquam eandem Fidei Professionem emiserint.

Quicumque Laici, vel Clerici quovis pacto legendi, aut interpretandi, vel docendi munus exercent publice, vel privatim; Medici item omnes, & Chyrurgi; quive literarias, vel liberales artes exercent, etiamsi prima Grammatices doceant Rudimenta publice, vel privatim; quovis nomine Pædaggi, vel Ludimagistri; Bibliopolæ, & alii libros venales exponentes, & librorum Impressores legitime eorum munera exercere volentes, duorum mensium spatio vel ostendant se Fidei Professionem præstitisse, vel eam re ipsa præstent in nostris, nostrive Officialis manibus. Qui vero aliquod ex hujusmodi muneribus in posterum suscepturi sunt, non ante illud exercent, quam fidem Catholicam eadem ratione professi fuerint.

Quorum omnium & aliorum item, qui hanc Fidei Professionem præstabunt, nomina diligenter, ordineque notata Curiae nostræ Archi-Episcopalis Cancellarius in librum certum referet, qui in Archivio nostro perpetuo asservetur.

Qui ab emissâ Fidei Professione recedet, sit officiis omnibus ac beneficiis Ecclesiasticis ipso facto privatus absque alia declaratione, nec possit ab aliquo in hac Civitate, ac Archi-Diecepsi recipi, sed statim ad Nos deferatur, ut debitis poenis contra eum agamus.

Ludimagistri, & alii, qui docendi munus exercent, Catholici sint, & Catholicam Religionem profiteantur, atque eos tantum libros, qui sanam & Catho-



Catholicam doctrinam continent, in Scholis suis adhibeant. Librorum, qui ab Ethnicis conscripti sunt, is delectus habeatur, ut non prælegantur, neque explanentur, qui de rebus obscenis, ac turpibus tractant. Eorum autem præcipua cura sit, ut discipuli in fidei rudimentis, & Catholicæ Religionis præceptis erudiantur, ac bonis moribus una cum literis imbuantur.

Ut autem fideles nostræ pastorali curæ concrediti in fidei Catholicæ puritate facilius conserventur, parentibus omnibus, pupillorum tutoribus, ac patribus familias interdiciamus, ne filios suos, aliosve, quorum curam gerunt, ad Hæreticorum scholas, sive ad ipsorum, ut vocant, Academias accedere, vel ad eorum loca habitatum iri permittant. Pueri enim, si in tenera ætate, adolescentiave nullos fidei errores imbiberint, ad omnes pietatis, & Religionis Catholicæ fructus consequendos, toto vitæ suæ curriculo, faciles se reddent.

Cum in comœdiis, ludis scenicis, aliisque repræsentationibus aliqua interdum misceantur, proponanturve, quæ Catholicæ Religionis, morumve honestati repugnant, hoc perpetuo Decreto inhibemus, ne in hac Civitate, & Archi-Diœcesi nostra, aliquæ comœdiæ, ludi scenici, seu repræsentationes sacræ, vel profanæ, publice, vel privatim exhibeantur, nisi prius a Nobis, Officialive nostro recognitæ, & scripto comprobatæ fuerint.

Ut spiritualium damnorum, quæ ex nimia Judæorum consuetudine, nimioque commercio fidelibus afferri solent, occasionem adimamus, prohibemus, ne Christiani ad convivias, nuptias, vel dies Festos, & Synagogas Judæorum accedant, aut cum eis ludant, choreasve agant, seu in eorum famulatu sint. Neve Christianæ mulieres Judæorum nutrices in eorum domibus esse ullo pacto possint. Parentes autem, ne filios suos, filiasve mittant ad aliquam artem, sive liberalem, sive alterius generis a Judæis discendam.

Nulli Clerici, vel Laici, pecuniam apud quemvis Judæum deponant, ut ratione mutui, vel depositi aliquid,

præter sortem ex convento, vel principaliter ab eo, alioque homine sperent, alioquin usuram committunt.

Perniciosorum & falsorum librorum lectionem, & usum perpetuam esse pestem animarum pretioso Christi Sanguine redemptarum, nemo est, qui nesciat. Ideo huic tanto malo remedium adhibere volentes complures Summi Romani Pontifices, ad fidei Catholicæ, doctrinæque integritatem salvam & incorruptam in Ecclesia Dei retinendam, adversus ejusdem fidei hostes se ipsos opposcentes, ne illorum dolis, & insidiis, imprudentes & simplices homines caperentur, probatos, laudabiles, & orthodoxos libros, ab adulterinis, perniciosis & apocryphis distinxerunt. Et ut facilius omnibus innotescerent libri, & scripta, quæ improbata sunt, sive ut hæretica pravitate suspecta, sive ut pietati ac morum honestati inutilia, aut aliqua saltem correctione indigentia; confectus est eorum Index, sive Catalogus, a PIO Papa Quarto peculiari Constitutione promulgatus, & SIXTI Papæ Quinti, ac CLEMENTIS Octavi jussu auctus. Quem Indicem cum aliquot declarationibus ad hujus Metropolis & Archi-Diœcesis nostræ usum accommodatis, Typis deponi, & quæ in eo præscripta sunt, ab omnibus perpetuo observari volumus, ac mandamus.

Ut autem Parochi, Confessarii, Verbi Dei Concionatores, Ludimagistri, librorum Impressores, & alii libros venales quovis modo proponentes, in re tam seria, partes suas facilius cognoscere possint, præfatum Indicem penes se habeant, & quidquid in eo præscribitur, exequantur, atque prout uniuscujusque eorum munus requirit, ab aliis in usum deduci procurent.

Præterea cum post prædicti Indicis editionem & promulgationem, alii etiam libri, tanquam doctrinas falsas, hæreticas, erroneas, scandalosas, bonisque moribus, ac pietati Christianæ contrarias continentes, a Sancta Sede Apostolica prohibiti fuerint, ut ad omnium notitiam facilius pervenire valeant, illos ad ejusdem Indicis Romani finem notari mandamus, atque quod

Q q q q 2

ad

ad eorum lectionem, & usum spectat, idem servetur, quod de aliis libris, scriptisve prohibitis præscripsimus.

Qui absque Sedis Apostolicæ facultate Nobis exhibenda hæreticorum libros, seu cujusvis authoris scripta, propter hæresim, vel falsi dogmatis suspicionem damnata atque prohibita legerit, seu penes se retinuerit, excommunicationis sententiam ipso facto incurret, Sedi Apostolicæ reservatam, præter alias pœnas a Constitutionibus Apostolicis, Sacrisve Canonibus constitutas. Qui vero libros alia de causa ab Ecclesia prohibitos legerit, habueritve, cum peccati mortalis se reum constituat, a nullo Confessario sæculari, vel regulari absolvi poterit, nisi prius illos Nobis consignaverit, seu cum effectu transmiserit.

Qui libros aliquos, seu scripta hæreticorum, aliosve quovis modo prohibitos habet, ipsos infra mensem proximum Nobis, Officialive nostro consignet, seu cum effectu transmittat; alioquin pœnas & censuras contra hujusmodi inobedientes (ut supra) infligat, ipso facto incurrat.

Nemo Sacræ Scripturæ verbis, vel sententiis, ad jocum, assentationem, contumeliam, superstitionem, impietatem, aut ad quosvis profanos sensus abutatur, alioquin in ejus nefariam temeritatem ad Sacrorum Canonum præscriptum severe animadvertemus.

Nulli libri, scriptave cujusvis generis imprimantur, nisi a Nobis, nostrove Officiali recognita, & scripto comprobata fuerint. Librorum autem, qui imprimuntur, exemplum auctoris manu signatum Nobis statim tradatur, ut in Archivo nostro Archi-Episcopali perpetuo asservetur.

Nemo opuscula, libros, commentarios, aliave id generis quovis titulo, & nomine, quæ manu scripta sunt, evulget, nisi prius a Nobis recognita sint, & nostra subscriptione approbata.

Quicumque artem librariam exercent, quive libros vendendos circumferunt, ne eos venales proponant, priusquam illos, seu eorum Indicem Nobis, vel Officiali nostro præsentent, nostra subscriptione comprobandum.

Nullos autem libros hujusmodi indice non notatos vendere, seu alia ratione alicui tradere, neque venales proponere audeant.

Parochus, in cujus Parochiæ finibus venales libri exponuntur, seu circumferuntur, eos de improvviso visitet, & si hujusmodi exponentes librorum indicem a Nobis subscriptum non exhibuerint, aut libros eo indice non descriptos habuerint, illos vendi, aut aliqua ratione tradi non permittant, & eorum nomina ad Nos illico deferant.

Præterea hospites, tabernarii, & cauponæ, si qui ad eos diverterint, ut de fide disputare, aut hæreticorum libros vendere, seu spargere facilius possint, illos Nobis statim denuntient.

Inter alia, quæ in subditis gubernandis attendere debent Barones, & Nobiles Catholici, unum illud est præcipuum, ut in omnibus locis eorum jurisdictioni subjectis Catholica Religio conservetur, ac propagetur; quamobrem eos omnes in Domino monemus, & per viscera Christi Domini obtestamur, ut si quos subditos hæreticos habent, eos resipiscere, & ad gremium Sanctæ Matris Ecclesiæ redire, debita diligentia & singulari pietate curent.

Iidem Barones, & Nobiles Catholici, si quos habent, hæreticos sibi in domestico usu inservientes, eos omni diligentia inducant, ut Catholici fiant, & Catholice vivant.

Abbates item, & alii Ecclesiastici, sive sæculares, sive cujusvis Ordinis, & Instituti Regulares, qui in aliquibus locis, Parochiisve hujus Metropolis, & Archi-Diœcesis nostræ jurisdictionem temporalem habent, omnem operam, omneque studium exhibeant, ut subditi sui in Catholica fide & doctrina pie instituantur, & ab hæreses labe, omnique hæretica pravitate liberi, Catholicam Religionem profiteantur, & Catholice vivant. Si in hoc negligentes se ostenderint, meminerint se Christo Domino, qui vivos & mortuos est judicaturus, strictissimam rationem reddituros.

## II. De Doctrinæ Christianæ initiiis.

**A**D æternam vitam cum nati sint fideles, illud diligenti, sanctaque sollicitudine providendum fuit, ut ab ineunte usque ætate, doctrinæ Christianæ, quæ ad illam cœlestem vitam hominum mentes in terris instruit, rudimentis, atque institutis plane imbuantur. Quamobrem & Sanctorum Patrum Sanctionibus, & Generalibus Conciliis, pie & salubriter sancitum est, ut saltem Dominicis, aliisque Festis diebus Christianæ fidei initia in unaquaque Ecclesia fidelibus tradantur. Quod necessarium, salutareque institutum, ut vehementius excitaret PIUS Quintus Pontifex Maximus, Christi fidelibus vere pœnitentibus, & confessis, firmum propositum habentibus, confitendi temporibus a Sacris Canonibus statutis, qui aliquam Christianæ doctrinæ Societatem ingredientur, & in discendo, vel docendo articulos fidei, & Sanctæ Matris Ecclesiæ præcepta, operam suam navaverint, quoties in hoc sancto exercitio se occupaverint, quadraginta dies de sibi injunctis pœnitentiis relaxat. Ut igitur pro debito Archi-Episcopalis vigilantia nostræ munere, iis salutari-ter consulamus, quibus in Domino ministramus, Parochis omnibus, etiam Regularibus edicimus, ac jubemus, ut Dominicis, Festisque diebus, a prandio, in sua quisque Ecclesia, dato de more campanæ signo, fideles sibi commissos ad doctrinæ Christianæ Scholas convocent, & ad Petri Canisii Catechismi præscriptum, ipsis rudimenta fidei tradant, & vernacula lingua exponant.

Præterea Parochorum cura in omnibus Ecclesiis parochialibus, ubi doctrinæ Christianæ Societas erecta non est, intra duorum mensium spatium erigatur, & Adjutores, Operarii-que ac Officiales convenienti numero eligantur, ac regulæ, præscriptionesve observentur, quæ jussu nostro edentur. Scholæ autem puellarum distinctæ sint & separatæ, quoad fieri poterit, a Scholis puerorum.

## III. De prædicatione Verbi Dei.

**V**erbi Dei prædicationem in Ecclesia sancta maxime utilem, & necessariam esse, non est qui dubitet, ideo quicumque parochiales, vel alias animarum curam habentes Ecclesias quocunque modo obtinent, quive certo vel incerto tempore, etiam aliorum nomine, onus habent parochialia munera obeundi, per se, vel per alios judicio nostro idoneos, si legitime impediti fuerint, diebus saltem Dominicis, & Festis solennibus; tempore autem jejuniorum, Quadragesimæ, & Adventus Domini quotidie, vel saltem tribus in hebdomada diebus, nempe die Dominico, feria quarta & sexta, plebes sibi commissas, pro sua & earum capacitate pascant salutaribus verbis, docendo ea, quæ scire omnibus necessarium est ad salutem; aliquid ex iis, quæ in Missa leguntur, exponant; Sanctissimi Missæ Sacrificii Mysterium aliquod declarent, annunciandoque eis cum brevitate & facilitate sermonis, vitia, quæ eos declinare, & virtutes, quas sectari oporteat, ut pœnam æternam evadere, & cœlestem gloriam consequi valeant.

Si qui autem ad id munus obeundum minus apti reperiuntur, ad peritos confugiant, quorum auxilium implorantes, vel homilias sibi præscriptas, vel latino sermone auctoris ab Ecclesia recepti, in vulgarem linguam conversos, a Nobis tamen approbatos, aut memoriter aut de scripto pronuntient.

Tam Parochi, quam alii Concionatores Catechismum Romanum Sacri Concilii Tridentini auctoritate editum, penes se habeant, & ad ejus præscriptum, quæ quilibet Christianus scire, credere, amplecti, & vitare tenetur, ut æternam salutem consequi valeat, pro temporis, loci, & personarum ratione accurate explicet.

Nemo, qui parochus non sit, concionandi munus aggrediatur, absque facultate a Nobis scriptis obtenta, medio examine.

Regulares cujuscunque Ordinis, & Instituti, nisi a Superioribus suis



de vita, moribus, & scientia examinati, & approbati fuerint, ac de eorum licentia, etiam in Ecclesiis suorum Ordinum prædicare, seu Sacræ Scripturæ lectionem habere non audeant; cum qua licentia se coram Nobis præsentare, & benedictionem petere teneantur, antequam prædicare incipiant. In Ecclesiis vero, quæ suorum Ordinum non sunt, ultra licentiam suorum Superiorum, etiam nostram habere teneantur, sine qua nullo modo prædicent, neque Sacræ Scripturæ lectionem publice vel privatim habeant.

Iidem Regulares nullis in Ecclesiis, etiam in iis, quæ sunt suorum Ordinum, prædicare audeant, Nobis, aut Officiali nostro contradicentibus.

Qui concionandi officio fungentur, eam inibunt rationem, ut ne quidquam ab Ecclesiæ Catholicæ sensu, aut a consentiente Sanctorum Patrum auctoritate, alienum proferant; neve futura ex Sacris Literis divinare, vel alicui eventui certum diem statuere audeant.

Ne historias apocryphas, neve miracula minus probata narrare assuecant.

Ne ridicula, aut levia, vel inanes fabulas, aliave risum moventia recensent, sed graviter, pure, sincere, & qua fieri potest, facilitate, Verbum Dei pronuntient.

Cum impia hæreticorum dogmata apud imperitam multitudinem erunt confutanda, id non proluxa disputatione, sed gravibus faciant ac solidis rationibus, & argumentis, ex Sacræ Scripturæ & Sanctorum Conciliorum, ac probatæ antiquæ consuetudinis auctoritate, & Catholicorum Patrum consensu depromptis. Hæreticos autem convitiis seu contumeliis non afficiant, sed eorum sectam, prætenfamque religionem tanquam non sanam, & Catholicæ Fidei, ac Religionis contrariam damnent, & improbent.

Ne quid obscure, vel ambigue exponant, quod auditores incertos, aut suspensos reddere, seu in eis varie intelligendi occasionem præbere possint.

Ne fucata oratione, aut inanibus

utantur verbis, quibus se magis ostentandæ eloquentiæ, vel doctriinæ, quam salutis animarum causa, id muneris obire ostendant, sui que ipsius esse potius, quam JESU Christi Prædicatores; sed Evangelia & Epistolas, quæ in Missa recitantur, dilucide ac fideliter explicent, oblatisque in dicendo occasionibus, ad Orationis Dominicæ, Apostolicique Symboli, & Decalogi, nec non ad septem Sacramentorum Ecclesiæ, Sacrorumque rituum, & solennitatum explanationem frequenter divertant.

Cum de Salvatoris nostri morte verba habere voluerint, eam docte, graviter & pie eatenus exponant, ut pietatem, ac lachrymas commoveant auditoribus, iisque externis actibus, qui ex Sanctæ Ecclesiæ ritu probati, ad risum, vel ad jocum nequaquam commovere animos possunt.

In arguendis autem vitiis, ut aciores se præstare debent, ita etiam se pietatis & charitatis studio, non hominum, sed peccatorum odio adductos, id facere significant. In ea autem vitiis, in quibus populos frequentius peccare intelligunt, vehementius invehantur, & præsertim in ebrietates, quæ animas & corpora maxime lædunt; atque in ludos, ex quibus sæpe blasphemix, rixæ & homicidia proveniunt; & inter alia sæpe declarent populo, usuram Jure Divino naturali vitatam esse, ideo nihil lucri ultra sortem in contractu mutui, vel depositi pacto, vel intentione principali interveniente, percipi posse absque peccato mortali, & obligatione restituendi. Detestentur contractus illicitos, & præsertim eos, qui non solum Divino Jure, sed etiam hujus regni Constitutionibus prohibentur. In emptionibus etiam & venditionibus, moneant res non posse carius vendi justo pretio ob dilatam solutionem, neque ob anticipatam minoris emi, quam valeant.

Ne quenquam expressis aut tacitis verbis commonstrantes insectentur, ne aliquo odio potius, quam animarum salute ad id adduci videantur.

Ne ullos in dignitate Ecclesiastica, aut sæculari constitutos asperius reprehendant.

prehendant, sed pia potius, ac miti moveant oratione, populos autem ipsos doceant, Præpositis suis, qui a Deo sunt, potius obedire, quam eorum nomini aut existimationi quidquam unquam detrudere.

In id autem præsertim, omni animi contentione, & omnibus orationis nervis intendant, ut ad solidæ Christianæ pietatis studium, animos auditorum incendant, ita, ut cum ex his assiduis cohortationum sermonibus, sui muneris partes intelligant, se quisque pro sui Ordinis, generis, & status ratione, in omnes recte, Christianoque more, vivendi partes excitent, ac tandem, Divina benignitate pie factorum præmium sempiternum consequantur.

Dei præcepta non solum servanda esse doceant; sed & modum ostendant, quo servari illa Deus voluerit.

Sæpe autem fideles ad perfectiorem vitam amplectendam efficacius hortentur, ut non mortalia tantum, sed etiam venialia peccata sibi fugienda proponant; quod ut facilius præstent, frequenter peccatorum suorum Sacerdoti approbato faciendam confessionem, & Sacrosanctam Eucharistiam sumendam commemorent, ac sæpius inculcent.

Indulgentias populo ne promulgent, priusquam a Nobis recognitæ sint, de quibus cum sermo inciderit, illarum concedendarum potestatem, in Ecclesia a Christo Domino relictam, & earum usum fidelibus maxime salutarem esse doceant.

Neminem paupertatis nomine commendent, nisi quem certo sciunt vere pauperem esse, nullamque fraudem, abusumve in hujusmodi commendatione intercedere posse.

Imprimis autem id sibi cavendum statuunt; ne quod verbis ædificaverint, id moribus destruant, neve cum aliis prædicaverint, ipsi reprobi fiant.

Absoluta concione, Concionatores omnes, sive Parochi sint, sive non, ex antiquissimo hujus Sanctæ Ecclesiæ Prægensis instituto, Generalem Confessionem lingua vernacula populo indicent,

ipsis alta voce illam insinuantes: & preces præscriptas super populum recitent, nempe: *Misereatur, & Indulgentiam &c.* subjungant: *Pax & benedictio + DEI Omnipotentis descendat super vos, & maneat semper vobiscum. R. Amen.*

Videant autem, ne ea verba absolutionis Sacramenti Pœnitentiæ proferant, quæ tantummodo in Confessione Sacramentali adhiberi debent. Imo moneant populum, hanc confessionem generalem ad concipiendam contritionem peccatorum mortalium, & remissionem venialium fidelibus prodesse, sed non esse Sacramentalem; ideo iis, qui alicujus peccati mortalis conscientiam habent, non sufficere, quod hanc confessionem generatim & publice faciant, sed illud Pœnitentiæ Sacramento diluere teneri, prout inferius dicemus sub Titulo de hoc Sacramento.

Ut autem unusquisque sciat præcipua capita, super quibus examinantur ii, qui ad Verbum Dei prædicandum, vel ad Sacram Scripturam interpretandam, admittendi erunt, ea hic notari volumus.

Primo de Doctrinæ articulis, dogmatibusve Sacro Concilio Tridentino explicatis, utpote de Canone Scripturæ, de peccato originali, de justificatione, de Sacramentis, & generatim de Sacrificio Missæ, de purgatorio, de invocatione, & veneratione Sanctorum, de Sacris Reliquiis, de potestate & auctoritate Papæ, de Jeuniis, & de diebus Festis.

An præterea habeat reliquos Theologiæ notos, & tractatos locos.

Quibus in Gymnasiis, Scholisve studiis operam dederit.

Quem in Scholasticis præsertim auctorem familiarem habeat.

An sæpius Sacrorum Bibliorum volumina cum glossa, aliove commentario studiose eolverit; anque in iis ipsis ita diligenter versatus sit, ut inde locos facile, apteque promere possit, ad omne sacræ tractationis genus.

An sanctarum interpretationum usu sit literate peritus.

An ex antecedentibus & consequentibus, verum Scripturæ sensum elice-

elicere possit; an item ex Evangelistis in eodem genere versantibus.

An rursus temere pro suoque libitu Sacram Scripturam a vero sensu detorqueat.

An tropologicos; moralesve sensus, cum literalis sensu non coherentes commentetur.

An in explicandis parabolis, re-ctum, præcipuumque rerum sensum spectet, prætermis- sis explicationibus, quæ nihil ad propositum faciunt.

An traditionum Apostolicarum, Ecclesiasticarumque notitiam teneat.

An in Sanctorum Patrum scriptis atque sermonibus perite versatus sit.

Quem item e Sanctis Patribus maxime in concionando sequatur, atque imitetur.

An sacrorum temporum mysteria norit, anve sacrorum rituum significationes habeat.

An rerum in Ecclesia sancta gestarum, & Conciliorum præsertim universalium, cognitionem teneat.

An Sanctorum vitas, historiamque veram norit.

An congruam Sacrorum Canonum scientiam teneat.

An Summorum Pontificum jura, atque instituta sciat.

An casuum conscientiae doctrina instructus sit.

An Theologiae illius mysticæ, quæ tota in spiritualis vitæ Constitutis tradendis, quæque in purgandis affectibus; atque in reformatione interiori versatur, præcepta atque exercitationes bene intelligat.

An denique sanctarum meditationum, orationisque mentalis usum habeat.

An morum doctrinæ, Christianæque disciplinæ locos, non solum ordine collectos, sed recte notos habeat.

Quos locos teneat, quibus auditorum animi excitantur vel ad Dei amorem, vel ad cœlestis Patriæ desiderium, vel ad virtutum studium, vel ad detestationem scelerum, vel ad misericordiam, vel ad certas præterea affectio-

nes, quæ ad Cœlum excitatæ, Christianas virtutes pariunt.

An aptus denique sit ad concionem concipiendam, & explicandam, non solum Theologiæ locorum tractatione, sed similitudinibus, quæ ab agricultura, vinea, semente, aliisque rebus ducuntur, quæ sub sensum cadunt, atque intelligentiam præsertim eorum, etiam rudium, ad quos concio habetur.

An ad concionis ingressum recta ratione utatur.

An totam concionem recte, ordineque disponat.

An dilucide, distincteque enarret.

An bene pronuntiet.

An illius verba pondus habeant, an vim item, ut non solum audientium aures attingant, sed animos intime penetrent.

An in tota concione pro cujusque rei, de qua agit, ratione, recte, apte, decore, & congruenter agat.

#### IV. De Sanctorum Reliquiis.

**G**loriosum adeo se ostendit DEUS in Sanctis suis, ut non solum eos in cœlis gloria ejus beatissima perfruentes, in terris coli, sed illorum etiam corpora, nempe quæ viva Christi membra fuerunt, nec non pura Spiritus Sancti tabernacula, quin ossa singula, ac cineres, Reliquiasque omnes a fidelibus suis in magna veneratione, ac religione haberi voluerit. Quare ut debitus eis cultus adhibeatur, hæc statuimus.

Ut in honestioribus locis, atque in vasculis decentibus, & quo per facultates licuerit, pretiosioribus asserventur, at nunquam una cum Sanctissimo Sacramento reponantur.

Atque ut inter se distincte internoscantur, eorum nomina in membrana sigillatim descripta, ipsis arcte, recteque alligentur.

Quo vero insigniores fuerint Reliquiæ, utpote Sanctorum capita, crura, brachia, aliave membra, vel etiam corpora integra, eo diligentius in capsulis, vasis, arcisque ex ære, auratis, aut etiam argenteis recondantur, earum nomi-



nomnibus distincte in ære, vel lapide sculptis, aut exaratis.

In pariete a dextro Evangelii cornu collocentur, loco scilicet tabulis intrinsecus septo, pannoque serico obtecto, atque extrinsecus firmis valvis, sera & clave bene munito, & clauso, vel in Sacristiæ armario, & in loco eminenti, bene ac firmiter occluso, ubi nihil aliud cum eis habeatur.

Non levem ob causam, sed pietatis tantum gratia exponantur, diligenti habita dierum, & personarum, quibus ostendendæ erunt, ratione, tumque cum luminibus accensis.

Cum autem aliqua occasione in altari erunt exponendæ, vel in processionibus circumferendæ, per Clericos tantum in Sacris Ordinibus constitutos deferantur.

Nec unquam quæstus gratia, qui Christianam pietatem, ac devotionem in animis fidelium imminuat, ostendantur.

Ad tutiorem Sacrarum Reliquiarum conservationem hoc perpetuo Decreto inhibemus, ne absque nostra, nostrive Officialis facultate scripto exarata, extra nostram Archi-Diœcesim eas transferri, nec vero quæ etiam aliunde allatæ sunt, intra nostræ Archi-Diœcesis fines ab una Ecclesia, ejusque Rectore, etiam de consensu Capituli, alteri Ecclesiæ donari, minus vero cuiquam Ecclesiastico vel laico homini, earum particulam aliquam privatim concedi, tradi, donarive liceat. Idque omnes ut Regulares, etiam exempti, servant, eos in Domino monemus.

#### V. De Sacris Imaginibus.

**S**anctorum Imagines uti mirum in modum animos fidelium ad Christianam pietatem excitare & inflammare solent, si rite, pieque pictæ ac sculptæ sint, ita studendum est, ut in iis effingendis omnis lascivia & procax venustas vitetur.

Nullæ Sacræ pingantur Imagines, quæ vel falsum aliquod dogma continere, vel periculosi erroris occasionem præbere posse rudibus videantur.

Neve quæ Sacræ Scripturæ, vel Ecclesiæ ritui, seu Traditionibus non convenient.

*Tomus VIII. Concilior. German.*

Ne item quæ apocryphas historias referant, aut aliquid falsi, aut supersticiosi contineant, vel piorum oculis aliquam asferre possint offensionem.

Neve humi, sordidoque aut uliginoso loco, neque sub fenestris, unde pluvia stillare possit, effingantur, neve eo loco, ubi clavi finguntur, ne indecenter transfigantur.

Neque vero cum Imaginibus Sanctorum, jumenta, canes, aliave bruta animalia in sacro loco appingantur, nisi quæ vel historiæ veritas, vel Ecclesiæ consuetudo approbaverit.

At corona, quæ Sanctorum capiti, ex antiquo Ecclesiæ ritu, imponi solet, ne iis, qui ab Ecclesia Catholica in Sanctorum numero relati non sunt, imponatur.

Id autem præcipue caveatur, ne dum Sacra Imago Beatissimæ Virginis, aliorumve Sanctorum exprimitur, alterius hominis viventis effigiem ex industria repræsentare artifex studeat; neve quivis alius id fieri curet.

Ne in Sacra Imagine quidquam, quod turpe, quod prophanum, vel inhonestum sit, appareat.

Quod si quæ imagines jam pictæ, sculptæve ita sint, ut Sacris Literis, vel Ecclesiæ ritui, aut pietati Christianæ, honestative aliquo modo repugnent, eas statim aboleri omnino volumus, ac jubemus.

Si quæ vero fractæ, aut diminutæ, vel vetustate corrosæ, seu situ, sordibusve obductæ sint, eas vel restaurentur, vel, si fieri id minus potest, convenienti loco custodiantur, ne vulgo appareant. Id autem imprimis per eos, quorum interest, curetur, ut illæ a situ, squalore, sordibus, carie, cæterisque id generis integræ conserventur.

Præterea pro Sacrosanctæ Crucis cultu & veneratione jubemus, ne ea humi exprimatur, neve sordidis, & aliqua labe inquinatis locis.

#### VI. De Blasphemia.

**G**rave nimis ac detestabile est scelus, quod cum, quem cælum & terra, & omnia, quæ in eis sunt, per-

R r r r

peruo

petuo venerantur, ac laudant, & ut piissimum Conditorem, ac Redemptorem cognoscunt, ingratisimi, atque impiissimi homines blasphemare, aut execrari non exhorrescunt. Quare ut hæc nefanda pestis omnino eradicetur, iis, quæ a Sacris Canonibus, & præsertim a LEONE Papa X. in Concilio Lateranensi, & novissime a PIO Papa V. Constitutione eo nomine edita, contra blasphemos constitutæ sunt, pœnis, in hujus criminis reos severissime animadvertatur.

Nemo præterea proximo maledicat, aut aliquod malum affectu injurioso imprecetur, imo penitus abstineat a solitis male imprecandi juxta patriæ morem modis, ne Deus offendatur, aut malum eveniat, vel scandalum detur proximo.

### *VII. De Superstitionibus.*

**C**UM in Dominico grege speculatores constituti simus, accurate videre tenemur, ne inimicus noster sub Religionis specie falsum cultum clam, & fraudulenter inducat. Quare ad evitandas Diaboli fraudes, & eradicandos errores, ubi jam orti sint, hæc de Superstitionibus præscribenda duximus, quæ animarum curam gerentes, & Confessarii Sacerdotes sedulo ab omnibus servari curent. Eam tamen cautionem adhibeant, ne dum simplicium animos inani cultu expugnare quærunt, simul etiam veræ pietatis radices convellant.

Signa igitur vel imagines, annulive, orationes scriptæ, vel, ut vocant, brevia, characteribus aut nominibus incognitis impressa, ne ad alicujus morbi, hominis, jumentive curationem adhibeantur.

Ne veneficia, fascinationes, vel ligaturæ certa quavis observatione, aut etiam medicamentis incognitis dissolvantur.

Ne vulnera, aut plagæ ullæ certo adhibito signorum, verborum, aut precum numero, vel alia, quæ a Medicis comprobata non sint, ratione, curentur.

Ne aliquæ herbæ, aut frutices, certo aliquo die, vel nocte, ea con-

ditione colligantur, ut alio die irrita, atque inanis futura sit cura illa, ac labor.

Et quia varia nimis, ac multiplicia superstitionum genera, hoc Decreto comprehendi facile non possunt, id summatim decernimus, ut omnia, quibus certa temporis, numeri, locive observantia, quam præfinire minime licet, tanquam a vero Religionis cultu, Sanctæque Ecclesiæ Catholicæ instituto, vel ratione naturali aliena, superstitiosa censeantur.

Omnino autem retinenda est pia, & laudabilis consuetudo benedictionum panis, vini, & aliarum rerum, etiam herbarum, quæ certis solennitatibus, & præsertim Paschæ, Nativitatis Domini, Assumptionis Beatæ Virginis, S. Joannis Evangelistæ, aliisque festivis diebus a Parochis ex sacris ritibus non sine mysterio, uberrimaque fidelium utilitate fieri solent, dummodo nihil indecens hac de causa super altari collocetur, veluti esculenta; sed quod ejusmodi est, ponatur super aliquo scamno, loco convenienti.

### *VIII. De Indulgentiis.*

**I**ndulgentiarum usus Christiano populo maxime salutarem, & Sacrorum Conciliorum auctoritate comprobatum esse, Catholica Ecclesia semper docuit, eosque anathemate damnat, qui illas aut inutiles asserunt, vel in eis concedendis ejus potestatem negant. Ut igitur fideles ad eas tam plenarias, etiam in forma Jubilæi concessas, quam alias consequendas, promptiores se reddant, ipsarum valorem, fructus, & utilitates Parochi, ac Concionatores sæpe declarent.

Abusus omnes, quorum occasione insigne earum nomen ab hæreticis blasphematur, tollantur, & pravi quaestus in iis percipiendis aboleantur.

Non publicentur, neque earum concessiones typis depromantur, nisi prius a Nobis, nostræ Officiali recognitæ fuerint. Quod etiam ab omnibus cujuscunque Ordinis, & Instituti Regularibus servari præcipimus.

Indulgentiæ, etiam perpetuæ, peccatorumve remissiones, quibuscunque  
Hospi-

Hospitalibus, Monasteriis, Ecclesiis, domibus, Militiis, Ordinibus, etiam mendicantium Ordinum Regularibus personis, tam singulariter, quam universaliter, per quoscunque Romanos Pontifices quavis occasione, vel causa concessæ, pro quibus consequendis manus sunt porrigendæ adjutrices, & quæ facultatem quæstuandi, colligendique eleemosynas quomodolibet continent, PII Papæ Quinti Constitutione, revocata, cassata, & annullata fuerunt; ideo nullo modo publicentur. Horrandi tamen sunt fideles, ut Indulgentiarum occasione, Ecclesiis, piis locis, ac pauperibus largas eleemosynas erogent.

### IX. De Diebus Festis.

**E**A est morum corruptela, atque ab omni Divina, & humana lege aliena, ut qui Deo dicati sunt dies, & ad ipsius & Sanctorum celebrandas laudes instituti, ii non modo sancte, pieque, ut par est, non colantur, sed servilibus etiam operibus, vilibusque officiis violentur, iisque ipsis homines ad Divinam iram & suarum animarum perniciem abutantur.

Nos igitur Sacrorum Conciliorum auctoritate, ac Summorum Pontificum Decretis innixi, Patrumque institutis adducti, hæc Christi fidelibus in Festis diebus sanctificandis proponenda censuimus; ut quæ sacris his diebus agenda, quæve fugienda sunt, unusquisque perspiciat.

Primum igitur pridie Festi, omni pietatis studio fideles se parent, atque instituant ad illius sanctificationem, & religiosum cultum, his præcipue piis exercitationibus, atque officiis inferius descriptis. Confessione, oratione crebriore, atque ardentiore, meditatione celebritatis, quæ agitur, & præcipue imitatione alicujus virtutis Sancti, aut Sanctæ, cujus dies festus colitur, jejunio, vel præcepti, vel devotionis, vel saltem aliqua abstinencia; firma, fixaque deliberatione progrediendi in vitæ sanctioris via.

Ipsa vero die Festo Missæ reverenter ac religiose intersint, quod prætermitti non potest absque peccato mor-

tali. Idque ut in Parochiali Ecclesia præstent ad Sacrorum Canonum præscriptum, vehementer in Domino monemus.

Patres autem familias filios suos, ac famulos, etiam eos, quos in pecoribus, aliisque animalibus pascendis occupant, Missæ jubeant interesse.

Oblationes pro facultatibus, Ecclesiæ Parochiali ex instituto faciant.

Sacramentaliter confessi Sacram Communionem sumant, aut summo dolore ex peccatis affecti, intimeque contriti, fide viva accensi, spiritualiter Sacram percipiant Eucharistiam.

Missæ etiam solemnæ, quæ collegiatim canitur, præsentibus adsint, præsertim in Anniversariis majoribus Solennitatibus.

Divinis Horarum Canonicarum officiis, ac præcipue Vesperis, Christiano devotionis studio intersint. In Solennitatum majorum celebritatibus ad Matutina Officia convenire studeant.

Concionem sacram attentissime audiant, monitaque Concionantis exquantur, aliis etiam, tum filiis, cæterisque domesticis, tum externis salutariter narrando, quæ disciplinæ usui opportuna audierint.

In doctrinæ Christianæ Scholis & discendo & docendo versentur; idemque ab iis, quorum curam habent, sive filii sint, sive alii, præstari curent.

Egentibus, & præsertim iis, quos ad fores Ecclesiæ repererint, aliquid pro facultatibus in eleemosynam conferant.

Pauperes non solum, qui in publicis Hospitalibus sunt, sed etiam alibi visitabunt & adjuvabunt, re, consilio, atque consolatione.

Monasteria Religiosorum, sanctioris vitæ laude præstantium adibunt, & cum eis aliquid temporis in salutariibus colloctionibus expendent.

Abstineant autem diebus Festis ab omni opere servili, mundanoque, atque a quavis illiberalis artis exercitatione, nec non a cujuslibet rei emptione, & venditione, præter id, quod ægrotis aut illius diei victui necessarium sit.



Ea vero cautio omnino adhibeatur, ut in hujusmodi casibus officinæ nullo modo apertæ sint, sed earum ostiolum tantummodo pateat.

Præterea Parochi, ac Concionatores sæpe populum præmoneant, ne Festis diebus personati homines incedant, neve tripudia, choreas, seu saltationes exercent, aut cujusvis generis ludis incumbant, neque tandem actiones aliquas, aut opera ulla faciant, quæ fidelium animos a Christianæ pietatis officiis abstrahere possint.

Circumforanei, circulatores, digladiatores, & alii id generis homines, ne diebus Festis præstigias suas, inaniaque spectacula agant; neque quidquam omnino vendant, ne medicamento quidem prætextu.

Si quis autem ex aliqua gravi causa, seu necessitate hujusmodi diebus aliquod servile aut vetitum opus aggredi voluerit, idque non faciat absque facultate a Nobis, aut nostro Officiali in hac Civitate & per Archi-Diœcesim a proprio Parocho impetranda.

Ut autem uniformi ratione a Parochis dies Festi denuncientur, eos omnes, qui in hac Civitate & Archi-Diœcesi tota, præcepto, aut consuetudine, seu voto ad Rubricæ Pragensis præscriptum sanctificari, colive debent, hic notari volumus.

Pascha cum duobus diebus proxime sequentibus.

Triduum ante Ascensionem usque ad meridiem propter processiones Litaniarum minorum.

Ascensionis Domini.

Pentecoste cum duobus diebus proxime sequentibus.

Solemnitas Sanctissimi Corporis Domini.

*Præterea Mense Januario.*

Circumcisio Domini die primo.  
Epiphania Domini die sexto.

*Mense Februario.*

Purificatio Beatæ Mariæ Virginis die 2.  
S. Matthiæ Apostoli die 24.

*Mense Martio.*

Annuntiatio Beatæ Mariæ Virginis die 25.

*Mense Aprili.*

S. Marci Evangelistæ die 25. usque ad meridiem propter Processiones Litaniarum.

*Mense Maio.*

Ss. Philippi & Jacobi Apostolorum die primo.

*Mense Junio.*

S. Viti Martyris die 15.  
Nativitas S. Joannis Baptistæ die 24.  
Ss. Petri & Pauli Apostolorum die 29.

*Mense Julio.*

S. Margaritæ Virginis Martyris die 13.  
S. Mariæ Magdalænæ die 22.  
S. Jacobi Apostoli die 25.

*Mense Augusto.*

S. Laurentii Martyris die 10.  
Assumptio Beatæ Mariæ Virginis die 15.  
S. Bartholomæi Apostoli die 24.

*Mense Septembri.*

Nativitas Beatæ Mariæ Virginis die 8.  
S. Matthæi Apostoli & Evangelistæ die 21.  
S. Wenceslai Martyris die 28.  
S. Michaelis Archangeli die 29.

*Mense Octobri.*

Ss. Simonis & Judæ Apostolorum die 28.

*Mense Novembri.*

Celebritas omnium Sanctorum die primo.  
Commemoratio omnium fidelium defunctorum die 2do usque ad meridiem.

*Mense Decembri.*

S. Thomæ Apostoli die 21.  
Nativitas Domini die 25.  
S. Stephani Protomartyris die 26.  
S. Joannis Apostoli & Evangelistæ die 27.

Festum Patrocinii, atque Anniversarium Consecrationis Ecclesiæ in propria Civitate, Oppido, & Parochia. Festa item, quæ in unoquoque loco ex consuetudine, aut voto celebrari consueverunt.

Nullibi tamen celebrentur dies festi in honorem eorum, qui ab Ecclesia Catholica in Sanctorum numero relati

lati non sunt; neve in Calendario, neque etiam literis manuscriptis, connotentur.

Ut autem omnis in posterum tollatur scrupulus, declaramus dies Festos incipere a media nocte antecedente usque ad mediam subsequentem. Eorum vero pietatem, qui a primis Vesperis, seu ab occasu Solis diei antecedentis ab operibus servilibus abstinere incipiunt, ut ad Festum celebrandum diligentius se præparent, summopere laudamus.

### X. *De Sacris Ecclesiæ Jejuniis, aut ciborum delectu.*

**O**Mnis Sacrorum temporum celebritas, cum ab Episcopis, animarumque Pastoribus, singularem sollicitudinem; tum a populis observantiam, cultumque ei solennitati debitum plane deposcit. Atque in iis quidem unum est, quod pie, religiose, sancteque coli a fidelibus maxime oportet, totum Quadragesimale tempus, virtutum Christianorum disciplinæ, atque exercitationibus dicatum; est enim plenum Sacris Mysteriis, propter quæ magnam illam Paschæ solennitatem, qua una omnium celebritatum dignitas, ut inquit LEO Pontifex, consecrata est, proxime præcedit. Fuit porro jejunium Quadragesimale a Christo Domino constitutum, & ab Apostolicis usque temporibus in universa Ecclesia Dei religiose observatum perpetuo, atque ita quidem, ut qui in Quadragesima (quemadmodum olim Canone Toletano cautum fuit) neglexerit, aut contempserit, Quadragesimalis abstinentiæ, & jejunii disciplinam, prohibitisque cibis illam violaret, is non solum reus censeatur Resurrectionis Dominicæ, sed etiam alienus fieret a Sacra ejusdem Communionem, ac præterea toto illo anno, a carnium esu abstinere. Quare ut tempus hoc Sacrum, tamque religiosum, in quo colendo sancteque observando veterum pietas mirifice eluxit, a fidelibus nostræ sollicitudini commissis, majoris obvantia studio, abstinencia, jejuniis, eleemosynarum largitionibus, oratione, continentia, carnis maceratione,

omnique salutaris pœnitentiæ disciplina colatur, hæc sancimus, atque edicimus, quæ ab animarum curam gerentibus, ac Concionatoribus quotannis die Dominico Quadragesimæ initium proxime antecedente, intra Missæ celebrationem, sacramve concionem populo præponantur.

Omnis, quem urgens necessitas, vel imbecilla ætas a quadragesimali lege non eximit, quocunque etiam gradu, ordine, potestate, vel dignitate præditus sit, carnibus, cæterisque omnibus, quæ a carne originem trahunt, upote ovis, lacte, caseo, & aliis id generis, toto Quadragesimæ tempore, videlicet a feria quarta Cinerum, usque ad Sabbatum Sanctum inclusive abstineat. Quicumque autem absque notabilis salutis corporalis detrimento verisimili periculo, hujusmodi cibis vesci non poterit, de proprii Parochi vel Medici consilio, & non aliter ipsis utatur, facultate tamen scriptis obtenta a Nobis in hac urbe, & per Archidiecepsim a proprii districtus Archidieceno, vel a Decano, sive saltem a proprio Parocho.

Omnis præterea, quicumque sit, qui jejunii lege adstrictus est, singulis Quadragesimæ diebus (Dominicis exceptis) jejunium servet, alioquin peccati mortalis reum se constituit.

Præter Quadragesimæ institutum, jejunium etiam servare tenentur fideles, & a carnibus abstinere, statim quatuor anni temporibus, videlicet feriis quartis post primam Dominicam Quadragesimæ, celebritatem Pentecostes, Exaltationem Sanctæ Crucis, ac Festum Sanctæ Lucie immediate occurrentibus, ac feriis sextis & Sabbatis hujusmodi ferias quartas sequentibus; in vigiliis autem Nativitatis Domini, Pentecostes, Apostolorum omnium (exceptis S. Joannis Evangelistæ, & Sanctorum Jacobi & Philippi) Nativitatis S. Joannis Baptistæ, S. Laurentii Mart., Assumptionis B. Mariæ Virginis, & omnium Sanctorum.

Si aliquod Festum occurrat celebrandum, feria secunda cujusvis hebdomadæ; non die Dominico, sed Sabbato præcedenti, ejus vigilia ex pio

Sanctæ Matris Ecclesiæ instituto, colatur.

Quod si diebus jejunium tam Quadragesimæ, quam quatuor temporum, & vigiliarum aliquis dies festus, etiam ex solemnioribus, inciderit, jejunium nihilominus iisdem diebus, sub peccati mortalis pœna, servari debet; nisi vigilia Nativitatis S. Joannis Baptistæ in Solennitate Corporis Christi occurrerit, quo casu eam in antecedentem diem transferendam declaramus.

Feriis autem sextis, & Sabbatis totius anni (excepto die festo Nativitatis Domini) abstinere debent fideles ab esu carniū sub eadem pœna peccati mortalis. Laudabilis autem consuetudo supra hominum memoriam in hac Metropoli, & Archi-Diœcesi Pragensi, jejunandi singula quaque feria sexta per totum annum, perpetuo retineatur.

Cum autem in die jejunii unica commestio fieri debeat hora præscripta, videant fideles, ne in permissa refectiuncula vespertina, in qualitate, & quantitate cibi excedant; ideo proprium Parochum, aut Confessarium, qui scientia & pietate præditus sit, consulant, ut animæ salutis tutius satisfacere valeant. Nullo enim modo ferendum est, ut cibus coctus, pisces, seu aliud ferculum sumatur, sed panis tantummodo, fructus, herbæ, & similia leviora, in ea quantitate, quæ prudentis iudicio modica censeatur.

In die Litaniarum majorum, quæ in festo S. Marci Evangelistæ celebrantur, & præterea triduo ante Ascensionem Domini, Litiis minoribus dicto ex Sanctæ Pragensis Ecclesiæ instituto, usuque immemorabili, in hac Metropoli, & Archi-Diœcesi tota, abstinere debent fideles ab esu carniū; qui mos fere per universam Germaniam ex prisco usu observari consuevit. Omni autem cohortationis officio inducant Parochi eosdem Christi fideles, ut iis diebus processionibus intersint, Sacrasque Reliquias, ac pia loca, Litaniarum causa, religiose visitent.

Si quis salutis suæ immemor fuerit, ut Quadragesimæ tempore, aut aliis diebus ab Ecclesia statutis, publice, cum scandalo, & absque licentia

nostra, seu Archi-Diaconi Diœcesani, aut saltem Parochi sui, carnibus vesci præsumpserit, a nullo Confessario absolvi poterit, absque nostra, aut nostri Officialis facultate scriptis obtenta, & alias pœnas incurret a Sacris Canonibus inflictas.

Nihil non aggrediuntur, atque omni altu semper agunt hostes fidei Catholicæ, ut impietatum suarum virus effundant, ideo Ecclesiæ Pastoribus maximo studio elaborandum est, ut omni tempore, & præsertim in Quadragesima, Verbi Dei prædicatione, tanquam pabulo vitæ, fideles nutriantur ac confirmentur. Quamobrem quod multis bene institutis civitatibus & locis, antiqui, religiosique moris est, ut dum sacra concio habetur, nullæ tabernæ aut officinæ patentes unquam sint, id in hac Metropoli, aut Archi-Diœcesi tota servari maximopere optamus, quo fideles ad prædicationem frequentissimi conveniant. Omnem igitur curam adhibeant animarum Rectores, & Concionatores, ut ab omnibus id in usum deducatur, & perpetuo observetur. Confidimus etiam Magistratum sæcularem in hoc opem omnem pro sua pietate & religione adhibiturum.

#### *XI. De Ecclesiarum cultu, piaque in eis versandi ratione.*

**E**clesias, quæ Domus Dei sunt, decet sanctitudo, omnisque honestas, ac cultus: quare Sacri Canones, Apostolicæ Constitutiones, Sacraque Concilia, multa Ecclesiarum cultum concernentia constituerunt Decreta, quæ ab omnibus executioni sunt demandanda. Inter alia autem hæc fidelibus nostræ Ecclesiasticæ jurisdictioni subjectis observanda proponimus, atque mandamus.

Nemo novam Ecclesiam, seu Oratorium, Capellamve atque Altare ædificare, vel construere audeat, absque nostra, nostrive Officialis facultate scriptis obtenta.

Ecclesias humiliter ac devote quilibet ingrediatur; atque in eis quiete & sancte conversetur, piisque orationibus incumbat.

Flexis



Flexis genibus Sanctissimum Sacramentum omnes venerentur, & adorent; Divinis Officiis & præsertim Sacrosancto Missæ Sacrificio, assistant, ea pietatis exterioris specie, qua se non tantum corpore, sed etiam mente, devotoque cordis affectu adesse declarent, aperto scilicet capite, & utroque genu, non altero tantum, flexo, nisi dum recitatur Evangelium, quod ad medium, quodque ad finem Missæ dici solet; Quo enim tempore Sacri Evangelii verba recitantur in Ecclesia, ex ANASTASII Summi Pontificis Decreto, stare debent fideles; quod etiam servandum est, cum & in Vesperis, *Magnificat*, & in Completorio, *Nunc dimittis*, & in Matutinis, *Benedictus*, recitentur, quæ ex Evangelio excerpta sunt.

Ne mendici, eleemosynæ causa in Ecclesiis vagentur, sed ad januam consistent.

Ne quis præterea, quovis tempore in Ecclesiis deambulet, aut negotiis secularibus operam det, seu cum mulieribus colloquatur, vel ad Sanctissimum Sacramentum terga vertat, aliudve quidpiam, quo Divina impediuntur aut turbentur officia, excitet, nec super altare se ponat, aut quod absurdius esset, super illo sedeat.

Neque Baptismi fontis, aquæve benedictæ vasis innitatur, vel inhæreat.

Ne in Ecclesiis, earumve ambitu, seu in cœmeteriis res aliquas venales vel proponere, seu emere cuiusvis liceat, neve comestiones, choreæ, seu profani quiquam ludi fiant. Permittimus tamen, ut candelæ, cereive Ecclesiæ usui, officiisque Ecclesiasticis destinandi extra Ecclesiam vendi, & emi possint.

Ne quis aliquam Ecclesiam ingreditur cum hastis, sclopetis, balistis, aliisve hujusmodi armis, nisi Magistratum publici ministri sint. Ne item cum venaticis, vel cujusvis generis canibus, accipitribus, ejusmodive volucribus.

Nulla sepulchra construantur sub altaribus, altariumve gradibus; sed loco ita remoto sint, ut eorum os a cu-

jusvis altaris gradu distet saltem dimidia ulna.

Lapides autem sepulchrales solum Ecclesiæ adæquent, illudque nullo modo superent; non Sacerdotibus, aliisve per Ecclesiam incedentibus, ullo sine impedimento, aut incommodo.

Cum in Epitaphiis construendis, alicujus defuncti imago super sepulchri operculo, aliove loco sculpenda est, ea ineatur ratio, ut nullam præbeat offensionem; sed tota hujusmodi sculptura ea forma sit, ut vere fideles ad pietatem modendi vim habeat.

Quavis in Ecclesia, præsertim Parochiali, loco eminenti & congruo, Crucis, ac Christi Domini in ea affixi imago, ligno, aliove genere pie, decoreque expressa, proposita, apteque collocata perpetuo habeatur.

Ad dexteram cujusvis portæ Ecclesiæ ingressu, positum sit vas aquæ benedictæ, ad usum conspersionis fidelium, quod æneum sit, vel stanneum, seu lapideum, decenti columella suffultum. In eo habeatur continuo aspersorium decens, quo utantur fideles ad se pie conspergendos, cum in Ecclesiam ingrediuntur, & ab ea exeunt.

Vasa aquæ benedictæ intus in Ecclesia collocentur, nec vero foris ullo modo, ac singula quaque hebdomada diligenter laventur, & aqua hujusmodi ex sacrorum rituum præscripto, renovetur. Præterea tam in Metropolitana nostra Basilica, quam in Collegiatis & Parochialibus omnibus Ecclesiis, singulis diebus Dominicis, ante summæ Missæ celebrationem, aqua præscriptis precibus benedicatur, & ea altare, se, & populum conspergat Celebrans ex Sanctæ Ecclesiæ instituto. Et nullo modo intermittatur processio cum vexillis, & cruce more consueto.

Ut autem fideles magis excitentur ad fructus consequendos, qui ex aquæ benedictæ usu proveniunt, Parochi omnes eos omni cohortationis officio inducant, ut non solum in ingressu Ecclesiæ ea se devote aspergant, sed ipsam domi in cubiculis, vase decente inclusam habeant, seque ac filios suos, & familiam mane & vesperi etiam consper-

spergant, atque item greges & armenta, ac fruges, ut a periculis, quæ demonum fraude evenire possunt, tutæ sint.

Aqua benedicta e vasis tollenda cum renovatur, in Sacrarium, vel in cœmeterium ea parte, qua defunctorum ossa reconduntur, projiciantur.

In uniuscujusque Ecclesiæ frontispicio, a superiori scilicet parte portæ majoris, extrinsecus pingatur, aut sculpatur decore, ac religiose imago Beatissimæ Mariæ Virginis, Jesum filium in complexu habentis; a cujus latere dextro exprimatur effigies Sancti, Sanctæve, cujus nomine illa Ecclesia nuncupatur, a sinistro alia item Sancti, cui præ cæteris Parochiæ illius populus venerationem tribuit. Aut saltem, si totum id triplicis imaginis opus fieri non potest, Sancti solius figura fiat, cujus nomine ipsa Ecclesia appellatur.

Cujusvis Ecclesiæ Rector, illius tanquam Sponsæ suæ carissimæ decorem, & ornatum summopere diligere debet; quare omnem in eo curam ponat, ac diligentiam; ut tum ex Ecclesiæ redditibus, si sufficiant, tum ex piorum hominum oblationibus, tum ex ære publico, debitis temporibus provideatur, ut illa semper undequaque facta, tectaue sit, & ab omni sorde ita expurgata, ut nihil in ea appareat, quod intuentium oculos possit offendere.

Præcipua autem cura adhibenda erit, ut a superiori parte tegulis, asseribusve decentibus bene sit tecta, ab intus vero fornice, vel tabulatis. Ejus parietes si non picti, at non rudes sint, neque inæquales, sed incrustati, & decenter calce liniti.

Clave semper & sera in foribus munita sit, ut tuto opportunis temporibus obserari possit.

Fenestræ, ex quibus a foris stantibus in Ecclesiam introspectum, & Missam videre licet, tollantur omnes, neque in posterum ædificentur; aliæ autem clathris ferreis clausæ sint, & vitreis specularibus munitæ.

Ecclesiæ omnes summa munditiæ semper excellent, octavo quoque die, & sæpius item scopis (\*) mundetur; pul-

veres e sedibus, parietibus, fenestris, altaribus, ac picturis, vulpium caudis, aut panno aliquo, vel scopis ad id aptatis abstergantur, atque arenearum telæ undique studiose tollantur.

Frumenta, filigines, ligna, scœnum, & omnem prophanam supellectilem, instrumentaque cujusvis artificii, ab Ecclesiis, Oratoriis, locisve sacris, ubi illa asservata sint, quamprimum exportetur (\*\*); neque in posterum illa ibidem recondi, custodiri a quoquam liceat.

Parochi, cæterique Ecclesiarum Præfecti ab earum cœmeteriis, atriis, vestibulis, parietibus, tectisque sordes, aliamque omnem scedam turpitudinem per eos amoveri quamprimum curent, ad quos pro officii munere pertinet; videantque in futurum, ne sordibus inquinentur, obsordescantve; quæ loca, cum sancta sint, ab omni labe pura esse debent.

Suggestus, si elegantior non habetur, saltem ex tabulis scetilibus iisdemque firmioribus decenti opere, & forma ab Evangelii latere Altaris majoris, exstructus sit, & loco conspicuo, unde Concionator ab omnibus conspici & audiri possit, apte collocatus. Pro ejus ornatu pannus = serico, vel ex alia materia juxta facultates, decentis magnitudinis habeatur.

In singulis Ecclesiis tot desiderantur sedes confessionales, quot Confessarii in frequentiori populi concursu adhiberi solent. At in quavis Parochiali, si non duæ, ut certe expediens esset, saltem una habeatur ex tabulis scetilibus constructa, quæ a parte anteriori aperta sit.

In medio tabulæ inter Confessarium & pœnitentem interjectæ, fiat fenestella magnitudinis ab omni parte dimidiæ ulnæ; cui a parte pœnitentis affigatur lamina ferrea plena parvulorum foraminum adinstar cribri confessorum. Unicuique autem confessionali affixa sit imago Christi Domini Crucifixi versus pœnitentem.

Præter illud, quod Baptisterio junctum est Sacrarium, alterum etiam aliis usibus destinatum, quavis in Ecclesia habeatur, in Sacristia, si ampla sit, vel alio commodiori loco, non tamen in aliquo

(\*) Subintelligendum forte: *pavimentum*.

(\*\*) Melius: *exportari curet*, scil. *Rector*.

aliquo altari. Illud autem sera, clavi-  
que continuo claudatur.

Turris campanilis ostium valvas  
habeat, quæ pessulo, seraque continuo  
claudantur.

Campanæ nullo modo pulsantur  
ad quævis opera profana significanda,  
& præcipue ad ea, quas Robotas vo-  
cant; neque item ad dandum signum  
mortis, seu sepulturæ eorum, qui ex  
Sacrorum Canonum Sanctionibus Ec-  
clesiastica sepultura carere debent.

Pulsantur autem in adventu Le-  
gati Sedis Apostolicæ, Antistitis, &  
Regis; & præterea cum nimbi, pro-  
cellæ, turbines aut grandines impen-  
dent; sonus enim earum adhiberi solet  
ad tempestates repellendas, ut ex Epi-  
scopali earum benedictione apparet.

Cœmeteria omnia undique sint mu-  
ro circumcincta, & qua ad ea ingressus  
patet, non solum valvæ ex asseribus  
habeantur, sed etiam supereffossa ad  
ulnam unam cum dimidia humo, po-  
natur ferrea crates, aut lignea saltem;  
ut in illa omni ex parte brutis anima-  
libus impediatur accessus.

## XII. De Altaribus.

**A**ltaria omnia lapidea sint, vel sal-  
tem lateritia, quæ tamen si con-  
secranda sint, tabulam lapideam & so-  
lidam habeant totum altare contegen-  
tem; eaque exstruantur ratione, ut in  
ipsis nihil subtus recondi, aut poni  
possit, nisi forte pro reponendis Sacris  
Reliquiis locus aptus relinquatur. Ea  
autem a scabelli, quam gradum vo-  
cant, solo, superficieve in altitudinem  
erecta, sint aliquantulum minus dua-  
bus ulnis; longe pateant ulnis tribus,  
lata sint sesqui ulna.

Scabellum, seu gradus altaris ex  
asseribus, solidove lapide, vel cœtili-  
bus lateribus confectus sit, latitudinis  
sesqui ulnæ; altitudinis quartæ partis  
ulnæ, longius præterea, quam altare  
ita pateat, ut unumquodque ejus latus  
excedat dimidia ulna, rursusque ab  
utroque latere, si fieri poterit, illud  
cingat.

Altaria singula, quæ non tota cum  
Sacerdote item celebrante, opere con-

camerato, sed tecto laqueato teguntur,  
aut fornice ita alte exstructa, ut ea for-  
nix commodè, sæpiusque purgari non  
queat, umbella, quam cœlum dicunt,  
operiantur; idque e lapide, aut saltem  
e panno serico, seu ex tabulis scetilibus,  
vel e tela decenter depicta fieri poterit;  
quod e ligno aut tela integumentum  
cum catenis ferreis e tecto, vel e pa-  
riete pendentibus, aut alia firma stru-  
ctura sustineatur. Hoc autem integu-  
mentum, cujusmodi sit, undique ita  
late patere debet, ut altare ipsum, &  
Sacerdos ibi Missæ Sacrum faciens om-  
nino contegantur, quo diligentius &  
ille & altare a pulvere, omnique laben-  
te sorde defendantur.

Curetur, ut, ubi fieri poterit, unum  
quodque altare habeat sepimentum e  
clathris ferreis, vel e cancellis ligneis  
opere tornatili decenter constructum;  
& in hujus sepimenti modio sint valvæ  
pessulo ac sera jugiter claudendæ.

Fenestula urceolorum, ampulla-  
rumve non in altari, sed in pariete a  
latere, ubi Epistola legitur, ornatè, po-  
liteque fiat. A solo alte exstruatur  
ulna una cum dimidia; ejus vero lati-  
tudo sit dimidia ulna, altitudo paulo  
minus una ulna, sitque distincta lapi-  
deo opere, vel saltem asserè decenti  
transverso. Ejus autem pars inferior  
usui sit ad projiciendam aquam ablutio-  
nis manuum Sacerdotis Sacrum facien-  
tis; & ideo foramen habeat exiguum  
in medio, unde illa defluat in cister-  
nulam suffossam. Superior vero pars  
usui sit ad pelviculam cum urceolis,  
ampullisve, dum Missæ Sacrum sit, re-  
ponendam.

Altaria omnia, quæ nondum con-  
secrata sunt, quamprimum ad sacro-  
rum rituum præscriptum consecrentur.  
Eorum autem, quæ consecrata non  
sunt, unumquodque petram habeat  
sacratam, quod altare portatile dicunt,  
longitudinis trium quadrantium ulnæ,  
latitudinis paulo amplius dimidia ulna.  
Ea autem tela cerata cooperta sit, atque  
in altaris medio justa dimensione ita  
inserta, ut nequeat amoveri, & ali-  
quantulum promineat ab illius mensa,  
quo Celebrans certo dignoscere valeat,  
se super ipsa Sacramentum perficere.



Altaria singula picturam habeant decentem. Crucem item elegantem, quæ saltem ænea sit. Candelabra duo, saltem ænea, cum vasculis etiam æneis ad sustinendas candelas. Duo extinctoria e lamina ferrea tenui confecta, cum suis baculis parvulis, & decentibus. Cartulam cum secretis orationibus super tabella, quæ aliquo vel modico circumdata sit ornamento, extensam. Mappas numero convenienti, ut cum erunt abluendæ, mutari possint, quarum aliquæ longiores sint, ita ut altaris latera usque ad terram contegant. Pulvinaria congrua e serico, vel e corio inaurato, aut alia decenti materia, ad librum missalem sustinendum; eorum autem loco haberi poterunt parva pulpita, saltem lignea polite elaborata. Telam viridem, aut alterius coloris, qua semper contextæ sint altarium mensæ post celebratam Missam, ut mappæ a pulvere, sordibusve præserventur. Ubi vero altarium mensæ non ejusmodi tela, sed asseribus cooperiri solent, quo tempore in eis Missa fit, asseres ita tollantur, ut nulla ipsius mensæ pars ab illis occupata remaneat.

Antipendia omnium colorum Ecclesiæ ritui convenientium, cum elegantiora pro solennioribus, tum congrua pro ferialibus diebus. Duo candelabra decentia ad sustinendas faces, vel cereos cum duobus extinctoriis.

Unicuique altari a parte, unde Evangelium legitur, tintinnabulum parvum, parieti laterali affixum hæreat, appenso funiculo tam longo, quo Clericus Minister uti possit, cum Corpus Domini elevatur in Missa, ad illud certis distinctis ictibus pulsandum.

### *XIII. De Sacristia.*

**S**acristiam, in qua & supellex omnis Ecclesiæ servari debet, & Sacerdos celebraturus sacras vestes induit, habeat unaquæque Ecclesia, in qua Missæ Sacrum celebratur. Ea autem ab altari majori paululum distet, & ad Orientem, ac Meridiem spectet, loco non humido, non uliginoso, ne sacra indumenta corrumpantur. Pavimentum habeat ab humo aliquanto altius exstructum. Tectum vero sit fornica-

tum; aut saltem asseribus polite elaboratis constet. Duas saltem habeat fenestras, unde aër facile exire valeat, quæ ferreis clathris, opereque vitreo munitæ sint. Ostium valvis decentibus pessulo, serraque munitis occludatur.

In qualibet Sacristia, loco magis conspicuo, sit Sacra Imago, tum etiam altare, Cruce & candelabris munitum, & mappa contextum, ad quod Sacerdos celebraturus sacras vestes induat; vel ubi, præ situs angustia, altare construi non possit, armarium, seu vestiarium illius altaris vicem gerat. Ad Crucem, vel regione Sacerdotis se induentis posita sit tabella, orationes continens ad singula indumenta recitandas, & eas item, quæ ante & post Missam recitari debent.

Sit præterea Oratorium ab aliqua Sacristiæ parte, sive prominens, sive intus decenti loco, idque instar parvi cubiculi, quo Sacerdos Missæ Sacrum facturus se recipiat, ibique se se colligens paulisper meditetur, & oret. Præterea altare parvum habeatur, in quo proposita Christi effigie, aut alia pia imagine sanctæ precetur, & gradus ligneus, ubi orando genua flectat. Si vero Sacristia ita exigua & angusta est, ut ejusmodi Oratorium habere nullo modo possit, ab aliquo ejus latere, quod orationi commodius sit, gradus ligneus apto loco, tela saltem vel panno obducto, collocetur, ubi Sacerdos genua flectens oret, affixa in pariete aliqua imagine Sacra, & tabella item earum orationum, quæ ante, quæve post Missam recitari solent.

Vas aquarium, quod manibus abluendis usui sit, e stanno solidove lapide fiat, cui papilla una, seu fistula, aut prout opus erit, plures infigantur. Ab inferiori parte sinus aquarius concavus ad excipiendam aquam, quæ inde affluit e lapide item solido, vel stanno sit, foramenque habeat, unde per fistulam aqua in parvulam cisternam subterraneam, vel alio derivetur. Ubi vero exiguus est redditus, superioris vasis vice adhibeatur situla, cui papilla, sive fistula instar gallinacei hæreat, unde aqua ad ablutionis usum sensim affluat, subjecto labello, sinuve aquario, vel

vel alio vase in parietis concavitate, quæ hemicycli exigui formam præbeat, ornate extructo, ne Sacristiæ situm impediat.

Ad abstergendas manus manutergium linteum prope vas aquarium ab opere, instrumentove tornatili pendeat; idque sæpe mutetur, ut semper mundum, nitidumve habeatur. E tela congrua confectum sit, tantæ latitudinis, quanta est telæ latitudo; longitudinis vero ulnarum sex.

Armarium item ad indumenta, vestes, & ornamenta Ecclesiæ asservanda, ex firmis tabulis sit confectum, a pavimento Sacristiæ altitudinis ulnæ unius cum dimidio, cum capsulis ductilibus pro colorum varietate sacras vestes asservantibus. Cui armario loculi etiam adjuncti sint, quibus Sacri Calices, patenæ, corporalia, vela, & alia id generis recondantur. Alii præterea, in quibus libri ad Chori, Ecclesiæve usum collocentur, ubi scilicet, vel loci angustia, vel census tenuitas proprium, præcipuumve librorum armarium fieri non patitur.

In Sacristia Parochialis Ecclesiæ habeantur, si fieri potest, paramenta integra omnium colorum, qui ex sacrorum rituum præscripto in Divinorum celebratione adhiberi solent, & solenniora, & ferialia item. Omnino autem casulæ cum stolis & manipulis saltem duplices sint omnium colorum; decentiores scilicet aliæ pro diebus solennioribus, & congruæ pro ferialibus.

Præterea tam in insignioribus, quam in aliis Ecclesiis, necessaria est omnis supellex, qua Ministri Ecclesiastici, in Divinis Officiis celebrandis uti solent. Ut autem in hac Metropoli, & Archi-Diœcesi nostra, uniformis in eatur ratio in hujusmodi supellectile construenda; hæc summam præscribenda censuimus, quæ ab omnibus in usum deduci jubemus.

Amictus, quem humerale vocant, e tenui, candidaque tela construatur, longitudinis ulnæ cum dimidio, latitudinis unius ulnæ, cum cruce parva in ejus medio. Habeat autem in duobus ejus angulis funiculos, qui ad crucis

instar supra Sacerdotis pectus transversim, indeque in tergum ducti, & mox revocati connectantur.

Alba e tela tenui, candidaque sit, longe tres ulnas producta, & late tres item circumquaque pateat.

Cingulum e candido filo conficiatur longitudinis ulnarum quinque. Ejus autem capita globulis ejusdem materiæ inferantur, filamentorum manipulis, floccisve appensis.

Stola extrinsecus ejusdem materiæ & coloris sit cum planeta, intrinsecus autem tenui serico vestiatur ejusdem coloris, longe ulnis quatuor cum dimidio producat; late vero pateat quinta parte ulnæ. Ab utraque autem extrema parte sensim latiuscule patens, laciniis ornatur congruæ longitudinis. Stolæ vero cruces tres annectantur, una in medio, reliquæ duæ in ejus partibus extremis.

Manipulus sit ejusdem materiæ & coloris ab utraque parte cum stola, longitudinis unius ulnæ cum dimidia, habeatque tres cruces annexas, unam scilicet in medio, & alias duas in partibus extremis, quæ sensim latiuscule patentes laciniis exornentur, longitudinis decimæ partis ulnæ. In ejus medio a parte inferiori funiculi annectantur cum globulo e serico filamentorum manipulo, floccove appenso; quibus funiculis, ac globulo ita Sacerdotis brachio manipulus hærebit, ut firmior reddatur.

Casula, quam alii planetam vocant, longe pateat saltem ulnas duas, fasciamque habeat decentis latitudinis assutam, & ab anteriori & posteriori parte usque ad extremum dependentem, cui altera fascia transversalis in summa prope parte a fronte adjuncta, crucem exprimat.

Vestis pluvialis, quam cappam dicunt, longitudine ulnarum duarum cum dimidio constet, & pro semicirculi ratione late pateat. A fimbriis ornatum laciniarum habeat, a parte solum anteriori, tota ab summo ad extremum usque aperta, hinc & inde auriphrigio, sacris etiam imaginibus intexto, decoretur; a posteriori parte, insigne, quod caputium sive scutum vo-

cant, brevibus admodum laciniis, ornatu vero auriphrigato, qui anteriori respondeat : a summa parte anteriori fibula inconsuta connectatur, intrinsecus vero serico tenui, aut tela bombyce texta ejusdem coloris circumvestiatur.

Dalmaticæ, seu tunicellæ longitudinis sint duarum ulnarum, cum auriphyrgiis sive quadris particulis, ejus panni & artificii, ut cum fasciis casulæ, & pluvialis omnino convenient.

Antependium altaris, vestimentum scilicet, quod ante altare tenditur suspensum ad ejus ornatum, paulo longe quam altare patere debet ; eoque altius, ut ab una parte paululum sub coronice gradus ejusdem altaris occultetur. A superiori parte palmum a summo distante, laciniis auro, sericove elaboratis pro colorum ratione ex Ecclesiæ ritu præscripta, ornetur. Intrinsecus tela bombycina, aliave decenti vestitum sit, quæ a superioris parte palmo uno excedat, ut sub mappis reflecti possit.

Superpellicium ex tela linea decenti esse debet ejus longitudinis, ut a terræ solo non amplius, quam quadrante ulnæ distet ; cujus manicæ sint latitudinis in omnes partes amplæ duarum ulnarum, & quadrantis.

Calix ex auro, vel argento, aut saltem ex aurichalco, dummodo cupa sit argentea, ab interiori saltem parte inaurata, confectus sit. Ejus pes ample pro illius magnitudine ita pateat, ut firmissime, ubi collocatur, consistens cadere non queat. Cupa forma antiqua constet ; nempe aliquantulum in fundo angusta sensim usque ad summum labrum latior fiat.

Patena ex auro, vel argento sit, aut saltem ex ære undique inaurata ; labrum extremum circulare ita subtile habeat, ut eo Sacræ Hostiæ fragmenta facile colligi possint. Illam mediam tenuem concavitatem habeat, quæ amplitudinem labri calicis fere adæquet.

Sacculus calicis & patenæ e tela tenui sit, late tam patens longeque productus, ut minime arte calicem capiat. Ita confutis erit, ut duo angu-

li fiant, & transversus calix in ipsum sacculum constringatur.

Theca lignea ad calicem una cum sacculo condendum comparata, opere tornatili conficiatur magnitudinis competentis cum operculo, quo compressæ claudatur. Intrinsecus panno laneo, vel holoserico, extrinsecus corio circumvestiatur, & cingulum ex corio ad eam gestandam adhibeatur.

Velum calicis, quod strophium dicunt, ab omni parte ulna, & aliquanto amplius pateat ; & ab oris undique sit opere serico, auro argentove tenuiter ornatum, etiamsi e tela tenui sit, decenter elaborata.

Corporale e tela linea pura & candida sit, ac simplex item ; nihilque elaboratum, & nihil sericum intextum habeat. Ab oris autem acus opere simplici punctum solum retortum sit, longe, lateque pateat ulnam unam ; ita vero complicatum, ut nulla ejus extremitas appareat.

Palla ex eadem tela constet, qua corporale, sed duplicata, longitudinis & latitudinis tertiæ partis ulnæ. Ea autem magis munda habebitur, si nulla ex parte serico elaborata sit, & semper cum corporali lavetur, atque amilo illiniatur.

Sacculus, burfave corporalium a fronte sit cruce, vel alia sacra imagine in medio intexta, a tergo etiam ex eadem materia & colore ; intrinsecus vero subserico aut tela tenui candida circumvestitus ; late autem undique pateat circiter dimidia ulna.

Purificatorium e tela non crassa admodum, neque tenui nimis & simplici acus opere confectum, latitudine sit ab omni parte saltem dimidiæ ulnæ. Ei autem Crux parvula in medio, vel in quatuor summitatibus, quos angulos appellant, acu pingatur.

Urceoli, ampullæve ex argento sint, vel e stanno, aut vitro ab omni parte sordibus puri ; ea latitudine, ut in eos digitus immitti possit, cum lavabuntur, quo nitidiores habeantur.

Pelvicula urceolorum, ampullarumve, si aurea vel argentea non sit, e stanno sit, opere autem czlato piam spe-



speciem exprimente; fundo intrinsecus constet lato, ac plano, non elaborato, quo firmitus ampullæ impostæ hæreant. Permittitur etiam pelvicula ex argilla, fictilisve, si congrua sit.

Missale opere librario bene firmiterque compactum, & conglutinatum tenuioribus tabellis sectilibus, corio, sericove intectis operiatur, & ad ejus ornatum folia inaurata existant.

Signaculum, sive registrum Missalis cornu transversale, unde cordulæ pendent, habeat e sericis filamentis confectum, atque ita latum, ut ejusdem Missalis crassitudinem adæquet; funiculos vero, cordulasve sericas duodenas colore diverso distinctas, ac longe ita ductas, ut Missalis longitudinem octava parte ulnæ excedant.

Pulvinar, quod Missali supponitur, plenum sit, non pluma, pilisve animalium, sed lana solida, aut bombyce, longe patens tribus quadrantibus ulnæ, late dimidia ulna.

Thuribulum, navicula, & cochleare, si pretiosiora haberi non possint, ex aurichalco singula sint artificiose cœlata, atque ornata periti artificis judicio. Quod sane thuribulum cum quadruplici catenula sit, & operculo ejusdem metalli; longitudo autem catenularum sit ulnarum duarum.

Linteam, quod manibus abstergendis in Missæ Sacro usui est, ex lino tenui contextum, longitudine ulnæ unius cum dimidio, latitudine vero paulo amplius quam ulna, tum præterea ab uno & altero capite ornatum laciniis, & filamentis ejusdem materiæ, & ab extremitatibus lateralibus acus opere simplici punctum retortum sit.

Tabella gestatoria, quam pacificale vocant, si ex auro haberi non potest, saltem sit ex aurichalco conflata, & aliquæ piæ cœlaturæ ornatu insignis, imaginem pietatis condecenter, egregieque expessam exhibentis. A tergo manubrium habeat ejusdem metalli. In ea autem includi poterunt aliquæ Sacræ Reliquiæ, ad fidelium devotionem magis augendam.

Vas gestatorium aquæ benedictæ ex argento opere cœlato, si fieri po-

test, habeatur, alioquin ex ære, aurichalco, vel stanno conflatum permittitur.

Vascula sacrorum liquorum usui Ecclesiæ Archi-Diaconalis grandia sint, pro Ecclesiarum eidem Archi-Diaconatui subjectarum numero, quibus distribuenda sunt. Quæ vascula argentea sint, aut saltem e stanno pretiosiori; inscriptionibus inter se distincta, quibus singula Sacra Olea internoscantur.

Capsula habeatur lignea opere tornatili confecta, decenter quæ servandis, portandisque sacrorum liquorum vasculis usui sit, cum ad ea ab Ecclesia Metropolitana accipienda statò Paschæ tempore mittetur.

Vascula autem Parochialis Ecclesiæ ad usum Sacra Olea servandi, ubi præ inopia ex argento fieri non possunt, e stanno, tum perpolita, mundaque omnino sint. Tria desiderantur, forma rotunda, atque ejusmodi, quæ inter se nulla plane dissimilitudine sint, sic quidem apte coagmentata, conjunctave, ut trianguli figuram exhibeant. Inscriptiones aperte expressas habeant, quibus uniuscujusque Sacri Olei vasculum distincte internoscatur.

Habeatur vasculum ligneum congruum opere tornatili confectum, quod Scatulam vocant. Idque a parte interiori aliquo ornamento serico vestitur. Habeatur præterea sacculus e serico confectus, in quo scatula cum Sacrorum Oleorum vasis includatur.

Vasculum, quod hostiis asservandis paratur, ex operculo constans, forma rotunda sit, ex argento, aut saltem ex polito ligno tornatili, aliave decenti materia, decoroque item ornatu, & opere confectum; intrinsecus vero serico panno vestitum, late ita pateat, ut hostiæ inde promi commode possint.

Alterum item vasculum minoribus hostiis asservandis habeatur, quod ex eadem materia, eodem opere, & ornatu constet, ac amplitudine majore, nempe quintæ partis ulnæ per diametrum ducta.

Vas ad usum abstergendis calices, & lavandi corporalia ex aurichalco, stannove confectum, aut æneum par-

retur in unaquaque Ecclesia, instar pelvis binis manubriis constans, atque ab uno labro ad aliud una ulna late pateat: osque habeat eminens, per quod quasi per canalem aqua inde paulatim in Sacrarium effundi possit.

Capsulæ corporalium e specioso ligno, aut certe condecenter ornato sint, intus vero serico, aut tenui panno lineo, circumvestitæ, forma quadrata. Habeantur autem capsulæ purificatorum, quæ itidem vestitæ, atque expolitæ sint.

In singulis Sacristiis appendatur loco conspicuo tabella, in qua sigillatim descripta sint omnium Missarum, & Anniversariorum onera, quæ in illa Ecclesia ex obligatione celebrari debent, & dies itidem adnotati, quibus illa sunt persolvenda.

Habeatur præterea liber, in quo Missæ, quæ indies fient, a quolibet Sacerdote proprio chyrographo notentur; ut scire possimus, an Missarum obligationibus debite satisfiat.

#### XIV. De Sacramentalibus.

**C**hristianæ pietatis ornamentum, in quo populum fidelem gloriari oportet, altare est cœlestis holocausti, Sacrosancta illa arbor Crucis, in qua Author humanæ redemptionis pependit Christus Dominus. Quare ad Catholicæ Religionis gloriam insignis admodum fuit ea veterum pietas, ut Crucis signum non in Templis solum, sed domi, forisque in parietibus, ac vestibulis, passimque in Civitatibus, expressum appareat, tanquam & præclarum populi Christiani trophæum, & clarissimum Divinæ misericordiæ monimentum, & sempiternum denique testimonium, quo palam fieret, fideles cum inimicis Christi nihil habere commune; sed contra eos omnes libere profiteri, quem colunt, Dominum JESUM, & hunc crucifixum. Hoc igitur Majorum religioso exemplo atque instituto excitati, Parochi omnes, in suæ quisque Parochiæ cœmiterio, vel alio insigniori loco, ex ære, vel ex lapide, aut saltem ex ligno præcipuis Christi Passionis mysteriis expressum, in foris, viisque publicis, præsertim

vero in biviiis, & triviis, eminentiori loco, erigi curent: idque, ut a populis sibi creditis sedulo præsteretur, frequenti admonitione efficient omnino.

Die SACRO PURIFICATIONIS Beatissimæ MARIÆ Virginis, usus ritusque benedictionis candelarum, cereorumve, cum plenus mysteriorum est, tum salutarium utilitatum, quas non solum ex orationibus, quibus Ecclesia in ea benedictione utitur, sed ex omni Rituali libro probato, Parochus, Concionatorve, eo ipso die fidelibus studiose exponat, quo religiosius illas & gestent, & habeant: nam cum illius benedictionis precatio ad alia multa referatur, tum ad hæc in primis:

Ut candelæ valeant ad sanitatem animæ, & corporis, terra, marique.

Ut de locis, ubi accendantur, Dæmon, & quidquid Dæmonis ars molitur, depellatur.

Ut mentes, & corda fidelium igne & splendore Sancti Spiritus accendantur, illustrenturque, ac depulsis vitiorum tenebris, videant, quæ sunt Deo grata & saluti utilia.

Ut ignis caritatis cum lumine fidei in animis accendatur, quo ad lumen æternum vitæ cœlestis perducantur.

Hæc sibi omnia a Christo Domino, qui est Deus verus, & splendor lucis æternæ, concedi precantur, intercessione & sanctissimis meritis Beatæ MARIÆ Virginis, quicunque fideles in illius honorem candelas, quibus benedictionis preces eo die adhibitæ sunt, devote gestant.

SACRORUM CINERUM usus in Ecclesia Dei antiquissimus est, ac non solum ad significandam, sed etiam ad excitandam pœnitentiam introductus. Quare Parochi & Concionatores, die Dominico, qui feriam aspersiois Cinerum proxime præcedit, salutare eas utilitates populum doceant, quas in earum benedictione multis orationibus Ecclesia petit. Atque hæc quidem præter cæteras sunt:

Ut fideles, qui Sacro Cinere asperguntur, ad intimam cordis humilitatem adjuventur.

Ut in eos benedictio cœlestis descendat,

scendat, qua adjuti, vere intimeque toto animo peccata doleant, hoc mente secum reputantes, ob hominis peccatum terram maledictam fuisse, nosque omnes in cinerem, ac terram redituros.

Ut detur corporis valetudo ad pœnitentiam peccatorum peragendam.

Ut anima Divino auxilio protegatur.

Ut a Deo impetremus, quæ ad illius voluntatem petimus.

Ut constanti animo in bene agendo perseveremus.

Hæc bona, quæ Mater Ecclesia pro Sacrorum Cinerum ritu a Divina benignitate precatur, ut fideles pie consequantur; Parochi & Concionatores, illo ipso die moneant, quam religiosa intimi animi pietate, quam humili contritoque corde, quam demisso vestitu ad eam actionem conveniant, quamque serio secum statuere debent, illos jejunii dies in amaritudine animæ suæ traducendos ad peccatorum satisfactionem.

Hoc asperfusionis Cinerum ministerium curent Parochi, ut quilibet sive mas, sive femina pie suscipiat.

Sanctissimi præterea & antiquissimi instituti in Ecclesia Dei est, die Dominico Pascha proxime antecedente, RAMOS PALMARUM, & OLIVARUM solennibus precibus benedici, ac fidelibus tradi, qui eos in processione gestent, & domi religiose, atque decenter asservent. Et sicut ritus is, & insignem illum Christi Domini ingressum ad urbem Hierosolymam & triumphum illum comemorabilem significat, quem Passione & morte sua superatis hostibus, idem Dominus resurgens reportavit; ita aliis etiam mysteriis plenus, a Parochis & Concinatoribus explicetur, quo ardentius ad illius Religionem fideles accensi, spirituales fructus capiant, quos ipsis a Deo Ecclesia precatur. Suntque hi præsertim:

Ut accipiant mentis, corporisque vim ad salutis opem, Deique gratiam implorandam.

Ut quemadmodum rami foliis virent, ita opera nostra, & justitia, & omni virtute sancta quam florentissima sint.

Ut quocunque hi rami inferentur, ejus loci incolæ benedictionem Dei consequantur, omnique re adversa propulsata, virtute Altissimi defendantur.

Has & alias salutare utilitates Parochi, & Concionatores fidelibus exponant, ut qua debent pietate, religiosoque animo sacros ramos capiendo, gestando, & custodiendo, ita Dominum precentur, ut per Passionem mortemque suam, qua Dæmonem superavit, & per misericordiam illam immensam, qua id egit, non solum corpora a malis tueatur, sed animæ gratiam suam cœlestem infundat; sicque ipsi multis virtutibus, bonisque operibus florentes, Christum Dominum sequantur, hostibusque omnibus devictis, ad cœlestis Hierosolymæ gaudia introducantur.

Sanctissimi item, veterisque instituti est, a Summo Pontifice Romano formas illas cereas, quas AGNUS DEI a figura impressa vocamus, solenni benedictionis ritu, multisque religiosis cæremoniis, non solum primo, sed septimo quoque Pontificatus anno consecrari. In quo consecrationis munere, sicut ille Christi Vicarius, (cujus oratio tanto majoris est momenti, quanto ejus officium in Ecclesia sublimius, & cum eodem Christo Domino conjunctius) multa sancte precatur, a Deo illis concedi, qui animo pio devotoque eos Agnos apud se habuerint, ita a fidelibus magna devotione iidem gestandi sunt, ad eosque usus religiose adhibendi, ad quos sacræ preces ex Ecclesiæ instituto referentur. Quare peculiari GREGORII Papæ VIII. Constitutione prohibetur sub pœna excommunicationis ipso facto incurrenda, ne minio, auro aut ullo colore inficiantur, neque venales proponantur.

Cum domi asservantur, ut piæ consuetudinis est, loculo decenti recondantur, cum autem in collo appensi gestantur, in thecam auream, argenteam, eburneam, crystallinamve aut alterius generis decentis, recte inclusi sint, ita ut tactu violari non possint. Nec vero ad ornatum habeat quidquam, quod profanum sit, quodque minime deceat. Neque qui illos gestant,



stant, aliquid impure, turpiterve agant, aut a Sacra hujusmodi re alienum.

Præterea nemo aliquem ex his Sacris Agnis annulo gestet. Thecarum fabri ne aliquam particulam sacræ illius ceræ, e qua Agni imago confecta est, in eis includant, quo pluris opus suum vendant, seu ab eo accipiant, qui thecam Agni causa faciendam locarint.

#### *XV. De Sacramentis generatim.*

**S**acramenta omnia, cum a Christo Domino salutis nostræ causa sint instituta, atque ex illius Sanguine preciosissimo vim sumpserint, ac virtutem; omni animi pietate, ac religione præstare is debet, qui illa tractaturus est, vel ministraturus; ne impure ministrans, dum aliis salutem afferre procuret, æternam sibi mortem comparet. Studeat igitur ab omni mortiferi peccati labe integrum servare animum, qui ad illa ministranda, omni fere temporis momento paratus esse debet.

Verum ut fidelium mentes ad ea percipienda, qua par est, devotione erigantur, eorum vim, ac virtutem frequenter, præsertim cum illa ministranda erunt, ex Catechismi Romani sensu, fidelibus explicabit.

Atque ut intus candida innocentiae stola ornatus esse debet, ita etiam extrinsecus mundo superpelliceo, stolaque ejus coloris, qui Sacramento ministrando congruat, etiam in Sacramentalibus confessionibus audiendis, indutus sit semper.

In iis autem ministrandis omnem adhibeat diligentiam, ac sollicitudinem, cum præsertim ægrotorum nomine, vel media nocte accerferetur, quo quidem tempore, neque a procellarum vi, neque rigore a gelu detineatur, quo minus, quocunque oportuerit, etiam in ultimos Parochiæ fines, eo prompte, & alacriter, nulla interposita mora, se conferat.

Sedulo quoque videbit, ne ad Sacramenta quævis aliquem admittat, nisi armis depositis, modestoque habitu, ac composito corporis gestu, aliquod reverentiæ interioris indicium exteriori cultu proferat. Neque item eos, qui solemnes fidei nostræ articu-

los, vel saltem ejusdem fidei quatuor præcipua capita, nempe Orationem Dominicam, Salutationem Angelicam, Symbolum Apostolorum, & Decalogum ignoraverint, eaque ediscere non curarint.

Caveat præterea, ne pro Sacramentorum administratione, quidquam prorsus exigat, vel extorqueat, seu signis, aut verbis, aliquid tanquam pretium, vel mercedem quovis modo perat, seu de iis paciscatur: id enim non sordidæ tantum avaritiæ, sed etiam Simoniacæ pravitate non caret suspitione. Honoraria tamen, & quidquid eleemosynæ nomine dari solitum est, prompte impendant homines laici, consuetudinem pie ac religiose introductam, sancte observantes. Illud autem videant Parochi, si id impendere aliqui renuerint, Sacramenta eis ministrare non differant, neque recusent; sed post ministerium, eorum nomina ad Nos, vel Officiale nostrum deferant, ut eos Sacrorum Canonum jure, ad piam consuetudinem observandam compellamus.

Religiosa cura in Sanctis Sacramentis ministrandis & percipiendis necessaria, cum ex ipsis mysteriis intelligi potest, tum perspicitur ex precibus, & sacris cæremoniis, quæ a Divinis, Apostolicisque traditionibus derivatæ, ac perpetuo Sanctæ Ecclesiæ usu corroboratæ, ad hæc usque tempora pie retinentur. Sacramenta enim a Christo JESU instituta, & ad communem omnium salutem proposita, cum cœlestia munera sint, atque instrumenta Divinæ gratiæ, solemnibus cæremoniis tractantur; ut eorum tum administratio sancta sit, tum perceptio plena religionis.

Ut igitur in hac Metropoli & Archidiecepsi nostra, uniformi ratione, ministrentur, librum Ritualementis inscriptum: Obsequiale, sive benedictionale, quod Agendam appellant; Sanctæ Pragensis Ecclesiæ, (qui postquam jussu nostro recognitus fuerit, ad Parochorum nostrorum commodum, Typis denuo deprometur) omnes penes se habeant; & quidquid in eo præscribitur, exacte observent, & in usum deducant. Editio autem libri Ritualis nostri,

stro, ut supra, reformando, antiquorum usum, sub gravi pœna, arbitrio nostro infligenda, omnibus plane interdiciamus.

Præterea antequam Parochus, ali-  
usve Sacerdos ad aliquod Sacramentum ministrandum accedat, paululum saltem in sacræ functionis, quam obitus est, meditatione, attente versetur, atque genibus flexis ad altare aliquantulum orabit, & hanc orationem adhibere poterit, ubi propria adscripta non est.

*Veni Sancte Spiritus, reple tuorum corda fidelium, & tui amoris in eis ignem accende. V. Gloria Patri, &c. R. Sicut erat, &c. & repetitur: V. Veni Sancte Spiritus, &c. Dominus vobiscum. R. Et cum Spiritu tuo. Oremus. Domine Deus omnipotens, qui me indignum propter tuam misericordiam ministrum fecisti Sacerdotalis officii; propitius esto peccatori; ut digne possim Divinæ clementiæ Sacramenta, fidelibus ad ea confugientibus ministrare. Per Christum Dominum nostrum. R. Amen.*

### XVI. De Baptismo.

**B**aptismi Sacramentum, cujus virtute in damnationis baratro, cui tanquam naturæ filii addicti, omnes nascimur, in Dei filios adoptamur, atque in innocentiae statum restituimur; omne certe sanctitate, & gravitate ministrandum est, atque omni item cum humilitate, sanctaque modestia suscipiendum. Quare in singulis Ecclesiis Parochialibus, loco convenienti, habeatur fons baptismalis, sive baptisterium, e stanno, solidove lapide constans, non tamen spongioso, ne ex illo aqua effluat; qui forma congrua sit, & columella sustinens. In eo autem toto anno habeatur aqua baptismalis ex sacris ritibus consecrata. Is præterea fera, quæ amoveri nequeat, jugiter claudatur. Clavis autem a Parocho solo diligenter custodiatur, neminique committatur, ne quæ temeraria manus ejusmodi aquam accipere possit, vel ea superstitione abutatur.

Panno decenti continuo tegatur, non solum ad ejus ornatum, sed etiam ut aqua a pulvere, aliisque sordibus præservetur.

Licet omne aquæ genus, sive maris, sive fluvii, sive paludis, sive pu-

*Tomus VIII. Concilior. German.*

tei, sive fontis, quæ sine ulla adjunctione, aqua dici solet, etiam si sit lutulenta, sit sufficiens hujus Sacramenti materia, tamen extra casum necessitatis, non alia aqua in hujusmodi ministerio adhibenda est, quam ex Sanctæ Matris Ecclesiæ instituto, statis cæremoniis, & Sacrorum Oleorum admixtione, Sabbato Sancto, & Sabbato item Pentecostes, solenni ritu, consecrari solet, & in baptisterio toto anno pure, & decore asservari. In casu autem necessitatis curandum est, ut pro Sacramenti dignitate, aqua pura & munda habeatur.

Cum statis Sabbatis aqua in baptisterio renovatur, fons iple diligenter lavetur, & lotio in Sacrarium, quod juxta illud est, vel super ossa mortuorum projiciatur.

Cum autem ad aures nostras devenit, aliquos Parochos in eorum, qui baptizandi sunt, exorcismo antiquissimum Ecclesiæ Catholicæ institutum non servare, inferendi salem baptizandi ori, ad illa verba: *N. accipe Salem sapientiæ; &c. &c.* decernimus, ut ad Prægenis Ritualis præscriptum, ab omnibus id omnino observetur.

Videat Parochus, ubi primum infans Baptismi causa ad se delatus est, an suæ Parochiæ sit; quem si alienæ esse norit, eum, nisi instante necessitate, non baptizet, sed ad Parochum proprium jubeat deferri.

Nemini liceat quemquam intra domesticos parietes baptizare, sed natum infantem ii, quorum est ea cura, ante novum ab ortu diem, in Ecclesiam portandum curent, ut a proprio Parocho baptizetur. Permissa est tamen, si infanti periculum mortis instet, facultas baptizandi in privatis ædibus Sacerdoti, vel si is absit, alteri in Sacris Ordinibus constituto, seu si non adfuerit, Laicis, primo mari, & deum scemina, qui recte norint veram Baptismi formam, quæ est: *Ego te baptizo in nomine Patris, & Filii, & Spiritus Sancti, Amen.* Quibus verbis nihil prorsus ab ipsis addendum, vel detrahendum esse, Parochi fideles crebro admoneant, eosque doceant, necessarium esse in hujusmodi functione, quod idem, qui baptizat, & aquam infantis capiti infundat, & eodem tem-

T t t t

pore

pore præscripta proferat verba, & præterea saltem intendat facere, quod intendit Ecclesia in hujus Sacramenti administratione.

Qui in casu necessitatis domi baptizabuntur, intra nonum ab ipsius infantis ortu diem, si vixerint, ad Ecclesiam deferantur, ubi exorcismi, præscriptæque cæremoniæ a Parocho adhibeantur. Si vero intra hoc spatium absque notabili vitæ, vel sanitatis corporalis detrimento, infans domi baptizatus ad Ecclesiam gestari non poterit; id cumprimum per valetudinem licebit, præstetur omnino.

Antequam Parochus hoc Sacramentum ministret, diligenter investiget, an infans baptizatus sit, & a quo, & qua materia, ac qua forma. Eum vero qui baptizavit, de forma prolata, aliisque ad Baptismi essentiam requisitis interrogabit, ut certe sciat, an vere Baptismi essentialia servata fuerint.

Re autem accurate explorata, si certo noverit Baptismi formam servatam fuisse, cum hoc Sacramentum iterari non debeat, caveat, ne illum, neque etiam sub conditione: *Si non es baptizatus, ego te baptizo* &c. baptizet, alioquin sacrilegium committet, & illud impedimentum contrahet, quod Sacri Canones irregularitatem vocant.

Et si dubium relinquatur, an Baptismi essentialia sint servata, nec ne, eo casu sub illa conditione baptizetur, nempe: *Si non es baptizatus, &c.*

Infans expositus, licet appensum collo scriptum habeat, quo ille baptizatus significetur: si tamen re diligenter investigata, adhuc dubium sit, eum baptizatum esse, eadem conditionis formula baptizetur: *Si non es baptizatus, &c.*

Ex antiquissima Catholicæ Ecclesiæ consuetudine, præter Sacerdotem, qui baptizat, alii etiam adhiberi solent, qui Patrini, & Compatres vocantur. Quare Parochi fidelibus declarent, cognationem spirituales in Baptismi administratione ad Sacrorum Canonum, & Generalium Conciliorum præscriptum, contrahi inter baptizantem & baptizatum, baptizatique patrem & matrem; nec non inter virum & mulierem, qui baptizatum de Sacro Fonte suscipiunt, quos Compatres appellant, & ipsum

baptizatum, atque illius patrem & matrem; quæ cognatio non solum impedit Matrimonium contrahendum, sed etiam dirimit contractum. Cum autem propter multitudinem prohibitionum, multoties in casibus prohibitis contracta sint Matrimonia, in quibus vel non sine magno peccato perseverandum est, vel ea non sine magno scandalo dirempta fuerunt; Comparum pluralitatem Sacri Canones jure meritoque semper detestati sunt; ideo decernimus, ac declaramus, unum tantum, aut ad summum unum, & unam, in Baptismi ministerio, juxta Sacri Concilii Tridentini dispositionem, cum baptizato, baptizatique patre & matre, cognationem spirituales contrahere, etiamsi plures adhibeantur, ad associandum baptizandum, cum ad Ecclesiam Baptismi causa deferretur. Parochus igitur, cum ad hoc Sacramentum conferendum accedit, unum tantummodo, sive virum, sive mulierem, vel ad summum unum & unam, ut superius diximus, ad tangendum baptizatum, cum de Sacro Fonte suscipitur, admittat, & eorum nomina in libro describat.

Vir autem & ejus uxor ad eundem baptizatum suscipiendum non admittantur.

Deligant parentes in filiorum suorum Baptismo compatres tales, quales esse oportet, qui & vitæ exemplis, & Christiana, eaque Catholica disciplina eos intruere possint.

Ad hujusmodi munus obeundum, nullo modo admittantur infideles, hæretici, excommunicati, interdicti, publice criminosi, seu infames, pueri natu minores quatuordecim annis, nec præterea, qui sana mente non sunt, nec vero Abbates, Monachi, vel Abbatissæ, aut Moniales, neque demum qui quatuor præcipua doctrinæ Christianæ capita, nempe Orationem Dominicam, Salutationem Angelicam, Symbolum Apostolorum & Decalogum non rite calluerint.

Meminerint Patrini, Compatresque, seu Susceptores, se hac potissimum lege obstrictos esse, ut spirituales filios perpetuo commendatos habeant; ad vitam Christianam instituunt; curent, ne in hæresin labantur: ac juxta S. Augusti-



gustini sententiam eos admonere non desinant, ut castitatem custodiant, iusticiam diligant, charitatem teneant: & ante omnia, nisi a parentibus aut ab aliis instruantur, Symbolum, Orationem Dominicam, Salutationem Angelicam, Decalogum, & prima Catholice Religionis rudimenta illos doceant.

Parochus, Sacerdosve baptizans caveat, ne ad infantem baptizandum alio Chrismate utatur, quam eo, quod illo ipso anno consecratum est, ut veteri Canone caveatur.

Curet idem, ut infantibus proprio nomine in Baptismo appellandis, ea nomina non imponantur, quæ turpia aut ridicula sunt, quæve gentilium, atque adeo impiorum, & impurorum hominum memoriam referant, sed illorum, qui ob veræ pietatis ac sanctæ Religionis, virtutisque Christianæ laudem, Sanctorum numero adscripti sunt; ut & in ipso vitæ ingressu, cum ethnicis ne nomen quidem commune fideles habere velle protestentur, & ipsi infantes, etiam cum ætate processerint, nominum similitudine, ad eorum, a quibus illa accepta sunt, imitationem excitentur, & præterea, quos imitari studeant, eosdem quoque frequentius precentur, ac sperent, eos potissimum sibi ad salutem tum animi, tum corporis Advocatos fore.

Moneant Parochi puerperas, ut cum primum post partum domo exierint, mox ad Ecclesiam Parochialem, Deo acturæ gratias, accedant, ubi ex laudabili Sanctæ Ecclesiæ consuetudine, benedictionem peculiaribus precibus a Parocho suscipiant. Parochus tamen hac de causa puerperæ domum non ingrediatur, etiamsi mulier ob adversam valetudinem Ecclesiam adire nequeat.

Grave atque immane facinus est, infantes per imprudentiam illorum suffocari, qui statim ac nati sunt, secum in cubile collocant. Ut igitur huic nefariæ immanitati occurramus, parentibus, nutricibus, aliisque quibuscunque districte inhibemus, ne infantem ætatis suæ anno nondum expleto, in lecto secum retineant, nec lactent, non adhibita cautione diligenti cunularum, quæ ab huiusmodi periculo infantes præservare solent.

*Tomus VIII. Concilior. German.*

Vix ulla alia causa esse potest, quamobrem plures ex iis, qui adulti Baptismum suscipiunt, non modo ullam in Christianis virtutibus progressionem faciant; sed plerumque flagitiis nefariis inquinari, præcipientes ad perniciem interitumque ruant, præter eam unam, quod non ita, ut par esset, affecti ipsi, nec vero ab aliis exculti, ad tantum Sacramentum accedant. Nemo igitur adultum quempiam in hac Metropoli & Archi Diocesi nostra Pragensi baptizare audeat, nisi prius adultus ipse coram Nobis se præsentaverit, & ea præstiterit, quæ pro majori animæ suæ salute ei præscribemus.

Antequam baptizandus admittatur, sive Judæus sit, sive Paganus, sive Turca, quærentur a Nobis, vel ab Officiali nostro, testimonia certa de ejus conditione, antea acta vita, statuque omni, & ejus voluntatem diligenter explorabimus, utrum ex animo, veraque pietate Baptismum petat. Si ita comperiat, illum alicui pio, & religioso viro committemus, a quo fidei & Christianæ vitæ institutionibus accurate erudiatur; qui tum sic instructus, ad Ecclesiam ducatur communi vestitu, ut a Nobis, seu ab eo, cui id muneris delegabimus, Baptismum suscipiat: & statim albam vestem rite accipiet, sacris cæremoniis ex Sanctæ Ecclesiæ instituto adhibitis.

Et quoniam dilatio Baptismi adulti convenit, poterit plerumque ad majorem Sacramenti cultum, unum ex statis temporibus Paschæ & Pentecostes expectari.

Interroganti Sacerdoti respondeat ipse, non patrinus; qui tamen semper assistat, tanquam pro baptizando spondeat.

Quod vero, licet horribile dictu sit, aliquando tamen evenisse comperit, aliquem scilicet ad turpem quæstum iterum Baptismum suscepisse; id ne accadat, antequam aliqui baptizentur adulti, omni studio curetur, ut isti homines, vel Judæi, vel Turcæ, qui Baptismum sibi conferri petierint, plane dignoscantur, ac statu omni, quantum licuerit, testimonium a probatis viris obsignatum, Nobis exhibeant.

Cum autem ad aures nostras devenit, ob obstetricum inscitiam plu-

res committi errores, in Baptismi administratione in casu necessitatis; præcipimus omnibus obstetricibus nostræ Archi-Episcopali jurisdictioni subiectis, ne hujusmodi munus exerçant, nisi a proprio Parocho sint approbatæ. Et in primis moneantur, ut in hoc munere exercendo ab omnibus superstitionibus abstineant.

Liber conficiatur, in unaquaque Ecclesia Parochiali diligenter asservandus perpetuo, in quo notentur omnes, qui in dies baptizantur, hac ratione, latino vel vernaculo sermone:

Anno 1684. die 5. Januarii in Ecclesia Parochiali Sancti N. a me Presbytero N. ejusdem Ecclesiæ Parocho baptizatus fuit N. filius legitimus naturalis Magnif. Domini N. & Dominæ N. ejus uxoris, natus nudius tertius. Ejus Patrinus fuit Dom. N. filius D. N. Matrina autem D. N. uxor D. N. & filia D. N.

Quod si filius non fuerit de legitimo Matrimonio natus, nomen tantum matris describatur, si de ea constiterit.

### *XVII. De Confirmatione.*

**Q**uoniam ii, qui Baptismum susceperunt, qualimodo geniti infantes imbecilli essent ad viriliter contra spirituales hostes pugnandum, ideo Christus Dominus, ne qua in re suis militibus deesset, Chrismatis Sacramento, per quod S. Spiritus dona in animis fidelium, nisi obicem ponant, uberrime influunt, eos muniri voluit, qui crescente jam ætate, solidiore etiam cibo indigere videntur, ut adversus omnes carnis illecebras, mundique fraudes, & malorum Dæmonum vires atque insidias robustiores evadant, ad nomen Domini nostri Jesu Christi non ore tantum, sed factis etiam confitendum, semperque & ubique locorum glorificandum. Quare licet hoc Sacramentum non sit necessarium ad salutem, tamen a nemine sine magno peccato negligi potest; sed potius in re tam sancta, per quam Divina munera largissime impertiuntur, maxima quisque uti debet diligentia, ut illud pie & religiose suscipiat.

Quamvis autem ad animarum Rectores non spectet hujus Sacramenti ad-

ministratio, cum id Episcopis competat, tenentur tamen sedulo invigilare, an in propria Parochia aliqui sint, qui Confirmationem non susceperint, quos omni cohortationis officio inducant, ad eam, cum primum facultas dabitur, humiliter & devote suscipiendam. Atque ut ad hujusmodi Sacramentum promptiores se reddant, ejus excellentiam & virtutem, ex Catechismi Romani doctrina, atque monitiones nostras hoc Decreto comprehensas, tribus diebus Pentecostes, & alio etiam tempore, quo illud per Nos, seu per Suffraganeum nostrum ministraturi erimus, fidelibus exponant; videantque diligenter, ut omnibus innotescat cognatio spiritualis, quæ in hujus Sacramenti ministerio orta intercedit; eadem enim est, quæ in Baptismo contrahitur, nempe inter confirmantem & confirmatum, confirmatique patrem & matrem: atque inter susceptorem, & susceptum, susceptique patrem & matrem.

Septennio minores ad hoc Sacramentum non admittantur, ut facilius Confirmationis susceptæ memores esse possint, quæ sine sacrilegio iterari non potest.

Quæ ad annos discretionis pervenerint, non solum jejuniis, & orationibus, sed etiam, si poterunt, Sacramentali Confessione, atque Sacræ Eucharistiæ perceptione ad illud se præparent, ut hujus Sacramenti effectus uberrime consequantur. Provideatur autem, ut eo die Missæ Sacro omnes devote intersint, si fieri poterit.

Ad hoc Sacramentum accedant fideles fronte non sordida, aut capillis, ut aliquando ex nimia contigit accedentium incuria, indecenter contexta; non gladio aut pugione accincti, atque tam qui confirmantur, quam eorum susceptores ab Ecclesia ne discedant, priusquam Episcopalis benedictio data fuerit.

Nulli præterea patrini, susceptoresve adhibeantur, qui infideles, hæretici, excommunicative sint, vel interdicti, neque viri Regulares, nec Abbatisæ, Monialesve, neque item eorum, qui confirmantur, parentes, filii, aut qui confirmandum levavit de

de Sacro Fonte ; nec qui Sacramenti Confirmationem nondum susceperunt. Permittitur tamen , ut viris Regularibus viri Regulares, & Moniales patrini, matrinæve respectively esse possint.

Demum, nisi aliud necessitas postulaverit, feminis viri, seu viri mulieres nullo modo adhibeantur.

In hujus Sacramenti susceptione fideles manus ante pectus junctas teneant; quo in statu permanebunt, quoad frons medulla panis, & aqua recte abluta, & mappa nitida absterfa erit. Nemo autem frontem Sacro Chrysmate illitam attingat, etiam signo Crucis se muniendi causa, priusquam abluta, ut supra, sit atque absterfa.

Meminerint autem recenter confirmati, ob Sacramenti reverentiam, debere eo saltem die a frontis lotionē abstinere.

Qui literarum rudes sunt, ultra solitas orationes, Orationem Dominicam, Salutationem Angelicam, & Symbolum Apostolorum, singulis septem diebus, saltem semel recitent, memores septem cœlestium donorum, illius Sacramenti virtute sibi collatorum, in quibus religiose conservandis solliciti esse debent.

Patrini omnes eorum, quos susceperunt, curam gerant, eos doctrinæ Christianæ rudimenta doceant, & cætera omnia præstent, quæ de Patrinis in Baptismo adhibitis, sancita sunt.

### *XVIII. De Sacra Eucharistia.*

**P**ræstantissimum Sacræ Eucharistiæ Sacramentum, a Christo Domino ad sempiternam suæ acerbissimæ Passionis memoriam, atque ad salutem nostram cœlestibus donis & gratiis communicandam institutum, qua maxime fieri potest animi pietate, puritate, humilitate, omnique religioso cultu, summi, ac ministrari oportet.

Cum autem hoc Sacramentum in Ecclesiis honorifice custodiri consueverit, tum ut fideles ad illud adorandum, Divinamque Salvatoris nostri, qui charismatum omnium fons vere in eo est, opem in quotidianis hujus sæculi necessitatibus implorandam, sæpe con-

fugiant, tum ut gravi morbo laborantibus deferri possit ; generatim decernimus, ac sancimus, ut in omnibus Ecclesiis Parochialibus continuo servetur.

Licet autem antiquæ sit hujus nostræ Ecclesiæ Pragensis consuetudinis, ut ad dextrum cornu Altaris majoris, loco congrue ornato, collocetur; decentius tamen est, ut, ubi fieri poterit, super majori Altari tanquam in Ecclesia loco digniori illud custodiri curent; nisi fortasse in peculiari aliquo extra Chorum Sacello, conspicuo tamen, & insigni loco positum, consueverit decenter servari.

Tabernaculum vero, in quo reconditum est, si e laminis argenteis, aut æneis inauratis, aliave ratione elegantius haberi non potest, saltem e tabulis scætilibus, quæ humiditatem non gignant, polite elaboratis, & religiosarum imaginum sculptura ornatis, & inauratis, decenti amplitudine extruatur; & in ejus summitate sit imago Christi gloriose resurgentis, & sacra vulnera exhibentis.

Si autem ita positum, ut super altare minime ascendere oporteat, ad extrahendam Sacram Eucharistiam; ostiolo sit aptato, ut in eo Sacramentum ipsum cum vasculo ad continendas particulas consecratas pro fidelium communionē destinato, Monstrantiave reponi, aut ex eo etiam extrahi commode valeat. Quod ostiolum a parte anteriori panno serico sit adornatum.

Vacuum sit omnino a Sacris Reliquiis, atque a Sacrorum Liqueurum vasis, aliisque quibusvis rebus, ut ne inane quidem vasculum, Monstrantiave in eo reponatur.

Sub vasculo, Monstrantiave extensum continuo sit candidum corporale amilo illitum, quod singulis saltem duobus mensibus mutetur, ut mundum semper habeatur.

Bene tutum & jugiter clausum sit tabernaculum; ejusque clavis habeat cordulam decentem ad ejus ornatum, & nullo modo clavis hæc cum aliis clavis eadem cordula colligetur, sed eam Parochus distincte asservet, neque altari unquam committat.

T t t t 3

Vascu-



Vasculum autem ipsum, Monstrantia ve tegumento decenti, instar pallioli, contegatur.

Monstrantia ad exponendam, vel in processionibus deferendam Hostiam magnam, si non ex auro, aut argento, saltem ex aurichalco bene aurato refulgeat, & velo vel peplo congruo ornata sit.

In unaquaque Parochiali Ecclesia unum saltem habeatur vasculum, ad retinendas particulas consecratas, ad usum Communionis fidelium, etiam infirmorum. Quod si ex auro vel argento non erit, saltem cupam habeat ex argento, ab interiori parte inauratam. At pes & operculum ex aurichalco esse poterit inaurato.

Quinque saltem particulae consecratae, sint semper in praedicto vasculo; vel etiam plures, ubi Parochiae frequentia, vel magnus graviter ægrotantium numerus id requirit, quæ saltem semel in mense mutantur, praesertim feria quinta, si commodum erit, in qua Christus Dominus hoc Sacramentum instituit. Idque fiat ex Hostiis non ante viginti dies confectis.

Hostia magna consecrata nunquam relinquatur, nisi cum vel populo orationis publicae causa ad orandum exponenda fuerit, vel in processionibus deferenda.

E Regione Sanctissimi Sacramenti præluceat continuo, etiam noctis tempore, lampas munda, loco convenienti posita, vel appensa.

In Ecclesiis Parochialibus, ubi Fraternitas Corporis Christi erecta non est, erigatur infra tres menses proximos, & eas regulas, ac praescriptiones Confratres observent, quæ jussu nostro edentur.

Unicum saltem habeatur coelum, sive baldachinum ad Sacram Eucharistiam contegendam, cum in processionibus vel ad infirmos deferatur; quod si pretiosius haberi non potest, saltem e panno subserico, vel alias congruo conficiatur, habeatque hastilia saltem quatuor decenter picta.

Cum autem Sacra Eucharistia ad infirmos deferatur, per vias asperas,

seu glacie, vel luto lubricas, habeatur bursa e serico ornatissima, ad includendum vasculum Sacram Eucharistiam continens, quæ bursa cordulas habeat e serico, Sacerdotis collo decenter appendendas.

Velum item adhibeatur majus, quod congruum sit, & latum sicuti veli tela, atque longum ulnis quatuor, vel quinque, ut non ipsum vasculum tantum, sed ipsius etiam deferentis Parochi humeri contegantur.

Cum Sacra Eucharistia ad infirmos deferatur, Clericus aliquis, seu Aedituus omnes præcedat; tintinnabulum continuis ictibus pulsans, ut homines admoneantur, & invitentur ad eam pie adorandam, & associandam. Adhibeatur item Crux decens ad hunc usum destinata, in qua Christi Domini imago, decore expressa, pietatem excitet. Ea autem infirmo porrigatur a Sacerdote, ut ad sacrorum rituum praescriptum, ipsam adoret, priusquam Sacram sumat Communionem.

Præterea in singulis Parochiis duæ habeantur laternæ magnæ, vel saltem una, in hujusmodi functione adhibenda, quæ furente etiam vento, lumen accensum defendat.

Cum ad aliquem infirmum deferenda est Sacra Communio, plures particulae consecratae in vasculo reponantur, quarum altera infirmo exhibita, saltem una ad Ecclesiam sub baldachino cum eodem honore, & cereorum accensorum comitatu referantur, nisi cum extra urbes, oppidave, seu de pago ad pagum, & per asperas, difficilesque vias eundum est, quo casu, tot tantummodo particulae deferantur, quot erunt infirmi communicandi.

Sacra Communio ad ægrotum non deferatur, nisi is eam vere sumpturus sit; si vero aliquando occurrat, ut dum ad illum Parochus venit, morbo ita affectum eum inveniat, ut illam tunc ei ministrare rite non possit; collocato vasculo super corporali, in mensa eo nomine apparatus; paululum moretur, dum flexis genibus una cum cæteris, qui adsunt, ac potissimum cum ægroto ipso sancte oret; ac postea recessurus Eucharistia vasculo inclusa infirmo

firmiter benedicat. Quod si ægrotus ipse id vehementer exoptat, Sacramentum, aperto etiam vasculo, liceat ostendere adorandum.

Parochus ad ægrotos hoc Sacramentum allaturus, diligenter præmoneat eos, ad quos infirmi cura spectat, ut ægrotantis cubiculum ab omni sordide purgetur, & amota omni re profana, pio apparatu, & sacris imaginibus, ubi potest, exornetur: tum præterea mensa mappa munda constrata appareatur, in qua super corporale vasculum cum Sanctissimo Sacramento collocari possit.

Antequam ægroto Sacram præbeat Eucharistiam, illius fidem & devotionem, pro personæ & temporis ratione, gravi & brevi sermone, ad libri Ritualis Pragensis præscriptum, excitare curet. Statim ac Sacram Communionem infirmo ministraverit, digitos vino & aqua abluat, & ipsi infirmo ejusmodi ablationem præbendam curet.

Ad saluberrimum hujus Sacramenti frequenter sumendi usum, Parochi, Concionatores, & Confessarii fideles continuo cohortentur, atque excitationis nascentis Ecclesiæ institutis, ac exemplis, & omnium Sanctorum Patrum consentiente doctrina, atque Oecumenicæ Synodi Tridentinæ sententia (quæ optaret quidem fideles in singulis Missis, non solum spirituali affectu, sed prius confessos Sacramentali etiam Eucharistiæ perceptione communicare) curabunt certe, ut præter Paschalem Communionem, quæ Sanctæ Ecclesiæ præcepto necessaria est, saltem in præcipuis Solennitatibus, veluti die Natali Domini, Epiphania, Pentecoste, Ascensione Domini, celebritate Corporis Christi, Festo omnium Sanctorum, ac præterea in Festis majoribus Deiparæ Virginis, Sacra Eucharistia se reficiant. Crebris etiam monitis illud, quod Beatissimus SILVERIUS Pontifex statuit, in consuetudinem studebunt revocare, ut qui sæpius non communicant, diebus saltem Dominicis, Quadragesimæ & Adventus, ac feria quinta Ccenæ Domini, prævia Sacramentali confessione Corpus Domini sumant.

Eam quoque consuetudinem introducant, ut quoties quis iter longum, aut infestum, remque arduam ac difficilem, etiam in qua nullum mortis periculum extimescendum sit, aggreditur; qui itidem in aliqua gravi perturbatione, vel ex filiorum, conjugisve obitu, vel ex bonorum amissione, vel ex alia re adversa affligitur, Sacram Communionem confessus suscipiat; idemque faciat itinere, vel negotio difficili, quod susceperit, confecto, vel quocunque beneficio accepto, gratias Deo acturus, hujus Sacramenti sumptione, in quo præcipua quædam ratio inest, qua Omnipotenti DEO pro immensis in nos collatis beneficiis, aliquam gratiam pie referamus. Curent item, ut mulieres proxime parituræ idem præstent; ac præterea cum primum a puerperio ad Ecclesiam accedunt.

Ad Sacram Communionem non admittantur hæretici, schismatici, excommunicati, interdicti, publice criminosi, meretrices, publici concubinarij, sceneratores, magi, sortilegi, & alij in peccatis & statu damnationis perseverantes. Si vero ejusmodi ab eo damnationis statu resipiscentes, servatis servandis, a censuris Ecclesiasticis, & peccatis admissis legitimam obtinuerint absolutionem; ad Sacram Communionem admitti poterunt.

Pueris item & infantibus, qui propter ætatis imbecillitatem, nondum hujus Sacramenti cognitionem habent, Sacram Eucharistiam nemo audeat ministrare, sub pena suspensionis a Divinis, ipso facto incurrenda. Ii autem cum ad annos discretionis pervenerint, qui ut plurimum duodecimi anni sunt, ad Communionem admittantur, dummodo prius a Parocho, Confessariove diligenter examinentur, atque de vi & ratione hujus Sacramenti pie instruantur, ut ad illius virtutem, & admirabiles effectus cognoscendos, piæque animi reverentiam amplectendam, excitentur.

Nemo autem ad hujus Sacramenti sumptionem accedat cum conscientia peccati mortalis, nisi prius contritus, & Sacramentaliter confessus fuerit, alioquin peccato mortali se obstringeret.

Non

Non solum monendi sunt fideles, ut jejuni (nisi ob infirmam valetudinem in periculo mortis sint constituti; iis enim, etiam si jejuni non sint, Sacra Communio per modum Viatici ministrari potest) ad Sacram Mensam accedant, ita ut saltem a media antecedentis diei nocte, usque ad illud temporis punctum, quo Eucharistiam sumunt, nihil omnino per modum cibi, potusve, aut medicinæ commederint, seu biberint, aut sumpserint; alioquin peccatum mortale admitterent; sed etiam cohortandi, ut pridie, quo illam sument, jejunium celebrent, aut saltem parcius cænent, & partem noctis in orationibus, piisque meditationibus vigilent, aut saltem prolixius orent, quam soliti sunt. Summa reverentia, omnique humilitate, ac genibus flexis, ad eam sumendam accedant, oculis non vagis, sed in Christi Corpus pie conjectis, & gladio, pugio, aliisque armis omnino depositis.

Antequam Sacra Communio fidelibus præbeatur, fiat Confessio generalis, clara voce, lingua vernacula, precationibus illis adhibitis, quas in Titulo: *de Verbi prædicatione*, præscripsimus; in ipso autem ministerio adsint duo Clerici, seu Æditui, qui mantilia, mappasve, vasculo sacratas particulas continenti suppositas, sustentent.

Raro communicantes non ante ad Sacram Communionem Parochus admittat, nisi iis diligenter explicaverit, quam immani scelere ex Apostoli sententia obstringatur, qui indigne illam sumit: debet enim se ipsum probare, quicumque ad salutem, non autem ad iudicium & condemnationem, cœlestem illum panem manducare voluerit.

Hoc institutum, quod antiquissimum ritus est, religiose servetur, ut infra Missarum solemnias, postquam scilicet Sacerdos Sanguinem sumpserit, Sacram Communionem fidelibus ad eam accedentibus ministret. Nec vero tamen eam alio tempore ministrari, cum occasio tulerit, vetitum sit.

Omnem adhibeant diligentiam Parochi, ut unusquisque in sua Parochiali Ecclesia hoc Sacramentum in Paschali

celebritate sumat, quemadmodum est Sanctæ Matris Ecclesiæ præceptum; ideo in Quadragesima populo promulgabunt, atque adeo explanabunt Constitutionem illam in Concilio Lateranensi, ab INNOCENTIO Tertio Pontifice Maximo editam, cujus initium est: *Omnis utriusque sexus*. Tempus autem Paschale Communionis est a Dominica Passionis usque ad Octavam Paschæ inclusive. Quod si festum Annuntiationis Beatissimæ Virginis ante Dominicam Passionis occurrerit; qui eo die a proprio Parocho Sacram sumpserint Eucharistiam, Ecclesiasticæ illi obligationi satisfacient.

Moneant Parochi Patres familias de cura per eos adhibenda, ut eorum filii, aliive, qui de eorum familia sunt, debito tempore peccata sua Sacramentaliter confiteantur, & Sacram sumant Eucharistiam.

Advenæ & peregrini, cujusvis status, & conditionis, qui tempore Paschali in hac urbe fuerint, ad Ecclesiam Metropolitanam ad Sacrosanctam Eucharistiam sumendam accedant, neque eis ab aliis Parochis ministretur.

Videant Parochi diligenter, an aliqui sint, qui præstituto tempore Paschali in propria Parochia non communicarint, si quos compererint, eos statim ad Nos deferant, ut ad Sacrorum Canonum præscriptum, ingressu Ecclesiæ interdicti declarentur, & si sic decesserint, careant Ecclesiastica sepultura.

Si qui testimonium Confessarii manu obsignatum Parocho attulerint, quo aliqua ex causâ eis differatur terminus sumendi Sacram Paschalem Communionem, si prorogatio hujusmodi ultra quindecim dies per Octavam Paschæ duraverit, eorum nomina Parochus Nobis denuntiet, ut quidquid eorum saluti judicabimus expedire, discernere possimus.

Qui vero tempore Sacræ Communionis Paschalis, in carcere detenti fuerint, eos Parochi, intra cujus Parochiæ limites carceres consistunt, visitent, & ad illos, postquam peccata sua Sacramentaliter confessi fuerint, Sacram deferant Communionem; aut si Sacella fue-



fuerint conjuncta, ibi ad illos communicandos celebrent.

Ut igitur omnibus innotescant ii, quibus in hac urbe, hujusmodi cura in posterum incumbet, decernimus, ut iis, qui in carceribus Civitatis veteris detinebunt, Sacramenta ministret, qui a Nobis curam animarum habet in Ecclesia S. Jacobi. In Civitate parva, qui Parochialia munera exercet in Ecclesia S. Thomæ. In Raczino Parochus S. Benedicti. In Arce aliquis ex Concionatoribus Basilicæ Metropolitanæ nostræ, ab ejusdem Ecclesiæ Decano monendus. Idque statuimus, donec aliter Nobis, Officialive nostro visum fuerit.

Cum autem Itali plures, alique nonnulli, sive Clerici, sive Laici, requirant a Parochis, aliisque Ecclesiasticis attestaciones Sacræ Confessionis, & Communionis, & aliarum actionum Catholicam Religionem concernentium; caveant omnes, ne aliquam attestacionem conficiant, nisi de iis, quæ certo sciunt vera esse. Atque ut in hujusmodi attestacionibus, omnis fraus, aut fraudis suspicio tollatur; ne eas alicui tradant, nisi prius a Nobis, Officialive nostro recognitæ, scriptove confirmatæ fuerint.

Si qui ob infirmam valetudinem, etiam si in Hospitalibus sint, tempore præstituto ad Ecclesiam accedere non possunt, ut Sacram sumant Eucharistiam, illam intra eundem terminum Parochus domum deferat, ut Ecclesiæ præcepto satisficiant, & fructus uberimos, spiritualesque utilitates, ex hujus Sacramenti perceptione provenientes, non amittant. Qui tempore Paschæ a Parochia abfuerit, cum primum domum redierit, vel attestacionem legitimam Parocho exhibeat, se prævia Confessione Sacramentali, Sacram Communionem sumpsisse; vel intra sex dierum spatium, confessus, a proprio Parocho illamumat; alioquin interdicti Ecclesiastici pœnam subeat, & sic decenter careat Ecclesiastica sepultura.

Nemo ad Sacram Communionem Paschalem admittatur, nisi prius attestacionem in scriptis exhibuerit, Confessarii subscriptione munitam, se pec-

cata sua idoneo Confessario confessum fuisse, & ab eo absolutionem impetrasse.

Nemo Regularis extra Ecclesias sui Ordinis, Clericis vel Laicis, Sacramentum Eucharistiæ ministrare audeat, absque facultate nostra, aut saltem proprii Parochi; alioquin excommunicationem incurreret ipso facto, Summo Pontifici reservatam.

Sacram autem Communionem Paschalem, quæ a Dominica Passionis usque ad Octavam Paschæ ab omnibus fidelibus sumi debet, neque etiam in sui Ordinis Ecclesiis, ministrent; cum id ad Parochos, non autem ad illos Sacerdotes, etiam si Regulares sint, spectet.

Omnes utriusque sexus Christi fideles in Domino hortamur, ut feria quinta Cœnæ Domini ad nostram Metropolitanam Basilicam se conferant, & a Nobis, tanquam præcipuo totius Ecclesiæ Pragensis Pastore, Sacram sumant Eucharistiam. Qui id præstiterint, paschali obligationi satisficient, ac si in propria parochia illam sumpsissent.

Quo autem religiosius Sanctissimi Corporis Christi Domini celebritatem colant, Parochi, die Dominico solennitatem præcedente, paterna charitate, gravique sermone illos de his præmoneant.

Ut confessi, vel in Solennitate, vel intra Octavam, Sacram Communionem sumant. Ut pro facultatibus elemosynam dent, ut pure, casteque in orationibus frequentes, atque assidui sint, & in pietatis Christianæ exercitationibus versentur. Ut pridie Solennitatis jejunent, ut & in Solennitate, & reliquis deinceps septem diebus, ad Vespertinum & Matutinum, aliarumque Canoniarum Horarum Officium, & Missæ solennis Sacrum conveniant; atque processioni solenni, cereum accensum manibus gestantes, pie intersint.

Ut autem ad ea Christianæ pietatis officia fideles magis inflammentur, per eosdem Parochos, Indulgentiæ a Summis Pontificibus URBANO IV. CLEMENTE V. MARTINO item V. & EUGENIO IV. unicuique pœnitenti, & confessio concessæ evulgentur. Sunt autem hæ:

*Tomus VIII. Concilior. German.*

V v v v

Jeju.

Jejunantibus pridie Solennitatis Indulgentia concessa annorum centum. Iis, qui primis Vesperis, quive in Solennitate Missæ solenni, Horis matutinis, ac secundis Vesperis intererunt, pro singulis hujusmodi Officiis, concessa est Indulgentia centum annorum. Qui Primæ, Tertiæ, Sextæ, Nonæ, & Completorii Officiis aderunt, Indulgentia iis datur quadraginta annorum pro singulis Horarum Officiis. Qui intra Octavam Vespertino, Matutinoque Officio, & Missæ solennis Sacro aderunt, Indulgentia item datur annorum centum.

Ut Processio, quæ in celebritate Corporis Christi, ubique fieri solet, debita reverentia, solennique apparatu, atque omni religioso cultu, peragatur, tam in hac Urbe, quam per universam Archi-Diœcesim, viæ, per quas transire debet, diligenter mudentur, & auleis, pannis, picturis, floribus, frondibusque virentibus, pro Civitatum, locorumve ratione, ornentur. In ea autem, & in aliis item, in quibus Sanctissimum Sacramentum deferretur, Canonici singuli, & qui dignitates obtinent, tam in Metropolitana, quam in Collegiatis Ecclesiis, & cæteri item Clerici, cereas faces, candelasve forma convenienti accensas, aperto capite, ferant.

Cum vero occasione orationis quadraginta horarum, vel alia gravi de causa a Nobis, Officialive nostro approbata, Sacra Eucharistia exponenda est; ea super altari majori collocetur, debito apparatu, & ornatu, ac convenienti cereorum accensorum numero religiose adhibito.

Tam in exponendo, quam in reponendo Sacramento processio fiat per Ecclesiam cum ipsa Sacra Eucharistia, adhibito convenienti apparatu, & debito luminum numero, ut in solennibus processionibus observari convenit.

Dum illa in altari exposita est, pro ejusdem custodia, semper unus saltem Sacerdos, Sacrisve initiatus, tanquam in statione collocatus, excubet, atque in assidua precatatione, sanctaque meditatione vigilet.

### *XIX. De Sacrosancto Missæ Sacrificio.*

**U**T Sanctissimum Missæ Sacrificium, in quo idem ille Christus continetur, & in altari quotidie a Sacerdotibus, in remissionem peccatorum, incruente immolatur, qui in ara Crucis semel se ipsum cruenta morte obtulit; ea, qua decet, cordis munditia, & puritate, atque exterioris devotionis, ac pietatis specie peragatur, hæc decernimus.

Sacerdos, qui, ut ait Apostolus, inter homines in iis, quæ sunt ad Deum, electus est, ut offerat dona & sacrificia pro peccatis populi, secum ipse frequenter consideret, quanti sit munus sibi commissum, victimam illam sacratissimam pro peccatis populi immolandi, & uti sæpius celebrare debet, ne tanto, tamque admirabili dono & beneficio fraudet Ecclesiam Dei; ita quoque eum eniti par est, ut omni animi pietate, ac religione Sacrosancta illa, & illibata offerat dona, ne cum aliis opem imploraverit, ipse sibi exitium paret. Celebraturus igitur diligenter prius discutiat conscientia suæ latebras, & si peccati mortalis sibi conscius fuerit, quamvis sibi contritus videatur, absque præmissa Sacramentali Confessione, ad Missam faciendam non accedat, etiamsi ex officio celebrare teneatur, modo non desit ei copia Confessoris. Quod si necessitate urgente, absque prævia confessione, celebraverit, quamprimum confiteatur. Mente præterea recogitet, ac pie meditetur, Mysteriorum, quod tractaturus est, altitudinem, atque excellentiam, propriamque sui ipsius miseriam, ac vilitatem, & suum in diligendo Deo torporem, totumque se in immensam illius misericordiam projiciens, interno cordis clamore se tanto Hospite indignum esse cognoscat, & coram Domino fateatur.

Tum primæ Horæ Officio, aut saltem Matutino, & Laudibus persolutis, ad Sacristiam, Oratoriumve se recipiat; & aliqua ex orationibus, quæ ante Missam recitare præscribuntur, in Missali seu tabella ibi appensa notatis, recitata; ad lavacrum manus abluat, & sacris

facris vestibus se induat; atque ad singula indumenta, singulas orationes dicere non omittat.

Nemo Sacerdos utatur calice e stanno, aliove, qui cupam saltem interiorius deauratam non habeat; neque item calice non consecrato, seu corporali non benedicto; neque præterea urceolis, ampullisve fictilibus, alioquin suspensionis a Divinis pœnam subibit.

Super Altare habeantur tres mappæ congruæ, & mundæ, sine quibus nullibi celebretur. Corporale sit mundum, & amylo illitum. Stola, & manipulus sint ejusdem materiæ & coloris, quibus constat planeta. Missale sit congruum, non lacerum, & habeat registrum sive cordulas decentes. Purificatorium item mundum & præscriptæ magnitudinis. Et breviter: paramenta omnia, & altaris ornamenta sint congrua, & ea forma confecta, quam superius præscripsimus.

Quod ad Episcopalis Ordinis observantiam, in Ecclesia institutum est, id omnino servetur, ut quo in altari nos Missam fecerimus, ne illo die in eodem alius quivis Sacerdos celebret, nisi nostro concessu. Idem observetur in altari, in quo quivis Episcopus celebrarit.

In Missæ celebratione, omnia sedate, graviter, ac districte pronuntiare studeat, nimiam quidem fugiens prolixitatem, atque inprimis properam, ac indevotam celeritatem.

Missæ initio Psalmum, qui incipit: *Judica me Deus*, atque in fine Sancti Joannis Evangelium (*In principio erat Verbum*) nunquam omittat, nisi iis diebus, quibus ex Missalis Rubricis, aliter est observandum. Ea autem ad ipsum altare, non in accessu a Sacristia ad altare, neque in recessu ab altari in Sacristiam pronunciet.

In iis autem, quæ ex Sanctæ Matris Ecclesiæ instituto, secreto dicuntur, pronuntiandis, cautionem illam adhibeat, ut distinctum quidem verborum sonum ipse percipiat, at ne ulla ratione ab iis, qui præsentibus sunt, audiat. Canonem vero, quanta maxima potest attentione, pronuntiet, ac

*Tomus VIII. Concilior. German.*

præsertim Sacrosancta illa verba, quibus Corpus, & Sanguis Domini conficitur; quæ quidem non memoriter, sed ex tabella, ad omnia altaria adhibenda, sive ex Missali, recitari debent, ne errorem aliquem in consecratione committi contingat.

Sumpto Sanguine, primo vino tantum Sacerdos se purificet; deinde digitis vino, & aqua dilutis, ablutionem sumat.

Cum in medio Missæ manus abluerit; videat, ne altaris mappa illas abstergat, sed linteolo ejus rei causa in Sacristia allato.

Missæ absoluta, in Sacristiam, eadem gravitate, redeat, & preces pro gratiarum actione recitando, sacra vestimenta exuat; iterumque ablutis manibus, ad Oratorium se recipiat, ubi aliquantulum pie meditetur.

Cum ad altare accedit, birreto Clericali quadrato caput opertum habere procuret, vel saltem parvulo birreto, quem mitram Sacerdotem vocant; neminemque alloquatur, vel cuiquam respondeat. Sacræ Cruci se profunde inclinet. Sanctissimo Sacramento intra tabernaculum posito, capite operto, reverentiam faciat, altero genu usque ad terram flexo. Si autem erit expositum, idem faciat capite aperto; quod etiam servandum est, cum ante altare, in quo Sacra Eucharistia asservatur, est transeundum.

Ne birretum, aut linteolum, ad nares emungendas destinatum, hostiarumve scatulam seu claves, & id generis alia, super altari ullo pacto ponat.

Cum autem ad altare accesserit celebraturus, neminem plane expectabit, neque cœptam Missam ad cujusvis instantiam iterum incipiat.

Si coram aliquo Cardinali, Legato, seu Nuntio Apostolico, aut hujus Ecclesiæ Archi-Episcopo pro tempore existenti celebret; dicto Evangelio, ad Sacrarum Cæremoniarum præscriptum, deferatur ei liber Evangeliorum, sive Plenarium deosculandum, & pariter post *Agnus Dei*, pacis tabella, quam Pacificale dicunt; & antequam in fine Missæ benedicat, faciat

V v v v 2

ipfi



ipsi Cardinali, Legato, seu Nuntio Apostolico, vel Archi-Episcopo, profundam reverentiam.

Atque ut multa paucis comprehendantur; accurate studeat, nullam ex statis cæremoniis, ac ritibus, antiquissimo hujus Sanctæ Ecclesiæ Pragensis Missali connotatis, prætermittere. Quod Missale a piis, & doctis viris jussu nostro recognitum, ad majorem hujus Metropolis, & Archi-Diœcesis nostræ utilitatem, & decorem, typis excudetur.

Genu flexiones in Missæ celebratione, aliisve functionibus Ecclesiasticis, tam a Canonicis, quam ab aliis Sacerdotibus, & Clericis quibuscunque faciendæ, semper in plana terra, nempe altero genu usque ad terram flexo, fiant, non autem sæcularium more, pedem retrahendo.

Illud præterea observandum est, ut quoties Canonici directe transeunt ante altare, ubi Sanctissimum Sacramentum non asservatur, vel ante Archi-Episcopum pro tempore existentem, caput & humeros profunde inclinent; cæteri vero Sacerdotes, & Clerici, Altari, & Archi-Episcopo distinctas reverentias faciant, altero genu ad terram flexo.

Ut autem in posterum in Sacrarum Cæremoniarum pericia debita adhibeatur diligentia; iis omnibus inhibemus, qui Sacerdotali Ordine initiabuntur, ne Missam primam, quas Primicias dicunt, celebrare audeant, nisi prius a Basilicæ nostræ Metropolitanæ Archi-Diacono, aliove, cui id curæ dederimus, in Sacris Cæremoniis obeundis approbati fuerint, & facultatem a Nobis, Officialive nostro scripto obtinuerint, quæ per verbum PLACET, exprimi solet, pœna suspensionis contravenientibus proposita, quam eo ipso subeant.

Sumptuosa autem convivia, ludos, choreas, & omne inanium oblectamentorum genus, aliosve abusus, qui novæ Missæ celebrandæ causâ irrepserunt, tollimus, & abrogamus.

Præterea ut aliqua ineatur ratio, qua Sacerdotes rite ordinati, & nulla censura Ecclesiastica innodati, & nulli

alii ad celebrandam Missam admittantur; statuimus, ut nemo Clericus, vel Laicus, in suis sæcularibus Ecclesiis, Capellis, vel Oratoriis, quamvis a Nobis probatis, etiam si Juris Patronatus fuerint, quemquam Sacerdotem sæcularem, qui advena sit, vel peregrinus, celebrare patiatur, nisi ostenderit formata, literasve testimoniales, seu dimissorias Ordinarii sui, intra sex mensium spatium ad summum datas, & a Nobis, Officialive nostro recognitas, & scripto comprobatas: in qua recognitione exhibere teneantur testimonium scriptum, de eorum vita & moribus ab iis Ordinariis, in quorum Diœcesi, post literas dimissorias a suo Episcopo obtentas, aliquamdiu permanferint.

Quod autem de Sacerdotibus sæcularibus præscripsimus, illud etiam locum habere volumus in Regularibus cujusvis Ordinis, & instituti, etiam exemptis, qui absque suorum Superiorum facultate, literisque testimonialibus de eorum vita & moribus, nulla ratione admittantur ad celebrandum in Ecclesiis, Oratoriisve, seu Capellis, etiam Laicalibus, nostræ Archi-Episcopali jurisdictioni subjectis.

Sacerdotes, qui publice & notorie criminosi fuerint, a Missæ celebratione abstineant, nisi emendatæ vitæ indicia certa dederint.

Una tantum Missa celebretur in die a quolibet Sacerdote sæculari, vel regulari: excipimus tamen celebritatem Nativitatis Domini, in qua, ex Sanctæ Ecclesiæ instituto, singuli Sacerdotes tres Missas celebrare possunt. Qui extra prædictam solennitatem quavis occasione vel prætextu, pluries celebrarit, suspensionem a Divinis ipso facto incurrat.

Missæ nec ante auroram, nec post meridiem celebrentur, cum id a Sacris Canonibus abhorreat, excepta nocte Nativitatis Domini, in qua post mediam noctem, statim Missa prior fieri potest, & a quolibet Sacerdote ante auroram celebrari permittitur, quod etiam a Regularibus fervetur. Neque ferendum est, quod alicubi Sabbato Sancto, seu in Vigilia Assumptionis

Bea-

Beatæ Virginis, aliisque quibusvis diebus, vesperi seu omnino post meridiem, Missa fiat, neque etiam vigore cuiusvis privilegii a Sede Apostolica, ante Concilium Tridentinum obtenti; huiusmodi etiam privilegia peculiari PII Papæ Quinti Constitutione abrogata sunt. Qui contraria fecerit, suspensionem a Divinis ipso facto incurrat.

Antiquissimus usus celebrandi cum cantu, per totum Adventum, summo mane, Missam de Beata Virgine, quæ *Rorate* appellatur, laudabilis est & fidelium devotioni, ac pietati apprime accommodatus; ideo in omnibus Ecclesiis hujus Metropolis, & Archi-Diœcesis nostræ perpetuo retineri poterit, & observari.

Nullus Sacerdos, etiam Regularis, in privatis ædibus, aut omnino extra Ecclesiam & Oratoria, quæ Divino tantum cultui dicata, & a Nobis approbata sint, Missam celebret.

Oratoriorum autem ædificatio, aut usus ad Missam in eis celebrandam, non facile, sed magna de causa permitti debet, in eis enim designandis, vel probandis hæc servari volumus: ne sint in interiorum ædium partibus, in quibus Domini, vel familia frequentius versentur, sed commodo & honesto loco, a cubiculis, tricliniis, & ab aula separato; atque ad templi formam, & regulam propius accedant.

In huiusmodi vero Oratoriis nemo dormiat, nihilque fiat, tractetur, aut exerceatur, quod profanum sit; nullæ cistæ profano usui destinatæ, nihilque ex domestica suppellectile, nihilve aliud sacris locis alienum, in eis asservetur, alioquin eo ipso interdicta sit in illis Missæ celebratio.

Altare habeant forma præscripta constructum, cum tabula lapidea, petraque sacrata, quod altare portatile dicunt, omnibus ornamentis, & paramentis instructum, ut superius statui-  
mus, cum de Altaribus egimus.

Videant autem ii, quibus concessa fuerit facultas huiusmodi Oratoriorum, ne passim in eis celebretur, sed tantum in calu necessitatis, præsertim infirmitatis.

Diebus autem Festivis, & præcipue solemnioribus, non in privatis Oratoriis, sed in Ecclesia Metropolitana, Collegiata, seu Parochiali, si fieri potest, Missæ Sacro intersint. Nullo autem modo in huiusmodi Oratoriis (extra diem festum Patrocinii) Missa cum cantu celebretur; nec Sanctissimum Sacramentum expositum teneatur ad adorandum, quavis occasione vel causa, neque etiam in festo Patrocinii, neve in majori hebdomada sub Domini sepulchri nomine, & prætextu, cum Sacra Eucharistia in iis tantum Ecclesiis exponenda sit, in quibus continuo asservari consuevit, ut in Collegiatis, & Parochialibus. Sacerdotes in hoc delinquentes, noverint se a Nobis graviter puniendos.

Nulli Sacerdoti sæculari, vel regulari, etiam si generalem celebrandi facultatem a Nobis, Officialive nostro obtinuerit, in Monialium Ecclesiis, Missæ Sacrum facere licet, præterquam cum nominatim id concessum fuerit.

In nostra Metropolitana Basilica nemo ad altaria constructa super tumulis Sanctorum Patronorum celebret, absque licentia Decani ejusdem Ecclesiæ.

Hostiæ in Missa consecrandæ, non a laicis personis, sed ab Ecclesiasticis, Monasteriisque sumantur. Eæ autem azymæ sint, non fermentatæ, atque ex sola aqua naturali, & farina confectæ, non mucidæ, non putres, non maculis aspersæ, non contractæ; sed omnino recentes. Et quæ ante mensam coctæ sint, nullo modo consecrentur.

Vinum purum adhibeatur in Missa, quod non acidum, non corruptum, non herbis, aliisque rebus conditum sit, atque ob decorem & munditiam, si fieri possit, album habeatur.

Clericus, vel alius Laicus rite instructus interserviat Celebranti; id autem munus nulla ratione obeatur a foemina quavis, etiam si Monialis sit.

Ante Missæ cuiusque initium, etiam si sine cantu fiat, duæ saltem candelæ accendantur, quæ e cera omnino sint, & decenti crassitudine, non autem e sevo. Eæ autem nullo modo extinguantur, priusquam ultimum Missæ Evangelium recitatum sit.

Antiqua & laudabilis hujus nostræ Ecclesiæ consuetudo orandi in Missarum celebratione pro Papa, Antistite, Rege, ac Regina, perpetuo servetur, ac pie retineatur.

Cum Corpus Domini nostri JESU CHRISTI elevandum est in Missa conventuali, parochialive, signum detur campanæ sono, cujus significatione fideles, qui in Ecclesia Missæ Sacrificio non interfunt, admoniti, ad tanti mysterii, ac beneficii recordationem animum excitantes, mente supplici religiosas preces adhibeant.

Feria V. Ccenæ Domini & Sabbato item Sancto in nostra Metropolitana, atque in unaquaque Ecclesia Collegiata, Parochialive, unica tantum Missa celebretur; unica præterea Missa fiat in Ecclesia Monialium. In aliis autem Ecclesiis, Oratoriisve, etiam laicalibus non celebretur hoc triduo.

Feria sexta in Parasceve nullibi fiat Missa cum consecratione ex sacris ritibus. Canonici autem omnes, ac reliqui item Sacerdotes, & Clerici in hac urbe degentes, in solemnem ejusdem diei officio, Sacramentaliter confessi, Sacram sumant Eucharistiam, habeantque Sacerdotes in ejusmodi sumptione stolam a collo pendentem, supra superpelliceum, ad Sacrorum Canonum præscriptum.

Quo die Summus Pontifex Romanus Consecrationis, Coronationisve insignia accepit, pietatis ratio postulat, in eo precationem a Clero adhiberi, quamobrem tam in Metropolitana, quam in omnibus Collegiatis Ecclesiis, quot annis, eo die, Missa solennis celebretur, ut in festo Cathedræ Sancti Petri, in albo apparatu, cum sola oratione, quæ solet dici pro Papa: *Deus omnium fidelium Pastor & Rector*. Et dicatur: *Gloria in excelsis*, ac *Credo*, cum Præfatione de Apostolis. Parochi omnes eandem Missam faciant absque cantu. Si vero hujusmodi Anniversarium in die aliquo festivo venerit, Missa de Festo celebretur, cum paramentis Festo convenientibus, & in ea pro Papa orecur statuta illa oratione: *Deus omnium fidelium*. Atque ob eam quidem causam, in Anniversario hujus Ecclesiæ Calendario,

Consecratio Pontificia die suo notetur, tum etiam de more denuntietur; ut universus Clerus, & populus item, excitetur ad preces pro illo adhibendas.

Præterea ex FELICIS Papæ Quarti Decreto, singulis annis, in Anniversario Consecrationis Archi-Episcopi hujus Ecclesiæ Pragensis, pro tempore existentis, fiat Missa solennis, eodem modo, & apparatu, atque iisdem in Ecclesiis, ut diximus pro Coronatione Summi Pontificis, cum eadem oratione: *Deus omnium fidelium Pastor*. Sed loco nominis Papæ, dicatur nomen Archi-Episcopi, & post verba illa: *Ecclesiæ tuæ*, adjiciatur *Pragensi*; & dicatur *Præfatio de Apostolis*. Ut autem & Clerus, & populus item, invitetur ad preces eo die pro Archi-Episcopo fundendas, in hujus Ecclesiæ Calendario notetur quotannis, Consecratio Archi-Episcopi.

Capellarum oneribus, & Missarum numero, cuivis beneficio Ecclesiastico, fundatione, aliove nomine adjuncto, unusquisque, prout sui muneris partes requirunt, satisfaciat. Quibus autem in Ecclesiis, ob multa, variaque defunctorum legata, Missas usque adeo multas celebrari oportet, ut pro ratione singulorum dierum, quos testamento, aliave ultima voluntate, testatores præscripserunt, muneri, quod eorum piis voluntatibus debetur, ob Sacerdotum penuriam satisfieri non potest, aut eleemosyna eo nomine assignata adeo tenuis est, ut non facile inveniantur, qui velit huic se muneri subicere; unde depereunt piæ testantium voluntates, & eorum conscientias, ad quos prædicta spectant, onerandi occasio datur; Ecclesiarum Rectores, sive Parochi, aliive, quorum interest, omnia sigillatim Nobis significant; ut re diligenter perspecta possimus in illis Ecclesiis, quas hac provisione indigere cognoverimus, statuere circa hæc, quidquid magis ad Dei honorem, & cultum, atque Ecclesiarum utilitatem videbimus expedire; ita tamen ut in singulis Missis, quæ jure reductionis celebrabuntur, eorum defunctorum commemoratio fiat, qui pro suarum animarum salute legata ad pios usus reliquerunt. Idque per intentionem applica-



plicationis Missarum, per preces in secundo *Memento*; & per *Collectas* in Missis fieri poterit.

Nemo Sacerdos sæcularis, vel Regularis, quavis occasione, vel causa, in Ecclesia, vel alibi, Missam non integram, quam Siccam vocant, absque Corporis & Sanguinis Domini nostri consecratione, & sumptione celebrare, seu recitare audeat, alioquin suspensionem a Divinis ipso facto incurrat. Qui vero hujusmodi Missis interfunt, Ecclesiæ præcepto, de Missa die festo audienda, non satisfaciunt; imo in hoc etiam, graviter delinquant.

Quæ in Missa ex sacris ritibus recitanda non sunt, nemo pro libitu suo, absque Sanctæ Ecclesiæ auctoritate, omittere, mutareve potest, ideo edicimus, ut in Missis omnibus, etiam iis, quæ cum cantu fiunt, Epistola & Evangelium latino sermone, ut in Missali connotata sunt, omnino legantur. Ut autem fidelium utilitati & devotioni, quantum cum Deo possumus, prospiciamus, permittimus, ut in Ecclesiis, in quibus lingua vernacula legi consueverunt, illa postquam latino idiomate pronuntiata fuerint, etiam eadem lingua vernacula, clara & intelligibili voce, absque cantu proferantur, dummodo de libro, qui a Nobis scripto approbatus fuerit, & non aliunde desumantur.

Cum Summus Pontifex Romanus, universalis Ecclesiæ Pastor, & Parens, ex hac vita migrarit, nuncio certo mortis allato, in omnibus Ecclesiis, omnium campanarum sono, ut pro mortuis fit, de more pulsetur; tum in nostra Metropolitana, & in Collegiatis Ecclesiis, Missa solemnis, & Officium ex ritu pro defunctis, pro eo pie celebrentur, atque Sacerdotes singuli Missam faciant. Præterea iisdem in Ecclesiis, Missa de Spiritu Sancto cum cantu fiat, & donec de novo Successore provisum fuerit, preces ad Deum continuo offerantur, pro opportuna novi Pontificis electione impetranda, qui Ecclesiam digne ac fructuose gubernare possit.

Pro Archi-Episcopo item, qui Pater, Magister, Duxque Cleri, & populi

Pragensis est, cum ex hac vita migrare contigerit, & Missa pro defunctis pariter celebretur, & preces fiant, pro optima novi Antistitis electione, atque hac de causa Missa de Spiritu Sancto in omnibus Ecclesiis cum cantu celebretur.

## XX. De Pœnitentia.

**I**Nter omnes nostræ Pastoralis curæ sollicitudines, quæ innumeræ, gravissimæque sunt, nulla profecto est, quo Nos magis urgeat, quam ut oves nostræ fidei concreditæ, ab iis Confessariis gubernentur, qui & vitæ probitate, & scientia, aliisque virtutum ornamentis decorati, eas ad æternæ beatitudinis pascua feliciter perducere possint. Quanto enim studio ac diligentia Pœnitentiæ Sacramentum ministrandum sit, id unum, si recte consideretur, facile ostendere potest, quod post Baptismum in peccatum lapsis, nulla alia prorsus ratione remitti peccata, aut condonari, cœlumque aperiri, aut in Dei gratiam restitui unquam liceat, quam hujus Sacramenti virtute, atque ope, si tamen rite, susceptum, ministratumque erit. Ne igitur tantum, tamque necessarium in populo Dei Sacramentum, negligenter, & imperite ministratum, & suscipientibus inutile evadat, & ministrantibus exitium pariat, curandum est, ut ii tantum Sacramentalibus confessionibus audiendis præficiantur, qui hujusmodi munus non perite modo, sed etiam prudenter ministrare noverint, ac summo opere velint, ut præter Ordinis potestatem, quam quidem, cum Sacerdotio initiati sunt, susceperunt; præter jurisdictionis auctoritatem, quam recipiunt, cum ad audiendas confessiones approbantur, doctrina etiam, prudentia & charitate præditi, atque exculsi sint, ut iis virtutibus instructi, doctrina quidem recte norint, ex variis peccatorum generibus, quæ gravia, quæve levia sunt, pro cujusque hominis ordine, & genere dijudicare; prudentia tanquam sapientes Medici, singulis animi morbis opportuna, atque optima præbeant medicamenta; & charitate Dei accensi, zeloque salutis animarum

marum excitati, Christi fidelibus omnia præstent salutaria adjumenta.

Nullus igitur Sacerdos, sive secularis, sive cujusvis Ordinis & instituti Regularis, confessiones secularium, etiam Sacerdotum, aut Clericorum audiat, nisi vel Beneficium Parochiale, sive animarum curam legitime obtineat, vel a Nobis, Officialive nostro approbationem & facultatem in scriptis prævio examine, vel sine eo, si ita judicabimus expedire, obtinuerit; alioquin suspensionem a Divinis ipso facto incurrat. Absolutio autem Sacramentalis ab illis collata, qui jurisdictionis potestatem non habent, irrita est, & invalida.

Confessionis sacræ audiendæ munus Sacerdotibus Regularibus, quamvis ad illud ob peritiam, scientiamque idoneis, nullo modo commitemus, nisi a Monasterii Præfecto testatum literis fiat, eos vitæ disciplina, moribusque probatos esse, ac dignos præterea, quibus id muneris imponatur. Quo in testimonii genere, ipse videat, ne quid testificando admittat, quod religiosæ conscientiæ suæ fraudi sit, labemve afferat.

Ut autem unusquisque sciat perpetua capita, super quibus examinabuntur ii, qui ad aliquod Beneficium Parochiale obtinendum, vel ad Confessiones audiendas præficiendi sunt, ea hic notari volumus.

Quare fuit institutum Sacramentum Pœnitentiæ. Quæ ejus materia, quæ forma, qui proprius Minister.

Quæ differentia sit inter peccatum mortale & veniale.

Qui sint effectus peccati mortalis.

Quæ sunt Regulæ cognoscendi, an peccatum sit mortale, nec ne.

Quæ circumstantiæ peccatorum sint necessario explicandæ in Confessione Sacramentali.

Quid sit occasio peccati, quoruplex, & quæ vitanda sub pœna peccati mortalis.

Quid sit cogitatio morosa, & quæ sit peccatum mortale.

Quæ sint essentialia Sacramenti Pœnitentiæ.

De differentia contritionis ab attritione.

De essentialibus Sacramenti Matrimonii, ejusque impedimentis tam dirimentibus, quam impediens tantum.

De furto, & quæ quantitas furti constituat peccatum mortale.

De juramento & ejus comitibus, seu conditionibus.

De superstitionibus, quæ regula tenenda sit, ut cognoscatur, quando sint peccatum mortale.

Quæ ratio ineunda sit in examinando pœnitente, cum Confessarius id faciendum necessario judicaverit.

Cætera Examinatorum judicio relinquuntur; qui aliquod cum eis experimentum facere poterunt: De Censuris, & earum effectibus; de Votis, eorumque obligatione, commutatione & irritatione; de Usuris; de conditionibus venditionis cum termino retrovendendi, & demum de restitutione tam in bonis animæ, quam famæ, corporis, & cæterarum rerum.

Non licet per literas, seu internuncium Confessario absenti peccata Sacramentaliter confiteri, & ab eodem absente absolutionem obtinere, ut Decreto CLEMENTIS VIII. auditis votis Patrum Theologorum, ac re cum Illustriss. Cardinalibus contra hæreticam pravitatem generalibus Inquisitoribus diligenter, & mature discussa, declaratum est.

Qui aliquid contra prædicti Pontificii Decreti præscriptum admiserit, pœnas, & censuras in eo inflictas ipso facto incurrat.

Considerent Parochi, aliive Confessarii diligenter tenorem suæ auctoritatis, ne in propriæ, & aliorum salutis detrimentum, jurisdictionis sibi traditæ limites excedendo, falcem mittant in messem alienam.

Ut in animarum salute procuranda, in Pœnitentiæ Sacramenti ministerio, uberiores fructus in Domino reportare valeant, Confessariis omnibus, etiam Regularibus, edicimus, ac jubemus, & singulis annis feria quarta

Cinc-

Cinerum, qui in hac urbe sunt, ad Nos, sive ad Officiale nostrum; qui vero per Archi-Diœcesim, ad proprii districtus Archidiaconum Diœcesanum accedant, ut ea monita accipiant, quæ in confessionibus audiendis, fidelibusque ad Sacram Communionem Paschalem admittendis, opportuna iudicabimus.

Cum peccata post Baptismum commissæ nulla alia ratione absolvi possint, ut superius diximus, nisi per Sacramentalem Confessionem, quæ fieri debet, non generatim, ac publice, sed speciatim ab unoquoque pœnitente; qui ad legitimi Sacerdotis aures, peccata sua, eorumque numerum, & circumstantias necessario explicandas, sigillatim & secreto confiteri tenetur; ut Confessarius, tanquam Judex, actum judiciale, ex Divina institutione, in eum exercere, & sententiam proferre valeat; nullo modo ferendum est, plurium confessiones ab eodem Sacerdote simul, & turmatim audiri; ideo decernimus, ne Sacerdos quisquam id sacrilegii admittere audeat, ut plures, sive adultos, sive impuberes, ita turmatim in Confessione Sacramentali, contra Christi Domini institutum, & morem in Ecclesia Catholica receptum, simul audire attentet, pœna excommunicationis proposita, ipso facto incurrenda.

Nemo Confessarius sæcularis, vel Regularis Sacramentum Pœnitentiæ Monialibus nostræ Archi-Episcopali jurisdictioni subjectis, ministrare audeat, etiamsi ad confessiones audiendas, in hac Civitate & Archi-Diœcesi nostra, generatim admissus fuerit, nisi specialem facultatem id obeundi, a Nobis, nostrove Officiali, scripto exaratam obtinuerit; alioquin excommunicationem ipso facto incurrat.

Ad populi disciplinam maximo-pere spectat, ut atrociora quædam & graviora crimina, non a quibus Confessariis indifferenter absolvantur; unde merito Pontifices Maximi causas aliquas criminum graviores suo peculiari iudicio reservare consueverunt; quod idem Episcopis omnibus, in sua cuique Diœcesi, licere certum est, pro illis in sub-

ditos tradita, supra reliquos inferiores Sacerdotes, auctoritate. Ut igitur infrascriptorum delictorum atrocitas ab omnibus cognoscatur, & eorum proclivitas diligentius rescetur, in populi Nobis commissi ædificationem, ipsorum absolutionem Nobis reservamus; Confessariis Sacerdotibus quibuscunque, etiam Regularibus, inhibentes, ne quempiam iis culpis, criminibusve irretitum, absque facultate nostra, scriptis obtenta, absolvere attentent, etiam quorumcunque privilegiorum jure, tam Regularibus ipsis, quam Confratriis, Ecclesiisve quibusvis concessorum, prout a Sancta Sede Apostolica sæpius declaratum fuit; alioquin excommunicationis pœnam ipso facto incurrant; atque ejusmodi absolutionem nullius roboris, ac momenti fore decernimus. Omnem autem facultatem, cuivis hactenus concessam, ab iis casibus, vel ab eorum aliquo absolvendi, penitus abrogamus.

1. Qui libros, seu scripta Hæreticorum, vel quavis alia ratione prohibita, penes se retinuerint, vel legerint, aut imprefferint, seu imprimi fecerint, non absolvantur, nisi prius libros, & scripta ejusmodi Nobis consignaverint, vel cum effectu transmiserint. Qui autem Hæreticorum libros hæresim continentes, vel de Religione tractantes, absque facultate Sedis Apostolicæ, legerint, aut tenuerint, imprefferintve, seu quomodolibet defenderint, publice vel occulte excommunicationem incurrant ipso facto, Sedi Apostolicæ reservatam.

2. Qui nefaria consuetudine in Deum, vel sanctos atroces blasphemias protulerint.

3. Exercentes Sodomiam; quive cum brutis coierint.

4. Homicidium voluntarium committentes, vel illud procurantes, si sequatur effectus. Quive subditos suos, seu quosvis alios, absque ordinario judiciali processu, ultimo supplicio damnaverint.

5. Qui abortum procurarint juxta Constitutiones SIXTI V. & GREGORII XIV.

X x x x

6. Qui



6. Qui cum aliqua Moniali luxuriae peccatum mortale, etiam solo tactu impudico, admiserint.

7. Qui secundo vel propinquiori gradu consanguinitatis, vel affinitatis, vel cum sibi cognatione spirituali junctis, incestum admiserint.

8. Concubinarij publici, sive Sacerdotes, sive alij.

9. Qui Legatorum piorum solutionem longius biennio distulerint.

10. Venefici, & qui potiones dederint, ut quis moriatur, aut morbo tabescat, vel insaniat.

11. Qui ad magicas artes, veneficia, incantationes, ligaturas, & alia hujusmodi, Eucharistia, Sacrisve rebus usi fuerint. Si autem sit error in intellectu, excommunicationem ipso facto incurrunt, Sedi Apostolicæ reservatam.

12. Qui publice, cum scandalo, & absque facultate nostra, aut saltem Parochi proprii, Quadragesimæ tempore, alijsve diebus ab Ecclesia statutis, carnibus vesci præsumperint.

13. Qui post Sponsalia de futuro se carnaliter cognoverint, priusquam Matrimonium inter eos legitime per verba de præsentis sit celebratum.

14. Qui parvulos suffocarint.

15. Adulterium fide data, nempe cum alter conjugum promittit ei, cum qua adulteratur, se contracturum Matrimonium cum illa, sive copula præcedat promissionem hujusmodi, sive subsequatur.

16. Clerici in Sacris constituti, qui Matrimonium de facto contraxerint; & sunt ipso facto excommunicati; quive hujusmodi Matrimoniis consilium & assensum præstiterunt.

17. Qui incendium fecerint, nempe antequam denuntientur, ac post denuntiationem eorum absolutio est Summo Pontifici reservata.

Attendant præterea Confessarii, ne a censuris quovis modo Summo Pontifici, Sédive Apostolicæ reservatis, quempiam extra articulum mortis absolvant, alioquin excommunicationem ipso facto subeant, & irrita est, ac nulla hujusmodi absolutio. Quod si quem in articulo mortis ab aliqua cen-

sura reservata absolverint; illum monent, ut si convaluerit, ad Superiorem, cui reservata est, quamprimum poterit, se præsentet; alioquin reincidet in eandem.

Canones item pœnitentiales memoriæ mandent, ut singulis criminibus congruam satisfactionem injungere valeant, simulque ipsis pœnitentibus, ut promptius ac libentius Confessarii præcepta & monita exequantur, diligenter exponant, quam benigne hodie Ecclesia Sancta gravissimas antiquorum Canonum pœnas in mitiores commutandas censuerit.

Populos autem infra annum sæpe, ac præsertim Adventus, ac Quadragesimæ initio, Parochi accurate de iis instruant, quæ ad peccatorum remissionem hoc Sacramento obtinendam necessaria sunt; vera scilicet, ac profunda cordis contritio, pura atque integra oris confessio, prompta atque exacta operis satisfactio; quæ quidem ex Catechismi Romani fonte hauriri facile poterunt, ac populis prædicari.

Confessarii facultatem habentes absolvendi aliquos ab excommunicatione majori, vel ab interdicto Ecclesiastico, ne eos a peccatis absolvant, nisi prius a censuris legitime absoluti fuerint.

Cum aliquem pœnitentem auditurus est Confessarius quisque, superpellicem decens, & stolam omnino induat, & infra scriptis precibus ad tantum ministerium se pareat, ac pœnitentem ipsum Summo Deo diligenter commendat.

*Veni Sancte Spiritus, reple tuorum corda fidelium, & tui amoris in eis ignem accende. Kyrie eleyson. Cbriste eleyson. Kyrie eleyson. Pater noster.*

*V. Et ne nos inducas in tentationem,  
R. Sed libera nos a malo.*

*V. Cor mundum crea in me Deus,  
R. Et Spiritum rectum innova in visceribus meis.*

*V. Redde mihi letitiam salutaris tui,  
R. Et Spiritu principali confirma me.*

*V. Docebo iniquos vias tuas,  
R. Et impii ad te convertuntur.*

*V. Li-*

*V. Libera me de sanguinibus Deus, Deus salutis meæ,*

*R. Et exultabit lingua mea justitiam tuam.*

*V. Domine exaudi orationem meam,*

*R. Et clamor meus ad te veniat.*

*V. Dominus vobiscum,*

*R. Et cum spiritu tuo.*

#### OREMUS.

**D**omine DEUS Omnipotens, propitius esto mihi peccatori, ut digne possim tibi gratias agere, qui me indignum, propter tuam misericordiam Ministrum fecisti officii Sacerdotalis, & me exiguum, humilemque mediatorem constituisti ad orandum, & intercedendum ad Dominum nostrum Iesum Christum, Filium tuum, pro peccatoribus & ad penitentiam revertentibus. Dominator Domine, qui omnes homines vis salvos fieri, & ad agnitionem veritatis tuæ venire; qui non vis mortem peccatorum, sed ut magis convertantur & vivant; suscipe orationem, quam fundo pro famulis, & famulabus tuis, qui ad penitentiam venerunt, ut des illis Spiritum compunctionis; resipiscant a Diaboli laqueis, quibus adstricti tenentur; ut ad te per dignam satisfactionem revertantur, per eundem Christum Dominum nostrum. *R. Amen.*

Prompte & alacriter ad hoc munus peragendum accedat Confessarius, & fideles benigne acceptet, eosque moneat, ut in Confessionis Sacramentalis actu, sint habitu demisso, & humili, depositis armis, genibus flexis, capite aperto, vultu demisso, manibus junctis ante pectus, considerantes se non coram homine peccatore, sed coram DEO Altissimo esse, ut agnoscendo, & confitendo veniam petant.

Moneant penitentem de obligatione examinis, discussionisve conscientiae suae, diligenter faciendae, antequam ad Confessarium accedat, ut omnia peccata mortalia, quorum, post diligentem huiusmodi sui discussionem, conscientiam habet, in confessione recenseat: etiamsi occultissima illa sint, & tantum adversus duo ultima praecepta Decalogi commissa, quae nunquam animum gravius sauciant, & periculosiora sunt iis, quae in manifesto admittuntur. Nam venialia, quibus a gratia Dei non excludimur, & in quae

frequentius labimur, sicuti recte & utiliter in confessionem dicuntur; ita etiam citra culpam taceri, multisque aliis remediis expiari possunt. Verum cum universa mortalia peccata, etiam cogitationis, homines, irae filios, & Dei inimicos reddant; necessarium est omnium etiam veniam cum aperta & verecunda Confessione Sacramentali a Deo quaerere; qui enim scienter aliqua retinent, nihil Divinae Bonitati per Sacerdotem remittendum proponunt: nam si erubescat ægrotus vulnus Medico detegere, quod ignorat, medicina non curat. Circumstantiae etiam, quae speciem peccati mutant, sunt necessario in Confessione Sacramentali explicandae.

Inter alia autem, quae fidelibus ad hoc Sacramentum accedentibus uberriam adferunt utilitatem, illud est praeceptum, ut Confessarius expectet, & excitet penitentem, ut peccata sua confiteatur, non expectatis Confessarii interrogationibus, quo diligentius conscientiae suae latebras discutiat, & admissa peccata apertius in confessione declaret. Cum vero id oportere cognoverit, interrogetur penitens de iis, quae necessaria, non quae inutilia, aut otiosa fuerint. At cum pueri, puellae de luxuriae culpis interrogari debebunt, ea cautio adhibeatur, ne quae antea ignorabant, in propriae salutis exitium fortasse a Confessario doceantur.

Peccata quaedam magis usitata, & quae maximo sunt fidelibus populis damno, studiosius persequatur, & praesertim contractus usurarios, aliosve quavis ratione injustos, crimen falsi testis, ebrietates, venereas amicitias, & ejusmodi.

Postquam penitentis conscientiam excusserit, illud sui muneris esse intelligat, ut remedia aliqua opportuna adversus tentationes, quibus ille maxime succumbere solitus est, sedulo doceat, atque adeo illum diligenter instituat nova aliqua spirituali vitae ratione, quam recte ineat.

Videat diligenter, ne quem absolvat, qui vel odium inimicitiaeve deponere nolit; vel restituere pro facultatibus

tatibus recuset alienum ; seu a statu peccati mortalis paratus non sit desistere, & occasionem similis peccati vitare ; qua de re doctrinas probatas studeat recte cognoscere, & secundum eas se se gerere.

Pro peccatis gravibus levissimæ pœnitentiæ non imponantur, alioquin, ut Canon ait, confuit pulvillos secundum Propheticum sermonem sub omni cubito manus, & facit cervicalia sub capite universæ ætatis, ad capiendas animas ; ideo Confessarius, qui dum cum confitentibus indulgentius ait, levissima quædam opera pro gravissimis delictis injungit, ex Sacri Concilii Tridentini sententia, alienorum peccatorum particeps fit. Concubinariis, atque iis etiam, qui pessimum blasphemandum plures annos retinuerunt, atque se emendare nunquam studuerunt, & quos præterea in quævis alia graviora crimina frequenter ex prava consuetudine incidisse animadverterit, etiamsi quo ad casus reservatos facultatem absolvendi a Nobis obtinuerit ; iis ad aliquot dies, atque adeo menses, prout morbi gravitas exigere videbitur, absolutionem differat ; ita tamen ut illos sanare, non autem in desperationem, aut confusionem inducere, pie, prudenterque procuret.

Fidelibus ad Sacramentalem Confessionem accedentibus pœnitentiam imponat, antequam eis beneficium absolutionis impendat. In ea autem imponenda, prudentiam, discretionem, pietatem & justiciam adhibeat, neque ei, qui in aliena potestate est, eam injungat, quam ob subjectionem, aliasve rationabiles causas exequi non potest. Nihil præterea pœnitenti imponat, quo vel aliquod scandalum, aut confusio provenire, vel ipse pœnitens nimium deterreri possit, habita semper ratione status, conditionis, sexus, & ætatis pœnitentis. Imo cum expediens fuerit, illum interroget, an possit pœnitentiam illam peragere ; si dubitet, eam mutabit, aut minuet.

Si pro personæ, criminis conditione satisfactionis nomine eleemosynam aliquam a pœnitente erogandam judicaverit ; eam ne ipse petat, ac ne oblatam quidem acceptet.

Confessione peracta, dum absolutionem impertit, ne Orationem Dominicam, Salutationem Angelicam, seu alias orationes pœnitenti injungat, eo ipso tempore recitandas, imo, ut pœnitens absolutionis verba audiens, spiritualem consolationem concipere possit, distincte, ac sedate illa pronuntiet, præsertim ea, quæ Sacramenti illius formam continent, nempe : *Absolve te, &c.*

In votis autem commutandis, cum ejus rei facultas a Summo Pontifice, vel a Nobis data fuerit, videat omnino, ut vel in majora pietatis opera, quæque Deo gratiora futura sint, vel saltem in æque pia, Deoque grata, illa commutet. Qua quidem in commutatione, laboris atque incommodi, sumptusque, quos, si persolvendum erat votum, subire, perferre, & facere oportuerat, rationem habeat quam diligentissimam.

Observe, si quod peccatum mortale in confessionibus præteritis studiose subticuit, ut eas repetere debeat.

In eo maxime cautus sit absolvens, cui facultas adsit aliena restituendi, vel legata pia persolvendi, idque jam alias in confessione promiserit, præstare tamen neglexit.

Dum absolutionis formam profert Confessarius, manum dexteram super pœnitentis caput, quod non sine mysterio est, elevatam teneat, ita tamen, ut ipsius caput non tangat.

Atque ut omnes una utantur absolutionis formula, etiam in iis, quæ ad hujus Sacramenti essentiam non pertinent, hanc Parochis, & Confessariis servandam omnibus proponimus.

*Misereatur tui Omnipotens Deus ; & dimissis peccatis, perducatur te ad vitam æternam, Amen.*

*Indulgentiam, absolutionem, & remissionem omnium peccatorum tuorum tribuat tibi omnipotens & misericors Dominus, Amen.*

*Dominus noster Iesus Christus, qui est Summus Pontifex, te absolvat, & ego auctoritate ipsius te absolvo ab omni vinculo excommunicationis minoris, aut etiam majoris, in quantum possum, & indiges. Deinde absolvo te ab omnibus peccatis tuis in nomine Patris, & Filii, & Spiritus Sancti, Amen.*

*Passio*



*Passio Domini nostri JESU Christi, & merita Beatæ Mariæ semper Virginis, & omnium Sanctorum, & quidquid boni feceris, & mali sustinueris, sint tibi in remissionem peccatorum tuorum, in augmentum gratiæ, & præmium vitæ æternæ, Amen. Vade in pace † & noli amplius peccare.*

Meminerint Confessarii servare Sigillum Confessionis Sacramentalis, ita, ut neque verbo, neque nutu, aliave quavis ratione, alicui relevent directe vel indirecte, quæ in confessione cognoverunt; alioquin præter gravissimas pœnas non solum corporales, sed etiam infamiæ, a Sacris Canonibus contra hujusmodi inflicta, etiam pœnam depositionis incurrunt.

Nihil a pœnitentibus quovis modo Sacræ Confessionis occasione exigant. Si quid autem eis eleemosynæ nomine ab aliquo sponte oblatum fuerit, id illos humiliter acceptare posse permittimus.

Cum infirmitas corporalis nonnunquam ex peccato proveniat, dicente Domino illi languido, quem sanaverat: Vade, & noli amplius peccare, ne quid deterius tibi contingat; Medici omnes ad præscriptum Decreti INNOCENTII Papæ Tertii, ac Constitutionis PII Papæ Quinti, cum ad infirmos in lecto jacentes vocati fuerint; ipsos ante omnia admoneant, ut peccata sua juxta ritum Sanctæ Romanæ Ecclesiæ confiteantur; neque tertio die ulterius eos visitent (nisi longius tempus infirmo Confessarius ob rationabilem causam, super quo ejus conscientia oneratur, concesserit,) si eis non constiterit, quod infirmi, ut præmittitur, peccata sua confessi fuerint; alioquin interdicti Ecclesiastici censura innodabuntur, & alias pœnas incurrant, Pontificia Sanctione prædicta contentas.

Propinqui autem & omnes familiares, ac domestici infirmi, statim Parochum de infirmitate hujusmodi certiores faciant; atque tam Parochus, quam conjuncti, & familiares præfati, infirmum ad Sacramentalem peccatorum confessionem accurate inducant.

Præterea cum anima sit pretiosior

corpore, Medicos omnes paterne monemus, ut pro corporali salute nihil ægroto suadeant, quod in periculum animæ convertatur; alioquin excommunicationem a Sacris Canonibus infligam subibunt.

Ad salutem cum omnibus fidelibus admodum necessarium sit Catholicæ fidei rudimenta scire, antequam confessiones audiant, diligenter videant Confessarii, an pœnitentes Orationem Dominicam, Salutationem Angelicam, Symbolum fidei, & decem Præcepta Dei, quæ Decalogo continentur, recte norint, & cum imperitis agant, ut clara voce ipsis audientibus illa recitent. Quos vero ignaros, rudesque offenderint, hanc eorum spirituales socordiam acriter reprehendant, ostendantque, quam gravis esse debeat illorum conscientiæ ignoratio rerum, quæ ad salutem tantopere necessaria sunt. Cum autem eos absolvent, præter alias pœnitentias & actiones satisfactorias, id etiam imponant, ut quatuor hæc potissima Doctrinæ Christianæ capita, nempe Orationem Dominicam, Salutationem Angelicam, Symbolum Apostolorum, & Decalogum, in posterum accurate ediscant, certo illis, pro arbitratu suo, præfinito congruo tempore, quod ob necessariam aliquam causam, semel aut pluries prorogari liceat.

At quo facilius perniciosæ hujusmodi ignorantie incommodo occurratur, neque aliqua excusatione suam negligentiam fideles prætexant, illud eisdem animarum Curatoribus mandamus, ut die Festo, intra Missarum celebrationem, cum frequentior fidelium multitudo in Ecclesia aderit, clara voce, ac disertis verbis, quæ ab omnibus audiantur, modo unum, aliquando plura ex iis præcipuis Doctrinæ Christianæ capitibus, prout opportunius sibi videtur, recitent; simulque eos, qui aderunt, hortentur, ut eadem verba, quibus ipsi præbunt, illi simul pronuntient, & dicant.

### XXI. De Extrema Unctione.

**C**lementissimus Redemptor noster, qui servis suis, quovis tempore, voluit de salutaribus remediis adversus

X x x x 3

fus

sus omnia hostium omnium tela esse prospectum, quemadmodum auxilia maxima in Sacramentis aliis præparavit, quibus Christiani se integros, dum viverent, ab omni graviore spiritus incommodo conservare possint; ita Extremæ Unctionis Sacramento, finem vitæ tanquam præsidio munivit. Nam etsi adversarius noster occasiones per omnem vitam quærat, & capret, ut devorare animas nostras possit, nullum tamen tempus est, quo vehementius ille omnes suæ versutiæ nervos intendat ad perdendos nos penitus, & a fiducia etiam, si possit, Divinæ misericordiæ deturbandos; quam cum impendere nobis exitum vitæ perspicit.

Quamobrem licet hoc Sacramentum necessarium non sit ad salutem, a nullo tamen negligi potest absque gravi peccato, ideo Parochi omnes, animarumque Rectores, ejus fructus & utilitates, sæpe ad Catechismi Romani præscriptum fidelibus explicent, doceantque hoc Sacramentum peccata, si quæ sint adhuc expianda, & eorum maculas abstergere, ægroti animum alleviare, & confirmare, magnam in eo Divinæ misericordiæ fiduciam excitando, qua infirmus sublevatur, & morbi incommoda, ac labores melius fert, & tentationibus dæmonis calcaneo insidiantis facilius resistit, atque sanitatem corporis interdum, ubi salutis animæ expedit, consequitur.

Omnem diligentiam & sollicitudinem adhibeant Parochi, ut neminem eorum, quorum curam gerunt, hoc salutari præsidio destitutum, ex hac vita migrare contingat; ideo cum periculum mortis ægroto impendat, supremusque vitæ dies instare videbitur; illud superpelliceo & stola induti, in tempore ministrent, proposito sibi exemplo Sanctiss. Episcopi MALACHIÆ, qui cum culpæ suæ (licet immerito) adscriberet, quod mulier quædam sine hoc Sacramento decessisset; totam noctem lacrymans se se afflixit; ita ut Dei misericordia, illa mane, quasi e somno excitata, e lecto se erigens, hoc Sacramentum acceperit, & etiam a morbo convaluerit. Parati erunt illud die, noctuque nulla interposita mora, prompte ministrare. Demonstrabunt quam

salutariter infirmis expediat, ultro sponteque hoc Sacramentum pie deprecari. Videant, ut qui illud suscepturus est, prius, si fieri poterit, Sanctissima Pœnitentiæ, & Eucharistiæ Sacramenta præcipiat, quorum virtute munitus Extremæ Unctionis effectus efficacius consequatur. Studeant illud ministrare, dum æger integris est sensibus; ut intelligere, quid agitur, & fructuosius ad ejus effectum consequendum se disponere possit.

Licet hoc Sacramentum nulli ministrandum sit, qui illud respuat; cum tamen ægrotus ingravescens morbi vi subito correptus, rationis sensum amiserit, si illud ante petierit, vel verisimile est, quod petiisset, nisi repentino illo casu præoccupatus esset, is rite inungatur, licet.

Si aliqua morbi vi infirmus oppressus, dubitatur vivus ne sit, an mortuus, eadem conditione utendum est: *Si es vivus, per istam Sanctam Unctionem &c.*

Si per errorem Sacerdos aliud oleum, quam quod infirmorum est, ad ægrotum ungendum unquam adhibuerit; etiam si Chrysmatis, aut Catechumenorum sit, ut erratum emendet, Olei Sacri, quod proprium infirmorum est, unctionem eidem adhibeat, tumque Sacramenti formam iteret.

Ministrari debet adultis periculose ægrotantibus, propeque moribundis; & senio etiam confectis in diem morituris, etiam si ægroti non sint; peste item laborantibus, cum derepente mors nec opinantes eos occupet; periculose etiam vulneratis ad mortem.

Nulla modo ministretur infantibus, puerisve, qui nullum adhuc rationis usum habent, neque peccatis obnoxii sint; nec furiosis, amentibusve toto vitæ tempore insania vexatis; nec excommunicatis, interdictis, seu impœnitentibus.

Infirmis autem, qui sana mente dum erant, illud petierunt, cum verisimile sit, quod petiissent, etiam si postea in amentiam inciderint, ministrabitur. Si vero dum infirmus amentia, phrenesive laborat, verisimile est, ut indecore, aut spurce, vel impure aliquid agat, quo irreverentia huic Sacramento

mento fiat; non ungatur; nisi alicujus complexu ita teneatur, ut absque alicujus irreverentiæ periculo, firmus, stabilisve hæreat.

Mulieribus proxime parituris non ministretur, nisi morbi vi ita vexentur, ut verisimile mortis periculum illis immineat, & morti propinquæ judicentur.

Cæcis, surdis, mutis, paralyticisve, quamvis eo sensus vel videndi, vel audiendi, loquendive, seu ambulandi semper caruerint, præbebitur; peccare enim potuerunt per internas potentias, quibus ea membra respondent.

Item illud ministrari debet ei, qui forte dum est in articulo mortis, fuerit baptizatus.

Si cui fortasse manus amputata, erutus oculus, naresve, aut aures præcisæ sint, seu alia corporis pars ex iis, quæ ungi solent, quavis ratione deerit, quæ pars propinquior est, inungatur.

In Sacerdote vero ungendo, manus non ab interiori parte, quæ utique in Sacerdotalis Ordinis susceptione uncta jam fuit, sed extrinsecus inungendæ sunt.

Videat Parochus, ut dum Sacramenti formam pronunciat, quæ est: *Per istam Sanctam Unctionem, & suam piissimam misericordiam, parcat tibi Dominus quidquid tui oculorum (sive aurium, aut narium, seu linguæ, vel oris, seu tactus, seu gressus, sive renum) vitio deliquisti.* Eodem tempore ægroti oculis, aliisve corporis membris, sigillatim unctionem adhibeat, & ad eorum singula distincte proferat, aut repetat eadem verba. Cumque oculi, nares, aures, & pedes, quæ duplicia sunt, inunguntur; caveat, ne in alterius membri unctione integra verborum forma absoluta sit.

Cum autem ad illud perficiendum renes ungere necessarium non sit, in mulieribus id omitti omnino jubemus; at in viris, si per valetudinem licuerit, ungi poterunt; sin minus, earum loco parti pectoris, quæ cordi proxima est, Sacra Unctio adhibeatur.

Licet hoc Sacramentum in diversis infirmitatibus sit iterabile, tamen

quamdiu in eadem ægitudine, & in eodem mortis periculo infirmus versatur, semel tantum est Extrema Unctione liniendus. Quod si unctione suscepta convaluerit, quoties postea in vitæ discrimen inciderit, toties hoc Sacramentum ei adhibebitur. Præterea in morbis quidusdam diuturnis, puta in hydropisi, si ob mortem impendentem quis unctus fuerit, & evaserit, deinde ex eodem morbo in alium similem casum, & periculum mortis inciderit, rursus etiam ungi debebit.

In hac Sacra Unctione vasculum olei infirmorum ab ipso Parocho, aliove, qui Sacris Ordinibus initiatus sit, non a Laicis, seu Clericis minorum Ordinum, aut a mulieribus teneatur, vel contrectetur.

In hujusmodi ministerio obeundo, non solum ægrotum ad antea actæ vitæ poenitentiam, & ad gloriæ æternæ spem inducat Parochus; sed etiam omnes, qui aderunt, diligenter cohortetur, ut pro infirmo simul preces fundant.

Illud demum advertendum est, quod licet de essentia Sacramenti, quilibet Sacerdos rite ordinatus, possit Extremam Unctionem cuivis ministrare, ita, ut Sacramentum teneat; tamen hujusmodi munus proprie ad proprium Parochum spectat; ideo Sacerdotes, qui absque nostra, vel Parochi facultate illud ministrare temere præsumunt, peccati mortalis se reos constituunt, & si Regulares sint, excommunicationem etiam, soli Papæ reservatam, ipso facto incurrunt.

Membra infirmi mudentur, priusquam Sacro Oleo inungantur; & unctione adhibita, mica panis, & bombyce, vel stuppa, ex sacris ritibus, abstergantur a Parocho, seu ab alio, qui in Sacris Ordinibus sit constitutus.

## XXII. De Ordine.

**S**acramenti Ordinis dignitas, utilitas & necessitas quanta sit, ex eo perspicue manifestum est, quod alia Sacramenta ab illo ita pendeant, ut sine eo, ita partim confici, ministrarive nullo modo possint, partim solenni cæremonia, & religioso quodam ritu, ac pio



pio cultu carere videantur ; atque si summus ejus gradus spectetur, hoc est Sacerdotium, ejus præstantia, atque excellentia apparebit; Sacerdotes enim Dei Interpretes, & Mediatores quidam sunt, qui ejus nomine Divinam Legem, & vitæ præcepta homines edocent, & ipsius Dei personam in terris gerunt; atque non Angeli solum, sed Dii etiam appellantur; quod Dei immortalis vim, & nomen apud nos teneant. Potestas Corpus & Sanguinem Domini nostri conficiendi, & offerendi, peccataque remittendi, quæ illis collata est, humanam quoque rationem, atque intelligentiam ita excedit, ut Sacerdotali dignitati aliquid par, & simile in terris inveniri non queat.

Cum autem Divina res sit tanti Sacerdotii ministerium; consentaneum fuit, quo dignius, & majori cum veneratione exerceri posset, ut in Ecclesiæ ordinatissima dispositione plures & diversi essent Ministrorum ordines & gradus, qui Sacerdotibus ex officio deservirent; ita distributi, ut qui jam Clericali tonsura insigniti essent, per minores ad majores ascendant.

Parochi igitur, ubi primum aliquem norint, qui vel sponte se Clericali militiæ adscribi velit, vel a Parentibus adhuc infans religiosa pietate destinetur, hoc sedulo curent, ut ille quo diligentius Clericalis disciplinæ, vitæque religiosæ institutis imbuatur, Ecclesias frequentius adeat, functiones Clericales, cæteraque id generis ministeria cernat; Ecclesiasticorum hominum consuetudine utatur, atque multiplici ratione Clericalis vitæ officiis assuescat.

Ut ad Ecclesiæ ministerium complures instituantur, qui ab ineunte ætate ad pietatem, vitæque innocentiam accurate instructi, & sancte, & utiliter postea inserviant; illud valde studeant iidem Parochi, ut quamplurimos possint pueros, bona indole præditos, qui spem afferant, se cum Sacris initiati fuerint, Ecclesiæ Ministros utiles fore; ad literarum eruditionem, atque ad Ecclesiasticæ vitæ, & professionis normam accurate informant, moribusque Clericali Religioni congruenti-

bus erudiant, atque parentes ipsos moneant, ut filios suos ad suscipiendos Ordines sancte inducant.

Cum autem sex temporibus a jure statutis per Nos, seu per Suffraganeum nostrum, Sacram habere soleamus Clericorum nostrorum ordinationem, videlicet singulis Sabbatis quatuor temporum, Sabbato item ante Dominicam Passionis, quod *Sitientes* dicitur, & Sabbato Sancto; Diebus Dominicis, qui Sacram Ordinationem immediate præcedent, Parochi omnes id populo significant intra Missæ celebrationem, & fideles omni studio inducant, ut quatuor temporum jejunia, hac de causâ ab Ecclesia instituta, pie observent; & Deum exorent, ut lumen nobis præbeat in iis deligendis; atque ad Ordines assumendis, qui ope Divina adjuti, in sanctitate & justitia ei serviant.

Quanta diligentia adhiberi debeat in qualitatibus eorum, qui ad Sacros Ordines assumendi sunt, perscrutandis, ne indigni, & minus apti, ad hujusmodi gradus admittantur; Sacri Canones, Pontificiæque Sanctiones, & præcipue Concilii Tridentini Decreta aperte declarant.

Idem quoque clare patet ex Constitutionibus ERNESTI, primi hujus Ecclesiæ Pragensis Archi-Episcopi, quibus cavetur, ut in Ordinibus conferendis scrutinium fiat, & inter cætera inquiratur etiam, an ordinandi pater, avus, & alii ejus ascendentes usque ad quartam lineam incurrerint aliquo modo irregularitatem, occidendo, vel mutilando, seu in carcerem trudendo aliquem Clericum, sive pro Clerico habitum. Si quis igitur aliqua culpa, impedimento ex iis, quæ inferius connotata sunt, irretitus tenetur; ne ad Sacram Ordinationem contra Sacrorum Canonum, & Conciliorum præscriptum accedat; alioquin censuras, & poenas Canonico jure constitutas subibit.

Impedimento irretiti, qui Ordinibus initiari non debent, sunt hi:

Minores ætate cuicunque Ordini requisita.

Rudes & ignari.

Uxo-

Uxorati.  
 Criminosi.  
 Hæresis nomine suspecti.  
 Ebrietati & gulæ dediti.  
 Impudici.  
 Prolapsi, sive relapsi in hæresim  
 post Ordinem susceptum.  
 Usurarii manifesti.  
 Perjuri.  
 Scurræ, mimi, comœdi, histriones.  
 Infames quocunque modo.  
 Patrociniis, computisque reddendis obligati.  
 Profugi a suis Dominis ob aliqua crimina.  
 Mancipia.  
 Corpore vitati.  
 Insigniter deformes.  
 Illegitime nati.  
 Bigami.  
 Homicidæ.  
 Ex infamibus, & inhonestis parentibus originem trahentes.  
 Irregulares quovis alio modo.  
 Quo in genere cautio sit, ut præter alia, speciatim perquiratur:  
 An Judicis criminalis in foro laicali officium gesserint.  
 An sententiam capitis tulerint.  
 An criminis, cujus nomine capitis quis damnatus sit, acta, sententiam, testificationesque dictarint, aut conscripserint.  
 An in eo Procuratoris, seu Advocati Fiscalis munus administrarint; aliaque exercuerint, unde irregularitatis maculam contraxerint.  
 An suspensi, an interdicti, an excommunicati.  
 An amentes.  
 An morbo caduco, chronico; contagioso, seu sordido laborantes.  
 An energumeni.  
 An ante legitimam ætatem, seu furtim, seu per saltum ordinati.  
 An non examinati & probati.  
 An alienæ Dicecesis absque dimissoriis sui Ordinarii literis.  
 Qui prima Tonsura, vel aliquo Ordine minori vel majori initiari intenderit, ad ædes nostras Archi-Episcopales veste decenti indutus, capillis decenter tonsis, & Tonsura Clericali, quam

Coronam vocant, Ordini suo congruenti, ac birreto quadrato ornatus se conferat, a feria secunda usque ad sextam Sacræ Ordinationis Sabbatum proxime præcedentem; ut se examini subiciat, atque ejus genus, personam, ætatem, institutionem mores, doctrinam, & fidem diligenter investigare possimus.

Antequam examinis initium fiat, semper a Nobis, seu Nobis absentibus, ab Officiali nostro recitabitur Oratio inferius descripta; quæ congregationum etiam earum initio, quæ de criminum causis gravioribus; de Parochialium Ecclesiarum cura committenda; de Confessariis, seu Concionatoribus admittendis; de sententia causæ gravioris ferenda; de rebus, quæ magnæ erunt deliberationis, habebuntur, omnino est recitanda.

## ORATIO.

*Adsumus, Domine Sancte Spiritus, adsumus quidem peccati immanitate detenti; sed in nomine tuo specialiter aggregati, veni ad nos, & esto nobiscum, & dignare illi cordibus nostris. Doce nos, quid agamus, quo gradiamur, & ostende, quid efficere debeamus: ut te auxiliante, tibi complacere in omnibus valeamus. Esto salus & suggestor, atque effector judiciorum nostrorum, qui solus cum Deo Patre, & ejus Filio nomen possides gloriosum. Non patiaris perturbatores nos esse justitiæ, qui summam diligis æquitatem: ut in sinistram nos ignorantia non trahat; non favor inflectat; non acceptio muneris, vel personæ corrumpat. Sed junge nos efficaciter tibi, solius tuæ gratiæ dono, ut finis in te unum, & in nullo aberremus a vero: quatenus in nomine tuo collecti, sic in cunctis teneamus (\*) cum moderamine pietatis justitiæ, ut & hic in nullo a te dissentiat sententia nostra, & in futuro pro bene gestis consequamur præmia sempiterna. R. Amen.*

Examinatores a Nobis, nostre Officiali vocati, qui, cum de aliquo majoribus Ordinibus iniciando examen conficietur, saltem tres, si fieri poterit, esse debent; grave munus sibi commissum considerent; in quo si negligerent, aut male se gesserint, Deo exactam rationem reddent: ideo non spe, non

(\*) In exemplari, quo sum usus, legitur: *teneamur*. Sit vel: *tueamur*, vel, ut correxi: *tencamus*, oportere cenfeo. Alia id genus errata typographica emendabo.

non metu, non præmio, non personarum ratione, non aliquo affectu ducti, munus hoc in Domino exequantur.

Ad primam Tonsuram non admittantur, qui sæcularis iudicii vitandi causa, ea initiari curant. Neve qui rixam, aut similitatem exercent. Nec qui spem minime præbent, Ecclesiæ utiles se fore. Neque qui Fidei Catholice rudimenta, doctrinæque Christianæ præcepta, atque instituta ignorant. Neve qui Epactæ intelligentiam non habent. Nec minores septennio completo. Neque qui defectum natalium patiuntur. Nec qui Confirmationis Sacramentum non susceperunt. Neve qui Fidei Professionem in manibus nostris non emiserunt (si decimum quartum ætatis suæ annum compleverunt) nisi prius cum effectu eam præstiterint. Neque demum qui legere, pronuntiare, & scribere nesciunt, de quibus experimentum omnino fiat.

Minoribus Ordinibus non initientur, qui saltem latinam linguam non intelligunt, ut eo accuratius, quantum sit hujus disciplinæ pondus, possint edoceri. Neque ii, qui a Parocho, & a Magistro Scholæ, de vitæ suæ disciplina, & moribus, testimonium non attulerint. Nec qui, quid sit Ordo, quem suscepturi sunt, ignorarint; quæ ejus materia, quæ forma; quod munus; ac differentiam Ordinum minorum a majoribus. Neque qui Officium parvum Beatæ Mariæ Virginis recitare nescient; nec qui in doctrinæ Christianæ Scholis operam suam non navaverint, neve qui in cantus pericia versati non fuerint; neque demum, qui Sacra Pœnitentiæ & Eucharistiæ Sacramenta non frequentaverint.

Ad Ostiariatum, Lectoratum, & Exorcistatum non admittantur minores septennio completo; neque ad Acolytatum, qui tertium decimum suæ ætatis annum saltem non attigerint.

Nemo primam Tonsuram, aut Ordines minores suscipiat ab Abbatibus, etiam baculi, & mitræ jure utentibus, aliove ejusmodi privilegio, & auctoritate conferendi Ordines minores munitis absque facultate nostra speciatim concessa, nisi ejusdem Ordinis Regula-

ris sit. Nulli autem hanc facultatem concedemus, nisi Nobis constiterit, hujusmodi Abbates Sacerdotio initiatos esse, & statis benedictionis precibus consecratos.

Minoribus Ordinibus initiati in unoquoque munere se exercent, in Ecclesia illa, cui a Nobis adscripti fuerint, nisi forte causa studiorum absint, atque ita de gradu in gradum ascendant, ut in eis cum ætate vitæ meritum, & doctrina major accrescat, quod & bonorum morum exemplum, & assiduum in Ecclesia ministerium, atque major erga Presbyteros & superiores Ordines reverentia, ac crebrior, quam antea, Corporis Christi Communio comprobabunt.

Nemo ad Subdiaconatus Ordinem promoveatur, qui vigesimum secundum, neque ad Diaconatus, qui vigesimum tertium, neve ad Presbyteratus, qui vigesimum quintum suæ ætatis annum, saltem non attigerit. Neque omnes ii, qui in ea ætate sunt constituti, debent ad hos Ordines assumi, sed digni duntaxat, & quorum probata vita senectus sit.

Quicumque Clerici sæculares, sive Regulares abique Canonica dispensatione extra tempora a jure statuta, vel ante legitimam ætatem, seu ab alieno Episcopo absque literis dimissoriis, ad aliquem ex Sacris Ordinibus promoveri se fecerint, ab Ordinibus, quos susceperint, executione ipso jure suspensi erunt. Et si hujusmodi suspensione durante, illorum Ordinum functiones obire præsumpserint, irregularitatis maculam contrahent, super qua a solo Romano Pontifice dispensari poterunt; & præterea Beneficiis Ecclesiasticis, si quæ possederint, privari poterunt, præter alias pœnas a Sacris Canonibus contra illos inflictas.

Cum non deceat eos, qui Divino Ministerio adscripti sunt, cum Ordinis dedecore mendicare, aut aliquem sordidum quæstum exercere; nemo ad Sacros Ordines promoveatur, etiamsi alias sit idoneus moribus, scientia & ætate; nisi prius testimonium legitimum Nobis exhibuerit, se Beneficium Ecclesiasticum, quod sibi ad victum hone-



honeste sufficiat, pacifice possidere. Id vero Beneficium resignare non possit, nisi facta mentione, quod ad illius titulum sit promotus; neque ea resignatio admittatur, nisi constito, quod aliunde commode vivere possit; & aliter facta nulla erit.

Ad Titulum autem Patrimonii, pensionisve ordinari poterunt ii, quos pro Ecclesiarum nostrarum necessitate vel utilitate assumendos judicabimus; eo tamen prius perspecto, Patrimonium illud, vel pensionem vere, & absque aliqua fictione ab eis obtineri, taliaque esse, quæ eis ad vitam sustentandam satis sint; atque illa deinceps sine licentia nostra alienari, aut extinguere, seu remitti nullatenus possint, donec Beneficium Ecclesiasticum sufficiens sint adepti, & aliunde habeant, unde vivere possint. Qui contra fecerint, poenas a Sacris Canonibus constitutas incurrunt.

Valor Patrimonii, aut pensionis, censusve, ad cuius titulum quis est promovendus, sit saltem talerorum quinquaginta annuorum.

Si præterea, qui a Nobis, mensæve Archi-Episcopali, sive a nostra Metropolitana, vel alia Ecclesia Collegiata, aut ab aliquo Monasterio, Barone, seu Nobili, vel alicujus Civitatis Senatu, titulum mensæ ad vitam habuerint, si publico testimonio scriptis exarato id Nobis constiterit, & Ecclesiis nostris utiles & necessarios judicaverimus, ad Sacros Ordines admittentur.

Cum iis, qui ad Ordines majores assumi volent, ab Examinatoribus experimentum fiat, an in cantus peritia sint versati, an vim, & naturam, mysteriaque Ordinis, quem susceperunt, norint.

An sacrarum vestium, quibus induuntur, mysteria item & significata.

An functionum notitiam habeant Ordinis, quo quisque initiandus est.

An earum usum, exercitationemque recte teneant.

An in minoribus Ordinibus probati sint.

*Tomus VIII. Concilior. German.*

An Officium Divinum recitare sci-ant, cum statim ac quis Subdiaconatus Ordine initiatus est, sub poena peccati mortalis, sacras preces horarias quotidie persolvere teneatur.

An in orationis sanctæ studio, usque versati sint.

Quibus meditationibus instructi Deum tacite orent.

Qui orationis modus.

Qui illius fructus, quæve utilitates.

Quot, quibusve partibus illa constet.

Quid sit Ordo, quem suscepturi sunt; quæ ejus materia; quæ forma; quodve munus.

Quæ differentia sit inter Sacramenta veteris Legis & novæ.

Quid sit Sacramentum novæ Legis.

Ex quibus constet unumquodque Sacramentum.

A quo fuerint instituta Sacramenta novæ Legis.

Qui & quotuplex sit hujusmodi Sacramentorum effectus.

An notitiam habeant voti continentiae, quod Subdiaconatus Ordini conjunctum est.

An Sacramentaliter confessi, frequenter Sacram sumpserint Eucharistiam.

An in Scholis Hæreticorum, eorumve, ut vocant, Academiis, literis incubuerint.

An in Catechismi ad Parochos, vel saltem Petri Canisii lectione versati sint.

Queratur item, an eorum nomina, & desiderium publice in Ecclesia proposita fuerint, ad Sacri Concilii Tridentini præscriptum, & de eorum qualitatibus facta sit inquisitio.

Nullus ad Sacrum Subdiaconatus Ordinem promoveatur, qui per annum saltem in Acolytatu non fuerit versatus; nisi a Nobis ob Ecclesiæ necessitatem seu utilitatem super interstitiis dispensationem obtinuerit.

Diaconorum examen fiat aliquanto diligentius de Sacramentorum doctrina. Experimentum item aliquod fiat de concionibus habendis, & ratione

Y y y y 2

Con-

Concionatorum examini superius præscripta.

Diaconatu non initientur, qui in spectantibus ad hunc Ordinem exercendum instructi non sunt; neque qui saltem per annum in Subdiaconatu versati non fuerint, nisi aliud Nobis visum fuerit.

Ab iis, qui Sacerdotio initiari volent, hæc sigillatim studiosius perquirantur.

An pie & fideliter in ministeriis ante actis se gesserint.

An spectata pietate sint, castisque moribus.

An præclarum bonorum exemplum, præclaraque vitæ rudimenta ab eis spectari possint.

*Hæc præterea quærantur:*

Quid sit Missæ Sacrificium, qui ejusdem effectus.

Quæ partes, & quæ mysteria in eo insint.

Quæ sacrarum vestium significationes.

Quæ in eo officio offerendo requirantur.

Ubi & quando illud fieri non licet.

Quæ dubia in eo aliquando accidere possint.

Qua explicatione opus habeant, ut illud recte fiat.

An Sacræ Confessionis aliquam notitiam habeant.

An ad alia item Sacramenta recte, riteque ministranda idonei sint.

An in Sacræ Missæ celebrandæ cæremoniis sint instructi.

An doctrinam item teneant, qui Verbum Dei tractare, concionemve habere possint.

An de re sacra, de Christianorum virtutum officiis, atque de omni re ad salutem necessaria, apte populum instruere, aut docere possint.

Regulares autem cujuscunque Ordinis & instituti, ad primam Tonsuram, seu ad Ordines minores, vel majores non admittentur, nisi omnibus & singulis, quæ superius præscripta sunt, diligenter servatis, non solum quoad examen & interstitia, sed circa Sacramentorum frequentiam, ætatem, &

Ordinum susceptorum functiones, ac testimonium præstite Professionis in Religione approbata.

li omnes, qui prima Tonsura, aliquove Ordine minori, vel majori initientur, in stato ordinandorum libro, quem Matriculam vocant, notentur, qui in Archivio Archi-Episcopali perpetuo asservetur.

Paramenta autem, in Ordinis, quem quisque suscepturus est, collatione, necessaria provideant, quæ lacera non sint, neque immunda. Qui autem prima Tonsura, vel aliquo Ordine minori iniciandi sunt, singuli superpellicem habeant, congruum & mundum, quod dum Missa Episcopalis fiet, & Sacra Ordinatio habebitur, omnino induant.

Dum Offertorium in Missa canetur, ordinandi omnes ad Romani Pontificalis, sacrorumque rituum præscriptum candelas integras pie offerant.

Sacramentali Confessione se præparent, & præscriptæ confessionis testificationem Confessarii manu obsignatam nostræ Metropolitanæ Archidiacono exhibeant; ut in ipso Sacræ Ordinationis die, intra Missæ celebrationem, a Nobis, Suffraganeove nostro Sacram Communionem percipiant.

Qui autem ad Sacerdotium erunt assumendi, Missale habeant, quo in ipsa Sacræ Ordinationis Missa utantur, in recitando Sacro Canone, ad Libri Pontificalis præscriptum. li autem nullo modo Missam primam, quas Primitias vocant, celebrare audeant; nisi prius a nostræ Metropolitanæ Archidiacono, aliove, cui id curæ dederimus, in cæremoniis approbatus, facultatem celebrandi a Nobis, Officialive nostro scriptis exarandam, quod *Placet* vocant, obtinuerint; alioquin suspensionem a Divinis ipso facto incurrant.

Cum Clerici omnes in Altaris ministerio, sacrisve functionibus, Ecclesiis inservire debeant; qui nulli Ecclesiæ, piove loco adscripti fuerint, Ecclesiæ Parochiali, sub qua degunt, inserviant: nec quisquam Ecclesiam, locumve pium, cui adscriptus fuerit, deserere audeat, Nobis inconsultis; alio-

alioquin ab Ordinum, quo initiatus est, exercitio, arbitrio nostro suspendetur. Et quo facilius etiam Ordinum minorum functiones in usum deducantur, sua singulis Ordinibus officia hic præscribenda judicavimus.

Prima Tonsura initiati, cum minorum Ordinum Clerici defuerint, Missis ministrent, eorum vices exequentes.

Ostiarii, Ecclesiæ ac Sacristiæ ostia custodiant, eaque debitis temporibus referent, & claudant. Publice & nominatim excommunicatos, infideles, & interdictos ab Ecclesiæ limine prohibeant; fores Ecclesiæ & parietes, cum opus est, ornent. Cœmeteria custodiant, ne quid in eis indecore fiat. Ecclesiam scopis verrant, atque omni sordium genere expurgent, mundamve ac nitidam servant. Campanas pulsent, librum Lectori, aut Concionatori sustineant. Altaria parent, atque indies antipendia, pro colorum ratione, singulis diebus convenientia, quoad fieri poterit, mutant, & a pulvere purgent.

Lectores, Prophetias, & Lectiones in Ecclesia legant. Antiphonas in Choro præcinent. Concionanti, cum opus est, de libro legant.

Exorcistæ curabunt, ut nunquam in stasis valis aqua benedicta deficiat, atque ut in tempore a Sacerdote renovetur, ac benedicatur. Aquæ benedictioni assistant, & ministrabunt; atque aquam ad benedicendum parabunt; valis tamen ipsis primum benelotis, ac diligenter absterfis. Munus autem exorcizandi Dæmones non assumant, absque nostra facultate scriptis exaranda.

Acolyti Diaconum, & Subdiaconum ad ministerium altaris procedentes anteire debent, eisque, prout res exegerit, ministrare, lumina quoque in altari accendere. In Processionibus candelabra cum candelis accensis deferent. Urceolos, sive ampullas nitidas cum aqua, & vino in pelvicula pro Missæ Sacrificio præparent. Thuribulum cum igne, & naviculam cum incenso parent. Sacramentorum ministrationi præsentibus adsint. Lampadis coram Sacra Eucharistia jugiter prælucentis curam habeant, eamque sæpe mudent.

Majorum Ordinum functiones, cum notæ sint, non est cur hic notemus; sed eas perpetuo, & diligenter ab iis, quorum interest, obiri mandamus; nulli enim ad superioris Ordinis patebit ascensus, nisi se in Ordine suscepto, altari ministrasse fidem fecerit, ut superius diximus.

Non liceat Capitulo Ecclesiæ nostræ Metropolitanæ, Sede Episcopali vacante, infra annum a die vocationis ordinandi licentiam, aut literas dimissorias, seu Reverendas, ut aliqui vocant, tam ex juris communis dispositione, quam cujusvis privilegii, aut consuetudinis vigore, alicui, qui beneficii Ecclesiastici recepti, sive recipiendi occasione arctatus non fuerit, concedere: si secus fiat, Capitulum Ecclesiastico subiciat interdicto, & sic ordinati, si in minoribus Ordinibus constituti fuerint, nullo privilegio Clericali, præsertim in criminalibus gaudeant; in majoribus vero, ab executione Ordinum ad beneplacitum futuri Archi-Episcopi sint ipso jure suspensi.

### XXIII. De Matrimonio.

Cum Matrimonium in Lege Evangelica veteribus connubiis per Christum gratia præstet, merito inter novæ Legis Sacramenta annumerandum, Sancti Patres nostri, Concilia, & universalis Ecclesiæ tradito semper docuerunt; ideo omni pietate, & sanctitate tractari a fidelibus debet. Ut autem innumera morum corruptelæ, quæ præsentium temporum calamitate, in eo contrahendo, hominum culpa, introductæ sunt, omnino tollantur; Parochi omnes sæpe populos suos docebunt, quanta veneratione ad tantum, tamque Sanctum Sacramentum fideles accedere oporteat; non quidem carnis desideria explere cupientes, sed prolis propagationem ad Dei honorem pie, sancteque meditantes. Quare Sponsos efficacibus, & repetitis hortationibus admoneant, ut ante Matrimonii celebrationem, peccatorum suorum sordes, in humili confessione lacrymarum abluant imbre salutari; mentesque, ne libidinis siti æstuentes deficiant, cœlesti Eucharistiæ cibo, tanquam rore matutino refrigerent, &



reficiant; atque ita contra spirituales nequitias, carnisque procacitatem muniti, ex eo Sacramento non sibi perniciem, atque iram Dei, ut multis evenire solet, sed gratiam, salutemque comparent.

Sacramenti hujus institutionem, vim, naturam, & sanctitatem, ex Catechismi Romani doctrina fidelibus sæpe explicabit, ut intelligant non solum præparationem, & pietatem in eo sancte contrahendo, cum res non humana, sed Divina sit, verum etiam, quomodo caste, pieque in eo versari debeant.

Plurima certe sunt damna, quæ clandestina Matrimonia fidelibus afferre consueverunt; ideo Sacri Canones, Generalia Concilia, & ERNESTI Primi Prædecessoris nostri Constitutiones, ut gravibus peccatis ex ejusmodi conubiis provenientius occurrerent, Matrimonia publice fieri, pie & religiose sanxerunt, nec non in eis contrahendis nonnullas præscriptiones, & leges condiderunt, quæ in hac Metropoli, & Archi-Diœcesi nostra invocabiliter observari volumus, ac mandamus. Nulli igitur Matrimonium contrahere audeant, nisi in proprii Parochi, & duorum aut trium testium præsentia, & iis omnibus servatis, quæ a Sacro Tridentino Concilio peculiari Decreto sancte præscripta sunt, his verbis:

" Tamen si dubitandum non est,  
" clandestina Matrimonia, libero contrahentium consensu facta, rata &  
" vera esse Matrimonia, quamdiu Ecclesia irrita non fecit: & proinde jure  
" damnandi sunt illi, ut eos Sancta Synodus anathemate damnat, qui ea vera ac rata esse negant; quique falso  
" affirmant, Matrimonia a filiis familias sine consensu parentum contracta,  
" irrita esse, & parentes ea rata, vel irrita facere posse; nihilominus Sancta Dei Ecclesia ex justissimis causis  
" illa semper detestata est, atque prohibuit. Verum cum Sancta Synodus animadvertat, prohibitiones  
" illas propter hominum inobedientiam jam non prodesse; & gravia peccata perpendat, quæ ex eisdem clandestinis conjugis ortum habent;  
" præsertim vero eorum, qui in statu

" damnationis permanent; dum priore uxore, cum qua clam contraxerant, relicta, cum alia palam contrahunt, & cum ea in perpetuo altero vivunt. Cui malo, cum ab Ecclesia, quæ de occultis non judicat, succurri non possit, nisi efficacius aliquod remedium adhibeatur; idcirco Sacri Lateranensis Concilii, sub INNOCENTIO III. celebrati, vestigiis inhærendo, præcipit, ut imposterum, antequam Matrimonium contrahatur, ter a proprio contrahentium Parocho, tribus continuis diebus Festivis in Ecclesia, inter Missarum solennia, publice denuntietur, inter quos Matrimonium sit contrahendum. Quibus denuntiationibus factis, si nullum legitimum opponatur impedimentum, ad celebrationem Matrimonii in facie Ecclesiæ procedatur, ubi Parochus viro, & muliere interrogatis, & eorum mutuo consensu intellecto, vel dicat: *Ego vos in Matrimonium conjungo in nomine Patris, & Filii, & Spiritus Sancti*, vel aliis utatur verbis, juxta receptum uniuscujusque Provinciæ ritum. Quod si aliquando probabilis fuerit suspicio, Matrimonium malitiose impediri posse, si tot præcesserint denuntiatores, tunc vel una tantum denuntiatio fiat, vel saltem Parocho, & duobus vel tribus testibus præsentibus Matrimonium celebretur. Deinde ante illius consummationem, denuntiationes in Ecclesia fiant; ut, si aliqua subsunt impedimenta, facilius detegantur: nisi Ordinarius ipse expedire judicaverit, ut prædictæ denuntiationes remittantur: quod illius prudentiæ & judicio Sancta Synodus relinquit. Qui aliter, quam præsentente Parocho, vel alio Sacerdote, de ipsius Parochi, seu Ordinarii licentia, & duobus vel tribus testibus Matrimonium contrahere attentabunt; eos Sancta Synodus ad sic contrahendum omnino inhabiles reddit, & hujusmodi contractus irritos & nullos esse decernit, prout eos præsentis Decreto irritos facit, & annullat. Insuper Parochum, vel alium Sacerdotem, qui cum minore testium numero, & testes, qui sine Parocho, vel Sacerdote, hujusmodi contractui interfue-

" fuerint, nec non ipsos contrahentes,  
 " graviter arbitrio Ordinarii puniri præ-  
 " cipit. Præterea eadem Sancta Syn-  
 "odus hortatur, ut conjuges ante be-  
 "nedictionem Sacerdotalem in templo  
 " suscipiendam in eadem domo non co-  
 " habitent: statuitque benedictionem  
 " a proprio Parocho fieri, neque a  
 " quoquam, nisi ab ipso Parocho, vel  
 " ab Ordinario licentiam ad prædictam  
 " benedictionem faciendam alii Sacer-  
 "doti concedi posse, quacunque con-  
 "suetudine, etiam immemorabili,  
 " quæ potius corruptela dicenda est,  
 " vel privilegio non obstante. Quod  
 " si quis Parochus, vel alius Sacerdos,  
 " sive Regularis, sive sæcularis sit, et-  
 " iam si id sibi ex privilegio, vel im-  
 " memorabili consuetudine licere con-  
 " tendat, alterius Parochiæ Sponsos si-  
 " ne illorum Parochi licentia, Matri-  
 " monio conjungere aut benedicere  
 " ausus fuerit, ipso jure tamdiu suspen-  
 " sus maneat, quamdiu ab Ordinario  
 " ejus Parochi, qui Matrimonium in-  
 " teresse debebat, seu a quo benedictio  
 " suscipienda erat, absolvatur. Habeat  
 " Parochus librum, in quo conjugum  
 " & testium nomina, diemque, & lo-  
 " cum contracti Matrimonii describat,  
 " quem diligenter apud se custodiat.  
 " Postremo Sancta Synodus conjuges  
 " hortatur, ut, antequam contrahant,  
 " vel saltem triduo ante Matrimonii  
 " consummationem, sua peccata dili-  
 " genter confiteantur, & ad Sanctissi-  
 " mum Eucharistiæ Sacramentum pie  
 " accedant. Si quæ Provinciæ aliis,  
 " ultra prædictas, laudabilibus consue-  
 " tudinibus, & cæremoniis hac in re  
 " utuntur, eas omnino retineri Sancta  
 " Synodus vehementer optat. Ne ve-  
 " ro hæc tam salubria præcepta quem-  
 " quam lateant, Ordinariis omnibus  
 " præcepit, ut, cum primum potuerint,  
 " curent hoc Decretum populo publi-  
 " cari, ac explicari in singulis suarum  
 " Diocesium Parochialibus Ecclesiis;  
 " idque in primo anno quam sæpiissime  
 " fiat, deinde vero, quoties expedire  
 " viderint. Decernit insuper, ut hu-  
 " jusmodi Decretum in unaquaque Pa-  
 " rochia suum robur post triginta dies  
 " habere incipiat, a die primæ publi-  
 " cationis, in eadem Parochia facta, nu-  
 " merandos."

Quo facilius autem hujusmodi De-  
 cretum ad omnium notitiam perveniat,  
 infra mensem proximum, a singulis Pa-  
 rochis, tam hujus Urbis, quam Archi-  
 Diocesis universæ, die Dominico, in-  
 fra Missæ celebrationem, ac præterea  
 bis in anno ad triennium proximum,  
 nempe ineunte Januario, & Augusto  
 mensibus, de verbo ad verbum, lin-  
 gua vernacula promulgetur. Atque  
 prædictæ primæ promulgationis testifi-  
 cationem manu propria obsignatam,  
 iidem Parochi infra duos menses proxi-  
 mos ad Nos transmittant, decem tale-  
 rorum pœna, in pios usus arbitrio  
 nostro eroganda, unicuique contrave-  
 nienti sancita.

Qui aliter, quam præsentem Paro-  
 cho, vel alio Sacerdote de nostra, Paro-  
 chie licentia, & duobus vel tribus te-  
 stibus Matrimonium contrahere atten-  
 tabunt, juxta prædicti Decreti Tri-  
 dentini dispositionem contractus irri-  
 tos, & nullos esse decernimus.

Declarent Parochi populo diffe-  
 rentiam, quæ est inter Sponsalia, & Ma-  
 trimonium; illa enim contrahuntur  
 per promissionem hinc inde accepta-  
 tam, de contrahendo Matrimonio,  
 per verbum *Promitto, vel juro, quod*  
*te accipiam in uxorem, vel maritum;*  
 hoc autem requirit consensum, ab u-  
 troque contrahente acceptatum, per  
 verba de præsentem, nempe: *Accipio te in*  
*meam uxorem, vel virum.*

Licet Sponsalia, quæ dicuntur de fu-  
 turo, etiam si secreto, & absque testium  
 præsentia contrahuntur, valida sint, &  
 observari debeant; tamen ad evitandas  
 fraudes, quæ aliquando committi so-  
 lent, decernimus, ut ea loco honesto  
 fiant, & saltem duo, aut tres testes ad-  
 hibeantur, quæ in foro exteriori, si  
 opus fuerit, probari possint.

Ad Sponsalium validitatem, & ro-  
 bur non requiritur necessario præsen-  
 tia Parochi, qui, si requisitus fuerit,  
 adesse poterit tanquam testis, non au-  
 tem ut Parochus, ea tamen cautione,  
 ut superpelliceo, & stola non sit indu-  
 tus, & omnibus adstantibus expresse  
 significet, illa Sponsalia esse de futuro,  
 non autem Matrimonium de præsentem;  
 ideo in iis contrahendis a Sponsis figil-  
 latim & simpliciter requiratur; an eis  
 placeat, quod fiant denuntiationes Ma-  
 trimo-

rimonii, quod inter eos tractatur, nullaque verba adhibeantur, quæ consensum de præsentī exprimere possint.

Modum autem & consuetudinem antiquam Sponsalia de futuro publice contrahendi inter Barones & Nobiles hujus nostræ Archi-Diœcesis, non improbamus; dummodo in eis nihil attentetur, quod libero Sponsorum, contrahentiumve, etiam si filii familias sint, consensui repugnet.

Matrimonium celebraturus Parochus a Sponsis investiget diligenter; an sponte, non autem contra propriam voluntatem, hujusmodi contractui consentiant; an alii fidem adstrinxerint; an votum castitatis, seu religionis emisserint; an sciant aliquod inter eos intercedere impedimentum, quominus libere contrahere possint.

Moneantur item, Matrimonia in aliquo ex casibus etiam occultis, impendentibus & dirimentibus absque dispensatione Apostolica contracta, nulla esse; eosque excommunicationem incurrere, qui in aliquo consanguinitatis vel affinitatis prohibito gradu scienter Matrimonium contrahunt. Ii autem, qui in aliquo ex casibus impendentibus & dirimentibus scienter contrahere audent, peccato mortali se se obstringunt, ac pœnas a Sacris Canonibus inflictas incurrunt.

Ad evitandas fraudes, quæ concurrere possunt in contrahendis Matrimoniis in gradibus prohibitis cum dispensatione Apostolica, nemo Parochus, aliussve quis audeat celebrare, vel solemnizare Matrimonium quodcunque inter eos, qui a Sede Apostolica dispensationem obtinuerint, contrahendi in gradibus prohibitis; nisi prius hujusmodi dispensationes a Nobis, Officiali nostro recognitæ sint.

Matrimonia in Ecclesia Parochiali, non autem in privatis ædibus celebrentur, moneanturque Sponsi, ne cum conscientia peccati mortalis ad hoc Sacramentum accedant, nam sacrilegium committerent, & Sacramentales effectus non consequerentur; ideo confessi, Sacram Communionem sumant, ut superius præscripsimus, & ad

tantum Sacramentum humiliter se præparent, & sancte disponant.

Ante altare genibus flexis sint contrahentes, dum hoc Sacramentum ministratur, Parochus autem, si extra Missam illud celebraverit, superpelliceo, & stola indutus sit.

Si alter e Sponsis alienæ Parochiæ fuerit, in utraque Parochia denuntiationes fiant, Parochus vero, ne Matrimonium celebret, priusquam testimonium acceperit ab altero Parocho, quod in sua Ecclesia denuntiationes fecerit; & nullum sibi propositum sit impedimentum, si vero ille alienæ Diœcesis sit, testimonium illud non Parochi solum, sed etiam Episcopi sigillo sit munitum.

Quo die tertia denuntiatio fit, ne Matrimonium celebretur absque facultate nostra, scriptis obtenta, ut facilius percipi possit, an inter eos aliquod intercedat impedimentum.

Cum autem verisimilis suspicio fuerit Matrimonium aliquod posse malitiose impediri, vel alia extiterit causa accelerandi Matrimonii celebrationem; hujusmodi impedimentum Nobis significetur, ut præscriptas denuntiationes, in totum, vel in partem remittamus, prout judicabimus expedire.

Tametsi Nuptiis contrahendis, consensus parentum necessario non requiritur, illud tamen est Jure tam Divino, quam humano traditum, ut ad omnia, quæ præsertim graviora sunt, parentum consilio, & auctoritate liberi utantur. Nam cum de honore parentibus tribuendo Lex Divina præscribit, tum Civilis hoc suadet, ut præcipue Nuptiis ineundis, obsequio eisdem satisfiat: ubi enim illis aut invicis, aut plane repugnantibus, nuptiæ contrahantur, tunc sibi nolenti Avus nepotem parat, sicque e stirpe sua ortum, non modo non diligit, carumque habet, sed plerumque male odit; quo fit, ut & hoc, & alia præterea mala inde existant. Parochi igitur, antequam publice in Ecclesia nuptiarum celebrationem denuntient; si, qui nuptias contrahere volunt, parentes habent; eorum voluntatem in re tanta, & quæ magnæ deliberationis est, recte, ac plane cog-



cognoscant, nec vero, nisi perspecta illorum voluntate ad denuntiationes progrediantur, sed iis interea, qui nuptias inire volunt, apposite, graviterque demonstrent, quam utile sit, & cum omni ratione conveniens, in ea re, parentum, tutorumve, seu consanguineorum, qui illorum curam gerunt, consilio, auctoritateque niti, atque omnino uti. Si vero liberorum nuptiis, parentum vel tutorum consensus repugnat, aut plane consentiens non est, ne Parochi quidquam prius ea de re conficiant, quam Nos consuluerint.

Moneant Parochi fideles, nullum posse consistere Matrimonium inter raptorem, & raptam, quamdiu ipsa in potestate raptoris manserit. Quod si rapta a raptoe separata, & in loco tuto, ac libero constituta, illum in virum habere consenserit, eam raptor in uxorem habeat: & nihilominus raptor ipse, ac omnes illi consilium, auxilium, & favorem præbentes, poenas a Sacro Concilio Tridentino inflictas, ipso jure incurrant.

Uberrimos fructus, & salutares utilitates, quæ benedictionis nuptialis institutum Matrimonium contrahentibus affert, si debita cum humilitate, & religiosa animi pietate eam suscipiant, explicent Parochi diligenter. Eam autem a proprio Parocho, non ab alio Sacerdote, absque nostra, propriæ Parochi facultate fiat, quacunque consuetudine, etiam immemorabili, quæ potius corruptela dicenda est, non obstante.

Curent autem Parochi, ut hujusmodi Benedictio mane, non a prandio, in Ecclesia, non in ædibus privatis fiat, cum celebratione Missæ, quæ pro Sponso & Sponsa, ex sacris ritibus, dici solet.

Præterea si Benedictio nuptialis celebrabitur die Dominico, vel alias Festivo, Missa fiat de Dominica, Festive cum secunda oratione de Sponso & Sponsa.

Si fuerint secundæ nuptiæ ex utraque parte, seu ex altera tantum, Matrimonium fiat in Ecclesia, sed Benedictio nuptialis intermittatur. Contrahentes autem Missæ eo die intersint.

*Tomus VIII. Concilior. German.*

Si quis Parochus, vel alius Sacerdos, sive secularis; sive Regularis sit, etiamsi illud sibi ex privilegio, vel immemorabili consuetudine licere contendat, alterius Parochiæ Sponso, absque nostra, propriæ Parochi licentia, Matrimonio conjungere, aut benedicere ausus fuerit; ipso jure tamdiu suspensus maneat, quamdiu Nobis videbitur.

Nemo Parochus, aliusve Sacerdos permittat, in sua Ecclesia Matrimonia celebrari ab aliquo Sacerdote, qui ad munia parochialia exercenda, a Nobis, Officialive nostro approbatus non sit, & præcipue caveat, ne ibidem admittat Prædicantes hæreticos ad hujusmodi munus obeundum; etiamsi contrahentes hæretici sint.

Cum maxime nefarium sit Matrimonii libertatem violare, omnes, & singulos, cujuscunque gradus, dignitatis, & conditionis existant, paterne monemus, ne quovis modo directe vel indirecte subditos suos, vel quoscunque alios cogant, quo minus libero Matrimonia contrahant, alioquin censuras contra hujusmodi inflictas subeunt. Caveant etiam iidem, ne subditis suis, famulisve quovis modo inhibeant, seu eos impediant, ne Matrimonia contrahant; ex hujusmodi enim inhibitione plura animabus determinata, graviaque scandala exoriri compertum est.

Cum quilibet semper præsumatur vivus, nisi de certo nuntio mortis evidenter pateat, ideo nemo sive mas, sive femina, qui Matrimonium contraxerit, & an ejus conjunx vivus sit, nec ne, penitus ignorat, etiamsi per septennium, pluresque annos illum expectarit, ad secundas nuptias, admittatur, priusquam Nobis, Officialive nostro legitime constiterit, ejusmodi conjugem mortem cum vita commutasse.

Multi sunt, qui vagantur, & incertas habent sedes; & ut improbi sunt ingenii, prima uxore relicta, aliam, & plerumque plures, illa vivente, diversis in locis ducunt: quare Parochi, antequam vagorum hominum Matrimoniis intersint, diligentem de eis inquisitionem faciant; & si illos copulandos esse judicaverint, rem totam ad Nos,

Z z z z

Offi-

Officialeme nostrum, si in hac urbe sint, & per Archi-Dioecesim ad proprii districtus Diaconum, seu saltem ad Decanum deferant, ut, quid agendum sit, prudenter decernatur.

Magnam in eo diligentiam adhibeant Parochi, ut corruptela illa, atque adeo peccatum tollatur, atque radicitus extirpetur, quod sæpe a Sponsis committitur, qui carnaliter antea se cognoscunt, quam Matrimonium per verba de præsentī, coram Parocho & testibus, rite in Ecclesia sit confectum, & celebratum, ut autem fideles ab hujusmodi scelere se contineant, ejus absolutionem Nobis reservamus.

Et Sacro Canonum jure, & Sanctorum Conciliorum Decretis, statis certis anni temporibus, nempe a prima Dominica Adventus, usque ad Epiphaniā, & a feria quarta Cinerum ad Octavam usque Paschæ inclusive, nuptiales solemnitates ita prohibita sunt, ut si quis eam prohibitionem aut tyrannicam esse, aut ab Ethnicorum superstitione profectam dixerit, anathema sit. Atque in eis quidem Solemnitatibus, ut est peritorum interpretum probatissima sententia, cum ille uxoris ad materiale domum ducendæ actus, tum etiam nuptialia convivia, tripudia, saltationes, & choreæ jure quidem censentur, quippe cum non solum conjugum, sed aliorum etiam animi, istarum actionum, quæ plane voluptarie sunt, illecebris deliniti, quo tempore spiritualibus exercitiis intenti admodum esse debent, ad ea evocantur, quæ carnis sensui serviunt omnino. Cum igitur manifestum sit, hujusmodi actiones Sacris Canonibus repugnare, hoc Synodali Decreto sancimus, ne quis eis temporibus, quibus nuptiarum solemnitates agi, celebrare interdicitum est, domum uxorem sponsam ducat, neve eo nomine convivia nuptialia condicat, seu celebret, nec vero item eam ob causam saltationes, tripudiave agat.

Si vero ex causa gravi aliquod Matrimonium iis temporibus contrahendum sit, causa ipsa Nobis proponetur, nec ad celebrationem Matrimonii tempore prohibito deveniatur, absque

nostra, nostrive Officialis facultate scripto exarata, ita tamen, ut eo casu Sponsi absque aliquo comitatu ad Ecclesiam Parochialem privatim accedant, pro Matrimonii celebratione, quam Copulationem vocant.

Ex antiquissimo hujus Sanctæ Pragensis Ecclesiæ instituto, laudabilique consuetudine, hujusmodi nuptiales solemnitates triduo quoque ante Ascensionem Domini intermitteri consueverunt, qui usus, cum fideles nostræ curæ concreditos excitare possit, ut iis diebus, processionibus, ac spiritualibus operibus, diligentius incumbant, in hac Metropoli, & Archi-Diocesi nostra perpetuo retineatur.

Quo facilius autem ad omnium notitiam Matrimonii impedimenta deveniant, Parochi omnes ea populo sæpe explicent, & præcipue declarent inter consanguineos & affines intra quartum gradum, Matrimonia contrahi non posse. Quod si de facto absque Romani Pontificis dispensatione attentetur, irrita sunt, & nulla; ita ut qui contrarium senserit, anathema sit. Declarent etiam, affinitatem ex fornicatione provenientem non excedere secundum gradum. Justitia vero publicæ honestatis, ubi Sponsalia quacunque ratione valida non erunt, est prorsus sublata, ubi vero valida fuerint, primum gradum non excedit.

In computandis autem gradibus consanguinitatis, vel affinitatis, semper remotior attendatur, ita ut, dummodo ex una parte quintus gradus extet, etiam si ab altera secundus, vel tertius, vel quartus existat, inter eos Matrimonium, absque aliqua Summi Pontificis, vel Ordinarii dispensatione contrahi poterit.

Inter alia crimina, quæ impediunt Matrimonium contrahendum, & dirimunt contractum, connumeratur adulterium, fide data, nempe cum unus conjugum committit adulterium, & promittit ei, cum qua adulteratur, se contracturum cum illa post obitum conjugis, sive copula præcedat promissionem hujusmodi, sive subsequatur. Invigilent igitur Parochi, ne inter hujusmodi adulteros, absque Sanctæ Sedis

dis Apostolicæ dispensatione, Matrimonium contrahatur.

Librum habet quilibet Parochus, quem diligenter custodiat, in quo conjugum, & testium nomina, cognomina, ac patriam, itemque locum contracti Matrimonii describat hac ratione.

Anno Domini 1684. die 20. Januarii, N. contraxit Matrimonium per verba de præsentem cum N. in Ecclesia Parochiali S. N. loci N. præsentem me N. Parocho, & DD. NN. N. testibus, factis tamen prius solitis tribus denuntiationibus, intra Missarum solemnias; quarum prima facta fuit in celebritate Circumcisionis Domini, de prima hujus mensis; altera die secunda, qui fuit dies Dominicus; & tertia in festo Epiphaniæ, die sexta, & nullo detecto impedimento legitimo, quominus libere contrahere possent.

Si vero alter conjugum fuerit alienæ Parochiæ, adjiciatur ut infra. Quæ denuntiationes factæ etiam fuerunt in Ecclesia Parochiali Sancti N. loci N. ut ex testimonio, ejusdem Ecclesiæ Parochi subscriptione munito, patet.

Attestationes autem hujusmodi, quæ indies ab aliis Parochis habebuntur, diligenter asserventur, ut Nobis, cum opus fuerit, exhibeantur.

Causæ matrimoniales a nemine cognoscantur, vel decendantur, nisi a Nobis, Officialive nostro ad antiquorum Canonum, & Sacrorum Conciliorum præscriptum. Archidiaconi autem, si qui ad eos recurrerint, factum intelligant, & de eo Nos illico certiores faciant, illosque, de quorum interesse agitur, ad Nos remittant.

#### XXIV. De Divinis Officiis.

**P**roprii loci Patrocinia, ac propriæ Ecclesiæ consecratæ Anniversarium Dedicationis, duplici, solennique Officio celebrentur cum octavis.

De Sancto, cujus Sacrum Corpus, vel Sacra Reliquia insignis asservatur, Natalis, ac Translationis dies, in ea Ecclesia, ubi reconduntur, duplici Officio celebretur.

Si alicubi ex consuetudine antiqua, votove, Sancti alicujus festum

diem populus universus, cessatione a servilibus, vetitisque operibus, aget; de eo Sancto inibi, statuta die, Officium duplex habeatur. At si solum pars ejusdem populi ex consuetudine, voto, vel devotione, alicujus Sancti diem festum colat, ac veneretur, de eo fiat Officium semiduplex.

De iis, qui Beati dicuntur, neque Sanctæ Sedis Apostolicæ auctoritate in Sanctorum numerum adscripti sunt, Officium ne fiat, nisi consultata eadem Sancta Sede, facultateque literis Pontificiis concessa.

De cætero tam in Metropolitana nostra Basilica, quam in omnibus Collegiatis, ac Parochialibus Ecclesiis, nostræ Archi-Episcopali jurisdictioni subiectis, publica omnis, & privata Officii Divini persolutio dirigatur, & conformetur ad hujus Sanctæ Ecclesiæ ritum, & præscriptiones, antiquissimo Breviario Pragensi contentas, quod jussu nostro a doctis, & piis viris recognoscetur, & ad majorem Clericorum & personarum Ecclesiasticarum hujus Archi-Diœcesis commoditatem denuo imprimetur.

Martyrologii usus in Ecclesia Dei antiquissimus, Patrum institutis introductus, perpetuaque Ecclesiastica consuetudine ita retentus est; ut cum in Choro publice illud legi solemne semper fuerit, tum in voluminibus Ecclesiasticis, unus liber antiquo Canone censeatur, cujus lectio nominatim Clericalis ordinis hominibus præscribitur. Quare ut in virtute sanctæ obedientiæ præcipimus, ut in Basilica nostra Metropolitana, & in omnibus Ecclesiis Collegiatis, Monasteriis, Conventibus, & locis, virorum, & mulierum, etiam exemptis, intra hujus nostræ Archi-Diœcesis limites consistentibus, Martyrologium Sanctiss. D. N. CLEMENTIS Papæ Octavi auctoritate promulgatum, in Choro ad primæ horæ Officium publice legatur: primoque loco semper fiat memoria illius Sancti, de quo sequenti die Officium celebrari debet, etiamsi ex iis Sanctis sit, qui in hac Metropoli, & Archi-Diœcesi nostra peculiari Officio celebrari consueverunt.

Ut autem sacræ preces horariæ



uniformi ratione ab omnibus persolvantur, Calendarium Pragenſe, juſſu noſtro, quotannis edendum, quo certa officii ratio ſingulis diebus præſcribitur, Eccleſiaſtici omnes penes ſe habeant, ſingulasque præſcriptiones in eo contentas, in Officio Divino perſolvendo, diligenter attendant, & accurate obſervent.

In Miſſis Divinis, Officiis, functionibusque Eccleſiaſticiſ obeundis, paramenta omnia ſint ejus coloris, qui pro Feſti, dieive, ac functionis ſacræ ratione, a Sancta Eccleſia præſcriptus eſt, prout in Miſſali denuo juſſu noſtro edendo, videri poterit.

Horæ Canonice in Choro quotidie canantur, ubi cantari conſueverunt: neque ob Conciones, aut ſolemnes Miſſas, aliamve ob cauſam omitantur unquam, niſi evidens neceſſitas aliud judicio noſtro aliquando poſtulant; quo caſu absque cantu eas in Choro recitari volumus.

Officium parvum Beatæ Mariæ Virginis recitetur in Choro, tam in Metropolitana, quam in omnibus Eccleſiis Collegiatis, Monasteriis, & locis tam virorum, quam mulierum Regularium, etiam exemptis, iis diebus, quibus ex piis foundationibus, laudabilive uſu recitari ſolet.

Candelæ & cerei in Miſſa, & aliis Divinis Officiis ea exiguitate ne adhibeantur, quæ in tanto Myſterio dedecet, & aſtantibus offentionem præbeat; nullo tamen modo e ſevo ſint.

In organis, cum vel ad Miſſam, vel ad Veſperas, aliaque Divina Officia, ad excitandam fidelium pietatem, pulſantur; ne quid laſcivum, aut impurum admiſceatur.

Quandocunque per organum figuratur aliquid cantari, ſeu reſponderi alternatim, verſiculis Hymnorum, aut Canticorum, ab aliquo de Choro, intelligibili voce, pronuntietur id, quod ab organo reſpondendum eſt.

Cum in Eccleſiam ad Divina Officia diurna, vel nocturna conveniendum erit; id campanarum ſono ſignificetur, ea interpolata mora, qua omnes facile convenire poſſint.

Signo audito, qui dignitates in Eccleſia, etiamſi Præſecti ſint, Perſonatusve, aut Canonicatus habent, cæterique omnes, qui intereſſe debent, præparent ſe ad Divinas laudes, & mature ad Eccleſiam progrediantur. Ingreſſi ad Eccleſiam, factis ad Sacroſanctam Eucharistiā precibus, recta in Sacriſtiam ſe conferant. Quo loco, retenta talari veſte, ſuperpelliceum aſſumant, & reliquum veſtitum ad ſacrum munus neceſſarium; quod ut ſervos Dei decet, tacite & modeſte faciant.

In ingreſſu Chori ad Matutinum, aliaque Divina Officia, is ordo ſervetur, ut paulo poſt ultimum campanæ ſignum ad rem Divinam faciendam, univerſis Canonicis, aliisque in Sacriſtia paratis, pulſetur campana parvula, qua egreſſus Sacerdotum ad Miſſas celebrandas ſignificari ſolet; ut omnes, qui in Eccleſia, vel circum eam ſunt, Divini Officii celebrationem inſtare intelligant. Poſtea omnes de Sacriſtia ordine præcedentes, bini exeant; & ubi ſe ad altare humiliter inclinaverint, ſuum quiſque locum in Choro adeat. Ibi flexis genibus, & ſubmiſſa voce, ſaltem Orationem Dominicam dicant; Deinde dato ſigno per Hebdomadarium, eumve, qui officium dirigit, ad initium officii, omnes ſurgant, & officium inchoetur.

Omnes in Choro Divina Officia, ut temporis ratio poſtularit, alternis vocibus canant, recitent, attenteque audiant; idque non curſim, non perturbate, non perfunctorie, non oſcitanter, ſed leniter, diſtincte, & ſtudioſe faciant.

In Choro, & Proceſſionibus, quadrato birreto, aut ſaltem ſubbirreto, quam Mitram Sacerdotalem vocant, utantur, nullo autem modo ſarmaticis, aliisve alterius generis pileis.

Pro temporis & officii ratione, ex Sanctæ Eccleſiæ inſtituto, cæremoniæ ſacrarum præſcripto, in Choro ſedeant, ſtent, ſectant gœna, caput aperiant, & ſubmittant, cæteraque ejus generis adhibeant; omnes vero æque idem faciant: faceſſant ſomnus, riſus, joci, rixæ, colloquia. Ne vagentur

gentur in Choro, vel Ecclesia, neve locum mutant, ne occasione quidem genua flectendi. Ne in Choro, ubi communi officio opera datur, privatim officium dicant, neque literas, aliave scripta legant.

Dum in Missa, Divinisque Officiis orationes recitantur, nemo sedeat. In Missis autem ferialibus Adventus & Quadragesimæ, ac in vigiliis, & iis item, quæ pro Defunctis cani solent, dum orationes pronuntiantur, omnes genua flectant.

Matutinum Officium, tam in nostra Metropolitana Basilica, quam in aliis Ecclesiis quibusvis, non tardius, quam hora quarta post mediam noctem recitetur, excepta nocte Nativitatis Domini, ac celebritatibus Paschæ, & Corporis Christi, cum tota hujus Solemnitatis octava, atque triduo ante Pascha, prima autem, oriente Sole, dicatur, vel paulo post, pro laudabili uniuscujusque Ecclesiæ consuetudine.

Vesperæ in Metropolitana quotidie, ex antiquissimo usu cum cantu recitentur, non submissa voce. In cæteris autem Ecclesiis, ea servetur consuetudo, quæ ex primo singularum instituto, observari consuevit.

Summæ Missæ tam in Metropolitana, quam in Collegiatis Ecclesiis, cum sit Officium duplex, vel semiduplex, aut Octava, absoluto in Choro tertiæ horæ Officio immediate peragantur. Diebus vero jejuniorum, etiam in temporibus Pentecostes, & in feriis Adventus, peracta Nona, cæteris diebus, statim post Sextam. Pro mortuis autem, post Laudes Defunctorum, si eorum Vigiliæ mane dicendæ sint, alioquin post Primam illico.

Officium Defunctorum recitetur in Choro in unaquaque Ecclesia, iis diebus, quibus ex prisco more, recitari consuevit.

Postridie illius diei, quo omnium fidelium Defunctorum commemoratio fit, in Metropolitana, & Collegiatis Ecclesiis singulis annis, dicatur in Choro Officium integrum Defunctorum pro omnibus hujus Ecclesiæ Archi-Episcopis, vita functis, sub ritu duplici,

cum sola oratione: *Deus, qui inter Apostolicos, & pro eisdem fiant Missæ omnes.* Præterea si non plures in anno, saltem semel, nempe quarto Nonas Novembris, in iisdem Ecclesiis idem fiat, pro Prædecessoribus in Beneficiis Ecclesiasticis, eorumque Fundatoribus, vita functis, cum sola oratione: *Deus veniæ largitor, & humanæ salutis, &c.*

Spirituales cantationes, quæ a pueris, adultisve, in aliquibus Ecclesiis, intra Missæ summæ, Divinorumque Officiorum celebrationem, atque ante & post Sacram Concionem, seu in Processionibus, ad fidelium devotionem excitandam, pie decantari consueverunt, permittendas duximus, dummodo prius a Nobis, Officialive nostro recognitæ sint, & scripto comprobata, ne aliquid contineant, quod prophanium sit, vel apocryphum, quodque sanæ & Catholicæ doctrinæ repugnet. At hujusmodi cantionum causa, nihil intermittatur ex iis, quæ in Missis, ac Divinis Officiis, ex Sacris ritibus, recitari debent.

### XXV. De vita, & honestate Clericorum.

**N**ihil est, quod alios magis ad pietatem, & Dei cultum assidue instruat, quam eorum vita, & exemplum, qui se Divino ministerio dedicarint; cum enim a rebus sæcularibus in altiorum sublati locum, conspiciantur; in eos tanquam speculum reliqui oculos conjiciunt, ex iisque sumunt, quod imitentur. Ut igitur Clerici, in sortem Domini vocati, vitam, moresque suos componant, & habitu, gestu, incessu, sermone, aliisque omnibus rebus, nil nisi grave, moderatum, ac religione plenum præ se ferant, delictaque etiam levia, quæ in ipsis maxima essent, efugiant. Sacri Canones, Sancta Concilia, Pontificiæque Constitutiones, certas officiorum vias, ac rationes Spiritu Sancto Duce præscripserunt, quibus intelligant se, cum in Dei militiam sint adscripti, non ad commoditates, & voluptates; sed ad labores & sollicitudines vocatos esse; atque ea studia, & officia amplecti debere, quæ, si reliquorum

oculis, auribusque observentur, profecto efficiatur, ut ipsi glorificantes Patrem, qui in cœlis est, magis vitæ exemplis, ad virtutis imitationem incitentur. Quare ad Clericalem disciplinam in Ecclesiasticis hominibus nostræ Archi-Episcopali curæ subiectis conservandam, & ea parte, qua collapsa est, restituendam, has recte vivendi formulas, ab eisdem Sacris Canonibus, Generalibus Conciliis, Apostolicisque Constitutionibus summatim depromptas ipsis præscribimus; quas ab omnibus diligenter attendi, & inviolabiliter observari mandamus.

Clerici omnes, vel in Sacris constituti, vel aliquod Beneficium Ecclesiasticum cujusvis generis obtinentes, Clericalem Tonsuram, quam Coronam vocant, eamque conspicuam gerant, ad eam formam, quam postulat cujuscunque ordinis ratio. Sacerdotalis autem non sit minor forma Taleri.

Vestes item Talaes non solum interiores, sed etiam exteriores, coloris tantum nigri (nisi interdum dignitatis ratio alium colorem postulet) ac simplices, continuo induant, præsertim in Civitatibus, & insignioribus oppidis. In locis autem minus insignibus, breviores permittimus, dummodo saltem usque ad tibie medium producantur. In itinere vero, quæ supra genua sint, omnino vetamus.

Pallio nunquam utantur, nisi pluviarum occasione, vel cum iter faciunt.

Caligis nequaquam turgidis, neque dissectis, calceis non incis, camisiis ad collum, sive ad manus, non crispis, & rugosis, aut artificio laboratis, utantur.

Birretum autem Clericale quadratum gerant, præsertim in Ecclesiis omnibus, in Choro, & Processionibus. Sarmaticis pileis nullo modo utantur; sed eos tantum gestent, qui Clericali modestiæ, & gravitati conveniant, & Clericum esse, qui illis utitur, indicent.

Annulos ne deferant, nisi quibus ex dignitatis officio convenit.

Ac denique in vestitu omnem novitatem fugiant, non tam nimis ele-

gantia, quam sordium, & negligentia suspicionem evitantes.

Cum animarum curam gerentes peculiari indumento uti debeant, ut a reliquo Clero distincti, ab omnibus tanquam populi sibi commissi Patres internoscantur, sancimus, ut Parochi omnes, etiam si ad hujusmodi munus obeundum ad certum tantummodo tempus admissi sint, vestem exteriorum usque ad talos demissam imposterum continuo induant, & gestent, quæ collo apte annexa laxiores etiam manicas habeat, neque sine ea coram Nobis, Officialive nostro unquam compareant, aut in Ecclesiis quovis tempore sint.

Qui in habitu Clericali, & tonsura convenienti non inceserint, pœnas & censuras Constitutione CLEMENTIS Papæ Quinti in Concilio Viennensi edita, quæ incipit: *Quoniam* &c. Literis Pontificiis SIXTI Papæ item Quinti contentas incurrunt.

Si barbam non radunt, ut antiquitus moris erat, saltem ne eam, comamve studiose nutriant, sed capillis simplicem cultum adhibeant.

Presbyteri autem barbam ad superius labrum ita incisam habeant, ut sumentibus Christi Sanguinem nullum afferat impedimentum, atque tam ipsi, quam cæteri omnes, ab utraque parte ne ullo pacto pilos intortos, aut a mento in acutum incisos, productosve more nutriant militari.

Ne larvati, personative unquam publice, vel privatim incedant, seu conspiciantur. Nec comœdiis, aut tripudiis, choreisve, seu aliis inanibus spectaculis intersint; neque iis etiam, quæ Judicum secularium jussu, populo ad terrorem proponuntur, cum vel rei torquentur, vel ultimo supplicio afficiuntur; nisi fortasse, ut eos consolentur, se illis comites adjungant. Quo in pietatis officio, sedulo videbunt, ne verbo, aut nutu, causam ullam carnifici, ut rei mortem acceleret, quavis, etiam pietatis ratione præbeant, ne irregularitatis maculam contrahant.

In omni incessu, statu, gestu, ac vultu, ordinem suum profiteantur, omnique Clericalis vitæ actione, religiosi animi mores expriment, qui in Eccle-



Ecclesiastici Ordinis hominibus elucere debent.

Taxillis, aleisque, ac chartis lusoriis, tesserisque, atque omni alio ejusmodi ludi genere abstineant. Cum Rusticis, aliisque cujusvis conditionis Laicis, ne pyramidibus ludant, neve item cum Clericis in Laicorum conspectu.

Nec solum ludere vetamus, sed eos ludorum spectatores esse nolumus, nec quemquam ludentem in ædibus suis permittere.

Ne sclopetis, aut bombardis, feras, seu aves venando persequantur; neve quodvis aliud aucupii, aut venationis genus exercent, canesve, aut accipitres, seu alia venatica alant animalia.

Nullo modo certent ad metam, sive ut vocant, ad signum balista, sclopetove, sive bombardis.

Nocturne vagentur, neque etiam domo, nisi ob causam necessariam, exeat.

Clericorum arma sunt orationes, & lacrymæ, quibus si recte se munierint, nihil in mundo est, quod timere debeant: ideo edicimus, ne Clerici hastas, sclopetas, enses, aliave arma cujusvis generis, ad offensionem, vel etiam defensionem ferant, exceptis cultellis ad domesticum vitæ usum accommodatis; ensen tamen breviorē in itinere eis permittimus. Quod si ob aliquam gravem causam aliquis Clericus aliis armis utendi a Nobis facultatem obtinuerit; ne publice ea gestet, nisi rei aut facti necessitas aliter postulet.

Mensa Clericorum, etiamsi Laici ei nulli accumbant, vel præsentēs sint, frugalis sit. In numero, & pretiositate ferculorum non se ostendet. Exquiritas delicias, comestiones, ebrietates, comotationes, ad æquales haustus provocationes, in omni Christiano, & multo magis in Clerico damnamus, atque detestamur. Mensæ ne accumbant, antequam illi statim precibus benedicant; neque a mensa discedant, nisi gratias Summo Deo religiose actis.

Ut flagitii, scandalive occasionem, quæ in cauponis, vel tabernis, seu pub-

licis hospitiiis, occurrere solent, Clericis adimamus; cauponarum, seu publicorum hospitiorum aditu, usque eis omnino interdiciamus, nisi in itinere necessitatis causa. In eos vero, qui Clericalem modestiam obliti, contra hujus nostri Decreti præscriptum, in tabernis, publicisque hospitiiis, extra itineris occasionem, cibum seu potum sumpserint, mulctis & poenis, habitæ culpæ & personarum ratione, severe animadvertemus. Si qui vero publice ebrii fuerint, & ii præterea, qui post ebrietatem, tremendum Missæ Sacrificium absque prævia Sacramentali Confessione celebrare non verebuntur, graviores dabunt poenas arbitrati nostro.

Non in comestationibus, & ebrietatibus, sed ut sobrie vivamus; prædicat Apostolus; ideo Clerici publica convivium, præsertim nuptialia, quibus mulieres, mimi, histrionesve interfunt, ut veteri Canone sancitum est, evitent: haud enim aliunde Clericalis ordinis gravitas magis offensa fuit. Illud autem præcipue caveant, ne in popinis, cauponisve, aut alibi in Laicorum præsentia, cythara, fidibus, aliisque hujusmodi instrumentis musicalibus sonent.

Si qui autem a necessitudine aut propinguitate sibi junctis invitati, cum illis cibum sumere voluerint, tum debita utantur modestia, ac frugalitate, tum etiam omnino videant, ne eidem mensæ aliqua cujusvis Clerici ancilla, quæ coctrix appellatur, accumbat; cum id absque piorum offensione admitti non possit.

Ne cum hæreticis, & præsertim cum hæreticorum ministris, qui prædicantes dicuntur, frequentem consuetudinem habeant, neve cum eis cibum capiant: hujusmodi enim familiaritates Laicis præsertim rudioribus, absque scandalo esse non possunt. Præcipue autem caveant a mutua quavis consuetudine, commercio cum iis, qui Wittembergæ, Lipsiæ, seu aliis ejusmodi locis sunt non legitime ordinati: ii enim, cum hæretici sint, hæresum venena evomere, Calvinismum introducere, & Catholicam Religionem derubare non desinunt. Ca-

ven-

vendum igitur est, ne hujusmodi peste fideles inficiantur.

Ne cum Laicis familiaria nimis, aut ridicula interponant colloquia, diceriave, aut mordaces sales admisceant. Neque vero digladiatorum, aliorumve improborum hominum consuetudine utantur, nisi quantum eorum officium pietatis causa exoptulerit.

Ordinis præterea Clericalis memores, homines leves, in quibus nihil singularis pietatis, & Christianæ virtutis elucet, quo possunt, studio, fugere debent; cum piis & honestis hominibus conversationem habeant. Simonia, ambitio, turpiloquium, ac scurrilitas inter Clericos nequidem nominentur.

Erga Laicos gravitatem mansuetudine temperatam servare procurent. Se ipsos propter temporalia odiosos non reddant, scandala evitent. Morum integritate, & vitæ exemplo omnibus præluceant, ut eos populus amare, ac revereri merito possit. Nul- lam dent occasionem laicis illos ad sæcularia tribunalia trahendi, aut evocandi.

Diligenter caveant, ne Sacrae Scripturae verbis ad prophanos sermones abutantur, seu alios ipsis præsentibus illis abuti permittant.

Cum qui Deo militant, implicare se negotiis sæcularibus prohibeantur, ne coram Judice sæculari, Advocati, aut Procuratoris nomine causas agant, nisi ab aliis in iudicium vocati, suam, vel Ecclesiæ suæ, propinquorum etiam, si necesse erit, & miserabilium hominum causas tueantur.

Ne artem medendi faciant.

Ab omni mercaturæ genere abstineant. In negotiationibus, mercaturisve se interpretes, & medios non interponant.

Negotiationem etiam cujusvis generis eis omnino inhibemus.

Neve cujusvis Patrocinium, tutelam, aut curam suscipiant, nisi cum pietatis causa, ejus rei facultatem a Nobis impetraverint.

Monialium Monasteria non ingrediantur; neve ad earum cancellos, seu

ad rotam accedant, neque cum eis colloquantur, absque facultate nostra scriptis obtenta, alioquin pœnas & censuras contra hujusmodi inobedientes inflictas incurrant.

In eo officio ne se exercent, ut Momiales, aliasve mulieres doceant legere, scribere, aut canere etiam cantum, quem vocant, figuratum, seu aliquo cujusvis generis instrumento sonare.

Quoniam ob incontinentiæ crimen, aut ejus etiam criminis suspicionem in Clericalis militiæ Professoribus, mirum in modum laici homines offendi solent, ne ob suspectarum mulierum cohabitationem, Ecclesiastici homines ullam populo dent offensionem; discernimus, ne Clerici, quicunque sint, vel in Sacris Ordinibus constituti, vel Ecclesiasticum Beneficium quaecunque obtinentes, cum mulieribus cujusvis conditionis habitent, nisi cum matribus, sororibus, amicis, fratrumque uxoribus; neque vero servas, ancillasve, quas coctrices vocant, in domestico usu inservientes, aut secum quovis modo habitantes habere possint, quadraginta annis minores, aut quæ vitæ aliqua ratione suspectæ fuerint; si secus fecerint, in eos graviter animadvertemus.

Ne apud se libros habeant, aut legant, quorum lectione bene agendi studium, morum disciplina, & timor, charitasque DEI languescere possit, quales sunt, qui res, vel jocosas, vel scurriles, ridiculasve, vel impuras continent. Libris item non utantur de Musico cantu obscenis, vel parum pudice conscriptis.

Sacrarum autem literarum studiis diligenter omnes incumbant, ut quod ipsi Deo obsequium debent, rite præstare, & alios in viam Domini dirigere sedulo valeant. Eam ob causam hos saltem libros habere procurent, in quorum lectione frequenter versentur.

Bibliam Sacram vulgatæ editionis. Breviarium Pragense.

Calendarium item Pragense in singulos annos edendum.

Calen-

Catechismus Romanum, auctoritate Sacri Concilii Tridentini editum, latine, vel lingua vernacula, cum indice, & distributione omnium materialium pro singulis Dominicis, & Festis, per concionem explicandarum, vel cum dilucidatione ejusdem, auctore Joanne Chapeville, vel cum explanatione Sebastiani Catanei.

Catechismus Trevirensis Archiepiscopi (a), cum praxi Catechistica.

Catechismus Petri Canisii, saltem minorem.

Epistolam Antonii Possenini de Catechismo docendo.

Concilium Tridentinum.

Has nostras Dioeceseanas Constitutiones.

Rationale Divinorum Officiorum.

Cæremoniale Romanum.

Directorium Joannis Polanci, & librum ejusdem de juvandis morituris.

Instructionem Sacerdotum Francisci Toleti Cardinalis.

Manuale Navarri, aut Summam Sylvestrinam (b), vel Armillam. (c)

Summulam Cajetani, vel Sancti Antonini.

Scutulum fidei Laurentii Hermanurii germanice.

Controversias Francisci Costeri, germanice vel latine.

Pro Concionibus unum, vel plures probatos Auctores, ut Homilias, Joannis Eckii de tempore, & Sanctis, ac de Sacramentis.

Promptuarium Strapletonii.

Postillam Petri Canisii germanicam, Friburgi Brisgojæ impressam, 1602.

Surium de vitis Sanctorum, vel saltem ejus compendium.

Postillam Georgii Schereri germanicam.

Epitomen Friderici Nauseæ, & id genus alios.

Item pro excitanda mente in Dei amorem, opuscula Granatæ latine, vel germanice. Institutiones, vel Meditationes Francisci Costeri. Libellum Thomæ de Kempis de Imitatione Christi,

aliaque ejusdem opuscula. His similes libellos spirituales sedulo lectitari a Clericis cupimus.

Atque ut in studiorum exercitatione indies magis progrediantur, congregationibus Dioeceseanis proprii districtus, seu tractus semper interlint. Ad Sacræ Scripturæ lectionem convenire non prætermittant. Minorum vero Ordinum Clerici, non grammaticæ modo, sed magis Ecclesiasticæ disciplinæ studio sedulo vacent; atque ut diligentius instituantur, ubi Scholæ Præceptoris æque pii, ac periti copia est, ei studiose operam navent.

Ad Canonicas Horas recitandas se sub peccati mortalis reatu omnino adstrictos scire debent, quicunque Beneficia vel Officia Ecclesiastica cujusvis generis obtinent, & ii etiam omnes, qui in Sacris Ordinibus constituti sunt. Illi vero præter peccati mortalis culpam, quam ut supra contrahunt, ex Decreto LEONIS Papæ Decimi in Lateranensi Concilio edito, beneficiorum suorum fructus pro rata omissionis officii, & temporis, suos non faciunt, sed eos tanquam injuste perceptos in fabricas ipsorum Beneficiorum vel pauperum eleemosynas erogare tenentur. In hujusmodi autem erogatione ea ratio ineatur; ut qui Horas omnes Canonicas uno, vel pluribus diebus intermiserit, omnes beneficii, seu beneficiorum fructus, qui illi, vel illis diebus responderent, si quotidie dividerentur; qui vero Matutinum, tantum, dimidiam, qui cæteras omnes Horas, aliam dimidiam, qui harum singulas, sextam partem fructuum ejusdem diei amittat.

At quicunque pensionem, fructus, aut alias res Ecclesiasticas, ut Clericus percipit, modo prædicto, ad dicendum Officium parvum Beatæ Mariæ Virginis devinctus est, & pensionem, fructuum, rerumque ipsarum amissioni obnoxius.

Ut autem in pietatis, devotionisque spiritu indies magis atque magis prof-

(a) Erat is Rdmus & Illmus Joannes a Schœnenberg, qui, apud III. Hontbenium, electus anno 1581. die 31. Jul. Obiit 1. Maji 1599.

(b) Summæ author Sylvester Mazolini & Prierate, Dominicanus, Magister S. Palatii. Obiit 1560.

(c) Bartholomæus Fumus, ejusd. Ord. scripsit circa annum 1550. Ita Claudius La Croix in citat. Auctorum expl. Tom. I.



proficiant, Sanctissima Pœnitentiæ, & Eucharistiæ Sacramenta, religiose frequentent Clerici omnes; Sacerdotes quidem singulis Dominicis, ac Festis diebus Sacramentaliter confessi Missam celebrent, nisi legitima, gravique causa detineantur, si vero Parochi sint, ter præterea in hebdomada, ac sæpius item, prout populi frequentia, & necessitas postulaverit. Diaconi, & Subdiaconi bis in mense, atque diebus solennioribus, ac aliis diebus festis, quibus in solemnibus Missæ Sacrificio vestibus sacris induti, altari ministraverint, peccatorum suorum Sacramentali Confessione, ac Sacræ Eucharistiæ sump-tione se reficiant. Prima Tonsura vel aliquo ex minoribus Ordinibus initiati, saltem semel in mense, & diebus solennioribus id præstent.

Si antiquæ Legis Sacerdotes sancti & puri esse debebant, ut incensum Domini, & panes Dei sui digne offerrent, quanto sanctiores & puriores esse tenentur hi, qui non incensum tantum, & panes, vel animalium carnes, sed ipsummet Christi Domini Corpus, & Sanguinem offerunt, manibus tractant, & ore suscipiunt, ne de eis dicat ipsemet Deus: Non permanebit Spiritus meus in homine, quia caro est. Quid enim magis dedecet Sacerdotem, quam vitæ impuritas & libido? Quare si quem cujusvis Ordinis Clericum concubinam, mulieremve eo nomine suspectam habere, aut illius consuetudine, commerciove uti compertum fuerit, in eum pœnis a Sacris Canonibus inflictis, & aliis etiam arbitrato nostro irrogandis animadvertemus. Quod si monitus, speciali monitione secundo deliquerit, tertia parte fructuum, proventuumque suorum Beneficiorum, qua ipso facto privatus existet, fabricæ Ecclesiæ, vel alteri pio loco arbitrio nostro applicetur. Si autem in eodem delicto perseverans secundæ monitioni non paruerit, omnibus suorum Beneficiorum fructibus privatus, prædictis locis similiter applicandis, ab ipsorum etiam administratione arbitrio nostro suspendetur. Et si ita suspensus non resipuerit, contra eum privatione Beneficiorum, aliisque pœnis, & censuris agemus.

Hæc eadem, quæ de concubina-

tu, vel aliis impudiciæ sordibus Clericorum præscripsimus, servantur etiam, si quis Clericus modo cum una, modo cum alia impudica muliere deliquisse comprehendatur.

Præterea quoniam Clerici in fornicationem prolapsi, quorum peccatum ejusmodi, notorium est per scientiam, seu per confessionem factam in judicio, aut per facti evidentiam, quæ aliqua tergiversatione celari non potest, aliquando ante, & sæpe numero post pœnitentiam actam, Ordinis, quo initiati sunt, proprium munus obeant, nulla absolutione obtenta a suspensione, quam ex admissi delicti notorietate ipso facto subierunt; quippe cum fortasse non animadvertant neque Dei offensionem, neque censuram Ecclesiasticam, qua ob tale crimen innodati existunt; eos omnes Clericos monemus, qui manifesta concubinatus, fornicationisve labe contaminati sunt, ut vere pœniteant, & absolutionem ab incurta suspensionis censura, a Nobis, vel ab eo, cui legitimam a tali censura absolvendi facultatem dederimus, obtineant, atque a male agendi consuetudine emendati, cujuscunque vel peccati, vel offensionis publicæ occasionem cum effectu præcidant; alioquin si absolutione non obtenta, occasioneque scandali non sublata, Ordinis, quo initiati sunt, functiones obiorint, irregularitatem incurrent, super qua a nullo alio, quam a Summo Pontifice Romano dispensari poterunt.

#### XXVI. De Parochis.

**I** omnes, quibus animarum cura commissa est, cum teneantur oves sibi concreditas agnoscere, pro eis Sacrificium offerre, Verbique Divini prædicatione, Sacramentorum administratione, ac bonorum omnium operum exemplo pascere, pauperum, aliarumque miserabilium personarum curam paternam gerere, & in certa munia Pastoralia incumbere, meminerint gregi suo jugiter invigilare, & assistere, illumque in judicio & veritate pascere, ac gubernare. Ut autem facilius hujusmodi sui muneris partes exequantur, hæc præter ea, quæ his nostris Synodalibus Constitutionibus variis in locis illis præscripsimus, peculiari

liari titulo eisdem proponenda censuimus.

Quicumque Beneficium aliquod Ecclesiasticum, curam animarum quomodolibet habens, obtinet, quovis etiam dignitatis nomine nuncupetur, etiam si eidem ab ipsa fundatione cura non immineat animarum, sed longo post tempore annexa sit; apud suam Ecclesiam resideat, in propria scilicet Ecclesiæ domo, si habeat, alioqui in alia, quæ tamen in propriæ Parochiæ finibus sita sit; neque ei unquam ulla ratione abesse liceat, nisi ex justa causa, a Nobis scripto approbanda. Qui secus fecerit, præter peccati culpam, pœnam etiam amissionis fructuum Ecclesiæ, cui præest, eo ipso incurrat.

Qui vero contra Sacrorum Canonum, & Sacri Concilii Tridentini præscriptum plura curam animarum habentia obtinent Beneficia, vel Dignitates, aut Canonicatus, seu alia, in quibus residere oporteat, nisi a Sancta Sede Apostolica dispensationem obtinuerit, is ab eo tempore, quo posterioris Beneficii possessionem assecutus est, sciatur Beneficium, quod prius obtinebat, ipso jure vacasse, tenerique ideo ad illud statim dimittendum, fructusque omnes interim mala fide perceptos, Ecclesiæ ipsi restituendos.

Quod si quis Canonicatum, una cum curato Beneficio ex dispensatione Apostolica, retinere possit; non in Canonicatu, sed in Beneficio curato resideat ad præscriptum Constitutionis Pii Papæ Quinti.

Nemo ab Ecclesia sua absit absque licentia Archidiaconi propriæ Regionis, seu tractus. Si autem longior septem diebus absentia sit duratura, non ab Archidiacono, sed a Nobis, Officialive nostro facultatem scripto obtineat. Nullo tamen modo occasione absentiae intermittatur celebratio Missæ in Ecclesia Parochiali, præsertim die Festo, & vespertinarum horarum, ac debita Sacramentorum administratio, aliaque quævis functio Parochialis.

Cum primum aliquis ejus curæ commissus in morbum incidit, tunc maxime etiam ab ægroto non vocatus, Parochus illum inviset; omnemque

Parochialis charitatis diligentiam in eo ponet, ut illum in via salutis recte dirigat, & a nequissimis Dæmonis insidiis, ac conatibus tueatur, atque defendat, præsidio salutarium adjumentorum.

Quod Concilio Agathensi olim præcautum est, idem Parochus præstare curet, ut Missa celebrata, si quos in Parochiali vicinia habet, frequenter, atque adeo quotidie, cum per alias Parochialis curæ suæ occupationes potest, visitet, eisdemque præstet, prout opus esse viderit, officium charitatis, & solitudinis paterno muneri suo conjunctæ.

Parochiales item suos, & universos, & sigillatim sæpe numero, prout occasio feret, hoc monebit, ut se accersant, cum primum aliquis in graviores morbum incidit.

Et vero quoniam aliis Parochialis curæ officiis aliquando fortasse distinguere potest, propterea Parochiæ suæ Sacerdotes, si quos habet, ut saltem aliquot Laicos homines, virtute & vitæ spiritualis usu præstantes, deliget, qui ægrotum adeant, recteque cohortentur, cum ad vim morbi patienter in Domino ferendam, tum ad alia Christianæ pietatis officia obeunda.

Illis maxime visitandis, & consolandis, assiduam charitatem navabit, qui rerum omnium indigentia, & morbi acerbitate miserabilem in modum afflictus, curationem difficillimam experiuntur, quorum paupertatem, pietatis zelo commotus ita sublevabit, ut & ipse, si per facultates potest, de suo aliquid erogat, & aliorum eleemosynas inquirat.

Quæcunque pietatis officia fidelibus suæ Parochiæ quavis adversa valetudine laborantibus præstare debet Parochus, eadem majori diligentia exhibere tenerur, cum ejus Parochialem viciniam, Parochialesve fines pestilentia, pestisve suspicio invadit: tunc enim proposito sibi ob oculos tam gravi gregis sibi commissi periculo, omni constantia, omnique animi firmitate munitus, illum nullo modo deferat, ne Pastoris solatio destitutus, vehementius perterrefactus, afflictione ta-

bescat; sed operam, studium, ac ministerium suum ita navare studeat, ut ad omnia charitatis, ac misericordiæ officia, & exemplo suo, & pio quodam sanctarum cohortationum ardore, quibus perpetuo, uti diligentissime debet, cæteros inflammet. Id autem præcipue curet, ne quis e grege suo absque Pœnitentiæ Sacramento ex hac vita migret.

Præter alias sacras functiones, quas quisque Parochus diebus Festis obire debet, ne vespertinæ horæ Officium in Ecclesia recitandum, quavis occasione, vel causa intermittat.

Singulis diebus Dominicis, intra Missæ Parochialis celebrationem, nempe post concionem immediate, præter Matrimoniorum denuntiationes, Parochi omnes dies Festos, ac jejunia in hebdomada sequenti occurrentia populo edicant, & evulgent; ut unusquisque, quo die ea occurrunt, intelligat, & ad alia religiose observanda excitetur, ac moneatur.

Cum Sacræ Concionis, sermonisve munus intra Missæ celebrationem præstatur, id ex antiquo hujus Ecclesiæ ritu, fiat semper, statim postquam Symbolum Apostolorum recitatum est, ante Offertorii pronuntiationem.

Præpositi, Parochi, alique Episcopi inferiores, cum in Altari in Missæ Sacrificio, quod ipsi celebrant, id munus obibunt, tunc capite aperto ad sacrorum rituum præscriptum, stare debent. Quo autem facilius a populo audiantur, suggestum, eos ascendere opportunius erit; tuncque casulam deponere, si maluerint, licebit, quam statim sermone habito, ad Altare reversi induant. Cum in suggestu concionem, sermonemve habent, operto sint capite; & sedeant, aut stent, prout maluerint.

Cum non is Sacerdos, qui Sacrificium Missæ facit, sed alius intra Missæ celebrationem, sermonem, concionemve habiturus est, is suggestum ascendat: interea vero Sacerdos celebrans, loco a Laicis segregato, & ab altari paululum remoto, non extra tamen Presbyterium, sacris vestibus indutus cum Diacono & Subdiacono,

si illi in Missa tunc adhibiti sunt, ab utroque latere confidentibus, sedebit.

Dum Sacra Concio, sermone habetur, ne eo ipso tempore, in Ecclesia eadem, Missæ Sacrificium ab ullo quovis Sacerdote fiat.

Oblationum institutum, quod Offertoria dicunt, jam pridem ab Apostolicis usque temporibus, Apostolico etiam Canone sancitum, Sanctissimorumque Pontificum, MELCHIADIS, FABIANI, & GREGORII Constitutionibus, & Conciliorum præterea Decretis communitum, quo gravius his temporibus a fidei, doctrinæque Catholicæ hostibus exagitur, & languescente pietatis studio, quo magis a fidelibus negligitur, hoc diligentius servari, atque ad executionis usum, ubi intermissum est, revocari convenit, cum præsertim & ad Divinum cultum illud pertineat, & populis salutare sit, & ad expianda peccata utile. Quare Parochi, Concionatoresve, omni persuadendi, cohortandique officio, illud, ubi est, retineri, ac ubi negligitur, restitui studiose ad Sacrorum Canonum præscriptum ita curent, ut in Solemnitatibus scilicet Domini, diebusque Dominicis, ac Festis, item quos coli, aut præcepti, aut consuetudinis est, & præterea in Missis Defunctorum, quilibet Christianus aliquid, sive pecunia, sive cereis, sive alio elemosynæ genere, prout sua quisque pietate, devotioneque maluerit, Deo offerre procuret, idque in Ecclesia Parochiali, cum ad Missæ Sacrificium, quod a Parocho celebratur, convenit. Quo in Officio servetur, ut quod antiquæ est consuetudinis, primo maribus, deinde fœminis offerant.

Quo gratius autem Deo sit, quod offertur, ad id præstandum accedant fideles intima animi pietate, spirituali hilaritate, sancta charitate, omnique Christianæ devotionis testificatione. Offerentium autem, prout sanctæ institutionis est, peculiaris commemoratio in Missæ Sacrificio a Celebrante fiat.

Pro fidelibus Defunctis religiosas Deo preces, orationemque adhibere, Officium est salubre quidem, & Sanctum, Christianæque pietatis studio plane



plane dignum; ideo Parochi, ex antiquissimo hujus Ecclesiæ nostræ more, singulis diebus Dominicis, & Festis, intra Missæ summæ celebrationem, immediate post concionem, fideles moneant, ut pro animabus in purgatorio detentis, intimo cordis affectu, preces effundant.

Oratio vespertina, quam Salve vocant, in omnibus tam hujus urbis, quam universæ Archi-Diœcesis nostræ Ecclesiis, a primo Sabbato Quadragesimæ, usque ad feriam quartam post Dominicam Palmarum fieri solita, cum ex prisco & laudabili more sit introducta, & maximam afferat fidelibus utilitatem, perpetuo obeatur; & ut ad eam populi frequentissimi conveniant, illos Parochi omni cohortationis officio inducant. Caveatur autem, ne hujusmodi orationis causa, cantiones ulæ, quæ Catholicæ non sint, canantur, & Antiphonam illam ab hæreticis editam, cui initium est: *Salve Jesu Christe*, omnino prohibemus.

Nullum officii genus, quo fideles ad pietatem excitare possint, Parochi prætermittere debent. Quare in unaquaque Parochiali Ecclesia, ter in die, summo scilicet mane, meridie, & sub noctem, campanæ sono fideles excitentur ad orationem, ut meminerint, si sæpius non possint, saltem tribus his temporibus esse orandum, ut Psalmus docet: Vespere, mane, & meridie, narrabo & annuntiabo, & exaudiet vocem meam. Ut igitur ii non solum campanæ sonitu, sed etiam Parochorum cohortationibus moniti, certis illis diei potissimum intervallis, se ad brevissimum saltem temporis spatium colligant, menteque ad Deum conversi, orent; illos unusquisque Parochus religiose, frequenterque moneat, ac hortetur. Quo in cohortationis genere doceat, quam sæpius fidelibus orandum sit, ut non solum in eas singulas certas horas, sed in singula potius momenta, de innumerabilibus beneficiis, quæ Deus in illos benignissime confert, pie gratias agant. Illis vero statis intervallis maxime precandum est, Beatissimæque Virginis MARIE patrocinium invocandum, ut per eximia beneficia iis horis humano generi colla-

ta, quibus illa adfuit, ab unigenito ejus Filio misericordiam fidelibus impetrare dignetur. Campanæ enim sonitu matutino renovatur memoria Resurrectionis Christi Domini, qui resurgens ex mortuis statim Sanctissimæ Matri suæ apparuit. Meridianus sonus datur ad excitandam memoriam, & recordationem Passionis Christi, cui Virgo Mater interfuit. Vespertinus autem ad recolendum mente, animoque beneficium Incarnationis ejusdem Salvatoris nostri in utero Beatissimæ Virginis. At quo fideles, iis tribus temporibus, uniformi ratione orent, & indulgentias a Summis Pontificibus hac de causa concessas consequi valeant, curent Parochi, ut omnes, ter Salutationem Angelicam cum tribus versiculis, & oratione, ex prisco Ecclesiæ usu, recitari solitis, genibus flexis, pie & devote recitent, ut infra.

*Angelus Domini nuntiavit Mariæ, & concepit de Spiritu Sancto. Ave Maria &c. Ecce Ancilla Domini, fiat mihi secundum verbum tuum. Ave Maria &c. Et Verbum Caro factum est, & habitavit in nobis. Ave Maria &c. Oremus. Gratiam tuam, quaesumus Domine, mentibus nostris infunde; ut qui Angelo nuntiante, Christi Filii tui Incarnationem cognovimus, per Passionem ejus & Crucem, ad Resurrectionis gloriam perducamur. Per eundem Christum Dominum nostrum, Amen.*

Cœlestia arma, quibus inter cætera, dum in hoc sæculo nequam, peregrinantur Christi fideles, adversus suæ salutis hostes, in colluctatione assidue utendum eis est, preces sunt, & oratio sancta. Cujus quidem orationis studium, cum & perpetuum, & necessarium eisdem esse non solum verbis, sed & exempli sui contestatione, docuerit Christus Dominus, fideles omnes ad illud pie, & religiose amplectendum, in eoque solícite versandum, omni diligentia, ac pietate inducere debemus, præsertim hoc tempore, quo Christiani nominis hostes, bellorum incursum, omnibusque dolis, insidiis, impiisque, & continuis machinationibus, Ungariæ Regnum, & alias finitimas ditiones vexare, eisque plurima afferre mala non cessant; quibus quidem malis ut

occurramus, quis non videt ad Divinam opem nos debere præcipue confugere? Quod sane, ut accuratius præstemus, illustre Moysis exemplum nos admonet, atque aperte docet, quo alte manus extendente, ac sustentante, hoc est, ferventibus precibus Divinam Majestatem sollicitante, Israëliticus populus Amalecitas superabat, prosternebat, atque internecioni tradebat evidentius; manus autem interdum fatigatas dimittente, hostis invalescebat illico, atque in fugam Israëlita convertebantur. Hac igitur de causa, præter supplicationes & processiones a Nobis indictas, quas omnino fieri volumus, etiam orationem vespertinam per singulas familias hujus Metropolis & Archi-Diœcesis universæ communiter in propriis ædibus faciendam instituimus, ad opem a Deo imminenti bello implorandam, contra Turcarum, & Catholicæ Religionis hostium vim, ac conatus, ad ejusdem Ecclesiæ Catholicæ & Religionis augmentum, Regnorumque & Statuum Sux Sacræ Cæsareæ Majestati quovis modo subjectorum conservationem & propagationem. Parochi igitur, fideles omnes, & præsertim Patresfamilias hortentur, ut hujusmodi orationi quotidie vacent, pia Litaniarum, vel Beatæ Mariæ Virginis Coronæ recitatione. Ut autem hoc pium institutum promptius amplectantur, iis omnibus utriusque sexus Christi fidelibus, qui vere pœnitentes, cum proposito temporibus debitis confitendi, singulis diebus, vesperi, hac de causa, per horæ quadrantem, certa hora eis bene visa, oraverint, pro quacunque vice id fecerint, quadraginta dierum indulgentiam, in forma Ecclesiæ consueta, concedimus.

Tam in hac Urbe, quam in aliis Civitatibus, & locis, ubi aliqui Itali habitant, Parochi illos & publice & privatim sæpe moneant, de observanda Constitutione fel. rec. CLEMENTIS Papæ Octavi, (\*) qua statuitur, ut nullus Italus, cujusvis conditionis, & status ille sit, quovis quæsito colore, audeat habitare, vel domicilium tenere, ubi aliqua Ecclesia cum Parocho, vel Pastore, seu Sacerdote Catholico non existit, in qua libere, & sine omni periculo palam

& publice celebrari, & audiri possint Missæ, Officia Divina & Conciones, ac Sacramenta ministrari, mortuorum corpora sepeliri, & cætera fieri juxta Catholicum ritum Sanctæ Romanæ Ecclesiæ. Abstineant Itali a Matrimoniis cum hæreticis mulieribus, & ab hæreticorum sepulturis; filios suos non sinant per hæreticos de Sacro Fonte levare; neque ipsi, hæreticorum filios, nisi a Catholico Sacerdote baptizentur, levare præsumant. Medicorum hæreticorum opera, cessante necessitate, ubi adsit Catholici Medici idonei copia, non utantur. Ex Italia ad hæreticorum loca profecturi, id significant Ordinariis suis, vel Inquisitoribus, a quibus serio admoneantur, ut Catholice, & religiose vivant, atque hæreticos & schismaticos vitent, singulis annis saltem, de eorum Sacramentali Confessione, & Sacratissimæ Eucharistiæ perceptione, per eos factam, fidem Ordinariis ipsis, vel Inquisitoribus transmittere teneantur. In eos, qui contra hæc facere præsumpserint, uti de hæresi suspectos, per locorum Ordinarios, & Inquisitores procedi poterit.

Sicut Episcopale visitandi munus necessarium est, Sacrorumque Canonum, & Generalium Conciliorum jure ad eorum, qui visitandi sunt, salutem procurandam utiliter institutum, ita, qui visitantur, ut quem debent, fructum ex eo uberem, salutaremque capiant, eos frequentes hujusmodi visitationibus adesse oportet. Quamobrem Parochi, crebro populum doceant, tum visitationum utilitates, tum eas officii partes, quas visitantibus Nobis, Visitatoribusve nostris, ab eo præstari convenit, tum vero in primis illum, dum visitatio fit, quam frequentissimum adesse, gravi cohortatione moneat. Cum autem per Nos ipsos id munus obire non poterimus, per Visitatores nostros supplebimus, ut teneamur, qui debitis temporibus ad quævis loca nostræ Archi-Diœcesis accedentes, sanam & orthodoxam doctrinam inducere, bonos mores tueri, pravos corrigere, populos cohortationibus, & admonitionibus ad Catholicam Religionem, & ad pacem, atque innocentiam accendere, cæteraque præterea, prout

locus,

[\*] Die 26. Julii anno 1596. edita.

locus, tempus, & occasio feret, ex eorum prudentia, ad fidelium fructum constituere, paterna charitate, Christianoque zelo, procurabunt. Parochi, & alii item, qui visitabuntur, Visitatores ipsos benigne & honorifice, ac decenter excipiant, victualiaque ad Sacrorum Canonum præscriptum prompte subministrent; non enim secundum Apostolum, magnum est ab eis meriti temporalia, per quos spiritualia seminantur.

Cum Parochiarum distinctio necessaria sit, ut proprium Pastorem Parochiales cognoscere possint, a quibus cum opus est, pie gubernentur, & Sacramentis, aliisque spiritualibus adjuventis pascantur; Parochis omnibus hujus Civitatis edicimus, atque jubemus, ut infra duos menses proximos ad Nos accedant, ut unicuique eorum certos Parochialis viciniae limites, ædibus, aut viis perpetuo distinguamus, quo facilius proprias oves pascere possint, & messem in alienam falcem non mittant.

Nemo Sacerdos sæcularis, vel cujusvis Ordinis & Instituti Regularis, etiam exemptus, in hac Metropoli & Archi-Diœcesi nostra, curam animarum quovis colore, vel prætextu, exercere audeat, nisi vel aliquod Beneficium Parochiale legitime possideat, vel facultatem a Nobis, Officialive nostro hujusmodi muneris ad certum, vel incertum tempus obeundi, scripto exaratum obtinuerit, etiam si, alterius Parochi Coadjutor, Cooperatorve existat, aut ab aliquo Abbate, Monasteriive cujusvis Præfecto, etiam exempto, deputatus, alioquin suspensionem a Divinis ipso facto incurrat.

Cum ad aures nostras devenerit, aliquas in hac Archi-Diœcesi reperiri Ecclesias Parochiales, in quibus Patrocinia non celebrantur, quia eorum titulus ignoratur, eo quod per plures annos in hæreticorum manibus extiterint; statuimus, ut quamprimum hujusmodi Ecclesiarum Parochi singuli ad Nos accedant, ut declaremus, quo die singulis annis, & Patrocinia, & Anniversarium Consecrationis propriæ Ecclesiæ, ad Dei honorem, & animarum salutem perpetuo sint inibi celebranda.

Curent Parochi, ut in unaquaque Parochia habeatur Ludimagister, qui Catholicus sit, & eruditus, ac bonæ famæ. Is autem non solum in grammatices, & humaniorum literarum peritia, sed etiam in fidei Christianæ rudimentis, ac Catholica Religione, ad Petri Canisii Catechismi præscriptum, pueros, adolescentesve instruat, eosque bonis moribus, Christiana pietate, atque spiritualibus exercitiis diligenter imbuat.

Diligentiam item adhibeant, ut mulieres, quæ in Parochia puellas docent legere, & scribere, Catholicæ sint, & spectatæ vitæ, atque in eis erudiendis, libris utantur Catholicis, & a proprio Parocho approbatis.

Curent Parochi, & Confessarii item, ut pie testantium voluntates, & relicta in pios usus, Ecclesiis, aliisque locis, & personis prompte persolvantur.

Nullis in Ecclesiis, juxta Missæ celebrationem, concionisve sacræ munus, seu alio tempore, neque item in Cœmeteriis, Ecclesiarumve atriis, vestibulis, aut fronte, neque præterea in quibusvis locis sacris, Parochi, Concionatores, Clerici, aliique quivis, quidquam, quod forense, vel profanum sit, quodque ad rerum prophanarum, seu forensium enuntiationem attineat, promulgent; sed ea tantum in locis Deo dicatis obeantur, quæ sacra, & pia sunt, atque ad Dei cultum & pietatis opera pertinent.

Ob frequentem aliquorum Parochorum mutationem, Ecclesiarum bona deperiri compertum est; ideo ad tutiorem, perpetuamque hujusmodi bonorum, quæ Patrimonium Christi sunt, conservationem, omnibus Parochis, etiam temporariis, & aliis item Beneficiariis hujus Archi-Diœcesis nostræ præcipimus, ut infra tres menses proximos duo inventaria authentica confici curent, in quibus omnis propriæ Ecclesiæ, propriæ Beneficii supellex, & præterea prædia, census, agri, eorumque fines, ac termini, jura, privilegia, oblationes, atque etiam bona se moventia, si quæ habet, distincte notata sint, quorum alterum penes se reti-



retineant, alterum vero Nobis tradant, in Archivio Archi-Episcopali diligenter asservandum.

Ad hujusmodi inventaria conficienda teneantur in posterum infra tres menses, post beneficii sui adeptam possessionem, quicumque beneficium Ecclesiasticum cujusvis generis obtinuerint, meminerintque se teneri pro posse recuperare sui beneficii bona, si quæ deperdita, & usurpata repere-  
rint.

Cum autem aliquando reperiantur aliqui bonorum Ecclesiasticorum, & jurium conductores, qui ea in totum vel in partem usurpare non verentur, in propriæ salutis spiritualis exitium, & maximum Ecclesiarum detrimentum; omnibus Parochis, Beneficiariisque edicimus, & jubemus, ut locationes bonorum suorum Beneficiorum nunquam faciant Nobis insciis, & exemplar hujusmodi bonorum locationis Nobis, aut Officiali nostro statim transmittere teneantur.

Parochi omnes sæpe populis significant, eos omnes tam Clericos, quam Laicos, qui alicujus Ecclesiæ, Beneficiive, aut loci pii bona, census, jura, fructus & obventiones, per se, vel alios, quacunque arte, vel quovis quæsito colore, in proprios usus convertere, & usurpare præsumpserint, seu impedire, ne ab iis, ad quos jure spectant, percipiantur, excommunicationem, & alias pœnas Sacrorum Canonum, & Generalium Conciliorum jure, contra hujusmodi inflictas, incur-  
rere.

Sepelire mortuos opus misericordiæ est non minimum, ut Sacrarum Litterarum monumenta, & perpetua Catholicæ Ecclesiæ consuetudo, Sanctorumque exempla clarissime testantur. Ad hoc sepeliendi munus Sacræ Cæremoniz, & ritus, qui neque recentes sunt, neque mysteriorum expertes, vel ab Apostolis ipsis, vel a primis Sanctissimæ Fidei nostræ Patribus ad fidelium pietatem, defunctorumque suffragia, fuerunt salubriter instituti. Quare Parochi omnes, cum sæpe fideles ad hoc spirituale officium hortentur, ut funus prosequantur, exequiis-

que omni animi pietate interfint; tum ipsi, cæterique Sacerdotes, & Clerici, ea devotione; iisque religiosis precibus, & sanctis cæremoniis, illud rite ita concelebrent, ut ad rem, quam agunt, intime, pie, animoque attenti, etiam corporis compositione, habitu, atque vultu, pietatem, gravitatemque, quemadmodum Dei Ministros decet, præ se ferentes, invitent alios præsentem non modo ad orationem pro defuncto, sed & meditationem mortis, quæ in ea funeris actione ob oculos unicuique proponitur.

Cum autem infidelium, nec non excommunicatorum, interdictorum, manifestorum usurariorum, impœnitentium, & aliorum ejusmodi defunctorum corpora, Ecclesiastica sepultura ad Sacrorum Canonum præscriptum care-  
re debeant: Caveant Parochi, ne hujusmodi corporum funeribus & exequiis interfint, eave in Ecclesiis suis, seu cœmeteriis sepeliri, aut funerum, seu exequiarum ejusmodi occasione, prædictarum Ecclesiarum campanas pulsari permittant; alioquin censuras & pœnas contra hujusmodi impositas incur-  
rent.

Magnam adhibeant diligentiam Parochi, ut, quæ de Ecclesiæ, Sacristiæ, Altarium ornamentorum, & Ecclesiasticæ suppellectilis nitore, mundicia, & forma superius præscripsimus, diligenter ab omnibus attendantur, & serventur, & præsertim, ut nullibi Missa celebretur, nisi in Ecclesiis, ac Oratoriis Deo dicatis, & a Nobis approbatis, & super altaribus forma præscripta constructis, & ornatis. Sedulo invigilent, ut Altarium mappæ, & alia ornamenta decentia sint, & munda. Nulla corporalia adhibeantur in Missæ Sacrificio, quæ non sint congrua, & amylo illicita. In Sacra Eucharistia, aqua Baptismali, sacris liquoribus, calicibus purificatoriis, & aliis ejusmodi rebus sacratis asservandis, & in Ecclesiasticis ministeriis adhibendis, nihil incultum, situque obsordescens, pulverulentum, immundum, aut rei sanctitate indignum haberi, seu usui esse permittant. Habeant vas decens huic tantum usui destinatum, ad harum nostrarum Constitutionum præscriptum, in quo,  
cum

cum opus est, lavent corporalia, & purificatoria, & lavationis aqua in Sacramentum projiciatur. In eo autem laventur calices lixivio, & smigmate, saltem ter in anno, ut decentiores, & nitidiores continuo remaneant.

Unusquisque Parochus Librum habeat status animarum suæ Parochiæ quotannis renovandus; cujus exemplar ad Nos deferat, mittatve, cum de hoc requisitus fuerit. Et in eo notet nomen, & cognomen eorum, qui in sua Parochia habitant per familias distinctorum. Qui in Pascha præcedenti Sacram sumpserint Eucharistiam, notentur hoc signo: *Comm.* Qui ad Confessionem Sacramentalem admittuntur, sed per ætatem eis non permittitur Sacra Communio, notentur hac ratione: *Conf.* qui vero Sacramentum Confirmationis susceperunt, distinguantur hoc modo: *Cbr.*

### XXVII. De Beneficiorum Collatione, ac Jure Patronatus.

**B**eneficia Ecclesiastica iis tantum conferenda sunt, qui medio examine, a Nobis approbati fuerint, exceptis iis, qui in forma, ut dicunt, gratiosa, a Sancta Sede Apostolica provisi fuerint.

Præsentati, seu electi, vel nominati a quibusvis Ecclesiasticis personis, etiam Sedis Apostolicæ Nuntiis, ad quævis Ecclesiastica Beneficia, non instituuntur, nec confirmentur, neque admittantur, etiam prætextu cujusvis privilegii, seu consuetudinis, etiam ab immemorabili tempore præscriptæ, nisi fuerint prius a Nobis examinati & idonei reperti.

Ad dignitates quascunque, aliave Beneficia, quibus animarum cura subest, nemo promoveatur; nisi qui saltem vigesimum quintum suæ ætatis annum attigerit, & in Clericali ordine versatus, doctrina ad suum munus exequendum necessaria, ac morum integritate commendetur.

Ad cæteras autem dignitates vel personatus, quibus animarum cura nulla subest, Clerici alioquin idonei,

*Tomus VIII. Concilior. German.*

& viginti duobus annis non minores adsciscantur.

Nemo ad dignitatem, Canonatum vel præbendam aliquam assumatur; nisi qui eo Ordine Sacro, quem illa dignitas, præbenda, aut portio requirit, aut sit initiatus, aut in tali ætate, ut infra annum initiari valeat. Quod etiam servetur in collatione Beneficiorum simplicium, seu Altarium, etiam extra Collegiatis Ecclesiis, quæ Sacerdotalem ordinem ex fundatione requirunt. Cætera autem, quæ Clerici quivis, etiam prima Tonsura tantummodo initiati, obtinere possunt; ii tamen, qui decimum quartum suæ ætatis annum expleverint, conferantur.

Cum alicujus Ecclesiæ Parochialis vacatio quomodocunque contigerit, ei tantum, qui medio examine, ætate, prudentia, scientia, morum probitate, & aliis requisitis, magis idoneus repertus fuerit, ad Sacrorum Canonum, & Constitutionum Pontificiarum præscriptum, conferatur. Quod si Juris Patronatus alicujus fuerit; qui e Patrono præsentatus erit, ab Examinatoribus, coram Nobis, Officialive nostro examinetur, ut non admittatur, nisi idoneus repertus fuerit.

Examinatores munus suum nullo modo aggrediantur, antequam, vel in Synodo nostra Diocesana, vel privatim, in manibus nostris, ad Sancta Dei Evangelia juraverint, ut infra:

Ego N. Examinator deputatus, juro, me omni humana affectione postposita, munus mihi commissum pie & fideliter executurum. Sic me Deus adjuvet, & hæc Sancta Evangelia.

Caveant, ne quidquam prorsus occasione examinum, nec ante, nec post, accipiant; alioquin Simonis vitium tam ipsi, quam alii dantes incurrunt; a quo absolvi nequibunt, nisi dimissis Beneficiis, quæ quomodocunque, etiam antea obtinebant, & ad alia imposterum obtinenda inhabiles reddantur.

Sicut legitima Patronatum jura tollere, piasque fidelium voluntates in eorum institutionem violare æquum non est, sic etiam, ut hoc colore Beneficia Ecclesiastica in servitutem redi-

B b b b b

gantur,

gantur, non est permittendum. Nul-  
lus igitur Juris Patronatus titulus ad-  
mittatur, nisi sit ex fundatione, vel do-  
tatione etiam ab eis facta, quibus jure  
hæreditario Patroni succedunt, & au-  
thentico documento, aliisque jure re-  
quisitis ostensum, siue etiam ex multi-  
plicatis præsentationibus, per anti-  
quissimum temporis cursum, qui ho-  
minum memoriam excedat, aliave se-  
cundum juris dispositionem.

Jura Patronatus nullo modo ad  
hæreticorum manus pervenire possint,  
etiamsi illa sibi competere prætendant  
jure hæreditario, vel quovis alio præ-  
textu.

Patroni autem Beneficiorum cujus-  
cunque Ordinis, conditionis, & dig-  
nitatis, etiamsi Communitates, Uni-  
versitates, Collegia quæcunque Cleri-  
corum, vel Laicorum existant, in per-  
ceptione fructuum, proventuum, &  
obventionum quorumcunque Benefi-  
ciorum, etiamsi vere de Jure Patrona-  
tus ipsorum ex fundatione, & dota-  
tione essent, nullatenus, nullave causa,  
vel occasione se ingerant, sed illos li-  
bere Rectori, seu Beneficiario, non ob-  
stante etiam quacumque consuetudine  
distribuendos dimittant.

Qui alicujus Beneficii Parochialis,  
vel etiam simplicis, Jus Patronatus ha-  
bent, personam idoneam Nobis, intra  
quatuor menses, a die vacationis, si  
Laici sint, & intra sex, si Ecclesiasti-  
ci, præsentare debeant. Alioquin pro  
illa vice jus præsentandi ipso facto amit-  
tunt, & Nobis, vel ei, ad quem hu-  
jusmodi collatio spectat, eo ipso devol-  
vitur.

Nemo autem præsentatus, vel no-  
minatus, vel electus, ab inferioribus  
provisus, a Nobis, Officialive nostro  
prius admittetur, vel instituetur ad  
quodvis Beneficium, quam infra scrip-  
tum jusjurandum emiserit.

Ego N. præsentatus, & electus ad  
Beneficium N. juro per Sacrosancta  
Dei Evangelia, quæ meis manibus tan-  
go, neque me beneficii obtinendi causa,  
aut ut ad id præsentarer, vel nomina-  
rer, neque quempiam alium, meo no-  
mine, aut consentiente, vel sciente  
me, quidquam Collatori, Patrono seu

alii cuiquam ea de causa promississe,  
aut dedisse; seu compensasse, aut pri-  
us datum confirmasse, vel apud quem-  
quam deposuisse; neque mutuo dedisse,  
vel locasse, vel prius mutuo da-  
tum, commodatum, locatum, aut  
quocunque modo debitum remisisse;  
vel relaxasse, nec de domibus, terris,  
prædiis, redditibus ejus Ecclesiæ, fru-  
ctibusve, juribus, aut obventionibus  
ejusdem, præteritis, præsentibus & fu-  
turis, donationem, remissionem, lo-  
cationemve fecisse, promississe, aut ini-  
visse. Ita me Deus adjuvet, & hæc  
Sancta Dei Evangelia.

Nemo admittatur ad possessionem  
cujusvis Beneficii Ecclesiastici, etiamsi  
juris Patronatus fuerit, priusquam in  
manibus nostris Professionem fidei emi-  
serit, & tactis scripturis jus jurandum,  
ut infra, præstiterit, quo promptius  
excitetur ad præstandam obedientiam  
Ordinario debitam, atque ad Bonorum  
sui Beneficii conservationem, & recu-  
perationem.

Ego N. Titularis Beneficii N. pro-  
mitto, & juro, quod obediens ero Il-  
lustrissimæ celsitudini Vestræ, & legi-  
timis Successoribus vestris in hoc Archi-  
Episcopatu; Ecclesiæ meæ inserviam,  
& omnia, quæ ratione Beneficii Eccle-  
siastici ad præsens mihi collati, præstare  
teneor, prompte exequar. Ejusdem  
Beneficii bona tam mobilia, quam im-  
mobilia, & se moventia, nullo modo  
alienabo; immo si quæ alienata repe-  
riam, pro posse recuperabo. Ritum  
Sanctæ Romanæ & universalis Eccle-  
siæ in ministrandis Sacramentis Eccle-  
siasticis inviolabiliter tenebo, & obser-  
vabo; vocatus ad Synodum Diocesa-  
nam veniam, nisi legitimo derentus  
fuero impedimento. Bonorum omni-  
um tam mobilium, quam immobili-  
um, ac jurium quorumcunque hujus  
beneficii duo conficiam inventaria au-  
thentica infra tres menses proximos;  
quorum alterum penes me diligenter  
conservabo, & alterum Illustrissimæ  
Celsitudini Vestræ tradam in Archi-  
Episcopali Archivio perpetuo asservan-  
dum. Sic me Deus adjuvet, & hæc San-  
cta Dei Evangelia.



## XXVIII. De Monasteriis Virorum.

**N**ulla Monasteria nova in hac Metropoli & Archidieceſi noſtra conſtruantur, absque facultate a nobis ſcriptis obtenta.

Regulares omnes, quo arctiori Regula obſtricti ſunt, eo accuratius, & perfectius, juxta eorum inſtitutum, Dominicum agrum excolere tenentur, in quo utique excolendo, Episcopis, & Parochis maximo debent eſſe adjumento, atque in cultu Dei augendo, animarumque ſalute procuranda omnem opem aſſerre. Quamobrem conſidimus eos omnes univerſa, quæ his noſtris Synodalibus Decretis continentur, prout ad eorum unumquemque ſpectant, & regulari diſciplinæ conveniunt, prompte aſſecuturos præcipuamque adhibituſos diligentiam in iis exequendis, quæ de Eccleſiarum cultu, & pia in eis verſandi ratione, de prædicatione Verbi Dei, de conſeſſionibus audiendis, de ornamentis, paramentis, ac ſupelleſtile in Miſſæ Sacrificio, Sacramentorum adminiſtratione, ſacrisque functionibus decenter adhibendis, eorumque mundicia, & nitore in hac Synodo ſunt præſcripta.

Caveant, ne intra ſuorum Monasteriorum clauſuram, mulieres quovismodo recipiant, admittantve ſub pœnis, & cenſuris, Conſtitutionibus Pontificiis expreſſis.

Quod ut facilius executioni mandari poſſit, curabunt Abbates, Præpoſiti, Prioresve, & alii Superiores, ut aliquis habeatur locus extra Clauſtra, ubi ſceminæ in caſibus neceſſariis audiri poſſint.

Nulli Monachi, Regularesve Viri, ad balnea publica accedant, cum id a Regularis ſtatus diſciplina, & obſervantia abhorreat.

Cum non ſolum Clerici ſæculares, ſed etiam regulares, ad ea, quæ Divinum cultum reſpiciunt, intendere teneantur, in eorum Clauſtris, & Monasteriis, ne quempiam ſui, aut alterius ordinis, Virum Regularem, qui vagus ſit, & absque ſui Superioris commendatiſ literis, admittant ul-

tra unam, aut alteram noctem ad ſummum.

Ne in ſuis Eccleſiis aliquem Sacerdotem ſecularem, vel regularem, vagum, ſeu peregrinum, absque ſui Superioris atteſtationibus, & commendatiſ literis, quæ omni falſitatis ſuſpicionem carent, ad celebrandam Miſſam admittant; ne tremendum hoc ſacrificium ab apoſtatis, aut a non rite ordinatis, cenſurisve Eccleſiaſticis innodatis fieri permittatur.

Peculiari CLEMENTIS Papæ VIII. Decreto pie ſancitum eſt, Regulares omnes debere ab eo Episcopo, in cujus Diœceſi Monasterium, in quo degunt, ſitum eſt, ordines ſuſcipere, niſi Sedes Episcopalis vacaverit, ſeu infirma valetudine, aliove impedimento detentus, Episcopus ille ſacram non habuerit ordinationem; quo caſu ſi extra Diœceſim ad ſuſcipiendos ordines accedere voluerint, hujusmodi impedimenti teſtimonium, ab Episcopo, ejusve Officiali Generali, ſeu, ſede vacante, ab Officiali Capitulari ſcripto comprobatum, ei, a quo ordinari voluerint, exhibere tenentur. Cum autem ſex temporibus a jure ſtatutis, vel a Nobis, vel a Suffraganeo noſtro, Sacramentum ordinis ad noſtræ Eccleſiæ utilitatem miniſtretur; non eſt, cur Monachi, aliive Regulares, ad alios Episcopos confugiant, ut ordines ſuſcipiant. Ad Nos igitur, ſive ad Suffraganeum noſtrum, non autem ad alienos Episcopos pro ſuſcipiendis ordinibus accedant; alioquin ad Sacrorum Canonum, & prædictæ Pontificiæ Sanctionis præſcriptum, contra eos agemus.

Quo facilius Parochi debitam iniſſe poſſint rationem in Sacra Communione Paſchali fidelibus miniſtranda, & conſeſſionum Sacramentalium atteſtationibus in animarum ædificationem accipiendis, & recognoscendis; iidem Regulares Sacram Communionem a Dominica Paſſionis uſque ad octavam Paſchæ incluſive, laicis non miniſtrent, ratione obligationis Paſchalis; ſed eos admoneant, ut ad proprium Parochum accedant; a quo juxta Sacrorum Canonum Conſtitutiones illam ſumant.

Quicumque Regularis extra Monasterium sine Scripta facultate vagatur, a Nobis tanquam suæ Regulæ desertor punietur, etiamsi eo se nomine excuset, quod ad Superiores suos velit accedere, nisi ab iis mittatur vel evoceatur; cuius rei speciatim, nominatimque in facultatem mentio fiat.

At qui habitum suæ Religionis deseruerint, nisi præcipua Sanctæ Sedis Apostolicæ facultate tuti sint, in eos, tanquam apostatas severissime agemus.

Qui vero in Monasterio degere solitus, extra Monasterium notorium aliquod crimen ita admiserit, ut populo scandalo sit; nobis instantibus, a suo Superiore, intra tempus a nobis præfigendum, severe puniatur, ac de punitione nos certiores faciat. Si Superior non punierit delinquentem, immo extra Diocesim transmiserit, intra terminum a nobis præscribendum, ad locum, in quo deliquit, illum revocet, sub pœnis Pontificio Decreto contentis. Alioquin Ordinarius loci, ad quem delinquens transmissus fuerit, a nobis requisitus, in eum severe animadvertet.

Censuras omnes, atque interdicta, quæ a Sancta Sede Apostolica, seu a Nobis emanaverint, Regulares omnes in suis Ecclesiis evulgent, & observent.

Dies festos, qui in hac Metropoli & Archidiecepsi nostra, ex voto, seu prisco usu sanctificari consueverunt, iidem Regulares observare teneantur.

Nemo Regularis, Monialium Monasteria ingredi, seu ad eorum cancellos, rotamve accedere, veleas alloqui audeat, sub pœnis a Sacra Congregatione Cardinalium, Episcoporum & Regularium negotiis præposita, ac peculiaribus Sanctionibus Apostolicis sancitis, & aliis etiam arbitrio nostro imponendis.

Vota substantialia in omnibus Monasteriis veraciter observentur. Cum autem regularis vitæ pestis sit perniciosissima proprietas; quæ ei occasionem, & fomenta subministrant, tollantur omnino.

Viçtus, vestitus, cæteraque vitæ subsidia, pro eorum necessitate, &

Monasterii facultatibus, ex communi, prompte, hilariter, non sordide, nec in pecuniis, sed in rerum specie præbeantur. Monachi, alique Religiosi, non in Ecclesiis incorporatis, sed omnes in Monasteriis vitam communem agant, nisi aliud Regula permiserit, & Superior cum Capitulo suo expresse consenserit, ac nos eorum sententiam approbaverimus. Non tamen prohibemus, quin curam animarum in iis exerceant, modo alias apti sint, & a Nobis approbati.

Pensiones ad vitam, aut redditus perpetuos, nullos quovis prætextu recipere, neque ratione officiorum vel ministeriorum pecuniam, ut propriam conservare permittatur, sed omnia in communem usum convertantur.

Nemo pecuniam, vel aliud quidpiam proprium apud se, vel alium habeat, immo nequidem apud Priorem suum, vel alterius nominis Superiorem, ut vere dicere possit: hoc est meum, & non commune, ac pro sua voluntate uti queat; nec bona immobilia ad usumfructum possideat.

Considerent Abbates, Præpositi, alique Superiores Monasteriorum Regularium, se non habere dominium Bonorum Ecclesiasticorum, qua Patrimonium Christi sunt, sed tantummodo administrationem, salvo paupertatis voto; ideo videant, ne ejusmodi bona gravent ære alieno, aliisque oneribus, onerosisque contractibus in præjudicium Monasterii sui, suorumque Successorum, ac eorum item, qui cœnobio, jurisdictionis temporalis ratione, præfunt. Ad servitia Monasterii nullos hæreticos, neque etiam per breve aliquod tempus, sub quovis prætextu admittant. Mimos, scurras, & alios id generis dyscolos, & moriones, non alant, neque eorum consuetudinem habeant.

Quæ Monasteria Parochias incorporatas habent; ut idoneos Parochos habere possint, duos ad minimum juvenes in celebri aliquo Gymnasio alere procurent.

Ut in omnibus Monasteriis docti viri haberi possint, semper duo ex juniori-

nioribus professis, vel si id nulla ratione fieri queat, ad minimum ex singulis cœnobiis, in Patrum Societatis Jesu Scholis, aliisque Gymnasiis Catholicis, usque ad secundum Theologiæ annum, alantur.

Caveant Prælati, ne ex bonis, aut fructibus Monasterii sui suos dicent amicos vel propinquos; neque quidquam ut proprium ipsi possideant, vel aliis possidendum, aut donandum relinquant.

Curent Abbates, Præpositi aliive Regularium Superiores habere Ludimagistrum aliquem eruditum, & bonæ famæ, qui vere Catholicus sit, curamque habeat, juniores statim a Professione, imo & Novitiis, si expedire videbitur, saltem in Catechismo & Grammaticis instruendi, atque ad Scholas altiores, ad quas mitti debent, disponendi. Procurent præterea habere Theologum; qui Sacerdotes, aliosque in piis, quæ regulam, conciones, casus conscientiæ, & id genus alia respiciant, diligenter instruat.

Si qui Regulares, quod absit, audendarum confessionum, aut concionandi munus non ita sincere, & cum ædificatione obierint; eos ab officio suspendemus, & removebimus.

Ea est quorundam Religiosorum temeritas, ut non solum extra Claustra, absque suorum Superiorum licentia degere, & apostatare audeant, censuras Ecclesiasticas contra Apostatas impositas incurrendo, sed etiam Religionis habitum deponere, & in hujusmodi censuris infordescere; atque in hoc damnationis statu perseverantes, in aliquibus Ecclesiis Parochialibus nostræ jurisdictioni Archi-Episcopali subiectis, Missas celebrare, Sacramentaque ministrare non erubescant. Quare pro debito vigilantia nostræ munere, eos paterne requirimus, atque in Domino monemus, ut præteritorum criminum poenitentes, ad nos cum omni fiducia confugiant; eos enim ad Sanctæ Matris Ecclesiæ gremium revertentes, benigne excipiemus; & eorum salutem, omni charitatis studio, totoque cordis affectu procurabimus: si vero, quod

absit, ab hoc damnationis statu respiscere non curaverint, in eos juxta Canonicas Sanctiones severe animadvertemus.

Regulares omnes utriusque sexus, etiam quovis modo exempti, si intra Archidiececesis nostræ limites eorum Monasterium existat, sacros liquores singulis annis renovari solitos, a nostra Metropolitana sumere teneantur. Si vero aliunde eos sumpserint, poenas dabunt a Sacris Canonibus sancitas.

### XXIX. De Monialibus.

**M**aximum certe periclitanti Ecclesiæ præsidium asserre possunt assiduis orationibus, & vigiliis suis Sacrae Virgines, quæ in Religione Deo se dicarunt, si, ut virginitatis flore decoratæ, gratiores sunt Christo Jesu, Sponso suo, ita majore devotionis Zelo, sanctoque charitatis igne accensæ fuerint. Quare ut in earum Monasteriis integra conservetur vetus disciplina, & ea parte, qua depravata est, restituitur, ad eamque se ipsæ conformantes, in rerum Divinarum contemplatione liberius conquiescant; hæc ab ipsis servanda decernimus, & sancimus.

Constitutio BONIFACII Papæ Octavi, quæ incipit: *Periculoso*, servetur diligenter, ita ut nemini Sanctimonialium cujuscunque ordinis, & instituti, liceat impofterum post Professionem exire a Monasterio, etiam ad breve tempus, quocunque prætextu (nisi ex aliqua legitima causa a nobis scripto approbata) sub poena excommunicationis ipso facto incurrenda. Ingre-di autem Clausuram Monasterii nemini liceat cujuscunque generis aut conditionis, sexus, vel ætatis fuerit, sine licentia nostra, vel Superioris earum (quoad Monasteria Regularibus subiecta) scriptis obtenta, alioquin eandem poenam subeant. Quæ facultas nulli concedatur, nisi urgentibus necessitatibus, aliter autem concessa nulla sit.

Facultas autem exeundi a Monasterio nullo modo concedi debet, nisi urgentibus necessitatibus; ideo nullis Abbatis, aliisque Monialibus permit-



mitteremus ; quavis occasione , vel causa , ut Commatris , Susceptricisque munus præstent in Baptismi ministerio ; neve ad nuptialia , aliave quæcunque convivia , sive symposia accedant ; neque ad balnea sive publica , sive privata adeant.

Cum a nobis facultatem obtinuerint ob aliquam gravem necessitatem a Monasterio exeundi ; saltem duas proVectioris ætatis & probatæ vitæ sceminas secum habeant , eisque perpetuo interdiciamus , ne extra Monasterium quavis occasione , vel causa pernotent.

Nullæ mulieres admittantur ad aliquam Monasteriorum servitia , nisi probatæ vitæ sint , & facultatem a Nobis scripto obtinuerint.

Moniales omnes ad regulæ , quam professæ sunt , præscriptum , vitam instituant & componant , atque in primis , quæ ad suæ professionis perfectionem , ut obedientiæ , ut obedientiæ , paupertatis , & castitatis vota , præceptaque ad trium votorum essentiam , nec non ad communis vitæ victus , & vestitus conservationem pertinent , fideliter observent : ea enim , quæ ad Regularis vitæ substantiam spectant , non sunt relaxanda , ne tota regularis disciplina corruat.

Ne ante professionem ( excepto victu & vestitu Novitiæ , illius temporis , quo in probatione est ) quocunque prætextu , ab ejus Parentibus , aut Curatoribus , Monasterio aliquid ex bonis ejusdem tribuatur ; ne hac occasione discedere nequeat , quod totam vel majorem partem substantiæ suæ Monasterium possideat , nec facile si discesserint , id recuperare possit. Abeuntibus autem ante professionem omnia restituantur , quæ sua erant.

Nulla acceptetur in Monasterio aliquo , educationis gratia , vel ut habitum regularem suscipiat , seu quovis alio prætextu , absque facultate a Nobis obtenta , alioquin excommunicationem subeant ipso facto non solum Moniales , quæ eam intra Monasterii clausuram introduxerint , sed illa etiam , quæ ingressa fuerit.

Nulla modo permittendum est ,

puellas hæreticas in aliquo Monialium Monasterio acceptari , educationis gratia , neque sub quovis alio prætextu , ne aliquod spirituale detrimentum iis , quæ in Monasterii clausura sunt , ob hoc afferatur : si vero aliqua admittenda videatur , eo quod spem præbeat conversionis , res tota ad Nos deferatur , ut , quid agendum sit , decernamus.

Si puella , quæ habitum regularem suscipere voluerit , major duodecim annis sit , non ante eum suscipiat , nec postea ipsa , vel alia professionem emitat , quam nos virginis voluntatem diligenter exploratam habuerimus , an coacta , an seducta sit , an sciat , quid agat : & si voluntas ejus pia , ac libere cognita fuerit , habueritque condiciones requisitas , juxta Monasterii illius , & ordinis regulam , libere ei profiteri liceat. Cujus professionis tempus ne nos ignoremus , teneatur Præfecta Monasterii ante mensem nos certiores facere.

Nullis in Monasteriis professio fiat ante decimum sextum annum expletum ; nec qui minori tempore , quam per annum post susceptum habitum in probationem steterit , ad professionem admittatur. Professio autem ante facta nulla est , nullamque inducit obligationem ad alicujus regulæ , vel Religionis , vel ordinis observationem , aut ad alios quoscunque effectus.

Nulla quoque renuntiatio , aut obligatio ante facta , etiam cum juramento , vel in favorem cujuscunque causæ piæ valeat , nisi cum licentia Nostra , vel Officialis nostri , fiat intra duos menses proximos ante professionem , ac non alias intelligatur effectum suum sortiri , nisi secuta professione : aliter vero facta , etiam si cum hujus favoris expressa renuntiatione , etiam jurata , est irrita , & nullius effectus.

Finito tempore Novitiatus , Præfecta Monasterii , obtenta prius a nobis facultate , Novitias , quas habiles invenerit , ad profitendum admittat , vel e Monasterio eas ejiciat.

Nulla Monialis ambiat , aut ullo quovis modo , sive directe , sive indirecte per se , aut aliam , honores , officia cujusvis generis sui Monasterii quærat.

Sin.

Singulæ propria voluntate deposita, & ad obtemperandum paratæ, si-bique Dei gloriam & communem Monasterii utilitatem tantummodo proponentes, ad honores & officia eas eligent, quas, omni remoto humanitatis affectu, Spiritus Sancti impulsu, ad id munus magis idoneas esse judicaverint.

Abbatissa, seu Priorissa, ne minor quadraginta annis eligatur, quæve in viræ honestæ laude vixerit octo annis, postquam professa est. Quod si in eodem Monasterio non ejusmodi reperitur, ex alio ejusdem Ordinis deligi possit. Sin autem Nos, vel Superior regularis (quoad Monasteria ei subiecta) hoc etiam incommodum judicaverimus, eligatur ex iis, quæ in eodem Monasterio annum trigessimum excesserint, & quinque saltem annis, post expressam professionem, laudabiliter vixerint.

In electione autem Abbatissæ, & Priorissæ, quæ tacitis suffragiis eliguntur, Monialium vota a Nobis, Officiali nostro, (seu a Superiore regulari, quo ad Monasteria ei subiecta) extra Monasterium ante cancellos, clatrosve fenestræ, colloctionis usui destinatæ, accipientur. In reliquis servantur singulorum Ordinum, vel Monasteriorum Constitutiones.

Abbatissa, sive Priorissa, tanquam communis omnium Monialium Mater, ipsarum & corporis, & animæ salutem quam diligentissime consulat, easque studiose admoneat, ut puro corde sint, vitæque integritatem servant, & ad perfectionem virtutum omnium contendant, siquidem quæ Religionem susceperunt, nisi ad summum illum gradum pervenire conentur, minus sane efficiunt, quam debent, pro vitæ, & Ordinis instituto, quod profitentur. Meminerint autem sibi reddendam rationem esse iustissimo Judici, erratorum omnium, quæ Moniales, ejus negligentia, aut culpa, admiserint.

Inprimis vero curet, ut pax & concordia Sororum conservetur, sublatis, quantum in ea fieri poterit, omnibus dissidiis, ac discordiæ causis, ut quemadmodum debent, unum corpus, &

unus spiritus in earum Sponso, JESU CHRISTO, perfecto charitatis vinculo, colligentur. Invigilent etiam, ut singulæ suo munere recte fungantur, neque ulla alterius officium occupet, nisi auxilii causa, idque ipsius jussu. At si alicujus importunitas, aut re, aut verbo, Sororum pace perturbata, charitatem violarit, acerrime ab ipsa Præfecta, & si opus erit, a Nobis, Superioreve puniatur, & ejus animi elatio edometur.

Abbatissæ autem, sive Priorissæ, Moniales omnes obedientiam, & observantiam præstent, quemadmodum earum votum postulat. Quæ vero ejus jussa neglexerit, neque pœnitentiam sibi impositam adimplere voluerit, aut superbe, & injuriose responderit, non habita ejus dignitatis ratione; aut contumaciter deferendo, vel excusando, eam impedierit, quo minus illas reprehendat, aut castiget, quæ aliquid commiserint; ad Nos deferantur, ut eorum contumaciæ debitæ pœnitentiis, & pœnis occurrere possimus.

Singulis etiam hebdomadis Abbatissa, Priorissave juxta propriæ Religionis institutum, Capitulum habeat corrigendi causâ Moniales pro erratis, quæ ipsæ publice, vel in suorum officiorum munere admiserint; quorum veniam ipsæ sponte, atque humiliter coram omnibus petant; eisque pœnitentiam imponendi, & alia adhibendi, quæ earum institutis tradita sunt, ad ipsas in humilitate, & sui contemptione continendas, atque ad virtutes omnes studiose sectandas. Caveant autem Moniales, ne pœnitentiam sibi ab Abbatissa, Priorissave impositam, pertinaciter recusent; neve superioris temporis delicta sibi invicem objiciant.

Novitiarum curam sola Magistra electa loco a cæteris Monialibus separato habeat, alia præterea nulla. Hæc Novitias in timore, & cultu Dei, & in observatione Religionis erudiat, coneturque etiam vitæ exemplo, quæ nullam habeat ansam reprehensionis, assiduisque admonitionibus ita eas instituere in spiritualis, & sanctæ vitæ ratione, ut progredientes, Deo adjutore, perfectæ ejus ancillæ possint evadere.

Januæ

Januæ Monasterii die clausæ sint una saltem clave, quæ ab ea, cui id jure Abbatisa dederit, custodiat, ut cum opus fuerit, aperiri possit. Ante occasum Solis quotidie claudantur duabus clavibus, diverso fabrilis opere confectis, quarum altera noctis tempore asservetur ab Abbatisa; altera vero ab aliqua ex antiquioribus Monialibus, ad id ab Abbatisa deputata.

Nulli viri, quavis occasione, vel causa in Monialium Monasterio pernoctent.

Abbatisa, sive Priorissa, & Moniales bona Monasterii alienare, permutare, locare, aut de eis contrahere nullo modo possint, absque Nostra, Officialisque nostri, seu Superioris regularis, quoad Monasteria ei subiecta, præsentia, & consensu; servatis item cæteris, quæ jure servari debent. Neque item aliquid in Monasterio ædificari, instaurarique faciant, absque nostro consensu scriptis exarato.

Nulla admittatur ad habitum Monachalem, neque ad professionem, nisi prius proposita fuerit in Monialium Capitulo, in quo ferantur tacita suffragia, ut singulæ Moniales, nullo humano affectu impeditæ, libere valeant suæ conscientię satisfacere.

Nulla proponatur in Capitulo tam pro habitu suscipiendo, quam pro professione emittenda, absque facultate a Nobis, Officialive nostro scriptis obtenta, etiam in Monasteriis Regularibus subiectis, ut prius de puellæ moribus, vita, & ætate inquiramus, & ipsam examinemus, ad explorandam ejus voluntatem, & propositum, quod liberum esse debet.

Quoniam autem, quæ Moniales, professione emissa, velum susceperunt, sacras preces horarias quotidie persolvere tenentur; nulla ad Professionem admittatur, quæ Officium Divinum recitare nesciat.

Professionis, & diei, & anni, quo facta est, in libro ad eum usum confecto, memoria conservetur, manu Abbatisæ, sive Priorissæ notata, adhibitaque subscriptione ejus, quæ professæ sit, si modo scribere sciverit, & Superioris item, qui eam admisit.

Cum ad Sanctimonialibus valde pertinet, Omnipotentem Deum assidue laudare, eidemque gratias agere, & supplicare, ut suam misericordiam omnibus hominibus ad salutem impertiat, idcirco die, noctuque chorum frequentent, Sacrisque Officiis distincte, & attente, ab ipsis, & voce, & pio animi affectu celebrandis intersint, illis solum exceptis, quarum Præfecta iusti impedimenti excusationem acceperit. Soni, & cantus, qui honesti & spirituales non sint, colloquia etiam, risus, quidquid præterea indignum est Domo Dei, & ejus Divina Majestate, cum qua colloquimur in oratione, omnino amoveantur.

Sacrosancta Eucharistia ne intra Monasterii clausuram, sed in Ecclesia exteriori, loco decenti, conservetur super altari majori, ea ratione, quam superius præscripsimus, cum de hoc Sacramento tractavimus. Coram ea autem continuo præluceat lampas decens & munda, in Ecclesia exteriori, loco convenienti posita.

Quod de clausura non violanda decrevimus, ita servetur, ut nulla Monialis, neque etiam ad Ecclesiam exteriori accedat. Ideo nullum ostium habeatur, per quod e Monasterio, locove colloctionum usui destinato in Ecclesiam pateat accessus; nisi forte permittendum sit hujusmodi ostium pro ministranda Monialibus Sacra Eucharistia, ubi non habetur fenestella huic usui destinata: quæ tamen quamprimum extruatur ad formam inferius descriptam, ut prædictum ostium muro obturari possit; illud autem interim clave continuo claudatur, quæ ab Abbatisa, Priorissave asservetur, ne extra Sacre Communionis tempus, quavis occasione, vel causa aperiatur.

Ut autem sacre vestes ad Missæ sacri usum, & antependia, aliaque ad altaris ornatum, cum opus est, exponi possint, in pariete Ecclesiæ a parte altaris majoris, quo commodior sit loco, intra Monasterii clausuram structo, in quo asservantur paramenta; fenestra fiat, rota apte constituta, quæ ejusmodi sit, ut tota pene sita inhæreat in crassitudine parietis, qui aliquo incru-



incrustationis opere crassior propterea fiat. Munietur valvis ab uno, & altero latere, quæ bonæ sint, unæ ab interiori Monialium parte, alteræ extrinsecus, & ambæ apte claudantur clavibus.

Ab altera parte Altaris in eodem pariete, loco, qui alicui Oratorio intra Monasterium construendo respondeat; fenestellula alia, sculptorio opere pie ornata exstruatur, unde Monialibus Sacra Communio ministretur. Cujus fenestellulæ planum æquale sit, & a pavimento Ecclesiæ alte exædificatum ulnis duabus. Hæc fenestellula late pateat extrinsecus ulnam unam & paulo amplius, alte exstructa ulnam unam, & tertiam partem alterius ulnæ; ita ut in primo aspectu latioris, intrinsecus autem angustioris formæ speciem præ se ferat. Tota autem in ipsa parietis crassitudine insit, quæ aliquanto minus unius ulnæ sit, ita tamen, ut intrinsecus a parte Monialium extremi parietis crassitudo ne latior sit decima parte ulnæ. Intus vero, in eo extremo pariete spatium insit trium quadrantium ulnæ; in quo spatio fenestellula altitudine & latitudine quadrantis ulnæ fiat, unde Monialibus Sacra Eucharistia præbeatur. In fenestellula a parte interiori valvulæ ferreæ, aut æneæ sint, polite confectæ, quæ pessulo, & clave obserentur; a parte exteriori valvulæ paulo majores, quibus tota fenestellula sepiatur, adjunctis fera, clave, & pessulo.

Nemo Sacerdos secularis, vel regularis audeat Missam facere in Ecclesia interiori, chorove Monialium, ubi officium ipsæ decantare solent, neque alibi intra Monasterii clausuram, alioquin suspensionis pœnam ipso facto subeat. Qui autem in Ecclesia exteriori id obire voluerint, ne inibi celebrent absque facultate nostra scriptis obtemperata.

Moniales Missæ non inserviant, neque Clerici ministrantis munus præstent, neque etiam intra Monasterii claustra respondendo, & pronuntiando ea, quæ Clericus in hujusmodi Sacrificio respondere consuevit.

Diebus Festis, ut otium, a quo omnia mala oriuntur, evitetur, tem-

*Tomus VIII. Concilior. German.*

pus, quod sibi a Divinis Officiis & consuetis orationibus superfuerit, in sacra aliqua lectione consumere curent, quæ ad Dei, & sui ipsius cognitionem conducatur, viamque monstret perfectionis, & æternæ vitæ; hujusmodi enim lectio suavis est & fructuosa animorum oblectatio, vitia coercet, atque ad virtutes inflammat. Videant autem, ne libros inanes, profanos, & qui quovis modo mentis puritatem corrumpere possint, ullo modo legant; immo nullos libros penes se habeant, qui animæ salutis, & regularis status splendori, Confessarii sui iudicio, non conveniant; præcipue vero caveant, ne libros hæreticos, seu quavis alia ratione prohibitos, apud se retineant, sive legant, alioquin censuras & pœnas superius præscriptas incurrunt. Præterea orationes ab hæreticis editas, aliasve, quæ ab eorum Confessario approbatæ non sint, nullo modo recitent.

Quod ad cibum, potum, somnum, vestitum, cæterasque res attinet; omnes communiter vivant, quemadmodum votum paupertatis postulat, ut tuum, & meum, & omnis privata rerum possessio, & re, & verbo, penitus tollatur, atque item omnis supervacaneus & inanis rerum usus; neque ulla sit, quæ quidquam possideat, aut ad usum adhibeat, ut proprium, etiamsi ad necessitatem concessum sit.

Dona, quæ singulis mittuntur, ad Abbatissam, Priorissamve adferantur, nec ulla possit illa accipere, aut ad usum adhibere, nisi sciente, aut consentiente Abbatissa, Priorissave, quæ in id omnino incumbere debet, ut ex Monasterio vitium proprietatis, tanquam multorum malorum causam evellat.

Mane & vesperi ante refectionem Abbatissa, sive Priorissa mensæ benedicat, in fine gratiæ agantur statim precibus. Ad mensam autem aliquis spiritalis liber, qui ad Religionem incendat, quotidie legatur, omnibus discumbentibus cum silentio, & attente audientibus, ut una cum corpore mens etiam recreetur.

Universæ Moniales, si fieri potest, uno loco dormiant, singulæ videlicet

C c c c c

in

in singulis lectis, & in singulis etiam cellis, si tanta sit copia cellarum, ut omnes capere possint.

De iis, quæ Domini sunt, frequenter cogitare assuescant, Divinarum rerum contemplationi vacent; fugiant colloquia vana & inutilia, sanctumque silentium, quo magna animæ spiritualium donorum fit accessio, sedulo servant. At præcipue caveant, ne vespere, signo silentii dato aliqua in alterius cellam se recipiat, sed ex disciplinæ regularis instituto, in propriis singulæ se contineant.

Monialibus nulla quidem nimia diligentia videri debet, ad ejus thesauri custodiam, cujus causâ propinquis, rei familiari, ac terrenis omnibus rebus, & curis renuntiantes, se Religionis jugo subjecerunt. Ut igitur sanctum earum propositum ea parte, quæ diaboli insidiis maxime patet, communiatur, non solum corpore, sed & corde, claustrali quieti perpetuo studeant. Nulla Monialis, puellam ullam, sive ex consanguineis, sive ex alienis apud se educare audeat; aut in sua cella dormire, etiam sub prætextu exercitii in monastica disciplina, permittat; cum hujusmodi puellæ, loco separato, puellarum educationi destinato, vel in Novitiatu, qui distinctus a Monialium cellis habeatur, omnino esse debeant.

Moniales quando cum œconomis Monasterii, aliisve quibusvis exteris, etiam strictiori consanguinitatis vel affinitatis gradu sibi junctis, ex gravi causa, loqui coguntur; facultatem obtineant ab Abbatisa, sive Priorissa, & ad locum colloctionum usui destinatum, nempe ad ipsius loci fenestram accedant, non ad januam, neque in Ecclesia, aut alibi; præsentibus semper Monialibus arbitris. Brevi finem loquendi faciant; caveantque, ne tempus, quo nihil est pretiosius, inani aut inutili sermone consumant.

Fenestra autem colloctionis bene munita sit opere clathrato ferreo duplici, dimidiæ ulnæ, vel paulo minoris intervallo inter unum & alterum interjecto. Opus vero clathratum ejusmodi sit, ut spissi clathri, firmiterque infixi, inter se singuli, non amplius di-

stent decima parte ulnæ. Instruatur præterea lamina ferrea, quæ latius paulo, quam fenestra undique patens, a parte Monasterii intus parieti infixa, firmoque bitumine agglutinata, clathrato operi interiori inhæreat. Sit vero plena foraminibus parvulis, inter se distantibus decima circiter parte ulnæ. Hæc lamina ferrea habeat fenestellulam in medio exstructam, dimidiam ulnam undique patentem, quæ sera, vecte, & clave claudatur. Obducatur item fenestra extrinsecus tela nigri coloris, affixa instrumento telari, quod aperiri queat.

Pars anterior Chori, in quo Moniales sacras preces horarias persolvunt, ea forma sit, ut ab iis, qui in Ecclesia exteriori fuerint, illæ nunquam videri possint, neque etiam per fenestram, per quam Sanctissimum Sacramentum, cum in Missa elevatur, adorant.

Omnes fenestræ, & cancelli, & quicunque locus, per quem Moniales externam Ecclesiam introspicere possunt, muro obturentur, præter fenestram, in qua collocata est rota, & fenestellam ad solum Sacræ Eucharistiæ sumendæ usum constitutam, atque illam fenestram, per quam Corpus, & Sanguinem Domini nostri Jesu Christi, a Sacerdote celebrante elevatum, aspicere valeant.

Ut accuratius clausura servari possit, omnem diligentiam adhibeant Abbatisæ, atque Priorissæ, ut quamprimum in Monasteriis habeantur Servæ, quas Conversas dicunt, Religionis habitum sumentes, & tria vota profitentes, quæ Monasterii servitia obeant, & famularum sæcularium vices intra claustra suppleant.

Quo quietius Abbatisæ, & Moniales spiritualibus officiis, & claustralibus exercitiis intendere possint, Oeconomos habeant, ab ipsis Deputatos cum interventu nostro, nostrive Officialis Generalis, atque Superiorum regularium, quoad Monasteria ei subiecta, qui curam habeant regendi eos, qui temporali manualium jurisdictioni sub sunt.

Si qui autem ex hujusmodi subditis ad Abbatisam, Priorissamve, seu ad

ad Moniales recursum habere voluerint, clausuram non ingrediantur; sed siue mares, siue foeminae sint, loco praescripto, ad cancellos, fenestramve collocautionis usui destinata, eas alloquantur.

Puellae, quae educationis causa, in Coenobiis degunt, non minores septennio sint, & vigesimum quintum annum non excedant. Absque facultate nostra, ut diximus, non acceptentur. In aliqua monasterii parte, a Monialium habitatione separata, degant. Magistra omnium una sit, quae doctrinam Christianam, modos orandi ab Ecclesia probatos, Litanias, Rosarium, Officium Beatae MARIAE Virginis, Psalmos poenitentiales, & huiusmodi eas recitare doceat. Item acu pingere, & alia, quae locum & sexum illum decent. Pretium pro earum victu, alimentisve persolvatur Abbatissae, seu Priorissae, quae eis necessaria a Monasterio subministrari curabit, non autem speciatim ab aliqua Moniali.

Cum propinquis, aliisque externis ne colloquantur, nisi eisdem servatis, quae supra de Monialibus eo in genere decreta sunt.

Quaecunque ex illis puellis monialis fieri voluerit, ad propinquos suos mittatur, aut ad eos, qui ipsius curam habent (nisi aliter a Nobis, Officialive nostro iudicatum fuerit expedire) apud quos saltem per mensem maneat, priusquam a Nobis, Officialive nostro examinetur; ut facilius, ac melius ejus libera voluntas exquiri, & explorari possit. Si vero propinqui haeretici fuerint, nullo modo ad eos puella mittatur, sed ejus voluntas in Monasterio ad cancellos, siue in Ecclesia exteriori, prout nobis videbitur, exploretur.

Puellas vero domi suae foris viventes, neque literas, neque ullam omnino artem Monialibus docere liceat, ne ad fenestellas quidem, aliave collocautionis loca.

Summopere optamus, ut unumquodque Monasterium habeat Concionatorem a nobis approbandum, quo ad Monasteria nobis subjecta, qui ei, singulis diebus Dominicis, & Festis,

*Tomus VIII. Concilior. German.*

ac saepius item, Dei verbum praedicet, easque erudiat in omnibus, quae ad Dei cultum & sempiternam salutem consequendam pertinent. Is autem nullo modo clausuram Monasterii ingrediatur, sed in exteriori Ecclesia, locove constituto, munus suum obeat.

Semel saltem singulis mensibus, & diebus item solennioribus per annum, ac saepius praeterea ad propriae religionis constitutionum praescriptum, Moniales omnes peccata sua Confessario a nobis speciatim approbato, confiteantur, & Sacram sumant Eucharistiam.

Ter in anno unicuique Monialium Monasterio nostrae Archi-Episcopali jurisdictioni subiecto, Confessarium extraordinarium eligemus, ut animarum morbis facilius & opportunior medicina adhiberi possit. At quo liberius, huiusmodi remedio indigentes, eo uti possint, omnes Moniales extraordinario Confessario se praesentare teneantur, etiamsi Confessionem Sacramentalem differre voluerint, ut eam coram Confessario ordinario obeant.

Monasterii clausuram Confessarius nullo modo ingrediatur, nisi cum Sacramenta Poenitentiae, Eucharistiae, & Extremae Unctionis Monialibus, graviter & periculose aegrotantibus, ministrare, & alia spiritualia adjumenta adhibere debet. Quo tempore, dum intra clausuram commoratur, eum duae Moniales, quae aetate caeteris praestent, comitentur. Eae autem omnes prosequuntur, quicumque clausuram Monasterii introierint, etiam Superiores, & Visitatores, facta prius significatione sonitu minoris campanae, ut Moniales se recipiant.

Cancelli ferrei, lamina, linea tela fenestulae ejus loci, ubi Moniales confitentur, ita compactae cohaereant, ut removeri non possint, & inde tantum audiri, aspici autem nullo modo valeant.

Abbatissa, Priorissave neminem ad Monasterii famulatum & procuracionem admittat, cujus aetas, & mores Nobis, & earum Superiori (si Regularibus subsint) probati non sint.

Monialibus non liceat exteris quibusvis etiam earum consanguineis, aut

C c c c c 2

affini-



affinibus, literas scribere, seu exarare, vel ab exteris exaratas accipere, absque facultate Abbatissæ, sive Priorissæ.

Nullis in Monasteriis admittantur Balneatores, nisi ex aliqua gravi necessitate, Medici testimonio comprobata, & facultate a nobis scripto obtenta.

Monialium corpora in sepulchris convenienti loco intra clausuram, non autem in Ecclesia exteriori constructis sepeliantur. Nullo autem modo Moniales, e clausura, funeris ducendi causa, exeant, sed processio fiat per Monasterium. Si autem intra clausuram nullum habetur sepulchrum; donec illud extruatur, sepeliantur in Ecclesia exteriori, ita tamen, ut funus ducatur intra Monasterium, & hac de causa ingredi poterit Confessarius ordinarius Monialium cum aliquo socio, qui defunctæ corpus, usque ad sepulturam comitentur, absque eo, quod Moniales e Monasterio exeant, seu Ecclesiam exteriori ingrediatur.

Moniales omnes intra hujus Metropolis & Archidiocesis nostræ limites consistentes, quæ Regularium curæ subsunt, has nostras Constitutiones in his præsertim, quæ spectant ad clausuram, sive ad admissionem cujusvis puellæ, adolescentisve ad habitum, seu professionem, vel ad educationem, inviolate observent, sub iisdem pœnis, & censuris superius sancitis, & inflictis.

### XXX. De Archi-Diaconis Diocesanis.

**U**T totius Archi-Diocesis nostræ necessitates facilius cognoscere, eisque opportuna remedia acuratus adhibere possimus, illam in certos Archi-Diaconatus, tractusve distribuendam censuimus, singulis tractibus certas Civitates, oppidaque ac loca assignando. Archidiaconi igitur Diocesani, qui hujusmodi districtibus, seu tractibus, jussu nostro, pro tempore præsidebunt, onus sibi commissum confiderent, & quam in eo sibi committendo spem, fiduciamque habuimus, perpendant; tum efficiant; ut nostræ ex-

spectationi respondeant, vigiliarum suarum studiis, assiduaque sollicitudine.

Omni studio ac diligentia curabunt, ut quæ ad Divini cultus augmentum, animarumque salutem procurandam, a Sacris Canonibus, Generalibus Conciliis, Apostolicis Sanctionibus, & Synodalibus Decretis, tam ERNESTI Primi Prædecessoris nostri, quam his nostris, atque Visitatorum nostrorum ordinationibus, sancte præscripta sunt, in regione, tractuve sibi commisso, ab omnibus diligenter attendantur, & accurate observentur. Monita nostra prompte exequantur, & Parochis suæ regionis tractusve, omni promptitudine significant, ut illa populis notificent, & ab omnibus in usum deduci curent. Frequenter autem de iis, ac reliquis omnibus, ad officium sum spectantibus, Nos, Officialemve nostrum literis suis certiores faciant.

Præcipuum vero eorum munus erit visitandi Ecclesias omnes, & loca regionis, tractusve sibi commissi, saltem bis in anno, nempe mense Aprili, & Octobri.

In hujusmodi bina visitatione videant diligenter, an Decreta nostra, Visitatorumque nostrorum executioni demandata sint. Si autem quæ existat difficultas in iis exequendis, eam nobis significant.

Videant item, an Ecclesiæ tam Parochiales, quam filiales, ac domus Ecclesiasticæ aliqua egeant instauratione.

An bona Ecclesiæ, Hospitaliumve, ubi illa sunt, & piorum locorum recte administrantur.

An singulis diebus Dominicis, & Festis, doctrina Christiana in omnibus Ecclesiis parochialibus doceatur.

An Parochi in propriis Ecclesiis resideant.

An verbum Dei assidue, & præsertim diebus Dominicis & Festis prædicent.

An munera Parochialia diligenter, & religiose exequantur.

An aliqua Ecclesia parochialis careat Rectore, Parochove.

An

An bona Ecclesiæ in totum, vel in partem ab aliquo usurpentur.

An hæ nostræ Constitutiones Synodales a Parochis, Clericis, & ab aliis omnibus, ad quos spectant, observentur.

Quæcunque in visitatione Nobis referenda repererint, statim literis suis significant; ut ea adhibeamus remedia, quæ Divini cultus augmento, & animarum salutis magis expedire iudicabimus.

Cum ex optimo Sacerdotalium Conventuum instituto, in Ecclesiastica disciplina non modo retinenda, sed etiam instauranda, uberrimi fructus percipi possint; iidem Archi-Diaconi Parochos omnes & Clericos sui districtus, singulis annis, saltem ter ad se convocent, & congregationes habeant, eaque præstent, quæ inferius præscribemus.

Hujusmodi autem Congregationum dies is constituatur, qui plerisque sit commodior, ea tamen habita ratione, ut hac de causa non impediatur Parochi, quominus Sacras Confessiones Sacramentales debitis temporibus audire possint. Ideo hi Conventus non habeantur hebdomada, quæ proxime antecedit Natalem Domini, neque duabus hebdomadis ante Pascha Resurrectionis, neve item diebus, quibusdam præcedentibus aliquam aliam Solemnitatem, veluti Pentecostes, Corporis Christi, Assumptionis Deiparæ Virginis, & omnium Sanctorum.

Ad Conventum Diocesenum cogantur Sacerdotes omnes, item qui Sacris Ordinibus sunt initiati, & qui Beneficia obtinent, etiam Canonici, iis tantummodo exceptis, qui aliquo legitimo impedimento fuerint impediti, ab Archi-Diacono approbando. Missæ intersint, quæ de Spiritu Sancto ab eo, cui id curæ dederit Archi-Diaconus, celebrabitur, habitu decenti, & talari induti, cum tonsura Clericali, quam Coronam vocant, Ordini suo congruente. Unusquisque præterea superpellicem habeat, quod neque situ, sordeve squalleat, nec vero usu obtritum sit, sed candidum, ab omni labe purum, & decens. Qui abfuerit, cau-

sam Archi-Diacono, eo ipso congregationis die, demonstret. Quæ si ab eo approbata non fuerit, præter alias poenas arbitrio nostro irrogandas, pecunia in pios usus, Archi-Diaconi arbitrato, convertenda, mulctetur; quæ neque minor sit dimidio taleri, neque major duorum talerorum; & in hos limites, pro culpæ modo, & personæ ratione, ab eo, qui præest, mulcta constitutur.

Pridie congregationis, omnes Sacerdotes peccata sua confiteantur, & ipso die conventus hujusmodi, pro Ecclesiasticis ac Benefactoribus vita functis, Missam celebrent.

Jejuni omnes & Missæ, & congregationi intersint, alioquin mulctam dent, ac si absque causa legitima absentes essent.

Missæ celebrata, in domum Archi-Diaconi modeste, & graviter accedant, & laicis hominibus exclusis, fiat oratio, ut infra, genibus flexis.

*Veni Sancte Spiritus, reple tuorum corda fidelium, & tui amoris in eis ignem accende. Kyrie eleyson. Christe eleyson. Kyrie eleyson. Pater noster.*

*V. Et ne nos inducas in tentationem, R. Sed libera nos a malo.*

*V. Memento Congregationis tuæ, R. Quam possedisti ab initio.*

*V. Domine exaudi orationem meam, R. Et clamor meus ad te veniat.*

*V. Dominus vobiscum, R. Et cum Spiritu tuo.*

#### OREMUS.

*Mentes nostras, quæsumus Domine, lumine tuæ claritatis illustra: ut videre possimus, quæ agenda sunt; & ea, quæ recta sunt, agere valeamus. Per Christum Dominum nostrum. R. Amen.*

Deinde, suo quisque loco, non tumultuarie, raptimque, sed graviter, ordineque confideant: & sermone habito ab Archi-Diacono, in quo aliquid de Clerici disciplina tractetur, una, aut altera quæstio proponatur, prout in præcedenti congregatione, seu saltem per mensem, antequam discutiendæ sit, unusquisque ab Archi-Diacono admonitus fuerit, & earum exemplar accenderit.

Ea autem sit quæstionum materia, quam hominum mores, actionesque & negotia, quæ in ipsa regione geruntur, suppeditabunt. Ad conscientiarum difficultates explicandas, non autem ad ingenii solum, verborumque argutias exercendas. In quas item quæstiones, Archi-Diaconi cura, apte inferantur, quæ ad Divini cultus rectam rationem, Sacramentorum rectam administrationem, ac casuum Sanctæ Sedi Apostolicæ & Nobis reservatorum explicationem, spectant.

Aliquis Parochus, Sacerdosve, qui Secretarii congregationis munere fungetur, ad id ab Archi-Diacono deputatus, silentio indicto, singulas quæstiones de scripto pronuntiet. Tum Archi-Diaconus de singulis quæstionibus sententiam singulorum roget, ab iis initium faciens, qui inferiori loco sedebunt, nisi aliquando ordinem huiusmodi aliquo modo mutare expedierit; neque quisquam, nisi interrogatus, sententiam dicat.

Archi-Diaconus ad congregationes quam maxime præmeditatus veniet, studio diligenti adhibito, consultis etiam doctissimis viris, quos adire judicaverit, pro quæstionum natura.

Unusquisque sententiæ suæ rationem, & certam auctoritatem afferat. Utantur omnes sermone latino, nisi aliquando aliquis, ut explicatius sententiam suam exprimat, lingua vernacula uti maluerit.

Archi-Diaconus autem, ubi omnium sententias audierit, summam colliget, quæ fuse dicta sunt; prætermissa commemorabit; falsa a veris, dubia a certis, singularia a communibus secernat, dissidentes inter se Doctorum opiniones conciliabit, & quæ verior doctrina sit, exponet; rem denique omnem enucleate explicabit, & ab eo, qui Secretarii congregationis munere fungetur, in libro describendam dictabit, vel ipse Archi-Diaconus scribet. Qui etiam Ecclesiasticos omnes diligenter inspiciat, an vestitu decenti induti sint, & corona Clericali ornati. An orationibus, spiritualibus exercitiis, studiis, & disciplinæ scholasticæ incumbant. An sacras preces horarias quo-

tidie recitent. Et alia in eis scrutabitur generatim, ac breviter, quæ pro sua prudentia expedire judicaverit, prout ratio personarum, & temporis spatium tulerit.

Legantur demum aliquæ ex his nostris Constitutionibus Synodalibus, præsertim illæ, quæ ad Parochos, & rectam Sacramentorum administrationem spectant. In hoc autem Archi-Diaconus arbitrabitur; qui etiam studebit, ut aliquod temporis spatium in eo ponatur, quo inter se Parochi, aliis remotis, quæ ad boni Sacerdotis, & Pastoris officium, atque ad animarum curam bene gerendam pertinet, conferre possint, ac de suæ quisque Parochiæ incommodis, & difficultatibus, quarum explicatio aliorum consilio, operaque opus habeat, consulere.

Deinde Archi-Diaconus diem sequentis congregationis indicat, & quæstiones proponat in eadem explicandas, earumque exemplar per se, vel per eum, qui Secretarii munere fungetur, unicuique tradat. Illis autem, qui a congregatione abfuerint, significetur dies sequentis conventus, & quæstionum exemplar mittatur saltem per mensem, ante statam congregationis diem.

Absoluta congregatione, antequam itineri se committant Sacerdotes, flexis genibus, preces inferius descriptas recitent.

*Kyrie eleyson. Christe eleyson. Kyrie eleyson.  
Pater noster.*

*V. Et ne nos inducas in tentationem,  
R. Sed libera nos a malo.*

*V. Confirma hoc Deus, quod operatus es  
in nobis,*

*R. A Templo Sancto tuo, quod est in Jerusalem.*

*V. Domine exaudi orationem meam,  
R. Et clamor meus ad te veniat.*

*V. Dominus vobiscum,  
R. Et cum Spiritu tuo.*

**OREMUS.**

*Presta nobis, quæsumus Domine, auxilium gratiæ tuæ: ut quæ, Te auctore, facienda cognovimus, Te operante, impleamus. Per Christum Dominum nostrum. R. Amen.*

Nemo



Nemo per Civitatem, seu oppidum, quo Clerus convenerit, vagetur, neque hac, aut illac concurser, neve otiose, seu curiose obambulet; nec negotia cujusvis generis cum Laicis habeat, neque ad tabernas, diversoria, seu hospitia publica ullo modo divertat. Sed precibus peractis, omnes se more Sacerdotali invicem salutes, seque item orationi mutue in visceribus JESU CHRISTI commendantes, absque aliqua mora, in pace discedant, ad suas quisque Sacerdotales, & Clericales stationes accedentes, eo studio ex conventus celebritate accensi, ut & in Dei gloria, & in animarum salute procuranda indies magis fructus constet, quem ex eodem conventu consecuti sunt.

Archi-Diaconus, quæ in conventu acta sunt, Nobis, aut Officiali nostro quamprimum per literas suas significabit, & præsertim, quæ ut executioni in animarum ædificationem facilius demandentur, nostram auctoritatem requirunt.

Omnes animarum curam gerentes, cujuscunque dignitatis fuerint, & alii item Sacerdotes, ac Clerici, Archidiaconi loco cedent; atque in iis omnibus, quæ ad illorum munus pertinebunt, humiliter obtemperabunt, ipsosque debito honore prosequuntur.

Singulis annis feria quinta Cœnæ Domini liquores a Nobis, Suffraganeove nostro, ex Sacrorum Canonum Sanctionibus consecrari solent, & ab omnibus Parochis nostræ Archidiececesis sumi, ut veteribus combustis, novi, recentesque in Sacramentis ministrandis, Sacramentalibusve functionibus obeundis ex sacris ritibus adhibeantur. Ut igitur animarum curam gerentes majori facilitate & promptitudine, illa habere valeant, Archidiaconi eo ipso die feriæ quintæ post Dominicam Palmarum, aliquem ad eos Sacros Liquores, a Basilica Metropolitana, in vasis forma præscripta confectis, & nitidis, sumendos mittant; eosque statim sui districtus, tractusve Decanis, & Parochis distribuunt. Curent autem, ut omnes ante Sabbatum Sanctum illos habeant, aut saltem ante Sabbatum,

quod immediate præcedit Dominicam in Albis, gravi pœna negligentibus proposita, arbitrato nostro irroganda.

Est illud perverus institutum, atque jure Canonum comprobatum, ut ob honorem, qui Basilicæ Metropolitanae, Cathedralive tanquam matri a cæteris Ecclesiis Parochialibus tribui debet, Cathedratum Archi-Episcopo, Episcopove singulis annis persolvatur. Cum autem hujus nostræ Archidiececesis Parochi, animarumve Rectores, etiam temporarii, in magna Paschæ solemnitate, ex antiquissima & immemorabili consuetudine, certam pecuniæ portionem hujusmodi Cathedratici nomine, quod fumalia vocant, Ecclesiæ nostræ Metropolitanae persolvere consueverint, ne hac de causa ad hanc Civitatem cum non parvo eorum incommodo, atque impensa, accedere cogantur, iis omnibus edicimus, ac jubemus, ut Ecclesiæ suæ nomine, ejusmodi pecuniam in manibus Archidiaconi propriæ regionis, seu tractus, ante Dominicam Palmarum quotannis persolvisse habeant, sub pœna dupli. Archidiaconi autem, cum ad harum constitutionum nostrarum præscriptum, ad sacros liquores a nostra Metropolitana sumendos mittent, illam pecuniæ portionem, quam a Parochis exegerint, ei integre consignandam curabunt, cui id curæ dedimus.

Ut ea, quæ in universa Archidiececesi nostra, correctione, & reformatione pro tempore indigebunt, facilius cognoscere, iisque opportuna remedia, quantum in nobis erit, adhibere valeamus, omnibus Archidiaconis Dicecesanis præcipimus, ut quotannis feria quarta, post Dominicam tertiam a Pascha, congregationi in hac Civitate, nempe in ædibus nostris Archiepiscopalibus, coram Nobis, Officialive nostro obeundæ, omnino interfint, in qua de bono Ecclesiæ nostræ regimine tractabimus. Idem autem Archidiaconi maximo nobis erunt adjumento, in iis cognoscendis, ac discernendis, quæ ad Cleri, populi que nobis commissi disciplinam conformandam apta judicabuntur.

XXXI.

## XXXI. De Decanis Ruralibus.

**C**um Clericalium Conventuum instituta ratio in omnes partes utilis sit, & salutaris; ii enim sunt Scholæ, & exercitationes non solum studiorum, sed etiam officiorum Ecclesiasticorum, in quibus & animarum Rectores, & cæteri Clericalis ordinis homines versantur; Civitates, & loca Archidiaconalibus Dicecesanis adjudicata, in certos Decanatus distinguere volumus, singulis Decanatibus certa oppida, locave assignando. Decani igitur proprii districtus, sive tractus Archidiacono subsint, & omni promptitudine obediant, atque de ejus consilio, omnia ad eorum munus spectantia diligenter peragant.

Nostra, Officialisve nostri monita, etiam quæ ab Archidiaconis nomine nostro eis indies notificabuntur, & ea item, quæ his nostris Synodalibus Decretis præscribuntur, prompte exequantur, & ab Ecclesiasticis, Laicisque intra sui tractus limites consistentibus, prout ad eorum quemque pertinere dignoscent, executioni demandari curabunt.

Quater in anno, Parochos, aliosve Ecclesiasticos suæ regionis, vel tractus ad se convocent, & Clericales Conventus habeant ad eam rationem, quam superius præscripsimus, cum de congregationibus ter in anno ab Archidiaconis habendis tractavimus. Si qui absentes fuerint absque legitima causa, a Decano approbanda, ab eo muldebuntur eo modo, quo, qui a congregationibus apud Archidiaconum habendis abfuerint, puniri debent. Quidquid autem in hujusmodi Conventibus agetur, ad proprii districtus Archidiaconum statim significant.

Licet Parochi omnes subsint Archidiacono proprii districtus; tamen suæ Regionis Decano debitam etiam præstabunt obedientiam in iis, quæ ad suum munus spectant; ita ut auctoritas Decani, non immediate a Nobis, sed subordinate ab Archidiacono pendeat, absque tamen aliquo præjudicio auctoritatis nostræ, Officialisque nostri Generalis, quæ semper salva remaneat, & illæsa.

## XXXII. De Testamentis Clericorum.

**C**lerici omnes sæculares hujus Metropolis & Archidiececesis nostræ, etiam si Beneficia Ecclesiastica cujusvis generis obtineant, liberam quidem habeant testandi facultatem ex privilegiis antiquissimis, & immemorabili consuetudine; sed de bonis Ecclesiæ nomine acquisitis nullo modo testari seu disponere poterunt.

Concubinarum, spuriorumve, vel aliarum turpium personarum in Testamentis Clericorum ne mentio fiat. Quod si quis quacunque de causa, vel quovis prætextu, concubinæ suæ, mulierive vitæ non probatæ, seu spuris, etiam sub ancillæ, vel servi, aliove quovis fictitio nomine, quid legaverit, hujusmodi legatum irritum sit, & nullum, illudque in pios usus arbitrio nostro convertetur.

Nullos Executores Testamento constituent, qui Catholici non sint; neque instituant bonorum suorum hæredes Pichardos, aliosve hæreticos, neque hujusmodi hominibus aliquid jure legati, vel quavis alia ratione relinquant; alioquin testamentum eo ipso irritum, inane & nullum declaramus.

Nulla Clericorum Testamenta suum sortiantur effectum, executionive demandentur; nisi prius clausa, & fide dignorum virorum sigillis obsignata, Nobis, Officialive nostro transmissa fuerint aperienda, & de more approbanda, & publicanda.

Executores Testamentorum, intra annum a die obitus Clerici defuncti, de omnibus, & singulis, quæ invenerint (quorum omnium inventarium authenticum extare volumus) & quibus, ac quomodo ea distribuerint, & qua ratione Testamentum executioni demandaverint; Nobis, aut Officiali nostro rationes reddant, alioquin poenas dabunt arbitrato nostro.

Quocunque anni tempore Clericus quispiam obierit, ex defuncti fructibus semper congrua portio relinquatur Successori, usque ad novi anni initium.

Si

Si inter Successorem, & testamenti Executores aliqua fuerit controversia; ad Officalem nostrum recurrant, qui illam summarie definiat, ac decidat.

Quicumque Sacerdos, vel Clericus, ubi primum de morbo, aut morte alterius Clerici cognoverit, Archidiaconum propriæ regionis, seu tractus, quamprimum certiores reddat. Quod si casus tam cito ad Nos deferri nequeat, præsertim si nullum testamentum sit factum, aut Testamentarii non sint præsentis, seu ignorentur, ipsi Sacerdotes proximi & primi, ejus obitus scientiam habentes nomine nostro universa obfignent, remque statim ad Nos, Officalemve nostrum deferant.

Ne quis sub quovis prætextu suppellectilem, remve aliam, seu scripta ad Ecclesiam, cui ille Clericus præerat, pertinentia, neve ipsius Clerici vivi, seu defuncti bona cujusvis generis invadat, asportet, seu surripiat, sub pœnis, & censuris, a Sacris Canonibus sancitis.

Si quis Clericus decesserit ab intestato, servetur consuetudo immemorabilis hujus Metropolis, & Archidiecesis nostræ; dividendo ejus bona, & hæreditatem in tres partes, portionesve æquales; quarum prima ad Ecclesiam, cui ipse, dum viveret, præerat; altera ad defuncti hæredes; tertia vero ad eum, ad quem spectat præfatæ Ecclesiæ Jus Patronatus, quam Collaturam vocant, absque aliqua contradictione perveniat.

### XXIII. De Clericorum Seminario.

**N**ihil est in hac Metropoli, & Archidiecesi nostra magis necessarium ad Catholicam Religionem propagandam, quam Sacerdotum, & Operariorum doctrina, pietate & morum integritate præstantium sufficiens numerus, & copia. Messis enim multa est, & paucissimi habentur operarii, ita ut multæ Ecclesiæ Rectore careant, & earum necessitati, ob Sacerdotum penuriam (quod lacrymantibus oculis fateri cogimur) succurrere nequimus. Cui gravi malo opportunum remedium

*Tomus VIII. Concilior. German.*

nulla ratione adhibere possumus, nisi Seminarium Clericorum ad Sac. Conc. Trid. præscriptum erigatur; in quo collegiatim certus adolescentium numerus constituatur, census & redditus ad eorum sustentationem necessarios præfiniendo. Cum enim duo præcipue in Sacerdote requirantur, probitas videlicet vitæ, & doctrina; earum utraque in Seminariis omni facilitate comparatur; quæ ea potissimum de causa eriguntur, ut in iis boni, strenuique operarii ad curationem animarum instituuntur; & ii quidem adolescentes (qui ob ætatem, cum tenera sit, & proclivior ad voluptates, & flexibilis etiam ad bonarum rerum impressiones admittendas, in operibus virtutum erudiendi debent) eam vitæ perfectionem adipiscantur, quæ in iis, qui Doctores populorum futuri sint, elucere debet, & severioribus disciplinæ legibus coercendi. Quare ut hujusmodi Seminarium ad Catholicæ Religionis augmentum, nostræque Ecclesiæ utilitatem ad eam rationem, quæ ejusdem Sacri Concilii Tridentini Decreto præscribitur, quamprimum erigatur, omnem operam, omneque studium pro debito vigilantia nostræ munere adhibebimus.

Cum autem in Seminarii erectione ii desiderentur redditus, qui ad illum adolescentium numerum sustentandum sufficiant, quem Archidiecesis nostræ amplitudo, & Ecclesiarum necessitas postulat, non possumus non plurimum confidere de pietate, religione, ac charitate Abbatum, & Catholicorum Baronum hujus Archidiecesis. Ideo eos rogamus, & per Dei misericordiam obsecramus, ut in hac re, quæ bono hujus Ecclesiæ regimini non solum utilis, sed necessaria est, desiderium nostrum religiosa liberalitate adjuvent, quo illum sortiri possit effectum, quem, Deo adjuvante, speramus.

### XXXIV. De Pœnis, & aliis, quæ generatim ad has Constitutiones pertinent.

**Q**uicumque, vel universi, vel singuli, quorum interest, his nostris Constitutionibus, non paruerint,

D d d d d



ruerint, aut aliquid contra commiserint, admiserintve, illi multas & pœnas luant iis ipsis Decretis sancitas, ac alias item, ex Ecclesiasticis, Conciliorumque Sanctionibus, & Canonum jure, atque graviores præterea pro culpa, & personarum ratione, arbitrato nostro constituendas.

Quæcunque facultas ex Decretis in hac Synodo editis a Nobis requirenda est, eam concedere poterit Officialis noster, nisi in iis, quæ proprie ad Ordinem Episcopalem pertinent, aut in quibus Vicarii a Sacris Canonibus, seu a Sacro Concilio Tridentino exclusi sunt.

Si in his Constitutionibus aliqua difficultas orta fuerit, ejus declarationem, & omnium præterea, quæ ipsis Decretis continentur, interpretationem, & explicationem Nobis, & Successoribus nostris Archi-Episcopis, legitime intransibus, perpetuo reservamus, salva semper Sedis Apostolicæ auctoritate.

Ut eorum, quæ in hac Synodo sancita sunt, ignorantiam excusare nemini liceat, edicimus, ut post duos menses proximos hodierna die inchoandos omnes se, & his Decretis, & si contra fecerint, pœnis, quæ in eis continentur, teneri intelligant.

Clerici omnes Beneficium aliquod Ecclesiasticum, qualecunque sit, obtinentes, & qui in Sacris Ordinibus sunt constituti, has Constitutiones nostras infra mensem proximum comparent, & penes se habeant, sex taliorum in pios usus arbitrio nostro erogandorum unicuique contravenienti multa sancita.

Omnia & singula, quæ a Nobis in hac Synodo Diocesana decreta, actaque sunt, qua debemus obedientia, & reverentia, auctoritati, ac judicio Sanctæ Romanæ Ecclesiæ, omnium Ecclesiarum Matris, & Magistræ semper emendanda, & corrigenda subjiciamus.

#### XXXV. De Sacri Concilii Tridentini acceptance.

**H**Oc tandem corollarii loco addimus, quod cum post præfata-

rum Constitutionum promulgationem Decretum de Sacrosancto Tridentino Concilio acceptando jussu nostro lectum & promulgatum fuerit, in hunc videlicet, qui sequitur modum:

**R**everendiss. ANTONIUS Prædecessor noster, ut primum Tridento, quo FERDINANDI I. Augustiss. mem. Imperatoris Orator ad Sacram Tridentinam Synodum perexerat, Pragam rediit; in eo totus fuit, ut quamprimum Archi-Diœcesanam Synodum cogeret, & in ea cum alia multa salubriter institueret, tum omnia & singula, quæ ab ipsa Sancta Tridentina Synodo definita, & statuta fuerant, & ipse palam reciperet, & ab omnibus, ac singulis Sacerdotibus, & Clericis suis palam recipienda curaret, quemadmodum Tridenti, suo, & hujus Archi-Episcopalis, cui tunc præerat, Ecclesiæ nomine acceptarat. Idque multa ejus scripta, quæ apud Nos conservantur, aperte ostendunt. Verum cum morte sublatus, Synodalem Conventum cogere non potuerit, & ob gravia tum Antecessoris nostri MARTINI, tum nostra impedimenta in hodiernum usque diem protractus sit, nostrum esse duximus illud ipsum exequi, quod ab omnibus Præsulibus in prima Synodo Diocesana præstandum est. Quare præsentī Decreto supradictum Concilium, omniaque & singula in eo definita, & sancita recipimus, & approbamus, atque vobis omnibus & singulis recipienda & observanda edicimus. In cujus rei testimonium, majusque robur Nos ipsi subscribemus, & a vobis subscribi mandamus.

Cumque omnes & singuli, nemine prorsus excepto, ac summa etiam alacritate, idem Sacrosanctum Concilium Tridentinum acceptarint, seseque illud in omnibus, & per omnia observaturos esse, summa sua voluntate, ac per propriam subscriptionem promiserint, quemadmodum ex actis Synodalibus liquet; Idcirco omnes & singulas Personas Ecclesiasticas in Domino moneamus, eisdemque in virtute sanctæ obedientiæ præcipimus & mandamus, ut infra trium mensium spatium ejusdem Con-

Concilii Tridentini Librum, & Decreta penes se habeant, illaque diligenter meditentur, perpendant, & quemad-

modum se facturos promiserunt, in omnibus, & per omnia observent.

F I N I S.

*Excusa primum hæc Synodus anno 1605. Pragæ typis Nigriam.*

*Recusa ibidem per Georgium Czernoch anno 1684. ex speciali mandato Celsissimæ ac Rdmæ Principis, Domini Joannis Friderici Comitis de Waldstein, Pragensis Archi-Episcopi, cum citationibus ad marginem diligenter expressis.*

*Commodavit exemplar Rdissimus, Celsissimusque Dominus Joannes Mauritius Gustavus perp. gratissimæque mem. primus Operis CC. Autor, & Auctor munificentissimus.*

Breve Benedicti XII. P. M., quo Ernestum Pragensem Episcopum a Metropolitana Henrici Archi-Episcopi Moguntini jurisdictione eximit, datum Avenione X. Cal. Aug. 1341. Pontificatus VII. vide apud *Lunig Contin. I. Spicil. Eccles.* pag. 207. Nihil de eodem Apostolico Breve (quod mirere) in vita Venerab. Arnesti, seu Ernesti primi Pragensis Archi-Episcopi *Balbinus*, ex quo diploma *Clementis VI*, factam a se A. 1343. prid. Cal. Maji in Metropolim Pragens. Ecclesiæ erectionem confirmantis A. 1344. 8. Cal. Sept., dedimus Tom. CC. IV. pag. 347.

Eod. Tom. pag. 381. existat Synodus Pragensis Provincialis Ernesti Prag. Archi-Episcopi I.

Statuta Dicecesana sub Antonio de Muglirio, exhibentur Tom. VII. a pag. 26. ad pag. 54., ubi tum Conradi Westphali luctuosam a vera fide defectionem, namque ex ea celeberrimæ Metropolis viduitatem diuturnam adeo ac perniciosam, tum Ferdinandi I. Imp. labores pro Sede illa vigori pristino reddenda gloriosissime susceptos, aliaque adnotatu digna reperies.

Successor Antonii & Concivis Martinus, Peltenbergensis Præpositus, Magister Crucigerorum Generalis, designatus ab Roman. Imperatore Rudolpho II. Archi-Episcopus Pragensis tanta officium suum solertia ac dexteritate gessit, ut cumulate faceret Bonis omnibus satis, nec, in illo quod carperet, comes felicitatis perpetuus, livor haberet. *Ita fere opusculum Pragæ editum 1672., cui titulus: Gloria Universitatis Carolo-Ferdinandæ Pragensis &c.*

Idem opusculum pauca refert eodem scribendi genere de Sbignæo Berka, XI. Prag. Archi-Episcopo, quæ fusius his plane verbis enarrat *Historiæ Soc. JESU Provinciæ Bohemiæ Part. II. P. Joannes Schmidl ejusd. Soc.*: " Quod vero hoc anno ad " memoriam celeberrimum, ad Ecclesiæ Bohemæ disciplinam utilissimum accidit, " erat Synodus Nationalis; qualis a temporibus *Arnesti I. Archi-Episcopi Prag.*, " qui ante *Ziskanas* turbas, id est, ante ducentos & complures annos hanc rexe- " rat Ecclesiam, celebrata non fuit. Hanc *Sbigneus Archi-Episcopus* ad diem 28. " Septembris, qui D. Wenceslao Bohemiæ Duci ac Martyri sacer est, edixit, ac " triduo extraxit. . . . . Scopus primarius, in quem Sacri Conventus intentio & " conatus collimabat, reformatio Cleri & integritas Romanæ Fidei urgenda occur- " rerat. . . . . Et hoc quidem, ad cæterum *Sbignæi* in Ecclesiam suam ingen- " tium meritorum cumulum, postremum opus ac gloriosissimum accessit: nam " anno, quem abhinc auspicamur, Christi 1606. die 6. Martii ■ mortalibus subla- " tus est, Vir non magis vetustate nobilissimæ in Bohemia Berkarum de Duba & " Lippa Familiæ, quam eximia virtute, morum elegantia, eruditione ac sapientia " præstans, in rebus gerendis magni usus & consilii, ideoque Rudolpho Imp. & " Proceribus Regni, etiam A catholicis, inprimis carus.

" Adolescens Olomucii in Academia nostra liberales artes & cum iis amorem erga " Societatem nostram combibit. Inde Cracoviam transgressus Philosophiam & " Theologiam perdidicit, ad Licentiam usque supremæ Laureæ provectus. . . . " Ecclesiæ Cathedralis sex, una etiam Metropolitana, Canonicatus suos (*Sbigneo*) " detulerunt: Præpositus Wischradi, Olomucii, Oetingæ ac Litomericii audiit: " Administrator Ratisbonensem Episcopatum annis aliquot fama maxima, virtute- " que integerrima gubernavit; donec ipsum Rudolphus Imp. Archi-Episcopum " Pragensem jussisset. Romani tres consequenter Pontifices suum esse Camera- " rium voluerunt. . . . Sedit in Pragensis Ecclesiæ solio annis 13., mensibus pro- " pe quinque. &c." *Hæc, quibusdam omissis, ex cit. Schmidlio pagg. 419. & 420.*



**STATUTUM SYNODALE**  
**ERNESTI, (\*) ARCHI-EPISCOPI COLONIENSIS,**  
*De Investitione, & Professione utriusque sexus Regularium*  
*anno 1605. undecima Septembris editum,*

CONFIRMATUM

A PAULO V. PP.

Anno Christi MDCVII. Ejusd. Pauli V. PP. III.  
 Rudolphi II. Imp. XXXI.

PAULUS PAPA V.

VENERABILIS FRATER &c. APOSTOLICAM BENEDICTIONEM.

**S**ingularis Tuus Regularis disciplina ac Religiosis conservandæ zelus promeretur, ut ea, quæ desuper a Te decreta & sancita esse cognoscimus, Apostolicæ firmitatis munimine roboremus. Cum itaque sicut Tuo nomine Nobis nuper expositum fuit, Tu ad nonnullos abusus in Religiosorum ad regularem vitam ingressu in Tua Diœcesi ingentes tollendos, & Religionis rigorem, quoad fieri potest, in viridi observantia manu tenendum, Statuta ac Decreta quædam edideris bujusmodi sub tenore, videlicet:

**ERNESTUS, DEI GRATIA**  
**ELECTUS ET CONFIRMATUS**  
**ARCHI-EPISCOPUS COLO-**  
**NIENSIS, &c.**

*Abusus circa ingressum Religionis.*

**Q**uia variæ audiuntur querelæ, quod in primo actu, & in ipso religiosæ vitæ tyrocinio, nec non in Professionibus, in Monasteriis utriusque sexus Regularium, multæ & magnæ fiunt expensæ, tam in sumptuosorum prandiorum, quam vestimentorum & supellectilis, quo recipiendorum cellulæ adornantur, ac munerum causa, quæ Superioribus dari consueverunt, unde quam plurimis ad vitam Monasticam alioquin idoneis media frequenter præcluduntur, quo minus ad tam sanctum institutum pervenire possint. Illis quoque qui admissi sunt, si forte vitam Monasticam minus sibi

convenire experiantur (quod non raro accidit) & loco cedere velint, libertas recedendi adimitur, propterea quod ob solemnitatem ejusmodi prandiorum & aliorum actorum circa investitionem habitorum, qui hominibus laicis professionis formam exhibent, sine apostasiæ & infamiæ nota id facere nequeant, tum etiam quod ob sumptus nimis magnos, qui recuperari nequam possunt, magnam partem Matrimonii sui & alimentorum in sequentem vitam necessariorum perdiderint.

*Et circa Testamenta Professorum, & eorum solennes Exequias.*

Detestabilis etiam corruptela quædam Monasteria invasit, qua Conventuales etiam Professi seu Professæ ex hac vita decedentes testamenta concedere, & Abbatibus, vel Abbatissis, seu aliis Superioribus Monasterii sui certam quandam pecuniæ summam relinquere, pro solemnioribus exequiis, sive etiam pro annuis obitus sui memoriis peculium, ex quo Conventui refectio aliqua detur, deputare & assignare tenentur, vel si id factum non fuerit, tota supellex quæ in demortui cella relicta in hunc usum vendi & distrahi debet; alioqui defuncti animæ hujusmodi charitatis officia & justa nequam persolvuntur; quæ quidem instituto vitæ monasticæ repugnant, ipsos Conventuales præter proprietatis vitium,

(\*) De Ernesto vide notata sub finem Synodi ad Annum 1598.



tium, quod hac ratione incurrunt, per omnem vitam suam in congreganda hujusmodi pecunia sollicitos ac distractos faciunt; amicos etiam, a quibus eam extorquere sæpe coguntur, valde gravant.

*Qualiter abusus prædicti corrigendi.*

Hinc statuimus, & ordinamus, ut in primo actu, quo qualescumque personæ Religioni alicui primum destinantur, & habitum assumunt, sive etiam ante, vel post illum actum, ante professionem nullum omnino instituat prandium, nulla Superioribus vel aliis quibuscumque dentur, nec per ipsos recipiantur dona, aut cellarum fenestræ, imagines, vel tabulæ pictæ, statuæ, cistæ, promptuaria, armaria, Sacrarum Reliquiarum thecæ, aut capsulæ, neque aliud quiddam, quo Novitii, vel Novitiæ cella potius adornatur, quam rebus necessariis instruitur.

*Forma convivii die Investitionis faciendi.*

Si quæ tamen Sacræ Vestitionis & Professionis ultra communem & quotidianam portionem ex consuetudine religionis in Monasterio existentibus ab antiquo data fuerit refectio, eam quidem non intendimus per hoc Statutum adimere, sed ita moderari volumus, ut pro singulis Religiosis istius Monasterii non amplius, quam dimidius florenus Colonienfis sive duodecim albi in sumptum ejusmodi refectiois a parentibus aut amicis Monasterio numerentur.

*Investiendi modus.*

Sacræ Religioni investienda Virgo absque omni pompa & superbo vestitu, absque ullo comitatu parentum vel amicorum, puerorum aut puellarum ex ipsis penetralibus Monasterii, & habitu, quo in Schola Monasterii constituta, vel alias antea diebus solemnioribus consueverat ad Sacram Communionem accedere, in publicum vestienda procedat.

Nulla Virgini religiosæ habitu vestiendæ aut professionem facturæ pueruli Jesu præferatur statua, sed ejus loco exponatur in summo Altari in Venerabili Sacramento ipse Virginum omnium Sponsus Christus Dominus.

*Convivium diei Professionis.*

Die Sacra Professionis non alii invitentur ad convivium, quam qui vel sanguine vel summo alio necessitudinis vinculo professionem edituro aut edituræ conjuncti sunt, qui sine aperta ingratitude nota & gravi offensione non invitari non possunt: hac tamen conditione, ut plures non admittantur convivæ, quam duodecim; procul hinc arceantur exquisitæ dapes, absint argentea atque aurea vasa & pocula, nulla admittatur instrumentalis, aut vocalis musica, nullæ ducantur choreæ, neque ulli conjunctis manibus in orbem ducti circuitus, sed sint frugalia omnia, sit spiritualis læticia, & in Deo Divinisque colloquiis recreatio; atque ante Vesperas, quæ ultra horam tertiam consuetam non differantur, finienda.

Secundo autem die, multominus tertio, aut sequentibus, nullus amicorum convivendi causa fiat accessus, nec in esculentis, aut poculentis novi aliqui in Monasteriis sumptus fiant: ullave negotia aut anniversaria Professionis convivia, &c.

*Prohibentur regalia & reginalia convivia.*

Prohibemus etiam omnia convivia regalia, aut reginalia, nec non prandia & sumptus, qui propter similes quascumque causas fieri, & institui solent.

*Plures concurrentes uno die eodem sumptu profiteantur.*

Si plures in eodem Monasterio ejusdem cursus fuerint Novitii aut Novitiæ, ii non distinctis diebus, sed uno atque eodem tempore simul professionem faciant, & una atque eadem opera unoque sumptu tempus, molestia & sumptus redimantur.

*Nemini liceat peculium colligere.*

Nemini Religionem seu vitam Monasticam Professo aut Professæ liceat testamentum condere, peculium colligere, Superioribus, vel aliis quibuscumque certam pecuniæ summam post mortem relinquere, vel pro solemnibus exequiis, aut pro annuis obi-

tus sui memoriis, vel pro similibus causis quidquam deputare vel assignare, &c.

*Pœnæ contravenientium his Statutis.*

Ut vero hæc sanctissime constituta optatum sortiantur effectum, & nusquam hisce Sanctionibus, adeoque Spiritui Sancto pertinaciter resistatur, præter excommunicationem ferendæ sententiæ, quam contra delinquentes Abbates, Commissarios, Visitatores, Prælatos, Rectores, Confessarios, aliosque investitionis actum facientes, vel Professionem excipientes, similiter contra Abbatissas, Magistras, Priorissas, Matres, aliasque Sanctimonialium Rectrices, Præfectas & investitionem ejusmodi promoventes vel admittentes in his scriptis & præsentium tenore comminamur, a qua excommunicatione, non nisi a Nobis, aut nostro in Spiritualibus Vicario absolvi valeat, quando lata fuerit, præter alias ordinarias ac arbitrarias pœnas certo infligendas.

*Pœnæ arbitrariæ certo infligendæ.*

Nullus postea, eo loco, ubi contra, quam præscripsimus, actum fuerit, investiatur, aut professionem faciendam admittatur.

Morientes quoque, qui testamenta condiderint, seu aliquid præscriptorum de exequiis, aut annuis obitus sui memoriis ordinaverint, aut Superioribus vel aliis quibuscumque pecuniam, aut peculium assignaverint, Ecclesiastica priventur sepultura.

Superiores vero & alii, qui pecuniam vel peculium tali modo exegerint aut receperint, vel ordinationibus scriptis consenserint, aut admiserint, a Prælaturis & officiis suis sint suspensi, donec transgressores ad obedientiam venerint, & Nobis pro excessibus suis satisfecerint.

*Prælegenda hæc Ordinatio investiendis, & Professionem edituris.*

Mandamus proinde Fiscalibus omnibus, ut omnes diligentia & vigilantia nervos intendant, ne quid ab eis desideretur officii in facienda investigatione, ac delatione hujusmodi excessuum, qui ne qua per aliquam igno-

rantia rimulam denuo alibi irrepant, aut per inolitæ vitiosæ, & corruptæ consuetudinis januam palam ingrediantur, volumus, ut quotiescumque aliquis investiendus aut Professionem editurus est, hæc nostra Constitutio in congregatione omnium istius Monasterii Professorum publice legatur uno mense ante investitionem, & professionem, eademque per Superiores Monasterii plenissime explicetur parentibus & amicis investiendorum, atque professionem editurorum, eosque præmoneant, ut omnibus modis huic nostræ Sanctioni obedienter acquiescant, & satisfaciant.

Præcipimus præterea Visitatoribus, & Rectoribus omnibus, ut eandem per singulos articulos in omni visitatione, & alias quotiescumque videbitur, vigilantissime inquirent, examinent, & vindicent.

*Præter Ordinarium alius Extraordinarius Confessarius bis aut ter in anno Sanctimonialibus offerendus.*

Insuper cum ob graves causas frequenter mandatum sit, ut Virginibus Sanctimonialibus præter ordinarium Confessarium bis aut ter in anno alius extraordinarius Confessarius offeratur, qui omnium confessiones audire debet; & necdum satis pro afflictarum conscientiarum consolatione ea res in usum ubique venerit, quin supersit justæ querelæ locus, sub pœna excommunicationis sententiæ mandamus Abbatibus, Prælatis, Rectoribus, Confessariis, Monasteriorum Præfectis, ad quos hæc cura aliquo modo pertinere dignoscitur, ut quot annis Sanctimonialibus suis bis aut ter aliquem a Nobis, aut nostro in Spiritualibus Vicario approbatum Confessarium extraordinarium, sive sæcularem, sive regularem, qui omnium confessiones audiat; nimirum in principio Quadragesimæ, ad Festum Assumptionis Beatæ Mariæ Virginis, circa Festum omnium Sanctorum, seu in principio Adventus Domini, aut aliis temporibus magis opportunis. Et ut Nobis constet quinam & quales isti extraordinarii Confessarii sint; & ne justa fieri possit contra personam exceptio, tenebuntur

tur singulorum Monasteriorum Prælati, Præfecti; aut Rectores, quibus incumbit hujusmodi Confessarium nominare, suorum Confessarii ordinarii, & extraordinarii nomen, Nobis aut nostro in Spiritualibus Vicario quot annis scripto exhibere ante Dominicam Quinquagesimæ. Datum Arnsburgi, anno 1605. die undecima mensis Septembris.

*Præfata Constitutiones confirmantur auctoritate Apostolica.*

**C**um cupias præinserta Statuta seu Decreta a Te edita, pro majore istorum firmitate, & firmiori observantia, Apostolica auctoritate confirmari, Tuo nomine Nobis fuit humiliter supplicatum, ut in præmissis opportune providere de benignitate Apostolica dignareremur.

Nos igitur Te specialibus favoribus, & gratiis prosequi volentes & a quibusvis suspensionis & interdicti, aliisque Ecclesiasticis censuris & penis a jure vel ab homine quavis occasione vel causa latis, si quibusdam quomodolibet inmodatus existis, ad effectum præsentium duntaxat consequendum harum se-

vie absolventes, & absolutum fore censentes, hujusmodi supplicationibus inclinati, præinserta Statuta, seu Decreta a Te edita, de Venerabilium Fratrum nostrorum S. R. E. Cardinalium negotiis regularium Præpositorum consilio Apostolica auctoritate tenore præsentium approbamus & confirmamus, illisque omnibus & singulis Apostolicæ firmitatis robur adjicimus, suppleres omnes & singulos tam juris, quam facti defectus, si qui intervenerint in eisdem, Tibique ut Statuta & Decreta supra inserta inviolabiliter observari facere possis ac valeas, concedimus & indulgemus, non obstantibus Constitutionibus, & Ordinationibus Apostolicis, nec non quorumcumque Monasteriorum, Conventuum, & Ordinum etiam juramento Confirmatione Apostolica vel quavis firmitate alia roboratis, statutis, & consuetudinibus, privilegiis quoque, indultis, & literis Apostolicis in contrarium præmissorum quomodolibet concessis, & confirmatis, & approbatis; quibus omnibus & singulis, eorum tenores pro expressis habentes, hac vice duntaxat harum serie specialiter, & expresse derogamus, ceterisque contrariis quibuscumque. Datum Romæ apud Sanctum Marcum sub annulo Piscatoris, die sexta Junii 1607. Pontificatus nostri anno Tertio.

Cl. Chapeavillus in gestis P.P. Leod. Tom. III. pag. 645. Lunig Spic. Eccl. Cont. I. P. pag. 873.

## SYNODUS PROVINCIALIS MECHLINIENSIS,

*Præsidente Rmo & Illmo in Christo Patre ac Domino,  
D. MATTHIA HOVIO,  
Archi-Episcopo Mechliniensi,*

*Præsentibusque omnibus Episcopis Comprovincialibus.*

HABITA

Anno Christi MDCVII. Pauli V. PP. III.  
Rudolphi II. Imp. XXXI.

## CONVOCATIO CONCILII PROVINCIALIS MECHLINIENSIS.

**MATTHIAS, DEI ET APOSTOLICÆ SÆDIS GRATIA ARCHIEPISCOPUS**  
Mechliniensis, RRmis DDnis Episcopis Comprovincialibus suis, totique Clero,  
& universo populo Diæcesis ac Provincia Mechliniensis, Salutem  
in Domino.

**D**ocet nos Evangelium, dormientibus bo-  
mibus, in agro Dominico ab inimico  
superseminari zizania: quo fit, ut in Ecclesia  
Dei nunquam barese, nunquam desint scan-  
dala.



dala. Quapropter maxime necessarium est non dormire, sed semper vigilare Pastores Ecclesiæ, ut in ea, vel non superseminentur depravata doctrinæ, morumve zizania, vel si subnasci aliqua ceperint, tempestive opprimantur, aut evellantur: atque ideo etiam consuetudinis semper fuit, jam inde ab Apostolorum temporibus, in Ecclesia Dei Synodos & Concilia cogere; per quæ Superiorum Ecclesiasticorum communi vigilantia, consilio ac decreto, diælis malis occurreretur, & sanæ doctrinæ puritas & morum integritas illibata conservaretur; ut ex omnium sæculorum Historiis, & Conciliorum Decretis, quæ etiamnum in omnium manibus sunt, manifestissime constat. Quapropter etiam S<sup>ta</sup> Synodus Tridentina merito mandavit omnibus Metropolitanis, ut singulis trienniis convocatis omnibus Comprovincialibus suis, Provinciale Concilium celebrent; eidemque Sacro Decreto mox a dicto S<sup>to</sup> Concilio Tridentino absoluto, anno scilicet septuagesimo, Mechliniæ obediri voluit Illustrissimus & Reverendissimus D. Cardinalis Granvellanus, piæ memoriæ, primus Archi-Episcopus Mechliniensis, quantumvis ob necessarias causas extra Provinciam suam degens: ac deinde rursus anno septuagesimo quarto Lovanii. Sed cum anno septuagesimo octavo ingravesceret bellum civile, & mox tota hæc regio ferro flammæque tradita videretur, sic ut septem Civitatum Episcopaliū hujus Provinciæ duæ tantum immunes manerent ab oppressione Hæreticorum, ac proinde omnia passim Capitula dispergerentur, Monasteria exterminarentur, Parochiales Ecclesiæ devastarentur, itinera denique omnia latronibus infestarentur, totusque Clerus proscriberetur, profligareturque; necessario intermitteri debuit sanctum hoc opus cogendorum Conciliorum Provincialium, cum tamen iis alioqui maxime opus videri posset, ob effusam ubique hæresim, & morum corruptelam. Nunc autem per Dei misericordiam, & Regis ac Principum nostrorum Catholicorum non minus sumptuosam quam laboriosam sollicitudinem, nonnihil mitigata calamitatis acerbitate, re communicata cum Reverendissimis Dominis Fratribus nostris Comprovincialibus, ac cum Venerabilibus Dominis in Christo Nobis plurimum dilectis Decano & Capitulo Ecclesiæ nostræ Metropolitanæ, nec non cum Vicariis nostris, Synodi Provincialis convocationem existimavimus non diutius differendam; sed eam proxima hac æstate, Deo opitulante,

celebrandam, idque prout etiam Serenissimæ S. Celsitudini visum est, in Civitate Mechliniensi, Ecclesiæque nostræ Metropolitanæ. Quapropter Reverendissimos in Christo Patres, ac Fratres, Gandensem, Silvaducensem, Ruremundanum, Brugensem, Antverpiensem, & Ipreensem, ipsorumque Cathedralium Ecclesiarum Capitula, ac alios quoscunque, qui de jure vel consuetudine Concilio Provinciali interesse debent, serio requirimus, hortamur, & monemus; & nihilominus pro auctoritate nostræ Archi-Episcopali, eisdem, & eorum singulis, in virtute sanctæ obedientiæ, ac sub penis a jure statutis, districte præcipimus & mandamus; ut per semetipsos, aut si forte iusto detineantur impedimento (de quo competentem fidem facere tenebuntur) saltem per Procuratores suos legitimos, ad dictam Synodum, & Concilium Provinciale in dicta Civitate Mechliniensi celebrandum die 25. Junii, postridie scilicet S. Joannis Baptiste præsentis anni millesimi sexcentissimi septimi, conveniant ac compareant. Ipsique Reverendissimi Comprovinciales nostri, quoscunque suarum Diocesium respectivè Abbates, Prælatos, Capitula & Conventus, aliosque, qui de jure vel consuetudine interesse debent ad hanc Synodum, tunc quoque comparere faciant; ad nobiscum, de modo & ratione, quibus errantes a fide ad Ecclesiæ gremium revocari, vitia, abusus, & scandala tolli, & Ecclesiastici Officii ratio in melius reformari valeat, aliisque ad hanc rem pertinentibus & necessariis, tractandum, consultandum & deliberandum, ac demum per Nos cum præfatis Reverendissimis Fratribus & Coepiscopis Suffraganeis nostris, prout oportuum videbitur, Deo aspirante, concludendum, decidendum & statuendum. Ut autem præsentis nostræ literæ, ad omnium, quorum interest, notitiam perveniant, earum exempla per Secretarium nostrum subsignata, ac contra sigillo nostro munita, valois singularum Ecclesiarum Cathedralium nostræ Provinciæ, nec non Collegiatarum S. Petri Lovanii & S. Gudilæ Bruxellæ, affigi volumus; ac eos, quos concernunt, sic archari, ac si ipsi met coram prælecta & insinuata forent, decernimus & declaramus: cum intimatione, quod sive ad dictam diem comparuerint, sive non, nos nihilominus ad dictæ Synodi Provincialis celebrationem procedemus, & procedi faciemus, prout juris fuerit & rationis, absentium contumacia in aliquo non obstante. Datum Mechliniæ in Palatio nostro Archi-Episcopali, pridie

*pridie Kalendas Martii, anno Domini Millefimo sexcentesimo septimo.*

† *De Mandato Rmi & Illmi  
Domini Archi-Episcopi  
Mecbliniensis.*

*Fac. van Sasseghem Secret.*

DECRETUM,

*Quod nulli præjudicium fiat ex ordine evocationis aut Sessionis in hac Synodo:*

*Pronunciatum a Secretario Concilii  
die XXVI. Junii anni M.DC.VII.*

**H** Abita cum nostris Confratribus Episcopis Comprovincialibus super ordine Ecclesiarum matura communicatione; de ipsorum consilio & assensu, ad evitandas quæstiones, quæ inde in principio oriri possent, declaramus omne id sine præjudicio ordinis & honoris futurum, quicquid in præsentī Provinciali Concilio accidet, ex Ecclesiarum evocatione, aut Deputatorum sessione: quodque nemo per hoc aliquid novi juris quoquo modo prætereundum poterit in futurum. Ne tamen quæstiones de ordine Ecclesiarum cum alicujus injuria dissimulare velle videamur, liberum erit omnibus, suo tamen loco, rationes, si quas habeant, proponere a Patribus examinandas.

ORATIO EXHORTATORIA,

HABITA

*per Rdissimum & Illmum Dominum  
ARCHI-EPISCOPUM MECH-  
LINIENSEM ad universum  
Clerum in Concilio Pro-  
vinciali jam congre-  
gatum.*

REVERENDISSIMI PATRES,

REVERENDI AC VENERABILES DOMINI:

**G** Ratias Divinæ Bonitati ago, quæ in dira hujus belli tempestate animos ve-

permovit, vosque in itinere sic conservavit, ut ad hunc sacrum cætum salvi conveniretis: ubi jam mihi incumbit, vobis aperire causas hujus convocati Concilii, & ejus celebrandi modum aliquem proponere. Quod quidem non videor commodius facturum, quam ob oculos ponendo exhortationem pientissimi & zelosissimi Principis Nehemias, cujus hæc sunt verba: (a) *Vos nostis afflictionem, in qua sumus, quia Jerusalem deserta est, & portæ ejus consumptæ sunt igni. Venite, & ædificemus muros Jerusalem, & non simus ultra opprobrium.* Qua quidem exhortatione vir sanctus ac prudens alloquitur contribules suos de tribu Juda & Benjamin, jam ex Persica captivitate reduces: qui cum ipso in afflictione erant, eo quod templum invenirent conflagram, ac nata in eo virgulta & arbuta; Sacerdotes Levitasque profligatos, clausa jam ora canentium Dominum, (b) *defecisse Sacrificia Officiaque Divina, neglectas plane contemptasque sanctæ Legis cærimonias, muros Jerusalem devastatos, populum commixtum fuisse inter gentes, & didicisse opera eorum;* (c) *bonam denique Israelitarum partem adhuc inter Atheos detineri captivam; ac præter hæc omnia, se undique Dei suisque hostibus circumcingi: idque (quod plurimum eos angebat) propter ipsorum peccata, dicente Jeremia Propheta: (d) Peccatum peccavit Jerusalem, & ideo instabilis facta est.* Quod etiam flebiliter Deo confitebantur Daniel, (e) Esdras, (f) & Nehemias. (g) Sed hæc illorum afflictio fuit. Nunc nostram inspiciamus, neque ei absimilem reperiemus. Quot enim nunc templa exusta? Quot Monasteria passim vastata? Quot altaria everfa, quot polluta videmus? atque utinam non multo plura viva Dei Tempia præteriti temporis tempestate, non tantum in Hollandia, Zelandia, Geldria, Frisia, ac Transilulana, verum & in multis Brabantiae locis, diabolo cessissent! Quot infaustis hisce temporibus abusus, quot scandala subnata sunt? Dei ministrorum numerus quomodo imminutus est, ut, cum in singulis pæne Parochiis plures esse soleant, qui laudes Deo personarent, cultum Divinum ac Sacrificia ad Deum populo placandum concelebrent, nec non verbo Dei, Sanctissimisque Sacramentis populum pascere, nunc in oppidis quidem pauci sint, in pagorum multis Ecclesiis nulli: & inter eos ipsos, quos populi necessitatibus Divina clementia reliquit, cheu! quam multi adhuc necessariis viræ destituti? Quam multi denique morum correctione indigent? Scholæ grammaticales pleraque omnes defecere

(a) 2. Esdr. 2.

(b) Esdr. 13.

(c) Ps. 105.

(d) Thren. 1.

(e) Dan. 3.

(f) 1. Esdr. 9.

(g) 2. Esdr. 1.

fecere ; Catechisticæ paucæ sunt ; pauca Seminaria Sacerdotum, eaque ipsa parum dotata. Et quod omnium maxime deplorandum est ; quam multis in locis Officium Divinum Deum populo irritat magis quam conciliat, ob id celebrantium nauseam ac precipitantiam, ob paramentorum sordes & contemptibilem vilitatem, atque ob veterum sanctarum augustarumque caeremoniarum neglectum & contemptum ? Quantum in multorum animis, ex conversatione cum hæreticis hic multis annis passim dominantibus, pravi fermenti hæsit, imo & hæret etiamnum ? Quot in populi manibus perniciosi relictæ sunt libri, ceu quædam gentium idola ? Et ut mala cuncta breviter recenseam ; quantus denique numerus fratrum, consanguineorum, & amicorum nostrorum adhuc sub diro illorum jugo in vicinis Provinciis detinetur, cum gravissimo periculo animarum suarum ? Quæ quidem omnia in vindictam peccatorum nostrorum indubie patimur, dum gratiam Dei in vacuum accepimus ; (b) dum arida ligna mansimus, (i) non reddentes fructum Domino vineæ, (k) neque charitatem veritatis habuimus ; (l) dum anima nostra nauseavit super manna nostro, (m) nimirum, verbo Dei & Sacrosanctis Sacramentis, quasi cibo levissimo ; & Domus orationis, cultusque Divini, neglecta, sordibus horruit, & non nisi solis labiis in ea Deus honorari visus est. Sane, his & infinitis aliis Ecclesiæ Belgicæ malis qui non affligitur, qui non uritur, ob hæc qui non gemit, aut pie luget, nec calidus est, nec frigidus ; (n) & nullius minus, quam Esdræ, quam Nehemiæ imitator. Quid ergo a nobis omnibus hæc Ecclesiæ Dei facies requirit, Patres Reverendissimi, & Fratres, quotquot adestis, Charissimi ? Anne, ut suaviter sedentes, otiosi, spectemus ipsius collabentis miseriam, nec ascendamus ex adverso opposcentes murum pro domo Israel : (o) nihil patientes super contritione Joseph ? [p] & quasi per viam, [q] id est, obiter, & ex occasione tantum salutantes ac salvantes subditos nostros, lana honoris & lacte utilitatis [r] ex grege nobis commisso contenti, ac interim quod perit, non requirentes ? Absit, absit inquam. Quia, teste D. Augustino, (s) *ut nihil est in hac vita, & maxime hoc tempore, facilius, lætius, & hominibus acceptabilius Episcopi, Presbyteri, aut Diaconi officio, si perfunctorie atque adulatorie res agatur ; ita nihil apud Deum miserior, & tristius, & damnabilius.* Et qui-

dem videri possemus perfunctorie egisse, quod dictis malis per Concilium occurrere non studuerimus, præsertim id serio mandante Sacro Concilio Tridentino : verum id, ob belli impedimenta, ac spem rerum tranquilliorum, ac proinde etiam majoris fructus, usque nunc differendum prudenter judicabat Illmus & Rmus Dominus Octavius Frangipani, Archi-Episcopus Tarentinus, Nuncius Apostolicus, pridem hinc digressus. Nimirum, quia posuit præteritis annis Deus tenebras, horam scilicet & potestatem tenebrarum, & facta est nox ; in ipsa pertransierunt omnes bestię silvæ, (t) brutales nimirum illi itinerum infestatores, nec non etiam hæretici, ut catuli leonum rugientes, ut rapiant escam sibi, animas a Deo desertas. Sed dum nunc videtur oriri sol induciarum, & speratæ pacis, & in cubilibus collocantur hi catuli : jussi nimirum intra sua præsidia se continere, exhibit homo ad opus suum : tempus scilicet est, ut pio nunc operi accingamur, nunc bona consilia ineamus ad mundanda Sancta, (u) & renovanda ; ne diutius quiescentibus nobis exprobet per Prophetam suum Zachariam Deus : [x] *O Pastor & idolum derelinquens gregem.* Si scilicet cum oculos, ut idolum, habeamus, nec tamen ostendamus nos videre abusus & scandala per nos corrigenda : pedes, ut idolum, sed perambulare gregem Dominicum non lubeat ; nec clamemus in gutture nostro, quantumvis lupum grassari intelligamus : nares quidem habeamus, nec tamen subodoremur, quo hæc mala tendant omnia, quid nobis, quid ovibus nostris sint allatura. Consilio igitur Nehemiæ acquiescamus, & quid porro dicat, audiamus : *Venite, & ædificemus,* inquit, *muros Jerusalem.* Qua quidem exhortationis voce (Venite) nullam profectionem corporalem requirebat, jam existentibus in Judæa hæc loquens ; sed animorum conjunctionem in opus, quod præ manibus erat, quam & obedienter mox præstabant, dicente Scriptura : (y) *Quod congregata sint in opus quadraginta duo millia virorum, quasi vir unus ; id est, omnes in eundem scopum collimantes, omnes idipsum concorditer agentes.* Quod & nobis omnibus ad hanc congregationem convenientibus summopere observandum erit, ut simus, quasi vir unus, & nihil æque caveamus, atque contentionis studium ; quo [quod absit] oboriente, nihilo amplius fecerimus, quam qui turrim Babylonicam moliebantur (z) jam divisus inter se linguis.

(b) 2. Cor. 6.

(i) Luc. 23.

(k) Matth. 21.

(l) 2. Thessal. 2.

(m) Num. 21.

(n) Apoc. 3.

(o) Ezech. 13.

(p) Amos 6.

(q) Luc. 10.

(r) Ezech. 34.

(s) S. Aug. Epist. 148.

(t) Psalm. 103.

(u) 1. Macchab. 4.

(x) Zachar. 11.

(y) 1. Esd. 2.

(z) Gen. 11.



guis. Rogo itaque vos omnes obedire Apostolo dicenti: (a) *Obsecro autem vos fratres per nomen Domini nostri Jesu Christi, ut idipsum dicatis omnes, & non sint in vobis schismata.* Proponere quidem, & suggerere cuique licebit, quod ad rem pertinere putaverit; sed ut hoc non nisi suo loco & ordine fiat, nec importuna suggestionem quisquam perturbet, significabuntur omnibus capita seu tituli agendorum, & eorum ordo, quo suo loco & tempori quisque suum conceptum reservet. Interim vero sapere apud semetipsum, aut, quod hinc nasci solet, pro sententia sua, quam Christiana humilitas aliorum iudicio subijcere mandat, decertare aut contendere nemo præsumat, memor dicti Apostolici: (b) *Si quis autem videtur contentiosus esse, nos talem consuetudinem non habemus, neque Ecclesia Dei.* Et alte quisque recogitet admonitionem Jacobi Apostoli, qui cum initio Capitis tertii Epistolæ suæ dixisset: (c) *Nolite plures Magistri fieri, fratres mei, scientes quia majus iudicium sumitis; addit in fine: Quod si zelum animarum habetis, & contentiones sint in cordibus vestris, non est ista sapientia de sursum descendens a Patre luminum, sed terrena, animalis, diabolica.* Ex porro indicans, quando quis existimare possit se vere sapere, subnectit: *Quæ autem de sursum est sapientia, primum quidem pudica est, deinde pacifica, modesta, suadibilis, bonis consentiens.* O vere aurea verba! quæ vel sola merito sufficiant ad hæreses omnes extinguendas, ad pertinaces omnes confundendos, ad discordes omnes conciliandos. Quare qui pudicam non habet sapientiam, id est, non verecunde sententiam suam proferit; qui modestam sapientiam non habet, id est, non humiliter de suo iudicio sentit; qui bonorum suasionibus acquiescere respuit, ideoque suadibilis non est, qui non veretur a bonis dissentire, liquido cognoscat non esse sapientiam suam de cælo a Patre luminum, ut pro ejus defensione contendere debeat. Et magnopere præterea nobis considerandum est, quod de nascente Ecclesia refert Beatus Evangelista Lucas, (d) nimirum fidelibus fuisse omnibus cor unum, & animam unam: quorum hic, si unquam alias, fidos imitatores nos esse convenit. Unde & se quisque suspectum habere debet, ne sui sensus amantior impios Sanaballath & Tobiam plus referat destruentes, (e) quam pios Nehemiam & Elsdram ædificantes. Nam, ut ait Sapiens, (f) *unus ædificans, & unus destruens, quid prodest illis, nisi labor?* Sed pergamus, & quid porro Nehe-

mias moneat, videamus. Postquam enim is per verbum [Venite] animorum unionem indixerat, non minus, quid nobis nunc, quam quid illis tunc agendum erat, consequenter deinde expressit: *Ædificemus, inquit, muros Jerusalem.* Ad id nempe, quadraginta duo millia virorum conveniant, huic operi, quasi vir unus, incumbant. Illud ipsum & nobis nunc cordi sit, huic sedulo intendamus, ad quod tanto numero convenimus: nam hæc est ratio, hic unicus scopus hujus convocati Concilii, ut videlicet, unanimi studio, & ut sapientes Architecti Ecclesiæ collapsa restauremus, (g) angulari lapidi pie superædificantes. At videat unusquisque, inquit Apostolus, quomodo superædificet: nam fabros spirituales esse Sacerdotes & Ecclesiæ Pastores testatur Deus, loquens Jeremiæ Prophetæ, qui erat de Sacerdotibus Anathoth: (h) *Ecce constitui te hodie super gentes & regna, ut evellas & destruas, ædifices & plantes.* Evellamus igitur, quæ in agro Dominico deprehenderimus succrevisse zizania, quæque in atrii Domini subnata virgulta: destruamus male fabricata per præteritorum temporum nimiam licentiam: plantemus = diverso salutarium legum, Sanctarumque Constitutionum surculos, unde piorum operum & vitæ veræ Ecclesiasticæ fructus proveniant: & dum singuli non possumus omnia, Nehemiæ sapientiam sequamur; ut, quemadmodum ille plurimos in fabricam suam conquirebat operarios, ita & nos hic solliciti simus de creandis Pastoribus, præcipuam curam in hoc Concilio gerentes circa erectionem & dotationem Seminariorum: (quod & præ cæteris voluit nobis esse cordi S. Concilium Tridentinum) ut in iisdem multi adaptentur Pastoratui; quia messis ubique multa, [i] sed operarii, cheu! nimis pauci. Deinde ubi Pastores assumpserimus, & hoc nobis serio curandum venit, ne ii ipsi fraudentur cibo suo, aut eorum necessitatibus quid desit in hac tanta annonæ caritate: (k) qui enim bene præsunt Presbyteri, duplici honore digni haberi debent, ne tædio per inedia superati, stationem suam deserant. Sed & aliud factum nobis [l] in Nehemia imitandum occurrit: quod videlicet, sicut is, distributis oneribus, certas murorum rupturas certis familiis sarcindas destinabat, donec omnes in unum consolidarentur; ita & diversis hic diversa incumbent munera, ut nimirum alii proponant, alii resolvant & decernant: alii Secretarii sint, alii negotiorum Promotores: hi quæ ad Theologiam, alii quæ ad jus perti-

(a) 1. Cor. 1.

(b) 1. Cor. 11.

(c) Jac. 3.

(d) Act. 4.

(e) 2. Esd. 4.

(f) Eccli. 34.

(g) 1. Cor. 3.

(h) Jerem. 1.

(i) Matth. 9.

(k) 1. Tim. 5.

(l) 1. Esd. 3.

pertinent, subministrent : sicque gratiam quisque sibi datam in alterutrum (*m*) ( ut loquitur Apostolus ) administrabit. Omnia vero nostra in charitate fiant, (*n*) & unus tam pii operis consummandi scopus nos connectat, & quasi virum unum efficiat. *Ædificemus & plantemus* a nobis ipsis inchoando; suum videlicet quisque, ac domesticorum suorum hortum, primum zizaniis expurget, & inde veteris hominis rudera removeat : atque ut ipsimet imprimis tamquam lapides vivi Christo superædificemur, [*o*] serio singuli nostrum per veram pœnitentiam, jejunia, eleemosynas, devotas preces, piaque ac frequentia Sacrificia, ad Deum recurramus ; enixe rogantes, ut nos Spiritu suo dirigat, & recta sapere concedat, suggeratque servis suis, quæ ad renovationem Ecclesiasticæ disciplinæ, quæque ad bonam ac salutarem populi sui directionem necessaria novit: sicque benigne faciat in bona voluntate sua Sion, [*p*] ut per pia, sanaque consilia, ac Decreta nostra, ædificentur muri Jerusalem ; atque ita nostras, omniumque nobis subditorum, juxta dictum Apostoli Petri, [*q*] castificet animas in obedientia charitatis: id est, omnium mentes ita purificet, omniumque oculum ac intentionem tam simplicem faciat, ut ex imis præcordiis quisque se ostendat diligere decorem Domus Dei, prompte obediendo in hac Sacra Congregatione decernendis ; nam sine vera perfectaque obedientia, nullus Concilii fructus. Nemo igitur contra id quod verum, justum, & sanctum est, quod Canonibus veteribus, quod denique novo juri Sacro aucti Concilii Tridentini conforme, sui Capituli, sui Monasterii, suæ Ecclesiæ consuetudines alleget: sed evelli obedienter patiatur, quod per inolitam consuetudinem male succrevit, ut meliori plantæ locus fiat : nemo hic jus acquisitum contra jus in Sacris Canonibus aut Sancto Concilio Tridentino sancitum alleget: [*r*] nemo altare contra altare erigat : nemo privilegia contra intentionem dantis extendat, aut abrogata obtendat: nemo denique se a Dei Lege, aut Apostolicæ Sedis delegatis, exemptum putet. Hortor autem vos paucis, cum Apostolo dicente: (*s*) *Obedite Præpositis vestris, & subjacete eis; ipsi enim pervigilant tanquam rationem reddituri pro animabus vestris.* Serio consideret quisque, nullum agrum, nullum hortum tam bene excultum, qui non subinde indigeat expurgatione & rastro : nullam quoque tam exacte ædificatam domum, quæ non aliquando restaurationem requirat. Quocirca & mira providentia Spiritus San-

ctus Ecclesiam suam regens, per Sacrum Concilium Tridentinum mandavit, in omni Provincia Concilium singulis trienniis, in omni Diœcesi singulis annis cogendum. Quod totum indubie frustraneum & illusorium erit, nisi adsit, ut ante diximus, vera obedientia: quæ ubi deesse solet, & Conciliorum celebratio, & ipsa quoque Religio tandem perire solet. Quamobrem & sic comminatur Deus per Prophetam Osee: (*t*) *Verumtamen unusquisque non judicet, & non arguatur vir; populus enim tuus sicut ii, qui contradicunt Sacerdoti. Et corruet bodie, & corruet etiam Propbeta,* id est, prophetia, tecum. O terribiles Dei minas ! O peccatum grande & exosum nimis Divinæ Majestati contradictio ! O infelicem, u miseram, inquam, regionem illam, ubi in tantum invaluit spiritus contradictionis erga Pastores Ecclesiæ, ut, dum nullus sequitur fructus, Deus ipse suadeat non judicari, id est, puniri ; non, inquam, redargui virum, quod contradici soleat Sacerdoti, aliis semper atque aliis repertis contradictionis ac inobedientiæ coloribus. Audiant ergo tales, & hanc Prophetæ sententiam serio ruminent: *Et corruet bodie,* id est, brevi. Cum enim per hunc spiritum contradictionis & inobedientiæ effusa fuerit contemptio super Principes, (*u*) illorum nimirum successores, de quibus dicitur: *Constitues eos Principes super omnem terram;* (*x*) errare hujusmodi facit Deus in invio viæ latæ, cujus novissima ducunt ad mortem, & non in via arcta & recta. Sed quid multa ? Ad Esdram & Nehemiam denuo recurramus ; eorum prudentiam & animi fortitudinem consideremus, assequamur, imitemur. Illi enim, ut multos patiebantur operi suo obgannientes ac contrariantes, multos item apud Regem Persarum calumniantes, quales erant Besellam & Ta-beel, (*y*) qui odio, quo in piam hanc fabricam æstuabant, prætexebant gratam memoriam salis, quod in Palatio regio comederant, atque animum impatientem læsionis Regis, seu jurisdictionis illius : illi, inquam, Divinæ protectioni difficultatem omnem ferventibus precibus committentes, nec non zelo suo fortiter insistentes, una manu trullam ad operis provectionem, (*z*) altera gladium ad hostium aversionem gestabant ; unde & Dei manum bonam super se sentiebant, atque opus suum feliciter consummabant. Nos quoque juxta egregium hoc Nehemiæ & Esdræ factum, in hac spirituali ædificatione semper quidem prudenter, sed & non minus fortiter elaboremus ; nec extimescamus tam in decernendis ac statuendis, quam etiam in

(*m*) 1. Pet. 4.(*q*) 1. Pet. 1.(*u*) Ps. 106.(*n*) 1. Cor. 16.(*r*) Jos. 22.(*x*) Ps. 44.(*o*) 1. Pet. 2.(*s*) Hebr. 13.(*y*) 1. Esd. 4.(*p*) Ps. 50.(*t*) Osee 4.(*z*) 2. Esd. 4.

in exequendis bonis constitutionibus, vel domesticorum, vel exterorum quorumcumque sinistras machinationes; confidentes benignissimum Deum indubie causam suam judicaturum, ac fideles ministros suos directurum & protecturum: ut hac ratione cum Nehemia recte sententiam concludamus: *Non sumus ultra opprobrium*. Ante enim stupendæ pulchritudinis & toto orbe celebratum fuerat templum: Civitas item Regia, & circumvicinis omnibus imperitans, Jerusalem; unde & Dominam gentium, & Principem Provinciarum eam nominat S. Jeremias, (a) quam nemo non suspiciebat, reverebatur. Sed ecce, hæc flammis & depopulationi tradita, nunc derisioni, sannis atque opprobriis hostium exponebatur, dicentium: (b) Hæccine est urbs perfecti decoris, & gaudium universæ terræ? Judæi quoque ipsi (natio tam grandis & incluta, ut haberet Deum appropinquantem sibi, (c) quamque cælum suo manna pascebat, (d) ac mare rubrum, (e) & ipse Jordanis extimescere videbatur, (f) quæque postmodum tanto fuit hominibus terrori, ut tria tantummodo millia Judæorum, (g) centum millia hominum in Antiochia trucidarint) in tantum a gentibus nunc contemnebantur & opprimebantur, atque adeo ipsis exosi facti erant, ut & impune eos occidere liceret, & mortui, Regis jussu, sepultura privarentur, ut ex Tobiae historia patet. [b] Quo tamen nihil Judæis accidere potuit gravius, quam quod hoc ipsum opprobrium in Deum redundare videretur, tamquam salvare nequivisset populum suum: [i] dum ejusdem Dei impotentiae hostes ascriberent, quod aliqui peccatis ipsius populi imputandum erat; quodque hoc pacto nomen Dei blasphemaretur in gentibus. Quemadmodum ergo ruina Templi, devastatio civitatis Jerusalem, ac ipsius populi immanis depressio, magno opprobrio fuere Judæis: ita & nunc non minus nobis irrisioni sunt, Templorum ac Monasteriorum everfio, Ecclesiarum depauper-

ratio, Sacerdotii quidam contemptus, atque hinc Presbyterorum exiguus numerus: hostium denique imperium in tot Catholicas Civitates. Ob quæ & alia nihil pæne sonant hæreticæ conciones, quam impropria, & despectum Catholicæ Ecclesiæ & Religionis; in summam profecto veræ fidei nostræ injuriam, ac proinde etiam ipsius Dei blasphemiam: & præsertim dum temere in publicis literis, non ita pridem a nobis lectis, adversarii nostri jactare audent; quod Deus per eorum prosperitatem, & nostram adversitatem, testetur veritatem religionis ipsorum: quam tamen nonnisi perfidiam esse certo cognoscimus. O superbiam execrandam! o dira impropria! Hæccine diutius toleremus? Elaboremus, Patres, elaboremus, inquam, ut hanc adversariis occasionem evomendorum opprobriorum, quæ non tam ex fortitudine eorum, quam ex merito peccatorum nostrorum, exque neglectu animarum officiique nostri, atque ex quadam Divini cultus nausea, ipsis nascitur, penitus tollamus: totis viribus id, ad quod hoc Concilium coactum est, exequamur: evellamus zizania, scandala & abusus vitemus, corrigamus; male fabricata destruamus; muros Jerusalem ædificemus; templa viva extruamus; surculos piæ juventutis plantemus; hortos denique nostros novellis virtutum plantis, per seriam vitæ emendationem, morum correctionem, ac Ecclesiæ Divinique cultus restorationem, serio exornemus: ac tum demum certo confidamus, veluti sublata causa, etiam tollendum effectum, opprobrium videlicet ipsum; simulque futurum, ut Ecclesiæ Dei, ejusque Ministris ac Filiis priscus suus honor, jurisdictio, & dignitas redeat: quodque consequenter, qui Ecclesiam velut navem rimosam, domumve ruinosam ante fugiebant, deserebant, & destruebant; nunc ad eam debite expurgatam, ac bonis legibus restauratam, revertentur, eamdemque nobiscum denuo visitabunt, ædificabunt, exornabunt.

## INDEX TITULORUM TOTIUS CONCILII.

*TIT. I. De Professione Fidei, ac de his, quæ ad ejusdem Fidei integritatem conservandam pertinent.*

*II. De Sacramentis in genere.*

*III. De Sacramento Baptismi.*

*IV. De Sacramento Confirmationis.*

*V. De Sacramento Pœnitentiæ.*

*VI. De Indulgentiis.*

*VII. De Sanctissimo Eucharistiæ Sacramento.*

*VIII. De Sacramento Extremæ Unctionis.*

*IX. De Sacramento Ordinis.*

*X. De Sponsalibus & Sacramento Matrimonii.*

*XI. De Doctrina & Prædicatione Verbi Dei.*

*XII. De Officio Divino & Cæremoniis.*

*XIII. De Festis & Jejuniis.*

*XIV. De Imaginibus & Sanctorum Reliquiis.*

E e e e 3

*XV.*

(a) Thr. 1.

(b) Thr. 2.

(c) Deut. 4.

(d) Exod. 16.

(e) Exod. 14.

(f) Pf. 119.

(g) 1. Machab. 11.

(h) Tob. 2.

(i) 4. Reg. 19.



XV. De Superstitione.

XVI. De Episcopis, & eorum officio, ac Sede vacante.

XVII. De Archi-Presbyteris, Pastoribus, & Custodibus, eorumque officiis.

XVIII. De vita & honestate Clericorum, eorumque correctione.

XIX. De Beneficiis & Officiis Ecclesiasticis, ac Beneficiatorum residentia.

XX. De Scholis.

XXI. De Seminariis.

XXII. De elocatione & conservatione bonorum Ecclesiasticorum.

XXIII. De Reparatione Ecclesiarum.

XXIV. De Regularibus & Monialibus.

XXV. De Foro, Jurisdictione, & Immunitate Ecclesiasticis.

XXVI. De Synodo Provinciali & Diocesana.

## DECRETA ET STATUTA SYNODI PROVINCIALIS MECHLINIENSIS.

### TITULUS PRIMUS.

*De Professione Fidei, ac his, quæ ad ejusdem Fidei integritatem conservandam pertinent.*

#### CAPUT I.

**C**UM a Fide, tamquam a fundamento, pendeat vita spiritualis, & Religio nostra; ab ea exordium sumendo Sacra Provincialis Synodus Mechliniensis legitime congregata statuit, & decernit, ut omnes Professores, Concionatores, Confessarii, ac etiam quicumque in hæresim lapsi ad Ecclesiæ gremium redeunt, singuli, præter abjurationem, & alia ad quæ tenentur, coram Ordinario suo, ejusve Vicario Generali, aut alio ab altero eorum ad id deputando, faciant Professionem Fidei juxta Bullam PII IV. & in Romanæ Ecclesiæ obedientia se permansuros spondeant ac jurent.

#### CAPUT II.

Multo magis saluberrimum Decretum Concilii Tridentini, de simili Fidei Professione, in manibus Ordinarii, ejusve Vicarii Generalis facienda ab omnibus & singulis, qui de Canonatibus, & dignitatibus in Ecclesiis Cathedralibus & quibuscumque Beneficiis curam animarum habentibus provisi sunt, si alicubi forte observari desierit, in usum revocetur; cum declaret idem Concilium, quod alioqui prædicti omnes non faciant fructus suos, nec illis possessio suffragetur.

#### CAPUT III.

Ludimagistri emittant Fidei Professionem juxta formulam a Ss. memor. PIO IV. præscriptam. Typographi

vero, Bibliopolæ, ac Librarii faciant Fidei professionem juxta formulam hic subjunctam; sic tamen ut ubi excepturus juramentum forte habebit aliquam rationem de professuri fide dubitandi, eum præmoneat & examinet circa aliquos articulos hoc tempore maxime controversos. Ludimagistri ac Ludimagistræ, & quicumque eorum Hypodidacali seu cooperatores sunt, in iis locis, ubi est Scholasticus, coram eo, alibi coram Archi-presbytero hanc Fidei professionem facient: Typographi vero, Bibliopolæ, ac Librarii in manibus Ordinarii, aut ab eo ad id deputandi. Et insuper hi juramentum præstabunt de non invehendis, nec distrahendis, vel etiam compingendis libris prohibitis: illi quoque etiam oblata Fidei professione, non aliter tamen ad aperiendam Scholam admittentur, quam si Scholastico, vel ubi is non est, Archi-presbytero suo de eorum fidei integritate, morumque probitate, per fide digna testimonia sufficienter constiterit.

#### CAPUT IV.

Ego N. omnia & singula, quæ continentur in Symbolo Fidei, quo Sancta Romana Ecclesia utitur, & quæ a Sacris Canonibus, & Generalibus Conciliis, ac præcipue a Sacrosancta Tridentina Synodo tradita, definita, & declarata fuerunt, indubitanter recipio atque profiteor; nec non Romano Pontifici, Summo in terris Jesu Christi Vicario, veram obedientiam spondeo ac juro; simulque hæreses omnes,

*omnes, ab Ecclesia damnatas & rejectas, ego pariter damno & rejicio. Sic me Deus adjuvet, & hæc Sancta Dei Evangelia.*

## CAPUT V.

Nemo præter Typographos, Bibliopolas & Librarios juratos, ullos libros excudere, aut venales exponere præsumat. Ipsi etiam Typographis, Bibliopolis, ac Librariis non liceat vel alios libros imprimere, quam qui ab Ordinario, vel aliquo approbato Censore examinati & approbati fuerint; vel alios venales exponere, aut secreto distribuere, quam quorum Catalogus ab Ordinario, vel approbato aliquo Censore sit visus & approbatus, sub pœnis pro qualitate & circumstantiis facti infligendis.

## CAPUT VI.

Libri etiam domorum mortuorum non distrahantur, nisi ab approbato aliquo Censore, vel alio ad id ab Ordinario deputato, visitati & vendi permessi fuerint. Et visitatio ista gratis fiat.

## CAPUT VII.

Moneant diligenter Parochi sibi subditos, libros hæreticos, vel ex professo lubricos, nullo modo legere vel habere licere; eisque prohibitiones, quæ habentur in Indicibus librorum prohibitorum, Sedis Apostolicæ auctoritate post Concilium editas, crebro insinuent.

## CAPUT VIII.

Studeant etiam nosse vultum pecoris sui, & si quem inter subditos suos peregrinis doctrinis abductum, falsa-ve dogmata spargentem adverterint, eum Ordinario, vel ejus Vicario Generali, aut Officiali mox denuntient; nec non & illos, quos Ecclesiam, Divina Officia, & Sacramenta debitis temporibus non frequentare, vel aliter de hæresi suspectos esse deprehenderint, nisi moniti statim se purgent, aut emendent.

## CAPUT IX.

Ludi theatrales non aliter deinceps permittantur, quam si ab Ordinario, vel eo, quem ipse ad id deputaverit, permittendi videantur. Idemque

fit de actionibus Mimorum & Histionum, qui vulgo *Comer-speelders* vocantur; ac de cantilenis, rythmis, & quibusvis scripturis, quæ passim ab ignotis & exteris hominibus venales circumferuntur, aut etiam publice decantantur. Et ut hæc omnia exactius observentur, decernit Synodus supplicandum Serenissimis Principibus, ut in eo auctoritatem suam interponant.

## TITULUS II.

*De Sacramentis in genere.*

## CAPUT I.

**I**N administrandis Sacramentis, Pastorale suæ Ecclesiæ Cathedralis omnes sequantur; & eo deficiente, Ecclesiæ Metropolitanæ, nihil temere addendo, demendo, vel immutando.

## CAPUT II.

Administraturi Sacramenta Baptismi, Sacræ Eucharistiæ, Extremæ Unionis, & Matrimonii, nec non concionaturi, stola & superpelliceo vel alba sint induti. Sacerdotes quoque sæculares, non nisi superpelliceo induti, in locis sacris sæcularium confessiones accipiant. Pastores vero, & Vice-pastores, etiam stolam superaddant.

## CAPUT III.

In administratione quorumcumque Sacramentorum, vis & efficacia eorum, pro capto sumentium ac præsentium, sæpe a Pastoribus explicentur; omnesque preces Sacramentales, maxime vero ipsæ formæ Sacramentorum, tractim, distincte, & attente cum debita reverentia pronuntientur.

## CAPUT IV.

Et ne, dum quis aliis est Minister ad salutem, damnationem sibi acquirat, caveat quisque diligentissime, ut qua decet munditiæ & puritate Sacramenta administret.

## CAPUT V.

Pastores ad administranda Sacramenta vocati, officio suo fungi non tardent, graviter alioqui puniendi; gravissime vero, si quem ipsorum negligentia, sine Baptismo, Confessione, Sacro Viatico, aut Extrema Unctione, ex hac vita migrare contigerit.

Ca-

## CAPUT VI.

Non modo Archi-presbyteri singulis annis ab Ordinario suo, vel Sede vacante a Vicario Generali, Sacrum Chrisma & Sacra Olea tempestive petant, & per Sacerdotem, Diaconum, vel saltem Subdiaconum, in mundis & honestis vasculis (scilicet stanneis aut argenteis, nullo modo vero cupreis, testaceis, aut vitreis) ad locum residentie suæ ferri curent: sed Pastores etiam singuli quotannis ab Archi-presbytero suo, vel ex ea Ecclesia unde consueverunt, per se, aut alium Sacerdotem, non autem illo inferiorem, in similibus vasculis Sacrum Chrisma, Sanctaque Olea ferre non omittant; iisque receptis, veteribus non utantur: sed quidquid ex illis superfuerit, si liquidum, lampadi, quæ lucet ante Venerabile Sacramentum, infundatur; sin autem bombyci vel gossipio immixtum fuerit, super piscinam comburatur.

## TITULUS III.

*De Sacramento Baptismi.*

## CAPUT I.

**P**Astores Sacrum Fontem sub operculo & fera diligenter servant; Sacrum quoque Chrisma & Oleum, sub fera & loco honesto. Et Sabbato Sancto, ac in Vigilia Pentecostes aquas Baptismales consecraturi, ipsum fontem antea per se, vel saltem aliquem in Sacro Ordine constitutum, mudent.

## CAPUT II.

Quilibet Parochus librum habeat, in quo singulorum baptizatorum, nec non parentum, & patrinorum ac matrinarum nomina & cognomina, diemque Baptismi diligenter describat, eundemque quotannis in visitatione Archi-Presbytero exhibeat; nec umquam plures, quam unum Susceptorem, vel unam Susceptricem, vel ad summum unum & unam admittat. Et si qui alii ad tangendum infantem instar Patrinarum se ingerant, declaretur aperte ante Baptismum, nec eos, nec alios, præter descriptos seu designatos, ullam cognationem spiritualem contrahere.

## CAPUT III.

Curent, quantum fieri potest, Parochi, ne gentilium aut alia prophana nomina pueris imponantur.

## CAPUT IV.

De pueris exposititiis id observent Parochi, ut si inveniant certa circa infantem indicia, per quæ constet eum non esse baptizatum, utpote sal, quod mulieres apud eum deponere solent, tamquam indicium non collati Baptismi, eo casu talem infantem absque ulla hæsitacione baptizent, nulla apposita conditione: si vero nulla signa, nullumque testimonium ejus rei deprehendant, eum sub conditione baptizent.

## CAPUT V.

Prohibet præterea Sancta Synodus, ne quis Pastorum Baptismi Sacramentum, alio in loco, quam in illis Ecclesiis, in quibus Sacri Fontes constituti & consecrati sunt, exceptis casibus in jure permissis, conferre audeat.

## CAPUT VI.

Et quia frequens experientia docet, modernos hæreticos sæpe contra receptam Ecclesiæ consuetudinem, & antiquissimam traditionem baptizare, uno aquam fundente, alio formam ipsam pronuntiante; ab hæreticis (qui non sunt ad baptizandum admittendi, ubi aliquis Catholicus præsto est) baptizati, similiter sub conditione baptizentur.

## CAPUT VII.

Hortatur hæc Synodus & requirit omnes Magistratus singulorum locorum, ne quam ad obstetricandum parturientibus admittant, nisi prius a Curato loci, ubi obstetrix moratur, testimonium sinceræ & Catholicæ fidei habeat, professionemque fidei coram Archi-Presbytero suo faciat; nec non materiam formamque Baptismi testimonio ejusdem Curati probe calleat: & ultra consuetum juramentum, juret etiam, quod infantes a se excipiendos quantocyus, vel saltem intra tres dies baptizari curabit; aut si obfistentibus parentibus vel amicis id efficere non possit, mox Pastori loci eos denuntiet.

CA-



## CAPUT VIII.

Puerperæ, cum a puerperio donum exeuntes se ad Ecclesiam contulerint, a Parocho proprio juxta probatissimam Ecclesiæ consuetudinem purificentur.

## CAPUT IX.

Ad abolendam pravam illam consuetudinem, qua ruri præsertim post Baptismum puerorum convivia non sine maximis incommodis & periculis tam puerperæ, quam infantis celebrari consueverunt: mandat hæc Synodus Pastoribus, ut subinde moneant & hortentur subditos suos, ut ab hujusmodi conviviis abstineant: quod ut facilius impetrent, caveant in primis ipsi, ne quantumvis invitati dictis conviviis interfint.

## TITULUS IV.

*De Sacramento Confirmationis.*

## CAPUT I.

**D**E dignitate, vi, & effectibus hujus Sacramenti, Parochi subditos suos sæpe diligenterque instruant; maxime sub id temporis, quo illud Episcopus in iis locis administraturus est.

## CAPUT II.

Moneant tunc etiam Sacramentum hoc iterari non posse, & Confessionem præmittendam a confirmandis, si sint doli capaces; eosque, qui in Baptismo Patrini esse non possunt, nec hic esse posse; nec non de conferendis integris mundisque fasciis justæ magnitudinis, ut fronti & capiti circumcingi possint: item de Patrinorum obligatione, ac cognitione spirituali, quam cum confirmandis, eorumque patre & matre contrahunt, ejusdemque cognitionis effectu, ac similibus.

## TITULUS V.

*De Sacramento Pœnitentiæ.*

## CAPUT I.

**N**emo, etiam Regularis, confessiones secularium, ne quidem Sacerdotum, audire præsumat extra mortis articulum, nisi aut Parochiale Beneficium obtineat, aut ab Ordinario

*Tomus VIII. Concilior. German.*

loci idoneus judicatus aut admissus fuerit. Admissio quoque ista in scriptis habeatur.

## CAPUT II.

Judicem sedentem sententias ferre oportet: ideo etiam Confessarius non nisi sedens confessiones excipiat, quacumque etiam pœnitentes dignitate fulgeant.

## CAPUT III.

Ubi erecta necdum sunt confessionalia, quæ Confessarium a pœnitente asserculo cancellato, ac pœnitentem a sequentibus alio asserculo disjungant, intra tres menses a publicatione Decretorum hujus Concilii sumptibus fabricarum erigantur; & ab eo tempore nemo sine licentia Ordinarii extra ejusmodi confessionalia, sceminarum confessiones audire præsumat, nisi in casu necessitatis, sub pœna arbitraria.

## CAPUT IV.

Sciat quilibet a casibus Sedi Apostolicæ aut Episcopo reservatis se absolvere non posse, præterquam in mortis articulo, nisi ad hoc specialem facultatem debite acceperit; quo etiam super irregularitatibus aut votis dispensare non præsumat, nisi aliam specialem potestatem ad hoc habuerit.

## CAPUT V.

Magna oportet esse instructum scientia, qui de rebus maximis ex tempore judicare debet. Ideo Confessarii, quibus non hominis, sed Dei judicium exercendum est, & quidem de animabus pretioso Jesu Christi Sanguine redemptis, lectioni eorum librorum, unde necessariam sibi scientiam hauriant, diligentissime vacare merito debent; utpote, Directorii Polanci, Manualis Navarri, aut ejus Compendii, Summæ Tolerti, Enchiridii Binsfeldii, & similibus.

## CAPUT VI.

Meminerit unusquisque confessionis sigillum strictissime servandum esse, etiam sub pœna depositionis a Sacerdotali officio, & detractionis in arctum Monasterium, ad agendam ibidem perpetuam pœnitentiam. Hoc porro sigillum ad ea se quoque extendit, quæ subinde occasione eorum, quæ in confes-

F f f f f

sione

sione detecta sunt, post datam absolutionem a Confessariis interrogati pœnitentibus vel repetunt, vel diffusius enarrant; quæ perinde, ut ea quæ in ipsa dicta sunt confessione, secreta sunt habenda.

## CAPUT VII.

Nemo aliquem ad perpetuo sibi soli confitendum obliget; & ejusmodi promissionem etiam juratam, tamquam irrationabilem & indiscretam, hæc Synodus irritam esse declarat, & quatenus opus est, irritat.

## CAPUT VIII.

Ut autem Pastores & Confessarii sciant, cujusmodi satisfactiones pœnitentibus injungere debeant, mature expendant verba Tridentini Concilii Cap. 8. Sess. 14. quæ sunt hæc: " De-  
" bent ergo Sacerdotes Domini, quan-  
" tum spiritus & prudentia suggesserit,  
" pro qualitate criminum, & pœni-  
" tentium facultate, salutare, & con-  
" venientes satisfactiones injungere:  
" ne, si forte peccatis conniveant, &  
" indulgentius cum pœnitentibus a-  
" gant, levissima quædam opera pro  
" gravissimis delictis injungendo, alie-  
" norum peccatorum participes effici-  
" antur. Habeant autem præ oculis,  
" ut satisfactio, quam imponunt, non  
" sit tantum ad vitæ novæ custodiam &  
" infirmitatis medicamentum, sed et-  
" iam ad præteritorum peccatorum vin-  
" dictam & castigationem. Nam cla-  
" ves Sacerdotum non ad solvendum  
" dumtaxat, sed & ad ligandum con-  
" cellas, etiam antiqui Patres & cre-  
" dunt & docent.

## TITULUS VI.

*De Indulgentiis.*

**I**ndulgentias, atque alias spirituales gratias, ab Ordinariis locorum, adhibitis duobus de Capitulo, debitis temporibus populo publicandas esse Sacrum Tridentinum Concilium decernit: quod ab eis erit diligenter observandum, summa in illis Indulgentiis recognoscendis adhibita diligentia, atque ita ad Tridentini Concilii præscriptum, coercitis iis, qui oblata charitatis subsidia colligunt, hos Ecclesiæ thesau-

ros non ad quæstum, sed ad pietatem exerceri omnes intelligant.

## TITULUS VII.

*De Sanctissimo Eucharistiæ Sa-  
cramento.*

## CAPUT I.

**I**N singulis Ecclesiis Parochialibus plures Hostiæ Sacræ ad usum ægrotorum continuo asserventur, & quidem sub sera, & in loco honesto, ac decenti vasculo. Et singulis saltem hebdomadis, aut circiter, vel si humiditas loci requirat, etiam sæpius species Sacramentales renoveantur.

## CAPUT II.

Ubicumque locus ab hostibus ac prædonibus est tutus, & facultates Ecclesiæ ferunt, continuo tam de nocte quam de die, ante tabernaculum Sanctissimæ Eucharistiæ lumen ardeat, alibi saltem sub Officio Divino.

## CAPUT III.

Pastores, & quicumque alii Sacerdotes, Venerabilis Corporis Christi Sacramentum ad ægrotos, aut alios, nunquam perferant, nisi decenter & reverenter ornati stola & superpelliceo, & Custos superpelliceo indutus lumen & campanulam sonantem præferat; quo populus sui moneatur officii, tum erga Sacramentum, tum erga laborantem infirmum. Idque observetur, etiam si infirmus frequentius in ægritudine sua viaticum salutis sibi deferri petat, alioqui pœna arbitraria punientur. Et quando fieri potest, antequam Sacra Eucharistia ad ægrotum deferatur, præmittatur confessio.

## CAPUT IV.

Numquam unica dumtaxat Sacra Hostia ad ægrotum deferatur, ne Parocho ad Ecclesiam redeunte inane vasculum populus adoret.

## CAPUT V.

Quilibet annos discretionis habens communicare debet ut minimum in Paschate in Ecclesia sua Parochiali. Incipit autem Pascha ad hunc effectum in Dominica Palmarum, & durat usque ad Dominicam in Albis, inclusive.

Ca-

## CAPUT VI.

Qui huic mandato Ecclesiæ non obedierint, vel in Paschate a Parochia abfuerint, & reversi intra octo dies non docuerint se alibi in Paschate communicasse, mox Episcopo denuntientur; ut ejus judicio, nisi legitimam excusationem attulerint, & vivi ab ingressu Ecclesiæ arceantur, & mortuis Ecclesiastica denegetur sepultura. Ultimo quoque supplicio afficiendis tempestive de Sacra Eucharistia provideatur. Quod ut fieri jubeant, rogentur Serenissimæ Suæ Celsitudines.

## CAPUT VII.

Concubinarij publici, antequam concubinas suas actu dimiserint, ad Sacram Communionem non admittantur; neque etiam publici Usurarii, vel palam inimicitias exercentes, nisi illi usuris renuntiaverint, & injusta lucra restituerint, aut de iis restituendis cautionem dederint; & hi reipsa pacem composuerint, vel sese ad reconciliationem debite obtulerint.

## CAPUT VIII.

Sacrosancta Eucharistia pie & utiliter ad populi devotionem interdum in publicis supplicationibus defertur; potissimum vero in Festo Sacro Christi Corpori consecrato, ejusque Octava. Sed ne nimia frequentia minuat reverentiam, rarius extra prædicta tempora id fiat, & non nisi in arduis causis pacis, & publicæ necessitatis, vel utilitatis. In illis autem processionibus, ad quas populus non tam orandi, quam spectandi gratia confluere solet, abstinetur. In communibus autem supplicationibus circumgestari poterunt Sanctorum Reliquiæ.

## TITULUS VIII.

*De Sacramento Extremæ Unionis.*

## CAPUT I.

**P**arochi ægrotos sæpe invisant, hortenturque, ne ad extremum Sacramenti hujus susceptionem differant; at potius sensibus rationisque usu adhuc integris, illud sibi administrari petant, ut ita uberiores ejus fructum percipiant.

*Tomus VIII. Concilior. German.*

## CAPUT II.

Falluntur, qui existimant suscepto hoc Sacramento vel testamentum conditum non posse, vel spem convalescendi ob id imminui. Ideoque Pastores contrarium subinde populum doceant. Et si forte alicubi usu introductum sit, ut testamentum a susceptione hujus Sacramenti conditum non subsistat, declarat hæc Synodus ejusmodi consuetudinem pro corruptela habendam esse; utpote causam, cur tam salutaris Sacramenti suscepcio ad extremum vitæ spiritum a plerisque differatur; iique interim effectus Sacramenti non percipiant, & sæpe etiam sine eo moriantur.

## TITULUS IX.

*De Sacramento Ordinis.*

## CAPUT I.

**A**d minores Ordines promovendi, bonum a Parocho, & Magistro Scholæ, in qua educantur, testimonium habeant.

## CAPUT II.

Majoribus Ordinibus insigniendi, si sint Religiosi, a Superiore suo, ætatis, natalium, ac vitæ morumque probitatis debita testimonia in scriptis adferant: Sæculares, si in Ecclesia Collegiata, eive subiecta, resideant, a Decano Capituli; si in Collegio, vel Pædagogio aliquo degant, ab illius Præsidente; alioquin a proprio Pastore similia testimonia exhibere debeant. Et non habens hujusmodi testimonia, ne ad examen quidem admittatur, nisi Episcopo aliter videatur.

## CAPUT III.

Fiant insuper proclamationes promovendorum ad singulos Ordines majores juxta Decretum Concilii Tridentini; & qui de iis non docuerint, rejiciantur.

## CAPUT IV.

Doceant Religiosi, etiam Ordinum Mendicantium, de Ordinibus susceptis testimonio ipsius Episcopi, per litteras a Secretario Episcopi communitas, antequam altiores Ordinem suscipiant.

F f f f f 2

CA-



## CAPUT V.

Episcopi subditos suos non nisi jam probatos & examinatos ad alium Episcopum dimittant, juxta Decretum Concilii Tridentini.

## CAPUT VI.

Tituli Patrimoniales, & Beneficiales, sint deinceps ad minimum quadraginta florenorum; nec ullus eorum, nisi visis literis in debita forma expeditis, admittatur.

## CAPUT VII.

Nemo ad Ordines titulo beneficii quantumvis opimi promoveatur, nisi Canonicam institutionem & pacificam possessionem ejusdem antea obtinuerit.

## CAPUT VIII.

Juret deinceps quilibet Ordinandus ad titulum patrimoniale, & beneficiale, quod titulum, quem pro futura sua promotione exhibet, vere & sine ulla fraude possideat; quodque illum non resignabit, vel alienabit, nisi ei de alio sufficienti titulo sit prospectum; neque tunc quidem aliter, quam cum scitu & consensu sui Episcopi, in literis ipsius resignationis aut alienationis exprimendo: item quod titulum illum, qui in locum prioris tituli successerit, absque simili consensu non resignabit, vel alienabit.

## TITULUS X.

*De Sponsalibus & Sacramento Matrimonii.*

## CAPUT I.

**P**arochus ante solennizationem Matrimonii tam Sponsum, quam Sponsam expresse interroget, num libere & sine ulla coactione ad Matrimonium simul contrahendum advenerint: & si alterum eorum ad id coactum esse adverterit, ad solennizationem Matrimonii non procedat, nec alteri ad hoc vires suas committat, sub pœna suspensionis ab officio & beneficio.

## CAPUT II.

Proclamationes Matrimoniales tribus distinctis Dominicis vel Festivis diebus, sub Summo Sacro, vel concio-

ne, aut alioqui sub frequenti populi conventu fieri debent. Si quis sine iis, earumve remissione ab Ordinario in scriptis obtenta, Matrimonio jungere aliquos præsumat, graviter puniatur.

## CAPUT III.

Quandocumque Matrimonium contrahere volentes sunt diversarum Diœcesium, Decanatum, vel Parochiarum; Parochus unius ad Matrimonii solennizationem non procedat, nisi & omnes proclamationes in Ecclesia sua fecerit, nullumque intellexerit Canonicum impedimentum; & similiter Parochum alterius desponsorum omnes tres proclamationes fecisse, & nullum Canonicum impedimentum denuntiatum esse, ex testimonio ejusdem Pastoris certo cognoverit, vel de dispensatione Ordinarii ipsi constiterit. Et si forte signaturam illius Pastoris non noverit, & testimoniales sibi exhibitas de falso suspectas habeat, exigat testimonium saltem unius personæ tide dignæ, quod testimoniales illæ sint scriptæ vel subsignatæ manu ejus, a quo scriptæ vel subsignatæ esse dicuntur; vel si hujusmodi testimonium haberi non possit, exigat juramentum ab altero desponsorum, quem testimoniales illæ concernunt, quod eas a Parocho suo acceperit, vel ab eo scriptas esse sciat. Et si quem hic perjurum esse, aut crimen falsi committere contigerit, is gravissime puniatur.

## CAPUT IV.

Impedimento aliquo denunciato, vel Matrimonio desponsorum oppositione aliqua facta; non prius ad ultiores proclamationes aut Matrimonii solennizationem Parochus procedat, quam re ad Ordinarium, vel Vicarium ejus, aut Officialem delata, ab eodem intellexerit, quid facere debeat.

## CAPUT V.

Parochi omnes impedimenta Matrimonii exacte nosse & in memoria habere studeant, & subinde in concionibus suis ea populo declarent. Et inter cætera sciant, suosque duceant, affinitatem ortam ex copula illicita impedire Matrimonium in primo & secundo gra-

gradu tantum : & nullam omnino cognationem spirituales contrahi inter Susceptorem & Susceptricem ; nec etiam inter baptizatum, vel confirmatum & susceptum, & suscipientis conjugem.

## CAPUT VI.

Meminerint Parochi sibi non licere vagorum hominum Matrimoniis interesse, nisi re ad Ordinarium delata ab eo licentiam id faciendi in scriptis obtinuerint : neque ea licentia sine causæ cognitione & matura deliberatione detur.

## CAPUT VII.

Habeant quoque singuli Pastores librum, in quo describant nomina & cognomina Matrimonio junctorum, ac testium, nec non diem & locum contracti Matrimonii; eundemque librum diligenter custodiant, & quotannis in visitatione Archi-Presbytero exhibeant. Qui quidem liber ubi jam completus fuerit, servabitur in Archivis Ecclesiæ.

## CAPUT VIII.

Tempus clausum diligenter observetur : & si quando ex legitima causa aliqui ad Matrimonium tunc contrahendum per Ordinarium admittantur, abstinendum tamen erit a solennitatibus nuptialium conviviorum, choreis, Sponsarum publicis translationibus, & similibus, quæ temporis sanctitati repugnant ; a quibus similiter abstinendum erit, etsi Matrimonium antea contractum fuerit, sub pœna arbitraria.

## TITULUS XI.

*De Doctrina & prædicatione verbi Dei.*

## CAPUT I.

**M**eminerint Regulares se sine licentia Superiorum suorum, ac benedictione Episcopi Diœcesis, in qua degunt, in Ecclesiis Ordinum suorum, & sine expressa licentia tam Episcopi, quam Superiorum suorum, in Ecclesiis non suorum Ordinum prædicare non posse, nec usquam omnino Episcopo contradicente.

## CAPUT II.

Pari aut majori ratione, Sacerdotibus & Diaconis sæcularibus nec sine licentia Ordinarii, nec eo contradicente prædicare licet. Et Pastores neminem omnino in Ecclesiis suis concionari permittant, nisi de ejusmodi licentia Ordinarii in scriptis prædocuerit.

## CAPUT III.

Abstineant Concionatores ab inani- bus, ac difficilibus, captumque auditorum superantibus, & ad fidei ædificationem minus pertinentibus quæstionibus, a convitiis, a fabulosis, & narratione apocryphorum, iisque omnibus, quæ vel auditoribus risum moveant, vel eorum animos a Superioribus suis avertant : neve passim hæreticorum argumenta apud imperitam multitudinem referant ; sed ea tantum doceant, quæ ad fidem veram, pietatem, obedientiam, & concordiam pertinent, quæque scire omnibus necessarium est ad salutem : annuntiando cum brevitate & facilitate sermonis, vitia quæ quemque declinare, & virtutes quas sectari oportet.

## CAPUT IV.

Pastores Ecclesiarum ruralium singulis diebus Dominicis sub concione recitent lingua vernacula tractim & intelligibiliter Orationem Dominicam, Salutationem Angelicam, Symbolum Fidei, & Præcepta Decalogi & Ecclesiæ.

## CAPUT V.

Diversitas libellorum doctrinæ Christianæ, sive Catechismi, magnum in discendo & docendo parit difficultatem. Ideoque mandat hæc Synodus, ut Parochi, alique omnes, ad quos spectat, a festo Nativitatis Domini proxime venturo, unum & eundem modum in docendo & discendo doctrinam Christianam ubique teneant, tenerique faciant; eum scilicet, qui in libello, auctoritate hujus Concilii ad eum finem brevi edendo, continebitur.

## CAPUT VI.

Optat denique hæc Synodus, ut Pastores singulis diebus Dominicis ac Festivis catechizandæ juventuti serio

se dent, vel ubi alteri alicui id oneris incumbit, diligenter superintendant.

## TITULUS XII.

### *De Officio Divino, ac Cæremoniis.*

#### CAPUT I.

**C**UM in Officio Divino negotium nobis sit cum Deo ipso, qui Rex Regum est & Dominus Dominantium, merito non modo statis semper horis ad chorum conveniatur, sed in eo etiam a fabulis, risibus, & aliis insolentiis omnino absteineatur, sub pœna amittendæ distributionis, & alias arbitraria pro modo scandali.

#### CAPUT II.

Meminerint autem omnes tam in dignitate constituti, quam Canonici, Capellani, Vicarii, Beneficiati, & reliqui Habituati, mandati Concilii Tridentini; ut omnes Divina per se, & non per substitutos, compellantur obire officia, atque in Choro ad psallendum instituto Hymnis & Canticis Dei nomen reverenter, distincte, devoteque laudare. Quod Decretum præsens Synodus inviolabiliter observari mandat.

#### CAPUT III.

Distributiones Chori dispensentur secundum præscriptum Concilii Tridentini ad tertiam partem fructuum. Ut vero minores Horæ non negligantur, pro illis certæ distributiones assignentur, aut minores illæ Horæ majoribus adjungantur: ita ut in majoribus illis Horis nemo distributione gaudeat, nisi qui in minoribus quoque Horis debite interfuerit.

#### CAPUT IV.

Careant quoque distributionibus, qui ante *Gloria Patri* primi Psalmi cujusque Officii usque ad finem eidem Officio actualiter non interfunt; exceptis dumtaxat iis, qui ex causis expressis in Cap. unico *De Clericis non resid. in 6.* & in primo Concilio Provinciali Mechliniensi (\*) hoc Tit. Cap. 4. 5 & 6. & in Bullis erectionis Episcopatum hujus Provinciæ, pro præsentibus & Officio Divi-

no interessentibus habendi sunt, & ut tales distributionibus gaudere debent.

#### CAPUT V.

In Ecclesiis, quæ necdum recepto usu Romano proprium Officium adhuc servant, vel recepto etiam usu Romano propria quædam Officia Patronorum suorum illi admiscant, si Apostolica auctoritate necdum ejusmodi Officia recognita, & debite ab incertis & apocryphis purgata ac correctæ sint, intra sex proximos menses id fiat.

#### CAPUT VI.

Serius ad Officium Divinum venientes, etsi distributione privandi sint, libere tamen Chorum intrare permittantur. Et si quis eos manuum, vel pedum plausu, aliove strepitu excipiat, ipse quoque distributione privetur, & insuper pro modo scandali puniatur.

#### CAPUT VII.

Gravis tantum, & quæ pios affectus moveat musica, Officio Divino adhibeatur; non etiam lasciva, vel sæcularis. Similiter & organa, & quæcumque instrumenta musica, tam in Processionibus, quam in Ecclesiis, modulatione sua lascivas cantiones non imitentur; nec Præfationem aut Orationem Dominicam in Missa absumant.

#### CAPUT VIII.

Tintinnabula quoque & campanas ad harmoniam quamdam pulsantes, ejusmodi pulsatione turpes, inhonestas, vel scandalosas cantiones non exprimant, vel imitentur, sed potius Hymnorum & Canticorum Ecclesiæ modulationes. Et sicubi necesse fuerit, cum Magistratu desuper agatur.

#### CAPUT IX.

Nemo in loco sacro vel convivium instituat, vel convivio intersit, aut negotiationem exerceat, vel in eo etiam post Officium Divinum deambulet, sub pœna arbitraria.

#### CAPUT X.

Proclamationes quoque forenses, & denuntiationes quarumcumque venditionum, vel rerum venalium, etiam in

(\*) Vide Tom. VII. pag. 614.



in Templo fieri solitæ, deinceps non fiant, nisi extra Templum, & Officio Divino prorsus absoluto.

## CAPUT XI.

Mandat deinde hæc Synodus, ut Conventus Capitularis non fiat sub Officio Divino, nisi res, ob urgentes aut repentinas causas, moram non patiatur.

## CAPUT XII.

Canon Missæ secreto pronuntietur; nihilque in eo, etiam pietatis prætextu, umquam addatur, vel mutetur. Et generalitet alios ritus, aliasve caerimonias vel preces in celebratione Missarum nemo adhibeat, præter eas, quæ ab Ecclesia probatæ & receptæ sunt.

## CAPUT XIII.

Curent ubique Pastores, nec non alii, ad quos id pertinet, ut sacri calices, corporalia, purificatoria, albæ ac reliquæ vestes Sacerdotales, omniaque paramenta altaris semper sint integra & munda; idque sub pœna arbitraria, pro modo culpæ & negligentiae.

## CAPUT XIV.

Ubi Ecclesiarum paupertas calices argenteos emi non patitur, hortatur Synodus, ut saltem superior eorum pars seu cuppa sit argentea, maxime ubi non est periculum ab hostibus aut prædonibus: ubi vero ob ejusmodi periculum, aut extremam paupertatem, calices stannei adhuc tolerandi sunt, ut minimum singulis saltem quindecim diebus debite mudentur.

## CAPUT XV.

Vago ac ignoto Sacerdoti, etiam Regulari, Missam celebrare non liceat, nisi ostensis testimonialibus, vel commendatitiis literis sui Ordinarii, nec cuiquam omnino extra Ecclesiam, & ad Divinum cultum dedicatum & ab Ordinario designatum Oratorium.

## CAPUT XVI.

In omnibus pagis totius Provinciæ Missa Parochialis Dominicis & Festis diebus certa & eadem hora semper fiat, quacumque ratione in contrarium non obstante, sub pœna arbitraria.

## CAPUT XVII.

Pauperes per Ecclesias tempore Missarum, Prædicationum, aliorumve Divinorum Officiorum, mendicare seu eleemosynas petere non permittantur, sed ad valvas Ecclesiæ stare jubeantur: deputenturque ubique a Superioribus vel Administratoribus Ecclesiarum, qui mendicantes ab Ecclesiis arceant & expellant; & quidem, si necesse fuerit, sub certo honorario ex bonis mensarum pauperum perfolvendo.

## CAPUT XVIII.

Ut uniformitas Cæremoniarum usus Romani ubique tandem inducatur; quilibet Ordinarii in singulis Decanatibus suæ Diœceseos, & insuper omnia & singula Capitula tam Collegiata, quam Cathedralia, aliquos deputant cæremoniarum & rituum Ecclesiæ Romanæ peritos, qui primitias celebraturos dictis cæremoniis ac ritibus debite instruant. Et deinceps nemo sæcularis primitias celebrare præsumat, nisi ab aliquo ex dictis deputatis easdem cæremonias & ritus se perfecte didicisse, Capitulo, vel Archi-presbytero, cui subest, testimonio Instruëtoris sui debite probaverit, sub pœna arbitraria.

## CAPUT XIX.

Ut autem hæc uniformitas sacrorum rituum & cæremoniarum, magnopere commendans Catholicæ Religionis dignitatem & unitatem, in omnibus etiam reliquis Ecclesiasticis Officiis adhibeatur; imprimendum in hisce partibus, & ab omnibus, quos concernit, quoad fieri poterit, observandum erit Cæremoniale Episcoporum, quod magno labore & industria ad hoc componi jussit fel. rec. CLEMENS PP. VIII. & in omnes Ecclesias Metropolitanas, Cathedrales, & Collegiatas introduci districte mandavit.

## CAPUT XX.

Hoc vero cum fieri non possit sine Magistro Cæremoniarum, qui totus in eo sit, ut dictum Cæremoniale perlegat, & aliis rationem dictarum Cæremoniarum ostendat & præeat; mandat hæc Sancta Synodus, ut in singulis Ecclesiis Cathedralibus & Collegiatis sumptu

ptu Capituli aliquis ad hoc maxime idoneus constituatur, cui in ritibus omnes obedire teneantur.

### TITULUS XIII.

#### *De Festis & Jejniis.*

##### CAPUT I.

**M**Eminerint exempti omnes, etiam Regulares, Decreti Concilii Tridentini, quo dies Festos, quos in Dicecesi sua servandos Episcopus præcepit, ipsi quoque servare jubentur.

##### CAPUT II.

Pastores singulis diebus Dominicis sub concione, vel Summo Sacro, dies Festos & Jejunia ea septimana occurrentia populo denuntiare non omitant.

##### CAPUT III.

Dies Festi tam celebriores, quam minus solennes, nec non jejunia per totam Provinciam servanda, in prima Synodo Provinciali Mechliniensi plene enumerantur, ita tamen ut in locis, ubi vel plura vel strictius observata fuerint, mandet Synodus, ut pia consuetudo observetur. Quænam vero Festa in singulis Dicecesibus, singulisque Parochiis, insuper servari debeant, stetur consuetudine cujusque loci.

##### CAPUT IV.

Nundinæ annuæ, & forum rerum venalium hebdomadarium, cum in diem festum incidunt, in alium transferantur. Et jejunia in diem Dominicam incidentia, pridie servantur.

##### CAPUT V.

Festum Annuntiationis Beatæ Mariæ, si quando inter Dominicam Palmarum, & Dominicam in Albis occurrerit, celebretur juxta receptam consuetudinem tam a populo, quam a Clero, feria tertia post dictam Dominicam in Albis: si vero in aliam quamlibet Dominicam Quadragesimæ præterquam Palmarum inciderit, celebretur feria secunda proxime sequenti etiam a populo.

##### CAPUT VI.

Festum S. Marci, si in hebdomada Paschæ, vel in Dominica *Quasi mo-*

*do*, evenerit; celebretur feria quarta post *Quasi modo*, tam a Clero, quam a populo. Si vero in aliam Dominicam inciderit, festum quidem servetur ipsa die Dominica; sed processio, abstinencia a carnibus per totum diem, & jejunium usque ad prandium, servantur die sequenti. Quod si vero in feriam quintam post Dominicam *Quasi modo* translatum, cum festis Ss. Philippi & Jacobi aut S. Crucis concurrerit; celebritas quidem a populo illis ipsis diebus servabitur, sed dicta processio, abstinencia, & jejunium, sicut in diebus Rogationum, in feriam quintam transferentur.

### TITULUS XIV.

#### *De Imaginibus, & Sanctorum Reliquiis.*

##### CAPUT I.

**N**E per falsi dogmatis imagines rudibus periculosi erroris occasio præbeatur, nulla umquam in Ecclesiis etiam exemptis insolita imago ponatur, nisi ab Ordinario prius approbata fuerit. Curentque diligenter Episcopi, ut in imaginibus tam sculptis, quam pictis, loco sacro jam illatis, vel deinceps inferendis, nihil inordinatum, nihil profanum, nihil inhonestum appareat, neque in intima altarium tabula vivorum effigies depingantur.

##### CAPUT II.

Imagines sacras sæculariter compras, nec in templis, nec in processionibus tolerant Episcopi, & quæ ad ornatum supplicationum proponuntur, ejusmodi sint, quæ oculos spectantium non offendant.

##### CAPUT III.

Nemo Ecclesiastici Ordinis lascivas, & ob nuditatem vel aliter obscenas, & quæ pias mentes offendant imagines, in suis ædibus ac hortis ponat, vel retineat, sub pœna arbitraria. Concionatores quoque contra hujusmodi imaginum quocumque etiam profano loco positarum detestandum usum, frequenter conciones suas instituant.

CA.

## CAPUT IV.

Reliquiæ Sanctorum in vasis honestis, seu capsulis obferatis, locoque honesto (non tamen in tabernaculo SSmi Sacramenti) asserventur; nec ex iis per alium, quam Ordinarium loci, aut ab eodem ad id potestatem in scriptis habentem, umquam educantur.

## CAPUT V.

Numquam etiam Reliquiæ vel imagines in processionibus deferantur, nisi per Clericos Sacris initiatos, quantum fieri potest; neque tam longi itineris circuitu, ut aut populi devotio languescat, aut computationibus, aliisque insolentis occasio præbeatur.

## TITULUS XV.

*De Superstitione.*

## CAPUT I.

**N**emo ad morbos vel vulnera hominum aut brutorum curanda superstitionis remediis utatur: vel super rebus deperditis, aut super futuris eventibus, ac quibusvis secretis, Divinos, seu pro Divinis se venditantes, consulere præsumat. Si quis aliquid horum fecerit, & monitus non abstinuerit, mox ipsi Ordinario, vel Officiali denuntietur, juxta Bullam SIXTI V. editam contra exercentes Astrologiæ judicariæ artem, quæ incipit: *Celi & terræ Creator.*

## CAPUT II.

Et nihilominus hæc Synodus mandet omnibus Judicibus Ecclesiasticis, ut in exilium mittant, vel mitti curent omnes, qui super futuris eventibus, aliisque secretis responsa dant; eosque, qui tales consulunt, graviter puniant, & multo gravius animadvertant in maleficos, & incantatores, & etiam omnes, qui vulgo Ægyptii vocantur.

## CAPUT III.

Et quoniam rudis populus sæpe ex ignorantia superstitionibus inquinatur; Parochi subditos suos diligenter de illis doceant, & inter cætera, supersticiosum esse, expectare quemcumque effectum a quacumque re, quem res illa, nec ex sua natura, nec ex institutione Divina, nec ex ordinatione vel

*Tomus VIII. Concilior. German.*

approbatione Ecclesiæ producere potest.

## CAPUT IV.

Nullus omnino exorcizare præsumat sine licentia Ordinarii in scriptis obtenta: nemo etiam utatur aliis exorcismis, quam ab Ordinario approbatis, vel potestate exorcizandi ulla ratione abutatur, sub pœna perpetuæ privationis illius officii, & alias arbitraria.

## TITULUS XVI.

*De Episcopis, & eorum Officio, ac Sede vacante.*

## CAPUT I.

**Q**uanto sublimior est Episcoporum dignitas, tanto etiam purior ac sanctior debet esse ipsorum vita: quare mores suos omnes ita componant, ut reliqui ab iis frugalitatis, modestiæ, continentiæ, ac quæ nos tantopere commendat Deo, sanctæ humilitatis exempla petere possint; nihilque in eorum suppellectili, mensa, victu, ac reliquo vitæ genere appareat, quod non simplicitatem, Dei zelum, ac vanitatum contemptum præ se ferat.

## CAPUT II.

Et quia in tremendo strictissimi judicii die non pro se ipsis tantum, sed pro animabus etiam sibi commissis rationem reddituri sunt, summo studio & continua vigilantia gregem suum pascant & regant; officiumque suum in omnibus, maxime quoad executionem Decretorum Concilii Tridentini, & hujus Provincialis, cum omni diligentia & sollicitudine explicent.

## CAPUT III.

Inter cætera meminerint oneris prædicandi verbi Dei, & totius Dioeceseos singulis saltem bienniis visitandæ.

## CAPUT IV.

Curent etiam, ut jura & stipendia Secretariorum, & aliorum quorumcumque Ministrorum suorum, Sacris Canonibus & Decretis Concilii Tridentini in nullo contrariantur; atque insuper pro qualitate laborum & ratione sumptuum ita sint moderata, ut iis se

G g g g g

grava-



gravari nemo iure conqueri possit: & si quis in eorum exactione excessisseprehendatur, graviter puniatur; & relapsus, officio privetur.

## CAPUT V.

Meminerint Episcopi se conformare Decreto ac Constitutioni Concilii Tridentini *Sess. 25. de Reform. Cap. 1.*

## CAPUT VI.

Cum primum Sedes Episcopalis vacaverit, supplicationes ac preces publice privatimque habeantur, atque a Capitulo per Civitatem & Dioecesim indicantur, quibus Clerus populusque bonum a Deo Pastorem valeat impetrare.

## CAPUT VII.

Vacante eadem Sede Episcopali sequentur Cathedralia Capitula in administratione dictæ Sedis Constitutionem Concilii Tridentini *Sess. 24. de Reform. Cap. 16.*

## CAPUT VIII.

Facta novi Episcopi nominatione, processus super ejus natalibus, vita, ætate, doctrina, & moribus, Romam transmittendus, fiat juxta dispositionem Bullæ GREGORII XIV. quæ incipit: *Onus Apostolicæ servitutis.*

## TITULUS XVII.

*De Archi-Presbyteris, Pastoribus, & Custodibus, eorumque Officiis.*

## CAPUT I.

**A**deptus Pastorum, ultra professionem Fidei, faciet etiam subsequens Juramentum, antequam cura animarum, vel possessio Pastorum ei detur.

## CAPUT II.

Ego N. juro & promitto obedientiam, reverentiam, & honorem Summo Pontifici Romano, ac Rmo Domino Episcopo N. eorumdemque Successoribus. Item juro & promitto Ecclesiæ meæ Parochiali de N. fideliter servire secundum oneris illi annexi exigentiam, & in eo personaliter residere. Bona Pastorum vel Ecclesiæ meæ non alienabo; & indubite alienata, quantum in me erit, fideliter

recuperare studebo. Specificationem omnium fructuum Pastorum mei, cum debita designatione hypothecarum, limitum & terminorum, intra annum a Festo Nativitatis S. Joannis Baptiste proximo venturo, Archi-Presbytero tradam; fructus anni, in quo me mori aut meam Ecclesiam dimittere contingeret, subijcio & obligo ad laudabilem deservituram usque ad festum Nativitatis S. Joannis Baptiste, mortem vel dimissionem meam proximo subsequendum. Sic me Deus, &c.

## CAPUT III.

Cum a Concilio Tridentino constituta sit certa ratio providendi Recto-ribus Ecclesiarum parochialium de competentia vivendi: mandat Synodus provincialis Episcopis, ut iisdem juxta præscriptum dicti Concilii de portione Canonica provideant. Quam quidem, computatis certis fructibus & emolumentis, ac incertis seu accidentalibus, quæ ad certam summam communibus tribus aut quatuor annis ultimo præteritis redigi possunt, singulis Pastoribus non infra triginta quinque libras, nullis autem supra quinquaginta libras grossorum Flandriæ, iidem Episcopi constituent; nisi eorumdem judicio parochiæ amplitudo aliquid amplius ultra 50. libras requireret. Ut vero hæc omnia perfici possint, licebit Episcopis per unionem vicinarum & minorum Ecclesiarum, aut simplicium Beneficiorum, vel per concessionem deserviturarum, & alias propter idoneorum Sacerdotum raritatem, per modum provisionis providere.

## CAPUT IV.

Si vero contingat oriri aliquam difficultatem Pastoribus in assignanda judicio Episcopi dicta Canonica portione, iidem Episcopi, seu eorumdem Vicarii aut Officiales, summarie & de plano, sine strepitu & figura judicii, audita nuda petitione Parochorum, ac eorum, quorum interest, responsione, & facta desuper summaria informatione, quod ipsis Parochis deesse compererint, ad summam superius taxatam per modum provisionis adjudicabunt; & appellatio executionem non suspendat.

CA.

## CAPUT V.

Ecclesiis parochialibus vacantibus curabunt Episcopi & Archi-Diaconi, ut quam fieri poterit citissime, iisdem de idoneis Pastoribus provideatur, illique mox instituantur, & sic a capta possessione, & inchoata residentia, pro rata temporis fructibus gaudeant.

## CAPUT VI.

Quamdiu ob malignitatem horum temporum, & raritatem idoneorum Sacerdotum, singulis pagis de proprio Pastore provideri non potest, sed uni Parocho duorum aut trium pagorum curam committere Ordinarii coguntur; curent ejusmodi deservitores, ut onera Missarum singulis pastoratibus incumbentia fideliter expleantur.

## CAPUT VII.

Archi-presbyteri & Pastores Decreta Concilii Tridentini, nec non hujus & primæ Synodi provincialis, sæpe diligenterque legant: & quæ passim in iisdem ponuntur officium ipsorum concernentia, quam diligentissime exequantur.

## CAPUT VIII.

Pastores ab omnibus ad suas parochias commigrantibus, si eorum vitam & fidem aliunde cognitam non habuerint, exigant desuper literas testimoniales ultimi ipsorum Pastoris; quæ si non exhibeantur, Curia Episcopi insinuent, ut eas exhibere compellantur juxta edicta desuper emanata.

## CAPUT IX.

Piorum legatorum diligentem curam habeant, & feriis monitionibus satagant, ut ante finem anni piis Fundatorum voluntatibus satisfiat, alioqui ii, quibus hoc onus incumbit, Ordinario denuntientur.

## CAPUT X.

Archi-presbyteri singuli, ubi id juris ex consuetudine habent, Ecclesias parochiales, Capellas, & Hospitalia, aliaque pia loca districtus sui, juxta commissionem sibi ab Ordinario datam vel dandam quotannis visitent; actaque visitationis intra tempus ab Ordinario præscriptum, vel præscriben-

*Tomus VIII. Concilior. German.*

dum, ad ipsum, vel Vicarium ejus Generalem transmittant.

## CAPUT XI.

Inter cætera visitaturi serio inquirent, an Pastores ipsi, ac reliqui Sacerdotes, & Ministri Ecclesiæ honeste vivant; & an officio suo in prædicatione verbi Dei, celebratione Missarum, administratione Sacramentorum, ac cæteris omnibus, satisfaciant.

## CAPUT XII.

Videant etiam, an Ecclesiæ & domus pastorales & Capellanorum sint factæ rectæ.

## CAPUT XIII.

Advigilent quoque, ut bona fabricarum, & pauperum, bene & fideliter administrentur.

## CAPUT XIV.

Capitula Pastorum singuli Archi-presbyteri quotannis celebrent, præcise illo die, quem Ordinarius illis statuet; ut ita Ordinarius, si ita expedire judicaverit, vel aliquem ad ea mittere, vel iis significanda scripto significare possit.

## CAPUT XV.

Custodes quarumcumque Ecclesiarum parochialium, ac Sacellorum, præstent juramentum de obedientia, in his, quæ officii sui sunt, exhibenda Pastori & Aedituis. Item requisiti dent cautionem pro his, quæ illorum curæ committuntur, ac promittant se in Officio Divino & administratione Sacramentorum superpelliceo usuros, alioqui officio privandi. Et si Custodes non resideant, teneantur providere Ecclesiæ de idoneo aliquo substituto, cum stipendio, Ordinarii arbitrio illi constituendo.

## CAPUT XVI.

Sacerdotes quoque quando haberi poterunt, præ cæteris ad officia Custodum assumantur; ut hac ratione Officium Divinum honestius peragi, & Scholæ de Ludimagistro, & populo de Missa matutinali provisum esse possit.

## TITULUS XVIII.

*De vita & honestate Clericorum,  
eorumque correctione.*

## CAPUT I.

**N**emo, etiam in Ordine Sacro constitutus, fidejubeat: sciantque omnes Clerici ipsis non licere ullo pacto fori privilegio renuntiare; & si renuntiaverint, nullam esse renuntiationem, in eosque ad Sacrorum Canonum præscriptum agi posse, ac debere.

## CAPUT II.

Quilibet tonsuram habeat, suo gradui & Ordini congruam, eamque semper conspicuam.

## CAPUT III.

Nemo Beneficiatus, vel in Ordine Sacro constitutus, barbam gestet alutam; & quilibet Sacerdos ita insuper superius labrum rescissum habeat, ut Sanguinem Christi sumpturo non sit impedimento.

## CAPUT IV.

Et si habitus non faciat Monachum, debent tamen Clerici in oppidis vestes gestare suo Ordini congruentes, ut per decentiam habitus extrinseci, morum honestatem intrinsecam ostendant; ideoque tunicas exteriores manicatas & Clericale biretum, quod est Ecclesiasticorum hominum proprium, ad Crucis formam confectum semper gerant: galerum vero non adhibeant, nisi cum ob adversam valetudinem, aut aeris intemperiem, pluviamve ingruentem, adhiberi oporteat; qui tamen sericus non sit, aut instar militarium turbinatus: quem etiam, cum primum in Ecclesiam vel in ædes publicas præcipue ingressi sunt, statim deponant. Qui vero ruri agunt, vestem interiorem, ut minimum, ad dimidium tibiæ usque promissam habere debeant. Porro Clerici viatores aut peregrinantes ita se decenter suæque professione digne gerant, ut eorum moribus, verbis, habituque modesto per omnia glorificetur Deus. Et quoniam munda curiositas quotidianas adinvenit levitates, omnis ille habitus quibuslibet Ecclesiasticis personis interdictus

sit, a quo Episcopus abstinendum mandavit: & qui ab Episcopo moniti, etiam per edictum publicum honestum habitum Clericalem non gestaverint, per suspensionem ab Ordinibus, officio, & beneficio, ac fructibus, & redditibus, & proventibus ipsorum beneficiorum, nec non si semel correpti iterum in hoc deliquerint, etiam per privationem officiorum & beneficiorum coerceantur.

## CAPUT V.

Clerici quoque beneficiati, vel in Sacris constituti, decimas, census, prædia, aut terras alienas non conducant, quæstus faciendi gratia, neve ullam negotiationem sæcularem exercent, sub pœna arbitraria.

## CAPUT VI.

Neque edendi vel bibendi causa tabernas ingrediantur, nisi peregrinationis, vel alia necessitate compulsi, sub pœna arbitraria.

## CAPUT VII.

Ebrietas quemlibet hominem valde dedecet, quod mentis inducat exilium; sed maxime personas Ecclesiasticas, quod præter peccati & scandali gravitatem, etiam libidinis fomitem subministret. Quare & tanto diligentius omnes ab ea sibi caveant, & in eam lapsi pro gravitate delicti & scandali puniantur.

## CAPUT VIII.

Quoad concubenarios (si qui sint, quod Deus avertat) vel suspectam cum mulieribus consuetudinem habentes, juxta Decreta Canonum & Concilii Tridentini rigore puniantur. Et hujusmodi mulieres, si monitæ ab Ordinario, se ab eorum consuetudine non sejunxerint, extra oppidum, vel Diocesim, invocato etiam, si opus fuerit, brachio sæculari, ejiciantur.

## CAPUT IX.

Et generaliter quæcumque a Sacris Canonibus, præsertim Concilii Tridentini, de vita, honestate, & modestia Clericorum retinenda, & simul de luxu, lusibus, & quibuscumque criminibus vitandis sancita sunt; eadem omnia sub iisdem pœnis, tamquam  
hic



hic repetita, hæc Synodus servari mandat.

## TITULUS XIX.

### *De Beneficiis & Officiis Ecclesiasticis, ac Beneficiatorum residentia.*

#### CAPUT I.

**E**X promotione inidoneorum Ministrorum Ecclesiæ plurimum mali & scandali provenire res ipsa loquitur. Quare mandat Synodus, ut non tantum Episcopi, ætate, vel moribus, vel eruditione, vel aliter quomodocumque inidoneos, a suscipiendis Ordinibus arceant; verum etiam ut quælibet beneficia & officia Ecclesiastica dignis tantum, & sine acceptione personarum conferantur, utque in conferendis Pastoratibus servetur Decretum Concilii Tridentini *Sess. 24. Cap. 18. de Reform.* etiam quoad convocationem examinandorum per edictum publicum.

#### CAPUT II.

Cum dignitates in Ecclesiis Cathedralibus & Collegiatis, ad conservandam augendamque Ecclesiasticam disciplinam sint institutæ, ut qui eas obtinent, pietate præcellant, & aliis sint exemplo: statuit hæc Synodus omnium Ecclesiarum & Monasteriorum Abbates, Præpositos, Prælatos, Decanos, Archi-Diaconos, Archi-Presbyteros, Pœnitentiarios, Cantores, Scholasticos, Thesaurarios, & Canonicos Cathedrales, nec non possessores Capellaniarum, quas vocant, animarum, quæve ex fundatione personalem residentiam requirunt, & alios omnes beneficiorum, quibus aut cura animarum annexa est, aut onus simile incumbit, possessores, ad personalem residentiam in Ecclesiis suarum dignitatum aut beneficiorum obligari, & personaliter residere debere. Quod si id præstare neglexerint, adversus eos, ad Sacrorum Canonum, ac Sacri Concilii Tridentini præscriptum, procedetur.

#### CAPUT III.

Si qui autem ex prædictis, sese privilegio perpetuo aut temporali tu-

tos & exemptos a personali residentia putent, dictum privilegium Episcopo, seu ejus Vicario, intra tres menses exhibeant, ut cognoscat, an ex veris causis concessum sit, nec ne.

#### CAPUT IV.

Beneficiati, neque ex fundatione, neque ex consuetudine, vel aliter ad personalem residentiam obligati, nihilominus onera Missarum beneficiis suis incumbencia, in Ecclesiis ubi ea fundata sunt, plene ac debite expleri curent; alioquin hoc ipso, etiamsi in loco privilegiato resederint, a fructibus beneficiorum suorum suspendantur, & suspensi maneant, donec debite docuerint de impleto onere Missarum, ob cuius omissionem suspensi fuerant.

#### CAPUT V.

Pluralitas beneficiorum, & certum continet animarum periculum, & totius Ordinis Ecclesiastici perversio est; ideoque mandat hæc Synodus exacte servari, quicquid de ea in Cap. *De multa*, x. *De Præbendis*, ac in aliis Sacris Canonibus, & præsertim in Sacro Concilio Tridentino, decretum & statutum est.

#### CAPUT VI.

Permutationes beneficiorum, quas vocant triangulares, & simplices resignationes beneficiorum in favorem tertii, cum clausula, non aliter, neque alias, improbat etiam hæc Synodus, easdemque deinceps fieri prohibet.

## TITULUS XX.

### *De Scholis.*

#### CAPUT I.

**E**X bona educatione ac institutione Juventutis pendet pro magna parte salus totius Reipublicæ. Quapropter ubicumque Scholæ, tam quotidianæ, quam Dominicales adhuc requiruntur, agant Archi-Presbyteri cum Magistratibus & Præfectis locorum, ut eæ mox erigantur, simulque rationem ineant ipsis Ludimagistris de annuis stipendiis providendi.

## CAPUT II.

Pauperes per subtractionem elemosynarum mensæ pauperum, alii vero aliis pœnis liberos, aliosque domesticos suos ad Scholas Dominicales, ac lectionem Catechisticam, mittere per Magistratus & Præfectos locorum sine conniventia compellantur; eoque tempore, quo juvenus in Scholis instituitur, a tripudiis & aliis insolentiis, quibus juvenes a Scholis avocentur, omnino abstineatur.

## CAPUT III.

Optat hæc Synodus, ut tam in Dominicalibus, quam aliis quibuscumque Scholis, masculi a viris, & puellæ a mulieribus tantum instruantur: ubicumque tamen id obtineri non poterit, saltem locis & interstitiis masculi a puellis separentur.

## CAPUT IV.

Scholæ Scholasticis Capitulorum subiectæ, ab iisdem Scholasticis, cæteræ omnes ab Archi-Presbyteris, vel aliis ad id ab Ordinario deputatis, singulis saltem semestribus serio visitentur; nec ulli omnino libri in iis prælegantur, qui turpe aut obscœnum quid contineant, quique ab Ordinario approbati non sint.

## CAPUT V.

Scholas Dominicales frequentantes non tantum doceantur legere & scribere; verum etiam, & quidem præcipue, instituantur in rudimentis fidei: & ante omnia doceantur Orationem Dominicam, Salutationem Angelicam, Symbolum Fidei, Præcepta Decalogi & Ecclesiæ, modumque confitendi ac Missæ Sacrificio inserviendi, & qui grandiores sunt, rationem etiam se parandi ad Communionem.

## CAPUT VI.

Insuper hortatur hæc Synodus, ut in Scholis latinis doceatur Cantus Gregorianus; necnon ut Ludimagistri & Ludimagistræ Scholarum linguæ vernaculæ juventutem suam statis diebus ad lectionem Catechisticam deducant, eosque ibidem in officio contineant.

## TITULUS XXI.

*De Seminariis.*

## CAPUT I.

Ubicumque saluberrimum Decretum Concilii Tridentini de instituendis Seminariis necdum executioni mandatum est, curent Episcopi illi plene ac debite satisfieri in proxima Synodo Dicecesana, in singulis Dicecesibus, quam citissime fieri poterit, celebranda. Ut autem hoc pro præsentis temporis statu commode fiat, sexagesimus denarius, aut plus minusve, prout videbitur Episcopo, cum consilio eorum, qui ex Decreto dicti Concilii Tridentini eidem sunt adjungendi, e bonis Ecclesiasticis in qualibet Dicecesi in hunc usum applicetur.

## CAPUT II.

Inter alia doceantur cantum Gregorianum, & cæremonias Ecclesiæ; & in illis ipsis, in Cathedralibus & aliis Ecclesiis exerceantur.

## CAPUT III.

Rektor vel Præsidens Seminarii ad minimum singulis annis administrationis suæ computum fideliter reddat.

## CAPUT IV.

Quæ præterea pro pia institutione hujusmodi juventutis, & Seminario-  
rum erectione, a Sacrosancta Tridentina Synodo decreta sunt *Sess. 23. Cap. 18. De Reform.* hic habeantur pro insertis.

## TITULUS XXII.

*De Elocatione & conservatione Bonorum Ecclesiasticorum.*

## CAPUT I.

Quæ in prima Synodo Provinciali Mechliniensi, de conservatione ac debita administratione Bonorum Ecclesiasticorum decreta sunt, eadem omnino amplectitur hæc Synodus: & insuper iis adjicit ea, quæ sequuntur.

## CAPUT II.

Bona Ecclesiæ locare non liceat ultra tempus a jure permissum.

## CAPUT

## CAPUT III.

Posseffores quorumcumque beneficiorum, literas foundationum eorundem, & omnium bonorum ad beneficia spectantium, Decanis Capitulorum vel Archi-Presbyteris, quorum visitationi ipsa beneficia subsunt, intra trimestre post publicationem præsentis Synodi exhibeant, in Archivis Episcoporum vel Capitulorum asservandas, sub poena quatuor florenorum Seminario applicandorum; vel si eas se habere negent, sub juramento se desuper expurgent.

## CAPUT IV.

Ubicumque registra bonorum quorumcumque Collegiorum Ecclesiasticorum, beneficiorum, fabricarum, mensarum Sancti Spiritus, aliarumque piarum foundationum, a quindecim annis legitime renovata non fuerint, renoventur ea cum debita designatione limitum & conterminorum infra annum proximum, idque sumptibus eorum, in quorum utilitatem fiunt.

## CAPUT V.

Et quia injuria horum temporum multa interciderunt munimenta bonorum Ecclesiasticorum: ut iniquis debitoribus, quos in posterum forte solutionem denegare contingeret, obvietur; mandat hæc Synodus universis Beneficiatis hujus Provinciæ, ut singuli legitima faciant manualia, in quibus annuam solutionem ita signent, ut ex eisdem manualibus successu temporis legitima possessio probari possit. Et hæc ipsa manualia quotannis a Decanis visitentur, & Successoribus gratis relinquuntur.

## CAPUT VI.

In singulis Ecclesiis Parochialibus & Sacellis fiat inventarium omnium ornamentorum, & quorumcumque aliorum bonorum mobilium, ad ipsam Ecclesiam vel Sacellum pertinentium: idemque inventarium a Pastore, vel Rectore Sacelli, ac Ædituis, subsignetur; atque ita subsignatum cum cæteris monumentis debite asservetur.

## CAPUT VII.

Pastores, & quicumque alii Beneficiati, domos beneficiorum suorum inte-

gras conservent; ac debite reparent, nisi reparationes earundem ab aliis fieri debere certo constet. Archi-Presbyteri, ubi ipsis id juris ex consuetudine competit, illas singulis annis serio visitent; & quando eas reparatione indigere advertent, eam mox fieri mandent; & non obediens denuntientur Episcopo, vel ejus Vicario Generali, ut ad debitas reparationes faciendas, prout juris & rationis fuerit, compellantur, & pro præterita negligentia etiam puniantur. Si vero ad hujusmodi reparationes obligatos, iis necdum perfectis, ex hac vita migrare vel beneficia sua resignare contigerit; bonorum domorum mortuariatum, eorumque qui beneficia sua dimiserunt, arrestentur, & arrestata maneant, donec ex perfectæ fuerint.

## CAPUT VIII.

Rationes fabricarum, & mensarum pauperum, aliarumque piarum foundationum, singulis annis ubique reddantur; vel saltem, ubi tenuiores sunt earum proventus, singulis bienniis: & de decennio in decennium contineant plenam specificationem quantitatis, limitum, & conterminorum, silvarum, pratorum, ac terrarum arabilium; nec non expressam designationem tam fundorum & ædium, super quibus redditus vel census hypothecati sunt, quam ædium & fundorum, iisdem hypothecis adjacentium, & conterminorum.

## CAPUT IX.

Certi quoque dies ad audiendas rationes ubique constituentur; & si eorum, quibus rationum redditio incumbit, culpa vel negligentia evenerit, quo minus statuto tempore redditio illa facta fuerit, singuli eorum multentur; & multa applicetur fabricæ, mensæ pauperum, vel foundationi, cujus computus reddi debuerat.

## CAPUT X.

Ordinarii ipsi per se, vel saltem per Archi-Presbyteros, vel alios ad id deputandos, non tantum fabricarum & mensarum pauperum, sed etiam Hospitalium, domorum orphanorum, ac quorumcumque locorum piorum computus semper audiant, & examinatis præ-



præcedentibus computibus videant, num eorum conclusiones debite purgatæ, seu reliqua eorum plene soluta sint; utque omnia debite administrentur, diligenter advigilent.

## CAPUT XI.

Hospitalia in subsidium peregrinorum erecta, histrionibus, aleatoribus, aliisque id generis hominibus non pateant: nec in iis viri cum fœminis versari permittantur, etiam si se Matrimonio junctos esse asseverent.

## CAPUT XII.

Decretum Concilii Tridentini *Sess. 22. C. 11. de Reform.* contra occupatores quorumcumque bonorum & jurium Ecclesiæ subinde populo per Concionatores inculcetur, eumque in finem hæc Synodus illud de verbo ad verbum hic inferendum censuit: " Si quem Clericorum, vel Laicorum, quacunque is dignitate etiam Imperiali aut Regali præfulgeat, in tantum malorum omnium radix cupiditas occupaverit, ut alicujus Ecclesiæ, seu cujusvis sæcularis vel regularis beneficii, montium pietatis, aliorumve piorum locorum jurisdictiones, bona, census ac jura, etiam feudalia & emphyteutica, fructus, emolumenta, seu quascumque obventiones, quæ in Ministrorum & pauperum necessitates converti debent, per se vel alios, vi vel timore incusso, seu etiam per suppositas personas Clericorum aut Laicorum, seu quacunque arte, aut quocumque quæsito colore, in proprios usus convertere, illosque usurpare præsumpserit, seu impedire, ne ab iis, ad quos jure pertinent, percipiantur; is anathemati tamdiu subjaceat, quamdiu jurisdictiones, bona, res, jura, fructus, & redditus, quos occupaverit, vel qui ad eum quomodocumque etiam ex donatione suppositæ personæ pervenerint, Ecclesiæ, ejusque Administratori sive Beneficiato, integre restituerit, ac deinde a Romano Pontifice absolutionem obtinuerit: quod si ejusdem Ecclesiæ Patronus fuerit, etiam jure Patronatus ultra prædictas pœnas eo ipso privatus existat. Clericus vero, qui

" nefandæ fraudis & usurpationis hujusmodi fabricator seu consentiens fuerit, eisdem pœnis subjaceat; nec non quibuscumque beneficiis privatus sit, & ad quæcumque alia beneficia inhabilis efficiatur, & a suorum Ordinum executione, etiam post integram satisfactionem & absolutionem, sui Ordinarii arbitrio suspendatur."

## CAPUT XIII.

Denique quicumque habent Reliquias, ornamenta, munimenta, vel alia quæcumque, ad Ecclesias, Hospitalia, Monasteria, aliave loca pia diruta, vel deserta, sive Rectoribus destituta, quomodolibet spectantia, ad Archiva Episcopi deferre teneantur ibidem conservanda.

## TITULUS XXIII.

*De reparatione Ecclesiarum.*

Cum infinitæ quotidie oriantur lites super reparatione Ecclesiarum, stante hoc civili bello destructarum, eo quod Episcopatus hujus Provinciæ sint in diversis Ducatibus & Comitatibus, & proinde non ubique eadem sint consuetudines: visum fuit huic Synodo per modum provisionis, & sine alicujus præjudicio, ex communi juris dispositione per Sacrum Concilium Tridentinum innovati, certam super hac re ineundam esse rationem, cui omnes sese conformare teneantur, posteaquam super eadem cum Serenissimis suis Celsitudinibus maturius actum fuerit.

## TITULUS XXIV.

*De Regularibus, & Monialibus.*

## CAPUT I.

Emerint Superiores Monasteriorum, & domorum, tam virorum, quam mulierum, Decreti Concilii Tridentini, quo statuitur, ut is tantum numerus constituatur, ac conservetur, qui vel ex redditibus propriis Monasteriorum, vel ex consuetis eleemosynis commode possit sustentari.

## CAPUT

## CAPUT II.

Curæ sit etiam Episcopis, & aliis Superioribus, ut juxta Decretum dicti Concilii, extraordinarium Confessarium bis aut ter in anno Monasteriis Sanctimonialium offerant, qui non unius vel alterius tantum, sed omnium omnino confessiones audire debeat: & certi ad hoc dies ubique præfigantur.

## CAPUT III.

Sciant similiter ipsæ Sanctimonialles, etiam exemptæ, sibi non licere post Professionem, etiam ad breve tempus, Monasterium egredi; nisi ob aliquam ex tribus causis expressis Constitutione Ssmæ memoriæ PII V. hac de re edita, quæ inviolabiliter est observanda.

## CAPUT IV.

Cætera omnia de Regularibus, ac Monialibus, in Concilio Tridentino, & in prima Synodo Provinciali Mechliniensi, decreta amplectens, & innovans, hæc Synodus insuper addit ea, quæ sequuntur.

## CAPUT V.

In Conventuali Religiosorum, & Monialium mensa, lectio sacra, quantum res patitur, numquam omittatur.

## CAPUT VI.

Prælati Regularium eos tantum subditis suis Confessarios deputent, quos prævio examine, per se vel Lectorem suum factò, invenerint sufficienter idoneos.

## CAPUT VII.

Libertati Professionis Virginum Deo dicandarum hæc Synodus prospicere volens, hoc præsentì Decreto tollit omnia Statuta & consuetudines, quæ dictæ libertati aliquo modo officere possunt. Prohibet itaque, ne quarumcumque Virginum capilli ante Professionem refecentur: mandatque, ut Episcopi, vel ab eis Deputati, earumdem virginum voluntatem, tam ante susceptionem habitus, quam ante professionem, Sacro Trid. Concilio ita jubente, diligenter explorent, non aliter tamen, quam eas solas esse certo cognoscant.

*Tomus VIII. Concilior. German.*

## CAPUT VIII.

Valde dedecet in Monasteriis tam virorum, quam mulierum, hospitibus advenientibus vina & cerevisiam vendi; atque ideo etiam hæc Synodus id fieri districte prohibet, sub pœna arbitraria.

## CAPUT IX.

Si Decreto Concilii Tridentini, de lectione Sacræ Scripturæ in Monasteriis Religiosorum habenda, negligentia prælatorum alicubi non satisfiat, Episcopi locorum, auctoritate a dicto Concilio sibi attributa, id debite procurent.

## TITULUS XXV.

*De Foro, Jurisdictione & Immunitate Ecclesiasticis.*

## CAPUT I.

**O**Rdinarii locorum, eorumque Officiales, juxta Decretum Concilii Tridentini causas omnes, etiam beneficiales, saltem infra biennium a die motæ litis terminent; alioquin post id spatium liberum sit partibus, vel alteri illarum, Judices superiores, alias tamen competentes, adire.

## CAPUT II.

Judices appellationum eas non recipiant, nisi a definitiva, vel a definitiva vim habente, & cum gravamen per appellationem a definitiva reparari nequeat; prout per Concilium Tridentinum decretum est.

## CAPUT III.

Ut in cæteris omnibus, ita quoque vel maxime in administranda justitia, quoad Statuta Curiarum, salaria, & stipendia Ministrorum, & practicum earum, cæteraque hujusmodi, uniformitatem in tota Provincia servari expedit. Et ideo statuit præsens Synodus, ut uniformis & moderata ratio, desuper ejusdem Synodi auctoritate constituenda, ab omnibus, quos concernit, observetur.

## CAPUT IV.

In correctionibus conforment se Episcopi Decreto Concilii Tridentini

H h h h h

*Seff.*

*Sess. 25. Cap. 3. ut nimirum rarius censuris utantur, sed aliis mediis ibidem a Concilio præscriptis.*

## CAPUT V.

Ut sat's fiat Decreto Concilii Tridentini, quod jubet in singulis Conciliis provincialibus, aut Diocesanis, aliquot personas juxta Constitutionem BONIFACII VIII. quæ incipit, *Statutum, &c.* qualificatas, & alioquin ad id aptas designari, quibus præter Ordinarios locorum, causæ Ecclesiasticæ in partibus delegandæ, a quolibet Legato vel Nuntio, atque etiam ab ipsa Sede Apostolica committantur: præsens Synodus designat, & nominat personas infra-scriptas, earumque nomina, cognomina, & qualitates, ad suam Sanctitatem transmittenda esse statuit.

*In Archi-Episcopatu Mechliniensi pro idoneis nominati & designati sunt:*

## MECHLINIÆ,

*D. Henricus Franciscus van der Burch, J. U. Licentiatus, Decanus Ecclesiæ Metropolitanæ Mechliniensis, & Vicarius Generalis Archi-Episcopatus ejusdem.*

*D. ac M. Petrus van den Wiele, Sacræ Theologiæ Licentiatus, ejusdem Ecclesiæ Metropolitanæ Archi-Diaconus.*

*D. Jacobus Boonen, J. U. Licentiatus, Canonicus & Officialis Mechliniensis.*

## LOVANI,

*Rdus Pater D. Libertus Schaloun, Abbas Vliet-hacensis.*

*Rdus Pater D. Joannes Drusus, S. Theologiæ Licentiatus, Abbas Parcensis.*

*Rdus Pater D. Ludovicus ab Eynatten, Abbas S. Gertrudis, & Conservator Privilegiorum Universitatis Lovaniensis.*

## BRUXELLÆ,

*D. Petrus Pantinus, Decanus Insignis Ecclesiæ Collegiatae S. Gudilæ Bruxellensis, Protototarius Apostolicus.*

*D. Caesar Clemens, S. Theol. Doctor, Decanus Ecclesiæ Collegiatae Anderlechtensis, Protototarius Apostolicus.*

*D. Cornelius Worzel, S. T. Licentiatus, Decanus Bredanus, & Plebanus Bruxellensis.*

## IN EPISCOPATU GANDENSI,

*D. ac M. Adrianus Varræus, S. T. Licentiatus, Catbed. Eccles. S. Bavonis Præpositus.*

*D. ac M. Petrus Bernaerts, S. T. Licentiatus, ejusdem Ecclesiæ Decanus.*

*Rdus Pater D. Livinus van der Meulen, Abbas Tbrunchiniensis.*

*D. Franciscus del Pio, U. J. Licentiatus, Canonicus Ecclesiæ Catbedralis S. Bavonis, & Officialis Gandavensis.*

*D. ac M. Philippus Jadaert, S. T. Licentiatus, Ecclesiæ Collegiatae S. Pharaëldis Decanus.*

## IN EPISCOPATU BUSCODUCENSI,

*D. ac M. Gisbertus Caverincx, S. Theologiæ Licentiatus, & Ecclesiæ Catbedralis Decanus, designatus Episcopus Daventrienfis.*

*Rdus Pater D. Arnoldus Vessénius, Abbas Monasterii Bernensis.*

*D. Everardus de Ravesleyn, U. J. Licentiatus, Canonicus dictæ Catbedralis Ecclesiæ, & Officialis.*

## IN EPISCOPATU RUREMUNDENSI,

*D. ac M. Petrus Pollius, S. T. Doctor, Catbedralis Ecclesiæ Ruremundensis Decanus.*

*D. Fredericus Joannis, Cantor ejusdem Ecclesiæ & Canonicus.*

*D. Guilelmus Randeract, J. U. Licentiatus, & ejusdem Ecclesiæ Canonicus.*

## IN EPISCOPATU BRUGENSI,

*D. ac M. Nicolaus de Heere, Ecclesiæ Catbedralis Brugenfis Decanus.*

*Rdus Pater D. Joannes de Bourier, Abbas Monasterii S. Andreae.*

*Rdus Pater D. Joannes Montanus, Abbas Monasterii de Eeckboudt.*

*D. ac M. Arnoldus a Mechlinia, S. Theologiæ Licentiatus, Ecclesiæ Catbedralis Archi-Diaconus & Canonicus.*

*D. Remigius Driutius, J. U. Licentiatus, Canonicus ejusdem Ecclesiæ & Officialis.*

*D. ac M. Dionysius Christophori, S. Theol. Licentiatus, ejusdem Ecclesiæ Canonicus & Scholasticus.*

## IN EPISCOPATU ANTVERPIENSI,

*D. Joannes del Rio, U. J. Licentiatus, Decanus Ecclesiæ Catbedralis Antverpiensis, & Vicarius Episcopatus ejusdem, & Protototarius Apostolicus.*

*Rdus Pater D. Dionysius Feyten, Abbas Monasterii S. Michaelis.*

*D. Cornelius de Witte, S. Theol. Licentiatus, Archi-Diaconus & Canonicus dictæ Catbedralis Ecclesiæ.*

*D. Joannes Gevarts, J. U. Licentiatus, ejusdem Ecclesiæ Canonicus & Officialis.*

*D. An-*



*D. Antonius Heylwig, J. U. Licentiatus, ejusdem Ecclesiæ Canonicus & Thesaurarius.*

*D. ac M. Aubertus Miræus, S. Theol. Baccalaureus, Canonicus & Scholasticus ejusdem Ecclesiæ.*

#### IN EPISCOPATU YPRENSI,

*D. Judocus Veranneman, Ecclesiæ Cathedralis Decanus.*

*Rdus Pater D. Carolus de Argenteau, Monasterii S. Winoci Abbas.*

*Rdus Pater D. Vincentius du Buer, Monasterii S. Joannis Abbas.*

*D. Carolus van Houcke, J. U. Licentiatus, Cathedralis Ecclesiæ Archi-Diaconus & Canonicus.*

*D. Ludovicus Vlaminck, J. U. Licentiatus, ejusdem Ecclesiæ Cathedralis Thesaurarius.*

*D. Franciscus de Montmorency, Ecclesiæ Collegiæ oppidi Casletensis Præpositus.*

Si quempiam ex prænominatis ante proximam Synodum provincialem, aut Dicecesanam, mori contigerit; Episcopus consilio Capituli alium usque ad proximam Synodum substituet, eamdemque substitutionem ad Sedem Apostolicam transmitti curabit.

### TITULUS XXVI.

#### *De Synodo Provinciali, & Dicecesana.*

##### CAPUT I.

**C**oncilio Provinciali, vel Dicecesano, debite convocato, omnes qui de jure vel consuetudine illi interesse debent, die & loco præfixis personaliter comparebunt, nisi legitime impediti fuerint: quo casu tempestive de causa impedimenti fidem facient: & nihilominus Procuratorem virum Ecclesiasticum mittent, non tantum ad audiendum & referendum, sed etiam ad deliberandum & agendum, quæ Principalis faceret, si personaliter interesset, nec non ad simpliciter acceptandum & recipiendum, quæcumque in ipsa Synodo statuta & decreta fuerint.

##### CAPUT II.

Contra absentes non legitime excusatos, vel qui Procuratorem sufficienti mandato instructum non miserint, primum ad contumaciam etiam per affixionem edicti publici ad valvas loci, in quo Concilium celebrabitur, deinde ad alias pœnas juxta Canonicas Sanctiones decernendas procedatur.

##### CAPUT III.

Nemo, sine licentia Præsidis Concilii, a Concilio recedere audeat; neque tunc aliter, quam sufficienti constituto Procuratore.

##### CAPUT IV.

Quod si Episcopi, & alii, qui interesse debent, a novissimo Concilio circa hæc aliqua observaverint, quod in futuro Concilio proponendum videatur, id uno mense ante diem præfixum ipsi Metropolitano per literas significant.

##### CAPUT V.

Quæcumque in hac Provinciali Synodo, ad majorem Dei gloriam & animarum salutem, statuta sunt per universam Mechliniensem Provinciam, per singulas Diceceses intra annum Dicecesanis Synodis publicanda sunt; ad quas omnes omnino, tam exempti, quam non exempti, ut publicari ea audiant, & ad ea se conforment, ex Decreto Tridentinæ Synodi Sess. 24. de Reform. Cap. 2. accedere tenebuntur.

Quæ reliqua sunt reformationem concernentia, & tempore exiguo expediri non potuerunt, Episcopi in proxima Synodo Dicecesana statuunt, prout utilitatem Ecclesiæ postulare judicabunt. Mandat postremo hæc eadem Synodus Provincialis, ut quæcumque tam in Concilio Tridentino, quam in hac ipsa Synodo decreta & statuta sunt, post impressionem inviolabiliter observentur; omnia interim & singula censuræ & judicio Sedis Apostolicæ quam humillime submittens. Actum Mechliniæ Anno Domini Millesimo sexcentesimo septimo, die decima nona mensis Julii; subsignatum:

*MATTHIAS (\*) Archi-Episcopus Mechliniensis.*

*Petrus*

(\*) Matthias Hovius Mechliniæ, qua in urbe Parentes habuit, non tam opulentia, quam fama vitæ ac nominis integritate claros, annumque 1542. natalem, totis viginti  
Tomus VIII. Concilior. German. H h h h h a qua

*Petrus Damant Episcopus Gandavensis.  
Gisbertus Masius Episc. Buscoducensis.  
Henricus Episcopus Ruremundensis.  
Carolus Philippus de Rodam Episcopus  
Brugensis.  
Joannes Miræus Episcopus Antverpiensis.  
Carolus Masius Episcopus Xprensis.*

*absint, & quanto hic sumptu detineantur,  
ideoque se non ferre diuturniorem moram; vi-  
sum est RRmis Patribus hujus Synodi vos cum  
bona venia sua dimittere, declarando, & con-  
sueti modo publicando, quod vobis auditis, &  
expensis rationibus vestris & suis, decernen-  
dum & observandum videtur.*

Ante horum Decretorum publicam lectio-  
nem, Rmus & Illmus Dominus Præsi-  
dens, re cum RRmis DDnis Coepiscopis  
communicata, sequentem Schedulam de  
scripto pronuntiavit, eamque hic ad cal-  
cem ad verbum adscribi mandavit:

Post cujus Schedulæ pronuntiationem præ-  
dicta Concilii Decreta publice lecta fue-  
runt, die vigesima mensis Julii anni Mil-  
lesimi sexcentissimi septimi. In cujus rei  
fidem nos infra scripti ejusdem Concilii  
Secretarii propria manu subscripsimus:

**R**everendi ac Venerabiles DDni: Rerum, de  
quibus hætenus hic actum est, multitudo  
& gravitas, merito tempus extensius requi-  
reret & longius, præsertim cum de plerisque  
etiam sint consulendæ Serenissimæ Celsitudines  
Sue, quarum protectione speramus faciliorem  
executionem: sed cum RR. VV. sapius nobis  
exposuerint, quanto cum damno ab ovibus suis

*Petrus Pantinus, Protonotar. Apostoli-  
cus, Decan. Eccl. S. Gudilæ Bru-  
xellensis.*

*Dionysius Christophori, Cathed. Ecclesiæ  
Brugensis Canonicus & Scholasti-  
cus.*

## TESTI-

quatuor annis Archi-Episcopali muneri Antistes ex Vicario Generali tertius ita præ-  
fuit, ut, *Cl. Foppensio teste*, rudi indigereque formam Diocesi primus daret. Fra-  
trem habuit *Joannem van den Hove*, pro avita Religione ac Patria V. Id. Apr. 1580.  
ab Sæctariis trucidatum.

Lovanii in domo Standonica altiorum Studiorum initia, ac progressus in scientiis  
Theologicis, Michaelis Baji, Doctoris opera usus atque institutione, perquam lau-  
dabiles fecit, Collegii Pontificii Alumnus, dignus, qui S. Theologiæ Licentia pa-  
lam condecoraretur. Inde domesticam sedem repetens per annos aliquot in SS.  
Petri & Pauli Ecclesia Concives suos Sacro verbi Divini pabulo Pastor gratiosissi-  
mus refecit, potuitque fructus laborum suorum uberes eo sibi polliceri certius, quo  
majore polleret dicendi suavitate, quo ampliore sermonis gratia in suorum animos  
auditorum sese insinueret, Orator tempestate sua florentissimus.

Anno 1577. Metropolitanæ S. Rumoldi electus Canonicus, Max. Morillono Torna-  
censes ad Insulas evecto successit Archi-Diaconus anno 1582. Quo ex officii ad Vi-  
carii Generalis primum, tum ad Archi-Episcopi dignitatem anno 1596. progressus,  
studia illuc omnia convertit, qua demum ratione, emendatis Cleri moribus, teme-  
ritatem A catholicorum sub ista tempora in Belgio vix non dominantem opprime-  
ret. Quare Synodum Provinciale anno 1607. Mechliniæ & auspiciatus est feli-  
citer, & pari fine terminavit. Statuta jam dedimus, daturi etiam, ubi ad manus  
pervenerint, alterius cujusdam, quam & Ipse altero anno post celebravit, Dico-  
cesanæ Decreta, una cum Gandavensi ejusdem anni Concilio, quod Petrus Da-  
mantius Ep. habuit.

Fuit Matthias Potentissimis Alberto & Isabellæ Principibus a Consiliis status, atque  
inprimis carus; Archi-Episcopale fundavit Seminarium, ac multa Ecclesiæ Belgicæ  
perutilia gnaviter congesta typo dedit. Obiit, postquam Episcopos consecrasset  
11., Presbyteros 2482., Diaconos 2777., Subdiaconos 2790., & in Minoribus  
Ordinibus 2713. in Abbatia sua Affligemiensi, anno 1620. 3. Cal. Julii, ætatis 78.  
Sacerdotii 54. Archi-Episcopatus 25. vel in sola Oratione parænetica ad Clerum  
universum in Synodo illa Provinciali jam congregatum habita, quam admirabilem  
Mores jure nuncupat, superstes nunquam non futurus.

*Vide Cl. Castillion. Sac. Belgii Chronologiam pag. 498. Et cit. Cl. Joan. Franc.  
Foppens Biblioth. Belg. P. II. pag. 874. & 875.*

## TESTIMONIUM

*Illustrissimi & Reverendissimi Domini,  
D. Cardinalis PAMPHILII,  
super facta recognitione Concilii  
Provincialis Mechliniensis ab Illu-  
strissimis & Rmis DD. DD. Car-  
dinalibus Interpretibus Sacri  
Concilii Tridentini.*

**N**OS HIERONYMUS Tituli S. Blasii  
de Annulo S. R. E. Cardinalis PAM-  
PHILIUS, fidem facimus & attestamus, De-  
creta confecta in Provinciali Synodo a Reve-  
rendissimo D. Archi-Episcopo Mechliniensi, ea-  
que a R. D. Dionysio Christophori, Cathedra-  
lis Ecclesie Brugensis Canonico, ipsiusque Ar-  
chi-Episcopi Procuratore, ad Summum D. N. per-  
lata a Sacra Congregatione Cardinalium Con-  
cilio Tridentino interpretando præpositorum  
emendata, recognita, atque aptata fuisse: nec  
non eorundem Decretorum exemplum apud  
ipsam Congregationem remansisse; cum quo bu-  
jusmodi Decreta hoc libello chartarum xxix.  
(quarum prima incipit: Decreta, &c. ulti-  
ma vero: Potuerunt, &c. & desinit: Ec-  
clesiæ Brugensis Canonici & Schola-  
stici) descripta, & collata in omnibus, &  
per omnia concordant. In quorum fidem his  
propria manu subscripsimus, & ab infrascripto  
Secretario item subscribi, sigillique nostri im-  
pressione communiri mandavimus. Datum  
Romæ, die III. Aprilis, Anno M. DC. VIII.

HIER. CARD. PAMPHILIUS.

JOANNES FRANC. FAGNANUS, Sa-  
cræ Congregat. Concilii  
Secretarius.

## B R E V E

SS. D. N. PAULI PP. V.

*Super Confirmatione Concilii Pro-  
vincialis Mechliniensis.*

VENERABILIBUS FRATRIBUS  
Archi-Episcopo & Episcopis Pro-  
vincia Mechliniensis,

PAULUS PP. V.

Venerabiles Fratres, Salutem & Apostoli-  
cam Benedictionem. Acta Synodi Pro-  
vincialis Mechliniensis, a Fraternitatibus ve-

stris nuper habita, quæ Dilectus Filius Dio-  
nysius Christophori, Canonicus & Scholasticus  
Ecclesiæ Brugensis, ad Nos detulit, ut si No-  
bis probarentur, illa confirmaremus auctoritate  
nostra Apostolica; nonnullis mutatis, ut vi-  
debitis, approbavimus: recognita prius man-  
dato nostro, a Venerabilibus Fratribus nostris  
Sanctæ Romanæ Ecclesiæ Cardinalibus, In-  
terpretibus Sacri Concilii Tridentini. Lau-  
damus valde, Fratres Venerabiles, zelum pie-  
tatis, prudentiam & vigilantiam vestram,  
quam in huiusmodi Decretis sanciendo agnovi-  
mus; ac Deum sapientiæ & misericordiarum  
Patrem precamur, ut quotidie in vobis augeat  
dona Divina suæ gratiæ, ut ministerii vestri  
ac laborum, quos ad ejus Sanctissimi Nominis  
gloriam & animarum salutem suscipitis, præ-  
mia benignus vobis retribuatur, cum reddide-  
ritis rationem villicationis vestræ. Quemad-  
modum etiam hortamur, atque Apostolicam au-  
thoritate, quam a Dei benignitate licet imme-  
riti accepimus, jubemus, ut ejus Synodi De-  
creta omnia, quæ ad Sacrorum Canonum præ-  
scriptum omnes istius Provinciæ Episcopos,  
omnesque eorum Diocesanos obstringunt, ab  
omnibus quam diligentissime & inviolate serven-  
tur: ac vobis omnibus Apostolicam benedictio-  
nem nostram peramanter largimur. Datum  
Romæ apud Sanctum Petrum, sub annulo Pi-  
scatoris, quarto Kal. Maji, M. DC. VIII.  
Pontificatus nostri anno Tertio.

PETRUS STROZA.

*Aliud Testimonium examinati Con-  
cilii, ab Illmo & Rmo Domino, D.  
Cardinale PAMPHILIO, dire-  
ctum Rmo & Illmo Domino  
Archi-Episcopo Mech-  
liniensi.*

PERILLUSTRI ac Rmo DOMINO  
uti Fratri D. Archi-Episcopo  
Mechliniensi.

**P**erillustri ac Rme D. uti Frater: Provin-  
cialem Synodum Mechliniensem, ab Am-  
plit. T. adhibitis Comprovincialibus Episcopis  
novissime celebratam, & a Rdo D. Dionysio  
Christophori Cathedralis Ecclesiæ Brugensis Ca-  
nonico & Scholastico, Amplit. T. & ipsorum  
Comprovincialium Episcoporum Procuratore,  
exhibitam, ejusque Decreta ad mores moderan-  
dos, excessus corrigendos, abusus istic bellorum  
præsertim injuria atque hæreticorum artibus

Hhh hh 3

intro-



introducendos eradicandos, pie ac sapienter confecta, Illmi Cardinales Trid. Conc. Ssmi D. N. auctoritate Interpretes, pro munere sibi injuncto diligenter recognoverunt, atque ubi oportuit, etiam emendarunt. Itaque illam ipsam Synodum ad Amplit. T. nunc remittimus, pro sui muneris debito edendam, publicandam, & sedulo in ista Provincia observandam, ut egregiæ ac pientissimæ operæ, & industriæ, saluberrimique laboris fructus, quos sibi initio proposuit, uberiores in dies, adjuvante Domino, percipiat. Quod ut cumulate & quam celerime fiat, nos summis precibus a Divina benignitate contendimus, Amplitudinique T. salutem plurimam precamur in Domino. Romæ, die X. Aprilis, Anno M.DC.VIII.

*Ampl. T. Perill. ac Rmæ*

uti Frater studiosiss.

HIER. CARD. PAMPHILIUS.

*Secundæ Literæ prænominati Illmi & Rdissimi Domini, D. Cardinalis PAMPHILII, ad dictum Rmum & Illmum D. Archi-Episcopum Mechliniensem, testantes omnium Protestationum in examine & recognitione hujus Concilii eam habitam rationem, quam jus & ratio requirit, ideoque illud jam omnes obligare.*

*PERILLUSTRI ac Rmo DOMINO  
uti Fratri D. Archi-Episcopo  
Mechliniensi.*

*Perillustri ac Rme D. uti Frater. Synodum Provinciale Mechliniensem ab Amplitudine T. adhibitis Comprovincialibus Episcopis novissime celebratam, a Sacra Congregatione Cardinalium Concilii Tridentini Inter-*

*pretum recognitam, ac nonnullis opportune immutatis probatam fuisse, jam aliis literis pro munere nostro attestati sumus. Nunc ne cuipiam adversus ipsum Concilium, prudenter ac moderate unanimi Episcoporum consensu confectum, conquerendi ansa aut occasio ulla supersit; superaddere placuit, quod reipsa verum, Illmos Patres in ea recognitione, atque emendatione, Protestationes istic habitas, ac in ipsa Synodi calce descriptas, perlegisse, expendisseque, ac earum, quantum Sacri Canones justitiæ norma suadebant, rationem habuisse. Illam igitur ipsam Synodum, ejusque Decreta incunctanter exequatur Ampl. T. quando jam nullum legitimum obsistit impedimentum, & bene valeat in Domino, a quo diuturnam illi incolumitatem cum ejus gratiæ incremento precamur. Romæ, die XXII. Maji, M.DC.VIII.*

*Ampl. T. Perill. ac Rmæ*

uti Frater studiosiss.

HIER. CARD. PAMPHILIUS.

*Sequitur Edictum Alberti & Isabellæ Claræ Eugeniz Archi-Ducum, idiomate expressum Belgico & Articulis 30. completens, in quibus de Ludimagistris, de Bibliopolis, ac Librariis, de Scholis Dominicalibus potissimum agitur.*

*Decreta hæc Synodi Provincialis Mechliniensis & Statuta typis Plantinianis edita Antverpiæ apud Joannem Moretum anno 1608. Recusa tum Antverpiæ in Officina Plantiniana apud Viduam & Hæredes Balthazaris Moreti anno 1680., tum per Harduinum in CC. Collectione Regia Tom. X. Parisiis anno 1714.*



SYNO.

## SYNODUS DIOECESANA

Y P R E N S I S,

Anno Christi MDCIX. Pauli V. PP. V.

Rudolphi II. Imp. XXXIII.

CELEBRATA

DIE QUARTA MENSIS NOVEMBRIS

Sub CAROLO MASIO, (\*) Yprensi Episcopo.

CAROLUS MASIVS, DEI ET APOSTOLICÆ SEDIS GRATIA EPISCOPUS

Yprensis, universo Clero &amp; populo Civitatis &amp; Diœcesis nostræ,

Salutem in Domino.

Cum a postremis hujus nostræ Provinciæ bel-  
licis tumultibus non esset in Ecclesia nostra  
servata Synodus Diœcesana, plurimæque inter-  
im tot annorum spatio, & injuria temporis,  
& hominum malitia, essent immutata, collap-  
sa & depravata: atque ad ea emendanda & re-  
stauranda non esset opinione nostræ remedium  
convenientius & salubrius, quam ad illud con-  
fugere, quo Ecclesia Dei in summis periculis sem-  
per esset usa; recurrendo nimirum ad Concilia  
Generalia, Provincialia, & Synodalia. Hinc  
est, quod, cum nihil magis haberemus in vo-  
tis, quam muneri bumeris nostris imposito,  
quantum in nobis esset, satisfacere, ceperimus  
statim a primo die Residentiæ nostræ omnes  
cogitationes & actiones nostras eo dirigere &  
collimare, ac ita omnia ad actum tam solem-  
nem præparare, ut quam primum tempus &  
ocasio permetteret, possemus Synodum indice-  
re, & eam celebrare, atque ita remedio illo  
tam salubri non solum, sed prorsus necessario,  
in tanta desolatione Ecclesiæ nostræ nos juvare.  
Nam ubi a quarto die Consecrationis nostræ  
Concilio Provinciali Mechliniensi interfuissemus,

& eo finito ad Residentiam nostram cum  
Dei gratia redissemus, visum fuit consultum,  
instituire ante omnia per totam Diœcesim no-  
stram Visitationem generalem: in qua cum  
propriis nostris oculis illius statum penitus  
perlustrassemus & inspexissemus: sane si antea,  
tunc magis judicavimus omnino necessarium  
in proposito nostro progredi, & conceptam  
Synodi declarationem ad effectum deducere, ut  
in ea etiam Provinciale Mechliniense Concilium  
publicare pro officio nostro possemus. Sed  
cum illud prius secundo anno a sua Sanctitate  
confirmatum prodiret in lucem, necesse fuit  
illam animi nostri sententiam differre in annum  
sequentem, tertium nimirum Residentiæ no-  
stræ, quando tandem hanc Synodum nostram,  
præhabito consilio cum Capitulo Ecclesiæ nostræ  
Cathedralis, indiximus, eamque ad optatum  
finem perduximus. De quo singulari Dei  
beneficio, tam opportune nobis ante translatio-  
nem & discessum nostrum præstito, non possu-  
mus ipsius Divinæ Majestati dignas satis  
agere gratias; & vobis deinde, qui præsen-  
tiam & operam vestram nobis in hac parte tam  
prompte

(\*) Carolus Masius (vulgo Maëz) Patria Bruxellensis, Frater Engelberti Masii egre-  
gium sanctioris Concilii Præsidentem olim agentis, ex Decano Antverpiensi ac Sere-  
nissimorum Archi-Ducum Alberti & Isabellæ Eleemosynario, Petro Simonis, Ti-  
letano, quem a variis scriptis typo editis Valerius Andreas in Bibliotheca sua Bel-  
gica pag. 761. commendat, indefesso per annos viginti Episcopo successit, Bruxel-  
lis in Ecclesia D. Gudulæ die XXIV. Junii anno 1607. consecratus. Sub ipsa statim  
novæ dignitatis primordia Provinciali Mechliniensi interfuit Synodo, & hanc,  
quam proferimus, post biennium celebravit. Evecti anno 1610. Gandavensem  
ad Insulam, magnas, quibus eminebat, tum corporis, tum animi dotes nemo sub-  
ditorum non suspexit, laudavitque. Annus illi M. DC. XII. mensis Maji die XXI.  
supremus diluxit, & sepulchrum in Ecclesia Cathedrali Gandavensi datum.

Castillon Sacra Belgii Chronolog. P. II. pag. 511. & 526. Havensius in Com-  
ment. de erectione novorum in Belgio Episcopatum Lib. I. pag. 71.

prompte exhibuistis. Unde tam certam in animo nostro de vobis omnibus fiduciam concepiimus, ut non dubitemus, quin eadem animi promptitudine unusquisque vestrum conabitur pro virili has nostras Ordinationes. exequi & adimplere: adeo ut existimemus necesse non esse pluribus ad hoc vos hortari vel monere, cum hoc ipsum & professio nostra, salusque propria & subditorum nostrorum, atque præsens Ecclesiæ extrema necessitas, nec non & Fidei Catholicæ conservatio, jure suo a nobis exposulet, & requirat: ne, dum putamus nos omnia mala & pericula cum bis induciis evasisse, in multo plura & graviora postmodum incidamus, quam hactenus perpeffi sumus: quæ si Deum ab Ecclesia sua, & hac nostra Yprensi, ac a nobis avertere velimus, præstet unusquisque nostrum officium suum, & studeat quam maxime sedulo pro modulo suo hanc communem Matrem nostram juvare. Hisce valete, memores horum estote, & Omnipotentem pro nobis orate.

## DECRETUM,

Quod nulli præjudicium fiat ex ordine Sessionis in hac Diœcesana Synodo, promulgatum per Reverendum Dominum Archi-Diaconum Ecclesiæ Cathedralis Yprensis.

**R**everendissimus Dominus Episcopus Yprensis statuit & decernit: si quis ad hanc Synodum vocatus, & in eam admissus, suo loco non ince-dat, aut sedeat, aliumve actum in ea gerat; non ideo alteri cuiquam jus acquiri, aut acquisitum esse, nihilque de hujusmodi jure aut possessione detrahi, sed in eo statu & conditione omnia permanere, quo erant ante hanc Synodum Diœcesanam.

## INDEX TITULORUM SYNODI.

- TIT. I. De Professione Fidei, ejusque integritate restituenda & conservanda.
- II. De Prædicatione verbi Dei.
- III. De Scholis Parochialibus & Dominicilibus.
- IV. De Seminario Clericorum.
- V. De Officio Divino, Cæremoniis & Locis Sacris.
- VI. De Festis, Jeuniis, & Processionibus.
- VII. De Sepulturis, Officiis Defunctorum & Funeribus.
- VIII. De Sacramentorum administratione.
- IX. De Sacramento Baptismi.
- X. De Sacramento Confirmationis.
- XI. De Sacramento Pœnitentiæ.

- XII. De Sacramento Eucharistiæ.
- XIII. De Sacramento Extremæ Unctionis.
- XIV. De Sacramento Ordinis.
- XV. De Sponsalibus & Matrimonio.
- XVI. De Episcopali Sede vacante.
- XVII. De vita & honestate Clericorum.
- XVIII. De Canonicis, Archi Presbyteris, sive Decanis ruralibus, Pastoribus, Custodibus, eorumque officiis.
- XIX. De Regularibus & Monialibus.
- XX. De bonorum Ecclesiasticorum administratione & conservatione.
- XXI. De Judicibus delegatis, & ordinariis Examinatoribus.
- XXII. De Synodo Provinciali & Diœcesana.

## CONSTITUTIONES & ARTICULI. SYNODI DIOECESANÆ YPRENSIS.

### TITULUS I.

*De Professione Fidei, ejusque integritate restituenda & conservanda.*

#### CAPUT I.

**C**um omnis cura nostra primo ver-  
versari debeat in iis, quæ ad Fidem  
Catholicam (quam Sancta Romana Ec-  
clesia Mater nostra colit, docet, & sine

qua impossibile est placere Deo) inte-  
gre violatæque servandam pertinent;  
ideo ab eadem potissimum Synodum  
hanc Diœcesanam judicavimus incho-  
andam:



andam : ut quam ab uno eodemque Spiritu hausimus, una etiam eademque Professione fateamur : quamque infelicissimis hisce temporibus hæreticorum rabie ac studio offuscatam & implicatam vidimus, non modo pristino splendori restituere, ac explicare; verum etiam ita stabilire, ac undequaque munire conemur, ut eam posteris claram, apertam, integram, firmamque relinquamus. Quare præmissa per Nos & universam hanc Synodum in nomine Sanctæ & Individuæ Trinitatis, congregatam, publica Catholicæ & Apostolicæ Fidei professione, juxta Bullam PII IV., inhærentesque saluberrimo Sacrosancti Concilii Tridentini Decreto, statuimus & ordinamus, ut similem Fidei professionem emittant omnes, qui deinceps in Dicecesi nostra ad Dignitates, sive Regulares, sive Sæculares, Canonici, & alia quæcumque Beneficia Ecclesiastica curam animarum habentia, promovebuntur & admittentur : idque in manibus nostris, vel Vicarii nostri Generalis, sive Officialis : alioqui prædicti omnes non faciant fructus suos, nec illis possessio suffragetur.

## CAPUT II.

Et quia, si unquam, nunc maxime, Fidei & Religionis ratio habenda est, ita ut nihil omittendum sit, quod ad ejusdem præsidium aliquo modo facere possit; statuimus, ut in posterum eandem Fidei professionem faciant, primo singuli Canonici Collegiatarum Ecclesiarum, in Capitulo suo, antequam ad residentiam admittantur.

## CAPUT III.

Secundo, quotquot deinceps ad Ordines Sacros promovendi.

Omnes insuper Concionatores, Confessarii, etiam Religiosi (juxta eandem Bullam PII IV.) nisi de ea antea facta coram Superioribus suis Regularibus (quos ad id deputamus) abunde doceant.

Lectores etiam Sacræ Theologiæ in Monasteriis sive Claustris.

Ut & omnes, qui posthac ad alias Synodos Dicecesanas convenient, & in hac Fidei professione non interfuerint.

*Tomus VIII. Concilior. German.*

Item qui in hæresim lapsi, ad Ecclesiæ gremium reverti volunt.

## CAPUT IV.

Præterea idem faciant omnes Baillivi, Scabini tam Civitatum, quam pagorum : eæque omnes publicæ personæ, quæ Ediçto Regio de prima Junii anno M.D.LXXXVII. per gloriosæ memoriæ PHILIPPUM II. comprehenduntur; idque juxta formam in eodem præscriptam. Rogamus interim & hortamur in Domino omnes, qui jus habent creandi & constituendi Magistratus, Baillivos, aliosque Ministros justitiæ, ne ullos assumant, nisi probatæ vitæ, & fidei viros, exceptoque ab iis prædicto juramento, cum professione fidei.

## CAPUT V.

Librarii vero & Bibliopolæ, præter eam professionem, adjicient & præstabunt juramentum de non invehendis, vel secreto distribuendis, libris prohibitis.

## CAPUT VI.

Cumque parum prodesset, Superiores & Præfectos Fidem Catholicam profiteri, nisi & populus a teneris annis eadem imbuatur, ipsorumque vigilantia cura in ea contineatur; monemus Prælatos, & Pastores omnes, ut per seipsos, aut alios viros doctos, explicent sedulo & diligenter populis sibi commissis Articulos Fidei, Orationem Dominicam, Salutationem Angelicam, præcepta Decalogi & Ecclesiæ, efficaciam insuper & ritus Sacramentorum; advigilentque pastores quam maxime, ne ullus lupo inter oves versetur aut latitet; procurentque, quantum humana diligentia assequi poterunt, ut agnoscant vultum pecoris sui, noverintque extraneos, si qui in parochiis suis habitaturi advenerint.

## CAPUT VII.

Parochias autem suas statim a Dominica in Albis serio quotannis visitabunt per domos & familias : omniumque ad Sacram Communionem obligatorum nomina & cognomina in registrum particulare referent.

## CAPUT VIII.

Observent insuper, ut ab omnibus in propria id fiat Parochia, & an huic Ecclesiæ præcepto de Communionē satisfecerint; arcendialias, ni id authentico testimonio probaverint, ab Ecclesia vivi, & mortui Ecclesiastica sepultura privandi, juxta Capitulum: *Omnis utriusque sexus, De Penitentiis & Remissionibus.*

## CAPUT IX.

Volumus etiam, & expresse inhibemus sub pœna suspensionis ab officio, ne ullos venientes ex partibus suspectis permittant in parochiis suis familiam constituere, vel habitationem eligere, nisi ipsis de Fidei professione facta, & eorum a Nobis, aut Vicariis nostris admissione legitime constet.

## CAPUT X.

Supremos autem Baillivos, Officiarios, & Magistratus, in omnibus & singulis Civitatibus, oppidis, pagis & locis Episcopatus nostri, in Domino rogamus & monemus, ne ullos similiter admittant, nisi de simili Fidei professione coram Nobis facta, ante omnia doceant; ut & de iis omnibus, ad quæ Ecclesiæ præcepta, principumque Edicta, similes obligant.

## CAPUT XI.

Cum autem periculosius sit venenum, quod auribus, quam quod ore hauritur, non satis erit populum sana doctrina instruere, nisi etiam librorum (quorum lectio ei conceditur) accurata ratio habeatur: quare districte præcipimus & mandamus Decanis & pastoribus, ut sedulo advigilent, ne Librarii & Bibliopolæ ullos libros in districtus suos invehant, aut venales exponant, quorum Catalogus non sit a Nobis, aut Vicariis nostris antea examinatus & approbatus.

## CAPUT XII.

Et quoniam ex Statuto Concilii provincialis, nemo præter Typographos, Bibliopolas & Librarios juratos, libros excudere, aut venales exponere possit; censendi sunt contravenire eidem Statuto, qui passim absque licentia & permissione Superiorum, quos-

vis libros, cantilenas, ephemerides, similiaque in vestibulis Templorum, aut aliis in locis publicis venalia habent, aut per plateas circumferunt. Rogat itaque hæc Synodus omnes Bailivos, Officiarios, Magistratus, aliosque, ejusmodi abusum impediendi facultatem & auctoritatem habentes, ea utantur per confiscationem etiam omnium librorum & cantilenarum, ut olim CAROLUS V. Imperator Augustæ memoriæ, anno M.D.L. Edicto suo caverat, confirmatum deinde a PHILIPPO II., Anno M.D.LVI.

## CAPUT XIII.

Libri omnes, inventi apud quoscumque Bibliopolas, aut circumforaneos, ex professo lascivi, obscœni, necromantici, superstitiosi, hæretici; quicumque denique bonis moribus aut fidei contrarii sunt, in eorum conspectu absque dissimulatione lacerentur & auferantur.

## CAPUT XIV.

Moneant etiam Pastores populum, neminem posse legere, aut penes se habere Sacra Biblia vulgari lingua sine Ordinarii licentia in scriptis: imo contrarium facientes, Sacramentaliter absolvi non posse, nisi Bibliis Ordinario prius traditis.

## CAPUT XV.

Quare Bibliopolæ ejusmodi Biblia nemini communicabunt, qui prædictam facultatem non habeat, sub pœnis quarta regula Indicis librorum prohibitorum expressis.

## CAPUT XVI.

Decani autem vel Pastores nequaquam præsumant eam facultatem alicui concedere.

## CAPUT XVII.

Monebunt insuper subditos, abstineant a lectione omnium librorum, qui aliquo modo tractant de Magicis artibus, præstigiis diabolicis, superstitionibus, cæterisque hujusmodi; quamque graviter peccent, qui eos legunt, aut iis utuntur.

## CAPUT XVIII.

Disputationes vero de rebus & mysteriis fidei a personis sæcularibus neque

que publice, neque privatim fiant: idque prohibitum esse sub pœna excommunicationis (Cap. 2. §. *Inhibemus quoque. De Hæreticis, in sexto.*) sæpe moneant pastores; volumusque tales, si qui essent, Officiali nostro denuntiari, & in eos, tamquam de fide suspectos, inquiri.

## CAPUT XIX.

Inhibemus præterea, ne quis sine nostra in scriptis obtenta licentia officium Exorcistæ exerceat: neque utatur alia forma, quam ea, quæ præscripta est in novo Manuali Ecclesiæ Yprensis: faciatque id ex mera charitate & desiderio juvandi proximum, non autem ex avaritia aut alia causa indebita.

## CAPUT XX.

Exorcismi autem non temere & leviter adhiberi debent, sed in probabili & apparente maleficii indicio; tum ne ludibrio passim exponantur, tum etiam ne frustra hominibus vanus de dæmone incutiatur metus. Neque hunc actum quisquam aggrediatur, nisi re cum Decano loci communicata: aut si remotius absit, cum pastore viciniore prudente, & in ejusmodi versato.

## CAPUT XXI.

Abstinebunt similiter Exorcistæ a verbis & sermonibus indiscretis, ne quis hac ratione de aliis sinistram opinionem concipiat.

## CAPUT XXII.

Pastores cum opportunitate denuntiabunt etiam excommunicatos, quotquot malis artibus & remediis superstitiosis (quæ explicitum vel implicitum pactum cum dæmone continent) morbos aut vulnera tam hominum, quam brutorum animalium curare præsumunt, quique in rebus perditis Divinatores consulunt: non resipiscences autem ad Nos deferent.

## TITULUS II.

*De Prædicatione Verbi Dei.*

## CAPUT I.

**A**Nte omnia monitos illos quam maxime volumus, qui prædicandi munere, vel Christianam Doctri-

*Tomus VIII. Concilior. German.*

nam exponendi funguntur. Videant inprimis, ne quod verbo ædificant, id vita & moribus destruant; ne cum aliis prædicaverint, ipsi reprobi efficiantur.

## CAPUT II.

Doceant vero & interpretentur Sacram Doctrinam eo sensu, quem Catholica Ecclesia & consentiens Sanctorum Patrum autoritas, comprobavit; nec quidquam ab iis alienum aut dissonum proferant: historias apocryphas, hæreticorum opiniones & argumenta ne referant ante imperitum vulgus.

## CAPUT III.

Et si necessitas postulat eorum dogmata falsa accuratius confutari, fiat id non longa disputatione, sed gravi & clara redargutione.

## CAPUT IV.

Ne ostentandi ingenii & doctrinæ causa, difficiles atque superfluas quæstiones tractent, fucumve orationis & pigmenta nimium requirant; cum ita se ipsos verius, quam Jesum Christum prædicare viderentur.

## CAPUT V.

Sed præcipue in articulorum Fidei, Orationis Dominicæ, Angelicæ Salutationis, præceptorum Decalogi, & Ecclesiæ, Sacramentorum, Missæ, Sacrorum Rituum, Evangelii & Epistolæ dilucidam & compendiosam explicationem & expositionem incumbant.

## CAPUT VI.

In coarguendis vitiis ita se modeste habeant, ut non hominum, sed peccatorum & delictorum odio, ac Christianæ pietatis & charitatis desiderio adducti videantur.

## CAPUT VII.

Ideo ne quempiam nominatim insectentur, aut tacite eum designent; interea non dissimulent, neque vereantur (justo tamen zelo) invehi in pravas & scandalosas consuetudines seu corruptelas, aut publica peccata; juxta illud 1. *Timoth. 5. Peccantes coram omnibus argue, ut & ceteri timorem habeant.*

IIII 2

CAPUT



## CAPUT VIII.

Volumus autem, Pastores omnes ex nunc singulis diebus Dominicis, & majoribus Solemnitatibus, consueta & certa hora concionari, vel ad minus catechizare. Quodsi nec hoc præstent, statuimus ejusmodi in functione Pastoralis nulla ratione tolerare: componant se itaque omnes, si non ad concionem, saltem ad lectionem Catechisticam.

## CAPUT IX.

Ad concionandum vero nemo a Pastoribus admittatur, nisi doceat legitime de facultate a Nobis obtenta: idque toties, quoties concionem habere voluerit: saltem singulis trimestribus.

## CAPUT X.

Superiores etiam non emittant suos ad concionandum, aut ad servandos terminos, nisi cum socio; neque ulla ratione permittant illos solos vivere, ubi ordinarias stationes habent, & focii assumendi commoditatem.

## CAPUT XI.

Servabunt autem exactissime solitas stationes, mittentque eos, quoties promiserunt, idoneos, gratos, & qui locis ipsis satisfaciant.

## CAPUT XII.

Neque Pastor externos Concionatores, aut Terminarios in tabernis ad usus Ecclesiarum tractet; sed quoniam ejus stationem servarunt, domi suæ honesta portione eos excipiat.

## TITULUS III.

*De Scholis Parochialibus & Dominicalibus.*

## CAPUT I.

**C**um juvenus semen sit Reipublicæ, multumque faciat ad conservandam & propagandam Catholicam Fidem, si illa probe instituatur & educetur: volumus omnino, ut ubique locorum Scholæ Parochiales restituantur. Quare rogamus, & serio moneamus, maxime Pastores & Magistratus, & notabiles singularum Parochiarum, diligenter in eam curam incumbant, ut

quam primum ubique eadem Scholæ erigantur aut renoventur.

## CAPUT II.

Iis præficiantur Ludimagistri integris moribus, fide, & vitæ probitate conspicui; quique nullos libros Flandricos aut Gallicos ediscendos pueris proponant, nisi honestos, aut saltem moralitatem docentes, iique prius per Scholasticum nostrum examinentur & admittantur.

## CAPUT III.

Qui tamen, antequam ludum aperiant, sistent se Nobis, admittendi demum, si literis testimonialibus, & vitæ probitate commendati, Fidei Professionem & consuetum Juramentum præstiterint.

## CAPUT IV.

Monemus itaque Pastorem loci, ne ullum sua auctoritate ad Ludimagistri officium admittat, qui licentiam nostram in scriptis non exhibeat: alias omnino rejiciendus; & Pastor, ut contemptor mandatorum sui Superioris, ex arbitrio puniendus.

## CAPUT V.

Utque melior Scholarum ratio habeatur, ipsique Ludimagistri facilius in officio contineantur, mandamus pastoribus, Scholarum suarum curam gerant diligentissimam.

## CAPUT VI.

Decanis insuper & Scholasticis omnibus, ut eas in districtibus suis personaliter visitent.

## CAPUT VII.

Commendamus autem Ludimagistris, primo suos doceant Orationem Dominicam, Salutationem Angelicam, Symbolum Fidei, præcepta Decalogi, & Ecclesiæ, Sacramenta, peccata mortalia, virtutes iis contrarias, aliaque doctrinæ Christianæ capita sensim, pro eorum capacitate.

## CAPUT VIII.

Adjungat deinde modum confitendi, mane & vesperi orandi, inserviendi Missæ, legendi, scribendi, demum canendi Cantum Gregorianum.

Ca-

## CAPUT IX.

Cumque non minor ratio habenda sit pauperum, quam divitum, optamus modum aliquem inveniri, ad Scholas Dominicales in gratiam pauperum erigendas, non sine singulari fructu & commodo.

## CAPUT X.

Mandamus etiam serio omnibus nostræ Diœcesis Pastoribus, ut de lectione Catechistica, in suis Ecclesiis per se, aut per alium idoneum habenda, maxime sint solliciti; idque omnibus Dominicis & Festivis diebus, signo campanæ ad eam dato.

## CAPUT XI.

Caveant, ne ob exiguum catechizandorum numerum a tam pio & necessario opere cessent, sub pœna unius floreni pro qualibet omissione, ad usum Seminarii nostri applicanda.

## CAPUT XII.

Ut autem majori cum fructu fiat, habeant Catalogum puerorum omnium & puellarum; absentium parentes moneant; monitos auxilio brachii secularis mulctent tandem pecuniaria pœna, juxta Ediçtum Serenissimorum Principum nostrorum.

## TITULUS IV.

*De Seminario Clericorum.*

## CAPUT I.

**P**orro cum de nulla re debeamus magis esse solliciti, quam ut Ecclesiæ nostræ de bonis & probis Ministris provideatur, quod ab eo pene ipsius salus dependeat; illiusque verum & unicum remedium non aliunde, quam ex bene fundato & dotato Clericorum Seminario peti debeat; hocque nostrum, etiam si ab erecta Sede Episcopali institutum, ita tenuiter dotatum sit, ut exigua spes videatur sublevandi extremam bonorum Pastorum & Capellanorum penuriam: inhærentes Decretis Sacrosancti Concilii Tridentini, Concilii Provincialis Mechliniensis, & consuetudini, ab initio erectæ Sedis usque ad postremos tumultus hic laudabiliter servatæ; declaramus, ex fru-

ctibus mensæ nostræ Episcopalis, Capituli Ecclesiæ nostræ Cathedralis, omnium Dignitatum, Personatum, Officiorum, Præbendarum, Portionum, Abbatiarum, Prioratum, Hospitalium (etiam si dentur in titulum vel Commendam) quorumcumque denique Beneficiorum nostræ aut ignotæ Diœceseos, cum consilio tamen duorum e Capitulo nostro, & duorum e Clero, sexagesimam partem aut portionem detrahendam, huicque Seminario nostro applicandam, quoad alia ratione eisdem provisum sit, ut prædictam contributionem in totum vel ex parte remittendam esse judicemus.

## CAPUT II.

In assumendis autem juvenibus, ad hoc Seminarium, & alendis ex istiusmodi contributione, delectus habebitur; & magis idonei cæteris præferentur; qui non nisi legitimi, & decimum nonum ætatis annum ingressi, assumentur.

## CAPUT III.

Declarabunt iidem, se animum habere ad statum Ecclesiasticum, promittentque se id munus in Ecclesia subituros, cum idonei fuerint, quod Nos ipsis imponemus: alias expensas Seminario refundant.

## CAPUT IV.

Uti etiam, se gratos fore, & memores beneficii a Seminario accepti, si quando ad meliorem fortunam evahantur.

## TITULUS V.

*De Officio Divino, Cæremoniis & locis sacris.*

## CAPUT I.

**C**um jam statim ab initio erectæ Sedis, Ecclesia nostra Cathedralis assumpserit usum Romanum, æquumque sit, ut membra Capiti suo se conforment: mandamus, ut omnes Ecclesiæ Collegiatæ & Parochiales, eundem usum & cæremonias observent. Pastores etiam Religiosi, quamdiu pastoralis munere funguntur, proprium relinquunt, Romanum assumant, tam in

Iiii 3

Missis,

Missis, Concionibus, quam in Horis  
Canonicis, aliisque officiis.

#### CAPUT II.

Libros Ecclesiæ sumptu procurent  
Magistri fabricæ; qui si negligentiores  
fuerint, a Nobis quam primum pro-  
videbitur: abstineantque omnino Pa-  
stores ab usu aliorum librorum.

#### CAPUT III.

In ornamentorum etiam coloribus  
& mutatione, Rubricis Romani Missa-  
lis se conforment.

#### CAPUT IV.

Utenturque ornamentis mundis,  
decentibus & benedictis.

#### CAPUT V.

Venerabile Sacramentum sub fi-  
deli custodia recludatur loco honesto,  
ac tuto, non humili, aut humido, sed  
a dextro latere summi Altaris, in mu-  
ro, aut in ipso Altari in capsula argen-  
tea, vel ad minus (si ex alia materia)  
deaurata: cujus claves penes se ser-  
vet solus pastor, & subsidiarius Sa-  
cellanus.

#### CAPUT VI.

Sit etiam ad manum alia decens  
& inaurata capsula, deferendo Sacra-  
mento ad infirmos commoda, in ea-  
que semper sufficientes Hostiæ: quæ  
ne corrumpantur, & ut singulis quin-  
denis mutantur, serio, & de his ratio-  
nem redditurus, advigilet Pastor.

#### CAPUT VII.

Ante Venerabile Sacramentum  
lampas ardeat, saltem tempore Divini  
Officii, ubi fundatio minus sufficiens:  
alias semper, ubi fabricæ abunde pro-  
visum.

#### CAPUT VIII.

Vascula Sacrorum Oleorum non  
sint ex cupræ, sed ex argento vel stan-  
no; reponanturque alio decenti loco,  
etiam clauso, & non cum Venerabili  
Sacramento.

#### CAPUT IX.

Virgulæ etiam, quarum in ungen-  
dis baptizandis & infirmis usus est, sint  
ex argento, non autem ex ligno, ut

pluribus in locis cum irreverentia fieri  
consuevit.

#### CAPUT X.

Volumus præterea, ne deinceps  
in tremendo illo Missæ Sacrificio alius  
sit usus calicum, quam argenteorum,  
aut saltem cuppa sit argentea: interdi-  
centes omnino Pastoribus & Sacel-  
lanis, post tres menses proximos, usum  
stanneorum, sub pœna arbitraria.

#### CAPUT XI.

Usum item Altarium portatili-  
um vel ligneorum in nostra Dicecesi non  
ulterius permitimus, quam ad Fe-  
stum Sancti Joannis proximum inclu-  
sive.

#### CAPUT XII.

Promovebunt interim Pastores suo-  
rum restaurationem altarium, utque  
iis lapis integer imponatur, offeren-  
tes semper operam nostram ad eorum  
consecrationem; quæ consecrata, ser-  
ventur munda & decenter ornata.

#### CAPUT XIII.

Et quoniam magnam passim irre-  
verentiam & indecentiam vidimus, for-  
des nimirum avium, maximeque bu-  
bonum, non in pavimentis Ecclesia-  
rum solum, sed & in ipsis altaribus:  
mandamus Pastoribus omnibus & Ma-  
gistris fabricæ, quamprimum earum  
in Ecclesiam ingressum occludant, &  
singula altaria asseribus superne, testu-  
dinis & fornicis instar muniant: sub  
gravi pœna per negligentes hujus no-  
stræ ordinationis incurrenda, & via  
juris infligenda.

#### CAPUT XIV.

Reliquias Sacras nemo pastorum  
in Ecclesiam suam admittat, nisi prius  
a Nobis examinatas & approbatas.

#### CAPUT XV.

Imagines etiam in Ecclesiis suis nul-  
las inhonestas aut scandalosas expo-  
nant; neque deinceps ullas exponen-  
das accipiant, nisi a Decano ejus di-  
strictus admissas: amovebunt autem  
eas quam primum, si quæ tales essent.

#### CAPUT XVI.

Imagines item vetustate consum-  
ptas, aut carie exesas, auferri cura-  
bunt,



bunt, cum nec ornatum Ecclesiis, nec populo devotionem afferant: quæ vero hæreticorum malitia & rabie mutilatæ aut læsæ sunt, ad tollendam irreverentiam decenter restaurentur.

## CAPUT XVII.

Epitaphia nulla ponantur, nisi examinata & approbata; nec unquam cuiuscumque demum sint, in eo loco, ubi tabernaculum Venerabilis Sacramenti poni consuevit.

## CAPUT XVIII.

Sedes confessionales cum cancellis ex utroque latere fieri curent pastores, ponanturque loco decenti, honesto, secreto, omnibus tandem conspicuo.

## CAPUT XIX.

Cumque jam DEI imprimis benignitate & misericordia, Serenissimorumque Archiducum Principum nostrorum vigilantia & industria, a belli calamitatibus & miseriis liberati, seriam domus Dei restorationem meditemur: omnes & singulos, tam Ecclesiasticos, quam sæculares, in Domino monemus, ne ulterius differant opus, Deo imprimis, Principibusque nostris gratissimum, ac populo omnino necessarium; sed serio in Ecclesiarum & Altarium restorationem incumbant.

## CAPUT XX.

Cæmeteriorum, cum sint loca benedicta, in quibus Christi fideles in spem Resurrectionis quiescunt, merito magna ratio habenda est. Volumus itaque, ea muris, fossis, aut sepibus, ita concludantur, ut equis, vaccis, porcis, aliisque similibus animalibus nullus ad ea pateat ingressus.

## CAPUT XXI.

Herba, quæ in cæmeteriis crescit, divendatur, & metatur in commodum Ecclesiæ: neque in cæmeteriis, tempore Dedicationis, ullæ merces venales exponantur, aut tripudia fiant; nihilque omnino, quod sanctitati & immunitati loci repugnet.

## CAPUT XXII.

In Missæ Sacrificio non minus, quam duæ candelæ cereæ & decentis

formæ accendantur, etiamsi sebaceæ plures accensæ fuerint.

## CAPUT XXIII.

Pro Majestate vero & reverentia tanti Mysterii, ad quod etiam Angeli contremiscunt, caveat Celebrans, ut & qui illi ministrant, ne unquam in altari pileum, biretum, chirothecas, chlamydes, claves, aliaque hujusmodi reponant, aut altari (quod multo est indecentius) toto corpore aut brachiis innitantur.

## CAPUT XXIV.

Diaconus autem, & Subdiaconus durante Sacrificio, cui assistunt, minime chirothecas aut flores manibus tractent; sed Rosarium aut libellum precum.

## CAPUT XXV.

Cumque in Concilio Provinciali cautum sit, ut Ordinarii in singulis Decanatibus deputent aliquot peritos cæremoniarum & rituum Ecclesiæ Romanæ, qui recenter ordinatos Sacerdotes in Missæ celebratione, aliisque ritibus instruant: volumus, ut singuli Archipresbyteri prævia communicatione nobiscum super hac re habita, quamprimum in suo districtu, & nostro nomine, duos designent, quos ad hoc judicaverint magis idoneos; & in locum defunctorum semper alios statim substituant.

## CAPUT XXVI.

Proinde inhibemus omnibus Pastoribus nostris, & Superioribus Monasteriorum, ne alicui in Ecclesiis suis Primitias celebrare permittant, qui de hac instructione per unum e prædictis facta scripto non doceat.

## CAPUT XXVII.

Ante Missam matutinalem, vel Laudes, quæ aliquando sunt de Venerabili Sacramento, Pastores omnes per se, vel per suos Sacellanos benedicant aquam, juxta priora Statuta Synodalia, quod iterum serio mandamus: & tanta copia infundatur in vasa ad hoc parata, ut populo per septimanam sufficiat.

## CAPUT XXVIII.

Quæ benedictio aquæ Dominicis diebus nunquam omittatur.

CA-

## CAPUT XXIX.

Summa Missa, & Concio, eadem hora fiant in omnibus Ecclesiis.

## CAPUT XXX.

Vesperæ canantur singulis diebus Dominicis & Festivis hora secunda pomeridiana; in Quadragesima vero, quando post Missam cantatæ fuerunt, Completorium cum laudibus consuetis eadem hora secunda canetur.

## TITULUS VI.

*De Festis, Jejuniis, & Processionibus.*

## CAPUT I.

**C**um magnus passim sit neglectus dierum Festorum, & intolerabiles sint insolentia, excessus & irreverentia, quæ his diebus committuntur, provocentque in nos Dei iram, qui Christianos iis diebus abuti videt, quos in Divinas Laudes, iram Dei avertendam, & peccatorum veniam impetrandam ab Ecclesia institutos, diligentissime impendere debuissent: volumus, quinimo huic malo occurrere cupientes, in virtute obedientia mandamus omnibus & singulis Pastoribus nostris, tam magnum abusum sæpe & graviter in concionibus suis reprehendant, & quantum in se est, impediant: Promotoribus vero nostris, diligenter advigilent, & hujusmodi violatores & contemptores pro meritis puniri curent. Baillivos etiam, Magistratus, cæterosque Officiarios urbium & locorum vehementer hortamur, ut juxta Edictum Serenissimorum Archi-Ducum Principum nostrorum huic etiam malo sua auctoritate mederi, omnibus modis annituntur; præsertim, ne tempore Summi Sacri, Concionis, & Vesperarum deambulationes in foro & locis publicis, computationes in tabernis, lusus in sphæristeriis vel plateis, venditiones carnum in macellis, similesque excessus committantur.

## CAPUT II.

Subhastationes & auctiones publicas fieri diebus Dominicis & Festivis, prohibemus omnino.

## CAPUT III.

Pastores omnes per se singulis diebus Dominicis cum gravitate & præmeditatione denuntiabunt populo jejunia & festa, quæ in sequentem septimanam incident, monebuntque de eorum accurata observantia, & obligatione ad peccatum mortale.

## CAPUT IV.

Prævidebunt autem diligenter Rubricas Missalis, Breviarii Romani, Concilium Provinciale, Synodum Diocesanam, eaque omnia, quæ super iis per Nos, aut Prædecessores nostros, pia memoria, statuta esse possent, ne quid male denuntient; prout hic & alibi aliquando factum, cum auditorum offensione, confusione & scandalo: alias graviter puniendi in exemplum aliorum.

## CAPUT V.

In processionibus cum passim magni abusus, insolentia & irreverentia committantur, monemus pastores, iis tempestive occurrant: qui si non audiantur, quoniam de ejusmodi respondere debent, potius domum se recipiant, neque processionem servent.

## CAPUT VI.

Processiones, quæ fiunt cum Venerabili Sacramento, sint modestæ: & Celebrans Sacramentum cum reverentia pedes gestet, non in curru, aut rheda.

## CAPUT VII.

Et quia contingit interdum, uno in loco ex diversis Ecclesiis duas processionem institui eodem die; deinceps ad vitandam confusionem, rationem iniri volumus, ut alterutra transferatur: in quo, si dissentiant partes, auctoritatem nostram interponendam offerimus.

## TITULUS VII.

*De Sepulturis, Officiis Defunctorum, & Funerabilibus.*

## CAPUT I.

**C**orpora fidelium Defunctorum ex domibus mortuariis per plateas in

in templum seu sepulturæ locum non deferantur, nisi Cruce præcedente, & uno ad minus Sacerdote ac Custode.

## CAPUT II.

Quod pro omnibus etiam pauperibus & mendicis observari volumus: & saltem Missa legatur in refrigerium eorum animæ, cujus pitantiam solvat mensa pauperum, si vere pauperes fuerint.

## CAPUT III.

Si autem in Xenodochiis mortui sint, antequam illinc efferantur, dicatur Missa in Sacello loci; deinde præcedente Capellano & Cruce, funus ad cæmeterium deferatur.

## CAPUT IV.

Omnes sepulturæ commode fient ante meridiem; & si Exequiæ non celebrentur, funus semper in Ecclesiam deferatur, ut ante sepulturam, super eo Missa dicatur.

## CAPUT V.

Officium Exequiarum & Anniversariorum non celebretur die Dominico & Festivo; sed in proxime sequentem feriam transferatur: sepultura tamen, si necessitas postulaverit, fiat cum Missa lecta, Exequiis in alium diem delatis.

## CAPUT VI.

Ad Sepulturam nequaquam admittendi usurarii notorii, nisi per testamentum usuras restitui mandaverint, cum sufficienti cautione de executione suæ voluntatis, juxta Constitutionem GREGORII X., & sub poenis Canonum.

## CAPUT VII.

Abrogamus irreligiosam & irrationabilem consuetudinem, quibusdam in locis introductam, qua occisorum Exequiæ differuntur, donec inter homicidam & occisi hæredes transactum sit; easque, aliarum more, quamprimum perfolvi mandamus.

## CAPUT VIII.

Cumque præ manibus habeamus taxam certam constituendi omnium juriarum Parochialium & funeralium, ut excessus omnes & abusus, qui passim

*Tomus VIII. Concilior. German.*

committuntur, e medio tollantur, & commendabilis illa uniformitas introducatur & servetur; mandamus & volumus, eam taxam ab omnibus ad amissim observari; sin minus, ad restitutionem acceptorum cogantur, & graviter præterea puniantur.

## TITULUS VIII.

*De Sacramentorum administratione.*

## CAPUT I.

Cum omnia illa, quæ ad Sacramentorum administrationem pertinent, tam accurate, exacte, & dilucide in Sacrosancto Concilio Tridentino, Catechismo ad Parochos, Concilio Provinciali, & Statutis Synodalibus explicentur, ut supervacaneum sit eadem hic repetere vel aliqua iis adjicere; ad ea Pastores nostros, aliosque, quorum interest, remittentes, commendamus tantum eorum diligentem lectionem, ut memoriæ mandent, iisque se, etiam in minimis, semper in administratione Sacramentorum conforment.

## CAPUT II.

Quod ut commodius fiat, & ne ullam eorum ignorantiam prætendant; volumus, ut deinceps omnes, quibus animarum cura commissa est, præter alios libros necessarios, habeant penes se Concilium Tridentinum, illiusque Catechismum ad Parochos, Decreta Concilii Provincialis, & nostra hæc Diocesana, ut & ea, quæ a nostris Prædecessoribus edita sunt.

## CAPUT III.

Quos omnes an habeant & legant, tenebuntur in suis visitationibus inquire Decani.

## CAPUT IV.

Ut autem in administratione Sacramentorum servetur uniformitas, utentur in posterum omnes, quibus eorum administratio credita est, novo Manuali Reverendissimi Domini PETRI SIMONIS Antecessoris nostri, piæ memoriæ.

## CAPUT V.

Diligenter Pastores advigilent, ne quis suorum e vivis excedat non mu-

K k k k k

nitus



nitus Ecclesiæ Sacramentis ; proinde nunquam ita domo absint, quin prius domesticis significaverint, & statim ad manum esse possint. Si vero diutius abesse cogantur, alium suo loco substituent : alioqui si quis eorum negligentia sine Baptismo, Sacro Viatico, aut Extrema Unctione e vivis excesserit, ad mensem integrum a Sacramentorum administratione suspendatur, aut arbitrio Judicis graviter puniatur.

## TITULUS IX.

### *De Sacramento Baptismi.*

#### CAPUT I.

**Q**uia veremur subinde committi per aliquot Pastores tales defectus in administratione Sacramenti Baptismi, ut nonnullis forte scrupulus injici possit, num constet vere Baptismus ; monemus eos serio, ut & alios omnes, qui eorum vices subeunt, etiam in minimis sequantur Manuale novum, servantque accurate formam & ritum in eo præscriptum.

#### CAPUT II.

Cumque plures sint pastores, qui negligentem curam habeant aquæ & fontis Baptismalis ; registrum item baptizatorum servant incorrectum, aut suis Custodibus, sæpe rudibus, ignavis, & negligentibus committant ; caveant sibi deinceps, & fontes Baptismales sub clausura nitidos & mundos habeant.

#### CAPUT III.

Registrum vero baptizatorum penes se servant ; & si rudiores in scriptura, aliena manu & correctâ utantur ; alias delinquentes gravissime puniendi.

#### CAPUT IV.

Si quando fons Baptismalis munda-  
dus sit, ejus aqua in piscinam infundatur, juxta præscriptum Concilii Provincialis.

#### CAPUT V.

Pueri exposititii, sive sal iis appositum fuerit, sive non, semper sub conditione baptizandi.

#### CAPUT VI.

Cum quis procuratorio nomine prolem e Sacro Fonte suscipit, non procu-

rator, sed ipse principalis cognationem contrahit : quo casu utriusque nomen, tam procuratoris, quam mandantis, registro inscribendum est hoc modo : *N. nomine, vel, commissione N.*

#### CAPUT VII.

In Baptismo, qui in necessitate domi fit, cognatio contrahitur ab eo, qui tum assistit, non autem ab eo, qui cæremoniis postea in Ecclesia adhibitis : eoque casu utriusque nomen in registro scribatur : *N. Susceptor in Baptismo, & N. Susceptor in Catechismo.*

#### CAPUT VIII.

In Patrinos non admittantur hæretici, notorie excommunicati, usurarii publici, infames, minores duodecim annis, & qui inopes mentis nullam habent notitiam ejus fidei iussione, ad quam se obligant : quod etiam servetur in mulieribus & matrinis.

#### CAPUT IX.

Monachis quoque, Religiosis, etiam in dignitate Abbatiali, vel alia constitutis, per Sacros Canones prohibetur, aliquem e Sacro Fonte suscipere : quod neque per Procuratorem fieri volumus.

#### CAPUT X.

Infantes sine Baptismo mortui, sepeliantur non in sacro loco, sed alio extra septa cœmeterii, vicino tamen & honesto : cum autem (quod funestum est) contingeret frætum utero matris adhuc inclusum, simul cum ea extingui, cum eadem sepeliatur, neque ex ea eximatur : si tamen id factum fuerit, separatim loco non sacro condatur.

#### CAPUT XI.

Pastores diligenter instruant obstetrices, quibus in casibus, qua verborum forma, & qua materia illis baptizare liceat ; nullasque admittant, nisi sic prius instructas, exhibito suæ vitæ & fidei testimonio : ac post juramentum coram Magistratu præstitum, denuntiandi (juxta Edictum Regium) quot & quæ proles in singulis Parochiis noverint baptizandas ; alias rejiciantur, & cum infantibus baptizandis ab Ecclesia arceantur.

## TITULUS X.

*De Sacramento Confirmationis.*

## CAPUT I.

**I**nstruant populum in omni occasione Pastores de vi & efficacia hujus Sacramenti; moneantque, nullos in posterum ad hoc admittendos, si majores sint & doli capaces, nisi prævia confessione, neque minores septennio, nisi Nobis ex causa rationabili contrarium expedire videatur.

## CAPUT II.

Nemo autem præsumat hoc Sacramentum suscipere, aut assistere confirmando, nisi probe instructus in fundamentis Fidei.

## CAPUT III.

Quicumque etiam non fuerit confirmatus, non admittatur, ut sit aliorum Patrinus, neque ad primam tonsuram.

## TITULUS XI.

*De Sacramento Pœnitentiæ.*

## CAPUT I.

**C**onfessiones excipere in nostra Dicecesi nemo præsumat, nisi cum facultate, eaque in scriptis, sub gravi pœna.

## CAPUT II.

Revocamus etiam omnes licentias absolvendi a casibus Ordinario reservatis, datas ab Antecessore nostro, bonæ memoriæ; nullusque ab iis quemquam absolvat, sine nostra facultate in scriptis obtenta.

## CAPUT III.

Eam vero, si alicui concedimus, non extendimus ad absolutionem ab hæresi.

## CAPUT IV.

Confessarii semper penes se habeant in scriptis omnes casus Summo Pontifici & Ordinario loci reservatos, ne per ignorantiam aut incuriam plus sibi facultatis assumant.

## CAPUT V.

Reservamus autem Nobis, primo de jure, & ex Decreto Concilii Tridentini, omnes Casus, quibus annexa est excommunicatio major; Sodomiam de-

*Tomus VIII. Concilior. German.*

inde cum aliis ejusdem generis etiam gravioribus, hæresim, apostasiam, raptum virginum, homicidium voluntarium, incendium voluntate deliberata procuratum, fornicationem sacrilegam cum Sanctimonialibus, incestum cum consanguineis & affinibus in primo aut secundo gradu, adulterium publicum, injectionem violentam manuum in parentes, & sortilegium.

## CAPUT VI.

Nemo confessiones excipiat in tenebris, sed cum sufficienti lumine.

## TITULUS XII.

*De Sacramento Eucharistiæ.*

## CAPUT I.

**S**i quando Sanctissimum Eucharistiæ Sacramentum ad infirmos deferendum erit, Pastores monebunt vicinos, ut comitentur cum cædis, idque pulsu campanulæ populo significabunt: iis vero, qui ex pio charitatis affectu Venerabile Sacramentum comitabuntur, præter Indulgentias a Summis Pontificibus concessas, quadraginta alios dies Indulgentiarum concedimus: aliis autem, qui impediti, domi oraverint pro salute ægroti, viginti etiam dies elargimur.

## CAPUT II.

Mandamus etiam Pastoribus, ne aliter, quam superpelliceo & stola induti, præeunte Custode cum superpelliceo, nola & lumine, Venerabile Sacramentum deinceps ad infirmos deferant.

## CAPUT III.

Inter eundum vero & redeundum nullibi hæreant, nisi apud infirmum.

## CAPUT IV.

Ad Sacramenta Eucharistiæ & Matrimonii, sine nostra venia ne admittantur, qui ita rudes, ut Orationem Dominicam, Salutationem Angelicam, Symbolum Apostolorum, Præcepta Decalogi & Ecclesiæ, prorsus ignorent, aut Confirmationis Sacramentum non acceperint.

K k k k k 2

TITU-

## TITULUS XIII.

*De Sacramento Extremæ Unctionis.*

## CAPUT I.

**O**leum infirmorum ad ægros quoties deferendum est, Pastor induatur superpelliceo & stola, præcedente Custode cum superpelliceo & lumine.

## CAPUT II.

Infirmus si inter unctiones exspiret, non progrediatur Pastor.

## CAPUT III.

In dubio vero an mortuus omnino, an adhuc vivus, utatur condicionali hac forma: *Si es vivus, per istam Unionem &c.*

## CAPUT IV.

Omnibus etiam Christi fidelibus, qui Sacrum Oleum, cum ad ægros deferretur, comitati fuerint, eundo decem, & redeundo totidem dies Indulgentiarum in Domino concedimus & elargimur: iis vero, qui id de nocte fecerint, viginti eundo, & totidem redeundo impartimur; quibus etiam hujus Sacramenti, sicut & Eucharistiæ Ministros, gaudere declaramus.

## TITULUS XIV.

*De Sacramento Ordinis.*

## CAPUT I.

**P**romovendi deinceps ad Ordines majores, de proclamationibus factis ad singulos Ordines doceant in scriptis, & tempori eas fieri curent: alias sciant se non admittendos.

## CAPUT II.

Nemo admittatur ad Primitias celebrandas (propter fraudes, quæ committi possunt) nisi Superiori ejus Ecclesiæ suscepti Sacerdotii literas exhibeat.

## CAPUT III.

Et quemadmodum sæcularis Clericus, ad Sacros Ordines promovendus, fidem facere debet, de sua provisione sufficienti, tituli nimirum Beneficialis, sive Patrimonialis; jurare etiam, se illum bona fide possidere, nec alienaturum aut resignaturum sine scitu &

consensu Ordinarii, & quando de alio sufficienti sibi prospectum fuerit: ita quoque Regularis fidem faciat literis sui Superioris, se Religionis, in quam admissus est, professionem emisisse; & ulterius juramento asserat, se eandem proprio motu fecisse, eamque se modo ratam habere. Quæ omnia Registro Ordinatum inscribantur.

## TITULUS XV.

*De Sponsalibus & Matrimonio.*

## CAPUT I.

**P**astores exacte sciant communiora Matrimonii impedimenta, tam ea, quæ impediunt contrahendum, quam quæ dirimunt contractum: qualia sunt, Consanguinitas usque ad quartum gradum inclusive: affinitas orta ex legitimo Matrimonio usque ad similem gradum etiam inclusive: affinitas orta ex fornicatione usque ad secundum gradum inclusive: cognatio spiritualis per Baptismi aut Confirmationis Sacramentum contracta: Ordo Sacer: omne votum castitatis: impotentia: validæ promissiones Matrimoniales: Justitia publicæ honestatis, ex validis Sponsalibus proveniens, quoad primum gradum tantum.

## CAPUT II.

Si itaque taliter impeditos conjunxerint, graviter punientur: graviusque si præciverint impedimenta subesse.

## CAPUT III.

Cum vero continget impedimentum aliquod denunciari, aut oppositionem aliquam fieri Matrimonio, desponsorum, vel tantum sit rumor publicus, subesse aliquod impedimentum; etiam si nulla fiat oppositio, inhibemus Pastoribus nostris, ne ad ultiores proclamationes, multo minus ad Matrimonii solemnizationem procedant, priusquam causa ad Nos, aut Officiale nostrum delata, quid agendum sit, decernatur: cum similium casuum judicium Nobis, aut Officiali nostro reservemus.

## CAPUT IV.

Quando ex causa dispensatum fuerit super una proclamatione trium ban-



bannorum: prohibemus Matrimonium solemnizari eo die, quo posterior reliquarum duarum facta sit: idemque servetur, si unica tantum facta esset, & super duabus a Nobis ex causa dispensatum fuisset.

## CAPUT V.

Proclamationes ordinarie fiant in Parochia Sponsi & Sponsæ, ubi contracturi Matrimonium degunt: si tamen ad illas recenter advenerint, fiant & in iis etiam, unde venerunt, & ubi magis innotuerunt: ut sic facilius impedimenta, si quæ sint, detegantur.

## CAPUT VI.

Prohibemus etiam, ne aliqua proclamatio fiat die feriali, etiam si eo tempore caneretur Missa de Venerabili Sacramento.

## CAPUT VII.

Publicabunt insuper Pastores in omnibus Ecclesiis Parochialibus Decretum Sacrosancti Concilii Tridentini, quod irritat & annullat Matrimonia, quæ aliter, quam præsentè Parocho proprio, vel alio Sacerdote, de ipsius Parochi, seu Ordinarii licentia, duobus item vel tribus testibus contrahuntur.

## CAPUT VIII.

Præterea Matrimonium nullum esse, etiamsi contrahatur coram Parocho loci, sed neutrius contrahentium.

## CAPUT IX.

Nolumus etiam sine speciali dispensatione nostra, alio loco, quam in Ecclesia (quæ proprie Sacramentorum locus est) & infra Missarum solemnias, Matrimonia celebrari.

## CAPUT X.

Qui quarto simul & quinto consanguinitatis vel affinitatis gradu juncti sunt, libere inter se sine aliqua dispensatione Matrimonium contrahant.

## CAPUT XI.

Pastores denuntiabunt excommunicatos esse, qui ligaturis aut quibuscumque aliis maleficiis Matrimonii actum inter conjuges impedire conantur; eosque etiam ex nunc, prout ex tunc excommunicatos declaramus;

cujus peccati, & excommunicationis nostræ, absolutionem Nobis reservamus.

## CAPUT XII.

Habeant Pastores omnes Registrum, in quo omnium contrahentium & testium nomina & cognomina inscribantur, cum anno, die, & loco: quod serio & sub gravi pœna mandamus.

## TITULUS XVI.

*De Episcopali Sede vacante.*

## CAPUT I.

**V**Acante per mortem Episcopi Sede, Capitulum Cathedrale infra octo dies, juxta præscriptum Sacrosancti Concilii Tridentini, Vicarium Generalem constituet, qui semel a Capitulo electus, sine justa & rationabili causa destitui nequaquam potest.

## CAPUT II.

Poterit tamen Capitulum eidem unum, aut alterum adjungere, quorum consilio in omnibus utatur.

## CAPUT III.

Si quæstio oriatur illius occasione inter Dominos de Capitulo, & plures ad hoc officium electi fuerint, præferetur, juxta declarationem Sacræ Congregationis magis idoneus: & si dubitetur quis magis idoneus, censetur electus, qui a majore parte Capituli electus & designatus fuerit.

## CAPUT IV.

Deputentur etiam statim a Capitulo unus aut plures Oeconomi, qui similiter, ut & alii Officarii omnes, non amoveantur sine justa & rationabili causa.

## CAPUT V.

Ubi autem Vicarium, vel alios Officiarios abesse contigerit, substitutorum electio ad Vicarium Generalem, non autem ad Capitulum pertinet.

## CAPUT VI.

Nulla Beneficia ad Collationem Episcopi spectantia, per Vicarium aut Capitulum conferantur; sed Successori servantur; poterunt tamen constituere idoneos, qui iis deserviant.

K k k k k 3

Ca-

## CAPUT VII.

Oeconomi de omnibus & singulis fructibus & proventibus dotis mensæ Episcopalis, qui defuncto non competunt, Successori rationem reddere teneantur: nec quidquam in contrarium facit Statutum Capituli, quod & numquam practicum, & Nos, Successoresque nostros minime obligare potest: eoque minus, quod nec Sedis Apostolicæ, nec Principum confirmatio accesserit.

## TITULUS XVII.

*De vita & honestate Clericorum.*

## CAPUT I.

Cum nihil ita Sæculares ad pietatem & Dei cultum excitet, quam probitas & exemplaris vita Clericorum, statui & professioni respondens: quippe quos sciunt ordine & dignitate alios præcellere, videant etiam moribus præcedere & prælucere: omnibus, qui in sortem Domini vocati sunt, quique ejus Ecclesiæ ministerio dedicati, nihil adeo curæ sit, quam vitam moresque suos ita componere & corrigere, ut habitu, gestu, sermone, cunctis exemplo serviant, & ædificationem adferant.

## CAPUT II.

Quæ reformatio, si unquam alias, jam maxime necessaria est: proinde Clericis omnibus serio mandamus, ut iis, quæ super hac re in Concilio Tridentino, Concilio provinciali, & superioribus Decretis Synodalibus pie constituta sunt, se per omnia studeant conformare.

## CAPUT III.

Curentque inprimis omnes, ut per extrinseci habitus & vestium decentiam, animorum honestas intrinseca, maturitas ac gravitas singulorum Ordini conveniens respondeat. Ad eos autem magis promovendos & inducendos, ipsa Sacri Concilii Tridentini verba putavimus hic inferenda, *Cap. 6. de Reform. Sess. 14.* " Quia vero etsi habitus non  
" facit Monachum, oportet tamen Cle-  
" ricos vestes proprio congruentes Or-  
" dini semper deferre, ut per decenti-  
" am habitus extrinseci, morum hone-

" statem intrinsecam ostendant: tanta  
" autem hodie aliquorum inolevit te-  
" meritas, Religionisque contemptus,  
" ut propriam dignitatem & honorem  
" Clericalem parvipendentes, vestes  
" etiam deferant, publice laicales, pe-  
" des in diversis ponentes, unum in Di-  
" vinis, alterum in carnalibus: propter-  
" ea omnes Ecclesiasticæ personæ, quan-  
" tumcumque exemptæ, quæ aut in  
" Sacris fuerint, aut Dignitates, perso-  
" natus, Officia, aut Beneficia qualia-  
" cumque Ecclesiastica obtinuerint, si  
" postquam ab Episcopo suo, etiam  
" per edictum publicum, moniti fue-  
" rint, habitum honestum Clericalem,  
" illorum Ordini, & dignitati congru-  
" entem, & juxta ipsius Episcopi ordina-  
" tionem & mandatum non detulerint,  
" per suspensionem ab Ordinibus, ac  
" officio, & beneficio, ac fructibus,  
" redditibus, & proventibus ipsorum  
" beneficiorum; nec non, si semel co-  
" repta, denuo in hoc deliquerint, et-  
" iam per privationem officiorum &  
" beneficiorum hujusmodi coerceri  
" possint, & debeant: secundum Con-  
" stitutionem CLEMENTIS V. in  
" Concilio Viennensi editam, quæ in-  
" cipit: *Quoniam innovando & ampliando.*

## CAPUT IV.

Cui Constitutioni Nos inhærentes præcipimus & ordinamus, ut omnes Sacris Ordinibus initiati, in Civitatibus suarum residentiarum incedant semper induti toga talari; sotana vero seu pallium interius, si ejusdem non sit longitudinis, ad mediam usque tibiam tamen dependeat: Quod licet itineris causa brevius esse possit, infra genua tamen semper defluat, & chlamyde exterius tegatur.

## CAPUT V.

Tali etiam pallio, aut promissiore, Pastores rurales semper utantur; & omnes passim a vestibus brevioribus abstineant.

## CAPUT VI.

Qui in Civitatibus commorantur, & Sacerdotes rurales, quando domi sunt, ex præscripto Concilii provincialis, Clericale Biretum, quod est Ecclesiasticorum hominum proprium, & ad

ad crucis formam confectum, semper in capite habeant: galerum vero non adhibeant, nisi rarissime, & ob causas ibidem expressas: sitque ejus formæ, & distinctus a Sæcularibus, qui Ecclesiasticum deceat.

## CAPUT VII.

Et quoniam teste Ecclesiastico C. 33. Multam maliciam docuit otiositas, nec illa quidquam perniciosius vitæ Clericorum nominari potest: quicumque Ecclesiæ ministerio nomen dederint, serio cogitent & expendant, se non ad ignaviam, desidiam, aut iners otium, sed ad salutare Ecclesiasticæ militiæ labores subeundos esse vocatos. Quare si a penso & officio præstito, ad quod primario obligantur, aliquod temporis superfuerit, illud non otio, vaniloquio, inutilibus actionibus, lusu, aut poculis; sed piis, sanctis, honestisque exercitiis aut studiis impendant; memores monitionis Divi Hieronymi: *Ama studia literarum, & carnis vitia non amabis.*

## CAPUT VIII.

Omnes Clerici beneficiati, & qui ad Ecclesiæ ministerium se parant, Sacram Eucharistiam sæpius sumant.

## CAPUT IX.

Decet etiam maxime, ut Diaconi & Subdiaconi diebus saltem Dominicis & solemnioribus, quando Altari ministrant, Sacram Communionem percipiant.

## CAPUT X.

Sacerdotes vero omnibus, saltem diebus Dominicis, Festisque solemnibus, Sacrosanctum Missæ Sacrificium Deo pro suis & populi peccatis offerant; alias tanti tamque pretiosi talenti sibi crediti severissimo Judici, & magno suo malo, exactissimam rationem reddituri.

## CAPUT XI.

Quod ipsum minus omittant Sacerdotes Canonici, qui etiam ex Christi patrimonio, & fidelium eleemosynis sustentantur.

## CAPUT XII.

Cumque ut omni ratione scandalis occurratur, auferaturque hoc cor-

ruptissimo sæculo omnis Cleri sugillandi occasio, abstinendum non est tantum a malo, sed ab omni specie mali: quisque sibi caveat, non solum ab ipso crimine incontinentiæ, quod Ordinem Ecclesiasticum adeo vilem & contemptibilem facit; verum ab omni ejus etiam minima suspicione. Parati itaque sint omnes, si ratione suarum ancillarum, aut mulierum aliarum, apud populum oblique audiant, easdem statim ad primam nostram aut Capituli sui monitionem a se ablegare, aut earum familiaritatem vitare: alias, si primo non obdierint, graviter mulctandi; & si ulterius perseverent, arbitrari pœna pro meritis puniendi.

## CAPUT XIII.

Tabernas vero, tamquam malorum multorum occasiones & fontes, non modo omnibus Clericis prohibemus; sed serio injungimus Promotoribus nostris, si quos Canonicos, Sacerdotes, Religiosos, Pastores, Sacellanos, aliosque Ecclesiæ Ministros, easdem frequentare aut ingredi (excepta sola itineris causa)prehenderint, eos coram Officiali nostro evocari quam primum faciant; cui mandamus, primum per multas pecuniarias, deinde etiam per carceres ad meliora tales compellat.

## CAPUT XIV.

E cellis vinariis Capituli vel Cleri nullum lucrum quæratur: quod tamen si deductis oneribus accesserit, in pios usus convertatur.

## CAPUT XV.

Eæ autem pia intentione admittæ, ne serviant pro tabernis Canonicorum aut subditorum Capituli, & minus extraneorum.

## TITULUS XVIII.

*De Canonicis, Archi-Presbyteris, seu Decanis ruralibus, Pastoribus, Custodibus, eorumque Officiis.*

## CAPUT I.

**I**N primis cum dignitates in Ecclesiis, præsertim Cathedralibus, ad augendam



gendam conservandamque Ecclesiasticam disciplinam institutæ sint; quique eas obtinent, pietate cæteros præcellere, exemplo esse, & Episcopos suos omni opera & officio juvare teneantur: merito, qui ad eas vocabuntur, aut ad Canonicatus Ecclesiæ Cathedralis assumentur, tales esse debent, eaque morum integritate, ut reliquis in Clero exemplo servire, & merito Ecclesiæ Senatus dici possint.

## CAPUT II.

Archi-Presbyteri continue advigilent, præterquam in populum, etiam in Pastores, Sacellanos, Custodes, Ludimagistros, aliosque Ecclesiarum districtus sui Ministros.

## CAPUT III.

Defectus vel excessus cum deprehendunt, eos statim Nobis, aut Officiali nostro denuntient.

## CAPUT IV.

Ad Pastoratuum etiam possessionem neminem inducant aut admittant, nisi excepta prius ab iis Fidei professione, & juramento, a Concilio Provinciali hoc Titulo præscripto, idque in præsentia duorum testium, cum nota omnium in suis registris.

## CAPUT V.

Nullus deinceps percipiat fructus Beneficii sui, qui non antea ab Archi-Presbytero in possessionem introductus, juraverit, ante sex menses proximos exhibere eidem exactum registrum omnium fructuum sui beneficii, cum debita specificatione hypothecarum, limitum & terminorum: ejusque notam servabit in suo registro Archi-Presbyter, & copiam authenticam omnium ad Nos mittet.

## CAPUT VI.

Decani vero Christianitatis, qui in suo quisque districtu sub Episcopo sunt Pastores Pastorum, & Ecclesiasticarum personarum Episcopo subjectarum, nec non observatores populi, constituent singuli in districtu sive Decanatu suo, post Dominicam in Albis, visitationem, quam infra quatuor septimanas proxime sequentes non solum

absolvent, sed acta etiam illius ad Nos quamprimum transmittent.

## CAPUT VII.

Cumque plurima mala & scandala oriantur in Ecclesia Dei ex mala & inhonesta vita Pastorum, aliorumque Ministrorum Ecclesiæ, juxta monitionem Apostoli 2. Cor. 6. *Nemini dantes ullam offensionem, ut non vituperetur ministerium nostrum*: statuimus in posterum nullos tolerare, qui ita vivunt, vel male audiunt, ut populo potius sint scandalo & offensioni, quam ædificationi.

## CAPUT VIII.

Multo tamen minus ferendi sunt, qui vel ob sordidum quæstum cum hæreticis connivere, componere, transigere, vel alia ratione eosdem in sua malitia & hæresi fovere præsumpserint.

## CAPUT IX.

Ut etiam, qui super subditorum excessibus component.

## CAPUT X.

Approbantes, & laudantes Caput X. Tituli VII. veterum Statutorum Synodaliū, quo Decanis Christianitatis decernitur, & adjudicatur optimum pignus, quod in domibus mortuariis Pastorum deprehensum fuerit; præsentī Statuto declaramus, hoc ipsum etiam ad domos mortuarias Pastorum Religiosorum, cujuscumque demum sint Regulæ vel Ordinis, per omnia extendendum. Decani enim & viventibus & morientibus omnibus Pastoribus ex æquo invigilant.

## CAPUT XI.

Mandamus insuper omnibus Pastoribus, ut secundum universalis Ecclesiæ ordinationem servant Tempus Paschale ad communicandum, a Dominica Palmarum usque ad Dominicam in Albis inclusive: neque cum ullo Parochianorum, nisi iusta ex causa, dispensent.

## CAPUT XII.

Pastores deinceps, sine prævio nostro aut Decani ruralis consensu, in scriptis obtento, neque Sacellanum, neque Custodem assumere, aut ad Ecclesiam suam admittere præsumant.

CA-

## CAPUT XIII.

Si qui vero ita admissi jam sint, & infra sex proximas septimanas se Nobis, aut Decanis non sistant, sciant se ex nunc ab omni officio suspensos, quoad præsentì ordinationi omnino satisfecerint.

## CAPUT XIV.

Custodes diligentes & assidui adsint Pastoribus, assistantque iis in omni officio Chori, & Horis Canonicis, Missa matutinali, votiva summa, Vesperis, Laudibus, omni administratione Sacramentorum, & omnibus officiis funeralibus; nec unquam se sine eorum venia absint.

## CAPUT XV.

Tabernas autem inhabitare, frequentare, in iisdem expensas facere, & minus tabernarium agere, prorsus nolumus.

## CAPUT XVI.

Cui nostro Mandato post publicationem qui obedire noluerint, statim amoveantur.

## CAPUT XVII.

Ludos theatrales aut comœdias neque profanas, neque sacras admittant Pastores, nisi a Nobis, aut Deputatis nostris de novo examinatas, & in scriptis admissas.

## CAPUT XVIII.

Caveantque in eo dispensare, sive directe aut indirecte consensum aliquem præbere, sub pena indignationis nostræ; sed potius pro viribus se illis opponant: tum si nihil proficiant, totum negotium ad Nos deferant.

## CAPUT XIX.

Baillivos etiam, Magistratus, aliosque justitiæ Ministros & Officiarios serio monemus, ne facultatem alicui ejusmodi ludos exhibendi faciant; sed toto conatu rem adeo periculosam impediant.

## CAPUT XX.

Pastores, qui augmentum dotis seu portionis canonicæ in cura sua fieri volunt, procurent inprimis, causam suam bene & clare instructam habeant, & tum Officialis, nostrumve Decretum conveniens expectent.

*Tomus VIII, Concilior. German.*

## TITULUS XIX.

*De Regularibus & Monialibus.*

## CAPUT I.

CUM in Ecclesia militante diversi sint & varii status hominum, omnes Domino Deo famulantium; nobiliores tamen ii sunt, & Deo gratiores, in quibus homines, præter diligentem observationem mandatorum (& quo arctius se illi conjungant, & similiores fiant) tria etiam Evangelica consilia, aliaque omnia ad majorem perfectionem tendentia media ultro amplectuntur. Ad quod sanctum vitæ Angelicæ in terris institutum (donum prorsus Divinum) promovendum, & conservandum, plurimi Sancti Summi-que Pontifices tum per Oecumenica, tum nationalia Concilia, aliaque opportuna remedia, plurimum semper elaborarunt. Sed ea fuit ab initio invidia adversarii nostri communis in hoc arctioris & sanctioris vitæ genus, ut illud oppugnare totis viribus & maxime hoc ultimo sæculo nunquam desierit; ut merito cum Propheta lachrymando exclamare possimus, Cap. 4. *Quomodo obscuratum est aurum, mutatus est color optimus, dispersi sunt lapides Sanctuarii in capite omnium platearum?* Vere dispersi lapides, muri, structuræque integræ Monasteriorum: sed parum id esset, si non simul cum iis dispersi & fugati Monachi, Monachæque, disciplina ipsa laxata, soluta, & multis in locis lapsa foret. Horratur quidem nos Sancta Synodus Tridentina Sess. 25. de Reformatione Regularium & Monialium, serio in restorationem Monasticæ disciplinæ incumbamus, Regulares, Religiosos, Moniales, omnes denique officii sui exequendi admonens: sed ea nostra est negligentia & tepiditas, ut potius toti hactenus simus in muris & structuris reparandis, quam in propriis & antiquis moribus & legibus emendandis & reformandis.

Quapropter Abbates, Præpositi, Prælati, cæterique Monasteriorum Superiores, eam deinceps seriam curam & diligentiam adhibeant, ne in essentialibus & substantialibus vitæ monasticæ (qualia inprimis tria vota, vel si

LIIII

quæ

quæ alia, pro loco & ordine) vel minimam relaxationem aut remissionem admittant: sed potius ipsi primum forma gregis sui facti ex animo, & tanquam lucidissima specula omnes, quas suis instillare & infundere volunt virtutes & perfectiones, exemplo & factis ipsis exprimant & præluceant.

## CAPUT II.

Temporalium itaque administrandorum non prima cura sit; verum Divinum Officium primi ipsi frequentent; Missæ Sacrificium quotidie Deo offerant; humilitate cæteris emineant; charitatis officiis omnes superent; castitate & puritate omnibus præluceant. Denique etsi divitiæ adsint aut abundant, meminerint voti paupertatis, futuræ necessitatis & parsimoniam, ac deinde, ut boni dispensatores, modestæ in mensa, vestitu, moribusque suis frugalitatis.

## CAPUT III.

Aderunt etiam semper, quantum in se erit, in prandio & cœna Religiosis suis, eorumque portionibus (ut omnis obloquii & murmurationis occasio tollatur) contenti maneant.

## CAPUT IV.

Præscindant insuper omnem damnablem proprietatis occasionem, si Religiosis suis aliquem idoneum præficiant, qui totus sit in eorum necessitatibus vestium, librorum, aliarumque rerum procurandis; quique de pecunia singulis mensibus in eum usum accepta, exactam sibi & fidelem rationem reddat.

## CAPUT V.

Ad habitum autem induendum, nullum deinceps admittant, nisi cum consensu & consilio suorum, etiam absentium, & in Curis agentium; saltem sanioris partis.

## CAPUT VI.

Ita admissi bene exerceantur in omnibus, quæ sunt Religionis; neque probationis anno durante, foras egredi permittantur.

## CAPUT VII.

Antiquum habitum Ordinis vel Monasterii, quem multi ob turbas mutarant aut deposuerant, quam primum

omnes resumant; quem ne in itinere quidem existentes unquam dimittant. Poterunt tamen tum galerum, & superius honestum pallium adjicere.

## CAPUT VIII.

Describantur etiam & designentur statim ubique septa Monasterii; (intra quæ Religiosi concludantur, nec iis egredi facile permittantur) ut cum amore & cultu solitudinis, Monachi nomen consonet: nec enim decet ea, quæ animo contempsimus, oculis auribusque repetere aut revivere.

## CAPUT IX.

Quæ claustrum Religiosi negligentia cum plurima nostris temporibus scandala & mala, ex frequenti illa virorum & mulierum promiscua consuetudine, invexerit, prudenter Sancta Tridentina Synodus omnibus Episcopis, sub obtestatione Divini judicii, & interminatione maledictionis æternæ, mandat & præcipit, ut Sanctimonialium clausuram inviolabiliter servari curent, & semel professæ, ne quidem ad breve tempus, Monasterio unquam egrediantur.

## CAPUT X.

Proinde nullæ in posterum ad habitum admittantur, quin perfectam clausuram, Monasterio utcumque restituto & reparato, se servaturas promittant.

## CAPUT XI.

Et omnes ante habitum & professionem sistant se Nobis, aut Vicario nostro examinandas, cujuscumque demum sint Monasterii, Ordinis, sive Religionis.

## CAPUT XII.

Ut autem libertati Virginum novitiarum melius provideatur, Sacrum Concilium Tridentinum, integrum probationis annum admittit; & Provinciale Mechliniense omnia Statuta & consuetudines tollit, quæ aliquo modo earum libertati contraria sunt: qualia sunt, si capilli ante earum professionem, refecentur; si cum solemnibus pompis, propendentibus crinibus, Sponsarum instar sæcularium ornatae, per plateas, confluyente populo, ad Monasterium vestiendæ ducantur; aliaque his similia,



milia, quæ ingressum Religionis & egressum maxime divulgant.

## CAPUT XIII.

Proinde volumus, ut deinceps filix, quæ ad Religionem admitti petent, listant se honesto secundum statum suum habitu in Ecclesia ejus loci; nobiles nobilium, communes communium: quod jam laudabiliter multis abhinc annis Ypris & alibi observatum fuit.

## CAPUT XIV.

Differantur etiam convivium (si tamen ea parentes fieri petant) in tempus professionis: quæ cum sint frugaliter & honesta.

## CAPUT XV.

Domos Ecclesiasticorum vel Sæcularium prandii aut cœnæ causa Religiosæ nunquam accedant; nec civitate ulla de causa egrediantur; ut etiam in suis Domibus & Monasteriis nullos unquam Sæculares nec Ecclesiasticos ad familiaritatem, minus autem ad prandium vel cœnam admittant.

## CAPUT XVI.

Choræ & tripudia, etiam si sine instrumentis musicis fiant, in vestitionibus & professionibus deinceps omnino omittantur.

## TITULUS XX.

*De Bonorum Ecclesiasticorum administratione & conservatione.*

## CAPUT I.

**O** Economiam & bonam utilemque bonorum temporalium (quæ a Majorum vel pietate, vel parsimonia multum nostris temporibus excreverunt) administrationem & dispensationem omnibus Prælati, aliisque Ecclesiasticis Superioribus unice commendamus.

## CAPUT II.

Decani etiam omnium Pastorum & Beneficiatorum nomina, cum circumstantiis suorum beneficiorum, quam primum per totum suum districtum inscribant: Beneficiati vero omnes ante sex menses finitos, a die pu-

*Tomus VIII. Concilior. German.*

blicationis præsentis Synodi, tradent suis Decanis in scripto beneficium cum oneribus, bonis, situ & terminis terrarum, decimarum elocationibus, redditibus &c. per Magistratum loci, aut aliam personam publicam, eorum notitiam habentem, subsignatum. Quod Decani ad Nos transmittant sub pœna suspensionis a perceptione fructuum, per negligentes incurrenda.

## CAPUT III.

Nemo deinceps Beneficiatus administrationem bonorum sui beneficii, quovis prætextu, Sæcularibus, Magistratibus aut Magistris fabricæ committat; sed ipse ea administret, & munimenta sua penes se semper retineat.

## CAPUT IV.

Cui malo ut occurramus, volumus præterea, tradantur Decanis omnes literæ originales, quæ aliquo modo ad beneficia, Curas, Capellanas, mensas pauperum, aliasque fundationes pias pertinere & spectare inveniantur; eæque in nostro Archivio servandæ transmittantur. Ad usum vero retineant sibi Beneficiati authenticas copias: ut & ipsas originales toties (prævio de restituendis juramento) recipient, quoties earum inspectionem in judicio, aut alibi necessariam judicabimus.

## CAPUT V.

Operæ pretium foret, ut omnes Prælati sæculares & regulares, Capitula etiam, omnia sua munimenta transcribi, vel in formam aliquam authenticam transumi quam primum curent; eæque in judicio fidem faciant, impetrata etiam Principis autoritate. Quod ipsum in pastoratibus, & simplicibus parochialibus beneficiis fieri similiter curabimus.

## CAPUT VI.

Et sicut postremo Concilio Provinciali cautum fuit, ut antiqua & ante quindecim annos scripta registra Collegiorum, beneficiorum, fabricarum, mensarum, cæterarumque piarum fundationum, ante proximum annum ubique renoventur: ita ubi nulla sunt omnino, aut imperfecta & mutila, quam citissime ea nova fiant aut perfici-

L I I I I 2

antur;

antur; ubique cum debita designatione limitum, terminorum, quantitate & situ terrarum, pratorum, sylvarum, vivariorum, hortorum, censuum, reddituum, similibusque circumstantiarum; idque sumptibus eorum, in quorum præsentem utilitatem cedunt.

## CAPUT VII.

Si interim bona Ecclesiarum Parochialium, aut aliorum simplicium beneficiorum, ob neglectam solutionem censuum, ab ipsismet Pastoribus aut Beneficiatis evincantur, vel evictione ab aliis facta, ab ipsis recuperentur: non ideo liberum, ea pignora sibi, aut suis hæredibus retinere; sed Ecclesiis aut beneficiis reacquisita esse censentur.

## CAPUT VIII.

Alias qui contrarium fecisseprehenduntur, puniantur ipsi; & contra hæredes Bonorum Ecclesiasticorum detentores procedatur.

## CAPUT IX.

Cui insuper incommodo ut occurrant Decani, petant ab omnibus, simul cum aliis beneficiorum circumstantiis, etiam omnes census & onera adscribi; de quorum solutione facta doceant semper tempore visitationis futuræ.

## CAPUT X.

Concionatores, Confessarii, & Pastores juxta Concilium Tridentinum *Sess. 22. Cap. 11.* in omni occasione populum doceant, omnes & quoscunque, qui jurisdictiones, bona, census, jura Ecclesiarum, beneficiorum, aut piorum locorum in proprios usus convertere, illa usurpare, aut usufructum impedire præsumpserint, tamdiu subiacere anathemati; Clericos præterea omnibus beneficiis privari, & ad omnia alia inhabiles effectos esse, donec ea Ecclesiæ aut possessoribus legitimis integre restituerint, & a Romano Pontifice veniam & absolutionem obtinuerint.

## CAPUT XI.

Pro beneficiorum vacantium bonis constituatur diligens aliquis, qui prævio juramento ea fideliter recipiat, & administret.

## CAPUT XII.

Absentes a suis beneficiis, tempori doceant de legitima absentiae causa; alias suos non faciant fructus.

## CAPUT XIII.

Observentur diligenter ab omnibus Beneficiatis, quæcumque in primo & secundo Concilio Provinciali sancita sunt de alienationibus, elocationibus, computubus, manualibus faciendis, cæterisque eo spectantibus: quæ etiam Sux Celsitudines edicto stabiliverunt, sub pœna nullitatis omnium contractuum, aliter quam superioris Decreto initorum, cum causæ cognitione interposito. Quæ omnia hæc Synodus probat, & ab omnibus Prælatiis, Capitulis, aliisque particularibus, etiam Magistris pauperum, & fabricæ, deinceps inviolate observanda statuit & præscribit.

## CAPUT XIV.

Arbores etiam Ecclesiarum, Pastoratuum, Capellaniarum, pauperum, vel aliarum quarumcumque piarum foundationum, nemo deinceps quovis prætextu, aut in qualemcumque usum, sine nostra interventione & facultate in scriptis obtenta, vendere aut amputare præsumat, sub pœna nullitatis: contra quos insuper via juris procedetur.

## CAPUT XV.

Patroni insuper, tam Ecclesiastici, quam sæculares, Magistratus, & Communitates, in posterum nequaquam disponant, aut in alios quosvis usus applicent bona Ecclesiæ vel pauperum, sine nostro consensu & licentia in scriptis obtenta.

## CAPUT XVI.

Reparationes vero & restorationes Ecclesiarum, & distributiones elemosynarum liberæ, semper fiant consilio Pastore.

## CAPUT XVII.

Qui eas non ex humano affectu, aut cum exceptione personarum, sed omnibus indifferenter vere pauperibus, & probis, honestisque, vel ipse distribuat, vel distribui curet.

Ca-

## CAPUT XVIII.

Si quæ indulto Principum ad reparationes Ecclesiarum concedantur, ea publice & plus offerentibus elocentur, neque ad alios usus applicentur; eorumque reddatur computus præsentente Pastore singulis semestribus.

## CAPUT XIX.

Multum interest, ut semper probi & fideles Magistri fabricæ, & mensæ pauperum Administratores constituantur: viderint proinde, qui alios & negligentes creant, num actionum similium iniquarum coram Deo participes esse velint.

## CAPUT XX.

Munimenta & computus tam fabricæ, quam mensæ pauperum, recondantur in arca lignea, qualem curabunt fieri omnes Pastores ante sex proximas septimanas, sumptibus communibus: eamque ponant tuto loco in Sacristia, sub tribus seris, & tribus clavibus, servandis a Pastore, a Magistro fabricæ, & tertia a seniore Magistro pauperum.

## CAPUT XXI.

Quod ipsum de clavibus tribus gazophylacii, seu trunci eleemosynarum, etiam observetur.

## CAPUT XXII.

Qui admittuntur ad administrationem bonorum fabricæ, vel mensæ pauperum, præstent Superioribus iuramentum.

## CAPUT XXIII.

Pastores omnes curent interesse computibus fabricæ & mensæ pauperum, utque iidem diligenter & fideliter redantur.

## CAPUT XXIV.

Quod idem faciant Decani circa computus Hospitalium, aliarumque piarum foundationum districtus sui.

## CAPUT XXV.

Monemus etiam Magistratus oppidorum, ut Nobis tempori significant, quando huiusmodi computus examinandi sunt; ut juxta Ediētum suarum Celsitudinum vel interesse, vel aliquem ex nostris eo mittere possimus.

## CAPUT XXVI.

Cum vero redditus computibus, & deductis deducendis, aliquid boni superest, id non relinquatur in administratorum manibus, sed statim in usus pauperum aut Ecclesiæ applicetur.

## CAPUT XXVII.

Pro reductionibus foundationum tenuium faciendis, ad Nos recurrendum est.

## CAPUT XXVIII.

Pastores de reparandis & reficiendis suis domibus Pastoralibus maxime sint solliciti: referantque ad Nos Decani in suis visitationibus, qui ea in re negligentes aut inobedientes fuerint.

## CAPUT XXIX.

Ubi vero domus Pastorales ita sunt collapsæ, vel ubi nullæ omnino sunt, Pastores eas quam primum restaurari, vel loco commodo de novo ædificari curent: prudenter tamen id faciant, & cum bona venia & sumptibus Parochianorum.

## CAPUT XXX.

Si per negligentiam Pastoris defuncti, necessaria domus reparationes factæ non sint, recurratur ad ejusdem domum mortuariam, implorato etiam, si opus fuerit, brachio sæculari.

## CAPUT XXXI.

Pastores omnes & Beneficiati, qui suis beneficiis domos annexas habent, easdem inhabitent; non autem externis elocent.

## CAPUT XXXII.

Ecclesiæ ob periculum furum, aut etiam profanationis, post Officium Divinum statim claudantur.

## TITULUS XXI.

*De Judicibus delegatis, & Ordinariis Examinatoribus.*

## CAPUT I.

**J**udices delegati sunt ii omnes, qui nominati sunt ultimo Concilio Provinciali; quibus in hac Dicecesi adjungendus est *D. Dionysius Blommaert, J. U. Licentiatuſ & Officialis.*



Examinatores vero juxta Decretum Concilii Tridentini constituuntur sequentes:

*D. Carolus van Houcke, J. U. Licentiat, Archi Diaconus*

*D. Joannes Sylvest, S. T. Licentiat, Penitentiarius.*

*D. Ludovicus Ulaminck, J. U. Licentiat, Archi-Præbyter.*

*D. Petrus Wyts, J. U. Licentiat, Cantor.*

*D. Petrus Cauweel, S. T. Licentiat, Scholasticus.*

*D. Guilielmus Zyloof, S. T. Licentiat, Graduat.*

#### CAPUT II.

Qui omnes memores erunt juramenti sui, munusque suum, seposita omni affectione, fideliter exequentur.

#### CAPUT III.

Ita ut ratione ejusdem examinis nihil a quoquam accipiant, sub pœna juxta Concilium Tridentinum incurrenda.

#### CAPUT IV.

In examine vero considerent non tam scientiam cujusque, quam etiam usum, experientiam, judicium, ingenium, solertiam; & maxime ne quis se alteri examinandum supponat; mi-

nus docti (modo noti, & probis moribus) doctioribus & ignotis semper præferantur.

### TITULUS XXII.

#### De Synodo Provinciali & Diœcesana.

#### CAPUT I.

**C**um omnes etiam exempti teneantur observare Statuta Concilii Provincialis & Diœcesani; monemus in Domino, iis se quam primum conforment in omnibus: utque omnem ignorantie prætextum auferamus, eadem nunc promulgamus, & publicamus, & pro legitime promulgatis & publicatis haberi volumus; secundum quæ per quoscumque Judices in judicio procedatur: eaque ab omnibus Prælati, Canonicis, Pastoribus, aliisque nostræ Diœcesis Sacerdotibus legi & observari per se, suosque omnes volumus & præcipimus.

#### FINIS.

*Impressa Ypris in 8vo anno 1609. typis Francisci Belleti; anno 1673. Antverpiæ in Officina Plantiniana Balbafaris Moreti reimpressa.*



## SYNODUS CONSTANTIENSIS

### DIŒCESANA,

Anno Christi MDCIX. Pauli V. PP. V.

Rudolphi II. Imp. XXXIII.

Sub JACOBO FUGGERO, (\*) Episcopo Constantiensi,

UNDEVICESIMO MENSIS OCTOBRIIS DIE  
CELEBRATA.

### ACTA SYNODI CONSTANTIENSIS.

**Q**uamvis a Sacro Tridentino Concilio salubriter sancitum ac decretum sit, ut singuli Episcopi Synodum Diœcesanam quotannis convocent, & indicant; ab hujus tamen Decreti executione Remus ac Illmus Princeps, ac Dominus, D. JACOBUS, Episcopus Constantiensis, Dominus

Augiæ majoris &c. Ejusque pii Antecessores, ob longe lateque patentem suam Diœcesin, temporum difficultatem, varisque impedimenta, retardati, ac præpediti sunt. At cum evidens necessitas, nimiumque intervallum ab ultima Synodo intercedens exposceret, moram hanc diuturniorem abrumpi, malis-

(\*) Vide sub finem Synodi.

malisque moribus, ex lapsa multis in locis Ecclesiastica disciplina, ortis, novis bonisque legibus congrueret obviari; Rma ac Illma Celsitudo Sua, nullam porro sumptuum, ac impedimentorum rationem habendam duxit, Synodumque hoc anno convocatis omnibus Diœceseos suæ Statibus Ecclesiasticis, celebrare penitus constituit. Accessit demum Bulla a Sanctissimo Domino nostro, D. PAULO Divina providentia Papa V. emanata, Rmam ac Illmam Suam Cels. in tam pio ac laudabili proposito confirmans, & Sacro Indulgentiarum Thesauro, omnes & singulos eidem Synodo præsentis, gratiose locupletans, sub modo & tenore infra scripto.

*Dilecto Fratri nostro JACOBO,  
Episc. Constant.*

PAULUS PAPA V.

VENERABILIS FRATER, SALUTEM  
& Apostolicam Benedictionem.

**C**um sicut Nobis nuper exponi fecisti, Tu Synodum tuam Diœcesanam, & in ea Missam solemnem in Pontificalibus, Divina adspirante gratia, propediem celebrare intendas; Nos ad ea, quæ Christi fidelium animarum salutis, simulque Tuæ spirituali consolationi conducunt, libenter Paternæ nostræ charitatis favorem dirigentes, de Omnipotentis DEI misericordia, ac Beatorum Petri & Pauli Apostolorum ejus, auctoritate confisi. Omnibus utriusque sexus Christi fidelibus, vere penitentibus, & confessis, ac Sacra Communione refectis, qui in die, qua dictam Missam in Pontificalibus, ut præfertur, in ipsa Synodo celebraveris, eidem Missæ, in totum vel in partem, & Benedictioni per Te post Missarum solennia, super populum elargiendæ devote interfuerint, seu eadem die Ecclesiam Constantiensem, etiam devote visitaverint, & ibi pro Christianorum Principum concordia, hæresum extirpatione, & Sanctæ Matris Ecclesiæ exaltatione, pias ad Deum preces effuderint, plenariam omnium peccatorum suorum Indulgentiam, & remissionem misericorditer in Domino concedimus, & elargimur. Contrariis non obstantibus quibuscunque. Præsentibus post dictam diem minime valituris. Datum Romæ apud S. Petrum, sub Annulo Piscatoris die XXVII. April. M. DC. IX. Pontific. nostri Anno Quarto.

S. COBELLUTIUS.

Qua quidem Indulgentiarum Bulla, cum ea, qua par est, reverentiæ & gratitudinis ex-

ga præmemoratum Ssmum D. N. significatione, a Rma & Illma Cels. Sua recepta, cum ante Messum, & Autumnum proxime imminens ob Diœceseos amplitudinem, Synodus celebrari commode non posset; placuit eidem Rmæ ac Illmæ Suæ Cels. eam ad diem Dominicam post Pentecosten decimam sextam, quæ est decima octava Mens. Octob. Anno Domini Millef. sexcentef. nono, ad Omnipotentis Dei laudem & gloriam, vitæque ac morum Status Ecclesiastici reformationem, necnon Fidei Catholicæ in hac Diœcesi propagationem indicare ac convocare. Quapropter Literas Citationis, omnibus & singulis Statibus Ecclesiasticis, in hac Diœcesi commorantibus, tam ab ordinaria jurisdictione exemptis, quam eidem subjectis, quos de jure, vel consuetudine Synodo hujusmodi interesse oporteret, insinuandas, prælo subijci, & per fideles juratosque Nuncios, seu Pedellos emitte, præfata Illma ac Rma Sua Celsitudo decrevit, atque mandavit.

### LITERÆ INDICATIONIS seu Convocationis Synodi.

**JACOBUS, DEI ET APOSTOLICÆ**  
Sedis Gratia Episcopus Constantiensis, Dominus  
Augiæ majoris & Oeningæ, &c. Rmis, Rdis,  
Venerabilibus, Religiosis, & Honorabilibus  
Nobis in Christo sincere Dilectis atque Devotis,  
Ecclesiæ nostræ Cathedralis Constantiensis Præposito, Decano & Capitulo, universis & singulis Abbatibus, Præpositis, Prioribus, Guardianis, & aliis Superioribus Ordinum quorumcunque, etiam Ordinis S. Joannis Hierosol. & B. Mariæ Virg. Teutonicæ Commendatoribus, nec non Reclori & Universitati Friburgensi, Eccles. Collegiarum Præpositis, Decanis, Custodibus & Canonicis, Capitulum Ruralium Decanis, Camerariis & Deputatis, Parochialium & aliarum Eccles. Rectoribus, Pastoribus, Plebanis, Parochis, eorum Vicariis, Capellanis, Clericis & Beneficiatis, Monasteriorum Sanctimonialium Abbatissis, Priorissis, Magistris, Matribus, aliisque Ecclesiasticis tam Regularibus utriusque sexus, quam Sæcularibus quibuscunque per Diœcesin nostram Constant. ubilibet constitutis, siue exemptis, siue nostræ ordinariæ jurisdictioni subjectis, qui de jure vel consuetudine Synodæ Diœces. interesse debent & tenentur,  
Salutem in Domino sempiternam.

**E**piscopalis officii nostri ratio postulat, ut quanto gravioribus malis & hæresibus laborantem Dei Eccles. conspiciamus, tanto majori

jori studio & vigilantia in eam, quam ex Alto Nobis traditam & commendatam suscepimus, functionem incumbamus, & gregi Nobis credito custodiam simul & disciplinam adhibeamus, ne si nostra fortasse incuria perire contingat, quod Christus Dominus noster in ara Crucis pretioso Sanguine suo redimendum duxit, æternæ maledictionis væ, quod apud Ezech. 34. c. Dominus Pastoribus negligentibus comminatur, certissimo judicio incurramus.

Hinc est, quod Nos ab initio statim nostræ susceptæ Pastoralis curæ de celebranda Diocesana Synodo, in qua morum & Ecclesiasticæ disciplinæ reformatio institueretur, excessus corrigerentur, & quantum per horum temporum difficultates fieri posset, variæ hæreses, errores ac schismata extirparentur, cogitavimus: Quam quidem cogitationem nostram hæcenus variis ex causis impeditam, Simus Dominus noster, D. PAULUS Divina providentia Papa V. per Suae Sanctitatis & Sedis Apostolicæ Nuntium cum potestate Legati de Litteris, apud D. Catholicos Helveticos commorantem, Illmum & Rmum Dominum, D. LAZARUM Comitem de Aquino, Episcopum Venafranum, ita promovit excitavitque, ut tantæ auctoritatis ac stimulo, tum etiam Sacris antiquis & novissimis Trid. Conc. Canonibus & Decretis contravenire, ab officio nostro Pastoralis alienum duxerimus, sed necessarium omnino ac valde utile futurum judicaverimus, si non obstantibus etiam multis impedimentis, variisque hujus nostri temporis incommoditatibus, quam primum Dioces. Synodum indicere mus, omnesque status Ecclesiasticos Episcopatus nostri convocaremus.

Quare vos omnes & singulos, tam exemptos, quam non exemptos, ac alios quoscunque, qui de jure vel consuetudine Synodo Diocesana interesse debent, auctoritate nostra ordinaria, & vigore Sacrosancti Conc. Trid. Nobis in hac parte concessa Apostolica, in Domino requirimus & hortamur, vobisque & cuilibet vestrum, sub penis & censuris, in dicto Conc. Trid. & alias contra contumaces in hoc casu, a jure infligi solitis & consuetis, præcipimus & mandamus, ut die Dominica, quæ est decima octava dies mensis Octobr. hujus currentis anni millesimi sexcentissimi noni in Civitate Constantiensi ad dictam Synodum Diocesanam celebrandam, personaliter & per vos ipsos, aut jure & Canonice impediti, per legitimos vestros Procuratores cum sufficienti man-

dato compareatis, (nisi diem celebrationis Synodi ex aliqua causa prorogatam fuisse, aliis nostris ad vos directis literis intellexeritis) atque sequenti die Lunæ ejusdem mensis, in Ecclesia nostra Cathedrali, in habitu & vestitu Chorali, uniuscujusque dignitati, ordini & statui congruo conveniatis, Sacra Missæ Officio a Nobis in Pontificalibus, Deo adjuvante, celebrando, in quo omnibus & singulis sive Clericis sive Laicis præsentibus, modo Sacramentaliter confessi, communicaverint, ex speciali gratia & concessione Sanctissimi Domini nostri, D. PAULI Papæ V. prout ex concess. Bulla, quam ad valvas Ecclesiæ nostræ Cathedralis affigi curavimus, latius patet, Indulgentiam plenariam & remissionem omnium peccatorum, in Domino præsentium tenore publicamus, & ut sese tanti Thesauri participes faciant, omnes serio requirimus & adhortamur, aliisque caeremoniis consuetis solenniter peractis, una Nobiscum communi consilio tractaturi & conclusuri ea, quæ ad Dei Omnipotentis laudem & gloriam, Eccles. Cathedral. Diocesisque nostræ Constant. incrementum, atque totius Cleri & populi mores & disciplinam instituendam & promovendam, ad hæresum denique extirpationem necessaria, ac utilia videbuntur.

Ne autem ob omnium aut multorum absentiam, interea Divinus cultus & debita Sacramentorum administratio intermitteri debeat, volumus ac mandamus, ut Ecclesiarum Collegiarum secularium, & Decanatum ruralium Capitula, per tres aut ad minus per duos, ex singulis Capitulis eligendos, cum pleno mandato, Abbatissæ vero, Priorissæ, Magistræ, Matres, ac aliæ Monasteriorum Sanctimonialium quorumcunque Præfectæ, per Procuratores Ecclesiasticos, sive Sæculares, sive Regulares, cum simili pleno ac sufficienti mandato compareant: Certificantes omnes & singulos, sive exempti, sive non exempti fuerint, qui a Nobis per præsens hoc edictum vocati, ad dictam Synodum venire neglexerint vel recusaverint, Nos nihilominus tam ad executionem eorum, quæ in Synodo statuentur, ipsorum absentia & contradictione minime obstante, quam ad supra comminatas penas & censuras irremissibiliter processuros. Volumus etiam, & ab omnibus Prælatiis, Parochiis & Curatis requirimus, ut quam primum hoc Edictum, quo Diocesana Synodi certa dies indicta est, acceperint, singulis septimanis usque ad finem Synodi, in suis Ecclesiis, una cum processione, ubi commode fieri poterit, Sacrum Missæ Officium,



pro optimo in præfata nostra Synodo tractandorum rerum eventu, celebrari faciant & procurent.

Omnes præterea Diœcesis nostræ fideles monemus, & per viscera misericordiæ Christi Domini adhortamur, ut omni studio Christianæ pietatis, & assiduis religiosisque precibus, a Deo misericordiarum & Patre totius consolationis, Nobis negotium tam salutare tractantibus, opem & auxilium implorent, quo adjuvi in hac Synodali tractatione, omnia consilia, sermones & actiones nostras in finem dirigamus, nempe in Christum Jesum, cui in omni justitia & sanctitate servire debemus. In cujus rei fidem hoc Edictum confici, auctoritateque nostra imprimi, & nostro signo muniti, tum manu Notarii Vicariatus signatum, publice proponi, & legitimæ executioni demandari volumus & jussimus. Datum Constantiæ in Palatio nostro Episcopali, Anno a Nativitate Domini Millesimo sexcentesimo nono, septima die mensis Septembris, Indictione septima.

JOAN. ANDREAS DORNSPERGER,  
D. Notarius ff.

Præinsertis igitur literis Pontificiis, & Citatione ad Synodum, per Notarium in eisdem subscriptum, & a tota postmodum Synodo deputatum, decima tertia Mensis Septembris, Anno Domini Millesimo sexcentesimo nono, Pontificatu Sanctissimi Domini nostri, D. PAULI Divina providentia Papæ V. Anno ejus Quinto, per affixionem ad valvas Ecclesiarum, Cathedralis, & Collegiatarum S. Stephani Proto-Martyris, & SS. Joannis Baptistæ & Evangelistæ, in Civitate Constantiensi, rite executioni demandatis; & extra Civitatem, per totam Diœcesin Constantiensem, exceptis locis hæresum labe infectis, omnibus & singulis, quorum interest, legitime per Pedellos ac Nuntios juratos insinuat; Exemptorum quidem Monasteriorum Abbatibus, aliisque illustrioribus Diœceseos Statibus, præter intimationem literarum Convocationis Synodi, etiam per literas a Rma ac Illma Sua Celsit. benevole vocatis, & invitatis, die & tempore præfixo, in celebri, magnoque numero Civitatem Constantiensem ingressi sunt, quorum nomina, dignitates, ac tituli, a calce horum actorum fideliter & quantum eorundem notitia haberi potuit, annotati sunt.

Reliqui partim exemptionis, ac privilegiorum suorum prætextu, partim viva voce, & in scriptis, absentiam suam purgarunt.

Interim pridie quam Synodus celebraretur, pro ejusdem felici auspicio & ingressu,

*Tomus VIII. Concilior. German.*

hora prima pomeridiana, omnium campanarum, in Ecclesiis & Monasteriis Civitatis Constantiensis existentium, compulsatio instituta est, continuato quidem pulsu earundem, per quartam horæ partem; majoris vero campanæ usque ad horam secundam.

## ACTA PRIMI DIEI SYNODI.

**D**ie itaque decima nona Mensis Octobris, mane hora quarta, in Ecclesia Cathed. decantatae sunt Matutinæ cum Laudibus; quas excepit Sacrum Missæ Officium de B. M. Virgine Deipara: sub quo usque ad horam sextam pulsata est campanula, Clerum ad preces Primarum pro more convocans, quo pulsu finito, omnes reliquæ Horæ Canonice, usque ad Nonam inclusive persolutæ sunt. Interim pulsu majoris campanæ, quadrante post sextam, tota Synodus ad Cathedralē Ecclesiam convocata est; id quod singulis subsequentibus diebus, ante Synodicum Convēntum observari consuevit.

Sub pulsu ejusdem campanæ, præmemoratus Rmus ac Illmus Episcopus Constantiensis, cum Aulica sua familia, & Dominis Consistorialibus celebri numero ac ordine, ex Palatio suo prodiit, comitante ipsum Rmo ac Perillustri Capitulo Ecclesiæ Cathed. ad portam ejusdem Ecclesiæ majorem. Ubi posteaquam porrecto aspergillo, astantes aqua benedicta pro more perfudit, per ipsam Ecclesiam, ad subsellium Rmæ ac Illmæ Suae Celsitud. ante medium Altare D. Virgini sacrum, extra Chorum præparatum, processit. Ibique cum reliquis Dominis Abbatibus, paramentis rubei coloris, assistentibus hinc inde Adm. Rdo ac Nobili Domino Sigismundo a Wolffurt, Decano, & Cathedralis Ecclesiæ Aichtatensis Canonico, nec non Adm. Rdo Illri ac Generoso Domino Udalarico Baroni in Königseck & Aulendorff, Ecclesiarum Salisburgensis, Constantiensis, & Augultanæ Canonico, & Collegiatae Ecclesiæ S. Cyriaci in oppido Weissenstaig Præposito, indutus est. Interim Domini Canonici in sedibus, ab utroque latere, juxta Dominum Episcopum collocatis, loca sua, dignitatis & senii habita ratione occuparunt; Rmo Domino Suffraganeo, paulo infra Dominum Episcopum, in Pontificalibus existente.

Porro Adm. Rdi & Clarissimi Domini, Joannes Hausman U. J. D. Rmi & Illmi Episcopi Constantiensis Vicarius & Officialis, Præpositus Colleg. Ecclesiæ S. Joannis Constantiæ: nec non Dominus Joannes Christophorus Hager Decretorum Doctor, Cathed. Ecclesiæ Constantiens. Canonicus, D. Leon-

M m m m m

hardus

hardus Hamerer, Ss. Theol. D., Parochus & Canonic. Eccles. Collegiatae S. Stephani, D. Georgius Benzius, U. J. D. Sigillifer & Fiscalis, & Joannes Andreas Dornspurger, U. J. D. Canonicus dictae Eccles. Collegiatae S. Stephani, singuli Rmi ac Illmi Episcopi Constantiensis Consilarii, in Promotores & Actuarius respectively a Synodo deputandi, in mensa, quæ inter subsellia Dnorum Canonorum media posita erat, confederunt.

Interim Dni Prælati Monasteriorum, baculis Pastoralibus, mitris, & reliquo Pontificali habitu instructi; Ecclesiarum vero Præpositi, Canonici, Decani, Presbyteri & Clerici, in habitu, & amictu suo Ecclesiastico, & Choralis, cum cujusque nomen, ac dignitas, ex catalogo, a Notario, qui postea in Actuarius Synodi deputatus fuit, recitaretur, in eadem Ecclesia Cathedrali præstolati sunt.

Qui cum ex loco editiori promulgaretur, Dominorum in Promotores deputandorum, alter dextrum, alter latus sinistrum tenebat, qui Dominos Abbates, eorum Procuratores, aliosque cujusque nomine, titulo ac dignitate lectos ac vocatos, in sedilia ad utrumque latus medii Templi, quod intra columnas majores, & qua in longitudinem patet, distribuerunt. Et primum quidem locum Rmi ac Illmi Domini Abbatis S. Galli nomine, a dextro latere occupavit, Reverendus & Religiosus Fr. Jodocus Mezler, Canonum Doctor, & ejusdem Monasterii Conventualis. Cumque nomine Rmi ac Illmi Domini Abbatis Campidonensis, nemo compareret, a latere sinistro ejusque primo loco Rmi ac Perillustri Domini Abbatis Monasterii B. M. V. loci Eremitarum Procurator, videlicet Reverendus, Religiosus ac Nobilis Dominus Joachimus a Böldingen, Decanus ejusdem Monasterii, est collocatus; & ita successive, pro cujusque dignitate, statu & gradu, singuli per dictos Dominos Promotores, in sedes instructas, hinc inde repositi sunt: Donec ad tenuioris status Presbyteros & Clericos perventum fuit, qui circum inferius claudebant, & in multa transversa scamna, quæ in eum usum ita inter se disposita erant, ut ambitus transinusque liber ubique pateret, locabantur.

Locis igitur cuique assignatis, Adm. Rmus & Clarissimus Dominus Joannes Hausmann U. J. D. Rmi ac Illmi Episcopi Constantiensis Vicarius in Spiritualibus generalis, Dominos Prælatos, aliosque ad Synodum convocatos, in hæc verba allocutus est:

*Rmi, Rdi, Illres, Nobiles, Magnifici, Venerabiles, Religiosi, & Honorabiles Viri ac Domini. Quamvis Rmus in Christo Pater*

*& Illmus Princeps ac Dominus noster, D. JACOBUS, Dei & Apostolicæ Sedis gratia, hujus Alimæ Ecclesiæ Constant. Episcopus, Dominus Augiæ majoris & Oeningæ, &c. Dominus noster gratiosissimus, propter solam Dei gloriam, pro Ecclesiæ, & Episcopatus sui reformatione, non ut de majoritate, aut præcedentia lites forsitan, & controversiæ suboriantur, ad hanc Synodum vos convocaverit: quia tamen Rma ac Illma Sua Celsitudo non intendit privilegiis, & prærogativis vestris circa Sessionem, in Diocesana Synodo vobis & cuilibet vestrum competentibus, quæ sibi plane perspecta non sunt, in aliquo præjudicare; Ideo hanc præsentem collocationem & ordinem sine vestro & cujuslibet vestrum præjudicio factam esse, vobisque & singulis, jus quod sibi in hoc casu de jure, vel consuetudine competere prætendit, saluum, ac integrum permanere, ex jussu & mandato speciali ejusdem Rmæ ac Illmæ Celsitud. Suae, coram universa Synodo, & specialiter coram Notario, ad conscribenda acta hujus Synodi deputando declaramus & protestamur, atque hanc nostram declarationem, & protestationem, ad acta ejusdem Synodi conscribi petimus.*

Quo peracto, ex mandato Reverendissimi Domini Episcopi, idem Dominus Vicarius, Synodum his verbis interpellavit:

*Rmus in Christo Pater, & Illmus Princeps ac Dominus, D. JACOBUS, Episcopus Constantiensis, per me interrogat omnes & singulos Dominos Prælatos, & alios quoscumque ad hanc Synodum legitime convocatos, anne ad DEI Omnipotentis laudem, & gloriam, Ecclesiæ Catholicæ decorem, & Episcopatus Constantiensis incrementum, Synodus Diocesana Constantiensis legitime indicta, convocata, & congregata, eis aperienda videatur?*

Quo publice dicto, & plerisque Placet respondentibus, Rmus Dominus Episcopus nolter, Synodum aperiendam decrevit his verbis:

*CHRISTI nomine invocato, pronunciamus & decernimus, Synodum Diocesanam Constantiensem, legitime indictam, convocatam, & congregatam, aperiendam fore & esse, prout eandem aperimus, apertamque esse declaramus, IN NOMINE PATRIS, ET FILII, ET SPIRITUS SANCTI.*

Qua sententia promulgata, organis & musica, cum compulsionatione campanarum, decantatus est Hymnus gloriosus: *Te Deum laudamus.* Interim Adm. Rdi Nobiles & Clarissimi

rissimi Domini Jacobus Raslerus, U. J. D. Proto-Notarius, Canonicus Cathedralis & Præpositus Collegiatae S. Stephani Ecclesiarum Constantiae, & Dominus Joannes Jacobus Blarer a Wartensee, Canonicus Cathedr. Constant. & Basileensis, nec non Collegiatae Elwacensis Ecclesiarum, in munere Diaconatus & Subdiaconatus inservituri, ad Sacristiam se conferentes, paramentis rubeis sese induerunt, & ad Rmum Dominum Episcopum processerunt. Absoluto Hymno, præmemoratus Rmi ac Illmi Domini Episcopi Vicarius, Celsitud. ejusdem his verbis allocutus est:

*Rme in Christo Pater, & Illme Princeps, Domine gratiosissime, laudabili consuetudine, in celebrandis Synodis introductum est, ut aliqui viri Ecclesiastici deputentur, qui procurent, ut omnia rite decenterque fiant, & totius Synodi acta fideliter conscribantur. Quare Illmam & Rmam Cels. Vestram pro Synodi hujus congregatae promotione, humillime rogo & requiro, ut viros aliquot idoneos Promotores & Actuarios Synodi, publice deputare & nominare dignetur.*

Cui Rmus & Illmus Dominus Episcopus Constantiensis, respondit his verbis:

*Eligimus, nominamus, ac deputamus ex Capitulo Ecclesiae nostrae Cathedralis, Dominum Joannem Christophorum Hagerum, Decretorum Doctorem, Canonicum; Ex inferiori Clero, Leonbardum Hamerer, Ss. Theologiae Doctorem, Canonicum & Plebanum Ecclesiae Collegiatae S. Stephani, in Promotores. In Actuarium vero, seu Notarium, Joannem Andream Dornspurger, U. J. D. Canonicum praedictae Ecclesiae S. Stephani. Quod si Domini Praelati, vel alii aliquid habeant, quod contra praefatos Promotores, & Actuarium opponere possint, vel velint, facultatem publice proponendi omnibus & singulis concedimus.*

Cui Decreto, cum nemo ex Patribus Synodalibus contradiceret, Dominus Vicarius eosdem Dominos Promotores, & Actuarium his verbis affatus est:

*Cum nemo prodeat, qui contra vos quicquam opponat, vos hic ad Sancta Dei Evangelia praestabitis Juramentum, quod quilibet vestrum Officium sibi injunctum, fideliter, rite, debite & diligenter exequi velit, omni dolo & fraude semotis.*

Quo quidem Juramento, ad delationem Domini Vicarii, per eosdem Dominos Promotores, & Notarium, ad Sancta Dei Evangelia praestito, omnes genua flexerunt, &

*Tomus VIII. Concilior. German.*

Reverend. Domino Episcopo praecinente, Antiphonam: *Veni Sancte Spiritus*, Cantoribusque eam prosequentibus, Dominus Episcopus Versiculum: *Emitte Spiritum tuum*, &c. cum oratione, cecinit.

His peractis, instituta est publica Processio circa summum Templum, in qua ut congruus ordo observaretur, Actuarius Synodi Catalogum omnium praesentium ex cancellis ejusdem Ecclesiae denuo inverso ordine, qui sessioni cujusque conformis esset, recensuit. Et principe quidem loco, Cruce praelata, duo Ceroferarii, admodum Reverendum & Clarissimum Dominum Joannem Christophorum Hagerum, Canonum Doctorem, & Cathedr. Ecclesiae Canonicum, pluviali aureo indutum, & Sacras Reliquias deportantem praebant. Eundem vero Scholares & Alumni S. Conradi subsecuti sunt.

Hos exceperunt Patres Capucini, Religiosi Ordinum mendicantium, videlicet Religiosi Ord. S. Francisci, nempe PP. quos vocant de Observantia, & Conventuales. Mox Religiosi Ordinum, B. Mariae Virginis Carmelitarum, D. Augustini, & D. Dominici. Religiosi Ord. S. Pauli primi Eremitae, & S. Wilhelmi. Deinde Capellani & Succentores Ecclesiae Cathedr., quos antecedeabant Capellani S. Pauli Constant. & Collegiatarum Ecclesiarum S. Joannis & S. Stephani ibidem. Quorum vestigiis illico Procuratores Decanatum ruralium, prout lecti erant, insistebant; subsequentibus Legatis Monasteriorum, & Abbatiarum Sanctimonialium, nec non Canonicis, Ecclesiarum Collegiatarum Procuratoribus. Postmodum procedebant Praepositi Collegiorum saecularium, & Ord. D. Augustini Canonicorum Regularium, Universitatis Friburgensis, & trium Principum Abbatissarum Legati. Post hos lecti sunt, singuli qui intererant Abbates, quos subsequutum est, Rmum & Perillustre Capitulum Cathedr., tum Reverendissimus Dominus Suffraganeus, & post illum Subdiaconus, & Diaconus, atque supranominati Domini Assistentes: demum Reverendissimus ac Illustrissimus Dominus Episcopus Constantiensis, cum Officialibus, Magistratu saeculari Constantiensi, Aulicis, & aliis compluribus Laicis, extremum ordinem confecit.

Finite solenni processione, Praelati, Praepositi, & Canonici, alique Illustrium Statuum Legati, eo ordine, quo antea extra Chorum sederant, superiora Chori sedilia occuparunt. Reliquus Clerus in inferioribus sedibus, & medio Chori spatio substitit. Moxque, ut a Musicis Sacrum Missae Officium de Spiritu Sancto inchoatum est, praecurrentibus Domino Joanne Jacobo Blarer a Wartensee, Subdiacono, & Domino Jacobo

M m m m m 2

Rasle:



Raslero U. J. D. Diacono, Reverendissimus ac Illustrissimus Dominus Episcopus e Sacratio, litus utrumque Adm. Reverendis Nobilibus ac Illustr. Dominis, Sigismundo a Wolfurt, Decano, nec non Domino Joanne Udalrico Barone in Königseck & Aulendorff, stipantibus, prodiit, & prædictum Missæ Officium solenni ritu, juxta Pontificalis libri præscriptum celebravit. Sub qua Missa complures ex Cathedr. Ecclesiæ Canonicis, qui in Sacerdotio constituti non erant, (Canonici namque Presbyteri per se Missas celebraverant) maximæ Cleri parte, & Reverendissimæ Sux Cels. familiaribus, de manu ejusdem Sacram Eucharistiam, quo gratiæ & Indulgentiarum a Sanctissimo nostro, in Bulla præinserta, concessarum, compotes redderentur, ea, qua par est, reverentia, & devoto animi cultu sumpserunt.

Finito Sacrificio Missæ, Reverendissimus Dominus Episcopus deposita casula, & resumpto pluviali rubei coloris, mitratus & pedo innixus, comitantibus Dominis Assistentibus, Diacono & Subdiacono, ac subsequentibus Dominis Prælati, Canonicis, omnibusque Synodum constituentibus membris, extra Chorum ad locum præparatum progressus est.

Quo cum perventum fuit, Reverendissima ac Illustrissima Sua Cels. in genua procubuit, depositaque mitra, quod & a Prælati factitatum, totaque Synodo genua flectente, Antiphonam: *Exaudi nos Domine*, inchoavit, Choro cum Cantoribus, eandem ad finem usque prosequente. Et generatim omnes illæ orationes, & cæremoniæ adhibitæ fuerunt, quas Pontificale Romanum, pro hujusmodi Synodicorum conventuum felici auspicio & ingressu, exprimit usurpandas.

Finito Hymno: *Veni Creator Spiritus*, suggestum conscendit Rmus & Religiosus P. Jacobus Maier, Societatis JESU Theologus, & summi Templi Constantiensis Ecclesiastes, ac subsequenti Oratione: *De optima Synodum celebrandi ratione* Rmum ac Illmum Dominum Præsulem, totius Synodi Proceres ac Clerum cohortatus est.

**T**Acita quadam naturæ convenientia (Rme & Illustrissime Princeps, Rmi, Illustres, Nobiles, Amplissimi Præsules, cæteri Admodum Reverendi, virtute, eruditione ac dignitate quavis spectabiles DD. & PP.) tota propemodum antiquitas consentit, omnem Remp. duabus potissimum rebus administrari: Prudentia & Consilio. Illam Principi inesse, hoc adesse debere. Ut enim prudentia imperantis propria & unica virtus est;

sic sola, nec oneri gubernationis par est, nec satis firma, nisi aliorum consilio stabilietur. Verissime enim dictum esse ab Euripide arbitror: Σ. Φ. ος Τύραννος, τὸν σοφὸν συμβουλεύει. Princeps sapiens, sapientium commercio. Magna namque negotia, magnis adiutoribus egere quis nesciat, cum nec ab Atlante cælestium machinarum pondera sine Hercule sustineri, fabulosa illa priscorum Poëtarum turba comminisci ausa sit? Sed mitto vana commenta, quando ipsa sacrarum historiarum auctoritas nobis fidem facit. Jethro Sacerdos Midian cum cognatum suum Moysen, nimia mole negotiorum, in populo, multitudine prope infinito, ingenio pervicaci nec satis tractabili, judicando pene oppressum vidisset, ratus tam pertinacem laborem & vires excedere imperantis, & populorum regimini non satis prospicere, eo consilio Moysen instruxit, ut curarum parte in alios translata, onus sibi levius ferendo redderet. *Non bonam*, inquit, ὦ Moyses [a], *rem facis. Stulto labore consumeris tu & populus iste, qui tecum est: ultra vires tuas est negotium, solus illud non poteris sustinere. Sed audi verba mea atque consilia, & erit Dominus tecum. Provide de omni plebe viros sapientes & timentes Deum, qui judicent populum omni tempore: si quid autem majus fuerit, ad te referant, leviusque sit tibi partito in alios onere.* Paruit Moyses; nec sic tamen satis expeditam ad omnes difficultates evolvendas sensit sibi esse gubernandi rationem: quare a Deo ipso auxilium & consilium in tam difficili negotio postulare necesse fuit. *Non possum* (clamat Moyses [b] ad DEUM) *solus sustinere hunc populum, quia gravis est mihi.* Quid ageret DEI sapientia? *Congrega*, inquit, *mibi septuaginta viros de Senibus Israël, quos tu nosti, quod Senes populi sint ac Magistri, & duces eos ad ostium Tabernaculi saderis, faciesque ibi stare tecum, ut descendam & loquar tibi, & auferam de spiritu tuo, tradamque eis, ut sustentent tecum onus populi, & non tu solus graveris.* Constitutum ergo nobis sit unius prudentia, non satis gubernari multitudinem, nisi aliorum accedant consilia. Pauca enim aliqua unus videat, unus audiat, ut jure merito ex Græciæ Sapientibus non postremus, multos regis oculos, multas aures desideret.

Quare neminem ex hac corona esse arbitror, qui non tuum Rme & Illme Princeps consilium, imo optimum factum vehementer prober ac collaudet, quo tandem post quadraginta duorum annorum intervallo, in hanc celeberrimam Civitatem Constantiensem Synodum convocare constituiti. Tale namque factum decebat prudentiam tuam, quam natura indidit, longus regimi-

(a) Exod. 18.

(b) Num. 11.

giminis usus confirmavit, ut id felici eventu consequeretur, quod Antecessores tui in diuturnis votis habuerunt. Recte, recte inquam, pervidisti, Diceces. hanc, quam DEI OPT. MAX. munere administras, cui amplitudine Germania non habet parem, quam variarum hæresum vicinia premit, intrinseca pariter & extrinseca mala divexant, non posse firma stabilitate regi, nisi communibus suffragationibus, quod ex Reipub. utilitate sit, statuatur. Habes igitur, Princeps optime, & oculis tuis præsentibus contueris, quos diuturnis votis expetiisti, quos publicis literis evocasti, viros, si numerum spectes, plurimos; si auctoritatem, gravissimos; si virtutem, probatissimos; si eruditionem, literatissimos; si in te affectum, tui amantissimos; si singulorum erga te officium, tibi fidelissimos; si prudentiam, solertissimos; & quod in consiliis dandis Rom. Eloquentiæ parens caput esse voluit, status Reip., morum ingeniorumque hominum in Provincia, maxime gnaros: ut proinde a tot & tam multis non nisi plurima; ab optimis optima; a peritissimis, saluberrima consilia expectare debeamus. Ad quos cum mihi in hoc primo ac celeberrimo confesso sermo habendus sit, nescio, an plura se offerant, quæ animum meum terrent & avocant, quam quæ me ad libere dicendum allicere possunt. Nam *Sapientiam* (c) *inter perfectos loqui*, nec facundia, nec virtus mihi concessit; ille solum potuit, quem Divina Sapientia erudit, quem tubam cælestem, lyram spirituales, organum Dominicum & magnum veritatis præconem Theologus ille appellavit, cui ab aurea dicendi facultate Chrysostomi cognomen est inditum, ut proinde merito formidare debeam, ne aliquis minus oculis me respiciens vetus in me dictum jaciatur:

*Num & Saul inter Prophetas?* (d)

Jubent nihilominus ex altera parte formidinem mente conceptam deponere, & frontem nonnihil exporrigere, tua inprimis Rme Antistes jussio & auctoritas, quæ me hoc loco constituit, quo vel supreme temerarium ambitio nunquam perduxisset: tum etiam vestra PP. amplissimi benevolentia ac prudentia, quarum hæc errores meos facile dissimulare novit, illa etiam condonare. Quam vero dicendi materiam potissimum eligam? De optima Synodum celebrandi ratione dicere mihi constitutum est, argumento, ni fallor, & tempori opportuno, & vestræ expectationi. Dicam vero breviter, quia sic vos desiderare intelligo, & apud eos dico, quibus animi sensa insinuare, est persuadere.

Si quid rectum, si quid excelleus, si quid sanctum homines in votis habere desiderant, semper ad prisca illa sæcula, ad antiquos Ecclesiæ primitiæ mores adspirant. Hinc illas voces sæpius ingeminari audimus: O quis nobis referat aurea illa sæcula, felicissimam illam ætatem, in qua prisca fides, vera pietas, sincera charitas floruit? Quod si perfectissima forma vivendi in populo primæ Ecclesiæ viguit, minime dubitandum est, optimam quoque regendi rationem in ejusdem Ecclesiæ Rectoribus constituisse; ut proinde recte facturus videar, si primam illam Apostolorum de rebus in fide ac moribus controversis Synodum Hierosolymis celebratam, vobis pro forma ac idea, ad quam præsentem vestram Synodum conformare debeatis, proposuero. Illam S. Lucas breviter, ut asserit, describit in Actibus Apostolorum. (e) Quidam de Phariseorum secta ex Judæa in Syriam & Antiochiam atque Ciliciam descendentes, gentiles noviter ad fidem conversos falsis doctrinis turbare, atque eorum salutem in circumcisione & Mosaicæ Legis observatione constituere nitentur. Cui malo ut occurreretur, Hierosolymis Apostoli & Seniores convenerunt, & cum causa in utramque partem acriter disputata fuisset, Petrus suam sententiam gravibus verbis proposuit, quam Barnabas & Paulus signis & prodigiis inter gentes factis; Jacobus Hierosolymorum Antistes Prophetarum oraculis confirmavit, reliquos Apostolorum & Seniorum Senatus ipsa sua taciturnitate comprobavit; ac tandem unanimi consensu decretum est, ne gentes Mosaicarum observationum iugo gravarentur. Habetis quasi compendio descriptam formam Concilii. In quo sive causam ejus & principium intueor, sive progressum & finem contemplor, manifeste comperio ex rectissimo rationis præscripto, immo ex ipso Spiritus Sancti instinctu ac ductu omnia perfecta fuisse. Agite ergo PP. Amplissimi, admoveamus lapidem Lydium ad opus nobis propositum, & bonæ Synodi condiciones examinemus: atque inprimis quid in personis huic Synodo præsentibus derivandum sit, indagemus. Prælidem Concilii agnoscere S. Petrum persuadeor, cum quia primus ipse sententiam dicit, tum quia cæteri ejus auctoritate moti, sententiæ acquiescunt. In hoc Conventu Præsidem habetis Rmum vestrum Episcopum, cui eam esse auctoritatem in hanc Synodum, quæ D. Petro fuit in Hierosolymitanam, nemo ambigit, nisi qui inter Theologos parum versatus nescit Apostolis Episcopos succedere, atque eorum quemque id sibi juris in Ecclesiam suam vendicare, quod Pontifex in universam fideli-

M m m m m 3

um

(c) 1. Corinth. 2.

(d) 1. Reg. 12.

(e) Act. 15.

um congregationem habet. Quare vestri officii erit, ejus auctoritatem in omnibus revereri, sententiam reverenter audire, justæ voluntati prompte obsequi, ac denique ejus definitionibus concordissime acquiescere. In vestris vero personis, qui Præsidi Consilarii assideris, quid desiderem? Totam vestri muneris functionem S. Petrus duobus verbis non minus bene, quam apposite expressisse mihi videtur, quando suos Assessores his titulis compellavit: *Viri fratres, vos scitis, quoniam, &c.* Viros honorifice, fratres amice appellat, & simul nos instruit, ad Conventus Ecclesiasticos, non nisi viros, non nisi fratres adhiberi debere, viros ut prudenter, fratres ut amanter: viros ut fortiter, fratres ut concorditer agant. Itaque ab hoc nostro confesso omnis procul abesto scemina. Nulla Reip. aut firma aut diuturna felicitas constitit, quæ mulierum consiliis fuit gubernata. Telemachus apud antiquissimum Scriptorum Homerum, omnem publici muneris curam matri Penelope, quamvis lectissimæ sceminæ, denegat, & ad colum fufumque remittit.

*Ergo domum (f) mater repetas, muliebria  
penſa*

*Atque opera exercens, telasque & pendula  
fila*

*Et calatibos relegas, famulasque ad lumina  
longis*

*Adhibeas penſis, operumque adiſſe labores  
Ipsa jube; nam ſermo viris debetur & oris  
Officium & ratio, &c.*

Quis singulis hominibus sua munia assignavit sapientius Salomone? at ille inquirens mulierem non imbellem, sed fortem, non ociosam, sed laboriosam, non nugigerulam, sed constantem, non stolidam, sed sapientem ac providam, quibus studiis deditam scribit? *Quæſivit, inquit, [g] lanam & linum, & operata est consilio manuum suarum. Manum suam miſit ad fortia, & digiti ejus apprehenderunt fufum. De nocte surrexit, deditque præſeclam domesticis ſuis, & cibaria ancillis ſuis, & reliqua œconomix muliebris ministeria exercuit; inter quæ nulla gerendi Magistratus, nulla publicæ functionis fit mentio. Aliena hæc a scemina, viri sunt propria. Nobilis (b) in portis vir ejus, quando ſederit cum Senatoribus terræ.* S. Paulus mulieribus in Ecclesia etiam discendi gratia loqui non permittit: ego ad docendum, ad consultandum de rebus summis, ad clavum Reipub. mulieres in hac Synodo admittam? Absit hoc a me, absit a vobis PP., nisi bonum, nisi felicitatem a nostro conventu abesse malimus. Intelligitis, opinor, me non tam muliebre sexum, quam muliebre

animum a vestro consensu excludere velle, & contra viros eviratos pugnare. Poſſe enim sub virili toga muliebre mentem latere, qui dubitat, ex Diogenis, meridiana luce, ad exiguum lucernæ lumen, in media virorum turba, virum quæritantis Philosophia responſum petat, & audiet, homines quidem eſſe permultos, viros autem perpaucoſ. Barba virum duntaxat ornat, non facit, vetus eſt, ſed verum verbum. Ergo viros vos eſſe oportet Pp. Synodici, hoc eſt, maculas virtutes pectore gerere. Viros maxime commendat prudentia, armat zelus, hoc eſt, Religionis ac pietatis tuendæ amor, corroborat fortitudo atque constantia. Prudentia opus habetis, ut, quæ agenda ſunt, perſpiciatis, zelus ad audendum impellat, robur animi ac constantia omne impedimentum amoliat. Quæ virtutum catena quam vobis ſit neceſſaria, ex ſine, ob quem conveniſtis, clare intelligetis. Antiquis id ſemper in more poſitum fuiſſe, ex hitoriis diſcimus, ut non niſi ob graviffimas cauſas magnorum ac plurium conventus agerent. Hinc quod Romani tributis aut centuriatis Comitibus non perfecerunt, ad curiata referre ſunt ſoliti. Hebræi quoque, ut ex Joſepho refert Illuſtriſſ. ac Doctiſſimus Cardinalis Baronius, tria Judiciorum genera exercuerunt, quorum ſupremum, quod ipſi Sanedrim, Græci *ovideior* appellant, tum primum cogebant, quando de maximis cauſis: Religionis, Sacerdotio, Propheta controverſia incidit. Quod ſi celebres conventus graves ſemper cauſas habuerunt, vos tanto numero, poſt aliquot annorum decades ob leves cauſas convocatos eſſe, exiſtimabimus? Concilium Hieroſolymitanum coëgit hæreſis Phariſæorum judaizantium; vos non una hæreſis, ſed tot propemodum circumſtant, quot beſtia illa Babylonica in Apocalypſi monſtroſa capita protulit; quas ſi amplius præcavere non poteſtis, extirpare tamen veſtro ſtudio, veſtra induſtria, gladio ſpiritus, armatura Dei debetis. Apoſtoloſ Hieroſolymas convocavit indiſcretus legis Moſaicæ zelus, cujus jugum, quod nec ipſi Judæi, nec Patres eorum portare potuerunt, gentibus converſis imponere conabantur. Sed hiſ calamitoſis temporibus malitia hominum eoſque excreſcit, ut non durum legis jugum obtrudere, ſed ſuave jugum Chriſti & onus leve, quod Patres noſtri jam a mille ſexcentis annis tanta facilitate ſuſtinuerunt, ab humeris noſtris moliantur excutere. Docent ex Cathedris omnem vivendi licentiam hæretici, Divinorum præceptorum obſervantiam impoſſibilem, piarum operationum exercitationem otioſam, immo pernicioſam clamitant, Sacroſanctum Pœnitentiæ forum, quo

(f) Hom. odif. 1.

(g) Prov. 31.

(b) 1. Corin. 14.



quo hucusque omnem disciplinam Christianam, ubi adhuc viger, conservatam, ubi intercidit, restauratam videmus, immanem conscientiarum carnificinam vociferantur. Reclamant quidem huic impiæ licentiæ & licentiosæ impietati verbis Catholici, repugnant sententiis, refutant argumentis, sed pro dolor, eandem impietatem multi tuentur vita, profitentur factis; dum passim ita vivitur, ut a populo, a Clero, a maximo, a minimo, ab omni gradu & ordine Divinus cultus negligatur, operum Sanctorum usus jaceat, & in eorum locum comestationibus, carnis deliciis, luxui, lasciviæ, vitiis universis vacetur. Quam pauci hodie mortificationem JESU in suo corpore circumferunt, (i) ut vita JESU in illis manifestetur? Quam multi delicias Sardanapali, luxum Sybaritarum ita moribus exprimunt, ut vita ipsa, velut tessera, ostendant se Epicuræe potius, quam Christianæ militiæ nomina dedisse. Hæc, & his graviora vitia emendare, propulsare & extirpare tenemini, si vestri muneris obligationem recte perpenditis. At quanta ad hoc opus moliendum prudentia exigitur, quanta circumspectio, ut dum prodesse vultis, obesse non probemini? Hoc etenim tempore ea est perversitas hominum, ut ex curatione vulnerentur, ex pharmaco venenum hauriant, nisi prudenter & discrete medicina applicetur. (k) Prudentiæ tres functiones ex Aristotele, Angelicus Doctor constituit, nimirum bene consultare, sincere judicare, & fortiter executionem præcipere. Quam bene omnes hujus virtutis partes expleverint Hierosolymitani illi Patres, ex Scriptura facile innoscitur. Primo namque de quæstione propolita facta est inquisitio magna, rationes firmæ cum a S. Petro, tum a S. Jacobo in medium prolatae, quæ omnia ad consultandi munus spectant. Deinde ad judicium perventum est in hanc formam: *Visum est Spiritui Sancto & nobis, nihil ultra imponere vobis oneris, quam hæc necessaria, ut abstinere vos ab immolatis simulacrorum & sanguine & suffocato & fornicatione; a quibus custodientes vos, bene agetis.* Denique ut executioni mandarent, quod prudenter judicatum est, miserunt Judam & Silam, qui cum magna consolatione fratres confirmaverunt. Hic rursus vos adhortor PP. Amplissimi, ut semel præfixam vobis agendi ideam, nunquam non intueamini. Ac imprimis seria a vobis deliberatio instituat, quibus mediis, quæ ex locorum, temporum, personarumque circumstantiis metienda sunt, tantis malis obvenire possitis. In judicandi vero munere duo ex Apostolica forma in vos præcepta derivare optarem, unum ut quicquid agitis in Spiritu San-

cto agatis. Spiritus ille sit Auctor, sit Director, sit Promotor, mentes vestras illuminet, pectora suo igne accendat, quod tunc demum consequemini, si puritate mentis, rectitudine intentionis, fervore charitatis vos digna Divini illius flaminis habitacula effeceritis. Alterum est, ut sicut illi, temporum & morum conditione sic postulante, sublata legis severitate, solummodo necessaria onera imposuerunt; ita vos e contrario nihil eorum statuere prætermittatis, quæ ad vivendi licentiam refrenandam, ad disciplinam Ecclesiasticam instaurandam vobis necessaria esse videbuntur: & quod a vestris subditis fieri postulatis, eo ipsos exemplo vestro, quæ compendiosissima persuadendi ratio est, ducatis, *Facti*, ut D. Petrus [1] loquitur, *forma gregis ex animo.* Denique cum recta statuisse nihil aut parum profit, nisi quæ imperata sunt, fiant, magna vobis animi constantia agendum est, ut nihil eorum, quæ statuta sunt, aut pertinaciter repudietur, aut negligenter intermittatur. Itaque proderit etiam mittere Judam & Silam ad fratres tota Provincia seu Diocesi dispersos, hoc est, Visitatores & Inspectores, qui eo nomine sint commendandi, quod traderint animas suas pro nomine Domini nostri JESU Christi, quibus ea cura ac sollicitudo sit, ut Decreta vestra & Senatusconsulta populis proponant, eadem statuta, sancta, perpetua esse velint. Atque his ferme functionibus integrum virorum munus, omni ex parte explebitis.

Supereſt ut quomodo in hac Synodo fratrum vobis nomen ac amorem vindicetis, paucis exponam. Sicut nihil adeo inimicum est bonis consiliis, quam inter consules dissensio, ita ausim affirmare, unicuique consultationum firmamentum esse concordiam. Sed quid dico sana consilia firmari concordia? Plus dicam. Nescit vinci, quicquid concordie voluntatum consensu aliquando coaleuit. Quid debili virgulto debilius? at societate & conjunctione cum aliis adeo forte efficitur, ut quod seorsim levi conatu puer frangeret, robustissimi viri vires accommatum omnem eludat. Notus est Phrygiæ illius tabulatoris Æsopi apologus de virgarum fasciculo, quem parens moriturus filiis suis frangendum proposuit. Conati sunt singuli colligatum dirumpere, sed conati tantum, minime vero consecuti sunt, quod maxime cupierunt; dissolutum vero fascem minimus natu nullo negotio fregit, rupit. Simile refert Plutarchus de Scyluro Scythæ, qui octoginta liberorum pater, cum jam moriturus esset, fascem jaculorum singulis porrexerat & frangere jussit, quod cum nemo eorum præstare conando posset, ipse singula

(i) 2. Corintb. 4.

(k) 2. 2. 4. 47. art. 9.

(l) 1. Petr. 5.

la exemit jacula, iisque sine negotio frangentibus omnia, quid symbolis hinc voluerit, explicavit. Si, inquit, concordēs fueritis, validi invictique manebitis: Sin vero discordes, imbelles & imbecilles facilesque expugnati futuri estis. Certum ergo sit, quod experientia etiam quotidiana nos docet: concordia res parvas crescere, discordia maximas dilabi. Nec mirum. Ut enim navis per medios fluctuum vortices, interque furibundos ventorum turbines illæsa pertransit, si vela idem litus respiciant; ita suaviora quoque ratis, ludibrium ventis debet, nisi consiliorum velis consentientibus ad unum portum dirigatur. Felicem hujus navis cursum duabus potissimum rebus impediri, gravissimi politicarum rerum Scriptores asserunt. Unum est contumacia velut remora quædam, qua aliqui propriæ persuasioni ita pertinaciter inhaerent, ut cujusvis consilii quamvis egregii, quod ipsi non adferunt, sint inimici, & ex suo tantum ore sapere posse videantur. Alterum sunt affectuum inordinatorum scopuli, in quos privata utilitatis ventus consiliorum cymbam sæpe cum publico exitio impellit, nisi diligentissime caveantur. Quæ omnia si a vestro Senatu longissime, uti non dubito, abfuerint, & fraterna concordia eritis illustres, & ad omnes difficultates superandas fortes. *Frater enim [m] qui adjuvatur a fratre quasi civitas firma, & judicium quasi vestes urbi-um*, ex Dei ore sapientissimus Salomon pronuntiavit. Scio equidem privata studia, & rei familiaris controversias solere aliquando fraternos animos in diversas trahere sententias, & mutuis aliquando dissociare odiis; quamprimum vero ab externo inimico communia omnium fratrum bona invaduntur, quamprimum parentis aut familiæ nomen & auctoritas violatur, mox tantisper dissimulatis privatis dissidiis, in veterem amicitiam coalescere; seque pro paterna hæreditate, pro familiæ honore, tam conjunctis animis opponere, ut omnem facile difficultatem perrumpant. Videbis nonnunquam oviculas patenti campo inter sese arietare; cernes subinde gallinaceos pullos in pugnam descendere, unguibus, rostellis se mutuo dilacerare, & implacabiles inimicitias ostentare; statim vero ut hi milui, illæ accipitris præsentiam senserint, depositis odiis in unum coire; ipso naturæ instinctu edocti, etiam propriæ incolumitati magis prospectum fore, si publico hosti conjunctis viribus obsistant, quam si privata dissidia cum certo suo exitio prosequantur. Quod si vestris quoque animis Patres penitus persuasum fuerit, vos in communi causa cœlestis Patris, qui vos in Filios adoptavit, convenisse,

pro paterna hæreditate, quæ est Ecclesia Dei, certare, a Christi grege communem hostem, lupum infernalem, hæreses, vitia propellere, nihil proprii commodi quærere debere, omnino confido nihil futurum, quod fraternam vestram concordiam dissolvat, sed potius omnia vestra consilia ab hac charitate vim roburque sumptura, quibus ad machinationes omnes adversariorum perfringendas fortes & invicti efficiamini.

Architecturæ vestræ conspexistis ideam, Patres integerrimi, intellexistis Concilii antiquissimi, augustissimi, sanctissimi formam: facite ergo secundum exemplar, quod vobis monstratum est in Monte Sancto Sion. Hoc commissi vobis muneris postulat obligatio, exigit ovium subditarum necessitas, expectat Christi Sanguine redempta Ecclesia, flagitat Dei amor. Cogitate vos non pro agris, sed pro aris, non pro vestris fortunis, sed pro Christi hæreditate, non pro liberis, sed pro filiis Dei tuendis convenisse: pro animabus, inquam, fidelium, quas Christus non corruptibilibus auro & argento, sed pretioso suo Sanguine emit, redemit: quas vestræ curæ ita commisit, ut sanguinem earum, immo sanguinem suum, si vel vestra negligentia, vel conniventia pereant, & præda hostibus fiant, de manibus vestris sit exacturus. Sed mihi jam dudum vestra benevolentia abutenti, receptui; vobis, classicum canat Apostolicus Doctor, tuba cœlestis, verbis, quæ primo Philippensibus (n) intonuit. Si qua consolatio in Christo, si quod solatium charitatis, si qua societas spiritus, si qua viscera miserationis, implete gaudium meum, ut idem sapiatis, eandem charitatem habentes, unanimis, idipsum sentientes, nihil per contentionem, neque per inanem gloriam, sed in humilitate Superiores sibi invicem arbitantes, non quæ sua sunt, singuli considerantes, sed quæ aliorum: ut probetis potiora, (o) ut sitis sincere & sine offensa in diem Christi, repleti fructu justitiæ per Jesum Christum in gloriam & laudem Dei.

H O C  
NOS OMNES VOVEMUS,  
VOS AGITE.

D I X I.

Qua Oratione ad finem deducta, Adm. Rdu & Clarissimus Dominus Joannes Christophorus Hager, Decretorum Doctor, Cathedral. Ecclesiæ Canonicus, primus Synodi Promotor, totum Synodicum Conven- tum, his, quæ sequuntur conceptis, verbis affatus est.

*Rmi, Rdi, Illustres, Nobiles, Venerabiles, Religiosi Viri ac Domini observandi, Rmus*

in

(m) Proverb. 18.

(n) Philip. 2.

(o) Philip. 1.

in Christo Pater ac Illmus Princeps ac Dominus, D. JACOBUS, Episcopus Constantiensis, Dominus noster Clementissimus, sub pena excommunicationis mandat ac præcipit omnibus ac singulis in Synodo Diocesana, hic præsentibus, & ad eandem vocatis, ne aliquis absque Rmæ ac Illmæ Cels. Suae licentia & consensu discedat, donec Synodus hæc debite finita, & cum Benedictione dimissa fuerit. Porro eosdem hortatur, ut omnes in diversoriis, hospitibus, & aliis ubique sese modeste decenterque gerant, ut eorum bona conversatio, aliis, præsertim vero Laicis, sit in exemplum, tum ut querelas, & gravamina sua, si quæ habeant, conjunctim vel divisim deputatis Consiliariis, singulis diebus durante Synodo in Palatio Episcopali, ab hora prima pomeridiana, usque ad secundam congregatis, in scriptis offerant, ut de iisdem mature deliberare, & quantum per horum temporum difficultates fieri potest, remedium adferri valeat. Denum omnes die crastina finito pulsu majoris campanæ, in hoc loco, habitu (Pontificalibus exceptis) cujuslibet statui ac ordini congruenti, de negotiis Synodalibus tractaturi conveniant.

Quibus omnibus expeditis, data prius solenni & Episcopali benedictione, a Reverendissimo Domino Præsidente Synodicus confessus, ad prandii refectionem dimissus est.

Horæ postmodum pomeridianæ ejusdem diei, spectandæ Tragico Comediæ de S. Martyre JUSTO, in PP. Societatis JESU recens extructo Gymnasio, celebratæ, impensæ sunt.

## ACTA SECUNDI DIEI SYNODI.

Postero die ad medium septimæ, Sacrum Missæ Officium celebravit Adm. Rdu & Religiosus Dominus Martinus, Abbas Monasterii S. Blasii, de Sanctissima Trinitate, cum Collecta de Spiritu Sancto, ministrantibus eidem duobus ex Ecclesiæ Cathedr. Constant. Succentoribus: Missa finita, Rmus Dominus Episcopus, indutus supra Rochetum (ut vocant) amictu, stola, & pluviali rubeo, assistentibus eidem duobus Dignitatibus præmemoratis, similiter indutis rubeis ornamentis, ex Choro processit, ad locum præparatum, quem Reverendissimum Capitulum Cathedrale, Domini Prælati, & alii subsequuti sunt. Sessione competenti ab omnibus occupata, Rmus Dnus Episcopus orationem: *Adsumus Domine &c.* clara voce recitavit.

Tomus VIII. Concil. German.

Quo facto, Reverendus & Clarissimus Dominus Leonhardus Hamerer, Ss. Theologiæ D., Parochus & Canonicus Ecclesiæ Collegiæ S. Stephani, secundus Synodi Promotor, conversus erga Synodicum conventum & universum populum, in hæc verba profatus est:

Rmus in Christo Pater ac Dominus, D. JACOBUS, Episcopus Constantiensis, sub pena excommunicationis præcipit ac mandat, ut omnes Laici, qui non de voluntate, & consensu Rmæ ac Illmæ Suae Cels. adsunt, hinc recedant.

Quo Edicto promulgato, Laici omnes Templum Cathedr. egrediuntur; Linguae vero latinæ ignari, per Aedituos & Pedellos ad hoc deputatos, excedere jussi, portæque ejusdem Ecclesiæ occlusæ sunt.

Postmodum primus Synodi Promotor, Synodum hisce verbis allocutus est:

Rmi, Rdi, Venerabiles & Religiosi Domini; Quia ad præsentem Synodum universi & singuli Domini Prælati, tam Sæculares, quam Regulares, exempti & non exempti, atque etiam totus Clerus Civitatis & Diocesis Constantiensis, & cæteri omnes, qui de jure vel consuetudine, Synodo interesse debent, per authenticas, & edictales literas legitime convocati sunt. Ideo Rmæ & Illmæ Domine Præsidentis, ego hujus Synodi deputatus Promotor a Rma & Illma Celsitudine Vestra decerni postulo, ut literæ Convocationis, cum earundem Executione, per Notarium ejusdem Synodi publice perlegantur.

Cui Domini Promotoris petitioni, Reverendissimus Dominus Episcopus Constantiensis, benigne annuendo respondit: *Decernimus.* Quo Decreto audito, Actuarius seu Notarius Synodi, literas Indictionis & Convocationis ejusdem, una cum earundem executione, per eum in valvis Ecclesiarum Cathedr. & Collegiarum S. Stephani & S. Joannis Constantiæ facta, publice perlegit. Quia vero infinitum fuisset, omnes & singulas Pedellorum & Cursorum extra Civitatem Constantiensem & per totam Diocesin insinuationes dd. literarum legendo percurrere; Idcirco eadem Executiones a Notario Synodi justæ & legitimæ repertæ, & in scriptis comprehensæ, toti Synodico conventui exhibitæ & monstratæ sunt, a quolibet pro arbitrio legendæ, ac lustrandæ.

Deinde idem Dominus Promotor hæc verba subjunxit:

Audiistis Rmi & Rdi Patres & Domini, Literas Convocationis Synodi omnibus

N n n n

&



& singulis, qui de jure vel consuetudine Synodo Diocesana interesse debent, transmissas, & legitime insinuatæ fuisse. Ut igitur inobedientes & contumaces ab obedientibus discernantur, peto, ut Notarius hujus Synodi Catalogum omnium specialiter vocatorum, alta voce legat, & ubi quis se nomine vel dignitate sua nominari audiet, mox respondeat, suamque verbo: Adsum, personalem præsentiam significet, qui vero tanquam Procuratores Collegiorum, Capitulorum, Monasteriorum, aut alias alieno nomine hic adfuerint, illi prodeant, & mandata sua Rmi ac Illmi Domini nostri Vicario in Spiritualibus exhibeant, ut ea examinare ac recognoscere, & utrum sufficientia sint nec ne, suo tempore, vel ad ipsam Synodum, vel ad Reverendissimum Dominum Episcopum, tanquam Ordinarium, referre possit. Quod si pro hujusmodi recognitione Domini Prælati, & cæteri Patres, unum vel plures, Domino Vicario adjungere velint, illud eis Rmus ac Illmus Dominus Episcopus permittit.

Quod dicto, Notarius Synodi omnium & singulorum ad Synodum vocatorum nomina, ex Catalogo recensuit.

Proinde singuli proprio nomine comparentium, ut nomina sua exaudierunt, verbo *Adsum*, sese propalarunt; qui vero alieno nomine aderant, ad lectum Dominorum suorum Principalium nomen vel dignitatem in medium prodierunt, & mandata procuratoria, vel realiter obtulerunt, vel in manus Notarii Synodi, de propediem transmittendis, caverunt.

Porro recognitio mandatorum exhibitorum a solo Domino Vicario, & Dominis Consiliariis Ecclesiasticis facta est; eo quod Domini Prælati, cæterique Patres Synodici, nullam de eorundem integritate suspicionem moventes, neminem eisdem adjunxerint.

Quibus peractis, alter Dominorum Promotorum, Dominus D. Hamerer, citatorum & ad Synodum vocatorum, quorumcunque sive sæcularium, sive Regularium, in Catalogo a calce actorum hujusmodi expressorum, non comparentium contumaciam accusavit, atque in pœnas Juris Canonici, & S. Tridentini Concilii incidisse declarari petiit, his verbis:

*Rme & Illme Princeps ac Domine, Domine Clementissime, cum ex recensito Catalogo appareat, quosdam ad hanc Diocesana Synodum legitime citatos, & convocatos, qui de jure vel consuetudine Synodo interesse te-*

*nentur, neque Procuratores, neque emanfionis, & absentia sua Excusatores misisse, sed contumaciter contra Sacrorum Canonum, & Sacri Tridentini Concilii Constitutiones emanfisse. Ideo omnium & singulorum non comparentium, contumaciam accuso, atque a Rma ac Illma Celsitud. Vstra obnixè peto, ut non solum tanquam contumaces, sed etiam in pœnas Canonicas incidisse, declaret, atque nihilominus contumacia & absentia illorum minime obstante, in Synodo, ad ea procedi decernat, quæ pro honore, & gloria Dei, pro Ecclesiæ & Fidei Catholicæ incremento, & pro morum reformatione, & disciplina necessaria videbuntur.*

Respondit Reverendissimus Dominus Præsidens.

*Decernimus, ut non obstante contumacia, & absentia non comparentium, nihilominus in Synodo procedatur, tractetur, & determinetur, prout Nobis & Patribus præsentibus visum fuerit, pœnas vero Juris, & Concilii Tridentini in contumaces statutas, spatium desuper maturius deliberandi sumentes, pro hac vice suspendimus.*

Lato hujusmodi Decreto, Prior Dominorum Promotorum, Dominus D. Hager, Synodalem confessionem, hisce affatus est verbis:

*Rmus in Christo Pater & Illmus Princeps ac Dominus, D. JACOBUS, Episcopus Constantiensis, quantum hujus Diœcesis Constantiensis, & ejusdem statuum, ac personarum, conditio & qualitas, horumque temporum, in quibus versamur, difficultas ferre potuit, nova Statuta Synodalia, Sacris Canonibus, & Tridentino Concilio conformia confici, & conscribi curavit, quorum lectio, nunc publice ex Cancellis alta, & intelligibili voce fiet: Quare ex mandato Rmæ & Illmæ Suae Celsitud. vos omnes hic præsentis, & quorum interest, in Domino adbortor, ut diligenter auscultetis, & ea, quæ ulteriori deliberatione indigere putaveritis, in notam sumatis, ut eo melius super iis deliberare, sententias vestras dicere, & Rmæ ac Illmæ Celsitudini Suae, pro excessibus corrigendis, & moribus reformatendis, atque pro Ecclesiasticæ libertatis conservatione, aliisque incumbendis negotiis, salutaris vestro consilio & auxilio assistere possitis.*

Interim Venerabilis Dominus Joannes Oschwaldi Præpositus Collegiæ Ecclesiæ in Oppido Imperiali Überlingensi, & Parochus ibi-

ibidem, suggestum ascendit, & lectionem novorum Statutorum Synodaliū aggressus est.

Qua paulo post decimam durante, Rmus ac Illmus Dominus Præsident, Synodum cum benedictione ad prandium dimisit.

Porro secundus Promotor Synodi, Dominus D. Hamerer pro continuatione lectionis Statutorum, secundam pomeridianam indixit, ac promulgavit.

Postmodum signo a majori campana, per quartam horæ partem dato, ad horam secundam præfixam convenientibus, Rmo ac Illmo Domino Præside, cum universis Prælati, & Patribus Synodalibus, in loco solito, præfatus Reverendissimus Dominus Præsident, Orationem: *Adsumus Domine S. Spiritus, &c.* protulit. Dein Laicis exire jussis, portisque oclusis, lectio Statutorum Synodaliū, usque ad horam quintam instituta est.

Interim Rmus Dominus Vicarius, & reliqui Domini a Synodo deputati, in Sacristiam superiorem se recipientes, procuratoria mandata recognoverunt.

Demum lectione Statutorum, usque ad horam quintam continuata, rursus cum benedictione Synodus dimissa est; & medium septimæ posteri diei, pro Sacro Missæ Officio audiendo, & residua Statutorum parte legenda, per alterum Synodi Promotorem deputatum est.

### ACTA TERTII DIEI SYNODI.

**T**ertia postmodum die, nimirum XXI. Octobris, ad pulsum majoris campanæ, convenerunt omnes Synodum constituentes Patres, Missæque de S. Ursula & Sociabus, ab Admodum Reverendo & Clarissimo Domino Joanne Christophoro Hagero, Decretorum Doctore & Cathedr. Ecclesiæ Constant. Canonico, duobus Canonicis, videlicet Rdis, Nobilibus & Clarissimis Dominis Jacobo Raslero U. J. D., & Jo. Jac. Blarer a Wartensee, in munere Diaconatus & Subdiaconatus ministrantibus celebrata est. Qua finita, Rmus & Illmus Dominus Episcopus processit extra Chorum, ad locum consuetum, quem Capitulum Cathedrale & reliqui Domini Prælati, totusque Clerus subsequutus est. Cæterum ut a Rma ac Illma Sua Celsit. oratio: *Adsumus Domine S. Spiritus, &c.* recitata est, & locum suum quisque tenuit, laicis exclusis, portisque obsecratis, Lector in promulgatione Constitutionum Synodaliū perrexerit. Ea cum ante meridiem finire commode non posset; Prior Do-

minorum Promotorum primam horam pomeridianam, pro continuatione lectionis finalium Statutorum indixit: simulque ex mandato Rmi ac Illmi Domini Præsidentis, ordines & status Ecclesiasticos in certas classes distribuit, locaque congrua, quantum fieri licuit, eisdem assignavit, subsequentibus verbis Synodum affatus:

*Rmi, Rdi, Venerabiles Viri ac Patres, Rmus Dominus Episcopus ac Præsident noster concedit vobis omnibus & singulis spatium consultandi & deliberandi, super Constitutionibus Synodalibus jam prælectis & promulgatis, & a vobis omnibus auditis, usque in crastinum. Quod ut commodius facere possitis, in certas classes vos distribui, atque loca idonea, ubi post prandium finita Statutorum Synodaliū lectione conveniatis, vobis assignari, singulisque classibus, unum exemplar Statutorum dari mandavit.*

*Et primo quidem loco Rmum & Perillustre Capitulum Cathedrale in loco Capitulari solito convocabitur.*

*Secundam classē obtinebunt Domini Abbates, Præpositi Regulares & Procuratores absentium Prælatorum, nec non trium Principum Abbatissarum, & Universitatis Friburgensis Legati, in hypocausto majori Palatii Episcopalis conventuri.*

*Tertiæ classis nimirum Præpositis, Decanis & Canonicis, Colleg. Ecclesiarum Procuratoribus attributum est, hypocaustum Dominorum Canonicorum Cathedr. Ecclesiæ contiguum.*

*Quartam classē conficiant omnes & singuli Ruralium Capitulorum Decani ac Procuratores, iisdemque Ecclesiæ Colleg. Ss. Joannis Baptista, & Evangelistæ deputata est.*

*Quinta demum classis consistet in conventu Provincialium, Priorum, Guardianorum, omniumque Procuratorum, vice ac nomine quorumvis Monasteriorum, utriusque sexus comparentium, iisque Ecclesiæ D. Dominici pro loco congruo, destinata est.*

Quæ locorum assignatio, ut a prædicto Domino Procuratore Synodi promulgata est, ad binas Ecclesiæ Cathedralis valvas in scriptis quoque per Notarium Synodi publicata & affixa est.

Præinserta igitur classium deputatione tum oretenus, tum in scriptis publicata, secundus Promotor Dominus D. Leonhardus Hamerer, Synodum his verbis interpellavit:

N n n n a

Rmus

*Rmus Dominus Episcopus, & Præfident noster, omnius præcipit, ut in prandio finita Statutorum Synodaliū lectione, omnes & singuli in loca sibi assignata concedant, & de Statutis Synodalibus prælectis, deposito omni humano affectu, solam Dei gloriam & bonorem, & Ecclesiæ Catholicæ, atque Episcopatus Constantiensis, in spiritualibus incrementum præ oculis habendo, inter se tractent, & die crastina Missa solenni finita, in hoc loco, & communi congregatione Rmæ & Illmæ Celsitudini, sententias suas in scriptis offerant.*

His peractis, Synodus cum benedictione ad prandium dimissa est.

Cæterum cum Rmus ac Illmus Dominus Episcopus a prandio, residuæ Statutorum Synodaliū lectioni, ob certa quædam occurrentia impedimenta, præsidere non posset, ejusdem vice ac nomine, Rmus Dominus Joannes Jacobus, Episcopus Sebastienfis, & Rmæ ac Illmæ Sux Celsitudinis in Pontificalibus Vicarius, præfuit.

### ACTA QUARTE ET QUINTÆ DIEI SYNODI.

**Q**uarta postmodum die, nimirum XI. Calendas Novembris, convocata de more per majorem campanam Synodo, ad medium septimæ, solenne Missæ Officium decantavit, Adm. Rmus Dominus Petrus Emberger, Præpositus Collegiæ Ecclesiæ Beronensis, duobus ex Succentoribus Cathedr. Ecclesiæ eidem inservientibus. Quo finito, Rmus ac Illmus D. Præfident pronuntiata primum alta, & intelligibili voce consueta oratione: *Adsumus Domine S. Spiritus, sese in superiorem Sacristiam, cum suis Ecclesiasticis Consiliariis recepit, Statuum Synodaliū sententias super prælectis Synodici Constitutionibus auditurus.*

Postmodum Rma ac Illma Sua Celsitudo locum præmemoratum ingressa est, primus Dominorum Promotorum, Synodum in Choro congregatam, hisce verbis affatus est:

*Rmi, Rdi & Venerabiles Viri Patres ac Domini observandi. Non dubitat Rmus in Christo Pater ac Dominus, D. JACOBUS, Episcopus Constantiens. Dominus noster Clementissimus, Dnes Vestras die besterna in locis sibi assignatis convenisse, de Statutis Synodalibus mature deliberasse ac conclusisse, proinde mandat vobis, ut per Deputatos, ex qualibet classe, Reverendissimæ & Illustrissimæ Sux Celsitud. vestras sententias & judicia offeratis.*

Deinceps totus ille dies, diversorum Statuum judicii super Constitutionibus Synodalibus, nec non variis eorundem gravaminibus, tam oretenus, quam in scriptis expositis, consumptus est.

Postera luce media ante septimam hora, Missa solennis per D. Michaellem Buchmaier, Succentorem Cathedr. Ecclesiæ decantata est. Qua finita, secundus Dominorum Promotorum Synodum his verbis allocutus est:

*Rmi, Rdi & Venerabiles Viri Patres ac Domini multum observandi; Crastina die Rmus ac Illmus Dominus Episcopus ac Præfident noster finem imponet Synodo huic Diocesanae Constant. Quare ex mandato Rmæ Celsit. Sux vobis omnibus & singulis præcipio, ut mane ad pulsus majoris campanæ, quilibet in suo habitu Pontificali vel Choralis, pro cujusque statu ac dignitate, pro agendis Deo gratias, & Synodalibus negotiis finiendis, in hoc loco compareat.*

Reliquæ ejusdem diei horæ, audiendis & excipiendis Monasteriorum, Collegiorum & Capitulorum, quibus diversimode gravari se prætendunt oneribus, & sententiis de Statutis Synodalibus, viva voce & in scriptis oblatis impensæ sunt.

Ea die in palatio Rmi ac Illmi Domini Episcopi, ex Dominorum Prælatorum numero selecti ac deputati Patres, suam de Constitutionibus Synodalibus sententiam edixerunt, eandem in scriptis redactam, Rmæ ac Illmæ Sux Celsitud. offerentes, prout a reliquis etiam Statibus factitatum.

### SEXTÆ DIEI SYNODI.

**U**ltima demum die, quæ erat XXIV. Mensis Octobris, qua Synodus dimittenda esset, omnes, vel in Pontificali, vel Choralis habitu, pro cujusque statu & dignitate, hora præfixa, in Templo Cathedr. comparuerunt. Missæ Officium celebravit Rmus Dominus, D. Joan. Jacobus, Episcopus Sebastienfis: Rmi ac Illmi Domini Episcopi Constantiensis in Pontificalibus Vicarius, d. Cathedr. Ecclesiæ Canonicus & Custos; assistentibus eidem in munere Diaconus & Subdiaconus, Admodum Reverendis, Nobilibus & Clarissimis Dominis, Domino Jacobo Raslero, U. J. D. Proto-Notario, & Domino Joanne Jacobo Blarer a Wartensee, ambobus Cathedr. Ecclesiæ Canonicis.

Quo finito, Rmus ac Illmus Dominus Præfident, Choro egressus, in loco præparato sese collocavit, omnibus reliquis loca & sedes sibi assignatas occupantibus, ibi Rmo ac Illmo Domino Episcopo cum tota Synodo



do in genua procumbente, Cantores Antiphonam: *Propitius esto peccatis nostris*, inceperunt, de cætero omnia prosequentes, quemadmodum in Pontificali Romano annotatum est. Hymno: *Veni Creator Spiritus*, finito, Reverendus & Clarissimus Dominus Leonhardus Hamerer, Ss. Theologiæ D., Parochus & Canonicus Collegiæ Ecclesiæ S. Stephani, suggestum conscendit, & subsequenti latino sermone, ad Synodum accommodato peroravit.

**Q**UOD olim Lucio Crasso præstantis ingenii, summæque eloquentiæ viro; Reverendissime & Illustrissime Princeps ac Domine, Domine Clementissime, Rmi, Rdi, Perillustres, Generosi, Nobiles, Magnifici, Clarissimi, Venerabiles Viri, Fratres, & Domini multum observandi, accidisse testatur M. T. Cicero, ut in principiis dicendi exalbesceret, & tota mente, atque omnibus artubus contremisceret; idem mihi jam nunc haud paulo minoris eloquentiæ, haud etiam paulo minore de causa usu venire fateor libere: Neque vero meus isthinc timor existit tantum, & formido, quod ego facundia impeditissima, coram vobis eloquentissimis, ingenio exiguo, vel potius nullo, coram vobis consultissimis, ætate & experientia juvenis, coram vobis iudicio & discretionem maturis, & ut uno verbo proloquar, ego humilis & indoctus coram totius Constantiensis Diocesis Amplissimis, Doctissimis, Selectissimisque Viris, quarumcunque censura non nisi gravis esse potest, & rigorosa, verba facere debeam, sed etiam non immerito meus inde proficiscitur metus, quod propter satis longam interruptionem, si quæ in me fuit unquam facultas orationis [quæ scio quam semper fuit exigua] eam ita sentio exaruisse, ut cum effluxisse verba, excidisse sententias, methodum oratoriam evanuisse, memoriam etiam ex parte defecisse animadvertam, vix brevem quendam, eundemque simplicem a me pertexi posse sermonem, & experiar, & ingemiscam. Attamen quia vestra mihi humanitas, & discretio singularis spem facit indubitatam, Vos hoc ipsum, quod a me suscipitur factum, non tam arrogantiae cuidam vel præsumptioni ascripturos, quam obedientiæ, quam Rmo & Ilmo Principi, Domino meo Clementissimo, cujus auctoritati in re licita & negotio pio refragari nefas esset, me debere suapte intelligitis: Idcirco dicam vobis & libere & breviter, non quomodo se quisque pro suo statu vocationeque gerere, vitamque traducere debeat, cum ex his, quæ in præsentis Episcopali Ss. Synodo hinc inde a vobis agitata, & trutinata sunt, quid cuivis sequendum, fugiendumve sit, abunde sa-

tis compertum sit: sed quidnam vos ad sedulam Statutorum observantiam allicere, commovere, stimulare possit ac debeat, paucissimis verbis demonstrabo, interim vero ut me attente & benevole audiat, precor.

Si creatura illa rationalis, homo nuncupatus, ut a DEO OPT. MAX. est factus, ita semper rectus ac integer perstitisset, non solum facilis, sed jucundus etiam fuisset ei cursus ad immortalitatem, & æternam gloriam, propter quam conditus erat, nullo quidem alio adjumento, præter DEI gratiam, quam tamen in ipsa origine hausisset, & suis deinde meritis & cooperatione uberrime adauxisset; nunc autem cum hæc humana natura, adeo fracta, debilitata ac deformata sit, non modo ex originali culpa, quæ deinde in omnes homines pertransit, sed etiam ex propriis cujusque peccatis, cumque eidem perpetua sit colluctatio & conflictus & cum carne, quam circumfert, & adversus Principes & potestates tenebrarum harum, a quibus jugiter infensissime oppugnatur, hinc fit, ut nihil jam ei aut difficilius, aut laboriosius, aut etiam periculosius esse possit, quam ad æternam illam beatitudinem aspirare, nihil proclivius, quam ab ea excidere, & quod acerbissimum est contra, in sempiternum animæ, corporisque exitium & interitum prorueret: Hanc igitur ob causam, Pientissimus ille hominum Creator & Custos, cujus Natura, Bonitas, & cujus proprium est semper misereri & parcere, nunquam destitit, neque desistit nostram hanc imbecillitatem opportunis quibusdam adjumentis fulcire, & omnibus Divina quædam quasi instrumenta proponere, quibus si velint secure, imo facile salutem suam operari possint; Hinc nimirum tot consilia, tot rationes, tamque varia, ut ita dicam, Domini ac Salvatoris nostri inventa & Sacramenta, quæ in Ecclesia Catholica videmus, ad hominem per se adeo lubricum, proclivem ac debilem vel sustinendum, ne cadat, vel sublevandum si ceciderit, & ad eum corroborandum, & in omni legis Christianæ perfectione confirmandum: Immo vero inter Divina hujusmodi media, ad vitam non modo Christiano homine, sed & Clerico & Religioso Viro dignam traducendam, ac æternam demum salutem assequendam, aptissima non minus, quam utilissima & maxime necessaria esse, sive Oecumenicas, sive Provinciales, sive etiam Diocesanas, cujusmodi hæc est, Synodos, quis nostrum est, qui non intelligat? Enimvero quid in præsentis, & jamjam finiendæ Synodo aliud est pertractatum, quam de principio & fundamento salutis nostræ, fide scilicet orthodoxa, sine qua impossibile est

ad Deum accedere, ipsique placere? Quid rursus aliud actum est, quam de Ss. Sacramentorum, per quæ vel Dei filii, & cohæredes Christi efficiuntur, vel eidem pœnitentes reconciliantur, vel denique iusti in gratia stabilimur, virtute & efficacia? An non etiam, quod certa quædam præscripta, & leges, secundum quas mores, vitamque quilibet suam conformare, seu potius reformare debeat, sunt sancitæ, inter Divina huiusmodi & quidem singularia remedia est recensendum? Quarum quidem Legum innovatio, quam hoc præsertim tragico, exulceratissimoque tempore & salubris & necessaria sit, vel ex olim Decretorum violatione, vel ex dissoluta, heu! nimium Clericorum vita, moribusque satis superque constat: Cujus enim culpa evenisse arbitramini, quod præterlapso sæculo tam perniciosæ variarum hæresum contagiones, totam propemodum invaserint Germaniam, quam quod Clerus, qui sal terræ esse debebat, fuerit infatuatus, nec ad eam rem, ad quam maxime oportuisset, utilis fuit? Quid insuper aliæ causæ esse suspicamini, quod præfatæ hæreses usque in hanc diem non modo non cessaverint, sed multis variisque amplificatæ accessioni- bus accreverint semper, & indies grandescant adhuc, quam quod Clerus tam Superior, quam Inferior, tantis Ecclesiæ ærumnis & calamitatibus non modo nihil afficiatur, sed longe magis insolescat, gulæque, crapulæ & libidini obscenæ indulgeat, quæ sane morum turpitudine adeo imperiti, simplicisque populi animos offendit, ut subinde magis, magisque, a Catholica nostra Religione alienior efficiatur, atque Sacerdotium una cum Sacerdotibus, doctrinam juxta ac Doctorem execretur, dirisque devoveat, ita & protinus ad quamvis sectam potius deficere sit paratus, quam qui ad veram velit Ecclesiam redire: quæ quidem cum ita sint, decuit sane Rmum nostrum Illumque Principem, ceu Supremum hujus Amplissimæ quidem, sed eheu! nimium collapsæ Diocesis Speculatorem & Pastorem, ejusmodi Ministrorum vitia, quæ vel ipsi Deo stomachum moverunt, & ad sumendum hoc de nobis acerbissimum supplicium provocaverunt, ab Ecclesia Christi depellere, & in ipsos malorum fontes, unde hæc scaturiunt, oculos conjicere, & ea, quæ Divinam aciem offendunt, quæ hostium nostrorum animos a nobis alienarunt, & ea, quæ tacitas etiam Catholicorum cogitationes vulnerant, in medio auferre: quod quidem partim per crebras, quas Reverendissima Celsitudo Sua per potiore Diocesis partem instituit Ecclesiasticæ disciplinæ visitationem & inquisitionem, partim vero per institutæ Synodi executionem fiet adhuc: nostrum autem est,

ut ea, quæ hisce diebus a nobis unanimibus vobis sancte, religiose, ac pie concepta, & stabilita sunt, deinceps sedulo servanda aggrediamur, & prosequamur. Neque vero ab huiusmodi observatione mandatorum, nos vel dura necessitas abstertere, vel præceptorum multiplicatio gravis & odiosa videtur debet, quippe per hanc ipsam necessitudinem illud tandem assequemur, ut cum initio necessitate hac coacti vivere inceperimus, assuetudo deinde & ipsa exercitatio, & quasi experientia quædam ejus, quæ sub virtute latet, suavitatis, eam nobis voluntariam reddet amabilemque.

Addo & aliud, quod nos ad Statutorum observantiam merito propellere debet, nempe obedientia, quam Præpositis nostris & debemus & vovimus, imo & juravimus, & cujus transgressores gravissimis semper a vindice Deo mulctati sunt pœnis, quas quidem recensere prolixum nimis foret, & odiosum. Jam vero ut tandem portum nostra prospiciat oratio velaque complicem, quid dicam de æternæ illius & immarcescibilis, quam speramus omnes, gloriæ retributione, intuitu videlicet cujus, nos cum Sanctissimo Davide Propheta cor nostrum non dicam ad hæc duntaxat facilia Statuta observanda, sed ad quasvis alias justificationes ejus, in æternum faciendas inclinare deberemus. Laboriosum equidem est agricolæ jungere boves, & aratrum ducere, sulcis arva proscindere & semina spargere, hyemes & frigora perferre, æstate vero pæne sanguinem ipsum sudare, fossis actis superfluas aquas a satis arcere, ripas amnium aggeribus præmunire, & per arva media collices facere, sed omnia ista operosa, laboriosaque levia redduntur ac facilia, dum vel sola spe concipit flaventes novalium segetes, & falces exacutas, & arcam manipulis plenam, & fruges maturas magna alacritate domum comportandas. Pari etiam modo gubernator efferatas undas ac tempestatum vim furensque pelagus sæpenumero contemnit; adhuc ventorum inconstantiam, marinas jactationes, longinquas peregrinationes haud gravatim fert, dum mercium sarcinas, emporiorum opportunitatem, prædivitemque ex his comparandam copiam animo secum reputat. Nec absimiliter miles vulnera patitur, telorum pilarumque nubem excipit, famem, frigus, æstus, sitim, difficiles peregrinationes, & in acie pericula & diurna & nocturna perfert, dum futuras victorias & trophæa cogitat; sed cur hæc commemoro, & quid sibi volunt hæc similitudines? Orationem nimirum his concludere lubet, ut ad labores virtutis causa alacriter & suscipiendos, & perferendos, & Synodalia Statuta magnanimitè capescenda

ani-

animemini. Si enim eorum quisque quos commemoravimus, laborem levem ac facilem existimat, spe futurorum commodorum, quibus etiam si potiri contingat, non tamen ultra præsentem vitam prorogantur, multo sane magis convenit vos percipiendæ gloriæ æternæ intuitu, & spe futuræ vitæ, cœlestisque beatitudinis, tam certamina dubia ( militia quippe est vita hominis super terram ) quam alios quosvis sudores impigre perferre, quandoquidem illorum spes temporaria est, & incerta, nec raro in expectatione melioris fortunæ ex hac vita sunt prærepti, spe tantum oblectari, eventu autem procul, graves licet interea labores ac pericula perpesi: Quoties enim accidit, ut post multos illos sudores agricola nonnunquam falcem jamjam in messem immissurus, rubigine in eam, aut locustarum multitudine delata, aut imbribus immodicis incidentibus, aut grandinibus ingruentibus, aut alia quapiam calamitate per aëris intemperiem oborta, redierit domum vacuis manibus, labore quidem omni exhausto, cæterum fructus spe frustratus? Annon sæpe itidem evenit, ut Gubernator lætus multitudine mercium, & magna alacritate velis expansis, multumque maris emensus, in ipso per sæpe portus ingressu, aut procella repente exorta, aut navi in latens aliquod saxum impacta totum onus perdidit, & post tanta pericula amissis mercibus ægre nudus in litus evaserit? Miles denique similiter non raro posteaquam toties in acie stetisset, adversosque hostes toties repulisset, ac fortiter profligasset, jamjam victoriæ imminens repentino aliquo ictu vel casu, e vita est sublatus, nullo interim periculorum ac strenuorum laborum præmio percepto. Nostræ vero res sese non ita habent: nam & spes habemus immobiles, æternas & firmas, nec cum temporaria hac vita finientas, sed ad immortalem illam, & beatam vitam perennantes, nec solum aëris tempestatibus, maris injuriis, aut aliis quibusvis improvisis casibus, sed & morti ipsi minime obnoxias. Hæc, inquam, spes gloriæ perennis adipiscendæ indubitata, nos ad currendam mandatorum Dei viam stimulare debet, & hæc omnia scientes, juxta præscripta nostram deinceps traducamus vitam, & æquo, quidquid molestiarum nobis accideret, feramus animo, ( memores quod non sunt condignæ passionibus nostræ ad futuram gloriam, quæ in nobis revelabitur, & quod momentaneum hoc & leve tribulationis nostræ mire supra modum æternum pondus gloriæ operatur in nobis; ) Hujusmodi nempe considerans olim electum illud organum, & Divinarum constitutionum proclamator Divus Paulus, non modo non est contrista-

tus afflictiones, infirmitates, carceres, vincula, verbera, lapides, pericula, naufragia, famem, sitim, nuditatem & mille alia exterius, interiusque incommoda perferendo, sed & in hujusmodi infirmitatibus est gloriatus, hujus inquam Ssmi Apostoli, imo ut uno proloquar verbo, omnium nullo excepto Sanctorum vestigiis insistentes, contemnamus generose sæculi hujus voluptates & illecebras, & officii obedientiæ Rmo nostro Antistiti debitæ, vocationisque quilibet suæ memor, ita juxta saluberrime & statuta, & recepta fidei, morumque dogmata, suam traducat vitam superstitem, ut post decursum hujus sæculi finem, tanquam fidelis servus mercedem recipiat æternam. Dixi.

Præinserta oratione conclusa, Adm. Rdu & Clarissimus Dominus Vicarius, subsequenter protestationem, contra eos, qui ad Synodum legitime convocati, vel contumaciter prorsus emanerunt, vel non legitimis instructi mandatis alieno nomine interfuerunt, coram toto Synodico confesso, hisce verbis interposuit:

*Quandoquidem Rmus & Illmus Dominus Episcopus, ac Præfident superioribus diebus non præter gravem animi sui molestiam animadvertit, quorundam Ordinum Superiores & alios nonnullos, ad Synodum Constant. (qui alias de jure, vel consuetudine interesse tenentur) legitime vocatos, partim omnino non accessisse, partim vero in eadem cum protestationibus frivolis, & mandatis procuratoriis limitatis comparuisse, desuper nihilominus votata, conclusa, & definita adprobando; Ne igitur hujusmodi inobedientes & contradictores, in præsumpto eorum proposito & facto, magis obfirmantur; silentio ejus rei novitatem & prætensiones præterire non potuimus. Itaque nomine ac vice Rmæ ac Illmæ Suae Celsitud. coram toto Synodali confesso, & nominatim coram Notario ad Acta ejusdem Synodi conscribenda deputato, solenniter protestamur, absentiam non comparentium, & protestationes quorundam præsentium nulliter factas, Diocesana Synodo jam celebrata & in posterum celebranda, aliisque competentibus juribus Episcopalibus, in nullo præjudicare debere; E contra Rma & Illma Sua Celsit. expresse se declarat, quod per hæc nova Statuta Synodalia, in reliquis omnibus, ipsorum exemptioni, juribus & privilegiis, quatenus sunt in usu, & Decretis Ss. Conc. Trid. non repugnant, minime derogare intendat, quorum omnium & singulorum, ut certa notitia, perpetuis futuris temporibus habeatur, petimus etiam*



etiam hanc declarationem, & respective contrariam elisivam protestationem, ad Acta hujus Synodi referri & conscribi.

Hanc protestationem, excepit sententia per Dominum Lectorem hujus Synodi, publice e superiore loco lecta & promulgata, eratque subscripti tenoris:

*Christi nomine invocato &c. Nos JACOBUS Dei & Apostolicæ Sedis Gratia Episcopus Constantiensis, Dominus Augiæ majoris & Oëningæ, &c. Constitutionibus Synodalibus, in hac Synodo Constantiensi publice propositis, lectis, & promulgatis, omniumque Statuum Ecclesiasticorum, responsionibus auditis atque discussis, maturo consilio, & deliberatione, nec non totius Synodi, omnium & singulorum Patrum Synodaliū unanimi & communi præcedente consensu, pronuntiamus, decernimus & declaramus, Synodum hanc in Dei nomine concludendam fore & esse, prout eam auctoritate nostra ordinaria concludimus, mandantes, ut omnes & singulæ Constitutiones Synodi præfate, quantum per horum temporum difficultates fieri potest, ab omnibus inviolabiliter, præsertim quæ Catholicæ Fidei Professionem, Sacramenta, caeremonias, & totius Cleri Sæcularis & Regularis vitam moresque concernunt, serventur; atque a Vicario, Officiali & Fiscali, nec non Ecclesiarum Prælati & Superioribus, pro ratione cujuslibet officii, executioni demandentur. Facultatem Nobis & Successoribus nostris ea omnia & singula declarandi, quatenus opus fuerit, reservantes in his scriptis.*

Quo Decreto pronuntiato, Adm. Rdus Dominus Vicarius Synodum, his verbis compellavit:

*Rmi, Rdi, Illres, Nobiles, Magnifici, Venles & Religiosi Viri, Patres ac Domini observandi, Rmus ac Illmus Dominus Episcopus & Præfident, Dominus noster Clementissimus, omnes & singulos per me interrogat, num vobis placeat, ut ad Dei Omnipotentis laudem & gloriam huic Sacræ Synodo Episcopali Constantiensi, finis imponatur.*

Omnibus Perplacet respondentibus, Rmus ac Illmus Dominus Præfident, alta voce recitavit orationem: *Exaudi quæsumus Domine supplicum preces, &c. juxta normam & ritum Romani Pontificalis.*

Interim portis reclusis, laici intromissi sunt, & a Musicis gloriosus Hymnus: *Te Deum laudamus, &c.* solenniter, adhibita campanarum compulsionem, decantatus est.

Quo absoluto, Adm. Rdus & Clarissimus Dominus, D. Joannes Christophorus Hagerus, prior Dominorum Promotorum, Notarium Synodi subsequentibus verbis requisivit:

*Reverende Domine Notarie, ego ad hanc Synodum Diæcesanam Constantien. una cum Domino Collega meo deputatus Promotor, nomine Synodi præfate a te requiro, & postulo, ut omnia & singula in hac Synodo, acta, tractata, proposita, decreta & definita diligenter & fideliter conscribas, unumque vel plura Instrumentum, vel Instrumenta, ad petitionem eorundem, quorum interest, de iis omnibus consicias, & confecta tradas.*

Cui quidem requisitioni, Notarius se ea, qua par est, fide ac sedulitate paritum pollicitus est, atque testes infra scriptos ibidem præsentem, ut omnium & singulorum, quæ in hac Synodo gesta & tractata fuerint, memores existant, requisivit.

Deinde alter Dominorum Promotorum solenniter grates retulit inprimis Deo Omnipotenti, B. Mariæ V., Sanctisque tutelari- bus Patronis Pelagio, & Conrado: tum nomine Rmi ac Illmi Domini Episcopi, universæ Synodo.

Demum publicatione Indulgentiarum facta, & benedictione Episcopali solenni ritu impertita, Diaconus ad Synodum conversus, alta voce cecinit: *Recedamus in pace.* Cui Chorus respondit: *In nomine Christi.*

Et quia ego Joannes Andreas Dornspurger, U. J. D. Canon. Eccles. Collegiæ S. Stephani Constant. Sacra Apostolica auctoritate publicus, & in Archivio Curiae Rom. immatriculatus, ac Episc. Curiae Constantiensis in officio Vicariatus Collateralis Notarius, a supramemorato, Rmo ac Illmo Domino Præfide, totaque Synodo, in Actuarium, deputatus ac juratus, omnibus & singulis præinsertis actis & actitatis interfui. Idcirco præscripta Decreta, Statuta, & Acta Synodalia, in fidem eorundem, prævia debita requisitione propria manu scripsi: Acta sunt hæc Anno a partu Virginis Millesimo sexcentesimo nono, Indiæ. septima, Pontificatu Sanctissimi Domini nostri, D. PAULI, Divina providentia Papæ Quinti, Anno quinto, diebus, mense & loco, quibus supra. Præsentibus Venerabilibus & Clarissimis Dominis, Alexandro Leimberer, Ss. Theolog. D. Marckdorffensi, & M. Philippo Jacopo Herber, Constantiensi, Rmi ac Illmi Domini Episcopi Constant. Capellani Aulicis, testibus ad præmissa vocatis specialiter ac requisitis.

*Joann. Andreas Dornspurger, D. Notar. ffl.*

CATA.

**CATALOGUS PRÆLATORUM, COLLEGIORUM, DECANATUM, omniumque utriusque sexus Monasteriorum ad Synodum Episcopalem Constantiensem, die decima nona mensis Octob. An. M. DC. IX. celebratam vocatorum, tam exemptorum, quam non exemptorum, tam eorum, qui per se, vel per alios comparuerunt, quam illorum, qui omnino emanferunt.**

**R**everendissimus & Illmus Dominus, D. JACOBUS Dei & Apostolicæ Sedis gratia Episcopus Constant. Dominus Augiæ majoris & Oëningæ, &c. Præsidens, ac Synodum Diœcesanam convocans.

Rmus Joannes Jacobus Mirgel, Episcopus Sebastienfis, Rmi ac Illmi Domini Episcopi Constantiensis Suffraganeus, Consiliarius, Cathedr. Ecclesiæ Constantiens. Canonicus & Custos.

Rmus ac Perillris D. Marcus Sitticus Comes de Altaemps, & Gallara, Præpositus & Canonicus Cathedr. Ecclesiæ Constantiens. nec non Ecclesiarum Salisburgensis & Augustanæ Canonicus.

Adm. Rmus ac Nobilis Dominus Sigismundus a Wolffurt, Decanus, & Cathedr. Eccles. Aichstattenfis Canonicus.

Adm. Rmus ac Nobilis Dominus Jacobus Blarer a Wartensee Senior, Præpositus Colleg. Eccl. S. Pelagii, in Episcopali Cella.

Adm. Rmus Illustris & Generosus Dominus Udalricus Baro in Königseck & Aulendorff, Canonicus Cathedr. Ecclesiarum Constant. Salisburg. & Augustanæ, nec non Colleg. Eccles. S. Cyriaci in oppido Wyssenstaig Præpositus.

Adm. Rmus ac Nobilis Dominus Sigismundus Fridericus ab Hornstain.

Adm. Rmus & Clarissimus Dominus Andreas Wendelstein, U. J. D. Cantor.

Adm. Rmus ac Nobilis Dominus Joannes Caparus Berz, Licentiat.

Adm. Rmus ac Nobilis Dominus Sixtus Wernerus Vogt de Summeraw, de Prasberg, Canonicus Cathedr. Ecclesiarum Constant. Augustanæ & Aichstattenf.

Adm. Rmus ac Nobilis Dominus Joannes Jacobus Blarer de Wartensee, Canonicus Cathedr. Constant. Basileensis & Colleg. Elwacensis Ecclesiarum.

Adm. Rmus & Clarissimus Dominus Jacobus Raslerus U. J. D. Protonotarius Apostolicus.

Adm. Rmus & Clarissimus Dominus Christophorus Hager, Decretorum Doctor.

*Abbates.*

Nomine Rmi ac Illmi Principis ac Domini, D. Bernardi, Abbatis Monasterii Ord. D. Benedicti, comparuit Rmus & Religiosus  
*Tomus VIII. Concilior. German.*

Fr. Jodocus Mezler, Canonum D. & ejusdem Monasterii Conventualis.

Nomine Rmi ac Illmi Principis ac Domini, Domini Henrici, Abbatis B. M. V. Campidonensis nemo comparuit, sed literis ad Reverendissimum ac Illmum Dominum Episcopum Constantiensem datis, privilegiorum suorum, & exemptionis prætextu, ab hujusmodi Synodali comparitione sese excusari censuit, rem tamen ad Ssmum, cui immediate subjectus sit, deferri curaturum.

Nomine Rmi & Perillustri Principis ac Domini, D. Augustini, Abbatis Monasterii B. M. V. loci Eremitarum, vulgo Einsiedlen Ord. S. Benedicti, comparuit legitimo cum mandato Rmus, Religiosus & Nobilis P. Joannes Joachimus a Boroldingen, Decanus ibidem.

Nomine Rmi Domini Perri, Abbatis Monasterii Salemitani, Ord. Cisterciensis, prout & reliquorum Dominorum Abbatum, ejusdem Ordinis, nominatim Monasterii Wettingen, S. Urbani, & Tennenbach, eo quod ipsis (uti scriptis ad Rmum ac Illmum Episcopum literis attestati sunt) a Rmo Ordinis Generali inhibitum sit, nemo comparuit.

Adm. Rmus D. Martinus, Abbas Monasterii S. Blasii, Ord. D. Benedicti.

Adm. Rmus Dominus Georgius, Abbas Monasterii Weingarten, Ord. ejusdem.

Adm. Rmus Dominus Urbanus, Abbas in Ochsenhausen, Ord. ejusdem.

Adm. Rmus Dominus Georgius, Abbas Monasterii Creutzlingen, Ord. Canonic. Regul. D. Augustini.

Adm. Rmus Dominus Jacobus, Abbas Monasteriorum Petridomus, & S. Georgii in oppido Stain, Ord. S. Benedicti.

Adm. Rmus Dominus Michael, Abbas Monasterii Zwifalten, Ord. S. Benedicti.

Adm. Rmus Dominus Balthasar, Abbas Monasterii Rothenfis, Ord. Præmonstrat.

Adm. Rmus Dominus Jacobus, Abbas Monasterii Augiæ minoris, vulgo Weissenaw, Ord. Præmonstratenfis.

Adm. Rmus Dominus Jodocus, Abbas Monasterii Muryensis, Ord. S. Benedicti.

Adm. Rmus Dominus Udalricus, Abbas Monasterii Rejnaw, Ord. ejusdem.

O o o o o

Adm.

Adm. Rdus Dominus Martinus, Abbas Monasterii Schuffenriedt, Ord. Præmonst.  
 Nomine Adm. Rdi Domini Gebhardi, Abbatis Monasterii Augiæ majoris Briganti-næ, Ord. D. Benedicti, Fr. Joannes Maier, Conventualis ibidem comparuit, cum mandato.  
 Adm. Rdus Dominus Jacobus, Abbas Monasterii Marchthal, Ord. Præmonstraten.  
 Adm. Rdus Dominus Gottfridus, Abbas Monasterii Wiblingen, Ord. D. Benedicti.  
 Adm. Rdus Dominus Martinus, Abbas S. Georgii in Hercynia Sylva, Ord. D. Benedicti.  
 Adm. Rdus Dominus Joannes Jacobus, Abbas Monasterii S. Petri, Ord. ejusdem.  
 Adm. Rdus Dominus Jacobus, Abbas S. Truperti, Ord. ejusdem.  
 Adm. Rdus Dominus Mathias, Abbas Monasterii Fischingen, Ord. ejusdem.  
 Nomine Adm. Rdi Domini Jacobi, Abbatis Monasterii Eisne, comparuit, cum mandato, Adm. Rdus Dominus Abbas Monasterii Weingarten.  
 Adm. Rdus Dominus Jacobus, Abbas Monasterii Montis Angelorum, Ord. ejusdem.  
 Nomine Adm. Rdi Domini Abbatis S. Joannis in valle Thuræ, nemo comparuit.

### *Jobannita.*

Rmus ac Illmus Princeps ac Dominus, D. Arbogastus, Magister Ordinis S. Joannis Hierosolymitani per Germaniam, & Commendator in Haiterschen.  
 Dominus Commendator in oppido Friburgensi.  
 Dominus Commendator in oppido Imperiali Überlingensi.  
 Dnus Commendator in Tobel.  
 Dnus Commendator in Vilingen.  
 Dnus Commendator in oppido Imperiali Rottwilensi.  
 Dnus Commendator in Hemmendorff.  
 Dnus Commendator in Rordorff.  
 Dnus Commendator in Kismacht.  
 Dnus Commendator in Bubichen.  
 Dnus Commendator in oppido Neoburgensi.  
 Dnus Commendator in Wadischweil.  
 Dnus Commendator in Rexingen.  
 Dnus Commendator in Leuggeren.  
 Dnus Commendator in Hohenrain.  
 Horum Commendatorum nullus per se, vel Procuratorem comparuit.

### *Teutonici.*

Adm. Rdus Nobilis & strenuus Dnus Christophorus Thumb a Newenburg, Balivus

per Alsatiam & Burgundiam, Commendator in Altschahusen.

Dnus Commendator in Maynaw.

Dnus Commendator in Beuchen.

Dnus Commendator in oppido Imperiali Ulmensi.

Dnus Commendator in oppido Friburg.

Dnus Commendator in Hitzkirch.

Dnus Commendator in Wineden.

Horum Commendatorum pariter nullus comparuit.

### *Abbatissæ Principes.*

Pro parte Rmæ & Perillustri Principis ac Dominae, D. Eleonora, Abbatissæ, & Capituli Collegiatae Ecclesiæ Ss. Cornelii & Cypriani in Buochaw, comparuit cum mandato, M. Sebastianus Köchlin, Parochus & Canonicus ibidem.

Nomine Rmæ & Perillustri Principis ac Dominae, D. Barbaræ, Abbatissæ, & Capituli Collegiatae Ecclesiæ B. M. V. in oppido Imperiali Lindaviensi, comparuerunt cum mandato M. Joannes Sorg, Decanus ruralis Capituli ibidem, & Parochus in Hergatschweil, M. Georgius Keller, Parochus in Wangen, & Dominus Michaël Troll, Parochus in Oberraitnaw, Camerarius.

Nomine Rmæ & Perillustri Principis ac Dominae, D. Ursulæ, Abbatissæ, & Capituli Colleg. Ecclef. S. Fridolini in Seckingen, D. Clemens Schubinger, Canonic. & D. Fridolinus Keller, Paroch. ibid. intererant.

### *Universitas Friburgensis.*

Nomine Archiducalis Academiae Friburgensis, comparuit mandato legitimo instructus M. Christophorus Pistorius, Vicarius Parochialis Ecclesiæ & Præsentia ibidem Rector.

### *Præpositi Regulares.*

Rdus Dominus Michael, Præpositus Monasterii Waldsee, Ord. Canonicorum Regul. D. Augustini.

Rdus Dominus Virus, Præpositus Monasterii Bewren, Ord. ejusdem.

Nomine Rdi Domini Joannis, Præpositi Monasterii Wengen, in Oppido Imperiali Ulmensi, comparuit cum literis absentiam suam purgantibus Adm. Rdus Dominus Gottfridus, Abbas Monasterii Wiblingen, Ord. D. Benedicti.

Rdus Dominus Udalricus, Præpositus Monasterii Omnium Sanctorum Friburgi, præfati Ord. D. Augustini.

Rdus Dominus Petrus, Præpositus Monasterii Riederen, Ord. ejusdem.

*Car-*



*Cartusiani.*

Nomine Rdorum Dominorum Priorum Cartusiarum Friburgensis & Ittingensis nemo comparuit, sed absentiae suae causas, nimirum certa quaedam ipsis occurrentia impedimenta, in scriptis exposuerunt; cum ratificatione omnium & singulorum pro se, suisque Monasteriis, quae in Synodo Diocesana acta, gestaue fuerint; salvis nihilominus exemptionibus, privilegiis, ac juribus Ordini ipsorum competentibus.

*Ecclesiae Collegiatae.*

Nomine Collegiatae Ecclesiae S. Stephani Constantiae comparuerunt sufficienti mandato instructi, Adm. Rdus ac Clarissimus Dominus Jacobus Raslerus, v. j. d. Protonot., Cathedr. Ecclesiae Constantiensis Canonicus, & praedictae Ecclesiae Praepositus; nec non Rdi Clariss. ac Nobiles, Dominus Leonhardus Hamerer, Ss. Theolog. D., Parochus & Canonicus, Dominus Joannes Fridericus a Menlishofen, & Dominus Jo. Udalricus Locher, Canonici ibid.

Collegiata Ecclesia S. Joannis Constantiae, comparuit per Rdum & Clarissimum Dominum Joannem Hausman, v. j. d. Rmi ac Illmi Episcopi Constant. Consiliarium, Vicarium & Officiale, Praepositum, & Dominum Valentinum Byrbaumer, Ss. Theol. Doctorem, Parochum & Canonicum ibidem.

Capitulum Collegiatae Ecclesiae S. Pelagii in Oppido Episcopalis Cellae, ablegavit Dominum Joan. Hilarium a Menlishofen, Custodem, & M. Gebhardum Keller, Parochum & Canonicum ibidem.

Nomine Collegiatae Ecclesiae Beronensis interfuit Dominus Petrus Emberger, Praepositus, & Dominus Rochus Bongartner, Canonicus & Secretarius ejusdem Capituli.

Ex Collegiata Ecclesia S. Margarethae, in Oppido Waltdkirch comparuit Dominus M. Matthaeus Zimmermann, Praepositus.

Nomine Collegiatae Ecclesiae S. Leodegarii Lucernae, comparuerunt Dnus Nicolaus Schall, Protonotarius Apostolicus, Praepositus, & Dnus Joannes Kaiser, Ss. Theolog. D., Canonicus ibidem.

Ex Colleg. Ecclesia S. Cyriaci in Wissenstaig, cum mandato comparuerunt Adm. Rdus Illris & Generosus Dominus Udalricus Baro in Königseck, & Aulendorff, Praepositus, & Dominus Laurentius Zoller Ss. Theol. D., Decanus, Magister Conradus Nunnenbeck, Canonicus senior, & Burfa-

rius, nec non Dominus Jodocus Byrbaumer Ss. Theol. D., Canonicus & Custos ejusdem Ecclesiae.

Collegiata Ecclesia S. Verenae Zurzachii existens, misit cum mandato Dominum Paulum Schufelbühel, Praepositum, & Dominum Jacobum Molitorem, Canonicum & Custodem ibidem.

Nomine Colleg. Ecclesiae S. Crucis in oppido Horb, comparuerunt sufficienti cum mandato, Dominus Jacobus Stainlin, Praepositus, & Georgius Zanger, Canonicus ibidem.

His sese adjunxit Dominus Sebastianus Vogler, Canonicus & Concionator ibidem.

Ex Collegiata Ecclesia S. Mauritii in Eningen cis Nicrum, procuratorio nomine cum mandato comparuerunt Dominus Jacobus Müller, Praepositus, & Dominus Joannes Jacobus Walch, Ss. Theologiae D., Canonicus ibidem.

Collegiata Ecclesia in Werd per neminem comparuit; verum Dominus Praepositus & Canonici ibidem, literis Domini Sculteri, & Senatus Civitatis Solodorensis, absentiae certas quasdam causas allegarunt.

Nomine Collegiatae Ecclesiae S. Nicolai in oppido Marckdorff, mandato legitimo instructus comparuit M. Martinus Buck, Parochus & Custos ibidem.

Collegiata Ecclesia B. M. Virginis in oppido Cellae Ratholdi, comparuit per Dominum M. Jacobum Keller, Parochum & Custodem, nec non Dominum Georgium Schlachter, Capellanum ibidem.

Nomine Collegiatae Ecclesiae B. M. V. in Bettenbrunnen, comparuerunt Dominus Melchior Hailig, & Dominus Christophorus Saurmann, Canonici ibidem.

Nomine Collegiatae Ecclesiae S. Petri in Stauffen, cum mandato adfuerunt Dominus Melchior Finckel, Parochus in Undersunthofen, & Dominus Michael Helcheberger, Parochus in Vischen.

Capitulum Coll. Ecclesiae S. Jacobi in Hechingen, misit Dominum Ottonem Henricum de Eöwen, Decanum & Parochum, & Dominum Conradum Unverdorben, Canonicum ejusdem Ecclesiae.

Ex Collegiata Ecclesia in Wolfegg, Dominus M. Georgius Wallerus, Praepositus, comparuit.

Collegiata Ecclesia S. Nicolai Uberlingae, comparuit per Dominum Joannem Oschwaldi, Ss. Theol. Baccalaureum, Praepositum, & Dominum Joannem Udalricum Kessering, Canonicum ibidem.

Nomine Collegiatae Ecclesiae in Zeill, adfuit Dominus M. Balthasar Lengst, Praepositus in Zeill.

*Abbatiae Sanctimonialium.*

Dominæ Abbatissæ Monasteriorum Rottenmünster, Vallis S. Crucis, Hegbach, Guttenzell, Feldbach, Baid, Fridenweiler, Günterstal, Gnadenenthal, Wunnenthal, Wurmspach, Frawenthal, Neidingen auf dem Hoff, Calcara, Maggenaw, Tenichen, Ord. Cisterciensis, neminem miserunt.

Pro parte Monasteriorum & Conventuum Rathausen & Eschenbach, prædicti Ord. Cisterciensis, comparuit Dominus Melchior Suterus, Parochus Colleg. Ecclesiæ S. Leodegarii Lucernæ, & ruralis Capituli ibidem Decanus.

Dominæ Abbatissæ & Conventus Monasterii Münsterlingen, Ord. D. Benedicti, comparuit per Rdm Nobilem, & Religiosum P. Joannem Joachimum a Börokingen, Decanum Monasterii B. M. V. loci Eremitarum.

Dominæ Abbatissæ & Conventus Monasteriorum S. Claræ in oppido Villingensi, in Paradiso prope Schaffhausen, in Witrichen, ejusdem Ord. comparuerunt per Rdm & Religiosum P. Beatum, FF. Minorum Conventualium Ord. D. Francisci per superiorem Germaniam Provinciale.

Nomine Dominarum Abbatissarum & Conventuum Monasteriorum S. Claræ in oppido Friburgensi, Horri Mariæ, Söflingen, comparuit Rdm & Religiosus F. Antonius Zierer, Ord. S. Francisci de Observantia, Provinciæ Argentinæ Diffinitor, & Confessarius d. Monasterii Söflingensis.

*Monasteria, quibus Præpositæ & Magistræ præficiuntur.*

Nomine Rdæ Dominæ Præpositæ & Canonissarum Monasterii Intrzkoffen, Ord. D. Augustini, comparuit cum mandato Dnus Andreas Rainolt, Ss. Theol. D., Confessarius ejusdem Monasterii.

Rdæ Dominæ Præpositæ & Canonissarum Monasterii Riederer, Ord. præfati, sese Rdm & Religiosus Dominus Petrus Haug, ibidem Præpositus, Procuratorem constituit.

Rdæ Dominæ Magistræ Monasteriorum Urspringen, & Amtenhausen, Ord. D. Benedicti, Rdm Adm. & Religiosus Dominus Abbas S. Georgii in Hercynia Sylva Procurator cum mandato existit, tanquam eorundem Monasteriorum Visitator.

Nomine Rdæ Dominæ Magistræ & Conventus Monasterii Hermansschweil, Ord. D.

Benedicti, præmemoratus Dominus Abbas tanquam Visitator, comparuit.

Pro parte Rdæ Præpositæ, & Conventus Monasterii Montis Angelorum Ord. D. Benedicti, comparuit Admodum Reverendus Dominus Abbas ibid.

Monasterium S. Mariæ in Monte, penes fluvium Lauchart, Ord. D. Benedicti, constituit Adm. Rdm & Religiosum Dominum Michaëlem, Abbatem monasterii Zwißaltach, ejusdem Ordinis, tanquam Ordinarium d. Monasterii Visitatorem.

Nomine Monasteriorum Sanctimonialium in Einsidlen im Saar, in Seedorff, prope Altdorff Helvetiorum, Ord. D. Benedicti, Rmi Domini Abbatis Monasterii B. M. V. loci Eremitarum, tanquam Visitatoris eorundem Monasteriorum Procurator, comparuit.

*Capitula & Decanatus Rurales.*

Ex Decanatu Augiæ Majoris, comparuerunt cum mandato M. Georgius Oschwald, Parochus ad S. Georgium & decanus, Dominus Melchior Fisel, Parochus ad S. Joannem ibidem, & Camerarius ejusdem Capituli.

Nomine Decanatus oppido Stain, adfuerunt Dominus Gallus Asphalus, Parochus in Hemmenhofen, & decanus, nec non Dominus Marcus Neidhard, Plebanus in Singen.

Decanatus oppidi Steckborn, & Frawenfeldt nunc uniti, miserunt Dominum Vitum Gäng, Parochum in Pfyn, Decanum, & Dominum Georgium Aigenmann, Parochum Frawenfeldensem.

Decanatus Newkirch Kleckoviæ, comparuit per Dominum Jacobum Iffingen, Parochum Obereggingen, decanum; & Dominum Georgium Bodmar, parochum in Büel, Camerarium.

Ex decanatu oppidi Stielingen, interfuit Dominus Joannes Jacobus Kraus, Parochus prædicti oppidi, & Camerarius; nec non Dominus Christophorus Lindius, Parochus in Grauenhausen.

Nomine Ruralis Capituli Waldtshut, comparuerunt Dominus Joannes Jacobus Holzer, Parochus in Lauttingen, decanus, Dominus Gregorius Drechsler, Parochus in Waldtkirch, Camerarius, & Dominus Joannes Lang, Plebanus prædicti oppidi Waldtshut.

Ex Decanatu oppidi Engen, interfuerunt Dominus Jacobus Faber, Parochus in Fridingen, decanus, & M. Christophorus Schley, Vicarius in oppido Tengen.

Deca-

Decanatus oppidi Stockach, comparuit per dominum Joannem Christophorum Maus, v. j. d. Parochum in Hindelwang, decanum, dominum Theodoricum Herman, Ss. Theol. D. Parochum in Bodma, nec non dominum Georgium Kestlin, Parochum prædicti oppidi Stockachensis.

Rurale Capitulum Lintzgow misit dominum M. Gailum Hummel, Parochum in Bermatingen, decanum, dominum Sebastianum Irmler, Parochum in Frickingen, & dominum Bernhardum Ill. Parochum in Lewkirch.

Pro parte Decanatus oppidi Moskirch, interfuerunt M. Sebastianus Angelin, decanus, & Parochus ibidem, nec non dominus Jacobus Krenckel, Plebanus in Walmanfchweiler.

Decanatus oppidi Imperialis Lindaviensis procuratores exstiterunt, M. Joannes Sorg, Parochus in Hergattschweiler, Decanus, M. Georgius Keller, Parochus Wangensis, nec non dominus Michael Troll, Parochus in Oberraitnaw, ejusdem Capituli Camerarius.

Decanatus Turingensis ablegavit M. Gregorium Brigler, Parochum in Cappel, decanum, & M. Christophorum Awer, Parochum in Türingen, Camerar.

Pro Parte Decanatus oppidi S. Galli interfuerunt M. Melchor Schelling, Parochus Rorschachensis, decanus, & dnus Michael Reuti, Parochus in Bernang, Camer.

Ex Decanatu Wilensi, missi sunt Dominus Diethelmus Ully, Plebanus in Maslang, decanus; dominus M. Joannes Phæbas, parochus Wilensis, Camerarius Aderat etiam M. Joan. Udoartus, præpositus in Werdbühel.

Nomine Decanatus Tigurini comparuit dnus Petrus Brendlin, parochus Rapperfchwilenf, & dominus Joannes Schwartzmann, parochus in Glarus.

Ex Decanatu Regenspergensis, & Clero Badensi, interfuit dominus Balthasar Hammer, parochus prædicti oppidi Badens.

Ex Decanatu Brengartensi ablegatus est Jacobus Hauser, parochus Tugiensis, & decanus ejusdem Capituli.

Decanatus oppidi Mellingen comparuit per M. Bernardum Stallder, parochum Vilmergensensem, decanum, & dominum Jacobum Walther, plebanum in Boffweil.

Decanatus Hochdorff misit dominum Jacobum Gampar, parochum in Innweil, Camerarium, & dominum Burchardum an der Hüb, parochum in Sintz.

Nomine Ruralis Capituli Willisaw adfuerunt dominus Henricus am Rein, Canonicus Beronensis, parochus in Dietweil, ejusdem

Capituli Camerarius, & dominus Adamus Hool, parochus in Zell.

Pro parte Decanatus Lucernensis ablegati sunt, dnus Melchior Suterus, decanus ruralis Capituli & parochus prædicti oppidi, & Rmi ac Illmi Episcopi Constant. in ditione Lucernensi Commissarius: nec non dominus Leonhardus Fründt, parochus Uraniensis, protonotarius Apostolicus.

Ex Decanatu Surfee comparuit dominus M. Ludovicus Schweitzer, parochus in Ruswyl, decanus, & dominus Martinus Mazinger, parochus in Sempach.

Nomine Decanatus, Cleri & Confratrum Præsentiae Friburgensis, adfuit M. Christophorus Pistorius, parochus & præsentiae Friburgensis Rector: M. Joannes Bley, Capituli Friburgensis decanus, & ejusdem præsentiae Ternarius.

Decanatus Brisacensis misit M. Joannem Michaelum, parochum in Munzingen, decanum, M. Joannem Paulum Curtium, parochum in Kirchhofen, Camerarium, dominum Matthiam Boucher, parochum in Veldtkirch.

Nomine decanatus Neoburgensis, comparuit dominus Joannes Haut, parochus in Bamlach, Camerarius, & dominus Nicolaus Gunterus, parochus Zielfensis.

Decanatus Endingensis comparuit per dominum Joannem Weifs, parochum in Sasbach, decanum, & d. Mathiam Fetscherum, parochum ad d. Petrum Endingæ, Camerarium.

Ex decanatu Wiesenthal, interfuit dominus Fridolinus Keller, parochus Seckingæ.

Decanatus oppidi Villingen, ablegavit dominum Felicem Wiel, parochum Eschingæ ad Danubium, decanum, dominum Joannem Textorem, parochum Riedberingum, Camerarium.

Nomine rdialis Capituli Wurmlingensis, interfuit dominus Joannes Meifs, parochus Hattingensis, decanus, & dominus Joannes Hirlinæus, parochus oppidi Möringen, prædicti Capituli Vice-Camerarius.

Decanatus & Cleri oppidi Imperialis Rottwilensis, procuratores exstiterunt M. Joannes Breneisen, parochus in Reiflingen, & M. Joannes Renner, parochus in Dünningen, Camerarius, nec non Dnus Jacobus Lyon, Parochus præmemorati oppidi Rottwilensis.

Ex Decanatu Ebingensi ablegati sunt dominus Christophorus Faulhaber, decanus, & parochus in Shertzingen, nec non dominus Udalricus Hagg, parochus in Harthausen, ejusdem Capituli Camerarius.

Decanatus Dornstetten, misit dominum Joannem Offtertinger, parochum inferioris



- pagi Waldach, decanum, & dominum Georgium Hopp, parochum in Salztetten, Camerarium.
- Decanatus oppidi Haigerloch, procuratores extiterunt Dominus Joannes Stozius, parochus ibidem & Decanus, nec non M. Joannes Hurm, Parochus in Binzdorff, Camerarius.
- Nomine Decanatus oppidi Herrenberg, nemo comparuit.
- Decanatus Tubingensis, nunc Rottenburgensis, comparuit per M. Franciscum Sartorium, Ss. Theologiæ Baccalaureum Forinatum, decanum & Parochum Rottenburgensem, dnum Fridericum Kettenacker, Parochum in Hurlingen.
- Decanatus oppidi Hechingensis, misit dominum Ottonem Henricum Baldum de Löwen, decanum tam ruralis Capituli, quam Collegiatae Ecclesiæ S. Jacobi, & parochum ibidem, nec non Dominum Marcum Teiffelium, parochum in Steinhoffen.
- Ex Decanatu Trochtelfingensi adfuit dominus Jacobus Munz, parochus in Oberstetten, decanus: & dominus Joannes Riegger, parochus in Gamertingen.
- Nomine Decanatus Eßlingen, seu Newhausen, adfuit dominus Zacharias Schnitzer, parochus in Newhausen.
- Rurale Capitulum oppidi Geislingen, comparuit per dominum Joannem Schreyer, parochum in Bemmerkirch, & dominum Christianum Speet, parochum in Wiffeltingen.
- Decanatus oppidi Blawbeuren, misit dominum Hermanuzium, parochum in Ringingen, electum decanum, & dnum M. Joannem Geismeyer, parochum in Eßlingen, Camerarium.
- Decanatus oppidi Ehingani ad Danubium, comparuit per dominum Claudium Aichel, Ss. Theol. Baccal. Formatum, & Vicarium Ehingensem; nec non M. Andream Hiltebrandt, parochum in Griesingen, & Ecclesiasten prædicti oppidi.
- Nomine Decanatus oppidi Riedlingensis, adfuit M. Georgius Pfeiffer, parochus in Dürrenwaldtstetten, decanus, & dnus Jacobus Beck, parochus prædicti oppidi Riedlingensis, Camerarius.
- Decanatus oppidi Munderkingen procuratores extiterunt, M. Jacobus Vischerus, decanus, & Parochus in pago fori Zwifaltach; nec non Fr. Balthasar Dorner, Conventualis Monasterii Marchtalensis, Ord. Præmonstratensis, parochus prædicti oppidi Munderkingensis.
- Decanatus oppidi Imperialis Bibracensis, ablegavit M. Leonhardum Gentner, parochum ibidem, & M. Matthæum Albertum, parochum in Schömerberg.
- Ex Decanatu Lauphaim, missi sunt M. Matthias Härlin, parochus in Sulmingen, & dnus Georgius Schick, Camerarius, & parochus in Hüttesheim.
- Decanatus Dietenheimensis comparuit per dominum Marcum Moz, decanum, & parochum ibidem: nec non dominum Simonem Jäch, parochum in Erolzheim, Camerarium.
- Decanatus oppidi Wurzach constituit Procuratores, dominum Georgium Fimpel, parochum in Schwartzach, & decanum: nec non F. Joachimum Gieteler, parochum in Heisterkirch, Conventualis Monasterii Rothensis, Ord. Præmonstratensis.
- Rurale Capitulum oppidi Sulgensis, misit Dominum Andream Vogel, Ll. Doctorem, parochum in Bezenweiler, Decanum: nec non dominum Laurentium Rebmänn, Canonum Doctorem, Parochum in Monte Bullo.
- Ex Decanatu oppidi Mengen, deputati sunt M. Joannes Stoll, Decanus, & Parochus Schærensis; nec non M. Jacobus Felber, Parochus in Bingen.
- Decanatus oppidi Imperialis Ravenspurgensis, comparuit per Dominum Conradum Fabrum, Ss. Theologiæ Baccal., Parochum Altorffensem, Decanum; M. Joannem Alberti, Parochum Ecclesiæ II Mariæ Virginis prædicti oppidi, Dominum Joannem Stehelin, Parochum in Valdtburg, nec non Dominum Matthæum Langenstein, Capellanum in Hospitali præmemorati oppidi Ravenspurgensis.
- Decanatus Stivenhoven destinavit Procuratores, Dominum M. Melchiorum Finckel, Parochum in inferiori pago Sundthofen, & dnum Michaëlem Helcheberger, Parochum in Fischen, Camerarium.
- Decanatus Eisne, misit Dom. M. Georgium Ruopp, Parochum in Reichenhofen, Decanum, & M. Barth. Routhart, Ss. Theol. Baccal., Parochum in Leukirch.

### *Monasteria Ord. D. Dominici Prædicatorum.*

Nomine Monasteriorum in Civitate Constantiensi, Friburgensi, & Rottwilensi existentium, comparuit Rdus & Religiosus P. Servatius Jüngling, Ss. Theologiæ Doctor, Fratrum Prædicatorum per superiorem Germaniam, Austriam & Saxoniam, Magister Provincialis. Cæterum cum de illius adventu dubitaretur, prædicta Monasteria in Procuratorem, Venerabilem & Religiosum P. Udalricum Gæzonium, Ss. Theologiæ Doctorem, prædicti Cæno-

Cœnobii Constantiensis Priorem, constituerunt.

*Monasteria Sanctimonialium ejusdem Ordinis, quæ per Priorissas reguntur.*

Dominæ Priorissæ & Conventus Monasteriorum S. Petri & Zoffingen Constantiæ, nec non S. Marci in Siessen, constituerunt Procuratorem præmemoratum dominum Priorem Monasterii Constantiensis.

Nomine dnæ Priorissæ & Conventus Monasterii Sancti Petri, auf dem Bach, prope oppidum Svicense, præfati Ordinis, adfuit Rmi domini Abbatis Monasterii B.M. V. Eremitarum Procurator.

Dominæ Priorissæ & Conventus Monasteriorum Vallis Sanctæ Catharinæ in Diessenhofen & Lewenthal, ejusdem Ordinis, comparuerunt, per F. Joannem Kener & F. Paulum Meyer, Ord. Prædicatorum, Confessarios ibidem.

Pro parte Priorissæ & Conventus Monasterii Habstal, comparuit dnus Joannes Ziegler, parochus ibidem.

Reliquæ Priorissæ & Conventus Monasteriorum ejusdem Ordinis, videlicet Kirchbergæ in Adelhausen, in Stetten, in Hedingen, Sanctæ Agnetis, Sanctæ Catharinæ, & ad Pœnitentes Friburgi, D. Agnæis, & D. Catharinæ Brisaci, comparuerunt, per præfatum Ordinis Magistrum provincialem.

*Congregationes Sororum, sive Inclusoria ejusdem Ordinis.*

Domus Congregationis in Hirsstal, prædicti Ordinis, constituit Procuratores dominum M. Joannem Sorg, decanum Capituli Lindaviensis, parochum in Hergatschweiler: dnum Melchiorum Troll, ejusdem Capituli Camerarium, & plebanum in Oberraitnaw.

Inclusorium seu domus in Enendach, ejusdem Ordinis, comparuit per prædictum dominum Joannem Ziegler, parochum Habstalem.

Reliquarum domorum seu inclusoriorum nomine in oppido Imperiali Rottwilensi, Buochorn, Pfullendorff, Marispurgi, Villingæ, in Horb, in Engen, in Waldshut, in Oberndorff, in Birtzdorff, in Hirlingen, in Haigerloch, in Gruolen, in Nellenberg, in Baden Ergoviæ, in Raurhacher, in oppido Wilensi Turgoviæ existentium, Procuratorem se pariter constituit præfatus ejusdem Ordinis Provincialis.

*Religiosi Ord. D. Augustini, Eremitarum.*

Nomine Monasteriorum hujus Ordinis utriusque sexus, videlicet Constantiensis, Friburgensis, Brisacensis, & Oberndorfensis, nec non Sanctæ Catharinæ & S. Adelhaidis, comparuit Reverendus & Religiosus P. Joannes Georgius Greiffenstein, Rheni & Sueviæ Provincialis, Prior prædicti Monasterii Oberndorfensis.

Dominus Prior & Conventus Monasterii Uttenweiler, ejusdem Ordinis, constituit procuratorem Dominum Andream Vogel, U. J. D., parochum in Bezenweiler.

*Monasteria FF. Minorum Conventualium S. Francisci.*

Nomine Monasteriorum hujus Ordinis, nimirum Constantiensis, Überlingensis, Lucernensis, Brisacensis, Villingensis, & Neoburgensis, interfuit Reverendus & Religiosus P. Beatus Bishalm, FF. Minorum Conventualium per superiorem Germaniam provincialis.

Idem P. Provincialis procuratorem se constituit Monasteriorum seu Congregationum Sanctimonialium ejusdem Ordinis, videlicet S. Germani Villingæ, in Valle Kinziaca, S. Galli Überlingæ, domus pauperum ibidem, Margrethausen, Sipplingen, Beche, Wettbach, S. Michaëlis, Rauenspurgi, Dalbach prope Brigantiam, S. Annæ ibidem, Reuthe, Molsheim, in Saulgen, in Riedlingen, in Laiz, in Göthaim, in Pfullendorff, in Grönenberg, in Hermannsberg, in Möckingen, in Newhausen, domus apud Thermas Helvetiæ, domus in Baden, Bremgarten, Tugii, in Mutterthal, Solodori, in Grimmenstein.

*Religiosi Ord. S. Francisci de Observantia.*

Nomine Monasteriorum Friburgensis, & S. Lucii prope oppidum Hechingen, a Reverendo & Religioso patre Gaspare Cholero, Ord. provinciali, ablegatus est P. Antonius Zierer, provinciæ Argentinæ Diffinitor, & Confessarius Söflingæ.

*Monasteria, Domus seu Inclusoria Sanctimonialium Ord. S. Francisci de Observantia.*

Præmemoratus P. Antonius Zierer comparuit etiam nomine infracriptorum Monasteriorum, seu domorum & inclusoriorum, quæ per P. de Observantia gubernantur.

nari consueverunt, videlicet Congregationis in oppido Brisacensi, Ehingenſi prope Danubium, Munderkingenſi, domus Oberclausen & Silchen prope Rottenburg, in Unlengen, in oppido Horb, Wurtzach, Waldſee, Warthauſen, S. Ottherti prope Deislingen, Weiler prope Urſpringen, Kyslegg, in Seckingen, in Überlingen, an der Wiß, Monasterii Berche, in Weingarten, & Ogelspeuren ſitorum.

### *Religioſi Ord. Carmelitarum.*

Nomine Monasteriorum Ordinis Carmelitarum in oppidis Rottenburgenſi & Ravenspurgenſi existentium, aderat P. Andreas Lucas, & P. Andreas Mayer, priores ibidem.

### *Ordo S. Antonii.*

Domini Procuratores Ordinis S. Antonii in oppido Friburgenſi, Villingenſi, & in Uznach, nec per ſe, nec per Procuratorem comparuerunt.

### *Wilhelmitæ.*

Nomine Monasterii Oberriedt, Ord. Wilhelmitarum Friburgi, interfuit F. Joannes Gold, Subprior ibidem.

Nomine Monasterii in oppido Mengen, ejusdem Ordinis, interfuit F. Joannes Wein-

ſchenck, prior, & parochus Eccleſiæ S. Martini ibidem.

Dominus Prior Monasterii Syon, prædicti Ord., neminem miſit ob exiguum numerum Conventualium illic tum temporis degentium.

### *Paulini.*

Nomine Dominorum Priorum, & Conventuum Monasterii Rorhaltentis in Tanaw, in Bondorff, & Grünenwaldt, Ord. D. Pauli primi Eremitæ Procuratorem ſe conſtituit R. P. Rudolphus Biel, prior Rorhaltentis, & provincialis ejusdem Ordinis.

Pro parte Monasteriorum Langenaw & Argenhardt præfati Ordinis, ſuo & reſpectively procuratorio nomine interfuit F. Thomas Schroff, prior monasterii Langenaw.

Ex Fratribus laicis in Bernſtain, Ordinis D. Franciſci nemo comparuit.

Si numerus perſonarum, qui huic Diœceſanæ Synodo interfuerunt, ineatur, reperientur centum nonaginta circiter, exceptis iis, qui in Rmi & Illmi Domini Epifcopi & Prælatorum familia extiterunt, nec non Capellanis & aliis Clericis Cathedralis & aliarum Eccleſiarum Civitatis Conſtantiensis.

### FINIS.

*Omnia ad majorem DEI gloriam, & Eccleſiæ Catholicæ exaltationem.*

## CONSTITUTIONES & DECRETA

### EJUSDEM SYNODI CONSTANTIENSIS,

ANNO SEQUENTE CAL. MART. PUBLICATA.

**JACOBUS, DEI ET APOSTOLICÆ SEDIS GRATIA EPISCOPUS CONſtantiensis, Dominus Augiæ majoris & Oeningæ, &c. Universis & ſingulis Cathedralis noſtræ, & Collegiatarum, Parochialiumque Eccleſiarum Prælatiſ, Abbatibus, Præpoſitiſ, Prioribus, Decaniſ, Rectoribus, & Curatiſ, cæteriſque Civitatis & Diœceſiſ noſtræ Conſtantiensis Clericiſ, & perſoniſ Eccleſiaſticis, tam Regularibuſ, quam Sæcularibuſ, Salutem in Domino ſempiternam.**

**N**ulla uſquam fuit vel mediocris Reſpublica, quæ non ſit certis legibuſ conſtituta; nihil enim eſt tam aptum ad juſ conditionemque naturæ, quam lex, ſine qua nec domus ulla, nec civitas, nec gens, nec hominum univerſum genus ſtare, nec verum natura, nec ipſe munduſ poteſt. Per leges & reguntur urbeſ, & conſervantur: quæ ſi abrogentur, & pro ſua cuique libidine licentia permittatur, non Reſpublica tantum ut intereat, ſed nihil etiam inter noſtram & bellvarum vitam interſit, necesse eſt. Omnia legibuſ & obſervan-

tia legum ornantur, omnia præclara, omnia auguſta legibuſ accepta ſunt ferenda. Lex enim, ait Cicero, nihil eſt aliud, niſi recta & a numine Deorum tracta ratio, imperans boneſta, prohibenſque contraria. Hinc etiam noſ inducti ſumus, ut Leges & Conſtitutioneſ aliquas pro horum temporum conditione neceſſariâ & ſalutareſ, ex Sacriſ Canonibuſ & Concilii Trid. Decretiſ depromptaſ colligere-muſ, atque in Diœceſana Synodo Conſtantiensi menſe Octobri proxime elapſo, celebra-ta vobiſ proponeremuſ, quibuſ tum Catholica noſtra



nostra Religio conservari, ac conservata propagari, tum perturbata Cleri & populi disciplina restitui possit. Eas de unanimi omnium vestrum tunc in præfata Synodo congregatorum consensu, sancitas, approbatas & collaudatas, non tantum Ordinaria nostra auctoritate præsentium tenore confirmamus, sed etiam typis expressas ad vos mittimus. Accipite igitur, quas una Nobiscum constituistis & approbastis Leges, & eas non tantum quanto ma-

ximo potestis amore & pietate amplectimini, atque ad earum sententiam & rationem vos totos accommodare, sed etiam subditis curæ vestræ committis, quatenus eos, eorumque salutem respiciunt, exponite, utque tum a vobis ipsis, tum ab iis diligenter & accurate observentur, curate. Datum in oppido nostro Marisburgo, 1. Martii, Anno reparate salutis M. DC. X.

## INDEX TITULORUM, QUI QUATUOR HIS DECRETORUM SYNODALIUM PARTIBUS CONTINENTUR.

### TITULI PRIMÆ PARTIS.

- I. De Religione & Fide Catholica.
- II. De Professione Fidei Catholicæ.
- III. De Libris prohibitis.
- IV. De Superstitionibus & Magia.
- V. De Sacramentis Ecclesiæ.
- VI. De Baptismo.
- VII. De Sacramento Confirmationis.
- VIII. De Sacramento Eucharistiæ.
- IX. De Sacrificio Missæ & celebratione Missarum.
- X. De Pœnitentia.
- XI. De Confessariis & Casibus reservatis.
- XII. De Extrema Unctione.
- XIII. De Ordine.
- XIV. De qualitatibus Ordinandorum.
- XV. De Sponsalibus.
- XVI. De Matrimonio & impedimentis Matrimonii.
- XVII. De Lectionibus Sacris.
- XVIII. De Prædicatione Verbi Dei.
- XIX. De Catechismo & institutione Juventutis Christianæ.
- XX. De Cultu Divino & Cæremoniis Ecclesiasticis.
- XXI. De Reliquiis, Imaginibus, cultu ac veneratione Sanctorum.
- XXII. De Indulgentiis & Purgatorio.
- XXIII. De Festis diebus.
- XXIV. De Jejuniis ac delectu ciborum.
- XXV. De Scholis privatis.
- XXVI. De Seminario.

### TITULI SECUNDÆ PARTIS.

- I. De vita & honestate Clericorum.
- II. De Prælati & Canonicis Ecclesiæ Cathedralis & Collegiatarum.
- III. De Officio Decani Ruralis.
- IV. De Camerariis.

Tomus VIII. Concilior. German.

- V. De Plebanis & Ecclesiarum Parochialium Rectoribus.
- VI. De Vicariis Ecclesiarum incorporatarum, & Canonica portione.
- VII. De Sacellanis & aliis inferioris Ordinis Clericis.
- VIII. De Clericis peregrinis.
- IX. De Residentia Clericorum.
- X. De Horis Canonicis.
- XI. De Libris Clericorum.
- XII. De Collationibus Beneficiorum & Jure Patronatus.
- XIII. De Institutionibus.
- XV. De Pluralitate Beneficiorum.
- XVI. De Simonia.
- XVII. De Concubinato.
- XVIII. De Usuris & aliis Contractibus illicitis.
- XIX. De Ecclesiis, Capellis, Oratoriis & Altaribus.
- XX. De Rebus Sacris & Sanctis.
- XXI. De Bonis & Juribus Ecclesiarum conservandis & non alienandis.
- XXII. De Decimis & Oblationibus.
- XXIII. De Fabricis & Fabricarum Procuratoribus.
- XXIV. De Successionibus & Testamentis Clericorum.
- XXV. De Exequiis & Sepulturis.
- XXVI. De Immunitate Ecclesiastica.

### TITULI TERTIÆ PARTIS.

- I. De Regularibus & Religiosis.
- II. De Electione & Confirmatione Prælatorum.
- III. De Monialibus.
- IV. De Religiosis Domibus.
- V. De Sodalitatibus & Confraternitatibus.

P p p p p

TITU.

## TITULI QUARTÆ PARTIS.

- I. De Jurisdictione & Judicio Ecclesiastico.
- II. De Causis Ecclesiasticis, quæ de jure & immemoriali tempore ac consuetudine ad forum Ecclesiasticum Constantiense pertinent
- III. De Personis Judicii Ecclesiastici.
- IV. De executione Processuum.

V. De Censuris Ecclesiasticis &amp; aliis penis judicialibus.

VI. De Absolutionibus.

VII. De Appellationibus.

VIII. De Visitationibus.

IX. De celebratione Synodorum, &amp; executione Statutorum Synodaliū.

## CONSTITUTIONUM SYNODALIUM DIOECESIS CONSTANTIENSIS, P A R S P R I M A.

IN NOMINE SANCTISSIMÆ ET INDIVIDUÆ TRINITATIS, PATRIS, ET FILII,  
ET SPIRITUS SANCTI, AMEN.

## TITULUS I.

## De Religione &amp; Fide Catholica.

**Q**uia sine vera Fide impossibile est placere Deo, <sup>(a)</sup> utpote quæ sit fundamentum Religionis. Ideo nos unam Sanctam, Catholicam, Romanam Fidem a Christi Domini nostri, & Apostolorum ejus doctrina ductam, a Majoribus nostris acceptam, atque a Sacris Oecumenicis Conciliis, & universalis Ecclesiæ sensu, novissime etiam a Sacra Tridentina Synodo explicatam, traditam & definitam suscipimus, veneramur, credimus & confitemur, omniaque huic Sanctæ, Catholicæ, & Apostolicæ Fidei contraria, hæreses quascunque & schismata detestamur, rejicimus & anathematizamus. <sup>(b)</sup> Statuentes, atque omnibus Prælati, universo Clero, ac populo Diocesis nostræ mandantes, & in Domino exhortantes, ut in hac Fide Catholica constantes, & firmi permaneant, eandem credant, observent, ac doceant; neque ulla ratione aut persuasione a veritate hujus Sanctæ Fidei, & Ecclesiæ Catholicæ, in qua stant & salvantur omnes gentes, avelli se patiantur.

## TITULUS II.

## De Professione Fidei Catholicæ.

**E**GO N. firma fide <sup>(c)</sup> credo & profiteor omnia & singula, quæ continentur in Symbolo Fidei, quo Sancta Romana Ecclesia utitur; videlicet: Credo in unum DEUM Patrem Omnipotentem, factorem cæli & terræ, visibilium omnium & invisibilium. Et in unum Dominum JESUM Christum, &c.

Hanc Fidei Catholicæ Professionem, <sup>(d)</sup> antequam beneficiis, dignitatibus & officiis quibuscunque frui & fungi cœperint, faciant omnes quarumcunque Ecclesiarum, tam Sæcularium, quam Regularium Prælati, Canonici, Parochi, Vicarii, Curati, Sacerdotes, alique Clerici, Concionatores, Confessarii, Universitatum, <sup>(e)</sup> Gymnasiorum & Scholarum Rectores, Doctores, Professores, Magistri. Item promovendi ad aliquem gradum Doctoratus, Licentiæ, aut Magisterii. Præterea Typographi, Bibliopolæ, Medici, Chirurghi. Prælati quidem Canonici, & cæteri Clerici sæculares, coram Nobis, vel Vicario nostro Generali, & in Capitulis suis.

Regulares in manibus suorum Superiorum.

<sup>(a)</sup> D. Paulus ad Hebr. 11. c.<sup>(b)</sup> C. Excommunicamus. 1. & 2. de Hæret.<sup>(c)</sup> Ex Bulla Pii Papæ IV. quæ incipit: *Injunctum nobis, sub dato Romæ Anno 1564. Idib. Nov.*<sup>(d)</sup> d. Bulla Pii IV. Concil. Trident. cap. 2. de Reform. Sess. 25.<sup>(e)</sup> Bulla Pii IV. quæ incipit: *Sacrofancta, sub dato Romæ Anno 1564. Idib. Nov. d. cap. 2. de Reform. Sess. 25.*

periorum, aut eorum, quibus hujusmodi receptio Professionis Fidei, de jure vel consuetudine competit.

Laici vero coram Parochis aut Decanis ruralibus, vel iis, ad quos receptio hujusmodi spectat.

### TITULUS III.

#### *De Libris prohibitis.*

##### I.

**L**ibros hæreticos, maxime illos, qui de religione falsa & hæresi ex profecto tractant, atque de hæretica pravitate sunt suspecti, nemo legat, vel apud se retineat, nisi a Sede Apostolica dispensationem desuper impetraverit in scriptis, (f) quam Nobis, aut Vicario nostro exhibeat.

II. Neque hos solum, sed omnes pietati morumque honestati contrarios libros, qui amatoria, impura, obscœna, inhonesta, famosa, supersticiosa, & his similia continent, narrant aut docent, serio prohibemus. (g) In delinquentes Procurator noster Fiscalis ex officio severissime, juxta Canonicas Sanctiones animadvertat.

III. Illos etiam, qui obscœnas ac petulantes imagines & picturas, vel ad ludibrium nostræ Catholicæ Religionis, vel ad Ecclesiasticarum aut aliarum honestarum personarum infamiam factas vendunt, emunt, sibi fieri procurant, vel retinent, minime impunitos relinquemus.

IV. Parochi diligenter advertant, ne subditi sui parochiani, ex malitia aut simplicitate, libris Hæreticis, vel de hæresi suspectis, aut bonis moribus atque pietati Christianæ repugnantibus utantur. Quod si aliquos hujusmodi libros haberi, & legere deprehenderint, eos cum charitate & discretione primum corrigant, contumaces & rebelles ab Ecclesiæ ingressu, & Sacra-

mentorum participatione arceant, & si incorrigibiles existant, Nobis, aut Vicario nostro referant, ut in tempore, malo, ne forte serpat ulterius, per competentia remedia subvenire valeamus.

V. Nulli libri, imagines aut picturæ uspiam in locis Catholicis Diocesis nostræ venales exponantur, quas non prius Parochi, Decani, vel alii Censores a Nobis designati, ope etiam & auxilio Magistratus sæcularis, si opus fuerit, quem Nos in tam pia, & necessaria re Nobis minime defuturum speramus, inspexerint, examinaverint & approbaverint. (b)

VI. Præterea statuimus, & Typographis serio mandamus, ne libros cujuscunque generis, sive Ecclesiasticos, sive prophanos, in civitate Constantiensi, & aliis locis Catholicis nostræ Diocesis, absque nostra, aut Vicarii nostri Generalis, aut a Nobis ad hoc specialiter Deputatorum approbatione & censura, imprimant; (i) Alioquin Nos contra eos juxta Canonicas Sanctiones ad Ecclesiasticas censuras, vel alias pœnas, prout Nobis opportunum videbitur, procedemus.

VII. Officinas Bibliopolarum in Civitate Constantiensi Vicarius noster, cum deputatis librorum Censoribus, in aliis locis Parochi, aut Decani rurales visitent, libros inspiciant, & examinent.

VIII. Denique rogamus & hortamur in Domino Principes, & Magistratus omnes sæculares: & Ecclesiasticos, in Diocesi nostra existentes, ut non tantum hæreticos & de hæresi suspectos, pro sua pietate ac studio erga veram & indubitatam Sanctam, Catholicam Fidem e suis ditionibus atque oppidis, quo ad ejus fieri potest, amoveant, & expellant, (k) verum etiam sub gravissimis pœnis prohibeant, ne suarum ditionum homines, percipiendæ linguæ,

(f) Concil. Trident. de editione & usu sacr. Libr. Sess. 4. & Sess. 18. de Libr. delectu. Index Libr. prohib. a Pio Papa IV. in speciali Bulla, quæ incipit: *Dominici gregis*, sub dato Romæ die 24. Martii Anno 1564. confirmatus.

(g) Per d. Ind. libr. prohib. c. 1. 2. & 3. §. q. 1. tot. tit. C. de libel. famos.

(b) d. Index libr. prohib. cum Regulis ei præpositis.

(i) d. Index & Regulæ.

(k) c. Sicut excellentia. 23. q. 4.



guæ, mercaturæ aut alio nomine diutius & ultra unum aut duos menses in locis hæreticorum commorentur; ne liberos suos ad sectariorum scholas ablegent, aut ad loca hæretica in Matrimonium locent, neve libros hæreticos & de hæresi suspectos & alios prohibitos in ditiones & oppida sua inferri, & venales exponi patiantur.

## TITULUS IV.

*De Superstitionibus & Magia.*

## I.

**F**requens est, præsertim apud mulierculas, sed grande superstitionis & magiæ piaculum, Christianæ fidei, ac vero cultui, qui DEO TER OPT. MAX. debetur, e diametro repugnans.

II. Cujus cum varia nimis & multiplicia sint genera, (1) ea hic recensere non intendimus: sed Parochos, Concionatores, Confessarios, & alios quoscunque ad summam casuum conscientiæ, Cardinalis Tolerti, aliosque probatos authores remittimus. Illud summatim decernimus, ut hujusmodi, cujuscunque generis sint incantatorum, sortilegorum, magorum, divinatorum supersticiosorum artes, cum sint ex quadam pestifera societate Dæmonum atque hominum quasi pacta infidelis & dolosæ amicitiae (m) sive tacite, sive expresse constituta, a Parochis, Concinatoribus, Confessariis, & pio Magistratu, sub poenis Ecclesiasticis & temporalibus severissime prohibeantur, atque ab Ecclesia Dei, & cœtu fidelium penitus eliminantur. (n)

III. Et sane Nos supersticiosos divinatores, sortilegos, & magos, nisi resipiscant, anathemate feriemus, (o) & si Clerici fuerint, a beneficiis, dignitatibus, & officiis quibuscunque perpetuo deponemus. (p)

## TITULUS V.

*De Sacramentis Ecclesiæ.*

## I.

**S**eptem Ecclesiæ Sacramenta divinitus instituta, (q) per quæ omnis vera justitia vel incipit, vel cœpta augetur, vel amissa reparatur: & quibus velut remediis Deus peccatis nostris mederi, nobisque gratiæ suæ munera impartiri voluit, ex Oecumenicorum Conciliorum & universalis Ecclesiæ præscripto, cum ea, qua decet, reverentia suscipimus. Omnibus Clericis Dicecesis nostræ, tam Sæcularibus, quam Regularibus, cujuscunque status & conditionis fuerint, districtius mandantes, ut ea omnia, & singula in timore Domini cum debita reverentia, tum per se usurpent, ac sancta sancte tractent, tum ut a laicis condigne suscipiantur, diligenter procurent.

II. Volumus autem & Ecclesiarum Ministris præcipimus, (r) ut in concionibus, in Catechismo, & ante cujusque Sacramenti administrationem, si necessitas, propter populi ruditatem & inscitiam postulaverit, breviter virtutes, fructus & debitum usum Sacramento- rum, quid externa signa, quid cæremoniæ significant, ad captum tum suscipientium, tum reliquorum astantium, lingua germanica exponant, atque declarent, ut nosse possint quid suscipiant, quantum fructum inde referant, & quomodo sese ad ejus usum digne præparare debeant.

III. Et ut in uniformitate Spiritus Deo serviamus, cæremoniis & ritibus in administrandis Ecclesiæ Sacramentis utantur omnes, juxta præscriptum Sacerdotalis Ecclesiæ nostræ, donec Nos aliter statuerimus, & prædictum Sacerdotale magis ad usum & cæremonias Ecclesiæ Romanæ reduxerimus.

IV. Quod si inter Missale nostrum ad Romanum reformatum, & Sacerdotale, quoad aliquas cæremonias differentia occurrat, Missale sequendum, &

(1) Vide cap. Igitur. 26. q. 3.

(n) C. Quicunque. §. Ex præmissis. 16. q. 5.

(q) Concil. Trid. Sess. 2. de Sacramentis. c. Ad abolendam, de Hæret.

(r) Concil. Trid. Sess. 24. de Reform. c. 7.

(m) Cap. Illud. in fin. 26. q. 2.

(o) C. Si quis ariolos. &amp; d. §. Ex præmissis.

(p) d. Passim causa. 26. q. 5. cap. Quam sit grave. De excels. Prælat.

& juxta ejusdem præscriptum cæremo-  
niis utendum esse declaramus.

V. Pias & antiquas consuetudines  
circa actus & officia quædam Ecclesiasti-  
ca, quæ fortasse sine offensione populi  
intermitti non possunt, ita probamus,  
ut prius Nos, aut Vicarius & Consilia-  
rii nostri Ecclesiastici consulantur: no-  
strumque aut eorum responsum ac re-  
solutio desuper expectetur & observe-  
tur.

VI. Sacerdotes, qui ex alienis  
Dioecibus in nostram transmigrave-  
rint, novas vel peregrinas cæremonias  
secum non adferant, aut pro suo libitu  
sibi fingant, sed si Ecclesiis nostræ Dioe-  
cesis inserviunt, in iisque beneficia as-  
sequuntur, nostræ etiam Dioecesis riti-  
tibus ac cæremoniis, tum in Sacramen-  
torum administratione, tum in aliis Di-  
vinis Officiis peragendis utantur. Con-  
tra inobedientes Fiscalis noster ex offi-  
cio procedat.

VII. Sacramenta omnia lingua la-  
tina, sobrie ante prandium, nisi ne-  
cessitas & laudabilis consuetudo aliter  
suaserit, sine peccato mortali, non obi-  
ter & præcipitanter, sed cum debita  
gravitate, reverentia ac pietate, sine  
gesticulationibus & cæremoniis non  
consuetis, cum stola & superpelliceo  
administrentur, ut populus, cum vi-  
derit sancta sancte ac religiose tractari,  
similiter ad sancte & religiose Sacramen-  
ta suscipienda moveatur.

VIII. Mandamus etiam, ut Divi-  
na Sacramenta omnibus indifferenter,  
divitibus, pauperibus, utriusque se-  
xus (iis exceptis, quos ad suscipien-  
da Sacramenta Canonice Sanctiones fa-  
ciunt inhabiles) sine dilatione, pro ra-  
tione loci, temporis & necessitatis,  
pie, prompte, sine Simonie labe,  
aut ulla mercede conventa, vel ex-  
actione aliqua indebita, gratis ministren-  
tur. (1)

IX. Permittimus tamen, si quid a  
susipientibus Sacramenta sponte offe-  
ratur, ut illud a Curatis vel Clericis,

præsertim pauperioribus, & quorum ali-  
qua pars reddituum in hujusmodi ob-  
ventionibus stolæ, ut vocant, sit, non  
tantum recipi, verum etiam, quantum  
de jure licet, pro sustentatione sufficien-  
ti aliquid peti possit. (2) Ubi etiam  
populum Christianum in Domino ex-  
hortamur, ne bovi trituranti os alligent,  
(3) sed Christianum ac dignum esse co-  
gitent, eos de altari vivere debere,  
qui altari inserviunt.

X. Sanctissimum Domini nostri  
JESU Christi Corpus, Aqua Baptismi,  
Sanctum Chrisma & Olea Sacra sub dili-  
genti & forti custodia atque clausura,  
quodlibet in loco suo condecienti, &  
in vasculis mundis conserventur & ha-  
beantur. (4) Claves non penes Ædi-  
tuos, sed Curatos, vel eorum socios in  
cura existant, quas non passim & co-  
ram familia relinquunt; sed vel secum,  
vel domi suæ in certo loco occlusas ha-  
beant, ne forte (quod absit) injuria  
aut prophanatio Sacris Christi mysteriis  
irrogari possit.

XI. Sanctum Chrisma & Olea Sa-  
cra, quorum in administrandis Sacra-  
mentis est usus, a Nobis & Ecclesia no-  
stra Constantiensi matrice singulis an-  
nis nova petantur & renoventur, cæ-  
tera vel in novo igne Sabbati Sancti,  
vel alio honesto loco & igne comburan-  
tur, & cineres in Sacrarium deponan-  
tur. (5)

XII. Quod si anno nondum abso-  
luto Sacra Olea sibi deficere animad-  
verterit Parochus, a Decano suo nonni-  
hil Olei Sacri, quo indiget, petat, aut  
hanc a Canone præscriptam rationem  
ineat, ut cum Oleo Sacro non sacrum,  
de olivis tamen expressum, misceat. (6)  
Id vero guttatim ita confundat, ut sem-  
per, quod infunditur, minus sit oleo  
consecrato.

## TITULUS VI.

### De Baptismo.

I.

**Q**uia Baptismus fundamentum (a)  
est nostræ salutis, per quem ex  
filiis iræ & diffidentie regenera-  
mur

P p p p p 3

(1) C. Non satis. c. Cum in Ecclesia. c. Apostolicam. de Simonia.

(2) Per d. c. Ad Apostolicam. de Simonia.

(3) Deut. 25. cap. 1, Corinth. 9.

(4) C. 1. de custod. Eucharist.

(5) C. Literis. de Consec. d. 3.

(6) Cap. 3. de Consecrat. d. 3.

(a) C. Conveniens. de Presbyt. non baptiz. c. Cum itaque, in fine. de Consecr. dist. 4.

mur in filios adoptionis filiorum Dei. Ideo infantes recenter nati sine aliqua mora, & quam citissime fieri potest, ad Ecclesiam Parochialem deferantur, & adhibitis prius debitis & consuetis orationibus, exorcismis, (b) unctionibus (c) & cæremoniis in aqua baptismali sanctificata & benedicta a Parochis baptizentur. (d)

II. Injungimus vero Parochis & Curatis omnibus serio, ut ad baptizandum aliquem infantem vocati sine mora in Ecclesia compareant, & officio suo pastoralis satisfaciant. Quod si eorum culpa infans aliquis sine Baptismo mortuus fuerit, Nos eos quam severissime puniemus, atque etiam pro qualitate culpæ ab officio suspendemus, aut beneficio privabimus.

III. Illustrium quoque & Nobilium Virorum infantium recens natorum Baptismus, ultra paucos aliquot dies minime differatur, & tunc modo ubi nullum mortis periculum timetur. (e)

Infantes omnes publice in Ecclesia, aut saltem in Sacello sive Oratorio aliquo baptizentur. (f) Casum necessitatis excipimus, quando scilicet propter mortis periculum infans ad Ecclesiam deferri non potest, quo casu & domi & privatim a quolibet homine Christiano Baptismus licite administrari & conferri poterit, (g) modo debita materia, quæ est aqua naturalis, simplex vel sanctificata, & forma, quæ est: *Ego te baptizo in nomine Patris, & Filii, & Spiritus Sancti*, adhibeantur. Magis tamen convenit etiam in hoc casu a Sacerdote, vel alio Clerico, si adsint, & eorum copia commode ac salva honestate haberi possit, tum a viro, denique a femina infantes periclitantes baptizari.

IV. Quod si in periculo infans baptizatus supervixerit, ad Ecclesiam nihilominus deferatur, & Baptismo excepto, reliquæ cæremoniæ propter necessitatem omissæ suppleantur. (h)

Examinent vero diligentissime Parochi, aut eorum socii obstetrices, vel alios, qui infantem aliquem baptizaverunt: An & quomodo, quibus verbis & forma, qua materia & aqua, & cum qua intentione baptizaverint. Quod si debitam materiam, formam, & Ecclesiæ intentionem adfuisse cognoverint, Baptismus minime repetant, si neutrum horum adfuerit, aut unum ex illis defuerit, de novo baptizent: si probabiliter dubitent, Baptismus cum conditione conferant, videlicet: *Si non es baptizatus, ego te baptizo in nomine Patris, & Filii, & Spiritus Sancti*.

V. Moneant etiam Parochi obstetrices, ut non tantum in baptizandis infantibus periclitantibus cautæ sint ac circumspectæ, officiumque piæ & honestæ matronæ præstent, sed etiam ut pro hujusmodi necessitatibus singulis annis aquam benedictam, antequam Sacrum Oleum & Chrisma fuerit infusum, in Sabbatis Paschæ & Pentecostes recipiant, per annum in vase mundo conservent, & ea in baptizando utantur.

VI. Infans expositus, licet in collo habeat appensum testimonium, quod baptizatus fuerit, si tamen aliunde non constet, baptizetur sub conditione. Quod si in testimonii schedula sit inscriptum nomen, quod illi in Baptismo impositum esse asseratur, idem nomen ipsi imponatur, & omnia, quæ circa hæc gesta sunt, in libro baptizandorum diligenter conscribantur.

VII. Prudenter Sacrum Tridentinum (i) Concilium propter pericula & difficultates impediendi cognationis spiritualis & Matrimoniorum constituit in Susceptores seu Patrinos baptizandorum unum tantum, vel ad summum unum, & unam sumi debere, quam salubrem Constitutionem hactenus in Dicecesi nostra observatam etiam de cætero observari mandamus. Neque

(b) C. Sive parvuli. de Consecr. dist. 4.

(c) C. 1. §. Quia vero. de Sacra Unctione. c. Deinde. de Consecr. dist. 4.

(d) C. Constat. de Consecr. d. 4.

& de Consecr. d. 4. c. Quicumque.

(e) C. In necessitate. c. Mulier. c. Sanctam. de Consecr. dist. 4.

(f) Facit cap. Ab antiqua. de Consecr. dist. 4.

concordat. cap. Quamvis. de cognat. spirit. in 6. c. Non plures. de Consecr. d. 4.

(g) C. Neque. c. Si quis per ignorantiam. r. q. 1.

(h) Clem. 1. de Baptif. & ejus effectu.

(i) Sess. 24. de Reform. Matrim. cap. 2.



que Parochi plures sub quovis prætextu admittant, nisi malint & nostram indignationem & condignam pœnam sustinere.

VIII. Viri nobiles, si quando plures Paternos forte pro majori solennitate & familiæ suæ splendore adhibeant, volumus, ut Parochi ex ipsis duos designent, qui veri Susceptores sint, & cognationem spiritualem contrahant, atque in librum baptizandorum a Parochis inscribantur: Reliqui non item, quos tamen loco testium Baptismi solennitatibus interesse non vetamus.

IX. Patrini sint homines pii atque Catholici, ætatis maturæ, ut ad interrogata apte respondere valeant, bonæ vitæ & famæ, in fide Catholica & probatis moribus bene instituti, ut filios suos spirituales in iisdem instruere possint: id enim ipsorum quam pro infantibus DEO & Ecclesiæ faciunt, sponsio requirit. (k)

X. Et revera satius esse judicamus eos Paternos deligere, qui magis infantes in fide & Christiana pietate imbuere, quam donis ac muneribus cumulare queant.

XI. Regulares cujuscunque Ordinis, Moniales item ad suscipiendum infantes ex Sacro Fonte, nec recipiantur, nec admittantur: (l) ii enim cum propriam voluntatem non habeant, sed ex Superiorum suorum nutu dependant pro aliis spondere quomodo possunt?

Parochi quoque Paternos officii & sponsionis suæ diligenter admoneant, omniumque baptizandorum, eorundem parentum ac patrinorum nomina & cognomina cum annotatione anni, mensis & diei in librum specialiter ad hoc deputatum inscribant, (m) & vel domi suæ, vel in aliquo loco Ecclesiæ clausum custodiant, illumque singulis annis Decano suo ostendant, ut in hoc negligentes Nobis, vel Vicario nostro digna pœna plectendos denunciare possit.

XII. Puerperæ exacto puerperio domum cum exierint, mox Ecclesiam Deo acturæ gratias ad benedictionem a Parocho accipiendam, & Missæ Sacrificium audiendum accedant. Ubi mos hic laudabilis & antiquus injuria temporum in desuetudinem abiit, in usum pristinum per Parochos cum prudentia & discretionem revocetur.

XIII. Habeant singulæ Ecclesiæ Parochiales & curatæ singulos fontes lapideos bene clausos & munitos, & ubi in una, & eadem Ecclesia diversæ religiones propter bonum, & pacem publicam tolerari debent, omnino distinctos, neque cum hæreticis ullo modo communes, in quibus aqua baptismalis benedicta, & Chrismatis unctione sanctificata, & singulis annis diebus Sabbati, Paschæ & Pentecostes per Parochos solenni ritu & cæremoniis renovata, summa cum diligentia & munditia servetur.

XIV. Moneant diligenter populum Christianum Parochi, ne aquam baptismalem ad aliquem prophanum & superstitiosum usum accipiat, nec ea aliter, quam ad asperisionem (n) corporum & domorum ad depellendas diabolicas nequitias utatur.

## TITULUS VII.

### De Sacramento Confirmationis.

#### I.

CUM in Sacramento Confirmationis homo quasi adolescat & perficiatur in virum, ut sit plenus atque perfectus Christianus, & ad pugnam, quæ nobis cum Diabolo, mundo & carne perpetua est, per Spiritus Sancti gratiam confirmetur: (o) Summo studio Parochis & Curatis omnibus enitendum est, ne sibi commissorum animæ tam potenti & salutari Sancti Spiritus robore defraudentur. Itaque quotiescunque occasio fuerit, præsertim vero in Festivitatibus Pentecostes de hujus Sacramenti institutione, præstantia, sanctitate, virtutibus & effectu populum

ex

(k) C. Vos autem omnia. de Consecr. d. 4.

(l) C. Non licet. c. Monachi. de Consecr. d. 4. c. Placuit 16. q. 1. c. Pervenit 18. q. 1.

(m) d. c. 2. Sess. 24. de Reform. Matrim. §. Parochus.

(n) C. In Sabbato Sanct. de Consecr. d. 4.

(o) C. Spiritus S. c. Novissime. de Consecr. d. 5.

ex concione instruant, simulque septem dona Spiritus Sancti, quæ in hoc Sacramento conferuntur & accipiuntur, explicent, & populum Christianum sedulo moneant ad hujus tam præstantis Sacramenti piam devotamque susceptionem.

II. Ne vero Nos in hac parte (cum solus Episcopus Confirmationis Sacramentum conferre possit) officio nostro pastorali defimus, conferemus hoc Sacramentum vel ipsi, vel per nostrum Vicarium in Pontificalibus Generalem, in Civitate nostra Constantiensi in festivitate Pentecostes, & temporibus, quibus in Ecclesia nostra Cathedrali Ordines Sacri conferri solent, videlicet Feria sexta post Dominicam *Invocavit*, feria sexta post Dominicam *Latere*, die Veneris sancto, feria sexta ante Festum Sanctissimæ Trinitatis infra octavam Pentecostes, feria sexta in angaria Crucis, & feria sexta in angaria ante Nativitatem Domini.

III. Extra vero civitatem Constantiensem in Diœcesi nostra in omnibus visitationibus, quibus vel nos, vel noster in Pontificalibus Vicarius intererit; Item in consecrationibus & benedictionibus Ecclesiarum, Cœmiteriorum, Altarium & Prælatorum.

IV. Monebimus vero prius Curatos locorum, ubi & quando Sacramentum hoc in Diœcesi administrare velimus, ut ipsi hoc populo ex cancellis denuntiare, atque ad suscipiendum cohortari possint, populus vero sese pie & digne præparare valeat.

V. Ad Confirmationem nullus, qui ad annos discretionis pervenit, accedat, nisi prius de peccatis confessus. (q) Minores septennio ex multis causis non admittimus, (r) nisi Nobis, aut Vicario nostro in Pontificalibus specialiter cum aliquo, ex causa dispensandum videatur.

VI. Susceptores in Sacramento Confirmationis tales sint, quales supra

de Baptismo descripsimus, nec plures, quam unus. (s) Susceptores vero neque iis quos susceperunt, neque eorum parentibus largiantur aliquid tale, ex quo occasio Sacramentum hoc iterandi, quod sæpius commissum audivimus, præbeatur.

VII. Quod ut præcaveri & melius etiam de cognatione spirituali judicari queat, mandamus Parochis, ut confirmatos & eorum compadres, annum, mensem & diem collatæ Confirmationis, servatis cæteris omnibus, quæ de libro Baptizatorum præscripsimus, in speciali libro, quantum fieri potest, inscribant.

## TITULUS VIII.

### De Sacramento Eucharistiæ.

#### I.

Sacro sancto Eucharistiæ Sacramento, Corpore & Sanguine Domini ac Redemptoris nostri JESU CHRISTI, Symbolo maximæ & infinitæ charitatis DEI erga nos, Ecclesia Catholica nihil habet sublimius, nihil sanctius, nihil augustius: Illud vero cum his calamitosi temporibus ab Hæreticis passim prophanetur, oppugnetur & contemnatur, mandamus serio omnium Ecclesiarum Diœcesis nostræ Rectoribus, Concionatoribus, cæterisque Clericis sæcularibus & Regularibus quibuscunque, ut subditis suis & populo Christiano sæpius quam diligentissime explicent, & inculcent, quæ post tot clarissima Sanctorum Patrum & Oecumenicorum Conciliorum testimonia novissime Sacra Tridentina Synodus (t) de institutione & excellentia, de veritate & reali præsentia Domini nostri JESU CHRISTI in Sanctissima Eucharistia, de transubstantiatione, de adoratione, cultu ac veneratione huic Sanctissimo Sacramento exhibenda, & de digna sumptione & oblatione hujus tanti Sacramenti definivit ac declaravit.

#### II.

(p) C. Quanto conf. c. Manus. de Consecr. d. 5. Conc. Trid. Sess. 7. de Confirm. can. 3.

(q) Cap. Et jejun. de Consecr. d. 5.

(r) Ex Catechismo Romano.

(s) C. In Catechismo, cum seq. de Consecr. d. 4. per tot. tit. de cognatione spirit. in 6. Concil. Trid. Sess. 24. de Reform. Matrim. cap. 2.

(t) Sess. 13. in Decreto de Sanctissimo Eucharist. c. 1. 2. 3. 4. & 5.

II. Et licet Ecclesia, refrigescente charitate ac fervore populi Christiani, semel tantum in anno circa festa Paschalia Corpus & Sanguinem Domini nostri a fidelibus, debita præparatione præmissa, sumi debere statuerit; (u) Quia tamen vere fit suavis Dominus sæpius gustantibus eum, omnes Christi fideles & Catholicos Diecefanos nostros in Domino hortamur, ut hunc cœlestem Divinumque panem, immensum cœlestium divitiarum thesaurum non semel tantum, sed sæpius in anno, maxime vero in solennioribus Festivitatibus sumant. (x).

III. Parochi quoque ad piam & salutarem hujus Sacramenti frequentiam suos quisque verbo & exemplo publice & privatim incitent atque invitent.

IV. Paschalis Communio quotannis in Parochiali Ecclesia fiat, (y) quam nemo intermittat, differat, aut alibi faciat, sine nostra, aut Vicarii nostri, vel proprii Parochi sui licentia. Quod si quis ex necessitate vel alia justa causa a Nobis, vel Vicario nostro approbata extra Parochiam suam communicaverit, de eo Parocho suo sufficientem fidem faciat.

V. Si quis vero Ecclesiæ & nostrum mandatum omnino contempserit, & monitus non resipuerit, is ad nullum aliud etiam Matrimonii Sacramentum admittatur, & vivus a communione fidelium & Ecclesiæ ingressu arceatur, & mortuus sepultura Christiana privetur. (z) Parochi etiam talium nomina Nobis, aut Vicario nostro in scriptis deferant, ut competens remedium adhibere, & inobedientes per condignas pœnas, adhibito etiam, si opus fuerit, brachii sæcularis auxilio ad obedientiam & præceptorum Ecclesiæ observantiam revocare valeamus.

VI. Nullus sine prævia Sacramentali confessione & absolutione præsumat ad tremendum hoc Sacramentum accedere, (a) sed probet seipsum homo, & sic de pane illo edat. (b) Qui secus facere deprehensus fuerit, contra eum ut sacrilegum tanti mysterii prophana-torem severissime procedemus.

VII. Publici concubinari, sceneratores, blasphemæ, & alii ejusmodi facinorosi (c) homines semel, bis, terve sub spe emendationis ad pœnitentiam & Sacram Communionem admissi, si postea eos in eodem luto peccatorum hædere cognitum fuerit, amplius ad Communionem non admittantur, donec eos vitam & mores emendasse, Parochi perspexerint.

VIII. Eucharistiæ Sacramentum qui sumunt, cogitent se ad Dominum & Deum suum accedere, proinde pœnitentiam, animi submissionem & debitam devotionem vultu ac habitu demisso præferant. (d)

IX. Ministretur Sacra Communio non promiscue maribus & sceminis simul, sed primo maribus seorsim, postea sceminis.

X. Eucharistiam vero eo modo porrigant Parochi fidelibus, qui in Ecclesia Catholica tot jam sæculis semper fuit observatus, & a Sacris Conciliis Constantiensi, (e) Basileensi, (f) & Tridentino (g) publico totius Ecclesiæ Decreto confirmatus, nimirum ut non modo fideles laici, verum etiam Sacerdotes non celebrantes Corpus & Sanguinem Domini, adeoque totum Christum Deum & hominem sub una panis specie sumant. Quem communicandi ritum tanto diligentius in Dicecesi nostra observari volumus, quod hoc non obscuro symbolo hodie vere Christiani & Catholici a Sectariis & Hæreticis discernantur.

XI.

(u) c. Omnis utriusque sexus. de Pœnit. & Remiss.

(x) Facit c. Omnis homo. d. & c. Ex si non frequentius. de Consecr. dist. 2.

(y) d. c. Omnis utriusque. Concil. Lateran. sub Innoc. III. can. 21. Concil. Trid. Sess. 13. de Sacram. Euchar. can. 9. & Sess. 14. de Sacram. Pœnit. c. 5.

(z) d. c. Omnis utriusque. (a) Concil. Trid. Sess. 13. de Sacram. Euchar. c. 7.

(b) 1. Corinth. 11.

(c) Pro dilectione. de Consecr. d. 2. Sylvester in verbo: Eucharistia. 3. n. 7. (d) d. Sess. 13. c. 7. (e) Sess. 13. (f) Sess. 30.

(g) Sess. 13. de Sacram. Euchar. can. 3. & Sess. 21. c. 1. 2. & 3. de Communionis sub utraq.



XI. Vinum ablutionis post sacram Communionem non in calice, nec a Sacerdote, sed vel ab alio Clerico vel honesto laico ex alterius formæ poculo argenteo, aut deargentato porrigatur, ne rudes & idiotæ, ut aliquando factum fuisse intelleximus, Christi Sanguinem in eo se sumere credant.

Adolescentibus, qui primum communicare voluerint, Eucharistia non detur, nisi Parocho constet illos in Articulis Fidei, Præceptis Ecclesiæ, Oratione Dominica, Salutatione Angelica, decem Præceptis, atque circa Sacramentorum, maxime Baptismi, Pœnitentiæ, & Eucharistiæ virtutes & efficaciam esse instructos: quod idem de puellis primum communicaturis intelligendum volumus.

XII. Communicantes omnes, ii præsertim, qui semel tantum in anno communicant, diligenter ex suggestu, & in confessione a Parochis & Confessar. admonendi sunt, cum quanta humilitate & reverentia ad tremendum illud Sacramentum venire debeant, (b) & quanta supplicia, juxta Apostoli Pauli sententiam (i) eos maneant, qui indigne Corpus & Sanguinem Christi Domini suscipiunt.

XIII. Ut autem populus, præsertim agrestis & rudis, cum debita reverentia & honestate Sacramentum hoc Corporis & Sanguinis Domini nostri summat, injungimus Parochis & Curatis, ut eundem ante aram flexis genibus procumbentem brevi aliqua exhortatione ad dignam Communionem præparent & inducant, deinde confessionem generalem, clara voce germanice pronuncient, dataque generali absolutione latine, & ter verbis Centurionis etiam germanice pro more repetitis, in ora singulorum non stantium, sed in genua procumbentium, cum summa reverentia & modestia, Sacram Eucharistiam immittant.

XIV. Et ne forte ex aliqua incuria aut negligentia Sacramento fiat ali-

qua irreverentia, volumus, ut a duobus piis & modestis pueris inter porrigentis Sacerdotis & suscipientium pectora velum aliquod extensum teneatur.

XV. Curent etiam Parochi diligenter, ut Thesaurum hunc cœlestium divitiarum cum ea, qua decet, animi & corporis puritate, reverentia & honore dispensent, nec quidquam faciant aut intermittant, quod huic tanto Mystério etiam minimam irreverentiam irrogare queat: itaque in tangendis Sacris Hostiis, in gerendo & circumferendo ciborio aut patena, in colligendis & sumendis micis, etiam minutissimis, in ablutione, &c. cauti sint & circumspécti. (k)

XVI. Denique cum boni Pastoris sit nosse & scire numerum ovium suarum, (l) non pauciores Hostias Parochi consecrent, quam habeant in Parochia sua communicantes, & ne ex defectu consecratarum Hostiarum aliqui rursus cum scandalo abire, & Communionem differre debeant, semper supernumerarias aliquot adjiciant & consecrent Hostias.

XVII. Consuetudo asservandi Sacrosanctam Eucharistiam pro infirmis adeo antiqua est, ut eam non tantum sæculum Nicœni Concilii, verum etiam ipsorum Apostolorum agnoverit, (m) & novissime Tridentinum Concilium, (n) tanquam rem salutarem ac maxime necessariam omnino retinendam statuerit.

XVIII. Tabernaculum, in quo asservari debet Venerabile Sacramentum, sit in loco eminenti, conspicuo, honorifico, (o) non humido aut sordido, sed sicco & mundo, cancellis & repagulis septo ac bene munito, vel in ipso Altari secundum morem Romanum, vel in latere sinistro Chori prope Altare, veluti plerumque ab Antecessoribus nostris Germanis non temere observatum videmus, pro cujusque loci commoditate. Asservetur autem cum

(b) Concil. Trid. Sess. 13. de Sacr. Euchar. c. 7. Timorem. de Consecr. d. 2.

(i) 1. Cor. 11.

(k) Tribus gradibus. de Consecr. dist. 2.

(l) Joan. 10.

(m) Clemens Epist. 2. ad Jacobum Fratrem Domini.

(n) Sess. 13. de Sacr. Euchar. cap. 6. & can. 7. c. De custod. Euchar. c. Sane. de celebr. Miss.

(o) C. Sane. de celebr. Miss. cap. 1. de custod. Eucharist.

cum decenti honore & ornatu, vasculum sive capsula, ubi fabricæ sunt ditiores, sit integra ex argento; ubi pauperiores, saltem deargentata vel deaurata, quæ ab extra pallio aureo, argenteo holoserico aut serico, pro cujusque loci qualitate vestiatur.

XIX. Hostiæ consecratæ pro morientium viatico & aliis necessitatibus tot reserventur, quot Parochus sufficere existimaverit. Renoveantur singulis mensibus bis aut minimum semel, veteribus in Communione Missæ sumptis.

Quod si ex negligentia alicujus Sacerdotis Hostiæ omnes, aut aliquæ (quod ne fiat, severissime prohibemus, & cum a quopiam factum fuerit, gravissimis pœnis vindicabimus) putrescerent, vermes, si qui nati sunt, comburantur, & cineres in Sacrarium Ecclesiæ projiciantur; Hostiæ vero, & earum partes, quæ adhuc sunt integræ, a Sacerdote sumantur, nisi ei horrorem & stomachum moverent, tunc enim in vase aliquo peculiari, donec omnino corrumpantur, in Tabernaculo cum reverentia reponi, & postquam corruptæ fuerint, similiter comburi, & cineres in Sacrarium projici volumus.

XX. Ardeat coram Tabernaculo, in quo Venerabile Sacramentum aservatur, sumptibus fabricæ, vel alterius, qui ad id obligatur, perpetuo noctes atque dies lampas, quæ, si extinguatur, rursus accendatur & conservetur. Quod licet Ædituorum munus sit, Parochis tamen incumbit Ædituos negligentes sui officii commonere.

XXI. Sanctissima Eucharistia ad ægrotos summa cum religione a Sacerdote, superpelliceo & stola induto, cum lumine & campanula, qua fidelibus signum detur, deferatur. (p) Ubi laudabilis viget consuetudo, cum majori solennitate, videlicet cum pueris in habitu choralis vexilla & lumina portantibus atque cantantibus, cum vicinorum, & aliorum Christi fidelium comitatu, aliisque piis & devotis cæremoniis Sacrum Viaticum ad ægrotos deferri, volumus, ut consuetudo hujusmodi in illis locis, ubi est, non tan-

tum in posterum observetur, sed etiam vehementer desideramus ad promovendum & augendum cultum tanti Sacramenti, ut talis mos etiam alibi, ubi nondum institutus est, introducatur.

XXII. Deferant autem Parochi, vel Curati ad minimum duas particulas ad infirmum, ne eis ad Ecclesiam redeuntibus populus vacuum vasculum adoret. Quod si ex negligentia vel inadvertentia (quam omnino sub gravi pœna cavendam esse mandamus) vel aliqua legitima causa, ut quod plures providendi fuerint, Parochi sine Sacra Hostia ad Ecclesiam redire debeant, fiat illud sine lumine, sine cantu, sine pulsu campanulæ, neque ciborium, uti alias fieri debet, alte portetur, sed in silentio & cum modestia ad Ecclesiam revertantur, ut cognoscere possit populus, non adesse ibi, quem debeat adorare.

XXIII. Nullus quoque Curatorum sacram Communionem, quantacunque atrocitate pestis, aut alius gravis morbus sæviat, nullaue alia de causa laico aut scemina ad infirmum deferendam tradat, sed per se ipsum illud oneris subeat, quemadmodum ex debito officii & muneris sui pastoralis tenetur.

XXIV. Ubi propter locorum distantiam aut viæ incommoditatem Parochi Sacrum Viaticum ad infirmos equitando portare debent, curent diligenter, ut Sacre Hostiæ in loculo, quem ex collo bene clausum, & cum forti ligatura gestabunt, ita sint compositæ & inclusæ, ne ex agitatione equi in frustra vel concidant, vel comminuantur, aut Venerabili Sacramento aliqua alia irreverentia contingat.

XXV. Quando grandines, turbine, aliæve tempestates imminet, aut magnum aliquod incendium exsurgit, Parochi, Curati, vel alii Clerici, sive sæculares, sive Regulares ad arcendam tempestatis procellam aut incendium, Venerabile Sacramentum extra Tabernaculum non exponant, neque cum eo in Ecclesiarum portis vel cœmeteriis aut apud incendium preces aliquas & cæremonias faciant, sed relicto eo in loco

(p) C. Sane. §. Quam. de celebr. Miss.

Tomus VIII. Concilior. German.

loco suo, ante illud Litanias aut alias preces, ejus rei causa institutas, pie ac devote pronuntient.

XXVI. Morem illum, quo plerique Parochi in rure existentes ex antiqua consuetudine, quæ sine scandalo tolli non potest, agros cum Sacrosancta Eucharistia loculo inclusa, & ex collo dependente obequitare solent, non omnino quidem improbamus, volumus tamen, ut cum tali reverentia ac devotione fiat, ne per hujusmodi obequitationem potius Deus offendatur, quam placetur, & ne rustici, dum segetum incrementa sperant, propter irreverentiam Sacramento factam sterilitatem magis sentiant. Parochi vero quamprimum agros cum consuetis piis ac laudabilibus cæremoniis obequitaverunt, statim sine ulla interposita mora cum Venerabili Sacramento ad Ecclesiam revertantur, illudque decenter in locum suum reponant.

XXVII. Denique habeatur in singulis Ecclesiis parochialibus Monstrantia, ut vocant, argentea, aut deargenteata pro ratione reddituum fabricæ, in qua Venerabile Corpus Christi in ejusdem solennitate annua & per octavam in majori forma ponatur, populo Christiano solenniter ad adorandum demonstretur, (q) & solennibus processionibus pro tanti Sacramenti reverentia honoretur.

XXVIII. Aliæ processiones cum Venerabili Sacramento in Monstrantia exposito extra Ecclesiam sine Nostra, aut Vicarii nostri Generalis licentia non fiant, nisi ubi antehac auctoritate Pontificia vel Ordinaria institutæ essent, quibus per hanc nostram ordinationem nihil derogatum esse volumus.

XXIX. Oratio quadraginta horarum, si quando ex gravibus causis instituat, fiat coram Venerabili Sacramento in Monstrantia exposito, & in altari aliquo decenter ornato, collocato. In processionibus vero, quæ tunc fiunt, Sacra Eucharistia extra ambitum templi non deferatur.

## TITULUS IX.

### *De Sacrificio Missæ, & celebratione Missarum.*

#### I.

**C**Hristus Dominus in ultima Cæna Sacrificium Missæ instituit, ut fideles munus aliquod haberent, quod DEO Patri pro variis beneficiis ac donis, & in remissionem peccatorum offerre possent. (r) Missa igitur est Sacrificium DEO gratissimum, in quo Filius unice dilectus Dominus ac Redemptor noster JESUS CHRISTUS, qui in ara Crucis seipsum cruento obtulit, DEO Patri suo incruente offertur & immolatur. Quare quanta maxima fieri potest interiori cordis munditia & puritate, atque exteriori devotione, pietate, humilitate ac reverentia Sacerdotes munus hoc Sacrosanctum, vere propitiatorium pro peccatis nostris offerant, tractent, atque absolvant. (s) Et quia passim ab hæreticis hujus nostri calamitosi sæculi tremendum hoc Sacrificium illuditur & contemnitur, nobis tanquam piis Catholicis & obedientibus Ecclesiæ filiis, e contrario summo studio enitendum est, ut non tantum ea, qua decet reverentia, Sacrificium hoc pie atque devote colamus, verum etiam quotidie Deo Patri pro peccatis nostris & totius populi Christiani hostiam placationis offeramus.

II. Præcipit Sacra Tridentina Synodus, ut quæcunque in Missæ celebrationem irrepererunt a tanti Sacrificii dignitate aliena, ea Episcopi tollere sedulo studeant. Quamobrem Nos ejusdem Concilii Decretum exequentes, ut Sanctissimum Missæ Sacrificium singulari religione ac pietate a Sacerdotibus celebretur, & a populo Christiano colatur, sequentia statuimus.

III. Missæ omnes, tam publicæ, quam privatæ, juxta ritum, cæremonias, & rubricas Missalis nostri Constantiensis ad Sanctæ Romanæ Ecclesiæ usum accommodati, ac reformati in Ecclesiis, Capellis, aut Oratoriis Episcopali consecratio-

(q) Concil. Trid. Sess. 13. in Decreto de Sanctif. Eucharist. Sacr. cap. 5.

(r) Concil. Trid. Sess. 22. c. 2. de Sacrificio Missæ.

(s) d. Sess. 22. c. 2. & in Decreto de observandis & evitandis in celebratione Missæ.



cratione dedicatis, dicantur & legantur. (t) Sub dio in ara portatili in privatis Oratoriis aut ædibus nemo celebret sine nostra licentia speciali in scriptis obtenta. (u)

IV. Utantur Sacerdotes in Missa vestibus tempori & officio convenientibus, ejusdem non disparis coloris, ab Episcopo benedictis. (x)

V. Cooperto capite nullus celebret. Quod si legitima causa subsistat, consulatur prius Vicarius noster, & privatim fiat.

VI. Missæ nec nimis prolixæ, nec nimis festinanter, neque memoriter, sed ex libro Missali legantur. Omnes peregrinos & singulares gestus, indecoros capitis, oris, manuum & reliqui corporis motus etiam ex devotione factos, in Missa prohibemus serio, (y) & ut Sacerdotes omnes se usui ac cæremoniis Romanæ & nostræ Ecclesiæ conforment, præcipimus.

VII. In peccato mortali nullus unquam celebrare præsumat, sed prius Sacramentaliter confiteatur. (z) Si quis copiam Confessarii habere non possit, & celebrare ex officio teneatur, cum contritione & proposito statim confitendi habita Confessarii copia, celebrare poterit.

VIII. Sacerdotes, qui quotidie fere ebrii ac temulenti, aut alioqui publice criminosi sunt, a Missarum celebratione a Prælati, Decanis & Parochis arceantur, nisi emendata vita sceleris maculam eluerint, incorrigibiles vero Vicario, & Fiscali nostro deferantur.

IX. In Missa Canon uterque tacite recitetur, (a) cætera voce clariore dicantur (b) distincte, graviter & religiose Symbolum Fidei, Præfatio & Oratio Dominica, & cætera sine aliqua abruptione integre vel legantur, vel cantentur. Quando in Ecclesiis duo Offi-

cia cantantur, unum post aliud, utrumque integre absolvatur.

X. In Ecclesia nostra Cathedrali, cæterisque Ecclesiis Collegiatis, Sæcularibus & Regularibus, Parochialibus item oppidorum & pagorum habeant semper Celebrantes omnes Ministrum, qui ipsis in Missa inserviat, & respondeat, (c) qui, Sacerdote rem Divinam faciente, per Ecclesiam non vagetur, nec det confabulationibus aut aliis rebus impertinentibus operam, sed composito corpore & moribus Celebranti assistat, & apud eundem usque ad finem Sacrificii permaneat.

XI. Missæ nec ante auroram, nec post meridiem, nisi ex causa jure permessa, nec etiam sub concione celebrentur. (d)

XII. Diebus Dominicis & Festivis Missa solennis propter mortuorum exequias pro defunctis non dicatur, uti hactenus in rure passim factum fuisse intelleximus, sed in alium diem exequiæ vel differantur, vel si propter populum exequiæ celebrari debent, Missa de Dominica aut Festo cum Collecta pro anima defuncti legatur. Ubi vero plures Sacerdotes in aliquo loco sunt, propter populi commoditatem permittimus, ut excepta Missa solenni aliæ Missæ pro defunctis celebrentur. Sed & hoc casu satius esset hujusmodi exequias in alium diem differre, quem usum paulatim Parochi cum discretionem introducere facile possunt.

XIII. Celebrantes pileum, chirothecas, claves aut similia in Altari non ponant, sed ea vel in Sacristia, vel penes Altare relinquunt. Videant etiam (e) diligenter ipsi per se, & per Ministros, ne forte aliquid Altarium mappis, super quo deberent celebrare, ad faciendam superstitionem sit suppositum, quale siprehenderint, quidquid sit, abjiciant, suppositores in-

Q q q q q 3

qui-

(t) d. Decreto de observ. & evitand. in celebr. Missæ. c. 1. c. Sicut. de Consecr. dist. 1.

(u) d. Decreto. c. Missarum. c. Unicuique. de Consecr. d. 1. c. Clericos. de Consecr. d. 1.

(x) C. Vestimenta. de Consecr. d. 1. c. Ecclesiastica. d. 23.

(y) Ex d. Decreto.

(z) Concil. Trid. Sess. 13. de Sacr. Euchar. c. 7. & can. 9.

(a) Concil. Trid. Sess. 22. c. 5. can. 9.

(b) d. c. 5.

(c) C. 11. c. Illud. de Consecr. dist. 1. facit c. Hoc quoque. de Consecr. d. 1.

(d) Ex Synodo Provinc. Mogunt. Anno 1549. celebrata.

(e) d. Sess. 22. in Decreto de observ. & evitand. in celebrat. Missæ.

quirant, & Nobis, vel Vicario nostro eorum nomina in scriptis deferant.

XIV. Horæ celebrandarum Missarum in singulis Decanatibus, oppidis & pagis hiberno & æstivo tempore ita instituuntur, ne, uti hætenus factum est, in dies mutantur, varientur, & in alicujus Magistratus gratiam vel anticipentur, vel differantur; sicque populus nullum ad Sacra conveniendi certum tempus habeat.

XV. In Ecclesiis, ubi plures Missæ vel ex laudabili consuetudine, vel ex fundatione celebrari debent, pro commoditate populi ita disponantur, ut omnium devotioni & obligationi satisfieri possit.

XVI. Circa elevationem Sacræ Hostiæ nihil cantetur, sed præsentia Domini Corporis & Sanguinis in altissimo silentio consideretur: elevato calice, si musice cantandum fuerit, id devoto & submissa voce fiat.

XVII. Ubi hætenus usus fuit, quod ad elevationem Corporis & Sanguinis Domini nostri, majori, vel alia campana pulsetur, etiam imposterum servetur, ubi non fuit, introducatur.

XVIII. Sacerdotes sacris vestibus induti, sive in Sacristia existant, sive non, cum nemine confabulentur, sed potius orantes se colligant, & mentem in cogitatione tanti mysterii defigant. Antequam ad Altare accedant, Missam querant, perlegant, & singulas partes ita notent, ut Celebrantes neque errent, neque hæreant.

XIX. Primæ Missæ Sacerdotum nuper ordinatorum (Primitias vocant) sine sæculari & externa pompa, sine fœminis, sine virginibus & sponsa celebrentur; (f) nefas enim est & indignum valde Sacerdotes Christi eo die, quo primum tremendi Sacrificii auspiciū faciunt, rebus prophanis & ludicris operam dare. Viros aliquot honestos & ex fœminis matrem, sorores & in secundo gradu conjunctas, reliquis

omnibus exclusis, ad Primitias & frugale convivium invitari ita permittimus, si omnis luxus, (g) ebrietates, comestiones & choreæ evitentur. Contra delinquentes Sacerdotes Vicarius noster, carcere, aut alia pœna procedat.

XX. Pacta & conditiones mercedum pro celebrandis Missis sub gravissimis pœnis serio interdicimus. (b) Si quid vel offertur vel accipitur, sine pacto fiat, nec pro re spirituali, quæ pretio æstimari nec potest, nec debet, sed pro labore, qui res temporalis est, detur & accipiat.

XXI. Ubi numerus Missarum ita magnus est, (i) ut juxta Fundatoris dispositionem dici non possint, aut elemosynæ, & redditus ita tenues sunt, ut oneri ferendo non sufficiant, Nobis, Vicario, & Consiliariis nostris Ecclesiasticis specificè cum omnibus suis circumstantiis referatur, ut, quid ad Dei gloriam fieri debeat, mature statuere ac declarare possimus.

XXII. Missæ plures posthac non recipiantur, quam quæ commode juxta Fundatoris mentem fieri possunt.

XXIII. Parochi & Concionatores sæpius populum, quid in Sacro Missæ Officio tractetur, singulas ejus partes explicando instruant, (k) præterea diligenter moneant Parochianos suos, ne sub reatu peccati mortalis Missam diebus Dominicis & Festivis omittant; (l) Et ut patres, matresque familias, liberos, famulos & ancillas suas talibus diebus ita occupent, ut tamen Missam & concionem audire possint.

## TITULUS X.

### De Pœnitentia.

#### I.

Quoniam sensus & cogitationes nostræ ad malum pronæ sunt ab adolescentia, (m) facile primam nostram innocentiam in Baptismo acceptam, vestem illam candidam & stolam jucun-

(f) Concil. Trid. Sess. 22. de Reform. c. 1. & Sess. 14. de Reform. c. 2.

(g) Ex Synod. Mogunt. Anno 1549. celebrata.

(b) Sess. 22. in Decreto de observ. & evit. l. in celebratione Missæ.

(i) Concil. Trid. Sess. 25. de Refor. c. 4.

(k) Concil. Trid. Sess. 22. de Sac. Missæ. c. 8.

(l) C. Missas. & c. Cum ad celebrandas. de Consecr. d. 1.

(m) Genes. 8.

jucunditatis amittimus, ut proinde ad salutem nostram omnino necessaria fuerit Sacramenti hujus a Christo Domino institutio, (n) videlicet secunda post naufragium tabula, (o) in qua nobis peccatorum nostrorum veniam consequi & amissam gratiam recuperare liceret. Itaque doceant Parochi & Concionatores diligenter populum, quam sit necessaria pœnitentia, quæ sint ejus partes, quomodo item instituenda & facienda sit: quæ tum ex Tridentino Concilio (p) & Catechismo Romano, tum ex aliis probatis Catholicis Authoribus de hac re ex professo tractantibus petere possunt.

II. Cum Concilium Tridentinum (q) declaret de peccatis mortalibus esse confitendum omnibus sacram Communionem sive in Sacrificio Missæ, sive extra percepturis, hoc ipsum a Sacerdotibus celebrantibus, si reatum peccati mortalis habeant, fieri præcipimus. Quod ut etiam in aliorum quorumvis Sacramentorum administratione faciant, aut saltem per formalem contritionem se in Divina gratia constituent, serio adhortamur.

III. Ut autem Sacerdotes & Clerici Diœcesis nostræ Sancta sanctius pertractent, præsentis Statuti tenore eis injungimus, ut Sacerdotes minimum singulis quatuordecim diebus, cæteri vero in majoribus & minoribus constituti Clerici singulis mensibus de peccatis suis confessionem instituunt. Contravenientes gravissime puniemus.

IV. Laici licet non nisi semel in anno ex Ecclesiæ præcepto ad confessionem Sacramentalem proprio Parocho suo, aut alteri Sacerdoti potestatem habenti de sui Parochi licentia faciendam obligentur. (r) Quia tamen per annum sæpius & quidem aliquando gravissime in peccata labuntur, eos in Domino vehementer adhortamur, ne in tanto salutis animarum suarum discrimi-

ne versentur, sed salutare pœnitentiæ remedium statim & sæpius, præsertim vero in majoribus Ecclesiæ festivitatibus recipiant. Parochi quoque populum sibi creditum ad frequentem peccatorum suorum Exomologesin adhortentur. Ipsi vero semper parati ac prompti sint ad subditorum suorum quocunque tempore confessiones excipiendas.

V. Ubi consuetudo fuit hætenus, ut bis in Quadragesima semel post illius initium, deinde cum ad sacram Communionem erit accedendum, confessio fiat, illam uti laudabilem & maxime necessariam quoad illos, qui per totum annum confessionem suam in hoc tempus differunt, etiam imposterum observari volumus.

VI. Prægnantes, periculose ægrotautes, & alii in probabili vitæ discrimine constituti in tempore confessionem faciant, & contra peccata sua sese tam salutare ac necessario remedio muniant, ne in ultimum usque diem differant, nec præoccupati una cum corpore etiam animæ jacturam faciant. Negligentes a Parochis suis officii & salutis suæ moneantur.

VII. Admonemus etiam Medicos, (s) ut ad infirmos vocati, ipsos ante omnia moneant & inducant, ut prius Medicos vocent animarum, ut, postquam fuerit ægrotanti de spirituali salute provisum, ad corporalis medicinæ remedium salubrius procedere possint.

VIII. Nec infirmis solum, sed etiam ultore gladio morituris, & ultimo damnatis supplicio, Pœnitentiæ Sacramentum non tantum negari non debet, (t) sed etiam a Nobis censuris Ecclesiasticis coercendi venient ii, (u) qui, quominus damnati id consequantur, adversantur. Quod ipsum & de Sacra Eucharistia intelligi volumus, dummodo ipso die supplicii propter tanti Sacramenti reverentiam non præbeatur.

IX.

(n) Joan. 20. & Matth. 26. c. Ut constitueretur. d. 50.

(o) C. Secunda. de Pœnit. d. 1.

(p) Sess. 14. de Sacram. Pœnit.

(q) Sess. 13. de Sacram. Euchar. cap. 7.

(r) C. Omnis utriusque. de Pœnit. & Remiss. Conc. Trid. Sess. 14. de Sacram. Pœnit. c. 5.

(s) C. Cum infirmitas. de Pœnit. & Remiss. Bulla Pii V. quæ incipit: *Supra gregem. Sub dato Romæ 8. Martii Anno 1566.*

(t) Clem. 1. de Pœnit. & Remiss. c. 2. de furtis. c. antepenult. 13. q. 1.

(u) C. Quarenti. de verb. signif.



IX. Ad Sacramentum vero Pœnitentiæ nemo sine debita præparatione & prævio diligenti examine accedat, sed in spiritu humilitatis & in amaritudine animæ suæ quilibet peccata sua non in genere, vel aliqua saltem & leviora, ut multorum magnus est & sacrilegus abusus, sed omnia & singula quantumcunque gravia & qualiacunque sint, in specie (x) cum debitis circumstantiis, non expectata Confessarii interrogatione recenseat. Ubi etiam illud nominatim admonemus, ut confitentes ad debitam peccatorum detestationem & dolorem, vitæque emendandæ verum propositum a Confessariis dirigantur.

## TITULUS XI.

### *De Confessariis & Casibus reservatis.*

#### I.

**Q**uoniam natura & ratio iudicii exposcit, ut sententia in subditos duntaxat feratur, nullius momenti est ea absolutio, quam Sacerdos in eum profert, in quem ordinariam aut subdelegatam non habet jurisdictionem: (y) nam licet Presbyteri in sua ordinatione a peccatis absolvendi potestatem accipiant; nullus tamen confessiones audire potest, nisi ab Episcopo loci per examen approbatus licentiam confessiones audiendi, & sic ad potestatem Ordinis etiam potestatem Jurisdictionis acceperit. (z)

II. Itaque in Episcopatu & Diœcesi nostra nullus sive Clericus sæcularis, sive Regularis, cujuscunque Ordinis, non obstantibus privilegiis & consuetudine quacunque etiam immemoriali, confessiones sive Sæcularium & Laicorum, sive Sacerdotum & Clericorum audiat, nisi prius a Nobis, aut Vicario nostro Generali idoneus repertus & approbatus fuerit. (a) Excipimus hunc solum casum, quando quis in articulo mortis est constitutus & approbatus Confessarius haberi non potest: tunc enim quilibet Sacerdos sæcularis & Regularis ab omnibus & quibuscunque

peccatis & censuris, etiam Sedi Apostolicæ & Nobis reservatis, in foro conscientię absolvere potest. (b) Proinde serio injungimus Parochis, eorum Sociis in Divinis, aliisque Curatis quibuscunque, ut quamprimum Beneficium aliquod Parochiale vel Curatum, sive Coadjutorium acceperint, coram Nobis, aut Vicario nostro se se ad examen curæ animarum sistant, nec prius se quoad confessiones excipiendas ingerant, quam legitime fuerint approbati.

III. Mendicantium vero & quorumvis Religiosorum privilegiatorum Superiores hortamur, ut in designandis Confessariis majoris eruditionis & prudentiæ, quam ab aliquibus hætenus factum fuit, rationem habeant, ne Nos eorum approbationem juxta mentem Sacri Tridentini Concilii nostro arbitrio subicere cogamur.

IV. Parochi, & cæteri omnes, sive Sæculares, sive Regulares, qui confessionibus sunt præficiendi, viri sint integri, quantum fieri potest, ætate, aut saltem moribus maturi, nullo crimine publice diffamati, non ebriosi, non leves, non ad quæstum intenti, neque exploratores nimium curiosi, sed prudentes, patientes, modesti, de animarum salute solliciti, ut inter lepram & non lepram discernere sciant, ne, dum intricatas confitentium conscientias extricare ignorant, se ipsos & illos perdant, juxta illud: (c) Cæcus cæcum ducit, & ambo in foveam cadunt.

V. Confessarii Canones pœnitentiales bene noverint, & de pœnitentia, quam cuique peccato præscripserunt, confitentes admoneant, ut tanto diligentius a peccatis cavere studeant, quanto in pœnitentiis Canonum mitigandis benigniorem in se Ecclesiam experiuntur.

VI. Et ut scientiam & doctrinam sufficientem habere possint, quæ in administrando hoc Sacramento Pœnitentiæ maxime est necessaria, legant sæpius quilibet pro suo captu & ingenio Auctores doctos, pios & probatos, qui de confessione scripserunt.

#### VII.

(x) Conc. Trid. Sess. 14. de Sacr. Pœnit. c. 5.

(z) Idem Conc. Sess. 23. de Reform. c. 15.

(b) Conc. Trid. Sess. 14. de Sacr. Pœnit. c. 7.

(y) Conc. Trid. Sess. 14. de Sacr. Pœnit. c. 7.

(a) d. Sess. & cap.

(c) Matth. 18.

VII. Sacerdotes in privatis domibus & cubiculis confessiones mulierum, nisi ægrotarum, non audiant, sed publice in Ecclesia, atque ibi non in Sacristia, sed alio loco aperto & comodo.

VIII. Caveant Confessarii, maxime vero ii, quibus audiendarum confessionum munus ex officio & cura Parochiali incumbit, ne iis temporibus, quibus confessiones frequentiores esse solent, aliis negotiis occupentur, sed in Ecclesia in sede confessionalis frequentes sedeant, nec ullo modo munus audiendæ confessionis sine urgenti ac necessaria causa prætermittant, differant, aut in alios rudiores Sacerdotes rejiciant.

IX. In injungendis & imponendis pœnitentiis sint prudentes & discreti. (d) Injungant pœnitentias pro modo & qualitate peccatorum non nimium magnas ac graves, nec nimium parvas aut faciles, multoque melius ac pœnitentibus salutaris esse ducimus, si impositio pœnitentiæ non in multos dies aut hebdomadas, ut a multis indiscrete fieri intelleximus, protrahatur.

X. Curent omnino Confessarii omnes & singuli, ne verbo, signo, aut quovis alio modo confitentem de peccato sibi confesso, etiam minimo & veniali tantum prodant. Quod si contra hanc juris (e) & nostram severissimam prohibitionem quis in pœnitentia Judicio peccatum sibi detectum temere quocunque modo revelare ausus fuerit, talem Nos non solum absque ulla gratia a Sacerdotali officio deponemus, verum etiam ad agendam pœnitentiam ad perpetuos carceres condemnabimus, vel ad triremes relegabimus.

XI. Magnopere ad Christiani populi disciplinam pertinere Ecclesiæ semper visum fuit, ut atrociora quædam & graviora crimina non a quibusvis, sed a summis duntaxat Sacerdotibus absolverentur, (f) unde merito Pontifex Maximus pro suprema potestate sibi in

Ecclesia universa tradita, causas aliquot criminum graviorum sui peculiari judicio reservavit.

XII. Quod idem Episcopi omnes (g) in sua quisque Diœcesi pro tradita sibi in subditos, & Diœcesanos suos supra reliquos inferiores Sacerdotes auctoritate, in ædificationem tamen, non in destructionem facere possunt.

XIII. Quare diligenter animadvertant Confessarii, ne quem ab his criminibus & peccatis absolvendo liberare tentent, quorum absolutio aut Romano Pontifici, aut Nobis est reservata: sed hujusmodi delinquentes juxta Sacrorum Conciliorum Decreta ad superiores & legitimos Judices pro absolutionis beneficio ( articulo mortis tantum excepto ) remittant. (b)

XIV. Casus Domino Apostolico reservati apud plerosque de materia confessionis & casibus conscientię tractantes authores reperiuntur, ad quos Parochos & Confessarios brevitatis causa remittimus, ut inde scire, & cognoscere possint, quid ipsis absolvendum, & quid ad Superiores remittendum sit.

XV. In his tamen & cæteris omnibus casibus Sedi Apostolicę reservatis, si occulti sint, (i) Nos, & Vicarius noster, ex Sacri Tridentini Concilii Constitutione absolvere possumus. Quod idem in hæresis crimine Nobis, non Vicario nostro permissum est. Quia vero hujus nostri temporis multæ sunt variæque calamitates ac hæreses, curabimus, ut a Sanctissimo Domino nostro circa hujusmodi casus Sanctæ Sedi reservatos, maxime quoad hæresis crimen, ampliores facultates impetremus.

XVI. Casus hætenus ab Antecessoribus nostris Episcopis de jure & consuetudine reservati, quos etiam præsentium tenore Nos reservamus, sunt sequentes:

*Casus reservati Clericorum.*

Fornicatio cum filia confessionis.

Reve-

(d) Concil. Trid. Sess. 14. de Sacr. Pœn. c. 8. c. Deus qui Ecclesiam. de Pœnit. & Remiss.

(e) C. Omnis utriusque. de Pœnit. & Rem.

(f) Conc. Trid. Sess. 14. de Sacr. Pœn. c. 7.

(g) d. Sess. c. 7. & can. 11. c. Si Episcopus. de Pœnit. & Rem. in 6.

(b) d. c. 7. Sess. 14.

(i) Conc. Trid. Sess. 24. de Reform. cap. 6.

Revelatio confessionis.

Celebratio in Ecclesia interdicta in altari non consecrato scienter: in altari portatili sine sacris vestibus, & a Sacerdote non jejuno.

Reordinatio scienter suscepta.

Item celebratio aut ministratio non ordinati.

Dioecesanus, qui ad Sacros Ordines per alium Episcopum sine nostra licentia aut furtive, aut per saltum, vel extra statuta tempora & ante legitimam cujusque sacri Ordinis ætatem promotus est.

In censuris Ecclesiasticis Ordinem sacrum suscipiens.

Scienter sepeliens corpus excommunicati in Ecclesia vel cœmiterio, vel etiam non excommunicati tempore interdicti.

*Casus reservati Laicorum.*

Matrimonium conjuge adhuc vivente scienter contrahens.

Matrimonium contrahens, antequam certificaretur de morte prioris conjugis.

Matrimonium clandestine non servata forma Sacri Tridentini Concilii contrahens.

Sponsalia de futuro contrahens nec observans.

Machinatio in mortem conjugis, si mors sequatur.

Baptizatio propriæ prolis excepto casu urgentis necessitatis, vel ejusdem in Baptismo & Confirmatione susceptio.

*Casus reservati Clericis & Laicis communes.*

Homicidium voluntarium factum, præcepto, consilio vel consensu deliberato commissum.

Procuratio abortus vel sterilitatis.

Incendium Ecclesiarum, domorum aut segetum malitiose & ex proposito factum.

Sacrilegium seu furtum sacræ rei.

Peccatum bestialitatis cum brutis commissum.

Coitus cum infideli vel Judæo.

Commixtio carnalis cum Sanctimonialibus.

Incestus cum consanguineis & affinis usque ad secundum gradum inclusive.

Adulterium.

Raptus.

Perjurium in judicio factum.

Pollutio Ecclesiæ vel cœmiterii sanguinis aut feminis effusione.

Immunitatis & libertatis Ecclesiasticæ violatio.

Falsificatio literarum nostrarum & Curia nostræ vel monetæ.

Percussio parentum enormis.

Abusus Sacramentorum & sacramentorum rerum ad magicas artes, veneficia & superstitiones.

Rebaptizatio scienter collata & suscepta.

Reconfirmatio scienter collata & suscepta.

Injectio manuum violentarum in Clericos, Monachos, Moniales, vel quamcunque aliam personam religiosam aut Ecclesiasticam.

XVII. Porro ne propter casus reservatos homines a salutaris confessionis remedio retrahantur, dum non facile Sacerdotem inveniunt, qui eos a reservatis absolvere possit, vel etiam famæ suæ & sumptibus timent, si Constantiam ad Nos vel Pœnitentiarum nostrum ablegentur, Nos hac in parte subditorum nostrorum salutis & commoditati consulere volentes, præsentis Decreto omnibus Ecclesiarum Parochialium Rectoribus, Plebanis, Vicariis, Curatis, aliisque Confessariis per Civitatem & Dioecesin nostram Constantiensem ubilibet constitutis, & per Nos seu Vicarium nostrum legitime approbatis concedimus, potestatemque illis auctoritate ordinaria ab Antecessoribus nostris jam antea datam confirmamus, ut deinceps quoscunque laicos utriusque sexus a quibuscunque peccatis, quantumvis gravibus & enormibus Nobis reservatis, si occulta sint, absolvere possint. Homicidas voluntarios & majori excommunicatione Judiciali innodatos excipimus. Licet enim casus hi occulti sint, tamen ut solum a Nobis, Vicario, aut Pœnitentiario nostro absolvi possint, definimus. Sicut etiam si Laici in supra speci-



specificatis casibus publice & notorie deliquissent, hujusmodi publica & notoria delicta, nostro foro pœnitentia per expressum reservamus. Clericorum in præmissis peccata sive publica, sive occulta hætenus nemo præter Nos, Vicarium & Pœnitentiarium nostrum absolvere potuit. Quia vero hinc Clericorum conscientias graviter onerari ac intricari intelleximus, permittimus, & hac Constitutione Synodali Confessariis omnibus approbatis, Clericos quoscunque a casibus Nobis reservatis occultis, non publicis, quos ut hætenus, ita etiam de cætero Nobis per expressum reservamus, absolvendi potestatem concedimus, excepto homicidio, majore excommunicatione, peccato bestialitatis, coitu cum Sanctimoniali, revelatione confessionis, & si quis ab alterius Diœcesis Episcopo aut furtive per saltum, extra statuta tempora, & ante legitimam ætatem sine licentia & dispensatione ordinatus esset, quibus casibus etiam si occulti sint, volumus, ut Clerici a nullo alio, quam a Nobis, aut Pœnitentiaro nostro absolvi possint. Cæterum hoc Canone nihil omnino iis, qui peculiaria privilegia sive a Nobis, sive a Sede Apostolica habent, quoad forum conscientiae adimere intendimus.

## TITULUS XII.

### De Extrema Unctione.

#### I.

**I**Nstituta est hæc sacra infirmorum Unctio tanquam vere & proprie Sacramentum novæ legis a Christo Domino nostro, apud Marcum (k) quidem insinuatam, per Jacobum autem Apostolum fidelibus commendatam ac promulgatam. (l) *Infirmatur, inquit, quis in vobis, inducat Presbyteros Ecclesie, & orant super eum, ungentes eum oleo in nomine Domini, & oratio fidei salvabit infirmum, & allevabit eum Dominus, & si in peccatis sit, dimittentur ei;* ut fideles sicut in ingressu in hunc mundum Sacramento

initiantur & admittuntur, ita in egressu Sacramento juventur & dimittantur.

II. Hujus Sacramenti usum, salutaresque effectus Parochi sæpius subditis suis, & præsertim ægrotis inculcent, (m) ut quod hætenus in multis locis propter negligentiam Parochorum & ignorantiam populi, fere in desuetudinem abiit, in pristinum laudabilem piumque usum revocetur.

III. Parochi induti superpelliceo & stola, Sacramentum illis administrent, qui periculose decumbunt, quorum jam est quasi deplorata valetudo, & qui in exitu vitæ constituti videntur, (n) dummodo adhuc integris sint sensibus, atque religiosam significationem erga hoc Sacramentum præ se ferant. Licet etiam agonizantibus, & iis, qui ex improvisa vi morbi sensibus carent, recte conferatur, modo antea bonæ & honestæ fuerint vitæ, & immediate præcedenti tempore Paschali communicaverint.

IV. Quod si infirmi post susceptam semel hanc sacram Unctionem convalescerint, iterum hujus Sacramenti subsidio juvari poterunt, (o) cum in aliud simile vitæ discrimen inciderint.

V. Pueris doli incapacibus, furiosis, supplicio capitali multandis & impœnitentibus, Extrema Unctio non detur.

VI. Vasculum olei Extremæ Unctionis sit argenteum seu stanneum. Si ad ægrotum deferatur, sonus campanulæ nullus fiat, & Minister veste choralis indutus, sine lumine cum aqua benedicta Sacerdotem sequatur.

VII. Ut alia quædam Sacramenta, ita, & hoc sola capitis apertione honorare sufficit.

## TITULUS XIII.

### De Ordine.

#### I.

**V**alde necessarium est Ecclesiæ idoneos Sacerdotes & Ministros populo

(k) Marci 6. (l) Jacobi 5. c. Presbyteros. d. 96. c. 1. §. 1. de Extrem. Unct.

(m) Conc. Trid. Sess. 24. de Reform. c. 7.

(n) Conc. Trid. d. loco.

(o) Conc. Trid. Sess. 14. c. 3. de Extr. Unct.

pulo Christiano præficere, eo præsertim tempore, quo varie variis hæresibus Ecclesia concutitur. Cum enim præstantissimum munus sit Sacerdotium, nemini dubium esse debet, quin cura maxima in eligendis & approbandis Sacerdotibus sit adhibenda: nam accidit per sæpe, ut populus ex Sacerdotum dignitate, Sacramentorum etiam dignitatem metiatur. Hinc est, quod Nos ex Sacri Tridentini Concilii præscripto, & ex injuncto Nobis Pastoralis officio certas quasdam leges præscripserimus, quibus Vicarius & Examinatores nostri in examinandis, approbandis & assumendis Ecclesiæ Ministris uterentur.

II. Qui Sacros Ordines suscepturi sunt, mature se illis temporibus, quibus ex Canonum præscripto (p) in Ecclesia nostra Cathedrali Constantiensi Ordines conferuntur coram Vicario, & Examinatoribus nostris deputatis, in Palatio nostro Episcopali sistant, atque se examini tum probitatis & honeste transactæ vitæ, tum eruditionis & doctrinæ, quæ in unoquoque Ordine requiritur, nullo penitus excepto, etiam si graduatus in Jure vel Theologia existat, subjiciant.

III. Admissi & approbati ad quoscunque Sacros sive majores, sive minores Ordines coram Vicario nostro in præsentia Notarii & testium faciant Catholicæ Relig. & Fidei Professionem, (q) Nobisque & Successoribus nostris, ac eorundem Vicario & Officiali pro tempore existentibus medio jurejurando tactis S. Evangelii Scripturis reverentiam, obedientiam & fidelitatem promittant. Item quod sine Canonica Institutione (r) aut approbatione nostra, vel Vicarii nostri nullum ministerium Ecclesiasticum in Civitate & Diocesi Constantiensi in aliqua Ecclesia vel Parochia quomodocunque, excepto mortis articulo, subire velint. Quod etiam quoad Professionem fidei faciendam simpliciter, quoad reliqua vero

juxta declarationem prioris Synodi (s) ad Regulares cujuscunque Ordinis extendimus.

IV. Qui Beneficia Parochialia, seu quævis alia curata adepti sunt, illis ante nostram approbationem sese non immisceant, sed quamprimum Constantiam veniant, atque per legitimum examen ad curam animarum (t) aut approbationem, aut repulsam accipiant; idque toties, quoties de nova cura provisi fuerint. Veniant autem Feria quarta vel quinta cujuslibet hebdomadæ, quas Férias pro examine Curatorum tenore præsentium deputamus; Et ab octava ad decimam matutinam, vel ab hora secunda usque ad quartam pomeridianam, prout Vicario & Examinatoribus nostris visum ac commodum, & ipsi venire jussi fuerint, se examini & censuræ submittant. Extra hæc tempora, qui comparuerit, non audiat, nisi in pœnam soluto uno floreno, cujus tertia pars Fisco, aliæ duæ partes Examinatoribus occupatis cedant.

V. Qui ex legitima causa Constantiam venire non possunt, Vicario nostro significant, & vel approbationem ad tempus vel commissionem, ut ab aliis examinari possint, impetrent.

VI. Examini Ordinandorum ordinarie, ac semper, admittendorum vero ad curam pro occasione Vicarius noster præsit, literas quasunque diligenter inspiciat, legat, & examinet, ac sedulo caveat, ne quacunque arte aut calliditate operarii inutiles ac desidiosi in vineam Domini conducantur.

VII. Examinatores ad præscriptum Vicarii semper tres aut ad minus duo simul examinent, (u) unus solus nunquam, eique in omnibus morem gerant. In sententia approbationis aut rejectionis, si Examinatores sint discordes, Vicarii votum accedat, & discordiam dirimat.

VIII. A promovendis ad curam ani-

(p) C. Sane super eo. c. De eo autem. de tempor. ordin. (q) Juxta Bullam Pii IV.

(r) C. Virtute. cap. ult. de Reform. Sess. 6. c. 8. 9. & 13. de Ref. Matr. Sess. 14. & c. 1. de Regular. in 6. facit. c. Sane. 16. q. 2. c. Si plures. §. Utergo. 16. q. 7. & c. Nullus omnino. 16. q. 7.

(s) Concil. Trid. Sess. 24. de Reform. c. 18.

(t) Parte I. tit. 14. c. 53.

(u) d. Sess. 24. c. 8.

animarum, si extradiocesani sunt, aut de eorum ordinatione dubium sit, literæ testimoniales Ordinum susceptorum petantur & examinentur.

IX. Examinatores a Nobis deputati jurabunt ad Sancta Dei Evangelia se quacunque humana affectione postposita fideliter munus suum secundum Trid. Concilii Decreta (x) & has nostras ordinationes executuros. Caveant vero, ne prorsus quicquam occasione examinis sive ante, sive post accipiant; (y) sed salario, quod Nos eis constituimus, contenti existant. Propter varias etiam suspiciones & diffamationes prohibemus Examinatoribus, ne ordinandos in convictu suo habeant. Examinatores nostri, qui beneficia Ecclesiastica in Civitate Constantiensi obtinent, quotiescunque in examine sive ordinandorum, sive ad curam animarum admittendorum occupati fuerint, in Ecclesiis suis pro præsentibus habeantur.

#### TITULUS XIV.

##### *De Qualitatibus Ordinandorum.*

**Q**ui primam Tonsuram & quatuor Minores suscipere voluerit, debet esse baptizatus, (z) Sacro Chrismate confirmatus; (a) ex legitimo Matrimonio procreatus, aut natalibus a Sede Apostolica relictus. Præterea origine, decennali domicilio vel Beneficio Ecclesiastico, quod in Dicecesi nostra legitime & pacifice possidet Dicecesanus, aut a suo Episcopo dimissus. (b) Ætas legitima ad primam Tonsuram & tres Ordines minores sunt septem, (c) ad Acolytatum vero duodecim anni completi. (d) Corporis aut animi defectum patientes nec Tonsura, nec minoribus Ordinibus initientur. Habeant quoque sive tonsurandi, sive ad minores promovendi, doctrinæ tum prophanæ, tum Christianæ a Magistris & Præceptoribus suis testimonium. (e)

I. Qui ad sacros majores Ordines promoveri desiderat, primo debet esse baptizatus & confirmatus, (f) quæ conditio aut ex libris Parochialibus, aut assertione jurata ordinandi probanda erit.

II. Secundo debet esse tonsuratus, & in minoribus Ordinibus constitutus: quod literis testimonialibus, Tonsuræ ac Ordinum susceptorum probabitur.

III. Tertio requiritur, ut habeat legitimam ætatem, scilicet Subdiaconandus viginti duos, Diaconandus viginti tres, Presbyterandus vero viginti quinque annos ad minus inceptos, si nondum plene absolutos. (g) Hoc requisitum testimonio scripto Magistratus loci & Parochi ex libro baptizandorum doceri volumus.

Et quia circa hanc qualitatem hætenus multos abusus irrepsisse, & varia falsa commissa fuisse cognovimus, Vicarius noster diligenter testimonia hujus qualitatibus perscrutetur, maxime in illis, qui ad Subdiaconatum aspirant. Et si vel aspectus & puerilis facies, aut reliquus habitus corporis suspicionem ætatis moveat, juramento eos adigat, quod nullam fallaciam sciant, nec probabiliter de ætatis testimonio dubitent, & sic ad Subdiaconatum admittat, postea autem non nisi per interstitia secundum Tridentinum Concilium (h) ad ultiores Ordines promoveantur.

IV. Quarto, ut sit ex legitimo Matrimonio procreatus, (i) quod ex literis Magistratus, aut alio publico Instrumento constare debet; aut si natalium defectum patiatur, dispensationem Apostolicam in scriptis habeat & exhibeat.

V. Quinto, quia liber esse debet, qui Divinæ aggregandus est militiæ, (k) ut a castris Dominicis, quibus ascribitur, nomen ejus nullius necessitatis aut dominiis vinculis abstrahatur, exhibeant ordinandi literas authenticas, quod sint conditionis liberæ, aut a Dominis

Rrrrr 3

(x) d. c. 18.

(y) d. loco.

(z) Facit c. 1. de Presbyt. non baptizat. c. fin. cod.

(a) Conc. Trid. Sess. 23. c. 4.

(b) C. 1. de filiis Presbyt. in 6.

(c) C. fin. de temp. ord. in 6. c. 2. d. 77.

(d) d. c. 2. d. 77. & c. 3. d. 28.

(e) d. Sess. 23. c. 5.

(f) d. Sess. 23. c. 4.

(g) d. Sess. 13. c. 12. Clem. Generalem.

de ætat. & qualit. ord.

(h) d. Sess. 23. c. 13.

(i) d. Conc. Trid. c. 5. Sess. 23.

(k) C. 1. c. Consuluit. descrui. non ordin. c. Nullus. d. 54.



minis suis servitute manumissi & in libertatem asserti.

Monachi quoque & Religiosi, nisi de suorum Superiorum fuerit voluntate, ad Sacros Ecclesiasticos Ordines promoveri non possunt. (l)

VI. Sexto requiritur, ut is, qui Sacris Ordinibus iniciari velit, sit integer mente & corpore. Mente, ut non sit phreneticus, (m) infans, lunaticus. Corpore, ut non careat aliquo membro, vel eo non sit truncatus, mutilatus, aut nimium læsus, ut non laboret morbo caduco, aut lepra, non sit obsessus (n) aut alium notabilem & deformem defectum patiatur.

Hæc ceditio quia difficilis est probationis, nisi defectus aperte sciat vel videatur, diligenter Vicarius & Examinatores nostri considerent, promovendorum physiognomiam, corporis ac membrorum constitutionem, & si nihil ab illis advertatur, jurejurando ordinandi confirmant se hujusmodi defectibus non esse obnoxios. Mentis integritatem ex conversatione Vicarius & Examinatores nostri facile intelligent. Aliæ deformitates, quales sunt, habere curvos seu inversos pedes, aliquam superfluitatem exteriorum in aliquo membro, & si quæ sunt similes, licet simpliciter a susceptione Sacrorum Ordinum non impediunt, (o) quia tamen hujusmodi deformitates Ecclesiastico statui contemptum, & ut plurimum apud populum scandalum generant, volumus & ordinamus, ut Vicarius noster sine nostra vel nostrorum Consiliariorum Ecclesiasticorum expresso consensu tales non admittat.

VII. Septimo, ut sit origine, decennali domicilio, aut beneficio Diocesanus, aut a suo proprio Episcopo dimissus: jure enim constitutum est, ne quis alienæ Diocesis virum præter proprii Superioris & Episcopi licentiam ordinare audeat. (p) Literæ vero dimissoriæ amplius nec concedantur, nec concessæ admittantur, nisi in quibus

mores & sufficientia ab Ordinario commendatur. (q)

Quum autem sæpe hætenus contigerit, quod nonnulli Clerici Civitatis & Diocesis nostræ censuris Ecclesiasticis obnoxii, apostatæ, irregulares, indocti ac vitæ non satis probatæ, ac propterea susceptionis Sacrorum Ordinum indigni conscientiam nostram, & Officialium nostrorum, quibus noti sunt, subterfugientes, ad remotiores Dioceses sese conferant, & a Nobis aut Vicario nostro literas dimissoriales variis artibus extorqueant. (r) Quorum temeritatem reprimere volentes, Vicario nostro in Spiritualibus serio inhibemus, ne imposterum alicui sine scitu & voluntate nostra, aut legitima, gravique causa literas dimissoriales ad aliquem alium Episcopum concedat.

VIII. Octavo, ne sit vinculo Matrimonii alicui scemina obstrictus.

IX. Nono, ut habeat honestatis bonorum morum, vitæ & conversationis retroactæ publicum fidedignum & sufficiens testimonium in scriptis a Magistratu loci, a Superioribus Scholarum, a Parocho, vel iis, quibuscum vixit. (s)

Ad Diaconatum & Presbyteratum promonendi adferant etiam testimonia a Parochis, in quorum Parochiis interea manserunt, quod sæpius Ordinem ante susceptum exercuerint, (t) horas suas Canonicas diligenter recitaverint, frequenter confessi fuerint, atque in moribus Clerico dignam & convenientem vitam duxerint.

Mandamus autem singulis Parochis, Curatis, & aliis quibuscunque, ne ejusmodi testimonia dent, nisi dignis & pro merito, si non propter gravissimam Dei offensionem velint a Nobis severa animadversione puniri. Testimonia omnia, qualiacunque sint, quoad scripturæ formam, sigillum, & reliqua, ex quibus aliqua suspicio oriri posset, diligenter a Vicario nostro considerentur &

(l) C. Statuimus. 19. q. 3. c. Ad aures. de temporibus ordinat. (m) C. Maritum. d. 33.

(n) C. Clerici. d. 33.

(o) C. 10. d. 55.

(p) Conc. Trid. Sess. 23. c. 8.

(q) d. Sess. c. 3. & 8.

(r) Ex c. 10. & 11. de Reform. Sess. 7. & c. 10. de Refor. Sess.

13. & c. 1. de Refor. Sess. 24.

(s) Conc. Trid. Sess. 23. c. 5. & 13. c. Quando. d. 24.

(t) d. c. c. 14. 13. & Sess. 23.

& examinentur. Et si ab aliquo, sicuti hætenus sæpius factum fuisse cognovimus, dolum, fraudem aut falsum in testimonia aliquo commissum deprehenderit, eum carcere in pane & aqua aliquot diebus, deinde vel omnimoda exclusionem, vel ad unum aut plures annos retardatione pro modo & qualitate commissi doli seu falsi sine remissione puniat.

X. Decimo, sacris majoribus initiandus, nec excommunicatus, nec suspensus, nec interdictus esse debet. (u)

XI. Undecimo, quia literarum scientia in promovendis ad Sacros Ordines valde necessaria est, (x) quomodo enim alios docere volunt, cum ipsi met nihil, aut parum sciant? ad examen pro Subdiaconatu nullus omnino admittatur, qui in aliqua publica & Catholica Universitate aut Gymnasio Rhetoricam & Dialecticam non absolvit, & casus conscientiae per duos integros annos cum fructu non audivit. Nisi Nobis, aut Vicario nostro ex aliqua legitima causa cum aliquo dispensandum esse videatur, quod tamen si fiat, ab aliis in exemplum trahi nolumus. Et cum ad curam animarum fere omnes aspirent, & post primum Ordinem Sacrum susceptum studia ut plurimum delinquant, volumus & mandamus, ut in primo examine, quando scilicet ad Subdiaconatum promovendi sunt, quoad literarum scientiam & doctrinam, de omnibus, quæ ad Sacros Ordines, & ad curam animarum pertinent, strictissime examinentur, nec facile, nisi bene probati & versati sint, admittantur. Neque ullius, qualiscunque sit, intercessionem seu præsentiam paupertatem attendi volumus, cum multo satius sit homines, quam Deum offendere, & Ecclesiae populiue Christiani, quam promovendorum commodum spectare, magisque præstet in Ecclesia Dei paucos, bonos & doctos, quam plures indoctos & imperitos habere Ministros, idque ratio nostrorum temporum maxime exigere videtur.

XII. Duodecimo, nullus sine beneficio Ecclesiastico, pacifico & sufficienti, de cuius valore Nobis aut Vicario nostro constet, & de quo sit legitime præsentatus & investitus, ad Sacros majores Ordines promoveatur. (y)

Patrimonia in defectum beneficii ita admittimus, si pro Ecclesiarum utilitate & necessitate Nobis commodum videatur. (z) Ea contineant mille, aut ad minus octingentos florenos communes Imperiales, ut videlicet in omnem eventum Clericus pro sui sustentatione quinquaginta aut quadraginta annuos florenos habere possit, ne cum dedecore Clericalis status mendicare cogatur.

Literæ Patrimoniorum sint a Magistratu, aut ab iis, qui juris sui sunt, & bonorum suorum administrationem habent, sub sigillo Magistratus confectæ. Obligatio sit cum effectu & vera, (a) non fictitia aut receptis reversalibus, de quo Vicario nostro fidem juratam fieri volumus. Bona Patrimonio obligata a Magistratu æstimentur non plures, quam communiter valent.

Monasteriorum Superiores, Hospitalium & aliorum piorum locorum Præfecti titulum mensæ, sive Patrimonium sine Conventus sui aut superiorum Præfectorum consensu non concedant.

Beneficia Ecclesiastica Titularia vel Patrimonia sine nostro, aut Vicarii nostri expresso, & in scriptis impetrato consensu a quovis ex quacunque causa nec resignentur, nec dimittantur, (b) se ad hoc in scriptis medio juramento obligando. (\*)

XIII. Interstitia, licet juxta Sacri Tridentini Concilii Decreta (c) commode in Episcopatu nostro, præsertim quoad eos, quorum virtus, doctrina, & Ecclesiarum necessitas celeriores promotionem requirunt, ex toto observari non possint, conetur tamen Vicarius noster, cujus discretionis & prudentiæ rem totam committimus, ut, quantum fieri potest, saltem ex aliqua parte observentur.

XIV.

(u) Sess. 25. c. 9. circ. fin.

(x) Ex variis locis & Decretis Conc. Trid. vided. 38. per tot.

(y) Conc. Trid. Sess. 21. c. 2. c. Diaconi, dist. 93.

(z) d. Sess. 21. c. 2. & Sess. 23. c. 16.

(a) d. Sess. 21. c. 2.

(b) d. Sess. 21. c. 2. cap. Cum secundum. de Præbend. cap. Si Episcopus. de Præbend. in 6. c. fin. de Rescrip. in 6.

(c) Sess. 23. c. 13. & 14.

[\*] Addendum forte: *Quod omnes spondeant, &c.*

XIV. Magnam hætenus Ordinandorum negligentiam in addiscendo cantu perspeximus, hinc passim tot confusiones, tot muti Clerici in Choro non sine gravi scandalo populi. Cui rei Nos remedium aliquod adferre volentes, serio mandamus omnibus ad Sacros Ordines aspirantibus, ut si non utrumque Choralem & figuralem, saltem Gregorianum cantum sive publice in Scholis, sive privatim discant. Majorem etiam posthac in examine ordinandorum rationem cantus, quam forte ab aliquo tempore factum fuit, a Vicario & Examinatoribus nostris haberi volumus.

XV. Denique Clericis omnibus ordinandis pro Sacris Ordinibus iter facientibus & Constantiæ commorantibus districte præcipimus, ut in hospitiiis, aliisque locis se honeste, verecunde ac modeste gerant, sicuti Clericos, ac eos, qui in sortem Domini vocati sunt & electi, decet, ab omni luxu, ludo, crapula, aliisque turpibus actibus abstineant. Secus facientes, Vicarius noster ab Ordinibus jam susceptis suspendat, & ad ulteriores suscipiendos pro modo culpæ, & excessus ad annum unum, duos vel plures retardet.

## TITULUS XV.

### *De Sponsalibus.*

#### I.

**S**ponsalia sunt futuri Matrimonii mentio ac repromissio, (d) qua sibi invicem vir & mulier se futuros conjuges spondent. Ea per novissimum Sacri Tridentini Concilii jus sublata non sunt, sed in iis contrahendis, & dissolvendis antiquo jure utimur, quo jure etiam Judices nostros Ecclesiasticos in judicandis sponsaliorum causis uti volumus.

II. Sponsalia posthac non fiant in angulis, sed coram aliquot testibus in domo aliqua honesta per verba de futuro, præsentem etiam Parocho, si com-

mode fieri possit, qui cavere debet, ne contrahentes per verba de præsentem, sed de futuro tantum juxta præscriptum nostri Sacerdotalis conjungat.

III. Et quia Sponsalia de futuro contrahentes non conjuges, sed sponsi tantum sunt, jure Matrimonii nullo modo gaudere vel invicem cohabitare possunt: Proinde curent Parochi & Curati, ut hujusmodi scandalosas cohabitationes, invocato etiam auxilio brachii sæcularis, e medio tollant.

IV. Qui semel legitime Sponsalia contraxerunt, ad fidem sibi invicem servandam & Matrimonium contrahendum, nisi legitima causa jure definita subfit, non tantum in conscientia obligantur, verum etiam censuris Ecclesiasticis compelli possunt, (e) nisi Nobis, Vicario & Officiali nostro ex rationabilibus causis aliter definiendum esse visum fuerit, cum frequenter coacta Matrimonia difficiles soleant habere exitus. (f)

## TITULUS XVI.

### *De Matrimonio & impedimentis Matrimonii.*

#### I.

**C**um Matrimonium a Deo in Paradiso primitus ad propagationem humani generis institutum, (g) in Lege Evangelica per infinita Passionis Christi merita gratiam conferat, & inter novæ Legis Sacramenta semper ab Ecclesia sit connumeratum; (b) maxime convenit, ut res sacra non nisi sancte suscipiatur, atque religiosa animi præparatione & cum omni honestate tractetur, (i) quod cum minus intelligant homines laici, mandamus Parochis, ut crebrius de recte ac pie contrahendo Matrimonio adhibitis Catechismi Romani locis & doctrina populum sibi commissum instituunt.

II. Cæterum quia circa Matrimonia ad tollendos varios abusus & scandala,

(d) C. Nostrates. 30. q. 5. l. 1. l. 2. ff. de Sponsal.

(e) C. De illis. §. fin. de Despons. impub. c. Sicut. c. Ex literis Sylv. de Sponsal.

(f) C. Requisitis. de Sponsal.

(g) Genes. 2. c. Fraternitatis. 35. q. 10. c. 1. de conjug. leprof. (b) 1. Corinth. 6. Ad Ephes. 5. c. Sunt qui. 27. q. 2. c. De infidel. de consang. & affin. Concil. Trid. Sess. 24. de Matrim. can. 1.

(i) d. Conc. de Reform. Matr. c. 10.



la, quæ irreperunt, Sacra Tridentina Synodus (k) multa constituit ac reformavit, Nos ea & quædam alia pro Ecclesiæ & Diocesis nostræ necessitate, & Curatorum meliori informatione his nostris Statutis inseri curavimus.

III. Matrimonium hodie a nemine contrahatur, nisi in præsentia proprii Parochi, vel alterius Sacerdotis, de Parochi, aut nostra, aut Vicarii nostri licentia, atque duorum vel trium testium. Aliter contractum coram Deo & Ecclesia irritum est, & in utroque foro conscientiæ & judiciali nullum, nec obligatorium. (l)

IV. Licet vero clandestine contrahentes non obligentur; grave tamen & mortale peccatum committunt: quod contra Ecclesiæ prohibitionem clandestine contrahant, a quo non nisi a Nobis aut Pœnitentiario nostro absolvi poterunt.

V. Matrimonium antequam contrahatur, ter a proprio contrahentium Parocho tribus continuis diebus Festivis in Ecclesia inter Missarum solennia, vel sub prædicatione verbi Divini ex suggestu, vel ut alias commodum fuerit, proclametur. (m) Quod si probabilis fuerit suspicio, Matrimonium malitiose impediri posse, tunc vel una tantum fiat denuntiatio, vel coram Parocho & duobus vel tribus testibus, si ne denuntiationibus Matrimonium contrahatur, quæ tamen denuntiationes omissæ, postea in Ecclesia ante Matrimonii consummationem fieri debent. (n) Atque in his denuntiationibus faciendis extra casum malitiosæ impeditionis Parochi sine nostra, vel Vicarii nostri expressa licentia non dispensent. Neque imposterum a Parochis denuntiationes fiant, nisi illis ipsis petentibus & consentientibus, de quorum Matrimonio contrahendo agitur.

VI. Quod si impedimentum aliquod ex proclamationibus deprehensum fuerit, tales a Parochis minime co-

pulentur, sed ad nostrum Consistorium pro declaratione remittantur. Qui vero falsum aliquod impedimentum malitiose attulerit, eum præter alias juris pœnas excommunicatione feriemus.

VII. Quod si qui tempore denuntiationis præsentés fuerint, & impedimentum reticuerint, post conjunctionem in conspectu Ecclesiæ celebratam, amplius ad ejus Matrimonii accusationem minime admittendos decernimus. (o)

VIII. Si contrahentes sint diversarum Parochiarum, in utraque, si commode fieri possit; sin minus, in ea Parochia publicationes fiant, in qua Matrimonium contrahere & solennizare vel cohabitare volunt.

IX. Parochi hortentur conjuges, ne ante Benedictionem Sacerdotalem in eadem domo simul cohabitent, (p) habeantque librum, (q) in quo conjugum & testium nomina, diemque & locum contracti Matrimonii describant.

X. Et quia non tantum Sancta Tridentina Synodus (qq) conjuges hortatur, ut antequam contrahant, vel saltem triduo ante Matrimonii consummationem peccata sua diligenter confiteantur, & ad Sanctissimum Eucharistiæ Sacramentum accedant, verum etiam ante hæc tempora in Diocesi nostra Constantiensi hoc ipsum faciendi laudabilis consuetudo fuit, volumus & serio mandamus, ut imposterum novi conjuges in locis Catholicis Episcopatus nostri non introducantur, nisi prius ad minus per Confessionem Sacramentalem a peccatis suis expiati fuerint.

XI. Parochi omnes in nullo alio loco, quam in Ecclesia ipsa, quæ Sacramentorum proprius locus est, Sponsos Matrimonio jungant. (r) In privatis ædibus nunquam, nisi facultate a Nobis, aut Vicario nostro in scriptis concessa.

XII.

(k) d. Sess. 24. in Decreto: de Reform. Matrim.

(m) d. c. 1. c. fin. de clandest. despons.

(o) Argumento. c. fin. de clandest. despons. c. Licet. de Probat.

(p) d. Sess. 24. de Reform. Matrim. c. 1.

(r) Sess. suprad. c. 1.

(l) d. Decreto c. 1.

(n) d. c. 1.

(q) d. loco.

(qq) Sess. suprad. cap. 1.

XII. Nuptiæ post Missarum solennia, quibus contrahentes ab initio usque ad finem interesse debent, benedicantur.

XIII. Ignoti ex alia regione venientes, vagabundi & illi, qui certam sedem & domicilium non habent, facile jungantur, (s) nisi post diligentem inquisitionem, re ad Nos, vel Vicarium nostrum delata, licentia a Nobis, vel ab eo, tales jungendi, fuerit impetrata.

XIV. Moneant Parochi Parochianos suos, ut tempestive, & hora constituta ad Ecclesiam Matrimonium tracturi veniant. Tarde venientes aut omnino non admittant, aut admissos pro modo culpæ & moræ una vel duabus aut tribus libris ceræ, fabricæ applicandis, puniant.

XV. Matrimonia a filiis familias sine parentum suorum consensu contracta, licet irrita non sint, cum parentum consensus in filiorum Matrimoniis de necessitate non requiratur; (t) Quia tamen honestum & valde decens est, filios etiam in Matrimoniis contrahendis parentes suos honorare, Parochi adolescentes & puellas sæpe moneant, ne parentibus suis, in quorum potestate existunt, insciis & invitis Matrimonia ineant, atque rem tam seriam & periculosam inchoare præsumant.

XVI. Quia etiam Matrimonia libera esse debent, (u) & coactæ nuptiæ plerumque miserabiles exitus sortiuntur, (x) sub pœna privationis beneficii & suspensionis ab officio Parochis & Curatis quibuscunque prohibemus, ne contractas nuptias jungant. Qui autem vel liberos vel subditos suos ad nuptias aliquas quocunque modo coegerint, eos anathematis pœna coercerimus. (y)

XVII. Catholicos nostros Ditecesanos vehementer obtestamur, ne commodum temporale animarum salutem præferentes, cum Hæreticis Matrimonia ineant, neve parentes filios aut filias suas ad loca hæretica in Matrimonium

collocent. Qua in re Catholicum Magistratum officio suo minime defuturum speramus.

XVIII. Abusus & consuetudines, superstitionem sapientes, quales sunt Sponsorum apud crines vel aures tractio, cerei accensi circa sponso circumductio, & ab iisdem extinctio, panis in populum projectio, & alia id generis ludicra ac ridicula, ubi vel levitate populi vel negligentia Curatorum irreperunt, de cætero amplius nec in, nec extra Ecclesiam, cum aliqui Matrimonio junguntur, fiant, sed a Parochis serio & sub pœna unius libræ ceræ, fabricæ applicandæ, prohibeantur.

XIX. Probare nullo modo possumus, sed corrigi, præsertim a Magistratibus locorum, vehementer optamus luxum & varia levitatis, prodigalitatis & lasciviæ studia, quæ passim in nuptiis sub prætextu nuptialis lætitiæ nimium licenter & scandalose fiunt ac committuntur. Ea aut tollantur penitus, aut ita temperentur, ne modum honestatis excedant. (z) Non enim decet Christianos & Sanctorum filios Matrimonia sua auspiciari, sicut Gentes, quæ ignorant Deum.

Sicut qui semel legitime & publice conjuncti sunt, seipsos propria auctoritate & voluntate separare amplius non debent; ita qui prohibitas nuptias contraxerunt, simul cohabitare nulloatenus sunt permittendi. Proinde si Parochi tales in sua Parochia esse noverint, Nobis aut Vicario nostro denuncient, ut contra eos secundum Canonicas Sanctiones procedere valeamus.

XX. Multorum hætenus fuit persuasio, si intra septennium de morte vel vita prioris conjugis nihil audiverint, licite se ad alia vota convolare posse. Quod cum juri contrarium sit, nec sufficiat absentem conjugem per septennium tantum expectare, sed ea certitudo juxta Leges & Canones requiratur, quam Judex æquus arbitrabitur,

(s) Sess. 24. de Reform. Matr. c. 7.

(t) d. Sess. 24. c. 1. c. Causam. de Rapt. c. Per

tuas. de condit. appos. c. Veniens. de Spons. c. 1. d. jud. in 6.

(u) C. Cum locum. de Spons. c. Significavit de eo, qui duxit in matr.

(x) C. Requisivit. de Spons.

(y) Conc. Trid. Sess. 24. de Reform. c. 9.

(z) Sess. 24. de Reform. Matr. c. 10. circa finem.

tur, (a) volumus, & Curatis omnibus serio injungimus, ne deinceps hujusmodi personas ad alias nuptias sic transeuntes matrimonialiter conjungant, nisi prius causa coram Officiali nostro cognita, & licentia contrahendi in scriptis impetrata fuerit.

XXI. Ab Adventu Domini nostri Jesu Christi usque ad Festum Epiphaniæ, & a feria quarta Cinerum usque ad octavam Paschæ inclusive nuptiarum solennitates non celebrentur. (b) Reliquis temporibus, etiam diebus rogationum, per octavas Pentecostes, & Corporis Christi, nec non a Festo Assumptionis B. Mariæ Virginis usque ad Festum Nativitatis ejusdem, quod tempus vulgus tricesimum B. Virginis appellat, Nuptiæ cum debita modestia & honestate licite celebrari poterunt, nisi quis propter reverentiam & honorem prædictorum Festorum & Beatissimæ Virginis Mariæ sponte abstinere vellet, quod nos non improbamus.

XXII. Ne autem aliquis (c) sive Pastorum, sive etiam aliorum quorumcunque ignorantia causam prætereundum possit, præcipua Canonica Matrimonii impedimenta hic exprimenda duximus. Ea sunt duplicis differentia, quædam quæ Matrimonium contrahendum impediunt & contractum dirimunt. Quædam vero, quæ contrahendum quidem impediunt, contractum tamen non dissolvunt.

XXIII. Prioris generis sunt, quæ his versibus comprehenduntur.

*Error, conditio, votum, cognatio, crimen,*

*Cultus, disparitas, vis, ordo, ligamen, honestas,*

*Dissensus atque affinis, si forte coire nequibis.*

*Hæc socianda vetant connubia, juncta tractant.*

XXIV. Non omnis error, sed personæ tantum & conditionis obest Matrimonio, ut si quis existimet & intendat ducere Catharinam vel liberam, & accipit Margaretham vel servam. (d) Error enim fortunæ & qualitatis, ut cum quis putat se divitem, formosam aut honestam ducere, & accipit pauperem, deformem, inhonestam & diffamam, Matrimonium contractum non dissolvit. (e)

XXV. Secundo impedit & dissolvit Matrimonium conditio honesta & possibilis Matrimonio adjecta, nec adimpleta. (f) Turpes & impossibiles conditiones in favorem Matrimonii pro non adjectis censentur. (g)

XXVI. Tertio votum solenne in Religione aliqua approbata, (h) & votum simplex in Societate Jesu ab una vel altera, vel ambabus partibus emissum.

XXVII. Cognatio duplex est, spiritualis & naturalis: spiritualis ex duobus Sacramentis Baptismi & Confirmationis oritur, (i) & contrahitur hodie quoad Baptismum, tantum inter baptizantem & baptizatum, baptizatique patrem & matrem, nec non inter levantem ex Baptismo, ac levatum, ejusque patrem ac matrem. Quoad Confirmationem vero spiritualis cognatio confirmantem & confirmatum, illiusque patrem & matrem, ac tenentem non egreditur. (k)

Quæ cognatio & prohibitio semper usque ad mortem durat, unde falsum est, quod passim vulgo dicitur: *Bann das Kind tod, so ist die Bräuterschaft aus.*

XXVIII. Naturalis cognatio aut est ascendentium & descendentium, aut colla-

(a) C. In præsentia & ibi Panorm. de Sponsal. c. 2. de secund. nupt.

(b) Conc. Trid. Sess. 24. de Reform. Matr. c. 10. c. Non oportet. cum trib. seqq. 33. q. 4. c. Capellanus. de feriis.

(c) De impedimentis Matrimonii.

(d) C. 2. Ad nostrum. de conjug. servo. cap. Si quis ingenuus. 29. q. 1.

(e) C. Gratianus. 29. q. 1.

(f) C. De illis. c. Per tuas. de condit. appof. c. Super. de Spons.

(g) C. fin. de condit. app.

(h) C. 1. & 2. & per totum, qui Cleri. vel vovent. Mat. c.

unico. de vot. in 6. Conc. Trid. Sess. 24. de Matrim. can. 9.

(i) C. fin. de cogn. spir. in 6.

(k) Sess. 24. de Reform. Matr. c. 2.



collateralium. (l) Inter ascendentes & descendentes, parentes scilicet & liberos, perpetua est Matrimonii prohibitio, & in infinitum. (m) Inter collaterales vero, fratres scilicet, sorores, patruos, amitas, avunculos, materteras, & qui ex his generantur, usque ad quartum gradum inclusive. (n) Quod si alter contrahentium in secundo, tertio, vel quarto, alter vero in quinto vel remotiori gradu extiterit, eo casu Matrimonium licite contrahitur. (o)

XXIX. In Episcopatu nostro circa Matrimoniorum in prohibitis gradibus contrahentium dispensationes, plurima suboriuntur scandala, quando cum quibusvis rusticis & infimæ conditionis hominibus, etiam in secundo consanguinitatis vel affinitatis gradu passim dispensatur. Nos hujusmodi scandalis obviare volentes, & Sacri Tridentini Concilii Constitutionibus (p) inhærentes, statuimus & volumus, ut si quis intra gradus prohibitos scienter, & quos nescire verisimiliter nec debuit, nec potuit, Matrimonium contrahere præsumpserit, per Judicium nostrum Ecclesiasticum separetur, & spe alicujus dispensationis consequendæ omnino careat. Idque in eo multo magis locum habeat, qui Matrimonium sic contractum consummare ausus fuerit.

Quod si quis ignoranter, sine tamen debita solennitate contraxerit, eisdem poenis subjiciatur, (q) cum dignus non sit, ut Ecclesiæ benignitatem experiatur, qui ejusdem præcepta contemnit. Si vero adhibitis solemnitatibus vere ac probabiliter quis ignoranter contraxerit, tunc facilius cum eo & gratis dispensetur. (r) In contrahendis Matrimoniis vel nulla omnino detur dispensatio, vel raro, idque ex causa, & gratis. In secundo gradu nunquam dispensentur, nisi inter magnos Principes & ob publicam causam. (s)

XXX. Ne autem simpliciores Presbyteri, quibus Apostolicæ dispensationes, commissiones, Literæ & Bullæ, earumque stylus, scriptura, sigilla, subscriptiones & signa incognita sunt, in iis facile decipiantur, jubemus & mandamus, ut omnes Presbyteri & Clerici, Nobis ordinario jure subjecti, hujusmodi literas, commissiones seu dispensationes Apostolicas quorumcunque tenorum, prius non exequantur, quam Nobis aut Vicario nostro exhibuerint, ac ostenderint, ut quæ circa ea jure facienda sint, mature deliberare & providere valeamus.

XXXI. Crimen impedit & dirimit Matrimonium, quando quis vivente adhuc conjuge cum alio Matrimonium vel contrahit, vel de contrahendo fidem facit, & postmodum ad quodlibet istorum sequatur adulterium, quod impedimentum pollutionis adulterinæ vocamus. (t) Aut quando quis propriam vel alterius conjugem interfecit, vel in mortem illorum machinatus est, ut alio & illicito Matrimonio potiri queat. (u)

XXXII. Christianus cum infideli, Judæo scilicet aut Pagano, Matrimonio jungi nec debet, nec potest. (x) Nihil enim aliud est, inquit D. Cyprianus, (y) jungere cum infidelibus vinculum Matrimonii, quam prostituere cum gentilibus membra Christi.

XXXIII. Aliud Matrimonii impedimentum est vis sive justus metus cadens in constantem virum, aut foeminam: ut cum quis spoliatione bonorum, honoris, patriæ, vi armata & præsentis mortis periculo ad contrahendum Matrimonium compellitur. (z)

Licet enim Matrimonium de facto contrahatur; illud tamen nullum est omnino ac irritum, nisi metus & coactio per subsequentem liberum consensum purgetur.

XXXIV.

(l) C. Primo gradu. 35. l. 1. cum seq. ff. de grad. aff.

Panorm. ad c. Non debet. de consang. & affin. n. 8.

(n) C. Non debet. de consang. & affin.

(p) Sess. 24. de Reformat. Mat. c. 5.

(r) C. 1. in fin. c. final. de eo, qui duxit ux. vers. infidel.

(y) In sermone de lapsis. prout refert Didac. Covar. in 4. Decret. 2. p. c. 6. §. 11.

(z) C. Cum dilectus. de his, quæ vi & met. caus. c. Abbas. eod. tit. c. 1. de rest. spol. in 6.

(m) L. Nuptiæ. 4. ff. de ritu nupt.

(o) C. fin. de consang. & affin.

(q) d. c. 5.

(r) d. c. 5.

(s) d. c. 5.

(x) C. Si quis vivente. 31. q. 1. c. 1. de con-

(t) C. Cave. 28. q. 1. Concil. Tolet. 3. can. 14. & 4. can. 16.

XXXIV. In majoribus Sacris Ordinibus constituti Presbyteri, Diaconi, Subdiaconi Matrimonia licite non contrahunt, nec contractum subsistit. (a) Quod secus est in Clericis prima tonsura vel quatuor minoribus Ordinibus initiatis. (b)

XXXV. Qui matrimonialiter jam alteri ligatus est, Matrimonium cum alio contrahere non potest. (c) Impedimentum hoc præcontractus appellant.

XXXVI. Justitiæ, publicæ honestatis impedimentum ex sponsalibus oritur. Hodie ex Sacri Tridentini Concilii Decreto (d) si sponsalia quacunque ratione valida non sint, publicæ honestatis impedimentum non oritur. Si valida sint, oritur quidem, primum tamen gradum non excedit.

XXXVII. Ad Matrimonium contrahendum requiritur consensus: (e) unde amentes, furiosi, stulti, & id generis homines ad contrahenda Matrimonia sunt inhabiles. (f)

XXXVIII. Affinitas primi generis usque ad quartum gradum inclusive Matrimonium contrahendum impedit, & contractum dissolvit. (g) Quoto enim gradu quis est cognatus viri vel uxoris, eodem gradu est affinis uxoris vel mariti. (h) Affinitas vero ex fornicatione aut alio illicito concubitu proveniens, hodie Matrimonia impedit & dirimit in primo & secundo tantum gradu. (i)

XXXIX. Denique cum ad propagationem generis humani Matrimonium sit institutum, (k) ad ineundum illud inhabiles sunt, qui ex impoten-

tia, vel naturali vel accidentali perpetua Matrimonio legitime uti non valent. (l)

XL. Inter raptorem quoque & raptam, quamdiu ipsa in potestate raptoris manet, non potest consistere Matrimonium, nisi rapta a raptores separata ac loco tuto & libero constituta de novo consentiat. (m)

XLI. Impedimenta quæ Matrimonium contrahendum impediunt, contractum tamen minime dissolvunt, sunt, si quis contra Imperium Episcopi, Judicis & Parochi sui, (n) aut tempore a jure prohibito Matrimonium in-  
eat, (o) aut si quis simplici voto castitatis, seu sponsalibus cum alia implicitus ad conjugium divertat, (p) aut cum hæretica contrahat. (q) His enim & similibus casibus licet contrahentes contra Canones delinquant, & mortaliter peccent, interim tamen Matrimonium verum contrahunt.

XLII. Quoniam vero hac tempestate nostra tantus est Sacrorum Canonum & Legum contemptus, tantaque flagitiosi incestus licentia & impunitas, ut multi suo proximo sanguini sese commiscere, & alias adversus Ecclesiæ instituta prohibita Matrimonia, contrahere non formident, & ubi proprii eorum Parochi talia Matrimonia intro-  
nisare ac benedicere noluerint, ad alia loca ignota, aut quæ ab unitate Ecclesiæ nostræ Catholicæ digressa sunt, se conferant, ibidemque publice ea celebrent & solennizent, atque deinde putantes omnia rata esse & firma, domum redeunt in non modicum totius Ecclesiæ offendiculum. Cui malo, quantum in Nobis est, obviare cupientes, omni-

S s s s s 3

bus

(a) C. 1. & 2. Qui Clerici vel vovent. Conc. Trid. Sess. 24. de Matr. can. 9.

(b) C. 1. c. 3. c. 5. de Cler. conjug. c. Si quis vero. c. Placuit. d. 32.

(c) Gen. 2. in fin. Matth. 19. c. Gaudemus. de divort. c. 1. Et passim. de Sponsal. duorum: c. Annon. 24. q. 3. Conc. Trid. d. Sess. de Matrim. can. 2.

(d) Sess. 24. de Reform. Matr. c. 3. (e) C. 2. 30. q. 2. c. 1. de despons. impub.

(f) C. Neque furiosus. 37. q. 7. c. Sicut. de Regul.

(g) C. Non deber. §. Prohibitio. de consang. & affin. (h) C. Quod super. eod.

(i) Conc. Trid. Sess. 24. de Refor. Mat. c. 4. (k) Genes. 2. 1. ad Cor. 7. c. Nuptiarum: 27. q. 1. (l) C. Requisisti. 33. q. 1. c. 1. & 2. c. Laudabilem. de frig. & malef.

(m) C. fin. de Rapt. Conc. Trid. Sess. 24. de Refor. Matr. c. 6.

(n) Ut videre est toto tit. de Matrimonio contrah. contra interd. Eccl.

(o) C. Capellanus. de feriis. c. Non oportet. 33. q. 4. Conc. Trid. Sess. 24. de Ref. Mat. c. 10.

(p) C. Rursus. qui Clerici vel vovent. c. unico de vot. & voti red. in 6.

(q) C. pen. 28. q. 2. Covarr. 4. Decret. 1. parte. c. 6. §. 11. n. 4.

bus & singulis Parochis & Curatis nostris mandamus, ut non obstante tali asserta solennizatione hujusmodi prætenso conjuges cum gravitate adhortentur, ut ab invicem discedant, aut intra proximam quindenam coram Nobis, aut Officiali nostro pro declaratione accipienda compareant, & ubi nostræ aut Officialis nostri declarationi non paruerint, vel omnino non comparuerint, eos ab ingressu Ecclesiæ arceant, & ab Ecclesiasticis Sacramentis excludant, & post mortem, nisi resipuerint, Ecclesiastica sepultura privent.

XLIII. Causæ omnes Matrimoniales, & ab eis dependentes, ad solam nostram, vel Vicarii, & Officialis nostri cognitionem & decisionem pertinent. (r) Idcirco nullus sive Ecclesiasticus, sive secularis, cujuscunque conditionis, dignitatis, aut præminentiae fuerit, de sponsalibus, tam de futuro, quam de præsentibus, de impedimentis quibuscunque, de divitiis & aliis ab iisdem dependentibus connexis & annexis sub pœna excommunicationis latæ sententiæ cognoscere, judicare & definire præsumat, sed ex omnes & singulæ ad Consistorium nostrum Ecclesiasticum pro earundem cognitione & decisione remittantur.

XLIV. Decani omnes, Parochi, cæterique Curati, si inter Parochianos suos ratione contracti Matrimonii differentiam, jus & actionem, seu impedimentum aliquod cognoverint, partes admoneant, & si opus sit, exclusionem ab ingressu Ecclesiæ adigant, ut hujusmodi causas vel coram Consistorio & Judicio nostro Ecclesiastico, vel coram Commissario aliquo Forensi proponant, & super iis a Judicio nostro Ecclesiastico decisionem expectent.

XLV. Quod si quis Decanorum, Parochorum, aut aliorum Curatorum seu Clericorum quorumcunque se hujusmodi matrimonialibus causis controversis immiscuerit, aliquid definierit, aut declaraverit, prout hætenus a multis factum fuisse cognovimus, eum

præter excommunicationis pœnam, quam incurrit ipso facto, beneficio suo privabimus.

XLVI. Super Matrimonio & ejus occasione sub prædicta pœna nullus sive Clericus, sive Laicus, etiam Commissarii nostri Forenses causarum matrimonialium transactionem aliquam inter partes faciant. In Matrimonio enim tanquam re spirituali transactio aliqua interponi non potest, (s) sed in eo secundum Canonicam severitatem est procedendum.

XLVII. Et quia non satis est Leges præscribere, nisi ea, quæ præscripta sunt, studiose observentur, & executioni debitæ demandentur; universis & singulis Ecclesiarum Parochialium Rectoribus, Parochis, Plebanis, eorum Vicariis, & generaliter omnibus Presbyteris ex institutione Canonica, aut alia nostra commissione curam animarum exercentibus in virtute sanctæ obedientiæ, & ejus fidei, qua Nobis uti Episcopo & Ordinario vestro devincti ac obligati estis, præcipimus & mandamus, ut prædicta omnia & singula, quæ circa Sponsalia & Matrimonium ejusque reformationem, tum juxta nova Sacri Tridentini Concilii, tum vetera Sacrorum Canonum Decreta pro necessitate Episcopatus nostri, & hujus temporis conditione hac nostra Synodali Constitutione statuimus atque ordinamus, diligenter observetis, & ab iis, quorum cura vobis commissæ est, observari & fieri curetis.

XLVIII. Quod ut ad populi caput commodius fieri possit, ea omnia vulgari & germanica lingua prælo excusa publicanda, & a vobis singulis annis bis videlicet Dominica prima post Festum Epiphaniæ, & Dominica prima post Festum Sanctissimæ Trinitatis publice ex Cancellis sub pœna 20. florenorum, toties quoties a quopiam vestrum contraventum fuerit, promulganda duximus.

TITU.

(r) Ad Ephes. 5. c. Tenore. c. 12. de foro compet. c. fin. de Jud. in 6. c. pen. & ult. de secund. nupt. c. Ecclesia Sanctæ Mariæ. de Constit. & ibi communiter omnes Canonistæ, teste Andr. Gail lib. 2. obs. 141. n. 5. Concil. Trid. Sess. 24. de sac. Mat. can. 12.  
(s) C. final. de transact. facit. c. Constitutus. c. Super. c. Præterea. eod.



## TITULUS XVII.

*De Lektionibus Sacris.*

## I.

**U**T apud celebriora Diœcesis nostræ Monasteria & Collegia, juxta Tridentini Concilii voluntatem <sup>(f)</sup> Theologiæ saltem moralis lectio habeatur, vehementer optamus. Curent proinde Monasteriorum & Collegiorum Prælati, ut ea, quamprimum commode fieri potest, non tantum instituantur, & ubi jam instituta est, continuando conservetur, sed etiam, ne frustra habeatur, ut a Conventualibus, Canonicis, & aliis Clericis suis frequentetur. Quod Nos quoque Clero nostro rudiori in Civitate Constantiensi mandabimus, ut Lektionen Theologicas, quæ apud Ecclesiam nostram Cathedralē habentur, frequentent.

II. Studiis Theologicis Præfecti captui auditorum se accommodent, & eas materias præcipue tractent, quæ in usu sunt frequentiores, & Clericis atque futuris Parochis magis utiles ac necessariæ.

## TITULUS XVIII.

*De Prædicatione Verbi Dei.*

## I.

**C**hristianæ Reipublicæ non minus necessaria est Evangelii prædicatione, quam Thologica lectio. Quia vero in prædicando verbo Dei maxima pars muneris, & officii nostri Pastoralis <sup>(u)</sup> versatur, curavimus hætenus, & imposterum per Dei gratiam curabimus, ut qui verbo Dei prædicando in Ecclesia nostra Cathedrali vice ac nomine nostro fungi debent, sint tales, quos & pietas vitæ ac morum honestas & doctrinæ puritas commendent, & qui populum tam verbo, quam exemplo ædificare possint.

II. In aliis Ecclesiis parochialibus & curam animarum habentibus, Parochi, vel illi, qui ex fundatione aut alias obligati sunt, per seipsos, & si ipsi legitime impediti fuerint, per alios

sufficientes & idoneos illorum expensis officio suo satisfaciant. <sup>(x)</sup>

III. Concionandi munus nemo sibi met usurpet, nisi legitime vocatus, & per Vicarium & Examinatores nostros prævio examine approbatus.

IV. Regulares vero cujuscunque Ordinis sine Superiorum suorum legitimo examine, approbatione, & licentia etiam in Ecclesiis suorum Ordinum prædicare non præsumant. <sup>(y)</sup> Et si a Superioribus suis approbati & licentiam prædicandi consecuti fuerint, prius prædicare non incipiant, quam se coram Nobis præsentaverint, atque benedictionem nostram Episcopalem petierint. In Ecclesiis, quæ suorum Ordinum non sunt, præter suorum Superiorum, etiam nostram licentiam habeant.

V. Illos, qui aliter, quam præmissum est, prædicationis officium usurpare præsumperint, vigore præsentis Statuti excommunicationis vinculo innodamus, & excommunicatos publice declarari mandamus, & nisi resipuerint, aliis etiam gravioribus pœnis a Nobis vel Vicario nostro plectendos decernimus. Quandoquidem non parum referat, scire, quis qualisque sit, cui alios in Religione Christiana instituendi & docendi potestas traditur, ne peregrinis forte & hæreticis doctrinis imbuti, nec satis probati ad gravem Domini gregis perniciem in ovile Christi recipiantur.

VI. Concionatores omnes diligentem dent operam, ut eorum vita cum doctrina consentiat, ne, quod præceptis & hortatu ædificant, id vita & moribus pravis rursus destruant: libentius enim magisque populus ea facit, quæ a Prædicatoribus suis fieri videt, quam ea, quæ ab iisdem audit. Pulchrum valde est, cum de Concione illud dicitur, quod olim de quodam ex veteribus dictum, legimus: Hic est, qui quale habet verbum, talem habet & vitam. Conciones fiant in omnibus Ecclesiis, quæ Rectorem habent, singulis diebus Dominicis & Festivis. <sup>(z)</sup>

Tem-

<sup>(f)</sup> Sess. 5. de Reform. c. 1.

<sup>(u)</sup> Conc. Trid. Sess. 5. de Reform. c. 2. & Sess. 24. de Reform. c. 4. c. Episcopus. dist. 88.

<sup>(x)</sup> d. Sess. 24. <sup>(y)</sup> d. Sess. 5. c. 2.

<sup>(z)</sup> d. Sess. 5. c. 2. & Sess. 24. c. 4. de Ref. Matr.

Tempore autem Quadragesimæ, in Civitate Constantiensi & insignioribus oppidis & pagis, ubi hætenus in usu fuit, bis vel ter in hebdomada, ubi vero fieri non consuevit, juxta Tridentinum Concilium, si ullo modo commode fieri possit, instituantur.

VII. Fideles pro concione de fide Catholica, de Ecclesiæ Sacramentis, de Sacrificio Missæ & observantia Mandatorum Dei & Ecclesiæ, de obedientia præstanda utrique legitimo Magistratui Ecclesiastico & sæculari, de ritibus & cæremoniis Ecclesiasticis, ut de aqua, sale, cereis, palmis, herbis & fructibus benedictis diligenter & ad caput sæpius instituantur, ut, quæ scire omnium interest, ad salutem omnes addiscant.

VIII. In producendis Scripturis Concionatores editione vulgata & probata utantur, earumque intelligentiam non ex privata præsumptione, sed eo sensu, quem Catholica Ecclesia & consentiens Sanctorum Patrum auctoritas comprobavit, interpretentur, (a) neque quicquam ab Ecclesia aut Ecclesiæ probatis Doctoribus alienum proferrant.

IX. Libros Hæreticorum etiam ad eorum argumenta refellenda nullo modo legant, (b) nisi tales sint, qui eos cum discretionem legere possint, & eos legendi a Sede Apostolica dispensationem in scriptis habeant.

X. A quæstionibus difficilibus & perplexis abstineant, atque in Hæreticorum opinionibus & argumentis recitandis & confutandis præsertim coram rudioribus providi sint, ac circumspæcti, aut si minus instructi, omnino taceant: non enim ad ingenii & eruditionis ostentationem, sed ad ædificationem Ecclesiæ & populi, prædicare debent, multoque melius est tacere, quam de nostri sæculi controversiis inepte disputare.

XI. In reprehendendis vitiis ita se gerant, ut pietatis & charitatis studio adducti, non hominum, sed peccatorum

odio id facere, auditores intelligant. Neminem aperte vel tacite perstringant, aut quasi digito commonstrent, neque in ullum Ordinem religiosum, seu statum Ecclesiasticum ab Ecclesia approbatum invehant, aut eorum privilegia labefactare præsumant. Magistratum quoque, tam Ecclesiasticum, quam sæcularem cum auditorum offensione non objurgent, sed pie potius ac modeste officii sui, quatenus opus fuerit, privatim admoneant, populumque doceant Præpositis & Superioribus suis, etiam discipulis obedire. (c)

XII. Nimiam illam & licentiosam pravamque consuetudinem blasphemandi, jurandi, Magistratui Ecclesiastico & sæculari, Clericis, Religiosis, & quibuscunque laicis detrahendi, & reliqua vitia, quæ populus frequentat, præ cæteris Concionatores exagitent. Decreta Concilii Tridentini, præsertim quæ ad mores & disciplinam Christianam restituendam pertinent, & has nostras Constitutiones Synod. populo studiosius inculcent, atque ad Sanctissimorum Sacramentorum Pœnitentiæ & Eucharistiæ frequentiam fideles magno opere cohortentur.

XIII. Fabulæ aniles, sales, (d) scommata, privati affectus, relatio historiarum aut miraculorum incertorum, seu suspectorum, immoderate invectivæ, & quicquid modestiæ, pietati, sanæ & Catholici doctrinæ contrarium est, a concionibus absit. Qui secus fecerint, præter alias pœnas eos a concionandi munere amovebimus.

XIV. Parochi sub finem concionis pro utroque Magistratu Ecclesiastico & Civili, atque pro omnibus Christi fidelibus vivis & defunctis Deum orent. (e) Dies Festivos (f) & solennes, Quatuor temporum jejunia, Vigilias, Quadragesimam, Adventum, solennes supplicationes, & si quæ sunt similia, non tantum populo simpliciter denuncient, verum etiam quomodo dies festi celebrandi, quomodo & a quibus jejunandum sit, populum instituant.

XV.

(a) Concil. Trid. Sess. 4. in Decreto: de editione & usu sacror. lib.

(b) Ex ind. libr. prohib. & Bulla Confirmatoria Pii IV.

(c) 1. Petri 2.

(d) 1. Timot. 4. 2. Timot. 2. Ad Titum 3.

(e) 1. ad Tim. 2.

(f) C. 1. de Consec. dist. 3.

XV. Et quia intelleximus, quod quidam Concionatores Dicecesis nostræ, interdum rancore & æmulatione moti, contra se invicem prædicare non verentur in populi scandalum & exemplum perniciosum; Ideo considerantes, quod, sicuti ex indiscreto silentio sæpius error post se relinquitur, ita & incauta locutio sæpius errorem inducit, præsentī Statuto serio inhibemus, ne quis Concionatorum in Ecclesiis & Monasteriis Civitatis & Dicecesis nostræ, sive Regularis, sive sæcularis existat, contra alium quemcunque Concionatorem invectere, aut quid aliud ex suggestu proferre præsumat, quo is irritari, atque ad vindictam, mutua convitia, & jurgia provocari, simplex autem populus ex tali controversia offendi possit, (g) sed si quis in reputatione, fama & honore, jureque suo, aut alias qualitercunque læsus ab alio fuerit, aut si errorem, vel hæresim ex ejus concione deprehenderit, id Nobis, vel Vicario nostro referat. Secus facientes gravissime puniemus.

XVI. Denique Christi fideles omnes & singulos, qui per ætatem & negotia necessaria possunt, in Domino vehementer hortamur, (h) ut non solum diebus Dominicis & Festivis, sed etiam reliquis diebus per annum, quibus haberi concio solet, ad audiendas conciones frequentes concurrant, iisdemque ab initio usque ad finem cum summa modestia & attentione intersint.

## TITULUS XIX.

### *De Catechismo seu Institutione Juventutis Christianæ.*

#### I.

CUM nostra hac ætate multorum hominum tanta sit socordia, ut ea, quæ ad salutem animarum sibi maxime necessaria sunt, aut parvi faciant, aut omnino negligant: recte ac prudenter Tridentinum Concilium (i) constituit, ut in singulis Parochiis diebus Dominicis & Festivis pueri fidei rudimenta docerentur, quo tenera ætas quasi cum

lacte materno Religionem Christianam imbiberet, & semel imbuta Christiana pietate, recens servaret odorem testadiu. Nos huic necessariæ & salutari Constitutioni inhærentes, omnibus Ecclesiarum Parochialium Rectoribus, Plebanis & Vicariis mandamus, serioque injungimus, ut singulis diebus Dominicis, ubi autem ex gravi aliqua & legitima causa a Visitatoribus nostris approbanda singulis Dominicis fieri non potest, ad minus semel in mense die aliqua Dominica aut Festiva, deinde per Adventum & Quadragesimam singulis diebus Dominicis & Festivis a prandio circa horam duodecimam aut primam, certo campanæ sono ad id assignato, per se, vel per alios idoneos sacræ nostræ Christianæ Fidei initia, ac rudimenta juventuti ipsorum diligenter lingua vernacula suaviter ac humaniter, adhibitis etiam minusculis tradant, & pueros quasi per ludum ad discendum alliciant.

II. Quod si in aliquibus locis tempore hyberno, vel propter distantiam Parochianorum ab Ecclesia Parochiali Catechesis commode haberi non possit, volumus & mandamus, ut Parochi semel singulis mensibus: Item omnibus Dominicis & Festivis per Adventum & Quadragesimam Christianam juventutem curæ suæ commissam, dum ex Cancellis ordinarie concionantur, loco concionis, si non integræ, saltem mediæ instituant, & in iis, quæ circa fidem Christianam Juventus scire debet, instruant. Neque existimamus adultos & ætate maturiores juste conqueri posse, cum ut plurimum & ipsi in hoc genere valde sint rudes, & æque bene ac juniores institutione indigeant.

III. Recitent vero Parochi primo clara voce ac lenta, Orationem Dominicam, Salutationem Angelicam & Symbolum Apostolorum, quos pueri recitando sequantur. Secundo recitationes puerorum & pia æmulandi studia disponant, tertio facilem, & qualem illa ætas admittit, explicationem sub-

(g) Ex Conc. Trid. Sess. 5. de Reform. c. 2.

(i) Sess. 24. de Reform. c. 4.

(h) Ex Conc. Trid. Sess. 24. de Reform. c. 4.



jungant, quarto lectionem juventuti ab ea proximo conventu exigendam, & memoriter recitandam præscribant. Denique decem præcepta Ecclesiæ cum quatuor novissimis, & aliis similibus, clare prænuntient. Pueros etiam ad obedientiam erga Deum, Parentes & Magistratum sedulo cohortentur, (k) a blasphemis vero & ab aliis vitiis, quibus juvenus libenter dedita esse solet, dehortentur.

IV. Ut autem hujusmodi Catechesis cum fructu frequentetur, Parochi parentes tam publice ex Cancellis, quam privatim admoneant, ut pueros suos vel ipsi adducant, vel venire jubent, ac mittant, cum hac protestatione, se imposterum nullum ad Eucharistiæ aut Matrimonii Sacramenta admittere velle, qui in primis fidei rudimentis sufficienter non fuerit instructus.

V. Et quia pium hoc ac necessarium institutum Magistratus sæcularis multum juvare & promovere potest, eum in Domino requirimus, ut eo tempore, quo juvenus instituitur, sub pœnis eorum arbitrio imponendis a choreis, tripudiis, lusibus & aliis insolentis abstinere præcipiant; ut sumptus, si qui necessarii sunt, vel pro puerorum munusculis, vel alias pro cujuslibet loci commoditate ex ærario publico, aut ex redditibus Patroni seu Fabricæ Ecclesiarum subministrent. Nihil enim in meliores usus collocari potest, quam quod ad recte instituendam juventutem, & a teneris annis ad pietatem imbuendam impenditur.

VI. In negligentes & munere suo Parochiali in hac parte non fungentes, Decani diligenter inquirant, Fiscali-que nostro ad procedendum contra eos quantocius in scriptis denuntient.

## TITULUS XX.

### *De Cultu Divino & Cæremoniis Ecclesiasticis.*

#### I.

**D**ivina Officia omnia peragantur ex ordine Breviarii & Missalis nostri

Constantiensis ad usum Romanæ Ecclesiæ accommodati. Itaque cæremoniis Romanis utantur omnes, nec quisquam novas excogitet, inducat, vel recipiat cæremonias; Et si quæ novæ aut suspectæ in aliquas Ecclesias irrepissent, aut veteres nondum omnino essent sublata, de his Decani rurales cognoscant, & quamprimum ad Nos vel Vicarium nostrum referant.

II. Ne autem confusiones suboriantur atque uniformitas cæremoniarum commodius introduci & observari queat, volumus, ut in omnibus Ecclesiis Collegiatis & Parochialibus, ubi plures sunt Clerici, unus constituatur, qui cæremoniarum curam, & inspectionem in se recipiat, & qui curet, ut omnia suo ordine, loco & tempore debite fiant.

III. Prælati quoque & Rectores Ecclesiarum ex injuncto sibi officio diligenter attendant, ut Canonici & Clerici Officia Divina omnia & singula, ad quæ tum ex laudabili & antiquissima consuetudine, tum ex fundatione sunt obligati, peragant, in iisque peragendis consuetis ac debitis cæremoniis utantur, nec quicquam sine expressa nostra, aut Vicarii nostri licentia intermittant, aut immutent.

IV. In Cathedrali nostra, Collegiatis & Parochialibus Ecclesiis Horæ Canonice, quæ cantari consueverunt, præsentibus Prælati, Canonicis, Parochis, Capellanis, Ludimoderatoribus, Scholaribus, superpelliceis & habitu convenienti indutis, in Choro alternatim devote, nec nimis præcipitanter & cursim, nec nimis lente, non clamorosis ac dissonis vocibus, sed leniter ac distincte cantentur. (l)

V. Missæ solennes cum consuetis ministeriis & cæremoniis juxta Rubricas Missalis attente & graviter celebrentur.

VI. In Choro pro temporis & officii ratione omnes simul sedeant, stent, genua flectant, caput aperiant, & cætera ejus generis faciant.

VII. Clericus cum in Ecclesiam venerit, illud meminisse debet, se esse in

(k) d. c. 4. Sess. 24.

(l) C. Dolentes, de celebrat. Miss. c. Cantantes. d. 92. Concil. Trid. Sess. 24. de Reform. c. 12.

in domo Dei sancta, quæ domus sit orationis: (m) quare cujuscunque ordinis & dignitatis fuerit, in Ecclesia non deambulet, (n) non confabuletur, aut aliquid aliud eo loco indignum tractet, sed recta Chorum ingrediatur, ac imprimis reverenter ac humiliter Venerabili Sacramento Corporis Domini salutato, ad stallum & locum suum consuetum se recipiat. Quod si ab aliquo contra factum fuerit, is distributione quotidiana illius diei careat, aut alia condigna pœna plectatur.

VIII. Multi etiam laici tempore Divinorum in Ecclesiis nugantur, confabulantur, discurrunt, merces & alia onera important, & exportant: Quæ omnia Ecclesiarum Prælati, Decani, & Pastores, (o) adhibito etiam, si opus fuerit, consilio & auxilio Magistratus sæcularis, corrigant, & pœna aliqua constituta contra transgressores prohibeant.

IX. Ad Divina Officia ita cantus musicus & organa adhibeantur, (p) ne devotionem impediant, aut audientium animos potius ad tripudium excitent.

X. Beatus ALEXANDER (q) Pontifex Martyr, qui sextus post B. Petrum Romanum rexit Ecclesiam, aquæ benedictæ usum non tam ipse invenit, quam ab Apostolis traditum observari ab omnibus jussit; sic enim scribit: (r) Aquam sale conspersam populis benedicimus, ut ea cuncti aspersi sanctificentur, quod & omnibus Sacerdotibus faciendum esse mandamus. Sane si cinis vitulæ aspersus olim populum sanctificabat atque mundabat, quanto magis aqua, quæ sale aspersa Divinis precibus sacrata est, populum pie ac devote usurpantem sanctificat atque emundat? Hunc antiquum ritum hætenus in Ecclesia Cathol. pie observatum, quamvis Hæretici nostri temporis, ut reliquas cæremonias omnes irrideant, Parochi & Curati minime deferant, sed

singulis diebus Dominicis ante Missam aquam cum sale benedicant, (s) eaque, ut moris est, populum Christianum aspergant.

XI. Cereorum (t) quoque, cinerum, (u) herbarum, palmarum, fructuumque benedictiones in Ecclesia Catholica antiquo more fiant, plenæ tum mysteriorum, tum salutarium utilitatum, quas Parochi ex orationibus, quibus Ecclesia in illorum benedictionibus utitur; & aliunde fidelibus studiose exponant, quo religiosius illa gestent & recipiant. Benedicatur unum quodque suo ab Ecclesia ordinato tempore ac Festo publice in Ecclesia ritu solenni, nec ullæ preces, in ejusmodi benedictionibus adhiberi consuetæ, intermittantur. Populus vero admoneatur sedulo, ne his rebus benedictis ad alios, quam Ecclesia instituit, effectus consequendos utatur.

XII. Litaniarum & Processionum publicarum usus (x) secundum Ecclesiæ universalis & cujusque Ecclesiæ particularis piam & laudabilem institutionem servetur, & ubi hætenus injuria temporum collapsus esset, restituatur. Fiant autem processionibus de Ecclesia ad Ecclesiam, ordine decenti, modeste cum contrito corde ad Deum sine quacunque levitate, risu, confabulatione, & his similibus, quibus magis ad iram, quam ad placationem provocatur Deus: Parochi, Clerus & Scholares veste choralis induti, cruce & vexillis prægestatis præcedant, hos primum viri, postea fœminæ separatim sequantur.

XIII. Edendi ac bibendi consuetudinem, secumque esulenta deferendi aut ea vendendi & emendi, aliasque nundinationes in supplicationibus sacris habendis Parochi omnino tollere studeant.

XIV. Inter alia a sancta Dei Ecclesia pie instituta, sed temporum vitio in Civi-

(m) Marci 11.

(n) Bulla Pii V. quæ incipit: *Cum primum Apostolatus. Sub dato Romæ 6. Cal. Aprilis Anno 1566.*

(o) d. Bulla.

(p) Concil. Trid. in Decreto: de observ. & evitand. in celebr. Missæ. Sess. 22.

(q) Relatus in c. Aquam. de Consecr. d. 3.

(r) In Epist. sua prima circa Annum Dom. 83.

(s) d. c. Aquam.

(t) C. Sane. c. fin. de celeb. Miss.

(u) Petrus Cluniacensis

lib. 2. Miracul. c. 22.

(x) Ex Conc. Aurelian. 1. can. 23.

Civitate Constantiensi antiquata, sunt Litanie majores, quas Summus Pontifex & Sanctissimus Vir GREGORIUS I. sancte instituit, (y) atque in universa Christiana Republica 7. Cal. Maji, qui dies D. Marco Evangelistæ dicatus est, eas agi & celebrari voluit. Illarum pium & solennem usum cum in hac nostra Constantiensi Ecclesia ita pene intermissum videamus, ut nullum fere pristinae institutionis vestigium appareat, nos vero ex officio Pastoralis Nobis incumbenti solliciti esse debeamus, ut quod pie a Majoribus nostris institutum est, non tantum retineatur, sed etiam, quantum in Nobis est, amplificetur, Constitutione hac Synodali edicimus, & jubemus, ut præfato S. Marci Festo universus Clerus Civitatis Constantiensis, tam Regularis, quam sæcularis in superpelliceis & habitu suo congruo ad Ecclesiam nostram Cathedralē conveniat, peractoque Missæ Sacrificio ad Ecclesiam Collegiatam S. Stephani solenni ritu ac processione, sanctisque precibus procedat, atque processione officio finito ad eam ipsam Cathedralē Ecclesiam ordine redeat. Quod idem, quoad Regulares Civitatis Constantiensis in Litiis minoribus, quæ triduo ante Ascensionem Domini celebrantur, observari volumus & mandamus.

XV. Ad processiones vero sive generales, sive particulares in nostra Cathedrali, & Collegiatis Ecclesiis quocunque tempore habendas, Prælati, Canonici, & alii Clerici omnes, quocunque dignitatis sint, convenient, & suo exemplo Laicis, quod imitentur, præbeant.

XVI. In extraordinariis processionibus pro instanti interdum necessitate instituendis, Parochi sibi a Magistratu sæculari nihil præscribi patiantur, sed pro temporis, loci ac personarum qualitate cum eo desuper mature concordent, & amice convenient.

## TITULUS XXI.

*De Reliquiis, Imaginibus, cultu ac veneratione Sanctorum.*

## I.

UT Sanctorum Martyrum, & aliorum cum Christo viventium Sanctorum corporibus & Reliquiis, quæ viva membra fuerunt Christi, & templum Spiritus Sancti, debitus honor ac veneratio a fidelibus tribuatur, atque in locis & vasis honestis reverenter aserventur, (z) Ecclesiarum Prælati, Rectores, & Parochi solcite curent.

II. Ubi mos est eas quandoque populo demonstrare, non ab Aedituis & Laicis, sed ab ipsis Parochis aut aliis Clericis cum lumine & sine aliquo quaestu fiat. Insignes item Reliquiæ ad altaria nec ponantur, nec reponantur, nisi reverenter, & a Clericis Sanctorum reliquiæ e capsulis & vasis, quibus inclusæ sunt, facile non exponantur: singulæ singulas schedas habeant, ut sciri possit, cujus sint Sancti. Dubiæ & suspectæ a probatis & certis separentur, & in alium locum honestum reponantur.

III. Superstitiones, imposturas & abusus omnes circa Sanctorum Reliquias Ecclesiarum Superiores tollant. Quod si ad aliquas novas aut prius incognitas reliquias, vel nova miracula novus populi concursus fieret, Parochi & Decani Nobis, vel Vicario nostro quotocius significant, (a) ut, quod super hujusmodi novis reliquiis & miraculis statuendum sit, mature consulere valeamus, ne fortasse populus superstitione aliqua illaqueetur, aut fictis miraculis illudatur.

IV. Imaginibus Christi, Deiparæ Virginis Mariæ, & aliorum Sanctorum, sive in Templis vel Oratoriis, sive extra ea, in publicis viis aut privatim in ædibus habeantur, etiam debitus honor & veneratio impertienda est, (b) non quod credamus iis inesse aliquam Divinitatem, vel virtutem, propter quam sint

(y) Circa Annum Domini 590.

(z) Ex Concil. Trid. Sess. 25. in Decreto: de Invo-

cat. vener. &amp; Reliquiis Sanctorum.

(a) d. Decreto. Sess. 25.

(b) Conc. Nicen. 2. &amp; Trid. d. loco c. Perlatum. de Consec. d. 3.



sint colendæ, vel quod ab iis aliquid petere debeamus, sed quoniam honos, qui eis exhibetur, refertur ad prototypa, quæ illæ repræsentant, ita ut per imagines, quas osculamur, & coram quibus caput aperimus & procumbimus, Christum adoremus, & Sanctos, quorum similitudinem gerunt, veneremur.

V. Imagines & historiæ sacræ vel pictæ, vel sculptæ imperitæ plebis libri sunt, ut illarum aspectu moniti mysteriorum Redemptionis nostræ recordentur, pietatem in Christo conservent, atque Sanctorum vitam imitari studeant.

VI. Quia vero nihil tam sanctum ac salutare, quod non aliquando propter abusum taxari queat, volumus, ut de cætero in Ecclesiis imagines vel historiæ nullæ pingantur, aut statuuntur, quibus neque Ecclesia, neque probati Scriptores aliquam auctoritatem dederunt. Imagines omnes prototypi dignitati & sanctitati congruæ sint, in iis nihil inordinatum aut præpostere accommodatum, nihil prophanum, nihilque inhonestum appareat, sed ita pingantur, ut ex earum inspectione pietas excitetur.

VII. Quod si in aliquibus Ecclesiis imagines non approbatæ aut minus decenter depictæ essent, eas Ecclesiarum Rectores aut omnino tollant aut mutant.

VIII. Historiæ prophanæ & sæculares effigies gentilium & brutorum animantium in Ecclesiis nec pingantur, nec sculptantur, cum domum Dei deceat sanctitudo. (c)

IX. Si quæ sacræ tabulæ aut imagines nimia vetustate, carie ac sordibus pene deletæ, & aspectu minus decenti essent, eas Ecclesiarum Prælati & Rectores religiosa pictura renovent, aut a fabricæ Procuratoribus renovari procurent.

X. Sanctorum invocationem & cultum Ecclesia Catholica semper pro-

bavit. (d) Alius tamen cultus & invocatio est, qua Deum & Mediatorem inter Deum & homines Jesum Christum Dominum nostrum colimus & invocamus; alius quo Sanctos veneramur: Quod ex Litania, qua Ecclesia utitur, quivis facile cognoscit: in ea enim alium Deo exhibemus, alium Sanctis deferimus cultum.

XI. Hæretici hujus temporis, quæ de Sanctorum cultu, Reliquiarum & imaginum asservatione & veneratione pie ac Catholice sentimus, rident & varie oppugnare student. Quorum præstigiis ne Christianus populus facile decipiat, serio mandamus omnibus Parochis, Concionatoribus, & cæteris quibuscunque, ut ea, quæ circa hæc Sacra Oecumenica Tridentina Synodus definivit, & probati Catholici Scriptores hætenus docuerunt, fidelibus Parochianis & auditoribus suis accurate & enucleate exponant.

## TITULUS XXII.

### *De Indulgentiis & Purgatorio.*

#### I.

**I**ndulgentiarum usus Christiano populo maxime salutaris, & Sacrorum Conciliorum auctoritate probatus, semper etiam antiquissimis temporibus in Ecclesia fuit. (e) Illæ quam maxime nobis sint necessariae pro peccatorum nostrorum satisfactione, quibus quotidie nos, nostrasque conscientias oneramus, Parochi doceant.

II. Quia vero indulgentiarum materia gravis est, in ea explicanda caute ac discrete versentur, nec quicquam, quod fidei nostræ minus conveniens aut populo sit scandalosum, proferant.

III. Indulgentiæ ignotæ aut suspectæ a nemine etiam Regularibus & exemptis publicentur, nisi prius a Nobis visitatæ & approbatæ fuerint.

IV. Catholica Ecclesia ex sacris literis & antiqua Sanctorum Patrum traditione in omnibus Conciliis, novissi-

T t t t t 3

me

(c) Psalm. 92. c. Decet. de Immunit. Eccles. in 6.

(d) S. Augustin. contra Faustum lib. 20. c. 21. Concil. Trid. d. Decreto: de invoc. Sancti Sess. 25. c. Venerabiles. de Consecr. d. 3.

(e) Matth. 16. Joan. 20. c. Audivimus. & c. Quodcunque. 24. q. 1. c. Ut constitueretur. d. 50. c. Adhuc. de Pœn. & Remiss. in 6. Conc. Trid. Sess. 25. Decreto de Indulgent.

me etiam in Sacra Tridentina Synodo (f) docuit ac definivit, purgatorium esse, animasque ibi detentas fidelium suffragiis, potissimum acceptabili & tremendo Altaris Sacrificio juvari, unde vetustissimus usus Anniversariorum Sacrificiorum pro Defunctis, quia creditum semper fuit a Christianis, nonnunquam annos aliquot in his poenis consumi.

V. Vivorum suffragia, Missarum scilicet Sacrificia, orationes, eleemosynæ, aliaque pietatis opera, (g) quæ a fidelibus vivis pro aliis fidelibus defunctis fieri consueverunt, secundum Ecclesiæ instituta fiant.

VI. Pro pueris in innocentia defunctis nulla suffragia fiant, cum illis non indigeant.

VII. Missæ, orationes, eleemosynæ, & similia opera, quæ pro fidelibus defunctis ex fundatione vel alia ratione debentur ab iis, qui ea præstare tenentur, non perfunctorie aut ex parte tantum, sed diligenter ac integre persolvantur. (b)

## TITULUS XXIII.

### *De Festis Diebus.*

#### I.

**F**esti dies non ad otium & ingluviem, sed ad profectum nostrum spiritualem, ad celebrandas Dei & Sanctorum Laudes ab Ecclesia sunt instituti, (i) ut, quia per totam fere hebdomadam negotiis & operibus sæcularibus intenti sumus, saltem his diebus mentem nostram ferventius ad Deum elevemus, & salutis animarum nostrarum aliquam rationem habeamus.

II. Celebrari autem in Episcopatu nostro Constantiensi sub præcepto volumus & mandamus dies & festa sequentia; videlicet diem Dominicam, quæ in gloriam Dominicæ Resurrectionis a primitiva Ecclesia ad nos usque maxime celebris semper est habita; Festum Nativitatis Domini, S. Stephani Protomartyris, Sancti Joannis Evangelistæ, Ss. Innocentium, Circumcisionis &

Epiphaniæ Domini, Festum Paschatis, cum feria secunda & tertia, Ascensionis Domini, Festum Pentecostes cum feria secunda & tertia, Corporis Christi. Quatuor festa Beatissimæ Mariæ Virginis: videlicet, Purificationis, Annunciationis, Assumptionis, & Nativitatis. Festa Ss. Apostolorum, Andrea, Thomæ, Mathiæ, Philippi & Jacobi, Petri & Pauli, Jacobi, Bartholomæi, Matthæi, Simonis & Judæ, S. Nicolai Episcopi, S. Georgii Martyris, Joannis Baptistæ, Mariæ Magdalene, Laurentii Martyris, Michaelis Archangeli, omnium Sanctorum, S. Martini Episcopi, Catharinæ Virg. & Mart., S. Conradi Episcopi & Patroni nostri. Et in Civitate Constantiensi festum S. Pelagii Martyris, etiam Patroni nostri, item Dedicationis Ecclesiæ nostræ Cathedralis.

III. Denique cum Divina testentur eloquia, confirmetque veneranda antiquitas, Beatis Spiritibus, Sanctis Angelis creditam Divinitus nostri custodiam, nihil antiquius nobis esse debet, quam ut hos fidissimos Custodes naturæ nostræ fragilis, viæ ac vitæ Comites & Duces speciali quadam veneratione, his præsertim temporibus, quibus major fere Christiani orbis pars non uno, sed multis malis & calamitatibus laborat & afflicatur, afficiamus, proinde exemplo multarum Provinciarum, & ipsa temporum difficultate rationabiliter inducti Synodali hac Constitutione serio mandamus ac volumus, ut in posterum per Diocesin nostram Constantiensem Sanctis Angelis locorum, hominumque Custodibus singularis cultus, festusque dies singulis annis Dominica octavam Apostolorum Petri & Pauli immediate sequente, juxta speciale Officium, quod Constantiæ propediem imprimi curabimus, cum solenni cæremonia, utrisque Vesperis, Officio & concione, ad populum tali festo accommodata, celebretur.

IV. Quibus jam specificatis Festis & diebus interdiciamus omnibus & singulis Clericis tam sæcularibus, quam Regularibus & Laicis, cujuscunque status, conditionis & præminentiae fuerint

(f) Sess. 25. in Decreto de Purgatorio.

(g) d. Sess. & Decreto. c. Animæ defunctorum. 13. q. 2.

(b) Ex Decr. de Invoc. Sanct. Sess. 25. & ibid. ex Decr. de cib. delect.

(i) Ex Decreto de Invocat. Sanctor. Sess. 25. & ibid. ex Decr. de ciborum delectu.

rint, omnia opera servilia, & alia illicita, ut sunt comestiones, ebrietates, & similia. (k) Econtra vero præcipimus, ut unusquisque his diebus audiendæ concioni, orationi & pietati vacet, Missæque Sacrificium integrum sub reatu peccati mortalis audiat. (l)

V. Ut autem fideles curæ nostræ commissi scire possint, qua hora festus dies incipiat & desinat, pro Civitatis & Diocesis nostræ consuetudine festi diei initium a media nocte, quæ illius diei celebritatem proxime præcedit, fieri, & sequenti itidem nocte eundem diem terminari & concludi declaramus, atque decernimus.

VI. Cæteræ Festivitates, quacunque ratione institutæ, cuique loco liberæ sint, ubi tamen communi consensu & Cleri & populi aliquæ receptæ sunt, ibi eas servari volumus.

VII. Diebus Dominicis & Festivis curent Parochi, agantque cum Magistratu sæculari, ut officinæ opificum & mercatorum sint clausæ, ut nihil ematur & vendatur, præter id, quod ad victum illius diei, vel ad ægrotorum curationem est necessarium; ne nundinæ fiant, sed quæ festo die fieri consueverunt, in antecedentem vel subsequentem diem rejiciantur, ut ludicra, & sæcularia spectacula, choreæ, & salutationes tempore Divinorum Officiorum, Concionum, Catechesis & Vesperarum non permittantur, quo populus, præsertim vero pueri Ecclesiam & Divina Officia frequentandi majorem occasionem habere possint. (m)

VIII. Nemo sæcularium ex quacunque causa diem Festum publice prophanandi, & in alium diem transferendi sibi potestatem assumat: sed si quid ex evidenti aliqua necessitate tempore Messis, vel Autumni circa hoc faciendum sit, cum nostra, vel Vicarii nostri, vel si commode propter moræ periculum fieri nequeat, cum Decani

ruralis aut Parochi consilio & assensu fiat.

## TITULUS XXIV.

### De Jeuniis ac delectu ciborum.

#### I.

**J**ejunandi tempora jam inde ab Apostolorum temporibus in Græca & Latina Ecclesia a Catholicis semper observata fuerunt. Jejunium enim, quod salubritati corporum, & animarum expedit, in Sacris Literis, non tantum summopere commendatur, verum etiam expressam Divinæ gratiæ promissionem habet.

II. Jejunia vero, quæ ex præcepto Ecclesiæ servari debent, sunt Quadragesima tota, Dominicis in ea occurrentibus exceptis, incipiendo a feria quarta Cinerum, usque ad Sabbatum Sanctum inclusive. (n) Quatuor anni tempora, (o) quorum primum est, circa principium Quadragesimæ post Dominicam *Invocavit*, secundum in hebdomada Pentecostes, tertium in Septembri feria quarta post Exaltationis Sanctæ Crucis, & postremum in Decembri feria quarta post festum Luciæ. Sunt autem in singulis Angariis tres dies, quibus ad jejunandum obligamur, videlicet feria quarta, feria sexta, & Sabbatum. Item Vigiliæ Nativitatis Domini, Pentecostes, Assumptionis B. V. Mariæ, Nativitatis S. Joannis Baptistæ, Sancti Laurentii, omnium Sanctorum & Apostolorum, excepta Vigil. Ss. Philippi & Jacobi, & S. Joannis Evangelistæ. (p) Hæc mature pro concione denuncient Parochi, ne quis forte, cum non jejunat, ullum ignorantia & inobedientia suæ prætextum allegare possit.

III. Inolevit apud plerosque hic abusus, quod se jejunio satisfacere existiment, si tantum a carnibus abstineant. Proinde diligenter instruant Parochi populum, quomodo & a quibus jeju-

(k) C. Omnes. c. Conquestus. de Feriis. Concil. Trid. d. locis.

(l) C. Missas. c. Et hoc. de Consecr. dist. 1.

(m) C. Omnes. de Feriis. & ex Synodo Provinc. Mogunt. anno 1549. celebrata. Bulla Pii V. quæ incipit: *Cum primum Apostolatus officium. Sub dato Romæ 6. Cal. Aprilis Anno 1566.*

(n) C. Quadragesima. de Consecr. dist. 5.

(o) C. Jejunium. cum duob. seqq. c. Statuimus. d. 76.

(p) C. Consilium nostrum. de

observat. jejun.



jejunandum, & quæ sit differentia inter jejunium & abstinenciam. Jejunium enim non tantum consistit, ut abstineamus nos a cibis prohibitis, sed etiam ut unica cibi refectio in die contenti simus, neve dum a cibis abstinemus, aliarum rerum delicias consectemur, & genio nostro indulgentes in varia peccata prolabamur, parum enim prodest homini corporis abstinencia, si animus peccatis indulgeat. (q)

IV. Atque hæc jejunia ab universis ætatem habentibus Clericis atque laicis ne legitime excusatis, sub periculo & reatu peccati mortalis observanda sunt.

V. Qui evidentis morbi alteriusque justæ causæ excusationem habent, licentiam a Vicario nostro, aut propter moræ periculum a Parocho suo, in scriptis accipiant, eamque quoad morbum de Medici, ubi ejus copia haberi potest, consilio.

VI. Abstinencia est, quando corpus quidem bis aut etiam sæpius in die reficimus, a carnibus tamen & cæteris prohibitis escis abstinemus, prout sub simili peccati mortalis reatu diebus Dominicis Quadragesimæ, & omni feria sexta (r) & Sabbato (s) cujuslibet hebdomadæ per annum, festo Nativitatis Domini, quando in eos dies inciderit (t) excepto, obligati sumus.

VII. Quæ jejunandi & abstinendi ratio eo magis pro concione urgenda & declaranda est a Parochis, quo minus hac nostra ætate fere apud omnis generis & status homines valere conspicitur.

VIII. Quibus ob infirmam valetudinem aut aliam justam causam permittitur diebus ab Ecclesia vetitis carne vesci, admoneantur, ne publice & coram familia, sed separatim in aliquo privato cænaculo ejus generis cibum capiant.

IX. Si feria secunda Festum aliquod incurrat celebrandum, quod habet Vigiliam, Sabbato præcedenti jeju-

netur, (u) nec ulterius trahatur Vigilia, quamvis in Sabbatum aliud jejunium incidat.

X. Cum in plerisque Catholicis locis Diocesis nostræ, feria quarta Cinerum non tantum carnes passim & publice comedantur, sed etiam varii generis stulta spectacula, lusus, tripudia, & comensationes celebrentur, & sic apud plerosque luxu potius, & ingluvie, quam cinere & cilicio Quadragesimæ fiat initium, serio injungimus & mandamus locorum Parochis, ut consuetudines hujusmodi pravas & scandalosas, auxilio Magistratus sæcularis, omnino tollant, & gravissime prohibeant.

## TITULUS XXV.

### *De Scholis privatis.*

#### I.

**M**agna diligentia adhibenda est, ut juvenus recte educetur & instituat: est enim adolescentium ætas prona, ad mundi voluptates & illecebras sequendas, (x) quæ nisi a teneris annis ad pietatem, studia & bonos mores informetur, ita vitiorum omnium habitus induit, quos postmodum ex ipsorum animis eradicare fere sit impossibile: nam illa puerorum testa nova non facile odorem exuit, quem recens imbibit. Filii tibi sunt, ait Ecclesiasticus, (y) erudi illos, & curva illos a pueritia illorum. Statuimus itaque, ut in singulis Diocesis nostræ oppidis, Castellis, & celebrioribus pagis juxta cujusque loci necessitatem Scholæ publicæ seu Ludi literarii latini, & germanici pro utriusque sexus Christiana juventute habeantur, in quibus honesta ingenia ad pietatem imprimis erga Deum, obedientiam erga Parentes & Magistratus, tum in moribus bonis, & literis pro cujusque captu, conditione & occasione erudiantur, atque ad usum & commodum Reipublicæ Christianæ idonea reddantur. Nullum enim munus Reipublicæ adferri majus, meliusve potest, quam

(q) C. Jejunium. de Consecr. d. 5.

(r) C. Sabbato. de Consecr. dist. 3. & dist. 5. c. Quia dies.

(t) C. Explicari. de observ. jejuniorum.

(x) Genes. 8.

(y) Cap. 7.

(r) C. De esu carniū. de Consec. dist. 3.

(u) C. 1. de observ. jejunior.

quam si doceatur atque erudiatur juvenis.

II. Proinde hortamur in Domino Ecclesiarum Prælatos & cujuslibet loci Magistratum, (z) ne huic tam pio ac necessario operi desint, sed ubi Scholæ hujusmodi jam institutæ sunt, eas omni diligentia conservent; ubi vero temporum injuria intercidissent, aut hætenus nondum institutæ fuissent, eas, quacunque ratione commode fieri potest, nulla sumptus habita ratione restaurent, sive de novo instituant.

III. Præceptores, Magistri & Provifores assumantur idonei Viri Catholici, pii morati & docti, (a) qui antequam munus suum incipiant, coram Parocho loci, fidei Catholicæ Professionem faciant.

IV. Magistri Scholarum, sive latine, sive germanice doceant, illud in primis curent, ut pueros sibi commissos in rudimentis Catholicæ fidei, juxta formam Catechismi minoris Petri Canisii instruant, atque ad omnem modestiam, Christianosque & bonos mores instituant. Ad quam rem vita Magistrorum magnum adfert momentum, nimirum si talis ea fuerit, in quam nulla justa cadere possit reprehensio: nam ut infantes nutricum, sic pueri vitam & mores Præceptorum sæpe referunt. In prophanis ea prælegant, quæ puerorum ætati conveniunt. Caveant autem, ne authoribus minus probatis, suspectis, aut impudicis utantur, qui fidei & moribus puerorum officere possent.

V. In Scholis Teutonicis puellæ seorsim a pueris masculis instituantur.

VI. Scholas Ecclesiar. & Collegiorum Prælati eorundem, vel ad quos de jure vel consuetudine pertinet, visitent: Scholas vero oppidorum, castellorum & insigniorum pagorum cujuslibet loci Parochi. Ubi tamen minime prohibemus, quin Magistratus sæcularis una cum Parocho per honestos & peritos viros a se deputatos hoc officium præstare possit.

VII. Cæterum diligenter curent ac circumspiciant Scholarum Visitatores, quicumque illi fuerint, ne quid in illis, quæ ad Catholicam Religionem, pietatem & pios mores pertinent, negligatur.

## TITULUS XXVI.

### De Seminario.

#### I.

**Q**uantum Clericorum bene instituta Seminaria utilitatis Ecclesiæ Dei adferant, neminem esse arbitramur, qui id ambigat: nam si Divino cultui mancipandi Clerici a teneris, tum in pietate bonisque moribus, tum in literarum scientia bene instituuntur, facile hæreses & schismata extirpantur, Ecclesiæ pristinus nitor, nec non Sacerdotio suum decus restituitur, & per consequens efficitur, ut Ecclesia, eruditione, pietate & vitæ puritate mire floreat, & singulæ Ecclesiæ Ministros idoneos ad bene & laudabiliter obeundum munus suum habere possint. Unde non immerito Sacrosancta Tridentina Synodus (b) in singulis Diocesibus unum vel plura hujusmodi Clericorum & Ecclesiæ Ministrorum Seminaria erigenda & instituenda decrevit. Quod Decretum licet Nos in hac nostra Diocesana Synodo exequi vehementer desideremus: quia vero cognoscimus hoc tempore propter alias & multorum annorum contributiones, ac varia Ecclesiasticorum Statuum Diœcesis nostræ gravamina, tum etiam quod Capitulum nostrum Cathedrale jam antea viginti alumnos Clericos aluerit, ac etiamnum alat, Seminarii erectionem non nisi cum summa difficultate fieri posse, cogimur salutare hoc institutum ad proximam futuram nostræ Diœcesis Synodum, melioraque tempora differre. Omnes & singulos Diœcesis nostræ Status Ecclesiasticos tam Sæculares, quam Regulares, in Domino exhortantes, ut interea de modo ac ratione tam pii, ac saluberrimi operis instituendi cogitent, & quantum possibile fuerit, ad Dei gloriam, Fidei nostræ & Ecclesiæ Catho-

(z) Ex Conc. Trid. Sess. 5. de Reform. Matrim. c. 1.

(a) Ex d. c. 1. Sess. 5.

(b) Sess. 23. c. 18.

licæ incrementum una nobiscum executioni demandent, quod a Sacro Tridentino Concilio salubriter est constitutum.

*Finis primæ Partis.*

## CONSTITUTIONUM SYNODALIUM PARS SECUNDA.

### TITULUS I.

#### *De vita & honestate Clericorum.*

##### I.

**C**um nihil fere sit, quod magis & efficacius ad pietatem & DEI cultum homines instruat, quam probata vita & exempla eorum, qui in sortem Domini vocati, (c) Divina munera dispensant, & Ecclesiasticis Ministeriis præficiuntur. Cum enim a rebus sæculi in altiore sublati locum conspiciantur, in eos tanquam speculum reliqui oculos conjiciunt, ex iisque sumunt, quod imitentur: Econtra vero Sacerdotii majestas atque dignitas passim apud plebem, non aliam ob causam vileat, contemnatur, & propemodum concidat, quam propter multorum Ecclesiasticorum hominum levem & minus probatam vitam.

II. Quapropter Clerici nostri vitam, moresque suos omnes ita componant, ut habitu, gestu, incessu, sermone, aliisque rebus omnibus nihil, nisi grave, moderatum, pietate ac religione plenum præ se ferant. (d) Sic luceat lux vestra coram hominibus, (e) ut videant opera vestra bona, & glorificent Patrem vestrum, qui in cælis est. Et quia lux mundi, (f) sal terræ, exemplum fidelium, & aliis nominibus cum laude appellantur Clerici, vehementer optamus, ut hujusmodi nomina re ipsa tueantur: quod, ut faciant, hac nostra Synodali Constitutione præcipimus;

neque impune ferent, qui paterna nostra monita non audierint.

III. Tonsuram Clericalem omnes ferant Ordini suo convenientem, (g) eamque, quoties opus fuerit, ad minus tamen singulis mensibus renoveant; mysticem, indecoramque barbam nemo alat. Labra præcisus pili paululum aperiantur, ne pili in Sacrificio Missæ Christi Domini Corpus & Sanguinem sumentem impediant, aut aliqua fortassis Venerabili Sacramento irreverentia fiat.

IV. Oblongos, Germanorum more, aut abscessos deferre capillos cuique liberum ita permittimus, ne tamen vel comæ studiosius nutriantur, vel ita abscessi sint capilli, ut corona conspici non possit.

V. Habitus sit honestus (h) & simplex uniuscujusque dignitati ac statui conveniens, in eo nihil studiosius exquisitum aut nimis abjectum sordidumque habeatur.

VI. In oppidis & locis celebrioribus veste talari, in villis paulo breviori utantur. Cum vero iter faciunt, ne ita brevis & succincta sit vestis, quin fimbria infra genua cadat. In omni vestitu, præsertim externo, color tantum niger adhibeatur. (i)

VII. Vestes, quas domi induunt Clerici, ejusmodi sint, quæ non colore, non ulla habitus specie a Clericali modestia discrepent. (k)

VIII. Collaria plana sint, quæ commode super veste reflecti possint, crispata, lactucata, nimium elaborata & acu picta, quæ militem vel aulicum potius ornant, omnino prohibemus.

IX. A turgidis & dissectis caligis abstineant, nec calceos ad elegantiam incidant. Torques, armillas & monilia respuant, nec annulum portent, nisi quibus propter officii munus aut honoris gradum sit jure concessus. (l) Eum vero, dum Missæ Sacrificium faciunt, Sacerdotes deponant.

X.

(c) C. Clericus. 12. q. 2.

(d) D. Paulus ad Col. 3. & 4. ad Ephes. 5. ad Philip. 4.

(e) Matth. 5.

(f) Matth. 5.

(g) C. Prohibere. c. Clerici. dist. 23. c. Clerici 2.

c. Clericis. de vita & hon.

(h) 1. Timoth. 2. Conc. Trid. Sess. 24. de Ref. c. 12.

(i) C. penult. de vita & hon. Cler. c. 2. eod. in 6.

(k) C. Clerici 2. de vita & hon. Cler.

(l) d. c. Clerici.



X. Clericorum arma sunt orationes & lachrymæ; Idcirco statuimus, ne Clerici arma cujusvis generis, sive ad offensionem, sive defensionem ullo unquam tempore deferant. (m) In itinere tamen ensẽ brevẽ, qui pallio tegatur, non alia arma permittimus. (n)

XI. Transgressores circa prædicta pœnis a Sacra Tridentina Synodo definitis coercebimus, atque ad debitam vitæ honestatem revocabimus.

XII. Mensa & supellex Clericorum sit frugalis & modesta, nihil delicatum, nihil sumptuosum, nihil quod non Dei zelum, simplicitatem, & omnium rerum inanium contemptionem testetur. (o) Hospitalitatem non splendidis & sumptuosis conviviis, sed largis eleemosynis exhibeant, & Patrimonium Christi non luxuriando consumant, sed in usum Ecclesiæ, & pauperum convertant.

XIII. Clerici omnes accubaturi mensis benedicant, & peracto prandio Deo, cujus benignitati omnia accepta ferenda sunt, gratias agant.

XIV. Famulatum pro cujusque statu & dignitate non nisi necessarium, & bonis moribus institutum habeant. (p)

XV. Comestiones, & compositiones, diurnæ nocturnæ, ad æquales haustus, provocaciones sive domi & privatim, sive pulice fiant, maximo pere detestandæ sunt in Clerico, cum non sine magnis animi, corporis & fortunæ periculis, & incommodis fieri consueverint. Eas proinde sub gravissima pœna Clericis omnibus interdiciamus. (q)

XVI. Et quia frequenter multi Clerici hospitia publica, & diversoria contra Sacrorum Canonum & Conciliorum prohibitionem (r) frequentant,

cum rusticis, & aliis per integros dies & noctes potitant, ex qua turpi & indecora consuetudine, Ecclesiasticus Status plurimum vilescit, præsentium tenore statuimus, ac Vicario & Fiscali nostro serio injungimus, ut, quotiescunque Clericum aliquem in publicis tabernis & diversoriis sic potitantem cognoverint, eum pro prima vice decem florenis, pro secunda decem dierum incarceratione puniant, pro tertia vero vice tanquam temulentum & incorrigibilem officio & beneficio privent.

XVII. In eos autem, qui alias publice ebrii fuerint, vel post ebrietatem sine confessione celebraverint, juxta modum culpæ, aut pecuniaria, aut gravioribus pœnis animadvertant.

XVIII. Casum itineris & honestatis excipimus, ut si quis ad amicum peregrinantem, ad honestas nuptias, aut alia convivia publice in publicis diversoriis haberi consuecta vocetur, vel ex alia legitima causa hospitia publica honesta adeat. Quibus tamen casibus memores esse volumus decoris Ecclesiastici, ut Clericali honestate dignos gestus præferant, & verbo & exemplo seipsos exhibeant, sicut Dei Ministros, nemini dantes offensionem. (s)

XIX. Blasphemantes, & ad tertium quodque verbum sine ulla necessitate ac reverentia per Ecclesiæ Sacramenta, per vulnera, crucem & passionem Christi jurantes Clericos Vicarius noster juxta Canonicas (t) Sanctiones severissime & ita puniat, ut alii, si non amore Dei & honestatis, saltem timore gravissimæ pœnæ deterreantur.

XX. Qui choreas sive publice, sive privatim duxerint, larvati quocunque modo inceserint, aut nocturno tempore cum vel sine armis tumultuarie vaga-

(m) C. Clerici. 23. q. ult. c. Clerici. de vita & honest. Cler. (n) Facit glossa in d. c. Clerici. de vita & honest. Cler. (o) Conc. Trid. Sess. 22. de Refor. c. 1.

(p) d. c. 1. Sess. 2. (q) Ad Philip. 3. c. A crapula. de vita & hon. Cler. Conc. Trid. Sess. 22. de Ref. c. 1. (r) Can. Apostolorum 53. Conc. Laodic. 24. Conc. Carthag. 3. can. 27. Conc. Trid. Sess. 24. c. 12. de Reform. c. Clerici. d. 44. c. Clerici. 1. de vita & honest. Cler. (s) 2. Corinth. 6.

(t) Conc. Lateran. sub Leone X. Bulla Pii V. quæ incipit: *Cum primum Apostolatus officium.* Sub dato Romæ 6. Cal. Aprilis Anno 1566. Conc. Trid. Sess. 24. c. 12. de Refor.

Tomus VIII. Concilior. German.

vagati fuerint, per mensem ab officio suspendantur, & fructibus beneficii priventur.

XXI. Tanta est quorundam Clericorum levitas, ut se in conviviiis, symposiis, vel similibus conventibus produtionibus & mimis gerant, varios jocos, dicteria & scommata effingant, & præsentibus non tantum ad immoderatos cachinnos, sed etiam ad quædam alia minus honesta permoveant. Quæ cum ordini ac dignitati Clericali valde sint indigna, magnaue sit (u) abominatio, Clericum ante prandium Divina Sacramenta dispensare, a prandio scurræ & joculari agere, sub pœna depositionis ab officio & privationis beneficii prohibemus.

XXII. Spectaculis prophanis, hastiludiis, choreis Clerici (x) sub pœna unius floreni non intersint: facile enim honestæ aures & oculi Divino cultui mancipati, hujusmodi ludicris actionibus distrahantur.

Quando necesse & cruciamenta improbis hominibus iudicio & sententia Magistratus sæcularis inferuntur, Ecclesiastici ordinis viri, sub pœna quatuor florenorum nullo modo intersint, (y) iis exceptis, qui consolandi officium illis, qui ad supplicium ducuntur, ex munere vel ad id specialiter vocati, præstant.

XXIII. Sicut Clericorum luxus & Ecclesiasticorum bonorum minus honesta ac prodiga consumptio; ita avaritia ac nummorum nimia & sordida accumulatio apud populum grave generant scandalum. Itaque Clerici præsertim quæstus gratia, negotiis sæcularibus, mercaturis, alienæ rei procurationibus, prophanis advocacionibus, decimarum conductionibus, & similibus minime se immisceant. (z) Et quia aliqui sunt Clerici, qui frumenta aut vina tempore utilitatis pretii eorundem coemunt, aut rusticis per annum pecunias sive frumenta ad messem & autumnum certis & illicitis pactis dare solent, ut ea postmodum tempore ca-

ristiæ(\*) duplo vel triplo majore pretio vendere possint; quæ cum valde sordidum & proximo injuriosum quæstum sapiant, atque etiam in laicis detestemur, sub pœna 20. florenorum, hujusmodi contractus, & vini, frumentive emptiones, Clericis prohibemus.

XXIV. Indecorum etiam est Clericos cauponarios esse, (a) & in ædibus suis vina mensuratim divendendo, rusticos, seu alios quosvis homines bibulos ad diurnas nocturnasque computationes pretio suscipere, cum accidere soleat, ut plerumque compotatores illi mero æstuant, in omnem libidinem & petulantiam despument, & cum maximo scandalo clamorosa vociferatione jubilent, obscœna, & nonnunquam aperte impia proferant, quandoque etiam omnis generis rixas, conflictus, & sæpe clades committant. Quamobrem serio mandamus omnibus Parochis, Sacerdotibus & Clericis, ne imposterum tabernam erigant, atque in suis ædibus Parochialibus sive Beneficialibus rusticos, & alios quoscunque adventantes, ad compotandum suscipiant. In transgressores Vicarius noster juxta delicti qualitatem pœna arbitraria animadvertat.

XXV. Non tamen prohibemus, quin illi, qui non minimam partem suorum proventuum Ecclesiasticorum in vino colligunt, & jus publice vinum sub mensura vendendi habent, eo jure uti possint, hac tamen conditione, ne per ipsos, sed alias honestas personas sæculares hujusmodi vina mensuratim sine aliquo scandalo divendant.

XXVI. Ubi Parochi, aut alii Clerici ad exhibenda quædam convivia, certis personis sive Laicis, sive Clericis, sive utrisque simul obligantur, serio mandamus, & sub pœna decem florenorum præcipimus, ne hujusmodi convivia diebus festivis aut jejuniorum fiant, sed in alios dies differantur. Magis tamen ac libentius vellemus, ut ea, si sine gravi scandalo & offensione fieri possit, omnino tollerentur, atque hujus-

(u) C. His. d. 23.

(x) C. Clerici. de vita & honest. Cler.

(y) C. Sententiam. Ne Clerici vel Monachi.

(z) C. Clerici. 2. de vita & honest. Cler. c. 1. 2. c. Secundum. Ne Clerici vel Monachi.

(\*) Charistia convivia erant cognatorum. Ovid. L. 2. Fast. & Valer. L. 2. cap. 1. Pro annona gravi ac difficili sumi, sed imperite, ait L. V. Calepinus.

(a) Ex Concil. Agath. Laodic. & Carthagenensi ultimo, & ex Conc. Viennensi.

hujusmodi profusiones pauperibus erogarentur. Ludum aleæ, talorum, taxillorum, tesserarum (b) venationes, aucupia (c) Clero Dieceſis noſtræ penitus inhibemus.

XXVII. Tempus, quod a perſolutione Divinorum Officiorum Clericis ſuperest, cum levibus, ſuſpectis & minus probatis perſonis non tranſigant, aut converſationibus vanis, & otioſis vel continuis deambulationibus per forum, vicos & plateas non impendant, ſed ſtudiis, ſacris lectionibus, pietatis & charitatis officiis, aliisque honeſtis exercitiis conſumant.

XXVIII. Recreationibus pro conſervanda valetudine, neceſſariis & honeſtis, atque a jure permiſſis, quo minus pro ratione temporis & loci utantur Clerici, non impedimus.

XXIX. Medendi artem quovis modo, cum vel ſine incifione, etiam ſi gratis fiat, Clerici non exercent, (d) niſi a Nobis, vel Vicario noſtro condignis pœnis multari velint.

XXX. Si Clericus Clericum vel Laicum probris, maledictis aut convitiis proſciderit, armis aut pugnibus percuſſerit, crinibus aut barba traxerit, lignis, lapidibus, cantharis aut vitris projecerit, membro aliquo mutilaverit, aut membrum inutile reddiderit, præter juſtam ſatiffactionem, læſæ parti factam, pro qualitate exceſſus pecunia, carcere, ſuſpentione ab officio, aut privatione beneficii per Vicarium noſtrum irremiſſibiliter plectatur. (e)

XXXI. Sanctimonialium Monasteria quæcunque, etiamſi debita clauſura in iis nondum ſit inſtituta, ingredi Clericis omnibus, ſerio non tantum interdiciamus, (f) ſed etiam in hoc genere delinquentes præter Canonicas cenſuras graviffime puniemus.

XXXII. Et quia ut plurimum Clerici ad anniverſaria, aut alias exequias in Monasteriis Sanctimonialium celebrandas convocantur; volumus ac man-

damus, ne tales Clerici Monasteria ipſa, quacunque ratione intrent, atque intra, vel extra ea, cum Monialibus comedant, ſed vel pecuniaria aliqua præſentia contenti ſtatim diſcedant, aut ſi ipſis reſectio præbeatur, eam extra Monasterium in loco aliquo honeſto, & ſine præſentia Monialium modeſte ac ſine ebrietate recipiant. Contrafacientes Vicarius noſter ſeveriffime puniat.

XXXIII. Denique quæ a Summis Pontificibus, Sacris Canonibus & Oecumenicis Conciliis, maxime vero Sancta Tridentina Synodo de Clericorum honeſtate ac modeſtia retinenda, de luxu, ſcandalo, & quibuſcunque criminibus vitandis, copioſe & ſalubriter conſtituta ſunt, eadem ſub inibi expreſſis aut etiam majoribus pœnis, noſtro arbitratu, tanquam ſi hic de verbo ad verbum inſerta eſſent, ab omnibus Clericis Dieceſis noſtræ cujuſque ſtatus, conditionis aut præeminentiæ fuerint, integre ſervari præcipimus.

## TITULUS II.

### *De Prælatiſ & Canonicis Eccleſiæ Cathedralis & Collegiatarum.*

#### I.

Cum Eccleſiaſticæ diſciplinæ retinendæ & conſervandæ cauſa Eccleſiarum dignitates ſint inſtitutæ, curent Eccleſiæ noſtræ Cathedralis Prælati, Canonici, & Collegiatarum Præpoſiti, Decani, ſeu alii Superiores, ut non tantum verbis & correctionibus, ſed etiam exemplo ſuo, cultum Divinum promovere, Eccleſiaſticam diſciplinam diligenter conſervare, atque nos opera & officio juvare ſtudeant.

II. Quo autem commodius & diſciplina conſervari, & cultus Divinus peragi valeat, maximopere conducit, ſi Eccleſiarum Collegia non tantum Capituli, ſed etiam Chori Statuta habeant.

V v v v v 3

III.

(b) Sæped. c. Clerici. 2. de vita & honeſt. Cler. Concil. Trid. Seſſ. 24. de Reſor. c. 12.

(c) C. 1. & 2. de Clerico venatore.

(d) C. Sententia. Ne Clerici vel Monachi.

(e) C. 1. de Clerico percuſſo.

(f) Conc. Trid. Seſſ. 25. c. 5. de Regular. Bulla

Gregorii XIII. quæ incipit: *Ubi gratia. Sub dato Romæ Idibus Junii Anno 1575.*

c. Monasteria. de vita & honeſt. Cler.



III. Qui dignitates in Ecclesia nostra Cathedrali vel Collegiatis obtinent, juxta Ecclesiarum statuta & consuetudines resideant, ac muneri & officio suo, si ad aliquod obligantur, satisfaciant.

IV. Ecclesiarum Superiores Chori tantum & Capituli excessus discrete puniant, reliquos Nobis, aut Vicario nostro puniendos relinquant. Si quis plus juris & superioritatis sibi assumere & usurpare conatus fuerit, quam legitime competat, eum ab hujusmodi attentatis, censuris Ecclesiasticis revocabimus.

V. Jurisdictioni, quam Decanus Ecclesiæ nostræ Cathedralis non in universum Clerum Civitatis Constantiensis, sed tantum in Clerum Ecclesiæ Cathedralis, certo modo habet, nihil derogamus, si consueti termini non excedantur.

VI. Canonorum ordo in Ecclesia antiquus est, inde dicti, quod vel certam Regulam secuti fuerint, vel ad Horas Canonicas in Ecclesia dicendas simul convenerint. Eorum officium est Horis Canonicis nocturnis & diurnis interesse, (g) hebdomadatim celebrare vel Celebranti ministrare. Canonici in Ecclesiis Collegiatis in Choro non sint in sedibus suis otiosi ac muti, sed una cum reliquis psallant, nisi valetudine aut alia legitima causa impediatur.

VII. Canonici a Processionibus solennibus & aliis supplicationibus quibuscunque sine legitima ac necessaria causa se non absentent, sed eorum exemplo inferioribus Clericis & laicis ad eorum facta intuentibus, ad pietatem præeant.

VIII. Si quæ Præbendæ Canonicales, habent annexum ordinem Sacerdotii & onus celebrandi Missas, curent eorum possessores, ut satisfaciant, neque onus in alios rejiciant, nisi approbatis foundationibus aliter sit constitutum. (h)

IX. Ut Canonici Præpositis, De-

canis, aliisve Superioribus suis obedientiam & reverentiam debitam exhibere, ita vicissim Superiores & Prælati Canonicis suis amorem, benevolentiam & condignum honorem præstare debent.

X. Distributiones quotidianæ in Ecclesiis, ubi plures Sacerdotes sunt, & parva vel nulla præsentiarum distributio est, ita instituantur, ut Tridentini Concilii Decretis, (i) quantum commode fieri potest, satisfiat.

XI. Quum gratiæ illæ, quas *Expectativas* vocant, ad Canonicatus & Beneficia vacatura per Sacrum Concilium Tridentinum sublatae sint; (k) ita ut amplius nemini, etiam Collegiis, Universitatibus, Senatibus & aliis singulis personis etiam sub nomine indulgentiarum aut ad certam summam vel alio quovis colore concedi, nec hætenus concessis cuiquam uti licere, atque non solum nostra Cathedralis, sed & quædam Collegiatae Ecclesiæ Episcopatus nostri certum expectantium hujusmodi numerum habere consueverint. Ut igitur ejusdem Concilii Decreta debite exequamur, Nos ejusmodi expectantias omnes in Ecclesiis Collegiatis hac nostra Constitutione tollimus & volumus, ut imposterum Canonicatus vacantes non nisi adultis juxta Decreta Sanctorum Canonum, & præsertim Concilii Tridentini qualificatis conferantur. Alioquin collatio aliter facta, sit nulla & invalida. Attamen Capitulo Cathedralis Ecclesiæ nostræ nihil innovare cupientes, ob protectionem & favorem Catholici Ordinis Equestris, quibus eandem Ecclesiam nostram prosecutus est, & imposterum, ut speramus, prosequetur sub spe approbationis Sanctissimi Domini Nostri Papæ permittimus, ut eum numerum expectantium, quem hucusque habuit, retineat ea tamen conditione, ut tales expectantes Clerici sint, atque in aliqua Universitate aut Gymnasio Catholico studeant, bonisque literis incumbant.

XII. In quibus Ecclesiis præbendæ

(g) Concil. Trid. Sess. 24. de Reform. c. 12.

(h) d. c. 12. Sess. 24.

(i) C. 3. de Reform. Sess. 22. & c. 15. de Reform. Sess. 24.

(k) Sess. 24. de Reform. c. 19. c. 2. De concess. Præbend. c. Detestando. eod. in 6.

dæ sunt Scholasticæ, ex Canonicis junioribus non dentur, nisi actu in aliquo Gymnasio, vel Studio Generali Catholico existant, suæque pietatis, morum & studiorum testimonium singulis annis Capitulis suis mittant. Quod si hujusmodi juniores Canonici mutato consilio a Statu Ecclesiastico rursus ad Sæcularem transierint, volumus, ut omnes fructus, quos ex Præbenda scholastica perceperunt, restituant, atque super restitutione facienda statim ab initio Capitulis sufficientem cautionem præstent.

XIII. Ecclesiarum Prælati & Canonici, qui Sacerdotes sunt, nec ad certas Missas obligantur, saltem singulis mensibus & præcipuis anni festivitibus prævia confessione Missas celebrent. Cæteri confiteantur, & communificent.

XIV. Quæ supra de honestate Clericorum constituta & infra variis titulis constituuntur, ea omnia non minus Ecclesiarum nostræ Cathedralis & Collegiatarum Prælatos & Canonicos, quam inferiores Clericos concernunt. Quo enim altiori dignitatis gradu collocati sunt, eo majori vitæ puritate conspiciui esse debent.

### TITULUS III.

#### *De Officio Decani Ruralis.*

##### I.

**Q**Uoniam gravis & lata est Pastoralis officii nostri cura, recte a Majoribus nostris Decani rurales certis regiunculis sunt præfecti, qui una Nobiscum onus ferre, nostramque sollicitudinem sublevare possint. Hi, quia sunt quodammodo Pastores Pastorum, (l) & alios exemplo, consilio, verbo & opere juvare tenentur, non nisi viri prudentes, docti, vitæ probatæ, multæque experientiæ esse debent.

II. Itaque vacante aliquo Decanatu talis a Confratribus canonice institutis in Decanum eligatur, qui a Nobis, aut Vicario nostro propter vitæ & eruditionis suæ merita facta prius inquisitione, si opus fuerit, confirmari possit.

III. Electus in Decanum Nobis quamprimum pro præstando solito fidelitatis Juramento & accipienda Confirmatione præsentetur, nec ante officio Decanatus ullo modo fungatur.

#### *Forma Juramenti Decanorum ruralium.*

**E**GO N. juro & promitto DEO Omnipotenti, & Beatae Mariæ Virgini, Sanctis Pelagio & Conrado Ecclesiæ Constantiensis Patronis, quod Reverendissimo & Illustrissimo Domino Episcopo Constantiensi, & suis Successoribus canonice intrantibus, eorumque Vicario & Officiali pro tempore existentibus fidelis & obediens ero, ejusdem Reverendissimi Domini Episcopi & ejus Ecclesiæ commoda promovebo, & damna avertam, atque officium, ad quod electus sum, fideliter, & pro virili meo, absque omni dolo & fraude exercebo: **SIC ME DEUS ADJUVET, ET HÆC SANCTA DEI EVANGELIA.**

IV. Ad officium Decani pertinet bis aut ad minus semel in anno cum Confratribus suis Capitulum celebrare, & eis post Divina Officia rite devoteque peracta, hæc nostra Synodalia Statuta sive eorum contenta prælegere, difficultatibus, gravaminibus & incommodis Ecclesiarum consulere, Confratrum suorum vitam, mores, & doctrinam examinare, minores excessus corrigere, tum videre utrum omnes Confratres canonice sint instituti, recteque fungantur suo munere.

V. Graviore Cleri & populi excessus, quibus Ecclesia scandalizatur, item si quos sive Clericos, sive Laicos in hæresim lapsos, vel de hæresi suspectos, vel hæreticorum libros legentes cognoverint, (m) Decani ad Nos, vel Vicarium nostrum referant, ut mature scandalis obviare, & tanta mala, priusquam latius serpent, quantum possibile fuerit, e medio tollere valeamus.

VI. Decani semel quotannis omnes suæ regionis una cum Camerario, vel aliquo ex Deputatis obeant Ecclesiis; Sacristias, vasa, vestes, ornamenta, cæmeteria, sepulturas, prædia & census beneficiorum, Parochorum, aliorumve Clericorum ædes, ac familias visitent, atque cum omni diligentia inspiciant,

(l) C. Singulæ plebes. de officio Archi-Presbytri.

(m) d. c. Ut singulæ plebes,

spiciant, & quid ubique locorum defuit, & desideretur, accurate considerent, minora reforment, & majora ad nostram cognitionem referant.

VII. Curent etiam, ut in Decanatus suis omnia Beneficia Ecclesiastica intra a jure præfixum terminum canonice sine diminutione, sine pactis & reversalibus conferantur. Contrafacientes ad condignam poenam Nobis, vel Vicario nostro in scriptis notificent.

VIII. Quæ autem Decani in Capitulis & visitationibus quotannis fecerint, curaverint, cognoverint, ea omnia scripto comprehendant, ut a Nobis, aut Vicario nostro quocunque tempore requisiti, administrationis suæ rationem reddere possint. (n) In negligentes privatione Decanatus, aut aliis poenis graviter animadvertemus.

IX. Quando aliquis ex Curatis, seu aliis Clericis ægrotaverit, eum Decani invisant, consolentur & curent, ut ei necessaria tam spiritualia, quam temporalia subministrentur. Si obierit, rerum relictarum per se, vel Camerarium, aut unum ex Deputatis adjuncto Notario, si haberi possit: & duobus testibus, vel Clericis, vel Laicis Inventarium conficiant, hæreditatem totam obligeant, & arrestent, arrestumque sine præscitu Sigilliferi & Fiscalis nostri non aperiunt.

X. Et ne cura animarum per obitum Curatorum detrimentum aliquod patiatur, Decani per mensis spatium a die vacationis per se, vel alios idoneos, & a Nobis ad curam approbatos, Ecclesiis viduatæ provideant, atque interim pro rato temporis fructus beneficii percipiant.

XI. Elapso mense, si Ecclesiæ Parochiali, aut alteri Beneficio de Successore nondum prospectum esset, curent Decani, ut per idoneos Clericos, & qui a Nobis specialem commissionem obtinent, Ecclesiis seu Beneficiis debita ministeria impendantur.

XII. Decanatum quorumvis Clerici suis Decanis reverentiam debitam exhibeant, eisque obediant, ad Capitula vocati compareant, aut si legitime

impediantur, excusatores mittant. Vicia & defectus, de quibus a Decanis interrogantur, bona fide indicent, si ab eis de aliqua re admoneantur, si corrigantur, si illis aliquid mandetur, morigeros se exhibeant. Inobedientes & rebelles, quos Nobis a Decanis deferri volumus, gravi poena afficiemus.

#### TITULUS IV.

##### *De Camerariis.*

###### I.

**C**amerarii ærario Capitulari præferti, & Decanis legitime impeditis substituti sunt, sine quorum jussu, consilio & præscitu nil faciant, nihil expendant, census Capituli & multas, quæ quavis ratione debentur, fideliter colligant, & de eisdem Capitulo rationem reddant.

II. Jura Episcopalia & Archidiaconalia exigant, eaque Sigillifero nostro & Archidiaconis mittant: Ut res & jura non tantum Capituli sui, sed universim omnium Ecclesiarum Decanatus debite conserventur, & defendantur, amissaque recuperentur, solite prospiciant.

III. Ædes Parochiales, & Beneficiales quotannis inspiciant, ne culpa Curati aut alterius Clerici inhabitantis ruinosæ efficiantur, provideant, & quid quisque in ædium suarum reparationem & conservationem impenderit, advertant.

IV. Administrationis, & officii sui, quoties a Nobis, vel Vicario nostro requisiti fuerint, rationem reddant, & Juramentum solitum præstent.

#### TITULUS V.

##### *De Plebanis, & Ecclesiarum Parochialium Rectoribus.*

###### I.

**G**ravissimum onus est animarum cura, magnamque tum eruditionem & pietatem, tum prudentiam requirit; quod si diligentius plerique considerarent, non ita passim quasi ex-

panso

(n) d. c. Ut singulæ plebes.



panso velo ad eam suscipiendam curre-  
rent, aut certe de iis, quæ ad officium  
Curati pertinent, prius se melius in-  
formarent, ne fortasse, quod multis  
accidere veremur, una cum commisso  
grege in præcipitium æternæ damna-  
tionis ruant. Quare diligentissime at-  
tendere volumus Vicarium & Exami-  
natores nostros, ne facile quempiam  
ad curam animarum exercendam ad-  
mittant, nisi quem virtutis & vitæ me-  
rita, atque sufficiens doctrina idoneum  
& commendabilem reddant. (o)

II. Parochi socios in Divinis, seu  
cooperatores, etiam probandi tantum  
causa, nullos assumant, & eorum opera  
in Sacramentorum administratione u-  
tantur, nisi prius a Vicario nostro  
prævio examine legitime & in scriptis  
approbatos; neque alienis Parochia-  
nis, sive per se, sive per socios suos,  
sine licentia proprii Parochi extra ca-  
sum necessitatis Sacramenta ullo modo  
distribuant.

III. Omnia & singula officia, quæ  
ex fundatione, vel laudabili consue-  
tudine obire debent Parochi, studiose  
exequantur. Sacram Missam diebus  
Dominicis, & Festivis nunquam inter-  
mittant, (p) & Sacramenta omnia re-  
verenter, summaque cum honestate per  
Confessionem Sacramentalem, si copia  
Confessarii haberi possit, aut saltem  
per veram cordis contritionem cum  
proposito confitendi, ab omni peccato  
mortali vacui, pro quorumcunque lo-  
corum & personarum necessitate admi-  
nistrent.

IV. Si quando propter inopiam  
plures Ecclesiæ unum tantum haberent  
Sacerdotem, concio non in una, & in  
altera Ecclesia Missa habeatur, sed in-  
teger Divinus cultus in earum singulis  
per vices agatur, populusque semper  
ad eam Ecclesiam convenire jubeatur,  
in qua Missam & concionem simul audi-  
re possit.

V. Parochi ægtotos suos non tan-  
tum Ecclesiæ Sacramentis provideant,

sed etiam non vocati eosdem sæpius in-  
visant ac consolentur.

VI. Ex Cancellis, & aliis locis sa-  
cris, dies Festos, jejunia, supplicatio-  
nes, anniversaria, & his similia, non  
prophana & sæcularia promulgent.

VII. Bona, Jura, Privilegia, De-  
cimas, census, agros, prædia Eccle-  
siæ suæ diligenter & cum discretionem  
defendant, atque in Urbarium authen-  
ticum conscribant, ut distincte cogno-  
sci queat, quos proventus & onera  
quælibet Ecclesia habeat.

VIII. Ecclesiarum suarum bona &  
redditus non oppignorent, ac debitis  
gravent, neque decimas aut alios pro-  
ventus in damnum Successorum ven-  
dant aut diutius locent, quam sit jure  
permissum. (q)

IX. Habeant omnes Ecclesiarum  
Parochialium Rectores quinque sepa-  
ratos libros, (r) in quibus baptizato-  
rum, confirmatorum, communicanti-  
um, Matrimonia contrahentium, &  
defunctorum nomina, cognomina, cum  
annotatione diei, mensis & anni dili-  
genter & legibiliter inscribant: hoc  
enim non tantum ad natalium, matri-  
monialium impedimentorum, ætatis  
& similium probationem, sed etiam &  
præcipue, ut Pastoribus ovium suarum  
ratio melius constet, conducit. Ne-  
gligentes Decani inquirent, & Vicario  
nostro pro qualitate plectendos defe-  
rant.

X. Denique cum pleraque, quæ in va-  
riis titulis hujus nostræ Synodi definita  
& constituta sunt, Parochos, eorum-  
que officium & curam concernant;  
Volumus, eisque severe præcipimus,  
ut ea omnia & singula sub inibi conten-  
tis, & aliis etiam gravioribus pœnis  
non tantum per se diligenter observent,  
sed etiam ab iis, quorum cura illis com-  
missa fuerit, observari faciant & pro-  
curent.

TITU.

(o) Conc. Trid. Sess. 24. de Reform. c. 18.

Joan. 21. Actor. 20. c. Sicut. dist. 43.

(p) c. Diaconi. c. Quicquid. 12. q. 2.

Tomus VIII. Concilior. German.

(p) Concil. Trid. Sess. 23. de Reform. c. 1.

c. Præcipue. 8. q. 1. c. Gloria Episcopi. 2. q. 3.

(r) Concil. Trid. Sess. 24. de Ref. Matr. c. 1. &amp; 2.

## TITULUS VI.

*De Vicariis Ecclesiarum incorporatarum, & Canonica portione.*

## I.

**V**icarii, siue perpetui, siue ad tempus, sine nostra approbatione & consensu non assumantur, (s) nec semel assumpti amoveantur, nisi alicui ex speciali privilegio, de quo Nobis constare volumus, legitime esset indultum.

II. Et quia Vicarii Parochorum in animarum cura administranda vices gerunt, eadem plane de illis, quæ de cæteris Ecclesiarum Parochialium Rectoribus, & Curatis hinc inde constituta sunt, definimus.

III. Prælati, Capitula, Collegia, Monasteria tam sæcularia, quam Regularia utriusque sexus, & alii quicunque, quibus Ecclesiæ Parochiales sunt incorporatæ, Vicariis suis de congrua & competenti portione ex fructibus Ecclesiæ provideant, unde decenter & pro hujus temporis conditione se sustentare, jura Episcopalia, & Archidiaconalia solvere, hospitalitatem erga pauperes, & alios debitam ac statui suo convenientem exercere, & alia onera impenduntia sustinere possint. (t)

IV. Quod si non fiat, Nos ex officio nostro Pastoralis hujusmodi negligentiam supplebimus, & juxta Canonicas Sanctiones Vicariis de congrua & sufficienti portione, justitia mediante, providebimus.

V. Caveant vero Vicarii, ne Prælati, Collegiis, Capitulis, Monasteriis, aut aliis quibuscunque literas renunciationis seu reversales tradant, quibus se modica & minus sufficienti competentia contentos fore obligent. Idque si a Nobis aut Vicario nostro investiantur, vel ad curam admittantur, se non fecisse, juramento confirmant.

## TITULUS VII.

*De Sacellanis & aliis inferioris Ordinis Clericis.*

## I.

**S**acellani & alii Clerici, cujuscunque gradus fuerint, attendant officio suo, & ministerium suum diligenter impleant, foundationibus, piisque Ecclesiarum & Beneficiorum suorum consuetudinibus impigre satisfaciant, nec facile & sine legitima causa Ecclesiam suam, præsertim diebus Festis deserant, ut alienam honorent.

II. Qui ad Chorum & Horas Canonicas persolvendas astricti sunt, mature veniant ad Ecclesiam, inter psallendum & cantandum verba non præcipitent, sed integre ac devote pronuncient.

III. Sacellani & reliqui Sacerdotes ac Clerici ordinarie singulis mensibus confiteantur, extraordinarie, quoties in peccato mortali fuerint, & celebrare aut communicare ex officio debent, vel expiata volunt.

IV. Ecclesiarum Prælati, Canonicis, & Parochis Sacellani, & cæteri Clerici debitam reverentiam exhibeant, & in omnibus licitis & honestis, præsertim cultum Divinum concernentibus, obedientiam & omnem fidelitatem bona fide promittant ac præstent, paternamque correctionem, si quando exorbitarint, modeste suscipiant. Rebelles in minoribus a Prælati & Parochis puniantur, & in majoribus Vicario nostro plectendi deferantur.

V. Cooperatores quoque suis Parochis ad nutum obediant, neque circa exercitium curæ animarum & Sacramentorum administrationem omnia pro arbitrio suo, sed prout ipsis a Parochis injunctum fuerit, prompte faciant.

VI. Quæ de moribus passim dicta sunt, ea Sacellani & Clerici omnes ad se maxime pertinere sciant. Quamobrem domi suæ sobrie, caste, pieque vivant,

(s) Conc. Trid. Sess. 24. de Reform. c. 18. bend. c. 1. eodem in 6. Vide Bullam Romæ 7. Cal. Novemb. Anno 1567.

(t) C. Extirpandæ. c. Exposuisti. de Præbend. Pii V. quæ incipit: *Ad exequendum. Sub dato*

vivant, ebrietatem fugiant, otium tanquam fomentum omnium vitiorum devitent, & honestis se laboribus occupent. Recordentur se quotidie astare in Ecclesia vultui Dei, cingi Angelorum cohortibus, & habere populi præsentis oculos in se coniectos.

## TITULUS VIII.

*De Clericis peregrinis.*

## I.

**C**um non infrequenter accidat, ut qui omnino Sacerdotes non sunt, aut si Sacerdotes vel Monachi fuerint, profugi tamen, infames, irregulares, excommunicati, aut aliquo alio Canonico impedimento irretiti sint, sese Missarum celebrationi, concionandi muneri, Sacramentorum administrationi, aliisque Divinis Officiis propria auctoritate ingerant. Idcirco omnium Ecclesiarum Prælati, Parochi, & ruralium Capitulorum Decanis serio mandamus & præcipimus, ne quemcunque Clericum ignotum ex alia Diocesi venientem sub quocunque prætextu in Ecclesiis & Decanatibus suis ad concionandum, Sacramenta administrandum, Missam vel alia Divina Officia celebrandum (u) admittant, nisi per Nos, seu Vicarium nostrum fuerit approbatus, atque de tali sua approbatione authenticas literas ostenderit.

II. Si qui contra Prælatorum, Parochorum, live Decanorum prohibitionem sese nihilominus in ejusmodi Ecclesiastica ministeria ingesserint, vel ingerere attentaverint, ii quamprimum Fiscali nostro significantur, ut jure per Ecclesiasticas censuras & alias poenas contra eos procedat.

III. Clerici vero peregrini transeunt, ad Missarum celebrationem admittantur, si ex literis testimonialibus authenticis & probatis de ipsorum ordinatione, ac vitæ morumque honestate constiterit.

IV. Apostatas & fugitivos Monachos in Episcopatu nostro nullatenus

esse ferendos, decernimus, ubicunque deprehensi fuerint, severissime per Nos castigabuntur, & ad sua Monasteria remittentur.

## TITULUS IX.

*De Residentia Clericorum.*

## I.

**O**btinentes curam animarum quocunque modo in Ecclesiis suis resideant, populumque suæ curæ ac fidei commissum, verbo & exemplo pascant. (x) Quod si quis Curatorum ab Ecclesia sua abfuerit, eum præter alias poenas adversus non residentes a Sacris Canonibus constitutas, ac peccati mortalis reatum, quem incurrit, absentiae fructus pro rata temporis suos non facere, nec cura conscientia, alia etiam declaratione non secuta, illos sibi retinere posse, sed fabricæ, aut pauperibus applicandos fore, decernimus.

II. Caveant Parochi & Curati, ne oves suas metu alicujus periculi, vel tempore pestis unquam deserant. Bonus Pastor, inquit Dominus (y), ponit animam suam pro ovibus suis, mercenarius autem fugit. Quod si fecerint, Deo & Nobis deserti officii poenas gravissimas dabunt.

III. Ne autem diutius Ecclesiæ Parochiales proprii Pastoris præsentia & residentia destituantur, ad illas nullus assumatur, qui non sit actu Presbyter, aut in tali ætate constitutus, ut infra annum in Presbyterum ordinari possit, & qui personalem residentiam facere velit. Intra præfixum tempus non residentes, aut se ordinari non procurantes, Parochiis, cæterisque beneficiis curatis quibuscunque priventur.

IV. Parochi ab Ecclesiis suis ultra hebdomadam se non absentent sine licentia Decani, & ad longius tempus sine licentia Vicarii nostri Generalis. Absentia vero nulli concedatur diebus solennioribus & ultra bimestre, & nisi interea Vicarium idoneum & approbatum, qui ipsorum vices obeat, cum debi-

(u) Conc. Trid. Sess. 23. de Reform. c. 16.

& Sess. 7. c. 1. Bulla Pii IV. *Super residentia*. c. Conquerente, & fere per totum, de Cleric. non resid.

(y) Joan. 10.



debita mercedis assignatione deputaverit. (z)

V. In Cathedrali & quibusvis aliis Ecclesiis Collegiatis Civitatis & Diocesis nostræ Dignitates, Canonicatus aut portiones obtinentibus, non liceat vigore cujuslibet Statuti aut consuetudinis ultra tres menses ad summum a suis Ecclesiis quolibet anno abesse, (a) sub pœna in sæpeditis Sacri Concilii Decretis comprehensa. Salvis nihilominus earum Ecclesiarum Statutis, quæ longius servitii tempus requirunt. Ubi tamen circa Ecclesiæ nostræ Cathedralis Statuta, Privilegia & laudabiles consuetudines auctoritate Apostolica aut Ordinaria roboratas, & quibus a Sede Apostolica specialiter non est derogatum, nihil innovare intendimus.

VI. Cætera beneficia qualiacunque simplicia residentiam de jure vel consuetudine exigentia obtinentes, similiter resideant, (b) neque unquam a Beneficiis & Ecclesiis suis sine legitima causa, & Superiorum præscitu & consensu sese absentent.

VII. Dispensationes perpetuæ de non residendo, aut de fructibus in absentia percipiendis nulli juxta mentem S. Trident. Concilii (c) suffragentur: temporales vero ex rationabilibus causis concessas, ita permittimus, si prius eas viderimus, & de earum veritate cognoverimus.

VIII. Excusantur tamen a residentia, qui Romano (d) Pontifici aut proprio Episcopo (e) obsequium exhibent, qui jura & negotia Ecclesiæ seu beneficii sui prosequuntur. (f) Aut si, ut studiorum causa abesse possit, est alicui specialiter indultum, (g) & si quæ sunt aliæ similes (h) sacris Canonibus expressæ non residendi causæ. Dummodo de iis si dubitari contingeret, per causæ cognitionem coram Superiori factam, sufficienter constet.

## TITULUS X.

### De Horis Canonicis.

#### I.

**I**N recitandis Horis Canonicis Clerici omnes utantur Breviario Romano, aut nostro Constantiensi ad Romanum accommodato. Regulares vero aut eodem, aut approbato Ordinis sui.

II. Obligantur autem ad septem Canonicas Horas quotidie devote recitandas omnes, qui sunt in sacris majoribus Ordinibus constituti, sive Beneficium Ecclesiasticum habeant, sive non: Et omnes ii, qui quaecunque Beneficium cum vel sine cura obtinent, sub reatu peccati mortalis (i) & pœna restitutionis fructuum perceptorum. (k)

III. Sacerdotes Missam celebraturi, prius ad minimum Matutinum cum Laudibus dicant.

IV. Clerici itinerantes, aut ii, qui levi aliquo morbo corripuntur, non æstiment se ab Horarum recitatione immunes.

V. Causas excusantes, vel non excusantes, a recitandis Horis Canonicis cuique propria conscientia, & pius ac discretus Confessarius dictabit.

VI. Quia vero magna est multorum Clericorum negligentia & malitia, qui, quas debent Horas Canonicas dicere, omittunt, ideo ex Decreto LEONIS Decimi, in Lateranensi Concilio (l) edito statuimus & mandamus, ut Clericus quicumque Beneficium habens cum cura, vel sine cura, si post sex menses ab obtento Beneficio Divinum Officium non dixerit, legitimo impedimento cessante, Beneficiorum suorum fructus non faciat suos pro rata omissionis, recitationis officii & temporis, sed eos, tanquam injuste perceptos, in fabricas hujusmodi Beneficiorum, vel pauperum eleemosynas erogare teneatur: Si vero ultra dictum tempus in simili

(z) d. Sess. 23. de Reform. c. 1.

(b) Conc. Trid. Sess. 24. de Refor. c. 2.

(d) C. Dilectus. de Cleric. non resid.

(f) C. Ex parte 2. eod.

(h) C. Ad audientiam. de Cleric. non resid. c. Unico. eod. in 6.

(i) D. Thomas quodlib. 6. & in 4. distinct. 15. Panor. in c. 1. de celebr. Miss. & omnes Dd.

(k) Vide Sylvest. in summa verbo: hora. n. 16.

(a) Concil. Trid. Sess. 24. de Refor. c. 12.

(c) d. Sess. c. 2.

(e) C. De cætero. eod.

(g) C. Relatum. c. Tuæ fraternitatis. eod.

(l) Sess. 9.

mili negligentia contumaciter perman-  
ferit, legitima monitione præcedente,  
beneficio privetur, cum propter offi-  
cium detur beneficium. Intelligatur  
autem officium omittere, quoad hoc  
ut beneficio privari possit, qui per quin-  
decim dies illud bis saltem non dixerit,  
Deo tamen ultra præmissa de dicta  
omissione redditurus rationem.

VII. Parochi, & alii Clerici Con-  
stantiam vel ratione examinis ad curam,  
vel ob alia negotia venientes, diligen-  
ter a Vicario, Fiscali, & Examinatori-  
bus nostris examinentur de modo ac  
ratione Horarum Canoniarum, & an  
de præsentis Breviarium secum habeant:  
& si quos deprehenderint, qui vel Bre-  
viarium secum non sumpserunt, vel  
Horas secundum Rubricas Breviarii re-  
citare non possunt, eos severissime  
multa pecuniaria, piis locis applican-  
da, carcere aut privatione pro quali-  
tate delicti puniant.

## TITULUS XI.

*De Libris Clericorum.*

## I.

**C**Lericis, ut ea, quæ officii sui sunt,  
rectius obire possint, & ne otio,  
quod in illis vehementer detestamur,  
torpescant, libri maxime sunt necessa-  
rii, quos præter hæc nostra Statuta  
Synodalia doctioribus Clericis non præ-  
scribimus, sed cujusque voluntati li-  
berum relinquimus, modo illos libros  
habeant, quos vel intuitu ordinis Cle-  
ricalis, vel ratione officii etiam quilibet  
ex minus doctioribus Clericis, & qui  
tenuiorum sunt facultatum, necessario  
habere tenetur.

*Quales sunt:*

## II. Biblia sacra.

Catechismus Romanus, auctoritate  
Concilii Tridentini editus.

Catechismus Petri Canisii.

Concilium Tridentinum.

Statuta nostra Synodalia.

Summa casuum conscientiae Fran-  
cisci Toleti Cardinalis.

Manuale Navarri.

Theologia Pastoralis Petri Binsfeldii.

Institutio confessionis Martini For-  
narii.

Controversiæ, institutiones, medi-  
tationes Costeri, & Vincentii Brunii.

Opuscula Ludovici Granatensis.

Libellus Thomæ de Kempis de imi-  
tatione Christi, & alia ejusmodi opus-  
cula.

Pro Concionibus vero Eckius, Cli-  
toveus, Nausea, Hoffmaisterus, Eisen-  
grinius, Costerus. Item Postillæ Feuch-  
tii, Petri Canisii, Schereri, & aliorum  
probatorum Authorum.

## TITULUS XII.

*De Collationibus Beneficiorum, &  
Jure Patronatus.*

## I.

**M**ulti sunt, præsertim ex Patronis  
Laicis, qui quid sit Jus Patro-  
natus, & quid Juris in beneficiorum  
collatione sibi competat, minus intelli-  
gunt, dum se pro libitu suo, tanquam  
essent Domini proprietarii beneficio-  
rum, de beneficiis patronatus disponere  
posse existimant, unde postmodum  
multa contra Jura & Canones inconve-  
nientia, & maxima salutis animarum  
dispendia suboriuntur.

II. Jus Patronatus nihil aliud est,  
quam potestas præsentandi Episcopo,  
aut alteri etiam inferiori, qui Jus insti-  
tuendi habet Clericum idoneum insti-  
tuendum ad beneficium vacans. (m)  
Hinc facile quis intelligit præter præ-  
sentationem Patrono nihil Juris in be-  
neficio patronato competere. Itaque  
omnes Ecclesiarum & beneficiorum Pa-  
tronos, sive Laicos, sive Ecclesiasticos,  
in Domino vehementer hortamur, ut  
salutis propriæ ac subditorum suorum,  
memores hujusmodi Jure Patronatus,  
quod sibi legitime vendicant, minime  
abutantur, sed juxta Sacrorum Cano-  
num (n) & Trid. Conc. (o) præscrip-  
tum Ecclesiis & beneficiis suis patro-  
natus provideant.

III. Et quidem Laici, quibus de  
jure in præsentationibus variare per-  
missum est, (p) intra quatuor menses,

Xxx xx 3

Eccle-

(m) Hostiens. in summa de Jure Patronatus.

c. Nobis. de Jure Patronatus.

(p) C. Cum autem. c. Quod autem. de Jure Patron.

(n) C. Piæ mentis, cum seq. 16. q. 1.

(o) Sess. 23. de Refor. c. 9. Sess. 14. de Refor. c. 12.

(q) Ecclesiastici vero Patroni, quibus variatio jure prohibita est, intra sex menses (r) personam idoneam præsentent. Quo jure etiam eum, qui jus nominandi habet, uti volumus.

IV. Quod si intra præscriptum tempus jus suum neglexerint, Nos auctoritate Ordinaria vacantibus Beneficiis ex jure devoluto pro illa vice providebimus.

V. Patroni Ecclesiarum & Beneficiorum quorumcunque semel legitime præsentatos & investitos Clericos, sub pœna excommunicationis, & amissionis Juris Patronatus propria auctoritate non amoveant, (s) vel ita tractent, ut beneficia sua vel deserere, vel resignare cogantur. Contra intrusos suspensione, excommunicatione, aliisque juris pœnis procedemus.

VI. Literas reversales, pacta illicita, juri & sacris Canonibus contraria, promissiones Simoniacas, a præsentandis Patroni non extorqueant, aut etiam sponte a Clericis oblata acceptent. (t) Quod cum ab aliquo Clerico factum fuerit, eum Vicarius noster non canonice, sed carcere investiat. Reversales autem & pacta, quæ juri & æquitati non repugnant, ita admittimus, si per Nos, vel Vicarium nostrum prius examinata & approbata fuerint.

VII. Patroni Beneficiis suis Patronatis, vel Clericis præsentatis pensiones, collectas, aut alia onera qualiacunque nova & insolita sine Sedis Apostolicæ, aut nostræ auctoritate non imponant, neque decimas, agros, vineas, prata, sive in toto, sive in parte, aut aliquam aliam partem beneficii quovis prætextu sibi vindicent, ac usurpent, (u) sed omnia Sacerdoti legitime instituto, integre & sine diminutione alia relinquunt. (x)

VIII. Jura Patronatus pretio non emantur, nec vendantur, (y) licet

cum Universitate rerum temporalium simul transferri possint. (z)

IX. Clerici universi per Civitatem & Diocesim nostram Constantiensem ubilibet constituti, Collatoribus seu Patronis suis omnem debitam reverentiam exhibeant, (a) & circa officii sui functionem, ad quam de jure, de fundatione, aut alia rationabili ac pia consuetudine tenentur, ita se gerant, ne Patroni justam de illis conquerendi causam habeant.

X. Quæ, si minus faciant, aut alias vitam Clerico indignam traducant, hortamur in Domino omnes & quoscunque Patronos, ut deposito omni affectu & indignatione, solam Dei gloriam & animarum salutem considerando, ea Nobis, vel Vicario nostro referant. (b) Promittimus vicissim eisdem, Nos apud Officiales nostros Ecclesiasticos curaturos tantumque effecturos, ut contra hujusmodi Clericos, justitia mediante, & prout juris fuerit, ad Canonicas pœnas pro ratione delicti, quantocius fieri potest, absque longiori mora procedant.

## TITULUS XIII.

### De Institutionibus.

#### I.

**N**ullus Beneficium, qualecunque sit, sine Canonica institutione, a Nobis, vel ab eo, cui jus instituendi competit, possideat, multo minus ministerio aut fructibus beneficii, quos absque Investitura suos non facit, sese ingerat. (c)

II. Ad Beneficia Parochialia, vel alia Curata assumpti, Sacramenta non administrent, nec quicquam faciant, quod curæ animarum sit annexum, nisi prius approbati & investiti fuerint. Quomodo enim eos ligare & absolvere possunt, in quos ipsis nulla adhuc attributa est jurisdictio & potestas?

#### III.

(q) C. Unico. eod. in 6.

(r) d. c. Unico.

(s) C. Præter ea. de Jure Patron.

(t) C. Non satis. c. Cum in Ecclesiæ. de Simon. & passim. 1. q. 1. cum 5. quæst. seqq.

(u) Concil. Trid. Sess. 25. de Reformatione. c. 9.

(x) Tot. tit. Ut Ecclesiastica Benefic. sine di-

minutione conferantur. c. Præterea. de Jure Patron.

(y) C. De jure. eod. tit. de Jure Patron.

(z) C. Ex literis. c. Cum sæculum. eod.

(a) C. Nobis. de Jure Patron.

(b) C. Filiis. 16. q. 7.

(c) C. Ex frequentibus. c. Cum venissent. de Institut. c. Præterea. de Jure Patronatus.



III. Qui ex privilegiis, aut alia legitima causa a Nobis approbata investiri non solent, pro Investitura commissionibus ad curam animarum exercendam in scriptis, & sigillatas recipiant, atque de triennio in triennium renovent.

IV. Quod si ad inferiores alicujus Curati institutio pertinet, talis nihilominus ab Examinatoribus nostris ad curam examinetur, alioquin institutio ab inferioribus facta, irrita sit & inanis. (d)

V. Et quia, juxta Apostolum, nemini cito manus sunt imponendæ, (e) volumus, ut ad aliquod Beneficium Ecclesiasticum præsentatus non prius instituatur, antequam ex Cancellis publice proclamatus, & terminus consuetus effluxus fuerit, ut interea de vita, moribus & sufficienti doctrina instituendi cognosci possit.

VI. Faciat instituendus tum Professionem fidei Catholicæ, tum inscriptum juramentum, aliaque præstet, quæ in his Statutis a Clericis exigimus.

VII. Decani & Camerarii rurales, quos in hac parte Executores constituimus, nullum Clericum in suo Decanatu absque legitima Investitura vel commissione beneficium possidere, (f) & in eo ministrare permittant; Inobedientes Vicario nostro puniendos deferant.

*Juramentum Investiendorum Clericorum.*

**E**GO N. Rmo & Illmo Domino Episcopo Constantiensi, ejusque Vicario & Officiali pro tempore existentibus fidelis ero, & mandatis eorundem obediam, ac ea reverenter exequar. A beneficio, ad quod institui peto, sine licentia & consensu Episcopi, aut ejus Vicarii non discedam. Res, decimas, bona & jura omnia Ecclesiæ & beneficii, nec non calices, libros, & alia ornamenta, si quæ ad illud spectantia habeat, non alienabo, sed conservabo & defendam, & in quantum ablata, vel alio quocunque modo alienata fuerint, summis viribus recuperare studebo. SIC ME DEUS

ADJUVET, ET HÆC SANCTA DEI EVANGELIA.

TITULUS XIV.

*De Resignationibus Beneficiorum.*

I.

**B**eneficiorum Ecclesiasticorum resignationes, quæ sine legitima causa fiunt, semper fuerunt odiosæ, & Sacris Canonibus prohibita, præsertim quando ii, quibus animarum cura commissa est, ex levissimis causis, & spe pinguioris beneficii oves sibi concreditas deserunt, atque ad alias oves, non tam ut illas, quam ut se ipsos pascant, transeunt: cum enim inter Pastorem & Ecclesiam, quasi Matrimonium aliquod spirituale contrahatur, minime tolerari debet, ut facilis fiat inter eos separatio.

II. Itaque Resignationes Beneficiorum quorumcunque non fiant, nisi ad manus Summi Pontificis, nostras, vel Vicarii nostri, aut ejus Collatoris, qui de jure resignationes recipere potest. Et quidem quæ coram Nobis, vel aliis inferioribus fiunt, pure & simpliciter absque favore alicujus fieri debent, ne magis successiones, quam dimissiones dicantur. Factæ cum conditione aliqua Juri contraria, aut in favorem alicujus puræ censeantur. Non tamen prohibemus, quin a Resignante pro aliquo alio preces non tamen obligatorie interponi possint, aliter factæ resignationes nullius sint effectus.

TITULUS XV.

*De pluralitate Beneficiorum.*

I.

**E**os, qui plura Beneficia curata, aut alias incompatibilia possident, veteres & recentes Canones constanter damnaverunt. (g) Nos Decreto (b) Sacræ Tridentinæ Synodi inhærentes, illud de verbo ad verbum his nostris Statutis Synodalibus inferendum duximus,

(d) Concil. Trid. Sess. 25. de Reform. c. 9.

(e) 1. ad Timoth. 5.

(f) C. 1. de Regul. Jur. in 6.

(g) C. Quia in tantum. c. Ad hæc. c. Cum non ignore-

res. de Præb. causa. 21. q. 4. per totam. Concil. Trid. Sess. 7. c. 2. & 4.

(b) Sess. 24. c. 7.

mus, omnibus & singulis Diecefis nostræ Ecclesiasticis quibuscunque sæcularibus & Regularibus serio mandantes, ut hujusmodi Decretum sub pœnis in eo contentis quam diligentissime observent.

" Cum Ecclesiasticus Ordo per-  
" vertatur, quando unus plurium offi-  
" cia occupat Clericorum, sanctæ sacris  
" Canonibus cautum fuit, neminem  
" oportere in duabus Ecclesiis conscri-  
" bi: Verum quoniam multi impro-  
" bæ cupiditatis affectu se ipsos, non  
" Deum decipientes, ea, quæ bene con-  
" stituta sunt, variis artibus eludere,  
" & plura simul beneficia obtinere non  
" erubescunt; Sancta Synodus debitam  
" regendis Ecclesiis disciplinam resti-  
" tuere cupiens, præsentî Decreto,  
" quod in quibuscunque personis quo-  
" cunque titulo, etiam si Cardinalatus  
" honore fulgeant, mandat observari;  
" statuit, ut impostero unum tantum  
" Beneficium Ecclesiasticum singulis  
" conferatur, quod quidem si ad vi-  
" tam ejus, cui confertur, honeste su-  
" stentandam non sufficiat, liceat nihil-  
" ominus aliud simplex sufficiens, dum-  
" modo utrumque personalem residen-  
" tiam non requirat, eidem conferri.  
" Hæcque non modo ad Cathedrales  
" Ecclesias, sed etiam omnia alia bene-  
" ficia, tam sæcularia, quam Regularia  
" quæcunque, etiam commendata per-  
" tineant, cujuscunque tituli ac qua-  
" litatis existant. Illi vero, qui in præ-  
" senti plures Parochiales Ecclesias, aut  
" unam Cathedralē, & aliam Paro-  
" chialem obtinent, cogantur omnino  
" quibuscunque dispensationibus, ac  
" unionibus ad vitam non obstantibus  
" una tantum Parochiali, vel sola Ca-  
" thedrali retenta, alias Parochiales in-  
" fra spatium sex mensium dimittere,  
" alioquin tam Parochiales, quam Be-  
" neficia omnia, quæ obtinent, ipso ju-  
" re vacare censeantur, ac tanquam  
" vacantia libere aliis idoneis conferan-  
" tur; Nec ipsi antea illa obtinentes,  
" cura conscientia fructus post dictum  
" tempus retineant." Hactenus Con-  
cilium.

II. Dispensationes ad plura Cura-  
ta sive jam acquisitas, sive impostero  
acquirendas non admittimus: Ad alia  
Beneficia incompatibilia ita toleramus,  
si prius a Nobis cognitum fuerit, eas  
omni suspicionis, falsitatis, aut alteri-  
us cujusdam sub- & obreptionis vitio  
carere.

## TITULUS XVI.

### *De Simonia.*

#### I.

**S**imonia nihil aliud est, quam rei spi-  
ritualis vel spiritualibus annexæ  
cum aliquo temporali facta commuta-  
tio. (i) Committitur dupliciter pacto  
& mente.

II. Pacto, cum aliquid vel datum est,  
vel de dando tractatus intercessit, &  
conventio: Mente, cum nullum qui-  
dem intercedit pactum, sed sola prava  
dantis aut recipientis, mens & intentio  
concurrit. Et quidem in variis rebus  
varie, maxime vero in Sacramento-  
rum & Divinorum administratione, at-  
que in Beneficiis Ecclesiasticis conferen-  
dis, acceptandis, resignandis & permu-  
tandis. (k) Quæ fusius ex Navarro,  
Toleto, aliisque Doctoribus peti pote-  
runt.

III. Hoc crimen, quod cæteris est  
detestabilius, licet a Deo in nova &  
veteri lege graviter vindicatum fuerit,  
ejusque tanta sit labes, ut ad ejus ac-  
cusationem etiam servi contra Domi-  
nos & quilibet criminosi, (l) qui alias  
regulariter personam in judicio standi  
non habent, (m) admittantur, illud ta-  
men apud multos ita commune esse,  
cum magno animi nostri dolore intel-  
leximus, ut quod gravissimum & hæ-  
reticæ pravitati simillimum, multisque  
valde periculosis casibus obnoxium est  
peccatum, ipsi vel pro nullo, vel sal-  
tem pro levi aliquo errato agnoscant.  
Unde Vicario & Fiscali nostro districtè  
mandamus, ut de hac tam execrabili  
labe, præsertim quoad Clericos, quam  
diligentissime inquirent, & si quos ea-  
dem irretitos prehenderint, gravissi-  
me

(i) Abb. in c. Nemo. de Simonia.

(k) C. Cum Ecclesiæ. c. Suam. de Simon. c. Si quis  
objecerit. 1. q. 3. Concil. Trid. Sess. 21. de Reformatione. c. 1. & Sess. 24. c. 14.

(l) C. Tanta. de Simon. c. pen. 3. q. 4.

(m) L. Vix certis. ff. de Jud.

sime pro modo & qualitate Simonia, incarceratione, privatione vel depositione puniant.

IV. Confessarii quoque, quantum possunt, epitantur hanc pestem ex animis sibi confitentium evellere.

V. Pecunias quascunque pro ingressu & statutorum redemptione, item pro adipiscenda alicujus dignitatis, Canonatus aut alterius beneficii possessione dare & recipere ita concedimus, si moderate fiat, & pecunia omnis in pium usum, atque ad Ecclesiae & fabricae necessitatem convertatur. (n) Dulciaria, Stophas & convivia omnino tol-  
limus.

VI. Cæterum si quid sponte, pure, sine pacto & conventionem qualibet, fuerit gratis oblatum, illud sine scrupulo Simoniacæ pravitatis recipi potest. (o) Quod idem obtinet ex contrario, si quid non sponte quis dederit, sed ut indebite illatam molestationem super quæsito jure redimat, dare coactus fuerit. (p) Quibus tamen casibus sinceram conscientiam & discretum Confessarium requirimus.

## TITULUS XVII.

### De Concubinato.

#### I.

**Q**uia propter incontinen-  
tiae crimen in Clericis non tantum mirum in modum homines laici offenduntur, verum etiam indignum valde est, eos, qui Divino cultui sese addixerunt, & quotidie Sacrosancta illa & tremenda Sacrificii Mysteria tractant, in impudicitiae sordibus & immundo concubinato versari. Ideo Clericis omnibus, cujuscunque status & conditionis fuerint, qui in Diocesi nostra commorantur, serio præcipimus & mandamus, ut honestatis & propriæ salutis memores, non tantum a concubinis abstineant, easque, si secum habeant, quantocius

expellant, sed etiam cæterarum mulierum quarumcunque, de quibus aliqua possit esse suspicio, consortium & familiaritatem fugiant: mulierum enim nimia consuetudo Sacerdoti, quem castitas & continentia perpetuo ornare debent, non convenit. (q) Et licet castitas quamvis non sine magna difficultate conservari, raro tamen bonum nomen in muliebri consortio retineri potest.

II. In familia sua Clerici mulieres consanguineas, vel alias honestas & ætate maturas, de quibus suspicio sinistra facile concipi non possit, habeant; (r) Quam suspicionem vitare nequeunt, qui mulieres juvenes, cultas, proca-  
ces, otiosas, impudentes, mali nominis ac famæ, aut quas antea actæ vitæ macula contaminat, vel secum alunt, vel frequenter ad se admittunt.

III. Si quis deinceps in turpissimo concubinato versari deprehensus fuerit, contra eum Vicarius noster juxta Canonem a Tridentino Concilio adversus concubinos editum (s) sine ullo respectu personæ, dignitatis aut status procedat.

IV. Pari modo contra eos, qui fornicationis simplicis, aut suspectæ familiaritatis convicti fuerint, procedi volumus.

V. Ecclesiarum Prælati & Decani rurales, si unum vel plures Clericos in Ecclesia vel Decanatu suo concubinos & fornicarios, seu de concubinato & fornicatione suspectos cognoverint, eos Nobis, aut Vicario nostro, vigore præstiti sui juramenti denuntient.

VI. Grave etiam peccatum est, homines solutos concubinas habere, gravissimum vero uxoratos quoque in hoc damnationis statu vivere. (t) Eos Parochi, si ab eis ter admoniti fuerint, nec concubinas ejecerint, ab ingressu Ecclesiae arceant; quod si nec hoc modo resipiscant, Nobis, aut Vicario nostro

(n) Concil. Trid. Sess. 24 de Reform. c. 14. c. Placuit. 1. q. 1.

(p) C. Dilectus. c. Matthæus. de Simon.

(q) C. 1. & 2. De cohabit. Cler. & mulier. c. Interdixit. 32. dist. c. Cum omnibus. c. Volumus. c. Fœminas. d. 81. Concil. Trid. Sess. 21. de Reform. c. 14.

(r) d. c. 1. De cohabit. Cler. & mul.

(s) d. Sess. 25. c. 14.

(t) C. 15. Qui. d. 34. c. Si concubinæ. de sent. excom. c. 2. in fin. de cohabit. Cler. & mulier.

Tomus VIII. Concilior. German.

Y y y y y



stro manifestent, ut excommunicatio-  
nis gladio eos ad meliorem mentem re-  
ducamus.

VII. Sed & concubinas, quæ post-  
hac sive cum Clericis, sive cum Laicis  
cohabitaverint, per excommunicatio-  
nis latæ sententiam ab Ecclesia expelle-  
mus. Quas etiam, ut e suis Jurisdictioni-  
bus temporalibus Magistratus sæcula-  
ris expellat, cum in Domino requiri-  
mus & hortamur.

## TITULUS XVIII.

### *De Usuris & aliis Contractibus illicitis.*

#### I.

**U**suram omni jure naturali, (a) Di-  
vino, (x) Canonico (y) & Ci-  
vili (z) prohibitam, ad perniciem po-  
puli latius manantem pro nostri mune-  
ris cura reprimere, cupientes, quæ-  
dam hujus generis delicta ex Sacrorum  
Canonum, & probatorum Patrum sen-  
tentiis conguessimus, quæ quia frequen-  
tius ab utroque Ordine Ecclesiasticor-  
um & Laicorum in Diocesi nostra  
committi animadvertimus, ea præ-  
cipue ac nominatim hic prohibenda du-  
ximus.

II. Ex mutuo cuicunque facto ni-  
hil præter sortem capitalem ex conven-  
tione percipiatur: unde eos, qui passim  
cuilibet solius lucri intentione mutuo  
dant, ut pro centum quinque vel plu-  
res florenos, aut aliquid pecunia æsti-  
mabile, salvo semper capitali, recipiant,  
proprie usurarios esse, & in æternæ  
damnationis periculo versari declara-  
mus. (a)

III. Nec refert etiam, si pecuniæ  
sint pupillorum, (b) & viduarum, aut  
locorum piorum: quamvis enim Cu-  
ratores pupillorum & Ecclesiarum bo-

na augete teneantur; illud tamen non  
per contractus usurarios, sed honestos  
ac licitos fieri debet. (c)

IV. Contractus emptionis & ven-  
ditionis annuorum censuum de se liciti,  
in quibus clausulæ & conditiones appo-  
nuntur, quæ substantiam & speciem  
contractus mutant, usurarii sunt. Ita  
quoque, si literæ reversales, instrumen-  
to emptionis legitimo confecto contra-  
riæ conficiantur, usura committitur.

V. Qui in hujusmodi annuorum  
censuum contractibus de centum plu-  
res, quam quinque florenos recipit,  
qui pecuniam majori pretio, quam com-  
muniter accipitur, qui incerta debita  
vel certa, difficilis tamen & sumptuosæ  
collectionis, (d) item qui una cum pe-  
cunia vina, frumenta, aut alia quævis  
communi & ordinario, sive majori pre-  
tio, quæ postmodum tali pretio vel  
saltem sine damno vendi nequeunt,  
venditoribus obtrudit, qui de centum  
decem aut plures florenos honorarii  
titulo sibi reservat, vel a venditoribus  
extorquet, usuram committit.

VI. Contractus damni emergen-  
tis, & lucri cessantis, si intra legitimos  
Juris terminos consistant, adeo non sunt  
improbandi, ut etiam eorum ratione  
& intuitu liceat lucrum ex mutuo quæ-  
rere. (e) Hodie tamen his contractibus  
variz & perniciosæ usuræ a plerisque  
palliari solent, quas in Clericis Nos  
severissime castigabimus; Laici vero, si  
non in præsentem, certe in futura vita  
hujus suæ dolosæ iniquitatis habebunt  
ultorem Deum.

VII. Qui pecunias, frumenta, &  
alias merces rusticis per annum dant,  
ut tempore messis vel Autumni fru-  
menta vel vina, pretio minori, quam  
sit communis, & a Magistratu facta  
taxa, ab illis recipiant, usuram commit-  
tunt.

#### VIII.

(a) D. Thom. 2. 2. q. 78. art. 1. & 2. Binsfeld. ad c. 3. de Usuris. q. 1. conclus. 1. ubi dicit  
esse communem opinionem Theologorum & Jurisperitorum.

(x) Levit. 25. Exod. 22. Ezech. 18. & 22. Ps. 14. Luc. 6. c. Præsentem. c. Super eo. de Usuris.

(y) Ext. per totum tit. de Usur. d. 46. causa 14. q. 45. & 6. per totum.

(z) Constitutio Maximiliani I. in Comitibus Auguttanis anno 1500. & Caroli V. an. 1548.

(a) C. Consuluit. de Usur. Lucæ 6. c. Mutuum date nihil inde sperantes.

(b) C. Super eo. de Usuris.

in verbo: Tutela.

(c) Covar. lib. 3. var. ref. c. 2. n. 1. Ang. Sylvest. & alii

in l. cum allegas C. de Usur.

(d) Sylvest. in verb. Usura. 1. n. 6. allegans Barth. & Bald.

(e) Videatur Covarr. var. resol. lib. 3. c. 4. Card.

Tolerus de Sacerd. instruct. lib. 5. c. 32. & 33. Navar. in Manual. c. 17. n. 211.

VIII. Frumentum aut vinum corruptum, vel non adeo bonum, mutuo datum, ut postea integrum melius & carius recipiatur, usuram sapit, (f) etiamsi restitutio differatur in tempus debitori commodum.

IX. Monopolia, quæ auctoritate privata fiunt, aut in manifestum Reipublicæ damnum conceduntur, damnamus. (g)

X. Mercatorum & Opificum pacta, quibus inter se conveniunt de non vendenda aut emenda aliqua merce vel opere infra aut ultra certum pretium, illicita sunt & iniqua. (h)

XI. Qui vina, frumenta, vel alia ad vitæ sustentationem necessaria cœmunt, ut tempore caritatis dividere possint, tanquam Reip. perniciosi non sunt ferendi.

XII. Clerici quicunque sive pauperes, sive divites usurarie quocunque modo ne contrahant, aut aliis injustis & illicitis contractibus sese ingerant, nisi velint & pecuniam amittere, & aliis pœnis Canonicis subiacere. (i) Si quid de patrimonio Christi Clericis superest, pauperibus erogando, aut in alios pios usus convertendo, Christo dent mutuo, certi, se usuram centenariam æternæ retributionis recepturos.

XIII. Laicos, ut ab hac & sibi & proximo suo valde exitiali labe desistant, & si quid hætenus minus juste perceperunt, cum Zachæo, (k) si non in quadruplo, saltem in simplo restituant, (l) in Domino vehementer obtestamur. Incorrigenes usurarios, usurarum proxenetas, & ministros, & eos, qui usuraria instrumenta conficiunt, Communione altaris, & sepultura Christiana privabimus. (m)

XIV. Hætenus de hoc valde communi vitio, quod jam prope omnem vitii naturam apud plerosque exiit,

Parochos & Concionatores aut nunquam, aut raro, & tunc quidem non nisi generatim verba fecisse intelleximus, forte quod & ipsorum aliqui in eodem luto hæsitaverint, vel quod propter commune vitium etiam communem populi offensam pertimuerint. Id ne amplius intermittatur, omnibus Ecclesiarum Parochis, Concionatoribus & Curatis serio præcipimus, & sub gravi pœna mandamus, quatenus se de hoc pernicioso vitio ex piis, probatisque libris & Doctoribus diligenter informant, ac pro concione ea prudentia & dexteritate populum instruant, ut, quid sibi in hujusmodi contractibus licite sit permissum, & quid sub gravissimis pœnis vetitum, quilibet facile cognoscere queat.

XV. Confessarii quoque hac in re operas suas sedulo impendant, neque usurariis, nisi manifeste se emendent, absolutionis beneficium impertiant, ut vel hac confusione ad sanio rem mentem reducantur.

XVI. Denique Principes & Magistratus sæculares in Domino hortamur, ut ipsi etiam huic pesti, quibus poterunt remediis, occurrant.

## TITULUS XIX.

### *De Ecclesiis, Capellis, Oratoriis & Altaribus.*

#### I.

**E**cclesiæ, Capellæ & Oratoria ad Divinum cultum destinata, sine nostro consensu, nullibi ædificentur: (n) ubi collapsa aut ruinosa sunt, sumptibus fabricarum, aut eorum, qui ad hujusmodi restorationem vel de jure, vel de consuetudine obligati sunt, reparentur; in defectum horum Parochiani operas, servitia & subsidia sua præstent. (o)

II. Si consecratæ non sint Ecclesiæ, quantocyus consecrentur, (p) & pol-

(f) C. Consuluit. de Usur. Sylvest. in verbo: Usura. 1. n. 17. circa fin.

(g) L. unica Cod. de Monopol.

Emptio. n. 19.

(k) Marth. 19.

(m) C. 3. de Usuris.

super. & ibi glos. de Privileg.

(p) C. Ecclesias. 16. q. 7. c. fin. de Consecr. Eccl. vel alt. c. Missarum. de Consecr. d. 1.

(h) Sylvest. in verbo: Negotiatio. n. 2. & in verbo:

(i) C. 1. Ext. de Usuris. c. Præterea. eod. c. 4. c. 8. 14. b. 4.

(l) C. Consuluit. c. Quam perniciosum. de Usur.

(n) C. Nemo Ecclesiam. de Consecr. d. 1. Cum olim. 14. §. In-

(o) Videatur Conc. Trid. Sess. 21. de Refor. c. 7.

pollutæ reconcilientur: (q) quemadmodum n. non alii, quam sacri Deo Sacerdotes Sacramenta ministrare debent, sic non in aliis, quam Domino consecratis locis Sacrificia offerre licet. (r)

III. Ubi propter pacem publicam communes sunt Ecclesiæ Catholicis & Hæreticis, & humatione cadaveris, vel alio modo polluta sit Ecclesia, nec debito modo reconciliari possit, super altari portatili consecrato Sacrificium celebretur.

IV. Et quia aliquando Ecclesiæ vel Cœmeteria a quibusdam temere polluantur, statuimus, ut quicumque deinceps Ecclesiam vel Cœmeterium violenta sanguinis aut voluntaria feminis effusione, vel Hæretici aut Excommunicati humatione (nisi in locis utriusque Religionis, quoad Hæreticorum humationem aliter fieri non possit) execraverit, ac polluerit, eum non tantum juxta Sacros Canones graviter puniemus, sed etiam in expensas omnes, quæ pro reconciliatione hujusmodi pollutæ Ecclesiæ vel Cœmeterii impendi debent, condemnabimus.

V. In omnibus Ecclesiis, ubi asservatur Venerabile Sacramentum, sit lampas perpetuo noctes atque dies ardens: magna Crucis imago in medio Ecclesiarum in sublimi collocata, ut ab omnibus introeuntibus conspici possit: Vas item pro aqua benedicta, qua se introeuntes & exeuntes, religiose & Catholico more aspergant, secumque domum adferant, non extra, sed intra Ecclesias constitutum.

VI. Nihil prophanum, nihil inordinatum, & nimia vetustate ac carie corrosum aut deletum, in Ecclesiis relinquatur; omnia sint ordine pulchro distincta, decenter ornata ac munda.

VII. Æditui, vel ii, quorum est officium, Ecclesias sæpius in anno verant, Altarium tabulas, imagines, picturas, statuas, fenestras, parietes & fornices a pulveribus ac araneis te-

lis purgent, & reliqua omnia agant, ut in omni Ecclesiarum loco nitor & munditia appareat.

VIII. In Ecclesiis sint piscine sacræ ad ablutiones rerum sacrarum projiciendas. Piscine autem locus sit sub terra fornice tectus, in quem juxta Sacros Canones aqua, cineres, & id genus alia immitti debent, ut terra hauriantur. Qui locus in Sacristia vel prope Altare, vel in alio Ecclesiæ aut Cœmeterii angulo pro cujusque loci commoditate construi potest. Clavem, qua referatur, semper habeat Parochus.

IX. Sint Ecclesiis annexæ Sacristiæ, non in humido, sed quantum fieri potest, paulo altiori & sicciori loco constructæ, in quibus Ecclesiarum sacra vasa, vestes, & cætera paramenta decenter ac ordine conserventur.

X. Suggesti eo loco constituantur, ut Concionatores ex omni parte Ecclesiarum commode audiri & intelligi possint. Confessionalia ita fiant, ne Confessarius & confitens se invicem aspicere possint.

XI. Viri & mulieres in Ecclesiis promiscue non stent, aut sedeant, sed separatim illæ in hoc, hi in altero latere pro cujusque Ecclesiæ commoditate.

XII. Mendici tempore Divinorum Officiorum in Ecclesiis hinc inde vagari, & eleemosynas petere non permittantur. (s)

XIII. Nundinationes, emptiones & venditiones qualiumcunque rerum in Ecclesiis, Capellis, Cœmeteriis, deambulatoriis, vulgo *Creutzgãng* dictis, & similibus locis consecratis fieri, severe prohibemus. (t)

XIV. In Ecclesiis, cum Divina celebrantur, vel verbum Dei prædicatur, nemo Laicorum deambulet, nugetur, cum mulieribus, de quibus suspicio esse possit, vel etiam cum aliis confabuletur, aut alias irreverenter stet vel sedeat. (u) Parochi in hoc genere

(q) C. Proposuiſti. c. Conſuluiſti. de Conſecr. Eccl. vel alt. c. Tuarum. de priv. int.

(r) C. Tabernaculum. d. c. Miſſarum. & c. Sicut non alii. de Conſecr. d. 1.

(s) Bulla Pii V. quæ incipit: *Cum primum Apoſtolatus officium.* Sub dato Romæ 6. Cal. Aprilis Anno 1566.

(t) Ex d. Bulla.

(u) d. Bulla Pii V.



nere delinquentes honestatis admoneant.

XV. In Ecclesiis Parochialibus habeantur campanæ tres, in reliquis, item in Capellis & Oratoriis una sufficit, quæ antequam in campanile sustollantur, ab Episcopo precibus & benedictionibus consecrentur, quæ non prophanis, sed sacris tantum significationibus deservire debent.

XVI. Ter in die, mane, meridie & vespere signo campanæ populus ad orationem moneatur.

XVII. Ecclesiarum & Capellarum tecta & superiores contignationes, frumentorum acervis, lignorum strue, aut prophana aliqua suppellectili non onerentur.

XVIII. Fores Ecclesiarum noctu semper, interdiu vero, ubi longius ab ædibus distant, Divinis peractis claudantur, ne sacris Mysteriis dicata Tempia variis hominum iniquitatibus pateant.

XIX. Inspectio cadaverum hominum occisorum ad cognitionem cædis a Judicibus sæcularibus, Chirurgis & Medicis in Ecclesiis aut aliis locis consecratis quibuscunque fieri non debet.

XX. Altaria sint lapidea aut lateritia superius integro lapide tecta. In iis, si consecrata sint, præter Reliquias nihil asservetur. Altaria omnia, ubi commode fieri potest, cancellis ferreis aut ligneis sepiantur: iis Laici nec incumbant, nec innitantur.

XXI. Apud unumquodque Altare sit appensum tintinabulum, aut e Sacristia ad Missæ Sacrificium afferatur. Crux in medio Altari sita, & duo candelabra: item tabula secretorum Missæ, in qua scilicet major & minor Canon contineatur.

XXII. Altaria tela cerata, aut ex panno grossiori, deinde duabus lineis albis mappis tegantur, quarum superior sit oblonga, quæ usque ad primam partem altaris pertingat, & utrumque latus decenter tegat. Supra has viri-

dis aut nigra tela, ne mappæ pulvere & forde inquinentur, constricta sit.

XXIII. Candelæ, quæ in altaribus tempore Sacrificii & Divinorum Officiorum ardere debent, ex nulla alia materia, quam cera conficiantur.

## TITULUS XX.

### De Rebus Sacris & Sanctis.

#### I.

**P**Ræter Ecclesias, Altaria, Sanctorum Reliquias & imagines, res Sacræ & Sanctæ sunt omnis generis vasa, vestes, ornamenta, & similia ad Divinum cultum principaliter comparata. Quæ omnia suo ritu & caeremoniis consecrata & benedicta esse debent. (x)

II. Ex iis ad prophanos usus nihil omnino convertatur, (y) sed ex antiquis paramentis pro aliis necessitatibus Ecclesiæ fiant bursæ corporalium, coopertoria Missalium vel Reliquiarum, pro altari pulvinaria, & hujus generis alia. Quod si amplius usui nec sint, nec esse possint, comburantur, & cineres in Sacrarium mittantur. (z)

III. Curent Parochi, & cæteri Clerici omnes, ut vestes & colores vestium sacrarum, atque sacra vasa omnia ad usum caeremoniarum Romanæ Ecclesiæ accommodentur. Colores Ecclesiastici sunt albus, niger, rubeus, viridis & violaceus, hi in casulis, stolis, manipulis, dalmaticis, tunicellis, pluvialibus, velis & antependiis conveniant, & pro temporum ac solennitatum varietate adhibeantur. In quibus Ecclesiis horum colorum sacræ vestes non sunt, ut parentur, præcipimus.

IV. Vasa, vestes, totaque sacra supellex semper sit munda (a) ac nitida, illa præsertim, quæ ad tremendum Altaris Sacrificium pertinet: quod enim domi tuæ in tuis prophanis vasis ac vestibus non ferres, in Domo Dei quomodo tolerabis?

V. Corporalia fiant ex tela (b) candida, & tenui simplicia, non duplicata, post lotionem amylo roborentur,

- Y y y y 3

ac

(x) C. Vestimenta. de Consecr. d. 1.

Consecr. d. 1. c. Semel. de reg. jur. in 6.

(a) C. Pulchra. dist. 86.

(y) d. c. Vestimenta. & c. Ligna Ecclesiæ. de

(z) C. Altaris palla. de Consecr. d. 1.

(b) C. Consulto. de Consecr. dist. 1.

ac summa semper munditia niteant. Quorundam hac in re crassam & pudendam negligentiam pecunia & carcere, omni excusatione seclusa, severe vindicabimus. Pallæ ex eadem tela sint, ex qua corporalia, ejusque magnitudinis, ut calicem ubique contendant.

VI. Mappæ, & aliæ vestes lineæ laventur ter, aut ad minimum bis in anno: Corporalia, pallæ, & purificatoria sæpius, calices & patenæ bis, terve.

VII. Urceoli, in quorum iummitate A. & V. inscriptum sit, ut qui vino & qui aquæ fundendæ serviant, primo aspectu cerni possit, toties eluantur, quoties in eis vinum aut aqua pro Sacrificio apponitur.

VIII. Candelabra, Cruces, tapezia, & alia sive vasa, sive ornamenta, tam sæpe laventur, purgentur, & a pulveribus excutiantur, ut nunquam sint sordida & immunda. (c)

IX. Calices, patenas, & vasa sacrorum Oleorum, soli Sacerdotes aut Clerici majorum Ordinum abluant. Corporalia & purificatoria prima ablutione Clerici, deinde aliæ personæ honestæ lavent. (d) Cætera vasa & vestes per Aedituos, Sacristas, sive alios purgentur. Ablutio a Sacerdotibus & Clericis facta in piscinam seu Sacrarium effundatur.

X. Quæ omnia, ut debito tempore, modo & ordine fiant, Ecclesiarum Prælati, Rectores, Custodes, vel ii, quibus de jure vel consuetudine competit, procurent, immemores officii sui moneant, & negligentes puniant.

## TITULUS XXI.

### *De Bonis & Juribus Ecclesiarum conservandis & non alienandis.*

#### I.

**C**Um Ecclesiarum bona non humani, sed Divini juris sint, (e) & ideo in nullius, nisi DEI OPT. MAX. bonis consistant, (f) utpote ejus Di-

vinæ Majestati a fidelibus oblata, atque secretorum cœlestium usibus dedicata; Ecclesiarum Prælati, ac Beneficiorum Ecclesiasticorum quorumcunque legitimi possessores, quibus Ecclesia vice ac nomine Christi potestatem patrimonii sui dispensandi & administrandi commisit, non tantum fideles & prudentes dispensatores esse, sed etiam ea diligenter tueri & conservare, atque quocunque modo illicito distracta & abalienata, recuperare & vindicare debent. Quod ut fiat, Nos omnibus & singulis Prælati, Capitulis, & Beneficiariis injungimus.

II. Ecclesiarum omnium prædia, terræ, jurisdictiones, census, domus, decimæ, & alia jura quæcunque distincte & authentice conscribantur, quæ vetustate fere consumpta sunt, in aliam formam authenticam transferantur, & ea omnia non apud Prælatos aut Beneficiarios, in eorum privatis ædibus, sed in Archivio Ecclesiarum loco tuto & congruo sub trium clavium custodia conserventur. Ubi hujusmodi Archivium non est, præsertim in Collegiatis, & in Ecclesiis, in quibus est numerosus Clerus, construatur. Claves habeant, qui eas de jure vel consuetudine Ecclesiarum, Capitulorum & locorum habere debent.

III. Defunctorum Clericorum hæredes, quicunque fuerint, Ecclesiis & Clericis in beneficio succedentibus omnia & singula scripta, registra, instrumenta ad Ecclesiam seu beneficium quocunque modo pertinentia, absque tergiversatione aliqua fideliter & gratis tradant, etiamsi defunctus Clericus in confectioe hujusmodi scripturarum, registorum vel instrumentorum aliquos fecisset sumptus & expensas.

IV. De Ecclesiarum & Beneficiorum quorumcunque bonis, prædiis ac juribus sine evidenti utilitate & necessitate, nostroque, vel Vicarii nostri cum causæ cognitione judicialiter & in scriptis dato expresso consensu nihil vendatur, permutetur, obligetur, ad longum tempus locetur, aut alias quocunque

(c) d. c. Pulchra. d. 86.

(d) Facit c. Nemo per ignorantiam. d. 1.

(e) §. Sacræ res Inst. de rerum divis. L. In tantum. §. Sacræ. ff. cod. c. Nulli. 12. q. 2.

(f) Vide Conc. Trid. Sess. 25. de Reform. c. 1.

cunque modo alienetur, (g) aliter factas alienationes & obligationes irritamus, ac nullas esse declaramus, (b) contra alienatores pœnam Canonicam Nobis reservantes.

V. Et ne ex incuria vel negligentia Ecclesiis damna accidant, nostræ Cathedralis, & Collegiatarum Capitulis, aliarumque Ecclesiarum Rectoribus & Curatoribus injungimus, ut singulis annis omnia Ecclesiarum vasa sacra, vestes, ornamenta, ac res quasunque ad Ecclesias, earumque usum pertinentes, visitent, inspiciant, atque in inventarium diligenter conscribant, ut deperdita facilius deprehendi, & ab iis, quorum incuria deperdita sunt, restitutio peti, lacerata, attrita & fracta restaurari, ac reparari possint.

VI. Quia etiam ut plurimum ædes beneficales factæ rectæ non conservantur, unde postmodum Ecclesiis ac Beneficiis damna irreparabilia eveniunt. Cui malo occurrere volentes, Capitulis tam nostræ Cathedralis, quam Collegiatarum Ecclesiarum injungimus, ut, quamprimum fieri potest, certum aliquem modum constituent, quo tum Curia Canonicales, tum cæteræ ædes beneficales restaurari & conservari queant.

VII. In aliis Ecclesiis Parochi & Beneficarii ædes suas conservent, & si reparatione indigeant, restaurent, nisi de jure seu consuetudine ad hujusmodi conservationem ac reparationem alii teneantur: secus facientes, subtractione fructuum, restorationi applicandorum mulctentur.

VIII. Qui Vicarii sunt Ecclesiarum incorporatarum, licet ad omnimodam ædificationem aut restorationem ædium Parochialium non teneantur, quia tamen plerique competencias habent sufficientes ac bonas, & quandoque multis annis hujusmodi ædes vel ipsi inhabitant, vel aliis locarunt, disponimus, ut & ipsi aliquid de suo secundum arbitrium nostrum, vel Vicarii nostri ad ædificationem seu restorationem

contribuant, maxime si illorum, aut familiæ suæ culpa ac negligentia ædes ruinosa factæ essent.

IX. Clerici ædes suas beneficales ipsi inhabitent, aut non nisi personis honestis locent.

X. Instituantur singulis annis omnium ædium non tantum visitatio & inspectio, Capitularium, a deputatis Capitulis: Parochialium, a Decanis vel Camerariis ruralibus: aliarum Beneficialium a Parochis locorum; sed etiam quid in qualibet visitatione deprehensum fuerit, quod reparari debeat, Nobis, vel Vicario nostro, aut Capitulis referatur.

XI. Agri, vineæ, in debita cultura ita conserventur, ut quotannis fructus reddant. Sylvæ non excidantur, nisi ad moderatam necessitatem.

XII. Cujus culpa aut negligentia ædibus, vineis, agris, sylvis, aut aliis prædiis damnum illatum fuerit, ab eo, vel ejus hæredibus restitutio illati damni petatur, ad quam faciendam Nos eos obligamus.

XIII. Graves pœnas Tridentinum Concilium (i) contra Ecclesiasticorum bonorum occupatores quoscunque, si-ve Clericos, si-ve Laicos statuit & decrevit. Illas ut sciat populus, & ne per ignorantiam forte censuras incurrat, volumus, ut singulis annis semel aut bis ex cancellis publice promulgentur.

*Tenor autem Concilii Tridentini talis est:*

" **S**I quem Clericorum vel Laicorum,  
" quacunque is dignitate etiam Imperiali aut Regali præfulgeat, in tantum malorum omnium radix cupiditas occupaverit, ut alicujus Ecclesiæ, seu cujusvis sæcularis vel regularis Beneficii, montium pietatis, aliorumque piorum locorum jurisdictiones, bona, census, ac jura, etiam feudalia, emphyteutica, fructus, emolumenta, seu quasunque obventiones, quæ in Ministrorum & pauperum neces-

(g) Tot. tit. Ext. in 6. & Clem. de reb. Eccles. non alienand. c. Prædia. c. Non liceat. cum seq. 12. q. 2. (b) Cap. Si quis Presbyterorum. de reb. Eccles. non alienand. c. Quod quis. 35. q. 9. Extravag. eod. c. unic. (i) Sess. 22. de Reform. c. 11.



" necessitates converti debent, per se,  
 " vel per alios vi vel timore incussio,  
 " seu etiam per suppositas personas Cle-  
 " ricorum aut Laicorum, seu quacun-  
 " que arte, aut quocunque quæsito  
 " colore in proprios usus convertere,  
 " illosque usurpare præsumpserit, seu  
 " impedire, ne ab iis, ad quos jure  
 " pertinent, percipiantur, is anathe-  
 " mati tamdiu subjaceat, quamdiu ju-  
 " risdictiones, bona, res, jura, fru-  
 " ctus & redditus, quos occupaverit,  
 " vel qui ad eum quomodocunque,  
 " etiam ex donatione suppositæ perso-  
 " næ pervenerint, Ecclesiæ, ejus Ad-  
 " ministratori sive Beneficiato integre  
 " non restituerit, ac deinde a Romano  
 " Pontifice absolutionem obtinuerit.  
 " Quod si ejusdem Ecclesiæ Patronus  
 " fuerit, etiam Jure Patronatus ultra  
 " prædictas pœnas eo ipso privatus ex-  
 " istat. Clericus vel qui nefandæ frau-  
 " dis & usurpationis hujusmodi fabri-  
 " cator seu consentiens fuerit, eisdem  
 " pœnis subjaceat, nec non quibuscun-  
 " que beneficiis privatus sit, & ad quæ-  
 " cunque alia beneficia inhabilis effi-  
 " ciatur, & a suorum Ordinum execu-  
 " tione, etiam post integram satisfactio-  
 " nem & absolutionem, sui Ordinarii  
 " arbitrio suspendatur." Hactenus Con-  
 " cilium.

## TITULUS XXII.

### *De Decimis & Oblationibus.*

#### I.

**A**ntiquissimi Decimarum juris pro  
 Ministrorum Ecclesiæ sustentatione solutio, hodie varie a variis aut  
 omnino contemnitur, aut legitime non  
 præstatur. Contra quos est Sacri Tri-  
 dentini Concilii (k) gravissima censura:  
 " Non sunt ferendi, inquit, qui variis  
 " artibus decimas, Ecclesiis obvenien-  
 " tes subtrahere moliuntur, aut qui ab  
 " aliis solvendas temere occupant, &  
 " in rem suam vertunt, cum decima-  
 " rum solutio debita sit Deo, & qui eas  
 " dare noluerint, aut dantes impediunt,  
 " res alienas invadunt. Præcipit igitur  
 " Sancta Synodus omnibus cujus-  
 " cunque gradus & conditionis sint, ad

" quos decimarum solutio spectat, ut  
 " eas, ad quas de jure tenentur, im-  
 " posterum Cathedrali, aut quibuscun-  
 " que aliis Ecclesiis vel personis, qui-  
 " bus legitime debentur, integre per-  
 " solvant. Qui vero eas aut subtra-  
 " hunt, aut impediunt, excommunicen-  
 " tur, nec ab hoc crimine, nisi plena re-  
 " stitutione secuta, absolvantur." Hactenus verba Concilii. Quæ de omnibus  
 decimis tam majoribus, quam minori-  
 bus, & aliis quibuscunque intelligenda  
 sunt.

II. Decimæ novales, quæ ex ter-  
 ris aut agris de novo ad culturam sive  
 ligone, sive aratro, vel alio quocunque  
 modo redactis, percipi solent, Eccle-  
 siarum Parochialium Rectoribus solvi  
 debent, non tantum tribus primis an-  
 nis, ut quidam falsè & ex prioribus  
 Statutis Synodalibus propter errorem  
 Typographi, valde Sophistice & dam-  
 nabiliter sunt argumentati, sed semper  
 & in perpetuum (l) iis omnino exclu-  
 sis, sive Laici, sive Clerici fuerint, qui  
 veteres decimas possident, aut qui eo  
 loci vel jus foresti, vel aliam tempora-  
 lem qualemcunque jurisdictionem aut  
 proprietatem habent. Semel enim de-  
 cimæ novales semper novales jure cen-  
 sentur. Eas Parochi locorum contra  
 quoscunque detentores jure vindicent,  
 aut si vi ac metu justo impediuntur,  
 Nobis, vel Vicario nostro referant. In  
 Ecclesiis incorporatis, ubi Vicarii sive  
 perpetui, sive temporales constituti sunt,  
 & congruam portionem obtinent, in  
 decimis novalibus nullum jus habent,  
 sed iis pertinent, quibus Ecclesia est  
 incorporata.

III. Ut autem scire possit populus,  
 quam grave sit piaculum, decimas qua-  
 lescunque aut omnino non solvere,  
 aut non integre præstare, injungimus  
 Parochis & Concionatoribus, ut tum  
 ex Sacra Tridentina Synodo, tum ali-  
 unde, de decimis rite persolvendis sæ-  
 pius ex cancellis prudenter & discrete  
 verba faciant.

IV. Magnus Majorum nostrorum  
 in faciendis oblationibus fervor ita apud  
 plerosque refriguit, ut plures hodie  
 sint,

(k) Sess. 25. de Reform. c. 12.

(l) C. Quoniam. c. Cum contingat. de Decim. c. Quid  
 per. de verb. sign. C. fin. de Privil.

sint, qui Ministris Ecclesiarum ea, quæ jam ante jure ac legitime possident, potius auferre, quam aliquid offerre malent, & fere hujus sæculi homines, ad ea sint cogendi, quæ Majores nostri sponte ac paratissimo animo fecerunt. Ideo statuimus, ut oblationes ad minus in quatuor principalioribus festis, scilicet Nativitatis Domini, Paschatis, Pentecostes, Assumptionis B. Mariæ Virg. ab adultis, seu communicantibus Parochianis ex antiquissima Ecclesiæ & Episcopatus nostri consuetudine Parochis solvantur. (m) Illud ut Parochiani faciant, a Parochis suis cum discretione interdum admoneantur. Reliquorum dierum oblationes pro cujusque loci consuetudine uniuscujusque voluntati ac devotioni liberas relinquimus.

## TITULUS XXIII.

*De Fabricis & Fabricarum Procuratoribus.*

## I.

**P**rocuratores Fabricarum præter cujuslibet loci Parochum, quem Nos tanquam omnium Ecclesiarum & rerum Ecclesiasticarum Civitatis & Diocesis nostræ Constantiensis verus, legitimus & ordinarius Judex ac Superior, (n) nostro nomine ac loco supremum Procuratorem ordinamus, assumantur de communitate cujusque loci viri fideles Catholici duo vel tres, qui singulis annis acceptorum & expensarum rationem reddant.

II. Generales fabricarum Procuratores, quos vulgo spiritualium administratores vocant, uti hæreticorum hujus temporis inventum, quod Ecclesiasticarum rerum maximam confusionem generat, rejicimus, & ut cuilibet Ecclesiæ speciales Procuratores deputentur, præcipimus.

III. Ubi in villis & pagis Procuratores sunt, qui legere & scribere ignorant, Parochus loci singula accepta & expensa in rationes, aliis Procuratoribus dictantibus, referat.

IV. Procuratores non tantum census annuos ad fabricam pertinentes sive in fixo, sive in accidentiis sint, diligenter, & fideliter colligant, Ecclesiæ, turris, campanarum, sacrorum vasorum & vestium, aliarumque rerum, quæ ad Ecclesiam & fabricam spectant, curam habeant; sed etiam de cereis, oleo, thure, & cæteris ad cultum Divinum juxta ritum & cæremonias Romanas necessariis provisionem faciant. Curent præterea, præsertim Parochis urgentibus, ut albæ, altarium mappæ, mantilia, corporalia, purificatoria, & cætera omnia, maxime quæ ad tremendum Sacræ Missæ Sacrificium pertinent, sint munda. Quæ sordida sunt, mudent, quæ fracta vel corrupta, reficiant.

V. Missalia, Obsequialia, Gradualia, Antiphonaria, & libros reliquos Ecclesiasticos pro cujusque Ecclesiæ necessitate sine cunctatione Procuratores cœmant. Negligentes in his, Parochi Nobis, aut Vicario nostro denuntient, ut eos Ecclesiasticis censuris ad præstandum officium adigere valeamus.

VI. Habeatur vero ubique annuorum reddituum ratio, & ita Ecclesiarum necessitatibus provideatur, ne interim fabricæ magnis debitis prægraventur. Proinde volumus, & mandamus, ut Parochi, vel alii quicunque non tantum non plus oneris imponant fabricis, quam ferre possint, sed etiam ut vasis, vestibibus, & aliis rebus Ecclesiasticis non sordide & inadvertenter, sed munde ac ordinate utantur.

VII. Magnus est abusus in plerisque locis & Ecclesiis, ut, quando pro Ecclesia emitur oleum, & cera, cerei conficiuntur, vel annuæ rationes rerum fabricæ redduntur, profusa convivium & comotationes magnis sumptibus fabricæ fiant; suntque fabricæ Procuratores ut plurimum in subministrandis ac reparandis rebus Ecclesiæ necessariis per annum parciores, ut eo plus postea habeant, quod inutiliter consumant. Sane indignissimum est elemosy-

(m) Facit c. Omnis Christianus. de Consecr. d. 1.

(n) Videatur Concil. Trid. de Reform. c. 9. Sess. 22. &amp; Sess. 24. c. 3. in fine.

mosynas piorum toto anno congestas, uno die ita abliguriri: proinde sub restitutionis, & aliis gravissimis pœnis hujusmodi convivia sumptuosa, & comotationes prohibemus, consuetudine etiam immemoriali non obstante.

VIII. In locis, in quibus fabricarum redditus ex magna parte in vino consistunt, sub eadem restitutionis pœna Procuratoribus interdiciamus, ne ipsi in cellis vinariis fabricarum conveniant, & potitent, aut alios qualescunque illi sint, in easdem cellas ad potandum deducant. Parochi in hac parte peccantes, præter restitutionis pœnam toties, quoties decem florenis puniantur.

IX. Ut autem Procuratores suorum laborum aliquem fructum recipiant, non impedimus, quin illis pro modo facultatum fabricæ & laborum salarium aliquod in pecunia constitutur.

X. Habeatur in singulis Ecclesiis cista, in qua literæ reddituum, jura & pecunia fabricarum conserventur, sub trium clavium custodia, quarum unam Parochus, reliquas duas alii duo Procuratores habeant.

XI. Qui debita fabricarum in singulos annos non solidaverint, vel non integre persolverint, a fabricarum administratione removeantur, & ad solutionem ac solidationem jure adigantur.

## TITULUS XXIV.

### *De Successionibus & Testamentis Clericorum.*

#### I.

**B**ona, quæ a Clericis possidentur, aut sunt Patrimonialia, aut Ecclesiastica, aut ex Ecclesiasticis bonis acquisita, aut denique quasi patrimonialia. (o)

II. Patrimonialia bona ea censentur, quæ Clericis ipsorum non Ecclesiæ intuitu ex successione sive testamentaria, sive ab intestato, parentum, fratrum, cognatorum, & aliorum, item quæ ex legato, fideicommissio, opera & industria sua, honesta & licita donatione, aliove legitimo contractu obvenierunt. (p) Et hæc cum nihil distent a bonis sæcularium, consequens est, ut non tantum ea a Clericis quovis titulo in alios transferri possint, verum etiam ad legitimos eorum hæredes ab intestato, aut ex testamento institutos, recte devolvantur. (q)

III. Bonorum Ecclesiasticorum nomine eæ res continentur, (r) quæ Ecclesiæ, ejusque Ministrorum usui & sustentationi consecratæ sunt, quales sunt domus, agri, vineæ, jus decimarum, jurisdictiones, &c. quarum omnium ea est conditio, ut nulla in iis hæreditaria successio tam ab intestato, quam ex testamento jure permittatur, (s) si quidem Clericus præter procuratorem, & administrationem in hujusmodi bonis Ecclesiasticis nihil juris habet. (t)

IV. Bona ex Ecclesiasticis bonis acquisita sunt, quæ Clericus ex fructibus & redditibus beneficii sui comparat. Atque in his bonis Clerici ex antiquissima consuetudine (u) Diecefis nostræ liberam testandi facultatem habent, illisque ab intestato a proximioribus legitimis hæredibus succeditur. Cui consuetudini licet nos nihil derogare velimus, quia tamen pium rationique valde consentaneum est, ut Clerici ex hujusmodi bonis honeste tantum vivant, (x) & quod superest, in pios usus convertant, (y) serio monemus omnes Clericos, ut circa hujusmodi bona, sive hæredes ex testamento, sive ab intestato relinquunt, etiam Ecclesiarum, quibus ascripti sunt, pauperum, alia-

(o) Navarr. in Tract. de redd. benef. Eccl. & in Comment. de spoliis Clericor.

(p) C. 1. de pecul. Cleric.

(q) C. Episcopi, cum 2. c. seq. 12. q. 1. c. Quicumque.

12. q. 3. c. 1. c. Firmum. 12. q. 5. c. Quia nos. c. Relatum. de Testament. c. 1. de success. ab intest.

(r) Tit. decret. de pecul. Cleric. & de Testament.

(s) C. Cum in officiis. c. Ad hæc. cum c. seq. de Testam. c. Episcopi. c. Manifesta. c. Sint manifesta. 12. q. 1.

(t) C. Pontifices. 12. q. 3. C. Non liceat Papæ. 12. q. 2.

(u) Quam probant Panorm. ad c. Cum tibi. n. 2. de verb. sign. Covarr. ad c. Cum in officiis. n. 9. de Testam.

(x) C. Ex his. cum c. seq. c. fin. 12. q. 1. c. Cum secundum. de Præbend.

dum. de Præbend.

(y) C. fin. 16. q. 1. c. Quatuor. cum seqq. 12. q. 2.



aliarumque piarum causarum rationem habeant, ne, dum forte suos consanguineos ex bonis Ecclesiasticis temporaliter locupletare contendunt, ipsi æternæ salutis dispendium atque jacturam patiantur.

V. Denique bona quasi patrimonialia sunt, quæ licet Clericus ratione Ecclesiastici ministerii percipit, vi tamen & effectu inter patrimonialia annumerantur, qualia sunt, quæ Clericis separatim obveniunt ex celebratione Missarum, ex concionibus, & similibus actibus spiritualibus, (z) quæ bona a Clericis tam ex testamento, quam ab intestato recte ad hæredes transmittuntur. (a)

VI. Concubinarum, & aliarum turpium personarum in testamentis Clericorum ne mentio quidem fiat, quod si quocunque modo, directe vel indirecte ab aliquo contra factum fuerit, volumus, ut totum id, quod concubinæ, vel aliis turpibus personis relictum est, in pios usus convertatur.

VII. Qui in Clericorum testamentis Executores deputantur, sive Clerici, sive Laici fuerint, fideles sint & diligentes in exequendo, (b) & quod sibi in simili fieri vellent, id aliis faciant. Legata omnia, præsertim ad pias causas, statim persolvant, & totum testamentum intra annum executioni demandent. Nobisque tanquam supremo hujusmodi testamentorum Executori, vel Vicario nostro ad nostram, vel ejus requisitionem de omnibus & singulis rationem reddant.

VIII. Et quia intelleximus in quibusdam locis Diœcesis nostræ consuetudines & statuta esse, quod neque Clericus, neque Laicus, ultra certam & expressam summam piis locis, aut aliquibus personis pro animæ suæ remedio & salute sua magis promovenda ali-

qua legata ordinare possit; Quæ cum Sacris Canonibus (c) & Imperatoriis Legibus (d) sint contraria, quod extrema voluntas & ultimum hominis testamentum immobile debeat consistere, (e) nihilque sit, quod hominibus magis debeat, quam ut supremæ voluntatis liber sit stylus. (f) Ideo hujusmodi consuetudines & statuta auctoritate hujus Statuti Synodalis reprobamus, firmiter statuentes, ut illis, quos jura a testamentorum factione non prohibent, tam in prospera, quam in adversa valetudine constitutis, de bonis sibi a Deo collatis, ad pia loca & causas, dummodo hæredes suos legitimos contra juris communis dispositionem non prætereant, legandi, ordinandi & disponendi libera sit facultas.

IX. Dolenter etiam audivimus, quod in pluribus locis, fidelium tam Clericorum, quam Laicorum testamenta & extremæ voluntates, præsertim pro animarum salute salubrius promovenda, & ad pios usus & loca legata & testata, interdum perversis hominum machinationibus multipliciter impediuntur, & retardentur, cum vero suprema hominis voluntas pro lege servari debeat, (g) Nobisque ex pastoralis nostri officio incumbat, hujusmodi testamenta & ultimas voluntates defendere, (b) universis nostræ Diœcesis tam Ecclesiastici, quam politici status hominibus gravissime & sub Canonicis censuris ac pœnis præcipimus & mandamus, ne fidelium Ecclesiasticarum vel civilium personarum, quas jura a testamentorum factione non repellunt, testamenta, codicillos, legata, ac alias legitimas voluntates, potissimum ad pios usus & salutis animarum promotionem sese extendentes, earumque executiones, quovis modo negligant, impediant, aut retardent.

X. Cæterum circa ea, quæ jam de Cleri-

(z) Navarr. in Apologia de redd. Eccl. q. 1. monit. 21. cum seq.

(a) Panorm. in repet. c. Cum esset. n. 261. de Testam. & in cap. Cum in officiis. n. 8. eod.

Navarr. in Comment. de spoliis Cler. §. 1. n. 3.

(b) C. Joannes. de Testam.

(c) Tit. de Immunit. Ecclesiastica, & aliis locis.

(d) L. Cassa. c. de Sacros. Eccles.

(e) C. Martha. §. Cæterum. de celebr. Miss. cap. ult. 13. q. 2.

(f) L. 1. C. de Sacrosan. Eccles. Auth. de Nupt. §. Disponat. coll. 4.

(g) d. Auth. de Nupt. §. Disponat. coll. 4.

(b) Cap. Si hæredes. c. Tua nobis. c. Jo-

annes. de Testamentis. Concil. Trid. Sess. 22. de Reform. c. 8.

Clericorum testamentis & successioni-  
bus ab intestato definivimus, nihil de-  
rogatum volumus, Nobis, vel aliis, qui  
ex privilegio jus succedendi habent,  
certis quibusdam Clericis.

XI. Clerici illegitime nati nec te-  
stamentum recte faciunt, nec ab inte-  
stato alium præter Nos relinquunt hæ-  
redem, nisi a Nobis licentiam in scrip-  
tis impetraverint.

## TITULUS XXV.

### *De Exequiis & Sepulturis.*

#### I.

**M**agna religione priscis tempori-  
bus Christianorum funera cu-  
rata sunt, & eorum sepulturæ non nisi  
in sacris & religiosis locis ideo consti-  
tutæ, (i) quod illorum Sanctorum  
commendentur patrocinio, quorum  
nomini Ecclesia, in qua corpora con-  
quiescunt, est consecrata, tum etiam  
quod defunctorum proximi ad sacra  
loca venientes, sepulturamque con-  
spicientes, suorum recordentur, &  
pro eis pias preces fundant. Verum  
ut in aliis rebus, ita & in hac non parum  
multis in locis a religione deflexum est,  
unde mandamus, ut Parochi & Curati  
vetus Ecclesiæ institutum mortuorum  
funera piis precibus & officiis religiose  
prosequendi ad pristinam pietatis ratio-  
nem revocare studeant.

II. Sit in omnibus Ecclesiis Parochia-  
libus sumptibus fabricæ niger pannus  
laneus cum alba cruce omnibus com-  
munis, quo mortuorum loculi dum ad  
sepulturam efferuntur, contegantur.  
In ditiorum arbitrio sit, vel communi,  
vel alio pretiosiori suis sumptibus com-  
parando pallio uti, quod post funus  
statim Ecclesiæ, in qua vel cujus cœ-  
meterio mortuus sepultus fuit, acqui-  
ratur.

III. Ubi adeo Christiana pietas &  
charitas refrigit, ut nulli sint, qui sine  
mercede mortuorum corpora efferre &  
sepelire velint, illis Parochi cum cu-

jusque loci Magistratu certam taxam  
constituant. Miserabiles personæ, qui-  
bus mortuis, aut nihil superest, aut  
ita parum, ut sua impensa humari non  
possint, Fabricarum, Hospitalium, aut  
aliorum piorum locorum sumptibus  
sepeliantur.

IV. Pro exequiis, sepulturis &  
anniversariis nihil exigatur, quod Si-  
moniacam labem aut sordidam avari-  
tiam sapiat. (k) Pias tamen consuetudi-  
nes pro Ecclesiarum fabricis & Mini-  
strorum commodiori sustentatione ali-  
quid recipiendi non improbamus.

V. Meminerint vero Parochi se  
debitores esse, ut statim pro suæ Paro-  
chiæ defunctis preces Deo fundant, ac  
Sacrosanctum Missæ Sacrificium offe-  
rant, eisque refrigeria concedi postu-  
lent: nam si unquam antea, tunc certe  
animæ corporibus solutæ, eorum ope-  
ra maxime indigent, sibi que a Deo  
precibus illorum & sanctis Sacrificiis  
misericordiam fieri cupiunt. (l)

VI. Concio funeralis non in re-  
censendis mortuorum laudibus verse-  
tur, sed tota ad humanam miseriam  
fidelium oculis proponendam, & om-  
nes ad vigilandum cohortandos refera-  
tur, ne, cum venerit Dominus hora,  
qua non putamus, inveniat nos dor-  
mientes. (m)

VII. In Templis sine Prælatorum,  
Capitulum & Parochorum consensu  
nemo sepeliatur. Quod si alicui locus  
sepulturæ deinceps in aliqua Ecclesia  
dabitur, humi tantum & in tali loco  
detur, in quo Divinis Officiis peragen-  
dis nihil impedimenti adferat. (n) Mor-  
tui in Ecclesiis tam profunde sepelian-  
tur, aut quod melius esset, aperto lo-  
culo viva calce perfundantur, ne quem  
fœtorem inducant.

VIII. Ut in tegumentis sepulchro-  
rum lapideis sive in Ecclesiis, sive in  
cœmeteriis imposterum Crucis imago  
non sculpatur, Parochi prohibeant. (o)

IX. In sacris locis infideles, hære-  
tici, schismatici, publice excommuni-  
cati,

(i) C. 3. de Sepult. c. Non adimemus. in fin. c. Cum gravia. 13. q. 2.

(k) C. Abolendæ. c. Quæst. c. In Ecclesiasticis. 13. q. 2. c. Non satis. c. Ad Apostolicam.  
de Simon.

(l) d. c. Ad Apostolicam. & gloss. ad c. Abolendæ.

(m) Marci 13. c.

(n) Facit c. Præcipiendum. §. Prohibendum. 13. q. 2.

(o) Facit L. unic. c. Nemini licere sig.

cati, nominatim interdicti, manifesti usurarii, & qui sibi manus violentas attulerunt, alique a jure prohibiti humari, & pro iis exequiæ celebrari non debent. (p)

X. Cœmeteria ad Christianorum sepulturas consecrata muro, aut alias ita sepiantur ac claudantur, ne pecoribus pateat ingressus. Curent Parochi, ut in medio cœmeteriorum magna Crucifixi imago sit erecta.

XI. Rustici, dum ad Templâ eunt, in cœmeteriis non conveniant, ut confabulentur, ac nugas & similia tractent. (q) sed recta Ecclesias ingrediantur & orent.

XII. In cœmeteriis nihil plantetur, nihil seratur, in iis omnes arbores, frutices, vites sive fructiferæ, sive non, excidantur. Telæ & panni linei prophani in cœmeteriis non siccentur, nec fœminæ colo ibi neant, aut tam illæ, quam viri opus aliquod ibi faciant a ratione locorum sacrorum alienum. (r)

XIII. Denique in omnibus cœmeteriis sit locus honestus pro ossibus mortuorum, non sparsim & confusè, sed ordine reponendis, cui vas cum aqua benedicta & aspergillo semper adsit.

## TITULUS XXVI.

### *De Immunitate Ecclesiastica.*

#### I.

**Q**Uoniam locorum sacrorum, rerum ac personarum Ecclesiasticarum immunitates, & privilegia non solum a Summis Pontificibus, sed etiam a supremis Principibus concessa, hodie passim violantur, cum Sacri Tridentini Concilii Patribus (s) omnia Concilia Generalia, nec non alias Apostolicas Sanctiones in favorem Ecclesiasticæ libertatis, & contra ejus violatores præsentî hoc nostro Synodali Decreto innovamus. Quapropter omnes Magistratus sæculares, cujuscunque sta-

tus aut præminentia fuerint, in Domino hortamur, ut non tantum ea, quæ Ecclesiastici juris sunt, a Ministris, Officialibus, & subditis suis ullo modo lædi pariantur, atque in eos omnes, qui Ecclesiasticam immunitatem & jurisdictionem perturbant & impediunt, severe animadvertant, verum etiam ipsimet exemplo ad pietatem, religionem, atque Ecclesiarum & Ecclesiasticæ libertatis protectionem existant, imitantes anteriores optimos, religiosissimosque Principes, qui res & jura Ecclesiæ, & sua auctoritate ac magnificentia auxerunt, & ab aliorum injuria vindicarunt.

II. Nemo Sæcularium Clericum qualemcunque in vincula ob quamcunque causam sub pœna excommunicationis latæ sententiæ conjiciat, aut ei mulctam vel pœnam aliquam imponere præsumat. (t)

III. Clerici delinquentes Nobis, aut Vicario nostro deferantur, quos juxta delicti qualitatem, & Canonicas Sanctiones puniemus.

Quod si Clericus aliquis valde enormiter deliquisset (enorme autem crimen intelligimus, quod de jure Canonico depositionem, de Civili vero pœnam capitalem meretur) & vehemens fugæ suspicio adesset, permittimus, ut a sæculari Magistratu in arresto & loco honesto interea, donec Nos, vel Vicarius noster certiores facti fuerimus, detineri, aut vinctus decenti, non infami modo ad Nos mitti possit, omni dolo & fraude remota. (u)

IV. Clerici deprehensi in habitu laicali, postquam cognitum fuerit illos revera Clericos esse, statim dimittantur, & ad Nos, vel Vicarium nostrum causa & excessus deferatur.

V. Falsâ quorundam Laicorum hætenus fuit opinio jure se Clericos captivare, & per viginti quatuor horas in carcere detinere posse: quod, ne

Zzz zz 3

fiat,

(p) C. Ecclesiam. cum seq. de Consecr. dist. 1. c. 2. de Hæret. in 6. c. Sacris. 12. de Sepult. c. 3. de Usuris. c. Placuit. 23. q. 5. cum multis similibus jurib. Vide etiam Concil. Trid. Sess. 25. de Reform. c. 19.

(q) C. 2. §. Cessent varia. §. Cessent confabulationes. & §. Cessent in Ecclesiis. de Immunit. Eccles. in 6. (r) d. c. 2. & c. Cum Ecclesiam. de Immunit. Eccl.

(s) Sess. 25. de Reform. c. 20.

(t) C. Nullus. de foro compet.

(u) Facit c. Ut famæ. de sent. excomm.



fiat, sub eadem excommunicationis pœna prohibemus. (x)

VI. Clerici ad sæcularia judicia se invicem non trahant, aut ad Judicem civilem confugiant, vel appellent. (y) Contrafacientes gravissime puniemus.

Nemo etiam Laicorum Clericum ad sæculare Tribunal citare præsumat. (z) Quod si Clericus ab aliquo isthuc vocetur, non compareat, nec respondeat, (a) sed id Nobis, aut Vicario nostro referat.

VII. Qui ad Ecclesias & loca sacra confugiunt, inde per Magistratum sæcularem non extrahantur, (b) nisi publici latrones, nocturni agrorum populatorum, viarum obsessores, aut alii fuerint, (c) qui se immunitatis Ecclesiasticæ privilegio indignos fecerunt: Nam si eos, qui ad statum Principis se proripiunt, ab omni violentia leges sæculares vindicant, (d) quanto magis convenit ad Templum Domini & loca sacra confugientes, loci sancti reverentia & auctoritate defendi. Quicumque igitur inde hominem reluctantem violenter abtraxerit, eum tam aliis pœnis pro commisso sacrilegio, quod admisit, quam Ecclesiastica excommunicatione, quam ipso jure incurrit, (e) pro violata immunitate coërceamus.

VIII. Clericorum domus non minus, quam Ecclesiæ ipsæ immunitatis jure gaudent. (f) Quare Magistratus sæcularis in ædibus Canonicorum, Parochorum, & cæterorum Clericorum nihil juris & auctoritatis quærat, ac sibi usurpet.

*Finis secundæ Partis.*

## CONSTITUTIONUM SYNODALIUM PARS TERTIA.

### TITULUS I.

#### *De Regularibus & Religiosis.*

##### I.

**R**egularem vitam professi in statu perfectionis consistunt, (g) unde tum ipsi perfecte vivere, tum alios religiosi moribus & exemplo perficere debent. Quare summo studio contendant Regularium quorumcunque Superiores, ut in Monasteriis suis secundum præscriptum Regulæ, quam professi sunt, vivatur, atque imprimis, quæ ad suæ professionis perfectionem pertinent, tria vota substantialia Religionis, videlicet obedientiæ, castitatis, & paupertatis, quam diligentissime observentur. (h)

II. Regulares omnes imprimis Nobis & Successoribus nostris, tanquam totius Ditecesis Capiti, reverentiam exhibeant, atque obedientiam in iis præstent, in quibus tum ex Sacrorum Canonum Jure, tum ex Concilii Tridentini Decretis præstare debent: (i) Deinde Superioribus & Præfectis suis ad nutum obediant. (k) Rebelles importune & opportune ad obedientiam redigantur, incorrigibiles, vel ad alia Monasteria, juxta cujuscunque Ordinis Statuta dimittantur, vel perpetuo incarcerationentur.

III. Prælati, & alii Superiores Monachos suos ex obedientia & Monasterio sub quocunque prætextu absque legitima & rationabili causa a Nobis cogni-

(x) d. c. Nullus. de foro compet. q. 1. c. Inolita. 11. q. 3.

(a) Per L. fin. ff. de Jurisdic. omnium jud. Experientia. cum seq. 11. q. 1.

(c) d. c. Inter. c. Sicut antiquitus. 17. q. 4. & c. fin. de Immun. Eccles. de his, qui ad statum confug.

(g) S. Thom. 2. 2. q. 134. relatus a Sylvest. in verbo: Religio. 1. n. 3.

(b) Clem. Exivi. de verb. signific. c. Cum ad Monasterium. de statu Monach. Conc. Trid. Sess. 25. de Regul. c. 1.

(i) Conc. Trid. in multis locis. fac. c. Conquerente. de offic. Jud. ord.

(y) C. Si diligenti. de foro compet. c. Placuit. 11.

(z) C. Qualiter. de Judiciis.

(b) C. Inter. de Immun. Eccl. c. Diffinivit. c. Frater. c. Sicut. c. Constituimus. c. Si quis contumax. 17. q. 4.

(d) Tot. tit. Cod.

(e) d. c. Et jurib. (f) d. c. Quis quis. 17. q. 4.

(k) d. c. Cum ad Monasterium. §. Abbas vero. c. Abbates. 18. q. 2.

cognita non dimittant. Religiosos suos vagabundos, qui vel sine, vel cum habitu extra Monasteria oberrant, diligenter inquirant, & ad sua Monasteria redire modis omnibus curent. (l)

IV. Regulares, sive in ipsis Monasteriis, quibus cura animarum est annexa, sive extra Monasterium Parochiis præfecti sint, Sacramenta minime administrent, nec curam animarum quocunque modo exercent, nisi prius a Nobis, vel Vicario nostro legitime examinati, probati & admissi fuerint. (m) In iis etiam, quæ ad curæ animarum administrationem pertinent, Nobis, Vicario nostro, & loci Decano rurali obedientiam & subjectionem præstare debent. (n) Regulares in Parochiis notorie delinquentes, secundum Canones impunitos non relinuemus, (o) in gravioribus excessibus in Parochiis non tolerabimus, sed ad Monasteria sua remitteremus.

V. Apostatas pœnitentes, & ad Monasterium revertentes, Superiores benigne recipiant, nec eis majores pœnas, quam a Sacris Canonibus aut Regula cautum sit, imponant. (p)

VI. Ut castitatis voto, quo se Religiosi obligarunt, commodius satisfacere queant, (q) fœminæ omnes excludantur a locis conventualibus. In quibus Monasteriis aditus adhuc patet mulieribus, ad ambitum, refectorium, dormitorium, & alia secretiora loca Conventus, Prælati, & Superiores infra sex menses clausuram instituant, & institutam diligentissime conservent, (r) atque in Religiosos suos votum castitatis violantes, gravissime animadvertant. Extra clausuram & loca conventualia in Monasteriis sic admittimus fœminas, ut ubique honestatis ratio habeatur.

VII. Regularis vitæ pestis est perniciosissima proprietas, cujus abdicatio adeo est Regulæ Monachali annexa, ut contra eam nec Summus Pontifex possit licentiam indulgere. (s) Quæ proprietati occasionem & fomenta administrent, ex omnibus Monasteriis penitus auferantur. Pensiones vitales ex parentum hæreditate, aut aliunde provenientes, nullus recipiat, neque pecuniam, vel aliud quidpiam proprium apud se, vel alium retineat, quocunque modo acquisitum fuerit, sed omnia in communem usum convertantur. (t) Consuetudinem, ubi Monachi, vel Canonici Regulares bona quædam immobilia ad ulumfructum possident, aut pro victu, potu, & vestitu certam summam vini, frumenti, panis, & aliorum esculentorum, vel pecuniam recipiunt, tanquam religioni & paupertatis voto contrariam omnino abrogamus. (u) Privatas Monachorum familias & mensas in Monasteriis interdicimus, & volumus, ut Religiosi in una mensa ac refectorio simul secundum cujusque Regulæ præscriptum comedant. (x) Mensæ adhibeatur sacra lectio, cui etiam Superior, nisi legitime impediatur, intersit. (y)

VIII. Subministrentur vero a Monasteriorum Prælati & Superioribus victus, vestitus, cæteraque vitæ subsidia singulis ex communi pro necessitate & Monasterii facultatibus prompte & hilariter, non sordide ac tenaciter. Meminerint Superiores se Religiosorum suorum Patres, non Dominos, & Religiosos, non servos, sed filios esse.

IX. Superiores Religiosis suis ægrotantibus præter tria vota, cætera religionis præscripta relaxent, potum, cibum, locum, & omnia alia, quæ sanitas exigere videtur, de Medici consilio libenter cum paterno affectu & charitate

- (l) C. Ne Religios. de Regularib. & transf. Clem. Ne in agro Dominico. §. Quia vero. d. c. Abbates. 18. q. 2. (m) Conc. Trid. Sess. 25. de Reg. c. 11.  
 (n) C. Qui Religiosi. 18. q. 2. Conc. Trid. Sess. 25. de Regular. c. 11.  
 (o) Conc. Trid. d. Sess. 25. de Reg. c. 14. (p) Facit c. Pœnæ. de Pœnit. d. 1. L. Interpretation. L. Respiciendum. L. Hodie. ff. de Pœnit.  
 (q) C. Quod Deo. 33. q. 5. c. Ananias. c. Sunt quidam. 17. q. 1. Num. 3. & Deut. 15. cap.  
 (r) Facit c. Pervenit. 18. q. 2. (s) C. Monachi. c. Cum ad Monasterium. de statu Monach. c. Joannes. de Reg. (t) d. c. Cum ad Monasterium. c. Non dicatis. 12. q. 1. c. Monacho. 27. q. 1. Conc. Trid. Sess. 25. de Reg. c. 2. (u) d. Sess. c. 2.  
 (x) Conc. Trid. d. Sess. 25. de Reg. c. 1. (y) d. c. Cum ad Monasterium. §. Abbas vero.

ritate ministrent. (z) Ægrotorum vero non mulieres, sed viri curam habeant.

X. Habitu & vestitu utantur omnes decenti & Regulæ convenienti, (a) nec abjecto nimis nec cultiori, sed potius vitæ innocentia ac morum integritate, quam externo cultu hominibus placere studeant.

XI. Habitum & Tonsuram Ordini congruam, sive foris, sive domi sint, semper gestent (b) aperte, occulte nunquam, nisi de Superiorum licentia, quando per loca hæretica periculosa transeundum esset.

XII. Cubent omnes in eodem dormitorio, singuli in singulis cellis & lectis.

XIII. Silentium, humilitatem, & cæteras virtutes Christianas Religiosi imprimis colant. (c) Colloquia autem vana, inutilia, turpia, sermones petulantes, jocos obscenos, lites, jurgia, odia, invidias, otium, & similes Religiosorum pestes abominentur & fugiant, atque a chartarum, alearum, & aliis minus honestis, illicitis ac jure prohibitis ludis abstineant.

XIV. Ad Officia Divina secundum singulorum Ordinum Regulas, & Monasteriorum fundationes & laudabiles consuetudines statis horis & locis celebranda, Religiosi omnes in Choro conveniant, & quanta quisque in Monasterio dignitate vel officio major est, tanto in Divinis Ministeriis studeat esse frequentior, nec se facile subducatur, nisi necessitatis vel majoris utilitatis ratio postulet. In Choro autem & Ecclesia invicem non confabulentur, non discurrant, non oculos huc illuc conijciant, aut aliquid aliud agant, quod homine & religioso loco sit indignum. Qui ritu Romano celebrant, omnia observent, quæ supra de Missarum celebratione a Nobis constituta sunt, & quæ Missalis Romani, aut nostri ad Romanum accommodati, Rubricæ continent.

XV. Sacerdotes confessionem Sacramentalem ultra decimum quartum diem nunquam differant, reliqui singulis mensibus confiteantur, & Sacrosanctam Eucharistiam suscipiant, nisi sæpius ex Regula sua obligentur. (d) Cæterum ut quilibet Regularis cuilibet ad voluntatem suam confiteatur, non expedit: ordinentur itaque Confessarii certi a Superiore, prudentia maturi, vita & doctrina probati, vel ex Monasterio, vel si ibi apti non sint, de communi consensu aliunde, præsertim ex religione aliqua, cui omnes simul confiteantur.

XVI. Capitula culparum, ad conservationem monasticæ disciplinæ instituta, secundum cujusque Ordinis Regulam & Statuta celebrentur sæpius: In iis Regula & Constitutiones Ordinis prælegantur, (e) & quæ contra honestatem & Ordinem gravius admissa fuerunt, puniantur. Capitulis Prælati & Superiores quoque intersint.

XVII. Caveant Superiores, ne aliquem ad professionem ante decimum sextum annum ætatis completum, & qui prius per integrum annum in probatione non fuerit, admittant: aliter enim professio facta nulla est, & invalida. (f) Nemo etiam ad alicujus religionis professionem emittendam vi metuque cogatur, aut inducatur. Atque in Religiosorum susceptione non divitiarum, familiarum splendor, & similia spectentur, sed tantum purus honor Dei & animarum salus quaeratur. Et quia raro terminatur fine bono, quod malo inchoatur, principio ad Monasteria & professionem mediante alicujus pecuniæ, aut muneris pacto Simoniaci, nulli omnino recipiantur. (g)

XVIII. Quando ad Ordinem aliquem recepti, habitum Novitiatu induunt, aut Professionem faciunt, vel jam professi suas Primitias offerunt, magnus apparatus & splendida ac sumptuosa convivia more Sæcularium ne fiant,

(z) Sæped. c. Cum ad Monasterium. §. Porro debiles.

(a) d. Sess. 25. c. 1.

(b) Clem. Ne in agro Dominico. §. Statuimus. de statu Monachor.

(c) C. Cum ad Monaster. §. In oratorio. de statu Monach. Isidor. de summo bono. lib. 1.

(d) Clem. Ne in agro Dominico. §. Sane. de statu Monachor.

(e) d. Clem. Ne in agro Domin. §. Regula.

(f) Conc. Trid. Sess. 25. de Regular. c. 15.

(g) C. Monachi. de statu Monach. c. Quoniam Simoniaci. de Simon.



frant, sicuti in multis locis fieri intelligimus, sed omnia sint frugalia, moderata, loco, tempori & personis convenientia. Sane consultius & illis honestius esset, qui ante professionem solennem ad sæculum redeunt, si habitus Novitiatus privatim in Ecclesia, vel in Capitulo sine externa aliqua pompa indueretur.

XIX. In singulis Monasteriis sit locus separatus pro Novitiis, quibus assignetur vir pius, prudens & doctus, qui eis Regulam explicet, ad vitam regularem verbo & exemplo instituat, ad pietatem informet, ad virtutis amorem inflamet, & in iis, quæ Ordinis sunt, exerceat; ut, quid professuri sint, non tantum sciant, sed etiam usu & experientia prius didicerint. (b) Novitios, & eorum Magistros, Superiores sæpe visitent, & quomodo instituantur, cognoscant.

XX. Monasteriorum Prælati, & alii Præfecti bonorum & fructuum Monasterii, non Domini, sed tantum dispensatores sunt, nec pro arbitrio & voluntate sua, sed secundum intentionem priorum Fundatorum & Ecclesiæ, pro utilitate & necessitate Monasterii bona dispensare possunt, ac debent. Quare omnes & singulos serio monemus, ne superfluo famulatu, nimio nec necessario equorum numero, splendidis conviviiis, sumptuosis & inutilibus ædificiis Monasteriorum redditus consumant, (i) interim vero vix duos aut tres Conventuales non sine summa diminutione cultus Divini alant, vel si plures habeant, eos ita sordide ac tenaciter in cibo, potu, ac reliquis necessitatibus, tractent, ut statim ad officia sua peragenda reddantur inhabiles.

XXI. Circa rerum Monasterii administrationem in gravioribus causis Prælati nihil agant, sine præscitu, consilio & consensu Conventus sui. Nihil vendant, distrahant, aut quocunque mo-

do alienent, sine nostra, aut aliorum suorum Superiorum licentia in scriptis obtenta. (k) Amicos & propinquos suos ex bonis & fructibus Monasterii non dicent, neve quicquam ut proprium ipsi possideant, vel aliis possidendum relinquunt. (l) Licet enim aliis præfecti sint, nosse tamen debent, se Legibus & Regula, quam professi sunt, solutos non esse.

XXII. Monasteriorum Prælatos & Superiores, qui bona Monasterii inutiliter dispensant, ac dissipant, si Nobis ordinaria jurisdictione subiecti sint, Prælaturis suis privabimus. (m) Si exempti, ut a suis Superioribus amoveantur, procurabimus.

XXIII. In singulis Conventibus, præsertim numerosis, habeatur Religiosus aliquis eruditus, & bonæ famæ, qui juniores Monachos instituat. (n) Et quia maxime interest, Religiosos Viros doctrina ornatos esse, tum ut aliis prodesse valeant, tum etiam, ut ipsi habeant, quo otium honeste terant, omnino necessarium esse censemus, ut juniores Religiosi duo, tres, pluresve, maxime ii, qui sunt bonæ indolis, pro cujusque Monasterii facultatibus in Gymnasio aliquo publico, usque ad secundum Theologiæ annum a Prælati, & aliis Superioribus alantur. Quod ut faciant Prælati, ab omnibus & singulis vehementer desideramus.

XXIV. Sine libris Religiosi docti non sunt: quare Bibliothecæ, ubi in Monasteriis sunt, non tantum conserventur, sed quotannis augeantur; ubi vero non sunt, instituantur.

XXV. Superiores officia Monasterii non ex gratia & affectu, sed dignis conferant. (o) Religiosi autem, quibus officia & bona temporalia administranda committuntur, non tantum singulis annis, sed singulis mensibus, vel diebus, si ita Superioribus visum fuerit, rationem reddant, (p) & ita se

ge-

(b) d. Clem. Ne in agro Dominico. §. Regula. in fin. facit c. 1. 12. q. 1.  
 (i) d. Clem. Ne in agro. in princ. (k) Tot. tit. Ext. in 6. Clem. de Eccl. non alien.  
 (l) d. c. Cum ad Monasterium. & d. Sess. 25. c. 2. (m) C. Monachi. §. Priores. de statu Monach.  
 (n) d. Clem. Ne in agro. §. Ad ampliationem. de statu Monach.  
 (o) C. Cum ad Monasterium. §. Tales autem. de statu Monach.  
 (p) d. c. Cum ad Monast. §. Tales autem.

gerant, ut semper memores sint Religionis & votorum, quibus se DEO & Superioribus astrinxerunt.

XXVI. Hospitalitas in Monasteriis ita exerceatur, ne forte magis publicis tabernis, quam Religiosorum hominum Conventibus comparentur. Qua in re Prælatos, & alios Superiores pro modo facultatum Monasterii, & pro ratione personarum illuc divertentium prudenter ac discrete procedere volumus. (q) Cæterum serio prohibemus, ne sub prætextu hospitalitatis crapulæ, ebrietatibus, æqualibus haustibus, inhonestis colloquutionibus, & his similibus ulla detur occasio. Ad curam vero hospitum deputentur viri graves, & bonæ conscientiæ.

XXVII. Censuras atque interdicta non modo, quæ a Sede Apostolica, sed etiam a Nobis emanaverint, Regulares omnes in Ecclesiis suis promulgent, observent, (r) & ab aliis sibi commissis observari procurent.

XXVIII. Religiosi privilegiis suis moderate ad ædificationem, non ad destructionem & Ecclesiasticarum rerum confusionem utantur.

XXIX. Denique, quæ in Concilio Tridentino (s) de Regularibus definita, & a Nobis supra de Sacramentis Ecclesiæ, de Ecclesiarum cultu, de Altaribus, sacris vasis, & vestibus, de sepulchris ac cæmeteriis, aliisque rebus constituta sunt, ea omnia, in quantum Monasteriorum Superiores & Regulares quoscunque concernere debent, volumus, ut ab omnibus diligenter observentur.

## TITULUS II.

### *De Electione & Confirmatione Prælatorum.*

#### I.

**M**agni refert ad Monasteriorum regimen tales assumi, qui in spiritualibus & temporalibus cum profectu præesse possint: quantum enim detrimenti Monasteria patiantur, quo-

rum Superiores luxui, & quibusvis animi sui desideriis intenti, spiritualia aut nihil, aut parum curant, & temporalia passim profundant, optima rerum Magistra experientia hætenus in multis locis docuit. Proinde vehementer adhortamur omnes & singulos, quibus in Superiorum electione jus competit, ut deposito omni affectu, viros assumant, & prudentia rerum agendarum, gravitateque maturos & pietate insignes. (t)

II. Concubinari, aut de incontinentiæ vitio notorie diffamati, proprietarii, excommunicati, suspensi, interdicti, nimium simplices, & qui alios juris patiuntur defectus, Monasteriis non præficiantur.

III. Electio fiat per vota secreta, (u) ita ut singulorum eligentium nomina nunquam publicentur, nec quorumcunque absentium suffragia admittantur. Electioni præsent duo vel tres scrutatores Prælati, sive alii in dignitate Ecclesiastica constituti, vel alias, prout juris fuerit, ab eligentibus requisiti, duo testes Clerici, vel Religiosi, & Notarius, qui, si fieri possit, sit Clericus. Ad scrutinium aut suffragia nulli Laici, etiam si Advocati fuerint, sub quovis prætextu admittantur.

IV. Electione canonice celebrata, electus per Instrumentum publicum ab Electoribus & Notario subscriptum & subsignatum, Nobis, aut Vicario nostro, vel alii Superiori quantocyus præsentetur, præsentatus vero confirmationem a Nobis prius non obtineat, quam per legitimam inquisitionem & proclamationem de electi sufficientia, & dignitate constiterit.

V. Prælati omnes in Diocesi nostra existentes, & Nobis ordinario jure subiecti, benedictionem suam solennem a nullo alio Episcopo, quam Nobis, vel Suffraganeo nostro recipiant. Exemptis, si extra Diocesim nostram benedictionis suæ munus accipere voluerint, modum non præscribimus. Sed ut in Diocesi nostra ab aliis, quam Nobis, aut Suffraganeo nostro sine nostra

(q) Conc. Trid. Sess. 25. de Reformat. c. 8.

(r) Sess. 25. de Regular. batem. 18. q. 2.

(s) Conc. Trid. Sess. 25. de Regular. c. 12.

(t) C. Ne pro defectu. de Elect. c. Vilissimus. l. q. 1. c. Ab-

(u) Concil. Trid. Sess. 25. de Regular. c. 6.

stra speciali & expressa licentia in scriptis obtenta, benedicantur, minime permittimus.

### TITULUS III.

#### *De Monialibus.*

##### I.

**Q**Uæ supra de Religiosorum votis disposuimus, eadem etiam de Monialibus intelligi volumus, quæ eodem plane modo ut viri regulares obedientiam, paupertatem & castitatem profitentur.

II. Obedientiam præstent Moniales Abbatis, Præfectis, & Matribus suis. (x) Quæ earum iussa neglexerint, neque pœnitentiam sibi impositam facere voluerint, aut superbe & injuriose responderint, contumaciter se defenderint aut excusaverint, velo priventur, incarcerentur, aut aliis pœnis ad obedientiam redigantur, & si rebelles permanerint, Superiori deferantur.

III. Proprii omnino nihil possideant, sed quæ a Præfecta illis ad usum concessa sunt, iis modeste, & ita utantur, ut semper paratæ sint ad Superioris nutum ea relinquere.

IV. Quæ ex labore manuum, aut ex suorum donatione vel hæreditate, aliave quavis iusta causa Moniales acquirunt, ea omnia ad communem usum & Monasterii utilitatem conferant. (y) Non tamen prohibemus, quin hujusmodi pecuniis illarum necessitatibus consulatur, a quibus pervenerunt.

V. Munera quæcunque, etiam minima, Moniales sive Clericis, aut Religiosis, sive Laicis nec dent, nec mittant, sine præscitu & consensu Præfectæ. Ut aliquando Moniales parentibus, fratribus, sororibus, aut aliis cognatis proximioribus aliquid donare possint, Præfectæ permittant.

VI. Eleemosynæ non alicujus privatæ Monialis, sed Monasterii tantum nomine dentur.

VII. Præfecta Monasterii bis singulis annis, aut sæpius Monialium cellas visitet, suppellectilem illarum perlustret, & scrutetur, an aliquid proprii, aut quam ei ad usum sit concessum, habeant. Quod si aliqua deprehensa fuerit, ex Decreto Concilii Tridentini (z) per biennium activa & passiva voce privetur, & alias juxta Regulam & Ordinis Constitutiones puniatur.

VIII. Et quia Moniales Sponsæ sunt Christi Domini, maxime decet, ut, quam fidem promiserunt, non tantum opere, sed etiam verbis, ac puro corde integram conservent. (a) Quare fugiant diligenter colloquia vana, prava & inutilia, sanctumque silentium, quo magna animæ donorum spiritualium fit accessio, sedulo colant. (b)

IX. Ut in omnibus Monasteriis Sanctimonialium, cujuscunque Ordinis & status fuerint, quoad cibum, potum, vestitum, cæteraque necessaria omnia, omnes communiter vivant, ut a Sacro Tridentino Concilio (c) decretum est, serio præcipimus. Certas portiones in vino, in pane, & reliquis victualibus; Censuræ vitales, proprias ancillas & familias, & si quæ his sunt similia, voto paupertatis, quod coram Deo & Angelis suis solenniter sunt professæ, & diametro repugnantia, severissime prohibemus, (d) non obstantibus consuetudinibus quibuscunque.

X. Nulla sit differentia inter Moniales, nulla alii præferatur aut postponatur, sed a Magistris & Præfectis unicuique Monialium secundum necessitatem provideatur.

XI. Cibum capiant omnes in communi refectorio, (e) etiam Abbatis, Magistræ, Matres, aut aliæ Præfectæ, (f) nisi infirmitas aut alia legitima causa subsistat. Mensis adhibeatur benedictio, & gratiarum actio a Præfecta, cui omnes Moniales interfint; absentes sine causa, puniantur. Fiat etiam lectio alicujus spiritualis, & approbati libri

(x) C. Cum ad Monasterium. §. Abbas vero. de statu Monachor.

(y) d. Sess. 25. c. 2.

(z) d. Sess. 25. c. 2.

(a) Causa 27. q. 1. fere per totum.

(b) C. Cum ad Monasterium. §. In oratorio. de statu Monachor.

(c) Sess. 25. de Regul. c. 1.

(d) Ex d. Sess. 25. c. 2.

(e) C. Perniciosam. 18. q. 2.

(f) Facit. d. c. Cum ad Monasterium. §. Abbas vero.



libri Germanici, in prima & secunda mensa, ut dum carnalibus cibis corpus nutriunt, etiam spiritualibus escis pascantur.

XII. Dormiant omnes in uno cubiculo distinctis lectis, aut in uno dormitorio distinctis cellis. (g) Cubiculum autem commune, seu dormitorium noctu semper sit clausum, clave penes Præfectam existente; cellæ vero aliter non claudantur, quam ut a Præfecta aperiri possint.

XIII. Ægrotis Monialibus in infirmaria, aut alio loco convenienti cibibus, medicamenta, aliaque necessaria secundum Monasterii facultates benevole administrentur. (h) Eas Præfecta charitatis causa quotidie visitet, ut & solatio sit, & melius, quæ ipsis sunt necessaria, cognoscere, ac procurare queat.

XIV. Vestitus sit simplex & Ordini conveniens, nihil quod superfluitatem aut mundi vanitatem sapiat. (i) Anuli & armillæ in manibus, cinguli, cultri argentei, aurei, deaurati, aut alias pretiosi mulieres aulicas, non Moniales ornant, ac decent. Hujusmodi res, si habeant, ad communes monasterii usus ac necessitates convertendas Præfectæ tradant.

XV. Canes, columbas, gallinas, aves, ut Moniales privatim habeant, interdiciamus. Quæ si apud aliquam repertæ fuerint, statim ex monasterio ejiciantur, vel communi usui ascribantur, & Moniales puniantur.

XVI. Quia Diaboli pulvinar est otium, caveant Sanctimoniales omnes, ne tempus vanis confabulationibus, & otio, sed honesto labore manuum pro communi monasterii necessitate ad Præfectæ præscriptum consumant.

XVII. Diebus Festivis, quibus a labore manuum abstinere, quod residuum est temporis a cultu Divino, illud totum piis meditationibus, orationibus, & sacrorum librorum lectionibus impendant.

Libri prophani, turpes, jocosæ & ludicri in monasteriis Monialium non habeantur, in illis, si tales sint, aut deinceps inveniantur, ex monasteriis ejiciantur, vel comburantur; nam sicuti sacrorum & piorum librorum lectio ad Dei & sui cognitionem ducit, viamque perfectionis, & æternæ vitæ monstrat; ita inanum & turpium librorum lectio vitia generat, mentemque corrumpit.

XVIII. Moniales Clericorum, seu Regularium quorumcunque interulas, sudaria, collaria, aliasque vestes nec lavent, nec conficiant. Vestes vero sacras, quales sunt alba, amictus, corporalia, purificatoria, & similia, ut Moniales lavare & conficere possint, ita concedimus, si cum præscitu & licentia Magistræ fiat.

XIX. Ad Sanctimoniales maxime pertinet, assidue laudare Deum, eidem gratias agere, & supplicare, ut suam misericordiam omnibus hominibus ad salutem impetiat; idcirco diu noctuque Chorum frequentent, Horasque Canonicas distincte & pro pio animi affectu recitent: (k) Quæ publicis horis interesse ex justa causa impediuntur, eas privatim orare ne intermittant, cum omnes Moniales, quæ Professione facta velum susceperunt, quotidie suæ Religionis Divinum Officium & consuetas preces dicere obligentur. (l) Adfint autem singulæ statim ad initium congruenti sui Ordinis vestitu indutæ, in suis propriis locis, & usque ad finem permaneant. Soni cantus, qui honesti & spirituales non sunt, colloquia, risus, & quicquid indignum est domo Dei, & ejus Divina Majestate, cum qua in oratione colloquimur, ab Ecclesiis & cultu Divino Monialium procul arceantur.

XX. Venerabile Sacramentum Corporis & Sanguinis Domini nostri Jesu CHRISTI intra septa monasterii non aservetur, (m) sed in exteriori Ecclesia, ita tamen, ut etiam Moniales locum, seu

(g) d. c. Perniciosam.

(h) d. c. Cum ad Monasterium. §. Porro debiles.

(i) d. Sess. 25. c. 1.

(k) C. Quia tua. 12. q. 1. D. Hieronym. ad Rusticum Monachum relatus in c. Nunquam. de Consecr. dist. 5.

(l) D. Anton. 3. parte. tit. 13. cap. 4. §. 1. Turrecremat. c. 1. dist. 91. q. 15. Navar. de orat. c. 7. num. 21. relati ab Azorio Instit. moral. lib. 10. c. 6.

(m) Concil. Trid. Sess. 21. de Regul. c. 10. circa fin.

seu tabernaculum intra septa commode videre possint, clave apud Capellanium, seu Confessarium existente. In oratoriis vero Monialium Venerabile Sacramentum omnino non sit, privilegiis, indultis, aut consuetudinibus quibuscunque non obstantibus. (n)

XXI. Sanctissima Pœnitentiæ & Eucharistiæ Sacramenta prima Domini- ca singulorum mensium, & celebrioribus Christi Domini, & Beatissimæ Virginis Festivitatibus, atque aliis diebus, quibus ex præscripto Ordinis obligantur, devote percipiant. (o)

XXII. Confessarium habeant ordinarium, sive regularem, sive sæcularem Clericum, a Superioribus assignatum & approbatum; Extraordinarium bis aut ter in anno ad nostram, vel alterius Superioris ordinationem. (p)

XXIII. Qui Monasteriis Sanctimonialium præsent, pios, prudentes, maturos, atque doctos Confessarios & Concionatores eis constituent, qui ad minus bis singulis mensibus Dei verbum prædicent, easque erudiant in omnibus, quæ ad Dei cultum & sempiternam salutem consequendam pertinent.

XXIV. Præfecta Monasterii quocunque nomine appelletur, ex Tridentini Concilii Decreto, (q) minor quadraginta annis non eligatur, & quæ in vitæ honestate octo annis non vixerit, postquam professa est. Quod si talis in eo Monasterio non inveniat, ex alio ejusdem Ordinis Monasterio assumatur, nisi incommodum ei videatur, qui electioni præest: tunc enim ex eodem Monasterio eligi poterit, quæ triginta annos excessit, & quinque annis laudabiliter post Professionem vixit.

XXV. Nulla Monialis ambiat, aut aliquo modo sive directe, sive indirecte, per se, vel per alios honores & officia quærat, sed singulæ propria voluntate deposita, & ad obtemperandum aliis magis paratæ, Dei gloriam & communem Monasterii utilitatem præocu-

lis habentes, eas eligant, quas, omni humanitatis affectu remoto, ad id munus magis idoneas judicaverint.

XXVI. Præfecta Monasterii, tanquam communis omnium Monialium mater, ipsarum, & corporis & animæ salutis diligentissime consulat, easque studiose admoneat, ut puro sint corde, vitæque integritatem servant, & ad perfectionem omnium virtutum contendant. Meminerit autem sibi reddendam esse rationem justissimo Judici erratorum omnium, quæcunque Moniales ejus culpa aut negligentia admitterint. Imprimis vero curet, ut pax & concordia sororum conservetur, sublati ab ea, quantum fieri poterit, omnibus dissidii, ac discordiæ causis, ut, quemadmodum debent, unum corpus & unus spiritus in earum Sponso Christo Jesu perfectæ charitatis vinculo colligentur.

XXVII. In Moniales garrulas rerum novarum & mundanarum amatrices, aliis sive detrahentes, sive maledicentes, quæ hodie apud plerasque Moniales passim sunt in usu, in Capitulis, singulis septimanis semel celebrandis, privatione veli, disciplina, carcere, aut aliis pœnis pro modo culpæ Præfecta Monasterii severissime animadvertat.

XXVIII. Regula, & aliæ Ordinis Constitutiones Monialibus sæpius prælegantur, (r) ut eis vocationis & professionis suæ debitum officium in memoriam revocetur.

XXIX. In negotiis paulo gravioribus Præfecta Monasterii sine præscitu & consensu Monialium, Officialium, aut Seniorum nihil decernat, in iis vero, quæ majorem deliberationem requirunt, totum Monialium Capitulum convocet.

XXX. Ad minora officia Moniales ætate, & prudentia maturæ assumantur, quæ ad nutum Superiorum sint amovibiles. (s) Quæ autem assumptæ fuerint, quemadmodum earum obedi-

Aaa aaa 3

entia

(n) d. loco.

(o) Concil. Trid. Sess. 25. de Regul. c. 10. Clem. Ne in agro. §. Sane.

de statu Monach.

(p) d. Sess. c. 10.

(q) Sess. 25. de Regular. c. 7.

(r) d. Clem. Ne in agro. §. Regula. de statu Monach.

(s) C. Cum ad Monasterium. §. Tales autem. de statu Monach.

entia postulat, officia suscipiant, & eorum munera sine recusatione humiliter exequantur.

XXXI. Novitiarum curam habeat Monialis specialiter deputata in loco separato, quæ Novitias in timore, & cultu Dei, & in observatione religionis suaviter erudiat, coneturque, & vitæ exemplo & assiduis monitionibus ita eas instituere in spiritualis vitæ ratione, ut Deo adiutore ejus perfectæ ancillæ evadere possint. (t) In Novitiatum nulla recipiatur sine habitu regulari, ad habitum nulla, nisi duodecim annis major, ad Professionem vero post annum probationis absolutum, & decimum sextum ætatis annum completum, (u) quæ prius Nobis, aut Vicario nostro de suo libero consensu, & pia voluntate fidem sufficientem non fecerit. (x) Plures autem nullibi assumentur, quam commode sustentari possunt. (y)

XXXII. Ut puellæ disciplinæ & honorum morum causa in Monasteriis Sanctimonialium degant, ac educantur, non prohibemus. (z) Volumus tamen, ut separatim a Monialibus pro cuiusque loci commoditate erudiantur. Puellæ tales habitu quidem sæculari, nec tamen sumptuoso & varii coloris, sed modesto ac loco religioso convenienti utantur. Sumptus vero ipsæ puellæ, sive parentes earum, non Monasterium ferat.

XXXIII. Quoniam Nobis gravissime sub obtestatione Divini Judicii & interminatione maledictionis æternæ a Sacra Tridentina Synodo (a) præceptum & mandatum est, ut in omnibus Monasteriis Nobis subiectis ordinaria, in aliis vero Sedis Apostolicæ auctoritate clausuram Sanctimonialium, ubi violata fuit, restituamus, & ubi inviolata permansit, conservemus, & inobedientes atque contradictores quoscunque per censuras Ecclesiasticas, alias-

que pœnas, quacunque appellatione postposita, compescamus. Ideo memores salutis nostræ, & ad avertendum a Nobis Divinam ultionem omnibus Monasteriorum Sanctimonialium Superioribus & Visitatoribus quibuscunque in virtute sanctæ obedientiæ præcipimus, & mandamus, ut, quantum in ipsis fuerit, atque pro horum temporum occasione & locorum commoditate fieri poterit, Monasteria Monialium sibi subiecta ad debitam clausuram & communem vitæ rationem, omni proprietate semota redigant, atque Moniales quascunque, vel alios impediētes Ecclesiasticis censuris, aliisque pœnis constringant.

XXXIV. Inclusoria, & congregationes Monialium in sylvis, aut aliis locis minus commodis existentes, ad alia loca hominum frequentia celebriora, ubi commode fieri potest, transferantur. (b)

XXXV. Moniales nondum clausæ extra Monasteria solæ non egrediantur: Ad convivias, ad nuptias Laicorum, sive Primitias Clericorum nullo modo accedant, extra Monasterium non pernoctent, ad Ecclesiarum Dedicaciones, ad nundinas non vadant, & per plateas & vicos oppidorum non discurrant. Quæ contrafecerint, & Dei ultionem, & nostram condignam atque severam animadversionem non effugient.

XXXVI. Canonissæ sæculares, continentiae & paupertatis studium nulla voti solennitate obstrictum sectantes commune habeant dormitorium, habitu modesto & castitatis indice utantur. Magna quoque instituti sui commoda perciperent, si communi mensa uterentur, quod, ut faciant, eas in Domino adhortamur. Abbatissæ, seu Præfectæ suæ sint obedientes, & Collegii, sive Monasterii constitutionibus in omnibus satisfaciant, quamdiu in eo manserint.

(t) d. Clem. Ne in agro. §. Regula. in fin.

(x) Ead. Sess. c. 17. concordat. 1. Paula. 20. q. 3.

(z) Vide Azorium lib. 13. c. 8. q. 4. Instit. moral.

(a) Sess. 25. de Regular. c. 5. c. Periculoso. de statu Monach. in 6. Videatur Bulla Pii V. edita an. 1566. quæ incipit: *Circa Pastoralis*. Item ejusdem edita an. 1569. quæ incipit: *Decoris*. Item Bulla Gregorii XIII. edita anno 1575. quæ incipit: *Ubi gratia*.

(b) d. Sess. 25. cap. 5. in fine.

(u) Sæped. Sess. 25. de Regular. c. 15.

(y) Ead. Sess. c. 3.



rint. Ad psallendum & laudandum Deum in Ecclesia sint frequentes, assidue & devotæ. A luxu ac mundi vanitatibus, a choreis & tripudiis, & aliis omnibus a loco sacro alienis, minusque dignis abstineant. Ea enim in Collegiis Canonistarum severe prohibemus, sed potius piis honestisque moribus a juventute ita asuescant, ut, cum rursus exierint, omnes facile, eas vere in educationis honestæ domicilio versatas & instructas fuisse, cognoscant.

## TITULUS IV.

*De Religiosis Domibus.*

## I.

**D**omus Religiosæ sunt Hospitalia, Xenodochia, Orphanotrophia, Leprosoria, & similia, (c) quarum cura & inspectio, sive Ecclesiastici, sive Laici administrationem habeant, cum Nobis de jure, (d) & Tridentini Concilii Decreto, (e) uti Ordinario competat, omnibus hujusmodi piorum locorum Administratoribus injungimus, ut non tantum fideliter munus suum obeant, Nobisque, si petierimus, id se facturos jurent, (f) sed etiam quotannis ad nostram requisitionem administrationis suæ rationem reddant, consuetudinibus & privilegiis quibuscunque non obstantibus. (g)

II. Fructus, eleemosynas, ac bona, quæ in administrationem sibi tradita sunt, in eos tantum usus, qui a piis Fundatoribus, aut alias constituti sunt, non in alios convertant; Pauperibus cujuscunque ordinis & sexus, quemadmodum uniuscujusque inopia requirit, & ejus voluntas, a quo bona illa profecta sunt, postulat, benigne & liberaliter distribuant. Quæ viduis designata sunt, dent viduis, quæ orphanis, dent orphanis, & quæ aliis deputata, ex iis illi, non alii vivant. (h) Neque im-

sterum circa ejusmodi res & fundationes pias ulla fiat mutatio sine nostra, aut Vicarii nostri, prævia causæ cognitione, obtenta licentia. (i) Nihil etiam ex bonis pauperum in suum, vel suorum privatum commodum vertant Administratores, (k) neque inutiles & superfluos sumptus faciant, nihil vendant, permutent, aut alienent, nisi iis servatis, quæ de jure requiruntur. (l) Unde administrationi piorum locorum non præsticiantur homines lucro & privato commodo dediti, egentes, prodigi, & qui rem suam administrare non possunt, sed pietate ac prudentia insignes, & qui moribus ac vita sint probati. (m)

III. In Hospitalibus, & aliis piis diversoriis, ubi hospitalitas exercetur, mares cum fœminis, etiam specie Matrimonii, nisi id certissime constet, non versentur. Ad ea loca circulatoribus, aleatoribus, nebulonibus, & istiusmodi hominibus nequissimis accessus non pateat.

IV. Mendici robusti, & morbum simulantes indiscussa causâ non recipiantur, sed graviter admoneantur, ut se potius in aliqua honesta arte exercent, & inde sibi vitæ subsidium comparent, quam ut ignaviæ ac desidiiæ dediti ostiatim in triviis & templis miserime mendicent.

V. Prima autem & præcipua cura sit in omnibus locis piis de salute animarum. (n) Ubi in hujusmodi locis proprii Sacerdotes sunt, iis serio mandamus, ut nihil eorum intermittant, quæ ad animarum salutem, pauperum, & infirmorum promovendam pertinent. Ubi vero non sunt, locorum Parochi, in quorum jurisdictione Parochiali hujusmodi loca existunt, eos invisant, verbo Dei, & Ecclesiæ Sacramentis pascant atque provideant, aliisque modis consolentur. (o)

## VI.

(c) Toto tit. Extr. & in 6. de Religiosis domib. c. In qualibet. 23. q. 8. d. Illud. cum L. seq. Cod. de Sacros. Ecclesiis.

(d) C. 3. & 4. de relig. domib.

(e) Sess. 7. c. 15. Sess. 22. c. 8. Sess. 25. c. 8. de Reform.

(f) Clem. Quia contingit. §. Ut autem. circa fin. de relig. domib.

(g) d. Sess. 22. c. 9. de Refor. d. Clem. Quia contingit. (h) d. Clem.

(i) d. Sess. 22. c. 6. de Reform.

(k) d. Clem. Quia contingit.

(l) Tot. tit. Extra in 6. & Clem. de reb. Eccles. non alienand.

(m) d. Clem. Quia contingit. §. Ut autem. de relig. dom.

(n) Sess. 22. c. 8. de Refor.

(o) Clem. Quia contingit. §. finali. de relig. domib.

VI. Omnes, qui piorum locorum sumptibus aluntur, Festis solennioribus contineantur, & Sacram Communionem reverenter accipiant. In Ecclesia & Sacro Missæ Officio sint frequentes, & quotidie pro Fundatoribus & Benefactoribus ad Deum preces effundant. Quod ut faciant, Parochi, & piorum locorum Præfecti eos adhortentur.

VII. Curent etiam Hospitalium, & aliorum piorum locorum Magistri, ne a peregrinis, advenis, & pauperibus quibuscunque aliquid contra Catholicam fidem, Christianam pietatem, & bonos mores admittatur.

## TITULUS V.

### *De Sodalitatibus seu Confraternitatibus.*

#### I.

**S**odalitates seu Confraternitates proximi adjuvandi, aut alia pia & legitima causa cum auctoritate erectæ, ubi collapsæ sunt, restituantur, ubi depravatæ, reformentur. Imposterum vero novæ Confraternitates a quopiam sive Clerico, sive Laico, cujuscunque dignitatis fuerit, sine Sedis Apostolicæ, aut nostra approbatione non instituantur.

II. Olim a Majoribus nostris in eum usum institutæ sunt Confraternitates, ut in iis tum quisque propriam, tum proximi salutem quæreret, ut orationes & Sacrificia pro vivis & defunctis fierent, ut conciones, aliaque ad pietatem incitamenta haberentur, fideles Christiani apud confratres viderent exempla, quæ imitarentur; hodie vero passim convenitur aut ad lusus, aut ad computationes & crapulas, quæ a primæva & pia institutione maxime sunt aliena, & quæ Nos sub gravissimis pœnis serio inhibemus.

III. Ubi ex institutione aliqua, aut laudabili ac necessario longo usu convivium aliquod fieri debet, in eo sit omnis frugalitas & modestia.

IV. Ad Confraternitates non recipiantur hæretici, aut de hæresi suspecti, criminosi, & peccatores publici, sed ii tantum, qui Deum timere, pacem colere, in charitatis operibus exerceri, mites atque humiles, ac Christianorum morum & disciplinæ amantes esse consueverunt.

Orationes, & alia pia opera, ad quæ ex Legibus & Statutis Apostolica aut ordinaria auctoritate confirmatis Confratres obligantur, non intermittant, sed officio ac pietati suæ quilibet faciat satis.

Redditus sive certi, sive incerti sint a deputatis Officialibus fideliter colligantur, & in usus necessarios convertantur; de iis, si petierimus, ratio Nobis quotannis fiat. (p) Officiales, & alii Ministri non sint perpetui, sed de anno in annum, aut ad summum de biennio in biennium semper novi constituantur. (q)

*Finis Partis Tertiæ.*

## CONSTITUTIONUM SYNODALIUM PARS QUARTA.

### TITULUS I.

#### *De Jurisdictione & Judicio Ecclesiastico.*

#### I.

**S**icuti in populo Christiano distincti sunt Status Ecclesiasticus & Sæcularis; ita etiam duplex est & distincta Jurisdictio. (r) Hinc Ecclesiasticarum personarum & rerum controversiis ac diffidiis componendis in unaquaque Diœcesi proprium est attributum forum. (s)

II. Et sane Ecclesiastica Jurisdictio Divina ordinatione ita instituta, & Sanctorum Patrum testimoniis, (t) variisque variorum Imperatorum Legibus (u) &

(p) Concil. Trid. Sess. 22. de Refor. c. 9.

(r) C. Duo sunt. d. 96.

(t) Conc. Trid. Sess. 25. de Refor. c. 20.

(q) Conc. Trid. Sess. 25. de Refor. c. 8.

(s) C. 1. de offic. Judic. ordin.

(u) L. Statuimus. & tot. tit. C. de Episc. & Cler. privil. L. Placet. C. de Sacros. Eccl. L. Cum Clericis. L. Omnes. C. de Ep. & Cler. facit c. Continua. §. Item Constantinus. c. Sacer. 11. q. 1. c. Futuram. 12. q. 1.

(t) Conc. Trid. Sess. 25. de Refor. c. 20.

& Rescriptis stabilita est, ut sæculari auctoritati ac jurisdictioni nihil deroget, sed una sine alterius præjudicio & offensione justitiam administrare possit, ut, scilicet Deo & Ecclesiæ militans, minime se sæcularibus negotiis implicet, ac vicissim ne rebus ille Divinis, & Ecclesiasticis præsideat, qui sæcularibus negotiis est implicatus. (x)

III. Ordinarie Judicium nostrum Ecclesiasticum Constantiæ in ambitu Ecclesiæ nostræ majoris, loco ad hoc deputato, publice celebretur, cum ea, qua decet, modestia ac gravitate. Qui locus nullo unquam tempore, sine nostro expresso consensu mutetur.

IV. Causæ Inquisitionum contra Clericos licet in Palatio nostro Episcopali tractentur, volumus tamen, ut sententiæ definitivæ non alibi, quam in loco Consistorii nostri solito pronuncientur: quod idem in omnibus causis matrimonialibus fieri mandamus. (y)

V. Celebretur autem Consistorium omni die semel hora nona matutina, in quo causæ Ecclesiasticæ omnes, sive novæ, sive pendentes, a Procuratoribus modeste proponantur, & a Judicibus nostris, servato juris ordine, sine longiori mora, & ad summum a die contestatæ litis intra biennium determinantur, & definiantur. (z) Excipimus primo omnes dies Dominicos, & Festivos, (a) quos sup. *Parte I. Tit. de Festis diebus*, enumeravimus. Deinde ferias Natalitias a Festo D. Thomæ Apostoli usque ad octavam Epiphaniæ Domini, tum ferias, quæ Bacchanales, & Paschales dicuntur, quarum priores sunt a Dominica *Quinquagesimæ* usque ad Dominicam primam *Quadragesimæ*, quæ *Invocavit* dicitur. Posteriores vero a Dominica *Palmarum*, usque ad Dominicam *Quasimodo geniti*. Denique messis & Autumni ferias, quarum hæc a festo S. Michaelis usque ad festum S. Galli inclusive, nisi vel citius, vel tardius Autumnus incideret, quo casu Vicarii nostri discretionis relinquimus ferias has vindemiales incipere & finire, ita tamen,

ne Consistoriales nostri a Consistoriis habendis pluribus diebus vacent, quam sunt inter prædicta S. Michaelis, & S. Galli Festa: Illæ vero a Festo Divi Jacobi Apostoli usque ad Festum D. Bartholomæi Apostoli, quæ alio nomine feriæ caniculares vocantur, a Majoribus nostris institutæ sunt.

VI. Quod si partes præsentēs, aut earum Procuratores feriis, quæ non in honorem Dei, sed ob utilitatem communem, vel alias causas institutæ sunt, præsertim vero in Matrimonialibus, & iis causis, quæ longiorem moram non patiuntur, renunciare vellent, permitimus, ut a Judicibus nostris audiri & expediri possint. (b)

VII. Alia Festa sunt, quæ Chori appellamus, quibus ante meridiem audientia judicialis non habetur. Ea sunt in *Januario* Festum S. Ivonis Patroni Consistorialium, Ss. Fabiani & Sebastiani, & Conversionis S. Pauli. In *Februario* S. Agathæ, Dorotheæ, & Cathedræ Petri. In *Martio* S. Fridolini & Gregorii. In *Aprili* S. Marci. In *Majo* Inventionis S. Crucis. In *Junio* Ss. Joannis & Pauli. In *Julio* Visitationis B. Mariæ Virginis, Udalrici, Margarethæ & S. Annæ. In *Augusto* S. Gebhardi Episcopi Constantiensis. In *Septembri* S. Verenæ, Fœlicis & Regulæ, & Exaltationis S. Crucis. In *Octobri* S. Lucæ Evangelistæ, & undecim millium Virginum. In *Novembri* omnium animarum, & Præsentationis B. Mariæ Virginis. In *Decembri* S. Barbaræ, Conceptionis B. Mariæ Virginis & Lucæ. Denique tota Octava Sanctissimi Corporis Christi. Atque his diebus, si necessitas postulaverit, & partes sint præsentēs, judiciumque urgeant, a prandio hora secunda pomeridiana Consistorium celebretur. Quas Ferias ideo hic transcripsimus, ut in Parochorum, & aliorum notitiam deductæ, partes litigantes pro consequenda justitia Constantiam commodius remitti, & venire possint, ne frustra itinerando vel diutius expectando magnos & inutiles sumptus faciant.

TITU.

(x) C. Cum ad verum. d. 96.

(z) Conc. Trid. Sess. 24. de Refor. c. 20.

(b) d. c. Conquestus. in fine.

Tomus VIII. Concilior. German.

(y) Facit c. Consuluit. de offic. Jud. deleg.

(a) C. 1. c. Conquestus. de Feriis.

B b b b b b



## TITULUS II.

*De Causis Ecclesiasticis, quæ de jure & immemoriali tempore ac consuetudine ad forum Ecclesiasticum Constantiense pertinent.*

## I.

**C**AUSÆ Ecclesiasticæ ad forum nostrum Ecclesiasticum pertinentes, varii sunt generis. Aliæ enim sunt mere spirituales ex sua natura; aliæ ex pure spiritualibus dependentes; aliæ vero mixtæ, quæ scilicet temporale aliquid spirituali annexum habent.

II. Puræ spirituales sunt, quæ circa fidem Christianam, circa Sacramenta & eorum administrationem, circa Ecclesias & cæremonias Ecclesiasticas versantur. Hinc causa Hæresis, (c) blasphemix in Deum & Sanctos, (d) Matrimoniales, (e) & his similes ad Ecclesiasticum forum pertinent.

III. Ex spiritualibus dependentes causæ sunt, quæ ex Matrimonio contrahendo vel contracto dependent, & emergunt: ut sunt causæ divortii, scævitiæ, deflorationis, ascriptionis prolis, taxæ dotis, legitimationis, quando scilicet dubitatur, num aliquis ex legitimo thoro sit procreatus, vel non: (f) Item causæ violationis & spoliationis Templorum, aliorumque sacrorum locorum. (g) Causæ sacrilegii, usuræ, & similium criminum Ecclesiasticorum, quorum cognitio & punitio de jure ad Episcopos pertinet, sive ea ab Ecclesiasticis, sive a Laicis perpetrentur. (b)

IV. Causæ mixtæ sunt Beneficia-

les, Jurispatronatus, (i) foundationum, decimarum majorum, minorum & novarium, tam in possessorio, quam in petitorio: omnium quoque jurium, servitutum, reddituum & proventuum quorumcunque Ecclesiasticorum, Episcopatum, Archidiaconatum, Decanatum, & Parochialium Ecclesiarum, Monasteriorum, Sacellorum, Fabricarum, Xenodochiorum, Leprosoriorum, & aliorum piorum locorum. (k) Item causæ testamentorum & legatorum ad pias causas. (l) His annumerantur causæ ratione personarum, quæ in judicium veniunt, quales sunt causæ omnes, quæ contra Clericos nostræ jurisdictioni subiectos moventur, sive reales, sive personales, sive civiles, sive criminales sint, etiam si eorum hæreditates & bona derelicta concernant. (m) Item causæ injuriarum, quibus personæ Ecclesiasticæ a Laicis afficiuntur. Causæ insuper viduarum & miserabilium personarum, (n) atque eorum, quibus justitiæ administratio ab aliis denegata fuit; (o) & tandem etiam eorum Laicorum, qui in obligationibus suis foro suo sæculari legitime renunciaverunt, & nostram Ecclesiasticam jurisdictionem prorogarunt, (p) & si quæ sunt aliæ similes causæ, quas Sacri Canones nonnisi in foro Ecclesiastico ventilari & determinari constituunt. Nam licet ex accidenti circa aliquid temporale versentur; tamen omni jure accessorium sequitur naturam sui principalis, (q) magisque dignum ad se minus dignum trahit.

V. Et quamquam hoc corruptissimo sæculo, quo omnia confunduntur, atque a recta ratione & justitiæ norma declinant, multi Sæculares & Laici

- (c) C. Excommunicamus. §. Adjicimus. de hæret. (d) C. 1. de offic. Jud. ordin.  
 (e) C. 1. in fin. de consang. & affin. c. Accedentibus. de excess. Prælat. Conc. Trid. Sess. 24. de Sac. Mat. can. 12. (f) C. Porro. c. De illa. de divort. c. De prudentia. de donat. inter vir. & uxor. tot. tit. Qui filii sint legit.  
 (g) C. Cum sit generale. de foro compet. (h) C. 1. de offic. Jud. ord. c. Novit. de Judic. d. c. Cum sit generale. (i) C. Quanto. de Judic.  
 (k) C. Si duobus. de Appell. c. Si Clericus. de foro compet. d. c. Cum sit generale. eod. per L. Si quis. L. Placet. Cod. de Episc. & Cler. (l) Conc. Trid. Sess. 22. de Ref. c. 8.  
 (m) C. 1. c. Si quis. de foro compet. c. Et si Clerici. c. Clerici. de Jud. c. 1. & 2. 11. q. 1. Auth. Ut Clerici apud propr. Ep. §. pen. coll. 6. (n) C. Ex parte. de foro comp.  
 (o) C. Ex tenore. de foro comp. (p) C. Significasti. eod. tit.  
 (q) C. Accessorium. de R. I. in 6. L. Cum principalis. L. Nihil dolo. §. Cum principalis. §. eod.

Laici plurimas ejusmodi causas ad sua fora sæcularia variis modis trahere conantur: Nos tamen his Sæcularium quorumcunque turbulationibus & attentatis Ecclesiasticæ nostræ jurisdictioni nihil derogarum esse volumus, ac declaramus, desuper solennissime protestantes, omnesque actus contrarios hac nostra Synodali Constitutione & proclamatione interrumpentes, atque Vicario & Officiali nostro serio mandantes, ut si hujusmodi causæ in forum nostrum adducantur, in iis, non attentis ullis avocationibus, appellationibus, inhibitionibus, aut aliis Processibus quibuscunque, Sanctorum Patrum, Canonumque Decretis, atque immemoriali consuetudine & stylo Episcopatus & Curie nostræ inhærendo, procedant, easdemque uti Judices competentes determinent & decident.

VI. Præcipimus quoque reliquis nostris Consistorialibus, ut ipsi hujusmodi causas in foro nostro ventilandas suscipiant & acceptent.

VII. Quod si quis Advocatorum vel Procuratorum Curie nostræ in supra nominatis causis, exceptionem fori declinatoriam, utpote meram causæ protelationem, & nostræ jurisdictionis elusionem confecerit & obtulerit, eum Vicarius noster juramenti, & fidelitatis sue Nobis præstitæ serio admoneat, & quatuor florenis puniat.

VIII. Prædictas causas Ecclesiasticas omnes & singulas, ut Prælati, Presbyteri, Clerici, & Laici quicunque in Dicecesi nostra Constantiensi existentes, si quæ eis vel nunc competunt, vel imposterum competierint, nusquam alibi, quam coram Nobis seu Judicibus nostris Ecclesiasticis instituunt & prosequantur, præsentī hac nostra Constitutione Synodali mandamus.

IX. Præterea Antecessorum nostrorum Constitutionibus (\*) inhærendo (r) serio inhibemus, ne de cætero persona Ecclesiastica quæcunque auxilium, subsidium seu defensionem Laicorum contra Nos & Jurisdictionem nostram

Ecclesiasticam sibi qualitercunque procurer, assumat, invocet, aut assumptam retineat: contrarium faciens, eo ipso excommunicationis sententiæ juxta Tridentinum Concilium subiaceat, (s) aliasque condignas pœnas tantæ suæ temeritatis a Nobis expectet.

X. Cæterum pollicemur omnibus, qui foro, & judicio nostro Ecclesiastico utuntur, Nos apud Judices & Consistoriales nostros pœnis & aliis competentibus remediis effecturos, ne partes litigantes diutius detineant, sed eis absque mora, affectu & partialitate justitiam administrent. (t)

XI. Vehementer etiam in Domino adhortamur, quoscunque Magistratus sæculares, ut suæ vocationis memores falcem in alienam messem non immittant, nostramque jurisdictionem Ecclesiasticam perturbent, meminerint gravissimam esse Sacri Tridentini Concilii (u) contra Ecclesiasticæ immunitatis & jurisdictionis violatores censuram, olimque in veteri lege eos impune non tulisse, qui contra Sacerdotii dignitatem aliquid egerint. Et multa passim in historiis exempla reperiri, quod Deus & in hoc, & in futuro sæculo Ecclesiasticorum jurium perturbatores severissime puniverit. Soli Episcopi & Prælati positi sunt, qui regant Ecclesiam, quos, qui spernit, non hominem, sed Deum ipsum, qui eos posuit, spernit.

XII. Sicuti autem Laici Ecclesiasticis causis se immiscere non debent; ita etiam Judicibus nostris Ecclesiasticis injungimus, ne ipsi Laicorum causas judicandas assumant. (x)

XIII. Quia vero causæ omnes in judicio nostro Ecclesiastico tractandæ & decidendæ, aut summariæ sunt, aut plenariæ, Nos in iisdem Juris Canonici & styli Curie nostræ formam atque processum observari volumus. Nominatim vero constituimus, ut causæ taxæ dotis & debitorum, quæ summam decem florenorum Rhenensium non excedunt, per processum summarium expediantur.

TITU.

(\*) Vid. T. VII. Synod. Constant. Diceces. sub Marco Sitico pag. 419.

(r) Vide antiqua Synodalia Statuta Parte 2. Tit. 18. c. 6.

(s) Conc. Trid. Sess. 25. de Reform. c. 10. in fin.

(t) C. Clerici. c. Qualiter. de Judiciis, & passim plurib. locis.

(u) Sess. 25. de Ref. Matr. c. 20.

(x) Sess. 25. de Reform. c. 20.

## TITULUS III.

*De Personis Judicii Ecclesiastici.*

## I.

**J**udicii nostri Ecclesiastici variae sunt personæ, quæ nomine & auctoritate nostra Judicio præsentantur & servantur. Inter eas Vicarius & Officialis noster primas obtinent, utpote causarum Judices, & reliquarum Consistorialium personarum Superiores. Sigillifer, Fiscalis, Advocati, Notarii, Procuratores, Commissarii, Scribæ, Nuntii, & Pedelli, reliquum numerum faciunt. Hi omnes sint Catholici, nec ante ad officium aliquod in Curia nostra admittantur, quam prius Catholicæ Fidei Professionem juxta præscriptum (y) PII IV. Pont. Max. præstiterint. Præterea viri graves, pacis studiosi, & a blasphemis, crapula, & omni levitate alieni: Statutorum nostrorum tam Synodali, quam Consistoriali, maxime vero Juris & Judiciarii processus, quantum cujusque officium requirit, sint periti. (z)

II. Partibus litigantibus sese humanos & benignos exhibeant, & ex æquo pauperibus divitibusque diligenter ac fideliter operas suas accommodent. Easdem ultra taxam in Statutis nostris Consistorialibus præscriptam nec pecuniæ exactione, nec convivis, nec alia quacunque ratione gravent; Causas non procrastinent, sed, ut quam citissime determinentur, procurent. Vicarium & Officialem Consistorii nostri capita, tam in, quam extra judicium revereantur, illorumque mandatis nostro loco obtemperent.

III. Et quia Vicarius & Officialis nostram personam repræsentant, volumus, ut non solum omnibus Consistorialibus vitæ honestate & diligentia præluceant, dignitatemque suam gravissime tueantur, verum etiam omnes

lites & actiones sine longiori mora breviter & mature, servato juris ordine, expediant, dilationes & terminorum præfixiones pro locorum distantia, & personarum actionisque qualitate, moderentur, atque constituent. (a)

IV. Pauperum quoque, pupillorum & viduarum defensio cum maxime nostro Episcopali incumbat officio, (b) diligenter curent Vicarius & Officialis noster, ne pauperes & aliæ personæ miserabiles in Consistorio nostro relinquantur indefensæ, sed eis juris & justitiæ administrationem implorantibus, ex officio Advocatos & Procuratores gratis constituent, vel etiam invitos judiciali Decreto compellant, eisque injungant, ut in hujusmodi pauperum causis tractandis non minorem adhibeant diligentiam, quam in causis locupletiorum adhibere solent.

V. Statuta nostra Consistorialia pro nostrorum temporum ratione reformatæ, singulis annis bis, Consistorii nostri personis omnibus in Palatium nostrum Episcopale congregatis publicentur & prælegantur, atque ea tam Vicarius, quam Procurator Fiscalis stricte exequantur, multasque & pœnas transgressoribus impositas exigant, minimeque remittant.

## TITULUS IV.

*De Executione Processuum.*

## I.

**C**um ab Antecessoribus nostris constitutum, & in Judicio nostro Ecclesiastico hætenus observatum fuerit, ut Citationes, Monitoria, Edicta, & alii Processus a Judicibus nostris decreti, ad evitandas majores expensas, quas partes litigantes facere deberent, si hujusmodi processus vel per Notarium publicum, vel Pedellum Curiae nostræ juratum ipsarum sumptibus conducendum executioni demandarentur, per Decanos rurales, Parochos, & alios Cleri-

(y) In Bulla, quæ incipit: *Injunctum*. Sub dato Romæ Anno 1564. Idib. Nov.

(z) C. Qui recte. c. Non licet. 11. q. 3. c. Non sane. 14. q. 5. C. de pœnis Jud. qui male judicav. vel ejus, qui Jud. vel advers. corrup. curav. per totum. L. Quisquis. C. Si certum petatur. (a) Sæped. Concil. Trid. Sess. 24. de Refor. c. 20.

(b) C. Causam. de Jud. c. Cum dilectus filius. de purgat. canon.

(c) Conc. Trid. Sess. 23. de Reform. c. 1.



Clericos partibus infinuatur, Nos hanc consuetudinem minime abolemus, sed ut in vigore suo permaneat, observe-  
turque impofterum, tenore præfenti-  
um decernimus, Decanis, Parochis,  
cæterisque Clericis quibuscunque in  
vim præficti sui juramenti præcipien-  
tes, ut literas, processus & mandata  
quæcunque a Nobis, Vicario & Offi-  
ciali nostro emanata, reverenter, ubi-  
que recipiant, statimque partibus cita-  
tis in faciem præfentent, ac legitime  
exequantur, diemque, mensem & an-  
num executionis factæ, atque nomen  
suum mandato & ejus copię diligenter  
& in hunc fere modum infcribant:  
*Executus sum hoc mandatum ego N. Ecclesiæ  
Parochialis in N. Parochus aut Sacellanus An-  
no, Die, Mense, &c.*

II. Curent vero Exequentes, ut  
processum originalem sigillatum parti,  
ad cujus instantiam decretus est, resti-  
tuant, copiam vero illi, contra quem  
processus emanavit, ostenso sibi origi-  
nali præfentent.

III. Quod si Processus sit Edictum  
publicum, in quo trina proclamatio  
requiritur, ut in causis Matrimoniali-  
bus impedimentorum fieri solet, tunc  
ita formetur executio: *Executus sum hoc  
Edictum ego N. Ecclesiæ Parochialis in N. Ple-  
banus, Vicarius, Coadjutor, aut Sacellanus  
publice, pro concione prima vice tali die Domi-  
nica vel festo, secunda vice tali, & tertia vi-  
ce tali, mense, anno, &c.*

IV. Cæterum, quia deprehendi-  
mus, quod in gravissimam legis frau-  
dem, justitiæ & jurisdictionis nostræ  
præjudicium ac vilipendium quidam  
Parochi suis Parochianis citationes &  
processus nimium tarde, aut cum al-  
terius partis periculo infinuatur, execu-  
tiones falsis dierum numeris, locisque  
annotando; Ideo Nos tantæ malitiæ  
tempestive occurrere volentes, omni-  
bus Clericis pro executione faciendâ  
requisitis serio injungimus, ut sine om-  
ni cunctatione, & periculo taliter pro-  
cessus exequantur, qualiter illos sibi  
a Judicibus nostris demandatos cogno-  
verint. Secus si aliqui fuerint depre-  
henfi, noverint, se malitiæ suæ gravif-  
simam pœnam, & justitiæ partique læsæ  
restitutionem daturus.

V. Quo minus autem Parochi &  
Clerici odiosis executionibus processu-  
um graventur, curabimus, ut, quan-  
tum fieri potest, processus per Pedel-  
los Curia nostræ juratos executioni de-  
mandentur. Nisi partes ipsæ ad evi-  
tandos sumptus Parochis citationes &  
processus ad exequendum attulerint,  
aut Pedelli nostri personas, contra quas  
processus sunt emanati, domi non in-  
venerint. Quibus & similibus casibus  
volumus, & mandamus, ut Decani,  
Parochi, vel alii Clerici quicunque re-  
quisiti processus hujusmodi legitime  
exequantur.

VI. Quia vero interdum contin-  
git, quod Personis Illustribus & in-  
dignitate constitutis infinuandi sint pro-  
cessus, & ea res non parum habeat  
aliquando difficultatis. Quocirca ut  
huic etiam rei suus sit constitutus mo-  
dus, & certa exequendi ratio, decer-  
nimus, si adversus hujusmodi perso-  
nas processus aliqui e foro nostro Ec-  
clesiastico emanaverint, ut Executor,  
sive is Clericus, sive Notarius publi-  
cus, sive Pedellus Curia nostræ juratus  
fuerit, ad eum locum, ubi reus domicili-  
um suum habet, accedat, & si accessus  
ad reum ipsi non facile concedatur, ut  
in faciem executionem facere possit,  
tunc vel ejus Consiliariis & Officialibus,  
vel Cancellariæ debita cum modestia ac  
reverentia processus tradat ac infinuet.  
Quod si nec ad sic faciendam executio-  
nem admittatur, nemoque sit, qui ab  
ipso processus accipere velit, eos vel  
valvis Ecclesiæ, vel portæ domus affi-  
gat, vel ante portam in publico con-  
spectu positos jacere sinat, nec ullo  
modo secum reportet, Nobisque, aut  
Vicario & Officiali nostro, quid sibi cir-  
ca hujusmodi executionem acciderit,  
fideliter & in scriptis referat.

VII. Quod si ad reum aliquem  
reique locum omnino difficilis, nec tu-  
tus esset accessus, nullusque invenire-  
tur, qui ob merum, potentiam, vel ty-  
rannidem rei, citationem ei in faciem,  
vel ad domum infinuare auderet, aut  
vellet, contra talem in valvis Ecclesiæ  
nostræ Cathedralis, & duarum vel tri-  
um aliarum ejus domicilio propinqua-  
rum Ecclesiarum Parochialium, ad quas

tutus est accessus, processus per afflictionem executioni demandentur.

## TITULUS V.

### *De Censuris Ecclesiasticis, & aliis pœnis Judicialibus.*

#### I.

**Q**uod multi sint hoc tempore, tam Clerici, quam Laici, qui Ecclesiæ censuras passim vel contemnant, vel omnino non curant, inde potissimum fieri existimamus, quod censurarum Ecclesiasticarum vim, & pœnarum in eis contentarum gravitatem maximaque salutis suæ discrimina, in quibus versantur, ignorent. Quæ, ut subinde populo tum publice ex Cancellis, tum privatim intimentur, ac inculcentur, Parochis, Concionatoribus & Confessariis serio injungimus.

II. Censura est Ecclesiastica correctio gravium quorundam scelerum vindex, Ecclesiasticæ disciplinæ nervus appellata, (c) qua in Ecclesia Dei gravior pœna non reperitur. (d) Ea pro delictorum genere ac diversitate tribus modis infertur, aut excommunicatione, aut suspensione, aut interdicto. (e)

III. Excommunicatio duplex est, (f) minor & major, quæ & anathematizatio dicitur, (g) & de qua hic præcipue agimus. Cujus excommunicationis fulmine percussi homines, ab omnibus Divinis Officiis, precibusque publicis, ab ingressu Ecclesiæ, quo tempore res Divina peragitur, a Sacramentorum participatione, & a Christiana sepultura excluduntur. (h) Ab omni item Canonica electione, tam passiva, quam activa, ab omni beneficio, munere & officio cujuscunque Ordinis, ita ut si illa exercent, irregularitatem incurrant. (i) Similiter ab omni potestate spiritali, ab actibus legitimis, (k) quibus homines inter se com-

municant, ab omni denique participatione bonorum operum Ecclesiæ, atque ex necessaria consecutione a regno Dei ac immortalī beatitudine prohibentur, & filii Satanæ æternæque damnationis efficiuntur. (l) Omnis Christianus, inquit D. Augustinus, (m) qui a Sacerdotibus excommunicatur, Satanæ traditur. Quomodo? Quia scilicet extra Ecclesiam Diabolus est, sicut in Ecclesia Christus, ac per hoc quasi Diabolo traditur, quia ab Ecclesiastica communione removeretur.

IV. Excommunicatio autem incipit aut ipso jure, aut ab homine infertur. Juris excommunicationes qui nosse voluerit, ut Parochi & Confessarii omnes nosse debent, in Corpore Juris Canonici inveniet, vel ex Summa Casuum conscientie Cardinalis Toleti, & Enchiridio de censuris Ecclesiasticis Feliciani Episcopi Scalensis, atque ex aliis probatis Authoribus petere poterit.

V. Excommunicatio, quæ ab homine infertur, proprie ad nostrum judicium Ecclesiasticum pertinet. Ea licet disciplinæ & jurisdictionis Ecclesiasticæ sit nervus, & ad populos in officio continendos valde salutaris, atque ad compellendos reos, ut juri se fiant, judicatisque pareant, necessarius, sobrie tamen magnaue circumspectione est exercendus, (n) ne, si temere & ex levibus causis incutiat, magis contemnatur, quam formidetur, & perniciem potius pariat, quam salutem. Proinde Sacri Oecumenici Tridentini Concilii Decreto (o) inhærentes, Vicario & Officiali nostro, & aliis quibuscunque in Civitate & Dicecesi nostra jus excommunicandi habentibus injungimus, ut in ferenda excommunicationis sententia valde cauti sint ac circumspecti, nec facile eam inferant, nisi gravibus de causis, & in quibus casibus alia juris remedia deficiunt. (p)

#### VI.

(c) Panorm. in c. Cum inter. de consuetud. not. 2.

(d) C. Corripiantur. 24. q. 3.

(e) C. 20. de verb. signific.

(f) C. Ad mensam. §. Aliquando. & §. Est & alia. 11. q. 3.

(g) C. Si habes. 23. q. 3.

(h) d. c. Ad mensam.

(i) C. 7. de Cler. excomm.

(k) C. Cum non ab homine. c. Intelleximus. de Judic.

(l) Vide D. Thomam. 4. d. 18.

q. 2. art. 1. q. 36.

(m) Relatus in c. Omnis Christianus. 11. q. 3.

(n) C. Delicto. de sentent. excomm. in 6. c. Multi. in princ. 2. q. 1. c. Corripiantur. 24. q. 3.

(o) Sess. 25. de Reform. c. 3.

(p) C. Nemo Episcoporum. 11. q. 3. & d. Sess. 25. c. 3.

VI. Quod si Executio realis vel personalis in quacunque parte iudicii a Iudicibus propria auctoritate fieri nequeat, vel pars contumax pœna pœcuniaria, pignoris captione, personali distractione commode compelli, aut si contra Ecclesiasticas personas ad suspensionem ab officio, & beneficiorum privationem procedi non possit, his & similibus casibus, contra quoscunque sive Clericos, sive Laicos contumaces licebit Iudicibus hoc spirituali gladio uti. (q)

VII. Ne autem excommunicatio etiam his casibus nimia frequentia vilescat, multique indignum esse asserant, ut propter causas pecuniarias tam gravis censura feratur: Decernimus, ut in causis, in quibus principaliter salus animæ non versatur, in contumaciam non comparentis, nec iudicio satisfaciens rei procedatur, causaque concludatur, atque sententia definitiva terminetur, prout in Statutis tum Synodalibus prioribus, (r) tum Consistorialibus ab Antecessoribus nostris est constitutum.

VIII. Si vero ad executionem rei iudicatæ perventum, & condemnatus in satisfaciendo sententiæ negligens fuerit, (s) processus executoriales sub pœna pecuniaria pro personarum & causarum qualitate pio alicui loco applicanda, privatione, vel aliis remediis juris decernantur, & si condemnatus his non moveatur, tum demum excommunicationis censura infligatur.

IX. Ut Majores nostri & humano, & Divino Jure id ipsum postulante, excommunicationis censuram sive illa ipso jure, sive a Iudice illata fuerit, non tantum vehementer formidarunt, verum etiam excommunicatos in familiari conversatione vitarunt: Ita ut hoc idem nostris temporibus fieret, valde optamus: Nemo, inquit S. Chrysost., (t) Ecclesiæ vincula contemnat: non enim homo est, qui ligat, sed Christus, qui hanc potestatem dedit. Sane tanta

excommunicationi inest contagio, ut non modo excommunicatos donis ac bonis spiritualibus omnibus privet, sed eos etiam contamineat, qui cum illis communicant. (u)

X. In Clericos excommunicatos Vicarius & Fiscalis noster severissime animadvertant: contra Laicos vero quoscunque, si post legitimas monitiones non resipuerint & satisfecerint, sed obdurato animo in excommunicatione inforduerint, non tantum ad invocationem brachii sæcularis, sed etiam tanquam de hæresi suspectos procedant. (x)

XI. Caveant autem Parochi, & ipsorum Cooperatores diligentissime, ne excommunicationem contra aliquem sibi transmissam denuncient, nisi literæ sint authenticæ & sigillo confirmatæ, in quibus explicetur iusta excommunicationis causa & contumacia rei in Iudicem, coram quo monitus, ac peremptorie citatus, se sistere contempserit.

XII. Suspendio est censura Ecclesiastica, qua quis ab usu ordinum officii & beneficii sui Ecclesiastici ita prohibetur, ut si durante prohibitione actum aliquem illius ordinis aut officii, a quo suspensus est, exercent, non tantum gravissime & mortaliter peccet, sed etiam irregularis fiat. (y)

XIII. Hæc ut excommunicatio a jure ipso facto infligitur, aut a Iudice infertur. Quæ juris sunt, aliunde petantur, suspensiones autem judiciales in personas Ecclesiasticas, in quas solas cadunt, (z) cum moderatione, & non nisi gravi & iusta de causa tum demum pronuncientur, quando, ut supra de excommunicatione constituimus, alia ibidem recensita remedia deficiunt. Nam si ita frequentes sint Clericorum ab executione ordinum & officiorum suorum suspensiones, & cura populi commissi negligitur, & conscientiæ Clericorum non sine maximo scandalo, & Sacramentorum summa irreverentia variis

(q) d. Sess. 25. c. 1. & c. Si quis deinceps. in fin. 17. q. 4.

(r) Parte 2. Tit. 18. c. 16.

(s) Vide Concil. Trid. d. Sess. 25. c. 3.

(t) Relatus in c. Nemo contemnat. 11. q. 3.

(u) C. Cum excommunicato. 11. q. 3.

(x) d. Sess. 25. c. 3. in fine.

(y) C. 1. §. Caveant. de sent. excomm. in 6. c. Cum æterni. de re jud. in 6.

(z) C. 1. de re jud. in 6.



cenſuris & irregularitatibus intrican-  
tur. Quare Vicario & Officiali noſtro  
injungimus, ut, antequam ad Clerico-  
rum ſuſpenſiones procedant, prius pe-  
cuniariis, aut aliis pœnis eos ad obe-  
dientiam & ſatisfactionem adigere con-  
tendant.

XIV. Temporibus anni ſolennio-  
ribus, quale etiam eſt tempus Quadra-  
geſimæ, dies Rogationum, & ſimiles  
contra Clericos nec ſuſpenſiones, nec  
excommunicationes in iudicio noſtro  
decernantur, aut antea decretæ execu-  
tioni mandentur, ſed in aliud tempus  
differantur.

XV. Publice quoque in Conſiſto-  
rio, atque judicialiter a Iudicibus no-  
ſtris non decretæ ſuſpenſiones vel ex-  
communicationes ſub gravi pœna a ne-  
mine emittantur. (a)

XVI. Interdictum Eccleſiaſticum  
eſt cenſura, quæ ut excommunicatio  
& ſuſpenſio, aut ipſo jure incurritur, aut  
a Iudice Eccleſiaſtico inferitur, quando  
ſcilicet vel generaliter, vel ſpecialiter  
aliqua Provincia, Univerſitas, Civitas,  
Eccleſia, vel perſona interdicatur, ut  
Miſſæ Sacrificium, cæteraque Divina  
Officia celebrari non poſſint. (b) Quæ  
cenſura, quia rarius infligitur, neque  
huius ſit inſtituti omnia velle proſequi,  
quæ paſſim in Jure & apud Juris Do-  
ctores tam de hac, quam aliis horum  
Statutorum materiis traduntur, eo nos  
Clericos noſtræ Diceceſis remittimus, &  
ſerio adhortamur, ut ſalutis & vocatio-  
nis ſuæ memores, vitam, mores & of-  
ficia ſua Eccleſiaſtica ita componant,  
ne in has graviffimas pœnas & cenſuras,  
ipſo factò & jure incurrant, vel a Ju-  
dicibus Eccleſiaſticis ad continendum  
eos in officio, eiſdem innodari de-  
beant.

## TITULUS VI.

### *De Abſolutionibus.*

#### I.

**C**ENſuræ Eccleſiaſticæ quia variz  
ſunt, varie etiam iſdem innodati

abſolvi debent. Nam quæ a jure illa-  
tæ ſunt, Romano Pontifici, aut Nobis  
ad abſolvendum ſunt reſervatæ. Quare  
qui cenſuram aliquam Sedi Apoſtolicæ  
immediate reſervatam incurrerunt, non  
aliunde, quam a Romano Pontifice, vel  
ab iis, qui ab eodem in huiusmodi  
caſibus abſolvendi poteſtatem & privi-  
legium obtinent, abſolutionem impe-  
trare debent. Qui vero cenſuras No-  
bis reſervatas ipſo jure inciderunt, ab-  
ſolutionis beneficium a Nobis, vel Pœ-  
nitentiaro noſtro ordinario, aut ab eo,  
cui a Nobis, aut Vicario noſtro com-  
miſſum fuerit, in foro conſcientiæ pe-  
tant.

II. Quod ſi huiusmodi cenſuræ ju-  
dicialiter a Iudice Eccleſiaſtico decretæ  
fuerint, a nullo alio, quam ab eodem  
Iudice, ſi prius parti & Eccleſiæ, cujus  
claves & juridiſctio contumaciter con-  
tempta fuit, factum fuerit ſatis, ordi-  
narie impetranda erit. Quod ut judi-  
cialiter quoque & in ſcriptis fiat, ſive  
Clerici, ſive Laici judicialiter excom-  
municati vel ſuſpenſi fuerint, omnibus,  
præſertim vero Vicario, & Officiali no-  
ſtro injungimus.

III. Quia vero excommunicati  
nonnunquam ſe abſolutos eſſe falſo af-  
ſerunt, ex quorum communione peri-  
cula eveniunt animarum, præſenti Con-  
ſtitutione inhibemus, ne de cætero Pa-  
rochus, ſive alius Sacerdos curatus,  
quamcunque perſonam ſuæ Parochiæ  
excommunicatam publice ad Divina  
Officia & Sacramenta Eccleſiaſtica ad-  
mittat, vel coram ea Miſſam celebret,  
aut abſolutam credat vel teneat, niſi  
de abſolutione ſua, literis authenticis &  
ſigillatis, legitime docuerit. (c) Trans-  
greſſores ultra pœnam juris, noſtram  
quoque condignam punitionem non  
evadent.

## TITULUS VII.

### *De Appellationibus.*

#### I.

**N**E appellationis remedio, quod ad  
innocentiæ præſidium inſtitutum  
eſt,

(a) Facit c. Si quis Episcopus. c. Servetur. 11. q. 3. c. Legum. 2. q. 1. c. Nullius. 4. q. 4.

(b) C. Quærenti. de verb. ſign. c. 5. de conſuet. c. 43. de ſentent. excomm.

(c) Facit c. Cum pro cauſa. c. Si quando. de ſentent. excomm. Clem. ſin. eod. Conc.  
Trid. Seſſ. 13. de Reform. c. 5.

est, ad iniquitatis defensionem & ad evitandas pœnas abutantur improbi, decernimus, ut in causis criminalibus Clericorum, visitationis & correctionis morum, quævis appellatio, etiam ad Sedem Apostolicam a Nobis, seu nostro in Spiritualibus Vicario Generali ante definitivam sententiam ab Interlocutoria vel alio quocunque gravamine interposita, executionem eorum, quæ decreta aut judicata fuerunt, minime impediat aut suspendat, sed ea tanquam frivola omnino rejiciatur, atque in hujusmodi causis quacunque inhibitione, stylo & consuetudine contraria non obstante, ad ulteriora procedatur. (d)

II. In cæteris quoque causis, quæ coram Judicio nostro Ecclesiastico ventilantur, Judices nostri Appellationes omnes frivole sine legitima causa, & ut plurimum ad vexandum & defatigandum adversarium interpositas, rejiciant.

III. Appellationes omnes a Judicio nostro ad Metropolitanum nostrum Moguntinensem juxta hætenus observatum stylum Curiae nostræ interponantur; ad alios Judices quoscunque præsertim sæculares interpositæ rejiciantur.

IV. Quod si quis Advocatorum, five Procuratorum Curiae nostræ etiam si partes & clientes sui ita jussierint, a Consistorio nostro in causis Ecclesiasticis, quas supra recensuimus, ad Judicem sæcularem quemcunque sive in scriptis, sive viva voce, sive judicialiter, sive extrajudicialiter appellationem interposuerit, in eum Nos gravissime præter pœnam viginti florenorum, pro tanta sua temeritate Fisco nostro solvendorum animadvertemus.

## TITULUS VIII.

### *De Visitationibus.*

#### I.

**S**tatuit Sacra Tridentina Synodus, (e) ut singulæ Diœceses semel in anno, vel si propter latitudinem Diœ-

cesis fieri non possit, saltem biennio visitentur. Quæ visitatio ut in Episcopatu nostro Constantiensi amplissimo, commode institui possit, præsentium tenore Diœcesim nostram totam in quatuor partes sive plagas dividimus, in Sueviam scilicet, in Almengoviam cum adjacente Sylva Brigantina, in Brigoiam cum vicina sylva Hercinia, & in Helvetiam, in quibus præter Decanos rurales, quorum officium est, ut supra de Decanis præscripsimus, quotannis regiunculam, sive Decanatum suum visitare, quatuor speciales Visitatores viros maturi judicii, prudentes, pios ac doctos constituemus, qui non tantum, ut Decani officio suo rite perfungantur, providere, verum etiam singulis annis partem seu plagam Diœcesis nostræ sibi assignatam visitare, & ad nostros duos generales Visitatores Constantiæ commorantes referre, atque ab iisdem quoad Visitationis officium tam ipsi, quam Decani rurales dependere debent.

II. Delegabimus autem visitandi munus generale viris gravibus, discretis, probis, scientia rerum agendarum peritis, ac boni nominis & exempli in Civitate Constantiensi Beneficiatis, & quantum fieri pro temporum ac personarum qualitate potest, in Ecclesiastica aliqua dignitate constitutis, qui quotannis duas partes Diœcesis nostræ, & in iis non solum Parochos, & eorum Ecclesias, sed etiam Collegiatis, & Regularium Ecclesias, atque Clericos sive Sæculares, sive Regulares quoscunque Nobis subiectos, nostra, exemptos vero, Apostolica auctoritate Nobis vigore Tridentini Concilii delegata, juxta ejusdem Concilii præscriptum visitabunt, (f) curabuntque, ut omnium Ecclesiarum & Capitulorum Statuta examinentur, revideantur, & juxta Sacri Tridentini Concilii & præsentis nostræ Synodi Decreta reformentur, & universim omnia & singula, his nostris Statutis Synodalibus definita, ab iis, quos ea concernunt, studiose observentur.

#### III.

(d) Concil. Trid. Sess. 13. de Reform. c. 1. Sess. 22. c. 1. Sess. 24. c. 10.

(e) Sess. 24. de Reform. c. 3.

(f) Sess. 6. de Reform. c. 4. Sess. 7. de Reform. c. 2.

Sess. 13. de Reform. c. 1. Sess. 22. c. 1. Sess. 24. de Reform. c. 9. 10. & 11.

Tomus VIII. Concilior. German.

C c c c c

III. Qui quidem Visitatores generales Nobis speciali juramento obstricti, munus suum diligenter ac fideliter, omni odio, rancore, amore & affectu semotis exercere, minores excessus corrigere, emendare, & punire, majores vero, totamque visitationis suæ seriem, quamprimum ex visitatione domum reversi fuerint, Nobis, & Ecclesiasticis nostris Consiliariis in scriptis referre debent, ut, quod ad jurisdictionis & disciplinæ Ecclesiasticæ conservationem statuendum sit, mature deliberare valeamus.

IV. Visitatores nostri tam speciales, quam generales neminem sumptibus superfluis gravent, pro visitatione nihil postulent, aut extorqueant, iis exceptis, quæ ad moderatum victum & visitationis sumptus necessarios pertinent. (g) Qua in re speramus Prælatos, Parochos, & cæteros quoscunque, ad quos Visitatores nostri visitandi causa pervenerint, prompte ac libenter procuracionem, ad quam de jure tenentur, (b) præstituros.

#### TITULUS IX.

##### *De Celebratione Synodorum, & executione Statutorum Synodali- um.*

###### I.

**M**Axime necessaria est in hac tanta, qua his calamitosis temporibus versamur, Ecclesiasticarum rerum perturbatione ad conservandam unitatem fidei, & morum honestatem, atque ad salutem populi Christiani Nobis commissi promovendam, Synodorum celebratio. Quæ licet juxta Sacri Trid. Concilii Decreta (i) quotannis esse deberet, quia tamen propter varia & multiplicia impedimenta Synodus Diece-  
sana in hoc nostro Constantiensi Episcopatu singulis annis celebrari non potest, curabimus nihilominus, ut sæpius, quam forte hætenus, & toties, quoties Ecclesiæ & Diece-  
sis nostræ necessitas postulaverit, posthac celebretur. Ad quam non solum ordina-

riæ nostræ jurisdictioni subiecti, sed etiam exempti omnes, qui alias cum juxta Sacrum Trid. Concilium cessante exemptione, tum ex antiquissima Diece-  
sis nostræ consuetudine interesse debent, accedere teneantur. (k)

II. Et quia parum utilitatis adfert, etiamsi Synodus Diece-  
sana sæpius celebretur, atque pro temporum conditione salutare leges condantur, nisi etiam sint, qui ea, quæ salubriter constituta sunt, executioni demandent. Idcirco in Executores generales præsentium Statutorum Synodali-  
um ordinamus & deputamus Vicarium, Officialem, Sigilliferum, Fiscalem, Visitatores nostros, & alios, quos vel Nos, vel Vicarius noster Generalis deputabimus, eisdem vigore juramenti sui Nobis præstiti præcipientes, ut supradicta omnia & singula Statuta, quantum cuilibet pro ratione officii sui incumbit, & eis de jure permissum est, debite exequantur.

III. Prælati quoque, & alii Superiores Cathedralis nostræ Collegiatarumque Ecclesiarum, nec non Monasteriorum quorumcunque, atque Decani rurales quilibet in sua Ecclesia, Monasterio & Decanatu studiose animadvertant, curentque, ut a Canonicis, Parochis, Capellanis, Clericis, & Religiosis suis omnia & singula, quæ in hac nostra Synodo sancita & definita sunt, in quantum unumquemque concernunt, fiant, eaque, quæ ipsis de jure & harum Constitutionum virtute commissa, ac demandata sunt, diligenter executioni demandent.

IV. Postremo, quæ in hac nostra Diece-  
sana Synodo determinata, decreta & statuta sunt, Nobis declaranda reservamus; Inprimis vero illa omnia & singula, cum ea, qua decet, obedientia & reverentia, auctoritati, judicio & censuræ Sanctissimi Domini nostri, Domini PAULI, Divina providentia Papæ hujus nominis V. & Sanctæ Sedis Apostolicæ emendanda, corrigenda, augenda, minuenda, approbanda, vel rejicienda humiliter subijcimus.

*Finis Partis Quarta.*

DE-

(g) d. Sess. 24. de Reform. c. 3.

juncto cap. Cum ex officio. de Præscript.

(k) d. Sess. & C.

(b) C. Cum instantia. c. Cum venerabilis. de Censib.

(i) Sess. 24. de Reform. c. 2.



## FORMA VULGARIS ET GERMANICA

## DECRETORUM MATRIMONIALIUM IN DIOECESANA

Synodo Constantiensi editorum, atque ab omnibus Parochis &amp;

Curatis bis in anno ex Cancellis publicandorum.

Andächtige in Christo, nachdem der Heilige Ehestandt von dem Allmächtigen Gott erstlichen in dem Paradies eingesetzt, und hernach in dem Evangelischen Gesetz durch das hohe Verdienst des bitteren Leidens und Sterbens Christi Jesu, zu einem Sacrament verordnet worden: Also will sich in allweg gebühren, daß dieß heilige Sacrament auch nicht anderst, dann mit aller Andacht, Zucht und Erbarkeit angenommen werde. Dieweil aber etliche Zeit und Jahr hero, sich allerley Mißgebräuch und Ergernuß zu großem Nachtheil der Seelen Heil und Seeligkeit zugetragen, so ist der Hochwürdige Fürst und Herr, Herr Jacob, Bischoff zu Constanz, Herr der Reichenaw und Deningen, ic. inn dem jüngstgehaltenen Constanzischen Synodo hochverursachet worden, hierinnen ein gebührendes und nothwendiges Einsehen zu thun, Daß hero dann ire Fürstl. Guad. zu Abstellung solcher Mißbräuch und Ergernuß, etliche auß dem Heiligen allgemeinen zu Trient gehaltenem Christlichen Concilio, auch auß geschriebnen gemeinen Geistlichen Rechten gezogene heilsame Ordnungen und Satzungen auffgerichtet und beschloffen: Und damit dieselbige männiglich eröffnet werden, auch sich der Unwissenheit niemands zu entschuldigen habe, mit als ewern Pfarrern, wie auch allen anderen Seelsorgern ihero J. G. Bistums Constanz ernstlichen aufgelegt und befohlen, euch solche vorgemeldte Satzungen zuverkünden, damit sich ein jede Person in Heuraten und anderen Ehelichen Sachen darnach wissen zu richten.

Erstlichen soll das heilige Sacrament der Ehe von niemands, was Stands der seye, anderst contrahiert und angenommen werden, dann in Gegenwart seines eigenen Pfarrherrn, oder eines anderen Priesters, mit des Pfarrherrn, des Bischoffen, oder seiner

Fürstl. G. Vicari Bewilligung, sampt zweyer oder dreyer Zeugen. Sonsten da einer, oder eine anderer Gestalt sich verheuraten wurde, ist solche Ehe nicht allein vor Gott und der Kirchen nichtig, unbündig und kraftlos, sondern auch macht das heilige Concilium zu Trient, diejenige Personen zu solchem vermeinten Heurat ganz unfähig und untüchtig.

Und ob gleichwol das Eheliche Versprechen, wann es in Gegenwartigkeit des Pfarrherrn und zweyer oder dreyer Zeugen, wie obgemeldet, nit vollzogen, unbündlich und kraftlos: Jedoch, dieweil solches wider der Kirchen Verbott geschieht, so begangen diejenigen, welche sich also verheuren, ein grosse und schwere Todtsünd, von welcher sie niemand, dann der Bischoff, oder ihr J. G. und des Bistums verordneter general Beichtvatter absolvieren und entbinden kann.

Ehe und zuvor aber sich zwey mit einanderen verheuraten, so sollen sie drey nachfolgende Sonn- oder Feiertag, durch ihren eigenen Pfarrherrn, under dem Ampt der Heiligen Mess, under der Predig auff der Cangel, oder wie es sich nach Gestaltsame und Gelegenheit der Zeit und des Orths verrichten lasset, öffentlich verkünd werden. Es were dann, daß die Ehegemächt, oder deren eins besorgten, daß ihr Ehe (welche die Kirch fren, ungezwungen und ohnverhindert haben will) von wegen sovil vorgehender Verkündung, der Ehelichen Freyheit und den Rechten zuwider, von jemand, wer der sey, bosshafftiglich verhindert werden wolte oder möchte, In welchen Zahl genug ist, daß eintweder allein ein Verkündung zuvor beschehe, oder das Eheliche Versprechen in Gegenwart des eigenen Pfarrherrn, auch zweyer oder dreyer Zeugen ohne einige Verkündung vollzogen werde, welche Verkündungen her-

nach vor dem Benschlaff öffentlich in der Kirchen beschehen sollen.

Es sollen auch die drey obgemeldte Verkündungen, ausserhalb obgeschriebenen Zahls, darinnen ihre Fürstl. Gn. eines jeden Gewissen beschwert, und so fern einige Gefahr gebraucht wurde, die gebührende Straff vorbehalten haben wollen, ohne des Bischoffs oder ihr Fürstl. Gnad. Vicari ausdrückliche Bewilligung, keins wegs, von den Pfarrherren underlassen, oder mit einiger hoch- oder nider Standts- Person dispensiert werden, Inmassen auch die Pfarrherren kein denuntiation oder Verkündung fürnehmen, es sey dann solche von denen selbst, so sich Ehelichen versprechen wollen, begehrt worden.

Und wann sich begeb, daß auß den drey oder einer vorgehenden Verkündung, eine oder mehr Verhinderung fürkommen wurden, sollen solche Personen von den Pfarrherren nicht zusammen gegeben, sondern für das Geistliche Bischöfliche Consistorium naher Costantz gewisen werden.

Welche aber böshafftiglich ein falsche Verhinderung durch sich selbst, oder durch andere für- und anbringen wurden, dieselbigen wollen ir Fürstl. Gnad. neben anderem gebührliehen rechtlichen Einsehen, mit dem Geistlichen Bann abstraffen, Auch diejenige, so ein Verhinderung wissen, und ohne erhebliche Ursachen erst nach beschehener Verkündung und Ehelichen Zusammengeben solche anzeigen, ferner nicht anhören, sonder ein ewig Stillschweigen auferlegen lassen.

Es wollen auch die Pfarrherren alle und jede newe Eheleut mit allem Ernst ermahnen, daß sie nach Inhalt des heiligen Tridentinischen Concilii, vor dem öffentlichen Kirchgang, und Empfangung des Priesterlichen Segens, in einem Haus nicht wohnen, oder sonst zusammen schliessen. Und dann so befehlen ihre F. G. allen und jeden Seelsorgern, daß sie der newen angehenden Eheleuten, wie auch der Gezeugen Tauf- und Zunammen, zu sampt dem Tag, Monat, Jahr und Orth des beschehenen Versprechens und Zusammengebens,

in ein sonderbahr Buch fleißig aufschreiben und verzeichnen, dasselbige in Zahl der Nothturfft, zur Bezeugung verloffner Sachen haben fürzulegen.

Und demnach nicht allein das heilige Concilium zu Trient die newe Eheleut ermant, daß sie vor irem Ehelichen Versprechen und Zusammengeben, oder auß das wenigst drey Tag vor dem Ehelichen Benschlaff, ihre Sünd beichten, und das hochheylige Sacrament des Altars empfangen, damit sie der Gnad des heiligen Sacraments der Ehe desto mehrer fähig und theilhaftig werden: Sonder auch vor dieser Zeit, ein uralter löblicher Gebrauch in dem Bistumb Costantz gewesen, und noch an etlichen Orthen ist, daß die Eheleut vor dem Kirchgang beichten: Also ist ihr F. G. ernstlicher Will und Befehl, daß hinfürter an den Catholischen Orthen dero Bistumbs Costantz die newe Eheleut nit eingeführt werden, sie haben dann zuvor ihrem Pfarrherren, oder einem anderen Priester, mit ihres Pfarrherren Wissen zum wenigsten gebichtet, und sich, wie es oben angedeutet, mit rechter wahrer Andacht, in Zucht und Erbarkeit, das heilige Sacrament der Ehe zu empfangen, gerüst und beflissen.

Ferner ist ihr F. G. Befehl, daß die Pfarrherren die newe Eheleut ohne sonderbahre ihr F. G. oder derselben Vicari schriftliche Erlaubnuß, an keinem andern Orth als in der Kirchen, in welcher die heilige Sacramenten sonderlich außgespient werden sollen, Ehelichen zusammen geben und einsegnen, und solches erst nach vollendem Gottesdienst, und Opfer der heiligen Mess, welchem die angehende Hochzeitleut von Anfang bis zum End in allweg bewohnen sollen, derhalben die Pfarrherren ihre Pfarrkinder, und die newe angehende Eheleut mit Ernst ermahnen wollen, sich bey guter Zeit, und zu der bestimpten Stund, zu der Kirchen und Gottesdienst zu beflissen, und zu befürdern, wann sie eintweder ohne die Zusammengehung nit gar hingewisen, oder aber umb ein, zwey oder drey Pfund Wachs, für die Fabrich der Kirchen, gestrafft werden wollen.

Und



Und dieweilen sich offtermahlen begibt, daß die Bettler und andere Landfahrer, die kein bleibend, oder gewiß Heimwesen haben, von einem Orth zum andern streiffen, ihre rechte Ehesweiber verlassen, und bey ihrem Leben mit nur eine, sonder etwa mehr vermeinte Ehesweiber an mancherley Orthennemen: So ist hierauff an alle und jede Pfarrherren und Seelsorger ihr J. G. ebenmässiger ernstlicher Befehl, bey Vermeidung schwerer Straff, dergleichen Ehen mit zusammen zugeben, einzuführen und einzusegnen, es sey dann, daß sie zuvor ein fleißige Inquisition und Erforschung ihres Vatterlands, Thuns und Lassens, und aller Sachen Beschaffenheit gehalten, und was sie also befunden, ahn ihr J. G. oder dero Vicari gelangen lassen, und von ihnen weiteren Befehl, was hierinnen zu thun sey, empfangen haben.

Obwol die Ehen, so von den Kindern ohne ihrer Eltern Vorwissen und Bewilligen beschehen, nicht unbündig und Krafftlos, sintemal zu kräftiger Verheurung der Kinder nothdürftiglich, und von Rechts wegen, der Eltern Bewilligung nicht vonnöthen, und erfordert wird, Jedoch dieweil es den Kindern wol ansteht, auch in diesem Fall ihre Eltern zu ehren: Also sollen die Pfarrherren die Kinder auff der Cangel offtermahls leren und ermahnen, ihre Eltern inn gebührenden Ehren zu halten, ihnen zu gehorsamen, und ohne ihr Wissen und Willen sich leichtlichen nit zu verheuren, und in einem so schweren und gefährlichen Stand zu begeben.

Wann auch die Ehen frey und ungezwungen sein sollen, und ungöttlich, unbillig und wider Recht ist, die Freyheit der Ehe zu schwächen oder jemand zubenemen, so befehlen ihre J. G. allen Pfarrherren, bey Verlierung ihrer Pfrunden, und Entsetzung ihres Priesterlichen Ampts, keine dergleichen gezwungene und ihnen bewusste Ehen, in keinerlei Weiß noch Weg, zusammen zugeben: Inmassen auch alle diejenige, was Stands, Würde und Wesens die seyen, so ihre Kinder, Underthonen, oder andere zu einiger Ehe wider ihren Willen antreiben, nötigen, und zwingen,

mit dem geistlichen Bann, laut mehrmals angezogenen Concilio zu Trient, ohnfehlbar gestrafft werden sollen.

Es wollen auch alle und jede Pfarrherren sich dahin starck bearbeiten und beflissen, damit ihre Catholische Pfarrkinder sich nit mit Secttischen Ehelichen einlassen und verheuren, und also das zeitliche Naab und Guth, Ehr und Ansehen, ihrer Seelen Heil und Seeligkeit fürziehen: Und verhoffen ihre J. G. es werde hierinnen der Catholische Magistrat für sich selbst sein gebührende Inspection haben, und dergleichen Heurat bey ihren Catholischen Underthonen abwehren.

Die Miß- abergläubische und lecherliche Gebräuch, so an vilen Orthenn bey den Hochzeiten, so wol inner- als ausserhalb der Kirchen beschehen, als das synd, bey dem Haar- und Ohren ziehen, brennende Kerzen umb die angehende Ehegemächt herumgehen, und dieselben durch sie ausblasen lassen, Brot anbeissen, und under das Vold werffen, und was dergleichen Gauckel- und Narrenwerck mehr ist, sollen die Pfarrherren und Seelsorger nicht allein mit Ernst abstellen, sondern auch die Ungehorsame umb ein Pfund Bachß, so der Fabrich und Kirchen Hallgen heimfallen soll, abstraffen. Inmassen auch ihr J. G. sich getrösten, daß aller Orthenn die Obrikeit den grossen Bracht und überschwencklichen Unkosten, und sonst alle unzümliche Leichtfertigkeiten bey den Hochzeiten abschaffen, und nach der Christlichen Erbarkeit, Zucht, und Bescheidenheit richten, und moderieren werden.

Und wie diejenige alle, so rechtmässig und nach Christlicher Ordnung, öffentlich zu Kirchen und Strassen gangen, und Ehelichen mit einander verpflicht, sich engens Gewalt und Willens, von einanderen nit scheiden könden, noch sollen: Also, welche unzümliche und verbottene Heurat beschlossen, denselbigen ist in keinen Weg Ehelichen bey einanderen zu wohnen zugestatten, deshalben die Pfarrherren, wann sie dergleichen Personen under ihren Pfarrkindern haben, solche nicht allein nicht gedulden, sondern auch ihr J. G. als



Ordinario, oder derselben Vicario umb gebührendes ernstliches Einsehen anzuzeigen wollen.

Es ist auch bey vielen dieser Wohn, wann sie von ihrem abwesenden Manns oder Weibs Leben oder Todt in sieben Jahren nichts gehört haben, daß sie sich wol in andere Weg widerumben Ehelichen versprechen und verheuraten können. Demnach aber dieser Wohn, nicht allein den Rechten zuwider, sonder auch ein solche Gewisheit des vorigen Manns oder Weibs Todt von Rechts wegen erfordert wirdt, die der Geistliche Richter für genugsam erachten und erkennen kan, so sollen die Pfarrherren keine dergleichen Ehen ohne vorgehende Richterliche Erkandtnuß des Officials zusammen geben.

Vom Advent unsers Herren Jesu Christi, bis auff den heiligen drey König Tag, und dann von dem Ascherisgen Mittwoch, bis auff den Sonntag Quasimodo, dieselben Tag eingeschlossen, sollen keine Hochzeiten gehalten und eingeführt werden. Sonsten ist solches zu allen Zeiten im Jahr, auch in der Creutz, Pfingst, und Ablasstochen, und in unser lieben Frawen Drensigst bewilliget, doch der Gestalt, daß alles mit Zucht und Erbarkeit zugehe, es wolle dann einer auß sonderbahrer Andacht und Ehrentbietung gegen dem Allmächtigen, und seiner lieben Mutter, an obgemelten Festen und Zeiten, für sich selbst das Hochzeitliche Wesen einstellen, daß man eines jeden Gelegenheit herumgesezt haben will.

*De Impedimentis Matrimonii.*

Damit aber die rechtmäßige Verhinderung der Ehe so wol den Pfarrherren, als den Pfarrkindern, und sonst mannißlichen offenbahr werden, und sich keiner der Unwissenheit entschuldigen, sonder ein jeder im Heuraten darnach richten möge. So haben ihre Fürs. Gnad. dieselbige hiemit auch publiciren, und seiner Fürs. Gnad. Bistums Underthonen kund thun wollen. Die sind ins gemein also beschaffen, daß sie entweder so wol die begehrte Ehe verhindernen, als die allbereit be-

schlossene widerumb auflösen: Oder aber die begehrte Ehe gleichwol verhindernen, wann sie aber schon gebührender massen beschehen, nicht widerumb aufbinden, sonder inn ihren Kräfften bestehen lassen.

Was die erste Verhinderung belangen thut, werden dieselbigen in diesen Lateinischen Verklein begriffen:

Error, conditio, votum, cognatio, crimen,

Cultus disparitas, vis, ordo, ligamen, honestas,

Dissensus, atque affinis, si forte coire nequibis,

Hæc socianda vetant connubia, juncta retractant.

*Error.*

Die erste Verhinderung ist, wann sich eins in dem Heuraten irret und verstoßet, als da einer begehrt sich mit Catharina, oder mit einer Leibs-freien Person zu verheuraten, und nimbt unwissender Dingen, auß Verstoßen und Irrung die Margaretham, oder eine so Leibengen ist, dann in diesen beyden Fällen die Irrung nicht allein die Ehe verhindert, sonder auch wann die Ehe gleich beschlossen wer, widerumb auflöst. Zwar was andere Irrungen der Reichtung, Schöne, Frumb- und Erbarkeit, und was dergleichen mehr ist, belangen thut, bringen dieselbigen dem Ehelichen Versprechen kein Verhinderung.

*Conditio.*

Zum anderen, ein ehrliche und mögliche Condition und Beding, darmit das Eheliche Versprechen beschehen, verhindert die Ehe so lang, bis dieselb Condition erfüllt und erstattet würd. Beyneben aber ist zu mercken, daß unziembliche unmögliche Beding nit binden, sonder dafür gehalten werden, als weren sie niemahlen angedingt worden.

*Votum.*

Zum dritten ist der Ehe verhindertlich, wann der Ehelichen Parteyen eins oder beyde in einem bestätten Orden die ewige Reinigkeit gelobt und Profession gethan haben: Also auch, wann eins in dem Orden der Societet Jesu, nach auß-

aufgestandenen Probation Jahren die Reingkeit verlobt hette, so bey diesem Orden allein für ein einfältig Gelübt und simplici voto gehalten wird.

*Cognatio.*

Die Sip- oder Blutsfreundschaft ist Geistlich und fleischlich. Die Geistliche fließet her auß beyden Sacramenten, des Tauffs und der Firmung. Und zwar so vil den Tauff belangt, so ist die Verhinderung zwischen dem, der taufft, und getaufft wird, und des getaufften Vatter und Mutter, wie auch zwischen denen, so auß der Tauff heben, der im Tauff gehebt wirdt, und des gehebten Vatter und Mutter. Die Verhinderung aber, die von der Firmung herkompt, ist zwischen dem, der firmet, der gefirmet wird, und dessen Vatter und Mutter, auch dem, so bey der Firmung hebt, und diß alles nach Aufweisung des heiligen zu Trient gehaltenen Concilii. Dese geistliche Freundschaft und dero Verhinderung wehret ewig. Derhalben nicht wahr ist, was das gemein Sprichwort sagt: Wann das Kind todt, so ist die Bevatterschaft auß.

Die fleischliche Sip- oder Blutsfreundschaft ist zwischen den Eltern, Kindern, Geschwisterigen, Vatter und Mutter Brüder und Schwöstern, und denen, so auß ihnen erboren werden: Zwischen den Elteren und Kinderen hat die Blutsfreundschaft kein Ziel, sonder ist ein ewige Verhinderung, zwischen den anderen aber erstreckt sich die Verhinderung der Ehe weiter nicht, dann bis in den vierten Grad, denselben eingeschlossen, Also, wann eins in dem andern, dritten, oder vierdten Grad, und das ander in dem fünften, oder noch weiterem Grad were, daß in solchem Zahl die Ehe zulässlichen beschehen und versprochen werden köndte.

Und dieweil in dem Bistumb Coſtanz bis dahero allerley Ergernussen fůrgeloffen, wann in den verbottenen Graden der Blutsfreundschaft und Schwagerschaft mit gemeinen schlechten Bauersleuthen ohne Unterscheid dispensiret, und ihnen die in den Geistlichen Rechten verbottene Ehen zugelass-

sen worden: Also damit die Ergernuss verhüttet, haben ihre Fürstliche Gnad. auß dem heiligen Concilio zu Trient hiemit verordnen wollen, daß wann einer oder eine sich wissentlich inn den verbottenen Graden, die ihme ohnbewußt nicht sein könden noch sollen, verheuren wurde, der oder dieselbige soll von seinem vermeinten Ehegemahel mit des Geistlichen Richters Urtheil widerumb abgesondert werden, und aller Hoffnung einiger Dispensation, Gnad oder Bewilligung zu erlangen, gänzlich beraubt sein: Und soll dasselbig nicht allein inn dem statt haben, der sich wissentlich der Verhinderung, also vermessenlich verheuren, sondern vil mehr in dem, der solchen vermeinten Heurat mit dem Benschlaff vollstrecken darff.

Gleiche Meinung soll es haben mit dem, der gleichwol die Verhinderung nicht weißt, und sich aber nicht mit vorgehender Verkündigung, oder vor seinen Pfartherren, in beywesen zweyer oder dreyer Gezeugen, vermög des heiligen Concilii Satzung verheuret hat, dann der, so die heilsame Gebott der Kirchen verachtet, ist nicht würdig, daß ihme der Kirchen Gnad und Gütigkeit zu Hülff und Guten kommen solle. Wann aber sich einer des Heiligen Concilii Satzung gemess gehalten, und hernach ein Verhinderung befunden wurde, deren er einiges glaubwürdiges wissen nit gehabt hette, so kann ihme mit einer Dispensation desto leichter und ehender vergebenlich geholffen werden.

Es sollen auch hinfüran zu den künftigen Ehen keine Dispensationes, und Begnadungen, oder doch gar selten, und dasselbig allein auß vernünftigen und beweglichen Ursachen, und zwar in dem andern Grad gar nit, dann grossen ansehnlichen Potentaten und Fürsten, von gemeinen Nutzen wegen, gegeben werden.

Und damit die gemeine Priester, denen die Päpstliche Dispensationes, Brieff und Bullen, auch dero Stylus, Schrifften, Sigel, Unterschreibung und Zeichen unbekant synd, leichtlichen nicht betrogen werden, Ist ihre Fürstl. Gn. ernst-

ernstlicher Will und Befehl, daß die Priester, wann ihnen dergleichen Dispensationes und Bullen, was Inhalts dieselben seyen, zugebracht werden, solche zuvor nicht vollziehen, und in das Werck richten sollen, sie seyen dann hochermeldt ihr F. S. oder deren Vicario gezeigt und fürgelesen, damit man was darunter zuthun oder zulassen, gebührende Verordnung anstellen möge.

*Crimen.*

Es verhindert auch die Ehe, wann ein Ehegemächt bey Lebzeiten seines Manns oder Weibs, mit einem andern sich ehelichen verspricht, oder die Ehe in das künftige zusagt, und beyneben mit ihm sich fleischlichen vermischet, welches ein Verhinderung pollutionis adulterinae genennet wirdt: Oder wann eines sein oder des andern Ehegemächt zu dem End umgebracht, oder nach dem Leben gesetzt, damit er sich mit des umgebrachten verlassenen Mann oder Weib verheuren könne.

*Cultus disparitas.*

Die Christen sollen sich mit den ungläubigen Juden oder Heiden keineswegs ehelichen versprechen und verheuren, dann es wider die Christliche Vermunfft und alle Recht ist.

*Vis.*

Wann auch eines mit Gewalt, und solcher Furcht, die in einen standhaftigen Mann, oder Frauen fallen kann, als bey Verlehrung der Ehren, Haab, Guth, und des Vaterlands, oder bey Erdrung Leibs und Lebens, sich zu verheuraten gezwungen wird, so ist solches ehelich gethon Versprechen unbündig und nicht kräftig, es seye dann daß der vorgehende Zwang und Furcht durch einen nachfolgenden guten freyen Willen purgiert werde.

*Ordo.*

Die so eine oder mehr der mehreren Wehinen von einem Bischoff empfangen haben, das ist, wann einer Episkop, Evangelist oder Priester, können zur Ehe nicht schreiten, und da sie es gleich thäten, so ist es doch nichtig und Kraftlos, auch weder vor Gott

noch der Welt kein rechtmäßige Ehe. Welche aber allein die minderen Wehinen haben, denselben ist das Heurathen nicht verboten.

*Ligamen.*

Wann der Parthenen eine oder beyd zuvor einen Ehegemähl haben, der noch im Leben ist, so ist ihnen sich anderwärts Ehelichen zu versprechen keineswegs zugelassen, wirdt die Verhinderung *Præcontractus* genent.

*Honestas.*

Die Verhinderung, so *impedimentum justitiæ publicæ honestatis* geheissen wirdt, fließet her auß dem Versprechen künftiger Ehe, die man *Sponsalia de futuro* nent, zwischen zweyen, so hernach solch ihr Versprechen nicht vollziehen. Nach Aufweisung des Heiligen und Christlichen Concilii zu Trient, wann das Versprechen künftiger Ehe, auß was Ursachen es seye, nicht kräftig, so ist zwischen denjenigen, so solche Versprechen künftiger Ehe gethon haben, und derselben beyderseits Verwandten keine Verhinderung: Wan aber das Versprechen künftiger Ehe gültig und kräftig, so ist die Verhinderung allein im ersten Grad, und nicht weiter.

*Dissensus.*

Es wirdt auch zu eines jeden Ehe nothwendig ein vernünftiger Will und Consens erfordert, daher die Unge sundten, Tauben, Narren, und dergleichen Leut zu dem ehelichen Versprechen untaugenlich.

*Atque Affinis.*

Die Schwagerschafft *primi generis*, hindert sowol den beschlossenen, als den künftigen ehelichen Contract, bis inn den vierdten Grad, denselben eingeschlossen: Dann in welchem Grad eins des Manns oder Weibs Blutsfreundt ist, inn demselbigen Grad ist er auch des Manns oder der Frauen Schwager.

Anderer Schwagerschafften, so man nent *secundi generis*, das ist, Schwagers Schwagerschafft bringen keine Verhinderung, weder den beschlossenen noch künftigen Ehen.

Was



Was aber die Schwagerschaft anbelangen thut, die auß verbottenem und unzümlichen Verschlaß herkömpt, hat das heilige Tridentinische Concilium verordnet, daß solche Schwagerschaften weiters nicht verhindern soll, dann allein in dem ersten und anderen Grad.

*Si forte coire nequibis.*

Und dann diereil zu Erhaltung des Menschlichen Geschlechts der Ehestandt eingesetzt, so können diejenige, die zu den Ehelichen Pflichten untaugenlich sind, sich nicht verheuren.

*Raptus.*

Es mag auch, wann einer ein Tochter ihren Eltern raubt, und entführt, ohne ihren Willen zwischen demselbigen Rauber und der Tochter keine Ehe bestehen, so lang die Tochter in des Raubers Gewalt ist, es sene dann, daß die Tochter von dem Rauber abgesondert, und an einen sichern Orth, auff freyen Fuß gestellt, und widerumb von neuen den Raubern zuhaben einwilligen wurde.

Die Verhinderung, welche zwar die allbereit beschlossene Heurath nit auflösen, aber doch die zukünftige Ehen verhindern, sind, wann sich eins wider das Verbott seines Bischoffen, des Geistlichen Richters, oder seines Pfarrherren, zu verbottener Zeit, mit einem der mit einem einfachen Gelübt der Keuschheit, *Votum simplex* genant, beschafft were, oder in dem Glauben mit der Catholischen Römischen und Päpstlichen Kirchen nicht übereinstimpte, oder einen anderen die Ehe in das künftige per *Sponsalia de futuro* versprochen hette, sich ehelichen einlassen wolte, In welchen und der gleichen Fällen, obwol die beschlossene Ehe besteht, so begehen doch diejenige ein Tödtliche und schwere Sünd, die sich also wider die Geistliche Recht und Gebott verheuren.

Diereil auch bey diesen unseren Zeiten die geistliche und weltliche Rechten bey vilen dermaßen in veracht gerahen, und ein solche grosse Vermessenheit ist, daß sie mit nahen Blutsfreunden, und sonst wider die Rechten und Befehl der Christlichen Kirchen, verbottene Ehen zu machen, und wann die Pfarrherren solche Ehen (imassen sie

dann Ampts und Pflichten halben schuldig) nicht einführen wöllen, an Sectische oder andere unbekandte Orth zu ziehen, und solche ihre verbottene Ehen bestätigen zu lassen, sich weder schewen, noch schämen, zu nicht geringer Ergernuß des gehorsamen Christlichen Volcks. Welchem Ubel und Ergernuß, so vil möglich, vorzukommen, ist oft hochermeldt ihr J. G. des Herren Bischoffen und Ordinarii, an alle und jede Pfarrherren und Seelsorger ernstlicher Befehl, daß sie dergleichen vermeinte Eheleut, wann sie sich widerumb in ihre Pfarren begeben werden, mit allem Ernst anmahnen sollen, von solcher ihrer vermeinten Ehe alsobald abzustehen, oder innerhalb vierzehn Tagen bey dem Geistlichen Richter zu Costanz deshalben ein Erleuterung und Declaration zu begehren, und derselben zu geloben. Auff den Fall aber solche vermeinte Eheleut, entweder bey dem Geistlichen Richter gar nicht erscheinen, oder demjenigen, was von ihme declariert und erket, nit nachkommen wurden, so sollen sie von ihren Pfarrherren auß der Christlichen Kirchen und Gemeind, mit Entziehung der heiligen Sacramenten, und Versagung Christlicher Begräbnuß, so lang ausgeschlossen werden, bis sie umb ihre begangene Mißhandlung Penitenz und Buß würcken, und der Christlichen Kirchen schuldige Gehorsame leisten.

Alle und jede Ehesachen, und was denselben anhängig ist, die gehören, vermdg der Rechten, allein zu ihr J. Gnad. des Herren Bischoffen, oder derselben Vicari und Officials Erkandtnuß. Derhalben sollen weder Geistlich noch Weltlich, was Würden, Stands, und Präeminenz die sene, bey Straff des Banns, dergleichen Ehesachen, sie sene beschlossene oder künftige Ehen, derselben Verhinderungen, Auflösung und Scheidungen, und alles, was dergleichen Sachen anhängig ist, für ihre Gericht-Zwang ziehen, dieselben erkennen, urtheilen, sonder da sich hierinnen was Irrung und Gespänn zutragen wurden, für das ordentliche Bischöfliche Geistliche Gericht und Consistorium naher Costanz weisen.

*Tomus VIII. Concilior. German.*

D d d d d d

Nicht

Nicht weniger wann die Rural Dechant, Pfarrherren, und andere Seelsorger, under ihren anbefohlenen Decanats, Pfarr und Seelsorg Underthönen, eheliche Gespänn und Irrungen, wie die Namen haben möchten, erfahren werden, sollen sie dieselbigen ihre Underthönen ermahnen, und da es vonnöthen, mit Aufschliessung auß der Christlichen Kirchen und Gemein, und Entziehung der Heiligen Sacramenten, dahin halten, daß sie solche ihre Gespänn vor dem Geistlichen Gericht zu Costanz anbringen, allda einer rechtlichen, schleimigen Erkandtnuß und Ausspruchs erwarten, und demselbigen hernach geleben und statt thun wollen.

Es sollen auch gemeldte Dechant, Pfarrherren und andere Geistliche, und insonderheit die Bischöfliche Commissarii der Ehesachen, wie bißhero von vielen beschehen ist, sich nicht allein inn die gespännige Ehesachen nicht einmischen, und darinnen etwas Erleuterung und Extrajudicial Erkandtnuß geben, sonder auch dergleichen Matrimonial und Ehesachen zuvertragen sich keines wegs unterstehen und gelusten lassen, sentemahl die Ehesachen nicht vertragen, sonder nach Aufweisung der Geistlichen Rechten entschieden und definit werden müssen, darn da in das künfftig, von dem einen oder anderen hierinnen weiters beschehen solte, wurde man neben der Straff des Geistlichen Banns, mit Entsetzung der Pfründ oder des Commissariat-Ampts, wider einen solchen der Gebür nach zu verfahren nicht underlassen.

Wann es aber nicht genug, gute und heilsame Ordnungen zu machen, sonder vonnöthen, daß dieselbig fleißig gehalten und vollzogen werden, so ist mehr hochermeldt ihr Fürstl. Gnad. an alle und jede Dechant, Pfarrherren, und Seelsorgern, bey der Gehorsame, und den Pflichten, mit welchen sie ihr Fürstl. Gnad. als ihrem Bischöffen und

Ordinario verbunden sind, ernstlicher Will und Befehl nicht allein diß alles, wie obsteht, für sich selbst, fleißig, und ihres besten und höchsten Verindgens zu halten, und zusehen, damit solches von denjenigen, so juen zu versprechen stund, gehalten werde, sonder auch alle und jede Jahr zweymahl, nämlichen am Sonntag nach der heiligen drey König Tag, und am Sonntag nach der heiligen Drensfaltigkeit Tag, bey Straff zwanzig Gulden, inmassen hierinnen von Wort zu Wort begriffen ist, öffentlich auß der Candel, ihrem Christlichen Vöcklein und Pfarrkindern abzulesen und zuverkünden, damit sich männiglich darnach richten, und keiner der Unwissenheit entschuldigen könne.

*Ex Mandato Illustrissimi & Reverendissimi D. D. Jacobi(\*)  
Episcopi Constantiensis.*

J. ANDR. DORNSPERGER,  
D. Notarius subscr.

**Teutsche Formb des wahren und  
Catholischen Glaubens-Bekand-**  
nuß.

**I**ch N. glaube und bekenne mit fleiß, fem Glauben samptlich und sonderlich alles, was in dem heiligen Glauben, den die heilige Römische Kirch braucht, begriffen ist, nämlich: Ich glaub in einen Gott Vater, ic.

*Formula Germanica Patrimonii,  
in scriptis dandi, pro Ordinandis  
mutatis mutandis.*

**W**er Abbt und Convent des Gottes-  
haus N. ic.

*Cl. Lünig Spicil. Eccles. Cont. II. a pag. 587.  
ad 684. Synodi hujus epitome apud  
Jof. Biner in Appar. Eruditionis P.  
VIII. Lib. I. C. I. art. IX.*

(\*) Joanni Georgio de Halweil, Viro eruditionis, prudentiæ, vitæque sanctitatis fama per-  
celebri, quem appellare Episcoporum postremæ ætatis speculum *Bucelinus* non  
dubitat, successit A. 1604. die 26. Januarii Jacobus ex Illustrissima Fuggerorum de  
Kirchberg & Weissenhorn Comitum familia, Patre Joanne magnifico, Matre Eli-  
sabetha Nothaftin a Dodensteyn Sebastiani filia procreatus, magnorum Baronum  
Marci & Christophori frater, summi apud Constantienses templi Præpositus, flo-  
renti,

renti, ut Cl. *Jacobus Mantius* in *Cbron. suo Constant.* ait, vir ætate, & magnæ expectationis, quem, teste *P. Ignatio Agricola Provinciae German. Superior. Historiographo* ad cit. A. n. 350., dudum ad illud culmen honoris destinaverant populi vota, ob integerrimos mores, & conjunctam cum spectata virtute prudentiam, qui anno præcedente, ad totius Constantiæ, sacris tum Missionis Apostolicæ laboribus excolitæ, religionem, oblata liberaliter ad coemendos saccos, pœnitudinis Christianæ indices, pecunia, atratus ipse, Canonicis comitantibus, inceserat.

Hæc, aliaque Jacobi elogia alium nobis eundem depingant, atque is apud M. Georgium Conradum Pregizerum, ex Hübnero scribentem, in Serie Episcoporum Constantiensium notatur. Societas profecto nostra Meccenatem in illo amplissimum veneretur, grataque prædicet, oportet: enimvero inter Imperii Principes, quorum perpetuum in res Societatis studium enituit, (*inquit cit. Agricola Dec. VII. n. 946.*) ne ullo anno de se, nisi ingratis, tacere liceret, Jacobus maxime Fuggerus Constantiensis Præsul continuatis favoribus effecit. In omnia nascentis intra Constantiæ muros Collegii commoda vigil, cum absoluta quamprimum, instructaque Collegii, Templi, ac Scholarum ædificia cuperet, ad universum Diæceseos suæ Clerum Literas encyclicas dedit, gravissimis, nostroque Ordini perhonorificis argumentis refertas; queis omnes hortabatur, ut ad Gymnasium præsertim, quod in Pastores idoneos juventutem formaret, mox perficiendum & ipsi eleemosynam, sacrae ac profanae Reipublicæ profuturam, conferrent. Optimus hortationi præclarissimæ respondit fructus.

Adde, quod in maxima hac, celeberrimaque Synodo, cujus Statuta jam dedimus, quamque præter duodeviginti mitratos Antistites, ingenti Clerus uterque frequentia illustrem fecit, singulare suum disciplinæ Ecclesiasticæ restaurandæ studium, & veræ amorem, atque æstimationem Religionis non uno & coævis & posteris monumento Jacobus prodiderit.

Obiit post gloriosum duorum ac viginti annorum Regimen anno MDCXXVI. pridie Nonas Martias Princeps præstantissimus, avitæ fidei tam tenax, & cultor pietatis adeo eximius, ut facientis ad aram oculi suavibus præ animi teneritudine lacrymis passim manarent, amplissimique facultates patrimonii, cum vectigalibus annuis, pios in usus ab ipso converterentur.

Porro de Jacobo isthæc meminisse tanto mihi est jucundius, quanto existimem æquius esse, ut bina, quæ Metropolitico hujate in Senatu sub hæc etiamnum tempora resplendent, inclutissimæ ejusdem prosapiæ lumina gratus vel eo duntaxat ex capite reverear, quod ejusmodi noverim semper fuisse Fuggerorum ingenium, Societatis nostræ homines ut in amore, institutum in pretio haberent.

*Vide præter cit. AA., Jac. Wilhelm. Imbosii notitiam S. R. I. Procerum Lib. VII. Cap. III. P. Franc. Xav. Kropf in Hist. Prov. Germ. Sup. Dec. IX. n. 638.*

## SYNODUS DIOECESANA

M E T E N S I S *Prima,*

Anno Christi MDCX. Pauli V. Papæ VI.

Rudolphi II. Imp. XXXIV.

Ab ANNA DESCARS, (a) S. R. E. Presbyt. Cardinali,  
& Episcopo Metensi celebrata.

*Statuta CAROLI a LOTHARINGIA, Cardinalis & primi apud Nancejanos Primatis, de quibus mox fiet mentio, hucusque desiderantur.*

ANNAS DESCARS, DEI ET SANCTÆ SEDIS APOSTOLICÆ GRATIA

Tituli Sanctæ Susannæ S. R. E. Presbyt. Cardinalis de Giury nuncupatur, Episcopus Metensis, Sacri Romani Imperii Princeps. Universo Clero, ac Populo Civitatis, ac Diæcesis Metensis, Salutem in Domino Sempiternam.

Pastoralis officii cura Nos admonet, & igitur, ut ovium Nobis commissarum saluti Sacrorum Canonum Decreta a Nobis ex- invigilantes, omnes animi nervos in id intendamus,  
Tomus VIII. Concilior. German. D d d d d 2



damus, ut Catholica fidei veritas nimium multis in locis hujus nostræ Diœcesis labefacta pristinum splendorem recipiat, & corrupti mores tam Cleri, quam populi nostri, quoad fieri potest, in melius commutentur. Cum autem nulla ad eum finem rectior sit via, quam frequens Synodi Diœcesanæ congregatio, ubi multis Sacerdotibus in unum coactis, & unanimiter orantibus baud dubium est,

quin Pater misericordiarum faciliores præbeat aures, & multorum piorum ac eruditorum Virorum consilio, quidnam aut correctione, aut moderatione indigeat, quidoe agendum, fugiendumque sit, melius, ac sanius judicatur: Quamprimum per innumeras, easque gravissimas occupationes Nobis licuit, hanc ipsam viam ineundam, primamque hanc Synodum nostram Diœcesanam convocandam, ac celebran-

- (a) Ortum habuit III. Cal. Apr. anno 1546. Lutetiæ Annas Descars, Jacobi huj. nom. & Franciscæ Longovicæ de Giury filius, Caroli Lingonensis Episcopi frater. Multa sunt, quæ virum commendent. D. Benedicti ingressus Ordinem, prima jecit religiosæ vitæ fundamenta in Divionensi, quod a S. Benigno nomen habet, pervertito Monasterio, cujus postea Abbatem dignissimum egit, Molismo deinde, Cœnobio olim florentissimo, aliisque locis Archimandrita susceptus. Calendis Martii A. 1585. deferrebat ipsi Ecclesiæ Lixoviensis regimen, cujus tamen fructibus officii, bellicos ob tumultus ac temporum illorum injurias carendum diutius fuit. Romanam ad Purpuram ut a Clemente VIII. anno 1599. eveheretur, strenui, quos pro tuenda apud Gallos Apostolicæ Sedis auctoritate suscepit, tulitque, labores effecere. Illum ætate maturum, moribus spectabilem, doctrina ac pietate præcellentem Sedi Metensi præesse voluit Summus Pontifex Paulus V., eumque præ Henrico Borbonio septem duntaxat annorum Marchione, novis Canonorum comitiis electum, auctoritate Apostolica A. 1608. confirmavit.

Auctus sacra hac dignitate Annas, in domestico, quod singulis hebdomadis semel iterumve habebat, concilio multa sapienter, ac præclare decrevit, & Judæis Metensibus ad fidem Christianam invitandis, & coercendis a Catholicorum sepultura Sectariis, & Familiis Religiosis omni, qua fieri poterat, moderatione purgandis, poliendisque idonea. Parum etiam aliquando abfuit, ut ad universæ Christi in terris Ecclesiæ capeffenda gubernacula, voce populi (quæ Dei vox non raro fuit) eundem, modo Pontificem per Urbem designante, evocaretur. Ferunt, hanc de eo quam honorificam, tam veram Henricum Magnum pronunciasse sententiam: *In cassum agitur cum Cardinale de Giury, si aliquid a ratione & recto tramite devium ab eo postuletur.*

Obiit anno 1612., ætatis non 74., sed 66. vel 67., Vici, peramœno in Germaniæ confinibus oppido plenus meritorum Antistes, cui elegans Metis inscribere Epitaphium, æqui rerum arbitri, his verbis expressum:

D. O. M.

*Piis manibus æternæ memoriæ plorabili busto Antistitis desideratissimi  
omni ævo retro dolendi.*

ANNÆ D'ESCARS TITULI SANCTÆ SUSANNÆ SANCTÆ ROMANÆ Ecclesiæ Presbyteri Cardinalis de Giury nuncupati, qui paterna sobole, clara familia d'Escars: materna prosapia primæ Longovicorum nobilitatis, egregia Principum Aurelianensium consanguinitate infelicitissimo Sæculo feliciter Ecclesiæ datus, Parisiis editus, Divinione in antiquissimo Divi Benigni Cœnobio Sancti Benedicti disciplina institutus, professusque indidem Abbas, tum Lexoviorum Antistes electus, tota Gallia præclarus, Romæ perquam illustris, Metis amabilis, ubique stupenda lenitate, spectabili senio, rara pietate, innata gravitate mirabilis ac venerandus, Regi percharus, Pontifici Maximo jucundissimus, omnibus æternum lamentabilis, Ecclesiæ Metensis Pontificatu simul & castissima vita perfunctus, vitam immortalis gloria deperatam oppetiit decimo tertio Calendas Majas, anno ætatis sexagesimo septimo, Sæculi vero Christianissimi M.DC.XII.

*Vide Hist. Eccles. Germaniæ, anno 1724. Bruxellis gallice editam apud Franciscum Foppens, & Cl. Petri Frizon Galliam Purpuratam, apud Simonem le Moine Lutetiæ Parisiorum anno 1638., latine conscriptam Lib. IV. pag. 676., unde hac deprompsimus.*

brandam duximus. Ac primum quidem Statuta olim in Synodis hujus nostræ Diœcesis edita, maxime vero a fel. rec. CAROLO Cardinale a Lotbaringia Prædecessore nostro promulgata, conquiri jussimus. Cum ut ea, quantum fas esset, observari curaremus. Tum etiam ut, si quid addendum, minuendum, mutandumve esset, adderemus, minueremus, aut mutaremus. Conquisita, & reperta cum quibusdam ex Dilectis Fratribus nostris Ecclesiæ nostræ Cathedralis Primoribus, aliisque doctis, ac piis viris examinavimus. Quo quidem examine nonnulla in iis mutatione indigere, quædam redundare, plurima vero om-

nino desiderari animadvertimus. Quare ex iis, quæ usui fore credidimus, ea intacta servavimus, quæ minus utilia, aut hisce temporibus minus accommodata reperimus, illis sublatis alia utiliora, atque aptiora subrogavimus: Plurima vero tam ex Concilio Tridentino, quam ex Sacris Canonibus, atque Conciliis, & vicinarum Diœcesum Synodis addidimus. Ex iisque omnibus Statuta, quæ sequuntur, compilanda, atque in hac nostra Synodo Diœcesana prima proponenda: & promulganda duximus, vobisque omnibus, quatenus vestrum unumquemque tangunt, servanda, & adimplenda proponimus.

## STATUTA SYNODI DIOECESANÆ METENSIS PRIMÆ,

Ab Illustrissimo ac Reverendissimo D. D. ANNA DESCARS, Tituli  
S. Susannæ S. R. E. Presbyt. Cardinale de Giury nuncupato, Epi-  
scopo Metensi, S. R. I. P. Metis habitæ die 21. Aprilis,  
Anno Domini 1610.

### INDEX TITULORUM HUIUS SYNODI.

- |  |  |
|--|--|
| I. De Fidei Christianæ Professione & Doctrina.                             | XX. De officio Parochi.  |
| II. De Prædicatione Verbi Dei.   | XXI. De officio Archi-Presbyterorum.   |
| III. De Sacramento Baptismi.   | XXII. De ordine servando convocatis in Ca-<br>pitulo rurali Archi-Presbytero, & Para-<br>chis, eorumque Vicariis.  |
| IV. De Sacramento Confirmationis.  | XXIII. De eligendo Archi-Presbytero.   |
| V. De Sacramento Eucharistiæ & Sacrosancto<br>Missæ Sacrificio.            | XXIV. De Procuratoribus Capituli ruralis.  |
| VI. De Sacramento Penitentia.  | XXV. De Ludimagistris.   |
| VII. De Sacramento Extremæ Unctionis.                                      | XXVI. De Obstetricibus.  |
| VIII. De Sacramento Ordinis.   | XXVII. De Portione congrua.  |
| IX. De Sacramento Matrimonii.  | XXVIII. De Decimis.  |
| X. De Officiis Divinis rite persolvendis.                                  | XXIX. De Judæis.   |
| XI. De vita & honestate Clericorum.  | XXX. De Casibus reservatis.  |
| XII. De observatione Festorum.   | XXXI. Casus Episcopo reservati.  |
| XIII. De Beneficiariis.  | XXXII. Statutum circa Divina, seu Eccle-<br>siastica Officia servandum, pro quibus de<br>jure retributio Parochis & Sacerdotibus<br>a suis Parochiis competit. |
| XIV. De Immunitate & jurisdictione Eccle-<br>siastica.                     | XXXIII. Temporale Festorum & jejuniorum,<br>observandum per universam Diœcesim<br>Metensem. De præcepto Ecclesiæ &<br>nostro.                                  |
| XV. De legitima bonorum & reddituum Ec-<br>clesiasticorum administratione. |  |
| XVI. De Regularibus.   |  |
| XVII. De Regiosis domibus.   |  |
| XVIII. De Testamentis.   |  |
| XIX. De Sepulturis.  |  |

IN NOMINE SANCTÆ, ET INDIVIDUÆ TRINITATIS PATRIS, ET FILII,  
ET SPIRITUS SANCTI. AMEN.

#### I. De Fidei Christianæ Professione, & Doctrina.

CUM Fides omnium Christianarum  
virtutum sit fundamentum, ve-  
rumque Symbolum, quo Christi oves  
ab hædis discernuntur, ideo ab ea po-  
tissi-

tissimum Synodi hujus Diœcesanæ exordium sumendum duximus: quam integram, atque inviolatam ab omnibus non modo mente retineri, sed etiam verbo prædicari peroptamus.

## II.

Sacri igitur Tridentini Concilii, ac PII IV. Pontificis Maximi vestigiis inhærentes statuimus, & mandamus, ut omnes beneficia Ecclesiastica nunc obtinentes, & in posterum obtenturi, Fidei Professionem emittant ex formula ab eodem PIO IV. præscripta, nisi eam se jam emisisse docuerint. Cujus formulæ tenor sequitur:

Ego N. firma fide credo, & profiteor omnia, & singula, quæ continentur in Symbolo fidei, &c.

## III.

Quicumque publice, aut privatim domi suæ, vel alienæ pueros cujuscunque ætatis, & sexus, quascunque artes literarias, vel alias liberales, legendo, interpretando, repetendo, vel alia ratione etiam gratis docent, & docebunt, eandem Fidei Professionem, si in Civitate sint, coram Nobis, aut Vicario nostro; In aliis vero locis coram Archi-Presbytero, vel Parocho, & duobus testibus emittere omnino teneantur, ejusque Professionis actum manu propria subscribere.

## IV.

Ad cujus rei salutarem executionem studiose inquirant Parochi, quinam in suis Parochiis docendi munere fungantur: eorumque nomina, ætatem, vivendi modum, una cum testimonio de Fidei Professione ab eis emissâ Archi-Presbyteris, ipsique Archi-Presbyteri Nobis, aut Vicario nostro infra duos menses consignanda deferri curent.

## V.

Nullus vero in posterum ad docendi munus admittatur, qui testimonio sui Parochi, & duorum, vel trium fide dignorum non manifestet se in Ecclesia Catholica semper perseverasse: quique secum non habeat testimonium ab iisdem vitæ honeste, pieque actæ. Mandamusque Parochis omnibus, & aliis curam animarum gerentibus, ut

hæc nostra Constitutio diligenter observetur, Nosque quamprimum certiores faciant, si ab his, quorum est Ludimagistrorum institutio, vel approbatio, aliter (quod absit) attentari contingat. Archi-Presbyteri vero solliciti curent, ne Parochi hac in parte suo officio desint, eosque, qui contra fecerint, ad Nos deferant.

## VI.

Insuper diebus Dominicis finita concione, quam in Missa ad populum habere debent, Orationem Dominicam, Salutationem Angelicam, Fidei Symbolum, Decalogum, & Ecclesiæ præcepta, per se, aut per puerum aliquem clare, aperte, & distincte proferant, ac recitent, ut hoc saltem modo rudiores ea sic repetita discere valeant.

## VII.

Prohibeant ipsi Parochi auctoritate nostra universis, & singulis suis Parochianis, ne quibusvis superstitionibus utantur. Inobedientes ab ingressu Ecclesiæ, & Sacramentorum usu arceant. Aboleant profana tonitrualia festa, cum paganismum redoleant: cæterasque vanas observationes, quas pro curandis, & conservandis pecoribus hætenus a plerisque adhibitas accepimus. Inobedientes, ab Ecclesia, & Sacramentis arceant. Prohibeant quoque Parochianis suis eadem auctoritate nostra ne superstitiose cessent ab operibus servilibus Sabbato post meridiem certis anni temporibus: cum id perperam, & sine Ecclesiæ auctoritate introductum nimis apertam redoleat superstitionem. Illis, qui non paruerint, Ecclesiæ ingressu, & participatione Sacramentorum interdicatur, & morientes Ecclesiastica careant sepultura.

## VIII.

Cum sicut a viris probis ac fide dignis accepimus, in variis Diœcesis nostræ locis hæretici prætextu charitatis & consolationis Catholicos utriusque sexus ægritudine laborantes, & in extremis agentes invisant, & Parochis absentibus errorum suorum virus effundere conentur in certum animarum periculum. Nos huic malo, quantum in nobis est, occurrere cupientes. Omni-



Omnibus, & singulis utriusque sexus fidelibus severissime inhibemus, ne ullius sectæ hæreticos quocunque prætextu in ædes suas admittant ad ægros invisendos, vel etiam consolandos, multo minus eos ullo modo dogmatizare permittant. Alioqui censuris, & pœnis canonicis subjaceant. Mandamusque omnibus & singulis Parochis, aliisque curam animarum exercentibus, ut tribus continuis diebus Dominicis hanc nostram Constitutionem publicent, in illis maxime Parochiis, ubi aliqui hæretici habitant, ac publicationum ipsarum exemplar ad Nos, aut Vicarium nostrum quamprimum deferri curent.

## II. De Prædicatione Verbi Dei.

### ART. I.

**S**Tatuimus, ne quis etiam Regularis, nisi a Nobis, aut Vicario nostro facultatem in scriptis obtinuerit, se se ad prædicandum Dei verbumingere audeat. Parochis vero inhibemus, ne ullum ad prædicandum in Ecclesiis suis admittant, nisi de facultate ipsa prius docuerit. Qui vero ad hoc ministerium admissi fuerint, videant, ne verbum veritatis contra Ecclesiæ receptum sensum, & Apostolicas traditiones privatis suis judiciis servire compellant.

### II.

Laicis omnibus, imo & Clericis in sacris Ordinibus non constitutis, prædicandi officium interdiciamus: neve ulla in Dicecesi nostra conventicula faciant, in quibus de Religione tractetur. Quod si contra fecerint, excommunicationis vinculo innodatos, & nisi resipiscant, graviore etiam pœna plectendos declaramus.

### III.

Singulis diebus Dominicis Parochi aliquam ex ordine particulam Rudimentorum nostræ fidei populum doceant, idque præsertim ex Catechismo Tridentino, quem, ut assidua manu versent, hortamur. Hinc enim Sacramentorum efficaciam, ac legitimam administrationem docebuntur, intelligentque quibus potissimum armis expugnanda sit hæresis. Et quanta cautio-

ne, ac prudentia uti debeant in dijudicandis conscientiæ casibus, audiendisque pœnitentium confessionibus.

### IV.

Et quoniam vix ac ne vix quidem fieri potest, ut absque librorum ope Parochi prædicationibus, aliisque muneribus, ad quæ tenentur, rite satisficiant, volumus, ut præter Breviarium, Missale, & Agenda, Biblia etiam sacra, Catechismus Tridentinum, Concilium Tridentinum, Binsfeldium, & Statuta hæc Synodalia penes se singuli habeant.

## III. De Sacramento Baptismi.

### ART. I.

**Q**uilibet Parochus librum habeat, in quo baptizatorum simul, & parentum, ac suscipientium nomina, cognomina, statum, & domicilium, nec non Baptismi diem, & annum designet, & annotet; isque ita servetur, ut ad successoris manus integer deveniat.

### II.

Unctiones ne faciat intincto pollice, sed stylis, seu bacillis ex stanno, vel argento in eum usum comparatis, qui singuli in singulis unctionem sacramentorum vasculis recondantur.

### III.

In Baptismi administratione caveant omnino, ne pro pueris illegitimis plus exigant, quam pro aliis, sub pœna quadrupli restituendi.

### IV.

Sacerdos baptizaturus urceolo deinceps, seu cochleari, non nuda manu aquam ex pelvi baptismali hauriat. Infantem autem baptizandum Patrini teneant supposito disco, ne quo forte casu, aut infantis infirmitate inquinentur fontes.

### V.

Ubi Parochus alicujus pueri parentes diutius distulisse Baptismum animadverterit, graviter eos increpet. Et, si adhuc neglexerint, significet Nobis, aut Vicario nostro, ut huic malo remedium afferre possimus.

### VI.

Ad suscipiendum ne admittantur, qui rationis usum nondum habent, multo

multo minus ad hoc munus obeundum admittantur hæretici, vel de hæresi suspecti.

## VII.

Parochus in sua Parochia, & sacris Ordinibus initiatus in suæ residentiæ, vel beneficii loco pueros de sacro fonte ne suscipiant, nunquam vero Monachus, vel Monialis ad hoc suscipiendi munus admittantur.

## VIII.

Paganorum nomina in Baptismo pueris ne imponantur.

## IX.

In Baptismo compater nemo sit, qui sacro Chrismate confirmatus non fuerit. Proinde Parochi studiose de hoc inquirere non omittant.

#### IV. De Sacramento Confirmationis.

## ART. I.

**A**D Sacramentum Confirmationis suscipiendum nemo adducatur, qui septem annos non exegerit, & Orationem Dominicam, Salutationem Angelicam, Symbolumque fidei, memoria teneat. Sit etiam jejunus, atque confessus, si fieri potest, quisquis ad hoc ipsum Sacramentum accesserit.

## II.

Qui supra suscipere in Baptismo prohibentur, eos pariter in Confirmatione suscipere prohibemus.

#### V. De Sacramento Eucharistiæ, & Sacrosancto Missæ Sacrificio.

## ART. I.

**P**Ræcipimus omnibus Parochis, & Sacerdotibus in nostra Dicecesi Metensi constitutis, quatenus Ædituum, aut Ludimagistrum habeant, puerumve aliquem doceant ministrare, & respondere Sacerdoti Missam celebranti, statuimusque, ut qui celebrare sine Ministro respondente inventus fuerit, mulctam duorum francorum irremissibiliter solvat pro qualibet vice. Idque ut facilius executioni mandetur, Missis celebrandis certum tempus, & stata

hora præfigatur: ita ut plures simul Missæ in eadem Ecclesia non celebrentur: maxime ubi defunt Ministri, qui Sacerdotibus celebrantibus deserviant.

## II.

Nusquam mulieres, etiam Moniales in Monasteriis, Sacerdoti celebranti in altari deserviant, sed Clericus superpellicio indutus, si fieri possit.

## III.

Parochi omnes, qui ratione sui muneris diebus Festis, aut Dominicis bis celebrant, caveant, ne in prima Missa purificationem sumant: alias enim postea celebrarent non jejuni contra præceptum Ecclesiæ.

## IV.

Singulis saltem mensibus, nisi sæpius pro ratione loci necesse fuerit, Sanctissimum Eucharistiæ Sacramentum renovetur: ac, novarum Hostiarum consecratione peracta, veteres, & earum fragmenta a Sacerdote reverenter sumantur.

## V.

Substernatur in Ciborio Sanctissimo Sacramento pars aliqua corporalis mundi, neque unquam sordibus aspersum relinquatur.

## VI.

In Monstrantiæ, ut vocant, Sanctissimi Sacramenti lunula substernatur pars aliqua corporalis, quam extracto Sanctissimo Sacramento statim etiam extrahat Sacerdos, excutiatque diligenter in calicem, ne adhærentes ei particule deperdantur.

## VII.

Atque ad calicem ipsum, post sumptum Sacramentum & vinum ablutiois, decenter abstergendum parentur sudariola, seu purificatoria ex albo linteo firmo comburanturque, quæ jam præ vetustate sunt olida, aut putrida, & cineres, vel in piscinam altari vicinam, (si capax sit) effundantur, vel in scrobe Ecclesiæ, vel Cœmeterii recondantur.

## VIII.

Non liceat uti Purificatoriis ex serico in posterum.

## IX.

## IX.

Observetur diligenter, ut ad tremendum Missæ Sacrificium nonnisi recens haustum vinum adhibeatur, recentes quoque panes singulis saltem mensibus provideantur. Maxime vero, quando renovandæ sunt Hostiæ, & in Ciborio conservandæ.

## X.

Stet in altari Sacerdos erecto corpore, non cubitis innixus, nisi dum actu versatur in consecratione tam Hostiæ, quam Calicis. Nullæ externæ aut inusitatæ cæremoniæ invehantur.

## XI.

In unoquoque Archi-Presbyteratu designetur aliquis Cæremoniarum Magister, qui novos Sacerdotes Sacras Missæ cæremonias doceat. Is vero eligatur, qui, & eas perfecte calleat, sitque probatæ vitæ, & famæ, nullusque sub gravi pœna præsumat primum Sacrum facere in hac Diœcesi, nisi Syngrapha præfati Magistri cæremoniarum doceat, se in his ritibus, cæremoniisque satis esse instructum. Ejus autem Magistri cæremoniarum nomen ad Vicarium nostrum deferat Archi-Presbyter.

## XII.

Albas ne ex crassa nimium tela, sed subtiliore, & decenti, easque rugatas circa collum, neque nimium laxas, aut strictas, manicis non ita amplis, sed oblongis fieri curent Parochi.

## XIII.

Armariola, seu Tabernacula, in quibus asservatur Sanctissimum Sacramentum, quæ cancellis ferreis, aut cratibus ut plurimum septa reperiuntur, tabulis seu asserculis ligneis intrinsecus circumsepiantur, ne pulveri, muscis, & araneis in ea pateat aditus, neve ita facile injuria quævis Sanctissimo Sacramento inferri possit.

## XIV.

Vascula sacrarum Unctionum, cæteraque omnia, quæ in tabernaculo, seu repositoio Sanctissimi Sacramenti pluribus in locis reposita inveniuntur, honesto alio loco, ubi commode fieri poterit, recondantur.

*Tomus VIII. Concilior. German.*

## XV.

Pastores, eorumque Vicarios hortamur, ut aliquoties in hebdomade, etiamsi non occurrat dies festus, Sacrum faciant, ad conservandam, & augendam populi devotionem.

## XVI.

Sacerdotes omnes, etsi iis animarum cura non incumbat, neque teneantur ratione beneficii, certo tempore celebrare, juxta Sacrosancti Concilii Tridentini Decreta celebrent præcipuis saltem anni Festivitatibus, omni excusatione semota, sub pœna arbitrato nostro, vel Officialium nostrorum imponenda: Nullus tamen mortalis peccati sibi conscius, quantumlibet sibi contritus videatur, absque prævia confessione celebret, licet ei ex officio celebrare incumbat, si modo adsit copia Confessoris. Ubi vero quis necessitate urgente, non confessus celebraverit, quamprimum postea confiteatur.

## XVII.

Moneant diligenter, & sæpe Pastores suos Parochianos, ut statim initio Missæ adsint, neque ex Ecclesia ante ejus finem discedant; Inobedientes primo secrete corripiant, secundo coram Scabinis iterum arguant, eosque, nisi resipuerint, ad Officiales nostros deferant puniendos.

## XVIII.

Communicanti populo purificationis vinum, non ex calice, sed ex scypho, vel cratere in posterum, quacunque consuetudine non obstante, præbeatur.

## XIX.

In posterum inter Missarum solennia, vel alias, in Templo, aut Cœmeterio promulgationes locationum, & cæterorum hujusmodi prophanorum nec faciant Parochi, nec ab aliis fieri patiantur. Sed ea, absoluto Officio Divino, per designatum a Magistratu loco publico fiant.

## XX.

Ad celebrandum Missæ Sacrum Parochi neminem admittant, nisi sic probe notus, aut a proprio Episcopo testimoniales habeat, & exhibeat. Dum

E e e e e

concio



concio habetur, vel supplicationes fiunt in Ecclesia, nemo in quocunque ejus altari Missam celebret.

## XXI.

Districte præcipimus omnium Ordinum Religiosis curam animarum non habentibus, ne ulli Sacram Eucharistiam die Sancto Paschæ administrare præsumant, nisi de expressa nostra, aut proprii Pastoris licentia pro legitimis causis concedenda.

## XXII.

In qualibet Ecclesia, ubi plures Missæ celebrandæ sunt, illæ per æqualia temporis interstitia celebrentur. Ita tamen, ut nec ante diluculum, nec post meridiem ulla dicatur, nisi forte ubi ex fundatione matutinales Missæ ante diluculum dici consueverunt: quo casu etiam eas tantum, non alias ante diluculum celebrari permittimus. Vetamus quoque in eadem Ecclesia plures Missas simul celebrari, nisi tantus sit Sacerdotum numerus, ut hoc Decretum commode servari nequeat. Mandamus præterea universis quarumcunque Ecclesiarum hujusmodi Capitulis, Præpositis, & Rectoribus, ut tabellam in Sacristiæ loco conspicuo fixam teneant, diem, & altare, in quibus singulæ Missæ celebrari debeant continentem, una cum assignatione ordinis, & horæ competentis; ejusque tabellæ exemplar ad Nos infra duos menses mitti curent.

## XXIII.

Ad Missarum autem celebrationem altarium ornamenta, sacræque vestes eo colore, quo pro temporis, & officii ratione uti consuevit Sancta Mater Ecclesia, ac, prout in Rubricis Missalis Romani traditum est, præparentur, quatenus id per Ecclesiæ facultates licuerit.

## XXIV.

Sacerdotes, qui publice, & notorie criminosi fuerint, a Missæ celebratione arceantur.

## XXV.

Nullus Sacerdos in privatis ædibus, sed in Ecclesia tantum, & Oratoriis cultui Divino dicatis, & a Nobis designatis, & visitatis Missam celebrare audeat.

## XXVI.

Ne plures tribus, vel ad summum quinque Orationes, seu Collectæ in Missa dicantur, nisi ubi Ecclesiæ institutum aliud postulaverit.

## XXVII.

In novis Missis cessent sumptuosa convivia, ludi, choreæ, cæterique omnes abusus, qui hætenus aut populi temeritate, aut Sacerdotum avaritia irrepsérunt.

## XXVIII.

Sacerdotes celebraturi, non in Altari, sed in Sacristia vestiantur, & postquam induti fuerint, cum nemine colloquantur.

## XXIX.

In Parochialibus Ecclesiis stitis horis Missæ celebrentur, nemine quavis de causa expectato.

## XXX.

In Ecclesia, etiam cum aliquid offertur, nec tympana, nec cytharæ, aut alia ejus generis instrumenta audiantur, neve illa gerentes etiam taciti Ecclesiam ingrediantur.

## XXXI.

Gradibus altaris nemo hæreat, aut prope altare sit, dum Sacrum fit; neve pueri, vel alii illis insideant dorso ad altare verso. Mulieres etiam ad altaris latera ita ne maneant, ut a Celebrante ad altare converso videri possint.

## XXXII.

Parochi omnes, & singuli libellum habeant, in quo communicantium in Paschate nomina, & cognomina per familias describant; separatim vero notam fideliter faciant eorum, qui non communicaverint; ac utriusque exemplar Nobis, aut Vicario nostro statim post Pascha consignari curent.

## VI. De Sacramento Pœnitentiæ.

## ART. I.

Singulis saltem mensibus confiteantur omnes, & singuli Parochi, & requisiti fidem facere teneantur Archiepiscopo suo, sub pœna duorum francorum pro prima vice, trium, pro secun-

secunda, quatuor pro tertia, graviorisque pœnæ, etiam carceris, pro quarta. Contumaces Archi-Presbyter ipse ad Officiales nostros deferre teneatur, alias ipsemet arbitrio nostro puniatur.

## II.

Intolerabilis abusus irrepsit in hanc Diocesim auctore Diabolo, audiendi simul confessiones plurium puerorum, quem ex toto eliminare cupientes, prohibemus universis, & singulis Parochis, & Sacerdotibus ad confessiones audiendas deputatis, ne, sub pœna suspensionis ab Ordine, ullo unquam tempore, quovis quæsito prætextu, plures pueros, puellasve etiam septennio minores in confessione simul, sed seorsim singulos audiant: hortamurque in Domino, ut, quoniam omnium animarum sibi creditarum rationem in districto iudicio sunt reddituri, eas ne negligant, neve sinant item pueros maiores septennio sine sacra confessione decedere: moneantque sedulo parentes, ut, quando contigerit aliquem ex suis decumbere, mature Parochum advocent ejus confessionem auditurum. Relinquimus autem discretionis, prudentiæ & conscientiæ Parochorum curam advertendi ex probabilibus conjecturis, aliquisne ex sibi commissis pueris ante septennium discretionis usum habeat. Quod si adverterint, ita se gerant cum eo, quemadmodum cum iis, qui essent maiores septennio.

## III.

Caveant Parochi diligenter, ne pueros ad confessionem, aut benedictionem Sacerdotalem recipiendam venientes, minis, verberibus, aut virgis terreant, scientes pro certo se, nisi in posterum ab ejusmodi abstinuerint, severe castigandos.

## IV.

In singulis saltem Parochiis unum fiat Confessionale, ut, & hujus Sacramenti reverentiæ, & Sacerdotis simul, & confitentium commoditati consulatur, omniaque fiant cum ordine, & decore. Nec noctu, nisi accensa lucerna, seu candela, confessiones, etiam in Ecclesia audiantur.

*Tomus VIII. Concilior. German.*

## V.

Non sint difficiles Parochi in concedenda suis subditis facultate alteri Sacerdoti a Nobis approbato confitendi, sive in Paschate, sive alio tempore. Qui tamen in Paschate alteri confessus fuerit, confessionis testimonium in scriptis Parocho suo exhibere teneatur: alioquin contra eum, tanquam non confessum, procedatur.

## VI.

In hac Diocesi nullus Sacerdos sive secularis, sive Regularis: etiam alibi approbatus absque nostra, vel Vicarii nostri approbatione in scriptis obtenta, immiscere se audeat confessionibus audiendis, etiam puerorum, etiam in necessitate, quamdiu copia proprii Sacerdotis haberi poterit, aut alterius approbati, etiam de consensu proprii Parochi, vel Archi-Presbyteri, nisi habeant ad hoc speciale mandatum. Quod si qui forte mendicantes, aut alii se hoc Decreto non astringendos prætendant, de privilegiis suis Nobis quamprimum fidem faciant, nostramque super hac re declarationem expectent.

## VII.

Qui approbati fuerint ad confessiones audiendas, formam mandati, seu licentiæ ne excedant, si fuerit limitata certo loco, tempore, casibus, vel personis.

## VIII.

Habentes facultatem a censuris, ac casibus reservatis absolvendi, si quid gravius, aut difficilius occurrerit, ad Nos, aut Pœnitentiarium nostrum majorem referant.

## IX.

Superiores omnes regulares quamprimum dent Catalogum Confessorum sui Conventus approbatorum, nomen, & cognomen uniuscujusque continentem: idque semel quolibet anno in capite Quadragesimæ repetant.

## X.

Ad januam Sacristiæ Ecclesiarum Collegiarum, aut Conventualium teneatur Catalogus Confessorum inibi approbatorum, si plures fuerint approbati.

E e e e e a

XI.

## XI.

Regularium Superiores, quando aliquem approbandum ad confessiones præsentabunt, eum bonis moribus præditum esse testentur: alias eum non approbandum sciant.

## XII.

Nemo, vel verbo, vel signo aliquid petat pro confessionibus audientis. Si quid tamen sponte oblatum fuerit, id recipere liceat.

## XIII.

Sint Confessores tam sæculares, quam Regulares parati audire confessiones, maxime a Dominica Passionis, usque ad Octavam Paschæ, & aliquot diebus ante festa Nativitatis Domini, Pentecostes, Assumptionis Beatæ Virginis, & Omnium Sanctorum, aliaque Festa solennia, ac præterea quando contigerit Jubileum.

## XIV.

Vocati ad infirmos audiendos moneant proprium Parochum, ut de statu infirmi melius cognoscant.

## XV.

In domibus privatis non audiant confessiones, nisi infirmorum, &, si mulieres fuerint, ostio cubiculi aperto.

## XVI.

Eos, qui sæpe mutant Confessores, graviter redarguant.

## XVII.

Concubinariis, & usurariis publicis semel admissis, nisi destiterint, non amplius communicare permittant.

## XVIII.

Diligenter examinent pœnitentes, an contractus usurarios, aut alios illicitos fecerint, & eo casu ante satisfactionem ne absolvant. Ubi audierint peccatum restitutioni obnoxium, ne expectent finem confessionis, ad eam injungendam, ne forte interim obliviscantur.

## XIX.

Tempore Paschatis tarde venientes exhortentur, ne amplius hebdomadam sanctam expectent ad confitendum, maxime si raro confiteri consueverint.

## XX.

Non admittant usurarios, nisi resciderint contractus fœneratitios. Obligatos ad restitutionem, & restituere valentes, si prius moniti, vel a se, vel ab alio Confessore, non satisfecerint, non absolvant. Idem de iis, qui legata pia non impleverint. Quod si excusationem aliquam prætenderint, eos ad Nos, vel Pœnitentiarium nostrum majorem remittant. Nec absolvant eos, qui moniti res amissas, aut furto ablatas scientes non revelaverint: nec eos, qui per decretum aut sententiam Curie nostræ excommunicati fuerint, sine excommunicatoris licentia, expressaque auctoritate. Nec facile admittant ab alio Confessore (\*) forte destruant, quod alii ædificare procuraverint.

## XXI.

Sæpe legant, vel etiam affixam habeant in Confessionali Bullam Cœnæ Domini, & Casus Nobis reservados. Et, si quos his ligatos invenerint, ad eos, ad quos spectat, remittant, priusquam eos, aut ulterius audiant, aut absolvant ab aliis peccatis.

## XXII.

Noverint etiam, & apud se habeant Canones Pœnitentiales, eosque, quando videbitur, pœnitentibus explicent. Ut cognoscant, quanta benignitate cum eis nunc utatur Ecclesia.

## XXIII.

Ubi pœnitentia publica opus esse judicaverint, ob scandalum peccando excitatum, ad Nos recurrant. Ut, si expedire viderimus, pœnitentiam illam publicam in aliud pœnitentiæ genus commutemus.

## XXIV.

Ubi pro pœnitentia injunxerint eleemosynas, Missas, aut aliud simile, vel ubi agatur de restitutione incertorum, vel commutatione votorum, nihil sibi, vel Ecclesiæ suæ applicent.

## XXV.

Non admittant prima vice ad Communionem, nisi quos prius de ejus fructu & Sanctissimi Sacramenti virtute, ac dignitate instruxerint.

## XXVI.

(\*) Forte omissum: non absolutos; ne



## XXVI.

Frequenter moneant Parochi populum, ut ad Pœnitentiæ Sacramentum, tanquam ad tutissimam salutis ancoram, quam sapissime confugiant.

## XXVII.

Nec ad Communionem Paschatis admittant alteri, quam sibi confessos, nisi fidem fecerint in scriptis confessionis de nostra, aut eorum licentia alteri a Nobis approbato factæ. Quod etiam Parochi ipsi per dies Dominicos Quadragesimæ publice moneant se observaturos. Frequenter etiam Parochi populum moneant, ut, quoties aliquis ægrotaverit, Parochum suum advocet ad infirmum invisendum, quo tempestive Sacramenta necessaria ei administrare possit.

## XXVIII.

Habeant Parochi descripta nomina, & cognomina Parochianorum: & puncto aliquo notent sibi confessos statim ab ipsa confessione: vel saltem libellum habeant, in quo statim a confessione uniuscujusque, ejus nomen, cognomen, & cujus sit familiæ, describant.

## VII. De Sacramento Extremæ Unctionis.

## ART. I.

**D**olentes audivimus, Sacrum Extremæ Unctionis Sacramentum ægrotis, quo ex hac vita pie discedant, maxime necessarium, in pluribus locis negligi: dent ergo operam Parochi, ut sæpe populum hujus Sacramenti efficaciam doceant, exhortenturque serio, ut quando ex suis aliqui decumbent, mature juxta morem Christianorum Parochum advocent, qui hoc Sacramentum ministret, & ex suggestu tribus diebus Dominicis continuis publice significant, se ex mandato nostro nullum ad Ecclesiasticam sepulturam admissuros, qui hoc Sacramentum non perceperit, nisi ab eo percipiendo repentino aliquo casu impeditus fuerit.

## II.

Vasculis saltem stanneis sacras Unctiones conservent, non vero æneis,

quæ rubiginem facile, aut nidorem contrahunt.

## III.

In vascula Sacrarum Unctionum ter aut quater in anno Pastores instillent unam aut alteram guttam olei Olivæ, non autem alterius cujuscunque, ne frequenti usu exhauriantur.

## IV.

Sacris Olei Unctionum in singulis earum locellis Parochi omnes in posterum pro recepto more Diœcesis nostræ Metensis gossipium substernant, non vero canabem, stuppam, aut aliud quidpiam.

## V.

Sacerdos Extremam Unctionem mulieribus ministraturus, renes illis ne ungat.

## VIII. De Sacramento Ordinis.

## ART. I.

**S**cient omnes, nos ea, quæ a Sacro Concilio Tridentino de ætate, & qualitate Ordinandorum, decreta sunt, exacte observaturos.

## II.

Nemo ex Diœcesanis nostris ad Ordines suscipiendos vel Dimissorias obtinendas accedat, nisi Parochi sui saltem testimonium in scriptis habeat de natalibus, ætate, vita, & moribus. Et si Sacris initiandus fuerit, etiam de beneficio, pensione, vel patrimonio, & eorum valore ab ipso Parocho, & Archipresbytero. Testimonia autem illa literis rite obsignatis contineantur. Ipsi vero sacris ordinandi juramento firmabunt, se nullam pactionem, vel promissionem fecisse de retrocedendis beneficiis, pensionibus, seu aliis bonis pro titulo Patrimonii sibi assignatis. Neve fraus ulla circa hujusmodi pensionum, aut Patrimonii assignationem committi possit, literæ ipsius assignationis ante ordinationem in Ecclesia Parochiali, in cujus territorio bona ipsa sita sunt, die Dominico inter Missarum solennia publicentur a Parocho, qui publicationis ipsius fidem in scriptis faciat, quam ordinandus ipse Nobis exhibere teneatur.

Ecc ecc 3

III.

## III.

Sacros Ordines suscepturi, quoniam in Missa ordinationis Eucharistiam sumpturi sunt, prius confiteri debent. Clericali vero tonsura, ac Minoribus Ordinibus initiandos, ut idem præstent, & optamus, & hortamur.

## IV.

Literæ dimissoriæ ad Ordines nemini, etiam Regulari, concedantur, nisi debite examinatus, & pro Ordinum, ad quos dimittendus fuerit, qualitate idoneus reperiatur.

## V.

Qui sub titulo alicujus Beneficii, aut Patrimonii ad Sacros Ordines promotus fuerit, hujusmodi Beneficio, aut Patrimonio nullo modo cedere queat, nisi facta mentione, quod ad illius Beneficii, vel Patrimonii titulum sit promotus: neque ea resignatio, aut cessio admittatur, nisi prius constet, quod aliunde habeat, unde commode vivere possit. Alias resignatio, sive cessio nulla censeatur.

## IX. De Sacramento Matrimonii.

## ART. I.

**S**acrosancti Concilii Tridentini Decretum *Sessione XXIV. Cap. I. de Reformatione Matrimonii*, in qualibet nostræ Diocesis Parochia tribus continuis diebus Dominicis a Parochis publicetur, ac de verbo ad verbum intelligibiliter recitetur. Cujus Decreti tenor sequitur:

## II.

" Tametsi dubitandum non est,  
" clandestina Matrimonia, libero contrahentium consensu facta, rata, &  
" vera esse Matrimonia, quamdiu Ecclesia ea irrita non fecit, & proinde  
" jure damnandi sint illi, ut eos Sancta Synodus anathemate damnat, qui  
" ea vera, ac rata esse negant, quique falso affirmant Matrimonia a filiis  
" familias sine consensu parentum contracta, irrita esse, & parentes ea rata,  
" vel irrita facere posse: nihilominus Sancta Dei Ecclesia ex justissimis  
" causis illa semper detestata est, atque prohibuit. Verum cum Sancta Synodus  
" animadvertat, prohibitiones

" illas propter hominum inobedientiam jam non prodesse, & gravia  
" peccata perpendat, quæ ex eisdem clandestinis conjugiiis ortum habent:  
" præsertim vero eorum, qui in statu damnationis permanent, dum, priore  
" uxore, cum qua clam contraxerant, relicta, cum alia palam contrahunt,  
" & cum ea in perpetuo adulterio vivunt. Cui malo cum ab Ecclesia,  
" quæ de occultis non judicat, succurri non possit, nisi efficacius aliquod  
" remedium adhibeatur: Idcirco Sacri Lateranensis Concilii, sub INNOCENTIO III. celebrati, vestigiis inhaerendo præcipit, ut in posterum, antequam Matrimonium contrahatur: ter a proprio contrahentium Parocho tribus continuis diebus festivis in Ecclesia inter Missarum solennia publice denunciatur, inter quos Matrimonium sit contrahendum: quibus denunciationibus factis, si nullum legitimum opponatur impedimentum, ad celebrationem Matrimonii in facie Ecclesiæ procedatur, ubi Parochus viro, & muliere interrogatis, & eorum mutuo consensu intellecto, vel dicat: *Ego vos in Matrimonium conjungo, in Nomine Patris, & Filii, & Spiritus Sancti*: vel aliis utatur verbis juxta receptum uniuscujusque Provinciae ritum. Quod si aliquando probabilis fuerit suspicio, Matrimonium malitiose impediri posse, si tot præcesserint denunciationes, tunc, vel una tantum denunciatio fiat, vel saltem Parocho, & duobus, vel tribus testibus præsentibus Matrimonium celebretur: deinde ante illius summationem denunciationes in Ecclesia fiant, ut, si aliqua subsint impedimenta, facilius detegantur: nisi Ordinarius ipse expedire judicaverit, ut prædictæ denunciationes remittantur, quod illius prudentiæ, & judicio Sancta Synodus relinquit. Qui aliter, quam præsentem Parocho, vel alio Sacerdote, de ipsius Parochi, seu Ordinarii licentia, & duobus, vel tribus testibus Matrimonium contrahere attentabunt: eos Sancta Synodus ad sic contrahendum omnino inhabiles reddit: & hujusmodi contractus irritos, & nullos esse decernit,

" nit, prout eos præfenti Decreto irri-  
 " tos facit, & annullat. Insuper Pa-  
 " rochum, vel alium Sacerdotem, qui  
 " cum minore testium numero, & te-  
 " stes, qui sine Parocho, vel Sacerdote  
 " hujusmodi contractui interfuerint,  
 " nec non ipsos contrahentes graviter  
 " arbitrio Ordinarii puniri præcipit.  
 " Præterea eadem Sancta Synodus hor-  
 " tatur, ut conjuges ante Benedictio-  
 " nem Sacerdotalem, in Templo susci-  
 " piendam, in eadem domo non co-  
 " habitent: statuitque benedictionem  
 " a proprio Parocho fieri: neque a  
 " quoquam, nisi ab ipso Parocho, vel  
 " ab Ordinario licentiam ad prædictam  
 " benedictionem faciendam, alii Sacer-  
 " doti concedi posse: quacunque con-  
 " suetudine, etiam immemorabili, quæ  
 " potius corruptela dicenda est, vel  
 " privilegio, non obstante. Quod si  
 " quis Parochus, vel alius Sacerdos,  
 " sive Regularis, sive sæcularis sit: etiam  
 " si id sibi ex privilegio, vel immemo-  
 " rabili consuetudine licere contendat,  
 " alterius Parochiæ Sponsos sine illo-  
 " rum Parochi licentia Matrimonio  
 " conjungere, aut benedicere ausus  
 " fuerit: ipso jure tamdiu suspensus  
 " maneat, quamdiu ab Ordinario ejus  
 " Parochi, qui Matrimonio interesse  
 " debebat, seu a quo benedictio susci-  
 " pienda erat, absolvatur. Habeat  
 " Parochus librum, in quo conjugum,  
 " & testium nomina, diemque & lo-  
 " cum contracti Matrimonii describat,  
 " quem diligenter apud se custodiat.  
 " Postremo Sancta Synodus conjuges  
 " hortatur, ut, antequam contrahant,  
 " vel saltem triduo ante Matrimonii  
 " consummationem sua peccata diligen-  
 " ter confiteantur, & ad Sanctissimum  
 " Eucharistiæ Sacramentum pie acce-  
 " dant. Si quæ Provinciæ aliis, ultra  
 " prædictas, laudabilibus consuetudini-  
 " bus, & cæremoniis hac in re utuntur,  
 " eas omnino retinere Sancta Synodus  
 " vehementer optat. Ne vero hæc  
 " tam salubria præcepta quemquam  
 " lateant, Ordinariis omnibus præci-  
 " pit, ut, cum primum poterunt, cu-  
 " rent hoc Decretum populo publica-  
 " ri, ac explicari in singulis suarum  
 " Diecefsum Parochialibus Ecclesiis,  
 " idque in primo anno quam sæpiissime

" fiat, deinde vero quoties expedire  
 " viderint. Decernit insuper, ut hu-  
 " jusmodi Decretum in unaquaque Pa-  
 " rochia suum robur post triginta dies  
 " habere incipiat, a die primæ publi-  
 " cationis, in eadem Parochia factæ,  
 " numerandos."

## III.

Hoc ergo Sacrosancti Concilii De-  
 cretum exacte servetur, ac post trigin-  
 ta dies a prima publicatione sic, ut præ-  
 fertur, facienda per Officiales nostros  
 secundum illud omnino judicetur.

## IV.

Publicationum autem ut supra fa-  
 ciendarum, statim atque factæ fuerint,  
 Parochi Archi-Presbyteris, Archi-Pres-  
 byteri vero Nobis infra duos menses  
 testimonium in scriptis omnino config-  
 nare teneantur, sub pœna arbitratur  
 nostro negligentibus infligenda.

## V.

Cognationis spiritualis impedimen-  
 tum inter suscipientem, ac susceptum,  
 susceptique Patrem, & Matrem: rur-  
 susque inter baptizantem, & baptiza-  
 tum, baptizatique Patrem, & Matrem,  
 tantummodo, & non ulterius locum  
 habeat.

## VI.

Affinitas per fornicationem con-  
 tracta ultra secundum gradum Matri-  
 monium postea contractum deinceps  
 non dirimat.

## VII.

Publicæ vero honestatis impedi-  
 mentum jam nullum exstet, si Spon-  
 salia invalida præcesserint, ubi vero va-  
 lida fuerint, primum gradum non ex-  
 cedat.

## VIII.

Parochi de impedimentis istis per  
 Sacrosanctum Concilium Tridentinum,  
 ut supra, limitatis populum quampri-  
 mum moneant, ac deinceps quoties  
 opus esse viderint.

## IX.

Prohibitum est omnibus, & singu-  
 lis Parochis, ne ullos ad Sacramentum  
 Matrimonii admittant, qui non sciant  
 Orationem Dominicam, Salutationem  
 Angelicam, Symbolum Apostolorum,

PRÆ-



Præcepta Dei, & Sanctæ Matris Ecclesiæ, numerumque Sacramentorum, sub poena viginti francorum solvendum, per dictos Parochos, qui huic Constitutioni contravenerint.

## X.

Matrimonio jungendos Parochi sedulo admoneant, ne post Sponsalia de futuro ullo modo in iisdem ædibus degere incipiant ante Matrimonium contractum. Neve ita se gerere audeant, ac si per verba de præsentis contraxissent: si secus a quopiam factum fuerit, prohibetur Parochus eorum Matrimonii adesse, ante poenitentiam peractam.

## XI.

Habeant iidem Parochi librum penes se, quem & ad Successorem transmittant, in quo contrahentium, Parentum quoque, ac testium nomina, cognomina, statum, ac domicilium, diemque, ac locum annotent, & an præmissæ sint tres denunciationes, an vero omissæ ex nostra, vel Vicarii nostri dispensatione.

## XII.

Item sintne in aliquo gradu consanguinitatis, vel affinitatis cujuscunque, & ex cujus dispensatione contraxerint. Ejusque notæ transsumptum singulis annis deferant ad Synodum Diocesanam, tradantque Vicario nostro Generali, vel ejus vices gerenti.

## XIII.

Postridie nuptiarum nihil indecens fiat: nulli, sub poena unius marce argenti, in Ecclesiam larvati ingrediantur, aut nuptas in Ecclesiam deducant. Nihil futile, nihil leve in Ecclesia fiat, sub poena unius libræ cere, in usum Ecclesiæ solvendæ a contraveniente.

## XIV.

Caveant Parochi, ne vagos Matrimonio jungant, nisi forte de mandato nostro expresso, & scriptis edito.

## XV.

Caveant item, ne alienæ Parochiæ Sponsum, Sponsamve Matrimonio jungant, antequam ab illius, qui intra Parochiæ suæ fines non habitat, Parocho scriptum acceperint, fidem faciens denunciationum, aut factarum, aut Or-

dinarij voluntate remissarum, nullumque legitimum impedimentum fuisse significatum, quominus Matrimonium rite contrahi liceat.

## XVI.

Denunciationes a Parochis ne fiant, nisi de expressa eorum, qui contracturi sunt, voluntate.

## XVII.

Ne Archi-Presbyteri, aut Parochi literas deliberatorias Extradicecesanis pro Matrimonio contrahendo dare præsumant, sed eos ad Nos, ut moris est, remittant. Neve super denunciationibus bannorum, aut aliqua earum dispensent quocunque prætextu, sub poena unius marce argenti arbitrio nostro applicandæ.

## XVIII.

Matrimonio copulandi, si fieri potest, sint confirmati.

## XIX.

Neutri conjugum liceat ab altero, etiam quoad thorum, discedere, nisi ex causa legitima prius a Nobis, vel ab Officialibus nostris approbata. Quod si eos quoad thorum, vel etiam cohabitationem separari contigerit, sciant nihilominus neutri eorum licere ad novum Matrimonium convolare. Si autem concubinam vir alere comperiat, vel uxor adulterum, nisi ter moniti resipuerint, excommunicentur. Et si nihilominus perseveraverint, poenis severissimis coerceantur.

## X. De Officiis Divinis rite persolvendis.

## ART. I.

**P**arochi, quorum officium est Christi gregem pascere verbo, & exemplo, caveant, ne quem ex suis Parochianis prætermittant, neque contenti sint in solis Ecclesiis matricibus Catechismum docere, sed eandem etiam operam navent in annexis, ut vocant, seu capellis sibi subditis bis saltem singulis mensibus, etiamsi hætenus non sit factum.

## II.

Singuli Parochi Vesperas decantent hora solita omnibus diebus Dominicis,

nicis, & Festis: itemque diebus Sabbati, & saltem in Vigiliis majorum festorum. Qui secus fecerit, ab Archi-Presbytero deferatur, & pœna pro modo negligentiae debita coerceatur.

## III.

Omnes Parochialium Ecclesiarum Rectores suos Parochianos singulis diebus Dominicis a Vesperis per horam Catechismum Canisii doceant familiariter. Pueros item formare signum Crucis; curentque, ut singuli ex sibi creditis sciant ea omnia, quæ Christianos scire necesse est, Orationem Dominicam, Salutationem Angelicam, Symbolum Apostolorum, Præcepta Dei, & Ecclesiæ, Sacramenta, eorumque numerum, præcipuaque mysteria Religionis Christianæ. Quod eo diligentius in iis locis, ubi degunt hæretici, erit exequendum, quo majore in periculo versantur ii, quorum rationem exactam coram Summo Judice reddere debent, propter continuam pene cum ipsis hæreticis conversationem, quorum sermo, teste Apostolo, serpit, ut cancer.

## IV.

In Ecclesiis, ut omnia cum ordine fiant, & sine confusione viri separati loco, & sedibus a mulieribus sedeant. Nullæ mulieres in Cancellos, aut Chorum irrepant, vel designata viris loca occupent, vel contra.

## V.

Ubi organorum, vel aliorum instrumentorum est usus, ex officii partes, quæ organis, aliisve instrumentis canuntur, in Choro distincte ab aliquo ad id deputato pronuncientur.

## VI.

Divina Officia non cursim, non perturbate, nec oscitanter, sed leniter, distincte, ac studiose pronuncientur.

## VII.

Omnes Canonici, Nobis subditi Parochi, & alii Beneficiati ad residentiam obligati in Canonicatibus, Ecclesiis, Parochiis & Beneficiis suis omnino resideant, Officiisque Divinis sedulo interfint: alioqui pœnas a Sacrosancto Tridentino Concilio sancitas se noverint incursumas.

*Tomus VIII. Concilior. German.*

## VIII.

Curent Parochi, ut Missæ omnes, aliaque Divina Officia tam ab ipsis, quam ab aliis intra Parochiarum suarum fines debita, & consuetas celebrentur. In quo, si quem negligentem repperint, eum ad Archi-Presbyterum suum, Archi-Presbyter vero ad Nos infra duos menses, ac deinceps singulis annis omnino deferant.

## IX.

Omnes Canonicos, Parochos, & Clericos, omnes item cujusvis Ordinis Regulares hortamur, ut Officium Romanum in Ecclesiis suis, ad instar Ecclesiæ nostræ Cathedralis admittant, & amplectantur.

## X.

Nemini unquam, sed maxime, quando Divina peraguntur Officia, in Ecclesiis deambulare, vel ociosis fabulis vacare contingat, sub pœna Officialium nostrorum arbitrio infligenda.

XI. *De vita, & honestate Clericorum.*

## ART. I.

**C**UM ii, qui Beneficia Ecclesiastica sine Canonica institutione occupant, sibi damnationem consciscant, eam statim a Nobis, vel a Vicario nostro Generali impetrare satagant: certi alioquin se istiusmodi beneficio, & ejus obtinendi spe non solum carituros, sed & ad quævis beneficia in hac Diocesi obtinenda inhabiles futuros.

## II.

Deferant omnes Clerici beneficiati, vel in Sacris constituti habitum Clericalem, & nunquam domo exeant sine tunica, sub pœna unius aurei. Deferant item omnes tonsuram Clericalem, quam Coronam vocant, sub simili pœna.

## III.

Nemo Sacrum dicat, quin sub alba, hujusmodi tunicam deferat, sub pœna decem francorum irremissibiliter solvendorum.

## IV.

In vestibus nihil indecorum, nihil inusitatum, nullus color contra recep-

F f f f f f

tum

rum Ecclesiæ usum, nihil leve, aut vanum appareat. Collaria non rugata, seu crispa, nec valde lata, aut distenta, sed simplicia, & modice lata, & ad collum honeste reclinata.

## V.

Quemadmodum non decet eos, qui in sortem Domini allekti sunt, vanitates vestimentorum, & novitates sectari: ita etiam convenit eosdem honeste vestiri: ne, quod inde facile evenire solet, in causâ sint, ut a populis vituperetur eorum ministerium. Si quem ergo ex Parochis, cæterisque Sacerdotibus, aut Clericis viderint Archi-Presbyteri sordidius vestitum, eum primo arguant, & increpent: Non obedientem vero deferant ad Officiales nostros castigandum.

## VI.

Tabernas, & cauponas, nisi in itinere constituti, ne ingrediantur, sub pœna arbitrio nostro, vel Officialium nostrorum imponenda.

## VII.

Omnes Clerici tam sæculares, quam Regulares, maxime vero Parochi bonorum Authorum lectioni diligenter incumbant, ac libros de casibus conscientiæ sibi comparent, sciantque Visitatores diligenter in posterum investigaturos, utrum ex præscriptis studiis profecerint. Et contra incapaces ex Sacrosancti Tridentini Concilii præscripto processuros.

## VIII.

Choreas neque publicas, neque privatas agant Clerici, nec spectent: neque unquam larvati incedant. Fabulis, comœdiis, aliisque prophanis spectaculis ne interfint: multo vero minus ea in Ecclesiis, aliisque locis sacris fieri sinant. Minus honestis conviviis ne interfint, neve turpes personas ad convivendum apud se convocent. Ebrietatem omnino effugiant, neque alios ad immoderate bibendum provocent.

## IX.

Quia aliqui ex Ecclesiasticis status sui, & decoris obliti cum scandalo, & summa offensione populi Christiani ancillas suas secum ad nundinas, convivias,

nuptias, cauponasque frequenter ducunt, id, ne de cætero fiat, severe prohibemus: Statuimusque, ut, si quis eo impudentiæ devenerit, ut mulierculam sibi inservientem ad nundinas, convivias, nuptias, cauponasque, vel aliqua vis loca publica duxerit, vel in suis ipsius ædibus cum aliis fecerit mensæ assidere, mulctetur irremissibiliter pœna viginti francorum pro prima vice, pro secunda triginta, pro tertia graviore, etiam carceris. Præcipimusque Archi-Presbyteris, ut, quamprimum ad eorum notitiam pervenerit aliquem ex Presbyteris suis huic mandato contravenisse, eum statim ad Promotores nostros deferant: alioqui iisdem pœnis ipsi, tanquam culpæ fautores, subjaceant.

## X.

Quoniam autem aliquos ex Clero ut jumenta in stercore fœdi concubinarum putrescere compertum est, quod a Nobis, Officialibusque nostris longius absint, teneantur Archi-Presbyteri omnes, & singulos hujusmodi concubenarios monere super concubinato, cæterisque omnibus excessibus, ipsasque monitiones rite subsignatas deferre ad Fiscales nostros: quibus mandamus, ut quam diligentissime monitos ipsos pro modo reatus, ex Sacrosancti Concilii Tridentini Decretis puniendos curent.

## XI.

Aliquos etiam ex Ecclesiasticis eo impudentiæ devenisse compertum est, ut mentiti sint suas, aut sorores, aut neptes esse mulierculas impudicas, quas fovebant, cui malo occurrere cupientes, statuimus, ut, si quis ea unquam abusus deprehendatur, quam falso asseruerit suam, seu sororem, seu neptem, aut cognatam in quocunque gradu, pœnis contra incestuosos ex rigore Canonum statutis plectatur.

## XII.

Multis rationibus moti, hisque piis, & justissimis prohibemus omnibus, & singulis Ecclesiasticis sive Sæcularibus, sive Regularibus, ne unquam in suas ædes admittant, aut recipiant ullas cujusvis Ordinis Moniales, seu Religiosas sub pœna triginti francorum irremissibiliter a contravenientibus solvendo-



veudorum: Præcipimusque Fiscalibus nostris, & omnibus Archi-Presbyteris, quatenus sedulo, & studiose curent hanc nostram Constitutionem per Officiales nostros executioni mandari, ne, quam in alios exercere noluerint, justam a Nobis vindictam suo merito sentiant.

## XIII.

Immo vero, quoniam eos, qui in sortem Domini vocati sunt, & Sancta tractare debent, non solum crimine incontinentiæ, sed ejus etiam suspitione carere oportet, re multum discussa, & mature deliberata, universis, & singulis Clericis beneficiatis, vel in Sacris Ordinibus constitutis, districte præcipiendo interdiciamus, ne prætextu servitii mulierculas ullas ætate, aut forma suspectas teneant: sed, si quas ancillas habere voluerint, sint illæ saltem quinquagenariæ, nec ullo modo de incontinentia, aut lenocinio suspectæ. Quod si qui forte juniores, aut suspectas jam habeant, eas protinus abjiciant: alias pœnis a Sacrosancto Concilio Tridentino contra concubinos latis omnino subjaceant. Ad cujus Decreti severam executionem omnibus, & singulis Archi-Presbyteris mandamus, ut studiose ac serio invigilent, & si quos ex districtus sui Ecclesiasticis contravenientes resciverint, eos protinus ad Fiscales nostros deferant: quibus etiam præcipimus, ut serio, & absque ulla personarum acceptione inobedientes præfatis pœnis plecti curent. Quod si in hoc Archi-Presbyteri negligentes fuerint, ipsimet tanquam peccantium fautores arbitraria pœna mulcentur. Eo ipso vero hac in parte negligentes fuisse, & esse censeantur, si quis ex sui Archi-Presbyteratus Ecclesiasticis ab alio, priusquam ab ipsis, delatus fuerit.

## XIV.

Parochi populum sibi commissum ad leges Ecclesiasticas accurate, & pie observandas sæpe hortentur; at novas ne adinveniant, neve ad illas populum obligare præsumant.

## XV.

Nemo militans Deo, implicat se negotiis secularibus, inquit Apostolus.

Tomus VIII. Concilior. German.

lūs) quod tamen minus observatum a plerisque Sacerdotibus audivimus, qui familias amplas, servos, ancillas detinent, & multa, nescio quo prætextu, pecora pascunt. Id, ne de cætero fiat ab Ecclesiasticis hominibus, neve negotiari ullus eorum audeat sub pœnis gravibus arbitrato nostro, vel Officium nostrorum imponendis, severe prohibemus; volumusque, ut singuli Archi-Presbyteri non obedientes, statim ad eosdem Officiales nostros deferant.

## XVI.

Si quis in Sacris Ordinibus constitutus, aut Beneficiatus compertus fuerit usuram exercuisse, sive nomine proprio, sive alieno, juxta Niceni Concilii sententiam a Clero deiciatur, & ab Ecclesiastico gradu alienus habeatur, alisque pœnis arbitrariis nihilominus plectatur.

## XVII.

Clerici, maxime Beneficiati, & in Sacris Ordinibus constituti, nec Medicinam, nec Chirurgiam exercent. Aliena prædia lucris causa ne conducant. Neve aliorum tutelam, aut curam sine expressa nostra licentia suscipiant, nec pro aliis fidejubeant, nec Laicorum quacunque dignitate fulgentium Procuratores, aut Oeconomi existant, neve illis inserviant.

## XVIII.

Confraternitates absque confirmatione Sanctæ Sedis, vel nostræ, de novo erigi prohibemus. Ubi erectæ, & nondum confirmatæ visuntur, ex iis designetur aliquis confirmationem earum a Nobis, vel Vicario nostro petiturus: in iisque omnino teneantur uti iis regulis, quas in eum finem fieri curabimus. Nisi tamen aliis a Sancta Sede confirmatis utantur.

## XIX.

Interdicimus sub pœna quadraginta francorum omnibus, & singulis Parochis, Sacerdotibus, Clericis, Religiosis, & Monachis, ne unquam se obligent sub sigillis Tabellionatum quorumcunque Principum: præcipimusque omnibus Archi-Presbyteris, ut sedulo advertant, ne quis huic Consti-

F f f f f f 2

tutioni

tutioni contraveniat, quosque deprehenderit contravenisse, deferant ad Fiscales nostros.

## XX.

Prohibemus omnibus Presbyteris, & Clericis, ne, sub pœna viginti francorum pro prima vice, officium Notarius secularis exercent.

## XXI.

Prohibemus, ne quis ex Sacerdotibus, vel Clericis Sclopetos, vel catapultas unquam deferat, vel cum iis venationi vacet. Archi-Presbyteri autem deferant non obediētes ad Fiscales nostros, ut omni excusatione remota castigentur.

## XXII.

Qui contra hæc de vita, & honestate Clericorum decreta, aut aliquod eorum deliquerint, non modo pœnis præfatis, sed etiam aliis pro arbitrio nostro imponendis subiaceant.

## XII. De observatione Festorum.

## ART. I.

**N**emini die Festo liceat cujuscunque generis ludis vacare, vel in cauponis, aut alibi computationibus indulgere, dum Sacrum Missæ Offitium peragitur, vel decantantur Vesperæ, sub pœna unius libræ ceræ, Ecclesiæ applicandæ.

## II.

Nundinæ ne uspiam sub quocunque prætextu fiant die Parasceves ante meridiem, neque ad eas ullus convenire audeat sub pœna unius libræ ceræ, in usum Ecclesiæ applicandæ.

## III.

Qui diebus Festis ab Ecclesia præceptis absque licentia Officialium nostrorum, vel Parochorum laboraverit, libra ceræ, prout ab antiquo assolet, in usum Ecclesiæ applicanda mulctetur.

## IV.

Ipso die Sanctissimi Sacramenti honorum Ecclesiæ fieri ratiocinium quibusdam in locis audivimus. Id, ne in posterum fiat, præcipimus Archi-Presbyteris & Parochis.

## V.

Quando in diem, quo fieri solent nundinæ, vel mercatus, incidet Festum aliquod ex præcepto servandum, in diem alium, qui festus non sit, transferatur. Cui rei ad praxim adducendæ Magistratus Laici operam, & auctoritatem Sacerdos loci, in quo haberi solet, junctus Archi-Presbytero, si opus fuerit, implorabit.

## VI.

Viderint Parochi, ne quid inter sacras Ecclesiæ caeremonias irrepat superstitionis, vel irreverentiæ: caveantque diligenter, ne quocunque tempore, maxime vero ipso Dominicæ Ascensionis die, aliquid indecenter fiat in Ecclesia, neve ut solet aliquibus in locis, e fornibus Templi deiciatur aqua, vel quidvis aliud in adstantes, sciantque se, nisi id genus irreverentiæ impederint, ab Officialibus nostris graviter puniendos.

## VII.

In Supplicationibus, Litanis, & Processionibus, quæ ex solenni Ecclesiæ ritu fiunt, videant Parochi, ne quidpiam indecenter fiat, vel cantilenæ aliquæ a mulierculis nugarum plenæ cantentur. Inobediētes unius libræ ceræ mulcta in usum Ecclesiæ coerceant. Eidem quoque pœnæ subiaceant chorizantes, aut ludis vacantes tempore Divini Officii.

## VIII.

Diebus Festis, & Dominicis molitores ne molant, nisi id necessitas exigat, quæ dum incidet, id etiam ne faciant, dum cantatur Missa Parochialis. Idem omnino servetur a mercatoribus, nec merces ullas, etiam rerum ad vitum necessariarum, præsertim tempore Divini Officii, aut sacre Concionis, exponere vanum tolerantur.

## IX.

Patresfamilias, qui suorum, & maxime domesticorum curam gerere tenentur, moneantur a Parochis, ut, Missam audiendi & verbum Dei, suis servis, & ancillis templis concedant, etiam iis, qui in pascendis animalibus occupantur. Quod etiam de cæteris communitatum opilionibus, aut bubulcis cura-

curabunt communitatum ipsarum Praefecti.

## X.

Curabunt quoque Archi-Presbyteri, & Parochi, ut ter in die, mane scilicet, meridie, & vesperi detur signum ad Salutationem Angelicam.

## XI.

Imagines novæ, aut extra morem ornatae, aut quicquam falsum representantes nullo modo inducantur.

## XIII. De Beneficiariis.

## ART. I.

**O**Mnes Canonici Nobis subditi, Parochi, & alii cujuscunque nominis Beneficiati ad residentiam obligati, sive Sæculares sint, sive Regulares, in Canonizatibus, Ecclesiis, & Beneficiis suis per se omnino resideant. Alioquin poenas, a Sacrosancto Tridentino Concilio contra non residentes sancitas, se noverint incururos. Ut autem hoc Decretum debitæ facilius executioni mandetur, statuimus, ut in Collegiatis hujus nostræ Diocesis Ecclesiis ab earum Capitulis singulis sex mensibus absentium nomina, & cognomina, & beneficiorum ab iis obtentorum qualitates Nobis scripto intimentur. Archi-Presbyteri vero idem faciant de Parochis, & aliis Beneficiatis intra districtus suos ad residentiam obligatis. Ac ne quis per Vicarium deserviendo hoc Decretum eludere possit, omnes, & singulas per mercenarios Presbyteros deservendi licentias hæctenus quomodo libet obtentas revocamus, & revocatas esse declaramus. Neve fraus ulla huic ipsi Decreto fiat, Archi-presbyteri nomina illorum, qui ita deserviunt, intra mensem ad Nos deferri curent, quo Ecclesiarum necessitatibus providere possimus.

Nemini Beneficiato, etiam studiorum causa, nisi de licentia nostra, a beneficio residentiam requirente abesse liceat.

## III.

Inhibemus, ne aliquam Religionem professus Parochialis Ecclesiæ regimen recipiat, nisi de nostra, aut Vi-

carii nostri licentia in scriptis habita. Quod si quis privilegio se fultum prætenderit, de eo Nobis fidem faciat, nostramque super hac re declarationem expectet.

## IV.

Beneficiati omnes intra proximam Synodum Titulos, & literas Ordinum, & beneficiorum suorum Nobis, aut Vicario nostro exhibeant.

## XIV. De Immunitate &amp; Jurisdictione Ecclesiastica.

## ART. I.

**J**udices sæculares monitos esse volumus, & hortamur, ut causas totam semotas ad Ecclesiæ jurisdictionem pertinentes, ad Ecclesiasticum Judicem relegent, nec mittant falcem in messem alienam.

## II.

Ne Promotores, vel Officiales nostri ulla a partibus munera capiant, alioqui poenæ arbitrariæ subjaceant.

## III.

Inhibemus, ne quis personam Ecclesiasticam ad judicium sæculare contra Ecclesiasticam libertatem, & Ordinis ejusdem privilegia vocare præsumat. Quod si Laicus actor fuerit a suo jure cadat, & judicatum non teneat, Judexque ex tunc potestate ita judicandi ipso facto sit privatus. Clericus vero, qui alium Clericum ad tale judicium traxerit, seu si Judex laicus Clericum coram se litigare, aut respondere coegerit, sententiam excommunicationis incurrere declarabitur.

## XV. De legitima bonorum, &amp; reddituum Ecclesiasticorum administratione.

## ART. I.

**E**ccliarum, & locorum piorum indemnitatibus providere cupientes, statuimus, ut omnes, & quicunque Canonici, Nobis subditi Parochi, Capellani, & quocunque alio nomine censeantur tam sæculares, quam regulares Beneficiati, etiam in dignitatibus constituti, omnes item Ecclesiarum Scabini, Hospitalium, Fratriarum, & alio-



aliorum locorum piorum Administratores, seu Gubernatores, omnium, & singulorum bonorum, tam mobilium, quam immobilium, jurium, reddituum, ædificiorum, nominum quoque debitorum, & aliorum quorumcunque ad eorum Capitula, Dignitates, Canonicatus, Ecclesias Parochiales, Capellanas, Hospitalia, Fraternitates, & alia quocunque nomine nuncupentur beneficia, & pia loca pertinentium declarationes authenticas faciant intra tres menses: easque Nobis, aut Archi-Presbyteris tradant, qui eas ad Nos, aut Vicarium nostrum deferant in Camera Episcopali servandas, ad futuras necessitates. Earum autem declarationum copiam, seu exemplar, ipsi singuli Beneficiarii, & Officiarii penes se afferrent: ut in singulis visitationibus conferantur: ne quid, quod in eis descriptum fuerit, desit, & si quid forte deerit, Ecclesiæ restitui curetur: si quid accessionis, vel mutationis, præsertim circa mobilia contigerit, id quotannis annotetur: & cum opus fuerit, declarationes ipsæ, maxime quoad mobilia, renoveantur.

## II.

Turpe est eos, qui bonorum Ecclesiæ fideles debent esse Administratores, ea, vel bonam eorum partem, in convivia, & computationes impendere. Id ergo ne fiat in posterum sub pœna dupli ejus, quod hoc pacto consumptum fuerit, restituendi, graviorisque pœnæ pro ratione contumaciæ severe præcipimus. Ergo in locatione bonorum Ecclesiæ is modus serveretur. Quando aliquid Ecclesiæ locandum erit, illud indicet Parochus populo, & omnia plus offerenti pro more locentur, neque liceat vina, ut, vocant, addere, vel quidpiam aliud quocunque prætextu, quod in computationes vertatur. Neque vero fiant eæ locationes ultra novem ad summum annos: quæ autem ad plures fient, eæ omnes sint irritæ, & inanes. Quæ hætenus factæ sunt, revocentur, & annullentur juxta Sacras Constitutiones.

## III.

Scabini, & alii Administratores bonorum Ecclesiæ singulis annis coram Parocho acceptorum, & expensorum

rationem reddant, prout alias a Nobis statutum est, sub pœna arbitrio nostro imponenda.

## IV.

In redditione rationum per Scabinos, & alios bonorum Ecclesiæ Administratores, nullæ fiant expensæ, nulla convivia instruantur. Parochi exemplo sint aliis, neque conviviis hujusmodi interfint, caveantque, ne hujusmodi conviviorum expensas concedant Administratoribus bonorum Ecclesiæ.

## V.

Prohibemus omnibus, & singulis Ecclesiasticis tam Sæcularibus, quam Regularibus, ne sub pœna mediæ partis fructuum beneficiorum, locationes bonorum faciant hæreticis.

## VI.

Scabini, & Administratores omnes reddituum Ecclesiarum, eos primo in comparandam necessariam Ecclesiæ suppellectilem impendant, tum demum, si quid supersit, illud in sacra quatuor temporibus celebranda convertant, ubi ea hætenus consuetudo viguit, caveantque, ne tunc convivium ullum instruant, sed celebrantibus Sacerdotibus stipendium honestum, & Ædituo, sibi que solvant pro ratione occupationis, & laboris juxta taxam a Nobis imponendam, & ab Archi-Presbyteris deinceps declarandam.

## VII.

Providere cupientes, ne beneficiis vacantibus non inveniatur, unde merces deservientibus persolvi queat, interim dum novi fructus expectantur: Sancimus, ne Ecclesiastica beneficia, vel officia quomodolibet obtinentes, sine licentia nostra in scriptis obtinenda pendentes beneficiorum, vel officiorum suorum fructus quovis prætextu, vel causa alienent, nisi dilata solutione in id tempus, quo fructus erunt a solo separati: si secus factum fuerit, contractus sit irritus, nec possit emptor illius vigore fructus ipsos sibi vendicare, & si de facto illos abstulerit, eorum pretium Successori iterum solvere teneatur.

## VIII.

Statuimus insuper, ut quisquis antequam ex Diocesis nostræ Parochis ante diem

diem festum S. Joannis Baptistæ decesserit, in fructibus tunc pendentibus, & a solo nondum separatis, vel eorum decimis nihil percipiat: sed omnes illi fructus ad Successorem pertineant. Qui vero post diem ipsum, vel etiam die ipso S. Joannis Baptistæ decesserit, omnes illos fructus, eorumque decimas lucratus erit: ita tamen, ut fructus ipsi, immo & universa defuncti hæreditas ad portionem congruam Successori, vel alteri Sacerdoti a Nobis approbando persolvendam pro deserviendo ipsi beneficio usque ad diem S. Joannis Baptistæ proxime sequentem remaneant obligata.

## IX.

Si quis Clericus, aut Sacerdos cujusvis generis scripta ad Ecclesiæ rationem pertinentia occultarit, vel easdem suppresserit, iisdem, quibus bonorum Ecclesiasticorum alienatores, subjiciatur poenis.

## XVI. De Regularibus.

## ART. I.

**R**egulares, etiam exempti, cujusunque sint Ordinis, non aliunde, nisi ab Ecclesia nostra Cathedrali Sacra Olea sumant: & si curam animarum exerceant, etiam Synodo nostræ Diœcesanæ interfint.

## II.

Monachi, Monialesque omnes, cujusunque Ordinis existant, tempore probationis exacto, si legitimæ fuerint ætatis, Regulæ suæ professionem expressam in Superiorum manibus quamprimum emittere teneantur. Alioquin e Monasteriis excludi, beneficiisque ac officiis, & portionibus Monachalibus privari possint, ac debeant.

## XVII. De Religiosis Domibus.

## ART. I.

**Q**uibus in Ecclesiis instauratione, vel reparatione opus est, ex omnino ab iis, ad quos spectat, instaurentur, & reparentur. Similiter & sacris vestibus, ornamentis, supellectilique Ecclesiastica ad cultum Divinum necessaria instruantur, & instructæ conserventur.

## II.

Bona, & proventus ad Ecclesiarum fabricas pertinentia, ab earum Administratoribus ne ad alios, quam ipsarum Ecclesiarum usus, convertantur: ac de iis, coram quibus oportet singulis annis rationes reddant: Nobis tamen prius monitis, ut, si opus esse viderimus, iis audiendis certos aliquos viros probos, ac peritos deputemus.

## III.

Ubi, vel foundationis jure, vel alio probato instituto Hospitalia, vel alia loca ad pauperes peregrinos, aut senes, aut ægros, aliosve hospites excipiendos erecta extant, & foundationes, & instituta omnino servantur, quatenus per loci facultates licebit. In excipiendis autem, & alendis hujusmodi hospitibus, & distribuendis eleemosynis sincere omnino, & extra omnem favoris speciem se gerant Administratores. Neque id, quod ad unum aliquem pium usum destinatum est, ullo modo in alium, etiam pium, usum absque licentia nostra in scriptis obtenta convertant. Alias expensarum contra hæc factarum ratio nulla habeatur.

## XVIII. De Testamentis.

## ART. I.

**C**urent Parochi, & Archi-Presbyteri, ut, si qua ad pias causas facta fuerint, legata, ea omnino impleantur. Negligentes vero implere ad Nos deferant.

## II.

Notarii, qui Testamentis hujusmodi pia legata continentibus interfuerint, vel ea receperint, nisi ea infra tres menses a die notitiæ obitus testatorum revelaverint, excommunicationis poenam incurrant.

## III.

Omnes Archi-Presbyteri, & eorum singuli quamprimum suorum Curatorum, aut Vicariorum aliquem e vivis excedere contigerit, statim, & infra spatium viginti quatuor horarum diligentissime curent, certos, & indubitatos Nuntios ad Sigilliferum nostrum, vel Promotorem destinare, qui illius obitum ipsis notificet, ne quid in præjudicium Ecclesiæ, aut nostrum fieri, aut attentari queat.

## XIX.

*XIX. De Sepulturis.*

## ART. I.

**A**Nte Solis ortum, & post ejus occasum mortuos efferri, & ad sepulturam recipi absque nostra, vel Vicarii nostri licentia prohibemus.

## II.

Ne diebus Dominicis, aut Festis agantur anniversaria pro defunctis, licet defuncti ipsi id præscripserint, sed proximo præcedente die, quo pro ratione officii licuerit, celebrentur.

## III.

In unaquaque Ecclesia singulis Dominicis anniversaria, quæ per hebdomadam proxime sequentem celebranda erunt, fidelibus denunciarentur. Idem de septimo, trigesimo, & alio ejusmodi officio fiat.

## IV.

Ne cuiquam, nisi Parocho proprio, liceat locum sepulturæ assignare, aut in ejus absentia Parocho viciniori.

## V.

Omnes Christiani, præsertim Laici in Cœmeteriis, non autem in Ecclesiis sepeliantur, nisi de consensu Superiorum.

## VI.

Humata semel corpora fidelium exhumari, & in alia quantumvis pia, & religiosa loca transferri sine licentia nostra prohibemus.

## VII.

Qui autem sunt publici Simoniaci, fiduciarii, hæretici, schismatici, venefici, sortilegi, usurarii, & qui sibi manus violentas attulerunt, aut in duello suscepto mortui sunt, & qui subita morte præventi Paschali tempore nec confessi sunt, nec Eucharistiæ Communionem susceperunt, omnes denique infideles, & excommunicati Christianæ sepulturæ honore, locoque priventur. Qui autem eos sepeliendos quacunque ratione procuraverint, excommunicatione feriuntur.

## VIII.

Pueri morientes ante Baptismum, ne omnino in cœmeteriis Ecclesiasticis sepeliantur, sed in loco aliquo separato, & cum in usum assignato. Ubi vero in aliqua cœmeterii parte, vel angulo

sepeliri consueverunt, illa pars, vel angulus a reliquo cœmeterio muro atque quamprimum secernatur, alioqui nec ibi sepeliantur.

## IX.

Parocho ne patiantur ullum ex suis inhumari in cœmeteriis Ecclesiasticis sine statis & solitis cæremoniis Christianorum, neque ipsi suo officio desint: sed pro ea, qua polliceri debent, charitate in oves sibi commissas, quas charos habuere viventes, mortuos ne deserant, neve lucelli, ac pecuniolæ aliqujus gratia officio suo desint in pauperes, sed eis, & sepulturam, & alia extrema, prout moris est, inter Christianos, gratis persolvant.

## X.

Ubi in circuitu Ecclesiarum incastellatarum sunt cœmeteria, quæ instar viarum publicarum patent, curribus, & pecoribus non sine eorum profanatione, detur diligenter opera, ut, vel pars cœmeterii aliquo muro sepiatur, in eaque in posterum sola mortui inhumantur, vel, si id præ loci angustia fieri minime possit, locus alius in eum finem eligatur, & benedicatur; ut non deinceps in loco prophanis usibus obnoxio mortui sepeliantur.

*XX. De Officio Parochi.*

## ART. I.

**P**arochi eos omnes, qui libros prohibitos tenent, ad Nos omnino deferant.

## II.

Sedulo etiam curent, ut Bibliopolæ librorum, quos proponunt, Inventarium illis exhibeant: caveantque, ne quos exponant, in quibus, vel contra bonos mores, & honestatem, vel contra orthodoxam fidem aliquid contineatur. Quod idem, ne ipsi Bibliopolæ facere audeant, sub pœna confiscationis omnium librorum suorum prohibemus.

## III.

Ægrotos, etiam non vocati, invitant: ut eos ad Sacramentorum suspensionem mature inducant.

## IV.

Crebris cohortationibus in id maxime incumbant, ut populus sibi commissus



missus ad Confessionem, & Communionem frequenter accedat.

## V.

Parochus librum habeat, in quo omnium, qui in ejus Parochia sunt, nomina, & cognomina, & qualitates, & ætatem describat; in eoque deinceps annotet recentem natos, & mortuos: tum etiam in Parochiam habitatum venientes, & inde emigrantes. Quem librum Nobis, quoties petierimus, vel inspiciendum, vel describendum dabit.

## VI.

Quoties Parochum ad aliam Ecclesiam transire contigerit, antequam a priore migret, libros tradat, in quibus eorum, qui baptizati, confirmati, Matrimonio juncti, & sepulti fuerint, nomina describi solent.

## VII.

Advertant Parochi in Ecclesiis suis, ac etiam inter visitandum Archi-Presbyteri, an, qui Capellanas seu fundata altaria obtinent, foundationum oneribus satisfaciant: si quos negligentes compererint, ea de re Officiales nostros certiores reddant.

## VIII.

Parochus quisque omnium Beneficiorum, Capellaniarum, & Altarium in Parochia sua sitorum, & fundatorum notam faciat exactam: eamque intra sex menses ad Nos deferri curet.

### XXI. De Officio Archi-Presbyterorum.

## ART. I.

**P**enes se habeant Archi-Presbyteri librum, in quo Parochorum, Capellanorum, omniumque Sacerdotum, in suo Archi-Presbyteratu consistentium nomina descripta sint. Annotentque, quibus Ecclesiis, & beneficiis præsent, vel inserviant, a quibus ea obtineant, vel approbati sint, ad iis inserviendum, aut confessiones audiendum, neque liceat cuiquam quocunque prætextu beneficiis ullis inservire, quoquo modo, priusquam nomen suum Archi-Presbytero dederit, inscriptusque fuerit in ejus catalogo.

## II.

Visitent singulis annis, & lustrent sibi subditas Parochias Archi-Presbyteri,

*Tomus VIII. Concilior. German.*

comitante Procuratore Capituli, vel alio, quem elegerint, idoneo, & perito Sacerdote: inquirentque diligenter de vita, & moribus subditorum: Et advertant sedulo, num aliquid desit Ecclesiis, & illud statim suppleri curent. Eos tamen charitative excipiant Parochi, qui ne nimis & superfluis sumptibus graventur, curent Archi-Presbyteri. Dividantur vero sumptus ex æquo in visitatos: refundantque singuli ei, qui visitantes hospitio exceperit, quod per schedulam Archi-Presbyteri manu signatam jubebuntur: eamque penes se reservent Visitoribus generalibus tradendam.

## III.

Agant Archi-Presbyteri serio tam cum Parochis ipsis, quam cum Scabinis, atque aliis piis viris cujusque loci, ut fractæ, quæ passim occurrunt, Cruces restituantur, & in locis celebrioribus novæ defigantur.

## IV.

Teneantur omnes Parochi infra mensem a publicatione præsentis Statuti residere personaliter in suis Parochiis: non obstantibus quibuscunque licentiis, quas omnes revocamus, & revocatas declaramus, sub pœnis statutis contra non residentes in beneficiis curatis. Attendant vero diligenter Archi-Presbyteri, num quis forte huic Decreto non pareat, Nosque, vel Vicarium nostrum Generalem certiores quamprimum reddant.

## V.

Archi-Presbyteri in bannis, seu proclamationibus Matrimonialibus sub pœna decem francorum, ne dispensent quocunque prætextu; multo vero minus ceteri Parochi.

## VI.

Inquirent Archi-Presbyteri sedulo, an fabricarum hospitalium, & locorum piorum redditus in alios usus, quam debeant, convertantur: si quem abusum repererint, ad Officiales nostros deferant, qui reliquam pecuniam in locorum reparationes, vel ornamenta converti curent.

## VII.

Si qua sacra loca belli, vel temporis injuria diruta reperiantur, curent

G g g g g g

Archi-

Archi-Presbyteri eorum statum, situm, nuncupationes, bona, redditus, & onera notare: Nobisque quamprimum, saltem intra sex menses, significare: ut de translatione beneficiorum simplicium in iis locis existentium decernamus, & contra illicitos bonorum Ecclesiasticorum detentores procedamus.

## VIII.

Omni-  
bus Archi-Presbyteris, & eorum cuilibet præcipimus, quatenus nomina, & cognomina omnium Parochorum, & Vicariorum suorum ad Sacerdotium non promotorum, non residentium, nec non excommunicatorum, & publicorum concubinariorum, usurariorum, & aliorum id generis damnatae conversationis, si qui forsitan sint, a domo Dei deiciendorum, ad Fiscales nostros, omni excusatione semota, infra duos menses deferant.

## IX.

Sciant Archi-Presbyteri se ideo aliis Presbyteris esse Prælatos, ut eorum saluti Nobiscum invigilent: utque eorum mores, actiones, verba, immo & omissiones, quo viciniores illis sunt, diligentius observent, ac delinquentes ad Nos, aut Officiales nostros deferant. Idcirco officii sui memores caveant, ne delinquentibus ipsis ullo pacto, ullove prætextu conniveant. Sed, si quis ex Parochis, aliisque subditis suis adversus Decreta hæc nostra, vel eorum aliquod, aut egerit, aut agere omiserit, cum omnino deferant. Alias negligentiae poenas arbitrarias luant. Cujus negligentiae, immo potius conniventiae toties rei habeantur, quoties ab alio aliquo, priusquam ab ipsis, criminosos deferri, & crimina probari contigerit.

**XXII. De ordine servando convocatis in Capitulo rurali Archi-Presbytero, & Parochis, eorumque Vicariis.**

## ART. I.

**S**ingulis annis fiat Capitulum rurale, a quo nemo absit sine causa legitima, eaque Archi-Presbytero probata.

## II.

Convocatis omnibus deferat unusquisque suas difficultates in scriptis ad Archi-Presbyterum: isque, quæ erunt gravioris momenti, ad Nos, aut Vicarium nostrum deferat.

## III.

In Ecclesia suo quisque loco sedeat cum gravitate, & modestia superpellicio indutus decenter cum pileo quadrato, & tonsura Clericali, quam Cotonam vocant. Nemo ex Ecclesia discedat absque Archi-Presbyteri licentia, & ut omnes bini, & bini in Ecclesiam convenire debuerunt sequente Archi-Presbytero, ita & egrediantur eodem ordine, subsequente etiam Archi-Presbytero, qui solus stolam deferet.

## IV.

Assidente mensæ Archi-Presbytero, omnes assideant, surgente, surgant: nemo ad æquales haustus provocet socium, vel importunis sermonibus lectorem impediat, aut adstantes.

## V.

In Missa cantent omnes modeste, præeuntibus Cantoribus: nemo nimium festinet; in celebranda item Missa, quam omnes, ubi commode fieri poterit, celebrabunt, is ordo servetur, quem designaverit Archi-Presbyter ex scripto affixo, loco conspicuo Ecclesiae.

## VI.

Liceat unicuique servata modestia, si quid habeat, quod correctione, vel mutatione egeat, illud proponere, neque ullam inde timeat sibi conflagandam invidiam.

## VII.

Quod propositum erit: si tale sit, quod expediri possit, extemplo illud ex consilio Capituli, vel peritorum expediatur; si vero res maturiori examine egeat, ad Nos, aut Vicarium nostrum referatur.

## VIII.

Librum habeat Archi-Presbyter, in quo statim describi curet, & resolutiones, monitionesque factas, ut supra dictum est, suoque signo, & Procuratoris sui, item & Secretarii, quem elegerit, totum roboret, & confirmet.

## IX.

Caveant diligenter Parochi, ne, quo tempore ipsi in unum convenientes debent efficacius ad virtutem populis præbere exemplum, majorem ruinæ ansam præbeant. Longe vero absint omnes crapulae, & ebrietates, discordiae, contentiones; inter convivandum sit

unus

unus semper Lector, qui toto prandio selecta aliquot ex Sacris Literis capita, alta, & intelligibili voce legat, quem nemo interrumpat.

## X.

Omnibus exacte consideratis, absolutisque omnibus, dimittat omnes Parochos in pace Archi-Presbyter: neque cuiquam ante dimissionem exire liceat. Data, & accepta exeundi licentia, recedant unusquisque in suas Parochias: cauponas ne intrent, neve in iis computationibus vacent.

## XI.

Si quis autem adeo sui sit immemor, & negligens, ut inebrietur, statim multa decem francorum emendetur ab Archi-Presbytero pro una vice, vel ulteriore etiam poena pro ratione scandali; cedat vero ea multa Archi-Presbytero pro tertia parte, & Procuratori pro reliquis, in usum Ecclesiae Capitularis.

## XII.

Novos Parochos ne sumptibus gravent: neve ab iis in ingressu aliquid ultra decem francos exigant Capitulares, ubi haecenus consuevit aliquid exigi: Ubi tamen ea consuetudo non fuit, nihil omnino exigatur.

## XIII.

Quas ex antiqua consuetudine solvent in ingressu Parochi pecunias, in communem usum recipiat Procurator Capituli: earumque rationem coram omnibus, qui interesse voluerint, reddat: viderintque Archi-Presbyteri, ne superfluis sumptibus consumant, quod pro necessitatibus reservatum oportuit.

## XIV.

In Ecclesiis, ad quas ex antiquo convenire solent Parochi celebraturi suum Capitulum rurale, a Collatoribus, Scabinis, vel Parochianis tot altaria decenter instruantur, totque sacra vestes, & ornamenta Missae necessaria parentur, ut singuli Parochi Missam dicere possint: hoc, nisi factum fuerit, liberum sit Archi-Presbytero, & Parochis aliam Ecclesiam sibi bene visam commodam eligere, & ad eam convenire.

*Tomus VIII. Concilior. German.*

## XXIII. De eligendo Archi-Presbytero.

## ART. I.

**P**raemissa Missa de Spiritu Sancto, Dei timorem praeculis habentes ex Parochis eum eligant in Archi-Presbyterum, qui, & vitae probitate, & scientia caeteris praelucere possit, quique morum gravitate, sermone, & exhortationibus caeteros in officio continere possit. Illud autem maxime caveant, ne quem impudicitiae suspectum assumant.

## II.

Electiorem factam Archi-Diaco- nis, ut moris est, representent, & personam; quo ab iis juxta Sacras Constitutiones discussio diligens, & exacta super moribus, & doctrina electi, fieri possit.

## III.

Archi-Presbytero confirmato, ut par est, Parochi obedient: alias castigandi pro meritis ab Officialibus nostris.

## XXIV. De Procuratoribus Capituli ruralis.

## ART. I.

**P**rocuratores Archi-Presbytero adfint industria, opera, diligentia, & si quid advertant mutandum, aut corrigendum, illud statim referant Archi-Presbytero. Concubinos, ebriosos, &c. deferant, ut mature scandalis occurratur.

## II.

Si quid pecuniae in commune conferatur, & ipsi administrent, id fideliter faciant, singulis annis in Capitulo rationem reddant coram Archi-Presbytero, & Parochis adstantibus.

## III.

Is eligatur, qui & scientia, & vitae probitate polleat, prudentiaque in negotiis administrandis valeat.

## XXV. De Ludimagistris.

## ART. I.

**I**n singulis Parochiis sit Ludimagister, qui, & Aeditui officium agat, stipendioque assignato pro Aedituo fruatur; nisi pro utroque stipendium sufficiens assignatum sit. Parochi nemi-

G g g g g g 2

nem



nem ad hoc munus obeundum admittant, qui probatæ vitæ non sit, & integræ famæ, habeatque in scriptis a Parochis, in quorum Parochiis habitavit, de vita, & moribus testimonium, ab eoque professionem fidei Catholicæ omnino Parochus exigat, ante quam Scholas aperire sinatur.

## II.

Ludimagistri singulis diebus matutino tempore, congregatis discipulis, curent recitari per unum, aut plures ex pueris alta, & intelligibili voce Orationem Dominicam, Salutationem Angelicam, Symbolum Apostolorum, Præcepta Dei, & Ecclesiæ. Item antequam lectiones pomeridianas auspicentur, brevi aliqua oratiuncula implorabunt Dei opem, Scholasque alia etiam oratiuncula terminabunt, ad gratias DEO Optimò Maximo agendas.

## III.

Singulis feriis sextis, aut Sabbatis matutina lectio erit ex Catechismo, quem curabunt diligenter mandari memoriæ a discipulis, crebroque repeti: & super eo, disputationibus frequentibus eosdem exercebunt Ludimagistri.

## IV.

Teneatur Ludimagister per se, vel per honestum aliquem adolescentem deferre in ædes Parochianorum aquam benedictam pro more Christianorum diebus Dominicis. Parochiani vero ejus laborem compensabunt, & remunerabuntur, prout solet fieri ut plurimum in Diœcesi Metensi.

## V.

Teneantur omnes suos pueros mittere ad Scholas. Itaque a publico stipendium Ludimagistro solvatur, ut vere pauperes ab eo gratis, & sine stipendio doceri possint. Prudentiæ autem Superiorum erit curare, ne sub prætextu paupertatis sinant a quoquam fraudari Ludimagistros suo minervali.

## VI.

Parochiani (quod jam alias sub pœna gravi statutum fuit a Nobis) convivium ne extorqueant, sub pœna arbitraria, ab Ædituis, aut Custodibus Ecclesiæ: sed ii gaudeant integro stipendio sibi assignato: salvo tamen, quod supra dictum est, de hoc officio committendo Ludimagistris.

## VII.

Ludimagistros, qui hoc muneris rite exercent, ad bonum publicum non mediocriter conducere nemo neget. Eos ergo, ut in hanc rem diligentius incumbant, immunes esse decet, & expedit, ab omnibus vectigalibus, & tributis.

## VIII.

Conqueruntur multi se ob paupertatem Ludimagistros habere non posse. Ergo dum (quod nos brevi facturos speramus) aliter providebitur, ex redditibus Fraternitatum, mulctis non observantium dies festos, exque pane, & vino, quod plerisque locis in singulas familias circa Pascha distribui solet, aliisque ejusmodi incertis, aliquid in posterum, in eorum stipendium assignetur.

## XXVI. De Obstetricibus.

## ART. I.

**I**N singulis pagis, & urbibus sit una saltem obitrix bonæ, & illibatæ famæ. Ea, priusquam officio fungatur, juramentum præstet solitum in manibus Pastoris loci, doceaturque ministrare Sacramentum Baptismi, & cætera, quæ ei incumbunt aliquando, munia rite præstare. Quod idem fiet in iis locis, in quibus plures constitui solent. Atque ex in posterum in obstetrices solæ eligantur, quæ Catholicæ sint, & integris moribus. Quod ubi non fiet, electam ne admittant Parochi.

## II.

In nonnullis hujus nostræ Diœcesis locis audimus obstetrices Catholicas non absque fidelium scandalo, ac evidenti animarum suarum periculo, postquam hæreticis mulieribus parturientibus operam suam navarunt, infantes etiam ad hæreticorum baptismum deferre, eaque occasione ipsorum ritibus, ac Ministrorum prædicationibus interesse. Cujus mali ansam præcidere cupientes, omnibus & singulis obstetricibus districtissime prohibemus, ne quorumcunque hæreticorum infantes ad eorum baptismum amplius deferant, neve eorum prædicationibus intersint. Prohibere tamen non intendimus, quominus mulieribus ipsis hæreticis parturientibus operam suam præstent.

Man-

Mandamusque omnibus, & singulis Parochis, aliisque curam animarum gerentibus, ut hanc Constitutionem nostram in Parochiis suis, ubi hæretici quivis habitant, publicent: ac publicationis notam Nobis, aut Vicario nostro quamprimum præbeant.

### XXVII. De Portione congrua.

**C**um teneatur nemo suis stipendiis militare, & dignus sit operarius cibo suo, dolemus Parochiarum in hac Dicecesi ut plurimum tam parvos esse redditus, ut Parochis alendis, oneribusque eorum sustinendis non sufficiant. Cui malo pro virili occurrere cupientes, portionibus, ut vocant, congruis assignandis viros aliquot spectatæ prudentiæ deputabimus, qui in eam curam diligenter æque, ac sine cujusquam injuria incumbant. Eos ergo Parochis, quibus ea convenienter hætenus assignata non est, adire licebit.

### XXVIII. De Decimis.

**P**ervenit ad Nos in hac nostra Metensi Dicecesi de jure percipiendi Decimas Novalium multas prodisse querelas: quæ quidem undenam irreperint, non liquet; cum Jure Canonico satis constet. Ergo in posterum, ubi hac de re difficultas extiterit, eam ex præscripto Sacrorum Canonum terminabunt Officiales nostri; salvo tamen per omnia jure eorum, quibus privilegiis Apostolicis, & indultis, jus eas percipiendi concessum est.

### XXIX. De Judæis.

#### ART. I.

**J**udæi, qui in hac Dicecesi versantur, nota, & habitu a Christianis distinguantur, prout in Civitate fieri solet: quod, nisi fecerint infra mensem, prohibeant Parochi suis Parochianis, prout Nos præsentī Constitutione prohibemus, ne cum eisdem Judæis omnino agere; aut aliquid commercii habere audeant sub pœna arbitraria.

#### II.

Prohibeant iidem Parochi, & advertant, ne obstetrices Christianæ Judæis mulieribus in partu adsint. Item ne Christiani Sabbato Judæorum ædes

ingrediantur eorum rem domesticam curaturi, neve sub pœna excommunicationis & privationis sepulturæ Ecclesiasticæ, & Sacramentorum, ulli ex Christianis eosdem Judæos lectionem librorum ab iis audituri adire ulla ratione audeant.

### XXX. De Casibus reservatis.

**A**ccepimus a plerisque timorata conscientia Pastorum, & Confessariis hætenus dubitatum de numero Casuum Nobis per Constitutiones nostras, & Prædecessorum nostrorum reservatorum, & efflagitatum, ut quoniam ii essent, declararemus. Hoc ergo facturi ac tam Confessariorum, quam pœnitentium tranquillitati consulere volentes, matura deliberatione præhabita sequentes infra scriptos excessus solos ex quamplurimis, Nobis reservandos, censuimus, præter eos tamen, qui de jure communi Episcopis sunt reservati, quique peti poterunt ab Authoribus, qui de Casibus conscientia conscripserunt.

### XXXI. Casus Episcopo reservati.

1. **S**i quis Sacrosanctam Eucharistiam, venerandas Sanctorum Reliquias & Imagines malitiose pedibus conculcaverit, vel alia insigni contumelia affecerit, aut Chrismate, Sacra Hostia, vel alia re sacrata abusus fuerit ad magicas artes, veneficia, superstitiones.
2. Si quis Patrem, vel Matrem sponte & de industria percusserit.
3. Si quis homicidium voluntarium perpetrarit.
4. Qui prolem suam studiose ante partum, vel post, perimunt, vel opprimunt, illamque projiciunt vel exponunt Hospitalibus, vel alio loco.
5. Qui abortum procurant, vel aliquid dant mulieribus, ne concipiant.
6. Si quis Virgini vim intulerit.
7. Si quis incestum in primo, & secundo gradu, vel Sodomiam commiserit, vel cum Judæa commisceri præsumpserit.
8. Si quis Matrimonium cum alia muliere, post sponsalia jurejurando firmata, contraxerit.

Ggg ggg 3

9. Usu.

9. Usurarii manifesti, & notorii, sive in iudicio convicti, sive ita publice ad usuram dantes, ut nulla tergiversatione celari possit.
10. Perjuri de perjurio judicialiter convicti & condemnati.
11. Cogentes virgines, vel viduas invitatas ingredi Religionem.
12. Bona Ecclesiastica alienantes, vel alienata recipientes, sine eorum, ad quos pertinet dispositio, licentia.
13. Falsarii literarum Episcopaliū, vel Officialium, seu publicorum instrumentorum.

*Pro Sacerdotibus & Clericis.*

14. Omnes confessionum proditores peccatum in confessione auditum verbo, vel signo detegentes ex industria.
15. Concubinarij publici, & manifesti.
16. Qui mulierem aliquam cognoscit carnaliter, cujus prolem baptizavit, vel ejus confessionem excepit.

**XXXII. Statutum circa Divina, seu Ecclesiastica Officia servandum, pro quibus de jure retributio Parochis & Sacerdotibus a suis Parochianis competit.**

**N**E, quod ab insigni populi Christiani liberalitate, & devotione jam a sæculis sumpsit initium, & longa jam annorum serie invaluit, in ejusdem populi detrimentum recidat; neve Parochi refrigerante charitate multorum, quo jam inde a multis sæculis jure potiti sunt, priventur: matura deliberatione prævia, & iis perpensis, quæ in diversis nostræ Diocesis partibus observata sunt, in ejusmodi Parochorum juribus exigendis, & solvendis, multorumque precibus inclinati confusionem, & scandala, quæ hac in parte frequenter oborta deprehenduntur, tollere cupientes, præsentī Constitutione præcipimus, ne ullus ex Parochis sub specie prætenforum ab iis jurium exigit ultra sequentia a Parochianis, quæ ab omnibus nostræ Diocesis Pastoribus, Vicariis, Scabinis, Ludimagistris, Ædituis, & Parochianis inviolabiliter in posterum observari volumus, & præcipimus.

Ubi mos invaluit aliquid pro Baptismo infantum tribuere Sacerdoti, eidem pro Baptismo cujusque, qui primus post fontium Baptismalium benedictionem in Paschate, & Pentecoste fieri solitam baptizandus affertur, dentur tres grossi.

Eidem a puerpera, cum post puerperium in Templum benedictionem acceptura venit, duo albi.

Eidem in Sponsalium solennitate, quinque grossi.

Parocho item eidem ab eo ex suis Parochianis, qui in alia Parochia Matrimonium contrahit, pro Dimissorialibus, & Bannorum (ut vocant) proclamatione, duo franci tribuantur.

Parocho, in cujus Parochia contrahunt conjugandi, pro omni eo jure, quod competit, par Chirothecarum valentium quinque grossos, & præterea duo franci.

Ubi Scabinis, aut Synodalibus, jus aliquod ex consuetudine competit recipiendi vinum, sesteritius, seu cacabus, aut lebes (poculo tribus grossis æstimato) censetur ac taxatur in præsentia valore unius franci. Itaque vel hæc summa prædictis Scabinis, vel tanti æstimatum vinum a solvere debentibus tribuatur, debitoribus optione alterutius solvendi relicta.

Item Parocho ob funeralia & sepulturam defuncti sex grossi.

Scholæ Magistro, seu Ædituo, qui in ejusmodi officio assistit Sacerdoti, duo solidi.

Singulis Sacerdotibus assistentibus prædictæ sepulturæ, tres grossi.

Pro quolibet Officio Sacro, quod sive in fine mensis, aut trigesimo die, seu Anniversario, in quo tres Missæ solenniter cantantur, cum officio Defunctorum in pervigilio, item cum Commendatione, ut vocant, animarum; Sacerdoti dentur de jure tres franci.

Ad eundem Parochum etiam pertinebit, quod reliquum est cereorum, seu luminarium, nisi forte antiquo, ac præscripto jure Ecclesiæ ipsi competere.

Unicuique item Sacerdoti pro Missa solenni dabuntur novem grossi.

Pro sepulchri effossione in terra sancta nihil.

Pro



Pro sepultura tamen in Choro Ecclesiæ, si obtineatur nomine Defuncti seu viri, seu pueri, dabuntur decem franci, pro sepultura autem in Navi ejusdem, dabuntur quinque franci: Atque utraque summa partim in Parochi, partim in fabricæ usum conferetur: a quarum tamen solutione excipiendi erunt ii, quorum liberalitate, vel parentum prædefunctorum annui redditus Ecclesiæ eidem sunt concessi, valoris decem francorum, aut dotatum Sacellum, aut ædificatum certe, aut factum tectum extat, quo casu pro jure sepulturæ in dictis locis Sacerdoti tribuatur unus francus.

Non licebit terram sanctam sepulturæ gratia aperire, nisi ex prævia Parochi licentia.

Quicquid oblationis nomine tempore Divini Officii hujusmodi prodibit, ad Parochum pertinebit.

Omnes tumbæ, seu lapides sepulchrales, qui cujusnam sint, ignorantur, ad Ecclesiam pertinebunt, nec eos in usum prophanum convertere cuiquam licebit.

Sodales Confraternitatum, qui Missam solennem cantari cum Vesperis, tam in Festo, quam pridie Festi curabunt; tribuent Parocho octodecim grossos.

Defuncto cuique, qui Pater- aut Materfamilias est, aut caput domus extitit, in Ecclesia Parochiali, providendum Ecclesiastici funeris subsidium cum Officio Vigiliarum, ut vocant, & Missa, & Commendationibus solitis: eoque nomine Parocho, vel ejus Vicario tribuentur triginta grossi. Quo quidem Officio procurando, si negligentes hæredes, vel Executores testamenti viderit Parochus, eos officii commonefaciet, ac prædictis justis persolutis, jus prætaxatum ab eis reposcet.

**XXXIII. Statutum servandum circa debitam Ludimagistro, seu Aedituo retributionem pro obsequio, vel comitatu, seu assistentia, quam in prædictis Parocho exhibet.**

**P**ro officio trium Missarum solennium, & Vigiliarum cum animæ commendatione, unus francus tribuatur.

Pulsatoribus singulis ad pulsationem campanarum unius circiter horæ intervallo durantem necessariis, tres grossi.

Idem præmium Aedituo, si Pulsatoris partes obiverit, debetur, scilicet tres grossi.

Insuper ejus labor & sollicitudo in explicandis & reponendis Ecclesiæ ornamentis, & pia assistentia in prædictis compensabitur tribus grossis.

**XXXIV. Temporale Festorum, & Jejuniorum, observandorum per universam Diocesim Metensem. De præcepto Ecclesiæ, & nostro.**

### JANUARI.

1. **D**ie 1. Festum Circumcisionis Domini.
6. Epiphaniæ Domini.

### FEBRUARI.

2. Festum Purificationis Beatæ Mariæ Virginis.
23. *Vigilia, & Jejunium de præcepto.*
24. Sancti Matthiæ Apostoli.

Hoc festum annis Bissextilibus 25. die celebretur, ejus vero Vigilia die 24. servetur.

Si festum ipsum feria 4. Cinerum acciderit, in sequentem diem transferatur, ejus vero Vigilia, & Jejunium ipsa feria 4. Cinerum observetur.

### MARTII.

25. Festum Annunciationis B. Mariæ Virginis.

### APRILIS.

25. Festum Sancti Marci Evangelistæ, & abstinencia a carnibus.

Si contigerit in Dominica, festum ipsum eodem die celebretur: Abstinencia vero, Litaniarum, & Processiones transferantur in sequentem diem, & tunc usque ad Processionis finem ab operibus servilibus cessetur.

### MAJI.

1. Festum Sanctorum Philippi & Jacobi Apostolorum.
3. Inventio Sanctæ Crucis.

### JUNII.

23. *Vigilia, & Jejunium de præcepto.*
24. Festum Nativitatis Sancti Joannis Baptistæ.
28. *Vigilia, & Jejunium de præcepto.*
29. SS. Petri, & Pauli Apostolorum.

JU.

## JULII.

22. Festum Beatæ Mariæ Magdalenzæ.  
 24. *Vigilia, & Jejunium de præcepto.*  
 25. Sancti Jacobi Apostoli.

## AUGUSTI.

3. Festum Inventionis S. Stephani Protomart. Patroni Diocesis hujus.  
 9. *Vigilia, & Jejunium de præcepto.*  
 10. Sancti Laurentii Martyris.  
 14. *Vigilia, & Jejunium de præcepto.*  
 15. Assumptionis B. Mariæ Virginis.  
 23. *Vigilia, & Jejunium de præcepto.*  
 24. Sancti Bartholomæi Apostoli.

## SEPTEMBRIS.

8. Festum Nativitatis B. Mariæ Virg.  
 20. *Vigilia, & Jejunium de præcepto.*  
 21. Sancti Matthæi Apost. & Evangel.  
 29. Sancti Michaëlis Archangeli.

## OCTOBRIS.

18. Festum Sancti Lucæ Evangelistæ.  
 27. *Vigilia, & Jejunium de præcepto.*  
 28. Sanctorum Simonis & Judæ Apostolorum.  
 31. *Vigilia, & Jejunium de præcepto.*

## NOVEMBRIS.

1. Festum omnium Sanctorum.  
 2. Commemoratio omnium Fidelium Defunctorum, servatur non ultra meridiem.  
 Quando hoc festum die Dominica incidit, in sequentem diem transferatur.  
 11. Sancti Martini Episcopi.  
 23. Sancti Clementis Episcopi Meten.  
 25. Sanctæ Catharinæ Virginis & Martyris.  
 29. *Vigilia, & Jejunium de præcepto.*  
 30. Sancti Andreæ Apostoli.

## DECEMBRIS.

4. Ad festum S. Barbaræ Virginis, & Martyris celebrandum hortari populum, mi-

nime autem obligare Parochis licebit. Hortabuntur autem ii maxime, qui vel in Civitate, vel prope Civitatem habitant, vel circa pagum ab eadem Diva Barbara nuncupatum.

6. Festum Sancti Nicolai Episcopi.  
 8. Conceptionis B. Mariæ Virginis.  
 20. *Vigilia, & Jejunium de præcepto.*  
 21. Sancti Thomæ Apostoli.  
 24. *Vigilia, & Jejunium de præcepto.*  
 25. Nativitatis Domini nostri JESU Christi.  
 26. Sancti Stephani Protomart.  
 27. S. Joannis Apostoli & Evangelistæ.

*Festa mobilia.*

Dies Veneris Septimanæ sanctæ usque ad meridiem.

Dies Paschæ, cum duobus sequentibus.

Dies Ascensionis Domini nostri Jesu Christi.

Dies Pentecostes, cum duobus sequentibus.

Festum Sanctissimi Corporis Christi.

Festum cujusque Ecclesiæ Patroni.

Festum item Dedicationis cujusque Ecclesiæ.

*Jejunia servanda præter supradicta Vigiliarum.*


1. Quadragesimæ.  
 2. Quatuor temporum, quæ semper incipiunt: Prima, quarta feria immediate post Dominicam primam Quadragesimæ: Secunda, post festum Pentecostes: Tertia, post festum Exaltationis Sanctæ Crucis: Quarta, post festum S. Lucæ Virginis & Martyris.

3. Vigilia Pentecostes.

In Rogationibus, id est, tribus diebus ante festum Ascensionis Domini a carnibus abstinendum.

*Mtis, ex Typographia Abr. Fabert.  
 Exemplar commodevit Trevirensis  
 Collegium.*

FINIS.



# SYNODUS DIOECESANA ANTVERPIENSIS,

Eodem Anno Christi MDCX.

MENSE MAJO CELEBRATA,

Præsidente in ea Rmo in Christo Patre, & Domino, D. JOANNE  
MIRÆO, (\*) Episcopo Antverpiensi.

## INDICTIO SYNODI DIOECESANÆ ANTVERPIENSIS.

JOANNES MIRÆUS, DEI ET APOSTOLICÆ SEDIS GRATIA

Episcopus Antverpiensis, universo Clero, & populo Civitatis & Diœcesis  
nostræ, Salutem in Domino.

**C**um ex Sacrorum Canonum, & Concil.  
Trid. instituto, quotannis Synodum Diœ-  
cesanam, ad moderandos mores, corrigendos  
excessus, aliaque ab iisdem Canonibus præscrip-  
ta rite peragenda, celebrari oporteat, idque  
vel tum maxime non negligi debeat, cum Con-  
cilii Provincialis ante habiti Decreta publi-  
cationem executionemque desiderant: pro Epi-  
scopalis nostri officii munere, de consilio Ca-  
pituli nostri Cathedralis, Synodi Diœcesanæ  
Indictionem, quam hactenus, & temporum  
injuria, & inconstans rerum publicarum sta-  
tus, aliaque causæ remoratae sunt, ulterius  
differendam non esse arbitrati sumus.

Decernimus itaque Concilium Diœcesa-  
num celebrandum esse Feria tertia post Domi-  
nicam quartam post Pascha, quæ erit dies  
undecima mensis Maji anni præsentis: dictum-  
que Capitulum nostrum Cathedrale, RR. DD.  
Abbatessas, Abbates, Præpositos, Capitula  
Ecclesiarum Collegiatarum, Archi-Presbyteros  
rurales, Priores, Priorissas, Pastores, Pa-  
storatuumque Deservitores, cæterosque omnes,  
qui Canonum jure, Ecclesiasticis Sanctionibus,  
Trident. Concil. Decreto vel consuetudine, alia-  
ve ratione Synodo prædictæ interesse debent,  
monemus, & in virtute S. Obedientiæ, ac sub  
penis a sacris Canonibus statutis, districte  
jubemus, ut statuta die, hora septima matu-  
tina ad Synodum in Ecclesia Cathedrali cele-  
brandam in habitu decenti conveniant, audi-  
turi legitimam Publicationem Decretorum

Concilii Provincialis Mechliniensis anno Mille-  
simo sexcentesimo septimo habiti, Decisionem-  
que eorum, quæ insuper ad animarum salutem,  
Cleri disciplinam, totiusque nostræ Diœcesis  
reformationem statuenda existimabimus. In-  
timantes eisdem, quod siue absentes, siue præ-  
sentes fuerint, die horaque præscriptis, Nos  
nihilominus ad Synodi celebrationem procede-  
mus, eorum absentia non obstante; quam juris  
penis prosequemur, emendarique curabimus.  
Declarantes insuper, absentes ad Decretorum  
hujusmodi observationem, perinde atque præ-  
sentes, fore obligatos. Quo autem facilius hæc  
nostræ literæ ad omnium, ad quos ea res  
spectat, notitiam perveniant, earum exempla  
sigillo nostro munita, & a Secretario nostro  
subscripta, valvis Ecclesiæ nostræ Cathedralis,  
nec non Collegiatarum Sancti Gumhari Liræ,  
Sancti Petri Turnauti, & Sanctæ Catharinæ  
Hooghstrati, affigi volumus; ac eos, quos con-  
cernunt, sic arctari declaramus, ac si ipsismet  
coram lectæ forent hæc litteræ, ac insinuatæ.  
Datum Antverpiæ in Aula nostra Episcopali,  
Anno Domini Millesimo sexcentesimo decimo,  
mensis Martii die vigesima nona.

De mandato Rmi Domini  
Episcopi Antverpiensis.

F. VAN DEN ZYPE,  
Secret.

JOAN.

(\*) Vide sub finem Synodi.

Tomus VIII. Concilior. German.



JOANNIS MIRÆI, Episcopi Antverpiensis,  
O R A T I O

*Ad Clerum habita in Synodo Diocesana Antverpiæ, M. DC. X.*

**Q**uerebatur olim D. Gregorius (a) Pontifex vere magnus, se, Clerumque suum annos septem & viginti inter Longobardorum Arianorum gladios vitam trahere; multaue, ut inter illos vivere possint, ab Ecclesia quotidianis diebus erogari. Hinc & illæ ad Mauritium Augustum (b) voces: O tempora, o mores! ecce cuncta in Europæ partibus barbarorum juri sunt tradita, destructæ urbes, eversa castra, depopulatæ Provincie: nullus terram cultor inhabitat; sæviunt & dominantur quotidie in necem fidelium cultores idolorum. Quam calamitatum causam scrutatus, Sacerdotum gravioribus delictis adscribendum esse his verbis testatur: Quis, inquit, ferocissimæ gentis gladius in necem fidelium tanta crudelitate grassaretur, nisi vita nostra, qui Sacerdotes nominamur & non sumus, a pravissimis gravaretur operibus? Sed dum nos competentia nobis relinquimus, & nobis incompetentia cogitamus, peccata nostra barbaricis vitiis sociamus, & culpa nostra hostium gladios exacuit. Demum, tanto Doctore (c) dignam pronuntiat sententiam: Flens dico, & gemens denuntio; Cum Sacerdotalis Ordo intus cecidit, foris quoque distare non potest.

Si meminisse lubet eorum, quæ potissimum ab anno superioris Sæculi septuagesimo nono, ad hoc fere usque tempus, in nostra Diœcesi vidimus & sensimus; non inferiori numero, nec crudelitatum genere minori, ab Iconomachis & Calvinistis sævire in nos reperiemus. Causam volumus? Quam vereor, ne hæreticorum in nos gladios vita, moresque nostri (utar D. Gregorii verbis) exacuerint; & peccata nostra, inimicis Ecclesiæ robur addiderint. Ea etenim justitiæ Divinæ semper observata ratio, ut quandocumque Sacra Deo, vocationis immemores, ad scelera delapsi, salutaribus monitis aures, pectoraque clausissent, atrocissimis hostibus, tamquam indignantis & sævientis Dei Ministris, Regna, Tempia, & Sacerdotes miserrime castigandi traderentur. Testes decem Tribus Israël a Salmanasare oppressæ. Audite Michæam: (d) Causa vestri (de Sacerdotibus loquitur) Sion quasi ager arabitur; & Jerusalem quasi acervus lapidum, & mons Templi in excelsa sil-

varum. Neque in his stetit indignatio Divina: securæ reliquæ Tribus duæ peccata priorum decem, senserunt eandem vindictam Dei manum per Nabuchodonosorem, in durissima Babylonica captivitate. Causam Jeremias (e) tradit: Quia stulte egerunt Pastores, & Dominum non quaesierunt, propterea non intellexerunt, & omnis grex eorum dispersus est. Vox auditionis ecce venit, & commotio magna de terra Aquilonis, ut ponat civitates Juda solitudinem & habitaculum draconum. Sed & Judas Machabæus (f) dum deplorat, quod Sacerdotes jam non circa altaris officia dediti essent, sed contempto Templo & Sacrificiis neglectis festinarent participes fieri palestræ, satis superque denuntiat, non nisi ob rerum Divinarum neglectum ædem Salomonis corruisse; & in improbisimi Antiochi efferatam tyrannidem Israël incidisse. Cæterum inter Sacerdotum vitia, quæ ad indignationem & vindictam Deum solent provocare, tria potissimum in Sacris Paginis recensentur: Ignorantia videlicet, Divini cultus neglectus, vitiosique Clericorum mores. De ignorantia disertum dat testimonium ipse Dominus per Oseam: (g) Quia tu scientiam repulisti, repellam te, ne Sacerdotio fungaris mihi. De Divini cultus neglectu exclamat Ezechiel: (h) Sacerdotes contempserunt legem meam, & polluerunt sanctuaria mea, inter sanctum & profanum non habuerunt distantiam, & a Sabbatis meis averterunt oculos suos: & quaesivi de eis virum, qui anteponeret sepem, & staret oppositus contra me pro terra, ne dissipem; & non inveni. Quis vero dubitare potest, irreligiosam Clericorum vitam Dei iracundiam accendere? cum id palam demonstret Jeremias: (i) Non crediderunt habitatores urbis, quoniam ingreditur hostis propter peccata Prophetarum, & iniquitates Sacerdotum ejus. Et Malachiæ: (k) Ad vos mandatum hoc o Sacerdotes: Si nolueritis ponere super cor, ut detis gloriam Nomini meo, ait Dominus exercituum, mittam in vos egestatem, & maledicam benedictionibus vestris. Vos recessistis de via, & scandalizastis plurimos de lege: propter quod & ego dedi vos contemptibiles & humiles omnibus populis. Vos ego nunc appello, qui ad cæterum hunc convenistis, qui vel coram Belgicorum tumul-

(a) Gregor. Lib. 4. epist. 34.

(b) Lib. 4. epist. 32.

(c) Lib. 4. ep. 55. & Lib. 5. ep. 7.

(d) Mich. 3.

(e) Jerem. 10.

(f) 2. Macchab. 4.

(g) Ose. 4.

(h) Ezech. 22.

(i) Jerem. 4.

(k) Malach. 2.

multum initia conspexistis, vel a Majoribus sacrilegam hæreticorum audaciam didicistis; non intuemini inscitiam, & despectam in Officiis Divinis reverentiam, & collapsam in Clero sanctioris vitæ integritatem, miseriarum omnium Iliadem nobis peperisse? Quid? an non uberius calamitatum Oceanus exundavit, & cœlestes minæ in Patriam nostram conspirarunt, quando Antistitum suorum saluberrima Decreta, & sanioris consilii monita Clerus non admisit?

Dum Majorum & Prædecessorum meorum gesta memoria recolo, serioque discutio, illud inter cætera observo; insignem plerumque calamitatem mox subsequutam fuisse, quando vitæ, morumque Cleri reformatio a Superioribus proposita, neglecta extitit, aut contempta. Annales, si placet, evolvite. Quinto & sexagesimo elapsi Sæculi anno Sacrosanctæ Tridentinæ Synodi Decreta sunt promulgata; in quibus dum Ecclesiasticæ vitæ professoribus displicent plurima, nec æquis animis paterentur licentiam suam tam piis constitutionibus coerceri, ac proinde flocci penderent, quod Ecclesiæ Orthodoxæ & orbis senatus summo iudicio & auctoritate statuisset, justus mox ultor adfuit Deus. Anno enim proxime insequenti, perpauci, atque ii obscurissimi vilissimique nebulones, augustissimum hoc nostrum Deiparæ Templum, aliaque hujus & aliarum urbium loca sacra, contractis Divorum imaginibus, everfisque altaribus, insolentissime diripuerunt ac profanarunt.

Anno cix. d. lxxvii. in hanc urbem venit Illustrissimus D. Maximilianus a Bergis, Archi-Episcopus Cameracensis: qui cum in Presbyterorum cœtu, gravi oratione superioris anni ruinas, Templorumque clades, ostendisset ob Divini cultus neglectum a Deo permissas, novis Statutis veteres, corruptosque mores corrigere aggreditur, sed dum pii Parentis conatus retardantur, eodem ipso anno Martius furor in pacatissimam Brabantiam erupit: quin & in agro nostro suburbano intonuit, Scaldis fluvii aggeribus a Tolousio hæreticorum antesignano ad Austerwelium occupatis. Subsecuta statim nox illa temporum (horret meminisse) cum xv. fere millia Calvinistarum pontem Merium occuparunt, & grandioribus tormentis bellicis omnes illius aditus munierunt; armatique per Tempia ac Monasteria postmodum discurrentes, Sacerdotes ac Monachos ædibus suis depulerunt ac profligarunt.

Quis a lacrymis sibi temperet, qui Rmi Sonni tempore (l) intuebitur? Primus hic

Antverpiensium Præsul, cum Provinciali Concilio Mechliniæ interfuisset, & in urbe insuper sua Diocesana celebrasset, præclara multa utriusque Synodi stabilita suffragiis promulgavit; quæ dum negliguntur aut seponuntur, paucis post obitum ejus mensibus, alia rerum turbatio exoritur: & nequid ad miseriarum cumulum deesset, ab ipsis etiam præfidiariis militibus (m) idem Clerus bonis spoliatur, anno nimirum decimo ab eo, quem Iconoclasticum omnis posteritas nominabit & detestabitur.

Exorta deinde tempestas omnium gravissima, qua omnis Ecclesiasticus ordo ipso Dominicæ Ascensionis die (n) a Calvinistis captus, atque in exilium ab hac urbe pulsus est. Exinde statim tantus hæreticorum passim in Deum, Sanctos, Tempia, Altaria, Sacerdotes, Monachos, eorumque facultates, subsequutus est furor & rabies vere diabolica, ut vix unum sciam Templum in hac Diocesi, quod impie barbæreque non fuerit violatum. Quid perinde Christiano sanguine exundantes agros referam? in ferarum speluncas, Divorum, & bonorum domicilia commutata? vastitatem & solitudinem fecundissimæ regioni plurium annorum inventam? tot antiquitatis monumenta diruta? Quod denique miseriarum & calamitatum genus, quo florentissimum hoc quondam Belgium non fuerit exagitatum? Quot, quantique casus capitibus nostris imminet, dum religiose instituta negligimus aut violamus? Justo enim iudicio Deum sentit per suos hostes vindicantem, qui benignam Matrem Ecclesiam per suos Superiores non audit monentem. Fuere tamen (ut scio) in tantis tribulationum fluctibus non pauci melioris vitæ Sacerdotes, & inter populorum suorum cadavera stantes Danieles, (o) & clamantes: *Peccavimus, iniquitatem fecimus, impie egimus, & recessimus, & declinavimus a mandatis tuis ac judiciis: non obedivimus servis tuis Prophetis, qui locuti sunt in nomine tuo. Tibi, Domine, justitia; nobis autem confusio faciei.* Et certe nisi piorum precibus & lacrymis benignas aures Dominus commodasset, forte ut Sodoma & Gomorra periissemus. Verum iis placatus, sustulit a nobis jugum inimicorum nostrorum. Insultantem enim orthodoxæ veritati Calvinianam perfidiam repressit, & cum Farnefiana signa gloriosus miles in urbem retulisset, ipsa etiam Religionis trophæa erexit.

Sed utinam juste flagellati, vere etiam fuissetis emendati! At vero dum magnus ille Lævinus Torrentius, secundus hujus urbis Episcopus, magno religionis zelo exequi-

(l) A. 1570.

(m) 1576.

(n) 1579.

(o) Daniel. 9.

equitur, quæ sui sunt muneris, reperiretque adversantes eos, quos in laboribus socios, & in agro Dominico secundando debuerat habere concolonos; eodem ipso tempore (p) oppidum Bredanum ab hoste intercipitur, qui ad præcedentem usque annum totam hanc Diocesim fecit tributariam, omnesque Clericorum tam foris, quam in oppidis residentium facultates dirissimis exactionibus reddidit obnoxias. Quisquamne vestrum tacite hæc secum examinans, ac tempora temporibus conferendo serio expendens, alterum (ut dixi) alterius causam exitisse non animadvertat? nec populum Clero paruisse, quod is nec suis obtemperasset majoribus? sorduisse agros tribulis, & in campis fertilissimis zizaniorum manipulos agricolam messuisse, quia sacrarum ædium viluerat cultura, & fecundior ibi vitiorum feges inveniebatur, ubi virtutum proventus uberius enasci debuisset?

Respirare nunc aliquantulum, & a nuperis induciis solatium aliquod impetrasse videmur; patent enim liberi in finitimos agrosegressus: quæque a narrantibus tantum discere cogebamur, coram licet intueri, ut collapsa instaurare, integra exornare, ac labefactatam disciplinam curare, melius tutiusque valeamus. Verum etsi spes aliqua affulgeat, quæ meliora omnia, securiora, & tranquilliora polliceatur; ne tamen in utramque aurem dormiamus, tranquillitatem hanc Divina Bonitas ita temperavit, ut una manu olivam, altera gladium ostendere videatur. (q) Olivam, si imitatores Apostolorum, Ecclesiam Dei, dum pacem habet, in timore Domini ædificemus. Gladium vero, dum nos exteris domesticisque hostibus cinctos relinquit, ut habeamus perpetuo, quod metuemus; virga furoris, qua suos castigare solet, velut ad terrorem nobis ante oculos posita. Si quæ nos quotidie circumstant, inspiciamus; est sane quod cum timore cautius vigilemus. Nam ut vulgarissima præteream, & antiqui vulneris cicatrices nova recordatione non exulcerem; quis Pater lacrymarum imbre non madeat, & recentibus semper doloribus lancinetur, dum in gremio suo ereptas proles meretricio sinu videt confoveri, & adulterino lacte pasci filios electionis in vicinis urbibus, Breda, Berghizoma, Guilielmopoli, & Steenbergæ, eosque sub Calvinianæ perfidiæ jugo audit gemere? libereque per totam istorum oppidorum viciniam hæreseos veneta incautis animis cernit instillari? An non adsunt indies in urbis nostræ visceribus, qui variis libellis, verborumque de veritate digladiationibus, falsæ

doctrinæ virus passim diffundunt? qui curiosis obtutibus actus moresque observent, ut si vel nævum in Sacerdote conspexerint, de paricidio accusent? Sudant sub illorum prælis chartæ, blasphemiarum testes & impietatis nutrimenta; nihil denique omittunt, quo hæresim propagent, Religionem orthodoxam exosam faciant, & ejusdem propugnatores infament.

Magna profecto ex his omnibus videmus nobis imminere pericula: contra quæ, & alios omnes nefarios hostium Ecclesiæ conatus, ut muniti & stabiles persistamus: imitemur veteris Testamenti Sacerdotum vestigia, qui dum sese ob inscitiam, rerum Divinarum neglectum, pravosque mores, sedibus suis cernunt ejectos, pacem nacti oppositis virtutibus Divini numinis iram placare, suumque regnum stabilire laborarunt. Impius Rex Achab ita omnem cultum Divinum prostraverat, ut Helias (r) zelo zelatus pro Domino Deo exercituum animæ suæ peteret mori: sed impetrata pace successor Regni Ezechias (s) mandat populo habitanti Jerusalem, ut darent partes Sacerdotibus & Levitis, ut vacarent legi Dei: in qua instructi populum erudirent. Judæi a captivitate Babylonica reduces, (t) noluerunt manducare de Sanctis Sanctorum, donec staret Sacerdos doctus & eruditus. Quid mirum cum Sacerdotis sit officium (teste Domino per Malachiam (u)) alios docere: *Labia Sacerdotis custodiunt scientiam, & legem requirunt ex ore ejus.* Quod quidem ad novæ legis Pastores maxime pertinere, ipsi Apostoli (x) in unum congregari definierunt. *Non est æquum nos derelinquere verbum Dei, & ministrare mensis; nos vero ministerio verbi instantes erimus.*

O quam latus sese campus aperit, in quem uniuscujusque industria potest excurrere, & amplissimos referre manipulos animarum; ut prædicatione verbi Dei reparari valeat, quod libertas & inscitia devastarunt. An non contemplamini, quam multi passim sint extra urbis pomeria, qui sitiunt atque esuriunt verbum Dei? præsertim qui Parochorum hætenus solatiis destituti, de Religionis nostræ mysteriis vix umquam inaudierunt, aut qui temporum potius injuria, quam suo vitio in hæresim inciderunt? aut qui ex variis disceptationibus, quibus aures inter hæreticos conversantium quotidie obtunduntur, in vera Religione vacillant? aut qui sugillant, quod ignorant, agnitamque etiam veritatem pertinaci studio impugnant? O quantum, Fratres, in hujusmodi animarum

(p) A. 1591.

(t) 2. Esdr. 7.

(q) Act. 9.

(u) Malach. 2.

(r) 3. Reg. 19.

(x) Act. 6.

(s) 2. Paralip. 31.



bus lucrificandis potest solida erudiri Concionatoris prædicatione!

Expergiscimini, si qui forte negligentiae somno hætenus torpuiſtis, Sacrarum Literarum cognitionem comparare. Nihil indocto Sacerdote contemptibilius, nihilque tam ipsi, quam Ecclesiæ magis noxium. Indoctus namque Pastor, cum alios docere non possit, quod ipse non didicit, ignorantiae tenebris obæcetos suos relinquens subditos, cum ipsis tenebrosis mancipatur carceribus. Ignorans enim ipse ignorabitur. Unde in eos invectus merito exclamat Isaias: (y) *Speculatores ejus nescierunt universi, canes muti non valentes latrare.* Ideoque prudenter statutum ab ipsis Apostolis: (z) *Presbyter, qui pietatem non docet, segregabitur; & si in socordia perseveret, deponatur.* Si vero temeritate quadam præsumant imperiti alios docere, animas audientium occidunt; similes puero Elisæi, (a) qui parans pulmentum filiis Prophetarum, & vim herbarum ignorans, colocyntidas agri collegit, ollæque imponens, omnes veneno sustulisset (unde & clamabant: *Mors in olla*) nisi singulari ipsius Elisæi virtute fuissent præservati.

Enimvero, si umquam, nunc vel maxime in omni scientia exercitatos Pastores Ecclesia nostra sibi vendicat, quam sciolorum quotidie curiosis quæstionum argumentis audacia vellicat; & cum Scripturas tantum crepent, vicisse se jactitant, si ab imperitiis orthodoxa responsa non imperrant. Familiare hoc omnibus hæreticis fraudes suas verbo Dei palliare: ut D. Hilarius, Irenæus, alique Sanctissimi Patres observarunt, & posteritatis bono scriptis consignarunt. *Memento* (inquit D. Hilarius (b)) *neminem hæreticorum esse, qui se non secundum Scripturas prædicare, ea, quibus blasphematur, mentitur: omnes Scripturas sine sensu loquitur.* Ex contra hos si obmutescat Pastor, quanta ovibus calamitas imminet? cecidisse ductores suos credunt, si referre adversarios non possint. Non minus docte, quam vere sensit hoc Innocentius Pontifex, (c) cum ait: *Error, cui non resistitur, approbatur; nec caret scrupulo societatis occulta, qui manifesto crimini desinit obviare.* Quid Hieronymus? (d) *Sancta* (inquit) *rusticitas sibi prodest: & quantum ædificat ex vitæ merito Ecclesiam Christi, tantum nocet, si destruentibus non resistat.* An non magnus ille Gentium Apostolus (e) *Timum voluit amplecti fidelem, qui secundum doctrinam est sermonem, ut potens*

*esset eos, qui contradicunt, arguere?* Et si Petrus (f) exoptavit Christianos *semper esse paratos ad satisfactionem omni poscenti rationem de ea, quæ in ipsis est fide & spe;* multo magis id exigitur a Sacerdote, cujus est in lege Domini die ac nocte meditari. An non est risui, & merito explodi solet, quisquis artis aut scientiæ alicujus Magistrum se proficitur, cujus principia aut præcepta ignorat? Raro fidei est ornamento, subjectis utilis, quem sacrarum rerum imperitia despicabilem facit. *Attendite igitur vos Dei Ministri* (Paulo (g) monente) *lectioni, exhortationi & doctrinæ.* Amate scientiam Scripturarum, & vitia carnis (teste Hieronymo) non amabitis.

Sed nec minor nobis Divini cultus atque officii Ecclesiastici cura esse debet, ne iterum e domo orationis, tamquam ea indigni, ab irato Numine depellamur. Scimus in veteri lege ex duodecim unam tribum Levi delectam, quæ speciali cultu tabernaculo Dei, aliisque sacrificiis ritu perpetuo deserviret. Atque id Sacerdotibus per Joëlem (b) injunxit Deus, *ut plorent inter vestibulum & altare, dicentes: Parce Domine, parce populo tuo, & ne des hæreditatem tuam in opprobrium, & dominantur eis nationes.* Hoc suum esse munus ipsi Discipuli agnoverunt, cum dicerent: (i) *Nos vero orationi instantes erimus.* Hoc ipsum in Lateranensi (k) & Tridentino (l) Conciliis Generalibus præceptum Clericis, *ut per se distincte, reverenter, & devote Officium Divinum adimpleant.* Quod dum facimus, Deo placemus, Angelos lætificamus, nos ipsi pietatis fructus ferimus, audientibus spiritum devotionis ingerimus; & si quis infidelis, hæreticus, aut idiota templum intret, fateri cogitur, Deum esse in medio talium Ecclesiæ Ministrorum. Habent enim reverenter celebrata Ecclesiæ Cantica vim istam & energiam, ut, nescio, quo pietatis sensu præsentium animos mulceant, & salutarem eliciant imbrem lacrymarum. Augustinum (m) audite: *Flebam* (inquit) *uberius, in Hymnis & Canticis suave sonantibus Ecclesiæ vehementer affectus; voces illæ insuebant auribus meis, & eliquabatur veritas in cor meum, & fluebant lacrymæ, & mihi bene erat cum eis.* Dabitis mihi veniam, si & hic iterum vel in admiratione sim vehementior, vel in increpando acerbior. Per vadit enim doloris gladius animum meum, dum Officium Divinum resque sacras tam negligenter & irreligiose quibusdam in locis

Hhh hhh 3

video

(y) Isa. 56.

(z) Can. 58.

(a) 4. Reg. 4.

(b) Hilarius contra Constant. August.

Irenæus lib. 1. contra hæret. c. 1.

(c) Dist. 83. cap. eodem.

(d) Hieron. ad Paulinum Presbyterum.

(e) Tit. 1.

(f) 1. Pet. 3.

(g) 1. Tim. 4.

(h) Joel. 2.

(i) Act. 6.

(k) Cap. 17.

(l) Sess. 24. de Reform. c. 12.

(m) August. lib. 9. Confess. c. 6.

video peragi atque tractari. Ad altare Del-  
stantes videbis subinde Sacerdotes sine ullo  
pietatis sensu; sordent situ aræ, & vilissimus  
Sacerdotalis amictus nauseabundum sæpe fa-  
cit spectatorem. Audies nonnumquam quos-  
dam tamquam scutica diabolica agitados pre-  
ces Canonicas percurrere. Quantis exilti-  
matis cachinnis, opprobriisque statum no-  
strum exponi, dum hæc aliter sentientium  
mordax temeritas calumniatur? quanto ge-  
mitu deplorari, dum ista Catholicorum huc  
commemantium pietas spectat? quibus id fere  
accidere solet, ut dum sacras nostras ædes  
accedunt, fructum ibi aliquem ac devotionis  
gustum, ut putabant, percepturi, e contra  
indignabundi recedant. Dicam, quod sen-  
tio: Deo & Ecclesiæ quodammodo videmur  
contumeliosi, Sanctis Angelis tristitiam pa-  
rimus, hæreticis exultationem, Catholicis  
verecundiam, malignis spiritibus gaudium,  
dum Ecclesiastica ministeria tam parum de-  
voti administramus. Videte, seduloque  
perpendite; quam multa, nec levia in uno  
opere peccata reperiuntur. Socordiae reos  
nos facimus, testante Propheta: (n) *Male-*  
*dictus homo, qui facit opus Dei negligenter.*  
De injustitia accusabimur, qui beneficium  
propter officium collatum non ignoramus.  
Barnardum (o) audite: *Sumptus Ecclesiasti-*  
*cos gratis te habere reputas? bonum erat ma-*  
*gis fodere aut mendicare. Peccata enim po-*  
*puli comedis: sollicitus esto, tamquam ratio-*  
*nem redditurus pro eis. Alioqui tibi noveris*  
*ea imputanda, quæ modo inter delicias come-*  
*dis, & parvipendis, & dissimulas tamquam*  
*nihil attinentia tibi.* Est & hic Canonum  
Ecclesiasticorum transgressio & inobedien-  
tia, toties de Officio Divino & Sacramento-  
rum administratione rite ac debite peragen-  
do repetitorum. Denique probis ac impro-  
bis in hoc certissimum præbatur scandalum.  
(p) *Vae autem homini, per quem scandalum*  
*venit: expedit ei, ut suspendatur mola asinaria*  
*in collo eius, & mergatur in profundo maris.*  
Scitis jam pridem a nascentis Ecclesiæ exor-  
diis Apostolum (q) monuisse: *Nemini dan-*  
*tes ullam offensionem, ut non vituperetur mi-*  
*nisterium nostrum.* Imitemur itaque veteris  
Synagogæ pietatem & Sacerdotes; qui cum  
probe cognovissent, irreligiositatem vastitati  
& incendio templum Jerosolymitanum ex-  
posuisse, (r) ubi a captivitate Babylonica do-  
mum reverterant, delicta pristina, Religio-  
ne debita correxerunt.

Adnitendum vero maximopere, ut cæ-  
teris sanctitate vitæ præluceamus. Vos enim  
estis lux mundi: *Lucerna super candelabrum*

*posita.* Unusquisque sibi ab Apostolo (s)  
dictum arbitretur: *In omnibus teipsum prabe*  
*exemplum bonorum operum, ut is, qui ex ad-*  
*verso est, vereatur, nihil habens mali dicere de*  
*nobis.* Exegit olim a Comministris suis  
Princeps Apostolorum, (t) *ut forma sui gre-*  
*gis fierent.* Circumeunt enim hostes nostri  
non secus ac curiosi speculatores; & quid  
aliud captant, ut cum B. Augustino (u) lo-  
quar, nisi ut quisquis Episcopus, vel Clericus,  
vel Monachus, vel Sanctimonialis ceciderit,  
omnes tales esse credant, sed non omnes posse  
manifestari. Et cum de aliquibus, qui san-  
ctum nomen profitentur, aliquid criminis vel  
falsi insomuerit, vel veri patuerit, instant, sa-  
tagunt, ambiunt, ut de omnibus credatur.  
Idem de Apostatis nostris & fidei desertori-  
bus judicate. Cum namque ævi hujus cala-  
mitosi sectæ, Monachis ac Sacerdotibus apo-  
statis initia atque incrementa sua debeant,  
quos metu correctionis ob varia commissa  
flagitia ab Orthodoxæ Ecclesiæ castris defe-  
cisse constat, eosque tamen velut Apostolos  
atque antesignanos suos sectarii nostri suspi-  
ciant ac venerentur; quid miramur, si vel  
minimum Cleri nævum observent atque ex-  
aggerent, ut suas sic turpitudines regant,  
transfugii causas pallient, suamque hæresim  
stabiliant? Quæ haud dubie magna ex parte  
corrueat, si nos, qui Pastores & Sacerdotes  
nominamur, (x) *sine reprebensione in medio*  
*nationis prave, bonis operibus sicut lumina-*  
*ria in mundo luceamus: si quod monet Pe-*  
*trus, (y) bene facientes imprudentium homi-*  
*num ignorantiam obmutescere faciamus: si*  
*cum Juda Machabæo, (z) pace potito, eli-*  
*gamus tantum Sacerdotes sine macula, volun-*  
*tatem habentes in lege Dei.*

Cum itaque post cruentissima tot anno-  
rum bella, aliquali nunc pace & tranquill-  
itate perfruamur; adlaboremur, ut & ipsa  
ad finem a Deo destinatum uramur. Finis  
autem pacis est, ut in sanctitate & iustitia  
Deo serviamus: *Iustitia enim & pax oscu-*  
*lata sunt.* Id suo exemplo nos docuerunt  
Apostoli, Actorum (a) testante historia:  
*Ecclesia quidem per totam Judæam & Gali-*  
*laam & Samariam habebat pacem, & adifi-*  
*cabatur ambulans in timore Domini, & con-*  
*solatione Sancti Spiritus replebatur.* Monet  
Paulus: (b) *obsecrationes, orationes, postu-*  
*lationes fieri pro Regibus, & omnibus, qui in*  
*sublimitate sunt, ut quietam & tranquillam*  
*vitam agamus in omni pietate & castitate.*  
Quare magnis animis ad meliora omnia  
mentes vestras erigite, stete in Christiano  
pulvere contra inimicam manum pro Sacro-  
sancti-

(n) Jerem. 49.

(q) 2. Cor. 6.

(u) August. epist. 137.

(a) Act. 9.

(o) Bernard. ad verba: Ecce nos reliquimus.

(r) 2. Esdr. 10.

(x) Philip. 2.

(b) 1. Tim. 2.

(s) Tit. 2.

(t) 1. Pet. 5.

(y) 1. Pet. 3.

(z) 1. Machab. 4.

(p) Luca 17.

sancti Tridentini Concilii Decretis. Nuperæ Provincialis Synodi Statuta amplectimini: & quidquid Diocesana hac Congregatione firmabitur, ratum gratumque habetote. Si vero salutaria hæc reformationum Decreta, tergiversando prompte exequi neglexerimus, Deumque per Ecclesiæ Præfectos monentem contempserimus; Divinæ vindictæ flagella, juratos inquam Religionis nostræ hostes, cervicibus nostris circumquaque imminentes atque insultantes, non effugiemus. (c) *Ecce enim oculi Domini super regnum peccans, ut conterat illud a facie terræ.* Eritque posterior vindicta priore gravior & acerbior. Viderat Jeremias (d) *primo virgam vigilantem, post ollam succensam.* Virgam hætenus quasi vigilantem sensit, qua nos a veterno negligentia voluit Dei benignitas excitare: si somno ignorantia & impietatis manemus immergi, olla imminet succensa furore Domini, qui consummet & eradat nomina nostra de terra viventium. Si vero ad meliora properando, salutaria hæc monita cum omni alacritate

complectimur; Religionem Orthodoxam, statumque Ecclesiæ hic conservandum, propagandum, firmiterque stabiliendum confidimus in Domino, qui per Prophetam (e) promisit: *Si gens egerit penitentiam a malo suo, quod locutus sum adversus eam, agam & ego penitentiam super malo, quod cogitavi, ut facerem; & subito loquar de gente & regno, ut ædificem & plantem illud.* In quo regnum Dei hic plantando atque ædificando, si nos, qui ad operandum in vinea Domini vocati sumus, sedulo cooperemur; si ut boni milites Christi, vallati muro sanctitatis, instructi armis scientiæ, & virtutum omnium exercitu stipati, contra hostes Ecclesiæ fortiter dimicemus; amplissimos Divinæ benedictionis ac repromissionis cum in hac, tum in futura vita manipulos referemus. Denique ut cum D. Gregorio, sicut exorsus sum, ita & finiam; id a DEO Opt. Max. impetrabimus, ut Sacerdotalis Ordo, qui dum intus cecidit, foris diu stare non potest, ita dum intus restituetur, foris quoque firmiter atque æternum stabiliatur.

## D E C R E T A

### SYNODI DIOECESANÆ ANTVERPIENSIS,

*Præsidente Reverendissimo in Christo Patre, ac Domino,  
D. JOANNE MIRÆO, Episcopo Antverpiensi,  
habitæ.*

#### I N D E X T I T U L O R U M.

- |   |  |
|---|--|
| <p><i>TIT. I. De Fidei restituendæ, conservandæ, ac propagandæ studio.</i></p> <p><i>II. De Sacramentis in genere.</i></p> <p><i>III. De Sacramento Baptismi.</i></p> <p><i>IV. De Sacramento Confirmationis.</i></p> <p><i>V. De Sacramento Penitentia.</i></p> <p><i>VI. De Indulgentiis.</i></p> <p><i>VII. De Sanctissimo Eucharistiæ Sacramento.</i></p> <p><i>VIII. De Sacramento Extremæ Unctionis, Testamentis, &amp; Sepulturis.</i></p> <p><i>IX. De Ordine.</i></p> <p><i>X. De Sponsalibus &amp; Matrimonio.</i></p> <p><i>XI. De Prædicatione verbi Dei.</i></p> <p><i>XII. De Officio Divino.</i></p> <p><i>XIII. De Festis &amp; Jeuniis.</i></p> <p><i>XIV. De Imaginibus.</i></p> <p><i>XV. De Superstitionibus.</i></p> | <p><i>XVI. De Archi-Presbyteris, Pastoribus, Capellanis, &amp; Custodibus.</i></p> <p><i>XVII. De vita &amp; honestate Clericorum.</i></p> <p><i>XVIII. De Beneficiis &amp; Officiis Ecclesiasticis, Beneficiatorum Residentia, oneribusque Beneficiorum, &amp; Fundationum adimplendis.</i></p> <p><i>XIX. De Scholis.</i></p> <p><i>XX. De Seminariis.</i></p> <p><i>XXI. De conservatione, recuperatione, &amp; recta administratione bonorum Ecclesiasticorum.</i></p> <p><i>XXII. De Templis.</i></p> <p><i>XXIII. De Regularibus.</i></p> <p><i>XXIV. De Visitatione.</i></p> <p><i>XXV. De Foro, &amp; Jurisdictione Ecclesiastica.</i></p> |
|---|--|

TITU-

(c) Amos 6.

(d) Jerem. 1.

(e) Jerem. 18.



## TITULUS PRIMUS.

*De Fidei restituendæ, conservandæ ac propagandæ studio.*

## CAPUT PRIMUM.

**C**Um triginta jam fere annis, Episcopatus Antverpiensis variis tempestatum fluctibus fuerit agitatus; quippe qui aliquo tempore totus sub hæreticorum jugo gemuerit, multis in locis ab habitatoribus desertus, majori ex parte Pastorum solatio destitutus fuerit, atque nunc hæreticis partim cinctus sit, partim immixtus; dubitari non potest, quin Religio Catholica, & disciplina Ecclesiastica multum passim in eo sit labefactata. Quare ad eam restituendam, conservandam & propagandam, summa sollicitudo atque omne studium sunt adhibenda.

## CAPUT II.

Fides cum sit ex auditu, Pastores numquam omittant per se, aut impediti legitime per alium, diebus Dominicis & Festivitatibus solemnioribus populo suo prædicare verbum Dei.

## CAPUT III.

In omnibus Scholis, post librum alphabeticum, Catechismus Episcopatus Antverpiensis vernaculus minor doceatur, aut Provincialis. In Latinis vero, ubi pueri latine intelligunt, semel in hebdomade Catechismus Canisii: quem ab ineunte ætate discipuli memoriter discant. Et post ultimam lectionem cujusque diei, Ludimagister, aut discipulus maxime idoneus, elata voce per particulas seu periodos rudimenta fidei prælegat, & discipuli omnes quemlibet articulum aut periodum distincte pronuntiando repetant.

## CAPUT IV.

Ut sine ulla dilatione in omnibus Parochiis, aut Capellis sub illis sitis, instituatur catechizatio sive institutio in doctrina Christiana; ultra media a Concilio Provinciali, & super illo edito edicto Serenissimorum Principum præscripta, addantur & hæc: Imprimis, ut quilibet Parochus per se (ubi id per alium Ecclesiasticum non fit) singulis diebus Dominicis hora prima pomeridiana, dato pulsu campanæ, catechi-

zet; ubi id per alium fit, ipse, cum potest catechizationi intersit, eamque dirigat; & inducat Rectores fabricæ & mensæ Sancti Spiritus, aliosque viros probos, & honestas matronas, ad charitatis officia præstanda promptos, ut sua præsentia & opera tam sanctum opus modis omnibus, quibus possunt, promoveant: petatque Pastor a quolibet Magistratu unum alterumve virum pium, honestum, & talium rerum amantem, qui una cum ipso catechizatio continuationi, & bono ordini superintendant.

## CAPUT V.

Ad hunc Catechismum teneantur Ludimagistri & Ludimagistræ ducere suos discipulos: pueri vero a sexto ætatis anno usque ad decimum quintum qui Scholas quotidianas non visitant ob paupertatem, describantur a committendis a Magistratu loci, qui & eo compellantur, venire sub pœna, qua parentes, aut ii, quibuscum habitant, mulcentur: in quem finem suspendatur catalogus in Scholis, qui singulis vicibus legatur, & absentes requirantur; quos si contigat sæpius sine causa legitima abesse, deferantur ad superintendentes castigandi; & Rectores mensæ pauperum eleemosynas, dari solitas parentibus, qui suas proles non mittunt ad hunc Catechismum, suspendant. Si vero animadvertatur, quod catechizatio fieri commode non possit hora prima, fiat aut mane post Missam matutinalem, aut summam Missam: ita tamen ut semper sit certa hora; & quantumcumque pauci convenient, non ideo omittatur.

## CAPUT VI.

Hortamur etiam in Domino omnes Parochos, ut confraternitatem doctrinæ Christianæ in sua Parochia erigant, suisque Parochianis opus hoc charitatis instituendi proximum, sedulo commendent, & Indulgentias a variis Pontificibus ad id promovendum concessas promulgent; easque in tabulis descriptas, in sua Ecclesia suspendant.

CA-

## CAPUT VII.

In promulgatione istarum Indulgentiarum singulis annis promerendum in Dominica infra octavam Epiphaniæ, qua Evangelium proponitur de Christo invento in templo in medio Doctorum, capient Concionatores & Confessarii occasionem commendandi suis auditoribus, ut salubre hoc negotium modis omnibus, quibus possunt, promoveant.

## CAPUT VIII.

Ut etiam pauperiores ea, quæ salutis sunt, discere possint, emanant sumptibus mensarum pauperum vel communitatum libelli Catechismi, & præmia ad pueros excitandos.

## CAPUT IX.

Ne hæresis, malorum omnium maximum, gregem Dominicum inficiat: advigilent Pastores, & in concionibus suis sæpe moneant, nullo modo vere Catholicis licitum esse hæreticas conciones visitare, ab iis Sacramenta suscipere, eorumque sectæ ullis exercitiis interesse; libros quoscunque contra Ecclesiam, Religionemque Catholicam, ad Ecclesiasticorum ordinum ac graduum contemptum conscriptos, aut aliquo alio modo scandalosos vel suspectos legere, vel apud se retinere, aut ullis actibus externis (licet corde aliter credant) hæresim profiteri, aut probare vel simulare. Exponentque gravitatem hujus peccati, pœnas, censurasque Ecclesiasticas contra tales constitutas, easque suis auditoribus in concione quotannis prima Dominica Quadragesimæ, & Dominica in Septembri, qua indicendum est jejunium Quatuor Temporum, notificent.

## CAPUT X.

Quamvis propter præsentem Reipubl. statum saluberrimas verbi Dei monitiones, & Sanctissima Ecclesiæ de vitandis hæreticis Statuta exacte observari vix possint; frequenter tamen Pastores inculcent, quanto studio eos vitandos docuerint Christus Dominus,

Apostoli, Sanctique Patres, ob certum cum eis conversantibus imminens periculum: ideoque saltem, quantum per rerum ac necessitatum cujusque rationem licebit, a familiaritate, imo consortio eorum abstinere unumquemque sedulo oportere.

## CAPUT XI.

Si animadvertat Pastor aliquem pravæ religionis seu incolam, seu adventam in suo grege hæresim disseminare, libellos distribuere, de fide disputare, præcepta Ecclesiæ violare, aut scandala aliqua facere, statim eum conveniat, & cum omni modestia moneat, eique duo Serenissimorum Principum hac de re Ediæta promulgata (quæ omnes Pastores habere volumus) legenda exhibeat: si incorrigibilem animadvertat, ad Nos, Officiale nostrum, aut loci Officiarium, corrigendum deferat. At ut Pastor, quantum in se est, impediatur, ne cancer ille inter suos serpat, observet inter cætera ea, quæ in titulo de Archi-Presbyteris & Pastoribus constituta sunt, in prima Synodo Provinciali Capite decimo, in postrema Cap. 8. & in hac Diocesana C. 8. 9. 11. 12. 13. 14. 16. 17. & 18.

## CAPUT XII.

Monendi frequenter a suis Parochis Catholici, qui vitare non possunt, quin cum hæreticis subinde converfentur, ne cum iis de fide disputent: id enim Laicis non licere tum res ipsa loquitur, tum Constitutio Pontificia (a) ac Serenissimorum Principum nostrorum Ediætum prohibet: si vero disputare velint, respondeant sui officii non esse cum iis disputare, (hoc enim ad Pastores & Doctores pertinet) sed pro ipsorum salute orare juxta D. Augustini (b) salubre consilium, sive præceptum. Et Apostolum docuisse Timotheum, dicentem: Noli contendere verbis, ad nihil enim utile est, nisi ad subversionem audientium. Ac Constantinum Magnum (c) monuisse sui temporis Catholicos, de dogmatibus hæreticorum nec omnino rogandum, nec

(a) C. Quicumque, de vitand. hæreticis.  
& de natura & gratia. c. 25.

Tomus VIII. Concilior. German.

(b) Lib. De dono perseverantiæ. cap. ult.  
(c) Euseb. Lib. 2. de vita Constant. c. 67.

nec ad rogata respondendum. Et Basilium Magnum (d) respondisse Demostheni laico secum disputari volenti: Tuum est de coquina loqui. Si autem in mensis aut alias loco importuno disputationes moventur, vel argumenta hæreticorum in medium proferuntur, præsentibus Pastoribus, vel Sacerdotibus, moneant illi eos, ut ad se soli veniant seorsim instituendi, & audituri solutionem argumentorum, quæ eis scrupulum faciunt; & tunc eorum conversationi ita solidis rationibus incumbant, & in spiritu lenitatis cum illis agant, ut ex compassione & sincera charitate ipsorum salutem vere quæri intelligant.

## CAPUT XIII.

Qui ab hæresi ad Religionem Catholicam convertuntur, antequam Ecclesiæ reconcilientur, facient Professionem Fidei juxta formam a PIO Quarto præscriptam; & libros omnes hæreticos, quos apud se habent, tradent suis Confessariis. Et ad fidem conversi, moneantur stabilire cor suum per Sacri Chrismatis susceptionem, & Sacramentorum Pœnitentiæ atque Eucharistiæ frequentationem, nec non conciones & monitiones sæpe audiendo, piosque libros legendo.

## CAPUT XIV.

In prima visitatione Ecclesiarum Collegiatarum facient Professionem fidei omnes Canonici & Capellani, ut & in prima visitatione Decanorum Christianitatis omnes Pastores, Vice-Pastores, Ecclesiarumque Parochialium Capellani, Ludimagistri, & Ludimagistræ, & Obstetrices, nec tantum summariam, sed integram juxta dictam PII IV. formam; quam singulis annis Ludimagistri coram Scholastico, & Obstetrices coram Nobis, aut Vicario nostro Generali repetent postridie Circumcisionis Domini in Civitate: alibi vero coram Decanis Ecclesiarum Collegiatarum, ubi sunt; alias Ruralibus in visitatione. Idemque juramentum Pastores & Beneficiati omnes, antequam admittentur imposterum ad possessionem suorum beneficiorum, in manibus Decani ruralis emittent.

## CAPUT XV.

Quoniam in Civitate Antverpiensi plurimæ sunt Typographiæ & Bibliopolia, eoque ex omnibus orbis partibus varii deferuntur libri, advigilent librorum Censores, alique, qui a Nobis ad hoc deputantur, ut omnes Typographi & Bibliopolæ exacte observent, quæ in Synodo Provinciali Edicto Serenissimorum Principum desuper edito, aliisque illorum ordinationibus sancita sunt, & singulis annis 2. Januarii coram Nobis, aut Vicario nostro Generali iidem renoveant Professionem fidei juxta formam a PIO Quarto propositam, promittantque se omnia & singula Constitutionibus, Edicto, & ordinationibus antedictis Decreta observaturos, exemplaue istorum omnium habeant penes se, servent, ac sæpe relegant.

## CAPUT XVI.

Quando librorum sarcinæ Antverpiam advehentur, teneantur, antequam illas aperiant, advocare duos Deputatos, qui omnes libros diligenter inspiciant, neque ullos vendi permittant, qui suspecti sunt, sed eos statim auférant. Quia vero hominum nequitia adinvenit indies dolos, dum inter cætera venenum propinatur ementito loco impressionis, aut specioso libri titulo commendantur; requirimus & hortamur, ut singulis annis a Typographis duo nominentur, qui simul cum dictis Deputatis apertioni sarcinarum & visitationi Officinarum intersint, fraudesque, quæ in rebus hujusmodi committi solent, detegant, & cum iisdem in omnibus advigilent.

## CAPUT XVII.

Sciantque non tantum prohiberi libros in Catalogo librorum prohibitorum nominatim insertos, sed & alios omnes, qui etsi ex professo de hæresi non tractent, tamen sub alio argumento indifferenti immiscent hæretica dogmata contra Catholicam fidem, scandala, scommata, abusus Scripturæ Sacræ, aliaque similia. Et quicumque tales libros inferre, legere, aut aliis legendos tradere, aut apud se detinere de-

pre-

(d) Theod. L. 4. c. 17.



prehensus fuerit, nostro Officiali denuntietur graviter coërcendus.

## CAPUT XVIII.

Ut Sanctio Serenissimorum Principum nostrorum, qua vetuerunt ab aliis, quam juratis Bibliopolis libros vendi, servetur, mandamus Censoribus, ut jure contra eos coram Officiali nostro agant, qui Antverpiæ in Peristyllo, seu Bursa, ut vocant, aliisque locis libros venales exponunt, cum jurati Bibliopolæ non sint. Idemque contra veteramentarios vestium venditores, & alios quoscumque, qui simile attentaverint, stricte servetur. Invigiletur etiam, ne in sarcinis sub aliis mercibus importentur libri perniciosi ad quoscumque tandem.

## TITULUS II.

*De Sacramentis in genere.*

## CAPUT I.

**I**N administratione Sacramentorum proponant sibi Sacerdotes, ut tamquam Ministri Domino suo placeant conscientiae puritate & vitae innocentia, ideoque præcaveant, ne Sacramenta administrent, dum se culpæ graviori sentiant obnoxios, sed statim se confessione expurgent. Quare ut parati semper esse possint, hortamur & requirimus, ne umquam ultra hebdomadam peccatorum suorum confessionem differant.

## CAPUT II.

Si quis (quod absit) potus, vel aliter indispositus atque inidoneus ad ministrandum Sacramentum accesserit, five is Pastor, aliusve Sacerdos, five Matricularius fuerit, juxta irreverentiae enormitatem graviter punietur.

## CAPUT III.

Pastor requisitus ad ministrandum Sacramentum, statim sit paratus ac facilis, nec sese prætextu horæ importunæ, temporis incommodi, alteriusve occupationis, multo minus convivii, excuset, aut durioribus verbis petentes Sacramenta excipiat, & per se administret, quando id sine magno incommodo fieri potest: ac ubi populus est numerosior, bis in die, mane circa horam

*Tomus VIII. Concilior. German.*

septimam, & vesperi sub Laudibus, in Templo sese præsentem exhibeat omnibus opera illius uti volentibus.

## CAPUT IV.

Pastor domo discedens Custodi significet, ubi inveniri possit: si vero a petentibus Sacramentorum administrationem diligenter quæsitus non facile reperiat, & ob absentiam aut moram Pastoris suboriat, a præsentibus murmuratio aut scandalum, aut sit in mora periculum, poterit tunc alius ejusdem Ecclesiæ Pastor (si plures sint) aut Vice-Pastor, & in casu necessitatis Cappellanus (alias idoneus) administrare Sacramentum, Matrimonio dumtaxat excepto.

## CAPUT V.

Quoniam cum omni diligentia circa Ecclesiæ Sacramenta versari oportet Pastores, semper penes se reservent claves repositorii Venerabilis Sacramenti, Baptismatis, & sacrorum vasorum: ex necessitate absentes, viris probatis custodiendas committant: graviter puniendus, qui ista neglexerit.

## CAPUT VI.

Sacra Olea quotannis Archi-Presbyteri rurales a Nobis, ab Archi-Presbyteris Pastores in loco sacro distribuenda omnes per se ipsos, aut alium Sacerdotem, aut alium in aliquo Ordine sacro constitutum petant & ferant; eaque in vasis honestis & mundis (vase in quo oleum infirmorum conservabitur; ab aliis sejuncto) decenter custodiant, ac statim ad Ecclesiam suam deferant.

## TITULUS III.

*De Sacramento Baptismi.*

## CAPUT I.

**U**Bicumque in Ecclesiis Parochialibus dirutus est fons Baptismalis, restituatur ex lapide solido, ne ex eo aqua effluat, sitque figuræ rotundæ; & latitudinis circiter duorum pedum, fixusque loco commodo constituatur a latere sinistro portæ Occidentalis, juxta antiquam ecclesiæ observationem, semperque sub sera clausus, cujus clavem servet Pastor.

lii iii 2

CA-

## CAPUT II.

Extra Fontem sacrum nemo baptizetur, nisi forte quem periculum ad Ecclesiam deferri non permittit. Quod ubi contingit, in hujusmodi Baptismo, qui domi fiet, adhibeatur quidem Baptismi forma, sed postmodum proles ad Ecclesiam deferatur, ibique cærimoniarum præscriptarum suppleantur. Si quis secus fecerit, pœna arbitraria puniatur.

## CAPUT III.

Sciant Catholici non licere sibi suscipere infantem, qui a Ministro hæretico baptizatur, cum susceptor sit apud Deum fidejussor de adhibenda cura proles susceptæ in vera fide instituendæ: quinimo tenentur Patrini laborare, ut ad fidem Catholicam convertantur ii, quos in Ecclesia Catholica susceperunt, si in hæresin fuerint prolapsi.

## CAPUT IV.

Pastores non admittant ad suscipiendas proles eos, qui ebrii sunt, aut hæretici, aut de hæresi suspecti, aut alias scandalosæ vitæ, & juniores, qui nesciunt rudimenta fidei.

## CAPUT V.

Cum variæ quotidie audiantur querelæ de abusu pluralitatis Patrinarum, & conviviorum in puerperiis, præsertim in pagis, statuimus, ut Pastores, quotiescumque infantem baptizaturi sunt, ante inchoatum exorcismum clara voce denuntient tantum unum, aut ad summum unum & unam posse esse Susceptorem seu Susceptricem, eorumque nomina describat: qui in hac re negligentes fuerint, nostro arbitrio corrigentur, sæpiusque moneat Pastor suos parochianos de abusu conviviorum in puerperiis instituendorum vitando.

## CAPUT VI.

Mulier, quæ Antverpiæ ad obstetricandum admissa fuerit, antequam officium suum exerceat, tenebitur sese præsentare Vicario nostro Generali, alibi vero Decano Christianitatis, aut saltem Pastori loci, ut ab eo examinetur, an sciat substantialia Sacramenti Baptismi, & faciat Professionem fidei integram, promittatque se denunciaturam

ram Pastori parochiæ eos, qui ultra tertium diem Baptismum infantium differunt, & eos, qui ab hæreticis infantes baptizari curant, aut permittunt. Si qua vero aliquid horum præstari noluerit, aut monita neglexerit, aut hæresi infecta fuerit, ab officio suo suspendatur, aut amoveatur. Tenebuntur Pastores hujusmodi obstetrices, & parentes infantium ultra tertium a natiuitate diem Baptismum differentes, aut apud hæreticos proles suas baptizari curantes, aut permittentes, Nobis, aut Officiali nostro denuntiare.

## CAPUT VII.

Ab hæresi conversi si baptizandi, aut iis cærimoniarum Ecclesiæ sint adhibendæ: priusquam id fiet, hæresin abjurent.

## CAPUT VIII.

Infantes ex illegitima copula nati non deferantur ad Ecclesiam cum aliqua solemnitate, neque illorum matres a puerperio surgentes purificentur, neque signa, honestis matronis dumtaxat debita, illis exhibeantur; quale est ostii annulum fascia linea obligare, &c.

## CAPUT IX.

•• Habeatur diligens ratio de exposititiis, ut diligenter inquirent Pastores, an baptizati sint, nec ne: si dubitent post inquisitionem diligentem, sub conditione baptizentur.

## TITULUS IV.

*De Sacramento Confirmationis.*

## CAPUT I.

**P**ostquam Parochus de constituto die Chrismatis administrandi fuerit admonitus, perquirat diligenter, qui confirmandi sunt, in Parochia etiam per singulorum domos circumeundo, si id commode fieri potest, & die Dominico aut Festo præcedente ex professo doceat populum suæ curæ & custodiæ commissum, ea omnia, quæ ad Sacramentum debite recipiendum pertinere intelliget; & ut paratiores fideles ad hoc accedant, illius sanctitatem, utilitatem, & hoc rerum statu necessitatem exponat, & nomen Confirmationis explicet, quod idiomate nostro

*Worms*

**Bormfel**, seu **Broomfel**, id est, robur, significat. Et doceantur, a Christo Domino institutum ad spiritale robur, virtutem & fortitudinem animi ad fidem profitendum dandam. Declaret insuper materiam, formam, effectus, ejusque cærimonias & qualitates in suscipientibus requisitas, Patrinorum officium; aliaque omnia, quæ eo spectant, ex probatis Auctoribus aperiat: ut intelligentes se hujus Sacramenti beneficio contra diaboli, carnis, mundi, hæreseosque insidias spiritu principali confirmari, atque muniri, Christi que milites fieri, ardentiori animo, totisque viribus ad dimicandum toto vitæ suæ tempore, & coronam victoribus paratam apprehendendam, sese comparent.

## TITULUS V.

*De Sacramento Pœnitentiæ.*

## CAPUT I.

**C**UM in confessionum auditione sic positum incredibile momentum ad seriam emendationem vitæ ipsius populi; studiose in hoc incumbant Confessarii, ut in confessionibus audiendis magnum fructum faciant, pœnitentibus salutare pœnitentias injungant, & salubria consilia ad peccata vitanda & serio vitam corrigendam suggerant; quale est in primis, ut frequenter confiteantur & communicent, saltem singulis quinque aut quatuor majoribus Solemnitatibus.

## CAPUT II.

Confessarii, ubi rudiores esse perspicient, suos pœnitentes, diligenter examinent, an sciant necessaria ad salutem: & ut in iis instrui se curent, sedulo & serio admoncant.

## CAPUT III.

In singulis Diœcesis nostræ Parochiis quotannis in Dominica Passionis publicetur *C. Omnis utriusque sexus*, x. de Pœnit. & Remiss., inculcentque severe illud esse observandum: & post Dominicam in Albis animadvertant qui nam defuerint, quos monebunt, officii sui, alioquin extra Ecclesiam ejiciendos, & ad sepulturam Ecclesiasticam non admittendos, & ad Nos, vel Officiale nostrum deferendos.

## CAPUT IV.

In pagis, qui se allegabunt in Paschate alibi confessos esse, testimonio Confessarii id doceant.

## CAPUT V.

Pauperes, qui a mensa S. Spiritus subsidium habere solent, si non docuerint de annua confessione, ab eleemosynis suscipiendis suspendantur, donec debito officio satisfecerint.

## CAPUT VI.

Casus Episcopo reservati sunt ii, qui in prima Synodo Provinciali Mechliniensi, (\*) *Tit. De Sacramentis*, C. 6. & in Pastoralibus expressi sunt.

## CAPUT VII.

Propter præsentem tamen hujus temporis statum concedimus facultatem absolvendi a casibus Nobis reservatis, quando crimina publica & notoria non sunt, omnibus Pastoribus & Superioribus Ordinum, qui externorum confessiones audire solent.

## CAPUT VIII.

Hortamur in Domino omnes Medicos, ut tamquam viri boni & Catholici in visitatione infirmorum Bullæ PII V. quæ incipit: *Sugra gregem*, sese conforment; qua sancitur, ut infirmos in lecto jacentes ante omnia moneant, ut idoneo Confessori omnia peccata sua confiteantur, neque tertio die ulterius eos visitent, nisi longius tempus infirmo Confessor ob aliquam rationabilem causam concesserit, & eis per fidem a Confessore in scriptis factam constiterit, quod infirmi peccata sua confessi fuerint: eosdemque rogamus, ut, si quos forte fidei Catholicæ non satis addictos tergiversari animadverterint, Pastori ex charitate statim velint denuntiare.

## CAPUT IX.

Qui infirmorum confessiones excipient, si Pastores non sint, scripto in domo decumbentium relicto, aut aliter de excepta confessione Pastori fidem faciant.

## CAPUT X.

Pastores numquam different excipere infirmorum confessiones in tempus, quo simul deferant Venerabile

(\*) Sub Illmo & Revmo Domino D. Antonio Perrenot Tom. nostro CC. VII. pag. 608.



Sacramentum, excepto casu necessitatis, aut talis reconciliationis infirmi, quæ brevissimo tempore queat peragi; alioqui se puniendos a Nobis pro ea culpa intelligant.

## CAPUT XI.

Sedes confessionales fiant loco conspicuo: neque temere Confessarii de uno loco ad alterum, potissimum in majoribus Festivitatibus, excurrant, cum id sæpe magnæ murmurationis causam multis præbeat.

## CAPUT XII.

Quoniam usuræ hoc tempore variis quæsitis coloribus sub specie recti, & titulis mutui dati ad interesse, in deposito Cambii, aliisque nominibus diversimode pallientur, studiöse perquirant & examinent Confessarii suos pœnitentes, an tituli illi, quibus sese pecuniam cum assecuratione fortis & certo lucro mutuam dedisse dicunt, sint veri, an vero tantum imaginarii & usuræ pallia: & si solido fundamento contractus usurarios esse deprehenderint, non prius illos absolvant, quam usuris restitutis, aut saltem pro prima vice firmiter restitutione promissa: si secundo redierint, non absolvantur, nisi ipsa restituerint. In quem finem diligenter legant Bullam SIXTI V. *Execrabilis avaritia*, contra hujusmodi usuras palliatis editam, ex auctoritate PAULI V. per Illustrissimum Dominum D. GUIDONEM BENTIVOLIUM, Archi-Episcopum Rhodiensem, Nuntium Apostolicum recipi mandatam in Belgio.

## TITULUS VI.

*De Indulgentiis.*

## CAPUT I.

**N**emo Indulgentias publicet, nisi a Nobis prius examinatas & probatas: & qui in Ecclesiis suis aliquas se habere prætendunt Indulgentias novas aut antiquas, aut forte aliquando a Prædecessoribus nostris aut Nobis approbatas, eas iterum exhibere ante trimestre, aut saltem antequam de novo eas publicent, teneantur.

## CAPUT II.

Quando in aliquo Festo concessæ sunt Indulgentiæ, illudque juxta Ru-

bricas transfertur, promulgentur Indulgentiæ promerendæ eo die, quo illud Festum a populo celebrabitur.

## TITULUS VII.

*De Sanctissimo Eucharistiæ Sacramento.*

## CAPUT I.

**U**bi numerosior est populus, singulis diebus Dominicis, certa hora exponatur Venerabile Sacramentum in altari alicujus Capellæ, debite luminaribus, aliisque ornamentis instructo, ut ad Communionem accedere volentibus paratum esse possit; illudque cum maxima & debita reverentia semper administretur. Ablutio autem non datur ex calice. Et solemnioribus Festivitatibus in Parochia numerosiori semper sit aliquis Sacerdos ad altare a mane usque ad meridiem, petentibus Sacramentum administrare paratus.

## CAPUT II.

Quando hostiæ pro communicaturis parantur, prius a Pastore gustentur, an sint, quales esse debent.

## CAPUT III.

In Parochia quemque sua in Paschate ad Sacram Synaxin accedere cum oporteat, non satisfaciunt communicantes in aliis Ecclesiis quorumcumque etiam Ordinum privilegiatorum: quod in Dominica Passionis in Parochiis publicent Pastores, una cum Decreto Concilii Lateranensis de Communionem in Paschate faciendâ: ut in *C. Omnis utriusque sexus. Ext. De penitentis & remiss.* & in Pastoralis Mechl.

## CAPUT IV.

Quoniam compertum est iis locis, ubi in publicis oneribus imponendis ratio ac tempus taxandi desumitur ex sumptione Ven. Sacramenti (ut scilicet censeantur juniores, eoque nomine ab hujusmodi oneribus immunes, qui nondum ad mensam Domini accesserint) fieri, ut adolescentes & juvenes a Sacra Communionem retardentur, eamque in decimum octavum vel ulteriorem annum multi differant; inhibemus hujusmodi Collectoribus, vel quocumque nomi-

nomine censeantur, ne in onerum publicorum partitionibus, in posterum hanc rationem ineant, sed certam potius ætatem taxandis designent.

## CAPUT V.

Tabernaculum Ven. Sacramenti plerisque in locis eversum, sollicitus sit Pastor, ut id restituatur: quod fiat vel in medio altaris, vel in pariete a Septentrione juxta altare, extrinsecus decore depictum; ejusque ostiolum aliqua cortinula sit rectum, intrinsecus autem panno colorato tabernaculum sit circumvestitum, ac circumquaque firmum ac tuto clausum. Tabernaculum vero sub ipso dumtaxat Ven. Sacramenti vase, candido semper corporali sit stratum.

## CAPUT VI.

In qualibet Parochia ut minimum duo sint vascula, in quibus Sacre Hostiæ conserventur. Unum, quod veteri vocabulo Ecclesiastico Ciborium vocamus, in quo reponantur Sacre Hostiæ communicantibus distribuendæ, quo etiam uti licebit, dum Venerabile Sacramentum ad infirmos deferatur. Alterum vero vasculum sit hierotheca pellucida, quam vulgo Monstrantiam appellant: cujus usus sit Venerabili Sacramento deferendo in publicis processionibus, vel cultus & adorationis causa proponendo super altare; quæ hierotheca idcirco intra columellas ita crystallo transparenti circumdetur, ut Sacra Hostia perspicui possit.

## CAPUT VII.

Abusus, qui in Civitate Antverpiensi frequens est, ut ad ægros deferatur Ven. Sacramentum sub tempus vespertinum, paulatim tollatur: moneaturque populus, ut ægri, quantum potest fieri, jejuni tantum hoc Viaticum percipiant, adeoque tempestive sibi illud administrari postulent, non expectantes tempus ultimæ necessitatis. Numquam tamen Pastor tempore nocturno, aut alias quantumvis importuno vocatus, cum id infirmi status postulat, ab officio faciendo sese excuset; gravissime puniendus, cujus culpa infirmus non munitus Sacramentis ex vita decesserit. Monebunt Pastores

suos Parochianos, quando tempore nocturno aut cum tenebræ sunt, sibi volunt infirmi administrari Sacramentum, deducant secum unum atque alterum virum probum Pastori notum.

## CAPUT VIII.

Quoniam in Processionibus, quas vocant Dedicationum, contingit multas insolentias plerumque committi, & quædam inepta & lasciva immisceri, (quæ tamen non esse toleranda decernimus) omnino prohibemus in illis Ven. Sacramentum circumferri: Pastor, qui secus fecerit, in multam decem florenorum, aut majorem nostro arbitrio incidat.

## TITULUS VIII.

*De Sacramento Extremæ Unctionis, Testamentis, & Sepulchris.*

## CAPUT I.

Quando Pastor ex suis subditis infirmum esse sciet, de quo veretur, ne negligentia aut malignitate domesticorum seu propinquorum non munitus Sacrosanctis Ecclesiæ Sacramentis moriatur, adibit ædes infirmi etiam non vocatus, dicetque se ex charitate & nomine sui officii tamquam bonum Pastorem oviculam suam invisere; monebitque infirmum de habenda cura suæ salutis, & susceptione Sacramentorum, frequenterque eum visitabit, potissimum si videat morbum augeri, habeatque libellos, qui modum adjuvandi infirmos describant, aliosve: & invigilet, ne ad eos irrepant novatores illi, qui sese falso vocant *Sielentroosters*. Ubi vero per occupationes Pastori non licet, submittat ipse, aut moneat infirmum, ut advocetur alius Sacerdos & vir Religiosus, qui morti proximum, in lucta contra serpentem calcaneo hominis insidiantem, adjuvet: ac sciant Pastores ab hujusmodi charitatis officiis, præter meritum apud Deum, multum sibi subditorum conciliari animos.

## CAPUT II.

Numquam patiantur Pastores corpus alicujus quantumvis pauperis ad sepul-

sepulturam deferri sine præsentia Sacerdotis, ac multo minus sepeliri sine debitis cæremonis in Pastoralis præscriptis. Celebretur porro pro pauperibus una Missa sumptibus Eleemosynariorum aut mensæ Sancti Spiritus, si aliunde media non supperant.

## CAPUT III.

Nulli liceat jura funeralia auctoritate nostra stabilita, & antiquissima consuetudine probata, propria præsumptione augere: nec Custodi aut Ministris Ecclesiæ permissum sit aliqua jura exigere, nisi a Pastore loci in Parochiis, aut in aliis Ecclesiis ab aliquo ad hoc deputato aut deputando descripta; qui omnia jura funeralia, quæ aliquo modo ratione funeris debentur, bene examinata subsignabit.

## CAPUT IV.

Post mortem alicujus Parochiani inquiret Pastor, an defunctus pia aliqua legata reliquerit, advigiletque, ut executioni mandentur, eademque indicentur Sigillifero aut Archi-Presbytero rurali illius Districtus. Monemus autem serio hæredes & testamentorum Executores, ut si quæ per defunctos foundationes piæ institutæ erunt, eas denuntient, ut acturum registrentur, atque in Archivis nostris servanda reponantur.

## TITULUS IX.

*De Ordine.*

## CAPUT I.

**I**Nsigniendi tonsura Clericali aut minoribus Ordinibus, Nobis se sistant Feria quinta septimanæ ejus, qua conferendi sunt Sacri Ordines, natalium & probitatis testimoniis instructi: admissi vero nomina sua a Secretario nostro describi curent, redeantque Feria VI. sub horam IX. cum superpelliceo & cereo, tonsuram, aliisque minores Ordines suscepturi.

## CAPUT II.

Promovendi vero ad Sacros Ordines majores, compareant examinandi Feria VI. post II. pomeridianam, exhibeantque testimonia laudabilis vitæ ante actæ, proclamationum factarum, ætatis, Ordinum præcedentium suscepto-

rum literas, eorundemque facti exercitii, tituli que sufficientis documenta. Idonei per examen reperti & admissi, postridie post octavam per Confessionem Sacramentalem ad Sacram Communionem parati, in habitu ac tonsura Ordini suo conveniente, cum ornamentis necessariis ad ædes Episcopales revertantur, inde ad Ecclesiam, ubi Ordines conferentur, Nobiscum accessuri.

## CAPUT III.

Ad Ordines majores provecti meminerint se obligatos ad legendum quotidie, sub pœna peccati mortalis & amissione fructuum illius diei, integrum officium Horarum Canonicarum. In Ordine suscepto sese exerceant a susceptione cujusque Ordinis, & Sacerdotes intra quadraginta dies Primitias celebrent.

## CAPUT IV.

Primitias celebraturus Sacerdos sæcularis in Civitate Antverpiensi, aut locis, ubi Ecclesiæ Collegiatæ sunt, sistet se cum suo instructore Decano & Capitulo, etiam si ipsis subditus non sit. In pagis vero Decano Christianitatis exhibebit literas Sacerdotii suscepti, & Instructor ejus fidem faciet de sufficienti in cæremoniis Missæ institutione.

## CAPUT V.

Examinatores tam ordinandorum, quam ad Pastorum promovendorum nominamus Venerabiles Viros, Dominum *Jaannem Del Rio*, J. U. Licent. Protonotarium Apostolicum, Decanum Ecclesiæ nostræ Cathedralis, ac Vicarium nostrum Generalem, D. *Cornelium de Witte*, S. Theol. Licent. Archi-Diaco-num, D. *Petrum Santfort*, S. Theol. Licent. Pœnitentiarium, D. *Egbertum Spitholdium*, S. Theol. Licent. Plebanum, D. *Aubertum Miraum*, S. Theol. Baccal. Sigilliferum nostræ Curie, D. *Maximilianum Eynatten*, S. Theol. Licent. Scholasticum, D. *Laurentium Beyerlinck*, S. Theol. Licent. dictæ Ecclesiæ Canonicum: quibus alii Canonici præbendas graduatis affectas in Ecclesia nostra Cathedrali obtinentes, jungere se possunt.

TITU.



## TITULUS X.

*De Sponsalibus, & Matrimonio.*

## CAPUT I.

**S**ponsalia de futuro tamen si valida sint, (e) quamvis coram proprio Parocho contracta non fuerint, nihilominus tamen ad evitandas multas difficultates ea præsentem Parocho proprio fieri præcipimus.

## CAPUT II.

Quoniam animadversum est, pœna a Concilio Tridentino constituta in eos, qui non suos Parochianos Matrimonio junxerint, quosdam non moveri; decernimus, Pastores & Sacerdotes quoscumque nostræ Diœcesis, qui id facere præsumpserint, insuper pœna pecuniaria viginti florenorum corrigendos esse.

## CAPUT III.

Ebriis & intempestiva nocte, aut in tabernis contrahere Sponsalia volentibus operam suam Pastor non impendat, sub pœna arbitraria.

## CAPUT IV.

Solemnizationem Matrimonii, in qua aliqua concurrit dispensatio, volumus fieri per Pastores, non autem Vice-Pastores. Nemo autem alias, nisi præviis omnibus proclamationibus, Matrimonium solemnizet.

## CAPUT V.

Sponsi infra dies quadraginta ad Matrimonium procedant; alioqui Nobis, aut Officiali nostro per Pastorem indicentur.

## CAPUT VI.

Indecentes in quibusdam pagis excessus committi intelligimus a juvenibus, qui a novis Sponsis pecuniam extorquent, aut alioquin domos infringunt: & in nonnullis locis Sponso statim a contracto in facie Ecclesiæ, quidam etiam in ipso Templo, summa vi palmas & pugnos in dorsum impingunt: quæ cum non solum sint violenta & injuriosa, sed etiam spectent ad

irreverentiam Sacramenti, in posterum ne id fiat, prohibemus.

## CAPUT VII.

Propter evidens periculum salutis animarum, Pastores subinde in concione significant, præter legem naturalem & Divinam, esse etiam Ecclesiæ prohibitionem, (f) ne fideles cum hæreticis Matrimonia contrahant; ejusque impedimenti, ut & aliorum, in proclamationibus habeant rationem singularem.

## CAPUT VIII.

Inquirant diligenter Pastores, an contrahentes Sponsalia sciant necessaria ad salutem. Ignaros vero, donec edocti fuerint, & Sacramento Confirmationis non roboratos ad Matrimonium non facile admittant. Diligenter de impedimenti inquirant: si dubitent, peritiores consulant. Si vero Matrimonium personarum, inter quas impedimentum aliquod dirimens existit, aut non servata Concilii Trident. forma, Matrimonium solemnizare scienter præsumpserint, pœnam incurrant quinquaginta florenorum, & alias arbitriam.

## CAPUT IX.

Laudabilem (g) & antiquam consuetudinem solemnizandi Matrimonium inter Missarum solemnias, potissimum diebus Dominicis & Festis, studiose servari volumus. Nullus autem Pastor sub gravi pœna post meridiem Matrimonium solemnizare præsumat.

## TITULUS XI.

*De Prædicatione verbi Dei.*

## CAPUT I.

**Q**uoniam latissimus apertus est campus ad animas Deo lucrandas per Divini verbi prædicationem, (est enim virtus Dei in salutem omni credenti) dabunt operam omnes, quibus munus Sacras Conciones habendi incumbit, ut eas habeant utiles, capui auditorum accommodatas, solidas atque elaboratas; easque teneantur describere, descriptasque requisiti Nobis, aut

(e) Sacra Congreg. Concil. Trident. Interp. ad C. 1. Sess. 24. de Reformat. Matrim.

(f) C. Caut. 28. q. 1. (g) Conc. Trid. Sess. 24. de Ref. Matr. c. 1. in fine.

aut Decano rurali visitanti, seu alii, cui mandaverimus, exhibere.

## CAPUT II.

Conciones fere ita disponantur in locis, ubi grassatur hæresis, ut pars una pertineat ad mores formandos, pars vero altera confirmet duobus aut tribus argumentis solidis aliquod dogma Catholicum, & uni aut alteri argumento, quo hæretici præcipue simplices homines seducunt, solide & perspicue respondeat: solide inquam, nam aliqui præstat illa non attingere. Potissimum autem, pro veritate inculcent ea argumenta generalia Catholicorum contra hæreticos, quæ sunt veluti principia quædam, utpote de unitate, auctoritate & notis Ecclesiæ.

## CAPUT III.

Consultum omnino fuerit, adeoque id requirimus, Concionem Pastoralem perpetuo esse divisam in duas partes, quarum prior sit doctrinalis ordine prosequens materias Catechismi; posterior agat de Evangelio, de Epistola, vel de solemnitate diei.

## CAPUT IV.

Quæ omnia, ut debite præstari possint, quilibet Pastor solícite & curiosè curet, ut Bibliothecam instructam habeat: in qua ut minimum sint Biblia sacra, Catechismus Romanus, Summa doctrinæ Christianæ per Canisium, Concilium Tridentinum, Synodus Provincialis Mechliniensis, utraque Antverpiensis, sub piæ mem. Rmo FRANCISCO SONNIO (\*) celebrata, atque hæc nostra, Homiliastæ aliqui, Promptuarium Morale, item Catholicum Stapletoni, Sermones Costeri, ejusque libellus Sodalitatis, & de controversiis horum temporum, Lessii Consultatio nupera, quæ Religio sit capessenda, Directorium Polanci, ejusque libellus de frequenti Communione & modo juvandi morientes, alique similes pro singulorum capacitate & facultatibus. Rudiores vero & minus instructi in Theologia (quos hætenus ob Sacerdotum raritatem & inopiam tolerare cogimur) numquam aliquid dicant pro

concione, quod ex probato auctore aliquo demonstrare non possint.

## CAPUT V.

Pastores non dicant pro concione ea, ex quibus colligi possit particularis aliqua contra privatos animi exacerbatio; multoque minus nominatim aliquem designent.

## CAPUT VI.

Ut autem in omnibus Ecclesiis nostræ Diocesis sit conformitas in recitandis Evangeliiis, servetur ordo Missalis Romani.

## CAPUT VII.

Pastoribus per se munus prædicationis obire volentibus, meminerint omnes quomodocumque privilegiati, se juxta Decretum Concilii Trid. (b) cedere debere. Convenit autem Pastores in oppidis & municipiis per se habere concionem matutinam seu antemeridianam, & potissimum in Dominicis Quadragesimæ & Adventus, majoribusque Solemnitatibus: si alii ibidem iis temporibus stationes habent, eas post meridiem servant.

## CAPUT VIII.

Cum etiam juxta Concilii Tridentini (i) Decretum ad audiendum verbum Dei quisque suæ Parochiæ interesse teneatur; nemo in Civitate nostra & oppidis, Dominicis & Festis diebus ante meridiem extra Ecclesiam Parochialem lingua vernacula concionetur, ne quidem sub prætextu Indulgentiarum, aut Confraternitatum: lingua vero externa non fiat concio ante horam decimam.

## CAPUT IX.

Concionatores non sint in concionibus suis prolixiores, (k) & unius horæ spatium non excedant.

## CAPUT X.

In omnibus Ecclesiis suggestus fabricentur, ex quibus populo Pastor, bireto & superpelliceo, vel alba cum stola indutus, verbum Dei prædicet.

## CAPUT XI.

Advigilet Pastor, ut tam publice, quam privatim populum sibi commissum

(\*) Vid. Tom. VII. pag. 811. sqq.

(i) Sess. 24. de Reform. cap. 4.

(b) Sess. 5. de Reform. cap. 2.

(k) Concil. Trid. Sess. 5. de Reform. c. 5.

sum instruat, potissimum in his, quæ necessaria sunt ad salutem, ea de cāsa inculcet frequenter illud Prophetæ: (1) *Propterea populus meus ductus est captivus, quia non habuit scientiam.*

## CAPUT XII.

Quo in opere tam salutari non tantum Pastor, sed etiam quilibet Ecclesiasticus (labia enim Sacerdotis custodiunt scientiam) deberet quærere in tanta populi ignorantia occasiones de salute animarum bene merendi. Et ut quilibet in hac Civitate sese reddat ad hoc opus capaciores, hortamur omnes Sacerdotes, ut lectiones Theologicas, quæ in hac Civitate quotidie satis frequenter habentur, visitent, quando id sine detrimento Officii Divini, aliarumque functionum, quibus ratione suorum beneficiorum obligantur, licebit. Nec desinant privatim libros pios & doctos huc facientes diligenter evolvere, cum nulla alia occupatione utilius aut decentius bonas horas queat Sacerdos transigere.

## TITULUS XII.

*De Officio Divino.*

## CAPUT I.

UT, quæ de Officio Divino in Synodo Provinciali statuta sunt, ad exactam observationem & commodiorem executionem perducere possint; statuenda, quæ sequuntur, duximus.

## CAPUT II.

Ut districtius servetur Decretum Concilii Tridentini, (m) quo omnes jubentur Divinum Officium per se facere, atque in Choro ad psallendum instituto Hymnis & Canticis Dei nomen reverenter, distincte, devoteque laudare: idcirco mandamus omnibus Beneficiatis, cujuscumque dignitatis fuerint & ordinis, ut Decretum illud observent; meminerintque in eo proprium Ecclesiasticorum officium versari, & nostram omnium quam expectamus beatitudinem, futuram esse, Dei laudibus cum universo Sanctorum cœtu celebrandis æternum occupari.

## CAPUT III.

Decantationes Vesperarum passim in pagis intermissæ, paulatim restituantur, una cum Laudibus, quarum initium *Salve Regina*, aut alia pro temporis conditione Antiphona de Deipara: quæ Laudes concludantur trina repetitione Salutationis Angelicæ: *Ave Maria*. In solemnibus vero Festis congruum est, ut Laudes de Ven. Sacramento addantur. In Ecclesiis, ubi decantatur Prima, legatur quotidie Martyrologium pro die sequenti. Et post Primam dies denuntietur, quo Anniversarium aliquod celebrandum erit, simul recitando eorum nomina, quorum recurrent Anniversaria. In pagis vero die Dominico post concionem denuntientur eorum nomina, quorum Anniversaria illa hebdomada occurrent celebranda.

## CAPUT IV.

In omnibus Ecclesiis Collegiatis & Parochialibus semper certa hora diebus Dominicis & Festis Concio & summa Missa celebretur. Quæ Missa in pagis æstate fiet hora octava, hyeme vero hora nona; nec prætextu solemnizandi Matrimonii aut expectationis alicujus notabilis personæ, aliove colore differatur, eo quod magna incommoda ex dilatione oriantur. Si qui vero propter Sacerdotum raritatem duobus locis Officium Parochiale facere debent, in una Ecclesia Officium incipiant hora septima, in altera sub decimam. Si quis hoc tempus notabiliter sive præveniando, sive subsequendo fuerit transgressus, mulcabitur tribus florenis; si sæpius, graviori poena arbitraria.

## CAPUT V.

Comparentur aut describantur in omnibus pagis libri ad cantandum Officium, quod ibidem fieri consuevit, aut debet, necessarii: sitque ubique in cantu & cæremoniis celebrationis Missarum conformitas juxta præscriptum Missalis Romani; quod etiam Regulares, Parochiale Officium facientes, sequi teneantur.

## CAPUT

(1) Isaïæ 5.

(m) Sess. 24. de Reform. cap. 12. sub fin.

Tomus VIII. Concilior. German.

K k k k k 2



## CAPUT VI.

Quoniam in omnibus Ecclesiis nostræ Diœcesis ( Cathedrali dumtaxat excepta ) rarior est Clerus, quam ut omnes Divini Officii ritus juxta præscriptum Cæremonialis jussu CLEMENTIS Octavi editi, servari possint: volentes tamen, ut ea serventur, quæ possunt, & ubique sit conformitas, subsequenter exacte observari præcipimus. In Ecclesiis Collegiatis & Parochialibus hujus Civitatis & locis celebrioribus summa Missa Dominicis & Festis cum omnibus cæremoniis & thurificationibus in Missali Rom. de Missa solemnè præscriptis celebretur; assistentibus Diacono & Subdiacono, qui cum omni reverentia, sine ullo discursu aut confabulatione, Celebranti juxta cæremonias in eodem Missali præscriptas operam suam præstent. Numquam vero tam in istis, quam aliis Missis etiam votivis aliquid eorum, quæ decantari debent, omittatur, aut per Cantores aut organa syncopetur, multo minus circa legenda aut decantanda in Missali præscripta aliquid immutetur.

## CAPUT VII.

Ei, qui tamquam Presbyter Divinum Officium celebrat, habitu convenienti induto, detur semper in Processionibus locus dignior: in Laudibus porro ad *Benedictus*, & in Vesperis ad *Magnificat*, hic idem pluviali indutus thurificationem faciat. Sit autem tam in hac re, quam in Laudibus vespertinis per omnes Parochias conformitas, neque Pastor, aliusve quispiam propria auctoritate præsumat aliquid immutare. Eandem uniformitatem etiam in administratione Sacramentorum, purificatione puerperarum, Sacramentorum delatione, & sepultura defunctorum, servari mandamus.

## CAPUT VIII.

In omnibus Parochiis diebus Dominicis ac Festivis celebretur summa Missa in summo altari de Tempore; neque Missæ votivæ, aut Missæ pro defunctis loco summæ Missæ, umquam, saltem in Civitate, peragantur: ideoque Officium Defunctorum non fiet in

die Dominico aut Festo, nisi alius adsit Sacerdos, qui debita hora celebret summam Missam de Tempore aut Festo. Maxime autem solliciti sint, quibus ea cura incumbit, ut totum Officium Divinum fiat reverenter, devote, ordinate, & cum debita solemnitate, semper quidem, sed præcipue Dominicis & Festis, ut populus ad devotionem & Parochiæ suæ assiduam frequentationem incitetur.

## CAPUT IX.

Ubi in Ecclesia aliqua plures sunt Sacerdotes, ut populi commoditati consulatur, potissimum Dominicis & Festis, non plures simul celebrent, sed horas dividant, quæ a singulis indubitate serventur. Tempus, quo Missæ a Fundatoribus certa aliqua hora celebrari jubentur, sub poena amittendi alterum tantum, quanta est eleemossyna cuique Sacro attributa, numquam mutetur aut prætermittatur.

## CAPUT X.

Appendatur catalogus in Vestiario Ecclesiæ, in quo descripta sint nomina omnium Beneficiatorum & Officiatorum Ecclesiæ ejusdem: & singulis nominibus adscribantur Missæ ab unoquoque celebrandæ ex fundatione beneficiorum vel officio proprio, simul dies & hora, quam servare infallibiliter teneantur.

## CAPUT XI.

Quando in aliquo altari est fundata Capellania ad alicujus Sancti honorem, in Festo ejusdem Sancti occurrente hoc agatur, ut solemnè aliqua Missa in eodem celebretur.

## CAPUT XII.

Si quæ sint Capellæ aut Altaria diruta, in quibus foundationes aliquæ sunt institutæ, Nobis indicentur, ut juxta Decretum Sacrosancti Concilii Tridentini (n) a Nobis ad alias Capellas aut altaria (donec propria restituta sint) transferantur.

## CAPUT XIII.

Altare tegatur cum mappis debite juxta Rubricas Missalis, atque honeste, & frontispicio ejus toti præpendeat decens

(n) Sess. 21. cap. 7.

decens aliquod aulæum, quod *Antependium* vulgo dicitur. Sit Crux in altari & tabula aliqua picta, aut ipsemet paries contiguus altari, depictus: maxime autem curetur, ut tam in altari, quam vestibulis Sacerdotalibus perpetua sit mundities linteorum, & aliorum, quæ ad rem Divinam pertinent. Graviter puniendus hujus Statuti transgressor.

## CAPUT XIV.

Pastores & Capellani cantantes Collectam in Laudibus vespertinis, aut assistentes Officio Ven. Sacramenti, teneantur circa altare superpelliceo induti subsistere a principio usque ad finem Laudum: quibus finitis, aqua benedicta populum etiam non aspergant, nisi induti superpelliceo.

## CAPUT XV.

Similiter quodcumque Officium Divinum Pastor, Capellani, Cantores, Custodes decantant, aut in Processione procedunt, semper induti sint superpelliceo, habeantque sub eo vestem talarem nigram, aut subnigram, ac collaria simpliciora, sub pœna distributionis amittendæ.

## CAPUT XVI.

Canonici insuper in Cathedrali & in Ecclesiis Collegiatis omnibus a die Commemorationis omnium fidelium Defunctorum usque ad feriam sextam Parasceves inclusive choralibus cappis sub eadem pœna utantur: & primo quoque tempore in Cathedrali & Collegiatis Capellani æstate superpelliceo cum almutio, hyeme vero cappis suo Ordini congruentibus induantur.

## CAPUT XVII.

Ubi Horæ Canonice ante has turbas decantari solitæ interruptæ sunt, ante proximum trimestre curet Pastor deferri ad Nos descriptionem fructuum ad decantationem hujusmodi Horarum relictorum, ut juxta illorum rationem decernatur, quæ Horæ in posterum cantari debeant.

## TITULUS XIII.

*De Festis, & Jeuniis.*

## CAPUT I.

**M**aximam in servandis Dominicis & Festis diebus negligentiam

ut populus corrigat, Concionatores sæpe moneant, explicantes, ad quæ istis diebus agenda, omittendaque obligentur, gravitatemque transgressionis exponentes: & singulis Ecclesiis tabula ordinationis de Festorum observatione sit appensa.

## CAPUT II.

Et quia non omnes monitionibus flectuntur; volumus contra illos transgressores sine dissimulatione procedi juxta Ecclesiæ præcepta, Serenissimorum Principum nostrorum edicta, Prædecessorumque nostrorum ordinationes. Idemque, ut faciant, hortamur in Domino, & serio requirimus omnes Magistratus, Officiariosve sæculares, duas tertias mulctarum, in quas incursum sint, transgressores applicando fabricæ Ecclesiæ illius Parochiæ, in qua istiusmodi transgressio committetur. Potissimum autem diligenter observetur, ne Dominicis & Festis diebus, eo tempore, quo Divinum Officium fit, aut verbum Dei prædicatur, tabernæ vel hospitia ulla aliis, quam viatoribus pateant. Si vero ipsi Officarii caupones sint, & hac occasione lucri cupiditate hanc justissimam legem ipsi violent, aut alias fuerint negligentes, mandamus Pastoribus, & aliis in Parochia Sacerdotibus, nec non & Custodibus, ut tales ad Officium nostrum deferant: eidem Officiali nihilominus injungentes, ut in tales inquirat, etiam non monitus a Pastore.

## CAPUT III.

Festa celebranda in Dicecesi Antverpiensi exprimuntur in primo Synodo Provinciali Mechliniensi: occurrentia vero illis diebus, ex quibus secundum Breviarii Rubricas debent transferri, celebrentur illis diebus, in quos incidunt; a Clero vero servantur Rubricæ, exceptis dumtaxat Festo Annuntiationis B. Mariæ, & Festo S. Marci, in quorum celebratione Statutum Synodi Provincialis servetur.

## CAPUT IV.

Dominica Quinquagesimæ Pastor publice jejunium Quadragesimale, ejusque observationis obligationem, prout in Pastoralis Mechliniensi: & eadem

Kkk kkk 3

occa-

occasione moneat populum, ut tempestive ante Pascha isto sacro tempore paret se ad Confessionem, & in pagis designet aliquos in Quadragesima dies, in quibus instructurus est juniores & rudiores ad Confessionem bene faciendam, & Communionem Sacram rite sumendam.

## CAPUT V.

Quicumque deprehenderetur ova aut carnem in Quadragesima, aut aliis diebus, quibus per Ecclesiæ legem id non licet, sine legitima dispensatione comedisse, ad Officiale nostrum sine dissimulatione deferatur, atque pro scandali vel contemptus qualitate puniatur. Nulli vero dispensatio hujusmodi a quocumque obtenta suffragetur, nisi fuerit a Nobis, aut certe Vicario nostro Generali examinata & approbata. Is autem, cui ex legitimis causis esus carnis, vel illius venditio permittitur, ea venia discrete & sine ullo scandalo utatur, tam hic, quam ille: alioqui is, qui hoc scandalum dederit, pater etiam familias, qui ne daretur, non impedivit, perinde atque si sibi nulla facultas concessa foret, corrigetur.

## CAPUT VI.

In Quadragesima ante feriam quartam hebdomadæ sanctæ publice ova vendi inhibemus.

## CAPUT VII.

Quoniam propter annonæ caritatem, plurimorum inopiam, & multorum infirmitatem, usum lacticiniorum in Quadragesima, die Cinerum, Feria quarta & sexta, & Sabbato hebdomadæ sanctæ exceptis, in hac Diocesi permittere hætenus visum est; Nos etiam in posterum idem permittendum existimavimus, donec aliter statuerimus: ita tamen ut singuli ad jejunium obligati, ea gratia uti volentes, quotidie recitent semel Orationem Dominicam & Salutationem Angelicam, vel intra Quadragesimam eleemosynam unius stufieri inferant in Gazophylacium ad hoc in singulis Parochialibus Ecclesiis constituendum, pro medietate in usum fabricæ cujusque Ecclesiæ, & altera Seminarii usibus applicandam.

## CAPUT VIII.

Histriones, Comædi, & similes non admittantur ad agendum seu exhibendum, nisi eorum comediarum a Censoribus sint perlustratæ & probatæ, ac ne sic quidem in Quadragesima vel Adventu.

## TITULUS XIV.

*De Imaginibus.*

## CAPUT I.

**I**magines cum omni decentia & servato decore depingi oportet: quæ in re, quia sæpius peccatur, volumus, ut in posterum, quodcumque imago aliqua nova & insolita depingetur in Ecclesia collocanda, ipsum prototypon vel prima delineatio in Civitate Nobis, aut Vicario nostro Generali, una cum Capitulo, ruri Decano Christianitatis exhibeatur; ut quod contra veritatem aut decorum forte depingendum fuerat, emendetur. In depictione autem & admissione imaginum habeatur ratio eorum, quæ scripsit in opusculo quatuor librorum de Sacris Imaginibus Venerabilis Theologus Joannes Molanus.

## CAPUT II.

Gravissime illos puniendos declaramus, qui imagines falsum quippiam significantes, aut ludibrii causa excogitatas contra veritatem, Ecclesiam, Ecclesiasticasve personas, aut in ignominiam alicujus Ordinis vel status pinxerint, sculperint, aut impresserint.

## CAPUT III.

Inter quos censeri debebunt ii, qui Cœnam Domini depingent instar cœnæ Calvinisticæ, videlicet positis in lance panis frustis oblongis, aut offis rubro vino tinctis. Quales imagines, ubicumque reperientur, statim emendantur, aut omnino tollantur.

## CAPUT IV.

Imagines ab Iconomachis ruptæ, aut mutilatæ, aut carie consumptæ, si decenter reparari nequeant, ab Ecclesiis tollantur: quæ autem restaurari queunt, interim dum id fit, extra populi conspectum ponantur; cujus rei diligentem habeant rationem in faciendâ



da qualibet visitatione Archi-Presbyteri rurales.

## CAPUT V.

Imagines Christi crucifixi sanguinolentæ & vibicibus lividæ, ut Redemptionis nostræ pretium uberius expriment, depingantur.

## CAPUT VI.

Si in pede altaris personæ vivæ, aut alioqui viventibus notæ, vel si profana ibi depicta sint, illa deleri; aut dum in altari Sacrificium Missæ celebrabitur, cortinula tegi volumus: atque ne in posterum ibi pingantur, vetamus.

## CAPUT VII.

Insignia aut effigies personarum ob crimina commissa infamium, ab Ecclesiis penitus eliminantur.

## CAPUT VIII.

Quæ de pictoribus dicta sunt, eadem de sculptoribus & incisoribus, impressoribusque intelligantur; quos etiam novas & insolitas aliquas imagines sculpere, incidere, imprimere vetamus, nisi prius illarum exemplar aut delineatio visitata a Censore & probata fuerit. Si quis vero imagines aliquas, etiam antiquas, aut alibi impressas, continentes aliquam falsitatem, scommata, scandala, aut obscenitatem pinxerit, impresserit, aut vendiderit, subjaceat pœnis contra Typographos & Bibliopolas in similibus peccantes latis.

## TITULUS XV.

*De Superstitione.*

## CAPUT I.

**G**Rave peccatum, Deo valde injurium, & Reipubl. in primis noxium, est Superstitio: ad quam reprimendam & extirpandam servantur ea, quæ SIXTUS V. in Bulla: *Celi & terræ*, & Serenissimi Archi-Duces tam in suis literis huic Synodo in calce adjecit, quam in edicto Concilio Provinciali Mechliniensi addito, statuerunt.

## TITULUS XVI.

*De Archi-Presbyteris, Pastoribus, Capellanis & Custodibus.*

## CAPUT I.

**A**Rchi-Presbyteri, seu Decani rurales in visitatione inquirant, an

observentur ea, quæ in Synodo Provinciali & hac Dioecesana statuta sunt, potissimum quæ sub Titulis: De Officio Divino, Catechizatione, Templis, Pastoribus, Scholis, administratione bonorum Ecclesiasticorum ordinantur, cæteraque omnia, quæ in particulari instructione a Nobis subsignata habent, cui fidem haberi volumus tamquam hujus Synodi Decretis: visitabit autem quilibet suum Districtum statim post Dominicam in Albis: suæque visitationis acta nitide descripta post festum Visitationis B. Mariæ Feria secunda septimanæ personaliter deferant, simulque Feria tertia subsequenti in ædibus nostris conveniant. Ipsi vero suo ordine Congregationem Pastorum habeant, feriis tertiis hebdomadarum dictam septimanam subsequentium. Hortamur tamen omnes, ut licet mox post Pascha instituerint, absolverintque visitationem suam, data tamen occasione Parochias sibi commissas sæpius invisant.

## CAPUT II.

In congregatione Pastorum tractabitur præcipue de executione Decretorum hujus Synodi: & singuli Pastores libere pudent, si in suis aut vicinis Ecclesiis aliquos defectus aut transgressiones animadverterint. Decanus autem indicabit Nobis defectus, quos in observandis Decretis visitando vel quomodolibet aliter deprehenderit.

## CAPUT III.

Archi-Presbyteri seu Decani rurales, cum sint Parochorum aut Sacerdotum sui Districtus Pastores, solliciti sint de eorum salute & profectu spirituali, & singularem habeant inspectionem & curam de ipsorum doctrina, vita & moribus. Et vicissim mandamus Parochis & Sacerdotibus, ut Decanos uti Superiores suos agnoscant, reverantur, & ament.

## CAPUT IV.

Ubi autem intelligent aliquem e sui Districtus Pastoribus aut Sacerdotibus periculose laborare, statim ad eum excurrant, moneantque, ut salutem suam consulat, eique, si opus est, Sacramenta administrent: quod si eum ex ea ægritudine decedere contigerit, etiamsi Regu-

Regularis alicujus instituti sit, statim curabunt fieri inventarium omnium bonorum relictorum, ut piis legatis, aliisque creditoribus de solutione debitorum cautum sit: atque omnia munimenta fabricæ Ecclesiæ vel mensæ pauperum apud eum reperta, fabricæ eidem vel mensæ pauperum respective curent restitui. Quæ vero ad Pastorum aut fundata sibi beneficia spectabunt, ac speciatim defuncti Enchiridion seu Manuale, in quo reddituum a se receptorum rationes descripsit, secum deferent; neque ulla hujusmodi monumenta relinquent in manibus aliorum, etiam sub prætextu, quod iis forte indigeant ad executionem testamenti. Si tamen aliquo revera opus sit, dabunt exemplum seu copiam istiusmodi documenti, quo se indigere asserent. Mortuis iuxta persolvent, curamque gerent, ut infra annum in Curia nostra Ecclesiastica domus mortuariæ (si Sacerdotes sæculares fuerint) computus & rationes exhibeantur, & peragantur. Habebunt autem Decani sua jura tam a sæcularibus Sacerdotibus, quam Regularibus in sua instructione descripta.

## CAPUT V.

In administratione Sacramentorum & funeralium, Beneficiatus aut Habituatus in Ecclesia Cathedrali, Collegiata, eisdemve subalterna, suberit Decano istius Collegii. Qui vero in iisdem Beneficiatus aut Habituatus non est in Civitate, suberit Archi-Presbytero civitatenſi, alibi Archi-Presbytero rurali: cujus officium est, omnibus Ecclesiasticis tam Sæcularibus, quam Regularibus extra Monasterium degentibus, in suo Districtu morientibus, Sacramenta administrare, & officium funebre facere. Urgente tamen necessitate Pastor loci aut vicinus vices suppleat.

## CAPUT VI.

Si vero contingat aliquem mori, qui sit Beneficiatus aut Habituatus in Ecclesia Cathedrali, Collegiata, aut subalterna, & simul alibi in Dicecesi nostra, administrabit ei Sacramenta Decanus loci, in quo infirmatur. Officium au-

tem funebre fiet utroque loco beneficii a quolibet illius Decano.

## CAPUT VII.

Pastores noverint finem officii sui esse salutem ovium, ad quem proinde scopum Pastorales actiones suas omnes dirigere & referre se debere intelligant, meminerintque illius, quod a primis Ecclesiæ Pastoribus fuit dictum: (o) *Nos autem orationi & ministerio verbi instantes erimus.* Quo significatum est, hæc duo præcipue spectare ad Pastorum officium: alterum, ut pro salute gregis sui quotidie Deo Sacrificium offerre, atque etiam extra Sacrificium pias ad Deum preces fundere numquam desistant; alterum, ut prædicationi verbi Dei assidue insistant: sub quibus & tertium comprehenditur, administratio Sacramentorum, quæ reverenter & devote cum altantium ædificatione fiat. Denique pie, sobrie, & iuste vivendo sint forma sui gregis.

## CAPUT VIII.

Cum non excusetur, sed magno-  
pere culpandus sit Pastor, si lupo oves devorat, & Pastor id nescit: diligentissime advigilent Parochi, ne quis extraneus aut incola oves sibi commissas hæresi inficiat, & proinde diligenter exequantur Articulum octavum hoc Titulo Synodi Provincialis, ut ab iis, qui ad ipsorum Parochiam recens commigrarint, exigant vitæ testimonium, ab illo Pastore, sub cujus Parochia ultimum domicilium habuerunt, subsignatum: aut si veniant ex Provinciis, ubi Pastores non sunt, adferant alias fide dignum testimonium, eademque in re Magistratus locorum requirimus, ut Decretum Serenissimarum suarum Celsit. ad juvandum executionem dicti Concilii Provincialis promulgatum Articulo 17. & 18., ejusque voluntatem sæpius declaratam fideliter ac sedulo observent.

## CAPUT IX.

Ut quod a Sacrosancto Concilio Trident. & primo Provinciali Mechliniensi salubriter, quo Pastores facilius agnoscerent vultum pecoris sui, statutum est, ut, ubi in una Ecclesia plures Pasto-

(o) Act. 6.

Pastores toti populo pro indiviso præ-  
sunt, certæ singulis assignentur Paro-  
chiarum regiones, executioni mande-  
tur; præcipimus, ut ante trimestre  
proximum, ubi Parochiæ indivisæ sunt,  
per deputandos a Nobis hujusmodi  
partitio fiat, ac Nobis approbandi causa  
exhibeatur.

## CAPUT X.

Intelligent Pastores non satis esse,  
si generaliter in suis concionibus pec-  
cata arguant, sed etiam privatim se de-  
bere monere eos, quos in statu dam-  
nationis versari vident: quos si obsti-  
natiores animadvertant, suisque moni-  
tionibus non moveri, obligatos se ad  
eos Nobis, Officialive nostro indican-  
dos. Quod si in alicujus Parochia no-  
torii peccatores inveniantur, quorum  
Pastores habeant, aut facile habere no-  
titiam potuerunt: eosque non denun-  
tiaverunt, ob gravem ejusmodi negli-  
gentiam, Dei in primis, deinde & Epi-  
scopi sui indignationem sciant sese in-  
cursuros.

## CAPUT XI.

Hortamur Pastores, ut habeant  
singularem ac paternam curam eorum,  
qui vere pauperes sunt, & aliena ope  
indigent, sive de suo si possint eos ad-  
juvando, sive ditionibus Parochiæ suæ  
eos commendando, sive quacumque  
alia ratione eorum inopiam sublevando.  
Et ab iis in administratione Sacramen-  
torum nihil accipiant.

## CAPUT XII.

Duobus registris, quorum in Syn-  
odo Provinciali fit mentio, addant Pa-  
stores tertium, in quo describant no-  
mina in sua Parochia morientium, sive  
in Ecclesia parochiali, sive in alia sepe-  
liantur.

## CAPUT XIII.

Si vero contingat in posterum, ali-  
quem ex facultate sibi legitime facta,  
administrare Baptismi aut Matrimonii  
Sacramenta non suis subditis; teneatur  
ipsorum nomina ad Archi-Diaconum  
nostrum, & proprios Pastores, si ha-  
beant, transmittere. Similiter & ea  
registra, in quibus descripta sunt no-  
mina baptizatorum, & Matrimonio  
junctorum, ab & coram non propriis

*Tomus VIII. Concilior. German.*

Parochis, sed aliis, quibus ob turbatam  
temporum rationem illa cura commissæ  
fuerit, per eosdem ad illos transmit-  
tantur.

## CAPUT XIV.

Ad evitanda multa incommoda,  
quæ proveniunt, dum Patroni Ecclesia-  
rum Parochialium incorporatarum de-  
bitam non contribuunt portionem;  
hortamur omnes Patronos in Domino,  
ut ante festum S. Remigii proximum  
competentiam Pastori certam & juxta  
taxam Provincialis Synodi sufficientem  
assignent. Id, ubi omissum fuerit, Pa-  
stor, & ubi Ecclesiæ provisum non erit  
de Pastore, Communitas ipsa, curante  
seu monente Decano Christianitatis,  
Nobis, Officialive nostro offerat libel-  
lum; eique adjungat specificationem  
fructuum bona fide declaratorum, con-  
scriptam, ut ad assignandam competen-  
tiam procedatur juxta Cap. 4. hoc Tit.  
Synodi Provincialis.

## CAPUT XV.

Pastor apud suos Parochianos re-  
sideat, nec ab iis sine licentia Decani  
ruralis, ac nisi alteri idoneo cura suo-  
rum commissæ, ultra octiduum absit:  
habitetque non solum intra limites suæ  
Parochiæ, sed etiam non procul ab Ec-  
clesia; nullo autem modo in diversorio  
quopiam seu taberna, aut in domo qua-  
piam malæ famæ.

## CAPUT XVI.

Ideoque ubi Presbyteria, seu Do-  
mus Pastorales non sunt, provideat  
Pastor cum suis Parochianis, ut quanto  
citius fieri potest, aliqua domus ipsi  
Ecclesiæ propinqua, in fundo ipsius  
Pastoratus, si quis sit, ædificetur. Quam,  
ubi exstructa fuerit, deinceps Pastor  
sartam tectam servare teneatur.

## CAPUT XVII.

Pastores, qui propter raritatem Sa-  
cerdotum duabus serviunt Ecclesiis,  
alternatim in alterutra plene faciant  
Officium, & in alia solum Sacrum ce-  
lebrare teneantur.

## CAPUT XVIII.

Capellani residentes in pagis, in  
Capellis subalternis, ita celebrent Offi-  
cium suum in iis, ut in Parochia sum-

LII III

ma



mæ Missæ populus atque ipsi interesse possint.

#### CAPUT XIX.

Custos assumatur, qui boni sit nominis & famæ, & honestæ conversationis, peritus cantus: qui, si alius Ludi-magister non sit, etiam Scholam aperiat; si id facere nolit, ne admittatur (nisi forte provisionaliter, donec alius idoneus inveniatur ad custodiam) quod si semel susceptam, sine causa, per Decanum ruralem approbanda, Scholam deseruerit, etiam custodia privari possit.

#### CAPUT XX.

Assumptus Custos Decano rurali præsentabitur, ab eo de qualitatibus requisitis examinandus & admittendus; & si ejusmodi matricularia beneficium sit, ab Archi-Diacono institutionem postulat.

#### CAPUT XXI.

In admissione ad matriculam deinceps præter fidei professionem & promissionem de observandis iis, quæ in Synodo Provinciali & hac Diocesana de officio Custodis decreta sunt, promittat etiam, quod personaliter residet, & officium per se faciet. Qui vero ante hanc Synodum admissi sunt, si per se officium suum ostendant facere non teneri, aut non possint, debeant substituere debite qualificatum, a Decano rurali & Pastore loci examinandum, ac cum assignatione honestæ competentis admittendum.

#### CAPUT XXII.

Pastoribus, aliisque Sacerdotibus Officium Divinum aut Pastorale munus in pagis obeuntibus, aut Missam celebrantibus, Custodes non tantum Dominicis & Festis, sed etiam ferialibus diebus, per se, vel alium operam suam in habitu decenti exhibeant. Ter aut bis, id est, mane & vesperi, atque ingruente tempestate, ad populum ad precationem excitandum campanam pulsant: & quid pulsus iste sibi velit, Pastores aliquando suis explicant.

#### CAPUT XXIII.

Qui Ballivi, Prætoris, Procuratoris, aut simili funguntur officio, aut

cauponam aperiunt, cum hujusmodi officiis distracti debite officium Custodis facere non soleant, in posterum ad hoc officium non admittantur. Admissus vero ad custodiam, si deinceps hujusmodi incompatible officium cum custodia suscipere præsumat, censeatur ipso facto privatus, possitque statim alteri de officio Custodis provideri.

### TITULUS XVII.

#### *De vita & honestate Clericorum.*

#### CAPUT I.

Cum Clerus in hac nostra Diocesi in medio quotidie versetur hæreticorum, quos scribit D. Augustinus (p) accurate Sacerdotum, Clericorum, & Monachorum observare actiones, ac ex minimis etiam nævis maximam accipere totum ordinem calumniandi occasionem; ita studeant vivere, ut obmutescere faciant adversarios, & ut in medio nationis pravæ luceant tamquam luminaria, in omni bonitate, justitia, & veritate. Et ad promovendam Dei gloriam ac proximorum salutem, quotidianis pro Christi ovibus Sacrificiis, assiduis orationibus, instructione ignorantium, aliisque charitatis Christianæ officiis, in tanta inopia Sacerdotum, & animarum periclitantium multitudine, totum se impendat unusquisque pro sui talenti ratione.

#### CAPUT II.

Quilibet Sacerdos ante festum D. Joannis proximum habeat vestem suo Ordini congruentem, Sæculares juxta præscriptum Synodi Mechliniensis, vel saltem utramque vestem interiorem & exteriorem talarem: Regulares vero juxta suæ professionis statuta, sub præpitis & censuris a jure communi & ordine latis; nec ullus Regularis sine ea in publicum prodeat absque speciali nostra licentia, non nisi ob singulares rationes a Nobis concedenda.

#### CAPUT III.

Quamquam laudabilis consuetudo in Belgio certa forma tundendi capillitium & barbam (quo vetustissimo Ecclesiæ ritu Clerici significabant se superflua omnia ac terrenas sollicitudines abje-

abjecisse, ea, quæ sursum sunt, quære-  
re & sapere, quo & a Laicis secerne-  
bantur, & a multis levitatibus munda-  
nis coërcebantur) turbulento hoc tem-  
pore apud multos intermissa sit: volu-  
mus tamen omnes Beneficiatos, & in  
Sacris Ordinibus constitutos, semper  
gestare tonsuram Clericalem conspi-  
cuam, gradui suo convenientem, &  
crines non habere setarum instar (quæ  
juvenilis est vanitas Laicorum) ere-  
ctos supra frontem, neque barbam stu-  
diosè comptam, aut ab utroque oris  
latere militum more allatam, vel quo-  
vis modo ita labro superiori incumben-  
tem, ut Sacrum Christi Sanguinem  
sumpturo creet aliquod impedimentum  
aut irreverentiæ periculum.

## CAPUT IV.

Ut tollantur scandala, pericula Or-  
dinis Ecclesiastici contemptus, aliaque  
mala, quæ ex tabernarum visitatione  
necessario consequi solent, districte ob-  
servari volumus Statutum Prædecesso-  
ris nostri Reverendissimi Domini SON-  
NI, ut quicumque Ecclesiasticus (nisi  
peregrinationis, aut alia necessitatis  
causa compulsus) tabernam bibendi  
causa visitaverit, incurrat pœnam trium  
florenorum prima vice, secunda dupli,  
tertia quadrupli: quam pœnam inex-  
cusabiliter incurrere, decernimus om-  
nes & singulos, qui id fecerint.

## CAPUT V.

Quod si vero aliquis Clericalis suæ  
dignitatis, officiique immemor, potui-  
nimis indulgens, in ebrietatem, quod  
absit, inciderit; & scandalum aliquod  
sen in loco convivii, seu egressus inde  
in plateis, aut ubicumque demum de-  
derit; pro scandali gravitate severissi-  
me puniatur: quæ pœna ut minimum  
sit pro prima vice duodecim floreno-  
rum, secunda dupli, si sæpius, arbitra-  
ria & gravis.

## CAPUT VI.

Quia vero incontinentiæ crimen  
maximum dedecus parit Ordini Eccle-  
siastico, ita ut sola illius suspicio popu-  
lum graviter offendat; districte prohi-  
bemus, ne quis Clericorum habeat an-  
cillam, per quam incontinentiæ peri-  
culum, opinionem, vel suspensionem

possit incurrere; neque cum ancilla  
umquam ad convivia, multo minus ad  
tabernas accedat: teneaturque unus-  
quisque suam ancillam sine judicii stre-  
pitu dimittere, quamcumque Nos in  
Vicariatu nostro, aut Decanus & Ca-  
pitulum quoad sibi subditos, dimitten-  
dam judicaverimus.

## CAPUT VII.

Nullus Ecclesiasticus per se, vel  
alium negotiationem, vel aliud officium  
Clerico indignum exerceat; nec deci-  
mas, aut agros, vel silvas cæduas ad lig-  
norum venditionem conducto accipiat:  
neque alicujus testamentum conscribat  
extra causam necessitatis, aut nisi ad  
hoc specialiter sit admissus.

## CAPUT VIII.

Abstineant Clerici a convictu &  
familiaritate omnium hominum, qui  
publice habentur potatores, ebriosi,  
aleatores, scortatores, usurarii, hære-  
tici, aut alio quovis crimine infames.

## CAPUT IX.

Choreas non agitent, aleis ne lu-  
dant, aut pila palmaria in platea, loco-  
ve alio publico diebus Dominicis &  
Festis: neque arcubus, balistis, aut  
bombardis instructi incedant.

## CAPUT X.

Ut Statuta singulorum Capitulo-  
rum, & juramenta ab admittendis ad  
Beneficia præstari solita, Decretis Con-  
cilii Trident. consentiant; exhibebun-  
tur Nobis omnia antiqua Statuta & ju-  
ramenta examinanda, ut si quæ in iis  
forte reperiantur supradicti Concilii  
Tridentini Decretis repugnantia, emen-  
dentur.

## CAPUT XI.

Hortamur autem in Domino om-  
nes, quos ea res concernit, ut revi-  
deant atque perpendant juramenta an-  
tiqua, quæ ab admittendis ad officia,  
opificia, aliaque munia præstari solent;  
eo fine, ut quæ in usum deduci non  
possunt, omittantur, & ejusmodi ju-  
ramento admittendorum addatur clau-  
sula de fide Catholica servanda.

TITU-

## TITULUS XVIII

*De Beneficiis & Officiis Ecclesiasticis, Beneficiatorum residentia, oneribusque Beneficiorum & Foundationum adimplendis.*

## CAPUT I.

**N**emo ad officium Pastoris, aut Vice-Pastoris, aut ad functiones Pastorales exercendas admittatur, qui ad hunc effectum Nobis & Examinatoribus non fuerit specialiter examinatus & idoneus repertus: alioquin actus per eos gestos nullos esse declaramus, & insuper competenti pœna ipsos fore plectendos.

## CAPUT II.

Admittendus ad possessionem cuiuscumque Beneficii, post fidei professionem, præstet iuramentum, ab habente jus Institutionis, aut Decano rurali proponendum.

## CAPUT III.

Fructus autem fabricæ debiti, re ipsa omnes, distributionibus exceptis, fabricæ applicentur. Quod etiam observandum erit, quando ab admissis ad possessionem alicujus Canonatus, aut alterius Beneficii datur aliqua summa pecuniæ in augmentum distributionis panis, aut bursæ infirmorum, aut bonorum communium; quæ summa tota de facto in illum usum solum debet applicari: qui vero hujusmodi pecuniam in admissione alicujus Canonatus aut Beneficii datam in suos usus converterit, sciât se in conscientia teneri ad restitutionem, præter peccatum, quod admisit.

## CAPUT IV.

Ad qualem restitutionem etiam obligati sunt, quicumque fructus Beneficiorum, foundationumque quarumcumque in suos usus converterint, oneribus illarum non expletis. Quamvis ubi ob malignitatem temporum, aliasve causas onera ejusmodi expleta non fuerint, non ideo ipsi debitores a solutione excusentur; cum onera istius-

modi adhuc adimpleri, aut saltem ipsi fructus debiti ad fabricas Ecclesiarum, aliosve pios arbitrio nostro similes usus, possint & debeant applicari.

## CAPUT V.

Meminerint omnes Patroni, & alii quicumque, qui hujusmodi Beneficiorum, foundationumque quarumcumque & nominatim vacantium & absentium, vel ad eos, qui abessent, pertinentium fructus aut emolumenta, cum ad alios jure spectarent, perceperunt, & iis, quibus debentur, non restituant, sese incidisse in pœnas a Concilio Trident. (q) statutas.

## CAPUT VI.

Jura Officiariorum, quæ in adoptione Beneficii evolvuntur, non exigantur ultra taxam pro singulis Capitulis aut Ecclesiis determinatam, aut a Nobis cum iis, quorum interest, determinandam.

## CAPUT VII.

Capitula Ecclesiarum Collegiatarum, quæ certas aut sufficientes distributiones non habent, cogitent de modo, quo ex singulis Horis assignari possint; eumque Nobis prima quaque opportunitate suggerant, ut communicato consilio ordinationi Concilii Trident. (r) satisfieri possit.

## CAPUT VIII.

Ut etiam distributiones Capellaniarum in Ecclesia nostra Cathedrali & aliis Ecclesiis augeri possint, ordinamus, ut omnia ea, quæ pro distributionibus relicta sunt, interessentibus in Choro juxta præscriptum Synodi (s) re ipsa distribuantur.

## CAPUT IX.

Quoniam pia Fundatorum fraudatur intentio, Ecclesia suis Ministris, & populus Divino Officio, aliaque plurima sequuntur incommoda, quando obtinentes Capellanas non resident in Ecclesiis suarum Capellaniarum; iis detrimentis & incommodis, ut ex officio nostro prospiciamus, declaramus ad residentiam teneri obtinentes Capellaniam, quam vocant animarum, ita funda-

(q) Sess. 22. cap. 11. de Reform.

(s) Mechl. tit. 12. c. 3. 4.

(r) Sess. 21. cap. 3. Sess. 22. cap. 3. Sess. 24. cap. 15.



fundatam, ut qui eam obtinet, Pastori in sua functione sit adiutor: Possessorem etiam Capellaniam, cujus fundatio exprimit Capellanum debere residere. Contra quos, si non resideant, personaliter procedi volumus, pœnis contra non residentes a jure (†) constitutis.

## CAPUT X.

Decretum Concilii Tridentini (\*) de revidendis unionibus, quod hactenus a Prædecessoribus nostris injuria temporum prohibitis executioni mandatum non est, exequi volentes, omnino requirimus ante semestrem proximum ad manus nostras omnium omnino unionum quorumcumque Beneficiorum, quibuscumque mensis, Capitularibus, Abbatibus, piis locis, Pastoratibus quacumque auctoritate unitorum exemplaria manu Notarii publici descripta deferant; quo eas revidendo dispiciamus, an conditionibus in unione præscriptis satisfiat.

## CAPUT XI.

Et quoniam compertum, plures se in possessionem Beneficiorum superiorum turbatum tempore sine ullo justo titulo intrusisse; statuimus, ut quorumcumque Beneficiorum aut Officiorum Ecclesiasticorum nostræ Diocesis extra Cathedralis & Collegiatis Ecclesias, eisdemque subjectas, possessores in prima visitatione per Decanum ruralem faciendam titulos suos collationis, institutionis, & possessionis exhibeant: qui vero quacumque ex causa absunt, infra proximum a tempore publicationis hujus Synodi trimestre, ad Archidiaconum teneantur literas originales, vel si ita illis visum fuerit, saltem copiam illarum authenticam transmittere, sub pœna suspensionis a fructibus eorundem Beneficiorum vel Officiorum.

## CAPUT XII.

Missæ per Beneficium quodcumque fundatæ, (x) quæ debent celebrari in quibusdam certis altaribus, certis diebus vel horis, cantu, aliisque modificationibus, secundum omnes suas

clausulas, fundationes requisitas, celebrentur. Ubi vero Ecclesiæ, aut altaria diruta sunt, aut fructus hujusmodi oneribus non sufficiunt; auctoritate Nobis a Concilio Tridentino (y) attributa, ad certa loca ea Beneficia transferantur, aut onera ad certam quantitatem reducantur: quod nemo, ne Patronus quidem, auctoritate privata præsumat facere, aut, ut hoc fiat, consentire.

## CAPUT XIII.

Beneficiati omnes infra trimestre Decano rurali sui Districtus tradant, seu transmittant syllabum seu descriptionem exactissimam omnium, quæ possident titulo Beneficii, omniumque proventuum, cum annotatione nominum, possessorum, hypothecarum, & limitum vicinorum fundorum; eamque descriptionem & annotationem authenticam; sub pœna decem florenorum pro primo trimestri, pro secundo viginti florenorum: & Decani infra mensem, deinde subsequentem tradent, vel tuto mittent hæc eadem ad Archidiaconum, ut in Archivis nostris ponantur.

## CAPUT XIV.

Ubi vero Beneficium vacat, aut Possessor illud deserit, Decanus ruralis cum interventu Pastoris loci inventarium supra nominatum procurabit.

## CAPUT XV.

Dum quis onus Missæ Beneficio aut Officio suo annexum per se explet, aut annexum Beneficio vacanti, vel ei quod a quopiam non residente possidetur, quæ Missa celebrari debeat certa hora, aut Dominicis, aut Festis diebus, in cujusque Missæ officium sex stufferorum eleemosynam assignamus: si autem celebretur cum cantu, septem; alias quinque tantum. Ad quam taxam celebrationem Missarum, pro rata fructuum recipiendorum hoc præsentium rerum statu, usque dum aliter eade re disponemus, auctoritate Nobis a Sacrosancto Concilio Tridentino (z) tributa reducimus.

(†) X. de Cler. non resid. cap. 4. 6. 8. &c.

(x) Concil. Trident. Sess. 25. cap. 5.

(z) Dicta Sess. 25. cap. 4.

(u) Sess. 7. cap. 6. Sess. 24. cap. 13.

(y) Sess. 21. cap. 7. Sess. 25. cap. 4.

## CAPUT XVI.

Pari ratione, ne ob tenuitatem foundationum defunctorum anniversaria negligantur, plura anniversaria simul jungi permittimus, secundum taxam a Nobis in unaquaque Ecclesia pro numero Ecclesiasticorum residentium faciendam. In pagis vero, ubi tantum est unus Pastor & Custos, distribuatur pro decantatione Vigiliarum trium Lectionum & Missa unicus florenus; cujus duæ tertiæ cedant Pastori, & restans tertia Custodi, nisi aliter in fundatione distributio ordinata est.

## CAPUT XVII.

In quolibet Capitulo deputetur unus vel alter, qui visitet & legat omnia munimenta Beneficiorum, & quarumcumque piarum foundationum in Ecclesiis suis, Capellisque subjectis constitutarum, describatque singulis incumbentia onera Missarum, & quarumcumque sunt alia. Iisque ut exacte satisfiat, procuret Decanus, aut qui ad hoc specialiter deputabitur.

## CAPUT XVIII.

Pastor etiam quilibet a Rectoribus fabricæ suæ Ecclesiæ, Capellarumque inde dependentium, & Curatoribus mensæ Sancti Spiritus, Hospitalium & Confraternitatum, curet sibi dari ex fabricæ, mensæ Sancti Spiritus, Hospitalis, Confraternitatisque respective registris extractum authenticum omnium Missarum, Anniversariorum, aliarumque ejusmodi foundationum, ad faciendum speciale aliquod officium relictarum, ut Fundatorum intentioni omnino satisfieri possit. Extractum vero hujusmodi, illiusque copiam authenticam, altera sibi servata, Decano visitanti exhibeat; qui illam Archivis Episcopalibus, peracta visitatione, inferat.

## CAPUT XIX.

Ut exactius Missarum foundationes serventur, Decanus ruralis & Pastor cujusque Ecclesiæ junctim disponent & curabunt Missas Beneficiorum & Officiorum vacantium, item detentorum ab his, qui non resident, fieri per Beneficiarios residentes in loco fundationis; ita videlicet ut habeatur ratio ejus,

qui maxime ex residentibus vitæ probitate meruerit, & indiguerit. Hujusmodi autem Missæ maxime diebus Dominicis & Festis fieri curentur, ut populi commoditati consulatur. Plane id exigit justitia, ut ex talium Beneficiorum fructibus primo satisfiat oneri Missarum, antequam de iis Possessor absens quippiam recipere possit.

## CAPUT XX.

Nemo sub obligatione restitutionis, & pœna unius floreni, præsumat una & eadem Missa satisfacere pluribus fundationibus, aut Sacris votivis: si monitus non desistat, severe puniatur.

## CAPUT XXI.

Beneficium simplex obtinens, habitum Clericalem gestet, Horas Canonicas legat, oneribus Missarum, & aliis, si quæ incumbunt, satisfaciat; eorumque omnium legitimum testimonium ante festum Beatæ Mariæ Magdalænæ Archi-Diacono, vel Decano rurali exhibeat, ut & studii literas aut concessæ absentiæ, si quas alicui ob rationabiles causas concesserimus: alioquin fructus non faciat suos.

## CAPUT XXII.

Fructus Pastoratus aut Beneficii vacantis per decessum vel cessum debentur domui mortuariæ, pro rata temporis, quo Possessor resedit post festum D. Joannis Baptistæ. Ulteriores vero administrabit Sigillifer, & debitis oneribus curabit satisfieri. In Ecclesiis vero Cathedrali & Collegiatis, observentur illarum Statuta.

## TITULUS XIX.

*De Scholis.*

## CAPUT I.

**S**cholæ in pagis (ubi non sunt) statim instituantur: sintque in loco aliquo commodo juxta Templum, ut tam Præceptores, quam discipuli frequentissime a Pastoribus, aliisque visitari, observari, & in Religionis nostræ initiis commodius exerceri possint.

## CAPUT II.

Ludimagister constituatur a Pastore, Magistratu, & primariis Parochiæ inco-

incolis (qui curabunt de necessario stipendio ei provideri) cum consensu Decani ruralis, in cujus manibus faciet Professionem fidei, jurabitque se non docturum aut permissurum ab hypodidascalo vel discipulis in Schola sua haberi libros hæreticos, aut de hæresi suspectos, aut quacumque ratione in honestatem peccantes, aliasve prohibitos; promittetque se observaturum ea, quæ de Ludimagistris tam in Synodo Provinciali, quam Dicecesana constituta sunt.

## CAPUT III.

Habeant autem rationem Ludimagistri, ut tenera ætas in pietate & morum modestia instituatur; ideoque ad catechizationem discipulos suos deducant, eosque ibi existentes in disciplina contineant; & ipsimet Præceptores pro captu discipulorum suorum diebus Sabbati post meridiem fidei nostræ rudimenta explicant. Diebus Dominicis & Festis ad Missam Parochialem, atque ut minimum quater in anno simul ad Confessionem Sacramentalem deducant; ipsique Magistri bonæ vitæ suæ exemplo discipulos ad virtutem provocent, & ab omni tabernarum frequentatione, aliisque levitatibus abstineant. Ubi autem consuetudo Laudes B. Mariæ quotidie, vel saltem Sabbato decantandi a Scholaribus intermissa est, quamprimum restituatur.

## CAPUT IV.

Pro pueris, quorum parentes sustentantur ex elemosynis mensæ Sancti Spiritus, solvent Rectores ejusdem mensæ dimidium didactri ejus, quod ditiores pendunt, & suppeditabunt eis libros ad discendum necessarios; curabuntque, ne umquam desint ipsis Catechismi, & præmiola in catechizatione pauperioribus distribuenda.

## CAPUT V.

Quoniam ex raritate eorum, qui cantus sunt periti, multis in locis Officium Divinum non recte peragi videmus, & difficilius in ætate grandiori cantus addiscitur; in omnibus Scholis, potissimum Latinis, designetur bis tervē in hebdomada una hora, aut saltem pars temporis pomeridiani Sabbatis &

Profestis, quando discere cantum idonei doceantur, idemque ut in Religioforum, qui juventutem docent Scholis, observetur, in Domino hortamur, & requirimus.

## CAPUT VI.

Ut profectui eorum, quos rei familiaris angustia depressos tenet; quominus cum inferiores Scholas percurrerunt, ad altiores disciplinas procedant, quoad ejus fieri potest, consulatur; inquirant omnes Pastores sedulo, an in sua Parochia natis, aut ex ea oriundis alicubi institutæ sint aliquæ bursæ, aliæve ad Studiosos alendos subsidia, atque ad Nos deferant, aut Decano visitanti denuntient: ut si qua forte temporum injuria obscurata, aut etiam deperdita fuerint, in statum observationemque pristinam restituantur.

## TITULUS XX.

*De Seminariis.*

## CAPUT I.

**I**Nstitutum Seminarii a Nobis ante annos quinque erecti ipsa rei evidentia abunde commendat; ac probat omnibus, qui fructum ex eo proveniente in hac tanta Sacerdotum raritate, ipsoque afflictissimo Ecclesiæ nostræ statu, cognoverint. Formantur enim in eo provectiores bonæ spei juvenes, qui in humanioribus literis, studiisque Philosophicis versati, idonei sunt ad Theologiæ studium capeßendum; in quo per tres quotidianas lectiones, quarum duæ in Theologia morali, tertia in Controversiis, per frequentes disputationes, item per conferentias in casibus conscientiæ, conciones domesticas, privatasque examinationes, exercitia in cantu, cæremoniis Ecclesiasticis, similibusque aliis, brevissimo tempore redduntur capaces Dei singulari beneficio ad operam suam in vinea Domini præstandam.

## CAPUT II.

Enimvero cum omnia alias sapientissime instituta subsistere nequeant, nisi rei domesticæ subsidiis fulciantur, Seminarioque de necessariis proventibus congrue provisum nondum fit; non tam sancti operis, adeo feliciter coepti, pro-



progressum fisti aliquando contingat, rogamus omnes personas Ecclesiasticas nostræ Diœcesis, quibus vel in primis congruit de superfluis suis eleemosynas largiri, ut Seminarii ante omnia in piis largitionibus meminisse velint, præsertim in confectione testamentorum suorum, & una cum consanguineis, aliisve hæredibus Christum cohæredem in membris suis Seminarii alumni scribant.

## CAPUT III.

Tamet si autem hætenus media a Concilio Tridentino in Seminarii subsidium præscripta eo applicare non potuerimus, quod per tumultuum præteritorum tempestates, bonorum præscriptiones, variasque exactiones, ita Beneficiorum redditus fuerint accisi, ut ipsis Beneficiatis alendis vix suffecerint, rebus nunc pacatioribus æquitas certe postulat, ut pro facultatum suarum ratione, & præsentis rerum statu, unusquisque onus ab eadem Sancta Synodo impositum, per Nos, & ad hoc deputatos determinandum, suscipiat alacriter ac ferat.

## CAPUT IV.

Cum ob horum temporum malitiam, Templorum, pagorumque vastationem, non dubium sit plures fructus bonorum Ecclesiasticorum receptos esse, ad quorum proportionem nullum officium fuerit factum, aut ab iis, quibus non debebantur; hortamur eosdem in Domino, & alios, qui quacumque ex causa ad restitutionem similium tenentur, ut ea Seminario applicent, quando expeditior restituendi via non occurrit.

## TITULUS XXI.

*De conservatione, recuperatione, & recta administratione bonorum Ecclesiasticorum.*

## CAPUT I.

**C**um per bellicos tot annorum tumultus, ædium sacrarum incendia, oppidorum direptiones, locorumque omnium devastationes, plurima passim Ecclesiarum, fundationumque sacrarum munimenta, registra, computus, similiaque documenta deperdita

sint, aut uspiam suppressa; ad eorum recuperationem omnes, ad quos ea sollicitudo quoquomodo spectat, omnes nervos intendant: in quam rem vias ac modos, qui Nobis occurrerunt, hoc loco suggerendos esse putamus.

## CAPUT II.

Pastores in concionibus suis efficaciter ostendant populo gravitatem sacrilegii, quod illi committunt, qui aliqua bona Ecclesiastica detinent, redditus, quos ipsi debent, eos obscurandi causa non solvunt, munimenta que, per quæ Ecclesiæ ad recuperationem bonorum suorum possent pervenire, non restituunt; in eumque finem pro suggestionem promulgent Decretum Concilii Tridentini, insertum ultimo Concilio Provinciali Mechliniensi sub hoc Titulo & Cap. 12. cum edicto Serenissimorum Principum Art. 21. & 22. Declarabuntque non eos tantum peccare, qui detinent, sed & eos, qui cum scient; non tamen indicant detentores.

## CAPUT III.

Ut & Magistratus civilis, quod sui muneris est, ad recuperandas pias fundationes, faciat; expediet eum publico edicto suis subditis mandare, ut qui sciunt bona ad pias fundationes spectantia, uspiam per quemcumque suppressa seu detenta, ante trimestre proximum manifestent.

## CAPUT IV.

Pastores, Æditui, alique bonorum Ecclesiasticorum Administri, requirant, ut & Nos requirimus, hortamurque in Domino omnes receptores antiquorum censuum & jurium Dominicalium, ut quando in suis registris inveniunt aliqua hypothecata super fundis piarum fundationum, huiusmodi fundos denuntient: similiter agant cum Secretariis, Graphiariis, & Notariis, ut cum in instrumentis, quæ faciunt, præsertim in investitionibus, inheredationibus, inventariis bonorum, munimentorumque in domibus mortuariis repertorum, hæreditatum, familiarumque divisionibus, mentio erit aliqua redditus alicujus loco alicui pio debiti, eos, ad quos ea res spectat, reddant certiores, suaque registra inspicienda exhibeant. Et si ipsi ea percurrentes,

rentes, aut alias aliquos hujusmodi redditus deprehenderit, obscuratosque indicaverint, digno aliquo honorario compensentur.

## CAPUT V.

Administratores Capitulorum, Monasteriorum, aliorumque piorum locorum, exhibeant Nobis tam pro se, quam Beneficiatis sibi subditis, statum omnium bonorum a quadraginta annis alienatorum, & reddituum redemptorum: & si cum debitis solemnitatibus alienationes non processerint, necessitasque aut utilitas ita postulet, ut approbentur, adhibeantur; si adhibita fuerint, videatur, an condiciones in alienationibus præscriptæ sint adimpletæ, & an recepti nummi capitales in similitum reddituum emptiones rite collocati sint: si id minus factum fuerit, statim omnino fiat, & ante trimestre proximum de applicatione facta iidem apud Nos doceant.

## CAPUT VI.

Pecunia ex redemptione reddituum aut aliunde proveniens, ad pia loca pertinens, quæ quibusdam in locis data est communitatibus, aut privatis personis sub interfusorio aut interesse, statim super certis fundis ab illis hypothecetur, accepta natura justis redditus, aut repetatur aliis in redditum danda.

## CAPUT VII.

Si quæ bona spectantia ad Parochiales Ecclesias aut Beneficia simplicia, ob non solutos census per Pastores, aut Beneficiatos, Curatos fabricarum, mensarum Sancti Spiritus, cæterorumque piorum locorum Administratores, evincantur, seu evicta nunc sint; non ideo eis liberum sit, pignora sic evicta sibi retinere, aut ea transferre in suos hæredes, sed ipsis Ecclesiis, locisque vel officiis piis, quibus census debebantur, reacquisiti censeantur; ita tamen ut ratio habeatur sumptuum ab ipsis factorum, & Canonum antecessorum.

## CAPUT VIII.

Rogamus etiam, vehementerque hortamur Dominos temporales, & alios quoscunque, qui ob debita Domini-

calia non præstita census aut redditus per temporum injuriam vel incuriam & negligentiam Rectorum, Possessorum, vel Administratorum (quæ causis piis damno esse non debet) non solutos, aut ob pecuniam ad aggeres muniendos aut reparandos non exhibitam, bona aliqua ad pias fundationes relicta evicerunt, ut eadem illis restituant, salvo dumtaxat suo censu, ejusque annuo redditu & refusione eorum, quæ in aggeres sunt impensa.

## CAPUT IX.

Et ut in posterum ejusmodi incommoda evitentur, mandamus, ut omnes eo tempore, quo specificationes bonorum ad Beneficia sua spectantium, Archi-Diacono vel Archi-Presbytero tradere debent, simul etiam tradant specificationem censuum, reddituum, & aliorum quorumcumque onerum, quibus illa subjecta sunt; & insuper illa onera persoluta esse tempore visitationis, alternis saltem annis, per apochas vel alias sufficienter doceant sub poena arbitraria.

## CAPUT X.

Ut Decimæ, quæ sunt Deo debita tributa, integre Ecclesiis & Sacerdotibus persolvantur, quas sibi Dominus ad universalis Domini signum & agnitionem reservavit, promulgent Pastores circa tempus messis Decretum Concilii Trident. (a) quo statuit non esse ferendos, sed excommunicandos eos, qui variis artibus decimas Ecclesiæ obvenientes subtrahere nituntur: si autem sint, quos tantæ æquitatis aut conscientiae dictamen non permoveat, eos Edicto PHILIPPI Secundi Regis in calce addito coërceant.

## CAPUT XI.

Census & redditus quorumcumque granorum & leguminum, nec non vini, olei, hælecum, ceræ, & similes, Collegiis Ecclesiasticis, Beneficiis, fabricis, mensis Sancti Spiritus, & quibuscunque locis piis debiti, in specie quotannis persolvantur, aut saltem non in certa semper & eadem quantitate pecuniæ solvi permittantur: nisi ob legitimam præscriptionem censuum, constitu-

(a) Sess. 25. de Reformat. cap. 12.

Tomus VIII. Concilior. German.

stitutionem seu creationem, aliter fieri debeat. Redimi vero atque extinguere sine auctoritatis nostrae interventu redditus in speciebus istiusmodi consistentes, atque originaliter ad usus pios relictæ, numquam permittantur, sed nec si originarie eos pecunia emptos docuerint debitores: (quibus, si se onere illo exolvere prætendant, id demonstrare incumbit ex Edicto Regiæ Majestatis anno 1571. super reductione & redemptione reddituum promulgato; ac sententia & declaratione facta in Concilio privato, habita aliorum Conciliorum deliberatione inter status Ecclesiasticum & sæcularem Namurcensem 26. Octobris, 1573.) sine scitu tamen nostro atque auctoritate, Beneficiati, aut Administratores, pecunias capitales recipere non possint; cum in redemptione similium reddituum, præsertim antiquorum, multa ad emolumentum aut jacturam piæ causæ spectantia attente & industrie perpendi debeant.

## CAPUT XII.

Ubi autem necessario redemptionem hujusmodi pati oportuerit, fors pecuniæ capitalis, si utiliter & secure statim impendi non possit, penes ipsum tamen Beneficiatum ne relinquatur, sed Archi-Diacono nostro aut Capitulo (si ei immediate subsit) consignetur in Archivis servanda, donec opportunitas fructuose ac tuto eam collocandi obvenit.

## CAPUT XIII.

Officiarios vero locorum, Magistratus, & Collectores monemus, ut sint memores Constitutionis BONIFACII VIII. quæ incipit: *Clericis laicos*, quæ habetur sub Tit. *De Immunitate Ecclesiarum* in 6. ubi constituitur, ne indebite Ecclesias, Ecclesiasticasque personas aut bona gravent.

## CAPUT XIV.

Non præsumant etiam Patroni, aut alii Superintendentes, piarum fundationum bona ad certa officia, certosve usus relictæ, ad alios etiam pios usus applicare; sed ubi hoc legitime rationes fieri exegerint, ordinaria id auctoritate fiat.

## CAPUT XV.

Omnes elocationes bonorum spectantium ad Beneficia aut Officia Ecclesiastica, fiant cum cognitione & approbatione Decani & Capituli, quibus subsunt; alibi vero cum Archi-Presbyteri consensu, qui in Actis visitationis suæ hujusmodi elocationes annotabit, alioquin Successores non obligent.

## CAPUT XVI.

Bona illa, quæ spectant ad Beneficia vacantia, nec non quæ ad Beneficia illorum absentium, qui absentiae *Placetum* non habent, elocabit in suo districtu Archi-Presbyter ruralis publice plus offerenti.

## CAPUT XVII.

Elocationes bonorum cujuscunque Beneficii aut Officii, non fiant anticipatis solutionibus, sub pœna duplum restituendi ejus, quod acceptum erit.

## CAPUT XVIII.

Rectores bonorum fabricæ, mensarum Sancti Spiritus, Capellarum, Hospitalium, aliorumque piorum locorum, similiter elocent bona ad administrationem suam spectantia plus offerenti, cum interventu Pastoris & Officiarii loci; nec elocent domos suæ curæ concreditas, juxta Templum sitas, iis, qui aperiunt Scholas tripudiatricas vel tabernas, aut aliquod exercent opificium, cujus exercitio magnus strepitus editur, multo minus hominibus malæ vitæ aut famæ.

## CAPUT XIX.

Ut bona hætenus conservata, aut nunc recuperata, aut recuperanda, in posterum conserventur, statuimus, ut omnes literæ & munimenta originalia quorumcumque Beneficiorum Ecclesiasticorum concordatorum privilegiorum, foundationum Militarum, Officiorumque Ecclesiasticorum, Bursarum, antiqua registra, manualia, testamenta Ecclesiasticorum spectantia ad Ecclesiam Cathedralē, aut Collegiatas, eorumve Ecclesias subalternas, aut Capellas ipsis subditas, deferantur ad Archiva suorum Capitulorum; quæ vero ad alias Ecclesias pertinent, ad Archiva Episcopatus. Beneficiati vero habeant manualia sua, munimentorumque transumpta, seu eorum copias authenticas.

Ea



Ea vero, quæ ad fabricas & mensas Sancti Spiritus, aliaque pia loca spectant originalia & principalia, ponantur in cista in Sacristia collocanda, tribus clavibus oblerata; quarum una sit penes Pastorem, altera penes seniore[m] Aedituum, & tertia penes seniore[m] Rectorem mensæ Sancti Spiritus. Transumpta vero authentica mittantur ad Archiva Episcopatus, una cum Registro accurate de huiusmodi bonis confecto, etiam duobus videlicet antiquo & novo computibus.

## CAPUT XX.

In qualibet Ecclesia fiat Registrum (si id a decennio factum non est) in quo accurate, distincte, ac separatim describantur omnia bona ad Pastorum, Beneficia, Officia, fabricam, mensam Sancti Spiritus, Hospitalia, aliasque pias fundationes spectantia, cum plena specificatione, qua exprimat[ur] quantitas, limites, ac termini silvarum, pratorum, & terrarum arabilium, nec non cum expressa designatione fundorum ipsis bonis ad prædictas personas vel causas pertinentibus adjacentium, adscriptis illorum nominibus & cognominibus, qui huiusmodi hypothecas aut fundos limitaneos impræsentiarum possident.

## CAPUT XXI.

Ut conservationi munimentorum, Registorumque ad Beneficia spectantium cautius prospectum sit, mandamus omnibus Ecclesiasticis, ut dum testantur, semper aliquam personam Ecclesiasticam Executorem sui testamenti nominent; aut alioqui per Ordinarium vel Capitulum, cui immediate subsunt, Ecclesiasticus Executor adjungetur, sub pœna privationis fructuum Beneficii nondum perceptorum, si eundem non admiserint.

## CAPUT XXII.

Literæ quoque originales, Registra, munimenta, quæ verustate consumuntur, in authenticam formam transumpta renoveantur. Fiat insuper quamprimum exactum omnium ornamentorum, & quorumcumque utensilium cujusque Ecclesiæ inventarium.

## CAPUT XXIII.

In locis, in quibus administratio bonorum hætenus non bene directæ fuit, ac munimenta obscura sunt, computusque intricati, & Rectores in huiusmodi parum versati, omnino expedit, ut consilio Pastoris, eorumdemque Rectorum, & notabiliorum (quos dicunt) ipsius loci, aliquis peritus & industrius constituatur cum moderato stipendio, qui bona & registra & computus in ordinem debitum a Decano rurali præscribendum redigat, quem ordinem ac modum in reddendis rationibus deinceps sequi oporteat.

## CAPUT XXIV.

Dum autem rationes redduntur Ecclesiæ Parochialis, simul etiam reddantur ea, quæ ad Capellas sub illius districtu sitas pertinent.

## CAPUT XXV.

Rectores fabricarum & mensarum Sancti Spiritus nullas lites assument, nisi causa prius a Nobis, nostrove Vicariatu examinata, ne alicui inconsulta temeritate per injuriam molesti sint, atque non necessariis sumptibus, salariis, vacationibusque fabricas aut mensas pauperum gravent. Quod si etiam causa gravioris momenti sit, committetur alicui ex Vicariatu aut Decano Christianitatis, ut antequam lites instuantur, cum adversariis seria ratione agant; ut, si fieri possit, res sine strepitu iudicii terminetur, assumptis potius, si dubium jus fuerit, utrimque Jurisconsultis, quibus decisio negotii committatur: si quis secus fecerit, nullo modo expensas in fabricæ aut mensæ Sancti Spiritus rationes referat, nec auditores rationum inferri patientur, in quas forte condemnatus erit, aut quas ab adversario recuperare nequiverit, sed eas ipse in pœnam temeritatis suæ luat.

## CAPUT XXVI.

Decimæ ad Capitula, Monasteria, aliaque pia loca, vel Beneficia spectantes, ultra triennium non elocentur; præterea quoque quando separatim elocabuntur; ut & domus, non ultra sexennium, terræ vero arabiles non ultra novem annos; nec contractus ejusmodi elocationum renoveantur, nisi finito biennio

prioris contractus quoad decimas, quadriennio quoad domos & prata, & sexennio quoad terras arabiles: nec quis umquam prædictos terminos excedat, nisi observatis solemnitatibus, quæ ad alienationem rei Ecclesiasticæ de jure requiruntur, sub pœna nullitatis ipsorum contractuum, & alias arbitraria.

## CAPUT XXVII.

Quod attinet ad auditionem computuum, ea, quæ in Synodo Provinciali, atque Serenissimorum Principum edicto desuper prudentissime ordinata sunt, exactissime servantur.

## TITULUS XXII.

*De Templis.*

## CAPUT I.

**T**empla & Altaria Dei passim ab Iconomachis profanata, conculcata, & everfa, omni studio statim instauranda sunt: eaque reparatio, quantum populi necessitati sufficit, tergiversando, dum alius in alium hoc onus rejicit, diutius nullo modo differatur; ne incurramus indignationem Dei Omnipotentis, severissime comminantis per Prophetam Aggæum iis, qui domum Dei negligunt, & ad suas reparandas festinant: sed potius communi manu & liberalitate ad locum habitationis ejus condecorandum omnes concurrant, ad imitationem populi Judaici, qui augustissimum Jerosolymitanum a Nabuchodonosor spoliatum atque eversum, (b) brevissimo tempore splendidissime instaurarunt: ac liberaliter omnes Levitæ quidem decimam partem decimæ suæ, reliqui vero terriam partem sicali per annum ad opus domus Dei offerebant.

## CAPUT II.

Moneatur autem populus, qui aut ipse furore hæretico concitatus Temppla sua devastavit, aut Ecclesiis suis pro fortalitiis, domiciliis, stabulis, abusus est, aut militibus necessaria denegando, contributiones suas non solvendo, conflagrationis aut devastationis Templorum suorum occasionem efficacem dedit, ut in restituendo damno, cui dedit causam, sese liberalem præbeat, & qui

hactenus ingentem summam pecuniæ singulis mensibus armorum metu extortam solvit, ut nunc paciori statu aliquod subsidium voluntarium præstet pro reparatione domus Dei, in qua pabulo verbi Divini ac Sacramentorum Christi susceptione ipsorum mentes pascantur, cum summæ remunerationis sive temporalis, sive spiritualis certissima promissione.

## CAPUT III.

Ne autem ulla prætermittatur occasio in usum Templi colligendi elemosynas, omnibus diebus Dominicis & Festis circumeant Ædificii, tam sub concione, quam Summo Sacro, collecturi elemosynas a devotis Christi fidelibus offerendas, & oblatores summam statim annotent, de iis suo tempore reddituri rationem: & in omnibus Ecclesiis statuatur Gazophylacium, seu truncus cavatus, qui claudatur duabus clavibus, quarum una sit penes Pastorem, altera penes Ædificium seniore.

## CAPUT IV.

In omnibus Ecclesiis ad minus summum Altare adaptetur, idque sic, ut lapis unus solidus tegat superne totum altare: ubi autem tam amplius haberi commode non potest, adaptetur (ut & in aliis altaribus) lapis ut minimum bipedalis in quadro, qui medium altaris, supra eum locum, in quo Reliquiæ Sanctorum reconduntur, tegat; ponaturque semper imago Christi crucifixi in altaris medio, sitque super illud tabula aliqua sacra pie depicta.

## CAPUT V.

Non extruantur plura altaria, quam commode adornari possint: & durante hac Sacerdotum penuria non plura, quam tria in quolibet Parochiali rurali Templo sine nostra auctoritate ædificentur, etiam si Capellanix plures ibi fundatæ existant.

## CAPUT VI.

Ubi Temppla adhuc integra sunt, ante mensem ab iis auferatur omnis laica supellex, & omnia similia impedimenta, sub pœna trium florenorum, singulis hebdomadis post dicti mensis finem ab iis, quorum supellex ablata non

(b) 2. Esdr. 10.

non fuerit, ad usum fabricæ solvendum.

## CAPUT VII.

Templa, quæ habent adhuc integros suos parietes, extructo ostio concludantur & mudentur.

## CAPUT VIII.

In locis Ecclesiarum dirutarum, aut cœmeteriorum in usus profanos, non sordidos tamen converforum, juxta Concilii Tridentini (c) Decretum erigatur. Et dum hujusmodi loca profanis usibus applicantur (quod sine nostra auctoritate fieri veramus) Fidelium defunctorum ossa ad sacra loca vicina transferantur; ac Beneficia, bonaque ad aliam Ecclesiam nostra auctoritate (vocatis iis, quorum interest) transferenda sint, donec illa reedificentur; committendaque administratio bonorum hujusmodi Ecclesiarum ac locorum viris probatis, qui de illa rationem reddent coram Nobis, nostrisve Deputatis, aliisque, quorum interest, ut ad usus, ad quos relicta sunt, impendantur.

## CAPUT IX.

Nemo etiam in Ecclesiis obambulet, nulla ibi convivia fiant. Sedilia sceminarum, quæ fera claudantur, in Templis fieri non facile permittantur. Clerus profana colloquia, etiam in Sacristia, non habeat, sub pœna sex stufferorum, toties, quoties; multo minus ulla irreverentia a quibuscumque fieri in sacris locis toleretur.

## CAPUT X.

Non parum irreverentiæ sacris locis ex eo accidere potest, quod alicubi per totum diem aperta relinquantur, & hoc pacto non solum furum direptionibus, sed etiam variis profanationum periculis exponantur: quod ne deinceps contingat, Pastoribus ac Matriculariis Ecclesiarum in pagis constitutarum præcipimus, ut extra tempus Divini Officii easdem clausas teneant, sub pœna unius floreni, toties, quoties a negligentibus exigendi, & fabricæ ipsius Ecclesiæ applicandi.

## CAPUT XI.

Cœmeteria omnia, quæ in multis locis aggeribus & fossis adinstar forta-

litorum munita sunt, statim complanentur, & a ruderibus, vepribus, aliisque impedimentis purgentur, ut commodè a Nobis, in eorumdem reconciliatione, & in processionibus, & ab his, qui pro defunctis oraturi eo veniunt, circumiri possint: ac statim muro, alleribus vel sepe concludantur, ut pecoribus ad ea aditus non pateat: nec in eis fiant strues lignorum, fœni, aut domus, nisi forte pro Schola ædificentur; multoque minus permittantur in iis lusus aut insolentiæ puerorum, aut aliorum quorumcumque.

## CAPUT XII.

Si qua sacrorum locorum ornamenta, calices, campanæ, materialia ex Templorum ruinis ablata, dignoscantur alibi extare, ea vendicentur. Quod si in usus ædificiorum profanorum materialia ejusmodi applicata sint; justo pretio per Decanum ruralem, Pastorem, & primarios de pago æstimata redimantur.

## CAPUT XIII.

Ad evitandas multas difficultates, quæ sæpe contingunt circa immunitatem præstandam confugientibus ad Ecclesiam, servetur Constitutio GREGORII XIV. quæ incipit: *Cum alias nonnulli.*

## TITULUS XXIII.

*De Regularibus.*

## CAPUT I.

**R**egulares, ab Ordine abscissos, ad Beneficiis aut Officiis Ecclesiasticis in nostra Dicecesi deservendum admitti plane nolumus; & admissos ad Beneficia, ea deferere ante festum D. Joannis proximum jubemus.

## CAPUT II.

Meminerint Ordinum Superiores non esse sibi licitum, Monachos quamvis in gravium criminum aut incorrigibilitatis causa ab Ordine abscindere & dimittere, sed debere fugitivos & ejectos requirere & recipere in Monasterium; aut si id Regularis Ordo non patitur, apud Monasteria sua in locis competentibus, si absque gravi scandalo fieri possit, alioquin in aliis religiosis

M m m m m 3

giosis



giosis domibus ejusdem Ordinis ad agendum ibi pœnitentiam, eisque vitæ necessaria ministrare, juxta dispositionem C. *Ne Religiosi. x. De Regular.* quam Constitutionem per literas ad Illustrissimum Archi-Episcopum Rhodiensem, Nuntium Apostolicum, datas Sua Sanctitas servari jussit.

## CAPUT III.

Contingit nonnumquam homines sæculares, e mentito habitu Monachali aut Eremitico, gravem infamiam inferre Ordini, cujus habitum gerunt. Contingit etiam Monachos sine Superiorum licentia vagantes, eleemosynas passim petendo, aut per plateas discurrendo, scandalizare totum Ordinem Ecclesiasticum. Quare mandamus Apparitoribus Curiae nostræ, ut istiusmodi fictitios vel vagabundos deprehendere satagent, & ad Nos, cum modestia tamen & sine scandalo, deducant; ut de eorum statu informati, quod rationi congruum erit, statuamus.

## CAPUT IV.

Conqueri solet populus se gravari collectis eleemosynarum ab aliis Religiosis, qui, vel quæ ex Ordine Mendicantium non sunt, nec ab antiquo similes eleemosynas petere solebant: proinde omnes, qui Mendicantes non sunt, ex sua professione Nobis demonstrent, quo fundamento, aut a quo tempore soleant hujusmodi circuitiones & collectas facere; alioqui eis id sit in posterum interdictum.

## CAPUT V.

Ut, quod de Confessario extraordinario Monialibus dando (d) sancitum est, exactius servetur, declaramus Nos istiusmodi Confessarios delegaturos in Adventu, Quadragesima, & mense Julio, nisi ratio aliqua secus fieri suadeat.

## CAPUT VI.

Quæ de clausura Monialium in Concilio Trid. (e) & Provinciali Mechliniensi (f) decreta sunt, solite observentur. Quando vero necessitas aliqua urgebit, ut aut Confessarius moribundarum confessiones excipiendi, aut Medicus, aut Chirurgus visitandi causa, aut alius quispiam operarius in-

gredi clausuram Monasterii debet; illos tunc ingredienti, & intra septa Monasterii versantes, & egredientes, duæ Moniales ex senioribus semper comitentur.

## CAPUT VII.

In Monasteriis Sororum, quæ in charitatis circa infirmos officiis versantur, in quibus ratione suæ vocationis arcta illa clausura servari non potest, volumus ea omnia servari, quæ sine impedimento suæ vocationis servari possunt: ac in singulis talibus Monasteriis, pro loci constitutione, sedulo tollatur omnis occasio, qua Sorores cum viris familiaritatem aut colloquia non necessaria habent: ipsæ Monasterium suum non egrediantur, nisi cum necessitas aut officii sui ratio postulat; non ad Dedications, convivias, nuptias eant, aut rebus sæcularibus, & quæ ad vocationem suam non pertinent, sese immisceant; diebus autem, quibus communicant, confabulationes cum externis nullas admittant.

## CAPUT VIII.

Quoniam vero tales Sorores profitentur Regulam Sancti Augustini, exacte eam observent, ac nominatim, ne extra horam refectionis aliquod esculentum aut poculentum sumant.

## CAPUT IX.

In refectorio ad mensam communem numquam aliquem externum admittant, ne quidem Confessarium, aut commensales; quas volumus a refectorio tempore refectionis, quo pium aliquid legendum est, exclusas. Observeturque, ut semper certa hora omnes simul in eodem refectorio comedant, ad dormitorium una omnes sese recipiant, illudque sera diligenter claudatur, nec alicui egressus de nocte sine Superioris licentia pateat.

## TITULUS XXIV.

*De Visitatione.*

## CAPUT I.

Cum a triginta quinque annis nullus Episcopus in pagis nostræ Diœcesis Ecclesias visitaverit, quod in eis functiones suas libere & personaliter exhibere non potuerit, & vix ulla in

ca,

(d) Conc. Trid. Sess. 25. de Regul. c. 10.

(e) Sess. 25. de Reg. c. 5. (f) Mech. hoc tit.

ea, proh dolor! sint Tempia, Altaria, aut cœmeteria, non destructa, everſa, aut ſaltem profanata: decrevimus, Deo dante, primo quoquo tempore ſingulas Eccleſias viſitare, eorumque altaria & cœmeteria conſecrare, ſeu reconciliare. Quapropter injungimus Paſtoribus omnibus & Eccleſiaſticis perſonis, ut tempeſtively omnia præparent neceſſaria; & dum Nos adventuros ſciunt, tempore admoneant ſuos Parochianos, ut Rectores fabricæ, menſæ Sancti Spiritus, & Primarii aliquot de Magiſtratu præſentes ſe Nobis in Eccleſia exhibeant, ut de iis, quæ a Nobis interrogabuntur, ſpectantibus ad regimen Eccleſiæ, in ſpiritualibus & temporalibus respondeant. Et ſi quæ iis in rebus ac negotiis reformanda exiſtiment, libere Nobis aperiant: computus quoque ſuos fabricæ, & menſæ Sancti Spiritus paratos habeant Nobis oſtendendos; & difficultates circa illos, & alia, ſi quæ ſint, candide ac fideliter indicent, Nobisque ſaltem ſummarium Eccleſiæ & menſæ pauperum ſtatum exponant.

## CAPUT II.

Decanus ruralis præmonitus a Nobis, ſuos Paſtores moneat, ut Episcopo viſitatorio omnia, quæ ad viſitationem ſpectant, præparent; eiſque in eam rem mittat inſtructionem a Nobis præſcriptam. Paſtor, qui in his præparandis negligens fuerit, arbitrio noſtro punietur.

## CAPUT III.

Viſitantibus vero Decanis ruralibus, tamquam a Nobis miſſis, omnem debitam reverentiam & aſſiſtentiam ad exequendam commiſſionem a Nobis injunctam exhibeant; & ſi aliqua ad reformationem aut bonum Eccleſiæ facientia ſciant, benevole ſuggerant; communiq; conſilio dies audiendorum computum quotannis ſtatuatur.

## TITULUS XXV.

*De Foro & Jurisdictione Eccleſiaſtica.*

## CAPUT I.

**U**T Decreta hujus Synodi executioni mandentur, eorumque transgreſſores, alique criminoſi corrigantur & coërceantur; ſingulis ſeptimanis feria ſexta poſt meridiem in ædi-

bus noſtris, aut Vicarii noſtri Generalis Nobis abſentibus, fiat congregatio Vicariatus, in qua de commodiori ratione executionis Decretorum Concilii Tridentini, Provincialis Mechlinienſis, & hujus Diœceſani, aliisque, quæ ad rectam directionem totius Episcopatus ſpectant, tractetur; & exceſſus & difficultates, quæ poſſunt, ſine ſtrepitu judicii puniantur & componantur. Proinde quando Decani in ſuo Diſtrictu, Paſtores in ſua Parochia, norunt aliqua corrigenda, reformanda, aut emendanda, ea Nobis in Vicariatu determinanda ſcripto vel verbo indicent.

## CAPUT II.

Officialis, qui hujusmodi Congregationis membrum eſt, habeat penes ſe ſyllabum ſeu catalogum omnium cauſarum criminalium, quæ coram eo vertuntur.

## CAPUT III.

Promotores Curiaſ noſtræ & Apparitores, durante congregatione hujusmodi, adſint in ædibus noſtris, aut Vicarii Generalis præſentes, ut ſint parati, quando opera eorum requiretur: & antequam cauſam aliquam contra Eccleſiaſticas aut honeſti nominis perſonas in judicio contradictorio tractandam exhibeant, eam prius in Vicariatu denuntient, ut tentetur via aliter eam terminandi.

## CAPUT IV.

Quæ via amicabili definiri non poſſunt, & in judicio contradictorio terminanda ſunt, curet Officialis, ut ea quam breviffime abſolvantur; potiſſimum cauſæ miſerabilium perſonarum, alimentatiſ, divortii, & incarcerationis, in quibus de triduo in triduum procedatur.

## CAPUT V.

Advigilet Officialis, ut Statuta Curiaſ noſtræ, & quæ unicuique in ipſius ad officium admiſſione injuncta ſunt, exactiſſime obſerventur.

## CAPUT VI.

Immunitate Eccleſiaſtica indignus eſt, quiſquis ad eam oppugnandam operam ſuam præſtat.

## CAPUT VII.

Fiscalium cauſarum Curiaſ noſtræ Procuratores, alique Officiarii, caveant, ne



ne importune aut indiscrete subditos nostros exagitent, aut scandalose exactiones faciant, defectusque propalent; sed cum omni modestia, integritate & humanitate, officium suum exerceant.

Si quos delinquentes sciant, cum quibus connivent, & ad Nos non deferunt; tamquam consentientes, vel saltem negligentes, arbitrarie puniantur.

*Sequitur Edictum Regium, ut Ecclesiastici & sæculares Judices omni modo adnitantur extirpare superstitiones & magias, gallice expressum. &c.*

*Excusa Antverpiæ in 8. Anno 1610. recusa 1680. typis Plantiniani Moreti.*

Respirante nonnihil a gravissimis belli pertinacis & luctuosi tumultibus Belgio, Episcopales ad Insulas evectus est anno 1610. JOANNES MIRÆUS, (*le Mire*) dignissimus Guilielmi de Berges, Antverpiensi e Sede Cameracum evocati Successor. Antiqua erat Cameracenses inter cives familia, unde ortum Bruxellis habuit anno 1560. VIII. Idus Januarii. Grandior jam atque ætate paulo adultior, Philosophicas Stagiritæ disciplinas Lovanii primum Castrensi in Gymnasio coluit. Verum, turbatis ibidem assiduo bellorum strepitu Musis ac pene inter arma silentibus, Duacum recepit sese, cæptaque Lovanii studia in palæstra Regia tanto confecit ardore & fructu, ut, cum sacras modo scientias hausisset, dignus, qui docendi tum græcas literas, tum Rhetoricam ea in urbe anno 1587. præficeretur muneri, Sacraeque Theologiae laurea anno post IV. Non. Augusti insigniretur, habitus fuerit.

Honores fugitabat, splendidaque officia: nam Decanatum Rothnacensem, a Joanne Hauchino, Mechliniensium Antistite sibi oblatum recusavit, ac Namurcensem Canonicatum sponte alteri cessit. Impedire tamen haud potuit, quin ipsis quasi medius in laboribus, curisque sacris, in quas pro oviculis Pastori sibi Bruxellæ ad D. Jacobi in Monte frigido, commissis toto semper pectore incumberebat, Canoniorum S. Gudulæ Collegio adjungeretur, diplomate anno 1592. V. Cal. Septembris dato, ac tandem, opitulante fama virtutum, & Matthiæ Hovii, Mechlin. Archiepiscopi commendatione, quartus Ecclesiæ Antverpiensis Præsul anno 1604. III. Cal. Junii inauguraretur.

Hac dignitate, qua carere maluisset, ornatus, novo Patrum, S. Augustini Regulam profitentium Cœnobio ac Lycæo, novoque cognominatarum ab Annunciatione B. M. Virginum Monasterio Antverpiam auxit. Adivit Prædecessorum suorum ipse primus, dum per inducias inter Sereniss. Archi-Duces, & Batavorum Ordines patas licebat, maximam Diocesis suæ partem, Bredam versus ac Bergizomium, plura capitum millia Chrismaris Sacramento roboravit, Hooghstratanam lustravit expiavitque Ecclesiam; Catholicos a variis, iisque peracerbis heterodoxorum injuriis ac molestiis, singulari, quo apud Principes pollebat, favore nixus liberavit. Foundationem sex Bursarum, ut vocant, sat amplam Duaci reliquit, alia & Antverpiæ relicturus pietatis ac liberalitatis monumenta, si longior illi vita fuisset; quam posuit pridie Id. Januarii anno 1611., intercluso per catarrhum spiritu extinctus. Quæ edidit, præter Statuta hæc Synodalia & Orationem elegantissimam iis præmissam, fuere *beneficia ac miracula B. M. Virginis in Aspricolle*, a se accurate cognita, diligenterque explorata: unde sua postmodum & *Lipsius & Philippus Numannus* deprompserunt.

Duplicem Antverpiæ videre licet inscriptionem, Miræi Præsulis optimi laudes breviter complectentem: Alteram in tumba marmorea; in Seminario sub ejus effigie alteram.

*Vid. Histor. Episcopat. Antverpiens. editam Bruxell. apud Franc. Foppens 1717. Biblioth. Belgic. Tom. II. & Sac. Belg. Chronol. Part. II. Joan. Bapt. de Castillon.*

\* \* \*

*Ad Chartam Chorographicam modernæ Germanicarum Ecclesiarum Hierarchiæ explanatio Historica de Episcopatibus in Germania a Sæculo XVI. suppressis, novisque dein erectis dabitur, auspice Deo, alias.*

FINIS TOMI VIII. CONCIL. GERMAN.







